

Nduudu N'dai Yeⁿ'e Ndyuūs

El Nuevo Testamento
de Nuestro Señor Jesucristo

en el cuicateco de Tepeuxila



La Liga Bíblica

Las Sagradas Escrituras para Todos

El Nuevo Testamento
en el cuicateco de Tepeuxila

La Liga Bíblica 1M primera edición 1974 [cux]
La Liga Bíblica versión electrónica 2009

Publicado por
© La Liga Bíblica 1974

Se permite copiar, distribuir y comunicar públicamente esta obra bajo las siguientes condiciones:

- Reconocimiento. Reconozca a la Liga Bíblica los derechos que tiene en la impresión o distribución de esta obra, deslindándola de responsabilidad alguna por cualquier uso que se le de a la presente publicación.
- No comercial. No puede utilizar esta obra para fines lucrativos.
- Sin obras modificadas. No se puede alterar, transformar o generar una obra a partir de ésta.

PRÓLOGO

El Nuevo Testamento fue escrito originalmente en griego. Pronto se empezó a traducir a otros idiomas para que las personas que no hablaban griego pudieran leerlo en su propia lengua. A lo largo de casi dos mil años ha sido traducido a más de quinientos idiomas. Entre las traducciones más recientes se encuentra la presente en el idioma cuicateco, tal como se habla en el municipio de Tepeuxila, estado de Oaxaca.

A pesar de que la gramática y el vocabulario del cuicateco son distintos a los del griego, el cuicateco posee construcciones gramaticales y formas retóricas que pueden expresar con igual hermosura el significado original del mensaje del Nuevo Testamento. Existen palabras del griego que no pueden ser traducidas al cuicateco con una sola palabra; lo mismo sucede en el sentido inverso: hay frases del griego que pueden ser mejor expresadas en cuicateco en forma más abreviada. En ambos casos se tuvo que buscar la traducción más adecuada para lograr una interpretación fiel y a la vez presentar una narración natural y fluída en cuicateco.

El texto se presenta tanto en cuicateco como en español para el deleite de todos aquellos que hablen uno u otro idioma, o bien ambos.

Aclaraciones acerca del Alfabeto Cuicateco

La mayoría de las letras del alfabeto cuicateco son las mismas que se encuentran en el alfabeto español. Sin embargo, en el cuicateco existen algunos sonidos y peculiaridades que no hay en español y que tienen sus respectivos símbolos. Estas características del alfabeto cuicateco son las que a continuación exponemos:

1. El tono. Cada vocal puede pronunciarse de tres modos:

- con tono alto, indicado por el acento agudo (á)
- con tono bajo, indicado por una pequeña raya sobre la vocal (ā)
- con tono medio, sin indicación alguna (a)

ejemplos:	cúú	‘culebra’	(tono alto)
	cūū	‘campana’	(tono bajo)
	cu'u	‘plato’	(tono medio)

2. El signo ('), o saltillo. Indica el cierre instantáneo de la garganta, como sucede en las siguientes palabras:

'cūū	‘este’
ca'á	‘mi pie’

3. La vocal ε. Se pronuncia como en las palabras que siguen:

nguεε	‘no’
ndεεche	‘siete’

4. La nasalización. Para poder distinguir entre las vocales orales y las nasalizadas, se escribe una ⁿ después de la vocal nasalizada. Este signo se utiliza con cualquier vocal nasalizada. Si después de la vocal nasalizada hay un saltillo seguido de otra vocal, la segunda vocal será también nasalizada.

ejemplos:

naá ⁿ	‘mi cara’	chéé ⁿ	‘corral’
na ⁿ ’á	‘leña’	ne ⁿ ’é	‘quiero’
tií ⁿ	‘mi cabeza’	yuu ⁿ	‘mazorca’
ch’i ⁿ ’í	‘manifesté’	nyu ⁿ ’u	‘cinco’

Índice

SAN MATEO.....	1
SAN MARCOS.....	78
SAN LUCAS	125
SAN JUAN	204
HECHOS.....	253
ROMANOS.....	318
1 CORINTIOS	354
2 CORINTIOS	388
GÁLATAS.....	411
EFESIOS.....	424
FILIPENSES.....	437
COLOSENSES	446
1 TESALONICENSES	454
2 TESALONICENSES	462
1 TIMOTEO.....	466
2 TIMOTEO.....	476
TITO	483
FILEMÓN.....	488
HEBREOS	490
SANTIAGO	517
1 PEDRO	526
2 PEDRO	536
1 JUAN	542
2 JUAN	549
3 JUAN	551
JUDAS	553
APOCALIPSIS	556

NDUUDU N'DÁÍ CHÍ DÍNGUŪⁿ

APÓSTOL MATEO

Yeⁿ'é 'iiⁿ'yāⁿ chi ndaata yeⁿ'ē
Jesucristo chí vmnááⁿ vmnaaⁿ
(Lc. 3.23-38)

1 Chuū chí lista yeⁿ'e ndaata
yeⁿ'e Jesucristo, ndíí na ndaata
Abraham ndíí na ndaata David ndíí
tiempo chí ch'iindiyáāⁿ Jesucristo.

²Abraham miiⁿ ch'iindī daiya
sa chi nguuvi Isaac. Isaac miiⁿ
ní ch'iindī daiya sa chi nguuvi
Jacob. Jacob miiⁿ ní ch'iindī daiya
sa Judá ndúúcū tanáⁿ'ā 'díínu yā.

³Judá miiⁿ ní ndúúcū Tamar chí
n'daataá yeⁿ'ē sa ch'iindī daiyá yā
chí cuates chí nguuvi Fares ndúúcū
Zara. Fares miiⁿ ní ch'iindī daiya sa
Esrom. Esrom miiⁿ ní ch'iindī daiya
sa Aram. ⁴Aram miiⁿ ní ch'iindī
daiya sa Aminadab. Aminadab
miiⁿ ní ch'iindī daiya sa Naasón.
Naasón miiⁿ ní ch'iindī daiya sa
Salmón. ⁵Salmón ndúúcū Rahab chí
n'daataá yeⁿ'ē sa ní ch'iindī daiyá
yā Booz. Booz miiⁿ ndúúcū Rut chí
n'daataá yeⁿ'ē sa ní ch'iindī daiyá yā
Obed. Obed miiⁿ ní ch'iindī daiya
sa Isaf. ⁶Isaf miiⁿ ní ch'iindī daiya
sa rey David. Rey David miiⁿ ní
ch'iindī daiyá yā Salomón taachi
caneé yā ndúúcū n'daataá chí

vmnááⁿ vmnaaⁿ ní n'daataá yeⁿ'e
saⁿ'ā Urías.

⁷Salomón miiⁿ ní ch'iindī daiya sa
Roboam. Roboam miiⁿ ní ch'iindī
daiya sa Abías. Abías miiⁿ ní
ch'iindī daiya sa Asa. ⁸Asa miiⁿ ní
ch'iindī daiya sa Josafat. Josafat
miiⁿ ní ch'iindī daiya sa Joram.
Joram miiⁿ ní ch'iindī daiya sa
Uzías. ⁹Uzías miiⁿ ní ch'iindī daiya
sa Jotam. Jotam miiⁿ ní ch'iindī
daiya sa Acaz. Acaz miiⁿ ní ch'iindī
daiya sa Ezequías. ¹⁰Ezequías
miiⁿ ní ch'iindī daiya sa Manasés.
Manasés miiⁿ ní ch'iindī daiya sa
Amón. Amón miiⁿ ní ch'iindī daiya
sa Josías. ¹¹Josías miiⁿ ní ch'iindī
daiya sa Jeconías. Jeconías miiⁿ
ndúúcū tanáⁿ'ā vi'i yā ch'iindiyáāⁿ
yā taachi chiidá yā ndúúcū cheecú
yā ní preso yā ndúúcū tanáⁿ'ā 'iiⁿ'yāⁿ
yeⁿ'e ndaata Israel ní taachi cuen'é
yā na cyúúní na yāⁿ'āa Babilonia.

¹²Cuayiivi chí cho'ó yā na
yāⁿ'āa Babilonia, Jeconías miiⁿ ní
ch'iindī daiya sa Salatiel. Salatiel
miiⁿ ní ch'iindī daiya sa Zorobabel.
¹³Zorobabel miiⁿ ní ch'iindī daiya
sa Abiud. Abiud miiⁿ ní ch'iindī
daiya sa Eliaquim. Eliaquim miiⁿ ní
ch'iindī daiya sa Azor. ¹⁴Azor miiⁿ

ní ch'iindí daiya sa Sadoc. Sadoc miiⁿ ní ch'iindí daiya sa Aquim. Aquim miiⁿ ní ch'iindí daiya sa Eliud. ¹⁵Eliud miiⁿ ní ch'iindí daiya sa Eleazar. Eleazar miiⁿ ní ch'iindí daiya sa Matán. Matán miiⁿ ní ch'iindí daiya sa Jacob. ¹⁶Jacob miiⁿ ní ch'iindí daiya sa José, 'iiⁿ'yāⁿ chí isáⁿā yeⁿe María. Ní daiya ta ní Jesús chí nguuví Cristo.

¹⁷Tíicā nducuéⁿē ndaata yeⁿe Abraham ndíí rey David ní ndiichicúuⁿ ndaata yeⁿé yā o generaciones. Ní ndíí rey David miiⁿ ndíí taachi cueⁿe nducyáácá 'iiⁿ'yāⁿ ndaata yeⁿe yā na país Babilonia ní ndiichicúuⁿ ndaata yeⁿé yā. Ní ndíí taachi cheⁿe yā na yáⁿāa Babilonia ndíí taachi ndaā Cristo iⁿ'yéeⁿdi 'cūū ní ndiichicúuⁿ ndaata yeⁿé yā.

'Túúcā ch'iindiyáāⁿ Jesucristo

(Lc. 2.1-7)

¹⁸'Túúcā ch'iindiyáāⁿ Jesucristo. Taachí María miiⁿ chí cheecu Jesús miiⁿ caⁿa yā chí 'caandavaacú yā ndúúcū José níicú taachi 'āa cuéé 'caandavaacú yā ndúúcū viⁱ, véé 'áámá daiya yā cheetí yā cucáávā Espíritu N'dai yeⁿé Ndyuūs. ¹⁹José miiⁿ ní neⁿé yā 'caandavaacu yā ndúúcū María miiⁿ. Ní José miiⁿ ní neéné n'dai yā. Ní cuayiivi nguée neⁿé yā 'caandavaacú yā ndúúcū táⁿā cucáávā chí véé dacua'a cheetí yā. Ní nguée neⁿé yā yaa'vi yā 'iiⁿ'yāⁿ yeⁿe yāāⁿ miiⁿ'ya yeⁿe María chí nguée n'daācā ti nguée neⁿé yā chí María cuuví 'cuinaaⁿ yā. ²⁰Ní taachí José miiⁿ nacadínuuⁿ yā chí cu'neeⁿ yā María miiⁿ, cuayiivi ní taachí cyaadu yā, 'áámá ángel yeⁿe

Señor Ndyuūs che'enaáⁿ yā yeⁿé yā ní caⁿa yā chíí yā José miiⁿ: Díí, José, saⁿā yeⁿe ndaata rey David, nguée 'va'a di cuuví n'daataá yeⁿe di María, ti dacuáⁿā yeⁿé tá chí véé cheetí tá nguée yeⁿe 'iiⁿ'yāⁿ ti yeⁿé Espíritu N'dai yeⁿe Ndyuūs. ²¹Ní táⁿā miiⁿ ní 'cuundiyáāⁿ daiya tá 'áámá saⁿā 'lííⁿ. Díí ní cu'neeⁿ di chí nguúví sá JESÚS caati cucáávā Jesús miiⁿ ní nadanguáⁿ'ai 'iiⁿ'yāⁿ yeⁿé iⁿ'yeeⁿdí 'cūū ní nadich'ecú yā nuuⁿndi yeⁿe nducyaaca 'iiⁿ'yāⁿ.

²²Tanducuéⁿē chuū ní 'tíicā chíí ndúúcū María ní 'íicú cuuvi cuaacu chí caⁿā profeta yeⁿe nduudu yeⁿé Ndyuūs ndíí cuaaⁿ vmnaaⁿ, nduudu chí canée nguūⁿ na libro yeⁿé Ndyuūs 'tíicā:

²³Níicú n'diichí nī. Tá 'cūū 'áámá chí cuinuu tá 'cuúndí daiya tá. Taachí 'cuundiyáāⁿ 'áámá daiya tá ní cu'neeⁿ chí duuchi Emanuel chí neⁿe caaⁿ'maⁿ Ndyuūs ndúúcū s'uúúⁿ.

²⁴Cuayiivi miiⁿ ní taachi José miiⁿ nanduuchí yā, tuu'mi ní dííⁿ yā tan'dúúcā chí ngaⁿā ángel yeⁿe Señor Ndyuūs níicú ch'iindivaacú yā ndúúcū María miiⁿ. ²⁵Naati José miiⁿ nguée n'diichi sá María miiⁿ ndíí ch'iindiyáāⁿ daiya tá, ní José s'neeⁿ sá chí nguúví dacua'āa miiⁿ dúúchí JESÚS.

Yeⁿé 'iiⁿ'yāⁿ magos chí cheⁿe sa n'diichi sa Jesús

2 Taachi Jesús ch'iindiyáāⁿ yā na yāāⁿ Belén yeⁿe yáⁿāa Judea, tiempo miiⁿ ní saⁿa Herodes miiⁿ ní rey yeⁿe yáⁿāa Judea. Ní n'duuví magos, 'iiⁿ'yāⁿ chí déenu ca yā yeⁿe 'ííⁿ'nyúⁿ ndiicá yaⁿ'ái yā ndíí

cuaaⁿ ná ícan'daā 'yá'ⁿā. Ní magos ndaa yā na yāāⁿ Jerusalén. ²Magos ní ndaa yā nanááⁿ rey Herodes miiⁿ ní ntiinguuneeⁿ yā rey: ¿Tíí cánée 'ii'ⁿyāⁿ chí rey ye'ⁿe 'ii'ⁿyāⁿ Israel chí 'niindiyáaⁿ yā? Nús'uū ní n'diichí 'nū 'áámá 'íí'nyúⁿ ch'εεε cuááⁿ ná ican'dáá 'yá'ⁿā 'íí'cú chííⁿ chí cuchíí 'nū. Níí'cú ndaa 'nū chí cu'téénú 'nū sa'ⁿā 'lííⁿ rey miiⁿ.

³Taachí rey Herodes miiⁿ ch'iindiveéⁿ yā chuū, chista'ⁿā vaanicadíínūⁿ ye'ⁿe yā. 'Tiicá ntúūⁿ nducyaaca 'ii'ⁿyāⁿ ye'ⁿe yāāⁿ Jerusalén taachi ch'iindiveéⁿ yā. ⁴Ní rey Herodes miiⁿ ní nádaamá yā nducyaaca chiidūu n'gεεé chí nga'ⁿa ntii'nyúⁿ yā ye'ⁿe yaācū Israel ndúú'cū 'ii'ⁿyāⁿ chí ngi'cuééⁿ ley 'ii'ⁿyāⁿ ye'ⁿe Israel. Ní itiinguuneeⁿ yā 'ii'ⁿyāⁿ s'ee'ⁿ: ¿Tíí 'niindiyáaⁿ Cristo? ⁵'Ii'ⁿyāⁿ s'ee'ⁿ ní ca'ⁿa yā chíi yā rey miiⁿ: 'Cuundiyáaⁿ yā na yāāⁿ Belén ye'ⁿe yá'ⁿā Judea caati 'tíicá canéé nguūⁿ na libro ye'ⁿe Ndyuūs cucáávā sa'ⁿa profeta:

⁶Ndís'tii 'ii'ⁿyāⁿ ye'ⁿe yāāⁿ Belén ye'ⁿe yá'ⁿā Judá, ¿'áá nguéé yāāⁿ ye'ⁿe ní chí 'lííⁿ cá nguaaⁿ nducuéⁿē yāāⁿ ye'ⁿe yá'ⁿā Judá naachi 'ii'ⁿyāⁿ ndíí tiiⁿ nga'ⁿa ntii'nyúⁿ yā? Nguéé chí 'tíicā, caati nguaaⁿ ndís'tii chí ye'ⁿē yāāⁿ Belén can'dáá 'áámá sá'ⁿā chí nga'ⁿā ntii'nyuⁿ sá ye'ⁿe nducyáácá 'ii'ⁿyāⁿ Israel chí judíos chí 'ii'ⁿyāⁿ s'ee'ⁿ chí Ndyuūs nndεeve yā.

⁷Tuu'mi ní rey Herodes yaa'vi n'dé'í yā sa'ⁿā magos ní ntiinguuneeⁿ cá yā sa'ⁿa s'ee'ⁿ: ¿Dε'ē tiempo n'diichi ní 'íí'nyúⁿ miiⁿ? ⁸Ní

rey miiⁿ ní ca'ⁿa yā chíi yā sa'ⁿa s'ee'ⁿ: Ndís'tii magos, cue'ⁿe ní na yāāⁿ Belén ní in'nuūⁿ n'daāca ní dacua'a 'lííⁿ miiⁿ. Ní taachí ndaaca ní dacua'a mííⁿ, nanguεecunéeⁿ ní ní caa'ⁿmaⁿ ní ye'ⁿé. Maaⁿ níí'cú 'úú ntúūⁿ ní cuuvi ca'ⁿā cu'teenú dacua'a 'lííⁿ miiⁿ.

⁹Magos ní ch'iindiveéⁿ yā nduudu ye'ⁿe rey miiⁿ ní cúna'ⁿa yā. Cuin'diichí ní. 'Íí'nyúⁿ chí 'ii'ⁿyāⁿ magos n'diichi yā cuaaⁿ na ican'daa 'yá'ⁿā, 'íí'nyúⁿ mííⁿ cue'ⁿé nanááⁿ ye'ⁿe magos taanduvéé ndaā ní cānee lugar naachi canéé dacua'a 'lííⁿ. ¹⁰Ní taachi magos 'āā n'diichí yā 'íí'nyúⁿ miiⁿ, yéénú taaví yā. ¹¹Ní taachi sndaá yā va'āi miiⁿ, n'diichí yā sa'ⁿā 'lííⁿ dacua'ā miiⁿ ndúú'cū chεecu sá María. Ní chíintii'yá yā nanááⁿ dacua'ā miiⁿ ní s'téenu yā. Taachi n'guaaⁿ yā caja naachi snéé regalos ye'ⁿe yā, tuu'mi ní ca'á yā ye'ⁿē dacua'ā miiⁿ. Regalos ní 'díí'nguaāⁿ ndúú'cū yá'ⁿā chí n'dεeve ngééⁿ ndúú'cū mirra chí diitū taavi n'dai ngééⁿ. ¹²Cuayivi miiⁿ ní Ndyuūs yaa'vi yā magos na 'yúúdíyaaⁿ ye'ⁿe yā chí 'āā ntéé na'ⁿa yā nanááⁿ rey Herodes miiⁿ. Níí'cú magos cuna'ⁿa yā na vaacu yā na taama yúúni.

Cue'ⁿe yā ngéenu yā na yá'ⁿā Egipto

¹³Taachi magos cuna'ⁿa yā, tuu'mi ní Ndyuūs dicho'ó yā 'áámá ángel níí'cú ángel miiⁿ ní ndaa yā nanááⁿ José miiⁿ taachi cyaadú yā ní ca'ⁿa yā chíi yā José: Díí José, nducueeⁿ di ní cuta'a di sa'ⁿā 'lííⁿ ní cue'ⁿe di cáanū di ndúú'cū chεecu sa ndíí yá'ⁿā Egipto. Ní 'cuεetinéeⁿ ní miiⁿ ndíí taachi 'úú caa'ⁿmáⁿ caati canéé

chí rey Herodes miiⁿ ní nan'nuúⁿ yā saⁿā 'lírⁿ chí 'caaⁿnúⁿ yā saⁿā.

¹⁴ José miiⁿ ní nanduuchí yā. 'Tiicá ntúúⁿ chɛɛcu sa. Ní sta'a yā saⁿā 'lírⁿ miiⁿ ní nguiinū mííⁿ nūuⁿ cueⁿe yā ndúúcu chɛɛcu sa na yáⁿā Egipto. ¹⁵ Níicú miiⁿ ch'ɛetinée yā ndíí chí ch'ií rey Herodes. Níicú cúúnú ca'a chííⁿ chí Señor Ndyuūs caⁿa yā na libro yeⁿe yā ndii cuááⁿ vmnaaⁿ cucáávⁿ saⁿa profeta miiⁿ taachi caⁿa yā 'tíicā: Ná yáⁿā Egipto 'caí daíyá.

Rey Herodes caⁿa ntiiⁿnyúⁿ yā chí 'caaⁿnúⁿ yā dacuaⁿāa ngaiyāā

¹⁶ Taachí rey Herodes miiⁿ tuumicadínuuⁿ yā chí 'iiⁿyāⁿ magos chinnche'éí yā 'iiⁿyāⁿ, tuuⁿmi ní nduuví taáⁿ n'dai yā. Ní rey miiⁿ ní caⁿa ntiiⁿnyuⁿ yā ní dichóó yā soldados chí ch'iíⁿnuⁿ yā nducyáácá dacuaⁿāa chí saⁿā ndíí cuaacu 'uúvī nduūyū chí véé na yááⁿ Belén ndúúcu tanáⁿā yááⁿ chí na niiⁿnuúⁿ. 'Tíicā rey miiⁿ diiⁿ cuenta yā ti cho'oo 'uuví nduūyū chí magos n'diichí yā 'ííⁿnyúⁿ ch'ɛete miiⁿ yeⁿe nanguuvi. ¹⁷ Tuuⁿmi ní cho'oo chuū chí cuuvi cuaacu tan'dúúca chí canée nguūⁿ na libro yeⁿe Ndyuūs cucáávⁿ chí caⁿa saⁿā profeta Jeremías cuááⁿ vmnaaⁿ 'túúca:

¹⁸ Na yááⁿ Ramá chíiindiveéⁿ

'iiⁿyāⁿ chí ngɛɛcu yā ní n'gái yā ndúúcu 'áámá vaadi ya'ai ch'ɛeté cucáávⁿ daiya yā chí ch'ií. N'daataá yeⁿe Israel s'eeⁿ ngɛɛcu yā cucáávⁿ daiya yā chí ch'iíⁿnūⁿ rey tan'dúúca chí táⁿā Raquel ngɛɛcu yā cucáávⁿ daiya yā chí ch'ií. Ní nguée chíi ndaacā n'daataa s'eeⁿ 'viich'etíínūⁿ miiⁿ.

¹⁹ Cuayiiivi taachí ch'ií rey Herodes miiⁿ, José miiⁿ ní 'āā canee yā na yáⁿā Egipto. Tuuⁿmi ní Señor Ndyuūs dicho'o yā 'áámá ángel ní ángel che'enaáⁿ yā yeⁿe José taachi cyaadú yā. ²⁰ Ní ángel miiⁿ caⁿa yā chíi yā José: Díí José, nducueeⁿ di ní cuta'a di saⁿā 'lírⁿ dacuaⁿāa ní cuinaⁿa di ndúúcu chɛɛcu sa na yáⁿā Israel caati ch'ií 'iiⁿyāⁿ chí neⁿe yā 'caaⁿnuⁿ yā saⁿā 'lírⁿ.

²¹ Tuuⁿmi ní José ncueeⁿ yā. 'Tiicá ntúúⁿ chɛɛcu sa. Ní sta'a yā saⁿā 'lírⁿ miiⁿ ní cueⁿe yā ndúúcu chɛɛcu sa na yáⁿā yeⁿe 'iiⁿyāⁿ Israel.

²² Taachí José miiⁿ chíiindiveeⁿ yā chí saⁿā Arquelao canée lado yeⁿe rey Herodes chí chiida sa, tuuⁿmi ní José miiⁿ ní 'va'á yā chí caⁿa yā na yáⁿā Judea chí yáⁿā yeⁿe 'iiⁿyāⁿ Israel. Naati tan'dúúca chí ángel che'enaáⁿ yeⁿe yā na 'yuudiyaⁿ yeⁿe yā, cueⁿe yā yáⁿā Galilea chí yáⁿā yeⁿe 'iiⁿyāⁿ Israel ntúūⁿ. ²³ Ní ndaá yā na yáⁿā mííⁿ ní cueⁿe yā ch'ɛetinee yā na yááⁿ Nazaret yeⁿe yáⁿā Galilea. Ní 'iicu cuuvi cuaacu chí caⁿa profetas vmnááⁿ vmnaaⁿ yeⁿe Jesús chí 'túúca: Canée chí cuuvi nguúvī yā 'iiⁿyāⁿ nazareno yā cucáávⁿ chí cueⁿe yā na yááⁿ Nazaret.

Yeⁿe chí Juan cueédínuūⁿniⁿ yā ní ngaⁿa yā nduudu cuaacu

(Mr. 1.1-8; Lc. 3.1-9, 15-17; Jn. 1.19-28)

3 Tiempo miiⁿ chiicá Juan chí cueédínuūⁿniⁿ yā na lugar naachi nguée ch'ɛetinée 'iiⁿyāⁿ. Lugar miiⁿ chí yeⁿe yáⁿā Judea ní mííⁿ ngaⁿa Juan nduudu cuaacu. ² Juan miiⁿ ní ngaⁿa yā chí 'túúca: Ndís'tii, ndaacadaamí ní yeⁿe chí

dííⁿ nī chi nguéeⁿ n'dai caati 'āā ndaā nīiⁿnuuⁿ nguuvi mīiⁿ naachi Ndyuūs ngaⁿ'a ntiⁿnyúⁿ yā na va'ai cheeti nguuvi. ³Nífcú yeⁿ'e Juan 'cūū ní saⁿ'a profeta Isafas caⁿ'a yā yeⁿ'e yā vmnááⁿ vmaaⁿ taachí caⁿ'a yā 'túucā:

'Caandiveéⁿ nī. 'Áámá saⁿ'ā ngaⁿ'ā yuudu sa 'túucā na yáⁿ'āa cuūⁿmáⁿ naachi nguéeⁿ ch'etinééⁿ 'iⁿ'yāⁿ: 'Cuundiyaáⁿ nī yúúⁿ yeⁿ'ē Señor Ndyuūs caati cúchii yā. Nan'guáaⁿ nī yúúⁿ cuaacu caavá yā. Dideevéⁿ nī staava yeⁿ'é nī ní cuuvi cuaáⁿ nī 'iⁿ'yāⁿ mīiⁿ taachi ndaa yā.

⁴Catecai Juan mīiⁿ ní nin'dai ndúúⁿcū yuūdū yeⁿ'ē 'iiti camello. Ní cinturón yeⁿ'ē sa ní diiⁿmaⁿ 'iiti. Nífcú chí che'ē sa ní 'iiti langostas ndúúⁿcū n'di'í yeⁿ'ē 'iiti 'yáaiⁿ chí vee cuēti. ⁵N'deeé 'iⁿ'yāⁿ can'daa yā chí 'caandiveéⁿ yā nduudu yeⁿ'é Juan mīiⁿ. Ní can'daa yā yeⁿ'e yāāⁿ Jerusalén, yeⁿ'e yáⁿ'āa Judea, ní yeⁿ'e yáⁿ'āa chí cuaaⁿ 'diituú yeⁿ'ē yífcú Jordán. ⁶'Iⁿ'yāⁿ ní caⁿ'a yā nuuⁿndi yeⁿ'é yā nanááⁿ Ndyuūs nífcú Juan mīiⁿ ní cheedínūⁿnīⁿ sá 'iⁿ'yāⁿ mīiⁿ na yífcú Jordán mīiⁿ.

⁷Taachí Juan mīiⁿ n'diichī sa chí neené 'yaaⁿ 'iⁿ'yāⁿ fariseos ndúúⁿcū 'iⁿ'yāⁿ saduceos neⁿ'é yā chí cuēdínūⁿnīⁿ sa 'iⁿ'yāⁿ, Juan mīiⁿ caⁿ'a sa chí sa 'iⁿ'yāⁿ mīiⁿ: Ndís'tií tan'dúúⁿcā cúú, 'tíficā ndís'tií. ¿Du'ú chí 'cuéeⁿ ndís'tií chí cuuvi cáanu nī yeⁿ'e castigo taaⁿ chí cuchii?

⁸N'daāca dííⁿ nī maaⁿ nífcú 'cuuⁿ'míⁿ nī 'iⁿ'yāⁿ chí 'āā ndaacadaamí nī yeⁿ'e nuuⁿndi yeⁿ'e nī. ⁹Ndís'tií ní 'āā ntée nadacadíínuuⁿ nī chí n'dai

nī caati ndaata yeⁿ'e Abraham ndís'tií. Naati 'úú ní ngaⁿ'á ngii ndís'tií chí Ndyuūs cuuvi dííⁿ yā chí tuūu s'tií ní cuuvi daiya Abraham.

¹⁰Cutíiⁿ mīíⁿ 'āā canéeⁿ na dii'yu yáⁿ'á. Nducyaaca yáⁿ'á chí nguéeⁿ n'dáacā ngii n'gui'í yeⁿ'ē canee chí 'caata yáⁿ'á mīíⁿ ní cūnuuⁿ na yaⁿ'ā. ¹¹'Úú ní cuaacu nííⁿnyúⁿ chí ngeēdínūⁿnīⁿ ndís'tií ndúúⁿcū nuuⁿnīⁿ caati 'āā ndaacadaamí nī yeⁿ'e nuuⁿndi yeⁿ'e nī. Naati ndáá táámá 'iⁿ'yāⁿ cuayiivi yeⁿ'e 'úú chí ch'ete taavi cá poder yeⁿ'e yā nguéeⁿ ti 'úú. 'Úú ní nguéeⁿ neené n'dai 'úú chí cuuvi candéé ndaacuú yeⁿ'e yā. 'Iⁿ'yāⁿ mīiⁿ ní n'dai taavi cá yā chí cuuvi 'úú. 'Iⁿ'yāⁿ mīiⁿ ní cuēdínūⁿnīⁿ yā ndúúⁿcū Espiritu N'dai yeⁿ'é Ndyuūs ndúúⁿcū yaⁿ'ā. ¹²Ní taachi ndaa 'iⁿ'yāⁿ mīiⁿ chí nguuvi Jesús dííⁿ yā tan'dúúⁿcā 'áámá 'iⁿ'yāⁿ chí dideevéⁿ yā trigo 'tíficā dííⁿ yā ndúúⁿcū 'iⁿ'yāⁿ. Ní sta'á yā zaranda yeⁿ'e yā ní nadidaamá yā trigo na cheeti díínūⁿ. Ní dēecú mīiⁿ nī'neeⁿ yaⁿ'a yā ná nguuchí yaⁿ'ā chí 'āā ntée n'tuūvi. Dēecú mīiⁿ ní tan'dúúⁿcā 'iⁿ'yāⁿ chí nguéeⁿ i'ténu yā Ndyuūs.

Juan cheedínūⁿnīⁿ sa Jesús

(Mr. 1.9-11; Lc. 3.21-22)

¹³Tuu'mi ní Jesús chiicá yā na yáⁿ'āa Galilea ní ndaá yā na yífcú Jordán naachi canee Juan chí Juan mīiⁿ ní cuēdínūⁿnīⁿ sa Jesús mīiⁿ.

¹⁴Juan mīiⁿ ní nguéeⁿ 'cuuⁿ sa. Ní caⁿ'a sa chí sa Jesús mīiⁿ: 'Úú ní neⁿ'é chí dii cuēdínūⁿnīⁿ di 'úú. ¿Áá dii cuchii di nanáaⁿ 'úú?

¹⁵Jesús nan'guēcútaⁿ'a yā: Diiⁿ dí maaⁿ 'tíficā; ní diiⁿ yú tan'dúúⁿcā

chi Dendyuūs neⁿe yā chi diiⁿ yú.
Tuu'mi ní Juan 'cuūⁿ sa.

¹⁶ Cuayiivi taachi 'āā chēēdínúuⁿnīⁿ
Juan miiⁿ Jesús miiⁿ, tuu'mi ní
Jesús ní nan'dáa yā na nuūⁿnīⁿ.
Cuayiivi ní nanguaāⁿ nanguuvi. Ní
Juan n'diichí sa Espíritu N'dai yeⁿé
Ndyuūs miiⁿ chi tan'dúúcā paloma
'tífcā. Chiica yeⁿē na va'ai chēeti
nguuvi ní ndaā vmnaaⁿ yeⁿe Jesús
miiⁿ. ¹⁷ Tuu'mi ní n'giindiveeⁿ yā
'áámá nduudu yeⁿē nanguuvi chí
ngaⁿa: Saⁿa 'cūū Daiyá chí neⁿe
taaví. Ní yeenú taaví cáávā sáⁿa
'cūū.

**Yáá'n'guiinūuⁿ neⁿe sa tuu'vi neeⁿ sa
Jesús**

(Mr. 1.12-13; Lc. 4.1-13)

4 Tuu'mi ní Espíritu N'dai yeⁿé
Ndyuūs candēē Jesús miiⁿ
ná yáⁿāa cuūⁿmāⁿ naachi nguéé
ch'ēetinéé 'iiⁿyāⁿ chi yáá'n'guiinūuⁿ
neⁿe sa chi Jesús díⁿ yā nuuⁿndi.

² Jesús canée yā miiⁿ 'uūvū ngēecu
nguuvi ní 'uūvī ngēecu n'gaaⁿ ní
nguéeé che'é yā. Ní cuayiivi ní
cuiicú yā. ³ Yáá'n'guiinūuⁿ ní ndaā
sa nanaáⁿ Jesús chí n'diichineeⁿ sa
'iiⁿyāⁿ. Ní caⁿā sa: Dii Jesús, nduuti
chi dii chi Daiya Dendyuūs dii,
caaⁿmaⁿ dí cuuvi dí tuūu 'cūū chi
nduuví pan. Ní nduuvi pan ní cuuvi
che'e di.

⁴ Jesús miiⁿ nan'guēecútaⁿa yā
ní caⁿa yā: 'Túúcā canee nguūⁿ na
libro yeⁿé Ndyuūs: Nguéeé dámaāⁿ
pan che'é 'iiⁿyāⁿ ní cunduūchi
yā caati ndúúcu tanducuéⁿē
nduudu chi ngaⁿa Ndyuūs ní 'iiⁿyāⁿ
cunduūchí yā nduuti chi cu'téenu yā.

⁵ Tuu'mi ní yáá'n'guiinūuⁿ miiⁿ
candēē sa Jesús na yāā Jerusalén

chi yáāⁿ yeⁿe Ndyuūs. Ní chin'duu
sá 'iiⁿyāⁿ na yáácú yeⁿe yaācū. ⁶ Ní
yáá'n'guiinūuⁿ caⁿa sa chii sa Jesús:
Nduuti chi dii chi Daiya Dendyuūs
dii, cáávā di ndii 'múúⁿ ndii na
yáⁿāa; caati 'túúcā canéé nguūⁿ na
libro yeⁿé Ndyuūs:

Ndyuūs dichó'o yā ángeles yeⁿe
yā chi diiⁿ yā cuidado yeⁿē
di. Ní ángeles cundēē yā dii
ndúúcu ta'á yā, ní nguéeé cuuvi
ya'ai ca'a di na tuūu.

⁷ Jesús nán'guēecútáⁿa yā: 'Tuucá
ntúúⁿ canéé nguūⁿ na libro yeⁿé
Ndyuūs: Nguéeé diiⁿ di mar 'áámá
cosa chi n'diichineeⁿ di Señor
Ndyuūs yeⁿē di.

⁸ Tuu'mi candēē yáá'n'guiinūuⁿ
miiⁿ Jesús miiⁿ na 'áámá yiicū yáácú
ní ch'iⁿi sa tanducuéⁿē naciones
yeⁿē iⁿ'yeeⁿdí 'cūū ndúúcu chí ngaⁿa
ntiiⁿnyuⁿ sa yeⁿē ndúúcu dendú'ū
chí n'gēete chi véé yeⁿē. ⁹ Ní caⁿa
sa chii sa Jesús miiⁿ: Tanducuéⁿē
chuū téé dii nduuti chi caantí'ya dí
nanaáⁿ ní cu'téenu di 'úú.

¹⁰ Tuu'mi ní Jesús miiⁿ caⁿa yā
chii yā saⁿā miiⁿ: Dí yáá'n'guiinūuⁿ,
cuví di nanaáⁿ caati 'túúcā canéé
nguūⁿ na libro yeⁿe Dendyuūs:
Cu'téenu di Señor Ndyuūs yeⁿē di ni
'caandiveeⁿ di yeⁿe 'iiⁿyāⁿ mífⁿ nūuⁿ.

¹¹ Tuu'mi ní yáá'n'guiinūuⁿ miiⁿ
diví sa yeⁿe Jesús, ní níndaā
ángeles ní dichí'v'e yā Jesús miiⁿ.

**Jesús tucá'a yā ntiiⁿnyuⁿ yeⁿe yā na
yáⁿā Galilea**

(Mr. 1.14-15; Lc. 4.14-15)

¹² Taachi ch'iindiveeⁿ Jesús miiⁿ
chi Juan chi ngēedinuūⁿnīⁿ 'iiⁿyāⁿ
canúúⁿ sá vácūū, nanguēecunée
yā cunaⁿa yā na yáⁿā Galilea.

¹³Chiicá yā na yáaⁿ Nazaret ní ndaa yā canee yā na yáaⁿ Capernaum. Yáaⁿ miiⁿ ní niiⁿnuúⁿ na nuúⁿníⁿyáⁿā canee, ní canee na yáⁿāa yeⁿe Zabulón ndúúcū yáⁿāa yeⁿe Neftalí. ¹⁴Ní cuuvi cuaacu nduudu yeⁿe saⁿā profeta Isafas chí caⁿa sa cuááⁿ vmnaaⁿ 'tíicā:

¹⁵Ná yáⁿāa yeⁿē Zabulón ndúúcū na yáⁿāa yeⁿe Neftalí chí canée na yúúⁿ chí ngeⁿe ná nuúⁿníⁿyáⁿā ndúúcū na yáⁿāa chí canee taama lado yeⁿe yíicú chí nguuví Jordán. Míiⁿ canée yáⁿāa Galilea yeⁿe 'iiⁿyāⁿ chí nguéeⁿ yeⁿē ndaata 'iiⁿyāⁿ Israel.

¹⁶'Iiⁿyāⁿ chí snée na maāiⁿ ti nguéeⁿ yeⁿe Ndyuūs, 'iiⁿyāⁿ s'eeⁿ n'diichí yā 'áámá dēeve ch'ēete. Ní chíi dēevé miiⁿ naachi snee 'iiⁿyāⁿ s'eeⁿ.

¹⁷Ndíí tuu'mi tucáⁿā Jesús caⁿa yā nduudu cuaacu ní caⁿa yā: Ndaacadaamí ní yeⁿe nuuⁿndi yeⁿé ní caati tiempo chí Ndyuūs ngaⁿa ntiiⁿnyúⁿ yā na va'ai ch'ēeti nguuví 'āā ndaa niiⁿnuúⁿ.

Jesús yaa'vi yā cuūuⁿ saⁿa chí itungááⁿ 'yaācā

(Mr. 1.16-20; Lc. 5.1-11)

¹⁸Guayiivi ní Jesús miiⁿ cachiicá yā cuaaⁿ 'diituú nuúⁿníⁿyáⁿā chí nguuví Galilea, ní n'diichí yā na 'uuví saⁿā 'dínu sa vi'í. Áámá saⁿa ní Simón Pedro nguuví sa. Táámá saⁿā ní 'diinu sa ní Andrés nguuví sa. Saⁿā s'uuⁿ ní n'gaa nuuⁿ sa yáanā yeⁿé 'yaācā miiⁿ na nuúⁿníⁿyáⁿā ti saⁿā s'eeⁿ itungááⁿ sa 'yaācā na nuúⁿníⁿyáⁿā ti ntiiⁿnyuⁿ yeⁿē sa. ¹⁹Jesús caⁿa

yā chíi yā saⁿā s'eeⁿ: Cuchí ní nduucú, ní 'úú ní dííⁿ chí in'nuúⁿ ní 'iiⁿyāⁿ chí cuuvi caⁿá yā nduucú. Ní tan'dúúcā chí tungaáⁿ ní 'yaācā yeⁿe nuúⁿníⁿyáⁿā, 'tíicā in'nuúⁿ ní 'iiⁿyāⁿ chí caⁿá yā nduucú.

²⁰Hora míiⁿ nuuⁿ ní saⁿā s'eeⁿ s'neeⁿ sa yaānā yeⁿē sa ní cueⁿe sa ndúúcū Jesús miiⁿ.

²¹Tuu'mi ní Jesús miiⁿ cueⁿe ca yā ní n'diichi yā taama 'uuví saⁿā chí 'diinu sá vi'í chí nguuví sa Jacobo ndúúcū Juan. Ní saⁿā s'uuⁿ ní daiya Zebedeo. Ní snee sa na barco miiⁿ ndúúcū chiida yā Zebedeo miiⁿ ní n'diyaatá yā yáanā yeⁿe yā. Jesús 'cai yā Juan ndúúcū Jacobo miiⁿ.

²²Tuu'mí nuuⁿ ní saⁿā s'uuⁿ ní s'neeⁿ sa barco miiⁿ ndúúcū chiida sa, ní cueⁿe saⁿā s'uuⁿ ndúúcū Jesús miiⁿ.

Jesús ngi'cuéeⁿ yā 'yaaⁿ taavi 'iiⁿyāⁿ

(Lc. 6.17-19)

²³Jesús cachiicá yā núúⁿmáⁿ ná yáⁿāa yeⁿe Galilea ní ngi'cuéeⁿ yā na yaacū sinagogas na yáāⁿ yeⁿē yáⁿāa miiⁿ. Ní caⁿá yā nduudu cuaacu yeⁿé naachi Ndyuūs ngaⁿa ntiiⁿnyúⁿ yā. Jesús miiⁿ ní dííⁿ yā chí nduūvā yeⁿé 'iiⁿyāⁿ yeⁿe nducuéⁿē naaⁿ ca'ái ndúúcū 'iiⁿyāⁿ yeⁿe nducuéⁿē chí ya'ai yeⁿe yā.

²⁴Ní nducyááⁿ 'iiⁿyāⁿ yeⁿe núúⁿmáⁿ yáāⁿ yeⁿe yáⁿāa Siria ch'iindiveeⁿ yā yeⁿe Jesús miiⁿ. Ní candée yā 'iiⁿyāⁿ chí ya'ai yeⁿē, ndúúcū 'iiⁿyāⁿ chí n'dee nááⁿ ca'ai ndii yā, ndúúcū 'iiⁿyāⁿ chí canee yā ndúúcū espíritus yeⁿe yááⁿn'guiniūuⁿ, ndúúcū 'iiⁿyāⁿ chí ndistáⁿā vaanicádiinūuⁿ yeⁿē, ndúúcū 'iiⁿyāⁿ ndúúcū ca'ái chí in'dúuví cuerpo yeⁿe yā. Ní Jesús dííⁿ yā

chi nducyaaca 'iiⁿ'yāⁿ nduūwā yeⁿ'é yā. ²⁵Neené 'yaaⁿ 'iiⁿ'yāⁿ cueⁿ'é yā ndúúcu Jesús miⁿ. 'Iiⁿ'yāⁿ s'eeⁿ ní yeⁿ'e yáⁿ'āa Galilea, ndúúcu distrito yeⁿ'ē Decápolis chi véé ndíichi yáaⁿ yeⁿ'ē, ndúúcu yáaⁿ Jerusalén, ndúúcu yáⁿ'āa yeⁿ'e Judea, ndúúcu yáⁿ'āa chi snéé táámá lado yeⁿ'ē yíícu Jordán.

**Jesús ngaⁿa yā nduudu cuaacu na
'áámá yiicu**
(Lc. 6.20-23)

5 Taachi Jesús n'diichí yā chi n'deee n'dái 'iiⁿ'yāⁿ cueⁿ'e yā ndúúcu yā tuuⁿ'mi ní Jesús cueⁿ'e yā 'áámá yiicu. Taachi Jesús miⁿ ch'iindí yā tuuⁿ'mi ní discípulos yeⁿ'e yā ní ndaa yā nanááⁿ yā. ²Jesús ní caⁿ'a yā ní ngi'cuéⁿ yā 'iiⁿ'yāⁿ s'eeⁿ.

³De'e chúúcā n'dai 'iiⁿ'yāⁿ chi deenú yā na staava yeⁿ'é yā chi neⁿ'e deenu cá yā yeⁿ'e Ndyuūs, caati cuuvi yeⁿ'é yā yeⁿ'e naachi Ndyuūs ngaⁿa ntiiⁿ'nyúⁿ yā ná va'ai chēeti nguuvi.

⁴De'e chúúcā n'dai 'iiⁿ'yāⁿ chi ndaachi i'inú yā cáávā chi i'téenu yā Ndyuūs maaⁿ, caati cuayiivi ní Ndyuūs ca'á yā 'viich'et'ínūⁿ 'iiⁿ'yāⁿ.

⁵De'e chúúcā n'dai 'iiⁿ'yāⁿ chi ndiicúuⁿ yā na staava yeⁿ'e yā, ti 'iiⁿ'yāⁿ s'eeⁿ cuuvi ndaācá yā de'ē chi cuuvi yeⁿ'e yā chi Ndyuūs caⁿ'a yā chi ca'a yā 'iiⁿ'yāⁿ s'eeⁿ.

⁶De'e chúúcā n'dai 'iiⁿ'yāⁿ chí neⁿ'e ca yā diiⁿ yā chi n'daācā tan'dúúcā chi neⁿ'e Ndyuūs. Ní Ndyuūs cúnnee yā 'iiⁿ'yāⁿ s'eeⁿ.

⁷De'e chúúcā n'dai 'iiⁿ'yāⁿ chi 'nuūⁿ ndii ya'ai i'inú yā cáávā tanáⁿ'ā 'iiⁿ'yāⁿ, caati Ndyuūs 'nuūⁿ ndii ya'ai i'inú ntúuⁿ yā cáávā 'iiⁿ'yāⁿ s'eeⁿ.

⁸De'e chúúcā n'dai 'iiⁿ'yāⁿ chi dēēve staava yeⁿ'é yā, ti 'iiⁿ'yāⁿ s'eeⁿ ní snaaⁿ yā Ndyuūs.

⁹De'e chúúcā n'dai 'iiⁿ'yāⁿ chi diiⁿ yā chi nguéé 'caa'vá 'iiⁿ'yāⁿ, ti tanáⁿ'ā 'iiⁿ'yāⁿ caaⁿ'máⁿ yā yeⁿ'é 'iiⁿ'yāⁿ chi daiyá Dendyuūs 'iiⁿ'yāⁿ.

¹⁰De'e chúúcā n'dai 'iiⁿ'yāⁿ chi n'geenú yā ngii cáávā chi díⁿ yā chíⁿ chi Ndyuūs neⁿ'é yā, caati véé parte yeⁿ'e yā naachi Ndyuūs ngaⁿa ntiiⁿ'nyúⁿ yā ná va'ai chēeti nguuvi.

¹¹De'e chúúcā n'dai ndís'tii taachi 'iiⁿ'yāⁿ díⁿ yā chi ndís'tii 'cuenú nī cuuvi cucáávā 'úú, ní taachi 'iiⁿ'yāⁿ taáⁿ yā ndúúcu ndís'tii ní n'deee n'dái caaⁿ'máⁿ yā nduudu yaadi yeⁿ'e ndís'tii cucáávā 'úú. ¹²Cuuvi yeenu taaví nī caati cuuvi ndaācā nī chí ch'ēete yeⁿ'é nī ná va'ai chēeti nguuvi. 'Túúⁿcā 'iiⁿ'yāⁿ can'daa yā ndíí cuaaⁿ vmnaaⁿ 'iiⁿ'yāⁿ profetas chi ndéé yā nduudu yeⁿ'e Ndyuūs. Ní profetas ch'eenú yā chii.

Yiimā yeⁿ'ē yáⁿ'āa
(Mr. 9.50; Lc. 14.34-35)

¹³Jesús caⁿ'a yā: Ndís'tii, nduuti chi i'téenu nī chi 'úú chí Cristo, tuuⁿ'mi ní ndís'tii, tan'dúúcā yiimā yeⁿ'ē yáⁿ'āa 'tiicá nī. Nduuti chí yiimā nguéé n'daācā sabor yeⁿ'ē, 'de'ē cuuvi díⁿ nī? Nguéé de'ē vēe dichí'vē yiimā miⁿ. 'Āa taanduu rá chí cungéé 'iiⁿ'yāⁿ na yáⁿ'āa ní n'diivi neeⁿ ca'a yā.

Déévé yeⁿ'e iⁿ'yeeⁿdí 'cūū

¹⁴Ndís'tii chi i'téenu nī chi 'úú chí Cristo, tan'dúúcā dēēve yeⁿ'e iⁿ'yeeⁿdí 'cūū 'tiicá nī, ti caⁿ'á nī ch'iⁿ'i nī dēēve yeⁿ'é Ndyuūs nanááⁿ 'iiⁿ'yāⁿ. 'Áámá yáaⁿ chi canduūu

na 'áamá yiicū nguée cúúví cunuu" n'de'ēi. ¹⁵Ndíí nguée ndúú 'ii"yā" ra 'cuu"mi" yā 'áamá lámpara ní cu'nuú" yā maa" 'áamá caja; naati cun'duú" yā na 'áamá mesa, ní íícú cuuví deēve ye"ē nducyaaca 'ii"yā" chi snée yā chēeti va'āi. ¹⁶Tan'dúúccā 'áamá lámpara chí ngii ndēve, 'tífcā cuuvi n'daācā vida ye"é nī nanáá" 'ii"yā" chi snée yā i"yee"dí' cūū. Ní 'íícú 'ii"yā" s'ee" cuuvi snaa" yā ntii"nyu" chí n'daācā chi idií" nī. Ní 'ii"yā" s'ee" caa"má" yā: De'e chúúcā ch'ēete Ndyuūs chi Chiidá nī, Ndyuūs chi canée yā ná va'ai chēeti nguuví.

**Jesús nga"a yā ye"e ley
ye"e 'ii"yā" Israel**

¹⁷Nguée nadicádíínuu" ndís'tiī chi 'úú chi Jesús ní cúchií chi divií ley ye"e Moisés ndúúccū nduudu ye"e profetas chi canée nguū" ndíí cuaa" vmnaa". 'Úú nguée ndaá chí divií ti ndaá chi dicuaācú ye"ē. ¹⁸Ti cuaacu níí"nyú" nga"á ngii ndís'tiī: Ne"e chi canée cá nanguuvi ndúúccū i"yee"dí' cūū nguée cuuvi chó'oo mar 'áamá punto 'líf" ndíí nguée ndúú mar 'áamá coma ye"e ndúúdu ye"e ley, nuu"ma" ne"e chi tanducué"ē 'āā cuée cuuvi cuaacu taanduvee chí canée nguū" na libro ye"e Ndyuūs. ¹⁹Tífcā 'āā du'ú nūu" 'ii"yā" chi nguée díf" yā cumplir 'áamá mandamiento 'líf" ní 'tífcā ngi'cuee" yā 'ii"yā" chi díf" yā tan'dúúccā maá" yā dii" yā, 'líf" 'líf" cá nūu" cuuvi tune" yā naachi Ndyuūs nga"á ntii"nyú" yā na va'ai chēeti nguuvi nguée tan'dúúccā taná"ā 'ii"yā". Naati 'ii"yā" chi n'daāca idií" yā ní

ngi'cuee" yā" 'ii"yā" táacā chi cuuvi dii" n'daācā yā, 'ii"yā" mií" cuuvi tune" yā dendu'ū chi n'daācā ná va'ai chēeti nguuvi naachí Ndyuūs nga"á ntii"nyu" yā. ²⁰'Úú ní nga"á ngií ndís'tiī: Nduuti chi ndís'tiī nguée n'daācā ca idií" nī chi cuuvi 'ii"yā" chi ngi'cuee" ley ndúúccū 'ii"yā" fariseos, tuu"mi ní ndís'tiī nguée cuuvi cundaa nī na va'ai chēeti nguuvi naachí Ndyuūs nga"á ntii"nyú" yā.

**Jesús nga"a yā ye"e chi nduuví táá"
'ii"yā"**

(Lc. 12.57-59)

²¹Maa" ní chí'índivee" nī chí ca"á yā chíi yā 'ii"yā" ndii cuáá" vmnaa" chi 'túúccā: Nguée 'caa"nu" di 'ii"yā". Du'u chí 'caā"nū" 'ii"yā" véé nuu"ndi ye"e yā nguuvi chi Ndyuūs caa"ma" yā ye"e nuu"ndi. ²²Naati 'úú ní nga"á ngií ndís'tiī 'tífcā: 'Āā du'ú nūu" chi nduuví taa" ye"ē vi'i, véé nuu"ndi ye"e yā nguuvi chi Ndyuūs caa"ma" yā ye"ē nuu"ndi. 'Āā du'ú nūu" chi caa"ma" cuuvi vi'i 'tífcā: De'e chúúcā chēechí tiī" di, véé nuu"ndi ye"e yā nanáá" juez. 'Āā du'ú nūu" 'ii"yā" chi caa"ma" yā 'tífcā: De'e chúúcā zonzo dii, ca"á yā na infierno naachi canée 'áamá nguuchi ya"ā.

²³Nduuti chi dii" di tan'dúúccā costumbre ye"ē di ní ndē di ofrenda ye"ē di ní ca'a di Ndyuūs vmnáá" nátaí ye"e yaācū templo, ní hora míf" nūu" ninán'gaacu di chí vi'i di ní véé vaadi 'caa'va ye"ē di ndúúcu sa; ²⁴tuu"mi ní cu'nee" di ofrenda ye"ē di nii"nuú" nátaí. Ní cue"e di ntun'dáá n'dai di ndúúccū vi'i di. Cuayiivi ní cuuvi

ngueecundí di ní ca'a di ofrenda yeⁿē di nátai.

²⁵Tun'dáa n'dai di ndúúcū 'āa du'u nūuⁿ 'iⁿyāⁿ chi taaⁿ yeⁿe di maāⁿncheē^éē nūuⁿ taachi canúu di yúúni ndúúcu yā, 'aatiⁱ caⁿa yā canguu yā dii nanááⁿ juez. Ní juez míⁿ nca'a yā dii ta'a policía. Ní policía miⁿ ní cu'nuūⁿ sa dii vácūū. ²⁶Cuaacu níⁿnyúⁿ ngaⁿá ngii dii chi nguée nan'daā di vácūū neⁿe chí nguée 'cuiinu nadíⁿvē di tanducuéⁿē chi can'diicu di.

Jesús ngaⁿa yā yeⁿe adulterio

²⁷N'giindiveeⁿ nī chí caⁿa 'iⁿyāⁿ yeⁿē nuuⁿndi chi adulterio 'túúcā: Ndís'tii chi n'giindivaacú nī, nguée in'nuúⁿ nī n'daataá o isaⁿā chí nguē yeⁿē di. ²⁸Naati 'úú, Jesús ní ngaⁿá ngii ndís'tii 'tíicā: 'Āa du'ú nūuⁿ chí n'giⁿnyūⁿ ndúúcu 'áámá saⁿā o n'daataá ní neⁿe yā cuuvi n'dái yā ndúúcu vi'i, 'āa diiⁿ nuuⁿndí yā na staava yeⁿe yā tan'dúúca chí 'āa 'tíica yā ndúúcu vi'i. Ní 'āa diⁿ yā adulterio.

²⁹Chuū ngaⁿá: Nduuti chi nduutináaⁿ di lado tá cuaācú di diiⁿ chí diiⁿ di nuuⁿndi, 'caaca di nduutinaaⁿ di ní cun'dáa di. Ti n'dáacā ca chi cuuvi ndai di 'áámá parte yeⁿe cuerpo yeⁿē di, nguée ti tanducuéⁿē cuerpo yeⁿē di caⁿa na infierno. ³⁰Ndúúti chí ta'a cuaācú di idiⁿ chí diiⁿ dí nuuⁿndi, 'caaca di ní cun'dáa di. Ti n'dáacā ca chí cuuvi ndāi 'áámá parte yeⁿe cuerpo yeⁿē di, nguée ti núúⁿmáⁿ ch'ēte cuerpo yeⁿē dii caⁿa na infierno.

Jesús ngaⁿa yā yeⁿe chí i'teēchi vi'i yā

(Mt. 19.9; Mr. 10.11-12; Lc. 16.18)

³¹Tiempo chí chó'ōo 'iⁿyāⁿ caⁿa yā 'túúcā: 'Āa du'ú nūuⁿ 'iⁿyāⁿ chí

'teēchi n'daataá yeⁿē yā, canée chí ca'a yā 'áámá caaca yeⁿē chí 'teēchi vi'i yā. ³²Naati 'úú ní ngaⁿá ngii ndís'tii 'tíicā: Nduuti chí 'áámá saⁿā chí 'teēchi sá n'daataá yeⁿē sa, nguée cáávā chí véé saⁿā chí n'dai ndúúcu tá, tuu'mi ní diiⁿ sa chí n'daātāa cuuvi adulterio tá. 'Āa du'ú nūuⁿ saⁿā chí 'caandavaacu sá ndúúcu n'daataa chí i'néeⁿ isaⁿā yeⁿe ta táⁿā, saⁿā miⁿ idiⁿ ntúūⁿ sa nuuⁿndi chí adulterio.

Jesús ngaⁿa yā yeⁿē nduudu chí 'tíicā o nguē 'tíicā

³³Ndís'tii ní ch'iindiveeⁿ nī chí caⁿa yā chí yā 'iⁿyāⁿ tiempo chí 'āa chó'ōo 'tuucā: Nguée caaⁿmaⁿ nī nduudu, “por Ndyuūs”, cáávā cosa chí cuaacu níⁿnyúⁿ chí diⁿ nī ní nguée 'tíicā diiⁿ nī. Taachi caaⁿmáⁿ nī nduudu, “por Ndyuūs”, diiⁿ cuaacú nī tan'dúúca chí diⁿ nī cáávā Ndyuūs. ³⁴Naati 'úú ní ngaⁿá ngii ndís'tii: Nguée caaⁿmáⁿ nī nduudu, “por Ndyuūs”, yeⁿē mar 'áámá naaⁿ. Ndíí nguée caaⁿmáⁿ nī nduudu, “cucáávā nanguuvi”, ti miⁿ canée trono yeⁿe Dendyuūs. ³⁵Ndíí nguée ndúú caaⁿmáⁿ nī nduudu, “cáávā yāⁿā 'cūū”, ti chíⁿ chí banco 'líⁿ yeⁿē ca'a Ndyuūs; ndíí nguée ndúú 'áámá nduudu, “cáávā yāⁿā Jerusalén”, ti chíⁿ chí yāⁿ yeⁿē Rey Ndyuūs chí ch'ēte yā. ³⁶Ndíí nguée ndúú caaⁿmáⁿ nī nduudu, “cáávā tíⁿ nī”, ti nguée cúúví diiⁿ nī chí cuuvi cuēē naachi cuáfⁿ mar 'áámá yuūdū tíⁿ nī. Ní nguée cuuvi diⁿ nī chí cuuvi cuáfⁿ naachi cuēē mar 'áámá yuūdū tíⁿ nī. ³⁷Naati ndís'tii caaⁿmáⁿ nī, “'tíicā”, nduuti chí 'tíicā; o nduuti chí nguée 'tíicā,

tuu'mi ní caaⁿmaⁿ nī, “ngueε 'tíicā”, caati nduuti chi caaⁿmaⁿ nī nduudu, “por Ndyuūs” o cááv táámá yeⁿe chuū, tuu'mí ní nduudu miⁿ ní nguée n'daācā chi caaⁿmaⁿ nī.

**Dinéⁿe nī 'iiⁿyāⁿ chi nguée ngí
n'diichí yā ndís'tiī**

(Lc. 6.29-30)

³⁸Jesús caⁿa yā: Ndís'tiī ní ch'iindiveéⁿ nī chí caⁿa 'iiⁿyāⁿ tiempo chi chó'oo yeⁿe ley chi 'tíicā: Nduuti chi 'áámá 'iiⁿyāⁿ tun'dáa yā nduutinaaⁿ taama 'iiⁿyāⁿ, 'tiicá ntúūⁿ 'iiⁿyāⁿ miⁿ ní cuuví tun'daá yā nduutinaaⁿ 'iiⁿyāⁿ chí diiⁿ nduucú yā 'tíicā. Ní 'áámá 'iiⁿyāⁿ chí tun'dáa yā 'diiⁿyuⁿ táámá 'iiⁿyāⁿ, 'tiicá ntúūⁿ cuuví tun'daá yā 'diiⁿyuⁿ 'iiⁿyāⁿ chí diiⁿ nduucú yā 'tíicā. ³⁹Naati 'úú ní ngaⁿá ngí ndís'tiī: Nguée 'cuuⁿmaⁿ nī ndúúcú 'iiⁿyāⁿ chi yaādii'yá yā. 'Āā du'ú nūⁿ 'iiⁿyāⁿ chí 'cueⁿé yā tiicūnáaⁿ nī ti duuchineéⁿ yā yeⁿe nī 'cuuⁿ nī chí díⁿ yā taama vmnéⁿēe nduuti chi neⁿe yā. ⁴⁰Ní nduuti chi 'aama 'iiⁿyāⁿ chí in'nuúⁿ yā vaadi 'caa'va ndúúcu nī, ní neⁿe yā diví yā tiinuuⁿ yúudūu yeⁿe nī, ca'a ntúūⁿ nī cotón yeⁿe nī. ⁴¹Ní nduuti chi 'aama 'iiⁿyāⁿ chí cuuví yā ndís'tiī chi a fuerza canée chí cándεε nī chéédí yeⁿe yā tan'dúúcā 'uūvi kilómetros 'tíicā yaⁿai ca candée nī yeⁿe yā ndii cuūuⁿ kilómetros. ⁴²Taachí caaca 'iiⁿyāⁿ ndís'tiī 'āā dε'ē nūⁿ cosa ca'a nī 'iiⁿyāⁿ cosa miⁿ. Nguée nguεcundí nī cuadámí nī yeⁿé yā.

Dinéⁿe nī 'iiⁿyāⁿ chí taaⁿ ndúúcu nī

(Lc. 6.27-28, 32-36)

⁴³Ndís'tiī ní ch'iindiveéⁿ nī chi caⁿa 'iiⁿyāⁿ tiempo chi 'āā chó'oo:

Dinéⁿe di 'iiⁿyāⁿ na niiⁿnuúⁿ vaacu dí. Nguée dinéⁿe di 'iiⁿyāⁿ chí taáⁿ yā ndúúcu di. ⁴⁴Naati 'úú ní ngaⁿá ngí ndís'tiī: Dinéⁿe nī 'iiⁿyāⁿ chí taaⁿ yā ndúúcu nī. N'dáacā caaⁿmaⁿ nī yeⁿe 'iiⁿyāⁿ chí nguée n'daācā ngaⁿa yā yeⁿe nī. N'daācā díⁿ nī ndúúcú 'iiⁿyāⁿ chí nguée neⁿe yā ndís'tiī. Caaⁿmaⁿnguaⁿá nī yeⁿe 'iiⁿyāⁿ chí 'cueⁿe ndís'tiī ní nguée n'daācā idiíⁿ yā ndúúcu nī ní idiíⁿ yā chí ndís'tiī n'geenú nī ngii. ⁴⁵Ní ndís'tiī ní 'cuuⁿmiⁿ nī 'iiⁿyāⁿ s'eeⁿ chí ndís'tiī ní daiya Dendyuūs ndís'tiī. Chiida yú chí cánée na va'ai cheeti nguuví idiíⁿ yā chí ican'daa 'yáⁿā naachi snée 'iiⁿyāⁿ chí n'dai ndúúcú 'iiⁿyāⁿ chí nguée n'daācā díⁿ yā. Ní Ndyuūs idiíⁿ yā chí ngeeⁿ cuūvi yeⁿé 'iiⁿyāⁿ chí n'daācā idiíⁿ yā ndúúcú 'iiⁿyāⁿ chí nguée n'daācā idiíⁿ yā. ⁴⁶Ndúúti chí ndís'tiī dinéⁿe nī 'iiⁿyāⁿ chí neⁿe yā ndís'tiī, 'dε'ē premio chí ndaacá nī? 'Āā nguée 'tiicá ntúūⁿ idiíⁿ 'iiⁿyāⁿ chí cobrador yā? ⁴⁷Nduuti chí ndís'tiī díⁿ nī saludar dámaaⁿ hermanos yeⁿe nī, 'dε'ē premio chí ndaacá nī? 'Āā nguée 'tiicá ntúūⁿ idiíⁿ 'iiⁿyāⁿ chí nguée yeⁿé ndaata Israel chí nguée i'téenu yā Ndyuūs? ⁴⁸N'daācā n'dai ca díⁿ ndís'tiī chí díⁿ nī tan'dúúcā chí diiⁿ Dendyuūs, Chiida yú, chí canée na va'ai cheeti nguuví.

**Jesús ngaⁿa yā yeⁿe chí
nginne yú 'iiⁿyāⁿ**

6 Ndís'tiī nguée díⁿ nī denduū chí n'daācā yeⁿe yaācū nanááⁿ 'iiⁿyāⁿ caati snaaⁿ yā chí diiⁿ nī chí nadacadiinúúⁿ yā chí ndís'tiī ní n'daācā nī. Nduuti chí 'túúcā idiíⁿ nī, tuu'mi ní Ndyuūs Chiida yú nguée

tée yā chi cuuvi yeⁿe nī yeⁿē chi díⁿ nī taachi ndaa nī ná va'ai cheeti nguuví. ²Taachi ndís'tiī ca'a nī ofrenda yeⁿe nī, nguée díⁿ yuudú nī níicú nguée cuuvi cadíinuⁿ 'iⁿyāⁿ. 'Tíicā idiⁿ náⁿā 'iⁿyāⁿ chi 'uūví naaⁿ 'uūví cheendí yā taachi snée yā na yaācū sinagoga ndúúcū na cuaaⁿ cyúúní. Ní 'íicú 'iⁿyāⁿ ní cuuvi snaaⁿ yā ní caaⁿmaⁿ yā chi 'iⁿyāⁿ s'eeⁿ ní nn'dai yā. Cuaacu nííⁿnyúⁿ 'úú ngaⁿá ngii ndís'tiī, chi 'iⁿyāⁿ s'eeⁿ ní vee chi 'āā ndaāca yā yeⁿe chi díⁿ yā na iⁿ'yeeⁿdí 'cūū. ³Taachi ndís'tiī ní ca'á nī cosas chi inneé nī 'iⁿyāⁿ chi nguée yeⁿe yā, nguē ca'a nī chi tuumícadíinuⁿ ta'á 'cueé nī chi díⁿ tá'á cuaacú nī. ⁴'Tíicā ca'a n'de'éeí nī cosas miiⁿ yeⁿe nī ní 'iⁿyāⁿ nguē cuuvi snaaⁿ yā; 'íicú Chiida yú chi cánée ná va'ai cheeti nguuví inaaⁿ yā chi nguée n'diichi 'iⁿyāⁿ s'eeⁿ. Ní Chiida yú tée yā chi cuuvi yeⁿe nī nanááⁿ 'iⁿyāⁿ.

**Jesús ngi'cueeⁿ yā yeⁿē chí
ngaⁿānguá'āa**

(Lc. 11.2-4)

⁵Taachi ndís'tiī caaⁿmaⁿngua'á nī, nguée díⁿ nī tan'dúúcā 'iⁿyāⁿ chí 'uūví naaⁿ 'uūví cheendí yā, caati 'iⁿyāⁿ s'eeⁿ inee yíinú yā chi n'gētíndiī yā na yaācū sinagogas ndúúcū cuaaⁿ cyúúní ní 'íicú 'iⁿyāⁿ ní snaaⁿ yā 'iⁿyāⁿ s'eeⁿ. Cuaacu nííⁿnyúⁿ ngaⁿá ngii ndís'tiī, chi 'iⁿyāⁿ s'eeⁿ ní 'āā véé chí cuuvi yeⁿē yā na iⁿ'yeeⁿdí 'cūū. ⁶Ndís'tiī, taachi caaⁿmaⁿngua'á nī, cundáa nī na cuarto 'lííⁿ yeⁿe va'ai yeⁿe nī ní n'gaadí nī cheendi va'āi cuarto 'lííⁿ miiⁿ. Ní caaⁿmaⁿngua'á nī ndúúcū

Chiida yú chí inaaⁿ n'de'ei yā. Ní Chiida yú ntée yā chi cuuvi yeⁿe nī nanááⁿ 'iⁿyāⁿ.

⁷Ní taachi caaⁿmaⁿngua'á nī, nguée dachííⁿ dachííⁿ caaⁿmaⁿ nī tan'dúúcā chi díⁿ náⁿā 'iⁿyāⁿ chi 'uūví naaⁿ 'uūví cheendí yā chi nguée i'téenu yā Ndyuūs ní nguē yeⁿe ndaata Israel yā. Ní 'iⁿyāⁿ s'eeⁿ nadicadíinuⁿ yā chi Ndyuūs caⁿá yā 'caandiveéⁿ yā nduudu yeⁿē yā ti neené n'deēē nduudu ngaⁿa yā. ⁸Nguée díⁿ nī tan'dúúcā chi idiⁿ 'iⁿyāⁿ s'eeⁿ ti Chiida yú 'āā déenu yā dendu'ū chi neⁿe nī taachi 'āā cuée caaca nī. ⁹Ní taachi ndís'tiī caaⁿmāⁿngua'á nī, 'túúcā caaⁿmaⁿngua'á nī:

N'diī Chiidá nducyaaca 'nū, n'diī chi caneé nī ná va'ai cheeti nguuví. De'e chúúcā dēeve chi nguúví nī.

¹⁰Canée chi ndaa tiempo naachi chí ngaⁿa ntiiⁿnyuⁿ nī. Cúúví tan'dúúcā chi n'diī neⁿe nī tan'dúúcā ná va'ai cheeti nguuví 'tiicá ntúúⁿ na yáⁿāa 'cúú.

¹¹Tée nī chi cuuví che'ē 'nū nguuví 'cūū.

¹²Nadich'ēcú nī nuuⁿndi yeⁿe 'nū tan'dúúcā chí nús'uu inadich'ēcú 'nū yeⁿe 'iⁿyāⁿ chi nguē n'daācā díⁿ yā nduucú 'nū.

¹³Nguée 'cuáaⁿ nī chi ndaā nanaáⁿ 'nū cosas chi cheechi ca chi díⁿ chi díⁿ 'nū nuuⁿndi naati nadanguáⁿai nī nús'uu yeⁿē nducuéⁿē chi nguē n'daācā. Ti yeⁿē nī naachi ngaⁿa ntiiⁿnyúⁿ nī ndúúcū poder ndúúcū dēeve chi n'dái taavi

ca yeⁿe nī ndúúcū nducuéⁿē
nduuyū cueⁿe daāⁿmaⁿ. 'Tíicā
cuuvi.

¹⁴Nduuti chi ndís'tiī nadich'εεcú
nī yeⁿe 'iiⁿyāⁿ chi nguéeⁿ n'daācā
idiīⁿ yā nducú nī, tuu'mi ní Chiida
yú chi cánée yā ná va'ai cheeti
nguuvi nadich'εεcú ntúuⁿ yā yeⁿe
nī. ¹⁵Ndúúti chi ndís'tiī nguéeⁿ
nadich'εεcú nī yeⁿe 'iiⁿyāⁿ chi nguéeⁿ
n'daācā idiīⁿ yā ndúúcu nī, 'tiicā
ntúuⁿ Chiida yú nguéeⁿ nadich'εεcú
yā nuuⁿndi yeⁿe nī.

**Jesús ngaⁿa yā yeⁿe chi 'iiⁿyāⁿ
nguéeⁿ ca'diīnū yā tiempo
chī ngaⁿanguaⁿá yā**

¹⁶Taachi nguéeⁿ nga'diīⁿnúⁿ nī
caati ngaⁿanguaⁿá nī nguéeⁿ nduuví
ndaachií naāⁿ nī tan'dúúca 'iiⁿyāⁿ
chi 'uūví naaⁿ 'uūví cheendí yā chí
neⁿé yā chi tanáⁿā 'iiⁿyāⁿ snaaⁿ yā.
'Iiⁿyāⁿ s'eeⁿ idiví yā catecai vmnááⁿ
yā ní 'cuuⁿmíⁿ yā tanáⁿā 'iiⁿyāⁿ
chi nguéeⁿ nga'diīⁿnúⁿ yā. Cuaacu
nífⁿnyúⁿ ngaⁿá ngí ndís'tiī, chi
'iiⁿyāⁿ s'eeⁿ ní 'āā véé chi ndaācā
yeⁿe yā na iⁿ'yeeⁿdí 'cūū. ¹⁷Naati
ndís'tiī, ní taachi nguéeⁿ nga'diīⁿnúⁿ
nī, 'cuīīnī aceite tííⁿ nī ní nááⁿnú
nī naaⁿ nī. ¹⁸Ní nguéeⁿ 'cuuⁿmíⁿ
nī nanááⁿ 'iiⁿyāⁿ chi nguéeⁿ ngeⁿé
nī naati Chiida yú chí cánuuⁿ yā
nán'de'ei snaáⁿ yā. Ní Chiida yú
chí snaáⁿ yā chííⁿ chí diīⁿ nī taachi
cánúúⁿ nī nán'de'ei ní téé yā nanááⁿ
'iiⁿyāⁿ de'ē chi cuuví yeⁿe nī.

**Vée vaadi 'cuiica ná va'ai cheeti
nguuvi
(Lc. 12.33-34)**

¹⁹Caⁿa Jesús: Ndís'tiī ní nguéeⁿ
dííⁿ nī chí cuuvi 'cuiica nī ná

iⁿ'yeeⁿdí 'cūū naachi véé i'yéevē
chí dí'tuuví tí ndúúcū che'e
yáⁿāa chí tuuví ní naachi véé
chí duucu ní diduucú sa. ²⁰Naati
n'dáacā chí dííⁿ nī chí 'cuūndí
yeⁿe nī ná va'ai cheeti nguuvi
naachi nguéeⁿ véé i'yéevē chí
dí'tuuví tí ndíí nguéeⁿ ndúú che'e
yáⁿāa chí tuuví, ndíí nguéeⁿ
ndúú cuuvi cundaā chí duucu ní
diduucú sa. ²¹Caati naachí cánée
vaadi 'cuiica yeⁿe nī, miiⁿ canee
staava yeⁿe nī chí nadicadiīnūúⁿ
nī yeⁿe tanducuéⁿē.

**Chídeevē yeⁿe cuerpo yeⁿe yú ní
nduutinaaⁿ yú
(Lc. 11.34-36)**

²²Caⁿa Jesús chí chídeevē
yeⁿe cuerpo yeⁿe yú chííⁿ chí
nduutinaaⁿ yú. Ndúúti chí
nduutinaaⁿ nī n'daācā, tuu'mi
ní núúⁿmáⁿ ncheete cuerpo
yeⁿe nī ní inaaⁿ chí deevē. ²³Ní
nduuti chí nduutinaaⁿ nī nguéeⁿ
n'dai, tuu'mi ní núúⁿmáⁿ ncheete
cuerpo yeⁿe nī cunée na maāiⁿ.
'Tíicā nduuti chí deevē chí cánee
nduucú nī nguéeⁿ n'daācā, tuu'mi
ní cánée nī na maāiⁿ chí díítūu
n'dái.

**Jesús ngaⁿa yā yeⁿe chí 'cuiica 'iiⁿyāⁿ
(Lc. 16.13)**

²⁴Mar 'áamá 'iiⁿyāⁿ nguéeⁿ cuuvi
dichíí'vē yā 'uūví 'iivi yā caati
dinéⁿe yā 'aama yā ní nguēe
dinéⁿe yā taama yā. Ní n'dáacā
nadicádíínuuⁿ yā yeⁿe 'aama yā
ní nguéeⁿ n'daācā nadicádíínuuⁿ yā
yeⁿe taama yā. Nguéeⁿ cuuvi in'nuúⁿ
nī vaadi 'cuiica yeⁿe nī ní dichíí'vē
nī 'iivú Ndyuūs.

**Ndyuūs idííⁿ yā cuidado yeⁿe 'iiⁿyāⁿ
yeⁿe yā**

(Lc. 12.22-31)

²⁵Chuū ngaⁿá ngíi ndís'tií: Nguéé nadicadíínuuⁿ nī yeⁿe vida yeⁿe maaⁿ nī, o yeⁿe chí che'é nī, o yeⁿe chí cu'u nī, ndíí nguéé ndúú cáávā chí neⁿe cuerpo yeⁿe nī chí 'cuēetinúu nī. ¿Áá nguéé yaⁿai ca vida yeⁿe nī nguéé ti chí ngé'e nī? ¿Áá nguē yaⁿai ca chí'vē cuerpo yeⁿe nī nguéé ti catecai nī? ²⁶Cuin'diichí nī 'yaada yeⁿe nanguuvi. Nguéé ngiinú tī ndaata, ndíí nguéé ngii cosecha yeⁿe tī, ndíí nguéé ndúú ín'guain'daí tī yeⁿe tī. Chiida yú chí cánée ná va'ai cheeti nguuví ng'a yā chí nge'e tī. ¿Áá nguéé yaⁿai cá chí'vē ndís'tií nguéé ti 'yaada? ²⁷¿Cheé ndís'tií chí néené n'dai tííⁿ nī cúúví iintíineeⁿ nī áámá yuūchí yeⁿe chí yaācu nī?

²⁸¿De'ē cáávā chí ínadicadíínuuⁿ nī yeⁿe catecai nī? Nadacadíínuuⁿ nī yeⁿe naāndā cuēē yeⁿe cuēeti táácā chí n'giita. Nguéé dííⁿ ntiiⁿnyuⁿ ndíí nguéé ndúú idin'daí hilo. ²⁹Naati 'úú ní ngaⁿá ngíi ndís'tií, chí rey Salomón miíⁿ ní ndúúcu tanducuéⁿē catecaí yā chí n'déévé n'dai ndii tuunu ngii 'yáⁿā naati nguéé neené n'dēevéé tan'dúúcā yeⁿe naāndā s'eeⁿ. ³⁰Ndúútí chí Ndyuūs idííⁿ yā cuidado yeⁿe yáatā chí vee cuēeti chí maāⁿ ní canee ní cavyaaⁿ ní ntíⁿ ní n'nee yaⁿā 'iiⁿyāⁿ. ¿Áá nguéé dííⁿ cá Ndyuūs cuidado yeⁿe ndís'tií, 'iiⁿyāⁿ chí duū'vii 't'éenu nī Ndyuūs? ³¹Nguéé nadicadíínuuⁿ ndís'tií, ní caaⁿmaⁿ nī 'tíicā: ¿De'ē che'é nū? o ¿de'ē cu'ú nū? o ¿de'ē 'cuēetinúu

'nū? ³²'Iiⁿyāⁿ chí nguéé yeⁿe ndaata Israel in'nuúⁿ yā dendu'ū chí 'túúcā. Chiida yú chí cánée yā ná va'āi cheeti nguuví déénu yā tanducuéⁿē dendu'ū chí necesidades neⁿe yú.

³³Naati ndís'tií ní canee chí in'nuúⁿ nī vmnááⁿ vmnaaⁿ yeⁿe náachi Ndyuūs ngaⁿa ntiiⁿnyúⁿ yā ndúúcu vaadí cuaacu yeⁿe Ndyuūs, ní 'íicú tanducuéⁿē dendu'ú 'cūú ní ntiineeⁿ yā yeⁿe nī. ³⁴Nguéé nadicadíínuuⁿ nī yeⁿe cavyaaⁿ caati cavyaaⁿ ní táámá nguuví ndúúcu yeⁿe, ní 'íicú nguuví ní 'āā véé nūuⁿ chí véé. Dámaāⁿ nadacadíínuuⁿ nī yeⁿe maaⁿnguuví, 'āā 'tiicá nūuⁿ.

**'Túúcā ngaⁿa Jesús: Nguéé tun'daá nī
nuuⁿndi yeⁿe táámá 'iiⁿyāⁿ**

(Lc. 6.37-38, 41-42)

7 Jesús caⁿa yā: Ndís'tií ní nguéé caaⁿmaⁿ néeⁿ nī yeⁿe táámá 'iiⁿyāⁿ maaⁿ ní 'íicú Ndyuūs nguéé caaⁿmáⁿ yā nuuⁿndi yeⁿe nī. ²Caati ndúúti chí ndís'tií caaⁿmaⁿ nī nuuⁿndi yeⁿe 'iiⁿyāⁿ, 'tiicá ntúūⁿ Ndyuūs caaⁿmáⁿ yā nuuⁿndi yeⁿe nī. Nduuti chí n'deeé n'daí caaⁿmáⁿ nī, 'tiicá ntúūⁿ caaⁿmáⁿ Dendyuūs yeⁿe nī. Nduuti chí duu'ví nūuⁿ, 'tiicá ntúūⁿ Ndyuūs caaⁿmáⁿ yā yeⁿe nī. ³¿De'ē cúúví chí maaⁿ nch'eteté nūuⁿ n'gíínu nī nuuⁿndi chí dííⁿ tanáⁿā 'iiⁿyāⁿ ní nguéé inaaⁿ nī nuuⁿndi ch'ēete chí dííⁿ nī? ⁴¿De'ē cúúví chí caaⁿmáⁿ nī 'iiⁿyāⁿ yeⁿe chí dííⁿ yā chí nguē n'daācā nduuti chí ndís'tií dííⁿ nī cosas chí nguéé n'daācā? 'Caandivééⁿ nī. Véé nuuⁿndi yeⁿe nī chí ch'ēete chí nguéé ndaacadaamí nī yeⁿe. ⁵Ndís'tií 'iiⁿyāⁿ 'uūví naaⁿ 'uuví cheendi nī. Dííⁿ cá maáⁿ nī

ndaacadaamí nī yeⁿe nuuⁿndi chí dííⁿ nī ní 'íicú cuuvi caaⁿmaⁿ nī yeⁿe 'iiⁿ'yāⁿ chí canéé chí din'daācā yā ní ndaacadaamí yā yeⁿe nuuⁿndi chí dííⁿ yā.

⁶Nguéé ca'a nī dendu'ū chí yeⁿe Ndyuūs 'yaānā s'eeⁿ ti 'yaānā s'eeⁿ cuuvi contra yeⁿe nī. Ní caⁿ'á tī che'e tī ndís'tiī chí pedazos cánéé nī. Nguéé 'cuíi nī cosas yeⁿe nī chí dichíí'vē tan'dúúccā perlas nanááⁿ puercos ti cuuvi nanguεεcúndii tī ní ca'a ta'á tī ní ndís'tiī canéé nī maaⁿ ca'a tī.

Caacá nī, in'nuúⁿ nī, ní yaa'ví nī cheendi va'ai

(Lc. 11.9-13; 6.31)

⁷Caⁿ'a Jesús: Caacá nī Ndyuūs, ní Ndyuūs téé yā yeⁿe nī. In'nuúⁿ nī ní ndaāca nī. Yaa'ví nī cheendi va'āi ní nan'guaaⁿ yeⁿ'é nī. ⁸Caati nducyaaca 'iiⁿ'yāⁿ chí ngiica Ndyuūs ní Ndyuūs ca'a yā yeⁿe yā. Ní nducyááccā 'iiⁿ'yāⁿ chí in'nuuⁿ yā, ní inndaaca yā. Ní nducyááccā 'iiⁿ'yāⁿ chí yaa'vi yā cheendi va'āi, ní nan'guaaⁿ yeⁿ'é yā.

⁹¿Chéé yeⁿe ndís'tiī taachi caaca daiya nī 'aama pan, ca'a nī 'áámá tuūu? ¹⁰O nduuti chí caaca daiyá nī 'áámá 'yaācā, ¿áá ca'á nī 'áámá cúu? ¹¹Nduuti chí ndís'tiī chí cúⁿncheeⁿ nī deenú nī ca'a nī cosa chí n'daācā daiya nī, ndii 'tεε cá Chiida yú chí canéé yā na va'ai chεeti nguuví ca'á yā cosas chí n'dááccā n'dai cá 'iiⁿ'yāⁿ chí caaca yā Ndyuūs.

¹²Tíicā chí tanducuéⁿē chí neⁿ'é nī chí dííⁿ 'iiⁿ'yāⁿ ndúúcu nī, chuū ntúūⁿ dííⁿ nī ndúúcu 'iiⁿ'yāⁿ. Chuū chí ley yeⁿe Moisés ndúúcu chí canéé nguūⁿ yeⁿe profetas s'uuⁿ ndíí cuááⁿ vmnaaⁿ.

Cheendi va'āi chí 'tuūcuú

(Lc. 13.24)

¹³Caⁿ'a Jesús: Cundáa nī chééndí va'āi chí 'tuucúú, tí cheendi va'ai ch'εēⁿū ndúúcu yúúní ch'εēⁿū, chíiⁿ chí candéé 'iiⁿ'yāⁿ chí caⁿ'a yā na infierno. Néené 'yaaⁿ 'iiⁿ'yāⁿ chí ndaa yā chééndí va'ai chí ch'εēⁿū miiⁿ. ¹⁴Naati chééndí va'āi 'tuucúú miiⁿ ní yúúní cuééⁿ miiⁿ chí candéé 'iiⁿ'yāⁿ chí caⁿ'a yā na vida cueⁿe daāⁿmaⁿ. Ní duu'ví 'iiⁿ'yāⁿ chí ndaāca yā chééndí va'āi miiⁿ.

Yá'a ní cucáávā n'gui'i yeⁿ'ē tuumicádíínuuⁿ nī

(Lc. 6.43-44)

¹⁵Caⁿ'a Jesús: Dííⁿ nī cuidado ndís'tiī yeⁿ'e 'iiⁿ'yāⁿ profetas chí falsos yā chí ngaⁿ'a yā chí ndεε yā nduudu cuaacu yeⁿ'é Ndyuūs naati nguεε 'tíicā. Taachi nndaa yā nanááⁿ ndís'tiī cuaaⁿ dáámí 'iiⁿ'yāⁿ miiⁿ tan'dúúccā catecai 'iiti cuūchī naati cuááⁿ chεēti yā tan'dúúccā 'yáá'yāⁿ ngaātāá chí taaⁿ tī. ¹⁶Ní yeⁿ'e chí dííⁿ yā tuumicádíínuuⁿ nī yeⁿ'e yā. ¿Áá cuta'a 'iiⁿ'yāⁿ uvas yeⁿ'e yááⁿ? o ¿áá cuta'a 'iiⁿ'yāⁿ n'guiidii yaaⁿ nguuví yeⁿ'e yááⁿ? Nguεε 'tíicā. ¹⁷Tíicā, nducyaaca yá'a chí n'dái, n'daācā ngíí n'gui'i n'dáacā yeⁿ'ē, naati yá'a chí nguéé n'daācā ní nguéé n'dai n'gui'i yeⁿ'ē. ¹⁸Áámá yá'a chí n'dáacā nguéé 'cuūndi n'gui'i chí nguéé n'daācā, ndíí nguéé ndúú yeⁿ'e chí nguéé n'daācā 'cuūndi n'gui'i chí n'daācā yeⁿ'ē. ¹⁹Nducyaaca yá'a chí nguéé n'daācā ngíí n'gui'i yeⁿ'ē, 'iiⁿ'yāⁿ ní 'cáaca yā ní 'cuíi yā na yaⁿ'ā. ²⁰Tiicā ntúūⁿ ndís'tiī tuumicádíínuuⁿ nī

yeⁿe 'iiⁿ'yāⁿ cáāvā cosas chi dííⁿ yā
yeⁿe chi n'daacā o yeⁿe chi nguée
n'daācā.

**Nguée cuuví cundaa nducyaaca
'iiⁿ'yāⁿ na va'ai cheeti nguvi**

(Lc. 13.25-27)

²¹ Jesús ngaⁿa yā 'tíicā: Nguée
nducyaaca 'iiⁿ'yāⁿ chi ngaⁿá yā
yeⁿe 'úú: N'díí Señor, Señor, ní
cuuví cundaa yā naachí Ndyuūs
ngaⁿa ntiiⁿ'nyuⁿ yā, dámaaⁿ 'iiⁿ'yāⁿ
chi dííⁿ yā tan'dúúicā chi neⁿe
Chiidá chi canee yā na va'ai cheeti
nguvi. ²²Nééné 'yaaⁿ 'iiⁿ'yāⁿ
caaⁿ'maⁿ yā cuuvi yā 'úú nguuví
yeⁿe juicio N'díí Señor, Señor, 'áá
nguée caⁿ'a nū nduudu cuaacu
ndúúcū chi duuchí nī ní tun'dáa nū
yááⁿ'nguiniūⁿ yeⁿe 'iiⁿ'yāⁿ ndúúcū
chi duuchí nī? Ní nééné n'deēe
vaadi n'gínú idííⁿ nū ndúúcū chi
duuchí nī. ²³Tuu'mi ní 'úú Cristo
caaⁿ'máⁿ cuaacú cuuví 'iiⁿ'yāⁿ s'eeⁿ:
'Úú nguée n'diichí tandíí ndís'tii.
Cuví nī yeⁿe 'úú, ndís'tii chi nguée
n'daācā dííⁿ nī.

**Yeⁿe ndúú 'uúví cimientu yeⁿe va'ai
s'eeⁿ**

(Lc. 6.47-49; Mr. 1.22)

²⁴Ní caⁿ'a ntúūⁿ Jesús: 'Āā du'ú
nūⁿ 'iiⁿ'yāⁿ chi n'giindiveéⁿ yā
ndúúúú 'cūū yeⁿe níicú idííⁿ yā
chēe chi 'úú ngaⁿá, 'iiⁿ'yāⁿ miiⁿ ní
tan'dúúicā 'áámá saⁿā chí n'dēēvee
nadicádíínuuⁿ sa. Saⁿā miiⁿ din'dái
sa vaacu sá na 'áámá yáává. ²⁵Níicú
chééⁿ cúúví naⁿā ní ch'iita yíicú.
Ní chéenū 'yúúné taaⁿ contra
yeⁿe va'āi miiⁿ ní nguée chindeeve
caatí n'daacā chééndii na yáává
miiⁿ. ²⁶Āā du'ú nūⁿ 'iiⁿ'yāⁿ chi

n'giindiveéⁿ yā nduudú 'cūū yeⁿe ní
nguée idííⁿ yā tan'dúúicā chi ngaⁿá,
'iiⁿ'yāⁿ miiⁿ ní tan'dúúicā 'aama saⁿā
chi nguée n'daācā inadícádíínuuⁿ
sa. Saⁿā miiⁿ ní din'dái sa vaacu sa
na yáⁿā ndúútii. ²⁷Ní cheeⁿ cuuví
naⁿā ní ch'iita yíicú miiⁿ. Ní chéenū
'yúúné taaⁿ contra yeⁿe va'āi miiⁿ ní
va'āi chideeve ní ntuūvii.

²⁸Taachí Jesús miiⁿ ch'iinu caⁿ'a
yā ndúúúú 'cūū, 'iiⁿ'yāⁿ miiⁿ cheⁿe
yiinú yā yeⁿe chííⁿ chí ngi'cueeⁿ
Jesús. ²⁹Caati Jesús miiⁿ ngi'cueeⁿ
yā 'iiⁿ'yāⁿ s'eeⁿ tan'dúúicā 'áámá
'iiⁿ'yāⁿ chí déenu o 'áámá 'iiⁿ'yāⁿ chí
ngaⁿ'a ntiiⁿ'nyúⁿ yā nguée tan'dúúicā
'áámá maestro chi ngi'cueeⁿ ley
yeⁿe yā.

**Jesús idííⁿ yā chi nduūvā yeⁿe 'áámá
saⁿā yeⁿe ca'āi chi nguvi lepra chí
ín'duuti yuūtē yeⁿe sa**

(Mr. 1.40-45; Lc. 5.12-16)

8 Taachí Jesús cuch'eeⁿ yā na
'áámá yīicū, nééné 'yaaⁿ 'iiⁿ'yāⁿ
cueⁿe yā ndúúúú yā. ²N'diichí
nī. Nanááⁿ Jesús ndaā 'áámá saⁿā
chi ndíí sa 'áámá ca'ai chi nguvi
lepra chí índuuti yuūtē yeⁿe sa. Ní
chíntii'ya sa nanáaⁿ yā ní s'teenu
sá ní caⁿ'a sa chíi sa 'iiⁿ'yāⁿ: N'díí
Señor, nduuti chi neⁿe nī, ní dííⁿ nī
chi nduūvā yeⁿe.

³Jesús ní n'doó yā ta'á yā ní tuu'ví
yā saⁿā miiⁿ ní caⁿ'a yā chíi yā saⁿā:
'Úú neⁿe. Nduūvā yeⁿe di. Tuu'mí
nūⁿ ndúúvā n'daācā yeⁿe sa ní
nduūvī deeve sa. ⁴Tuu'mi ní Jesús
ní caⁿ'a yā chíi yā saⁿā miiⁿ: Cuéⁿe
di ní 'cuuⁿ'míⁿ dí cuerpo yeⁿe di
nanááⁿ chiiduú ní ca'a di ofrenda
nanááⁿ Ndyuūs tan'dúúicā chí ngaⁿ'a
na ley chi dinguuⁿ Moisés. 'Tíicā ní

chiiduú caaⁿmaⁿ cuaacú yā yeⁿē di nanááⁿ nducyaaca 'iiⁿyāⁿ, ní nguéé 'cuuⁿmiⁿ di yeⁿē chí chií ndúúcu di mar 'áámá 'iiⁿyāⁿ.

Jesús díiⁿ yā chi nduūvā yeⁿe 'aama mozo yeⁿe capitán romano

(Lc. 7.1-10)

⁵Taachí Jesús cáámá ndaa yā na yāāⁿ Capernaum, ndaā 'áámá saⁿā capitán yeⁿe ndaata yeⁿe 'iiⁿyāⁿ romanos nguéé yeⁿe ndaata Israel. Ní ndaā sa nanááⁿ Jesús miiⁿ ní di'cuútu sa 'iiⁿyāⁿ. ⁶Ní caⁿa sa chií sa Jesús: N'díi Señor, mozo yeⁿē candiítí sá na cama ndúúcu ca'āi chi in'dúúvú cuerpo yeⁿē sa. Nééné ya'āi ngiitá sa.

⁷Jesús caⁿa yā chií yā saⁿā: 'Úú ní caⁿá ní díiⁿ chí saⁿā ní nduūvā yeⁿē sa.

⁸Saⁿā capitán nan'guεεcútaⁿa sa ní caⁿa sa chií sa Jesús miiⁿ: N'díi Señor, 'úú nguéé neené n'dai 'úú chí cundaa ní chéétí va'āi yeⁿē. Dámaāⁿ chí caaⁿmaⁿ núuⁿ ní saⁿā mozo yeⁿē ndúúvā yeⁿē sa. ⁹'Úú ní saⁿā chí véé saⁿā ndíi tíiⁿ yeⁿē, ní ngaⁿā ntiiⁿnyúⁿ yā yeⁿē 'úú. 'Úú ntúūⁿ ní ngaⁿá ntiiⁿnyúⁿ yeⁿē cien soldados chi maaⁿ poder yeⁿē. 'Úú ní ngaⁿá ngií 'aama sa: Cúnaⁿā di, ní inaⁿā sa. Ní ngaⁿá ngií taama sa: Cuchí di, ní chií sa. Ní ngaⁿá ngií mozo chi diiⁿ mandado yeⁿē: Diiⁿ di ntiiⁿnyúⁿ 'cūū, ní diiⁿ sa.

¹⁰Taachi Jesús ch'iindiveéⁿ yā chuū cheⁿé yiinú yā. Ní caⁿa yā chií yā 'iiⁿyāⁿ chi ndúúcu yā: Cuaacu níⁿnyúⁿ ngaⁿá ngií ndis'tii chí 'úú nguéé īndaacá 'iiⁿyāⁿ chi i'téenu n'dai yā mar 'áámá 'iiⁿyāⁿ yeⁿe ndaata Israel tan'dúúca

saⁿá 'cūū. ¹¹Ní ngaⁿá ngií ndis'tii, chí neené 'yaaⁿ yā chí caaca yā cuaaⁿ ná ícan'daa 'yáⁿā ndúúcu cuaaⁿ na ngiia 'yáⁿā ní 'cuēetē yā ná va'ai cheeti nguuví ndúúcu Abraham, ndúúcu Isaac, ndúúcu Jacob. ¹²Naati n'deee n'dái daiyá 'iiⁿyāⁿ yeⁿe ndaata Israel chí canéé chí 'cuēetinēe yā naachí Ndyuūs ngaⁿa ntiiⁿnyuⁿ yā ná va'ai cheeti nguuví, Ndyuūs tun'dáa yā 'iiⁿyāⁿ s'eeⁿ chuva'āi naachí maāiⁿ. Míiⁿ ní cuεecu yā ní che'e 'diiⁿyuⁿ yā ti nguéé i'téenu yā Dendyuūs.

¹³Tuuⁿmi ní Jesús miiⁿ caⁿa yā chií yā capitán miiⁿ: Cunaⁿā di. Tan'dúúca chí i'téenu di chí 'úú idiíⁿ chí nduūvā yeⁿe mozo yeⁿē di, 'tíicā cuuví ndúúcu mozo yeⁿē di. Ní hora miiⁿ nūuⁿ nduūvā yeⁿe mozo yeⁿē sa.

Jesús díiⁿ yā chi nduūvā yeⁿe indáⁿā Pedro

(Mr. 1.29-31; Lc. 4.38-39)

¹⁴Guayiivi ní ndaā Jesús ná va'ai yeⁿē Pedro miiⁿ ní n'diichí yā chí indáⁿā Pedro miiⁿ candiiti yā na cama. Ndēē 'iiⁿnūⁿ taán táⁿā miiⁿ.

¹⁵Jesús tuuⁿví yā ta'ā tá ní 'iiⁿnūⁿ miiⁿ ní chivii. Tuuⁿmi ní tánⁿā miiⁿ ní nducueeⁿ tá ní diiⁿ ta mandado yeⁿē 'iiⁿyāⁿ s'eeⁿ ní ca'a ta chí che'e yā.

Jesús díiⁿ yā chi nanduūvā yeⁿē n'deee n'dái 'iiⁿyāⁿ

(Mr. 1.32-34; Lc. 4.40-41)

¹⁶Taachi chí 'da'a nguuví miiⁿ, tuuⁿmi ní 'iiⁿyāⁿ yeⁿe yāāⁿ miiⁿ ndaa yā chí ndēē yā 'yaaⁿ n'dái 'iiⁿyāⁿ nanááⁿ Jesús. Ndēē yā 'iiⁿyāⁿ chí snēe yā ndúúcu espíritus yeⁿe

yáá'n'guiinūu". Jesús ca"n'a yā 'áámá nduudu nūu" ní tun'dáa yā espíritus ye"e yáá'n'guiinuu" ye"e 'ii"yā". Ní díí" yā chí nduuva ye"ē nducyáácá 'ii"yā" s'ee" chí ngííta yā. ¹⁷Tííca ní cuuví cuaacu chí ca"n'a sa"ā profeta Isaías ndíí cuaa" vmnaa" taachí ca"n'a yā 'túúcā: 'Ii"yā" maá" yā sta'á yā ca'āi ye"e yú ní candéé yā vaadi ya'ai ye"e yú.

**'Ii"yā" āā ne"e yā ca"n'a yā ndúúcū
Jesús**

(Lc. 9.57-62)

¹⁸Taachi Jesús n'diichi yā nducyaaca 'ii"yā" cuaa" diitú yā ca"n'a yā chíi yā discípulos ye"e yā chí cho'ó yā táámá lado ye"e nuū"nī"yá"ā.

¹⁹Áámá sa"ā chí ngi'cuee" ley ndaā sa nanáá" Jesús ní ca"n'a sa chíi sa 'ii"yā": N'díí Maestro, ca"á ndúúcu nī 'āā tíí nūu" naachi cá"n'a nī.

²⁰Jesús ca"n'a yā chíi yā sa"ā mii": 'Yuunéé" ní véé yiivi yáává ye"e tī. 'Yáádá ye"ē nanguuvi véé 'dééce tī naati 'úú chí Sa"ā chí Daiya Dendyuūs nguéé va'ai chí vaacú naachi cundiití tíí".

²¹Táámá discípulo ye"é yā ca"n'a sá chíi sa Jesús: N'dii Señor, vmnáá" vmnaa" téé nī lugar 'úú ti ca"á 'cuūchí chiidá ní ca"n'a yú.

²²Jesús nga"n'a yā ngii yā sa"ā: Cuchí di ndúúcū 'úú. Cu'nee" dí 'ii"yā" chí nguéé i'téenu yā chí 'cuuchí yā tiná"ā chí chiida di. Tí 'ii"yā" s'ee" tan'dúúcā tiná"ā 'tííca yā.

**Jesús chí'nee" 'díí" yā olas ye"ē
nuū"nī"yá"ā nduūcū 'yúúné chí táá"**

(Mr. 4.35-41; Lc. 8.22-25)

²³Jesús sndaa yā na 'áámá barco ní discípulos ye"e yā cue"e yā

ndúúcu yā ní sndaa yā na barco mii". ²⁴Hora míf" nūu" ní ndaā 'áámá 'yúúné táá" chí olas ye"e nuū"nī"yá"ā mii" ní ch'ēete cá chí ndaā nuū"nī" cheeti barco mii". 'Téé 'téé nūu" nguéé cánduūu ná barco. Jesús mii" ní cyaadu yā. ²⁵Discípulos ye"é yā ndaa yā nanáá" Jesús ní nanduūchí yā 'ii"yā" mii" ní nga"n'a yā ngii yā Jesús: N'dii Señor, nadanguá"ai nī s'uūú" caati 'cuūvi yú. 'Āā 'cuēechi yú cuaa" maa" nuū"nī"yá"ā.

²⁶Jesús ca"n'a yā chíi yā discípulos ye"é yā: ¿De'ē cúuví chí 'va'á ní? Ndís'tií ní dúú'vii i'téenu nī. Tuu'mi ní Jesús nducuee" yā ní yaa'vi yā 'yúúné míf" ndúúcū nuū"nī"yá"ā chí cu'néé" 'dii". Ní hora míf" nūu" canee 'dii". ²⁷Discípulos ní che"e yiinú yā ní ca"n'a yā nguaa" vi'i: ¿Du'u sá"ā chí 'túúcā, ti ndii 'yúúné ndíí nuū"nī"yá"ā n'giindiveéé" ye"ē sa?

**Sa"ā s'ee" ye"e yá"ā Gadara chí
véé espíritus ye"e yáá"n'guiinūu"
ndúúcu sa**

(Mr. 5.1-20; Lc. 8.26-39)

²⁸Taachi Jesús ndúúcū discípulos ye"é yā cho'ó yā nuū"nī"yá"ā mii" ní ndaá yā nī"nuú" na yá"ā Gadara mii", snéé na 'uuvi sa"ā chí snéé sa ndúúcū espíritus ye"e yáá"n'guiinūu" ní nacan'dáa sa na yiive yáává chí nguaa" yáinyā". Ní nééné taa" sa chí mar 'áámá 'ii"yā" nguéé ngíí ngo'ó yā yúúní mii". Sa"ā s'ee" ní ndaa sa nanáá" Jesús. ²⁹Ní 'cai yiicu sa: N'dii Jesús Daiya Dendyuūs, ¿dé'ē canéé ye"é ní ndúúcū nús'uu? ¿Áá ndaá nī 'muu" chí di'vaachí nī ye"ē nús'uu taachi

'āā cuéé cúúnú ca'a tiempo taachi Dendyuūs ca'a yā castigo?

³⁰Ní naachi snéé saⁿā s'eeⁿ ní yaⁿai 'téé na 'áámá yīicū. Ní niiⁿnuúⁿ saⁿā s'eeⁿ snéé 'yaaⁿ n'dáí puercos, chi nge'é tī. ³¹Ní espíritus yeⁿe yááⁿ'guinūuⁿ miiⁿ ní di'cuíftu sa Jesús miiⁿ: N'dii Jesús, ndúúti chi tun'dáa nī nús'uu yeⁿe saⁿā s'uuⁿ, 'cuáaⁿ nī chi cundaa 'nū chēeti puercos miiⁿya. ³²Jesús miiⁿ caⁿa yā chii yā espíritus yeⁿe yááⁿ'guinūuⁿ: Cuéⁿe nī. Tuu'mi ní espíritus yeⁿe yááⁿ'guinūuⁿ cān'daa sa ní cueⁿe sa chēeti puercos. Cuin'diichí nī. Nducyaaca puercos chéenu tī na yīicū miiⁿ ní chingéé nuúⁿ tī nguááⁿ nuūⁿnīⁿ'yáⁿā ní ch'lí nuúⁿ tī nguááⁿ nuūⁿnīⁿ miiⁿ.

³³Iiⁿ'yāⁿ chi diiⁿ cuidado puercos miiⁿ cunaⁿ'á yā ngéenu yā na yāāⁿ miiⁿ ní caⁿa yā tanducuéⁿ'ē chí chii tan'dúucā chí chó'oo yeⁿe 'iiⁿ'yāⁿ chi snéé ndúúcū espíritus yeⁿe yááⁿ'guinūuⁿ. ³⁴Nducyaaca 'iiⁿ'yāⁿ yeⁿe yāāⁿ miiⁿ cheⁿe yā n'diichi yā Jesús. Taachí ndaa yā naachi canéé Jesús miiⁿ, 'iiⁿ'yāⁿ s'eeⁿ ní di'cuíftu yā Jesús miiⁿ chí cuéeví yā yeⁿ'ē yāāⁿ vaacú yā.

Jesús diiⁿ yā chi nduuvā yeⁿe 'áámá saⁿā ndúúcū ca'āi chi in'dúuví sá

(Mr. 2.1-12; Lc. 5.17-26)

9 Tuu'mi ní Jesús miiⁿ sndáa yā na barco, ní cueⁿ'é yā táamá lado yeⁿ'ē nuūⁿnīⁿ'yáⁿā ní cueⁿ'e yā ní ndaa yā yāāⁿ vaacú yā. ²Tuu'mi ní ndaa nanááⁿ Jesús 'iiⁿ'yāⁿ ní ndēe yā 'áámá saⁿā ndúúcū ca'āi chi in'dúuví cuerpo yeⁿe sa. Candúu sa na 'áámá yīive. Taachí Jesús miiⁿ tuumicadínuuⁿ yā chi saⁿā s'eeⁿ

i'téenu sa yeⁿ'é yā, tuu'mi ní caⁿ'a yā chii yā saⁿ'a miiⁿ: Nduuví tiínú di daiyá. 'Úú 'āā nadach'ēecú nuuⁿndi yeⁿ'ē di.

³Tuu'mi ní náⁿā saⁿ'a s'eeⁿ chi ngi'cueeⁿ ley chi snee sa miiⁿ tucá'a sa nadacadínuuⁿ sa nguaaⁿ maāⁿ sa: Sáⁿ'a 'cūū ní ngaⁿ'a taaⁿ sa contra yeⁿ'e Ndyuūs. ⁴Jesús miiⁿ tuumicadínuuⁿ yā vaanicadínuuⁿ yeⁿ'ē sa ní caⁿ'a yā chii yā saⁿ'a s'eeⁿ: ¿Dē'ē cuuvi chi nguéé n'daācā inadicadínuuⁿ nī na staava yeⁿ'e nī? ⁵¿Chēe cá chi nguéé ngiⁿ'ii chi caaⁿ'máⁿ cuuví sáⁿ'a 'cūū: Nuuⁿndi yeⁿ'ē di nch'ēecú o chi caaⁿ'máⁿ: Ndúcuééⁿ dí ní caaca dí? ⁶Tíicā ngaⁿ'á chi ndís'tii cadínuuⁿ nī chi Saⁿ'ā chi Daiya Dendyuūs ní véé poder yeⁿ'ē sa na iⁿ'yeeⁿdí 'cūū chi nadach'ēecú sa nuuⁿndi yeⁿ'é 'iiⁿ'yāⁿ. Tuu'mi ní caⁿ'a yā chii yā saⁿ'ā ndúúcū ca'āi chi in'dúuví sá: Nducueeⁿ di ní nta'a di yīive yeⁿ'e di ní cunaⁿ'ā di na vaacu di.

⁷Tuu'mi ní saⁿ'ā miiⁿ ní nducuééⁿ sá ní cúnaⁿ'ā sa na vaacu sa.

⁸Taachí 'iiⁿ'yāⁿ s'eeⁿ n'diichí yā chuū cheⁿ'e yīinú yā ní caⁿ'a yā: Dē'e chúucā ch'ēete Dendyuūs chí ca'á yā poder 'cūū saⁿ'ā iⁿ'yeeⁿdí cūū.

Jesús yaa'vi yā saⁿ'ā chi nguuví Mateo

(Mr. 2.13-17; Lc. 5.27-32)

⁹Jesús cho'ó yā miiⁿ, ní cachiicá yā ní n'diichí yā 'áámá saⁿ'ā chi nguuví sa Mateo. Mateo miiⁿ ní vee sa na cuarto naachi nadí'f'vē 'iiⁿ'yāⁿ yeⁿ'ē yán'āa yeⁿ'e yā. Jesús caⁿ'a yā chii yā saⁿ'ā: Díí, cuchí di caⁿ'ā di nduucú. Ní Mateo miiⁿ nducueeⁿ sa ní cueⁿ'e sa ndúúcū Jesús.

¹⁰Taachí Jesús vɛɛ yā na mesa ná va'āi yeⁿe Mateo miiⁿ, hora mífí neéné 'yaaⁿ 'iiⁿ'yāⁿ publicanos chi cobradores chí inn'guɛɛ yā yeⁿe impuesto ndúúcu 'iiⁿ'yāⁿ nuūⁿndíí ní ndaa yā ní ch'ɛɛtɛ yā na mesa ndúúcu Jesús ndúúcu discípulos yeⁿe yā. ¹¹Taachí 'iiⁿ'yāⁿ fariseos n'diichí yā chuū, caⁿ'a yā chii yā discípulos yeⁿe Jesús: ¿Dɛ'ɛ cúuví chí nge'e maestro yeⁿe nī ndúúcu saⁿ'ā publicanos chi cobradores chí inn'guɛɛ yā yeⁿe impuesto ndúúcu 'iiⁿ'yāⁿ nuūⁿndíí?

¹²Taachí Jesús ch'iindiveeⁿ yā chuū, caⁿ'a yā chii yā 'iiⁿ'yāⁿ s'eeⁿ: 'iiⁿ'yāⁿ chi nguée ngiitā nguée neⁿe yā 'aama médico, dámaaⁿ 'iiⁿ'yāⁿ chí ngiitā. ¹³Cueⁿe nī ní tuumicádiinuⁿ nī dɛ'e chí canée nguūⁿ na libro yeⁿe Ndyuūs ndúúcu chí neⁿ'ɛ caaⁿ'maⁿ chí 'tíicā: 'Úú neⁿ'é chí 'iiⁿ'yāⁿ nduuví ya'āi 'iinú yā ndúúcu ví'i. 'Úú ní nguée neⁿ'é chí 'caaⁿ'nuⁿ yā 'iiti ní ca'á yā 'iiti tan'dúúca ofrenda cucáávā 'úú. Ní 'úú ní nguée cuchii iⁿ'yeeⁿdí 'cūú chí yaa'ví 'iiⁿ'yāⁿ chí nadacádiínuⁿ yā chí n'dáaca yā ti nguée dinuuⁿndí yā, naati 'iiⁿ'yāⁿ chí véé nuuⁿndi yeⁿe yā ní 'íicú ndaacadaamí yā yeⁿ'ɛ nuuⁿndi yeⁿe yā.

'Iiⁿ'yāⁿ ntinguuneeⁿ yā yeⁿ'e chí nguée ca'diiⁿ'núⁿ yā ti caaⁿ'maⁿngua'a yā
(Mr. 2.18-22; Lc. 5.33-39)

¹⁴Tuu'mi ní discípulos yeⁿe Juan chí chɛɛdínuⁿniⁿ yā ndaa yā nanááⁿ Jesús miiⁿ ní caⁿ'a yā: N'dii Jesús, ¿dɛ'ɛ cúuví chí nús'uu ndúúcu 'iiⁿ'yāⁿ fariseos neéné n'dee cuūví nguée nga'diiⁿ'núⁿ nū ní discípulos yeⁿe nī nga'dííⁿ'núⁿ yā?

¹⁵Jesús caⁿ'a yā chii yā 'iiⁿ'yāⁿ s'eeⁿ: ¿Áá cuuví 'cuɛɛtinée 'iiⁿ'yāⁿ ndúúcu catecai 'cuáiⁿ tinaⁿ'ā taachí caⁿ'á yā naachi n'giindivaacu 'iiⁿ'yāⁿ neⁿ'e chí saⁿ'ā chí n'giindivaacu miiⁿ canée sá? Naati ndaa nguuví chí isaⁿ'ā yeⁿ'e yā ní cuaví sa yeⁿ'é yā ti 'cuūví sa; tuu'mi ní nguɛɛ ca'diiⁿ'núⁿ yā.

¹⁶Mar 'áámá 'iiⁿ'yāⁿ nguée cúuví cuta'á yā 'áámá tiinūⁿ ngai chí nguée naaⁿnu yā chí n'dyaatá yā na catecai ndiicúu yeⁿ'e yā. Nduuti chí 'tíicā diíⁿ yā, caātā ndu'ū tiinūⁿ ndiicúu. Ní cuuví ch'ɛɛtɛ ca naachí ndíí nteeⁿ tiinūⁿ ndiicúu. ¹⁷Ndíí nguée ndúú caaⁿ'yúⁿ 'iiⁿ'yāⁿ vino ngai chéétí bolsa yiiⁿmaⁿ ndiicúu tan'dúúca chí diíⁿ 'iiⁿ'yāⁿ tiempo chí chó'oo caati yiiⁿmaⁿ ndiicúu miiⁿ ní cúteeⁿ ní vino miiⁿ ní cungéé. Ní cuuví ndái yiiⁿmaⁿ. Caaⁿ'yúⁿ yā vino ngai chɛɛti bolsa yiiⁿmaⁿ ngai; ní cuaví'i nduu 'uūví n'dáaca canée yeⁿ'ɛ.

Jesús diíⁿ yā chí nanduūvā yeⁿ'e
'uūví n'daataá

(Mr. 5.21-43; Lc. 8.40-56)

¹⁸Taachí Jesús miiⁿ ngaⁿ'a yā ndúúdu 'cūú, 'áámá saⁿ'ā chí ngaⁿ'a ntiíⁿnyúⁿ yā yeⁿ'e yáacū sinagoga ndaa sa nanááⁿ Jesús, ní chiintiiⁿya sá ní chi'teenú sa. Ní caⁿ'a sa chí sa 'iiⁿ'yāⁿ: N'dii Jesús, miniiⁿ'yuⁿ ch'ií daiyá; naati cuchíí nī ní cun'duu nī ta'a nī vmnaaⁿ yeⁿ'ɛ tá ní nduuchi tá.

¹⁹Ní Jesús nducueeⁿ yā ní cueⁿ'e yā ndúúcu discípulos yeⁿ'e yā ní ndaa yā ndúúcu saⁿ'ā miiⁿ na vaacu sá. ²⁰Tuu'mi ní 'áámá n'daataa chí canée ndúúcu 'áámá ca'ai, chí

ican'dáa yuuúⁿ yeⁿe cuerpo yeⁿe tá 'āā ndiichúví nduūyū ndaa niiⁿnuⁿ tá cuaaⁿ dáámí Jesús. Tuū'vi tá naachí ndeetúú yeⁿe catecai Jesús miiⁿ. ²¹Ti taⁿ'ā miiⁿ maāⁿ tá nadicádiinuuⁿ tá 'tíicā: Ndúúti chi 'úú tuū'ví dámaaⁿ catecai yā, tuu'mi ní nduūvā yeⁿ'é. ²²Tuu'mi ní Jesús nguēcúndii yā ní n'diichi yā táⁿ'ā, ní caⁿ'a yā chii yā táⁿ'ā: Cúúví dítiínú di, díí daiyá; 'āā nanduuvā yeⁿ'é di ti i'téenu di 'úú. Hora mífⁿ nūuⁿ táⁿ'ā miiⁿ nánduūvā yeⁿ'é tá.

²³Taachí Jesús miiⁿ sndaa yā na va'ai yeⁿ'é sáⁿ'ā chi ngaⁿ'a ntiiⁿnyuⁿ yā yeⁿ'e yáacū sinagoga tuu'mi ní n'diichí yā 'iiⁿ'yāⁿ chi i'tiiví yā flauta, ndúúcū 'iiⁿ'yāⁿ chi n'gai yā, ndúúcū 'iiⁿ'yāⁿ chi ngēcū yā ní snéé yā naachi candíftí tináⁿ'ā. ²⁴Ní Jesús caⁿ'a yā chii yā 'iiⁿ'yāⁿ s'eeⁿ: Cuvíi ní; ti ta'díí miiⁿ nguée n'dii tá, cyaadu tá. 'Iiⁿ'yāⁿ s'eeⁿ ní ch'ííⁿnyuⁿneeⁿ yā Jesús miiⁿ. ²⁵Taachi tun'dáa yā 'iiⁿ'yāⁿ miiⁿ chæti va'āi, Jesús ndaa yā va'āi ní sta'á yā ta'ā n'daataa 'lííⁿ miiⁿ, ní n'daata 'lííⁿ miiⁿ ní nducueeⁿ tá. ²⁶Chuū chí diiⁿ Jesús ní ndōō fama miiⁿ nuuⁿmaⁿ ná yáāⁿ naachí chii chuū.

**Jesús dííⁿ yā chi nanduūvā
'uuví 'iiⁿ'yāⁿ chi ngueenááⁿ**

²⁷Taachi Jesús cho'ó yā yeⁿ'é miiⁿ, ní 'uuví saⁿ'ā chi ngueenááⁿ can'dáa sa 'iiⁿ'yāⁿ. 'Cai yiicú sá ní caⁿ'a sa: N'díí Daiya David, cunéé ya'ai 'iinu ní nús'uu.

²⁸Taachi Jesús cueⁿ'é yā ndaa yā na va'ai tuu'mi ní ndaa ndúú 'uūví saⁿ'ā ngueenááⁿ miiⁿ nanááⁿ Jesús. Jesús caⁿ'a yā chii yā saⁿ'ā s'eeⁿ:

¿Áá i'téenu ní chi 'úú cuuvi dííⁿ chi nanduūvā yeⁿ'é ní? Saⁿ'ā s'eeⁿ ní caⁿ'a sa: 'Tíicā Señor.

²⁹Tuu'mi ní Jesús tuū'ví yā nduutinááⁿ saⁿ'ā s'eeⁿ ní caⁿ'a yā: 'Tíicā cuuvi tan'dúúcā chi i'téenu ní yeⁿ'é.

³⁰Nduutinááⁿ saⁿ'ā s'eeⁿ ní n'guaaⁿ ní nduuvā yeⁿ'é sa. Ní Jesús caⁿ'a yā chii yā saⁿ'ā s'eeⁿ: Nguée ca'a ní chi cadíínúuⁿ 'iiⁿ'yāⁿ yeⁿ'e chuū.

³¹Naati saⁿ'ā s'eeⁿ ní cueⁿ'e sa núúⁿmáⁿ ná yáⁿ'āa miiⁿ, ní caⁿ'a sa nducuéⁿ'é chí Jesús miiⁿ dííⁿ yā.

**Jesús dííⁿ yā chí nduūvā
yeⁿ'é 'áámá 'díí'mi**

³²Taachi Jesús ndúúcū 'iiⁿ'yāⁿ s'eeⁿ nan'daa yā na va'ai miiⁿ, ndaa saⁿ'ā s'eeⁿ nanááⁿ Jesús ní ndée sa 'áámá 'díí'mi chi canee sa ndúúcū espíritu yeⁿ'e yááⁿn'guiinūuⁿ. ³³Ní taachi Jesús miiⁿ tun'dáa yā espíritu yeⁿ'e yááⁿn'guiinūuⁿ miiⁿ, tuu'mi ní 'díí'mi miiⁿ ní chíí caⁿ'a sa. 'Iiⁿ'yāⁿ ní cheⁿ'e yiínú yā ní caⁿ'a yā: Nguée in'diichí dendu'ū chi 'túúcā nguaaⁿ 'iiⁿ'yāⁿ yeⁿ'e Israel.

³⁴Naati 'iiⁿ'yāⁿ fariseos caⁿ'a yā: Saⁿ'ā miiⁿ ní tun'dáa sa espíritu yeⁿ'e yááⁿn'guiinūuⁿ cáávā saⁿ'ā chi ngaⁿ'a ntiiⁿnyuⁿ sa yeⁿ'e espíritus yeⁿ'e yááⁿn'guiinūuⁿ.

Jesús ya'ai 'iinú yā 'iiⁿ'yāⁿ

³⁵Jesús cachiica yā nuuⁿmáⁿ na yáāⁿ n'gæte ndúúcū yaāⁿ n'gaiyāā, ní ngí'cueeⁿ yā na yáacū sinagogas yeⁿ'e 'iiⁿ'yāⁿ Israel. Ní ngaⁿ'a yā nduudu cuaacu yeⁿ'é naachí Ndyuūs ngaⁿ'ā ntiiⁿnyúⁿ yā na va'ai chæti nguuví. Ní dííⁿ yā chi nduūvā yeⁿ'é nducyaaca 'iiⁿ'yāⁿ yeⁿ'e nducuéⁿ'é

naaⁿ ca'ai yeⁿe yā ndúúcū 'iⁿ'yāⁿ chi ya'ai yeⁿé yā. ³⁶Ní taachi Jesús n'diichi yā nducyaaca 'iⁿ'yāⁿ s'eeⁿ, tuu'mi ní yá'ai 'iinú yā caava 'iⁿ'yāⁿ s'eeⁿ, ti iⁿ'yāⁿ s'eeⁿ ndicúunu yā ni snée yā tan'duucā 'iiti cuūchí chi nguée du'ū chi idiiⁿ cuidado 'iiti. 'Tiicá yā. ³⁷Tuu'mi ní Jesús miiⁿ ca'a yā chii yā discípulos yeⁿe yā: Cuaacu níⁿ'nyúⁿ chí ngí yeⁿé nééné n'deēe chi diiⁿ yú cosechar naati 'iⁿ'yāⁿ chí idiiⁿ ntiiⁿ'nyuⁿ nguée 'yaaⁿ yā. ³⁸Cáávā chuū cáácá nī Ndyuūs chí véé cosecha yeⁿe yā chí dicho'ó yā mozos ní nadidáámá yā cosecha yeⁿé yā.

**Jesús yaa'vi yā ndu'u ndiichúúví
discípulos**

(Mr. 3.13-19; Lc. 6.12-16)

10 Tuu'mi ní Jesús yaa'vi yā ndu'ū ndiichúúví discípulos yeⁿe yā chi ndaa yā nanáaⁿ yā. Ní Jesús miiⁿ ca'a yā poder discípulos chí tun'daá yā espíritus yeⁿe yááⁿ'guiniūⁿ yeⁿé 'iⁿ'yāⁿ, ní diíⁿ yā chi nduūvā yeⁿé 'iⁿ'yāⁿ chi ngiitā yeⁿe nducuéⁿē naaⁿ ca'ai yeⁿe yā ndúúcū 'iⁿ'yāⁿ chi ya'ai yeⁿé yā.

²Túúcā duūchi ndu'u ndiichúúví apóstoles; Simón chi nguuví Pedro ndúúcū Andrés 'dínu sa, Jacobo ndúúcū Juan 'diinū sa chi daiya Zebedeo; ³ndúúcū Felipe, ndúúcū Bartolomé, ndúúcū Tomás, ndúúcū Mateo chi sáⁿ'a publicano chi cobrador; ndúúcū Jacobo saⁿ'ā daiya Alfeo; ndúúcū Lebeo chi nguuví Tadeo; ⁴ndúúcū Simón yeⁿe yáⁿ'āa Caná; ndúúcū Judas Iscariote saⁿ'a miiⁿ chi cuayiivi ch'iⁿ'i sá du'u chí Jesús miiⁿ chi cuuvi 'caaⁿ'núⁿ ya 'yā.

Ntiiⁿ'nyuⁿ yeⁿé ndiichúúví apóstoles

(Mr. 6.7-13; Lc. 9. 1-6)

⁵Jesús dicho'ó yā ndu'ū ndiichúúví apóstoles ní caⁿ'a yā chii yā 'iⁿ'yāⁿ taacā chi canee chi diíⁿ yā. Ní Jesús caⁿ'a yā: Nguée caⁿ'á nī cuaaⁿ yúúni yeⁿé 'iⁿ'yāⁿ chi nguée ndaata yeⁿé Israel chi judíos. Nguée cundaa nī yááⁿ vaacú 'iⁿ'yāⁿ Samaritanos. ⁶Naati ndís'tií nī caⁿ'a nī nanááⁿ 'iⁿ'yāⁿ Israel s'eeⁿ tí 'iⁿ'yāⁿ s'eeⁿ tan'dúúcā 'íití cuuchi chí nín'dái tí na icyáⁿ'ā, 'tííca yā. ⁷Ní taachi caⁿ'á nī 'túúcā caaⁿ'maⁿ nī nduudu cuaacu ní caaⁿ'maⁿ nī yeⁿé naachí Dendyuūs ngaⁿ'a ntiiⁿ'nyúⁿ yā na va'ai cheeti nguuví chí 'āā ndaa niiⁿ'nuúⁿ. ⁸Diíⁿ nī chi nduūvā yeⁿé 'iⁿ'yāⁿ chí ngíta. Diíⁿ nī chí nduuchi 'iⁿ'yāⁿ chí n'díí chí tináⁿ'ā. Diíⁿ nī chi nduūvā ní nduuví deēve cuerpo yeⁿe 'iⁿ'yāⁿ chí véé vaadi ya'ai chí nguuví lepra chí in'duuti yuūtē yeⁿe yā. Ní diíⁿ nī chí diví nī espíritus yeⁿé yááⁿ'guiniūⁿ chí snée ndúúcū 'iⁿ'yāⁿ. Ndís'tií ndaacá nī poder 'cūū yeⁿé Dendyuūs, ní nguée cuta'a nī tuumí cáávā chuū. Chuū chí diíⁿ nī ndúúcū 'iⁿ'yāⁿ nguée cuuvi cún'di'í yeⁿé yā.

⁹Nguée candée nī 'dííⁿ'nguaaⁿ, ndíí nguée ndúú 'dííⁿ'nguae, ndíí nguée ndúú tuumí cheēyē ra. ¹⁰Nguée candée nī morral yeⁿe nī cuaaⁿ cyúúni chí cáⁿ'a nī. Ndíí nguée ndúú 'uūvī ra catecai nī candée nī. Ndíí nguée ndúú candu ndaacuú yeⁿé nī, ndíí nguée ndúú in'daacuú rá yeⁿe nī, tí 'iⁿ'yāⁿ chí diíⁿ ntiiⁿ'nyuⁿ, na ntiiⁿ'nyúⁿ chí diíⁿ yā ní ndaācā chí ch'é yā ndúúcū necesidades chí neⁿe yā.

¹¹Āā tíf nūuⁿ yāāⁿ n'gεεε ndúúcu yāāⁿ n'gaiyāá naachí cundāā nī tínguuneēⁿ nī du'ú 'iiⁿyāⁿ yeⁿē yāāⁿ miiⁿ chí n'dai yā ní cunée nī na vaacú yā ndii n'dáá cá nī. ¹²Taachí ndaá nī na vaacu 'iiⁿyāⁿ: Ndaí ndís'tiī, caaⁿmáⁿ nī, tan'dúúcā costumbre yeⁿe nī. ¹³Ndúúti chí 'iiⁿyāⁿ yeⁿē va'āi miiⁿ n'dai yā tuu'mi ní vaadi 'diiⁿ yeⁿe nī cunée ndúúcu yā. Nduuti chí nguée n'dai yā o nguée vaadi 'diiⁿ ndúúcu yā, nacan'dāā nī va'āi miiⁿ ndúúcu 'áamá nduudu n'dai. ¹⁴Nduuti chí 'iiⁿyāⁿ s'eeⁿ nguée 'cuaaⁿ yā ndís'tiī ndíí nguée ndúú 'caandiveeⁿ ra yā nduudu yeⁿe nī nan'dāā nī va'ai miiⁿ o yeⁿe yāāⁿ miiⁿ ní n'dáádi nī iyaācāā yeⁿe ca'á nī ti nguée n'giindiveeⁿ yā yeⁿē nī. ¹⁵Cuaacu nííⁿnyúⁿ cuaacu nííⁿnyúⁿ ngaⁿ'á ngī ndís'tiī chí taachi ndaá nguuví chí Ndyuūs n'diichí yā nuuⁿndi yeⁿe yāāⁿ, castigo yeⁿe 'iiⁿyāⁿ yeⁿe yāāⁿ 'cūū cunncāā ca chí cuuví castigo yeⁿe 'iiⁿyāⁿ yeⁿe yāāⁿ Sodoma ndúúcu yāāⁿ Gomorra chí yāāⁿ s'eeⁿ yeⁿē 'iiⁿyāⁿ chí nguée dííⁿ yā chí n'dai ndíí nguée 'iiⁿyāⁿ yeⁿe ndaata Israel yā.

**Ndaá nguuví chí 'iiⁿyāⁿ
din'gíínu yā nduucú nī**

¹⁶Cun'diichí nī. 'Úú ní dicho'ó ndís'tiī tan'dúúcā chí ndís'tiī ní 'iiti cuūchí náávtaⁿā yeⁿē 'yāāⁿyāāⁿ n'gaātāā, 'tiicá nī. Canée chí dííⁿ nī chí listo nī tan'dúúcā 'aama cúú. Ní canée chí din'daacá nī ní canée manso nī tan'dúúcā 'áamá paloma. 'Tíicā dííⁿ nī. ¹⁷Candée nī cuidado caati 'iiⁿyāⁿ s'eeⁿ ní nca'á yā ndís'tiī nanááⁿ 'iiⁿntyēⁿē yeⁿe

yaacū sinagoga. Ní cúúví 'cueⁿē yā ndís'tiī na yaacū sinagoga miiⁿ. ¹⁸Ní 'iiⁿyāⁿ s'eeⁿ candée yā ndís'tiī nanááⁿ gobernadores ndúúcu nanááⁿ reyes cucáāvā 'úú. Ní 'íicú ndís'tiī cuuví caaⁿmáⁿ nī nduudu cuaacu yeⁿē 'úú nanááⁿ 'iiⁿyāⁿ s'eeⁿ ndúúcu 'iiⁿyāⁿ chí nguée yeⁿe ndaata Israel. ¹⁹Ní taachi 'iiⁿyāⁿ nca'a yā ndís'tiī nanááⁿ 'iiⁿyāⁿ s'eeⁿ, nguée nadicádíínuuⁿ nī yeⁿe chí caaⁿmáⁿ nī ti hora mííⁿ nūuⁿ ní Ndyuūs téē yā nduudu chí caaⁿmáⁿ nī. ²⁰Ti nguée ndís'tiī chí caaⁿmáⁿ nī naati Espíritu N'dai yeⁿē Ndyuūs Chiida yú. Espíritu miiⁿ caaⁿmáⁿ yā cáāvā ndís'tiī ti canée yā nduucú nī.

²¹Nguaaⁿ 'dínū sa caⁿ'a sa caaⁿ'maⁿ sa contra yeⁿē ví'í chí canée chí 'cuūví sa. 'Tiicá ntúūⁿ chiidá yā caⁿ'a yā caaⁿ'maⁿ yā contra yeⁿē daiya yā chí canée chí 'cuūví yā. 'Tiicá ntúūⁿ daiyá yā ní caⁿ'á yā diíⁿ yā ndúúcu chiidá yā ti ndís'tiī candée nī nduudu yeⁿē. ²²Ní nducyáácá 'iiⁿyāⁿ nguée cuuvi n'diichí yā ndís'tiī cucáāvā 'úú ti cueⁿē nī nduucú. 'Iiⁿyāⁿ chí cuchée yā tanducuéⁿē chuū nducuéⁿē nguuví yeⁿē yā 'iiⁿyāⁿ miiⁿ chí nanguaⁿ'ai yā. ²³Taachí 'iiⁿyāⁿ can'daá yā ndís'tiī chí neⁿe yā chí ndís'tiī 'cureenú nī cuuvi, na 'áamá yāāⁿ, tuu'mi ní caⁿ'ā nī cáanu nī ná taama yāāⁿ ti cuaacu nííⁿnyúⁿ ngaⁿ'á ngī ndís'tiī chí Saⁿ'ā chí Daiya Ndyuūs miiⁿ nndaa sá taama vmnéⁿēē vmnaaⁿ chí ndís'tiī cuuvi caaⁿ'maⁿ nī nduudu cuaacu yeⁿē nuuⁿ'maⁿ na yáⁿ'āā Israel.

²⁴Mar 'áamá discípulo ní nguée n'gεεε ca ntiiⁿnyuⁿ sá chí cuuvi maestro yeⁿē sa, ndíí nguée ndúú

mar 'áámá mozo ní ng'eete ca sa chí cuuvi 'iivi sa. ²⁵N'dáacā chí discípulo mií" dii" sa tan'dúúcā chí idii" maestro ye"e sa ní mozo mii" dii" sa tan'dúúcā chí dii" 'iivi sa. Ndúúti chí 'ii"yā" chí nga"n a ntii"nyu" ye"e va'ai chí nguuví Beelzebú chí yáá"nguiniū", tuu'mi ní taná"ā 'ii"yā" chí nguéé ye"e familia ye"e Beelzebú mii" cunncaā ca"n a yā caa"má" yā ye"e 'ii"yā" ye"e Beelzebú.

Du'ū chí cuuvi 'va'ā yú

(Lc. 12.2-9)

²⁶Tuu'mi ní ndís'tii nguéé 'va'á ní 'ii"yā" ti nguéé 'áámá chí canúú" n'de'ei chí nguéé cuuví snaa" yú, ndíí nguéé ndúú canee 'áámá secreto chí 'ii"yā" nguéé cuuvi cadíínuu" yā. ²⁷'licu chíi" chí 'úú nga"á ngíí ndís'tii ye"e nduūdū n'de'ei chí nguéé ituumicádíínuu" 'ii"yā", ndís'tii caa"ma" nī nduudu chí túúmícadíínuu" 'ii"yā". Nífcú de'e chí nga"á ngíí ndís'tii ní 'cuai nī ndii na yaacū ye"ē ti" va'āi ní túúmícadíínuu" 'ii"yā" nduudú cūū. ²⁸Nguéé 'va'á ní 'ii"yā" chí 'caā"nū" cuerpo ye"e nī ní nguéé cuuvi 'caa"nú" yā alma ye"e nī. Di'va'á ca nī Dendyuūs chí cuuvi 'caa"nú" yā alma ye"e nī ndúúcū cuerpo ye"e nī chí ca"á nī na infierno.

²⁹¿Áá nguéé in'dífcui yā na 'uūvī 'yaada cáávā 'aama tuūmī? Mar 'áámá 'yáádá s'éé" nguéé 'cuuvá ti na yá"āa 'cūū núú"má" ne"e chí nguéé déenu Ndyuūs Chiida yú. ³⁰Nífcú nducyaaca yuudu ti" nī ní ndii dúúché ndúúcū Ndyuūs. ³¹Nguéé di'vá'a ndís'tii caati ch'eete cá nī chí cuuvi 'yaa" n'dáí 'yaada.

'Ii"yā" chí nga"á yā iintii"naá" yā Cristo nanáá" 'ii"yā"

(Lc. 12.8-9)

³²Áā du'ú nūu" chí nga"n a chí iintii"naa" 'úú nanáá" 'ii"yā", 'úú ntúū" ní caā"má" chí iintii"naá" 'ii"yā" s'ee" nanáá" Chiidá chí canée yā na va'ai cheeti nguuvi. ³³Áā du'ú nūu" chí caā"má" chí nguéé in'diichi 'úú nanáá" 'ii"yā", 'úú ntúū" ní caā"má" chí nguéé in'diichi 'ii"yā" s'ee" nanáá" chiidá chí canée yā na va'āi cheeti nguuví.

Cáávā Jesús mii" véé divisiones nguaa" 'ii"yā"

(Lc. 12.51-53; 14.26-27)

³⁴Nguéé nadicádíínuu" nī chí 'úú, Jesús, ndaá chí ndéé vaadi 'dii" 'ii"yā" na i"yee"ndí cūū. Nguéé ndaá chí ndéé vaadi 'dii" caati ndéé vaadi 'caa'va ní tan'dúúcā chí candéé 'áámá machete chí 'caāi" nduu 'uuví lados. ³⁵Tí ndaá chí 'ii"yā" ní nguéé cuuvi n'diichí yā chiidá yā, ní n'daataá nguéé cuuvi n'diichi tá chæecu tá, n'daataá nguéé cuuvi n'diichi ntúū" tá indá"n a tá. ³⁶Caati 'áámá 'áámá yā ní enemigos yā ye"e yā ví'i na vaacu yā.

³⁷'Ii"yā" chí ne"e cá yā chiidá yā o chæecu yā nguéé ti 'úú, nguéé neene n'dai yā chí cuuvi ye"é 'ii"yā". 'Ii"yā" chí ne"e cá yā daiyá yā sa"ā o daiyá yā n'daataá nguéé ti 'úú, nguéé neene n'dai yā chí cuuvi ye"é 'ii"yā". ³⁸Ní 'ii"yā" chí nguéé ne"e yā 'cueenú yā cuuvi cucáávā 'úú chí tan'dúúcā chí cuta'á yā cruz ye"e yā ní ca"n a yā nduucú, nguéé neené n'dai yā chí cuuvi ye"é 'ii"yā". ³⁹'Ii"yā" chí ne"e cá

yā vida yeⁿe yā cáávā cosas chi véé ná iⁿ'yeeⁿdí cūū nguéeⁿ ti 'úú, tuu'mi ní táámá vida ní dindaí yā. 'Iicú 'iiⁿ'yāⁿ chí dindaí yā vida yeⁿe yā na iⁿ'yeeⁿdí cūū cucáávā 'úú, ti dííⁿ yā chi 'úú neⁿ'é ní ndaacá yā táámá vida yeⁿ'é yā.

Yeⁿ'e chi ndaācā yeⁿ'ē yú

(Mr. 9.41)

⁴⁰Iiⁿ'yāⁿ chi 'cuaaⁿ yā ndís'tií, 'cuaaⁿ yā 'úú. 'Iiⁿ'yāⁿ chi n'gúuⁿ yā 'úú, n'gúuⁿ yā 'iiⁿ'yāⁿ chi dichó'o yā 'úú. ⁴¹'Iiⁿ'yāⁿ chi n'gúuⁿ yā 'áámá saⁿ'a profeta caati profeta miiⁿ chií yā lado yeⁿ'e Ndyuūs 'iiⁿ'yāⁿ ní cuta'á yā premio chí ndaacā yeⁿ'ē chi tunéeⁿ 'iiⁿ'yāⁿ chi profeta. 'Iiⁿ'yāⁿ chí n'gúuⁿ yā 'áámá 'iiⁿ'yāⁿ chí n'dai caati 'iiⁿ'yāⁿ miiⁿ ni n'dai yā, 'iiⁿ'yāⁿ ní cuta'á yā premio chí tunéeⁿ 'iiⁿ'yāⁿ chi n'dai. ⁴²Āa du'ú nūnⁿ 'iiⁿ'yāⁿ chi ca'a 'áámá vaso nuūⁿnīⁿ 'liche 'áámá 'iiⁿ'yāⁿ caati i'téenu yā 'úú, cuaacu níⁿ'nyúⁿ ngaⁿ'á ngí ndís'tií chi véé premio yeⁿ'e 'iiⁿ'yāⁿ miiⁿ chi cuuvi ndaācā yā yeⁿ'e yā.

Juan chí cheēdínuūⁿnīⁿ sa dichó'o sa 'iiⁿ'yāⁿ nanááⁿ Jesús

(Lc. 7.18-35)

11 Taachí Jesús ch'íínúⁿ chií yā ndu'u ndiichúúví discípulos yeⁿ'e yā táácā chí canéeⁿ chi dííⁿ yā tuu'mi ní Jesús chiicá yā yááⁿ miiⁿ ní cueⁿ'é yā na tanáⁿ'ā yááⁿ s'eeⁿ chí ca'cueeⁿ yā ní caaⁿ'maⁿ yā nduudu cuaacu yeⁿ'é Ndyuūs.

²Juan chí cheēdínuūⁿnīⁿ sa 'iiⁿ'yāⁿ canúúⁿ sá vácūū. Ní taachi ch'iindiveeⁿ sá taacā idiiⁿ Jesús miiⁿ, tuu'mi ní dichó'o sa ná 'uuvi discípulos yeⁿ'e sa nanááⁿ Jesús.

³Ní 'iiⁿ'yāⁿ s'eeⁿ ndáa yā ní ntiinguuneeⁿ yā Jesús miiⁿ: 'Áá n'dií chí Cristo chí canee chí ndaa o cunee ngíínúⁿ nū taama yā?

⁴Jesús miiⁿ nán'gueécútaⁿa yā yeⁿ'e 'iiⁿ'yāⁿ s'eeⁿ ní caⁿ'a yā: Ndís'tií cúnaⁿ'a ní ní cuuvi ní Juan miiⁿ yeⁿ'é dendu'ú chí inaaⁿ ní ndúúcū chí n'giindiveeⁿ nī. ⁵'Iiⁿ'yāⁿ chí ngueenááⁿ ní inaaⁿ yā, 'iiⁿ'yāⁿ chí nguéeⁿ ngii ngiicá ní ngiicá yā, 'iiⁿ'yāⁿ chí ndíí ca'ai lepra chí in'duuti yuūtē yeⁿ'e yā ní nduuva dēeve yeⁿ'é yā, 'iiⁿ'yāⁿ chí chēetúū ní n'giindiveeⁿ yā, 'iiⁿ'yāⁿ chí n'díí ní nnduuchí yā yeⁿ'e nguaaⁿ tináⁿ'ā, níicú 'iiⁿ'yāⁿ chí ndaachíí snee yā ch'iindiveeⁿ yā nduudu cuaacu yeⁿ'é Ndyuūs chí nadanguáⁿ'ai 'iiⁿ'yāⁿ ti 'iiⁿ'yāⁿ candēe yā nduudu cuaacu miiⁿ nanááⁿ yā. ⁶Dēē chúúcā n'dai 'iiⁿ'yāⁿ chí nguéeⁿ cunnkáā ch'ēenú yā 'úú ndúúcū nduudu yeⁿ'é.

⁷Taachi cuinaⁿ'a yā 'iiⁿ'yāⁿ s'eeⁿ, Jesús tucá'a yā caⁿ'a yā chií yā 'iiⁿ'yāⁿ yeⁿ'e Juan chí cheēdínuūⁿnīⁿ miiⁿ: 'Dēē cheⁿ'e ndís'tií n'diichi ní na yáⁿ'āa cuūⁿmáⁿ naachi nguéeⁿ ch'ēetinéeⁿ 'iiⁿ'yāⁿ? 'Áá 'áámá ndúú chí n'giidí 'yúúné? ⁸O 'dēē tuu'mi cheⁿ'e ní n'diichí ní? 'Áá 'áámá saⁿ'ā chí cánuuⁿ sa catecái n'dai sa? Cuin'diichí ní. 'Iiⁿ'yāⁿ chí snúuⁿ yā catecai n'dai yā snee yā ná va'ai yeⁿ'ē rey. ⁹Tuu'mi ní 'dēē cheⁿ'e ní n'diichi ní? 'Áá 'aama profeta chí ngaⁿ'a nduudu cuaacu yeⁿ'e Ndyuūs? 'Tíicā nduudu cuaacu. Ní 'úú ní ngaⁿ'á ngii ndís'tií 'tíicā. Cheⁿ'é ní n'diichi ní 'áámá 'iiⁿ'yāⁿ chí ch'ēete ca yā chí cuuvi profeta. ¹⁰Chuū cánée nguūⁿ yeⁿ'e Juan miiⁿ náⁿ libro yeⁿ'é Ndyuūs ndii cuááⁿ vmnaaⁿ:

Cuin'diichí nī. 'Úú ní dicho'ó
'áamá sa"ā chí caa"ma" sa
nduudu cuaacu ye"é nanáa"
di. Sa"ā mii" ní nuu"nū"
cuaacú sa yúúni cáávā di.

¹¹ Cuaacu ní"nyú" nga"á ngíi
ndís'tii: Nguáá" nducyaaca 'ii"yā"
chí n'giindiyáa" yā ye"ē n'daataá
nguée taama yā chí ch'ēete ca yā
ti Juan mii" chí chēdínū"nī" sa.
Naati 'ii"yā" chí ndiicuú" ca yā
naachí Ndyuūs nga"a ntii"nyu" yā
ní ch'ēete ca yā nguée ti Juan mii".

¹² Caati ndíi tiempo chí
ch'iindiyāa" Juan chí chēdínū"nī"
sa ndíi maa" ye"e naachí Ndyuūs
nga"a ntii"nyu" yā ndúúcū 'ii"yā"
chí ye"é Ndyuūs ní n'geenu cá yā
ngii. Ní 'ii"yā" chí ngu"u yā contra
ye"e Ndyuūs ne"e yā caa"ma"
ntii"nyú" yā ye"e naachi Ndyuūs
nga"a ntii"nyú" yā. ¹³ Ní nducyaaca
'ii"yā" profetas ndúúcū ley ye"e
Moisés nga"ā nduudu cuaacu ye"é
naachi Ndyuūs nga"a ntii"nyu" yā
ndíi tiempo chí ndāa Juan mii" ná
i"yee"dí 'cūū. ¹⁴ Ndúúti chí ndís'tii
ne"e ní 'caandivee" ní nduudu ye"e
profetas ndúúcū nduudu ye"e ley
mii", tuu'mi ní cadíinu" ní chí
Juan mii" ní sa"ā chí profeta Elías
dinguu" yā chí canée chí ndaa sa.
¹⁵ Ndís'tii chí véé veé" ní 'caandivee"
ní ye"é.

¹⁶ ¿De'é tan'dúúcā 'ii"yā" chí snée
yā na i"yee"dí 'cūū maa"? 'ii"yā"
s'ee" tan'dúúcā sa"ā n'gaiyāa chí
n'gēēte nī'vēē ní duūchi sa ní n'gai
sa compañeros ye"e sa. ¹⁷ Ní nga"a
sa: 'Tiiví 'nū flauta cáávā baile
naati nguée inde'éi nī. Ní chiita
'nū canción chí ndaachí tan'dúúcā
canciones cáávā tiná"ā naati nguée

chēēcu nī. ¹⁸ Juan chí chēdínū"nī"
sa ndāa sa. Nguée che'e sa pan,
nguée chí'í sa vino ní ndís'tii nga"ā
ní chí sa"ā mii" ní canee sa ndúúcū
espíritu ye"e yáa"n'guiinū". ¹⁹ 'Úú
ní ndāá, 'úú chí Sa"ā chí Daiyá
Ndyuūs 'úú. Ní nge'é ní ngí'í. Tuu'mi
ní ndís'tii nga"a nī ye"é: Cuin'díichí
nī. 'Áamá sa"ā chí n'dēē n'dái nge'e
sa ní ngí'í taavi sá vino. Ní nga"ā
ní chí 'úú ní sa"ā chí n'dai ndúúcū
'ii"yā" publicanos chí cobradores
chí inn'guē yā ye"e yá"āa ndúúcū
'ii"yā" chí dinuu"ndi yā. Nducyaaca
'ii"yā" deenu yā chí vaadī deenu
mii" ní ye"é Ndyuūs. Ní 'ii"yā"
ch'i"í yā vaadī deenu mii" cáávā
dendu'ū chí n'daācā chí díi" yā ti
ye"é Ndyuūs 'ii"yā".

**De'e chúúcā ya'āi 'ii"yā" ye"e yāa"
naachi nguée indaacadaamí yā ye"ē
nuu"ndi ye"é yā**

(Lc. 10.13-15)

²⁰ Jesús tucá'a yā díi" yā regañar
'ii"yā" s'ee" na yāa" s'ee" naachi
dii" yā néené n'dēē vaadī n'giinu
ti 'ii"yā" ye"e yāa" mii" 'āa cuée
ndaacadaamí yā ye"ē núú"ndi ye"e
yā. Ní nga"a yā 'tíicā: ²¹ De'ē chúúcā
ya'āi ye"é ndís'tii 'ii"yā" ye"e yāa"
Corazín. De'ē chúúcā ya'āi ye"ē
ndís'tii 'ii"yā" ye"e yāa" Betsaida
ti ndúúti chí chíi vaadī n'giinu
na yāa" Tiro ndúúcū yāa" Sidón
tan'dúúcā chí chíi nguua" ndís'tii,
tuu'mi ní 'ii"yā" ye"e yá"āa s'ee" 'āa
'naa" tiempo ndaacadaamí yā ye"e
nuu"ndi ye"é yā. Ní chí'í yā 'ii"yā"
tan'dúúcā costumbre ye"é yā chí
neené ya'ai yā. Ní ch'ētínū" yā
catecaí yā ye"e chí díinū" ní ch'ēte
yā nguua" yayiāa. ²² 'Úú nga"ā

ngíí ndís'tií ti nguuví chí Ndyuūs caaⁿ máⁿ yā nuuⁿ ndi yeⁿé 'iⁿ yāⁿ nguée ya'āi ca 'cueenú yā cuuvi 'iⁿ yāⁿ yeⁿé yāⁿ aa Tiro ndúúcu 'iⁿ yāⁿ yeⁿé yāⁿ aa Sidón nguée ti ndís'tií. ²³ Ndís'tií 'iⁿ yāⁿ yeⁿé yāⁿ Capernaum, ¿'áa cuuvi caⁿ á nī na va'ai cheeti nguuví? Nguée cuuvi. Caⁿ á nī infierno ti nguée i'téenu nī nduudu cuaacu yeⁿé ndúúcu vaadi n'giinu chí diiⁿ Ndyuūs. Ndúúti chí chíi vaadi n'giinu na yāⁿ Sodoma tan'dúúca chí chíi nguaaⁿ ndís'tií tuuⁿ mī ní 'iⁿ yāⁿ yeⁿé yāⁿ 'cūū 'āā i'téenu yā. Ní yāⁿ 'cūū 'āā canée ndíí maaⁿ. ²⁴ 'Úú ngaⁿ á ngíí ndís'tií ti nguuví chí Ndyuūs caaⁿ máⁿ yā nuuⁿ ndi yeⁿé 'iⁿ yāⁿ nguée ya'āi ca 'cueenú yā cuuvi 'iⁿ yāⁿ yeⁿé yāⁿ aa Sodoma nguée ti ndís'tií.

Cuchií nī nanaaⁿ 'úú ní ntaavi'tuunúúⁿ nī

(Lc. 10.21-22)

²⁵ Ní tiempo miiⁿ ní Jesús nan'guεεcútaⁿ a yā yeⁿé yā ní caⁿ a yā: N'dií Chiidá chí 'iiví nī yeⁿé va'ai cheeti nguuví ndúúcu yāⁿ aa 'cūū, 'úú ca'á gracias n'dií caati snuuⁿ n'dé'ei nī nduudu 'cūū yeⁿé 'iⁿ yāⁿ chí déenu ca yā ndúúcu 'iⁿ yāⁿ chí n'dee n'dái tuumicádífnuuⁿ yā, ní ca'a nī chí cadífnuuⁿ 'iⁿ yāⁿ chí ndiicúuⁿ yā chí nguée n'dee cá déenu yā. ²⁶ 'Tífcā dííⁿ nī Chiidá ti 'tífcā neⁿé nī chí n'daācā diiⁿ nī ti n'daācā.

²⁷ Ní Jesús caⁿ a yā chíi yā discípulos yeⁿé yā: Chiidá ní teé yā 'úú tanducuéⁿ dendu'ū. Mar 'áámá 'iⁿ yāⁿ nguée deenu yā táacā 'áámá n'dyáⁿ a Daiya Dendyuūs, dámaāⁿ Chiidá yā. Mar 'áámá 'iⁿ yāⁿ

nguée deenu yā táacā Dendyuūs Chiida yú, dámaāⁿ 'áámá n'dyáⁿ a Daiyá yā ndúúcu 'āā du'ú nuuⁿ 'iⁿ yāⁿ chí Daiyá Ndyuūs neⁿé yā 'cuuⁿ mīⁿ yā Chiida yā. ²⁸ Cuchí nī nanáaⁿ 'úú, ndís'tií, chí véé n'dee n'dái cuidado yeⁿé nī chí tan'dúúca 'áámá carga yeⁿé nī ní 'úú ní dííⁿ chí ntaavi'tuunúúⁿ nī. ²⁹ Ní dííⁿ nī tan'dúúca chí can'dée nī yugo yeⁿé chí 'tífcā. 'Cueeⁿ nī yeⁿé 'úú caati 'úú ní ndiicúuⁿ 'úú ní néené n'dai staava yeⁿé, tuuⁿ mī ní ndaācā nī vaadi ntaavi'tuunúuⁿ yeⁿé alma yeⁿé nī. ³⁰ Caati yugo yeⁿé chí teé ndís'tií nguée ngíí. Candée nī cheedí yeⁿé ní nguée cuuví n'gii yeⁿé nī.

Discípulos yeⁿé Jesús sta'á yā trigo nguuví chí ntaavi'tuunúúⁿ 'iⁿ yāⁿ

Israel

(Mr. 2.23-28; Lc. 6.1-5)

12 'Áámá nguuví sábadu chí ntaavi'tuunúúⁿ 'iⁿ yāⁿ Israel, Jesús cueⁿé yā ndúúcu discípulos yeⁿé yā cuaaⁿ naachí 'iⁿ yāⁿ 'āā ndííⁿ ntiiⁿ nyúⁿ yā ní mífⁿ ní véé trigo. Discípulos yeⁿé Jesús miiⁿ chíi cuiicú yā ní sta'á yā trigo ní che'e yā. ² 'Iⁿ yāⁿ fariseos n'diichí yā chuū, ní caⁿ a yā chíi yā Jesús miiⁿ: Cuin'diichí nī, discípulos yeⁿé nī ní nguée dííⁿ yā tan'dúúca chí ngaⁿ a ley yeⁿé nguuví chí ntaavi'tuunúúⁿ 'iⁿ yāⁿ.

³ Jesús caⁿ a yā chíi yā 'iⁿ yāⁿ s'eeⁿ: ¿'Áa nguée n'geeⁿ nī táacā diiⁿ David miiⁿ ndúúcu 'iⁿ yāⁿ chí cueⁿé ndúúcu sa taachi chíi cuiicú yā?

⁴ David miiⁿ sndáa yā ná yáacú yeⁿé Ndyuūs ní sta'á yā pan chí canée na mesa yeⁿé nátaí. Ní che'e yā ní ca'a

yā chi che'e 'i'i'yā" chi nduucú yā. Pan mii" dāmaā" chiiduú s'ee" cuuvi che'é yā. Ní tan'dúúca chí nga" na ley mii" nguée canée chí che'e rey David ní nguée canée chí che'é 'i'i'yā" chi ndúúcu yā. ⁵ ¿Áá nguée n'gee" ndís'tií na ley ye"e Moisés chi diií" chííduú s'ee"? Nguée ntaavi'tuunúú" yā ye"e ntii"nyu" ye"e yaācū tīnūu" nguuví chi ntaavi'tuunúú" 'i'i'yā". Chiidu s'ee" nguée dií" yā tan'dúúca chí nga" na ley ye"e Moisés ní nguée nuu"ndi ye"é yā. ⁶ 'Úú nga"á ngii ndís'tií chi véé 'áámá 'i'i'yā" chi ch'εete ca yā chi yaācū templo ní canee yā ndúúcu ndís'tií. ⁷ Ndís'tií nguée déenu nī d'εe chi ne"e caa"ma" chi canée nguū" na libro ye"é Ndyuūs ye"e chuū: Ne"é chi 'i'i'yā" ya'āi 'iinú yā 'i'i'yā" caavā 'úú. Nguée ne"é chi 'caa"nu" yā 'iiti ní tée yā 'iiti caavā ofrenda ye"é 'úú. Nduuti chí cadíínuu" nī tuu'mi ní nguée dií" nī condenar 'i'i'yā" chi nguée nuu"ndi ye"e yā. ⁸ Tíicā Sa"ā chi Dāiyá Dendyuūs mii" véé ntúú" poder ye"e sa ye"e nguuví chí ntaavi'tuunúú" 'i'i'yā".

Sa"ā chi ntí'i ta'ā sa

(Mr. 3.1-6; Lc. 6.6-11)

⁹ Cuayiivi ní Jesús che"e yā na yaācū sinagoga ye"é 'i'i'yā" ye"e yaā" mii". ¹⁰ Quin'diichí nī. Mii" ní canée 'áámá sa"ā chi ntí'i ta'ā sa. Snée 'i'i'yā" mii" chi tiinguunée" yā Jesús mii" ní ca"na yā: ¿Áá canée na ley ye"e yú chí nduuvā ye"é 'i'i'yā" nguuví chi ntaavi'tuunúú" 'i'i'yā"? Chuū ní ca"na yā ti ne"é yā cuuvi caa"ma" yā núú"ndí ye"e Jesús mii".

¹¹ Jesús ca"na yā chii yā 'i'i'yā" s'ee": ¿Dú'u 'aama sa"ā nguaa"

ndís'tií chi véé 'áámá 'iiti cuūchí ye"é sa? Ní ndúúti chí cun'daa nuú" tī na 'áámá yiivi yā"āa nguuví chí ntaavi'tuunúú" 'i'i'yā", ¿áá nguée ntuun'dāa sa 'iiti nguuví mii"?

¹² ¿Áá nguée ya"ai ca chii'vē 'áámá 'i'i'yā" nguée ti 'áámá 'iiti cuūchí? 'Tíicā dii" yú chí n'daācā nguuví chí ntaavi'tuunúú" 'i'i'yā".

¹³ Tuu'mi ní Jesús ca"na yā chii yā sa"ā chí ya'āi ye"é sa: N'doo dí ta'a di. Sa"ā mii" ní n'doō sá ta'ā sa ní ta'ā sa nduūvi n'dáacā tan'dúúca taama. ¹⁴ 'I'i'yā" fariseos nan'dāa yā ch'εeti yaācū ní nduuvidaamá yā chí ca"na yā contra ye"e Jesús mii" ti ne"é yā 'caa"nú" yā 'i'i'yā".

'Áámá nduudu chí caa"ma" ye"e Jesús

¹⁵ Taachí Jesús chicadíínuu" yā chuū nan'daa yā mii". Neené 'yaa" 'i'i'yā" cue"e yā ndúúcu Jesús mii" ní Jesús mii" idií" yā chí nduūvā ye"e nducyáacá 'i'i'yā". ¹⁶ Ní ca"na yā chii yā 'i'i'yā" s'ee" chi nguée caa"ma" yā cuuví yā taná"ā 'i'i'yā" du'u yā. ¹⁷ Ní 'iicu cuaacu chí profeta Isaías mii" ca"na yā ndii cuáá" vmnaa" taachí dinguu" yā 'tíicā. Ndyuūs nga"na yā:

¹⁸ Sá"na 'cūū nī idichí'vē 'úú. 'Úú chínndēēvē sa"á 'cūū chi ne"é ní neene yeenú ndúúcu sa. 'Úú ní cu'neé" Espíritu N'dai ye"é vmnáá" ye"e sa. Sa"á 'cūū caa"ma" sa ye"e ley ye"é nanáá" nducyáacá naciónes na i"yee"dí 'cūū.

¹⁹ Nguée 'cuu"ma" sa ndíí nguée ndúú 'cuāi ra sa. Mar 'áámá 'i'i'yā" na yúúní nguée 'caandiveé" yā nduudú ye"e

sa ti nguée caaⁿmaⁿ yúúdu sa
cuaaⁿ na yúúní.

²⁰ Saⁿá cūū nginne sa 'iⁿyāⁿ
chi véé ca cuidados yeⁿe yā,
'iⁿyāⁿ chi tan'dúúca 'áámá
taaⁿ ndúú chí 'aa ndeētúú 'tée
'tée, 'tiicá yā. Ndíí nguée ndúú
chí ntuūvi sa 'aama mecha
yeⁿe quinque chí ican'dáa
ca 'yaaⁿmiⁿ yeⁿe. Ndíí nguée
candée sa nduudu cuaacu
yeⁿe Ndyuūs ndii taachi a
fuerza 'āa cuée de'e vee chi
cuchee sa ndúúcu vaadi
cuaacu miⁿ yeⁿe tanducuéⁿē.

²¹ Ní 'íicú nducyáácá 'iⁿyāⁿ yeⁿe
naciones yeⁿe iⁿyeedí cūū
cūnee ngíínú yā yeⁿe saⁿá
'cūū chi cu'téenu yā yeⁿe sa.

**'Iiⁿyāⁿ ngaⁿá yā chi Jesús véé poder
yeⁿe yááⁿ'nguiinūⁿ ndúúcu yā**

(Mr. 3.19-30; Lc. 11.14-23; 12.10)

²² Tuuⁿmi ní 'iⁿyāⁿ ndaa yā nanááⁿ
Jesús ní ndée yā 'áámá saⁿā chi
cane sa ndúúcu espíritu yeⁿe
yááⁿ'nguiinūⁿ yeⁿe chi ngueenáaⁿ
sa ndúúcu chi nguée ngii ngaⁿa
sa. Jesús miⁿ dííⁿ yā chi nduūvā
yeⁿe sa. Ní saⁿā chi ngueenáaⁿ
miⁿ ní inaaⁿ sa ní ngíí ngaⁿā sa.
²³ Nducyaaca 'iⁿyāⁿ ngeⁿe yiinú yā
ní ngaⁿa yā: ¿Áá sáⁿa 'cūū Daiya
'iⁿyāⁿ chí ndaataa yeⁿe David?

²⁴ Ní taachi 'iⁿyāⁿ fariseos
ch'iindiveéⁿ yā chuū ní caⁿa yā:
Sáⁿa 'cūū nitun'dáa sa espíritu yeⁿe
yááⁿ'nguiinūⁿ cáávā Beelzebú, chí
Satanás chí ngaⁿā ntiiⁿnyuⁿ sa yeⁿe
espíritus yeⁿe yááⁿ'nguiinūⁿ.

²⁵ Jesús miⁿ déenu yā chi
nadacadíinūⁿ 'iⁿyāⁿ s'eeⁿ ní caⁿa
yā chii yā 'iⁿyāⁿ s'eeⁿ: 'Áámá

gobierno chi ngaⁿa ntiiⁿnyúⁿ yā
yeⁿe yáⁿāa chí véé 'uūvi partido
yā chí nguⁿu yā 'áámá yā ndúúcu
taama yā, tuuⁿmi ní nguée
cuuvi 'naaⁿ chí 'iⁿntyéⁿe yā. Ní
nducuéⁿē yáⁿā o va'ai naachi
'iⁿyāⁿ véé 'uūvi vaanicadíinūⁿ
yeⁿe yā nguée cuuvi nduuvidaamá
yā. ²⁶ Tiicá ntúūⁿ nduuti chí
yááⁿ'nguiinūⁿ tun'dáa sa espíritus
yeⁿe yááⁿ'nguiinūⁿ véé 'uūvi
vaanicadíinūⁿ yeⁿe sa ní cuáácú
chí nguⁿu sa yeⁿe maaⁿ sa ní véé
'uūvi partido yeⁿe sa ní 'cuiinu
sa. ²⁷ Ndís'tii ní ngaⁿa nī chí 'úú
itun'dáa espíritu yeⁿe yááⁿ'nguiinūⁿ
yeⁿe 'iⁿyāⁿ ndúúcu poder yeⁿe
Beelzebú chí Satanás chí ngaⁿa
ntiiⁿnyuⁿ sa yeⁿe espíritus yeⁿe
yááⁿ'nguiinūⁿ. Ndúúti chí 'tíicā
tuuⁿmi ní, ¿ndúúcu du'ū rá poder
yeⁿe tun'dáa 'iⁿyāⁿ chí ndúúcu nī
espíritu yeⁿe yááⁿ'nguiinūⁿ? Chííⁿ
chí diiⁿ 'iⁿyāⁿ chí ndúúcu nī ngiⁿi
yā chí nguée 'tíicā chí ngaⁿā ní.
²⁸ Ndúúti chí 'úú itun'dáa espíritus
yeⁿe yááⁿ'nguiinūⁿ cáávā poder
yeⁿe Espíritu N'dai yeⁿe Dendyuūs,
cuaacu níⁿnyúⁿ naachí Ndyuūs
ngaⁿa ntiiⁿnyúⁿ yā ndaa nanááⁿ
ndis'tii.

²⁹ Mar 'áámá 'iⁿyāⁿ nguée cuuvi
cundaa yā va'ai yeⁿe 'aama saⁿā chí
véé fuerzas yeⁿe sa ní diví yā chí
vee yeⁿe sa. ¿Canée chí cachiihí yā
saⁿa vmnááⁿ vmnaaⁿ? Cuayiivi ní
cuuví dííⁿ yā tun'dáa yā dendu'ū chí
snúūⁿ va'ai yeⁿe sa.

³⁰ 'Iiⁿyāⁿ chí nguée canée yā lado
yeⁿe, 'iⁿyāⁿ miⁿ canée yā contra yeⁿe.
'Iiⁿyāⁿ chí nguée dáámá dííⁿ yā cosechar
nduucú, tuuⁿmi ní dííⁿ yā tan'dúúca chí
ingée tanducuéⁿē cosecha.

³¹Chííⁿ chí nduudu cuaacu chí 'úú ngaⁿá ngíí ndís'tií: Tanducuéⁿē nuuⁿndi chí dííⁿ 'iiⁿyāⁿ ndúúⁿcū nduudu taaⁿ chí nguéeⁿ n'dáacā chí ngaⁿa yā contra yeⁿe Ndyuūs, Ndyuūs nadach'ēecū yā yeⁿe yā. Naati 'iiⁿyāⁿ chí ngaⁿa yā nduudu taaⁿ chí nguéeⁿ n'dáacā chí contra yeⁿe Espíritu N'dai yeⁿe Ndyuūs ní nguéeⁿ nch'ēecū yēⁿe yā maaⁿ ní tiempo chí cuchíi. ³²Āā du'ú nūuⁿ chí caaⁿmaⁿ nduudu chí nguéeⁿ n'dáacā contra yeⁿe Saⁿā chí Daiyá Ndyuūs ní cuuvi nach'ēecu yeⁿe yā. Naati 'iiⁿyāⁿ chí nguéeⁿ n'daācā ngaⁿa yā contra yeⁿe Espíritu N'dai yeⁿe Ndyuūs ní nguéeⁿ cuuvi nach'ēecū yeⁿe yā ndíí nguéeⁿ ndúú na iⁿyeeⁿdí 'cūū ndíí nguéeⁿ ndúú táámá iⁿyeeⁿdi chí cuchíi.

'Áámá yáⁿá ní ngíⁿi cucáāvā n'guíⁱ yeⁿē

(Lc. 6.43-45)

³³Tiicá ntúūⁿ caⁿa Jesús: Ndúúti chí véé 'áámá yáⁿá chí n'dáacā yeⁿē ní tuuⁿmi ní cuuvi n'guíⁱ n'dáacā yeⁿē. Níicú ndúuti chí véé 'áámá yáⁿá chí nguéeⁿ n'daācā yeⁿē ní nguēe n'dáacā cuuvi n'guíⁱ yeⁿē. Cáāvā n'guíⁱ yeⁿe yáⁿá ituumicadínuuⁿ yā táacā yáⁿá nduuti chí n'dai o nduuti chí nguéeⁿ n'dai. ³⁴Ndís'tií, tan'dúúⁿcā ndaata yeⁿē cúú 'tiicá nī. ¿Táacā ngaⁿa nī cosas chí n'daācā ní idííⁿ nī chí nguēe n'daācā? Tí chííⁿ chí ngaⁿa nī ndúúⁿcū cheendí nī ngiica na staava yeⁿē nī. ³⁵Saⁿā chí n'dái idiiⁿ sa dendúú chí n'daācā chí nadacadínuuⁿ sa na staava yeⁿe sa chí n'daācā. Saⁿa chí cunnⁿcāā idiiⁿ sa tanducuéⁿē chí nguēe n'daācā

nadacadínuuⁿ sa caati staava yeⁿe sa nguéeⁿ n'dáacā. Nduudu chí ngaⁿā sa ngiica sa yeⁿē chí ndiituú na staava yeⁿe sa. ³⁶Naati 'úú ní ngaⁿā ngíí ndís'tií: Nducuéⁿē nduudu chí nguéeⁿ de'ē vee chíí'vē chí 'iiⁿyāⁿ ngaⁿa yā, nducyááca yā ní cánéeⁿ chí ncaⁿá yā cuenta yeⁿe nduudu chí nguēe n'daācā chí caⁿa yā nguuvi chí Ndyuūs caaⁿmaⁿ yā yeⁿe nuuⁿndi yeⁿe yā. ³⁷Tí cáāvā nduudu yeⁿe nī chí n'daācā nduuví n'dai nī ní 'iicu cáāvā nduudu yeⁿē nī nduuti chí nguéeⁿ n'dáacā cuuví ní castigo.

'Iiⁿyāⁿ chí nguéeⁿ n'daācā néⁿe yā snaaⁿ yā señales

(Mr. 8.12; Lc. 11.29-32)

³⁸Tuuⁿmi ní n'duuví maestros yeⁿe ley ndúúⁿcū n'duuví saⁿā fariseos ngaⁿa sá ngii sa Jesús miiⁿ ní caⁿa sa: N'díí maestro, néⁿe 'nū snaaⁿ 'nū 'áámá señal chí dííⁿ nī.

³⁹Jesús nán'guēecútaⁿa yā yeⁿe saⁿā s'eeⁿ ní caⁿa yā: 'Iiⁿyāⁿ cunnⁿcāā ndúúⁿcū 'iiⁿyāⁿ chí nguéeⁿ i'téenu yā Ndyuūs neⁿe yā snaaⁿ yā señal naati señal nguéeⁿ snaaⁿ yā. Dámaaⁿ snaaⁿ yā señal yeⁿe profeta Jonás chí ndíí cuaaⁿ vmnaaⁿ canee nguūⁿ na libro yeⁿe Ndyuūs. ⁴⁰Tí tan'dúúⁿcā Jonás canúúⁿ sá chēeti 'yaācā ch'ēete 'iīnū nguuví 'iīnū n'gaaⁿ 'tíicā canee chí cūnee Saⁿā chí Daiyá Ndyuūs mááⁿ yáⁿā 'cúú 'iīnū nguuví 'iīnū n'gaaⁿ. ⁴¹Na nguuví yeⁿe juicio 'iiⁿyāⁿ chí ch'ēetinée yā na yáāⁿ chí nguuví Nínive nducúeeⁿ yā contra yeⁿe 'iiⁿyāⁿ chí snéeⁿ maaⁿnguuví taachí Ndyuūs caaⁿmáⁿ yā yeⁿē nuuⁿndi yeⁿe 'iiⁿyāⁿ, ní cuuví yā

condenado. 'Tífcā tí 'iiⁿyāⁿ yeⁿe yááⁿ Nínive ní ndaacadaamí yā taachi profeta Jonás miiⁿ ndii cuááⁿ vmnaaⁿ caⁿa sá nduudu cuaacu yeⁿe Ndyuūs. Cuin'diichí nī 'áámá saⁿā chi ch'ēete ca nguéé tí profeta Jonás miiⁿ canee sa 'muuⁿ na lugar 'cūū. ⁴²'Tiicá ntūūⁿ nguuvi yeⁿe juicio n'daataá reina chí tiempo chí ch'óo ngaⁿā ntiⁿnyuⁿ tá yeⁿe lado yeⁿe Sur caⁿa tá nducueeⁿ tá contra yeⁿe 'iiⁿyāⁿ chi snée yā maaⁿnguui taachi Ndyuūs caāⁿmáⁿ yā nuuⁿndi yeⁿé 'iiⁿyāⁿ. Ní táⁿā miiⁿ ní diiⁿ tá condenar 'iiⁿyāⁿ chi snée yā maaⁿnguui ti táⁿā miiⁿ ndaā tá ndíí na yaⁿai taavi yeⁿe yáⁿā. Ní ngiica tá ní ch'iindiveeⁿ tá yeⁿe vaadi deenu yeⁿe rey Salomón. Cuin'díichí nī 'áámá saⁿā chi ch'ēete ca vaadi deenu yeⁿe sa canee sa 'muuⁿ nguéé ti Salomón miiⁿ.

Espíritu yeⁿe yááⁿn'guiniūⁿ chí nanguēcunée na saⁿā

(Lc. 11.24-26)

⁴³Caⁿa Jesús: Taachí espíritu yeⁿe yááⁿn'guiniūⁿ nacan'daa na 'áámá saⁿā cachiica na yáⁿā cuūⁿmáⁿ naachi nguē ch'ēetinée 'iiⁿyāⁿ ní n'nuūⁿ naachi cuuvi ntaaviⁿtuunūⁿ ní nguéé ndaācā. ⁴⁴Tuuⁿmi ní espíritu yeⁿe yááⁿn'guiniūⁿ ngaⁿa: Nanguēcuneeé na vaacú naachi chiicá. Taachí nguēcūnéee ní ndaā na vaacu miiⁿ ndaācā saⁿa miiⁿ ní tan'dúúca 'aama va'āi chí n'dai ní nduui deēv ndúúcu nducúⁿe na lugar yeⁿe. ⁴⁵Tuuⁿmi ní espíritu miiⁿ cueⁿe ní in'nuuⁿ tá ná ndēchē espíritus chí cunncaā ca chí cuuví maāaⁿ. Ní ndaā espíritu miiⁿ ndúúcu ndēchē espíritus ní

ch'ēetinée na saⁿā miiⁿ. Cuayiivi ní n'geenu sa ngii taavi ca ní cunncaā ca canee sa nguéé ti vmnaaⁿ. 'Tiicá ntūūⁿ 'cuenú yā cuuvi 'iiⁿyāⁿ chí snée yā maaⁿ ti nguē n'daācā idiíⁿ yā.

Chēcú Jesús miiⁿ ndúúcu 'dínu yā

(Mr. 3.31-35; Lc. 8.19-21)

⁴⁶Taachí Jesús miiⁿ índé yā ndúúcu 'iiⁿyāⁿ, tuuⁿmi ní ndaā nīⁿnuúⁿ chēcú yā ndúúcu 'dínu yā ní snée yā chuva'āi. Ní neⁿe yā ndé yā ndúúcu Jesús miiⁿ. ⁴⁷'Áámá 'iiⁿyāⁿ caⁿa yā chí yā Jesús miiⁿ: N'dii Jesús, cuin'díichí nī. Chēcú nī ndúúcu 'dínu nī snée yā chuva'āi ní neⁿe yā ndee yā ndúúcu nī.

⁴⁸Jesús nan'guēcútaⁿa yā ní caⁿa yā chí yā saⁿa miiⁿ: ¿Dúú chí chēcú miiⁿ? o ¿dúú chí 'diinú miiⁿ?

⁴⁹Ní n'doó yā ta'á yā naachi snée discípulos ní caⁿa yā: Cuin'diichí nī, 'iiⁿyāⁿ s'ūuⁿ ní tan'dúúca chí chēcú ndúúcu 'diinú, 'tíca yā. ⁵⁰Tí 'āa du'ú nūuⁿ 'iiⁿyāⁿ chí diíⁿ yā tan'dúúca chí neⁿe Chiidá chí canee yā ná va'ai chēti nguui tuuⁿmi ní 'iiⁿyāⁿ s'eeⁿ chí 'diinú ndúúcu víí ndúúcu chēcú.

'Áámá ejemplo yeⁿe sáⁿā chí ngiinū ndaata

(Mr. 4.1-9; Lc. 8.4-8)

13 Nguuvi miiⁿ Jesús can'daa yā va'āi miiⁿ ní ch'iindi yā nīⁿnuúⁿ ná nuūⁿnīⁿyáⁿā. ²Ní nééné n'deē 'iiⁿyāⁿ ndúúvidaamá yā naachi canée Jesús. Tuuⁿmi ní Jesús ndaa yā na 'áámá barco ní ch'iindí yā. Nducyáácá 'iiⁿyāⁿ snée yā 'diituu núuⁿnīⁿ naachi vee yáⁿā ndúútií. ³Ní Jesús caⁿa yā nééné

n'deēe nááⁿ ndúúcu parábolos
chí ejemplos tan'dúúca dendu'ú
chi véé iⁿ'yeeⁿdí'cū. Ní caⁿ'a yā
chuū: 'Áámá saⁿ'ā chi ngiīnū ndaata
can'dāa sa chiīnū sa ndaata. ⁴Taachí
chiīnū sa, 'áámá duutu ndaata míiⁿ
ní chiīya cyúúni. Ndaā 'yaadá ní
ch'iinu che'e tī. ⁵Náⁿ'ā duutu ndaata
miiⁿ ní chiīya na tuūu naachi nguée
ch'ēete yáⁿ'āa. Maaⁿ'ncheetē nūuⁿ
can'dāa ti nguée ch'ēete yáⁿ'āa yeⁿ'ē.
⁶Can'dāa 'yáⁿ'ā ní yaata miiⁿ ní ti'i ti
nguée dii'yu yeⁿ'ē. ⁷Iicu náⁿ'ā duutu
ndaata miiⁿ ní chiīya nguāaⁿ yááⁿ.
Yááⁿ miiⁿ ní ch'iita ní di'vaāchí yeⁿ'ē
yaata miiⁿ. ⁸Iicu náⁿ'ā duutu ndaata
miiⁿ ní chiīya na yáⁿ'āa n'dáacā ní
n'dáacā chiī cosecha yeⁿ'ē. 'Áámá
ní chiī 'áámá ciento yeⁿ'ē, taama
ní chiī 'iīnū ngēecu yeⁿ'ē, ní táámá
ní chiī ndíícu ndiichi yeⁿ'ē. ⁹Iiⁿ'yāⁿ
chi véé veéⁿ yā ní 'caandiveéⁿ yā
nduudu yeⁿ'é.

Chííⁿ chí neⁿ'ē caāⁿ'māⁿ ejemplo miiⁿ

(Mr. 4.10-20; Lc. 8.9-15)

¹⁰Tuu'mi ní discípulos ndaá yā
nanááⁿ Jesús miiⁿ ní caⁿ'a yā chiī
yā Jesús: ¿De'e cáávā chi ndúúcu
ejemplos ngi'cuaeⁿ ní 'iiⁿ'yāⁿ?

¹¹Jesús nan'guēcútaⁿ'a yā ní caⁿ'a
yā chiī yā discípulos yeⁿ'e yā: 'Āā
ndís'tíi nūuⁿ ndaācā chicadíínuuⁿ
ní dendu'ú chi canúúⁿ n'de'ei yeⁿ'e
naachí Ndyuūs ngaⁿ'a ntiiⁿ'nyúⁿ
yā ná va'ai chēeti nguuví, naatí
tanáⁿ'ā 'iiⁿ'yāⁿ s'eeⁿ nguée canéeⁿ chí
cadíínuuⁿ yā. ¹²Iiⁿ'yāⁿ chí véé yeⁿ'e
yā Ndyuūs ca'a cá yā ní n'deēe cá
cuuví yeⁿ'e yā. 'Iiⁿ'yāⁿ chí nguée véé
yeⁿ'e yā, 'áará chí dúú'ví nūuⁿ chí
nadacádíínuuⁿ yā chí véé yeⁿ'e yā
chuū ní Ndyuūs ndivíi yā yeⁿ'e yā.

¹³Cáávā chííⁿ chí ngaⁿ'á ngií 'iiⁿ'yāⁿ
ndúúcu ejemplos caati inaaⁿ yā
naati n'gēetinēe yā tan'dúúca chí
nguée inaaⁿ yā. Ní n'giindiveéⁿ yā
naati n'gēetinee yā tan'dúúca chí
nguée n'giindiveéⁿ yā ndíí nguée
ndúú tuumicadiinuⁿ yā. ¹⁴Ní 'íícu
cuuví cuaacu yeⁿ'e 'iiⁿ'yāⁿ s'eeⁿ chííⁿ
chí caⁿ'a profeta Isaías ndii cuááⁿ
vmnaaⁿ taachi caⁿ'a yā 'túúca ní
canéeⁿ nguūⁿ na libro yeⁿ'e Ndyuūs:

Ndúúcu veéⁿ yā 'caandiveéⁿ yā
ní nguē tuumicadíínuuⁿ yā;
ní snaaⁿ yā ní nguée ca'a yā
cuenta yeⁿ'ē.

¹⁵Caati staava yeⁿ'e 'iiⁿ'yāⁿ s'eeⁿ
ní chēechi. Ndúúcu veéⁿ yā
n'giindiveéⁿ yā naati nguée
tuumicadíínuuⁿ yā n'daācā.
'Iiⁿ'yāⁿ s'eeⁿ ní n'gaadí yā
nduutinaaⁿ yā caati nguée
snaaⁿ yā ndúúcu nduutinaaⁿ
yā; ní nguée 'caandiveéⁿ yā
ndúúcu veéⁿ yā, ndii nguē
ndúú ituumicadíínuúⁿ yā
ndúúcu staava yeⁿ'é yā, ndii
nguée ndúú ndaacadaamí yā
yeⁿ'ē nuuⁿndi yeⁿ'e yā chí 'úú
cuuví nadich'ēécú nuuⁿndi
yeⁿ'é yā.

¹⁶De'e chúúca n'dai ndís'tiī ti
véé nduutinaaⁿ ní chí inaaⁿ ní ní
veéⁿ ní chí n'giindiveéⁿ ní. ¹⁷Ti
cuaacu níⁿ'nyúⁿ 'úú Jesús ngaⁿ'á
ngií ndís'tiī chí neenē 'yaaⁿ 'iiⁿ'yāⁿ
profetas ndúúcu 'iiⁿ'yāⁿ chí n'dai
neⁿ'é yā snaaⁿ yā chííⁿ chí ndís'tiī
inaaⁿ ní naati nguée n'diichi yā.
Neⁿ'e yā 'caandiveéⁿ yā chííⁿ chí
ndís'tiī n'giindiveéⁿ ní naati nguée
ch'iindiveéⁿ yā.

¹⁸'Caandiveeⁿ ndís'tiī ejemplo
yeⁿ'e saⁿ'ā chí ngiīnū ndaata.

¹⁹ 'Iiⁿ'yāⁿ chí n'giindiveéⁿ yā nduudu yeⁿ'e naachí Ndyuūs ngaⁿ'a ntiiⁿ'nyúⁿ yā yeⁿ'ē va'ai cheeti nguuví ní nguée ituumicadiínuuⁿ yā, 'iiⁿ'yāⁿ s'eeⁿ tan'dúúca duutu ndaata chí chiiya cuaaⁿ cyúúni. Ndaa yááⁿ'n'guinūuⁿ ní sta'a sa nduudu yeⁿ'ē Ndyuūs chí canée na staava yeⁿ'ē yā. ²⁰ Ndaata chí chiiya nguaaⁿ tuūu ní tan'dúúca 'iiⁿ'yāⁿ chí n'giindiveéⁿ yā nduudu yeⁿ'ē Ndyuūs. Ní taachí n'giindiveéⁿ yā nduudu miiⁿ ní yeenú n'dai yā, ²¹ naati nguée 'áamá cānee na staava yeⁿ'ē yā ní nguée 'ááⁿ tiempo cūnee. Taachí n'géenu yā ngii ti 'iiⁿ'yāⁿ cān'daa yā 'iiⁿ'yāⁿ s'eeⁿ cáavā nduudu yeⁿ'ē Ndyuūs, tuu'mí nūuⁿ diví yā nduudu miiⁿ ní nguée canée na staava yeⁿ'ē yā. ²² Ndaata chí chiiya nguaaⁿ yááⁿ ní tan'dúúca 'iiⁿ'yāⁿ chí ch'iindiveéⁿ yā nduudu miiⁿ naati neⁿ'e cá yā nducuéⁿ'ē yeⁿ'ē iⁿ'yeeⁿ'dí 'cūū ndúúcu chí véé. Ní nginnche'éei yā 'iiⁿ'yāⁿ. Ní vaadi 'cuiica miiⁿ di'vaachíi yeⁿ'ē nduudu miiⁿ ní diiⁿ chí nguée dichí'vē nduudu miiⁿ na vida yeⁿ'e 'iiⁿ'yāⁿ s'eeⁿ. ²³ Ndaata chí chiiya na yáⁿ'āa n'dáacāa chíⁿ chí tan'dúúca 'iiⁿ'yāⁿ chí n'giindiveéⁿ yā nduudu yeⁿ'ē Ndyuūs ní tuumicadiínúuⁿ yā ní i'téenu yā nduudu miiⁿ. Ní n'daācā idiíⁿ yā. Ní nduudu miiⁿ tan'dúúca chí chíi 'aama ciento yeⁿ'ē o chí chíi 'iinū ngeecu yeⁿ'ē o chí chíi ndiicú ndiichi yeⁿ'ē. 'Tífcā chíi cosecha yeⁿ'ē nduudu miiⁿ.

Ejemplo yeⁿ'ē yaātā chí nguée n'daācā chí véé nguaaⁿ trigo

²⁴ Jesús miiⁿ ngaⁿ'a yā ngii yā 'iiⁿ'yāⁿ s'eeⁿ: Cuuví ndís'tii táamá ejemplo. Ní caaⁿ'máⁿ yeⁿ'e naachí

Ndyuūs ngaⁿ'a ntiiⁿ'nyúⁿ yā yeⁿ'ē na va'ai cheeti nguuví ní tan'dúúca 'áamá saⁿ'ā chí ngiinū sa ndaata yeⁿ'e trigo chí n'daācā na campo yeⁿ'ē sa. ²⁵ Taachí mozos cyaadu sa, tuu'mi ní saⁿ'ā chí enemigo yeⁿ'ē sa ndaā sa ní chiinū sa 'daaⁿ'nuⁿ trigo na campo yeⁿ'e saⁿ'ā miiⁿ nguaaⁿ trigo chí n'daācā miiⁿ, ní cūnaⁿ'a sa. ²⁶ Taachí can'daa yaata yeⁿ'ē ní chíi trigo, tuu'mi ní can'daa nguuví 'daaⁿ'nuⁿ trigo miiⁿ. ²⁷ Tuu'mi ní mozos chí idiíⁿ sa ntiiⁿ'nyuⁿ na campo miiⁿ ndaa sa nanááⁿ saⁿ'a chí 'iivi yeⁿ'e campo miiⁿ ní caⁿ'a sa chíi sa 'iivi: N'díi Señor, ¿'áá nguée chiinū ndaata yeⁿ'e trigo chí n'daācā na campo yeⁿ'e ní? ¿Tíi chíicā ndaata 'daaⁿ'nuⁿ trigo? ²⁸ Saⁿ'ā 'iivi miiⁿ ní caⁿ'a sa chíi sa mozos chí idiíⁿ ntiiⁿ'nyuⁿ: 'Áamá saⁿ'ā enemigo yeⁿ'ē niinū sa. Mozos ní caⁿ'a sa chíi sa 'iivi sa: ¿'Áá neⁿ'e ní chí caⁿ'a 'nū ní tiicu 'nū yaātā miiⁿ chí nguée n'daācā? ²⁹ 'Ivi miiⁿ ní caⁿ'a sa chíi sa mozos chí idiíⁿ ntiiⁿ'nyuⁿ: Nguée tiicú di 'daaⁿ'nuⁿ trigo miiⁿ caati cuuví tiicú ntúuⁿ di trigo chí n'daācā miiⁿ. ³⁰ Ca'a di lugar chí dáamá 'cuiita ndíi taachi ndaa tiempo yeⁿ'e cosecha miiⁿ, tuu'mi ní 'úu caaⁿ'máⁿ cuuví 'iiⁿ'yāⁿ chí 'caacá yā trigo miiⁿ chí 'caacá yā vmnááⁿ vmnaaⁿ 'daaⁿ'nuⁿ trigo miiⁿ ní dichiihí yā caadi ticuaá ní 'neeⁿ yaⁿ'a yā. 'Cuiinu maaⁿ ní nandé yā trigo miiⁿ ní 'cuíi yā cheeti díínūuⁿ.

'Áamá ejemplo yeⁿ'ē ndaata yeⁿ'ē yiiivē ntíi'yāa

(Mr. 4.30-32; Lc. 13.18-19)

³¹ Táamá ejemplo Jesús caⁿ'a yā chíi yā 'iiⁿ'yāⁿ s'eeⁿ: Naachí Ndyuūs ngaⁿ'a

ntii'nyúⁿ yā na va'ai cheeti nguuví
ní tan'dúúca 'aama nduutií yeⁿe yíivē
ntíí'yāa chí 'áámá saⁿā stā sa ní
chiinū sa na yáⁿāa yeⁿē sa. ³²Ndaata
yíivē ntíí'yāa 'cūū ní 'liiⁿ ca nguéé ti
tanducuéⁿē ndaata. Taachí n'giita
yaātā miiⁿ, tuu'mi ní ch'ēete ca chí
cuuvi tanáⁿā yaātā. Ní chíi yáⁿá. Ní
ndaá 'yáádá yeⁿē nanguuvi ní din'dái
tí 'deēce tí na dúuⁿnē yáⁿá miiⁿ.

Ejemplo yeⁿe levadura yeⁿe pan

(Lc. 13.20-21)

³³Táámá ejemplo Jesús caⁿa yā
chii yā 'iiⁿyāⁿ s'eeⁿ: Naachí Ndyuūs
ngaⁿa ntii'nyúⁿ yā yeⁿē na va'ai
cheeti nguuví ní tan'dúúca 'áámá tááⁿ
levadura yeⁿe pan. 'Áámá n'daataá
sta'a tá levadura miiⁿ ní chistaⁿā tá
nguaaⁿ 'iinū medida yeⁿe harina ndíí
chí nan'guiita tanducuéⁿē yaāchí yeⁿē.

Chuū chí ngaⁿā Jesús miiⁿ ndúúcu ejemplos

(Mr. 4.33-34)

³⁴Tanducuéⁿē chuū ngi'cueeⁿ
Jesús ní caⁿa yā chíi yā 'iiⁿyāⁿ s'eeⁿ
ndúúcu ejemplos. Ní nduuti chí
nguéé ndúúcu ejemplos yeⁿe chí véé
iⁿyeeⁿdí 'cūū, nguéé ngi'cueeⁿ yā
'iiⁿyāⁿ s'eeⁿ. ³⁵Ní 'iicu cuuvi cuaacu
chí caⁿa profeta ndii cuááⁿ vmnaaⁿ
taachí caⁿa yā 'túúca. Ní canéé
nguūⁿ ná libro yeⁿē Ndyuūs 'túúca:

Caaⁿmāⁿ ndúúcu ejemplos.

Ca'cueéⁿ dendu'ū chí canúúⁿ
n'de'ei ndíí taachi Ndyuūs
din'dái yā iⁿyeeⁿdí.

**Jesús ngaⁿa yā yeⁿe chí neⁿe
caaⁿmāⁿ ejemplo yeⁿe trigo**

³⁶Tuu'mi ní Jesús yaa'vi yā 'iiⁿyāⁿ
s'eeⁿ chí cunaⁿá yā na vaacú yā.

Jesús ntúúⁿ cunaⁿa yā ní snda
yā 'áámá va'ai. Discípulos yeⁿe yā
nndaa yā nanááⁿ Jesús, ní caⁿa yā
chii yā 'iiⁿyāⁿ: N'dií, Jesús, ca'cuéeⁿ
ní chí neⁿe caāⁿmaⁿ ejemplo yeⁿe
'daaⁿnuⁿ trigo chí véé nguaaⁿ trigo
na campo.

³⁷Jesús nan'guεεcútaⁿa yā ní
caⁿa yā chíi yā 'iiⁿyāⁿ s'eeⁿ: 'Iiⁿyāⁿ
chí ngiinu ndaata chí trigo chí
n'dáacā, 'iiⁿyāⁿ miiⁿ chí Saⁿā chí
Daiya Ndyuūs. ³⁸Campo miiⁿ ní
tan'dúúca iⁿyeeⁿdí 'cūū. Ndaata chí
n'dáacā miiⁿ ní tan'dúúca nducyáácá
'iiⁿyāⁿ chí daiya Ndyuūs ní yeⁿē
naachi Ndyuūs ngaⁿa ntii'nyúⁿ
yā. Yaātā yeⁿe ndaata chí nguéé
n'daācā ní tan'dúúca 'iiⁿyāⁿ chí
nguéé n'daācā idiíⁿ yā, 'iiⁿyāⁿ s'eeⁿ
chí daiya yááⁿn'guiinūⁿ. ³⁹Saⁿā
chí chíinū sa 'daaⁿnuⁿ trigo miiⁿ
ní tan'dúúca maāⁿ yááⁿn'guiinūⁿ.
Ní cosecha yeⁿē miiⁿ ní tan'dúúca
chí 'cuiinu iⁿyeeⁿdí. Saⁿā s'eeⁿ chí
ita'a sa cosecha miiⁿ ní tan'dúúca
ángeles. ⁴⁰Tan'dúúca chí tiicú yā
'daaⁿnuⁿ trigo ní nadidáámá yā ní
'neeⁿ yaⁿa yā, 'tíicā cuuvi tiempo
taachi 'cuiinū iⁿyeeⁿdí 'cūū. ⁴¹Saⁿā
chí Daiya Ndyuūs ní dichó'o yā
ángeles yeⁿe yā chí nadidáámá
yā 'iiⁿyāⁿ chí yeⁿē naachí Ndyuūs
ngaⁿa ntii'nyúⁿ yā. Niicú tun'dáa
yā nducyaaca 'iiⁿyāⁿ chí dííⁿ yā chí
náⁿa yā idiíⁿ nuuⁿndí yā ndúúcu
'iiⁿyāⁿ chí idiííⁿ chí nguεε n'daācā.
⁴²Ní cu'nuúⁿ yā 'iiⁿyāⁿ na nguuchí
yaⁿā. Mííⁿ 'iiⁿyāⁿ s'eeⁿ ní cuεεcú
yā ní che'e 'diííⁿyúⁿ yā. ⁴³Tuu'mi
ní 'iiⁿyāⁿ chí n'dái nanááⁿ Ndyuūs
cuuvi deēv yā ngii tan'dúúca 'yáⁿā
taachi 'āa snée yā naachi Ndyuūs
Chiidá yā ngaⁿa ntii'nyúⁿ yā na

va'ai cheeti nguuví. Ndís'tií chí vée
veéⁿ ní 'caandiveéⁿ ní nduudu yeⁿé.

**Ejemplo yeⁿe vaadi 'cuiica
chí canúúⁿ n'de'ei**

⁴⁴Caⁿa ca Jesús miiⁿ táamá
ejemplo: Naachí Ndyuús ngaⁿa
ntiiⁿnyúⁿ yā yeⁿé va'ai cheeti
nguuví ní tan'dúúca vaadi 'cuiica
chí canúúⁿ n'de'ei na 'áamá campo.
'Áamá saⁿā ní ndaācā sa vaadi
'cuiica miiⁿ ní cunuⁿ n'dé'ei ntúūⁿ
sa lugar miiⁿ. Yeenú taavi sa.
Cunaⁿa sa ní n'diicui sa tanducuéⁿē
chí vée yeⁿé sa ní cuái sa campo
miiⁿ.

**Ejemplo yeⁿé 'áamá perla
chí yaⁿai taavi chí'vē**

⁴⁵Tiicá ntúūⁿ. Naachí Ndyuús
ngaⁿa ntiiⁿnyúⁿ yā na va'ai cheeti
nguuví ní tan'dúúca 'áamá saⁿā chí
n'diicui sa chí in'nuuⁿ sa perlas chí
yaⁿai taavi chí'vē. ⁴⁶Taachí ndaācā
sa 'áamá perla chí n'deēveé ní yaⁿai
taavi chí'vē, tuuⁿmi ní cuinaⁿā sa ní
n'diicui sa tanducuéⁿē chí vée yeⁿé
sa ní nícú cuai sa perla miiⁿ.

Yeⁿe ejemplo yeⁿe yaānā

⁴⁷Tiicá ntuūⁿ. Naachí Ndyuús
ngaⁿa ntiiⁿnyúⁿ yā na va'ai
cheeti nguuví ní tan'dúúca 'áamá
yaānā chí saⁿā n'gaa nuúⁿ sa na
nuūⁿnīⁿyáⁿā ní ita'āa nducuéⁿē naaⁿ
'yaācā. ⁴⁸Taachí 'āa ndiituú yaānā
miiⁿ, intun'dáa yā cuaaⁿ 'diituú
nuūⁿnīⁿyáⁿā miiⁿ. Ní n'daaviyá yā
ní nan'guaáⁿ yā 'yācā chí n'daācā.
N'gií yā 'iiti 'cuéētē. Ní 'iiti chí
nguéeⁿ n'dáacā miiⁿ nginngée yā
'iiti. ⁴⁹Tiicá cuuvi taachi 'cuiiū
iⁿ'yeeⁿdí 'cūū. Nandaā ángeles

ní tun'dáa yā 'iⁿ'yāⁿ chí n'dai yā
nguaaⁿ 'iⁿ'yāⁿ chí nguēē n'dáacā
idiíⁿ yā. ⁵⁰Ní 'cuíi yā 'iⁿ'yāⁿ chí
nguéeⁿ n'daācā ná nguuchi yaⁿā. Mííⁿ
'iⁿ'yāⁿ s'eeⁿ cueⁿe daāⁿmaⁿ cuēecú
yā ní cueⁿe daāⁿmaⁿ chéé 'diiⁿ'yuⁿ
yā.

**Ejemplo yeⁿé vaadi 'cuiicá
ngai ndúúcu chí ndiicúū**

⁵¹Jesús tiinguuneeⁿ yā 'iⁿ'yāⁿ
s'eeⁿ: ¿Áa tuumicádíínuuⁿ ndís'tií
tanducuéⁿe dendu'ū chí 'túúca?
'Iiⁿ'yāⁿ s'eeⁿ ní n'guēecútaⁿa yā:
'Tiicá Señor.

⁵²Jesús ní caⁿa yā chíi yā 'iⁿ'yāⁿ
s'eeⁿ: 'Áamá 'aama maestro yeⁿé
ley chí'neeⁿ yā yeⁿe naachi Ndyuús
ngaⁿa ntiiⁿnyúⁿ yā na va'ai cheeti
nguuví, maestro miiⁿ ní cuuví yā
tan'dúúca 'áamá patrón chí vée
vaadi 'cuiica yeⁿe sa na va'ai yeⁿé
sa. Ní deenu sa táacā tun'dáa sa
yeⁿe vaadi 'cuiica yeⁿé sa dendu'ū
cosa chí ngai ndúúcu cosa chí
ndiicúū.

**Jesús canee yā na yāāⁿ Nazaret
(Mr. 6.1-6; Lc. 4.16-30)**

⁵³Taachí Jesús miiⁿ chí'ínú caⁿá
yā nduudu 'cūū, cueⁿé yā yeⁿé
miiⁿya. ⁵⁴Ní ndaá yā yāāⁿ vaacú yā
chí nguuví Nazaret ní ngi'cueeⁿ yā
yaācú sinagoga miiⁿ. 'Iiⁿ'yāⁿ s'eeⁿ ní
cheⁿe yiinú yā yeⁿe chí chí'cueeⁿ
Jesús. Ní ngaⁿa yā: ¿Tií ndiicaá
vaadi déenu yeⁿé saⁿá 'cūū? ¿Táacā
cuuvi diiⁿ sa vaadi n'giinu chí idiíⁿ
sa? ⁵⁵Sáⁿa 'cūū chí daiya 'viichiyáⁿā
ní María nguūví cheecu sa. Ní 'dínú
sa ní Jacobo, ndúúcu José, ndúúcu
Simón, ndúúcu Judas. ⁵⁶Víⁿi ntúūⁿ
sa snee yā ndúúcu yú. ¿Tií ndiicaá

tanducuéⁿē vaadi deenú 'cūū chí ngí'cuéⁿ sa? ⁵⁷Ní cáávā chuū 'i'nyāⁿ yeⁿe yāāⁿ miiⁿ cuncāā caⁿa yā yeⁿe Jesús miiⁿ, ní nguéé 't'éénu yā yeⁿe yā. Naati Jesús ní caⁿa yā chíi yā 'i'nyāⁿ s'eeⁿ. Nguéé véé mar 'áámá profeta chí candee nduudu yeⁿé Ndyuūs chí 'i'nyāⁿ yeⁿē yāāⁿ vaacú yā ndúúcu 'i'nyāⁿ na vaacu yā dinéⁿe yā profeta miiⁿ.

⁵⁸Jesús miiⁿ nguéé neenē n'deēe vaadi n'giinu díⁿ yā miiⁿ caati 'i'nyāⁿ s'eeⁿ nguéé s't'éénu yā yeⁿe Jesús miiⁿ.

Ch'i'nnúⁿ yā Juan chí ngeedínuūⁿnīⁿ

(Mr. 6.14-29; Lc. 9.7-9)

14 Tiempo 'cūū saⁿa rey Herodes, chí gobernador yeⁿe yāⁿā Galilea, ch'iindiveeⁿ sá tan'dúúca chí 'i'nyāⁿ ngaⁿa yā yeⁿe Jesús miiⁿ. ²Ní rey miiⁿ caⁿa sa chíi sa mozos yeⁿē sa: Sáⁿā Jesús 'cūū ní Juan chí ngeedínuūⁿnīⁿ chí nduuchi sá yeⁿē nguaaⁿ tináⁿā. Ní cáávā chuū véé poder yeⁿē sa chí idiⁿ sa vaadi n'giinu.

³Rey Herodes miiⁿ ní 'i'nyāⁿ chí caⁿa ntiⁿnyúⁿ yā chí soldados sta'a sa Juan miiⁿ ní cāchiichí sa Juan ndúúcu cadenas ní chi'nuuⁿ sa Juan vácūū. 'Tífcā díⁿ rey miiⁿ cucáávā n'daataá yeⁿe yā chí nguuvi Herodías ti vmnáāⁿ vmnaaⁿ n'daataá miiⁿ ní n'daataá yeⁿē Felipe chí 'díínu rey miiⁿ. Ní diví rey miiⁿ táⁿā miiⁿ yeⁿe Felipe. ⁴'Tífcā díⁿ rey ndúúcu Juan chí ngeedínuūⁿnīⁿ ti Juan miiⁿ ngaⁿa sá ngii sa Herodes miiⁿ chí tan'dúúca chí ngaⁿa na ley, nguéé canee chí cuuvi n'daataá yeⁿē yā n'daataá miiⁿ.

⁵Rey Herodes miiⁿ ní neⁿe yā 'caaⁿnuⁿ yā Juan miiⁿ, naati 'va'á yā 'i'nyāⁿ yeⁿe yāāⁿ miiⁿ; ti 'i'nyāⁿ s'eeⁿ ní s't'éénu yā chí Juan miiⁿ ní 'i'nyāⁿ profeta chí dichó'o Ndyuūs.

⁶Taachí 'i'nyāⁿ díⁿ yā 'viicu yeⁿē cumpleaños yeⁿe Herodes miiⁿ, n'daataá 'lífⁿ daiya táⁿā Herodías miiⁿ nde'ei tá naavtaⁿā yeⁿe 'i'nyāⁿ s'eeⁿ. Ní rey Herodes miiⁿ ní chíi yeenú yā chí nde'ei tá ní caⁿa yā: ⁷Dii, n'daataá 'lífⁿ. 'Úú ngaⁿá ndúúcu nduudu, “por Dios”, chí teé dii 'āā de'ē nūuⁿ chí neⁿe di.

⁸Chæecu tá ni caⁿa yā chíi yā n'daataa 'lífⁿ miiⁿ de'ē chí caaca tá. Ní n'daata 'lífⁿ caⁿa ta chíi tá rey miiⁿ: N'dii rey, téé nī 'úú tiⁿ Juan chí ngeedínuūⁿnīⁿ cu'nuúⁿ chæeti 'áámá cu'u.

⁹Tuu'mi ní rey Herodes miiⁿ s'neeⁿ ndaachii yiinú yā; naati rey miiⁿ caati 'āā caⁿa yā ndúúcu nduudu, “por Dios”, ní ch'iindiveeⁿ 'i'nyāⁿ chí snée yā ndúúcu yā na mesa miiⁿ, caⁿa yā chí 'āā ca'a núúⁿ yā chíⁿ chí ngiica táⁿā miiⁿ. ¹⁰Caⁿa ntiⁿnyúⁿ yā chí 'caātā daandu Juan chí ngeedínuūⁿnīⁿ chí canúuⁿ sa vácūū. ¹¹Ní ndee sa tiⁿ yā miiⁿ sn'núúⁿ chæeti cu'u ní ca'a sa n'daata 'lífⁿ miiⁿ. Ní táⁿā miiⁿ ní ca'a tá chæecu tá.

¹²Tuu'mi ní discípulos yeⁿe Juan chí ngeedínuūⁿnīⁿ ndaá yā ní sta'á yā cuerpo yeⁿe Juan miiⁿ ní ch'iichi yā. Ní cheⁿe yā chíi yā Jesús miiⁿ tan'dúúca chí chíi.

Jesús ca'á yā che'e nyuⁿu mil 'i'nyāⁿ

(Mr. 6.30-44; Lc. 9.10-17; Jn. 6.1-14)

¹³Taachí Jesús miiⁿ ch'iindiveeⁿ yā chuū, cueⁿē yā ní sndáa yā na

'áamá barco, ní cueⁿe yā na 'áamá lugar cuēti naachi nguée 'iⁿyāⁿ. Taachí 'iⁿyāⁿ s'eeⁿ ch'iindiveén yā chuū, can'dáa yā yeⁿe yāāⁿ s'eeⁿ ní cueⁿe yā ndúúcu Jesús. ¹⁴Ní taachí Jesús miiⁿ nan'dáa yā ná barco miiⁿ, n'diichí yā n'dee n'dái 'iⁿyāⁿ, ní nnee ya'ai 'iinu yā 'iⁿyāⁿ s'eeⁿ. Ní dííⁿ yā chi nduūvā yeⁿé 'iⁿyāⁿ chi ngiitā chi ndaā ndúúcu 'iⁿyāⁿ chi candē yā 'iⁿyāⁿ s'eeⁿ. ¹⁵Ní taachí 'āā chiinu discipulos yeⁿe Jesús miiⁿ ndaā yā nanááⁿ Jesús ní caⁿ'a yā chii yā 'iⁿyāⁿ: 'Āā chí chínū maaⁿ, ní 'muuⁿ nguée n'geetinée 'iⁿyāⁿ. Yaa'ví ní 'iⁿyāⁿ s'tíi chí caⁿ'á yā cuááⁿ na yāāⁿ n'gaiyāā ní cuái yā chi che'e yā.

¹⁶Jesús caⁿ'a yā chii yā discipulos: 'iⁿyāⁿ s'tíi nguée cánée chí náⁿa yā. Ndís'tiī ca'a nī chi che'e yā.

¹⁷Discipulos ní caⁿ'a yā: Nguée tunéeⁿ chi che'e yā. Dámāāⁿ nyuⁿ'u panes ndúúcu na 'uūvī 'yaācā véé.

¹⁸Jesús caⁿ'a yā chii yā discipulos: Candē nī panes ndúúcu 'yaācā 'muuⁿ.

¹⁹Cuayiivi ní Jesús chii yā 'iⁿyāⁿ s'eeⁿ chí ch'etē yā ná yaātā miiⁿ. Jesús ní sta'a yā nduu nyúⁿ'ú panes miiⁿ ndúúcu 'uūvī 'yaaca ní n'diichí yā nanguuvi ní ca'a yā gracias Ndyuūs Chiidá yā. Cuayiivi ní n'dee yā panes ní ca'a yā discipulos yeⁿe yā. Discipulos miiⁿ ní ca'a yā 'iⁿyāⁿ chí snée miiⁿ. ²⁰Nducyáácá yā che'e yā ní chiitu 'iⁿyāⁿ. Ní discipulos nān'guaáⁿ yā chí nángaāva panes yeⁿe miiⁿ ndúúcu 'yaācā miiⁿ ní chiitu tá ndiichúúví 'cuētē. ²¹'iⁿyāⁿ chí che'e miiⁿ nyuⁿ'u mil ngii yā, ndii nguée chiduūche n'daataá, ndíi nguée ndúú da'caiyāa ra.

**Jesús ngiicá yā cuááⁿ vmnaaⁿ
nuūⁿnīⁿyáⁿā**

(Mr. 6.45-52; Jn. 6.16-21)

²²Cuayiivi ní Jesús caⁿ'a yā chii yā discipulos yeⁿe yā chí cundaa yā na barco ní caⁿ'á yā táamá 'díituú nuūⁿnīⁿyáⁿā, 'naaⁿ chí Jesús miiⁿ dííⁿ yā despedir yeⁿé 'iⁿyāⁿ.

²³Jesús dííⁿ yā despedir yeⁿé 'iⁿyāⁿ s'eeⁿ ní divíi yā yeⁿe yā ní cuchē yā na 'áamá yiicū ní caⁿ'angua'á yā. Taachí chii 'da'a, 'āā dámaaⁿ Jesús canée yā miiⁿ. ²⁴Barco miiⁿ ní 'āā cánduūu naavtaⁿ'ā yeⁿe nuūⁿnīⁿyáⁿā miiⁿ naachi olas yeⁿe nuūⁿnīⁿ miiⁿ neⁿe 'cuuchii na yaānūuⁿ yeⁿe nuūⁿnīⁿ miiⁿ. 'Yúúné ní ngeēnū taaⁿ ní diitu n'dái n'geⁿe na barco miiⁿ. Ní barco miiⁿ nguée ngii ngíicá. ²⁵Taachi 'da'a ca táamá nguuvī tan'dúúcā n'geecu cuūuⁿ o n'geecu nyuⁿ'u, Jesús ndaā yā nanááⁿ discipulos ní ngíicá yā cuaaⁿ vmnaaⁿ nuūⁿnīⁿyáⁿā miiⁿ. ²⁶Taachí discipulos ní n'diichí yā Jesús miiⁿ chí ngiicá yā cuaaⁿ vmnaaⁿ nuūⁿnīⁿyáⁿā miiⁿ ní dii'yá yā chii. Ní chistaⁿ'a vaanicadiinūuⁿ yeⁿé yā. Ní 'cai yā: Chuū ní 'áamá bulto. Ní caⁿ'á yā ndúúcu vaadī 'va'a.

²⁷Cuayiivi miiⁿ ní Jesús yaa'ví yā discipulos ní caⁿ'a yā: Ndís'tiī cúúví ditiinú nī caati 'úú. Nguée di'va'a nī.

²⁸Tuu'mi ní Pedro nān'guēcútaⁿ'a sa ní caⁿ'a sa: N'díi Señor, ndúúti chí n'diī caaⁿ'maⁿ n'tiīnyúⁿ nī chí caⁿ'á naachi canee nī ní caacá cuaaⁿ vmnaaⁿ nuūⁿnīⁿyáⁿā.

²⁹Jesús miiⁿ ní caⁿ'a yā chii yā: Pedro, cuchí di. Pedro miiⁿ ní nan'dáa sa na barco miiⁿ ní tucá'a sa ngiica sa cuaaⁿ vmnaaⁿ nuūⁿnīⁿ

miiⁿ. Ní cueⁿē sa naachi canéé Jesús miiⁿ. ³⁰Taachí Pedro miiⁿ n'diichi sa 'yúúné taaⁿ miiⁿ di'vá'a sa ní 'āa tucá'a chεechi sa nguaaⁿ nuūⁿnīⁿ miiⁿ. Tuuⁿmi ní cáí yiicu sa ní caⁿ'a sa: Señor, nadanguáⁿai ní 'úú.

³¹Hora miiⁿ nūuⁿ, Jesús miiⁿ n'doó yā ta'a yā ní sta'a yā ta'a Pedro ní caⁿ'a yā chii yā Pedro: Dii saⁿ'ā chi dúú'vii i'téenu di, ¿de'ē cúúví chí nadi'uúví di staava yeⁿ'ē di ní nguée i'téenu di?

³²Ní taachí Jesús ndúúcū Pedro sndáa yā na barco miiⁿ, canee 'diiⁿ 'yúúné miiⁿ. ³³Tuuⁿmi ní discípulos chí snúuⁿ yā na barco miiⁿ ní ndaa yā nanááⁿ Jesús ní s'téenu yā 'iiⁿyāⁿ. Ní caⁿ'a yā: N'dii Jesús, cuaacu nííⁿnyúⁿ chí Daiya Ndyuūs n'dii.

Jesús diíⁿ yā chi nduuvā yeⁿ'e 'iiⁿyāⁿ yeⁿ'e yáⁿ'āa Genesaret

(Mr. 6.53-56)

³⁴Tááchí chíinu cho'ó yā táamá lado yeⁿ'e nuūⁿnīⁿyāⁿ'ā miiⁿ ní ndaa yā na yáⁿ'āa Genesaret. ³⁵'Iiⁿyāⁿ s'eeⁿ yeⁿ'e yáⁿ'āa miiⁿ taachi tuumicádíínuuⁿ yā chí Jesús canée yā miiⁿ, tuuⁿmi ní 'iiⁿyāⁿ s'eeⁿ caⁿ'á yā ní chii yā 'iiⁿyāⁿ yeⁿ'e núúⁿmáⁿ cuaaⁿ yáaⁿ n'gaiyāa chí snée nīⁿnuúⁿ chí Jesús canée yā miiⁿ. Níícuⁿ 'iiⁿyāⁿ s'eeⁿ cándée yā nducyaaca 'iiⁿyāⁿ chí ngííta yā nanááⁿ Jesús miiⁿ. ³⁶Ní 'iiⁿyāⁿ s'eeⁿ di'cuúítu yā Jesús miiⁿ chí 'cuáaⁿ yā chí 'iiⁿyāⁿ s'eeⁿ tuuⁿví yā naachi n'déétíí yeⁿ'ē catecái yā. Ní nducyaaca 'iiⁿyāⁿ chí tuuⁿví yā catecai Jesús miiⁿ ní nduūvā yeⁿ'e yā.

Yeⁿ'e chí diiⁿ chí vεε nuuⁿndi yeⁿ'e 'iiⁿyāⁿ

(Mr. 7.1-23)

15 Tuuⁿmi ní duuⁿvi maestros chí ngi'cueeⁿ ley ndúúcū

'iiⁿyāⁿ fariseos chí chiicá yā yáaⁿ Jerusalén ndaa yā nanááⁿ Jesús miiⁿ, ní caⁿ'a yā chii yā 'iiⁿyāⁿ:

²¿De'ē cúúví chí discípulos yeⁿ'e ní nguée diíⁿ yā tan'dúúcā costumbre yeⁿ'ē 'iiⁿyāⁿ ndiicúú? ¿De'ē cúúví chí nguée inaaⁿnu yā ta'a yā taachi 'āa cuée che'e yā pan?

³Jesús nan'gueecútaⁿ'a yā ní caⁿ'a yā chii yā 'iiⁿyāⁿ s'eeⁿ: ¿De'ē cúúví chí ndís'tii ní nguée diíⁿ ní tan'dúúcā chí ngaⁿ'a ley yeⁿ'ē Ndyuūs ní diíⁿ ní tan'dúúcā costumbre yeⁿ'ē 'iiⁿyāⁿ ndiicúú? ⁴Ti Ndyuūs ní ca'á yā ley yeⁿ'e yā ní caⁿ'a yā: Diíⁿ ní honrar chiidá ní ndúúcū chεecú ní. 'Iiⁿyāⁿ chí nguée n'daacā ngaⁿ'a yā yeⁿ'e chiidá yā o yeⁿ'ē chεecú yā ní 'cuūvi yā. ⁵Naati ndís'tii ní ngaⁿ'a ní chí 'āa du'ú nuuⁿ 'iiⁿyāⁿ chí caaⁿ'máⁿ yā cuuvi yā chiidá yā ndúúcū chεecú yā 'tíicā: Nducuéⁿ'ē chí teé n'dii maaⁿ ní ca'á lado yeⁿ'ē Ndyuūs caava ofrenda yeⁿ'e yā. ⁶'Iiⁿyāⁿ 'āa ntée idííⁿ yā chí neⁿ'é yā chiida yā ndúúcū chεecú yā. 'Tíicā caavā costumbre yeⁿ'ē ní diíⁿ ní chí 'āa ntée idichíí'vε ley yeⁿ'ē Ndyuūs yeⁿ'e yú. ⁷Ndís'tii 'uūvi naaⁿ 'uuvi cheendí ní. N'daacā caⁿ'a profeta Isaías miiⁿ yeⁿ'ē ní taachi caⁿ'a sa ndíí vmnaaⁿ ní canée nguūⁿ na libro yeⁿ'e Ndyuūs 'tíica:

⁸'Iiⁿyāⁿ s'uuⁿ ní i'téenu yā 'úú ndúúcū nduudu yeⁿ'e yā, naati staava yeⁿ'ē yā yaⁿ'ai canee yeⁿ'ē 'úú.

⁹Nguée de'ε vεε dichíí'vε chí i'téenu yā 'úú, caati chí ngi'cueeⁿ yā ní ley yeⁿ'e saⁿ'ā yeⁿ'e iⁿ'yeeⁿdí 'cūū nguée yeⁿ'ē Ndyuūs.

¹⁰Jesús n'gai yā n'dee n'dái 'iiⁿyāⁿ chí ndaa yā nanáaⁿ yā. Ní caⁿ'a yā

chii yā 'i'i'yān s'ee": 'Caandivée"
nī ní tuumicadíínuu" nī. ¹¹Nguéé
tanducué"ⁿē chí ng'e sa"ⁿā chí ndaā
cheendi sa"ⁿā idivaatí sa"ⁿā naati
nduudu chí ican'daā cheendi sa"ⁿā,
chíí" chí dii" chí véé nuu"ndi ye"ⁿē
sa"ⁿā.

¹²Tuu'mi ní discípulos ye"ⁿe
Jesús ndaā yā nanáa" yā ní ca"ⁿa
yā chii yā Jesús mii": ¿Áá nguéé
déenu nī chí 'i'i'yān fariseos taachí
ch'iindiveé" yā nduudú 'cūū nduuví
taá" yā?

¹³Naatí Jesús mii" nan'guεεcúta"ⁿa
yā ní ca"ⁿa yā: Taanduvéé yaāta chí
nguéé chiichi Chiidá chí canéé yā
na va'ai chēeti nguuví canee chí
tiicūu ndii dí'yú. ¹⁴Áá s'néé" rá
'i'i'yān s'ee" chí tan'dúúca 'i'i'yān chí
ngueenáá" chí candée yā táamá
'i'i'yān chí ngueenáá" ndúúcu
yā. Nduuti chí 'áámá 'i'i'yān chí
ngueenáá" candée yā táamá 'i'i'yān
chí ngueenáá" ndúúcu yā, nduu
'uuví yā cungéé nuu" yā na yiivi
yá"á".

¹⁵Tuu'mi ní Pedro mii" ní
nan'guεεcúta"ⁿa sa ní ca"ⁿa sa chii
sa Jesús mii": Cúuví nī nús'uu dē'e
né"é caā"mān ejemplo 'cūū.

¹⁶Jesús ca"ⁿa yā: ¿Áá 'tiicá ntūū"
nguéé ituumicadíínuu" nī? ¹⁷¿Áá
nguéé ituumicadíínuu" nī chí
tanducué"ⁿē chí indaā cheendi
sa"ⁿā nge"ⁿe chēēti sa ní cungéé
cuaa" chuva'ái? ¹⁸Naati nduudu chí
ícan'daa cheendi sa chí níngiica na
staava ye"ⁿē sa, chuū idiii" chí véé
núú"ndí ye"ⁿē sá"ⁿā. ¹⁹Caati ye"ⁿe na
staava ye"ⁿe 'i'i'yān ngiicá dendú'ú
chí nguéé n'dáacā chí inadícadíínuu"
yā. Chuū ní inadícadíinúú" yā ye"ⁿē
chí 'caā"nu" yā 'i'i'yān, ndúúcu ye"ⁿē

chí ca"ⁿá yā ndúúcu isa"ⁿā o n'daataá
chí nguéé ye"ⁿe yā, ndúúcu chí
n'diichí yā 'aama sa"ⁿā o n'daataá
chí duuchí vi'i, ndúúcu ye"ⁿē chí
ididuucú yā, ndúúcu ye"ⁿē chí
testigo yā ní caa"má" yā nduudu
yaadi, ndúúcu ye"ⁿē chí caa"ma" taá"ⁿ
yā contra ye"ⁿe Ndyuūs. ²⁰Dendú'ú
'cūū chí idiii" chí véé nuu"ndi ye"ⁿē
sa naati chí che'e sa taachi nguéé
naa"nú sa ta'a sa, chíi" ní nguéé
idinuu"ndi sa.

**Ye"ⁿe 'áámá n'daataá chí nguεε ye"ⁿe
ndaata Israel ní i'téenu tá Jesús**
(Mr. 7.24-30)

²¹Jesús chiicá yā ye"ⁿē yáa" mii"
ní cue"ⁿe yā na yá"áa ye"ⁿe Tiro
ndúúcu Sidón. ²²Cuin'díichí nī.
'Áámá n'dáátāa ye"ⁿe yá"áa Canaán
chí can'daā tá ye"ⁿe yáa" vaacu tá.
N'gai yiicu tá ní nga"á tá ngii tá
Jesús mii": N'díí Señor chí Daiya
David, nnéé ya'ai 'iinu nī 'úú.
'Áámá espíritu ye"ⁿe yáa"n'guiniūu"
idindú'ú taaví tá"á daiyá.

²³Jesús nguéé nan'guεεcúta"ⁿa yā
ye"ⁿē tá. Tuu'mi ní discípulos ye"ⁿē
Jesús mii" ndaā yā nanáa" yā ní
di'cuíftu yā Jesús ní ca"ⁿa yā chí yā
'i'i'yān: N'dii Jesús, díi" nī despedir
ye"ⁿē ta ti tá"á 'cūū ní n'gai tá
cūchiitá cuaa" daami yú.

²⁴Jesús nan'guεεcúta"ⁿa yā ní ca"ⁿa
yā: Dendyuūs dicho'ó yā 'úú cucáávā
'i'i'yān ye"ⁿe Israel chí tan'dúúca 'iiti
cuūchí chí nindái, 'tiicá yā.

²⁵Tuu'mi ní ta"ⁿā mii" ndaā ta
nanáa" Jesús ní chiinti'ya tá ní
ca"ⁿa tá chíi tá 'i'i'yān: N'díí Señor,
cunneé nī 'úú.

²⁶Jesús mii" ní nan'guεεcúta"ⁿá
yā ye"ⁿē tá ní ca"ⁿa yā chíi yā tá"á:

Nguéé n'daācā chí divíí pan yeⁿé daiyá 'nū ní ca'a chí che'e 'yaānā.

²⁷ Táⁿā miiⁿ ní caⁿā ta: 'Tíicā Señor, naati 'yáanā miiⁿ ngé'e tí yeⁿé cheeyéé chí ngéé yeⁿé na mesa yeⁿé 'iiví tí.

²⁸ Tuu'mi ní Jesús miiⁿ nan'guēcútaⁿa yā ní caⁿa yā chíi yā táⁿā: Díí n'daataá, dé'e chúucā ch'ēete vaadi i'téénú yeⁿé di. Cuuví ndúucu di tan'dúucā chí neⁿé di. Daiya tá miiⁿ ní hora mííⁿ nūuⁿ nduuva yeⁿé ta.

**Jesús idiíⁿ yā chí nduūvā
yeⁿe 'yaaⁿ n'dai 'iiⁿyāⁿ**

²⁹ Jesús chiicā yā yeⁿé yáⁿāa miiⁿ ní ndaá yā 'diituú nuūⁿnīⁿyáⁿā Galilea. Cuayíivi ní cuchée yā ná yīicū miiⁿ ní chíiⁿdi yā. ³⁰ Néené 'yaaⁿ 'iiⁿyāⁿ ndaā miiⁿnuúⁿ yā nanááⁿ Jesús miiⁿ ní ndée yā 'iiⁿyāⁿ chí ngāá yó'ōo, ndúúcū 'iiⁿyāⁿ chí ngueenááⁿ, ndúúcū 'iiⁿyāⁿ 'díi'mī, ndúúcū 'iiⁿyāⁿ chí ló'ō tá'á yā o ca'a yā, ndúúcū 'yaaⁿ n'dái 'iiⁿyāⁿ chí véé cá tanáⁿā ca'ai chí ndíi yā. Ní s'neeⁿ yā 'iiⁿyāⁿ s'eeⁿ nanááⁿ Jesús miiⁿ. Ní Jesús dííⁿ yā chí nduūvā yeⁿe 'iiⁿyāⁿ s'eeⁿ. ³¹ Nducyáácá 'iiⁿyāⁿ cheⁿe yīinū yā taachí n'diichi yā chí 'iiⁿyāⁿ 'díi'mī ní ngíí ngaⁿa, ní 'iiⁿyāⁿ chí ló'ō tá'á yā o ca'a yā nduuva yeⁿe yā, ní 'iiⁿyāⁿ chí nguée ngii ngiicā, ngiica yā; ní 'iiⁿyāⁿ ngueenááⁿ, inaaⁿ yā; ní tuc'áa yā caⁿa yā: Dē'ē chúuca ch'ēete Ndyuūs yeⁿe 'iiⁿyāⁿ Israel.

**Jesús ca'a yā chí che'e cuūuⁿ mil
'iiⁿyāⁿ**

(Mr. 8.1-10)

³² Jesús 'caí yā discípulos yeⁿé yā ní caⁿa yā chíi yā discípulos: Yá'ái

cáávā 'iiⁿyāⁿ s'tíí tí 'āā 'iinū nguuví snée yā nduucú ní 'muuⁿ ní nguée dé'ē vee chí che'e yā. Nguée neⁿé nadicho'ó 'iiⁿyāⁿ chí nguée che'e yā. 'Áátíi cuuví cúunu yā cuaaⁿ cyúúni chí náⁿa yā.

³³ Tuu'mi ní discípulos yeⁿe yā caⁿa yā chíi yā Jesús: 'Tíí cáⁿa 'nū nguaiⁿ 'nū pan chí n'dee n'dái chí ché'é nducyaaca 'iis'tíí na lugar 'cūū naachi nguē ch'ēetinée 'iiⁿyāⁿ?

³⁴ Jesús caⁿa yā chíi yā discípulos: 'Áá 'yaaⁿ ca pan yeⁿé ní vee?

Discípulos caⁿa yā: Ndeēchē panes ndúúcū n'duuví 'yaācā n'gaiyāā vee.

³⁵ Jesús ca'a yā orden 'iiⁿyāⁿ s'eeⁿ chí 'cuēté yā na yáⁿāa miiⁿ.

³⁶ Tuu'mi ní Jesús sta'á yā ndu'ū ndeēchē panes miiⁿ ndúúcū 'yaācā miiⁿ. Ní ca'a yā gracias Ndyuūs cáávā panes miiⁿ. Ní n'dee yā panes miiⁿ ní ca'a yā discípulos yeⁿe yā. Ní discípulos ní ca'a yā 'iiⁿyāⁿ chí snée miiⁿ. ³⁷ Nducyááca yā che'e yā ní chíitu 'iiⁿyāⁿ. Discípulos ní nān'guaáⁿ yā chí nángaāva ní chíitu tá ndeēchē 'cuéētē. ³⁸ 'iiⁿyāⁿ chí che'e yā miiⁿ ní taandu cuūuⁿ mil ngii sáⁿā. Nguée diduuche yā n'daataá ndíí nguée ndúú da'caiyāa. ³⁹ Tuu'mi ní Jesús yaa'ví yā 'iiⁿyāⁿ s'eeⁿ chí cunaⁿá yā. Ní Jesús ndaá yā na barco miiⁿ ní cueⁿe yā na yáⁿāa yeⁿe Magdala.

'Iiⁿyāⁿ s'eeⁿ ngiica yā vaadi n'giinu

(Mr. 8.11-13; Lc. 12.54-56)

16 'Iiⁿyāⁿ fariseos ndúúcū 'iiⁿyāⁿ saduceos ndaá yā nanááⁿ Jesús chí neⁿe n'diichíneeⁿ yā Jesús. Ní chíica yā Jesús 'áámá vaadi n'giinu yeⁿé va'ai cheeti nguuví.

²Naati Jesús nan'guëcúta^a yā yeⁿé 'iiⁿyāⁿ s'eeⁿ ní caⁿa yā: Taachí ngii chíinū ní nanguuvi ní ndíí cuá^aā, ndís'tii ní ngaⁿá nī chi n'dáacā diiⁿ tiempo. ³Ní cuá^aā ná nguëtyaaⁿ taachí meëⁿ ngíí cuá^aá, ndís'tii ngaⁿa nī chi nguéé n'dáacā diiⁿ tiempo maaⁿ. Ndís'tii 'uūvi naaⁿ 'uūvi cheendí nī chi déénu nī de^e chí cúúví yeⁿé nanguuvi naati nguéé tuumicadínuuⁿ nī de^e chí cuuvi tiempo 'cūū ndúúcu señales chí inaaⁿ nī. ⁴Iiⁿyāⁿ chí cunncāá idiíⁿ yā ndúúcu 'iiⁿyāⁿ chí nguéé i'téenu yā Ndyuūs 'iiⁿyāⁿ miiⁿ néⁿe yā snaaⁿ yā 'áamá vaadí n'giinu naati señal miiⁿ nguéé ndaāca yā. Dámaāⁿ cánéé señal yeⁿe profeta Jonás chí ndíí cuaaⁿ vmnaaⁿ chí canéé nguuⁿ na libro yeⁿe Ndyuūs. Jesús s'néeⁿ yā 'iiⁿyāⁿ s'eeⁿ ní cueⁿe yā.

Levadura yeⁿe 'iiⁿyāⁿ fariseos

(Mr. 8.14-21)

⁵Discípulos yeⁿe Jesús ndaá yā táamá lado yeⁿe nuūⁿnīⁿyāⁿā ní chinaáⁿ yā chí cāndeē yā pan. ⁶Jesús ca'a yā chíi yā 'iiⁿyāⁿ s'eeⁿ: Cundēē ndís'tii cuidado yeⁿe levadura yeⁿe 'iiⁿyāⁿ fariseos ndúúcu 'iiⁿyāⁿ saduceos ti levadura miiⁿ ní chíiⁿ chí chí'cueeⁿ yā. ⁷Discípulos ní tuca^a yā caⁿa yā nguaaⁿ maaⁿ yā. ¿Áá chí nguéé ndeē yú pan chíiⁿ chí 'tíicā ngaⁿa yā? ⁸Jesús miiⁿ tuumicadínuuⁿ yā yeⁿé chí inadicadínuuⁿ discípulos ní caⁿa yā chíi yā discípulos: ¿De^e cúúví chí inacadadínuuⁿ nī 'túúca na staava yeⁿé nī chí cáávā chí nguéé ndeē nī pan? Ndís'tii ní dúúvii i'téenu nī. ⁹¿Áá nguéé

ituumicadínuuⁿ nī, ndii nguëe ndúú inang'aacú nī yeⁿé nyuⁿ'u panes chí che^e nyuⁿ'u mil saⁿā? nī ¿Áá n'deē 'cuééteē ca panes nángaāva? ¹⁰¿Áá ndíí nguéé nduu inang'aacú nī yeⁿé ndeēchē panes chí che^e cuūuⁿ mil saⁿā? nī ¿Áá n'deē 'cuééteē ca panes nángaāva? ¹¹¿De^e cuuvi chí nguëe ituumicadínuuⁿ nī chí nguéé cáávā pan miiⁿ chí caⁿá chí cundee nī cuidado yeⁿe levadura yeⁿe 'iiⁿyāⁿ fariseos ndúúcu 'iiⁿyāⁿ saduceos?

¹²Tuuⁿmi ní discípulos tuumicadínuuⁿ yā chí Jesús miiⁿ nguéé caⁿa yā chíi yā chí discípulos nguéé cundee yā cuidado yeⁿe levadura yeⁿe pan ti yeⁿe chí chí'cueeⁿ 'iiⁿyāⁿ fariseos ndúúcu 'iiⁿyāⁿ saduceos.

Pedro miiⁿ caⁿa sa nduudu cuaacu chí Jesús chí Cristo yā

(Mr. 8.27-30; Lc. 9.18-21)

¹³Jesús ndaá yā yeⁿe yáⁿāa yeⁿe Cesarea yeⁿe yáⁿāa yeⁿe Filipo ní itinguuneéⁿ yā discípulos yeⁿe yā ní caⁿa yā: ¿Duⁿú 'úú ngaⁿa 'iiⁿyāⁿ yeⁿé 'úú chí Saⁿā chí Daiya Dendyuūs 'úú?

¹⁴Discípulos ní caⁿa yā: Náⁿa yā ní ngaⁿa yā chí díí chí Juan chí cheedinuūⁿnī díí. Náⁿa yā ní ngaⁿa yā chí díí chí profeta Elías miiⁿ díí. Níicú náⁿa yā ní ngaⁿa yā chí díí profeta Jeremías o 'āā duⁿú nūuⁿ profeta.

¹⁵Jesús caⁿa yā chíi yā discípulos: ¿Duⁿú 'úú ngaⁿa ndís'tii?

¹⁶Simón Pedro miiⁿ nan'guëcúta^a sa ní caⁿa sa: N'dii ní Cristo chí Daiya Dendyuūs chí cánduuchi cueⁿe daāⁿmaⁿ.

¹⁷Tuu'mi ní Jesús miíⁿ nan'gueécútaⁿa yā yeⁿē sa ní caⁿa yā: De'ē chúúca n'dai dii Simón, daiya Jonás, ti 'úú nguée ch'iⁿí dii ndii nguē nduu táámá 'iⁿyāⁿ, naati Chiidá chi canée yā ná va'ai chēeti nguuví ch'iⁿí yā dii. ¹⁸Úú ntúūⁿ ngaⁿá ngíí dii chi dii ní nguuví Pedro dii ní nguuví di neⁿe caaⁿmaⁿ tuūu. Ní vmnaaⁿ 'áámá tuūu ch'etē 'cūū chí neⁿe caaⁿmaⁿ Cristo, ní 'úú din'daí yaācū yeⁿé. Ní ndíí mar 'áámá poder yeⁿe yáá'n'guiinūⁿ nguée cuuvi din'nú'u tuūu miíⁿ. ¹⁹Úú teé dii, Pedro, poder tan'dúúca chi teé dii llaves yeⁿe va'ai chēeti nguuví yeⁿe naachí Ndyuūs ngaⁿa ntiiⁿnyúⁿ yā 'tíicā dííⁿ. Ní tanducuéⁿē chi cachiichí di na iⁿ'yeeⁿdí 'cūū cuchiichi ntúūⁿ ná va'ai chēeti nguuví. Ní tanducuéⁿē chi n'gúuⁿ di na iⁿ'yeeⁿdí 'cūū 'cuāāⁿ ntúūⁿ ná va'ai chēeti nguuví.

²⁰Tuu'mi ní Jesús ca'á yā chi yā discípulos yeⁿe yā chi nguée caaⁿmaⁿ yā cuuvi yā mar 'áámá 'iⁿyāⁿ chi Jesús miíⁿ chi Cristo yā.

Jesús caⁿa yā chí canee chi 'cuūví yā
(Mr. 8.31-9.1; Lc. 9.22-27)

²¹Tuu'mi ní Jesús miíⁿ tucá'a yā chi'cueeⁿ yā discípulos yeⁿe yā. 'Úú cánée chi caⁿá na yáāⁿ Jerusalén ní cánée chí 'cueenu taaví cuuvi néené n'deē dendu'ū yeⁿé 'iⁿyāⁿ ndiicūū chi ngaⁿā ntiiⁿnyuⁿ yeⁿe yaācū miíⁿ, ndúúcu chiiduú n'gētē, ndúúcu yeⁿe maestros yeⁿe ley. Cuayiivi ní 'iⁿyāⁿ s'eeⁿ 'caaⁿnúⁿ yā 'úú. Ní 'cuūví. Ndiichi ndii 'íínú nguuví ní 'úú nduūchí yeⁿe nguaaⁿ tináⁿā. ²²Tuu'mi ní Pedro miíⁿ ní cueⁿe sa ndúúcu Jesús 'áámá lado ní caⁿa

sa chii sa Jesús: N'díí Señor, nguée 'cuáaⁿ ní Ndyuūs 'iivi yú ndii mar 'áámá naaⁿ chi cuuvi chuū ndúúcu nī.

²³Jesús nan'gueécútaⁿa yā yeⁿe Pedro miíⁿ ní caⁿa yā chii yā saⁿá: Diví di nanaaⁿ, dii chi tan'dúúca yáá'n'guiinūⁿ. Dii ní nguée nadicadíínuuⁿ di tan'dúúca Ndyuūs nadicadíínuuⁿ yā ti nadicadíínuuⁿ di yeⁿe dendu'ū yeⁿe iⁿ'yeeⁿdí 'cūū.

²⁴Tuu'mi ní Jesús caⁿa yā chii yā discípulos yeⁿe yā: Nduuti chi 'áámá 'iⁿyāⁿ néⁿe yā caⁿá yā nduucú, canée chi cu'neeⁿ maáⁿ yā tanducuéⁿē dendu'ū chi véé yeⁿe yā ní cuta'á yā cruz yeⁿe yā chi tan'dúúca chi 'cueenu taaví yā cuuvi cucáávā 'úú. Ní 'íicú caⁿa yā nduucú. ²⁵Tí nducyáácá 'iⁿyāⁿ chi neⁿe yā nadanguáⁿai maáⁿ yā vida yeⁿe yā na iⁿ'yeeⁿdí 'cūū ní dindaí yā táámá vida yeⁿe yā nanááⁿ Ndyuūs. Ní nducyáácá 'iⁿyāⁿ chi dindaí yā vida yeⁿe yā cucáávā 'úú ní nandaācá yā táámá vida yeⁿe yā nanááⁿ Ndyuūs. ²⁶¿De'ē dichí'vē yeⁿe saⁿā ndúúti chi diiⁿ sa ganar nducuéⁿē chi véé núúⁿmáⁿ iⁿ'yeeⁿdí 'cūū ní dindaí sa alma yeⁿe sa? ¿Áá n'deē cuuvi nadí'vē sa 'áámá 'iⁿyāⁿ cucáávā alma yeⁿe sa? ²⁷Naati 'úú chí Saⁿá chi Daiya Dendyuūs 'úú ní ndaá ndúúcu dēve ch'ēete n'dai yeⁿe Chiidá chi canée yā na va'ai chēeti nguuví. Ní ndaá ndúúcu ángeles yeⁿé. Tuu'mi ní 'úú dííⁿ chi nadí'vē ca'áámá ca'áámá yā tuunu tuunu ca chi ndííⁿ yā. ²⁸Cuaacu nííⁿnyúⁿ ngaⁿá ngíí ndís'tii chi véé náⁿa nī chi snée nī 'muuⁿ chi nguée 'cuūví nī taanduvée ndíí snaaⁿ nī Saⁿa chi Daiya Dendyuūs ndaa

sá chi caaⁿmaⁿ ntiiⁿnyuⁿ sa yeⁿe tanducuéⁿē.

Jesús n'dáaⁿ yā cuerpo yeⁿe maaⁿ yā
(Mr. 9.2-13; Lc. 9.28-36)

17 Chó'oo jaāⁿ nguuví, ní Jesús candéē yā Pedro ndúúcu Jacobo ndúúcu Juan chi 'dínū Jacobo. Ní Jesús cueⁿé yā ndúúcu saⁿā s'eeⁿ na 'áamá yīicū yaacu. ²Ní Jesús n'dáaⁿ yā cuerpo yeⁿe maāⁿ yā nanááⁿ saⁿā s'eeⁿ. Ní chín'gai naaⁿ yā tan'dúúcā 'yáⁿā 'iicu catecai yā ní nduuví cuéē tan'dúúcā deēve. ³Cuin'diichí nī. Tuu'mí nūuⁿ che'enaāⁿ Moisés ndúúcu profeta Elías. 'Iiⁿyāⁿ s'eeⁿ chi n'díí ndíí cuaaⁿ vmnaaⁿ ní nndeé yā ndúúcu Jesús miiⁿ. ⁴Tuu'mí ní Pedro caⁿa sá chii sa Jesús: Señor, de'e chúúca n'dáacā yeⁿe yú chí 'cuētinée yú 'muuⁿ. Ndúúti chí neⁿé nī din'daiⁿ nū ná 'iinū va'ai n'gaiyāā, 'áamá ní yeⁿé n'dií, táamá ní yeⁿe Moisés, táamá ní yeⁿe profeta Elías.

⁵Taachí Pedro ngaⁿa sá chuū, 'áamá meēⁿ cuéē chí ngii yáⁿāa ndii sn'díí 'iiⁿyāⁿ s'eeⁿ ní discípulos ch'iindiveéⁿ yā 'áamá nduudu ná meēⁿ miiⁿ chí ngaⁿā: Sáⁿa 'cūū Daiyá chí neⁿe taaví ní yeenú cáávā sáⁿa 'cūū. 'Cu'neeⁿ veéⁿ nī yeⁿē sa.

⁶Taachí discípulos ch'iindiveéⁿ yā nduudu 'cūū candiitín'dií yā ní dii'yaa n'dái yā chií. ⁷Tuu'mí ní Jesús miiⁿ ndaa niiⁿnuúⁿ yā ní tuu'v'í yā discípulos ní caⁿa yā: Nducueeⁿ nī. Nguéé 'va'a nī.

⁸Taachí nducueeⁿ discípulos 'āa ntéé n'diichí yā du'ū vee caati 'āa dámaāⁿ Jesús miiⁿ n'diichi yā.

⁹Taachi nangua'á yā yeⁿe yīicū miiⁿ ní na yúúní naachí cunaⁿa yā,

Jesús caⁿa yā chii yā 'iiⁿyāⁿ s'eeⁿ chi nguéé cuuví yā mar 'áamá 'iiⁿyāⁿ yeⁿe chi n'diichí yā ndíí taachi Saⁿā chi Daiya Ndyuūs nduuchí yā yeⁿe nguaaⁿ tináⁿā.

¹⁰Tuu'mí ní discípulos ntiinguunéeⁿ yā Jesús ní caⁿa yā: ¿De'ē cúuví chí ngaⁿa maestros yeⁿe ley chi canéé chí profeta Elías miiⁿ ndaa sa vmnaaⁿ?

¹¹Jesús miiⁿ nán'guēecútaⁿa yā ní caⁿa yā chii yā discípulos: Cuaacu níⁿnyúⁿ profeta Elías miiⁿ ndaaá sa vmnááⁿ vmnaaⁿ ní 'cuundiyāⁿ sa tanducuéⁿē. ¹²Naati 'úú ní ngaⁿā ngii ndís'tií chí profeta Elías miiⁿ ní 'āā ndaá yā. Ní 'iiⁿyāⁿ s'uuⁿ nguéé tuumicadínuuⁿ yā yeⁿe yā du'u chí Elías miiⁿ naati dííⁿ yā ndúúcu Elías miiⁿ tan'dúúcā chí neⁿe yā ní n'geenu sá ngii. 'Tiicá ntúūⁿ Saⁿā chí Daiyá Ndyuūs 'cueenu sá cuuvi yeⁿe 'iiⁿyāⁿ s'uuⁿ.

¹³Tuu'mí ní discípulos tuumicadínuuⁿ yā chí Jesús ngaⁿa yā ngii yā discípulos yeⁿe Juan chi cheedínuūⁿnī.

Jesús idiíⁿ yā chí nduūvā yeⁿe 'áamá saⁿā 'dííⁿ chí ndii sa ataques

(Mr. 9.14-29; Lc. 9.37-43)

¹⁴Taachí ndaa Jesús ndúúcu discípulos yeⁿe yā naachi snéé n'dee n'dái 'iiⁿyāⁿ, tuu'mí ní ndaa 'áamá saⁿā nanááⁿ Jesús ní chiintii'ya sá ní caⁿa sá: ¹⁵Señor, nnéé ya'ai 'iinú nī daiyá ti sta'a ataques daiyá ní neenē n'geenu sá ngii. Néénē n'dee cuūvi in'dáa nuūⁿ sa na yaⁿā ní 'āā neenē n'dee cuūví chí in'dáa nuūⁿ sa nguaaⁿ nuūⁿnī. ¹⁶Ní 'āā chí nguú saⁿā nanááⁿ discípulos yeⁿe nī naati nguéé ngii dííⁿ yā chí nduūvā yeⁿe sa.

¹⁷ Jesús nan'gueécútaⁿa yā ní caⁿ'a yā chii yā saⁿ'ā: Ndís'tii 'iiⁿ'yāⁿ chi nguee i'téenu nī ndíí nguée ndúú idiiⁿ n'daacá nī. ¿Áá 'naaⁿ tiempo canée chi cuneé ndúúcu nī? ¿Áá 'naaⁿ cuheé ndúúcu ndís'tii? Candée nī 'muuⁿ saⁿ'ā 'dííⁿ.

¹⁸ Jesús miiⁿ yaaⁿ'vi neeⁿ yā espíritu yeⁿ'e yááⁿ'nguiinūⁿ ní espíritu miiⁿ nan'dáa yeⁿ'e saⁿ'ā 'dííⁿ miiⁿ ní tuuⁿ'mí nūuⁿ ndúúvā yeⁿ'e sa.

¹⁹ Tuuⁿ'mi ní discípulos ní ndaa yā nanááⁿ Jesús na 'áámá lado naachi nguée snée 'iiⁿ'yāⁿ ní caⁿ'a yā chii yā Jesús: ¿De'e cúuví chí nús'uú nguée chii tun'dáa 'nū espíritu yeⁿ'e yááⁿ'nguiinūⁿ miiⁿ yeⁿ'e saⁿ'ā 'díí?

²⁰ Jesús miiⁿ ní caⁿ'a yā chii yā discípulos: Nguée ch'ete vaadi i'téenu yeⁿ'e nī. Cuaacu nííⁿ'nyúⁿ ngaⁿ'á ngí ndís'tii chi nduuti chi véé vaadi i'téenu yeⁿ'e nī ní tan'dúúca 'áámá duuti yeⁿ'e yíivē ntííⁿ'yā chí 'lílíⁿ ca cuuvi nī yíicū 'cúú: Yíicū, cuví ndii 'muuⁿ ní cuéⁿ'é ndíí taama lugar. Ní yíicū ní caⁿ'ā. Tanducuéⁿ'ē cuuvi dííⁿ nī nduuti chi cuaacu chi i'téenu nī. ²¹ Naati tanducuéⁿ'ē espíritus yeⁿ'e yááⁿ'nguiinūⁿ chi 'túúca nguée nan'daā yeⁿ'e 'iiⁿ'yāⁿ chí 'tiicá nūuⁿ caati dámaāⁿ ndúúcu chí ngaⁿ'angua'a yā ndúúcu chí nguee 'āa ca'diiⁿ'núⁿ yā nguuvi chí ngaⁿ'angua'á yā.

Jesús caⁿ'a ntuúⁿ yā táámá yeⁿ'ē chí 'cuúvi yā

(Mr. 9.30-32; Lc. 9.43-45)

²² Taachi 'iiⁿ'yāⁿ s'eeⁿ snée yā na yáⁿ'ā Galilea Jesús caⁿ'a yā chii yā discípulos yeⁿ'e yā: Saⁿ'ā chí Daiya Ndyuūs ní 'iiⁿ'yāⁿ canée chí ca'a

yā saⁿ'ā na táá 'iiⁿ'yāⁿ. ²³ Ní 'iiⁿ'yāⁿ 'caaⁿ'nuⁿ yā saⁿ'ā miiⁿ naati saⁿ'a miiⁿ ndii chííⁿ ndii 'íínú nguuvi nduuchi sa yeⁿ'e nguaaⁿ tináⁿ'ā. Discípulos ní s'neeⁿ ndaachi yíinú yā.

Yeⁿ'ē chí nadíí'vē yā yeⁿ'ē yáacū templo

²⁴ Taachí ndaa Jesús ndúúcu discípulos yeⁿ'e yā na yááⁿ Capernaum, 'iiⁿ'yāⁿ s'eeⁿ chí indaaca tuumí yeⁿ'e yáacū templo ní ndaa yā nanááⁿ Pedro miiⁿ. Ní caⁿ'a yā chii yā saⁿ'ā: ¿Áá nguée nadíí'vē maestro yeⁿ'ē nī tuumí chí cáávā yeⁿ'ē yáacū templo?

²⁵ Pedro miiⁿ ní caⁿ'ā sa chí 'tíicā va. Taachí sndaā yā va'ai yeⁿ'e sa Jesús miiⁿ caⁿ'a yā ndúúcu Pedro: ¿Táácā chí ngí yeⁿ'e dí, díí Simón Pedro? ¿Du'ú nadíí'vē impuestos yeⁿ'ē yáⁿ'ā nanááⁿ reyes yeⁿ'ē iⁿ'yeeⁿ'dí 'cūú? ¿Áá daiya 'iiⁿ'yāⁿ yeⁿ'e yáⁿ'ā naachi rey ngaⁿ'a ntiinⁿ'yúⁿ yā nadíí'vē sa o 'iiⁿ'yāⁿ chí cuchii táámá lado?

²⁶ Pedro miiⁿ nan'gueécútaⁿ'a sa ní caⁿ'a sa chí sa Jesús: 'Iiⁿ'yāⁿ chí chiica táámá lado nadíí'vē yā. Jesús caⁿ'a yā chí yā Pedro: Daiya 'iiⁿ'yāⁿ yeⁿ'e yáⁿ'ā naachi rey ngaⁿ'a ntiinⁿ'yúⁿ yā miiⁿ ní nguée canée chí nadíí'vē sa.

²⁷ Nguée neⁿ'e yú chí nduuvi taaⁿ yā. Maaⁿ ní cueⁿ'e dí ná nuūⁿ'niⁿ'yáⁿ'ā ní caⁿ'nuuⁿ dí 'áámá gancho yeⁿ'ē yaacā nguaaⁿ nuūⁿ'niⁿ'. Yaacā chí ndaacā dí vmnááⁿ vmnaaⁿ cutá'a dí ní nn'guaaⁿ dí cheendí tí. Mííⁿ ní ndaacā dí 'aama tuumí. Ndúúcu tuumí miiⁿ ní caⁿ'a dí cá'ā dí yeⁿ'ē 'úú ndúúcu yeⁿ'e maaⁿ dí chí nadíí'vē yú yeⁿ'e yáacū templo.

¿Du'u 'iiⁿ'yāⁿ chí ch'ete ca yā?

(Mr. 9.33-37; Lc. 9.46-48)

18 Nguuvi mííⁿ discípulos yeⁿ'e Jesús ndaa yā nanááⁿ

yā ní caⁿ'a yā chii yā Jesús: N'dii Jesús, ¿du'u cá chi ch'etete cá naachi Ndyuūs ngaⁿ'a ntiⁿ'nyuⁿ yā na va'ai cheeti nguuví?

²Jesús 'cai yā 'áámá saⁿ'ā 'lírⁿ ní ch'ííndi yā saⁿ'ā 'lírⁿ náávtaⁿ'a yeⁿ'e discípulos. ³Ní caⁿ'a yā: Cuaacu nííⁿ'nyúⁿ ngaⁿ'á ngíí ndís'tii. Ndúúti chi ndís'tii nguée dííⁿ nī tan'dúúcā 'áámá saⁿ'ā 'lírⁿ nguée cuuvi ndaa nī naachí Ndyuūs ngaⁿ'a ntiⁿ'nyúⁿ yā na va'ai cheeti nguuví. ⁴Tífcā 'āā du'ú nūuⁿ 'iíⁿ'yāⁿ chi ndiicúⁿ maáⁿ yā tan'dúúcā saⁿ'a 'lírⁿ 'cūū, 'iíⁿ'yāⁿ 'cūū chi ch'etete ca yā naachí Ndyuūs ngaⁿ'a ntiⁿ'nyúⁿ yā na va'ai cheeti nguuví. ⁵Āā du'ú nūuⁿ 'iíⁿ'yāⁿ chi 'cuaáⁿ yā 'áámá saⁿ'ā 'lírⁿ ndúúcu chi duuchí, tuu'mi ní 'cuaáⁿ yā 'úú.

**Dendu'ū chi idiíiⁿ chí 'iíⁿ'yāⁿ
dinuuⁿndí yā**

(Mr. 9.42-48; Lc. 17.1-2)

⁶Ní caⁿ'a Jesús: Āā du'ú nūuⁿ 'iíⁿ'yāⁿ chi dííⁿ yā chí 'áámá chee chí n'gaiyāā chi i'téenu yā 'úú dinuuⁿndí yā n'daācā ca cáāvā 'iíⁿ'yāⁿ miiⁿ chi 'iíⁿ'yāⁿ s'eeⁿ cāchiichí yā 'áámá tuūu yúúdu chí íngúú 'iíⁿ'yāⁿ na daandú yā ní canuúⁿ yā 'iíⁿ'yāⁿ miiⁿ naachi yāanūuⁿ yeⁿ'e nuūⁿníⁿ'yáⁿ'ā ní 'iíⁿ'yāⁿ miiⁿ cun'dáá nuúⁿ yā. ⁷Dē'e chúúcā ndaachíí yeⁿ'e 'iíⁿ'yāⁿ yeⁿ'e iⁿ'yeeⁿdí 'cūū cáāvā dendu'ū chi 'túúca chí diiⁿ chí cuuvá yā na nuuⁿndi. Āā véé nūuⁿ cosas chí 'tífcā naati dē'e chúúcā ndaachíí yeⁿ'e 'iíⁿ'yāⁿ chí dííⁿ yā chí táámá 'iíⁿ'yāⁿ cuuva yā na nuuⁿndi.

⁸Ní nduuti chi ta'a di o ca'a di idiíiⁿ chí dinuuⁿndí nī, 'caacā nī ta'a di o ca'a di ní diví di. N'dáacā ca chí ndaa di ló'ō ta'a di o ló'ō

ca'a di na vida cueⁿ'e daāⁿ'maⁿ ní nguée chí caⁿ'a di ndúúcu 'uūvi ta'a di o nduu 'uūvi ca'a di na infierno naachí nguuchi yaⁿ'ā chí 'áámá cūnee. ⁹Nduutí chí nduutináaⁿ di idiíiⁿ chí idinuuⁿndí di, tun'dāa di ní diví di. N'daācā ca chí cunee di ndúúcu 'áámá nduutináaⁿ di nguée ti chí cunee di ndúúcu nduu 'uūvi nduutináaⁿ di ní caⁿ'a di ná nguuchi yaⁿ'ā chí 'áámá cānee cueⁿ'e daāⁿ'maⁿ.

**'Áámá ejemplo yeⁿ'e 'iiti cuūchí chí
nindái**

(Lc. 15.3-7)

¹⁰Ní caⁿ'a Jesús: Tandii ra dííⁿ nī ndúúcu mar 'áámá da'caiyāa n'gaiyāā ní dííⁿ nī chí cuuvi dinuuⁿndí nī. Nguée cunncaā dííⁿ nī yeⁿ'ē ti 'úú ngaⁿ'á ngíí ndis'tii chí ángeles yeⁿ'ē da'caiyāa snée yā ná va'ai cheeti nguuví nanááⁿ Chiidá nī inaaⁿ yā cucáāvā da'caiyāa. ¹¹Ti Saⁿ'ā Daiyá Ndyuūs miiⁿ ní ndaa sa chí nadinguáⁿ'ai sa chííⁿ chí nindái.

¹²¿Dē'ē inadacídiinuⁿ ndís'tii? Nduuti chí 'áámá saⁿ'ā véé 'áámá ciento 'iiti cuūchí yeⁿ'ē sa ní cuuvi ndái 'áámá ti 'áá nguée cū'neeⁿ sa 'iiti chí cuūⁿ ngeecú ndítiiⁿ'yuⁿ cuúⁿ tī ní caⁿ'a sa cuááⁿ yiicū miiⁿ ní cun'nuuⁿ sa 'áámá 'iiti chí nindái miiⁿ. ¹³Ndúúti chí ndaācā sa 'iiti, cuaacu nííⁿ'nyúⁿ ngaⁿ'á ngíí ndís'tii ti yeenú taavi sa cáāvā 'iiti chí nindai nguée ti ndu'ū chí cuūⁿ ngeecú ndítiiⁿ'yuⁿ cuúⁿ tī chí nguée chí nindái tī. ¹⁴Tífcā Chiidá yú chí canée yā ná va'ai cheeti nguuví nguée neⁿ'e yā chí mar 'áámá chí n'gaiyāā s'ūuⁿ cuuvi ndái.

'Iiⁿyāⁿ canee chí nadich'ēcú yā yeⁿē
vīi

(Lc. 17.3)

¹⁵Tiicá ntúūⁿ ngaⁿá ngíí ndís'tiī: Ndúúti chí 'dínū di diiⁿ sa chí nguéeⁿ n'daācā ndúúcu di, cueⁿe di ní ndee di ndúúcu sa nguaaⁿ maáⁿ nī yeⁿe chí nguēē n'daācā chí diiⁿ sa. Nduuti chí cu'neeⁿ veeⁿ sa yeⁿe di, 'āā nan'dāā n'dái di ndúúcu 'dínū di. ¹⁶Naati nduuti chí nguéeⁿ cu'neeⁿ veeⁿ sa yeⁿe di 'cuai di ná 'uūvi o 'iīnu 'iīⁿyāⁿ. Ní chíi yā na 'uūvi yā o na 'iīnu yā chí 'caandiveéⁿ yā tanducuéⁿē chí caaⁿ'maⁿ di ní véé testigos yeⁿé di tan'dúúca chí canéeⁿ nguūⁿ na ley. ¹⁷Ndúúti chí 'dīnu di nguéeⁿ cu'nēēⁿ veeⁿ sa yeⁿé yā ndúúcu yeⁿe di cúúvī dí 'iīⁿyāⁿ chí ngaⁿ'a ntiīⁿnyúⁿ yā yeⁿē 'iīⁿyāⁿ chí i'téenu yā Ndyuūs. Ndúúti chí 'dínū di miiⁿ nguéeⁿ cu'nēēⁿ veeⁿ sa yeⁿé 'iīⁿyāⁿ chí ngaⁿ'a ntiīⁿnyúⁿ yā yeⁿe 'iīⁿyāⁿ chí i'téenu yā Ndyuūs, cu'neeⁿ di 'dínū di tan'dúúca 'áamá 'iīⁿyāⁿ ndiica yáⁿái chí nguéeⁿ yeⁿē ndaata yeⁿe di o tan'dúúca chí 'aama saⁿā chí inn'guēē sa yeⁿē yáⁿāa.

¹⁸Cuaacu níⁿnyúⁿ ngaⁿá ngíí ndís'tiī: Tanducuéⁿē chí nguéeⁿ 'cuaaⁿ nī chí 'iīⁿyāⁿ díⁿ yā na iⁿ'yeeⁿdí 'cūū Ndyuūs chí canéeⁿ ná va'ai chēeti nguuvī nguéeⁿ 'cuaaⁿ ntuúⁿ yā. Tanducuéⁿē chí 'cuáaⁿ nī chí 'iīⁿyāⁿ díⁿ yā na iⁿ'yeeⁿdí 'cūū Ndyuūs chí canéeⁿ ná va'ai chēeti nguuvī 'cuaaⁿ ntuúⁿ yā.

¹⁹Taama vmnéⁿēē ngaⁿá ngíí ndís'tiī: Nduuti chí ná 'uūvi ndís'tiī nduuvidaamā nī ná yáⁿāa 'cūū yeⁿe 'āā de'é nūuⁿ chí caacá nī yeⁿē Chiidá chí canéeⁿ yā na va'ai chēeti

nguuvī, Chiidá téē yā ndís'tiī. ²⁰Tiī naachí snéé 'uūvī o 'iīnu 'iīⁿyāⁿ chí nduuvidaama yā cucáāvā chí duuchí, miiⁿ caneeⁿ nduucú yā.

²¹Tuu'mi ní ndaā Pedro miiⁿ nanáaⁿ Jesús ní caⁿ'a yā chíi yā 'iīⁿyāⁿ: N'díí Señor, 'áá n'deēē cuūvī caneeⁿ chí nádich'ēcú yeⁿē 'diīnú chí nguéeⁿ n'daācā idiīⁿ sa nduucú? 'Áá ndēēchē cuūvī?

²²Jesús caⁿ'a yā chíi yā Pedro: Nguéeⁿ ngaⁿ'á ngíí dii chí ndēēchē cuuvī tiī 'iīnū ngēecu ndiichi veces chí ndēēchē ngaⁿ'á ngíí dii.

Ndúú 'uūvī 'iīⁿyāⁿ chí sn'diicu yā

²³Ní caⁿ'a Jesús: 'Tíicā naachí Ndyuūs ngaⁿ'a ntiīⁿnyúⁿ yā ná va'ai chēeti nguuvī ní tan'dúúca 'áamá rey chí neⁿe yā tun'dāa yā cuenta ndúúcu mozos yeⁿé yā. ²⁴Taachí neⁿe yā tuca'a yā tun'daa yā cuenta, candēē yā 'áamá mozo yeⁿé rey nanáaⁿ yā chí can'diicū sa n'deeē n'dái mil tuūmī. ²⁵Mozo miiⁿ ní nguéeⁿ cuuvī diiⁿ sá nadíí'vē sa. Tuu'mi ní rey chí 'iiví sa caⁿ'a yā chíi yā táamá mozo miiⁿ chí n'diicui sa mozo ndúúcu n'daataā yeⁿē sa ndúúcu daiya sa ndúúcu tanducuéⁿē chí véé yeⁿē sa ní nadíí'vē mozo miiⁿ chí can'díicū sa yeⁿé yā. ²⁶Tuu'mi ní mozo miiⁿ candiitīn'díi sa nanáaⁿ 'iivī sa ní di'cuítu sa 'iīⁿyāⁿ ní caⁿ'a sa chíi sa 'iīⁿyāⁿ: N'díí Señor, cunee ngínú nī 'áamá tiempo ní 'úú ní nadíí'vē tanducuéⁿē yeⁿé nī. ²⁷Iivī sa miiⁿ ní nneé ya'ai 'iīnu yā saⁿā ní caⁿ'a yā chíi yā saⁿā: Cunaⁿā di ní 'āā ntéē cun'diicū di yeⁿé. ²⁸Sá'a 'cūū cúnaⁿ'a sa ní nan'daā sa ní ndaācā sa mozo chí daama idiīⁿ sa ntiīⁿnyuⁿ ndúúcu sa. Táamá mozo

miiⁿ can'dífcu ntúūⁿ sa 'aama ciento tuūmī yeⁿē sa. Ní mozo miiⁿ chita'ā sa daandu sáⁿā miiⁿ ní tucá'a sa chiī sa yaācū sa ní caⁿa sa: Nadí'vē di chi can'dífcu di. ²⁹Tuu'mi ní mozo miiⁿ candiitín'diī sa nanáaⁿ sa ní caⁿa sa chiī sa: Cuneē ngíínú dí 'téé ní nadí'vé yeⁿē di. ³⁰Naati saⁿā miiⁿ nguéé 'cuūⁿ sa. Cheⁿe sa chiica sa nuūⁿndī yeⁿe mozo miiⁿ ndúúcu sa ní s'nuūⁿ yā mozo vácūū ndíí nadí'vē sa chi cándífcu sa. ³¹Tanáⁿā mozos ndúúcu sa n'diichi yā chi chiī ní s'neeⁿ ndaachi yiínú yā. Ní cheⁿe yā nanááⁿ 'iivi yā ní caⁿa yā chiī yā 'iiví yā tanducuéⁿē chí chiī. ³²Tuu'mi ní 'iiví mozos 'cai yā mozo 'cūū chi ndaa sa nanáaⁿ yā. Ní caⁿa yā chiī yā mozo miiⁿ: Dii mozo, nguéé n'daācā di. Tanducuéⁿē chí can'dífcu di yeⁿē 'āā chíí dii chi 'āā ntéé nadí'vē di ti di'cuíftu di 'úú. ³³¿Áā nguéé nnee ya'āi 'iinu di mozo ndúúcu di tan'dúúcā chi 'úú nnee ya'ai 'iínú dii? ³⁴Tuu'mi ní nduuví taáⁿ 'iivi sa ní chiicá yā nuūⁿndī yeⁿē sa. Ní cueⁿe sa vácūū chi ch'eⁿē yā saⁿā ní miiⁿ canee sa ndii nadí'vē sa tanducuéⁿē chi can'dífcu sa yeⁿe yā.

³⁵'Tiicá ntúūⁿ Chiidá chi canéé na va'ai chēēti nguuví 'tífcā dííⁿ yā ndúúcu ndís'tiī nduuti chi ndís'tiī ní nguéé nadich'ēcū nī ndúúcu nuuⁿmaⁿ staava yeⁿe nī yeⁿe 'áámá 'áámá 'díínu nī yeⁿe chi nguéé n'daācā ndííⁿ yā ndúúcu nī.

Jesús ngí'cueeⁿ yā yeⁿē chi 'tēechí vi'i 'iíⁿyāⁿ

(Mr. 10.1-12; Lc. 16.18)

19 Taachí Jesús ch'íínú caⁿa yā ndúúdu 'cūū chiicá yā

na yáⁿā Galilea ní cueⁿe yaⁿai cá yā na yáⁿā yeⁿe Judea chi táámá lado yeⁿe yíícú Jordán. ²Nééné 'yaaⁿ 'iíⁿyāⁿ cueⁿē yā n'daa yā Jesús miiⁿ ní Jesús dííⁿ yā chi nduūvā yeⁿe 'iíⁿyāⁿ s'eeⁿ chi ngiītā.

³Tuu'mi ní 'iíⁿyāⁿ fariseos ndaá yā nanááⁿ Jesús miiⁿ ti neⁿē yā chi n'diichíneeⁿ yā Jesús miiⁿ. Ní ngaⁿa yā ngiī yā 'iíⁿyāⁿ: N'diī Jesús, ¿'áá canéé ná ley chí saⁿā ní cu'neeⁿ sa n'daataa yeⁿē sa chi nguéé ch'ēēte dē'ē chi ndiīⁿ tá?

⁴Jesús miiⁿ nan'guēēcútaⁿa yā ní caⁿa yā chiī yā 'iíⁿyāⁿ s'eeⁿ: ¿'Áā nguéé n'geeⁿ nī naachi canéé nguūⁿ na libro yeⁿē Ndyuūs naachí ngaⁿa chi Ndyuūs din'dái yā taanduvéé cosas ndíí cuááⁿ vmnaaⁿ ní din'dái yā saⁿā ndúúcu n'daataa? ⁵Ní caⁿa yā: Chífⁿ chí saⁿā cu'neeⁿ sá chiida sa ndúúcu chēēcu sá ní nduūvidaama sa ndúúcu n'daataa yeⁿē sa ní nduu 'uuví yā ní nduūvī 'aama yā nduucū vi'ī. ⁶Tuu'mi ní 'āā ntéé 'uuví ngiī yā tí 'āā 'aama núúⁿ yā. Chífⁿ chí Ndyuūs nádaama yā, 'iíⁿyāⁿ nguēē cánéé chí idiví yā.

⁷'Iíⁿyāⁿ fariseos caⁿa yā chiī yā Jesús: ¿Dē'ē cáāvā chi Moisés caⁿa ntiiⁿnyuⁿ sa chí ca'á yā carta chí i'tēechi vi'ī yā ní cu'neéⁿ yā n'daataa yeⁿe yā?

⁸Jesús caⁿa yā chiī yā 'iíⁿyāⁿ fariseos: Moisés miiⁿ ní 'cuūⁿ sa chi s'neeⁿ saⁿā n'daataa yeⁿe sa cucáāvā chi staava yeⁿe sa ní nééné chēēchi. Naati cuááⁿ vmnaaⁿ naachí chi nga'a, nguēē 'tífcā chiī. ⁹Úú ní ngaⁿá ngiī ndís'tiī chí 'āā du'ú nūūⁿ saⁿā chi cu'neeⁿ sa n'daataa yeⁿē sa ndúúti chi nguéé cáāvā chí cueⁿe tá ndúúcu taama saⁿā ní

saⁿā miiⁿ cunee sa ndúúcu taama tá, véé nuūⁿndi yeⁿē sa. Sáⁿā chi 'caandavaacu sa ndúúcu n'daataá chi s'neeⁿ tá isaⁿā yeⁿē tá, véé ntúūⁿ nuuⁿndi yeⁿē sa chi adulterio.

¹⁰Tuu'mi discípulos yeⁿe Jesús ní caⁿa yā chii yā Jesús: Ndúúti chi saⁿā miiⁿ cúⁿneeⁿ sa n'daataá yeⁿē sa tuu'mi ní n'daācā ca chi nguéeⁿ 'caandavaacu sa.

¹¹Tuu'mi ní Jesús miiⁿ caⁿa yā chii yā discípulos: Nguéeⁿ nducyaaca 'iiⁿyāⁿ cuuvi deenu yā chuū naati 'āā dāmaāⁿ 'iiⁿyāⁿ chí Ndyuūs nca'a yā chuū. ¹²Véeⁿ yaaⁿ razones chi nguéeⁿ 'caandavaacu saⁿā. Véé saⁿa chí ndii taachi n'giindiyāaⁿ sa yeⁿē cheecu sa 'āā nguéeⁿ cuuvi 'caandavaacu sa. Ní véé ntúūⁿ saⁿā eunucos chi 'iiⁿyāⁿ idiíⁿ yā chi nguéeⁿ cuuvi 'caandavaacu sa. Véé ntúūⁿ saⁿā chi maaⁿ sa nguéeⁿ neⁿe sa 'caandavaacu sa cáāvā chi diiⁿ sa ntiiⁿnyuⁿ yeⁿe naachí Ndyuūs ngaⁿa ntiiⁿnyúⁿ yā. Nduuti chi 'iiⁿyāⁿ cuuvi ca'cueeⁿ yā nduudúⁿ cūū tuu'mi ní 'āā deenú yā.

Jesús idi'viicú yā dá'caiyāa

(Mr. 10.13-16; Lc. 18.15-17)

¹³Tuu'mi ní ndaa 'iiⁿyāⁿ chi ndeē yā da'caiyāa nanááⁿ Jesús. Ní 'íicú Jesús miiⁿ cun'du'ú yā ta'a yā vmnááⁿ yeⁿē da'caiyāa s'eeⁿ ní caⁿ'angua'á yā yeⁿē dá'caiyāa. Discípulos yaa'vi néeⁿ yā 'iiⁿyāⁿ chí índaa ndúúcu dá'caiyāa. ¹⁴Jesús miiⁿ ní caⁿa yā chii yā discípulos: 'Cuaáⁿ ní chí chii da'caiyāa nanaáⁿ. Nguéeⁿ caaca taaⁿ ní yeⁿē da'caiyāa s'tíi ti naachí Ndyuūs chi canéeⁿ na va'ai cheeti nguuvi ngaⁿa ntiiⁿnyúⁿ yā ní yeⁿē da'caiyāa s'tíi. 'Tííca chii.

¹⁵Ch'iinu chin'du'ú ta'á yā vmnaaⁿ yeⁿē da'caiyāa s'eeⁿ ní chiicá yā lugar miiⁿ.

Saⁿā 'dííⁿ chí 'cuiica ní indeē sa ndúúcu Jesús

(Mr. 10.17-31; Lc. 18.18-30)

¹⁶Tuu'mi ní ndaā 'áámá saⁿā 'dííⁿ nanááⁿ Jesús miiⁿ ní caⁿa sa chii sa Jesús: N'dii maestro chí n'dai, ¿de'ē chí n'dáacā chí cuuví dííⁿ ní cuuví ndaācā vida cueⁿe daāⁿmaⁿ chí cuuvi yeⁿé?

¹⁷Jesús caⁿa yā chii yā saⁿā 'dííⁿ miiⁿ: ¿De'ē cúví chí ngaⁿā di chí n'dai 'úú? Mar 'áámá 'iiⁿyāⁿ nguéeⁿ n'dai yā ti dāmaāⁿ Ndyuūs. Naati ndúúti chí neⁿe di cundaā di na va'ai cheeti nguuvi naachí Ndyuūs ngaⁿa ntiiⁿnyuⁿ yā, idiíⁿ di tan'dúúcu chí ngaⁿa mandamientos.

¹⁸Saⁿā 'dííⁿ mííⁿ ní caⁿa sa: ¿Cheé chííⁿ? Jesús caⁿa yā: Nguéeⁿ 'caāⁿnūⁿ di. Nguéeⁿ caⁿa di ndúúcu 'aama n'daataá chí nguéeⁿ yeⁿē di. Nguéeⁿ diduucú di. Nguéeⁿ caaⁿmaⁿ di nduudu yaadi yeⁿé mar 'áámá 'iiⁿyāⁿ. ¹⁹Dinéⁿe di cheecu di ndúúcu chiida di. Dinéⁿe di 'iiⁿyāⁿ na niiⁿnuúⁿ vaacú di tan'dúúcu chí neⁿe di maāⁿ di.

²⁰Saⁿā 'dííⁿ miiⁿ ní caⁿā sa: Tanducuéⁿē chuū 'āā idiíⁿ ndíi taachi saⁿā 'lííⁿ 'úú. ¿De'ē cá indai yeⁿé?

²¹Jesús caⁿa yā chii yā saⁿā: Ndúúti chí neⁿe di chí cúví n'dai ca di tuu'mi ní cueⁿe di ní ndiicui di tanducuéⁿē chí véé yeⁿē di ní ca'a di 'iiⁿyāⁿ chí nguéeⁿ yeⁿe yā. Tuu'mi ní ndaācā chí véé vaadi 'cuiica yeⁿē ná va'ai cheeti nguuvi

chi cuuví yeⁿē di. Ní cuchíi di ní caⁿa di nduucú.

²²Taachí saⁿā 'díiⁿ miiⁿ ch'iindiveeⁿ sa chuū, cunáⁿa sa ní s'neeⁿ ndaachi yiinú sa ti neené 'cuiica sa.

²³Tuu'mi ní Jesús caⁿa yā chii yā discípulos yeⁿe yā: Cuaacu níⁿnyúⁿ ngaⁿá ngíi ndís'tií chí ngíⁿi chí cundaā 'áámá saⁿā 'cuiica naachí Ndyuūs ngaⁿa ntiⁿnyúⁿ yā na va'ai chēeti nguuví. ²⁴Táámá cosa ngaⁿá ngíi ndís'tií chí 'ááma iti camello chí chēete ca nguéé ti 'yuudūu 'tiicá tī, nguéé ngíⁿi ca chí cho'ó tī na nduutinááⁿ 'iini chí cheendi va'ai 'líiⁿ nguéé ti 'áámá 'iiⁿyāⁿ 'cuiica cu'téenu yā Ndyuūs ní cundáa yā naachí Ndyuūs ngaⁿa ntiⁿnyúⁿ yā na va'ai chēeti nguuví.

²⁵Taachí ch'iindiveeⁿ discípulos yeⁿe yā chuū, néené nadicádíinuⁿ yā ní caⁿa yā nguááⁿ maaⁿ yā: ¿Du'u cuuví nanguaⁿāi?

²⁶Jesús chíⁿu yā discípulos ní caⁿa yā: Saⁿā yeⁿe iⁿyeeⁿdí cūū ní nguéé cuuví diiⁿ sa chuū naati Ndyuūs cuuví díiⁿ yā tanducuéⁿē.

²⁷Tuu'mi ní Pedro miiⁿ ní nan'guēcútaⁿa sa ní caⁿa sa chii sa Jesús: N'dií Señor, cuin'diichí nī. Nús'ūū ní sn'neeⁿ 'nū tanducuéⁿē chí véé yeⁿē 'nū ní cuchíi 'nū ndúúcu n'dií. ¿De'ē ndaāca yeⁿē 'nū?

²⁸Jesús caⁿa yā chii yā discípulos: Cuaacu níⁿnyúⁿ, ngaⁿá ngíi ndís'tií, chí tiempo chí cuchii taachí nducuéⁿē nduuví ngai ní Saⁿa chí Daiyá Dendyuūs 'cuūndi sa na trono yeⁿē sa ndúúcu dēve chēete yeⁿe maaⁿ sa ní 'cuai sa ndís'tií chí cueⁿe nī ndúúcu sa. Ní ndís'tií ní 'cuēté nī na ndiichuuví tronos ní díiⁿ nī

juzgar ndu'u ndiichúúvī ndaata yeⁿe 'iiⁿyāⁿ Israel chí judíos yā.

²⁹Āā du'ú nūuⁿ chí cu'neeⁿ ná vaacu yā o 'díinu yā o ví'í yā o chiidá yā o chēécú yā o n'daataa yeⁿe yā o daiya yā o yáⁿāa yeⁿe yā cáávā chí duuchí, 'iiⁿyāⁿ miiⁿ ndaāca cá yā táámá ciento más cá. Ní Ndyuūs ca'á yā 'iiⁿyāⁿ miiⁿ vida cueⁿe daāⁿmaⁿ yeⁿe yā ná va'ai chēeti nguuví. ³⁰Néené 'yaaⁿ 'iiⁿyāⁿ chí maaⁿ snée yā cuááⁿ chí vmnaaⁿ ní 'iiⁿyāⁿ s'eeⁿ 'cuēetinée yā cuaaⁿ chí cuayiivi ní néené 'yaaⁿ 'iiⁿyāⁿ chí maaⁿ snée yā cuaaⁿ chí cuayiivi ní 'iiⁿyāⁿ s'eeⁿ 'cuēetinée yā cuaaⁿ chí vmnaaⁿ.

Ejemplo yeⁿe 'iiⁿyāⁿ chí díiⁿ yā ntiⁿnyuⁿ

20 Caⁿa Jesús: Naachí Ndyuūs ngaⁿa ntiⁿnyúⁿ yā yeⁿe na va'ai chēeti nguuví ní tan'dúúca 'áámá dueño chí véé yáⁿāa yeⁿe yā. Dueño miiⁿ ní can'dáa yā cuaaⁿ ná nguēetiyaⁿ chí in'nuuⁿ yā mozos chí diiⁿ ntiⁿnyuⁿ naachi véé dí'yú uvas yeⁿē yā. ²Ní indeé yā ndúúcu mozos taaca chí nadí'vé yā mozos. Ní caⁿa yā chí ca'a yā 'aama caadi plata nguuví miiⁿ ní dicho'ó yā mozos miiⁿ chí diiⁿ sa ntiⁿnyuⁿ naachi véé dí'yú uvas yeⁿē yā. ³Dueño miiⁿ can'dáa yā na vaacu yā taandúu cuááⁿ nááⁿ n'gēcú nuuuⁿ nguēetiyaⁿ ní cuéⁿe yā cuaaⁿ nīi'vēē ní n'diichi yā ta n'duuví sán'a chí snée sa chí nguéé ndaāca ntiⁿnyuⁿ yeⁿe sa. ⁴Ní caⁿa yā chí yā saⁿā s'eeⁿ: Ndís'tií, cuéⁿe nī díiⁿ nī ntiⁿnyuⁿ yeⁿē naachi véé dí'yú uvas yeⁿē. 'Úú ní nadí'vé ndís'tií tan'dúúca chí tuumicadiinúúⁿ chí

n'daācā. Saⁿā s'eeⁿ ní cueⁿe sa diiⁿ sa ntiⁿnyúⁿ miiⁿ. ⁵Ní can'dáá ntuuⁿ yā taandúú cuááⁿ naaⁿ ingyáⁿā. 'Tiicá ntúūⁿ cun'daa yā táánduu cuaaⁿ nááⁿ n'gēcú 'íínú chiinū, 'tiicá ntúūⁿ diiⁿ yā n'nuúⁿ yā mozos chi diiⁿ sa ntiⁿnyuⁿ. ⁶Ní taandúū n'gēcú juⁿu chiinū cueⁿe ntúuⁿ yā ní ndaācā yā taanduu 'uuví saⁿā chi nguée índaācā ntiⁿnyuⁿ yeⁿe sā. Ní caⁿa yā chii yā saⁿā s'eeⁿ: ¿De'ē cúúví chí ndís'tií snée nī 'muuⁿ ní núúⁿmāⁿ nguuví chi nguée ntiⁿnyuⁿ chi idiíⁿ nī? ⁷Saⁿā s'eeⁿ caⁿa sa: Tí mar 'áámá 'iiⁿyāⁿ nguée tee yā ntiⁿnyuⁿ yeⁿé nū. Dueño miiⁿ caⁿa yā chii yā saⁿā s'eeⁿ: Ndís'tií, cueⁿé nī diiⁿ nī ntiⁿnyuⁿ naachi véé dí'yú uvas yeⁿé ní nadií'vé ndís'tií tan'dúúcā chi ituumicádiinúúⁿ chi n'daācā. ⁸Taachí cueⁿe yā 'yáⁿā, dueño miiⁿ naachí véé dí'yú uvas miiⁿ caⁿa yā chii yā saⁿa chi ngaⁿa ntiⁿnyuⁿ sa yeⁿe mozos: 'Cuai dí mozos ní nadií'vé di mozos chi ndaa sa cuayiivi. 'Cuiinu maaⁿ ní nadií'vé di mozos chi ndaa sā cuayiivi. 'Cuiinu maaⁿ ní nadií'vé di mozos chi ndaa sā vmnaaⁿ. ⁹Ndaa mozos chi cheⁿe sā na ntiⁿnyuⁿ miiⁿ taanduu na n'gēcú juⁿu chiinū ní nadií'vé sa mozos. 'Áámá 'áámá sā ndaācā sā 'áámá caadi plata yeⁿé sā. ¹⁰Taachí ndaa mozos chi cheⁿe sā vmnaaⁿ ná ntiⁿnyuⁿ miiⁿ, nadacádiinuⁿ sā n'deē cá tuūmī ndaācā sā. Mozos ntúūⁿ ndaācā sā 'áámá caadi tuūmī yeⁿe sā. ¹¹Taachí nadií'vé sā mozos ní neenē n'deē caⁿa mozos yeⁿe dueño yeⁿe naachi véé dí'yú uvas miiⁿ. ¹²Mozos ní

caⁿa sa: Sáⁿa s'tií ti 'āā 'ai chiinū ndaā sa ní 'áámá hora nūuⁿ diiⁿ sa ntiⁿnyuⁿ ní dāámá nūuⁿ nadií'vé nī sáⁿa s'tií ndúúcu nús'uū. Nús'uū ní diiⁿ 'nū ntiⁿnyuⁿ ní ch'etinee 'nū na 'yáⁿā. ¹³Dueño miiⁿ ní nan'gēcútaⁿá yā ní caⁿa yā chii yā 'áámá chee mozos: Ndís'tií saⁿā chí n'dai nduucú, nguée nduuví taaⁿ di nduucú. Nguée cunncaā idiíⁿ nduucú ndís'tií. ¿Áá nguée ndeē ndúúcu nī chí nadií'vé ndís'tií 'áámá caadi plata ní 'āā canée yiinú nī? ¹⁴Cutaⁿá nī chí tunéeⁿ ndis'tií ní cunaⁿa nī. 'Úú ní nadicádiinúúⁿ chí nadií'vé mozos chí ndaa sa cuayiivi tan'dúúcā chí nadií'vé ndís'tií. ¹⁵¿Áá nguée cuuvi diiⁿ 'úú tan'dúúcā chi neⁿé ndúúcu tuūmī yeⁿé? ¿Áá ngíí nguee nī ti 'úú ní n'daí? ¹⁶Túúca 'iiⁿyāⁿ chi snée cuááⁿ vmnááⁿ 'cuetinée yā ndii cuaaⁿ cuayiivi. 'Iiⁿyāⁿ chi snée cuayiivi ní 'cuetinee yā cuáaⁿ vmnaaⁿ ti neenē 'yaaⁿ n'deē 'iiⁿyāⁿ chi 'cai Ndyuūs naati duu'vii 'iiⁿyāⁿ chi ndeēve Ndyuūs.

Jesús ngaⁿa ntuuⁿ yā yeⁿe chí 'cuūvi yā

(Mr. 10.32-34; Lc. 18.31-34)

¹⁷Jesús cuche yā na yāāⁿ Jerusalén ní cueⁿé yā ndúúcu ndu'ū ndiichúúví discípulos yeⁿé yā 'áámá lado. Ní Jesús caⁿa yā chii yā discípulos taachi ngicá yā: ¹⁸Ndís'tií ní maaⁿ ní cuche yú na yāāⁿ Jerusalén miiⁿ. 'Úú chi Saⁿā chi Daiya Dendyuūs 'iiⁿyāⁿ s'eeⁿ ncaⁿá yā 'úú tá'āa chiiduú n'gēetē ndúúcu maestros chí ngi'cueⁿ ley. 'Iiⁿyāⁿ s'eeⁿ ní diiⁿ yā condenar 'úú ní 'cuūvi. ¹⁹Ní ncaⁿa

yā 'úú ta'a 'ii'yā" chi nguée ndaata ye"e 'ii'yā" Israel. 'Ii'yā" s'ee" ní 'cáá'nyu"nee" yā 'úú ní 'cue"e yā 'úú ní cu'nee'nga'á yā 'úú. Ní 'úú chí Sa"ā chi Daiya Ndyuūs mii" nanduuchí ndiichi ndii 'íínú nguuví ye"ē nguaa" tiná"ā.

**Chí cheecu Jacobo ndúúcu Juan
chiica tá ye"ē 'áámá naa"**

(Mr. 10.35-45)

²⁰Tuu'mi ní ndaa' n'daataá ye"e sa"ā Zebedeo nanáá" Jesús mii" ndúúcu daiya tá ní chiintii'ya tá nanáá" Jesús mii" ní dich'ēte tá 'yā ní chiica ta 'áámá favor. ²¹Jesús ní ca"ā yā: ¿Dé'ē ne"ē dí? Tá"ā mii" ní ca"ā tá: Taachí ndaa di naachí caa"ma" ntii"nyu" di, caa"ma" ntii"nyu" di chi ndúú 'uūví sa"ā daiyá 'cuēte sa 'diituu dí, 'aama sa ní lado tá cuaacu di ní taama sa ní lado tá 'cuéé di.

²²Tuu'mi ní Jesús nan'guēcúta"ā yā ní ca"ā yā chii yā 'ii'yā": Nguée déenu nī de'ē chi ngiica nī. ¿Áá cuuvi dii" nī chí cúu nuú" nī ye"e chi n'gee" ye"e vaso chi ye"ē chi 'cuenú cuuvi? ¿Áá cuuvi cuta'á nī maa" ngeēdínú"nī" chí cuta'á? Juan ndúúcu Jacobo mii" ní nga"ā yā chi cuuvi dí" yā. ²³Jesús mii" ca"ā yā chii yā 'ii'yā" s'ee": Cuaacu ní"nyú" canée chí cu'ú nī ye"e vaso ye"é ye"e chí 'cuenú cuuvi ní canée chí cuta'á nī chí cheēdínú"nī" chí 'úú ita'á. Naati nguée tunée" 'úú chí ca'á du'ú chí 'cuundi lado tá cuaacú o lado tá 'cuée. Lugar 'cūú ní Ndyuūs ca'á yā 'ii'yā" chí Ndyuūs 'cuundiyaá" yā cáávā 'ii'yā".

²⁴Taachí ndu'u ndífhí discípulos ch'iindiveé" yā chuū, nduuví taá" yā

ye"e nduu 'uūví discípulos chí daiya sa"ā Zebedeo. ²⁵Tuu'mi ní Jesús yaa'ví yā discípulos ní ca"ā yā chii yā 'ii'yā" s'ee": Áā deenu ndís'tií chí 'ii'yā" ye"e naciones chí nga"ā ntii"nyu" vee poder ye"é yā nguaa" 'ii'yā" ye"e naciones ye"é yā. Ní 'ii'yā" chí n'geete cá ye"ē naciones ní nga"ā ntii"nyú" yā ye"e taná"ā yā. ²⁶Naati nguée 'tíicā cuuvi nguaa" ndís'tií. Sa"ā chí ne"e sa cúúví ch'ēte sa nguaa" ndís'tií canée chí dichí'v'e sa ndís'tií. ²⁷Sa"ā chí ne"e sa cūnee cuaa" vmnaa" ca ye"e ndís'tií canée chí dichí'v'e ca sa ndís'tií. ²⁸Naati Sa"ā chí Daiya Ndyuūs nguée ndaa sa chí 'í"yā" dichí'v'e yā sa"ā ti maā" sa dichí'v'e sa 'ii'yā", ní chí ca'a sa vida ye"ē maa" sa tan'dúúca chí precio ye"ē nuu"ndi cáávā chí nadangua"ai yā 'yaa" n'dái 'ii'yā".

'Uūví chí ngueenáá" nduūvā ye"ē sa

(Mr. 10.46-52; Lc. 18.35-43)

²⁹Taachí Jesús ndúúcu discípulos ye"é yā can'daa yā ye"e yáā" Jericó néené 'yaa" 'ii'yā" can'daa yā 'ii'yā" s'ee". ³⁰'Uuvi sa"ā chí ngueenáá" chí vee'te sa nii"nuú" cyúúní taachí ch'iindivee" sa chí Jesús cho'ó yā mii", 'cai yiicú sa ní ca"ā sa: N'dii Señor, Daiya David, nnee ya'ai 'iinu nī nús'uu.

³¹Néené 'yaa" 'ii'yā" yaa'vi nee" yā sa"ā s'ee" chí cunēē 'dii" cheendi sa naati sa"ā s'ee" ní n'gai yiicú cá sa: N'dii Señor, Daiya David, nnée ya'āi 'iinu nī nús'uu.

³²Jesús mii" cheendii yā ní 'cai yā sa"ā s'ee" ní ca"ā yā chii yā sa"ā s'ee": ¿Dé'ē ne"é nī chí 'úú díi" ndúúcu nī?

³³ Saⁿā s'eeⁿ ní caⁿa sa: N'dií Señor, dííⁿ nī chí snaaⁿ 'nū.

³⁴ Tuuⁿmi ní Jesús, Daiya David, nnéé ya'ai 'línu yā saⁿā s'eeⁿ ní tuuⁿvi yā nduutináaⁿ sa. Ní hora mífⁿ nūuⁿ nduutináaⁿ sa nnguaaⁿ ní chíi snaaⁿ sa. Saⁿā s'eeⁿ ní cueⁿe sa ndúúcu Jesús.

**Jesús sndaa yā na yāāⁿ Jerusalén
tan'dúúcā 'áámá rey**

(Mr. 11.1-11; Lc. 19.28-40; Jn. 12.12-19)

21 Taachi Jesús ndaa niiⁿnuúⁿ yā na yāāⁿ Jerusalén ní ndaa yā ná yīicū chi nguuví Olivos chí yeⁿe yāāⁿ 'lífⁿ chi nguuví Betfagé, dich'ó yā na 'uūvī discípulos yeⁿe yā. ²Ní caⁿa yā chíi yā discípulos: Cueⁿe nī na yāāⁿ 'lífⁿ chíi canéé niiⁿnuúⁿ. Miiⁿ ní ndaaca nī 'áámá burra chí n'dēēchiichí tī ndúúcu daiya tī. Ndís'tií ní n'daatí nī 'iiti ní candée nī 'iiti 'muuⁿ. ³Ní ndúúti chí 'áámá 'iiⁿyāⁿ yaaⁿvi yā ndís'tií yeⁿe 'iiti miiⁿ, caaⁿmaⁿ nī cuuvi nī 'iiⁿyāⁿ ti Señor yeⁿe yú neⁿe yā 'iiti miiⁿ. Ní 'iiⁿyāⁿ miiⁿ caama nadicho'ó yā 'iiti.

⁴Tanducuéⁿe 'túúca chíi ní 'iicu cuuví cuaacu chí caⁿa profeta chí ndēē yā nduudu yeⁿe Ndyuūs ndii cuááⁿ vmnaaⁿ taachí dinguúⁿ yā chuū na libro yeⁿe Ndyuūs:

⁵ Cuuví nī 'iiⁿyāⁿ chí snée yā na yāāⁿ Sión 'tífā. Cun'diichí nī, Rey yeⁿe nī cuchíí yā nanáaⁿ nī. Rey miiⁿ ní ndiicuúⁿ yā ní canduú yā burra 'lífⁿ. Ní burra 'lífⁿ ní daiya 'iiti chíi candée.

⁶ Discípulos cueⁿe yā ní dííⁿ yā tan'dúúcā chí Jesús miiⁿ dich'ó yā 'iiⁿyāⁿ s'eeⁿ. ⁷Ní candēē yā burra miiⁿ ndúúcu daiyá tī. Ní sn'duú yā

cotón yeⁿe yā vmnáaⁿ yeⁿe burra 'lífⁿ. Ní Jesús miiⁿ ní canduú yā 'iiti.

⁸ 'Iiⁿyāⁿ chí n'dēēē n'dái n'doo yā cotón yeⁿe yā cuaaⁿ cyúúni. Tanáⁿa yā ch'íica yā dúuⁿnē yáⁿá ní n'doo yā cuaaⁿ cyúúni. ⁹ 'Iiⁿyāⁿ chí cueⁿe yā cuááⁿ vmnaaⁿ ndúúcu 'iiⁿyāⁿ chí cueⁿe yā cuaaⁿ dáámí yā tucá'a yā 'cai yīicú yā, ní caⁿa yā: Dē'ē chúúca ch'ēēte n'dai 'iiⁿyāⁿ chí Daiya rey David. Dē'ē chúúca n'dai 'iiⁿyāⁿ chí cuchii ndúúcu chí duuchi Señor miiⁿ. Dich'ēēte yú Ndyuūs chí snée ná va'ai cheēti nguuví.

¹⁰ Taachí Jesús miiⁿ sndaa yā na yāāⁿ Jerusalén nducyáácá 'iiⁿyāⁿ yeⁿe yāāⁿ miiⁿ tuumicadínuuⁿ yā ní caⁿa yā nguaaⁿ maaⁿ yā: ¿Du'u rá sáⁿa 'cūū?

¹¹ 'Iiⁿyāⁿ mífⁿ ngaⁿa yā: Sáⁿa 'cūū saⁿa profeta Jesús chí cuchii sá cuaaⁿ na yāāⁿ Nazaret yeⁿe yāⁿāa Galilea.

Jesús inadideevé yā yaācū templo

(Mr. 11.15-19; Lc. 19.45-48; Jn. 2.13-22)

¹² Jesús miiⁿ sndaa yā ná yaācū templo yeⁿe Ndyuūs ní tun'dáa yā nducyaaca 'iiⁿyāⁿ chí in'diicui yā ndúúcu 'iiⁿyāⁿ chí ngái yā na yaācū miiⁿ. Ní cheēcundaa yā mesas yeⁿe 'iiⁿyāⁿ chí n'dáaⁿ yā tuūmī yeⁿe 'iiⁿyāⁿ. Ní cheēcú yā sillas yeⁿe 'iiⁿyāⁿ s'eeⁿ chí in'diicui yā 'yáádá palomas. ¹³ Ní Jesús caⁿa yā chíi yā 'iiⁿyāⁿ s'eeⁿ: Na libro yeⁿe Ndyuūs naachi canéé nguūⁿ 'túúca ngaⁿa: Vá'ai yeⁿe canéé chí duuchi va'ai naachi 'iiⁿyāⁿ caaⁿmaⁿngua'a yā, naati ndís'tií ní dííⁿ nī chí yīivi yáává yeⁿe 'iiⁿyāⁿ chí díduucu.

¹⁴ Ní cheēti yaācū miiⁿ ndaa nanáaⁿ Jesús 'iiⁿyāⁿ chí ngeuenáaⁿ

ndúúcū 'iiⁿyāⁿ chi ngaā yó'oo, ní Jesús miⁿ díⁿ yā chí nduūvā yeⁿe nducyaaca yā. ¹⁵Naati chiiduu n'gɛɛtɛɛ ndúúcū maestros yeⁿe ley nduuví taáⁿ yā taachí n'diichi yā chí 'tíicā idiiⁿ Jesús miⁿ ní chí indiveéⁿ yā chuū. Ní saⁿā dácaiyāa n'gai sa ní caⁿa sa: Dɛ'ɛ chúucā ch'ɛɛte saⁿā chí Daiya rey David miⁿ. ¹⁶Ní 'iiⁿyāⁿ s'leeⁿ caⁿa yā chí yā Jesús miⁿ: ¿Áá n'giindiveéⁿ ní chí saⁿā da'caiyāa ngaⁿā sa? Jesús caⁿa yā: N'giindiveéⁿ. ¿Áá nguéeⁿ n'geeⁿ ndís'tii Nduudu yeⁿe Ndyuūs naachi canée nguūⁿ? Ní ngaⁿa 'túúcā:

Áā diiⁿ di chí da'caiyāa ndúúcū dacuaⁿāa caata yā chí n'daāca n'dai yeⁿé Ndyuūs.

¹⁷Jesús ní nan'daa yā yeⁿe yaācū miⁿ. Ní nan'daa yā yeⁿe yāāⁿ miⁿ ní cueⁿe yā na yāāⁿ 'líiⁿ chí nguuví Betania. Ní míⁿ canee yā nguīnū miⁿ.

Jesús ngaⁿa yā chí nguɛɛ n'dáacā yāⁿā yeⁿe n'guíidii yaaⁿ nguuví chí nguée n'guiⁱ yeⁿé

(Mr. 11.12-14, 20-26)

¹⁸Chidéévé táámá nguuví, ní Jesús ndaa ntúⁿ yā ná yāāⁿ miⁿ ní chíi cuicú yā. ¹⁹Cuaaⁿ cyúúní ní n'diichi yā 'áámá yāⁿā yeⁿe n'guíidii yaaⁿ nguuví níⁿnuúⁿ cyúúní, ní cueⁿe yā naachí cutá'a yā n'guiidii miⁿ, ní nguée ndaaca yā n'guiⁱ yeⁿé, dámaāⁿ táāa. Ní Jesús caⁿa yā chíi yā yāⁿā 'túúcā: Dii yāⁿā, 'āā ntéé nguɛɛcunéeⁿ 'cuūndi n'guiⁱ yeⁿé di. Tuuⁿmi nūⁿ yaⁿā miⁿ ntiⁱ. ²⁰Taachí discípulos n'diichí yā chuū, ngeⁿé yiinú yā yeⁿé ní caⁿa yā: ¿Dɛ'ɛ cúúví chí maāⁿncheɛtɛ nuūⁿ ntiⁱ n'guíidii yaaⁿ nguuví?

²¹Jesús nán'guɛɛcútaⁿa yā ní caⁿa yā chíi yā discípulos: Cuaacu níⁿnyúⁿ ngaⁿā ngí ndís'tii, ndúúti chí ndís'tii i'téenu ní ní nguéeⁿ n'deéé nadicádíinuⁿ ní, nguéeⁿ dámaāⁿ chuū cuuví díⁿ ní yeⁿé n'guíidii yaaⁿ nguuví naati cuuví díⁿ ní ndúúcū yíicū 'líiⁿ 'cūú chí caaⁿmaⁿ ní cuuví ní: Dii yíicū, cuví dí 'múúⁿ ní cueⁿe di cundáá nuūⁿ di ná nuūⁿniⁿyāⁿā, ní cuuví. ²²Tanducuéⁿ chí caaca ní naachí caaⁿmaⁿnguaⁿā ní, ndúúti chí cul'téenu ní, ní ndaācā yeⁿe ní.

Jesús ngaⁿa ntiⁿnyúⁿ yā tan'dúúcā 'iiⁿntyéⁿé

(Mr. 11.27-33; Lc. 20.1-8)

²³Taachí Jesús miⁿ ndaa yā cheɛti yaācū templo miⁿ, chiiduu n'gɛɛtɛ ndúúcū 'iiⁿyāⁿ ndiicú chí ngaⁿa ntiⁿnyúⁿ yā yeⁿe yaācū ndaa yā nanááⁿ Jesús miⁿ taachí ngi'cueeⁿ yā, ní caⁿa yā chíi yā Jesús: ¿Du'ú 'íiⁿntyéⁿé ngaⁿa yā chí 'túúcā idiiⁿ ní? ¿Du'ú 'iiⁿyāⁿ tee yā poder chí caaⁿmaⁿ ntiⁿnyúⁿ ní 'túúcā?

²⁴Nan'guɛɛcútaⁿa Jesús miⁿ ní caⁿa yā chíi yā 'iiⁿyāⁿ s'leeⁿ: 'Úú ntúūⁿ ní intiinguuneeⁿ ndís'tii. Nduuti chí nan'guɛɛcútaⁿa ní yeⁿé, tuuⁿmi ní cuuví ndís'tii du'ú 'iiⁿntyéⁿé tee yā poder 'úú chí idiⁿ dendú'u chuū. ²⁵Yeⁿé chí cheɛdinúⁿniⁿ Juan, ¿tíi chíicā? ¿Áá yeⁿe Ndyuūs chí canée na va'i cheɛti nguuví o yeⁿe saⁿā iⁿyeeⁿdí 'cūú? Tuuⁿmi ní 'iiⁿyāⁿ s'leeⁿ ndeé yā nguááⁿ maáⁿ yā ní caⁿa yā: Nduuti chí caaⁿmaⁿ yú chí yeⁿé nanguuví, tuuⁿmi ní Jesús caaⁿmaⁿ yā cuuví yā s'uūⁿ: ¿Dɛ'ɛ cuuví chí nguéeⁿ s'teenu ní yeⁿe chí ngaⁿa Juan

miiⁿ? ²⁶Ní nduuti chi caaⁿ'maⁿ yú chi yeⁿe saⁿ'ā iⁿ'yeeⁿdí 'cūū, 'va'a yú 'iiⁿ'yāⁿ yeⁿe yāāⁿ ti nducyaaca yā ní déénu yā chi Juan chí cheedínuūⁿnī ní 'aama profeta yeⁿ'é Ndyuūs.

²⁷Ní nan'guεεcútaⁿ'a yā yeⁿ'e Jesús miiⁿ ní caⁿ'a yā: Nguéé déénu 'nū. Jesús miiⁿ ní caⁿ'a ntúuⁿ yā: 'Tiicá ntúūⁿ 'úú ní nguéé cuuví ndís'tiī du'u 'ííⁿ'ntyeⁿ'ē tee yā poder 'úú chí idiíⁿ chuū.

'Áámá ejemplo yeⁿ'ē 'uuví daiya yā

²⁸Jesús caⁿ'a yā: ¿Dεē inadacadiinúúⁿ ndís'tiī yeⁿ'e chuū? Caⁿ'á caaⁿ'māⁿ ndúúcu ndís'tiī yeⁿ'e 'áámá saⁿ'ā chi véé 'uūvī daiya sa. Ndaā sa nanááⁿ 'áámá daiya sa ní caⁿ'a sa: Díí daiyá, cuéⁿ'é di ní diiⁿ dí ntiiⁿ'nyuⁿ naachi véé díí'yú uvas yeⁿ'é. ²⁹Daiya sa ní nan'guεεcútaⁿ'a sa ní caⁿ'a sa: Nguéé neⁿ'é. Ch'iinu maaⁿ ní nadicádíínuuⁿ sa chi nguéé n'daācā diiⁿ sa ní cuéⁿ'e sa diiⁿ sa ntiiⁿ'nyuⁿ miiⁿ. ³⁰Ní cueⁿ'e ntúuⁿ saⁿ'ā miiⁿ ní yaa'vi sa táámá daiya sa, ni 'tiicá ntúūⁿ caⁿ'a sa chii sa daiya sa. Ní daiya sa mííⁿ nán'guεεcútaⁿ'ā sa ní caⁿ'a sa: 'Tíicā, n'diī chiidá, caⁿ'á. Naati nguéé cueⁿ'e sa diiⁿ sa ntiiⁿ'nyuⁿ. ³¹¿Dεē inadacadiinuuⁿ ndís'tiī? Naachi 'uūvī daiya yā ¿cheε chí diiⁿ tan'dúúca chi neⁿ'e chiidá yā? 'Iiⁿ'yāⁿ s'eeⁿ caⁿ'a yā: Saⁿ'ā chi yaa'ví yā vmnaaⁿ. Jesús caⁿ'a yā chii yā 'iiⁿ'yāⁿ s'eeⁿ: Cuaacu nííⁿ'nyúⁿ ngaⁿ'á ngíí ndís'tiī, chi 'iiⁿ'yāⁿ chí inn'guéé yeⁿ'e impuestos ndúúcu n'daataá chi véé cá saⁿ'ā yeⁿ'e tá caⁿ'á yā vmnaaⁿ yeⁿ'é ní naachí Ndyuūs ngaⁿ'a ntiiⁿ'nyúⁿ yā. ³²Ti Juan chí cheedínuūⁿnī ndaā

sa vmnááⁿ ndís'tiī. Chiica sá na 'áámá yúúni cuaacu ní ngaⁿ'a sa yeⁿ'e yúúni cuaacu yeⁿ'e Ndyuūs ní nguéé s'téénu ní yeⁿ'ē sa. Naati saⁿ'ā publicanos chí inn'guéé yeⁿ'e impuestos ndúúcu n'daataá chi véé saⁿ'ā s'ee ndúúcu tá s'téénu yā nduudu yeⁿ'e sa. Ndís'tiī, taachí n'diichí ní chuū chí 'āā diiⁿ Juan, nguéé ndaacadaamí ní yeⁿ'e nuuⁿ'ndi yeⁿ'é ní nguéé s'téénu ní chiiⁿ chi ngaⁿ'a Juan miiⁿ.

'Áámá ejemplo yeⁿ'e 'iiⁿ'yāⁿ chi nguεε n'dáacā idiíⁿ yā ntiiⁿ'nyuⁿ

(Mr. 12.1-12; Lc. 20.9-19)

³³Tuuⁿ'mi ní caⁿ'a Jesús: 'Caandiveéⁿ ní táámá ejemplo chi 'tεε nguεε dáámá. Canéé 'áámá 'iiⁿ'yāⁿ chi véé yáⁿ'āa yeⁿ'e yā ní chiinu yā diiⁿ'yu yeⁿ'e uvas na yáⁿ'āa yeⁿ'e yā. Ní din'dái yā 'áámá cheeⁿ yeⁿ'ē yáⁿ'á 'lííⁿ núúⁿ'máⁿ cuaaⁿ 'diituú. Din'dái yā 'aama tanque naachi cuuví tun'dáa yā nuūⁿnīⁿ yeⁿ'e uvas miiⁿ. Ní din'dái yā 'áámá torre nguaaⁿ diiⁿ'yu uvas naachi mozos yeⁿ'e yā 'cuεetinéeⁿ sa diiⁿ sa cuidado n'guiⁿ'i uvas miiⁿ. Dueño miiⁿ ca'a yā yáⁿ'āa yeⁿ'e yā saⁿ'ā s'eeⁿ chi diiⁿ sa ntiiⁿ'nyuⁿ miiⁿ ní cueⁿ'e yā táámá país. ³⁴Taachí snuū ca'a yeⁿ'ē tiempo yeⁿ'e n'guiⁿ'i uvas miiⁿ chí túúmá yā, dueño dicho'ó yā mozos yeⁿ'e yā chí saⁿ'ā s'eeⁿ nca'a sa n'guiⁿ'i uvas yeⁿ'e yáⁿ'āa, parte yeⁿ'e n'guiⁿ'i chi tuneⁿ dueño. ³⁵Saⁿ'ā chí diiⁿ ntiiⁿ'nyuⁿ na yáⁿ'āa miiⁿ sta'a sa mozos. 'Áámá ní ch'eⁿ'e sa, táámá ní ch'iiⁿ'nuⁿ sa ní táámá ní chiituu sa. ³⁶Dueño miiⁿ dicho'ó yā taandúú 'uūvī mozos, 'āā víí mozos chí cheⁿ'ē vmnaaⁿ. 'Tiicá ntúūⁿ diiⁿ sa ndúúcu mozos.

³⁷ Cuayiivi mífⁿ dichó'o yā daiya yā ti dueño miiⁿ ní ngaⁿa yā: Saⁿā s'eeⁿ ní diiⁿ sa honrar daiyá.

³⁸ Taachí saⁿā s'eeⁿ chi diiⁿ sa ntiiⁿnyuⁿ yeⁿe yáⁿāa miiⁿ n'diichi sa daiya dueño miiⁿ, caⁿa sa nguááⁿ maaⁿ sa: Sáⁿa 'tīi chi cuuví yeⁿe sa yáⁿāa 'cūū. 'Caaⁿnuⁿ yú sáⁿā miiⁿ ní ndúúcū chi véé naaⁿ chi cuuví yeⁿe sa ní cuuví yeⁿe yú. ³⁹ Ní staⁿā sa daiya dueño miiⁿ ní tun'daa sa saⁿā 'áámá lado yeⁿe chéeⁿ yeⁿe díf'yú uvas miiⁿ ní ch'iⁿnuⁿ sa saⁿā.

⁴⁰ Taachí ndaā dueño yeⁿe díf'yú uvas 'de'ē diiⁿ yā ndúúcū saⁿā chí ídiiⁿ ntiiⁿnyuⁿ na yáⁿāa yeⁿe yá?

⁴¹ 'Iiⁿyāⁿ s'eeⁿ ní caⁿa yā: Dueño miiⁿ ní 'caaⁿnúⁿ yā saⁿā chi cúuncheeⁿ sa diiⁿ sa. Ní caⁿá yā yáⁿāa yeⁿe yā naachi véé díf'yú uvas táámá 'iiⁿyāⁿ chi diiⁿ yā ntiiⁿnyuⁿ na yáⁿāa miiⁿ, 'iiⁿyāⁿ chí ntée yā uvas chí tuneéⁿ yā na tiempo yeⁿe n'gui'i.

⁴² Jesús caⁿa yā chii yā 'iiⁿyāⁿ s'eeⁿ: 'Áá nguéé n'geēⁿ ndís'tii naachi canéé nguūⁿ na libro yeⁿe Ndyuūs chí ngaⁿa 'túúca:

Tuūu chí 'iiⁿyāⁿ chi idin'dái yā va'ai staⁿá yā ní ch'ēēcú yā 'áámá lado ti nguéé neⁿe yā. Tuūú 'cūū tuūú ch'ēete ní dichí'vē ca ní canéé tuūu ch'ēetē esquina yeⁿe va'āi. Chuū ní Señor Ndyuūs dífⁿ yā. Chuū ní 'áámá chí ngeⁿe yiinu yú taachí inaaⁿ yú yeⁿe.

⁴³ Chíⁿ chí 'túúca ngaⁿá ngíí ndís'tii, chí naachí Ndyuūs ngaⁿa ntiiⁿnyúⁿ yā diví yā yeⁿe ndís'tii ní caⁿá yā táámá 'iiⁿyāⁿ chí caⁿá yā n'gui'i chí tuneēⁿ lado yeⁿe Ndyuūs. ⁴⁴ 'Āā du'ú nūuⁿ 'iiⁿyāⁿ chí cun'dáá ndúú yā

vmnaaⁿ na tuūu 'cūū ní caātū 'ííni yeⁿe yā. Naati 'āā du'ú nūuⁿ 'iiⁿyāⁿ chí cun'dáá nduūu tuūu 'cūū vmnaaⁿ yeⁿe yā, 'cuíínú ndúúví yuūni yā.

⁴⁵ Taachí 'iiⁿyāⁿ chiiduú n'geetē ndúúcū 'iiⁿyāⁿ fariseos ch'iindiveēⁿ yā chuū, 'iiⁿyāⁿ s'eeⁿ tuumicadínnuⁿ yā chí yeⁿe yā ngaⁿa Jesús miiⁿ.

⁴⁶ Nadicadínnuⁿ yā taacā chí cuta'á yā Jesús miiⁿ naatí 'va'a yā 'iiⁿyāⁿ yeⁿe yáāⁿ tí 'iiⁿyāⁿ s'eeⁿ i'téenu yā Jesús miiⁿ tan'dúúca chí 'áámá profeta chí ngaⁿa nduudu yeⁿe Ndyuūs.

'Áámá ejemplo yeⁿe 'viicu chí n'giindivaacú yā

22 Jesús tuca'á yā ndee yā taama vmnéⁿēe ndúúcū ejemplos, ní caⁿa yā: ² Naachí Ndyuūs ngaⁿa ntiiⁿnyúⁿ yā yeⁿe va'ai cheeti nguuví tan'dúúca 'áámá rey chí chiica yā 'viicu chí ch'iindivaacu saⁿa daiya yā. ³ Ní dichó'o yā mozos yeⁿe yā chí yaa'vi sa 'iiⁿyāⁿ chí ndíi yā invitado naati 'iiⁿyāⁿ s'eeⁿ nguéé néⁿe yā caⁿa yā. ⁴ Ní dichó'o yā tan'duuví mozos ní caⁿa yā chí yā mozos: Caaⁿmaⁿ ní cuuvi ní 'iiⁿyāⁿ chí ndíi yā invitado 'tíicā. 'Āā véé yaāaⁿ comida miiⁿ. 'Āā ch'iⁿnuⁿ i'tiindu yeⁿe ní 'iiti chí 'viicheé. Tanducuéⁿē 'āā véé yaāaⁿ. Cuchií ní 'viicu. ⁵ Naatí 'iiⁿyāⁿ s'eeⁿ nguéé diiⁿ yā cuenta. 'Áámá yā ní cueⁿe yā cuéétí yeⁿe yā. Taama yā ní cueⁿe yā negocio yeⁿe yā. ⁶ Tanáⁿa yā ní staⁿá yā mozos. Cuⁿu yā ndúúcū sa ní ch'iⁿnuⁿ yā mozos. ⁷ Taachi rey miiⁿ ch'iindiveēⁿ yā chuū, ndúúví taaⁿ yā. Ní dichó'o yā soldados yeⁿe yā ní caⁿa ntiiⁿnyúⁿ yā chí 'caaⁿnuⁿ sá 'iiⁿyāⁿ chí

ch'ii''nu''n yā mozos ye''é yā. Ní 'nee''n ya''ā sa yāā''n vaacú 'ii''yā''n s'ee''n.

⁸Tuu'mi ní ca''a yā chii yā mozos ye''é yā: Cuaacu ní''nyú''n 'viicu mii''n ní 'āā véé yāāā''n caavā 'ii''yā''n chí chii yā invitado naati nguéé n'dai taaví yā chí cuchii yā. ⁹Maa''n ní cue''e nī na yúú''n chí can'daā ye''e yā''ā yāā''n ní dí''n nī invitar 'ii''yā''n chí chii yā na 'viicu, 'ii''yā''n chí ndaāca nī. ¹⁰Mozos ní can'daa sa ní cue''e sa cuaa''n cyúú''n ní nadaama sa nducyaaca 'ii''yā''n chí ndaāca sa, 'ii''yā''n chí cúúnchee''n yā ndúú''cú 'ii''yā''n chí n'dai yā. Ní ndaā nducyaacá 'ii''yā''n s'ee''n chí mozos 'cai sa ní ndeēe n'dá''i 'ii''yā''n ndaá yā 'viicu mii''n.

¹¹Ní rey mii''n che''e yā n'diichi yā 'ii''yā''n chí ndii yā invitado ní ndaācá yā 'áámá sa''ā chí nguéé cánú''n sá catecai sa ye''ē naachi n'giindivaacu yā. ¹²Ní ca''a yā chii yā sa''ā: N'dii amigo, 'taācá chí ndāa nī 'muu''n chí nguéé canú''n nī catecai nī ye''ē chí n'giindivaacú 'ii''yā''n? Sa''ā mii''n ní nguéé nan'guεεcúta''n sa ye''e yā. ¹³Tuu'mi ní rey mii''n ca''a yā chii yā mozos ye''e yā: 'Caāchiichí nī ca'a sa ndúú''cú ta'a sa ní diví nī sa''ā ndii 'múú''n ní 'cuεεcú nī sa''ā cuaa''n chuvá''ā na maā''n. Mí''n cuεεcu sa ní ché''é 'dii''yu''n sa cue''e daā''ma''n. ¹⁴Jesús ca''a ntú''n yā chuū: Nééné 'yaa''n yā chí Ndyuūs 'cuai yā naati duu''ví yā chí Ndyuūs ndeévé yā.

Chí''n chí ntinguune''n yā ye''e asunto ye''e impuestos

(Mr. 12.13-17; Lc. 20.20-26)

¹⁵Tuu'mi ní 'ii''yā''n fariseos cue''é yā ní nduuvidaamá yā. Ní ndeé yā

nguaa''n maá''n yā táácā cuuvi dí''n yā chí Jesús mii''n cásta''a nduudú ye''e yā chí caa''má''n yā 'áámá nduudu yaadi. ¹⁶Ní fariseos dicho'ó yā 'ii''yā''n ye''e yā ndúú''cú 'ii''yā''n ye''e Herodes mii''n chí caa''má''n yā Jesús: N'dii maestro, déénu 'nū chí n'dii ní 'áámá sa''ā chí n'dai. N'dii ní dí''n nī chí n'dáácā. Ní cuaacu ní''nyú''n ngi'cuee''n nī yúú''n ye''e Ndyuūs. Ní nguéé 'va'a nī 'ii''yā''n ti nguéé indeé nī cuidado táácā 'ii''yā''n. ¹⁷Maa''n ní cúú''vī nī nús'uu: 'Dé'ē inadacádíinu''n nī? 'Áá canéé nguū''n na ley chí nadí''ve nī emperador César tuūmī ye''é 'nū o nguéé?

¹⁸Jesús tuumicádíinu''n yā chí 'ii''yā''n s'ee''n ní dí''n yā chí nguéé n'daācā ní ca''a yā chii yā 'ii''yā''n s'ee''n: 'Dé'ē cúú''vī chí ne''e nī n'diichineé''n nī 'úú? Ndís'tii ní vεε 'uūvī chí nadacádíinu''n nī. ¹⁹Tée nī tuūmī chí nadí''ve nī ye''e impuesto. 'Ii''yā''n s'ee''n ní ch'i''nī yā 'áámá tuūmī Jesús mii''n. ²⁰Tuu'mi ní Jesús mii''n ca''a yā chii yā 'ii''yā''n s'ee''n: 'Du'u náá''n chí canéé ná tuūmī? 'Du'ū chí ngúú''vī cánéé nguū''n?

²¹'Ii''yā''n s'ee''n ní ca''a yā: Naa''n emperador César cānee. Ní Jesús ca''a yā chii yā 'ii''yā''n s'ee''n: Nca'a nī tuūmī emperador César chí''n chí ye''ē sa ní ca'a nī Ndyuūs chí ye''e Ndyuūs.

²²Taachí ch'iindiveé''n yā chuū, che''e yiinu yā ní cue''e yā.

Chii''n chí ntinguuneé''n yā ye''e chí 'ii''yā''n nduuchi yā ye''e nguaa''n tiná''ā

(Mr. 12.18-27; Lc. 20.27-40)

²³Nguuvi mii''n 'ii''yā''n saduceos ndaá yā nanáá''n Jesús mii''n. 'Ii''yā''n

saduceos ngaⁿa yā chí nguéé
 índuuchi 'iⁿyāⁿ yeⁿē nguaaⁿ tináⁿā.
 Ní ntiinguunéeⁿ yā Jesús, ²⁴ní
 caⁿa yā: N'dii maestro, Moisés miiⁿ
 caⁿa sá chí 'āā du'ú nūuⁿ saⁿā chí
 'cuūví sa ní nguéé ch'iindí daiya
 n'daataá yeⁿē sa tuu'mi ní 'diinū sa
 'caandavaacu sa ndúúcu n'daataá
 míⁿ. Ní saⁿā miiⁿ ní 'cuūndí daiya
 sá lado yeⁿē 'díinu tináⁿā. ²⁵Maaⁿ
 ní véé ndēēchē sáⁿa nūuⁿ yeⁿē
 chēecú sa yeⁿē chiidá sa. Sáⁿā
 vmnaaⁿ miiⁿ ní ch'iindivaacu sa ní
 ch'ií sa. Ní nguéé daiya n'daataá
 yeⁿē sa. Ní canee n'daataá yeⁿē sa.
 Ní 'díinu sa ní canee sá ndúúcu tá.
²⁶Tiicá ntúūⁿ chó'oo yeⁿē ndii chiiⁿ
 ndii 'uuví saⁿā. 'Tiicá ntúūⁿ chó'oo
 yeⁿē saⁿā chí ndii 'iínū. 'Tiicá
 ntúūⁿ chó'oo yeⁿē saⁿa s'eeⁿ nduu
 ndēēchē sa. ²⁷Ndíí ná ch'iínú ní
 ch'ií ntúūⁿ n'daataá miiⁿ. ²⁸Taachí
 nduuchi 'iⁿyāⁿ yeⁿe nguaaⁿ tináⁿā,
 naachí ndēēchē saⁿā s'eeⁿ ní 'chēe
 sa chí n'daataá yeⁿē sa táⁿā caati
 nducyaaca sá canee sá ndúúcu tá?

²⁹Tuu'mi ní Jesús miiⁿ ní
 nan'guēecútaⁿa yā ní caⁿa yā chii
 yā 'iⁿyāⁿ s'eeⁿ: Ndís'tii ní nguéé
 n'daācā nadicádiinuⁿ nī, ti nguéé
 déenu nī taacā ngaⁿa na libro
 yeⁿé Ndyuūs naachi canée nguūⁿ.
 Ndíí nguéé ndúú déenu nī poder
 yeⁿé Ndyuūs. ³⁰Ti naachí nduuchi
 'iⁿyāⁿ yeⁿe nguaaⁿ tináⁿā, nguéé
 'caandavaacú yā. Ndíí nguéé ca'a
 ra yā chí 'caandavaacu daiya yā
 ti cuuví yā tan'dúúca ángeles chi
 dichí'vē Ndyuūs chi canée yā na
 va'ai cheetí nguuví. ³¹Naati yeⁿē chí
 nduuchi yā yeⁿe nguaaⁿ tináⁿā, 'áá
 nguéé n'geeⁿ nī chi maáⁿ Ndyuūs
 caⁿa yā yeⁿē taachí caⁿa yā 'túúca?:

³²Úú ní Ndyuūs yeⁿē Abraham
 ndúúcu Isaac ndúúcu Jacob.
 Ndyuūs miiⁿ ní nguéé Ndyuūs yeⁿe
 tináⁿā ti yeⁿé 'iⁿyāⁿ chí sндуuchi.

³³Taachí nducyaaca 'iⁿyāⁿ
 ch'iindiveéⁿ yā chuū, cheⁿe yiinú
 yā yeⁿē nduudu yeⁿe Jesús miiⁿ
 tan'dúúca chí ngi'cueeⁿ yā.

Mandamiento chi ch'etete ca

(Mr. 12.28-34)

³⁴Tuu'mi ní saⁿā fariseos taachí
 ch'iindiveéⁿ yā yeⁿe chí Jesús dííⁿ
 yā, 'iⁿyāⁿ saduceos 'āā ntéé caⁿa
 yā ndúúcu Jesús miiⁿ, fariseos miiⁿ
 nduuvidaamá yā. ³⁵Áámá saⁿa
 fariseo abogado chí ngi'cueeⁿ sa chí
 ngaⁿā ley miiⁿ neⁿe sa n'diichinééⁿ
 sa Jesús ní ntiinguunéeⁿ sa 'iⁿyāⁿ.
 Ní caⁿa sá chii sa Jesús: ³⁶N'dii
 Maestro, 'chéé mandamiento chí
 ch'etete n'dai ca yeⁿē na ley yeⁿē
 Moisés?

³⁷Jesús caⁿa yā chii yā saⁿā:
 Dinéⁿe di Señor Ndyuūs yeⁿē di
 ndúúcu núúⁿmáⁿ stáává yeⁿē di
 ndúúcu núúⁿmáⁿ alma yeⁿē di
 ndúúcu núúⁿmáⁿ vaanicadínnūⁿ
 yeⁿē di. ³⁸Chuū chí vmnaaⁿ ní
 ch'éētē ca chi cuuvi tanáⁿā
 mandamientos. ³⁹Ndiichi ndii 'úúví
 tan'dúúca chí vmnááⁿ vmnaaⁿ:
 Dinéⁿe di 'iⁿyāⁿ na niiⁿnuúⁿ vaacú
 di tan'dúúca chí neⁿe dí maáⁿ di.
⁴⁰Yeⁿē ndúú 'uūví mandamientos
 miiⁿ canee tanducuéⁿē yeⁿe ley
 Moisés miiⁿ ndúúcu nduudu chí
 ngaⁿa profetas ndii cuááⁿ vmnaaⁿ.

¿Du'u 'iⁿyāⁿ chíí daiya Cristo?

(Mr. 12.35-37; Lc. 20.41-44)

⁴¹Taachí 'iⁿyāⁿ fariseos
 ndiidáámá yā Jesús ntiinguuneeⁿ yā

fariseos, ⁴² ní caⁿa yā chii yā 'iⁿyāⁿ s'eeⁿ: ¿De'ē nadicádíínuuⁿ ndís'tií yeⁿe Cristo? ¿Du'lú daiyá 'iⁿyāⁿ 'cúu? Ní fariseos caⁿa yā chii yā: Daiya David miiⁿ.

⁴³ Ní Jesús caⁿa yā chii yā fariseos: ¿Táácā cuuvi David miiⁿ na espíritu yeⁿe sa ní caⁿa sa chi Cristo ní Señor? Ní caⁿa yā chuú:

⁴⁴ Caⁿa Señor Ndyuūs miiⁿ chii yā Señor Cristo yeⁿé: 'Cuundi di lado tá cuaacú chi lado yeⁿe honor ndíí 'úú cu'neéⁿ 'iⁿyāⁿ chi contra yeⁿe di cuaaⁿ ndii yā na ca'a di tan'dúúca chi enemigos ní 'áámá banco lííⁿ.

⁴⁵ Maaⁿ ní nduuti chi David miiⁿ caⁿá yā yeⁿe Cristo chi Señor yeⁿé yā, ¿táácā cuuvi chii chi Señor miiⁿ ní daiya David 'iⁿyāⁿ?

⁴⁶ Mar 'áámá 'iⁿyāⁿ nguée cuuvi nan'gueécútaⁿa yā yeⁿe mar 'áámá. Ndíí nguuvu miiⁿ s'neeⁿ naaⁿ yā ntiinguuneeⁿ yā Jesús miiⁿ.

Jesús ngaⁿa yā chi dííⁿ yā cuidado yeⁿe maestros chi ngí'cueeⁿ ley ndúúcu 'iⁿyāⁿ fariseos

(Mr. 12.38-40; Lc. 11.37-54; 20.45-47)

23 Jesús yaa'vi yā 'iⁿyāⁿ ndúúcu discípulos yeⁿe yā ní caⁿa yā: ² Maestros chi ngí'cueeⁿ ley ndúúcu 'iⁿyāⁿ fariseos, 'iⁿyāⁿ s'uuⁿ deenu n'dai yā ní ngí'cueéⁿ yā ní caaⁿmaⁿ cuaacú yā ley yeⁿe Moisés. ³ Tiicá ntúūⁿ cu'téenu ndís'tií ní dííⁿ nī tan'duucā 'iⁿyāⁿ s'eeⁿ ngaⁿa yā, naati nguée dííⁿ nī tan'dúúca 'iⁿyāⁿ s'eeⁿ idiíⁿ yā tí 'iⁿyāⁿ s'eeⁿ ní ngaⁿa yā yeⁿe ley naati nguée 'tífā idiíⁿ yā. ⁴ 'Iiⁿyāⁿ s'eeⁿ ní dííⁿ yā tan'dúúca chi 'caachiichí yā cheedi chi n'gii taavi

chi 'iⁿyāⁿ nguée cuchée yā ní ngaⁿa yā chi 'iⁿyāⁿ canée chí cuchée yā. Naati 'iⁿyāⁿ s'eeⁿ maán yā ndíí nguée neⁿé yā 'neeⁿ nduutitá'a yā chi tuu'vi yā cheedi miiⁿ ní dííⁿ yā. ⁵ 'Iiⁿyāⁿ s'eeⁿ ní idiíⁿ yā nducuén^e ntiíⁿnyuⁿ yeⁿe yā caati tanáⁿā 'iⁿyāⁿ snáaⁿ yā ní n'diichí yā táácā idiíⁿ yā. Neⁿé yā candee yā chí canée nguⁿ chi yeⁿe Nduudu yeⁿe Ndyuūs ní s'neeⁿ yā 'áámá caja lííⁿ ní dich'iichí yā 'áámá yiiⁿmaⁿ ní s'neeⁿ yā maaⁿ ta'a yā ní ncheeté yā. Ní n'geeti núuⁿ yā vestido yeⁿe yā chí n'geé nūuⁿ ca. ⁶ 'Iiⁿyāⁿ s'eeⁿ ní neⁿe yā 'cuundí yā sillas chí yeⁿe 'iⁿyāⁿ ch'etete taachi caⁿá yā 'áámá 'viicu chí che'é yā. Ní neⁿe yā 'cuundí yā sillas yeⁿe honor chi vmnááⁿ vmnaaⁿ ná yáacu sinagogas. ⁷ Ní neⁿe yā chí tanáⁿā 'iⁿyāⁿ diíⁿ n'daacá yā ní dííⁿ yā saludar 'iⁿyāⁿ taachi snee yā cuaaⁿ nií'vée ní neⁿe yā chí 'iⁿyāⁿ caaⁿmaⁿ yā, maestro, maestro, taachi dííⁿ yā saludar 'iⁿyāⁿ.

⁸ Naati ndís'tií ní nguée neⁿe nī chí caaⁿmaⁿ 'iⁿyāⁿ yeⁿe nī maestro ti 'áámá 'iⁿyāⁿ nūuⁿ chí maestro ní 'iⁿyāⁿ miiⁿ chí Cristo. Ní nducyaaca ndís'tií ní hermanos yeⁿe nī vi'í. ⁹ Nguée caaⁿmaⁿ nī yeⁿe mar 'áámá 'iⁿyāⁿ yeⁿe yán'aa 'cúu: N'dii chiiduú padre, ti dámaaⁿ 'áámá chi Chiida yú chí Ndyuūs chí canée na va'ai cheeti nguuví. ¹⁰ Ndíí nguée ndúu caaⁿmaⁿ rá yā yeⁿe nī: Maestro, ti 'áámá chí maestro yeⁿe nī chí Cristo. ¹¹ 'Iiⁿyāⁿ chí ch'etete ca yā yeⁿé nī canee chí dichí'v'e yā ndís'tií. ¹² Ní 'iⁿyāⁿ chí dííⁿ yā chí cuuví ch'etete maán yā, 'iⁿyāⁿ miiⁿ cuuví ndiicuúⁿ yā. 'Iiⁿyāⁿ chí idiíⁿ

yā chí maáⁿ yā ndiicuúⁿ yā, cuuví ch'eté yā.

**Jesús caaⁿ máⁿ yā yeⁿ e nuuⁿ ndi yeⁿ e
'iiⁿ yāⁿ fariseos**

(Mk. 12.40; Lc. 11.39-42, 44, 52; 20.47)

¹³Naati de'e chúúcā ya'ai yeⁿ é ndis'tiī, maestros chi ngi'cueeⁿ ley ndúúcū 'iiⁿ yāⁿ fariseos, ndís'tiī 'uūví naaⁿ 'uūví cheendí nī, ti nguée ngi'cueeⁿ nī yeⁿ e naachí Ndyuūs ngaⁿ a ntiī nyúⁿ yā nanááⁿ 'iiⁿ yāⁿ yeⁿ e iⁿ yeeⁿ dí cūū. Ndíí nguée ndúú maaⁿ ndís'tiī cundáa nī va'ai cheeti nguuví. Ndíí nguée n'guúⁿ nī tanáⁿ ā 'iiⁿ yāⁿ chí neⁿ e ndaá yā chí cūndaa yā.

¹⁴De'e chúúcā ya'ai yeⁿ é ndís'tiī, 'iiⁿ yāⁿ chí dinguūⁿ ní ngi'cueeⁿ nī ley ndúúcū 'iiⁿ yāⁿ fariseos, ti ndís'tiī 'uūví nááⁿ 'uūví cheendí nī, ti ndiví nī va'ai yeⁿ é n'daataá nguáā. Ní néené n'deēē ngaⁿ a nī taachi ngaⁿ angua'á nī nanááⁿ nducyaaca 'iiⁿ yāⁿ. 'Úú ngaⁿ á chi ch'etē ca castigo yeⁿ e nī nguuví yeⁿ e juicio.

¹⁵De'e chúúcā ya'ai yeⁿ é ndís'tiī, maestros chi ngi'cueeⁿ ley ndúúcū ndís'tiī 'iiⁿ yāⁿ fariseos ti ndís'tiī 'uūví naaⁿ 'uūví cheendí nī. Ndís'tiī ní chiicá nī ndíí yáⁿ āa yaⁿ ai táámá lado nuūⁿ nī yáⁿ ā ní díⁿ nī chí 'áámá 'iiⁿ yāⁿ i'téenu yā tan'dúúcā ndís'tiī. Ní taachí 'iiⁿ yāⁿ cu'téenu yā tan'dúúcā ndís'tiī neⁿ é nī, idíⁿ nī chí 'iiⁿ yāⁿ miiⁿ ní 'uūví tanto cuuví yā yeⁿ é daiya infierno nguée ti chí ndís'tiī. ¹⁶De'e chúúcā ya'ai yeⁿ e ndís'tiī, chí ngi'cueeⁿ nī tan'dúúcā 'iiⁿ yāⁿ chí ngueenááⁿ. De'e inadacádíⁿ nuuⁿ ndís'tiī. Nduuti chí 'áámá 'iiⁿ yāⁿ caⁿ a yā chí díⁿ yā

'áámá cosa ní 'cuaí yā, “cáávā yaācū templo”, tuuⁿ mi ní nguée de'e vee nacadíⁿ nuuⁿ nī yeⁿ e chuū, naati nduuti chí 'iiⁿ yāⁿ 'cuaí yā, “cáávā 'diiⁿ nguaaⁿ” chí vée cheeti yaācū templo miiⁿ, tuuⁿ mi ní 'iiⁿ yāⁿ miiⁿ canee cuuⁿ miⁿ chí díⁿ yā chí caaⁿ máⁿ yā chí caⁿ a yā chí diiⁿ yā. ¹⁷Ndís'tiī ní 'iiⁿ yāⁿ chí nguē deenu ti tan'dúúcā 'iiⁿ yāⁿ ngueenááⁿ 'tiicá nī. ¿Chee cá ch'etē ca? ¿Áá 'díⁿ nguaāⁿ miiⁿ o yáacū miiⁿ chí diiⁿ chí didēve 'díⁿ nguaāⁿ miiⁿ cucááva Ndyuūs? ¹⁸Tiicá ntúūⁿ ndís'tiī: Ndúúti chí 'áámá 'iiⁿ yāⁿ caⁿ a yā chí díⁿ yā 'áámá cosa, ní n'gaí yā, “cáávā nátaí”, nguée de'e vee nacadíⁿ nuuⁿ nī yeⁿ é. Naati ndúúti chí 'iiⁿ yāⁿ n'gaí yā, “cáávā ofrenda” chí candúú vmnááⁿ yeⁿ é nátaí, tuuⁿ mi ní 'iiⁿ yāⁿ miiⁿ canee cúúⁿ míⁿ chí díⁿ yā chí caⁿ a yā chí diiⁿ yā. ¹⁹Ndís'tiī ní tan'dúúcā 'iiⁿ yāⁿ chí cheechí tiīⁿ o 'iiⁿ yāⁿ chí ngueenááⁿ, 'tiicá nī ti ¿chee ca chí ch'etē ca? ¿Áá ofrenda miiⁿ o nátaí chí diiⁿ chí ofrenda miiⁿ ní didēve cucáávā Ndyuūs? ²⁰Tíicá. 'Iiⁿ yāⁿ chí n'gai yā, “cáávā nátaí”, n'gai yā cáávā nátaí ndúúcū tanducuéⁿ chí canduū nátaí. ²¹Iiⁿ yāⁿ chí n'gaí yā, “cáávā yaācū templo”, nguée dámaāⁿ ngaⁿ a yā cáávā yaācū templo miiⁿ naati cáávā maáⁿ Ndyuūs chí cané na yaācū templo miiⁿ. ²²Iiⁿ yāⁿ chí n'gaí yā, “cáávā va'ai cheeti nguuví”, n'gaí yā cáávā trono yeⁿ e Ndyuūs ní cáávā Ndyuūs chí vee yā na trono miiⁿ.

²³De'e chúúcā ya'ai yeⁿ e ndís'tiī, maestros chí ngi'cueeⁿ yā ley ndúúcū 'iiⁿ yāⁿ fariseos, ndís'tiī 'uuví naaⁿ 'uūví cheendí nī. Ndís'tiī

ní nga'á nī Ndyuūs 'áámá ndiichi parte yeⁿe yaātā chí yīivií, ndúúcū yaāta anís, ndúúcū yaātā comino. Ní ndís'tiī ní s'néeⁿ nī 'aama lado cosas chí n'geete ca yeⁿe na ley, chíⁿ chí n'diichí nī nuuⁿndi yeⁿe 'iiⁿ'yāⁿ ndúúcū vaadī cuaacu ndúúcū vaadī ya'ai 'iinu ndúúcū vaadī i'téenu. Chuū canee chí dííⁿ nī ní dííⁿ nī táámá naaⁿ dendu'ū. ²⁴Ndís'tiī 'iiⁿ'yāⁿ chí tan'dúúcā chí ngueenááⁿ chí candee nī 'iiⁿ'yāⁿ. Dííⁿ nī tan'dúúcā chí i'yaáⁿ nī 'áámá 'yaācū yeⁿe nuūⁿnīⁿ chí cu'ú nī naati cu'ú nī i'iti camello chí ch'ēete.

²⁵De'ē chúúcā ya'ai yeⁿe ndís'tiī, maestros yeⁿe ley ndúúcū 'iiⁿ'yāⁿ fariseos, ndís'tiī ní 'uūvi naaⁿ 'uūvi cheendí nī, ti inadēevé nī cuaaⁿ daami yeⁿe vaso ndúúcū cu'ū, chí tan'dúúcā cuerpo yeⁿe maáⁿ nī, naati cuááⁿ chēētí nī ní ndiituú ndúúcū chí diduucú nī ndúúcū tanducuéⁿe chí nguēe n'daēcā. ²⁶Caandiveéⁿ nī ndís'tiī 'iiⁿ'yāⁿ fariseos chí tan'dúúcā chí ngueenááⁿ. Dííⁿ cá nī chí didēevé nī chí cuaaⁿ chēeti vaso ní 'tiicá ntūūⁿ cu'ū, tuuⁿmi ní cuuvi dēevé nī cuaaⁿ chuváⁿāi vaso miiⁿ.

²⁷De'ē chúúcā ya'ai yeⁿe ndís'tiī, maestros yeⁿe ley ndúúcū 'iiⁿ'yāⁿ fariseos, ndís'tiī 'uūvi naaⁿ 'uūvi cheendí nī, ti ndís'tiī ní tan'dúúcā yaānyāⁿ 'cuēē chí cuaaⁿ daami mífⁿ n'dēevé chí nneⁿe yaāchī caaca, ti cuaacu níⁿnyúⁿ cuááⁿ chēētí miiⁿ ndiituú 'iini yeⁿe tináⁿā ndúúcū taanduvéé cosas chí vaati. ²⁸Tífcā ndís'tiī ti cuaacu níⁿnyúⁿ n'giⁿi nī 'iiⁿ'yāⁿ chí ndís'tiī ní saⁿā chí n'dai ndís'tiī naati cuaaⁿ chēētí nī ndiituú

ndúúcū nduudu yaadi ndúúcū nuuⁿndi.

²⁹De'ē chúúcā ya'ai yeⁿe ndís'tiī, maestros yeⁿe ley ndúúcū 'iiⁿ'yāⁿ fariseos, 'iiⁿ'yāⁿ 'uūvi naaⁿ 'uūvi cheendí nī, ti idin'dái nī yaānyāⁿ yeⁿe profetas ní n'dēeve nī yaānyāⁿ yeⁿe 'iiⁿ'yāⁿ chí n'dai taachi snēe yā iⁿ'yeeⁿdí 'cūū. ³⁰Ndís'tiī ní ngaⁿ'á nī 'tífcā: Ndúúti chí nús'uu ch'ēetinēe 'nū tiempo chí ch'ēetinēe chiidá 'nū cuááⁿ vmnaaⁿ, nguéé chinnee 'nū ch'iīⁿnúⁿ 'nū profetas taachi cungēe yuūūⁿ yeⁿe yā. ³¹Tífcā ndís'tiī ní ngaⁿ'á nī nduudu cuaacu yeⁿe maáⁿ nī ti ndís'tiī ní dáiyá 'iiⁿ'yāⁿ chí ch'iīⁿnuⁿ yā profetas. ³²Ndís'tiī ní canéé chí dííⁿ nī tan'dúúcā chiidá nī.

³³Ndís'tiī ní tan'dúúcā cúú 'tífcā ndáátá yeⁿe nī. ¿Táácā cuuvi nguáⁿ'ai nī yeⁿe castigo yeⁿe infierno? ³⁴Cáávā chuū 'úú ní dicho'ó nanááⁿ ndís'tiī profetas chí candee yā Nduudu yeⁿe Ndyuūs, ndúúcū 'iiⁿ'yāⁿ chí déenū, ndúúcū 'iiⁿ'yāⁿ chí ng'i'cueeⁿ ley. N'dúúví 'iiⁿ'yāⁿ s'eeⁿ ní ndís'tiī ní chita'á nī 'iiⁿ'yāⁿ ní chí'neeⁿnga'á nī 'iiⁿ'yāⁿ. Tá n'duuvi yā ní ch'eⁿe nī 'iiⁿ'yāⁿ na yaācū sinagogas yeⁿe nī ní can'dáa nī 'iiⁿ'yāⁿ ndii na 'áámá yāāⁿ táámá yāāⁿ chí ch'eenú yā chii. ³⁵Ní ndís'tiī ní ca'á nī cuenta yeⁿe nducuéⁿe yuūúⁿ yeⁿe 'iiⁿ'yāⁿ chí n'dai chí 'iiⁿ'yāⁿ yeⁿe nī ch'iīⁿnúⁿ yā 'iiⁿ'yāⁿ na yáⁿ'āa 'cūū ndii yuūúⁿ yeⁿe Abel chí saⁿ'ā n'dai ndii yuūúⁿ yeⁿe Zacarías daiya saⁿ'ā Berequías chí ndís'tiī ch'iīⁿnuⁿ nī náavtaⁿ'ā yeⁿe yaācū miiⁿ ndúúcū nátaí miiⁿ. ³⁶Cuaacu níⁿnyúⁿ ngaⁿ'á ngíí ndís'tiī: Castigo yeⁿe tanducuéⁿe

chuū canee vmnaaⁿ 'iiⁿ'yāⁿ chi snée
yā maaⁿ tiempo 'cūū.

**Jesús ngeɛcu yā cáávā 'iiⁿ'yāⁿ yeⁿe
yāāⁿ Jerusalén**

(Lc. 13.34-35)

³⁷Ní ngaⁿa Jesús: Ndís'tií 'iiⁿ'yāⁿ
yeⁿe yāāⁿ Jerusalén, ndís'tií 'iiⁿ'yāⁿ
yeⁿe yāāⁿ Jerusalén, chí ch'iiⁿ'núⁿ nī
'iiⁿ'yāⁿ profetas ní chi chiituú nī 'iiⁿ'yāⁿ
chí Ndyuūs dicho'ó yā nanáaⁿ nī.
Nééné n'deēe 'cuūví neⁿ'é nadaamá
daiya nī tan'dúúcā tú'ū chí inadáámá
tī daiya tī maaⁿ ngeɛchi tī ní
nguéeⁿ 'cuuⁿ nī. ³⁸Ndís'tií, n'diichí nī.
Ndyuūs chí'neeⁿ yā ndís'tií ndúúcu
vaacú nī dámaāaⁿ. ³⁹Ti 'úú ní ngaⁿ'á
ngíí ndís'tií, tī ndii maaⁿ ní 'āā ntéé
snaaⁿ nī 'úú ndíí ndāā tiempo taachí
caaⁿ'maⁿ nī: De'e chúúca n'dai 'iiⁿ'yāⁿ
chí cuchii yā ndúúcu chí duuchi
Señor chí Daiyá Dendyuūs miiⁿ.

**Jesús ngaⁿ'a yā chí yaācū templo miiⁿ
ní ntuuví**

(Mr. 13.1-2; Lc. 21.5-6)

24 Taachí Jesús miiⁿ nan'dáa yā
yeⁿe yaācū templo cueⁿ'é yā.
Discípulos yeⁿ'é yā ní ndaa yā nanáaⁿ
yā ní n'giⁿ'i yā Jesús miiⁿ va'ai s'eeⁿ
yeⁿe yaācū templo miiⁿ. ²Jesús miiⁿ
ní n'gueɛcútaⁿ a yā ní caⁿ'a yā: ¿Áá
inaaⁿ ndís'tií nducyáácá chuū? Cuaacu
nííⁿnyúⁿ ngaⁿ'á ngíí ndís'tií, chí nguéeⁿ
cunee tuūu cuaaⁿ vmnaaⁿ yeⁿe víí chí
nguéeⁿ ntuuví.

**Jesús ngí'cueeⁿ yā de'e chí cuuvi
taachi 'āā ndaa niiⁿnuúⁿ nguuví chí
'cuiinu iⁿ'yeeⁿ'di**

(Mr. 13.3-23; Lc. 21.7-24; 17.22-24)

³Jesús véé yā ná yiicū chí nguuví
Olivos. Discípulos ndaa yā nanáaⁿ

yā taachi caneé yā damáaⁿ yā ní
caⁿ'a yā chíi yā Jesús: Cúúví nī
núⁿ'uu tíí cuaⁿ'ā cuuví chuū. ¿De'e
señal 'cuuⁿ'miⁿ nī taachi 'āā ndaa
nī taama vmnéⁿ'ee ní taachí 'cuiinu
iⁿ'yeeⁿ'di?

⁴Jesús nan'gueɛcútaⁿ a yā yeⁿe yā
ní caⁿ'a yā: Cundée nī cuidado chí
mar 'áámá 'iiⁿ'yāⁿ nguéeⁿ cannche'í
yā ndís'tií. ⁵'Yááⁿ n'dái 'iiⁿ'yāⁿ ndaa
yā ndúúcu chí duuchí ní caaⁿ'maⁿ
yā 'tíicā: 'Úú chí Cristo 'úú. Ní
cannche'í yā 'yaaⁿ n'dái 'iiⁿ'yāⁿ. ⁶Ní
'caandiveéⁿ nī chí véé caandaá ní
'caandiveéⁿ nī chí 'cuūndi caandaá.
Cundée nī cuidado chí 'iiⁿ'yāⁿ s'eeⁿ
nguéeⁿ castaⁿ a vaanicádiinúúⁿ yeⁿe
nī ti canée chí chííⁿ nducuéⁿ'e
dendu'ū chí 'túúca cuuvi, naatí 'āā
cuée chí 'āā 'cuiinu iⁿ'yeeⁿ'di. ⁷Ti
'áámá nación 'cuuⁿ'maⁿ ndúúcu
taama nación, ní 'áámá rey ndúúcu
nducuéⁿ'e país naachi ngaⁿ'a
ntiiⁿ'nyuⁿ yā contra yeⁿe taama rey
ndúúcu nducuéⁿ'e país naachi chí
ngaⁿ'a ntiiⁿ'nyuⁿ yā. Ndaá tiempos
chí cuiicu ndúúcu tiempos chí
'iiⁿ'yāⁿ 'cueenú yā cuuvi cáávā chí
ya'ai yeⁿ'é yā, ní ndúúcu tiempos
chí inuⁿ'u yáⁿ'āa n'dee cuááⁿ n'dai.
⁸Taachí cuuví dendú'ū chí 'túúca
ní chíi tuuⁿ'mi ní cáámá cúūⁿngaⁿ'a
vaādí ya'ai.

⁹Tuuⁿ'mi ní 'iiⁿ'yāⁿ s'eeⁿ ní ncaⁿ'a yā
ndís'tií na ta'a 'iiⁿ'yāⁿ chí 'cueenu
nī cuuvi ní 'caaⁿ'núⁿ yā ndís'tií. Ní
nducyáácá 'iiⁿ'yāⁿ nguéeⁿ cuaaⁿ yā
ndís'tií caavā chí ngaⁿ'a nī chí
duuchí. ¹⁰Ní tiempo miiⁿ neené
'yaaⁿ 'iiⁿ'yāⁿ chí 'āā i'téenu yā yeⁿ'e
'úú ní 'cueenú yā cuuvi. Ní 'áámá
yā caaⁿ'máⁿ yā contra yeⁿe taama
yā chí i'téenu yā. Ní 'āā ntéé neⁿ'é

yā vi'i. ¹¹Ní neéné 'yaa' 'ii'yā' profetas falsos chí nguée nga'a yā nduudu cuaacu ye'e Ndyuūs ndaa yā ní cannche'ei yā 'yaa' n'dái 'ii'yā'. ¹²Ní cáávā chí 'ii'yā' neené dinuu'ndí yā. 'Āā ntée ne'e yā 'áámá yā táámá yā vi'i. ¹³'Ii'yā' chí cuchée yā ní 'áámá i'téenu yā ye'e Ndyuūs ndii tiempo chí 'cuūvi yā ní nguá'ai yā. ¹⁴Ní nduūdū cuaacú 'cūū chí ngai ye'e naachi Ndyuūs nga'a ntii'nyú' yā 'ii'yā' canée chí caa'ma' yā nanáá' nducue'e i'nyee'di. Ní nduudu cuaacu ye'e Ndyuūs ní cūnee chí 'caandivee' 'ii'yā' ye'e tanducue'e nación ye'e núú'má' i'nyee'di tuu'mi ní ndaa chí 'cuiinu i'nyee'di.

¹⁵Taachí ndís'tii snaa' nī tanducue'e chí cuncáā ca tan'dúúcā chí dinguu' profeta Daniel ndii cuáá' vmnaa' taachi cheendí yā na cuaa' chí santo tuu'mi ní ndís'tii ndúúcū 'ii'yā' chí n'gee' yā túúmícadíinu' yā ye'e. ¹⁶Ní tiempo ye'e chúū, 'ii'yā' chí snée yā na yá'āa Judea cáánu yā ca'á yā cuaa' yiicū. ¹⁷Ní 'ii'yā' chí sndúu yā tíf' va'āi nguée ngua'ái yā chí cuta'á yā 'tē chí snúū' chēeti va'āi ti cáánu yā. ¹⁸'Ii'yā' chí canée yā cuēti nguée nguēcundí yā na vaacu yā chí cuta'á yā tiinu' ye'e yā ti cáánu yā. ¹⁹De'e chúúcā ya'ai ye'e n'daataá chí vée daiya tá chēeti tá ndúúcū n'daataá chí ngiicu dacua'āa ye'e tá nguui s'ee' chí cáánu yā. ²⁰Caa'ma'ngua'á nī chí taachí ndaa nguui chí cáánu nī, nguée tiempo chí 'iiche ndí nguée ndúu nguui sábadó chí ntaavi'tuunú' nī. ²¹Tuu'mi ní ndaa nguui chí neéné 'cueenu cá

nī cuuvi chí nguée n'diichi nī, ndí nguée ndúu ndí naachi chinga'a ye'e i'nyee'di, ndí máá', ndí nguée ndúu snaa' ra nī cuayiivi. ²²Ndúuti chí Ndyuūs nguée 'āā diduu'ví yā tiempo chí 'cueenu cá nī cuuvi mar 'áámá 'ii'yā' nguée ngua'ai yā. Naati cáávā 'ii'yā' chí Ndyuūs dēēve yā, Ndyuūs diduu'ví yā tiempo mii'.

²³Tuu'mi ní ndúuti chí 'áámá 'ii'yā' caa'ma' yā cuuvi yā ndís'tii: Cuin'diichí nī, 'muu' canee Cristo, o cuin'diichí nī, mii' canée Cristo mii'ya, nguée cu'teenú nī 'ii'yā' mii'. ²⁴Ti ndaa 'yaa' n'dái 'ii'yā' chí nga'á yā chí Cristo yā naati nguée Cristo 'ii'yā' s'ee'. Ndaá 'yaa' n'dái profetas falsos chí nguée caa'má' yā nduudu cuaacu ye'e Ndyuūs. Ní 'ii'yā' s'ee' idií' yā señales chí n'geete ndúúcū vaadi n'giinu. Ní cannche'ei yā 'ii'yā' ndí 'ii'yā' chí Ndyuūs ndēēve yā nduuti chí cuuví yā. ²⁵Caandivee' nī. Āā ndí vmnaa', 'āā nga'á ngíi chuū ndís'tii. ²⁶Ndúuti chí 'ii'yā' caa'ma' yā cuuvi yā ndís'tii 'tíicā: Cuin'diichí nī, Cristo canée yā na yá'āa cuū'má', nguée ca'á nī mii'. O nduuti chí caa'má' yā: Cuin'diichí nī, Cristo canée yā ná 'aama cuarto chēeti va'ai, nguée cu'téenu nī. ²⁷Tan'dúúcā 'cuai chí ngiia cuáá' naachi ican'daa 'yá'á ní inaa' yú ndí taachi ndaa cuaa' na ngiia 'yá'á, 'tiicá ntúū' cuuvi taachí 'úu nddaá, 'úu chí Sa'a chí Daiya Ndyuūs. ²⁸Tí 'āā tíí nūu' naachi candiiti cuerpo ye'e tiná'ā, míf' nduuvidaama luutí.

Taaca ndaa Sa'a chí Daiya Ndyuūs

(Mr. 13.24-37; Lc. 21.25-28)

²⁹Jesús ca'a yā: Tuu'mi ní taachi 'cuiinu 'cueenu yā cuuvi ní chó'oo

tiempo miiⁿ, tuu'mi ní 'yáⁿá ní cuuví maāiⁿ, ní 'iiyū miiⁿ ní nguée cunuūⁿ deēve. 'Iiⁿnyuⁿ ní cun'daā yeⁿē nanguuvi ní nanguuvi ní nuⁿu ndúúcū poder yeⁿē. ³⁰Tuu'mi ní snaáⁿ yā señales nanguuvi chi yeⁿe Saⁿā chi Daiya Ndyuūs. Ní nducyáácá 'iiⁿyāⁿ yeⁿe nducuéⁿē nacióⁿ yeⁿē iⁿ'yeeⁿdí ní cuēecú yā ní snaaⁿ yā chí ndaā Saⁿā chi Daiya Ndyuūs na meēéⁿ yeⁿē nanguuvi ndúúcū poder yeⁿe yā ndúúcū chídēevé n'dai yeⁿe maáⁿ yā. ³¹Taachí dichó'o yā ángeles yeⁿe yā, tuu'mí nūuⁿ áamá yā ní d'cuēecú yā trompeta yeⁿe yā. Ní ángeles miiⁿ nadáámá yā 'iiⁿyāⁿ chi yeⁿe Cristo chí Cristo ndēeve yā yeⁿē cuaaⁿ núuⁿmáⁿ yáⁿāa cūū ndii 'áámá 'diituú ndii táámá 'diituú yeⁿē nanguuvi.

³²Cuayiiⁿ miiⁿ ní Jesús caⁿa yā: 'Cueéⁿ nī ejemplo yeⁿē yáⁿá yeⁿe n'guíidii yaaⁿ nguuvi taachí ínnguaaⁿnu duūⁿnē n'gaiyāá ní ican'daā tá'āā 'āā déenu nī chi 'āā cuchii yāāaⁿ. ³³Tiicá ntúūⁿ, ndís'tiī, taachí snaaⁿ nī tanducuéⁿē chūū, 'āā deenú nī chi 'āā cháā ndaa Saⁿā chi Daiya Dendyuūs. Ní 'āā neené nīⁿnuúⁿ cánéé tiempo chi ndaa sa. ³⁴Cuaacu níⁿnyúⁿ ngaⁿá ngií ndís'tiī, chi 'iiⁿyāⁿ chi snée yā maaⁿ nguée 'cuūvi yā neⁿe chi 'āā cuée cuuvi tanducuéⁿē chuū. ³⁵Nanguuvi ndúúcū yáⁿāa cūū chó'oo naati nduudu yeⁿé nguēe chó'oo.

³⁶Naati nguuvi miiⁿ ndúúcū hora miiⁿ taachí ndaa Saⁿā chi Daiya Dendyuūs, nguēe véé mar 'áámá 'iiⁿyāⁿ chi deenú yā yeⁿē, ndíí nguée ndúú ángeles yeⁿe va'ai chēeti nguuvi, ti dámaaⁿ Ndyuūs Chiidá deenú yā.

³⁷Tan'dúúcā chí chíí tiempo chi 'āā chó'oo taachi canéé Noé miiⁿ tiempo taachi chó'oo diluvio, 'tíscā cuuvi taachí ndaā Saⁿā chi Daiya Dendyuūs. ³⁸Ní tiempo taachi 'āā cuée chó'oo diluvio chi cueeⁿ taaⁿ cuūvi, 'iiⁿyāⁿ ní ng'e yā, ní ng'i yā, ní n'giindivaacu yā, ní nga'a yā daiya yā chí n'giindivaacu, ndíí nguuvi chi Noé miiⁿ sndaa yā na arca chi barco ch'ēete ca chí din'dái yā. ³⁹Ní 'iiⁿyāⁿ yeⁿe tiempo yeⁿe Noé nguée s'neeⁿ veéⁿ yā ndíí taachi cheeⁿ taaⁿ cuūvi ní ch'iinū nducyáácá 'iiⁿyāⁿ ti ch'iī yā. 'Tiicá ntúūⁿ cuuvi taachí ndaa Saⁿā chi Daiya Ndyuūs. ⁴⁰Tuu'mi ní nguuvi taachi nndaa Daiya Ndyuūs snée 'uūvi saⁿā na cuēeti. 'Aama saⁿā ní Cristo candée yā saⁿā, taama saⁿā ní cūnee sa. ⁴¹Ní na 'uūvi n'daataá snee ta ingúú tá 'áámá va'ai naachi inguú yā. 'Aama tá ní candēe yā táⁿā, taama ta ní cūnee ta.

⁴²Ndís'tiī cundēe nī cuidado, ti nguēe déenu nī de'ē hora chi nndaá Señor yeⁿe nī. ⁴³Naati déenu nī chuū. Ndúúti chi saⁿā n'dai chi vaacu sa miiⁿ déenu sa de'ē hora ndaa chí duucu tuu'mi ní canduuchi sa. Ní nguée ca'a sa lugar chí diduucú yā chí véé chēeti vaacu sa. ⁴⁴Chífⁿ chí ndís'tiī ní 'cuēetinée yaaⁿ nī ti Saⁿā chi Daiya Ndyuūs miiⁿ ndaa yā hora chi ndís'tiī nguée déenu nī.

Ejemplo yeⁿe mozo chi n'daācā ní yeⁿe mozo chi nguée n'daācā

(Lc. 12.41-48)

⁴⁵Caⁿa Jesús: ¿Du'ú dueño caⁿa yā ntiiⁿnyuⁿ chi s'nee yā vmnaaⁿ yeⁿe va'ai yeⁿé yā nduuti chí nguée 'aama mayordomo chí n'daācā n'dai

ní deenu sa ní ca'a sa chi che'e mozos ye^{n'}é yā hora chi che'e sa? ⁴⁶De'e chúúca n'dai mayordomo miiⁿ chí dííⁿ sa ntiíⁿnyuⁿ taachi dueño miiⁿ ní ndāa yā ní ndaaca yā mayordomo chí dííⁿ sa tan'dúúca chi ne^{n'}e yā. ⁴⁷Cuaacu nííⁿnyúⁿ nga^{n'}á ngíí ndís'tii, chí dueño miiⁿ cu'neeⁿ yā mayordomo miiⁿ chí caa^{n'}maⁿ ntiíⁿnyuⁿ sa ye^{n'}é chí véé ye^{n'}e yā. ⁴⁸Ndúúti chi mayordomo miiⁿ ní nguée n'dáaca idiiⁿ sá ní 'íicú nacádíínuuⁿ sa na staava ye^{n'}é sa chi dueño cuuvi 'náaⁿ yā ní ndaa yā. ⁴⁹Ní tucá'a sa ch'e^{n'}e sa mozos chi idiiⁿ sa ntiíⁿnyuⁿ ndúúcu sa ní ng'é^e sa ní ng'iⁿ sa ndúúcu amigos ye^{n'}e sa ní cuu'vi sa. ⁵⁰Dueño miiⁿ ní ndaa yā nguuvi chi nguée canée ngíínú sa ní hora chi nguée deenu sa. ⁵¹Ní dueño miiⁿ ní ca'á yā 'aama castigo ch'ete mayordomo miiⁿ. Ní 'caacá yā mayordomo chi cheeyēí ní cu'neeⁿ yā mayordomo miiⁿ chuva'āi ndúúcu 'iiⁿyāⁿ 'uuvi nááⁿ 'uūví cheendi yā. Lugar miiⁿ ní cuéecu sa ní che'e 'diiⁿ'yuⁿ sa cue^{n'}e daaⁿmaⁿ.

Ejemplo ye^{n'}e ndiichi n'daataá chi cuíínuú

25 Jesús ca^{n'}a yā taama ejemplo: Naachí Ndyuūs nga^{n'}a ntiíⁿnyúⁿ yā na va'ai cheeti nguuví tan'dúúca ndiichi n'daataa chi cuíínuú chi sta'á yā lámparas ye^{n'}e yā ní can'dáa yā. Ní cue^{n'}e yā ndaāca yā sa^{n'}ā chi 'caandavaacú sa. ²Ní nyuⁿ'u yā candée n'daāca yā cuidado ti lista yā. Tá nyuⁿ'u yā nguée candée yā cuidado ní dííⁿ yā tan'dúúca chi n'daataá tonta yā. ³N'daataa chi cuíínuú chi nguée candée yā cuidado, candée yā

lámparas ye^{n'}e yā ní nguée candée yā petróleo ye^{n'}é. ⁴Ní nyuⁿ'u yā ní candée n'daacá yā cuidado, candée yā botellas ye^{n'}e petróleo ndúúcu yā ndúúcu lámparas ye^{n'}e yā. ⁵Ní chí'naaⁿ sa^{n'}ā miiⁿ chí ndaa sa chí 'caandavaacu sa. Ní taachi 'āa cuée ndaa sa, n'daataá s'eeⁿ chí ndaa yááⁿ nááⁿ yā ní ch'eti yaadú yā. ⁶Chí ma^{n'}ā yaaⁿ, chí'indiveeⁿ yā 'áamá nduudu chí 'caí. Ní nga^{n'}a yā: Ndaa sá^{n'}ā chí 'caandavaacu sa. Can'dáa nī ní dííⁿ nī recibir sa^{n'}ā. ⁷Tuu'mi ní nducyaaca chí cuíínuú s'éeⁿ nducueeⁿ yā ní nuuⁿ'mí yā lámparas ye^{n'}e yā. ⁸Chí cuíínuú chí nguée lista yā ca^{n'}a yā chíi yā chí cuíínuú chí lista yā: Téé nī 'téé petróleo ye^{n'}é nī nús'uu ti lámparas ye^{n'}é nū 'āā cháā 'āā n'tuuví. ⁹Chí cuíínuú chí candée yā petróleo n'guécúta^{n'}a yā ní ca^{n'}a yā chíi yā taná^{n'}a yā: Nguée cuuvi teé 'nū ndís'tii. Nús'uū ní ne^{n'}e cá 'nū petróleo chí candée 'nū ní 'íicú 'áátii nguée cuuvi falta ye^{n'}e yú. N'dáaca ca ye^{n'}e ndís'tii chí ca^{n'}a nī naachí in'diicuí yā petróleo ní cuái nī ye^{n'}é nī. ¹⁰Ne^{n'}e chí n'daātā s'eeⁿ chí nguée lista yā cue^{n'}e yā cuái yā petróleo miiⁿ, sa^{n'}ā chí 'caandavaacu sa ndaa sa ní chí cuíínuú chí candée n'daacá yā cuidado cue^{n'}é yā ndúúcu sa^{n'}ā naachí n'giindivaacu 'iiⁿyāⁿ. Ní sa^{n'}ā miiⁿ nan'gaādí sá cheendi va'āi miiⁿ. ¹¹Cuayiivi miiⁿ ní ndaa taná^{n'}ā chí cuíínuú s'eeⁿ ní ca^{n'}a yā: N'dií Señor, Señor, nan'guaaⁿ nī ye^{n'}é 'nū. ¹²Naati sa^{n'}ā miiⁿ chí 'caandavaacu sa ní nan'guécúta^{n'}a yā ní ca^{n'}a yā: Cuaacu nííⁿnyúⁿ nga^{n'}á ngíí ndís'tii, 'úú ní nguée n'diichí ndís'tii.

¹³Maaⁿ ní nducyaaca ndís'tii candée nī cuidado ti nguée déenu nī

de'ē nguuvī o de'ē hora chi Saⁿā chi Daiya Dendyuūs nndaa sa.

Ejemplo yeⁿe tuūmī

¹⁴Tuuⁿmi ní caⁿa Jesús: Naachí Ndyuūs ngaⁿa ntiⁿnyuⁿ yā na va'ai cheeti nguuvī tan'dúúcā 'áámá saⁿā chi caⁿā yaⁿái yā ndii táámá yáⁿāa ní 'cai yā mozos yeⁿe yā ní nca'a yā mozos miiⁿ dendú'u chi véé yeⁿe yā, chi diiⁿ sa cuidado yeⁿe.

¹⁵Aama mozo ní ca'a yā nyuⁿu mil caadi, táámá mozo ní 'uūvī mil caadi, táámá mozo ní 'aama mil caadi. Ní ca'a yā 'áámá 'áámá mozo tan'dúúcā chi chee sa. Ní cueⁿē yaⁿái yā. ¹⁶Mozo chí sta'a nyuⁿu mil caadi cunaⁿā sa ní diiⁿ sa negocio ndúúcū tuumī miiⁿ. Ní ndaācā sa tá nyuⁿu mil caadi yeⁿe daiya túumī miiⁿ. ¹⁷Tiicá ntúūⁿ mozo chí sta'a sa ná 'uūvī mil caadi miiⁿ ndaācā sa ná 'uūvī mil caadi yeⁿe daiya tuumī miiⁿ. ¹⁸Mozo chi sta'a sa 'aama mil caadi cheⁿe sa ní s'neeⁿ sa tuūmī miiⁿ cheeti 'áámá 'cuutií cuééé ní ch'iī sa maaⁿ yáⁿāa. 'Tíicā chinuuⁿ n'dé'ei sa tuumī yeⁿe 'iiví sa.

¹⁹Chi 'naáⁿ ní ndaā 'iivī mozos miiⁿ ní tun'dáa yā cuenta ndúúcū mozos. ²⁰Ndaā mozo chi nca'a yā nyuⁿu mil caadi nanáaⁿ yā. Ndée sa ta nyuⁿu mil caadi yeⁿe daiya tuūmī miiⁿ. Ní caⁿa sa chii sa 'iiví sa: N'dii señor, nyuⁿu mil caadi tee nī 'úú. 'Íngaā. Ndaācā ta nyuⁿu mil caadi daiya tuūmī yeⁿe nī. ²¹Ivī mozo miiⁿ ní caⁿa yā chii yā saⁿā: Dii mozo yeⁿé chí n'daācā ní n'dai, n'daācā n'dai ndíiⁿ di. Maaⁿ ti 'āa n'daācā diiⁿ di ndúúcū chí duū'vi, maaⁿ ní caaⁿmaⁿ ntiⁿnyuⁿ di yeⁿe

n'deēe cá teé dii. Cho'o di cuaaⁿ cheeti va'āi ní cueⁿe daāⁿmaⁿ cuuvi yeenú di nduucú. ²²Ndaā ntúūⁿ nanáaⁿ yā mozo chi nca'a yā na 'uūvī mil caadi. Mozo miiⁿ ní caⁿa sa chii sa 'iivī sa: N'dii señor, 'uūvī mil caadi tee nī 'úú. 'Íngaā tuumī yeⁿe nī. Ndaācā ta na 'uuvī mil caadi daiya tuūmī miiⁿ. ²³Ivī sá caⁿa yā chii yā saⁿā: Díí mozo yeⁿé chi n'daācā ní n'dai, ní n'daācā idiⁿ di. Nguéé cheete teé dii ní n'daācā diiⁿ di. Maaⁿ ní caaⁿmaⁿ ntiⁿnyuⁿ yeⁿe n'deēe ca chi teé dii. Cho'o di cuaaⁿ cheeti va'āi ní cueⁿe daāⁿmaⁿ cuuvi yeenú di nduucú. ²⁴Ndaa nanáaⁿ yā mozo chí nca'a yā 'áámá mil cáádí, ní caⁿa sa chii sa 'iivī sa: N'dii Señor, deenú tí n'dii ní cheechí nī, ní diiⁿ nī cosechar ndúúcū tuumī yeⁿé nī chi nguéé ngiinū nī, ní 'naaⁿ trigo ngaáⁿ nī naachí nguéé ngiinū nī ti yeⁿe nī. ²⁵Chííⁿ chí diiⁿ ti 'va'á. Ní cheⁿé ní s'nuuⁿ n'de'ei tuūmī yeⁿe nī na 'áámá yiivī yáává maaⁿ yáⁿāa. 'Íngaā tuūmī yeⁿe nī chi tee nī 'úú. ²⁶Ivī sa mííⁿ nan'guεεcútaⁿa yā ní caⁿa yā chii yā mozo miiⁿ: Díí mozo chi nguεε n'dáacā ní 'daān'di dii. Ní nguéé n'dáacā idiⁿ di. Díí ní déénu di chí nt'a cosecha naachi nguéé ndíiⁿ ntiⁿnyuⁿ ní nn'guaáⁿ trigo naachi nguéé ngiinú ti yeⁿé. ²⁷¿De'ē cúúvī chi nguéé s'neeⁿ di tuūmī yeⁿé na banco? Ní taachi 'úú ndaā cuuvi ntee di tuūmī yeⁿé ndúúcū daiya tuūmī miiⁿ. ²⁸Ivī miiⁿ caⁿa yā ndúúcū 'iiví yāⁿ chí snéé miiⁿ: N'dii, diví nī tuūmī yeⁿe sa ní ca'a nī tuūmī mozo chi ndeē ndiichi mil caadi. ²⁹Ti 'iiví yāⁿ chí véé yeⁿe yā, ní ndaācā ca yeⁿe yā. Ní 'iiví yāⁿ miiⁿ n'deēe cá vεe yeⁿe yā. 'Iiví yāⁿ

chi nguée yeⁿe yā, ta 'líⁿ duū^{vi} chi véé yeⁿe yā ní divíⁱ yā yeⁿe yā.
³⁰ Mozo chi nguée dichíⁱvē ní cuta^áá ní ní cuⁿuuⁿ ní cuaaⁿ chuva^áái ná maaiⁿ. Míⁿ cuéecu sa ní che'e 'díⁱ'yúⁿ sá cueⁿe daāⁿmaⁿ.

N'diichí Jesús nuuⁿndi yeⁿē naciones

³¹ Ní caⁿ'a Jesús: Taachí ndaa Saⁿ'ā chi Daiyā Dendyuūs tan'dúú^{cā} Rey chí ch'ete ca ní n'deeve taavi ndúú^{cū} tanducueⁿē ángeles yeⁿe yā, tuu^{mi} ní saⁿ'ā miiⁿ 'cuū^{ndi} sa na trono yeⁿe sa. ³² Ní nduuvidaama nanááⁿ Rey miiⁿ 'iiⁿ'yāⁿ yeⁿe nducyaaca naciones ní Rey miiⁿ divíⁱ yā 'iiⁿ'yāⁿ, 'áámá yā yeⁿe táámá yā tan'dúú^{cā} chi 'iiⁿ'yāⁿ pastor chi idiiⁿ yā cuidado yeⁿe 'iiti cuūchí divíⁱ yā chiivu nguaaⁿ 'iiti cuūchí. ³³ Ní cu'neeⁿ yā 'iiti cuūchí lado tá cuaacú yā ní chiivú miiⁿ lado ta 'cueé yā. ³⁴ Tuu^{mi} ní Rey miiⁿ caaⁿ'máⁿ yā cuuvi yā 'iiⁿ'yāⁿ lado ta cuaacu yā: Ndí^s'tíi chi Chiidá ngaⁿ'a yā yeⁿe ní n'dái taavi ní. Cuchíⁱ ní. Ííngā parte chi ituneeⁿ ndí^s'tíi yeⁿē naachí Ndyuūs ngaⁿ'a ntiiⁿ'nyúⁿ yā ní nguaiⁿ'ndai yā yeⁿē ndí^s'tíi ndíⁱ taachi Ndyuūs 'āā cuéé din'dái yā iⁿ'yeeⁿdí. ³⁵ Tí taachí cuicú, ní tee ní chi che'é. Ní taachí chi yaācá, ní tee ní chí chíⁱ. Ní taachí canú^u yú^uní tan'dúú^{cā} 'iiⁿ'yāⁿ chí ndiicá yā táámá yāāⁿ, ndí^s'tíi 'cuúⁿ ní 'úú. ³⁶ Ní taachi 'āā ntéé catecaí, ní tee ní catecaí. Ní taachi chí^{tā} 'úú, dicuéénaaⁿ ní 'úú. Ní taachi cheⁿ'é vácūū, ní ndaa ní n'diichi ní 'úú. ³⁷ Tuu^{mi} ní 'iiⁿ'yāⁿ chi n'dái yā nan'guēcútaⁿ'a ní caⁿ'a yā cuuvi yā 'iiⁿ'yāⁿ: N'dii señor, 'tíⁱ cuaⁿ'ā n'diichí 'nū n'dii chí cuicu

ní ní tee 'nū chi che'é ní, o yaacá ní ní tee 'nū chi chíⁱ ní? ³⁸ 'Tíⁱ cuaⁿ'ā n'diichí 'nū n'dii cuaaⁿ cyúúⁿ ní nta^á 'nū n'dii na vaacú 'nū, o nguée catecaí ní ní tee 'nū catecaí ní? ³⁹ O 'tíⁱ cuaⁿ'ā n'diichí 'nū n'dii chí ngí^{tā} ní o vácūū canuuⁿ ní, ní nín^{dā}á 'nū nanáaⁿ ní? ⁴⁰ Rey miiⁿ ní nan'guēcútaⁿ'a yā ní caⁿ'a yā chii yā 'iiⁿ'yāⁿ s'uuⁿ: Cuaacu níⁿ'nyúⁿ 'úú ngaⁿ'á ngíⁱ ndí^s'tíi, ti taachi díⁱ ní 'tíⁱcā ndúú^{cū} 'áámá hermano 'áará chí ndíⁱcúúⁿ cá yā, tuu^{mi} ní 'tiicá ntúúⁿ díⁱ ní nduucú.

⁴¹ Tuu^{mi} ní Rey caaⁿ'maⁿ ntúuⁿ yā cuuvi yā 'iiⁿ'yāⁿ chí snée lado ta 'cueé yā: Cuvíⁱ ní yeⁿē 'úú, ndí^s'tíi, 'iiⁿ'yāⁿ condenado chí nguée n'daācā idiⁱ ní. Ní caⁿ'a ní ná nguuchi yaⁿ'ā chí 'áámá ngiichi cueⁿ'e daāⁿmaⁿ. Lugar 'cūū ní n'dai cááva yááⁿ'n'guinūuⁿ ndúú^{cū} ángeles yeⁿe sa. ⁴² Tí taachí cuicú, nguée tee ní chí che'é. Chii yaācá, ndíⁱ nguée ndúú tee ní chí chíⁱ. ⁴³ Canú^u yúúⁿ, ndíⁱ nguée ndúú 'cuúⁿ ní 'úú. 'Āā ntéé catecaí, ndíⁱ nguée ndúú tee ní catecaí. Chí^{tā} 'úú ní canú^u vácūū, ndíⁱ nguée ndúú dicuéénaaⁿ ní 'úú. ⁴⁴ Tuu^{mi} ní 'iiⁿ'yāⁿ s'eeⁿ nan'guēcútaⁿ'a yā ní caⁿ'a yā: N'dii señor, 'tíⁱ cuáⁿ'ā n'diichí 'nū n'dii chí cuicú ní, o yaācá ní, o canú^u ní yúúⁿ, o nguée catecaí ní, o ngí^{tā} ní, o vácūū cánuuⁿ ní, ní nguée dichíⁱ'vē 'nū n'dii? ⁴⁵ Tuu^{mi} ní Rey miiⁿ nan'guēcútaⁿ'a yā ní caaⁿ'maⁿ yā cuuvi yā 'iiⁿ'yāⁿ s'eeⁿ: Cuaacu níⁿ'nyúⁿ ngaⁿ'á ngíⁱ ndí^s'tíi, tan'dúú^{cā} chí nguée díⁱ ní ndúú^{cū} 'áámá chí ndíⁱcúúⁿ cá 'tiicá ntúúⁿ 'úú, nguée díⁱ ní nduucú. ⁴⁶ 'Iiⁿ'yāⁿ s'eeⁿ ní caⁿ'a yā na 'áámá castigo chí

'áamá canee ní 'iiⁿ'yāⁿ chí n'dáí yā
caⁿ'á yā ná vida cueⁿ'e daāⁿmaⁿ.

**'Iiⁿ'yāⁿ ní n'nuuⁿ yiinú yā táácā cuta'á
yā Jesús**

(Mr. 14.1-2; Lc. 22.1-2; Jn. 11.45-53)

26 Taachí Jesús ch'iinu caⁿ'a
yā tanducuéⁿ'ē nduudú
'cūū, caⁿ'a yā chíi yā discípulos
yeⁿ'e yā: ²Āā déenu ndís'tiī ná 'uūví
nguuvi maaⁿ cuūvā 'viicu yeⁿ'ē
pascua. Íícu 'úú Saⁿ'ā chi Daiya
Dendyuūs 'úú ní 'iiⁿ'yāⁿ nca'a yā 'úú
ní cuⁿ'ééⁿnga'a yā 'úú.

³Tuuⁿ'mi ní chiiduú n'geete ndúúcu
maestros yeⁿ'e ley ndúúcu 'iiⁿ'yāⁿ
ndiicúú s'eeⁿ chí ngaⁿ'a ntiiⁿ'nyuⁿ
yeⁿ'é yaācū nduuvidaamá yā na
palacio yeⁿ'ē chiiduú ch'eté ca chí
nguuvi Caifás. ⁴Ní ndeé yā taācā
cuuvi cannche'élí yā Jesús ní cuta'á
yā 'iiⁿ'yāⁿ ní 'caaⁿ'núⁿ yā 'iiⁿ'yāⁿ. ⁵Ní
caⁿ'a yā: Nguéé diiⁿ yú nguuvi 'viicu
ti 'iiⁿ'yāⁿ yeⁿ'e yāāⁿ Jerusalén miiⁿ
didáⁿ'a yā ní dííⁿ yā vaadi 'caaⁿ'va
ndúúcu nús'uu.

**Ch'eēndāa yā aceite vmnaaⁿ tiīⁿ
Jesús na yāāⁿ Betania**

(Mr. 14.3-9; Jn. 12.1-8)

⁶Jesús canée yā na yāāⁿ Betania
ná va'ai yeⁿ'e Simón chi canée ca'ai
lepra chi in'duuti yuūtē yeⁿ'ē sa. ⁷Ní
ndaā 'áamá n'daataā nanáāⁿ Jesús
miiⁿ chi ndéē tá 'áamá frasco tuūu
alabastro chi s'néēⁿ aceite perfume
chí yaⁿ'ai n'dai chííⁿvē. Ní ch'eēndāa
ta perfume miiⁿ na tííⁿ Jesús taachí
vēc yā na mesa. ⁸Ní discípulos
taachi n'diichí yā chūū nduuvi
taāⁿ yā. Ní caⁿ'a yā: ¿De'ē cúúví chí
chingéē aceite 'cūū? ⁹Cuuví n'diicui
ta chuū ti yaⁿ'ai n'dai chííⁿvē chuū

ní ca'a tá tuūmí miiⁿ 'iiⁿ'yāⁿ chi
nguée yeⁿ'e yā.

¹⁰Jesús tuumicadínuuⁿ yā chí
discípulos ngaⁿ'a yā 'tíicā, ní caⁿ'a
yā chíi yā discípulos: ¿De'ē cúúví
chí n'gaa'va ní ndúúcu n'daataā
'tíí? Táⁿ'a 'tíi n'dáacā diiⁿ tá nduucú.
¹¹Ti 'iiⁿ'yāⁿ chi nguée vée yeⁿ'é yā
ní 'áamá cánée yā nduucú ní, naati
'úú ní nguée 'aama cuneé nduucú
ní. ¹²Taachi tá 'tíi ch'eēndāa ta
perfume vmnáāⁿ cuerpo yeⁿ'é, ndaā
ta 'úú tí taachí 'cuūví 'āā canee listo
cuerpo yeⁿ'é chí 'cueēchí. ¹³Cuaacu
nííⁿ'nyúⁿ ngaⁿ'á ngii ndís'tiī, chí 'āā
tíí nūuⁿ chí caaⁿ'máⁿ yā ndúúdu
ngai yeⁿ'e chí nanguaⁿ'ai 'iiⁿ'yāⁿ na
núúⁿ'máⁿ iⁿ'yeēⁿdí, caaⁿ'maⁿ ntuúⁿ
yā chí tá 'tíi diiⁿ tá chuū ní n'gaacu
yā yeⁿ'e tá.

**Judas miiⁿ ngaⁿ'a maaⁿ sa chí nca'a
sa Jesús**

(Mr. 14.10-11; Lc. 22.3-6)

¹⁴Tuuⁿ'mi ní 'áamá discípulo yeⁿ'ē
naachi ndiichúúví yā chí nguuvi
sa Judas Iscariote, cheⁿ'e sá nanáāⁿ
chiiduú n'geetē. ¹⁵Ní caⁿ'a sa chíi
sa 'iiⁿ'yāⁿ s'eeⁿ: ¿De'ē tée ní 'úú ní
'cuuⁿ'míⁿ ndís'tiī du'u chí Jesús?
'Iiⁿ'yāⁿ s'eeⁿ ní caⁿ'a yā chí nadiiⁿ'vé
yā Judas miiⁿ ndiicū ndiichi caadi
'dííⁿngueē. ¹⁶Ndíí tuuⁿ'mí nūuⁿ in'nuuⁿ
yíínú Judas miiⁿ de'ē tiempo ní
táácā chí nca'a sa Jesús miiⁿ.

**Jesús yaa'ví yā yeⁿ'ē chí che'e
nguiinú yā 'viicu pascua**

(Mr. 14.12-25; Lc. 22.7-23; Jn.

13.21-30; 1 Co. 11.23-26)

¹⁷Nguuvi vmnáāⁿ vmnaaⁿ yeⁿ'e
'viicu pascua, nguuvi yeⁿ'e pan chí
nguée levadura yeⁿ'ē, discípulos

ní ndaa yā nanááⁿ Jesús ní caⁿa yā chii yā 'iⁿyāⁿ: ¿Tíí neⁿe nī chi inⁿuúⁿ nū chi che'e nguīnū yú mááⁿ yeⁿe 'viicu yeⁿe pascua?

¹⁸Níicú Jesús caⁿa yā chii yā discípulos: Cueⁿé nī na yááⁿ Jerusalén nī ndaacá nī 'áámá saⁿā ní caaⁿmaⁿ nī cuuvi nī saⁿā: Maestro yeⁿe yú caⁿa yā 'túúcā: Tiempo yeⁿe chí 'cuúví 'āā snee nīiⁿnuúⁿ ní neⁿé dííⁿ 'viicu yeⁿe pascua ndúúcu discípulos yeⁿé na va'ai yeⁿé nī.

¹⁹Discípulos dííⁿ yā tan'dúúcā chi Jesús dicho'ó yā chí dííⁿ yā. Ní inⁿuúⁿ yā chí che'e yā yeⁿe 'viicu yeⁿe pascua.

²⁰Taachi 'āā chii chiīnū miiⁿ, Jesús ch'iindi yā na mesa ndúúcu ndu'u ndiichúúví discípulos. ²¹Ní taachí v̄et̄é yā ní nge'e yā Jesús caⁿa yā: Cuaacu nííⁿnyúⁿ ngaⁿá ngíí ndís'tií, chí 'áámá chéé ndís'tií díí nī entregar 'úú.

²²Discípulos s'neeⁿ ndaachi yiinú yā. 'Áámá 'áámá yā ní tuc'á yā caⁿa yā: N'dií Señor, ¿'áá 'úú?

²³Tuu'mi ní Jesús nan'gūēcútaⁿa yā ní caⁿa yā: 'Iⁿyāⁿ chí nduucú ní dí'caandá yā pan yeⁿé yā na cú'ú 'cūū nduucú, 'iⁿyāⁿ 'cūū ní nca'a yā 'úú. ²⁴Cuaacu nííⁿnyúⁿ cuuvi ndúúcu Saⁿā chí Daiya Dendyuūs tan'dúúcā chí canéé nguūⁿ yeⁿé sa na libro yeⁿé Ndyuūs, naati de'e chúúcā ya'āi yeⁿe saⁿā chí nca'a sa 'úú chí Saⁿā chí Daiya Dendyuūs. N'dáacā ca yeⁿé sa nduutí chí ngūéé ch'iindiyáaⁿ sa.

²⁵Tuu'mi ní Judas, saⁿa chí neⁿe nca'a sa Jesús, ní caⁿa sa: ¿'Áá 'úú, Maestro? Jesús caⁿa yā chii yā Judas: Díí, ngaⁿa di 'tíicā.

²⁶Taachí 'iⁿyāⁿ s'uuⁿ nge'e yā, Jesús miiⁿ sta'á yā pan ní ca'á yā gracias Ndyuūs cáávā pan miiⁿ. Ní n'deé yā pan ní ca'a yā discípulos yeⁿe yā. Ní caⁿa yā: Cuta'á nī, che'e nī pan caati tan'dúúcā cuerpo yeⁿé 'tíicā.

²⁷Ní Jesús sta'á yā taza ndúúcu jugo yeⁿe uvas ní ca'á yā gracias Ndyuūs cáávā nuūⁿnīⁿ uvas miiⁿ, ní ca'a yā discípulos yeⁿe yā. Ní caⁿa yā: Nducyaaca ndís'tií, cu'u nī nuūⁿnīⁿ uvas yeⁿe taza 'cūū, ²⁸ti jugo nuūⁿnīⁿ uvas miiⁿ ní tan'dúúcā yuūuⁿ yeⁿé ní yeⁿé compromiso chí ngai yeⁿé. Yuūuⁿ yeⁿé chí cūngēé cáávā 'yaaⁿ n'dai 'iⁿyāⁿ, 'tíicā. Yuūuⁿ yeⁿé chííⁿ chí nch'ēēcú nuuⁿndi yeⁿe nducyaaca 'iⁿyāⁿ. ²⁹'Úú ní ngaⁿá ngíí ndís'tií chí 'āā ntéé cu'ú jugo nuūⁿnīⁿ yeⁿé uvas na iⁿ'yeeⁿdí 'cūū ndii nguuvi chí cu'ú ndúúcu ndís'tií naachi Chiidá ngaⁿa ntiiⁿnyúⁿ yā.

**Jesús ngaⁿa yā Pedro miiⁿ chí
cuééⁿdítu sa chí ngūéé n'diichi sa
Jesús**

(Mr. 14.26-31; Lc. 22.31-34; Jn. 13.36-38)

³⁰Taachí ch'iinu chiita yā 'áámá canción yeⁿé Ndyuūs nan'dáa yā va'āi ní cueⁿé yā na yiicū chí nguuvi Olivos. ³¹Tuu'mi ní Jesús caⁿa yā chii yā discípulos: Nducyáácá ndís'tií cuuví 'cuināⁿ nī yeⁿe 'úú maaⁿnguūnū. Caati ngaⁿa naachi canéé nguūⁿ na libro yeⁿé Dendyuūs 'túúcā: 'Úú Ndyuūs 'nuūcá'ai ní 'caaⁿnúⁿ saⁿā chí idiíⁿ sa cuidado 'iiti cuūchí, ní 'iiti s'eeⁿ ní caⁿá 'múúⁿ caⁿá miiⁿ tī ní cuuví ndai tī. ³²Taachí 'úú nduuchí nguaaⁿ tináⁿā, caⁿá vmnaaⁿ yeⁿe ndís'tií na yáⁿā Galilea.

³³Tuu'mi ní Pedro miiⁿ ní nan'guēcútaⁿa sa ní caⁿa sa chii sa Jesús: 'Áará chi nducyaaca yā cuuvi 'cuinaaⁿ yā cáávā n'dií 'úú nguée cuuvi 'cuinaáⁿ mar 'aamá naaⁿ.

³⁴Tuu'mi ní Jesús caⁿa yā chii yā Pedro: Cuaacu níⁿnyúⁿ ngaⁿá ngií dii chi maaⁿnguínū taachi 'āā cuée 'cuaí túsaⁿā, dii ní 'āā 'iinū cuuvi cueeⁿdiitū di yeⁿē 'úú chi nguée in'diichi di 'úú.

³⁵Naati Pedro miiⁿ caⁿa sa: Ndúúti chi canée chí 'cuūví nduucú nī maestro ní 'cuūví. Nguée caaⁿmaⁿ chí nguée n'diichi n'dií. Ní nducyaaca discípulos ní 'tiicá ntúūⁿ caⁿa yā.

Jesús ngaⁿangua'á yā na jardín chi nguuvi Getsemaní

(Mr. 14.32-42; Lc. 22.39-46)

³⁶Tuu'mi ní ndā Jesús ndúúcū discípulos yeⁿé yā na 'áámá cuaaⁿ chí nguuvi Getsemaní ní caⁿa yā chii yā discípulos yeⁿe yā: 'Cuēté nī 'muuⁿ. 'Úú ní caⁿa niiⁿnuúⁿ miiⁿ ní caaⁿmaⁿngua'á.

³⁷Jesús miiⁿ cueⁿe yā ndúúcū Pedro ndúúcū nduu 'uuvi saⁿā daiya Zebedeo. Tuu'mi ní Jesús s'neeⁿ ndaachi yiínú yā. ³⁸Ní caⁿa yā chii yā 'iiⁿyāⁿ s'uuⁿ: Alma yeⁿé ní nééné ndaachí yiínú chí ya'āi chí 'cuūví. 'Cuētinée nī 'muuⁿ ní 'cuēti nduuchí nī nduucú.

³⁹Jesús ní cueⁿé yā ta 'lííⁿ cuááⁿ vmnaaⁿ. Candiitin'dií yā ní caⁿangua'a yā ní caⁿa yā: N'dií Chiidá, ndúúti chí cuuvi, nguée dííⁿ nī chí 'cuenú cuuvi prueba 'cūū naati nguée cuuvi tan'dúúcā chí 'úú neⁿé naati tan'dúúcā chí n'dií neⁿé nī.

⁴⁰Tuu'mi nūuⁿ ndaá yā naachi snée discípulos yeⁿe yā ní ndaāca yā 'iiⁿyāⁿ chí stiyaadú yā. Ní caⁿa yā chí yā Pedro: 'Áá 'tíicā nguée íchéé dí chí induūchi dí nduucú 'áámá hora? ⁴¹Ndís'tií ní candée nī cuidado ní caaⁿmaⁿngua'á nī níicú nguée dííⁿ nī nuuⁿndi. Cuaacu níⁿnyúⁿ espíritu yeⁿe nī neⁿe diiⁿ n'daacā naati cuerpo yeⁿé nī 'āā dūūvā.

⁴²Jesús cheⁿe chí ndií 'úúví cuuvi ní caⁿangua'á yā ní caⁿa yā: N'dií Chiidá, ndúúti chí neⁿé nī, dííⁿ nī chí nguée 'cuenú cuuvi prueba 'cuu chí n'daāca tuu'mi ní 'tíicā dííⁿ nī, naati cuuvi tan'dúúcā chí neⁿe nī.

⁴³Jesús nndaa ntuuⁿ yā táamá vmnéⁿēe naachi snée discípulos yeⁿé yā ní ndaaca ntúūⁿ yā 'iiⁿyāⁿ stiyaadú yā ti 'iiⁿyāⁿ s'eeⁿ 'āā ntée íchee yā nduutināaⁿ yā chí yaāⁿnnāaⁿ yā. ⁴⁴Jesús miiⁿ ní nguée yaa'vi yā discípulos ní s'neeⁿ yā 'iiⁿyāⁿ chí stiyaadú yā. Ní cueⁿe ntúūⁿ yā ní caⁿangua'á ntúūⁿ yā ndií chí ndiíⁿ 'íínú cuuvi ní caⁿa ntuuⁿ yā tan'dúúcā chí 'āā ngaⁿa yā. ⁴⁵Cuayiivi ní ndaa ntuuⁿ yā nanááⁿ discípulos ní cáⁿa yā chí yā discípulos: 'Cuētiyaadú nī ní ntaavi'tuunúúⁿ nī. Cuin'diichi nī ti 'āā ndaā hora yeⁿe 'úú chí Saⁿā chí Daiya Dendyuūs. 'Iiⁿyāⁿ nca'a yā 'úú tá'a saⁿā s'eeⁿ chí véé nuuⁿndi yeⁿe sā. ⁴⁶Nducueeⁿ ndís'tií ní cúⁿyú. 'Āā cuchii niiⁿnuúⁿ saⁿā chí nca'a 'úú.

Sta'á yā Jesús ní candée yā 'iiⁿyāⁿ presos

(Mr. 14.43-50; Lc. 22.47-53; Jn. 18.2-11)

⁴⁷'Naaⁿ chí Jesús indee yā, ndaā Judas miiⁿ, 'áámá saⁿā yeⁿē ndu'u

ndiichúúví discípulos. Ní neéné 'yaaⁿ 'iiⁿ'yāⁿ ndaá yā ndúú^{cū} Judas miiⁿ ndúú^{cū} machetes 'uūví lados 'caāiⁿ ndúú^{cū} yáⁿ'á. Chiiduú n'geeté ndúú^{cū} 'iiⁿ'yāⁿ ndiicúú s'eeⁿ chí ngaⁿ'a ntiiⁿ'nyuⁿ yeⁿ'e yaācū dichó'o yā 'iiⁿ'yāⁿ s'eeⁿ. ⁴⁸Judas miiⁿ chi nca'a sá Jesús 'iiⁿ'yāⁿ s'eeⁿ, ca'a sa 'áámá seña ní 'túú^{cā} caⁿ'a sa: 'Iiⁿ'yāⁿ chi 'úú chi'neeⁿ cheendí, 'iiⁿ'yāⁿ miiⁿ chí 'iiⁿ'yāⁿ chi cuta'a nī chi preso yā.

⁴⁹Tuu'mi ní Judas miiⁿ ní ndaa sa nanááⁿ Jesús miiⁿ ní caⁿ'a sa: Tavacho'onoó nī, n'diī Maestro. Ní 'neeⁿ cheendi sá Jesús. ⁵⁰Jesús miiⁿ ní caⁿ'a yā chii yā Judas: Díí, amigo yeⁿ'é, ¿de'ē cáávā chi cuchii di? Tuu'mi ní 'iiⁿ'yāⁿ s'eeⁿ ní ndaa yā nanááⁿ Jesús miiⁿ ní sta'á yā Jesús ní candé^e yā 'iiⁿ'yāⁿ preso.

⁵¹Naati 'áámá saⁿ'ā chi cané^e sá ndúú^{cū} Jesús miiⁿ ní tun'dáa sa machete 'uūví lados 'caāiⁿ ná chēēti vaacu ní 'nuūcá'ai sa 'áámá mozo yeⁿ'ē chiiduú ch'ēetē ca ní ch'iica sa veēⁿ mozo miiⁿ. ⁵²Tuu'mi ní Jesús caⁿ'a yā chii yā saⁿ'ā: 'Nuūⁿ di machete 'uūví lados 'caāiⁿ yeⁿ'ē di vaacu. Nducyaaca 'iiⁿ'yāⁿ chi ita'á yā machete 'uūví lados 'caāiⁿ ní ndúú^{cū} machete 'uūví lados 'caāiⁿ 'cuūví. ⁵³¿Áá nguéé déénú dí chi 'úú cuuví caaⁿ'maⁿ'nguā'á ní caacá Chiidá ní mīⁿ'níf'yúⁿ mīⁿ'niiⁿ'yuⁿ cho'ó yā nanááⁿ 'úú taandu ngo'oo ndiichúúví taāⁿ ángeles ní chiidá cuuvi díⁿ yā? ⁵⁴Naati maaⁿ ní nduuti chi díⁿ chuú t'áácā cuuvi cúúnú ca'a naachi cané^e nguūⁿ na libro yeⁿ'é Ndyuūs, chi cané^e chí cuuvi 'tíicā?

⁵⁵Hora miiⁿ Jesús caⁿ'a yā chii yā 'iiⁿ'yāⁿ s'eeⁿ: ¿De'ē cúúví chí can'daa

nī ndúú^{cū} machetes 'uūví lados 'caāiⁿ ndúú^{cū} yáⁿ'á s'eeⁿ tan'dúú^{cā} chi 'úú 'iiⁿ'yāⁿ chi duucu 'úú chi sta'á ní 'úú? Nguuvi nguuvi ch'iindí ndúú^{cū} ndís'tiī na yaācū templo ní ngi'cueeⁿ ndís'tiī ní nguéé sta'á ní 'úú. ⁵⁶Tanducuéⁿ'ē chuū cuuví ní cúúnú ca'a yeⁿ'ē chi cané^e nguūⁿ na libro yeⁿ'é Ndyuūs cáávā profetas ndii cuááⁿ vmnaaⁿ. Tuu'mi ní nducyaaca discípulos s'neeⁿ yā Jesús miiⁿ ní chéénu yā.

Jesús nanááⁿ 'iiⁿ'ntyéⁿ'ē yeⁿ'e yaācū templo

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷'Iiⁿ'yāⁿ chi sta'á yā Jesús miiⁿ candé^e yā 'iiⁿ'yāⁿ miiⁿ nanááⁿ chiiduú ch'ēetē ca chí nguuvi Caifás. Mííⁿ nduuvíⁿáámá maestros yeⁿ'e ley ndúú^{cū} 'iiⁿ'yāⁿ ndiicúú s'eeⁿ chí ngaⁿ'a ntiiⁿ'nyúⁿ yā yeⁿ'e yaācū. ⁵⁸Pedro miiⁿ cueⁿ'e ntúuⁿ sa ní n'dáa yaⁿ'ai sa cuaaⁿ dáámí Jesús ndíí chuva'āi yeⁿ'ē va'ai ch'ēete yeⁿ'ē chiiduú ch'ēete cá. Ní ndaa sa na patio ní ch'iindí sa ndúú^{cū} policías chí díⁿ yā cuidado yeⁿ'e va'āi miiⁿ. Pedro neⁿ'e sa snaaⁿ sa táácā chí díⁿ yā ndúú^{cū} Jesús miiⁿ.

⁵⁹Chiiduú n'geeté ndúú^{cū} 'iiⁿ'yāⁿ ndiicúú s'eeⁿ chí ngaⁿ'a ntiiⁿ'nyuⁿ yā yeⁿ'e yaācū ndúú^{cū} nducyaaca 'iiⁿ'yāⁿ chí ngaⁿ'a ntiiⁿ'nyuⁿ yā in'nuúⁿ yā 'áámá testigo chí nguéé ngaⁿ'a cuaacu yeⁿ'ē Jesús miiⁿ. Ní 'íicú cuuvi nca'a yā Jesús miiⁿ chí 'cuuvi yā. ⁶⁰Nguéé ndaaca yā mar 'áámá naaⁿ taācā chí 'caaⁿ'nuⁿ yā Jesús miiⁿ. 'Áará chí neené 'yaaⁿ 'iiⁿ'yāⁿ caⁿ'a yā nduudu yaadi yeⁿ'e Jesús miiⁿ. Cuayiivi miiⁿ ní ndaa ntúūⁿ

tanaaⁿ 'uūvī testigos chí ngaⁿ'a yā nduudu yaadi. ⁶¹Testigos ní caⁿ'a yā: Sáⁿ'a 'cūū ní caⁿ'a sa: 'Úú ní cuuvi díⁿ chuū. Natuūví yáacū templo 'cūū chí yeⁿ'é Ndyuūs naati chʼɛɛtī 'iīnū nguuvī nadan'daí.

⁶²Chiiduú chʼɛɛtɛ cá miiⁿ ní ncueeⁿ yā ní caⁿ'a yā chíi yā Jesús: 'Áá nguée nan'guɛɛcútaⁿ'a nī mar 'áámá nduudu yeⁿ'e de'ē chí ngaⁿ'a 'íís'tiī yeⁿ'e nī?

⁶³Naati Jesús nguée de'ē vɛɛ caⁿ'a yā. Tuu'mi ní chiiduú chʼɛɛtɛ cá miiⁿ caⁿ'a yā: 'Úú ní n'gaí, “por Ndyuūs chí canduuchí”. Cuuvi nī nús'uu ndúúti chí n'diī chí Cristo, Daiya Ndyuūs chí cánduuchi.

⁶⁴Jesús miiⁿ ní caⁿ'a yā chíi yā chiiduú chʼɛɛtɛ cá miiⁿ: 'Úú tan'dúúcā chí n'diī ngaⁿ'a nī. Ngaⁿ'á ca ngíí ndís'tiī, chí ndiī maaⁿ snaaⁿ nī Saⁿ'á chí Daiya Ndyuūs 'cuūndī sa lado yeⁿ'e honor yeⁿ'é Ndyuūs chí véé tanducuéⁿē poder yeⁿ'é yā ní ndaa sa na meēⁿ yeⁿ'ē nanguuvi.

⁶⁵Tuu'mi ní chiiduú chʼɛɛtɛ cá miiⁿ chíin'cuúⁿ yā catecai yā ní caⁿ'a yā: Sáⁿ'a 'cūū ní ngaⁿ'ā sa contra yeⁿ'é Ndyuūs. 'De'ē ca diiⁿ yú testigos chí in'nuuⁿ yú? Cuin'dííchí nī. Maaⁿ ní ndís'tiī ní n'giindiveéⁿ nī táácā ngaⁿ'a sa contra yeⁿ'e Ndyuūs. ⁶⁶'De'ē nadacádíínuuⁿ ndís'tiī? 'Iiⁿ'yāⁿ s'eeⁿ ní nan'guɛɛcútaⁿ'a yā ní caⁿ'a yā: Véé nuuⁿndi yeⁿ'e sa chí canée chí 'cuūvī sa.

⁶⁷Tuu'mi ní ca'a nee daiⁿ yā naaⁿ Jesús miiⁿ ní ch'eⁿ'é yā Jesús. Ní n'gaadi yā nduutináaⁿ sa ndúúcū tiīnūⁿ. Ní tanáⁿ'a yā ch'eⁿ'é yā 'iiⁿ'yāⁿ ndúúcū ta'á yā. ⁶⁸'Iiⁿ'yāⁿ s'eeⁿ ní caⁿ'a yā: N'diī chí Cristo, cuuví nī nús'uu, 'du'ū chí ch'eⁿ'é n'diī?

Pedro miiⁿ ní ngaⁿ'a sa chí nguée n'diichi sa Jesús miiⁿ

(Mr. 14.66-72; Lc. 22.56-62; Jn. 18.15-18, 25-27)

⁶⁹Pedro miiⁿ ní vɛɛ sa na patio yeⁿ'e va'āi chʼɛɛtɛ chiiduú chʼɛɛtɛ cá ní ndaa nīⁿnuúⁿ 'áámá táⁿ'ā chí canée caadi 'iiyū. Ní táⁿ'ā miiⁿ ní caⁿ'ā tá chíi tá Pedro miiⁿ: Diī ntúūⁿ nī canee di ndúúcū Jesús yeⁿ'e yáⁿ'āa Galilea.

⁷⁰Naati Pedro miiⁿ ní chééⁿdiitu sa nanááⁿ 'iiⁿ'yāⁿ s'eeⁿ ní caⁿ'a sa: Nguɛɛ deenú chí ngaⁿ'ā di.

⁷¹Ní taachí ndaā Pedro miiⁿ cheendi va'āi yeⁿ'e patio miiⁿ, táámá táⁿ'ā chí canée caadi 'iiyu n'diichi ntuūⁿ tá saⁿ'ā miiⁿ ní caⁿ'a tá chíi tá 'iiⁿ'yāⁿ chí snée miiⁿ: 'Tiicá ntúūⁿ sáⁿ'a 'cūū ní canee sa ndúúcū Jesús yeⁿ'e yáāⁿ Nazaret.

⁷²Pedro miiⁿ ní cheeⁿdiitu ntúūⁿ sa, ndíí túnúⁿ 'caí sa, “por Ndyuūs”. Ní caⁿ'a sa: 'Úú ní nguée in'diichí sáⁿ'a 'cūū.

⁷³Cuayiivi 'tɛɛ 'tée ní 'iiⁿ'yāⁿ chí snée yā cuaaⁿ na nīⁿnuúⁿ miiⁿ ndaa yā nanááⁿ Pedro miiⁿ. Ní caⁿ'a yā chíi yā Pedro: Cuaacu níⁿnyúⁿ dii ntúūⁿ ní cachiica dí ndúúcū 'iiⁿ'yāⁿ s'eeⁿ ti tan'dúúcā chí ngaⁿ'a di ní n'g'iⁿ'i di yeⁿ'e di chí dii ní nguaaⁿ 'iiⁿ'yāⁿ s'eeⁿ.

⁷⁴Tuu'mi ní Pedro miiⁿ ní tucá'a sa caⁿ'a taaⁿ sa, ní 'caí sa, “por Ndyuūs”, ní caⁿ'a sa chíi sa 'iiⁿ'yāⁿ miiⁿ: Nguée in'diichí sáⁿ'a 'cūū. Tuu'mi nūuⁿ 'caí tusáⁿ'ā. ⁷⁵Tuu'mi nūuⁿ ní Pedro miiⁿ ní n'gaacū sa nduudu yeⁿ'é Jesús taachí caⁿ'a yā 'túúcā: Taachi 'āa cuée 'cuai tusáⁿ'ā, 'āa cheeⁿdiitū di 'iīnū cuuvi

chi nguée n'diichi di 'úú. Ní Pedro miiⁿ ní can'daa sa na lugar 'cūú ní cheecu taaví sa ti ya'ai staava yeⁿe sa.

Jesús nanááⁿ Pilato

(Mr. 15.1; Lc. 23.1-2; Jn. 18.28-32)

27 Taachí 'āā chideeve, nducyáácá chiiduú n'geete ndúúcū 'iiⁿyāⁿ ndiicūú chí ngaⁿa ntiⁿnyuⁿ yeⁿe yaācū nduuvidaamā yā chí ndeé yā taācā diⁿ yā ndúúcū Jesús miⁿ ní nca'a yā 'iiⁿyāⁿ chí 'cuūvi yā. ²Ní n'deéchiichí yā Jesús miⁿ ní candée yā ní nca'a yā Jesús miiⁿ Poncio Pilato, 'iiⁿyāⁿ gobernador.

Judas miⁿ ch'ii sa

³Tuu'mi ní Judas miⁿ, saⁿa chí nca'a Jesús miⁿ, taachí n'diichí sa chí Jesús miiⁿ chií yā condenado chi 'cuuví yā, ndaacadaamí sá yeⁿe nuuⁿndi chí diⁿ sa. Ní cheⁿe sa nanááⁿ chiiduú n'geeté ndúúcū 'iiⁿyāⁿ ndiicūú chí ngaⁿa ntiⁿnyuⁿ yeⁿe yaācū ní nca'a sa ndu'ū ndiicu ndííchí caadi 'diiⁿnguεε 'iiⁿyāⁿ s'eeⁿ. ⁴Ní caⁿa sa chii sa 'iiⁿyāⁿ s'eeⁿ: 'Úú ní diⁿ 'áámá nuuⁿndi. Ncá'á 'áámá 'iiⁿyāⁿ chí nguée nuuⁿndi yeⁿe yā. 'Iiⁿyāⁿ s'eeⁿ caⁿa yā: ¿Dé'ē ínneeⁿ nús'uū chiⁿ? Chuū chí maaⁿ di can'dífcu di.

⁵Tuu'mi ní Judas chingée sa tuūmī miiⁿ cheeti yaācū ní cunaⁿa sa. Ní dicuái yaacu sa maaⁿ sa. Ní Judas ní ch'ii sa.

⁶Chiiduú n'geeté n'guáaⁿ yā tuūmī ní caⁿa yā: Na ley miiⁿ ní ngaⁿā chí nguée 'cuī yú túmī 'cūú na caja yeⁿe ofrendas yeⁿe yaācū, ti túmī 'cūú ní túmī yeⁿe yuūúⁿ yeⁿe 'aama 'iiⁿyāⁿ.

⁷Ch'iinu chuū ní nduuvidaama yā chí cáí yā 'áámá tááⁿ yáⁿāa ndúúcū tuūmī chí cuuvi panteón cáávā 'iiⁿyāⁿ chí snúúⁿ yúúní. Miiⁿya yaⁿāa chí nguuvi Alfarero chí neⁿe caaⁿmaⁿ yáⁿāa yeⁿe chí 'iiⁿyāⁿ din'dái 'cuūtií cueēe. ⁸Chíⁿ chí yáⁿāa chí panteón cánée chí dúúchí ndíí mááⁿ, Yáⁿāa yeⁿe Yuūuⁿ.

⁹Tíicā ní cuunúū ca'a chí profeta Jeremías ca'a yā chuū ndii cuááⁿ vmnaaⁿ taachí dingúuⁿ yā na libro yeⁿe Ndyuūs 'tíicā: Ní sta'á yā ndu'u ndiicu ndííchí caadi 'diiⁿnguεε. Tuūmī miiⁿ ní saⁿā s'eeⁿ canée yiinu sa chí ca'a sa Judas cucáávā chí ch'iiⁿnūⁿ sa Cristo. ¹⁰Ní ca'a yā tuūmī miiⁿ yeⁿe yáⁿāa chí nguuvi Alfarero, tan'dúúcā Señor yeⁿe yú caⁿa yā chí yā 'úú.

Pilato intínguuneeⁿ yā Jesús

(Mr. 15.2-5; Lc. 23.3-5; Jn. 18.33-38)

¹¹Jesús chééndii yā nanááⁿ gobernador Pilato ní gobernador intínguuneeⁿ yā 'iiⁿyāⁿ ní caⁿa yā chí yā 'iiⁿyāⁿ: ¿Áá díí chí Rey yeⁿe 'iiⁿyāⁿ Israel chí judíos? Jesús caⁿa yā chí yā gobernador: N'dii ngaⁿa cuaacú ní ti 'tíicā.

¹²Chiiduú n'geeté ndúúcū 'iiⁿyāⁿ ndiicūú chí ngaⁿa ntiⁿnyúⁿ yā yeⁿe yaācū caⁿa yā chí véé nuuⁿndi yeⁿe Jesús naati Jesús miiⁿ ní nguée nan'guεεcútaⁿa yā mar 'áámá nduudu. ¹³Tuu'mi ní Pilato miiⁿ caⁿa yā chí yā Jesús: ¿Áá nguée n'giindiveeⁿ di tanducuéⁿe chí ngaⁿa yā yeⁿe di?

¹⁴Naati Jesús miiⁿ nguée nan'guεεcútaⁿa yā mar 'áámá nduudu. Tuu'mi ní gobernador miiⁿ cheⁿe yiinu taavi yā yeⁿe Jesús ní

nguée déenu yā táácā nadacádínuuⁿ
yā yeⁿē.

Jesús canée chí 'cuūvi yā

(Mr. 15.6-20; Lc. 23.13-25; Jn. 18.38-19.16)

¹⁵Maaⁿ ní nguúví 'viicu miiⁿ vée
'áámá costumbre chí gobernador
miiⁿ canée chí ín'dééchí yā 'áámá
saⁿā chí canúuⁿ sa vácū 'viicu
yeⁿe pascua 'aama saⁿā chí preso
sa chí 'iiⁿyā Israel neⁿe yā.

¹⁶Ní canúuⁿ 'aama saⁿā vácū chí
nguuví Barrabás. Nducyáácá 'iiⁿyāⁿ
ní déenu yā táácā idiiⁿ Barrabás
miiⁿ. ¹⁷Ní taachi 'iiⁿyā yeⁿe yāāⁿ
Jerusalén miiⁿ nduuvidaamá yā,
gobernador Pilato miiⁿ ní caⁿa yā
chii yā 'iiⁿyā s'eeⁿ: ¿Duⁿ neⁿe
nī chí 'úú n'déechí? ¿Áá neⁿe nī
Barrabás o Jesús chí nguuví Cristo
chí 'úú caⁿá libre 'iiⁿyāⁿ?

¹⁸Pilato miiⁿ ní deenu yā chí
cáávā vaadi ngueee 'iiⁿyā s'eeⁿ
nca'a yā Jesús chí preso yā.

¹⁹Taachí Pilato miiⁿ ní vee yā na
silla yeⁿe juez miiⁿ, n'daataá yeⁿe
yā ní dich'ó tá 'áámá 'iiⁿyā chí
caⁿa yā chii yā Pilato miiⁿ nduudú
'cū: Nguée deⁿ vee dííⁿ nī ndúúcū
saⁿā n'dái 'cū ti taachí cyaadú
néené n'deē ch'eenú chí taachí
ch'iínú cáávā sáⁿa 'tīi.

²⁰Naati chiiduú n'gēete ndúúcū
'iiⁿyā ndiicū chí ngaⁿa ntiiⁿnyúⁿ
yā yeⁿe yaācū néené n'deē caⁿa yā
chii yā 'iiⁿyā yeⁿe yāāⁿ Jerusalén
miiⁿ chí caaⁿmaⁿ yā chí Pilato miiⁿ
n'dééchii yā Barrabás miiⁿ ní 'cuūvi
Jesús miiⁿ. ²¹Gobernador miiⁿ caⁿa
yā chii yā 'iiⁿyā s'eeⁿ: ¿Naachí na
'uuví yā ní cheⁿ yā chí neⁿe nī chí
n'déechí? 'Iiⁿyā s'eeⁿ ní caⁿa yā:
Barrabás.

²²Pilato miiⁿ ní caⁿa yā chii yā
'iiⁿyā s'eeⁿ: ¿Deⁿ dííⁿ ndúúcū Jesús
chí nguuví yā Cristo? Nducyaa
yā nan'guēcútaⁿa yā ní 'cai yā:
Cu'néeⁿnga'á yā.

²³Gobernador miiⁿ caⁿa yā chii yā
'iiⁿyā s'eeⁿ: ¿Deⁿ nuuⁿndi yeⁿe yā
vee? Naati 'iiⁿyā s'eeⁿ ní n'gái yiicú
yā ní caⁿa yā: Cu'néeⁿnga'á yā.

²⁴Taachi Pilato miiⁿ n'diichí yā chí
nguée deⁿ vee chí dííⁿ yā ndúúcū
'iiⁿyā ti yuudu n'dái ca n'gai yā,
tuu'mi ní sta'á yā nuūⁿnīⁿ ní naaⁿnu
yā ta'a yā nanááⁿ nducyaaca 'iiⁿyāⁿ
yeⁿe yāāⁿ Jerusalén miiⁿ. Ní ngaⁿa
yā: Limpia canée 'úú yeⁿe asunto
'cū. 'Úú ní nguée nuuⁿndi yeⁿe chí
'cuūvi sáⁿa 'cū ti n'dai sa. Ndís'ti
deenu nī táácā dííⁿ nī ndúúcū sa.

²⁵Nducyaa 'iiⁿyāⁿ
nan'guēcútaⁿa yā ní caⁿa yā: Yuuúⁿ
yeⁿe sáⁿa 'cū 'āā cūnee dáámí rá
'nū ndúúcū daiya 'nū.

²⁶Tuu'mi ní Pilato miiⁿ ní
n'déechii yā Barrabás miiⁿ ní caⁿa
ntiiⁿnyuⁿ yā chí soldados ch'eⁿe
yā Jesús. Ch'iínú ch'eⁿe yā ní nca'a
Pilato miiⁿ Jesús miiⁿ 'iiⁿyā chí
cu'neeⁿnga'á yā 'iiⁿyāⁿ.

²⁷Tuu'mi ní soldados romanos
yeⁿe gobernador can'dée sa Jesús
na vaacuyāāⁿ yeⁿe gobernador ní
nducyáácá soldados nduuvidaama
sa nanááⁿ Jesús miiⁿ. ²⁸Ní diví sa
catecaí vmnaaⁿ Jesús ní s'nuuⁿ sa
tíínūⁿ morado cu'āā Jesús miiⁿ.
²⁹Ní s'nuuⁿ sa tiiⁿ Jesús 'áámá
corona chí ndeenyú ndúúcū yaaⁿ. Ní
sn'duuⁿ sa 'áámá taaⁿ ndúú ná ta'ā
cuaacú Jesús. Tuu'mi ní chiintiiⁿya
sa nanááⁿ Jesús miiⁿ ní ch'ííⁿnyuⁿneeⁿ
sa 'iiⁿyāⁿ. Ní caⁿa sa: Cūnduuchí nī
n'dií Rey yeⁿe 'iiⁿyā yeⁿe Israel.

³⁰Ní ca'a nee daiⁿ sa cuerpo yeⁿē Jesús ní sta'a sa 'áámá tááⁿ ndúú chí ndēē sa ní ch'eⁿ sa tiiⁿ Jesús. ³¹Ch'íínú ch'iiⁿnyuⁿneeⁿ sa Jesús miiⁿ ní ndivíi sa tíínúuⁿ yā chí morado cuá'āa ní ch'nuuⁿ sa catecai yā. Ní candēē sa Jesús chí cu'nééⁿnga'a sa 'iiⁿyāⁿ.

S'nééⁿnga'a yā Jesús miiⁿ ní ch'ii yā

(Mr. 15.21-32; Lc. 23.26-43; Jn. 19.17-27)

³²Taachí can'daa yā ní cueⁿe yā na yúúní naachi cu'nééⁿnga'a yā ndaaca yā 'áámá saⁿā yeⁿe yāāⁿ Cirene chí nguuví sa Simón. Ní a fuerza soldados di'cuiitu sa Simón 'cūū chí candēē sa cruz yeⁿe Jesús.

³³Ní taachi ndaá yā na táámá lado yeⁿe yāāⁿ Jerusalén lugar chí nguuví Gólgota chí neⁿe caaⁿmaⁿ, Lugar yeⁿē 'Iini Nga'ai Tíiⁿ, ³⁴saⁿā ca'a sa Jesús vinagre ndístaⁿa ndúúcu nuuⁿníⁿ yeⁿē yáatā yaāa cáávā chí nguē cueenu cá cuuvi Jesús chí chí'i Jesús miiⁿ. Taachí Jesús n'diichineeⁿ yā, nguéé 'cuuⁿ yā chí'i yā.

³⁵Taachí 'āā s'neeⁿnga'a sa Jesús, soldados ní tun'dáa sa suertes na catecai Jesús miiⁿ chí ca'a sa 'áámá sa nduúcu taama sa. Ní 'iicu cúúnúu ca'a tan'dúúca chí caⁿa profeta ndii cuááⁿ vmaaaⁿ ní canéé nguúⁿ na libro yeⁿē Ndyuūs 'túúca: Tun'daá yā suerte na catecai Jesús miiⁿ ní nca'a yā nguaaⁿ 'iiⁿyāⁿ s'eeⁿ. ³⁶Miiⁿ ch'eētēē soldados ní diiⁿ sa cuidado 'iiⁿyāⁿ chí s'nééⁿnga'a. ³⁷Ní 'áámá nduudu naaⁿ tíⁿ cruz miiⁿ chí canéé nguūⁿ 'túúca: Jesús miiⁿ chí Rey yeⁿe 'iiⁿyāⁿ yeⁿe ndaata Israel. Ní nduudu miiⁿ ngaⁿā d'e'e cáávā chí chí'i Jesús miiⁿ.

³⁸Tuu'mi ní miiⁿ ntúūⁿ s'neeⁿnga'a yā ndúúcu Jesús miiⁿ 'uūví chí duucu, 'áámá ní lado ta cuaacú yā, taama ní lado tá 'cuee yā. ³⁹'Iiⁿyāⁿ chí cho'ó yā naachi canee cruz miiⁿ ch'iiⁿnyuⁿneeⁿ yā Jesús miiⁿ. Ní idiⁿnúⁿu yā tííⁿ yā. ⁴⁰Ní caⁿa yā: N'dii chí ngaⁿā nī chí maáⁿ nī cuuvi nada'tuūví nī yaācú templo ní cheēti 'iinū nguuví nadan'dái nī, nadinguáⁿāi maáⁿ nī maaⁿ. Ndúúti chí Daiya Dendyuūs n'dii, nch'éeⁿ nī yeⁿē na cruz.

⁴¹'Tiicá ntúūⁿ chiiduú n'geete ndúúcu 'iiⁿyāⁿ fariseos chí dingúuⁿ yā ní ngi'cueeⁿ ley, ndúúcu 'iiⁿyāⁿ ndiicúú chí ngaⁿa ntiíⁿnyúⁿ yā yeⁿe yaācú templo ch'ííⁿnyuⁿneeⁿ yā Jesús miiⁿ ní ngaⁿa yā yeⁿe yā: ⁴²Tanáⁿā 'iiⁿyāⁿ ní nadinguáⁿai yā naati nguéé cuuvi maaⁿ yā nguáⁿai yā. Ndúúti chí 'iiⁿyāⁿ miiⁿ ní Rey yeⁿe 'iiⁿyāⁿ Israel maaⁿ ní nch'éeⁿ yā yeⁿe na cruz ní cu'téenu 'nū 'iiⁿyāⁿ miiⁿ. ⁴³Jesús miiⁿ ní i'téenu yā Ndyuūs. Maaⁿ ní Ndyuūs nadinguáⁿai yā 'iiⁿyāⁿ nduuti chí cuaacu chí 'cuaáⁿ yā 'iiⁿyāⁿ. 'Iiⁿyāⁿ ngaⁿā yā 'tíicá ti Jesús ngaⁿa yā: 'Úú ní daiya Dendyuūs 'úú.

⁴⁴'Tiicá ntúūⁿ ch'iiⁿnyuⁿneeⁿ chí duucu s'eeⁿ chí s'nééⁿnga'a sa dáámá ndúúcu Jesús.

Jesús ch'ii yā

(Mr. 15.33-41; Lc. 23.44-49; Jn. 19.28-30)

⁴⁵Ndíí maⁿa nguuví miiⁿ ndíí taanduú n'geecu 'iinu chiinū chíí maāiⁿ núúⁿmáⁿ iⁿyeeⁿdí. ⁴⁶Āā tááanduú n'geecu 'iinu, Jesús 'caí yiicú yā: Elí, Elí, ¿lama sabactani? Nduudu hebreo 'cūū ní neⁿē caaⁿmaⁿ Ndyuūs yeⁿē, Ndyuūs yeⁿē, ¿dēē cuuvi chí s'nééⁿ nī 'úú damaáⁿ?

⁴⁷N'duuví 'ii'nyāⁿ chí snée yā 'miiⁿ taachí ch'iindiveéⁿ yā chí ca'ⁿa Jesús miiⁿ ní ca'ⁿa yā: Sá'ⁿa 'cūū n'gai sa profeta Elías.

⁴⁸Hora miiⁿ nūuⁿ 'áamá chée 'ii'nyāⁿ s'eeⁿ chéⁿe yā ngeenu yā sta'a yā 'áamá esponja ní di'caāndá yā ndúúcū vinagre ní s'neeⁿ yā esponja miiⁿ na 'áamá táán ndúú ní ca'a yā chí chí'i Jesús miiⁿ. ⁴⁹Taná'a yā ní nga'ⁿa yā: 'Āā canee ra yā. N'diichi yú 'áá chíi Elías miiⁿ nadinguá'ⁿai yā 'ii'nyāⁿ?

⁵⁰Naati Jesús miiⁿ 'caī ntúuⁿ yā taama vmnéⁿēe ní maaⁿ yā nca'a yā espíritu yeⁿ'e yā na ta'a Ndyuūs ní chíi yā. ⁵¹Hora miiⁿ nūuⁿ chí chíi Jesús, cortina yeⁿ'e yaācū templo s'teeⁿ naavtá'ⁿa ndii cuaaⁿ 'nii'nuúⁿ ndíí cuááⁿ ndiiyā. Ní n'nu'u yá'āa ní tuūu ní índee. ⁵²Tuu'mi ní yáinyāⁿ s'eeⁿ ní nguaaⁿ ní nééné 'yaaⁿ cuerpos yeⁿ'e 'ii'nyāⁿ chí n'díí chí i'téenu yā Ndyuūs ndii cuááⁿ vmnaaⁿ nandáa yā chēeti yaínyāⁿ s'eeⁿ. ⁵³Ní 'ii'nyāⁿ s'uuⁿ chí 'āā ndii miiⁿ taachi 'āā nduuchi Jesús miiⁿ yeⁿ'ē nguaaⁿ tiná'ⁿa 'ii'nyāⁿ s'uuⁿ ní nandaa yā chēeti yaínyāⁿ s'eeⁿ ní cueⁿ'e yā cachiica yā na yāāⁿ Jerusalén chí Ndyuūs dēēve yā. Ní 'yaaⁿ n'dái 'ii'nyāⁿ chinaáⁿ yā 'ii'nyāⁿ chí 'āā n'dii.

⁵⁴Sa'a capitán ndúúcū soldados chí snée yā ndúúcu yā ní díiⁿ yā cuidado yeⁿ'e cuerpo yeⁿ'e Jesús taachi s'neeⁿ yā na cruz. Soldados miiⁿ, taachi n'diichí yā chí n'nu'ⁿu yá'āa ndúúcū dendu'ū chí chíi, neené di'vá'a yā ní ca'ⁿa yā: Cuaacu níi'nyúⁿ, sá'ⁿa 'cūū ní Daiya Dendyuūs sa'ⁿa.

⁵⁵'Yaaⁿ n'dái n'daataá snée ya'ⁿai yā ní ng'ínu yā tanducuéⁿē

chí chó'oo yeⁿ'e Jesús. N'daataá s'eeⁿ cachiica yā ndúúcū Jesús ndii na yá'āa yeⁿ'e Galilea ní dichí'íve yā Jesús miiⁿ. ⁵⁶Ní nguaaⁿ n'daataá s'eeⁿ, miiⁿ canée ta María Magdalena ndúúcū María chí chēecu Jacobo ndúúcū José. Ní canée ntúuⁿ tá chēecuú da'cáiyā yeⁿ'e sá'ⁿa Zebedeo.

Ch'iichí yā cuerpo yeⁿ'e Jesús chēeti yáinyāⁿ

(Mr. 15.42-47; Lc. 23.50-56; Jn. 19.38-42)

⁵⁷Taachí chíinu nguuví miiⁿ ndaá 'áamá sa'ⁿa chí nguuví José chí yeⁿ'ē yáāⁿ Arimatea. Sa'ⁿa miiⁿ ní 'cuiica sa ní discípulo yeⁿ'e Jesús. ⁵⁸Sá'ⁿa 'cūū ní cheⁿ'e sa nanááⁿ Pilato miiⁿ ní chiica sa cuerpo yeⁿ'e Jesús miiⁿ. Tuu'mi ní Pilato ca'ⁿa ntii'nyúⁿ yā chí ca'ⁿa capitán yeⁿ'e soldados chí ca'a yā cuerpo yeⁿ'e Jesús miiⁿ José miiⁿ. ⁵⁹Tuu'mi ní José sta'a sa cuerpo yeⁿ'e Jesús ní ch'ēēcū sa 'áamá sá'bana dēēve tan'dúúcā chí costumbre yeⁿ'e 'ii'nyāⁿ s'eeⁿ. ⁶⁰Ní s'nuūⁿ sa cuerpo yeⁿ'e Jesús na 'áamá yáinyāⁿ yeⁿ'e maaⁿ sa chí ngai chí maaⁿ sa níi'nuⁿ sa na 'aama yaava. Ch'íínú chíiichi sa cuerpo yeⁿ'e Jesús, s'neeⁿ sa 'áamá tuūu chí nééné ch'ēete naachí níndaa yā yeⁿ'e cheendi yaínyāⁿ miiⁿ. Ní cuná'ⁿa sa. ⁶¹Miiⁿ véé María Magdalena ndúúcū táamá María nii'nuúⁿ ná yaínyāⁿ.

Soldados ní idiiⁿ yā cuidado yáinyāⁿ miiⁿ

⁶²Chó'oo nguuví chí in'nuúⁿ yā yeⁿ'e 'viicu yeⁿ'e pascua ní chidēēve táamá nguuví chí sá'bado ní chiiduú n'gēetē ndúúcū 'ii'nyāⁿ fariseos ní

nduuvidaamá yā ní cheⁿe yā nanááⁿ Pilato miiⁿ. ⁶³Ní caⁿa yā chii yā Pilato: N'dií Pilato, n'gaacú 'nū chí saⁿā chí n'dií chí chinnche'ei sa taachí canee sa iⁿ'yeeⁿdí 'cūū ní caⁿa sa 'túúcā: 'Cuínū 'iinu nguuvi ní nduūchí nguaaⁿ tináⁿā. ⁶⁴Maaⁿ ní dichó'o nī soldados chí diiⁿ yā cuidado yáinyāⁿ miiⁿ ndíí 'cuiinu 'iínū nguuvi. ¿Áátii ndaá discípulos yeⁿe yā n'gaaⁿ ní diiⁿ iduucú yā cuerpo yeⁿe Jesús? Ní caaⁿmaⁿ yā cuuvi yā 'iiⁿyāⁿ chí sáⁿā miiⁿ ní nanduuchi sá yeⁿe nguaaⁿ tináⁿā. Ní cunnécā ca nduudu yaadi miiⁿ nguéé ti chí 'āā chó'ōo.

⁶⁵Pilato miiⁿ ní caⁿa yā chii yā 'iiⁿyāⁿ s'eeⁿ: 'Ingaā 'áámá taaⁿ soldados. Cueⁿe nī ní diiⁿ nī cuidado yáinyāⁿ miiⁿ tan'dúúcā chí déénu nī chí n'daācā.

⁶⁶Tuu'mi ní 'iiⁿyāⁿ s'eeⁿ ní cheⁿe yā yáinyāⁿ miiⁿ ní diíⁿ yā cuidado yáinyāⁿ miiⁿ. S'neeⁿ yā 'áámá sello na tuūu ch'etē ní s'neeⁿ yā soldados chí diiⁿ sa cuidado yáinyāⁿ miiⁿ.

Jesús nduuchi yā yeⁿe nguaaⁿ tináⁿā

(Mr. 16.1-8; Lc. 24.1-12; Jn. 20.1-10)

28 Chó'ōo nguuvi sábadó chí ntaavi'tuunúúⁿ yā ní chideeve táamá nguuvi chí domingo, nguuvi chí ngaⁿa yú chí nguuvi vmnááⁿ vmnaaⁿ yeⁿe ndetē, ní tá María Magdalena ndúúcū taama tá María cheⁿe ta n'diichí tá na yaínyāⁿ yeⁿe Jesús. ²Ní nééné díftūu nuⁿu yáⁿāa ti 'aama ángel yeⁿe Señor Ndyuūs chiiya yā yeⁿe va'ai chēeti nguuvi. Ní taachi ndaa yā, divíi yā tuūu ch'etē miiⁿ yeⁿe cheendi yaínyāⁿ ní ch'iindi yā vmnaaⁿ yeⁿe tuūú miiⁿ. ³Ángel miiⁿ tan'dúúcā chí

inááⁿ 'cuai 'tíicā máaⁿ yā chí deeve yā. Ní catecai yā ní cuéé tan'duucā yaāⁿ. ⁴Soldados chí idiíⁿ yā cuidado yáinyāⁿ miiⁿ in'dúúví yā chí 'va'a yā. Ní nduuví yā tan'dúúcā chí ch'ii yā. ⁵Naati ángel miiⁿ caⁿa yā chí yā n'daataá s'eeⁿ: Nguéé 'va'a ndís'tii; ti 'úú ní deenú ti in'nuúⁿ nī Jesús chí cā'neeⁿngaⁿā. ⁶Áā ntéé 'iiⁿyāⁿ miiⁿ ti nduuchi yā yeⁿe nguaaⁿ tináⁿā tan'dúúcā chí caⁿa yā. Cuchíi nī ní n'diichí nī naachí cānuuⁿ cuerpo yeⁿe Señor miiⁿ. ⁷Cuayiivi ní ngaⁿa ángel chí yā n'daataá s'eeⁿ: Cuinaⁿa núuⁿ nī maāⁿncheéⁿté ní caaⁿmaⁿ nī cuuvi nī discípulos yeⁿe yā chí nduuchi Jesús miiⁿ yeⁿe nguaaⁿ tináⁿā. Cuin'diichí nī. Jesús miiⁿ caⁿa yā vmnááⁿ ndís'tii na yáⁿāa Galilea. Mííⁿ snaaⁿ nī 'iiⁿyāⁿ. Chúú chí ngaⁿā ngíí ndís'tii.

⁸Tuu'mi ní n'daata s'ééⁿ nan'dáa yā chēeti yáinyāⁿ miiⁿ ní dií'yā yā chí ní duuvi yeenú yā. N'daata s'ééⁿ ní cueⁿe yā ngéenū yā ní caⁿa yā chí yā discípulos yeⁿe Jesús tan'dúúcā chí n'diichí yā. ⁹Tuu'mi ní taachi cueⁿe yā chí yaa'ví yā discípulos cuin'diichí nī, Jesús miiⁿ ndaá yā chí nndaacá yā n'daata s'eeⁿ ní caⁿa yā: Tavacho'onoó nī ndís'tii n'daata s'eeⁿ. Ní n'daata s'eeⁿ ní ndáá niiⁿnúⁿ yā Jesús miiⁿ ní túmaⁿa yā ca'a Jesús miiⁿ ní s'téenu yā 'iiⁿyāⁿ. ¹⁰Tuu'mi ní Jesús caⁿa yā chí yā n'daataá s'ééⁿ: Nguéé 'va'a nī. Cuéⁿe nī cuuví nī hermanos yeⁿe chí n'diichí nī 'úú. Ní hermanos caⁿa yā na yáⁿāa Galilea ní miiⁿ snaaⁿ yā 'úú.

Soldados ngaⁿa yā ngii yā chiiduú n'geete s'eeⁿ tan'dúúcā chí chíi

¹¹Nchó'ōo n'daata s'uuⁿ cunaⁿā yā ní nduuvi soldados chí dííⁿ yā

cuidado yeⁿe yáinyāⁿ cheⁿé yā na yáāⁿ Jerusalén ní caⁿ'a yā chii yā chiiduú n'geete yeⁿé tánducueⁿē chí chii. ¹²Chiiduú n'geete nadidaamá yā ndúúcū 'iiⁿ'yāⁿ ndífcū chi ngaⁿ'a ntiiⁿ'nyuⁿ yeⁿe yaācū. Ní nduuvidaamá yā ní nééné n'deēe túumí ca'a yā soldados. ¹³Ní caⁿ'a yā chii yā soldados: Ndís'tii ní 'túúcā caaⁿ'maⁿ nī: Taachi yaaⁿ stiyaadú 'nū discípulos yeⁿe Jesús ndaá yā ní diduucú yā cuerpo yeⁿe Jesús. ¹⁴Ní nduuti chi gobernador 'caandíveéⁿ yā chífⁿ chí ndís'tii caaⁿ'maⁿ nī, nús'uu yaaⁿ'vi neeⁿ 'nū 'iiⁿ'yāⁿ ní nguaⁿ'āi ndís'tii.

¹⁵Soldados ní sta'á yā tuūmí miiⁿ ní dífⁿ yā tan'dúúcā chi chiiduú n'geete caⁿ'á yā chii yā soldados. Chífⁿ chí ndii maaⁿ ní 'iiⁿ'yāⁿ yeⁿe ndaataá Israel ngaⁿ'á yā 'tífcā.

Jesús idichó'o yā discípulos yeⁿe yā
(Mr. 16.14-18; Lc. 24.36-49; Jn. 20.19-23)

¹⁶Ndu'ū ndiicháámá discípulos cueⁿé yā na yáⁿ'āa Galilea ní

ndaá yā ná yiicū naachí Jesús miiⁿ dichó'o yā 'iiⁿ'yāⁿ s'eeⁿ.

¹⁷Taachí discípulos n'diichí yā Jesús miiⁿ, s'téenu yā 'iiⁿ'yāⁿ 'áará chí ná'a yā ní 'uūvī vaanicádiinūuⁿ yeⁿe yā. ¹⁸Jesús ní ndaa niiⁿ'núⁿ yā ní yaaⁿ'vi yā discípulos ní caⁿ'a yā: Chiidá ní tee yā 'úú nducueⁿ'e poder chí caaⁿ'maⁿ ntiiⁿ'nyúⁿ na va'āi cheeti nguuví ndúúcū na iⁿ'yeeⁿ'dí 'cūū. ¹⁹Maaⁿ ní cueⁿ'e nī nī ca'cueéⁿ nī nuuⁿ'maⁿ naciones, ní cuuvi nī discípulos yeⁿé. 'Iiⁿ'yāⁿ chí i'téenu yā nduudu cuaacu yeⁿé, ndís'tii cuēdínūūⁿ nī nī 'iiⁿ'yāⁿ miiⁿ ndúúcū chi duuchi Ndyuūs Chiida yú, ndúúcū Daiya yā, ndúúcū Espíritu N'dai yeⁿé Ndyuūs. ²⁰Cá'cueeⁿ nī 'iiⁿ'yāⁿ s'eeⁿ chí dífⁿ yā tanducueⁿ'ē dendu'ū chí 'úú ngaⁿ'á ngíí ndís'tii. Ní cadífnūuⁿ nī chí 'úú ní canee ndúúcū ndís'tii nducueⁿ'ē tiempo ndíí ntuví iⁿ'yeeⁿ'dī. 'Tífcā cuuvi.

NDUUDU N'DÁÍ CHÍ DÍNGÚŪⁿ

APOSTÓL MARCOS

**Yeⁿe chi ngaⁿa Juan chi
ngeedínuūⁿniⁿ**

(Mt. 3.1-12; Lc. 3.1-9, 15-17; Jn. 1.19-28)

1 'Túúcā chí ngaⁿa nduudu ngai
yeⁿe Jesucristo chí Daiya
Dendyuūs.

²'Iiⁿyāⁿ profeta Isaías miiⁿ chí
ngaⁿa nduudu yeⁿé Ndyuūs ndíí
cuááⁿ vmnaaⁿ dingúúⁿ yā tan'dúúca
chí caⁿa Ndyuūs, 'tíicā:

'Úú dicho'ó 'aama 'iiⁿyāⁿ chí
caaⁿmáⁿ yā nduudu yeⁿé
nanááⁿ ndís'tií.

³'Iiⁿyāⁿ miiⁿ ní caⁿa yā ndúúdu
ngai na yáⁿāa cuūⁿmáⁿ naachi
nguée ch'etinéé 'iiⁿyāⁿ. Ní
caⁿa yā: Cuundiyaáⁿ nī yúúní
yeⁿe Señor Ndyuūs caati
cuchii yā. Nan'guáaⁿ nī yúúní
cuaacu caavá yā Didéevé nī
staava yeⁿé nī ní cuuvi 'cuaáⁿ
nī 'iiⁿyāⁿ miiⁿ taachi ndaa yā.

⁴'Tíicā Juan miiⁿ ní cheedínuūⁿniⁿ
sa 'iiⁿyāⁿ s'eeⁿ na yáⁿāa cuūⁿmáⁿ
naachi nguée ch'etinéé 'iiⁿyāⁿ.
Ní caⁿa cuáácú sá chí 'iiⁿyāⁿ
ndaacadáámí yā yeⁿé nuuⁿndi
yeⁿé yā ní cuēdínúūⁿniⁿ sa 'iiⁿyāⁿ
chí n'giindiveéⁿ yā nduudu yeⁿe
sa, naati Ndyuūs nadich'ecú yā

nuuⁿndi yeⁿé yā. ⁵Ní n'deee 'iiⁿyāⁿ
yeⁿe yáⁿāa Judea ndúúcū 'iiⁿyāⁿ
yeⁿe yáāⁿ Jerusalén can'dáa yā
chí 'caandiveéⁿ yā chí ngaⁿa Juan
miiⁿ. Ní taachi 'iiⁿyāⁿ s'eeⁿ caⁿa yā
nuuⁿndi yeⁿé yā nanááⁿ Ndyuūs
níicú Juan miiⁿ ní cheedínuūⁿniⁿ sa
'iiⁿyāⁿ miiⁿ na yíicú Jordán.

⁶Catecai Juan miiⁿ ní nín'dai
ndúúcū yuūdū yeⁿe 'iiti camello.
Ní cinturón yeⁿé sa ní dííⁿmáⁿ 'iiti.
Ní chí che'ē sa ní 'iiti langostas
ndúúcū n'di'í yeⁿé 'iiti 'yáaiⁿ chí
véé cuēti. ⁷Juan miiⁿ ngaⁿa sa
nduudu cuaacu yeⁿé Ndyuūs. Ní
caⁿa sa: Cuayiivi yeⁿe 'úú cuchii
'áámá 'iiⁿyāⁿ chí ch'etē taavi cá
poder yeⁿé yā nguée ti 'úú. 'Úú ní
nguée neené n'dai 'úú chí cuuví dííⁿ
n'daatií yííⁿmáⁿ yeⁿé ndaacuú yeⁿe
yā. ⁸'Úú ní ngeedínuūⁿniⁿ ndís'tií
ndúúcū nuūⁿniⁿ naati 'iiⁿyāⁿ miiⁿ ní
cuēdinuūⁿniⁿ yā ndúúcū Espiritu
N'dai yeⁿé Ndyuūs.

Juan miiⁿ cheedínuūⁿniⁿ sa Jesús

(Mt. 3.13-17; Lc. 3.21-22)

⁹Nguuvi s'eeⁿ Jesús miiⁿ chiicá yā
yeⁿe yáāⁿ Nazaret yeⁿe yáⁿāa Galilea
ní ndaa yā na yíicú Jordán. Ní Juan
miiⁿ ní cheedínuūⁿniⁿ sa Jesús miiⁿ na

yíicú Jordán. ¹⁰Taachi Jesús can'daa yā na nuū'nī' miī'n, cuin'diichí nī. N'diichí yā chí nanguaā'n nanguuvi ní Espíritu N'dai ye'n'é Ndyuūs ní cuch'ée'n vmnaa'n ye'n'é yā tan'dúucā 'áámá paloma 'tíicā. ¹¹Ch'iindivee'n Jesús 'áámá nduudu chí chiicā ye'n'é nánguuví chí ca'n'a: Díí Daiyá chí ne'n'e taaví ní yeenú taaví cáávā dii.

**Yáá'n'guiinūu' ne'n'e sa n'diichinee'n
sa Jesús**

(Mt. 4.1-11; Lc. 4.1-13)

¹²Cuayiivi miī'n ní Espíritu N'dai ye'n'é Ndyuūs candēē Jesús na 'áámá yá'āa cuū'má'n naachi nguée' ch'ēetiné'e 'ii'nyā'n. ¹³Jesús miī'n ní canée yā miī'n 'uuví ngeecu nguuví naachi véé 'iiti chí taa'n. Ní yáá'n'guiinūu' miī'n ní n'diichinee'n sa Jesús chí díí'n yā nuu'ndi naati nguée' dinuu'ndí yā. Níicú ángeles ndaá yā ní díí' yā cuidado Jesús miī'n.

**Jesús tuc'a yā ntii'nyu' ye'n'é yā na
yá'āa Galilea**

(Mt. 4.12-17; Lc. 4.14-15)

¹⁴Cuayiivi taachi s'nuú'n yā Juan chí cheedinuū'nī'n 'ii'nyā'n vácūū, Jesús miī'n ndāa yā na yá'āa Galilea, ní ca'n'a yā nduudu cuaacu chí ngai ye'n'e naachi Ndyuūs nga'n'a ntii'nyu' yā. ¹⁵Jesús miī'n ní ca'n'a yā: 'Āā snuū ca'a tiempo naachí nga'n'a ntii'nyu' Ndyuūs ní 'āā ndaá nī'nuú'n. Nandaacadaamí nī ye'n'é nuu'ndi ye'n'é nī ní cu'teenú nī nduudu cuaacu chí ngai chí ye'n'e Cristo.

**Jesús yaa'ví yā cuūú' sa'n'ā chí
itungáá'n 'yaācā**

(Mt. 4.18-22; Lc. 5.1-11)

¹⁶Jesús miī'n ní cachiicá yā cuaa'n 'diituú nuū'nī'nyā'n chí nguuví

Galilea, taachí n'diichí yā Simón ndúucū 'dínū sa Andrés. Sá'n'ā s'ee'n ní sa'n'ā chí itungaá'n 'yaācā, ní ngii sa yaānā ye'n'é sa cheeti nuū'nī'nyā'n ti sa'n'ā s'ee'n itungaá'n sa 'yaācā na nuū'nī'nyā'n. ¹⁷Ní Jesús nga'n'a yā ngii yā sa'n'ā s'ee'n: Cuchíi nī, ca'n'á nī nduūcú ní 'úú ní díí' chí in'nuú'n nī 'ii'nyā'n chí cuuvi ca'n'á yā nduucú. Ní tan'dúucā chí ndís'tii tungaá'n nī 'yaācā ye'n'e nuū'nī'nyā'n 'tíicā nga'n'a nī ndúucū 'ii'nyā'n chí ca'n'á yā nduūcú.

¹⁸Hora míí'n nūu' sa'n'a s'uu'n s'nee'n sa yaānā ye'n'é sa nī cue'n'e sa ndúucū Jesús.

¹⁹Tuu'mi Jesús miī'n ní cue'n'é yā 'tēe 'tēé ní ndaacá yā sa'n'a chí nguuví Jacobo ndúucū Juan chí 'diinū sa. Sa'n'ā s'ee'n ní daiya Zebedeo ní snee sa na 'aama barco ní n'diyaata sá yaānā ye'n'é sa.

²⁰Jesús 'caí yā sa'n'ā s'ee'n. Sa'n'ā s'ee'n ní nan'dāa sa na barco naachi snée sa ndúucū chiida sa n'diyaata sá yaānā ye'n'é sa. Ní s'nee'n sa chiida sa Zebedeo ndúucū mozos ye'n'e yā ní cue'n'e sa ndúucū Jesús.

**'Áámá sa'n'ā chí vee espíritu ye'n'e
yáá'n'guiinūu'**

(Lc. 4.31-37)

²¹Jesús miī'n ní ndaá yā na yáá'n Capernaum ndúucū sa'n'ā s'ee'n. Ní ca'áámá ca'áámá sábadó, nguuví chí ntaaví'tuunúú'n 'ii'nyā'n s'ee'n, Jesús cue'n'é yā na yaacū sinagoga ní chí'cuee'n yā 'ii'nyā'n. ²²Ii'nyā'n s'ee'n nge'n'e yiinu yā ye'n'e chí Jesús nga'n'a yā; tí ngí'cuee'n yā tan'dúucā 'ii'nyā'n chí nga'n'ā ntii'nyú'n yā, nguée' tan'dúucā 'áámá maestro ye'n'é ley. ²³Ní cheeti yaacū sinagoga míí'n

canée 'áámá saⁿā chi véé espíritu yeⁿe yááⁿn'guiinūuⁿ ndúúcu sa. Ní espíritu miiⁿ n'gai yeⁿe sā: ²⁴N'diī Jesús yeⁿe yááⁿ Nazaret, cu'néeⁿ nī nús'uu. ¿DÉ'ē canée yeⁿe 'ē nū nduucú nī? ¿Áá ndáa nī chi di'cuiinú nī nús'uu? 'Úú ní n'diichí du'ú n'diī. N'diī ní 'iiⁿyāⁿ chí n'dai chi daiya Dendyuūs n'diī.

²⁵Jesús miiⁿ ní yaa'vi néeⁿ yā espíritu yeⁿe yááⁿn'guiinūuⁿ, ní caⁿa yā: Dii espíritu n'gáádí dí cheendi di, níicú nan'dáa di yeⁿe saⁿá tīi.

²⁶Tuu'mi ní espíritu yeⁿe yááⁿn'guiinūuⁿ diiⁿ chí chitá'āa 'áámá ataque sáⁿa 'cūū. Ní 'cai yiicú espíritu miiⁿ, ní nan'daā espíritu miiⁿ ná cuerpo yeⁿe sáⁿa 'cūū. ²⁷Ní nducyáácá 'iiⁿyāⁿ cheⁿe yiinu yā yeⁿe chuū ní tiingūūneeⁿ yā nguaaⁿ maaⁿ yā ndúúcu vī'i: ¿DÉ'ē chuū? ¿DÉ'ē chí ngai chí ngi'cueeⁿ 'íiⁿyāⁿ 'cúū? 'Íiⁿyāⁿ 'cúū ní véé poder ca yeⁿe yā ní ngíi ngaⁿa ntiiⁿnyúⁿ yā yeⁿe espíritu yeⁿe yááⁿn'guiinūuⁿ ní n'giindivééⁿ espíritu yeⁿe yā.

²⁸Maāⁿnch'etē nūūⁿ nducyaaca 'iiⁿyāⁿ n'giindiveéⁿ yā yeⁿe chí diiⁿ Jesús miiⁿ, 'iiⁿyāⁿ yeⁿe núúⁿmáⁿ ná yāⁿāa yeⁿe yáⁿāa Galilea.

Jesús díiⁿ yā chi nduūvā yeⁿe indáⁿā
Simón Pedro

(Mt. 8.14-15; Lc. 4.38-39)

²⁹Taachí n'daā Jesús na yaacū sinagoga Jesús miiⁿ ní cueⁿe yā ndúúcu Jacobo, ndúúcu Juan ná vaacu Simón ndúúcu Andrés. ³⁰N'daataá chí indáⁿā Simón miiⁿ ní ngíita yā. Ndéē 'íiⁿnūuⁿ 'iiⁿyāⁿ miiⁿ ní candiití yā. Ní 'iiⁿyāⁿ na vaacu yā caⁿa yā chi yā Jesús

miiⁿ chí n'daataá miiⁿ ní ngíita yā.

³¹Tuu'mi ní Jesús miiⁿ ní ndaa yā nanááⁿ n'daataá míⁿ ní sta'á yā ta'ā tá ní nadicuéeⁿ yā táⁿā. Níicú chivii 'iiⁿnūuⁿ miiⁿ hora miiⁿ taachi nadicuéeⁿ yā n'daataa miiⁿ, ní tucáa tá díiⁿ tá mandados yeⁿe 'iiⁿyāⁿ s'eeⁿ chi che'e yā.

Jesús miiⁿ ní diiⁿ yā chi nééné 'yaaⁿ
'iiⁿyāⁿ nduūvā yeⁿe yā

(Mt. 8.16-17; Lc. 4.40-41)

³²Cuayiivi taachí 'āā chiya 'yáⁿā ní 'āā 'da'a miiⁿ, 'iiⁿyāⁿ s'eeⁿ ní ndaa yā nanááⁿ Jesús miiⁿ ndúúcu nducyaaca 'iiⁿyāⁿ chí ngíita yā ndúúcu 'iiⁿyāⁿ chí véé espíritu yeⁿe yááⁿn'guiinūuⁿ ndúúcu yā. ³³Ní nducyáácá 'iiⁿyāⁿ yeⁿe yááⁿ miiⁿ ní ndaa yā na cheendi va'āi naachi canée Jesús miiⁿ. ³⁴Ní Jesús miiⁿ ní díiⁿ yā chi nanduuva yeⁿe 'yaaⁿ n'dái 'iiⁿyāⁿ chí véé n'dee nááⁿ n'dai ca'ai yeⁿe yā. Ní divíi yā n'dee n'dái espíritu yeⁿe yááⁿn'guiinuuⁿ yeⁿe 'iiⁿyāⁿ s'eeⁿ. Nguéé 'cuúⁿ yā chí espíritu s'uuⁿ caāⁿmaⁿ, caati espíritu s'uuⁿ ní deenu du'ū chí Jesús miiⁿ.

Jesús ngaⁿa yā nduudu cuaacú yeⁿe
Dendyuūs na yáⁿā Galilea

(Lc. 4.42-44)

³⁵Táámá nguētiyaaⁿ 'da'ā ca, Jesús miiⁿ ní ncuéeⁿ yā ní can'dáa yā na yááⁿ Jerusalén miiⁿ ní cueⁿe yā 'áámá lado yeⁿe yááⁿ miiⁿ naachi nguéé 'iiⁿyāⁿ ní miiⁿ caaⁿmaⁿngua'á yā. ³⁶Simón miiⁿ ndúúcu tanáⁿā compañeros yeⁿe sa cheⁿe yā n'núúⁿ yā Jesús. ³⁷Taachí ndaaca yā Jesús miiⁿ, tuu'mi ní caⁿa yā chi yā Jesús: N'diī Jesús, nducyáácá 'iiⁿyāⁿ in'núúⁿ yā n'diī.

³⁸ Jesús miⁿ ní caⁿ'a yā chii yā 'iiⁿ'yāⁿ s'eeⁿ: Caⁿ'ā yú tanáⁿ'ā yāāⁿ chí snéé na niⁿ'nuúⁿ, ní 'tiicá ntúūⁿ caaⁿ'maⁿ yú nduudu cuaacu yeⁿ'é Ndyuūs miⁿ ti cáávā chuu chí cuchií.

³⁹ Jesús miⁿ ní cachiicá yā núúⁿ'máⁿ yāāⁿ cuaaⁿ na yáⁿ'āa Galilea. Ní ngaⁿ'a yā nduudu cuaacú yeⁿ'é Ndyuūs miⁿ na yáacū sinagogas yeⁿ'e yāāⁿ s'eeⁿ. Ní divíi yā espíritus yeⁿ'e yaaⁿ'n'giinūuⁿ yeⁿ'e 'iiⁿ'yāⁿ.

Jesús diíⁿ yā chí nduūvā yeⁿ'e 'áámá saⁿ'ā ndúúcu ca'ai lepra

(Mt. 8.1-4; Lc. 5.12-16)

⁴⁰ Áámá saⁿ'ā chí canéé ca'ai chí ín'duuti yuutē yeⁿ'ē sa ndaa sa nanááⁿ Jesús, ti neⁿ'e sa caaca sa 'áámá favor yeⁿ'é yā. Ní chíintii'ya sa ní caⁿ'a sa: N'dii Jesús, ndúúti chí n'dii neⁿ'e nī, diíⁿ nī chí nduūvā yeⁿ'é.

⁴¹ Jesús ní nduuví ya'āi 'íinu yā saⁿ'ā miⁿ, ní tuu'ví yā saⁿ'ā ndúúcu ta'a yā ní caⁿ'a yā: Táácā nguēē. 'Úú neⁿ'é. Dii saⁿ'ā, 'āā nduuvá yeⁿ'ē di.

⁴² Taachí caⁿ'a Jesús 'tuucā, chivii ca'ai chí ín'duuti yuute yeⁿ'ē sa ní nduūvā yeⁿ'ē sa, ní dēeve sa.

⁴³ Tuu'mi ní Jesús miⁿ ní yaa'vi yā saⁿ'ā miⁿ chí cunaⁿ'a sa na vaacu sa, naatí néé ca'á yā cuidado saⁿ'a miⁿ ní yaa'ví yā saⁿ'a miⁿ: ⁴⁴ Díí, cun'díichí dí, nguēé cuuvi di mar 'áámá 'iiⁿ'yāⁿ chí nanduūvā yeⁿ'e di. Cueⁿ'e di ní 'cuuⁿ'miⁿ di maaⁿ cuerpo yeⁿ'e di nanááⁿ chiiduú chí nduūvā yeⁿ'ē di. Ní ca'a di ofrenda tan'dúucā chí ngaⁿ'a ley yeⁿ'e Moisés miⁿ cáávā chí nduūvā yeⁿ'ē di ní cáávā chí dēeve cuerpo yeⁿ'ē di.

'Tíicā nducyáácá 'iiⁿ'yāⁿ snaaⁿ yā chí 'āā nduuvá yeⁿ'ē di.

⁴⁵ Tuu'mi ní saⁿ'ā miⁿ ní cunaⁿ'a sa ní caⁿ'a sa chíi sa n'dee n'dái 'iiⁿ'yāⁿ tan'dúucā chí chíi ndúúcu sa. Ní cáávā chí diiⁿ sa 'túucā, Jesús miⁿ ní 'āā ntéé cheⁿ'e nguūvi yā mar 'áámá yāāⁿ, ti 'iiⁿ'yāⁿ s'eeⁿ snaaⁿ yā 'iiⁿ'yāⁿ. Ní Jesús cueⁿ'é yā yeⁿ'e yāāⁿ miⁿ, ní cachiicá yā 'áámá lado yeⁿ'e yāāⁿ s'eeⁿ naachi nguēé ch'etinéé 'iiⁿ'yāⁿ; naati 'iiⁿ'yāⁿ yeⁿ'e nducuéⁿ'ē yāāⁿ ní n'dáa yā chí n'diichi yā Jesús miⁿ.

Jesús diiⁿ yā chí nduūvā yeⁿ'e 'áámá saⁿ'ā chí nguēé ngii inuⁿ'u sa

(Mt. 9.1-8; Lc. 5.17-26)

2 Cho'ōo nguuvi s'uuⁿ, Jesús miⁿ ní nguēcunéé yā nndaa yā na yāāⁿ Capernaum. Ní 'iiⁿ'yāⁿ ngaⁿ'a yā chí Jesús canéé yā na va'ai miⁿ. ² Maaⁿ'nch'etē nūuⁿ na va'ai naachi canéé Jesús miⁿ nduuvidaamá 'yaaⁿ n'dái 'iiⁿ'yāⁿ, ní 'āā ntéé tunéé cheendi va'āi miⁿ chí ch'etii nūūⁿ 'iiⁿ'yāⁿ s'eeⁿ. Ní Jesús miⁿ ngaⁿ'a yā nduudu yeⁿ'e Ndyuūs. ³ Tuu'mi ní ndaa na cuūuⁿ sáⁿ'ā ndēē yā 'áámá saⁿ'ā ndúúcu ca'ai chí ín'dúuví cuerpo yeⁿ'e sa. ⁴ Nguēé chíi sndaa yā naachi canéé Jesús miⁿ ti neenē n'dee 'iiⁿ'yāⁿ snúuⁿ yā. Cuchée yā cuaaⁿ tííⁿ va'ai ni nadvíi yā na n'duuví táátá tííⁿ va'āi miⁿ. Ch'íínú n'guaaⁿ yā miⁿ'ya dich'óo yā saⁿ'ā ndúúcu ca'āi chí ín'dúuví cuerpo yeⁿ'e sa na yíive yeⁿ'ē sa ní ndēē sa naachi cheendii Jesús miⁿ. ⁵ Taachi Jesús n'diichí yā chí 'iiⁿ'yāⁿ s'eeⁿ véé vaadi i'téenu nanáaⁿ yā, caⁿ'a yā chíi yā saⁿ'ā ndúúcu ca'āi chí ín'dúuví cuerpo yeⁿ'e sa: Díí, daiyá, núúⁿ'ndí yeⁿ'ē di 'úú ní nch'ēcú.

⁶N'duuví maestros yeⁿe ley miiⁿ chí vɛɛtɛ yā miiⁿ, nadacádíínuuⁿ yā 'tíicā na staava yeⁿé ya. ⁷¿Dɛ'ɛ cúuví chí 'tíicā ngaⁿa sán'a 'tíi? Ngaⁿa sa yeⁿe dendu'ū chi nguɛé n'daācā chi contra yeⁿe Ndyuūs, ti mar 'áámá 'iiⁿ'yāⁿ nguɛé cuuví dííⁿ yā nadach'ɛɛcú yā nuūⁿndi yeⁿe 'iiⁿ'yāⁿ, ti dámaaⁿ Ndyuūs. ⁸Jesús miiⁿ ní deenu yā dɛ'ɛ chi nadacádíínuuⁿ saⁿ'ā s'eeⁿ, ní caⁿ'a yā chii yā 'iiⁿ'yāⁿ: ¿Dɛ'ɛ cúuví chí 'tíicā nadacádíínuuⁿ ndís'tíi na staava yeⁿé ní? ⁹¿Áá nguɛé ngiⁿ'ii ca chi caaⁿ'máⁿ cuuvi saⁿ'a ndúúcū ca'āi chi in'dúuví cuerpo yeⁿe sa: Nuūⁿndi yeⁿé di ní 'āā nchɛɛcú yeⁿé di, o 'úú caaⁿ'máⁿ: Ndúcuééⁿ di, ní nadícuééⁿ di yiive yeⁿé di ní caaca di? ¹⁰Ní caāwā chi ndís'tíi inaáⁿ nī chuū, níicú cadiinuūⁿ nī chi Saⁿ'ā chi Daiya Dendyuūs ní vée poder yeⁿé yā na iⁿ'yeeⁿdí 'cūū chi nadach'ɛɛcú ya nuūⁿndi. Tuu'mi ní caⁿ'a yā chii yā saⁿ'ā ndúúcū ca'āi chi in'dúuví cuerpo yeⁿe sa: ¹¹Díí saⁿ'ā, nducuééⁿ di, ní nadacuéeⁿ di yiive yeⁿe di ní cunaⁿ'a di na vaacu di.

¹²Saⁿ'a chi ngiitā miiⁿ nducueeⁿ sa, ní nadacuéeⁿ sa yiive yeⁿe sa, ní nan'daa sa miiⁿ. Ní nducyaaca 'iiⁿ'yāⁿ n'diichí yā chuū ní cheⁿe yiinú yā ní dich'ɛɛtɛ yā Ndyuūs. Ní ngaⁿ'a yā: Mar 'áámá vmnéⁿ'ɛɛ nguɛé n'diichi yú dendu'ū chi 'tuucā.

**Jesús yaa'ví yā 'áámá saⁿ'ā chi
nguuvi Leví**

(Mt. 9.9-13; Lc. 5.27-32)

¹³Guayiivi Jesús miiⁿ cheⁿe yā cuaaⁿ 'díftuú nuūⁿnī'yáⁿ'ā. Ní taachi nducyaaca 'iiⁿ'yāⁿ ndaá yā nanáaⁿ yā, ní Jesús miiⁿ ní chí'cuééⁿ yā

'iiⁿ'yāⁿ s'eeⁿ. ¹⁴Ní taachi cachiicá Jesús miiⁿ, n'diichí yā 'áámá saⁿ'ā chi nguuví Leví, chí daiya Alfeo. Vée sá naachi vée 'iiⁿ'yāⁿ chí inn'guɛɛ yeⁿe impuestos. Ní Jesús caⁿ'a yā chii yā saⁿ'ā miiⁿ: Díí saⁿ'ā, cuchíi di caⁿ'ā di nduucú. Tuu'mi ní Leví miiⁿ nducueeⁿ sa ní cueⁿ'e sa ndúúcū Jesús miiⁿ.

¹⁵Tuu'mi ní Leví miiⁿ diiⁿ sa invitar Jesús miiⁿ chí caⁿ'á yā na vaacu sa ní cheⁿe yā ndúúcū sa. Neené 'yaaⁿ 'iiⁿ'yāⁿ chí inn'guɛɛ yeⁿe impuestos ndúúcū 'iiⁿ'yāⁿ chí vée nuūⁿndi yeⁿe yā ndaā ntúuⁿ yā. Ní 'yaaⁿ n'dái yā ch'ɛɛtɛ yā na mesa daama ndúúcū Jesús ndúúcū discípulos yeⁿe yā ti neené 'yaaⁿ 'iiⁿ'yāⁿ chí cueⁿ'e yā ndúúcū yā. ¹⁶Ní taachi maestros yeⁿe ley ndúúcū 'iiⁿ'yāⁿ fariseos n'diichí yā chí Jesús ní nge'e yā ndúúcū nducyaaca 'iiⁿ'yāⁿ s'eeⁿ, tuu'mi ní caⁿ'a yā chii yā discípulos yeⁿe Jesús: ¿Dɛ'ɛ cúuví chí maestro yeⁿé ní vée yā nge'e yā ní ngi'i yā ndúúcū 'iiⁿ'yāⁿ chí inn'guɛɛ yeⁿe impuestos ndúúcū 'iiⁿ'yāⁿ nuūⁿndi?

¹⁷Taachí Jesús chíiindiveéⁿ yā chuū, tuu'mi ní caⁿ'a yā chii yā 'iiⁿ'yāⁿ s'eeⁿ: 'Iiⁿ'yāⁿ chí nguɛé ngííta yā nguɛé neⁿe yā 'aama médico. Dámaaⁿ 'iiⁿ'yāⁿ chí ngiitā neⁿe yā chí cuuvi yíicú yā. 'Úú ní nguɛé cuchíi chí yaa'ví 'iiⁿ'yāⁿ chí nadacadiinúⁿ yā chí ch'ɛɛte maaⁿ yā chí nguɛé dinuuⁿndí yā caati chí yaa'ví 'iiⁿ'yāⁿ chí vée nuūⁿndi yeⁿe yā.

**'Iiⁿ'yāⁿ nítiinguuneeⁿ yā Jesús miiⁿ
yeⁿe chí nguɛɛ ca'diinú yā**

(Mt. 9.14-17; Lc. 5.33-39)

¹⁸'Áámá tiempo taachi discípulos yeⁿe Juan miiⁿ ndúúcū fariseos

ca'diinúⁿ yā, náⁿā 'iiⁿ'yāⁿ ndaa yā nanááⁿ Jesús miiⁿ ní ntinguunéeⁿ yā Jesús: ¿De'ē cuuvi chí ca'diinúⁿ discípulos yeⁿe Juan miiⁿ ndúúcū 'iiⁿ'yāⁿ fariseos miiⁿ naati discípulos yeⁿe ní nguéeⁿ ca'diinúⁿ yā?

¹⁹Jesús nan'guεεcútaⁿ a yā 'iiⁿ'yāⁿ s'eeⁿ: ¿Áá ca'diinúⁿ 'iiⁿ'yāⁿ chí ndíí yā invitado naachí n'giindivaacu 'iiⁿ'yāⁿ 'naaⁿ chí sáⁿā chí n'giindivaacu sa canéeⁿ sá ndúúcu yā? Ndúúti chí canéeⁿ saⁿā chí n'giindivaacu sa miiⁿ, nguéeⁿ cuuví ca'diinúⁿ yā. ²⁰Naati cuchii tiempo taachí ch'ii saⁿā chí n'giindivaacu sa tuuⁿmi ní cuuvi ca'diinúⁿ yā.

²¹Mar 'áámá 'iiⁿ'yāⁿ nguéeⁿ cuta'á yā 'áámá tááⁿ tiinūⁿ ngai chí 'āā nguéeⁿ naaⁿnu yā chí 'iindi'yaatá yā yeⁿe na catecai ndiicúú yeⁿe yā. Ndúúti chí dííⁿ yā 'tífcā, maáⁿ tiinūⁿ ngai miiⁿ ní cáancuūⁿ cú'teeⁿ tiinūⁿ ndiicúú miiⁿ. Nífcú cuuví ch'εεte ca naachí ndíí n'teeⁿ. ²²Tiicā ntuūⁿ mar 'áámá 'iiⁿ'yāⁿ nguéeⁿ caaⁿn'yúⁿ yā vino ngai na bolsa yííⁿmáⁿ ndiicúú yeⁿe vino tan'dúúcā chí diiⁿ 'iiⁿ'yāⁿ ndiicúú. Nduuti chí dííⁿ yā 'tífcā vino ngai miiⁿ ní dí'cuūnⁿ yííⁿmáⁿ ndiicúú miiⁿ ní cuuvi ndai vino miiⁿ ndúúcū yííⁿmáⁿ. Chífⁿ chí vino miiⁿ canéeⁿ chí 'cueēⁿ na bolsa yííⁿmáⁿ ngai.

Discípulos yeⁿe Jesús miiⁿ ní tiicú yā trigo nguuví sábadó chí ntaavi'tuunúúⁿ 'iiⁿ'yāⁿ Israel

(Mt. 12.1-8; Lc. 6.1-5)

²³Áámá nguuví chí sábadó chí ntaavi'tuunúúⁿ 'iiⁿ'yāⁿ Israel Jesús miiⁿ ndúúcū discípulos yeⁿe yā cho'ó yā 'áámá campo naachi véé trigo ní discípulos yeⁿe yā ní

tucá'a yā tiicú yā yááⁿ miiⁿ yeⁿe trigo taachi cho'ó yā. ²⁴Tuuⁿmi ní 'iiⁿ'yāⁿ fariseos ní caⁿ'a yā chí yā Jesús miiⁿ: N'díí cuin'dífcíⁿ ní, ¿dé'ē cúúví chí dííⁿ discípulos yeⁿe ní chí nguεε canéeⁿ chí diiⁿ yú nguuví chí ntaavi'tuunúúⁿ 'iiⁿ'yāⁿ?

²⁵Naati Jesús miiⁿ ní caⁿ'a yā chí yā saⁿā fariseos: ¿Áá nguéeⁿ n'geēⁿ ndís'tií chí diiⁿ David miiⁿ ndúúcū 'iiⁿ'yāⁿ chí cachiica ndúúcu yā taachi cuiicu yā? ²⁶David miiⁿ ní sndáa yā ná yáacū yeⁿe Ndyuūs taachi saⁿā chí nguuví Abiatar ngaⁿ'a ntiíⁿnyuⁿ sa yeⁿe chíiduú ch'εεte ca. Ní David che'é yā panes yeⁿe nátaí yeⁿe Ndyuūs chí dámaāⁿ chíiduú s'eeⁿ cuuvi che'é yā. Ní David miiⁿ ca'a yā pan miiⁿ 'iiⁿ'yāⁿ chí snéeⁿ ndúúcu yā. Ní che'e yā.

²⁷Jesús miiⁿ ní caⁿ'a yā chí yā 'iiⁿ'yāⁿ: Nguuví chí ntaavi'tuunúúⁿ yā canéeⁿ chí cuuví yeⁿe saⁿā yeⁿe iⁿ'yeeⁿdí 'cūū naati nguéeⁿ saⁿā chí cuuvi yeⁿe nguuví chí ntaavi'tuunúúⁿ saⁿā. ²⁸Cáávā chuū chííⁿ chí Saⁿā chí Daiyá Dendyuūs cuuví caaⁿ'maⁿ ntiíⁿnyúⁿ ntúúⁿ sa yeⁿe nguuví chí ntaavi'tuunúúⁿ 'iiⁿ'yāⁿ.

Saⁿā chí ntí'í ta'a sa

(Mt. 12.9-14; Lc. 6.6-11)

3 Jesús miiⁿ ní chindáá ntúúⁿ yā na yáacū sinagoga. Ní miiⁿ canee 'áámá saⁿā ndúúcū ta'á sa chí ntí'í. ²Iiⁿ'yāⁿ fariseos ní neⁿe yā n'diichi yā nduuti chí Jesús miiⁿ chí ndúúvā yeⁿe saⁿā miiⁿ caati nguuví sábadó chí ntaavi'tuunúúⁿ 'iiⁿ'yāⁿ. Ní fariseos cuuví caaⁿ'máⁿ yā nuuⁿndi yeⁿe Jesús. ³Tuuⁿmi ní Jesús miiⁿ ngaⁿ'a yā ngii yā saⁿā

chí ntí'i ta'ā sa miiⁿ: Nducuéⁿ dí ní cueendii di naavtaⁿ'a yeⁿ'e 'iiⁿ'yāⁿ.

⁴Jesús miiⁿ ní ntinguuneeⁿ yā saⁿ'ā s'eeⁿ ní caⁿ'a yā: ¿D'éē diiⁿ yú nguuví chí ntaaviⁿ'tuunūuⁿ yú? ¿Áá cuuvi chí diiⁿ yú cosas chí n'daācā o cosas chí nguéé n'daācā? ¿Áá n'daācā chí nguaⁿ'āi yú vida yeⁿ'e 'iiⁿ'yāⁿ o chí 'caaⁿ'nūⁿ yú 'iiⁿ'yāⁿ? 'Iiⁿ'yāⁿ s'eeⁿ ní ch'etinéé 'diiⁿ yā. ⁵Tuuⁿ'mi ní Jesús miiⁿ ní n'diichi yuudú yā saⁿ'ā s'eeⁿ ní s'neeⁿ ndaachi yiinú yā ti nguéé neⁿ'e cu'téenu sá yeⁿ'e yā. Ní Jesús caⁿ'a yā chíi yā saⁿ'ā miiⁿ: N'doó di ta'a di. Ní saⁿ'ā miiⁿ n'doó sa ta'ā sa, ní ta'ā sa ní nduūvā n'daācā tan'dúúcā taama. ⁶Tuuⁿ'mi ní can'dāā 'iiⁿ'yāⁿ fariseos ní ndeé yā ndúúcū 'iiⁿ'yāⁿ yeⁿ'e Herodes ní 'íicú n'diichí yā táácā diiⁿ yā ní 'íicú cuuvi 'caaⁿ'núⁿ yā Jesús miiⁿ.

**Nééné 'yaaⁿ 'iiⁿ'yāⁿ snée yā
na 'diituú nuūⁿnīⁿ'yāⁿ'ā**

⁷Jesús miiⁿ ndúúcū discípuos yeⁿ'e yā cueⁿ'é yā cuaaⁿ na 'dítuú nuūⁿnīⁿ'yāⁿ'ā. Nééné 'yaaⁿ 'iiⁿ'yāⁿ yeⁿ'e yáⁿ'āa Galilea ndúúcū yáⁿ'āa Judea cheⁿ'e yā can'dāā yā Jesús miiⁿ. ⁸Taachi 'iiⁿ'yāⁿ yeⁿ'e yáⁿ'āa Galilea chicadíinuⁿ yā yeⁿ'é dendu'ū chí n'gæte n'dai chí Jesús diiⁿ yā, nééné 'yaaⁿ 'iiⁿ'yāⁿ ndaa yā n'diichi yā Jesús miiⁿ. 'Iiⁿ'yāⁿ s'eeⁿ ní 'iiⁿ'yāⁿ yeⁿ'e yáⁿ'āa Judea, ndúúcū 'iiⁿ'yāⁿ yeⁿ'e yááⁿ Jerusalén, ndúúcū 'iiⁿ'yāⁿ yeⁿ'e yáⁿ'āa Idumea, ndúúcū 'iiⁿ'yāⁿ yeⁿ'e táámá 'diituú yíicú Jordán, ndúúcū 'iiⁿ'yāⁿ yeⁿ'e yáⁿ'āa Tiro ndúúcū yáⁿ'āa Sidón. ⁹Cáāvā chí ndaa n'deee n'dái 'iiⁿ'yāⁿ, Jesús caⁿ'a yā chíi yā discípuos

yeⁿ'e yā chí cu'nee yaáⁿ yā 'áámá barco yeⁿ'e yā, níicú cuuví cuchée yā barco miiⁿ chí 'yaaⁿ n'dái 'iiⁿ'yāⁿ nguéé 'cueti núūⁿ chíichi yā yeⁿ'e Jesús miiⁿ. ¹⁰Ní Jesús diiⁿ yā chí 'yaaⁿ n'dái 'iiⁿ'yāⁿ nduūvā yeⁿ'e yā. Ní nducyáácá 'iiⁿ'yāⁿ chí ngiitā neⁿ'é yā tuuⁿ'ví yā Jesús. ¹¹Ní 'iiⁿ'yāⁿ chí canee yā ndúúcū espíritu yeⁿ'e yááⁿ'n'guinūuⁿ, espíritu miiⁿ diiⁿ chí 'iiⁿ'yāⁿ s'uuⁿ ndaa yā nanááⁿ Jesús ní espíritu ní 'cai yeⁿ'e 'iiⁿ'yāⁿ: Díí ní Saⁿ'a chí Daiya Dendyuūs.

¹²Jesús caⁿ'a yuudu yā espíritu s'uuⁿ 'túúcā: Nguéé caaⁿ'maⁿ dí du'u 'iiⁿ'yāⁿ 'úú.

**Jesús ndeēve yā ndu'u ndiichúúví
discípuos**

(Mt. 10.1-4; Lc. 6.12-16)

¹³Quayivi miiⁿ ní Jesús cuchée yā na 'áámá yiicū, naachí yaaⁿ'ví yā 'iiⁿ'yāⁿ chí neⁿ'e yā, ní 'iiⁿ'yāⁿ s'eeⁿ ndaa yā nanááⁿ Jesús miiⁿ. ¹⁴Ní nduuvidaamá ndu'ū ndiichúúví discípuos chí canee yā ndúúcū yā. Ní dicho'ó yā 'iiⁿ'yāⁿ s'eeⁿ chí caaⁿ'máⁿ yā nduudú yeⁿ'e Ndyuūs chí nduudu cuaacu yeⁿ'e yā. ¹⁵Ní Jesús ca'a yā poder discípuos yeⁿ'e yā chí cuuvi diiⁿ yā chí nduūvā yeⁿ'e 'iiⁿ'yāⁿ ní chí divíi yā espíritus yeⁿ'e yááⁿ'n'guinūuⁿ yeⁿ'e 'iiⁿ'yāⁿ. ¹⁶'Iiⁿ'yāⁿ s'eeⁿ ní ndiichúúví discípuos: Simón, chí duuchi ntúuⁿ sa Pedro, ¹⁷ndúúcū Jacobo ndúúcū Juan 'diinū sa ní 'uūví sáⁿ'a s'eeⁿ chí daiya Zebedeo, ní saⁿ'ā s'eeⁿ ní Jesús s'neeⁿ yā nguuvi sa Boanerges chí neⁿ'e caaⁿ'maⁿ Daiya Dēevé; ¹⁸tanáⁿ'a yā ní nguuvi Andrés, ndúúcū Felipe, ndúúcū Bartolomé, ndúúcū Mateo, ndúúcū

Tomas, ndúúcū Jacobo chi daiya Alfeo, ndúúcū Tadeo, ndúúcū táámá Simón chi yeⁿe 'iiⁿyāⁿ yeⁿe yāⁿāa Canaan, ¹⁹ndúúcū Judas Iscariote, saⁿā chi cuayiivi míⁿ ch'iⁿi sá du'u chi Jesús miiⁿ chi cuuvi 'caaⁿnúⁿ yā 'yā. Ní Jesús ndúúcū ndiichuuví discípulos yeⁿe yā cueⁿe yā ní sndaa yā na 'áámá va'āi.

Ngaⁿa yā chi Jesús canée yā ndúúcū poder yeⁿe yááⁿ'nguiinūⁿ

(Mt. 12.22-32; Lc. 11.14-23; 12.10)

²⁰Cuayiivi ní Jesús cueⁿe yā na vaacu yā. Táámá vmnéⁿēe néené n'deēe 'iiⁿyāⁿ ndaa yā nanááⁿ Jesús miiⁿ chi nguée vée yaāⁿ chí che'e yā pan. ²¹Taachí 'iiⁿyāⁿ yeⁿe familia yeⁿe Jesús chicadíinuⁿ yā yeⁿe Jesús, yeⁿe chi 'iiⁿyāⁿ ngaⁿa yā chi Jesús ní nduuví loco yā, ndaa yā chi nandée yā Jesús.

²²Tiicá ntúūⁿ maestros chí ng'i'cueⁿ ley chí chiicá yā yeⁿe na yāāⁿ Jerusalén ní caⁿa yā: Sáⁿa 'cūū canée sá ndúúcū espíritu chi nguuví Beelzebú chi Satanás chí ngaⁿa ntiiⁿnyuⁿ sa yeⁿe espíritus yeⁿe yááⁿ'nguiinūⁿ, ní cáávā poder yeⁿe espíritu miiⁿ chí tun'daá yā espíritus yeⁿe yááⁿ'nguiinūⁿ yeⁿe 'iiⁿyāⁿ.

²³Tuu'mi ní Jesús miiⁿ ní yaa'vi yā 'iiⁿyāⁿ s'eeⁿ ní s'neeⁿ yā 'áámá ejemplo. Ni caⁿa yā: ¿Táácā cuuví diiⁿ yááⁿ'nguiinūⁿ diví sa yááⁿ'nguiinūⁿ? ²⁴Ndúúti chi 'áámá gobernador chi ngaⁿa ntiiⁿnyúⁿ yā yeⁿe yāāⁿ naachi vée uūvī partido chi nguⁿu ná 'aamá yā ndúúcū yeⁿe taama yā 'iiⁿntyéⁿē miiⁿ nguée cuuvi 'nááⁿ yā chí 'iiⁿntyéⁿe yā.

²⁵Ndúúti chi n'deēe nadacadíinuⁿ

yā na 'áámá familia chi vée partido yeⁿē, familia miiⁿ ní nguée cuuvi nduuvíáámá yā. ²⁶Tiicá ntúūⁿ, ndúúti chi yááⁿ'nguiinūⁿ diiⁿ sa contra yeⁿe maaⁿ sa, nguée cuuví cūnee sa ti chūū diiⁿ chí 'cuiinu sa.

²⁷Mar 'áámá 'iiⁿyāⁿ nguée cuuvi cundaa yā na vaacu 'áámá saⁿā chí vée fuerzas yeⁿē sa ní diví yā dendu'u yeⁿē sa. Canée chí caāchiichí yā saⁿā vmnááⁿ vmnaaⁿ. Cuayiivi ní cuuvi diiⁿ yā diví yā dendu'ū chi snúūⁿ va'ai yeⁿē sa.

²⁸Nduudu cuaacu 'úú ngaⁿá ngí ndís'tií. Tanducuéⁿe nuuⁿndi chí diiⁿ 'iiⁿyāⁿ yeⁿe iⁿ'yeeⁿdí 'cūū ndúúcū nduudu taaⁿ chí 'iiⁿyāⁿ s'eeⁿ ngaⁿa yā contra yeⁿe Ndyuūs, Ndyuūs nadich'ēecū yā nuuⁿndi yeⁿē yā.

²⁹Naati 'iiⁿyāⁿ chi ngaⁿa yā nduudu taaⁿ chí nguēe n'dáacā yeⁿe Espíritu N'dai yeⁿē Ndyuūs, ní nguée nch'ēecū yeⁿē yā maaⁿ ní tiempo chí cuchíi.

³⁰Tiicá Jesús ngaⁿa yā ti náⁿā 'iiⁿyāⁿ ngaⁿa yā chí Jesús míⁿ ní vée espíritu yeⁿe yááⁿ'nguiinūⁿ nduucú yā.

Chēecú Jesús ndúúcū 'díinu yā

(Mt. 12.46-50; Lc. 8.19-21)

³¹Cuayiivi ní ndaā chēecú Jesús miiⁿ ndúúcū díinu yā, ní ch'ēetinée yā cuaaⁿ chuva'āi. Ní dichó'o yā 'áámá saⁿā chí yaa'vi sa Jesús chí cuchíi yā nanááⁿ yā. ³²Yááⁿ 'iiⁿyāⁿ ní veeⁿté yā cuaaⁿ 'diituú Jesús miiⁿ ní caⁿa yā: Chēecú ní ndúúcū 'diinú ní in'nuúⁿ yā n'dií cuaaⁿ chuva'āi.

³³Jesús miiⁿ ní caⁿa yā chíi yā saⁿā miiⁿ: ¿Dú'ū chí chēecú miiⁿ? o ¿dú'ū chí 'diinú miiⁿ?

³⁴Tuu'mi ní Jesús n'gíinu yā 'iiⁿyāⁿ chí veeⁿté yā cuaaⁿ 'diitúú yā

ní nga^a yā ngii yā 'iⁿ'yāⁿ s'eeⁿ:
N'diichí nī. 'Iⁿ'yāⁿ chí snée yā
nduucú miiⁿ, 'iⁿ'yāⁿ s'eeⁿ tan'dúúcā
chí chεεcú ndúúcú 'diinú. ³⁵Ní 'āā
du'ú nūⁿ chí diiⁿ chíⁿ chí Ndyuūs
neⁿe yā chí díⁿ yā, 'iⁿ'yāⁿ s'eeⁿ chíⁿ
vī'í, 'iⁿ'yāⁿ s'eeⁿ chíⁿ 'diinú, ndúúcú
chεεcú.

**'Aama ejemplo yeⁿe 'aama saⁿā chí
ngiinū sá ndaata**

(Mt. 13.1-9; Lc. 8.4-8)

4 Taama vmnéⁿēe Jesús miiⁿ
ní tucá'a yā chí'cueeⁿ yā
cuaaⁿ 'diituú nuūⁿnīⁿ'yāⁿā. Ní
nduuvídáámá n'deeē n'dái 'iⁿ'yāⁿ
naachi canée Jesús miiⁿ ndíí 'āā
ntéé lugar chí cuéndii Jesús. Ní
chindáa yā na 'aama barco chí
canuuⁿ vmnaaⁿ nuūⁿnīⁿ'yāⁿā miiⁿ.
Ní miiⁿ chí'iindí yā chí ca'cueeⁿ yā.
Nducyáácá 'iⁿ'yāⁿ ch'εetinée yā na
'diituú nuūⁿnīⁿ miiⁿ. ²N'deēē n'dái
parábolos caⁿ'a Jesús 'iⁿ'yāⁿ s'eeⁿ
chí ejemplós chí tan'dúúcā dendu'u
chí véé iⁿ'yeeⁿdí 'cūū. Ní taachí
ngi'cueeⁿ yā caⁿ'a yā ndúúcú 'iⁿ'yāⁿ
s'eeⁿ 'tíicā. ³Ndís'tií ní 'caandiveéⁿ
nī chuū. 'Áámá saⁿ'ā chí ngiinū
ndaāta ní cuéⁿe sá cuūnū sa ndaata
miiⁿ. ⁴Taachi chíinū sa ní 'áámá
duutu ndaata mífⁿ chíiya na 'diituú
yúúní ní ndāā 'yáádá ní che'e
tī. ⁵Náⁿ'ā duutu ndaata ní chíiya
nguaaⁿ tuūū naachi nguée dáana
n'deēē yáⁿ'āa véé. Duutu ndaata
miiⁿ núúⁿ cān'daa tí yáⁿ'āa miiⁿ
ngueē daanáá yáanūⁿ. ⁶Ní taachi
can'daa yaatū miiⁿ ní ti'i caati nguée
yáanūⁿ snúú díf'yú. ⁷Náⁿ'ā duutu
ndaata miiⁿ chíiya nguaaⁿ yááⁿ.
Yááⁿ s'eeⁿ ní chíiita ní di'vaāchi
yéⁿē. Chífⁿ chí ndaata miiⁿ ní nguée

dichíí'vē. ⁸Náⁿ'ā duutu ndaata mífⁿ
na yáⁿ'āa n'dáacā chíiyā. Can'dáā
ní chíiita n'deeē n'dái cosecha yeⁿē.
N'duuví ní ch'εetinée tanduu ndiicu
ndiichi ndaata yeⁿē. Tan'duuví ní
'iīnū ngeēcu ndiichi ndaata yeⁿē ní
tan'duuví ní 'áámá ciento ndaata
yeⁿē.

⁹Tuu'mi ní Jesús caⁿ'a yā chíi yā
'iⁿ'yāⁿ s'eeⁿ: Ndís'tií chí véé veéⁿ nī,
'caandiveéⁿ nī.

Chífⁿ chí neⁿē caāⁿ'mā ejemplo miiⁿ

(Mt. 13.10-23; Lc. 8.9-15)

¹⁰Cuayivi taachí nduūví
dámaáⁿ yā ndaa nanááⁿ Jesús
náⁿ'ā 'iⁿ'yāⁿ chí snée nīⁿ'núⁿ yā
ndúúcú ndiichúúví discípulos ní
ntiinguunéeⁿ yā Jesús: ¿Dē'ē neⁿe
caaⁿ'maⁿ ejemplo 'cūū?

¹¹Ní Jesús caⁿ'a yā chíi yā 'iⁿ'yāⁿ
s'eeⁿ: Ndís'tií ní canée chí cadiinuuⁿ
nī chí canúúⁿ n'de'ei yeⁿ'é naachi
Ndyuūs ngaⁿ'a ntiiⁿ'nyúⁿ yā. Naati
tanáⁿ'ā 'iⁿ'yāⁿ chí nguée sneé
yā nduucú, 'úú ní ngaⁿ'á ngíí
tanducuéⁿ 'iⁿ'yāⁿ s'eeⁿ ndúúcú
ejemplós. ¹²Níicú 'iⁿ'yāⁿ s'eeⁿ snaaⁿ
yā naati ch'εetinée yā tan'dúúcā
chí nguée inaaⁿ yā, ní 'caandiveéⁿ
yā naati ch'εetinée yā tan'dúúcā
chí nguée 'caandiveéⁿ yā, ní nguēē
tuumicadínuuⁿ yā. Ndíí nguée
ndaacadáámí yā ní cu'téenu yā
Ndyuūs ní nch'εēcú nuuⁿ'ndi yeⁿe yā.

¹³Tuu'mi ní Jesús caⁿ'a yā chíi
yā discípulos yeⁿe yā: ¿Áá nguée
ituumicadínuuⁿ nī yeⁿ'ē ejemplo
'cūū? ¿Táácā, túú'mí, cadínuuⁿ nī
yeⁿ'ē tanáⁿ'ā ejemplo? ¹⁴'Iⁿ'yāⁿ
chí ngiinū yā ndaata miiⁿ
tan'dúúcā 'iⁿ'yāⁿ chí candēē yā
nduudu cuaacu yeⁿ'é Ndyuūs.

15 N'dúúví 'iiⁿ'yāⁿ ní tan'duūcā ndaata chí chiiya cyúúní míⁿ, 'tiicá yā ch'iindiveéⁿ yā nduudu yeⁿ'é Ndyuūs. Ní cuayiivi taachí ch'iindiveéⁿ yā, chíi yááⁿ'nguiniūⁿ ní divíi sa nduudu chí ch'iindiveéⁿ yā chí canéé na staava yeⁿ'e yā. **16** Tán'duuví yā ní tan'dúúccā ndaata chí chiiya nguaaⁿ tuūú, 'tiicá yā. N'giindiveéⁿ yā nduudu cuaacu yeⁿ'é Ndyuūs ní yeenú n'daí yā nduūcū. **17** Naati nguée 'áámá cānee na staava yeⁿ'e yā ní nguée 'nááⁿ tiempo cūnee. Taachi ndaa tiempo chí 'cueenu yā cuuvi o neⁿ'e chí n'gíⁿ'nyuⁿ'neeⁿ 'iiⁿ'yāⁿ yeⁿ'é yā cáávā nduudu cuaacu miiⁿ, 'āā ntéé candii yā chí n'daacā miiⁿ. **18** Tán'duuví yā ní tan'dúúccā ndaata chí chiiya nguaaⁿ yááⁿ miiⁿ, 'tiicá yā. N'giindiveeⁿ n'daacā yā nduudu cuaacu yeⁿ'é Ndyuūs. **19** Naati neené neⁿ'e cá yā dendu'ū yeⁿ'e iⁿ'yeeⁿdí cūū ndúúccū chí véé. Ní nginnche'etí yā 'iiⁿ'yā. Ní 'iiⁿ'yāⁿ s'eeⁿ ní dineⁿ'e yā cosas chí véé yeⁿ'e taama 'iiⁿ'yā. Tanducuéⁿ'ē chuū ní ndaá ní d'vaachíⁿ yeⁿ'e nduudu cuaacu yeⁿ'é Ndyuūs. Ní diiíⁿ chí nguée dichíⁿ've nduudu miiⁿ na vida yeⁿ'e 'iiⁿ'yāⁿ s'eeⁿ. **20** Naati tán'duuví yā ní tan'dúúccā ndaata chí chiiya na yáⁿ'āa n'daacā, 'tiicá yā. N'giindiveéⁿ yā nduudu cuaacu yeⁿ'é Ndyuūs ní i'teenu n'daaca yā, ní véé n'gui'i yeⁿ'ē. N'duuví yā ní tan'dúúccā ndaata chí chíi ndiīcū ndiichi yeⁿ'ē yeⁿ'e 'aama 'aama. N'duuví yā tan'dúúccā chí chíi 'iinu ngēcū ndiichí yeⁿ'ē, o tan'dúúccā chí chíi 'aama ciento yeⁿ'ē.

Tanducuéⁿ'ē chí cunuúⁿ n'de'ei cunduú nguuví

(Lc. 8.16-18)

21 'Tiicá ntúūⁿ caⁿ'a Jesús táámá ejemplo chí 'téé nguée dáámá. ¿'Áá ndeé yā 'áámá lámpara chí cu'neeⁿ yā maaⁿ 'aama caja o maaⁿ 'aama cama? ¿'Áá nguée cu'neeⁿ yā lámpara miiⁿ na yaacu, 'íicú 'iiⁿ'yāⁿ cuuvi snaaⁿ yā? **22** Mar 'áámá cosa chí canúúⁿ n'de'ei nguée cunee chí nguée snaaⁿ 'iiⁿ'yāⁿ, ndíi nguée ndúú 'áámá cosa chí cánúúⁿ n'de'ei chí nguée cadiīnuuⁿ 'iiⁿ'yāⁿ. **23** Du'ū chí véé vééⁿ ní 'caandiveeⁿ'.

24 Ní Jesús caⁿ'a ntúūⁿ yā 'iiⁿ'yāⁿ s'eeⁿ: Cunndéē ndís'tiī cuidado yeⁿ'e chí n'giindiveéⁿ nī. Ndúúccū caādī chí ndís'tiī idiíⁿ nī juzgar 'iiⁿ'yāⁿ, caadi míⁿ ntúū Dendyuūs idiíⁿ yā juzgar ndís'tiī. Ní n'deēē cá n'daacā yeⁿ'ē ndís'tiī taachi Ndyuūs idiíⁿ yā juzgar ndís'tiī. **25** 'Iiⁿ'yāⁿ chí véé yeⁿ'e yā Ndyuūs ca'a cá yā 'yā. 'Iiⁿ'yāⁿ chí nguée ca yeⁿ'e yā, Ndyuūs ndivíi yā 'téé chí 'āā véé yeⁿ'e yā.

Ejemplo yeⁿ'e ndaata chí ngiita

26 Jesús caⁿ'a ntúūⁿ yā: Naachi Ndyuūs ngaⁿ'a ntiiⁿ'nyúⁿ yā ní tan'dúúccā 'áámá saⁿ'ā chí ngiīnu sa ndaata na yáⁿ'āa yeⁿ'e sa. **27** Saⁿ'ā miiⁿ ngiīnū sa ndaata na yáⁿ'āa. Ní chíi maáⁿ ní cyaadú sa ní nducueeⁿ sa taachí chideeve. Cuayiivi ní cho'ōo nguūví cho'ōo n'gááⁿ ní ndaata miiⁿ ní can'daa ní ch'iita naati saⁿ'ā miiⁿ ní nguée deenu sa táácā ch'iita. **28** Yáⁿ'āa miiⁿ ngii maáⁿ yéⁿ'ē. Vmnaáⁿ vmnaaⁿ ican'dáa ta'a n'gaiyáa. Cuayiivi ní can'daa yááⁿ miiⁿ yeⁿ'e. Cuayiivi ní n'giita ní ngii

trigo chí ndiitūu n'daāca na yááⁿ miiⁿ. ²⁹Taachí trigo miiⁿ 'āā ntí'i, tuu'mi ní ngeⁿe 'iiⁿ'yāⁿ chí yeⁿ'ē ní n'giica yā, ti 'āā snuū ca'a chí 'caātā.

Tan'dúúcā ejemplo nduutií yeⁿe yíivē ntíí'yāa

(Mt. 13.31-32; Lc. 13.18-19)

³⁰Jesús miiⁿ ní ca'a ntúuⁿ yā: ¿De'é tan'dúúcā naachí ngaⁿ'a ntiiⁿ'nyuⁿ Ndyuūs miiⁿ? o ¿de'é nduucū chi nadidáámá yú? ³¹Chuū tan'dúúcā nduutií yeⁿe yíivē ntíí'yāa chí 'lííⁿ cá yeⁿ'ē tanducuéⁿ'ē nduutií chí véé iⁿ'yeeⁿ'dí 'cūū. Chííⁿ chí chiinu 'iiⁿ'yāⁿ na yáⁿ'āa yeⁿ'é yā. ³²Taachí 'āā niínú yā ndaata miiⁿ ní ngíí n'geete yeⁿ'ē tanducuéⁿ'ē yāātā. Ní dúuⁿ'nē miiⁿ ní n'geete n'dái ngii chí 'yáádá ngíí í'neeⁿ tī 'dééce tī na 'cuutí yeⁿ'ē.

Taama ejemplo chi ngí'cúeeⁿ Jesús

(Mt. 13.34-35)

³³Tíicā ngí'cúeeⁿ Jesús 'iiⁿ'yāⁿ s'eeⁿ nduudu cuaacu yeⁿ'é Ndyuūs ndúúcu n'dee n'dái ejemplos tan'dúúcā chuū, tanducuéⁿ'ē chí cuuvi cadiinuⁿ yā.

³⁴Ní ngaⁿ'a yā ngii yā nducyaaca 'iiⁿ'yāⁿ ndúúcu ejemplos, naati taachi canee yā dámaāⁿ ndúúcu discípulos yeⁿ'e yā tanducuéⁿ'ē miiⁿ n'giⁿ'i yā discípulos yeⁿ'e yā de'e chí neⁿ'e caaⁿ'maⁿ ejemplos chí 'āā caⁿ'a yā.

Jesús chí'neeⁿ 'dííⁿ yā 'yúúné ndúúcu nuūⁿníⁿ'yáⁿ'ā

(Mt. 8.23-27; Lc. 8.22-25)

³⁵Taachi chí'da'á nguuvi miiⁿ, Jesús miiⁿ ngaⁿ'a yā ngii yā discípulos yeⁿ'e yā: Caⁿ'ā yú táamá 'diituú nuūⁿníⁿ'yáⁿ'ā.

³⁶Tuu'mi ní s'neeⁿ yā miiⁿ ní discípulos ní candée yā Jesús miiⁿ

na barco chí 'āā canée na 'diituú nuūⁿníⁿ'yáⁿ'ā ní cueⁿ'é yā. Miiⁿ ntúūⁿ canée tanáⁿ'ā barcos. Ní 'iiⁿ'yāⁿ yeⁿ'e tanáⁿ'ā barcos cueⁿ'é ntúūⁿ yā. ³⁷Tuu'mi ní chéenū 'áámá 'yúúné taaⁿ ní nuūⁿníⁿ'yáⁿ'ā miiⁿ snda yaacú. Ní sndaā yaanūuⁿ barco miiⁿ, ní chiitūu nuūⁿníⁿ barco naachi canée Jesús miiⁿ. ³⁸Ní Jesús miiⁿ ní cyáádu yā cuaaⁿ 'diituú barco miiⁿ, ní candiitinee yā na cojín. Ní discípulos ní nanduūchí yā Jesús miiⁿ ní caⁿ'a yā chii yā: N'dii Maestro, ¿'áá nguéé de'é vee inee ní chí 'cuūvi yú?

³⁹Tuu'mi ní Jesús miiⁿ ní nducúeeⁿ yā ní yaaⁿ'vi yā 'yúúné miiⁿ ní caⁿ'a yā chii yā nuūⁿníⁿ'yáⁿ'ā miiⁿ 'túúcā: 'Diiíⁿ nūuⁿ cunee di. Hora mífⁿ nūuⁿ 'yúúné miiⁿ ní canee 'diiíⁿ ní nducuéⁿ'ē canee 'diiíⁿ 'diiíⁿ. ⁴⁰Tuu'mi ní Jesús miiⁿ ní caⁿ'a yā chii yā discípulos yeⁿ'e yā: ¿De'é cuuvi tátii 'va'a ní? ¿De'é cúuví chí nguéé cu'téenu cá ní?

⁴¹Ní discípulos yeⁿ'é yā neené dii'yá yā chíí, ní ngaⁿ'a yā ngii yā nguaaⁿ maáⁿ yā ndúúcu v'í: ¿Du'u rá 'iiⁿ'yāⁿ 'cūū, chí ndii 'yúúné ndíí nuūⁿníⁿ'yáⁿ'ā chí'indiveéⁿ yeⁿ'e yā?

Saⁿ'ā yeⁿ'e yáⁿ'ā Gadara chí canée sá ndúúcu espíritus yeⁿ'e yááⁿ'nguiinūuⁿ

(Mt. 8.28-34; Lc. 8.26-39)

5 Jesús ndúúcu discípulos ndaa yā na táamá lado 'diituú nuūⁿníⁿ'yáⁿ'ā miiⁿ yeⁿ'e yáⁿ'āa chí nguuvi Gadara. ²Tuu'mi ní Jesús nan'daá yā na barco miiⁿ, ní ndaa 'áámá saⁿ'ā chí canée ndúúcu espíritus yeⁿ'é yááⁿ'nguiinūuⁿ. Ní ngiicá sa ná vaacu sa chí 'áámá yiivi yáává chí canée nguaaⁿ yaínyāⁿ

ní ndaa sa nanááⁿ Jesús. ³Saⁿā miiⁿ ní mar 'áámá 'iiⁿyāⁿ nguée chi cuuví cuta'á yā saⁿā ní cachiichí yā saⁿā, ndii nguée ndúúcū cadenas. ⁴Nééné n'deēe cuuví 'iiⁿyāⁿ s'eeⁿ cachiichí yā saⁿā miiⁿ ndúúcū cadenas ca'a sa ndúúcū ta'ā sa, náátí ch'lica sa cadenas miiⁿ, ní dicheeyéi sa cadenas miiⁿ. Ní mar 'áámá 'iiⁿyāⁿ nguée ichée yā ndúúcū sa. ⁵Cué'é daāⁿmaⁿ cachiica sá n'gaí sa cuaaⁿ ná yiicū ndúúcū cuaaⁿ nguaaⁿ yáinyāⁿ ndíí nguuví ndíí n'gaaⁿ, ní 'nuu cá'ai maāⁿ sa sáⁿā ndúúcū tuūu. ⁶Ní taachi n'diichi yá'ái sa Jesús miiⁿ, cueⁿe sa ngéenu sā nanááⁿ yā ní chiintii'yā sa nanááⁿ yā. ⁷Ní caⁿ'a sa chii sa Jesús miiⁿ ní 'cái yiicu sá: ¿De'ē cuuvi chi ndaa nī nanaáⁿ, n'dii Jesús, Daiya Dendyuūs chi canee yā na va'ai chēeti nguuví? Ngicá cáávā chi dúúchí Ndyuūs chi nguée téé nī vaadi 'caa'va 'úú.

⁸Saⁿā miiⁿ ní caⁿ'a sa chuū caati Jesús miiⁿ ní caⁿ'a yā chii yā espíritus yeⁿe yááⁿn'guiniūⁿ: Ndís'tiī, nan'dáa nī yeⁿe sáⁿa 'cūū.

⁹Jesús miiⁿ tiinguuneeⁿ yā saⁿā: ¿De'ē nguuví dí? Ní espíritus yeⁿe yááⁿn'guiniūⁿ chi canée ndúúcū sáⁿa 'cūū nan'guēcútaⁿa sa: Legión nguūví, caati neené 'yaaⁿ 'nū.

¹⁰Ní espíritus neené di'cuíftuū ca Jesús miiⁿ chi nguée tun'dáa yā espíritus chi caⁿ'ā yaⁿ'ai yeⁿe yāⁿāa miiⁿ. ¹¹Ní neené n'deēe puercos nge'e tī cuaaⁿ na níⁿnúⁿ yiicū miiⁿ. ¹²Ní espíritus yeⁿe yááⁿn'guiniūⁿ idi'cuiitu Jesús: N'dii, dicho'ó nī nús'uu chi caⁿ'a 'nū chēeti puercos miiⁿ.

¹³Tuu'mi ní Jesús ní ca'a yā permiso, ní espíritus yeⁿe

yááⁿn'guiniūⁿ chínan'dáa sa yeⁿe saⁿā miiⁿ chí ndáa sa chēeti puercos. Ní véé tan'duu 'uūvi mil puercos miiⁿ. Ní taachi espíritus yeⁿe yááⁿn'guiniūⁿ sndáa sa chēeti puercos tuu'mi ní cheenu nducyaaca tī ní chingée nuúⁿ tī chēeti yaāi miiⁿ. Ní chingée tī nguaaⁿ nuuⁿnī'yáⁿā. Ní chiitu nuūⁿnīⁿ veéⁿ tī duutu tī cheendi tī ní ch'ii tī nguaaⁿ nuūⁿnīⁿ miiⁿ.

¹⁴Iiⁿyāⁿ chi idiⁿ cuidado puercos cueⁿe yā ngéenu yā chi cuuvi yā 'iiⁿyāⁿ ná yááⁿ miiⁿ ndúúcū 'iiⁿyāⁿ chi snée na cuēetí chí chíi miiⁿ. Ní 'iiⁿyāⁿ s'eeⁿ can'daa yā n'diichi yā chí chíi. ¹⁵Taachí ndaa yā niiⁿnuúⁿ nanááⁿ Jesús miiⁿ, ní taachí n'diichí yā saⁿā chi canée sá ndúúcū espíritus yeⁿe yááⁿn'guiniūⁿ chi maaⁿ ní vee sa 'diiⁿ ndúúcū catecai sa ní 'āā n'daācā sa tuu'mi ní dí'va'a yā. ¹⁶Iiⁿyāⁿ s'eeⁿ chi n'diichí yā chí diiⁿ Jesús miiⁿ, ní caⁿ'a yā chíi yā táácā chíi ndúúcū saⁿā miiⁿ chi canée sá ndúúcū espíritus yeⁿe yááⁿn'guiniūⁿ, ní tan'duucā chí chíi ndúúcū puercos. ¹⁷Tuu'mi ní 'iiⁿyāⁿ s'eeⁿ di'cuíftu yā Jesús miiⁿ chi cáⁿa yā táámá lado yeⁿe yāāⁿ miiⁿya.

¹⁸Jesús cueⁿe yā. Ní taachi ndaa yā na barco miiⁿ ndaa saⁿā chí vmnaaⁿ canée sá ndúúcū espíritus yeⁿe yááⁿn'guiniūⁿ. Ní saⁿā miiⁿ chiica sa Jesús chí caⁿ'a sa ndúúcū yā na barco miiⁿ. ¹⁹Jesús ní nguée 'cuuⁿ yā naatí caⁿ'a yā: Cunaⁿ'a dí ná vaacu di ndúúcū 'iiⁿyāⁿ yeⁿe di, ní cuuvi di 'iiⁿyāⁿ chí ch'ēete n'dai dendu'ū chí Señor 'iivú Ndyuūs miiⁿ díⁿ yā ndúúcū dii, ní tan'dúúcā Señor 'iivú Ndyuūs miiⁿ chí nduuví ya'āi 'iinú yā dii.

²⁰Saⁿā miiⁿ ní cunaⁿā sa, ní tucá'a sa chii sa 'iiⁿyāⁿ nuuⁿmaⁿ yáaⁿ cuaaⁿ 'diituú chí nguuví Decápolis yeⁿe dendu'u chí n'geete n'dai chí Jesús dííⁿ yā ndúúcu sa. Ní nducyaaca yā che'e yiinú yā.

**Táⁿā daiya sáⁿā Jairo, ndúúcu
n'daataá chí tuū'vi tá catecai Jesús**

(Mt. 9.18-26; Lc. 8.40-56)

²¹Taachí Jesús miiⁿ nanguεεcunée yā ní cho'ó yā táamá lado yeⁿē nuuⁿnūⁿyáⁿā ní ndaa yā na yáⁿāa 'diituú nuuⁿnīⁿyáⁿā, neenē n'deēe 'iiⁿyāⁿ ndaa yā naachi Jesús canee yā. ²²Ní ndaa 'áámá saⁿā chí nguuví sa Jairo, saⁿa chí ngaⁿa ntiíⁿnyuⁿ sa yeⁿe yáacū sinagoga. Taachí n'diichi sa Jesús miiⁿ candiitin'díí sa na ca'a yā. ²³Ní neenē dí'cuíftu sa Jesús miiⁿ ní caⁿa sa: Daiyá ní neⁿē 'cuūvi tá. Cuchíí nī ní cún'du'u tá'a nī vmnaaⁿ yeⁿē tá, ní cuuví nduūvā yeⁿe tá ní nguéé 'cuūvi tá.

²⁴Tuu'mi ní Jesús miiⁿ ní cuéⁿe yā ndúúcu sa. Neenē 'yaaⁿ 'iiⁿyāⁿ can'daa yā Jesús ní néenē chiiⁿnu chiichí yā Jesús. ²⁵Ní nguaaⁿ nducyaaca 'iiⁿyāⁿ miiⁿ canée 'áámá n'daataá chí ngíitā tá, chí 'āa ndiichúúví nduūyū canee tá ndúúcu ca'ai chí nguuví nguuví ngee yuuúⁿ yeⁿe cuerpo yeⁿe tá. ²⁶Néené n'geenu tá ngii ndúúcu médicos, ní 'āa ch'iinu diíⁿ tá gastar tanducuéⁿē chí véé yeⁿē tá, naati nguéé du'ū vεε dichíí'vε yeⁿē tá ti dáyíicándíí cá ca'ai yeⁿē ta cuaaⁿ vmnaaⁿ. ²⁷Āa ch'iindiveeⁿ tá yeⁿe Jesús miiⁿ chí dííⁿ yā chí nduūvā yeⁿe 'iiⁿyāⁿ chí ngíitā. Ní cueⁿe tá nguaaⁿ 'iiⁿyāⁿ s'eeⁿ cuaaⁿ daamí Jesús ní tuū'vi tá catecai yā. ²⁸Caati nadicádíínuuⁿ tá

maāⁿ tá 'tíicā. Ndúúti chí dámaāⁿ tuū'ví catecai yā, ní nduūvā yeⁿē.

²⁹Hora mífⁿ nūuⁿ chí tuū'vi tá catecai Jesús miiⁿ 'tíicā canée naaⁿ chí ngeε yuuúⁿ yeⁿē tá. Ní chicadiinuⁿ tá na cuerpo yeⁿe tá chí 'āa nduūvā yeⁿē tá. ³⁰Tuu'mi ní Jesús miiⁿ tuumicádíínuuⁿ yā chí 'āa nduūvā yeⁿē 'áámá 'iiⁿyāⁿ ndúúcu poder yeⁿē yā. Ní nguεεcundíí yā ní n'diichi yā náavtaⁿā yeⁿe 'iiⁿyāⁿ ní ntiinguuneeⁿ yā: ¿Du'u túu'vii catecai?

³¹Tuu'mi ní discípulos yeⁿe yā caⁿa yā: Cuin'diichí nī 'iiⁿyāⁿ chí i'nūuⁿ chiichí yā s'uūúⁿ miiⁿ ní maaⁿ ní ntiinguuneeⁿ nī: ¿Du'u tuū'vii 'úú?

³²Naati Jesús ní nguεεcundíí yā n'giinu yā 'áámá lado taama lado, ní 'iicu cuuvi snaaⁿ yā du'ū tuu'vī 'iiⁿyāⁿ. ³³Tuu'mi ní n'daataá miiⁿ, ní in'duuví tá chí 'va'ā tá. Deenū tá de'ē chí chii. Cheⁿe tá ní chiintii'ya tá nanááⁿ Jesús. Ní caⁿa tá chí tá 'iiⁿyāⁿ tanducuéⁿē chí nduudu cuaacu. ³⁴Jesús ngaⁿa yā ngii yā táⁿā: Díí daiyá, nduūvā yeⁿē dí cáávā chí i'téenu di 'úú. Díí 'diííⁿ nūuⁿ cunáⁿa di, ní ndúúvā yeⁿē di yeⁿē ca'ai chí ndii di.

³⁵Ngaⁿa Jesús miiⁿ ndúúcu táⁿā miiⁿ, taachí ndaa yā ná va'ai yeⁿe saⁿā Jairo chí ngaⁿa ntiíⁿnyuⁿ sa yeⁿē 'iiⁿyāⁿ na yáacū sinagoga miiⁿ. Ní 'iiⁿyāⁿ yeⁿē va'ai miiⁿ ní caⁿa yā Jairo: Daiya dí 'āa n'dii tá. ¿DÉε cuuví chí idindú'ū ca di maestro?

³⁶Naati Jesús miiⁿ, ní ch'iindiveeⁿ yā chí caⁿá yā yeⁿē saⁿā chí ngaⁿa ntiíⁿnyuⁿ sa. Ní caⁿa yā chí yā saⁿā miiⁿ chí ngaⁿā ntiíⁿnyuⁿ sa yeⁿe 'iiⁿyāⁿ na yáacū sinagoga: Nguéé 'va'a di naati cu'téenu dí.

³⁷ Jesús nguée 'cuuⁿ yā nducyaaca 'iiⁿyāⁿ chi cueⁿe ca yā cuaaⁿ cheeti va'ai ndúúcu yā, ti dámaāⁿ Pedro, ndúúcu Jacobo, ndúúcu Juan, saⁿā 'diinū Jacobo. ³⁸ Taachí ndaa yā va'ai yeⁿe sáⁿā chi ngaⁿa ntiinⁿnyuⁿ yeⁿe 'iiⁿyāⁿ yeⁿe yaācū sinagoga miiⁿ, n'diichí yā 'iiⁿyāⁿ. Ní ch'iindiveéⁿ yā chí n'gai yā ní ngeecu yā. ³⁹ Tuu'mi ní taachi sn'daa yā cuaaⁿ cheeti va'āi miiⁿ, caⁿa yā: ¿De'ē tātíi yuudu idiíⁿ ní? ¿De'ē cúúví chí ngeecu ní? Tá'díiⁿ nguée n'dii tá, tí cyaadu tá.

⁴⁰ 'Iiⁿyāⁿ s'eeⁿ ní n'gíiⁿnyūⁿneeⁿ yā yeⁿe Jesús miiⁿ. Tuu'mi ní Jesús miiⁿ dííⁿ yā chi can'daa nducyaaca yā. Ní Jesús can'dee yā chiida tá ndúúcu cheecu tá ndúúcu discípulos chi canée ndúúcu yā ní sn'daa yā naachi candífti ta'dííⁿ chí n'dii tá ní tináⁿā. ⁴¹ Ní sta'á yā ta'ā tá ní caⁿa yā: Talita cumi, chi neⁿe caāⁿmaⁿ na nduudu yeⁿe yú, díí n'daata 'lífⁿ, 'úú ngaⁿá ngíi dii, ndúúcueeⁿ di.

⁴² Hora mífⁿ nūuⁿ ta'dííⁿ miiⁿ ní nduucueeⁿ tá ní cachiica tá. N'daata 'lífⁿ miiⁿ ní ngii tá ndiichuuvi nduūyū. Tuu'mi ní 'iiⁿyāⁿ s'eeⁿ cueⁿe yiinú yā. ⁴³ Jesús mífⁿ yaa'vi yuudú yā 'iiⁿyāⁿ chi nguée caaⁿmaⁿ yā cuuvi yā chííⁿ mar 'áámá 'iiⁿyāⁿ. Ní caⁿa Jesús chi ca'a yā yuündú chi che'e n'daata 'lífⁿ miiⁿ.

Jesús canee yā na yáāⁿ Nazaret

(Mt. 13.53-58; Lc. 4.16-30)

6 Jesús ní ndaācá yā miiⁿ ní cunaⁿá yā na yáāⁿ Nazaret chi yáāⁿ vaacú yā, ní discípulos yeⁿe yā ní cueⁿe yā ndúúcu yā. ² Taachí ndaa nguuvi sá'bado chí ntaavi'tuunúúⁿ 'iiⁿyāⁿ, Jesús tucá'a yā chí'cueeⁿ yā na yaācū

sinagoga miiⁿ. Néené 'yaaⁿ 'iiⁿyāⁿ ch'iindiveéⁿ yā chí caⁿa Jesús, ní cheⁿe yiinú yā. Ní caⁿa yā: ¿Tíí ch'eeⁿ sáⁿa 'cūū tanducueⁿē chuū? ¿De'ē vaadi déénú chí ca'a yā 'iiⁿyāⁿ miiⁿ, ndúúcu vaadi n'giinu chí dííⁿ yā chuū? ³ ¿Áá nguée sáⁿa 'cūū daiya saⁿā 'viichiyáⁿá miiⁿ, daiya María miiⁿ, saⁿā chí 'diinū Jacobo, ndúúcu José, ndúúcu Judas, ndúúcu Simón, ndúúcu v'íi yā chí snée yā miiⁿ nguaaⁿ s'uūuⁿ? Cáāvā chí yeⁿe yáāⁿ miiⁿ chííⁿ chí nguée s'teenú yā 'iiⁿyāⁿ. ⁴ Tuu'mi ní Jesús caⁿa yā chíi yā 'iiⁿyāⁿ s'tíi: Nducyáácá 'iiⁿyāⁿ dinéⁿe yā profetas naati nguée dinéⁿe yā 'áámá profeta yeⁿe yáāⁿ vaacú yā. Ní nguée dinéⁿe 'iiⁿyāⁿ yeⁿe yā ndúúcu 'iiⁿyāⁿ na vaacu yā profeta miiⁿ. ⁵ Jesús ní nguée chidiíⁿ yā mar 'áámá vaadi n'giinú miiⁿ, dámaāⁿ chí sn'duú yā ta'a yā vmnaaⁿ yeⁿe n'duuví 'iiⁿyāⁿ chí ngíítá ní nduūvā yeⁿe yā. ⁶ Ní cheⁿe yiinu Jesús tí 'iiⁿyāⁿ s'eeⁿ ní nguée s'téenu yā. Cuayíivi miiⁿ ní Jesús cachiicá yā cuaaⁿ na yáāⁿ na niiⁿnuúⁿ ní ngí'cueeⁿ yā 'iiⁿyāⁿ.

Jesús dichó'o yā discípulos yeⁿe yā chí caaⁿmaⁿ yā nduudu yeⁿe Nduyuús

(Mt. 10.5-15; Lc. 9.1-6)

⁷ Ní Jesús yaa'vi yā ndu'ū chí ndiichuuvi discípulos, ní tucá'a yā dicho'o yā 'iiⁿyāⁿ 'uuví yā 'áámá 'áámá yáāⁿ. Ní ca'a yā poder discípulos chí tun'dáa yā espíritus yeⁿe yáāⁿ n'guiniūuⁿ yeⁿe 'iiⁿyāⁿ. ⁸ Ní caⁿa yā chíi yā discípulos chí nguée de'ē vee candée yā chí cuuví yeⁿe yúúní yeⁿe yā, dámaāⁿ in'daacuú. Nguée canée chí candée yā ndii mar 'áámá moral, ndíí

nguée ndúú pan ra, ndíí nguée ndúú tuūmī ra na bolsa. ⁹Cunúúⁿ ca'a yā ndacuú ndaachíí, ní 'áámá nūuⁿ catecai yā, nguée uūvī. ¹⁰Ní caⁿ'a Jesús: Ndís'tií, taachi cúndaa nī chēeti 'áámá va'āí, 'cuētinée nī miiⁿ taanduvée ndii taachí nan'dáa nī yeⁿ'e yāāⁿ miiⁿ. ¹¹Nduuti chi ndaá nī 'áámá yāāⁿ ní 'iiⁿ'yāⁿ s'eeⁿ nguée 'cuaáⁿ yā 'cuētinée nī miiⁿ, ndíí nguée ndúú neⁿ'e ra yā chi 'caandiveéⁿ yā yeⁿ'e nī, tuu'mi ní nan'dáa nī yeⁿ'e yāāⁿ miiⁿ. Ní n'dáadi nī yaācā yeⁿ'e ca'a nī. Chuū ní 'áámá señal chi 'cuuⁿ'mīⁿ nī chi nguée n'daācā idiíⁿ yā ti contra yeⁿ'é nī. Cuaacu níⁿ'nyúⁿ ngaⁿ'á ngíí ndís'tií, chi nguuvī yeⁿ'e juicio duu'vī cá castigo yeⁿ'é 'iiⁿ'yāⁿ yeⁿ'e yāāⁿ Sodoma ndúúcū 'iiⁿ'yāⁿ yeⁿ'e yāāⁿ Gomorra, chi ndíí cuááⁿ vmnaaⁿ, ní nguée ti 'iiⁿ'yāⁿ yeⁿ'e yāāⁿ naachí nguée 'cuúⁿ yā ndís'tií.

¹²Tuu'mi ní discípulos ican'dáa yā, chí caⁿ'a yā nduudu cuaacu yeⁿ'é Ndyuūs yeⁿ'e chí ndacadáámí 'iiⁿ'yāⁿ yeⁿ'e nuuⁿ'ndi yeⁿ'e yā. Ní chi n'daaⁿ yā chí cuuvi 'cuētinée n'daāca yā. ¹³Tuucá ntúūⁿ discípulos diví yā neenē n'deeē espíritus yeⁿ'e yāāⁿ'nguiinūuⁿ yeⁿ'é 'iiⁿ'yāⁿ. Ní ch'ii yā aceite n'deeē n'dái 'iiⁿ'yāⁿ chi ngíitā ní nduūvā yeⁿ'e 'iiⁿ'yāⁿ.

Juan chi ngeēdinuūⁿnī ní ch'ii sa

(Mt. 14.1-12; Lc. 9.7-9)

¹⁴Rey Herodes ch'iindiveéⁿ ntúuⁿ yā chuū chi núúⁿ'máⁿ íⁿ'yeēⁿ'dī miiⁿ ní ch'iindiveéⁿ yā chí diíⁿ Jesús miiⁿ. Rey Herodes mííⁿ caⁿ'a yā: 'Āā nduūchi Juan chi ngeēdinuūⁿnīⁿ nguaaⁿ tináⁿ'ā, chííⁿ chí saⁿ'ā ní véé taavi poder yeⁿ'e sa.

¹⁵Naⁿ'a 'iiⁿ'yāⁿ ní ngaⁿ'a yā: Jesús miiⁿ ní Elías chí profeta ndíí vmnaaⁿ. Naⁿ'a 'iiⁿ'yāⁿ ní ngaⁿ'a yā: Jesús miiⁿ ní 'áámá profeta tan'dúúcā profetas chí ch'ētinée ndii cuaaⁿ vmnaaⁿ.

¹⁶Taachí Herodes miiⁿ ch'iindiveéⁿ yā chuū, tuu'mi ní caⁿ'a yā: Juan sáⁿ'a 'cūū, chí 'úú chí caⁿ'a ntiiⁿ'nyúⁿ chí chíicá yā daandu sá ní 'āā nduuchi sa yeⁿ'e nguaaⁿ tináⁿ'ā.

¹⁷Ti Herodes miiⁿ caⁿ'a ntiiⁿ'nyúⁿ yā soldados chí sta'a sa Juan ní chíicā chíichi sa ndúúcū cadenas ní chí'nuuⁿ sa saⁿ'ā vácūū cáávā n'daataá Herodías. Táⁿ'ā miiⁿ chí chíi n'daataá yeⁿ'e Felipe cuááⁿ vmnaaⁿ ní canée tá ndúúcū sa. Ní Felipe miiⁿ ní 'diinu Herodes.

¹⁸Juan miiⁿ ní caⁿ'a sa chíi sa Herodes miiⁿ: N'dii rey nguée canée chí cunee nī ndúúcū n'daataá yeⁿ'e 'diinu nī.

¹⁹N'daataá yeⁿ'e Herodes miiⁿ nguée canee yīinū tá ndúúcū chí caⁿ'a Juan miiⁿ. Ní neⁿ'e tá 'caaⁿ'nuⁿ tá Juan miiⁿ naati nguée ngii diíⁿ tá. ²⁰Herodes miiⁿ ní deenu yā chí Juan ní n'dai sa ní yeⁿ'e Ndyuūs saⁿ'ā miiⁿ. Ní rey miiⁿ 'va'á yā Juan miiⁿ. Chííⁿ chí nguée n'guuⁿ rey miiⁿ chí táⁿ'ā miiⁿ diíⁿ daño tá ndúúcū Juan. Ní rey miiⁿ s'neeⁿ veéⁿ yā n'daacā ní ch'iindiveéⁿ yā yeⁿ'e nduudu Juan 'áará chí nguée tuumicadiinúuⁿ yā nducuéⁿ'ē chí ngaⁿ'a Juan miiⁿ. ²¹Naati n'daataá yeⁿ'e rey miiⁿ nguuvī tá Herodías ní ndaāca tá táācā chí diíⁿ tá. Herodes miiⁿ dííⁿ yā 'áámá 'viicu nguuvī cumpleanos yeⁿ'é yā. Dííⁿ yā 'áámá 'viicu yeⁿ'e chí nge'é yā chí che'é 'iiⁿ'yāⁿ chí ngaⁿ'a ntiiⁿ'nyuⁿ, ndúúcū

saⁿā s'eeⁿ chi 'neéⁿ vmnaaⁿ yeⁿe soldados, ndúúcū 'iiⁿyāⁿ yuudu yeⁿe yáⁿāa Galilea. ²²Ní taachí nge'e yā n'daatāa 'línⁿ daiya táⁿā Herodías miiⁿ sndaā tá naachi nge'e yā. Ní nde'ei tá. Rey Herodes ndúúcū 'iiⁿyāⁿ chi snée yā ndúúcu sa chií yeenú yā chi nde'ei tá. Ní miiⁿ caⁿa yā chií yā n'daataa 'línⁿ miiⁿ: Dii, n'daataa 'línⁿ, caaca di 'úú chí neⁿe dí ní 'úú ní teé dii.

²³Ní caⁿa yā, “por Ndyuūs” chi ca'a yā n'daatāa 'línⁿ miiⁿ 'āā de'é nūuⁿ chi neⁿe tá, 'áará chí ná maⁿa yeⁿe yáⁿāa chi ngaⁿa ntiiⁿnyúⁿ yā.

²⁴N'daatāa 'línⁿ miiⁿ ní can'daā tá ní caⁿa tá chií tá cheecu tá: Mamá, ¿de'é caacá? Ní cheecu tá ní caⁿa yā chií yā táā: Caaca di tíⁿ Juan chi cheedínūⁿnīⁿ.

²⁵Maaⁿncheēté nūuⁿ sndaā ta'dííⁿ miiⁿ naachi canúúⁿ rey miiⁿ, ní caⁿā tá: Neⁿe chí maaⁿnguuví nūuⁿ teé ní 'úú cheeti 'áámá cu'u tiiⁿ Juan chí cheedínūⁿnīⁿ. ²⁶Tuuⁿmi ní rey miiⁿ ní s'neeⁿ ndaachi nuúⁿ yā naati cáávā chi caⁿa yā, “por Ndyuūs”, ní cáávā 'iiⁿyāⁿ chi snée yā ndúúcū rey miiⁿ, nguée chí diiⁿ nuuⁿ yā cheeⁿdiitú yā yeⁿe chí ngiica ta'dííⁿ miiⁿ. ²⁷Hora miiⁿ nūuⁿ caⁿa ntiiⁿnyuⁿ rey miiⁿ 'áámá soldado chí cheⁿe sa 'caāca sa daandu Juan chí cheedínūⁿnīⁿ ní nguāi sa tíⁿ yā. ²⁸Soldado miiⁿ ní cheⁿe sa ná vácūú ní chíica sá daaⁿdu Juan miiⁿ. Ní sn'nuuⁿ sa tiiⁿ Juan miiⁿ cheeti 'áámá cu'u. Ní ndeē soldado miiⁿ ní ca'a sa ta'dííⁿ miiⁿ. Ní ta'dííⁿ miiⁿ ní ca'a tá cheecu tá.

²⁹Taachí discípulos yeⁿe Juan miiⁿ ch'iindiveéⁿ yā chuū, cheⁿe yā chí nguai yā cuerpo yeⁿe Juan miiⁿ. Ní candée yā chí 'cuuchi yā.

Jesús ca'a yā chí che'e nyuⁿu mil 'iiⁿyāⁿ

(Mt. 14.13-21; Lc. 9.10-17; Jn. 6.1-14)

³⁰Cuayiivi miiⁿ ní apóstoles ní nduuvidaamá yā ndúúcū Jesús miiⁿ ní caⁿa yā chií yā Jesús tanducuéⁿe chí diiⁿ yā, ndúúcū chí chí'cueeⁿ yā. ³¹Jesús caⁿa yā chií yā apóstoles: Cuchíi ní, ní caⁿa yú ntaaviⁿtuunúuⁿ yú na 'aama lugar chí 'aama lado yeⁿe yāāⁿ naachi nguée 'iiⁿyā. Ngaⁿa yā 'tíicā, caati n'dee n'dái 'iiⁿyāⁿ indaā yā nanááⁿ Jesús ndúúcū n'dee n'dái 'iiⁿyāⁿ chí inaⁿa, ndíi maaⁿ rá chí nge'e yā, nguée ngii. ³²Tuuⁿmi ní Jesús miiⁿ ndúúcū apóstoles yeⁿe yā cueⁿe yā dámaāⁿ yā na 'áámá barco na 'áámá lugar chí nguée snée 'iiⁿyāⁿ. ³³Naati néené 'yaaⁿ 'iiⁿyāⁿ n'diichí yā Jesús ndúúcū apóstoles, ní déenu yā du'u yā ní taachí cueⁿe yā. Ní nducuéⁿe 'iiⁿyāⁿ yeⁿe yāāⁿ s'eeⁿ cueⁿe yā chíicá yā na yáⁿāa naachi ndaá Jesús ní vmnaaⁿ cá ndaa yā. Ní cuayiivi ndaa Jesús miiⁿ ndúúcū apóstoles yeⁿe yā. ³⁴Taachí Jesús nan'dáa yā na barco, n'diichí yā neené n'dee 'iiⁿyāⁿ ní neené ya'ai 'iinú yā 'iiⁿyāⁿ s'eeⁿ, ti sneé yā tan'dúúcā 'iiti cuūchí chí nguée du'ū chí idiⁿ cuidado 'iiti, 'tíica yā. Ní Jesús tucá'a yā chí'cueeⁿ yā 'iiⁿyāⁿ s'eeⁿ n'dee n'dái dendu'ū. ³⁵Taachí chí chiinū, discípulos yeⁿe yā ní ndaá yā nanáaⁿ yā ní caⁿa yā: N'dii Jesús, 'āā chiinū ní mar 'áámá 'iiⁿyāⁿ nguē snée yā na yáⁿāa 'cūū. ³⁶Yaa'ví ní 'iiⁿyāⁿ, ní caⁿá yā yāāⁿ n'gaiyāā ndúúcū yaāⁿ n'geete chí snée na niiⁿnuúⁿ ní cuái yā pan, ti nguée ndée yā chí che'e yā.

³⁷Naati Jesús ní nan'guεεcútaⁿa yā yeⁿe yā ní caⁿa yā: Ndís'tiī, ca'á nī che'e yā. Discípulos ní caⁿa yā: ¿Áá cuuvi diiⁿ nús'uu chi caⁿa 'nū cuái 'nū 'uuvi ciento caadi pan, ní ca'á 'nū che'e yā?

³⁸Jesús caⁿa yā chii yā discípulos: ¿Áá n'dee panes yeⁿe ndís'tiī vεε? Cueⁿe nī n'diichi nī. Taachí 'āā n'diichí yā, tuu'mi ní yaa'vī yā: Véé nyuⁿu panes ndúúcu 'uuvi 'yaācā.

³⁹Tuu'mi ní caⁿa ntiī'nyuⁿ Jesús chí ch'εéte 'iiⁿyāⁿ s'eeⁿ caadi cuááⁿ caadi cuááⁿ naachí vεε yuuni cueēe.

⁴⁰Ní naachí ch'εete yā 'áámá ciento yā ní naachi ch'εéte tá 'uūvī ngeεcu ndiichí yā. ⁴¹Tuu'mi ní Jesús miiⁿ ní sta'á yā ndu'ū nyuⁿu panes miiⁿ ndúúcu 'uuvi 'yaācā. Ní chεεnaaⁿ yā nanguuvi ní ca'a yā gracias Ndyuūs cáāvā pan miiⁿ ndúúcu 'yaācā. Ní ch'iinu ní n'dee yā panes miiⁿ ní nca'a yā discípulos yeⁿe yā chi ca'a yā che'e 'iiⁿyāⁿ s'eeⁿ. Discípulos ca'a yā nducyaaca 'iiⁿyāⁿ s'eeⁿ 'yaācā miiⁿ ndúúcu pan miiⁿ. ⁴²Nducyáácá yā che'e yā ní chiitu 'iiⁿyāⁿ. ⁴³Ní nanngaáⁿ yā chí ningaavā miiⁿ ní chiitu ndiichúúvī 'cueēte ndúúcu chí ningaāva miiⁿ yeⁿe pan ndúúcu 'yaācā miiⁿ. ⁴⁴Nducyaaca saⁿā chí che'e sa panes miiⁿ ní ngii nyuⁿu mil sa.

Jesús ngíica yā vmnááⁿ nuūⁿnīⁿyáⁿā

(Mt. 14.22-27; Jn. 6.16-21)

⁴⁵Tuu'mi ní caⁿa Jesús chii yā discípulos yeⁿe yā chí cundaa yā na barco miiⁿ ní ndaá yā táámá lado yeⁿe nuūⁿnīⁿyáⁿā miiⁿ vmnaaⁿ yēⁿe yā chí caⁿa yā na yāāⁿ Betsaida, nuuⁿmaⁿ neⁿe chi Jesús dííⁿ yā despedir 'iiⁿyāⁿ s'eeⁿ.

⁴⁶Taachí Jesús dííⁿ yā despedir yeⁿe 'iiⁿyāⁿ s'eeⁿ, cueⁿé yā na yīicū miiⁿ chí caaⁿmaⁿngua'á yā.

⁴⁷Taachí chii 'da'a miiⁿ, barco miiⁿ ndúúcu discípulos 'āā cachíicá vmnaaⁿ yeⁿe nuūⁿnīⁿyáⁿā miiⁿ ní náávtaⁿa nuūⁿnīⁿyáⁿā miiⁿ canéé. Ní 'āā dámaāⁿ Jesús miiⁿ canee yā na yáⁿāa miiⁿ. ⁴⁸Ní Jesús n'diichí yā chí discípulos ní ch'eenu yā chii chí dííⁿ yā chí chiica barco miiⁿ ti 'yúúné miiⁿ ní contra yeⁿe naachí cachiica barco miiⁿ. Na nguεetiyaⁿ 'da'a ca, Jesús ndaa yā nanááⁿ discípulos, ní ngiicá yā vmnaaⁿ nuūⁿnīⁿ miiⁿ. Ní neⁿé yā cho'o daamá yā. ⁴⁹Taachí discípulos yeⁿe yā n'diichí yā Jesús chí ngiica yā cuaaⁿ vmnaaⁿ nuūⁿnīⁿ miiⁿ, discípulos nadacádíínuuⁿ yā chí 'áámá bulto ch'εete ní 'cai yiicu yā. ⁵⁰Ti nducyáácá discípulos n'diichí yā Jesús, ní dii'yá yā chí. Naati Jesús ní yaa'vī yā 'iiⁿyāⁿ s'eeⁿ ní caⁿa yā: Ndís'tiī saⁿā, nguéé 'va'á nī ti 'úú.

⁵¹Ní Jesús miiⁿ cuchée yā na barco miiⁿ naachi snúuⁿ discípulos. Ní canéé 'diííⁿ 'yúúné. Ní discípulos nadicádíínuuⁿ yā. De'e chúúcā ch'εete Ndyuūs. Ní che'e yīinú yā.

⁵²Vaanicadíínuuⁿ yeⁿe discípulos ní chεechí caati nguéé tuumicádíínuuⁿ yā vaadi n'giinu yeⁿe panes miiⁿ.

Jesús dííⁿ yā chí nduūvā yeⁿe 'iiⁿyāⁿ chí ngítá na yáⁿā Genesaret

(Mt. 14.34-36)

⁵³Cho'ó barco miiⁿ ndúúcu yā táámá lado yeⁿe nuūⁿnīⁿyáⁿā miiⁿ ní ndaá yā ná yáⁿāa Genesaret, naachí cachiichí yā barco miiⁿ cuaaⁿ 'diituú nuūⁿnīⁿyáⁿā. ⁵⁴Ní

taachi nacan'daa yā na barco miiⁿ, 'iiⁿyāⁿ s'eeⁿ chi 'āā ndaa yā miiⁿ ní ntiinaáⁿ yā Jesús miiⁿ. ⁵⁵Ní 'iiⁿyāⁿ s'eeⁿ caⁿ'á yā chii yā 'iiⁿyāⁿ yeⁿ'e núúⁿmáⁿ cuaaⁿ na yāāⁿ n'gaiyāāⁿ chi snééⁿ niiⁿnuúⁿ chi Jesús canéeⁿ yā. Ní 'iiⁿyāⁿ s'eeⁿ chinguai yā 'iiⁿyāⁿ chi ngítā. Ní tuca'a yā ndaa yā ndúúⁿcū 'iiⁿyāⁿ chi ngítā na cama yeⁿ'é yā ní candee yā 'iiⁿyāⁿ nanááⁿ Jesús miiⁿ. ⁵⁶Ní 'āā de'é nūⁿ lugar naachi cueⁿ'e Jesús miiⁿ, nduuti chi na yāāⁿ n'gaiyāāⁿ, o na yāāⁿ n'geete, o na campo, 'iiⁿyāⁿ ní íneeⁿ yā 'iiⁿyāⁿ chi ngítā cuaaⁿ cyúúⁿ. Ní di'cuítu yā Jesús chi ca'á yā lugar 'iiⁿyāⁿ chi ngítā chi cuuví tuu'ví yā maaⁿ rá naachí ndeetií yeⁿ'ē catecai Jesús. Ní nducyaaca 'iiⁿyāⁿ chí tuu'ví yā tiinūⁿ yeⁿ'e yā, nduūⁿva yeⁿ'e yā.

Chííⁿ chí diiⁿ chí ngii nuuⁿndi 'iiⁿyāⁿ

(Mt. 15.1-20)

7 Tuu'mi ní 'iiⁿyāⁿ fariseos ndúúⁿcū n'duuvi maestros yeⁿ'e ley n'daa yā na yāāⁿ Jerusalén, ní ndaa yā nanááⁿ Jesús. ²'Iiⁿyāⁿ s'eeⁿ ní n'diichí yā chí discípulos yeⁿ'e Jesús miiⁿ ngé'e yā ndúúⁿcū ta'a yā chí vaatí, ní vee nuuⁿndi yeⁿ'e yā ti nguée inaaⁿnu yā ta'a yā taachí āā cuée che'e yā tan'duucā chi ngaⁿ'a ley yeⁿ'é yā. ³Chúu chii caati 'iiⁿyāⁿ fariseos ndúúⁿcū nducyááca 'iiⁿyāⁿ Israel candí yā costumbres yeⁿ'é 'iiⁿyāⁿ ndiicúu s'eeⁿ chi nguée che'e yā ndúúⁿti chí nguée n'deēe cuuví nnaaⁿnú yā ta'a yā. ⁴Taachí indaa yā nii'vēē, nguée che'e yā nduuti chí nguée nnaaⁿnu yā ta'a yā n'deēe cuuví. Véé cá costumbres chí 'iiⁿyāⁿ s'eeⁿ icandiica yā, chí nnaaⁿnu yā vasos chí n'geē chí ngi'i yā, ndúúⁿcū

jarros, ndúúⁿcū taza yeⁿ'e cūū, ndúúⁿcū mesas. ⁵Tuu'mi ní 'iiⁿyāⁿ fariseos ndúúⁿcū maestros yeⁿ'e ley miiⁿ itinguunéeⁿ yā Jesús: ¿De'é cúúví chí nguée candí discípulos yeⁿ'e ní costumbres yeⁿ'e 'iiⁿyāⁿ ndiicúu s'eeⁿ? Nge'é yā ndúúⁿcū ta'a yā chí vaatí.

⁶Jesús nan'guεεcútaⁿ'a yā: N'dáacā caⁿ'a profeta Isaías miiⁿ ndii cuááⁿ vmnaaⁿ yeⁿ'e ndís'tií chí 'uūvi naaⁿ 'uūvi cheendí ní. Chuū caⁿ'a yā taachí dingúuⁿ yā 'túúcā:

'Iiⁿyāⁿ s'uúⁿ ní dich'eté yā 'úú ndúúⁿcū cheendi yā, naati staava yeⁿ'e yā yaⁿ'āi canee yeⁿ'e 'úú.

⁷Nguée de'é vee dichí'vē chí diiⁿ yā chí dich'eté yā 'úú, ti chííⁿ chí ngi'cueeⁿ yā ní ley yeⁿ'e saⁿ'ā yeⁿ'e iⁿ'yeeⁿdí cūū.

⁸Naati ndís'tií ní chí'néeⁿ ní leyes yeⁿ'e Ndyuūs ní candí ní costumbres yeⁿ'e saⁿ'ā yeⁿ'e iⁿ'yeeⁿdí cūū. Chííⁿ chí neenē n'deēe cuūví nnaaⁿnu yā jarros ndúúⁿcū vasos naachi ngi'i nuúⁿ yā, ndúúⁿcū chí diíⁿ yā ndúúⁿcū neenē n'deēe cá dendu'ū. Tanducuéⁿē chuū ní nguée dichí'vē.

⁹Tíicā caⁿ'a Jesús chii yā 'iiⁿyāⁿ s'eeⁿ: Ndis'tií ní cándii ní costumbres maáⁿ ní ní cáávā chuū i'neéⁿ ní 'áámá lado ley yeⁿ'e Ndyuūs. ¹⁰Moisés caⁿ'a yā ley 'cūū: Diíⁿ ní honrar chiidá ní ndúúⁿcū cheεcú ní ní 'iiⁿyāⁿ chí nguée n'dáacā ngaⁿ'a yā yeⁿ'e chiidá yā o yeⁿ'e cheεcú yā canée chí 'cuūvi yā. ¹¹Naati ndís'tií ní ngaⁿ'a ní chí nga'a ní permiso 'aama saⁿ'ā chí caaⁿ'maⁿ sá cuuvi sa chiida sa o cheεcu sa, 'tíicā: 'Úú ní nguée cuuvi nneé n'dií, caati nducuéⁿē chí

yeⁿé ní Corbán. (Nduudu Corbán miiⁿ ní neⁿe caaⁿmaⁿ chi ca'á yā Ndyuūs.) ¹²Ndúúti chi saⁿā ngaⁿa sa 'túúcā, tuu'mi ní ndís'tiī ngaⁿa nī chi 'āā ntéé nga'a nī lugar chi cunnee sá chiida sá ndúúcū chεεcu sá. ¹³Ndís'tiī ní diíⁿ nī chi 'āā ntéé dichíí'vē Nduudu yeⁿé Ndyuūs cáāvā costumbre chi ngo'ó yeⁿé 'áámá nī taama nī. Nééné n'deēe dendú'ū diíⁿ nī tan'dúúcā chuū.

¹⁴Caⁿa ntúūⁿ Jesús chii yā 'iiⁿyāⁿ taama vmnéⁿēē ní caⁿa yā: Cu'neeⁿ veeⁿ nducyaaca nī yeⁿé, ní tuumicadiinuⁿ nī. ¹⁵Mar 'áámá dendú'ū chi nge'e saⁿā chi 'āā cuéé che'e sa cuuví diiíⁿ chi 'āā ntéé dεεve sa. Chííⁿ chi nadicádíinuⁿ saⁿa na staava yeⁿé sa ní ican'dāā na staava yeⁿé sa chííⁿ idiííⁿ chi 'āā ntéé dεεve sa. ¹⁶Ndís'tiī chi véé veéⁿ nī, 'caandiveéⁿ nī.

¹⁷Taachí Jesús s'neeⁿ yā 'iiⁿyāⁿ miiⁿ ní sndaa yā va'ai yeⁿé discípulos yeⁿe yā, discípulos yeⁿé yā ní itiinguuneeⁿ yā: ¿Dε'ε néⁿé caaⁿmaⁿ ejemplo 'cūū?

¹⁸Ní caⁿa Jesús chii yā discípulos: ¿Áá 'tiicá ntúūⁿ ndís'tiī nguée ituumicadíinuⁿ nī? ¿Áá nguée deenu nī chi tanducuéⁿē chi nge'e saⁿā ní cungée cuaaⁿ chuva'āi ní nguée cuuví diiíⁿ chí saⁿā miiⁿ ní vaati sa, ¹⁹ti nguée indaā na staava yeⁿé sa naati na cheēti sa? Ní cuayiivi mífⁿ nan'dāā na cuerpo yeⁿé sa. 'Tíicā ní nducuéⁿē chi ngé'é saⁿā ní dεεve. Ní nguée diiíⁿ chi dinuuⁿndí yā. ²⁰Ní caⁿa Jesús: Chííⁿ chí can'dāā na staava yeⁿé sa chííⁿ chi diiíⁿ chi véé nuuⁿndi yeⁿé sa. ²¹Ti chiiⁿ cuaaⁿ cheēti sáⁿā chí neⁿe caaⁿmaⁿ chi yeⁿé na staava yeⁿé

sa, ican'dāā yeⁿé vaanicadíinuⁿ yeⁿe sa chi nguée n'daācā. Nadacadíinuⁿ yā yeⁿe chi caⁿa sa ndúúcū 'aama n'daataā o isáⁿā chi nguée yeⁿe yā, ndúúcū yeⁿe chi n'diichí yā 'áámá saⁿā o n'daataā ní duuchinééⁿ vi'í yā, ní ndúúcū chi 'caaⁿnúⁿ yā 'iiⁿyāⁿ, ²²ndúúcū yeⁿé chi ididuucú yā, ndúúcū yeⁿe chi neⁿe yā cosas chi véé yeⁿé taama yā, ndúúcū yeⁿé dendú'ū chi yeⁿe yáá'n'guiinuⁿ, ndúúcū yeⁿe chi nginnche'éf yā 'iiⁿyāⁿ, ndúúcū vicios, ndúúcū n'daataā chi caⁿā tá ndúúcū n'daataā chi duuchinee tá vi'í, ndúúcū yeⁿé sáⁿā chi caⁿa sa ndúúcū saⁿā chi duuchinee sa vi'í, ndúúcū yeⁿé chi n'diichí yā cosas chi nguée n'daācā, ndúúcū yeⁿé chi caaⁿmaⁿ taáⁿ yā contra yeⁿe Ndyuūs, ndúúcū yeⁿe chi dich'εetε maáⁿ yā 'iiⁿyāⁿ, ndúúcū nduudu chi nadicádíinuⁿ yā tan'duucā chi loco yā. ²³Tanducuéⁿē dendú'ū 'cūū chi nguée n'daācā ican'dāā yeⁿé na staava yeⁿé yā. Chííⁿ chi diiíⁿ chi véé nuuⁿndi yeⁿé yā.

'Áámá n'daataā chi nguée n'daataā

Israel tá chi i'teenú tá Jesús

(Mt. 15.21-28)

²⁴Nan'dāā Jesús miiⁿ ní cunaⁿa yā na yáⁿā Tiro ndúúcū Sidón. Ní chindāā yā na 'áámá va'ai. Ní nguée neⁿé yā chi 'iiⁿyāⁿ s'eeⁿ cadíinuⁿ yā naachi cánée yā naati nguée chii canúúⁿ n'de'ei yā. ²⁵Maaⁿncheetε tuumicadiinuⁿ 'áámá n'daataā chi véé 'áámá n'daataā lííⁿ daiya tá chi cánée ndúúcū espíritu yeⁿe yáá'n'guiinuⁿ. N'daata miiⁿ ní ndāā tá ní chiintii'yā tá ná ca'a Jesús miiⁿ. ²⁶N'daata mífⁿ ní nguée yeⁿé

ndaata yeⁿe 'iⁿ'yāⁿ Israel naati yeⁿe ndaataá yeⁿe 'iⁿ'yāⁿ yeⁿe yáⁿāa Sirofenicia. Ndaā tá ní chiica tá Jesús miⁿ chí tun'dáa yā espíritu yeⁿe yááⁿ'nguiinūuⁿ yeⁿe n'daataá 'lífⁿ daiya tá. ²⁷Naati Jesús miⁿ ní caⁿ'a yā chii yā n'daataá miⁿ: Ca'a di lugar chi che'e daiyá 'iⁿ'yāⁿ Israel vmnááⁿ vmnaaⁿ ti nguée cánée chí divií pan yeⁿe daiyá 'nū ní ca'á 'nū chi che'e 'yaānā.

²⁸Táⁿā miⁿ ní nan'guεεcútaⁿā tá: 'Tíficā, Señor, naati 'yaānā chi snée tī maaⁿ mesa miⁿ nge'ē tī cheeyéi pan chi ngée yeⁿe da'caiyāā.

²⁹Tuu'mi ní Jesús miⁿ ní caⁿ'a yā chii yā táⁿā: Dii n'daataá n'daācā ngaⁿ'a di. 'Āā cuuví naⁿ'a di. Espíritu yeⁿe yááⁿ'nguiinūuⁿ 'āā nan'dáā yeⁿe daiya di.

³⁰Taachí ndaā tá na vaacu tá, n'daataá 'lífⁿ miⁿ yeⁿe tá canee tá na cama ní candiiti tá. Ní espíritu yeⁿe yááⁿ'nguiinūuⁿ ní 'āā nan'dáā yeⁿe n'daata 'lífⁿ miⁿ.

**Jesús dííⁿ yā chi nduūvā yeⁿe
'áámá sáⁿā chi nguée ngaⁿ'a sa ndíí
nguée ndúú n'giindiveeⁿ rá sá**

³¹Jesús nan'daa ntuuⁿ yā yeⁿe yáⁿāa Tiro ndúúⁿcū yáⁿāa Sidón ndúúⁿcū na yāāⁿ s'eeⁿ yeⁿe yáⁿāa Decápolis. Ní ndaa yā na yáⁿāa chi 'díítuu nuūⁿnīⁿ'yáⁿā Galilea. ³²Miⁿ ní ndaa 'iⁿ'yāⁿ ndúúⁿcū 'áámá saⁿā chi cheetúú chi nguée ngii ngaⁿā sa n'dáacā. Ní chiacá sá Jesús chi cun'duú yā ta'a yā vmnaaⁿ yeⁿe sa.

³³Jesús candée yā saⁿā miⁿ 'áámá lado naachi 'āā ntée snée 'iⁿ'yāⁿ ní tingúúⁿ ndutá'a yā na veeⁿ sá ní chiidaiⁿ yā ní s'neeⁿ nduta'a yā na ch'iia sa. ³⁴Ní ch'íinu yā nanguuvi,

ní ndaa niiⁿnúⁿ yā ní caⁿ'a yā: Efata, chi neⁿe caaⁿ'maⁿ na nduudu yeⁿé, n'guaaⁿ di.

³⁵Ndúúⁿcū chuū ní n'guaaⁿ veeⁿ sá ndúúⁿcū ch'iia sa ní nduūvā yeⁿe sa. Ní 'āā chí caⁿ'a n'dáacā sā.

³⁶Jesús ní caⁿ'a yā chii yā 'iⁿ'yāⁿ s'eeⁿ chi nguée cuuvi yā mar 'áámá 'iⁿ'yāⁿ. 'Áará chi neenē ca'a cuidado yā 'iⁿ'yāⁿ s'eeⁿ chi nguée cuuvi yā 'iⁿ'yāⁿ, 'iⁿ'yāⁿ s'eeⁿ ní caⁿ'a yā chii yā n'dee n'dái 'iⁿ'yāⁿ. ³⁷Ní 'iⁿ'yāⁿ s'eeⁿ ní neene cheⁿe yiinú yā, ní caⁿ'a yā: 'Iⁿ'yāⁿ miⁿ ní tanducueⁿē idin'daacá yā, ndíí 'iⁿ'yāⁿ chi cheetúú ní idíí yā chí n'giindiveeⁿ yā. Ní 'iⁿ'yāⁿ chi nguée ngaⁿ'a yā ní díí yā chí ngíí ngaⁿ'a yā.

**Jesús ca'á yā che'e cuūuⁿ mil 'iⁿ'yāⁿ
(Mt. 15.32-39)**

8 Tiempo 'cūū neenē yááⁿ 'iⁿ'yāⁿ nduuvidaama yā ndúúⁿcū Jesús. Nguée de'ē chi ca'á yā chí che'e 'iⁿ'yāⁿ s'uuⁿ. Tuu'mi Jesús 'caí yā discípulos yeⁿe yā, ní caⁿ'á yā chii yā discípulos: ²Úú ní ya'ái cáāvā 'iⁿ'yāⁿ s'tíí, tí 'āā 'iinu nguūvī snée yā nduucú na lugar 'cūū ní nguée de'ē vee chi che'ē yā. ³Ndúúⁿti chi nadicho'ó 'iⁿ'yāⁿ na vaacu yā ní nguée che'ē yā, 'áatīi cuuvi cúúnú yā cuaaⁿ cyúúní chi naⁿ'a yā ti náⁿ'a yā ní yaⁿāi ndiicá yā.

⁴Discípulos ní nan'guεεcútaⁿā yā: ¿Taaca ca'á nī chi chée'ē 'iⁿ'yāⁿ na lugar naachi nguée ch'εetinée 'iⁿ'yāⁿ?

⁵Jesús miⁿ ntiinguuneeⁿ yā discípulos: ¿Áá n'dee cá panes yeⁿé nī véé? Discípulos ní caⁿ'a yā: Tá ndeēchē vee.

⁶Tuu'mi ní chii Jesús 'iⁿ'yāⁿ s'eeⁿ chi 'cuεeté yā na yáⁿāa miⁿ. Ní

Jesús sta'á yā ndēēchē panes miiⁿ. Ca'á yā gracias Ndyuūs cáávā panes miiⁿ. Ní n'dee yā panes miiⁿ ní ca'á yā discipulos yeⁿé yā. Ní discipulos ca'á yā che'e 'iiⁿ'yāⁿ s'uuⁿ. ⁷Véé ntúūⁿ n'duuvī 'yaācā. Jesús sta'á yā 'yaācā ní ca'á yā gracias Ndyuūs cáávā 'yaācā ní ca'á yā discipulos chi ca'á ntúūⁿ yā 'yaācā 'iiⁿ'yāⁿ s'uuⁿ. ⁸Nducyaaca 'iiⁿ'yāⁿ che'e yā ní chiitu 'iiⁿ'yāⁿ. Ní nin'guaáⁿ yā tá ndēēchē 'cuēētēe chí nángaava. ⁹'Iiⁿ'yāⁿ chi che'e yā ní ngii yā tan'dúú cuūⁿ mil 'iiⁿ'yāⁿ. Tuu'mi ní Jesús miiⁿ ní dííⁿ yā despedir yeⁿé 'iiⁿ'yāⁿ s'uuⁿ. ¹⁰Ní Jesús ndaa yā na 'aama barco ndúúⁿcū discipulos yeⁿe yā ní cueⁿé yā na yáⁿāa chi nguuvī Dalmanuta.

'Iiⁿ'yāⁿ fariseos chiica yā Jesús chi ch'iⁿi yā 'aama vaadi n'giinu

(Mt. 16.1-4; Lc. 12.54-56)

¹¹Tuu'mi ní ndaā 'iiⁿ'yāⁿ fariseos ní tucá'a yā caⁿ'a yā n'dee n'dái ndúúⁿcū Jesús. Neⁿé yā n'diichi yā táacā caaⁿ'maⁿ Jesús. Chiica yā Jesús 'áámá vaadi n'giinu yeⁿé na va'ai chēeti nguuvī. ¹²Jesús nandaa yiinú yā tí ndaachíi 'iinu yā na staava yeⁿé yā, ní caⁿ'a yā: ¿De'e cúúví chí ngiica 'iiⁿ'yāⁿ s'uuⁿ 'áámá señal yeⁿé vaadi n'giinu? 'Úú ngaⁿ'á cuaacu chi nguéé ca'á mar 'áámá señal 'iiⁿ'yāⁿ s'uuⁿ.

¹³Cuayiivi chi caⁿ'a yā chii yā 'iiⁿ'yāⁿ s'uuⁿ chuū, Jesús nanguēecunée yā sndaa yā na barco miiⁿ. Ní cueⁿe yā taama lado nuūⁿnīⁿyáⁿā miiⁿ.

Levadura yeⁿe 'iiⁿ'yāⁿ fariseos

(Mt. 16.5-12)

¹⁴Discipulos chinaáⁿ yā chi candēe yā chi che'e yā, naati ndēe

yā 'aama n'dyáⁿā pan ndúúⁿcū 'iiⁿ'yāⁿ s'eeⁿ na barco miiⁿ. ¹⁵Tuu'mi ní Jesús caⁿ'á yā chii yā discipulos: Cuin'diichí nī, cundēe nī cuidado yeⁿe levadura yeⁿe 'iiⁿ'yāⁿ fariseos ndúúⁿcū levadura yeⁿe rey Herodes. Levadura miiⁿ ní chííⁿ chí dííⁿ yā chi nguéé n'daācā.

¹⁶Discipulos ní tucá'a yā caⁿ'a yā nguaaⁿ maáⁿ yā: ¿Áa chi nguēe ndēe yú pan chiiⁿ chí 'tiicā ngaⁿ'a yā?

¹⁷Jesús miiⁿ ní déenu yā chí ngaⁿ'ā discipulos nguaaⁿ maáⁿ yā ní caⁿ'a yā: ¿De'e cúúví chí ngaⁿ'a nī chí cáávā chí nguéé ndēe nī pan? ¿Áa cuéé tuumicadiinúúⁿ nī? ¿Áa cuéé i'téenu nī na staava yeⁿe nī?

¹⁸¿Áa nguéé inaaⁿ ndís'tii ndúúⁿcū nduutináaⁿ nī, ndíí nguéé ndúú n'giindiveeⁿ rá nī ndúúⁿcū veéⁿ nī? ¿Áa nguéé inan'gaacú nī? ¹⁹Taachí n'dee ndu'u nyuⁿ'u panes miiⁿ chí che'e nyuⁿ'u mil 'iiⁿ'yāⁿ, ¿áa n'dee 'cuéētēe ca pan nángaava? ¿Áa nin'guaáⁿ nī? 'Iiⁿ'yāⁿ s'eeⁿ ní caⁿ'a yā: Ta ndiichuuvī.

²⁰Ní caⁿ'a Jesús: Taachí ca'á ndēēchē panes miiⁿ che'e cuūⁿ mil 'iiⁿ'yāⁿ, ¿áa n'dee 'cuēētēe ca nin'guaáⁿ nī? Discipulos ní caⁿ'á yā: Tá ndēēchē.

²¹Tuu'mi ní Jesús caⁿ'a yā: ¿Áa cuéé tuumicadiinúúⁿ nī?

Jesús dííⁿ yā chi nduūvā yeⁿe 'áámá 'iiⁿ'yāⁿ chi ngueenáaⁿ na yāāⁿ Betsaida

²²Cuayiivi miiⁿ mí ndaā Jesús ndúúⁿcū discipulos yeⁿe yā na yāāⁿ Betsaida. Náⁿ'ā 'iiⁿ'yāⁿ ní ndēe yā 'áámá chí ngueenáaⁿ nanáaⁿ Jesús ní ngiicá yā Jesús chí tuu'vi yā 'iiⁿ'yāⁿ chí ngueenáaⁿ. ²³Jesús

sta'á yā ta'ā chi ngueenááⁿ ní tun'dáa yā 'i'iⁿyāⁿ 'áámá lado yeⁿe yááⁿ 'l'íⁿ miiⁿ. S'neeⁿ yā nuuⁿnīⁿ daiⁿ yā na nduutinááⁿ sa ní snduu tá'a yā vmnaaⁿ yeⁿe saⁿāⁿ miiⁿ ní itinguunéeⁿ yā saⁿāⁿ ndúúti chi 'āa inaaⁿ sa 'tēē. ²⁴Chi ngueenááⁿ miiⁿ ní ch'iinu sa, ní caⁿā sa: Inaaⁿ 'áámá saⁿā tan'dúúca chi 'áámá yāⁿā 'tíicā saⁿā, naati ngiicā sá.

²⁵Tuu'mi ní Jesús miiⁿ ní sn'duu ntúuⁿ yā ta'a yā na nduutináaⁿ saⁿā miiⁿ. Saⁿā miiⁿ ní ch'iínu n'daācā sa ní nduuvī n'dai nduutináaⁿ sa. 'Āa tanducuéⁿē inaaⁿ n'dáacā sa. ²⁶Tuu'mi ní Jesús miiⁿ dichó'o yā saⁿā chí cuinaⁿa sa na vaacu sa. Ní caⁿa yā: Díí, nguée cundaā di núúⁿmáⁿ na yáāⁿ miiⁿ ní cuuvi di chuū mar 'áámá 'i'iⁿyāⁿ.

Pedro ní caⁿā cuaacu sá chí Jesús chí Cristo yā

(Mt. 16.13-20; Lc. 9.18-21)

²⁷Cuayiivi miiⁿ Jesús ndúúcu discípulos yeⁿé yā cheⁿé yā na yáāⁿ s'eeⁿ yeⁿe yāⁿāa Cesarea ndúúcu yāāⁿ s'eeⁿ yeⁿe yāⁿāa Filipo. Taachí snúuⁿ yā yúúní ntinguuneeⁿ Jesús miiⁿ discípulos yeⁿe yā, ní caⁿa yā: ¿Du'ū 'úú ngaⁿa 'i'iⁿyāⁿ?

²⁸Discípulos nan'guēcútaⁿa yā: Náⁿā 'i'iⁿyāⁿ ní ngaⁿa yā chí díí chí Juan chí cheedínuuⁿnīⁿ díí. Náⁿa yā ní ngaⁿa yā chí díí chí profeta Elías díí. Náⁿa yā ní ngaⁿa yā chí díí chí 'áámá profeta díí.

²⁹Tuu'mi ní Jesús ntinguunéeⁿ yā discípulos: ¿Du'ū 'úú ngaⁿá ndís'tíi?

Tuu'mi ní Pedro miiⁿ ní caⁿā sa: N'díi chí Cristo chí yeⁿe Ndyuūs.

³⁰Jesús ní caⁿa yā chí nguée cuuvi yā mar 'áámá 'i'iⁿyāⁿ chuū.

Jesús ngaⁿa yā yeⁿe vaadī n'gii yeⁿe maáⁿ yā

(Mt. 16.21-28; Lc. 9.22-27)

³¹Tuu'mi ní Jesús tuca'á yā chí'cueeⁿ yā yeⁿē Saⁿā chí Daiya Dendyuūs. Ní neenē 'cueenu sa cuuvi. 'I'iⁿyāⁿ chiiduú n'geetē ndúúcu 'i'iⁿyāⁿ ndiicúu chí ngaⁿā ntiiⁿnyuⁿ yeⁿē yáacu miiⁿ ndúúcu maestros yeⁿe ley, 'āa ntéé neⁿe yā saⁿā. Ní caⁿa yā chíi yā 'i'iⁿyāⁿ s'eeⁿ chí 'caaⁿnúⁿ yā saⁿā, naati saⁿā miiⁿ ní cheeti 'i'inū nguuvī nduuchi sa yeⁿe nguaaⁿ tináⁿā. ³²Úú ní ngaⁿá cuaācú chuū. Tuu'mi ní Pedro miiⁿ ní cueⁿe sa ndúúcu Jesús 'áámá lado ní tucá'a sa yaa'vi neeⁿ sa Jesús. ³³Naati Jesús nan'guēcundíi yā ní n'diichí yā discípulos ní yaa'vi neeⁿ yā Pedro ní caⁿa yā: Díí, Pedro, tan'dúúca yááⁿn'guiinūuⁿ, 'tíicā dii. Cuvíi di yeⁿē 'úú, ti dii ní nguée nadicádífnuuⁿ di tan'dúúca Ndyuūs nadicádífnuuⁿ yā, ti nadicádífnuuⁿ di yeⁿe dendu'ū yeⁿe iⁿ'yeeⁿdí 'cūū.

³⁴Tuu'mi ní Jesús yaa'ví yā discípulos yeⁿe yā ndúúcu tanáⁿā 'i'iⁿyāⁿ, ní caⁿa yā chíi yā 'i'iⁿyāⁿ s'uuⁿ: Ndúúti chí 'áámá 'i'iⁿyāⁿ neⁿe yā caⁿa yā nduucú, canée chí cu'néeⁿ maáⁿ yā tanducuéⁿe dendu'ū chí véé yeⁿe yā ní cuta'á yā cruz yeⁿé yā chí tan'dúúca chí 'cueenu taaví yā cuuvi cucáāvā 'úú 'iicu caⁿá yā nduucú. ³⁵Tí nducyáácá 'i'iⁿyāⁿ chí neⁿe yā nadanguáⁿāi yā vida yeⁿe maáⁿ yā na iⁿ'yeeⁿdí 'cūū ní dindaí taama vida yeⁿé yā nanááⁿ Ndyuūs. Ní nducyáácá 'i'iⁿyāⁿ chí dindaí yā vida yeⁿe yā cucáāvā 'úú ní cucáāvā nduudu cuaacu chí nguaⁿai 'i'iⁿyāⁿ,

tuu'mi ní nandaacá yā vida yeⁿe yā nanááⁿ Ndyuūs. ³⁶¿De'ē dichíí'vē yeⁿe saⁿā ndúúti chí diiⁿ sa ganar nducuéⁿē chí véé iⁿ'yeeⁿdí' cūū ní dindaí sa alma yeⁿē sa? ³⁷¿Áá n'deēē cuuvi nadíí'vē sa 'áámá 'iiⁿ'yāⁿ cucáávā alma yeⁿē sa? ³⁸Nduuti chí 'áámá 'iiⁿ'yāⁿ cuuvi 'cuináaⁿ yā yeⁿe 'úú ndúúcu nduudu yeⁿé nanááⁿ 'iiⁿ'yāⁿ chí véé nuuⁿndi yeⁿe yā, ní nguéé n'daācā idiíⁿ yā, 'tiicá ntúūⁿ 'úú chí Saⁿa chí Daiyá Ndyuūs, cuuví 'cuináaⁿ yeⁿe yā taachi ndaá ndúúcu dēēve ch'ēte n'dai yeⁿē Chiidá ndúúcu ángeles chí dēēve yā.

9 Jesús ní caⁿa yā chíi yā 'iiⁿ'yāⁿ s'eeⁿ: Cuaacu níⁿ'nyúⁿ ngaⁿá, chí véé ná'a ní chí snée ní 'muuⁿ chí nguéé 'cuuví ní taanduvéé ndii snaaⁿ ní naachí Ndyuūs ngaⁿa ntiⁿ'nyúⁿ yā yeⁿē chí ndaa yā ndúúcu poder yeⁿé yā.

Jesús n'daaⁿ yā cuerpo yeⁿe maáⁿ yā

(Mt. 17.1-13; Lc. 9.28-36)

²Cho'ó jaāⁿ nguuví, ní Jesús candéē yā Pedro, ndúúcu Jacobo, ndúúcu Juan. Ní cheⁿe yā ndúúcu 'iiⁿ'yāⁿ s'eeⁿ na 'áámá yiicū yaacu. Ní miiⁿ ní Jesús n'daaⁿ yā cuerpo yeⁿe yā nanááⁿ 'iiⁿ'yāⁿ s'eeⁿ. ³Catecai yā nguēcundāā ngii n'gai ní cuéē tan'dúúcā nieve. Mar 'áámá 'iiⁿ'yāⁿ yeⁿe iⁿ'yeeⁿdí' cūū nguéé cuuvi naáⁿnú yā 'áámá tীনūⁿ táátii cuéē. ⁴Ní che'enaāⁿ sáⁿā profeta Elías ndúúcu Moisés, 'iiⁿ'yāⁿ s'eeⁿ chí ch'ii ndíí cuááⁿ vmnaaⁿ. Ní ndeé yā ndúúcu Jesús. ⁵Tuu'mi ní Pedro miiⁿ ní caⁿa sá chíi sá Jesús: N'díí Maestro, de'ē chúúcā n'daācā yeⁿe yú chí 'cuētinee yú 'muuⁿ. Din'dái n'ū iinū va'ai lííⁿ: 'Áámá yeⁿé ní,

táámá yeⁿe Moisés, táámá yeⁿe profeta Elías.

⁶Discípulos ní di'yáá yā chíi. Ní Pedro miiⁿ nguēē deenu sa de'ē chí ngaⁿa sa. ⁷Tuu'mi ní ndaā vmnááⁿ yeⁿe 'iiⁿ'yāⁿ s'eeⁿ 'áámá meēēⁿ ní sn'dii 'iiⁿ'yāⁿ s'eeⁿ. Ní discípulos ch'iindiveēⁿ yā 'áámá nduudu chí ngaⁿa nguaaⁿ meēēⁿ miiⁿ chí ngaⁿa: Sáⁿa 'cūū Saⁿā Daiyá chí neⁿe n'dái. Cu'neeⁿ veēⁿ ní yeⁿē sa.

⁸Hora míⁿ nūūⁿ, taachi discípulos n'diichí yā, 'āā ntéé du'ū vee snée ndúúcu yā, 'āā dámaāⁿ Jesús miiⁿ nduucú yā.

⁹Taachí nangua'á yā yeⁿe yiicū miiⁿ na yúúní miiⁿ naachi cunaⁿa yā Jesús caⁿa yā chíi yā 'iiⁿ'yāⁿ s'eeⁿ chí nguéé caaⁿmán yā yeⁿe chí n'diichi yā, ndíí taachi Saⁿa chí Daiya Ndyuūs nduuchi sa yeⁿē nguaaⁿ tináⁿā. ¹⁰Cáávā chuū nanguaín'daí yā chí canúúⁿ n'de'ei nguaaⁿ maáⁿ yā, naati ntiinguunéeⁿ yā nguaaⁿ maáⁿ yā ¿de'ē chí 'túúcā chí nduuchi sa yeⁿē nguaaⁿ tináⁿā? ¹¹Tuu'mi ní discípulos ntiinguunéeⁿ yā Jesús ní caⁿa yā: ¿De'ē cúúví chí ngaⁿā maestros yeⁿe ley chí Elías miiⁿ canéé chí ndaa vmnaaⁿ sa?

¹²Jesús miiⁿ nan'guēcútaⁿa yā ní caⁿa yā chíi yā discípulos: Cuaacu níⁿ'nyúⁿ chí Elías miiⁿ 'āā ndaá sá vmnááⁿ vmnaaⁿ ní diiⁿ sa n'neē sa tanducuéⁿē yeⁿé Ndyuūs. ¿De'ē ngaⁿā naachi canéé nguūⁿ na libro yeⁿe Ndyuūs yeⁿe Saⁿā chí Daiya Ndyuūs? Ngaⁿa chí canéé chí 'cueenu sá cuuvi ní 'iiⁿ'yāⁿ s'eeⁿ dííⁿ yā despreciar saⁿā ní nguéé neⁿe yā saⁿā. ¹³Naati maaⁿ ní ngaⁿá chí 'āā ndaā profeta Elías miiⁿ ní 'iiⁿ'yāⁿ s'eeⁿ 'āā dííⁿ yā chí neⁿe yā ndúúcu

sa, tan'dúúcā chí ngaⁿa naachi canéé nguūⁿ na libro yeⁿé Ndyuūs yeⁿē chí canéé chí chó'ōo.

Jesús divii yā espíritu yeⁿe yááⁿn'guiinūuⁿ yeⁿē 'aama saⁿā 'dííⁿ
(Mt. 17.14-21; Lc. 9.37-43)

¹⁴ Cuayiivi mííⁿ Jesús ndaa yā naachi snéé discípulos yeⁿe yā. N'diichí yā neené n'deēe 'iiⁿyāⁿ cuaaⁿ 'diituú discípulos yeⁿé yā. Véé ntūūⁿ maestros yeⁿe ley miiⁿ chí ndeé yā n'deēe n'dái ndúúcū discípulos. ¹⁵ Ní taachi n'díichi nducyaaca yā Jesús miiⁿ cueⁿe yiinu yā ní ngéenu yā ní ndáa yā nanááⁿ Jesús chí dííⁿ yā saludar Jesús. ¹⁶ Tuu'mi ní Jesús ntiinguuneeⁿ yā 'iiⁿyāⁿ s'eeⁿ: ¿De'é ngaⁿa nī ndúúcū 'iiⁿyāⁿ s'tíí?

¹⁷ Áamá chéé 'iiⁿyāⁿ s'eeⁿ chí snée yā miiⁿ nn'guaacútaⁿ a yā: N'díí Maestro, ndeé 'aama daiyá, chí canéé sá ndúúcū 'áamá espíritu yeⁿe yááⁿn'guiinūuⁿ chí dííⁿ chí nguéé ngíí ngaⁿā sa. ¹⁸ Āa tií nūuⁿ naachi canéé sá espíritu 'cūū ní sta'a sáⁿā ní n'gēecu sáⁿā ná yáⁿāa. Ní saⁿā miiⁿ ní ican'dáa yáíⁿ cuaaⁿ cheendi sa. Ní n'gēecu r'íí 'dííⁿyúⁿ sá. Chífⁿ chí neené nduuví duūvā sa. Āa ngíí discípulos yeⁿe nī chí tun'dáa yā espíritu yeⁿe yááⁿn'guiinūuⁿ, naati nguéé cuuvi dííⁿ yā.

¹⁹ Jesús nan'guēcútaⁿ a yā yeⁿe 'iiⁿyāⁿ s'eeⁿ: Ndís'tíí, 'iiⁿyāⁿ chí nguéé i'téenu nī. ¿Áá 'naaⁿ tiempo canéé chí cuneé ndúúcū ndís'tíí? ¿Áá 'naaⁿ tiempo canéé chí cucheé ndúúcu nī? Candée nī 'muuⁿ saⁿā 'dííⁿ.

²⁰ Cheⁿe yā nguai yā saⁿā 'dííⁿ miiⁿ. Ní taachí n'diichi espíritu

yeⁿe yááⁿn'guiinūuⁿ Jesús miiⁿ, yááⁿn'guiinūuⁿ miiⁿ chindeeve saⁿa 'dííⁿ miiⁿ. Chēecu ndáa sa ní n'gee yáíⁿ cuááⁿ cheendi sa. ²¹ Tuu'mi ní Jesús ntiinguuneeⁿ yā chiida saⁿā 'dííⁿ: ¿Áá 'naaⁿ canee sa ndúúcū ca'ai 'cūū? Chiida sa miiⁿ ní caⁿa yā: Ndii chí 'lííⁿ sa. ²² Nééné n'deēe cuuví espíritu yeⁿe yááⁿn'guiinūuⁿ miiⁿ ní n'gaanuuⁿ sáⁿā nguaaⁿ nguuchi yáⁿā ní nguaaⁿ nuūⁿnīⁿ va, chí neⁿe 'caāⁿnūⁿ saⁿā. N'díí Jesús, ndúúti chí cúúví dííⁿ nī 'tēe de'é chí cunnee nī nús'uu, ní nuuⁿ nnee ya'āi 'iinú nī nús'uu ní cunnee nī nús'uu.

²³ Jesús caⁿa yā chíi yā saⁿā miiⁿ: Nduuti chí cuuvi cu'téenu di, tuu'mi ní tanducuéⁿē ní cuuvi cáāvā 'iiⁿyāⁿ chí i'téenu yā.

²⁴ Tuu'mi ní chiida sa nééné 'caī ní ngēcú yā. Ní caⁿa yā: 'Úú cu'teenú. Cunnee nī 'úú ní cuuvi cu'teenú ca.

²⁵ Taachí Jesús n'diichí yā chí neené n'deēe 'iiⁿyāⁿ nduuvidaamá yā, ngaⁿa diitú yā ndúúcū espíritu yeⁿe yááⁿn'guiinūuⁿ ní caⁿa yā: Díí espíritu chí dííⁿ chí nguéé ngíí ngaⁿa ní nguéé n'giindiveéⁿ 'úú cuuví díí chí nan'dáa di yeⁿe cuerpo yeⁿe saⁿā 'dííⁿ 'cūū, ní 'āa ntéé nguēcunee di cundaā di na cuerpo yeⁿē sa.

²⁶ Espíritu miiⁿ ní chindeeve saⁿā 'dííⁿ miiⁿ ní chēcundáa saⁿā taama vmnéⁿēe ní nan'daā yeⁿē sa. S'neeⁿ saⁿā 'dííⁿ miiⁿ tan'dúúcā chí ch'ii sa. Taachí 'iiⁿyāⁿ s'uuⁿ n'diichí yā saⁿā 'dííⁿ miiⁿ neené 'yaaⁿ yā caⁿa yā chí n'díí sá. ²⁷ Naati Jesús miiⁿ ní sta'á yā ta'ā sa, ní nadicuéⁿe yā saⁿā. Saⁿā 'dííⁿ miiⁿ ní chéendii sa.

²⁸ Cuayiivi ní Jesús sndaa yā na 'áamá va'ai, ní discípulos yeⁿe yā

ntiinguunéeⁿ yā Jesús taachi snée yā 'áamá lado: ¿De'ē cúúví chí nús'uu nguée chitundáa 'nū espíritu yeⁿe yáán'nguiniūuⁿ yeⁿe saⁿ'ā 'dííⁿ?

²⁹Ní Jesús caⁿ'a yā: Espíritu 'cūū chí 'túúca nguée nan'daā yeⁿe 'iíⁿ'yāⁿ chí 'tiicá nūuⁿ caati dámaāⁿ chí ngaⁿ'angua'á yā ndúúcu chí nguée 'āa ca'diinú yā nguuví chí ngaⁿ'angua'á yā.

Jesús ngaⁿ'a ntúuⁿ yā yeⁿe vaadi n'gii yeⁿe yā

(Mt. 17.22-23; Lc. 9.43-45)

³⁰Taachí can'daā Jesús ndúúcu discípulos na yáāⁿ miiⁿ, cho'ó yā na yáⁿ'āa Galilea. Jesús miiⁿ nguée neⁿe yā chí cadiinuuⁿ mar 'áamá 'iíⁿ'yāⁿ chí canee yā miiⁿ, ³¹ti Jesús miiⁿ ní ngi'cueeⁿ yā discípulos yeⁿe yā chí Saⁿ'a chí Daiya Dendyuūs miiⁿ ní canée chí ca'a yā sáⁿ'ā na ta'āa 'iíⁿ'yāⁿ. Ní canée chí 'caaⁿ'núⁿ yā saⁿ'ā. Ní taachí 'āa 'cuuví sa ch'etí 'iinū nguuví canée chí nduuchi sa yeⁿe nguuaⁿ tináⁿ'ā. ³²Naati discípulos ní nguée túúmícadíínuuⁿ yā chí ngaⁿ'a Jesús. Ní 'va'a yā chí ntínguuneeⁿ yā yeⁿe chūū.

¿Du'ū cá chí ch'ete ca?

(Mt. 18.1-5; Lc. 9.46-48)

³³Tuu'mi ní ndaa Jesús ndúúcu discípulos yeⁿe yā na yáāⁿ Capernaum; ní taachí ndaa yā 'áamá va'ai, Jesús ntiinguuneeⁿ yā discípulos: ¿De'ē ngaⁿ'a ndís'tií cuaaⁿ cyúúní?

³⁴Discípulos ní 'āa ntée caⁿ'á yā mar 'áamá ti cuaaⁿ cyúúní mííⁿ ntínguuneeⁿ vi'í yā ch'ee ca yā chí ch'ete ca yā. ³⁵Tuu'mi ní Jesús miiⁿ

ch'iindí yā ní yaa'ví yā ndiichúúví discípulos yeⁿ'é yā chí cuchii yā nanáaⁿ yā. Ní cāⁿ'a yā: Ndúúti chí 'áamá ndís'tií neⁿe nī cuuví nī cuááⁿ vmnaaⁿ, canée chí cuuví nī ndii cuayiivi yeⁿ'ē nducyáácá yā ní ndiicuuⁿ ca nī. Ní canée chí dichííⁿ v'ē nducyaaca 'iíⁿ'yāⁿ.

³⁶Tuu'mi ní Jesús sta'á yā 'áamá saⁿ'ā 'lííⁿ ní s'neeⁿ yā naavtáⁿ'ā yeⁿ'e discípulos. Ní sta'á yā saⁿ'a 'lííⁿ miiⁿ ní ca'nuúⁿ yā saⁿ'ā. Ní caⁿ'a yā chíi yā discípulos yeⁿ'e yā: ³⁷'iíⁿ'yāⁿ chí 'cuaáⁿ yā saⁿ'ā 'lííⁿ 'túúca, nduūcū chí duuchí, 'iíⁿ'yāⁿ miiⁿ ní 'cuaáⁿ yā 'úú. 'iíⁿ'yāⁿ chí 'cuaáⁿ yā 'úú, nguée dámaāⁿ 'úú cuaáⁿ yā, naati 'cuaáⁿ ntúuⁿ yā 'iíⁿ'yāⁿ chí dich'ó yā 'úú.

Yeⁿ'e 'iíⁿ'yāⁿ chí lado yeⁿ'e Jesús

(Mt. 10.42; Lc. 9.49-50)

³⁸Tuu'mi ní Juan miiⁿ ní caⁿ'a sa chíi sa Jesús: N'díí Maestro, n'diichí 'nū 'áamá saⁿ'ā chí divíí sa espíritus yeⁿ'e yáán'guiniūuⁿ yeⁿ'e 'iíⁿ'yāⁿ ndúúcu chí dúúchí nī, naati sáⁿ'ā miiⁿ ní nguée cachiicá sá ndúúcu nús'uu. Nguée 'cuúⁿ 'nū chí diíⁿ sa 'tíicā.

³⁹Jesús caⁿ'a yā chíi yā discípulos: Ndís'tií 'cuáaⁿ nī chí diíⁿ sa 'túúca; ti nguée v'ee mar 'áamá 'iíⁿ'yāⁿ chí dííⁿ yā vaadi n'giinu ndúúcu chí duuchí, ní cuayiivi cúúví caaⁿ'máⁿ yā chí 'úú ní nguée n'daācā 'úú. ⁴⁰Ti 'iíⁿ'yāⁿ chí nguée idiíⁿ yā contra yeⁿ'e s'uūuⁿ, ní yeⁿ'é yā favor yeⁿ'ē yú. ⁴¹Āa du'ú nūuⁿ 'iíⁿ'yāⁿ chí té yā ndís'tií 'áará chí 'áamá vaso nuūⁿ'nīⁿ ndúúcu chí duuchí, ti ndís'tií yeⁿ'e Cristo ndís'tií, cuaacu nííⁿ'nyúⁿ 'iíⁿ'yāⁿ miiⁿ ní v'ee chí ndaācā chí cuuví yeⁿ'e yā ná va'ai cheeti nguuví.

**Ye[']e dendu[']ū chi dii['] chi 'ii[']yā['] dii[']
nuu[']ndi['] yā**

(Mt. 18.6-9; Lc. 17.1-2)

⁴²Tuu[']mi ní ca[']a Jesús: 'Āā du[']ú nūu['] 'ii[']yā['] chi dii['] yā chi 'áámá chēē chi n'gaiyāā chi i'téenu yā 'úú dii['] yā nuu[']ndi, n'daācā ca cáāvā 'ii[']yā['] mii['] chi 'ii[']yā['] s'ee['] cāchiichí yā 'áámá tuūu yúúdu['] chí inguí 'ii[']yā['] na daandu yā ní canuú['] yā 'ii[']yā['] mii['] naachí yaānuú['] ye[']e nuū[']nī[']yā[']ā. ⁴³Ní ndúúti chi ta'ā di idiii['] chí dinuu[']ndi di, n'daacā ca chí 'caaca di ta'a di ní divíi di. N'daacā ca chí ndaā di ndúúcū 'aama ta'á nūu['] di ná vida cue[']e daā[']ma['], ní nguée['] chi ca[']ā di ndúúcū 'uūvī ta'a di na infierno, naachí nguūchí ya[']ā mii['] ní nguée['] ín'tuūvī. ⁴⁴Lugar mii['] naachi nguée['] n'gii n'daāa ní nguuchi ya[']ā mii['] ní 'āā ntée['] n'tuūvī. ⁴⁵Ndúúti chi ca'a di idiii['] chí dinuu[']ndi di 'caaca ntúu['] di ní divíi di. N'daacā ca chí ndaa di lo'ō di na vida cue[']e daā[']ma['] mii['], nguée['] ti chí ca[']ā di ndúúcū 'uuvī ca'a di na infierno naachí nguuchi yā[']ā mii['] chi nguée['] ín'tuūvī. ⁴⁶Lugar mii['] ní naachi nguée['] n'gii n'daāa ní nguuchi yā[']ā mii['] 'āā ntée['] ín'tuūvī. ⁴⁷Ndúúti chi nduutināa['] di dii['] chí idinuu[']ndi di, tuu[']mi ní tun'dáa di; ti n'dáācā ca chi ndāa di ndúúcū 'áámá nduutināa['] naachí Ndyuūs nga[']a nti[']nyú['] yā, nguée['] ti chí ca[']ā di ndúúcū nduu 'uuvi nduutināa['] di na infierno, ⁴⁸naachi n'daāa míí['] nguée['] n'gíí ti ní nguuchi yā[']ā mii['] 'āā ntée['] ín'tuūvī tan'díí nūu['].

⁴⁹Ti nducyaaca 'ii[']yā['] chi i'téenu yā canée['] chí n'diichi née[']

yā 'cuenú yā cuuvi tan'dúúcā chi cho'ó ná nguuchi ya[']ā, ní tanducué[']ē iiti chi 'ii[']yā['] 'caa[']nú['] yā cáāvā ofrenda ye[']é Ndyuūs, dii['] yā preparar iiti mii['] ndúúcū yīimā. ⁵⁰Yīimā ní n'dai. Ní nduuti chi nguēē ndaācā sabor ye[']ē, ¿d'éē cuuvi dii['] nī, ní cuuvi ndaācā sabor ye[']ē? Ndís'tii cuneé['] nī tan'dúúcā chi yīimā, 'tíica cuneé['] nī, ní canée['] n'daaca nī 'aama nī taama nī ndúúcū vi'í.

**Jesús ngi[']cuee['] yā ye[']e divorcio chi
i'tēechíí vi'í 'ii[']yā[']**

(Mt. 19.1-12; Lc. 16.18)

10 Jesús can'daa yā ye[']e yāā['] Capernaum, ní cue[']e yā na yā[']āa Judea ndúúcū yā[']āa chi canee táámá lado ye[']ē yíícú Jordán. Mii['] ní nduuvidaama ntúu['] 'ii[']yā['] naachi canée['] Jesús mii[']. Jesús tuca'a yā chi'cuee['] yā 'ii[']yā['] s'ee['] tan'dúúcā costumbre ye[']e yā. ²Tuu[']mi ní n'duuvi 'ii[']yā['] fariseos ndaā yā nanáā['] Jesús ti ne[']é yā n'diichínee['] yā Jesús mii[']. Ní ntiinguunée['] yā Jesús ndúúti chi n'daācā chí sa[']ā n'tēechi sá n'daataa ye[']ē sa. ³Jesús mii['] ní nan'guēēcúta[']a yā: ¿D'éē ca[']a Moisés chii sa ndís'tii na ley ye[']e yú?

⁴Fariseos ní ca[']a yā chii yā Jesús: Moisés mii['] ní 'cuū['] sa chi ca'a sá n'daataa mii['] 'áámá caaca yé[']e chí i'tēechi vi'í yā. Tuu[']mi ní cu'nee['] sa tá[']ā sa.

⁵Tuu[']mi ní Jesús ca[']a yā chii yā fariseos: Moisés mii['] tee sa mandamiento 'cūū, ndís'tii, caati ndís'tii ní neené['] chēechi staava ye[']ē nī. ⁶Naati ndíí cuaa[']

vmnaaⁿ, taachi Ndyuūs din'dái yā tanducueⁿē dendu'ū, din'dái yā sáⁿā ndúúcū n'daataá. ⁷Chííⁿ chí saⁿā miiⁿ cun'néeⁿ sa chiida sa ndúúcū cheecu sá ní ndūūvidaama sa ndúúcū n'daataá yeⁿē sa, ⁸ní nduu 'uuví yā ní nduūví 'aama yā ndúúcū ví'í. Chííⁿ chí 'āā ntéeⁿ 'uūvi yā tí 'āā 'aama núúⁿ yā. ⁹Chííⁿ chí saⁿā miiⁿ nguéeⁿ canee chí nadvíi sa chí Ndyuūs nadaamá yā.

¹⁰Guayiivi miiⁿ taachí 'āā snée Jesús ndúúcū discípulos yeⁿe yā cheetí 'áámá va'āí, miiⁿ discípulos nguēcunée yā ntiinguuneⁿ yā Jesús yeⁿe nduudu 'cūū. ¹¹Jesús caⁿa yā chíi yā discípulos: Saⁿā chí cu'neeⁿ sá n'daataá yeⁿē sa ní 'caandivaacu sa ndúúcū táámá n'daataá, saⁿā miiⁿ ní idinuuⁿndi sa chí véé táámá n'daataá yeⁿē sa. ¹²Ní ndúúti chí 'áámá n'daataá cu'neeⁿ ta isáⁿā yeⁿe tá ní 'caandivaacu tá ndúúcū táámá saⁿā, 'tiicá ntūūⁿ n'daataá miiⁿ idinuuⁿndi tá chí véé taama isáⁿā yeⁿe tá.

Jesús di'viicú yā dá'caiyāa

(Mt. 19.13-15; Lc. 18.15-17)

¹³Tuu'mi ní 'iiⁿyāⁿ s'eeⁿ níndeé yā dá'caiyāa nanááⁿ Jesús, chí Jesús tuu'ví yā dá'caiyāa miiⁿ; naati discípulos ní yaa'vi néeⁿ yā 'iiⁿyāⁿ s'eeⁿ chí ndéé dá'caiyāa s'eeⁿ.

¹⁴Taachí Jesús n'diichi yā chuū, yaa'vi néeⁿ yā ní caⁿa yā chíi yā discípulos: 'Cuaaⁿ nī chíi dá'caiyāa nanaáⁿ, ní nguéeⁿ ndivíi nī yeⁿē, ti na va'ai cheeti nguuví naachi Ndyuūs ngaⁿa ntiiⁿnyúⁿ yā ní yeⁿē dá'caiyāa s'tíi, 'tíicā. ¹⁵Cuaacu nííⁿnyúⁿ ngaⁿá ngíi ndís'tíi, 'iiⁿyāⁿ chí nguéeⁿ cu'téenu yā yeⁿe

naachi Ndyuūs ngaⁿa ntiiⁿnyúⁿ yā tan'dúúcā chí i'teenú 'aama dá'caiyāa, nguéeⁿ cuuví cundaa yā naachi Ndyuūs ngaⁿa ntiiⁿnyúⁿ yā.

¹⁶Ní Jesús sta'á yā dá'caiyāa miiⁿ ní ca'nuu yā ní di'viicú yā. Ní s'neeⁿ yā sn'duū tá'a yā vmnaaⁿ yeⁿē.

Yeⁿe saⁿa 'dííⁿ chí 'cuiica

(Mt. 19.16-30; Lc. 18.18-30)

¹⁷Taachí Jesús candíi yā yúúní yeⁿé yā, ndaā 'áámá sáⁿā. Ngeenu sa nanááⁿ Jesús ní chíintiiⁿya sa nanááⁿ yā ní ntínguuneⁿ sa: N'dii Maestro chí n'dái nī, 'de'e dííⁿ ní ndaacá vida cueⁿe daāⁿmaⁿ chí cuuvi yeⁿé?

¹⁸Jesús caⁿa yā chíi yā saⁿā: 'De'e cúuví chí ngaⁿā dí chí n'dai 'úú? Mar 'áámá 'iiⁿyāⁿ nguéeⁿ n'dai yā tí dámaaⁿ Ndyuūs. ¹⁹Dii ní deenu di chí canéeⁿ nguūⁿ na ley chí 'tuucā: Nguéeⁿ caⁿa di ndúúcū tááma n'daataá chí nguéeⁿ yeⁿe di. Nguéeⁿ 'caāⁿnuⁿ di. Nguéeⁿ diduucú di. Nguéeⁿ caaⁿmaⁿ nduudu yaadi yeⁿē mar 'áámá 'iiⁿyāⁿ. Nguéeⁿ canche'ei di 'iiⁿyāⁿ. Dinéⁿe di chiida di ndúúcū cheecu di.

²⁰Saⁿā miiⁿ ní nan'guēcútaⁿā sa: N'dii Maestro, tanducueⁿē chuū 'āā idiíⁿ ndíi taachi saⁿā 'lííⁿ 'úú.

²¹Jesús ní chíinu yā saⁿā 'dííⁿ ní dinéⁿe yā saⁿā. Ní caⁿa yā: Véé táámá chí indái yeⁿē di. Cuéⁿé dí n'diicú dí tanducueⁿē chí véé yeⁿē di, ní ca'a di 'iiⁿyāⁿ chí nguéeⁿ yeⁿe yā. Tuu'mi ní ndaācā chí véé vaadi 'cuiica yeⁿe na va'ai cheeti nguuví chí cuuvi yeⁿē di. Tuu'mi ní cutá'a di cruz yeⁿē di chí yeⁿē chí 'cueenu di cuuvi ní cuchii di ní caⁿa di nduucú.

²²Naatí taachi ch'iindiveeⁿ sá chuū, néené s'neeⁿ ya'āi 'iinu sa ní neene ndaachi 'iinú sa. Ní cunaⁿa sa ti neenē 'cuiica sa.

²³Tuu'mi ní Jesús ch'iinu yā cuaaⁿ 'diitúú yā ní caⁿa yā chii yā discípulos yeⁿe yā: De'ē chúucā ngíⁿ'ii chi cundaā 'iiⁿ'yāⁿ 'cuiica naachí Ndyuūs ngaⁿa ntiiⁿ'nyúⁿ yā.

²⁴Discípulos ní ng'e yiinu yā yeⁿe nduudu yeⁿe yā; naati Jesús ní caⁿa ntúuⁿ yā: Ndís'tii daiyá, de'ē chúucā ngíⁿ'ii chi 'iiⁿ'yāⁿ chi idinéⁿe ca yā chi véé yeⁿe yā chí cundaa yā naachí Ndyuūs ngaⁿa ntiiⁿ'nyúⁿ yā. ²⁵Nguéé ngíⁿ'ii cá chi 'áamá 'iiti camello, chi ch'εεte cá nguéé ti 'yúúduu chi cho'ó tī na nduutinááⁿ 'iini, chi cheendi va'ai 'líiⁿ nguéé ti 'áamá 'iiⁿ'yāⁿ 'cuiica i'téenu yā Ndyuūs ní cundaa yā naachí Ndyuūs ngaⁿa ntiiⁿ'nyúⁿ yā.

²⁶Taachí discípulos ch'iindiveéⁿ yā chuū, nadicádíinuⁿ taavi ca yā ní nguaaⁿ maaⁿ yā ntínguunéeⁿ yā vi'i. Tuu'mi ní ngaⁿa yā: ¿Du'ú cuuvi nanguaⁿ'āi?

²⁷Jesús miiⁿ ch'iinu yā discípulos ní caⁿa yā: Saⁿ'ā iⁿ'yeeⁿdí 'cūū nguéé cuuvi diiⁿ sa chuū, naati Ndyuūs cuuvi díiⁿ yā caati nanááⁿ Ndyuūs nguéé de'ē vee chi nguéé cuuvi díiⁿ yā.

²⁸Tuu'mi ní Pedro miiⁿ tuca'a sa caⁿa sa ní caⁿa sa chii sa 'iiⁿ'yāⁿ: Nús'uu ní s'neéⁿ nū tanducuéⁿ'ē chi véé yeⁿ'é nū, ní cuchíi nū nduucú nī.

²⁹Jesús nan'guεεcútaⁿa yā: Cuaacu níiⁿ'nyúⁿ ngaⁿ'á ngíi ndís'tii. 'Āa du'ú nūuⁿ 'iiⁿ'yāⁿ chí cu'neéⁿ yā vaacu yā, o 'díinu yā, o v'íi, o cheécú yā, o chiidá yā, o n'daataá

yeⁿ'é yā, o daiya yā, o yáⁿ'āa yeⁿ'e yā, cáávā 'úú ní cáávā chi candee yā nduudu chi nguaⁿ'ai 'iiⁿ'yāⁿ, ³⁰cuta'á yā na iⁿ'yeeⁿdí 'cūū 'áamá ciento cúúvī cá chí n'dee ca dendu'ū yeⁿ'e va'ai s'eeⁿ ndúúcū 'díinu yā ndúúcū 'cεε've yā ndúúcū vi'i yā, ndúúcū chiidá yā, ndúúcū cheécú yā, ndúúcū daiya yā, ní yeⁿ'ē yáⁿ'āa yeⁿ'e yā. Ní canée chí n'géénú yā ngii chí 'iiⁿ'yāⁿ idiíⁿ yā naati ná iⁿ'yeeⁿdí chí cuchii ndaācā vida cueⁿe daāⁿmaⁿ yeⁿ'e yā. ³¹Néené 'yaaⁿ 'iiⁿ'yāⁿ chí maaⁿ snée yā cuaaⁿ vmnaaⁿ 'iiⁿ'yāⁿ s'eeⁿ 'cuεetinée yā cuaaⁿ chi cuayiivi. Ní neenē 'yaaⁿ 'iiⁿ'yāⁿ chí maaⁿ snée yā cuaaⁿ chí cuayiivi, 'iiⁿ'yāⁿ s'eeⁿ 'cuεetinée yā vmnaaⁿ.

Jesús ngaⁿa ntúuⁿ yā yeⁿ'e chí 'cuūvī yā

(Mt. 20.17-19; Lc. 18.31-34)

³²Jesús ndúúcū discípulos yeⁿ'e yā snúúⁿ yā yúúní ní cucheε yā na yáaⁿ Jerusalén. Jesús cueⁿ'é yā vmnááⁿ discípulos. Ní discípulos nadicádíinuⁿ yā ní cueⁿ'e yiinu yā ní 'va'á yā. Tuu'mi ní Jesús miiⁿ nguεecunée yā ní yaaⁿvi ndiichúúvī discípulos yeⁿ'e yā ní tuca'a yā caⁿa yā chii yā discípulos yeⁿ'e chí canée chí 'cuūvī yā. ³³Ní caⁿa yā Cun'diichí nī, caa yú na yáaⁿ Jerusalén, naachí 'úú chí Saⁿ'a chí Daiya Dendyuūs miiⁿ ní 'iiⁿ'yāⁿ nca'a yā 'úú chiiduú n'gεete ndúúcū maestros yeⁿ'e ley. Ní 'iiⁿ'yāⁿ s'eeⁿ caacá yā yeⁿ'e 'úú chí 'cuūvī. Ní nca'á yā 'úú 'iiⁿ'yāⁿ chí nguéé ndaata yeⁿ'ē Israel. ³⁴Ní 'caaⁿ'nyuⁿ néeⁿ yā 'úú. Ní 'cueⁿ'é yā 'úú ní ca'a neeⁿ daiⁿ yā 'úú. 'Cuiinu chuū ní 'caaⁿ'núⁿ yā

'úú. Naati ndiichi ndii 'íínú nguuví miiⁿ, nduuchí yeⁿ'ē nguaaⁿ tináⁿ'ā.

Jacobo ndúúcu Juan ngíicá sá 'áámá favor

(Mt. 20.20-28)

³⁵Tuu'mi ní Jacobo ndúúcu Juan, chí daiya Zebedeo, ndaá yā nanááⁿ Jesús miiⁿ ní caⁿ'a sa: N'dii Maestro, neⁿ'ē 'nū chi dífⁿ nī 'áámá favor chí ngiica 'nū.

³⁶Tuu'mi ní Jesús ntinguuneéⁿ yā: ¿Dē'ē neⁿ'e nī chí dífⁿ?

³⁷Tuu'mi ní caⁿ'a sa chii sa Jesús miiⁿ: 'Cuááⁿ dí chí 'cueētē 'nū 'áámá 'nū lado tá cuaācú di ní táámá 'nū ní lado tá 'cueē di taachi 'āā ndaá hora yeⁿ'e chí ngaⁿ'a ntiin'nyuⁿ dí yeⁿ'e nducuéⁿ'ē.

³⁸Tuu'mi ní Jesús miiⁿ caⁿ'a yā: Ndís'tii nguéé déenu nī dē'ē chí ngiica nī. ¿Áá cuuvi diiⁿ di cu'u nuúⁿ nī yeⁿ'ē chí n'geēⁿ chēeti vaso chí yeⁿ'e chí 'cuenú cuuvi? ¿Áá cuuvi cuta'á nī maaⁿ chí ngēédínuⁿ nī chí cuta'á?

³⁹Juan ndúúcu Jacobo miiⁿ ní nan'gueécútaⁿ'a yā: Cuuvi dífⁿ 'nū. Tuu'mi ní Jesús caⁿ'a yā chii yā 'iiⁿ'yāⁿ s'eeⁿ: Cuaacu níⁿ'nyúⁿ canéé chí cu'ú nī yeⁿ'e vaso chí yeⁿ'e chí 'cuenú cuuvi ní canéé chí cuta'á nī chí ngēédínuⁿ nī chí 'úú ita'á. ⁴⁰Caati nguéé ituneēⁿ 'úú chí ca'á du'ú chí 'cuūndi lado tá cuaacú o lado ta 'cueē. Lugar 'cūū ní Ndyuūs ca'á yā 'iiⁿ'yāⁿ chí Ndyuūs dífⁿ yā 'cundiyaáⁿ yā cáávā 'iiⁿ'yāⁿ.

⁴¹Taachí ch'iindiveéⁿ ndu'u ndiichí discípulos chuū, nduuvi taáⁿ yā ndúúcu Jacobo ndúúcu Juan miiⁿ.

⁴²Jesús ní yaa'vi yā discípulos ní caⁿ'a yā: Tan'dúúca chí ndís'tii

deenu nī, 'iiⁿ'yāⁿ chí ngaⁿ'a ntiin'nyúⁿ yā yeⁿ'e naciones véé poder yeⁿ'ē yā nguaaⁿ 'iiⁿ'yāⁿ yeⁿ'e nación yeⁿ'e yā ní 'iiⁿ'yāⁿ chí n'geetē cá yeⁿ'ē naciones ngaⁿ'a ntiin'nyúⁿ yā 'iiⁿ'yāⁿ s'eeⁿ. ⁴³Naati nguaaⁿ ndís'tii, nguēē 'tíicā. 'Iiⁿ'yāⁿ chí neⁿ'e cuuvi ch'ēetē yā nguaaⁿ ndís'tii canéé chí dichíí'vé yā 'iiⁿ'yāⁿ. ⁴⁴Áā du'ú nūuⁿ ndís'tii chí neⁿ'e nī cunee nī cuaaⁿ vmnaaⁿ yeⁿ'e ndís'tii canéé chí dichíí'vé nī nducyaaca 'iiⁿ'yāⁿ. ⁴⁵Naati Sáⁿ'ā chí Daiya Dendyuūs nguéé ndaā sa chí 'iiⁿ'yāⁿ dichíí'vé yā saⁿ'ā, ti maaⁿ sa dichíí'vé sa nducyaaca 'iiⁿ'yāⁿ, ní ca'a sa vida yeⁿ'e maāⁿ sa tan'dúúca precio yeⁿ'ē nuuⁿndi cáávā chí nanguaⁿ'ai yā n'dee n'daí 'iiⁿ'yāⁿ.

Jesús n'guaáⁿ yā nduutinááⁿ saⁿ'ā Bartimeo

(Mt. 20.29-34; Lc. 18.35-43)

⁴⁶Tuu'mi ní ndaā Jesús ndúúcu discípulos na yāāⁿ Jericó. Ní taachí can'daa yā yāāⁿ Jericó ndúúcu 'yaaⁿ n'daí 'iiⁿ'yāⁿ 'áámá sáⁿ'ā chí ngueenááⁿ chí nguuvi Bartimeo, daiya Timeo, véé sá niiⁿnuúⁿ cyúúni ní ngiica sá limosnas. ⁴⁷Ní taachí ch'iindiveeⁿ sa chí Jesús yeⁿ'e yāāⁿ Nazaret cho'o yā miiⁿ, saⁿ'a ngueenááⁿ miiⁿ tuca'a sa 'caí sa ní caⁿ'a sa: Jesús, Daiya David, nnéé ya'āi 'iinú nī 'úú.

⁴⁸Néené 'yaaⁿ yā yaa'vi neeⁿ yā saⁿ'ā miiⁿ chí cunēē 'díiⁿ sa cheendí sa, naati saⁿ'ā miiⁿ ní n'gaí yiicú cá sá: N'dii Daiya David, nnéé ya'āi 'iinú nī 'úú.

⁴⁹Tuu'mi ní Jesús cheendii yā ní caⁿ'a yā: Yaa'vi nī saⁿ'ā chí cuchii sa 'muuⁿ. Ní cheⁿ'ē yā ní chii yā saⁿ'ā

chi ngeenáán miiⁿ: Canéé diitu di ní cáániicū di ndúcueeⁿ di ti Jesús n'gai yā dii.

⁵⁰Tuu'mi ní sn'dáa sa cotón yeⁿe sa ní nadacueeⁿ sa ní chéⁿé sa ndaā sa nanááⁿ Jesús miiⁿ. ⁵¹Tuu'mi ní Jesús ntiinguunéeⁿ yā saⁿā: ¿De'ē neⁿé di chi díⁿ ndúúcū dii? Sáⁿā chi ngeenáán miiⁿ ní caⁿa sa: N'diī Maestro díⁿ nī chi snaáⁿ.

⁵²Jesús caⁿa yā: Cunaⁿā di. Āā inaaⁿ di, ti s'téenu di. Hora 'cūū nūuⁿ chi ngeenáán miiⁿ ní snaaⁿ sa ní cueⁿe sá ndúúcū Jesús miiⁿ na yúúni.

Jesús ndaa yā na yāāⁿ Jerusalén

(Mt. 21.1-11; Lc. 19.28-40; Jn. 12.12-19)

11 Taachí Jesús ndúúcū discípulos ndaa yā niiⁿnuúⁿ na yāāⁿ Jerusalén, ndaa yā na yāāⁿ Betfagé, ndúúcū yāāⁿ Betania, niiⁿnuúⁿ na yiicū chi nguuví Olivos. Ní Jesús dich'ó yā na 'uūví discípulos yeⁿe yā. ²Ní caⁿa yā: Cuéⁿe nī na yāāⁿ 'lírⁿ chi canéé niiⁿnuúⁿ ní taachí ndaa nī miiⁿ ndaaca nī 'áámá burro n'déēchiichí tī. Burro miiⁿ ní mar 'áámá 'iiⁿyāⁿ 'āā cuéé cunduú yā 'iiti. N'daatí nī 'iiti ní candéé nī 'iiti 'múúⁿ. ³Ndúúti chi 'áámá 'iiⁿyāⁿ tínguuneeⁿ yā ndís'tii: ¿De'ē cúúví chí 'tíicā idíⁿ nī? Caaⁿmaⁿ nī cuuvi nī 'iiⁿyāⁿ tí Señor yeⁿe yú neⁿe yā 'iiti miiⁿ. Ní caama nadicho'ó yā 'iiti.

⁴'Iiⁿyāⁿ s'eeⁿ ní 'tíicā cheⁿe yā, ní ndaāca yā burro miiⁿ n'déēchiichí tī na cyúúni niiⁿnuúⁿ cheendiva'āi. Ní n'daati yā 'iiti. ⁵N'dúúví 'iiⁿyāⁿ chi snéé yā miiⁿ ní caⁿa yā chíi yā discípulos: ¿De'ē idíⁿ nī? ¿De'ē cúúví chí in'daatí nī burro?

⁶Tuu'mi ní discipulos ní nan'gueécútaⁿa yā tan'dúúcā chi Jesús caⁿa yā chíi yā 'iiⁿyāⁿ. Ní 'cuuⁿ yā chí discipulos cueⁿe yā ndúúcū burro miiⁿ. ⁷Tuu'mi ní cueⁿe yā ndaá yā ndúúcū burro miiⁿ nanááⁿ Jesús miiⁿ. Ní sn'duú yā cotón yeⁿe yā vmnááⁿ yeⁿe burro miiⁿ ní Jesús canduú yā 'iiti. ⁸Taachí 'āā cueⁿe yā cuaaⁿ cyúúni miiⁿ, néené 'yaaⁿ 'iiⁿyāⁿ n'doó yā cotón yeⁿe yā cuaaⁿ cyúúni miiⁿ. Tanáa yā chíicā yā dúuⁿnē yáⁿá ní chintaaví yā cuaaⁿ cyúúni.

⁹Néené 'yaaⁿ ca yā chí cueⁿe yā cuááⁿ vmnaaⁿ miiⁿ yeⁿe Jesús ndúúcū 'yaaⁿ n'daí yā chí cuchii yā cuaaⁿ daami yā 'caí yā: De'ē chúúcā ch'εεε Ndyuūs. Ndyuūs di'viicú yā 'iiⁿyāⁿ chí cuchii yā ndúúcū chí dúúchí Señor miiⁿ. ¹⁰De'ē chúúcā n'dai naachi ngaⁿa ntiiⁿnyuⁿ Ndyuūs. Cúchii tiempo maaⁿ chí tan'dúúcā yeⁿe chiida yú David ngaⁿa ntiiⁿnyúⁿ yā ndii cuááⁿ vmnaaⁿ. Hosanna. Nduudu miiⁿ ní nduudu Israel chí neⁿe caaⁿmaⁿ na nduudu yeⁿe yú, chí ch'εεε n'dai Ndyuūs chí canéé na va'ai ch'εeti nguuví.

¹¹'Tíicā sndaā Jesús na yāāⁿ Jerusalén. Ní ndaá yā na yaacū templo yeⁿe yāāⁿ Jerusalén miiⁿ. Ch'íinu yā tanducueⁿe dendu'ū nuuⁿmáⁿ cuaaⁿ diituú yā. Cueⁿe ntúuⁿ yā na yāāⁿ Betania ndúúcū ndu'ū ndiichuuví discípulos caati 'āā chí chiiⁿnū.

Jesús ngaⁿa yā ngii yā yáⁿá n'guíidii yaaⁿ nguuví miiⁿ

(Mt. 21.18-19)

¹²Chidēve táámá nguuví miiⁿ, taachí Jesús ndúúcū discípulos

yeⁿé yā can'daa yā na yaāⁿ Betania, Jesús miⁿ chí cuicu yā. ¹³Ní n'diichi yaⁿái yā 'áamá yáⁿá yeⁿe n'guídii yaaⁿ nguuvu chí véé tá'āa. Ní cueⁿé yā n'diichi yā chí 'áá snéé n'gui'i yeⁿē. N'diichí yā chí nguée ndaācā n'gui'i yeⁿē ti ta'á nūⁿ, ti nguée tiempo yeⁿē. ¹⁴Tuu'mi ní Jesús miⁿ caⁿa yā chí yā yáⁿá mífⁿ, 'túúcā: Dii yáⁿá, mar 'áamá 'iⁿyāⁿ nguée ch'é yā n'gui'i yeⁿē di, tanducuéⁿē tiempo. Discípulos yeⁿe yā ch'iindiveéⁿ yā tanducuéⁿē chi caⁿa yā.

Jesús nadεεvé yā yaācū ch'εete

(Mt. 21.12-17; Lc. 19.45-48; Jn 2.13-22)

¹⁵Cuayiivi mífⁿ 'iⁿyāⁿ s'eeⁿ ndaá yā na yāāⁿ Jerusalén miⁿ. Taachí Jesús ndaá yā na yāacū templo miⁿ, tucá'a yā tun'dáa yā 'iⁿyāⁿ na yaācū miⁿ, 'iⁿyāⁿ chí in'diicui yā ndúúcū 'iⁿyāⁿ chí ngai yā. Ch'εεcundáa yā mesas yeⁿe 'iⁿyāⁿ chí n'dáaⁿ yā tuūmí. Ní ch'εεcundáa yā sillas yeⁿe 'iⁿyāⁿ chí in'diicui yā palomas. ¹⁶Ní dííⁿ yā chí 'āā ntéeⁿ candée 'iⁿyāⁿ na yaācū miⁿ mar 'áamá cosa. ¹⁷Ní chí'cuéeⁿ yā 'iⁿyāⁿ ní caⁿa yā: Naachi canéeⁿ nguūⁿ na libro yeⁿé Ndyuūs ní 'túúcā ngaⁿā: Va'ai yeⁿé canéeⁿ chí duuchi va'ai naachi caaⁿmaⁿngua'á 'iⁿyāⁿ yeⁿē nducuéⁿē nación. Naati ndís'tii ní dííⁿ nī chí yiive yáává yeⁿe 'iⁿyāⁿ chí diduucu.

¹⁸Chiiduú n'gεete chí ngaⁿa ntiiⁿnyuⁿ ndúúcū maestros yeⁿe ley ch'iindiveéⁿ yā chuū, ní tucá'a yā n'nuuⁿ yiinú yā taacā chí 'caaⁿnuⁿ yā Jesús, naati 'va'á yā 'iⁿyāⁿ. Ní nducyaaca 'iⁿyāⁿ ngeⁿe yiinú yā yeⁿē chí ngi'cueeⁿ Jesús

miiⁿ. ¹⁹Taachí chí 'da'a, Jesús miⁿ can'dáa yā na yāāⁿ Jerusalén miⁿ ní cueⁿé yā táámá yāāⁿ 'lííⁿ chí niiⁿnuúⁿ.

Yáⁿá in'guídii miⁿ ntí'i

(Mt. 21.20-22)

²⁰Chidεeve táámá nguuvu, ní Jesús ndúúcū discípulos cho'ó yā na yúúní ní n'diichí yā 'áamá yáⁿá n'guídii yaaⁿ nguuvu chí 'āā ntí'i ndii díí'yú yeⁿē. ²¹Tuu'mi ní Pedro miⁿ ní nn'gaacu sa chí 'āā chó'oo ní caⁿa sa chí sa Jesús miⁿ: N'dii Maestro, cuin'diichí nī. N'guídii chí nguée n'daācā caⁿa nī yeⁿē 'āā ntí'i.

²²Jesús miⁿ nan'gueεcútaⁿa yā ní caⁿa yā: Ndís'tii, cuuvi cūnee chí véé confianza yeⁿe nī ndúúcū Ndyuūs. ²³Cuaacu níí'nyúⁿ ngaⁿá ngí ndís'tii: 'Āā du'ú nūⁿ 'iⁿyāⁿ chí caaⁿmán yā cuuvi yā yiicū 'cūū 'tífā: Dii yiicū, cuví di 'muuⁿ ní cundaā di nguaaⁿ nuūⁿnīⁿyáⁿā. Ní nduuti chí nguée 'uūvī vaanicádiinūⁿ yeⁿe yā ní i'téenu yā chí chííⁿ chí ngaⁿá yā chí cuuví cuaacu, tuu'mi ní cuuvi 'tífā. ²⁴Chííⁿ chí maaⁿ ngaⁿá ngí ndís'tii: Tanducuéⁿē chí ndís'tii ngiicā nī Ndyuūs taachi ngaⁿangua'á nī, nduuti chí cu'téenu nī chí ndaācā yeⁿe nī, tuu'mi ní tanducuéⁿē ní ndaācā nī. ²⁵Ní taachí ngaⁿangua'á nī, nduuti chí 'áamá 'iⁿyāⁿ idinuuⁿndí yā contra yeⁿé nī, nadach'εecú nī yeⁿe yā, 'tiicá ntúūⁿ Chiida yú chí canée yā na va'ai cheeti nguuvu nádich'εecú yā nuuⁿndi yeⁿé nī. ²⁶Ndúúti ndís'tii nguée nadich'εecú nī nuuⁿndi yeⁿé 'iⁿyāⁿ, 'tiicá ntúūⁿ Chiida yú chí canée yā na va'ai cheeti nguuvu

nguée nadich'ecú yā nuuⁿndi yeⁿe nī.

Jesús ní ngaⁿa ntiiⁿnyúⁿ yā

(Mt. 21.23-27; Lc. 20.1-8)

²⁷Tuu'mi ní Jesús ndúúcu discipulos ndaa yā na yāāⁿ Jerusalén. Taachí Jesús chiicá yā na yaācū templo, chiiduú n'geete ndúúcu maestros chi ng'icúeⁿ ley ndúúcu 'iiⁿyāⁿ ndiicū chi ngaⁿa ntiiⁿnyúⁿ yā yeⁿe yaācū miiⁿ chindaá yā n'diichí yā Jesús. ²⁸Ní ntiinguuneⁿ yā Jesús: ¿Du'ú 'iiⁿntyēⁿē diiⁿ nduucú nī chuū? O ¿du'ú tee poder dii chí idiíⁿ nī chuū?

²⁹Jesús nan'guēcútaⁿa yā: 'Úú ntúúⁿ ní tiinguuneⁿ ndís'tií, ní ndúúti chí cuuví n'guēcútaⁿa nī yeⁿé, tuu'mi ní cuuví ndís'tií du'ú 'iiⁿntyēⁿē tee yā poder 'úú chí idiíⁿ dendú'u 'cūú. ³⁰Chí ngeédínuuⁿnī Juan miiⁿ ¿tíí chiicā chí? ¿Áá yeⁿe sáⁿā iⁿ'yeeⁿdí 'cūú o yeⁿé va'ai chæti nguuví? Nan'guēcútaⁿa nī yeⁿé.

³¹Tuu'mi ní tucá'a yā caⁿa yā nguááⁿ maáⁿ yā ní caⁿa yā chíi yā vi'i: ¿Taacá caaⁿmaⁿ yú? Ndúúti chí caaⁿmaⁿ yú chí yeⁿé nanguuvi, 'iiⁿyāⁿ miiⁿ ní nan'guēcútaⁿa yā yeⁿé yú 'tíicā: ¿De'ē cúuví chí nguée i'téenu nī? ³²Ní ndúúti chí caaⁿmaⁿ yú, chí yeⁿé saⁿā iⁿ'yeeⁿdí 'cūú tuu'mi ní 'va'a yú 'iiⁿyāⁿ s'eeⁿ caati nducyáácá 'iiⁿyāⁿ deenu yā chí Juan chí chædínuuⁿnī miiⁿ ní 'áámá profeta chí cuaacu. ³³Ní nan'guēcútaⁿa yā yeⁿe Jesús miiⁿ ní caⁿa yā: Nguée cuuví nī n'dií. 'Tíicā caⁿa yā chíi yā Jesús: Nguée deenú 'nū. Tuu'mi ní Jesús caⁿa yā chíi yā 'iiⁿyāⁿ s'eeⁿ: 'Tiicá ntúúⁿ 'úú

nguée cuuví ndís'tií du'ú 'iiⁿntyēⁿē idiíⁿ ndúúcu chuū.

**Ejemplo yeⁿe 'iiⁿyāⁿ chí nguée
n'daācā dííⁿ yā ntiiⁿnyuⁿ**

(Mt. 21.33-46; Lc. 20.9-19)

12 Jesús miiⁿ tucá'a yā caⁿa yā 'iiⁿyāⁿ s'eeⁿ ndúúcu ejemplos chí 'téé nguée dáámá. Ní caⁿa yā: Véé 'áámá 'iiⁿyāⁿ chí chíinu yā díí'yú uvas na yáⁿāa yeⁿé yā. Ní din'dái yā 'áámá cheēⁿ yeⁿé yáⁿāa 'lííⁿ. Ní din'dái yā 'áámá tanque naachí cuuvi tun'dáa yā nuūⁿnīⁿ yeⁿe uvas miiⁿ. Ní din'dái yā 'áámá torre nguaaⁿ yáⁿāa uvas naachi mozos yeⁿé yā 'cuætinée sa diiⁿ sa cuidado n'gui'i uvas miiⁿ. Cuayiivi ní ca'a ya yáⁿāa miiⁿ mozos chí dííⁿ yā ntiiⁿnyuⁿ yeⁿe yáⁿāa, ní cueⁿe yáⁿái yā. ²Taachí ndaa tiempo yeⁿe cosecha yeⁿe uvas miiⁿ, dueño miiⁿ dich'ó yā 'aama mozo yeⁿé yā nanááⁿ mozos chí idiíⁿ sa ntiiⁿnyu yeⁿe yáⁿāa yeⁿé yā chí nguai nca'a sa n'gui'i uvas parte yeⁿe cosecha chí itúneeⁿ dueño miiⁿ. ³Mozo miiⁿ ní cueⁿe sa, naati mozos ní sta'a sa mozo miiⁿ ní ch'eⁿe sa ní nadacho'o sa mozo miiⁿ ní nguée de'ē vee ca'a sa mozo. ⁴Tuu'mi ní dueño yeⁿé yáⁿāa miiⁿ nguēcunée yā dich'ó yā taama mozo. Mozos ní chíi tuu sa mozo miiⁿ ní 'nuūca'ai sa tiíⁿ sa ní chíi taaⁿ sa saⁿā miiⁿ. ⁵Dueño yeⁿe yáⁿāa miiⁿ dich'ó yā táámá mozo. Mozo miiⁿ, mozos chí diiⁿ ntiiⁿnyuⁿ na yáⁿāa miiⁿ ch'iiⁿnuⁿ sa. Cuayiivi miiⁿ ní 'yaaⁿ n'dái mozos dich'ó yā. Mozos ní náⁿa mozos miiⁿ ní ch'eⁿe sa saⁿā, tanáⁿā sa ní mozos miiⁿ ch'iiⁿnuⁿ sa saⁿā.

⁶Cánée cá daiya yā chí neⁿe taavi yā. Cuayiivi míⁿ ní dueño miiⁿ dichó'o yā daiya yā ní nadicadífínuuⁿ yā 'tíicā. Saⁿā daiyá ní diiⁿ sa honrar daiyá. ⁷Naati mozos chi idiiⁿ sa ntíiⁿnyuⁿ na yáⁿāa yeⁿé yā caⁿa sa nguaaⁿ maaⁿ sa: Sáⁿa 'cūū chi canee chi cuuví yeⁿē sa yáⁿāa herencia 'cūū. 'Caāⁿnuⁿ yú saⁿā ní cúuví yeⁿē yú yáⁿāa ndúúcu chí véeⁿ yeⁿē. ⁸Tíicā ní sta'a sa saⁿā ní ch'iⁿnuⁿ sa saⁿā ní tun'daa sa cuerpo yeⁿē sa 'áamá lado yeⁿe yáⁿāa miiⁿ.

⁹Tuu'mi ní Jesús ntinguuneeⁿ yā 'iiⁿyāⁿ s'eeⁿ: ¿De'ē ra diiⁿ dueño yeⁿē yáⁿāa 'cūū? Ndaá yā ní 'caāⁿnúⁿ yā mozos chi idiiⁿ ntiiⁿnyuⁿ, ní ca'á yā yáⁿāa tánaⁿa 'iiⁿyāⁿ.

¹⁰¿Áá nguéeⁿ n'geeⁿ ndís'tii naachi canée nguūⁿ na libro yeⁿe Ndyuūs? Ngaⁿa 'túucā:

Tuūu chi 'iiⁿyāⁿ din'dái yā va'ai miiⁿ ní sta'á yā ní ch'εεcú yā 'áamá lado ti nguéeⁿ neⁿe yā. Tuūu 'cūū chí tuūu ch'εεte ní canée tuūu ch'εεte yeⁿē na esquina yeⁿe va'ai.

¹¹Chuū ní Señor Ndyuūs diíⁿ yā, chuū ní 'áamá cosa chí ngeⁿe yiinu yú taachi inaaⁿ yú yeⁿē.

¹²Tuu'mi ní 'iiⁿyāⁿ s'eeⁿ nadacádíínuuⁿ yā chi cuta'á yā Jesús miiⁿ ní diíⁿ yā preso 'iiⁿyāⁿ ti déenu yā chí Jesús miiⁿ caⁿa yā ejemplo 'cūū chí 'téé nguéeⁿ dáamá chí yeⁿe yā. Naati 'va'á yā 'iiⁿyāⁿ yeⁿe yáāⁿ miiⁿya, ní s'néeⁿ yā Jesús ní cueⁿe yā.

Chúū chi yeⁿē impuestos

(Mt. 22.15-22; Lc. 20.20-26)

¹³Cuayiivi miiⁿ 'iiⁿyāⁿ chí ngaⁿa ntiiⁿnyuⁿ yeⁿe yaacū dichó'o yā

'iiⁿyāⁿ yeⁿe Herodes ndúúcu n'duuví 'iiⁿyāⁿ fariseos nanááⁿ Jesús miiⁿ.

Ní neⁿé yā chí Jesús castáⁿa yā nduudu yeⁿe yā ní caaⁿmán yā 'áamá nduudu yaadi. ¹⁴'Iiⁿyāⁿ s'eeⁿ ndaá yā nanááⁿ Jesús miiⁿ, ní caⁿa yā: N'dii Maestro, déenu 'nū chí n'dii ní ngaⁿa nī nduudu cuaacu ní nguéeⁿ diíⁿ nī cuenta yeⁿe chí ngaⁿa 'iiⁿyāⁿ yeⁿē. Ní nguéeⁿ ndéé nī cuidado táacā idinááⁿ 'iiⁿyāⁿ iⁿ'yeeⁿdí 'cūū naati ngi'cueeⁿ nī ndúúcu nduudu cuaacu yúuní yeⁿé Ndyuūs. ¿Áá canée chí nadíí'vε 'nū na emperador César tuūmī yeⁿe recaudación yeⁿe yáⁿāa o nguéeⁿ?

¹⁵Jesús miiⁿ ní déenu yā chí nguéeⁿ n'daācā chí 'iiⁿyāⁿ s'eeⁿ diíⁿ yā. Ní caⁿa yā chí yā 'iiⁿyāⁿ s'eeⁿ: ¿De'ē cúuví chí neⁿé nī chí castaⁿá nī nduudu yeⁿé? Candée nī 'áamá tuūmī, chí snaáⁿ.

¹⁶'Iiⁿyāⁿ ndéé yā tuūmī. Ní Jesús miiⁿ n'diichí yā ní tinguuneeⁿ yā 'iiⁿyāⁿ s'eeⁿ: ¿Dú'u naaⁿ chuū? ¿Du'ū chí duuchi canée nguūⁿ? 'Iiⁿyāⁿ s'eeⁿ ní n'guεεcútaⁿa yā: Nááⁿ emperador César cānee.

¹⁷Tuu'mi Jesús miiⁿ ní caⁿa yā chí yā 'iiⁿyāⁿ s'eeⁿ: Nca'á nī tuūmī yeⁿe recaudación o impuestos chí yeⁿe emperador César miiⁿ chííⁿ chí yeⁿē sa, ní nca'a nī Ndyuūs chí yeⁿē yā. 'Iiⁿyāⁿ s'eeⁿ ní cueⁿe yiinú yā yeⁿē chí n'guεεcútaⁿa Jesús miiⁿ.

'Iiⁿyāⁿ ntíínguúúneeⁿ Jesús yeⁿē chí iiⁿyāⁿ nnduuchi yā nguaaⁿ tináⁿa

(Mt. 22.23-33; Lc. 20.27-40)

¹⁸Tuu'mi ní ndaā n'duuví 'iiⁿyāⁿ saduceos nanááⁿ Jesús. 'Iiⁿyāⁿ s'eeⁿ ní nguéeⁿ s'teenú yā chí tináⁿā ní nduuchi yā. Ní ntinguuneeⁿ yā

Jesús chuū: ¹⁹N'díí Maestro, Moisés miiⁿ ní s'neeⁿ nguuⁿ yā yeⁿe s'uuúⁿ tí chuū: Nduuti chi 'áámá saⁿā 'cuūví sa ní cu'neeⁿ sa n'daataá yeⁿe sa ní nguéeⁿ daiya sa, tuu'mi ní 'dínú sá cuuví 'caandavaacu sá ndúúcú n'daataá miiⁿ. Ní saⁿā miiⁿ ní 'cuūndí daiya sa lado yeⁿe 'dínú tináⁿā. ²⁰Áámá saⁿā véé ndeēchē 'dínú sa ndúúcú sa. Saⁿā miiⁿ chí vmnááⁿ vmnaaⁿ ch'iidivaacu sá ní ch'ií sa ní nguéeⁿ ch'iindí daiya sa ndúúcú n'daataá yeⁿe sa. ²¹Saⁿā ndii chííⁿ ndii 'úúví mífⁿ ch'iindivaacu sa ndúúcú n'daataá yeⁿe tináⁿā ní saⁿā miiⁿ ch'ií ntúuⁿ sa ní nguéeⁿ ch'iindi daiya sá ndúúcú n'daata miiⁿ. 'Tiicá ntúuⁿ ch'ēenu saⁿā ndii chííⁿ ndii 'íínú. ²²Ndu'ū ndeēche sá ch'iindivaacu sá ndúúcú tá ní mar 'áámá sá nguéeⁿ s'neeⁿ sa daiya sa ndúúcú tá. Cuayiivi ní ch'ií ntúuⁿ n'daataá miiⁿ. ²³Tuu'mi ní taachí nduuchí yā nguaaⁿ tináⁿā, ¿cheé yā chí n'daataá yeⁿe yā taⁿā miiⁿ, caati ndu'u ndeēche yā ch'iindivaacú yā ndúúcú tá?

²⁴Tuu'mi ní Jesús mífⁿ nan'guεεcútaⁿa yā 'iíⁿyāⁿ s'eeⁿ: Ndís'tií ní nguéeⁿ déenu nī chí ngaⁿa nī, ti nguéeⁿ n'diichí nī naachi canée nguūⁿ na libro yeⁿe Ndyuūs yeⁿe chuū, ndíí nguéeⁿ ndúú n'diichi rá nī poder yeⁿe Ndyuūs. ²⁵Taachí 'iíⁿyāⁿ nanduuchí yā yeⁿe nguaaⁿ tináⁿā, ndíí nguéeⁿ ndúú n'daataá rá, ndíí nguéeⁿ ndúú saⁿā rá 'caandavaacu sa. 'Iiⁿyāⁿ s'eeⁿ 'cuεetinée yā tan'dúúca ángeles yeⁿe va'ai cheeti nguuvi chí nguéeⁿ ch'iindivaacu yā. ²⁶Chuū chí yeⁿe tináⁿā miiⁿ chí nanduuchi yā nguaaⁿ tináⁿā, ¿áá nguéeⁿ n'geēⁿ ndís'tií na libro yeⁿe Ndyuūs chí

dinguuⁿ Moisés tan'dúúca Ndyuūs yaa'ví yā Moisés, ndíí taachi canee sa nanááⁿ yáⁿá 'lííⁿ chí ngiichi? Ní 'túúca caⁿa Ndyuūs chí yā Moisés miiⁿ: 'Úú ní Ndyuūs yeⁿe Abraham, ndúúcú Isaac, ndúúcú Jacob. ²⁷Ndyuūs miiⁿ nguéeⁿ Ndyuūs yeⁿe tináⁿā ti yeⁿe 'iíⁿyāⁿ chí sндуuchi. Chííⁿ chí ndís'tií nguéeⁿ déenu nī chí ngaⁿa nī.

Mandamiento chí ch'εete ca

(Mt. 22.34-40)

²⁸Áámá maestro yeⁿe ley chí ch'iindiveéⁿ yā chí ndeē 'iíⁿyāⁿ saduceos s'eeⁿ, déenu yā chí Jesús miiⁿ nan'guεεcútaⁿa n'daaca yā. 'Iiⁿyāⁿ miiⁿ ní ntiinguuneeⁿ yā Jesús: ¿Cheé mandamiento chí canee nguūⁿ chí ch'εete n'dai ca?

²⁹Jesús nan'guεεcútaⁿa yā: Mandamiento vmnááⁿ vmnaaⁿ miiⁿ ní chuū: 'Caandiveéⁿ nī, ndís'tií 'iíⁿyāⁿ yeⁿe Israel miiⁿ, Señor Ndyuūs yeⁿe yú ní 'áámá n'dyáⁿā Señor miiⁿ. ³⁰Canée chí dineⁿé nī Señor Ndyuūs yeⁿe nī ndúúcú nuuⁿmaⁿ staaava yeⁿe nī, ndúúcú nuuⁿmaⁿ alma yeⁿe nī, ndúúcú nuuⁿmaⁿ vaanicadínūuⁿ yeⁿe nī, ndúúcú nducuéⁿē fuerzas yeⁿe nī. Chuū chí mandamiento chí vmnááⁿ vmnaaⁿ. ³¹Mandamiento chí canée nguūⁿ chí ndii chííⁿ ndii 'úúví mífⁿ tan'dúúca chí vmnááⁿ vmnaaⁿ 'āā 'tiicá ntúuⁿ: Dinéⁿe di 'iíⁿyāⁿ na niiⁿnuúⁿ vaacú di tan'dúúca chí neⁿe dí maāⁿ di. Nguéeⁿ áámá mandamiento chí canée nguūⁿ chí ch'εete ca nguéeⁿ ti mandamientos s'uuⁿ.

³²Tuu'mi ní maestro yeⁿe ley caⁿa yā chí yā Jesús miiⁿ: N'dii Maestro,

cuáácú ngaⁿa nī. Cuaacu níⁿnyúⁿ chí ngaⁿa nī chí vɛɛ 'aama n'dyáⁿā Ndyuūs. Nguéé táámá 'āā tanduu rá 'iiⁿyāⁿ miiⁿ. ³³Níícú 'iiⁿyāⁿ canéé chí dinéⁿe yā Ndyuūs ndúúćú nuuⁿmaⁿ staava yeⁿe yā, ndúúćú nuuⁿmaⁿ vaanicadínūⁿ yeⁿe yā, ndúúćú nuuⁿmaⁿ alma yeⁿe yā, ndúúćú tanducuéⁿe fuerzas yeⁿe yā. Ní dineⁿe yā 'iiⁿyāⁿ na miiⁿnuúⁿ vaacú yā tan'dúúćā chí neⁿé yā maáⁿ yā. Chuū chí n'daācā ca nguéé ti n'giiⁿnúⁿ 'iiti chí nga'a yā 'iiti lado yeⁿe ofrenda yeⁿé Ndyuūs ní yeⁿé tanducuéⁿe ofrenda chí ngicyáⁿā nátai.

³⁴Tuu'mi ní taachi ch'iindiveeⁿ Jesús tan'dúúćā chí n'guɛɛcutaⁿa cuaacu sa chí caⁿa sa, Jesús caⁿa yā chiī yā saⁿā miiⁿ: Nguéé yaⁿai canee di yeⁿé naachí Ndyuūs ngaⁿa ntiīⁿnyuⁿ yā. Cuayiivi miiⁿ ní 'iiⁿyāⁿ 'āā ntɛɛ candii cá yā ntinguuneeⁿ ca yā Jesús mar 'áámá.

¿Du'u chiī Daiya Cristo miiⁿ?

(Mt. 22.41-46; Lc. 20.41-44)

³⁵Jesús ngi'cueeⁿ yā chɛɛti yaācū templo ní ngaⁿa yā: ¿Dɛ'ɛ cúúví chí maestros yeⁿe ley ngaⁿá yā chí Cristo miiⁿ ní daiya David? ³⁶Caati maaⁿ David miiⁿ caⁿa sá taachi yaa'vi Espíritu N'dai yeⁿé Ndyuūs chuū chí canéé nguūⁿ na libro yeⁿe Ndyuūs:

Señor miiⁿ caⁿa yā chiī yā Señor yeⁿé: 'Cuundi dí lado ta cuaācú chí lado yeⁿe honor, ndíí taachi 'úú cu'neéⁿ 'iiⁿyāⁿ chí contra yeⁿé di ndii cuaaⁿ ndiyya maaⁿ ca'ā di tan'dúúćā chí 'aama banco 'lífⁿ, 'tiicá yā.

³⁷David miiⁿ ngaⁿa sa chuū yeⁿe Señor yeⁿé yā. Maaⁿ ní ɛ́táácá

cuuví chiī chí Cristo miiⁿ ní daiya David miiⁿ? Nééné n'deéé 'iiⁿyāⁿ ch'iindiveeⁿ yā yeⁿe Jesús ndúúćú vaadi yeenú.

Jesús ngaⁿa yā nuuⁿndi yeⁿe 'iiⁿyāⁿ chí ngi'cuééⁿ yā yeⁿe ley

(Mt. 23.1-36; Lc. 11.37-54; 20.45-47)

³⁸Jesús ngaⁿa yā chuū taachi ngi'cueeⁿ yā: Cundéé di cuidado yeⁿe maestros yeⁿe ley. 'Iiⁿyāⁿ s'eeⁿ ní n'gɛɛtinéé yiinú yā chí n'geenūu catecai yā. Ní taachi chiicá yā cuaaⁿ cyúúní neⁿe yā chí 'iiⁿyāⁿ dííⁿ yā saludar 'yā ndúúćú respeto n'daācā. ³⁹Ní neⁿé yā sillas vmnááⁿ vmnaaⁿ yeⁿe honor taachí 'cuundí yā na yaācū sinagogas ndúúćú lugar chí ch'ɛɛte taachi cheⁿe yā naachi véé 'viicu chí cheⁿé yā. ⁴⁰Ní ndivíi yā va'ai yeⁿé n'daataá nguá'āa. Ní 'íícú cuunuuⁿ n'dé'ei yā chí idiíⁿ yā miiⁿ nduucú nééné n'deéé ngaⁿangua'á yā. 'Iiⁿyāⁿ s'eeⁿ ní ch'ɛɛte ca castigo yeⁿé yā nguuvi yeⁿe juicio.

Ofrenda yeⁿe n'daataá nguá'āa

(Lc. 21.1-4)

⁴¹'Áámá vmnéⁿéé Jesús véé yā na yāacū templo niiⁿnuúⁿ na cajas naachí 'iiⁿyāⁿ n'gíi yā ofrendas. N'gíínu yā tan'dúúćā chí dííⁿ 'iiⁿyāⁿ táácā n'gíi yā tuumī lado yeⁿe ofrenda na cajas. N'diichí yā chí 'yaaⁿ n'dái 'iiⁿyāⁿ 'cuiica neené n'deéé tuumī ca'a yā. ⁴²Tuu'mi ní ndaā 'áámá n'daataá nguá'āa chí neene ndaachíí canee tá. Táⁿā miiⁿ ní s'nuūⁿ tá na caja miiⁿ na 'uūví centavos chí cobre. ⁴³Tuu'mi ní Jesús yaa'vi yā discípulos yeⁿe yā ní caⁿa yā chiī yā 'iiⁿyāⁿ s'eeⁿ: Cuaacu níⁿnyúⁿ ngaⁿá ngií ndís'tiī

chí n'daataá nguá'aa 'cúū ch'εete
ca nga'ā tá, nguée ti taná"n'a yā chí
s'nuú"n yā tuūmī na cajas. ⁴⁴Tí 'i"n'yā"n
s'ee" ní nga'a yā ye"e chí ngaava
ye"e yā; naati n'daataá mí"n ní
neené ndaachí canee tá ní ca'ā tá
tanducué"ē chí ye"ē tá chí che'e tá.

**Jesús nga"n'a yā chí yaācū templo mii"n
ní ntúúvíí**

(Mt. 24.1-2; Lc. 21.5-6)

13 Taachí Jesús mii"n nan'dáa
yā yaācū templo mii"n 'áámá
discípulo ye"e yā ní ca"n'a yā chí
yā Jesús: N'díí Maestro, n'diichí nī
dē'ē chúúcā n'gεete tuūu s'ee" ní dē'e
chúúcā n'gεete va'ai s'ee" ye"e yaācū
templo.

²Jesús nán'guεεcúta"n'a yā: ¿Áá
inaa" nī va'ai templo? 'Muu"n ní nguée
cunee mar 'áámá tuūu cuaa"n vmnáá"n
ye"e vi'í ti tanducué"ē ní cundεεve.

**Jesús nga"n'a yā ye"ē chí"n chí
'cuu"mī"n taachí 'āā cuée' cuiinu
i"nyēē"di**

(Mt. 24.3-28; Lc. 21.7-24; 17.22-24)

³Tuu"mi ní che"é yā 'áámá yiicū
chí nguuví Olivos, chí canée
nii"nuú"n na yaācū templo mii"n. Ní
taachi Jesús vεé yā mii"n, Pedro
ndúúcū Jacobo, ndúúcū Juan,
ndúúcū Andrés ndaa yā nanáa"n yā
chí ca"n'a n'de'ei yā 'áámá nduudu
ndúúcū Jesús. ⁴Ní ca"n'a yā: N'díí
Señor, né"e nū chí cuuví nī nús'uu
¿tíí cua"n'a cuuví chuū? ¿Dē'ē senal
'cuu"mī"n nī nús'uu ye"e tiempo chí
cuuvi tanducué"ē 'túúca?

⁵Jesús nan'guεεcúta"n'a yā: Cundée
nī cuidado chí mar 'áámá 'i"n'yā"n
nguée canche'ái yā ndís'tií. ⁶Ti
néené 'yáá"n 'i"n'yā"n chí yā ndúúcū

chí duuchí ní canche'ái yā 'i"n'yā"n
ní caa"má"n yā: 'Úú Cristo 'úú. 'Ii"yā"n
s'ee" ní canche'ái yā 'yaa"n n'dái
'i"n'yā"n.

⁷Taachi ndís'tií 'caandiveé"n nī
caandaá ní 'i"n'yā"n 'va'a yā chí chí
caandaá nguée idií'yá nī cuuvi ti
'tíicā canée chí cuuvi. Naati chíi"n
ní 'āā 'cuée tiempo chí ntuuvíí
í"nyēē"di. ⁸Ti 'áámá nación ní
'cuu"ma"n ndúúcū táámá nación
nī 'áámá gobierno ní 'cuu"ma"n yā
ndúúcū táámá gobierno. Ní néené
n'deeε cuaa"n nu"u yá"n'āa. Ní ndaa
vaadi 'cuiicu ndúúcū dendu'ū chí
dī'vaachií. Taachí cuuví dendu'ū chí
'túúca ní chíi"n ní cáámá cuunngá'a
vaadi ya'ai.

⁹Díí"n nī cuidado maá"n nī ndís'tií
ti 'i"n'yā"n nca'a yā ndís'tií tá'āa
'i"n'ntyé"ē. Tuu"mi ní 'cue"é yā
ndís'tií na yaācū sinagogas. Ndís'tií
nī canee chí ca"n'a nī nanáá"n 'i"n'yā"n
chí nga"n'a ntií"nyu"n yā ndúúcū reyes
cáāvā ntií"nyu"n ye"é. Ní 'íicú cuuvi
caa"má"n nī ye"é ní 'caandiveé"n yā
nduudu cuaacu. ¹⁰Taachí 'āā cuée
ndaa chí 'cuiinu i"nyēē"di, nduudu
cuaacu 'cūū canée chí caa"ma"n
nanáá"n nducyaaca 'i"n'yā"n ye"e
naciones ye"e núú"má"n í"nyēē"di.

¹¹Taachí candée yā ndís'tií chí nca'a
yā ndís'tií vmnáá"n 'i"n'ntyé"ē, nguée
nadicádínuu"n nī ye"é chí caa"ma"n
nī. Nguée dií"n núú"n yíi"nu"n nī ye"é.
Caa"ma"n nī tan'dúúca Espíritu
N'dai ye"é Ndyuūs caa"ma"n cuuvi
ndís'tií hora mii"n; ti nguée ndís'tií
chí caa"má"n nī ti Espíritu N'dai
ye"é Ndyuūs. ¹²Ní ye"e tiempo mii"n
nguaa"n 'díínu yā nca'a vi'í yā chí
'cáá"nú"n yā 'i"n'yā"n. Ní 'íicú chíidá yā
ní ca'a yā daiya yā. Ní daiya yā ní

ca'a yā chiidá yā ndúúcu chεécú yā ní 'caaⁿ'núⁿ yā 'iiⁿ'yāⁿ. ¹³Nducyáácá 'iiⁿ'yāⁿ nguée cunee yiinú yā chi ndís'tiī díⁿ nī ntiⁿ'nyuⁿ caavā 'úú. Naati 'iiⁿ'yāⁿ chi cuchée yā ní 'aama canée yā ndúúcu chi i'teenu yā yeⁿ'e Ndyuūs ndíi tiempo chi 'cuūvi yā ní nnguáⁿ'ai yā. ¹⁴Taachí ndís'tiī 'āā snaaⁿ nī dendu'ū chi 'túúca chi saⁿ'ā profeta Daniel dinguúⁿ yā na libro yeⁿ'e Ndyuūs tiempo chi chó'oo tuu'mi ní 'iiⁿ'yāⁿ chi snée yā na yáⁿ'āa Judea canée chi caⁿ'á yā caanu yā ná yiicū n'geεε. ('Iiⁿ'yāⁿ chi 'cueēⁿ chuū canée chi cuuvi deenú yā yeⁿ'e chuū.) ¹⁵Nguuvi miiⁿ ní ndúúti chi 'áámá 'iiⁿ'yāⁿ canduú yā tíⁿ va'āi ní nguée cuuvi núúⁿ nch'eeⁿ yā ní ndaa yā va'ai ní tun'dáa yā dendu'ū yeⁿ'e yā. ¹⁶Ní ndúúti chi 'áámá 'iiⁿ'yāⁿ canée yā na campo, ní nguée cuuvi núú ndaa yā va'ai yeⁿ'e yā ní nta'a yā cotón yeⁿ'e yā. ¹⁷De'e chúúca yaⁿ'ai yeⁿ'e n'daataá chi véé daiya tá chεeti tá ndúúcu n'daataá chí ngiicu dacuá'āa yeⁿ'e tá nguuvi chi cáanu yā. ¹⁸Ndís'tiī, caaca nī Ndyuūs chi nguée chó'oo chuū tiempo chi 'iiche. ¹⁹Ti nguuvi miiⁿ ní nééné 'cueenu 'iiⁿ'yāⁿ cuuvi tan'dúúca chi mar 'áámá vmnéⁿ'ēē 'āā cuée cuuvi 'tífca ndíi taachí Ndyuūs din'dái yā íⁿ'yeēⁿdí. 'Āā ntée ndúú cuayiivi ra chí snaaⁿ yā dendu'ū chi 'tífca. ²⁰Ndúúti chi Señor miiⁿ nguée nadidúú'vi yā tiempo miiⁿ mar 'áámá 'iiⁿ'yāⁿ nguée nnguáⁿ'ai yā. Naati ndiiⁿ nadidúú'vi yā cáavā 'iiⁿ'yāⁿ chi yeⁿ'é yā ti 'iiⁿ'yāⁿ miiⁿ Señor ndεεve yā.

²¹Tuu'mi ní ndúúti chi 'áámá 'iiⁿ'yāⁿ caaⁿ'maⁿ yā cuuvi yā ndís'tiī: Cuín'díichí nī, 'íngaā Cristo miiⁿ, o

cuín'díichí nī, miiⁿ canee Cristo miiⁿ'ya, nguée cu'téenu nī 'iiⁿ'yāⁿ miiⁿ. ²²Ti ndaa 'iiⁿ'yāⁿ chi cristos chi falsos yā ndúúcu 'iiⁿ'yāⁿ chi profetas chi falsos yā. Ní díⁿ yā señales ndúúcu vaadī n'giinu. Ní 'ífcú cuuvi canche'éi yā 'iiⁿ'yāⁿ, ndíi 'iiⁿ'yāⁿ chí Ndyuūs ndεεve yā ndúúti chi chuū cuuvi díⁿ yā. ²³Naati ndís'tiī ní 'cuεetinée yaaⁿ nī. Ngaⁿ'á ngíi ndís'tiī tanducuéⁿ'ē chuū 'nááⁿ chí 'āā cuée ndaa.

Táácā ndáá Saⁿ'a chi Daiya Ndyuūs

(Mt. 24.29-35, 42-44; Lc. 21.25-36)

²⁴Cho'oo chúū ní nguuvi miiⁿ chi 'cueenu nī cuuvi, 'yáⁿ'āa miiⁿ ní cúúvi maāⁿ ní 'iīyū miiⁿ ní 'āā ntée cuuvi dεεve. ²⁵Iiⁿ'nyuⁿ miiⁿ ní cun'dáa yeⁿ'ē nanguuvi ní nducuéⁿ'ē chi véé nanguuvi ní nuⁿ'u. ²⁶Tuu'mi ní snaaⁿ yā Saⁿ'ā chi Daiya Ndyuūs chí ndaa sa nguaaⁿ meēēⁿ ndúúcu poder yeⁿ'ē sa chí ch'εεte taavi ní ndεεvé n'dai ngíi n'gai maāⁿ sa. ²⁷Tuu'mi ní Ndyuūs dicho'ó yā ángeles yeⁿ'e yā chí nadidáámá 'iiⁿ'yāⁿ yeⁿ'é yā chi Ndyuūs ndεεve yā yeⁿ'ē núúⁿmaⁿ íⁿ'yeeⁿdí, ndii na yáⁿ'āa nducuéⁿ'ē n'dai yeⁿ'e yáⁿ'āa ndúúcu ndii na nducueⁿ'e nanguuvi.

²⁸Maaⁿ ní 'cueēⁿ nī yeⁿ'e ejemplo yeⁿ'e n'guíidii yaaⁿ nguuvi: Taachí inguaaⁿnu duūⁿnē n'gaiyāá ní ican'daa tá'āa, 'āā déenu nī chí 'āā cuchii tiempo yaááⁿ. ²⁹Tiicá ntúūⁿ taachi snaaⁿ ndís'tiī chi cuuvi dendú'ū chi 'túúca, 'āā deenú nī chí 'āā sneeⁿ niiⁿ'nuⁿ tiempo chi ndaa Saⁿ'ā chi Daiya Ndyuūs. Ní 'āā nééné niiⁿ'nuⁿ cánee tiempo 'cūū. ³⁰Cuaacu níⁿ'nyúⁿ ngaⁿ'á ngíi ndís'tiī: 'Iiⁿ'yāⁿ s'eeⁿ chi snée yā

maaⁿ 'āā cuéé 'cuūví yā neⁿe chi 'āā cuéé cuuví tanducuéⁿē chuū.

³¹Nánguuví ndúúcu ná yáⁿ'āā 'cūū ní chó'oo, naati nduudu yeⁿ'é nguéeé cho'oo.

³²Naati yeⁿ'ē nguuví miiⁿ ndúúcu hora miiⁿ nguéeé véé mar 'áámá 'iiⁿ'yāⁿ chi deenu yeⁿ'ē. Ndíí nguéeé ndúú ángeles, yeⁿ'e va'ai chæeti nguuví ndíí nguéeé ndúú Sáⁿ'ā chi Daiya Dendyuūs deenú yā yeⁿ'ē. Dámaāⁿ Chiida yú chi canée yā na va'ai chæeti nguuví deenu yā.

³³Chííⁿ chí ndís'tii ní 'cuætinéeé yaaⁿ nī. Dicuéeénaaⁿ nī ní caaⁿ'ma'ngua'á nī, ti nguéeé déénu nī tíí cuaⁿ'ā ndaa hora miiⁿ. ³⁴Ejemplo chuū tan'dúúca 'áámá 'iiⁿ'yāⁿ chí caⁿ'a yā yaⁿ'ai. Taachi 'āā cuéé can'dáa yā na vaācu yā, caⁿ'a yā chii yā mozos yeⁿ'é yā chí caⁿ'a yā ntiiⁿ'nyuⁿ 'áámá 'áámá mozo yeⁿ'ē sa. Ní cuuvi yā saⁿ'ā chí idiiⁿ cuidado yeⁿ'e cheendi va'āi miiⁿ chi cunée yaaⁿ sa. Ní cueⁿ'e yā. ³⁵Maaⁿ ní ndís'tii 'cuætinéeé yaáⁿ nī, ti nguéeé déénu nī tíí cuaⁿ'ā ndaa dueño yeⁿ'e va'āi miiⁿ. Nguéeé déénu nī nduuti chi ndaa yā n'gaaⁿ, o yaaⁿ chæete, o taachí 'cuaí tú'u, o cuaaⁿ na nguætiyaaⁿ. ³⁶Áá tii dácanaaⁿ ndaa yā ní ndaāca yā ndís'tii chí styaađu nī. ³⁷Chííⁿ chí ngaⁿ'á ngíí ndís'tii, ní ngíí nducyaaca 'iiⁿ'yāⁿ: 'Cuætinéeé yaáⁿ yā.

Saⁿ'ā s'eeⁿ nadacádiinūūⁿ sa taacā cuta'a sa Jesús

(Mt. 26.1-5; Lc. 22.1-2; Jn. 11.45-53)

14 Ná 'uūví nguūví ní cuuvā 'viicu yeⁿ'e pascua chí 'viicu yeⁿ'ē pan chí nguéeé levadura yeⁿ'ē. Chiiduú n'geete ndúúcu maestros

yeⁿ'e ley 'nuúⁿ yā taacā chí cuuvi cannche'éeí yā Jesús ní cuta'á yā 'iiⁿ'yāⁿ ní 'caaⁿ'núⁿ yā 'yā. ²Naati caⁿ'a yā: Nguéeé diiⁿ yú nguuví 'viicu tí 'iiⁿ'yāⁿ yeⁿ'e yāā Jerusalén miiⁿ didáⁿ'a yā ní diíⁿ yā vaadi 'caa'va ndúúcu nús'uu.

'Áámá n'daataá n'gií tá aceite na cuerpo yeⁿ'e Jesús

(Mt. 26.6-13; Jn. 12.1-8)

³Jesús canee yā na yāā Betania na vaacu Simón chí canéeé sá ndúúcu ca'ai chí nguuví lepra chí in'duuti cuerpo yeⁿ'ē sa. Taachí Jesús miiⁿ véé yā na mesa, ndaā 'áámá n'daataá nanáaⁿ yā. Táⁿ'ā miiⁿ ní ndeē tá 'áámá frasco yeⁿ'e alabastro ndiituú ndúúcu aceite perfume yeⁿ'e nardo chí ndæeve ngeeⁿ ní neené ya'ai chíí'vē. Ní 'cuūⁿ tá frasco miiⁿ ní ch'eendaa tá aceite miiⁿ na tiiⁿ Señor Jesús miiⁿ. ⁴N'duuví discípulos chí snée yā miiⁿ nduuví táaⁿ yā ní caⁿ'a yā nguaaⁿ maaⁿ yā: ¿Dē'ē cuuví chí chingéeⁿ ta aceite 'cūū? ⁵Ti cuuvi n'diicui yú ní ngo'o 'iinū ciento caadi ní cuuvi ca'a yú 'iiⁿ'yāⁿ chí nguéeé yeⁿ'e yā. Ní nduuví taáⁿ yā ndúúcu tá.

⁶Naati Jesús miiⁿ ní caⁿ'a yā: 'Āā canee ra tá. Nguéeé yaa'vi ní táⁿ'ā. ¿Dē'ē cúúví chí yaa'vi ní táⁿ'ā? Tá 'tii ní n'daācā idiiⁿ tá nduucú. ⁷Iiⁿ'yāⁿ chí nguéeé yeⁿ'e yā ní 'aama ca cánée yā ndúúcu nī. Ní ndís'tii ní cuuvi din'daacá nī nduucú yā taachi neⁿ'e nī; naati 'úú nguéeé 'aama cuneeé ndúúcu nī. ⁸Tá 'cūū ní diiⁿ tá tan'dúúca chí ch'ii tá perfume cuerpo yeⁿ'ē maaⁿ chí 'āā cuéé 'cuūví, 'tííca diiⁿ tá. Ní 'āā nnee 'cuii ta chuū 'úú taachí 'āā cuéé

'cueechí. ⁹Cuaacu níⁿnyúⁿ ngaⁿá ngí ndís'tii: 'Áā tíí nūuⁿ chí 'iiⁿyāⁿ caaⁿmáⁿ yā nduudu ngai yeⁿé yeⁿē chi nanguaⁿ'ai 'iiⁿyāⁿ na núúⁿmáⁿ íⁿ'yeeⁿdī caaⁿ'maⁿ ntuuⁿ yā chi diiⁿ n'daataa 'cūū ní n'gaacú yā yeⁿē tá.

Judas Iscariote nca'a sa Jesús

(Mt. 26.14-16; Lc. 22.3-6)

¹⁰Tuu'mi ní Judas Iscariote, 'áámá chéé 'iiⁿyāⁿ naachi ndiichuuví discipulos, cheⁿe sá nanááⁿ chiiduú n'geete. Ní ngaⁿ'a sa táácā chi cuuvi ncaⁿā sa Jesús miiⁿ ná ta'a 'iiⁿyāⁿ s'eeⁿ. ¹¹Taachí 'iiⁿyāⁿ s'eeⁿ ch'iindiveéⁿ yā chuū, neené yeenú yā, ní caⁿ'a yā chi ca'a yā tuumí Judas miiⁿ cáávā chuū. Judas ní in'nuuⁿ sa dē'ē hora chi nca'a sa 'iiⁿyāⁿ s'eeⁿ Jesús miiⁿ.

Naachí che'e nguiinū yeⁿe Señor Jesús miiⁿ

(Mt. 26.17-29; Lc. 22.7-23; Jn.

13.21-30; I Co. 11.23-26)

¹²Ndaā nguuví vmnāáⁿ vmnaaⁿ yeⁿe 'viicu chi che'é yā pan chi nguéé levadura yeⁿē, 'viicu taachi n'giiⁿnúⁿ yā 'iiti cuūchí yeⁿe pascua miiⁿ. Ní discipulos yeⁿe Jesús miiⁿ ntiinguuneéⁿ yā Jesús: 'Tíí neⁿ'e di chí caⁿ'á 'nū in'nuúⁿ 'nū chi che'e nguiinū yú yeⁿe 'viicu pascua?

¹³Tuu'mi ní Jesús dicho'ó yā na 'uūví discipulos yeⁿe yā, ní caⁿ'a yā chii yā 'iiⁿyāⁿ: Ndís'tii cueⁿ'é nī yāāⁿ Jerusalén. Miiⁿ ní ndaacaⁿ nī 'áámá sáⁿā chí ndéé sa 'áámá 'cuuti cuéé nuūⁿnīⁿ. Can'dáa nī saⁿ'ā. ¹⁴Naachí ndaa sa va'ai miiⁿ, ní cuuví nī sáⁿ'ā chi yeⁿē va'ai miiⁿ: Maestro yeⁿe yú ngaⁿ'a yā 'tíicā: 'Tii canéé cuarto naachi che'e nguiinū yeⁿe pascua

ndúúcū discipulos yeⁿ'é? ¹⁵Tuu'mi ní chíⁿ'i yā 'áámá cuarto ch'ēte ná ndiichi ndii 'úúví piso miiⁿ chí 'áá véé yaāⁿ. Miiⁿ ní in'nuúⁿ nī chí che'e yú.

¹⁶Discipulos cueⁿ'e yā ní ndaa yā ná yāāⁿ Jerusalén miiⁿ ní ndaāca yā tanducuéⁿē tan'duucā chi Jesús ngaⁿ'a yā. Ní 'iiⁿyāⁿ s'eeⁿ in'nuúⁿ yā chí che'e nguiinū yā yeⁿe 'viicu yeⁿ'e pascua miiⁿ.

¹⁷Taachí 'āā chiī chiinū míⁿ ndaā Jesús ndúúcū ndiichuuví discipulos yeⁿe yā. ¹⁸Taachí v̄et̄é yā na mesa miiⁿ chí che'e yā Jesús caⁿ'a yā chii yā 'iiⁿyāⁿ s'eeⁿ: Cuaacu níⁿnyúⁿ ngaⁿ'á ngí ndís'tii, chí 'áámá chéé ndís'tii chí nge'é nī nduucú diiⁿ nī entregar 'úú.

¹⁹Tuu'mi ní discipulos ní s'nee ndaachi núúⁿ yā ní tuca'a yā tiinguuneeⁿ yā Jesús ca'áámá ca'áámá yā: 'Áá 'úú? Ní táámá yā ngaⁿ'a ntúuⁿ yā: 'Áá 'úú rá?

²⁰Jesús nan'gueecútaⁿ'a yā: 'Áámá ch̄eē naachi ndiichúúví chí di'caāndā yā pan yeⁿ'é yā na cúú 'cūū nduucú caⁿ'á yā diiⁿ yā 'tíicā. ²¹Cuaacu, chí Saⁿ'ā chí Daiya Dendyuūs caⁿ'a sa 'cuenú sa cuuvi tan'dúúcā chí ngaⁿ'a yeⁿ'é yā naachi canéé nguūⁿ na libro yeⁿ'é Ndyuūs. Dē'e chúúcā ya'ai yeⁿ'e saⁿ'ā chí nca'a sa 'úú chí Saⁿ'ā chí Daiya Ndyuūs. N'dáácā ca yeⁿ'ē sa ndúúti chí nguē ch'iindiyaāⁿ sa.

²²Taachí v̄et̄é yā nge'e yā, tuu'mi ní Jesús sta'á yā pan, ní nca'a yā gracias Ndyuūs cáávā pan miiⁿ. Ní n'deé yā pan ní ca'a yā discipulos. Ní caⁿ'a yā: Che'é nī pan caati tan'dúúcā cuerpo yeⁿ'é 'tíicā.

²³Ní Jesús sta'á yā taza ndúúcū nuūⁿnīⁿ yeⁿ'e uvas. Ní taachi

nca'a yā gracias Ndyuūs, ca'a yā discípulos ye^{n'}é yā. Ní ca^{n'}a yā. Nducyaaca ndís'tiī cu'ú nī nuū^{n'}nī^{n'} uvas ye^{n'}e taza 'cūū. ²⁴Ní ca^{n'}a yā chii yā 'iī^{n'}yā^{n'} s'ee^{n'}: Nuū^{n'}nī^{n'} uvas mii^{n'} tan'dúú^{n'}cā yuū^{n'} ye^{n'}é, ní ye^{n'}e 'áámá compromiso chi ngai ye^{n'}é. Yuū^{n'} ye^{n'}é chí cungee^{n'} ní cáávā 'yaa^{n'} n'dái 'iī^{n'}yā^{n'}. ²⁵Cuaacu ní^{n'}nyú^{n'} nga^{n'}á ngíí ndís'tiī, chí 'āā ntéé cu'ú nuū^{n'}nī^{n'} ye^{n'}e uvas na i^{n'}ye^{n'}é^{n'}dí 'cūū ndíí nguuví chi cu'ú naachí Ndyuūs nga^{n'}a ntii^{n'}nyú^{n'} yā.

Jesús nga^{n'}a yā chi Pedro ní caa^{n'}ma^{n'} sa chi nguéé in'diichi sa Jesús

(Mt. 26.30-35; Lc. 22.31-34; Jn. 13.36-38)

²⁶Taachí ch'iinu chiita yā himno, chi canción ye^{n'}e Ndyuūs nan'dáa yā va'āī ní cue^{n'}é yā na yiicū chi nguuví Olivos. ²⁷Tuu'mi ní Jesús ca^{n'}a yā chii yā discípulos: Nducyaaca ndís'tiī cuuví 'cuinaá^{n'} nī ye^{n'}é 'úú maa^{n'}nguínū caati nga^{n'}a naachi canéé nguū^{n'} na libro ye^{n'}é Ndyuūs 'túú^{n'}cā: 'Nuūcá'ai yā 'caa^{n'}nú^{n'} yā sa^{n'}ā chi idiī^{n'} sa cuidado 'iiti cuūchí ní 'iiti cuūchí s'ee^{n'} ní ca^{n'}á 'muu^{n'} ca^{n'}á mii^{n'} ti. ²⁸Taachi 'úú nduuchí ye^{n'}e nguaa^{n'} tiná^{n'}ā, ca^{n'}á vmnaa^{n'} ye^{n'}é ndís'tiī na yá^{n'}āa Galilea.

²⁹Tuu'mi ní Pedro mii^{n'} ní ca^{n'}a sa chii sa 'iī^{n'}yā^{n'}: 'Áará chí nducyaaca yā cuuví 'cuinaá^{n'} yā, 'úú ní nguéé cuuví 'cuinaá^{n'}.

³⁰Tuu'mi ní Jesús ní ca^{n'}a yā chiiya Pedro: Cuaacu ní^{n'}nyú^{n'} nga^{n'}á ngíí dii chi maa^{n'}nguuiinu taachi 'āā cuéé 'cuaī tusá^{n'}ā 'uūví cuuví, 'iinū cuuví cuee^{n'}díftu di nga^{n'}a di ye^{n'}é 'úú chi nguéé in'diichi di 'úú.

³¹Naati Pedro mii^{n'} ní chee^{n'}diitū ca^{n'}a sa: 'Áará chí 'cuūví ndúúcu nī, Maestro, nguéé nga^{n'}á chi nguéé in'diichi N'dii. Ní nducyaaca discípulos ní 'tiicá ntúū^{n'} ca^{n'}a yā.

Jesús nga^{n'}angua^{n'}á yā na jardín chi nguuví Getsemaní

(Mt. 26.36-46; Lc. 22.39-46)

³²Tuu'mi ní ndaá yā na 'áámá jardín chi nguuví Getsemaní, ní Jesús ca^{n'}a yā chii yā discípulos ye^{n'}e yā: 'Cuētéé nī 'muu^{n'}, ne^{n'}e chí 'úú ca^{n'}á caa^{n'}mā^{n'}ngua^{n'}á.

³³Ní Jesús candéé yā Pedro, ndúúcu Jacobo, ndúúcu Juan. Ní neené nadicádiinu^{n'} Jesús ní nééne s'nee^{n'} ndaachí yiinú yā. ³⁴Ní ca^{n'}a yā chii yā 'iī^{n'}yā^{n'} s'ee^{n'}: Alma ye^{n'}é neené ndaachi yiinú chí ya'āī chí 'cuūví. 'Āā snéé núú^{n'} nī 'muu^{n'}, ní nguéé 'cuēeti yaadú nī.

³⁵Tuu'mi ní Jesús cue^{n'}e yā ta 'líí^{n'} cuáá^{n'} vmnaa^{n'}, ní candiitín'dii yā na yá^{n'}āa ní ca^{n'}angua^{n'}á yā ní ca^{n'}a yā: N'diī Chiidá, ndúúti chí cuuví ní nguéé díí^{n'} nī ye^{n'}e chí 'cuenú cuuví ye^{n'}e prueba 'cūū chí canéé chí cuuví hora chí cuchii. ³⁶Tuu'mi ní naachí ca^{n'}angua^{n'}á yā ní ca^{n'}a yā: N'diī Chiidá, n'diī cuuví díí^{n'} nī tanducue^{n'}é. Nadinguá^{n'}ai nī 'úú ye^{n'}e chí 'cuenú cuuví prueba 'cūū. Naati nguéé cuuví tan'dúú^{n'}cā chí 'úú ne^{n'}é, naati tan'dúú^{n'}cā chí n'diī ne^{n'}e nī.

³⁷Tuu'mi ní ndaa ntúū^{n'} yā naachi snee discípulos ye^{n'}é yā, ní ndaāca yā discípulos chí stiyaadú yā. Ní Jesús ca^{n'}a yā chii yā Pedro mii^{n'}: Díí Simón, ¿Áá cyaadu di? ¿Áá nguéé ichéé di cánduuchi di mar 'áámá hora? ³⁸Ndís'tiī 'cuēeti

nduuchí nī ní caaⁿmaⁿngua^a ní ní nguée dííⁿ ní nuuⁿndi. Cuaacu níⁿnyúⁿ espíritu yeⁿe ní neⁿe díiⁿ n'daacáa, naati cuerpo yeⁿe ní ní 'āā duūvā.

³⁹Tuuⁿmi ní Jesús cueⁿe ntúuⁿ yā ní ngaⁿangua^a yā, ní caⁿa ntúuⁿ yā tan'dúúca chí caⁿa yā vmnaaⁿ. ⁴⁰Ní nguēcunée yā ndaa ntúuⁿ yā naachi snée discípuⁿlos, ní ndaaca ntúuⁿ yā 'iⁿyāⁿ s'eeⁿ stiyaadú yā. Ní 'āā ntée ngii ichēe yā ndúúcu yaaⁿ ti nduutināaⁿ yā chí yaaⁿ náaⁿ yā. Ní 'iⁿyāⁿ s'eeⁿ ní nguée déenu yā chí n'guēcútaⁿa yā. ⁴¹Cueⁿe yā ndii chiiⁿ ndii 'ínú cuuvi, ní ngaⁿangua^a yā. Ní taachi ndaa yā naachi snee discípuⁿlos, caⁿa yā: Ndís'tií 'cuētiyaadú ní ní ntaavi'tuunúúⁿ ní. 'Āā tiiní cā. 'Āā ndaa hora chí 'iⁿyāⁿ nca'a yā 'úú Saⁿā chí Daiya Dendyuūs na táā saⁿā s'eeⁿ chí dinuuⁿndi. ⁴²Nducueeⁿ ndís'tií ní cuⁿū yú. 'Āā cuchii níiⁿnuúⁿ saⁿā chí nca'a 'úú.

Chiichí yā Jesús ní candée yā 'iⁿyāⁿ preso

(Mt. 26.47-56; Lc. 22.47-53; Jn. 18.2-11)

⁴³Naaⁿ chí Jesús indée yā ndaa Judas chí saⁿā 'áámá yeⁿe ndiichuuví discípuⁿlos. Ní ndaa sa ndúúcu n'dee n'dái 'iⁿyāⁿ ndúúcu machete 'uūví lados 'caāiⁿ ndúúcu yáⁿá. Chiiduú n'gēete ndúúcu maestros yeⁿe ley, ndúúcu 'iⁿyāⁿ ndiicúu chí ngaⁿa ntiiⁿnyuⁿ yeⁿe yaācū dichó'o yā 'iⁿyāⁿ s'eeⁿ. ⁴⁴Judas miiⁿ chí nca'a sa Jesús 'iⁿyāⁿ s'eeⁿ, ní ca'a sa 'aama seña. Ní caⁿa sa 'túúca: 'iⁿyāⁿ chí 'úú chí'neeⁿ cheendí, 'iⁿyāⁿ miiⁿ chíí. Cuta^a ní 'iⁿyāⁿ ní candée ní 'iⁿyāⁿ ní din'daacá ní seguro 'iⁿyāⁿ.

⁴⁵Taachí ndaā Judas nanááⁿ Jesús ní caⁿa sa: N'díí Maestro, Maestro. Ní 'neeⁿ cheendi sa 'iⁿyāⁿ. ⁴⁶Tuuⁿmi ní sta^a yā Jesús ní candée yā preso 'iⁿyāⁿ. ⁴⁷Naati 'áámá chéeⁿ 'iⁿyāⁿ chí snée miiⁿ itun'dáa yā machete chí 'uūví lados 'caāiⁿ yeⁿe yā ní 'nuucá'ai yā mozo yeⁿe chiiduú ch'ēete ca ní chíica sa veēⁿ mozo miiⁿ. ⁴⁸Tuuⁿmi ní Jesús caⁿa yā chii yā nducyaaca 'iⁿyāⁿ s'eeⁿ: 'Áá can'daā ndís'tií ndúúcu machete chí 'uūví lados 'caāiⁿ ndúúcu yáⁿá chí cuta^a ní 'úú tan'dúúca chí 'úú 'áámá duucu 'úú. ⁴⁹Nguuvi nguuví caneé na yáacū templo miiⁿ nguaaⁿ ndís'tií chí ngi'cueⁿ ní ndís'tií ní nguēe sta^a ní 'úú. Chūú canée chí cuuvi ní cuuvi cunnuū caⁿa naachi canée nguūⁿ na libro yeⁿe Ndyuūs. ⁵⁰Tuuⁿmi ní nducyaaca discípuⁿlos s'neeⁿ yā Jesús miiⁿ dámaáⁿ yā ní cheenu yā.

Saⁿā 'díí chí cueⁿe ngéenū

⁵¹Naati 'áámá saⁿā 'dííⁿ ndaā sa ní cueⁿe sa ndúúcu 'iⁿyāⁿ s'eeⁿ. Ndēecu sa 'áámá n'dyáⁿā sámana. 'Áámá yā sta^a yā saⁿa 'díí miiⁿ.

⁵²Naati saⁿā 'dííⁿ miiⁿ ní s'neeⁿ sa sámana ní cueⁿe sa dácaa yuūcú sa.

Jesús nanááⁿ 'iⁿntyéⁿe chí n'gēete ca yeⁿe yaācū

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³Tuuⁿmi ní candée yā Jesús miiⁿ nanááⁿ chiiduú ch'ēete ca. Ní miiⁿ nduuvidaamá yā nducyaaca chiiduú n'gēetē ndúúcu 'iⁿyāⁿ ndiicúu chí ngaⁿa ntiiⁿnyuⁿ yeⁿe yaācū ndúúcu maestros yeⁿe ley. ⁵⁴Pedro miiⁿ ní cueⁿe yaⁿai sa n'dáa sa Jesús miiⁿ.

Ní ndaa sa ndii chuva'āi yeⁿ'e va'ai chiiduú ch'εete ca ní ch'iindí sa ndúúcu policías ní in'taavi cuutú sa dáámá ndúúcu yā ti miiⁿ ní ngiichi yaⁿ'ā yeⁿ'é yā.

⁵⁵Chiiduú n'gεete ndúúcu nducyaaca yā chí nduuvidaama in'nuúⁿ yā 'áámá prueba contra yeⁿ'e Jesús miiⁿ chí díiⁿ yā condenar Jesús chi 'caaⁿ'núⁿ yā Jesús; naati nguée ndaaca yā. ⁵⁶Neené 'yaaⁿ 'iiⁿ'yāⁿ ngaⁿ'a yā nduudu yaadi yeⁿ'e Jesús miiⁿ naati mar 'áámá yā nguée dáámá ngaⁿ'a yā. ⁵⁷N'duuví yā ní ncueeⁿ yā ní caⁿ'a yā nduudu yaadi, ní caⁿ'a yā: ⁵⁸Nús'uu ní ch'iindiveéⁿ 'nū chí Jesús caⁿ'a yā 'túúcā: 'Úú ní nadituúví yáacu 'cūú chi saⁿ'ā yeⁿ'e iⁿ'yeeⁿ dí 'cūú din'dái sa. Ní chεeti 'iinū nguuví nadin'dái taama chi nguée saⁿ'ā iⁿ'yeeⁿ dí 'cūú din'dái sa.

⁵⁹Naati nguée nduuvídáámá nduudu yā yeⁿ'e chí ngaⁿ'a yā.

⁶⁰Tuu'mi ní chiiduú ch'εete ca chi ngaⁿ'a ntiiⁿ'nyuⁿ yeⁿ'e tanáⁿ'ā chiidūu, ndúcueeⁿ yā nguaaⁿ nducyáácá 'iiⁿ'yāⁿ s'eeⁿ ní ntiinguuneeⁿ yā Jesús miiⁿ: 'Áá nguée de'ē vεε nan'guεεcútaⁿ'a ní? 'De'ē chí ngaⁿ'á yā yeⁿ'e ní? 'De'ē ngaⁿ'a ní maánⁿ ní yeⁿ'e ní?

⁶¹Jesús míiⁿ 'āā ntée caⁿ'a yā. Ní nguée n'guéécútaⁿ'a yā yeⁿ'e mar 'áámá. Chiiduú ch'εete ca miiⁿ ntiinguunéeⁿ ntúuⁿ yā Jesús, ní caⁿ'a yā: 'Áá dii Cristo, Daiya Dendyuūs chí n'dai taavi?

⁶²Jesús caⁿ'a yā chii yā 'iiⁿ'yāⁿ s'eeⁿ: 'Tíicā 'úú. Ndís'tii ní caⁿ'a ní snaaⁿ ní Saⁿ'ā chi Daiya Dendyuūs chí 'cuūndi sa lado yeⁿ'e honor yeⁿ'é Ndyuūs chí véé tanducuéⁿ'e poder yeⁿ'e yā. Ní ndaa sa nguaaⁿ meééⁿ yeⁿ'e nanguuvi.

⁶³Tuu'mi ní chiiduú ch'εete ca chíin'cuūⁿ sa catecai sa, ní caⁿ'ā sa: 'De'ē ca díiⁿ yú testigos chí n'nuuⁿ yú? ⁶⁴Áā ch'iindiveéⁿ ní dendu'ū chí ngaⁿ'ā sa contra Ndyuūs. 'Ítáácā tuumicadíinuⁿ ní? Nducyaaca 'iiⁿ'yāⁿ ngaⁿ'a yā chí condenado Jesús chí 'cuuví yā.

⁶⁵Tuu'mi ní n'duuví yā ní ca'a nee daíⁿ yā Jesús ní n'gaadí yā nduutináaⁿ yā ndúúcu tíinūⁿ. Ní policías ndúúcu tá'á yā ch'eⁿ'e yā naaⁿ Jesús. Ní caⁿ'a yā: Caaⁿ'maⁿ dí 'du'ū ch'eⁿ'e dii?

**Pedro miiⁿ ní ngaⁿ'ā sa chí nguée
n'diichi sá Jesús**

(Mt. 26.69-75; Lc. 22.56-62; Jn. 18.15-18, 25-29)

⁶⁶Pedro miiⁿ ní canee sa chuva'ai cuaaⁿ ndiiyā. Ní ndaa 'áámá n'daataá chí díiⁿ mandado yeⁿ'e chiiduú ch'εete ca nanááⁿ Pedro miiⁿ. ⁶⁷Ní n'diichi tá chí in'taavi cúutū sa na yaⁿ'ā. Ní cānee táⁿ'ā miiⁿ ní ch'iinu tá Pedro. Tuu'mi ní caⁿ'a tá: Dii ntúūⁿ di canee dí ndúúcu Jesús yeⁿ'e yāāⁿ Nazaret.

⁶⁸Naati Pedro miiⁿ cheeⁿ'diitū sa, ní caⁿ'ā sa: 'Úú ní nguée in'diichi 'iiⁿ'yāⁿ, ndíi nguée deenú chí ngaⁿ'ā di. Ní can'dáa sa cuaaⁿ chuva'āi naachi indaa yā. Tuu'mi ní 'caí tusáⁿ'ā. ⁶⁹Táⁿ'ā chí idiin mandado miiⁿ ch'íinú ntúūⁿ ta sáⁿ'ā, ní caⁿ'a tá chí tá 'iiⁿ'yāⁿ chí snée yā miiⁿ: Sáⁿ'a 'cūú 'áámá chée saⁿ'ā chí cachiica ndúúcu Jesús.

⁷⁰Naati Pedro miiⁿ ní nnguεεcunée sa cheeⁿ'dítu sa. Cuayiivi miiⁿ ní 'iiⁿ'yāⁿ chí snée yā miiⁿ ní caⁿ'a ntúūⁿ yā Pedro: Cuaacu chí dii ní dáámá chí

cachiica di ndúúcū Jesús ti dii ní ye^{ní}ē yá^{ní}āa Galilea, ní nduudu ye^{ní}ē di tan'dúúcā 'ií^{ní}yāⁿ s'eeⁿ.

⁷¹Tuu'mi ní Pedro miiⁿ ní 'caa'va sa, ní cunncaā ca^{ní}ā sa. Ní 'cái sa “por Ndyuūs”: Nguéé n'diichí 'íí^{ní}yāⁿ 'cúū.

⁷²Tuu'mi ní túsa^{ní}ā miiⁿ 'cai ntúuⁿ tī ndii 'úúví cuuvi. Ní Pedro miiⁿ ní n'gaacu sa chi Jesús ca^{ní}a yā chii yā sa^{ní}ā: 'Naaⁿ chi 'āā cuéé 'cuaí túsa^{ní}ā 'uúví cuuvi, 'āā 'íínú cuuvi cheeⁿdiitu di chí nga^{ní}a di chi nguéé n'diichi di 'úú. Taachi nadicádíínuuⁿ sa chuū, ní cheēcū sa.

Jesús nanááⁿ Pilato

(Mt. 27.1-2, 11-14; Lc. 23.1-5; Jn. 18.28-38)

15 Taachí chideεεε, chiiduú n'geetē ní nduuvi daamá yā ndúúcū 'ií^{ní}yāⁿ ndiicū chi nga^{ní}a ntii^{ní}nyuⁿ ye^{ní}e yaācū, ndúúcū maestros ye^{ní}e ley, ndúúcū nducyaaca 'ií^{ní}yāⁿ n'geete. Ní ndēē chiichí yā Jesús ní candēē yā 'ií^{ní}yāⁿ nanááⁿ gobernador Pilato. ²Tuu'mi ní Pilato miiⁿ intiinguuneeⁿ yā Jesús: 'Áá díí Rey ye^{ní}e 'ií^{ní}yāⁿ Israel s'eeⁿ chi judíos? Ní Jesús nan'guεεcúta^{ní}a yā: N'dii nga^{ní}a cuaacú nī ti 'tífcā. ³Chiiduú n'geete ní neenē n'deeē nááⁿ chi nga^{ní}á yā contra ye^{ní}e Jesús naati Jesús nguéé nan'guεεcúta^{ní}a yā ye^{ní}ē mar 'áámá. ⁴Tuu'mi ní Pilato miiⁿ ní nan'guεεcunée yā ntiinguunéeⁿ yā Jesús miiⁿ: 'Áá nguéé de'ē vee nán'guεεcúta^{ní}á nī? 'Cuin'dííchí nī ye^{ní}é tanducué^{ní}ē chí nguéé n'daacā nga^{ní}á yā ye^{ní}e nī.

⁵Naati Jesús miiⁿ ní nguéé de'ē vee nan'guεεcúta^{ní}á yā. Chíf^{ní} chí Pilato miiⁿ che^{ní}e yiínú yā ní nguéé déénu yā de'ē nadicádíínuuⁿ yā.

Pilato ca^{ní}a yā chi 'íí^{ní}yāⁿ s'eeⁿ candēé yā Jesús chi 'caa^{ní}núⁿ yā 'ií^{ní}yāⁿ

(Mt. 27.15-31; Lc. 23.13-25; Jn. 18.38-19.16)

⁶Canéé 'áámá costumbre ye^{ní}e 'ií^{ní}yāⁿ Israel s'eeⁿ chí n'dεechi yā 'áámá sa^{ní}ā chi canuuⁿ vácūū nguuvi 'viicú ye^{ní}e pascua. 'Áámá sa^{ní}ā chi preso sa chi 'ií^{ní}yāⁿ Israel ne^{ní}e yā, 'tífcā canee chí diiⁿ Pilato miiⁿ. ⁷Ní canuuⁿ 'áámá sa^{ní}ā vácūū chí nguuvi Barrabás ndúúcū ta n'duuví sa^{ní}ā chí 'nii^{ní}nuⁿ sa 'ií^{ní}yāⁿ taachi 'āā diiⁿ caandá yā contra gobierno miiⁿ. ⁸Ní 'ií^{ní}yāⁿ Israel s'eeⁿ ní ndaa yā nanááⁿ Pilato miiⁿ, ní chiica yā chi Pilato ní dííⁿ yā tan'dúúcā costumbre ye^{ní}e yā. ⁹Ní Pilato miiⁿ nan'guεεcúta^{ní}a yā: 'Áá ne^{ní}e nī chí n'dεēchí Rey ye^{ní}ē 'ií^{ní}yāⁿ Israel?

¹⁰Tí Pilato miiⁿ deenu yā chí chiiduú n'geete nca^{ní}á yā Jesús miiⁿ cáávā vaadi ngueéé. ¹¹Naati chiiduú n'geete chinuú yā 'ií^{ní}yāⁿ ye^{ní}e yááⁿ Jerusalén chí caaca yā Barrabás ti n'dáacā chí n'dεechii yā sa^{ní}ā chí nguuvi Barrabás. ¹²Tuu'mi ní Pilato miiⁿ intiinguunéeⁿ yā: 'Dε'ē ne^{ní}e nī chí dííⁿ ndúúcū 'ií^{ní}yāⁿ chí ndís'tii nga^{ní}a nī Rey ye^{ní}e 'ií^{ní}yāⁿ Israel?

¹³'Ií^{ní}yāⁿ s'eeⁿ nan'guεεcúta^{ní}a yā ní 'cai yiicú yā: Cu'nee^{ní}nga^{ní}á nī 'ií^{ní}yāⁿ.

¹⁴Pilato miiⁿ ní ca^{ní}a yā chii yā 'ií^{ní}yāⁿ s'eeⁿ: 'Dε'ē chí nguéé n'daacā ndíí^{ní} sá^{ní}a 'cūū? Naati 'ií^{ní}yāⁿ s'eeⁿ ní nan'guεεcunée yā 'cai yā: Cu'nee^{ní}nga^{ní}á nī 'ií^{ní}yāⁿ.

¹⁵Tuu'mi ní Pilato miiⁿ chí nguéé ne^{ní}e yā chí nduuví táa^{ní} 'ií^{ní}yāⁿ s'eeⁿ ye^{ní}é yā, n'dεechii sá Barrabás miiⁿ. Cuayiivi ní ca^{ní}a ntii^{ní}nyuⁿ sa chi

'cueⁿé yā Jesús miiⁿ. Ch'iinu ch'eⁿé yā Jesús miiⁿ ní nca'a sa Jesús miiⁿ 'iiⁿyāⁿ chí cuⁿééⁿnga'á yā.

¹⁶Tuu'mi ní soldados romanos candéé sa Jesús vaacuyáaⁿ na cuarto yeⁿe palacio miiⁿ chí nguuví Pretorio, ní yaa'ví yā tanáⁿā soldados ní nduuvidaamá yā miiⁿ.

¹⁷Ní s'nuúⁿ yā catecai morado cuá'ā Jesús miiⁿ. Ní s'nuúⁿ yā tiiⁿ Jesús miiⁿ 'áamá corona chi ndeenyú ndúúcū yaaⁿ. ¹⁸Tuu'mi ní tucá'a yā 'cai yā: Cunduuchi ní n'dii, Rey yeⁿe 'iiⁿyāⁿ Israel.

¹⁹Ní ch'eⁿé yā tiiⁿ yā ndúúcū 'áamá taaⁿ nduu. Ní ca'a nee dáíⁿ yā Jesús ní nchiinti'yá yā nanáaⁿ yā, ní dííⁿ yā honrar 'iiⁿyāⁿ. ²⁰Ch'iinu ch'iiⁿnyuⁿnéⁿ yā yeⁿe Jesús 'tíica, ndivíi yā catecai chi morada ní 'nuuⁿ 'nuūⁿ ntúuⁿ yā catecai maáⁿ yā. Cuayiivi tun'dáa yā Jesús ní s'neeⁿnga'á yā 'iiⁿyāⁿ.

S'nééⁿnga'á yā Jesús

(Mt. 27.32-44; Lc. 23.26-43; Jn. 19.17-27)

²¹'Áamá saⁿā yeⁿe yáⁿā Cirene chi nguuví sa Simón, chí chiidá Alejandro ndúúcū Rufo, ndáa sa cheⁿe sa cuéeti. Taachí cho'o sa cyúúni miiⁿ, soldados a fuerza di'cuíitu yā saⁿā chí candéé sa cruz yeⁿe Jesús miiⁿ.

²²Ní candéé yā Jesús 'áamá lado yeⁿe yáaⁿ Jerusalén na lugar chi nguuví Gólgota chi neⁿe caaⁿmaⁿ nduudu yeⁿe yú, Lugar ní 'Iini Nga'ai Tiiⁿ. ²³Ní ca'á yā chí chí'i Jesús vino chí staⁿa yā ndúúcū yaātā yaāa chí nguuví mirra, naati Jesús nguéé chí'i yā. ²⁴Tuu'mi ní chí'neeⁿnga'á yā Jesús. Ní soldados ní tun'dáa yā suertes yeⁿé yā

ndúúcū na catecai Jesús miiⁿ, ní n'diichí yā cheé chí candéé 'aama 'aama yā.

²⁵N'gēcú nuuⁿ yeⁿe ngéetiyaⁿ miiⁿ taachí s'neeⁿnga'á yā 'iiⁿyāⁿ.

²⁶Ní s'néⁿe yā 'áamá letrero na tiiⁿ cruz yeⁿe Jesús miiⁿ. Ní letra chí cánéé nguūⁿ na tabla miiⁿ ní ngaⁿā yeⁿe nuūⁿndi yeⁿe yā. Ní cánéé nguūⁿ chuū: Rey yeⁿe 'iiⁿyāⁿ yeⁿe ndaata Israel. ²⁷Dáamá ndúúcū Jesús s'neeⁿnga'á yā 'uūví sáⁿā chí duucu. 'Áamá ní lado tá cuaacú yā táamá ní lado ta 'cueé yā. ²⁸Tíicā ní chí cuaacu naachi canéé nguūⁿ na libro yeⁿé Ndyuūs 'tíicā: Chídídúúché yā ndúúcū 'iiⁿyāⁿ chí véé nuuⁿndi yeⁿe yā.

²⁹'Iiⁿyāⁿ chí ngo'ó yā nanáaⁿ cruz miiⁿ cunncaá ngaⁿa yā yeⁿe Jesús. Idi'nú'u yā tiiⁿ yā ní cunncaá n'dai cheendi yā ní ngaⁿa yā: Díí chí ndiitu'ví di yaācū ní nadacueéⁿ di cheéti 'iinū nguuví, ³⁰nadanguáⁿāi maāⁿ di. Dii ní nch'eeⁿ di na cruz.

³¹Tiicá ntúūⁿ chiiduú n'gēete ndúúcū maestros yeⁿe ley duuchinéeⁿ yā Jesús. Ní ngaⁿa yā nguaaⁿ maāⁿ yā: 'Iiⁿyāⁿ miiⁿ nadinguáⁿai yā táamá 'iiⁿyāⁿ naati maaⁿ ní nguéé ngí nadinguáⁿai yā maāⁿ yā 'iiⁿyāⁿ. ³²Ndúúti chí 'iiⁿyāⁿ miiⁿ chí Cristo miiⁿ snaaⁿ yú 'iiⁿyāⁿ nch'éeⁿ yā na cruz maaⁿ. Tuu'mi ní cu'téenu yú. Ní ndíí 'iiⁿyāⁿ chí ca'neeⁿnga'á yā daama ndúúcū Jesús miiⁿ ní cunncaá ngaⁿa yā yeⁿe yā.

Jesús ch'ii yā

(Mt. 27.45-56; Lc. 23.44-49; Jn. 19.28-30)

³³Taachí chii maⁿa nguuví miiⁿ chí maāⁿ núúⁿmáⁿ íⁿyeeⁿdi ndii ná

n'geecu 'línú chiinū. ³⁴Āā táánduū n'geecu 'linu Jesús miiⁿ ní 'cai yiicú yā: Eloi, Eloi, ¿lama sabactani? (chí neⁿe caaⁿ'maⁿ nduudu yeⁿ'ē yú: N'díí Ndyuūs yeⁿ'ē, n'díí Ndyuūs yeⁿ'ē, ¿de'ē cuuvi chí s'neé nī maaⁿ 'úú dámaáⁿ?)

³⁵N'dúú'ví 'iiⁿ'yāⁿ chí snee yā miiⁿ ní ch'iindiveéⁿ yā ní caⁿ'a yā: 'Caandiveéⁿ nī, n'gai yā yeⁿ'e profeta Elías miiⁿ.

³⁶Ní ndaā 'áamá soldado ngeenu yā ní taachi chiitu 'áamá esponja yeⁿ'e vinagre s'neéⁿ yā esponja miiⁿ na 'áamá ndúú ní ca'a yā chí chí'i Jesús. Ní caⁿ'a yā: Āā canee rá yā. N'diichi yú nduuti chí 'áa chí profeta Elías miiⁿ ní nádich'eēⁿ sa 'iiⁿ'yāⁿ.

³⁷Tuu'mi ní Jesús 'cai yiicú yā ní chí'i. ³⁸Ní cortinas yeⁿ'e yaācū templo chíi 'uuvu taāⁿ, steēⁿ naavtáⁿā ndíí cuááⁿ 'niiⁿnúⁿ ndíí cuááⁿ ndiiyā. ³⁹Ní 'áamá saⁿ'ā romano chí ngaⁿ'a ntiiⁿnyuⁿ yeⁿ'ē cien soldados chééndii sa nanááⁿ Jesús miiⁿ. Taachí n'diichi sa ní ch'iindiveēⁿ sa taacá 'cai Jesús ní taacá chíi yā, soldado miiⁿ ní caⁿ'a sa: Cuaacu níⁿnyúⁿ chí sáⁿ'a 'cūū ní Dáfyá Dendyuūs saⁿ'ā.

⁴⁰Snée ntúūⁿ n'duuvu n'daataá n'giinu yaⁿ'ai tá. Ní ndúúcū n'daata s'ééⁿ míⁿ canee ta María yeⁿ'e yáāⁿ Magdala, ndúúcū tá María chí chεεcuú José ndúúcū Jacobo chí nguuvu Menor, ndúúcū n'daataá chí nguuvu Salomé. ⁴¹N'daata s'ééⁿ ní can'dáa yā Jesús miiⁿ ní dichíí'vε yā Jesús taachi cachiicá yā yáⁿ'āa Galilea. Ní neené 'yaaⁿ ca n'daataá snée yā miiⁿ, n'daataá chí ngaⁿ'a yā daama ndúúcū Jesús miiⁿ na yáāⁿ Jerusalén.

Ch'iichí yā cuerpo yeⁿ'e Jesús miiⁿ
(Mt. 27.57-61; Lc. 23.50-56; Jn. 19.38-42)

⁴²Taachí chiinū nguuvu miiⁿ chí viernes chí ch'iindiyaáⁿ yā cáāvā 'viicu pascua miiⁿ nguuvu chí cuuvi dεεve nguuvu chí ntaavi'tuunúúⁿ yā 'iiⁿ'yāⁿ, ⁴³ndaā José yeⁿ'e yáāⁿ Arimatea. Saⁿ'ā miiⁿ ní saⁿ'a ch'εete yeⁿ'e Junta Ch'εete yeⁿ'e 'iiⁿ'yāⁿ Israel. Ní cunee ngiinu sa nguuvu chí Ndyuūs ndaa yā ní ngaⁿ'a ntiiⁿnyuⁿ yā. Ní ndúúcū valor ndaā sa nanááⁿ gobernador Pilato miiⁿ. Ní caⁿ'a sa Pilato miiⁿ chí nca'a yā cuerpo yeⁿ'e Jesús. ⁴⁴Pilato miiⁿ ní cueⁿ'e yiinú yā chí 'āa chíi Jesús miiⁿ ní yaa'vi yā saⁿ'ā chí ngaⁿ'a ntiiⁿnyuⁿ yeⁿ'e soldados chí cuchii sa nanááⁿ yā. Taachí ndaa sa ní 'licu tiinguuneeⁿ yā saⁿ'ā: ¿Áa cuaacu chí chíi Jesús? ⁴⁵Taachí soldado centurión miiⁿ ngaⁿ'a sa chí cuaacu, tuu'mi ní Pilato miiⁿ ca'a yā orden chí ca'a sa cuerpo yeⁿ'e Jesús miiⁿ José miiⁿ. ⁴⁶Cuayiivi ní José cái sa 'áamá sávana chí fina ní nadicheeⁿ sa cuerpo miiⁿ ní sta'a sa ní ch'εēcū sa cuerpo miiⁿ ná sávana miiⁿ. Ch'iinu maaⁿ ní s'nuūⁿ sa chεeti 'áamá yáinyāⁿ ní níⁿ'nuúⁿ canee 'áamá tuūu ch'εetε. Ní s'nuúⁿ yā tuūu ch'εete cheendi yáinyāⁿ miiⁿ. ⁴⁷Tá María Magdalena ndúúcū María chí chεεcuú José cueⁿ'ē yā ní n'diichi yā naachí ch'εēchi Jesús miiⁿ.

Jesús nduuchi yā yeⁿ'ē nguaaⁿ tináⁿ'ā
(Mt. 28.1-10; Lc. 24.1-12; Jn. 20.1-10)

16 Taachi chó'oo sábadu, nguuvu chí ntaavi'tuunúúⁿ yā, María yeⁿ'e yáāⁿ Magdala, ndúúcū María chí chεεcuú Jacobo,

ndúúcū n'daata chi Salomé cai yā perfumes chi cueendái yā vmnááⁿ yeⁿē cuerpo yeⁿē Jesús miiⁿ ní cueⁿe yā. ²Neené tyaaⁿ yeⁿē nguuví vmnááⁿ vmnaaⁿ yeⁿē ndēēte chi domingo taachí can'dáá 'yáⁿā n'daatā s'eeⁿ ndaá yā na yáinyāⁿ miiⁿ. ³Ní ngāⁿa yā nguááⁿ maáⁿ yā: ¿Du'ū ndivíi tuūu yeⁿē yú taachí ndaā yú cheendi yáinyāⁿ?

⁴Taachí ndaa yā, tuu'mi ní n'diichi yā chi tuūu ch'etē n'dai miiⁿ 'āā ntéé canéé na lugar yeⁿē. ⁵Ní taachí ndaa yā ch'etē yáinyāⁿ, miiⁿ n'diichi yā 'áámá saⁿā 'dííⁿ vee sa lado tá cuaācú ní canúúⁿ sá catecai ch'éenūu sa ní cuéē. Ní n'daata s'eeⁿ dii'yá yā chíi. ⁶Sáⁿā miiⁿ ní caⁿā sa: Nguéé dii'yá nī cuuvi. Ndís'tii ní in'nuúⁿ nī cuerpo yeⁿe Jesús yeⁿe yáāⁿ Nazaret, 'iiⁿyāⁿ chí iiⁿyāⁿ s'eeⁿ ca'nééⁿnga'a yā. Náátí 'iiⁿyāⁿ miiⁿ ní 'āā ndúúchí yā yeⁿē nguaaⁿ tináⁿā ní nguée yā 'muuⁿ. Cuin'diichi nī naachí canuúⁿ yā. ⁷Ndís'tii cuinaⁿā nī ní cuuvi nī discipulos yeⁿe yā, ndúúcū Pedro, chí Jesús miiⁿ ní caⁿā yā vmnááⁿ ndís'tii na yáⁿāa Galilea. Mííⁿ snaáⁿ nī 'iiⁿyāⁿ tan'dúúca chí Jesús caⁿa yā chíi yā ndís'tii ndúúcū tanáⁿā 'iiⁿyāⁿ.

⁸N'daata s'eeⁿ ní cunaⁿā yā ngeenu yā yeⁿe na yáinyāⁿ, ti neené cueⁿe yiinú yā ní yiinduuví yā. Nguéé de'ē vee caⁿā yā chíi yā mar 'áámá 'iiⁿyāⁿ, ti 'va'á yā.

Jesús che'enaáⁿ yā yeⁿe ta María Magdalena

(Jn. 20.11-18)

⁹Taachí Jesús nduuchi yā chidēeve nguuví domingo chí nguuví vmnááⁿ vmnaaⁿ yeⁿe ndēēte

miiⁿ, vmnááⁿ vmnaaⁿ che'enaáⁿ yā nanááⁿ María Magdalena, n'daataá chí nn'divíi yā ndēēchē espíritus yeⁿe yááⁿn'guiinūuⁿ yeⁿē ta. ¹⁰Táⁿā miiⁿ ní caⁿa tá ní chíi tá 'iiⁿyāⁿ chí chíicá yā ndúúcū Jesús miiⁿ. Ní ngēecú 'iiⁿyāⁿ s'eeⁿ chí neené ndaachií yiinu yā. ¹¹Ní taachí 'iiⁿyāⁿ s'eeⁿ ch'iindiveéⁿ yā chí Jesús miiⁿ nduuchi yā yeⁿe nguaaⁿ tináⁿā ní chí táⁿā miiⁿ n'diichi tá Jesús, nguéé s'teenú yā.

Jesús che'enaáⁿ yā yeⁿē 'uūvi discipulos yeⁿe yā

(Lc. 24.13-35)

¹²Cho'ōo chúū, ní Jesús che'enaáⁿ yā yeⁿē 'uuví 'iiⁿyāⁿ chí cueⁿē yā na yúúní. Ní Jesús dííⁿ yā tan'dúúca chí nguēe déenu yā yeⁿe chí ch'óōo. ¹³Ní cuayiivi 'iiⁿyāⁿ s'eeⁿ ní cunaⁿā yā ní caⁿa yā chíi yā tanáⁿā discipulos. 'Tiicá ntúūⁿ discipulos ní nguéé s'teenú yā.

Jesús idich'óo yā 'iiⁿyāⁿ apóstoles yeⁿe yā

(Mt. 28.16-20; Lc. 24.36-49; Jn. 20.19-23)

¹⁴Chii ch'íinū nguuví domingo miiⁿ, ní Jesús che'enaáⁿ yā yeⁿē ndu'ū ndiicháámá discipulos yeⁿe yā, taachi 'iiⁿyāⁿ s'eeⁿ v'etē yā na mesa. Ní Jesús tuūvi iinú yā ndúúcū yā ti discipulos nguéé s'teenú yā ní ch'ēchi staava yeⁿē yā ti discipulos nguéé s'teenú yā 'iiⁿyāⁿ chí ngaⁿa yā chí n'diichi yā Jesús chí 'āā nduuchi yā yeⁿē nguaaⁿ tináⁿā. ¹⁵Ní caⁿa yā chíi yā discipulos: Cuéⁿe nī núúⁿmán nación yeⁿe íⁿyeeⁿdi ní caaⁿmán nī ndúúdu cuaacu yeⁿē chí nanguáⁿai yā nanááⁿ nducyaaca 'iiⁿyāⁿ. ¹⁶'Iiⁿyāⁿ chí i'teenú yā ní ngēedínuúⁿniⁿ yā,

ní nanguaⁿai yā yeⁿe nuuⁿndi yeⁿe yā. Naati 'iiⁿ'yāⁿ chi nguéeⁿ i'téenu yā cuuví yā condenado. ¹⁷Níicú señales yeⁿe poder miiⁿ canée ndúúcū 'iiⁿ'yāⁿ chi i'téenu yā 'úú. Ndúúcū chi duūchí tun'daá yā espíritus yeⁿe yááⁿn'guiinūⁿ yeⁿe 'iiⁿ'yāⁿ ní cuuví caⁿ'á yā táámá davaacu chí ngai. ¹⁸Ní nduuti chí cuta'á yā ndúúcū ta'a yā 'áámá cúú ní nguéeⁿ de'ē daño diíⁿ tī ndúúcu yā. Ní nduuti chí cu'ú yā de'ē chí veneno miiⁿ nguéeⁿ diiⁿ daño 'iiⁿ'yāⁿ. Ní cun'duú yā ta'a yā vmnaaⁿ yeⁿe 'iiⁿ'yāⁿ chí ngíitā ní 'iiⁿ'yāⁿ s'eeⁿ ní nduūvā yēⁿe yā.

Jesús cundáa yā va'ai cheeti nguuvi
(Lc. 24.50-53)

¹⁹Ch'íínú caⁿ'a Señor Jesús ndúúdú 'cūū ndúúcū discípulos yēⁿe yā ní cundáa yā na va'ai cheeti nguuvi. Ní ch'iindí yā lado yeⁿe honor yeⁿe Ndyuūs. ²⁰Discípulos ní cueⁿe yā, ní caⁿ'a yā nduudu cuaacu yeⁿe chí nanguaⁿai yā ndu'ū cuaaⁿ. Maaⁿ Señor Jesucristo ngiinnee yā discípulos 'íicú canee n'daācā ndúúdú yeⁿe yā cáāvā señales ndúúcū vaadī n'giinu chí diíⁿ yā. 'Tíicā chii.

NDUUDU N'DÁÍ CHÍ DÍNGUŪⁿ

APÓSTOL LUCAS

Yeⁿe cáávā chí idingúúⁿ yā carta 'cūū

1 Nééné 'yaaⁿ 'iiⁿ'yāⁿ nguaaⁿ s'uuúⁿ neⁿ'é yā idingúúⁿ yā dendú'ū chí chíi, chííⁿ chí s'uuúⁿ deenu yú chí nduudu cuaacu. ²Tííca tan'dúúca chí 'iiⁿ'yāⁿ s'eeⁿ n'diichí yā tanducuéⁿ'ē ndíí taachí chí nga'ā, 'iiⁿ'yāⁿ s'eeⁿ ní chí'cueeⁿ yā s'uuúⁿ. 'Iiⁿ'yāⁿ s'eeⁿ candée yā nduudu cuaacu yeⁿ'é Ndyuūs ní ngaⁿ'á yā nduudu miiⁿ. ³'Úú, Lucas, idinguúⁿ yeⁿ'é díí Teófilo cáávā chí deenú chí díí ní n'dai di. 'Tiicā ntúūⁿ 'úú ní nadicáadiinúúⁿ chí idinguúⁿ yeⁿ'ē di tanducuéⁿ'ē chí chíi. Díiⁿncā n'diichí tanducuéⁿ'ē ndúúcu cuidado ndíí taachí nga'ā. ⁴Túúca idinguúⁿ ní tuumicadínuuⁿ di chεε chí nduudu cuaacu yeⁿ'ē dendú'ū chí 'iiⁿ'yāⁿ chí'cuéeⁿ yā díi.

Yeⁿe chí ángel yaa'vi yā
chí ch'iindiyāⁿ Juan

⁵Tiempo miiⁿ chí 'iiⁿ'yāⁿ Herodes miiⁿ chí chíi yā rey yeⁿ'e yáⁿ'āa Judea, canée 'áámá chiiduú chí nguuví yā Zacarías. Chiiduú miiⁿ ní yeⁿ'e grupo yeⁿ'e Abías. Ní n'daataá yeⁿ'e Zacarías ní nguuvi tá Elisabet. Ní Elisabet miiⁿ ní yeⁿ'e ndaata

yeⁿ'e Aarón. ⁶Ndúú 'uuví yā ní n'dai taaví yā nanááⁿ Ndyuūs. 'Iiⁿ'yāⁿ s'eeⁿ nguéeⁿ de'ē vεε dííⁿ yā chí nguéeⁿ n'daacā ndúúcu 'iiⁿ'yāⁿ caati s'neeⁿ veéⁿ yā nducuéⁿ'ē nduudu chí ngaⁿ'a 'iivú Ndyuūs. ⁷'Iiⁿ'yāⁿ s'eeⁿ nguéeⁿ daiyā yā, ti Elisabet miiⁿ nguéeⁿ taaví yā daiyā yā. Ní nduu 'uuví yā ní 'āā ndiicú yā.

⁸'Áámá nguuvi, taachi tuneⁿ turno yeⁿ'e grupo yeⁿ'e Zacarías chí díiⁿ ntiiⁿnyuⁿ yeⁿ'e chiiduú chí dichí'vε yā na yáacū templo yeⁿ'é Ndyuūs, 'tííca dííⁿ Zacarías ntiiⁿnyuⁿ yeⁿ'e chiiduú nanááⁿ Ndyuūs. ⁹Ní tan'dúúca costumbre yeⁿ'e chiiduú s'eeⁿ, tuneⁿ Zacarías miiⁿ chí cunndaa yā na yáacū templo yeⁿ'e Ndyuūs ní 'neeⁿ yaⁿ'a yā incienso. ¹⁰Ní nducyaaca 'iiⁿ'yāⁿ snée yā cuaaⁿ chuva'āi yáacū templo ní ngaⁿ'angua'á yā neⁿ'e chí ngiichi incienso chεeti yaacū templo. ¹¹Zacarías miiⁿ canee yā na yaacū. Ní che'enaāⁿ yeⁿ'e Zacarías miiⁿ 'áámá ángel chí Ndyuūs dichó'o yā. Ní ángel mííⁿ chééndii yā lado tá cuaacu yeⁿ'ē nátaí naachi n'giichi incienso miiⁿ. ¹²Ní taachi Zacarías miiⁿ n'diichí yā ángel miiⁿ 'āā ntée deenú yā de'ē chí dííⁿ yā ní díi'ya

taaví yā chii. ¹³Naati ángel miiⁿ ní caⁿa yā: N'dií Zacarías, nguéeⁿ 'va'á nī, ti Ndyuūs ní ch'iindiveéⁿ yā chí caⁿ'angua'á nī. Ní 'cuundiyāāⁿ 'áámá daiya n'daataá yeⁿ'é nī Elisabet miiⁿ, ní cu'neéⁿ nī nguuví sa Juan. ¹⁴Ní cuuvi yeenu taaví nī cáávā saⁿ'ā 'lííⁿ. Ní 'yaaⁿ n'dái 'iiⁿ'yāⁿ cuuvi yeenú yā cáávā chí 'cuundiyāāⁿ dacua'ā miiⁿ. ¹⁵Caati daiyá nī miiⁿ ní cuuvi ch'ēete sa nanáāⁿ Ndyuūs. Nguéeⁿ cu'u sa vino ndíí nguéeⁿ ndúú cu'u sa de'ē vee chí cuuvi cuú'vī sa. 'Āā canee sa ndúúcu Espíritu N'dai yeⁿ'é Ndyuūs ndíí taachi 'āā cuéeⁿ 'cuundiyāāⁿ sa. ¹⁶Saⁿ'ā miiⁿ ní diiⁿ sa chí 'yaaⁿ taavi ca daiyā 'iiⁿ'yāⁿ Israel nguēcuneéⁿ yā ní i'téenu yā Ndyuūs yeⁿ'e yú. ¹⁷Daiyá nī, Juan 'cūū, ní caⁿ'a sa vmnaaⁿ yeⁿ'ē Señor Jesucristo. Ní canee sa ndúúcu espíritu ndúúcu poder tan'dúúca chí canee profeta Elías ndii cuáāⁿ vmnaaⁿ. Saⁿ'ā miiⁿ ní diiⁿ sa chí 'cuēetinéeⁿ n'daācā 'iiⁿ'yāⁿ chí n'gēete ndúúcu daiya yā. Nífcú 'iiⁿ'yāⁿ cuuvi cu'téenu yā tan'dúúca Ndyuūs neⁿ'é yā chí cu'téenu yā, ní tan'dúúca tanáⁿ'ā 'iiⁿ'yāⁿ chí n'dai i'téenu yā. Ní 'tífcā caⁿ'a sa diiⁿ sa chí 'iiⁿ'yāⁿ s'eeⁿ 'cuēetinéeⁿ yaáⁿ yā chí cuuvi cu'téenu yā Señor Jesús taachi ndaa yā.

¹⁸Tuu'mi ní Zacarías miiⁿ ní tiinguunéeⁿ yā ángel miiⁿ: ¿Táácā cu'teenú chí ngaⁿ'a nī? caati 'úú ní 'āā ndiicúú 'úú, 'tiicá ntúūⁿ n'daataá yeⁿ'é.

¹⁹Ángel miiⁿ n'guēcútáⁿ'a yā ní caⁿ'á yā: 'Úú ángel chí nguuví Gabriel chí canee chí dííⁿ ntiiⁿ'nyuⁿ nanáāⁿ Ndyuūs. Dendyuūs dich'ó yā 'úú. Ní 'úú yaa'ví n'dií ní cuuvi

nduudu n'dái 'cūū n'dií. ²⁰Maaⁿ ní cuuvi 'díí'mi nī ní 'āā ntééⁿ cuuvi caaⁿ'máⁿ nī ndii chó'oo chúū taachi cunuuⁿ ca'ā tiempo yeⁿ'ē, ti nguéeⁿ chí'teenú nī nduudu yeⁿ'é taachi ngaⁿ'á chí chuū chí cuuvi.

²¹Neⁿ'e chí chíi chuū, 'iiⁿ'yāⁿ s'eeⁿ chí snée yā chuva'ai yáacū templo chí snée ngiinu yā Zacarías miiⁿ cueⁿ'e yíínú yā chí Zacarías miiⁿ ní chí'naáⁿ yā chēeti yaacū templo yeⁿ'é Ndyuūs. ²²Taachi Zacarías miiⁿ ní nan'dáa yā chēeti yaācū 'āā ntéé ngii ngaⁿ'a yā. 'Iiⁿ'yāⁿ s'eeⁿ ní tuumicadiínuuⁿ yā chí véé 'áámá visión chí n'diichí Zacarías miiⁿ taachí canée yā chēetí yaācū templo. Zacarías miiⁿ díta'á yā de'ē chí neⁿ'e caaⁿ'máⁿ yā ti chíi 'díí'mí yā.

²³Taachí chíinū turno chí 'áámá ndēete yeⁿ'e servicio chí diiⁿ yā ntiiⁿ'nyuⁿ chēeti yaacū templo Zacarías miiⁿ ní cunaⁿ'á yā na vaacu yā. ²⁴Cho'ó tiempo 'cūū ní n'daataá yeⁿ'é yā chí Elisabet miiⁿ ní ch'iindi dácua'a yeⁿ'é yā ní 'áámá canúuⁿ ta na vaacu ta nyuⁿ'u 'iīyū. Ní neenē nacadiínuuⁿ ta. Ní ngaⁿ'a ta maaⁿ ta: ²⁵Chuū chí Señor Ndyuūs miiⁿ ní dííⁿ yā nduucú na nguuví 'cūū ní dííⁿ yā chí 'āā ntéé 'cuinaāⁿ nanáāⁿ 'iiⁿ'yāⁿ.

Ángel caⁿ'á yā chí 'cuundiyāāⁿ Jesús

²⁶Cuayiivi chí ch'íínú jaaⁿ 'iīyū chí Elisabet miiⁿ ch'iindi dácua'a yeⁿ'e tá ní Ndyuūs dich'ó yā ángel Gabriel taama vmnéⁿ'ēe. Ní cueⁿ'é yā na 'áámá yāāⁿ chí nguuví Nazaret chí yeⁿ'ē yāⁿ'āa Galilea. ²⁷Ndyuūs dich'ó yā ángel Gabriel miiⁿ nanáāⁿ 'áámá n'daataá chí

cuiinú chi nguuví tá María. María miiⁿ ní caⁿá yā chi 'caandavaacú yā ndúúcu 'aama saⁿā chi nguuví José. Saⁿá 'cuū ní yeⁿe ndaata yeⁿe rey David chi ndíí tiempo chi 'āā chó'oo. ²⁸Angel miiⁿ ní sndaā yā naachi canéé María ní caⁿa yā: N'diī, María, yeenú taavi nī chi Ndyuūs neⁿe taaví yā n'diī. Señor Ndyuūs caneé yā ndúúcu n'diī. Ndyuūs di'viicu cá yā n'diī nguaaⁿ nducyaaca n'daataá yeⁿe iⁿ'yeeⁿdí 'cūū.

²⁹Taachi María miiⁿ ch'iindiveéⁿ yā chuū, cueⁿe yiinú yā ní chistaⁿa vaadi cadíinuⁿ yeⁿé yā yeⁿe nduudu yeⁿe ángel miiⁿ. Ní nadicádiinuⁿ yā: ¿Dé'e neⁿe caaⁿ'maⁿ nduudú 'cūū? ³⁰Tuu'mí ángel miiⁿ ní caⁿa yā: N'diī, María, nguée 'va'a nī, ti véé taavi favor yeⁿé nī nanááⁿ Ndyuūs, ti Ndyuūs dineⁿé yā n'diī. ³¹Ní cuuvi daiyá nī ní 'cuūndi 'áámá saⁿā daiyá nī, ní cuuvi nguuví yā JESÚS.

³²Daiyá nī cuuvi ch'εete n'dai yā ní 'i'iⁿyāⁿ s'eeⁿ ngaⁿá yā chi daiyá nī ní Daiyá Dendyuūs chi ch'εete taavi ca. Ní Señor Ndyuūs caⁿa yā dííⁿ yā chi daiyá nī ní cuuví yā rey lado yeⁿe rey David tan'dúúcaⁿ nguuví chí 'āā cho'oo. ³³Ní caaⁿ'maⁿ ntiⁿ'nyúⁿ yā yeⁿe 'i'iⁿyāⁿ yeⁿe Israel cueⁿe daāⁿmaⁿ. Ní naachi caaⁿ'maⁿ ntiⁿ'nyúⁿ yā ní 'áámá cūnee.

³⁴Tuu'mi ní María caⁿá yā chii yā ángel: ¿Taaca cuuví chuū, ti 'úú ní nguée isaⁿā yeⁿé?

³⁵Angel miiⁿ ní nan'guεécútaⁿá yā: Ndúúcu poder yeⁿé Ndyuūs chi canéé na va'ai ch'εeti nguuví Espíritu N'dai yeⁿé Ndyuūs ní ndaá yā vmnaaⁿ yeⁿé n'diī. Ní cu'neéⁿ yā

'daaⁿnúⁿ yā tan'dúúcaⁿ meééⁿ vmnaaⁿ yeⁿé n'diī ní 'iicu cuuvi chó'oo yeⁿé nī chí dacuaⁿā 'lííⁿ chí 'cuundiyaāⁿ miiⁿ 'tíicā cunée yā yeⁿé Ndyuūs ní cuuvi nguuví yā 'i'iⁿyāⁿ chí dēeve chí Daiya Dendyuūs 'i'iⁿyāⁿ. ³⁶Ní n'diichí nī. Prima yeⁿe nī chí nguuví Elisabet miiⁿ, 'cuundii ntúūⁿ 'áámá daiyá yā maaⁿ chí 'āā ndiicú yā. 'Áā jaaⁿ 'i'iyu daiyá yā ch'εetí yā, n'daataa miiⁿ chí 'i'iⁿyāⁿ s'eeⁿ ngaⁿ'a yā chí nguεε 'cuūndi daiya yā. ³⁷'Tíicā diiⁿ Ndyuūs caati 'iivú Ndyuūs cuuvi dííⁿ yā tanducueⁿé chí neⁿé yā dííⁿ yā.

³⁸Tuu'mi ní María miiⁿ ní caⁿá yā: 'Úú criada chí ngaⁿ'ā ntiⁿ'nyuⁿ 'iivú Ndyuūs yeⁿé. Maaⁿ ní Ndyuūs dííⁿ yā nduucú tan'dúúcaⁿ chí caⁿ'a yā chí dííⁿ yā. Taachi ch'iinu caⁿ'a yā chuū, ángel miiⁿ ní cunaⁿ'a yā.

María miiⁿ cheⁿé yā n'diichi yā Elisabet

³⁹Nguuvi s'eeⁿ María miiⁿ nūuⁿ cueⁿé yā na yúúní ní ndāā yā na yāāⁿ Judá. ⁴⁰Ní ndāā yā na vaacu Zacarías miiⁿ ní yaa'ví yā Elisabet. ⁴¹Taachi Elisabet miiⁿ ch'iindiveéⁿ yā nduudu yeⁿe María dacuaⁿāā miiⁿ ní nuⁿ'u ch'εeti Elisabet miiⁿ. Ní Elisabet mííⁿ chiitu Espíritu N'dai yeⁿé Ndyuūs táⁿā. ⁴²Ní caⁿ'a yā ndúúcu nduudu dííⁿtu: Dē'e chúúcaⁿ n'dai n'diī nguaaⁿ nducyaaca n'daataá. Ní n'dai taavi daiyá nī chí 'cuūndi yā. ⁴³¿Du'ú 'úú chí ndaā ch'εecu Señor Ndyuūs yeⁿé chí yaa'ví yā 'úú? ⁴⁴Ti taachí ch'iindiveéⁿ nduudu yeⁿe nī, dacuaⁿā yeⁿé nuⁿ'u ch'εetí tan'dúúcaⁿ chí yeenu taavi yeⁿe. ⁴⁵Dē'e chúúcaⁿ n'dai dii chí chí'téenu di caati cúúv

cuaacu tan'dúucā chi Señor Ndyuūs caⁿa yā.

⁴⁶Tuu'mi María ní caⁿa yā:

Alma yeⁿé i'teenú taavi Ndyuūs ní dich'eté Ndyuūs.

⁴⁷Ní staava yeⁿé ní yeenú n'dai chi i'teenú Ndyuūs. Ní Ndyuūs nadinguáⁿai yā 'úú yeⁿe nuuⁿndi yeⁿé.

⁴⁸Ti Ndyuūs n'diichí yā 'úú chi pobre 'úú ní dichii'vé Ndyuūs, ti ndíí maaⁿ nducyáácá 'iiⁿyāⁿ caaⁿmaⁿ yā yeⁿe 'úú: De'e chúucā n'dai 'úú.

⁴⁹Ti Ndyuūs chi véé taaví poder yeⁿé yā dííⁿ yā nduucú cosas chí ch'etete n'dai. Ní Ndyuūs ní deēvē taaví yā.

⁵⁰Ní Ndyuūs ya'ai 'iinu taaví yā caavā nducyaaca 'iiⁿyāⁿ chi i'téenu yā yeⁿe yā tiempo chi chó'oo, 'tiicá ntúuⁿ tiempo maaⁿ, ní 'tiicá ntúuⁿ tiempo chi cuchii.

⁵¹Dendyuūs 'āā diiⁿ yā vaadi n'dai ch'etete ndúucū poder yeⁿé yā, nífcú dííⁿ yā ganar yeⁿe staava yeⁿé 'iiⁿyāⁿ chi dich'eté yā maáⁿ yā.

⁵²Ndyuūs diví yā 'iiⁿntyéⁿē chi ngaⁿa ntiiⁿnyuⁿ yeⁿe trono yeⁿé yā, ní dich'eté yā 'iiⁿyāⁿ ndiicúúⁿ.

⁵³Ndyuūs ca'á yā cosas chi n'dai taavi 'iiⁿyāⁿ chí ch'iindiveéⁿ yā yeⁿe yā. Ní nguéé dííⁿ yā de'e vee cáávā 'iiⁿyāⁿ s'eeⁿ chi nguéé neⁿé yā chi Ndyuūs nneé yā 'iiⁿyāⁿ s'eeⁿ.

⁵⁴Ndyuūs chinneé yā s'uuúⁿ chi 'iiⁿyāⁿ yeⁿe Israel ti dichíí'vé yú 'iiⁿyāⁿ. Ní nn'gaacú yā yeⁿe s'uuúⁿ ní nduuví ya'ái taaví yā yeⁿe s'uuúⁿ.

⁵⁵Ndyuūs cueⁿe daāⁿmaⁿ idiíⁿ yā tan'dúucā chi caⁿa yā 'iiⁿyāⁿ yeⁿe ndaata yeⁿe yú, ní ndúucū chiida yú Abraham ndúucū 'iiⁿyāⁿ yeⁿé yā ndíí cuaaⁿ vmnaaⁿ.

'Túucā ngaⁿa María miiⁿ.

⁵⁶Tuu'mi ní María miiⁿ canée yā ndúucū Elisabet tan'dúucā 'íínú 'iyyū. Cuayiivi ní cunaⁿá yā na vaacu yā.

Yeⁿé chí ch'iindiyaāⁿ Juan chí cheedínuuⁿníⁿ

⁵⁷Taachí snuū ca'ā 'iyyū yeⁿe dacua'ā miiⁿ, Elisabet miiⁿ ch'iindiyaāⁿ 'áámá daiya yā chi saⁿā.

⁵⁸'Iiⁿyāⁿ na niiⁿnuuⁿ va'āi ndúucū 'iiⁿyāⁿ yeⁿé yā yeenú n'dai yā ndúucu yā taachí ch'iindiveéⁿ yā chi Ndyuūs ní ya'ai taaví yā Elisabet miiⁿ. ⁵⁹Ch'iinū dacua'ā 'lífⁿ niiⁿníⁿ nguuví, ní 'iiⁿyāⁿ ndāa yā na vaacú Elisabet chí diiⁿ yā circuncidar dacua'ā miiⁿ. Nífcú 'iiⁿyāⁿ s'eeⁿ neⁿé yā cu'neeⁿ yā chí cuuví nguuví sá Zacarías tan'dúucā chí nguuví chiida sa Zacarías. ⁶⁰Naati ch'eeⁿcu sa mífⁿ caⁿa yā: Nguéé 'tíicā. Juan cuuví nguúvⁿí sá.

⁶¹Tuu'mi caⁿa 'iiⁿyāⁿ s'eeⁿ chí yā ch'eeⁿcu sá miiⁿ: ¿De'e cáávā? Mar 'áámá 'iiⁿyāⁿ yeⁿe ní nguéé nguuví yā 'tíicā.

⁶²Ndúucū chí ditá'a yā ntiinguunéeⁿ yā chíida sa taacā néⁿe yā chí cuúvⁿí nguúvⁿí sá.

⁶³Zacarías miiⁿ ní 'neeⁿ ta'á yā naachi canee 'áámá caaca ní dingúuⁿ yā chuū: Chí Juan duuchi sa. Tuu'mi ní nducyaaca 'iiⁿyāⁿ ní cueⁿe yiínú yā. ⁶⁴Caati hora mífⁿ nūuⁿ, Zacarías miiⁿ nacan'dāa nduudu yeⁿe yā. Nífcú tuu'mi tuca'á

yā caⁿ'a yā: De'ē chūúcā ch'ēete Dendyuūs. ⁶⁵Ní nducyáácá 'iiⁿ'yāⁿ niiⁿnuúⁿ va'ai 'di'iⁿ'ya taavi cá yā chi. Ní yeⁿ'e chi chó'ōo, chuū ní caⁿ'a nducyáácá 'iiⁿ'yāⁿ na yāāⁿ chi snúuⁿ cuaaⁿ yaⁿ'āi yeⁿ'e chi snéé na yiicū s'eeⁿ yeⁿ'e yáⁿ'āa Judea. ⁶⁶Ní nducyáácá 'iiⁿ'yāⁿ chi cadiinuuⁿ yā yeⁿ'e chuū ní nacádiinuuⁿ yā na staava yeⁿ'e yā. Ní caⁿ'a yā 'áámá yā ndúúcū taama yā: ¿De'ē cuuvi ndúúcū dacuaⁿ'a líiⁿ chi 'tíicā? Caati 'tíicā Dendyuūs miiⁿ ní canéé ndúúcū dacuaⁿ'ā miiⁿ.

Zacarías caⁿ'a yā yeⁿ'e chi Dendyuūs caⁿ'á yā diiⁿ yā ndúúcū dacuaⁿ'āa miiⁿ

⁶⁷Zacarías, chiidāa dacuaⁿ'āa miiⁿ, chiitúú 'iiⁿ'yāⁿ ndúúcū Espiritu N'dai yeⁿ'é Ndyuūs ní caⁿ'a Zacarías nduudu chí caⁿ'a Ndyuūs chí caaⁿ'máⁿ yā. Ní caⁿ'a yā tan'dúúcā 'áámá profeta chi candēe nduudu yeⁿ'é Ndyuūs:

⁶⁸De'ē chūúcā n'dai Señor Ndyuūs yeⁿ'e 'iiⁿ'yāⁿ Israel chi ndāa yā nanaaⁿ s'uuúⁿ chi nadinguáⁿ'ai yā s'uuúⁿ, ní yeⁿ'é yā s'uuúⁿ.

⁶⁹Ní tee yā s'uuúⁿ 'áámá 'iiⁿ'yāⁿ chi nééné vee poder yeⁿ'e yā chi nadinguáⁿ'ai yā s'uuúⁿ chi 'iiⁿ'yāⁿ miiⁿ yeⁿ'e ndaata yeⁿ'e rey David chi dichíí'vē Ndyuūs ndíí cuaaⁿ vmnaaⁿ.

⁷⁰Ní Ndyuūs diíⁿ yā chí cuaacu tan'dúúcā chi caⁿ'a yā cáávā nduudu yeⁿ'e profetas chí caⁿ'a yā tiempo chi 'āā 'naaⁿ n'dai.

⁷¹Ní caⁿ'a yā chi Ndyuūs nadinguáⁿ'ai yā s'uuúⁿ yeⁿ'e 'iiⁿ'yāⁿ chi tááⁿ yā yeⁿ'e yú. Ní nadinguáⁿ'ai yā s'uuúⁿ yeⁿ'e

nducyáácá 'iiⁿ'yāⁿ chi nguée ngii n'diichí yā s'uuúⁿ.

⁷²Ní neene ya'ai 'iinú Ndyuūs 'iiⁿ'yāⁿ yeⁿ'e yú ndíí cuaaⁿ vmnaaⁿ, ní nan'gaacú yā yeⁿ'ē chi caⁿ'a yā chi diiⁿ yā chi n'daacā ndii cuááⁿ vmnaaⁿ.

⁷³Chuū ní compromiso chi Ndyuūs caⁿ'ā cuaacu yā ndúúcū chiida yú Abraham chi tee yā s'uuúⁿ.

⁷⁴Taachi Ndyuūs nadanguáⁿ'ai yā s'uuúⁿ yeⁿ'e 'iiⁿ'yāⁿ chi nduuvi tááⁿ yā yeⁿ'ē yú, diíⁿ yā 'túúcā caati dichíí'vē yú Ndyuūs ní nguée nduúcū vaadi 'va'a.

⁷⁵Tanducuéⁿ'ē vida yeⁿ'e yú ní dichíí'vē yú Ndyuūs, ní diiⁿ yú tan'dúúcā 'iiⁿ'yāⁿ chi dēeve ní n'dai nanááⁿ Ndyuūs.

⁷⁶Díí, saⁿ'ā 'lííⁿ chi daiyá, cūnee chi dúúchí dí profeta yeⁿ'é Ndyuūs chi ch'ēete n'dai chi canéé na va'ai chēeti nguuví caati caⁿ'ā di cuááⁿ vmnaaⁿ yeⁿ'e Señor Jesucristo. Ní 'cuūndiyāⁿ di 'iiⁿ'yāⁿ s'eeⁿ chi 'cuēetinéé ngiinu yā taachi ndaa Jesús.

⁷⁷Ní diiⁿ di chi 'iiⁿ'yāⁿ cadiinúúⁿ yā yeⁿ'e chí nguaⁿ'ai yā yeⁿ'e nuuⁿ'ndi yeⁿ'e yā ní Ndyuūs nadich'ēcú yā yeⁿ'e yā.

⁷⁸Ní cucáávā Ndyuūs yeⁿ'ē yú nééné ya'ai 'iinú yā s'uuúⁿ tee yā 'áámá dēeve yeⁿ'e yā s'uuúⁿ, dēeve chi chiicā yeⁿ'e va'ai chēeti nguuvi.

⁷⁹Ní chi dēeve miiⁿ chíí Ndyuūs ní cuuvi dēevé yā yeⁿ'e nducyaaca 'iiⁿ'yāⁿ chi snéé yā na maāiⁿ ndúúcū nuuⁿ'ndi yeⁿ'é yā. Ní Ndyuūs nacandée

yā s'uuúⁿ na yúúⁿí yeⁿ'e vaadi
'diiíⁿ.

⁸⁰Ní saⁿ'ā 'lírⁿ ní ch'iita sa ní 'āā
deenū sa ní ditiinú sa na espírítu
yeⁿ'ē sa. Ní taachi 'āā ch'ēete sa,
saⁿ'ā miiⁿ ní cueⁿ'e sa cuēeti ní
caneē sa miiⁿ ndii ndaa tiempo
taachi caⁿ'a sa nduudu cuaacu yeⁿ'é
Ndyuūs nanááⁿ 'iiⁿ'yāⁿ yeⁿ'e Israel.

Yeⁿ'e chi ch'iindiyáaⁿ Jesús

(Mt. 1.18-25)

2 Nguuvi s'eeⁿ emperador
Augusto César caⁿ'a ntiiⁿ'nyúⁿ
yā chi 'cuēetinéē nguūⁿ nducyaaca
'iiⁿ'yāⁿ yeⁿ'e núúⁿ'máⁿ yáⁿ'āa naachi
caⁿ'a ntiiⁿ'nyúⁿ yā. ²Ní taachi
Cirenio ní gobernador yā yeⁿ'e
yáⁿ'āa Siria, 'āā diíⁿ yā chuū chí
n'gēetinéē nguūⁿ yā. ³Ní nducyaaca
'iiⁿ'yāⁿ snaⁿ'a yā na yāāⁿ naachi
ch'iindiyáaⁿ yā ní ca'a yā chi ngúúví
yā. ⁴'Tífcā chií José miiⁿ ní n'dāa
yā na yāāⁿ Nazaret miiⁿ yeⁿ'ē yáⁿ'āa
Galilea ní ndaá yā na yaāⁿ Belén
yeⁿ'e yáⁿ'āa Judea. Yáāⁿ miiⁿ ní
duuchi Yáaⁿ yeⁿ'e David caati
José miiⁿ ní na ndaata yeⁿ'ē rey
David miiⁿ 'iiⁿ'yāⁿ. ⁵Cueⁿ'e José
miiⁿ ndúúⁿcū María ti chiida tá
ndúúⁿcū chēecu tá diiⁿ yā prometer
chi 'caandavaacu tá ndúúⁿcū José
miiⁿ. María miiⁿ ní véé daiya tá
chēeti tá. Miiⁿ ní ndaá yā ca'a
yā ngúúví yā. ⁶Taachi miiⁿ snée
yā, snuū ca'a nguuví yeⁿ'ē María
miiⁿ chi 'cuundiyaāⁿ daiya yā.
⁷Miiⁿ ch'iindiyāāⁿ saⁿ'a 'lírⁿ, daiya
tá chi vmnááⁿ vmnaaⁿ, ní chēcú
yā tínnūuⁿ saⁿ'a 'lírⁿ, ní sn'diití yā
saⁿ'ā 'lírⁿ miiⁿ naachi snúúⁿ 'iiti.
Ní ch'etinee yā miiⁿ caati nguéé
ndaacá yā va'āi chi n'dai.

Angeles ndeé yā ndúúⁿcū 'iiⁿ'yāⁿ chí idiⁿ cuidado 'iiti cuūchí

⁸Ná campo yeⁿ'ē yāāⁿ Belén
miiⁿ véé 'iiⁿ'yāⁿ chí snée cuidado
'iiti cuūchí. Ní n'gēetí nduuchí
yā n'gaaⁿ na cuēeti cucáāvā 'iiti
cuūchí miiⁿ. ⁹Ní n'gaāⁿ miiⁿ 'áámá
ángel chí Señor Ndyuūs dichō'o yā
che'enaáⁿ yā nanááⁿ 'iiⁿ'yāⁿ s'eeⁿ chí
snée cuidado 'iiti cuūchí. Ní chí
dēēve ch'ēete n'dai yeⁿ'é Ndyuūs
chiiya nanáaⁿ yā ní 'dii'yā n'dái
yā chii. ¹⁰Angel miiⁿ ní caⁿ'a yā
chii yā 'iiⁿ'yāⁿ s'eeⁿ: Ndís'tií, nguēē
'va'á nī ti 'úú nindeé 'áámá nduudu
chí n'dai níícú cuuvi yeenu taavi
ndís'tií ndúúⁿcū nducyaaca 'iiⁿ'yāⁿ.
¹¹Tí maaⁿ ní na yāāⁿ yeⁿ'e David
ch'iindiyāāⁿ cááva ndís'tií 'áámá
saⁿ'a 'lírⁿ chí nadanguáⁿ'ai yā 'iiⁿ'yāⁿ
yeⁿ'ē nuuⁿ'ndi yeⁿ'e yā. Saⁿ'ā 'lírⁿ mífⁿ
ní CRISTO chí Señor chí Ndyuūs
dichō'ó yā. ¹²Ní deenú nī chí
cuaacu ndúúⁿcū señal 'cūū. Ndís'tií
ní nndaaca nī dacua'a mífⁿ ndēecu
tínnūu ní candiiti sa na lugar naachi
snúúⁿ 'iiti.

¹³Hora mífⁿ nūuⁿ n'deeē n'dái
ángeles yeⁿ'ē va'ai chēeti nguuvi
che'enaáⁿ yā naachi canée ángel
miiⁿ. Angeles ní ngaⁿ'a yā chí
ch'ēete n'dai Ndyuūs miiⁿ. 'Tífcā
ngaⁿ'a yā:

¹⁴Ch'ēete n'dái Ndyuūs chí canée
na va'ai chēeti nguuvi. Ní véé
vaadi 'diiíⁿ na yáⁿ'āa nguaaⁿ
'iiⁿ'yāⁿ chí cunée n'daacā n'dai
ti snée yā ndúúⁿcū favor yeⁿ'é
Ndyuūs.

¹⁵Cho'oo chúu ní ángeles s'eeⁿ
cunaⁿ'á yā va'ai chēeti nguuvi. Saⁿ'a
chí snée cuidado 'iiti cuūchí miiⁿ

caⁿa sa chii sa vi'i: Cú'u yú maaⁿ na yáaⁿ Belén ní n'diichi yú chuū chi Señor Ndyuūs miiⁿ chii yā s'uūúⁿ.

¹⁶Maaⁿnch'etē nūuⁿ cueⁿe yā. Ní ndaacā yā María ndúúcu José, ndúúcu saⁿā 'línⁿ dacua'a miiⁿ cándiiti sa na lugar naachi snúuⁿ 'iiti. ¹⁷Ní taachi n'diichí yā saⁿā 'línⁿ miiⁿ, caⁿa yā chii yā 'iiⁿyāⁿ tan'dúúca ángel caⁿa yā chii yā maáⁿ yā yeⁿé dacua'a miiⁿ. ¹⁸Nducyáácá 'iiⁿyāⁿ chi ch'iindiveéⁿ yā chuū chí caⁿa 'iiⁿyāⁿ chi snéé cuidado 'iiti cuūchí cueⁿe yiinu taaví yā yeⁿe chuū. ¹⁹Naati María miiⁿ ní nguain'dai yā nducuéⁿe chuū na staava yeⁿe tá. Ní nacadínuuⁿ yā dē'ē cuuvi. ²⁰'iiⁿyāⁿ chi snéé cuidado 'iiti cuūchí cuínaⁿa yā ní ngaⁿa yā chi ch'etē n'dai Dendyuūs. Ní s'téenu yā Ndyuūs yeⁿe tanducuéⁿe chi ch'iindiveéⁿ yā ní n'diichi yā ti tan'dúúca chi ángel miiⁿ caⁿá yā chii yā 'iiⁿyāⁿ.

Yeⁿe saⁿā chi nguui Simeón ní yeⁿe 'áámá n'daataá chi nguui tá Ana

²¹Ch'iinu dacua'a miiⁿ ní n'ínⁿ nguui ní ndaa nguui chi díⁿ yā circuncidar dacua'a miiⁿ. Ní s'néeⁿ yā chi nguui JESÚS, tan'dúúca chi caⁿa ángel miiⁿ cuááⁿ vmnaaⁿ ndí taachi 'āa cuéé sa ch'eti María.

²²Taachí snuū ca'a niiⁿniⁿ nguui chi 'aama n'daataá ní canéé dēve taachi véé dacua'a 'línⁿ yeⁿe tá tan'dúúca chi canéé nguūⁿ na ley yeⁿe Moisés, tuu'mi ní José ndúúcu María candéé yā dacua'a miiⁿ na yáaⁿ Jerusalén. Candéé yā chi díⁿ yā presentar dacua'a miiⁿ nanááⁿ Señor 'iivú Ndyuūs. ²³Tífcā caⁿa

yā díⁿ yā ti canéé nguūⁿ na ley yeⁿe 'iiví Ndyuūs chi tanducuéⁿe dacua'a, chi vmnááⁿ vmnaaⁿ chi 'cuundiýáaⁿ yeⁿe chéécūu chi sáⁿā canéé lado yeⁿe Ndyuūs. 'Tífcā chiiⁿ chi díⁿ yā chuū. ²⁴Ní cheⁿe yā ca'a yā ofrenda yeⁿe 'áámá n'daataá chi 'cuundiýáaⁿ daiya tá tan'dúúca chi ngaⁿa ley yeⁿe Señor 'iivú Ndyuūs. Ofrenda miiⁿ ní ná 'uūvi 'yaada palomas o na 'uūvi 'yaada pichones.

²⁵Na yáaⁿ Jerusalén miiⁿ canee 'aama saⁿā chi nguui sa Simeón. Sáⁿa 'cūū ní néené n'dai sa ní chiⁿi sá chi i'téenu sa Ndyuūs, ní yeⁿé Ndyuūs saⁿā. Canéé Espíritu N'dai yeⁿé Ndyuūs ndúúcu sa. Ní cánéé ngiinu sa 'áámá 'iiⁿyāⁿ chi nadanguáⁿāi 'iiⁿyāⁿ yeⁿe ndaata Israel. ²⁶Espíritu N'dai yeⁿé Ndyuūs chii yā saⁿā 'cūū chi nguéé canéé chi 'cuūvi sa neⁿe chí 'āa cuéé n'diichi sá Cristo chi Señor Ndyuūs dichó'o yā íⁿyeeⁿdí 'cūū. ²⁷Ní Espíritu N'dai yeⁿé Ndyuūs canéé ndúúcu Simeón miiⁿ. Ní diiiⁿ guiar Simeón miiⁿ. Ní cueⁿé yā na yaacū templo taachi José miiⁿ ndúúcu María ndaa yā na yaacū templo ndúúcu saⁿa 'línⁿ Jesús miiⁿ. Ní 'ífcū cuuvi díⁿ yā presentar dacua'a miiⁿ nanááⁿ Ndyuūs tan'dúúca chi ngaⁿa ley miiⁿ. ²⁸Tuu'mi ní Simeón miiⁿ ca'nuúⁿ yā Jesús ní caⁿa yā chi ch'etē n'dai Dendyuūs. 'Túúca caⁿa yā:

²⁹Maaⁿ ní n'dii Señor Ndyuūs, díⁿ ní chi cuaacu tan'dúúca chi ngaⁿā nduudu yeⁿe nī. Maaⁿ ní díⁿ ní chí cuuví 'cuūví nduucu n'dai, 'úú chí dichii'vé n'dii.

³⁰Caati 'āa n'diichí ndúúcu nduutinaáⁿ 'iiⁿyāⁿ chi dichó'o ní chi inadanguáⁿāi nús'uu.

³¹ 'Iiⁿyāⁿ miiⁿ chíⁿ chí s'néeⁿyaáⁿ
nī chi cáávā nducyaaca 'iiⁿyāⁿ
chí nadanguáⁿai yā 'iiⁿyāⁿ
yeⁿe nuuⁿndí yeⁿé yā.

³² 'Iiⁿyāⁿ miiⁿ chí deeve ní cuuví
deeve yeⁿe nducyaaca 'iiⁿyāⁿ
chi nguéeⁿ yeⁿe ndaata Israel.
Ní ca'a yā honor 'iiⁿyāⁿ yeⁿe
nī chi 'iiⁿyāⁿ Israel yā.

³³ José ndúúcū María ngeⁿe yiinu
yā yeⁿe chi Simeón ngaⁿa yā yeⁿe
saⁿā 'lírⁿ Jesús miiⁿ. ³⁴Simeón miiⁿ
di'viicú yā María ndúúcū José. Ní
caⁿa yā chi yā cheecu sa María:
'Caandiveeⁿ nī. Saⁿā 'lírⁿ 'cūū ndaā
sa chi neené 'yaaⁿ 'iiⁿyāⁿ na yāⁿāa
nguéeⁿ i'téenu yā ní 'tiicá ntúúⁿ
'yaaⁿ 'iiⁿyāⁿ cu'téenu yā. Ní saⁿa
'lírⁿ 'cūū 'áámá seña ti néené 'yaaⁿ
'iiⁿyāⁿ caaⁿmaⁿ yā contra yeⁿe sa.
³⁵Chuū ní diiⁿ chi 'iiⁿyāⁿ cuuvi
cádiinuun yā yeⁿe ca'áámá cā'aama
'iiⁿyāⁿ taacā nadicádiinuun yā na
staava yeⁿe yā. Chuū ní tan'dúúcā
'áámá machete 'uūvī lados 'caāiⁿ chi
cho'ōo alma yeⁿe n'dii María.

³⁶Ná yaacú templo 'cūū, mífⁿ
ntúúⁿ canee 'áámá n'daataá n'dai chi
nguuvi Ana. Ní ngaⁿa tá dendu'ū
chi cuchii. N'daataá miiⁿ ní daiya
Fanuel, chí yeⁿe ndaataá yeⁿe
Aser. Ní Ana miiⁿ 'āa neené ndiicúú
ta. Ch'iindivaacu tá taachi 'lírⁿ tá
ní ndēēchē ndúuyū nūⁿ cánee
tá ndúúcū isaⁿā yeⁿe tá. Maaⁿ ní
'āa n'daataá nguáⁿá tá. ³⁷Āa cuūⁿ
ngeecú cuūⁿ nduuyūú chi nduuví
tá n'daataá nguáⁿā. Áámá canee
tá na yāacū templo yeⁿé Ndyuūs
ní canée tá ndí nguuví ndii n'gaaⁿ
ní dichíí'v'e tá Ndyuūs. Ní ndii
nguee nga'diinú tá ti dámaaⁿ chí
ngaⁿāngu'a tá. ³⁸Hora mífⁿ nūⁿ

Ana miiⁿ cheⁿe tá yaacū templo
ní ndee tá nduucú Dendyuūs,
'tíicā ngaⁿa ta: N'dii, Ndyuūs teé
gracias n'dii cáávā dacua'a 'lírⁿ
miiⁿ. Cuayiivi ní caⁿa ta chi ta
nducyáácá 'iiⁿyāⁿ chi canée ngiinu
'áámá 'iiⁿyāⁿ chi nadinguáⁿai yā
'iiⁿyāⁿ Israel yā yeⁿe saⁿā 'lírⁿ miiⁿ.

**José ndúúcū María ndúúcū dacua'a
'lírⁿ nandaá yā na yāāⁿ Nazaret**

³⁹Taachi José ndúúcū María
ch'iinu diⁿ yā nducuéⁿe chi ngaⁿa
ley yeⁿe Señor Dendyuūs, tuu'mi ní
cueⁿe ntuúⁿ yā ndúúcū saⁿā 'lírⁿ na
yāāⁿ vaacú yā chi nguuví Nazaret
yeⁿe yāⁿāa Galilea. ⁴⁰Saⁿā 'lírⁿ
Jesús miiⁿ ngiita sa ní ngii ditiinu
sa. Néené deenu sa. Ní Ndyuūs
di'viicú taavi cá yā saⁿā 'lírⁿ miiⁿ.

**Saⁿā 'lírⁿ Jesús cheeti yāacū yeⁿe
Ndyuūs ndúúcū maestros**

⁴¹Nduuyu nduuyu taachi ndaā
tiempo yeⁿe 'viicu yeⁿe pascua, tuu'mi
ní chiida Jesús ndúúcū cheecu sa
ngeⁿe yā yāāⁿ Jerusalén. ⁴²Ní taachi
Jesús chi yā ndiichúvī nduūyū,
'iiⁿyāⁿ s'eeⁿ cueⁿe ntúúⁿ yā na yāāⁿ
Jerusalén ndúúcū Jesús miiⁿ tan'dúúcā
chi 'āa ngeⁿe yā nduuyu nduuyu cáávā
'viicú mífⁿ. ⁴³Cho'ōo 'viicú miiⁿ, ní
José ndúúcū María miiⁿ ní cunaⁿa yā.
Nguée tuumicadíinuun yā chi saⁿā 'lírⁿ
Jesús miiⁿ canee sá na yāāⁿ Jerusalén.
⁴⁴'Iiⁿyāⁿ s'eeⁿ ní nadicadíinuun yā
chi Jesús miiⁿ ní cunaⁿa sa ndúúcū
'iiⁿyāⁿ parientes yeⁿe yā. 'Iiⁿyāⁿ s'eeⁿ
núúⁿmáⁿ nguuví ní chiica yā. Tuu'mi
nan'nuúⁿ yā Jesús nguaaⁿ 'iiⁿyāⁿ yeⁿe
yā ndúúcū 'iiⁿyāⁿ chi n'dai nduucú
yā, ⁴⁵naati nguée ndaacá yā saⁿā 'lírⁿ
Jesús miiⁿ. Ní nguēcunée yā snaⁿa yā

na yāaⁿ Jerusalén miiⁿ chi n'nuúⁿ yā Jesús miiⁿ.

⁴⁶Ndíí ch'iinu 'iinu nguuvi ní ndaacá yā Jesús na yāacū templo. Véé sá ndúúcū maestros chí ng'cuééⁿ yā ley. Jesús miiⁿ ní 'íneeⁿ veeⁿ sa chí ngaⁿa yā ní tiinguuneeⁿ sá maestros yeⁿe chí ngaⁿa yā. ⁴⁷Nducyáácá 'iiⁿyāⁿ chí n'giindiveéⁿ yā chí ngaⁿa saⁿa 'lííⁿ Jesús miiⁿ ngeⁿe yíínú yā yeⁿe sa chí déénu sa ní nan'guεεcútaⁿā sa chí ítiingúúneeⁿ yā saⁿa 'lííⁿ miiⁿ. ⁴⁸Taachí chíídá sá ndúúcū chεεcu sa n'diichí yā Jesús miiⁿ cueⁿe yíínú yā yeⁿe sa. Tuu'mi ní chεεcu sa ní caⁿá yā chíi yā saⁿa 'lííⁿ: Díí, daiyá, ¿de'ē cuuvi chí 'tíicá dííⁿ di nduucúⁿ nū? Cuin'díichí dí. Chiida di ndúúcū 'úú yā'āi n'dai staava yeⁿe nū 'íicú chíicá nū in'nuúⁿ nū díi.

⁴⁹Tuu'mi ní nan'guεεcútaⁿā sa yeⁿe yā: ¿Dé'ē vεε? ¿Dé'ē cúúví chí in'nuúⁿ ní 'úú? ¿Áá nguéeⁿ deenu ndís'tií chí 'úú ní canéeⁿ chí cūneé ndúúcū dendu'ū yeⁿe Chiidá?

⁵⁰'Iiⁿyāⁿ s'eeⁿ ní nguéeⁿ tuūmicadiinúúⁿ yā nduudu chí caⁿa daiyá yā Jesús miiⁿ chíi sá 'iiⁿyāⁿ.

⁵¹Tuu'mi ní cunaⁿa Jesús nduucú yā na yāaⁿ Nazaret miiⁿ ní 'neeⁿ veeⁿ sa yeⁿe yā. Chεεcu sa miiⁿ ní nadacadiinúúⁿ yā tanducuéⁿē na staava yeⁿe yā. ⁵²Jesús miiⁿ ní n'giita sa ndúúcū n'dee n'dái vaadi deenu, níicú véé favor yeⁿe sa nanááⁿ Ndyuūs ní nanááⁿ 'iiⁿyāⁿ na iⁿyeeⁿdí 'cūū. Níicú 'āā ngεēnū nduuyu yeⁿe sa.

Juan chí ngεēdínúūⁿnī sa ngaⁿa sa chí ndaacadaamí 'iiⁿyāⁿ yeⁿe nuuⁿndi yeⁿe yā

(Mt. 3.1-12; Mr. 1.1-8; Jn. 1.19-28)

3 Saⁿa chí nguuvi Tiberio César, 'āā ndíitiiⁿyuⁿ nduuyū chí

ngaⁿa ntiíⁿnyúⁿ yā chí emperador yā. Ní saⁿa chí nguuvi Poncio Pilato, ní gobernador yā yeⁿe yāⁿāa Judea. Saⁿa chí nguuvi Herodes ní rey yā yeⁿe yāⁿāa Galilea. 'Íicú 'diinū Herodes miiⁿ chí nguuvi Felipe ní rey yā yeⁿe yāⁿāa Iturea ndúúcū yāⁿāa Trachonite Ní saⁿa chí nguuvi Lisaniás ní rey yā yeⁿe yāⁿāa Abilinia. ²Ní saⁿa Anás ndúúcū Caifás, saⁿa 's'uuⁿ ní chiiduú n'gεεca yeⁿe yaācū yeⁿe 'iiⁿyāⁿ Israel. Tiempo miiⁿ ní Ndyuūs ní caⁿá yā 'áámá nduudu n'dai Juan, chí daiya Zacarías. Juan miiⁿ canee sa na yāⁿāa cuūⁿmánⁿ naachi nguéeⁿ ch'εetinéeⁿ 'iiⁿyāⁿ. ³Juan miiⁿ ní cachii ca sa nducuéⁿē yāⁿāa chí snéeⁿ niiⁿnuúⁿ ná yíicú Jordán. Ní Juan miiⁿ chíi sá 'iiⁿyāⁿ chí canéeⁿ chí cuēdínúūⁿnī yā níicú ndaacadaamí yā yeⁿe nuuⁿndi yeⁿe yā, níicú Ndyuūs nadich'εēcú yā nuuⁿndi yeⁿe yā. ⁴Chuū ní chíi tan'dúúcā chí profeta Isaías dingúuⁿ yā ndii cuaaⁿ vmnaaⁿ na libro yeⁿe Ndyuūs yeⁿe:

'Caandiveeⁿ yú nduudu yeⁿe 'áámá 'iiⁿyāⁿ chí caaⁿmánⁿ yā yuudū na yāⁿāa cuūⁿmánⁿ naachi nguéeⁿ ch'εetinéeⁿ 'iiⁿyāⁿ ní caⁿa yā 'tuuca: Cuundiyaáⁿ ní yúúní yeⁿe Señor Ndyuūs caati cuchii yā; nan'guáaⁿ ní 'aama yúúní cuaacu caavá yā. Dideεvé ní staava yeⁿe ní ní cuuvi 'cuaáⁿ ní 'iiⁿyāⁿ miiⁿ taachi ndaa yā.

⁵Naachi yaanúú ní nduūtī, núúⁿmánⁿ icyaⁿā ndúúcū nducyaaca yíicū nduuví neⁿe, yúúní 'cuéé nduuví cuaacu, yúúní chí nguéeⁿ neⁿe ní nduuví neⁿe.

⁶ Nducyaaca 'iiⁿyāⁿ snaaⁿ yā
'iiⁿyāⁿ yeⁿe Ndyuūs, 'iiⁿyāⁿ
chí nadinguáⁿai yā nducyaaca
'iiⁿyāⁿ.

⁷ Juan miⁿ ní ngaⁿa sá ngii sa
'iiⁿyāⁿ chí ndaá yā chí cuēédínuⁿnīⁿ
sa 'iiⁿyāⁿ: Ndís'tiī ní tan'dúúcā cúú
'tífcā ndís'tiī. ¿Du'ú chí 'cueeⁿ ndís'tiī
chí cuuvi cáanu nī yeⁿe castigo
taaⁿ chí cúchi? ⁸ Díⁿ nī dendu'ū
chí n'dáacā maaⁿ nífcú 'cuuⁿmí
nī 'iiⁿyāⁿ chí 'āā ndaacadaamí nī
yeⁿe nuuⁿndi yeⁿé nī. Nguēē tucá'a
nī caaⁿmaⁿ nī nguaaⁿ maaⁿ nī chí
Abraham miⁿ ní chiidá nī caati
'úú ngaⁿá ngii ndís'tiī chí Ndyuūs
ní cuuvi díⁿ yā chí tuū s'eeⁿ ní
chí cuuvi daiya Abraham. ⁹ Ní
cutiīⁿ mífⁿ ní 'āā canéé na di'yu
yáⁿá. Nducyaaca yáⁿá chí nguéé
ngii n'gui'í n'daacā yeⁿe canee chí
'caaca yáⁿá mífⁿ ní cūnuuⁿ na yaⁿā.
'Tiicá ntúūⁿ Ndyuūs díⁿ yā juzgar
nducyaaca 'iiⁿyāⁿ.

¹⁰ 'Iiⁿyāⁿ s'uuⁿ ntiinguuneeⁿ yā
Juan miⁿ: ¿De'ē cuuví díⁿ 'nū?

¹¹ Juan miⁿ ní nan'guēēcútaⁿā sa:
'Iiⁿyāⁿ chí 'uuví catecai yā, canéé
chí ca'a yā 'áámá catecai 'iiⁿyāⁿ chí
nguéé yeⁿe yā. 'Iiⁿyāⁿ chí véé chí
nge'e yā, canéé chí ca'a yā 'iiⁿyāⁿ
chí nguéé yeⁿé yā.

¹² Ndaá ntúūⁿ 'iiⁿyāⁿ chí
inn'guēē yeⁿe yáⁿā chí Juan miⁿ
cuēédínuⁿnīⁿ sa 'iiⁿyāⁿ. Ní 'iiⁿyāⁿ
s'eeⁿ caⁿa yā chí yā Juan: N'díⁿ,
maestro, ¿de'ē cuuví díⁿ 'nū?

¹³ Juan miⁿ ní caⁿa sa chí yā
'iiⁿyāⁿ: Nguéé caaca nī chí mar
'aama ndo'o tan'dúúcā chí ngaⁿa na
ley.

¹⁴ Tuu'mi ní soldados tiinguunééⁿ
sá Juan: Nús'uu, ¿de'ē cuuví díⁿ

'nū? Ní Juan caⁿa sa chí yā 'iiⁿyāⁿ:
Nguéé diduucú nī yeⁿé mar 'áámá
'iiⁿyāⁿ. Nguéé cunncāā caaⁿmaⁿ nī
yeⁿé tanáⁿā 'iiⁿyāⁿ. Nífcú 'cuēētíneé
nī ndúúcū vaadi yeenú ndúúcū chí
inadí'vé yā ndís'tiī.

¹⁵ 'Iiⁿyāⁿ s'uuⁿ snee yiinu yā Juan
ní nducyaaca yā ní nadicádínuuⁿ
yā na staava yeⁿe yā chí 'áá
nguéé Juan chí Cristo? ¹⁶ Tuu'mi
ní Juan miⁿ ní caⁿa sa chí yā
nducyaacá yā: Cuaacu níⁿnyūⁿ 'úú
ní ngēédínuⁿnīⁿ ndúúcū nuūⁿnīⁿ;
naati cuayiivi cuchii taamá yā chí
n'dáacā n'dai ca ndúúcū poder yeⁿé
yā chí ch'ete taavi nguéé ti 'úú. Ní
'úú ní nguéé n'daacā ca chí cuuvi díⁿ
n'daatií yíⁿmáⁿ yeⁿe ndaacuú yeⁿé
yā. 'Iiⁿyāⁿ miⁿ ní cuēédínuⁿnīⁿ yā
ndúúcū Espíritu N'dai yeⁿé Ndyuūs
ndúúcū yaⁿā. ¹⁷ 'Iiⁿyāⁿ miⁿ ndéé
yā ní diiⁿ yā tan'dúúcā 'iiⁿyāⁿ chí
dideévé yā trigo. 'Tífcā díⁿ yā
ndúúcū 'iiⁿyāⁿ. Ndáa yā ndúúcū
zaranda na ta'a yā. Naachí nadeévé
yā trigo miⁿ, diví yā trigo miⁿ ní
nguain'dai yā ch'eti díⁿnuuⁿ. Ní 'neeⁿ
yáⁿa yā dēcú miⁿ na nguuchí yaⁿā
chí 'āā ntéé n'tuūvi. Dēcú miⁿ ní
tan'dúúcā 'iiⁿyāⁿ chí nguéé i'téenu
yā Ndyuūs.

¹⁸ 'Túúcā ní ndúúcū n'dee n'dái
ca chí caⁿā Juan miⁿ, caⁿa sá chí
'cueeⁿ sa nduudu n'dai chí ngai
'iiⁿyāⁿ s'eeⁿ. ¹⁹ Tiempo miⁿ Juan
miⁿ ní yaa'vi neeⁿ sa rey Herodes
miⁿ chí canéé sá ndúúcū n'daataá
yeⁿé díⁿ sa ní yeⁿe tanducueⁿé
chí nguēē n'daacā chí díⁿ yā.
N'daataá miⁿ ní nguūvi tá Herodías.
²⁰ Tuu'mi ní rey Herodes miⁿ ní díⁿ
yā táámá nuuⁿndi chí ch'ete ca ní
s'nuūⁿ chíichí yā Juan vácū.

Juan miiⁿ cheedinúⁿniⁿ yā Jesús

(Mt. 3.13-17; Mr. 1.9-11)

²¹ Cuayiivi taachí Juan ngeedinúⁿniⁿ yā n'dee n'dái 'iiⁿyāⁿ, cheedinúⁿniⁿ ntúⁿ yā Jesús miiⁿ. Ní taachi Jesús miiⁿ ngaⁿ'angua'á yā nánguuví ní nánguāⁿ. ²² Ní ndaā Espíritu N'dai yeⁿ'é Ndyuūs vmnaaⁿ yeⁿ'é yā tan'dúúcā 'áámá paloma. Ní 'iiⁿyāⁿ s'eeⁿ ch'iindivéeⁿ yā 'áámá nduudu yeⁿ'é va'ai ch'eti nguuví chí ngaⁿ'ā: Díí, daiyá chí neⁿ'e taaví ní yeenú taavi cáāvā dii.

'Iiⁿyāⁿ vmnááⁿ vmnaaⁿ yeⁿ'e ndaata yeⁿ'é Jesús

(Mt. 1.1-17)

²³ Jesús miiⁿ ní chíí yā ndíicú ndiichi ndúuyū taachí tucá'a yā ntíí'nyúⁿ yeⁿ'é yā. Ndaata yeⁿ'e Jesús ní 'tíicā: 'Iiⁿyāⁿ nadicádíinuⁿ yā chí Jesús miiⁿ ní daiya José. José miiⁿ ní daiya Elí. ²⁴ Elí miiⁿ ní daiya Matat. Matat miiⁿ ní daiya Leví. Leví miiⁿ ní daiya Melqui. Melqui miiⁿ ní daiya Jana. Jana miiⁿ ní daiya José. ²⁵ José miiⁿ ní daiya Matatías. Matatías miiⁿ ní daiya Amós. Amós miiⁿ ní daiya Nahum. Nahum miiⁿ ní daiya Esli. Esli miiⁿ ní daiya Nagai. ²⁶ Nagai miiⁿ ní daiya Maat. Maat miiⁿ ní daiya Matatías. Matatías miiⁿ ní daiya Semei. Semei miiⁿ ní daiya José. José miiⁿ ní daiya Judá. ²⁷ Judá miiⁿ ní daiya Joana. Joana miiⁿ ní daiya Resa. Resa miiⁿ ní daiya Zorobabel. Zorobabel miiⁿ ní daiya Salatiel. Salatiel miiⁿ ní daiya Neri. ²⁸ Neri miiⁿ ní daiya Melqui. Melqui miiⁿ ní daiya Adi. Adi miiⁿ ní daiya Cosam. Cosam miiⁿ ní daiya Elmodam. Elmodam miiⁿ ní daiya Er. ²⁹ Er miiⁿ ní daiya Josué. Josué miiⁿ ní daiya Eliezar. Eliezar miiⁿ ní

daiya Jorim. Jorim miiⁿ ní daiya Matat. ³⁰ Matat miiⁿ ní daiya Leví. Leví miiⁿ ní daiya Simeón. Simeón miiⁿ ní daiya Judá. Judá miiⁿ ní daiya José. José miiⁿ ní daiya Jonán. Jonán miiⁿ ní daiya Eliaquim. ³¹ Eliaquim miiⁿ ní daiya Melea. Melea miiⁿ ní daiya Mainán. Mainán miiⁿ ní daiya Matata. Matata miiⁿ ní daiya Natán. ³² Natán miiⁿ ní daiya David. David miiⁿ ní daiya Isaí. Isaí miiⁿ ní daiya Obed. Obed miiⁿ ní daiya Booz. Booz miiⁿ ní daiya Salmón. Salmón miiⁿ ní daiya Naasón. ³³ Naasón miiⁿ ní daiya Aminadab. Aminadab miiⁿ ní daiya Aram. Aram miiⁿ ní daiya Esrom. Esrom miiⁿ ní daiya Fares. Fares miiⁿ ní daiya Fares. Fares miiⁿ ní daiya Judá. ³⁴ Judá miiⁿ ní daiya Jacob. Jacob miiⁿ ní daiya Isaac. Isaac miiⁿ ní daiya Abraham. Abraham miiⁿ ní daiya Taré. Taré miiⁿ ní daiya Nacor. ³⁵ Nacor miiⁿ ní daiya Serug. Serug miiⁿ ní daiya Ragau. Ragau miiⁿ ní daiya Peleg. Peleg miiⁿ ní daiya Heber. Heber miiⁿ ní daiya Sala. ³⁶ Sala miiⁿ ní daiya Cainán. Cainán miiⁿ ní daiya Arfaxad. Arfaxad miiⁿ ní daiya Sem. Sem miiⁿ ní daiya Noé. Noé miiⁿ ní daiya Lamec. ³⁷ Lamec miiⁿ ní daiya Musalén. Musalén miiⁿ ní daiya Enoc. Enoc miiⁿ ní daiya Jared. Jared miiⁿ ní daiya Mahalaleel. Mahalaleel miiⁿ ní daiya Cainán. ³⁸ Cainán miiⁿ ní daiya Enós. Enós miiⁿ ní daiya Set. Set miiⁿ ní daiya Adán. Adán miiⁿ ní yeⁿ'e Dendyuūs.

Yáá'n'guiinūⁿ neⁿ'é sá tuu'vineeⁿ sa Jesús

(Mt. 4.1-11; Mr. 1.12-13)

4 Jesús ní ndiituú yeⁿ'e Espíritu N'dai yeⁿ'é Ndyuūs 'iiⁿyāⁿ ní n'daa yā na yíicú Jordán. Espíritu N'dai yeⁿ'e Ndyuūs candée yā Jesús

na yáⁿāa cuūⁿmáⁿ naachi nguée^é ch'etinéé 'iⁿ yāⁿ. ²Uūvī ngeecu nguuvī caneé yááⁿ'nguīnūⁿ nanááⁿ Jesús mīⁿ chí n'diichineeⁿ sa 'iⁿ yāⁿ. Nguée^é de'ē vee che'é Jesús nguuvī s'eeⁿ. Cuayīvī mīⁿ chí cuicú yā. ³Tuu'mi ní yááⁿ'nguīnūⁿ caⁿ'a sa chíi sa Jesús: Dii Jesús, ndúú^{tí} chí dii chí Daiya Dendyuūs dii caaⁿ'maⁿ dí cuuvī dí tuūu 'cūú chí nduuví pan. Ní nduuví pan ní cuuvī che'e di.

⁴Jesús nan'guēcútáⁿ'a yā: 'Túúcā cánéé nguūⁿ ná libro yeⁿ'é Dendyuūs: Nguée^é dámaāⁿ pan che'é 'iⁿ yāⁿ ní cunduūchí yā caati ndúú^{cū} tanducuéⁿ'ē nduudu chí ngaⁿ'á Ndyuūs cunduuchí yā nduuti chí cu'téenu yā.

⁵Yááⁿ'nguīnūⁿ candée sa Jesús na 'áámá yīicū yáácú. Maaⁿ nch'eté nūⁿ ch'iⁿ'i sa Jesús tanducuéⁿ'ē naciones yeⁿ'ē íⁿ'yeeⁿ dí 'cūū.

⁶Tuu'mi ní yááⁿ'nguīnūⁿ caⁿ'a sa chíi sa Jesús. 'Úú ní teé dii nuuⁿ'maⁿ iⁿ'yeeⁿ dí 'cūú chí cuuví yeⁿ'ē di chí caaⁿ'maⁿ ntíⁿ'nyuⁿ dí yeⁿ'ē ndúú^{cū} nuuⁿ'máⁿ ch'ēete naciones 'cūū ndúú^{cū} chí ngaⁿ'a ntiiⁿ'nyuⁿ yeⁿ'ē caati poder 'cūū yeⁿ'é. 'Āā du'ú nūⁿ chí neⁿ'é chíⁿ chí ca'á. ⁷Ndúú^{tí} chí caantiiⁿ'ya di nanaáⁿ níⁿíⁿcu cu'téenu di 'úú cuuví yeⁿ'ē di tanducuéⁿ'ē chuū.

⁸Jesús caⁿ'a yā chíi yā saⁿ'ā mīⁿ: Dii yááⁿ'nguīnūⁿ cuví di nanaáⁿ caati 'túúcā caneé nguūⁿ na libro yeⁿ'e Dendyuūs: Cu'téenu di Señor Ndyuūs yeⁿ'ē di, ní dámaāⁿ 'caandiveeⁿ di yeⁿ'é 'iⁿ yāⁿ mīⁿ nūⁿ.

⁹Cuayīvī candée yááⁿ'nguīnūⁿ Jesús mīⁿ na yāāⁿ Jerusalén ní cuheé sá ndúú^{cū} yā na yáácú yeⁿ'ē

yáacū templo. Ní caⁿ'a sa: Nduuti chí dii chí Daiya Dendyuūs dii, cáávā di ndii 'múúⁿ ndii na yáⁿ'āa.

¹⁰Caati 'túúcā caneé nguūⁿ cuááⁿ vmaāⁿ na libro yeⁿ'é Ndyuūs:

Ndyuūs dich'ó yā ángeles yeⁿ'e yā chí díⁿ yā cuidado yeⁿ'ē di.

¹¹Ní ángeles cundée yā dii ndúú^{cū} ta'á yā, ní nguée^é cuuvī ya'ai ca'a di na tuūu.

¹²Jesús mīⁿ nán'guēcútáⁿ'a yā: 'Tuucá ntúūⁿ caneé nguūⁿ na libro yeⁿ'é Ndyuūs: Nguée^é diiⁿ di mar 'áámá cosa chí n'diichineeⁿ di Señor Ndyuūs yeⁿ'ē di.

¹³Taachí ch'iinu chí diiⁿ yááⁿ'nguīnūⁿ chí n'diichineeⁿ sa Jesús diví sa yeⁿ'é yā 'áámá tiempo.

Jesús tucá'a yā ntiiⁿ'nyuⁿ yeⁿ'é yā na yáⁿ'āa Galilea

(Mt. 4.12-17; Mr. 1.14-15)

¹⁴Jesús mīⁿ nnguēcúnée yā na yáⁿ'āa Galilea ní caneé poder yeⁿ'e Espíritu N'dai yeⁿ'e Ndyuūs ndúú^{cū} yā. Nducyáácá 'iⁿ yāⁿ chicadínuuⁿ yā na nuuⁿ'máⁿ na yáⁿ'āa cuaaⁿ 'diituú yeⁿ'e chí n'daācā n'dai idiíⁿ Jesús. ¹⁵Ní Jesús ngi'cueeⁿ yā na yaācū sinagogas yeⁿ'e 'iⁿ yāⁿ Israel yeⁿ'e nducuéⁿ'ē yāāⁿ ní nducyaaca 'iⁿ yāⁿ idich'eté yā Jesús.

Jesús canee yā na yāāⁿ Nazaret

(Mt. 13.53-58; Mr. 6.1-6)

¹⁶Ndaá Jesús na yāāⁿ Nazaret naachí ch'iita yā. Ní tan'dúú^{cā} chí costumbre yeⁿ'é yā, nguuvī sábadó chí ntaavi'tuunúúⁿ 'iⁿ yāⁿ yeⁿ'e ndaata Israel ndāa yā na yaācū sinagoga mīⁿ ní Jesús chééndii yā ní ch'eeⁿ yā yeⁿ'e libro yeⁿ'e Ndyuūs. ¹⁷Ní nan'guáaⁿ yā libro mīⁿ naachi

ngaⁿa yeⁿē profeta Isafas. Taachí nan'guaaⁿ yā libro miiⁿ, ndaacá yā naachi canée nguūⁿ chúu:

¹⁸ Espíritu yeⁿé Ndyuūs canée yā nduucú, tí Espíritu N'dai yeⁿé Ndyuūs ndeévé yā 'úú chi 'úú ní caaⁿ máⁿ nduudu chí ngai yeⁿé Ndyuūs nanááⁿ 'iiⁿ yāⁿ chí ndaachí sneeⁿ ndúúcū nuuⁿndi yeⁿe yā. Dicho'ó yā 'úú chí díⁿ chí nduūvā yeⁿe 'iiⁿ yāⁿ chí yaⁿ ai staava yeⁿe yā, ní caaⁿ máⁿ chí nánguaⁿ ai 'iiⁿ yāⁿ yeⁿe nuuⁿndi yeⁿé yā chí tan'duucā chí ca'á libertad 'iiⁿ yāⁿ chí snúūⁿ vácū, ní díⁿ chí inaaⁿ 'iiⁿ yāⁿ cosa chí n'daacā chí nguée déénu yā yeⁿē caati maaⁿ canee yā tan'dúúcā 'iiⁿ yāⁿ chí ngeenááⁿ, 'tiicá yā. Ní nadan'guai 'iiⁿ yāⁿ chí nguée n'daacā idiiⁿ ndúúcu yā caati cuuvi n'daacā idiiⁿ ndúúcu yā.

¹⁹ Ní caaⁿ máⁿ yeⁿe tiempo chí n'dai taavi chí Ndyuūs ndeévé yā chí caaⁿ máⁿ, yeⁿē vaadi n'dai taavi yeⁿé yā.

²⁰ Tuuⁿmi ní Jesús nan'gaadi yā libro yeⁿé Ndyuūs ní nanca'a yā 'iiⁿ yāⁿ chí díⁿ yā ntiiⁿnyuⁿ yeⁿe yaācū sinagoga miiⁿ. Ní cuayiivi Jesús ch'iindí yā. Nducyaaca 'iiⁿ yāⁿ snee yā n'gíinu yā yeⁿe Jesús.

²¹ Jesús tucá'a yā caⁿ'a yā 'iiⁿ yāⁿ s'eeⁿ: Maaⁿ cunuuⁿ ca'a chuū chí canee nguūⁿ cuááⁿ vmnaaⁿ chí yeⁿe ndís'tií, chuū chí ch'iinu ch'iindiveéⁿ nī.

²² Nducyáácá 'iiⁿ yāⁿ n'dáácā ngaⁿ'a yā yeⁿe Jesús. Ngeⁿe yíínú yā yeⁿē nduudu chí n'dai chí ngaⁿ'a Jesús miiⁿ ní ngaⁿ'a yā: ¿Áá nguée sáⁿ'a 'cūú daiya José?

²³ Ní caⁿ'a Jesús miiⁿ: Ndís'tií ní cuuví nī nduudu 'cūú 'úú. N'dií 'iiⁿ yāⁿ chí déénu nī diíⁿ yiicú nī 'iiⁿ yāⁿ, diíⁿ yiicú maáⁿ nī n'dií. Tanducueⁿ chí ch'iindiveéⁿ 'nū chí díⁿ nī na yááⁿ Capernaum, 'tiicá ntúūⁿ díⁿ nī 'muuⁿ yááⁿ vaacú nī.

²⁴ Naati 'uu ní caⁿ'á chíí ndís'tií: Cuaacu níⁿnyúⁿ mar 'áámá profeta ní nguée ngíí inee yā na yááⁿ vaacú yā. ²⁵ Cuaacu níⁿnyúⁿ ngaⁿ'á ngíí ndís'tií: Tiempo chí chó'oo neené 'yaaⁿ n'daataá nguá'aa vee tá nguaaⁿ 'iiⁿ yāⁿ Israel taachi profeta Elías cānee yā iⁿ'yeeⁿ díⁿ 'cūú ní 'āā ntée cheeⁿ cuuvi 'iinu ndúuyū canée maⁿ'a tiempo miiⁿ. Ní ch'iidi cuuicu nuuⁿ máⁿ yáⁿ'āa yeⁿe 'iiⁿ yāⁿ Israel. ²⁶ Ní Ndyuūs nguée dich'óo yā Elías miiⁿ nanááⁿ nducyaaca n'daataá nguá'aa, dámaāⁿ 'áámá n'daataá nguá'aa yeⁿe táámá nación. Ní canee tá na yááⁿ Sarepta chí niiⁿnuúⁿ na yáⁿ'āa Sidón. ²⁷ Ní tiempo taachi canée profeta Eliseo na iⁿ'yeeⁿ díⁿ 'cūú, 'tiicá ntúūⁿ neéne 'yaaⁿ 'iiⁿ yāⁿ ndúúcū ca'ai chí lepra chí in'duuti yúutē yeⁿe yā naati nguée nducyaaca 'iiⁿ yāⁿ s'eeⁿ nduuva yeⁿe yā, dámaāⁿ saⁿ'ā Naamán yeⁿe táámá nación chí yeⁿe yáⁿ'āa Siria.

²⁸ Taachí 'iiⁿ yāⁿ ch'iindiveéⁿ yā chuū nducyaaca yā na yaācū sinagoga miiⁿ neené nduuvi taaⁿ yā. ²⁹ Ní ch'eti ndií yā tí neⁿé yā tun'daa yā Jesús cuaaⁿ chuva'āi yááⁿ miiⁿ ní candée yā Jesús miiⁿ ndií na yaacu n'dai yeⁿe yiicū chí yaacú ca yeⁿe yááⁿ miiⁿ. Ní 'iicu cuuví cun'daa yā Jesús miiⁿ. ³⁰ Naati nguée cuuví díⁿ yā ti Jesús miiⁿ ní chó'ó yā náávtaⁿ'ā yeⁿe 'iiⁿ yāⁿ s'eeⁿ ní cunaⁿ'a yā na vaacu yā.

**'Áámá saⁿā chi canéé sa ndúúcū
espíritu chi nguεε n'daācā yeⁿe
yááⁿ'nguiniūⁿ**

(Mr. 1.21-28)

³¹Cuayiivi Jesús nangua'ái yā na yāāⁿ Capernaum yeⁿe yāⁿ'āa Galilea ní miiⁿ ngi'cueeⁿ yā 'iiⁿ'yāⁿ nguuvu sábadu chi nguuvu chí ntaavi'tuunúúⁿ yā. ³²Ní 'iiⁿ'yāⁿ na yāāⁿ miiⁿ ngeⁿe yiinú yā yeⁿe chi ngi'cueeⁿ Jesús, ti ngi'cueeⁿ yā ndúúcū poder tan'dúúca 'áámá 'iiⁿ'yāⁿ chí ngaⁿ'ā ntiⁿ'nyúⁿ yā.

³³Ní taachi snee Jesús na yaacu sinagoga miiⁿ canee 'áámá saⁿā ndúúcū espíritu yeⁿe yááⁿ'nguiniūⁿ. Espíritu miiⁿ diiⁿ chi saⁿ'ā miiⁿ neenē yuudu 'caí sa. ³⁴Ní espíritu miiⁿ ní caⁿ'ā: N'dii, Jesús, yeⁿe yāāⁿ Nazaret, cu'néeⁿ nī nús'uu. ¿Dé'ē canee yeⁿ'é nū nduucú ní? ¿Áá ndāa nī chi di'cuiniú nī nús'uu? 'Úú n'diichí du'ú n'dii. N'dii ní 'iiⁿ'yāⁿ chí N'dai chi Daiya Dendyuūs n'dii.

³⁵Jesús ní yaa'vineeⁿ yā ní caⁿ'a yā: Dii espíritu n'gáádí dí cheendi di ní nan'dáa di yeⁿe sá 'tīi. Tuu'mi ní espíritu yeⁿe yááⁿ'nguiniūⁿ chindeēve sa sáⁿ'a 'cūū náávtaⁿ'ā yeⁿe 'iiⁿ'yāⁿ s'eeⁿ ní nan'daā sa yeⁿ'e sáⁿ'a 'cūū. Nguéé de'ē vεε diiⁿ sa ndúúcū sáⁿ'a 'cūū. ³⁶Nducyaaca yā ní ngeⁿe yiinú yā ní ngaⁿ'a yā ngii yā vī'i: ¿Dé'ē nduudu chi 'túúca? 'Iiⁿ'yāⁿ 'cūū ngaⁿ'a ntiⁿ'nyúⁿ yā espíritu yeⁿe yááⁿ'nguiniūⁿ ndúúcū poder tan'dúúca 'áámá 'iiⁿ'ntyéⁿ'ē. Ngaⁿ'á yā chí nan'daā espíritu yeⁿe yááⁿ'nguiniūⁿ ní nacan'daā.

³⁷Ní nducyaaca 'iiⁿ'yāⁿ ngaⁿ'a yā yeⁿe Jesús miiⁿ nducuéⁿ'ē cuaaⁿ nducuéⁿ'ē yāāⁿ cuááⁿ 'diituú.

**Jesús díⁿ yā chi nduūvā yeⁿ'e indáⁿ'a
Simon Pedro**

(Mt. 8.14-15; Mr. 1.29-31)

³⁸Tuu'mi ní Jesús miiⁿ nan'dáa yā yaācū sinagoga miiⁿ ní ndaa yā va'ai yeⁿ'ē Simón Pedro. Ní indáⁿ'ā Simón Pedro miiⁿ ndéē 'aama 'iiⁿ'nūⁿ taaⁿ n'daataá ní 'iiⁿ'yāⁿ yeⁿ'e vaacu tá di'cuíitu yā Jesús miiⁿ chí cunée yā ní nanduūvā yeⁿ'ē tá. ³⁹Jesús candii yā naachi canéé n'daataa miiⁿ ní caⁿ'a yā chi cuavii 'iiⁿ'nūⁿ miiⁿ. Hora miiⁿ 'iiⁿ'nūⁿ miiⁿ chivii yeⁿ'ē tá. N'daataa miiⁿ ní hora miiⁿ ncueeⁿ nuuⁿ tá ní diiⁿ tá mandados yeⁿ'é 'iiⁿ'yāⁿ s'eeⁿ ní ca'a tá chí che'e yā.

**Jesús díⁿ yā chi nduūvā yeⁿ'e 'yaaⁿ
n'dái 'iiⁿ'yāⁿ chí ngiitā**

(Mt. 8.16-17; Mr. 1.32-34)

⁴⁰Taachí chiya 'yáⁿ'ā, 'yááⁿ n'dái 'iiⁿ'yāⁿ ndée yā 'iiⁿ'yāⁿ chí ngiitā nanááⁿ Jesús. Néénē n'deeenaaⁿ ca'ai ndii yā. Jesús miiⁿ ní yiin'duu tá'a yā vmnaaⁿ ca'áámá ca'áámá 'iiⁿ'yāⁿ ní 'tíicā nduuvā yeⁿ'e yā. ⁴¹Ní yeⁿ'ē 'yaaⁿ 'iiⁿ'yāⁿ chí ngííta yā yinan'dáa espíritus yeⁿ'e yááⁿ'nguiniūⁿ chí 'caí yā ní ngaⁿ'a yā: N'dii ní Daiya Dendyuūs n'dii. Tuu'mi ní Jesús miiⁿ ní yaa'vineeⁿ yā espíritus yeⁿ'e yááⁿ'nguiniūⁿ ní nguéé 'cuúⁿ yā chí caaⁿ'maⁿ sa ti espíritus yeⁿ'e yááⁿ'nguiniūⁿ ní deenu sá chí Jesús miiⁿ chí Cristo.

**Jesús ní caⁿ'a yā nduudu yeⁿ'é
Ndyuūs na yāⁿ'āa Judea**

(Mr. 1.35-39)

⁴²Chideēve táámá nguuvu Jesús miiⁿ ní cueⁿ'e yā chuva'ai yāāⁿ miiⁿ na 'áámá lugar naachi nguéé

ch'etinéé 'ii'yāⁿ. Ní 'ii'yāⁿ s'eeⁿ yeⁿe yāāⁿ miiⁿya in'nuúⁿ yā Jesús ní ndaá yā naachi canéé Jesús miiⁿ. Ní dí'cuiitú yā chi nguéeⁿ cuvii Jesús yeⁿe yā. ⁴³Naati Jesús miiⁿ ní ngaⁿa yā ngii yā 'ii'yāⁿ s'eeⁿ: Canéé chíⁿ chi 'úú ní caaⁿ'máⁿ yeⁿe nduudu ngai yeⁿe naachi Ndyuūs ngaⁿa ntiiⁿnyúⁿ yā, nanááⁿ 'ii'yāⁿ yeⁿe tanáⁿ'ā yāāⁿ ti yeⁿe chúu chí Dendyuūs dicho'ó yā 'úú.

⁴⁴Ní Jesús miiⁿ cueⁿ'é yā yāāⁿ ndíi yāāⁿ yeⁿe yāⁿ'āa Galilea ní ngaⁿ'á yā nduudu yeⁿe Ndyuūs na yaācū sinagogas naachi cueⁿ'é yā.

Ndúú^{cū} vaadī n'giinu yeⁿ'ē chi itungaaⁿ yā 'yaācā

(Mt. 4.18-22; Mr. 1.16-20)

5 'Áamá tiempo taachi Jesús canéé yā niiⁿnuúⁿ ná nuūⁿnīⁿ'yáⁿ'ā chi nguuvi Genesaret, néénéé 'yaaⁿ 'ii'yāⁿ ndaá yā nanááⁿ yā ní chiitu yā chi cuuvi 'caandiveéⁿ yā nduudu yeⁿe Dendyuūs. ²Jesús n'diichi yā ná 'uūvi barcos chi snéé níⁿnuúⁿ na nuūⁿnīⁿ'yáⁿ'ā. 'Ii'yāⁿ chi itungaaⁿ 'yaācā miiⁿ 'āā nan'daá yā na barco s'eeⁿ ní cueⁿ'é yā naaⁿ'nú yā yāānā yeⁿe 'yaācā na nuūⁿnīⁿ'yáⁿ'ā. ³Tuu'mi Jesús sndáa yā na 'áamá barco chi yeⁿe Simón Pedro miiⁿ ní chii yā Simón Pedro chí 'āā caⁿ'a rá barco miiⁿ ndíi niiⁿnuúⁿ 'diitúú nuūⁿnīⁿ miiⁿ. Tuu'mi ní Jesús ch'iindii yā na barco miiⁿ ní chí'cueeⁿ yā 'ii'yāⁿ. ⁴Taachi Jesús ch'iinu chí'cueeⁿ yā 'ii'yāⁿ, tuu'mi ní caⁿ'a yā chii yā Simón: Cueⁿ'e di ndúú^{cū} barco ndíí ná yāānūⁿ ní 'caanuūⁿ dí yaanā yeⁿe di nguaaⁿ nuūⁿnīⁿ ní tungaaⁿ dí 'yaācā.

⁵Simón miiⁿ ní nan'guεεcútaⁿa yā ní caⁿ'a yā chii yā Jesús: N'dií Maestro, 'āā núúⁿ'máⁿ yaaⁿ ch'etii nduuchí 'nū ní diiⁿ ntiiⁿnyúⁿ 'nū ní nguéeⁿ de'ē vεε ndaāca 'nū; naati ndúú^{cū} nduudu yeⁿe ní 'caanuúⁿ 'nū yaānā yeⁿ'é 'nū chεeti nuūⁿnīⁿ miiⁿ.

⁶Taachi 'caanuúⁿ yā yaānā miiⁿ chiitu 'yaācā chεeti yaānā miiⁿ chí yaānā miiⁿ ndiitúú nuūⁿ chííteⁿ.

⁷Tuu'mi ní dita'a yā yeⁿ'ē tanáⁿ'a 'ii'yāⁿ chi snúuⁿ yā chεeti taamá barco miiⁿ chí caⁿ'a yā ní cunneé yā Simón. 'Ii'yāⁿ s'eeⁿ ní ndaa yā ní chiitu 'yaācā nduu 'uuvi barcos chí nduu 'uuvi barcos neⁿ'e 'cuεechi ndii mááⁿ nuūⁿnīⁿ. ⁸Taachi Simón Pedro n'diichi yā chuū chíntii'yā yā nanááⁿ Jesús miiⁿ ní caⁿ'a yā chii yā Jesús miiⁿ: N'dií Señor, 'úú nguéeⁿ n'daācā 'úú chí cuchii nanááⁿ n'dií, ti 'úú ní 'ii'yāⁿ nuūⁿndí 'úú.

⁹Simón Pedro miiⁿ ní nééné ngeⁿ'e yiinú yā. 'Tiicá ntúūⁿ 'ii'yāⁿ chí snéé yā ndúú^{cū} sa ngeⁿ'e yiinú yā cáávā yeⁿ'ē chí diiⁿ Jesús chí 'ii'yāⁿ s'eeⁿ itúngaáⁿ yā 'yaācā chí 'yaaⁿ taaví ti. ¹⁰'Tiicá ntúūⁿ Jacobo ndúú^{cū} Juan, chí daiya Zebedeo, chí dáámá diiⁿ yā ntiiⁿnyuⁿ ndúú^{cū} Simón, dii'yā yā chíi. Ní Jesús caⁿ'a yā chíi yā Simón: Díí, Simón, nguéeⁿ 'va'a di; ndii maaⁿ ní tan'dúú^{cā} chí ituungaaⁿ di 'yaācā yeⁿ'e nuūⁿnīⁿ, 'tíicā maaⁿ ní 'úú idiíⁿ chí in'nuuⁿ dí 'ii'yāⁿ chí cuuvi caⁿ'á yā nduucú.

¹¹Taachi ndaa yā ndúú^{cū} barco miiⁿ niiⁿnuúⁿ 'diitúú nuūⁿnīⁿ, tuu'mi ní 'ii'yāⁿ s'eeⁿ s'neeⁿ yā ntiiⁿnyuⁿ yeⁿ'é yā ndúú^{cū} barco miiⁿ ndúú^{cū} nducuéⁿ'ē chí snúūⁿ chεeti barco miiⁿ ní cueⁿ'e yā ndúú^{cū} Jesús.

Jesús diiⁿ yā chi nduūvā yeⁿe 'áámá saⁿā ndúúcū ca'ai lepra

(Mt. 8.1-4; Mr. 1.40-45)

¹²Taachi Jesús miiⁿ ndaa yā na 'áámá yāāⁿ ní canée yā miiⁿ, ndaa nanááⁿ Jesús 'áámá saⁿā chi ndii sa 'áámá ca'ai chi nguuvī lepra chi ín'duuti yuūtē yeⁿe sa. Taachí saⁿā miiⁿ n'diichi sa Jesús miiⁿ, chííntiiⁿ ya sa can'dií sa ndii na yāⁿāa nanááⁿ Jesús miiⁿ. Ní chiica sa Jesús: N'dí Señor, ndúúti chi n'dií neⁿe nī, ní dííⁿ nī chí nduūvā yeⁿe.

¹³Tuu'mi ní Jesús miiⁿ n'doo ta'á yā ní tuu'ví yā saⁿā ní caⁿa yā: 'Úú ní neⁿe chí nduūvā yeⁿe di. Tuu'mí nūuⁿ ndúuvā yeⁿe sa ní nduūvī dēeve sá. ¹⁴Ní Jesús caⁿa yā chíi yā saⁿā miiⁿ: Nguéé cuuvi di mar 'áámá 'iiⁿyāⁿ chi nduuva yeⁿe di. Cueⁿe di ní 'cuuⁿmiⁿ di maaⁿ cuerpo yeⁿe di nanááⁿ chiiduú. Ní ca'a di nanááⁿ Ndyuūs ofrenda yeⁿe di yeⁿe chi nanduuva yeⁿe di tan'dúúcā chi ngaⁿa ley yeⁿe Moisés. Ní 'iicu cadíínuúⁿ nducyaaca 'iiⁿyāⁿ chi nduūvā yeⁿe di.

¹⁵Yeⁿe chí dííⁿ Jesús miiⁿ dāndoō ca, ní neenē 'yaaⁿ 'iiⁿyāⁿ ndaa yā chi 'caandiveēⁿ yā nduudu yeⁿe Jesús miiⁿ. Ní Jesús dííⁿ yā chi nduūvā yeⁿe 'iiⁿyāⁿ. ¹⁶Jesús cueⁿe yā na lugar naachi nguéé ch'etinéé 'iiⁿyāⁿ chí caaⁿmaⁿngua'á yā.

Jesús diiⁿ yā chi nduūvā yeⁿe 'áámá saⁿā chi in'dúuví cuerpo yeⁿe sa

(Mt. 9.1-8; Mr. 2.1-12)

¹⁷Áámá nguuvī Jesús ní ngi'cueeⁿ yā 'iiⁿyāⁿ ní miiⁿ vēē 'iiⁿyāⁿ fariseos

chi dingúuⁿ leyes ndúúcū maestros chí ngi'cueeⁿ ley. 'Iiⁿyāⁿ s'eeⁿ ní ngiicá yā yeⁿe táámá yāāⁿ ní yeⁿe nducyáácá yaāⁿ yeⁿe yāⁿāa Galilea ndúúcū yāⁿāa Judea, nífcú yeⁿe yāāⁿ Jerusalén. Jesús miiⁿ cuuvi dííⁿ yā chí nduūvā 'iiⁿyāⁿ s'eeⁿ ti poder yeⁿe Ndyuūs canéé nduucú yā.

¹⁸Tuu'mi ní ndaa ntúūⁿ n'duuvī saⁿā chi n'diichí yā Jesús. Ní saⁿā s'eeⁿ ní ndēē yā 'áámá saⁿā ndúúcū ca'āi chí in'dúuví cuerpo yeⁿe sa na 'áámá camilla. Ní ndiíⁿ yā chi ndaa saⁿā miiⁿ chēeti va'āi nanááⁿ Jesús miiⁿ.

¹⁹Nguéé ndaāca yā taacā cundāa yā ndúúcū saⁿa miiⁿ ti neenē n'deeē 'iiⁿyāⁿ snuuⁿ yā. Tuu'mi ní 'iiⁿyāⁿ s'eeⁿ ní chēē yā tiíⁿ va'āi ni diví yā n'duuvī táátá tiíⁿ va'āi. Ní di'cua'ái yā saⁿā na yiive naachi candííⁿ saⁿā miiⁿ nanááⁿ Jesús. ²⁰Taachí Jesús miiⁿ tuumicadíínuuⁿ yā chí vée vaadi i'teenu yeⁿe saⁿā s'eeⁿ caⁿa yā chíi yā saⁿā: Díí saⁿā, 'úú nadach'ēecú nuuⁿndí yeⁿe di.

²¹Tuu'mi ní 'iiⁿyāⁿ chí ngi'cueeⁿ ley ndúúcū 'iiⁿyāⁿ fariseos tuca'a yā nadicadíínuuⁿ yā ní caⁿa yā: ¿Du'u sáⁿa 'cūū chí duuchineeⁿ yā yeⁿe Ndyuūs? ¿Du'ū nadich'ēecu nuuⁿndi yeⁿe yú? Dámaaⁿ Ndyuūs cuuvi dííⁿ yā 'tífcā.

²²Jesús tuūmicadiinúúⁿ yā chí nadicadíínuuⁿ 'iiⁿyāⁿ s'eeⁿ. Tuu'mi ní caⁿa yā chíi yā 'iiⁿyāⁿ s'eeⁿ: Ndís'tií, ¿d'ēē cúúví chí 'tífcā inadicadíínuuⁿ ndís'tií na staava yeⁿe ní? ²³¿Chē cá nguéé ngíⁿii chí caaⁿmáⁿ: Āā nuuⁿndi yeⁿe di ní nch'ēēcū o ndúuncuéēⁿ dí ní caaca dí? ²⁴Túúfcā caⁿá chíí saⁿā chí ndís'tií cuuvi déénu nī ti 'úú ní Saⁿa chí Daiyá Dendyuūs 'úú. Ní vée poder iⁿ'yeeⁿ dí

'cūū chi inadach'eēcū nuu'ndi.
Tuu'mi ní Jesús ca'n'a yā chíi yā sa'n'a
mii'n: Ncuee'n di, nta'a di yiive ye'n'e
di ní cuna'n'a di na vaacu di.

²⁵Tuu'mi ní sa'n'a mii'n chí ndii chi
ca'āi sa 'āā ndúúvā ye'n'e sa ní sta'ā
sa yiive ye'n'e sa naachi cándiiti sa
ní nga'n'a sa: De'e chúúcā ch'ēete
Dendyuūs. Ní cuna'n'a sa naavta'n'a
ye'n'e 'ii'n'yā'n s'ee'n. ²⁶Nducyáácá
'ii'n'yā'n che'n'e yiinú yā ní neene
di'váá yā ní ca'n'a yā: De'ē chúúcā
ch'ēete Dendyuūs. Ní ca'n'a yā: Maa'n
ní n'diichi yú dendu'ū chi nguée ta
nn'diichi yú chi ca'n'a yiinu yú.

Jesús yaa'ví yā sa'n'a chi nguuví Leví
(Mt. 9.9-13; Mr. 2.13-17)

²⁷Cho'ōo chúū, ní Jesús mii'n
can'daa yā cachiicá yā ní n'diichi
yā 'áámá sa'n'a chí inn'guēe ye'n'e
impuestos ye'n'e yā'n'āa chí nguuví
sa Leví. Sa'n'a mii'n ní vēē sa naachi
n'gēeteē sa'n'a chí inn'guēe ye'n'e
impuestos. Jesús mii'n ní yaa'ví yā:
Dii, sá'n'ā, cuchíi di ca'n'a di nduucú.

²⁸Tuu'mi ní s'nee'n sá ntii'nyu'n
ye'n'e sa ndúúcu nducué'n'e dendu'ū
ní ndúcuee'n sá ní cue'n'e sa ndúúcu
Jesús.

²⁹Sa'n'a Leví mii'n ca'n'a ntii'nyu'n sá
chí in'nuūu'n 'áámá comida ch'ēete
n'dai na vaacu sa. Na vaacu sa
mii'n v'éé 'yáá'n sa'n'a chí inn'guēe
ye'n'e impuestos ndúúcu taná'n'a
sa'n'a. Nducyaaca yā ní vēētē yā
ndúúcu Leví na mesa mii'n. ³⁰Tuu'mí
maestros chí ngi'cuee'n ley mii'n
ndúúcu 'ii'n'yā'n fariseos chí díi'n yā
ley cunncaá ca'n'a yā ye'n'e discípulos
ye'n'e Jesús ní ca'n'a yā: ¿D'éē cúúví
chí ndís'tii ndúúcu Jesús nge'é nī ní
ngi'i nī ndúúcu 'ii'n'yā'n chí inn'guēe

ye'n'e impuestos ndúúcu 'ii'n'yā'n
nuu'ndi? Chuū nguée n'daācā.

³¹Jesús ní n'guēcúta'n'a yā: 'Ii'n'yā'n
chí nguée ngiitā nguée ne'n'e yā chí
cuuvi yíícú yā. Dámaā'n 'ii'n'yā'n chí
ngiitā ne'n'e yā chí cuuvi yíícú yā.

³²Úú nguée cuchíi chí yaa'ví 'ii'n'yā'n
chí nadacadiinúú'n yā chí n'dááca
yā chí nguée dinuu'ndí yā naati
'ii'n'yā'n chí vée nuu'ndi ye'n'e yā ní
íícú ndáácádáámí yā ye'n'e nuu'ndi
ye'n'e yā.

**Jesús nga'n'a yā ye'n'e chí nguée
ca'diinú 'ii'n'yā'n**

(Mt. 9.14-17; Mr. 2.18-22)

³³Tuu'mi ní 'ii'n'yā'n s'ee'n
tiingūnéen yā Jesús: ¿D'éē cúúví
chí discípulos ye'n'e Juan chí
ngēdínūu'n nī ndúúcu discípulos
ye'n'e fariseos néénē n'deēē cuúví
ní ca'diinúú'n yā ní nga'angua'á yā
ní discípulos ye'n'e nī ní nge'e yā ní
ngi'i yā?

³⁴Jesús ní ca'n'a yā chíi yā 'ii'n'yā'n:
¿Chēe ye'n'e maá'n nī cuuvi díi'n nī
chí nguée che'e 'ii'n'yā'n chí nandaa
naachi n'giindivaacu sa'n'a ne'n'e chí
canée sa'n'a chí n'giindivaacu sa mii'n
ndúúcu yā? Nguée cuuvi nī. ³⁵Naati
ndaá nguuví chí 'cuúví sā ní 'āā
ntéē sa ndúúcu yā, tuu'mi ní 'ii'n'yā'n
ca'diinúú'n yā nguuví mii'n.

³⁶Ca'n'a ntúū Jesús chíi yā 'ii'n'yā'n
táámá ejemplo chí 'tēē nguēe
daama: Mar 'áámá 'ii'n'yā'n nguée
'caaca yā 'áámá 'taa'n tiinūu'n ngai chí
nguée 'āā naa'nu yā chí n'dyaatá yā
'áámá catecaí yā ndicúu caati tiinūu'n
ngai mii'n ní cū'tee'n tíínūu'n ndiicúú.
Ní ndiicúú mii'n nguée n'daacá dináá'n
dii'n naachi nn'dyaatá ndúúcu chí
ngai mii'n. ³⁷Tiicá ntúū mar 'áámá

'iiⁿ'yāⁿ nguée caⁿuúⁿ yā vino ngai cheeti bolsa dííⁿmáⁿ 'iiti chi ndiicúū tan'dúucā chi diiⁿ 'iiⁿ'yāⁿ ndiicúū ti vino ngai miiⁿ ní chó'oo yaadi yeⁿ'ē ní diiⁿ chi 'cááncuū yííⁿmáⁿ ndiicúū. Ní vino miiⁿ ní cungéē ndíí yííⁿmáⁿ miiⁿ tuuvií. ³⁸Cáávā chuū caⁿuúⁿ yā vino ngai miiⁿ cheeti bolsa dííⁿmáⁿ ngai ní nduu 'uuvi ní n'daacā canee yeⁿ'ē. ³⁹Mar 'áámá 'iiⁿ'yāⁿ chí ngí'i yā vino ndiicúū neⁿ'é yā cu'u yā vino ngai cuayiivi caati ngaⁿ'a yā chi vino chi ndiicúū chííⁿ chí n'dai nguée ti vino ngai.

Discipulos yeⁿ'e Jesús sta'a yā trigo nguuvi chí ntaavi'tuunúúⁿ 'iiⁿ'yāⁿ Israel
(Mt. 12.1-8; Mr. 2.23-28)

6 'Áámá nguuvi sábadó chi ntaavi'tuunúúⁿ 'iiⁿ'yāⁿ Israel, Jesús cho'ó yā ndúucū discipulos yeⁿ'é yā 'áámá campo naachi véé trigo. Discipulos yeⁿ'e yā ní sta'a yā trigo ní chíi yā tiíiⁿ ndúucū ta'a yā ní che'e yā trigo. ²Tuu'mi ní nduuví fariseos caⁿ'a yā chíi yā discipulos yeⁿ'e Jesús: ¿De'ē cúuví chí ndís'tií dííⁿ nī cosas chi nguée canee chí dííⁿ nī ti contra yeⁿ'e ley yeⁿ'e nguuvi chí cánéé chí ntaavi'tuunúúⁿ?

³Jesús nan'guεεcútaⁿ'a yā: ¿Áá nguée n'geēⁿ ndís'tií na libro yeⁿ'é Ndyuūs tan'duucā chí diiⁿ rey David ndúucū 'iiⁿ'yāⁿ chí snée ndúucu yā taachi cuíicu yā? ⁴David sndáa yā yaacū ndúucū 'iiⁿ'yāⁿ chí snée ndúucu yā ní David sta'a yā pan chí cánéé nátaí yeⁿ'e Ndyuūs ní che'e yā ní ca'a yā chí che'e 'iiⁿ'yāⁿ chí snée ndúucu yā. David miiⁿ nguée canee chí che'e yā pan ndúucū 'iiⁿ'yāⁿ chí snée ndúucu yā ti dámaāⁿ chiiduú s'eeⁿ canee chí che'e yā pan miiⁿ.

⁵Ní Jesús caⁿ'a yā chíi yā 'iiⁿ'yāⁿ s'eeⁿ: 'Úú ní Saⁿ'ā chí Daiya Dendyuūs ní 'úú ngíí ngaⁿ'á ntiiⁿ'nyuⁿ yeⁿ'e nguuvi chí ntaavi'tuunúúⁿ 'iiⁿ'yāⁿ.

Jesús diiⁿ chí nduuvā yeⁿ'e saⁿ'ā chí ndíí cheechi ta'a sa
(Mt. 12.9-14; Mr. 3.1-6)

⁶Táámá nguuvi sábadó chí ntaavi'tuunúúⁿ 'iiⁿ'yāⁿ Israel, Jesús miiⁿ ní ndaa yā na yaacū sinagoga ní chí'cueeⁿ yā 'iiⁿ'yāⁿ. Mííⁿ canee 'áámá saⁿ'ā chí ntí'i ta'a sa ta cuaacú sa. ⁷Maestros yeⁿ'e ley ndúucū 'iiⁿ'yāⁿ fariseos ngeenu yā Jesús miiⁿ caati neⁿ'e yā n'diichi yā nduuti chí idiíⁿ Jesús chí nduuva yeⁿ'e sa nguuvi chí intaavi'tuunúúⁿ yā, ní 'tíicā cuuvi caaⁿ'máⁿ yā nuuⁿndi yeⁿ'e Jesús miiⁿ. ⁸Naati Jesús miiⁿ déenu yā yeⁿ'ē chí nadicádiinuⁿ 'iiⁿ'yāⁿ ní caⁿ'a yā chíi yā saⁿ'a chí ntí'i 'áámá ta'a sa: Díí saⁿ'ā, nducueeⁿ dí ní cuééndií di náávtaⁿ'ā yeⁿ'e 'iiⁿ'yāⁿ s'eeⁿ. Saⁿ'ā miiⁿ ní cuééndií sa náávtaⁿ'ā yeⁿ'e 'iiⁿ'yāⁿ s'eeⁿ. ⁹Tuu'mi ní Jesús miiⁿ caⁿ'a yā chíi yā 'iiⁿ'yāⁿ s'eeⁿ: 'Úú intiinguuneéⁿ ndís'tií. ¿De'ē chí cuuvi diiⁿ yú nguuvi chí ntaavi'tuunúúⁿ 'iiⁿ'yāⁿ? ¿Áá diiⁿ yú cosas chí n'daacā o cosas chí nguée n'daacā? ¿Áá n'daacā chí nanguaⁿ'āi yú vida yeⁿ'e 'iiⁿ'yāⁿ o 'caaⁿ'nuⁿ yú 'iiⁿ'yāⁿ?

¹⁰Jesús chíinu yā nducyaaca 'iiⁿ'yāⁿ chí snée yā cuaaⁿ 'diitú yā ní caⁿ'a yā chíi yā saⁿ'ā: N'doo di ta'a di. Saⁿ'ā miiⁿ ní n'doo ta'a sa ní ta'a sa mííⁿ 'āā nduuvā yeⁿ'ē sa. ¹¹'Iiⁿ'yāⁿ s'eeⁿ ní nduuví taaⁿ n'daí yā ní yaa'vi yā ví'i: ¿D'ē diiⁿ yú chí cuuvi tun'daa yú nuuⁿndi yeⁿ'e Jesús miiⁿ?

**Jesús ndeεve yā ndu'u chí ndiichúúví
discípulos yeⁿe yā**

(Mt. 10.1-4; Mr. 3.13-19)

¹²Nguuvi s'eeⁿ Jesús cueⁿe yā 'áámá yīcū chí caaⁿmaⁿngua'á yā ní Jesús miiⁿ ní núⁿmánⁿ yaaⁿ caⁿangua'á yā. ¹³Ní taachí chideεve Jesús yaaⁿvi yā discípulos yeⁿe yā ní ndeεve yā ndiichúúví 'iiⁿyāⁿ yeⁿe nguaaⁿ discípulos s'uuⁿ ní caⁿa yā chí ndiichúúví 'iiⁿyāⁿ s'eeⁿ chí apóstoles. ¹⁴'Iiⁿyāⁿ s'eeⁿ ní 'túúcā nguuvi yā: Simón chí nguuvi ntúuⁿ yā Pedro; ndúúcū Andrés chí 'dīinū Simón Pedro miiⁿ, ndúúcū Jacobo, ndúúcū Juan, ndúúcū Felipe, ndúúcū Bartolomé, ¹⁵ndúúcū Mateo, ndúúcū Tomás, ndúúcū Jacobo chí saⁿa daiya Alfeo, ndúúcū Simón chí nguuvi sa Zelote, ¹⁶ndúúcū Judas chí 'dīinū Jacobo ndúúcū Judas Iscariote chí cuayiivi chíⁿi sá du'ū chí Jesús miiⁿ chí cuuvi 'caaⁿnúⁿ yā 'yā.

Jesús chí'cuéⁿ yā 'yaaⁿ tááví 'iiⁿyāⁿ

(Mt. 4.23-25)

¹⁷Jesús nangua'á yā yeⁿe yīicū miiⁿ ndúúcū apóstoles yeⁿé yā ní ndúúcū n'deεe n'dái discípulos yeⁿe yā ní cueⁿe yā 'áámá yáⁿāa chí yúúdūu. Ní canee ntúūⁿ nduucú yā n'dee n'dái 'iiⁿyāⁿ yeⁿe yáⁿāa Judea ndúúcū yáāⁿ Jerusalén ní yeⁿe yáāⁿ s'eeⁿ 'diituú nuūⁿnīⁿyáⁿā ní yeⁿe yáⁿāa Tiro ndúúcū yáⁿāa Sidón. 'Iiⁿyāⁿ s'eeⁿ ní 'āā ndāa yā chí 'caandiveéⁿ yā yeⁿé chí ngí'cueeⁿ Jesús miiⁿ. Ní 'iiⁿyāⁿ chí ngííta yā neⁿé yā chí Jesús diiⁿ chí nduūvā yeⁿe yā. ¹⁸Ní 'iiⁿyāⁿ chí snée yā ndúúcū espíritu yeⁿe yááⁿn'guiinūuⁿ

ní Jesús diiⁿ yā chí nacan'dāā yeⁿe 'iiⁿyāⁿ s'eeⁿ ní ch'εenuu chíi yeⁿé 'iiⁿyāⁿ s'eeⁿ. Ní 'iiⁿyāⁿ s'eeⁿ nduuvā yeⁿé yā. ¹⁹Ní nducyáácā 'iiⁿyāⁿ chí ngiitā neⁿe yā tuuⁿvi yā Jesús miiⁿ ti véé cá poder yeⁿe yā chí diiⁿ yā chí nanduūvā yeⁿe yā.

**Yeⁿé vaadi yeenú ndúúcu yeⁿé chí
nguée vaadi yeenú**

(Mt. 5.1-12)

²⁰Tuu'mi ní Jesús n'diichí yā discípulos yeⁿe yā ní caⁿa yā chíi yā 'iiⁿyāⁿ s'eeⁿ: Dé'ε chúúcā n'dai ndís'tií chí nguée'ε dε'ε vεε yeⁿe ní ti yeⁿé ndís'tií cuuví naachí Ndyuūs ngaⁿa ntiiⁿnyúⁿ yā na va'ai chεeti nguuvi.

²¹Dε'ε chúúcā n'dai ndís'tií chí 'cueeⁿ cá ní libro yeⁿé Ndyuūs chí n'daācā ca canee staava yeⁿé ní. Dε'ε chúúcā n'dai ndís'tií chí maaⁿ ní nngεecu ní nanáāⁿ Ndyuūs ti neⁿe díⁿ ní nducuéⁿé chí cuaacu ti Ndyuūs ya'āi 'iinú yā ndís'tií.

²²Dε'ε chúúcā n'dai ndís'tií taachi 'iiⁿyāⁿ yeⁿé iⁿ'yeeⁿdí 'cūū nguée cuuvi snaaⁿ yā ndís'tií ní taachi 'iiⁿyāⁿ s'eeⁿ cuví yā yeⁿe ndís'tií. Ní cunncāá díⁿ yā ndúúcū ndís'tií. Ní 'āā ntée neⁿe yā 'caandiveéⁿ yā chí duuchí ní. Caaⁿmāⁿ yā chí nguée n'daaca ndís'tií cucáāvā 'úú chí Saⁿā chí Daiyá Ndyuūs. ²³Ndís'tií canée chí yeenú n'dai ní ní nguuvi miiⁿ cuuví yeenú n'dai ca ní caati Ndyuūs téε yā chí cuuvi yeⁿé ní dendu'ū chí ch'εεte n'dai taachi ndaa ní na va'ai chεeti nguuvi. Ti ndii cuááⁿ vmnaaⁿ 'tiicá ntúūⁿ idiíⁿ 'iiⁿyāⁿ cosas chí nguée n'daācā ndúúcū 'iiⁿyāⁿ profetas chí candée yā nduudu yeⁿe Ndyuūs.

²⁴De'e chúúcā ndaachii yeⁿe ndís'tií chi véé cá yeⁿe nī caati 'āā yeenú nī yeⁿe nducuéⁿe yeⁿe iⁿ'yeeⁿdí 'cūū.

²⁵De'e chúúcā ndaachii yeⁿe ndís'tií chi nadacádíínuuⁿ nī chí n'daācā canee nī nanááⁿ Dendyuūs ní nguéé n'giindiveéⁿ nī nduudu yeⁿe Ndyuūs ti cuayiivi naachi neⁿe nī 'caandiveéⁿ nī ní nguéé cuuví 'caandiveéⁿ nī. De'e chúúcā ndaachii yeⁿe ndís'tií chi maaⁿ ní n'gííⁿnyuⁿ nī ti cuayiivi ní cuēcú nī ti ndaāchii nī.

²⁶De'e chúúcā ndaachii yeⁿe ndís'tií taachi nducyaaca 'iiⁿ'yāⁿ caaⁿ'maⁿ n'daācā yeⁿe nī. Caati ndíí cuááⁿ vmaaaⁿ 'tíicā ngaⁿ'a 'iiⁿ'yāⁿ yeⁿe 'iiⁿ'yāⁿ profetas chi falso yā ní nguéé profetas yeⁿe Ndyuūs, ní nguéé candee yā nduudu yeⁿe Ndyuūs.

Dineⁿe yú 'iiⁿ'yāⁿ chi taaⁿ yā nduucú yú

(Mt. 5.38-48; 7.12)

²⁷Úú, Jesús, ní ngaⁿ'á ngii ndís'tií chi n'giindiveéⁿ nī nduudu chi ngaⁿ'á: Dinéⁿe ntúūⁿ nī 'iiⁿ'yāⁿ 'áará chi taāⁿ yā yeⁿe nī. Ní diiⁿ n'daacadā nī ntúūⁿ ndúúcū 'iiⁿ'yāⁿ 'áará chi nguéé neⁿe yā ndís'tií. ²⁸Di'viicú nī 'iiⁿ'yāⁿ 'áará chi caⁿ'a cunncaā yā ndúúcu nī. Ní caaⁿ'maⁿnguaⁿ'a nī caavā 'iiⁿ'yāⁿ 'áará chi nguéé n'daacadā dííⁿ yā ndúúcu nī. ²⁹Nduuti chi 'áámá 'iiⁿ'yāⁿ duuchineeⁿ yā yeⁿe nī ní n'geⁿe yā 'áámá tiicuaa náaⁿ nī, 'cuúⁿ nī chi dííⁿ yā táámá vmnéⁿ'ee nduuti chi neⁿe yā. 'Iiⁿ'yāⁿ chi divíí yā cotón yeⁿe nī, ca'ā ntúūⁿ nī catecai nī. ³⁰Āā du'ú nūuⁿ 'iiⁿ'yāⁿ chi caaca yā cosa yeⁿe nī

caavā necesidades yeⁿe yā, ca'á nī. 'Iiⁿ'yāⁿ chi cuta'á yā chi yeⁿe nī, 'āā ntéé nguēcunée nī ndaaca nī. ³¹Tan'dúúca chi ndís'tií neⁿe nī chi tanáⁿ'ā saⁿ'ā miíⁿ n'daacadā diiⁿ sa nduucú nī, 'tiicá ntúūⁿ diiⁿ ndís'tií ndúúcū saⁿ'ā s'eeⁿ.

³²Ndúúti chi ndís'tií dinéⁿe nī 'iiⁿ'yāⁿ chi neⁿe ndís'tií, 'dédéⁿ chi n'daacadā idiíⁿ nī? Caati 'iiⁿ'yāⁿ chi nguéé n'daacadā, 'tiicá ntúūⁿ idiíⁿ yā. ³³Ndúúti chi ndís'tií n'daacadā idiíⁿ nī ndúúcū 'iiⁿ'yāⁿ chi din'daacadā nduucú nī, 'dédéⁿ chi n'daacadā idiíⁿ nī? Caati 'iiⁿ'yāⁿ chi nguéé n'daacadā, 'tiicá ntúūⁿ idiíⁿ yā. ³⁴Tiicá ntúūⁿ, nduuti chi dííⁿ nī prestar chiíⁿ chi yeⁿe nī 'iiⁿ'yāⁿ ní cunee ngiinú nī chi 'iiⁿ'yāⁿ miíⁿ caⁿ'á yā tee yā chiíⁿ chi yeⁿe nī, 'dédéⁿ cuuvi chi 'iiⁿ'yāⁿ téé yā gracias ndís'tií? 'Tiicá ntúūⁿ idiíⁿ 'iiⁿ'yāⁿ chi nguée n'daacadā. ³⁵Ndís'tií dineⁿe nī 'iiⁿ'yāⁿ s'eeⁿ chi taáⁿ yā yeⁿe nī. 'Tíicā din'daacadā nī ndúúcū 'iiⁿ'yāⁿ chi nguéé ngii n'diichí yā ndís'tií. Dííⁿ nī prestar cosa chi yeⁿe nī ní nguéé de'e vee nadacadiinuⁿ cá nī yeⁿe. Ní Ndyuūs téé yā ndís'tií cosas chi dendu'ū chi ch'ete ca yeⁿe yā taachi caⁿ'a nī na va'ai ch'eti nguuví ní cuuví ndís'tií daiyá Dendyuūs chi ch'ete taavi ca. 'Tíicā Ndyuūs téé yā cosas chí n'daaca 'iiⁿ'yāⁿ chi cunncaā chi nguéé caaⁿ'máⁿ yā: N'dii Ndyuūs gracias. ³⁶Tiicá ntúūⁿ yá'ai 'iinú nī cááva 'iiⁿ'yāⁿ tan'dúúca Chiidá nī Ndyuūs ya'ái 'iinú yā ndís'tií.

Nguéé caaⁿ'maⁿ nī nuuⁿndi yeⁿe mar 'áámá 'iiⁿ'yāⁿ

(Mt. 7.1-5)

³⁷Nguéé caaⁿ'máⁿ nī nuuⁿndi yeⁿe 'iiⁿ'yāⁿ ní Ndyuūs ní nguéé

caaⁿmaⁿ ntúuⁿ yā yeⁿé nī. Nguéé dííⁿ nī condenar 'iiⁿyāⁿ ní Ndyuūs nguéé dííⁿ yā condenar ndís'tiī. Nadich'εεcú nī nuuⁿndi yeⁿe 'iiⁿyāⁿ ní Ndyuūs nadich'εεcú yā nuuⁿndi yeⁿe nī. ³⁸Ca'á n'daacá nī 'iiⁿyāⁿ chí véé necesidades yeⁿé yā ní 'íicú Ndyuūs téé yā ndís'tiī ní dicaadi n'dáaca yā chí cúúnú chiichi ndíí tuunu cungéé na morral yeⁿé nī, caati Ndyuūs dicaadi yā ndís'tiī ndúúcu maaⁿ caadi chí dicaadi nī.

³⁹Jesús ngii yā 'iiⁿyāⁿ s'eeⁿ 'áámá ejemplo yeⁿe 'áámá nduudu chí 'téé nguεε daama. ¿'Áá cúúví diiⁿ 'áámá chí ngueenááⁿ candéé táámá chí ngueenááⁿ? ¿'Áá nguεε cun'dáá nūuⁿ nduu 'uuví yā na yiivi yáⁿáa? ⁴⁰'Áámá discípulo miiⁿ ní nguéé ch'εete cá yā nguéé ti maestro yeⁿe yā. 'Áā du'ú nūuⁿ chí neⁿe cuuvi Maestro, canee chí 'cuiinu 'cueeⁿ yā din'daaca yā ní cuuví yā tan'dúúca maestro yeⁿe yā.

⁴¹Táácā cuuví chí maaⁿ nch'εete nūuⁿ n'gíínu nī nuuⁿndi chí diiⁿ tanáⁿá 'iiⁿyāⁿ ní nguéé inaaⁿ nī nuuⁿndi ch'εete chí dííⁿ nī. ⁴²Nguéé n'daacā chí caaⁿmáⁿ nī 'iiⁿyāⁿ yeⁿe chí dííⁿ yā chí nguéé n'daacā nduuti chí ndís'tiī diiⁿ nī cosas chí nguεε n'daacā. N'daacā ca chí ndaacadaamí nī yeⁿe nuuⁿndi chí diiⁿ nī ní 'íicú cuuvi caaⁿmáⁿ nī yeⁿe 'iiⁿyāⁿ chí canéé chí din'daacá yā.

'Áámá yáⁿá ní ngíⁿí cucáávā n'gui'i yeⁿé

(Mt. 7.17-20; 12.34-35)

⁴³N'gui'i yeⁿe yáⁿá chí n'dai, n'daacā chí cuuví n'gui'i yeⁿé ní yáⁿá chí nguéé n'dai ní nguéé

n'daacā n'gui'i yeⁿé. Naati yáⁿá chí nguéé n'daacā nguéé cuuvi n'gui'i chí n'daacā yeⁿé. ⁴⁴Tíicā ti tuunu tuunu ca yáⁿá n'giⁿi n'gui'i yeⁿé. Nguéé n'giichi yā yaaⁿ chí 'cuúndi n'guíídií yaaⁿ nguuví yeⁿé, ndíí nguéé ndúú tuūⁿmá yā uvas yeⁿé diiⁿyu nduuti yaaⁿ. ⁴⁵Tiicā ntúūⁿ saⁿā chí n'dai idiíⁿ sa dendu'ú chí n'daacā chí nadacadíínuuⁿ sa na staava yeⁿé sa chí n'daacā. Saⁿā chí cunnáá idiíⁿ sa tanducuéⁿé chí nadacadíínuuⁿ sa na staava yeⁿé sa caati staava yeⁿé sa nguéé n'daaca. Nduudu chí ngaⁿā sa ngiica yeⁿe chí ndiituu na staava yeⁿé sa.

Yeⁿé ndúú 'uuví cimientos yeⁿé nduu 'uuví va'āi

(Mt. 7.24-27)

⁴⁶Caⁿa ntúūⁿ Jesús: ¿De'e cúúví chí ndís'tiī ngaⁿá nī ngiiⁿ nī 'úú: N'dií, Señor yeⁿé, n'dií, Señor yeⁿé, ní nguéé 'caandiveéⁿ nī chí ngaⁿá? ⁴⁷'Úú cuuví ndís'tiī, du'ú 'iiⁿyāⁿ chí chíi nanaáⁿ ní n'giindiveéⁿ nduudu yeⁿé ní n'daacā idiíⁿ yā tan'dúúca chí ngaⁿá, ⁴⁸'iiⁿyāⁿ miiⁿ tan'dúúca 'áámá saⁿā chí din'dái sa vaacu sá. Chiinú yáanūuⁿ n'daaca sá ní s'nūūⁿ sa cimientu yeⁿé vmnaaⁿ 'áámá yáává. Ní taachi chíiya 'áámá cuuvi naⁿā ní ch'iita yíicú ní diitūu n'dái cheⁿé nuūⁿnīⁿ miiⁿ. Ní nuūⁿnīⁿ miiⁿ nguéé cuuvi diiⁿ di'nú'u va'āi miiⁿ ti n'daacā candúūu na yáává miiⁿ. ⁴⁹Naati 'iiⁿyāⁿ chí nguéé ch'iindiveéⁿ yā nduudu yeⁿé ní nguéé idiíⁿ yā tan'dúúca chí ngaⁿá 'iiⁿyāⁿ miiⁿ tan'dúúca 'áámá saⁿā chí din'dái sa vaacu sa na yaⁿá ndúútii ní nguéé ndúúcu cimientu. Ní díitūu n'dai cheⁿé nuūⁿnīⁿ miiⁿ ní va'āi

miiⁿ maaⁿnch'eté nūⁿ chindeeve ní cunncaá ntuūví va'āi miiⁿ.

Jesús idiíⁿ yā chi nduuvā yeⁿe 'áámá mozo yeⁿe capitán romano

(Mt. 8.5-13)

7 Taachí Jesús ch'íínú ngi'cueeⁿ yā 'iiⁿyāⁿ, tuu'mi ní cueⁿ'é yā na yaāⁿ Capernaum. ²Ná yāāⁿ miiⁿya canéé 'áámá saⁿ'ā capitán romano yeⁿ'ē soldados. Ní na vaacu capitán miiⁿ cánéé 'áámá saⁿ'ā mozo chi idiíⁿ mandado yeⁿ'ē sa. Nééné neⁿe sa mozo yeⁿ'ē sa ní nééné ya'āi iinu sa ti mozo ní neené ya'āi ngítā sa. 'Āā cháā 'cuūví sa. ³Taachi capitán miiⁿ ch'iindiveeⁿ sa chi Jesús miiⁿ diíⁿ yā vaadi n'giinu, capitán miiⁿ dicho'o sa n'dúúví 'iiⁿyāⁿ Israel chi caaⁿ'maⁿ ntiiⁿnyúⁿ yā na yaacū yeⁿ'e 'iiⁿyāⁿ Israel chi 'iiⁿyāⁿ s'eeⁿ di'cuíftu yā Jesús miiⁿ chi caⁿ'a yā na vaacu sa ní diíⁿ yā chi nduūvā yeⁿ'e mozo yeⁿ'ē sa. ⁴'Iiⁿyāⁿ s'eeⁿ cueⁿ'e yā nanááⁿ Jesús miiⁿ. Ní di'cuíftu yā Jesús, ní caⁿ'a yā chii yā 'iiⁿyāⁿ: N'dií Jesús, 'caandiveeⁿ nī caati capitán yeⁿ'é 'nū ní neené n'dai yā chi diíⁿ nī chí nduūvā yeⁿ'e mozo yeⁿ'e yā. ⁵Caati capitán romano miiⁿ ní idinéⁿe yā 'iiⁿyāⁿ yeⁿ'e yú chi yeⁿ'e ndaata Israel, ní din'dái yā yáacū sinagoga yeⁿ'e yú.

⁶Tuu'mi ní Jesús miiⁿ cueⁿ'e yā ndúúcū 'iiⁿyāⁿ s'eeⁿ. Ní taachi 'āā cháā ndaa niiⁿnuúⁿ yā ná va'ai yeⁿ'ē sa, capitán miiⁿ dicho'o sa n'duuví amigos yeⁿ'e sa chi caaⁿ'máⁿ yā cuuvi yā Jesús miiⁿ: N'dií, Señor, nguéeⁿ tuuviínúⁿ nī ti 'úú nguéeⁿ neené n'dai 'úú chi cundaa nī cheeti va'ai yeⁿ'é. ⁷Maaⁿ ní deenú

chi mar 'áámá 'iiⁿyāⁿ ní neené n'dai chi cuuvi ndaá nanáaⁿ nī. Dámaāⁿ chi caaⁿ'maⁿ ntiiⁿnyuⁿ núúⁿ nī ní nduūvā yeⁿ'e mozo chi diíⁿ mandado yeⁿ'é. ⁸'Āā de'e nuūⁿ chi caaⁿ'maⁿ ntiiⁿnyúⁿ nī yeⁿ'ē tuu'mi ní cuuvi chó'ōo. 'Tiicá ntúūⁿ 'úú ní véé 'iiⁿyāⁿ chí ngaⁿ'a ntiiⁿnyúⁿ yā yeⁿ'é. 'Úú ní capitán ní ngaⁿ'a ntiiⁿnyúⁿ yeⁿ'e soldados chi canee maaⁿ poder yeⁿ'é. Ngaⁿ'á ngií 'áámá sa: Cunaⁿ'a di, ní inaⁿ'a sa. Ní ngaⁿ'á ngií taama sa: Cuchí di, ní chii sa. Ní ngaⁿ'á ngií mozo chi diíⁿ mandado yeⁿ'é: Diíⁿ di ntiiⁿnyúⁿ cūū, ní diíⁿ sa.

⁹Ní taachí Jesús ch'iindiveeⁿ yā nduudu yeⁿ'ē sa chi ngaⁿ'a amigos yeⁿ'e capitán miiⁿ chéⁿ'é yiinu yā yeⁿ'e capitán. Ní nguēcundí yā n'diichi yā 'iiⁿyāⁿ chi snée yā cuaaⁿ daami yā ní caⁿ'a yā. 'Úú ní ngaⁿ'á ngií ndís'tií: 'Úú nguéeⁿ indaacá mar 'áámá 'iiⁿyāⁿ yeⁿ'e ndaata Israel chi i'teenú n'dai cá yā Nduuūs tan'dúúcuá capitán miiⁿ.

¹⁰Taachí ndaa 'iiⁿyāⁿ s'eeⁿ va'ai chi capitán miiⁿ dichó'o sa, 'iiⁿyāⁿ s'eeⁿ n'diichí yā chí mozo miiⁿ chí nééné ngítā sa ní 'āā nduuvá yeⁿ'ē sa.

Jesús nadanduuchí yā daiya 'áámá n'daata nguá'āa chi 'āā tináⁿ'ā sa

¹¹Cuayiivi, Jesús miiⁿ cheⁿ'e yā na yāāⁿ Naín ndúúcū discípulos yeⁿ'e yā ndúúcū 'yaaⁿ n'dái 'iiⁿyāⁿ chí cueⁿ'e ndúúcu yā. Ní chúú chíi.

¹²Taachí Jesús ndaá yā niiⁿnuúⁿ ná cheendi va'āi yeⁿ'e yaāⁿ miiⁿ, n'diichí yā chí ndeē 'iiⁿyāⁿ 'áámá caja tináⁿ'ā canuúⁿ yúúní chí cueⁿ'e yā cuēchi yā. Tináⁿ'ā miiⁿ 'áámá n'dyáⁿ'ā sa yeⁿ'ē cheecú sá. Ní

n'daata miiⁿ ní n'daataá ngua'a yā. Ní neené 'yaaⁿ 'iiⁿ'yāⁿ yeⁿ'e yāāⁿ miiⁿ snee yā ndúúcu yā. ¹³Taachí Jesús n'diichi yā n'daataá miiⁿ, néénéé ya'ai 'iinú yā n'daataá ní caⁿ'a yā chii yā n'daataá miiⁿ: Nguéé cuéécú di.

¹⁴Tuu'mi ní Jesús miiⁿ ní cueⁿ'e ndaa yā ní tuu'ví yā caja yeⁿ'e tinaⁿā. Ní 'iiⁿ'yāⁿ chi ndéé yā caja miiⁿ ch'etindii yā. Ní Jesús caⁿ'a yā: Saⁿ'ā 'dííⁿ 'úú yaa'ví dii, nducueeⁿ di.

¹⁵Tuu'mi ní 'nuūⁿndi saⁿ'ā 'dííⁿ chi n'dii ní tucá'a sa ndeé sa. Ní Jesús miiⁿ ní nca'á yā saⁿ'a 'dííⁿ ch'ecú sa. ¹⁶Nducyaaca 'iiⁿ'yāⁿ di'va'á yā yeⁿ'e chi n'diichi yā ní caⁿ'a yā: De'ē chúúca ch'ete Ndyuūs. Ní caⁿ'a yā chi 'áamá profeta ch'ete ndāa yā nguaaⁿ nús'uu chí Ndyuūs dichó'o yā caati ya'ai 'iinú yā yeⁿ'e s'uuúⁿ chi nación yeⁿ'é yā.

¹⁷Tíicā ngaⁿ'a 'iiⁿ'yāⁿ s'eeⁿ yeⁿ'e Jesús miiⁿ. Ní caⁿ'a yā chuū núúⁿmáⁿ na yáⁿ'āa Judea ndúúcu nuuⁿmáⁿ yāāⁿ cuaaⁿ 'diituú.

Juan chi ngeedínuūⁿnīⁿ dichó'o yā nduu 'uuvi 'iiⁿ'yāⁿ nanááⁿ Jesús

(Mt. 11.2-19)

¹⁸Discípulos yeⁿ'e Juan chi ngeedínuūⁿnīⁿ caⁿ'a yā chii yā Juan miiⁿ yeⁿ'é tanducueⁿ'é dendu'ú chi diiⁿ Jesús. Tuu'mí Juan miiⁿ yaa'vi yā 'uuvi discípulos yeⁿ'e yā nanááⁿ yā. ¹⁹Ní dichó'o yā discípulos s'eeⁿ chí ntinguuneeⁿ yā Jesús miiⁿ chuū: ¿Áá n'dii Cristo chi canéé chí ndaā o 'āā cūnee ngíínúⁿ nū taama yā? ²⁰Discípulos yeⁿ'e Juan miiⁿ cueⁿ'e yā ní ndaá yā nanááⁿ Jesús miiⁿ ní caⁿ'a yā chii yā Jesús: N'dii Señor, Juan chí ngeedínuūⁿnīⁿ

dichó'o yā nús'uu chí ntíngúúneeⁿ 'nū n'dii: ¿Áá n'dii chi canéé chí ndaā o 'āā cūnee ngíínúⁿ nū taama yā?

²¹Tiempo miiⁿ Jesús dííⁿ yā chi nnduūvā yeⁿ'e 'yaaⁿ n'dai 'iiⁿ'yāⁿ yeⁿ'é ca'ai chi ndíí yā ní yeⁿ'e ca'ai chí véé espíritu yeⁿ'e yááⁿ'n'guiinūⁿ ndúúcu yā. 'Tiicā ntúūⁿ dííⁿ yā chí snaaⁿ 'iiⁿ'yāⁿ chí ngueenááⁿ.

²²Tuu'mi Jesús nán'guéécútaⁿ'a yā yeⁿ'e nduu 'uuvi discípulos yeⁿ'e Juan miiⁿ ní caⁿ'a yā: Ndís'tií, cunaⁿ'a nī ní cuuvi nī Juan miiⁿ yeⁿ'e nducueⁿ'é chí n'diichi nī ndúúcu chí n'giindiveéⁿ nī. 'Iiⁿ'yāⁿ chí ngueenááⁿ ní inaaⁿ yā, 'iiⁿ'yāⁿ chí nguéé ngii ngíicá yā ní ngiica yā, 'iiⁿ'yāⁿ chí ndíí ca'ai chí lepra chí in'duuti yuūtē yeⁿ'é yā ní nduuva yeⁿ'é yā, 'iiⁿ'yāⁿ chí ch'etúū ní n'giindiveéⁿ yā, 'iiⁿ'yāⁿ chí n'díí ní nnduuchí yā yeⁿ'é nguaaⁿ tináⁿ'ā, ní 'iiⁿ'yāⁿ chí ndaachí snee yā 'úú ní ngaⁿ'á nanááⁿ yā nduudu yeⁿ'é Ndyuūs, nduudu ngai chí yeⁿ'é chí nanguaⁿ'āi 'iiⁿ'yāⁿ. ²³De'ē chúúca n'dai 'iiⁿ'yāⁿ chí nguéé cunncaā ch'eenú yā 'úú ndúúcu nduudu yeⁿ'é.

²⁴Taachi cueⁿ'e discípulos yeⁿ'e Juan chí dichó'o Juan miiⁿ, tuu'mi ní Jesús tucá'a yā caⁿ'a yā chii yā 'iiⁿ'yāⁿ chí snee yā ndúúcu yā yeⁿ'e Juan chí ngeedínuūⁿnīⁿ miiⁿ: ¿De'ē cheⁿ'e nī n'diichi nī na yáⁿ'āa cuuⁿ'maⁿ naachi nguéé ch'etinéé 'iiⁿ'yāⁿ? ¿Áá 'áamá ndúú chí idin'núⁿ'u yúúné? Nguéé 'tíicā. ²⁵¿Du'ú cheⁿ'e nī n'diichi nī tuu'mi? ¿Áá 'aama saⁿ'ā chí canúⁿ sa catecai n'dai sa? Deenu nī chí 'iiⁿ'yāⁿ chí n'daācā catecai yā nguéé n'geenu yā ngii ní snée yā na va'ai

yeⁿē rey. ²⁶¿Du'ú cheⁿé nī n'diichí nī tuu'mi? ¿Áá 'áámá profeta chí ngaⁿa nduudu cuaacu yeⁿé Ndyuūs? 'Úú ní ngaⁿá ngíí ndís'tií chí 'tíicā. Cheⁿé nī n'diichí nī 'áámá 'iⁿyāⁿ ch'ēete ca yā nguéé ti tanáⁿā profetas. ²⁷Chuū canéé nguūⁿ yeⁿe Juan miiⁿ na libro yeⁿé Ndyuūs ndii cuááⁿ vmnaaⁿ:

Cun'diichí nī. 'Úú ní dicho'ó
'áámá saⁿā chi caaⁿmaⁿ sā
nduudu cuaacu yeⁿé nanááⁿ
dii. Ní saⁿā miiⁿ ní 'cuundiyaáⁿ
sa yúúⁿí cáávā dii.

²⁸'Úú ní ngaⁿá ngíí ndís'tií chí nguaaⁿ nducyaaca saⁿā chí ch'iindiyaáⁿ sa na iⁿ'yeeⁿdí 'cūū nguéé táámá saⁿā chí ch'ēete ca sa ti 'āā Juan miiⁿ chí ch'ēedínuūⁿnīⁿ sa. Naati 'iⁿyāⁿ chí ndiiuúⁿ ca yā naachí Ndyuūs ngaⁿa ntiiⁿnyúⁿ yā ní ch'ēete cá yā nguéé ti Juan miiⁿ.

²⁹Neené n'dai 'iⁿyāⁿ ndúúⁿcū 'iⁿyāⁿ chí inn'guē yeⁿé yāⁿāa ch'iindiveéⁿ yā nduudu chí ngaⁿa Jesús. Ní 'iⁿyāⁿ s'eeⁿ chí'téenu yā nduudu yeⁿe Juan miiⁿ ní díⁿ yā tan'duucā Ndyuūs neⁿe yā. Ní Juan miiⁿ ch'ēedínuūⁿnīⁿ yā 'iⁿyāⁿ.

³⁰Naati 'iⁿyāⁿ fariseos miiⁿ ndúúⁿcū maestros yeⁿe ley, 'iⁿyāⁿ s'eeⁿ nguéé neⁿe yā Juan ndíí nguéé s'téenu yā nduudu yeⁿe Juan miiⁿ. Ní nguéé ch'ēedínuūⁿnīⁿ yā. ³¹Jesús miiⁿ caⁿa yā chíi yā 'iⁿyāⁿ: ¿D'ē cuuví nadidaamá ndúucu tan'dúúⁿcā 'iⁿyāⁿ chí snéé yā na iⁿ'yeeⁿdí 'cūū maaⁿ? ¿D'ē tan'duucá yā? ³²'iⁿyāⁿ s'eeⁿ tan'dúúⁿcā saⁿā ngaiyāá chí n'gēēte sa niiⁿvēē ní duūchí sa ndúúⁿcū viⁿi ní ngai sa compañeros yeⁿe sa. Ní ngaⁿá sa ngii sa viⁿi: Tiiví 'nū flauta cáávā baile ní nguéé

nde'í nī. Ngiita 'nū canciones chí ndaachií ní nguéé ch'ēcu nī. ³³Ní ndaā Juan chí ngēedínuūⁿnīⁿ chí 'aama 'iⁿyāⁿ chí nguéé che'e yā pan ní nguéé chí'i yā vino ní ndís'tií ní ngaⁿa nī yeⁿe yā: Juan miiⁿ ní cánée yā ndúúⁿcū espíritu yeⁿe yááⁿ'nguiniūⁿ. ³⁴'Úú ní ndaá, 'úú Saⁿā chí Daiya Dendyuūs 'úú. Ní nge'é ní ngí'í ní ndís'tií ngaⁿa nī yeⁿe 'úú: 'Cuin'díichí nī, 'iⁿyāⁿ chí n'dēē nge'é yā ní yāāⁿ n'dái ngí'í taaví yā vino. Ní ngaⁿa ntúúⁿ nī chí 'úú 'áámá amigo yeⁿe 'iⁿyāⁿ chí inn'guē yeⁿe yāⁿāa ndúúⁿcū 'iⁿyāⁿ chí diiⁿ nuuⁿndi. ³⁵Caati nducyaaca 'iⁿyāⁿ deenu yā chí vaadī deenu miiⁿ ní yeⁿe Ndyuūs. Ní 'iⁿyāⁿ chí'iⁿí yā vaadī deenu miiⁿ cáávā dendu'ū chí n'daācā chí diiⁿ yā ti yeⁿe Ndyuūs 'iⁿyāⁿ.

**Jesús cueⁿe yā na vaacu
Simón chí saⁿā fariseo**

³⁶'Áámá saⁿā fariseo di'cuíftu sa Jesús chí ch'éé yā ná váacu sá. Tuu'mi ní Jesús sndaa yā ná va'ai yeⁿe saⁿā fariseo miiⁿ ní ch'iindi yā na mesa ndúúⁿcū sa. ³⁷Tuu'mi ní 'áámá n'daataá chí vée nuuⁿndi yeⁿe ta chí canee tá yeⁿe yāāⁿ miiⁿ, taachí chicádíínuuⁿ tá chí Jesús miiⁿ cánée yā na va'ái yeⁿe saⁿā fariseo ní vee yā na mesa, n'daataá míⁿ ndaa ta ní ndēē ta 'áámá caja yeⁿē aceite perfume. ³⁸N'daataa míⁿ chíínti'ya tá na ca'a Jesús ní ngēecu tá. Ní ndúúⁿcū nuūⁿnīⁿ nduutináaⁿ tá naaⁿnu tá ca'a yā ní nadidēēve tá ca'a yā ndúúⁿcū yuūdū tiⁿ tá. Ní 'neeⁿcheendi ta ca'a yā ní chíi tá aceite perfume ca'a yā. ³⁹Taachí sáⁿā fariseo miiⁿ n'díichi sa chí diiⁿ

n'daataá miiⁿ, tuu'mi nadicadínnuuⁿ sa ní caⁿá sa nguááⁿ maáⁿ sa 'tíicā: Ndúúti chí sáⁿa 'cūū profeta sa, tuu'mi ní deēnū sa du'ū n'daātaa 'cūū chí ituu'vī tá saⁿá ti véé nuuⁿndi yeⁿē tá. ⁴⁰Tuu'mi ní Jesús miiⁿ caⁿa yā chíi yā saⁿa fariseo miiⁿ: Dii, Simón, véé de'ē chí cuuvi dii. Simón miiⁿ ní n'guēcútaⁿa sa ní caⁿa sa: Maestro, caaⁿmaⁿ nī.

⁴¹Jesús caⁿa yā ejemplo 'cūū: 'Uūvī 'iiⁿyāⁿ can'dícu yā yeⁿe 'áámá saⁿá. 'Áámá yā ní can'dícu yā nyuⁿu ciento caadi, taama yā ní 'uūvī ngēecu ndiichi caadi. ⁴²Naati 'iiⁿyāⁿ s'eeⁿ ní nguée tuūmī miiⁿ yeⁿe yā chí nadií'vé yā. 'Āā ntéé ndaaca yā tuūmī. Sáⁿá chí chinnee miiⁿ ní nadach'ēecú sa yeⁿē ndúú 'uuvī sa. Maaⁿ ní cuuvi di 'úú, 'chéē cá saⁿá s'eeⁿ neⁿe cá yā 'iiⁿyāⁿ miiⁿ?

⁴³Simón miiⁿ nan'guēcútaⁿa yā: 'Úú inadacádiinnúúⁿ chí dinéⁿe ca yā saⁿá chí n'deē ca can'díicū miiⁿ. Jesús nan'guaacútaⁿa yā: N'daācā inadacadínnuuⁿ di.

⁴⁴Tuu'mi ní nguēcundíi Jesús naachi canéé n'daataá míⁿ ní caⁿa yā chíi yā Simón: 'Áá ínaaⁿ di chí diiⁿ n'daātā 'cūū? 'Úú indaá na vaacu di ní nguée tee di nuūⁿnīⁿ chí naaⁿnú ca'á tan'dúúcā costumbre yeⁿē yú naati n'daātā 'cūū ní cheendāá tá nuūⁿnīⁿ nduutinaaⁿ tá ca'á ní nadidēve tá ca'á ndúúcū 'yuūdū tiīⁿ ta. ⁴⁵Taachí ndaá ní nguée 'neeⁿcheendi di 'úú tan'dúúcā costumbre yeⁿe yú naati n'daātā 'cūū 'áámá i'neeⁿcheendi tá ca'á, ndíi taachi sndaá. ⁴⁶Ndíi nguée ndúú cheendāá di aceite perfume tíⁿ tan'dúúcā costumbre yeⁿe yú naati n'daātā 'cūū cheendāá tá aceite

perfume na ca'á chí diiⁿ tá honrar 'úú. ⁴⁷Chuū ngaⁿá ngíi, dii Simón; ti tanducuéⁿe nuuⁿndi chí n'deē n'dái yeⁿe tá nadach'ēecú yeⁿē tá caati neenē neⁿe ta 'úú, ní diiⁿ tá 'túúcā cáávā chí nadach'ēecú yeⁿē tá. Ní 'iiⁿyāⁿ chí duū'vī neⁿe yā 'úú ní duū'vī nadich'ēecú yeⁿe yā.

⁴⁸Tuu'mi Jesús caⁿa yā chíi yā táⁿá: Díi n'daataá 'úú nadich'ēecú nuuⁿndi yeⁿē di.

⁴⁹'Iiⁿyāⁿ chí vēētē yā na mesa miiⁿ tucáa yā caⁿa yā chíi yā vī'i: 'Duu sáⁿá chuū chí nadicadínnuuⁿ sa chí cuuvi nadich'ēecu sa nuuⁿndi yeⁿe 'iiⁿyāⁿ?

⁵⁰Tuu'mi Jesús miiⁿ caⁿa yā chíi yā n'daataá mí: Cáávā chí i'téenu di 'úú, ndiiⁿ chí nanguáⁿai di. Maaⁿ ní cunaⁿá di ndúúcū vaadi 'diiⁿ.

N'daataa s'eeⁿ chí chinneé yā Jesús

8 Cuayiivi miiⁿ, ní cheⁿe Jesús nuuⁿmáⁿ yāāⁿ n'gēete ndúúcū nuuⁿmáⁿ yāāⁿ 'líiⁿ ní ngaⁿa yā nduudu cuaacu yeⁿē Ndyuūs yeⁿe naachí Ndyuūs ngaⁿa ntiiⁿnyúⁿ yā. Ní ndu'u ndiichúúví apóstoles yeⁿe Jesús miiⁿ cueⁿe yā ndúúcū yā. ²'Tiicá ntúūⁿ n'duuvī n'daataa chí Jesús díⁿ yā chí nanduūvā yeⁿe ca'ai yeⁿe yā ní chí díⁿ yā chí nacan'dāá espíritu yeⁿe yááⁿn'guiniūuⁿ yeⁿe náⁿá n'daataa s'eeⁿ. Ní nguaaⁿ n'daataa s'eeⁿ canee María yeⁿe yáāⁿ Magdala. N'daata miiⁿ ní Jesús díⁿ yā chí nán'daā ndēēchē espíritus yeⁿe yááⁿn'guiniūuⁿ yeⁿē ta. ³Cueⁿe ntúūⁿ Juana chí n'daataa yeⁿe saⁿá chí nguuvī Chuza chí ngaⁿa ntiiⁿnyuⁿ sá yeⁿe cosas yeⁿe rey Herodes, ndúúcū táⁿá Susana,

ndúúcū 'yaa' n'dái ca n'daataá chí
ca'a tá tuumí yeⁿē tá ní cuaí tá 'āā
de'é nūuⁿ chí neⁿe Jesús.

**'Áámá ejemplo chi nguuví parábola
chi yeⁿe 'áámá saⁿā chí ngiinū sa
ndaata**

(Mt. 13.1-9; Mr. 4.1-9)

⁴Taachí nduuvidaama 'yaa' n'dái
'iiⁿyāⁿ chí chiica yā yeⁿe 'yaa' n'dai
yáāⁿ tuu'mi ní ndaa yā nanáāⁿ
Jesús. Ní Jesús yaa'vi yā 'iiⁿyāⁿ s'eeⁿ
ndúúcū 'áámá ejemplo tan'dúúcā
'áámá dendu'ū chí véé iⁿyééⁿdi 'cūū.
Ní caⁿ'a yā 'tíicā: ⁵'Áámá saⁿā chí
cuūnū ndaata miiⁿ cuéⁿe sa cuūnū
sa. Taachí chiinū sa 'áámá duutu
ndaata chiia 'diitū cyúúni ní
ch'iinca'a 'iiⁿyāⁿ ní 'yaada ní che'e tī.
⁶Duutu ndaata ní chiia naachi véé
n'dee n'dái tuū. Taachí can'daā,
ní tī'í ti nguée ya'ai yeⁿē. ⁷Duutu
ndaata ní chiia nguaaⁿ yááⁿ. Yááⁿ
miiⁿ chí dáámá ch'iita ndúúcū
yaatá ní di'vaachí yeⁿē vi'í. ⁸Náⁿā
duutu ndaata ní chiia na yáⁿā
n'dáacā ní taachí can'daā n'dee
n'dái cosecha chii yeⁿē. Ní yeⁿē
'áámá ndaata ní chi'í 'aama ciento
ndaata yeⁿē. Taachí Jesús caⁿ'a yā
nduudú 'cūū, yuūdū n'dái caⁿ'a yā,
ní caⁿ'a yā: Ndís'ti chí véé veéⁿ nī,
ní 'caandiveéⁿ nī.

**Jesús caⁿ'a yā yeⁿe chí neⁿē caāⁿmāⁿ
ejemplo miiⁿ**

(Mt. 13.10-23; Mr. 4.10-20)

⁹Tuu'mi ní discípulos yeⁿe Jesús
caⁿ'a yā chii yā Jesús: ¿Dé'ē néⁿé
caaⁿmaⁿ nduudú 'cūū?

¹⁰Jesús miiⁿ ní caⁿ'a yā: Ndís'ti
ní maaⁿ ní cuuvi déénu nī chí
cánuuⁿ n'de'ei yeⁿe Ndyuūs naachi

ngaⁿ'a ntiiⁿnyúⁿ yā naati 'úú ní
ngaⁿ'á ndúúcū nduudu chí 'tee
nguee dáámá. Ní taachi 'iiⁿyāⁿ s'eeⁿ
snaaⁿ yā nguée cuuvi snaaⁿ n'daaca
yā, ní taachí 'caandiveeⁿ yā nguée
tuumicadíinuⁿ yā yeⁿē.

¹¹Chuⁿ chí neⁿe caāⁿmāⁿ ejemplo
miiⁿ. Ndaata miiⁿ ní chíⁿ chíⁿ
tan'dúúcā nduudu yeⁿe Ndyuūs.

¹²Duutu ndaata chí chiia ná
'diitū cyúúni, chíⁿ chí tan'dúúcā
nduudu cuaacu yeⁿé Ndyuūs chí
'iiⁿyāⁿ ch'iindiveeⁿ yā. Daacá nūuⁿ
ndaa yááⁿnguiinuⁿ miiⁿ ní diví
sa nduudu miiⁿ na staava yeⁿe
'iiⁿyāⁿ ti nguée cuuvi cu'téénu yā
ní nguée ndúú cuuvi nnguaⁿ'ai yā.

¹³Ndaata chí chiia nguaaⁿ tuū
chí nguée dii'yu yeⁿē ní tan'dúúcā
nduudu cuaacu yeⁿé Ndyuūs chí
'iiⁿyāⁿ n'giindiveeⁿ yā ní yeenú
taavi yā. Cánée yā tan'dúúcā 'áámá
milpa chí nguée véé dii'yu yeⁿē.

'Iiⁿyāⁿ s'eeⁿ ní 'áámá tiempo nūuⁿ
i'téénu yā ní taachí ndaa nguuví
chí chíⁿnyúⁿnééⁿ 'iiⁿyāⁿ yeⁿe yā
chí 'cuináaⁿ yā cáāvā nduudu miiⁿ
ní 'iiⁿyāⁿ s'eeⁿ diví yā nduudu miiⁿ
na staava yeⁿe yā. ¹⁴Dúútú ndaata
chí chiia nguaaⁿ yááⁿ tan'dúúcā
nduudu cuaacu yeⁿé Ndyuūs chí
'iiⁿyāⁿ ch'iindiveeⁿ yā. Ní 'iiⁿyāⁿ
s'eeⁿ damáāⁿ nadacadiinúⁿ yā
yeⁿe vaadi 'cuiica ndúúcū dendu'ū
chí idi'vaachí yeⁿe iⁿyeeⁿdí 'cūū
ndúúcū dendu'ū chí vicio yeⁿe yā.
Nducuéⁿē di'vaachi nduudu miiⁿ ní
diiⁿ chí nguée dichí'vé nduudu miiⁿ
na vida 'iiⁿyāⁿ s'eeⁿ. ¹⁵Duutu ndaata
chí chiia na yáⁿā n'dáacā chíⁿ
chí tan'dúúcā nduudu cuaacu yeⁿé
Ndyuūs chí 'iiⁿyāⁿ ch'iindiveeⁿ yā ní
din'daacá yā ndúúcū 'viich'et'íinūⁿ.

Ní i'téenu yā nduudu miiⁿ na staava yeⁿ'é yā. Ní ch'i'iⁿí yā tanáⁿ'ā 'iiⁿ'yāⁿ chi i'téenu yā nduudu cuaacu miiⁿ.

'Áámá ejemplo yeⁿ'e 'áámá lámpara

(Mr. 4.21-25)

¹⁶Ní Jesús ch'i'cueeⁿ yā 'túúcā: 'Áámá 'iiⁿ'yāⁿ nguéeⁿ ngiⁿ'i yā 'áámá lámpara ní cu'nuuⁿ yā maaⁿ 'áámá 'cuééⁿtēe o cu'nuúⁿ yā maaⁿ 'áámá cama ti cu'nuúⁿ yā na 'áámá mesa ní 'iiⁿ'yāⁿ chi cundāa yā ní snaaⁿ yā. ¹⁷'Tiicā ntūⁿ, nducueⁿ'ē chi nguéeⁿ deenu 'iiⁿ'yāⁿ yeⁿ'e chi cunúúⁿ n'de'ei nguéeⁿ cunee chi nguéeⁿ snaaⁿ yā. Ní nguéeⁿ chi cunúúⁿ n'de'ei chi nguēe cadíínuuⁿ 'iiⁿ'yāⁿ yeⁿ'ē.

¹⁸'Caandiveeⁿ n'daacā nī cáávā chi cuuvi deenu nī ti 'iiⁿ'yāⁿ chi véé yeⁿ'e yā ní Ndyuūs cá'a cá yā ní n'deēe cá cuuvi yeⁿ'e yā. Ní 'iiⁿ'yāⁿ chi nguéeⁿ yeⁿ'e yā 'áará chi dúú'ví nūⁿ chi nadacádiinúúⁿ yā chi véé yeⁿ'e yā, chuū ní Ndyuūs divíi yā yeⁿ'e yā.

Chēecu Jesús miiⁿ ndúúcū 'díínu yā chi ndāa yā

(Mt. 12.46-50; Mr. 3.31-35)

¹⁹Tuu'mi ní 'díínu Jesús ndúúcū chēecú yā neⁿ'e yā ndaá yā nanááⁿ Jesús naati nguéeⁿ cuuvi ndaa yā caati neenē 'yaaⁿ n'dai 'iiⁿ'yāⁿ snée yā miiⁿ. ²⁰Ní 'áámá 'iiⁿ'yāⁿ cueⁿ'e yā nanááⁿ Jesús ní caⁿ'a yā: N'dii Jesús, chēecú nī ndúúcū 'díínu nī snée yā cuaaⁿ chuva'āi ní neⁿ'e yā snaaⁿ yā n'dii.

²¹Tuu'mi ní Jesús miiⁿ caⁿ'a yā chii yā 'iiⁿ'yāⁿ s'ee: 'Iiⁿ'yāⁿ chí n'giindiveéⁿ yā nduudu yeⁿ'é Ndyuūs ní i'téenu yā 'iiⁿ'yāⁿ, 'iiⁿ'yāⁿ s'eeⁿ chí chēecú ní 'iiⁿ'yāⁿ s'eeⁿ chí 'diínú.

Jesús chin'neeⁿ 'dííⁿ yā 'yúúné ndúúcū nuūⁿnīⁿ'yáⁿ'ā

(Mt. 8.23-27; Mr. 4.35-41)

²²Chúū chíi. 'Áámá nguuvi Jesús miiⁿ sndaa yā na 'áámá barco ndúúcū discípulos yeⁿ'e yā ní caⁿ'a yā chíi yā 'iiⁿ'yāⁿ s'eeⁿ: Cho'o yú táámá 'díítuú nuūⁿnīⁿ'yáⁿ'ā. Ní cueⁿ'e yā. ²³Taachí chíica yā na barco miiⁿ, Jesús miiⁿ ní cyaadu yā. Chéenū 'aama 'yúúné taaⁿ ní diiⁿ chí chindaā nuūⁿnīⁿ chēeti barco miiⁿ ti barco miiⁿ neⁿ'e 'cuēechi nguááⁿ nuūⁿnīⁿ. Ní discípulos 'va'a yā. ²⁴Tuu'mi ní discípulos s'eeⁿ ndaa yā naachi canée Jesús miiⁿ ní nadin'duuchí yā 'iiⁿ'yāⁿ ní caⁿ'a yā: N'dii Maestro, n'dii Maestro, 'cuēechi yú nguááⁿ nuūⁿnīⁿ. Taachi Jesús miiⁿ nduuchi yā, tuu'mi ní caⁿ'a yā chí cūnéé 'diiⁿ 'yúúné miiⁿ ndúúcū nūⁿnīⁿ, ní canée 'diiⁿ. Tuu'mi ní 'āa ntée chéenū 'yúúné miiⁿ ní canée 'diiⁿ ní n'daacā cueⁿ'e yā ndúúcū barco miiⁿ. ²⁵Jesús ní caⁿ'a yā: ¿De'e cúúvī chi nguéeⁿ cu'téenu cá nī? Discípulos ní 'va'a n'daí yā ní cheⁿ'e yiínú yā ní ngaⁿ'a yā ngii yā vī'i: ¿Du'u sáⁿ'a 'cūū chí ngaⁿ'ā ntiiⁿ'nyuⁿ sa yeⁿ'ē 'yúúné ndúúcū nuūⁿnīⁿ ní n'giindiveéⁿ yeⁿ'ē sa?

Jesús dííⁿ yā chí nanduūva 'áámá saⁿ'ā yeⁿ'e yáⁿ'āa Gadara chí canée sá ndúúcū espíritus yeⁿ'e yááⁿ'n'guiínūⁿ

(Mt. 8.28-34; Mr. 5.1-20)

²⁶Jesús ndúúcū discípulos yeⁿ'e yā cueⁿ'e yā na yáⁿ'āa Gadara. Yáⁿ'āa miiⁿ ní canee 'diituú nuūⁿnīⁿ'yáⁿ'ā Galilea. ²⁷Taachí Jesús nacan'dāa yā na barco miiⁿ ní ndaa yā na yáⁿ'āa,

ndaā niiⁿnuúⁿ Jesús miiⁿ 'áámá saⁿā yeⁿe yáⁿāa miiⁿ. 'Āā 'naaⁿ tiempo canéé sá ndúúcū espíritus yeⁿe yááⁿ'nguiinūⁿ. Nguéé catecai sa ndíí nguéé ndúú canúúⁿ rá sá va'āi ti na yiivi yáávā cānuuⁿ sa. Ní ndaā sa ní ndaāca sa Jesús miiⁿ. ²⁸Ní taachi sáⁿa 'cūū n'dííchi sa Jesús miiⁿ chiintii'ya sá nanáaⁿ yā ní 'caī yiicū sa: N'dii Jesús, Daiya Ndyuūs chi ch'εεte n'dai poder yeⁿe nī, ¿de'ē dííⁿ nī nduucú? 'Úú di'cuiitú n'dii chi nguéé dííⁿ nī chi dííⁿ sufrir.

²⁹Túúcā caⁿa sa ti Jesús caⁿa ntiiⁿnyúⁿ yā chí nan'daā espíritus yeⁿe yááⁿ'nguiinūⁿ yeⁿe sáⁿā miiⁿ. 'Āā néené 'naaⁿ tiempo chi espíritus ichéé ndúúcū saⁿā miiⁿ. 'Iiⁿ'yāⁿ s'eeⁿ yeⁿe yááⁿ miiⁿ ní ngāā chiichí yā saⁿā miiⁿ ndúúcū cadenas naati ch'iica sá cadenas ní espíritu yeⁿe yááⁿ'nguiinūⁿ candée sa saⁿā naachi nguéé 'iiⁿ'yāⁿ. ³⁰Tuu'mi ní Jesús tiinguunéeⁿ yā saⁿā miiⁿ: ¿D'ē nguuví di? Saⁿā miiⁿ ní caⁿ'a sa: Legión nguūví. 'Tíicā ngaⁿ'a 'iiⁿ'yāⁿ yeⁿe sa ti neené 'yaaⁿ espíritus yeⁿe yááⁿ'nguiinūⁿ canee ndúúcu sa. ³¹Ní espíritus idi'cuítú Jesús chi nguéé dichó'o yā na abismo chi canéé cuaaⁿ maaⁿ yáⁿāa. ³²Ní niiⁿnuúⁿ ná snée yā néené n'deēe cuuchí vεε ti 'cuεeti miiⁿ chi in'nuúⁿ ti chi ch'éε ti. Ní espíritus di'cuítú Jesús miiⁿ chí ca'á yā lugar chi cundāā chεēti cuuchí s'eeⁿ. Jesús miiⁿ ní 'cuúⁿ yā. ³³Tuu'mi ní espíritus yeⁿe yááⁿ'nguiinūⁿ nan'dāā na cuerpo yeⁿe saⁿā miiⁿ ní sndaā na cuerpo yeⁿe cuuchi s'eeⁿ. Ní 'iiti s'eeⁿ ní chéenu ti na yiivi yaavā yeⁿe yiicū miiⁿ ní chingéé nuúⁿ ti nguuaⁿ nuūⁿnīⁿ ní ch'íi nuúⁿ ti nguuaⁿ nuūⁿnīⁿ miiⁿ.

³⁴'Iiⁿ'yāⁿ chi idiiⁿ cuidado cuuchí s'eeⁿ taachí n'diichí yā chuū, cueⁿ'é yā ngéenu yā ní cuuvi yā 'iiⁿ'yāⁿ na yāā ndúúcū 'iiⁿ'yāⁿ chi snée na 'cuεeti nducuéⁿ'ē chi chiī. ³⁵'Iiⁿ'yāⁿ yeⁿe yááⁿ miiⁿ ní cheⁿe yā n'diichi yā chi chiī. Ndaá yā nanááⁿ Jesús miiⁿ ní n'diichí yā saⁿa chi nacan'daā espíritus yeⁿe yááⁿ'nguiinūⁿ. Saⁿā miiⁿ ní véé sa na ca'a Jesús. Canúúⁿ sá catecai sa ní 'āā n'daāca idiiⁿ sa. 'Iiⁿ'yāⁿ s'eeⁿ ní dii'yā yā chiī. ³⁶Ní 'iiⁿ'yāⁿ s'eeⁿ chi n'diichí yā nducuéⁿ'ē chi chó'oo caⁿa yā 'iiⁿ'yāⁿ chi caama ndaa yā táácā espíritus yeⁿe yááⁿ'nguiinūⁿ nan'dāā na cuerpo yeⁿe saⁿā miiⁿ. ³⁷Tuu'mi ní nducyáácā 'iiⁿ'yāⁿ yeⁿe yáⁿā Gadara di'cuítú yā Jesús chi cuεeví yā yeⁿe 'iiⁿ'yāⁿ s'eeⁿ ti neené 'va'á yā. Tuu'mi ní Jesús ndaa yā barco miiⁿ. ³⁸Ní saⁿā chí nān'daa espíritus yeⁿe yááⁿ'nguiinūⁿ di'cuítú sa Jesús miiⁿ chi cundāā sa na barco miiⁿ ndúúcu yā. Jesús yaa'vi yā saⁿa miiⁿ ní caⁿ'a yā: ³⁹Cunaⁿ'ā di ná vaacu di ní caaⁿ'maⁿ di cuuvi di 'iiⁿ'yāⁿ dendu'ū chí ch'εεte n'dai chí Ndyuūs dííⁿ yā ndúúcū di. Saⁿā miiⁿ ní cunaⁿ'a sa ní caⁿ'a sa chiī sa 'iiⁿ'yāⁿ núúⁿmáⁿ na yāā dendú'ū chi ch'εεte n'dai chí Jesús dííⁿ yā ndúúcū sa.

Yeⁿe daiya Jairo chí ngiitā ní yeⁿe n'daataá chí tuu'vi tá catecai Jesús
(Mt. 9.18-26; Mr. 5.21-43)

⁴⁰Taachí Jesús cueⁿ'e yā cho'o yā táámá 'diituú nuūⁿnīⁿyáⁿā, ní ndaa yā yáāⁿ miiⁿ, 'iiⁿ'yāⁿ 'cuúⁿ yā Jesús ndúúcū vaadi yeenú ti n'deeε n'daí 'iiⁿ'yāⁿ ní snee ngiinu yā Jesús miiⁿ. ⁴¹Miiⁿ cánée 'aama saⁿa chí nguuvi

sa Jairo. Sa^{"a} mii^{"n} nga^{"a} nti^{"n}nyu^{"n} sa ye^{"ē} yaācū sinagoga ní ndaā sa nanáá^{"n} Jesús ní chiintii^{"yā} sa na ca^{"a} Jesús mii^{"n}. Ní di^{"cuítú} sa 'ii^{"yā}ⁿ chí cundáa yā na vaācū sa, ⁴²caati 'áámá n'dyá^{"ā} daiya sa 'āā 'náá^{"n} tá tan'duu ndiichúúví nduūyū tá 'āā cháá 'cuuvi tá. Taachí cue^{"n}e Jesús mii^{"n} neenē n'deeē 'ii^{"yā}ⁿ cue^{"n}e yā ndúúcu yā ní ndii tuunúú^{"n} ngeenúū chiichi yā.

⁴³Nguaa^{"n} 'ii^{"yā}ⁿ s'ee^{"n} canéē 'áámá n'daataá chí 'āā ndiichúúví nduūyū canee tá ndúúcu 'áámá ca^{"āi} chí ngéē yuuú^{"n} ye^{"n}e cuerpo ye^{"ē} tá. 'Āā dii^{"n} tá gasta ndúúcu médicos tanducué^{"ē} chí vee ye^{"ē} tá. Mar 'áámá médico nguéé ngii diyii^{"cú} yā tá^{"ā} mii^{"n}. ⁴⁴Ndaā nii^{"nu}^{"n} tá cuaa^{"n} daami Jesús ní tuū^{"vi} tá naachi n'dee tíí ye^{"n}e catecai Jesús mii^{"n}. Tuu^{"mí} nūu^{"n} canéē naa^{"n} chí ingéē yuuú^{"n} ye^{"n}e cuerpo ye^{"ē} tá.

⁴⁵Tuu^{"mí} ní Jesús mii^{"n} ca^{"a} yā: ¿Du^{"u} tuū^{"vi} 'úú? Nducyáácá 'ii^{"yā}ⁿ ní ca^{"a} yā: Nguēē 'úú. Pedro mii^{"n} ní ca^{"a} sa: N'dii Maestro, 'ii^{"yā}ⁿ mii^{"n} ní i^{"nuu}^{"n} chiichí yā n'dií ní táácā chí nga^{"a} nī: ¿Du^{"u} tuū^{"vi} 'úú?

⁴⁶Jesús ca^{"a} yā: Véé du^{"u} chí tuū^{"vi} 'úú. 'Úú ní deenú chí ndúúcu poder ye^{"ē} nduūvā ye^{"n}e 'áámá 'ii^{"yā}ⁿ.

⁴⁷Taachi n'daata mii^{"n} tuumicádiinu^{"n} tá chí Jesús deenú yā in'duuví n'dai tá ní ndaā tá nanáá^{"n} Jesús mii^{"n} ní chiintii^{"yā} ta nanáá^{"n} yā. Ní ca^{"a} cuaacu tá nanáá^{"n} nducyáácá 'ii^{"yā}ⁿ dē^{"ē} cáāvā chí tuū^{"vi} tá catecai Jesús. Ní hora mii^{"n} nūu^{"n} chí tuu^{"vi} ta nduūvā ye^{"ē} tá. ⁴⁸Jesús mii^{"n} ní ca^{"a} yā: Díí, daiyá, cáāvā chí i^{"teenú} di 'úú, ní nduūvā

ye^{"ē} di. Maa^{"n} ní cuna^{"a} di na vaacu di ndúúcu vaadi 'diíí^{"n}.

⁴⁹Ní taachi Jesús nga^{"a} yā chuū ndaā 'áámá sa^{"ā} ye^{"n}e na vaacu sa^{"ā} chí nga^{"a} nti^{"n}nyu^{"n} ye^{"ē} yaācū sinagoga. Ndaā sa nanáá^{"n} Jairo ní ca^{"a} sa: 'Āā ch'ií daiya di. 'Āā ntéé yaa^{"vi} di Maestro.

⁵⁰Jesús mii^{"n} ch'iindiveé^{"n} yā nduudu 'cūū ní ca^{"a} yā: Nguéé 'vaā di. Cu^{"téenu} di 'úú ní nanduūchi ta ye^{"ē} nguaa^{"n} tiná^{"ā}.

⁵¹Tuu^{"mí} ní Jesús sndaā yā na vaacu Jairo. Nguéé 'cuu^{"n} yā chí nducyaaca 'ii^{"yā}ⁿ sndaā yā ndúúcu yā cuaa^{"n} cheeti va^{"āi} mii^{"n}, dámaā^{"n} Pedro ndúúcu Jacobo, ndúúcu Juan, ndúúcu cheecu n'daata 'líí^{"n}, ndúúcu chiida tá. ⁵²Nducyaaca yā cuaa^{"n} chuva^{"āi} ch'etinee yā ní ngeecu yā ní n'gai yā ti ya^{"ái} yā caavā tá. Ní Jesús ca^{"a} yā: Nguéé cuēecú nī. Nguéé n'dií tá ti cyaadu tá.

⁵³'ii^{"yā}ⁿ s'ee^{"n} ní taachi n'giindiveé^{"n} yā nduudu ye^{"n}e Jesús mii^{"n} ch'íí^{"nyu}^{"n}nee^{"n} yā ye^{"n}e Jesús mii^{"n} ti 'āā deenú yā chí 'āā n'dií tá. ⁵⁴Tuu^{"mí} ní Jesús ndaā yā cuaa^{"n} cheeti va^{"āi} ní sta^{"á} yā ta^{"ā} tá ní ca^{"a} yuudú yā: Dii, ta^{"díí}^{"n}, nducuee^{"n} di.

⁵⁵Hora mii^{"n} nūu^{"n} espíritu ye^{"ē} ta^{"díí}^{"n} mii^{"n} nngueecunéē ndúúcu ta. Tuu^{"mí} nūu^{"n} nducue^{"ē} tá. Jesús ca^{"a} nti^{"n}nyú^{"n} yā chí ca^{"á} yā chí che^{"e} tá. ⁵⁶Chiida tá ndúúcu cheecu tá neenē nge^{"n}e yiinu yā ní Jesús ca^{"a} yā chí yā 'ii^{"yā}ⁿ s'ee^{"n} chí nguéé cuuví nī chí nduuchi tá ye^{"n}e nguaa^{"n} tiná^{"ā}.

**Jesús dichó'o yā ndu'u ndiichúúví
discípulos ye^{"n}e yā**

(Mt. 10.5-15; Mr. 6.7-13)

9 Jesús yaa^{"ví} yā ndu'u ndiichúúví discípulos ye^{"ē}

yā ní ca'a yā poder. Ní caⁿ'a yā chí tun'dáa yā espíritus yeⁿ'e yáaⁿ'nguiinūⁿ yeⁿ'e 'iiⁿ'yāⁿ ní dííⁿ yā chí nduūvā yeⁿ'e 'iiⁿ'yāⁿ chí ngiitā. ²Ní Jesús dichó'o yā discípulos chí caaⁿ'maⁿ yā nduudu n'dai yeⁿ'e naachí Ndyuūs ngaⁿ'a ntiinⁿ'nyúⁿ yā ní dííⁿ yā chí nduuvā yeⁿ'e 'iiⁿ'yāⁿ chí ngiitā. ³Ní caⁿ'a yā chii yā discípulos yeⁿ'e yā: Ndís'tii nguéeⁿ de'e vee candée nī cuaaⁿ cyúúⁿ. Nguéeⁿ ndúú in'daacuú, ndíí nguéeⁿ ndúú morral, ndíí nguéeⁿ ndúú pan ra, ndíí nguéeⁿ ndúú tuūmī ra, ndíí nguéeⁿ nduu candée nī 'uūvī catecai. ⁴Ní 'āā tíí nūⁿ va'ai naachi ndaa nī 'cuētinée nī miiⁿ ní ndíí taachi ndaa nī ndíí taachi nan'dáa nī yeⁿ'e yāaⁿ miiⁿ. ⁵Ní naachi ndaa nī 'áamá yāaⁿ ní 'iiⁿ'yāⁿ nguéeⁿ 'cuaaⁿ yā ndís'tii, tuu'mi ní nan'dáa nī yeⁿ'e yāaⁿ miiⁿ ní ndáádi nī yāacáa yeⁿ'e ca'a nī. Chuū ní 'áamá señal chí 'cuuⁿ'míⁿ nī chí nguéeⁿ n'daacā idiíⁿ yā ti contra yeⁿ'é nī.

⁶Discípulos ican'dáa yā ní cheⁿ'é yā nuuⁿ'máⁿ cuaaⁿ yāaⁿ s'eeⁿ ní nduu cuááⁿ ní ngaⁿ'a yā nduudu ngai yeⁿ'é Ndyuūs, nduudu chí nanguaⁿ'āi 'iiⁿ'yāⁿ. Ní dííⁿ yā chí nduūvā yeⁿ'é 'iiⁿ'yāⁿ chí ngiitā.

Rey Herodes nguéeⁿ s'teenu yā yeⁿ'e Jesús

(Mt. 14.1-12; Mr. 6.14-29)

⁷Ch'iindiveeⁿ rey Herodes tanducuéⁿ'ē chí Jesús miiⁿ idiíⁿ yā ní 'āā ntee déenu yā de'e nadicadínuuⁿ yā. Ní véé 'uūvī vandiicadíinúúⁿ yā caati náⁿ'ā 'iiⁿ'yāⁿ ní ngaⁿ'a yā chí Jesús chí Juan miiⁿ chí nduuchi yā yeⁿ'ē nguaaⁿ tináⁿ'ā. ⁸Náⁿ'a yā ní ngaⁿ'a yā chí profeta

Elías miiⁿ ní 'āā che'enaáⁿ yā. Náⁿ'a yā ní ngaⁿ'a yā chí 'áamá profeta chí ndíí yā ndíí yeⁿ'e tiempo chí 'āā 'naaⁿ nandúúchi yā yeⁿ'ē nguaaⁿ tináⁿ'ā. ⁹Ní rey Herodes miiⁿ ní caⁿ'a yā: 'Úú caⁿ'ā ntiinⁿ'nyúⁿ chí 'chiitā daandu saⁿ'ā chí Juan chí cheedínuūⁿnīⁿ sa. ¿Dú'ū chí saⁿ'ā miiⁿ chí ch'iindiveeⁿ tanducuéⁿ'ē yeⁿ'ē sa? 'Úú neⁿ'é cadiinúúⁿ ní neⁿ'é snaáⁿ sáⁿ'a 'cūū.

Jesús ca'a yā che'e nyuⁿ'u mil 'iiⁿ'yāⁿ

(Mt. 14.13-21; Mr. 6.30-44; Jn. 6.1-14)

¹⁰Taachi discípulos ndaa yā naachí canee Jesús, tuu'mi ní caⁿ'a yā Jesús tanducuéⁿ'ē chí dííⁿ yā. Cuayiivi ní Jesús cueⁿ'é yā ndúúcu discípulos yeⁿ'e yā níⁿ'nuúⁿ na yāaⁿ Betsaida ní cueⁿ'é yā cuēti yeⁿ'ē yāaⁿ miiⁿ'ya. ¹¹Taachí 'iiⁿ'yāⁿ cadíinuⁿ yā yeⁿ'e Jesús miiⁿ, cueⁿ'é yā ndáa yā 'iiⁿ'yāⁿ. Ní Jesús 'cuuⁿ yā 'iiⁿ'yāⁿ s'eeⁿ ní caⁿ'a yā chii yā 'iiⁿ'yāⁿ s'eeⁿ yeⁿ'e naachí Ndyuūs ngaⁿ'a ntiinⁿ'nyúⁿ yā. Ní dííⁿ yā chí nduūvā yeⁿ'é 'iiⁿ'yāⁿ chí ngiita yā.

¹²Taachí chí chiinū, ndu'u chí ndiichúúví yā ndaa yā nanáaⁿ Jesús ní caⁿ'a yā chii yā Jesús: Yaa'vi nī 'iiⁿ'yāⁿ s'eeⁿ chí caⁿ'a yā cuaaⁿ yāaⁿ s'eeⁿ, ní cuaaⁿ yāaⁿ 'lííⁿ naachi snéeⁿ 'iiⁿ'yāⁿ ní véé naachi 'cuētinée yā ní ndaaca yā chí che'e yā, ti nguéeⁿ de'e vee naachi snée yú.

¹³Jesús caⁿ'a yā chii yā discípulos: Ndís'tii ní ca'a nī chí che'e yā. Discípulos ní caⁿ'a yā: 'Āā ntée n'deēe yeⁿ'é 'nū véé ti táá nyuⁿ'u nūⁿ pan ndúúcu 'uūvī 'yaacā. Nguéeⁿ cuuvi dííⁿ 'nū cuái 'nū chí che'e nducyaaca 'iiⁿ'yāⁿ s'tíí.

¹⁴Miiⁿ ní snéeⁿ taanduu nyuⁿ'u mil saⁿ'ā. Tuu'mi ní Jesús miiⁿ caⁿ'á yā

chii yā discipulos yeⁿe yā: Caaⁿmaⁿ ntiⁿnyúⁿ nī 'iⁿyāⁿ s'eeⁿ chí 'cueeté yā 'uūvi ngeecu ndiichí yā 'aama 'áamá cuaaⁿ.

¹⁵Tíicā díⁿ discipulos ní ch'etét nducyaaca 'iⁿyāⁿ s'eeⁿ. ¹⁶Tuu'mi ní Jesús miiⁿ sta'á yā ndu'u nyuⁿu pan ndúúcu nduu 'uuví 'yaācā. Ní 'iicu n'diichí yā nanguuvi ní ca'á yā gracias Dendyuūs cáávā pan ndúúcu 'yaācā miiⁿ. Cuayiivi ní Jesús n'deé yā pan ndúúcu 'yaācā ní ca'á yā discipulos yeⁿe yā. Ch'iinu ní discipulos ca'á ntúuⁿ yā 'iⁿyāⁿ s'eeⁿ chi che'e yā. ¹⁷Ch'e nducyaaca yā ní chiituú 'iⁿyāⁿ. Cuayiivi ní discipulos nan'gaáⁿ yā chí ningaavā ní chiituú tá ndiichuuví 'cueētēe chí ningaāvā.

Pedro miiⁿ ní caⁿā cuaacu sa chi Jesús miiⁿ chi Cristo yā

(Mt. 16.13-19; Mr. 8.27-29)

¹⁸Áamá nguuví taachí Jesús ndúúcu discipulos yeⁿe yā canée yā 'aama lado ní ngaⁿāngua'á yā, tuu'mi ní Jesús itiinguunéeⁿ yā discipulos: ¿Du'ú 'úú ngaⁿā 'iⁿyāⁿ?

¹⁹'iⁿyāⁿ s'eeⁿ ní n'gueécútaⁿā yā: Náⁿā yā ní ngaⁿā yā chí díⁿ Juan chí cheédínuuⁿnī sa díí. Náⁿā yā ní ngaⁿā yā chí díⁿ ní profeta Elías díí; ní náⁿā yā ní ngaⁿā ntuúⁿ yā chí díí ní 'aama profeta chí 'āā 'naaⁿ tiempo chí n'dii ní nduuchí yā yeⁿe nguaaⁿ tinaⁿā.

²⁰Jesús miiⁿ ní caⁿā yā: Ndís'tii, tuu'mi, ¿du'ú 'úú ngaⁿā nī? Tuu'mi ní Simón Pedro nan'gueécútaⁿā yā ní caⁿā yā: N'dii chí Cristo yeⁿe Ndyuūs.

²¹Jesús chii yā 'iⁿyāⁿ s'eeⁿ chí nguéeⁿ cuuví yā chuū mar 'áamá 'iⁿyāⁿ.

Jesús ngaⁿā yā yeⁿe chí taācā 'cuūvi yā

(Mt. 16.20-28; Mr. 8.30-9.1)

²²Tuu'mi ní Jesús caⁿā yā: Cánée chí 'úú chí Saⁿā chí Daiyá Ndyuūs n'dee n'dái 'cuenú cuuvi ní 'íicú saⁿā ndiicúu chí ngaⁿā ntiⁿnyuⁿ yeⁿe yaācū ndúúcu chiiduú n'geete chí ngaⁿā ntiⁿnyúⁿ yā ndúúcu maestros yeⁿe ley ní nguéeⁿ neⁿe yā snaaⁿ yā 'úú chí Saⁿā chí Daiya Ndyuūs. Ní canée chí 'caaⁿnúⁿ yā 'úú. Ní 'úú nduuchí yeⁿe nguaaⁿ tináⁿā ndii 'cuínú 'iinū nguuví.

²³Cuayiivi ní Jesús ngaⁿā yā ngii yā nducyáacá 'iⁿyāⁿ: Ndúúti chí 'áamá 'iⁿyāⁿ neⁿe yā caⁿā yā nduucú, canée chí cu'néⁿ maáⁿ yā tanducuéⁿe dendu'ú chí véé yeⁿe yā, ní nguuví nguuví cuta'á yā cruz yeⁿe yā chí tandúúca chí 'cuenú taaví yā cuuví cucáávā 'úú ní caⁿā yā nduucú. ²⁴Caati nducyaaca 'iⁿyāⁿ chí neⁿe cá yā nadanguáⁿai yā vida yeⁿe maaⁿ yā na iⁿ'yeeⁿdí 'cūú dindaí yā táamá vida yeⁿe yā nanááⁿ Ndyuūs. Ní nducyaaca 'iⁿyāⁿ chí dindaí yā vida yeⁿe yā cucáávā 'úú ndaāca yā táamá vida yeⁿe yā nanááⁿ Ndyuūs. ²⁵¿De'e dichí'v'e saⁿā ndúúti chí diiⁿ sa ganar nducuéⁿe chí véé na iⁿ'yeeⁿdí 'cūú ní díⁿ sa chí dindaí sa vida cueⁿe daāⁿmaⁿ chí táamá vida yeⁿe yā ní idituuví sa maāⁿ vida yeⁿe sa? ²⁶Ní 'iⁿyāⁿ chí cuuví 'cuináⁿ yā yeⁿe 'úú nanááⁿ 'iⁿyāⁿ ndúúcu nduudu yeⁿe tuu'mi ní 'úú chí Saⁿā chí Daiya Dendyuūs cuuví 'cuinaáⁿ yeⁿe 'iⁿyāⁿ 'cūú taachi 'úú ndaá taama vmnéⁿēe tan'dúúca Rey ndúúcu poder yeⁿe Chiidá ndúúcu

poder yeⁿē maáⁿ ní ndúúcū ángeles.
²⁷Úú ngaⁿa cuaacú ndúúcū ndís'tií,
 chí vee náⁿa nī chí snee nī 'muuⁿ
 chí nguéeⁿ 'cuūvi nī taanduvéeⁿ ndíí
 snaaⁿ nī yeⁿe naachí Ndyuūs ngaⁿa
 ntiiⁿnyúⁿ yā.

Jesús n'daaⁿ yā cuerpo yeⁿe maáⁿ yā
 (Mt. 17.1-8; Mr. 9.2-8)

²⁸Ch'íínú níⁿníⁿ nguuví chí Jesús
 caⁿa yā nduudu 'cūū, Jesús cueⁿe
 yā ndúúcū Pedro, ndúúcū Juan
 ndúúcū Jacobo ní chee yā na yīicū
 chí caaⁿmaⁿngua^a yā. ²⁹Ní taachi
 Jesús ngaⁿangua^a yā, n'dááⁿ naaⁿ
 yā ní catecai yā nduuví cuéeⁿ ní ngii
 n'gai. ³⁰Ní tuuⁿmi nūuⁿ che'enaāⁿ
 na 'uuví saⁿā ndúúcū Jesús. Saⁿā
 s'eeⁿ chíiⁿ Moisés ndúúcū profeta
 Elías chí 'āā 'naaⁿ tiempo chí n'dií
 yā. ³¹Nduu 'iínú yā ní na chideeve
 chí ngíí n'gai yeⁿē va'ai cheeti
 nguuví snée yā. Ní ngaⁿa yā yeⁿē
 chí 'cuūvī Jesús ní 'cueenu taaví yā
 na yāāⁿ Jerusalén. ³²N'dáá rá chí
 cyaadu Pedro ndúúcū Juan ndúúcū
 Jacobo nadacueéⁿ yā ní n'diichi yā
 chí ngíí n'gai naaⁿ Jesús ndúúcū
 saⁿā s'eeⁿ chí canee ndúúcū yā.
³³Ní taachí Elías ndúúcū Moisés
 chivíi yā yeⁿe Jesús ní 'āā cuéeⁿ caⁿa
 yā, tuuⁿmi ní Pedro miiⁿ ní caⁿa
 yā chíi yā Jesús: N'dií Maestro,
 de'e chúúcā n'daācā yeⁿe yú chí
 'cuētinee yú 'muuⁿ. Ní dín'dái 'nū
 'iínū va'ai n'gaiyāā; 'áámá yeⁿe nī,
 'áámá yeⁿē Moisés, nī 'áámá yeⁿē
 Elías. Pedro miiⁿ ní nguéeⁿ déenu
 yā de'e chí ngaⁿa yā. ³⁴Ní neⁿe chí
 ngaⁿa Pedro miiⁿ ndaā 'áámá meēeⁿ
 ní sn'díí 'iínúyāⁿ s'eeⁿ ní 'va'a yā chí
 ndaa meēeⁿ vmnaaⁿ yā. ³⁵Tuuⁿmi ní
 chíiindiveéⁿ yā 'áámá nduudu chí

ngaⁿā nguaaⁿ meēeⁿ: Sáⁿa 'cūū ní
 Daiyá chí neⁿe taaví. Cu'neeⁿ veéⁿ
 nī nducueⁿē chí ngaⁿa sa.

³⁶Ch'íínú chíiindiveéⁿ yā nduūdū
 miiⁿ ní discípulos n'diichí yā chí Jesús
 miiⁿ caneeⁿ yā dámaaⁿ yā nduucú yā.
 Ní discípulos ch'etineeⁿ 'diiiⁿ cheendí
 yā nguuví s'eeⁿ ní nguéeⁿ chíi yā mar
 'áámá 'iínúyāⁿ yeⁿē chí n'diichi yā.

Jesús dííⁿ yā chí nanduūvā yeⁿe
'áámá saⁿā 'línú yeⁿe espíritu yeⁿe
yááⁿn'guiinūuⁿ

(Mt. 17.14-21; Mr. 9.14-29)

³⁷Táámá nguuví cuayiiví, 'iínúyāⁿ
 s'eeⁿ ní nangua^a yā yeⁿe yīicū
 miiⁿ ní néené 'yaaⁿ 'iínúyāⁿ can'dáa
 yā na yāāⁿ ní cueⁿé yā chí ndaacá
 yā Jesús. ³⁸Tuuⁿmi ní 'áámá saⁿā
 chí caneeⁿ ndúúcū 'iínúyāⁿ s'eeⁿ 'cái
 sa: N'dií Maestro dí'cuítūu n'dií
 chí snaaⁿ nī daiyá tí 'áámá n'dyáⁿā
 daiyá. ³⁹Ti 'áámá espíritu yeⁿe
 yááⁿn'guiinūuⁿ ita'a saⁿā ní ndáaca
 naāaⁿ nn'gai sa ní 'caí diitú sa ní
 ican'daā yáíⁿ cuaaⁿ cheendi sa ní
 n'dee n'dái tiempo chí néené taaⁿ
 idiiⁿ espíritu yeⁿe yááⁿn'guiinūuⁿ
 ndúúcū sa ní nguéeⁿ ngii vii espíritu
 yeⁿe yááⁿn'guiinūuⁿ yeⁿe sa. ⁴⁰Ní
 'āā dííⁿ 'cuítūú discípulos yeⁿe nī
 chí divíi yā espíritu miiⁿ yeⁿē daiyá
 naati nguéeⁿ cuuví dííⁿ yā.

⁴¹Jesús nan'guēcútaⁿa yā:
 Ndís'tií, 'iínúyāⁿ chí nguéeⁿ i'téenu
 nī ndíí nguéeⁿ ndúú idiiⁿ n'daacá nī.
 ¿'Áá 'naaⁿ tiempo caneeⁿ chí cuneé
 ndúúcū ndis'tií? ¿'Áá 'naaⁿ tiempo
 ní caneeⁿ chí cucheé ndúúcū ndis'tií?
 Ní ngaⁿa yā ngii yā sáⁿā miiⁿ:
 Cuchí di nanaáⁿ ndúúcū daiya di.

⁴²Taachí saⁿā 'dííⁿ miiⁿ ndaa
 niiⁿnuúⁿ sá nanááⁿ Jesús miiⁿ,

espíritu yeⁿe yááⁿn'guiinūⁿ
 miⁿ chindeēve saⁿā 'díí miⁿ ní
 ch'ēcundāā saⁿā. Ní Jesús
 yaa'vinéeⁿ yā espíritu yeⁿe
 yááⁿn'guiinūⁿ chí divíí yeⁿe
 saⁿa 'dííⁿ miⁿ, ní nanduūvā yeⁿē
 sa. Tuu'mi ní Jesús nca'á yā saⁿā
 'dííⁿ miⁿ chiida sa. ⁴³Nducyáácá
 'iiⁿyāⁿ ngeⁿe yiinu yā yeⁿē poder
 yeⁿe Dendyuūs chí ch'ēete n'dai. Ní
 taachi nducyaaca yā cheⁿe yiinu yā
 yeⁿe tanducueⁿē chí diiⁿ Jesús miⁿ,
 Jesús caⁿa yā.

**Jesús caⁿa yā táámá cuuvi yeⁿē chi
 'cuuvi yā**

(Mt. 17.22-23; Mr. 9.30-32)

⁴⁴Ní chii yā discípulos yeⁿe
 yā: 'Caandiveéⁿ nī n'daācā yeⁿe
 tanducueⁿē nduudu chi caaⁿ'máⁿ
 ní nguéeⁿ cuuvi naáⁿ nī yeⁿē. 'Úú
 Saⁿā chí Daiya Ndyuūs 'úú ní 'iiⁿyāⁿ
 canee chí naca'a yā 'úú ta'á 'iiⁿyāⁿ.

⁴⁵Discípulos ní nguéeⁿ
 tuumicádiinuuⁿ yā nduudu chi
 ngaⁿ'a Jesús. Canúúⁿ n'de'ei
 nduudú 'cūū yeⁿe yā. Ní nguéeⁿ
 túúmícádiinuuⁿ yā. Ní 'va'á yā chí
 ntiinguuneeⁿ yā Jesús de'ē neⁿe
 caaⁿ'maⁿ nduudú 'cūū.

Nduudu yeⁿe du'ū chí ch'ēete ca

(Mt. 18.1-5; Mr. 9.33-37)

⁴⁶Tuu'mi ní discípulos yeⁿe yā
 tucá'a yā caⁿa yā ndúúcu v'ií: 'Du'ū
 ca chí ch'ēete ca nguaaⁿ s'uúúⁿ?

⁴⁷Jesús tuumicadíinuuⁿ yā táácá
 chí discípulos nadicádiinuuⁿ yā na
 staava yeⁿe yā ní sta'á yā 'áámá
 saⁿā 'lííⁿ ní s'neeⁿ yā saⁿā nanáaⁿ
 yā. ⁴⁸Ní caⁿa yā chii yā discípulos
 yeⁿe yā: 'Āā du'ú nūuⁿ 'iiⁿyāⁿ chí
 'cuaaⁿ yā saⁿā 'lííⁿ 'cūū ndúúcu chí

duuchí 'cuaáⁿ yā 'úú. 'Āā du'ú nūuⁿ
 'iiⁿyāⁿ chí 'cuaáⁿ yā 'úú 'cuaáⁿ yā
 'iiⁿyāⁿ chí dichó'o yā 'úú. 'Iiⁿyāⁿ chí
 ndiicuuⁿ ca yā nguaaⁿ ndis'tii ní
 'iiⁿyāⁿ 'cūú, ní ch'ēete ca yā nguaaⁿ
 ndis'tii.

**'Iiⁿyāⁿ chí nguéeⁿ contra yeⁿē yú ní
 snée yā favor yeⁿē yú**

(Mr. 9.38-40)

⁴⁹Tuu'mi ní Juan caⁿa yā chii yā
 Jesús: N'dií, Maestro, 'āā n'diichí
 'nū 'áámá saⁿā chí divíí sa espíritus
 yeⁿē yááⁿn'guiinūⁿ yeⁿe 'iiⁿyāⁿ
 ndúúcu chí duuchí nī; ní nguéeⁿ cuúⁿ
 'nū ti nguéeⁿ canee sa ndúúcu yú.

⁵⁰Jesús caⁿa yā chii yā Juan:
 'Cuaáⁿ nī chí diiⁿ sa 'túúca; ti 'iiⁿyāⁿ
 chí nguéeⁿ dííⁿ yā contra yeⁿe s'uúúⁿ,
 'iiⁿyāⁿ miⁿ snée yā favor yeⁿē yú.

**Jesús yaa'vineeⁿ yā 'uūví
 discípulos yeⁿe yā**

⁵¹Taachi snuū ca'a nguuvi miⁿ
 chí Jesús miⁿ canée chí caⁿ'á yā
 na va'ai ch'ēeti nguuvi, Jesús 'āā
 deenú yā de'ē chí dííⁿ yā ní cueⁿe
 yā ndúúcu valor na yāāⁿ Jerusalén.

⁵²Ní dichó'o yā na 'úúví saⁿā
 vmnááⁿ yeⁿe yā. Saⁿā s'eeⁿ ní
 cueⁿē sa ní sndaā sa na 'áámá yāāⁿ
 yeⁿe yán'āa Samaria chí in'nuuⁿ sa
 nááchí 'cuēetinée yā. ⁵³Ní 'iiⁿyāⁿ
 samaritanos nguéeⁿ 'cuuⁿ yā Jesús
 miⁿ ti chicadíinuuⁿ yā chí Jesús
 caⁿa yā yāāⁿ Jerusalén. ⁵⁴Taachí
 discípulos yeⁿe yā n'giindiveéⁿ yā
 chuū, Jacobo ndúúcu Juan caⁿa
 yā: N'dií, Señor, 'áá neⁿe nī chí
 caaⁿ'maⁿ ntiíⁿnyuⁿ yú chí cun'geēⁿ
 yaⁿā yeⁿē nanguuvi ní di'cuinú
 yú 'iiⁿyāⁿ 'muuⁿ tan'dúúca chí diiⁿ
 profeta Elías miⁿ tiempo chí chó'oo

caati 'iiⁿyāⁿ s'eeⁿ nguéeⁿ neⁿé yā
'cuaāⁿ yā s'uúúⁿ?

⁵⁵Tuu'mi ní Jesús miiⁿ yaa'vineeⁿ
yā Jacobo ndúúcu Juan ní caⁿa yā
chii yā saⁿā s'eeⁿ: Ndís'tii ní nguéeⁿ
tuumicádiinuⁿ nī de'e espíritu yeⁿē
chi ngaⁿa nī. ⁵⁶Úú, ní Saⁿā chi
Daiyá Ndyuūs. 'Úú ní nguéeⁿ cúchí
chí dindaí vida yeⁿe 'iiⁿyāⁿ s'eeⁿ
naati chí nadinguaⁿái vida yeⁿe
'iiⁿyāⁿ s'eeⁿ. Tuu'mi ní cho'ó yā yāāⁿ
miiⁿ ní cueⁿe yā táamá yāāⁿ.

**Yeⁿe 'iiⁿyāⁿ chi neⁿe yā caⁿa yā
ndúúcu Jesús**

(Mt. 8.19-22)

⁵⁷Taachi snúuⁿ yā yúúní, 'áámá
saⁿā ní caⁿa sa chii sa Jesús miiⁿ:
N'díí, Señor, caⁿā nduucú nī 'āā tíf
núuⁿ naachi caⁿa nī.

⁵⁸Jesús caⁿa yā chii yā saⁿā miiⁿ:
'Yuunée nī véé yiivi yáává yeⁿe tī
ní 'yaada ní véé 'dééce tī; naati 'úú,
Saⁿā chi Daiya Dendyuūs, nguéeⁿ
mar 'áámá cuaaⁿ naachi cundiití tífⁿ.

⁵⁹Ní caⁿa yā chii yā 'áámá saⁿā:
Cuchí nī nduucú. Ní saⁿā miiⁿ ní
caⁿa sa: N'dííⁿ Señor, téé nī lugar
'úú ti caⁿā 'cuūchí chiidá ní caⁿā yú.

⁶⁰Jesús caⁿa yā: Cu'neeⁿ dí 'iiⁿyāⁿ
chi nguéeⁿ i'téenu yā chi 'cuūchí yā
tinaⁿā yeⁿe yā ti 'iiⁿyāⁿ s'eeⁿ chi
tan'dúúca tinaⁿā miiⁿ, 'tiicá yā. Dii
ní cueⁿe di ní caaⁿmaⁿ di nduudu
yeⁿé Ndyuūs yeⁿe naachi Ndyuūs
ngaⁿa ntiiⁿnyúⁿ yā.

⁶¹Tuu'mi ní táamá saⁿā caⁿa sa chii
sa Jesús miiⁿ: N'díí, Señor, 'úú neⁿé
caⁿā nduucú nī naati téé nī lugar
'úú ti caⁿā yaa'ví 'iiⁿyāⁿ chi snúuⁿ yā
ndavaacú chi caⁿā ndúúcu nī.

⁶²Jesús caⁿa yā chii yā saⁿā
miiⁿ: 'Āā du'ú núuⁿ saⁿā chi cuūndū

tá'a sa na laatú ní 'cuíínu sa cuaaⁿ
dáámí sá, nguéeⁿ dichíí'vē sa chi
cuuvi sa caⁿa sa nduucú ní diiⁿ
sa ntiiⁿnyuⁿ yeⁿé naachi Ndyuūs
ngaⁿa ntiiⁿnyúⁿ yā.

**Jesús dichó'o yā 'iinū ngeecu
ndiichí discípulos yeⁿe yā
chí ngaⁿā nduudu cuaacu**

10 'Cuiinú chúu ní Jesús
nandeeve yā tá 'iinū ngeecu
ndiichi discípulos yeⁿe yā ní dichó'o
yā cá'uúvi ca'uuví yā. Ní cueⁿe
yā cuááⁿ vmnaaⁿ yeⁿe Jesús cuaaⁿ
nducyáácá yāāⁿ ndúúcu nduu cuaaⁿ
naachi Jesús canéeⁿ chí cáⁿa yā.
²Ní Jesús ngaⁿa yā ngii yā 'iiⁿyāⁿ
s'eeⁿ: 'Cuaacu nííⁿnyúⁿ chí nééné
n'deē cosecha véé chí nééné n'deē
'iiⁿyāⁿ chí canéeⁿ chí 'caandiveeⁿ yā
nduudu yeⁿé Ndyuūs naati saⁿā chí
idiiⁿ ntiiⁿnyuⁿ nguéeⁿ 'yaaⁿ sa. Cáávā
chuū d'icuítu nī 'iiví Ndyuūs chí
dichó'o yā 'iiⁿyāⁿ chí caaⁿmaⁿ yā
nduudu cuaacu yeⁿé Ndyuūs ní
nadacuéeⁿ yā cosecha yeⁿé Ndyuūs.
Cosecha miiⁿ ní tan'dúúca 'iiⁿyāⁿ
chí cu'téenu yā Ndyuūs. ³Ndís'tii
cueⁿe nī caati 'úú dichó'o ndís'tii
chí ndís'tii ní caⁿa nī tan'dúúca
'iiti cuūchí caⁿa tī nguaaⁿ lobos.
⁴Nguéeⁿ candéeⁿ nī bolsa ndúúcu
tuūmī, ndíí nguéeⁿ nduu morral,
ndíí nguéeⁿ ndúú ndaacuⁿ yeⁿe
nī. Ní taachi dííⁿ nī saludar 'iiⁿyāⁿ
cuaaⁿ cyúúní, ní nguéeⁿ cuuvi 'naaⁿ
nī. ⁵Ní tanducuéⁿē va'āi chí ndaá
nī caaⁿmaⁿ nī vmnááⁿ vmnaaⁿ
'túúca: Cuneé 'iiⁿyāⁿ yeⁿe va'ái 'cūū
ndúúcu vaadi 'diiíⁿ. ⁶Ní nduuti chí
'iiⁿyāⁿ ní ndiicúuⁿ yā na va'ai miiⁿ,
tuu'mi ní vaadi 'diiíⁿ cunéeⁿ ndúúcu
yā. Ní nduuti chí nguéeⁿ véé 'iiⁿyāⁿ

ndiicúuⁿ na va'ai miiⁿ, vaadi 'diifⁿ
 nguée cunée ndúúcu yā. ⁷Cueetinée
 núuⁿ nī va'āi naachí 'iiⁿyāⁿ 'cuaáⁿ yā
 ndís'tiī. Che'é nī ní cu'u nī chí téé
 yā caati 'iiⁿyāⁿ chí idiiⁿ ntiiⁿnyuⁿ
 canée chí nduuvī 'í'vé yā. Ndís'tiī
 nguée caⁿa nī nduu va'āi nduu va'āi.
⁸Āa tíí nūuⁿ yāāⁿ naachi cūndaa
 nī ní 'iiⁿyāⁿ miiⁿ 'cuaáⁿ yā, che'é
 nī 'āa de'é nūuⁿ chí téé yā chí che'é
 nī. ⁹Idiiⁿ nī chí índuūvā yeⁿ'é 'iiⁿyāⁿ
 chí ngiitā chí snee yā na yāāⁿ. Ní
 cuuvi nī 'iiⁿyāⁿ yeⁿ'ē naachi Ndyuūs
 ngaⁿa ntiiⁿnyúⁿ yā ní 'āa ndāa
 niiⁿnuúⁿ naachi snée yā. ¹⁰Naati
 'āa tíí nūuⁿ yāāⁿ naachi ndāa nī ní
 'iiⁿyāⁿ ní nguée 'cuáaⁿ yā ndís'tiī,
 tuu'mi ní can'daa nī cuaaⁿ cyúúni
 ní caaⁿ'maⁿ nī 'túúcā: ¹¹Ndiiⁿ yaācāa
 yeⁿ'ē yāāⁿ 'cūū chí caī na ca'á 'nū
 n'dáadi 'nū ti nguée cu'teenū nī yeⁿ'é
 'nū. Naati cadíínuuⁿ nī chuū chí
 yeⁿ'ē naachi Ndyuūs ngaⁿ'a ntiiⁿnyúⁿ
 yā ní 'āa ndāa niiⁿnuúⁿ naachi
 snée nī. ¹²Úú, Jesús, ngaⁿ'á ngíí
 ndís'tiī chí nguuvī taachi Ndyuūs
 caaⁿ'máⁿ yā nuuⁿndi yeⁿ'e 'iiⁿyāⁿ,
 castigo yeⁿ'e 'iiⁿyāⁿ yeⁿ'e yāāⁿ s'tiī ní
 diitu cá ní nguée ti chí cuuvi yeⁿ'e
 'iiⁿyāⁿ chí nguée din'daācā yeⁿ'e yāāⁿ
 Sodoma.

**Yeⁿ'e yāāⁿ s'eeⁿ naachi 'iiⁿyāⁿ nguēē
 i'téenu yā Ndyuūs**

(Mt. 11.20-24)

¹³Caⁿ'a Jesús: De'ē chúúcā ya'ai
 yeⁿ'e 'iiⁿyāⁿ yeⁿ'e yāāⁿ Corazín. De'ē
 chúúcā ya'ai yeⁿ'e 'iiⁿyāⁿ yeⁿ'e yāāⁿ
 Betsaida. Ti ndúúti chí 'iiⁿyāⁿ na
 yá'āa Tiro ndúúcu 'iiⁿyāⁿ na yá'āa
 Sidón n'diichí yā vaadi n'giinu chí
 chiī nguaaⁿ ndís'tiī, 'iiⁿyāⁿ yeⁿ'e
 yá'āa s'eeⁿ 'āa 'naaⁿ ndaācādaamí

yā yeⁿ'ē nuuⁿndi yeⁿ'e yā. Ní
 ch'ēetinúuⁿ yā catecai yā tan'dúúca
 díínūuⁿ ní ch'ēetē yā nguaaⁿ yaiaā
 tan'dúúca costumbre yeⁿ'e 'iiⁿyāⁿ
 miiⁿ ndíí vmnaaⁿ taachi chí'i yā
 chí neenē ya'ai yā. ¹⁴Cáāvā chuū
 ní 'iiⁿyāⁿ yeⁿ'e yá'āa Tiro ndúúcu
 'iiⁿyāⁿ yeⁿ'e yá'āa Sidón 'duū'vī
 cá castigo yeⁿ'é yā nguée ti yeⁿ'e
 ndís'tiī taachí ndāa nguuvī chí
 Ndyuūs caaⁿ'maⁿ yā nuuⁿndi yeⁿ'e
 'iiⁿyāⁿ. ¹⁵Ndís'tiī, 'iiⁿyāⁿ yeⁿ'e yāāⁿ
 Capernaum, neⁿ'é nī dííⁿ nī chí
 maāⁿ nī n'geetē nī naati caⁿ'á nī na
 infierno.

¹⁶'Iiⁿyāⁿ chí n'giindiveeⁿ yā
 nduudu yeⁿ'ē ndis'tiī ní nduudu
 yeⁿ'ē 'úú n'giindiveeⁿ yā. 'Iiⁿyāⁿ chí
 nguée neⁿ'e yā ndís'tiī, nguēē neⁿ'e
 yā 'úú. Ní nguée neⁿ'e yā Ndyuūs ti
 'iiⁿyāⁿ miiⁿ dichólo yā 'úú.

**Nanguēēcuunée 'iīnū ngeēcu
 ndíichí discípulos yeⁿ'é Jesús**

¹⁷Nguēēcuunée ndu'ū 'iīnū ngeēcu
 ndíichí discípulos ndúúcu vaadi
 yeenú. Ní caⁿ'a yā: N'díí, Señor,
 espíritus yeⁿ'e yāāⁿ n'guiniūuⁿ
 n'giindiveeⁿ sa yeⁿ'e 'nū chí caaⁿ'maⁿ
 ntiiⁿnyúⁿ 'nū ndúúcu chiduuchí nī.

¹⁸Jesús caⁿ'a yā: Cuáácú 'úú ní
 inaāⁿ yāāⁿ n'guiniūuⁿ tan'dúúca chí
 sn'daā sa yeⁿ'ē nánguuvī tan'dúúca
 'cuai. ¹⁹Ní Jesús caⁿ'a yā chíi yā
 discípulos yeⁿ'e yā: 'Úú ní teē poder
 ndís'tiī chí cunnca'á nī cúú ndúúcu
 'iiti dá'nāi, níicu cuchée nī ndúúcu
 'iiⁿyāⁿ chí contra yeⁿ'e nī. Ní
 nguée du'ū vēē cuuvi cuchée yeⁿ'e
 ndís'tiī. Ní nguée idiiⁿ dañō ndís'tiī.
²⁰Ndís'tiī nguée ngii yeenú nī taachi
 caaⁿ'máⁿ nī ntiiⁿnyuⁿ yeⁿ'ē espíritus
 yeⁿ'e yāāⁿ n'guiniūuⁿ ní n'giindiveeⁿ

yeⁿe nī naati yeenú nī chí canéé nguūⁿ chí dúúchí nī na libro yeⁿé Ndyuūs na va'ai cheeti nguuví.

Jesús chíi yeenú yā

(Mt. 11.25-27; 13.16-17)

²¹Hora mífⁿ nūuⁿ Jesús yeenú n'dai yā cáávā Espíritu N'dai yeⁿé Ndyuūs ní caⁿa yā: N'diī, Chiidá, 'úú ní teé gracia n'diī chí 'iiví nī yeⁿe va'ai cheeti nguuví ndúúcū yāⁿāa 'cúū caati snuuⁿ n'dé'ei nī nduudú 'cūū yeⁿe 'iīⁿyāⁿ chí déénu ca yā ndúúcū 'iīⁿyāⁿ chí n'deēe n'dái túúmícadíínuuⁿ yā. Ní ca'á nī chí cadíínūuⁿ 'iīⁿyāⁿ chí ndiicúuⁿ yā chí nguéé n'deēe cá déénu yā caati 'tíicā neⁿe nī diiⁿ nī ti n'daācā.

²²N'diī Chiidá, 'āā tee nī tanducuéⁿē 'úú. Mar 'áámá 'iīⁿyāⁿ nguéé déénu yā du'ū chí 'aama n'dyaⁿā Daiya Dendyuūs, dámaaⁿ n'diī Chiidá. Mar 'aama 'iīⁿyāⁿ nguéé déénu yā du'ū chí n'diī Chiidá dámaaⁿ 'áámá n'dyaⁿā daiyá nī, ndúúcū 'āā du'ū nūuⁿ 'iīⁿyāⁿ chí Daiyá Dendyuūs neⁿé yā 'cuuⁿmíⁿ yā.

²³Tuu'mi ní Jesús ngaⁿa yā ngii yā discípulos yeⁿe yā: Dē'e chúúcā n'dai ndís'tiī chí ngii naaⁿ nī dendu'ū chí ndís'tiī n'gíínu nī. ²⁴'Úú ní ngaⁿá ngii ndís'tiī chí neené 'yaaⁿ profetas ndúúcū reyes chí yeⁿē ndiī cuááⁿ vmnaaⁿ néⁿe yā snaaⁿ yā chí ndís'tiī ínaaⁿ nī naati nguéé n'diichí yā. Ní neⁿé yā 'caandiveeⁿ yā chí ndís'tiī n'giindiveeⁿ nī naati nguéé ch'iindiveeⁿ yā.

Saⁿā samaritano chí n'dai

²⁵'Áámá maestro yeⁿe ley chí neⁿe sa n'diichineeⁿ sa Jesús ndaa

sa nanáaⁿ yā ní ntiinguuneeⁿ sa Jesús: N'dií, Maestro, ¿dē'ē chí canee chí diíⁿ chí ndáácā vida cueⁿe daāⁿmaⁿ?

²⁶Jesús nan'gueecútaⁿa yā: ¿Taacā canéé nguūⁿ na ley yeⁿé chuū? ¿Dē'ē tuumicadiinuūⁿ di yeⁿe ley yeⁿe chuū?

²⁷Maestro yeⁿe ley miiⁿ nan'gueecútaⁿā sa: 'Túúcā canéé nguūⁿ: Dinéⁿe di Señor Ndyuūs yeⁿē di ndúúcū núúⁿmáⁿ staava yeⁿē di, ndúúcū núúⁿmáⁿ alma yeⁿē di, ndúúcū tanducuéⁿē fuerzas yeⁿē di, ndúúcū tanducuéⁿē vaadi cadíínūuⁿ yeⁿē di. Ní dinéⁿe di nducyaaca 'iīⁿyāⁿ na niiⁿnuúⁿ va'āi yeⁿe di tan'dúúcā chí neⁿe di maāⁿ di.

²⁸Jesús nan'gueecútaⁿa yā: N'dáácā nan'gueecútaⁿā di. Diīⁿ di chuū, ní cunduūchi di cueⁿe daāⁿmaⁿ.

²⁹Saⁿā miiⁿ neⁿe sa cunéé n'daāca sa ní caⁿa sa chíi sa Jesús: ¿Dú'ū chí 'iīⁿyāⁿ chí canéé chí neⁿé chí niiⁿnuúⁿ va'āi yeⁿé?

³⁰Tuu'mi ní Jesús miiⁿ nán'gueecútaⁿā yeⁿē sa ndúúcū 'áámá cuento chí ejemplo chí 'tíicā: 'Áámá saⁿā ngua'āi sa yeⁿē yāāⁿ Jerusalén miiⁿ ní cunaⁿa sa na yāāⁿ Jericó. Taachi canúúⁿ sá yúúní 'iīⁿyāⁿ duucu ní sta'á yā saⁿā miiⁿ ní diví yā ndiī catecai sa ní ch'eⁿe yā saⁿā ndíí chí ya'āi ca yeⁿē sa ní 'tēe 'tēé nguéé chíi sa ní cunaⁿa yā.

³¹Tuu'mi ní 'áámá chiiduú cho'ó yā yúúní miiⁿ ní taachi n'diichi yā saⁿā miiⁿ, diví yā cuááⁿ 'diituú yúúní ní cho'ó yā ní cueⁿé yā. ³²Tiicá ntúūⁿ saⁿā levita chí chiiduú chí diiⁿ ntiiⁿnyuⁿ yeⁿe nátai cho'ó yā

naachi candíftí saⁿā miiⁿ. N'diichi yā saⁿā miiⁿ ní divíi yā cuaaⁿ 'diituú yúúní. Ní cho'ó yā ní cueⁿé yā. ³³ Cuayiivi ní 'áamá saⁿā yeⁿe yáⁿā Samaria cho'ó sa yúúní miiⁿ. Taachí ndaa niiⁿnuúⁿ sa naachi candíftí saⁿā miiⁿ, n'diichi sa saⁿā nnee ya'āi 'iinu sa saⁿā. ³⁴ Ní ndaā sa naachi candíftí saⁿā miiⁿ ní idiⁿ yiicú sá naachi ya'āi ndúúcū aceite ndúúcū vino ní ch'εecu sa tīnūuⁿ naachí ya'āi yeⁿē sa. Ní sn'duú sa saⁿā 'yúudūu yeⁿe sa ní candeē sa saⁿā na yāāⁿ. Ní nuuⁿ sa 'áamá va'ai naachí cuuvi cu'neeⁿ sa saⁿā miiⁿ naachi 'iiⁿyāⁿ díⁿ yā cuidado saⁿā miiⁿ. ³⁵ Chideεve táamá nguuví, taachi neⁿe caⁿa sa tun'dáa sa na 'uūví caadi yeⁿe bolsa ní ca'á sa saⁿā vaacu miiⁿ. Ní caⁿa sa chii sa saⁿā: N'dií, díⁿ nī cuidado saⁿā, ti 'āā taa véé nūuⁿ chi díⁿ nī gastar ndúúcū sa, taachí nguεecuneé nadí'vé yeⁿe nī. ³⁶ Maaⁿ ní Jesús ntiinguunéeⁿ yā saⁿā miiⁿ: Naachi 'iinu saⁿā s'eeⁿ 'chεε sá chi saⁿā chi neⁿe sa saⁿā na niiⁿnuúⁿ ya'āi chi 'nuū cá'ai chi duucu miiⁿ?

³⁷ Saⁿā miiⁿ ní caⁿā sa: Saⁿā chi nnee ya'āi 'iinu sa. Tuuⁿmi ní Jesús miiⁿ caⁿa yā: Díí, cueⁿe di, ní diiⁿ ntúuⁿ di 'túúcā.

**Jesús canée yā na vaacu
Marta ndúúcū María**

³⁸ Cuayiivi ní cueⁿe Jesús na 'áamá yāāⁿ 'lííⁿ ní ndaa yā na vaacu 'áamá n'daataá chi nguuví tá Marta. Ní 'cuūⁿ tá chi canee yā na vaacu tá. ³⁹ Ní Marta miiⁿ ní véé 'aama ví'i yā chi nguuví tá María. Ní María miiⁿ ch'iindi tá ná ca'a Señor Jesús miiⁿ, ní n'giindiveeⁿ tá nduudu chí

chi'cueeⁿ yā. ⁴⁰ Marta miiⁿ ní néené n'deēe ntiiⁿnyuⁿ idiⁿ tá ní ndaā tá nanááⁿ Jesús ní caⁿa tá: N'díí Señor, 'áá nguée inadícídiinūⁿ yeⁿé chi dámaaáⁿ n'nééⁿ ví'í 'úú chí díⁿ mandado? Cuuvi nī táⁿā ní cunnee tá 'úú.

⁴¹ Jesús caⁿa yā: Dii, Marta, Marta, néené n'deēe dendu'ū chi nadícídínuuⁿ di yeⁿē dendu'ū chí idi'vaachií. ⁴² Véé 'áamá nūuⁿ dendu'ū chi n'daacā ca. Tá María miiⁿ ndeεve tá chí n'daacā ca. Ní chuū nguée ndivíí 'iiⁿyāⁿ yeⁿē tá.

**Jesús ngi'cueeⁿ yā táácā chi 'iiⁿyāⁿ
cuuvi caaⁿmaⁿngua'á yā
(Mt. 6.9-15; 7.7-11)**

11 'Áamá vmnéⁿēe ní Jesús ngaⁿ'angua'á yā 'áamá cuaaⁿ, ní taachí ch'iinu caⁿ'angua'á yā, discípulos yeⁿe yā caⁿa yā chii yā Jesús: N'díí Señor, ca'cuéeⁿ nī nús'uu taacá chi cuuvi caaⁿmaⁿngua'á nū tan'dúúcā chi Juan chi chεedínuūⁿnī chi'cueeⁿ yā discípulos yeⁿe yā.

² Tuuⁿmi ní Jesús caⁿa yā chií yā discípulos yeⁿe yā: Taachí ndís'tií caaⁿmaⁿngua'á nī 'túúcā caaⁿmaⁿ nī:

N'dií, chi Chiidá 'nū chi canée na va'ai cheeti nguuví. N'daācā n'dai chi 'iiⁿyāⁿ dich'εeté yā n'dií. Cuchií tiempo chi ngaⁿa ntiiⁿnyúⁿ nī yeⁿe tanducuéⁿē. Cúúví tan'dúúcā chi n'dií neⁿe nī tan'dúúcā ná va'ai cheeti nguuví, 'tiicá ntuūⁿ ná yáⁿāa 'cúú.

³ Téé nī chi cuuvi che'é 'nū maaⁿnguuví.

⁴ Nadich'εεćú nī nuuⁿndi yeⁿé
'nū, tan'dúúćā chi nús'ūū
nadach'εεćú 'nū yeⁿe 'iⁿyāⁿ
chi nguεε n'daāćā diⁿ yā
nduucú 'nū. Nguéé 'cuááⁿ nī
chi ndaā nanaáⁿ 'nū cosas
chi chεεchi ca chi diⁿ chi
diⁿ 'nū nuuⁿndi naati cunneé
nī nús'uu chi nguéé diⁿ 'nū
nuuⁿndi ní cucheé 'nū.

⁵ Tuuⁿmi ní Jesús caⁿ'a yā 'áámá
ejemplo. ¿Du'ú ndís'tiī chi véé amigo
yeⁿe nī ní caⁿ'á nī nduu vaacu amigo
ná maⁿ'a yaaaⁿ ní caaⁿ'máⁿ nī: N'dií
amigo, teé nī 'iinū panes yeⁿe nī
'úú, ⁶ caati 'áámá amigo yeⁿé chi
canuuⁿ sa yúúní ndaā sa na vaacú ní
nguéé dε'ε vεε chi ca'á chi che'e sa?
⁷ Ní 'iⁿyāⁿ chi canúⁿ yā va'ai miiⁿ
nán'nguεεćútaⁿ'a yā: Nguéé diⁿ ndu'ú
nī 'úú. 'Āā nduudí cheendi va'āi ní
d'ácaiyāā yeⁿé ní candiití yā nduucú
na cama. 'Úú nguéé cuuví nducueéⁿ
ní teé n'diī chiiⁿ chi neⁿe nī. ⁸ Jesús
ngaⁿ'á yā: 'Úú ngaⁿ'á ngií ndís'tiī.
'Áárá chi nguéé nducueeⁿ amigo yeⁿē
sa chi ca'a yā pan saⁿ'ā miiⁿ cááva
chi amigo yeⁿē sa, naati nducueeⁿ
yā ní ca'a yā amigo miiⁿ ti amigo miiⁿ
nguéé 'cuinaaⁿ sa chi ngiica sa n'deeε
n'dái vueltas. ⁹ Ní 'úú ní ngaⁿ'á ngií
ndís'tiī: Cáácá nī ní Ndyuūs ní téε
yā yeⁿé nī, in'nuúⁿ nī ní ndaāca nī,
'yááví nī cheendi va'āi ní nan'guaaⁿ
yeⁿé nī. ¹⁰ Nducyáácá 'iⁿyāⁿ chi
ngiica yā Ndyuūs ní Ndyuūs ca'á
yā yeⁿe yā. Ní nducyáácá 'iⁿyāⁿ
chi in'nuúⁿ yā ní ínndaaca yā. Ní
nducyáácá 'iⁿyāⁿ chi yaa'vi yā
cheendi va'ai, ní nan'guaaⁿ yeⁿe yā.
¹¹ Maaⁿ ní chεé ndís'tiī chi véé
daiya nī, ndúúti chi daiya nī caaca
pan, ¿áá ca'á nī lado yeⁿe pan

'áámá túūu? O ndúúti chi caaca
daiyá nī 'aama 'yaāćā, ¿áá ca'a nī
lado yeⁿe 'yaāćā miiⁿ ní 'áámá cúú?
¹² O ndúúti chi caaca 'áámá dūtu'u,
¿áá ca'á nī lado yeⁿe dūtu'u 'áámá
'iitidaⁿ'āi? ¹³ Ndúúti chi ndís'tiī
chi cúnncheeⁿ nī déénu nī ca'a nī
dendu'ū chi n'dáacā daiya nī, tuuⁿmi
ní Chiidá nī chi canéé na va'ai
chεeti nguuvu n'deēε cá cá'a yā caati
cá'a yā Espíritu N'dai yeⁿé Ndyuūs
'iⁿyāⁿ chí caaca yā chiida yú.

**'Iiⁿyāⁿ s'eeⁿ ngaⁿ'a yā chi Jesús
miiⁿ véé poder yeⁿe yááⁿ'nguínūⁿ
ndúúcu yā**

(Mt. 12.22-30; Mr. 3.19-27)

¹⁴ Jesús miiⁿ tun'daa yā yeⁿē
'áámá saⁿ'ā 'lífⁿ 'áámá espíritu yeⁿe
yááⁿ'nguínūⁿ chi diⁿ chi nguéé
ngii ngaⁿ'ā sa. Ní taachí nan'daa
espíritu yeⁿe yááⁿ'nguínūⁿ saⁿ'ā
'díf'mī miiⁿ, ní caⁿ'a sa. Níćú 'iⁿyāⁿ
s'eeⁿ n'diichí yā chuū ní chéⁿé yiinú
yā yeⁿē. ¹⁵ Náⁿ'ā 'iⁿyāⁿ ní caⁿ'a yā:
Sáⁿ'a 'cūū ní nitun'daa sa espíritu
yeⁿe yááⁿ'nguínūⁿ cáávā poder
yeⁿē Beelzebú chi Satanas chí
ngaⁿ'ā ntiiⁿ'nyuⁿ sa yeⁿe espíritus
yeⁿe yááⁿ'nguínūⁿ.

¹⁶ Tanáⁿ'a yā ní neⁿe n'diichineeⁿ
yā Jesús ní ngiica yā Jesús chi diⁿ
yā 'áámá señal yeⁿē na va'ai chεeti
nguuvu chi cuuvi n'diichí yā. ¹⁷ Jesús
déénu yā chi nacádífnuuⁿ 'iⁿyāⁿ s'eeⁿ
ní caⁿ'a yā chii yā 'iⁿyāⁿ s'eeⁿ: 'Áámá
governador chi ngaⁿ'ā ntiiⁿ'nyúⁿ yā
yeⁿe yááⁿ'aa naachi véé 'uuvu partido
yā chi nguⁿ'u 'aamá yā ndúúćú
táámá yā, tuuⁿmi ní nguéé cuuvi 'naaⁿ
tiempo chi 'iⁿ'ntyéⁿē yā. 'Tiicá ntúūⁿ
naachi 'áámá familia yā ndúúti
chi n'deēε nadacadífnuuⁿ yā chi

vée partido yeⁿe familia miiⁿ nguεε cuuvi nduuvidaamá yā. ¹⁸Tiicá ntúūⁿ nduuti chi yááⁿ'nguiinūⁿ 'cuuⁿ'maⁿ sa ndúúcū maaⁿ sa, ítáácā canee naachí ngaⁿ'ā ntiiⁿ'nyuⁿ sa? Caaⁿ'máⁿ nī 'úú: ¿De'ē cáávā chi ngaⁿ'a ndís'tii chi caavā yááⁿ'nguiinūⁿ chi duuchi Beelzebú chi Satanás itun'daá espíritus yeⁿe yááⁿ'nguiinūⁿ yeⁿ'é 'iiⁿ'yāⁿ? ¹⁹Nduuti chi 'úú idivií espíritus yeⁿe yááⁿ'nguiinūⁿ cáávā Beelzebú, tuuⁿ'mi ní 'iiⁿ'yāⁿ ndúúcu nī ní 'du'ú poder itun'dáa yā espíritus yeⁿe yááⁿ'nguiinūⁿ? Chiiⁿ chi diiⁿ 'iiⁿ'yāⁿ chi ndúúcu nī n'giⁿ'í yā chi nguεε 'tíicā chi ngaⁿ'a nī. ²⁰Ndúúti chi cáávā poder yeⁿ'é Ndyuūs 'úú itun'daá espíritus yeⁿe yááⁿ'nguiinūⁿ yeⁿ'é 'iiⁿ'yāⁿ, tuuⁿ'mi ní cuaacu nííⁿ'nyúⁿ chi naachi Ndyuūs ngaⁿ'a ntiiⁿ'nyúⁿ yā nndaā nanááⁿ ndís'tii.

²¹Taachi saⁿ'ā dítiinú diiⁿ cuidado sa ná vaacu sa ndúúcū íngaatu, tuuⁿ'mi ní na vaacu sa canée seguro.

²²Taachí ndaa táamá saⁿ'ā chí vée fuerzas yeⁿe sa ní ichεε sa nduucú yā ní idivií sa tanducuéⁿ'ē íngaatu yeⁿ'é yā chi ngii chεetinúⁿ yā yeⁿ'e va'āi miiⁿ tuuⁿ'mi ní diiⁿ sa repartir íngaatu s'eeⁿ ndúúcū compañeros yeⁿ'ē sa.

²³'Iiⁿ'yāⁿ chi nguée canée yā lado yeⁿ'é, 'iiⁿ'yāⁿ miiⁿ ní canée yā contra yeⁿ'é. 'Iiⁿ'yāⁿ chi nguée daama dííⁿ cosechar nduucú tuuⁿ'mi ní dííⁿ yā tan'dúúcā chi ingéē tanducuéⁿ'ē cosecha.

Espíritu yeⁿe yááⁿ'nguiinūⁿ chi inguεεcunée na saⁿ'ā

(Mt. 12.43-45)

²⁴Caⁿ'a Jesús: Taachí espíritus yeⁿe yááⁿ'nguiinūⁿ nacan'daa

na 'áamá saⁿ'ā, cachiica na yáⁿ'āa cuuⁿ'maⁿ naachi nguée ch'εetinee 'iiⁿ'yāⁿ ní in'nuūⁿ naachi cuuvi ntaavi'tuunuuⁿ ní nguée ndaācā. Tuuⁿ'mi espíritus miiⁿ nadicádíínuuⁿ ní ngaⁿ'a: Nanguεεcunée na vaacú naachi chiicá. ²⁵Taachí nndaa na vaacu miiⁿ ndaācā chi saⁿ'ā miiⁿ tan'dúúcā 'áamá va'ai chi 'āā déévé n'dai ndúúcū nducuéⁿ'e na lugar yeⁿ'ē. ²⁶Tuuⁿ'mi ní espíritus miiⁿ cueⁿ'e ní in'nuūⁿ tá ndεēchē espíritus chi cunncaā ca chí cuuví maāⁿ. Ní ndaa espíritus ní ch'εetinee na saⁿ'ā miiⁿ. Cuayiivi ní n'geenu sa ngii ca ní cunncaā ca canée sá nguée ti cuááⁿ vmnaaⁿ.

Vée vaadi yeenú yeⁿ'e 'iiⁿ'yāⁿ chi i'téenu yā Ndyuūs

²⁷Taachí Jesús ngaⁿ'a yā dendú'u 'cūū 'áamá n'daataá 'caí yuudu tá nguaaⁿ 'iiⁿ'yāⁿ s'eeⁿ: De'ē chúúcā n'dai n'daataá chi ch'iindiyáaⁿ nī ní ntaavi tá n'dií.

²⁸Jesús ní caⁿ'a yā: N'daacā ca yeⁿ'e 'iiⁿ'yāⁿ chi n'giindiveéⁿ yā nduudu yeⁿ'é Ndyuūs, ní i'téenu yā nduudu miiⁿ.

'Iiⁿ'yāⁿ chi nguée n'daāca yā ngiica yā 'áamá señal

(Mt. 12.38-42; Mr. 8.12)

²⁹Taachí nduuvidaama 'iiⁿ'yāⁿ ndúúcū Jesús, Jesús tuc'a yā caⁿ'a yā nduudu miiⁿ: 'Iiⁿ'yāⁿ chí vée yā ngúúví 'cūū nééné cúnncheeⁿ yā. In'nuúⁿ yā señales naati nguée ndaācā táamá señal caati dámaāⁿ snaaⁿ yā señal chi diiⁿ Ndyuūs ndúúcū profeta Jonás tiempo chi 'āā chó'oo. ³⁰Tan'dúúcā Ndyuūs dííⁿ yā señal ndúúcū profeta Jonás

yeⁿe 'iiⁿyāⁿ na yāāⁿ Nínive, 'tiicá ntuūⁿ Saⁿā chi Daiya Ndyuūs cuuvi cunée yā lado yeⁿe señal tiempo 'cūū. ³¹Taachi ndaaⁿ nguuvi yeⁿe juicio chi Ndyuūs caaⁿ máⁿ yā yeⁿe nuuⁿndi yeⁿe 'iiⁿyāⁿ, n'daataá reina chi tiempo chi chóōo ngaⁿa ntiiⁿnyuⁿ tá yeⁿe lado yeⁿe sur chi caⁿa ta ní nducueeⁿ tá contra yeⁿe 'iiⁿyāⁿ chi snée yā maaⁿnguuví. Ní táⁿā miiⁿ ní diiⁿ tá condenar 'iiⁿyāⁿ chi snée yā maaⁿnguuví caati táⁿā miiⁿ yaⁿāi n'dai ngiica tá chi neⁿe tá ch'iindivee tá yeⁿe vaadi deenu yeⁿe rey Salomón. Maaⁿ ní 'muuⁿ canée 'áámá yā chi ch'etete ca vaadi deenu yeⁿe yā nguée ti rey Salomón. ³²'Iiⁿyāⁿ chi ch'etinéé na yāāⁿ Nínive ndii cuááⁿ vmnaaⁿ nducueeⁿ yā ní caaⁿ máⁿ yā nuuⁿndi yeⁿe 'iiⁿyāⁿ chi snée yā maaⁿ caati 'iiⁿyāⁿ yeⁿe yāāⁿ Nínive ndaacadaamí yā yeⁿe nuuⁿndi yeⁿe yā cáávā nduudu yeⁿe Ndyuūs chi caⁿa profeta Jonás miiⁿ. 'Tíicā caⁿā yā díiⁿ yā nguuví chi Jesús caaⁿ máⁿ yā nuuⁿndi yeⁿe 'iiⁿyāⁿ. 'Caandiveéⁿ nī. 'Múúⁿ ní vée 'áámá saⁿā chi ch'etete ca sa nguée ti profeta Jonás.

'Áámá ejemplo chi tan'dúúicā 'áámá deeve yeⁿe cuerpo yeⁿe yú
(Mt. 5.15; 6.22-23)

³³Caⁿa Jesús: Mar 'áámá 'iiⁿyāⁿ nguée cunuuⁿ n'déⁿei yā 'aama lámpara chí ngiichi ní nguée ndúú i'nuūⁿ ra yā maaⁿ 'aama caja naati s'nuúⁿ yā na 'áámá mesa ní 'iiⁿyāⁿ chí cundaa yā ní snaaⁿ yā deeve miiⁿ. ³⁴Ndúútináaⁿ yú chiiⁿ chí tan'dúúicā 'aama lámpara yeⁿe cuerpo yeⁿe yú. Taachí n'daí nduutináaⁿ nī 'tiicá ntúūⁿ

n'daí cuerpo yeⁿe nī ní inaaⁿ chí deeve. Naati taachí nguée n'daacā nduutináaⁿ nī tan'dúúicā lámparas chí nguée ngiichi ní 'tiicá ntúūⁿ cuerpo yeⁿe nī cunee ná maāiⁿ. ³⁵N'diichi nī, cundeeⁿ nī cuidado nduutináaⁿ nī chí deeve yeⁿe cuerpo yeⁿe nī chí nguée canee nī na maāiⁿ. ³⁶'Tiicá ntúūⁿ inaaⁿ n'dáaca nī ní nguée maāiⁿ naachi canee nī nduuti chí candée nī cuidado nduutinaaⁿ nī. Ní vée deeve nanáaⁿ nī tan'dúúicā 'áámá lámpara ngiichi ní naāⁿ nī chí deeve yeⁿe.

Jesús ngaⁿa nuuⁿndi yeⁿe maestros yeⁿe ley ndúúicū 'iiⁿyāⁿ fariseos
(Mt. 23.1-36; Mr. 12.38-40; Lc. 20.45-47)

³⁷Taachí Jesús miiⁿ ch'iinu cāⁿa yā chuū, 'áámá saⁿā fariseo ndaa sá nanáaⁿ Jesús ní d'cuíftu sa Jesús chí ch'é yā ndúúicū sa. Ní cueⁿe yā ndúúicū sa. Ní ndaa yā na vaacu sa ní cheeté yā na mesa. ³⁸Taachí ndaa tiempo chí che'e yā ní saⁿa fariseo miiⁿ n'diichi sa chí nguée naāⁿnū Jesús ta'á yā, (tan'dúúicā costumbre yeⁿe 'iiⁿyāⁿ Israel) tuuⁿmi ní cueⁿe yiinu sa. ³⁹Ní Señor Jesús caⁿa yā chii yā saⁿa fariseo: Díi ndúúicū tanáⁿā saⁿā fariseos inadéevé nī cuāāⁿ daami vaso ndúúicū cu'u chí tan'dúúicā cuerpo yeⁿe nī naati cuááⁿ cheeti chí tan'dúúicā staava yeⁿe nī ndiituú ndúúicū vaadi 'caa'va ndúúicū dendú'ū chí nguée n'daacā. ⁴⁰Ndís'tii chí cheechi tíiⁿ nī, 'áá nguée deenú nī chí Ndyuūs din'dái yā 'iiⁿyāⁿ ndúúicū staava yeⁿe yā ndúúicū cuerpo yeⁿe yā, ní neⁿe yā 'iiⁿyāⁿ chí nadeevé cuerpo yeⁿe yā ndúúicū staava yeⁿe yā ndúúicū taanduvée chí vee cheeti

cuerpo ye^{ne} yā? ⁴¹Ndís'tii canée chi ca'a nī limosnas ye^{ne} nī ndúúcū nuuⁿmaⁿ staava ye^{ne} nī caati chuū ní cosa chi n'daācā.

⁴²De'e chúúcā ya'āi ye^{ne} ndís'tii 'iiⁿyāⁿ fariseos caati nadicádíínuuⁿ nī chi n'daāca nī chi dííⁿ nī chi ngaⁿā ley ye^{ne} Ndyuūs ti ca'a nī Ndyuūs décima chi ndiichi parte ye^{ne} nducué^{ne} cosecha ye^{ne} nī chi yiivií ndúúcū 'iicudaáⁿ ndúúcū tanducué^{ne} yaātā ngaiyāā. Nguée véé vaadi ne^{ne} ye^{ne} Ndyuūs ndúúcū nī ndíí nguée dííⁿ nī dendu'ū chi cuaacu. Canée chi dííⁿ nī tanducué^{ne} chi ngaⁿā ley ye^{ne} Ndyuūs ní diné^{ne} nī nducyaaca 'iiⁿyāⁿ ní ca'a nī décima dendu'ū.

⁴³De'e chúúcā ya'āi ye^{ne} ndís'tii chí ne^{ne} nī 'cuēté nī na silla ye^{ne} 'iiⁿyāⁿ chi ngaⁿa ntiíⁿnyuⁿ ye^{ne} yaācū sinagogas. Ní ndís'tii ne^{ne} nī chi 'iiⁿyāⁿ dííⁿ yā saludar ndís'tii taachi snée nī na yúúní.

⁴⁴De'e chúúcā ya'āi ye^{ne} ndís'tii chi ngí'cueeⁿ nī ley ndúúcū 'iiⁿyāⁿ fariseos. Ndís'tii ngaⁿa nī chi n'daaca idiíⁿ nī ní nguée n'daaca idiíⁿ nī. Ndís'tii ní tan'dúúcā 'áamá yáinyāⁿ chi 'iiⁿyāⁿ nguée inaaⁿ yā ní nguée déenu yā ye^{ne} ní chiicá yā vmnááⁿ ye^{ne} yáinyāⁿ, 'tiicá nī.

⁴⁵Tuu'mi ní nan'guēcútaⁿa 'áamá abogado, chi maestros ye^{ne} ley. N'díí, Maestro, taachí ngaⁿa nī chuū, idííⁿ nī chí induuvi táaⁿ 'nū.

⁴⁶Naati Jesús caⁿa yā: De'e chúúcā ya'āi ntúūⁿ ye^{ne} ndís'tii, abogados, maestros ye^{ne} ley. Ndís'tii idiíⁿ nī n'dee cá leyes chí chēchi cá ní nga'a nī tan'dúúcā chi chēdī chi saⁿā nguée cuuvi candée sa. Ní ndís'tii ní ndii mar 'áamá ta'a nī

ní nguée ituu'ví nī chéédí miiⁿ. Ní nguée dííⁿ nī, ní nguée nginne nī 'iiⁿyāⁿ.

⁴⁷De'e chúúcā ya'āi ye^{ne} ndís'tii chi nadin'dái nī yaínyāⁿ ye^{ne} saⁿā profetas chi 'āā candée yā nduudu ye^{ne} Ndyuūs tiempo chi 'āā chó'oo. Ní 'iiⁿyāⁿ ye^{ne} ndaata ye^{ne} nī ndii cuááⁿ vmnaaⁿ ch'iiⁿnuⁿ yā saⁿā profetas. ⁴⁸Cuaacu níⁿnyúⁿ chí ndís'tii ní ngíⁿi nī chi yeenú nī ye^{ne} chi 'iiⁿyāⁿ ye^{ne} nī ndii cuááⁿ vmnaaⁿ ti cuaacu níⁿnyuⁿ 'iiⁿyāⁿ ye^{ne} ndaata ye^{ne} nī ch'iiⁿnuⁿ yā saⁿā profetas ní maaⁿ ní ndís'tii idin'dái nī yaínyāⁿ ye^{ne} profetas.

⁴⁹Ní cáāvā chuū ní cáāvā chi Ndyuūs deenú yā tanducué^{ne}, Ndyuūs caⁿa yā 'tíicā: 'Úú dicho'ó profetas ndúúcū apóstoles ní náⁿa yā 'caaⁿnúⁿ yā 'iiⁿyāⁿ ní tanáⁿa yā can'dáa yā 'iiⁿyāⁿ ní dííⁿ yā chi 'iiⁿyāⁿ s'eeⁿ n'geenú yā ngii.

⁵⁰Ndyuūs caⁿá yā dííⁿ yā castigar 'iiⁿyāⁿ chi maaⁿ snée iⁿ'yeeⁿdí 'cūū ti 'iiⁿyāⁿ ye^{ne} ndaata ye^{ne} yā ch'iiⁿnuⁿ yā profetas ndíí tiempo taachí Ndyuūs din'dái yā íⁿ'yeeⁿdí.

⁵¹Ní ndii tiempo taachi ch'iiⁿnuⁿ yā Abel ní chingēe yuuúⁿ ye^{ne} sa, ndíí taachi ch'iiⁿnuⁿ yā Zacarías miiⁿ naavtaⁿā ye^{ne} nátai ndúúcū ye^{ne} yaacu templo. Chuū ní ngaⁿā ngí ndís'tii, caati Ndyuūs caⁿá yā dííⁿ yā castigar 'iiⁿyāⁿ chi maaⁿ snee iⁿ'yeeⁿdí 'cūū cáāvā yuuúⁿ ye^{ne} 'iiⁿyāⁿ s'eeⁿ.

⁵²De'e chúúcā ya'āi ye^{ne} ndís'tii chi 'cuéeⁿ nī ley ní nguée ca'cuaeⁿ nī chi cadíínnúⁿ 'iiⁿyāⁿ vaadi deenu ye^{ne} Ndyuūs, ní nguée dííⁿ nī tan'dúúcā chi deenu nī chi canée chi dííⁿ nī.

⁵³Taachí Jesús ch'iinu caⁿa yā dendu'u 'cūū, tuu'mi ní maestros yeⁿe ley ndúúcū 'iiⁿ'yāⁿ fariseos nduuvu taáⁿ yā yeⁿe Jesús ní tucá'a yā itinguunéeⁿ yā n'dee n'dái ní caⁿa yā chíi yā Jesús.

⁵⁴Ní n'diichineeⁿ yā Jesús ndúúcū nduudu yeⁿe yā. Ní canée ngiinu yā Jesús miⁿ chí cucáávā nduudu yeⁿe yā ní Jesús cásta'a yā vaanicadíínūuⁿ yeⁿe yā ní caⁿa yā nduudu chí nguée cuaacu. Ní 'íicú cuuvi caaⁿ'máⁿ yā nuuⁿ'ndi yeⁿe Jesús.

Levadura yeⁿe 'iiⁿ'yāⁿ fariseos

12 Tuu'mi ní neenē 'yaaⁿ 'iiⁿ'yāⁿ nduuvuidaama yā chí tá tii n'dee 'iiⁿ'yāⁿ miⁿ chingúúⁿndai yā 'aamá yā taamá yā. Tuu'mi ní Jesús miⁿ tucá'a yā caⁿa yā chíi yā discípulos yeⁿe yā: Díⁿ ní cuidado yeⁿe chí ca'cueeⁿ 'iiⁿ'yāⁿ fariseos ti tan'dúúcā levadura yeⁿe pan. Nguée díiⁿ n'daaca yā yeⁿe chí ngi'cueeⁿ yā. ²Ti nguée de'ē vee chí nin'díi naaⁿ chí nguée cuuvi nánguāāⁿ naaⁿ. Ní nguée 'áamá dendú'ū chí cánúuⁿ n'de'ei chí nguée cuuvi cadíínuuⁿ yā. ³Tiicá ntúūⁿ dendu'ū chí ngaⁿ'a n'de'ei ndís'tiī, tuu'mi ní 'iiⁿ'yāⁿ ní 'caandiveeⁿ yā. Ní chííⁿ chí ndís'tiī ngaⁿ'a ní ndúúcū 'iiⁿ'yāⁿ chæti va'āi tuu'mi ní 'iiⁿ'yāⁿ caaⁿ'maⁿ yā cuuvi yā nducyáácá 'iiⁿ'yāⁿ ndíí na yaacū yeⁿe va'āi.

Du'ū dí'va'a yú

(Mt. 10.28-31)

⁴Caⁿ'a Jesús: Ndís'tiī chí n'dai nduucú, 'úú ngaⁿ'á ngíí ndís'tiī chí nguée 'va'á ní 'iiⁿ'yāⁿ chí 'caaⁿ'nuⁿ yā cuerpo yeⁿe 'iiⁿ'yāⁿ, ti 'āā ntée cuuvi dííⁿ yā cosa chí nguée n'daacā ca

ti chuū. ⁵'Úú ní cuuví ndís'tiī du'ū chí dííⁿ 'va'á ní: Ndís'tiī ní 'va'á ní Ndyuūs chí taachí 'āā n'díí 'iiⁿ'yāⁿ, Ndyuūs cuuví dííⁿ yā 'caanuúⁿ yā 'iiⁿ'yāⁿ infierno. 'Túúcā ngaⁿ'á ngíí ndís'tiī 'iiⁿ'yāⁿ miⁿ chí dí'va'a ní.

⁶¿'Áá nguée indíicuí yā na 'uūví 'yáádá cáávā 'uūví taaⁿ tuūmí? Ndyuūs ní nguée ngiinaáⁿ yā mar 'áamá 'yáádá. ⁷Níicú ndíí nducyaaca yuūdū tiiⁿ ndís'tiī ndíí dúúché ndúúcū Ndyuūs. Cáávā chuū nguée 'va'á ndís'tiī. ¿'Áá nguée ya'ai ca chííⁿve ndís'tiī nguée ti 'aama 'yáádá?

Yeⁿe 'iiⁿ'yāⁿ chí i'teenú yā Cristo ní ngaⁿ'a yā yeⁿe chuū nanááⁿ 'iiⁿ'yāⁿ
(Mt. 10.32-33; 12.32; 10.19-20)

⁸Caⁿ'a Jesús: 'Úú ngaⁿ'á ngíí ndís'tiī chí nducyaaca 'iiⁿ'yāⁿ chí ngaⁿ'a yā chí yeⁿe 'úú nguāāⁿ 'iiⁿ'yāⁿ 'tiicá ntúūⁿ 'úú Sáⁿ'ā chí Daiya Ndyuūs caaⁿ'máⁿ nanááⁿ ángeles yeⁿe Ndyuūs chí 'iiⁿ'yāⁿ s'eeⁿ ní yeⁿe 'úú. ⁹Nducyaaca 'iiⁿ'yāⁿ chí nguée ngaⁿ'a yā chí yeⁿe 'úú nguāāⁿ 'iiⁿ'yāⁿ 'tiicá ntúūⁿ 'úú Sáⁿ'ā chí Daiya Ndyuūs caaⁿ'máⁿ nanááⁿ ángeles yeⁿe Ndyuūs chí 'iiⁿ'yāⁿ s'eeⁿ ní nguée yeⁿe 'úú.

¹⁰Nducyáácá 'iiⁿ'yāⁿ chí caⁿ'a yā nduudu taaⁿ chí nguée n'daacā chí contra yeⁿe 'úú chí Sáⁿ'ā chí Daiya Dendyuūs, Ndyuūs nadach'æcú yā yeⁿe yā. Nducyáácá 'iiⁿ'yāⁿ chí caⁿ'á yā nduudu taaⁿ chí nguée n'daacā chí contra yeⁿe Espíritu N'dai yeⁿe Ndyuūs, Ndyuūs nguée nadach'æcú yā yeⁿe yā. Ndíí nguée ndúú iⁿ'yeeⁿdí 'cūū, ndíí nguée ndúú táámá iⁿ'yeeⁿdi chí cuchíi.

¹¹Taachí 'iiⁿ'yāⁿ ndée yā ndís'tiī na yaacū sinagogas nanááⁿ 'iiⁿ'ntyéⁿe

ndúúcū jueces, nguée nadicádíínuuⁿ nī de'ē chí nan'gueécútaⁿ a nī o de'ē chí caaⁿmaⁿ nī. ¹²Espíritu N'dai yeⁿe Ndyuūs cuuvi ndís'tiī hora mífⁿ nūuⁿ de'ē chí caaⁿmaⁿ nī.

**Jesús ngi'cueeⁿ yā yeⁿē
peligro yeⁿē vaadi 'cuiica**

¹³Áámá saⁿā caⁿa sa ngii sa Jesús: N'díí, Maestro, cuuví nī 'diinú chí ntée sa vaadi n'gua'áa yeⁿē chiidá 'nū cuuvi yeⁿé.

¹⁴Jesús miiⁿ ní caⁿa yā chiī yā saⁿā: N'dii, sáⁿā, 'du'ú s'neēⁿ 'úú vmnaaⁿ yeⁿē n'dii tan'dúúca juez chí nca'á chí cuuvi yeⁿé nī yeⁿē 'taa chí véé yeⁿē chiidá nī?

¹⁵'Úú ní ngaⁿá ngii nducyáácá ndís'tiī: Cuin'diichí nī ní cundée nī cuidado yeⁿe chí neⁿé nī yeⁿe vaadi 'cuiica caati 'iiⁿyāⁿ nguée ndaaca yā vida cueⁿe daāⁿmaⁿ cáávā chí véé ndee n'dái yeⁿe yā.

¹⁶Tuu'mi ní Jesús miiⁿ caⁿa yā chiī yā ejemplo 'cūū 'iiⁿyāⁿ: Áámá saⁿā 'cuiica véé yáⁿāa yeⁿē sa chí neenē n'dee chiinu sa. ¹⁷Sáⁿā miiⁿ ní nadicádíínuuⁿ sa ní caⁿā sa: 'Táácā dííⁿ ti nguée cuescomate ch'ete naachi nadidaamá cosecha yeⁿé? ¹⁸Ní caⁿa sa: 'Túúca dííⁿ. Cúndeevé cuescomate yeⁿé ní ndiiⁿ taama chí ch'etē ca ní miiⁿ nadaamá tanducueⁿē cosecha yeⁿé ndúúcū dendú'ū yeⁿé. ¹⁹Tuu'mi ní caaⁿmáⁿ māaⁿ cuuví alma yeⁿé. Dii alma yeⁿé de'ē chúúca n'dai dii. Néénē n'dee vee yeⁿē di chí nguáín'daí chí 'nááⁿ n'dai cuchéé. Maaⁿ ní ntaavi'tuunúūⁿ cuchéé, cu'ū, ní cuuvi yéénú. ²⁰Naatí Ndyuūs caⁿa yā chiī yā saⁿā: Díí saⁿā chí cheechi tiīⁿ di. Maaⁿnguiniúⁿ 'cūū

caⁿa di 'cuūví di. Ní chííⁿ chí nguáín'daí di chí vaadi 'cuiica yeⁿē di, 'du'ū cuuvi yeⁿé? ²¹Ní Jesús ngaⁿa yā: 'Tííca 'iiⁿyāⁿ chí nguain'dai yā chí véé yeⁿe maáⁿ yā cáávā maaⁿ yā naati 'iiⁿyāⁿ s'eeⁿ ní nguée véé yeⁿé yā nanááⁿ Ndyuūs.

**Ndyuūs idiíⁿ yā cuidado nducyaaca
'iiⁿyāⁿ chí daiyá yā**

(Mt. 6.25-34)

²²Jesús ngaⁿa yā ngii yā discípulos yeⁿe yā: Cáávā chuū chí ngaⁿá ngii ndís'tiī. Nguée nadicádíínuuⁿ nī yeⁿe vida yeⁿe maaⁿ nī yeⁿē chí nge'e nī cáávā vida yeⁿe nī ndii nguē ndúú cáávā catecaí nī yeⁿē cuerpo yeⁿé nī. ²³Vida ní ya'ai ca chíí'vē nguée ti chí nge'é nī. Ní cuerpo ní ya'ai ca chíí'vē nguée ti catecaí nī. ²⁴Nadicádíínuuⁿ nī yeⁿe 'yaadā chí nguuví ti cuervos. 'Yaada s'eeⁿ ní nguée ngiinu ti ndaata; ndíí nguée ndúú ingii cosecha yeⁿé ti chí che'e ti; ndíí nguée ndúú véé ra vaacú ti chí nguain'dai ti; ndíí nguée ndúú cuescomates yeⁿe ti. Ní Ndyuūs nga'a yā chí nge'e ti. 'Áá yaⁿ'ai ca chíí'vē ndís'tiī nguée tí 'yaada s'eeⁿ? ²⁵'Du'ū 'áámá chéé ndís'tiī cuuví cundee nī cuidado ní n'dee n'dái nacadiinúúⁿ nī ní ntiinee nī maⁿa metro yeⁿē chí yaacu nī? ²⁶Ndúúti chí nguē cuuvi dííⁿ nī chuū chí 'lííⁿ 'de'ē cúúví chí indeé nī cuidado ní n'dee n'dái nadicádíínuuⁿ nī yeⁿe dendu'ū chí n'geete cá?

²⁷Cuin'diichí nī naandā táácā n'giita. Nguée din'dái tíínūuⁿ, ndíí nguée ndúú idin'dái hilo. 'Úú ngaⁿá ngii ndís'tiī ti rey Salomón canúuⁿ yā catecaí yā chí ndeevé n'dai yeⁿe rey nguée neenē

n'deεvεé tan'dúúcā 'áámá naāndā s'eeⁿ. ²⁸Nduuti chi Ndyuūs nga'a yā catecai n'daacā naāndā chi maaⁿ ní snéé cuēeti ní cavyaaⁿ ní nti'í ní 'iiⁿyāⁿ 'neeⁿ yáⁿa yā, n'deē cá Ndyuūs téé yā ndís'tií ti Ndyuūs diíⁿ yā cuidado yeⁿe ndís'tií chi dúu'vii i'téenu nī Ndyuūs. ²⁹Ndís'tií ní nguéé in'nuúⁿ nī chi che'e nī o cu'ú nī. Nguéé nadicádíinuⁿ nī yeⁿe ní 'cuēetinéé 'diiíⁿ nī. ³⁰Ti 'iiⁿyāⁿ chi nguéé yeⁿe ndaata Israel o judíos in'nuúⁿ yā tanducueⁿe dendu'ú 'cūū. Naati ndís'tií nī vée 'aama Chiidá nī chi 'āā déenu yā yeⁿe tanducueⁿe dendu'ú chi necesidades yeⁿe ndís'tií. ³¹Vmnaáⁿ vmnaaⁿ ndís'tií ní cánéé chí in'nuúⁿ nī Ndyuūs ní yeⁿe nducueⁿe yeⁿe chi Ndyuūs ngaⁿa ntiíⁿnyúⁿ yā, ní 'íícú Ndyuūs téé yā ndís'tií tánducueⁿe dendu'ú.

Vaadi 'cuiica chi vée na va'ai cheeti nguuví

(Mt. 6.19-21)

³²Caⁿa Jesús: Ndís'tií chi tan'dúúcā 'iiti cuūchí yeⁿe 'tiicá nī. Nguéé 'va'á nī ti Ndyuūs Chiida yú neⁿe yā téé yā ndís'tií dendu'ú yeⁿe naachí ngaⁿa ntiíⁿnyúⁿ yā. ³³Cuin'díicui nī chi vée yeⁿe nī ní ca'á nī 'iiⁿyāⁿ chi nguéé vée yeⁿe yā. Diiⁿ n'daacá nī caati cuuvi yeⁿe nī vaadi 'cuiica yeⁿe va'ai cheeti nguuví naachi 'iiⁿyāⁿ duucu nguéé cuuvi cundaa yā, ndii nguεε nduu f'yéεvε cuuvi di'tuuví ti. ³⁴Caati naachi canéé vaadi 'cuiica yeⁿe nī, miiⁿ canee staava yeⁿe nī chí nadicadiinuúⁿ nī yeⁿe nducueⁿe.

Canéé chi candeé nī cuidado yeⁿe nducueⁿe

³⁵Cuēetinee chiichi n'daācā ndúúcū catecai nī. Cuēchiichi

nī paño cheēti nī 'íícú candεε nī lámparas yeⁿe nī chí ngiichi. ³⁶Cuēetinéé ndís'tií tan'dúúcā 'áámá saⁿā chí snéé ngiinu sa chí ndaa patrón yeⁿe sa naachi n'giindivaacú 'iiⁿyāⁿ. Ní maaⁿ nda'ai sa cheendi va'āi ní taachi ndaa yā chi di'cuēecú yā tuu'mí nūuⁿ nn'guaāⁿ sa yeⁿe yā. ³⁷De'ē chúúcā n'dai mozos chí diíⁿ mandado ní taachi ndaa Señor miiⁿ ní ndaaca yā mozos chí sндуuchí yā. Cuaacu nííⁿnyúⁿ ngaⁿá ngíí ndís'tií chi Señor miiⁿ ní cuēchiichi n'daacá yā paño cheēti yā. Ní Señor miiⁿ ní diíⁿ yā chí mozos 'cuēete sa na mesa. Tuu'mi ní Señor miiⁿ 'cuíi yā cu'u che'e mozos. ³⁸Áará chí Señor miiⁿ ndaa yā maⁿa yaaaⁿ o taachi 'āā cuéé chideεve nguuví ní ndaacá yā mozos chí sндуuchi sa. De'e chúúcā n'dai mozos ti sндуuchí yā. ³⁹Ndís'tií ní cadíinuⁿ nī chuū. Ndúúti chí 'iiⁿyāⁿ vaacu déenu yā de'ē hora chí ndaa chí duucu, cuaacu nííⁿnyúⁿ 'cuēetí nduuchí yā ní nguéé 'cuaaⁿ yā chí duucu na vaacú yā. ⁴⁰Tiicá ntúūⁿ ndís'tií 'cuēetinéé yaáⁿ nī ti hora chí nguéé inacádiinuⁿ nī 'úú chí Saⁿā chí Daiyá Dendyuūs ní ndaa taama vmnéⁿēe.

Yeⁿe mozo chí din'daacā ndúúcū mozo chí nguεε din'daacā

(Mt. 24.45-51)

⁴¹Tuu'mi ní Pedro miiⁿ ní caⁿa yā chíi yā Jesús: N'díí, Señor, ¿'áa caⁿa nī ejemplo 'cūū caavā nús'uu o caavā nducyaaca 'iiⁿyāⁿ?

⁴²Jesús miiⁿ ní caⁿa yā: ¿Du'ú dueño ca'a yā ntiíⁿnyuⁿ chí s'neeⁿ yā vmnaaⁿ yeⁿe va'ai yeⁿe yā 'áámá mayordomo nduuti chí

nguee ca'a sa chi che'e mozos
 ye^{n'}é yā hora chi che'e sa? ⁴³De'e
 chúucā n'dai mayordomo chi
 diiⁿ sa ntiiⁿnyuⁿ taachí dueño
 miiⁿ ní ndaa yā ní nandaaca yā
 mayordomo chi diiⁿ sa tan'dúucā
 chi ne^{n'}e yā. ⁴⁴Cuaacu níⁿnyúⁿ
 nga^{n'}á ngíí ndís'tií chi dueño miiⁿ
 ní cu'neéⁿ yā mayordomo miiⁿ chi
 caa^{n'}maⁿ ntiiⁿnyuⁿ sa ye^{n'}ē tanduvéé
 chi vee ye^{n'}e yā. ⁴⁵Ndúúti chi
 mayordomo miiⁿ nadicádiinuuⁿ sa
 na staava ye^{n'}e sa chí dueño cuuvi
 'náaⁿ yā nndaa yā tuu'mi ní tuca'a
 sa 'cue^{n'}e sa mozo ndúúcū n'daataa
 chi snéé caadi 'iyyū ní nge'e sa ní
 ng'i sa ndúúcū amigos ye^{n'}e sa ní
 cuu'vi sa. ⁴⁶Tuu'mi ní dueño miiⁿ
 ní ndāa yā nguuví chi mayordomo
 nguée cānee ngíínu sa ní 'áámá
 hora chi nguée déenu sa. Ní dueño
 miiⁿ ca'á yā castigo ch'εεε ca
 mayordomo miiⁿ tan'dúucā chi
 Ndyuūs ca'a yā castigo 'iiⁿyāⁿ chi
 nguée i'téenu yā yā. ⁴⁷Mayordomo
 chi deenu sa chí ne^{n'}e dueño ye^{n'}e
 sa naati nguée véé yaaⁿ sa ndíí
 nguée ndúú diiⁿ sa chi nga^{n'}a
 dueño ye^{n'}e sa cuuvi sa castigado
 ndúúcū neené n'dee cuuví 'cue^{n'}é
 yā sa^{n'}ā. ⁴⁸Naati mayordomo
 chi nguée déenu sa taacā ne^{n'}e
 dueño ye^{n'}e sa chi diiⁿ sa, ní diiⁿ
 sa chi nguée n'daacā chi cuuví
 sa castigado, tuu'mi ní cuuvi sa
 castigado ndúúcū 'téé nūuⁿ cuuví
 cue^{n'}é yā sa^{n'}ā. 'Āā du'ú nūuⁿ sa^{n'}ā
 chí n'deeé nga'a dueño ye^{n'}e sa,
 dueño miiⁿ ní n'deē cá caaca yā
 cuenta ye^{n'}ē chi diiⁿ sa. 'Iiⁿyāⁿ chi
 nga'a n'deē cá táámá yā, 'iiⁿyāⁿ
 miiⁿ n'deē cá caaca yā cuenta
 ye^{n'}e chi diiⁿ taamá yā.

**Vée 'áámá 'uūví taaⁿ 'iiⁿyāⁿ cáávā
 Jesús miiⁿ**

(Mt. 10.34-36)

⁴⁹'Úú Jesús ní ndāa chi cu'neéⁿ
 ya^{n'}ā ná i^{n'}yeeⁿdí 'cūū. De'ē ca ne^{n'}é
 diíⁿ nduuti chí 'āā ngiichi. ⁵⁰Canée
 chí 'úú 'cuenú cuuvi n'dee n'dái
 ní ne^{n'}é chi 'cuenú cuuvi ndíí
 taachi 'āā cuuví cuaacu tanducué^{n'}ē.
⁵¹¿'Āā nadicadíinuuⁿ nī chí 'úú
 ndāa chi ndéé vaadi 'diíⁿ 'iiⁿyāⁿ
 ye^{n'}e i^{n'}yeeⁿdí 'cūū? 'Úú ní nga^{n'}á
 ngíí ndís'tií chi nguée cuaacu caati
 ndéé vaadi 'caa'va, ní 'iiⁿyāⁿ 'caa'vá
 yā ndúúcū táámá 'iiⁿyāⁿ. ⁵²Ndíí
 tiempo miiⁿ ndíí tiempo chi cuchí,
 nduuti chí nyuⁿ'u 'iiⁿyāⁿ na 'áámá
 va'āi ndúúcū vaadi 'caa'va 'cuetinéé
 yā, 'iinu yā ní ca^{n'}a yā contra ye^{n'}ē
 na 'uuvi yā ní 'uuvi yā ní ca^{n'}a yā
 contra ye^{n'}ē ná 'iinú yā. ⁵³Sa^{n'}ā chí
 véé daiya sa ní 'caa'va sa ndúúcū
 daiya sa, 'íicú daiya sa ní 'caa'vá sa
 ndúúcū chiidá sa. Ní 'áámá n'daataa
 nguée cuuvi n'diichi tá daiya tá,
 'íicú daiya ntúūⁿ tá nguée cuuvi
 n'diichi tá cheecu tá. Ní ta^{n'}ā indá'ā
 tá ní 'caa'vá yā ndúúcū dicuūnú ta,
 ní dicuūnú ta ní 'caa'vá yā ndúúcū
 tá^{n'}ā indá'a tá.

Señales ye^{n'}e tiempo 'cūū

(Mt. 16.1-4; Mr. 8.11-13)

⁵⁴'Tiicá ntúūⁿ nga^{n'}a Jesús ngii
 yā 'iiⁿyāⁿ: Taachí ndís'tií inaaⁿ nī
 méēē chí íneeⁿ naachí ngiiya 'yá^{n'}ā,
 tuu'mi ní nga^{n'}a nī chí 'cuaeⁿ cúúvī.
 Ní 'tíicā ngii. ⁵⁵Ní taachí ngéenu
 'yúúné cuááⁿ ndiiyā nga^{n'}a nī chí
 cuuvi yāāaⁿ 'iicu ní ngii. ⁵⁶Ndístíí
 chí 'uūví naaⁿ 'uūví cheendi nī
 déenu nī taaca canée nánguuví

ndúúcū na yaⁿá, taachi ndaā 'íí'nūuⁿ
nī taachi cuuvi 'cueeⁿ cuuvi. ¿De'ē
cúúví chí nguée déenu nī yeⁿe
señales chí inaaⁿ nī yeⁿe tiempo
'cūū?

**Diiⁿnú yiiⁿnu di tun'dáá n'dai di
ndúúcū 'iiⁿyāⁿ chí táaⁿ yā yeⁿē di**

(Mt. 5.25-26)

⁵⁷Tuu'mi ní caⁿa Jesús: ¿De'ē
cúúví chí nguée indéē ndís'tii
cuidado chee chí n'daācā chí dííⁿ nī?
⁵⁸Taachi caⁿá nī ndúúcú sáⁿā chí
táaⁿ ndúúcū nī nanááⁿ juez, n'diichí
nī chí indee nī ndúúcū vi'í cuaaⁿ
cyúúní ní dííⁿ nī chí 'cuētinéé
n'dáaca nī ndúúcū vi'í nī 'iicu
nguée caⁿa nī nanááⁿ juez. Ní juez
miiⁿ nca'á yā ndís'tii ta'ā policía, ní
policía miiⁿ ní cu'nuūⁿ sá ndís'tii
vácūū. ⁵⁹Úú ngaⁿá ngíi ndís'tii ti
nguée nan'dáa nī vácūū neⁿe chí
nguée 'cuiinu nadíí'vē tanducuéⁿē
chí ndiicuⁿ nī.

**N'dáacā n'dai chí ndaacadaamí
nī yeⁿē nuuⁿndi yeⁿe nī**

13 Ndáa n'duuvi saⁿā nanááⁿ
Jesús ní caⁿa sa chíi sa
Jesús tan'dúúcā chí diiⁿ gobernador
Pilato. Ca'a yā orden chí ch'iiⁿnuⁿ
sa n'dúúví 'iiⁿyāⁿ yeⁿe yáⁿāa
Galilea ní staⁿa yā yuuúⁿ yeⁿe
'iiⁿyāⁿ s'eeⁿ ndúúcū yuuúⁿ yeⁿē 'iiti
chí 'āā nííⁿnúⁿ 'iiⁿyāⁿ Israel s'eeⁿ
chí ca'a yā ofrenda yeⁿē Ndyuūs.
²Jesús ní caⁿa yā chíi yā 'iiⁿyāⁿ
s'eeⁿ: ¿Áá nadicádíínuuⁿ ndís'tii
chí 'iiⁿyāⁿ s'eeⁿ yeⁿe yáⁿāa Galilea
ch'eenu yā 'tíicā ti véé ca nuuⁿndi
yeⁿe yā nguée ti tanáⁿā 'iiⁿyāⁿ
yeⁿe yáⁿāa Galilea? ³Úú ngaⁿá
ngíi ndís'tii: Nguée 'tíicā. Ndúúti

chí ndís'tii nguée ndaacadaamí nī
yeⁿē nuuⁿndi yeⁿe nī, tuu'mi ní
nducyaaca ndís'tii 'cuūvi ntúuⁿ nī
cueⁿe daāⁿmaⁿ. ⁴¿De'ē nadicádíínuuⁿ
ndís'tii yeⁿē ndu'ū ndítiiⁿyuⁿ 'iinu
'iiⁿyāⁿ chí ndíí cuaaⁿ vmaaaⁿ
sndaā nduūu torre na yáāⁿ Siloé
vmaááⁿ yā ní nducyáácá yā ch'ii
yā? ¿Áá nadicádíínuuⁿ ndís'tii chí
'iiⁿyāⁿ s'eeⁿ véé ca nuuⁿndi yeⁿe yā
nguée ti tanáⁿā yā chí snée yā na
yáāⁿ Jerusalén? ⁵Úú ní ngaⁿá ngíi
ndís'tii chí nguée 'tíicā. Nduuti chí
ndís'tii ntúuⁿ nguée ndaacadaamí
nī yeⁿe nuuⁿndi yeⁿē nī, tuu'mi ní
nducyaaca ndís'tii 'cuūvi nī cueⁿe
daāⁿmaⁿ.

**Ejemplo yeⁿe yáⁿá yeⁿe n'guídii
yaaⁿ nguuvi chí nguée n'guí'í yeⁿē**

⁶Tuu'mi ní Jesús caⁿa yā ejemplo 'cūū:
'Áámá saⁿā ní catá'āi 'áámá yáⁿá yeⁿē
n'guídii yaaⁿ nguuvi yeⁿe sa naachi
véé yáⁿāa cheeti chéeⁿ yeⁿē sa. Chó'oo
tiempo ní cheⁿe sa in'nuuⁿ sa n'guí'í yeⁿe
yáⁿá yeⁿe sa ní nguée ndaācā sa n'guí'í
yeⁿē. ⁷Tuu'mi ní caⁿa sa chíi sa 'iiⁿyāⁿ
chí dííⁿ yā ntiiⁿnyuⁿ yeⁿe yáⁿāa yeⁿe
sa: 'Áā 'iinu nduūyū chí ichíi ní nguée
indaāca n'guí'í na yáⁿá 'cūū. 'Caaca nī
yáⁿá. ¿De'ē cuuvi chí yáⁿá dí'vaachi na
yáⁿāa naachi snée yáⁿá 'cūū? ⁸Naati
saⁿā chí idiíⁿ ntiiⁿnyuⁿ na yaⁿā miiⁿ
nán'guēcútaⁿā sa: N'díí, señor, 'āā
canée rá nduuyú 'cūū ní 'úú nadidēevé
yáⁿá yeⁿē ní ca'á taavi abono yeⁿē. ⁹Ní
nduuti chí 'cuūndi n'guí'í yeⁿē ní n'daacā.
Nduuti chí nguée, ní 'caaca nī.

**Jesús dííⁿ yā chí nduūvā yeⁿe
'áámá n'daataá chí neenē n'guutíi**

¹⁰Nguuvi sábado chí
ntaavi'tuunúúⁿ 'iiⁿyāⁿ Israel s'eeⁿ,

Jesús ngi'cueeⁿ yā na 'áámá yaācū sinagoga. ¹¹Miiⁿ ní canéé 'áámá n'daataá chí 'āā ndítiiⁿyu 'iinu ndúuyū chí ndii n'guuti ta cáāvā chí diiⁿ espíritu yeⁿe yááⁿn'guiinūuⁿ 'tíicā ndúucū ta. Ndíí mar 'áámá naaⁿ nguéeé ngii ndaa cuaacū ta. ¹²Taachí Jesús n'diichí yā n'daata miiⁿ yaa'ví yā táⁿā ní caⁿ'a yā chíi yā táⁿā: N'díí, n'daataá, 'áá neⁿe nī chí nduuví cuaacū nī?

¹³Jesús sn'duú yā ta'a yā vmnaaⁿ yeⁿe n'daātā miiⁿ. Tuu'mí nūuⁿ ndaā cuaacu n'daataá miiⁿ ní n'daataá miiⁿ ní ngaⁿ'a yā: De'ē chúucā ch'ēete Ndyuūs. ¹⁴'Iiⁿyāⁿ chí ngaⁿ'ā ntiiⁿnyúⁿ yā yeⁿe yaacu sinagoga nduuví taáⁿ yā ti Jesús miiⁿ ní diyiicū yā n'daataá miiⁿ nguuví chí 'iiⁿyāⁿ ntaavi'tuunúúⁿ yā. Ní ngaⁿ'a yā ngii yā nducyaaca 'iiⁿyāⁿ: Jaāⁿ nguuví nūuⁿ canee chí diiⁿ 'iiⁿyāⁿ ntiiⁿnyuⁿ ní nguuví s'eeⁿ 'iiⁿyāⁿ cuuví chíi yā nanááⁿ Jesús miiⁿ ní cuuví diiⁿ yiicū yā 'iiⁿyāⁿ s'eeⁿ, naati nguéeé cuuví dííⁿ yā 'tíicā nguuví chí ntaavi'tuúnūuⁿ 'iiⁿyāⁿ.

¹⁵Tuu'mí ní Jesús nan'guēecútaⁿa yā yeⁿe sa: Ndís'tii saⁿ'ā 'uūví naaⁿ 'uūví cheendí nī, 'áá nguéeé in'daatí ndís'tii 'iiti yeⁿe nī naachi snéé 'iiⁿyu tī ní ngeⁿé nī ngaⁿ'a nī nuūⁿnīⁿ 'iiti nguuví chí ntaavi'tuunúúⁿ nī? ¹⁶N'daataa 'cūū ní yeⁿe ndaata yeⁿe Abraham. 'Āā ndítiiⁿyu 'iinu nduūyū ncachiichí yááⁿn'guiinūuⁿ táⁿā. 'áá nguéeé canee chí n'daatí táⁿā miiⁿ yeⁿe ca'ai nguuví chí ntaavi'tuunúúⁿ nī?

¹⁷Taachí Jesús miiⁿ caⁿ'a yā chuū, taanduvée yā chí taaⁿ yā yeⁿe yā ní 'cuināaⁿ yā. Nducyáácá 'iiⁿyāⁿ yeⁿe yāāⁿ miiⁿya yeenú n'dai yā yeⁿé

tanducueⁿē dendu'ū chí n'geete chí diiⁿ Jesús miiⁿ.

Ejemplo yeⁿe nduuti yéⁿe yíivē ntí'yāa

(Mt. 13.31-32; Mr. 4.30-32)

¹⁸Jesús caⁿ'a yā: 'De'ē tan'dúucā naachí Ndyuūs ngaⁿ'a ntiiⁿnyúⁿ yā? 'De'ē nadídaamá nduūcū?

¹⁹Tan'dúucā nduutií yeⁿe yíivē ntíí'yāa chí 'áámá saⁿ'ā ní staⁿā sa ní chíinū sa na yáⁿ'āa yeⁿe sa. Yaāta miiⁿ ní ch'iita tan'dúucā 'áámá yáⁿ'ā ch'ēete. 'Yáádá yeⁿe nanguuvi din'dái tī 'deecé tī na dúuⁿnē.

Ejemplo yeⁿe levadura yeⁿe pan

(Mt. 13.33)

²⁰Jesús ní caⁿ'a ntúūⁿ yā: 'De'ē tan'dúucā naachí Ndyuūs ngaⁿ'ā ntiiⁿnyúⁿ yā? ²¹Tan'dúucā 'aama tááⁿ levadura yeⁿe pan chí 'áámá n'daataa chistaⁿ'ā tá nguaaⁿ 'iinū medidas harina ndíí chí nan'guiiita tanducueⁿē yaāchí yéⁿe.

Cheendi va'āi 'tuucúú

(Mt. 7.13-14; 21-23)

²²Taachi Jesús canúúⁿ yā yúúní chí cho'ó yā na yāāⁿ Jerusalén cueⁿé yā tanáⁿ'ā yāāⁿ n'geete ndúucū yāāⁿ n'gaiyāā ní ngi'cueeⁿ yā 'iiⁿyāⁿ. ²³Tuu'mí ní 'áámá saⁿ'ā ndaā sa nanáaⁿ yā ní ntiinguuneeⁿ sa: N'díí, Señor, 'áá duū'ví 'iiⁿyāⁿ chí nnguaⁿ'ai yā? Jesús miiⁿ ní caⁿ'a yā chíi yā saⁿ'ā miiⁿ: ²⁴Dííⁿ nī tanducueⁿē chí cuuví nī chí cundaá nī cheendi va'āi 'tuucúú caati ngaⁿ'ā ngii ndís'tii chí nééne 'yaaⁿ 'iiⁿyāⁿ neⁿe yā cundaá yā cheendi va'ai 'tuucúú chí candéē naachi Ndyuūs nadanguaⁿ'ai

yā 'iiⁿyāⁿ naati nguée cuuvi diíⁿ yā. ²⁵Taachi 'iiⁿyāⁿ yeⁿe va'ai nducueeⁿ yā ní n'gaadí yā cheendi va'ai yeⁿe ndís'tii, tuu'mi ní ndís'tii snee nī cuaaⁿ chuva'ai. Ní di'cuéecú nī cheendi va'ai ní caaⁿmaⁿ nī: Señor, Señor, nn'guaáⁿ nī yeⁿe 'nū. 'Iiⁿyāⁿ yeⁿe va'ai ní nan'guéecutaⁿa yā: Nguée in'diichí ndís'tii ndii nguée deenú tii ndiicá nī. ²⁶Áará chí ndís'tii ní tucáa nī caaⁿmaⁿ nī 'tíicā: Che'é 'nū ní chí'i 'nū ndúúcu nī taachi n'dií ní chí'cueeⁿ nī 'iiⁿyāⁿ na yúúni yeⁿe yááⁿ vaacú 'nū. ²⁷'Iiⁿyāⁿ yeⁿe va'ai miiⁿ ní caaⁿmaⁿ yā cuuvi yā 'iiⁿyāⁿ s'eeⁿ: 'Úú ngaⁿá ngí ndís'tii ti nguée in'diichí ndís'tii ndíi nguée deenú tíi ndiica nī. Cueevii nī yeⁿe nducyaaca ndís'tii ti nguée n'daācā idiíⁿ nī. ²⁸Cuaacu chí ndís'tii snaaⁿ nī chiida yú s'eeⁿ Abraham, ndúúcu Isaac, ndúúcu Jacob, ndúúcu nducyaaca profetas chí ndii cuááⁿ vmnaaⁿ snée yā naachí Ndyuūs ngaⁿa ntiiⁿnyuⁿ. Ní ndís'tii ní 'cuéetinée nī cuááⁿ chuva'ai. Miiⁿ ní cuéecú nī ní che'é nī 'diiⁿyúⁿ nī. ²⁹'Iiⁿyāⁿ s'eeⁿ chii yā yeⁿe nducuéⁿe cuaaⁿ yeⁿe iⁿ'yeeⁿdí 'cūú ní ndaa yā nanááⁿ Ndyuūs. Chii yā ndíi cuaaⁿ na ican'dáá 'yáⁿā, ndii cuaaⁿ na ngiiya 'yáⁿā, ndíi cuaaⁿ 'nínⁿnúⁿ, ndíi cuaaⁿ ndiia, ní 'cuéeté yā na mesa yeⁿe banquete naachí Ndyuūs ngaⁿa ntiiⁿnyúⁿ yā. ³⁰Tuu'mi ní náⁿā 'iiⁿyāⁿ chí n'geete chí ngaⁿa ntiiⁿnyúⁿ yā maaⁿ na iⁿ'yeeⁿdí 'cūú ní cuuvi ndiicuuⁿ cá yā naachi snée Ndyuūs ní naⁿa 'iiⁿyāⁿ chí ndiicuuⁿ cá maaⁿ na iⁿ'yeeⁿdí 'cūú ní cuuvi n'geeté yā naachi snée Ndyuūs.

Jesús cheecú yā cáávā 'iiⁿyāⁿ yeⁿe yááⁿ Jerusalén

(Mt. 23.37-39)

³¹Nguuvi 'cuú nūuⁿ 'áamá chée 'iiⁿyāⁿ fariseos ndáa yā nanááⁿ Jesús ní caⁿa yā: N'dií, Jesús, cueⁿe nī ti rey Herodes neⁿé yā 'caaⁿnúⁿ yā n'dií.

³²Naati Jesús caⁿa yā chíi yā 'iiⁿyāⁿ s'eeⁿ: Cunaⁿá nī nanááⁿ rey miiⁿ ní caaⁿmaⁿ nī cuuvi nī: N'dií rey, tan'dúúca 'yuūnéé, 'tiicá nī. Cuin'diichí nī, Jesús miiⁿ ngaⁿá yā 'túúca: 'Úú itun'daá espíritu yeⁿe yááⁿ n'guinūuⁿ yeⁿe 'iiⁿyāⁿ ní diíⁿ chí nduūvā yeⁿe 'iiⁿyāⁿ maaⁿ nguuvi ndúúcu cavyaaⁿ, tuu'mi ní 'cuiinu ntiiⁿnyuⁿ yeⁿe damáíⁿ. 'Tíicā canee chí diíⁿ ná 'iinū nguuvi. ³³Naati 'úú ní canée chí caacá cuaaⁿ cyúúni ní diíⁿ ntiiⁿnyuⁿ yeⁿe maaⁿ ndúúcu cavyaaⁿ ndúúcu damáíⁿ, caati nguée canée chí 'cuuvi 'áamá saⁿā profeta ch'ete chí diiⁿ ntiiⁿnyuⁿ yeⁿe Ndyuūs 'áamá lado yeⁿe yááⁿ Jerusalén ti na yááⁿ Jerusalén chí 'caaⁿnúⁿ yā saⁿā profetas.

³⁴Jesús caⁿa yā chíi yā 'iiⁿyāⁿ yeⁿe yááⁿ Jerusalén: Ndís'tii chí 'muuⁿ n'giiⁿnuⁿ nī 'iiⁿyāⁿ profetas ní ngítuú nī 'iiⁿyāⁿ chí Ndyuūs dicho'ó yā chí ndee yā nduudu yeⁿe yā. Ní Jesús caⁿa yā: Neené n'dee cuuvi neⁿé nadaamá daiyá 'iiⁿyāⁿ yááⁿ Jerusalén miiⁿ tan'dúúca 'áamá tú'u nadaamá tí daiya tí mááⁿ ngeéchi tí, ní nguée 'cuúⁿ nī. ³⁵Túúca caⁿa yā: N'diichí ndís'tii. Vaacú nī cu'néeⁿ maáaⁿ. Ní ngaⁿá ngí ndís'tii chí 'āá ntée snaaⁿ nī 'úú ndíi ndáá tiempo chí caaⁿmaⁿ nī yeⁿe: De'e chúúca n'dai 'iiⁿyāⁿ chí

cuchii yā ndúúcū chi duuchi Señor
'iivú Ndyuūs ti 'iiⁿ'yāⁿ yeⁿ'é Ndyuūs.

**Jesús diiⁿ yā chi nduūvā
yeⁿ'e 'áámá saⁿ'ā**

14 'Áámá sábadu, nguuví
chi ntaavi'túúnuuⁿ 'iiⁿ'yāⁿ,
Jesús sndaā yā ní cheⁿ'e yā 'áámá
va'ai yeⁿ'e 'áámá saⁿ'ā fariseo chi
ngaⁿ'a ntiⁿ'nyuⁿ sa. Ní tanáⁿ'ā saⁿ'ā
fariseos canee ngiinu sa Jesús de'ē
chi caⁿ'á yā chi diiⁿ yā. ²Tuu'mi ní
ndaā nanááⁿ Jesús 'áámá saⁿ'ā chí
ngiitā ní ndiituú núúⁿ'máⁿ ch'ēete
sa. ³Jesús caⁿ'a yā chii yā maestros
yeⁿ'e ley ndúúcū saⁿ'ā fariseos: ¿'Áá
'cuaaⁿ ley miiⁿ chí cuuví diiⁿ chi
nduūvā yeⁿ'e 'iiⁿ'yāⁿ nguuví chí
ntaavi'tuunúúⁿ yā?

⁴Saⁿ'ā s'eeⁿ ní 'diiⁿ' diiⁿ' ch'ēetinee
sa ní nguée nan'guēcutaⁿ'a sa.
Tuu'mi ní Jesús sta'á yā ta'a saⁿ'ā
chi ndiituú ní diiⁿ yā chi nduūvā
yeⁿ'e saⁿ'ā miiⁿ. Ni yaa'vi yā saⁿ'ā
chi cunaⁿ'a sa. ⁵Cuayiivi ní Jesús
yaa'vi yā saⁿ'ā s'eeⁿ ní caⁿ'a yā: ¿Chēē
ndís'tii ndúúti chi 'áámá burro o
'áámá itiindu yeⁿ'e nī cun'dáá nuúⁿ ti
na 'áámá viini ní nguée tuu'mí nūuⁿ
ntun'dáa nī 'iiti 'áará chí nguuví chi
ntaavi'tuunúúⁿ 'iiⁿ'yāⁿ?

⁶Saⁿ'ā s'eeⁿ nguée chí
nan'guēcutaⁿ'a sa cucáāvā nduudu
chi ngaⁿ'a yā.

**'Iiⁿ'yāⁿ chi invitado yā naachi
n'giindivaacu 'iiⁿ'yāⁿ**

⁷Taachí Jesús n'diichí yā táácā
diiⁿ 'iiⁿ'yāⁿ chi invitados chi ndēve
yā silla yeⁿ'e mesa chi lugar chí
n'daacā ca, tuu'mi ní caⁿ'a yā 'áámá
ejemplo chi 'tēe nguēe dááma
ndúúcū 'iiⁿ'yāⁿ chi diiⁿ yā invitados.

⁸Ngaⁿ'a yā 'tífā. Taachi 'áámá
'iiⁿ'yāⁿ diiⁿ yā invitar dii naachí
n'giindivaacu 'iiⁿ'yāⁿ nguée 'cuūndí
di na silla vmnááⁿ vmnaaⁿ caati
cuuvi ndaa táámá 'iiⁿ'yāⁿ invitado
chi ch'ēetē yā nguée ti dii. Ní silla
miiⁿ ní caava 'iiⁿ'yāⁿ miiⁿ. ⁹Ní
taachí ndaa 'iiⁿ'yāⁿ chi ch'ēete ca yā,
tuu'mi ní 'iiⁿ'yāⁿ chi diiⁿ yā invitar
di ndaa yā nanááⁿ di ní caaⁿ'máⁿ yā
cuuvi yā dii: Cu'neeⁿ di lugar 'cūū
yeⁿ'e 'iiⁿ'yāⁿ 'cūū. Tuu'mi ní cuuví
'cuináaⁿ di ní 'cuūndí di na silla
n'díí naaⁿ n'giinu. ¹⁰Taachí 'iiⁿ'yāⁿ
diiⁿ yā invitar dii caⁿ'a di 'cuūndí di
na silla ndíí naaⁿ n'giinu. Ní taachi
ndaá nanááⁿ dii 'iiⁿ'yāⁿ chi diiⁿ yā
invitar dii, tuu'mi ní caaⁿ'máⁿ yā
cuuvi yā dii: Díí sáⁿ'ā chi n'dai
nduucú, caaca dí cuaaⁿ 'niiⁿ'nuⁿ. Ní
'āā n'daacā cuuvi yeⁿ'ē di nanááⁿ
'iiⁿ'yāⁿ chi vēetē yā na mesa. ¹¹'Iiⁿ'yāⁿ
chi dich'ēetē maáⁿ yā táámá 'iiⁿ'yāⁿ
ní diiⁿ yā chi ndiicuuⁿ yā. Ní 'iiⁿ'yāⁿ
chi maaⁿ yā diiⁿ chi ndiicuuⁿ yā
tááma 'iiⁿ'yāⁿ ní diiⁿ yā chi ch'ēetē
yā.

¹²Tuu'mi ní Jesús ngaⁿ'á yā ngii yā
saⁿ'ā chi diiⁿ invitar 'iiⁿ'yāⁿ s'eeⁿ: Dii
taachí in'nuuⁿ di chí che'e nguaiⁿ di
o chi che'e nguínū di, nguée 'cuai
di 'iiⁿ'yāⁿ chi n'dai ndúúcu di, ndíí
nguée ndúú ví'í rā di, ndíí nguée
ndúú 'iiⁿ'yāⁿ yeⁿ'ē di, ndíí nguée
ndúú 'iiⁿ'yāⁿ na niiⁿ'nuúⁿ va'āi yeⁿ'ē
di chí 'cuíca yā caati 'iiⁿ'yāⁿ s'uuⁿ ní
diiⁿ ntúuⁿ yā invitar dii chí che'e
di nduucú yā. 'Tífā ní nadí'vē yā
diiⁿ cáāvā chí ca'a di chí che'e yā.
¹³Naatí taachi idin'dái di 'aama
comida n'dai, 'cuai dí 'iiⁿ'yāⁿ chí
ndaachí snee yā, ndúúcū 'iiⁿ'yāⁿ
chí nguée ngii ngiicá yā, ndúúcū

chi ngai yó'o, ndúúcū 'ii'nyā chi ngeenáa".¹⁴ Ní caa'na 'ii'nyā s'ee' ye'ē di: De'e chúúcā n'dai di. Ti 'ii'nyā s'ee' nguée nteé yā dii. Naati Ndyuūs nadí'vε yā dii taachi ndaa nguuvu chi 'ii'nyā chi n'dai nduuchí yā ye'ē nguaa' tiná'ā.

Ejemplo ye'ē 'ii'nyā chi che'e yā cena chi ch'εte

¹⁵Taachi 'áamá 'ii'nyā chi véε yā na mesa mii' ch'iindiveé' yā chuū, ca'na yā chii yā Jesús: De'e chúúcā n'dai chi ca'á yā che'e yā pan naachi Ndyuūs nga'na ntii'nyú' yā.

¹⁶Tuu'mi ní Jesús ca'na yā ejemplo 'cūū: 'Áamá sa'ā ca'ā sa chi din'dái yā 'áamá chi che'e nguínū 'yaa' 'ii'nyā, ní idii' sa invitar n'dee n'dái 'ii'nyā. ¹⁷Ní taachi 'āā chaa che'e nguiniū yā dicho'o yā 'áamá mozo chi ca'na sa cuuvi sa 'ii'nyā chi ndii yā invitado: Cuchí nī. 'Āā véé tanducué'ē chí che'e nguiniu yú.

¹⁸Nducyaaca yā ní tucá'a yā ca'na yā 'tíicā: Ch'εetinúu' nī ye'ē. Ní 'áamá sa'ā ní ca'ā sa: Cáámá ch'iinū 'caí 'áamá finca ní cánéé chí ca'á n'diichí finca, chii' chi ch'εetinúu' nī ye'ē. ¹⁹Táámá yā ní ca'na yā: 'Caí nyu'u yáandā itiindu ní ne'ē dí' n'tii'nyu' ndúúcu ti. Ngicá favor. Ch'εetinúu' nī ye'ē. ²⁰Táámá yā ní ca'na yā: Cáámá ch'iinu ch'iindivaacú chi chii' nguée cuuvi ca'á. ²¹Taachí nguεcunée mozo, ca'na sa chuū chii sa 'iivi sa. Tuu'mi ní 'iivi mii' nduuvu taá' yā ní ca'na yā chii yā mozo mii': Cue'e di cuaa' ní'vεε ndúúcū cuaa' cyúúní ye'ē yáā ní candée di 'ii'nyā ndaachí, ndúúcū 'ii'nyā chi nguée ngii ngicá yā, ndúúcū 'ii'nyā chi ngai yó'o,

ndúúcū 'ii'nyā chi ngeenáāa".

²²Sá'ā mozo ní cue'ē sa. Cuayiivi ní ndaā sa ní ca'ā sa chii sa 'iivi sa: N'díí, señor, 'āā dí' tan'dúúcā chí nga'a nī ní véé cá lugar chi 'cúεtεé 'ii'nyā na mesa. ²³Ca'na señor mii' chii yā sa'ā mozo mii': Cue'e di cuaa' cyúúní n'gεεε ndúúcū yúúní chi véé chi neē' cuáá' 'diitū ní di'cuítu di 'ii'nyā chí chii yā na vaacú ní 'íicú cuuvi diituú na vaacú. ²⁴Ti 'úú ní nga'á ngii ndís'tii chi mar 'áamá sa'ā chí dí' invitar sa'ā vmnaa' nguée 'cuú' ndáa sa che'ε nguiniū sa nduucú na mesa ye'ē.

'Ii'nyā chi ca'na yā ndúúcū Jesús canee chi 'cuéenu yā cuuvi

²⁵Cuayiivi míf' neéné n'dee 'ii'nyā cue'e yā ndúúcū Jesús. Ní Jesús mii' ní ca'na yā chii yā 'ii'nyā s'ee' 'áamá ejemplo: ²⁶Ndúúti chi 'áamá 'ii'nyā ne'ē ca yā chiidá yā o chεεcú yā o n'daataa ye'ē yā o daiya yā o 'díinu yā o 'vi' yā o vida ye'ē maá' yā nguée ti 'úú chi Jesús, nguée cuuvi discípulo ye'ē. ²⁷'Āā du'ú nūu' chi ca'na yā nduucú ní nguée ndée yā cruz ye'ē yā chi tan'dúúcā nducué'ē chi 'cueenu taavi yā cuuvi cucááv' 'úú nguée cuuvi discípulo ye'ē. ²⁸¿Áá chεé nūu' 'áamá ndís'tii taachí ne'ē nī din'dái nī 'áamá torre, ¿áá nguée n'gεεtε nī ní ididuuché nī? ¿Áá n'deē dí' nī gasto ndúúti chi tu'née chí'vεε ye'ē nī chí 'cuiinu din'dái nī torre ye'ē nī? ²⁹Ní nduuti chi cu'nuú' nī cimientos ye'ē torre ní cuayiivi nguée cuuvi din'dái nī torre ye'ē nī, tuu'mi ní nducyaaca yā chí snaa' yā 'cá'nyū'nee' yā ndís'tii. ³⁰'Ii'nyā s'ee' ní caa'na

yā: Sá"n'a 'cūū tuc'a sa din'dái sa ní nguée ch'iinu di'cuiínú sa. ³¹Ní Jesús nga"n'a yā 'tíficā: ¿Du'ú rey ndúúti chí canee chí dií"n yā caandaá ndúúcu táámá rey, 'áá nguée n'giindi yā ndúúcu táámá sa"ā ní ididuuché yā? Nduuti chí tunéé" ndiicu mil soldados ní 'iicu ndúúcu chuú nūu" cuuvi 'cuu"ma"n yā ndúúcu soldados chí ndiichi mil ye"ē táámá rey. ³²Ní nduuti chí nguée cucheē yā, taachi cuchíí yā táámá rey ndúúcu soldados ye"e yā chí dií"n yā caandaá ní canéé ya"ai ca yā mii"n tuu'mi ní rey mii"n dicho'ó yā 'ii"yā"n chí candéē nduudu mii"n. Ní 'iicu caaca yā taama rey chí 'cuētinéé 'diií"n yā. Ní nguée dií"n yā caandaá ndúúcu rey ye"e yā. ³³Tiicá ntúū. 'Āā cheē nūu" ndís'tii nduuti chí nguée cu'nee nī tanducué"ē chí vée ye"e nī, nguée cuuví cuuvi ndís'tii discípulos ye"é.

Jesús nga"n'a yā ye"é yiima chí nguée n'daācā sabor ye"ē

(Mt. 5.13; Mr. 9.50)

³⁴Jesús nga"n'a yā: Yiima ní n'dai. Nduuti chí nguée n'daācā sabor ye"ē, ¿de'ē ca'a sabor ye"ē? ³⁵Nguée dichí'fē, ndii nguēē cáāvā yā"āa, ndii nguēē ndúú naachi vée abono, caati canangée yā yiima mii"n. 'Ii"yā"n chí vée veé"n yā, 'caandiveé"n yā ye"é.

Ejemplo ye"ē 'ííti cuūchí chí nindai

15 Nducyáácá sa"ā chí ínn'guēē sa ye"e yá"āa ndúúcu 'ii"yā"n nuu"ndi ndaá yā nanáá" Jesús chí 'caandiveé"n yā nduudu ye"e yā. ²Cáāvā chuū 'ii"yā"n fariseos ndúúcu maestros chí ngi'cuee"n ley nga"n'a yā n'de'ei yā

nguáá"n maá"n yā contra ye"e Jesús. 'Túuca nga"á yā: Jesús mii"n n'gúu"n yā chí ndaá nanáa"n yā 'ii"yā"n chí vée nuu"ndi ye"e yā. Ní 'ii"yā"n mii"n ngé'e yā ndúúcu yā.

³Tuu'mi ní Jesús mii"n ní ca"n'a yā 'aama chí 'téé nguēē daama ndúúcu 'ii"yā"n mii"n. ⁴Cheé ndís'tii ndúúti chí vée 'áámá ciento 'iiti cuūchí ye"e nī ní nduuti chí 'áámá cheē 'iiti 's'uu" cuuví ndái tī, ¿'áá nguée cu'nee nī ndu'u chí cuū"n ngēēcu nditii"yú cuuú"n tī na 'cuéé'tí? Ní ca"á nī in'nuú"n nī 'iiti chí nindái mii"n ndíí taachí ndaaca nī 'iiti mii"n. ⁵Ní taachí ndaaca nī 'iiti mii"n cun'duú nī 'iiti ná 'diimi nī ní candéē nī 'iiti cuūchí mii"n naachi canéé taná"ā 'iiti cuūchí. Ní yeenú n'dai nī. ⁶Ní taachi ndaa nī na vaacu nī, tuu'mi ní nadidaama nī 'ii"yā"n chí n'dai ndúúcu nī ndúúcu 'ii"yā"n na nī"nuu"n na va'ai ye"e nī. Ní caa"ma"n nī cuuvi nī, 'ii"yā"n s'ee": Ndís'tii cuuvi yeenú n'dai nī nduucú ní di'viicu yú tī 'āā n'daaca 'iiti cuūchí ye"é chí nindái. ⁷Tuu'mi ní Jesús nga"á ntúū"n yā, 'úú nga"á ngii ndís'tii: 'Tíficā vée vaādī yeenú taavi na va'ai cheēti nguuví ye"ē 'áámá 'ii"yā"n chí vée nuu"ndi ye"e yā ní ndaacadami yā ye"ē nuu"ndi ye"e yā nguée tī ye"ē cuū"n ngēēcu nditii"yú cuuū"n 'ii"yā"n chí n'dai chí nguée canee cuumi chí ndaacadami yā ye"ē nuu"ndi ye"e yā.

Ejemplo ye"ē 'áámá cáádí chí nindái

⁸Ní ca"n'a Jesús: Du'u 'áámá n'daataa chí vée ndiichi cáádí ye"ē ta nduuti chí dindai tá 'áámá ¿'áá 'cuu"mi"n tá lámpara ní n'daaca tá va'āi, ní in'nuu"n tá ndúúcu cuidado

taanduvée ndíí ndaācā ta tuūmī mii"? ⁹Taachí ndaācā tá nadaama tá 'ii'yā" chi n'dai ndúúcu ta ndúúcu 'ii'yā" na nii"nuu" va'ai ye"e ta ní ca"nā tá: Cuuvi yeenú nī nduucú ní di'viicu yú ti 'āā ndaācā 'áámá cáádí ye"é chí chindāi mii". ¹⁰'Úú nga"á ngíí ndís'ti caati 'tiicá ntúū" vée vaadi yeenú nguuaa" ángeles ye"é Ndyuūs cucáāvā 'áámá 'ii'yā" nuu"ndi chí nandaacadaamí yā ye"e nuu"ndi ye"e yā.

**Ejemplo ye"e sa"ā n'gaiyāā
pródigo chí s'nee" sa chiida sa**

¹¹Jesús nga"nā ntúū" yā ejemplo 'cūū: 'Áámá sa"ā vée uūvī daiya sa. ¹²Sa"ā n'gaiyāā daiya sa chí 'lín" ca mii" ca"nā sá chii sá chiida sa: N'diī, chiidá, té nī parte chí itunee" 'úú ye"e vaadi ngua'aá ye"e nī. Chiida sa ní naca"á yā ní nca'a yā sa"ā chí parte ye"e sa. ¹³Nguée chí 'naa", sa"ā 'lín" ca mii" ní nadídaamá sá tanducué"ē dēndu'ū ye"e sa. Ní cue"e ya"ai sa táámá país. Míí" ch'iinu dii" sa gastar tanducué"ē ti dii" sa nducué"ē chí nguē n'daācā. ¹⁴Ní taachi ch'iinu tuūmī ye"e sa tanducué"ē chí ca'a chiida sa, ndaā 'áámá cuicu ch'ēte na país mii". Sá"ā mii" ní ch'eenū n'dai sa chii caati nguée chí che'e sa. ¹⁵Sa"ā mii" ní ndaā sa nanáá" 'áámá 'ii'yā" ye"e país mii". Ní ca"nā sa chí ne"e sa dii" sa ntii"nyu". 'Ii'yā" mii" ní ca"nā yā chii yā sa"nā mii" chí cue"e sa tan'dúúcā mozo ye"é yā ní dii" sa cuidado cuūchí s'ee" ye"é yā. ¹⁶Sa"ā mii" ní nacádiinuu" sa chí ne"e sa che'e sa chí ye"e cuuchí s'ee" caati mar 'áámá 'ii'yā" nguée ca'a yā de'ē vee sa"ā. ¹⁷Tuu'mi ní

n'gaācu sa ní ca"ā sa nguua" maa" sa: N'deee n'dái mozos ye"e chiidá chí nge'e yā pan ní neenē n'deee chí nge'e yā vee, 'iicu 'muu" 'úú ní idií" ntii"nyu" ní ne"ē 'cuūvī chí cuicú. ¹⁸N'daa cá 'muu". Na"á n'diichí chiidá ní caa"má" cuuví 'ii'yā": N'diī chiidá vée nuū"ndi ye"e nanáá" Ndyuūs chí canée na va'ai cheeti nguuvī ní nanáá" n'diī. ¹⁹Áā ntée n'dai ca 'úú chí tune" 'úú chí caa"ma" nī chí daiya nī 'úú. Cu'neé" nī 'úú tan'dúúcā 'aama mozo ye"e nī. ²⁰Tuu'mi ní cuna"ā sa ndaā sa nanáá" chiidá sa. Taachi indái ca nndaa sa, tuu'mi ní chiida sa ní n'diichí yā sa"ā ní nnee ya'āi 'iinú yā sa"ā. Chiida sa ní cue"e yā ngeenu yā naachi canée sá ní tuma"á yā daiyá yā ní tuu'vī yā cheendi sa. ²¹Daiya yā mii" ní ca"nā sa chí sa chiida sa: N'diī, chiidá, vée nuu"ndi ye"é nanáá" Ndyuūs chí canee na va'ai cheeti nguuvī ndúúcu nanáá" n'diī. 'Áā n'tée n'dai ca 'úú chí itunee" 'úú chí caa"má" nī chí daiya nī 'úú. ²²Naati chiida sa míí" ní ca"nā yā chii yā mozos ye"e yā: Dii mozos, maa" nch'ēte nūu tun'dáa di tīnūu" chí n'dai ca ní cu'nuu" di sa"ā daiyá. Ní ca'a di chiinūta'āa cunuu" ta'ā sa ndúúcu ndaacuú chí cunuu" ca'ā sa. ²³Cué"e di canguai" di itiindu 'lín" chí 'viicheé. Ní 'caa"nu" di 'iiti chí che'e 'nū. Ní dií" 'nū 'viicu. ²⁴Ti sá"nā 'cūū daiyá cue"e sa ya"ai ní 'āā tan'dúúcā chí n'dií sá. Maa" ní navaacunee sa ní nduuchi sa. Ní tan'dúúcā chí nīndái sá ní ndaācā sa. Ní 'ii'yā" s'ee" ní yeenú taavi yā ní dií" yā 'áámá 'viicu.

²⁵Ní sa"ā daiyá yā chí vmnaa" canee sa cueeti. Ní taachí ndaā

nífnūuⁿ sa ná va'ai, ch'iindiveeⁿ sa chí itiivi saⁿā flauta ní 'iiⁿyāⁿ nde'ei yā. ²⁶Tuu'mi ní saⁿā miiⁿ ní 'cai sa 'aama mozo ní itiinguuneeⁿ sa mozo miiⁿ de'ē chí véé. ²⁷Mozo miiⁿ ní caⁿā sa chíi sa 'iiⁿyāⁿ: 'Āā ndāā 'dīinu nī. Ní nguée de'ē vee yeⁿē sa. Ní chiidā nī ní caⁿa ntiiⁿnyuⁿ yā chí ch'ii itiindu 'līiⁿ chí 'viiche. ²⁸Saⁿā miiⁿ ní nduuvī taaⁿ sa. Nguée 'cuuⁿ sa ndaā sa va'āi. Tuu'mi ní chiida sa miiⁿ ní cun'dāā yā va'āi ní d'cuítu yā daiya yā chí nuūⁿ ndaā sa va'āi. ²⁹Naati saⁿā miiⁿ ní nán'guēcútaⁿā sa yeⁿe chiida sa: 'Āā 'naaⁿ n'dái idichí'vē 'úú n'diī, ní dífⁿ tanducuéⁿē chí ngaⁿa nī ní mar 'áámá vmnéⁿēe nguée tee nī mar 'áámá 'iiti cuūchī 'līiⁿ chí 'caaⁿnúⁿ ní dífⁿ 'viicu. Ní 'úú cuuvi yeenú ndúúcu amigos yeⁿé. ³⁰Naatí taachi ndaā daiya nī sáⁿa 'cuū, 'nífⁿnuúⁿ 'tuū'vī sa tanducuéⁿē chí vaadi n'guá'āa yeⁿē sa ndúúcu n'daataa s'eeⁿ chí véé saⁿā s'eeⁿ yeⁿe. Ní ngaⁿa ntiiⁿnyúⁿ nī chí mozos ch'iiⁿnúⁿ yā itiindu 'līiⁿ chí 'viiche chí che'e sa. ³¹Tuu'mi ní chiida sa miiⁿ caⁿa yā chíi yā saⁿā: Díí, daiyá, 'áámá canee di nduucú ní tanducuéⁿē dendu'ū chíi yeⁿé ní yeⁿē di. ³²Canée chí díiⁿ yú 'viicu ti saⁿā 'diinu di chí 'úú nacadiinú chí tan'duucā chí 'āā n'díí sá ní nduuchí sa. 'Āā nindāā sa na vaacu yú ní maaⁿ ní ndaācā yú saⁿā.

**Ejemplo yeⁿe 'áámá patrón
chí nguée n'daācā díiⁿ yā
ndúúcu mozos yeⁿe yā**

16 Jesús ní caⁿa ntúuⁿ yā
chii yā discípulos yeⁿe yā:
'Áámá dueño 'cuiica s'néeⁿ 'áámá

mayordomo yeⁿē yáⁿāa yeⁿe yā. Náⁿā mozos ndaa sa nanááⁿ dueño ní tun'dáá nuuⁿndi sa yeⁿē mayordomo miiⁿ ní ngaⁿā sa de'ē chí díiⁿ mayordomo chí nguēe n'daācā ndúúcu dendu'ū chí yeⁿē dueño. ²Tuu'mi ní dueño miiⁿ ní yaa'vi yā mayordomo yeⁿe yáⁿāa ní caⁿa yā chíi yā sáⁿā: N'diī, 'de'ē 'túúca n'giindiveeⁿ yeⁿe nī? Teé nī cuenta 'úú yeⁿē ntiiⁿnyuⁿ chí díiⁿ nī tí 'āā ntée cuuví nī mayordomo. ³Saⁿā mayordomo yeⁿe yáⁿāa miiⁿ nadicádiinuⁿ sa 'túúca: 'Taācā dífⁿ maaⁿ caati dueño yeⁿe yáⁿāa ndivíi yā 'úú yeⁿe chí mayordomo 'úú yeⁿē ntiiⁿnyuⁿ? Nguée ditiinu 'úú chí dífⁿ ntiiⁿnyuⁿ chí n'gii ní nduuti chí caācā limosnas, 'cuinaāⁿ. ⁴Āā deenú de'ē chí dífⁿ ní taachi 'āā ntée ngaⁿa ntiiⁿnyúⁿ yeⁿe mayordomo tuu'mi ní amigos yeⁿé 'cuaāⁿ yā 'úú na vaacu yā. ⁵Tuu'mi ní mayordomo miiⁿ yaa'vi sa nducyáácā 'iiⁿyāⁿ chí cándíícu yā yeⁿe dueño yeⁿe yáⁿāa yeⁿe yā ní caⁿa sa chíi sa 'iiⁿyāⁿ vmnááⁿ vmnaaⁿ: 'Áá n'deēe cándíícu di yeⁿe dueño? ⁶Saⁿā miiⁿ ní caⁿa sa: 'Úú can'diicú 'áámá ciento toneles aceite. Tuu'mi ní mayordomo miiⁿ ní caⁿa sa saⁿā: Cuta'a dí caaca naachi canée nguūⁿ yeⁿē di. Cuundi dí ní n'nee nguūⁿ di 'uūvī ngēecu ndiichí toneles aceite. ⁷Ch'iinu maaⁿ ní caⁿa sa chíi sa taama saⁿā: Díí, 'Áá n'deēe cándíícu di? Saⁿā miiⁿ ní caⁿa sa: 'Úú can'diicú 'áámá ciento maquilas yeⁿē trigo. Tuu'mi ní mayordomo miiⁿ caⁿa sa: Cuta'a dí caaca naachi canée nguūⁿ yeⁿē di ní 'neeⁿ nguūⁿ di cuūuⁿ ngēecú maquilas. ⁸Tuu'mi ní dueño miiⁿ tuumicádiinuⁿ yā

yeⁿē mayordomo chi nguée n'daacā ní chuuné listo sa ndúúcū asuntos yeⁿē sa. Ní dueño míⁿ caⁿa yā chíi yā saⁿā: Tiempo miiⁿ sáⁿā chi snée iⁿ'yeeⁿdí 'cūū nguée n'daaca sa ní neene listo ca sa ndúúcū asuntos yeⁿē sa ndúúcū vaadi 'cuiica chi véé iⁿ'yeeⁿdí 'cūū nguée ti 'iiⁿ'yāⁿ chi dííⁿ yā chíiⁿ chi Ndyuūs neⁿe yā chí snée yā na dēēē.

⁹Caávā chuū 'úú ní ngaⁿá ngií ndís'tií: Ndúúcū vicios yeⁿe vaadi 'cuiica chi véé iⁿ'yeeⁿdí 'cūū dííⁿ nī n'daacā ndúúcū 'iiⁿ'yāⁿ ti véé amigos yeⁿe nī caati taachi 'cuūvi nī 'iiⁿ'yāⁿ s'eeⁿ chi nnee nī ní ngaⁿá yā: N'dai ndís'tií 'áá cuuvi ndaa nī na va'ai chēeti nguuví 'tíicā?

¹⁰'iiⁿ'yāⁿ chi n'daacā idiíⁿ yā ndúúcū cosas chi 'lííⁿ 'tiicā ntúūⁿ n'daacā idiíⁿ yā ndúúcū cosas chi n'dee n'dái ní n'gēē. ¹¹Nduuti chi ndís'tií nguée n'daacā idiíⁿ nī ndúúcū tuūmī chi véé iⁿ'yeeⁿdí 'cūū, 'du'ú 'iiⁿ'yāⁿ cuuvi teé yā ndís'tií ntiíⁿnyuⁿ yeⁿé Ndyuūs chi ntiíⁿnyuⁿ yeⁿē vaadi 'cuiica chi véé chi yeⁿé Ndyuūs? ¹²Ndúúti chi ndís'tií nguēē n'daacā idiíⁿ nī ndúúcū dendu'ū chi véé yeⁿe taamá yā, 'du'ú 'iiⁿ'yāⁿ téē yā chí véé yeⁿe nī?

¹³Mar 'áámá saⁿā nguée cuuvi diiⁿ sa mandados yeⁿe 'uūvi 'iivi sa; ti neⁿe ca sa 'aama yā nguée ti taama yā, o n'daacā ca diiⁿ sa ntiíⁿnyuⁿ yeⁿē 'aama yā nguée ti taama yā. Ndís'tií ní nguée cuuvi dichííⁿvē Ndyuūs nduuti chi neⁿe ca nī vaadi 'cuiica chi véé iⁿ'yeeⁿdí 'cūū.

¹⁴'iiⁿ'yāⁿ fariseos n'giindiveéⁿ ntúūⁿ yā dendu'ū chi 'túúcā ngaⁿa Jesús miiⁿ ní 'iiⁿ'yāⁿ s'eeⁿ dinéⁿe n'dai yā tuūmī ní yaa'vi neeⁿ yā

Jesús. ¹⁵Jesús miiⁿ ní caⁿa yā chíi yā 'iiⁿ'yāⁿ fariseos: Ndís'tií ní nadicádiinuuⁿ nī chí ndís'tií ní 'iiⁿ'yāⁿ n'dai ndís'tií nanááⁿ saⁿā iⁿ'yeeⁿdí 'cūū naati Ndyuūs ní n'diichí yā staava yeⁿe ndís'tií. Chííⁿ chí 'iiⁿ'yāⁿ nadicádiinuuⁿ yā chí ch'ēēē ca, chíiⁿ chí Ndyuūs dííⁿ yā cuenta chí nguée dē'ē vēē.

Jesús ngaⁿa yā chí ley ní n'daacā

¹⁶Ley yeⁿe Moisés ndúúcū chííⁿ chí chí'cueeⁿ profetas canee nanááⁿ ndís'tií ndíí taachi ndaā Juan chí chēedínuuⁿnī na iⁿ'yeeⁿdí 'cūū. Ndíí tiempo miiⁿ 'iiⁿ'yāⁿ caⁿa yā nduudú n'dai chí ngai yeⁿe naachí Ndyuūs ngaⁿa ntiíⁿnyúⁿ yā ní nducyáácá 'iiⁿ'yāⁿ neⁿe yā cu'téenu yā nduudu miiⁿ.

¹⁷Ngíⁿ'ií ca chí 'cuiinu nanguuvi ndúúcū na yáⁿāa nguée ti 'cuiínū 'áámá letra 'lííⁿ yeⁿe ley.

Jesús ngí'cueeⁿ yā yeⁿe divorcio

(Mt. 19.1-12; Mr. 10.1-12)

¹⁸Áā du'ú nūuⁿ sáⁿā chí cū'neeⁿ sa n'daataá yeⁿē sa ní 'caandivaacu sá ndúúcū taama tá diiⁿ nuuⁿndí sa. Sáⁿā chí cunee sá ndúúcū n'daataá chí s'neeⁿ tá isaⁿā yeⁿē tá 'āā dinuuⁿndí ntúūⁿ sa.

Yeⁿē sáⁿā 'cuiica ndúúcū saⁿā chí nguuví Lázaro

¹⁹Caⁿa Jesús: Tiempo chí chó'ōo canée 'áámá saⁿā 'cuiica chí 'nuuⁿ sa catecai n'dai sa ní diiⁿ sá 'viicu. Ní nge'e sa cosas chí n'dai nguuví nguuví. ²⁰Canée ntúūⁿ 'áámá saⁿā chí nguuví sa Lázaro chí ngiica limosnas. Ní diituú n'du'vi núúⁿmáⁿ chēēē sa. Ní vēē sa cheendi va'āi

ye^{n'}é sa^{n'}ā 'cuiica miiⁿ. ²¹ Sa^{n'}ā miiⁿ ní ne^{n'}e sa ch'e sa cosas chí ingéé ye^{n'}e mesa ye^{n'}e sa^{n'}a 'cuiicá miiⁿ. Ndaā 'yaānā s'eeⁿ naachi véé sa ní yaā'vi née ti naachí ya'āi ye^{n'}e Lázaro miiⁿ. ²² Cuayiivi miiⁿ ní ch'ií Lázaro. Ángeles ye^{n'}é Ndyuūs candéé yā Lázaro naachi canéé chiida yú Abraham na lugar paraíso chí ye^{n'}e 'ii^{n'}yāⁿ chí n'dái. Ch'ií ntúūⁿ sa^{n'}a 'cuiica miiⁿ ní ch'iíchi yā sa^{n'}ā. ²³ Taachi sá^{n'}ā 'cuiica miiⁿ ch'eenu sa chíi na infierno n'diichi sa cuaaⁿ 'niiⁿnuⁿ ní n'diichi sa chiida yú Abraham ndúúcu Lázaro miiⁿ. ²⁴ Tuu'mi ní 'caí sa^{n'}ā 'cuiica miiⁿ: N'díí, chiidá Abraham, inneé ya'ai 'iinú nī 'úú, ní dichó'o nī Lázaro chí di'caandá yā tii nduuti tá'ā nguaaⁿ nuūⁿnīⁿ ní cun'duú yā na ch'iíyá ní di'caanda ch'iíyá ti neené n'geenú ngii ná nguuchi ya^{n'}ā 'cúú. ²⁵ Abraham miiⁿ ní ca^{n'}a yā chíi yā sa^{n'}ā: Díí, daiyá, n'gaacú dí ti taachí canee dí i^{n'}yeēⁿdi miiⁿ ch'iindí ndii n'dee n'dái chí n'daācā ye^{n'}e di. Lázaro miiⁿ nguée véé ye^{n'}e sa naati maaⁿ ní 'muuⁿ ní véé 'viich'ēētífnūⁿ ye^{n'}e sa ní díí ní 'cuéénú dí cuuvi miiⁿ. ²⁶ Mííⁿ véé 'áámá yííⁿ yá^{n'}ā chí neene ch'ēete nguaaⁿ nús'uu ndúúcu ndís'tii. 'Ii^{n'}yāⁿ chí ne^{n'}e yā chó'o yā ndii 'muuⁿ ndíí naachi snée ndís'tii nguée cúúví díⁿ yā. Ndíí nguée ndúú 'ii^{n'}yāⁿ chí snée yā taa nguée cuuví cho'o yā ní ndaá yā naachi snée 'nū. ²⁷ Tuu'mi ní sa^{n'}ā 'cuiica mííⁿ nga^{n'}ā sa: N'díí, chiidá Abraham, idi'cuítú n'díí chí dichó'o nī Lázaro i^{n'}yeēⁿdi ndii vaacu chiidá, ²⁸ ti véé nyuⁿu 'diinú chí sa^{n'}ā miiⁿ ní Lázaro cuuvi sa 'diinú chí nguée ndaa yā lugar 'cūú

chí 'cueenu yā cuuvi. ²⁹ Abraham miiⁿ ní ca^{n'}a yā chíi yā sa^{n'}a: Canee nguūⁿ na libro ye^{n'}é Ndyuūs naachi canee nguūⁿ ye^{n'}e Moisés miiⁿ ndúúcu profetas ní cuuví yā 'ii^{n'}yāⁿ chí 'caandiveéⁿ yā ye^{n'}é 'ii^{n'}yāⁿ s'eeⁿ. ³⁰ Tuu'mi ní sa^{n'}ā 'cuiica miiⁿ ní ca^{n'}ā sa: N'díí, chiidá Abraham, nguée n'giindiveéⁿ yā ye^{n'}e yā. Ndúúti chí 'áámá 'ii^{n'}yāⁿ chí 'āā n'díí ca^{n'}a yā nanááⁿ 'diinú, tuu'mi ní 'caandiveéⁿ yā ye^{n'}é 'ii^{n'}yāⁿ miiⁿ ní ndaacadaamí yā ye^{n'}e nuuⁿndi chí dííⁿ yā. ³¹ Abraham miiⁿ ní ca^{n'}a yā chíi yā sa^{n'}a 'cuiica: Ndúúti chí nguée cu'téenu yā chí canéé nguūⁿ na libro ye^{n'}é Ndyuūs ye^{n'}e Moisés ndúúcu 'ii^{n'}yāⁿ profetas ndíí cuááⁿ vmnaaⁿ, nguée cu'téenu ntúuⁿ yā ye^{n'}é 'ii^{n'}yāⁿ 'cúú chí cuuví yā 'ii^{n'}yāⁿ s'eeⁿ 'áará chí 'ii^{n'}yāⁿ 'cúú ncuéeⁿ yā ye^{n'}e nguaaⁿ tina^{n'}ā.

Jesús ngi'cueeⁿ yā chí nguée canee chí dííⁿ yú nuuⁿndi

(Mt. 18.6-7; 21-22; Mr. 9.42)

17 Jesús ca^{n'}a yā chíi yā discípulos ye^{n'}e yā: Cuaacu nííⁿnyúⁿ chí véé de'e cáávā chí dííⁿ chí 'ii^{n'}yāⁿ dinuuⁿndi yā naati de'e chúúca ya'ai ye^{n'}e 'ii^{n'}yāⁿ chí dííⁿ yā chí taama 'ii^{n'}yāⁿ dinuuⁿndi yā. ² N'daācā ca chí cuuvi 'túúcā ndúúcu 'ii^{n'}yāⁿ miiⁿ. 'Ii^{n'}yāⁿ s'eeⁿ caāchiichí yā 'áámá tuūu yúúdu chí inguúⁿ 'ii^{n'}yāⁿ na daandu 'ii^{n'}yāⁿ miiⁿ ní 'caanuú yā 'ii^{n'}yāⁿ miiⁿ naachi yáānūⁿ ye^{n'}e nuuⁿní'yá^{n'}ā ní nguée cuuvi dííⁿ 'ii^{n'}yāⁿ miiⁿ chí taama da'caiyyā idinuuⁿndi yā.

³ Cundéé ndís'tii cuidado. Ndúúti 'díínu nī dinuuⁿndí sa contra ye^{n'}e 'aama nī, yaa'vi neéⁿ nī sa^{n'}ā. Ndúúti

chi ndaacadaami sa yeⁿē nuuⁿndi yeⁿē sa nadich'ēcū nī yeⁿē sa.
 4'Áará chí ndēēchē cuuvi idinuuⁿndí sa contra yeⁿe nī 'áámá nguuvi ní ndēēchē cuuvi ndaa sa nanááⁿ ndís'tiī ní caaⁿmaⁿ sa cuuvi sá ndís'tiī: Ndaacadaāmi yeⁿē nuuⁿndi yeⁿé, tuuⁿmi ní nadich'ēcū nī yeⁿē sa.

Poder yeⁿē vaadi i'teenu

5Apóstoles caⁿa yā chii yā Señor Jesús: N'dii, Señor, díⁿ nī chi nús'uu cuuvi cu'téenu cá nū.

6Tuuⁿmi Jesús caⁿa yā chii yā apóstoles: Ndúútí chi ndís'tiī duuⁿvi i'téenu nī, tuuⁿmi ní vaadi i'teenu yeⁿé nī ní tan'dúúcā 'áámá nduutí yeⁿē yiivē ntí'yaá. Ní cuuvi caaⁿmaⁿ nī 'tíicā ndúúcū yáⁿá: Díí yáⁿá cuví dí 'muuⁿ ní cueⁿe di ná nuuⁿnīⁿyáⁿá. Ní 'caandiveeⁿ yáⁿá miiⁿ yeⁿe dii.

Yeⁿe táácā cuuvi diiⁿ yú ntiiⁿnyuⁿ ndúúcū Ndyuūs 'iivu yú

7Ngaⁿa Jesús: Du'u ndís'tiī ndúútí chi vε 'áámá mozo chi di'cuündú 'iiti o diiⁿ sa cuidado 'iiti cuūchí yeⁿe nī taachi nguεεcunée sa yeⁿe campo miiⁿ, 'áá hora míⁿn nūuⁿ caaⁿmaⁿ nī cuuvi nī saⁿá?: Cho'o di 'cuündí di na mesa. 8'Áá nguée vmnááⁿ vmnaaⁿ caaⁿmaⁿ nī cuuvi nī mozo miiⁿ 'tíicā?: N'nuuⁿ di chi che'e nguīnu yú. Ní 'cuiinduū di yeⁿé na mesa, 'cuii di ní 'úú cu'ú che'é. 'Cuiinu che'é 'cuiinu cu'ú tuuⁿmi ní dii cuuvi ch'é di cu'u di. 9'Áá aama patrón nca'a yā gracias mozo miiⁿ ti diiⁿ sa mandados chi cāⁿa patrón yeⁿē sa? Nguée díⁿ yā 'tíicā. 10'Tiicā ntūūⁿ, ndís'tiī, taachí

'cuiinu díⁿ nī tanducuéⁿē ntiiⁿnyuⁿ chí ngaⁿá Ndyuūs ndís'tiī, tuuⁿmi ní caaⁿmaⁿ nī 'tiicā: Ndyuūs, nús'uu ní mozos yeⁿe nī naati nús'uu ní díⁿ 'nū dámaāⁿ chi canee chi díⁿ 'nū.

Jesús idiíⁿ yā chi nduūvā yeⁿe ndiichi 'iiⁿyāⁿ yeⁿe ca'āi lepra chi ín'duuti yuūtē yeⁿe yā

11Taachí Jesús miiⁿ canúuⁿ yā yúúⁿ chí cueⁿe yā na yāāⁿ Jerusalén, cho'ó yā naavtaⁿā yeⁿe na 'uuví yáⁿāa chi Samaria ndúúcū Galilea. 12Ní taachí Jesús sndaā yā 'áámá yāāⁿ 'lííⁿ snée ndiichi saⁿā chí induuti yuūtē yeⁿē sa chi ndii sa ca'ai lepra. Ndaā sa nanááⁿ Jesús miiⁿ ní ch'éétíndii yaⁿai sa. 13Ní 'cai sa: N'dii, 'iivú Jesús, nnée ya'ai 'iinu nī nús'uu.

14Taachí Jesús n'diichi yā saⁿā s'eeⁿ, tuuⁿmi ní yaaⁿvi yā: Ndís'tiī, cueⁿe nī ní 'cuuⁿmiⁿ nī nanááⁿ chiiduú s'eeⁿ. Ch'íínú caⁿa Jesús ndúúdú 'cūū saⁿā s'eeⁿ ní nduuvá yeⁿe sa. 15Tuuⁿmi 'áámá chée saⁿā s'eeⁿ taachí n'diichi yā chi 'āā nduuvá yeⁿe yā, nguεεcunée yā ní cheⁿe yā naachi canée Jesús miiⁿ ní caⁿa yuudu yā: Dε'ε chúúcā ch'εete Ndyuūs. 16Ní chiintii'yā yā nanááⁿ Jesús ní chi snaaⁿ na yáⁿāa, ní ca'a yā gracias 'iiⁿyāⁿ. Saⁿā miiⁿ ní 'áámá saⁿā yeⁿe yáⁿāa Samaria. 17Tuuⁿmi ní Jesús miiⁿ caⁿa yā: 'Áá nguεε ndiichi saⁿā chí nduūvā yeⁿē sa? Ta nuuⁿ sa, 'tíi snée sa? 18'Áá nguεε táámá yā chí canée chi caaⁿmaⁿ yā chi ch'εete Dendyuūs? Dámaāⁿ saⁿā miiⁿ chi canuuⁿ yúúⁿ chí ca'a sa gracias.

19Tuuⁿmi ní Jesús caⁿa yā chii yā saⁿā chí ngiita miiⁿ: Nducueeⁿ dí.

Cúnaⁿā di. 'Āā nanduuva yeⁿē di
caati i'téenu nī.

**Yeⁿe taaca Ndyuūs ngaⁿa ntiiⁿnyúⁿ
yā**

(Mt. 24.23-28, 36-41)

²⁰Taachí 'iiⁿyāⁿ fariseos
intínguúneeⁿ yā Jesús miiⁿ:
¿Tíí cua'a ndáá naachí Ndyuūs
ngaⁿa ntiiⁿnyúⁿ yā? Jesús miiⁿ ní
nan'guεεcútaⁿa yā: Naachí Ndyuūs
ngaⁿa ntiiⁿnyúⁿ yā nguée ndaa
tan'dúúca 'áamá manera chi ndís'tii
cunee ngiinú nī yeⁿē. ²¹Ní nguée
ndúú 'iiⁿyāⁿ caaⁿmaⁿ ra yā 'tíicā:
'Muuⁿ canee o miiⁿ canee ti Ndyuūs
'āā ngaⁿa ntiiⁿnyúⁿ yā nguaaⁿ
ndís'tii.

²²Tuu'mi ní Jesús caⁿa yā chii
yā discípulos yeⁿe yā: Tiempo
miiⁿ ndaa nguuvu taachi ndís'tii
neⁿe nī snaaⁿ nī taachi canée Saⁿā
chi Daiya Dendyuūs, naati nguée
snaaⁿ nī saⁿā miiⁿ. ²³Ní 'iiⁿyāⁿ
caaⁿmaⁿ yā cuuvi yā nduudu yaadi
ndís'tii: 'Muuⁿ canée Saⁿa chi Daiya
Dendyuūs, o miiⁿ canee sa. Nguée
caⁿa nī ndíí nguée ndúú can'dáa
nī 'iiⁿyāⁿ cuayiivi. ²⁴Tan'dúúca
chi inaaⁿ yú chí ngéⁿé 'cuai maaⁿ
nchεεté nūuⁿ ngiiyā, 'tiicá ntúūⁿ
cuuvi taachi 'úú chi Saⁿā chi
Daiya Dendyuūs ndaa nguuvu miiⁿ.
²⁵Naati vmnááⁿ vmnaaⁿ 'úú chi
Saⁿā chi Daiya Ndyuūs ní neené
'cuenú cuuvi. Ní 'iiⁿyāⁿ chi maaⁿ
snée iⁿ'yeeⁿdí 'cūū díⁿ yā condenar
'úú. ²⁶Tan'dúúca chi canee tiempo
chi 'āā chó'oo taachí canee saⁿā
Noé iⁿ'yééⁿdi 'cūū, 'tiicá ntúūⁿ
cuuvi tiempo yeⁿē Saⁿa chi Daiyā
Dendyuūs taachi ndaa sa. ²⁷Tiempo
yeⁿe Noé 'iiⁿyāⁿ s'eeⁿ ngé'e yā ngi'i

yā ní n'gíindivaacu yā. Ní ca'a yā
daiya yā chí n'giindivaacu ndii
nguuvu chi Noé sndaá yā na arca.
Tuu'mi ní chee taaⁿ cuūvi ní chiitu
iⁿ'yeeⁿdí 'cūū ndúúcu nuūⁿnīⁿ ní
ch'iī nducyaaca 'iiⁿyāⁿ. ²⁸'Tiicá ntúūⁿ
chii tiempo chi 'āā chó'oo taachi
canee saⁿa Lot iⁿ'yeeⁿdí 'cūū. 'Iiⁿyāⁿ
s'eeⁿ nge'e yā ngi'i yā. Ngai yā ní
n'diicui yā. Ní ngiinú yā ní idin'dái
yā vaacu yā. ²⁹Taachi can'daā saⁿā
Lot miiⁿ ná yāāⁿ Sodoma chi cheeⁿ
nguuchi yaⁿā ndúúcu azufre chí
tuūú chí ngiichi chí yeⁿe nanguuvi.
Cáávā chuū ch'iī nducyaaca 'iiⁿyāⁿ
na yāāⁿ miiⁿ. ³⁰'Tíicā cuuvi nguuvu
miiⁿ taachi 'úú Saⁿā chi Daiya
Dendyuūs ndaa taama vmnéⁿēe.

³¹Ní nguūvi chi ndaa, taachí
'iiⁿyāⁿ chi snée yā tííⁿ va'āi n'daacā
ca chi 'iiⁿyāⁿ miiⁿ ní nguée nch'éeⁿ
yā ní cuta'a yā dendu'ū chí véé
yeⁿe yā chεεtí va'āi. 'Tiicá ntúūⁿ
'iiⁿyāⁿ chí snée yā cuεeti n'daacā
ca chí nguée naⁿa yā nduvaacu yā.
³²Nan'gáácú nī tan'dúúca chí ch'iī
n'daataa yéⁿē saⁿā Lot. ³³'Āā du'ú
nūuⁿ 'iiⁿyāⁿ chí neⁿe cá yā vida
yeⁿe yā nguée ti 'úú, dindaí yā
táámá vida yeⁿe yā. 'Āā du'ú nūuⁿ
'iiⁿyāⁿ chí dichí'vε yā 'úú ní dindaí
yā vida yeⁿe maáⁿ yā cucáávā 'úú,
ní nndaacá yā táámá vida yeⁿe yā.

³⁴'Úú ngaⁿá ngií ndís'tii chí
nguūnū miiⁿ 'uuvu yā chí ndiiti
yā na 'áámá cama, 'aama yā ní
ndaā naáⁿ ní taama yā ní canee
yā. ³⁵Nífcú naachi 'uuvu n'daataa
daama snee ta ingúu tá, 'aama ta ní
ndaā naáⁿ tá ní taama tá ní canee
ta. ³⁶Naachí 'uūvi yā snée yā cuεeti,
'áámá yā nī ndaa naáⁿ yā, nífcú
taama yā ní canee yā.

³⁷Taachí 'iiⁿ'yāⁿ s'eeⁿ ch'iindiveéⁿ yā chuū itinguuneéⁿ Jesús: Señor, ɛtíí cuuví chuū? Jesús miiⁿ ní caⁿ'a yā yeⁿ'e tiempo miiⁿ: Naachi candiití cuerpo yeⁿ'e tináⁿ'ā, miiⁿ ní nduuvidaamá luutí ní che'e tī, tuuⁿ'mi ní cuuví chuū.

**Ejemplo yeⁿ'ē n'daataa nguá'āa
chí cueⁿ'e tá nanaaⁿ juez
ndúúcū 'áámá asunto**

18 Jesús caⁿ'a yā 'aama ejemplo chí 'téé nguéeⁿ daama yeⁿ'e chí 'iiⁿ'yāⁿ canéeⁿ chí caaⁿ'maⁿngua'á yā cuéⁿ'é daāⁿ'maⁿ nguéeⁿ ndúúcū vaadí 'daandí. ²Ní caⁿ'a yā chí yā 'iiⁿ'yāⁿ s'eeⁿ ejemplo 'cūū: Canéeⁿ 'áámá juez na 'aama yāāⁿ chí nguéeⁿ 'va'a sa Dendyuūs. Ní ndíí nguéeⁿ ndúú idiiⁿ rá yā respetar 'iiⁿ'yāⁿ chí ch'iindiveéⁿ yā asuntos yeⁿ'e yā. ³Canéeⁿ ntúūⁿ na yāāⁿ miiⁿ 'áámá n'daataa nguá'āa chí ndaa yā nguuví nguuví nanááⁿ juez miiⁿ ní ngiica tá justicia juez yeⁿ'e 'iiⁿ'yāⁿ chí taaⁿ ndúúcu tá. ⁴Juez miiⁿ ní nguéeⁿ 'cuuⁿ yā 'naaⁿ tiempo naati cuayiivi nadicádiinuⁿ yā: 'Áará chí nguéeⁿ 'va'á Dendyuūs ndíí nguéeⁿ ndúú idiiⁿ rá respetar 'iiⁿ'yāⁿ, ⁵naati n'daata nguá'āa 'cūū néené ididú'ū ta 'úú ní maaⁿ ní caⁿ'á dííⁿ n'daacā ndúúcū tá chí 'āā ntéeⁿ candii tá dindú'ū ta ti 'cuiinu paciencia yeⁿ'é.

⁶Naati Señor miiⁿ caⁿ'a yā: 'Caandiveéⁿ nī chí ngaⁿ'ā juez chí nguéeⁿ n'daacā táácā idiíⁿ yā. ⁷ɛ'Áá Ndyuūs nguē nnee ntúūⁿ yā 'iiⁿ'yāⁿ chí ndēeve yā, 'iiⁿ'yāⁿ chí caaⁿ'maⁿngua'á yā ndii nguuví ndíí n'gaaⁿ ní Ndyuūs dííⁿ yā castigar 'iiⁿ'yāⁿ chí contra yeⁿ'e 'iiⁿ'yāⁿ chí ndēeve yā? ɛ'Áá cuuvi 'naaⁿ Ndyuūs

chí cunnee yā 'iiⁿ'yāⁿ? Nguéeⁿ 'tíicā.

⁸Úú ní ngaⁿ'á ngíí ndís'tií chí Ndyuūs maaⁿ nch'etée nadanguáⁿ'ai yā 'iiⁿ'yāⁿ. Naati taachi 'úú chí Saⁿ'ā chí Daiya Dendyuūs ndaá, ɛ'áá nndaaca ntúūⁿ 'iiⁿ'yāⁿ chí i'téenu yā Ndyuūs ná iⁿ'yeeⁿdí 'cūū?

**Saⁿ'ā fariseo ndúúcu saⁿ'ā
chí inn'guē yeⁿ'e yáⁿ'āa**

⁹Jesús caⁿ'a yā ejemplo 'cūū chí 'téé nguéeⁿ dáámá caava n'dúúví 'iiⁿ'yāⁿ chí idin'geeté maáⁿ yā ní nguéeⁿ dííⁿ yā respetar tanáⁿ'ā 'iiⁿ'yāⁿ. Ní caⁿ'a yā: ¹⁰Na 'úúví saⁿ'ā cheⁿ'e sa yáacū templo chí caaⁿ'maⁿngua'ā sa. 'Aama sa ní saⁿ'ā fariseo, taama sa ní saⁿ'ā chí inn'guē yeⁿ'e yáⁿ'āa. ¹¹Saⁿ'ā fariseo chí ndii sa ní 'túúcā caⁿ'angua'a sa: N'díí Señor, ntee gracias n'díí ti 'úú ní nguéeⁿ tan'dúúcā tanáⁿ'ā saⁿ'a 'cūū. 'Úú nguéeⁿ ididuucú, nguéeⁿ yáádíí'yā 'úú, nguéeⁿ caⁿ'á ndúúcū taama n'daataá chí nguē n'daataá yeⁿ'é, nguéeⁿ idiíⁿ tan'dúúcā chí idiíⁿ saⁿ'a 'cūū chí inn'guē sa yeⁿ'ē yáⁿ'āa. ¹²Úú ní nguéeⁿ nga'diiⁿ'núⁿ 'uūví cuuvi 'áámá ndēete taachi caaⁿ'maⁿngua'á. 'Úú ní teé décima yeⁿ'e tanducuéⁿ'ē chí véé yeⁿ'é chí lado yeⁿ'e Ndyuūs chíⁿ chí tunéeⁿ Ndyuūs. ¹³Naati saⁿ'ā chí inn'guē yeⁿ'e yáⁿ'āa yaⁿ'ai canee sa ní nguéeⁿ neⁿ'e sa snaaⁿ sa nánguuví. Dámaāⁿ chí n'geⁿ'e sá niiⁿ'nuⁿ sa ní ngaⁿ'ā sa: N'díí Ndyuūs, ya'ai 'iinu nī 'úú, ti 'úú 'iiⁿ'yāⁿ nuūⁿ'ndí 'úú. ¹⁴Úú ngaⁿ'á ngíí ndís'tií: Sáⁿ'a 'cūū cūnaⁿ'ā sá ndavaacu sa ní Ndyuūs nadich'ecú yā nuuⁿ'ndi yeⁿ'ē sa. Saⁿ'ā fariseo miiⁿ nguéeⁿ 'tíicā. 'Áa du'ú nuūⁿ 'iiⁿ'yāⁿ chí dich'etée maāⁿ, cuuví yā

ndicúuⁿ nanááⁿ Ndyuūs. Ní 'iiⁿyāⁿ chí nguéeⁿ dich'etéⁿ maáⁿ yā 'iiⁿyāⁿ, Ndyuūs dich'etéⁿ yā 'iiⁿyāⁿ miⁿ.

Jesús idi'viicú yā da'caiyāa

(Mt. 19.13-15; Mr. 10.13-16)

¹⁵'Iiⁿyāⁿ ní candee yā da'cáiyāa nanááⁿ Jesús ní 'iicu Jesús tuu'ví yā da'cáiyāa. Taachí discípuos yeⁿe Jesús n'diichi yā chuū, yaa'vi née yā 'iiⁿyāⁿ s'eeⁿ chí indáa yā ndúúcú dá'caiyāa. ¹⁶Tuu'mi ní Jesús yaa'vi yā discípuos yeⁿe yā ní caⁿa yā: 'Cuááⁿ nī chí dá'caiyāa chíi yā nanaáⁿ. Nguéeⁿ 'caaca taaⁿ nī caati naachí Ndyuūs ngaⁿa ntiiⁿnyúⁿ yā ní yeⁿe 'iiⁿyāⁿ chí ndiicuúⁿ yā tan'dúúcā dá'caiyāa. ¹⁷Cuaacu nííⁿnyúⁿ ngaⁿá ngíí ndís'tii: 'Iiⁿyāⁿ chí nguéeⁿ cu'téenu yā Ndyuūs tan'dúúcā 'áamá dá'caiyāa i'téenu yā nguéeⁿ cuuví ndaa yā naachí ngaⁿa ntiiⁿnyuⁿ yā.

'Áamá saⁿā chí 'cuiica ndeē sa ndúúcú Jesús

(Mt. 19.16-30; Mr. 10.17-31)

¹⁸'Áamá saⁿā chí ngaⁿā ntiiⁿnyuⁿ sa itínguuneeⁿ sa Jesús miⁿ: N'díí, Maestro chí n'dai, ¿de'e cuuvi dííⁿ ní ndaācā vida cueⁿe daāⁿmaⁿ chí cuuvi yeⁿé?

¹⁹Jesús ní caⁿa yā chíi yā saⁿā: ¿De'e cúuví chí ngaⁿa di ngii di 'úú chí 'úú n'dai 'úú? Mar 'áamá 'iiⁿyāⁿ nguéeⁿ n'dai yā, dámaāⁿ Dendyuūs. ²⁰Dii ní déenu di chí canéeⁿ nguūⁿ na ley 'tíicā: Nguéeⁿ 'caāⁿnūⁿ di; nguéeⁿ caⁿa di ndúúcú táámá n'daataá chí nguē yeⁿe di; nguē diduucú di; nguéeⁿ caaⁿmaⁿ di nduudu yaadi ndúúcú mar 'áamá 'iiⁿyāⁿ; dinéⁿe di ch'ecú di ndúúcú chiida di.

²¹Saⁿā miⁿ n'guēcútaⁿā sa ní caⁿā sa: Tanducueⁿē chuū 'āā idííⁿ taachi saⁿā 'lífⁿ 'úú.

²²Taachí Jesús ch'iindiveeⁿ yā chuū, caⁿa yā chíi yā saⁿā: Véé 'áamá cosa nūuⁿ chí canéeⁿ chí diiⁿ di. N'diicui dí tanducueⁿē chí véé yeⁿe di ní caⁿa di 'iiⁿyāⁿ chí nguéeⁿ yeⁿe yā, ní ndaācā chí véé vaadi 'cuiica na va'ai ch'eti nguuví chí cuuvi yeⁿe di. Ní cuchíí di ní caⁿa di nduucú.

²³Taachí saⁿā miⁿ ch'iindiveeⁿ sá chuū, neenē s'neeⁿ ndaachíí yiinú sa, ti neenē 'cuiica sa. ²⁴Ní taachí Jesús n'diichi yā saⁿā miⁿ chí neenē s'neeⁿ ndaachi yiinú sa, tuu'mi ní caⁿa yā: De'e chúúcā ngíⁿíi chí cundaa 'iiⁿyāⁿ chí 'cuiica naachí Ndyuūs ngaⁿa ntiiⁿnyúⁿ yā. ²⁵Ní tan'dúúcā ejemplo 'cūū 'tíicā. Nguéeⁿ ngíⁿíi cá yeⁿe 'áamá 'iiti camello chí ch'ete cá ti 'yúúdūu chí cho'ó tī nduutinááⁿ 'iini chí cheendi va'ai 'lífⁿ nguéeⁿ ti 'aama saⁿā chí 'cuiica i'téenu sa Ndyuūs ní cundáa sa na va'ai ch'eti nguuví.

²⁶Taachi discípuos n'giindiveeⁿ yā chuū, caⁿa yā: ¿Du'ū cuuví nánguāⁿāi?

²⁷Ní Jesús caⁿa yā: Saⁿā iⁿ'yeeⁿdí 'cūū nguéeⁿ ngíí diiⁿ sa chuū naati Ndyuūs cuuvi dííⁿ yā tanducueⁿē.

²⁸Tuu'mi ní Pedro miⁿ ní caⁿa yā: Señor, cuin'dííchí nī. Nús'uu ní s'neeⁿ nū chí véé yeⁿe 'nū, ní cuchíí 'nū ndúúcú nī.

²⁹Jesús miⁿ ní caⁿa yā chíi yā 'iiⁿyāⁿ s'eeⁿ: Cuaacu nííⁿnyúⁿ ngaⁿá ngíí ndís'tii chí 'āā du'ú nūuⁿ 'iiⁿyāⁿ chí cu'nee yā vaacu yā, o chíidá yā, o ch'ecú yā, o 'díínu yā, o n'daataá yeⁿe yā, o daiya yā, cáávā chí dííⁿ yā ntiiⁿnyuⁿ yeⁿé naachí

Ndyuūs ngaⁿa ntiⁿnyúⁿ yā, ³⁰'iⁿyāⁿ miiⁿ n'deēe ca ndaācā yeⁿe yā ná iⁿ'yeeⁿdí cūū. Ní cuayiivi ní ndaaca yā vida cueⁿe daāⁿmaⁿ ná va'ai cheeti nguuvu.

Jesús ngaⁿa yā chi 'cuūvi yā

(Mt. 20.17-19; Mr. 10.32-34)

³¹Jesús cueⁿe yā 'áámá lado ndúúcū ndu'ū ndiichúúví discípulos yeⁿe yā ní caⁿa yā chii yā 'iⁿ'yāⁿ s'eeⁿ: Maaⁿ ní caⁿ'ā yú na yāāⁿ Jerusalén ní miiⁿ cūnuuⁿ ca'a tanducueⁿ'ē chi profetas dingúuⁿ yā ndíí cuááⁿ vmnaaⁿ yeⁿe 'úú chi Saⁿ'ā chi Daiya Dendyuūs. ³²Ní 'iⁿ'yāⁿ s'eeⁿ dííⁿ yā entregar 'úú 'iⁿ'yāⁿ chi nguéé yeⁿe ndaata Israel. Ní 'iⁿ'yāⁿ s'uuⁿ ní dūūchinéeⁿ yā 'úú ní dííⁿ taaⁿ yā nduucú níícu ca'a neeⁿ daíⁿ yā 'úú. ³³Cuíínú 'cueⁿ'é yā 'úú ní caaⁿ'núⁿ yā 'úú naati 'cuíínú 'iínū nguuvu ní nnduūchí yeⁿe nguaaⁿ tináⁿā.

³⁴Discípulos s'eeⁿ nguéé tuumicádíínuuⁿ yā yeⁿ'é dendū'u 'cūū ti canúúⁿ n'de'ei yeⁿ'e 'iⁿ'yāⁿ s'eeⁿ. Nguéé tuumicádíínuuⁿ yā de'ē chi caⁿ'a Jesús.

Jesús dííⁿ yā chi nduūvā yeⁿ'e 'áámá saⁿ'ā chi ngueenááⁿ yeⁿ'e yāāⁿ Jericó

(Mt. 20.29-34; Mr. 10.46-52)

³⁵Taachí Jesús ndaā niiⁿnuúⁿ yā na yāāⁿ Jericó, 'áámá saⁿ'ā ngueenááⁿ véé sa niiⁿnuúⁿ cyúúní. Ngiica sá limosnas. ³⁶Sáⁿa 'cūū tááchí ch'iindiveeⁿ sa chí cho'ó n'deēe n'dái 'iⁿ'yāⁿ, itiinguunéeⁿ sá: ¿Dé'ē chí chii?

³⁷Ní 'iⁿ'yāⁿ caⁿ'a yā chii yā saⁿ'ā chi ngueenááⁿ chí chó'oo Jesús chí yeⁿ'e yāāⁿ Nazaret. ³⁸Tuu'mi ní saⁿ'ā

nguéeⁿnaaⁿ miiⁿ 'caí sa: N'díí Jesús, Daiya David, nneé ya'ai 'iinu ní 'úú.

³⁹'iⁿ'yāⁿ chí cueⁿ'e vmnaaⁿ yeⁿ'e Jesús ngaⁿa yā ngii yā saⁿ'ā miiⁿ chí 'āā ntéé 'cuai sa, naati saⁿ'ā miiⁿ ní n'gai yiicu ca sa: N'díí, Daiya David, nneé ya'ai 'iinu ní 'úú.

⁴⁰Tuu'mi ní Jesús miiⁿ chééndii yā ní caⁿ'a yā chí canguai yā saⁿ'a chí nguéé inaaⁿ. Taachí saⁿ'ā miiⁿ ndaā sa nanááⁿ Jesús, Jesús miiⁿ ní itiinguunéeⁿ yā saⁿ'ā: ⁴¹¿De'ē neⁿ'e di chí dííⁿ ndúúcū díí? Saⁿ'ā miiⁿ ní caⁿ'ā sa: Señor, dííⁿ ní chí snāⁿ.

⁴²Jesús caⁿ'a yā chii yā saⁿ'ā: Cáávā chí i'téenu di nduūvā yeⁿ'e di.

⁴³Tuu'mí nūuⁿ snaaⁿ sa ní cuéⁿ'e sa ndúúcū Jesús. Ní ngaⁿ'a sa: De'e chúúcā ch'ēete Ndyuūs. Ní nducyaaca 'iⁿ'yāⁿ yeⁿ'e yāāⁿ miiⁿ chí n'diichí yā chuū ní caⁿ'a yā: De'ē chúúcā ch'ēete Dendyuūs.

Jesús ndúúcū saⁿ'ā chí nguuvu Zaqueo

19 Taachí Jesús sndaa yā na yāāⁿ Jericó, cánúuⁿ yā yúúní ní cho'ó yā náávtaⁿ'ā yāāⁿ Jericó miiⁿ. ²Na yāāⁿ miiⁿ canee 'áámá saⁿ'ā chí 'cuiica sa chí nguuvu sa Zaqueo. Saⁿ'ā miiⁿ, ní saⁿ'ā ndíí tiiⁿ yeⁿ'é 'iⁿ'yāⁿ chí inn'guee yeⁿ'e impuestos yeⁿ'e yáⁿ'āa. ³Saⁿ'a miiⁿ ní neⁿ'e sa snaaⁿ sa cheé yā chí Jesús miiⁿ naati nguéé ngii inaaⁿ sa ti neené n'deēe 'iⁿ'yāⁿ ti nguéé yaacu sá. ⁴Tuu'mi ní cueⁿ'e sa ngéenu sa cuááⁿ vmnaaⁿ ní cuchēē sá 'áámá tiiⁿ yáⁿ'á sicómoro caati cuuvi sa snaaⁿ sa 'iⁿ'yāⁿ, ti Jesús miiⁿ canee chí cho'ó yā miiⁿ. ⁵Taachí Jesús miiⁿ ndaá yā miiⁿ, n'diichí yā Zaqueo miiⁿ, ní caⁿ'a

yā chii yā saⁿā: Díí, Zaqueo, maaⁿ nch'etété nūuⁿ nch'éeⁿ dí ti maaⁿ ní neⁿé cuneé na vaacu dí.

⁶Tuu'mí ní Zaqueo miiⁿ maaⁿ nch'etété nūuⁿ nch'éeⁿ sa ní 'cuuⁿ sa chí cueⁿe Jesús miiⁿ ndúúcu sa na vaacu sa. Ní yeenú taavi sa. ⁷Taachí 'iiⁿyāⁿ n'diichí yā chuū, nducyaaca yā ní neené n'deē caⁿa yā. Ní caⁿa yā chí Jesús miiⁿ ní chinndaá yā chí cunee yā ndúúcu 'aama saⁿā chí véé nuuⁿndi yeⁿé sa. ⁸Tuu'mi ní taachi ch'iindiveeⁿ Zaqueo chuū, chéendii sa nanááⁿ Jesús miiⁿ ní caⁿa sá chii sa 'iiⁿyāⁿ: Señor, 'caandiveeⁿ ní yeⁿé. Ná maⁿa chí véé yeⁿé caⁿa 'iiⁿyāⁿ chí nguéeⁿ yeⁿe yā. Ndúúti chí deⁿé ndivií yeⁿé 'áámá 'iiⁿyāⁿ, tuu'mi ní n'guεεcunee cuūuⁿ tanto yeⁿe yā.

⁹Jesús caⁿa yā chí yā saⁿā: Maaⁿ ní nguáⁿ 'iiⁿyāⁿ yeⁿe va'ai Zaqueo yeⁿe nuuⁿndi yeⁿe yā ti Zaqueo miiⁿ ní yeⁿe ndaata Abraham. ¹⁰Ti 'úú chí Saⁿā chí Daiya Dendyuūs ní ndaá chí in'nuūⁿ ní 'úú nadinguaⁿ 'ái 'iiⁿyāⁿ chí nindái ndúúcu nuūⁿndi yeⁿe yā.

Ejemplo yeⁿe dueño chí ca'a tuumí mozos yeⁿé yā chí cuuvi diiⁿ sa negocio

¹¹Taachí Jesús miiⁿ 'āā canée niiⁿnúⁿ yā na yāāⁿ Jerusalén, 'iiⁿyāⁿ chí ch'iindiveeⁿ yā chuū nadicádíínuuⁿ yā chí 'āā maáⁿ nūuⁿ ndaá naachi Ndyuūs ngaⁿa ntiiⁿnyuⁿ yā. Tuu'mi ní Jesús miiⁿ ní caⁿa yā 'áámá ejemplo. ¹²'Áámá saⁿā chí n'dai chí yeⁿe familia chí ngaⁿā ntiiⁿnyuⁿ cueⁿe sa na 'aama país chí yaⁿai chí cunee sa rey yeⁿé país miiⁿ. Cueⁿe sa ní cuayiivi nguεεcunee sa. ¹³Taachi

'āā cháā caⁿā sa, yaaⁿvi sa ndiichi saⁿā mozos yeⁿé sa ní ca'a sa 'áámá cáádí 'diiⁿnguāⁿ 'áámá 'áámá mozo yeⁿé sa. Ní caⁿa sa chí sa mozos: Dííⁿ ní negocio ndúúcu tuumí 'cūū nuuⁿmaⁿ neⁿe chí caⁿā. ¹⁴'Iiⁿyāⁿ yeⁿe país chí yaⁿai nguéeⁿ neⁿe yā saⁿa miiⁿ ní nguéeⁿ neⁿé yā chí cuuvi rey yeⁿé yā saⁿā. Dich'óo yā n'duuví 'iiⁿyāⁿ chí caaⁿmaⁿ ya 'túúca: Nguéeⁿ neⁿe 'nū chí saⁿā 'cūū ní cúuvi sá rey yeⁿé nús'uu. ¹⁵Saⁿā miiⁿ chí rey chí ngaⁿa ntiiⁿnyúⁿ yā cueⁿe yā ní nguεεcunee yā ndāā yā na vaacu yā. Dich'óo sa 'iiⁿyāⁿ chí yaaⁿvi yā mozos chí ca'a sa tuumí miiⁿ chí ndaa sa nanáāⁿ yā ní cuuvi cadíínuuⁿ yā, 'áá n'deē daiyā tuumi ndaacā 'aama 'aama yā? ¹⁶Ndaa saⁿā chí vmnááⁿ vmnaaⁿ ní caⁿa sa chí sa 'iiⁿyāⁿ: N'dií, señor, yeⁿe 'aama caadi 'díínguāⁿ yeⁿe ní, daiya túumí miiⁿ diiⁿ ganar ndiichi caadi 'díínguāⁿ. ¹⁷'Iiⁿyāⁿ 'cuiica miiⁿ ní caⁿa yā chí yā mozo miiⁿ: Díí, n'daacā diiⁿ di; ní díí 'áámá mozo chí n'dai. Tan'dúúca chí n'daacā chí diiⁿ di ndúúcu chí 'téé chí téé dii maaⁿ ní díí ní caaⁿmaⁿ ntiiⁿnyuⁿ di yeⁿé ndiichi yāāⁿ. ¹⁸Cuayiivi ndaā táámá sá ní caⁿā sa: N'dií, señor, yeⁿe 'aama caadi 'díínguāⁿ yeⁿe ní, daiya tuumí miiⁿ diiⁿ ganar nyuⁿu cáádí 'díínguāⁿ. ¹⁹Tuu'mi ní caⁿa 'iiⁿyāⁿ 'cuiica miiⁿ chí yā mozo 'cūū: 'Tiicá ntuūⁿ dii ní caaⁿmaⁿ ntiiⁿnyuⁿ di yeⁿé nyuⁿu yāāⁿ. ²⁰Ndaā táámá mozo ní caⁿā sa chí sa 'iiⁿyāⁿ 'cuiica miiⁿ: N'dií, señor, ingāā tuumí yeⁿe ní chí cachiichí na pañuelo ní chí'neeⁿ n'dai. ²¹'Úú ní va'a n'dií ti neené cheechí n'dií chí nanguai ní cosas

naachi nguée idííⁿ nī ntiiⁿnyuⁿ
 ní ndúúcu tuūmī yeⁿé nī dííⁿ nī
 cosechar naachi nguée nīⁿnuⁿ nī ti
 yeⁿé nī. ²²Tuu'mi ní 'iíⁿyāⁿ 'cuiica
 miiⁿ caⁿa yā chii yā mozo miiⁿ:
 Díí, mozo chi nguée n'daacā idiiⁿ
 di, cáávā nduudu chi ngaⁿa di
 canee di condenado. Dii ní déenu
 di chi chēēchi 'úú ní nanangaáⁿ chi
 nguée yeⁿé nī idííⁿ cosechar chi
 nguée dííⁿ ntiiⁿnyuⁿ ti yeⁿé. ²³¿De'e
 cúúví chí nguée s'nuūⁿ di tuūmī
 yeⁿé na banco? Maaⁿ níícu taachi
 nindaá ni cuta'á tuūmī yeⁿé ndúúcu
 daiya. ²⁴Tuu'mi ní 'iíⁿyāⁿ 'cuiica
 caⁿa yā chii yā 'iíⁿyāⁿ s'eeⁿ chi
 snée yā miiⁿ: Divíi nī tuūmī yeⁿe
 sa ní ca'á nī saⁿa chi véé n'diichí
 caadi 'dííⁿnguāaⁿ yeⁿe sa. ²⁵'Iíⁿyāⁿ
 s'eeⁿ ní caⁿa yā: N'dií, señor, saⁿā
 miiⁿ ní 'āā véé ndiichi cáádí
 'dííⁿnguāaⁿ yeⁿe sa. ²⁶'Iíⁿyāⁿ 'cuiica
 nan'guēcútaⁿa yā ní caⁿa yā: 'Úú
 ní ngaⁿá ngíi ndís'tií chi 'iíⁿyāⁿ chi
 véé yeⁿe yā cuta'a cá yā chi cuuvi
 yeⁿe yā naati 'iíⁿyāⁿ chi dúú'vī vee
 yeⁿe yā 'téé chí véé yeⁿe yā ní 'iíⁿyāⁿ
 ndivíi yā yeⁿe yā. ²⁷'Tiicá ntúūⁿ,
 'iíⁿyāⁿ chi nguée neⁿe n'diichí yā chi
 táaⁿ yā nduucú, ní nguée neⁿe yā
 chi 'úú cuuvi rey yeⁿe yā, tuu'mi ní
 candée nī 'iíⁿyāⁿ s'eeⁿ nanaáⁿ 'muuⁿ
 ní 'caaⁿnuⁿ nī 'iíⁿyāⁿ 'muuⁿ.

Jesús ndáa yā na yāāⁿ Jerusalén

(Mt. 21.1-11; Mr. 11.1-11; Jn. 12.12-19)

²⁸Ch'íínú caⁿa yā chuū, Jesús
 cueⁿe yā cuááⁿ vmnaaⁿ ní cueⁿé
 yā ní ndaa yā na yāāⁿ Jerusalén.
 Cuayiivi cueⁿe ntúūⁿ discípulos
 yeⁿe yā. ²⁹Taachí ndaa nīⁿnúⁿ yā
 yeⁿe yāāⁿ Betfagé ndúúcu yāāⁿ
 Betania nīⁿnuúⁿ naachi canee yiicū

chi nguuví Olivos, tuu'mi ní Jesús
 dichó'o yā ná 'uūvī discípulos yeⁿe
 yā vmnaaⁿ yā. ³⁰Ní Jesús caⁿa
 'túúcā: Cueⁿe nī na yāāⁿ 'lírⁿ chi
 canée nīⁿnuúⁿ ní taachí cundaá
 nī yāāⁿ miiⁿ ndaacá nī 'áámá
 burro 'lírⁿ chí n'dééchiichí tī. Mar
 'áámá 'iíⁿyāⁿ 'āā cuée cunduú yā
 'iiti. N'daatí nī 'iiti ní candée nī 'iiti
 'muuⁿ. ³¹Ní nduuti chi 'áámá 'iíⁿyāⁿ
 tiinguuneeⁿ yā 'túúcā: Ndís'tií, ¿de'e
 cúúví chí n'daatí nī 'iiti? 'Túúcā
 nan'guēcútaⁿa nī chi Señor yeⁿe
 yú ní neⁿe yā 'iiti.

³²Discípulos chi dicho'ó Jesús
 cueⁿe yā ní ndaāca yā 'iiti tan'dúúca
 chi Jesús miiⁿ caⁿa yā. ³³Taachí
 n'daātí yā burro 'lírⁿ miiⁿ, 'iiví tī
 ní caⁿa yā chii yā 'iíⁿyāⁿ s'eeⁿ:
 ¿De'e cúúví chí n'daatí nī burro 'lírⁿ
 yeⁿé?

³⁴Ní 'iíⁿyāⁿ s'eeⁿ ní caⁿa yā: Señor
 yeⁿe yú ní neⁿe yā 'iiti.

³⁵Tuu'mi ní candée yā 'iiti nanááⁿ
 Jesús. 'Iíⁿyāⁿ s'eeⁿ sn'dúu yā cotón
 yeⁿe yā vmnááⁿ yeⁿe tī ní Jesús
 canduú yā 'iiti miiⁿ. ³⁶Ní taachí
 Jesús cho'ó yā cyúúní miiⁿ, 'iíⁿyāⁿ
 s'uūⁿ ní n'doo yā cotón yeⁿe yā
 cuaaⁿ cyúúní mífⁿ. ³⁷Taachí Jesús
 ndaa nīⁿnúⁿ yā naachi nga'ái yúúní
 mífⁿ yeⁿe yiicū chí nguuví Olivos,
 nducyáácá discípulos yeⁿe yā ní
 yeenú taavi yā. Ní tuca'á yā caⁿa
 yā chi ch'ēete n'dai Ndyuūs cucáávā
 chi vaadi n'giinu chi n'diichí yā chi
 Jesús dííⁿ yā. Níícu diitūu n'dai 'cai
 yā ti yeenu taaví yā. ³⁸Ní 'cai yā:
 De'e chúúca n'dai Rey chí cuchii yā
 ndúúcu chi duuchi Señor Ndyuūs.
 Ní cuneé vaadi 'diiiⁿ ná va'ai chēeti
 nguuví. Ní caⁿá yā ndúúcu vaadi
 yeenú. De'e ch'ēete ca n'dai Ndyuūs

chi deɛvé n'daí yā ndúúcu poder yeⁿé yā.

³⁹Tuu'mi ní n'duuví 'iⁿyāⁿ fariseos chi snée yā nguaaⁿ 'iⁿyāⁿ caⁿa yā chi yā Jesús miⁿ: N'dií, Maestro, yaaⁿí neeⁿ 'iⁿyāⁿ s'eeⁿ chi nguée caaⁿmaⁿ yā tíicā.

⁴⁰Jesús miⁿ ní nán'guɛcútaⁿa yā yeⁿe fariseos ní caⁿa yā: Ndúúti chi 'iⁿyāⁿ s'uuⁿ ní 'tíicā nguée caaⁿmaⁿ yā, tuu'mi ní tuūu miⁿ ní caaⁿmaⁿ 'tíicā.

⁴¹Taachí ndaa niiⁿnúⁿ yā chí n'diichí yā yāāⁿ Jerusalén miⁿ, tuu'mi ní Jesús chɛɛcú yā cucáávā 'iⁿyāⁿ yeⁿe yāāⁿ miⁿ ti ya'ai iinu yā caavā 'iⁿyāⁿ s'eeⁿ. ⁴²Ní caⁿa yā 'túucā: Ndís'tií, 'iⁿyāⁿ yeⁿe yāāⁿ Jerusalén, nduuti chi incheenaáⁿ nī yeⁿe nguuví 'cūu chi cuuvi nanguaⁿai nī tuu'mi ní 'úu cuuví teé ndís'tií vaadi 'diííⁿ. Naati maaⁿ ní Ndyuūs canuuⁿ n'de'í yā yeⁿe nī ní nguée cuuvi deenu nī. ⁴³Ti ndaa nguuví taachí 'iⁿyāⁿ chi taaⁿ ndúúcu nī chééndii yā núúⁿmáⁿ 'diituú yāāⁿ yeⁿe nī ní nguée cuuví cáanu nī yeⁿe yā.

⁴⁴Ní dííⁿ yā chi cundɛɛ nī ti nguɛɛ cuchéé nī ndúúcu yā. Ní 'caaⁿnúⁿ yā nducyaaca ndís'tií ndúúcu daiyá nī, ní dituuví yā yāāⁿ Jerusalén yeⁿe nī ti 'iⁿyāⁿ nguée deenu yā chi tiempo maaⁿ ní nguuví chi Ndyuūs s'neéⁿ yā chi cuuvi nanguaⁿai yā.

Jesús nadideɛvé yā yaācū templo

(Mt. 21.12-17; Mr. 11.15-19; Jn. 2.13-22)

⁴⁵Tuu'mi ní Jesús sndaá yā na yaācū templo ní tucá'a yā tun'dáa yā nducyaaca 'iⁿyāⁿ chi in'diicui yā ní ngái ntúuⁿ yā miⁿ. ⁴⁶Jesús caⁿa yā chi yā 'iⁿyāⁿ s'eeⁿ: 'Túucā canée

nguūⁿ na libro yeⁿé Ndyuūs: Yáacū yeⁿé ní naachi caaⁿmaⁿngua'a 'iⁿyāⁿ naati ndís'tií ní dííⁿ nī tan'dúucā chi yiive yaava yeⁿé 'iⁿyāⁿ chí diduucu.

⁴⁷Jesús miⁿ nguuví nguuví ngí'cueeⁿ yā ná yáacū templo; naati 'iⁿyāⁿ chiiduú n'gɛɛtɛ, ndúúcu 'iⁿyāⁿ chi ngí'cueeⁿ ley, ndúúcu 'iⁿyāⁿ chi ngaⁿa ntiiⁿnyuⁿ yeⁿe yāāⁿ miⁿ nduuvidaamá yā ti neⁿé yā n'diichí yā táacā chi cuuvi 'caaⁿnúⁿ yā Jesús miⁿ. ⁴⁸Nguée indaacá yā táacā chi 'caaⁿnúⁿ yā Jesús, ti nducyáacá 'iⁿyāⁿ s'nee veeⁿ n'daacá yā yeⁿe chi ngí'cueeⁿ Jesús miⁿ.

Jesús ngaⁿa ntiiⁿnyúⁿ yā

(Mt. 21.23-27; Mr. 11.27-33)

20 'Áamá nguuví taachí Jesús miⁿ ngí'cueeⁿ yā chɛɛti yaācū templo ní ngí'cueeⁿ yā nduudu chí ngai yeⁿe Ndyuūs, ndaa nanááⁿ Jesús miⁿ chiiduú n'gɛɛtɛ ndúúcu maestros yeⁿe ley, ndúúcu 'iⁿyāⁿ ndiicúu chí ngaⁿa ntiiⁿnyuⁿ yeⁿe yaācū. ²Ní ntiinguunéeⁿ yā Jesús: ¿Du'ú caⁿa ntiiⁿnyuⁿ chi ca'cueeⁿ nī déndu'ū chi 'tuucá? O ¿du'ú 'iⁿntyéⁿē tee yā orden chi dííⁿ ni 'tíicā?

³Tuu'mi ní Jesús miⁿ nan'guɛcútaⁿa yā: 'Úú ntúuⁿ ní ntiinguuneeⁿ 'áamá ndís'tií. Nan'guɛcútaⁿa nī yeⁿé: ⁴¿Dú'u ca'a orden Juan chi chɛɛdínuūⁿniⁿ yā 'iⁿyāⁿ? ¿Áa yeⁿe Ndyuūs o saⁿa iⁿ'yeeⁿdí 'cūu?

⁵'iⁿyāⁿ s'eeⁿ nduuvidaamá yā ní caⁿa yā nguaaⁿ maaⁿ yā: Ndúúti chi caaⁿmaⁿ yú chí yeⁿe Ndyuūs, Jesús miⁿ ní cuuvi yā s'uūúⁿ: ¿De'ɛ cuuvi chi nguée chí'téenu nī? ⁶Nduuti chí

caaⁿmaⁿ yú chí yeⁿe saⁿā íⁿyeⁿdí
'cūū, nducyaaca 'iⁿyāⁿ ní cuiituú yā
s'uūūⁿ ti 'iⁿyāⁿ s'eeⁿ nadicádíinuⁿ
yā chí cuaacu níⁿnyúⁿ Juan miⁿ ní
'áámá profeta chi Ndyuūs dicho'ó yā.

⁷Tuuⁿmi ní 'iⁿyāⁿ s'eeⁿ
nan'guεεcútaⁿa yā yeⁿe Jesús chi
nguée déenu yā tíí ndiicá yeⁿe chí
ngeedínuūⁿniⁿ Juan miⁿ. ⁸Tuuⁿmi
ní Jesús caⁿa yā chíi yā 'iⁿyāⁿ
s'eeⁿ: Ndíí nguée ndúú 'úú ra cuuvi
ndís'tií du'u 'iⁿntyéⁿe tee yā orden
'úú chí idiíⁿ chuū.

Yáⁿāa yeⁿe saⁿā chí diiⁿ cuidado díí'yú uvas

(Mt. 21.33-44; Mr. 12.1-11)

⁹Jesús tucá'a yā caⁿa yā chíi yā
'iⁿyāⁿ s'eeⁿ 'áámá ejemplo chi 'téé
nguée dáámá: 'Áámá saⁿā chíinu
sa díí'yú uvas ná yáⁿāa yeⁿe sa.
Dueño miⁿ ca'a yā n'duuvi saⁿā chí
idiíⁿ sa ntiiⁿnyuⁿ ní nadíí'vε yā saⁿā.
Ní chíica yā yāāⁿ vaacú yā ni cueⁿe
yā chí cuuvi 'náaⁿ yā. ¹⁰Taachí ndaā
tiempo yeⁿe cosecha yeⁿe uvas miⁿ,
dueño miⁿ dicho'ó yā 'aama mozo
yeⁿe yā chí cueⁿe sa cuta'a sa parte
yeⁿe cosecha chí tuneⁿ dueño
miⁿ. 'Iiⁿyāⁿ chí idiíⁿ ntiiⁿnyuⁿ yeⁿe
yáⁿāa ch'eⁿé yā mozo ní nadich'ó
yā mozo miⁿ. Ní nguée de'ε vεε ca'a
yā mozo miⁿ. ¹¹Dueño nguεεcunée
yā dicho'ó yā táámá mozo nanááⁿ
saⁿā chí idiíⁿ ntiiⁿnyuⁿ na yáⁿāa
yeⁿe yā. 'Tiicá ntúūⁿ nguée n'daacā
diiⁿ sa ndúúcu mozo miⁿ. Ch'éⁿé
sa saⁿa ní nadicáánu sa saⁿā miⁿ.
Ní nguée de'ε vεε ca'a sa saⁿā mozo
miⁿ. ¹²Dueño yeⁿe yáⁿāa miⁿ
nguεεcunée ntúūⁿ yā dicho'ó yā
táámá mozo nanááⁿ 'iⁿyāⁿ chí idiíⁿ
ntiiⁿnyuⁿ na yáⁿāa yeⁿe yā naati

'nuucá'a sa saⁿa ní nadicaanu sa
saⁿā.

¹³Tuuⁿmī ní dueño yeⁿe yáⁿāa
miⁿ caⁿa yā: ¿Táácā dííⁿ? Dicho'ó
saⁿā daiyá chí neⁿe taaví. ¿'Áá
nguée taachí snaaⁿ sa saⁿā diiⁿ sa
honrar saⁿā daiyá? ¹⁴'Iiⁿyāⁿ chí
idiíⁿ ntiiⁿnyuⁿ na yáⁿāa miⁿ taachí
n'diichi sa saⁿā daiya dueño yeⁿe
yáⁿāa miⁿ nadicádíinuⁿ sa ní caⁿa
sa chíi sa ví'i: Sá'a 'cuu chí cuuvi
yeⁿe sa yáⁿāa 'cūū. 'Caāⁿnuⁿ yú
saⁿā ni yáⁿāa ndúúcu chí véé naaⁿ
cuuvi yeⁿe yú. ¹⁵Tuuⁿmī tun'dáa sa
saⁿā daiya dueño 'áámá lado yeⁿe
chééⁿ yeⁿe díí'yú uvas ní ch'iⁿnuⁿ
sa saⁿā. Jesús caⁿa yā: Maaⁿ ní,
¿de'ε dííⁿ dueño yeⁿe yáⁿāa nduucú
saⁿā s'eeⁿ chí diiⁿ 'tíicā? ¹⁶Dueño
miⁿ taachi ndaa yā ni diví yā saⁿā
chí idiíⁿ ntiiⁿnyuⁿ na yáⁿāa yeⁿe yā
ní 'caaⁿnúⁿ yā saⁿā s'eeⁿ. Ní ca'á yā
yáⁿāa miⁿ yeⁿe yā táámá 'iⁿyāⁿ.
Taachí 'iⁿyāⁿ fariseos ch'iindiveéⁿ
yā chuū, tuuⁿmi ní caⁿa yā: N'daacā
chí Ndyuūs nguée 'cuaaⁿ yā chí
'tíicā.

¹⁷Jesús ch'iinú yā 'iⁿyāⁿ s'eeⁿ,
ní caⁿa yā: ¿De'ε neⁿe caaⁿmaⁿ
nduudu chí canée nguūⁿ na libro
yeⁿe Ndyuūs chí 'tuucá?

Tuūu ch'εeté chí 'iⁿyāⁿ chí
din'dái yā va'āi miⁿ ní sta'á
yā ní ch'εécú yā 'áámá lado,
ní tuūu 'cúu chí tuūu ch'εete
miⁿ dichíí'vε ca ní canée tuūu
ch'εeté yeⁿe esquina yeⁿe va'āi.

¹⁸Áa du'ú nūuⁿ 'iⁿyāⁿ chí cun'daa
nduú yā vmnaaⁿ na tuūu 'cúu ní
caātū 'ííní yeⁿe yā. Naati 'āa du'ú
nūuⁿ 'iⁿyāⁿ chí cun'dáa nduūu tuūu
'cúu vmnaaⁿ yeⁿe yā, 'cuíínú ndúúví
yuūni yā.

**Yeⁿe tuumī chi ca'á yā emperador
César**

(Mt. 21.45-46; 22.15-22; Mr. 12.12-17)

¹⁹Iiⁿyāⁿ chiiduú n'geetē ndúúcū maestros yeⁿe ley neⁿé yā cuta'á yā Jesús ní díⁿ yā chi preso yā naati dí'va'a yā 'iiⁿyāⁿ yeⁿe yáāⁿ miiⁿ. Tuu'mí nūuⁿ tuumicádiinuⁿ yā chi Jesús miiⁿ caⁿ'a yā ejemplo 'cūū chi 'téé nguée dáámá ní yeⁿe yā. ²⁰Tuu'mi ní dich'ó yā 'iiⁿyāⁿ chí 'cueenuúⁿ Jesús miiⁿ. 'Iiⁿyāⁿ s'eeⁿ ní ndaacá yā táácā chi cástaⁿ'a yā nduudu Jesús miiⁿ chi Jesús cuuví caaⁿ'máⁿ yā 'aama nduudu yaadi. 'Tíicā ní cuuvi dich'ó yā Jesús nanááⁿ gobernador. ²¹Chiiⁿ chí 'iiⁿyāⁿ s'eeⁿ ní ntiinguuneeⁿ yā Jesús nduudú 'cūū: N'díí, maestro, déenu 'nū chí ngaⁿ'a nī ní ngi'cueeⁿ nī chiiⁿ chi n'daacā. Ní nguée díⁿ nī juzgar 'iiⁿyāⁿ tan'dúúcā chi n'gee nī chi n'daacā o nguée, naati ngi'cueeⁿ nī yúúⁿ yeⁿe Ndyuūs ndúúcū nduudu cuaacu. ²²Maaⁿ ní cuuví nī chuū: ¿Áá n'daacā chí nadíí've 'nū emperador César tuumī yeⁿe yáāⁿ o nguée?

²³Jesús tuumicadínuⁿ yā chí 'iiⁿyāⁿ s'eeⁿ ní nguée n'daacā chi díⁿ yā ní caⁿ'a yā chii yā 'iiⁿyāⁿ s'eeⁿ: ¿De'e cúúví chí neⁿe nī castaⁿ'á nī nduudu yeⁿé? ²⁴Cuuⁿ'miⁿ nī 'áámá tuumī. Jesús n'diichí yā tuumī ní caⁿ'a yā: ¿Du'ū naaⁿ ndēē tuumī miiⁿ? ¿Du'ū chi nguuví canee ngúūⁿ naaⁿ? Tuu'mi ní saⁿ'a s'uuⁿ nan'guēcútaⁿ'ā sa: Naaⁿ emperador César cānee.

²⁵Tuu'mi ní Jesús caⁿ'a yā chii yā 'iiⁿyāⁿ s'eeⁿ: Nca'a nī tuumī emperador César miiⁿ chíⁿ chi yeⁿé

yā ní ca'á nī Ndyuūs chíⁿ chi yeⁿé yā.

²⁶Nguée cuuvi díⁿ yā chistaⁿ'a mar 'áámá nduudu yeⁿe Jesús miiⁿ ní cheⁿe yiinú yā yeⁿé chí nan'guēcútaⁿ'ā Jesús. Ní 'āā ntée caⁿ'a yā mar 'áámá.

**'Iiⁿyāⁿ itiinguuneeⁿ yā Jesús yeⁿé chi
nduuchi tináⁿ'ā**

(Mt. 22.23-33; Mr. 12.18-27)

²⁷Cuayiivi ní 'nduuví 'iiⁿyāⁿ saduceos ndaa yā nanááⁿ Jesús. Saduceos nguée s'téenu yā chí nduuchi tináⁿ'ā. Ní caⁿ'a yā chii yā Jesús: ²⁸N'díí, Maestro, Moisés dingúuⁿ yā na ley 'tíicā: Ndúúti chí 'áámá saⁿ'ā 'cuuvi sa ní cu'neeⁿ sa n'daataa yeⁿé sa ní nguée daiya tá, tuu'mi ní 'díínu sa cuuvi 'caandavaacu sa ndúúcū n'daataa miiⁿ ní 'cuundi daiya sa lado yeⁿe 'díínu tináⁿ'ā. ²⁹Maaⁿ ní véé ndēēchē 'díínu yā. Saⁿ'ā vmnaaⁿ mífⁿ canee sa ndúúcū n'daataa yeⁿé sa ní ch'ií sa. Nguée ch'ēetinée daiya sa. ³⁰Saⁿ'ā 'díínu sa ndiichi ndii 'úúví canee sá ndúúcū n'daataa yeⁿé tináⁿ'ā. 'Diinu sa miiⁿ ch'ií ntúūⁿ saⁿ'ā miiⁿ. Nguée ch'ēetinée ntuūⁿ daiya sa. ³¹Saⁿ'ā 'diinú sa ndiichi ndii 'íínú canee ntúūⁿ sa ndúúcū n'daataa mífⁿ. 'Tiicā ntúūⁿ ch'ií sa ní nguée ch'ēetinée ntúūⁿ daiya sa. Nduu ndēēche yā ch'ēetinée yā ndúúcū n'daataa mífⁿ ní ca'áámá ca'áámá yā ch'ií yā ní nguée ch'ēetinée mar 'áámá daiya yā. ³²Cuayiivi miiⁿ ní ch'ií n'daataa mífⁿ. ³³Taachí ndaa nguuví chi nduuchi 'iiⁿyāⁿ chi n'díí, ¿che' saⁿ'ā s'eeⁿ n'daataa yeⁿé sa táⁿ'ā? Tí nduu ndēēche yā ch'ēetinée yā ndúúcū n'daataa mífⁿ.

³⁴Tuu'mi ní Jesús miiⁿ nan'guéécútaⁿa yā yeⁿe 'iiⁿ'yāⁿ s'eeⁿ ní caⁿa yā: 'Iiⁿ'yāⁿ chi snée yā iⁿ'yeeⁿdí 'cūū n'giindivaacu yā ní 'iiⁿ'yāⁿ yeⁿe yā nga'a yā chi n'giindivaacu yā. ³⁵'Iiⁿ'yāⁿ chi túneeⁿ chi ndaá yā na táamá iⁿ'yeeⁿdí, taachi nduuchí yā yeⁿe nguaaⁿ tináⁿā, na yáⁿāa miiⁿya ní nguεε 'caandavaacu yā, ndíí nguéeⁿ ndúú chi ca'a 'iiⁿ'yāⁿ yeⁿe yā chi 'caandavaacu yā. ³⁶Yáⁿāa miiⁿya 'āā ntéeⁿ 'cuūvi yā ti daama yā ndúúcū ángeles. 'Iiⁿ'yāⁿ s'eeⁿ chi daiya Ndyuūs tí induuchi yā yeⁿe nguaaⁿ tináⁿā. ³⁷Ndíí cuaaⁿ vmnaaⁿ ndíí taachi maaⁿ Moisés miiⁿ dingúuⁿ yā yeⁿe yáⁿá 'lííⁿ chí ngíichi iteé cadíínuuⁿ yú caati tináⁿā ninduuchi yā. Ní Moisés miiⁿ ngaⁿá yā chi Señor Ndyuūs miiⁿ ní Ndyuūs yeⁿe Abraham, ndúúcū Isaac, ndúúcū Jacob. ³⁸Ti Ndyuūs ní nguéeⁿ Ndyuūs yeⁿe tináⁿā ti yeⁿe 'iiⁿ'yāⁿ chí sндуuchí yā. Caati nanááⁿ Ndyuūs miiⁿ nducyaaca 'iiⁿ'yāⁿ ní sндуuchí yā cueⁿe daāⁿmaⁿ.

³⁹Tuu'mi ní n'duuvi maestros chi ngi'cueeⁿ ley caⁿa yā chii yā Jesús miiⁿ: N'díí, Maestro, n'daacā ngaⁿa nī.

⁴⁰'Iiⁿ'yāⁿ s'eeⁿ 'āā ntéeⁿ neⁿe yā ntiinguuneeⁿ ca yā.

¿Du'ū 'iiⁿ'yāⁿ chi Cristo?

(Mt. 22.41-46; Mr. 12.35-37)

⁴¹Jesús caⁿa yā chii yā 'iiⁿ'yāⁿ s'eeⁿ: Ndís'tií, ítáácā chí ngaⁿa nī chi Cristo miiⁿ ní daiya David? ⁴²Maāⁿ David miiⁿ ní ngaⁿa yā na libro yeⁿé Ndyuūs chi Salmos 'túúca:

Caⁿa Señor Ndyuūs chii yā
Señor yeⁿé: 'Cuundi di lado

tá cuaācū yeⁿé chi lado yeⁿe honor,

⁴³ndíí taachi 'úú cu'neéⁿ 'iiⁿ'yāⁿ chi enemigos chi contra yeⁿe di cuaaⁿ ndii yā ca'a di tan'dúúca chi 'aama banco 'lííⁿ.

⁴⁴Ndúúti chi David miiⁿ caⁿa yā chi Cristo miiⁿ ní Señor yeⁿe yā, ítáácā cuuvi chií chi Cristo miiⁿ ní daiya David?

Jesús ngíicá nuuⁿndi yeⁿe maestros chi ngí'cueeⁿ ley

(Mt. 23.1-36; Mr. 12.38-40; Lc. 11.37-54)

⁴⁵Nducyáácā 'iiⁿ'yāⁿ n'giindiveeⁿ yā taachi Jesús caⁿa yā ndúúcū discípulos yeⁿe yā ní tuca'á yā caⁿa yā chuū: ⁴⁶Dííⁿ nī cuidado, ndís'tií, yeⁿé maestros chi ngi'cueeⁿ ley. 'Iiⁿ'yāⁿ s'eeⁿ ní neⁿe yā 'cuεeti núuⁿ yā catecai n'geēnúú yā, ní neⁿe yā chi ndís'tií ní dííⁿ nī saludar 'iiⁿ'yāⁿ s'eeⁿ taachi snée yā nií'vεε ní neⁿé yā chi dííⁿ nī respetar 'iiⁿ'yāⁿ s'eeⁿ. Ní neⁿe yā 'cuεetε yā na sillas vmnááⁿ vmnaaⁿ yeⁿe honor ná yaacū sinagogas ní sillas yeⁿe honor yeⁿe 'viicu naachi ché'e yā. ⁴⁷'Iiⁿ'yāⁿ s'eeⁿ ní ndivíi yā va'ai yeⁿe n'daataá nguá'āa. Ní neéne n'deēe ngaⁿ'angua'á yā ní neⁿe yā chi snaaⁿ tanáⁿā 'iiⁿ'yāⁿ chi diiⁿ yā 'tíicā. 'Iiⁿ'yāⁿ s'eeⁿ ní neene ch'εetε ca castigo yeⁿe yā nguuvi yeⁿe juicio.

Ofrenda yeⁿe n'daataá nguá'āa

(Mr. 12.41-44)

21 Jesús snée yā na yaācu templo ní n'diichi yā chi 'iiⁿ'yāⁿ 'cuiica ngii yā ofrendas yeⁿe yā na cajas naachí inúūⁿ ofrendas. ²N'diichí ntúuⁿ yā 'áámá n'daataá nguá'āa chí neene ndaachíí cānee

tá. Táⁿá miiⁿ ní s'nuūⁿ tá cheeti caja miiⁿ 'uūvī centavos chi cobre. ³Jesús miiⁿ ní ngaⁿa yā ngii yā 'iiⁿyāⁿ s'eeⁿ: Cuaacu níⁿnyuⁿ 'úú ngaⁿá ngíí ndís'tií chí n'daataá nguáⁿáa 'cūū ch'ēete ca tuūmī chií tá, nguéé ti tanáⁿá 'iiⁿyāⁿ. ⁴Tí 'iiⁿyāⁿ s'eeⁿ ní ngaⁿa yā yeⁿē chí nngaāva yeⁿe yā chi cuuvi ofrenda yeⁿe Ndyuūs; naati n'daataá 'cūū chí neenē ndaachíí canee tá ní ca'ā tá tanducuéⁿē chí véé yeⁿe ta chi che'e tá.

Jesús nn'geeⁿ yā táamá ejemplo chi yeⁿe yaācá chí ntuvíí

(Mt. 24.1-2; Mr. 13.1-2)

⁵Náⁿá 'iiⁿyāⁿ ní ngaⁿa yā yeⁿe yaācū templo miiⁿ chi yaāva canéé ndúúcu tuūu n'dēē cheeⁿ ndúúcu adornos yeⁿē regalos chí lado yeⁿe ofrenda. Jesús caⁿa yā chií yā 'iiⁿyāⁿ s'eeⁿ: ⁶Ndís'tií ní inaaⁿ nī dendú'ū chí 'túúcā. Ndáá nguuvī taachí nadituuví yā yaācū miiⁿ ní 'āā ntéé cūnee tuūu cuaaⁿ vmnááⁿ yeⁿe vī'í chí nguéé ntuvíí.

Ejemplo yeⁿe tiempo taachi 'āā cuéé ndaa nguuvī chí 'cuiinū íⁿyeēⁿdí

(Mt. 24.3-28; Mr. 13.3-23)

⁷Tuu'mi ní 'iiⁿyāⁿ s'eeⁿ ntiinguunéⁿ yā Jesús miiⁿ: N'dií, Maestro, ítií cuaⁿā cuuví chuū? ¿De'ē señāl 'cuuⁿmíⁿ nī taachi 'āā cuuvi chí 'tiicā?

⁸Jesús caⁿa yā: Cundéé nī cuidado chí 'iiⁿyāⁿ nguéé cannche'éfí yā ndís'tií caati neenē n'deē 'iiⁿyāⁿ chíí yā caaⁿmáⁿ yā ndúúcu chí duuchí 'tííca: 'Úú chí Cristo; ní 'āā snéé nguuvī chí 'cuiinū íⁿyeēⁿdí. Naati ndís'tií, nguéé caⁿá nī ndúúcu

yā. ⁹Ní taachí 'caandiveéⁿ nī chí véé caandaá ní 'iiⁿyāⁿ 'cuuⁿmaⁿ yā contra yeⁿe taama yā nguéé díí'yá nī cuuvi. Tanducuéⁿē chuū canéé chí cuuvi vmnááⁿ vmnaaⁿ naati 'āā cuéé 'cuiinū íⁿyeēⁿdí.

¹⁰Tuu'mi ní Jesús caⁿa yā chií yā 'iiⁿyāⁿ s'eeⁿ: 'Áámá nación ní 'cuuⁿmáⁿ contra yeⁿe taama nación ní 'iiⁿyāⁿ yeⁿe 'áámá país ní 'cuuⁿmáⁿ yā contra yeⁿe 'iiⁿyāⁿ yeⁿe taama país. ¹¹Ní n'deē cuuvi nuⁿ'u taaⁿ yáⁿāa, ndúúcu tiempos chí 'cuūndí cuiicu, ndúúcu ca'ai taaⁿ n'deē cuaaⁿ n'dai, ní 'iiⁿyāⁿ snaaⁿ yā dendu'ū chí vaadi n'giinu yeⁿē va'ai cheeti nguuvī ní díí'yá yā cuuvi.

¹²Ni taachi 'āā cuéé cuuvi tanducuéⁿē dendu'ū chí 'túúcā, 'iiⁿyāⁿ ní cuiítuú yā ndís'tií ní cuta'á yā ndís'tií chí presos nī. Ní nca'á yā ndís'tií 'iiⁿyāⁿ chí ngaⁿa ntiin'nyuⁿ yeⁿe yaācū sinagogas ní 'cuii yā ndís'tií vácūū. Cuayiivi ní candéé yā ndís'tií nanááⁿ 'iiⁿyāⁿ reyes ndúúcu gobernadores cáāvā chí ngaⁿa nī chí duuchí. ¹³Chuū 'cueenu ndís'tií cuuvi ti cueⁿé nī nduucú ní nanááⁿ 'iiⁿyāⁿ s'eeⁿ cuuvi caaⁿmáⁿ nī nduudu cuaacu yeⁿé. ¹⁴Cundéé n'daaca nī cuidado ná staava yeⁿe nī ní nguéé nadacadíínuuⁿ nī vmnaaⁿ yeⁿe taācā nán'guēecútaⁿa nī yeⁿe 'iiⁿyāⁿ s'eeⁿ. ¹⁵Ti hora mífí nūuⁿ 'úú ní yaa'ví ndís'tií nduudu chí caaⁿmáⁿ nī. Ní teé ndís'tií vaadi deenu yeⁿé ní 'iiⁿyāⁿ s'eeⁿ nguéé cucheé yā ndúúcu ndís'tií, ndíí nguéé ndúú cuuvi caaⁿmaⁿ yā contra yeⁿē ndís'tií. ¹⁶Naati chiidá nī, ndúúcu 'díínu nī, ndúúcu 'iiⁿyāⁿ yeⁿe nī, ndúúcu amigos yeⁿe nī

ní caaⁿ máⁿ yā contra yeⁿ e ndís'tiī chí 'iⁿ yāⁿ 'caaⁿ núⁿ yā náⁿ ā ndís'tiī. ¹⁷ Ní nducyaaca 'iⁿ yāⁿ nguée cuuvi n'diichí yā ndís'tiī cucáávā 'úú ti cueⁿ é nī nduucú. ¹⁸ Naati mar 'áámá yuūdū tiīⁿ nī nguée cuuví ndái. ¹⁹ Nduuti chí ndís'tiī ngiinū ngiinū cuchée nī na staava yeⁿ é nī ní 'cuetinéé n'daāca nī, tuu'mi ní ndáá nguuvi chí ndaaca nī vida cueⁿ e daāⁿ maⁿ yeⁿ e nī.

²⁰ Taachi ndís'tiī snaaⁿ nī soldados nuuⁿ maⁿ ndííví yā yāāⁿ Jerusalén, tuu'mi ní cadíinuⁿ nī chí yāāⁿ Jerusalén miiⁿ 'āā ntuví. ²¹ Tuu'mi ní n'daacā chí 'iⁿ yāⁿ chí snée yā na yáⁿ āa Judea caⁿ 'á yā cáānu yā cuaāⁿ yiicū. Ní 'iⁿ yāⁿ chí snée yā na yāāⁿ Jerusalén miiⁿ ní nan'dāa yā miiⁿ. Ní 'iⁿ yāⁿ chí snée yā campo nguée nguēcunee nndaa yā na yāāⁿ Jerusalén. ²² Ti nguuvi s'eeⁿ ní nguuví chí cuchii 'cuenú yā cuuvi cáāvā nuuⁿ ndí yā. Níícu canée chí cuuvi cuaacu tanducuéⁿ chí canée nguūⁿ na libro yeⁿ e Ndyuūs. ²³ Naati de'ē chúicā ya'āi yeⁿ e n'daataa chí véé daiya tá chēti tá ndúucū n'daataa chí ngiicú da'cua'āa daiya tá nguuvi chí cáānu yā. Ní 'iⁿ yāⁿ miiⁿ néené 'cuenú yā cuuvi na yáⁿ āa 'cúū. ²⁴ Ní 'yāāⁿ 'iⁿ yāⁿ ní 'cuūví yā ndúucū machete 'uūví lados 'caāiⁿ taachi dííⁿ yā caandaá. Ní candē yā 'yaaⁿ 'iⁿ yāⁿ chí presos yā ní caⁿ 'á yā ndíí nducyaaca países. Níícu yāāⁿ Jerusalén miiⁿ cūnee ndúucū 'iⁿ yāⁿ gentiles chí 'iⁿ yāⁿ chí nguée yeⁿ e ndaata Israel ní 'iⁿ yāⁿ s'eeⁿ canée yā na yáⁿ āa miiⁿ ndíí tiempo chí Ndyuūs 'cuaaⁿ yā 'iⁿ yāⁿ gentiles cuuvi yeⁿ e yā.

Taácā ndaá Saⁿ ā chí Daiya Dendyuūs

(Mt. 24.29-35, 42-44; Mr. 13.24-37)

²⁵ Tuu'mi ní Ndyuūs 'cuuⁿ miⁿ yā ndúucū vaadí n'giinu señales ná yáⁿ āa, ndúucū ná 'iⁿ yu, ndúucū na 'ííⁿ nyúⁿ. Néené ya'āi 'cuenú 'iⁿ yāⁿ yeⁿ e tanáⁿ ā naciones nī nducyaaca 'iⁿ yāⁿ díiⁿ yā cá yā cuuvi. Ní nguée déenu yā taacā chí idiīⁿ yā cucáávā chí 'yuudu n'dai 'cueecu nuūⁿ nīⁿ yāⁿ ā ní can'dái yaacu nuūⁿ nīⁿ miiⁿ. ²⁶ 'iⁿ yāⁿ s'eeⁿ cuuvi cúunu yā chí 'va'á yā ndúucū dendu'ū chí ndaa vmnááⁿ yáⁿ āa 'cúū ní cucáávā nducuéⁿ e nanguuvi ní 'nuⁿ u.

²⁷ Tuu'mi ní 'iⁿ yāⁿ snááⁿ yā 'úú chí Saⁿ ā chí Daiya Dendyuūs chí ndaá na 'áámá meēeⁿ ndúucū poder ch'ēte yeⁿ e ndúucū chí dēvéⁿ n'dai yeⁿ e maáⁿ cuerpo yeⁿ e. ²⁸ Taachí cunga'ā tanducuéⁿ e chuū cu'neeⁿ diitú nī na staava yeⁿ e nī tí ndaā nguuvi chí nnguaⁿ āi ndís'tiī ní canée nīⁿ nuúⁿ.

²⁹ 'Úú ní ngaⁿ 'á ngíí ndís'tiī 'áámá ejemplo: Cuin'diichí nī yáⁿ 'á yeⁿ e n'guíídiī yaaⁿ nguuvi ndúucū nducyaaca yáⁿ 'á. ³⁰ Taachí snaaⁿ nī chí 'āā ndaa tá'āa yáⁿ 'á mífⁿ, tuu'mi ní 'āā deenú nī ti 'āā snee nīⁿ nuúⁿ tiempo chí cuchii yāāⁿ. ³¹ 'Tiicá ntúūⁿ cuuvi taachi snaaⁿ nī dendu'ū chuū chí ngaⁿ 'á, 'āā deenú nī chí naachí Ndyuūs ngaⁿ 'a ntiīⁿ nyúⁿ yā 'āā snee nīⁿ nuúⁿ.

³² 'Úú ngaⁿ 'á ngíí ndís'tiī, chí cuaacu níⁿ nyúⁿ 'iⁿ yāⁿ chí snée yā maaⁿ 'āā cuéeⁿ 'cuuví yā nenⁿ e chí 'āā cuéeⁿ cuuví tanducuéⁿ e chuū.

³³ Nanguuvi ndúucū yáⁿ āa ní chó'oo naati nduudu yeⁿ e nguée chó'oo.

³⁴ Ndís'tiī ní cundēe nī cuidado chí staava yeⁿ e nī nguée nduuví

cheechí ndúúcū vicios chi véé
iⁿ'yeeⁿdí 'cūū. Nguéé nadicádiinúúⁿ
ca nī yeⁿ'e chi che'é nī o cu'ú nī
o yeⁿ'ē n'dee yeⁿ'e vida yeⁿ'e nī
ti nguuvī mīⁿ ní dácanaāⁿ ndaa
nanááⁿ yeⁿ'e ndís'tiī. Ní canéé chi
canéé listo nī. ³⁵Ti nguuvī s'eeⁿ
ní ndaa nanááⁿ ndís'tiī ndúúcū
'iīⁿ'yāⁿ chi snée yā iⁿ'yeeⁿdí 'cūū ní
nducyaacá yā ní 'cueenú yā cuuvī tí
ndaa nguuvī s'eeⁿ tan'dúúcā 'áámá
tuūvī dácanaāⁿ índuudi. ³⁶Cueeti
nduuchí nī ní caaⁿ'maⁿ'nguaⁿ'á nī
nguuvī nguuvī chi cuuví nnguaⁿ'ai
nī yeⁿ'e dendu'ū vaadi ya'ai chi
cuchiī. Ní cuuvī ndaa nī nanááⁿ 'úú,
Saⁿ'ā chi Daiya Ndyuūs.

³⁷Nguuvī nguuvī Jesús mīiⁿ
ngí'cueeⁿ yā na yáacū templo ní
n'gaaⁿ ní n'ndaa yā ná yīicū 'līíⁿ chi
nguuvī Olivos. ³⁸Ní nguuvī nguuvī
cuaaⁿ ná nguētiyaaⁿ ní nducyaaca
'iīⁿ'yāⁿ ndaa yā na yaācū templo
nanááⁿ Jesús mīiⁿ chí 'caandiveéⁿ
yā nduudu yeⁿ'e yā.

**'Iiⁿ'yāⁿ chi contra Jesús ngaⁿ'a yā
táacā chi dííⁿ yā chi cuuvī cutaⁿ'á yā
Jesús**

(Mt. 26.1-5, 14-16; Mr. 14.1-
2, 10-11; Jn. 11.45-53)

22 'Āā snee nīiⁿ'nuúⁿ nguuví
yeⁿ'e 'viicu yeⁿ'e pascua
chi 'viicu chi che'é yā pan chi nguéé
levadura yeⁿ'ē. ²Ní 'iīⁿ'yāⁿ chiiduú
n'gēetē ndúúcū maestros yeⁿ'e ley
nduuvidaamá yā ní ngaⁿ'á yā taacā
chi cuuví 'caaⁿ'núⁿ yā Jesús naati
'va'á yā 'iīⁿ'yāⁿ yeⁿ'e yāáⁿ Jerusalén
mīiⁿ.

³Espíritu yeⁿ'e yááⁿ'n'guiinūⁿ
sndáa na staava yeⁿ'e saⁿ'ā chi
nguuvī Judas Iscariote chi 'aama

discípulo yeⁿ'e Jesús naachi
ndiichuuvī yā. ⁴Judas mīiⁿ cheⁿ'e
sa nanááⁿ chiiduú n'gēetē ndúúcū
capitanes ní yaaⁿ'vi sá 'iīⁿ'yāⁿ táacā
chi cuuví diiⁿ sa chi naca'a sa Jesús
mīiⁿ 'iīⁿ'yāⁿ s'eeⁿ. ⁵'Iiⁿ'yāⁿ s'eeⁿ ní
yeenú n'dai yā ní nduuvidaamá
yā chí ca'a yā tuūmī Judas
mīiⁿ. ⁶Judas sta'a sa tuūmī ní
caⁿ'a sa. Nadacádiinuuⁿ sa táacā
cuuvī nta'a sa Jesús mīiⁿ na ta'a
'iīⁿ'yāⁿ s'eeⁿ manera chi 'iīⁿ'yāⁿ
yeⁿ'e yāáⁿ Jerusalén mīiⁿ nguéé
ntuemicadiinúúⁿ yā yeⁿ'ē.

**N'nuúⁿ yā chi che'e yā cáāvā 'vícú
yeⁿ'e pascua**

(Mt. 26.17-29; Mr. 14.12-25;
Jn. 13.21-30; I Co. 11.23-26)

⁷Ndaa nguuvī yeⁿ'e pascua, 'viicu
chi nducyaaca 'iīⁿ'yāⁿ che'e yā pan
chi nguéé levadura yeⁿ'ē. Nguuvī
mīiⁿ ní 'iīⁿ'yāⁿ 'caaⁿ'núⁿ yā 'áámá
'iiti cuūchī 'līíⁿ chí sacrificio yeⁿ'e
pascua. ⁸Jesús dicho'ó yā Pedro
mīiⁿ ndúúcū Juan ní caⁿ'a yā chii
yā 'uuvī yā: Cuéⁿ'é nī ní n'nuúⁿ nī
naachi che'e nguiinū yú yeⁿ'e 'viicu
yeⁿ'e pascua.

⁹'Iiⁿ'yāⁿ s'eeⁿ ní caⁿ'a yā chii yā
Jesús mīiⁿ: ¿Tíí neⁿ'e nī chi in'nuúⁿ
'nū chi che'e nguiinū yú?

¹⁰Jesús n'gueecútaⁿ'a yā: Taachi
cundaa nī na yāáⁿ Jerusalén mīiⁿ
ndaāca nī 'áámá saⁿ'ā chi ndéε sa
'cuuti cuéé nuūⁿnīⁿ. Caⁿ'á nī ndúúcu
sa ndíí ná va'ai naachi ndaa sa. ¹¹Ní
caaⁿ'máⁿ nī cuuvī nī saⁿ'ā chi va'ai
yeⁿ'ē mīiⁿ: N'diī, señor Maestro
yeⁿ'e yú ngaⁿ'á yā 'túúcā: ¿Tíí cánéé
cuarto chi che'é nguiinú yeⁿ'e
pascua ndúúcū discípulos yeⁿ'é?

¹²Saⁿ'ā mīiⁿ ní 'cuuⁿ'mīⁿ sa ndís'tiī

'áamá cuarto ch'εete yeⁿe va'āi chí ndii 'uūvī piso ní 'aa véé yaāaⁿ. Miiⁿ in'nuúⁿ nī chí che'e yú yeⁿe pascua.

¹³Apóstoles ní cueⁿe yā ní ndaaca yā tanducuéⁿē tan'dúúca chí Jesús ngaⁿa yā ngii yā, ní n'nuúⁿ yā chí che'e yā yeⁿe pascua.

¹⁴Taachí ndaā snuū ca'a hora chí che'e nguiinú yā, Jesús miiⁿ ndúúcu apóstoles yeⁿe yā ch'εetē yā na mesa chí che'e nguiinú yā. ¹⁵Jesús caⁿa yā chíi yā 'iiⁿ'yāⁿ s'eeⁿ: De'e chúúca neⁿé che'é ndúúcu ndís'tii 'viicu yeⁿe pascua 'cūū neⁿe chí 'āā 'cuéé 'cuūví. ¹⁶Caati ngaⁿa ngii ndís'tii ti 'úú ní 'āā ntéé che'é ndúúcu nī táámá 'viicu pascua ndíi taachi cuuvi cuaacu chí neⁿe caaⁿ'maⁿ yeⁿē naachí Ndyuūs ngaⁿa ntiiⁿnyúⁿ yā.

¹⁷Tuu'mi ní Jesús sta'a yā taza ndúúcu vino ní ca'a yā gracias Ndyuūs. Ní caⁿ'a yā chíi yā apóstoles yeⁿe yā: Cuta'á nī chuū ní cu'u nī nguaaⁿ nducyaaca nī. ¹⁸Ti 'úú ní ngaⁿ'á ngii ndís'tii, chí 'āā ntéé cu'ú jugo yeⁿe uvas, ndii ndaá nguuví yeⁿe naachí Ndyuūs ngaⁿa ntiiⁿnyúⁿ yā.

¹⁹Tuu'mi ní sta'a Jesús pan miiⁿ ní ca'a yā gracias Ndyuūs. Ní n'deé yā ní ca'a yā apóstoles ní caⁿ'a yā: Chuū chí tan'dúúca cuerpo yeⁿé 'tíicā. Ní teé lugar 'iiⁿ'yāⁿ chí 'caaⁿ'núⁿ yā 'úú cáávā ndís'tii. Dííⁿ nī chuū taachi n'gaacú nī yeⁿe 'úú.

²⁰Tiicá ntúūⁿ dííⁿ yā ndúúcu taza. Taachí ch'íínú che'e yā ní caⁿ'a yā: Jugo yeⁿe uvas yeⁿe taza chí cuuvi cuaacu ní chuū tan'dúúca chí yuūuⁿ yeⁿé chí cungéē cáávā ndís'tii.

²¹Maaⁿ ní saⁿ'ā chí naca'ā 'úú vee sa ndúúcu yú na mesa. ²²Saⁿ'ā chí

Daiya Dendyuūs chí 'úú cuaacu nííⁿnyúⁿ caⁿ'a sa 'cuūvī sa tan'dúúca chí neⁿe Dendyuūs. De'e chúúca ya'ai yeⁿē saⁿ'ā chí naca'ā sa 'úú.

²³Tuu'mi ní apóstoles tuc'a yā ntiingūūneeⁿ vi'i yā: ¿Du'u ra chí diiⁿ chuū?

Ngaⁿ'a yā nguaaⁿ maaⁿ yā:

¿Du'ū chí ch'εete ca?

²⁴Tuu'mi ní apóstoles tuca'a yā caⁿ'a yā nguaaⁿ maaⁿ yā cheé yā chí ch'εete ca yā. ²⁵Tuu'mi ní Jesús miiⁿ caⁿ'a yā chíi yā 'iiⁿ'yāⁿ s'eeⁿ: Reyes yeⁿe tanáⁿ'ā naciones ngaⁿa ntiiⁿnyuⁿ yā tan'dúúca chí 'iivi chεechi ní 'iiⁿ'yāⁿ yeⁿe naciones ní ngaⁿ'a yā chí rey yeⁿe yā n'daacā idiíⁿ yā. ²⁶Naati nguaaⁿ ndís'tii nguéé 'tíicā. 'Iiⁿ'yāⁿ chí ch'εete ca nguaaⁿ ndís'tii canéé chí dííⁿ yā tan'dúúca saⁿ'ā da'caiyāa chí diiⁿ mandados. 'Iiⁿ'yāⁿ chí ngaⁿ'a ntiiⁿnyúⁿ yā nguaaⁿ ndís'tii canee chí dííⁿ yā tan'dúúca 'áamá 'iiⁿ'yāⁿ chí dichíí'vē 'iiⁿ'yāⁿ. ²⁷Chēē cá yā chí ch'εetē yā. ¿Áá 'iiⁿ'yāⁿ chí n'giindí yā na mesa o 'iiⁿ'yāⁿ chí n'gii chí cho'o chí cu'u? ¿Áá nguéé 'iiⁿ'yāⁿ chí n'giindi na mesa? N'diichi nī. 'Úú ní canee nguaaⁿ ndís'tii tan'dúúca 'iiⁿ'yāⁿ ndíicūūⁿ chí dīchíí'vē.

²⁸Ndís'tii ní ch'εetinée nī nduucú nguuví nguuví taachi 'úú n'geenú ngii tanducuéⁿē. ²⁹Ní tan'dúúca Chiidá tee yā 'úú naachí ngaⁿ'ā ntiiⁿnyúⁿ 'tiicá ntúūⁿ 'úú ní teé ndís'tii 'áamá chí caaⁿ'maⁿ ntiiⁿnyúⁿ nī. ³⁰Ní ndís'tii 'cuēetē nī na mesa nduucú chí che'é nī ní cu'ú nī naachi 'úú ngaⁿ'ā ntiiⁿnyuⁿ. Ní 'cuēetē nī na sillás yeⁿe juez ní

n'diichí nī nuuⁿndi yeⁿē ndichúúví
ndaata yeⁿe 'iiⁿyāⁿ Israel chi judíos.

**Jesús caaⁿmaⁿ yā chi Pedro caaⁿmaⁿ
yā chi nguée deenu sa Jesús**

(Mt. 26.31-35; Mr. 14.27-31; Jn. 13.36-38)

³¹ Jesús yaa'ví yā Pedro ní caⁿa
yā: N'dii, Simón Pedro, Simón Pedro,
cuin'diichí nī ti yááⁿ'guiinūⁿ
ngiicá sa yeⁿe ndís'tií chí cuuvi diiⁿ
sa. N'diichineeⁿ sa ndís'tií tan'dúúcā
'iiⁿyāⁿ ndáádi yā trigo 'tíicā diiⁿ sa.
Ní véé permiso yeⁿe sa. ³² Naati 'úú
ní ngaⁿ'angua'á cáávā dii, Pedro,
chi cu'téenu ca di. Ní taachi
ndaacadaamí di yeⁿē nuuⁿndi
yeⁿe di ní cu'téenu ca di tuu'mi ní
cunnee di tanáⁿā hermanos yeⁿe di
chi cu'téenu cá yā.

³³ Simón caⁿa yā chii yā Jesús
miiⁿ: Señor, 'āā véé yááⁿ chí caⁿ'á
nduucú nī ndíí vácūū; ní ndúúti chí
'cuuví nī, 'úú ní 'cuuví ndúúcu nī.

³⁴ Jesús caⁿa yā chii yā Pedro:
Ngaⁿ'á ngíí dii chí tusáⁿā ní nguée
'cuai tī ndíí taanduvée cueueⁿdiitú
di 'iīnū cuuvi yeⁿe 'úú chí nguée
in'diichi di 'úú.

Jesús ngaⁿa yā yeⁿe chí cuchii.

³⁵ Tuu'mi ní Jesús itiinguunéeⁿ yā
apóstoles: Taachí dicho'ó ndís'tií
nguée cándεε nī bolsa yeⁿe tuumi
nī, ndíí nguée ndúú morral yeⁿe nī,
ndíí nguée ndúú ndaacuú yeⁿe nī,
¿'áá véé de'ē vεε chí chii faltar yeⁿe
nī? Apóstoles ní caⁿ'a yā: Nguée de'ē
vεε.

³⁶ Ní Jesús caⁿa yā: Maaⁿ ní
ndís'tií chí véé bolsa yeⁿe nī,
candεε nī. 'Tiicá ntúūⁿ ndís'tií
chí véé morral yeⁿe nī, candεε nī.
Ndís'tií chí nguée 'aama machete

'uūví lados 'caāiⁿ yeⁿe nī, n'diicuí nī
cotón yeⁿe nī ní cuái nī. ³⁷ Ti ngaⁿ'á
ngíí ndís'tií chí canée chí cuuvi
cuaacú tanducuéⁿē chí canée nguūⁿ
yeⁿé: Ní 'iiⁿyāⁿ caⁿ'a yā chí véé
nuūⁿndi yeⁿe 'úú tan'dúúcā tanáⁿā
'iiⁿyāⁿ chí véé nuuⁿndi yeⁿe yā. Tí
tanducuéⁿē chí canée nguūⁿ yeⁿe
'úú canée chí cuuvi cuaacu.

³⁸ Tuu'mi ní discípulos ní caⁿ'a yā:
N'dii, Señor, íngāā na 'uuvi machete
'uūví lados 'caāiⁿ. Jesús ní caⁿ'a yā:
Ndúúcu stíí 'āā véé.

**Jesús ngaⁿ'angua'á yā na jardín chí
nguuví Getsemaní**

(Mt. 26.36-46; Mr. 14.32-42)

³⁹ Cuayiivi ní can'daā Jesús
tan'dúúcā costumbre yeⁿe yā ní
cueⁿé yā na yiicū yeⁿe Olivos. Ní
discípulos yeⁿe yā cueⁿé yā ndúúcu
yā. ⁴⁰ Ní taachí ndaa yā na lugar
miiⁿ, tuu'mi ní Jesús miiⁿ ní caⁿ'a yā
chii yā discípulos yeⁿe yā: Ndís'tií
caaⁿmaⁿ'ngua'á nī chí yááⁿ'giinūⁿ
nguée n'diichineeⁿ sa ndís'tií chí dííⁿ
nī nuuⁿndi.

⁴¹ Jesús ní cueⁿe yā yeⁿe
discípulos yeⁿe yā tanduu naaⁿ
chí naachi ndaá 'áámá tuūu chí
ngii ya ní Jesús caantii'yā yā ní
caⁿ'angua'á yā. ⁴² Ní caⁿ'a yā: N'dii,
Chiidá, ndúúti chí neⁿe nī ní diví
nī yeⁿe chí canee chí 'cuenú
cuuvi yeⁿe prueba 'cūū. Naati nguée
cuuví tan'dúúcā chí 'úú neⁿé naati
tan'dúúcā chí n'dii neⁿe nī.

⁴³ Ní che'enaāⁿ 'áámá ángel yeⁿē
nanguuvi ní ca'á yā fuerzas Jesús
miiⁿ. ⁴⁴ Ti neené ya'ai Jesús miiⁿ ní
ndiituu n'dai ca ngáⁿ'angua'á yā.
Ní nuuⁿ'ni'yaaⁿ yeⁿe yā tan'dúúcā
yuuúⁿ chí ndii na yáⁿā ingée.

⁴⁵Nducueeⁿ yā naachí ngaⁿ'angua'á yā ní ndaa yā nanááⁿ discípulos yeⁿ'e yā ní ndaaca yā chi styaadú yā, ti discípulos ní neené ndaachi núúⁿ yā ti ya'ai yā cáávā Jesús miiⁿ. ⁴⁶Tuu'mi ní Jesús caⁿ'a yā chii yā discípulos: ¿De'ē cúúví chí styaadú ní? Nducueeⁿ ní ní caaⁿ'ma'ngua'á ní ní yáá'n'guiinūuⁿ nguéé n'diichineeⁿ sa ndís'tii chí diíⁿ ní nuuⁿndi.

Sta'a yā Jesús miiⁿ ní candéé yā preso

(Mt. 26.47-56; Mr. 14.43-50; Jn. 18.2-11)

⁴⁷Taachí Jesús indée yā neené n'deeé 'iiⁿ'yāⁿ ndaa yā ní saⁿ'ā chí nguuví Judas miiⁿ chí 'áámá chéé naachí ndiichuuví discípulos yeⁿ'é yā cueⁿ'é yā vmnááⁿ yeⁿ'ē 'iiⁿ'yāⁿ s'eeⁿ ní ndaa niiⁿ'nuúⁿ yā Jesús miiⁿ chí 'neeⁿ'cheendí yā. ⁴⁸Tuu'mi ní Jesús miiⁿ ní caⁿ'a yā chii yā saⁿ'ā: Díí, Judas, ¿'áá ndúúcu 'áámá beso ínaca'a di 'úú chí Saⁿ'ā chí Daiya Ndyuūs 'iiⁿ'yāⁿ?

⁴⁹Discípulos chí snée yā ndúúcu Jesús taachí snaaⁿ yā chí cuuvi, tuu'mi ní caⁿ'a yā chii yā Jesús: N'díí, Señor, ¿'áá 'caaca taaⁿ 'nū ndúúcu machete 'uúví lados 'caāiⁿ yeⁿ'ē yú?

⁵⁰Tuu'mi ní 'áámá chéé discípulos 'nuucá'ai yā 'áámá mozo yeⁿ'ē chiiduú ch'eté ca ní ch'iica yā veeⁿ sa lado tá cuaácú sa. ⁵¹Ní Jesús caⁿ'a yā: 'Áā ntéé 'cuuⁿ'miⁿ dí. 'Áā snée ra yā. Ní Jesús tuu'ví yā veeⁿ sa ní nduūvā yeⁿ'ē sa. ⁵²Quayivi ní Jesús caⁿ'a yā chii yā chiiduú n'gēete ndúúcu soldados chí capitanees chí diíⁿ sa cuidado yaācū templo ndúúcu 'iiⁿ'yāⁿ ndicúú chí ngaⁿ'ā

ntiiⁿ'nyúⁿ yā yeⁿ'e yaācū chí ndaa yā ndúúcu Judas miiⁿ: ¿'Áā ndaa ndís'tii ndúúcu machetes 'uúví lados 'caāiⁿ ndúúcu yáⁿ'á yeⁿ'e soldados tan'dúúca chí caⁿ'a ní cutá'a ní 'áámá chí duūcū? ⁵³Taachí caneé ndúúcu ndís'tii nguuví nguuví ná yaācū templo nguéé neⁿ'é ní cuta'á ní 'úú. Naati maaⁿ ní hora 'cūú chí yeⁿ'ē ndís'tii ti hora taachí maāiⁿ miiⁿ, chííⁿ chí yáá'n'guiinūuⁿ ngaⁿ'ā ntiiⁿ'nyuⁿ sa.

Pedro miiⁿ ní ngaⁿ'a sa chí nguéé in'diichi sa Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴Tuu'mi ní 'iiⁿ'yāⁿ s'eeⁿ sta'a yā Jesús miiⁿ ní candéé yā Jesús va'ai yeⁿ'ē chiiduú ch'eté ca. Pedro miiⁿ ní ndáá yaⁿ'ai sa 'iiⁿ'yāⁿ. ⁵⁵Ná'ā 'iiⁿ'yāⁿ tiiví yā yaⁿ'ā náávtaⁿ'ā chuva'ai ní ch'eté yā cuaaⁿ 'diituú yaⁿ'ā miiⁿ chí dicuutú yā. Pedro miiⁿ ní ch'iindi sa ntúuⁿ sa ndúúcu 'iiⁿ'yāⁿ s'eeⁿ.

⁵⁶Tuu'mi ní 'áámá táⁿ'ā chí cánée caadi 'iyyū, n'diichi tá Pedro miiⁿ chí vee sa 'diituú na yaⁿ'ā. Ní n'giinu n'dai tá saⁿ'ā ní caⁿ'a tá: Sá'a 'cūú ní caneé sa ndúúcu 'iiⁿ'yāⁿ chí preso yā.

⁵⁷Pedro miiⁿ ní caⁿ'a sa chí sa n'daātā miiⁿ: 'Úú nguéé in'diichi 'iiⁿ'yāⁿ miiⁿ.

⁵⁸Quayivi miiⁿ ní 'aama saⁿ'ā n'diichi n'dai sa ní caⁿ'a sa chí sa Pedro miiⁿ: Dii, ní ndúúcu di nguaaⁿ 'iiⁿ'yāⁿ s'eeⁿ. Pedro miiⁿ ní caⁿ'a sa chí sa saⁿ'ā miiⁿ: Nguéé 'úú.

⁵⁹Cho'ōo 'áámá hora, ní táámá yā ní caⁿ'a yā: Cuaacu ní'nyúⁿ sá'a 'cūú ní cánée sa ndúúcu 'iiⁿ'yāⁿ chí preso yā ti sá'a 'cūú ní yeⁿ'ē yáⁿ'ā Galilea ntúuⁿ.

⁶⁰ Pedro miiⁿ ní caⁿā sa chii sa saⁿā miiⁿ: Díí, sáⁿā, nguée deenú chi ngaⁿā di. Taachí Pedro miiⁿ 'āā cuéeⁿ cuiinu sa caⁿa sa chúu, tusáⁿā miiⁿ ní 'cai tī. ⁶¹Tuu'mi ní Jesús miiⁿ nguēcundíí yā ní n'diichi yā Pedro. Pedro miiⁿ nán'gaācū sa nduudu chí caⁿa Jesús miiⁿ chii yā saⁿā 'túúcā: 'Áā 'iinu cúúví caaⁿmaⁿ dí chi nguée n'diichi di 'úú, taachi 'āā cuéeⁿ 'caí 'áámá vmnéⁿēe tusáⁿā. ⁶²Tuu'mi ní Pedro miiⁿ ní can'dáa sa cuaaⁿ va'ai, ní chæecu taaví sa ti ya'ai staava yeⁿē sa.

Saⁿā s'eeⁿ ch'eⁿe sa Jesús

(Mt. 26.67-68; Mr. 14.65)

⁶³Sáⁿā s'eeⁿ chi diiⁿ cuidado Jesús miiⁿ chííⁿnyuⁿneeⁿ sa Jesús miiⁿ ní ch'eⁿe sá 'iiⁿyāⁿ. ⁶⁴Ní n'gaadi sa nduutináaⁿ yā ndúúcū 'aama tíínuuⁿ. Tuu'mi ní ch'eⁿe sá naaⁿ Jesús ní ngaⁿa sa ngii sa 'iiⁿyāⁿ: Dii, caaⁿmaⁿ di, 'du'ú ch'eⁿē dii?

⁶⁵Ní neene cunnccā nduudu ngii sá Jesús.

Jesús nanááⁿ 'iiⁿntyéⁿē yeⁿe yaācū templo

(Mt. 26.59-66; Mr. 14.55-64; Jn. 18.19-24)

⁶⁶Taachí chidæeve táámá nguuvi, 'yaaⁿ n'dái 'iiⁿyāⁿ ndiicūú yeⁿe yāāⁿ miiⁿ chi ngaⁿa ntiiⁿnyuⁿ yā yeⁿe yaācū, ndúúcū chiiduú n'gæeté, ndúúcū maestros chi ngi'cueeⁿ ley miiⁿ candée yā Jesús nanááⁿ 'iiⁿntyéⁿē yeⁿe yaācū templo.

⁶⁷Mífⁿ íntiinguunéeⁿ yā Jesús: 'Áá díí chí Cristo? Jesús miiⁿ nan'guēcútaⁿa yā yeⁿe 'iiⁿyāⁿ s'eeⁿ: Ndúúti chi caaⁿmaⁿ chí 'tíicā, ní nguée cu'téenu ní yeⁿé. ⁶⁸Nduuti chí 'úú ntiinguuneeⁿ ndís'tií,

nguée n'guēcútaⁿa ní yeⁿé, ndíí nguée ndúú n'dæechi ra ní 'úú.

⁶⁹Naati hora chi cuchií ní Saⁿā chi Daiya Ndyuūs ní 'cuūndi sa lado yeⁿe honor yeⁿé Ndyuūs chí véé tanducueⁿē poder yeⁿe yā.

⁷⁰Tanducueⁿē 'iiⁿyāⁿ s'eeⁿ caⁿa yā: 'Áá dii Daiya Dendyuūs miiⁿ? Ní Jesús ní caⁿa yā: Ndís'tií maāⁿ ní ngaⁿa ní chi 'úú ní 'tíicā.

⁷¹Tuu'mi ní 'iiⁿyāⁿ s'eeⁿ ní caⁿa yā: 'De'ē cá nduudu cuaacu yeⁿe 'iiⁿyāⁿ chí neⁿe yú? Tí maāⁿ yú chíiindiveeⁿ cuaacú yú nduudu chí caⁿa sa.

Jesús nanááⁿ gobernador Pilato

(Mt. 27.1-2, 11-14; Mr. 15.1-5; Jn. 18.28-38)

23 Tuu'mi ní nducyaaca 'iiⁿyāⁿ ní candæe yā Jesús miiⁿ nanááⁿ gobernador Pilato. ²Ní tuc'a yā caⁿa yā nuuⁿndi yeⁿē Jesús miiⁿ ní caⁿa yā: Inndaacá 'nū sáⁿa 'cūū chi diiⁿ sa chí 'iiⁿyāⁿ nguée i'téenu yā chi ngaⁿa ley yeⁿé 'nū. Ní nguée neⁿe sa chí nadí'v'e 'nū yeⁿe yáⁿāa emperador César tan'dúúcā chí ngaⁿa ley yeⁿé ní. Ní sáⁿa 'cūū ní ngaⁿā sa chí maāⁿ sa chí Cristo, chí Rey yeⁿé 'nū.

³Tuu'mi ní saⁿā Pilato miiⁿ ní itiinguunéeⁿ sa Jesús: 'Áá dii chí Rey yeⁿe 'iiⁿyāⁿ Israel s'eeⁿ? Jesús nan'guēcútaⁿa yā: N'dií ngaⁿā cuaacú ní ti 'tíicā.

⁴Pilato miiⁿ ní caⁿa yā chii yā chiiduú n'gæeté ndúúcū 'iiⁿyāⁿ s'eeⁿ: 'Úú nguée inndaacá mar 'áámá nuuⁿndi yeⁿe sáⁿa 'cūū.

⁵'Iiⁿyāⁿ s'eeⁿ ní diitu n'dái 'cai yā: Sáⁿa 'cūū ní idiíⁿ sa chí 'iiⁿyāⁿ n'g'éécú cheendi yā nguaaⁿ maaⁿ yā ndúúcú chí ngi'cueeⁿ yā ní

ngi'cueeⁿ yā nuuⁿmáⁿ yáⁿāa Judea ndíí na yáⁿāa yeⁿē Galilea ndii 'muuⁿ.

Jesús nanááⁿ rey Herodes

⁶Tuu'mi ní Pilato, taachi ch'iindiveéⁿ yā chi Jesús cheⁿe yā ndii yáⁿāa yeⁿe Galilea, ní ntiinguuneéⁿ yā Jesús nduuti chi yeⁿe yáⁿāa yeⁿe Galilea. ⁷Ní taachí Pilato ch'iindiveeⁿ sa chi Jesús miiⁿ ní yeⁿē yáⁿāa Galilea yeⁿe yáⁿāa naachi rey Herodes ngaⁿa ntiinⁿnyúⁿ yā, Pilato miiⁿ ngaⁿa ntiinⁿnyúⁿ yā chi Jesús caⁿa yā nanááⁿ rey Herodes tii canée yā na yááⁿ Jerusalén nguuví miiⁿ.

⁸Taachí rey Herodes n'díichi sa Jesús miiⁿ, neené yeenú sa ti 'āā 'nááⁿ n'dai tiempo néⁿé sá snaaⁿ sa Jesús. Tí néené n'deē 'nááⁿ chí ch'iindiveeⁿ sa yeⁿē yā ní canée ngíínú sá chí snaaⁿ sa 'áámá vaadi n'giinu chi dííⁿ Jesús miiⁿ. ⁹Néené n'deē 'naaⁿ chí ntiingūūneeⁿ sa Jesús miiⁿ, naati nguéeⁿ deⁿē vee nan'guuecútaⁿa Jesús. ¹⁰Tuu'mi ní miiⁿ canee ntuuⁿ chiiduú n'geeté ndúúⁿcū maestros chí ngi'cuéeⁿ ley miiⁿ chí n'deē 'nááⁿ n'dai ngaⁿa yā chí nuuⁿndi yeⁿē Jesús. ¹¹Tuu'mi ní Herodes ndúúⁿcū soldados yeⁿe yā chi'nuuⁿ yā 'áámá tiinūuⁿ n'dái tan'dúúⁿcā catecai rey Jesús miiⁿ ní chiiⁿnyuⁿneeⁿ yā Jesús miiⁿ ní cunnkáā caⁿa yā yeⁿe Jesús miiⁿ. Cuayiivi ní dicho'o ntúuⁿ yā Jesús nanááⁿ Pilato miiⁿ. ¹²Ndíí nguuví miiⁿ tuu'mi ní Pilato ndúúⁿcū Herodes naaⁿ n'daá n'dai yā ndúúⁿcū vi'í ti cuááⁿ vmnaaⁿ ní nguéeⁿ n'diichi yā vi'í.

Pilato nca'a sa Jesús chí 'cuūvi

(Mt. 27.15-26; Mr. 15.6-15; Jn. 18.39-19.16)

¹³Tuu'mi ní Pilato nduuvidaamá yā chiiduú n'geeté ndúúⁿcū 'iiⁿntyéⁿe ndúúⁿcū nducyaaca 'iiⁿyāⁿ yeⁿē yááⁿ Jerusalén miiⁿ. ¹⁴Ní caⁿa yā chiiⁿ yā 'iiⁿyāⁿ s'eeⁿ: Ndís'tii ní ndaá nī chí 'cúúⁿ nī sáⁿa 'cūū chí diiⁿ sa chí 'iiⁿyāⁿ ní nguéeⁿ n'geetinéeⁿ 'diiⁿ yā ndúúⁿcū chí ngi'cueeⁿ sa. Taachí intiinguuneéⁿ saⁿā nanááⁿ ndís'tii nguéeⁿ nindaācá mar 'áámá nuuⁿndi yeⁿē sa chí ngaⁿa ndís'tii yeⁿē sa. ¹⁵Ndíí nguéeⁿ ndúúⁿ rey Herodes miiⁿ ndaāca yā nuuⁿndi yeⁿē sáⁿa 'cūū chí canée chí 'cuūvi sa ti Herodes 'āā dicho'ó yā sáⁿa 'cūū nanaáⁿ. Sáⁿa 'cūū nguēe diiⁿ sa nuuⁿndi ch'εεte chí 'cuūvi sa. ¹⁶Maaⁿ ní dííⁿ 'cueⁿé saⁿā miiⁿ ní cuáyíívi n'dεechí saⁿā.

¹⁷Canéeⁿ 'áámá costumbre yeⁿé nī chí gobernador canee chí n'dεechi yā 'áámá preso 'viicu pascua ní gobernador Pilato miiⁿ ní canée yā diiⁿ yā 'tíicā. ¹⁸Nducyáácá 'iiⁿyāⁿ 'cai yā: N'dεechii nī saⁿā chí ngúúvī Barrabás. Ní 'āā 'cuuvi rá sáⁿa 'cūū.

¹⁹Barrabás miiⁿ canúúⁿ sá vácūū chí diiⁿ sa chí 'iiⁿyāⁿ yeⁿe yááⁿ Jerusalén miiⁿ ní 'cuuⁿmíⁿ yā contra yeⁿe gobierno ní ch'iiⁿnuⁿ sa 'áámá tináⁿā. ²⁰Gobernador Pilato miiⁿ ní neⁿe sa n'dεechi sa Jesús, ní caⁿa sa chiiⁿ sa 'iiⁿyāⁿ s'eeⁿ taama vmnéⁿēe chí n'dεechi sá Jesús. ²¹Naati 'iiⁿyāⁿ s'eeⁿ 'cai ntúuⁿ yā: Cu'nééⁿnga'á nī saⁿā, cu'nééⁿnga'á nī saⁿā.

²²Gobernador Pilato miiⁿ ní caⁿa ntúuⁿ yā ndii chiiⁿ ndii 'íínú cuuvi: ¿D'É'É chí nguéeⁿ n'dáacā ndííⁿ sáⁿa 'cūū? 'Úú nguéeⁿ inndaācá mar 'áámá

núúⁿndí ch'εεte yeⁿé sa chi 'cuúvi sa.
'Úú ní ca'á orden chi ch'eⁿé yā sáⁿa
'cūū ní n'dεεchí sáⁿa 'cūū.

S'nééⁿnga'á yā Jesús

²³Iiⁿyāⁿ s'eeⁿ chi canndii
cá yā 'cai yā chí chiica yā chí
cu'neeⁿngá'āa Jesús miiⁿ. Ní
'iiⁿyāⁿ s'eeⁿ ndúúcu chiiduú n'geeté
diituú n'dái ca 'cai yā. ²⁴Tuu'mi
ní gobernador Pilato miiⁿ ní ca'a
yā orden chi diiⁿ yā tan'dúúca chí
neⁿe 'iiⁿyāⁿ s'eeⁿ. ²⁵Ní n'dεεchi yā
saⁿā chi nguuví Barrabás miiⁿ chi
canúúⁿ vácūū. Sáⁿā miiⁿ ní diiⁿ sa
chi 'cuuⁿmíⁿ 'iiⁿyāⁿ yeⁿe Israel
contra yeⁿe gobierno ní 'niⁿnuⁿ sa
'áámá tináⁿā. Sáⁿa 'cūū chi chiica
'iiⁿyāⁿ s'eeⁿ chi n'dεεchí yā saⁿā. Ní
nca'a yā Jesús miiⁿ chí soldados
cu'neeⁿnga'a sa tan'dúúca chi neⁿe
'iiⁿyāⁿ s'eeⁿ.

Yeⁿé chí cu'neeⁿnga'á yā Jesús

(Mt. 27.32-44; Mr. 15.21-32; Jn. 19.17-27)

²⁶Taachí cueⁿe yā cuaaⁿ cyúúni
miiⁿ ndúúcu Jesús miiⁿ, soldados
sta'á yā 'áámá saⁿā yeⁿe yáⁿā
Cirene chi nguuví sa Simón. Saⁿā
miiⁿ ní yúúni canuuⁿ sa chi cueⁿe
sa cuεeti. Soldados a fuerza
di'cuíftu yā Simón miiⁿ chi candée
sa cruz yeⁿe Jesús miiⁿ ní cueⁿe sa
cuaaⁿ daami Jesús miiⁿ.

²⁷Nééⁿé 'yaaⁿ 'iiⁿyāⁿ yeⁿe yáāⁿ
Jerusalén miiⁿ cueⁿe yā n'dáa yā
Jesús miiⁿ ndúúcu n'daataá chí
diituu ngeecu yā ní ya'ai yā cáávā
Jesús miiⁿ. ²⁸Jesús miiⁿ ní ch'íínu
yā n'daataá s'ééⁿ ní caⁿa yā chii
yā táⁿā s'eeⁿ: Ndís'tiī, daiya 'iiⁿyāⁿ
yeⁿe yáāⁿ Jerusalén, nguéeⁿ cuεécú
ní cáávā 'úú, naati cuεécú ní cáávā

maáⁿ ní ní caavā daiya ní. ²⁹Ti
ndaá nguuví chí caaⁿmaⁿ 'iiⁿyāⁿ:
¿De'ε chúúca n'dai n'daataá chí nguéeⁿ
ncuuví daiya tá ní n'daataá chí
nguéeⁿ ntaavi daiya tá ní n'daataá
chí nguéeⁿ daiya tá chí ca'a ta daiya
tá chí chiicu? ³⁰Tuu'mi ní 'iiⁿyāⁿ
s'eeⁿ tucá'a yā caⁿa yā 'tuucā: Díí
yiicū cun'daá nduú ní vmnaaⁿ yeⁿé
'nū. Caⁿa ntúuⁿ yā chii yā yiicū
n'gaiyāā: Cun'díí neeⁿ dí nús'uu.
³¹Caati ndúúti chí 'iiⁿyāⁿ chí taaⁿ yā
'caaca yā yáⁿā cueéⁿ chí tan'dúúca
'úú, ¿áá nguéeⁿ caniicu cá yā 'caaca
yā yáⁿā chí cuuⁿmaⁿ chí tan'dúúca
ndís'tiī? 'Tííca ngaⁿa Jesús.

³²Nguuví miiⁿ ní candée ntúuⁿ yā
na 'uuví saⁿā chí n'giiⁿnuⁿ 'iiⁿyāⁿ
chí cu'neeⁿnga'a yā saⁿā s'eeⁿ
dáámá ndúúcu Jesús miiⁿ. ³³Taachí
ndaa yā lugar yeⁿé 'áámá yiicū
'lííⁿ chí nguuví Calavera, miiⁿya
chí'nééⁿnga'a yā Jesús miiⁿ ndúúcu
nduu 'uúví saⁿā chí n'giiⁿnuⁿ 'iiⁿyāⁿ,
'áámá sa lado ta cuaacú Jesús
miiⁿ, ní táámá sá lado tá 'cueé
yā. ³⁴Tuu'mi ní taachi snée yā
i'neeⁿnga'á yā, Jesús miiⁿ caⁿa yā:
N'dii, Chiidá, nadich'εécú ní yeⁿe
saⁿā s'uuⁿ caati nguεε déénu sá de'ε
chí 'túúca idiíⁿ sa. Tuu'mi ní soldados
tun'dáa sa suerte na catecai Jesús
chí ca'á sa 'áámá sá ndúúcu taama
sa. ³⁵'Iiⁿyāⁿ yeⁿe yáāⁿ Jerusalén miiⁿ
snée yā n'giinu yā níícu 'iiⁿntyenⁿé
n'giiⁿnyuⁿneéⁿ yā Jesús miiⁿ. Ní
ngaⁿa yā ngii yā yeⁿe Jesús: Sáⁿa
'cūū ní nadangúⁿai sa tanáⁿā 'iiⁿyāⁿ.
¿De'ε cuuvi chí nguéeⁿ nadinguáⁿai
maāⁿ sa saⁿā nduuti chí saⁿā miiⁿ
chí Cristo chí Ndyuūs dicho'ó yā?

³⁶Tiicá ntúūⁿ soldados
n'giiⁿnyuⁿneeⁿ sa Jesús miiⁿ. Cheⁿe

niiⁿnúⁿ yā ní ca'a yā vinagre. ³⁷Ní caⁿa yā chii yā Jesús miiⁿ: Ndúúti chí díí chí Rey yeⁿ'e 'iiⁿ'yāⁿ Israel, nadanguáⁿ'ai maāⁿ di díí.

³⁸Ní canéé nguūⁿ na tiiⁿ cruz yeⁿ'e Jesús miiⁿ nduudu griego ndúúcu nduudu latín ndúúcu nduudu hebreo, chí ngaⁿ'a: Sáⁿ'a 'cūū Rey yeⁿ'e 'iiⁿ'yāⁿ yeⁿ'e ndaata Israel.

³⁹Áámá chee saⁿ'ā chí véé nuuⁿ'ndi yeⁿ'e sa chí ca'nééⁿnga'a yā 'áámá lado yeⁿ'e Jesús cunncaā caⁿ'a sa ní caⁿ'a sa chí sa Jesús: Ndúúti chí díí chí Cristo miiⁿ nadinguáⁿ'ai di maaⁿ di ní nadinguáⁿ'ai ntuuⁿ di nús'uu.

⁴⁰Táámá saⁿ'ā chí cu'nééⁿnga'a yā táámá lado yeⁿ'e Jesús 'caa'va sa ndúúcu sáⁿ'a 'cūū ní caⁿ'a sa chí sa saⁿ'ā: Díí 'áá nguéé 'la'a di Ndyuūs? Díí ní dáámá condenado ndúúcu nús'uu. ⁴¹S'uúⁿ ní cuaacu níⁿ'nyúⁿ n'geenu yú ngii ti véé nuuⁿ'ndi yeⁿ'e yú chí nadíí'vē yú nuuⁿ'ndi yeⁿ'e yú naati sáⁿ'a 'cūū nguéé dē'ē vee nuuⁿ'ndi dííⁿ sa.

⁴²Saⁿ'ā miiⁿ ní caⁿ'a sa chí sa Jesús miiⁿ: N'diī, Jesús, n'gaacú nī yeⁿ'e 'úú taachí ndaá nī naachi caaⁿ'maⁿ ntiiⁿ'nyuⁿ yeⁿ'ē.

⁴³Tuu'mi ní Jesús miiⁿ caⁿ'a yā chíi yā saⁿ'ā: Cuaacu níⁿ'nyúⁿ ngaⁿ'á ngíí díí, ti maaⁿ ní cunee di nduucú na lugar chí nguuví paraíso.

Jesús ch'ii yā

(Mt. 27.45-56; Mr. 15.33-41; Jn. 19.28-30)

⁴⁴Taachí chíi maⁿ'a nguuví chíi maāiⁿ núúⁿ'máⁿ íⁿ'yeeⁿdi ndíí taanduū n'gēecu 'ínú chíinū.

⁴⁵Yáⁿ'ā ní nduuví maāíⁿ ní cortina yeⁿ'e yaācū templo nda'ai náávtáⁿ'ā.

⁴⁶Tuu'mi ní Jesús miiⁿ 'cai yā: N'diī, Chiidá, na ta'á nī cu'neéⁿ espíritu

yeⁿ'é. Ch'ínú caⁿ'a yā chuū, ní Jesús ch'ii yā.

⁴⁷Taachí saⁿ'ā chí ngaⁿ'a ntiiⁿ'nyuⁿ yeⁿ'e soldados romanos n'diichi sa chí chíi Jesús, tuu'mi ní caⁿ'a sa: Dē'e chúúca ch'ēete Ndyuūs. Cuaacu níⁿ'nyúⁿ sáⁿ'a 'cūū saⁿ'ā chí nguéé nuuⁿ'ndi yeⁿ'e sa.

⁴⁸Nducyáácá 'iiⁿ'yāⁿ chí cheⁿ'e yā ní n'diichi yā chí chíi, nguēcundíi yā cheⁿ'e niiⁿ'nuⁿ yā taachi cueⁿ'é yā vaacu yā. ⁴⁹Ní nducyáácá 'iiⁿ'yāⁿ chí n'diichí yā Jesús miiⁿ, ndúúcu n'daataá chí cheⁿ'e ndúúcu Jesús miiⁿ ndii yáⁿ'āa yeⁿ'e Galilea, ch'ēetinéé yaⁿ'ai yā ch'ínú yā dendu'ū chí 'túúca.

Ch'iiichi yā Jesús

(Mt. 27.57-61; Mr. 15.42-47; Jn. 19.38-42)

⁵⁰Véé 'áámá saⁿ'ā chí n'dai ní n'daacā sa chí ngúúví sá José. Sáⁿ'ā miiⁿ ní saⁿ'ā ch'ēete yeⁿ'é 'iiⁿ'ntyéⁿ'ē ch'ēete yeⁿ'é 'iiⁿ'yāⁿ Israel. ⁵¹Saⁿ'ā miiⁿ ní yeⁿ'e yāāⁿ Arimatea chí yáⁿ'āa yeⁿ'e 'iiⁿ'yāⁿ Israel. Ní saⁿ'ā nguéé ndúúvídaama sa ndúúcu tanáⁿ'ā 'iiⁿ'ntyéⁿ'ē ti nguéé canee yiinú sa ndúúcu chí dííⁿ yā. Tí saⁿ'ā miiⁿ canee ngíínú sá tiempo chí Ndyuūs ndaa yā iⁿ'yeeⁿdí 'cūū ní ngaⁿ'a ntiiⁿ'nyúⁿ yā. ⁵²Ní cueⁿ'e sa ndaa sa nanááⁿ gobernador Pilato ní chiica sa cuerpo yeⁿ'e Jesús miiⁿ. ⁵³Quayiivi taachi José ndiví sa cuerpo yeⁿ'e Jesús na cruz ní ch'ēecu sa áámá sámana na cuerpo yeⁿ'e yā tan'dúúca costumbre yeⁿ'e 'iiⁿ'yāⁿ Israel ní ch'iiichi sa na 'áámá yáinyāⁿ ngai chí din'dái yā ch'ēeti yiivi yaava naachí mar 'áámá 'iiⁿ'yāⁿ nguéé nnúuⁿ yā. ⁵⁴Nguuvi miiⁿ ní nguuví viernes chí 'iiⁿ'yāⁿ

ch'iindiyaáⁿ yā tanducueⁿē cáávā 'viicu pascua ní cáávā nguuví chī cuchií chī sábadó chī nguuví chī ntaavi'tuunúúⁿ 'iiⁿ'yāⁿ Israel.

⁵⁵N'daata s'eeⁿ chí can'daa Jesús ndii na yáⁿ'āa Galilea, cueⁿ'e tá ní n'diichi tá yáinyāⁿ ní táácā canuúⁿ cuerpo yeⁿ'e Jesús. ⁵⁶Ní taachí n'daataá s'eeⁿ ndaa tá vaacu tá, n'nuuⁿ tá perfumes ndúúcū pomadas chī n'dεévé ngeeⁿ. Ní nguuví cuayiivi, ní nguuví sábadó chī ntaavi'tuunúúⁿ 'iiⁿ'yāⁿ tan'dúúccā chī ngaⁿ'a ley yeⁿ'e yā.

Jesús nanduuchí yā yeⁿ'ē nguaaⁿ tináⁿ'ā

(Mt. 28.1-10; Mr. 16.1-8; Jn. 20.1-10)

24 Nguuví domingo chī maaⁿ ní nguuví vmnááⁿ vmnaaⁿ yeⁿ'ē ndεete, tyaaⁿ n'dáí cueⁿ'e n'daataá s'ééⁿ ní cueⁿ'e yā ndúúcū tanáⁿ'ā n'daataá. Candée yā especias chī dεévé ngeéⁿ chí 'āā vée yaáⁿ yā. ²Taachí ndāa yā na yáinyāⁿ miiⁿ, 'āā ntée tuúú ch'εetē miiⁿ na cheendi yáinyāⁿ ti canee 'aama lado. ³Tuu'mi ní taachí sndaa yā chεeti yáinyāⁿ miiⁿ, nguée ndaacá yā cuerpo yeⁿ'e Jesús. ⁴Taachí n'diichí yā chuū, ní dii'yá yā chií, tuu'mi ní neééⁿ na 'uuví saⁿ'ā 'diituú yā ndúúcū catecai chī dεévé ngii. ⁵Ní n'daataá s'eeⁿ dii'ya n'dai yā chií ní n'diichí yā ndii na yáⁿ'āa. Saⁿ'ā s'eeⁿ ní caⁿ'a sa: ¿Dε'ē cuuví chí in'nuúⁿ nī 'iiⁿ'yāⁿ chī candúúchí yā yeⁿ'ē nguaaⁿ tináⁿ'ā? ⁶Iiⁿ'yāⁿ miiⁿ ní 'āā ntée canee yā 'muuⁿ. 'Āā nnduuchi yā nguaaⁿ tináⁿ'ā. N'gáácú nī yeⁿ'ē nduudu chí caⁿ'a yā taachi canee yā ndúúcu nī na yáⁿ'āa Galilea taachí 'āā cuéeⁿ 'cuūví yā. ⁷Ní Jesús

miiⁿ ní caⁿ'a yā chií yā ndís'tií: 'Úú Saⁿ'a chī Daiya Ndyuūs ní 'iiⁿ'yāⁿ canée chí nca'á yā 'úú ta'ā 'iiⁿ'yāⁿ chī dinuuⁿndí yā. Ní 'iiⁿ'yāⁿ s'eeⁿ cu'nee'nga'á yā 'úú; naati ndiichi ndii 'ínú nguuví 'úú nduuchí yeⁿ'e nguaaⁿ tinaⁿ'ā.

⁸Tuu'mi ní n'daata s'eeⁿ n'gaacu tá yeⁿ'ē nduudu yeⁿ'ē Jesús miiⁿ. ⁹Ní cueⁿ'e tá yeⁿ'e yáinyāⁿ ní cunaⁿ'ā ta ní caⁿ'ā tá chií tá ndu'u ndiicháámá apóstoles ndúúcū tanáⁿ'ā 'iiⁿ'yāⁿ chī snée yā miiⁿ'ya. ¹⁰N'daata s'eeⁿ chī caⁿ'a ta chií tá apóstoles ní ta María yeⁿ'e yāā Magdala, ndúúcū ta Juana, ndúúcū tá María chí chεecuú Jacobo, ndúúcū tanáⁿ'ā n'daata s'eeⁿ. ¹¹Apóstoles ní nadicadiinúúⁿ yā chí tán'ā s'eeⁿ ní loca tá cáávā chī ngaⁿ'a tá. Ní nguée s'téenu yā nduudu yeⁿ'ē tá.

¹²Tuu'mi ní Pedro miiⁿ ní ncueeⁿ sa ní cueⁿ'e sa ngéenu sa na yáinyāⁿ. Taachí ndāa sa, tuu'mi ní n'diichi núúⁿ sa chεeti yainyāⁿ ní 'āā dámaaⁿ sábanas canee miiⁿ. Saⁿ'ā ní cueⁿ'e yiinu sá yeⁿ'e chí chó'oo ní cunaⁿ'ā sa na vaacu sa.

Saⁿ'ā s'eeⁿ ní cueⁿ'e sa cuaaⁿ cyúúni chí ngeⁿ'e cuaaⁿ na yāāⁿ Emaús

(Mr. 16.12-13)

¹³Nguuví mííⁿ nūuⁿ, 'uuví saⁿ'ā s'eeⁿ cueⁿ'é yā 'áámá yāāⁿ 'lííⁿ chí nguuví Emaús chī canee taanduú ndiichúúví kilómetros yeⁿ'e yāāⁿ Jerusalén. ¹⁴Ní taachí cueⁿ'e yā cuaaⁿ cyúúni ní índéé yā yeⁿ'e tanducueⁿē dendu'ū chí chií. ¹⁵Nááⁿ chí índéé yā ní itiinguuneeⁿ vi'í yā, maaⁿ Jesús miiⁿ ndaa niiⁿ'núⁿ yā ní cueⁿ'é yā ndúúcū 'iiⁿ'yāⁿ s'eeⁿ. ¹⁶Taachí n'diichí yā Jesús miiⁿ nguée

iintiinaaⁿ yā 'iⁿ'yāⁿ. ¹⁷ Jesús caⁿ'a yā chii yā 'iⁿ'yāⁿ s'eeⁿ: ¿De'e indee ndís'tii? ¿De'e cuuví tātii ndaachi yíinú ní?

¹⁸ Saⁿ'ā chi nguuví Cleofas nan'guēcútaⁿ a yā. ¿Áá díí, 'áamá n'dyáⁿ'ā dii chi canuuⁿ di yúúní na yáāⁿ Jerusalén chi nguée déenu di de'é chií nguuví s'eeⁿ na yáāⁿ Jerusalén miiⁿ?

¹⁹ Tuu'mi ní Jesús caⁿ'a yā chii yā 'iⁿ'yāⁿ s'eeⁿ: ¿De'é chií yáāⁿ miiⁿ'ya? 'iⁿ'yāⁿ s'eeⁿ ní caⁿ'a yā: Jesús yeⁿ'e yáāⁿ Nazaret, chi 'áamá saⁿ'ā profeta ní dííⁿ yā 'áamá ntiⁿ'nyuⁿ n'dai ndúúcu poder. Ní dííⁿ yā n'dee n'dái vaadi n'giinu ní ngaⁿ'a yā nduudu yeⁿ'é Ndyuūs nanááⁿ Ndyuūs ní nanááⁿ nducyaaca 'iⁿ'yāⁿ. ²⁰ Chiiduú n'gēetē ndúúcu 'iⁿ'ntyéⁿ'ē yeⁿ'ē yú tun'dáa nuuⁿ'ndi yeⁿ'e Jesús ní ncaⁿ'a yā Jesús 'iⁿ'yāⁿ ní caⁿ'a yā chí 'cuuvi yā. Nícu s'neeⁿ'nga'á yā Jesús. ²¹ Nús'uu ní snée yúúní nū ní cunee ngiinú nū chí sáⁿ'a 'cūū ní nadinguáⁿ'ai sa 'iⁿ'yāⁿ yeⁿ'é nación Israel chi nación yeⁿ'é nū. Maaⁿ ní 'iinū nguuví chí chií chuū. ²² Ní ná n'duuví n'daataá chí chiicá yā dáamá nduucú nū cheⁿ'é yā tyaaⁿ na yáinyāⁿ ní cueⁿ'e yíinú nū. ²³ Ní ndaá yā nanaáⁿ nū ní caⁿ'a yā chi nguée ndaaca yā cuerpo yeⁿ'e Jesús miiⁿ. Ní n'diichí yā n'duuví ángeles chí caⁿ'a yā chii yā 'iⁿ'yāⁿ s'eeⁿ chí Jesús miiⁿ 'āa nduuchí yā yeⁿ'e nguaaⁿ tináⁿ'ā. ²⁴ Ni cheⁿ'é n'duuví saⁿ'ā chi chiicá nduucú nū na yáinyāⁿ ní ndaāca sa tan'dúúca chí ngaⁿ'a n'daataá s'eeⁿ naati nguée n'diichi sa Jesús.

²⁵ Tuu'mi ní Jesús caⁿ'a yā chii yā saⁿ'ā s'eeⁿ: De'e chúúca vaadicadínūuⁿ yeⁿ'e ndís'tii ndúúcu staava yeⁿ'e ní chí cheechi chí nguée st'éenu ní

tanducuéⁿ'ē chí caⁿ'a saⁿ'ā profetas.

²⁶ ¿Áá nguée canee nguūⁿ na libro yeⁿ'é Ndyuūs chí Cristo miiⁿ canée chí 'cuenú yā cuuvi cosas chí 'túúca ní cuayiivi mífⁿ cunaⁿ'á yā ná va'ai cheeti nguuví?

²⁷ Tucá'a Jesús caⁿ'a yā yeⁿ'e tanducuéⁿ'ē chí canée nguūⁿ na libro yeⁿ'é Ndyuūs ndíí taachí dinguuⁿ Moisés ndúúcu chí dingúūⁿ nducyaaca profetas. Ní ngaⁿ'a Jesús yeⁿ'e chí dingúūⁿ yā yeⁿ'é Cristo ndíí cuááⁿ vmnaaⁿ yeⁿ'e chí canée chí chó'oo yeⁿ'é yā.

²⁸ Tuu'mi ní taachi ndaá yā na yáāⁿ 'lín chí cueⁿ'e yā, Jesús miiⁿ ní dííⁿ yā chí candiicá ca yā. ²⁹ Saⁿ'ā s'eeⁿ di'cuítu sa Jesús chí canee yā ndúúcu sa, ní caⁿ'a sa chí sa Jesús: N'dií cunee ní nduucú nū, ti cuuvi chíinū yeⁿ'e ní. 'Áa cuée cuuví 'da'ā. Tuu'mi ní Jesús cueⁿ'e yā ndúúcu saⁿ'ā s'eeⁿ cuaaⁿ cheeti va'ái ní canee yā ndúúcu sa.

³⁰ Taachí Jesús miiⁿ vee yā na mesa ní che'é yā ndúúcu 'iⁿ'yāⁿ s'eeⁿ, tuu'mi ní sta'á yā pan ní caⁿ'angua'á yā ní ca'a yā gracias Ndyuūs caavā pan miiⁿ. Ní n'dee yā pan ní ca'a yā 'iⁿ'yāⁿ s'eeⁿ.

³¹ Tuu'mi nūuⁿ saⁿ'ā s'eeⁿ iintiinaaⁿ sa Jesús miiⁿ, naati Jesús ndaanaáⁿ yā yeⁿ'e saⁿ'ā s'eeⁿ. ³² Ní saⁿ'ā s'eeⁿ ngaⁿ'a sa ngii sa ví'i: ¿Áá nguée chicadiinuūⁿ yú na staava yeⁿ'e yú chí ya'ai taachi snúuⁿ yú yúúní taachí indee yā ndúúcu yú, ní ngi'cueéⁿ yā nduudu yeⁿ'é Ndyuūs s'uuúⁿ?

³³ Hora mífⁿ nūuⁿ nducueeⁿ sa ní cunaⁿ'á sa na yáāⁿ Jerusalén. Ní ndaaca sa ndu'ū ndiicháamá apóstoles ndúúvidaama yā ndúúcu tanáⁿ'ā 'iⁿ'yāⁿ chí snée yā ndúúcu yā. ³⁴ 'iⁿ'yāⁿ s'eeⁿ ní ngaⁿ'a yā nguaaⁿ maáⁿ yā: Cuaacu níⁿ'nyúⁿ Jesús nduuchi yā

nguaaⁿ tináⁿā ní che'enaáⁿ yā yeⁿe Simón.

³⁵Tuu'mi ní 'uuví saⁿā s'eeⁿ ní caⁿ'a yā táácā chii yúúⁿí chī cueⁿe yā. Tii ní iintiinaáⁿ Jesús miⁿ taachí n'déé yā pan.

Jesús che'enaáⁿ yā yeⁿe discípulos yeⁿe yā

(Mt. 28.16-20; Mr. 16.14-18; Jn. 20.19-23)

³⁶Taachí saⁿ'a s'eeⁿ ngaⁿ'a sa chuū, Jesús miⁿ ní cheⁿ'e naáⁿ yā naavtaⁿ'a 'iiⁿ'yāⁿ s'eeⁿ ní caⁿ'á yā chii yā 'iiⁿ'yāⁿ s'eeⁿ: Cuuví diiⁿ ndúúⁿcū ndís'tii.

³⁷Tuu'mi ní 'iiⁿ'yāⁿ s'eeⁿ dii'yā yā chii ti nadicádíⁿnuuⁿ yā chí ndiichi yā 'aama espíⁿritu. ³⁸Naati Jesús miiⁿ caⁿ'á yā chii yā 'iiⁿ'yāⁿ s'eeⁿ: ¿De'ē cúúⁿví chí dii'yā nī chii? ¿De'ē cúúⁿví chí 'tíicā nadacádíⁿnuuⁿ nī na staava yeⁿe nī? ³⁹Cuin'diichí nī ta'á ndúúⁿcū ca'á. 'Úú maáⁿ chuū. Cuituu'ví nī 'úú. Cuin'diichí nī. 'Úú nguéé 'aama espíⁿritu tan'dúúⁿcā chí nadacádíⁿnuuⁿ nī. 'Áamá espíⁿritu nguéé 'iini ní nguéé yuutē tan'dúúⁿcā chí inaaⁿ ndís'tii chí véé yeⁿ'ē 'úú.

⁴⁰Taachi Jesús caⁿ'a yā nduudú 'cūū, chíⁿ'i yā ta'a yā ndúúⁿcū ca'a yā.

⁴¹Naati 'iiⁿ'yāⁿ s'eeⁿ ní nguéé s'téenu yā ti yeenú ndai yā ní ngeⁿ'e yiinu yā. Ní cáávā chuū Jesús caⁿ'a yā chii yā 'iiⁿ'yāⁿ s'eeⁿ: ¿Áá nguéé de'ē vee 'muuⁿ chí che'e yú?

⁴²Tuu'mi ní ca'a yā 'áamá tááⁿ 'yaācā ndúúⁿcū 'aama taaⁿ va'ai ndí'i. ⁴³Cristo miiⁿ ní sta'a yā ní che'e yā nanááⁿ 'iiⁿ'yāⁿ s'eeⁿ. ⁴⁴Ní caⁿ'a yā chii yā 'iiⁿ'yāⁿ s'eeⁿ: Ndúúⁿdú 'cūū caⁿ'á taachi canéé ndúúⁿcū ndís'tii. Canéé chí cúúⁿví cuaacu tanducuéⁿ'ē dendu'ū chí canéé nguūⁿ yeⁿ'ē 'úú na libro yeⁿ'é Ndyuūs chí canéé nguūⁿ na ley yeⁿ'ē Moisés

ndúúⁿcū yeⁿ'e profetas ndúúⁿcū yeⁿ'e salmos.

⁴⁵Tuu'mi ní Jesucristo diiⁿ yā chí tuumicadiinuⁿ 'iiⁿ'yāⁿ s'eeⁿ chí canéé nguūⁿ na libro yeⁿ'é Ndyuūs.

⁴⁶Ní caⁿ'a yā chii yā 'iiⁿ'yāⁿ s'eeⁿ:

'Tíicā canéé yeⁿ'ē 'úú chí Cristo

'úú. 'Tíicā canee chí 'cuenú cuuvi ní 'cuúví. Ní nduuchí yeⁿ'e nguaaⁿ tináⁿā ndii chíⁿ ndii 'íínú nguuví.

⁴⁷Ní 'iiⁿ'yāⁿ s'eeⁿ canéé chí caaⁿ'maⁿ yā nduudu miiⁿ chí ndaacadaami 'iiⁿ'yāⁿ yeⁿ'ē nuuⁿ'ndi yeⁿ'e yā vmnaaⁿ núúⁿ'máⁿ na yāāⁿ ní Ndyuūs nadach'ēcú yā nuuⁿ'ndi yeⁿ'e yā cáávā chí duuchí. Ní vmnááⁿ vmnaaⁿ nanááⁿ 'iiⁿ'yāⁿ yeⁿ'e yāāⁿ Jerusalén. Cuayiivi yeⁿ'e 'iiⁿ'yāⁿ yeⁿ'e núúⁿ'máⁿ naciones yeⁿ'e íⁿ'yeeⁿdi. ⁴⁸Ndís'tii ní cuuví nī testigos yeⁿ'e chuū ti n'diichí nī chuū ní canéé chí caaⁿ'máⁿ nī 'iiⁿ'yāⁿ. ⁴⁹Cuin'diichí nī. 'Úú dicho'ó Espíⁿritu N'dai yeⁿ'é Ndyuūs chí caⁿ'ā Chiidá chí ndaā nanááⁿ ndís'tii. 'Cuēetinéé nuúⁿ nī na yāāⁿ Jerusalén ndí chí ndaāca nī poder yeⁿ'e Ndyuūs, poder chí cuchii yeⁿ'ē cuaaⁿ 'nínⁿ'núⁿ.

Jesús cunaⁿ'a yā va'ai cheeti nguuví

(Mr. 16.19-20)

⁵⁰Chen'e Jesús ndúúⁿcū 'iiⁿ'yāⁿ s'eeⁿ na yāāⁿ 'líi Betania ní di'viicú yā 'iiⁿ'yāⁿ s'eeⁿ. ⁵¹Taachí chíinu di'viicú yā 'iiⁿ'yāⁿ s'eeⁿ, cueⁿ'é yā yeⁿ'e 'iiⁿ'yāⁿ s'eeⁿ ní cundaa yā va'ai cheeti nguuví. ⁵²Cuayiivi 'iiⁿ'yāⁿ s'eeⁿ dich'etē yā Ndyuūs ní cunaⁿ'a ntuúⁿ yā na yāāⁿ Jerusalén. Ní neenē yeenu taavi yā. ⁵³Ní 'áamá cheetinéé yā na yaācū templo ní ngaⁿ'á yā chí ch'etē Ndyuūs. Ní i'téenu yā Ndyuūs. 'Tíicā chí.

NDUUDU N'DÁÍ CHÍ DÍNGÚŪⁿ

APÓSTOL JUAN

N'diī ní saⁿā chi Nduudu

1 Cuááⁿ nááchí chínɡa'a 'āā ngaⁿa Dendyuūs ndúúcū Nduudu, ní Nduudu mífⁿ 'āā ngaⁿā ndúúcū Dendyuūs, ní Nduudu miiⁿ ní Dendyuūs. ²Chuū chíí naachi chínɡa'a ndúúcū Dendyuūs miiⁿ. ³Tanducuéⁿē chi vεε ní cucáāvā 'iiⁿyāⁿ miiⁿ din'dái yā chi véé. Nduuti chi nguée yā, nguée véé mar 'aama cosa chi véé. ⁴Iiⁿyāⁿ miiⁿ canée ndúúcū vida cueⁿe daāⁿmaⁿ ní vida miiⁿ ní dεεve yeⁿe 'iiⁿyāⁿ. ⁵Níícú dεεve chíí dεévé na maaiⁿ, chí maaiⁿ mífⁿ 'iiⁿyāⁿ nguεε tuumicadíínuuⁿ yā.

⁶Dendyuūs nidichó'o yā 'áámá saⁿā, chi nguvi sa Juan. ⁷Saⁿā miiⁿ ndaa sa chí caⁿa sa nduudu cuaacu. Ní caaⁿmáⁿ sá nduudu cuaacu yeⁿe chi dεεve caati nducyaacá yā cu'téenu yā cáāvā saⁿā miiⁿ. ⁸Nguée saⁿā miiⁿ chi dεεve; naati chi ngaⁿā sa nduudu cuaacu yeⁿē dεεve. ⁹Chííⁿ chí nduudu cuaacu chí dεεve. Chííⁿ ngaⁿā dεεve yeⁿē nducyaácá yā chi sneé yā fⁿyeeⁿdí 'cūū.

¹⁰Iiⁿyāⁿ miiⁿ chi dεεve ní canée yā iⁿyeeⁿdí 'cūū, ní din'dái yā iⁿyeeⁿdí, ní 'iiⁿyāⁿ yeⁿe fⁿyeeⁿdí

nguée n'diichi yā 'yā. ¹¹Ndaá yā caavā ndaata yeⁿé yā 'íícú 'iiⁿyāⁿ yeⁿé yā nguée 'cuúⁿ yā chi canée yā. ¹²Nducyaácá 'iiⁿyāⁿ chí 'cuúⁿ yā chí 'iiⁿyāⁿ miiⁿ canée yā nduucú yā, Ndyuūs ca'a yā poder 'iiⁿyāⁿ miiⁿ chí cuuvi daiya Dendyuūs 'iiⁿyāⁿ, 'iiⁿyāⁿ chí i'téenu yā chí nguúví yā. ¹³Nguée cuuvi yā daiya yā cáāvā yuúúⁿ, ní nguée caava yuútē, ní nguée caavā isáⁿā, caati cáāvā 'iivú Ndyuūs.

¹⁴Níícú Nduudu miiⁿ ní ch'iindiyáaⁿ yā tan'dúúcā s'uuuⁿ ní canée yā ndúúcū s'uuuⁿ. N'dái taavi yā ndúúcū favor ndúúcū nduudu cuaacu. Ní n'diichi yú poder yeⁿé yā, poder tan'dúúcā yeⁿē 'áámá n'dyáⁿā yeⁿē Chiidá yā chí Dendyuūs miiⁿ. Ndiituú taavi yā ndúúcū favor ndúúcū nduudu cuaacu. ¹⁵Juan caⁿa sa nduudu cuaacu yeⁿé yā ní 'cai sa ní ngaⁿā sa yeⁿe 'iiⁿyāⁿ 'cūū: 'Iiⁿyāⁿ chí cuchíí yā cuaaⁿ daamí ní vmnaaⁿ cá yā yeⁿē 'úú caati 'āā 'naaⁿ cá yā niicu 'úú.

¹⁶Níícú nducyaaca yú ita'a yú favor ndúúcū favor yeⁿē Jesús chí ndiituú yā ndúúcū favor. ¹⁷Caati véé ley miiⁿ cucáāvā Moisés ca'a

yā naati vée favor ndúúcū nduudu
cuaacu cucáávā Jesucristo ca'a yā.

¹⁸Mar 'áámá 'ii'yā" nguée n'diichí
yā Dendyuūs mií". Jesús 'áámá
n'dyá"ā ye"ē Chiidá yā chi canée
nduucú yā, Jesús míí" díí" yā chi
'ii'yā" deenú yā ye"ē Chiidá yā.

**Nduudu cuaacu ye"e Juan chi
ngeedinuū"nī"**

(Mt. 3.11-12; Mr. 1.7-8; Lc. 3.15-17)

¹⁹Taachi 'ii'yā" Israel ye"e yāā"
Jerusalén dichó'o yā chiiduú s'ee"
ndúúcū 'ii'yā" levitas s'ee" ní ndaá
yā nanáá" Juan mií" chí itinguunée"
yā: ¿Díí, du'ū dii? chuū chi nduudu
cuaacu chi n'guēcúta"ā Juan. ²⁰Ní
Juan mií" ntumii"nú" yā ní nguée
chee"diitú yā ní ca"ā cuaacú yā:
Nguée 'úú chi Cristo.

²¹Ní natiinguunée" yā sa"ā:
¿Du'ū dii, tuu'mi? ¿Áá díí profeta
Elías? Nga"ā Juan: Nguée 'úú. Ní
natiinguunée" yā sa"ā: ¿Áá díí chí
profeta? Nga"ā ntúu" sa: Nguée 'úú.

²²Nga"ā ntúu" yā ngii yā sa"ā:
¿Du'ū di, tuu'mi? Ní 'tíicā caa"mán"
'nū cuuvi 'nū 'ii'yā" chí dichó'o yā
nú'suu. ¿De'ē nga"ā di ye"e maā"
di?

²³Tuu'mí ca"ā Juan: 'Úú nduudu
chi ca"ā na yā"ā naachi nguée
ch'etinéé 'ii'yā": Nan'guáa" nī yúúní
cuaacu ye"ē Dendyuūs, tan'dúúcā
chi nga"ā profeta Isafás mií" naachi
canée nguū" na libro ye"e Ndyuūs.

²⁴Ícú 'ii'yā" s'ee" chí ndaá yā
mií" ní 'ii'yā" ye"ē fariseos. ²⁵Níicú
ntinguunée" yā sa"ā ní nga"ā
yā ngii yā sa"ā: ¿De'ē cúví chí
ngeedinuū"nī" di, ndúúti chí dii
nguée Cristo dii, ní nguée Elías dii,
ní nguée profeta 'cūú dii?

²⁶Níicú Juan nan'guēcúta"ā
yā ye"ē yā ní ca"ā ya: 'Úú ní
ngeedinuū"nī" ndúúcū nuū"nī";
naati nguaa" ndís'tií ní canée 'áámá
yā ní nguée ináa" nī 'ii'yā". ²⁷'Ii'yā"
'cūú chí cuchii cuayiivi ní vmnaa"
ca yā ye"ē 'úú. Niicu 'úú nguēē n'dai
'úú, chí cuuvi díí" n'daatií yíí"mán"
ye"e ndaacuú ye"ē yā.

²⁸Cosa 'cūú chí chií ná yā"āa
Betábara na táámá lado ye"e yíicú
Jordán, naachi Juan chéedinuū"nī"
sa 'ii'yā".

'Iti cuūchī ye"e Dendyuūs

²⁹Chi dēve táámá nguuví ní Juan
n'diichi sa Jesús ndaá yā naachi
canee sa, níicú nga"ā sa: Cun'diichí
nī. 'Íngaā Jesucristo chí nguuví
yā 'Íiti Cuūchī ye"ē Dendyuūs chí
nadiví yā nuū"ndi ye"e 'ii'yā" ye"e
í"yee"dí. ³⁰Chuū chí nga"ā ye"ē yā:
Cuchii 'áámá sa"ā cuayiivi ye"e 'úú
níicú 'āa vmnaa" sa ye"ē 'úú, caati
'āa 'naa" ca sa niicu 'úú. ³¹'Úú ní
nguée n'diichí 'ii'yā" naati deenú
chí snaa" 'ii'yā" Israel 'yā. Cáávā
chuū 'úú cuchíí ní ngeedinuū"nī"
ndúúcū nuū"nī".

³²Juan míí" ní nga"ā sa nduudu
cuaacu: 'Úú ní n'diichí Espíritu
N'dai ye"e Dendyuūs chí cuch'éé"
nanguuvi tan'dúúcā paloma ní
ndaa vmnaa" ye"ē yā ní canée yā
ndúúcū yā. ³³'Úú nguée n'diichí
'ii'yā" mií" naati 'ii'yā" chí dichó'o
yā 'úú chí ngeedinuū"nī" ndúúcū
nuū"nī", 'ii'yā" mií" chí nga"ā yā
ngii yā 'úú: Du'ū chí n'diichí di chí
ndeē Espíritu N'dai ye"e Ndyuūs
ní canée yā nduucú yā, 'ii'yā" 'cūú
chí ngeedinuū"nī" ndúúcū Espíritu
N'dai ye"ē Ndyuūs. ³⁴'Úú ní n'diichí

ní ngaⁿa cuaacú chi chuū chi Daiya Dendyuūs.

Discípulos chí vmnááⁿ vmnaaⁿ

³⁵Chi dæevε táámá nguuví canéé ntuūⁿ Juan ndúúcū 'uuví discípulos yeⁿé sa. ³⁶Ní inaaⁿ sa Jesús miⁿ chí cachiicá yā cuaaⁿ miⁿ. Ní ngaⁿā sa: N'diichí nī. Íngaā Jesucristo chi nguuví yā Ítí Cuūchí yeⁿé Dendyuūs.

³⁷Ndúú 'uuví discípulos yeⁿe Juan chí ch'iindiveéⁿ yā chíⁿ chí ngaⁿā sa, ní cueⁿé yā ndúúcū Jesús.

³⁸Ngueεcundí Jesús ní n'diichí yā chí n'dáa yā 'yā. Ní ngaⁿa yā ngii yā 'iiⁿyāⁿ s'eeⁿ: ¿D'éε in'nuuⁿ dí? Ngaⁿā 'iiⁿyāⁿ s'eeⁿ ngii yā 'yā: Rabí (nduudu míⁿ neⁿe caaⁿmaⁿ chí Maestro), ¿tíí canééⁿ vaacu dí?

³⁹Tuuⁿmi ngaⁿa yā ngii yā saⁿā: Cuchíí nī níícu n'diichí nī. Ní ndaa yā ní n'diichí yā tii canéé yā. Ní ch'εetinée yā nduucú yā nguuví miⁿ caati 'āā tandúú n'gεεcú cuūúⁿ chíinū.

⁴⁰Ní yeⁿe 'uuví yā chí ch'iindiveéⁿ yā yeⁿé Juan ní cueⁿé yā ndúúcū Jesús. 'Áámá saⁿā miⁿ ní nguuví sa Andrés 'diinū Simón Pedro. ⁴¹Ni Andrés miⁿ nndaacá sa maaⁿ 'díínu sa Simón ní ngaⁿa sa ngii sa sáⁿā: Nndaaca 'nū Mesías miⁿ (neⁿe caaⁿmaⁿ nduudu miⁿ chí Cristo).

⁴²Ní candεε sa Simón nanááⁿ Jesús. Ní taachi Jesús miⁿ n'gíínu yā saⁿā miⁿ, ní ngaⁿā yā: Díí Simón Pedro, daiya Jonás miⁿ. Mááⁿ ní cu'neeⁿ yú chí duuchi Cefas (nduudu míⁿ neⁿē caaⁿmaⁿ tuūú).

Jesús yaa'ví yā Felipe ndúúcū Natanael

⁴³Chi déévé táámá nguuví Jesús neⁿé yā caⁿa yā na yáⁿā Galilea,

ní cueⁿé yā. Ndaaca yā Felipe ní ngaⁿa yā ngii yā saⁿā: Cuchíí di nduucú.

⁴⁴Ní yāāⁿ vaacú Felipe ní yeⁿé yāāⁿ Betsaida ní dáámá yāāⁿ vaacú sa ndúúcū Andrés ndúúcū Pedro.

⁴⁵Felipe míⁿ nndaaca sá Natanael, níícu ngaⁿā sa ngii sa sáⁿā: 'Áā nndaacá 'nū Jesús daiya José yeⁿe yāāⁿ Nazaret. Dingúúⁿ Moisés yeⁿé 'iiⁿyāⁿ 'cūū na ley, ní dingúúⁿ profetas yeⁿe 'iiⁿyāⁿ 'cūū.

⁴⁶Ní ngaⁿa Natanael: ¿'Áá véé cosa chí n'daacā na yāāⁿ Nazaret? Ní ngaⁿā Felipe miⁿ: Cuchíí di ní n'diichi di.

⁴⁷Jesús miⁿ ní n'diichí yā Natanael chí cuchíí sa nanááⁿ yā. Ní ngaⁿā yā yeⁿé sa: N'dííchí nī 'áámá saⁿā chí cuaacu níⁿnyúⁿ yeⁿé ndaata Israel miⁿ. Ní nguéé nginnche'ei sa 'iiⁿyāⁿ.

⁴⁸Ngaⁿa Natanael ngii sa 'iiⁿyāⁿ: ¿Tíí n'diichi di 'úú? Ní ngaⁿā Jesús ngíí yā saⁿā: Taachi 'āā cuéé yaa'ví Felipe dii ní taachi canéé dí maaⁿ yáⁿā yeⁿe n'guíídií yaaⁿ nguuví, 'āā n'diichí díí.

⁴⁹Ní nan'gueεcutáⁿā Natanael miⁿ ni ngaⁿa sa ngii sa 'iiⁿyāⁿ: Maestro, n'dií chí Daiya Dendyuūs miⁿ. N'dií chí Rey yeⁿe Israel.

⁵⁰Ní ngaⁿa Jesús ngii yā saⁿā: ¿'Áá cáāvā chí ngaⁿā ngíí dii chí n'diichí dii maaⁿ n'guíídií yaaⁿ nguuví chí 'āā i'teenū di 'úú? Ch'εete n'dai ca n'diichí dí dendú'ū nguéé ti chúū.

⁵¹Ní ngaⁿā yā ngii yā saⁿā: Cuaacu níⁿnyúⁿ cuāācū niiⁿnyuⁿ ngaⁿā ngii dii. Ngúúví maaⁿ ní ngúúví chí cuíchií cunéé chí n'diichi di chí nanguaāⁿ nanguuví

níicú ángeles yeⁿé Dendyuūs miiⁿ
ní ngeē yā ní ngua'á yā nanááⁿ Saⁿā
chi Daiya Dendyuūs.

Ch'iindivaacu 'iiⁿyāⁿ yeⁿe yāāⁿ Caná

2 Chii ndii chíⁿ ndii 'íínú
nguuví miiⁿ ní ch'iindivaacú
'áámá 'iiⁿyāⁿ na yāāⁿ Caná yeⁿe
yáⁿā Galilea. Ní miiⁿ cánéé chεεcú
Jesús. ²Ní idiíⁿ yā invitar Jesús
ndúúcú discípulos yeⁿé yā nááchí
ch'iindivaacú 'iiⁿyāⁿ. ³Ní ch'iinu
vino yeⁿé yā. Ní chεεcú Jesús ngaⁿá
yā ngii yā Jesús: 'Āā ntéé vino yeⁿé
yā.

⁴Ní ngaⁿā Jesús ngii yā chεεcú
yā: ¿De'ē caneé yeⁿé ndúúcú dii
n'dataá? 'Āā cuéé ndaa hora yeⁿé
miⁿniiⁿyuⁿ.

⁵Chεεcú yā miiⁿ ngaⁿá yā ngii
yā saⁿā s'eeⁿ chi diiⁿ mandado: Dii
sáⁿā s'eeⁿ, diiⁿ di tan'dúúcā chi
Jesús caaⁿmán yā cuuví yā ndis'tíi.

⁶Miiⁿ snéé níyaaⁿ 'cuutií n'gεete
chi nin'dai ndúúcú tuūu chí ngeē
nuūⁿnīⁿ. 'Iiⁿyāⁿ naaⁿnú yā 'cuutií
s'eeⁿ tan'dúúcā costumbre yeⁿe
'iiⁿyāⁿ Israel. 'Aama 'aama 'cuutií
ch'εete tunéēⁿ nn'geēⁿ nduuví cuūuⁿ
ngeεcu ndii 'áámá ciento litros yeⁿe
nuūⁿnīⁿ.

⁷Ní ngaⁿā Jesús ngii yā saⁿā
chi idiíⁿ mandado: Diicuutú nī
ndúúcú nuūⁿnīⁿ 'cuutií n'gεete chí
nin'dai ndúúcú tuūu. Ní 'iiⁿyāⁿ s'eeⁿ
diicuutú yā ndiitúú n'dai ndúúcú
nuūⁿnīⁿ. ⁸Ní ngaⁿá Jesús ngii
yā saⁿā s'eeⁿ chi idiíⁿ mandado:
Tun'dáa nī naachi s'néēⁿ nuūⁿnīⁿ,
ní tun'dáa nī nuūⁿnīⁿ, nī candée nī
nanááⁿ 'iiⁿyāⁿ chi chééⁿ ndii vmnaaⁿ
yeⁿe 'viicū. Ní candée yā ch'iíⁿ yā
na 'iiⁿyāⁿ chí chééⁿ ndii vmnaaⁿ

yeⁿe 'viicū. ⁹Ní taachi 'iiⁿyāⁿ chí
chééⁿ ndii vmnaaⁿ yeⁿe 'viicū caneé
yiinú yā nuūⁿnīⁿ chí 'āā ndii vino
naati nguéé déénú yā tii ngiica vino
miiⁿ. Naati 'iiⁿyāⁿ chí idiíⁿ mandado
ní déénú yā caati cheⁿé yā nguai
yā nuūⁿnīⁿ. Tuu'mi ní yaa'ví yā saⁿā
chi n'giindivaacu miiⁿ. ¹⁰Ní ngaⁿá
yā ngii yā saⁿā chí n'giindivaacu:
Tanducueⁿé saⁿā miiⁿ dííncā vino
chi n'dai ca nga'a sa vmnaaⁿ 'iiⁿyāⁿ.
Ní taachi 'āā ndiitú yeⁿé yā, tuu'mi
nga'a sa vino chí nguéé n'dai ngi'i.
Naati dii ní nguain'dai di vino chí
n'dai ndíí maaⁿ.

¹¹Chiiⁿ ní vmnááⁿ vmnaaⁿ señal
chí diiⁿ Jesús ná yāāⁿ Caná yeⁿe
yáⁿā Galilea. Ní ch'iíⁿ yā poder
yeⁿé yā. Ní discípulos yeⁿé yā
chi'teenú sa 'yā.

¹²Cho'o chuū ní cuinaⁿá Jesús
ndúúcú chεεcú yā, ndúúcú 'díínu yā
ndúúcú discípulos yeⁿé yā na yāāⁿ
Capernaum. Ní duu'ví nguuví caneé
yā miiⁿ.

Jesús didεevé yā yāacū templo

(Mt. 21.12-13; Mr. 11.15-18; Lc. 19.45-46)

¹³Ní 'āā snee niiⁿnuúⁿ nguuví
chi ndaa 'viicū yeⁿé pascua yeⁿé
'iiⁿyāⁿ Israel, ní cucheε Jesús na yāāⁿ
Jerusalén. ¹⁴Ní ndaacá yā chεeti
cheendi chéēⁿ yāacu templo 'iiⁿyāⁿ
s'eeⁿ chí ch'εeté yā n'diicuí yā 'itiindu
ndúúcú 'iiti 'cuūchí ndúúcú palomas,
ní ndaacá yā 'iiⁿyāⁿ chí inn'daaⁿ
tuūmī. ¹⁵Taachí Jesús din'dái yā
cuerda ní dich'ó yā nducyáácá 'iiⁿyāⁿ
chuva'āi cheendi cheēⁿ yaacū templo
miiⁿ, ndúúcú 'iiti 'cuūchí s'eeⁿ ndúúcú
'itiindu s'ééⁿ. Ní ch'iinu ngéé yā tuūmī
yeⁿé 'iiⁿyāⁿ s'eeⁿ chí inn'daaⁿ tuūmī
ní chingúúⁿndaa yā mesas yeⁿé yā.

¹⁶Níicú ngaⁿa Jesús ngii yā saⁿā chi n'diicuí palomas: Diví nī chuū 'muuⁿ ni nguée díⁿ nī va'āi yeⁿe Chiidá va'ai chi n'diicui 'iⁿyāⁿ.

¹⁷Tuu'mí ní n'gaacu discípulos yeⁿé yā yeⁿe chi cánée nguūⁿ na libro yeⁿe Ndyuūs chi vaādī n'diité yeⁿe vaacu di, ní di'cuiinú 'úú.

¹⁸Níicú 'iⁿyāⁿ Israel nan'guēcútaⁿá yā ní caⁿa yā Jesús: ¿De'ē señal chí cu'neeⁿ di nús'uū chi v'éé poder yeⁿe di chi diiⁿ di 'túúcā?

¹⁹Nan'guēcútaⁿā Jesús ní caⁿa yā: Nadtuuví nī yáácū templo 'cūū ní 'iⁿū nguuví 'úú nadācueeⁿ.

²⁰Tuu'mi caⁿa 'iⁿyāⁿ Israel: Ch'ēeti na 'uūvī ngeecu jaaⁿ ndúuyū chi n'dai yáácū templo 'cūū. Níicú dii, ¿áa na 'iⁿū nguuví neⁿe di nādācueeⁿ di?

²¹Naati Jesús caⁿa yā yeⁿe yaācū templo chi cuerpo yeⁿe maáⁿ yā.

²²Taachi Jesús nanduuchí yā yeⁿe nguuaⁿ tináⁿā tuu'mi discípulos yeⁿé yā nan'gaacú yā chí caⁿa yā chuū. Ní i'téenu yā chí canée nguūⁿ na libro yeⁿe Dendyuūs ndúúcū nduudu chi ngaⁿa Jesús miiⁿ.

Jesús deenú yā nducyáácá saⁿā

²³Taachi Jesús canée yā yāāⁿ Jerusalén, nguuví 'viicú yeⁿe pascua neenē 'yáaⁿ yā chí'téenu yā Jesús caati 'āa n'diichí yā señales chi díⁿ yā.

²⁴Naati maaⁿ Jesús miiⁿ ní nguée ngí ch'ētinuúⁿ yā 'iⁿyāⁿ s'eeⁿ caati déénú Jesús yeⁿe nducyáácá yā. ²⁵Ní nguée neⁿé yā chi ndii 'áámá 'iⁿyāⁿ caaⁿmaⁿ cuaacu yeⁿe saⁿā ti deenú yā de'e chi canée ndúúcū saⁿā.

Jesús ndúúcū Nicodemo

3 Níicú canee 'áámá sáⁿā yeⁿe fariseos chi nguuví sa

Nicodemo. Saⁿā miiⁿ, saⁿā chi chéeⁿndii vmnááⁿ 'iⁿyāⁿ Israel.

²Sáⁿa 'cūū ndaa sa nanááⁿ Jesús nguūinū miiⁿ. Níicú ngaⁿa sa ngii sá 'iⁿyāⁿ: N'dii Maestro, déénú 'nū chi ndaa nī yeⁿé Dendyuūs chi lado yeⁿe maestro caati mar 'áámá 'iⁿyāⁿ nguée cuuvi díⁿ yā señales chi idiíⁿ nī ndúúti chi nguée canee Dendyuūs ndúúcu yā.

³Jesús ní nan'guēcútaⁿá yā ní ngaⁿa yā ngii yā saⁿā: Cuaacu níⁿnyúⁿ cuāācū niiⁿnyuⁿ ngaⁿá ngii dii, du'ū chi nguée nguēcundí 'cundiyaāⁿ táámá vmnéⁿēe nguée cuuví n'diichí yā naachi 'iivú Dendyuūs ngaⁿa ntiⁿnyúⁿ yā.

⁴Ní ngaⁿā Nicodemo ngii sa Jesús: ¿Táácā nanguēcundí 'áámá 'iⁿyāⁿ saⁿā ndiicú 'cuundiyáaⁿ ntuúⁿ yā? ¿Táácā cuuví nuuⁿ ndáá ntuúⁿ yā na ch'ēti ch'ēcú yā ní 'cuundiyáaⁿ ntuúⁿ yā?

⁵Jesús ngaⁿa yā ngii yā saⁿā: Cuaacu níⁿnyúⁿ cuāācū niiⁿnyuⁿ ngaⁿá ngii dii, du'ū chi nguée 'cuundiyáaⁿ yā cáāvā nuūⁿnīⁿ ní cáāvā Espíritu N'dai yeⁿe Ndyuūs nguée cuuvi cundáa yā naachi canée 'iivú Dendyuūs. ⁶Du'ū chí ch'iindiyáaⁿ yeⁿe 'iⁿyāⁿ, 'iⁿyāⁿ canee ndúúcū. Níicú du'ū chí ch'iindiyáaⁿ yeⁿe Espíritu, espíritu canee ndúúcū. ⁷Nguée caⁿā yiinu di chí ngaⁿá ngii dii chí nducyaaca 'iⁿyāⁿ cánée chí 'cuundiyáaⁿ ntuúⁿ yā taama. ⁸Yúúné ní na neⁿe miiⁿ ngéenū. Níicú n'giindiveeⁿ di chi ngeēnū. Ní nguée déenu di tíí chiicā tíí caⁿā. Tíicā nducyáácá 'iⁿyāⁿ chi 'niindiyáaⁿ yā yeⁿe Espíritu N'dai yeⁿe Ndyuūs.

⁹Ní nan'guēcútaⁿā Nicodemo yeⁿé yā ní ngaⁿa sa ngii sa Jesús: ¿Táácā cuuví chuū?

¹⁰Nan'gueécútaⁿā Jesús ní ngaⁿá yā ngii yā sáⁿā: ¿Áá díí maestro yeⁿē 'iiⁿ'yāⁿ Israel ní nguée deenu di chuú? ¹¹Cuaacu níⁿ'nyúⁿ cuāācū niiⁿ'nyuⁿ ngaⁿá ngii dii chi déenu 'nū chii chi ngaⁿ'a 'nū. Níicú chi 'n'diichí 'nū chii chi ngaⁿ'a cuaacu 'nū ní nguée 'n'diichí 'nu chii chi ngaⁿ'ā cuaacu 'nū. Níicú nguée 'caandiveeⁿ di chi caaⁿ'maⁿ 'nū nduudu cuaacu. ¹²Nduuti chi ngaⁿ'á cosa chi véé iⁿ'yeeⁿdí 'cūū niicu nguée i'téenu dí, ¿táácā cu'téenu di nduuti chi caaⁿ'máⁿ cosa chi véé na va'ai chēeti nguūvī?

¹³Ndii 'áámá 'iiⁿ'yāⁿ nguée chēe yā na va'ai chēeti nguuvī nduuti chi nguée 'iiⁿ'yāⁿ chi ch'eeⁿ yeⁿ'e va'ai chēeti nguuvī. 'Iiⁿ'yāⁿ miiⁿ, Sáⁿ'ā chi Daiya Dendyuūs, chi canée na va'ai chēeti nguuvī. ¹⁴Tan'dúúccā Moisés miiⁿ chinadācuéeⁿ sa cúu na yáⁿ'āa cuūⁿ'máⁿ naachi nguée ch'ēetinéé 'iiⁿ'yāⁿ 'tíicā canee chí nicueēⁿ Saⁿ'a chi Daiyá Dendyuūs. ¹⁵Caati nducyaaca 'iiⁿ'yāⁿ chi cu'téenu yā 'iiⁿ'yāⁿ nguée cuuvi ndái yā caati cunduuchí yā cueⁿ'e daāⁿ'maⁿ.

**'Tíicā Dendyuūs dineⁿ'é
yā 'iiⁿ'yāⁿ yeⁿ'e iⁿ'yeeⁿdí**

¹⁶Caati chuū dínéⁿ'e Dendyuūs 'iiⁿ'yāⁿ yeⁿ'e iⁿ'yeeⁿdí chí dich'ó yā 'aama n'dyáⁿ'ā Daiya yā, caati nducyáácá 'iiⁿ'yāⁿ chí cu'téenu yā 'iiⁿ'yāⁿ nguée cuuvi ndái yā. Níicú cunduuchí yā cueⁿ'e daāⁿ'maⁿ. ¹⁷Caati Dendyuūs ní dich'ó yā Daiyá yā iⁿ'yeeⁿdí chí Daiyá yā nguée diiⁿ yā juzgar 'iiⁿ'yāⁿ chí snée iⁿ'yeeⁿdí, naati chí cuchii yā nadanguáⁿ'ai yā 'iiⁿ'yāⁿ yeⁿ'e iⁿ'yeeⁿdí cááva yā.

¹⁸Du'u chi i'téenu 'iiⁿ'yāⁿ nguée condenado yā, niicu du'u chi nguée i'téenu 'iiⁿ'yāⁿ 'āā condenado yā caati nguée chíteenu chi nduuchi 'áámá n'dyáⁿ'ā yeⁿ'e Chiidá yā chí Dendyuūs. ¹⁹Níicú chuú ní condenación. Chí dēeve 'cūū ndaá iⁿ'yeeⁿdí 'cūū naati saⁿ'ā yeⁿ'e iⁿ'yeeⁿdí 'cūū dinéⁿ'e sa na maaiⁿ nguée ti chí dēeve caati diiⁿ sa chí nguée n'daacā. ²⁰Caati nducyáácá 'iiⁿ'yāⁿ chí díⁿ yā chí nguēe n'daacā, nguée dinéⁿ'e yā chí dēeve. Ní nguēe indaá yā chí dēeve miiⁿ caati nguée neⁿ'e yā chí cuuvi déénú 'iiⁿ'yāⁿ ní caaⁿ'maⁿ 'iiⁿ'yāⁿ chí nuuⁿndí yā. ²¹Naati 'iiⁿ'yāⁿ chí díⁿ yā ntiiⁿ'nyuⁿ chí n'daacā, indaá yā naachi chí dēeve caati 'iiⁿ'yāⁿ snáaⁿ yā ntiiⁿ'nyuⁿ yeⁿ'é yā chí yeⁿ'e Dendyuūs.

**Juan chí ngeedínuūⁿnīⁿ ngaⁿ'a sa
ndúúccū Jesús táámá vmnéⁿ'ēe**

²²Cho'ōo chúū, ndaā Jesús ndúúccū discípulos yeⁿ'é yā na yáⁿ'āa Judea. Ní cunée yā ndúúccū 'iiⁿ'yāⁿ s'eeⁿ. Níicú Jesús chēēdinúūⁿnīⁿ yā 'iiⁿ'yāⁿ. ²³Ní Juan mífⁿ ngeedínuūⁿnīⁿ ntúuⁿ yā na yáⁿ'ā Enón niiⁿ'nuúⁿ na yaāⁿ Salim ti mífⁿ neenē vee ca nuūⁿnīⁿ. Ní ndaā 'iiⁿ'yāⁿ ní chēēdinúūⁿnīⁿ yā. ²⁴Caati Juan miiⁿ 'āā cuée cunúuⁿ yā vácūū.

²⁵Discípulos yeⁿ'e Juan ch'ēecu cheendí yā ndúúccū 'iiⁿ'yāⁿ Israel yeⁿ'é táácā 'iiⁿ'yāⁿ nduuvī dēevé yā. ²⁶Níicú nndaa sá nanááⁿ Juan ní ngaⁿ'a sa ngii sa saⁿ'ā: Dii, Maestro, 'iiⁿ'yāⁿ chí canée ndúúccū di na táámá lado yeⁿ'e yíicú Jordán 'iiⁿ'yāⁿ chí díí caaⁿ'maⁿ cuaacu di yeⁿ'é yā; n'diichi di, 'iiⁿ'yāⁿ miiⁿ ngeedínuūⁿnīⁿ yā. Niicu nducyáácá 'iiⁿ'yāⁿ ndaa yā nanáaⁿ yā.

²⁷ Nan'gueécútaⁿā Juan ní caⁿa sa: Nguéé cúúví cuta'a 'iiⁿ'yāⁿ de'ē vee nduuti chi nguéé cuchii yeⁿe va'ai cheeti nguuvi. ²⁸ Ndís'tii testigo yeⁿ'é chi caⁿá: 'Úú ní nguéé Cristo 'úú, caati dich'óo Dendyuūs 'úú vmnaaⁿ yeⁿ'é yā. ²⁹ Du'ū chi véé n'daataá yeⁿe yā, 'iiⁿ'yāⁿ miiⁿ ní isáⁿā yeⁿ'ē tá. Amigo yeⁿ'ē isáⁿā miiⁿ ní 'iiⁿ'yāⁿ chi cánéé ndúúcu yā ní n'giindiveéⁿ yā yeⁿ'é yā. Yeenú taavi yā cáávā nduudu yeⁿ'ē isáⁿā miiⁿ. 'Tíicā vaadi yeenu yeⁿ'é ní 'áámá ndiituú taaví ca. ³⁰ 'Iiⁿ'yāⁿ miiⁿ ní canéé chi ch'eté yā, niicu 'úú dánduu'vi 'líⁿ 'úú.

**'Iiⁿ'yāⁿ chí cuchii yā yeⁿ'e
va'ai cheeti nguuvi**

³¹ Du'ū chí nndaā yeⁿ'ē va'ai cheeti nguuvi ch'etete ca yeⁿ'ē nducyaaca 'iiⁿ'yāⁿ. Du'ū chi yeⁿ'e yáⁿāa ní yeⁿ'ē yáⁿāa ni ngaⁿa yeⁿ'ē cosas yeⁿ'ē yáⁿāa. 'Iiⁿ'yāⁿ chi nndaā yā yeⁿ'ē va'ai cheeti nguuvi, ch'etete cá yā yeⁿ'ē nducyáácá 'iiⁿ'yāⁿ. ³² 'Iiⁿ'yāⁿ miiⁿ ngaⁿa cuaacú yā yeⁿ'ē chi n'diichí yā ndúúcu chi ch'iindiveéⁿ yā ní mar 'áámá 'iiⁿ'yāⁿ ní nguéé neⁿ'é yā 'caandiveéⁿ yā nduudu cuaacu yeⁿ'é yā. ³³ 'Iiⁿ'yāⁿ chi n'gúuⁿ yā nduudu cuaacu yeⁿ'e Jesús nduuvidaamá yā ndúúcu yā ní ngaⁿa yā chi Dendyuūs miiⁿ chí cuaacu. ³⁴ Du'ū chí Dendyuūs dich'óo yā, 'iiⁿ'yāⁿ miiⁿ ngáⁿa yā nduudu yeⁿ'e Dendyuūs miiⁿ, caati Dendyuūs nga'a yā 'iiⁿ'yāⁿ Espíritu N'dai yeⁿ'e Ndyuūs nguéé ndúúcu caadi. ³⁵ Dendyuūs Chiida yú dinéⁿe yā Daiyá yā. Níicú tanducuéⁿe dendu'ū ca'á yā ta'ā Daiyá yā. ³⁶ 'Iiⁿ'yāⁿ chi i'téenu yā Daiya Dendyuūs miiⁿ canée yā

ndúúcu vida cueⁿ'e daāⁿmaⁿ. Naati 'iiⁿ'yāⁿ chi nguéé i'téenu yā Daiya Dendyuūs miiⁿ nguéé snaaⁿ yā vida cueⁿ'e daāⁿmaⁿ miiⁿ naati caⁿá yā cuta'á yā castigo yeⁿ'e Dendyuūs chi diituú n'dai.

**Jesús ndúúcu n'daataá
yeⁿ'e yáⁿāa Samaria**

4 Tááchí Jesús ituumicádiinuⁿ yā 'tíicā chi saⁿā fariseos ch'iindiveeⁿ sa chííⁿ chí Jesús dííⁿ yā ní chí cheedinuūⁿniⁿ yā 'yaaⁿ ca 'iiⁿ'yāⁿ ní véé 'yaaⁿ ca discípulos yeⁿ'é yā nguéé ti Juan miiⁿ; ² 'áará chí nguéé Jesús chi ngeedinuūⁿniⁿ yā caati discípulos yeⁿ'e yā ngeedinuūⁿniⁿ yā; ³ Jesús s'néeⁿ yā yáⁿāa Judea ní cheⁿ'e ntuúⁿ yā yáⁿāa Galilea.

⁴ Ní canéé chi cho'ó yā yáⁿāa Samaria. ⁵ Ní ndaá yā na 'áámá yáāⁿ yeⁿ'ē Samaria chi nguuvi Sicar, niiⁿnuúⁿ ná yáⁿāa chí ca'a Jacob yeⁿ'ē daiya sa José. ⁶ Ní mífⁿ canéé vaacunuūⁿnīⁿ yeⁿ'ē Jacob. Jesús chicúúⁿnu yā chi ngiica yā ní ch'iindí yā niiⁿnuúⁿ na vaacunuūⁿnīⁿ. Ní 'āā tanduu n'geecu ndiichuuví. ⁷ Ndaā 'áámá n'daataá yeⁿ'ē yáⁿāa Samaria chi sta'a tá nuūⁿnīⁿ. Ní Jesús caⁿa yā chii yā táⁿā: Díí n'daataá, téé dí tíí nuūⁿnīⁿ cu'ú.

⁸ Discípulos yeⁿ'é yā cueⁿ'ē sa yáāⁿ Sicar chí cuāi sa chí che'é yā. ⁹ Ní n'daataá yeⁿ'ē yáⁿāa Samaria ngaⁿa tá ngii tá Jesús: ¿Táácā chi ngiica di nuūⁿnīⁿ chí cu'ú di 'úú ti díi ní 'iiⁿ'yāⁿ Israel díi niicu 'úú yeⁿ'ē yáⁿāa Samaria 'úú? Saⁿā Israel s'eeⁿ ní nguéé n'diichi sa 'iiⁿ'yāⁿ yeⁿ'e yáⁿāa Samaria. ¹⁰ Ní n'gueécútaⁿa

Jesús, ní ngaⁿa yā ngii yā táⁿā: Ndúúti chí n'diichi di regalo yeⁿe Dendyuūs miⁿ, ní du^u chí ngaⁿā ngii dii, tee di nu^unⁿiⁿ cu^u, tuu^mi ní caaca di nu^unⁿiⁿ yeⁿé yā. Ní 'iiⁿyāⁿ miⁿ caⁿa yā teé yā nu^unⁿiⁿ chí cu^u di, nu^unⁿiⁿ chí diiⁿ chí canduuchi 'iiⁿyāⁿ.

¹¹N'daataa mífⁿ ní ngaⁿa tá ngii tá Jesús: Señor, nguée de^e chí cuta^á nduucú nī tíf vaacunu^unⁿiⁿ yáanūⁿ. ¿Tíi cuuvi canguaí nu^unⁿiⁿ yeⁿé nī chí diiⁿ chí canduuchi 'iiⁿyāⁿ? ¹²¿Áá vmnaaⁿ ca n'dií yeⁿe chiida 'nū Jacob? 'Iiⁿyāⁿ miⁿ din^ádá yā vaacunu^unⁿiⁿ 'cūū cáávā nús^uu. 'Múúⁿ sta^á yā nu^unⁿiⁿ ndúúcu daiya yā ndúúcu 'iiti yeⁿé yā.

¹³Nan'guecútaⁿa Jesús ngaⁿa yā ngii yā táⁿā: Nducyáácá 'iiⁿyāⁿ chí ng'i yā nu^unⁿiⁿ 'cūū canée chí cuuvi yaaca ntúⁿ yā. ¹⁴Naati du^u 'iiⁿyāⁿ chí cú^u yā nu^unⁿiⁿ chí 'úú chí ca^á, 'āā ntéé cuuvi yaacá yā. Nu^unⁿiⁿ chí 'úú ca^á 'iiⁿyāⁿ mífⁿ, nu^unⁿiⁿ miⁿ tan^ádúúca chí cuuvi nduucú yā 'áámá vaacunu^unⁿiⁿ chí ngáā nu^unⁿiⁿ miⁿ yeⁿé yā caavā vida cueⁿe daāⁿmaⁿ.

¹⁵N'daataá miⁿ ní ngaⁿa tá ngii tá Jesús: Dii Señor, téé nī 'úú nu^unⁿiⁿ 'cūū. Cu^u ní 'aa ntéé cuuvi yaacá, ní 'aa ntéé chí cuta^á nu^unⁿiⁿ.

¹⁶Jesús ngaⁿa yā ngii yā táⁿā: Cuéⁿé dí ní cananguaí di isaⁿā yeⁿe di. Ní cuchii di ndúúcu sa 'muuⁿ.

¹⁷N'guecútaⁿa n'daataa mífⁿ ní ngaⁿa tá ngii tá 'iiⁿyāⁿ: Nguée isaⁿā yeⁿé. Ngaⁿa Jesús ngii yā táⁿā: N'daacā chí ngaⁿa di chí nguée isaⁿā yeⁿe di. ¹⁸Caati nyu^u isaⁿā canée ndúúcu dii, ní saⁿā chí canée ndúúcu dii mīⁿniiⁿyuⁿ nguée isaⁿā

yeⁿe di. Chiiⁿ chuū ní ngaⁿā cuaacú dí.

¹⁹Ngaⁿa n'daataá ngii ta Jesús: N'dií Señor, deenú chí n'dií ní 'áámá profeta n'dií. ²⁰Chiida 'nū ní dííⁿ yā adorar ná cuéétiⁿ 'cūū naati 'iiⁿyāⁿ Israel chí judíos ngaⁿā ntuuⁿ yā chí na yāāⁿ Jerusalén chí cánée chí dííⁿ yā adorar Ndyuūs.

²¹Ní ngaⁿā Jesús ngii yā táⁿā: N'daataá, cu^uteénu di 'úú. Ndaā hora taachi ní nguée cuéetiⁿ 'cūū ní nguée yāāⁿ Jerusalén 'iiⁿyāⁿ dííⁿ yā adorar Chiida yú. ²²Ndísⁿtií ní dííⁿ nī adorar chí nguée deenú nī. Nús^uu ní idiíⁿ 'nū adorar chí déenu 'nū naati vaadī nguaⁿai ndaā lado yeⁿe 'áámá 'iiⁿyāⁿ chí nadanguáⁿāi ní yeⁿe 'iiⁿyāⁿ Israel. ²³Naati hora miⁿ ní cúchii níícu hora miⁿ ní ndaā, taachi cuaacu nííⁿnyúⁿ 'iiⁿyāⁿ s'eeⁿ dííⁿ yā adorar Dendyuūs Chiida yú ndúúcu chideeve yeⁿé yā ndúúcu vaadī cuaacú. Caati 'tífca Chiida yú mífⁿ inⁿnuúⁿ yā 'iiⁿyāⁿ chí dííⁿ yā adorar 'yā nī cu^uteénu yā 'yā. ²⁴Dendyuūs ní Espíritu 'yā. Ní 'iiⁿyāⁿ cánée chí dííⁿ yā adorar 'yā cánée chí dííⁿ yā adorar 'yā ndúúcu chideeve yeⁿé yā ndúúcu vaadī cuaacu.

²⁵N'daataá mífⁿ ngaⁿa ta ngii ta Jesús: Deenú chí Mesías canée chí ndaā chí duuchi Cristo. Taachí 'iiⁿyāⁿ miⁿ ndaā yā, tuu^mi caaⁿmaⁿ yā nducuéⁿe cosas.

²⁶Ní ngaⁿa Jesús ngii yā táⁿā: 'Úú chí Cristo chí indeé ndúúcu di.

²⁷Taachí indeé yā ndúúcu n'daataá mífⁿ, ndáa discípulos yeⁿé yā. Ní cueⁿe yíínú sá chí indeé yā ndúúcu n'daataá miⁿ. Mar 'áámá saⁿā nguée natiinguuneeⁿ sa Jesús:

¿De'e iⁿnuuⁿ di? ¿De'e cuuvi chi ndee di ndúúcu tá? ²⁸Ní n'daataá mífⁿ ní s'neeⁿ tá 'cuuti cuéé^e yeⁿe tá ní cueⁿe tá ná yáaⁿ miⁿ. Ní caⁿa tá chii tá 'iiⁿyāⁿ s'eeⁿ: ²⁹Cuchií nī ní n'diichí nī 'áámá saⁿā chi caⁿa sa chii sa 'úú tanducuéⁿe chi ndííⁿ. ¿Áá nguée^e 'iiⁿyāⁿ miiⁿ chi Cristo?

³⁰Ní 'iiⁿyāⁿ s'eeⁿ can'dáa yā na yáaⁿ miiⁿ. Cueⁿe yā n'diichí yā Jesús. ³¹Ní taachi cueⁿe n'daataa mífⁿ na yáaⁿ tuuⁿmi ní discípulos yeⁿe yā ngaⁿa sa ngii sá Jesús: N'di Maestros, che^e nī yuündū nduucú 'nū.

³²Ni Jesús miiⁿ ngaⁿa yā ngii yā saⁿā s'eeⁿ: 'Úú ní véé 'áámá comida yeⁿe chi che^e. Ndís'tii nguée^e déenu nī.

³³Nícu discípulos ngaⁿa sa ngii sa vi'i: ¿Áá ndaa 'iiⁿyāⁿ chi cuú yā chí che^e yā?

³⁴Ní ngaⁿa Jesús ngii yā saⁿā s'eeⁿ: Comida yeⁿe chííⁿ chí cuuví dííⁿ tan'dúúccā chí neⁿe 'iiⁿyāⁿ chi dichó'o yā 'úú. Ní di'cuuinú ntiiⁿnyuⁿ yeⁿe yā. ³⁵Ngaⁿa ndis'tii: ¿Áá nguée^e véé cá tá cuúuⁿ 'iīyū taachi ndaa tiempo yeⁿe cosecha? N'diichí nī. 'Úú ngaⁿá ngíí ndís'tii: N'diichí nī cuaaⁿ 'niiⁿnuⁿ. Snaáⁿ nī cuéétí yeⁿe nī. 'Áá ndaa nguuví chi dííⁿ nī cosechar. ³⁶Iiⁿyāⁿ chi nadacuéeⁿ yā cosecha véé chii'véé yeⁿe yā. Ní véé n'gui'i yeⁿe yā chi cūnee cueⁿe daaⁿmaⁿ. Nícu 'iiⁿyāⁿ chí niinu yā ndúúcu 'iiⁿyāⁿ chi nadacuéeⁿ yā cosecha ní nduu 'uuví yā yeenú taaví yā. ³⁷Caati chuū chí cuaacu nííⁿnyúⁿ chi nduudu cuaacu: 'Áámá 'iiⁿyāⁿ ní ngīinu yā nī táámá yā ní nadacuéeⁿ yā. ³⁸'Úú nidicho'o ndís'tii ní nadacuéeⁿ nī cosecha chi

nguée^e ndííⁿ nī ntiiⁿnyuⁿ. Táámá yā dííⁿ yā ntiiⁿnyuⁿ. Ní ndís'tii chí ndaa nī tuu'ví nī ntiiⁿnyuⁿ ndííⁿ yā.

³⁹Ni neené 'yaaⁿ 'iiⁿyāⁿ samaritanos yeⁿe yáaⁿ miiⁿ s'teenú yā Jesús cucáávā nduudu yeⁿe n'daātāa miiⁿ chí caⁿa yā nduudu cuaacu: 'Iiⁿyāⁿ mífⁿ ní caⁿa yā chii yā 'úú tanducuéⁿe cosa chí ndííⁿ.

⁴⁰Ndaa saⁿā samaritanos nanááⁿ Jesús. Di'cuííⁿ sa 'iiⁿyāⁿ chí canée yā ndúúcu sa. Ní canée yā miiⁿ 'uuví nguuví. ⁴¹Neené 'yaaⁿ cá yā s'teenú yā cucáávā nduudu yeⁿe Jesús.

⁴²Nícu 'iiⁿyāⁿ s'eeⁿ ngaⁿa yā ngii yā n'daataá miiⁿ: 'Áá ntée cu'teenú 'nū caavā chí ch'iindiveéⁿ 'nū chí cuaacu nííⁿnyúⁿ nguée^e dámaaⁿ yeⁿe chí ngaⁿā di. Caati maáⁿ 'nū n'diichí 'nū ní ch'iindiveeⁿ 'nū chí cuaacu nííⁿnyúⁿ chí 'iiⁿyāⁿ 'cūu nguuví Cristo chí inadan'guáⁿai yā 'iiⁿyāⁿ yeⁿe iⁿ'yeeⁿdí 'cūu.

Jesús dííⁿ yā chí nduuvā yeⁿe daiya 'áámá rey

⁴³Ch'íínú 'uuví nguuví ní Jesús cueⁿe yā yáⁿāa Galilea. ⁴⁴Caati maaⁿ Jesús miiⁿ caⁿa cuaacú yā chí 'iiⁿyāⁿ nguée^e dííⁿ yā honrar 'áámá 'iiⁿyāⁿ profeta taachi ngaⁿa yā yáaⁿ vaacú yā. ⁴⁵Ní ndaa yā yáⁿāa Galilea ní 'iiⁿyāⁿ yeⁿe yáⁿāa Galilea miiⁿ tuuⁿmi di'cuúⁿ yā chí canée yā. 'Áá n'diichí yā tanducuéⁿe chí dííⁿ yā na yáaⁿ Jerusalén, nguuví yeⁿe 'viicu yeⁿe pascua, caati 'iiⁿyāⁿ s'uúⁿ cheⁿe ntuúⁿ yā 'viicu miiⁿ.

⁴⁶Ndaa ntúūⁿ Jesús na yáaⁿ Caná yeⁿe yáⁿāa Galilea naachi din'dái yā vino ndúúcu nuūⁿnī. Mífⁿ canée 'áámá rey yeⁿe yáaⁿ Capernaum. Ngiitā 'áámá daiya rey miiⁿ. ⁴⁷Iiⁿyāⁿ

'cūū mífⁿ ch'iindiveéⁿ yā chí ndaā Jesús yeⁿē yáⁿāa Judea na yáⁿāa Galilea. Cheⁿé yā nanááⁿ Jesús ní d'icuítu yā 'yā chí caⁿa yā n'diichí yā daiya sa chí nanduūvā yeⁿē caati 'aa cháá 'cuuvi. ⁴⁸Tuu'mi ní ngaⁿā Jesús ngii yā saⁿā: Ndúúti chí nguéeⁿ snaaⁿ di señales ndúúcu milagros chí vaadi n'giinu nguéeⁿ cu'téenu di.

⁴⁹'Iiⁿyāⁿ yeⁿe rey ngaⁿā yā ngii yā Jesús: Señor, cú'u yú caati 'āa cuéeⁿ 'cuūvi saⁿā 'lífⁿ yeⁿé.

⁵⁰Ngaⁿā Jesús ngii yā 'iiⁿyāⁿ: Cúnaⁿa di, daiya dí cánduuchi sa. Ní saⁿā miiⁿ ní ch'i'téenu sa nduudu chí caⁿā Jesús miiⁿ. Ní cuinaⁿa sa. ⁵¹Taachi 'āa ndaa niiⁿnuúⁿ vaacu sa 'iiⁿyāⁿ chí idiⁿi mandado yeⁿē sa caⁿdāa yā n'diichi yā saⁿā. Ní ngaⁿa yā ngii yā saⁿā: Daiyá ní miiⁿ caⁿdúúchi sa.

⁵²Tuu'mi ní itiinguunéeⁿ sa 'iiⁿyāⁿ s'eeⁿ: ¿Deⁿ hora naachi cuaáⁿ yeⁿē sa? Nícuⁿ ngaⁿa yā ngii yā saⁿa: 'Iicu taachi n'geecu 'áámá ní ch'iinu 'iiⁿnuúⁿ miiⁿ sáⁿā.

⁵³Tuu'mi ní chiida saⁿā 'lífⁿ miiⁿ tuumicádífnuuⁿ yā chí hora miiⁿ chí ngaⁿa Jesús ngii yā: Daiya dí ní cánduuchi sa. Ní 'iiⁿyāⁿ miiⁿ ndúúcu nducyaaca familia yeⁿe yā s'téenu yā Jesús.

⁵⁴Chuū ndii 'úúví señal chí Jesús dífn yā cuayiivi chí ndāa yā yeⁿe yáⁿāa Judea ndii yáⁿāa Galilea.

Saⁿā chí nguée ngii ngíicá

5 Chó'oo tanducuéⁿē cosa 'túúca. Véé 'áámá 'viicu yeⁿē 'iiⁿyāⁿ Israel. Nícu Jesús cuchée yā yááⁿ Jerusalén. ²Mífⁿ canéeⁿ 'áámá viini ch'etete niiⁿnuⁿ cheendi chéeⁿ, cuaaⁿ naachí indāa yā ndúúcu 'iiti cuūchi

chí n'diicui yā na yááⁿ Jerusalén. Viini ch'etete miiⁿ nguuvi Betesda na nduudu hebreo. Véé nyuⁿu corredor nuuⁿmaⁿ ndiivi viini ch'etete. ³Na corredor miiⁿ ndiitú ndúúcu n'deēe n'dáí 'iiⁿyāⁿ ngíitā; 'iiⁿyāⁿ n'guenááⁿ, ndúúcu 'iiⁿyāⁿ chí nguéeⁿ ngii ngíicá yā, ndúúcu 'iiⁿyāⁿ chí ntíⁿi ta'á yā o ca'a yā. 'Iiⁿyāⁿ miiⁿ canéeⁿ ngíínú yā chí in'nuⁿu nuūⁿníⁿ. ⁴Caati vee tiempo chí 'áámá ángel nch'eeⁿ yā nícuⁿ idiⁿnuⁿu yā nuūⁿníⁿ chí snée ná viini ch'etete. Ní cuayiivi 'iiⁿyāⁿ chí ndāa yā vmnááⁿ vmnaaⁿ ch'etí viini mífⁿ nanduuva yeⁿé yā yeⁿē 'āa deⁿē nūuⁿ ca'āi chí ndii yā. ⁵Ní miiⁿ canéeⁿ 'áámá sáⁿā ndiicú nditiⁿyuⁿ 'iinu ndúuyū chí ngíitā sa. ⁶Taachí Jesús n'diichí yā saⁿā chí candíití sá, nícuⁿ 'āa deenú yā chí 'āa 'naáⁿ ngíitā sa, tuu'mi ní ngaⁿa yā ngii yā saⁿā: ¿Áá néⁿé dí chí nduūvā yeⁿē di?

⁷Ní saⁿā chí ngíitā miiⁿ nan'guēcútaⁿā sa yeⁿé yā: Señor, nguéeⁿ mar 'áámá saⁿā chí cuⁿnuūⁿ sa 'úu ch'éti viini taachi íⁿnuⁿu nuūⁿníⁿ. Caati taachí ndaá, 'āa ndāa taamá yā ch'etí viini.

⁸Ní ngaⁿa Jesús ngii yā saⁿā: Nacuéeⁿ di. Nadacuéeⁿ di yiive yeⁿē di ní cúnaⁿa di.

⁹Tuu'mí nūuⁿ nduūvā yeⁿē sa. Ní nadacuéeⁿ sa yiive yeⁿē sa. Ní cunaⁿa sá. Ní nguuvi miiⁿ ní sábadu nguuvi chí ntaaviⁿtuunúⁿ 'iiⁿyāⁿ Israel. ¹⁰Nícuⁿ 'iiⁿyāⁿ Israel ngaⁿa yā yā ngii yā saⁿā chí 'āa nanduuvá yeⁿē sa: Caati maaⁿ ní sábadu miiⁿ, tan'dúúca chí caⁿa ley, nguéeⁿ cuuvi nandée di yiive yeⁿē di.

¹¹Ní n'guēcútaⁿā sa yeⁿé yā: 'Iiⁿyāⁿ chí dífn yā chí nduuvā yeⁿé,

'i'iⁿyāⁿ miiⁿ ní ngaⁿ'a yā ngii yā
'úú: Nadacuéⁿ di yiive yeⁿ'ē di. Ní
cuinaⁿ'a di.

¹²Tuuⁿ'mi ní tiinguunéⁿ 'i'iⁿyāⁿ
Israel saⁿ'ā: ¿Duⁿ'ú chi 'tíicā ngaⁿ'ā
ngii di: Nadacuéⁿ di yiive yeⁿ'e di,
ní cuinaⁿ'a di?

¹³Níicú saⁿ'ā chi 'āā nduuvá yeⁿ'ē
sa nguéeⁿ déénú sá duⁿ'ú 'i'iⁿyāⁿ miiⁿ,
caati Jesús diví yā yeⁿ'e saⁿ'ā miiⁿ.
Ní neené n'deēe 'i'iⁿyāⁿ snée yā miiⁿ.

¹⁴Cuayiivi Jesús nandaacá yā saⁿ'ā
na yáacū templo. Ní ngaⁿ'a Jesús
ngii yā saⁿ'ā: Cunⁿ'díichí dí maaⁿ 'āā
nduuvá yeⁿ'ē di. 'Aa ntéeⁿ diiⁿ di
nuuⁿ'ndi niicu nguéeⁿ cutaⁿ'āa táamá
ca'ai chi más cā taaⁿ di.

¹⁵Tuuⁿ'mí saⁿ'ā miiⁿ cunaⁿ'ā sa ní
caⁿ'a sa chii sa 'i'iⁿyāⁿ Israel chi
Jesús chi díiⁿ yā chi ndúúvā yeⁿ'e
sa. ¹⁶Ni cáávā chuū ní canⁿ'dáā
'i'iⁿyāⁿ Israel Jesús miiⁿ chí neⁿ'é
sa 'caaⁿ'núⁿ sa 'i'iⁿyāⁿ caati díiⁿ yā
cosa chi 'tíicā miiⁿ nguuví chi
sábado chi ntaaviⁿ'túúnuuⁿ 'i'iⁿyāⁿ.

¹⁷Jesús nanⁿ'guēcútaⁿ'a yā yeⁿ'ē
sa: Chiidá ní ndíiⁿ maaⁿ chí idiⁿ'i cá
yā ntiiⁿ'nyuⁿ. Ní 'úú idiⁿ'i ntiiⁿ'nyuⁿ
denduⁿ'ū.

¹⁸Tuuⁿ'mi ní 'i'iⁿyāⁿ Israel neⁿ'e
taavi sa 'caaⁿ'núⁿ sa Jesús, caati
nguéeⁿ damaāⁿ chi nguéeⁿ díiⁿ yā
cumplir chi ngaⁿ'ā na ley yeⁿ'e
sábado, caati ngaⁿ'á yā chi
Dendyuūs Chiidá yā, ní díiⁿ yā chi
nduuvídáámá yā ndúúcu Dendyuūs.

Dendyuūs dicho'ó yā Daiya yā

¹⁹Nanⁿ'guēcútaⁿ'á Jesús ní ngaⁿ'a
yā ngii yā saⁿ'ā: Cuaacu níⁿ'nyúⁿ,
cuāacū niiⁿ'nyuⁿ chí ngaⁿ'á ngíi
ndisⁿ'tii chi nguéeⁿ cuuví diiⁿ Daiyá
Dendyuūs mar 'áámá cosa dámaāⁿ

ndúúti chi nguéeⁿ n'diichí yā chi
diiⁿ Chiidá yā. Caati tanducuéⁿ'ē
chi diiⁿ Chiidá yā, 'tiicá ntúūⁿ diiⁿ
Daiyá yā. ²⁰Caati Dendyuūs Chiidá
ní dinéⁿ'e yā 'úú chi Daiya yā. Ní
n'giⁿ'i yā 'úú tanducuéⁿ'e denduⁿ'ū
chi díiⁿ yā. Niicu Chiidá n'giⁿ'i cá
yā 'úú ntiiⁿ'nyuⁿ n'geete ca nguéeⁿ tii
chuū. Níicú ndisⁿ'tii caⁿ'a yíínú ní
yeⁿ'ē. ²¹Tanⁿ'dúúca Chiidá nadacuéⁿ
yā 'i'iⁿyāⁿ chí 'āā n'dii ní ngaⁿ'a yā
vida yeⁿ'é yā, 'tiicá ntúūⁿ 'úú Daiyá
yā ní nadacuéⁿ 'i'iⁿyāⁿ chí 'āā n'díi
ní ngaⁿ'á vida 'i'iⁿyāⁿ miiⁿ chí neⁿ'é
ngaⁿ'á. ²²Caati Chiidá nguéeⁿ díiⁿ yā
juzgar mar 'aama 'i'iⁿyāⁿ naatí caⁿ'á
yā 'úú chi Daiya yā chí díiⁿ juzgar
tanducuéⁿ'ē. ²³Caati tanducuéⁿ'ē
'i'iⁿyāⁿ díiⁿ yā honrar 'úú chí Daiyá
yā tanⁿ'dúúca tanducuéⁿ'ē 'i'iⁿyāⁿ
díiⁿ yā honrar Chiidá. Duⁿ'ú chí
nguéeⁿ idiⁿ'i yā honrar 'úú chí Daiyá
Dendyuūs ní nguéeⁿ idiⁿ'i yā honrar
Chiidá chí dicho'ó yā 'úú.

²⁴Cuaacu níⁿ'nyúⁿ, cuāacū
niiⁿ'nyuⁿ ngaⁿ'á ngíi ndisⁿ'tii: 'Iiⁿ'yāⁿ
chí n'giindiveéⁿ yā nduudu chí
ngaⁿ'á, ní i'téenu yā yeⁿ'e 'i'iⁿyāⁿ chí
dicho'ó 'úú, véé vida cueⁿ'e daāⁿ'maⁿ
yeⁿ'é yā. Niicu nguéeⁿ condenado
yā. Nguéeⁿ canee yā dácaā yeⁿ'ē chí
n'gii caati véé vida cueⁿ'e daāⁿ'maⁿ
yeⁿ'é yā. ²⁵Cuaacu níⁿ'nyúⁿ, cuāacū
niiⁿ'nyuⁿ ngaⁿ'á ngíi ndisⁿ'tii: Cuchii
hora ní hora miiⁿ chuū taachi 'i'iⁿyāⁿ
s'eeⁿ chí 'āā n'díi yā, 'caandiveéⁿ
yā nduudu yeⁿ'e 'úú chí Daiyá
Dendyuūs. 'Iiⁿ'yāⁿ chí i'teenu yā
nduudu yeⁿ'é cunduuchí yā cueⁿ'e
daāⁿ'maⁿ. ²⁶Tanⁿ'dúúca Chiidá véé
vida yeⁿ'ē maáⁿ yā, 'tiicá ntúūⁿ caⁿ'a
yā 'úú chí Daiya yā vida yeⁿ'ē maáⁿ.
²⁷'Tíicā caⁿ'á yā poder 'úú chí díiⁿ

juzgar 'iiⁿ'yāⁿ caati 'úú Saⁿā chi Daiya Dendyuus 'úú. ²⁸Nguéé caⁿā yiinu di yeⁿ'ē chūū, caati cuchii hora taachi nducyáácá 'iiⁿ'yāⁿ chi chinúu yā maaⁿ yaⁿā 'caandiveéⁿ yā nduudu yeⁿ'é. ²⁹Ní nadacuéeⁿ yā yeⁿ'ē nguaaⁿ tináⁿā. 'Iiⁿ'yāⁿ chi dííⁿ yā chi n'daacā, ní caⁿ'á yā cuneé yā ndúúcu vida cueⁿ'e daāⁿmaⁿ yeⁿ'é yā. Ní 'iiⁿ'yāⁿ chi nguéé n'daacā idiíⁿ yā, caⁿ'á yā na condenación.

**'Iiⁿ'yāⁿ s'eeⁿ caⁿ'a cuaacú
yā yeⁿ'ē Jesús**

³⁰Ní caⁿ'a Jesús: 'Úú ní damaáⁿ ní nguéé deⁿē vee cuuvi dííⁿ. Tan'dúúca chi n'giindiveéⁿ, 'tíicā dííⁿ juzgar. Ní chi dííⁿ juzgar ní cuaacu caati nguéé in'nuúⁿ chi neⁿ'é maáⁿ naati chi neⁿ'e maāⁿ Chiidá chi dichó'o yā 'úú. ³¹Ndúúti chi yeⁿ'é māaⁿ chi ngaⁿ'á cuaacu ní nguéé cuaacu. ³²Táámá 'iiⁿ'yāⁿ chi dííⁿ yā caaⁿ'maⁿ cuaacú yā yeⁿ'ē 'úú. 'Úú ní deenú tii chí ngaⁿ'a yā yeⁿ'ē 'úú chi cuaacu. ³³Ní ndís'tii ní dichó'o ní 'iiⁿ'yāⁿ s'eeⁿ nanááⁿ Juan. Ní Juan miiⁿ caⁿ'a sa nduudu cuaacu yeⁿ'e 'úú. ³⁴Caati 'úú nguéé itaⁿ'á nduudu cuaacu yeⁿ'ē sáⁿ'ā yeⁿ'e iⁿ'yeeⁿdí 'cūū naati ngaⁿ'á tanducuéⁿ'ē chuū caati ndís'tii ní cuuvi nanguáⁿ'ai nī. ³⁵Níicú Juan chi cheédínuūⁿní yā 'iiⁿ'yāⁿ miiⁿ tan'dúúca 'áámá chi deēve ngiichi ní ngíí n'gai, 'tíica yā. Ní ndís'tii ní dinéⁿ'e ní vaadi yeenú yeⁿ'é ní 'áámá tiempo ndúúcu chi deēve yeⁿ'é yā. ³⁶Naati 'úú ní ngaⁿ'á nduudu cuaacu chi ch'ēete ca chi caⁿ'a Juan miiⁿ caati ntiiⁿnyuⁿ chi teē Chiidá 'úú, ní chuū idiíⁿ. Tan'dúúca maāⁿ ntiiⁿnyuⁿ chi dííⁿ ní ngaⁿ'ā nduudu cuaacu yeⁿ'é

chi Chiidá dichó'o yā 'úú. ³⁷Níicú maaⁿ Chiidá chi dichó'o yā 'úú ngaⁿ'a yā nduudu cuaacu yeⁿ'ē 'úú. Ndís'tii mar 'áámá vmnéⁿ'ēe nguéé n'giindiveéⁿ ní nduudu yeⁿ'e chiidá, ndíí nguéé ndúú n'diichí ní 'iiⁿ'yāⁿ taacá yā. ³⁸Ní ndis'tii ní nguéé 'áámá canée ní ndúúcu nduudu yeⁿ'é yā caati ndís'tii nguéé s'téenu ní chi 'úú ní 'iiⁿ'yāⁿ chi Dendyuūs dichó'o yā. ³⁹In'nuúⁿ ní naachi cánée nguūⁿ na libro yeⁿ'e Ndyuūs, níicú cadiinúúⁿ ní chi véé vida cueⁿ'e daāⁿmaⁿ yeⁿ'é nī. Ní mífⁿ ngaⁿ'ā cuaacu yeⁿ'ē 'úú. ⁴⁰Ndis'tii nguéé neⁿ'é ní chii ní nanaáⁿ tii cuūvi vida cueⁿ'e daāⁿmaⁿ yeⁿ'é nī.

⁴¹'Úú ní nguéé cutaⁿ'á honra yeⁿ'e saⁿ'ā yeⁿ'e iⁿ'yeeⁿdí 'cūū. ⁴²Naati 'úú ideenú táacā ndís'tii ní nguéé neⁿ'é ní Dendyuūs. ⁴³'Úú ní cuchíí ndúúcu chi duuchi Chiidá. Ní nguéé 'cuaaⁿ ní ndís'tii 'úú. Ndúúti chi taamá yā cuchíí yā ndúúcu nduudu yeⁿ'e maáⁿ yā, tuuⁿ'mi ní 'cuaáⁿ ní 'iiⁿ'yāⁿ miiⁿ. ⁴⁴¿Táacā cu'téenu ndís'tii chi dííⁿ ní honrar 'áámá ní yeⁿ'ē taamá ní ní nguéé neⁿ'é ní chi Dendyuūs dííⁿ yā honrar n'dii? ⁴⁵Nguéé nadacadíinuūⁿ ndis'tii chi 'úú ngaⁿ'á nuuⁿndi yeⁿ'e ndís'tii nanááⁿ Chiidá. Véé 'áámá 'iiⁿ'yāⁿ chi ngaⁿ'a nuuⁿndi yeⁿ'e ndís'tii chi Moisés chi 'iiⁿ'yāⁿ chi i'téenu nī. ⁴⁶Ndúúti chi ndís'tii chi'téenu ní yeⁿ'e Moisés miiⁿ tuuⁿ'mi ní cu'téenu ní 'úú caati yeⁿ'ē 'úú chi dingúuⁿ sa. ⁴⁷Ndúúti chi nguéé i'téenu ní chi dingúuⁿ Moisés, ¿táacā cu'téenu ní nduudu yeⁿ'ē 'úú?

**Jesús caⁿ'á yā chi che'é nyuⁿ'u mil
saⁿ'ā**

(Mt. 14.13-21; Mr. 6.30-44; Lc. 9.10-17)

6 Cho'o cosa chuū, ní cueⁿ'e
Jesús taama lado yeⁿ'ē

nuuⁿniⁿyaⁿā Galilea chi nguuví ntúūⁿ Tiberias. ²Nééné n'deēe 'iiⁿyaⁿ cueⁿe yā n'dāa yā Jesús caati n'diichí yā señales yeⁿé yā chi diíⁿ yā ndúúⁿcú 'iiⁿyaⁿ chi ngiitā. ³Ní cucheē Jesús 'áámá cuēeti ní mííⁿ ch'iindí yā ndúúⁿcú discípulos yeⁿé yā. ⁴Ní chinee niiⁿnuúⁿ nguuví yeⁿe pascua yeⁿē 'iiⁿyaⁿ Israel s'eeⁿ. ⁵Tuuⁿmí n'diichi Jesús cuaaⁿ 'niiⁿnuúⁿ níⁿcú snaaⁿ yā chí n'deeē n'dái 'iiⁿyaⁿ cuchí yā nanáaⁿ yā. Ní Jesús ngaⁿa yā ngii yā Felipe: ¿Tií caⁿa yú cuaí yú pan chi che'e 'iiⁿyaⁿ s'tíi?

⁶Ní chuū Jesús ngaⁿa yā ti diíⁿ yā probar saⁿā miiⁿ táacā diiⁿ sá maāⁿ sa, caati Jesús maāⁿ yā deenú yā dēē chi diíⁿ yā. ⁷Nan'guēcútaⁿa Felipe miiⁿ yeⁿé yā: Ndúúⁿcú nyuⁿu ciento caadi tuūmí chi caⁿá nguaí pan nguēé tunéēⁿ chí cutaⁿá 'iiⁿyaⁿ s'tii 'aama taaⁿ chí che'e yā.

⁸Áámá discípulo yeⁿé yā chí ngúúví Andrés chi 'dínu yā Simón Pedro, ngaⁿa sá ngii sa Jesús: ⁹Áámá saⁿā 'lííⁿ chi canee 'muuⁿ ndéē sa nyuⁿu panes cebada ndúúⁿcú na 'uuví 'yaacā n'gaiyāā. ¿Dēē tunéēⁿ chuū chi che'e 'iiⁿyaⁿ s'tíi?

¹⁰Tuuⁿmí ní nan'guēcútaⁿā Jesús miiⁿ ngaⁿa yā ngii yā saⁿā: Cúúví ní 'iiⁿyaⁿ s'tii ní 'cuēetē núúⁿ yā. Nééné v'éē yuune lugar miiⁿ níⁿcú ch'ēete 'áámá número tan'duucā nyuⁿu mil saⁿā. ¹¹Ní Jesús miiⁿ staⁿá yā panes miiⁿ níⁿcú taachi ngaⁿa yā ngii yā: Gracias N'dii Ndyuús, tucá'a yā ca'a yā discípulos, ní discípulos ní caⁿá yā 'iiⁿyaⁿ chí v'ētē miiⁿ. 'Tiicá ntúūⁿ diiⁿ Jesús ndúúⁿcú 'yaacā. Ní 'iiⁿyaⁿ miiⁿ staⁿá yā 'yaacā. Staⁿá yā

nducuéⁿē chi neⁿé yā. ¹²Taachi 'āā ntēē v'éē chi neⁿe yā, Jesús ngaⁿa yā ngii yā discípulos yeⁿé yā: Nadicuéⁿ di nducuéⁿē tááⁿ panes chi nángaāva caati nguēé cuuvi ndái dēē v'ēē.

¹³Nadicuéⁿ yā tanducuéⁿē taaⁿ panes chi nángaāva. Níⁿcú chiitu ndiichúúví 'cuēetēē naachi nyuⁿu pan cebada chi ningaāva naachí che'e 'iiⁿyaⁿ s'eeⁿ. ¹⁴Taachi n'diichi 'iiⁿyaⁿ s'eeⁿ señal chi diiⁿ Jesús miiⁿ tuuⁿmí ní ngaⁿa yā ngii yā vi'i: Cuaacu níⁿnyúⁿ 'iiⁿyaⁿ 'cúú chi profeta chi canee chi ndaá yā iⁿyééⁿdi 'cūū.

¹⁵Taachí tuumicádíínuuⁿ Jesús chi 'iiⁿyaⁿ s'eeⁿ neⁿé yā cutaⁿá yā 'yā ní cuⁿnéēⁿ yā 'yā lado yeⁿē rey tuuⁿmí ní cueⁿé máaⁿ yā na 'áámá cuēeti.

Jesús ngiica yā vmnaaⁿ nuūⁿniⁿyaⁿā

(Mt. 14.22-27; Mr. 6.45-52)

¹⁶Āā chii chíínu miiⁿ ní cueⁿe discípulos yeⁿé yā na nuūⁿniⁿyaⁿā. ¹⁷Ní chi ndaa yā 'áámá barco ní cueⁿé yā ná nuūⁿniⁿyaⁿā. Ní 'āā ntéē ndaá yā na yāāⁿ Capernaum. 'Āā chii 'da'a ní nguēé ndāā Jesús naachi snéē yā. ¹⁸Ní cho'ō 'aama 'yúúnē taaⁿ ní nadācuééⁿ n'dai nuūⁿniⁿyaⁿā. ¹⁹Taachí 'āā cueⁿé yā tanduu nyuⁿu candúú nyaaⁿ kilómetros, tuuⁿmí n'diichí yā chí cúchii Jesús miiⁿ. Ngicá yā cuaaⁿ vmnaaⁿ nuūⁿniⁿ. Ní taachi 'aa cháá ndaa Jesús niiⁿnuúⁿ na barco miiⁿ discípulos diiⁿya sá chii. ²⁰Ní Jesús ngaⁿa yā ngii yā saⁿā s'eeⁿ: Nguēé 'va'ā ndís'tii ti 'úú.

²¹Tuuⁿmí ngaⁿa sá ngii sa Jesús: Cho'ó ní cuaaⁿ chēeti barco. Yeenú n'dai sa chi sndaā Jesús na barco.

'Āā nuúⁿ ndaa barco miiⁿ na yáⁿāa naachí cuéⁿē.

'Iiⁿyāⁿ in'nuúⁿ yā Jesús

²²Chi dēve táamá nguuví ní 'iiⁿyāⁿ chi snéé yā táamá lado yeⁿe nuúⁿnīⁿyáⁿā n'diichí yā 'áamá barco nūⁿ, barco miiⁿ chi 'āā cuéⁿē discipulos. Ní n'diichí yā chi nguéé cuéⁿe Jesús ndúúcu discipulos yeⁿé yā. Ní discipulos yeⁿé yā cuinaⁿá yā dámaáⁿ yā. ²³Tan'duuví barcos yeⁿē Tiberias ndāā niⁿnuúⁿ na lugar naachi ch'etē yā chi cheⁿé yā pan 'iicū cuayiivi chi Jesús ngāⁿa yā: Gracias n'dii Dendyuūs Chiidá. ²⁴Taachí 'iiⁿyāⁿ n'diichi yā chi nguéé Jesús miiⁿ ndíi nguéé ndúú discipulos yeⁿé yā, tuuⁿmi ní chi ndāá yā ch'etē barcos. Ní cuéⁿé yā na yāāⁿ Capernaum. N'nuūⁿ yā Jesús miiⁿ.

Jesús tan'dúúca yuündū chi ca'a vida

²⁵Taachí 'iiⁿyāⁿ s'eeⁿ ndaacá yā Jesús táamá lado yeⁿē nuūⁿnīⁿyáⁿā tuuⁿmi ní ngaⁿa yā ngii yā 'iiⁿyāⁿ: N'dii Maestro, ítíi cuāⁿa ndāá nī 'muuⁿ?

²⁶Nan'guecutáⁿa Jesús yeⁿe yā ní ngaⁿa yā ngii yā: Ndis'tií, cuaacu níⁿnyúⁿ cuāācū niⁿnyuⁿ nguéé in'nuúⁿ nī 'úú ti n'diichí nī chi dííⁿ señales naati chí teé pan, ní cheⁿé nī ní chiitu ndis'tií. ²⁷Nguéé dííⁿ nī ntiiⁿnyuⁿ yeⁿe comida chi chó'oo ti yeⁿe comida chí cunéé cuéⁿe daāⁿmaⁿ, ch'etē chi tee Saⁿā chi Daiya Dendyuūs ndis'tií caati Dendyuūs Chiidá ca'á yā poder Daiyá yā.

²⁸Tuuⁿmi ní ngaⁿa saⁿā s'eeⁿ ngii sa 'iiⁿyāⁿ: ÍTaaca dííⁿ 'nū chi cuuví

dííⁿ 'nū ntiiⁿnyuⁿ chi ntiiⁿnyuⁿ yeⁿé Dendyuūs miiⁿ?

²⁹Nan'guecutáⁿā Jesús yeⁿē sa ní ngaⁿá yā ngii yā saⁿā: Chuū chi ntiiⁿnyuⁿ yeⁿe Dendyuūs miiⁿ chi cu'téenu di yeⁿē 'iiⁿyāⁿ chi Ndyuūs dichó'o yā 'iiⁿyāⁿ.

³⁰Tuuⁿmi ngaⁿa sa ngii sa 'iiⁿyāⁿ: ÍDe'e señal chí cu'neeⁿ nī chí snaāⁿ 'nū, ní cu'téenu 'nū n'dii? ÍDe'e ntiiⁿnyuⁿ idiíⁿ nī? ³¹Chiida yú ní cheⁿé yā yuündū maná na yāⁿā naachi nguéé ch'etēnéé 'iiⁿyāⁿ tan'dúúca chi canéé nguūⁿ na libro yeⁿe Ndyuūs 'tífā: Yuündū yeⁿē nanguuvi Ndyuūs ca'á yā chi cheⁿé 'iiⁿyāⁿ s'eeⁿ.

³²Nan'guecutáⁿā Jesús yeⁿē sa: Cuaacu níⁿnyúⁿ, cuāācū niⁿnyuⁿ ngaⁿá ngii ndis'tií: Nguéé teé yā Moisés miiⁿ yuündū chi maná chi yeⁿē nanguuvi, naati Chiidá teé yā n'dii pan chi cuaacu níⁿnyúⁿ chí yeⁿe va'ai ch'etē nguuví. ³³Caati pan chi yeⁿé Dendyuūs ní 'iiⁿyāⁿ miiⁿ chi inch'eeⁿ yā yeⁿe va'ai ch'etē nguuví ní ngaⁿá yā vida cuéⁿe daāⁿmaⁿ yeⁿē 'iiⁿyāⁿ yeⁿe fⁿyeēⁿdí.

³⁴Tuuⁿmi ní ngaⁿā sa ngii sa Jesús: Señor, téé nī pan 'cūū nús'uu cuéⁿé daāⁿmaⁿ.

³⁵Jesús ngaⁿa yā ngii yā saⁿā: 'Úú ní tan'dúúca pan 'tífā 'úú nī ca'á vida cuéⁿe daāⁿmaⁿ. Du'u chi chii nanaāⁿ nguéé cúúví cuicú yā. Ní du'ū chi cu'teenu 'úú 'āā ntéé cuuví yaacá yā. ³⁶Naati 'úú nī ngaⁿá ndis'tií: 'Āā n'diichí nī 'úú, níícu ndíi nguéé s'téenu nī 'úú. ³⁷Tanducuéⁿē 'iiⁿyāⁿ chi itée Chiidá 'úú, 'iiⁿyāⁿ s'tíi cuchii nanaāⁿ. Du'ū chí chii nanaāⁿ nguéé tun'daá 'iiⁿyāⁿ chuva'ai.

³⁸Caati 'úú chiicá yeⁿē na va'ai

cheete nguuví ní nguée dífⁿ chí 'úú neⁿé maáⁿ, caatí dífⁿ chí neⁿe maāⁿ 'iiⁿyāⁿ chí dichó'o yā 'úú. ³⁹Chuu chí neⁿe Chiidá chí dichó'o yā 'úú, caatí 'úú ní nguée nindaí mar 'áamá yeⁿe tanducueⁿe chí tee yā 'úú. 'Úú ní nadin'duuchí tanducueⁿe 'iiⁿyāⁿ yeⁿe nguaaⁿ tináⁿā nguuví chí 'cuiinū iⁿ'yeēⁿdí. ⁴⁰Chuū chí neⁿe 'iiⁿyāⁿ chí dichó'o yā 'úú: Nducyaaca 'iiⁿyāⁿ chí n'diichí yā Daiya Ndyuūs, ní i'téenu yā 'iiⁿyāⁿ, véé vida cueⁿe daāⁿmaⁿ yeⁿé yā. Niicu 'úú ní nadicueēⁿ 'iiⁿyāⁿ s'eeⁿ nguuví chí 'cuiinū iⁿ'yeēⁿdí.

⁴¹Tuu'mí ngaⁿ'a 'iiⁿyāⁿ Israel yeⁿé yā: Nguée n'daacā chí ngaⁿ'a yā: 'Úú tan'dúúcā pan chí cuch'éeⁿ nanguuvi, 'tíicā 'úú. ⁴²Ní ngaⁿ'a yā: ¿Áá nguée sáⁿ'a 'cūū chí Jesús daiya José? Ní n'diichi yú chiidá yā ndúúcū chæcú yā. ¿Taacā chí ngaⁿ'a sa: 'Úú chí cuch'éeⁿ yeⁿe na va'ai cheeti nguuví?

⁴³Ní Jesús nan'guæcútaⁿ'á yā yeⁿe sa, ní ngaⁿ'a yā ngíí yā saⁿ'ā: Nguée caaⁿ'máⁿ ndís'tií nguááⁿ maáⁿ nī. ⁴⁴Mar 'áamá 'iiⁿyāⁿ nguée cuuvi ndaá yā nanaáⁿ ndúútí chí Chiidá chí dichó'o yā 'úú nguée nndéé yā 'iiⁿyāⁿ. 'Úú nadan'duuchí yā nguuví chí 'cuiinū iⁿ'yeēⁿdí. ⁴⁵Canée nguūⁿ na libro yeⁿe Ndyuūs naachi ngaⁿ'a profetas 'tíicā: Dendyuūs ca'cueeⁿ yā nducyaaca yā. Nducyaaca 'iiⁿyāⁿ chí ch'iindiveéⁿ yā yeⁿe Chiidá ní 'āā cueéⁿ yā yeⁿe Chiidá, cuchíí yā nanááⁿ 'úú.

⁴⁶Mar 'áamá 'iiⁿyāⁿ 'āā n'diichí yā Chiidá, dámaaⁿ Cristo chí yeⁿe Dendyuūs ti Daiyá Ndyuūs. 'Iiⁿyāⁿ 'cūū dámaaⁿ n'diichí yā Chiidá.

⁴⁷Cuaacu nífⁿnyúⁿ, cuāācū nīⁿnyuⁿ

ngaⁿ'á ngíí ndis'tií: Du'ū chí i'téenu yā 'úú cunduuchí yā cueⁿe daāⁿmaⁿ. ⁴⁸'Úú tan'dúúcā pan chí canduuchi, 'tíicā 'úú. ⁴⁹Chiidá nī che'é yā pan maná na yāⁿāa naachi nguée 'iiⁿyāⁿ ní ch'íi yā. ⁵⁰Chuū chí pan chí cuch'éeⁿ na va'ai cheeti nguuví caatí 'iiⁿyāⁿ chí che'é yā yeⁿe nguée 'cūūví yā. ⁵¹'Úú tan'dúúcā pan chí canduuchi chí cuch'eeⁿ na va'ai cheeti nguuví. Du'u 'iiⁿyāⁿ chí che'e yā pan 'cūū, cunduuchí yā cueⁿe daāⁿmaⁿ. Níicú pan miiⁿ chí 'úú caⁿ'á ní yuūtē yeⁿé maáⁿ. Chuū chí ca'á cáávā vida yeⁿé 'iiⁿyāⁿ yeⁿe iⁿ'yeēⁿdí 'cūū.

⁵²Tuu'mí ní 'iiⁿyāⁿ Israel ch'æcu cheendí sá nguaaⁿ maāⁿ sa: ¿Táácā cuuvi téé sá cuerpo yeⁿe sa chí che'é nū?

⁵³Tuu'mí ngaⁿ'a Jesús ngíi yā saⁿ'ā: Cuaacu nífⁿnyúⁿ, cuāācū nīⁿnyuⁿ ngaⁿ'á ngíí ndis'tií: Nduuti chí nguée che'e nī cuerpo yeⁿe Saⁿ'ā chí Daiya Dendyuūs ní nduuti chí nguée cu'ú nī yuuúⁿ yeⁿe sa, nguæ cūnee vida cueⁿe daāⁿmaⁿ ndúúcū nī. ⁵⁴Du'u chí che'e cuerpo yeⁿé nī cu'u yuuúⁿ yeⁿé, cunée vida cueⁿe daāⁿmaⁿ ndúúcū. Níicú 'úú nadicueēⁿ 'iiⁿyāⁿ s'eeⁿ nguuví chí 'cuiinū iⁿ'yeēⁿdí. ⁵⁵Caatí cuerpo yeⁿé, cuaacu nífⁿnyúⁿ yuūtē chí che'e yā. Ní yuuúⁿ yeⁿé, cuaacu nífⁿnyúⁿ chí yuuúⁿ chí cu'u yā.

⁵⁶Du'u chí che'e cuerpo yeⁿé ní cu'í yuuúⁿ yeⁿé cunee yā nduucú, ní 'úú cunee ndúúcū yā. ⁵⁷Tan'dúúcā chí Chiidá canduuchí yā ní dichó'o yā 'úú, ní 'úú canduuchí cáávā 'iiⁿyāⁿ miiⁿ. 'Tiicá ntúūⁿ 'iiⁿyāⁿ chí che'e yā 'úú, 'iiⁿyāⁿ miiⁿ ní cunduuchi ntúúⁿ yā cáávā 'úú. ⁵⁸Chuū pan chí

cuch'eéⁿ yeⁿē na va'ai chæeti nguuvi. Nguéé tan'dúú^{cā} pan maná chi che'ē chiidá nī mīiⁿ tiempo chi 'āā ch'ó^ōo ní ch'iī yā. Du'u chi che'e pan 'cūū cunduuchí yā cueⁿe daāⁿmaⁿ.

⁵⁹Chuū chí caⁿa Jesús na yáacū sinagoga taachi cueⁿé yā na yááⁿ Capernaum.

Nduudu yeⁿe vida cueⁿe daāⁿmaⁿ

⁶⁰Tuu'mi n'deeē n'dái discipulos yeⁿé yā taachi ch'iindiveéⁿ yā chuū ní caⁿa yā: Chæechí 'téē nduudu 'cūū. ¿Du'ū rá 'caandiveeⁿ rá?

⁶¹Taachí déénú maāⁿ Jesús chi discipulos yeⁿé yā indeē sa nguááⁿ maāⁿ sa yeⁿe chúū tuu'mi ní ngaⁿá yā ngii yā saⁿā s'eeⁿ: ¿Áá chuū chi nguæe ineéⁿ nūuⁿ ndís'tiī? ⁶²¿De'ē ca dííⁿ ndis'tiī, taachí n'diichí nī Saⁿā chí Daiya Dendyuūs chí ch'ee sa na va'ai chæeti nguuvi naachí canéé sa vmnááⁿ vmnaaⁿ? ⁶³Espíritu chuū chí nga'a vida yeⁿé 'iīⁿyāⁿ ní 'iīⁿyāⁿ canéé ndúú^{cū} espíritu yeⁿé yā. Yuūtē mīiⁿ nguéé de'ē væē idiīiⁿ. Nduudu chi ngaⁿá ngii ndis'tiī, ní yeⁿē espíritu ní ca'a vida 'iīⁿyāⁿ. ⁶⁴Véé n'duuvi ndís'tiī chi nguéé i'téénú nī. Caati Jesús ndíí cuaaⁿ vmnaaⁿ 'āā deenú yā du'ū 'iīⁿyāⁿ s'eeⁿ chi nguéé cu'téenu yā, nífcú du'ū 'iīⁿyāⁿ chí dííⁿ yā entregar 'iīⁿyāⁿ. ⁶⁵Ní Jesús ngaⁿa yā: Cáávā chuū chi ngaⁿá ngii ndís'tiī, caati mar 'áámá 'iīⁿyāⁿ nguéé cuchíí yā nanaáⁿ ndúúti chi nguéé cáávā chi Dendyuūs 'cuúⁿ yā 'iīⁿyāⁿ. ⁶⁶Ndii tuu'mi, neené 'yaaⁿ discipulos yeⁿé yā ndaacadáámí sá ní 'āā ntéé cachiica sa ndúú^{cū} Jesús. ⁶⁷Tuu'mí ní ngaⁿa Jesús ngii yā saⁿā chí ndiichúúví: ¿Áá neⁿé nī ntuūⁿ ndís'tiī ndaacadáámí nī yeⁿé?

⁶⁸Tuu'mi ní nan'guæecútaⁿā Simón Pedro: Señor, ¿du'u chí caⁿā ndúú^{cū} 'nū? N'diī ní canéē nī ndúú^{cū} nduudu yeⁿé vida cueⁿe daāⁿmaⁿ.

⁶⁹Nús'uu i'téenu 'nū ní deenú 'nū chí n'diī chí Cristo, Daiya Dendyuūs chí canduuchi cueⁿe daāⁿmaⁿ.

⁷⁰Ní Jesús nan'guæecútaⁿá yā: ¿Áá nguéé 'úú chí ndæevé ndís'tiī ndiichúúví nī? Ní 'áámá chéé ndís'tiī nī yááⁿnguiinūⁿ.

⁷¹Ní ngaⁿa yā yeⁿe Judas Iscariote, daiya Simón caati sáⁿa 'cūū chí canee chí diiⁿ sa entregar 'iīⁿyāⁿ. Saⁿā mīiⁿ 'áámá sá yeⁿē naachi ndiichúúví sá.

'Diinū Jesús nguéé i'teenú yā

7 Cho'ōo tanducuéⁿē chuū, Jesús cachiicá yā na yáⁿāa Galilea. Nguéé neⁿé yā cuchiicá yā na yáⁿāa Judea caati saⁿā Israel s'eeⁿ canéē ngiinu sa chí 'caaⁿnúⁿ sa Jesús. ²Ní 'āā chinee nīiⁿnuúⁿ nguuvi 'viicu yeⁿē va'āi chí 'neeⁿ n'daí yā arco yeⁿē testamento yeⁿē 'iīⁿyāⁿ Israel s'eeⁿ. ³Tuu'mí ní ngaⁿa 'díínu yā ngii yā 'iīⁿyāⁿ: Nan'dáa di 'múúⁿ ní cueⁿe di na yáⁿāa Judea caati discipulos yeⁿē di cuuví snaaⁿ yā dendu'ū ntiīⁿnyuⁿ chí idiīⁿ di. ⁴Caati ndii 'áámá 'iīⁿyāⁿ nguéé dííⁿ yā 'áámá chí canúúⁿ n'de'ei. Nífcú maáⁿ yā ní neⁿé yā chí 'iīⁿyāⁿ n'diichí yā 'yā. Ndúúti chí dii chí diiⁿ di cosa chí 'tífcā tuu'mi ní 'cuuⁿmiⁿ di maāⁿ di nanááⁿ 'iīⁿyāⁿ yeⁿe iⁿ'yeeⁿdí 'cūū.

⁵Ní mar 'áámá 'díínu yā nguéé chi'teenú yā 'iīⁿyāⁿ. ⁶Tuu'mí ngaⁿa Jesús ngii yā saⁿā: 'Aa ntéé véé chí 'aacu hora yeⁿé, caati tiempo yeⁿé nī 'āā canéé. ⁷'Iīⁿyāⁿ yeⁿē iⁿ'yeeⁿdí cuuvi n'diichí yā ndis'tiī.

Nguéé cuuvi n'diichí yā 'úú caati 'úú ní nga"á cuaacú chee chi nguéé n'daacā idii" 'ii"yā" ye"e i"yéé"di 'cūū. ⁸Ndís'tií ca"nā nī 'viicú 'cūū. 'Úú ní nguée ca"á maa"nguuví, caati 'āā cuéé cunuū" ca'a hora ye"é.

⁹Taachi ch'iinu ca"nā yā chíi yā nduudú 'cūū 'díinu yā, tuu'mi Jesús canée ca yā yā"āa Galilea.

Jesús cue"e yā 'viicu ye"ē va'āi chi 'nee n'dái yā arco ye"ē testamento

¹⁰Taachi cue"é sa"nā 'díinu yā 'viicu, 'tiicá ntúū" mii" ní cue"é Jesús cuayiivi. Nguéé ch'i"í yā chí Jesús mii". Che"e n'de'ei núu" yā. ¹¹Tuu'mi ní sa"nā Israel s'ee" ní in'nuu" sa 'ii"yā" na 'viicu mii". Ní nga"nā sa: ¿Tíí cánée 'ii"yā" mii"?

¹²'ii"yā" yāā" mii" neenē n'deēe nga"nā yā ye"é yā. N'duuví yā nga"nā yā: 'ii"yā" mii" n'dai taavi yā. Ta n'duuví yā nga"nā yā: Nguéé, caati nginnche'éf yā 'ii"yā".

¹³Mar 'áámá sa"ā chí che"e sa 'viicu nguéé ca"nā sa ye"é yā ti 'va'a sa 'ii"yā" Israel.

¹⁴Chí ma"ā 'viicu, tuu'mi ní Jesús cuhéé yā cheeti yāacū templo ní ch'i'cuee" yā. ¹⁵Nífcú sa"nā Israel nge"e yiinu sa ní nga"ā sa: ¿Táácā déenu sá"nā 'cūū letras caati sá"nā 'cūū nguée 'née" sa?

¹⁶N'guēcúta"nā Jesús ní ca"nā yā: Chii" chí ngi'cuee" chi deenú ní nguéé ye"é, ti ye"e 'ii"yā" chi dichó'o yā 'úú. ¹⁷Ndúuti chi 'ii"yā" ne"é yā díf" yā voluntad ye"é Dendyuūs, tuu'mi ní deenú yā chi ngi'cuee" nduuti chi ye"é Dendyuūs o nduuti chi 'úú nga"á ye"ē maá".

¹⁸'ii"yā" chí nga"nā yā ye"ē maá" yā in'nuú" yā poder ye"ē maá" yā.

Naati 'ii"yā" chí in'nuú" yā poder ye"e 'ii"yā" chí dichó'o yā yā, 'ii"yā" mii" ní cuaacú yā. Ní nguéé chí nguéé cuaacu nduucú yā.

¹⁹¿Áá nguéé ca'a Moisés ndís'tií ye"ē ley? Ní mar áámá ndís'tií nguéé idií" nī chí nga"nā ley mii". ¿De'ē cáávā chí ne"e 'caa"nu" ndís'tií 'úú?

²⁰N'guēcútá"ā 'ii"yā" ní ca"nā yā Jesús: Yáá"n'guiniū" canée ndúúcū di. ¿Du'ú idií" núú" yiinu chí ne"é 'caa"nū" dii?

²¹Jesús ní n'guēcútá"nā yā ní nga"nā yā ngii yā 'ii"yā": Díf" 'áámá ntii"nyu" ní nducyaaca ndís'tií nge"e yiinu nī. ²²Cuaacu chí Moisés mii" tee sa ley ye"e circuncisión ndís'tií. (Nguéé chíf" ye"ē Moisés mii" chí ye"ē chiidā nī.) Ní sábadó chí nguuví chí 'ii"yā" Israel ntaavi'tuunúú" yā, ndís'tií idií" nī circuncidar sa"ā 'líf". ²³Ndúuti chí cuaá" nī chí díf" yā circuncidar sa"ā 'líf" nguuví sábadó caati ley ye"ē Moisés canée chí díf" nī cumplir, ¿de'ē induuvi táa" nī nduucú caati sábadó idií" chí nduūvā n'daacā ye"e 'áámá sa"ā? ²⁴Nguéé díf" nī juzgar tan'dúúcā chí nadacadíínuu" nī naati díf" nī juzgar chí cuaacu ndúúcū chí n'dái mii".

¿Áá sa"ā mii" chí Cristo?

²⁵Tuu'mí nga"nā n'duuví 'ii"yā" ye"e yāā" Jerusalén: ¿Áá nguéé 'ii"yā" 'cūú chí ne"e 'caa"nú" yā?

²⁶N'diichí nī. Jesús nguéé 'va'á yā nga"nā yā nanáá" nducyáácā 'ii"yā". Ní nguéé du'ū vεε 'ii"yā" nga"nā yā ngii yā yā. ¿Áá cuaacu ní"nyú" chí 'ii"yā" n'geete chí nga"ā ntii"nyú" yā ní déenú yā chí 'ii"yā" 'cūú chí cuaacu ní"nyú" chí Cristo? ²⁷'ii"yā"

'cúu deenu yú tíí ndiicá yā naati taachi ndiicá Cristo mií", mar 'áámá 'ii"yā" nguée deenú yā tíí ndiicá yā.

²⁸Tuu'mi ní nga"n a yuudu Jesús taachí ch'i'cuee" yā na yáacu templo ní nga"n a yā: Ndís'tií, ní 'āā n'diichí nī 'úú. Ní 'āā deenú nī tií yāā" ye"é. Níicú 'úú ní nguée cuchií ye"é maá", naati 'ii"yā" chi dichó'o yā 'úú ní cuaacú yā. Ndís'tií nguée n'diichí nī 'ii"yā" mií". ²⁹Naati 'úú ní n'diichí 'ii"yā" mií" caati 'úú ndiicá ye"é yā, ní 'ii"yā" mií" dichó'o yā 'úú.

³⁰Tuu'mi ní idii" núu" yiinu 'ii"yā" chi cuta'á yā Jesús naati mar 'áámá 'ii"yā" nguée che'ē ta'á yā Jesús, caati 'āā cuée ndaa hora ye"é yā. ³¹Níicú 'yaa" n'dáí 'ii"yā" ye"e 'ii"yā" chi snée mií" chi'téenu yā Jesús. Ní nga"n a yā ngii yā 'ii"yā" s'ee": Taachi ndaá Cristo mií", 'áá nguée cuuvi dií" yā más cā señales chi dií" sá"n a 'cūū?

Sa"ā fariseos dicho'ó yā policías chi sta'á yā Jesús

³²Tuu'mi ní sa"ā fariseos ch'iindivee" sa ye"e 'ii"yā" chi neenē n'dee nga"n a yā 'túúcā ye"é Jesús mií". Chiiduú n'gēetē ndúúcū sa"ā fariseos dicho'ó yā policías chi cuta'a sa Jesús. ³³Tuu'mi ní Jesús nga"n a yā ngii yā sa"ā s'ee": 'Āā ntēe 'nāá" cuneé ndúúcū ndis'tíí ní na"á n'diichí 'ii"yā" chi dichó'o yā 'úú. ³⁴In'nuú" nī 'úú ní 'āā ntéē ndaacá nī 'úú. Ní naachi 'úú caneé, ndís'tií ní nguée cuuvi ndaa nī.

³⁵Tuu'mi ní nga"n a 'ii"yā" Israel nguaa" maá" yā: 'Tíí cá"ā 'ii"yā" 'cúu chi nguée nindaaca yú 'ii"yā"? 'Áá ca"á yā n'diichi 'ii"yā" Israel chi cue"é yā 'muu" cue"é yā mií"yā

nguaa" 'ii"yā" chi nguée ye"e ndaata Israel ní ca'cueé" yā 'ii"yā" mií"? ³⁶¿De'ē chi ntúu" nga"ā Jesús: In'nuú" nī 'úú ní nguée nindaaca nī 'úú; ní naachi 'úú caneé, nguée cuuvi cundaā ndís'tií?

Yíicú ye"e nuū"nī" chi canduuchi

³⁷Ngúuví chí ch'iinū 'viicu ch'ēete mií", Jesús cheendii yā ca"ā diitú yā: Du'u chí yaaca chií nanaá" ní 'úú ca'á chi cu'u yā. ³⁸Du'ū chi i'teenu 'uú, véé vida ye"é yā. Ní vida canée tan'dúúcā 'áámá yíicú nuū"nī" chi ca'a vida cue"e daā"ma" 'ii"yā" mií". Chuū canee nguū" na libro ye"e Dendyuūs.

³⁹Ní chuū nga"á yā ye"ē Espíritu N'dai ye"e Ndyuūs. 'Ii"yā" chi cu'téenu yā Jesús canée chi cuta'á yā Espíritu N'dai ye"e Ndyuūs. Ní Dendyuūs nguée ca'a yā Espíritu N'dai ye"e yā ti Jesús mií" ní 'āā cuée che"é yā na va'ai chēeti nguuvi.

Vée división nguaa" 'ii"yā"

⁴⁰Tuu'mí ní neenē 'yaa" 'ii"yā" taachí ch'iindivee" yā chuū nga"n a yā: Cuaacu ní"nyú" 'ii"yā" 'cúu chi profeta.

⁴¹Ta n'duuví yā nga"n a yā: 'Ii"yā" 'cúu chi Cristo. Naati n'duuví yā nga"n a yā: 'Áá ye"ē yá"āa Galilea chí cánée chí ndaa Cristo? ⁴²'Áá nguée nga"ā naachi canée nguū" na libro ye"e Ndyuūs chi Cristo ní cuchií yā ye"ē ndaata ye"ē rey David, ní ye"ē yāá" 'lín" Belén, yāá" chi chiica David mií"?

⁴³Tuu'mí neene vēe división nguaa" 'ii"yā" cucáávā Jesús mií". ⁴⁴N'duuvi 'ii"yā" ne"e yā cuta'á

yā Jesús naati mar 'áámá saⁿā miiⁿ
nguéeⁿ tuuⁿvi sa 'iiⁿyāⁿ.

**Mar 'áámá saⁿā ndii tiitiⁿ
nguéeⁿ i'téenu sa Jesús miiⁿ**

⁴⁵Policías ndaa sa nanááⁿ chiiduú
n'geeté ndúúcu saⁿa fariseos. Ní
'iiⁿyāⁿ s'eeⁿ ní ngaⁿa yā ngii yā
policías: ¿Deⁿē cuuvi chi nguéeⁿ
candéé nī saⁿā?

⁴⁶Policías n'guēcutáⁿa yā 'iiⁿyāⁿ:
Mar 'áámá saⁿā nguéeⁿ ngaⁿa sa
tan'dúúca chi ngaⁿā 'iiⁿyāⁿ 'cūú.

⁴⁷Tuuⁿmí saⁿā fariseos n'guēcutaⁿa
sa policías: ¿Áá nginncheⁿéi yā ntúúⁿ
ndisⁿtií? ⁴⁸¿Áá i'teenu n'duuví 'iiⁿyāⁿ
chi caⁿā ntiⁿnyuⁿ yā o saⁿā fariseos
nduudu Jesús miiⁿ? ⁴⁹'iiⁿyāⁿ chí
nguéeⁿ déenu yā chi cánéeⁿ nguūⁿ na
ley, āā condenado 'iiⁿyāⁿ.

⁵⁰Sáⁿā miiⁿ nguuvi Nicodemo
chi 'āā ndaa nanááⁿ Jesús n'gaaⁿ,
saⁿā miiⁿ canée sa ndúúcu yā.
Tuuⁿmí ngaⁿa Nicodemo ngii sa
'iiⁿyāⁿ: ⁵¹¿Áá ley yeⁿē yú cuuvi
caaⁿmaⁿ nuuⁿndi yeⁿē 'iiⁿyāⁿ,
ndúúti chi nguéeⁿ n'diichi di 'iiⁿyāⁿ,
ní 'caandiveeⁿ dí yeⁿē 'iiⁿyāⁿ ní
túúmícadíínuuⁿ di chi dííⁿ yā?

⁵²Nan'guēcutáⁿa yā ní ngaⁿa
yā ngii yā saⁿā: ¿Áá 'iiⁿyāⁿ yeⁿē
yáⁿāa Galilea ntúúⁿ dii? In'núúⁿ dí
nífúcu n'diichi di chi canéeⁿ nguūⁿ na
libro yeⁿē Ndyuús caati yeⁿē yáⁿāa
Galilea mar 'áámá vmnéⁿēe nguéeⁿ
can'dáá 'áámá profeta.

⁵³Ní cunaⁿa nducyaacá yā na
vaacu yā.

**'Áámá n'daataá chí cueⁿe
tá ndúúcu saⁿā**

8 Jesús miiⁿ ní cueⁿe yā cuééti
chí nguuvi Olivos. ²Tyaaⁿ

tyaaⁿ chí dēeve táámá nguuvi ndáa
ntúúⁿ yā yaācū templo. Nuⁿmáⁿ
yáāⁿ 'iiⁿyāⁿ ndaa yā nanáaⁿ yā.
Ch'iindí yā ní ca'cueéⁿ yā 'iiⁿyāⁿ
s'eeⁿ. ³Tuuⁿmí ní ndaa n'duuví
saⁿā chí ngi'cueeⁿ ley ndúúcu
n'duuví saⁿā fariseos. N'dée sa
nanááⁿ Jesús 'áámá n'daataá chí
cyaadu tá ndúúcu 'aama saⁿā chí
'āā 'niinivaacu. Nífcú chí canee sa
chí nuuⁿ sa táⁿā náávtaⁿā yeⁿē
'iiⁿyāⁿ s'eeⁿ. ⁴Ngaⁿa saⁿā s'eeⁿ:
Maestro, n'daataá 'cūú ní tunéeⁿ nū
táⁿā ndúúcu táámá saⁿā. ⁵Naachi
cánéeⁿ guuⁿ ley yeⁿē Moisés miiⁿ ní
ngaⁿā chí cuíftuúⁿ nū n'daataá chí
'tíicā. N'dií túúⁿmí, ¿deⁿē ngaⁿa n'dií?

⁶Chuū ngaⁿā saⁿā s'eeⁿ chí neⁿe
sá n'diichi sa táácā diiⁿ Jesús 'iicu
tun'dáa nuuⁿndi sa yeⁿē yā. Jesús
ní can'dií yā ní dingúuⁿ yā na yáⁿāa
miiⁿ ndúúcu nduutitaⁿā yā. Dííⁿ yā
tan'dúúca chí nguéeⁿ ch'iindiveeⁿ
yā yeⁿē 'iiⁿyāⁿ miiⁿ. ⁷Taachí
nitiinguunéeⁿ ntuūⁿ sáⁿā 'iiⁿyāⁿ,
tuuⁿmí nanguaacundii yā ní ngaⁿa
yā ngii yā: Du'ū ndísⁿtií chí nguéeⁿ
nuuⁿndi yeⁿē ní, cutaⁿā ní vmnáaⁿ
vmnaaⁿ 'áámá túúu ní caⁿā ní táⁿā.

⁸Can'díí ntuuⁿ yā ní dingúuⁿ ntúuⁿ
yā ná yáⁿāa. ⁹'iiⁿyāⁿ chí ch'iindiveeⁿ
yā chuu tuumicádíínuuⁿ yā chí véé
nuuⁿndi yeⁿē yā. Ní ca'áámá ca'áámá
inan'daa yā, 'iiⁿyāⁿ ndiicúú 'āā ndíí
ná ch'iinuu maaⁿ. Nan'daa nducyáácá
yā. Ní 'aa dámaāⁿ Jesús canee yā
ndúúcu táⁿā chí canéeⁿ naavtaⁿā.
¹⁰Nacueeⁿ Jesús ní n'diichí yā 'āā ntéé
du'ū véé ti 'āā dámaāⁿ n'daataá miiⁿ.
Ní ngaⁿa yā ngii yā táⁿā: Dii n'daataá,
¿tíí canéeⁿ 'iiⁿyāⁿ chí tun'dáa nuuⁿndi
yā yeⁿē di? ¿Áá ndii 'áámá 'iiⁿyāⁿ
nguee ngaⁿa yā nuuⁿndi yeⁿē di?

¹¹N'daata mííⁿ ní ngaⁿá tá: Señor, mar 'áámá 'iíⁿyāⁿ. Tuuⁿmi ní Jesús ngaⁿá yā ngii yā táⁿá: 'Úú nguée caaⁿmáⁿ nuuⁿndí yeⁿé di. Cunaⁿá di ní 'āā ntée diiⁿ nuuⁿndí di.

Jesús chí dēve íⁿyeēⁿdí

¹²Cuayíivi Jesús ní ngaⁿá ntúuⁿ yā ngii yā 'iíⁿyāⁿ: 'Úú tan'dúúca dēve yeⁿe íⁿyeeⁿdí cūū, 'tíicā 'úú. Du'u chí can'daā 'úú nguée caⁿa yā na maafⁿ caati cunée yā ndúúcu chí dēve yeⁿé vida.

¹³Tuuⁿmi ní ngaⁿá saⁿá fariseos ngii sa Jesús: Dii ní yeⁿé maaⁿ di nduudu cuaacu chí ngaⁿá di. Nduudu chí ngaⁿá di nguée nduudu cuaacu.

¹⁴Nan'guēcútaⁿá Jesús ngaⁿa yā ngii yā saⁿá: 'Úú ní ngaⁿá nduudu cuaacu yeⁿé maáⁿ. Nduudu chí ngaⁿá ní nduudu cuaacu miiⁿ. Deenú tíí ndiicá ní tii caⁿá. Naati ndís'tií nguée déenu ní tíí ndiicá ní nguée déenu ní tii caⁿá. ¹⁵Ndís'tií ní ngaⁿa ní nuuⁿndi yeⁿe 'iíⁿyāⁿ dacaā 'iíⁿyāⁿ. Naati 'úú nguée ngaⁿá nuuⁿndi yeⁿé mar 'áámá 'iíⁿyāⁿ. ¹⁶Ndúúti chí 'úú ngaⁿá nuuⁿndi yeⁿe 'iíⁿyāⁿ, nduudu yeⁿé ní nduudu cuaacu chí, caati 'úú ní nguē damaāāⁿ ti 'úú ní ndúúcu Chiidá chí dich'ó yā 'úú. ¹⁷Caati naachi canée nguūⁿ na ley yeⁿé ní naachi ngaⁿá na 'uuvi 'iíⁿyāⁿ, chíi chí nduudu cuaacu. ¹⁸'Úú chí ngaⁿá nduudu cuaacu yeⁿé maaⁿ. Ní Chiidá chí dich'ó yā 'úú ngaⁿá yā nduudu cuaacu yeⁿé.

¹⁹Tuuⁿmí ngaⁿá sáⁿá s'eeⁿ ngii sa Jesús: ¿Tíí canée Chiida di? Nan'guēcútaⁿá Jesús: Nduuti chí nguée 'āā n'diichi ní 'úú, ndíí nguée

ndúú 'āā n'diichi ní Chiidá. Ndúúti chí 'āā n'diichi ní 'úú, 'tíicā ntúūⁿ 'āā n'diichi ní Chiidá.

²⁰Ndúúdu cūū ngaⁿá Jesús taachi canée yā naachi snūūⁿ cajas yeⁿe ofrendas. Tuuⁿmi ní taachí ngí'cueéⁿ yā cheeti yáácū templo mar 'áámá 'iíⁿyāⁿ inátuuⁿvi yā Jesús caati 'āā 'cuée cunuūⁿ ca'a hora yeⁿé yā.

Naachi 'úú caⁿá ndís'tií ní nguée cuuvi ndaá ní

²¹Jesús ngaⁿa ntúuⁿ yā ngii yā saⁿá: 'Úú ní caⁿá ní ndís'tií in'nuúⁿ ní 'úú. Ná nuuⁿndi yeⁿé ní cūūvi ní. Naachi 'úú caⁿá ndís'tií ní nguée cuuvi ndaá ní.

²²Tuuⁿmi saⁿá Israel s'eeⁿ ngaⁿa sa: ¿Áá 'caaⁿnuⁿ maáⁿ yā 'iíⁿyāⁿ caati ngaⁿa yā: Naachi 'úú caⁿá, ndís'tií nguée cuuvi ndaá ní?

²³Tuuⁿmi ní Jesús ngaⁿa yā ngii yā saⁿá: Ndís'tií ní yeⁿé cuaaⁿ ndiyyā ndís'tií niicu 'úú ní yeⁿé cuaaⁿ 'niiⁿnuⁿ 'úú. Ndís'tií ní yeⁿe íⁿyeeⁿdí cūū ndís'tií naati 'úú ní nguée yeⁿé íⁿyeeⁿdí cūū 'úú. ²⁴Caavā chúū chí ngaⁿá ngí ndís'tií chí 'cuūvi ní na nuuⁿndi yeⁿe ní. Ndúúti chí nguée cu'téenu ní chí 'úú chí Cristo miiⁿ tuuⁿmi ní na nuuⁿndi yeⁿé ní ní 'cuūvi ní.

²⁵Ní ngaⁿa sa ngii sa 'iíⁿyāⁿ: ¿Díí du'ū dii? Tuuⁿmi ní Jesús ngaⁿa yā ngí yā saⁿá: Tan'dúúca nūūⁿ chí ngaⁿá ndii cuaaⁿ vmnaaⁿ, 'tíicā 'úú. ²⁶Nééné n'deē dendú'ū chí canée chí caāⁿmáⁿ ndúúcu ndis'tií ní dííⁿ juzgar ndis'tií. 'iíⁿyāⁿ chí dich'ó yā 'úú, 'iíⁿyāⁿ mííⁿ chí cuaacu yā. Chííⁿ chí ngiindiveéⁿ yeⁿe yā, chíiⁿ ngaⁿá na íⁿyeeⁿdí cūū.

²⁷'iíⁿyāⁿ s'eeⁿ nguée tuumicádíínuuⁿ yā chí 'iíⁿyāⁿ

miiⁿ ní ngaⁿá yā yeⁿē Chiidá yā.

²⁸Tuu'mí ngaⁿā Jesús ngii yā saⁿā: Taachí nadacuéⁿ nī Saⁿā chi Daiya Dendyuūs, tuu'mi ní cuuvi déenu nī chi 'úú. Nguéé du'ū vee chi díⁿ chi yeⁿē maáⁿ naati Chiidá ch'i'cueé yā 'úú. Ní chíⁿ chí ngaⁿá. ²⁹Ní 'iiⁿyāⁿ chi dichó'o yā 'úú canée yā nduucú. Chiidá ní nguéé ch'i'neeⁿ yā 'úú dámaáⁿ. Naati 'úú ní díⁿ tanducuéⁿē chi neⁿe yā.

³⁰Taachí ngaⁿá Jesús chuū néené 'yaaⁿ 'iiⁿyāⁿ ch'i'téenu yā yeⁿé yā.

Nduūdū Cuaacu chi nanguaⁿai 'iiⁿyāⁿ

³¹Tuu'mí ngaⁿā Jesús ngii yā saⁿā Israel seⁿe chi i'téenu sa 'yā: Ndúúti chi ndís'tiī cunée nī ndúúcū nduudu yeⁿé tuu'mi ní cuaacu chí ndis'tiī discípuulos yeⁿé. ³²Ní n'diichí nī nduudu cuaacu. Ní caavā nduudu cuaacú miiⁿ ndís'tiī nanguáⁿai nī.

³³Nan'guēecútaⁿā saⁿā yeⁿé yā: Nús'uu ní ndaata yeⁿē Abraham. Nífcú mar 'áámá 'iiⁿyāⁿ nguéé dichiiⁿve nū. ¿Táácā chí ngaⁿa di chi ndís'tiī ní canee chí nanguáⁿai nī?

³⁴Jesús ní nan'guēecutáⁿa yā yeⁿē sa: Cuaacu níⁿnyúⁿ, cuāācū niiⁿnyuⁿ ngaⁿá ngí ndís'tiī chi nducyáácá 'iiⁿyāⁿ chi díⁿ yā nuuⁿndi, 'iiⁿyāⁿ s'tí dichíⁿve yā yeⁿē nuuⁿndi. ³⁵'Iiⁿyāⁿ chi díⁿ mandado yeⁿē 'iiví yā nguéé 'áámá ineéⁿ yā ndúúcū familia yeⁿe 'iiví yā naati daiya 'iiví miiⁿ ní 'áámá cuneéⁿ yā. ³⁶Ndúúti chi Daiyá yā nadinguáⁿai yā, cuaacu níⁿnyúⁿ chí ndís'tiī ní nínguaⁿai nī. ³⁷'Úú deenú chi ndís'tiī chi ndaata yeⁿé Abraham. Naati dinúúⁿ yiinu nī chí neⁿe 'caaⁿnúⁿ nī 'úú, caati nduudu

yeⁿé nguéé ngii neé ndúúcū ndis'tiī.

³⁸Chiⁿ chi n'diichí ndúúcū Chiidá, chiⁿ chi 'úú ngaⁿá. Ndís'tiī ní díⁿ nī chi n'diichí nī chiidá nī.

**Ndís'tiī yeⁿē yááⁿ'n'guinūuⁿ
chi chiidá nī**

³⁹'Iiⁿyāⁿ s'eeⁿ nan'guēecutáⁿa yā yeⁿé yā ní ngaⁿá yā: Chiidá 'nū Abraham. Ngaⁿa Jesús ngí yā saⁿā: Nduuti chi daiya Abraham ndís'tiī tuu'mi ní ntiiⁿnyuⁿ yeⁿē sa idíⁿ nī.

⁴⁰Naati maaⁿ ní idinúuⁿ yiinu nī chi 'caaⁿnuⁿ nī 'úú, caati 'úú saⁿā chi ngaⁿa nduudu cuaacu chi ch'iindiveéⁿ yeⁿē Dendyuūs. Abraham nguéé díⁿ sa chuū.

⁴¹Ndís'tiī ní díⁿ nī ntiiⁿnyuⁿ yeⁿē chiidá nī. Tuu'mi ní ngaⁿa sa ngii sa Jesús: Nús'uū nguéé ch'iindiyáaⁿ 'nū yeⁿē daiya sa saⁿā cyúúni. Canée 'áámá chiidá 'nū chi Dendyuūs miiⁿ.

⁴²Tuu'mi ní ngaⁿa Jesús ngii yā saⁿā s'eeⁿ: Ndúúti chi chiidá nī chi Dendyuūs miiⁿ cuaacu níⁿnyúⁿ chi dinéⁿe nī 'úú, caati 'úú ní yeⁿé Dendyuūs chiicá ní ndaá. Ní nguéé ndaá yeⁿé maáⁿ ti Ndyuūs maáⁿ yā dichó'o yā 'úú. ⁴³¿De'e cuuvi chi nguē n'gúuⁿ nī nduudu yeⁿé? Ti nguē n'giindiveéⁿ nī nduudu yeⁿé. ⁴⁴Ndís'tiī ní yááⁿ'n'guinūuⁿ chiidá nī. Ndís'tiī ní neⁿé nī díⁿ nī tanducuéⁿē chi neⁿē chiida nī. Yááⁿ'n'guinūuⁿ chí n'giiⁿnūⁿ 'āā canée núuⁿ yā ndíⁿ naachi ngaⁿā. Nguéé 'áámá canée yā na nduudu cuaacu ti nguéé nduudu cuaacu nduucú yā. Taachí yááⁿ'n'guinuuⁿ ngaⁿā sa nduudu yaadi yeⁿē maaⁿ sa ngaⁿa sa ti saⁿā yeⁿē nduudu yaadi ní chiida nduudu yaadi sáⁿā. ⁴⁵Naati 'úú ní ngaⁿá nduudu

cuaacu ní nguée i'téenu nī ye"ⁿé.
⁴⁶¿Du'ú ye"ⁿé ndís'tiī nga"ⁿa chi
 idi"ⁿ nuu"ⁿndi? Ní nduutī chi 'úú ní
 nga"ⁿá nduudu cuaacu, ¿de'ē chi
 nguée i'téenu nī 'úú? ⁴⁷Du'u chí
 ye"ⁿé Dendyuūs mii"ⁿ nduudu ye"ⁿé
 Dendyuūs n'giindivee"ⁿ yā. Chi"ⁿ chí
 ndís'tiī ní nguée n'giindivee"ⁿ nī ti
 nguée ye"ⁿé Dendyuūs ndís'tiī.

**Jesús canée yā vmnáa"ⁿ
 vmnaa"ⁿ chi i"ⁿye'e"ⁿdi**

⁴⁸Tuu'mi ní nan'gueecúta"ⁿā sa"ⁿa
 Israel s'ee"ⁿ ní nga"ⁿa sa ngii sa Jesús:
 ¿Áá nguée cuaacu nga"ⁿā nús'uū chi
 samaritano dii, ní cánée dí ndúúcū
 yáá"ⁿnguiniūu?"

⁴⁹Nan'gueecúta"ⁿā Jesús: 'Úú nguée
 cánée ndúúcū yáá"ⁿnguiniūu". 'Úú
 díi"ⁿ honrar Chiidá. Ndís'tiī nguée
 i'téenu nī 'úú. ⁵⁰'Úú ní nguée in'nuú"ⁿ
 honra ye"ⁿé maa"ⁿ. Véé 'ii"ⁿyā"ⁿ chi
 in'nuú"ⁿ yā honra ye"ⁿé ní díi"ⁿ yā
 juzgar 'ii"ⁿyā"ⁿ. ⁵¹Cuaacu níi"ⁿnyú"ⁿ,
 cuāācū nii"ⁿnyu"ⁿ nga"ⁿá ngii ndís'tiī:
 Du'u chí n'giindivee"ⁿ nduudu
 ye"ⁿé nguée n'diichí yā vaadi n'gii
 taanduvée nguuví.

⁵²Tuu'mi ní sa"ⁿa Israel s'ee"ⁿ
 nga"ⁿā sa ngii sa Jesús: Maa"ⁿ ní
 tuumicádífnuu"ⁿ nū ye"ⁿé di. Canee
 di ndúúcū yáá"ⁿnguiniūu". Abraham
 mii"ⁿ ní ch'iī ndúúcū profetas 'iicu
 díi ní nga"ⁿā di: Du'u chi n'giindivee"ⁿ
 nduudu ye"ⁿé nguée n'diichínee"ⁿ
 yā vaadi n'gii taanduvée nguuví.
⁵³¿Áá vmnaa"ⁿ ntuū"ⁿ ca dii ye"ⁿé
 chiida yú Abraham chi ch'iī yā ní
 ye"ⁿe profetas chí ch'iī yā? ¿Du'ū
 nadacádiinu"ⁿ di chi máa"ⁿ di?

⁵⁴Nan'gueecúta"ⁿā Jesús: Ndúúti
 chí 'úú díi"ⁿ honrar maa"ⁿ tuu'mi
 ní honra ye"ⁿé ní nguée de'ē vee.

Chiidá míi"ⁿ chí idi"ⁿ yā honrar 'úú.
 Ní ye"ⁿe chiidá chí nga"ⁿā ndís'tiī
 chí Dendyuūs ye"ⁿé nī. ⁵⁵Ní nguée
 'āā n'diichí nī 'ii"ⁿyā"ⁿ naati 'úú
 'āā nin'diichí 'ii"ⁿyā"ⁿ. Ndúúti chí
 nga"ⁿá chí nguée nin'diichí 'ii"ⁿyā"ⁿ
 tan'dúúcā chí yaadi ndís'tiī, 'tífcā
 ntúú"ⁿ 'úú. Caati 'āā n'diichí 'ii"ⁿyā"ⁿ
 ní n'giindivee"ⁿ nduudu ye"ⁿé yā.
⁵⁶Chiidá nī Abraham yéénú taavi sa
 chí 'āā n'diichí sa nguuví ye"ⁿé. Ní
 'āā n'diichí sa. Ní yéénú taavi sa.

⁵⁷Tuu'mi ní nga"ⁿa 'ii"ⁿyā"ⁿ Israel
 s'ee"ⁿ: ¿Áá 'āā cuée cuuvi 'uuví
 ngeecu ndiichi nduūyū ní 'āā
 n'diichi di Abraham?

⁵⁸Ní nga"ⁿa Jesús ngii yā sa"ⁿa:
 Cuaacu níi"ⁿnyú"ⁿ, cuāācū nii"ⁿnyu"ⁿ
 nga"ⁿá ngii ndís'tiī chí 'úú vmnáa"ⁿ
 vmnaa"ⁿ chí Abraham.

⁵⁹Tuu'mi ní sa"ⁿā s'ee"ⁿ sta'á sa
 tuūu chí ca'á sa Jesús, naati Jesús
 ní canúú"ⁿ n'de'ei yā ní nan'dáa yā
 cheeti yāacū templo ní cho'ó yā
 náavta"ⁿá yā 'íi"ⁿyā"ⁿ s'ee"ⁿ. Ní cuna"ⁿá
 yā.

**Jesús ca'á yā vista ye"ⁿe 'áámá
 sá"ⁿā chí ngueenáa"ⁿ ndii
 taachi chí ch'iindiyāa"ⁿ sa**

9 Nífcú taachi cho'ōo Jesús ní
 n'diichí yā 'áámá sa"ⁿā chí
 nguee nduutináa"ⁿ sa ndíi taachí
 ch'iindiyāa"ⁿ sa. ²Nífcú discípulos
 ye"ⁿé yā ntiinguunee"ⁿ yā Jesús
 ní nga"ⁿa yā ngii yā 'ii"ⁿyā"ⁿ: N'dii
 Maestro, ¿du'u dínuū"ⁿndi? ¿Áá
 chiida sa ndúúcū cheecu sa vee
 nuu"ⁿndi ye"ⁿé yā? ¿Áá maa"ⁿ sa 'tífcā
 sa chí nguee nduutináa"ⁿ sa taachí
 ch'iindiyāa"ⁿ sa?

³Nan'gueecúta"ⁿā Jesús ní nguée
 ndúú sá"ⁿa cūu ní nguée chiida sa

ndúúcū chæecu sa vee nuuⁿndí yeⁿé
yā chi ngueēe nduutináaⁿ sa. 'Tíicā
saⁿā ní 'cuuⁿ'míⁿ chi diiⁿ Déndyuūs
miiⁿ nduucú yā. ⁴Cánée chí díiⁿ
ntiiⁿnyuⁿ chi idiiⁿ 'iiⁿ'yāⁿ chi dichó'ó
yā 'úú neⁿe chi véé nguuví. Ndaá
chi cuuvi 'da'a taachi mar 'áámá
'iiⁿ'yāⁿ ní nguée díiⁿ yā ntiiⁿnyuⁿ.
⁵Nuuma neⁿe chí cuneé iⁿ'yeēⁿdi
'úú chi cuneé tan'dúúcā dæeve yeⁿé
iⁿ'yeēⁿdi 'úú.

⁶Taachí níngaⁿa yā chuū chiidaiⁿ
yā na yáⁿāa níicú in'dái yā incheetí
ndúúcū nuuⁿniⁿ daíⁿ yā. Níicú
s'néeⁿ yā ncheetí nduutináaⁿ saⁿā
ngueenáaⁿ. ⁷Ní ngaⁿa yā: Cúnaⁿā
dí. Nááⁿnú dí nduutináaⁿ di na
cheendi yííve yeⁿé Siloé. (Nduudu
miiⁿ neⁿe caaⁿ'maⁿ Dich'ó' Yā.)
Tuuⁿ'mi ní cunaⁿā sa ní naāⁿnu sa ní
ngueecundí sa 'āā inaaⁿ sa. ⁸Tuuⁿ'mi
ní 'iiⁿ'yāⁿ na nííⁿnúⁿ va'ai yeⁿé sa
ndúúcū 'iiⁿ'yāⁿ chi 'āā ndíí vmnaaⁿ
n'diichí yā saⁿā chi ngueenáaⁿ ní
ngaⁿa yā: ¿Áá nguée sáⁿa 'cūū
n'giindí ngiica limosna?

⁹N'duuví yā ngaⁿa yā: Sáⁿa
'cūū. Ta n'duuví yā ní ngaⁿa yā:
Tan'dúúcā saⁿā miiⁿ, 'tíicā saⁿā.
Saⁿā miiⁿ ngaⁿa sa: 'Úú.

¹⁰Ngaⁿa yā ngii yā saⁿā: ¿Taaca
nínguuaⁿ nduutináaⁿ di?

¹¹N'gueecútaⁿā sa ní ngaⁿā sa:
Saⁿā chi nguuví Jesús miiⁿ din'dái
sa ncheetí ní chí'neeⁿ sa nduutinaáⁿ.
Ní ngaⁿā sa ngii sa 'úú: Cueⁿe di
cheendi yiive nuūⁿnīⁿ yeⁿé Siloé.
Naaⁿnu di nduutináaⁿ di. Níicú
cheⁿé, ní naāⁿnu nduutinaáⁿ, ní 'āā
inaáⁿ.

¹²Tuuⁿ'mi ní ngaⁿa yā ngii yā saⁿā:
¿Tii canée saⁿā miiⁿ? Tuuⁿ'mí ngaⁿā
sa: Nguée deenú.

**Fariseos itiinguunéeⁿ yā saⁿā
ngueenaaⁿ chí 'āā nduuva yeⁿé sa**

¹³Tuuⁿ'mi ní candée yā saⁿā chí
ngueenaáⁿ ndíí cuaaⁿ vmnaaⁿ
nanáaⁿ saⁿā fariseos. ¹⁴Ní sábadó
miiⁿ nguuví chí ntaavi'túúnuuⁿ
'iiⁿ'yāⁿ Israel chí Jesús idin'dái
yā ncheetí mííⁿ. Ní nin'guaaⁿ
yā nduutinaaⁿ sa. ¹⁵Tuuⁿ'mi ní
ntiinguuneeⁿ ntúuⁿ yā fariseos:
¿Táácā 'āā inaaⁿ di? Tuuⁿ'mi ní ngaⁿā
sa: S'néeⁿ yā ncheetí na nduutinaáⁿ,
níicú naāⁿnú. Maaⁿ ní inaáⁿ.

¹⁶Tuuⁿ'mi ní 'áámá saⁿā fariseo
ngaⁿa sa: Sáⁿa 'cūū ní nguée yeⁿé
Dendyuūs saⁿā caati nguée diiⁿ sa
nguuví sábadó tan'dúúcā chí ngaⁿa
ley yeⁿe yú. Ta n'duuví sa ngaⁿa sa:
¿Táácā saⁿā chí véé nuuⁿndi yeⁿé
sa diiⁿ sa señales chí 'tuucā? 'Uuvi
nuúⁿ díiⁿ sa vaanicadínuuⁿ yeⁿé
sa. ¹⁷Ngueecundí ntúuⁿ sa ní ngaⁿa
sa ngii sa saⁿā chí ngueenáaⁿ sa:
Díí, ¿de'é ngaⁿa di yeⁿé saⁿa chí
nan'guaaⁿ nduutináaⁿ di? Saⁿā miiⁿ
ngaⁿā sa: 'Iiⁿ'yāⁿ miiⁿ profeta.

¹⁸Saⁿa Israel s'eeⁿ nguée i'téenu
sa yeⁿe saⁿā chí chingueenáaⁿ sa
ní inaaⁿ sa ndíí 'cai yā chiida sa
ndúúcū chæecu sa yeⁿé sáⁿā chí 'āā
inaaⁿ sa. ¹⁹Ní ntiinguunéeⁿ saⁿā
s'eeⁿ 'iiⁿ'yāⁿ, ní ngaⁿā sa: ¿Áá sáⁿa
'cūū daiyá nī, saⁿā chí ngaⁿā ndíí'ti
chí ch'iindiyáaⁿ sa 'āā ngueenáaⁿ sa?
¿Táácā chí maaⁿ inaaⁿ sa?

²⁰Nan'gueecutáⁿa yā chiida sa
ndúúcū chæecu sa ní ngaⁿa yā
'iiⁿ'yāⁿ: Déenu 'nū daiya 'nū saⁿā
'cūū 'āā ngueeé nduutináaⁿ sa taachi
ch'iindiyáaⁿ sa. ²¹Maaⁿ ní inaaⁿ sa.
Nguée déenu 'nū táácā inaaⁿ sa.
Du'ú yā chí nin'guaaⁿ yā nduutináaⁿ

sa nús'uu nguée déenu 'nū. Saⁿā tii 'āā 'naaⁿ sa, ntiingúúneeⁿ nī saⁿā. Saⁿā tii caaⁿmaⁿ sa yeⁿē maaⁿ sa.

²²Chuū chi nan'guēcutáⁿa sa chiida sa ndúúcu chēecu sa, caati 'va'á yā 'iiⁿyāⁿ Israel s'eeⁿ. Caati 'iiⁿyāⁿ Israel s'eeⁿ 'āā indeē sa chi du'ū chi caaⁿmaⁿ chi Mesías chí Cristo miiⁿ chuū ní tun'daa yā chēeti yaācū. ²³Chii chi 'tíicā caⁿā chiida sa ndúúcu chēecu sa: Sáⁿā 'caa 'āā 'nāaⁿ sa. Ntíingúúneeⁿ nī saⁿā.

²⁴Tíicā ní 'caī ntúuⁿ yā saⁿā chí ngueenááⁿ níicú ngaⁿa yā ngii yā saⁿā: Dii, ní ca'a di honra Dendyuūs. Nús'uu deenu 'nū chí sáⁿa 'cūū véé nuuⁿndi yeⁿē sa.

²⁵Tuu'mi ní nan'guēcutáⁿa sa ní caⁿā sa: Ndúúti chi nuuⁿndi yā o nguée nuuⁿndi yā nguée deenú. 'Áámá chi deenú chi ngueeé nduutinaáⁿ ní maaⁿ ní ināaⁿ.

²⁶Ní ngaⁿā ntúuⁿ yā ngii yā saⁿā: ¿Dé'ē dííⁿ yā ndúúcu dii? ¿Táácā 'āā inaaⁿ di?

²⁷Nan'guēcutáⁿa sa yeⁿē yā: 'Āā ngaⁿā ngii ndís'tii ní nguée ch'iindiveéⁿ nī. ¿Dé'ē cúúví chi neⁿē ntúuⁿ nī 'caandiveéⁿ nī? ¿Áá neⁿē nī ntúuⁿ ndís'tii chi cuuvi discípulos yeⁿē yā ndís'tii?

²⁸Ní 'caa'vá yā ndúúcu sa ní caⁿa yā: Díí, chí discípulo yeⁿē yā dii, naati nús'uū discípulos yeⁿē Moisés nús'uu. ²⁹Nús'uu ní déenu 'nū chi Dendyuūs ní yaa'vi yā Moisés naati nguée déenu 'nū tíí ndiica sáⁿa 'cūū.

³⁰Nan'guēcutáⁿa saⁿā miiⁿ ní caⁿa sa: Chuū ní cuaacu ní cosa chi 'āā ngeⁿe yiinu yú caati ndís'tii nguée déenu nī tíí ndiicá yā ní nn'guaaⁿ yā nduutinaáⁿ. ³¹Ní

deenu yú chi Dendyuūs ní nguée n'giindiveé yā yeⁿe 'iiⁿyāⁿ nuuⁿndi. Du'ú 'iiⁿyāⁿ chi neⁿē Dendyuūs níicú idííⁿ yā chiiⁿ chi neⁿē Dendyuūs, tuu'mi ní Dendyuūs miiⁿ nn'giindiveéⁿ yā yeⁿē 'iiⁿyāⁿ 'cūū. ³²Ní taachi chi ngaⁿā iⁿ'yeeⁿdí 'cūū, nguée ch'iindiveeⁿ yú chi mar 'áámá 'iiⁿyāⁿ nn'guaaⁿ yā nduutinaáⁿ 'iiⁿyāⁿ chí ngueenááⁿ ndíí ch'iindiyáaⁿ yā. ³³Ndúúti chi 'iiⁿyāⁿ 'cūū chí nguée yeⁿē Dendyuūs 'iiⁿyāⁿ, tuu'mi ní nguée du'ū véé cuuvi dííⁿ yā.

³⁴Nan'guēcutáⁿa 'iiⁿyāⁿ s'eeⁿ ní caⁿa yā chii yā saⁿā: Dii ní na nuuⁿndi ch'iindiyáaⁿ di. ¿Áá dii ngi'cuéeⁿ dí nús'uū? Ní tun'daa yā saⁿa chēeti yaācū.

Ngueenááⁿ yeⁿē cosa chi yeⁿē Espíritu

³⁵Jesús ch'iindiveéⁿ yā chí 'āā tun'daa yā saⁿā chiva'āi yaacu templo. Taachi nindaaca yā saⁿā ní ngaⁿa yā ngii yā saⁿā: ¿Áá i'téenu dí Daiya Dendyuūs miiⁿ?

³⁶Tuu'mi ní nan'guēcutáⁿa sa ní caⁿa sa: Señor, ¿du'ū miiⁿ, ní 'tíicā cu'teenú?

³⁷Ní ngaⁿa Jesús ngii yā saⁿā: In'diichi dí 'iiⁿyāⁿ ní 'iiⁿyāⁿ miiⁿ ní 'iiⁿyāⁿ chí indeé yā ndúúcu di.

³⁸Tuu'mi ní ngaⁿā sa ngii sa Jesús: Señor, cu'teenú n'dií. Ní diiⁿ sa adorar yā.

³⁹Ní ngaⁿā Jesús: 'Úú nindaá iⁿ'yeeⁿdí 'cūū chí caaⁿmaⁿ nuuⁿndi yeⁿē 'iiⁿyāⁿ caati 'iiⁿyāⁿ chí nguée inaaⁿ yā ní naáⁿ yā. Ní 'iiⁿyāⁿ chí cuuvi inaaⁿ yā cuuvi ngueenáaⁿ yā.

⁴⁰N'duuví 'iiⁿyāⁿ fariseos chí canée yā ndúúcu yā ch'iindiveéⁿ yā chuū ní caⁿā yā Jesús: ¿Áá ngueeé ntúuⁿ nduutinaáⁿ 'nū tuu'mi?

⁴¹Tuu'mi ní ngaⁿa Jesús ngii yā saⁿā s'eeⁿ: Ndúúti ngeenáaⁿ ní nguéeⁿ nuuⁿndi yeⁿe nī. Naati maaⁿ ní ngaⁿa nī: Inaaⁿ 'nū. Chiⁿ chi nuuⁿndi yeⁿé nī 'áámá cunéeⁿ nūuⁿ.

**Cuenta yeⁿé 'iiⁿyāⁿ chi
véé 'iiti yeⁿe yā**

10 Cuaacu níⁿnyúⁿ cuāācū niⁿnyuⁿ ngaⁿá ngíí ndís'tiī: Du'u chi nguéeⁿ indāā cuaaⁿ cheendi chēēⁿ yeⁿé 'iiti cuūchī naati nge'é yā na chēēⁿ táámá lado, tuu'mi ní 'iiⁿyāⁿ 'cūū duucú yā ní diduucú yā. ²Du'ú 'iiⁿyāⁿ chi indāā yā cuaaⁿ cheendi chēēⁿ miⁿ, 'iiⁿyāⁿ miⁿ ineenaāⁿ yā 'iiti. ³Iiⁿyāⁿ ineenaāⁿ yā cheendi chēēⁿ ní inin'guaaⁿ yā cheendi chēēⁿ caavā 'iiⁿyāⁿ miⁿ ní 'iití cuūchī n'giindiveēⁿ tī nduudu yeⁿé yā. Ní n'gaí yā duuchi 'iiti cuūchī yeⁿé yā. Ní n'daá tī saⁿā. ⁴Taachi intuundāā yā tanducuéⁿé 'iiti yeⁿé yā cuaaⁿ dáámí cheēⁿ candéé tī vmnaaⁿ yeⁿé tī. Nífcú 'iiti cuūchī cueⁿé tī cuayiivi 'iiví tī. Caati 'caandiveēⁿ tī nduudu yeⁿé yā. ⁵Nguéeⁿ can'dāā tī 'iiⁿyāⁿ chi nguéeⁿ 'iiví tī nífcú ngéenu tī yeⁿé yā caati nguéeⁿ 'caandiveēⁿ tī nduudu yeⁿé yā chi nguéeⁿ 'iiví tī 'iiⁿyāⁿ. ⁶Chuū cuenta chi caⁿa Jesús 'iiⁿyāⁿ ní 'iiⁿyāⁿ miⁿ nguéeⁿ tuumicadínuuⁿ yā de'é chí caⁿā Jesús miⁿ.

Jesús chi n'dai ca pastor yā

⁷Nguēcúndíí ntuūⁿ Jesús ní ngaⁿa yā: Cuaacu níⁿnyúⁿ, cuāācū niⁿnyuⁿ ngaⁿá ngíí ndís'tiī: 'Úú tan'dúúca cheendi cheēⁿ naachi cho'ō 'iiti cuūchī. ⁸Tanducuéⁿé 'iiⁿyāⁿ chí ndaá yā vmnaaⁿ yeⁿé

'úú, 'iiⁿyāⁿ s'eeⁿ ní duucu yā ní diduucúū ntúuⁿ yā. Caati nguéeⁿ ch'iindiveēⁿ yā 'iiti cuūchī miⁿ yeⁿé yā. ⁹'Úú tan'dúúca cheendi cheēⁿ 'úú. Du'ú 'iiⁿyāⁿ chí indāā caavā yeⁿé, ninguaⁿai yā. Ní can'dāā yā. Ní ndaa ntuūⁿ yā. Ní ndaacá yā chí che'é yā.

¹⁰Duucú míⁿ taachi ndaa sa miⁿ, iduucu sa. Ní n'giⁿnuⁿ sa ní nadi'tuuvi sa. 'Úú nindāā chí ca'á vida nífcú ca'á vida chí yeenú taavi yā. ¹¹'Úú 'iivi 'iiti cuūchī chí n'dai taaví. 'Iiví 'iiti cuūchī chí n'dai taaví yā, nga'á yā vida yeⁿe maáⁿ yā caavā 'iiti. ¹²'Iiⁿyāⁿ chí canee naáⁿ 'iiti cuūchī chí nguéeⁿ yeⁿé yā 'iiti ní nguéeⁿ 'iiví tī 'iiⁿyāⁿ. Taachí ināaⁿ yā yáá'yāaⁿ ngaātāa chí cuchíí tī ní cu'néⁿ yā 'iiti cuūchī ní ngeⁿe yā ngéenu yā. Ní yáá'yāaⁿ ngaātāa cúchíí tī miⁿ ní cuta'á tī 'iiti cuūchī ní 'iiti cuūchī miⁿ idií'yāaⁿ tī ngii ní ngéenu tī. ¹³'Iiⁿyāⁿ chí nguéeⁿ yeⁿe yā 'iiti ngéenu yā caati nguéeⁿ yeⁿé yā 'iiti. Ní nguéeⁿ idiíⁿ yā cuidado 'iiti cuūchī.

¹⁴'Úú 'iivi n'dai taavi 'iiti cuūchī. Ní canúnaāⁿ 'iiti cuūchī yeⁿé. Ní 'iiti cuūchī yeⁿé ní canúnaāⁿ tī 'úú. ¹⁵Tan'dúúca chí Chiidá in'diichí yā 'úú, 'tífcá 'úú in'diichí Chiidá. Ní nga'á vida yeⁿé cucaava 'iiti cuūchī. ¹⁶Véé ntúūⁿ ta n'duuvi 'iiti cuūchī yeⁿé chí nguéeⁿ yeⁿé cheēⁿdi chēēⁿ 'cūū 'iiti. 'Iiti miⁿ ntúūⁿ ní cánéé chí candéé 'iiti. Ní 'caandiveēⁿ tī chí caāⁿmáⁿ nífcú 'áámá cheēⁿ nduuví tī ní 'áámá nūuⁿ 'íiví 'iiti.

¹⁷Caavā chíⁿ chí neⁿe Chiidá 'úú caati 'úú ca'á vida yeⁿe maáⁿ chí ní nanguēcúndíí ntuūⁿ cuta'á.

¹⁸Mar 'áámá 'iiⁿyāⁿ nguéeⁿ cuuvi

'caaⁿ'núⁿ yā 'úú naati 'úú ca'á vida yeⁿ'e maáⁿ. Cuuví dííⁿ cu'neéⁿ vida yeⁿ'é ní cuuví dííⁿ cuta'á. Chuū mandamiento chi dííⁿ chi ngaⁿ'ā Chiidá.

¹⁹Ch'ííndi ntúūⁿ vaadi 'caa'va nguaaⁿ náⁿ'ā 'iiⁿ'yāⁿ Israel s'eeⁿ cáávā nduudúⁿ 'cūū. ²⁰Nééné 'yaaⁿ 'iiⁿ'yāⁿ Israel caⁿ'a yā chuū: Canée yā ndúúcu yááⁿ'nguiniūⁿ ní nguεε ndeé yā vaanicadiinúúⁿ yeⁿ'é yā. ¿De'ē cúúví chí n'giindiveéⁿ nī yeⁿ'e yā?

²¹Tá n'duuví yā ní ngaⁿ'a yā: Ndúúduⁿ 'cāā ní nguéé yeⁿ'ē 'iiⁿ'yāⁿ chi canée ndúúcu yááⁿ'nguiniūⁿ. ¿Áá cúúví nán'guaaⁿ yááⁿ'nguiniūⁿ nduutinaáⁿ 'iiⁿ'yāⁿ chi nguenaáⁿ?

**'Iiⁿ'yāⁿ Israel s'eeⁿ nguéé
'cuúⁿ yā Jesús**

²²Ch'iindí 'vícú yeⁿ'ē dedicación na yāāⁿ Jerusalén tiempo chi 'iichεε. ²³Nífcú Jesús cachiicá yā chεeti yaācū templo na corredor chi nguuví Salomón. ²⁴Iicu saⁿ'a Israel s'eeⁿ ní cheⁿ'e sa nduuvidaama sa nanáaⁿ yā ní caⁿ'a sa chii sa Jesús: ¿Tíí cuaⁿ'ā castaⁿ'ā dí chídεεve yeⁿ'e 'nū? Ndúúti chi dii chi Cristo miiⁿ, caaⁿ'maⁿ cuaacú dí cuuvi dí nús'uū.

²⁵Nan'guεεcútaⁿ'a Jesús yeⁿ'ē sa: 'Āā ngíí ndís'tiíⁿ ní nguéé i'teenu nī. Ntiiⁿ'nyuⁿ chi dííⁿ ndúúcu chi dúúchí Chiidá, chuū ngaⁿ'ā nduudu cuaacu yeⁿ'é. ²⁶Ndís'tií nguéé i'téenu nī caati nguéé 'iiti cuūchí yeⁿ'é ndís'tií, tan'duucā 'āā ngaⁿ'á. ²⁷Iiti cuūchí yeⁿ'é n'giindiveéⁿ ti nduūdū yeⁿ'é ní 'úú in'diichí ntúūⁿ 'iiti. Ní 'iiti miiⁿ can'daa ti 'úú. ²⁸'Úú ní nga'á vida cueⁿ'e daāⁿ'maⁿ yeⁿ'é ti ní nguéé 'cūúvi ti. Nī mar 'áámá

'iiⁿ'yāⁿ cuuví cuta'á yā 'iiti s'eeⁿ taachí 'āā canée ta'á. ²⁹Chiidá chi téé yā 'iiⁿ'yāⁿ s'eeⁿ 'úú vmnaáⁿ yā yeⁿ'ē nducyáácá 'iiⁿ'yāⁿ. Mar 'áámá 'iiⁿ'yāⁿ cuuví cuta'á yā taachi 'āā canée ta'ā Chiidá. ³⁰'Úú ndúúcu Chiidá 'áámá núúⁿ 'nū.

³¹Tuu'mi ní sta'ā ntúūⁿ saⁿ'a Israel s'eeⁿ túūu chi neⁿ'e ca'a sa Jesús.

³²Nan'guεεcútaⁿ'a Jesús 'iiⁿ'yāⁿ: Nééné n'deēe n'daacā ntiíⁿ'nyuⁿ chí n'giⁿ'i yeⁿ'ē Chiidá. ¿Chéé ntiíⁿ'nyuⁿ chi nguéé innée yiinú ndís'tií chi ngiituú nī 'úú?

³³Nan'guεεcútaⁿ'ā saⁿ'a Israel s'eeⁿ ní ngaⁿ'ā sa ngii sá Jesús: Nguéé caavā ntiíⁿ'nyuⁿ n'daacā chi ngiituú 'nū dii naati cáávā chi ngaⁿ'ā di chi nguéé n'daacā, ní caati dii chí saⁿ'ā iⁿ'yeeⁿ'dí 'cūū ní diiⁿ di chi Dendyuūs dii.

³⁴Nan'guεεcútaⁿ'a Jesús yeⁿ'ē sa: ¿Áá nguéé cánée nguūⁿ na ley 'tííca: 'Úú ngingaⁿ'á chi ndyuūs s'eeⁿ ndís'tií? ³⁵Ndúúti chí ngaⁿ'á yā chi 'iiⁿ'yāⁿ miiⁿ ní ndyuūs s'eeⁿ, 'iiⁿ'yāⁿ chi sta'á yā nduudu yeⁿ'e Dendyuūs nífcú naachi cánée nguūⁿ canée chí cuuvi cuaacu. ³⁶Chiidá indεεve nuúⁿ yā 'úú ní dicho'ó yā 'úú iⁿ'yeeⁿ'dí 'cūū. ¿Áá ndís'tií ní ngaⁿ'ā nī chi nguéé n'daacā yeⁿ'é chi 'úú nduuvidaamá ndúúcu Dendyuūs caati caⁿ'á chi 'úú Daiya Dendyuūs 'úú? ³⁷Nduuti chi nguéé dííⁿ ntiíⁿ'nyuⁿ yeⁿ'ē Chiidá, nguéé cu'téenu di 'úú. ³⁸Naati ndúúti chi dííⁿ ntiíⁿ'nyuⁿ miiⁿ 'áará chi nguéé i'téenu di 'úú, cu'téenu di na ntiíⁿ'nyuⁿ chi dííⁿ. Iicu cuuvi deenu di ní cu'téenu di chi Chiidá canee nduucú nífcú 'úú ní canée ndúúcu Chiidá.

³⁹Ní ne^{n'e} ntuuⁿ sa cuta'a sa Jesús, naati Jesús miiⁿ ní nan'dáa yā na ta'a sa s'uuⁿ.

⁴⁰Nífcú nguēcúndii yā taama lado ye^{n'e} yífcú Jordán na yáⁿāa miiⁿ naachi vmnááⁿ vmnaaⁿ nacheēdinúuⁿníⁿ Juan. Nífcú canée yā miiⁿ. ⁴¹Nífcú néené 'yaaⁿ 'iiⁿyāⁿ ndaá yā nanáaⁿ yā, ní ngaⁿá yā: Nduudu cuaacu tii Juan miiⁿ ní 'áamá señal nguée diiⁿ sa naati tanducue^{n'e} chi caⁿā Juan ye^{n'e} yā, chuū nduudu cuaacu.

⁴²Nífcú néené 'yaaⁿ 'iiⁿyāⁿ miiⁿ ní chi'téenu yā Jesús na yáⁿāa miiⁿ.

Lázaro ch'i yā

11 Véé 'áamá sáⁿā ngiitā sa chi nguuvi sa Lázaro na yāⁿ Betania. Yāāⁿ miiⁿ vaacú tá María nduucū v'íⁱ tá Marta. ²Niicu tá María ní v'íⁱ ta Lázaro. N'daataa miiⁿ ch'eendái tá aceite Jesús ní nātíⁱ tá ca'a yā ndúúcū yuūdū tiiⁿ tá. ³Viⁱ sa miiⁿ ní dichó'o ta 'áamá 'iiⁿyāⁿ chi yaaⁿv'í yā ye^{n'e} Jesús miiⁿ chi caⁿā yā: Señor, n'diichí nī. Saⁿā chi né^{n'e} nī ní ngítā sa.

⁴Taachi ch'iindiveeⁿ Jesús chuū, ní caⁿā yā: Ca'āi miiⁿ ní nguée ca'āi chi 'cuūvi sa, naati ca'āi chi diiⁿ honrar Dendyuūs, nífcú cuuví yā honrar Daiyá Dendyuūs caava ca'ai 'cūū.

⁵Niicu Jesús ní ya'āi 'iinu yā Marta ndúúcū v'íⁱ tá María ndúúcū v'íⁱ tá Lázaro. ⁶Taachí Jesús ch'iindiveeⁿ yā chi ngiitā saⁿā miiⁿ canée yā tá 'uuvi nguuvi lugar naachi canée yā. ⁷Cho'o 'uuvi nguuvi ngaⁿā Jesús ngii yā discípulos ye^{n'e} yā: Cuⁿu ntúūⁿ yú na yáⁿāa Judea.

⁸Ní discípulos ní ngaⁿá yā ngii yā 'iiⁿyāⁿ: N'dii Maestro, ngiituūu 'iiⁿyāⁿ Israel s'eeⁿ n'dii. ¿Áa ne^{n'e} ntúūⁿ nī caⁿā nī miiⁿ?

⁹Nan'guēcútaⁿā Jesús: ¿Áa nguée ndeē nguuví ndiichúví hora? 'iiⁿyāⁿ chi chiicá yā nguuví nguée indeē ca'a yā tii inaaⁿ yā chí deēve ye^{n'e} iⁿyeeⁿdí 'cūū. ¹⁰'iiⁿyāⁿ chí ngiica na maāiⁿ indeē ca'á yā, ti nguée chi deēve ndúúcu yā.

¹¹Caⁿā yā chuū, ní caⁿā yā chí yā 'iiⁿyāⁿ s'eeⁿ: Lázaro amigo ye^{n'e} yú cyaadu sa. Caⁿā nanduūchí saⁿā chí cyaadu sa.

¹²Tuuⁿmí caⁿā discípulos ye^{n'e} yā: Señor, ndúúti chí cyaadu sa ní 'āa ninguaⁿāi sa.

¹³Chuū ngaⁿā Jesús miiⁿ ye^{n'e} vaadi n'dii ye^{n'e} Lázaro nífcú 'iiⁿyāⁿ s'eeⁿ ní cadíínuuⁿ yā chí ngaⁿā yā chí cyaadu n'dai Lázaro. ¹⁴Tuuⁿmí ní Jesús caⁿā cuaacú yā: Lázaro miiⁿ ch'ii sa. ¹⁵Úú ní yeenú cáávā ndís'tii chí nguée caneé miiⁿ ní 'ífcú cu'téenu nī. Naati caⁿā yú n'diichi yú saⁿā.

¹⁶Tuuⁿmí ní caⁿā Tomás, saⁿā chí duuchi Dídimó chí Gemelo ní ngaⁿā sa ngii sa saⁿā s'eeⁿ chí discípulos ndúúcū sa: Cúⁿu ntúúⁿ s'uúⁿ ní 'cuūvi yú ndúúcu yā.

Jesús chí nanduuchi niicu teé yā vida ye^{n'e} yā

¹⁷Taachi ndaā Jesús miiⁿ ní 'āa cuūⁿ nguuví n'dii Lázaro canúúⁿ sa na cheeti yáinyāⁿ. ¹⁸Ní yāāⁿ Betania 'āa niiⁿnuúⁿ ná yāāⁿ Jerusalén tan'dúúca 'iinu kilómetro. ¹⁹Neené 'yaaⁿ 'iiⁿyāⁿ ndaá yā na vaacu Marta ndúúcū María chí nica'á yā 'viicheetínūuⁿ n'daata s'eeⁿ ye^{n'e}

vi'i yā Lázaro. ²⁰Tuu'mi ní Marta miíⁿ taachí ch'iindiveéⁿ yā chí ndaā Jesús miíⁿ can'dáa yā chuva'ai ní nandaaca yā 'iiⁿ'yāⁿ. Naati María miíⁿ canúuⁿ yā cheeti va'ai. ²¹Ní Marta miíⁿ ní ngaⁿ'a yā ngii yā Jesús: Señor, ndúúti chi canée ní ndúúcu 'nū nguéeⁿ ch'ii vi'í. ²²Naati maaⁿ deenú chí tanducuéⁿ'ē chí caaca di Dendyuūs miíⁿ ní tée yā dii.

²³Tuu'mí ngaⁿ'a Jesús ngii yā Marta: Nnduuchi ntuūⁿ ví'í di.

²⁴Marta ngaⁿ'a ta ngii ta Jesús: 'Úú ní deenú chí nduuchi ntúūⁿ sa ní nacueeⁿ sa nguuvi chi 'cuiinu iⁿ'yeēⁿdí.

²⁵Ní ngaⁿ'a Jesús ngii yā táⁿ'ā: 'Úú chí nanduuchi niicu 'úú teé vida yeⁿ'é yā. Du'ū chi i'téénū 'úú 'aara n'díi yā, 'tíicā nduuchi yā. ²⁶Ní nducyáácá 'iiⁿ'yāⁿ chi véé vida yeⁿ'e yā chi i'téenu yā 'úú, nguéeⁿ 'cuūvi yā cueⁿ'e daāⁿmaⁿ. ¿Áá i'teenú di chuū?

²⁷Tuu'mi ní Marta ngaⁿ'a yā: I'teenú Señor. 'Úú i'teenú dii chí Cristo Daiya Dendyuūs chí ndaá ní iⁿ'yeēⁿdí 'cūū.

Cueecu Jesús taachi snée yā na yáinyāⁿ yeⁿ'ē Lázaro

²⁸Taachi Marta ch'iinu caⁿ'a ta chuū cueⁿ'e tá ní yaa'vi n'dé'ei ta vi'í María ní ngaⁿ'a ta: Dii María, Maestro canee yā ní n'gai yā dii.

²⁹Taachi María ch'iindiveeⁿ ta chuū ní ncueeⁿ ta ngéeniicu tá ní ndaa ta nanááⁿ Jesús. ³⁰Jesús miíⁿ 'āā cuéeⁿ nindáa yā yaaⁿ miíⁿ. Naati canee yā miíⁿ naachi nandaaca María 'iiⁿ'yāⁿ. ³¹Tuu'mi ní 'iiⁿ'yāⁿ Israel s'eeⁿ chí snée yā na vaacu tá

ndúúcū tá ní inca'á yā 'viicheetínūu María. Taachi n'diichí yā chí María miíⁿ ní nnicueeⁿ tá ngéeniicu tá, tuu'mi ní can'dáa yā cuaaⁿ chuva'āi. 'Iiⁿ'yāⁿ s'eeⁿ cueⁿ'é yā ndaá yā ní ngaⁿ'a yā: Táⁿ'ā 'cāā ní caⁿ'a tá na yáinyāⁿ. Caⁿ'a tá cueecu ta.

³²María miíⁿ taachi ndaa ta nanááⁿ Jesús ní n'diichi ta 'iiⁿ'yāⁿ ní chiin'tiia yā tá ná ca'ā Jesús. Ní ngaⁿ'a ta ngii ta Jesús: Señor, ndúúti chí canee ní 'muuⁿ, ní nguéeⁿ ch'ii vi'í.

³³Tuu'mi ní taachi n'diichi Jesús miíⁿ chí ngeecu María ndúúcū 'iiⁿ'yāⁿ Israel s'eeⁿ chí ndaá yā ndúúcū María ngeecu ntuúⁿ yā ní neenē yaⁿ'āi 'iinu Jesús ndii Espiritu yeⁿ'é yā. ³⁴Ní ngaⁿ'a yā: ¿Tíí s'neeⁿ yā saⁿ'ā? Ní ngaⁿ'a yā ngii yā 'iiⁿ'yāⁿ: Señor, cuchí ní ní n'diichí ní.

³⁵Ní cheecu Jesús. ³⁶Tuu'mi ní 'iiⁿ'yāⁿ Israel s'eeⁿ ní caⁿ'a yā: Cún'díichí ní tan'dúúcā chí dinéⁿ'e yā saⁿ'ā.

³⁷Ní n'duuví 'iiⁿ'yāⁿ s'eeⁿ ní caⁿ'a yā: ¿Áá nguéeⁿ ngii diiⁿ 'iiⁿ'yāⁿ 'cūū chí inin'guaáⁿ yā nduutináaⁿ 'iiⁿ'yāⁿ chí ngueenááⁿ, nguéeⁿ cuuvi dííⁿ yā chí saⁿ'a 'cūū nguéeⁿ ní ch'ii sa?

Nanduuchi Lázaro yeⁿ'ē nguaaⁿ tináⁿ'ā

³⁸Ní Jesús neenē ya'ai 'iinu ntuúⁿ yā maáⁿ yā ní ndaá yā na yáinyāⁿ. Ní yáinyāⁿ miíⁿ 'áámá yíivi yáávā. Níicú canee 'aama túūu vmnaaⁿ yeⁿ'ē. ³⁹Ngaⁿ'ā Jesús miíⁿ: Ndiví ní túūu. Marta vi'í saⁿ'ā chí ch'ii ngaⁿ'a ta ngii ta Jesús miíⁿ: Señor, 'āā ngeéⁿ sá. 'Āā cuūúⁿ nguuvi n'dii sa.

⁴⁰Jesús ní ngaⁿ'a yā ngii yā Marta: ¿Áá nguéeⁿ ngii dii chí nduuti chí cu'téénú dí tuu'mi ní n'diichi di poder yeⁿ'ē Dendyuūs?

⁴¹Tuu'mi ní ndivíi yā tūūu naachí canéé tináⁿā. Níicú Jesús ní n'diichí yā cuaaⁿ 'niⁿnuⁿ ní caⁿa yā: N'dií Chiidá, 'úú ca'á gracias n'dií Dendyuūs chí n'giindiveéⁿ ní yeⁿé. ⁴²'Úú ní deenú chí 'āā cueⁿe daaⁿmáⁿ nūuⁿ n'giindiveéⁿ ní yeⁿé ti cáāvā 'iⁿyāⁿ chí snéē nanaáⁿ cuuvi cu'téenu yā chí n'dií dicho'ó ní 'úú.

⁴³Ní ch'iinú caⁿa yā chuū néené yuudu caⁿa yā: Lázaro, cuchíi di.

⁴⁴Saⁿā chí n'dií miⁿ ní nan'dáa sa. Nandéécú sá ndíi ta'ā sa ndíi ca'ā sa ndúúcū cintas tiinūuⁿ. Ndeecuú nuuⁿmáⁿ cuerpo yeⁿe sa ndií naaⁿ sa. Níicú pañuela canee naaⁿ sa. Tuu'mí ngaⁿa Jesús míⁿ 'iⁿyāⁿ: N'ndaatíi ní saⁿā ní 'āā naⁿā sa.

Nduuvidaamá yā chí diíⁿ yā 'caaⁿnúⁿ yā Jesús

(Mt. 26.1-5; Mr. 14.1-2; Lc. 22.1-2)

⁴⁵Néené 'yaaⁿ 'iⁿyāⁿ Israel s'eeⁿ chí ndaá yā ndúúcū Maríá ní n'diichí yā chí diíⁿ Jesús miⁿ chí'teenú yā 'iⁿyāⁿ. ⁴⁶Taná'a yā ní cheⁿé yā nanááⁿ saⁿā fariseos ní chíi yā saⁿā s'eeⁿ chí diíⁿ Jesús miⁿ.

⁴⁷Tuu'mi ní saⁿā chiiduú n'geeté ndúúcū saⁿā fariseos nduuvidaamá yā ndeé yā. Ní ngaⁿa yā: ¿D'e'ē diíⁿ yú? Tíi sáⁿa 'cūū caati neené n'deé chí n'giⁿi sa señales nanáaⁿ yú.

⁴⁸Ndúúti chí cu'nee yú saⁿā chí 'tíica nūuⁿ nducyáácá yā ní cu'téenu yā saⁿā. Ní ndaa saⁿā romanos ní ndivíi yā lugar yeⁿe yáacú yeⁿe yú ndúúcū nación yeⁿe yú.

⁴⁹Áamá chéé saⁿā s'eeⁿ chí nguuví Caifás miⁿ, saⁿā chí chiiduú ch'etē ca yeⁿe nduuyu miⁿ caⁿa sa chíi sa saⁿā s'eeⁿ: Ndís'tii ní nguéé du'ū v'e deenú ní. ⁵⁰Ní nguéé nacádiinúúⁿ

ní chí 'áamá saⁿā 'cuūvī sa yeⁿe nducyaaⁿ yā níicú nguéé ti nación yeⁿe yú cuuvi ndái.

⁵¹Chuū ní nguéé caⁿa yā yeⁿe maáⁿ yā caati 'iⁿyāⁿ miⁿ chiiduú ch'etē ca yeⁿe nduuyu miⁿ. Caⁿā cuaacú sa chí cuchíi chí 'cuūvī Jesús cáāvā nación 'cūū. ⁵²Ní Jesús nduuvidaamá yā nguéé damaāⁿ 'iⁿyāⁿ nación miⁿ naati ndúúcū tanáⁿā daiyá Dendyuūs miⁿ chí snéé 'muuⁿ chí snéé miⁿ.

⁵³Tíica ndíi tuu'mi ndeé yā chí 'caaⁿnuⁿ yā Jesús.

⁵⁴Tuu'mi ní 'aa ntéé cuchiiica nguuví Jesús nguaaⁿ 'iⁿyāⁿ Israel s'eeⁿ naati cueⁿé yā na 'áamá yáāⁿ niiⁿnuúⁿ yáⁿāa cuuⁿmáⁿ naachi nguéé ch'etinéé 'iⁿyāⁿ chí nguuví Efraín. Ní canéé yā miⁿ ndúúcū discípulos yeⁿé yā.

⁵⁵Ní 'viicu pascua yeⁿe 'iⁿyāⁿ Israel s'eeⁿ 'āā chí néé niⁿnuúⁿ nguuví. Néené 'yaaⁿ yā cuchéé yā yeⁿe yáāⁿ yeⁿé yā na yáāⁿ Jerusalén, vmnaaⁿ tiempo yeⁿe 'viicu pascua. Ní 'iⁿyāⁿ s'eeⁿ did'eéⁿ yā vida yeⁿé yā tan'dúúcā costumbre yeⁿé yā.

⁵⁶Ní in'nuúⁿ yā Jesús miⁿ. Ní 'iⁿyāⁿ s'eeⁿ indeé yā ndúúcū vi'ī naachi canéé yā ch'eti yaacū templo taacā chí ngii yeⁿe ndís'tii: ¿Áá nguéé chíi Jesús 'viicu?

⁵⁷'iⁿyāⁿ chiiduú n'geeté ndúúcū saⁿā fariseos 'āā s'nééⁿ yā caaca 'tíicā. Ndúúti du'ū chí déenú tíi canéé Jesús miⁿ caaⁿmaⁿ yeⁿe chiiduú n'geeté níicú cuta'á yā 'iⁿyāⁿ.

Cheēndáa yā aceite Jesús na yáāⁿ Betania

(Mt. 26.6-13; Mr. 14.3-9)

12 Níicú indaá cá taaⁿ jááⁿ nguuví chí ndaa 'viicu yeⁿe

pascua. Ndaā Jesús yáāⁿ Betania naachi canee Lázaro, saⁿā chi 'āā ch'ií ní n'duuchí ntuūⁿ Jesús miiⁿ saⁿā yeⁿe nguaaⁿ 'iiⁿyāⁿ chi n'dii. ²Ní miiⁿ ca'a yā chi che'e nguīnū Jesús. Marta miiⁿ ní n'gii yā cu'u na mesa. Ní Lázaro miiⁿ vee sa ndúúcū Jesús na mesa. ³Tuu'mi ní sta'ā María miiⁿ 'áámá libre yeⁿē aceite perfume yeⁿē nardo nūuⁿ chi yaⁿ'ai chii'vē. Ní cheēndāā tá ca'a Jesús miiⁿ. Ní ndúúcū yuūdū tiiⁿ tá miiⁿ nadeēve tá ca'ā Jesús miiⁿ. Niicu nuuⁿ máⁿ ch'ēte chēti va'āi cheēⁿ perfume yeⁿe aceite miiⁿ. ⁴Áámá chéé discípulo yeⁿé yā chi nguuví Judas Iscariote chi daiya Simón chi saⁿā chi canéé chí dííⁿ sa entregar Jesús, ngaⁿ'a sa: ⁵¿De'ē cúúví chí nguéé n'diicuí yú aceite 'cūū ndúúcū ndēēchē ciento caadi canéé 'uūví ngēecu ndiichi centavo ní ca'a yú 'iiⁿyāⁿ chi nguéé yeⁿe yā?

⁶Ní caⁿ'a sa chuū ní nguéé chi ya'āi sa 'iiⁿyāⁿ chi ndaachíí snée yā, naati cáávā chi duucu sa. Ní ndēē sa bolsa miiⁿ snúúⁿ tuūmí. ⁷Tuu'mi ní ngaⁿ'ā Jesús: 'Āā canéé 'nū tá, taachi n'dai tá chuū cáávā nguuví chi caⁿ'á 'cuēchí. ⁸Caati 'iiⁿyāⁿ chi nguéé yeⁿe yā 'āā canee núúⁿ nī nduucú yā cueⁿe daāⁿmaⁿ, naati 'úú ní nguéé 'áámá cuneé núúⁿ nduucú nī.

Nduuvidaamá yā contra yeⁿe Lázaro

⁹Tuu'mí neenē 'yaaⁿ 'iiⁿyāⁿ yeⁿē 'iiⁿyāⁿ Israel tuumicadínnuuⁿ yā chi Jesús miiⁿ ní cunée yā na yāāⁿ Betania. Ní níndaā yā nguēē cáávā damaāⁿ chi neⁿe n'diichí yā Jesús miiⁿ ti neⁿe n'diichí yā Lázaro, saⁿā chi 'āā n'dii ní nduuchi. ¹⁰Saⁿ'ā s'eeⁿ chi chiiduú n'gēetē nduuvidááma yā

chi neⁿé 'caaⁿ'nuⁿ ntúuⁿ yā Lázaro. ¹¹Ti neénē 'yaaⁿ 'iiⁿyāⁿ Israel s'eeⁿ ngeⁿe yā ní i'téenu yā Jesús miiⁿ caavā Lázaro.

Jesús ndaá yā yáāⁿ Jerusalén lado yeⁿe rey

(Mt. 21.1-11; Mr. 11.1-11; Lc. 19.28-40)

¹²Chi dēēve táámá nguuví ni neenē 'yaaⁿ 'iiⁿyāⁿ ndaá yā 'viicu taachi ch'iindiveēⁿ yā chi Jesús miiⁿ ndaa yā Jerusalén. ¹³Sta'á yā n'duuví tiicuáá yíⁿyúⁿ ní can'daa yā Jesús. Ní ndaacá yā Jesús ní 'cai yā: Hosanna. N'dái taavi 'iiⁿyāⁿ chi cuchíi yā ndúúcū chi dúúchí Señor chi Rey yeⁿē Israel ntúūⁿ.

¹⁴Ní ndaācā Jesús 'aama burro 'lííⁿ ni canduú yā 'iiti tan'dúúcā chi canéé nguūⁿ na libro yeⁿe Ndyuūs 'tíicā:

¹⁵Tán'ā daiya Sión nguéé 'va'a dí. N'díichí dí, cuchii Rey yeⁿē dí. Canduú yā 'aama daiya burro.

¹⁶De'e ndúúcū chi 'tuucā nguéé tuumicadiínúúⁿ yā discípulos yeⁿé yā nguuví miiⁿ. Taachi Jesús cánéé yā na va'ai chēti nguuví tuu'mi ní discípulos yeⁿe yā nn'gaacú yā tanducueⁿē de'ē chi canee nguūⁿ yeⁿé yā, 'íicú dííⁿ yā de'ē ndú'ū chi 'túúcā.

¹⁷'Iiⁿyāⁿ chi canéé yā ndúúcū Jesús ngaⁿ'a cuáácú yā: Taachí yaa'ví yā Lázaro na yáinyāⁿ ní nnduuchi sa nguaaⁿ tinaⁿā.

¹⁸Cáávā chuū ní n'daā 'yaaⁿ 'iiⁿyāⁿ caati n'giindiveēⁿ yā chi Jesús ní dííⁿ yā señal miiⁿ. ¹⁹Saⁿ'ā fariseos ní ngaⁿ'a sa nguaaⁿ maāⁿ sa: Inaaⁿ nī ti nguéé de'ē vee idiiⁿ nī aprovechar yeⁿe asunto 'cūū. N'díichí nī. Núúⁿmaⁿ iⁿ'yeēⁿdi ní caⁿ'ā can'dāā Jesús.

Saⁿā griegos inⁿuúⁿ yā Jesús

²⁰Ilicu véé 'iiⁿyāⁿ griegos chí chée yā yeⁿé 'viicū miiⁿ ní díⁿ yā adorar.

²¹'Iiⁿyāⁿ s'uúⁿ ndaá yā nanááⁿ Felipe yeⁿé yāáⁿ Betsaida chi yeⁿé yāⁿaa Galilea. Ní di'cuutú yā 'iiⁿyāⁿ, ní ngaⁿa yā ngii yā 'iiⁿyāⁿ: Señor, neⁿé 'nū n'diichí 'nū Jesús.

²²Ndaá Felipe miiⁿ ni ngaⁿa yā ngii yā chuū Andrés. Tuu'mi ní Andrés ndúúcu Felipe ngaⁿa yā ngii yā Jesús.

²³Tuu'mi ní Jesús nan'guεεcutáⁿa yā, ní ngaⁿa yā ngii yā saⁿā s'eeⁿ: Hora mífⁿ cuchii taachi Saⁿā chi Daiya Dendyuūs cánée chi caⁿá yā na va'ai chεeti nguuvi. ²⁴Cuaacu níⁿnyúⁿ cuāācū niiⁿnyuⁿ ngaⁿá ngii ndís'tiī: Nduuti chi 'áámá trigo nguée cuuvā na yāⁿaa ní 'cuūvi damaāaⁿ canee. Naati ndúúti chi trigo 'cuūvi neené n'deee nduuví trigo 'cúuⁿndī. ²⁵Du'u chí neⁿe vida yeⁿé yā na iⁿ'yeeⁿdí 'cūū n'dái yā vida yeⁿe yā cueⁿe daāⁿmaⁿ. ²⁶Du'u 'iiⁿyāⁿ chi dichí'íve yā 'úú ní chii yā can'daa yā 'úú, naachi 'úú chi caneé, mífⁿ ntúūⁿ snée 'iiⁿyāⁿ chi dichí'íve 'úú. Nduuti 'áámá 'iiⁿyāⁿ chi dichii've yā 'úú, Chiidá ní díⁿ yā honrar 'iiⁿyāⁿ.

Jesús yaa'ví yā yeⁿé vaadi ngii yeⁿé yā

²⁷Ní caⁿ'a Jesús: Maaⁿ ní neené ndístaⁿā alma yeⁿé. ¿De'é caāⁿmaⁿ? N'diī Chiidá, ¿áá nadanguáⁿai ní 'úú yeⁿe hora 'cūū? Cáāvā chuū chi cuchí hora 'cūū. ²⁸N'diī Chiidá, ch'iⁿi ní poder yeⁿe chi duuchi yeⁿé ní. Tuu'mi ní chii 'áámá nduudu yeⁿé nanguuvi chi ngaⁿa: 'Úú ní 'āā ch'iⁿi poder yeⁿé ní cuuvi 'cuuⁿmíⁿ poder yeⁿé ntúuⁿ taama vmnéⁿee.

²⁹'Iiⁿyāⁿ chi chinée yā miiⁿ ní ch'iindiveéⁿ yā 'áámá nduudu ní ngaⁿa yā: Daavi miiⁿ. Ta n'dúúvi yā ní ngaⁿa yā: Angel yaa'ví yā 'iiⁿyāⁿ.

³⁰Nan'guεεcutáⁿā Jesús ní caⁿ'a yā: Nguée ndaā nduudu 'cūū caavā 'úú, ti cáāvā ndís'tiī. ³¹Maaⁿ ní véé chí diiⁿ juzgar 'iiⁿyāⁿ yeⁿe iⁿ'yeeⁿdí 'cūū. Maaⁿ ní 'aama saⁿā chi ch'εete yeⁿé iⁿ'yeeⁿdi 'cūū 'cuεεcú yā cuaaⁿ chuva'āi. ³²Ndúúti chi 'úú chí ncueéⁿ yeⁿé yāⁿaa 'cūū tuu'mi candéé nducyaacá yā nanáaⁿ 'úú.

³³Ní chuū ngaⁿa Jesús ngii yā 'iiⁿyāⁿ chí ngaⁿá yā de'é vaadi ngii 'cuuví yā. ³⁴Nan'guεεcutáⁿā 'iiⁿyāⁿ s'eeⁿ yeⁿé yā: Nús'uū ní n'giindiveéⁿ 'nū chi canée nguūⁿ na libro yeⁿe Ndyuūs chi Cristo cuneé yā cueⁿe daāⁿmaⁿ. ¿Táācā chi ngaⁿā dii, cánée chí níncueeⁿ Saⁿā chi Daiya Dendyuūs? ¿Du'ū chi Saⁿā chi Daiya Dendyuūs?

³⁵Tuu'mí ngaⁿa Jesús ngii yā 'iiⁿyāⁿ s'eeⁿ: 'Téé nūuⁿ chi canée chi dεeve nanáaⁿ ní. Cúchiicā ní naachi canée chi dεeve neⁿe chi canée chi dεeve nduucú ní, ní nguée ndaā maāíⁿ naachí canée yā. 'Iiⁿyāⁿ chí cachiicā yā na maāíⁿ nguée deenú yā tíí caⁿ'a yā. ³⁶Naachi canée chi dεeve ndúúcu ní cu'téenu ní chi dεeve miiⁿ ní cuuvi daiya chi dεeve ndís'tiī. Chuū caⁿ'a Jesús, ní cueⁿe yā ní canúúⁿ n'de'ei yā maāⁿ yā yeⁿé 'iiⁿyāⁿ s'eeⁿ.

'Iiⁿyāⁿ Israel s'eeⁿ nguée i'téenu yā

³⁷Néené ch'iⁿi Jesús señaes dendu'ū nanáaⁿ 'iiⁿyāⁿ s'eeⁿ naati nguée chi'teenú yā 'iiⁿyāⁿ. ³⁸Ilicu cuuví cuaacu chí caⁿ'a saⁿā profeta Isaías naachí canée nguūⁿ na libro yeⁿe Ndyuūs 'tíicā:

Señor, ¿du'ū i'teenu chí ngaⁿa
yā? ¿Du'ū n'diichi chí n'giⁿi yā
poder yeⁿe Señor?

³⁹ Cáávā chuū chí nguée i'téenu yā
chí táamá vmnéⁿēe caⁿa Isaías
naachí ndii nguūⁿ na libro yeⁿe
Ndyuūs 'tíicā:

⁴⁰ Nan'gaadí yā nduutinaáⁿ 'iiⁿ'yāⁿ
s'eeⁿ ní diiⁿ chēechí yā staava
yeⁿé yā, caati nguée inaáⁿ yā
ndúúcū nduutinaáⁿ yā, ní
nguée deenú yā yeⁿē staava
yeⁿé yā, ndíi nguée ndúú
cu'téenu yā, ní 'úú diyiicú
'iiⁿ'yāⁿ s'eeⁿ.

⁴¹ Chuū caⁿa Isaías miiⁿ taachí
n'diichi sa Dendyuūs ndúúcū poder
yeⁿé yā ní caⁿa sa yeⁿe yā ní 'āā
dinguūⁿ sa yeⁿē.

⁴² Caavā yeⁿē nducuéⁿē chuū
néené 'yaaⁿ 'iiⁿ'yāⁿ chí n'geete ca
chi'téenu yā Jesús naati nguée
ntumiiⁿnúⁿ yā chí chi'téenu yā ti
'va'a yā chí nan'daa yā yaācū cáávā
saⁿā fariseos. ⁴³ Caati neⁿé ca yā
honra yeⁿe saⁿā iⁿ'yeeⁿdí 'cūū, nguée
ti honra yeⁿē Dendyuūs miiⁿ.

Nduudu yeⁿē Jesús diiⁿ juzgar saⁿā s'eeⁿ

⁴⁴ Naati Jesús ní caⁿa yuudú
yā: Du'ū chí i'téenu 'úú, nguée 'úú
i'téenu yā ti 'iiⁿ'yāⁿ chí dichó'o
yā 'úú. ⁴⁵ Du'ú 'iiⁿ'yāⁿ chí inaaⁿ yā
'úú, inaaⁿ yā 'iiⁿ'yāⁿ chí dichó'o yā
'úú. ⁴⁶ 'Úú tan'dúúcā dēeve ní ndaá
iⁿ'yeeⁿdí 'cūū. Ní 'iicu nducyáácá
'iiⁿ'yāⁿ chí cu'téenu yā 'úú nguée
cunee yā ndúúcū maáiⁿ. ⁴⁷ 'Iiⁿ'yāⁿ
chí n'giindiveéⁿ yā nduudu yeⁿé
ní nguée i'téenu yā nduudu yeⁿé,
'úú nguée díⁿ juzgar 'iiⁿ'yāⁿ miiⁿ.
Caatí nguée ndaá díⁿ juzgar 'iiⁿ'yāⁿ

yeⁿe iⁿ'yeeⁿdí 'cūū, ti ndaá chí
nadanguaⁿái 'iiⁿ'yāⁿ yeⁿe iⁿ'yeeⁿdí.

⁴⁸ Du'ū chí nguée neⁿē 'úú, ní
nguée n'gúuⁿ yā nduudu yeⁿé. Véé
'iiⁿ'yāⁿ chí díⁿ yā juzgar 'iiⁿ'yāⁿ s'eeⁿ
nguuví chí 'cuiinu iⁿ'yeeⁿdí. ⁴⁹ Caati
'úú nguée ngaⁿá yeⁿe maáⁿ. Chiidá
chí dichó'o yā 'úú, 'iiⁿ'yāⁿ miiⁿ teé
yā nduudu cuaacu chí ngaⁿá ní
yeⁿē chí canée chí caaⁿmaáⁿ. ⁵⁰ 'Úú
deenú chí cucáávā nduudu cuaacu
yeⁿé yā cúnduuchi yú cueⁿe
daāⁿmaⁿ. 'Tíicā ngaⁿā 'úú, tan'dúúcā
chí ngaⁿa Chiidá ngii yā 'úú.

Jesús naaⁿnú yā ca'a discípulos yeⁿé yā

13 Ní vmnááⁿ vmnaaⁿ 'viicu
yeⁿe pascua 'āā deenu
Jesús chí hora 'āā cuée ndaa chí
cho'ó yā yeⁿe iⁿ'yeeⁿdí 'cūū chí ndaá
yā nanááⁿ Chiidá yā. Tan'dúúcā chí
dineⁿe Jesús 'iiⁿ'yāⁿ yeⁿé yā chí
snée yā iⁿ'yeeⁿdí 'cūū, 'āā dinéⁿe
núúⁿ yā 'iiⁿ'yāⁿ ndii cuááⁿ ná ch'liinu.

² Ch'íínú che'e nguuiⁿú yā.
Yááⁿnguuiⁿūⁿ 'āā s'neeⁿ sa na staava
yeⁿē Judas Iscariote chí daiya
Simón chí canée chí díⁿ yā entregar
Jesús. ³ Déenú Jesús chí tanducuéⁿē
ní ca'a Chiidá yā ta'a daiyá yā ní
chí nan'dáa yā yeⁿé Dendyuūs ní
duu'vī tiempo tuu'mí naⁿá yā nanááⁿ
Dendyuūs. ⁴ Nadacuéⁿē yā naachi chí
che'e nguuiⁿú yā ní ndiví yā catecaí
yā. Ní sta'á yā 'aama toalla chēecu
vmnaaⁿ cuerpo yeⁿe yā. ⁵ Ní ch'liinuúⁿ
yā nuūⁿniⁿ chēeti tina ní tuc'á yā
naaⁿnu yā ca'a discípulos. Ní natíⁿi yā
ndúúcū toalla chí ndēecú yā.

⁶ Ndaá yā naachi canée Simón
Pedro ní sáⁿa 'cūū ngaⁿa sa ngii
sa 'iiⁿ'yāⁿ: Señor, ¿áá n'dií ntúūⁿ
naaⁿnú ní ca'á?

⁷Nan'guεεcútaⁿā Jesús ní ngaⁿa yā ngii yā saⁿā: 'Úú ní chí dííⁿ nguéeⁿ deenu di maaⁿ naati cadíínuuⁿ di cuayíivi.

⁸Ngaⁿā Pedro ngii sa 'iiⁿyāⁿ: N'dií, nguéeⁿ nááⁿnú nī ca'á mar 'áámá tiempo. Nan'guεεcútaⁿā Jesús yeⁿē sa: Ndúúti chí nguεε naaⁿnú yeⁿē di nguéeⁿ 'áámá parte yeⁿē di nduucú.

⁹Tuu'mi ní ngaⁿa Simón Pedro: Señor, nguéeⁿ dámaāⁿ ca'á ti ndii ta'á ntúūⁿ ndúúcuⁿ tííⁿ.

¹⁰Tuu'mi ní ngaⁿa Jesús ngii yā saⁿā: Du'u chí chiínē nguéeⁿ neⁿē sa chí naaⁿnu sa cuerpo yeⁿe sa ti dámaāⁿ ca'a sa caati tanducuéⁿē cuerpo yeⁿē sa ní dεεve. Ndís'tií ní 'āā dεεvé nī 'āā n'dáá rá chí nguéeⁿ nducyaaca nī.

¹¹Ti deenú yā du'u chí dííⁿ entregar 'iiⁿyāⁿ ní cáávā chííⁿ chí caⁿa yā: Nguéeⁿ nducyaacaⁿ nī dεεve nī.

¹²Taachí ch'iinu naaⁿnú yā ca'a discípulos, ní sta'á yā catecaí yā nguεεcundíí ntuúⁿ yā 'cuundi yā. Ngaⁿa yā ngii yā saⁿā s'eeⁿ: 'Áá déénú nī dε'ē chí idiíⁿ nduucú nī? ¹³Ndís'tií ngaⁿa nī chí 'úú ní Maestro, chí 'úú ní Señor. N'daācā ngaⁿa nī caati 'tífcā 'úú. ¹⁴'Úú ní Señor yeⁿē nī, 'úú ní Maestro yeⁿē nī. 'Úú inaaⁿnú ca'a nī. Ndís'tií canéeⁿ nī ntúūⁿ chí naaⁿnu nī 'aama nī ca'a taama nī. ¹⁵Caneéⁿ chí dííⁿ chuū. Tan'dúúcuⁿ chí 'úú chí dííⁿ 'tífcā nī ntúūⁿ diíⁿ ndís'tií. ¹⁶Cuaacu nííⁿnyúⁿ cuāācū nīiⁿnyuⁿ ngaⁿā ngii ndís'tií: 'Iiⁿyāⁿ chí diíⁿ mandado nguéeⁿ 'āā naaⁿ ca yā chí 'iiⁿyāⁿ chí ngaⁿa ntiiⁿnyūⁿ yeⁿē yā. Ndíí nguéeⁿ ndúú 'iiⁿyāⁿ chí dicho'ó yā nguéeⁿ 'āā naaⁿ cá yā chí 'iiⁿyāⁿ chí dicho'ó

yā 'iiⁿyāⁿ. ¹⁷Nduuti chí deenu nī taanduvéeⁿ dendu'ū ní yeenu taaví nī ndúúti chí dííⁿ nī chuū.

¹⁸Nguéeⁿ ngaⁿā yeⁿē nducyaaca ndis'tií. 'Úú ní deenú 'iiⁿyāⁿ chí ndεεvé. Ní 'iicu canéeⁿ chí cuuví cuaacu chí canéeⁿ nguūⁿ. Du'ū chí nge'é pan nduucú, canéeⁿ chí caⁿā yā contra yeⁿē 'úú. ¹⁹Ndíí maaⁿ 'āā ngaⁿā 'aara chí 'āā cuéeⁿ cuuvi nīiⁿnuūⁿ. Taachi 'āā cho'ōo chuū cuuví cu'téenu nī chí 'úú. ²⁰Cuaacu nííⁿnyúⁿ cuāācū nīiⁿnyuⁿ 'úú ngaⁿā ngii ndís'tií: 'Iiⁿyāⁿ chí 'cuáaⁿ yā 'iiⁿyāⁿ chí 'úú dicho'ó 'cuáaⁿ yā 'úú. Ní 'iiⁿyāⁿ chí 'cuáaⁿ yā 'úú 'cuáaⁿ yā 'iiⁿyāⁿ chí dicho'ó yā 'úú.

Jesús dííⁿ yā anunciar chí Judas dííⁿ yā entregar 'iiⁿyāⁿ

(Mt. 26.20-25; Mr. 14.17-21; Lc. 22.21-23)

²¹Taachí ngaⁿa Jesús chuū ya'ai 'iinú yā na espíritu yeⁿé yā ní caⁿa cuaacú yā: Cuaacu nííⁿnyúⁿ cuāācū nīiⁿnyuⁿ ngaⁿā ngii ndís'tií chí 'áámá chéeⁿ ndís'tií dííⁿ nī entregar 'úú.

²²Tuu'mi discípulos n'gínú yā na 'áámá yā na táámá yā. Nguéeⁿ tuumicádiinúúⁿ yā du'u yeⁿē chí ngaⁿa yā. ²³'Áámá discípulo, chí nééné neⁿé Jesús, candítíⁿ neeⁿ yā na nííⁿnúⁿ Jesús. ²⁴Simón Pedro ca'a yā señas saⁿā 'cūú ní ngaⁿa yā saⁿā chí natiingúúneeⁿ sa yeⁿē sáⁿā chí ngaⁿa Jesús. ²⁵Nífcú taachi candiitíⁿ neeⁿ yā nííⁿnúⁿ Jesús, tuu'mí ngaⁿā yā: Señor, ¿du'ū chíi?

²⁶Nan'guεεcútaⁿā Jesús: Caⁿā dí'caandá pan ní ca'á 'iiⁿyāⁿ ní 'iiⁿyāⁿ miiⁿ chííⁿ. Ní dí'caandá yā pan ní ca'á yā Judas Iscariote, daiya Simón. ²⁷Ch'íínú che'e sa pan miiⁿ

ní yááⁿ n'guinūⁿ ndaa sa na staava yeⁿé sa. Tuu'mí Jesús ní ngaⁿa yā ngii yā saⁿā: Chíí chi neⁿe di diiⁿ dí miiⁿ, diiⁿ núúⁿ yiiⁿnu nuuⁿ di.

²⁸Naati mar 'áamá 'iiⁿyāⁿ chi véé na mesa miiⁿ nguée tuumicadiinúⁿ yā deⁿé chúú chí 'tíicā caⁿa yā.

²⁹N'duuví yā nnacadíinuⁿ yā chi caati Judas ndée sa bolsa chi Jesús ní 'āā ngaⁿa yā ngii yā saⁿā: Cuái di chi neⁿe yú yeⁿe 'viicu o cuica'a dí 'tée 'iiⁿyāⁿ chi ndaachíí snée yā.

³⁰Ch'iinú che'é yā pan can'daā núuⁿ Judas chuva'ai ní 'āā chi 'da'a.

Mandamiento chí ngāi

³¹Taachí Judas miiⁿ can'daā sa miiⁿ tuu'mi ní ngaⁿā Jesús: Maaⁿ ní canée chí cuuvi ch'ée Saⁿā chi Daiya Dendyuūs. Ní Dendyuūs miiⁿ canée chí ch'ée ndúúcu yā. ³²Ndúúti chí Dendyuūs canée chí ch'ée yā, 'tiicá ntúúⁿ dííⁿ yā chí ch'ée maáⁿ yā. Ní 'cuiinu ní dííⁿ yā chí ch'ée 'iiⁿyāⁿ.

³³N'dii daiya n'gaiyāá 'tée 'tée nuúⁿ cuneé ndúúcu ndis'tií. In'nuúⁿ ní 'úú tan'dúúca chí 'úú chí ngaⁿá ngii 'iiⁿyāⁿ Israel s'eeⁿ: Naachi 'úú caⁿá ndis'tií ní nguée cuuvi ndaá ní. 'Tíicā ngaⁿá ndis'tií maaⁿ. ³⁴Áamá ley ngai itee ndis'tií chí diiⁿ yá'āi 'iinu ní vi'í 'aama ní taama ní tan'dúúca chí idiíⁿ yá'āi 'iinú ndis'tií. 'Tiicá ntúúⁿ diyá'ai 'iinú ní vi'í 'aama ní taama ní. ³⁵Íicú chúú tuumicadiinuⁿ nducyaaca 'iiⁿyāⁿ chí ndis'tií ní discípulos yeⁿé ndúúti chí neⁿe ní 'áamá ní taama ní.

Jesús ngaⁿa yā chí Pedro caaⁿmaⁿ yā chí nguée n'diichí yā Jesús

(Mt. 26.31-35; Mr. 14.27-31; Lc. 22.31-34)

³⁶Tuu'mí ngaⁿā Simón Pedro ngii sa Jesús: Señor, étií cáⁿa di?

Nan'guēcútaⁿā Jesús miiⁿ: Naachi 'úú caⁿá nguée cuuvi chíí ndis'tií can'dáa ní 'úú. Naati canée chí chíí ní can'dáa ní 'úú cuayiivi.

³⁷Tuu'mí ngaⁿā Pedro miiⁿ: Señor, édeⁿé cuuvi chí 'āā ntee cuuvi chí can'daá dii maaⁿ? Vida yeⁿé cu'neéⁿ lugar yeⁿé di.

³⁸Nan'guēcútaⁿā Jesús miiⁿ: É'Áá 'cuuvi di lado yeⁿe 'úú? Cuaacu níⁿnyúⁿ cuāacū niiⁿnyuⁿ ngaⁿá ngii di chí nguée 'cai tusáⁿā taachi nguée cuueⁿdíitū di 'úú 'iinū cuuvi vuelta.

Jesús ní tan'dúúca yúúni chí candée 'iiⁿyāⁿ nanááⁿ Chiidá yā

14 Caⁿa Jesús: Nguée ndii 'úúvi staava yeⁿé ní. Cu'téenu ní Dendyuūs. Cu'téenu ní 'úú dendu'ū. ²Na vaacu Chiidá véé taavi naachi 'cuēetinée yú. Ndúúti chí nguée nduudu cuaacu, tuu'mi ní 'úú nguée caaⁿmaⁿ 'tiicā. Caⁿá nanguain'daí naachi 'cuēetinée ndis'tií. ³Ndúúti chí naⁿá ní nnguain'daí 'áamá cuaaⁿ yeⁿé ndis'tií chí 'cuēetineé ndis'tií, cuchii ntúúⁿ táamá vmnéⁿé ní candée māaⁿ ndis'tií. Naachi cuneé miiⁿ ndis'tií ní 'cuēetinée ní ntúúⁿ ní. ⁴Ní déénú ní naachi caⁿá mífⁿ, ní n'diichí ní yúúni.

⁵Tuu'mi ní ngaⁿa Tomás ngii sa Jesús: Señor, nguée déenu 'nū tíí caⁿá ní. ÉTáácā n'diichí 'nū yúúni?

⁶Jesús nan'guēcútaⁿa yā yeⁿe sa: 'Úú tan'dúúca yúúni, 'úú ngaⁿá nduudu cuaacu, 'úú teé vida. Nguée du'ū vee ndaá nanááⁿ Chiidá ndúúti chí nguée cáavā 'úú. ⁷Ndúúti chí n'diichí ní 'úú in'diichí ní ntúúⁿ Chiidá. Ní ndii maaⁿ ní n'diichí ní 'iiⁿyāⁿ. Ní n'diichí ní ntúúⁿ 'iiⁿyāⁿ.

⁸Tuu'mí ngaⁿ'a Felipe miⁿ ngii sa 'iiⁿ'yāⁿ: Señor, 'cuuⁿ'míⁿ nī Chiida yú ní 'cuëetinée 'nū ndúúcū vaadi yeenú.

⁹Jesús ní ngaⁿ'a yā ngii yā saⁿ'ā: Dii Felipe, 'naaⁿ n'dái ntúūⁿ caneé ndúúcū ndis'tií ní 'áá nguée nin'diichi di 'úú, Felipe? Du'ú 'iiⁿ'yāⁿ chi n'diichí yā 'úú, n'diichí yā Chiidá. ¿Táácā caaⁿ'maⁿ di: 'Cuuⁿ'míⁿ nī Chiida yú? ¹⁰¿Áá nguée i'téenu di chi 'úú ní caneé ndúúcu Chiidá ní Chiidá caneé yā nduucú? Nduudu chi ngaⁿ'á nanááⁿ ndis'tií nguée ngaⁿ'á yeⁿ'é maáⁿ ti yeⁿ'ē Chiidá chi caneé yā nduucú. 'Iiⁿ'yāⁿ miⁿ díⁿ yā ntiiⁿ'nyuⁿ. ¹¹Cu'téenu di 'úú ti 'úú caneé ndúúcū Chiidá ní Chiidá míⁿ caneé yā nduucú, o cu'téenu di 'úú cáávā ntiiⁿ'nyuⁿ chi díⁿ. ¹²Cuaacu níⁿ'nyúⁿ cuāācū niⁿ'nyuⁿ ngaⁿ'á ngii ndis'tií: Du'ú chi i'teenu 'úú, ní ntiiⁿ'nyuⁿ chi 'úú idiíⁿ, 'tiicá ntúūⁿ díⁿ yā. Ní ch'ēete ca ntiiⁿ'nyuⁿ nidiíⁿ yā nguée ti chuū caati 'úú ní caⁿ'á nanááⁿ Chiidá. ¹³Ní tanducuéⁿ'ē chi caaca nī Chiidá ndúúcū chi duuchí, chuū 'úú idiíⁿ niicu Chiidá miⁿ ní 'cuuví 'cuuⁿ'míⁿ yā poder caavā 'úú. ¹⁴Ndúúti chi dē'ē chi caaca nī ndúúcū chi duuchí, 'úú ní díⁿ.

**Jesús caⁿ'a yā dicho'ó yā Espíritu
N'dai yeⁿ'e Dendyuūs**

¹⁵Ndúúti chi neⁿ'e nī 'úú, díⁿ nī chi ngaⁿ'a ley yeⁿ'é. ¹⁶'Úú di'cuíitu Chiidá ní teé yā taama yā chi teé yā poder ndis'tií. Ní cuneé yā ndúúcu nī cuen'e daāⁿ'maⁿ. ¹⁷Espíritu ngaⁿ'a yā vaadi cuaacu. Chiiⁿ chi nguée 'cuúⁿ 'iiⁿ'yāⁿ yeⁿ'e iⁿ'yeēⁿdí caati nguée 'iiⁿ'yāⁿ s'eeⁿ inaaⁿ yā ní nguée ntúūⁿ ní n'diichí yā Espiritu miⁿ.

Naati ndís'tií n'diichí nī ti Espiritu miⁿ canée ndúúcū ndís'tií ní cunée ntúūⁿ yeⁿ'ē ndis'tií. ¹⁸Nguée cu'neéⁿ ndís'tií da'caiya nguá'āa. Ndaá nanaáⁿ ndis'tií. ¹⁹Tēē 'téé nūⁿ 'āā ntée snaāⁿ iⁿ'yeēⁿdí 'úú. Ndís'tií ní snaāⁿ nī 'úú. Caati 'úú ní canduūchí, ní ndís'tií canduuchi ntúūⁿ nī. ²⁰Tuu'mí nguuví miⁿ ní canée chi n'diichí nī 'úú chi caneé ndúúcū Chiidá. Ní ndís'tií canee nī nduucú. Ní 'úú caneé ndúúcu nī. ²¹Du'ú 'iiⁿ'yāⁿ chi canee yā ndúúcū ley yeⁿ'é ní díⁿ yā tan'dúúcā chi ngaⁿ'a ley yeⁿ'é, 'iiⁿ'yāⁿ miⁿ chi neⁿ'é yā 'úú. Ní 'iiⁿ'yāⁿ chi neⁿ'é yā 'úú, Chiidá neⁿ'e ntúūⁿ yā 'iiⁿ'yāⁿ miⁿ ní 'úú ní neⁿ'é ntúūⁿ 'iiⁿ'yāⁿ miⁿ. Ní 'úú 'cuuⁿ'míⁿ maáⁿ nanááⁿ 'iiⁿ'yāⁿ miⁿ.

²²Tuu'mí ngaⁿ'ā Judas ngii sá Jesús (nguée saⁿ'ā Judas Iscariote): Señor, ¿dē'e véé chi 'cuuⁿ'míⁿ nī nanááⁿ nús'uu ní nguée nanááⁿ 'iiⁿ'yāⁿ yeⁿ'e iⁿ'yeēⁿdí?

²³Nan'guēcútaⁿ'ā Jesús ní caⁿ'a yā: Dú'ú 'iiⁿ'yāⁿ chi neⁿ'e yā 'úú, nduudu yeⁿ'é n'giindiveéⁿ yā. Ní Chiidá míⁿ neⁿ'é yā 'iiⁿ'yāⁿ. Ní ndaá 'nū nanááⁿ yā. Ní ndaāca 'nū naachi 'cuëetinée 'nū nduucú yā. ²⁴Du'ú 'iiⁿ'yāⁿ chi nguée neⁿ'é yā 'úú ní nguée n'giindiveéⁿ yā nduudu yeⁿ'é. Nduudu chí n'giindiveéⁿ nī nguée yeⁿ'é caati yeⁿ'ē Chiidá chi dichó'o yā 'úú.

²⁵Chuū ngaⁿ'á taachi caneé ndúúcū ndís'tií. ²⁶'Iiⁿ'yāⁿ chi tee yā poder s'uuúⁿ, 'iiⁿ'yāⁿ miⁿ ní Espiritu N'dai yeⁿ'e Ndyuūs. Chuū chi dichó'o Chiidá ndúúcū chi duuchí. 'Iiⁿ'yāⁿ míⁿ ca'cuaeⁿ yā ndís'tií tanducuéⁿ'ē dendu'ū. Ní nin'gaacú yā ndís'tií tanducuéⁿ'ē chi caⁿ'á nanááⁿ ndís'tií.

²⁷Chí cunee 'diiⁿ cu'neéⁿ ndúúcu ndís'tií. Chí cu'neéⁿ 'diiⁿ yeⁿé maaⁿ teé ndis'tií. Nguéé tan'dúúca chí iⁿ'yeēⁿdí teē chí 'úú teé ndis'tií. Nguéé 'cuūndi daānā yeⁿe staava yeⁿé nī, ndíí nguéé ndúú 'va'a rá nī. ²⁸Ch'iindiveéⁿ nī chí 'úú ngaⁿá: Caⁿá ní cuchii ntūuⁿ nanááⁿ ndís'tií. Ndúúti chí neⁿé nī 'úú, tuu'mi ní cuaacu níⁿnyúⁿ chí yeenú taavi nī ti ngaⁿá chí caⁿá nanááⁿ Chiidá. Ní Chiidá vmnaaⁿ cá yā ní chí cuuvi 'úú. ²⁹Maaⁿ ní ngaⁿá yeⁿe chí cuuvi, ní 'iicu taachi chó'oo chuū cuuvi cu'téenu nī.

³⁰Āā ntéé 'yaaⁿ caⁿá ndúúcu ndis'tií caati ndaa saⁿā chí 'iiⁿntyéⁿē yeⁿe iⁿ'yeēⁿdí 'cūū. Ní nguéé du'ū vee canéé yeⁿé yā nduucú. ³¹Iicu cuuví cu'téenu 'iiⁿyāⁿ yeⁿe iⁿ'yeēⁿdí chí 'úú neⁿé Chiidá. Ní tan'dúúca chí Chiidá ca'á yā mandamiento 'úú 'tíicā chí díⁿ. Ncueeⁿ yú ní caⁿa yú maaⁿ.

Jesús tan'dúúca 'áamá dii'yu dúnde'e chí cuaacu

15 Caⁿa Jesús: 'Úú tan'dúúca dii'yu dúnde'e chí cuaacu, ní Chiidá díⁿ yā cuidado yeⁿe dii'yu dúnde'e. ²Tanducuéⁿe duuⁿnē yeⁿé chí nguéé dē'ē vee n'gui'i yeⁿē 'caacá yā ní diví yā. Ní nducuéⁿē duuⁿnē chí vée n'gui'i yeⁿē ní didēvē yā 'iicu cuuví n'deē ca n'gui'i yeⁿē. ³Ndís'tií 'āā dēvē nī cáāvā nduudu chí ngaⁿá. ⁴Ndís'tií cunée nī nduucú ní 'úú cunee ndúúcu nī. Tan'dúúca duúⁿne nguéé 'cuētínē n'gui'i yeⁿē nduūti chí nguē canéé na dii'yu dúnde'e, 'tiicā ntūūⁿ ndis'tií nduuti chí nguéé cunée nī nduucú.

⁵'Úú tan'dúúca dii'yu dúnde'e ní ndís'tií ní dúuⁿnē. 'Iiⁿyāⁿ chí canée yā nduucú ní 'úú canee nduucú yā, 'iiⁿyāⁿ miⁿ néénē n'dee n'gui'i candée yā. Ndúúti chí nguéé 'úú nduucú yā ní nguéé dē'ē vee cuuvi díⁿ yā. ⁶Du'u 'íiⁿyāⁿ chí nguē canée yā nduucú cun'dáa yā tan'dúúca dúúⁿne chí nguéé n'gui'i yeⁿē ní ntí'i. Ní 'iiⁿyāⁿ ita'á yā ní ngii yā na yaⁿā. Ní ngiichi.

⁷Ndúúti chí canée nī nduucú, ní nduudu yeⁿé canee nduucú nī, caaca nī tanducuéⁿē chí neⁿé nī ní cuuvi. ⁸Taachi candē nī n'deē n'dáí n'gui'i yeⁿé nī, ní ch'iⁿi nī chí discípulos yeⁿé tuu'mi ní ndúúcu chuū ní ch'iⁿi nī poder Chiidá. ⁹Tan'dúúca chí neⁿe Chiidá 'úú 'tiicā ntūūⁿ 'úú neⁿé ndís'tií. Cunée nī ndúúcu vaadi neⁿe yeⁿé. ¹⁰Ndúúti chí díⁿ nī tan'dúúca chí ngaⁿa ley yeⁿé, tuu'mi cunee nī ndúúcu vaadi neⁿe yeⁿé. Ní chuū tan'dúúca chí 'úú idiⁿ nducuéⁿē chí ngaⁿa ley yeⁿē Chiidá ní canee ndúúcu vaadi neⁿe yeⁿé yā.

¹¹Dendú'ū chí 'tuucā ngaⁿá. Níicú vaadi yeenú yeⁿé cunee nduucú nī. Ní vaadi yeenú yeⁿé nī diiⁿ cumplir. ¹²Chuū ley yeⁿé chí dineⁿé nī vi'i 'aama nī taama nī tan'dúúca chí 'úú neⁿé ndis'tií. ¹³Mar 'áamá saⁿā nguéé vaadi neⁿe chí ch'ēete cá yeⁿē chí 'cuuvi 'áamá saⁿā caavā amigo yeⁿē sa. ¹⁴Ndís'tií ní amigos yeⁿé ndís'tií ndúúti chí díⁿ nī cosa chí 'úú ngaⁿá. ¹⁵Āā ntéé caaⁿmáⁿ chí ndis'tií ní mozos yeⁿé ti mozos nguē deenu sa dē'ē chí diiⁿ 'iiⁿyāⁿ chí ngaⁿa ntiⁿnyúⁿ yā yeⁿē sa. Naati ngaⁿá chí ndís'tií ní amigos yeⁿé ti tanducuéⁿē chí ngiindiveéⁿ

yeⁿē Chiidá, ngaⁿá ngí ndis'tií.

¹⁶Ndís'tií nguée ndeēve nī 'úú, naati 'úú nindeēvé ndís'tií. Ní 'neéⁿ ndís'tií caati cuuvi candée nī n'gui'i. Ní n'gui'i yeⁿe nī 'áámá cūnee. Ní tanducueⁿē chi caaca nī Chiidá ndúúcū chi duuchí, 'iⁿ'yāⁿ miiⁿ ní téé yā ndís'tií. ¹⁷Chuū ní ngaⁿá ndis'tií chi dinéⁿe nī vī'i 'áámá nī táámá nī.

**'Iⁿ'yāⁿ yeⁿe iⁿ'yeēⁿdī
nguée n'diichi ndís'tií**

¹⁸Ndúúti chi 'iⁿ'yāⁿ yeⁿe iⁿ'yeēⁿdī nguée neⁿe yā ndís'tií 'āā déenu nī chi vmnáāⁿ vmnaaⁿ nguée neⁿe yā 'úú. ¹⁹Ndúúti chi canée nī ní dífⁿ nī cosas ndúúcū 'iⁿ'yāⁿ yeⁿe iⁿ'yeēⁿdī, 'iⁿ'yāⁿ yeⁿe iⁿ'yeēⁿdī dinéⁿe yā ndís'tií, naati ndís'tií nguée yeⁿe iⁿ'yeēⁿdī ndís'tií. Ndeēvé ndís'tií vmnaāⁿ yeⁿē chi din'dái iⁿ'yeēⁿdī. Cáávā chuū chi iⁿ'yeēⁿdī nguée neⁿe ndís'tií. ²⁰N'gaacu nī yeⁿe nduudu chi 'úú ngaⁿá ngí ndis'tií: Nguée vmnaaⁿ ca 'iⁿ'yāⁿ chi diiⁿ mandado ti 'iⁿ'yāⁿ chi ngaⁿa ntiⁿ'nyuⁿ. Ndúúti chi 'iⁿ'yāⁿ s'tíi ní can'daa yā 'úú 'tiicá ntúūⁿ can'daa yā ndís'tií. Nduuti chi dífⁿ yā tan'dúúcā chi ngaⁿá 'tiicá ntúūⁿ dífⁿ yā tan'dúúcā chi ngaⁿá nī. ²¹Tanducueⁿē chuū dífⁿ yā ndúúcū ndis'tií caavā chi duuchí ti nguée n'diichí yā 'iⁿ'yāⁿ chi dichó'o yā 'úú.

²²Ndúúti chi nguée ndaá ndíi nguée ndúú yaa'ví rá 'iⁿ'yāⁿ tuu'mi 'iⁿ'yāⁿ ní nguée déenu yā chi véé nuuⁿndi yeⁿé yā. Maaⁿ ní nguée mar 'áámá yā chi cuuvi caaⁿ'máⁿ yā chi nguée véé nuuⁿndi yeⁿē yā. ²³'Iⁿ'yāⁿ chi nguée neⁿe yā 'úú 'tiicá ntúūⁿ Chiidá mífⁿ ní nguée neⁿe yā

'iⁿ'yāⁿ. ²⁴Ndúúti chi 'úú nguée dífⁿ nguaaⁿ yā ntiⁿ'nyūⁿ chi mar 'áámá 'iⁿ'yāⁿ nguée dífⁿ yā, nguée déenu yā chi véé nuuⁿndi yeⁿē yā. Naati maaⁿ ní n'diichí yā 'úú, ní nguée neⁿé yā 'úú ndúúcū Chiidá. ²⁵'Icu cuuví cuaacu nduudu chi canée nguūⁿ na ley yeⁿē yā: Nguée de'ē caavā chi nguē neⁿé yā 'úú.

²⁶Naati taachi ndaá yā 'iⁿ'yāⁿ chi Espíritu N'dai yeⁿe Dendyuūs ní téé yā poder s'uuūⁿ. Ní 'úú ní dicho'o Espíritu N'dai chi yeⁿē Chiidá. Espíritu N'dai yeⁿe Dendyuūs ní cuaacu ní cuchii yeⁿē Chiidá. Espíritu miiⁿ caaⁿ'maⁿ cuaacú yā yeⁿē 'úú. ²⁷'Icu ndís'tií ní caaⁿ'maⁿ cuaacú nī yeⁿē 'úú caati canée nī nduucú ndii cuááⁿ naachi chi ngaⁿá.

16 Caⁿ'a Jesús: Chuū ngaⁿá ngí ndis'tií 'iⁿ'yāⁿ nguée nduuví taáⁿ nī. ²'Iⁿ'yāⁿ ní 'cuēecú yā ndís'tií cuaaⁿ chuva'āi yaācū. Ní taachí ndaá hora chi 'caaⁿ'núⁿ yā ndís'tií, nacádiinúúⁿ yā chi n'daacā idiíⁿ yā ntiⁿ'nyuⁿ yeⁿé Dendyuūs. ³Ní 'iⁿ'yāⁿ s'tíi ní 'tíicā idiíⁿ yā ti nguē n'diichí yā Chiidá, ndii nguée nduu 'úú ra. ⁴Maaⁿ ní ngaⁿá ngí chuū ndis'tií caati taachí ndaa hora miiⁿ n'gáacú nī ti 'úú ní 'āā caⁿ'á. Chuū ní nguée caⁿ'á ndíi cuaaⁿ vmnaaⁿ ti 'úú canée ndúúcū ndis'tií.

**Ntiⁿ'nyuⁿ yeⁿē Espíritu
N'dai yeⁿe Ndyuūs**

⁵Caⁿ'a Jesús: Naati maaⁿ ní caⁿ'á n'diichí 'iⁿ'yāⁿ chi dichó'o 'úú. Ní mar 'áámá ndís'tií nguée ntiinguuneéⁿ nī 'úú: ¿Tíi caⁿ'a nī? ⁶Chiiⁿ chi caⁿ'á chi 'túúcā, ní néené chii ndaāchií staava yeⁿē nī. ⁷'Úú ngaⁿá nduudu cuaacu miiⁿ: N'daacā

caávā ndís'tiī chi caⁿá. Ndúútí chi 'úú nguée caⁿá tuu'mi ní Espíritu N'dai yeⁿe Dendyuūs chi tée yā poder ndís'tiī nguée ndai yā nanááⁿ ndís'tiī. Ndúútí chi 'úú caⁿá ní 'úú dicholó 'iⁿyāⁿ. ⁸Taachí 'iⁿyāⁿ miiⁿ ní ndāa yā, ní caaⁿmáⁿ yā ndúúcū 'iⁿyāⁿ yeⁿe iⁿyeēⁿdí yeⁿe nuuⁿndi, ní yeⁿe vaadī cuaacu, ní yeⁿe 'iⁿyāⁿ chi diiⁿ juzgar. ⁹Caaⁿmáⁿ yā yeⁿe nuuⁿndi chi nguée i'téenu yā 'úú. ¹⁰Caaⁿmáⁿ yā yeⁿe vaadī cuaacu chi 'úú caⁿá nanááⁿ Chiidá ní 'āā ntéé n'diichí yā 'úú. ¹¹Caaⁿmáⁿ yā nuuⁿndi yeⁿe 'áámá 'iⁿntyēⁿe ch'etē yeⁿe iⁿyeēⁿdí cūū 'āā canéé juzgado sa.

¹²Nééné n'deee dendu'ū chi véé chi cuuví ndis'tiī naati maaⁿ ní nguē cuuví cūnee ná vaanicadiinūⁿ yeⁿé nī. ¹³Taachí ndaá Espíritu yeⁿé vaadī cuaacu, 'iⁿyāⁿ miiⁿ ní ca'cuéēⁿ yā ndís'tiī na tanducuéⁿe vaadī cuaacu. Ní nguée caaⁿmáⁿ yā yeⁿe maáⁿ yā ti caaⁿmáⁿ yā tanducuéⁿe chi n'giindiveēⁿ yā. Ní ch'iⁿi yā ndis'tiī dē'ē chí cuchii. ¹⁴'iⁿyāⁿ miiⁿ ní ch'iⁿi yā poder yeⁿé ti cuta'á yā poder yeⁿe 'úú ní ch'iⁿi yā ndis'tiī. Ní cuuvi cádiinúúⁿ nī. ¹⁵Nducuéⁿe chi véé yeⁿe Chiidá, chuū ní yeⁿé. Cáávā chuū ngaⁿá chi Espíritu yeⁿe vaadī cuaacu cuta'á yā yeⁿe 'úú ní ch'iⁿi yā ndís'tiī. Ní cádiinúúⁿ nī.

Chi ndaachí yeⁿé nī ní nduuvi vaadī yeenú

¹⁶Caⁿa Jesús: Taa 'lííⁿ ní 'āā ntéé snaáⁿ nī 'úú. Taama vmnéⁿee, taa 'lííⁿ ní snaáⁿ nī 'úú ti 'úú ní caⁿá nanááⁿ Chiidá.

¹⁷Tuu'mí caⁿa n'duuvi discípulos yeⁿé yā ngii yā 'áámá yā táamá

yā: ¿De'ē chi 'tíicā ngaⁿa yā ngii yā s'uuúⁿ taaⁿ 'lííⁿ ní 'āā ntéé chinaáⁿ nī 'úú ní taama vmnéⁿee taaⁿ 'lííⁿ ní chinaáⁿ nī 'úú, ti 'úú ní caⁿá nanááⁿ Chiidá? ¹⁸Tuu'mi ní ngaⁿa yā. ¿De'ē chi 'tíicā taaⁿ 'lííⁿ? Nguée tuumicadiinuuⁿ yú.

¹⁹Ní tuumicadiinuuⁿ Jesús chi neⁿe ntiinguuneeⁿ saⁿā s'eeⁿ, ní ngaⁿa yā: ¿Áá ntínguúneeⁿ vi'í nī chi 'túúcā caⁿá chíí taaⁿ 'lííⁿ ní 'āā ntéé chi naaⁿ nī 'úú, ní taama vmnéⁿee, taa 'lííⁿ ní chi naáⁿ nī 'úú? ²⁰Cuaacu níⁿnyú cuācū niiⁿnyuⁿ ngaⁿá ngii ndis'tiī: Maaⁿ ní cuēecu nī ní ya'ai nī. Ní iⁿyeēⁿdí ní cuuvi yeenú naati ndís'tiī ní chi n'daaⁿ chi yá'ai nī ndúúcū vaadī yeenú. ²¹N'daataá chí canee chi 'āā 'cuundiyāā daiyā tá, véé vaadī ya'ai yeⁿe ta, ti 'āā chéé ndaa hora yeⁿe tá. Taachí 'āā véé daiyā tá 'āā ntéé n'gaacu tá yeⁿe vaadī ya'ai yeⁿe tá chi yeenú tá chi véé 'áámá daiyā tá yeⁿe iⁿyeēⁿdí. ²²Tiicá ntúūⁿ ndís'tiī ní canéé vaadī ndaachíí nanááⁿ nī. Naati taama vmnéⁿee ní n'diichí ntúūⁿ ndís'tiī. Ní cuneé nī vaadī yeenú na staava yeⁿé nī. Ní mar 'áámá 'iⁿyāⁿ ní nguée diví yā vaadī yeenú yeⁿé ndis'tiī.

²³Ní nguuvi miiⁿ nguée ntiinguuneeⁿ nī du'ū vē yeⁿé. Cuaacu níⁿnyúⁿ cuācū niiⁿnyuⁿ ngaⁿá ngii ndís'tiī chi tanducuéⁿe chí caaca nī Chiidá ndúúcū chi duuchí ní Chiidá tée yā ndís'tiī. ²⁴Ndii maaⁿ nguée du'ū vē ngiica nī ndúúcū chi duuchí. Caaca nī ní Chiidá tée yā ndís'tiī. Ní vaadī yeenú yeⁿé nī cuuvi yeenu taavi.

Jesús chicheé yā ndúúcū iⁿyeēⁿdí

²⁵Chuū chi ngaⁿá ndúúcū cuentas yeⁿé ndúúcū ndís'tiī. Maaⁿ ní ndaa

hora chi 'āā ntéé caⁿ'á yeⁿ'é ndis'tii ndúú^{cū} cuentas naati caaⁿ'máⁿ cuaacu yeⁿ'ē Chiidá. ²⁶Nguuvi miiⁿ ní caaca nī ndúú^{cū} chi duuchí. Ní 'úú nguéé ngaⁿ'á chi 'úú nídi'cuíftú Chiidá cáávā ndis'tii. ²⁷Maaⁿ Chiidá neené neⁿ'é yā ndís'tii caati ndís'tii neⁿ'é nī 'úú. Ní i'teenú nī chi 'úú chiicá yeⁿ'ē Chiidá. ²⁸Chiicá yeⁿ'ē Chiidá ní ndaá iⁿ'yeēⁿdí 'cūū. Cu'neēⁿ ntuúⁿ iⁿ'yeēⁿdī. Ní naⁿ'á n'diichí Chiidá.

²⁹Tuu'mí ngaⁿ'a discípulos yeⁿ'é yā: Cun'díichí dí maaⁿ ní ngaⁿ'ā cuaacu di nguéé ndúú^{cū} cuentas. ³⁰Maaⁿ ní tuumicadiinúúⁿ 'nū chi deenú nī tanducuéⁿ'ē dendu'ū. Ní nguéé canee ngiinú nī chi ntiinguuneeⁿ 'iiⁿ'yāⁿ n'diī. Cáávā chuū i'teenú 'nū chi chiica nī yeⁿ'é Dendyuūs.

³¹Nan'guæcútaⁿ'ā Jesús: ¿'Áá i'téenu nī maaⁿ? ³²Cun'diichí nī. Hora miiⁿ ní cuchii. Ní 'āā ndaā chí caⁿ'ā 'muuⁿ caⁿ'ā miiⁿ ndís'tii na vaacú nī. Ní cu'neēⁿ nūuⁿ nī 'úú dámaaⁿ. Naati nguéé canee dámaaⁿ ti Chiidá canée yā nduucú. ³³Chuū nī ngaⁿ'á ngí ndis'tii chi cucáávā 'úú canee 'diifⁿ nī. Iⁿ'yeēⁿdī ní 'cúeenú nī cuuvi. Cuuvi ch'ëētiinúu nī. 'Úú ní chichëé ndúú^{cū} iⁿ'yeēⁿdī.

Jesús ndee yā ndúú^{cū} Chiidá yā caavā discípulos yeⁿ'é yā

17 Chuū caⁿ'a Jesús ní n'diichí yā cuaaⁿ nanguuvi ní caⁿ'a yā: N'diī Chiidá, hora yeⁿ'é ní 'āā ndaā. Díⁿ nī dich'eté nī Daiya nī. 'Tiicā ntūūⁿ 'úú chi Daiya nī cuuvi dich'eté n'diī. ²Tan'dúú^{cā} chi tee nī poder 'úú chi Daiya nī yeⁿ'e dë'ē

chi díⁿ nducyaaca 'iiⁿ'yāⁿ cáávā chí caⁿ'á vida cueⁿ'e daāⁿ'maⁿ 'iiⁿ'yāⁿ chi tee nī 'úú. ³Chuū chi vida cueⁿ'e daāⁿ'maⁿ chí n'diichí yā n'diī chi 'áámá n'dyaⁿ'ā Dendyuūs chi cuaacu níⁿ'nyúⁿ chí Dendyuūs ndúú^{cū} Jesucristo chí dich'óo nī.

⁴'Úú ní dich'eté n'diī na yáⁿ'āa 'cūū. 'Āā ch'iinú díⁿ ntiⁿ'nyuⁿ chi tee nī chí díⁿ. ⁵Maaⁿ ní n'diī, Chiidá, dich'eté nī 'úú, n'diī ndúú^{cū} maáⁿ nī, ndúú^{cū} poder chi canee nduucú maáⁿ taachi 'āā 'cuéé cunee iⁿ'yeēⁿdī.

⁶Ngaⁿ'a cuaacú yeⁿ'ē chi duuchi yeⁿ'é nī nanááⁿ saⁿ'ā s'eeⁿ yeⁿ'e iⁿ'yeēⁿdí 'cūū chi tee yā 'úú. Saⁿ'ā s'eeⁿ yeⁿ'é nī. Ní tee nī 'úú. Ní n'giindiveéⁿ yā nduudu yeⁿ'é nī. ⁷Maaⁿ ní déenú yā chi tanducuéⁿ'ē dendu'ū chí tee nī 'úú ní yeⁿ'é nī. ⁸Ti ndúú^{dú} chí tee nī 'úú ní caⁿ'á nanááⁿ 'iiⁿ'yāⁿ ní 'iiⁿ'yāⁿ s'eeⁿ ní n'giindiveéⁿ yā nduudu miiⁿ. Ní deenu cuaacu yā chí chiicá nanááⁿ n'diī. Ní i'téenu yā chí n'diī dicho'óo nī 'úú.

⁹'Úú ngiicá caavā 'iiⁿ'yāⁿ s'eeⁿ. Nguéé nídi'cuíftú cáávā iⁿ'yeēⁿdī ti cáávā 'iiⁿ'yāⁿ chí tee nī 'úú, ti yeⁿ'é n'diī. ¹⁰Ní taanduvéé dendu'ū yeⁿ'é ní yeⁿ'é nī. Ní taanduvéé dendu'ū yeⁿ'é nī ní yeⁿ'é. Ní chuū ch'iⁿ'i poder yeⁿ'é.

¹¹Ní 'āā ntéé cūneé iⁿ'yeēⁿdī naati 'iiⁿ'yāⁿ s'eeⁿ snée yā iⁿ'yeēⁿdī. 'Úú ní cuchí nanááⁿ nī. N'diī Chiidá chí dëve, díⁿ nī cuidado 'iiⁿ'yāⁿ chí tee nī 'úú ndúú^{cū} chí duuchí nī. Ní chí cuuví 'áámá yā tan'dúú^{cā} s'uuúⁿ ní 'áámá yú. ¹²Taachí canee ndúú^{cū} 'iiⁿ'yāⁿ iⁿ'yeēⁿdī ní diiⁿ cuidado 'iiⁿ'yāⁿ ndúú^{cū} chí duuchi

nī, 'iɪⁿɪyāⁿ chi nteé nī 'úú. 'Úú ní dīiⁿ cuidado 'iɪⁿɪyāⁿ ní mar 'áámá yā nguée chindāi yā. 'Áámá nūuⁿ saⁿā daiya yááⁿnguiniūⁿ chindai sa. Ní 'iicu naachi cánée nguūⁿ ní cúúví cuaacu.

¹³Naati maaⁿ ní cuchií nanáaⁿ nī. Ní ngaⁿá chuū taachi cuneé iⁿ'yeēⁿdí 'cūū caati vaadi yeēnu yeⁿ'é canée nduucú yā, ní cuuvi yeenú taavi yā. ¹⁴'Úú ní ca'á 'iɪⁿɪyāⁿ nduudu yeⁿ'e nī. Iⁿ'yeēⁿdí nguée dinéⁿe 'iɪⁿɪyāⁿ ti nguée yeⁿ'e iⁿ'yeēⁿdí 'iɪⁿɪyāⁿ. 'Tiicá ntúūⁿ nguée yeⁿ'e iⁿ'yeēⁿdí 'úú. ¹⁵Nguée d'icuíitūu chi ndiví nī 'iɪⁿɪyāⁿ yeⁿ'e iⁿ'yeēⁿdí. Dííⁿ nī cuidado 'iɪⁿɪyāⁿ s'eeⁿ yeⁿ'e yááⁿnguiniūⁿ. ¹⁶Nguée yeⁿ'e iⁿ'yeēⁿdí 'iɪⁿɪyāⁿ s'eeⁿ tan'dúúca chi nguée yeⁿ'e iⁿ'yeēⁿdí 'úú. ¹⁷Dííⁿ nī didéevé nī 'iɪⁿɪyāⁿ cucáávā nduudu cuaacu yeⁿ'é nī. Nduudu yeⁿ'é nī ní nduudu cuaacu. ¹⁸Tan'dúúca chi dicho'ó nī 'úú iⁿ'yeēⁿdí 'tiicá ntúūⁿ dicho'ó 'iɪⁿɪyāⁿ s'eeⁿ iⁿ'yeēⁿdí. ¹⁹Cáávā 'iɪⁿɪyāⁿ s'eeⁿ 'úú māaⁿ didéevé maáⁿ. Ní 'iɪⁿɪyāⁿ s'eeⁿ cuuví yā dēeve na nduudu cuaacu.

²⁰Nguée d'icuiitūu dámaaⁿ caavā 'iɪⁿɪyāⁿ miiⁿ ti cáávā 'iɪⁿɪyāⁿ chi cu'téenu yā 'úú cáávā nduudu yeⁿ'e 'iɪⁿɪyāⁿ s'eeⁿ. ²¹Ní nducyaaca yā ní 'áámá nūuⁿ cuuví yā tan'dúúca n'dií canée nī nduucú, ní caneé nduucú nī. Níicú 'iɪⁿɪyāⁿ s'eeⁿ ní canée ntúūⁿ yā 'áámá nūuⁿ ndúúcu yú. Ní 'iicu cu'téenu 'iɪⁿɪyāⁿ yeⁿ'e iⁿ'yeēⁿdí chi n'dií dicho'ó nī 'úú. ²²Ní poder chi téé nī 'úú, miiⁿ ni ca'á 'iɪⁿɪyāⁿ. Ní 'áámá nūuⁿ cuuví yā tan'dúúca chi 'áámá nus'ūu. ²³'Úú ní ndúúcu 'iɪⁿɪyāⁿ s'eeⁿ. Ní n'dií ní ndúúcu 'úú. Níicú 'áámá nūuⁿ chi n'daacā cuuví yā. Ní

iⁿ'yeēⁿdí ní cuuvi deenu chi dicho'ó nī 'úú ní chí dinéⁿe nī 'iɪⁿɪyāⁿ s'eeⁿ tan'dúúca chi neⁿ'é nī 'úú.

²⁴N'dií Chiidá, 'iɪⁿɪyāⁿ s'eeⁿ chi téé nī 'úú, neⁿ'é chi naachi 'úú cuneéⁿ, 'iɪⁿɪyāⁿ s'eeⁿ cūnée yā nduucú. Ní cuuvi n'diichí yā poder yeⁿ'é chi téé nī 'úú caati n'dií ní neⁿ'é nī 'úú ndií taachi 'āa 'cuée iⁿ'yeēⁿdí. ²⁵N'dií Chiidá chi dēeve, 'aa ntéé rá chi iⁿ'yeēⁿdí nguée n'diichí n'dií 'úú n'diichí n'dií. Ní 'iɪⁿɪyāⁿ s'tií ní deenú yā chi n'dií dicho'ó nī 'úú. ²⁶'Úú ní ngaⁿá yeⁿ'e chi duuchí nī, ní caⁿá ngāⁿa yeⁿ'e chi duuchí nī. Níicú maaⁿ vaadi neⁿ'e chi néⁿ'e nī 'úú cuuvi cunée ndúúcu yā. Ní 'úú caneé ndúúcu yā.

Sta'á yā Jesús

(Mt. 26.47-56; Mr. 14.43-50; Lc. 22.47-53)

18 Taachí Jesús caⁿá yā chuū, can'dáa yā ndúúcu discípulos yeⁿ'é yā táámá lado yíicú 'lííⁿ chi nguuví Cedrón naachi canée 'áámá cheēⁿ yeⁿ'e naāndā. Ní miiⁿ sndaā Jesús ndúúcu discípulos yeⁿ'é yā. ²Judas chí diíⁿ sa entregar Jesús ní n'diichi ntúūⁿ saⁿā na cheēⁿ miiⁿ ti 'āa cánée n'dee cuuví nduuvíadáámá yā Jesús ndúúcu discípulos yeⁿ'é yā na cheēⁿ miiⁿ. ³Saⁿā chiiduú n'geeté ndúúcu saⁿā fariseos teé yā Judas Iscariote soldados ndúúcu policías ní Judas cueⁿ'e sa ndúúcu 'aama taaⁿ soldados ndúúcu policías. Ndaa yā na cheēⁿ miiⁿ ndúúcu lámparas, ndúúcu antorchas, ndúúcu armas. ⁴Naati Jesús chi déénú yā tanducuéⁿe dendu'ú chí cuchií, cueⁿ'e yā ní ndaa yā nanáaⁿ 'iɪⁿɪyāⁿ s'eeⁿ ní caⁿ'a yā: ¿Du'u in'nuúⁿ nī?

⁵Ní nan'guεεcutáⁿa sa yeⁿe yā: Jesús yeⁿē yāāⁿ Nazaret miiⁿ. Tuu'mí ngaⁿa Jesús ngíí yā 'iiⁿyāⁿ s'eeⁿ: 'Úú 'iiⁿyāⁿ miiⁿ. Canée ntúūⁿ Judas miiⁿ, saⁿā chí dííⁿ nca'a sa 'iiⁿyāⁿ. ⁶Taachí Jesús caⁿa yā: 'Úú 'iiⁿyāⁿ miiⁿ, tuu'mi ní saⁿā s'eeⁿ ndaacadaamí yā ní ch'εεtindiití yā na yāⁿāa. ⁷Nan'guεεcúnéé ntuúⁿ yā tiinguuneeⁿ yā: ¿Du'u ra in'nuúⁿ nī? Ní 'iiⁿyāⁿ s'eeⁿ ní caⁿa yā: Jesús yeⁿē yāāⁿ Nazaret miiⁿ.

⁸Nan'guεεcútaⁿā Jesús: Āā ngaⁿā ngíí ndís'tii chí 'úú. Ndúúti chí 'úú chí in'nuúⁿ nī, 'cuāaⁿ nī chí naⁿa 'iiⁿyāⁿ s'tíí.

⁹Ní cuuvi cuaacu chí 'úú chí caⁿā: 'iiⁿyāⁿ chí teē nī 'úú, mar 'áamá yā nguéeⁿ chí ndai yā. ¹⁰Tuu'mi Simón Pedro chí ndée sa espada ní tun'dáa sa ní 'nuūcá'ai sa ní ch'iica sa veeⁿ sa lado tá cuaacu yeⁿē sáⁿā chí diiⁿ mandado yeⁿe chiiduú ch'εete ca. Ní saⁿā miiⁿ ní nguuví sa Malco. ¹¹Tuu'mí Jesús ngaⁿa yā ngii yā Pedro: N'nuūⁿ dí espada vaacu. Prueba chí teē Chiidá 'úú, ¿áá nguéeⁿ cánée chí 'cuenú cuuvi yeⁿē?

Jesús nanááⁿ chiiduú ch'εeté ca

(Mt. 26.57-58; Mr. 14.53-54; Lc. 22.54)

¹²Tuu'mi ní 'iiⁿyāⁿ yeⁿē 'áamá taaⁿ soldado ndúúcu soldado chí yuudu ndúúcu policías yeⁿē 'iiⁿyāⁿ Israel s'eeⁿ ní sta'a sa Jesús ní cachiichí sa 'iiⁿyāⁿ. ¹³Ní candée sa vmnáaⁿ vmnaaⁿ nanááⁿ saⁿā chí nguuví Anás, tii sáⁿā miiⁿ ní nchaⁿā ndiicú Caifás miiⁿ. 'Iiⁿyāⁿ miiⁿ ní chiiduú ch'εeté ca nduuyu miiⁿ. ¹⁴Ní Caifás miiⁿ ca'a sá consejo saⁿā Israel s'eeⁿ chí cánée chí 'cuūví 'aama saⁿā cáávā 'iiⁿyāⁿ.

Pedro canée yā chuva'ai yeⁿē Anás

(Mt. 26.69-70; Mr. 14.66-68; Lc. 22.55-57)

¹⁵Ní n'daā Simón Pedro Jesús miiⁿ ní táamá discípulos. Ní chiiduú ch'εeté ca n'diichí yā discípulos miiⁿ chí sndaá sa ndúúcu Jesús corredor yeⁿē va'ai yeⁿē chiiduú ch'εeté ca miiⁿ. ¹⁶Naati Pedro miiⁿ canée sá cuaaⁿ dáámí cheendi va'āi. Ní can'dáa taama discípulo chí chiiduú ch'εeté ca n'diichí yā 'iiⁿyāⁿ. Ní yaa'ví yā n'daataá chí cánée cheendi va'āi. Ní diiⁿyúⁿ yā Pedro míⁿ cheeti va'āi. ¹⁷Tuu'mi ní n'daataá chí diiⁿ mandado chí cánée cheendi va'āi ngaⁿa tá: ¿Áá nguéeⁿ díí ntúūⁿ 'áamá discípulo yeⁿē saⁿa 'cūū? Tuu'mí Pedro ngaⁿā sa: Nguéeⁿ 'úú.

¹⁸Ní chéendii saⁿā chí dichí'vē ndúúcu policías, saⁿā miiⁿ tiivi sa yaⁿā yeⁿe yíyū ti 'áamá 'iicheε. Saⁿā miiⁿ nga'a tavii'nu sa. Ní cánée nī ntúūⁿ Pedro ndúúcu sa. Ní chéendii sa nga'a tavii'nu sa ca'a sa.

Anás tiinguunéeⁿ sa Jesús

(Mt. 26.59-66; Mr. 14.55-64; Lc. 22.66-71)

¹⁹Ní chiiduú ch'εeté cá miiⁿ nítiinguuneeⁿ sa Jesús yeⁿe discípulos yeⁿē yā ndúúcu yeⁿe chí Jesús chí'cueéⁿ yā. ²⁰Jesús nan'guεεcutáⁿa yā yeⁿē sa: 'Úú ní ngaⁿā cuaacú nanááⁿ 'iiⁿyāⁿ yeⁿe iⁿyeēⁿdi. 'Úú ní chí'cueéⁿ na yaācū sinagogas ní na yaacū templo ntúūⁿ naachí nduuvidaama nducyaaca 'iiⁿyāⁿ Israel s'eeⁿ ní nguéeⁿ de'ē vεε chí ngaⁿa n'de'éeí. ²¹¿De'ē tíngúúnéeⁿ di 'úú? Tíngúúnéeⁿ dí 'iiⁿyāⁿ chí ch'iindiveéⁿ yā chí caⁿā chíí 'iiⁿyāⁿ. N'diichi nī. 'Iiⁿyāⁿ s'eeⁿ déénú yā chí caⁿā.

²²Taachí Jesús ch'iinu caⁿá yā chuū, 'áamá policía chi canéé miiⁿ ch'éⁿe sá Jesús, ní caⁿa sa: ¿Áá 'tíficā nan'gueecutáⁿa di yeⁿē chiiduú ch'etete ca?

²³Nan'gueecútaⁿā Jesús: Ndúúti chi nguē n'daacā chi ngaⁿá caaⁿmaⁿ di de'ē chi nguē n'daacā chi ngaⁿá. Ndúúti chi n'daacā, ¿de'ē cuuvi chi n'geⁿē di 'úú?

²⁴Anás miiⁿ ní dichó'o sa Jesús ch'ēchiichí yā nanááⁿ saⁿā chi nguuví Caifás miiⁿ, saⁿā chi chiiduú ch'eteté cá miiⁿ.

Pedro miiⁿ ngaⁿa sa taama vmnéⁿēe chí nguéé n'diichi sa Jesús miiⁿ

(Mt. 26.71-75; Mr. 14.69-72; Lc. 22.58-62)

²⁵Chééndii Simón Pedro miiⁿ ní nga'a taviiⁿu sa saⁿā. Ní ngaⁿa yā ngii yā saⁿā: ¿Áá nguéé 'tíficā chi díí ní discípulo yeⁿē yā? Pedro cheeⁿdíftu sa ní ngaⁿā sa: Nguéé 'úú.

²⁶Áamá saⁿā chi diiⁿ mandado yeⁿē chiiduú ch'eteté cá ní saⁿā miiⁿ ní 'iiⁿyāⁿ yeⁿe saⁿā chi chiica Pedro miiⁿ veeⁿ sa. Ngaⁿa sa ngii sa saⁿā: ¿Áá nguéé n'diichí dii ch'eteti chééⁿ naāndā miiⁿ ndúúcu yā?

²⁷Taama vmnéⁿēe ní cheeⁿdiitú táaⁿ Pedro: Nguéé 'úú. Ní miⁿniiⁿyu miⁿniiⁿyu ní tusaⁿā chiita tī.

Jesús nanááⁿ Pilato

(Mt. 27.1-2, 11-14; Mr. 15.1-5; Lc. 23.1-5)

²⁸Ní candée sa Jesús miiⁿ tyaaⁿ tyaaⁿ yeⁿē nanááⁿ Caifás miiⁿ ndii naachi canéé cuarto yeⁿē juzgado. Ní 'iiⁿyāⁿ s'eeⁿ ní nguéé chi ndáá yā cuaaⁿ ch'eteti va'ai ch'etete miiⁿ cáávā chi nguéé neⁿe yā chi cuneedáámí yā nuuⁿndi taachi ch'é yā nguiinú yeⁿē pascua. ²⁹Tuu'mi ní can'daá

Pilato chuva'ai nanááⁿ 'iiⁿyāⁿ s'eeⁿ ní caⁿa sa: ¿De'ē nuuⁿndi yeⁿē saⁿa 'cūū vee?

³⁰Nan'gueecutáⁿa yā ní caⁿá yā 'iiⁿyāⁿ: Ndúúti chi saⁿa 'cūū chi nguē du'ū vee diiⁿ sa, nguéé teé 'nū saⁿā n'dii.

³¹Tuu'mi ní ngaⁿā Pilato ngii sa 'iiⁿyāⁿ s'eeⁿ: Cuta'á nī 'iiⁿyāⁿ. Ní n'diichí yā de'ē nuuⁿndi yeⁿe yā véé tan'dúúca chi canéé na ley yeⁿē nī. Níicú 'iiⁿyāⁿ Israel s'eeⁿ ní caⁿa yā: Nús'uu ní nguéé cánéé chí 'caaⁿnuⁿ 'nū mar 'áamá 'iiⁿyāⁿ.

³²Ní cuuvi cuaacu chi caⁿa Jesús miiⁿ. Ní caⁿa yā chí cadiinuⁿ 'iiⁿyāⁿ de'ē vaadi n'gii 'cuuvi yā. ³³Níiⁿnuuⁿ ndáá ntūūⁿ Pilato cuarto yeⁿē juzgado. Ní 'cái sa Jesús miiⁿ ní caⁿa yā: ¿Áá díí chi Rey yeⁿē 'iiⁿyāⁿ Israel s'eeⁿ chi judíos?

³⁴Nan'gueecútaⁿā Jesús: ¿Áá ngaⁿa dii chuū yeⁿe maāⁿ di o 'iiⁿyāⁿ 'cūū ch'iⁿi yā ní ngaⁿa yā n'dii yeⁿē 'úú?

³⁵Pilato miiⁿ ní n'gueecutáⁿa sa: ¿Áá 'úú chi saⁿa Israel 'úú? 'Iiⁿyāⁿ yeⁿe nación yeⁿē di ndúúcu chiiduú n'geetē nteé yā dii 'úú. ¿De'ē ndiíⁿ di?

³⁶Nan'gueecútaⁿā Jesús: Cuaaⁿ naachi 'úú chi 'iiⁿntyeeⁿe nguéé canéé iⁿyeeⁿdí 'cūū. Ndúúti chi yeⁿē iⁿyeeⁿdí 'cūū naachi caaⁿmaⁿ ntiiⁿnyúⁿ tuu'mi ní 'iiⁿyāⁿ chi diiⁿ mandado yeⁿē ní 'cuuⁿmaⁿ yā cáávā 'úú ni nguéé nica'á yā 'úú 'iiⁿyāⁿ Israel s'eeⁿ. Maaⁿ ní cuaaⁿ naachi 'úú chi 'iiⁿntyeeⁿe nguéé yeⁿē iⁿyeeⁿdí 'cūū.

³⁷Tuu'mi ngaⁿa Pilato ngii sa 'iiⁿyāⁿ: Tuu'mi, ¿áá díí chí rey miiⁿ? Nan'gueecútaⁿā Jesús: Díí ngaⁿā

di chi rey 'úú ní 'tíicā 'úú. 'Úú ní cáávā chuū ch'iindiyáaⁿ, ní cáávā chuū chi ndaa iⁿ'yeeⁿdí 'cūū, caavā chi caaⁿ'maⁿ cuaacú yeⁿ'ē nduudu cuaacu. Nducyáácá 'iⁿ'yāⁿ chi yeⁿ'ē vaadi cuaacu miiⁿ, n'giindiveeⁿ yā nduudu yeⁿ'é.

Jesús canéé chí 'cuūvi yā

(Mt. 27.15-31; Mr. 15.6-20; Lc. 23.13-25)

³⁸Tuu'mí ngaⁿ'ā Pilato: ¿Chēe chí vaadi cuaacu? Taachí caⁿ'a Pilato chūū ní can'dáá ntuúⁿ sa nanááⁿ 'iⁿ'yāⁿ Israel s'eeⁿ: Ní caⁿ'a sa 'iⁿ'yāⁿ Israel s'eeⁿ: 'Úú ní nguée ndaācá mar 'áámá nuuⁿndi yeⁿ'é yā. ³⁹Naati cáávā costumbre yeⁿ'e ndís'tií ní 'úú caneecúuⁿmíⁿ chí ín'deēchí 'áámá saⁿ'ā chi preso sa 'viicu yeⁿ'e pascua. ¿Áá neⁿ'é nī chi ín'deēchí Rey yeⁿ'ē 'iⁿ'yāⁿ Israel s'eeⁿ?

⁴⁰Tuu'mí ní 'cai ntúūⁿ nducyaaca yā, ní ngaⁿ'a yā: Nguée 'iⁿ'yāⁿ 'cūū ti Barrabás. Níicú saⁿ'ā Barrabás miiⁿ ní neenē duucu sa.

19 Tuu'mí ní sta'āa Pilato Jesús miiⁿ ni ch'eⁿ'e sa 'iⁿ'yāⁿ.

²Ní soldados ní din'dáa sa 'áámá corona yeⁿ'ē yááⁿ ní chi n'duu sá na tíiⁿ yā. Ní ch'iⁿnuúⁿ sa 'áámá catecai morado 'iⁿ'yāⁿ. ³Ní caⁿ'a sa: Néené 'nááⁿ cānee di íⁿ'yeeⁿdi, dii, Rey yeⁿ'e 'iⁿ'yāⁿ yeⁿ'e Israel. Ní n'geⁿ'é sa 'iⁿ'yāⁿ.

⁴Tuu'mí can'dáa ntuūⁿ Pilato chufa'āi. Ní caⁿ'ā sa chii sa 'iⁿ'yāⁿ s'eeⁿ: Cuin'diichí nī, tun'daá 'iⁿ'yāⁿ chufa'āi niicu tuumicadiinúúⁿ nī chi nguée n'diichí mar 'áámá nuuⁿndi yeⁿ'é yā.

⁵Ní can'daā Jesús chufa'āi. Can'dée yā corona yeⁿ'e yááⁿ ndúúcu catecai morado yā. Ní ngaⁿ'a Pilato miiⁿ: Cun'díichí nī saⁿ'ā.

⁶Taachí n'diichí yā 'iⁿ'yāⁿ tuu'mí ní chiiduú n'geetē ndúúcu policías n'gai yiicu sa: Cu'néeⁿnga'á nī 'iⁿ'yāⁿ. Cu'néeⁿnga'á nī 'iⁿ'yāⁿ. Tuu'mí ngaⁿ'ā Pilato ngii yā 'iⁿ'yāⁿ s'eeⁿ: Cuta'a ndis'tií 'iⁿ'yāⁿ, ní cu'néeⁿnga'á nī 'iⁿ'yāⁿ, ti 'úú ní nguée indaacá mar 'áámá nuuⁿndi yeⁿ'e yā.

⁷Nan'gueecútaⁿ'ā 'iⁿ'yāⁿ Israel s'eeⁿ: Nús'uū ní cánée ley yeⁿ'é 'nū. Ní tan'dúúca chí ngaⁿ'a ley miiⁿ canee chí 'cuūvi caati caⁿ'a yā chí maáⁿ yā Daiya Dendyuūs 'iⁿ'yāⁿ.

⁸Taachí ch'iindiveeⁿ Pilato chuū dii'yā ca sá chíi. ⁹Chindáa ntuūⁿ sa cuarto yeⁿ'ē juzgado ní caⁿ'á yā chíi yā Jesús: ¿Tíi 'iⁿ'yāⁿ dii? Naati Jesús ní nguée caⁿ'a yā.

¹⁰Tuu'mí ní caⁿ'a Pilato Jesús: Dii, ¿'áá nguēe ngaⁿ'ā di yeⁿ'é? ¿'Áá nguée deenu di chí 'úú ní cúúvi caaⁿ'maⁿ ntiíⁿnyúⁿ chí cu'néeⁿnga'á nī dii, ní cuuvi n'teēchí ntúūⁿ dii?

¹¹Nan'gueecútaⁿ'ā Jesús miiⁿ: Nguée du'ū vee cuuvi diiⁿ di ndúúcu 'úú ndúúti chí nguée du'ū vee ndii ca'a yeⁿ'ē di yeⁿ'ē va'ai chēeti nguuvi. 'iⁿ'yāⁿ chí tee yā 'úú chí preso 'úú nanáá n'dií, 'iⁿ'yāⁿ miiⁿ dich'ēete ca nuuⁿndi yeⁿ'e yā.

¹²Ndíi tuu'mí ní neⁿ'e Pilato n'teēchi sa 'iⁿ'yāⁿ. Naati 'iⁿ'yāⁿ Israel s'eeⁿ n'gai yiicú yā ní ngaⁿ'a yā: Ndúúti chí saⁿ'á 'cūū n'teēchi di, nguée dii amigo yeⁿ'ē César. Nducyáácá 'iⁿ'yāⁿ chí ngaⁿ'a yeⁿ'é yā chí maáⁿ yā rey ngaⁿ'a yā contra César.

¹³Tuu'mí Pilato, taachi ch'iindiveeⁿ sa chuū, candée sa Jesús chufa'āi. Ní ch'iindi sa ná silla yeⁿ'e juzgado chí nguuvi Enlosado, ní nduudu

hebreo neⁿe caaⁿmaⁿ Gabata. ¹⁴Ní nguuví chī díiⁿ yā ntiⁿnyuⁿ yeⁿē 'viicu yeⁿē pascua, tan'dúúca ndiichúúví na nguuví. Tuu'mí ngaⁿa Pilato 'iiⁿyāⁿ Israel s'eeⁿ: Cuin'diichi ní Rey yeⁿé nī.

¹⁵Naati 'iiⁿyāⁿ s'eeⁿ 'caí yā diitú yā: Divíi nī 'iiⁿyāⁿ, divíi nī 'iiⁿyāⁿ, cu'nééⁿnga'á nī 'iiⁿyāⁿ. Tuu'mí ngaⁿa Pilato: ¿Áá rey yeⁿé nī chī cu'nééⁿnga'á nī? Tuu'mí nan'guēcútaⁿā saⁿā chiiduú n'gēeté: Nguéé rey yeⁿe 'nū caati 'āā César nuúⁿ.

¹⁶Tuu'mí ní Pilato ca'á yā Jesús miiⁿ 'iiⁿyāⁿ s'eeⁿ ní 'iicu cu'nééⁿnga'á yā. Ní 'iiⁿyāⁿ s'eeⁿ sta'á yā Jesús miiⁿ ní candée yā 'iiⁿyāⁿ.

Cu'nééⁿnga'a yā Jesús ní ch'ii yā

(Mt. 27.32-44; Mr. 15.21-32; Lc. 23.26-43)

¹⁷Ní Jesús candée yā cruz yeⁿe yā. Ní can'dáa yā na lugar chī 'áámá lado yeⁿe yāāⁿ Jerusalén chī nguuví Calavera chī lugar 'Iini Nga'ai Tíiⁿ, 'iicu nduudu hebreo neⁿe caaⁿmaⁿ Gólgota. ¹⁸Naachí cu'nééⁿnga'á yā Jesús ndúúcu taa na 'uuví yā. 'Áámá yā 'áámá 'áámá lado 'iicu Jesús miiⁿ ní naavtáⁿā canuúⁿ yā. ¹⁹Ní 'neeⁿ Pilato miiⁿ 'áámá letra chī n'duu sá nanááⁿ cruz ní canéé nguūⁿ miiⁿ, Jesús yeⁿē yāāⁿ Nazaret, Rey yeⁿe 'iiⁿyāⁿ yeⁿe ndaata yeⁿe Israel. ²⁰Ní neené 'yaaⁿ 'iiⁿyāⁿ Israel s'eeⁿ ch'eeⁿ yā letra 'cūū ti nááchí cu'nééⁿnga'a yā Jesús miiⁿ niiⁿnuúⁿ na yāāⁿ Jerusalén miiⁿ. Canéé nguūⁿ miiⁿ na nduudu hebreo ndúúcu nduudu griego ndúúcu nduudu latín. ²¹Ní ngaⁿa saⁿā chiiduú n'gēeté yeⁿē 'iiⁿyāⁿ Israel s'eeⁿ ngii sa Pilato: Nguéé 'neeⁿ di Rey yeⁿē 'iiⁿyāⁿ yeⁿe

ndaata yeⁿe Israel naati maáⁿ yā ngaⁿa yā: 'Úú Rey yeⁿe 'iiⁿyāⁿ yeⁿe Israel 'úú.

²²Nan'guēcútaⁿā Pilato saⁿā miiⁿ: Chiiⁿ 'neéⁿ 'āā 'neéⁿ.

²³Taachi soldados ch'iⁿneeⁿnga'á sa Jesús, sta'á sa catecai yā ní diiⁿ sa repartir catecai yā. Niicu 'áámá 'áámá tááⁿ catecai yā 'aama soldado. Abrigo catecai yā miiⁿ nguéé n'deenyú ndii 'niiⁿnuúⁿ ndíí cuaaⁿ ndiia. ²⁴Ní caⁿa sa nguaaⁿ maáⁿ sa: Nguéé 'canuu cuūⁿ yú naati tun'daí yú suerte yeⁿē yú nduūcū. Du'ú yeⁿē cuuvi. Ní 'iicu cuuví cuaacu naachí canee nguūⁿ chī ngaⁿa:

Nca'á yā catecaí nguaaⁿ maáⁿ yā, ní na catecaí ch'ii yā suerte. Ní soldados ní diiⁿ sa chuū.

²⁵Ní chēecuú Jesús miiⁿ canée yā niiⁿnuúⁿ ná cruz yeⁿe Jesús ndúúcu vi'í chēecuú yā chī nguuví María chī n'daataá yeⁿē Cleofas, ndúúcu María Magdalena. ²⁶Taachí n'diichi Jesús chēecú yā ndúúcu discípulos chī ya'āi 'iinú yā chī canéé niiⁿnuúⁿ tuu'mí ní Jesús ngaⁿa yā ngii yā chēecú yā: N'dii n'daataá, cun'díichi nī daiya nī. ²⁷Tuu'mí ní ngaⁿa yā ngii yā discípulo: Cun'diichi di, 'ííngaā chēecu di. Ndíí tuu'mí ní discípulo miiⁿ ní dicheecú yā 'iiⁿyāⁿ.

Jesús ch'ii yā

(Mt. 27.45-56; Mr. 15.33-41; Lc. 23.44-49)

²⁸Cho'ó tanducueⁿē chuū ní déénú Jesús chī tanducueⁿē dendu'ū ní 'āā chii cuaacu. Niicu naachi canéé nguūⁿ níícu cuuvi cuaacu. Ngaⁿa Jesús: Yaacá.

²⁹Mííⁿ canéé 'áámá vaso ndiitu vinagre. Tuu'mí ní 'áámá soldado

dicuutu yā 'áámá esponja ndúúcū vinagre. Ní chí'neeⁿ yā na áámá yá'ⁿá hisopo. Ní s'neeⁿ yā na cheendi Jesús.
³⁰Taachí Jesús chí'í yā vinagre, ca'ⁿa yā: Ch'ínú tanducuéⁿē dendu'ū. Ní nadicua'á yā tiíⁿ yā chí n'nééⁿ maáⁿ yā espíritu yēⁿe yā.

**Soldado n'da'ai yā 'iini 'tiicua
 Jesús ndúúcū 'aama lanza**

³¹Tuu'mi ní caati nguuví viernes chí dííⁿ yā ntiiⁿnyuⁿ yeⁿē 'viicu pascua miiⁿ, ní 'iiⁿ'yāⁿ Israel s'eeⁿ dí'cuíftu sa Pilato chí 'cúuⁿmāⁿ sa 'ííní ca'a sa'ⁿā s'eeⁿ ní candéē sa cuerpo yeⁿē yā. Caati nguéé neⁿē sa chí canée cuerpo yeⁿē yā na cruz nguuví sábadu miiⁿ caatí sábadu ní nguuví ch'ēete yeⁿe 'viicu pascua. ³²Ní ndaā soldados ní ndaa sa nanááⁿ sa'ⁿā chí vmnááⁿ vmnaaⁿ. 'Tíicā 'cuúⁿ sa ca'a sa. 'Tíicā 'cuúⁿ ntúúⁿ sa ca'ā taama sa. ³³Naati taachí ndaa sa nanááⁿ Jesús miiⁿ, ní caati n'diichí yā chí 'āā n'dii Jesús nguéé 'cuúⁿ sa ca'a yā.

³⁴Naati 'áámá soldado n'da'ai sa tiicua Jesús ndúúcū 'aama lanza ní can'daā yuuúⁿ ndúúcū nuūⁿníⁿ. ³⁵'Iiⁿ'yāⁿ chí n'diichí yā nga'ⁿá yā nduudu cuaacu. Níicú chíiⁿ chí nga'ⁿá yā. Miiⁿ ní cuaacu chííⁿ. 'Iicu déenu yā chí nga'ⁿá yā nduudu cuaacu níicú ndís'tii ntúúⁿ ní cu'teenú ní. ³⁶Níicú chuū cho'ōo ní cúúví cuaacu chí canée nguūⁿ na libro yeⁿe Ndyuūs: Mar 'áámá 'iini yeⁿē yā nguéé 'cúúⁿ sa. ³⁷Ní taama naachi canée nguūⁿ ní nga'ⁿā: N'diichí yā 'iiⁿ'yāⁿ chí cho'ōo nééⁿ tiicua yā.

S'nuúⁿ yā Jesús chēeti yáinyāⁿ

(Mt. 27.57-61; Mr. 15.42-47; Lc. 23.50-56)

³⁸Cho'ōo chuū. José yeⁿē yāáⁿ Arimatea chí 'áámá discípulo yeⁿe

Jesús n'de'ei n'de'ei nūⁿ ti 'va'a sa 'iiⁿ'yāⁿ Israel s'eeⁿ, dí'cuíftu sa Pilato miiⁿ chí cuuví candéē sa cuerpo yeⁿē Jesús. Ní 'cuúⁿ Pilato sa'ⁿā miiⁿ. Tuu'mi ní ndaā sa ní nadiví sa cuerpo yeⁿē Jesús miiⁿ ní candéē sa cuerpo miiⁿ. ³⁹Ndaa ntúúⁿ Nicodemo, sa'ⁿā chí vmnaaⁿ indaá sá nanááⁿ Jesús miiⁿ 'aama n'gaaⁿ, ní ndéē sa 'áámá perfume chí ndístaⁿā perfume yeⁿē mirra ndúúcū áloes. Ngíí tanduu 'áámá ciento libras. ⁴⁰Sta'á yā cuerpo yeⁿe Jesús ní ch'ēcú yā ná tiinūⁿ ndúúcū perfume miiⁿ, tan'dúúcā costumbre yeⁿē 'iiⁿ'yāⁿ Israel s'eeⁿ taachí n'giichí yā tina'ⁿā. ⁴¹Ní lugar miiⁿ naachi chí'neeⁿnga'a yā, miiⁿ canée 'áámá chéēⁿ naāndā. 'Íicú chēeti chéēⁿ miiⁿ canée 'áámá yáinyāⁿ ngai. Mar 'áámá 'iiⁿ'yāⁿ nguéé in'nuúⁿ yā chēeti. ⁴²Cáāvā chí nguuví viernes chí chí'indiyaáⁿ yā yeⁿe 'viicú yeⁿe pascua yeⁿē 'iiⁿ'yāⁿ Israel s'eeⁿ, s'nuúⁿ yā cuerpo Jesús miiⁿ chēeti yáinyāⁿ miiⁿ chí canee niiⁿnuúⁿ.

Jesús nduuchi yā yeⁿe nguaaⁿ tiná'ⁿā

(Mt. 28.1-10; Mr. 16.1-8; Lc. 24.1-12)

20 'Áámá domingo chí nguuví vmnááⁿ vmnaaⁿ yeⁿe ndēetē miiⁿ tá María Magdalena néénē 'da'a ca ndaā tá na yáinyāⁿ. Ní n'diichi tá tuūu miiⁿ chí ndiiví na yáinyāⁿ. ²Tuu'mi ní n'daataá ngéenu tá nanááⁿ Simón Pedro ndúúcū táámá discípulo, 'iiⁿ'yāⁿ chí dinéⁿe taavi yā Jesús. Tuu'mí nga'ⁿā tá ngii tá sa'ⁿā s'eeⁿ: 'Āā ndiiví yā Jesús miiⁿ ná chēeti yáinyāⁿ, ní nguéé deenu yú tíí n'nééⁿ yā 'iiⁿ'yāⁿ. ³Ní can'daā Pedro miiⁿ ndúúcū taama discípulo ní ndaā yā na

yáinyāⁿ. ⁴Ngéénū, ngéénū nduu 'uuví yā. Táámá discípulo diitu cá chéenu sa nguée ti Pedro, ní ndaá vmnaaⁿ sa na yáinyāⁿ. ⁵Can'díi sa ní n'diichi sa. Ní n'diichi sá chi 'aa dámaaⁿ tiinūⁿ miiⁿ snúūⁿ naati nguée chi ndaa sa cheeti yáinyāⁿ. ⁶Simón miiⁿ ní sndaa sa cheeti yáinyāⁿ. Ní n'diichi sa tiinūⁿ miiⁿ naachi snúūⁿ. ⁷Niicu pañuelo ch'ete ca tiiⁿ nguée dáámá tiinūⁿ lino. Ndéetií nduu cánée táamá cuaaⁿ. ⁸Tuu'mi ní sndaa ntúūⁿ táámá discípulo chi ndaá vmnááⁿ vmnaaⁿ ná yáinyāⁿ ní n'diichí yā ní ch'i'téenu yā. ⁹Tii nguée déenu yā chi canée nguūⁿ chí Jesús miiⁿ cuuví nduuchí yā yeⁿē nguaaⁿ tináⁿā. ¹⁰Ní nguēcundií discipulos na vaacu yā.

Jesús nndaaca yā María Magdalena

(Mr. 16.9-11)

¹¹Naati tá María canee ta chúva'āi yáinyāⁿ. Neené ngēecu tá. Ní di'cua'ái naaⁿ tá n'diichi tá cheeti yáinyāⁿ. ¹²Ní n'diichí tá na 'uuví ángeles ndúúcū catecaí yā cuéē. 'Áámá ángel miiⁿ vee yā cuaaⁿ tiⁿ naachi canúúⁿ cuerpo Jesús miiⁿ ní táámá yā vee yā cuaaⁿ ndiia. ¹³Ní caⁿá yā: Díi n'daataá, ¿de'ē cúuví chí ngēecu di? Tuu'mí ngaⁿa tá: Caati candé yā Señor yeⁿē, ní nguée deenú tíi s'neeⁿ yā 'iiⁿyāⁿ.

¹⁴Taachi caⁿa tá chuū, ndaacadaami tá. Ní n'diichi ta Jesús chi canée yā miiⁿ naati nguée deenu tá chi Jesús miiⁿ. ¹⁵Tuu'mí ngaⁿa Jesús ní ngii yā táⁿā: Díi n'daataá, ¿de'ē cúuví chí ngēecu di? ¿Du'ū in'nuuⁿ di? 'Iicu n'daataá miiⁿ ní nacadínuuⁿ tá chi 'iiⁿyāⁿ 'cúū ní

'iiⁿyāⁿ chi diiⁿ cuidado yeⁿē chéēⁿ yeⁿe naāndā miiⁿ. Ní caⁿa tá: Señor, ndúúti chi dii candé di 'iiⁿyāⁿ cuuvi di 'úú tíi chí'neeⁿ dí 'iiⁿyāⁿ ní 'úú ní candé 'iiⁿyāⁿ.

¹⁶Tuu'mi ngaⁿa Jesús miiⁿ: María. Nguēcundií ntúūⁿ ta ní ngaⁿā ta: Raboni. (Nduudu 'cūū neⁿe caaⁿmaⁿ, Maestro.)

¹⁷Tuu'mí ngaⁿa Jesús: Nguée tu'v'í di 'úú caati 'āā cuéé caⁿá nanááⁿ Chiidá. Naati dii, cuéⁿe di n'diichi di hermanos yeⁿe yú ní caaⁿmaⁿ di cuuvi di 'iiⁿyāⁿ: Caⁿá nanááⁿ Chiidá ní nanááⁿ Chiida yú, nanááⁿ Ndyuūs yeⁿē ní nanááⁿ Ndyuūs yeⁿē yú.

¹⁸Cheⁿe tá María Magdalena nanááⁿ discipulos ní caⁿa tá chi n'diichi tá Jesús miiⁿ. Caⁿa tá chii tá discipulos nduudu chi Jesús miiⁿ caⁿa yā chii yā táⁿā.

Jesús nndaacá yā discipulos

(Mt. 28.16-20; Mr. 16.14-18; Lc. 24.36-49)

¹⁹Chii chí nguiinū yeⁿe maāⁿ nguuvi domingo míⁿ, nguuvi vmnááⁿ vmnaaⁿ yeⁿē ndēete miiⁿ ní naachi snúūⁿ discipulos ní nduudí cheendi va'āi miiⁿ caati 'va'á yā 'iiⁿyāⁿ Israel s'eeⁿ. Ndaa Jesús miiⁿ. Ní canée yā naavtaⁿā 'iiⁿyāⁿ s'eeⁿ. Ní caⁿa yā: Cuuvi 'diifⁿ ndúúcū ndís'ti.

²⁰Taachí caⁿa yā chuū, ní ch'iⁿi yā ta'á yā ndúúcū tiicuáá yā. Ní discipulos yeenú taaví yā chí n'diichí yā Jesús. ²¹Tuu'mí ngaⁿā ntúūⁿ Jesús ngii yā 'iiⁿyāⁿ: Cuuvi 'diifⁿ ndúúcū ndís'ti. Tan'dúúcā chi dich'ó Chiidá 'úú, 'tiicā ntúūⁿ 'úú dicho'ó ndís'ti.

²²Taachí caⁿa yā chuū tiivineeⁿ yā 'iiⁿyāⁿ ní caⁿa yā: Cuta'á ní Espíritu

N'dai ye^{n'}é Ndyuūs. ²³Ii^{n'}yāⁿ chi ndís'tiī nadich'ēecú nī nuūⁿndī ye^{n'}é yā, ní 'āā nach'ēecu ye^{n'}é yā. Ii^{n'}yāⁿ chíí nguée nadich'ēecu nī nuuⁿndi ye^{n'}é yā, 'āā nguée nach'ēecu ye^{n'}é yā.

Nguée chi'teenú Tomás

²⁴Naati Tomás 'áámá discípulo chi nguuví Dídimó chi Gemelo nguée cúnée sá ndúúcū sa^{n'}ā s'eeⁿ taachi Jesús miiⁿ ndaá yā. ²⁵Chíí tan'duuví discípulos miiⁿ nga^{n'}a yā ngii yā sa^{n'}ā: N'diichí 'nū Señor miiⁿ. Sa^{n'}ā miiⁿ ní nga^{n'}a sa ngii sá 'ii^{n'}yāⁿ s'eeⁿ: 'Úú ní nguée cu'teenú ndúúti chi nguée n'diichí, ní nguée tiinguú nduutita'á naachí ch'ēechi clavos, ní tiinguú ta'á ná tiicuáá yā.

²⁶Ch'iinu niiní nguuví vēete ntúūⁿ discípulos snée yā chēeti va'āi. Mííⁿ canée Tomás ndúúcu yā. Ní nduudí cheendi va'āi miiⁿ. Ndaa ntúūⁿ Jesús miiⁿ. Ní canúⁿ yā naavta^{n'}ā ní ca^{n'}a yā: Cuuvi 'diiíⁿ ndúúcu ndís'tiī.

²⁷Tuu'mí ní Jesús nga^{n'}a yā ngii yā Tomás miiⁿ: Tiinguú nduutita'á di 'muuⁿ ní n'diichi di ta'á. Ní tiinguú ta'a di ndii 'muuⁿ ní tiinguú ta'á di tiicuáá. Ní nguée chí nguée cu'téenu dí, canée chi cu'téenu dí.

²⁸Tuu'mi ní Tomás miiⁿ ní ca^{n'}ā sa: N'dii Señor ye^{n'}é. N'dii Dendyuūs ye^{n'}é.

²⁹Tuu'mi ní nga^{n'}a Jesús miiⁿ: Tomás, díí ní chi'téenu di tiī n'diichi di 'úú. N'daí 'ii^{n'}yāⁿ chi nguée n'diichi yā 'úú ní chi'téenu yā.

¿De'e cúuví chi véé libro 'cūū?

³⁰Ní néené n'deēe ca señales chi ch'i^{n'}i Jesús nanááⁿ discípulos ye^{n'}é

yā chi nguée canée nguūⁿ na libro 'cūū. ³¹Naati chuū ní canée nguūⁿ níícu cuuvi cu'téenu di chi Jesús miiⁿ chi Cristo chi Daiya Dendyuūs. Ní chi cu'téenu di 'ii^{n'}yāⁿ ní cunee ndúúcū vida cue^{n'}e daāⁿmaⁿ cáávā chi duuchi yā.

Jesús ndaaca yā ndēēchē discípulos ye^{n'}é yā

21 Cuayiivi chi cho'oo chuū chiināāⁿ ntúūⁿ maaⁿ Jesús miiⁿ ye^{n'}é discípulos ye^{n'}é yā niiⁿnuúⁿ ná yaana nuuⁿni^{n'}yá^{n'}ā chi nguuví Tiberias ní 'túúcā chiinaāⁿ yā. ²Ndidaama yā Simón Pedro ndúúcū Tomás miiⁿ chi nguuví Dídimó chi Gemelo, ndúúcū Natanael sa^{n'}ā ye^{n'}e yāāⁿ Caná ye^{n'}é yā^{n'}ā Galilea, ndúúcū na 'úúví sa^{n'}ā daiya Zebedeo ndúúcū táá na 'uuví discípulos ye^{n'}e Jesús. ³Tuu'mí nga^{n'}a Simón Pedro: Ca^{n'}á tungaáⁿ 'yaācā. Tuu'mí nga^{n'}ā 'ii^{n'}yāⁿ s'eeⁿ ngii yā sa^{n'}ā: Ca^{n'}ā ntúūⁿ nús'uu ndúúcu di. Ní cue^{n'}e yā ní chindāā yā na 'áámá barco. Nguīnū miiⁿ nguée sta'á yā mar 'áámá ti. ⁴Chi dēēve táámá nguuví, Jesús ní canée yā cuaaⁿ 'diitú yā yaana nuuⁿni^{n'}yá^{n'}ā naati discípulos nguée túúmicadínuuⁿ yā chi Jesús miiⁿ. ⁵Ní ca^{n'}a yā chii yā sa^{n'}ā s'eeⁿ: Ndís'tiī, sa^{n'}ā n'gaiyāāⁿ 'áá véé chi tungaaⁿ di chí che'e yú? Nan'guēcutá^{n'}a yā ye^{n'}e yā: Nguée. ⁶Tuu'mi ní nga^{n'}a yā ngii yā sa^{n'}ā s'eeⁿ: Ca^{n'}nuúⁿ nī yaana lado ta cuaacu ye^{n'}é barco miiⁿ ní ndaaca nī. Tuu'mi ní chi'nuúⁿ yā yaana tií ní 'āā ntee ngii dííⁿ yā tun'dāā yā chi neené tááⁿ n'gii 'yaācā. ⁷Tuu'mi ní discípulo chi neené diya'āi 'ínu

Jesús ngaⁿā sa ngii sa Pedro: Señor miiⁿ 'iiⁿyāⁿ s'tíi. Ní Simón Pedro, taachi ch'iindiveeⁿ sa chi Jesús miiⁿ nuⁿnuúⁿ sá catecai sa ti dámaāⁿ ngáaⁿ sa, ní chindáa sa cheeti yaana nuūⁿnīⁿyāⁿā. ⁸Ni tanduu 'uuvi discípulos ndaá yā ndúúcū barco ti nguée dáanā yaⁿāi chi chinée yā yeⁿe yáⁿāa miiⁿ ti tandúú na cuūúⁿ ngeecu ndiichi metros. Ngíi n'daā yā yaāna yeⁿe 'yaāca. ⁹Taachi n'cheéⁿ yā yáⁿāa miiⁿ n'diichi yā n'giichi yáⁿā. Ní 'áamá 'yaācā nduú tī nanááⁿ nduucyáⁿā. Ní n'diichi yā pan. ¹⁰Tuu'mí ngaⁿa Jesús ngii yā saⁿā: Teé nī ta n'duuvu 'yaācā chí caama staⁿá nī maaⁿ.

¹¹Cuchee Simón Pedro ní nandée sa yaāna na yáⁿāa miiⁿ ndiituú 'yaācā n'geeté, ngii 'áamá ciento 'uuvu ngeecu n'diichi 'íínú, ní yaāna miiⁿ nguée chi teeⁿ n'dáá rá chi n'dee taaví 'yaācā. ¹²Tuu'mi Jesús ngaⁿa yā ngii yā saⁿā s'eeⁿ: Cuchií nī ca'diinú nī. Mar 'áamá discípulo miiⁿ nguée tiinguuneeⁿ yā 'iiⁿyāⁿ: ¿Du'u rá díí? Ti 'āa deenú yā chi Jesús miiⁿ. ¹³Ndaā Jesús miiⁿ ní staⁿá yā pan ní caⁿa yā 'iiⁿyāⁿ. 'Tíicá nī ntúúⁿ dííⁿ yā ndúúcū 'yaāca.

¹⁴Āa chií 'iinu cuuvi chi n'geenaāaⁿ Jesús yeⁿē discípulos yeⁿé yā taachi 'āa nnduuchi yā nguaaⁿ tináⁿā.

Ca'a di chi ché'é 'iiti cuūchi yeⁿé

¹⁵Taachi ch'iinu ca'diinú yā, Jesús ngaⁿa yā ngii yā Simón Pedro: Simón, díí daiya Jonás, ¿'áa neⁿe ca di 'úú, nguée ti chuū? Tuu'mí ngaⁿa sa ngii sa Pedro: 'Tíica, Señor, n'dií ní déenú nī chi neⁿé n'dií. Ngaⁿa yā ngii yā saⁿā: Ca'á di 'iiti cuūchi 'lííⁿ yeⁿé chí che'é tī.

¹⁶Jesús ní ntiinguuneeⁿ ntuúⁿ yā yeⁿe saⁿā naachi ndii 'uuvi cuuvi: Simón, díí daiya Jonás, ¿'áa neⁿe di 'úú? Nan'guēcútaⁿa sa yeⁿe yā: 'Tíica, Señor, n'dií ní déenú nī chi neⁿé n'dií. Tuu'mí ngaⁿa yā ngii yā saⁿā: Ca'á dí 'iiti cuūchi yeⁿé chí che'é tī.

¹⁷Tuu'mí ngaⁿa yā ngii yā saⁿā naachi ndii chííⁿ ndii 'íínú cuuvi: Simón, dii saⁿā daiya Jonás, ¿'áa neⁿe di 'úú? Canée ndaachi yiinú Pedro chí 'āa naachi ndii chííⁿ ndii 'íínú cuuvi yaa'v'í yā saⁿā: ¿'Áa neⁿe di 'úú? Tuu'mí ngaⁿa sa ngii sa 'iiⁿyāⁿ: Señor, n'dií déenú nī tanducuéⁿē dendu'ū. Maaⁿ ní deenu nī chi neⁿé n'dií. Tuu'mí ngaⁿa Jesús ngii yā saⁿā: Ca'á dí 'iiti cuūchi yeⁿé, chí che'é tī. ¹⁸Cuaacu nííⁿnyúⁿ cuāācū nīíⁿnyuⁿ ngaⁿá ngíí dii: Taachi saⁿā 'lííⁿ dii in'nuuⁿ canúúⁿ dí catecai di ní cheⁿe di naachi neⁿe di. Naati taachi 'āa cuuvi ndiicú di ndoo tá'a di ní táámá 'iiⁿyāⁿ in'nuúⁿ yā catecai di ní candée yā dii naachi nguée neⁿē di.

¹⁹Ní chuū Jesús caⁿa yā ní ngá'a yā chí cádiinuuⁿ sa de'é vaadi n'gii diiⁿ honrar Dendyuūs miiⁿ. Ch'iinu caⁿa yā chuū, tuu'mí ngaⁿa yā ngii yā Simón Pedro: Can'dáa di 'úú.

Discípulo chi neⁿe taavi Jesús

²⁰Ngeēcundíi Pedro miiⁿ n'diichi sá discípulo chí dineⁿé Jesús, discípulo chí cueⁿe sa ndúúcū Jesús. Sáⁿā chí candiitínee sa 'iiⁿyāⁿ taachi 'āa caama chí che'e nguiinú yā. Ní 'āa caⁿa yā chíi yā saⁿā: Señor, ¿du'u chí canée chí diiⁿ entregar n'dií? ²¹Taachi Pedro miiⁿ

n'diichi sa discípulo miiⁿ tuu'mí
nga^{n'a} yā ngii yā Jesús: Señor, ɛde'e
idiiⁿ sá^{n'a} tíí?

²²Tuu'mí nga^{n'a} Jesús ngii yā sa^{n'a}:
Ndúúti chi 'úú chi ne^{n'é} chi cunee
sá ndii taachi nindaá, ɛde'é ineeⁿ di
chííⁿ? Díí can'dáa di 'úú.

²³Caāvā nduudu 'cūū
tuumicadiinuuⁿ vi'í s'eeⁿ chi
discípulo miiⁿ nguée canée chi
'cuūvī sa. Naati Jesús ní nguée ca^{n'a}
yā chi nguée 'cuūvī sa, naati Jesús
ca^{n'a} yā: Ndúúti chi 'úú chi ne^{n'é} chi

cunee sá ndii taachi nindaá, ɛde'é
ineeⁿ di chííⁿ?

²⁴Sa^{n'a} 'cūū discípulo chi nga^{n'a}
cuaacu sa ye^{n'e} chúū. Ní idingúuⁿ
sa chuū. Ní deenu yú chi chiiⁿ chi
nga^{n'a} sa ní nduudu cuaacu ní
cuaacu níⁿnyúⁿ chi nduudu cuaacu.

²⁵Neené n'deēe n'dái cosa chi dííⁿ
Jesús miiⁿ. Ndúúti chi canée nguūⁿ
'áámá 'áámá cosa 'úú nadacadíinúúⁿ
chi maaⁿ rá iⁿyeēⁿdí 'cūū nguée
tunéeⁿ libros chi canée nguūⁿ ye^{n'e}
chuū. "Tíicā chií.

CHUŪ CHI DIIⁿ APÓSTOLES

**Dendyuūs caⁿa yā chi
tée yā Espíritu N'dai**

1 Dii Teófilo, taachí vmnááⁿ vmnaaⁿ dingúúⁿ yeⁿe di, caⁿá yeⁿe tanducuéⁿē chi 'túúcā diiⁿ Jesús ní ca'cueéⁿ yā, ²ndii nguuví chí cunaⁿā Jesús va'ai cheeti nguuví. Vmnááⁿ vmnaaⁿ chí cunaⁿā Jesús miiⁿ ch'íínú ca'a yā orden yeⁿé yā apóstoles caava Espíritu N'dai yeⁿe Ndyuūs. Jesús ndeεvé yā ní dichó'o yā apóstoles. ³Jesús ch'eenú yā chií ní ch'ií yā. Cuayiivi taachi 'āā ch'ií yā nééné n'dee nááⁿ chííⁿ ch'iⁿi maáⁿ yā yeⁿé yā tan'dúúcā chí 'āā cuéé 'cuūvi yā vmnááⁿ apóstoles caati apóstoles cuuvi déenu yā chí cánduuchi ntuuⁿ yā. Canée yā ndúúcū apóstoles yeⁿé yā 'uuví ngεεcu nguuví ní caⁿa yā yeⁿē chí Dendyuūs ngaⁿa ntiiⁿnyúⁿ yā. ⁴Taachí ndii dáámá yā tuu'mi ní Jesús caⁿa ntiiⁿnyúⁿ yā apóstoles. Nguéé náⁿa nī yeⁿe yāāⁿ Jerusalén naati cunee ngíínú nī yeⁿē chí caⁿa Chiida yú chí téé yā. Chuū chí 'āā ch'iindiveéⁿ nī yeⁿē 'úú. ⁵Juan cuaacu nííⁿnyúⁿ chí ndúúcū nuūⁿnīⁿ chεedinuūⁿnīⁿ sa naati ndís'tií ní cuεedinuūⁿnīⁿ nī ndúúcū Espíritu N'dai yeⁿe Ndyuūs.

Jesús cuchée yā

⁶Tuu'mi ní saⁿa chí ndúúvídáámá nitiinguunéeⁿ yā 'iiⁿyāⁿ ní ngaⁿá yā: Señor Jesús, ¿áá nadicuéeⁿ ntuuⁿ nī taama saⁿā Israel chí caaⁿmaⁿ ntiiⁿnyuⁿ sa yeⁿe 'iiⁿyāⁿ Israel maaⁿ nguuví 'cūū? ⁷Ní ngaⁿa Jesús ngii yā 'iiⁿyāⁿ: Nguéé ituneeⁿ ndís'tií chí cadíínuuⁿ nī de'e tiempo o de'e nguuví yeⁿē chuū chí Chiida yú s'neeⁿ yā na poder yeⁿe maáⁿ yā. ⁸Naati cuta'á nī poder chí diitú nī taachi 'āā ndaa Espíritu N'dai yeⁿe Ndyuūs vmnaaⁿ yeⁿé nī. Ní ndís'tií ní caaⁿmáⁿ nī nduudu cuaacu yeⁿé na yāāⁿ Jerusalén ndii nuuⁿmaⁿ yáⁿā Judea, ndii yáⁿā Samaria, ndii núúⁿmáⁿ iⁿyeēⁿdí. ⁹Ní ch'íínú caⁿa yā chuū taachi n'diichi saⁿā s'eeⁿ Jesús cuchée yā ní che'enaāⁿ sa 'iiⁿyāⁿ ná meēⁿ. Ní 'āā ntéé snaaⁿ saⁿa s'eeⁿ 'iiⁿyāⁿ.

¹⁰Ní saⁿā s'eeⁿ ní n'gíínú sá nanguuvi. Taachí 'āā cuchée Jesús, n'diichi sa na 'uuví saⁿā chí ángel chineē ndúúcū sa ndúúcū catecai cuéé sa. ¹¹Úuvi 'iiⁿyāⁿ miiⁿ ní ngaⁿa yā ngii yā saⁿā s'eeⁿ: Ndís'tií saⁿa yeⁿe yáⁿā Galilea, ¿de'e n'gíínú nī nanguuvi? Maāⁿ Jesús chí cunaⁿa yā yeⁿe ndís'tií nanguuvi

'tíicā ndaa túuⁿ yā tan'dúúicā chí n'diichí nī 'iiⁿyāⁿ cuinaⁿá yā nanguuvi.

Ndeeve yā saⁿā lado yeⁿe Judas

¹²Can'dáa yā ná yiicū 'lírⁿ chí nguuví Olivos chí canéé niiⁿnuⁿ ná yāāⁿ Jerusalén ní ndáá yā na yāāⁿ Jerusalén. Distancia 'cūū chí ngaⁿa ley chí cuuvi caacá yā sábadó nguuví chí ntaaviⁿtuunuⁿ yā. ¹³Ndaá yā na yāāⁿ miiⁿ. Chéé yā na cuarto yaacu naachi cānee Pedro, ndúúcū Jacobo, ndúúcū Juan, ndúúcū Andrés, ndúúcū Felipe, ndúúcū Tomás, ndúúcū Bartolomé, ndúúcū Mateo, ndúúcū Jacobo dáiyā saⁿā chí nguuví Alfeo, ndúúcū Simón Zelote, ndúúcū Judas chí 'diinū Jacobo. ¹⁴Nducyáácá 'iiⁿyāⁿ s'eeⁿ ndúúcū n'daata s'eeⁿ ndúúcū María chí chéecu Jesús ndúúcu 'dínu Jesús nduuvídaamá yā ní 'áámá vaādī cadiinúúⁿ yeⁿé yā ní ngaⁿanguaⁿá yā ní di'cuiitú yā Dendyuūs. ¹⁵Iiⁿyāⁿ chí nduuvídaama miiⁿ ngíi yā tan'dúúicā 'áámá ciento canee ndiicú yā. Hora miiⁿ nacueéⁿ Pedro naavtaⁿa yeⁿe 'iiⁿyāⁿ s'eeⁿ chí i'téenu yā Cristo ní caⁿa sa: ¹⁶Ndís'tii hermanos, canee cuuⁿmiⁿ chí cuuvi cuaacu Escritura chí Espíritu N'dai yeⁿe Ndyuūs caⁿa David cuaaⁿ vmaāⁿ ní David miiⁿ dinguúⁿ yā yeⁿe Judas. Judas miiⁿ ch'iⁿi sá du'u chí Jesús. Maaⁿ nífú chíi chitaⁿá yā Jesús. ¹⁷Judas miiⁿ ní ndúúcū nús'uu ní diiⁿ sa ntiiⁿnyuⁿ ndúúcū nús'uu.

¹⁸Sáⁿa miiⁿ ní cái sa 'áámá tááⁿ yáⁿāa ndúúcū tuūmī yeⁿé nuuⁿndi yeⁿé sa. Ní chin'daā sa dácaā n'díi sa ní nda'ai naavtaⁿa cuerpo yeⁿé

sa ní tanducueⁿé ngeeti sa ch'iinu cān'daa. ¹⁹Nducyáácá 'iiⁿyāⁿ yeⁿe yáāⁿ Jerusalén chicadínuuⁿ yā chuū. Ní yáⁿāa miiⁿ ní 'tíicā canee chí duuchi Acéldama davaacu yeⁿé yā chí neⁿe caaⁿmaⁿ campo yeⁿé yuūúⁿ.

²⁰Ti canéé nguūⁿ na libro yeⁿe Ndyuūs naachi chí duuchi Salmos: Naachí navaacu sa míⁿ nduuví díyáái. Ndíí nguéé 'iiⁿyāⁿ chí 'cuetinée yā miiⁿ.

Níicú canéé nguūⁿ:

Cuta'a taamá yā ntiiⁿnyuⁿ yeⁿe saⁿā ndíí tiiⁿ.

²¹Iiⁿyāⁿ sáⁿā miiⁿya canee cuuⁿmiⁿ chí canéé yā ndúúcu 'nū nducueⁿe tiempo chí Señor Jesús canéé yā ndúúcu 'nū. ²²Iiⁿyāⁿ miiⁿ canee cuuⁿmiⁿ chí canéé yā ndúúcu 'nū taachi tucá'a yā chéedinuūⁿní Juan ndíí nguuví chí Jesús cunaⁿá yā cuaaⁿ 'niiⁿnuⁿ nanguuvi. 'Túúicā canee cuuⁿmiⁿ chí 'áámá yā caaⁿmaⁿ yā ndúúcū nús'uu nduudu cuaacu yeⁿé chí nduuchi Jesús ngaaⁿ tináⁿā. ²³Ní 'neeⁿ ndutá'a yā ná 'uuví 'iiⁿyāⁿ. 'Áámá saⁿā miiⁿ ní nguuví sa José Barsabás chí nguuví Justo ndúúcū taama saⁿā miiⁿ chí nguuví sa Matías. ²⁴Ní caⁿanguaⁿá yā ní caⁿa yā: N'díi, Señor Ndyuūs, chí n'diichi nī staava yeⁿé nducyáácá yā, 'cuuⁿmíⁿ nī nús'uu 'áámá chéé sáⁿā s'ūuⁿ chí 'āā ndeévé nī. ²⁵Níicú cunee ndúúcū sa ntiiⁿnyuⁿ ndúúcū apóstoles lado yeⁿe Judas. Ní diiⁿ sa ntiiⁿnyuⁿ yeⁿé Judas ntiiⁿnyuⁿ chí nguéé diiⁿ sa cumplir cucáāvā nuuⁿndi yeⁿé sa. 'Tíicā ní Judas cúnaⁿa sa na lugar naachí tuneⁿe saⁿā. ²⁶Níicú dinguúⁿ yā na 'úúví caaca ndúúcū

'uuvī chi nguuvī 'iiⁿ'yāⁿ, José miiⁿ
ndúúcū Matías. Ní tun'dáá yā 'áámá
chi nguuvī Matías ní Matías miiⁿ
tuneeⁿ. Ní nduuvidaama sa chíí
ndicháámá apóstoles chi 'iiⁿ'yāⁿ chi
dichóló Dendyuūs.

Ndaa Espíritu N'dai

2 Nducyáácá yā nduuvidaamá
yā taachi ndaā nguuvī yeⁿe
Pentecostés chi 'viicu yeⁿe cosecha.
²Tuu'mí nūuⁿ tucá'a ch'éecu ruuⁿ
cuchiī nanguuvi tan'dúúcā 'áámá
'yúúné tááⁿ chí ngéenū. Ch'iindiveéⁿ
yā ruūⁿ miiⁿ chí chíítú va'āi naachi
snée yā miiⁿ. Ní 'iiⁿ'yāⁿ s'uúⁿ veeⁿté
yā. ³Ní che'enaāⁿ n'dee n'dai cosas
tan'dúúcā ch'ííyā yeⁿe yaⁿā n'gaiyāā.
Ní ch'εete ndúūu vmnaaⁿ yeⁿe
'iiⁿ'yāⁿ. ⁴Níícú canée yā nducyááca
yā chiitu ndúúcū Espíritu N'dai
yeⁿe Ndyuūs. Níícú Espíritu N'dai
miiⁿ dííⁿ yā chí tucá'a yā caⁿ'a yā
táámá naaⁿ davaacu s'eeⁿ tan'dúúcā
nduudu chí ca'ā Espíritu N'dai miiⁿ.

⁵Tuu'mi ní na yāāⁿ Jerusalén
ch'εetinée 'iiⁿ'yāⁿ yeⁿe Israel chí
saⁿā chí i'téénú Dendyuūs yeⁿe
nducyaaca naciones yeⁿe iⁿ'yeeⁿdí
'cūū. ⁶Taachí ndaā chí 'εecu ruuⁿ
mííⁿ nduuvidaamá n'dee n'dái yā
ní chidáanā yeⁿe yā ti ca'áámá
ca'áámá yā ch'iindiveéⁿ yā chí
ngaⁿā davaacu yeⁿe maáⁿ yā.
⁷Nducyáácá yā 'áámá cheⁿe yiinu
yā ní 'áámá nínacadínuuⁿ yā, ní
ngaⁿā yā: N'diichí nī, ¿'áá nguée
yeⁿe yāⁿā Galilea nducyaaca
saⁿā s'eeⁿ chí ngaⁿā sa? ⁸¿'Taacā
chííⁿ n'giindiveeⁿ yú nduudu yeⁿe
yú tan'dúúcā naachí ch'iindiyāāⁿ
yú? ⁹Vée 'iiⁿ'yāⁿ yeⁿe país Partia,
'iiⁿ'yāⁿ país Media, país Elam,

ndúúcū 'iiⁿ'yāⁿ chí snée yā na
país Mesopotamia, 'iiⁿ'yāⁿ yāⁿā
Judea, yāⁿā Capadocia, yāⁿā
Ponto, yāⁿā Asia, ¹⁰'iiⁿ'yāⁿ yāⁿā
Frigia ndúúcū país Panfilia, país
Egipto, yāⁿā s'eeⁿ yeⁿe Africa
chí canee cuaāⁿ diituú 'áámá lado
cuaaⁿ yeⁿe yāⁿā Cirene, ndúúcū
'iiⁿ'yāⁿ yeⁿe yāāⁿ Roma chí snée yā
miiⁿ. Tan'dúúcā ntúūⁿ 'iiⁿ'yāⁿ Israel
s'eeⁿ 'tiicá ntúūⁿ 'iiⁿ'yāⁿ chí 'āā
maaⁿ 'iiⁿ'yāⁿ Israel. ¹¹Níícú 'iiⁿ'yāⁿ
isla Creta, ndúúcū 'iiⁿ'yāⁿ país
Arabia snée yā miiⁿ. Nducyaaca yú
n'giindiveeⁿ yú davaacu yeⁿe yú.
Ngaⁿ'á yā yeⁿe chí ch'εete taavi cá
yeⁿe Dendyuūs.

¹²Nducyaacá yā ní 'áámá
cheⁿe yeⁿe yā, ní ndiíiⁿ 'uuví yā
vaanicadínuuⁿ yeⁿe yā. Ní ngaⁿ'á
yā 'aamá yā ndúúcū taamá yā: ¿D'é
neⁿe caaⁿ'maⁿ chuū? ¹³Tanáⁿ'a yā ní
sta'á yā tan'dúúcā 'áámá duuchi ní
ngaⁿ'a yā: 'Āā chíí yā.

Chuū ngaⁿ'a Pedro vmnááⁿ vmnaaⁿ

¹⁴Tuu'mi ní Pedro mííⁿ cheendii
sa ndúúcū ndiicháámá yā ní
caⁿ'a yuudu sá ní ngaⁿ'a sā ngii
sa 'iiⁿ'yāⁿ: Ndís'tiī saⁿā s'eeⁿ yeⁿe
Israel ndúúcū nducyaaca chí snée
yā na yāāⁿ Jerusalén. Ní cánée chí
'cuuⁿ'míⁿ ndís'tiī ní tumicadínuuⁿ
nī chuū. Ní 'caandiveéⁿ nī nduudu
yeⁿe 'úú. ¹⁵Sáⁿ'ā s'uuⁿ nguée cúú'ví
sá tan'dúúcā chí nadacadínuúⁿ
ndís'tiī caati maaⁿ ní n'gεecu nuuⁿ
'yáⁿā. ¹⁶Chuū canée nguūⁿ na libro
yeⁿe Ndyuūs naachi caⁿ'a profeta
Joel chí ngaⁿ'a chí cuchiī:

¹⁷Ndyuūs ní caⁿ'a yā taachi ndaā
nguuvī cuayiivi chí cuchiī,
chí teé Espíritu yeⁿe vmnaaⁿ

nducyaacá 'iiⁿ'yāⁿ. Ní daiyá nī saⁿ'ā ndúúcū daiyá nī n'daataá caaⁿ'máⁿ yā nduudu yeⁿ'é. Ní saⁿ'ā n'gaiyáá n'deēē nááⁿ chí 'cuuⁿ'míⁿ'náāⁿ yeⁿ'ē sa. Ní 'iiⁿ'yāⁿ ndiicūú yeⁿ'é nī n'deeē nááⁿ chí 'cuíínu yā.

¹⁸ Tíicā yeⁿ'e nguuvi miⁿ', 'úú teé Espíritu yeⁿ'é vmnaaⁿ yeⁿ'e saⁿ'ā chí dichíí'vē 'úú ndúúcū n'daataa chí dichíí'vē 'úú. Ní caaⁿ'maⁿ yā nduudu yeⁿ'é.

¹⁹ Níicú 'cuuⁿ'míⁿ vaadi n'giinu yeⁿ'é cuaaⁿ 'niiⁿ'nuⁿ nanguuvi, ndúúcū señales yeⁿ'é cuaaⁿ ndiiyā na yáⁿ'āa, ndúúcū yuúúⁿ, ndúúcū yaⁿ'ā, ndúúcū yaaⁿ'mi,

²⁰ 'iicu 'yáⁿ'ā miiⁿ nduuví maāiⁿ. Níicú 'iiyū mífⁿ ndúúví yuúúⁿ, taachi 'aa cuéé ndaa nguuví yeⁿ'ē Señor. Nguuvi miⁿ ch'ēete ní chí 'cuuⁿ'míⁿ yā.

²¹ Níicú nducyaaca 'iiⁿ'yāⁿ chí caaca: Señor 'iivú, ní Ndyuūs nanguáⁿ'ai yā.

²² Ndís'tii saⁿ'ā yeⁿ'e 'iiⁿ'yāⁿ Israel, 'caandiveéⁿ nī nduudu 'cūú: Jesús yeⁿ'e yāāⁿ Nazaret ní 'áámá saⁿ'ā chí Dendyuūs n'diichí yā chí n'daācā sa nguaaⁿ ndís'tii. Ní Dendyuūs dííⁿ yā vaadi n'gíínú ndúúcū señales ndúúcū ntiíⁿ'nyuⁿ ch'ēete cáávā saⁿ'ā miiⁿ nguaaⁿ ndís'tii tan'dúúcā ndís'tii deenú nī. ²³ Sáⁿ'a 'cūú Ndyuūs ní ca'a yā saⁿ'ā cáávā voluntad yeⁿ'e maaⁿ yā tan'dúúcā chí déénú n'dai yā ndíí vmnaaⁿ. Ndís'tii ní chiicá nī chí sta'á yā sáⁿ'a 'cūú chí'neé'nga'á yā saⁿ'ā. Ní chí'iiⁿ'núⁿ yā saⁿ'ā cucáávā 'iiⁿ'yāⁿ s'eeⁿ chí nguéé n'daacā. ²⁴ Sáⁿ'a 'cūú Ndyuūs nadacuéeⁿ yā saⁿ'ā yeⁿ'ē

nguaaⁿ tináⁿ'ā. Sáⁿ'a 'cūú nguéé cuuví cunée sa nguaaⁿ tináⁿ'ā. Cáávā chuū ní Dendyuūs nadacuéeⁿ yā saⁿ'ā nguaaⁿ tináⁿ'ā. ²⁵ David caⁿ'a sá yeⁿ'e sáⁿ'a 'cūú:

Ti cueⁿ'e daāⁿ'maⁿ inaáⁿ Señor 'iivú Ndyuūs vmnááⁿ yeⁿ'é. Ní canée yā lado yeⁿ'e honor, ní mar 'aamá 'iiⁿ'yāⁿ nguéé cuuví dí'vaachí yā 'úú.

²⁶ Cáávā chuū caaⁿ'máⁿ ndúúcū 'áámá vaadi yeenú yeⁿ'ē staava yeⁿ'é ndúúcū vaadi yeenú yeⁿ'e cheendí. 'Iicu cuerpo yeⁿ'é 'intaavi'tuunúúuⁿ ndúúcū chí canee ngiínú yeⁿ'é Ndyuūs.

²⁷ Ti nguéé cuⁿ'néeⁿ nī alma yeⁿ'é na lugar Hades chí lugar yeⁿ'ē alma. Ní nguéé 'cuaaⁿ nī 'úú chí daiyá nī 'úú chí 'iiⁿ'yāⁿ chí nguéé nuuⁿ'ndi 'úú chí choō cuerpo yeⁿ'é.

²⁸ Dííⁿ nī chí n'diichí chí yúúní cuaacu yeⁿ'e vida. N'díi dích'ēeté nī vaadi yeenú 'úú ti caneeⁿ nī nduucú.

²⁹ Ndís'tii víí, cuuví caaⁿ'maⁿ cuaacú ndís'tii yeⁿ'e chiida yú David. Ch'ii yā ní ních'ēechí yā na yáinyāⁿ. Ní yáinyāⁿ yeⁿ'é yā canee ndúúcú yú ndii nguuví 'cūú. ³⁰ Saⁿ'a miiⁿ saⁿ'ā profeta miⁿ chí ngaⁿ'a nduudu yeⁿ'e Dendyuūs. Ní deenú sa chí Ndyuūs ngaⁿ'a cuaacú yā ndúúcū nduudu cuaacu chí 'áámá 'iiⁿ'yāⁿ chí cuchii na ndaata yeⁿ'é yā. Ní Dendyuūs nadacuéeⁿ yā Cristo chí 'cuundi yā na trono yeⁿ'é yā ní caaⁿ'maⁿ ntiíⁿ'nyúⁿ yā. ³¹ David déénú sa chí cuaaⁿ vmnaaⁿ ní caⁿ'a sa chí Cristo nanduuchí yā yeⁿ'ē nguaaⁿ tináⁿ'ā. Nguéé cunee alma yeⁿ'é yā na lugar Hades chí lugar

yeⁿē alma ní nguée yúute yeⁿé yā chí choo. ³²Ndyuūs nadin'duuchí yā Jesús yeⁿe nguaaⁿ tináⁿā ní cáávā 'iiⁿyāⁿ miⁿ nducyaaca 'nū cuuví caaⁿmaⁿ 'nū nduudu cuaacu yeⁿé yā. ³³Tíicā Jesús canée yā ná yaacu na lado yeⁿe honor yeⁿe Dendyuūs ní dííⁿ yā recibir yeⁿē Chiidá yā miⁿ yeⁿe chi caⁿā Chiidá yā chí ca'a yā Espíritu N'dai. Chuū ní Jesús teé yā ndís'tií ní inaáⁿ nī ní n'giindiveéⁿ nī. ³⁴Ti David miⁿ nguée cuche sa nanguuvi; ti maāⁿ sa ngaⁿa sa:

Caⁿa Señor chí yā Señor yeⁿé:

'Cuundi dí lado yeⁿe honor,

³⁵ndíí cu'neéⁿ 'iiⁿyāⁿ chí táaⁿ yā yeⁿe di chí tun'dáaⁿ n'dai di ndúúcu yā ní cunée yā na poder yeⁿē di.

³⁶Cuaacu niiⁿnyuⁿ cádiinuⁿ nducyáácá 'iiⁿyāⁿ yeⁿe ndaata Israel chí Jesús chí ndís'tií ní chí'neéⁿnga'á nī 'iiⁿyāⁿ, Ndyuūs dííⁿ yā chí Señor ní Cristo yā ní 'iiⁿyāⁿ ch'etete taavi.

³⁷Taachí ch'iindiveéⁿ yā chuū ní neéne ya'ai chíí staava yeⁿé yā. Ní caⁿa yā chíí yā 'iiⁿyāⁿ s'eeⁿ Pedro ndúúcu taa na 'uuví apóstoles: Ndís'tií saⁿā vi'í, ¿de'ē dííⁿ 'nū?

³⁸Pedro miⁿ ngaⁿa sa ngii sa 'iiⁿyāⁿ s'eeⁿ: Nguēcúndií nī yeⁿē nuuⁿndi yeⁿé nī ní cuēdinúⁿnīⁿ ca'áámá ca'áámá nī cucáávā chí chí duuchi Jesús. Níicú Ndyuūs nadach'ēcú yā nuuⁿndi yeⁿe ndís'tií; nī cuta'á nī chí tee Ndyuūs miⁿ chí Espíritu N'dai yeⁿé yā.

³⁹Caati Espíritu N'dai caⁿā Chiida yú chí teé yā cucáávā ndís'tií ndúúcu daiya nī ní cucáávā nducyaaca 'iiⁿyāⁿ chí snée yā yaⁿai, nī cucááva nducyaaca 'iiⁿyāⁿ chí

'cuaí Señor 'iivú Ndyuūs yeⁿē yú 'iiⁿyāⁿ.

⁴⁰Pedro miⁿ ngaⁿá yā nduudu cuaacu nanááⁿ na 'uuví yā ndúúcu n'dee taaví nduudu ní ngaⁿa díitú yā 'iiⁿyāⁿ s'eeⁿ ní ngaⁿa yā: Nanguáⁿai nī yeⁿe 'iiⁿyāⁿ chí nguée n'daacā.

⁴¹Tíicā 'iiⁿyāⁿ chí 'cuúⁿ yā nduudu yeⁿe yā chēdinúⁿnīⁿ yā, ní chí 'yaáⁿ yā nguuví miⁿ tan'dúúca 'iiⁿnūⁿ mil 'iiⁿyāⁿ. ⁴²Ní 'áámá caneé yā ndúúcu chí chí'cueeⁿ apóstoles ní nduuvidaama yā ní n'dee yā pan ní caⁿangua'á yā.

Vida yeⁿe 'iiⁿyāⁿ s'eeⁿ yeⁿe Evangelio yeⁿe Jesucristo vmnááⁿ vmaaⁿ

⁴³Ní vaadi 'va'a nínadaā nanááⁿ nducyaaca yā. Néene n'dee vaadi n'giinu ndúúcu señales chí dííⁿ apóstoles chí dichó'ó Dendyuūs.

⁴⁴Ní nducyaacá yā chí i'téenu yā nduuvidaama yā. Ní nducuéⁿē chí véé yeⁿé yā canée yeⁿē nducyaaca yā. ⁴⁵Ní n'diicuí yā yáⁿāa yeⁿé yā ndúúcu chí véé yeⁿe yā ní nga'a yā 'téé 'téé nducyáácá 'iiⁿyāⁿ tuunu tuunu cá chí ngi'vaachí 'iiⁿyāⁿ.

⁴⁶'Áámá ninduuvidaamá yā na yáacu nguuví nguuví. Ní ninduuvidaamá yā ní yeenú taaví yā staava yeⁿé yā ndúúcu 'áámá vaanicadiinúⁿnīⁿ yeⁿe yā taachi n'dee yā pan ní taachí ch'éé yā na vaacú yā. ⁴⁷'Iiⁿyāⁿ miⁿ dich'etete yā Dendyuūs. Ní véé favor yeⁿé yā ndúúcu 'iiⁿyāⁿ yeⁿe yáaⁿ miⁿ. Ní Señor Ndyuūs nguuví nguuví idi'yáaⁿ yā 'iiⁿyāⁿ chí i'teenú yā 'iiⁿyāⁿ.

Saⁿā chí nguée ngii ngíicá sá ní nānduūvā yeⁿē sa

3 Pedro mííⁿ ndúúcu Juan dáámá cueⁿe yā cuche yā na yaacú

templo cuaaⁿ nan'geecú 'íí'núⁿ chiinu, hora chi caⁿ angua'á yā. ²Ní ná'a yā ndéé yā 'áámá saⁿā chi ndii dúúvá sá ndíí cheeti cheecu sa. Saⁿā miiⁿ ni nguúví nguúví i'néeⁿ yā saⁿā cheendi yaācū chi nguuví Hermosa o N'deeveé. Saⁿa miiⁿ ngiica sa limosna 'iiⁿyāⁿ chi ngeⁿe yaācū templo. ³Sáⁿa 'cūū taachi n'diichí sa Pedro ndúúcū Juan chí chindáa yā yaācū ch'ēte, chiica sá limosna 'iiⁿyāⁿ s'eeⁿ. ⁴Pedro ndúúcū Juan ch'ētinée yā ch'íínu yā saⁿā miiⁿ, ní caⁿá yā chii yā saⁿā: Cun'diichi dí nús'uu.

⁵Tuu'mi ní saⁿā miiⁿ ch'íínu sa 'iiⁿyāⁿ s'eeⁿ chi canee ngíínu sá de'ē ca'á yā saⁿā. ⁶Naati Pedro miiⁿ caⁿá yā: Nguéé tuūmí 'díí'nguee yeⁿé ni nguéé 'dii'nguāaⁿ yeⁿé chí canée yeⁿé chi teé dii, cucáávā Jesucristo yeⁿe yāaⁿ Nazaret miiⁿ, nacuéeⁿ dī ní caaca di.

⁷Ní sta'á yā ta'a sa lado tá cuaācū sa ní nadacuéeⁿ yā saⁿā. Hora mííⁿ nūuⁿ ní ndaā dítiinú ca'a sa ndúúcū 'ííni ruundi ca'a sa. ⁸Ní caí yaācú sa, ní chéendii sá, ní chiicā sa. Sndāa sa ndúúcū Pedro ndúúcū Juan cheeti yaācū templo miiⁿ. Ngiica sá ní ngái yaācú sa ní i'téenu sá Dendyuūs. ⁹Núú'mánⁿ yāaⁿ 'iiⁿyāⁿ n'diichí yā saⁿā chi ngiica sa ní i'téenu sa Dendyuūs. ¹⁰Ní nntíínaaⁿ yā chi saⁿā miiⁿ chi saⁿā chi n'giindi cheendi yaācū templo chi nguuví Hermosa, ní ngiica sa limosnas. Ní cheⁿe yiinu yā ní 'iiⁿyāⁿ s'eeⁿ dii'yá yā chii chi 'tíicā nanduuvá yeⁿe sa.

Pedro ngaⁿá yā na corredor chi nguuví Salomón

¹¹Saⁿā chí nguee ngiica ní chi nduūvá yeⁿe sa sta'a sa Pedro

ndúúcū Juan ní nuuⁿmaⁿ yāaⁿ yā ngeⁿe yiinu yā 'iiⁿyāⁿ. Ní cueⁿé yā na corredor chi nguuví Salomón chí 'áámá corredor yeⁿe yaācū ch'ēte. ¹²Taachi Pedro n'diichi sa 'iiⁿyāⁿ s'uúⁿ Pedro nan'geecútáⁿa sa yeⁿé 'iiⁿyāⁿ yāaⁿ: Ndís'tii saⁿā yeⁿe Israel, 'de'ē cuuvi chí ngeⁿe yiinu ní yeⁿe chūú? O 'de'ē cuuví chí n'gíínu ní nús'uú? 'Áá caava chí diitú 'nū o chí n'dái 'nū chí dííⁿ 'nū chí ngíicá sáⁿa 'cūū? ¹³Ndyuūs yeⁿe saⁿā s'eeⁿ, Abraham ndúúcū Isaac ndúúcū Jacob ní Ndyuūs yeⁿe chiida yú, Ndyuūs dííⁿ yā honrar Daiyá yā Jesús. Ndís'tii ní ca'á ní 'iiⁿyāⁿ miiⁿ ní cheeⁿdiitú ní nanáaⁿ Pilato miiⁿ taachi Pilato neⁿé yā ca'á yā libertad yeⁿé yā. ¹⁴Ndís'tii ní cheeⁿdiitú ní chí Jesús chí n'daaca yā, Jesús chí n'dai taaví yā, ní chiica ní chí canée libre 'áámá saⁿā chí 'nífⁿnúⁿ 'iiⁿyāⁿ. ¹⁵Ní ch'iiⁿnuⁿ ní Jesús chí cā'a yā vida yeⁿe 'iiⁿyāⁿ. 'Iiⁿyāⁿ miiⁿ ní nadin'dūūchí Dendyuūs 'iiⁿyāⁿ yeⁿe nguaaⁿ tináⁿā ní nús'uú caaⁿmaⁿ cuaacú 'nū yeⁿé yā. ¹⁶Sáⁿa 'cūū chí nguee ngiica chí ndís'tii inaáⁿ ní ní n'diichí ní, sáⁿa 'cūū ní ditiinú sa cucáávā chí i'téenu sa Jesús. Ndúúcū vaadi i'téenu chí ca'a Jesús, sáⁿa 'cūū 'āa nduuví n'dái sá tan'dúúicā chí n'diichí nducyaacá ndis'tii.

¹⁷Naati maaⁿ ní, ndís'tii ví'í, deenú chí ndís'tii diiⁿ ní chuū cucáávā chí nguee déenu ní tan'dúúicā chí dííⁿ 'iiⁿyāⁿ s'eeⁿ chí ngaⁿa ntiíⁿnyúⁿ yā yeⁿe ndís'tii. ¹⁸Tíicā Dendyuūs ní snuūⁿ ca'a chí caⁿa yā vmnáaⁿ vmnaaⁿ cáávā cheendi nducyaaca profetas chí n'dai chí caⁿa nduudu yeⁿe Dendyuūs yeⁿe chí Cristo

Daiyá yā. Ní cánéé chí Cristo ní 'cuenú yā cuuvi. ¹⁹Tíicā maaⁿ ní nacadíínuuⁿ ní ní ndaacadáámí ní yeⁿ'ē nuuⁿndi yeⁿ'é ní ní cu'téénú ní. Níicú Ndyuūs nadiví yā nuuⁿndi yeⁿ'é ní. Níicú ndaa tiempo chí ntaavi'tuunúúⁿ ní nanááⁿ Señor 'iivú Ndyuūs. ²⁰Ndyuūs ní ndéevé yā Jesucristo ndíí vmnaaⁿ níicú caⁿ'a yā chí dichó'o yā Jesucristo tan'dúucā chí caⁿ'a yā ndíí cuááⁿ vmnaaⁿ. ²¹Cuaacu nííⁿnyuⁿ chí 'iiⁿ'yāⁿ miiⁿ canee cúúⁿmíⁿ chí canéé yā va'āi chēeti nguuví ndíí taachi ndáá nguuví chí Dendyuūs dííⁿ yā taanduvéé dendu'ú chí Dendyuūs caⁿ'á yā vmnááⁿ vmnaaⁿ cucáávā cheendi profetas yeⁿ'e yā. Profetas chí n'dai caⁿ'a yā chí cuchii ndíí cuááⁿ vmnaaⁿ. ²²Caati Moisés miiⁿ ní caⁿ'a yā chii yā chiida yú s'eeⁿ ndíí vmnaaⁿ: Señor Ndyuūs yeⁿ'ē yú nadacuéeⁿ yā 'áámá profeta nguaaⁿ 'iiⁿ'yāⁿ yeⁿ'ē yú tan'dúucā 'úú. Ní yeⁿ'é 'iiⁿ'yāⁿ miiⁿ 'caandiveéⁿ ní yeⁿ'ē taanduvéé dendu'ú chí caaⁿ'maⁿ yā ndúucū ndís'tií. ²³Ní cuuví chí nducyaaca yā chí nguéé 'caandiveéⁿ yā yeⁿ'e 'iiⁿ'yāⁿ profeta miiⁿ canéé chí can'dáa yā yeⁿ'ē nguaaⁿ 'iiⁿ'yāⁿ.

²⁴Tanducuéⁿe profetas ní ndii tiempo yeⁿ'e Samuel ndii tiempo chí cuchí 'yaaⁿ n'dái yā ní caⁿ'a yā, ní 'āā caⁿ'a ntúuⁿ yā yeⁿ'ē nguuví 'cūú. ²⁵Ndís'tií daiya profetas chí caⁿ'a nduudu yeⁿ'é Dendyuūs ní yeⁿ'e compromiso chí Dendyuūs caⁿ'a cuaacú yā ndúucū chiida yú s'eeⁿ ní caⁿ'a yā chii yā Abraham: Ná ndaatá yeⁿ'ē di cuchii 'áámá saⁿ'ā cuayiivi, caati sáⁿ'ā miiⁿ cúúví dí'viicú sa tanducuéⁿ'ē 'iiⁿ'yāⁿ yeⁿ'e iⁿ'yeeⁿdí 'cūú. ²⁶Ndyuūs nadicuéeⁿ

yā Daiyá yā vmnááⁿ vmnaaⁿ cáávā ndís'tií. Ní dichó'o yā 'iiⁿ'yāⁿ miiⁿ chí dí'viicú yā ndís'tií chí 'áámá 'áámá ní ndaacadaamí ní yeⁿ'ē nuuⁿndí yeⁿ'é ní.

Pedro ndúucū Juan nanááⁿ 'iiⁿ'ntyéⁿ'ē Concilio

4 Taachi Pedro ndúucū Juan yaaⁿ'ví yā nanaaⁿ 'iiⁿ'yāⁿ miiⁿ chí nduuvídáámá yā tuuⁿmí ndaa nanááⁿ 'iiⁿ'yāⁿ s'eeⁿ chiiduú s'eeⁿ yeⁿ'é Israel ndúucū soldados ndíí tiiⁿ yeⁿ'ē soldados chí díiⁿ cuidado yeⁿ'e yáacū templo yeⁿ'e 'iiⁿ'yāⁿ Israel ndúucū 'iiⁿ'yāⁿ saduceos chí nguéé i'teenú yā chí ndduuchí 'iiⁿ'yāⁿ yeⁿ'e nguaaⁿ tináⁿ'ā. ²'iiⁿ'yāⁿ s'eeⁿ miiⁿ ya'āi chí yeⁿ'e staava yeⁿ'é yā taachi chí'iindiveéⁿ yā chííⁿ chí Pedro ndúucū Juan caⁿ'a yā chí chí'cuéeⁿ yā 'iiⁿ'yāⁿ yááⁿ miiⁿ. Ní caⁿ'a yā chí Dendyuūs nadacuéeⁿ yā 'iiⁿ'yāⁿ s'eeⁿ yeⁿ'e nguaaⁿ tináⁿ'ā cucáávā Jesús miiⁿ. ³Ch'ínū nguuví miiⁿ ní 'iiⁿ'yāⁿ s'eeⁿ chitaⁿ'á yā Pedro ndúucū Juan ní chinuúⁿ yā saⁿ'a s'eeⁿ vácūú ndíí chideeve miiⁿ. ⁴Naati nguaaⁿ tanducuéⁿe yā neenē 'yaaⁿ yā chí chí'iindiveéⁿ yā ní n'deeē taaví yā chí chí'teenú yā, ní 'iiⁿ'yāⁿ s'eeⁿ ní ngii yā taandu yuⁿ'u mil.

⁵Chideeve táámá nguuví miiⁿ nduuvidaamā na yáāⁿ Jerusalén 'iiⁿ'yāⁿ s'eeⁿ chí ngaⁿ'ā ntiiⁿ'nyuⁿ ndúucū 'iiⁿ'yāⁿ ndiicú chí ngaⁿ'a ntiiⁿ'nyuⁿ yeⁿ'ē yáacū ndúucū maestros yeⁿ'e ley, ⁶ndúucū chiiduú ch'ēē cá yeⁿ'ē Israel chí nguuví Anás, ndúucū Caifás, ndúucū Juan, ndúucū Alejandro, ndúucū nducyáácá 'iiⁿ'yāⁿ yeⁿ'e familia chiiduú ch'ēē cá yeⁿ'e Israel. ⁷Ní

ch'iinú yā Juan ndúúcū Pedro naavtaⁿā, ní ntiinguunééⁿ yā saⁿā s'eeⁿ: ¿De'ē poder, o de'ē duuchí 'iiⁿyāⁿ chi teē poder chi díⁿ ní chuū?

⁸Tuu'mi ní Pedro miiⁿ ní diituú Espíritu N'dai yeⁿe Ndyuūs 'iiⁿyāⁿ caⁿa yā chii yā saⁿa: Ndís'tií 'iiⁿyāⁿ chi ngaⁿa ntiiⁿnyúⁿ yā ndúúcū 'iiⁿyāⁿ ndiicū chi ngaⁿa ntiiⁿnyúⁿ yā yeⁿe yáacū yeⁿe 'iiⁿyāⁿ Israel; ⁹ndúúti chi ndís'tií maaⁿ ní díⁿ ní juzgar nús'uu yeⁿe saⁿā chi ngiitā miiⁿ ní n'daacá nū ndúúcū sa, ní sáⁿa 'cūū miiⁿ nanduuva yeⁿe sa, ¹⁰cadíínuuⁿ nducyaaca ndís'tií ndúúcū nducyáacá 'iiⁿyāⁿ yeⁿe Israel miiⁿ chi sáⁿa 'cūū chi canéé sá ndúúcu yú nanduuvá yeⁿe sa cucááv Jescu Cristo yeⁿe yáā Nazaret. 'Iiⁿyāⁿ miiⁿ ndís'tií ní s'nééⁿnga'á nī 'iiⁿyāⁿ ní Dendyuūs nadicuéeⁿ yā 'iiⁿyāⁿ yeⁿe nguaaⁿ tináⁿā. ¹¹Jesús tan'dúúcā tuūu 'cūū chi ndís'tií 'iiⁿyāⁿ chi din'dái va'ai ní nguéeⁿ canee yiinú nī, naati maaⁿ ní Ndyuūs chi cu'néeⁿ yā tuuú 'cūū yeⁿe lado tuūu ch'etē yeⁿe esquina yeⁿe va'ai. ¹²Véé dámaaⁿ 'áamá n'dyáⁿā sáⁿa 'cūū chi cuuvi nadanguáⁿai sa 'aa du'ú nūuⁿ 'iiⁿyāⁿ. Neⁿe chi nguéeⁿ ndúúcū 'iiⁿyāⁿ miiⁿ nguéeⁿ nínguaⁿāi yú, ti nguéeⁿ táamá 'iiⁿyāⁿ ná iⁿ'yeeⁿdí 'cūū chi nadanguáⁿai yā s'uuúⁿ.

¹³Tuu'mi ní taachí n'diichi yā chi Juan ndúúcū Pedro ditiinú taavi sa, nguéeⁿ di'váⁿ sa ní cudéenu yā chi nguéeⁿ saⁿā chi deenu sa letra ti tonto sa, cheⁿe yiinú yā chií. Ní deenú yā chi saⁿā s'eeⁿ ch'etinééⁿ sa ndúúcū Jesús. ¹⁴Taachí n'diichí yā chi chééndii saⁿā chi 'āā nnduuvá

yeⁿe ndúúcū 'iiⁿyāⁿ s'eeⁿ nguéeⁿ ngíí ngaⁿa yā contra yeⁿe sa. ¹⁵Tuu'mi ngaⁿá 'iiⁿyāⁿ s'eeⁿ ngii yā saⁿā s'eeⁿ miiⁿ chí nacan'dáa sa nguaaⁿ 'iiⁿyāⁿ s'eeⁿ. Ní 'iiⁿyāⁿ s'eeⁿ chí nddeé yā nguaaⁿ maáⁿ yā. ¹⁶Ní ngaⁿa yā: ¿De'ē diiⁿ yú ndúúcū saⁿā s'eeⁿ? Cuaacu níⁿnyúⁿ chi vee 'aama señal caavá saⁿā s'eeⁿ diiⁿ sa 'tíicā ní cadíínuuⁿ nducyaaca yā na yáāⁿ Jerusalén miiⁿ. Ní nguéeⁿ cuuvi 'cuēcutáⁿa yú yeⁿe chuú. ¹⁷Naati chi 'aa ntéé caaⁿmaⁿ sa chi 'yaaⁿ cá chuū nguaaⁿ yáāⁿ, tuu'mi ní 'iiⁿyāⁿ chi ngaⁿa ntiiⁿnyúⁿ yā yeⁿe yáāⁿ miiⁿ ngaⁿa yā: Yáá'ví yúúdu yú yeⁿe saⁿā s'eeⁿ chí 'aa ntéé caaⁿmaⁿ sa mar 'áamá yeⁿe Jesús ndii mááⁿ ndíí nguuvi chi cuchíi.

¹⁸Ní 'cai yā saⁿā s'eeⁿ ní caⁿa yúúdu yā chii yā saⁿā s'eeⁿ chi 'āā ntéé caaⁿmaⁿ sa ní 'aa ntéé ca'cuéeⁿ sa yeⁿe Jesús miiⁿ. ¹⁹Naati Pedro ndúúcū Juan nán'guēcutáⁿa sa yeⁿe yā ní caⁿā sa yeⁿe yā: Canéé chí tuumicadiinuⁿ nī nanááⁿ Dendyuūs. ¿'Áá canéé chí cu'téenu 'nū yeⁿe ndís'tií vmnááⁿ vmnaaⁿ o cu'teenú 'nū yeⁿe Dendyuūs? ²⁰Ti nguéeⁿ cuuvi chí 'aa ntéé caaⁿmáⁿ nús'uū de'e chí n'diichi 'nū o chííⁿ chí ch'iindiveéⁿ nū.

²¹Tuu'mi ní taachi yaa'vi yuudú yā saⁿā s'eeⁿ ní nadich'ó yā saⁿā s'eeⁿ cáávā nducyáacá yā i'téenu yā Dendyuūs cucááv chíí 'āā chíi. Ní nguéeⁿ indaacá yā mar 'áamá nuuⁿndi ch'etē yeⁿe saⁿā s'eeⁿ chí cuuvi díⁿ yā castigar saⁿā s'eeⁿ cáávā chí 'va'á yā 'iiⁿyāⁿ yáāⁿ miiⁿ. ²²Níicú díⁿ yā 'áamá milagro ndúúcū saⁿā miiⁿ chí nduūvá yeⁿe sa. Saⁿā miiⁿ 'āā ngo'o sá 'uūví ngēecu nduūyū yeⁿe sa.

**'Iiⁿ'yāⁿ chi i'teenu caacá yā
confianza ndúú^{cū} ánimo**

²³Taachí 'āā nduuví yā libre cueⁿ'é yā nanááⁿ compañeros yeⁿ'é yā. Tuuⁿ'mi ní caⁿ'á yā nducueⁿ'ē chi ncaⁿ'a chiiduú n'gēetē yeⁿ'e Israel ndúú^{cū} 'iiⁿ'yāⁿ ndiicū^ū chi ngaⁿ'a ntiiⁿ'nyuⁿ yeⁿ'e yáacū. ²⁴Ní 'iiⁿ'yāⁿ s'eeⁿ ní taachí ch'iindiveēⁿ yā chuū, nduuvidaamá yā ní caⁿ'a yā ndúú^{cū} Dendyuūs: N'díi, Señor Dendyuūs chi ch'ēete n'dai ca, n'dii 'iiⁿ'yāⁿ chi din'dái nī nanguuvi ndúú^{cū} yáⁿ'āa ndúú^{cū} nuūⁿ'nī yáⁿ'ā ndúú^{cū} tanducueⁿ'ē chi véé. ²⁵Caati ndúú^{cū} cheendi David, saⁿ'ā chi n'dii chí 'āā diiⁿ mandado yeⁿ'é nī ní 'āā caⁿ'a nī: ¿Deⁿ'ē cuchíⁿ chi rebelde 'iiⁿ'yāⁿ chi nguéé 'iiⁿ'yāⁿ yeⁿ'ē ndaata Israel? Níicú 'iiⁿ'yāⁿ yeⁿ'ē naciones miiⁿ inacádiinúúⁿ yā cosa chi nguéé dichiiⁿ'vē. ²⁶Nduuvidaamá reyes yeⁿ'ē yáⁿ'āa 'cūū, 'íicú saⁿ'ā n'gēete chí ngaⁿ'ā ntiiⁿ'nyúⁿ yā nduuvidaamá yā contra yeⁿ'e Señor Dendyuūs, ndúú^{cū} Cristo yeⁿ'é yā.

²⁷Maaⁿ ní cuaacu níⁿ'nyúⁿ chí nduuvidaamá yā Herodes ndúú^{cū} Poncio Pilato, ndúú^{cū} 'iiⁿ'yāⁿ chi nguéé 'iiⁿ'yāⁿ yeⁿ'ē ndaata Israel ndúú^{cū} 'iiⁿ'yāⁿ yeⁿ'e Israel na yáaⁿ 'cūū contra yeⁿ'e Jesús chi Daiya nī chi n'dai. Ní n'díi caⁿ'á nī ntiiⁿ'nyuⁿ chi díⁿ' yā. ²⁸'Iiⁿ'yāⁿ miiⁿ díⁿ' yā chi cuuvi tan'dúú^{cā} chi neⁿ'é nī vmnááⁿ vmnaaⁿ chí cuuvi 'tífā. ²⁹Maaⁿ ní n'dii Señor, n'diichí nī chi tan'dúú^{cā} chi chiiduú n'gēetē yeⁿ'ē Israel ngaⁿ'a taáⁿ yā ndúú^{cū} nús'uu. N'dii Señor, teé nī nús'uu chi idiiⁿ

mandado yeⁿ'é nī chí nguéé 'vaⁿ'á 'nū ní caaⁿ'máⁿ 'nū nduudu yeⁿ'é nī. ³⁰Ch'íⁿ'í maáⁿ nī chí diitú nī chí 'iiⁿ'yāⁿ díⁿ' yā chí nánduū^{vā} yeⁿ'e 'iiⁿ'yāⁿ, ní díⁿ' yā señales ndúú^{cū} vaadi n'giinu cucáāvā Daiyá nī chí Jesús chi n'dai taavi.

³¹Taachí ch'iinu caⁿ'ánguaⁿ'á yā naachi nduuvidaámá yā, nuⁿ'u vaⁿ'āi miiⁿ. Ní nducyaaca yā ní chiitu Espíritu N'dai yeⁿ'e Ndyuūs 'iiⁿ'yāⁿ. Nguéé 'vaⁿ'á yā chí caⁿ'a yā nduudu yeⁿ'e Dendyuūs.

**Nducueⁿ'ē chi véé yeⁿ'ē
nducyáácá 'iiⁿ'yāⁿ**

³²'Iiⁿ'yāⁿ n'dee n'dái chí ch'i'téenu yā nduuvidaamá yā ní 'áámá staava yeⁿ'é yā, 'áámá alma yeⁿ'é nducyaaca yā. Mar 'áámá 'iiⁿ'yāⁿ nguē caⁿ'a yā chí yeⁿ'é yā dendu^ū chí véé yeⁿ'é yā ti nducueⁿ'ē chí véé ní yeⁿ'ē nducyááca yā.

³³Apóstoles chí dichó^ó Ndyuūs ngaⁿ'á yā nduudu cuaacu ndúú^{cū} poder ch'ēete yeⁿ'ē Señor Jesús chí nadacueēⁿ yā yeⁿ'e nguaaⁿ tináⁿ'ā. Níicú favor ch'ēete taavi cá yeⁿ'é Dendyuūs cánéé nanááⁿ 'iiⁿ'yāⁿ s'eeⁿ. ³⁴Mar 'áámá 'iiⁿ'yāⁿ nguē ngii 'vaachí yā. Nducyáácá 'iiⁿ'yāⁿ chí véé yeⁿ'ē chiidá yā chí yeⁿ'e yā ndúú^{cū} dendu^u yeⁿ'é yā ín'diicuí yā. Ní ndéē yā chí ndāāca yā chí n'diicui yā chiiⁿ. ³⁵Ní 'neeⁿ yā na ca'a apóstoles chí dichó^ó Dendyuūs. Ní ngaⁿ'á yā ca'áámá 'iiⁿ'yāⁿ tuunu tuunu ca ngii 'vaachí 'iiⁿ'yāⁿ. ³⁶Tuuⁿ'mi ní José, ní 'iiⁿ'yāⁿ chí s'neeⁿ apóstoles chí duuchi Bernabé (chí neⁿ'e caaⁿ'maⁿ, 'Iiⁿ'yāⁿ chí ngaⁿ'a 'viich'ētíⁿnūⁿ). José miiⁿ 'iiⁿ'yāⁿ yeⁿ'e ndaata yeⁿ'e levita

ní ch'iindiyáaⁿ yā na isla Chipre.
³⁷Iiⁿyāⁿ miiⁿ véé 'áamá vaadi
 ngua'aá yeⁿ'ē yā. N'diicui yā ní ndée
 yā tuumi yeⁿ'ē miiⁿ, ní s'neéⁿ yā na
 ca'a apóstoles chi dichó'ó Ndyuūs.

Ananías ndúúcū Safira

5 Véé 'áamá saⁿ'ā chi nduuvu
 sa Ananías ndúúcū Safira
 n'daataa yeⁿ'ē sa chi n'diicui sá
 'áamá vaadi ngua'aá yeⁿ'ē sa. ²Nguée
 tanducueⁿ'ē tuumi chi sta'a sa
 yeⁿ'e yáⁿ'āa ndée sa, ní n'daataa
 yeⁿ'ē sa chicalíinúⁿ tá chuū. Saⁿ'ā
 miiⁿ ní 'téé nūu ndée sa chi 'neeⁿ
 sa na ca'a apóstoles chi dichó'ó
 Dendyuūs. ³Tu'uⁿmí ngaⁿ'ā Pedro
 miiⁿ: Díí, Ananías, ¿de'ē cuuví chi
 yááⁿnguiniūⁿ chistaⁿ'a sa na staava
 yeⁿ'ē di, ní nguée caⁿ'a cuaacú dí
 nanááⁿ Espíritu N'dai yeⁿ'e Ndyuūs,
 ní nguée ndée di tanducueⁿ'ē tuumí
 yeⁿ'ē yáⁿ'āa miiⁿ? ⁴Naaⁿ chi cánée
 ta'ā di, ¿'áá nguée yeⁿ'ē di? Ni taachi
 'āā n'diicui di, ¿'áá nguée yeⁿ'ē di
 dendu'ū? ¿De'ē cúuví chí chi'neeⁿ di
 na staava yeⁿ'ē di? Nguée caⁿ'a di
 nduudu yaadi miiⁿ ná saⁿ'ā iⁿ'yeeⁿdí
 'cūū naati nanááⁿ Dendyuūs.

⁵Taachi Ananías ch'iindiveeⁿ sa
 nduudú 'cūū sndeeve sá ní ch'iī sa.
 Ní nducyáaca yā chi ch'iindiveeⁿ yā
 chuū dii'yā taaví yā chiī. ⁶Ní saⁿ'ā
 da'caiyāa chi s'neéⁿ miiⁿ nadicuéeⁿ
 sa 'iiⁿ'yāⁿ, ní ch'ēecu sa tíinūⁿ
 'iiⁿ'yāⁿ, ní tun'dáa sa 'iiⁿ'yāⁿ chuva'āī.
 Ní ch'iichi sá 'iiⁿ'yāⁿ na panteón.

⁷Cho'oo tan'dúúcā 'iiⁿnūⁿ hora
 chi ndáa n'daataa yeⁿ'ē sa chēeti
 yaacū. Táⁿ'a 'cūū ní nguée deenū
 tá de'ē chi chiī. ⁸Tu'uⁿmí ní Pedro
 ngaⁿ'a sa ngii sa táⁿ'ā: Cuuvi di
 'úú, ¿'áá n'deē tuumí sta'a di yeⁿ'e

yáⁿ'āa miiⁿ chí n'diicui sa? Ní tá
 miiⁿ ní caⁿ'a tá: 'Tíicā. ⁹Pedro miiⁿ
 ngaⁿ'a sa ngii sa táⁿ'ā: ¿De'ē cáávā
 chi diiⁿ di ndúúcū isaⁿ'a yeⁿ'ē di chi
 chinnche'ei dí Espíritu yeⁿ'e Señor
 'iivú Ndyuūs? N'diichí dí. 'Iiⁿ'yāⁿ chi
 cheⁿ'e chí n'guuchi isaⁿ'ā yeⁿ'ē di
 sneé yā cheendi yaacū ní canée chí
 tun'dáa ntúuⁿ yā dii. ¹⁰Tu'uⁿmí ní chi
 nndeevé túūⁿ tá 'cūū na ca'a Pedro
 ní ch'iī tá. Taachi ndáa saⁿ'ā s'eeⁿ
 yáacū ní ndaaca sa táⁿ'a 'āā n'dii
 ntúūⁿ tá. Ní tun'dáa nī ntúūⁿ saⁿ'ā
 da'caiyāa s'eeⁿ táⁿ'ā. Ní ch'iichi sa
 táⁿ'ā niiⁿnuúⁿ ná yáinyāⁿ yeⁿ'ē saⁿ'a
 yeⁿ'ē tá. ¹¹Nducyáacá 'iiⁿ'yāⁿ yeⁿ'ē
 yáacū ndúúcū 'iiⁿ'yāⁿ chi ch'iindiveeⁿ
 yā chuū neenē dii'yā yā chiī.

N'dee taaví señal s'eeⁿ ndúúcū vaadi n'giinu s'eeⁿ

¹²Cáávā ta'a apóstoles neenē
 n'dee nááⁿ señales ndúúcū
 vaadi n'giinu s'eeⁿ díiⁿ yā na
 yáāⁿ miiⁿ. Ní nducyáacá yā 'áamá
 nduuvidaamá yā corredor chi
 nguuví Salomón yeⁿ'e yaacū templo
 yeⁿ'e 'iiⁿ'yāⁿ Israel. ¹³Iiⁿ'yāⁿ chi
 nguée nduuvidaamá yā ndúúcū
 'iiⁿ'yāⁿ yeⁿ'e yáacū 'va'á yā chi
 nduuvidaama yā nduucú yā. Naati
 'iiⁿ'yāⁿ yeⁿ'e yáāⁿ miiⁿ diiⁿ yā honrar
 'iiⁿ'yāⁿ yeⁿ'e yáacū. ¹⁴Iiⁿ'yāⁿ chi
 i'téénú Señor 'iivú Ndyuūs chi 'yaaⁿ
 cá yā tan'dúúcā chi 'yaaⁿ sáⁿ'ā 'tiicá
 ntúūⁿ n'daataa; ¹⁵tun'dáa yā 'iiⁿ'yāⁿ
 s'eeⁿ chi ngíita miiⁿ cyuuni. Ní
 sn'duú yā 'iiⁿ'yāⁿ na cama, ní sn'duú
 yā 'iiⁿ'yāⁿ na colchones, ti taachi
 cho'o Pedro miiⁿ ní 'aa cunee 'cuutií
 yeⁿ'ē Pedro miiⁿ vmnaaⁿ yeⁿ'ē 'áamá
 chē 'iiⁿ'yāⁿ s'eeⁿ. ¹⁶Nífcú 'iiⁿ'yāⁿ
 yáāⁿ na niiⁿnuúⁿ mífⁿ neenē 'yáāⁿ

yā ndaá yā yáaⁿ Jerusalén ndúúcū 'iiⁿyāⁿ chi ngiítā ndúúcū 'iiⁿyāⁿ chí sta'ā 'yúúné chí nguéé n'dāācā yeⁿe yáaⁿ'nguiinūⁿ. Nducyáácā yā nduuva yeⁿ'é yā.

'Iiⁿyāⁿ s'eeⁿ can'dáa yā chi n'nuuⁿ cá'ai yā Pedro ndúúcū Juan

¹⁷Tuu'mi ní chiiduú ch'εεte ca yeⁿe Israel ndúúcū 'iiⁿyāⁿ chi snée yā ndúúcū yā chi yeⁿ'ē saduceo s'eeⁿ chí nguéé i'téenu yā chi nduuchi 'iiⁿyāⁿ nguaaⁿ tináⁿ'ā diíⁿ yā contra yeⁿ'e 'iiⁿyāⁿ s'eeⁿ. Ní diíⁿ nguéé yā. ¹⁸Ní sta'á yā apóstoles chí dichó'ó Ndyuūs ní s'nuúⁿ yā saⁿ'ā s'eeⁿ vácūū yeⁿ'e yáaⁿ miiⁿ. ¹⁹Naati 'áámá ángel yeⁿ'e Señor 'iivú Dendyuūs miiⁿ ní nn'guaaⁿ yā cheendi vácūū miiⁿ n'gaaⁿ, ní tun'dáa yā 'iiⁿyāⁿ s'eeⁿ ní caⁿ'a yā: ²⁰Cunaⁿ'á nī, ní 'cuetíndíi nī na yáacū templo ní caa'maⁿ nī tanducuéⁿ'ē nduudu yeⁿ'e vida ngaí 'cūū nanááⁿ nducyaaca 'iiⁿyāⁿ yeⁿ'ē yáaⁿ miiⁿ.

²¹Taachí ch'iindiveéⁿ yā chuū ní sndaa yā yaacū templo miiⁿ tyaaⁿ tyaaⁿ ní ca'cueeⁿ yā. 'Naaⁿ chí snée yā cheeti yaacū miiⁿ ní nduuvadáámá chiiduú ch'εεte ca yeⁿ'e Israel ndúúcū 'iiⁿyāⁿ chí snée nduucú yā. Ní 'cai yā 'iiⁿyāⁿ chí ngaⁿ'a ntiiⁿnyuⁿ ndúúcū nducyaaca 'iiⁿyāⁿ ndicúū yeⁿ'e 'iiⁿyāⁿ Israel. Ní dichó'ó yā soldado s'eeⁿ chí caⁿ'ā sa na vácūū chí canguái sa 'iiⁿyāⁿ.

²²Taachi ndāā soldado s'eeⁿ nguéé indaāca sa 'iiⁿyāⁿ s'eeⁿ vácūū tuu'mi ní nguεεcundíi sa ní yaa'vi sa 'iiⁿyāⁿ s'eeⁿ. ²³Ní ngaⁿ'ā sa: Cuaacu níⁿ'nyúⁿ taachí ndaá 'nū, ní nduudí vácūū ní canée candado, ní 'iiⁿyāⁿ chí snée cuidado vácūū snée yā cheendi

vácūū. Taachí nan'guaaⁿ 'nū mífⁿ, mar 'áámá 'iiⁿyāⁿ nguéé yā cheeti vácūū miiⁿ. ²⁴Taachi chiiduú ch'εεte ca yeⁿ'e Israel miiⁿ ndúúcū soldado ndíitiⁿ yeⁿ'e soldado s'eeⁿ chí idiⁿ cuidado yaacū templo miiⁿ ndúúcū chiiduú n'geεte ch'iindiveéⁿ yā nduudu 'cūū, néené nadacadíinuuⁿ yā chí chiⁿ chuū. ²⁵Naati 'áámá 'iiⁿyāⁿ ndaá yā ní chíi yā 'iiⁿyāⁿ s'eeⁿ chuū: Cun'diichí nī, sáⁿ'ā chí s'nuúⁿ nī vácūū miiⁿ yáacū templo snúuⁿ sa. Ní ngi'cuééⁿ sa 'iiⁿyāⁿ yáaⁿ.

²⁶Tuu'mi ní cueⁿ'ē soldado ndíiⁿ tiiⁿ yeⁿ'e soldado s'eeⁿ chí diiⁿ cuidado yeⁿ'ē yáacū ndúúcū soldado s'eeⁿ ní nguéé ndúúcū vaadi caa'va chí nguái yā saⁿ'ā, ti 'va'á yā chí cuíituūū 'iiⁿyāⁿ yáaⁿ miiⁿ. ²⁷Taachi ndée yā saⁿ'ā s'eeⁿ ní diíⁿ yā presentar saⁿ'ā s'eeⁿ nanááⁿ 'iiⁿntyéⁿ'e yeⁿ'e concilio tuu'mi ní chiiduú ch'εεte cá yeⁿ'e Israel miiⁿ ntiinguunéeⁿ yā saⁿ'ā s'eeⁿ.

²⁸Ní ngaⁿ'a yā saⁿ'ā s'eeⁿ: ¿Áá nguéé caⁿ'a 'nū chíi 'nū diituú ndís'tii chí nguéé ca'cueéⁿ nī yeⁿ'e Jesús? Maaⁿ ní 'āa dicutúu ntúuⁿ nī na yáaⁿ Jerusalén ndúúcū nduudu náⁿ'á yeⁿ'é nī. Ní neⁿ'e cu'neéⁿ nī nuuⁿndi nús'uu ndúúcū nuuⁿndi yeⁿ'ē vaadi n'gii yeⁿ'ē sáⁿ'a 'cūū. ²⁹Nanguεεcútaⁿ'ā Pedro ndúúcū apóstoles ní caⁿ'a yā: Canee chí díiⁿ 'nū o cu'téenu 'nū yeⁿ'é Dendyuūs vmnááⁿ vmnaaⁿ chí 'cuiinu ní cu'téenu 'nū yeⁿ'é saⁿ'ā iⁿ'yeeⁿdí 'cūū. ³⁰Dendyuūs yeⁿ'ē chiida yú nadācuééⁿ yā Jesús. Ní ndís'tii ní ch'iin'núⁿ nī 'iiⁿyāⁿ ní dicuái nī 'iiⁿyāⁿ ná 'áámá yáⁿ'á. ³¹Ndyuūs nadicuééⁿ yā Jesús lado yeⁿ'e honor. Ní chí'neéⁿ yā 'iiⁿyāⁿ chí

ch'εεte ní Salvador chi nadach'εεcu Jesús 'iiⁿ'yāⁿ yeⁿ'ē nuuⁿndi yeⁿ'é yā. Ní chuū ní cáāvā chí Jesús ca'a yā 'iiⁿ'yāⁿ Israel chi cuuvi ndaacadáámí yā yeⁿ'ē nuuⁿndí yeⁿ'e yā. Nífcú Dendyuūs nadach'εεcú yā nuuⁿndi yeⁿ'é yā. ³²Nífcú nús'uū ní testigo 'nū yeⁿ'é yā yeⁿ'e cosa 'cūū ndúúcū Espíritu N'dai yeⁿ'e Ndyuūs. Dendyuūs miiⁿ ca'a yā Espíritu N'dai miiⁿ 'iiⁿ'yāⁿ chi ch'iindiveéⁿ yā yeⁿ'é yā.

³³Taachí 'iiⁿ'yāⁿ s'eeⁿ ch'iindiveéⁿ yā chuū neené nduuví taáⁿ yā ní neⁿ'e 'caaⁿ'núⁿ yā saⁿ'ā s'eeⁿ. ³⁴Tuuⁿ'mi ní nguaaⁿ 'iiⁿ'ntyéⁿ'ē yeⁿ'e concilio ncueeⁿ 'áámá saⁿ'ā yeⁿ'é 'iiⁿ'yāⁿ fariseo s'eeⁿ chi nguuví sa Gamaliel, chi saⁿ'ā chi déénú taavi yeⁿ'ē ley. Saⁿ'ā miiⁿ 'áámá sá chi neené induuví 'iiⁿ'yāⁿ yāáⁿ sáⁿ'ā. Caⁿ'a ntiíⁿ'nyuⁿ sa chi can'daa apóstoles chi dichó'ó Ndyuūs chuva'ai miiⁿ 'áámá rato 'líⁿ. ³⁵Tuuⁿ'mi ní caⁿ'a sa: Ndís'tií, 'iiⁿ'yāⁿ Israel, cuin'dífcí nī chí dííⁿ nī ndúúcū sáⁿ'a s'eeⁿ. ³⁶Caati nguuví chí 'āā chó'oo nācueeⁿ saⁿ'ā chí nguuví Teudas chi caⁿ'a sá 'iiⁿ'yāⁿ chí 'áámá 'iiⁿ'yāⁿ ch'εεte. Ní nduuvidaamá 'iiⁿ'yāⁿ ndúúcū saⁿ'ā miiⁿ tan'dúúcā cuuⁿ ciento 'iiⁿ'yāⁿ. Sáⁿ'a 'cūū ní ch'ii sa, ní 'iiⁿ'yāⁿ chí ch'iindiveéⁿ yā yeⁿ'ē sa, tuunu tuunu ca na vaacú yā cuináⁿ a yā. Mar 'áámá yā 'āā ntéé ch'εetinée yā. ³⁷Chó'oo chúū ní nācueeⁿ Judas, saⁿ'ā yeⁿ'ē yáⁿ'āa Galilea taachí nduuví duuché 'iiⁿ'yāⁿ. Ní neené 'yaaⁿ 'iiⁿ'yāⁿ n'dáa yā saⁿ'ā. Saⁿ'ā miiⁿ ní ch'ii ntúuⁿ sa ní nducyaaca 'iiⁿ'yāⁿ chí ch'iindiveéⁿ yā cueⁿ'e 'múúⁿ cueⁿ'e miiⁿ yā. ³⁸Maaⁿ ní ngaⁿ'á

ngii ndís'tií: Cuvííⁿ nī yeⁿ'ē sáⁿ'ā s'eeⁿ. Ní 'āā snée ra sa ti ndúúti chí consejo 'cūū o ntiíⁿ'nyuⁿ 'cūū yeⁿ'e saⁿ'ā iⁿ'yeeⁿ'dí 'cūū tuuⁿ'mi ní nguéeⁿ de'ē vεε dichí'vε. ³⁹Nguéeⁿ cuuvi dííⁿ nī chí nadituuví nī chuū ndúúti chí yeⁿ'e Dendyuūs ní nguéeⁿ dííⁿ nī chí cuuví cuuⁿ'máⁿ nī ndúúcū Dendyuūs.

⁴⁰Canee yiinú yā chí caⁿ'a sa. Ní 'cai yā apóstoles chí dichó'ó Dendyuūs ní cheⁿ'é yā saⁿ'ā s'eeⁿ. Ní yaaⁿ'vi yuudu yā saⁿ'ā s'eeⁿ chí nguéeⁿ caaⁿ'maⁿ sa yeⁿ'e Jesús miiⁿ. Ní n'dεεchí yā saⁿ'ā s'eeⁿ. ⁴¹Saⁿ'ā s'eeⁿ ní nan'dáa sa nguaaⁿ 'iiⁿ'yāⁿ concilio s'eeⁿ, ní yeenú taaví sa caati Dendyuūs 'cuúⁿ yā chí ch'εenu sa chii cucáāvā Jesús. ⁴²Nguéeⁿ i'neeⁿ naaⁿ yā chí ndii ngi'cueeⁿ yā, ní ngaⁿ'a yā yeⁿ'e Jesucristo miiⁿ chεeti yáacú templo ndúúcū ná vaacú 'iiⁿ'yāⁿ nguuví nguuví.

Dííⁿ yā votar ndeēchē sáⁿ'ā diáconos

6 Nguuvi miiⁿ chí'yááⁿ 'iiⁿ'yāⁿ s'eeⁿ chí i'téenu yā Jesús. Ch'iindiveéⁿ yā nduudú vaadi caa'va nguáaⁿ yā. 'iiⁿ'yāⁿ s'eeⁿ chí griego yā caⁿ'a yā chí 'iiⁿ'yāⁿ Israel s'eeⁿ nguéeⁿ dííⁿ yā cuenta ndii nguεε ca'á yā nguuví nguuví n'dáátaa nguá'āa chí cuta'a tá chεε chí che'ē tá. ²Tuuⁿ'mi ní ndiichúúví apóstoles nadidaama yā nducyáácá 'iiⁿ'yāⁿ chí i'téenu yā Jesús, ní caⁿ'a yā: Nguéeⁿ n'daacā chí cu'neeⁿ 'nū chí caaⁿ'máⁿ 'nū yeⁿ'ē nduudu yeⁿ'e Dendyuūs ní ca'á 'nū chí che'ē 'iiⁿ'yāⁿ. ³Ndís'tií hermanos, in'nuúⁿ nī nguaaⁿ s'uuúⁿ ndeēchē saⁿ'ā chí n'daacā vida yeⁿ'e yā ní chí diitú yā ndúúcū Espíritu N'dai yeⁿ'e Ndyuūs ndúúcū vaadi cadínūuⁿ.

Saⁿā s'eeⁿ ca^ā yú ntíⁿnyúⁿ 'cūū saⁿā. ⁴Ní nús'uū 'cuēetinée 'nū caaⁿmaⁿngua^á 'nū ní 'cuēetinée 'nū lado yeⁿē chi caaⁿmáⁿ 'nū nduudu yeⁿe Dendyuūs.

⁵Nducyáacá yā ní canee yiinú yā chuū. Ní díⁿ yā votar Esteban saⁿā chi i'teenu taavi ní ndiituú ndúúcū Espíritu N'dai yeⁿe Ndyuūs, ndúúcū Felipe, ndúúcū Prócoro, ndúúcū Nicanor, ndúúcū Timón, ndúúcū Parmenas, ndúúcū Nicolás 'aama chi i'teenu yeⁿe yāāⁿ Antioquía ní maaⁿ ní 'āā saⁿā Israel.

⁶Nducyaacá yā chi'néeⁿ yā saⁿā s'eeⁿ ní cueⁿe sa nanááⁿ apóstoles chi dichóó Dendyuūs. Ní cuayíví chi caⁿ'angua^á yā tuu'mi ní sn'dúú yā ta'á yā vmnááⁿ yeⁿe saⁿā s'eeⁿ cáávā ntiⁿnyūⁿ chí ca'a yā saⁿā.

⁷Nífcú chi 'yāāⁿ 'iiⁿ'yāⁿ chí chi'teenú yā nduudu yeⁿe Dendyuūs miiⁿ. Ní 'iicu 'iiⁿ'yāⁿ s'eeⁿ chí i'teenú yā Jesús neené chi 'yaaⁿ taavi sá ná yāāⁿ Jerusalén. Neené 'yāāⁿ chiiduú s'úúⁿ yeⁿē Israel chí'téenu yā tan'dúúcā chi 'iiⁿ'yāⁿ s'eeⁿ chí'téenu yā.

Sta'á yā Esteban

⁸Esteban miiⁿ ní 'áámá 'iiⁿ'yāⁿ chi i'teenú taavi yā nífcú chi diitú yā ndúúcū poder. Ní neene n'gēēē vaadi n'giinu ndúúcū señales díⁿ yā nguaaⁿ 'iiⁿ'yāⁿ yāāⁿ. ⁹Tuu'mi ní tanáⁿā 'iiⁿ'yāⁿ chi caⁿ'á yā yaacū sinagoga yeⁿe yāāⁿ yeⁿe yā 'iiⁿ'yāⁿ chi nguuví Libertos, ndúúcū 'iiⁿ'yāⁿ yeⁿē yāāⁿ Cirene, ndúúcū 'iiⁿ'yāⁿ yeⁿe yāāⁿ Alejandría, ndúúcū dendu'ū 'iiⁿ'yāⁿ yeⁿe yáⁿā Cilicia, ndúúcū 'iiⁿ'yāⁿ yeⁿē yāāⁿ Asia, 'iiⁿ'yāⁿ s'eeⁿ ch'ēcu cheendí yā

ndúúcū Esteban. ¹⁰Naati nguéeⁿ chi chēē yā ndúúcū Esteban cáávā vaadi deenu yeⁿē yā ndúúcū chi Espíritu N'dai yeⁿe Ndyuūs caⁿ'a chi caaⁿmaⁿ Esteban. ¹¹Tuu'mi ní n'de'ei n'de'ei caⁿ'a yā chi yā náⁿā 'iiⁿ'yāⁿ chi caaⁿmáⁿ yā chi 'āā n'giindiveéⁿ yā chi Esteban miiⁿ caⁿ'a yuudú yā contra Moisés ndúúcū Dendyuūs.

¹²'iiⁿ'yāⁿ s'eeⁿ ní chicadiinuⁿ yā chi nducyaaca 'iiⁿ'yāⁿ yeⁿe yāāⁿ miiⁿ ní nééné ch'ēcu cheendí yā ní ndástaⁿ'a vaadi cadiinuúⁿ yeⁿē 'iiⁿ'yāⁿ ndicúū ndúúcū maestros yeⁿe ley. Ní nducyáacá 'iiⁿ'yāⁿ s'eeⁿ ndaacá yā Esteban, ní sta'á yā 'iiⁿ'yāⁿ, ní ndēē yā nanááⁿ 'iiⁿ'ntyéⁿē concilio. ¹³Ní 'hēē yā testigos chí ngaⁿ'a nduudu yaadi ní ngaⁿ'a sa: Esteban 'cūū ní nguéeⁿ 'nēēⁿnaaⁿ sa chí ngaⁿ'a taaⁿ sá yeⁿe lugar 'cūū yeⁿē Dendyuūs ní contra yeⁿe ley.

¹⁴N'giindiveéⁿ 'nū chi ngaⁿ'a sa chí Jesús miiⁿ yeⁿe yāāⁿ Nazaret nadatuuví yā lugar 'cūū ní n'daáⁿ yā costumbre chi teē Moisés s'uúúⁿ.

¹⁵Tuu'mi ní nducyaacá 'iiⁿ'ntyéⁿē concilio vēēē yā ní n'diichí yā saⁿā miiⁿ. N'diichí yā naaⁿ sa tan'dúúcā naaⁿ ángel chi saⁿā yeⁿe va'ai chēēti nguuví chi díⁿ ntiⁿnyuⁿ yeⁿē Ndyuūs.

Esteban caⁿ'á yā yeⁿē maáⁿ yā nī ch'ii yā

7 Tuu'mi ní ngaⁿ'ā chiiduú ch'ēēē cá miiⁿ yeⁿē Israel: ¿Áá 'tífcā chuū? ²Ní Esteban miiⁿ ní ngaⁿ'ā sa: Ndís'tii saⁿā ví'í ndúúcū chiida yú s'tii, 'caandiveéⁿ nī yeⁿē 'úú: Chiida yú Abraham n'diichí yā Ndyuūs chí dēēē taavi ca taachi canée yā na yáⁿā Mesopotamia taachí 'āā cuée

cuneé yā na yāāⁿ Harán. ³Ní Ndyuūs caⁿa yā chiī yā 'iiⁿyāⁿ: Can'dáa di yeⁿē yāāⁿ vaacú di ndúúcū yeⁿē 'iiⁿyāⁿ yeⁿē di, ní cuchii di na yāⁿāa chi 'cuuⁿmíⁿ dii. ⁴Tuu'mi ní Abraham miiⁿ nan'dáa yā yeⁿē ná yāⁿāa yeⁿe 'iiⁿyāⁿ s'eeⁿ yeⁿe yāⁿāa Caldea ní canée yā na yāāⁿ Harán. Cuayiivi chi ch'iī chiidá yā, tuu'mi ní Ndyuūs nadach'óo yā 'iiⁿyāⁿ miiⁿ ná yāⁿāa 'cūū naachi snée ndís'tiī maaⁿ. ⁵Tiempo miiⁿ Ndyuūs nguée ca'a yā Abraham de'ē vee chi cuuvi yeⁿē yā yeⁿe na yāⁿāa miiⁿ, mar 'aama naachi 'canca'á yā naati caⁿa Ndyuūs chi ca'á yā cuayiivi yāⁿāa 'cūū chi yeⁿē Abraham, ní yeⁿē daiyá yā chi cuchiica ndíi cuayiivi ca taachi 'āa cuée daiya yā. ⁶Ní Ndyuūs ní 'túúcā caⁿa yā chiī yā: Daiyá ní chi cuchii ní 'iiⁿyāⁿ chi snúúⁿ yúúní caⁿá yā yāāⁿ vaacú 'iiⁿyāⁿ. Ní 'iiⁿyāⁿ yāⁿāa miiⁿ ní cuta'á yā daiyá yā chi dichí've 'iiⁿyāⁿ yāⁿāa miiⁿ. Ní 'iiⁿyāⁿ yāⁿāa miiⁿ ní nguée n'daacā ti 'cueenu yā cuuvi cheeti cuūuⁿ ciento nduūyū. ⁷Tuu'mí caⁿa Ndyuūs: 'Úú ca'á castigo 'iiⁿyāⁿ na yāⁿāa chi cuuví yā mozos yeⁿe yāⁿāa miiⁿ. Ní cuayiivi chi chó'oo chúū, ní nan'dáa yā. Nífcú cu'téenu yā 'úú na lugar 'cūū ní dííⁿ yā cheē chi neⁿé. ⁸Ní Ndyuūs dííⁿ yā 'áamá compromiso yeⁿē circuncisión ndúúcū Abraham. Circuncisión miiⁿ 'áamá señal chi 'caacá yā na cuerpo. Ní Abraham miiⁿ vée daiyá yā chi nguuví Isaac, ní dííⁿ yā circuncidar daiyá yā Isaac nguuví chi niiní nguuví sa. 'Tiicá ntúūⁿ Isaac ndúúcū daiyá yā Jacob, ní Jacob ndúúcū ndichúúvi daiyá yā chi saⁿā patriarcas chi chiida yú s'eeⁿ.

⁹Ní chiida yú s'eeⁿ chinn'gueé yā yeⁿe 'díínu yā José. Ní n'diicui yā 'díínu yā José miiⁿ na 'iiⁿyāⁿ yeⁿe yāⁿāa Egipto. Ní cueⁿē José na yāⁿāa Egipto naati Dendyuūs canée yā ndúúcū yā. ¹⁰Dendyuūs nadanguáⁿai yā saⁿā yeⁿe tanducueⁿē chi ch'eēnu sa chiī na yāⁿāa Egipto. Ní Dendyuūs dííⁿ yā chi rey Faraón yeⁿe yāⁿāa Egipto n'diichí yā José chí saⁿā n'dai ní saⁿā chi déenu taavi ndúúcū taanduvée vaadí deenu chí ca'a Dendyuūs. Ní cucáávā chuū rey Faraón chi'neeⁿ yā José lado yeⁿe gobernador nanááⁿ yeⁿē yán'āa Egipto ndúúcū taanduvée chi vée na vaacú yā.

¹¹Ndaā cuicú ní nuuⁿmáⁿ na yāⁿāa Egipto ndúúcū yāⁿāa Canaán, ní nch'eenu n'dái yā chiī. Chiida yú s'eeⁿ ní nguée índaa ca yā chi che'e yā. ¹²Taachí ch'iindiveeⁿ Jacob miiⁿ chi vée trigo ná yāⁿāa Egipto, dich'óo yā daiyá yā chi chiida yú s'eeⁿ ndíi vmnááⁿ vmnaaⁿ ní cueⁿé yā 'áamá viaje. ¹³Ndiichi ndii 'úúví viaje ntiinaaⁿ sá chi José miiⁿ ní 'diinū sa cáávā chi José ch'iⁿi maāⁿ sa chi 'diinū sa. Tuu'mi ní rey Faraón miiⁿ ní n'diichí yā ti 'iiⁿyāⁿ yeⁿē José saⁿā s'eeⁿ. ¹⁴José miiⁿ ní diiⁿ sa chí ndaā chiidá sa Jacob ndúúcū nducyaaca 'iiⁿyāⁿ yeⁿē sa. 'Iiⁿyāⁿ yeⁿē sa ní ngii yā 'iiⁿnūⁿ ngēecu ndítiⁿyu yā. ¹⁵Tíicā cueⁿe Jacob na yāⁿāa Egipto naachí ch'íi yā ndúúcū chiida yú s'eeⁿ. ¹⁶Ní cuerpo yeⁿē tináⁿā s'eeⁿ candée yā 'iiⁿyāⁿ na yāāⁿ Siquem ní ch'iichí yā 'iiⁿyāⁿ na yáinyāⁿ chi caí Abraham. Abraham miiⁿ ní ndúúcū túumi yeⁿé yā caí yā yāⁿāa miiⁿ na yāāⁿ

Siquem yeⁿē daiya saⁿā s'eeⁿ Hamor yeⁿē yáaⁿ Siquem miiⁿ.

¹⁷Ní taachi 'āa snee niiⁿnuúⁿ nguuví chi Dendyuūs díⁿ yā chi cāa yā chii yā Abraham, ch'iitá 'iiⁿyāⁿ Israel ní chii 'yáaⁿ yā na yáⁿāa Egipto. ¹⁸Ní nducueēēⁿ táámá rey na yáⁿāa Egipto chi nguée in'diichí yā José. ¹⁹Ní rey miiⁿ ní nguée n'daacā díⁿ sa ndúúcū ndaata yeⁿe yú ndúúcū chiida yú s'eeⁿ. Ní chí cu'neeⁿ sa daiyá yā na peligro chi 'cuūví. Ní nguée cuuvi 'yáaⁿ yā. ²⁰Tiempo miiⁿ ní ch'iindiyáaⁿ Moisés, ní Ndyuūs n'diichí yā saⁿā 'lííⁿ chi n'daacā sa. Ch'iita sá na vaacu chiida sa 'iiⁿnuⁿ 'iiyū taaví yā saⁿā. ²¹Ní taachí chiida Moisés chi cu'neeⁿ yā saⁿa 'lííⁿ na peligro chi 'cuūví sa, tuu'mi ní táⁿā 'díí daiya rey Faraón chinguai tá saⁿā 'lííⁿ ní taaví tá saⁿā tan'dúúcā 'áámá daiya tá. ²²Ní Moisés miiⁿ ní ch'eēⁿ sa yeⁿē taanduvée vaadi deenu yeⁿē yáⁿāa Egipto. Ní diitinú taavi sa ndúúcū nduudu yeⁿē sa ndúúcū ntiiⁿnyuⁿ yeⁿē sa.

²³Taachi chii sá 'uuvi ngeecu ndúuyū, nacádiinuuⁿ sa na staava yeⁿē sa chi caⁿa sa n'diichi sa 'iiⁿyāⁿ yeⁿē sa chi saⁿā Israel miiⁿ. ²⁴Taachí n'diichí yā 'áámá saⁿa yeⁿē yáⁿāa Egipto chi nguē n'daacā idiiⁿ sa ndúúcū 'áámá 'iiⁿyāⁿ yeⁿē ndaata yeⁿē yā, Moisés miiⁿ ní dííⁿ yā nadanguáⁿai yā 'iiⁿyāⁿ. Ní ch'eⁿe ca yā ní 'nuucáⁿai yā saⁿā Egipto 'cūū ní ch'ii sa. ²⁵Moisés miiⁿ nacadíinuuⁿ sa chi 'iiⁿyāⁿ yeⁿē sa tuumicadiinúúⁿ yā chi Dendyuūs caⁿá yā ca'a yā libertad 'iiⁿyāⁿ s'eeⁿ cáávā ta'a sa. 'Iiⁿyāⁿ s'eeⁿ ní nguée tuumicadiinúúⁿ yā

chi 'tíicā. ²⁶Táámá nguuví miiⁿ ní Moisés cueⁿē sa naachí nguⁿu 'iiⁿyāⁿ yeⁿē sa. Neⁿe sa chi ntun'dáá n'dai yā ndúúcū paz. Ní ngaⁿa sa ngii sa 'iiⁿyāⁿ: Ndís'tií saⁿā 'diinú, nguée 'cuuⁿmáⁿ nī, 'de'ē cáávā chi nguⁿu nī ndúúcū ví'í? ²⁷'Áámá saⁿā Israel chí n'geⁿe ví'í miiⁿ chingúúⁿ ndaā sa Moisés ní nadivíi sa 'iiⁿyāⁿ 'áámá lado ní ngaⁿa sá ngii sa 'iiⁿyāⁿ: 'Du'ú s'neeⁿ n'dii tan'dúúcā 'iiⁿntyéⁿē o juez nanááⁿ nús'uú? ²⁸'Áá neⁿē nī 'caāⁿnuⁿ nī 'úú tan'dúúcā chi ch'iiⁿnuⁿ nī saⁿā yeⁿe yáⁿāa Egipto 'iicu? ²⁹Tááchí Moisés ch'iindiveéⁿ yā nduudú 'cūū, chéenu yā ní chindaa sa na yáⁿāa Madián. Cánée yā tan'dúúcā 'áámá sáⁿā canuuⁿ yúúní. Ní ch'iindí na 'uūví daiyá yā.

³⁰Cho'ōo 'úuvi ngeecu ndúuyū, ní 'áámá ángel che'enaáⁿ yā yeⁿē Moisés ní 'cai yā 'iiⁿyāⁿ naachi ngiichi yaⁿa 'lííⁿ na yiicú 'lííⁿ chi nguuví Sinaí. ³¹Moisés miiⁿ n'diichí yā ní cueⁿē yíinu yā yeⁿē chi n'diichi yā miiⁿ. Ndaa niiⁿnúⁿ yā chi cuuvi n'diichi yā. Saⁿā miiⁿ ch'iindiveéⁿ yā nduudu yeⁿē Dendyuūs miiⁿ chi ngaⁿā: ³²'Úú Ndyuūs yeⁿē chiidá nī s'eeⁿ, Ndyuūs yeⁿē Abraham, Ndyuūs yeⁿe Isaac, ní Ndyuūs yeⁿe Jacob. Moisés miiⁿ ní néénē dii'yá yā chii ndíí 'āa ntée nēⁿe yā n'diichi yā. ³³Ní caⁿa Señor Ndyuūs chii yā 'iiⁿyāⁿ: Tun'dáá ca'a di ndaacuú yeⁿē di caati naachi canée dí chí chéendii di nanááⁿ Dendyuūs. ³⁴Cuaacu nííⁿnyuⁿ chí n'diichí chi ch'eēnu taavi chii 'iiⁿyāⁿ yeⁿē chi snée yā yáⁿāa Egipto. N'giindiveéⁿ chí n'gai ya'ái yā. Ní caⁿá chí nadinguaⁿái 'iiⁿyāⁿ. Maaⁿ

ní cuchíi di. 'Úú dicho'ó dii na yáⁿaa Egipto.

³⁵Moisés miiⁿ ní 'iiⁿyāⁿ chi saⁿa diiⁿ sa chi cheenú yā chuva'āi yáⁿaa miiⁿ taachi caⁿa sa: ¿Dú'ú s'neeⁿ n'dii tan'dúúcā 'iiⁿntyéⁿe o juez? Maaⁿ ní Moisés miiⁿ Ndyuūs dichó'o yā chi cuuví yā saⁿa ntyéⁿe, ní nadinguáⁿai yā 'iiⁿyāⁿ. Dendyuūs diiⁿ yā chi canéé Moisés ndúúcū nduudu yeⁿé yā cucáávā ángel chí che'enaáⁿ yā yeⁿe Moisés na yáⁿá 'lííⁿ. ³⁶Moisés cuayiivi taachi diiⁿ yā vaadi n'gíínú ndúúcū señales na yáⁿaa Egipto, na nuūⁿníⁿyáⁿā chi nguuví Cuá'ā, ní na yáⁿaa cuuⁿmáⁿ chεεti 'uuví ngeεcu ndúuyū, ní tun'dáa yā 'iiⁿyāⁿ. ³⁷Moisés miiⁿ chiiⁿ chi ngāⁿa yā ngíi yā 'iiⁿyāⁿ Israel: Señor Dendyuūs yeⁿe yú caⁿá yā s'neéⁿ yā profeta chi caaⁿmaⁿ nduudu yeⁿé yā nguaaⁿ vi'i yú. 'Iiⁿyāⁿ miiⁿ tan'dúúcā 'úú. Ní 'caandiveéⁿ nī yeⁿe 'iiⁿyāⁿ profeta miiⁿ. ³⁸Sáⁿa 'cūū Moisés 'cūū chí canee sa naati nduuvidaamá yā na yáⁿaa cuūⁿmáⁿ ndúúcū ángel chi yaaⁿvi yā saⁿā na yiicū chi nguuví Sinaí, ní canee sa ndúúcū chiida yú. Ní Dendyuūs ca'á yā nduudu yeⁿe vida chi tee sa s'uuúⁿ. ³⁹Chiida yú ní nguéeⁿ ch'iindiveéⁿ yā yeⁿe Moisés miiⁿ ní chi'neéⁿ yā saⁿā 'áámá lado, ní divíi yā vaanicadíínuuⁿ yeⁿe yā, ní neⁿé yā nanguεεcúndíi yā yáⁿaa Egipto. ⁴⁰Ní caⁿá yā chii yā Aarón 'iiⁿyāⁿ chi chiida yú: Din'dái nī nús'uu dendyuūs s'eeⁿ chi cuuvi caⁿa yā vmnááⁿ yeⁿe yú caati Moisés 'cūū chí tun'dáa sa nús'uu yeⁿe yáⁿaa Egipto, nguéeⁿ deenu yú dε'ε chí ndúúcū sa. ⁴¹Tuu'mi ní din'dái

yā 'áámá ídolo 'itiindu 'lííⁿ yeⁿe 'dííⁿnguāaⁿ chi n'duúⁿ yā 'iiti nátai ní 'caaⁿnúⁿ yā 'iiti cuūchí 'lííⁿ ní ca'a yā ídolo miiⁿ tan'dúúcā sacrificio. Ní yeenú taaví yā caavā ntiⁿnyuⁿ yeⁿe ta'á saⁿā s'eeⁿ. ⁴²Níícú Ndyuūs chivíi yā yeⁿe 'iiⁿyāⁿ s'eeⁿ. Ní chi'néeⁿ yā 'iiⁿyāⁿ s'eeⁿ chi i'teenú yā tanducuéⁿe cosa chi véé nanguuvi tan'dúúcā 'yáⁿā ndúúcū 'iíyū, ndúúcū 'ííⁿnyúⁿ. 'Tíícā canee ngúūⁿ na libro yeⁿe Ndyuūs naachi ngúūⁿ profetas:

N'dii 'iiⁿyāⁿ Israel miiⁿ, ¿'áá tee nī 'úú 'iiti sacrificio chí 'āá 'nífⁿnúⁿ nī ndúúcū dendú'ú na yaⁿaa cuuⁿmáⁿ chεεti 'uuví ngeεcu ndúuyū?

⁴³Nguéeⁿ dε'ε vεε tee nī 'úú. Candée nī yaācū tíínūuⁿ yeⁿe ídolo Moloc, ndúúcū 'ííⁿnyúⁿ yeⁿe ndyuūs yeⁿé nī chi nguuví Renfán, ndúúcū cosa chuū chííⁿ chí din'dái nī chí cu'téenu nī. Níícú 'úú dichó'ó ndis'tií táámá lado yeⁿe yáⁿaa Babilonia.

⁴⁴Chiida yú s'eeⁿ ní canéé yeⁿé yā na yáacū tiínūuⁿ yeⁿé Ndyuūs chí caⁿā nduucú yā na yáⁿaa cuuⁿmáⁿ. Ní caⁿa Ndyuūs chii yā Moisés miiⁿ chí din'dái sa yáacū tiínūuⁿ tan'dúúcā chí n'diichi sa. ⁴⁵Chííⁿ yáacū tiínūuⁿ miiⁿ ní sta'a chiida yú s'eeⁿ ní candée yā ndúúcū Josué tiempo miiⁿ taachi sta'á yā yáⁿaa yeⁿe 'iiⁿyāⁿ chí nguéeⁿ 'iiⁿyāⁿ yeⁿe ndaata Israel. Ndyuūs nadacaanú yā 'iiⁿyāⁿ s'eeⁿ chí nguéeⁿ 'iiⁿyāⁿ yéⁿe ndaata Israel nanááⁿ chiida yú s'eeⁿ. Ní yaācu tíínūuⁿ snee ndúúcū yā ndii nguuví yeⁿe David miiⁿ. ⁴⁶David miiⁿ nandaāca sa

favor nanááⁿ Dendyuūs ní chiica sa chi din'dái sa yaācū ch'ēte yeⁿé Ndyuūs chi i'téénú Jacob miⁿ. ⁴⁷Salomón nínin'dái sa yaācū ch'ēte yeⁿe Dendyuūs. ⁴⁸Naati Ndyuūs chi canée yā na va'ai ch'ēti nguuví, nguée canée yā na yaācu chi din'dái 'iiⁿyāⁿ ndúúcu ta'á yā, ti tan'dúúca chi ngaⁿā profeta nduudu Dendyuūs tiempo chi chó'oo:

⁴⁹Nángúúví miiⁿ chí tan'dúúca trono yeⁿé, ní yáⁿāa miⁿ ní tan'dúúca banco yeⁿe ca'á. ¿Dé'ē va'āi idin'dái dí yeⁿé? ngaⁿa Señor i'ivú Ndyuūs. O ¿de'ē lugar chi ntaavi'tuūnuúⁿ?

⁵⁰¿Áa nguée 'úu din'dái ndúúcu ta'á tanducuéⁿe dendu'ú?

⁵¹Chééché tiⁿ nī ní ch'ēchí staava yeⁿé nī ní nduudí veéⁿ nī. Ndís'tií ní nguée diiⁿ díveéⁿ nī yeⁿe Espíritu N'dai yeⁿe Ndyuūs cueⁿe daāⁿmaⁿ. Tan'dúúca chiidá nī 'tiicá ntúuⁿ ndís'tií. ⁵²¿Du'u profeta chi caⁿa nduudu yeⁿe Dendyuūs chi chiidá nī nguée can'dáa yā chi ya'ái yā 'iiⁿyāⁿ? Ní ch'i'iiⁿnuⁿ yā 'iiⁿyāⁿ chi caⁿa yā vmnááⁿ vmnaaⁿ chi cuchiiⁿ 'iiⁿyāⁿ chi n'dai taavi. Ní 'iiⁿyāⁿ miiⁿ chi n'dai taavi ndís'tií ní sta'á nī 'iiⁿyāⁿ nī ch'i'iiⁿnúⁿ yā 'iiⁿyāⁿ. ⁵³Ndís'tií ní sta'á nī ley chí tee ángeles ní nguée díiⁿ nī cumplir.

⁵⁴Taachi ch'iindiveeⁿ saⁿā s'uun chuū chi caⁿa Esteban nduuví taaⁿ n'dái sa na staava yeⁿe sa ní ndiitunuúⁿ ngé'ē diiⁿyuⁿ sa contra yeⁿe Esteban. ⁵⁵Naati Esteban miiⁿ ndiitu Espíritu N'dai yeⁿe Ndyuūs che'enaáⁿ yā nanguuvi ní n'diichi yā Dendyuūs chi neené ngii 'yáⁿā ní n'diichi yā Jesús miiⁿ chi canée yā lado yeⁿe honor yeⁿe Dendyuūs.

⁵⁶Tuu'mi ní Esteban caⁿa yā: Cuin'díichí nī, inaáⁿ nanguuvi canda'āi 'íicú Daiyá Dendyuūs canée lado yeⁿe honor yeⁿe Dendyuūs. ⁵⁷Tuu'mi ní 'iiⁿyāⁿ s'eeⁿ ní 'caí yiicú yā ní n'gaadí yā veéⁿ yā ní tanducuéⁿe yā ndaá yā nanááⁿ Esteban. ⁵⁸Ní tun'dáa yā saⁿā yáaⁿ miiⁿ ní chíituú yā saⁿā. Ní 'iiⁿyāⁿ testigos s'neéⁿ yā cotón ná ca'a 'áamá saⁿā 'díiⁿ chi nguuvi Saulo. ⁵⁹Tuu'mi ní nga'a yā tuū Esteban. 'Iicu Esteban miiⁿ ní 'caí sá Ndyuūs ní ngaⁿā sa: Señor Jesús, nánguái nī espíritu yeⁿé.

⁶⁰Chiintii'ya sá ní 'caí yiicu sá: Señor, nguée diiⁿ cuenta nī núúⁿndí cūū yeⁿe 'iis'tíi. Ní taachi caⁿā sa chuū, ní ch'ií sa.

Saulo diiⁿ sa chi 'iiⁿyāⁿ yeⁿe yaācū chéenu yā

8 Ní Saulo miiⁿ canee yiinú sa chi 'cuūví Esteban miiⁿ. Nguuvi miiⁿ n'dee n'dái 'iiⁿyāⁿ ní nduuví taáⁿ yā yeⁿe 'iiⁿyāⁿ ná yāacū chi canée yāaⁿ Jerusalén nī nducyaaca yā chi i'teenu Jesús cueⁿe 'muuⁿ cueⁿé miiⁿyā. Chéenu yā cuaaⁿ na yáⁿāa Judea ndúúcu yáⁿāa Samaria. Dámaaⁿ apóstoles chi dichó'ó Dendyuūs nguē chéenu yā. ²Saⁿā s'eeⁿ chi n'dai nanááⁿ Dendyuūs candée sa Esteban. Ní ch'iichi sá 'iiⁿyāⁿ ní ch'ecu taavi sá yeⁿe yā. ³Saulo miiⁿ ní can'dáa sa 'iiⁿyāⁿ chí ngeⁿe yaācū chi n'nuūⁿ cá'ái sa 'iiⁿyāⁿ. Cheⁿe sa ndúú va'ai nduu vā'āi ní candée sa 'iiⁿyāⁿ ndíi n'daataá ndíi saⁿā. Ní ngíi sa 'iiⁿyāⁿ vácūū.

Caⁿa yā ndúúdu ngai na yáaⁿ Samaria

⁴Iiⁿyāⁿ chi chéenu miiⁿ cheⁿé yā nduu yáaⁿ nduu yáaⁿ ní caⁿa

yā ndúúdu ngai ye^{'n}e Jesucristo chi evangelio. ⁵Tuu'mi ní Felipe miiⁿ can'dáa sa na yáaⁿ Samaria ní nga^{'a} sa ye^{'n}e Cristo. ⁶Ní nducyáácá 'i^{'n}yāⁿ ch'iindiveéⁿ nii^{'n}nyúⁿ yā de'e ndu'ū chi nga^{'a} Felipe miiⁿ. Ch'iindiveéⁿ yā ní inaaⁿ yā señales chiiⁿ idiiⁿ sa. ⁷Neené 'yaaⁿ 'i^{'n}yāⁿ chí snée yā ndúúcu 'yúúné chi espíritus chi nguε n'daacā ye^{'n}e yááⁿnguiniūⁿ taachí can'daa 'yúúné na cuerpo ye^{'é} yā neéné 'cai espíritus. Ní neené 'yaaⁿ 'i^{'n}yāⁿ ndúúcu ca'āi chi in'dúuví cuerpo ye^{'é} yā ndúúcu 'i^{'n}yāⁿ chi nguée ngíca ní nducyaacā yā nanduūvā ye^{'é} yā. ⁸I^{'n}yāⁿ ye^{'n}e yáaⁿ miiⁿ ní yeenú taaví yā.

⁹Cánée 'áamá sa^{'a} chi nguuví Simón chi déenu sa magia chi cuaaⁿ vmnaaⁿ neené diiⁿ sa na yáaⁿ miiⁿ. Ní nginnche'ei sá 'i^{'n}yāⁿ na yáaⁿ Samaria. Nga^{'a} sá ngii sa 'i^{'n}yāⁿ chi ch'εεte sa. ¹⁰Chi'neeⁿ veeⁿ ndii n'gaiyáa ndii n'geεte yā 'i^{'n}yāⁿ miiⁿ. 'I^{'n}yāⁿ s'eeⁿ ní ca^{'n}á yā: Chuū poder ch'εεte ye^{'n}e Dendyuūs.

¹¹Ní s'neeⁿ veéⁿ yā ye^{'n}e sa ti ndúúcu artes magias ye^{'n}e sa neené 'náaⁿ chinnche'ei sá 'i^{'n}yāⁿ. ¹²Taachi 'i^{'n}yāⁿ s'eeⁿ chi'téenu yā ye^{'n}e Felipe miiⁿ chi nga^{'a} yā ndúúdu ngai ye^{'n}e chi Ndyuūs nga^{'a} yā nti^{'n}nyuⁿ ní ye^{'n}e ndúúdu ngai ye^{'n}e Jesucristo miiⁿ, tuu'mí chēēdinúⁿnīⁿ ndii n'daataá ndii sá^{'a} 'i^{'n}yāⁿ. ¹³S'teenú ntúúⁿ Simón. Chēēdinúⁿnīⁿ sa. 'Áamá cānee sa ndúúcu Felipe. Taachi n'diichi sa señales ndúúcu vaadi n'giinu ch'εεte chi diiⁿ Felipe miiⁿ tuu'mi ní che^{'n}e yiinu sá.

¹⁴Taachi ch'iindiveéⁿ apóstoles chi dichóó Dendyuūs chí snée yā

yáaⁿ Jerusalén chi 'i^{'n}yāⁿ ye^{'n}e yáaⁿ Samaria i'téenu yā nduudú ye^{'n}e Dendyuūs miiⁿ, dichóó yā Pedro ndúúcu Juan miiⁿ. ¹⁵Taachí ndaa 'i^{'n}yāⁿ s'eeⁿ tuu'mi ca^{'n}angua'á yā cáávā 'i^{'n}yāⁿ s'eeⁿ chi cuuvi diíⁿ yā recibir Espíritu N'dai ye^{'n}e Ndyuūs, ¹⁶ti Espíritu N'dai ye^{'n}e Ndyuūs miiⁿ 'āa cuéé ca^{'n}ā nanááⁿ ndii 'áamá 'i^{'n}yāⁿ s'eeⁿ. Dámaaⁿ chi chēēdinúⁿnīⁿ núuⁿ yā ndúúcu chi duuchi Jesús miiⁿ. ¹⁷Apóstoles sn'duú yā ta'a yā vmnaaⁿ ye^{'n}e 'i^{'n}yāⁿ s'eeⁿ ní diíⁿ yā recibir Espíritu N'dai ye^{'n}e Ndyuūs.

¹⁸Taachi Simón n'diichí sa chi cáávā chi sn'duu tá'a apóstoles diíⁿ yā recibir Espíritu N'dai ye^{'n}e Ndyuūs, tuu'mi ní ca^{'n}a sa chi ca'a sa tuumí. ¹⁹Ní ca^{'n}ā sa: Tée ntúuⁿ nī poder 'cūú 'úú ní 'āa du'ú nūuⁿ chi cun'duú ta'á vmnaaⁿ ye^{'n}e, 'i^{'n}yāⁿ miiⁿ cunée yā ndúúcu Espíritu N'dai ye^{'n}e Ndyuūs.

²⁰Tuu'mi ní Pedro mífⁿ ca^{'n}a sá chii sa 'i^{'n}yāⁿ: Túumí ye^{'n}e di 'cuiinú ndúúcu di caati nacádiinuuⁿ di chi regalo ye^{'é} Ndyuūs ní ndúúcu tuumí cuai di. ²¹Nguée ituneeⁿ di ndí nguée ndúú suerte ye^{'n}e di na asunto 'cūú ti staava ye^{'n}e di nguée n'daacā nanááⁿ Dendyuūs. ²²Ndáácadáámí dí ye^{'n}e nuuⁿndi ye^{'n}e di, ní caaca di Dendyuūs ti ne^{'n}e Ndyuūs nadāch'εεcú yā ye^{'n}e di chí nacádiinuuⁿ di na staava ye^{'n}e di. ²³Ti 'úú inaáⁿ dii ní cunee di na vaadi nguée ye^{'n}e di. Ní n'dēē chiichí di ndúúcu nuuⁿndi ye^{'n}e di.

²⁴Tuu'mi ní Simón nan'guεεcúta^{'a} sa ye^{'é} yā ní ca^{'n}ā sa: N'dii caacá nī Señor caavā 'úú chi nadach'εεcú

yā nuūⁿndi yeⁿ'é ti mar 'áámá chi ngaⁿ'a nī nguéeⁿ chiī nanááⁿ yeⁿ'ē 'úú.

²⁵Iiⁿ'yāⁿ s'eeⁿ caⁿ'a cuaacú yā nduudu yeⁿ'e Ndyuūs miiⁿ. Ní caⁿ'a yā yeⁿ'ē evangelio chi ndúúdu ngai yeⁿ'e Cristo. Ní cueⁿ'e yā ndí néené n'dee yāāⁿ yeⁿ'e yáⁿ'āa Samaria. Ní ndaa ntúuⁿ yā na yāāⁿ Jerusalén miiⁿ.

**Felipe ndúúcu saⁿ'a yeⁿ'e
yáⁿ'āa Etiopía**

²⁶Áámá ángel yeⁿ'e Señor miiⁿ yaaⁿ'vi yā Felipe ní caⁿ'a yā: Nducuéⁿ dí ní cuéⁿ'é dí ndii cuaaⁿ ndiiya sur na yúúniⁿ chi ngaⁿ'ai yeⁿ'ē yāāⁿ Jerusalén ndii yāāⁿ Gaza. Yúúniⁿ miiⁿ ní choⁿ'o na yáⁿ'āa cuūⁿmaⁿ. ²⁷Tuuⁿ'mi ní Felipe miiⁿ nducueⁿ sá ní cueⁿ'e sa. Ní chóⁿ'oo chi 'áámá saⁿ'a yeⁿ'ē yáⁿ'āa Etiopía canuuⁿ sa yúúniⁿ ní sáⁿ'ā miiⁿ eunuco. Saⁿ'ā miiⁿ chi idiiⁿ sá ntiiⁿ'nyuⁿ yeⁿ'e n'daataá reina chi duuchi Candace. Saⁿ'ā miiⁿ ní diiⁿ sa cuidado nducuéⁿ'ē tuūmī yeⁿ'e reina. Ndaa sa yāāⁿ Jerusalén miiⁿ chi diiⁿ sa chi cuⁿ'teenu sá Ndyuūs. ²⁸Nanguēcunéeⁿ sá yāāⁿ yeⁿ'é yā ní ch'iindī sa na carreta yeⁿ'ē sa. Ní n'geeⁿ sa libro yeⁿ'e Ndyuūs naachi profeta Isaías chi caⁿ'a nduudu Dendyuūs tiempo chi chóⁿ'oo. ²⁹Ní Espíritu miiⁿ ní ngaⁿ'a yā ngii yā Felipe miiⁿ: Cueⁿ'e di ní ndaa niiⁿnūⁿ di na carreta 'cūū.

³⁰Ní Felipe miiⁿ cueⁿ'ē sa ngeēnū sa ni ch'iindiveeⁿ sa chi n'geeⁿ saⁿ'a miiⁿ naachi dingūⁿ profeta Isaías miiⁿ. Ní caⁿ'a sa: ¿Áá túúmícadīinuūⁿ nī chi n'geeⁿ nī?

³¹Saⁿ'ā miiⁿ caⁿ'a sa: ¿Taacā cuuvi díⁿ ti mar 'áámá 'iiⁿ'yāⁿ nguéeⁿ

ngi'cueeⁿ yā 'úú? Ní neⁿ'e sa chi Felipe miiⁿ caa sa ní 'cuūndi sa ndúúcu sa.

³²Naachí n'geeⁿ sa yeⁿ'ē Escritura, chuū chi:

Tan'dúúca 'iiti cuūchī candée
yā 'iiti ní 'caaⁿ'núⁿ yā 'iiti.
Tan'dúúca 'iiti cuūchī 'líⁿ
nguéeⁿ ngii n'gai tī taachi ngii
yā duudu ti 'tíicā nguéeⁿ n'dai
yā cheendi yā.

³³Caati ndiicuuⁿ yā 'iiⁿ'yāⁿ n'dái yā ní nguéeⁿ caⁿ'a sa justicia yeⁿ'é yā; ¿duⁿ'u caaⁿ'maⁿ yeⁿ'e ndaatá yeⁿ'é yā? Caati divíⁿ 'iiⁿ'yāⁿ vida yeⁿ'é yā na iⁿ'yeeⁿdī.

³⁴Saⁿ'ā eunuco nan'guēcútaⁿ'ā sa ní caⁿ'a sa chii sa Felipe miiⁿ: Ngiiⁿca chi cuuvi nī 'úú: ¿Duⁿ'ú yeⁿ'ē chi caⁿ'a profeta 'túúca? ¿Áá yeⁿ'ē maáⁿ yā o yeⁿ'ē taama 'iiⁿ'yāⁿ?

³⁵Tuuⁿ'mi ní Felipe miiⁿ nan'guēcútaⁿ'ā sa. Tucáⁿ'ā sa yeⁿ'ē libro 'cūū ní caⁿ'a sa yeⁿ'ē evangelio chi ndúúdu ngai yeⁿ'ē Jesús. ³⁶Canúⁿ yā yúúniⁿ chíⁿ cueⁿ'é yā ndaá yā naachi vee nuūⁿnīⁿ. Ní caⁿ'a saⁿ'ā eunuco: 'Muuⁿ ní vee nuūⁿnīⁿ. ¿Deⁿ'ē cucáávā chi nguéeⁿ cuēdinúⁿ'nī?

³⁷Felipe miiⁿ ngaⁿ'ā sa: Nduuti chi i'téénú nī ndúúcu núúⁿmaⁿ staava yeⁿ'é nī tuuⁿ'mí cuuvi cuēdinuūⁿ'nī nī. Nan'guēcútaⁿ'ā sa yeⁿ'é yā nī ngaⁿ'ā sa: I'teenú chi Jesucristo miiⁿ ní Daiyá Dendyuūs 'iiⁿ'yāⁿ.

³⁸Ní caⁿ'a sa chi cuééndii carreta. Nduu 'uuví yā, Felipe ndúúcu eunuco cueⁿ'e yā naachi véé nuūⁿnīⁿ ní cheēdinuūⁿ'nī sa. ³⁹Taachí cuíchee yā naachi véé nuūⁿnīⁿ Espíritu N'dai yeⁿ'e Ndyuūs candeē

Felipe miiⁿ. Ní saⁿā eunuco 'āā ntéé n'diichi sa saⁿā. Ní cuinaⁿā sa ní yeenú taavi sa. ⁴⁰Felipe miiⁿ ndaaca sa na yāāⁿ Azoto. Cho'o sá nduu yāāⁿ nduu yāāⁿ ndii ndaā sa yāāⁿ Cesarea ní caⁿa sa yeⁿe evangelio chi ndúúdu ngai yeⁿe Jesucristo nanááⁿ tanducuéⁿe 'iiⁿyāⁿ yeⁿe yāāⁿ miiⁿ.

Saulo ndaacadaami sa yeⁿe nuūⁿndi yeⁿe sa ní i'téenu sa
(Hch. 22.6-16; 26.12-18)

9 Taachi Saulo taaⁿ sa ní yaāⁿvī yuudu sa yeⁿe chí 'cuūvī 'iiⁿyāⁿ chi i'téenu yā Señor Jesucristo, ndaa sá nanááⁿ chiiduú ch'εεte cá yeⁿe 'iiⁿyāⁿ Israel. ²Ní chiica sa carta s'eeⁿ chí 'cuuⁿmiⁿ sá nanááⁿ 'iiⁿyāⁿ yeⁿe yaācu sinagogas yeⁿe yāāⁿ Damasco chí ndúúti chi ndaācā sa saⁿā o n'daataā miiⁿ yeⁿe Yúúni yeⁿe vaadi i'téenu yeⁿe Jesucristo miiⁿ cúúvī diiⁿ sa nandéε sa 'iiⁿyāⁿ chi preso yā ní nndaa yā na yāāⁿ Jerusalén. ³Taachi canúuⁿ sá yúúni mífⁿ taachi 'āā cháā ndaa sa yaāⁿ Damasco dácānaāⁿ chiia yáámá deεv yeⁿe nanguuvi naachi canée sa. ⁴Taachí sndeεve sá ná yaⁿāa miiⁿ ch'iindiveeⁿ sa 'áámá nduudu chi ngaⁿā: Saulo, Saulo, ¿de'ε cúúvī chí n'ndaā di 'úú?

⁵Saⁿā miiⁿ ní caⁿā sa: ¿Du'ú n'diī, Señor? Tuu'mi ní ngaⁿā yā: 'Úú Jesús chi n'daā dī. Ngúéé n'daacā chi diiⁿ di ti diiⁿ di tan'dúúcā 'iiti chi ca'a ca'a ti na yáⁿá cuiiⁿnyuⁿ.

⁶Saulo miiⁿ ní in'duuvī sa, ní 'va'a sa, ní caⁿa sa: Señor, ¿de'ε néⁿe nī chi dífⁿ? Señor Jesús miiⁿ ngaⁿā yā ngī yā saⁿā: Nducueeⁿ dí ní cueⁿe di yāāⁿ, ní cuuvī yā dii de'ε diiⁿ di.

⁷Ní 'iiⁿyāⁿ chí cuéⁿe ndúúcu Saulo neé yā n'giinu yā. N'giindiveeⁿ cuaacú yā nduudu ti nguéé du'ú vεε inaaⁿ yā. ⁸Tuu'mi ní Saulo nducueeⁿ sá ná yáⁿāa miiⁿ naachi chí ndεeve sá. Nán'guaaⁿ sa nduutináaⁿ sa naati nguéé inaaⁿ sa. Candéé neeⁿ yā ta'a sa, ní ndaā sa yāāⁿ Damasco. ⁹Miiⁿ ní canee sa 'iiⁿnūⁿ nguuvī ní nguéé inaaⁿ sa, ní nguéé che'e sa, ní nguéé chí'i sa.

¹⁰Na yāāⁿ Damasco canée 'áámá saⁿā chí n'geeⁿ chí i'téenu sa Jesucristo chí nguuvī sa Ananías. Tuu'mi ní Señor Jesús miiⁿ ní caⁿa yā chí yā saⁿā na visión yeⁿe sa: Dii Ananías. Ananías miiⁿ nan'guεcutáⁿa sa: Señor, 'úú canée.

¹¹Ní Señor Jesús miiⁿ ngaⁿa yā ngī yā saⁿā: Nadacueeⁿ di ní cueⁿe di yúúni chí nguuvī Cuaācú miiⁿ ní in'nuuⁿ dí vaacu Judas. Miiⁿ canée 'áámá saⁿā chí nguuvī sa Saulo ní sáⁿā yeⁿe yāāⁿ Tarso. N'diichí nī, saⁿā miiⁿ ngaⁿanguaⁿā sa. ¹²Ní Saulo miiⁿ n'diichi sa na visión yeⁿe sa 'áámá saⁿā chí nguuvī sa Ananías. Ní Ananías miiⁿ cho'o sá cuaaⁿ ch'εeti va'āi ní chí n'duūⁿ sá tá'a sá vmnááⁿ yeⁿe Saulo, ní ninguaāⁿ nduutináaⁿ sa. 'Tífcā n'diichi Saulo miiⁿ na visión yeⁿe sa.

¹³Naati Ananías miiⁿ nan'guεcutáⁿa sa: Señor Jesús, n'giindiveeⁿ chí neené ngaⁿa 'iiⁿyāⁿ yeⁿe sáⁿa 'cūū. Saⁿā miiⁿ ní nguéé n'daacā dífⁿ sa ndúúcu 'iiⁿyāⁿ chí i'téenu Jesucristo na yāāⁿ Jerusalén. ¹⁴Chiiduú n'gεete yeⁿe Israel ca'a yā poder Saulo miiⁿ chí cuta'a sa ní candéε sa vácūū 'iiⁿyāⁿ chí ngaⁿanguaⁿā yā ndúúcu chí duuchi Cristo.

¹⁵Señor miiⁿ ngaⁿa yā ngii yā saⁿā: Cunaⁿā di. Saⁿā miiⁿ 'úú ndēēvé saⁿā chi cāndēē sa chi duuchí nanááⁿ 'iiⁿyāⁿ s'eeⁿ chi nguéeⁿ 'iiⁿyāⁿ yeⁿē ndaata Israel ndúúⁿcū rey s'eeⁿ ndúúⁿcū 'iiⁿyāⁿ Israel. ¹⁶Ti 'úú 'cuuⁿmíⁿ naaⁿ sa chi cánéé chí 'cueenu sa cuuvi caavā 'úú.

¹⁷Tuu'mi ní cueⁿē Ananías ní chindaā sa va'ai ní sn'duū sa ta'a sa vmnááⁿ yeⁿē Saulo. Ní caⁿa sa: Díí, Saulo hermano, Señor Jesús miiⁿ chi che'enaáⁿ yā yeⁿē di na yúúⁿ chí cuchii di. 'Iiⁿyāⁿ miiⁿ dichó'o yā 'úú 'íicú cuuvi nanguaāⁿ nduutináaⁿ di. Ní cuuvi cuūtū di ndúúⁿcū Espíritu N'dai yeⁿe Ndyuūs.

¹⁸Hora miiⁿ chiiya na nduutináaⁿ sa cosa tan'dúúⁿcā dííⁿmáⁿ 'yaācā ní inguaāⁿ nduutináaⁿ sa. Nacueeⁿ sá ní chēēdinuūⁿnīⁿ sa. ¹⁹Taachí che'ē sa yuūndū miiⁿ ndaaca tiinú sa. Saulo miiⁿ cánéé sá nguuvi chi ch'etinee sa ndúúⁿcū 'iiⁿyāⁿ s'eeⁿ chi i'teenú yā Cristo chi snée yā yāāⁿ Damasco.

Saulo ngaⁿā sa nduudu cuaacu na yāāⁿ Damasco

²⁰Guayiivi mífⁿ chí'cueéⁿ sa yeⁿe Cristo na yaācū sinagoga. Ní ngaⁿā sa 'iiⁿyāⁿ miiⁿ chi Cristo ní Daiya Dendyuūs. ²¹Nducyáácá 'iiⁿyāⁿ chí ch'iindiveéⁿ yā cheⁿe yiinú yā ní ngaⁿā yā: ¿Áá nguéeⁿ sáⁿa 'cūū chí n'gaā'vā sa ndúúⁿcū 'iiⁿyāⁿ chí ngaⁿāngua'á yā ndúúⁿcū chí duuchi Cristo na yāāⁿ Jerusalén? ¿Áá nguéeⁿ cáāvā chíⁿ chí cuchii sáⁿa 'cūū chí candéé sa 'iiⁿyāⁿ 'cuee chíichí yā nanááⁿ chiiduú n'geetē yeⁿe Israel?

²²Saulo miiⁿ ditiinú taavi sa. Ní véé 'uuvi nadacádiinūⁿ 'iiⁿyāⁿ yeⁿe

Israel yeⁿē yāāⁿ Damasco. Saⁿā miiⁿ ní ch'iⁿi sá chí Jesús miiⁿ chí Cristo.

Saulo nanguáⁿai yā yeⁿe 'iiⁿyāⁿ Israel s'eeⁿ

²³Cheēnū n'deēē nguuví ní 'iiⁿyāⁿ Israel s'eeⁿ nduuvidaamá yā ní nndeé yā chí 'caaⁿnuⁿ yā Saulo.

²⁴Saulo āā deenu sa de'ē chí neⁿe dííⁿ yā. 'Iiⁿyāⁿ s'eeⁿ ní ch'etinee yā cuidado cheendi va'ai yeⁿe pared yeⁿe yāāⁿ miiⁿ ndii nguuvi ndíí n'gaaⁿ ti cuuvi 'caaⁿnúⁿ yā sáⁿā.

²⁵Tuu'mi ní 'iiⁿyāⁿ s'eeⁿ chí i'teenú yā Cristo ní tun'dáa yā saⁿā chēeti va'ai n'gaaⁿ. Ní sn'nuⁿ yā saⁿā chēeti 'áámá 'cuéētēē. Tun'dáa yā saⁿa na tiiⁿ pared yeⁿe yāāⁿ miiⁿ i'cuáa yā saⁿā ndúúⁿcū 'cuéētēē.

Saulo na yāāⁿ Jerusalén

²⁶Taachi ndaā Saulo na yāāⁿ Jerusalén neⁿe sa nduuvidaama sa ndúúⁿcū 'iiⁿyāⁿ s'eeⁿ chí i'téenu yā Cristo. Nducyáácá yā ní 'va'a yā saⁿā ti nguéeⁿ i'téenu yā chí i'teenú saⁿā miiⁿ. ²⁷Tuu'mi ní Bernabé ndáa yā ndúúⁿcū sa nanááⁿ apóstoles chí dichó'o Dendyuūs. Ní chí yā 'iiⁿyāⁿ s'eeⁿ táácā n'diichi Saulo miiⁿ Señor Jesús na yúúⁿ. Ní Señor yaa'vi yā saⁿā. Ní 'túuca caⁿā Saulo miiⁿ nduudu cuaacu yeⁿe Jesús miiⁿ na yāāⁿ Damasco, ní nguéeⁿ ndúúⁿcū vaadi 'va'ā. ²⁸Saulo miiⁿ canee sa ndúúⁿcū 'iiⁿyāⁿ s'eeⁿ yāāⁿ Jerusalén miiⁿ. ²⁹Caⁿa sa nduudu cuaacu yeⁿe Señor Jesús nguéeⁿ ndúúⁿcū vaadi 'va'ā. Ní n'deeē n'dái ngaⁿā sa ndúúⁿcū 'iiⁿyāⁿ chí nguéeⁿ ndaata Israel naati 'iiⁿyāⁿ s'uúⁿ nacádiinúⁿ yā chí 'caaⁿnúⁿ yā Saulo. ³⁰Taachi hermanos chicádiinuuⁿ yā chuū,

candée yā Saulo ndii yáāⁿ Cesarea, ní dich'óo yā saⁿā yáāⁿ Tarso.

³¹Tuu'mi ní nducyaaca yáacū canée 'dííⁿ tan'dúuca ná yáⁿāa Judea ndúúcū yáⁿāa Galilea ndúúcū yáⁿāa Samaria. Ní ngi'cueeⁿ yā ná nduudu cuaacu ní chi chiicá yā ná vaadi i'teenu yeⁿē Señor Jesús miiⁿ. Ní Espíritu N'dai yeⁿe Ndyuūs miiⁿ ca'á yā vaadi diituú 'iiⁿyāⁿ s'eeⁿ, ní chi'yaaⁿ yā.

Saⁿā Eneas nanduuvá yeⁿē sa

³²Chií chúū Pedro miiⁿ ní cueⁿe yā nduu cuáāⁿ ndaa yā ntúuⁿ yā naachi snée 'iiⁿyāⁿ chi i'téenu na yáāⁿ Lida. ³³Ní ndaaca yā 'áámá saⁿā chi nguuví sa Eneas. 'Āā nííⁿníⁿ nduūyū chi canee sa na cama. Ní saⁿā canee sa ndúúcū ca'āi chi indúuví cuerpo yeⁿe sa. ³⁴Ní caⁿa Pedro miiⁿ: Eneas, Jesucristo miiⁿ ní dííⁿ yā chi nduūvā yeⁿē di. Nacueeⁿ di ní cuta'a di yiivē yeⁿē di. Hora mííⁿ nūuⁿ nacueeⁿ sá. ³⁵Nducyáácá 'iiⁿyāⁿ chi snée yā na yáāⁿ Lida ndúúcū yáāⁿ Sarón n'diichí yā sáⁿa 'cūū. 'Iiⁿyāⁿ s'eeⁿ ndaacadaamí yā ní chi'téenu yā Ndyuūs Señor.

**Nadacuéⁿ yā táⁿā Dorcas
yeⁿe nguaaⁿ tínáⁿa**

³⁶Canée 'áámá n'daataá chi i'teenu Jesucristo na yáāⁿ Jope chi nguuví tá Tabita chi neⁿē caaⁿmaⁿ ndúúcū dávaacu griego Dorcas. Tá 'cūū neenē n'daacā dííⁿ tá ní ca'ā tá limosnas. ³⁷Nguuví miiⁿ ní chiitā tá ní ch'ií ta. Ch'iinu naaⁿnú yā cuerpo yeⁿē táⁿā ní chin'diiti yā cuerpo yeⁿe táⁿā na 'áámá sala. ³⁸Yáāⁿ Lida miiⁿ canée niiⁿnuúⁿ ná

yáāⁿ Jope. 'Iiⁿyāⁿ s'eeⁿ chí i'téenu Jesucristo ch'iindiveeⁿ yā chi Pedro canée sá miiⁿ. Dich'óo yā na 'uuví sáⁿā chi caⁿa sa cuuvi sa Pedro. Nguée cuuvi 'naaⁿ di ní chií di naachi sneeⁿ nū.

³⁹Tuu'mi ní Pedro miiⁿ ní ncueeⁿ sa ní cueⁿe sa ndúúcū yā. Taachi ndaā sa miiⁿ candée yā saⁿā na sala naachi ndúúvídaama nducyaaca n'daataá nguá'āa. Ngεεcu yā ní n'giⁿi yā ntúuⁿ yā camisas yeⁿe yā ndúúcū vestidos yeⁿé yā chi Dorcas miiⁿ din'dái tá taachí canduūchi tá. ⁴⁰Tun'dáá Pedro nducyaaca yā chuva'āi. Pedro miiⁿ chiinti'yā yā ní caⁿangua'á yā, ní ngueεcundí yā naachi canée cuerpo yeⁿē tináⁿā ní caⁿa yā: Tabita, nacuéⁿ di. Taⁿā miiⁿ ní nn'guaāⁿ tá nduutinaaⁿ tá ní taachi n'diichi tá Pedro, 'nuūⁿ ndii tá. ⁴¹Pedro miiⁿ ní ca'á sa ta'ā sa táⁿā miiⁿ ní nadacuéⁿ sa táⁿā. Tuu'mi ní n'gaí sa 'iiⁿyāⁿ chi i'téenu yā Ndyuūs miiⁿ ndúúcū n'daataá nguá'āa. Ní ch'iⁿi sa táⁿā nááⁿ 'iiⁿyāⁿ chi 'āā canduūchi ta. ⁴²Nducyáácá 'iiⁿyāⁿ yáāⁿ Jope ch'iindiveeⁿ yā chuū. Ní neenē 'yaáⁿ yā s'téenu yā Señor miiⁿ. ⁴³Ní chó'oo chí Pedro miiⁿ canée yā 'áámá tiempo na yáāⁿ Jope na vaacu 'áámá saⁿā chi nguuví Simón chi idicuuⁿnuⁿ sa dííⁿmáⁿ 'iiti.

Pedro ndúúcū Cornelio

10 Cánée 'áámá saⁿā na yáāⁿ Cesarea chi nguuví sa Cornelio. Saⁿā miiⁿ capitán yeⁿē 'áámá taaⁿ soldado chi nguuví Italiano. ²Saⁿā miiⁿ ní n'dai taavi sa ní i'téenu sa Dendyuūs ndúúcū nducyaaca 'iiⁿyāⁿ na vaacu sá. Saⁿā

miiⁿ nééné nga'a sa limosnas yeⁿe 'iiⁿyāⁿ chí nguá'āa yeⁿe na yáāⁿ. Cueⁿé daāⁿmaⁿ ngaⁿ'angua'a sa Ndyuūs. ³Sáⁿa 'cūū ní claro n'diichi cuaacú sa ná 'áámá visión tan'dúúcā chi n'gēecu 'iiⁿnuⁿ yeⁿē nguuví miiⁿ. 'Áámá ángel yeⁿē Dendyuūs chindāa yā naachi cánéé sa miiⁿ. Ní ngaⁿ'a ángel ngii yā saⁿ'ā: Díí, Cornelio.

⁴Sáⁿ'ā miiⁿ ní ch'íínú cuaacú sa ndúúcū vaadi 'vaā, ní caⁿ'a sa: ¿Du'u n'dií, Señor? Ní ngaⁿ'a ángel ngii yā saⁿ'ā Cornelio: Chííⁿ chi ngaⁿ'āngua'a di ndúúcū limosnas chi ngaⁿ'ā di, Dendyuūs n'giindiveéⁿ yā ní nan'gaacú yā dii. ⁵Ángel ngaⁿ'a yā ngii yā Cornelio: Dicho'ó di 'iiⁿyāⁿ s'eeⁿ na yáāⁿ Jope ní diiⁿ di chi cuchii saⁿ'ā Simón chi nguuví sa Pedro. ⁶Sáⁿ'a 'cūū ní canee sa na vaacu sáⁿ'ā chi nguuví Simón, saⁿ'ā chi idicúúⁿnuⁿ sa dífⁿmánⁿ 'iiti. Va'ai yeⁿe saⁿ'ā miiⁿ canéé niiⁿnuúⁿ na nuūⁿnīⁿyáⁿ'ā. Saⁿ'ā miiⁿ cuuvi sa díí de'ē chi diiⁿ di.

⁷Cueⁿe ángel chi caⁿ'a yā ndúúcū Cornelio, nífcú Cornelio miiⁿ ní 'cai sa 'uuví saⁿ'ā chí diiⁿ mandado yeⁿē sa ndúúcū 'áámá soldado chi i'téénú Dendyuūs chí snéé ndúúcū sa.

⁸Dichó'o sa 'iiⁿyāⁿ s'eeⁿ yáāⁿ Jope taachí ch'íínú caⁿ'a sa tanducuéⁿē chi ch'ó'oo.

⁹Chideēve tááma nguuví taachí snúuⁿ yā yúúní ní taachí snee niiⁿnuúⁿ yā yáāⁿ miiⁿ Pedro miiⁿ ncheē sa tiíⁿ va'āi chí caaⁿ'maⁿngua'a sa tan'dúúcā chi n'gēecu ndichúúví nguuví. ¹⁰Saⁿ'ā miiⁿ ndaa cuiicú sá. Ní neⁿe sa che'e sa naati nuuⁿmánⁿ ne'ē chi idin'dái yā chi che'e sa miiⁿ, n'diichi sa 'áámá visión. ¹¹N'diichi

sá nanguuvi chí candá'āi ní cuich'ééⁿ nanguuvi 'áámá cosa tan'dúúcā 'áámá tiinūuⁿ ch'ēte chí n'déé chíichí nduū cúuⁿ esquinas cuch'ééⁿ cuaacu na yāⁿ'āa miiⁿ.

¹²Ní miiⁿ ní n'diichi sa nducyaaca naaⁿ 'iiti chí cuuúⁿ ca'a tī chí vée ná yáⁿ'āa ndúúcū nducyaaca naaⁿ cúu ndúúcū 'yaada chí vée nanguuvi.

¹³Ní ndaā 'áámá nduudu ní caⁿ'a: Díí Pedro, nducueeⁿ di, 'caaⁿ'nuⁿ di ní che'e di.

¹⁴Tuu'mi ní Pedro miiⁿ ní caⁿ'ā sa: Nguéé, Señor. Mar 'áámá chí vaatíi ndúúcū chí nguēē n'daacā, nguéé che'ē.

¹⁵Yáá'ví ntuūⁿ nduudu miiⁿ ndiichi ndii 'úúví cuuvi ní ngaⁿ'ā: Chuū chí nadindeēvé Ndyuūs miiⁿ, nguéé caaⁿ'maⁿ di yeⁿē chí vaatíi.

¹⁶Chuū ní chíi 'iiⁿnūⁿ cuuvi ní tiinūuⁿ miiⁿ cuinaⁿ'ā ntúūⁿ nanguuvi. ¹⁷Naachí Pedro miiⁿ nadācadínnuⁿ sa yeⁿē visión de'e chí neⁿē caaⁿ'maⁿ, tuu'mi ní 'iiⁿyāⁿ s'eeⁿ chí nadicho'ó Cornelio, 'iiⁿyāⁿ s'eeⁿ itiingúúnéeⁿ yā tií va'ai yeⁿe Simón. Ní ndaa yā cheendi va'āi.

¹⁸Ní 'cai yā ní ntínguuneeⁿ yā: ¿Áá miiⁿ canee Simón chí nguūví sa Pedro? ¹⁹Taachi 'āā chicadínnuⁿ Pedro yeⁿē visión chí n'diichi sa Espíritu N'dai yeⁿe Ndyuūs miiⁿ ngaⁿ'a ngii saⁿ'ā: Cun'diichí dí. 'Iiⁿnūⁿ saⁿ'ā in'nuuⁿ sá dii. ²⁰Nducueeⁿ dí ní nangua'ai di ní nguéé n'deēē nacadínnuⁿ di chí caⁿ'ā di nduucú yā, ti 'úú dicho'ó 'iiⁿyāⁿ.

²¹Tuu'mi ní ca'āi Pedro miiⁿ ní cueⁿē sa naachí snéé 'iiⁿyāⁿ s'eeⁿ chí dicho'ó Cornelio, ní caⁿ'a sa: N'diichi ní. 'Úú saⁿ'ā chí in'nuúⁿ ní. ¿De'ē cáávā chí cuchíí ní?

²²Iiⁿ'yāⁿ s'eeⁿ ní caⁿ'a yā: Cornelio, capitán romano, 'áamá saⁿ'ā chi n'dái taavi ní i'téenu sa Dendyuūs. Sáⁿ'ā miiⁿ, 'iiⁿ'yāⁿ Israel s'eeⁿ déenu yā chi saⁿ'ā miiⁿ n'daacā n'dai sa. Saⁿ'ā miiⁿ ní caⁿ'a 'áamá ángel yeⁿ'ē Ndyuūs chii yā saⁿ'ā, chí neⁿ'e yā chí ndaa nī na vaacú yā ni 'caandiveéⁿ yā nduudu yeⁿ'ē nī.

²³Tuuⁿ'mi ní Pedro miiⁿ 'cai yā saⁿ'ā na vaacú yā ní canee sa ndúucu yā. Chideeve táamá nguuvi miiⁿ nacueeⁿ sá ni cueⁿ'e sa ndúucu yā. Ní cueⁿ'e n'duuvu hermanos yeⁿ'e yáāⁿ Jope miiⁿ ndúucu sa.

²⁴Táamá nguuvi miiⁿ ndaa yā yáāⁿ Cesarea. Ní Cornelio cunee ngíínú yā. Ní 'cai yā 'iiⁿ'yāⁿ yeⁿ'e yā ndúúcū nducyaaca 'iiⁿ'yāⁿ chi amigo chi n'dai ndúucu yā ní nduuvidaama nducyaaca yā. ²⁵Taachí ndaa Pedro miiⁿ, can'daa Cornelio miiⁿ ní dííⁿ yā recibir saⁿ'ā s'eeⁿ. Chintii'yá yā na ca'a Pedro miiⁿ ní chí'téenu yā 'iiⁿ'yāⁿ. ²⁶Pedro miiⁿ nadacuéⁿ sa Cornelio miiⁿ ní caⁿ'a sá chíi sa 'iiⁿ'yāⁿ: Nacueeⁿ dí. 'Úú saⁿ'ā ntúūⁿ 'úú.

²⁷Ní neⁿ'e chí indeé yā ndúucu sa ní candée yā saⁿ'ā cheeti va'āi. Néené 'yaaⁿ yā nduuvidaámá yā miiⁿ. ²⁸Ní caⁿ'ā Pedro: Ndís'tii ní deenu nī chí nguée n'daacā chi 'áamá saⁿ'ā Israel nduuvidaámá sá o ndaa niiⁿ'nuúⁿ sá ndúúcū 'iiⁿ'yāⁿ chi nguée 'iiⁿ'yāⁿ yeⁿ'ē ndaata Israel. Ndyuūs ní chí'iⁿ'i yā 'úú chi nguée canée chi caaⁿ'maⁿ yā mar 'áamá saⁿ'ā vaatíi sa o chí nguée n'daacā sa. ²⁹Taachí Dendyuūs 'cai yā 'úú, núúⁿ ndaa. Maaⁿ ní intínguuneéⁿ ndís'tii: ¿De'e neⁿ'e ní 'úú chí cuchii? ³⁰Tuuⁿ'mi ní Cornelio caⁿ'á

yā: Maaⁿ cuūuⁿ ngūūví chí 'āā hora 'cūū nūuⁿ chi n'gēecu 'iiⁿ'nuⁿ chíiínū taachi 'āā cuée ca'diinú, cucáávā chí ngaⁿ'angua'á na vaacú. N'díichí 'áamá saⁿ'ā. Neené ngii 'yáⁿ'ā catecai sa. ³¹Ní ngaⁿ'ā sa ngii sa 'úú: Díí Cornelio, chííⁿ chí caⁿ'angua'a di ndúúcū limosnas yeⁿ'ē di Dendyuūs n'giindiveéⁿ yā ní nan'gaacu yā.

³²Díí, dichó'o di saⁿ'ā na yáāⁿ Jope ní diiⁿ di chí chíi Simón chi nguuvu Pedro miiⁿ. Saⁿ'ā miiⁿ cánée sa na vaacu sa Simón, saⁿ'ā chi idicuúⁿnuⁿ dííⁿmáⁿ 'iiti. Vaacu sa niiⁿ'nuúⁿ ná nuūⁿnīⁿ'yáⁿ'ā. Taachí ndaa saⁿ'ā miiⁿ ní yaa'vi sa díí. ³³Tuuⁿ'mi ní Cornelio ngaⁿ'a yā ngii yā Pedro: Hora miiⁿ dicho'ó 'iiⁿ'yāⁿ cáávā di. N'dáaca diiⁿ di chí cuchii di. Maaⁿ ndúcyaacá 'nū ní snée 'nū 'muuⁿ ndúúcū Dendyuūs. Ní sneé 'nū chí 'caandiveéⁿ 'nū tanducuéⁿ'ē chi Dendyuūs caⁿ'á yā chíi yā dii.

³⁴Tuuⁿ'mi ní Pedro ngaⁿ'a sa ngii sa: Maaⁿ ní, 'úú tuumicadiiínúⁿ chí Ndyuūs ní neⁿ'e yā nducyaaca 'iiⁿ'yāⁿ daama daama. ³⁵Nducyáácá 'iiⁿ'yāⁿ yeⁿ'ē nducyaaca yáⁿ'āa chí i'téenu yā Dendyuūs ní dííⁿ yā n'daacā ní Ndyuūs ní 'cuaáⁿ yā 'iiⁿ'yāⁿ. ³⁶Ndyuūs ní dicho'ó yā 'áamá nduudu yeⁿ'e yā nanááⁿ 'iiⁿ'yāⁿ yeⁿ'é Israel. Caⁿ'a yā nduudú ngai yeⁿ'ē evangelio ní véé vaadi 'diííⁿ cucáávā Jesucristo. 'Iiⁿ'yāⁿ 'cúū Señor 'iivú Ndyuūs yeⁿ'ē nducyáácá 'iiⁿ'yāⁿ. ³⁷Ndís'tii ní déénú nī nduudu chí caⁿ'a yā nuuⁿ'máⁿ yáⁿ'āa Judea. Tucá'a yā ndii yáⁿ'āa Galilea, cuayiivi chí'iiⁿu chí caⁿ'a Juan yeⁿ'e chí chēdinuūⁿníⁿ yā. ³⁸Tíicā Dendyuūs tee yā Jesús yeⁿ'e yáāⁿ Nazaret Espíritu N'dai

ndúúcū poder. Jesús miiⁿ ní chiica yā dííⁿ yā chí n'daacā. Ní dííⁿ yā chí nduuvā yeⁿe nducyáácá 'iiⁿ'yāⁿ chí caneé yā ndúúcū espíritus yeⁿe yááⁿ'nguínūⁿ caatí Ndyuūs miiⁿ canée yā ndúúcū Jesús. ³⁹Ní nús'uū ní testigo 'nū yeⁿ'ē tanducuéⁿ'ē chí Jesús dííⁿ yā na yáⁿ'āa Judea ndúúcū na yāāⁿ Jerusalén. 'Iiⁿ'yāⁿ s'eeⁿ miiⁿ ní ch'iⁿ'nuⁿ yā 'iiⁿ'yāⁿ. Ní ch'iⁿ'nééⁿnga'á yā 'iiⁿ'yāⁿ na 'áamá yáⁿ'á. ⁴⁰Jesús 'cūū Ndyuūs nadicuéeⁿ yā 'iiⁿ'yāⁿ yeⁿe nguaaⁿ tináⁿ'ā ndiichi ndii 'ííⁿ'núⁿ nguuví miiⁿ ní dííⁿ yā chí che'enaáⁿ yā nguaaⁿ 'iiⁿ'yāⁿ. ⁴¹Nguééⁿ che'enaáⁿ yā yeⁿ'ē nducyaaca 'iiⁿ'yāⁿ caatí yeⁿ'ē testigo chí Dendyuūs ndεεve yā cuááⁿ vmnaaⁿ. Nús'uū ní che'éⁿ 'nū ní chííⁿ 'nū nduucú yā cuayiivi taachí nducueeⁿ yā yeⁿ'e nguaaⁿ tináⁿ'ā. ⁴²Ní dichó'ó yā nús'uū chí caaⁿ'máⁿ 'nū evangelio chí nduudú ngai nanááⁿ 'iiⁿ'yāⁿ. Ní ngaⁿ'a cuaacú 'nū chí Cristo miiⁿ ní s'neéⁿ Ndyuūs 'iiⁿ'yāⁿ lado yeⁿ'e Juez yeⁿ'é 'iiⁿ'yāⁿ chí nduuchi ndúúcū 'iiⁿ'yāⁿ chí n'díí. ⁴³Nducyaaca profeta s'eeⁿ chí caⁿ'a nduudú yeⁿ'e Dendyuūs caⁿ'a yā yeⁿ'e 'iiⁿ'yāⁿ miiⁿ. Nducyáácá 'iiⁿ'yāⁿ chí cu'téenu yā 'iiⁿ'yāⁿ, véé vaadí nadich'εcú nuūⁿndí yeⁿ'é yā cucaavā Jesús miiⁿ.

⁴⁴Taachi ngaⁿ'ā Pedro nduudú 'cūū, Espíritu N'dai yeⁿ'e Ndyuūs ní ndaā vmnaaⁿ yeⁿ'ē nducyaaca 'iiⁿ'yāⁿ chí ch'iindiveéⁿ yā nduudu 'cūū. ⁴⁵Ní 'iiⁿ'yāⁿ yeⁿ'e Israel chí'téenu yā chí ndaá yā ndúúcū Pedro, 'iiⁿ'yāⁿ s'eeⁿ ch'εstinéeⁿ n'giinu yā chí vmnaaⁿ yeⁿ'e 'iiⁿ'yāⁿ s'uuⁿ chí nguééⁿ 'iiⁿ'yāⁿ yeⁿ'e ndaata Israel, Dendyuūs ca'a ntuúⁿ yā regalo yeⁿ'ē

Espíritu N'dai yeⁿ'e Ndyuūs, ⁴⁶caatí ch'iindiveéⁿ yā chí ngaⁿ'a 'iiⁿ'yāⁿ s'eeⁿ tanáⁿ'ā davaacu. Ní ngaⁿ'á yā chí ch'εεε taaví Dendyuūs. ⁴⁷Tuu'mi ní nan'guεcútaⁿ'ā Pedro: ¿Áá cúuví chí 'āā du'ú nuūⁿ 'iiⁿ'yāⁿ chí nguééⁿ 'cuáaⁿ yā yeⁿ'é nuūⁿníⁿ chí cuεdinúuⁿníⁿ 'iiⁿ'yāⁿ chí dííⁿ yā recibir Espíritu N'dai yeⁿ'e Ndyuūs tan'dúúcā s'uūⁿ'?

⁴⁸Ní dichó'ó yā 'iiⁿ'yāⁿ chí cuεdinuūⁿníⁿ yā ndúúcū chí duuchi Jesús. Tuu'mi ní 'iiⁿ'yāⁿ s'eeⁿ chiica yā Pedro chí cunée yā 'áamá tiempo ndúucu yā.

Pedro caⁿ'a yā chuū ná yaācū templo yeⁿ'e yāāⁿ Jerusalén

11 Ch'iindiveeⁿ apóstoles chí dichó'ó Dendyuūs ndúúcū hermanos chí snée yā na yáⁿ'āa Judea chí 'tiicá ntúūⁿ 'iiⁿ'yāⁿ s'eeⁿ chí nguééⁿ 'iiⁿ'yāⁿ yéⁿ'ē ndaata Israel chí dííⁿ yā recibir nduudu yeⁿ'e Dendyuūs. ²Taachí Pedro miiⁿ cuchεε sa yáāⁿ Jerusalén, hermanos yeⁿ'e 'iiⁿ'yāⁿ Israel ch'εεcu cheendí yā ndúúcū Pedro. ³Ngaⁿ'á yā: ¿Dε'ε cúuví chí sndáa di va'ai yeⁿ'e 'iiⁿ'yāⁿ chí nguééⁿ yeⁿ'e 'iiⁿ'yāⁿ Israel, ní che'e di ndúucu yā?

⁴Tuu'mi ní Pedro miiⁿ ní tuca'a sa chí sa 'iiⁿ'yāⁿ s'eeⁿ táácā chí. Ní caⁿ'a sa: ⁵Caneé na yāāⁿ Jope ní ngaⁿ'angua'á ní nnduūchí ní n'diichí 'áamá visión dácaā 'áamá tiinūⁿ ch'εεté cuch'ééⁿ nanguuvi n'déé chíichí nduū cúūⁿ esquinas ndaā ndii vmnááⁿ. ⁶Taachi n'diichí, nacádiinúúⁿ. Tuu'mi ní n'diichí yeⁿ'é icyáⁿ'ā 'iiti chí cuūⁿ cá'a tī ndúúcū 'iiti taaⁿ ndúúcū cúú ndúúcū 'yaada yeⁿ'ē nanguuvi. ⁷Ní ch'iindiveéⁿ

'áamá nduudu chi caⁿā chíi 'úú:
Díí Pedro, nacueeⁿ di. 'Caaⁿ'nuⁿ
dí 'iiti, ní chéé dí 'iiti. ⁸Ní caⁿ'á
chuū: Señor, nguée; ti mar 'áamá
chi vaatí chí nguée ndaacā che'é.
⁹Tuu'mi ní nduudu yeⁿ'ē nanguuvi
caⁿ'a ntuūⁿ ndiichi ndii 'úúví: Chíiⁿ
chi Ndyuūs nádindeevé yā, nguée
caaⁿ'maⁿ di yeⁿ'ē chi vaatí. ¹⁰Chuū
ní 'iiⁿ'nuⁿ cúúví chíi. Cuinaⁿ'ā ntúūⁿ
tanducueⁿ'ē nandée yā cuááⁿ 'niⁿ'nuⁿ
nanguuvi. ¹¹Ní n'diichí nī. Hora miiⁿ
ndaā na 'iiⁿ'nuⁿ saⁿ'ā na va'āi naachi
'úú caneé. 'Áamá 'iiⁿ'yāⁿ chi nguuvi
Cornelio dichó'o yā saⁿ'ā yeⁿ'e
yáāⁿ Cesarea ndíí naachi caneé.
¹²Ní Espíritu N'dai yeⁿ'e Ndyuūs
ngaⁿ'a ngii 'úú chi caⁿ'á ndúúcu sa.
Ní nguée de'ē vee nadicádiinúúⁿ.
Cheⁿ'é ndúúcu niyaaⁿ hermanos ní
sndáa 'nū vaacu Cornelio. ¹³Saⁿ'ā
miiⁿ caⁿ'a sá chíi sá nús'uū, táaca
n'diichi sa 'áamá ángel vaacū sa
chí cheendii yā ní cāⁿ'a yā: Díí
Cornelio, dichó'o dí saⁿ'ā s'eeⁿ yāāⁿ
Jope ní diiⁿ dí chí ndaa sán'ā Simón
chi nguuvi Pedro mííⁿ. ¹⁴Saⁿ'ā
miiⁿ ní caaⁿ'maⁿ sá nduudu chí
nanguaⁿ'āi dii ndúúcu nducyáácá
'iiⁿ'yāⁿ yeⁿ'e di na vaacu di. ¹⁵Ní
taachí tucá'á caⁿ'á, ndaā Espíritu
N'dai yeⁿ'e Ndyuūs yeⁿ'e cuaaⁿ
'niⁿ'nuⁿ vmnaaⁿ yeⁿ'ē nducyaaca
'iiⁿ'yāⁿ s'eeⁿ dendu'ū, tan'dúúca chí
chíi ndúúcu s'uúūⁿ vmnááⁿ vmnaaⁿ.
¹⁶Tuu'mi ní nn'gaácú chi caⁿ'a
Señor miiⁿ, chí caⁿ'a yā: Juan mííⁿ
chēdinuūⁿnfⁿ yā ndúúcu nuūⁿniⁿ
naati ndís'tii ní cuéédinuūⁿnfⁿ nī
ndúúcu Espíritu N'dai yeⁿ'e Ndyuūs.
¹⁷Nduuti chí Dendyuūs chí ca'a yā
regalo miiⁿ 'iiⁿ'yāⁿ tan'dúúca chí
teé yā s'uúūⁿ chí i'teenu yú Señor

Jesucristo, ǐdu'ū 'úú chí di'vaachí
yeⁿ'ē Dendyuūs miiⁿ?

¹⁸Tuu'mi ní ch'iindiveéⁿ yā
nduudu miiⁿ ní ch'ēetinéeⁿ dííⁿ yā ní
cāⁿ'a yā chí ch'ēetē yā Ndyuūs, ní
caⁿ'a yā: 'Tiicá ntúūⁿ ca'a Dendyuūs
'iiⁿ'yāⁿ s'eeⁿ chí nguée 'iiⁿ'yāⁿ yeⁿ'e
ndaata Israel chí ndaacadaamí yā
yeⁿ'ē nuuⁿndi yeⁿ'é yā ní ndaāca yā
vida cueⁿ'e daāⁿmaⁿ.

Yáacū yeⁿ'e yáāⁿ Antioquía

¹⁹Maaⁿ ní 'iiⁿ'yāⁿ chí cueⁿ'ē 'múúⁿ
cueⁿ'e miiⁿ yā cucáávā chíiⁿ chí dííⁿ
'iiⁿ'yāⁿ ndúúcu Esteban, 'iiⁿ'yāⁿ miiⁿ
cho'ó yā ndii yáⁿ'āa Fenicia, ndúúcu
isla Chipre, ndii yaāⁿ Antioquía.
Ní nguée cāⁿ'a yā nduudu yeⁿ'e
Dendyuūs ndúúcu nducyáácá 'iiⁿ'yāⁿ,
dámaāⁿ 'iiⁿ'yāⁿ Israel s'eeⁿ caⁿ'a yā
nduucú yā. ²⁰Nguaaⁿ 'iiⁿ'yāⁿ s'eeⁿ ni
snée saⁿ'ā yeⁿ'e isla Chipre yeⁿ'e yāāⁿ
Cirene. Saⁿ'ā s'eeⁿ ní taachi ndaā sa
yāāⁿ Antioquía yaa'vi sá 'iiⁿ'yāⁿ s'eeⁿ
chí nguée 'iiⁿ'yāⁿ yéⁿ'ē ndaata Israel
dendú'ū ní caⁿ'a sa evangelio chí
ndúúcu ngai yeⁿ'ē Señor Jesús. ²¹Ní
ta'ā Señor 'iivú Ndyuūs miiⁿ canée
ndúúcu sa. Chíi 'yaaⁿ n'dái 'iiⁿ'yāⁿ
chí'téenu yā Señor miiⁿ. Ní can'dáa
yā Señor miiⁿ.

²²Cho'oo chí 'iiⁿ'yāⁿ yeⁿ'e
yáacū chí snée yā yāāⁿ Jerusalén
ch'iindiveéⁿ yā chuū. Ní dichó'o
yā Bernabé chí caⁿ'a sa yāāⁿ
Antioquía. ²³Sáⁿ'a 'cūū taachi ndaā
sa ní n'diichi sa favor ch'ēete taavi
yeⁿ'ē Dendyuūs miiⁿ, yeenú taavi
sa. Ní chí'cueeⁿ sa chí nducyáácá
yā 'cuēetinéeⁿ yā ndúúcu nuuⁿmaⁿ
staava yeⁿ'é yā ndúúcu Señor 'iivú
Dendyuūs miiⁿ. ²⁴Saⁿ'ā Bernabé miiⁿ
ní n'dai sa, ní ndiitú saⁿ'ā Espíritu

N'dai yeⁿe Ndyuūs ní i'téenu sá ndúúcū núúⁿmáⁿ staava yeⁿe sa. Chii 'yaaⁿ n'dái 'iiⁿyāⁿ chi'téenu yā Señor miiⁿ.

²⁵ Cuayiivi miiⁿ ní cueⁿē Bernabé na yāāⁿ Tarso chi in'nuuⁿ sa Saulo miiⁿ; ní ndaācā sa saⁿā ní nandē sa saⁿā na yāāⁿ Antioquía. ²⁶ Ní nduuvidaamā yā 'áámá nduuyu na yaācū miiⁿ, ní chi'cuééⁿ yā neené 'yaaⁿ 'iiⁿyāⁿ. Chiiⁿ vmnááⁿ vmnaaⁿ na yāāⁿ Antioquía 'iiⁿyāⁿ s'eeⁿ yeⁿe yāāⁿ miiⁿ caⁿa yā chi duuchí cristiano s'eeⁿ, 'iiⁿyāⁿ chi i'teenu Cristo.

²⁷ Nguuvi s'uúⁿ tanáⁿā profetas chi ngaⁿā nduudu yeⁿe Dendyuūs can'dáa yā na yāāⁿ Jerusalén. Ndaā yā na yāāⁿ Antioquía. ²⁸ Nadacueeⁿ 'áámá yā chi nguuví yā Agabo ní dííⁿ yā chí inadacádiinūⁿ 'iiⁿyāⁿ s'eeⁿ cáāvā Espíritu N'dai yeⁿe Ndyuūs chí ndaa 'áámá cuiicu ch'ēete núúⁿmáⁿ yáⁿāa chi véé 'iiⁿyāⁿ. Cho'ōo chuū nguuvi yeⁿe saⁿā Claudio. ²⁹ Tuuⁿmi ní 'iiⁿyāⁿ s'eeⁿ chi i'téenu Cristo dííⁿ yā chí dicho'ó yā ofrendas yeⁿē hermanos chi snée yā yáⁿāa Judea. 'Áámá 'áámá yā tuunu tuunu ca tan'dúúⁿcā chi cuuvi ca'á yā. ³⁰ Chuū ní dííⁿ yā ní ca'á yā 'iiⁿyāⁿ ndiicū. Ní 'iiⁿyāⁿ ndiicū dichó'o yā limosna ndúúcū Bernabé ndúúcū Saulo.

**Herodes 'caaⁿnúⁿ yā Jacobo,
ní s'nuúⁿ yā Pedro vácūū**

12 Tiempo miiⁿ ní rey Herodes diiⁿyuⁿ ta'á yā chi neⁿe 'caaⁿnúⁿ yā náⁿā 'iiⁿyāⁿ chi ngeⁿe yaācū. ² Nífcú ch'iⁿnuⁿ rey miiⁿ ndúúcū machete chí 'caāíⁿ ndúú 'uuví lados Jacobo chí 'dínū Juan.

³ N'diichí yā chi 'iiⁿyāⁿ Israel s'eeⁿ canee yiinú yā chuū. Dichó'o yā saⁿa s'eeⁿ chi cuta'ā ntúuⁿ sa Pedro dendu'ū. Nguuvi mífⁿ ní nguuvi yeⁿē pan chi nguéé yiinūⁿ levadura miiⁿ. ⁴ Sta'á yā Pedro ní s'nuúⁿ yā saⁿā vácūū naachi snée cuūuⁿ taáⁿ soldado, 'áámá taáⁿ soldado miiⁿ cuūuⁿ ngí sa. Soldado s'eeⁿ cunundai sa Pedro ní cho'ó yeⁿē pascua ní rey Herodes tun'dái yā saⁿā. ⁵ Cunundai sa Pedro miiⁿ chi canuuⁿ sa vácūū. 'Iiⁿyāⁿ chí ngeⁿe yaācū miiⁿ ngáⁿánguā'á yā ní ngíicá yā Dendyuūs ndii nguuvi ndíí n'gaaⁿ cucáāvā Pedro miiⁿ.

Nanguaⁿai Pedro yeⁿe vácūū

⁶ Taachi neⁿe ntun'dáa Herodes miiⁿ Pedro miiⁿ, nguiinú mífⁿ nūuⁿ ní cyaadu Pedro miiⁿ naavtaⁿa yeⁿe 'uuví soldado s'eeⁿ. Ndēē chiichí sa ndúúcū 'uuví cadena s'eeⁿ. Saⁿā s'eeⁿ chí diiⁿ cuidado vácūū mífⁿ snée sa cheendi vacūū miiⁿ. ⁷ Caandiveéⁿ nī, ndaā 'áámá ángel yeⁿē Señor. Ní 'áámá dēevé canée na vácūū. Tuuⁿvi yā tífcuaa Pedro ní nanduuchí yā Pedro. Ní caⁿa yā: Nacueeⁿ di cániicū di. Cadena s'ūuⁿ ní chiví na ta'á sa. ⁸ Tuuⁿmi ní ngaⁿa ángel miiⁿ ní ngii yā saⁿā: Cu'neeⁿ di cinto yeⁿē di ní cunuūⁿ cá'a di ndaacuú yeⁿē di ní diiⁿ chiichí di cinta yeⁿē. 'Tífcā diiⁿ sa. Ní caⁿa yā: Nunúúⁿ dí catecai vmnaaⁿ di ní cuchí di, ní can'daā di 'úú.

⁹ Ní ndaa sa ní cueⁿe sa ndaā sa 'iiⁿyāⁿ. Pedro miiⁿ ní nguéé deenu sa chí cuaacu chí diiⁿ ángel miiⁿ. Nadacádiinuuⁿ sa chí 'áámá visión chí n'gííⁿnuⁿ sa nguaaⁿ na 'yúúduyaāⁿ yeⁿē sa. ¹⁰ Cho'ó yā, yeⁿē

'áamá tááⁿ soldado s'eeⁿ, ní cho'ó yā ndii chiiⁿ ndii 'úúví tááⁿ soldado s'eeⁿ. Ní ndaá yā ná cheendi va'ái cūū chí canéé cuaaⁿ na yááⁿ miiⁿ. Chii ní nánguááⁿ mááaⁿ cheendi va'ai yeⁿé yā. Can'dáa yā ní cho'ó yā 'áamá yúúní, ní ángel miiⁿ ní chiví yā yeⁿe yā. ¹¹Tuu'mi ní Pedro miiⁿ ní nduuchi sa. Ní caⁿā sa: Maaⁿ ní ituumicadiinuⁿ chí Ndyuūs miiⁿ nidicho'ó yā ángel yeⁿé yā ní nanguáⁿai yā 'úú yeⁿe ta'a rey Herodes. Níicú yeⁿe tanducueⁿe yááⁿ chí yááⁿ yeⁿe 'iiⁿyāⁿ Israel s'eeⁿ chi snéé ngiinu yā chí 'cuūvi 'úú.

¹²Taachí Pedro nacadíinuⁿ yā yeⁿe chuū cueⁿé yā, ní ndaa yā na vaacu María chεecu Juan, chí ngúúví ntúūⁿ sa Marcos, naachí neení 'yaaⁿ yā snéé yā chí nduuvídáamá yā ní ngaⁿangua'á yā.

¹³Taachí di'cuεécú Pedro cheendi va'ái yeⁿe patio, can'dáa 'áamá n'daataá chí nguuví tá Rode. ¹⁴Tá 'cūū ní 'naanaveeⁿ tá nduudu yeⁿe Pedro ní chiiⁿ yeenú tá. Ní nguée nn'guaaⁿ tá cheendi va'ái. Cunaⁿā tá ngeēnū tá chεeti va'ái ní caⁿa tá chí Pedro miiⁿ canee sa cheendi va'ái. ¹⁵'iiⁿyāⁿ s'eeⁿ ní ngaⁿá yā ngii yā táⁿā: Loca dii. Taⁿā miiⁿ dicuaācu tá saⁿā miiⁿ. Tuu'mí 'iiⁿyāⁿ s'eeⁿ caⁿa yā: Angel chí díⁿ cuidado saⁿā.

¹⁶Pedro miiⁿ ní iyaa'vi ca sá. Taachí nn'guaaⁿ yā ní n'diichi yā saⁿā dii'yā yā chí. ¹⁷Pedro miiⁿ ní dit'á sa yeⁿé yā chí 'cuεetinéé díⁿ cheendi yā. Ní chii sa 'iiⁿyāⁿ táácá ángel yeⁿe Señor ntun'dáa yā saⁿā vácūū. Pedro ní caⁿa sa: Díⁿ nī chí cadiinuⁿ Jacobo ndúúcū hermanos. Pedro can'dáa sa ní cueⁿe sa taama lugar.

¹⁸Chi dεεve míⁿ ní dii'yā n'dái soldado s'eeⁿ chí chii ndúúcū Pedro.

¹⁹Herodes miiⁿ ní n'nuúⁿ yā saⁿā. Nguée ndaaca yā saⁿā. Ch'iinu maaⁿ ní tiinguuneéⁿ yā saⁿā s'eeⁿ chí diiⁿ cuidado. Caⁿa yā chí 'cuūvi saⁿa s'eeⁿ. Cuayiivi cueⁿe Herodes miiⁿ yáⁿāa Judea ná yááⁿ Cesarea ní canee yā miiⁿ.

Ch'ii rey Herodes

²⁰Herodes miiⁿ taaⁿ n'dai yā yeⁿe 'iiⁿyāⁿ yááⁿ Tiro ndúúcū 'iiⁿyāⁿ yááⁿ Sidón. Naati 'iiⁿyāⁿ yeⁿe yááⁿ s'eeⁿ ní ndaá yā nanááⁿ rey Herodes miiⁿ chí neⁿe taaví yā chí canéé 'diiⁿ, ti chí nge'é yā chí yeⁿe yáⁿāa yeⁿe rey. Cuta'á yā tan'dúúcā amigo yeⁿé yā saⁿā chí nguuví Blasto chí diiⁿ cuidado va'ai yeⁿe rey, cuarto naachi cyaadú yā. Neⁿé yā chí cuuví caaⁿmaⁿ sa ndúúcū rey cááva yā. ²¹'Áamá nguuví chí diiⁿ señalado cáávā chuū, Herodes canuuⁿ yā catecai rey. Ch'iindí yā na trono yeⁿé yā ní caⁿa yā chí yā 'iiⁿyāⁿ 'áamá nduudu. ²²Ní 'iiⁿyāⁿ yááⁿ miiⁿ 'cai yiicú yā ní caⁿa yā: Ndúúdú miiⁿ yeⁿe Dendyuūs, nguée yeⁿe saⁿā iⁿyeedí 'cūū.

²³Hora miiⁿ ní 'áamá ángel yeⁿe Señor miiⁿ n'nuuⁿ cá'ai yā saⁿā Herodes caati nguée caⁿa sa chí yeⁿe Dendyuūs chí chεete taavi chí ngaⁿa sa. Ní che'e taavi n'dáá rey miiⁿ ní ch'ii sa.

²⁴Nduudú yeⁿe Señor Jesucristo miiⁿ ndí chεete ca ní 'iiⁿyāⁿ chí i'téenu ngíⁿ 'yaaⁿ cá yā.

²⁵Bernabé ndúúcū Saulo miiⁿ nndaá ntúuⁿ yā yááⁿ Jerusalén ti 'āa díⁿ yā cumplir ntiiⁿnyuⁿ yeⁿé yā. Ndeē ntúuⁿ yā Juan chí nguuví Marcos.

**Bernabé ndúúcū Saulo tucaⁿá
yā viaje vmnááⁿ vmnaaⁿ**

13 Véé 'iⁿyāⁿ profetas chi
caaⁿmaⁿ nduudu yeⁿe
Dendyuūs ndúúcū maestros yeⁿe
yaācū yeⁿe yāāⁿ Antioquía. 'Iiⁿyāⁿ
s'eeⁿ ní Bernabé, ndúúcū Simón
chi nguuví sa Niger, ndúúcū Lucio
yeⁿe yāāⁿ Cirene, ndúúcū Manaén
saⁿā chi dáámá chiita sá ndúúcū
rey Herodes, ndúúcū Saulo. ²'Iiⁿyāⁿ
s'eeⁿ ní taachí snée yā i'téenu yā
Señor Jesucristo. Ní taachí 'āā
cuéé che'é yā tuu'mí Espíritu N'dai
yeⁿe Ndyuūs caⁿa yā: Cu'neeⁿ v'í
ní 'āā v'í Bernabé ndúúcū Saulo
cáāvā ntiiⁿnyuⁿ chi 'úú ca'á saⁿā
s'eeⁿ. ³Taachi 'āā cuéé che'é yā ní
ngaⁿāngua'á yā níícú s'nduúⁿ yā ta'á
yā vmnaaⁿ yeⁿe saⁿā s'eeⁿ ní dííⁿ yā
despedir yeⁿe sa.

**Apóstoles caⁿa yā nduudu
cuaacu na isla Chipre**

⁴Espíritu N'dai dichó'o yā 'iiⁿyāⁿ
s'eeⁿ ní cueⁿé yā yāāⁿ Seleucia.
Ndií miiⁿ ní cueⁿé yā na barco
isla Chipre. ⁵Ndaá yā na yāāⁿ
Salamina ní ngaⁿa yā nduudu yeⁿe
Dendyuūs miiⁿ na yāacū sinagogas
yeⁿe 'iiⁿyāⁿ Israel s'eeⁿ. Ní canéé
ntúúⁿ yā ndúúcū Juan miiⁿ chí
nginneé sá 'iiⁿyāⁿ. ⁶Ní ch'iinu snee
yā cheⁿe yā núúⁿmán yāāⁿ yeⁿe isla
Chipre ní ndaá yā na yāāⁿ Pafos, ní
nndaacá yā 'áámá saⁿā Israel chi
nguuví Barjesús. Saⁿā miiⁿ saⁿā
chí idin'dái magia ní profeta chi
nguée ngaⁿā nduudu cuaacu yeⁿe
Dendyuūs nanááⁿ 'iiⁿyāⁿ. ⁷Saⁿā miiⁿ
canéé sá ndúúcū saⁿā gobernador
Sergio Paulo ní 'áámá saⁿā chi

déenu sa. Sergio Paulo miiⁿ ní 'cai
sa Bernabé ndúúcū Saulo. Neⁿe
sa 'caandiveeⁿ sa nduudú yeⁿe
Dendyuūs. ⁸Sáⁿā Elimas (nguuví
sá neⁿe caaⁿmāⁿ davaacú 'cūú saⁿā
chí idin'dái magia) nguée 'cūúⁿ sa
saⁿā. Neⁿe sa divíi sa chí i'teenu
Sergio Paulo chi gobernador.

⁹Tuu'mi ní Saulo chi nguuví Pablo
dendú'ū, ndiituú sa ndúúcū Espíritu
N'dai ní n'gíinu sa saⁿā Elimas miiⁿ.
¹⁰Pablo caⁿa sa: Dii, sáⁿā diitú
yeⁿe tanducuéⁿe vaadi nginnche'éi
ndúúcū nducuéⁿe chí nguεε n'daācā,
daiya yāāⁿ n'guiinūⁿ ní contra yeⁿe
tanducuéⁿe vaadi cuaacu. ¿Áá
nguée cu'nēēⁿ 'naaⁿ di chí di'váachí
di yeⁿe yúúⁿí cuaacu yeⁿe Señor
Jesucristo? ¹¹Maaⁿ ní ta'ā Señor
miiⁿ canee contra yeⁿe di ní cúúv
nngueenāⁿ di. Nguée n'díichi di
'yáⁿā 'áámá tiempo. Tuu'mí nūuⁿ chí
nngueenāⁿ sa ní 'áámá chí maāi
yeⁿe sa. Ní cachiica 'múúⁿ cachiicá
miiⁿ sa ní in'nuūⁿ sa du'ū chí cundéé
neeⁿ ta'ā sa. ¹²Tuu'mi ní gobernador
Sergio Paulo n'diichi sa chí chíi,
ní s'teenu sa. Ngeⁿe yíínú sá yeⁿe
nduudu yeⁿe Señor Ndyuūs.

**Pablo ndúúcū Bernabé cuēⁿe yā na
yāāⁿ Antioquía yeⁿe distrito Pisidia**

¹³Pablo ndúúcū 'iiⁿyāⁿ chí ndúúcū
sa cueⁿé yā na barco yeⁿe yāāⁿ
Pafos ní cueⁿé yā na yāāⁿ Perge
yeⁿe país Panfilia. Naati Juan
miiⁿ ní cueⁿe sa yēⁿe yā na yāāⁿ
Jerusalén. ¹⁴'Iiⁿyāⁿ s'eeⁿ ní cueⁿé
yā yeⁿe yāāⁿ Perge ní ndaá yā yāāⁿ
Antioquía yeⁿe distrito Pisidia.
Ní ndaa yā na yaācu sinagoga
nguuví sábadu, 'áámá nguuví chí
ntaavi'tuunúúⁿ yā tiempo miiⁿ. Ní

ch'eté yā na silla. ¹⁵ Cuayiivi chi saⁿa ch'ete yeⁿe yaācū sinagoga ch'eeⁿ sa ná libro yeⁿe ley ndúúcū ná libro yeⁿe profetas, saⁿā ch'ete dich'ó sa saⁿā s'eeⁿ chí caāⁿmāⁿ sa ní caⁿa sa: Ndís'tiī saⁿā vi'í, ndúúti chi canee 'áámá nduudu yeⁿe chí ca'cuaeⁿ di 'iⁿyāⁿ 'cūū, caaⁿmaⁿ di. ¹⁶ Tuuⁿmi ní Pablo miiⁿ ní nacueeⁿ sa. Diīⁿ sá ndúúcū ta'a sa chi cuuvi 'diīⁿ. Ní caⁿa sa: Ndís'tiī saⁿā yeⁿe Israel ndúúcū 'iⁿyāⁿ chi i'téénú Ndyuūs, 'caandivéⁿ nī. ¹⁷ Ndyuūs yeⁿe 'iⁿyāⁿ yeⁿe yú Israel ndēeve yā chiida yú s'eeⁿ ní diīⁿ yā chi 'iⁿyāⁿ ch'ete. Ní 'iⁿyāⁿ s'eeⁿ snée yā yāⁿāa Egipto tan'dúúcā 'iⁿyāⁿ snúúⁿ yúúni. Ní Ndyuūs ndúúcū poder yeⁿe yā ndúúcū ta'á yā ní tun'dáa yā 'iⁿyāⁿ. ¹⁸ Ní taandúú 'úúví ngēecu nduūyū diīⁿ yā cuidado 'iⁿyāⁿ na yāⁿāa cuūⁿmaⁿ. Ní chi ch'é yā taanduvéⁿ chí 'iⁿyāⁿ s'eeⁿ diīⁿ yā. ¹⁹ Ní taachí Ndyuūs diīⁿ tuuví yā ndēēchē nación yeⁿe 'iⁿyāⁿ chi nguéé ndaata Israel na yāⁿāa Canaán, ca'á yā yāⁿāa miiⁿ chí cuuvi yeⁿe 'iⁿyāⁿ Israel. ²⁰ Cho'ó chuū ch'eti cuūⁿ ciento canéé 'uūví ngēecu ndiichi ndúúyū ca'a yā juez yeⁿé yā ndii nguuvi profeta Samuel miiⁿ chi caⁿa nduudu Ndyuūs. ²¹ Tuuⁿmi ní tiempo miiⁿ chiica yā rey ní Ndyuūs ní ca'á yā Saúl miiⁿ chi cuuvi sa rey. Ch'etí 'uuvi ngēecu nduūyū Saúl miiⁿ rey miiⁿ. Saúl miiⁿ saⁿa daiya Cis, 'áámá saⁿā yeⁿe 'iⁿyāⁿ yeⁿe Benjamín. ²² Diví yā saⁿā ní Ndyuūs nadicuéeⁿ yā táámá rey chi David chí caⁿa yā nduudu cuaacu yeⁿé yā. Ní Ndyuūs ngaⁿá yā: 'Úú ndaacá David daiya Isai miiⁿ 'áámá

saⁿā tan'dúúcā chi neⁿe staava yeⁿé. Saⁿā miiⁿ ní diīⁿ sa tanducueⁿé chi neⁿé. ²³ Yeⁿe ndaata sáⁿa 'cūū miiⁿ tan'dúúcā chi Ndyuūs ngaⁿa chi cā'a yā, Ndyuūs nadicuéeⁿ yā Jesús yeⁿe 'iⁿyāⁿ Israel lado yeⁿe Salvador chi 'iⁿyāⁿ chi nadanguáⁿai yā 'iⁿyāⁿ yeⁿe nuuⁿndi yeⁿé yā. ²⁴ Taachí 'aa cuéé ndaá Jesús miiⁿ, caⁿā Juan miiⁿ chi cuēdinuūⁿniⁿ yā yeⁿé chi nducyaaca 'iⁿyāⁿ yeⁿe Israel ndaacadaamí yā yeⁿé nuuⁿndi yeⁿe yā. ²⁵ Juan miiⁿ taachi ch'iinu diīⁿ sa ntíⁿnyūⁿ yeⁿé sa, caⁿa sa: ¿Du'ū 'úú nadicádiinuⁿ ndis'tiī? Nguéé 'iⁿyāⁿ miiⁿ 'úú. Cun'diichí nī. Cuchii 'áámá na cuaaⁿ daami 'úú nī 'úú nguéé n'daācā 'úú chi cuuví diīⁿ n'daatií yíⁿmáⁿ naaⁿ ndaacuú yéⁿé chí cánúúⁿ ca'a.

²⁶ Ndís'tiī saⁿā vi'í, daiya 'iⁿyāⁿ yeⁿe Abraham ndúúcū 'iⁿyāⁿ chi snée yā ndúúcū ndis'tiī chi i'téénú yā Ndyuūs, caavā ndís'tiī dich'o Ndyuūs nduudu chí nnguaⁿai 'iⁿyāⁿ. ²⁷ 'iⁿyāⁿ chi snée yā na yāāⁿ Jerusalén miiⁿ ndúúcū nducyáácá yā chi ngaⁿā ntiiⁿnyuⁿ yeⁿé yā nguéé n'diichí yā Jesús ní nguéé nduudu yeⁿe profetas chi n'geeⁿ yā nducueⁿé nguuvi sábadu chi intaavi'tuunúúⁿ yā. Ní 'iⁿyāⁿ s'eeⁿ diīⁿ yā condenar Jesús. ²⁸ Ícu ní nguéé ndaacá yā falta yeⁿe yā chi 'caaⁿnuⁿ yā 'iⁿyāⁿ. Chiica 'iⁿyāⁿ nanááⁿ Pilato miiⁿ ní 'iⁿyāⁿ s'eeⁿ ngaⁿa yā chi Pilato 'caaⁿnúⁿ yā Jesús ní 'cuūvi yā. ²⁹ Taachí ch'iinu chii tánducueⁿé chi canéé nguūⁿ yeⁿé yā, 'iⁿyāⁿ diví yā Jesús na yáⁿá cruz ní s'nuúⁿ yā 'iⁿyāⁿ na yáinyāⁿ. ³⁰ Ndyuūs nadicueeⁿ yā 'iⁿyāⁿ yeⁿe nguaaⁿ tinaⁿā. ³¹ Jesús

miiⁿ ch'iⁿí maáⁿ yā nééⁿé n'deēe nguuví nanááⁿ 'iiⁿ'yāⁿ chí dáámá cuhéé yā ndúúcu yā yeⁿ'e yāⁿ'āa Galilea ní ndaá yā yāāⁿ Jerusalén. 'Iiⁿ'yāⁿ s'uuⁿ testigos yeⁿ'é yā nanááⁿ 'iiⁿ'yāⁿ.

³²Nús'uú ntuūⁿ ngaⁿ'á 'nū ndúúdu ngai. Chuū chí nduudu chí Ndyuūs ca'a yā chiida yú s'eeⁿ taachi Ndyuūs ca'a yā chí díⁿ yā. ³³Chuū chí Ndyuūs miiⁿ ní dicuacú yā ní Ndyuūs díⁿ yā cáávā s'uuúⁿ chí 'iiⁿ'yāⁿ daiyá chiida yú s'eeⁿ yeⁿ'e Israel tááchí Ndyuūs nadacueéⁿ yā Jesús miiⁿ. Chuū chí canéé nguūⁿ na libro yeⁿ'ē Ndyuūs naachi nguūⁿ salmo ndii 'úúví chí ngaⁿ'ā: Dii daiyá dii, maaⁿ nguuví 'úú n'giⁿí chí daiyá dii 'tíicā. ³⁴Ndyuūs nadacueéⁿ yā 'iiⁿ'yāⁿ yeⁿ'ē nguaaⁿ tináⁿ'ā. 'Āā ntéé nguēcunéé choó yā. 'Túúca ca'a yā: 'Úú teé dii cosa chí n'dai chí cāⁿ'a chí ca'á David. Chuū chí cuaacu. ³⁵Cáávā chuū ngaⁿ'á yā na táámá salmo: Nguéé 'cuaáⁿ nī chí Daiyá nī chí n'dai chí nguēcunéé choó cuerpo yeⁿ'é yā. ³⁶Cuaacu níⁿ'nyúⁿ chí David miiⁿ tááchí dichíⁿ've yā 'iiⁿ'yāⁿ yēⁿ'e yā tan'dúúcā chí neⁿ'e Dendyuūs, ch'iⁿ yā nífcú ch'ēchí yā naachi ch'ēchi chiidá yā. Ní choo yā. ³⁷Naati 'iiⁿ'yāⁿ chí Dendyuūs nadacueéⁿ yā yeⁿ'e nguaaⁿ tináⁿ'ā ní nguéé choo yā. ³⁸Nadacadínuuⁿ nī chuū, ndís'tiⁿ saⁿ'ā ví'f. Caⁿ'a 'nū ndís'tiⁿ nduudu yeⁿ'é Ndyuūs chí Ndyuūs nadach'ēcú yā nuuⁿ'ndi yeⁿ'e nī cucáávā 'iiⁿ'yāⁿ 'cūū. ³⁹Cucáávā 'iiⁿ'yāⁿ miiⁿ Ndyuūs nadach'ēcú yā nducuéⁿ'ē nuuⁿ'ndi yeⁿ'ē nducyáácá 'iiⁿ'yāⁿ chí i'téenu yā Dendyuūs. 'Iiⁿ'yāⁿ miiⁿ ní díⁿ yā chí nduuví

n'dai dii nanááⁿ Dendyuūs, naati ley yeⁿ'e Moisés nguéé cuuví nach'ēecu nuuⁿ'ndi yeⁿ'é 'iiⁿ'yāⁿ. ⁴⁰Quin'díichí nī chí nguéé chiī nanááⁿ ndís'tiⁿ chí cánéé nguūⁿ cáávā profetas chí caⁿ'a nduudu yeⁿ'e Dendyuūs, ní canéé nguūⁿ na libro yeⁿ'e Ndyuūs:

⁴¹Quin'díichí nī ndís'tiⁿ chí taaⁿ nī, ní ngeⁿ'e yiiⁿ'núúⁿ nī, ní 'cuuví nī; caati 'úú ní díⁿ 'áámá ntiⁿ'nyuⁿ neⁿ'e chí ndís'tiⁿ snée nī iⁿ'yeeⁿ'dí 'cūū, 'Áámá ntiⁿ'nyuⁿ chí nguéé i'téenu nī ndúúti chí du'ū 'iiⁿ'yāⁿ caaⁿ'maⁿ yā yeⁿ'e chuū.

⁴²Taachí nan'daa yā na yaācū sinagoga yeⁿ'ē 'iiⁿ'yāⁿ Israel s'eeⁿ, 'iiⁿ'yāⁿ s'eeⁿ chí nguéé yeⁿ'e ndaata Israel di'cuíftu yā 'iiⁿ'yāⁿ, chí cúví dēeve táámá nguuví sábadu, nguuví chí ntaavi'tuunúúⁿ nī chí caaⁿ'máⁿ nī yeⁿ'e chuū. ⁴³Ní taachi 'āā díⁿ yā despedir 'iiⁿ'yāⁿ yeⁿ'e yaācū sinagoga neené 'yaaⁿ 'iiⁿ'yāⁿ yeⁿ'e Israel ndúúcū 'iiⁿ'yāⁿ chí n'daacā chí 'āā maaⁿ ní 'iiⁿ'yāⁿ Israel s'eeⁿ, can'dāa yā Pablo ndúúcū Bernabé. Pablo ndúúcū Bernabé ní caⁿ'a yā 'iiⁿ'yāⁿ s'eeⁿ chí 'áámá 'cuēetinéé yā na favor ch'ēete yeⁿ'é Dendyuūs.

⁴⁴Chidēeve táámá nguuví sábadu, nguuví chí ntaavi'tuunúúⁿ yā, nduuvídáámá yā n'deēe taaví 'iiⁿ'yāⁿ 'téé nuuⁿ'maⁿ yáaⁿ yā chí 'caandiveéⁿ yā nduudu yeⁿ'e Dendyuūs. ⁴⁵Naati 'iiⁿ'yāⁿ Israel s'eeⁿ taachi n'diichí yā chí n'deēe n'daí 'iiⁿ'yāⁿ miiⁿ ní ndiitú yā ndúúcū vaadí ngueēe, caⁿ'a yā chí nguéé n'daacā chí ngaⁿ'ā Pablo miiⁿ. Ní caⁿ'a taáⁿ yā contra yeⁿ'é yā ní contra yeⁿ'e Dendyuūs. ⁴⁶Tuu'mi ní Pablo ndúúcū Bernabé miiⁿ caⁿ'a yā nguéé ndúúcū vaadí 'va'a caⁿ'a

yā: Ndís'tiī cuaacu ní'nnyúⁿ cánée
chí caaⁿ máⁿ 'nū ndúúcū ndís'tiī
nduudu yeⁿé Dendyuūs vmnááⁿ
vmnaaⁿ naati ndís'tiī ní divíi nī
yeⁿé veéⁿ nī. Ní túúmícadíinúúⁿ
maáⁿ nī chí nguéeⁿ n'daacá nī chí
tuneeⁿ nī vida cueⁿe daāⁿmaⁿ.
Cáávā chí dííⁿ nī, Ndyuūs nguéeⁿ
teé yā ndís'tiī vida cueⁿe daāⁿmaⁿ
ndís'tiī. Cuin'diichí nī. Ngueecunéeⁿ
'nū caⁿ'a ntúúⁿ 'nū ndúúcū 'iiⁿ'yāⁿ
s'eeⁿ chí nguéeⁿ yeⁿé ndaata Israel.
⁴⁷Caati 'tíicā chidichó^o Señor 'iivú
Ndyuūs miiⁿ nús'uu, ní Ndyuūs cáⁿ'a
yā chíi yā nús'uu:

'Úú chí'neéⁿ ndís'tiī tan'dúúicā
chídeēve yeⁿé 'iiⁿ'yāⁿ s'eeⁿ chí
nguéeⁿ yeⁿe ndaata Israel, chí
cuuvi caaⁿ máⁿ nī nduudu
chí nanguaⁿ'āi 'iiⁿ'yāⁿ ndii
núúⁿmáⁿ iⁿ'yeéⁿdí.

⁴⁸Taachí ch'iindiveéⁿ 'iiⁿ'yāⁿ s'eeⁿ
chí nguéeⁿ yeⁿe ndaata Israel chuū
ndiitú yā ndúúcū vaadi yeenú ní
caⁿ'a yā chí ch'ēete taavi Ndyuūs
cáávā nduudu yeⁿe Señor Ndyuūs
miiⁿ. Ní s'teenú yā nducyáácá
'iiⁿ'yāⁿ s'eeⁿ chí Ndyuūs chíndeēve
yā ní tee yā vida cueⁿe daāⁿmaⁿ.
⁴⁹Ní nduudu Señor miiⁿ 'āā chí
chiicadífínuuⁿ 'iiⁿ'yāⁿ ti cheⁿe
núúⁿmáⁿ yāáⁿ estado miiⁿ. ⁵⁰Naati
'iiⁿ'yāⁿ Israel s'eeⁿ dííⁿ yā chí nguéeⁿ
snéeⁿ 'dííⁿ yā n'daataá chí n'dai taavi
chí n'dááca taavi ndúúcū 'iiⁿ'yāⁿ
chí ngaⁿ'a ntiiⁿnyuⁿ yeⁿe yāáⁿ miiⁿ.
'Iiⁿ'yāⁿ miiⁿ ndúúcū n'daataá ndúúcū
'iiⁿ'ntyéⁿē nadacuéⁿ yā vaadi 'caa'va
contra yeⁿe Pablo ndúúcū Bernabé
ní ndivíi yā 'iiⁿ'yāⁿ yeⁿé na yāáⁿ
naachí snée yā. ⁵¹Pablo ndúúcū
Bernabé ní n'dáádi yā iyaacá yeⁿe
ca'a yā ti 'iiⁿ'yāⁿ yeⁿe yāáⁿ miiⁿ ní

contra yā. Cueⁿe yā ní ndaa yā yāáⁿ
Iconio. ⁵²'Iiⁿ'yāⁿ s'eeⁿ chí i'téenu yā
Cristo ní yeenú taavi yā ndúúcū
vaadi yeenú ndúúcū Espíritu N'dai.

Pablo ndúúcū Bernabé na yāáⁿ Iconio

14 Chii na yāáⁿ Iconio chí
Pablo ndúúcū Bernabé
sndaa yā daama daama na yaācū
sinagoga yeⁿé 'iiⁿ'yāⁿ Israel s'eeⁿ.
Ní 'túúicā caⁿ'a yā. Ní neené n'dai
'iiⁿ'yāⁿ Israel s'eeⁿ s'téenu yā. 'Tiicá
ntúúⁿ 'iiⁿ'yāⁿ s'eeⁿ chí nguéeⁿ yeⁿé
ndaata Israel. ²Naati 'iiⁿ'yāⁿ Israel
s'eeⁿ chí nguéeⁿ i'téenu yā, n'gēecu
cheendí yā ndúúcū 'iiⁿ'yāⁿ s'eeⁿ chí
nguéeⁿ yeⁿé ndaata Israel ní dííⁿ
yā chí 'iiⁿ'yāⁿ s'eeⁿ chí nguéeⁿ yeⁿé
ndaata Israel nguéeⁿ nacadífínuuⁿ
yā n'daacā yeⁿe 'iiⁿ'yāⁿ chí i'téenu
yā. ³Tuu'mi ní Pablo miiⁿ ndúúcū
Bernabé 'naaⁿ n'dái ch'ēetinée yā
miiⁿ ní Señor Jesucristo dííⁿ yā
chí 'iiⁿ'yāⁿ s'eeⁿ nguéeⁿ 'va'á yā caⁿ'a
yā yeⁿé Señor Jesucristo. Señor
Jesucristo miiⁿ ní chí'iⁿi yā chí
nduudu cuaacu miiⁿ chí nduudú
yeⁿé yā yeⁿé favor ch'ēete yeⁿé yā.
Ní Señor miiⁿ diiⁿ yā chuū ní cā'a
yā poder chí Pablo ndúúcū Bernabé
dííⁿ yā señales ndúúcū vaadi n'giinu.
⁴Níicú 'iiⁿ'yāⁿ s'eeⁿ yeⁿé yāáⁿ miiⁿ ní
'uūvi vaanicadíinúúⁿ yeⁿé yā. Ná'a
yā ní lado yeⁿe 'iiⁿ'yāⁿ Israel s'eeⁿ ní
tanáⁿ'a yā ní lado yeⁿé apóstoles
chí dichó^o Dendyuūs. ⁵'Iiⁿ'yāⁿ Israel
s'eeⁿ ndúúcū 'iiⁿ'yāⁿ s'eeⁿ chí nguéeⁿ
yeⁿé ndaata Israel ndúúcū 'iiⁿ'yāⁿ
chí ngaⁿ'a ntiiⁿnyūⁿ in'núúⁿ yā
vaadi 'caa'va chí tun'dáa yā Pablo
ndúúcū Bernabé ní chí cuituú yā
'iiⁿ'yāⁿ s'eeⁿ. ⁶Taachí chicadífínuuⁿ
saⁿ'ā s'eeⁿ chuū, cueⁿé yā ngeenu yā

na yáaⁿ Lистра ndúúcū yáaⁿ Derbe
chi distrito yeⁿe Licaonia ndúúcū
nducyaaca yáaⁿ nuuⁿmaⁿ ndiiví ná
yáⁿaa. ⁷Ní miiⁿ caⁿa yā evangelio
chí ndúúdú ngai yeⁿe Jesucristo
miiⁿ.

**'Iiⁿyāⁿ caⁿa tuú yā Pablo
na yáaⁿ Lистра**

⁸Cánée 'áámá saⁿa yeⁿe yáaⁿ
Lистра chí véé sá ti mar 'áámá
fuerza yeⁿe caⁿa sa. Nguéé ngiica sa
ndíí ch'iindiyaāⁿ sa. ⁹Sáⁿa 'cūū ní
ch'iindiveeⁿ sa chi caⁿa Pablo. Ní
Pablo miiⁿ ní n'gíínu yā saⁿa miiⁿ
ní nacádiinúúⁿ yā yeⁿe saⁿa miiⁿ ti
i'téenu sa chi cuuví nduūvā yeⁿe
sa. ¹⁰Ní caⁿa yuudú yā: Nducueeⁿ
cuaacú di ndúúcū caⁿa di. Hora
miiⁿ ní saⁿa miiⁿ nducueeⁿ sa ní
chiica sa. ¹¹'Iiⁿyāⁿ chi n'diichí yā
chi diiⁿ Pablo 'cai diitú yā ní caⁿa
yā ndúúcū davaacu yeⁿe yáⁿaa
Licaonia chi ndyuūs s'eeⁿ ndaa yā
nanáaⁿ yā tan'dúúcā saⁿa iⁿyeenⁿdí
'cūū.

¹²Caⁿa yā yeⁿe Bernabé chi
Júpiter, ní Pablo miiⁿ ní Mercurio
ti Pablo miiⁿ ní chindée yā nduudu.
¹³Yáacú yeⁿe Júpiter cánée chuva'ai
yáaⁿ miiⁿ. Chiiduú yeⁿe Júpiter
ndée yā itiindu s'ééⁿ ndúúcū corona
s'eeⁿ yeⁿe naāndā nanáaⁿ chééndí
cheēⁿ yáaⁿ miiⁿ. Ní neⁿe yā 'caaⁿnúⁿ
yā 'iití chi caⁿa yā sacrificios. 'Tiicá
ntúūⁿ n'dee taaví 'iiⁿyāⁿ yeⁿe yáaⁿ
miiⁿ neⁿe yā diiⁿ yā. ¹⁴Ní naachí
ch'iindiveeⁿ apóstoles Bernabé
ndúúcū Pablo chuū chíín'cuuⁿ yā
catecai yā tí neené ndachí ní cueⁿé
yā nguaaⁿ 'iiⁿyāⁿ. Ní 'cai yā. ¹⁵Ní
caⁿa yā: Ndís'tii saⁿa, 'déd'e cuuvi
chi 'tíicā idiíⁿ ní? Nús'uū sáⁿa ntuuⁿ

nús'uu tan'dúúcā ndís'tii. Ní ngaⁿa
'nū nduudu cuaacu chí diví ní yeⁿe
nducueⁿe dendu'ū ní cu'téenu ní
Ndyuūs chi cánduuchi chí din'dái
yā nanguuvi ndúúcū yáⁿaa ndúúcū
nuūⁿniⁿyāⁿ ndúúcū nducyáácá
dendu'ū chí véé. ¹⁶Nguuvi chí 'āā
cho'ōo Ndyuūs s'neeⁿ yā nducyaaca
'iiⁿyāⁿ s'eeⁿ chí cáⁿa yā yúúni
damaāⁿ yā. ¹⁷Nguéé s'neeⁿ yā ti
nguéé cosa chí ch'iⁿi dú'ūu 'iiⁿyāⁿ
yā. Din'daacá yā. Ní teé yā cuuvi
yeⁿe nanguuvi ndúúcū tiempo yeⁿe
n'deē taaví n'gui'i o cosecha. Ní
di'cuiitá yā staava yeⁿe yú ndúúcū
vaadi yeenú ti teé yā chí neⁿe
cuerpo yeⁿe yú.

¹⁸Caⁿa yā chuū, ngii n'dái naati
idiíⁿ yā chí 'iiⁿyāⁿ yáaⁿ miiⁿ nguéé
idiíⁿ yā sacrificio.

¹⁹Tuu'mi ní ndaā náⁿa 'iiⁿyāⁿ
Israel s'eeⁿ yeⁿe yáaⁿ Antioquía
ní yeⁿe yáaⁿ Iconio chí yaa'ví yā
nducyáácá yā contra yeⁿe Pablo.
Ní caⁿa tuú yā saⁿa ní chíí n'dai
yā saⁿa 'áámá lado chuva'ai yáaⁿ
miiⁿ ní 'áacú yā chí 'āā n'dii sa.
²⁰'Iiⁿyāⁿ s'eeⁿ chí i'téenu yā Cristo
ní nuuⁿmaⁿndiiví nanáaⁿ yā. Pablo
miiⁿ ní nacueeⁿ sá ní nuuⁿ ndaaⁿ tuuⁿ
sa na yaaⁿ miiⁿ. Ni chideeve táamá
nguuví cueⁿe sa ndúúcū Bernabé na
yáaⁿ Derbe.

²¹Ní caⁿa yā evangelio chí
ndúúdú ngai yeⁿe Jesucristo
yáaⁿ miiⁿ. Ní dííⁿ yā chí néené
'yaaⁿ 'iiⁿyāⁿ chí i'teenu. Pablo
ndúúcū Bernabé nguēcunée yā
yáaⁿ Lистра, yáaⁿ Iconio, ndúúcū
yáaⁿ Antioquía. ²²Ní dííⁿ yā chí
ditiinú yā ndúúcū vaadi i'teenu na
alma yeⁿe 'iiⁿyāⁿ s'eeⁿ chí i'téenu
yā Cristo ndúúcū staava yeⁿe yā.

Ní ngi'cueén yā 'ii'nyāⁿ chi 'áámá cunee yā ndúúcū vaadī i'teenu. Ní caⁿ'a yā ndúúcū 'ii'nyāⁿ s'eeⁿ: Cánée chí nééné n'deēe chí cho'o núuⁿ yú maaⁿ níícú ndaā yú va'ai chēeti nguuvī. ²³S'néén yā 'ii'nyāⁿ ndiicúú chí saⁿ'a ndii tíiⁿ yeⁿ'ē 'áámá 'áámá yaācū ní caⁿ'angua'á yā taachi 'āa cueε ca'diinú yā. Ní s'néen yā na ta'a Señor 'iivú Ndyuūs 'ii'nyāⁿ chi i'téenu.

Nguéecundií yā ní cueⁿ'é yā yāāⁿ Antioquía yeⁿ'e yāⁿāa Siria

²⁴Cuayiivi chí cho'ó yā distrito yeⁿ'ē Pisidia ní ndaá yā yāⁿāa Panfilia. ²⁵Taachi caⁿ'a yā nduudu cuaacú miiⁿ na yāāⁿ Perge cunaⁿ'á yā na yāāⁿ Atalia. ²⁶Yeⁿ'e yāāⁿ miiⁿ cunaⁿ'á yā na barco na yāāⁿ Antioquía. Miiⁿ ní naachí hermanos s'eeⁿ vmnáāⁿ vmnaaⁿ tucá'a yā Pablo ndúúcū Bernabé na ta'a Dendyuūs ndúúcū favor yeⁿ'e Dendyuūs cáávā ntiiⁿnyūⁿ chí 'āā dííⁿ yā. ²⁷Ní ndaá yā na yāāⁿ Antioquía. Ní taachi nduuvidaamá yā na yaacū caⁿ'a yā tanducueⁿ'ē cosa ch'εεε chí 'āā dííⁿ Dendyuūs ndúúcū yā. Ní táácā Dendyuūs ca'á yā permiso 'ii'nyāⁿ chí nguée yeⁿ'ē ndaata Israel chí cu'téenu yā nduudu yēⁿ'e yā. ²⁸Nááⁿ tiempo canée yā ndúúcū 'ii'nyāⁿ s'eeⁿ chí i'téenu yā Cristo.

Concilio na yāāⁿ Jerusalén

15 Tuu'mi ní náⁿ'a yā chí nndaá yā yeⁿ'ē yāⁿāa Judea chí'cueén yā hermanos chuū: Ndúúti chí nguée dííⁿ di circuncidar 'ii'nyāⁿ tan'dúúcā chí ngaⁿ'a 'áámá ley yeⁿ'e Moisés tuu'mi ní nguée

cuuvi nínguaⁿ'ai di. ²Pablo ndúúcū Bernabé ch'εεcu cheendí yā ndúúcū 'ii'nyāⁿ yeⁿ'e yāāⁿ miiⁿya ní nééné n'deēe caⁿ'a yā. Ní 'ii'nyāⁿ yeⁿ'e yāāⁿ miiⁿ caⁿ'a yā chí caⁿ'a Pablo ndúúcū Bernabé ndúúcū tan'duuvī 'ii'nyāⁿ s'eeⁿ na yāāⁿ Jerusalén. Ní caⁿ'á yā ní tiinguuneeⁿ yā yeⁿ'ē chuū nanááⁿ 'ii'nyāⁿ ndiicúú chí 'ii'nyāⁿ ndíí tíiⁿ yeⁿ'e yaacū ndúúcū apóstoles chí dichó'ó Dendyuūs.

³'Ii'nyāⁿ s'eeⁿ yeⁿ'e yaācū ch'εetinúúⁿ yúúni yā ndúúcū 'ii'nyāⁿ s'eeⁿ. Ní cho'ó yā 'ii'nyāⁿ s'eeⁿ na yāⁿāa Fenicia ndúúcū yāⁿāa Samaria. Ní 'ii'nyāⁿ s'eeⁿ caⁿ'a yā taacā chí i'teenu 'ii'nyāⁿ s'eeⁿ chí nguée yeⁿ'ē ndaata Israel. Ní nducyaaca hermanos miiⁿ yeenu taaví yā.

⁴Ní ndaá yā na yāāⁿ Jerusalén. Ní apóstoles ndúúcū 'ii'nyāⁿ ndiicúú ndúúcū 'ii'nyāⁿ yeⁿ'e yaacū miiⁿ dííⁿ yā recibir 'ii'nyāⁿ s'eeⁿ. Ní 'ii'nyāⁿ s'eeⁿ caⁿ'a yā tanducueⁿ'ē chí Dendyuūs dííⁿ yā ndúúcū yā. ⁵Naⁿ'a 'ii'nyāⁿ yeⁿ'e fariseos chí s'teenu yā ní dííⁿ yā costumbre yeⁿ'é yā nacuéen yā ní caⁿ'a yā: Cánée chí dííⁿ yú circuncidar 'ii'nyāⁿ ní canee cúúⁿmíⁿ yā dííⁿ yā chí ngaⁿ'ā ley yeⁿ'e Moisés.

⁶Ní nduuvidaamá yā apóstoles ndúúcū 'ii'nyāⁿ ndiicúú chí 'ii'ntyéⁿe yeⁿ'e yaacū chí n'diichí yā yeⁿ'e chuū. ⁷Ní ch'iinu caⁿ'a yā n'dee n'dái, ní Pedro miiⁿ ní ncueeⁿ sá ni caⁿ'ā sa: Ndís'tií, saⁿ'ā hermanos, deenú ní tan'dúúcā 'āā naaⁿ tiempo chí Dendyuūs ndēēvé yā 'úú nguaaⁿ s'uúúⁿ ní cáávā cheendí ní 'ii'nyāⁿ s'eeⁿ chí nguée yeⁿ'ē ndaata Israel chí'iindiveéⁿ yā nduudu cuaacu ní

s'téenu yā. ⁸Ní Ndyuūs chi inaaⁿ yā staava yeⁿē yú ch'iⁿi yā chi i'téenu 'iiⁿyāⁿ s'eeⁿ. Ní ca'a yā Espíritu N'dai 'iiⁿyāⁿ s'eeⁿ chi nguéeⁿ yeⁿē ndaata Israel tan'dúúca s'uúúⁿ. ⁹Dáamá nducyaaca yú ndúúcu 'iiⁿyāⁿ s'eeⁿ ní Ndyuūs nadideevé yā staava yeⁿe 'iiⁿyāⁿ s'eeⁿ cáávā chi i'téenu yā. ¹⁰Maaⁿ ní ðde'ē cáávā chi di'vaachi ní yeⁿe Ndyuūs, ní s'néeⁿ ní na tiiⁿ 'iiⁿyāⁿ s'eeⁿ chi i'téenu yā Cristo tan'dúúca áamá yugo chi s'uúúⁿ nguéeⁿ cuuvi candē yú ndii nguēe chii candē yā chiida yú s'eeⁿ dendú'ū? ¹¹Maaⁿ ní i'téenu yú cucáávā favor ch'ēte taavi yeⁿe Señor Jesús cuuví nanguaⁿāi yú dáamá dáamá ndúúcu 'iiⁿyāⁿ s'eeⁿ chi nguéeⁿ yeⁿē ndaata Israel.

¹²Tuu'mi ní nducyaaca 'iiⁿyāⁿ s'eeⁿ 'aa ntée caⁿá yā mar áamá. Ní ch'iindiveén yā yeⁿe Bernabé ndúúcu Pablo chi caⁿa yā n'dee n'dái señales ndúúcu vaadi n'giinu chí Ndyuūs diⁿ yā cáávā 'iiⁿyāⁿ miiⁿ nguáán 'iiⁿyāⁿ s'eeⁿ chi nguéeⁿ yeⁿē ndaata Israel. ¹³Taachí 'iiⁿyāⁿ s'eeⁿ miiⁿ snéeⁿ diⁿ yā tuu'mi Jacobo nan'guēecutaⁿā sa ní caⁿa sa: Ndís'tii saⁿā hermanos cu'neeⁿ veeⁿ ní yeⁿē. ¹⁴Simón miiⁿ āā caⁿa sá táaca Dendyuūs vmnáán vmnaaⁿ n'diichí yā 'iiⁿyāⁿ s'eeⁿ chi nguéeⁿ yeⁿē ndaata Israel ní sta'á yā 'iiⁿyāⁿ nguaaⁿ 'iiⁿyāⁿ s'eeⁿ chí 'iiⁿyāⁿ yeⁿē yā cáávā chi i'téenu yā Jesucristo. ¹⁵Ndúúcu nduudu 'cūú ní ndíí tiempo vmnaaⁿ cunee yiinú profetas chi caⁿa chi cuchii tan'dúúca chi cunee nguūⁿ na libro yeⁿe Ndyuūs:

¹⁶Cho'oo chúu nanguēecúndíí ní nadin'daí va'ai yeⁿe David

chí sndeeve ní nadin'daí to'o ndiicúú, ní va'ai miiⁿ nanguēecunee nádacuéⁿ ntuúⁿ.

¹⁷Ní taná'a yā 'iiⁿyāⁿ n'nuuⁿ ntuúⁿ yā Señor Jesucristo, ní yeⁿē nducyaaca 'iiⁿyāⁿ chi nguéeⁿ yeⁿē ndaata Israel miiⁿ chi Dendyuūs caⁿa yā chi cuuvi déenu yā.

¹⁸Chuū ngaⁿa Señor miiⁿ chi din'daí tuuū ndeevéeⁿ ní dendú'ū diⁿ yā chi cadiinuuⁿ 'iiⁿyāⁿ chúu ndíí tiempo ndii cuaaⁿ vmnaaⁿ.

¹⁹Maaⁿ ní 'úú diⁿ inacádiinúúⁿ yeⁿe chuū, chi nguéeⁿ di'vaachi yú yeⁿē 'iiⁿyāⁿ s'eeⁿ chi nguéeⁿ yeⁿe ndaata Israel chi cu'téenu yā Dendyuūs. ²⁰Mííⁿ dingúuⁿ yú yeⁿē 'iiⁿyāⁿ chi cūvii yā yeⁿē tanducuéⁿē chi yeⁿē ídolos ndúúcu yeⁿē áamá saⁿā áamá n'daataá chi nguéeⁿ snee yā ndúúcu vi'i ní nguéeⁿ n'giindivaacu yā, ndíí nguéeⁿ che'é yā yuūtē yeⁿē áamá iiti chi idi'núú yā daandú tī, ndíí nguéeⁿ che'é yā ingee yā yuuúⁿ yeⁿē tī. ²¹Ndíí tiempo yeⁿē Moisés miiⁿ ní ndíí cuáán vmnaaⁿ ndíí nducyáácá yáán véeⁿ 'aama yā chí ngaⁿa yā yeⁿē Dendyuūs na yaácū sinagoga naachi n'geeⁿ yā libro yeⁿe Dendyuūs nguuví nguuví chi intaavi'tuunúúⁿ yā chí sábadu.

²²Apóstoles chi dichó'ó Dendyuūs ndúúcu 'iiⁿyāⁿ ndiicúú chí ngaⁿa ntiiⁿnyuⁿ yeⁿe yáacu ndúúcu nducuéⁿē 'iiⁿyāⁿ na yaácū canée yiinú yā chí n'daacā chí níndeevē yā yeⁿē nguáán yā 'uuví saⁿā. Ní dicho'ó yā saⁿā s'eeⁿ ndúúcu Pablo ndúúcu Bernabé na yáán Antioquía.

Ní ndeεve yā Judas chi nguuví sa Barsabás, ndúúcū Silas. Saⁿā s'eeⁿ n'geete sá nguaaⁿ hermanos. ²³Ní dichó'ó yā caaca ndúúcū 'iiⁿ'yāⁿ s'eeⁿ. Apóstoles ndúúcū 'iiⁿ'yāⁿ ndicúū ndúúcū hermanos níngúūⁿ yā chuu yeⁿ'ē hermano chi nguéeⁿ yeⁿ'ē ndaata Israel chi snée yā na yāāⁿ Antioquía, na yāⁿāa Siria, ndúúcū na yāⁿāa Cilicia: N'dai n'dii. ²⁴Nús'uu ní n'giindiveéⁿ 'nū chi náⁿ'a yā cueⁿ'é yā yeⁿ'é 'nū ní dííⁿ yā chi ndís'tii nguéeⁿ ch'etinééⁿ 'dííⁿ nī ndúúcū nduudu yeⁿ'é yā. Ní nguéeⁿ caⁿ'a ntiiⁿ'nyuⁿ 'nū chi can'dáa yā. 'Iiⁿ'yāⁿ miiⁿ dííⁿ yā chí staⁿ'a yā alma yeⁿ'é nī ní chí'cueeⁿ yā chí diiⁿ circuncidar 'iiⁿ'yāⁿ ní dííⁿ yā chí ngaⁿ'a ley yeⁿ'e Moisés. ²⁵N'daacā n'dai canée nus'uu chi 'āā ndúúvidaama nducyáácá 'nū chí dεεve 'nū saⁿā s'eeⁿ ní dichó'ó 'nū nanáāⁿ ndís'tii saⁿ'a s'eeⁿ ndúúcū Bernabé ndúúcū Pablo, 'iiⁿ'yāⁿ s'eeⁿ chi neⁿ'e taavi yú. ²⁶Saⁿā s'eeⁿ n'deēe cuūví cueⁿ'é yā naachi deenú yā chí vεε peligro chí 'cuūví yā cáāvā Señor Jesucristo yeⁿ'ē yú. ²⁷Chííⁿ chí dichó'ó 'nū Judas ndúúcū Silas. 'Iiⁿ'yāⁿ s'eeⁿ ní 'tiicá ntúūⁿ caaⁿ'máⁿ yā chí cuuvi deenú nī. ²⁸Chuū ní n'daacā canee ndúúcū Espíritu N'dai ndúúcū nús'uu dííⁿ 'nū chi nguéeⁿ i'neeⁿ 'nū vmnaaⁿ ndís'tii mar 'áámá carga chí ngo'o ca ndís'tii caati 'āā chí neⁿ'e nūūⁿ. ²⁹Nguéeⁿ tuu'ví nī cosa chí nga'á yā na ídolos ndíí nguéeⁿ yeⁿ'e yuūūⁿ ndíí nguéeⁿ yuute yeⁿ'e 'iiti chí nge'e yíícú ndíí nguéeⁿ diiⁿ nī chí cunee nī ndúúcū 'áámá 'iiⁿ'yāⁿ chí nguéeⁿ n'giindivaacu ndúúcu nī. Ndúúti chí dííⁿ nī chuū tuu'mi ní n'daacā

idiíⁿ nī. N'dáácā cho'ó nī. Chuū chí ngaⁿ'á.

³⁰Tíicā chí 'iiⁿ'yāⁿ chí dichó'ó yā cueⁿ'ē na yāāⁿ Antioquía. Ní nduuvidaamá yā ndúúcū nducyaaca hermanos. Ní nica'á yā carta 'iiⁿ'yāⁿ. ³¹Taachí ch'eeⁿ yā carta miiⁿ ní yeenú taavi yā cáāvā nduudu 'viich'etínūⁿ. ³²Judas ndúúcū Silas chí profetas ntúūⁿ chí caⁿ'a nduudu yeⁿ'e Dendyuūs ní ca'a yā 'viich'etínūⁿ ní didiitú yā hermanos ndúúcū neene n'dái nduudu. ³³Canée yā 'áámá tiempo miiⁿ ní hermanos dííⁿ yā despedir 'iiⁿ'yāⁿ ní neⁿ'é yā chí n'daacā canée yā chí 'cueetinééⁿ 'dííⁿ yā ndúúcū vaadi 'diiíⁿ. Ní 'iiⁿ'yāⁿ miiⁿ nguεεcunéeⁿ yā na yāāⁿ naachi snéeⁿ 'iiⁿ'yāⁿ chí dichó'ó yā. ³⁴Silas miiⁿ canée yíínu sa chí canée sa miiⁿ. ³⁵Pablo ndúúcū Bernabé miiⁿ canee yā na yāāⁿ Antioquía. Ngí'cueeⁿ yā nduudu Dendyuūs miiⁿ ní ngaⁿ'a yā evangelio chí ndúúdu ngāi yeⁿ'e Jesucristo ndúúcū náⁿ'ā 'yááⁿ 'iiⁿ'yāⁿ.

**Pablo diví yā yeⁿ'ē Bernabé
ní cueⁿ'é yā ndii 'uuví viaje**

³⁶Cuayiivi chí cho'ó tan'duuví nguuví, Pablo ngāⁿ'a yā ngii yā Bernabé: Nanguεεcunéeⁿ ntúūⁿ yú, caⁿ'ā yú n'diichi yú hermano s'eeⁿ yeⁿ'ē nducyaaca yāāⁿ naachí cheⁿ'e yú, ní caⁿ'a yú nduudu yeⁿ'ē Señor. Ní n'diichi yú táácā snée yā.

³⁷Ní Bernabé miiⁿ neⁿ'ē sa chí caⁿ'á Juan chí nguuví Marcos ndúúcu sa.

³⁸Naati Pablo miiⁿ ní nguéeⁿ canee yíínu sa chí candée sa 'iiⁿ'yāⁿ chí diví yā yeⁿ'ē saⁿ'ā s'eeⁿ ndii yāⁿāa Panfilia. Ní 'iiⁿ'yāⁿ miiⁿ nguéeⁿ cheⁿ'é yā chí dííⁿ yā ntiiⁿ'nyuⁿ. ³⁹Nguéeⁿ canée yíínu yā

nguaaⁿ maáⁿ yā ní ndaacādaamí yā hermanos Bernabé ndúúcu Marcos ní cueⁿé yā isla Chipre na barco. ⁴⁰Pablo miiⁿ ní ndeeve sa saⁿā Silas ní náⁿā hermanos caⁿa yā chií yā chi vaadī ch'ēte yeⁿe Dendyuūs cunée ndúúcu Pablo ndúúcu Silas miiⁿ. ⁴¹Ní cuayiivi cho'ó yā yáⁿā Siria ndúúcu yáⁿā Cilicia. Ch'ētinée chiichi yā 'iⁿyāⁿ yeⁿe yaācū.

**Timoteo cueⁿé yā ndúúcu
Pablo ndúúcu Silas**

16 Cuayiivi miiⁿ índaa sa yāáⁿ Derbe ndúúcu yāáⁿ Listra, ní 'caandiveéⁿ nī. Canee 'áamá saⁿā discípulo chí ch'ēⁿ chi nguuví sa Timoteo, daiya 'áamá n'daataá 'iⁿyāⁿ Israel chí i'téenu tá Dendyuūs, ní chiidá sa miiⁿ nguéeⁿ yeⁿe ndaata 'iⁿyāⁿ Israel. ²Ní hermanos chí snée yā yāáⁿ Listra ndúúcu yāáⁿ Iconio ngaⁿa cuaacú yā yeⁿe sáⁿā miiⁿ chí neenē n'dai sa. ³Pablo miiⁿ ní neⁿe yā chí caⁿa sa nduucú yā. Ní sta'á yā saⁿā ní díⁿ yā circuncidar saⁿā miiⁿ caavā 'iⁿyāⁿ Israel s'eeⁿ ti déenú yā nducyaaca 'iⁿyāⁿ yeⁿe yāáⁿ miiⁿ chí saⁿā miiⁿ daiya sa saⁿā chí nguéeⁿ yeⁿe ndaata Israel. ⁴Ní taachi cho'ó yā yāáⁿ s'eeⁿ caⁿa yā orden chí nn'gaacú yā chí caⁿa apóstoles chí caⁿa nduudu yeⁿe Dendyuūs ndúúcu 'iⁿyāⁿ ndiicú chí ngaⁿa ntiⁿnyuⁿ yeⁿe yāacū chí snée yā na yāáⁿ Jerusalén chí díⁿ yā nducueⁿē chuū. ⁵'iⁿyāⁿ s'eeⁿ yeⁿe yāacū s'eeⁿ 'āā neē chiichí yā ndúúcu vaadī i'teenu. Ní ngíⁿ 'yaaⁿ ca yā 'áámá nguuví taama nguuví.

**Pablo n'diichí yā na visión yeⁿe yā
'áamá saⁿā yeⁿe yáⁿā Macedonia**

⁶Ní cho'ó yā yáⁿā Frigia ndúúcu yáⁿā Galacia. Espíritu N'dai yeⁿe

Ndyuūs miiⁿ nguéeⁿ 'cuūⁿ chí caⁿá yā caaⁿmaⁿ yā nduudu cuaacu na yáⁿā Asia. ⁷Ndaá yā yáⁿā Misia ní neⁿe caⁿa yā yáⁿā Bitinia naati Espíritu miiⁿ nguéeⁿ 'cuūⁿ. ⁸Ní cho'ó yā 'diituú yáⁿā Misia ní cueⁿé yā na yāáⁿ Troas. ⁹Nguiinū miiⁿ ní Pablo miiⁿ ní ch'iⁿi 'yúúdiyaaⁿ sáⁿā na yaāⁿ yeⁿe sa. Ní n'diichi sa 'áamá saⁿā yeⁿe yáⁿā Macedonia chéendii sa ní d'cuítu sa Pablo ní caⁿa sa: Cho'o dí yáⁿā Macedonia miiⁿ ní cunnee di nús'uū. ¹⁰Ní Pablo miiⁿ taachi n'diichi sa na 'yúúdiyaaⁿ yeⁿe sa, cuayiivi míⁿ nacadínuuⁿ 'nū chí caⁿa 'nū yáⁿā Macedonia. Déenú 'nū chí Dendyuūs ndeevé yā nús'uu chí caaⁿmaⁿ 'nū yeⁿe evangelio chí ndúúdu ngai yeⁿe Jesucristo.

Cueⁿé yā vácū na yāáⁿ Filipos

¹¹Chen'ē 'nū na barco yeⁿe yāáⁿ Troas ní ndaá 'nū yúúni cuaacu na isla Samotracia. Chideeve táamá nguuví ní ndaá 'nū yāáⁿ Neápolis. ¹²Ndii míⁿ cueⁿé 'nū na yāáⁿ Filipos chí yeⁿe 'iⁿyāⁿ romanos ní yāáⁿ miiⁿ vmnááⁿ vmnaaⁿ yeⁿe yáⁿā Macedonia. Ní ch'ētinée 'nū 'aama tiempo yāáⁿ miiⁿ. ¹³'Áamá nguuví sábadu chí intaavi'tuunuúⁿ yā tan'dúúca ley yeⁿe yā can'daa 'nu cuaaⁿ dáámí cheendi va'āi yeⁿe yāáⁿ miiⁿ niⁿnuuⁿ yíicú naachi caⁿ'angua'á yā ní ch'ēteⁿ 'nū. Ní caⁿa n'deeé 'nū ndúúcu n'daataá chí nduuvidaama.

¹⁴Miiⁿ canée 'áamá n'daataá chí nguuví tá Lidia. N'diicui tá tínnuⁿ morada cua'á yeⁿe yāáⁿ Tiatira. Ní i'téenu tá Dendyuūs. Táⁿā miiⁿ ní n'giindiveeⁿ tá. Ní Señor miiⁿ ní

nda'ai yā vaanicadiinúuⁿ yeⁿē tá chí cu'neeⁿ veeⁿ tá chi caaⁿ'maⁿ Pablo. ¹⁵Ní taachí cheedinuūⁿniⁿ tá ndúúcū 'iiⁿ'yāⁿ yeⁿē tá, dí'cuíitu tá nús'uu ní ngaⁿ'a tá: Ndúúti chi deenu ní chi 'úú 'áámá caneé ndúúcū Dendyuūs, cundáa ní vaacú ní 'cuēetinée ní. Ní dí'cuíitu tá nús'uu ní ch'ēetinée 'nū. ¹⁶Taachí cueⁿ'e 'nū na lugar chi caⁿ'angua'a 'nū tuu'mi ní ndaacá 'nū 'áámá n'daata 'líiⁿ chi caneé tá ndúúcū espíritu yeⁿ'e yáá'n'guinūuⁿ chí diiⁿ adivinar. Ní ndaā tá nanáaⁿ 'nū. N'daata míiⁿ nééné n'deēe idiíⁿ tá ganar yeⁿ'ē 'iivi tá ndúúcū espíritu yeⁿ'ē chí diiⁿ adivinar. ¹⁷Tá 'cūū ní cán'daā tá Pablo ndúúcū nús'uu ní n'gai yiicu ta ní caⁿ'a tá: Saⁿ'ā s'uuⁿ ní saⁿ'ā chí dichíí'vē Dendyuūs chí ch'ēete n'dai chí caneé na va'ai ch'ēeti nguuví. Saⁿ'ā s'eeⁿ n'gíⁿ'i sa yúúni chí nanguaⁿ'āi yú.

¹⁸N'daata miiⁿ diiⁿ tá 'túúcā neené 'yaaⁿ nguuví. Pablo miiⁿ ní nguéé caneé yiinū sa ní caⁿ'a sá chíi sa espíritu miiⁿ: 'Úú dicho'ó dii ndúúcū chí duuchi Jesucristo chí nan'dáa di yeⁿ'ē tá 'tii. Ní nan'dáa espíritu miiⁿ hora miiⁿ. ¹⁹Taachí n'diichi 'iivi tá chí cueⁿ'e espíritu yeⁿ'ē adivinanza chí diiⁿ tá ganar cááva yā, tuu'mi sta'á yā Pablo ndúúcū Silas. Ní candée yā saⁿ'ā s'eeⁿ na vaacūyāāⁿ nanááⁿ 'iiⁿ'ntyéⁿ'e. ²⁰Ní chíⁿ'i yā saⁿ'ā s'eeⁿ nanááⁿ 'iiⁿ'ntyéⁿ'e ní caⁿ'a yā: Sáⁿ'a s'uuⁿ, 'iiⁿ'yāⁿ Israel s'eeⁿ díiⁿ yā chí véé vaadi 'caa'va na yāāⁿ yeⁿ'e yú. ²¹Ní ngí'cueeⁿ yā s'uuúⁿ costumbre chí nguēe 'cuaaⁿ yú ní nguéé caneé chí diiⁿ yú, caati s'uuúⁿ ní 'iiⁿ'yāⁿ romanos s'uuúⁿ.

²²Ní 'iiⁿ'yāⁿ yeⁿ'e yāāⁿ miiⁿ nduuvídáama yā ndúúcū 'iiⁿ'ntyéⁿ'e.

Ní 'iiⁿ'ntyéⁿ'e s'eeⁿ chíiⁿ'cuúⁿ yā catecai sa ní ca'á orden yā chí 'cueⁿ'é yā saⁿ'ā ndúúcū nduucu. ²³Ch'íiⁿú ch'eⁿ'é yā saⁿ'ā s'eeⁿ n'deēe taaví vueltas ní s'nuúⁿ yā saⁿ'ā s'eeⁿ vácūū. Ní chíi yā saⁿ'ā chíiⁿ idiíⁿ yā cuidado ch'ééndí vácūū chí díiⁿ yā cuidado n'daacā saⁿ'a s'eeⁿ. ²⁴Taachí ch'iindiveéⁿ yā chuū s'nuúⁿ yā saⁿ'ā s'eeⁿ vácūū chí yáanūu ca ní snuūⁿ chíichi yā ca'a sa na cepo.

²⁵Maⁿ'a yāāⁿ míiⁿ taachi Pablo ndúúcū Silas ngáⁿ'ángua'á yā ní ngiita yā canciones yeⁿ'é Dendyuūs ní 'iiⁿ'yāⁿ chí snúūⁿ vácūū miiⁿ ní n'giindiveéⁿ yā. ²⁶Hora miiⁿ diituú nuⁿ'u yáⁿ'āa ní cimientos yeⁿ'ē vácūū miiⁿ ní nuⁿ'u. Ní hora míiⁿ nūuⁿ nducyaaca cheendi vácūū míiⁿ ní nánguaāⁿ. Ní ndaatíi ca'a yā ndúúcū ta'a yā nducyáácá 'iiⁿ'yāⁿ chí snúūⁿ vácūū. ²⁷Saⁿ'ā soldado chí caneé cuidado vácūū miiⁿ taachí nduuchi sa chí cyaadu sa, ní n'diichi sa chí sdá'āi nducyaaca cheendi vácūū. Tuu'mi ní nntun'dáa sa espada yeⁿ'ē sa ní neⁿ'e sa 'caaⁿ'nuⁿ maaⁿ sa saⁿ'ā, caati nadacadíiⁿnuⁿ sa chí 'iiⁿ'yāⁿ chí snúūⁿ vácūū miiⁿ cheenú yā. ²⁸Pablo miiⁿ 'cai yiicu sa ní ngaⁿ'ā sa: Nguéé diiⁿ di ndúúcū di 'tíicā. Nducyaacá 'nū snée 'nū.

²⁹Tuu'mi ní saⁿ'ā miiⁿ ngiica sa dēēvē. Chindáa sa ngeēnū sa ch'ēeti cuarto miiⁿ. Ní yinduuví sa ní chíiⁿtií'ya sa na ca'a Pablo ndúúcū Silas. ³⁰Ní tun'dáa sa saⁿ'ā s'eeⁿ ní caⁿ'a sa: Ndís'tii Señores, 'táácā díiⁿ ní 'iicu nanguaⁿ'ái?

³¹Saⁿ'ā s'eeⁿ ní caⁿ'a sa: Cu'téénú dí Señor Jesucristo níicú nanguaⁿ'āi di ndúúcū 'iiⁿ'yāⁿ yeⁿ'ē di ná vaacu di.

³²Ní caⁿa yā nduudu yeⁿe Señor saⁿā miiⁿ ndúú^{cū} nducyaaca 'iiⁿyāⁿ ná vaacu sa. ³³Saⁿā miiⁿ ní hora miiⁿ nūuⁿ yeⁿe yāāⁿ sta'a sa 'iiⁿyāⁿ ní naāⁿnū sa chi ya'āi yeⁿe yā. Cuayiivi miiⁿ ní chēēdinuūⁿnīⁿ saⁿā miiⁿ ndúú^{cū} nducyaaca 'iiⁿyāⁿ yeⁿe sa. ³⁴Ní candée sa 'iiⁿyāⁿ na vaacu sa ní ca'a sa chi che'e yā. Nducyááca yā navaacu sa yeenú taavi yā chi s'téenu yā Dendyuūs miiⁿ.

³⁵Chidēve táamá nguuvī miiⁿ 'iiⁿntyéⁿe s'eeⁿ dich'ó yā policía chi yaa'vi sa saⁿā ní caⁿa sa: N'dēechi yā saⁿā s'eeⁿ. ³⁶Ní saⁿā soldado chi canee cuidado cheendi vácū^ū chii sa Pablo nduudú^ū cū^ū: 'Iiⁿntyéⁿe yaa'vi yā 'úú chi 'úú tun'dáá ndís'tii. Maaⁿ ní cho'ó nī ní caⁿá nī ndúú^{cū} cuidado. ³⁷Naati Pablo miiⁿ ní ngaⁿa sa ngii sa 'iiⁿyāⁿ: Cuayiivi chí ch'ínú ch'ēⁿe yā nús'uu nanááⁿ 'iiⁿyāⁿ ndíf nguée itiinguuneéⁿ yā yeⁿe asunto miiⁿ dē'ē chi caaⁿmáⁿ nū ní candée yā nús'uu vácū^ū, 'áá ntun'dáá n'de'ei yā nús'uu, ti nús'uu 'iiⁿyāⁿ romanos s'uuuⁿ ní s'nuúⁿ yā nús'uu vácū^ū?

³⁸Ní soldado s'eeⁿ ní ca'a sa chi cádiinuūⁿ 'iiⁿntyéⁿe. Taachí ch'iindiveéⁿ yā chuū ní dii'yá yā chii taachi chicadiinuúⁿ yā chi romanos 'iiⁿyāⁿ s'eeⁿ. ³⁹Ní 'iiⁿntyéⁿe ndaá yā ní d'cuiitú yā 'iiⁿyāⁿ. Ní tun'dáa yā 'iiⁿyāⁿ vácū^ū. Ní chii yā saⁿā s'eeⁿ chi nan'daa sa na yāāⁿ miiⁿ. ⁴⁰Tuu'mi ní taachi nan'dáa yā vácū^ū sndaa yā na vaacu 'áamá n'daataá chi nguuvī Lidia. Ní n'diichí yā hermanos ní chii yā 'iiⁿyāⁿ chi caⁿá yā ndúú^{cū} cuidado. Ní cunaⁿa yā.

Nduuvitaáⁿ yā na yāāⁿ Tesalónica

17 Cho'ó yā yāāⁿ Anfípolis,
cho'ó yā yāāⁿ Apolonia ní

ndaá yā na yāāⁿ Tesalónica. Naachi véé 'áamá yaacū sinagoga yeⁿe 'iiⁿyāⁿ Israel s'eeⁿ. ²Ní Pablo miiⁿ ti 'āā ndii níⁿnuⁿ yā chēⁿe yā naachi snéeⁿ 'iiⁿyāⁿ. Ní 'iiⁿnuⁿ sábadó chi ntaaviⁿtuunúⁿ yā, caⁿa yā ndúú^{cū} nducyaaca yā nduudú yeⁿe Dendyuūs. ³Chi'cueeⁿ sá ní caⁿa sa yeⁿe chi neené nguūⁿ na Escrituras. Ngaⁿā sa chi canée chi Cristo 'cuūvi yā ní nnduuchí yā nguaaⁿ tináⁿā. Ní Jesús yeⁿe chi 'úú chi ngaⁿá, Jesús miiⁿ chi Cristo chi Ndyuūs dēve yā.

⁴Naⁿa 'iiⁿyāⁿ s'eeⁿ s'téenu yā ní nduuvidaamá yā ndúú^{cū} Pablo ndúú^{cū} Silas ndúú^{cū} n'dee n'dái 'iiⁿyāⁿ s'eeⁿ chi nguéeⁿ yeⁿe ndaata Israel chi 'iiⁿyāⁿ n'dai taavi, ndúú^{cū} n'dee n'dái n'daataá chi n'dái taavi, nguéeⁿ duu'vi yā. ⁵Tuu'mi ní 'iiⁿyāⁿ Israel s'eeⁿ chi nguéeⁿ i'téenu yā ní ngueé yā sta'á yā náⁿā saⁿā chi nguéeⁿ n'daacā saⁿā chi 'daān'di. Ní n'deeé nduuvidaamá yā ní nduuvī taáⁿ yā 'iiⁿyāⁿ yāāⁿ miiⁿ ní ndaa staⁿa vaadicadiinuūⁿ yeⁿe yā. Ní sta'á yā 'iiⁿyāⁿ yeⁿe vaacu Jasón. Ní neⁿe yā tun'dáa yā Pablo ndúú^{cū} Silas nanááⁿ 'iiⁿyāⁿ yāāⁿ miiⁿ.

⁶Naati nguéeⁿ nindaāca yā 'iiⁿyāⁿ s'eeⁿ. Candée yā Jasón ndúú^{cū} náⁿā hermanos nanááⁿ 'iiⁿntyéⁿe yeⁿe yāāⁿ miiⁿ. Ní 'cai yiicú yā: Sáⁿā s'ūūⁿ nidi'vaachi sā nducyááca 'iiⁿyāⁿ yeⁿe núúⁿmáⁿ iⁿyeēⁿdī ní ndaa sa ndii 'múúⁿ. ⁷Ní Jasón miiⁿ snée yā 'iiⁿyāⁿ s'eeⁿ na vaacu sa. Ní nducyaaca yā nguéeⁿ idiⁿ yā tan'dúú^{cā} chi ngaⁿā César. 'Iiⁿyāⁿ s'eeⁿ ngaⁿá yā ti véé táamá rey chi Jesús.

⁸Ní 'iiⁿyāⁿ s'eeⁿ ndúú^{cū} 'iiⁿntyéⁿe yeⁿe yāāⁿ cū^ū nduuvī taáⁿ yā taachi

ch'iindiveéⁿ yā chuū. ⁹Tuu'mi ní sta'á yā tuumi yeⁿē Jasón ndúúcū náⁿa yā ní n'dēechi yā 'iiⁿyāⁿ.

Pablo ndúúcū Silas na yáāⁿ Berea

¹⁰Tuu'mí nūuⁿ hermanos dichó'o yā Pablo ndúúcū Silas ndii yáāⁿ Berea. Ní taachí ndaá yā miiⁿ ní sndaā yā na yaacū sinagoga yeⁿe 'iiⁿyāⁿ Israel s'eeⁿ. ¹¹'Iiⁿyāⁿ s'uuⁿ n'daaca yā nanáāⁿ Dendyuūs nguéé tan'dúúcā 'iiⁿyāⁿ chi snée yā na yāāⁿ Tesalónica. Sta'á yā nduudu miiⁿ ndúúcū vaadi yeenú ní ch'eeⁿ yā nguuvu nguuvu Escrituras. Neⁿé yā n'diichí yā, ¿áá cuaacu chi 'tíicā? ¹²Neené 'yaaⁿ yā s'téenu yā, n'daataa chi nguéé yeⁿe ndaata Israel chi táⁿā n'dai taavi ndúúcū neéné 'yaaⁿ saⁿā. ¹³Taachi 'iiⁿyāⁿ Israel s'eeⁿ yeⁿe yáāⁿ Tesalónica chicadínuuⁿ yā chi 'iiⁿyāⁿ yeⁿe yáāⁿ Berea 'aa deenú ntúuⁿ yā yeⁿē nduudu yeⁿe Dendyuūs cáávā chi ngaⁿa Pablo, tuu'mi ní cheⁿé yā miiⁿ. 'Tíicá ntúuⁿ ca'á yā vaadi 'caa'va 'yaaⁿ 'iiⁿyāⁿ. ¹⁴Hora míⁿ nūuⁿ hermanos dichó'o yā Pablo ndíí na nuūⁿnīⁿyáⁿā. Ní Silas ndúúcū Timoteo ch'ēetinée yā miiⁿ. ¹⁵'Iiⁿyāⁿ chí cánée chi can'dáa yā Pablo, candéé yā saⁿa miiⁿ na yáāⁿ Atenas. Ní Pablo ca'a sa orden 'iiⁿyāⁿ s'eeⁿ chi dichó'o yā Silas ndúúcū Timoteo naachí cunée sa chinúúⁿ cueⁿé 'nūūⁿ. Ní cueⁿē 'iiⁿyāⁿ s'eeⁿ.

Pablo na yáāⁿ Atenas

¹⁶Pablo miiⁿ canee ngiinu sa 'iiⁿyāⁿ na yáāⁿ Atenas. Ní neené ndaachi ndíí espíritu yeⁿē sa taachí n'diichi sa nducyaaca 'iiⁿyāⁿ yeⁿē yáāⁿ chi neéné i'téenu yā ídolos.

¹⁷Caⁿa yā n'dee n'dáí ná yaacū sinagoga ndúúcū 'iiⁿyāⁿ Israel s'eeⁿ ndúúcū 'iiⁿyāⁿ chi i'téenu yā chi maaⁿ ní 'iiⁿyāⁿ Israel. Ní nguuvu nguuvu caⁿa ntúuⁿ yā ndúúcū 'iiⁿyāⁿ chi sneé yā niⁿvēē. ¹⁸Ní náⁿā 'iiⁿyāⁿ chi ch'eeⁿ chi neené n'dáí tiiⁿ, 'iiⁿyāⁿ s'eeⁿ yeⁿe 'iiⁿyāⁿ epicúreos, yeⁿē 'iiⁿyāⁿ estoicos ní n'gēcú cheendí yā ndúucu yā. Ní n'dúúví 'iiⁿyāⁿ ngaⁿá yā: ¿Dē'e neⁿé caaⁿmaⁿ sáⁿa 'cūū chí tá'tii n'deéé ngaⁿā sá? Ní náⁿa yā ní caⁿa yā: Ngaⁿā sa tan'dúúcā chi 'iiⁿyāⁿ chi ngaⁿa yeⁿé ndyuūs ngai. Pablo miiⁿ caⁿa yā yeⁿē evangelio chi ndúúdú ngai yeⁿē Jesucristo ní yeⁿē 'iiⁿyāⁿ chí nduuchí yā nguaaⁿ tináⁿā. ¹⁹Ní sta'á yā saⁿā ní ndaá yā nanáāⁿ 'iiⁿntyéⁿē ndúucu sa yiicū chi nguuvu Areópago. Ní caⁿa yā: ¿Áá cuuvi cádínuuⁿ 'nū dē'e chí ca'cueéⁿ nī chí ngai chí ngaⁿa nī? ²⁰Ngaⁿa nī dendu'ū chi n'daaⁿ ní neⁿé 'nū cadiinuⁿ 'nū dē'e neⁿe caaⁿmāⁿ chuū.

²¹(Naati 'iiⁿyāⁿ yeⁿe yáāⁿ Atenas ndúúcū 'iiⁿyāⁿ chi snúuⁿ yúúⁿ chí snée yā miiⁿ, nguéé tuumicadínuuⁿ yā yeⁿē taama naaⁿ, caati dámaāⁿ neⁿe yā 'caandiveéⁿ yā ní caaⁿmaⁿ yā cosa chí ngai.)

²²Tuu'mi ní Pablo míⁿ chéendii sa náávtaⁿā 'iiⁿntyéⁿē yiicū chi nguuvu Areópago, ní caⁿa sa: Ndís'tii saⁿa yeⁿe yáāⁿ Atenas, 'úú tuumicadiinúúⁿ yeⁿe nī chí neené i'téenu nī ndyuūs s'eeⁿ. ²³Cho'ó ní n'diichí lugar naachi cu'téenu nī ndyuūs s'eeⁿ yeⁿé nī. Ndaacá 'áamá na santo naachi canée nguūⁿ nduudu 'cūū, NDYUŪS CHI NGUÉÉ N'DIICHI YÚ. Ndyuūs chí ndís'tii

nguée n'diichí ní ní i'téenu ní,
Ndyuūs miiⁿ chí 'úú ní ngaⁿá.

²⁴Ndyuūs chí din'dái yā iⁿ'yeēⁿdī
ndúúcu tanducuéⁿē chí véē iⁿ'yeēⁿdī,
Señor miiⁿ chí yeⁿ'é yā nanguuvi
ndúúcu yeⁿ'e na yáⁿ'āa miiⁿ. Ní
nguée canúuⁿ yā yaācu chí nín'dai
ta'ā 'iⁿ'yāⁿ. ²⁵Ndíí nguée ndúú
chí neⁿ'é yā de'ē vee yeⁿ'e 'iⁿ'yāⁿ
caati 'iⁿ'yāⁿ miiⁿ ní ca'a yā vida
nducyaaca 'iⁿ'yāⁿ yeⁿ'e iⁿ'yeēⁿdī
ndúúcu 'yúúné chí yíícu yā ndúúcu
tanducuéⁿē dendu'ū.

²⁶Ndyuūs diiⁿ yā chí 'áámá ndaata
nducyáácá 'iⁿ'yāⁿ chí 'cuētinée yā
vmnaaⁿ yáⁿ'āa. Ní vmnááⁿ vmnaaⁿ
dííⁿ yā señalar yáⁿ'āa naachi
'cuētinée yā ndúúcu tiempo chí
'cuētinée yā na yáⁿ'āa. ²⁷Dendyuūs
s'neéⁿ yā 'iⁿ'yāⁿ na yáⁿ'āa chí n'nuúⁿ
yā Dendyuūs miiⁿ ndúúti chí cuuvi
ndaā niiⁿnúⁿ yā níícu ndaacá yā
'iⁿ'yāⁿ, 'áará chí cuaacu nííⁿnyúⁿ
nguée yaⁿ'ai canée yā yeⁿ'e ca'áámá
ca'áámá s'uúuⁿ. ²⁸Ní cucáávā 'iⁿ'yāⁿ
miiⁿ canduuchi yú ní inuⁿ'u yú
ndúúcu yā ní s'uúúⁿ 'cuētinée yú
ndúúcu yā. Tan'dúúca chí caⁿ'a
tanáⁿ'ā 'iⁿ'yāⁿ poetas yeⁿ'é ní: Tí
ndáátá yeⁿ'e Ndyuūs s'uúuⁿ. ²⁹Canee
yú na ndaata yeⁿ'é Dendyuūs. Nguée
cánée chí nadacadíínuuⁿ yú chí
Dendyuūs miiⁿ tan'dúúca 'dííⁿnguaaⁿ
'iⁿ'yāⁿ, tan'dúúca 'dííⁿnguee 'iⁿ'yāⁿ,
tan'dúúca tuúú 'iⁿ'yāⁿ, tan'dúúca chí
saⁿ'ā din'dái ndúúcu vaadi cadiinūuⁿ
yeⁿ'e sa. ³⁰Tuuⁿmi ní Dendyuūs
nguée dííⁿ cuenta yeⁿ'e tiempo yeⁿ'e
vaadi tonto yeⁿ'e 'iⁿ'yāⁿ. Maaⁿ ní
Ndyuūs ca'á yā orden nducyaaca
'iⁿ'yāⁿ nducuéⁿē cuaaⁿ chí 'iⁿ'yāⁿ
ndaacadáámí yā yeⁿ'e nuuⁿndí
yeⁿ'é yā. ³¹Cáávā chuū Dendyuūs

'cuuⁿmiⁿ yā 'áámá nguuví chí dííⁿ
yā juzgar 'iⁿ'yāⁿ yeⁿ'e iⁿ'yeēⁿdī
ndúúcu justicia cucáávā saⁿ'ā
miiⁿ chí ndeeve. Cáávā saⁿ'ā miiⁿ
Dendyuūs dííⁿ yā chí nducyaaca
'iⁿ'yāⁿ deenú yā chí cuaacu chí
Dendyuūs nadacuéēⁿ yā saⁿ'ā nguaaⁿ
tináⁿ'ā.

³²Taachí ch'iindiveeⁿ yā chí
nnduuchi yā nguaaⁿ tináⁿ'ā, náⁿ'ā yā
dííⁿ duuchí yā 'iⁿ'yāⁿ. Níícu náⁿ'ā yā
caⁿ'a yā: 'Áa 'caandiveeⁿ ntúuⁿ 'nū
yeⁿ'é ní ndii táámá.

³³Pablo miiⁿ nan'daa sa naavtaⁿ'ā
yeⁿ'é yā. ³⁴Náⁿ'a yā chí'téenu yā
ní nduuvidaamá yā ndúúcu Pablo
miiⁿ. Nguaaⁿ 'iⁿ'yāⁿ miiⁿ canee
'áámá saⁿ'ā Dionisio yeⁿ'e 'iⁿ'ntyéⁿē
concilio chí nduuvidaamá yā na
lugar Areópago ndúúcu 'áámá
n'daataá chí nguuví tá Dámaris,
ndúúcu táámá 'iⁿ'yāⁿ s'eeⁿ ndúúcu
'iⁿ'yāⁿ miiⁿ.

Pablo na yáāⁿ Corinto

18 Cuayiivi chí chó'oo chúū
Pablo miiⁿ ní nan'dáa sa
yeⁿ'e yáāⁿ Atenas ní cueⁿ'e sa na
yáāⁿ Corinto. ²Ní nndaaca sa 'áámá
saⁿ'ā Israel chí nguuví sá Aquila.
Saⁿ'ā miiⁿ yeⁿ'e yáⁿ'āa Ponto chí
cáámá ndaā sa yeⁿ'e yáⁿ'āa Italia
ndúúcu tán'ā sa chí nguuví Priscila
ti Claudio miiⁿ chí rey ch'ēete ní
ca'a sa orden chí nan'daā nducyaaca
'iⁿ'yāⁿ Israel s'eeⁿ yeⁿ'e yáāⁿ Roma.
Pablo cueⁿ'e sa naachi canée 'iⁿ'yāⁿ
s'eeⁿ. ³Saⁿ'ā miiⁿ ní dáámá diiⁿ
sa ntiiⁿnyūⁿ ní canée sá ndúúcu
yā. Dáámá nūu dííⁿ yā ntiiⁿnyuⁿ.
Ntiiⁿnyuⁿ yeⁿ'e 'iⁿ'yāⁿ s'eeⁿ chí
din'dái yā va'ai tíínnūuⁿ. ⁴Ní nguuví
nguuví sábadu miiⁿ Pablo n'dee

indeé yā na yāacū sinagoga. Ní dííⁿ yā chi nduuvidaamá yā 'iiⁿ'yāⁿ Israel s'eeⁿ ndúú^{cū} 'iiⁿ'yāⁿ s'eeⁿ chi nguéeⁿ yeⁿ'ē ndaata Israel lado yeⁿ'é yā.

⁵Taachi Silas ndúú^{cū} Timoteo ndaá yā yeⁿ'ē yáⁿ'āa Macedonia, Pablo miiⁿ 'aama canée sá chi ngaⁿ'ā sa nduudu yeⁿ'é Dendyuūs. Ní ngaⁿ'ā sa nduudu cuaacu ní ngaⁿ'a sa ngii sa 'iiⁿ'yāⁿ Israel s'eeⁿ chi Jesús miiⁿ chi Cristo. ⁶Ní 'iiⁿ'yāⁿ s'eeⁿ ngaⁿ'á yā contra yeⁿ'e Pablo ní 'caⁿ'va yā yeⁿ'ē sa. Pablo ch'íidí sa tiinuúⁿ yeⁿ'ē sa. Ní Pablo caⁿ'a sa chii sa 'iiⁿ'yāⁿ: Ndis'tii ní canée chí 'āā maáⁿ nī candíícu nī chi cuuvi ndúú^{cū} nī. 'Úú nguéeⁿ can'diicú yeⁿ'ē chuū. Maaⁿ ní caⁿ'á ndúú^{cū} 'iiⁿ'yāⁿ s'eeⁿ chi nguéeⁿ yeⁿ'ē ndaata Israel.

⁷Nandáa sa miiⁿ ní cueⁿ'e sa na vaacu 'áámá saⁿ'ā chi nguuvi Justo chi i'téenu sa Dendyuūs. Vaacu sa canée sá na niiⁿ'nuúⁿ na yāacū sinagoga. ⁸Níícu saⁿ'ā Crispo saⁿ'ā chi ndii tiiⁿ yeⁿ'ē yāacū sinagoga s'téenu sa Señor 'iivú Ndyuūs ndúú^{cū} nducyaacá yā na vaacu sa. Ní neenē 'yaaⁿ 'iiⁿ'yāⁿ yeⁿ'e yāā Corinto miiⁿ ch'indiveéⁿ yā. Ní s'téenu yā ní chēdinuūⁿniⁿ yā. ⁹Tuu'mi ní Señor caⁿ'a yā ndúú^{cū} Pablo na 'yúúdyaaⁿ yeⁿ'ē sa: Nguéeⁿ 'vaⁿ'a di caāⁿ'maⁿ di. Nguéeⁿ cunēⁿ 'diiⁿ cheendí di. ¹⁰Caati 'úú canee ndúú^{cū} di ni mar 'áámá 'iiⁿ'yāⁿ nguéeⁿ dííⁿ n'gíínu yā ndúú^{cū} di. Ti 'úú neenē n'deeⁿ 'iiⁿ'yāⁿ chi véé ní yeⁿ'é na yāⁿ 'cūū.

¹¹Ní canee sá miiⁿ 'áámá nduūyū canee maⁿ'ā. Chi'cueeⁿ sa nduudu yeⁿ'e Dendyuūs 'iiⁿ'yāⁿ s'eeⁿ.

¹²Taachi saⁿ'ā Galión canée sá 'iiⁿ'ntyéⁿ'ē gobernador yeⁿ'e yáⁿ'āa

Acaya, tuu'mi ní 'iiⁿ'yāⁿ Israel s'eeⁿ ní nducueeⁿ yā ti nduuvidaamá yā contra Pablo. Ní candée yā saⁿ'ā nanááⁿ silla yeⁿ'e juez miiⁿ. ¹³Ní caⁿ'a yā: Saⁿ'a 'cūū ngaⁿ'a sa chi 'iiⁿ'yāⁿ s'eeⁿ cu'téenu yā Dendyuūs nguéeⁿ tan'dúú^{cā} chi ngaⁿ'a ley.

¹⁴Taachí Pablo miiⁿ ní tuca'a sa caⁿ'a sa, tuu'mí saⁿ'a Galión ngaⁿ'a sa ngii sa 'iiⁿ'yāⁿ Israel s'eeⁿ: Ndis'tii 'iiⁿ'yāⁿ Israel s'eeⁿ, ndúú^{ti} chi 'áámá cosa chi ya'ai n'dai chii o 'áámá tinaⁿ'ā n'dii yā tuu'mi ní cuaacu cucheé ndúú^{cū} nī. ¹⁵Ndúú^{ti} chí vaadi tiinguuneeⁿ yeⁿ'ē nduudu yeⁿ'é nī ndúú^{cū} chi duuchi 'iiⁿ'yāⁿ ndúú^{cū} yeⁿ'ē ley yeⁿ'é nī, tuu'mi ní, ndis'tii, dííⁿ nī juzgar chuū. Ti 'úú nguéeⁿ neⁿ'é dííⁿ juzgar chi 'túú^{cā}.

¹⁶Tuu'mi ní tun'dáa yā 'iiⁿ'yāⁿ chuva'āi yeⁿ'e cuarto yeⁿ'e juez.

¹⁷Tuu'mi ní nducyaacá 'iiⁿ'yāⁿ chi nguéeⁿ yeⁿ'e ndaata Israel sta'á yā saⁿ'ā Sóstenes chí chééndii vmnaaⁿ yeⁿ'ē yāacū sinagoga ní ch'eⁿ'é yā saⁿ'ā nanááⁿ silla yeⁿ'ē juez. Naati Galión miiⁿ nguéeⁿ dííⁿ yā cuenta yeⁿ'e nducueⁿ'ē chuū.

¹⁸Níícu Pablo miiⁿ neenē 'naaⁿ canee sa miiⁿ'ya ní caⁿ'a sa hermanos: Cuidado 'cuētinéeⁿ nī. Cueⁿ'e sa na barco na yáⁿ'āa Siria ndúú^{cū} 'áámá táⁿ'ā chi nguuvi Priscila ndúú^{cū} 'áámá saⁿ'ā chi nguuvi Aquila. Vmnaáⁿ vmnaaⁿ na yāāⁿ Cencrea Pablo miiⁿ 'chiica sa yuūdū tiiⁿ sa ti 'áámá seña chi diiⁿ sa compromiso ndúú^{cū} Dendyuūs. ¹⁹Tuu'mi ní ndaā sa yāāⁿ Efeso ní Pablo s'neeⁿ sá 'iiⁿ'yāⁿ miiⁿ. Ní sndaa maāⁿ sa na yāacū sinagoga miiⁿ. Ní caⁿ'a sa ní n'deēⁿ ndeē sa ndúú^{cū} 'iiⁿ'yāⁿ Israel s'eeⁿ. ²⁰'Iiⁿ'yāⁿ s'eeⁿ

di'cuíftu yā saⁿā chi 'nááⁿ cunee sa ndúúcu yā naati nguéeⁿ chíi 'tuucā.
²¹Naatí yaaⁿvi sá 'iiⁿyāⁿ ní caⁿa sa: Cánéeⁿ chí nguēcúndíi na yāāⁿ Jerusalén cáávā 'viicu chíi cuchíi. Nguēcunéeⁿ ntuúⁿ n'diichíi ndis'tií ndúúti chíi Dendyuūs neⁿe yā. Ní chiica sá yeⁿe yāāⁿ Efeso ní cueⁿe sa ná barco.

Pablo ndaá yā yāāⁿ Antioquía ní cueⁿe yā ndii chíi 'iiⁿnūⁿ viaje

²²Cuchēē sá na yāāⁿ Cesarea ní cheⁿe sá diiⁿ sa saludar hermanos chíi caⁿá yā na yaācū. Tuu'mi ní cueⁿe sa na yāāⁿ Antioquía.
²³Canéeⁿ sá mífⁿ 'áámá tiempo. Cun'dáa sa ní cueⁿe sá na orden yeⁿe nducyaaca yáⁿāa Galacia ndúúcu yáⁿāa Frigia. Ní s'neeⁿ chiichi sa nducyaaca 'iiⁿyāⁿ chíi i'téenu yā Cristo ná vaadí i'teenu.

Apolos ngaⁿá yā nduudu cuaacu na yāāⁿ Efeso

²⁴Áámá saⁿā Israel chíi nguuví sa Apolos ndáa sa yāāⁿ Efeso yeⁿe yāāⁿ vaacú sa chíi nguuví Alejandría. Saⁿā miiⁿ saⁿā chíi deenú taavi sa. Neené n'dēve nduudu yeⁿe sa ní véé valor sa chíi caāⁿmāⁿ sa Escrituras chíi canéeⁿ nguūⁿ. ²⁵Saⁿā miiⁿ ní 'áámá 'iiⁿyāⁿ chíi 'cueéⁿ yā saⁿa yúúni yeⁿe Señor miiⁿ. Ní saⁿā miiⁿ ní diiⁿ sa ndúúcu núúⁿmáⁿ espíritu yeⁿe sa. Ní ngaⁿa sá ngí'cueéⁿ sa cuéⁿe daāⁿmaⁿ nduudu yeⁿe Dendyuūs miiⁿ, 'áará chíi dámaāⁿ deenu sa yeⁿe chíi chēdinuūⁿnī Juan. ²⁶Ní Apolos miiⁿ tucá'a sa caⁿa sa nguéeⁿ ndúúcu vaadí 'va'a chēti yaācū sinagoga taachí saⁿā Aquila ndúúcu táⁿā sa Priscila

ch'iindiveéⁿ yā, s'néeⁿ vi'i yā saⁿā ní chíi'cuéeⁿ cá yā saⁿā más ca yeⁿe yúúni cuaacu yeⁿe Ndyuūs.
²⁷Apolos neⁿe sa cho'o sa yáⁿāa Acaya, ní hermanos ní caⁿa yā chíi caⁿā sáⁿā miiⁿya. Ní hermanos dingúuⁿ yā yeⁿe 'iiⁿyāⁿ s'eeⁿ chíi i'téenu yā Cristo chíi 'cuaāⁿ yā saⁿā. Tuu'mi ní ndaā sa miiⁿ ní chinnee taaví sa 'iiⁿyāⁿ chíi i'téenu yā cáávā favor ch'ēte yeⁿe Dendyuūs.
²⁸Ndúúcu nducueⁿe poder n'dēē ch'écū cheendi sa ndúúcu 'iiⁿyāⁿ Israel s'eeⁿ nanááⁿ nducyaaca 'iiⁿyāⁿ s'eeⁿ ní n'g'iⁿ sa chíi Jesús miiⁿ chíi Cristo chíi nndēve Dendyuūs cáávā Escrituras.

Pablo na yāāⁿ Efeso

19 Taachí canéeⁿ Apolos miiⁿ yāāⁿ Corinto, Pablo miiⁿ ch'íínú cheⁿe sa yáⁿāa yeⁿe distrito cuaaⁿ niiⁿnuúⁿ ní ndaa sá yāāⁿ Efeso. Ní nndaaca sá ndúúví saⁿā chíi i'téenu yā Cristo. ²Ní caⁿa sa: ¿Áá diiⁿ di recibir Espíritu N'dai yeⁿe Ndyuūs taachí chíi'teenu di? Ní 'iiⁿyāⁿ s'eeⁿ miiⁿ ní caⁿa yā: Nguéeⁿ n'giindiveeⁿ 'nū chíi véé Espíritu N'dai yeⁿe Ndyuūs.

³Tuu'mi ní caⁿa sa: ¿Du'u chēdinuūⁿnī dii? 'Iiⁿyāⁿ s'eeⁿ ní cāⁿa yā: Chēdinuūⁿnī 'nū cucáávā nduudu Juan.

⁴Pablo miiⁿ ní caⁿa sa: Juan miiⁿ chēdínúⁿnī sa chíi cuēdínúⁿnī 'iiⁿyāⁿ yeⁿe chíi indaacadaamí yā yeⁿe nuuⁿndi yeⁿe yā, ní Juan ngaⁿa sa ngii sa 'iiⁿyāⁿ chíi cu'téenu yā 'iiⁿyāⁿ chíi cuchii yā cuaaⁿ dáámí sá. 'Iiⁿyāⁿ 'cúu chíi Cristo Jesús miiⁿ.

⁵Taachí ch'iindiveéⁿ yā chuū chēdinuūⁿnī yā ndúúcu chíi

duuchi Señor Jesús miiⁿ. ⁶Taachí Pablo sn'duuⁿ ta'á yā vmnaaⁿ yeⁿe 'iiⁿyāⁿ s'eeⁿ tuuⁿmi ní ndaá vmnaaⁿ yeⁿe 'iiⁿyāⁿ s'eeⁿ Espíritu N'dai yeⁿe Ndyuūs. Ní caⁿ'a yā davaacu chi n'dááⁿ ní caⁿ'a yā chiⁿ chi Dendyuūs yaaⁿvi yā. ⁷Saⁿ'ā s'eeⁿ ní ngii sa tan'dúucā ndiichúví sá.

⁸Sndáá Pablo miiⁿ na yaācū sinagoga miiⁿ ní caⁿ'a cuaacū sá taandúu cuuví 'iiⁿnuⁿ 'iiyū, nguée ndúucū vaadí 'va'a. Ní n'cueeⁿ sa ní ngaⁿ'a sa ndíí neⁿe sa chi cu'téenu yā yeⁿe chi Dendyuūs ngaⁿ'a yā ntiiⁿnyuⁿ. ⁹Naatí diiⁿ chεεchí náⁿ'a yā na staava yeⁿe yā ní nguée chi'téenu yā. Nguée caⁿ'a yā n'daacā yeⁿe yúúni yeⁿe Dendyuūs miiⁿ nanaaⁿ nducyaaca 'iiⁿyāⁿ. Ndaacadaamí Pablo yeⁿe yā ní snee viⁿ sa 'iiⁿyāⁿ chi i'teenú yā Cristo. Ngí'cueeⁿ sá nguuvi nguuvi ná escuela chi nguuvi Tiranno. ¹⁰Canée sá taanduu 'úúvi nduúyū. 'Tíicā chi nducyaaca 'iiⁿyāⁿ chi snée yā na yáⁿ'āa Asia, 'iiⁿyāⁿ Israel s'eeⁿ ndúucū 'iiⁿyāⁿ s'eeⁿ chi nguée yeⁿe ndaata Israel ch'iindiveén yā nduudu yeⁿe Señor Jesús. ¹¹Dendyuūs miiⁿ dííⁿ yā vaadí n'giinu ch'εete n'dai cáāvā ta'a Pablo miiⁿ. ¹²Manera chi 'tíicā sta'á yā paños ndúucū delantales chi tuuⁿvi cuerpo yeⁿe Pablo ní candée yā nanááⁿ 'iiⁿyāⁿ ngiita. 'Iicu ndiiví ca'ai yeⁿe yā ndúucū 'yúúne s'eeⁿ chi nguée n'daacā yeⁿe yááⁿn'guiinūⁿ.

¹³Tuuⁿmi ní náⁿ'ā 'iiⁿyāⁿ Israel s'eeⁿ chi ngiicá yā ndíí miiⁿ ndíí 'muuⁿ chí ngaⁿ'a yā ndúucū espíritu chi nguée n'daacā yeⁿe yááⁿn'guiinūⁿ neⁿe yā caaⁿ'máⁿ yā chi yeⁿe Jesús

miiⁿ. Ní ngaⁿ'á yā: 'Úú ní caacá cáāvā Jesús miiⁿ, 'iiⁿyāⁿ chí ngaⁿ'a Pablo yeⁿe chi can'daā na cuerpo miiⁿ.

¹⁴Áamá saⁿ'ā chi nguuvi Esceva véé ndεechē daiya sa chi saⁿ'ā s'eeⁿ. Saⁿ'ā miiⁿ ní saⁿ'ā Israel ní saⁿ'ā chi ngaⁿ'a ntiiⁿnyuⁿ yeⁿe chiiduú s'eeⁿ yeⁿe Israel. Ní daiya sa dííⁿ yā chuū. ¹⁵Nan'guεεcútaⁿ'ā espíritu chi nguée n'daacā yeⁿe yááⁿn'guiinūⁿ ní caⁿ'á yā: 'Úú ní n'diichi Jesús miiⁿ ní deenú ntúūⁿ du'ū chi Pablo. Ndís'tii, ¿du'u ndís'tii?

¹⁶Ní 'iicu saⁿ'ā chi canee sa ndúucu espíritu chi nguée n'daacā cú'u sá ndúucū 'iiⁿyāⁿ s'eeⁿ, ní chíche sa ndúucū 'iiⁿyāⁿ s'eeⁿ ní diiⁿ ca sá ndúucū 'iiⁿyāⁿ s'eeⁿ. 'Iiⁿyāⁿ s'eeⁿ ní chéenu yā yeⁿe va'āi miiⁿ. 'Āā ntée snúúⁿ yā catecai vmnáaⁿ yā ní nca'ái yā. ¹⁷Chuū chicadiinúúⁿ nducyaaca 'iiⁿyāⁿ chi snee na yááⁿ Efeso, tan'dúucā 'iiⁿyāⁿ Israel s'eeⁿ 'tiicá ntúūⁿ 'iiⁿyāⁿ s'eeⁿ chi nguée yeⁿe ndaata Israel. Ní nducyaaca yā dii'yá yā chi. Ní chíí ch'εete ca Señor Jesús miiⁿ.

¹⁸Neené 'yaaⁿ yā chi s'téenu yā ní ndaá yā. Ní caⁿ'a yā chi véé nuuⁿndi yeⁿe yā. ¹⁹Neené 'yaaⁿ 'iiⁿyāⁿ chi ch'éeⁿ yā cosas magias ndée yā libros yeⁿe yā ní chicyáⁿ'a yā nanááⁿ nducyaaca 'iiⁿyāⁿ. Ntun'dáa yā cuenta yeⁿe libros ní chicadiinúúⁿ yā chí ngíí 'uúvi ngeecu ndiichi mil tuūmí yeⁿe 'dííⁿngueε. ²⁰'Tíicā chi 'yaaⁿ 'iiⁿyāⁿ chi chi'teenu nduudu yeⁿe Señor 'iivú Dendyuūs miiⁿ. Ní 'áamá canée chiichi yā nduudú Dendyuūs miiⁿ.

²¹Cho'oo chúú ní Pablo miiⁿ nacadiinu sa na staava yeⁿe sa

chi cho'ō sa na yáⁿāa Macedonia ndúúcū yáⁿāa Acaya ní cuayiivi caⁿā sa na yáāⁿ Jerusalén. Ní ngaⁿā sa: Cuayiivi chí 'āa cheⁿé yáāⁿ s'eeⁿ canee chi n'diichí ntúūⁿ yáāⁿ Roma. ²²Ní dicho'o na yáⁿāa Macedonia 'uūvī saⁿa, Timoteo ndúúcū Erasto chi cunnée yā 'iⁿyāⁿ. Pablo miiⁿ canee sa 'áamá tiempo na yáⁿāa Asia.

'Caa'vá yā na yáāⁿ Efeso

²³Tiempo miiⁿ ch'iindī 'áamá vaadi 'caa'va ch'ēte yeⁿē yúúní yeⁿe Dendyuūs miiⁿ. ²⁴Caati cunee 'áamá saⁿā chi nguuvī sa Demetrio chi din'dái sa yaācū n'gaiyāā yeⁿe imagen chi nguuvī Diana. Dámaāⁿ 'diiⁿnguee din'dái sa. Ní diiⁿ sa ganar n'dee taaví tuūmī yeⁿē ntiiⁿnyuⁿ yeⁿē sa ndúúcū saⁿā s'eeⁿ chidin'dái yā yaācū n'gaiyāā s'eeⁿ. ²⁵Demetrio mífⁿ ní diiⁿ sa chí nduuvidaamá saⁿā s'eeⁿ chi idiiⁿ ntíⁿnyuⁿ miiⁿ. Caⁿa Demetrio: Ndís'tii saⁿā, déenu nī chi véé tuumī yeⁿē yú yeⁿē ntiiⁿnyúⁿ 'cūū. ²⁶Naati inaāⁿ nī ní n'giindiveéⁿ nī chi Pablo 'cūū taanduvéé diiⁿ sa chi neenē n'dai 'iⁿyāⁿ s'téenu yā. Nguéé dámaaⁿ yāāⁿ Efeso ti nuuⁿmaⁿ yáⁿāa Asia. Ní ngaⁿā sa chí nguéé dendyuūs s'eeⁿ chi din'dái yā ndúúcū ta'á yā. ²⁷Nguee dámaāⁿ negocio yeⁿē yú chí véé peligro yeⁿē chí 'aa ntéé du'ū vee. 'Tiicá ntúūⁿ yāacū yeⁿē imagen Diana chí ch'ēte mífⁿ, mar 'áamá 'iⁿyāⁿ 'āa ntéé neⁿe yā. Ní tuca'á yā natuuví yā chí ch'ēte yeⁿē Diana miiⁿ chí i'teenu nuuⁿmaⁿ nación yeⁿe yáⁿāa Asia ndúúcū núúⁿmáⁿ iⁿyeeⁿdí 'cūū.

²⁸Taachí ch'iindiveéⁿ yā chuū nduuvī taāⁿ yā ní 'cai yā, ngaⁿa yā:

Ch'ēte n'dai tá táⁿā imagen Diana yeⁿe 'iⁿyāⁿ yeⁿē yāāⁿ Efeso.

²⁹'Iⁿyāⁿ yāāⁿ miiⁿ chiidáānā yeⁿé yā. Ní sta'á yā saⁿā chí nguuvī Gayo ndúúcū saⁿā chí nguuvī Aristarco ní candée yā saⁿā s'eeⁿ na teatro. Saⁿā miiⁿ ní yeⁿē yáⁿāa Macedonia ní compañeros yeⁿe Pablo. ³⁰Pablo miiⁿ neⁿe sa can'dáa sa nanáāⁿ 'iⁿyāⁿ yāāⁿ miiⁿ naati 'iⁿyāⁿ s'uúⁿ chí i'téenu yā Cristo nguéé 'cuúⁿ yā. ³¹Dendú'ū náⁿa 'iⁿntyéⁿē saⁿā yeⁿe yáⁿāa Asia, saⁿā chí amigo yeⁿē Pablo dichó'o yā caaca yeⁿē chí ngaⁿā yā chí nguéé caⁿā sa na teatro. ³²Náⁿa yā n'gai yā 'áamá cosa, náⁿa yā táamá cosa ti ngiidáānā yeⁿé yā. Náⁿa yā miiⁿ ní nguéé déenu yā de'ē cáavā nduuvidaamá yā. ³³Ní 'iⁿyāⁿ yeⁿe Israel tun'dáa yā Alejandro nguaaⁿ 'iⁿyāⁿ chí n'dee n'dái. 'iⁿyāⁿ Israel s'eeⁿ ingúúndaí yā saⁿā. Tuuⁿmi ní Alejandro mífⁿ caⁿa sa ndúúcū ta'a sa chí cunee 'diiⁿ. Neⁿe sa caaⁿmaⁿ sa yeⁿē maaⁿ sa nanáāⁿ 'iⁿyāⁿ yāāⁿ miiⁿ. ³⁴Taachí tuumicadiinúúⁿ yā chí saⁿa Israel saⁿa miiⁿ nducyáácā yā 'cai yā taanduu 'uuvī hora: Ch'ēte n'dai imagen ndyuūs Diana yeⁿé 'iⁿyāⁿ yeⁿe yāāⁿ Efeso.

³⁵Tuuⁿmi ní saⁿā 'iⁿntyéⁿē chí idingúūⁿ diiⁿ sa chí 'caadií nducyaaca yā cheendi yā ní caⁿā sá: Ndís'tii saⁿā s'eeⁿ yeⁿe yāāⁿ Efeso, ¿du'u saⁿā chí nguéé deenu sa chí 'iⁿyāⁿ yeⁿe yāāⁿ Efeso diiⁿ yā cuidado yaācū yeⁿe táⁿā ch'ēte n'dai chí imagen Diana ní imagen yeⁿē tá chí ndaā yeⁿe nanguuvi? ³⁶Deenu yú chuū chí mar 'áamá 'iⁿyāⁿ nguéé cuuvi caaⁿmáⁿ yā contra yeⁿe chuū. Ndís'tii canéé chí

'cuetinéé 'dífn nī ní inadacadiinúúⁿ nī. Ní nguée dífn nī de'ē vee. ³⁷Naatí candée nī saⁿā s'eeⁿ ti nguée dífn duucú sá 'áamá cosa yeⁿē yáacū ndíí nguée ndúú ngaⁿa rá yā chi nguēe n'daaca lado yeⁿe imagen dendyuūs n'daataá yeⁿe yú.

³⁸Nduuti chi Demetrio miiⁿ ndúúcū tanáⁿā 'iⁿyāⁿ chi dífn yā ntiiⁿnyuⁿ miiⁿ vée vaadi 'caa'va ndúúcu sa o dendú'ū contra 'áamá 'iⁿyāⁿ, tuu'mi ní, candée yā saⁿā vaacuyāāⁿ ní vée saⁿa 'iⁿntyéⁿē. Mífn ní cuuvi caaⁿmaⁿ 'áamá yā táámá yā.

³⁹Ndúúti chi ngiicá nī yeⁿē táámá naaⁿ dendu'ū 'iⁿntyéⁿē s'eeⁿ cuuví cāāⁿmaⁿ yā chée chí cuaacu. ⁴⁰Tí cáándá yeⁿe yú chi caaca nuuⁿndí yā yeⁿe yú ní cadiinúúⁿ yā yeⁿē chí 'caí yú 'maaⁿ. Nguée mar 'áamá nduudu chi caaⁿmaⁿ yú yeⁿē chuū.

⁴¹Taachí caⁿá yā chuū ní dífn yā despedir nducyaaca yā.

Pablo cueⁿé yā yáⁿā Macedonia ndúúcū yáⁿā Grecia

20 Taachí canee 'dífn 'iⁿyāⁿ, yaa'vi Pablo miiⁿ 'iⁿyāⁿ s'eeⁿ chi i'téenu yā Cristo. Ní taachí Pablo ca'a sa consejo 'iⁿyāⁿ s'eeⁿ ní 'cuetinéé n'daāca yā ndúúcū Dendyuūs miiⁿ. Ní dífn sa despedir yeⁿē yā ní tu'maⁿá sá 'iⁿyāⁿ s'eeⁿ. Tuu'mí candáa sa ní cueⁿē sa yáⁿā Macedonia. ²Cuayiivi mífn cheⁿe ntúuⁿ sa yāā s'eeⁿ chi chí'cueeⁿ taavi sa 'iⁿyāⁿ yeⁿe ndúúdú yeⁿe Dendyuūs miiⁿ ní ndaā sa yáⁿā Grecia. ³Cuayiivi taachi 'āā cānee sa 'iⁿnuⁿ 'iⁿyū miiⁿ ní cuayiivi taachí nadacadiinuuⁿ sa chí 'iⁿyāⁿ Israel s'eeⁿ chi dífn n'gíinu yā ndúúcu sa hora chí neⁿe sa tucáa

sa sndáa sa na barco miiⁿ na yáⁿā Siria, tuu'mi ní nadacadiinuuⁿ sa chuū chí cho'o ntúuⁿ sa na yáⁿā Macedonia. ⁴Ní sáⁿā s'ūuⁿ cheⁿe sá ndúúcū Pablo ndii yáⁿā Asia. Sáⁿā s'uuⁿ ní Sópater yeⁿe yāāⁿ Berea, ndúúcū Aristarco ní saⁿā chí nguuví Segundo saⁿā s'eeⁿ yeⁿē yāāⁿ Tesalónica, ndúúcū saⁿā chí nguuví Gayo yeⁿe yāāⁿ Derbe, ndúúcū Timoteo, ndúúcū saⁿā s'eeⁿ yeⁿe yáⁿā Asia chí sáⁿā Tíquico ndúúcū sáⁿā Trófimo. ⁵'iⁿyāⁿ s'eeⁿ née candáa naaⁿ yā ní canée ngíinu yā nús'uuⁿ na yāāⁿ Troas chí niiⁿnuúⁿ nuūⁿnīⁿyáⁿā. ⁶Taachi 'aa chó'oo nguuví yeⁿē pan chí nguée levadura, tuu'mi cueⁿé 'nū na barco yeⁿē yāāⁿ Filipos. Cho'oo nyuⁿu nguuví ní ndaā 'nū ní nduuvidaamá 'nū ndúúcū 'iⁿyāⁿ s'eeⁿ yeⁿē na yāāⁿ Troas. Ní ch'etinéé 'nū ndēēchē nguuví miiⁿ.

Pablo na yaāⁿ Troas

⁷Nguuví domingo vmnáāⁿ vmnaaⁿ yeⁿē ndaata miiⁿ nduuvidaamá 'iⁿyāⁿ s'eeⁿ chí i'téenu yā Cristo chí n'dée yā pan. Pablo miiⁿ ní ngi'cueeⁿ sa 'iⁿyāⁿ. Canée chí candáa sa nguuví chí cuchii. Ní chí'cueeⁿ sa taanduú ndíí maⁿa yaaⁿ. ⁸Ní na cuarto yáacū naachi nduuvidaama yā néénē n'deēe lámparas vee. ⁹Náa tiempo caⁿa Pablo miiⁿ ní 'áamá saⁿa 'dífn chí nguuví sá Eutico chí vée sá na ventana, cyaadú n'dai sa. Saⁿā miiⁿ chin'dáa sa ndiichí ndii 'iⁿnuⁿ piso. Taachí nadacuéⁿ yā saⁿā miiⁿ ní 'āā n'dii sa. ¹⁰Tuu'mi ní nangua'āi Pablo miiⁿ ni tu'maⁿá yā saⁿā ní can'nuu yā saⁿā. Ní caⁿa Pablo chí yā saⁿā s'uuⁿ: Nguée 'vaá

nī. Canduuchi ntúuⁿ staava ye^{n'e}
sa taama vmné^{n'e}. ¹¹Ch'iinu maáⁿ
ní Pablo cuindáá tuuⁿ yā cuaaⁿ
'niiⁿnuúⁿ. Ní n'dee yā pan. Ní che'é
yā ndúúcu yā chi candíi yā ch'icueeⁿ
ntúuⁿ yā nuuⁿmaⁿ yaaⁿ ndii
chideeve. Nícu cuē^{n'e} yā. ¹²Candée
yā sa^{n'a} 'díiⁿ miiⁿ ní candúúchi
sa. Ní yéénú n'dai yā ndúúcu
'viich'etíínūuⁿ ch'ete.

**Cue^{n'e} yā ye^{n'e} yáaⁿ Troas
ndii yáaⁿ Mileto**

¹³Nús'uū ní candáá naaⁿ 'nū ní
cue^{n'e} 'nū na barco na yáaⁿ Asón
chi ndaacá 'nū Pablo yáaⁿ miiⁿ.
Pablo miiⁿ 'āā ne^{n'e} sa chí caaca
sa na yá^{n'a}. ¹⁴Taachí Pablo
nduuvidaama sa nduucú 'nū na
yáaⁿ Asón miiⁿ, ní cue^{n'e} 'nū na
barco miiⁿ, ní ndaá 'nū na yáaⁿ
Mitilene. ¹⁵Cue^{n'e} 'nū na barco miiⁿ
ní chideeve táamá nguuví ndaa 'nū
niiⁿnuúⁿ na isla Quío. Ní chideeve
táamá nguuví chi ndaa 'nū isla
Samos. Ní cue^{n'e} 'nū ndaa 'nū na
yáaⁿ Trogilio. Ch'etineeⁿ 'nū nguiinū
miiⁿ. Chideeve táamá nguuví cue^{n'e}
'nū na barco ní ndaa 'nū yáaⁿ Mileto.
¹⁶Pablo miiⁿ nacadínuuⁿ sa chi
chó'o sa yá^{n'a} Asia. Canée chi
cacyiinu sa chi cunee ngiinu sa
nguuví ye^{n'e} Pentecostés chi 'viicu
ye^{n'e} cosecha na yáaⁿ Jerusalén
ndúúti chi cuūvi.

**Pablo nga^{n'a} sa nduudu cuaacu ní diiⁿ
sa despedir 'iiⁿyāⁿ ye^{n'e} yáaⁿ Mileto**

¹⁷Pablo dichó'o sa 'iiⁿyāⁿ ye^{n'e} yáaⁿ
Mileto ndii yáaⁿ Efeso chi 'cái yā
'iiⁿyāⁿ ndiicúu chi nga^{n'a} ntiiⁿnyuⁿ
ye^{n'e} yaācū. ¹⁸Taachí ndaa 'iiⁿyāⁿ
s'eeⁿ nanááⁿ Pablo, ca^{n'a} sá chii

sa 'iiⁿyāⁿ s'eeⁿ. Ndís'tii deenú ní ti
ndii nguuví vmnáaⁿ vmnaaⁿ chi
ndaá yá^{n'a} Asia táácā diiⁿ ní canee
nduucú ní tanducue^{n'e} tiempo.
¹⁹Diíⁿ ntiiⁿnyuⁿ ye^{n'e} Señor ndúúcu
vaadi ndiicúuⁿ taavi. Ch'eenú chii
taanduvéé chi nguéé n'daacā chi diiⁿ
'iiⁿyāⁿ Israel s'eeⁿ nduucú. Ch'ecú
nícu tun'daa nuūⁿnīⁿ nduutinaáⁿ.
²⁰Ní 'áamá nga^{n'a} tanducue^{n'e}
dendú'u chi n'daacā ye^{n'e} nī. Ní
ch'icueeⁿ nanááⁿ nducyaacá 'iiⁿyāⁿ
nduu va'ai nduu va'āi. ²¹Ni ca^{n'a}
nduudu cuaacu 'iiⁿyāⁿ Israel s'eeⁿ
ndúúcu 'iiⁿyāⁿ s'eeⁿ chi nguéé ye^{n'e}
ndaata Israel ye^{n'e} chi ndaacādaamí
yā ye^{n'e} nducue^{n'e} nuuⁿndi ye^{n'e}
yā nanááⁿ Dendyuūs. Ní cu'téenu
yā ye^{n'e} Señor Jesucristo ye^{n'e} yú.
²²Maaⁿ ní cun'diichi nī. Canée chi
diiⁿ cucaava espíritu ye^{n'e}. Ca^{n'a}
na yáaⁿ Jerusalén ní nguéé deenú
de'e 'cueēnú miiⁿ. ²³Maaⁿ deenú
chi Espíritu N'dai ye^{n'e} Ndyuūs
miiⁿ nga^{n'a} yā ngii yā 'úu na
nducyáácā yáaⁿ chi ca^{n'a} cunee
ngíínú chi 'cueēnú cuuví ní ca^{n'a}
vácū. ²⁴Naati mar 'áamá naaⁿ
nguéé idiíⁿ cuenta ndii nguéé ndúú
ya'ái 'úu vida ye^{n'e} maáⁿ. Canee
ngiínú chi di'cuiinū ntiiⁿnyuⁿ ye^{n'e},
ntiiⁿnyuⁿ chi teē Señor Jesús 'úu
chi caaⁿmaⁿ nduudu cuaacu ye^{n'e}
yā ye^{n'e} evangelio chí ndúúdu ngai
ndúúcu vaadi yeenú. Nduūdū miiⁿ
ye^{n'e} favor ch'ete ye^{n'e} Dendyuūs.
²⁵Maaⁿ ní 'caandiveeⁿ nī. 'Úu ní
deenú ti mar 'áamá ndís'tii nguaaⁿ
'iiⁿyāⁿ naachí chó'o ní ca^{n'a} ye^{n'e}
chi Dendyuūs nga^{n'a} yā ntiiⁿnyuⁿ
mar 'áamá nī 'aa ntéé n'diichí nī
naáⁿ. ²⁶Tanducue^{n'e} chuū nga^{n'a}
ngíi ndís'tii maaⁿnguuví caati 'úu

nguée canee chi dífⁿ responder yeⁿē mar 'áamá nī yeⁿē tanducuéⁿē vida yeⁿē tanducuéⁿē 'iⁿyāⁿ. ²⁷Nguée cheeⁿdiitú ti caⁿá tanducuéⁿē consejo yeⁿe Dendyuūs ndúúcū ndís'tiī. ²⁸Tuu'mi ní cundee nī cuidado yeⁿē maáⁿ nī ndúúcū nducyáácá 'iⁿyāⁿ chi i'téenu yā ti Espíritu N'dai yeⁿe Ndyuūs chi'neéⁿ yā ndís'tiī cáávā chi cuuvi diiⁿ nī cuidado yeⁿe 'iⁿyāⁿ chi i'téenu Señor, 'iⁿyāⁿ chi caⁿá yā yaacū yeⁿe Señor. Señor miiⁿ ní cai yā 'iⁿyāⁿ ndúúcū yuuúⁿ yeⁿē maáⁿ yā. ²⁹Úú ní deenú chi cuayiivi taachí 'āā ntéé canduuchí ní ndaa 'iⁿyāⁿ tan'dúúcā lobos nguaaⁿ ndís'tiī ní dífⁿ yā chi nguée diiⁿ n'daāca nī ndúúcū tanducuéⁿē 'iⁿyāⁿ.

³⁰Nguaaⁿ ndís'tiī nūuⁿ nacueeⁿ sáⁿā s'eeⁿ chi ngaⁿa nduudu chi nguée n'daāca chi cuuvi candéé sa 'iⁿyāⁿ s'eeⁿ chí i'téenu yā Cristo ndúúcū sa.

³¹Cáávā chuū cuin'diichi n'daaca nī. N'gáácū nī ti chēeti 'iⁿnūⁿ nduuyū ndii nguuvi ndii n'gaaⁿ nguée chi'neéⁿ naáⁿ caⁿá ndúúcū nuūⁿnīⁿ nduutinaáⁿ 'áámá 'áámá ndís'tiī.

³²Maaⁿ ní ndís'tiī hermanos, i'neéⁿ ndis'tiī yeⁿe Dendyuūs ndúúcū nduudu yeⁿē favor ch'etete taavi yeⁿé yā. Nduudu miiⁿ diitu ch'eteté chi 'cuiitá ndis'tiī ní teē ndís'tiī 'áámá cosa chi véé chi cuuví yeⁿe nī ndúúcū nducyaaca 'iⁿyāⁿ chi Dendyuūs didēvé yā. ³³Nguée dífⁿ ngueēē ndíf nguée tuumi 'dífⁿngueē ndíf nguée ndúú tuumi 'dífⁿnguāaⁿ ndíf nguée ndúú catecai 'iⁿyāⁿ.

³⁴Ndís'tiī ní deenú nī chi ta'á dichíí'vē 'úú ndúúcū 'iⁿyāⁿ chi snéé nduucú yeⁿē nducuéⁿē chi neⁿé 'nū. ³⁵Tanducuéⁿē chuū chi'cueéⁿ

ndís'tiī chi diiⁿ yú ntiīⁿnyuⁿ 'túúcā. Canee chi cuuvi cunnee yú 'iⁿyāⁿ chí ngi'vaachí. Ní nn'gaacu yú nduudu yeⁿē Señor Jesús miiⁿ chí caⁿa yā: N'dai taavi ca chi ca'a yú nguée ti chí cuta'ā yú.

³⁶Taachi caⁿa yā chuū chiintii'yā yā ní caⁿ'angua'á yā ndúúcū nducyaaca 'iⁿyāⁿ s'uúⁿ. ³⁷Tuu'mi ní nducyaaca yā chēecu taavi yā ní tú'maⁿ'á yā Pablo, maaⁿ ní 'neeⁿ cheendi yā 'iⁿyāⁿ. ³⁸Neéne ya'ai taavi yā cáávā nduudu chi caⁿ'ā Pablo miiⁿ chí 'āā ntéé nanguēcuneeⁿ n'diichi nī naáⁿ. Ní cueⁿe yā canguu yúúⁿ yā saⁿ'ā ndii na barco.

Pablo cueⁿe sa na yáāⁿ Jerusalén

21 Cuayiivi chi n'daā cá 'nū yeⁿē 'iⁿyāⁿ s'eeⁿ, cueⁿe 'nū na barco ní cueⁿe 'nū yúúⁿí cuaacu ní ndaá 'nū na isla Cos. Chidēeve táámá nguuvi cueⁿe 'nū na barco ní cho'ó 'nū na isla Rodas ní ndii yeⁿē isla miiⁿ ndaá 'nū na yaāⁿ Pátara. ²Ní ndaaca 'nū 'áámá barco chi caⁿa na yáⁿ'āa Fenicia, cuch'éé 'nū cueⁿé 'nū na barco. ³Ní n'diichí 'nū isla Chipre chi snee lado tá 'cueēē. Ní cueⁿé 'nū na yáⁿ'āa Siria, ní ndii miiⁿ ndaá 'nū na yaāⁿ Tiro ti barco miiⁿ míⁿ cu'neenⁿ carga yeⁿē. ⁴Nndaacá 'nū 'iⁿyāⁿ s'eeⁿ chi i'téenu Cristo ní canéé 'nū miiⁿ ndēēchē nguuvi. 'iⁿyāⁿ s'eeⁿ ní ngaⁿa yā ngii yā Pablo miiⁿ cáávā Espíritu N'dai yeⁿe Ndyuūs chi nguée caⁿ'a sa yáāⁿ Jerusalén. ⁵Taachi snuūⁿ ca'a nguuvi miiⁿ nan'dáa 'nū nducyaaca 'iⁿyāⁿ ndaá yā chi cunee ngínú yā nús'uu ndúúcū n'daataá yeⁿe yā ndúúcū

daiya yā ndii 'áámá lado yeⁿē yāāⁿ. Ní nducyaaca yā chiintii'yā yā na 'diituú nuūⁿnīⁿyāⁿā. ⁶Ní tu'maⁿa 'nū hermanos 'áámá 'nū taama 'nū ní cueⁿé 'nū na barco. Ní 'iiⁿyāⁿ s'eeⁿ ní cunaⁿa yā na vaacu yā.

⁷Nús'uū ní ch'iinu cheⁿé 'nū na barco. Cueⁿé 'nū yeⁿē yāāⁿ Tiro ní ndáa 'nū yāāⁿ Tolemaida. Ní taachí yaa'vi hermanos nús'uu ch'etineeⁿ 'nū ndúúcu yā 'áámá nguuví. ⁸Chidéeve táámá nguuví miⁿ ni Pablo ndúúcu nús'uu chi snéeⁿ 'nū ndúúcu sa, can'dáa 'nū. Cueⁿé 'nū na yāāⁿ Cesarea. Ní sndāa 'nū va'āi yeⁿe Felipe chí ngaⁿa sa evangelio chi ndúúdu ngai yeⁿe Jesucristo. Felipe miⁿ 'áámá saⁿā naachi ndeēchē diáconos. Ní canéeⁿ 'nū ndúúcu sa. ⁹Saⁿā miⁿ cuūuⁿ n'daataa 'ngáiyāa daiya sa chi ngaⁿā tá chi Ndyuūs yaa'ví yā. ¹⁰Ch'etineeⁿ 'nū ndee nguuví. Cuchééⁿ 'áámá saⁿā profeta chi caaⁿmaⁿ chi cuchí chí yeⁿe yáⁿāa Judea. Saⁿā miⁿ nguuví sa Agabo. ¹¹Saⁿā miⁿ ní n'diichi sá nús'uū. Sta'a sá cinta yeⁿē Pablo miⁿ ní ca'ā chiichi sá ca'a Pablo ndúúcu ta'á yā. Ní caⁿā sá: Chuū ngaⁿa Espíritu N'dai yeⁿe Ndyuūs: 'Tífcā 'iiⁿyāⁿ Israel s'eeⁿ yeⁿe yāāⁿ Jerusalén ca'ā chiichí yā saⁿa yeⁿe cinta 'cūū. Ní nca'á yā sa'ā ta'a 'iiⁿyāⁿ s'eeⁿ chi nguéeⁿ yeⁿē ndaata Israel.

¹²Taachí ch'iindiveéⁿ 'nū ndúúcu 'iiⁿyāⁿ yāāⁿ miⁿ nducyáácá 'nū chiica 'nū Pablo miⁿ chi nguéeⁿ cáⁿa sa yāāⁿ Jerusalén. ¹³Tuu'mi ní Pablo miⁿ nan'gueécútaⁿā sa: ¿De'ē cúúví chí ngeécú ndís'tii ní néené i'neeⁿ ya'ai nī staāvā yeⁿé? Ti 'úú ní nguéeⁿ dámaāⁿ chi 'caachiichí yā 'úú caati

canéeⁿ chi 'cuuví na yāāⁿ Jerusalén cucáāvā Jesús miⁿ.

¹⁴Nguéeⁿ cuuvi di'cuítu 'nū 'iiⁿyāⁿ chí cu'neeⁿ 'nū 'iiⁿyāⁿ ní ngaⁿā 'nū: Cuuví tan'dúúca chí neⁿe Señor.

¹⁵Cho'oo nguúví miⁿ cúcheeⁿ 'nū na yāāⁿ Jerusalén ndúúcu dendu'u yeⁿé 'nū. ¹⁶Ní ndaa ntúuⁿ yā ndúúcu nús'uu náⁿa yā chí i'téenu Jesucristo yeⁿe yāāⁿ Cesarea. Ní 'iiⁿyāⁿ s'eeⁿ ndée yā nús'uu na vaacu 'áámá saⁿā chí nguuví Mnasón chí yeⁿe isla Chipre. Saⁿā miⁿ i'teenú sa cuaaⁿ vmnaaⁿ ní nús'uu ch'etineeⁿ 'nū ndúúcu sa.

Sta'á yā Pablo na yaacū templo

¹⁷Taachí ndaá 'nū na yāāⁿ Jerusalén, hermanos yeenú taavi yā taachi sndaa 'nū. ¹⁸Chidéeve táámá nguuví Pablo miⁿ cueⁿe sa ndúúcu 'nū ní snaáⁿ 'nū Jacobo ndúúcu nducyáácá 'iiⁿyāⁿ ndiicúú s'eeⁿ chí 'āā nduuvidaama yā. ¹⁹Taachi diiⁿ sa saluda 'iiⁿyāⁿ s'eeⁿ, Pablo caⁿa sá chí sa 'iiⁿyāⁿ ca'áámá ca'áámá nducuéⁿē dendu'u chí Dendyuūs diⁿ yā nguaaⁿ 'iiⁿyāⁿ s'eeⁿ chí nguéeⁿ yeⁿē ndaata Israel caavā ntiiⁿnyúⁿ yā. ²⁰Taachí 'iiⁿyāⁿ s'eeⁿ ch'iindiveéⁿ yā chuū, s'téenu yā Dendyuūs ní caⁿa yā chí yā saⁿā: 'Caandiveéⁿ nī, hermanos. Véé cá 'iiⁿyāⁿ Israel s'eeⁿ chí s'téenu yā tan'duucā 'yaaⁿ millares. Ní nducyaaca yā ní neené chi'téenu yā ley yeⁿe Moisés. ²¹Naati 'āā caⁿa yā chí yā 'iiⁿyāⁿ s'eeⁿ yeⁿē ndís'tii chí ndís'tii ca'cuéeⁿ nī nducyaaca 'iiⁿyāⁿ Israel s'eeⁿ chí snée yā nguaaⁿ 'iiⁿyāⁿ s'eeⁿ chí nguéeⁿ yeⁿē 'iiⁿyāⁿ Israel. Ca'cueéⁿ nī chí 'iiⁿyāⁿ Israel s'eeⁿ nguéeⁿ cánée chí

diíⁿ yā chí ngaⁿa ley yeⁿē Moisés ndíí nguée diíⁿ yā circuncidar daiya yā, ndíí nguée ndúú diíⁿ yā costumbres yeⁿe Moisés. ²²¿Dé'e chíi tuu'mí? Neené n'deeé 'iiⁿ'yāⁿ caⁿá yā ní nduuvíáámá yā taachi ch'iindiveéⁿ yā chí ndaá nī. ²³Diíⁿ dí chuū chí ngaⁿa 'nū ndúúcu dii: Véé cuūuⁿ saⁿā nguaaⁿ nús'uū chí véé compromiso yeⁿe sa ndúúcu Dendyuūs. ²⁴Candée di saⁿā s'eeⁿ. Tan'dúúca costumbre yeⁿe religión yeⁿē di, nínduuví dēevé di ndúúcu yā yeⁿe nducuéⁿē. Niicu cuayiivi nadí'íve di saⁿā chí cuū tiiⁿ sa. Ní nducyáácá 'iiⁿ'yāⁿ tuumícadíinúúⁿ yā ti nguée dē'ē vee chí caⁿá yā cucaavā yeⁿē di. Ní tuumícadíinúúⁿ yā chí ngíicá cuaacu di ní chí diiⁿ di chí ngaⁿa ley. ²⁵Naati 'iiⁿ'yāⁿ s'eeⁿ chí nguée yeⁿe ndaata Israel chí i'téenu yā nguée canée chí diíⁿ yā chuū. Nús'uū ní idingúuⁿ 'nū chí nguée du'ū chí canée chí diiⁿ chuū. Dámaāⁿ chí nguée cuta'á yā yuute yeⁿē 'iiti chí 'caaⁿ'núⁿ yā caavā ídolos, ndíí nguée ndúú yuuúⁿ yeⁿē tī, ndíí nguée ndúú yuuúⁿ yeⁿe 'iiti chí nduuchi diiⁿ yā daandu tī. Ní nguée cánée chí cunée sa ndúúcu 'áámá n'daatāa chí nguée n'daataá yeⁿē sa.

²⁶Tuu'mi ní Pablo miiⁿ nícandée sa 'iis'uūⁿ. Ní chidēve táámá nguuvi tan'dúúca costumbre yeⁿē yā Pablo 'āā nididēevé sa maaⁿ sa ndúúcu saⁿā s'eeⁿ. Ní sndáa yā yaacū templo chí caaⁿ'máⁿ yā chí cúúnú ca'ā nguuvi yeⁿē compromiso yeⁿē yā, chí cánée chí ca'a yā 'áámá 'aama yā ofrenda yeⁿē yā.

²⁷Taachi cánée chí cúúnú ca'ā chí ndēēchē nguuvi, taachí 'iiⁿ'yāⁿ

Israel yeⁿē yáⁿāa Asia n'diichí yā Pablo cheeti yaacū templo n'gaā'vá yā ndúúcu sa. Ní diíⁿ yā chí nduuvi taáⁿ yā nducyaaca yā. Ní sta'á yā Pablo. ²⁸N'gai yiicú yā: Ndis'tii saⁿā Israel, cúnnee nī. Sáⁿa 'cūū chí nduu cuaaⁿ ngi'cueeⁿ sa nducyaaca 'iiⁿ'yāⁿ contra yāāⁿ miiⁿ ndúúcu yeⁿē contra yeⁿe ley ndúúcu yeⁿē contra yeⁿe lugar 'cūū. N'dēee ca nguée ti chuū. Ní candēe sa 'iiⁿ'yāⁿ chí nguée yeⁿe ndaata Israel cheeti yaacū templo. Ní divaatí sa yaacū templo chí dēevē.

²⁹Tii cuááⁿ vmnaaⁿ ní náⁿā 'iiⁿ'yāⁿ n'diichí yā ndúúcu sa sáⁿā chí nguuvi Trófimo yeⁿē yāāⁿ Efeso. Ní nadacádínuuⁿ yā chí Pablo miiⁿ nicandée sa saⁿā cheeti yaacū templo. ³⁰Nducyáácá 'iiⁿ'yāⁿ miiⁿ n'gēcú cheendí yā ní chí 'i dāanā yeⁿē yā. Ní din'gíínu yā ní sta'á yā Pablo miiⁿ ní tun'dāa yā saⁿa cheeti yaacū templo. Ní hora mífⁿ nūuⁿ n'gaadí yā cheendi va'ai yāacū templo. ³¹Ní diiⁿ nú yíinu yā chí 'caaⁿ'nuⁿ yā Pablo. Áámá yā caⁿa yā yeⁿē comandante, chí nducyáácá 'iiⁿ'yāⁿ yāāⁿ Jerusalén nguē 'diiiⁿ snée yā. ³²Tuu'mí nūuⁿ comandante sta'á yā soldado s'eeⁿ ndúúcu capitán ní chéenu yā 'iiⁿ'yāⁿ s'eeⁿ naachi canée Pablo miiⁿ. Taachí nducyaaca yā n'diichí yā comandante ndúúcu soldado s'eeⁿ tuu'mi s'neeⁿnaaⁿ yā chí n'geⁿé yā Pablo miiⁿ. ³³Taachí ndaā comandante tuu'mi ní sta'á yā Pablo ní caⁿá yā orden chí chē chíichí sá ndúúcu 'uuvi cadenas. Ní comandante tiinguuneéⁿ yā: ¿Du'u rá saⁿā miiⁿ ní dē'ē vee miiⁿ ní dē'ē idiíⁿ sa? ³⁴Naachi n'dee n'dai

'iiⁿyāⁿ, náⁿa yā ní n'gaí yā 'aama naaⁿ, náⁿa yā n'gaí yā taama naaⁿ, ní 'iiⁿyāⁿ s'eeⁿ nguée itumicádiinúúⁿ yā yeⁿē sa chi tátii n'gaí yā. Ca'á yā orden chi cho'ó yā saⁿā na vácūū naachi sneé soldado s'eeⁿ. ³⁵Taachi Pablo miiⁿ cúchee sa nandēē, candēē yā yaacū soldado s'eeⁿ saⁿa cáávā chi taāⁿ 'iiⁿyāⁿ s'eeⁿ ndúúcu sa. ³⁶Ti n'dēē n'dái 'iiⁿyāⁿ yeⁿe yaāⁿ miiⁿ cueⁿe yā cuaaⁿ dáámí saⁿā miiⁿ ní n'gaí yā: 'Cuuvi sa.

**Pablo ngaⁿa sa yeⁿē maaⁿ
sa na yāāⁿ Jerusalén**

³⁷Taachí tuc'á yā diiⁿyú yā na vácūū tuuⁿmi ní Pablo miiⁿ ngaⁿa sa ngii sa comandante: ¿Áá 'cuááⁿ nī chi caaⁿmáⁿ 'tēē ndúúcu n'dii? Ní comandante caⁿā sa: ¿Áá déénú dí davaacu griego? ³⁸¿Áá nguée dí saⁿā yeⁿe yāⁿāa Egipto chi diiⁿ di chí nduuví taáⁿ yā 'iiⁿyāⁿ vmnaaⁿ yeⁿe nguuví miiⁿ ní tun'dáa di cuūū mil 'iiⁿyāⁿ chi duucu na yáⁿāa cuuⁿmáⁿ?

³⁹Tuuⁿmi ní caⁿā Pablo: 'Úú ní saⁿā Israel yeⁿē yāāⁿ Tarso, saⁿā yeⁿē áámá yāāⁿ ch'ēetē yeⁿe yāⁿāa Cilicia. Ngicá nanáaⁿ nī, 'cuaaⁿ nī chi yaaⁿví 'iiⁿyāⁿ.

⁴⁰Taachí saⁿā miiⁿ ca'a sa lugar, Pablo miiⁿ chééndii sa nāndēē ní ca'a sa señal 'iiⁿyāⁿ ndúúcu ta'á sa, ní taachí 'diiiⁿ ní caⁿa sa ndúúcu davaacu hebreo. Ní caⁿa sa:

22 Ndís'tii saⁿā ní ndís'tii vi'í ndúúcu 'iiⁿyāⁿ ndicúū, 'caandiveéⁿ nī chi ngaⁿa yeⁿē maáⁿ nanáaⁿ ndis'tii.

²Taachí ch'iindiveéⁿ yā chi ngaⁿā sa davaacu hebreo, ch'ēetinéé 'diiiⁿ cá yā. Pablo miiⁿ ní caⁿā sa:

³Cuaacu níⁿnyúⁿ saⁿā Israel 'úú. Ch'iindiyaáⁿ na yāāⁿ Tarso yeⁿē yáⁿāa Cilicia, naatí ch'iitá na yaáⁿ 'cūū. Ch'ēēⁿ ndúúcu maestro Gamaliel miiⁿ. Tan'dúúca chi ngaⁿā na ley yeⁿē chiida yú. 'Úú chí díⁿ ndúúcu núúⁿmáⁿ staava yeⁿē tan'dúúca chi maaⁿ nducyaaca nī díⁿ nī ndúúcu Dendyuūs. ⁴'Iiⁿyāⁿ chí cuéⁿē Yúúní 'cūū 'úú can'daá 'iiⁿyāⁿ miiⁿ. Ní sta'á ndii n'daataá ndíⁿ saⁿā ní nca'á 'iiⁿyāⁿ chí cuētinúúⁿ yā vácūū chí 'cuūvi yā. ⁵'Tiicá ntúūⁿ chiiduú ch'ēetē cá yeⁿe Israel miiⁿ testigo yeⁿē ndúúcu nducyaaca 'iiⁿyāⁿ ndiicúū. 'Tiicá ntúūⁿ 'úú sta'á carta ndúúcu orden chí 'cuuⁿmíⁿ 'iiⁿyāⁿ s'eeⁿ ní cueⁿē naachi snéé hermanos. Ní cueⁿē yāāⁿ Damasco ní cueⁿē chí candēé presos hermano s'eeⁿ ndii yāāⁿ Jerusalén. 'Tiicá ntúūⁿ 'iiⁿyāⁿ chí sneé yā miiⁿ ní cuuví yā castigados.

Pablo ngaⁿa yā taacā i'teenú yā
(Hch. 9.1-19; 26.12-18)

⁶Naatí chiī taachi yúúní canuúⁿ, ndaá niiⁿnuúⁿ yāāⁿ Damasco tan'dúúca maⁿa nguuví dáácanaāⁿ nndaā áámá dēēve yeⁿē nanguuvi naachi 'úú caneé. ⁷Ní sndēēvé ná yāⁿāa. Ní ch'iindiveéⁿ áámá nduudu chí ngaⁿa ngii 'úú: Saulo, Saulo, ¿dēē cúú chí nn'daā di 'úú chí nééné ya'ai 'úú? ⁸Tuuⁿmi nan'guēcutaⁿá: ¿Du'ú n'dii, Señor? Ní caⁿa yā chiī yā 'úú: 'Úú Jesús yeⁿe yāāⁿ Nazaret miiⁿ chí n'daā di 'úú ní nguée neⁿē di n'diichi di 'úú. ⁹'Iiⁿyāⁿ chí snéé nduucú cuaacu níⁿnyúⁿ n'diichi yā dēēve miiⁿ. Ní dii'yá yā chiī. Naati nguée ch'iindiveéⁿ yā nduudu chí ngaⁿa Señor Jesús nduucú. ¹⁰Ní

caⁿá: ¿De'ē díⁿ, Señor? Señor miiⁿ ngaⁿá yā ngī yā 'úú: Nducueeⁿ dí ní cueⁿe di na yāāⁿ Damasco. Miiⁿ cadiinuⁿ di tanducuéⁿē chi canee chi diiⁿ di. ¹¹Úú ní nguéeⁿ inaáⁿ cáávā chí ch'ēdi nduutinaáⁿ yeⁿē vaadi dēve ch'ēte ca chi dēve miiⁿ. 'Iiⁿyāⁿ chi snée yā nduucú candéeⁿ nee yā ta'á ní ndaá yāāⁿ Damasco.

¹²Tuu'mi ni miiⁿ canee 'áámá saⁿā chi nguvi Ananías, saⁿā chi diiⁿ sa tan'dúúcā chi ngaⁿa ley miiⁿ. Ní nguaaⁿ nducyaaca 'iiⁿyāⁿ Israel s'eeⁿ chi snée yā, ngaⁿá yā chi saⁿā miiⁿ n'dai taavi sa. ¹³Ndaá yā nanaáⁿ ní ndaa niiⁿnúⁿ yā ní caⁿa yā: Dii hermano Saulo, nan'guaāⁿ nduutināaⁿ di. Ní hora miiⁿ nūuⁿ n'guaaⁿ nduutinaáⁿ ní snaáⁿ. ¹⁴Saⁿā miiⁿ ní caⁿā sa: Ndyuūs yeⁿē chiida yú ndēve yā dii chí cuuvi déénú dí chí neⁿe yā. Ní cuuvi n'diichí di Jesús chi n'dai taavi. Ní 'caandiveeⁿ di chí ngaⁿa yā. ¹⁵Ti cuuví di caaⁿmaⁿ di nduudu cuaacu yeⁿé yā yeⁿē cosa chi 'aa n'diichi di ndúúcu chi 'aa ch'iindiveeⁿ di nanááⁿ nducyaaca 'iiⁿyāⁿ. ¹⁶Maaⁿ ní ¿de'ē ínee ngiinu di? Cuééndii di ní cuēdinuūⁿníⁿ di ní didēevé di dii yeⁿē nuuⁿndi yeⁿē di. Caaⁿmaⁿngua'a di nanááⁿ Señor Jesús.

Dicho'ó yā Pablo nanaaⁿ 'iiⁿyāⁿ s'eeⁿ chí nguéeⁿ yeⁿē ndaata Israel

¹⁷Túúcā chiī. Taachí nanguēcúndí na yaāⁿ Jerusalén miiⁿ ní taachí caⁿangua'a na yaācū templo n'diichí 'áámá visión, cosa tan'dúúcā chiiⁿ ch'iiⁿnú. ¹⁸Ní n'diichí 'iiⁿyāⁿ ní caⁿá yā chii yā

'úú: Diinú yiiⁿnu di ní cueenu di yeⁿe yāāⁿ Jerusalén, ti nguéeⁿ 'cúaaⁿ yā nduudu cuaacu yeⁿé. ¹⁹Úú ní caⁿá: Señor 'iiⁿyāⁿ s'eeⁿ deenú yā yeⁿē nducyáácá yā chí snúuⁿ yā yaācū sinagoga s'eeⁿ ti 'úú ní ch'íi 'iiⁿyāⁿ vácūú ní ch'eⁿé 'iiⁿyāⁿ chí i'teenú yā n'dii. ²⁰Ní taachi ch'ii Esteban saⁿā chí caⁿa nduudu cuaacu yeⁿé nī, 'úú ntúūⁿ ni canee nanáaⁿ sa. 'Úú ní 'cuúⁿ chí ch'ii sa. Ní nguain'daí cotón yeⁿe 'iiⁿyāⁿ chí ch'iiⁿnūⁿ saⁿā. ²¹Tuu'mi caⁿa Jesús chii yā 'úú: Cuéⁿé dí, ti 'úú idicho'ó dii yá'ái n'dai ndúúcu 'iiⁿyāⁿ s'eeⁿ chí nguéeⁿ yeⁿē ndaata Israel.

Pablo nanááⁿ comandante

²²Ní taachi 'iiⁿyāⁿ s'eeⁿ ch'iindiveeⁿ yā ndii nduudú 'cūú tuu'mi ní caⁿa yuudú yā: Diví di sáⁿa 'cūú na yá'āa ti nguéeⁿ canée chí cunduuchi sa.

²³Taachí 'cai yā ní chíín'cuuⁿ yā catecai yā ní chingée yā iyaācā na 'yúúné, ²⁴comandante chí ngaⁿa ntiiⁿnyuⁿ caⁿā sa chí cu'nuúⁿ yā Pablo vácūú. Ní caⁿā orden chí caⁿá yā tiingúúneeⁿ yā Pablo ní ch'eⁿé yā Pablo, maaⁿ niicu cadíinuⁿ yā de'ē cáávā chí n'gāi yā contra yeⁿē sa. ²⁵Taachí dichiichí yā Pablo ndúúcu yiiⁿmaⁿ, Pablo miiⁿ ní caⁿā sa capitán chí snee yā miiⁿ: ¿Áá canée chí 'cueⁿé nī 'áámá saⁿā romano ndúúti chí nguéeⁿ ndaaca nī nuuⁿndi yeⁿē sa?

²⁶Taachí capitán miiⁿ ch'iindiveeⁿ sa chuū, cueⁿe sa níccú caⁿa sa yeⁿe comandante ní yaa'vi sa: N'diichí nī, ¿de'ē díⁿ nī caati sáⁿa 'cūú ní saⁿā romano sa?

²⁷Ndaa comandante ní caⁿa sa: Cuuvi di 'úú. ¿Áá díⁿ saⁿā romano? Pablo miiⁿ ní caⁿa yā: 'Tíicā.

²⁸Nan'guεεcútaⁿā comandante:
'Úú caí māaⁿ 'úú. N'deēé tuūmī ca'á
ní ndii chíí saⁿā romano 'úú. Tuu'mi
ní Pablo miiⁿ ní caⁿa sa: 'Úú ní
ch'iindiyáaⁿ na yáⁿāa romano 'tíicā.

²⁹Ní cueⁿé yā yeⁿē sa 'iiⁿ'yāⁿ chi
sta'a orden chi 'cueⁿé yā saⁿā.
Taachí comandante tuumicádiinuuⁿ
sa chi saⁿā romano sa, tuu'mi dii'yá
ntúuⁿ sa chií, chi dichiíchí sa Pablo.

Pablo nanááⁿ concilio

³⁰Chideeve táamá nguuvī sáⁿā
miiⁿ neⁿe sa cadíinuuⁿ sa dēē cáávā
chi tun'dáá nuuⁿndi 'iiⁿ'yāⁿ Israel
s'eeⁿ. Divíi yā cadenas yeⁿē Pablo
miiⁿ ní ca'a yā orden chi cho'ó yā
Pablo nanááⁿ chiiduú n'geeté yeⁿe
Israel ndúúcū nducuéⁿē 'iiⁿ'ntyéⁿē
yeⁿe concilio. Ní tun'dáa yā Pablo
miiⁿ. Ní chiⁿi yā saⁿā nanááⁿ 'iiⁿ'yāⁿ
s'eeⁿ.

23 Tuu'mi ní Pablo miiⁿ
ch'íínú cuaacu sa saⁿā s'eeⁿ
yeⁿē concilio. Ní caⁿa sa: Ndís'tií
saⁿā vi'í, Ndyuūs ní n'diichí yā
taanduvéé chi 'úú dííⁿ ní nguéé dííⁿ
'uūvī staava yeⁿé yeⁿe cosa chi dííⁿ.

²Ananías, saⁿā chi chiiduú ch'εete
cá yeⁿe Israel caⁿa yā chií yā 'iiⁿ'yāⁿ
chi canee daama yā ndúúcu sa
chí 'cueⁿe yā cheendi sa. ³Tuu'mi
ní Pablo mífⁿ ní caⁿa sa: Ndyuūs
'cueⁿé yā dii, saⁿā chi tan'dúúcā
'aama cheeti cuéē. ¿Áá diiⁿ di juzgar
'úú tan'dúúcā ley miiⁿ, 'iicu nguéé
idiiⁿ di cumplir chi ngaⁿā ley, nífcú
maaⁿ ní ngaⁿā di chi 'cueⁿé yā 'úú?

⁴'Iiⁿ'yāⁿ chi snée yā nanááⁿ Pablo
caⁿa yā: ¿Áá chiiduú ch'εete ca yeⁿé
Dendyuūs ngaⁿā taaⁿ di ngii di 'tíicā?

⁵Pablo miiⁿ ní caⁿa sa: Ndís'tií vi'í,
'úú ní nguéé deenú chi sáⁿa 'cāa chi

chiiduú ch'εete cá yeⁿe Israel. Naati
cánée nguūⁿ. Nguéé caaⁿmaⁿ taaⁿ di
yeⁿē 'áámá saⁿā ch'εete yeⁿe Israel
yeⁿé 'iiⁿ'yāⁿ yeⁿē di.

⁶Tuu'mi Pablo miiⁿ tuumicádiinuuⁿ
sa chi 'áámá taaⁿ yā yeⁿē 'iiⁿ'yāⁿ
saduceo s'eeⁿ chi nguéé i'téenu yā
chi nanduuchi 'iiⁿ'yāⁿ ní táámá
táaⁿ yā yeⁿē 'iiⁿ'yāⁿ fariseos chi
i'téenu chí nanduuchi 'iiⁿ'yāⁿ. Ní 'cai
yuudu sa nanááⁿ nducyaaca 'iiⁿ'yāⁿ
yeⁿē concilio: Ndís'tií saⁿā vi'í, 'úú
ní saⁿā fariseo 'úú ní daiyá saⁿā
fariseo 'úú. Dííⁿ yā juzgar 'úú yeⁿē
chi canee ngíínú yā chí nadacuéⁿ
yā yeⁿē nguaaⁿ tináⁿā.

⁷Taachí caⁿa yā chuū véé 'uuvī
vaanicadiinūuⁿ yeⁿe saⁿā fariseos
ndúúcū saⁿā saduceos. Ní 'iiⁿ'yāⁿ
s'eeⁿ ní divíi yā 'áámá taaⁿ táámá
taaⁿ. ⁸Caati 'iiⁿ'yāⁿ saduceos ngaⁿā
yā chi nguéé iniduuchi 'iiⁿ'yāⁿ ndii
nguéé nduu ángel ra ndíí nguεe
nduu espíritus. 'Iiⁿ'yāⁿ fariseos
ngaⁿā yā ti véé 'tíicā. ⁹Ní n'dee
n'dái caⁿa yā 'iiⁿ'yāⁿ s'eeⁿ. Ní nacuéⁿ
'iiⁿ'yāⁿ chi déénú taavi ley lado
yeⁿē fariseos ní caⁿa yā chi chuū
chi cuaacu. Ní ngaⁿa yuudu yā:
Nguéé dēē vεε chi nguεe n'daacā
inndaacā 'nū yeⁿe saⁿā miiⁿ. Ndúúti
'áámá espíritu o 'áámá ángel yaa'vi
yā Pablo miiⁿ nguéé n'daacā chi
'cuuⁿmaⁿ yú ndúúcū Dendyuūs.

¹⁰Taachi véé vaadi 'caa'va chi
ch'εete ca tuu'mi ní comandante
'va'á yā chí 'caaⁿnúⁿ yā Pablo. Ní
comandante miiⁿ dicho'ó yā soldado
s'eeⁿ chi cueⁿē sa ní cuta'a sa Pablo
miiⁿ nguaaⁿ 'iiⁿ'yāⁿ s'eeⁿ ní candée
sa Pablo na vácū. ¹¹Táámá nguiinū
miiⁿ ndaā Señor Jesús nanááⁿ yā ní
caⁿa yā: Pablo, nguéé cu'neeⁿ duuva

di. Tan'dúúcā chi ngaⁿa di nduudu cuaacu yeⁿe 'úú na yáāⁿ Jerusalén 'tiicá ntúūⁿ caaⁿ'maⁿ di yeⁿ'ē 'úú na yáāⁿ Roma.

'Iiⁿ'yāⁿ s'eeⁿ díⁿ yā compromiso chí 'caaⁿ'núⁿ yā Pablo

¹²Chideεve táámá nguuví, náⁿā 'iiⁿ'yāⁿ Israel s'eeⁿ nduuvidaamá yā ní díⁿ yā compromiso chí nguéé che'e yā ndí nguéé cu'ú yā neⁿ'e chí 'āā cuéé 'caaⁿ'núⁿ yā Pablo miiⁿ. ¹³Ngo'o 'úúví ngeεcu 'iiⁿ'yāⁿ chí nduuvidaamá yā yeⁿ'e chúú. ¹⁴'Iiⁿ'yāⁿ s'uúⁿ ní cheⁿ'é yā nanááⁿ chiiduú n'geεté yeⁿ'e Israel ndúúcu 'iiⁿ'yāⁿ ndiicúú ní caⁿ'a yā: Nús'uu ní nduuvidaámá 'nū ní díⁿ 'nū compromiso chí díⁿ 'nū sufrir ní nguéé du'ū vε 'nuú 'nū che'ē 'nū taanduvéé ndí 'caaⁿ'núⁿ 'nū Pablo. ¹⁵Maaⁿ ní ndís'ti ndúúcu 'iiⁿ'yāⁿ yeⁿ'e concilio, cavyaaⁿ cáácá yā nanááⁿ comandante chí candée yā Pablo ní chicuú yā nanááⁿ nús'uu. Díⁿ nī tan'dúúcā chí neⁿ'e di tiinguuneeⁿ di cosa chí cuaacu yeⁿ'é yā. Niicu nús'uu, 'aa snéé ngiinú 'nū chí 'caaⁿ'núⁿ 'nū saⁿ'ā taachí ndaa sa.

¹⁶Tuu'mi ní 'áámá saⁿ'ā daiya táⁿā vi'i Pablo, taachí ch'iindiveéⁿ sá chí caⁿ'a yā dε'e chí díⁿ yā, cheⁿ'e sa ní chí ndaa sa chεeti vácúū miiⁿ ní caⁿ'a sa chí sa Pablo miiⁿ. ¹⁷Pablo miiⁿ 'cai sa capitán ní caⁿ'a sa: Candée di saⁿ'ā 'díⁿ 'cūū nanááⁿ comandante ti canéé chí cuuvi sa 'iiⁿ'yāⁿ dε'ē chí deenu sa.

¹⁸Saⁿ'ā miiⁿ sta'a sa saⁿ'ā 'díⁿ ní candée sa saⁿ'ā nanááⁿ comandante ní caⁿ'a sa: Pablo chí canúúⁿ vácúū di'cuíftu sā 'úú chí candée saⁿ'ā 'díⁿ 'cūū nanááⁿ nī. Véé chí déénú sá chí caaⁿ'maⁿ sa ndúúcu nī.

¹⁹Comandante miiⁿ ní sta'á yā ta'ā sa ní cueⁿ'é yā taama lado ndúúcu sa ní ntiinguunéeⁿ yā saⁿ'ā: ¿Dε'ē chí cuuvi di 'úú?

²⁰Ní caⁿ'a sa chí sá 'iiⁿ'yāⁿ: 'Iiⁿ'yāⁿ Israel s'eeⁿ ní chí yā ní caacá yā nanááⁿ nī chí cavyaaⁿ ní candée nī Pablo nanááⁿ 'iiⁿ'yāⁿ yeⁿ'e concilio. 'Iiⁿ'yāⁿ s'eeⁿ nduuvidaamá yā ní itiingúuneeⁿ yā Pablo miiⁿ 'áámá chí cuaacu níⁿ'nyúⁿ yeⁿ'ē sa. ²¹Naati n'dii, nguéé cu'téenu nī. Ngo'ō 'uuví ngeεcu saⁿ'ā s'eeⁿ yeⁿ'e 'iiⁿ'yāⁿ Israel chí 'cuεetinúú n'de'ei yā diituú cyúúní. 'Iiⁿ'yāⁿ s'eeⁿ nduuvidaama yā chí díⁿ yā compromiso ní cadíínuuⁿ yā chí nguéé n'daacā chí nguéé ndúú che'e yā ndí nguéé ndúú cu'u ra yā taanduvéé ndii yā chí 'caaⁿ'núⁿ yā Pablo. Maaⁿ ní listos canee yā ní canee ngíínú yā cáávā chí caaⁿ'máⁿ n'dii.

²²Tuu'mi ní comandante dichó'o sa saⁿ'a 'díⁿ chí nguéé caaⁿ'maⁿ sa cuuvi sa mar 'áámá 'iiⁿ'yāⁿ chí caⁿ'a sa chí sa 'iiⁿ'yāⁿ yeⁿ'ē chúú.

**Dicho'ó yā Pablo nanááⁿ
Félix saⁿ'a gobernador**

²³Comandante miiⁿ 'cai yā na 'uuví capitán. Ní caⁿ'á yā chí yā saⁿ'a soldados chí nduuvidáamá sá taandu n'geεcu nuúⁿ yaaaⁿ na 'uuví ciento soldado s'eeⁿ ndúúcu 'iiⁿ'nūⁿ ngeεcu ndiichí soldados chí sndúúⁿ sa 'yúūdūu ndúúcu 'uuví ciento soldado chí véé lanza yeⁿ'é yā. Ní cho'ó nducyaaca yā yáāⁿ Cesarea. ²⁴Ní cundiyaáⁿ nī 'iiti ti cunduú Pablo ní candée nī saⁿ'ā ndúúcu cuidado nanááⁿ Félix chí gobernador. ²⁵Ní dingúuⁿ sa 'áámá carta ndúúcu nduudú 'cūū:

²⁶Úú Claudio Lisias idinguúⁿ yeⁿé nī Félix saⁿā gobernador chi n'dai taavi: N'dái nī. ²⁷Saⁿa cūū nī sta'a nū saⁿā caava 'iⁿyāⁿ Israel s'eeⁿ chí neⁿe caaⁿnuⁿ yā saⁿā. 'Úú ninguáⁿái saⁿā miiⁿ ndúúcū soldado s'eeⁿ tí deenú chí saⁿā romano saⁿā miiⁿ. ²⁸Ní neⁿé deenú de'ē cáávā tun'dáa yā nuuⁿndi yeⁿé sa. Candéé saⁿā nanááⁿ 'iⁿntyéⁿé yeⁿé concilio yeⁿé yā. ²⁹Ní táácā chí tun'dáa nuuⁿndí yā yeⁿé sa caavā ley yeⁿé yā naati mar 'áámá nuuⁿndi ch'ēete yeⁿé sa chí 'caaⁿnúⁿ yā saⁿā o cunúúⁿ sa vácūū. ³⁰Taachí 'úú chicadiinúúⁿ chi nduuvidaamá yā contra yeⁿé saⁿá 'cūū, hora miiⁿ dicho'ó saⁿā nanááⁿ n'diī. Ní ngaⁿá ngíí saⁿā chí tun'dáa nuuⁿndi yeⁿé sa chí chíi yā nanááⁿ nī. Ní cuuví yā n'diī de'ē chí canée yā ndúúcu sa. N'dáácā canée nī.

³¹Soldado s'eeⁿ sta'á yā Pablo tan'dúúcā chí caⁿa yā chíi yā saⁿā ní nguiinū miiⁿ candée yā saⁿā ná yāāⁿ Antípatris. ³²Chideēve táámá nguuví ní soldado chí sndúū 'yuúdūu cueⁿé yā ndúúcū Pablo ní náⁿa yā nguēecunée yā na va'āi ch'ēete naachi canée vácūū. ³³Taachí ndaá yā 'iⁿyāⁿ s'eeⁿ na yāāⁿ Cesarea, ca'á yā carta gobernador Félix ní dííⁿ yā presentar ntúuⁿ Pablo nanááⁿ gobernador. ³⁴Gobernador miiⁿ ch'eeⁿ yā carta ní tiinguunéeⁿ yā: ¿Tíí yāⁿāa saⁿā? Ní tumicadínuuⁿ yā chí saⁿā ní yeⁿe yāⁿā Cilicia. ³⁵Ní caⁿa yā chíi yā Pablo: Cu'neeⁿ veéⁿ yeⁿé di taachi ndaa sa chí tun'dáa nuuⁿndi yeⁿé di. Ní dicho'ó yā 'áámá saⁿā soldado chí diiⁿ cuidado saⁿā na váácū Herodes naachi diiⁿ juzgar 'iⁿyāⁿ.

Pablo caⁿa sa yeⁿé maaⁿ
sa nanááⁿ Félix

24 Cho'ō nyuⁿu nguuví ní ca'ái chiidúú ch'ēete ca yeⁿe Israel chí nguuví Ananías ndúúcū náⁿa 'iⁿyāⁿ ndiicúū ndúúcū 'áámá saⁿā chí nguuví sa Tértulo. Saⁿā miiⁿ neenē n'dēevé indee sa. 'iⁿyāⁿ s'eeⁿ chíi yā nanááⁿ gobernador ní caaⁿmáⁿ yā contra yeⁿe Pablo miiⁿ. ²Taachí gobernador Félix 'cai yā Pablo miiⁿ tuu'mi ní saⁿā chí nguuví Tértulo caⁿa sa nuuⁿndí yeⁿé Pablo miiⁿ ní caⁿa sa: Déenu nū ti cááva nī, n'diī Félix, véé vaadi yeenú nū ní 'āā nin'guēetinée nū ndúúcū vaadi 'diííⁿ ch'ēete. Néené n'deeé n'dái déndu'ū chí n'dai na yāāⁿ vaacú nū cáávā vaanicadiinúuⁿ n'dái yeⁿé nī. ³N'diī, Félix chí n'dai taavi n'diī, nús'uū ní ch'iindiveéⁿ nū nduudu yeⁿé nī nducuéⁿé tiempo nducuéⁿé cuaaⁿ ní caⁿáⁿ nū Ndyuūs nadíí'vé n'diī cáávā chí dííⁿ nī. ⁴Chí 'āā ntéé tee nū vaadi 'caa'va n'diī 'naaⁿ tiempo ngiicá nanááⁿ n'diī chí n'dai chí 'caandiveeⁿ nī yeⁿe nū ndúúcū vaadi n'dai yeⁿé nī. ⁵Sáⁿa 'cūū néené itee sa vaadi 'caa'vā nús'uū yāāⁿ vaacú nū. Níicú ididáⁿa sa 'iⁿyāⁿ nguaaⁿ nducyáácá 'iⁿyāⁿ Israel s'eeⁿ chí snée yā núúⁿmáⁿ iⁿyeeⁿdi. Ní saⁿā miiⁿ ngaⁿá ntiⁿnyuⁿ sa yeⁿé 'iⁿyāⁿ chí nazarenos chí i'téenu yā Jesús. ⁶Ní neⁿe ntúuⁿ sa divaatí sa yaācū templo. Sta'á nū saⁿā ní neⁿé nū cadíínuuⁿ nū yeⁿé sa tan'dúúcā ley yeⁿé nū. ⁷Comandante yeⁿé 'áámá taaⁿ soldado chí nguuví Lisias ndáa sa naachi snée nū ní sta'a sa Pablo

ndúúcu vaadi diituú yeⁿē sa ní divíi sa Pablo na ta'á 'nū. ⁸Dicho'ó yā saⁿā s'eeⁿ chí tun'dáá nuuⁿndi yeⁿe Pablo chí ndáa sá nanááⁿ n'dií. Maaⁿ ní taachi diíⁿ ní juzgar cadíínuuⁿ ní yeⁿé nducuéⁿē dendu'ú de'ē cáávā chí tun'dáá 'nū nuuⁿndi yeⁿē sa.

⁹Iiⁿ'yāⁿ Israel s'eeⁿ ngaⁿ'á yā chí 'tíicā chí caⁿ'a Tértulo miíⁿ.

¹⁰Tuuⁿ'mi ní ca'a gobernador señal Pablo chí caaⁿ'maⁿ sa. Pablo miíⁿ n'guεcútaⁿ'ā sa: 'Úú deenú ti 'āā nééné 'āā 'naaⁿ canee ní juez yeⁿē nación 'cūū. 'Úú ngaⁿ'á yeⁿē maáⁿ ndúúcu confianza. ¹¹Ti ní deenu ní maaⁿ taandúū ndichúúví nguuvi chí cheé na yāāⁿ Jerusalén chí cuuvi cu'teenú Dendyuūs. ¹²Nguéé ndaāca yā 'úú chí nguⁿ'ú ndúúcu mar 'áámá 'iiⁿ'yāⁿ, ní nguéé dííⁿ chí n'dee n'dái 'iiⁿ'yāⁿ nguε snéé 'dííⁿ yā, ní nguéé ndúú ná yāacū templo miíⁿ, ní nguéé ndúú ná yaācū sinagoga, ní nguéé na yāaⁿ 'cūū.

¹³Ní nguéé cuuví caaⁿ'māⁿ yā chí chuū idiíⁿ. ¹⁴Chuū ngaⁿ'á ngií n'dií. Tan'dúúca chí 'iiⁿ'yāⁿ s'eeⁿ ngaⁿ'á yā chí nguéé cuaacu, 'tíicā 'úú i'teenú Ndyuūs yeⁿē chiidá 'nū s'ééⁿ. Ní 'úú i'teenú tanducuéⁿē dendu'ú chí cánéé nguūⁿ na ley ndúúcu nduudu yeⁿē profetas chí caⁿ'a nduudu yeⁿe Ndyuūs. ¹⁵Véé chí cānee ngiinú 'áámá cosa yeⁿé Dendyuūs tan'dúúca 'iiⁿ'yāⁿ s'eeⁿ canee ngiinu ntúuⁿ yā, chí Dendyuūs nduuchí yā 'iiⁿ'yāⁿ yeⁿe nguaaⁿ tinaⁿ'ā, tan'dúúca 'iiⁿ'yāⁿ chí n'dai taaví ndúúcu 'iiⁿ'yāⁿ chí nguε n'dai taavi. ¹⁶Cáávā chuū cueⁿe daāⁿmaⁿ deenú chí nguéé véé nuuⁿndi na staava yeⁿé nanááⁿ Dendyuūs ndíí nguéé ndúú nanááⁿ 'iiⁿ'yāⁿ.

¹⁷Cho'ó 'áámá na 'uuví nduūyū ndaá ní nga'á limosnas 'iiⁿ'yāⁿ vaácú ní nga'á ofrenda. ¹⁸Cunee na yaācū templo taachi náⁿā 'iiⁿ'yāⁿ Israel s'eeⁿ yeⁿe yáⁿ'āa Asia ndáácá yā 'úú ná yaācū templo ndúúcu compromiso chí nadideevé tan'dúúca costumbre yeⁿē religión yeⁿé. Nguéé dííⁿ ndúúcu n'dee n'dái 'iiⁿ'yāⁿ ní nguéé n'dee n'dái 'caí 'iiⁿ'yāⁿ s'eeⁿ. ¹⁹'Iiⁿ'yāⁿ s'eeⁿ cánéé chí cuuvi yā n'dií ní caaⁿ'maⁿ yā nuuⁿndi yeⁿé, ndúúti véé de'ē chí canee yā nduucú. ²⁰Ní cánéé cúuⁿ'míⁿ yā chí caaⁿ'māⁿ maáⁿ yā ndúúti chí ndaaca yā chí nguéé n'daaca chí dííⁿ taachí canee ndúúcu saⁿ'ā 'iiⁿ'ntyéⁿē concilio s'eeⁿ. ²¹Ndúúti chí chuū chí 'caí yiicú, caⁿ'á yeⁿē chí nduuchí yā yeⁿē nguaaⁿ tináⁿ'ā taachí canee nanaáⁿ 'iiⁿ'yāⁿ s'eeⁿ. Cáávā chuū maaⁿnguuví dííⁿ yā juzgar 'úú.

²²Tuuⁿ'mi ní Félix ch'iindiveeⁿ yā chuū. Déenú cuaacú yā yeⁿē Yúuní cuaacu yeⁿe Ndyuūs ní s'nééⁿ ca yā chí caāⁿ'māⁿ sa ní caⁿ'a yā: Taachí ndaa Lisias miíⁿ chí comandante 'cuiinu tuumicádiinuúⁿ yeⁿē asunto yeⁿe di.

²³Félix cho'ó yā chíi yā capitán chí diíⁿ sa s'neeⁿ sa Pablo preso ní ca'a sa duu'vi libertad yeⁿē sa naati s'néeⁿ sa Pablo arrestado. Ní capitán miíⁿ cuuvi yā Pablo chí cuchíi 'iiⁿ'yāⁿ yeⁿē sa nanááⁿ sa ndúúcu 'iiⁿ'yāⁿ chí dichíí'vε yā yeⁿē sa ní ca'á yā chí neⁿe sa.

²⁴N'duuví nguuví cuayiivi ndaā Félix ndúúcu n'daataá yeⁿé yā chí nguuví Drusila chí ndaataá yeⁿē Israel. 'Caí sa Pablo ní ch'iindiveeⁿ sa yeⁿe vaadi i'teenu

yeⁿē Jesucristo. ²⁵Taachí caⁿa Pablo yeⁿē nduudu cuaacu yeⁿe chi dííⁿ yā chi nguée n'daacā ní yeⁿē juicio chí cuchíi, tuu'mi ní Félix miíⁿ dii'yā sá chii ní caⁿa sa: Cunaⁿa di maaⁿ. Ní taachí véé cuaáⁿ tuu'mi ní 'cuaf díí.

²⁶Félix canee ngíínú yā chuū chi Pablo miíⁿ ní ca'a sa tuūmí yeⁿé yā tuu'mi ní n'deēchi yā saⁿā. Caavā chuū chi neene n'deēé cuuvi 'cai yā ní ndaā sa ní ndee sa nduucú yā. ²⁷Ch'iinu 'uūvi nduuyū miíⁿ ní nan'daā Félix miíⁿ yeⁿē lado gobernador ní sndaā saⁿā chí nguuvi Porcio Festo. Naati Félix miíⁿ ní neⁿe sa cunée sa chí ch'ēete sa lado yeⁿe 'iiⁿyāⁿ Israel s'eeⁿ ní snuūⁿ ntuūⁿ sa Pablo vácūⁿ.

**Pablo ngaⁿa sa chí caⁿā
sa nanááⁿ César**

25 Taachí ndaā saⁿā Festo na yáⁿāa yeⁿé yā cho'ōo 'iiⁿnūⁿ nguuvi ní cuhéé yā yeⁿē yāāⁿ Cesarea ní ndaa yā na yāāⁿ Jerusalén. ²Ní 'iiⁿyāⁿ chiiduú ch'ēete ca yeⁿe chiiduú n'geeté yeⁿe Israel ndúúcu 'iiⁿntyéⁿē yeⁿe 'iiⁿyāⁿ Israel s'eeⁿ cheⁿe yā nanááⁿ Festo miíⁿ ní ngaⁿá yā contra yeⁿe Pablo miíⁿ. Ní chiicá yā saⁿā. ³Ngaⁿá yā contra Pablo miíⁿ ní ngiica yā 'áámá favor chí nandéé yā Pablo na yāāⁿ Jerusalén. Ti 'iiⁿyāⁿ s'eeⁿ ní canée listo yā ní nadicadíínuuⁿ yā chí 'caaⁿnúⁿ yā saⁿā cuaaⁿ cyúúní. ⁴Naati Festo mífⁿ nan'guēcútaⁿā sa chí Pablo miíⁿ canuuⁿ sa vácūⁿ na yāāⁿ Cesarea ní 'úú cáámá can'daá yeⁿē yāāⁿ 'cūū. ⁵Tuu'mi ní ngaⁿā sa: Ndís'tií chí ngii dííⁿ nī, caⁿá ní nduucú na yāāⁿ miíⁿ ní nduutí chí

véé nuūⁿndi yeⁿē saⁿá 'cūū tuu'mi caaⁿmáⁿ nī cheé nuuⁿndí yeⁿē sa.

⁶Ní canée chí Festo cuuví 'náaⁿ yā ndúúcu 'iiⁿyāⁿ s'eeⁿ tan'dúúca nííⁿ nguuvi ndííchí nguuvi. Ní ndaá yā na yāāⁿ Cesarea. Chideēve táámá nguuvi ní Festo ch'iindí yā na silla yeⁿē juez ní caⁿá yā chí cinguai yā Pablo. ⁷Sáⁿa 'cūū taachí ndaā sa, 'iiⁿyāⁿ Israel s'eeⁿ chí ndaá yā yeⁿē yāāⁿ Jerusalén 'iiⁿyāⁿ miíⁿ nanguēcundií yā Pablo miíⁿ ní caⁿa yā neenē n'deēe nuuⁿndi yeⁿē sa. Mar 'áámá 'iiⁿyāⁿ cuuvi ngaⁿa yā cheé chí cuaacu. ⁸Tuu'mi ní Pablo miíⁿ ní caⁿa maāⁿ sa yeⁿē sa: Nguēe nuūⁿndi yeⁿé mar 'áámá, ndii nguée ndúú yeⁿē ley yeⁿe 'iiⁿyāⁿ Israel s'eeⁿ ndii nguée ndúú yeⁿē costumbre yeⁿē yaācū templo ndíí nguée ndúú yeⁿē rey César.

⁹Naati Festo miíⁿ neⁿe sa caⁿa sa favor yeⁿē 'iiⁿyāⁿ Israel s'eeⁿ. Ni nan'guēcútaⁿā sa yeⁿē Pablo, ní caⁿā sa: 'Áá neⁿe di caⁿā di na yāāⁿ Jerusalén ní mífⁿ 'cuundicaadi yeⁿē di de'e ndu'ū miíⁿ nanááⁿ 'úú níícu cádiinuⁿ de'e falta yeⁿē di?

¹⁰Pablo miíⁿ ní caⁿa sa: Nanááⁿ saⁿā ntyeⁿē canee na juzgado yeⁿe César naachi canée, chí 'cuūndicaadi yeⁿé. 'iiⁿyāⁿ Israel s'eeⁿ nguée de'e vee ndííⁿ ndúúcu yā, tan'dúúca chí n'dai deenú nī.

¹¹Caati nduutí chí de'e chí 'áámá ch'ēētē ndííⁿ o n'niíⁿnúⁿ tinaⁿā, nguée 'va'á chí 'cuuví. Ndúúti chí nguée de'e vee ndííⁿ yeⁿē chí ngiica 'iiⁿyāⁿ s'tíi, mar 'áámá 'iiⁿyāⁿ nguée cuuvi ca'a yā 'úú saⁿa s'tií. 'Úú neⁿé caⁿá caaⁿmáⁿ nanááⁿ César.

¹²Tuu'mi ní Festo miíⁿ taachí caⁿa sá chí sa saⁿā ntyeⁿe yeⁿē concilio,

ní n'gueécúta^{n'a} sa: Nga^{n'a} ntúuⁿ
di chí na^{n'a} di nanááⁿ César miiⁿ
tuu'mi ní na^{n'a} di.

**Pablo nanááⁿ Agripa
ndúúcu Berenice**

¹³Cho'oo 'áámá nduu 'úúví
nguuvi ní rey Agripa ndúúcu tá^{n'a}
Berenice ndaá yā yááⁿ Cesarea chi
díⁿ yā saludar Festo. ¹⁴Naaⁿ 't'ee
ch'etinéé yā ndúúcu Festo miiⁿ
ní Festo miiⁿ ca^{n'a} cuáácú sá rey
ye^{n'e} nuuⁿndi ye^{n'e} Pablo ní nga^{n'a}
sa: 'Áámá sa^{n'a} canúúⁿ sa vácū
caavā Félix miiⁿ. ¹⁵Chuū chi ye^{n'e}
sa^{n'a} miiⁿ. Taachí che^{n'e} na yāāⁿ
Jerusalén tuu'mi ní chiiduú n'geeté
ye^{n'e} Israel ndúúcu 'iiⁿyāⁿ ndiicū
ye^{n'e} 'iiⁿyāⁿ Israel s'eeⁿ ndaá yā
nanaáⁿ ní chiica yā chi 'úú díⁿ
condenar sa^{n'a}. ¹⁶Nan'gueécúta^{n'a}
ye^{n'e} 'iiⁿyāⁿ s'eeⁿ. Nguéé costumbre
ye^{n'e} 'iiⁿyāⁿ romano s'eeⁿ chi
'caaⁿnúⁿ yā 'áámá 'iiⁿyāⁿ ne^{n'e} chí
'āā cuéé 'cuūndicaadí ye^{n'e} yā ní
caaⁿmáⁿ yā ye^{n'e} maáⁿ yā nanááⁿ
'iiⁿyāⁿ chi ngiica nuuⁿndi ye^{n'e} yā.
¹⁷Nguéé chi 'naáⁿ. Nduuvidaamá yā
'muuⁿ. Chideeve táámá nguuví 'úú
ch'iindí na silla ye^{n'e} juez ní ca'á
orden, ní dicho'ó chi canguai sa^{n'a}
miiⁿ. ¹⁸Āā snéé sa^{n'a} chi ngiica
nuuⁿndi ye^{n'e} sa. Nguéé ca^{n'a} yā
mar 'áámá nuuⁿndi tan'dúúca chí
'úú nacádiinuúⁿ. ¹⁹Ti véé vaadi
'caa'va ye^{n'e} yā ndúúcu sa lado ye^{n'e}
religión ye^{n'e} 'áámá Jesús chí 'āā
n'dii yā. Ní Pablo miiⁿ nga^{n'a} cuaacu
sa chi nguéé n'dii yā. ²⁰Úú nguéé
deenú de'e ra idíⁿ ye^{n'e} chuū ní
tiinguūneéⁿ sa^{n'a} miiⁿ: 'Āā ne^{n'e}
di chí ca^{n'a} di na yāāⁿ Jerusalén ní
miiⁿ 'cuūndicaadí yā nuūⁿndi ye^{n'e}

di? ²¹Naati Pablo miiⁿ chiica sa chí
'cueetinéé ngíínú sa sa^{n'a} Augusto ní
sa^{n'a} miiⁿ ní cadíínuuⁿ sa nuuⁿndi
ye^{n'e} sa. 'Úú ní chiicá chí cu'núuⁿ yā
sa^{n'a} vácū ne^{n'e} chí ca^{n'a} dicho'ó
sa^{n'a} nanááⁿ César Augusto.

²²Tuu'mi ní Agripa nga^{n'a} sa ngii
sa Festo: 'Úú ní ne^{n'e} 'caandiveéⁿ
ye^{n'e} sa. Sa^{n'a} miiⁿ nga^{n'a} sa ngii sa
sa^{n'a}: Cavyaaⁿ ní 'caandiveeⁿ di.

²³Chideeve táámá nguuví Agripa
ndúúcu tá^{n'a} Berenice ndaá yā
tan'dúúca costumbre ye^{n'e} rey. Ní
sndaa yā naachi snéé 'iiⁿyāⁿ ndúúcu
comandante ndúúcu sa^{n'a} n'geete
ye^{n'e} yāāⁿ miiⁿ. Ní Festo miiⁿ ca^{n'a} yā
chí dicho'ó yā Pablo miiⁿ, ní ca^{n'a} yā
nguai yā sa^{n'a}. ²⁴Tuu'mi ní Festo miiⁿ
ní ca^{n'a} sa: N'dii rey Agripa ndúúcu
nducyáácá ndis'tii 'iiⁿyāⁿ chí snéé ní
nduucú 'nū. 'Muuⁿ canéé sá^{n'a} 'cūū.
Nducyáácá 'iiⁿyāⁿ Israel s'eeⁿ ye^{n'e} yāāⁿ
Jerusalén ní ye^{n'e} yāāⁿ 'cūū ngiicá yā
nuūⁿndi ye^{n'e} sá^{n'a} 'cūū. N'gai yuudú
yā chí 'cuūvi sa. Ní 'āā ntéé cunéé sá.
²⁵Nguéé ndaacá mar 'áámá falta ye^{n'e}
sa chí 'cuūvi sa. Maaⁿ sa ngiica sa chí
ca^{n'a} sa nanááⁿ ye^{n'e} sá^{n'a} Augusto
César. Ní 'úú dicho'ó sa^{n'a}. ²⁶Úú
nguéé de'e véé chí deenú chí dingúūⁿ
ye^{n'e} Augusto César ye^{n'e} sa^{n'a} miiⁿ.
Candéé sa^{n'a} nanááⁿ ndis'tii ní vmnáāⁿ
vmnaaⁿ nanaáⁿ n'dii sa^{n'a} rey Agripa ti
taachí 'cuiinu tascaadí ye^{n'e} sa, canee
chí dingúūⁿ. ²⁷Caati deenú chí nguéé
n'daacá chí 'úú dicho'ó sa^{n'a} ndí nguéé
cadiinuúⁿ nuūⁿndi ye^{n'e} sa chí díiⁿ
nguúⁿ tandii ra.

**Pablo ca^{n'a} sa ye^{n'e} maaⁿ sa
nanááⁿ rey Agripa**

26

Tuu'mi ní rey Agripa nga^{n'a}
sa ngii sa Pablo: Teé lugar

chi caaⁿmaⁿ di yeⁿē maaⁿ di. Tuuⁿmi ní Pablo miiⁿ ndo^o sa ta'a sa. Tucá'a sa caⁿa sa yeⁿé maāⁿ sa: ²N'diī rey Agripa, de'ē chūúcā n'daacā chi cuuví caaⁿmaⁿ yeⁿé maāⁿ nanáaⁿ nī yeⁿé tanducuéⁿe nuuⁿndi chi ngaⁿa 'iiⁿyāⁿ Israel s'eeⁿ. ³N'diī ní deenú nī tanducuéⁿē costumbre ndúúcū chi itiinguuneeⁿ yeⁿē chi véé nguuaⁿ 'iiⁿyāⁿ Israel s'eeⁿ. Ní ngiicá n'diī chi 'caandiveeⁿ nī yeⁿé ndúúcū n'dai.

Vida yeⁿē Pablo

⁴Ndii cuááⁿ vmnaaⁿ ndii saⁿā 'líiⁿ 'úú canéé na yáāⁿ Jerusalén ndúúcū 'iiⁿyāⁿ Israel. N'diichi 'iiⁿyāⁿ Israel s'eeⁿ 'úú. ⁵'iiⁿyāⁿ s'eeⁿ ntúūⁿ déenu yā yeⁿé ndíi cuaaⁿ vmnaaⁿ. Ní nduuti chi neⁿe yā caaⁿmaⁿ cuaacú yā, canéé tan'dúúcā saⁿā fariseo chi chεεchi taavi yeⁿē religión yeⁿé 'nū ndúúcū costumbre yeⁿé 'nū. ⁶Maaⁿ ní caavā chi 'úú i'teenú chi Dendyuūs caⁿá yā nadacuéeⁿ yā 'iiⁿyāⁿ yeⁿe nguuaⁿ tináⁿā tan'dúúcā chi ngaⁿa yā ngii yā chiida 'nū 'iiⁿyāⁿ s'eeⁿ n'gai yā 'úú nanááⁿ juez. ⁷'iiⁿyāⁿ yeⁿe ndiichúúví daiyá yā 'iiⁿyāⁿ Israel yeⁿé 'nū i'teenú yā chi Ndyuūs caⁿa yā chi diiⁿ yā. Ní cáávā chuū cueⁿe daāⁿmaⁿ idiíⁿ yā ntiiⁿnyuⁿ yeⁿé Dendyuūs ndii nguuví ndii n'gaaⁿ. N'diī rey Agripa, caati cáávā chuū chi cunee ngífnú ntúúⁿ 'iiⁿyāⁿ Israel ngiicá yā yeⁿé. ⁸¿De'ē nacadiinúúⁿ nī yeⁿē chūú? ¿De'ē cuuvi chí ndís'tiī nadacadiinúúⁿ nī chi Dendyuūs nguéeⁿ cuuvi nadin'duuchí yā 'iiⁿyāⁿ yeⁿē nguuaⁿ tináⁿā?

Pablo ditaáⁿ yā ndúúcū 'iiⁿyāⁿ

⁹'Úú ní cuaacu nífníⁿnyúⁿ s'teēnú chi cánéé chi n'deēe n'dái dííⁿ

contra yeⁿe Jesús yeⁿe yáāⁿ Nazaret. ¹⁰Tiicá ntúūⁿ dííⁿ na yáāⁿ Jerusalén. 'Úú chíí 'iiⁿyāⁿ chi i'téénú Jesús vácūū. Chiiduú n'geeté yeⁿe Israel tee yā poder 'úú. Ní taachí chííⁿnúⁿ yā 'iiⁿyāⁿ, 'úú caⁿá ti 'tíicā. ¹¹Nééné n'dee cuuvi chíí 'iiⁿyāⁿ s'eeⁿ chi i'teenú na nducyáácá yaācū sinagoga na vácūū. Dííⁿ chí 'iiⁿyāⁿ cuuví caaⁿmaⁿ yā chí nguéeⁿ i'téénú yā Jesús. Neené taaⁿ dííⁿ ndúúcū 'iiⁿyāⁿ s'eeⁿ chí i'téénú yā Jesús. Ní can'daá 'iiⁿyāⁿ ndíí na yáāⁿ chí nguéeⁿ n'diichi.

Pablo caⁿa yā taacā chí i'téénú yā

(Hch. 9.1-19; 22.6-16)

¹²Taachí dííⁿ chuū cueⁿé na yáāⁿ Damasco ní candεε caaca ndúúcū orden yeⁿē chiiduú n'geeté yeⁿe Israel. ¹³N'diī rey, taachi canuúⁿ yúúní taanduu ná maⁿa nguuví n'diichí 'áámá dεεve nanguuvi chí ch'εεte n'dái cá dεεve nguéeⁿ tii dεεve yeⁿé 'yáⁿā. Dεεvé miiⁿ ní nuuⁿmaⁿ ndiivii 'úú ndíí 'iiⁿyāⁿ chí snee yā nduucú. ¹⁴Chindεεve nducyaaca nús'úu na yáⁿā. 'Úú chíiindiveeⁿ 'áámá nduudu chí yaā'vī 'úú ndúúcū davaacu hebreo chí ngaⁿā: Saulo, Saulo, ¿de'ē cáávā n'daā di 'úú? Chééchí taavi chí diiⁿ di tan'dúúcā 'áámá 'iiti ca'a ca'a tī na yáⁿá cuiiⁿnyuⁿ. ¹⁵'Úú ní caⁿá: ¿Du'ú n'diī, Señor? Ní Señor miiⁿ ní caⁿa yā: 'Úú Jesús chí n'daā di. ¹⁶Naati nacuééⁿ di, ní cueendi di. Cáávā chuū che'enaááⁿ yeⁿē di. Ní cu'neéⁿ dii lado yeⁿé 'iiⁿyāⁿ ndíí tiiiⁿ chí diiⁿ ntiiⁿnyuⁿ yeⁿé ní caaⁿmaⁿ di nduudu cuaacu yeⁿe dendú'ū chí n'dííchi di yeⁿe dendú'ū chí 'úú dííⁿ chí 'cuuⁿmíⁿ náāaⁿ yeⁿē

di. ¹⁷Maaⁿ ní 'úú ní dicho'ó dii nanááⁿ 'iiⁿyāⁿ yeⁿ'e di ndúúcū yeⁿ'e 'iiⁿyāⁿ s'eeⁿ chi nguéeⁿ yeⁿ'e ndaata Israel. Ní taachi neⁿ'é yā sta'a yā dii ní 'úú nneé dii. ¹⁸Ní cuuví diiⁿ di chi 'iiⁿyāⁿ chi nguéeⁿ snaaⁿ yā ní snaaⁿ yā ní tun'dáa di 'iiⁿyāⁿ s'eeⁿ ná maáiⁿ ní naⁿ'á yā na dēēve. Ní tun'dáa di 'iiⁿyāⁿ yeⁿ'e poder yeⁿ'e yááⁿnguiniūⁿ ní naⁿ'á yā lado yeⁿ'e Dendyuūs. Ní ndaācā yā 'úú ní 'úú inadach'ēcū nuuⁿndi yeⁿ'é yā ní caavā chi cu'téenu yā yeⁿ'é. Ní vée herencia yeⁿ'é yā ndúúcū 'iiⁿyāⁿ chi Dendyuūs dindēēve yā.

Pablo dííⁿ yā tan'dúúcā visión

¹⁹Cáāvā chuū, n'dii rey Agripa, nguéeⁿ dííⁿ chi cheeⁿdiitú dííⁿ n'diichí cosa yeⁿ'e Dendyuūs. ²⁰Naati caⁿ'á vmnaaⁿ vmnaaⁿ 'iiⁿyāⁿ chi snée na yāāⁿ Damasco, ní cuayiivi caⁿ'á na yāāⁿ Jerusalén ndúúcū nuuⁿmaⁿ na yáⁿ'āa yeⁿ'e Judea ndúúcū 'iiⁿyāⁿ s'eeⁿ chi nguéeⁿ yeⁿ'e ndaata Israel chi canee cuuⁿmíⁿ yā chi ndaacadaamí yā yeⁿ'e nuuⁿndi yeⁿ'é yā nícu cu'téenu yā Dendyuūs. Ní dííⁿ yā ntiiⁿnyuⁿ chí n'daācā n'dai ní ch'iⁿ'í yā tanáⁿ'ā 'iiⁿyāⁿ chi ndaacadaamí yā yeⁿ'e nuuⁿndi yeⁿ'e yā. ²¹Cáāvā chuū 'iiⁿyāⁿ Israel s'eeⁿ sta'a yā 'úú na yāacū templo ní nadacadínuuⁿ yā chi 'caaⁿ'nuⁿ yā 'úú. ²²Ndyuūs chinnee yā 'úú chi chéé ndíí maaⁿ ní caⁿ'á nduudu cuaacu ndúúcū 'iiⁿyāⁿ ndiicúū ní 'iiⁿyāⁿ chi ngaⁿ'a ntiiⁿnyúⁿ yā. Nguéeⁿ n'dēē cá caⁿ'á yeⁿ'e dendu'ū chi caⁿ'a profetas ndúúcū Moisés yeⁿ'é dendu'ū chi canéeⁿ chí chii. ²³Caati Cristo miiⁿ canéeⁿ chi 'cueenu yā cuuvi ní 'iiⁿyāⁿ

miiⁿ vmnááⁿ vmnaaⁿ nduuchí yā yeⁿ'e nguaaⁿ tináⁿ'ā. Ní ngaⁿ'a cuaacú yā yeⁿ'e dēēve nanááⁿ 'iiⁿyāⁿ Israel yeⁿ'e ndúúcū 'iiⁿyāⁿ s'eeⁿ chi nguéeⁿ yeⁿ'e ndaata Israel.

Pablo ngaⁿ'a sa Agripa chi canéeⁿ chi cu'téenu yā

²⁴Caⁿ'a Pablo chúú cáāvā maāⁿ sa. Festo gobernador miiⁿ ní caⁿ'a yuudu sa: Loco dii, Pablo. Cáāvā chi n'geeⁿ taaví dí chííⁿ chi nduuví loco di.

²⁵Naati saⁿ'ā miiⁿ ní caⁿ'ā sa: Nguéeⁿ loco 'úú, n'dii Festo, chi n'dai taavi. Ngaⁿ'á nduudu cuaacu chi n'dai. ²⁶Rey Agripa miiⁿ deenú ntúuⁿ yā chuū. 'Úú ngaⁿ'á nduucú yā yeⁿ'e tanducuéⁿ'e ndúúcū confianza. 'Úú nadacadiinúúⁿ chi déenu yā chuū. Nguéeⁿ chó'oo chuū ná n'de'ei. ²⁷N'dii rey Agripa, ¿'áá i'téenu nī 'iiⁿyāⁿ profetas chi caⁿ'a nduudu yeⁿ'e Dendyuūs? 'Úú deenú chi i'téenu nī.

²⁸Tuu'mi ní Agripa miiⁿ caⁿ'a sa chii sa Pablo: 'Tēe 'tēe nūuⁿ diiⁿ di chi cu'teenú ndaacá Dendyuūs.

²⁹Pablo miiⁿ ní caⁿ'ā sa: 'Úú ngiicá Dendyuūs ndii ta'lííⁿ o ndii ch'ēete, nguéeⁿ dámaāⁿ n'dii ti 'tiicá ntúuⁿ nducyaaca 'iiⁿyāⁿ chi n'giindiveén yā yeⁿ'é, cuuví cu'téenu ntuuⁿ yā Ndyuūs miiⁿ tan'dúúcā 'úú, naati nguéeⁿ cuneé yā ndúúcū cadenas 'cūū.

³⁰Taachí caⁿ'a sa chuū ncueeⁿ rey ndúúcū gobernador ndúúcū Berenice ndúúcū 'iiⁿyāⁿ chi canéeⁿ yā ndúúcū 'iiⁿyāⁿ s'eeⁿ. ³¹Taachí 'iiⁿyāⁿ s'uuⁿ cueⁿ'é yā 'áamá lado caⁿ'á yā nguaaⁿ maáⁿ yā: Mar 'áamá nuuⁿndi ch'ēete nguéeⁿ vée yeⁿ'e sa 'cūū nguéeⁿ chi 'caaⁿ'nuⁿ yú saⁿ'ā, ndíí nguéeⁿ chi caⁿ'a sa vácúū.

³²Níicú Agripa ngaⁿā sa ngii sa Festo: Sá 'cūū cúúví nguáⁿai sa nduuti chí nguée caⁿā sa 'tíicā: 'Úú caⁿā nanááⁿ César.

Dicho'ó yā Pablo na yaāⁿ Roma

27 Taachí Festo ca'á yā orden chí cueⁿé 'nū na barco na yáⁿāa Italia, dííⁿ yā entregar Pablo ndúúcu tanáⁿā 'iiⁿyā chí preso yā capitán chí nguuví sa Julio. Capitán miiⁿ chí yeⁿé 'áámá taaⁿ soldados chí nguuví Augusto. ²Cueⁿé ntúuⁿ 'nū na 'aama barco yeⁿé yāāⁿ Adramitio chí caama cáácá ní caⁿā ná cheendi va'ai s'eeⁿ yeⁿé nuūⁿnīⁿyáⁿā na yāāⁿ s'eeⁿ yeⁿé yáⁿāa Asia. Sndaá 'nū na barco ní cueⁿé 'nū. Ní canée sa ndúúcu nús'uu 'áámá saⁿā chí nguuví Aristarco yeⁿé yáⁿāa Macedonia chí yeⁿé yāāⁿ Tesalónica. ³Táámá nguuví ndaá 'nū cheendi va'ai yeⁿé nuūⁿnīⁿyáⁿā niiⁿnuúⁿ na yāāⁿ Sidón. Julio miiⁿ dííⁿ yā ndúúcu Pablo miiⁿ tan'dúúcā amigo n'dai. 'Cuúⁿ yā chí cueⁿé sa naachi canee amigos yeⁿé sa. Amigos ca'á yā chí neⁿé Pablo miiⁿ. Ní Pablo miiⁿ ntaavi'tuunúúⁿ sa. ⁴Ní cueⁿé ntúuⁿ 'nū na barco ní cho'ó 'nū cuaaⁿ ndiia lado sur yeⁿé isla Chipre caati 'yúúné ní contra yeⁿé barco miiⁿ. ⁵Taachi cho'oo cuaacú 'nū nuūⁿnīⁿyáⁿā cueⁿé 'nū niiⁿnuúⁿ yáⁿāa Cilicia ndii yáⁿāa Panfilia. Ndaá 'nū na yāāⁿ Mira chí 'áámá yāāⁿ yeⁿé yáⁿāa Licia.

⁶Ní capitán chí ngaⁿa ntiiⁿnyúⁿ yā nndaaca yā 'áámá barco yeⁿé yāāⁿ Alejandría chí naⁿā yáⁿāa Italia. Cuchéⁿ 'nū na barco miiⁿ ní cuinaⁿa 'nū. ⁷Ní ngínū ngiinū cueⁿé 'nū na barco chí 'nááⁿ taavi n'deēe nguuví.

Ní cueⁿé 'nū ndúúcu nééné n'deēe peligro na barco niiⁿnuúⁿ ná yaāⁿ Gnido ní 'āā ntéé 'cuūⁿ 'yúúné chí caⁿā 'nū cuááⁿ vmaāⁿ. Tuuⁿmi ní cueⁿé 'nū na nduu 'uuví isla, isla Salmón chí canee niiⁿnuúⁿ ndúúcu isla Creta caati nguée 'yúúné taaⁿ miiⁿ. ⁸Níicú a fuerza dííⁿ 'nū ndaá 'nū niiⁿnuúⁿ 'áámá yāāⁿ chí nguuví Buenos Puertos ní niiⁿnuúⁿ yāāⁿ miiⁿ canée yāāⁿ Lasea.

⁹Taachí cho'oo 'naaⁿ tiempo cueⁿé 'nū na barco ndúúcu nééné n'deēe peligro. 'Āā cho'oo nguuví yeⁿé 'viicu chí nguée che'é 'nū. Tuuⁿmi ní Pablo caⁿa yā chíi yā 'iiⁿyā s'uuⁿ. ¹⁰Ní cāⁿa yā: Ndís'tii saⁿā, 'úú inaāⁿ chí 'āā nééné n'deēe peligro cueⁿé ndúúcu yú chí cuuvi ndaa yú. Nguée dámaāⁿ carga yeⁿé barco cuuvi ndái caati ndii s'uuúⁿ cuuvi ndai yú.

¹¹Naati capitán miiⁿ ní n'giindiveéⁿ yā nduudu yeⁿé saⁿā chí ndēe barco ndúúcu saⁿā chí ngaⁿa ntiiⁿnyuⁿ yeⁿé barco miiⁿ ti 'āā chí caaⁿmaⁿ 'nū Pablo miiⁿ. ¹²N'deēe n'dái inaāⁿ yā chí 'āā ntéé n'daacā chí canee barco na cheendi va'āi yeⁿé nuūⁿnīⁿyáⁿā miiⁿ tiempo chí 'iiche. Ní n'deēe n'dái 'iiⁿyā nduuvidaamā yā chí caⁿa yā nuūⁿnīⁿyáⁿā yeⁿé miiⁿ. Ní neⁿé yā chí ndaá yā na yāāⁿ Fenice chí 'áámá cheendi va'āi yeⁿé nuūⁿnīⁿyáⁿā yeⁿé isla Creta chí canee cuaaⁿ ndiia sur, cuaaⁿ naachi n'giia yáⁿā. Ní miiⁿ cánée tiempo chí 'iiche.

'Yúúné tááⁿ na nuuⁿnīⁿyáⁿā

¹³Ndaá 'yúúné ngíinu yeⁿé cuaaⁿ ndiia tan'dúúcā chí nacadiinuⁿ yā chí n'daāca. Candéⁿ yā anclas cūū chí 'caanu barco miiⁿ ní cueⁿé yā

canée diituú nuūⁿnīⁿyáⁿā nīⁿnúuⁿ isla Creta. ¹⁴Nguéé neé 'naaⁿ ndaā táámá 'yúúné taāⁿ taavi chi nguuvi Euroclidón tan'dúúcā ciclón chi contra yeⁿē barco miiⁿ. ¹⁵Taachi 'yúúné mífⁿ diiⁿ chi barco 'āā ntéé cuuvi caⁿ'a barco miiⁿ contra yeⁿē 'yúúné, tuuⁿmi s'neeⁿ maáⁿ 'nū candéē 'yúúné barco miiⁿ naachi neⁿē. Ní nús'uu cueⁿé 'nū 'tífā. ¹⁶Ndaá 'nū na 'áámá isla chi nguuvi Clauda naachi nguéé véé 'yúúné taāⁿ. 'Āā nééné ngíⁿi candéé yā barco 'liiⁿ vmnaaⁿ barco ch'εεte ní dichiiⁿchí yā barco 'lífⁿ miiⁿ. ¹⁷Taachi 'āā chí n'daí yā dichiiⁿchí yā barco 'lífⁿ ndúúcū 'ii'yū cuaaⁿ náávtaⁿā, tuuⁿmi ní 'va'á yā chi ndāa yā Sirte chi 'áámá cuaaⁿ cheeti nuūⁿnīⁿyáⁿā naachi canée yáⁿāa dúúⁿ naachí 'āā ntéé cuuvi caaca barco miiⁿ. Tuuⁿmi di'cua'á yā tীনūⁿ yeⁿe barco miiⁿ. Tuuⁿmi ní chi 'néⁿ yā barco miiⁿ chi cueⁿe maāⁿ ntúūⁿ. ¹⁸Ní diiⁿ 'yúúné miiⁿ chi cueⁿē barco ndúúcū peligro ti 'yúúné tááⁿ. Chideeve táámá nguuvi tucá'a yā ndaavi yaí yā carga yeⁿē barco na nuūⁿnīⁿyáⁿā. ¹⁹Ndiichí ndii 'ííⁿnúⁿ nguuvi miiⁿ ndúúcū ta'á yā chíí yā nducuéⁿē dendú'ū chi ndēē barco na nuūⁿnīⁿyáⁿā. ²⁰Nguuvi nguuvi s'eeⁿ 'āā ntéé n'diichí 'nū 'yáⁿā ndii nguεε ndúú 'ííⁿnyúⁿ cucáávā 'yúúné tááⁿ mífⁿ chi nuuⁿmaⁿ ndiiví 'nū. Tuuⁿmi 'āā ntéé nacadiinúúⁿ 'nū chi nanguáⁿai 'nū.

²¹'Āā 'nááⁿ nguuvi chi nguéé nge'é 'nū. Tuuⁿmi Pablo miiⁿ cheendii yā naavtaⁿā yeⁿé nducyaaca 'nū ní caⁿ'a yā: Ndúúti chi ndís'tií chí chí'téenu nī yeⁿé ní nguéé cueⁿē yú na barco yeⁿē isla Creta chi cuta'ā

yú peligro miiⁿ ndúúcū dendu'ū chí dindēē yú. ²²Maaⁿ ní cuuví ndis'tií. Canee cúúⁿmíⁿ nī más cā ánimo caati nguéé mar 'áámá 'iiⁿyāⁿ chí dindaí yā vida yeⁿé yā nguaāⁿ yú, dámaaⁿ barco miiⁿ chí cuuvi ndái. ²³Caati maaⁿ nguiinú 'cūū canée ángel yeⁿe Dendyuūs nduucú. 'Úú ní yeⁿe Dendyuūs 'úú ní 'úú dichiiⁿvé 'iiⁿyāⁿ. ²⁴Caⁿ'a ángel miiⁿ chíí yā 'úú: Pablo, nguéé 'va'ā di. Canee chí cuéendii di nanááⁿ César. Nducyáácá 'iiⁿyāⁿ chí caⁿ'á yā na barco ndúúcū di cunduūchí 'iiⁿyāⁿ. ²⁵N'diichí nī compañeros. Cunee ngííⁿú nī ánimo caati 'úú i'teenú Dendyuūs. Canée chí cuuvi tan'dúúcā chí chíí yā 'úú. ²⁶Canée chí ca'ā naaⁿ yú na 'áámá isla.

²⁷Chii ndiichí cuūⁿ yaaⁿ nífcú tan'dúúcā chí cuchíí 'nū na nuūⁿnīⁿyáⁿā chí nguuvi Adriático, ní cúchii ná maⁿ'a yaaⁿ ní saⁿ'ā s'eeⁿ chí diiⁿ manejar barco chí tuumicádíínuuⁿ sa chí 'āā snée 'nū nīⁿnuúⁿ na yáⁿāa. ²⁸Tuuⁿmi ní ca'a nuuⁿ sá sonda ní ndaaca sa ngii ndiicú 'ya'āa chí yáánūuⁿ ní cho'ō ca ta'lííⁿ cuaaⁿ vmnaaⁿ nngueεcunée sa ca'a nuuⁿ ntúuⁿ sa sonda. Ndaaca ntuuⁿ sa ndítiiⁿyu 'ya'āa chí yáánūuⁿ. ²⁹Va'á yā chí ca'a naáⁿ yā na 'vaachií. Tuuⁿmi ní ca'ā nuúⁿ ya ná cuúúⁿ ancla cūū yeⁿē cuaaⁿ dáámí, cosa chí cuendii barco miiⁿ ní 'āā ntéé caaca. Ní snee ngííⁿú yā chí cúúví dēεε. ³⁰Tuuⁿmi ní saⁿ'ā chí dííⁿ yā manejar barco ch'εeti yaaⁿ sá chí cáanu sa yeⁿē barco. Ní ca'a nuúⁿ yā barco 'lífⁿ na nuūⁿnīⁿyáⁿā. Dííⁿ yā tan'dúúcā chí cangúu yā ancla cūū yeⁿe cuaaⁿ vmnaaⁿ barco miiⁿ. ³¹Pablo miiⁿ

caⁿa yā chii yā capitán: Ndúúti
chi saⁿā s'eeⁿ nguée canee sa na
barco miiⁿ ndís'tií ní nguée cuuvi
nanguaⁿai nī.

³²Tuu'mi ní soldados ch'iica sa
lazo yeⁿē barco lííⁿ. Diiⁿ sá chí
cueⁿe maāⁿ ní chindai.

³³Taachí caama chideeve Pablo
caⁿa yā chii yā nducyáácá 'iiⁿyāⁿ
chi che'é yā. Ní caⁿa yā: Maaⁿ ní
ndiichi cuúúⁿ nguuvi chí 'āā ntée
ché'e nī ní 'cuetinée nī ndúúcū
cuidado. Ní nguée che'é nī mar
'áámá yuündū. ³⁴Úú ngiicá ndis'tií
chi che'e nī maaⁿ níicú véé fuerza
yeⁿē nī ti mar 'áámá yuündū tííⁿ nī
nguée cuuvi ndai.

³⁵Taachí caⁿa yā chuū, sta'á yā
pan. Ca'á yā gracia Ndyuūs nanááⁿ
nducyaaca yā ní taachi n'dée yā
pan tuc'áa yā che'é yā. ³⁶Tuu'mi ní
nducyaaca yā canee cúúⁿmíⁿ yā
más ca ánimo ní che'é ntúúⁿ yā.

³⁷Nducyáácá 'nū chi snúuⁿ 'nū na
barco tan'dúúca 'uūví ciento canée
'iiⁿnūⁿ ngeecu nditiíⁿyu 'áámá 'nū.

³⁸Āā nduuví ditiinú yā. Dííⁿ yā chi
nan'daa ca'ái barco miiⁿ. 'Canuúⁿ
yā trigo chi ndēē barco miiⁿ na
nuūⁿnīⁿyáⁿā.

Chindai barco

³⁹Taachí chideeve táámá nguuvi
nguée 'íintinaáⁿ 'nū tíí yáⁿā naachi
snée 'nū naati n'diichí 'nū 'áámá
lugar naachi vee 'áámá playa o
yáⁿā ndúútií. Nduuvidáámá 'nū
neⁿe 'nū cundaa 'nū na playa miiⁿ
ndúúcū barco. ⁴⁰Ní chiica ntúuⁿ yā
'iiⁿyu yeⁿē cucáávā chi ancla cūū
chi canuúⁿ na nuūⁿnīⁿyáⁿā. Tuu'mi
ní cuaaⁿ dáámí barco miiⁿ nadatíí
yā remos chi tan'dúúca 'áámá tabla

chi diiⁿ guiar barco miiⁿ. Ní ch'eeⁿ
yā tiinūⁿ miiⁿ yeⁿē cuaaⁿ vmnaaⁿ
barco miiⁿ na 'yúúné nī cueⁿé
'nū na playa chí yáⁿā ndúútií.
⁴¹Caⁿa 'naaⁿ 'nū naachi 'áámá
lugar chí 'uūví nuūⁿnīⁿ ní dííⁿ yā
chi ndaā barco miiⁿ na yáⁿā cuaaⁿ
diituú cheeti nuūⁿnīⁿ. Dííⁿ yā chí
nacan'dāa barco 'iicu cuááⁿ vmnaaⁿ
yeⁿē barco miiⁿ chí canúúⁿ ca
nguaaⁿ nuūⁿnīⁿ 'āā na yáⁿā canée
cheechi. Chééndii chí 'āā ntée chiicā
'iicu cuaaⁿ dáámí barco miiⁿ neⁿe
nda'ai ndúúcū fuerza yeⁿē nuūⁿnīⁿ
miiⁿ. ⁴²Tuu'mi ní soldado s'eeⁿ caⁿa
yā chí 'caaⁿnuⁿ yā preso s'uuⁿ níicú
mar 'áámá yā nguée cuuvi cáaⁿyuⁿ
yā nuūⁿnīⁿ níicú cunaⁿa yā na
yáⁿā. ⁴³Naati capitán miiⁿ neⁿe
sa dinguaⁿai sa Pablo miiⁿ. Tuu'mí
chícataáⁿ yā chí neⁿe soldado
s'uuⁿ. Tuu'mi ní capitán chí ngaⁿā
ntiiⁿnyuⁿ caⁿá sa chí nducyáácá
yā chí cuuvi 'caaⁿyuⁿ yā nuūⁿnīⁿ
níicú chí cun'daa yā vmnaāⁿ
nuūⁿnīⁿ ní 'caaⁿyuⁿ yā ní nandaá
yā na yáⁿā ní nnguaⁿái yā. ⁴⁴Níicú
tanáⁿa yā ní na tablas yeⁿē barco
ndúúcū yáⁿā yeⁿē barco cuuví
nacan'dāa yā. 'Tíicā chii nducyááca
yā nanguáⁿai yā nandāa yā na
yáⁿā cuūⁿmáⁿ.

Pablo snée yā na isla Malta

28 Taachi 'āā nnguaⁿái 'nū
chicadínuuⁿ 'nū isla miiⁿ
nguuví Malta. ²Iiⁿyāⁿ chí snée na
isla miiⁿ dííⁿ yā tratar nús'uu n'daacā
caati tiiví yā yáⁿā ní dííⁿ yā recibir
nducyaaca 'nū cáávā chí 'iiche miiⁿ
ndúúcū chí ngeeⁿ cúúví. ³Tuu'mi ní
Pablo miiⁿ nanguáiⁿ yā nduuví tááⁿ
dúuⁿnē yáⁿā cuuⁿmaⁿ ní ch'íí yā na

yáⁿā. Ní 'áámá cúú cueⁿe tī chéénu tī caavā chi 'íí'nūuⁿ ní chēcú tī na tá'a Pablo miiⁿ. ⁴Taachi 'iiⁿyāⁿ chi snée miiⁿyā n'diichí yā cúú can'dícu tī na ta'a Pablo tuu'mi ní caⁿ'a yā nguááⁿ maáⁿ yā: Nduudu cuáácú sáⁿ'a 'cūū 'nínⁿ'núⁿ sa 'iiⁿyāⁿ. 'Áará chi nanguáⁿ'āi sa na nuūⁿnīⁿ'yáⁿ'ā nguéeⁿ 'cuááⁿ chí cunduūchi sa.

⁵Naati Pablo miiⁿ ch'íidi sa cúú miiⁿ na yaⁿ'ā. Nguéeⁿ de'ē vee dííⁿ tī ndúúcu sa. ⁶Iiⁿyāⁿ s'uuⁿ snée ngíínú yā chi n'diichí yā chi cundiitu ta'a sa o cundéévé sá chi 'cuūví. 'Iiⁿyāⁿ s'ééⁿ ní ch'etinéé ngíínú yā de'ē cuuví ndúúcu sa. Ní n'diichí yā chi nguē de'ē vee chí ndúúcu sa. Tuu'mi ní na'dááⁿ yā vaanicadíínūuⁿ yeⁿ'é yā cucáávā chi n'diichí yā. Tuu'mi ní caⁿ'a yā: Pablo miiⁿ ní dendyuūs saⁿ'ā.

⁷Na yāāⁿ miiⁿ vée yāⁿ'āa yeⁿ'e 'iiⁿyāⁿ chí ngaⁿ'ā ntíiⁿ'nyúⁿ yā chi ngúúví yā Publio. 'Iiⁿyāⁿ yāāⁿ miiⁿ diiⁿ yā recibir nus'uū. Ní tee yā naachí ch'etinéé 'nū 'iiⁿnūⁿ nguuví. ⁸Ní chiida Publio canée yā na cama chi ngííta yā yeⁿ'ē ca'ai 'íí'nūuⁿ ndúúcu ca'ai yuuúⁿ. Tuu'mí chi ndaā Pablo ní n'diichí yā 'iiⁿyāⁿ. Ní ch'íínú caⁿ'angua'á yā niicu s'nééⁿ Pablo miiⁿ ta'á yā cuerpo yeⁿ'é yā. Níícú nnduuva yeⁿ'é yā. ⁹Ch'íínú chí dííⁿ yā chuū tuu'mi ní cuchiī tanáⁿ'a yā chi snée yā na isla chi vee ntúūⁿ ca'ai yeⁿ'é yā. Ndaá yā naachi canée Pablo ní nduuva ntúuⁿ yeⁿ'e yā. ¹⁰Iiⁿyāⁿ s'úūⁿ dinéⁿ'e yā nús'uu ní dííⁿ yā n'daacā nduucú 'nū. Taachí chi ndaá 'nū na barco tee yā taanduvée cosa chi neⁿ'e 'nū.

Pablo ndaá yā na yāāⁿ Roma

¹¹Ch'etinééⁿ 'nū 'iiⁿnūⁿ 'iiyu miiⁿ ní cueⁿ'é 'nū na barco chi

yeⁿ'ē yāāⁿ Alejandría chi ch'etinéé 'áámá tiempo 'iiche na isla miiⁿ. Barco miiⁿ ní cuaaⁿ vmnaaⁿ canée imágenes yeⁿ'e Cástor ndúúcu Pólux chi dendyuūs s'eeⁿ yeⁿ'e 'iiⁿyāⁿ miiⁿ. ¹²Ní ndaa ntúuⁿ 'nū na yaāⁿ Siracusa ní ch'etinéé ntuuⁿ 'nū yāāⁿ miiⁿ na 'iiⁿnūⁿ nguuví. ¹³Yeⁿ'e yāāⁿ miiⁿ cueⁿ'e ntúúⁿ 'nū na barco niiⁿnuúⁿ ná 'diituú nuūⁿnīⁿ'yaⁿ'ā miiⁿ. Ndaa ntúuⁿ 'nū niiⁿnuúⁿ na yaāⁿ Regio. Táámá nguuví cuayiivi chí ndáá 'yúúné yeⁿ'ē cuaaⁿ ndiyya sur ní ndii chíiⁿ ndii 'úúví nguuví ndaa ntúuⁿ 'nū na yāāⁿ Puteoli. ¹⁴Miiⁿ ní naachi ndaāca 'nū hermanos chí i'téenu yā Cristo di'cuíítu yā nús'uu ní 'cuetinéé 'nū ndúúcu yā ndeēchē nguuví. Ch'iinu ní cueⁿ'e 'nū chiicá 'nū yāāⁿ Roma. ¹⁵Taachi ch'iindiveeⁿ hermano s'uuⁿ yeⁿ'é 'nū ní can'dáa yā ní dííⁿ yā recibir nús'uu ndíí yāāⁿ Apio naachi vee niiⁿvēē ní ndii yāāⁿ chí nguuví Tres Tabernas. Taachí Pablo n'diichi yā 'iiⁿyāⁿ, ca'á yā gracias Ndyuūs níícú vee ca ánimo yeⁿ'e yā. ¹⁶Taachí ndaá 'nū yaāⁿ Roma, capitán diiⁿ sa entregar preso s'eeⁿ jefe. Níícú jefe miiⁿ 'cuuⁿ yā chí cunée 'āa vi'i Pablo ndúúcu 'aama soldado chí diiⁿ sa cuidado 'iiⁿyāⁿ.

Pablo ngaⁿ'á yā nduudu cuaacu na yāāⁿ Roma

¹⁷Ch'íínú tá 'iiⁿnūⁿ nguuví Pablo miiⁿ ní ca'á yā chí cádiinuⁿ saⁿ'ā n'geete yeⁿ'ē 'iiⁿyāⁿ Israel s'eeⁿ. Níícú taachi nduuvídaama sa Pablo miiⁿ caⁿ'á yā chíi yā saⁿ'ā: Ndís'tii vi'í, 'úú ní nguée de'ē vee dííⁿ ndúúcu 'iiⁿyāⁿ ndíí nguée ndúú contra yeⁿ'e costumbre yeⁿ'e chiidá yú chí yeⁿ'ē ndíí vmnaaⁿ. Ní

'iiⁿyāⁿ diíⁿ yā entregar 'úú ndíí yáāⁿ Jerusalén na ta'ā saⁿā romano s'uuⁿ.
 18 Saⁿā s'eeⁿ, ní taachi tuumicadiinúúⁿ sa yeⁿé chi nguée nuūⁿndí ch'ēete yeⁿé neⁿe sa nn'dēechii sa 'úú caati nguée indaaca sa mar 'áámá nuūⁿndí yeⁿé chi 'cuūví. 19 Naati 'iiⁿyāⁿ Israel s'eeⁿ snée yā contra yeⁿé, chíí obligado chi canée chi caⁿá n'diichí saⁿā chi rey César. Nguée dē'ē caavā chi caacá contra 'iiⁿyāⁿ yeⁿé. 20 Chííⁿ chi cucáāvā 'úú chiicá n'diichí ndis'tíi maaⁿ níícu snaaⁿ nī, níícu ndee nduucú nī. Caati cucáāvā chi canee ngiinú cosa yeⁿé Israel, canée chi diíⁿ sufrir ndúúcu cadena 'cūū.

21 Tuu'mí caⁿa sa chii sa Pablo: Nús'uu ní nguée ndííⁿ 'nū recibir carta yeⁿe yāⁿā Judea cucáāvā dii, ndíí nguée ndúú chííⁿ ndaá mar 'áámá vīi yú chi caaⁿmáⁿ yā nuuⁿndí yeⁿé di.
 22 Naati neⁿé 'nū 'caandiveéⁿ 'nū chí nadicadiinuuⁿ di caati cucáāvā chí i'téenu dí. Nús'uu ní déenu 'nū chi nducuéⁿe cuaaⁿ ngaⁿa yā contra cosa chi i'téenu di.

23 Tuu'mi ndēeve yā 'áámá nguuví ní ndaā taaví 'iiⁿyāⁿ na vaacu sa. Ní Pablo miiⁿ caaⁿmaⁿ cuaacú yā ní chííⁿí yā 'iiⁿyāⁿ yeⁿe chi Ndyuūs ngaⁿa yā ntiiⁿnyúⁿ yā ndíí naachi ngíí ndēeve ndíí naachi ngíí 'da'a. Ní ngaⁿa yā nduudu cuaacu yeⁿé Jesús tan'dúúcā chi yeⁿé Moisés. 'Āā 'tííca nūuⁿ yeⁿé profetas chi ca'ā nduudu yeⁿé Dendyuūs. 24 'Iicu náⁿa yā ní i'téenu yā chi caⁿa sa. Niicu náⁿa yā nguée i'téenu yā. 25 Naati nguée nduuvidaamá yā. Ní cuindaacadáámí yā naati vmnááⁿ vmnaaⁿ chí cuindaacadaamí yā Pablo miiⁿ caⁿa sa nduudu 'cūū ndúúcu 'iiⁿyāⁿ s'eeⁿ tan'dúúcā chí caⁿa cuaacu Espíritu

N'dai yeⁿe Ndyuūs cucáāvā profeta Isaías ndúúcu chiidá yú. Ní cāⁿa Espíritu N'dai chuū:

26 Cueⁿe di yāⁿ 'cūū níícu cuuvi di 'iiⁿyāⁿ: N'giindiveéⁿ di ndúúcu veeⁿ di ní nguée tuumicadiinuuⁿ di; inaaⁿ di ndúúcu nduutináaⁿ di ní nguée i'téenu di;

27 caati staava yeⁿe 'iiⁿyāⁿ yāⁿ 'cūū néené chēechi, níícu nguée cuuvi tuumicadíinuuⁿ yā ndúúcu staava yēⁿe yā ndúúcu veéⁿ yā nguée n'dáácā ch'iindiveéⁿ yā, ndíí nguée n'giindiveéⁿ yā ndúúcu veéⁿ yā, nduutináaⁿ yā ní nnduudí maaⁿ, tí nguée chinaáⁿ yā ndúúcu nduutinaáⁿ yā, ndíí nguée nanguēcundíí yā yeⁿé nuuⁿndí yeⁿé yā caatí 'úú idiíⁿ chí nduuví n'dái yā nanduūvā yeⁿé yā.

28 Maaⁿ ní cádiinúúⁿ nī chííⁿ chí Ndyuūs nadach'ēcú yā nuuⁿndí yeⁿé nducyáácá 'iiⁿyāⁿ s'eeⁿ chí nguée yeⁿé ndaata Israel cáāvā chí 'tííca 'iiⁿyāⁿ s'eeⁿ 'caandiveéⁿ yā yeⁿe chuū.

29 Níícu taachi caⁿa sa nduudu 'cūū, 'iiⁿyāⁿ Israel s'eeⁿ caⁿa yā. Néené n'deeé caⁿa yā nguaaⁿ maáⁿ yā.

30 Pablo miiⁿ ní canée yā 'uūví ndúuyū na 'áámá va'ai chí nadííⁿve yā. 'Iiⁿyāⁿ mííⁿ diíⁿ yā recibir ndúcyáácá yā chí nndaā na vaacú yā. 31 Caⁿá yā yeⁿé chí Dendyuūs ngaⁿā ntiiⁿnyúⁿ yā níícu chí'cueeⁿ yā yeⁿé Señor Jesucristo. Caⁿa yā ndúúcu nducyaaca 'iiⁿyāⁿ. Mar 'áámá 'iiⁿyāⁿ nguée chíicatáaⁿ yā yēⁿe yā.

PABLO IDINGUÚⁿ YĀ CARTA 'CŪŪ YEⁿE 'IIⁿYĀⁿ CHI SNÉE YĀ YĀĀⁿ ROMA

**Pablo idinguúⁿ yā yeⁿe 'iiⁿyāⁿ
yeⁿe yaacū yeⁿe yāāⁿ Roma**

1 'Úú Pablo 'úú ní 'úú dichíí'vē
Señor Jesucristo. Ndyuūs
yaa'ví yā 'úú ni ndēēvé yā 'úú. Ní
dichó'o yā 'úú chi cuuví apóstol chi
candéé nduudu yeⁿé Ndyuūs chi
nduudu yeⁿe evangelio yeⁿe chi
nanguaⁿai 'iiⁿyāⁿ.

²Ndyuūs ní caⁿa yā n'deeē n'dái
tiempo chi 'āā chó'o'o chi ca'a yā
evangelio chí nduudu cuaacu chi
nadanguáⁿai yā taachi profetas
ngaⁿá yā yeⁿē. Ní dingúúⁿ yā na
libro yeⁿe Dendyuūs yeⁿē chúū.

³Nduudu 'cūū chi evangelio ní
yeⁿe Señor Jesucristo yeⁿe yú
chi Daiya Dendyuūs. Cristo ní
ndāa yā iⁿ'yeeⁿdí 'cūū ndúúcu
cuerpo tan'dúúca 's'uúúⁿ cáávā
na ndaata yeⁿē rey David. ⁴Ní
cucááva Espíritu chi n'dai taavi
yeⁿe Cristo, Cristo dicuaacú yā chí
Daiyá Ndyuūs ndúúcu poder yeⁿé
Ndyuūs chi ch'ēēte taavi ca taachi
nducuéⁿ yā yeⁿe nguaaⁿ tináⁿā.

⁵Ní cáávā Cristo miⁿ Ndyuūs tee
yā 'aama favor 'úú ti dicho'o yā
'úú chi 'úú cuuvi apóstol yeⁿé yā
cáávā chi duuchi Cristo. Ní cáávā

chi 'úú cuuvi 'cuuⁿmíⁿ 'iiⁿyāⁿ yeⁿe
nducuéⁿē nación táácā cuuvi
cu'téenu yā Ndyuūs. Ní 'caandiveéⁿ
yā nduudu yeⁿe yā. ⁶Ní ndís'tiī ní
yeⁿe 'iiⁿyāⁿ chi i'téenu yā Jesucristo
caati Ndyuūs yaa'ví yā ndís'tiī chi
cuuvi yeⁿé Cristo ndís'tiī.

⁷'Úú idinguúⁿ carta 'cūū yeⁿe
nducyáácā ndís'tiī chi snée nī na
yāāⁿ Roma, ndís'tiī chi Ndyuūs neⁿe
yā ní yaa'ví yā ndís'tiī chi cuuví
yeⁿé yā ndís'tiī. Neⁿé chi Ndyuūs
Chiida yú ndúúcu Señor Jesucristo
tée yā ndís'tiī vaadi n'dai ca yeⁿé yā
ndúúcu vaadi 'diiⁿ yeⁿé yā.

Pablo neⁿe yā caⁿá yā yāāⁿ Roma

⁸Vmnááⁿ vmnaaⁿ ca'á gracias
Ndyuūs cáávā Jesucristo cucáávā
nducyaa ca ndís'tiī caati 'iiⁿyāⁿ yeⁿe
núúⁿmáⁿ iⁿ'yeeⁿdí ch'iindiveéⁿ yā
tan'dúúca chi ndís'tiī i'téenu nī
Jesucristo ní ngaⁿá yā yeⁿe ndís'tiī.

⁹'Úú ndúúcu nuuⁿmaⁿ staavā yeⁿé
dichii'vé Ndyuūs. Ní candéé nduudu
ngai yeⁿe evangelio yeⁿe Daiyá
yā. Ndyuūs deenú yā chi 'úú cueⁿe
daāⁿmaⁿ nan'gaacú yeⁿe ndís'tiī ní
taachí ngaⁿāngua'á ní ngaⁿāngua'á
cucáávā ndís'tiī. ¹⁰Ní ngiiicā Ndyuūs
chi nduuti chi neⁿé yā chi tée yā

lugar 'úu chi tiempo 'cūu cuuví ndaá nanááⁿ ndís'tií. ¹¹Neⁿ'e cá snaáⁿ ndís'tií ní cunneé ndís'tií ndúúcū Espíritu N'dai yeⁿ'é Ndyuūs chi cu'téenu cá nī ní 'íicú ndís'tií diitūu 'cuɛetinée nī ndúúcū chi i'téenu nī. ¹²Ní 'íicú ndís'tií ndúúcū 'úu ca'á díttuu yú 'aama yú taama yú ndúúcū chi i'téenu yú ti daama daama i'téenu yú.

¹³Ndís'tií hermanos yeⁿ'é, neⁿ'é chí cádiinuuⁿ ndís'tií chi neené n'dee cuuví neⁿ'é chíi n'diichí ndís'tií naati ndii mááⁿ nguée ngii chí chíi. Neⁿ'é n'diichí ndís'tií caati tan'dúúcā chi véé n'gui'i yeⁿ'e cosecha 'tiicá ntúūⁿ ndís'tií cuuvi tan'dúúcā n'gui'i yeⁿ'e cosecha yeⁿ'e ntiiⁿnyuⁿ yeⁿ'é caati 'tíicā véé n'gui'i yeⁿ'é nguaaⁿ 'iiⁿyāⁿ yeⁿ'e tanáⁿā naciones yeⁿ'e iⁿ'yeeⁿdí 'cūū. ¹⁴Ní 'úu cánée chi cunneé 'iiⁿyāⁿ chi yeⁿ'e ndaata yeⁿ'é ndúúcū 'iiⁿyāⁿ chi yeⁿ'e tanáⁿā naciones, 'iiⁿyāⁿ chi deenu ndúúcū 'iiⁿyāⁿ chi nguée deenū. ¹⁵Ní 'tiicá ntúūⁿ 'úu caneé listo chi caaⁿmáⁿ nduudu cuaacu yeⁿ'e evangelio chi nanguaⁿ'ai 'iiⁿyāⁿ. Ní caaⁿmáⁿ nanááⁿ ndís'tií chi snee nī na yāāⁿ Roma.

Poder yeⁿ'e evangelio chí nduudu ngai yeⁿ'é Cristo

¹⁶Ní nguée 'cuinaáⁿ chi caaⁿmáⁿ nduudu cuaacu yeⁿ'e evangelio ti nduudu miiⁿ ní poder yeⁿ'é Ndyuūs. Ní nanguaⁿ'āi nducyáácá 'iiⁿyāⁿ chi i'téenu yā Cristo, vmnááⁿ vmnaaⁿ 'iiⁿyāⁿ chi 'iiⁿyāⁿ Israel chi judío s'eeⁿ. 'Tiicá ntúūⁿ 'iiⁿyāⁿ s'eeⁿ chi nguée yeⁿ'e ndaata Israel. ¹⁷Ní nduudu cuaacu yeⁿ'e evangelio mífⁿ ní n'giⁿ'i chi Ndyuūs ní diiⁿ

yā aceptar s'uuúⁿ chi cuuvi yeⁿ'é yā s'uuúⁿ cáávā chi i'téenu yú Jesucristo, ni dámaaⁿ cáávā chí i'téenu yú Jesucristo. 'Tíicā canee nguūⁿ na libro yeⁿ'é Ndyuūs: 'Iiⁿ'yāⁿ chi Ndyuūs dífⁿ yā aceptar chi cuuvi yeⁿ'é yā, 'cuɛetineé yā cucáávā chi i'téenu yā.

Núúⁿndí yeⁿ'e 'iiⁿ'yāⁿ chí snee yā na iⁿ'yeeⁿdí 'cūū

¹⁸Déenu yú chi Ndyuūs ca'á yā castigo chi neené díttuu nducyaaca 'iiⁿ'yāⁿ chi nguée n'daacā idiíⁿ yā ndúúcū 'iiⁿ'yāⁿ chi dinuuⁿndí yā. Ní cucáávā nuuⁿndi yeⁿ'é yā nguɛe n'gúúⁿ chi 'iiⁿ'yāⁿ cuuví deenú yā nduudu cuaacu yeⁿ'é Ndyuūs. Castigo yeⁿ'é yā ngíicá ndí na va'ai chɛeti nguuvi. ¹⁹Ní 'iiⁿ'yāⁿ s'eeⁿ chí deenu n'dái yā cuuvi cadíinuuⁿ yā chí yeⁿ'e Ndyuūs caati Ndyuūs chíⁿ'í yā 'iiⁿ'yāⁿ s'eeⁿ chuū. ²⁰Denduⁿu chi yeⁿ'é Ndyuūs chi nguée inaaⁿ yú cuuvi déenu yú cucáávā nducuéⁿ chí Ndyuūs din'dái yā ndúúcū poder yeⁿ'é yā chí 'áámá cānee. Ní chuū cuuví snaaⁿ 'iiⁿ'yāⁿ ndii tiempo chi Ndyuūs din'dái yā iⁿ'yeeⁿdí. Ní deenú yā chi Ndyuūs ní Ndyuūs nuuⁿmáⁿ cuaacu. Ní nguée cuuví caaⁿmáⁿ yā chi nguée cuuví n'diichí yā Ndyuūs. ²¹Iiⁿ'yāⁿ s'eeⁿ n'diichí yā Ndyuūs naati nguée chí'téenu yā Ndyuūs miiⁿ chí ch'ɛete yā ní nguée ca'á yā gracias Ndyuūs. Nguée 'tíicā dífⁿ yā. Naati nadicádíinuuⁿ yā yeⁿ'e denduⁿu chi nguée dichíⁿ'vɛ chí yeⁿ'e maāiⁿ. Ní cáávā chí necio yā ch'ɛetinée yā na maāiⁿ. ²²Iiⁿ'yāⁿ s'eeⁿ ní ngaⁿ'a yā chí deenu ca yā naati dífⁿ yā chí tonto yā. ²³Ní n'daáⁿ yā vaadī dɛɛve ngii yeⁿ'é Ndyuūs

chi canduuchí yā cueⁿe daāⁿmaⁿ
cáāvā santos ídolos o imágenes chi
idin'dái 'iiⁿyāⁿ, santos chi tan'dúúcā
'iiⁿyāⁿ chi n'díí. 'Tíícā santos miiⁿ
ndúúcū ídolos yeⁿe 'yáádā, ndúúcū
ídolos yeⁿe cúú ndúúcū ídolos yeⁿe
'iiti chi cuūuⁿ cá'a tī.

²⁴Ní cáāvā chi 'iiⁿyāⁿ s'eeⁿ ni
nguéeⁿ neⁿe yā tuumicadínuuⁿ yā
ní Ndyuūs s'neeⁿ yā chi dííⁿ yā
dendú'ū chi nguéeⁿ n'daacā chi
neⁿe diiⁿ cuerpo yeⁿe yā. Ní dííⁿ
yā ndúúcū cuerpo yeⁿe yā nguááⁿ
maáⁿ yā dendu'ū chí vaadi 'cuíínuuⁿ.

²⁵Ní diiⁿ yā 'túúcā ti nguéeⁿ i'téenu
yā nduudu cuaacu yeⁿe Ndyuūs
ti i'téenu yā nduudu yaadi. Ní
dich'etétē yā dendu'ū chi Ndyuūs
din'dái yā naati nguéeⁿ dich'etétē yā
maáⁿ Ndyuūs chi din'dái yā dendu'ū.
Nducyáácā 'iiⁿyāⁿ cuéⁿe daāⁿmaⁿ
canéeⁿ chi dich'etétē yā Ndyuūs.
'Tíícā canee chi dííⁿ yā.

²⁶Ní cáāvā chi dííⁿ yā 'tuucā
Ndyuūs dííⁿ yā ch'i'neéⁿ maáⁿ yā
'iiⁿyāⁿ chi dííⁿ yā dendu'ū chi nguēⁿ
n'daacā chi 'cuináaⁿ yā. Ní n'daataá
s'eeⁿ nguéeⁿ caⁿá yā ndúúcū saⁿa
naati caⁿá yā ndúúcū n'daataá ní
dííⁿ yā tan'dúúcā chi ch'iindivaacú
yā ndúúcū vi'í. ²⁷Tiicā ntúūⁿ saⁿa
s'eeⁿ nguéeⁿ caⁿá yā ndúúcū n'daataá
naati caⁿá yā ndúúcū saⁿa ni dííⁿ
yā tan'dúúcā chi ch'iindivaacú yā
ndúúcū vi'í. Dííⁿ yā nguaaⁿ maáⁿ yā
cosas chi vaadi 'cuíínuuⁿ ní sta'á yā
castigo na cuerpo yeⁿe yā yeⁿe chi
nguēⁿ n'daacā chi dííⁿ yā.

²⁸Ní cáāvā chi nguéeⁿ neⁿe yā
ntiinaáⁿ yā Ndyuūs, Ndyuūs ch'i'neéⁿ
yā 'iiⁿyāⁿ chi dííⁿ yā nducuéⁿe chi
'iiⁿyāⁿ s'eeⁿ nadacadíínuuⁿ yā chi
nguēⁿ n'daacā. Ní dííⁿ yā cosas chi

nguéeⁿ canee chi dííⁿ yā. ²⁹Iiⁿyāⁿ
s'eeⁿ néené nadacadiinúúⁿ yā yeⁿe
nducuéⁿe chi nguēⁿ n'daacā. Ní caⁿá
yā ndúúcū n'daataá o saⁿa chi nguēⁿ
yeⁿe yā. Ní neené yaadii'yā yā ní
dííⁿ yā cosas yeⁿe yāáⁿnguiniūⁿ.
Ní neⁿe yā dendú'ū chi nguēⁿ yeⁿe
yā. Ní neene idííⁿ yā cosa chi nguēⁿ
n'daacā ti neⁿe yā diiⁿ yā 'tíícā. Ní
neené nnguēⁿ yā. Ní n'giiⁿnúⁿ yā
'iiⁿyāⁿ. Ní neené n'gēecu cheendí
yā ndúúcū 'iiⁿyāⁿ, ní nginnche'í
yā 'iiⁿyāⁿ. Ní néené nguēⁿ n'daacā
staava yeⁿe yā. Ní neené n'gēecu
cheendí yā yeⁿe chi 'iiⁿyāⁿ diiⁿ yā
yeⁿe chi nguēⁿ n'daacā. ³⁰Ngaⁿá yā
yeⁿe chi nguéeⁿ n'daacā yeⁿe taama
yā. Nguéeⁿ neⁿe yā Dendyuūs. Ngaⁿá
yā nanááⁿ 'iiⁿyāⁿ yeⁿe s'uuúⁿ ní ngii
'cuináaⁿ 'iiⁿyāⁿ yeⁿe s'uuúⁿ. Maáⁿ
yā dich'etétē yā 'iiⁿyāⁿ. Ní idiyaadí
taaví yā ní nadacadíínuuⁿ yā cosa
chí ngai chi nguēⁿ n'daacā. Ní nguéeⁿ
i'téenu yā yeⁿe chēecú yā yeⁿe
chiida yā. ³¹Nguéeⁿ itúúmícadíínuuⁿ
yā, nguéeⁿ idííⁿ yā chi ngāⁿa yā chi
dííⁿ yā. Nguéeⁿ idinēⁿe yā 'iiⁿyāⁿ ní
nguéeⁿ déenu yā nadach'ēecú yā
nuuⁿndi yeⁿe 'iiⁿyāⁿ áará chí ngaⁿa
yā chi nadach'ēecú yā yeⁿe yā. Ní
nguéeⁿ ya'ái iinú yā 'iiⁿyāⁿ. ³²Iiⁿyāⁿ
s'eeⁿ néené déenu yā chí Ndyuūs
ngaⁿa yā chi canéeⁿ chi diiⁿ yā. Ní
déenu yā chi 'iiⁿyāⁿ chi nguéeⁿ dííⁿ
'tíícā, tuu'mí chí 'cuūvi yā naati
icandíicá yā chi idííⁿ yā 'tíícā. Yeenú
taaví yā taachi inaáⁿ yā 'iiⁿyāⁿ chi
dííⁿ yā 'tíícā.

Ndyuūs ináaⁿ yā 'iiⁿyāⁿ yeⁿe
nuuⁿndi ní yeⁿe chi cuaacu

2 Ndís'tii amigos yeⁿe, é'áá
n'diichí ní de'ē chi idiiⁿ

taamá yā o 'āā du'ú nūuⁿ 'iiⁿyāⁿ? Véé nuuⁿndi yeⁿe maáⁿ yā taachi dííⁿ yā 'tífcā. Taachi n'diichí yā nuuⁿndi chi idiíⁿ taamá yā, ní maáⁿ yā dííⁿ yā 'tiicā, tuuⁿmi ní dich'eté maáⁿ yā nuuⁿndi yeⁿe yā. ²Deenu yú chi Ndyuūs dííⁿ yā cosa chi cuaacu taachi dííⁿ yā condenar 'iiⁿyāⁿ chi dííⁿ yā chi 'túúcā. ³¿Áá 'aacu nī chi Ndyuūs nguée inaaⁿ yā nuuⁿndi yeⁿe 'iiⁿyāⁿ chi idiíⁿ yā 'túúcā taachi n'diichí yā nuuⁿndi yeⁿe taamá yā? Nguéé 'tífcā. ⁴¿Áá nguée inee yiinú nī yeⁿe Ndyuūs cucáávā chi ya'ai 'iinú yā ndís'tii ní ndai yā ndúúcū ndís'tii ní tee yā ndís'tii n'dee n'dái favores yeⁿe yā ndúúcū vaadí 'diííⁿ yeⁿe yā? Ní nguée dííⁿ nī cuenta chi Ndyuūs tee yā ndís'tii favores yeⁿe yā ní n'gíⁿí yā ndís'tii taaca cuuvi ndaacadaamí nī yeⁿe nuuⁿndi chi idiíⁿ nī. ⁵Naati 'iiⁿyāⁿ chi dííⁿ yā 'túúcā ní dich'echi yā staava yeⁿe yā. Ní nguée ndaacadaamí yā yeⁿe nuuⁿndi yeⁿe yā. Cáávā chi idiíⁿ yā 'tífcā ní nduuvadáámá castigo yeⁿe maáⁿ yā nguuví taachi Ndyuūs dííⁿ yā juzgar nuuⁿndi yeⁿe yú ní tee yā castigo yeⁿe chi dííⁿ yú ndúúcū vaadí cuaacu. ⁶Ní Ndyuūs ní ca'a yā ca'áámá cā'aama 'iiⁿyāⁿ nadíí'vē yā yeⁿe chi dííⁿ yā. ⁷Ní ca'a yā vida cueⁿe daāⁿmaⁿ 'iiⁿyāⁿ chi chéé yā chi dííⁿ yā nducuéⁿē chi n'daacā, ní n'nuúⁿ yā, ní dííⁿ yā nducuéⁿē chi yeⁿe va'ai ch'eti nguuví, ní dííⁿ yā chi honrado yā. ⁸Naati 'iiⁿyāⁿ chi neⁿe nducuéⁿē yeⁿe maáⁿ yā ní nguée i'téenu yā nduudu cuaacu yeⁿe Ndyuūs naati dííⁿ yā nducuéⁿē chi nguéé n'daacā, Ndyuūs nguée canee yiinú yā yeⁿe 'iiⁿyāⁿ s'eeⁿ.

Ní ca'á yā castigo 'iiⁿyāⁿ s'eeⁿ. ⁹Ní nducyáácá 'iiⁿyāⁿ chí nguée n'daacā idiíⁿ yā canée chi n'dee n'dái 'cuéénú yā cuuvi, vmnááⁿ vmnaaⁿ 'iiⁿyāⁿ chi yeⁿe ndaata Israel chí judíos ní cuayiivi ní 'iiⁿyāⁿ chi nguée yeⁿe ndaata Israel. ¹⁰Naati Ndyuūs dííⁿ yā chí d'evé 'iiⁿyāⁿ ní dich'eté yā 'iiⁿyāⁿ ní ca'a yā vaadí 'diííⁿ yeⁿe nducyáácá 'iiⁿyāⁿ chí din'daacá yā, vmnááⁿ vmnaaⁿ 'iiⁿyāⁿ yeⁿe ndaata Israel ní cuayiivi 'iiⁿyāⁿ chí nguée yeⁿe ndaata Israel.

¹¹Caati nanááⁿ Ndyuūs ní 'āā daamá nūuⁿ nducyaaca 'iiⁿyāⁿ. ¹²Ní 'iiⁿyāⁿ chí idinuuⁿndí yā chí nguée ndúúcū ley yeⁿe Moisés miiⁿ ní cuuvi ndái yā nguée ndúúcū ley miiⁿ. Ní 'iiⁿyāⁿ chí idinuuⁿndí yā ní ndéé yā ley yeⁿe Moisés miiⁿ tuuⁿmi ní ley miiⁿ nūuⁿ ní cuuví yā castigo. ¹³Caati nguée cuaáⁿ Ndyuūs 'iiⁿyāⁿ chí dámaaⁿ chí n'diichí yā ley miiⁿ naati Ndyuūs cuaáⁿ yā 'iiⁿyāⁿ chí dííⁿ yā tan'dúúcā chí ngaⁿa ley miiⁿ. ¹⁴Ní taachi 'iiⁿyāⁿ chí nguée yeⁿe ndaata Israel s'eeⁿ ní nguée déenu yā yeⁿe ley Moisés, naati neⁿe yā cadiinúúⁿ yā dííⁿ yā cosa chí cuaacu tan'dúúcā chí ngaⁿa ley miiⁿ, 'áará chí nguée ndúúcū ley miiⁿ véé 'aama ley yeⁿe yā chí 'āā vi'í cā nguaaⁿ maáⁿ yā. ¹⁵Ní ch'iⁿí yā cáávā chí idiíⁿ yā chí ley yeⁿe Ndyuūs tan'dúúcā chí canée nguúⁿ na staava yeⁿe yā 'tífcā canée. Ní chiiⁿ chí dííⁿ yā ní 'áámá prueba yeⁿe chuú ní chiiⁿ chí nadacadiinúúⁿ yā dííⁿ yā condenar maáⁿ yā o caaⁿmaⁿ cuaacu yeⁿe maáⁿ yā. ¹⁶Ní taachi ndaá nguuví chí Ndyuūs dííⁿ yā juzgar cáávā Jesucristo miiⁿ nducyáácá 'iiⁿyāⁿ

ndúúcū nducuéⁿē chi yeⁿe 'iⁿyāⁿ maáⁿ yā canúúⁿ n'deⁿei na staava yeⁿé yā, tuuⁿmi ní Ndyuūs diiⁿ yā chuū ndúúcū nduudu cuaacu yeⁿe yā chi nadanguaⁿ'ai 'iⁿyāⁿ. Chuū ní nduudu cuaacu chi 'úú Pablo ngaⁿá.

**'Iⁿyāⁿ Israel s'eeⁿ ndúúcū
ley yeⁿe Moisés**

¹⁷Diiⁿ ní ngaⁿa di chi 'iⁿyāⁿ Israel di. Ní ngaⁿa di chi 'i'téénú dí ley yeⁿe Moisés ní dich'etē maāⁿ di dii. Ní dii ngaⁿa di chi yeⁿé Ndyuūs dii. ¹⁸¿Áá déénú di dē'e chi neⁿe Ndyuūs ní ley chi 'cuuⁿmiⁿ di chi cuuvi in'nuuⁿ di denduⁿū chi n'daacā ca chi diiⁿ di? ¹⁹¿Áá déénu di chi cuaacu chi cuuvi ca'cuaeⁿ di 'iⁿyāⁿ chi ngueenááⁿ o 'iⁿyāⁿ chi nguée dē'e vee deenu, ní ndēe di nduudu chi tan'dúúcā chidēeve nanááⁿ 'iⁿyāⁿ chi ngiica yā na maāiⁿ? ²⁰¿Áá i'teenu di chi cuuví diiⁿ di ca'cuaeⁿ di 'iⁿyāⁿ chi tonto yā ní táácā chi ngi'cuaeⁿ di da'caiyāā? ¿Ní ndúúcū ley yeⁿe di véé nducuéⁿē chi diiⁿ chi cuuví deenu di vaadī cuaacu? ²¹Díí chi ngi'cuaeⁿ di tanáⁿa yā, ¿dē'e cáávā chi nguée ngi'cuaeⁿ maāⁿ di dii? Díí chi ngaⁿa di 'iⁿyāⁿ chi nguée canée chi diduucú yā, ¿dē'e cáávā chi diduucú di? ²²Díí saⁿā o n'daataá chi ngaⁿa di chi 'iⁿyāⁿ nguée caⁿá yā ndúúcū isaⁿā o n'daataá chi nguée yeⁿé yā, ¿dē'e cáávā chí maaⁿ dí caⁿa di ndúúcū n'daataá o isaⁿā chi nguée yeⁿe di? Díí chi nguée ngii n'diichí di santos ídolos, ¿dē'e cáávā chi diduucu di vaadī 'cuiica yeⁿe yáacú yeⁿe santos ídolos? ²³Díí chi ngaⁿa maaⁿ di yeⁿe di chi ch'etē di cucáávā chi canee di ndúúcū ley yeⁿé Ndyuūs

¿dē'e cáávā chi nguée diiⁿ di honrar Ndyuūs? 'Tiicá diiⁿ di caati nguée diiⁿ di tan'dúúcā chi ngaⁿa ley chi Ndyuūs tee yā dii. ²⁴Canée nguūⁿ na libro yeⁿé Ndyuūs 'tiicā: 'Iⁿyāⁿ chi nguée yeⁿe ndaata Israel nguée n'daacā ngaⁿa yā yeⁿe chi duuchi Ndyuūs. Ní chuū ní nuuⁿndi yeⁿe di.

²⁵Cuaacu níⁿnyúⁿ chí ley yeⁿe circuncisión yeⁿe saⁿa Israel s'eeⁿ ní dichííⁿvē cáávā di nduuti chi diiⁿ di chi ngaⁿa ley yeⁿe Moisés. Ní ndúúti chi nguée diiⁿ di chi ngaⁿa ley miiⁿ, tuuⁿmi ní canee di tan'dúúcā saⁿā chi nguée circuncidado di. 'Tiicā canee di. ²⁶Ní ndúúti chí 'áamá saⁿā chi nguée yeⁿe ndaata Israel ní nguée circuncidado yā tan'dúúcā chi ngaⁿa ley yeⁿe Moisés, naati saⁿā miiⁿ diiⁿ sa chi ngaⁿa ley miiⁿ, saⁿā miiⁿ 'aara chi nguée circuncidado sa, Ndyuūs dííⁿ yā cuenta yeⁿe saⁿā miiⁿ chí tan'dúúcā chi circuncidado, 'tiica sa. ²⁷Saⁿā chi nguée circuncidado na cuerpo yeⁿe sa ní diiⁿ sa tan'dúúcā chi ngaⁿa ley, saⁿā miiⁿ diiⁿ sa condenar dii chi nguée diiⁿ di tan'dúúcā chi ngaⁿa ley 'áará chí véé ley yeⁿe di ní canee circuncidado di na cuerpo yeⁿe di. ²⁸Cuaacu níⁿnyúⁿ nguée nduudu cuaacu chí 'áamá saⁿā ní saⁿā Israel chí ndíí sa circuncidado ndúúcū seña na cuerpo yeⁿe sa. Ndíí nguée ndúú chí nduudu cuaacu chí circuncisión chí seña chí canee na cuerpo yeⁿe sa diiⁿ chí Israel sa. ²⁹Nguée 'tiicā. Saⁿā chí cuaacu níⁿnyúⁿ chí saⁿā Israel miiⁿ, saⁿā miiⁿ ní saⁿā chí circuncidado na staava yeⁿe sa. Chuū ní circuncisión chí cuaacu níⁿnyúⁿ chí

cuaacu. Nguéé tan'dúúcā chi canee nguūⁿ na ley yeⁿe sa naati chi yeⁿe Espíritu N'dai yeⁿé Ndyuūs. Saⁿā chi circuncidado na staava yeⁿe sa, Ndyuūs n'diichinee yā chi saⁿa n'dai sa. Nguéé cuuvi n'diichinee saⁿā s'eeⁿ yeⁿe iⁿ'yeeⁿdí 'cūū.

3 Tuu'mi ní ðde'ē chíí'vē cáávā chi saⁿā miiⁿ chi saⁿā yeⁿe ndaata Israel? ¿O dé'ē dichíí'vē nduuti chi saⁿā ní circuncidado sa? ²N'dáácā n'dai dichíí'vē cáávā n'dee n'dái razones. Vmnááⁿ vmnaaⁿ Ndyuūs s'neeⁿ yā nduudu cuaacu yeⁿe ley yeⁿe yā vmnaaⁿ ndís'tií chi 'iⁿ'yāⁿ Israel. ³Ní nduuti chi náⁿā 'iⁿ'yāⁿ Israel nandaacadaamí yā yeⁿe chi i'téénu yā, ¿'áá cucáávā chiiⁿ chí dííⁿ Ndyuūs chi nguéé dichíí'vē chiiⁿ chi Ndyuūs ngaⁿa yā chi caⁿá yā diiⁿ yā? Nguéé 'tíicā. ⁴Ndyuūs ní cuaacu ní dííⁿ yā nducueⁿē chi cuaacu naati nducyaaca 'iⁿ'yāⁿ yeⁿe iⁿ'yeeⁿdí 'cūū ngaⁿa nduudu yaadi. Canéé nguūⁿ na libro yeⁿe Dendyuūs ní Ndyuūs ngaⁿá yā 'tíicā:

Canee chi 'cuuⁿ'miⁿ di 'iⁿ'yāⁿ cáávā nduudu chi ngaⁿa di chí díí diiⁿ di chi cuaacu ní naachi n'diichí yā dii, deenú yā chí díí ní diiⁿ di chi cuaacu.

⁵Ní taachi diiⁿ yú cosas chi nguéé n'daacā, tuu'mi ní más ca 'cuuⁿ'miⁿ chi Ndyuūs chí cuaacu, ðde'ē cuuvi caaⁿ'maⁿ yú? ¿'Áá caaⁿ'maⁿ yú chi Ndyuūs nguéé dííⁿ yā cosas chi cuaacu taachi dííⁿ yā castigar s'uūuⁿ? Nguéé 'tíicā. ('Úú ngaⁿá tan'dúúcā chi ngaⁿa 'iⁿ'yāⁿ yeⁿe iⁿ'yeeⁿdí 'cūū.) ⁶Nduuti chi Ndyuūs nguéé dííⁿ yā tanducueⁿe chi

n'daacā, ðtáácā cuuvi diiⁿ yā juzgar nuuⁿndi yeⁿe 'iⁿ'yāⁿ yeⁿe iⁿ'yeeⁿdí? Dííⁿ yā juzgar 'iⁿ'yāⁿ caati dííⁿ yā tanducueⁿē chi n'daacā.

⁷Ní ndúúti chi nduudu yaadi miiⁿ yeⁿe yú dichíí'vē chi cuuvi dich'ēete ca yú Ndyuūs, ðde'ē cúúvi chi Ndyuūs dííⁿ yā juzgar nuuⁿndi yeⁿe yú chi nuuⁿndi yú? ⁸¿De'ē cúúvi chi nguéé ngaⁿa yú 'tíicā? S'uúúⁿ ní diiⁿ yú cosas chi nguéé n'daacā ní cuuvi candēe cosas chi n'daacā yeⁿe. 'Tíicā ngaⁿa tanáⁿa yā chi s'uúúⁿ ngi'cueeⁿ yú 'tíicā ní nguéé n'daacā yeⁿe yú. 'Iⁿ'yāⁿ s'eeⁿ ní canee chi condenado yā.

Nducyáácá 'iⁿ'yāⁿ ní dinuuⁿndi yā

⁹¿De'ē tuu'mi ngaⁿa yú? ¿'Áá n'daacā ca s'uúúⁿ chi 'iⁿ'yāⁿ Israel s'uúúⁿ nguéé ti 'iⁿ'yāⁿ chi nguéé 'iⁿ'yāⁿ Israel? Nguéé 'tíicā. Ndís'tií deenú ní tan'dúúcā chi ngaⁿá chí s'uúúⁿ dinuuⁿndi yú tan'dúúcā 'iⁿ'yāⁿ chi nguéé yeⁿe 'iⁿ'yāⁿ Israel dinuuⁿndi yā. Ní nducyaaca 'iⁿ'yāⁿ dinuuⁿndi yā ní na poder yeⁿe nuuⁿndi snée yā. ¹⁰Canéé nguūⁿ na libro yeⁿe Dendyuūs 'tiicā:

Nguéé 'iⁿ'yāⁿ chi n'dái yā, nguéé mar 'áámá yā.

¹¹Nguéé véé mar 'áámá 'iⁿ'yāⁿ chi tuumicadínuuⁿ yā, nguéé véé mar 'áámá 'iⁿ'yāⁿ chi in'nuúⁿ yā Ndyuūs.

¹²Nducyáácá yā ndaacadaamí yā yeⁿe Ndyuūs, nducyáácá yā dííⁿ yā cosas chi nguéé n'daacā. Nguéé 'áámá yā chi n'daacā idiíⁿ yā, nguéé ndíí mar 'áámá yā.

¹³Daandú yā canéé tan'dúúcā 'áámá yáinyāⁿ chi candá'āi,

'tíicā daandú yā; ní nginnche'él yā 'i'i'yāⁿ ndúúcū cheendi yā. Ní chēeti cheendí yā ní snúū tan'dúúcā chi veneno yeⁿ'ē cúú 'tíicā cheendí yā ndúúcū nduudu chi tan'dúúcā veneno, 'tíicā.

¹⁴ Dámaāⁿ ngaⁿ'á yā ndúúdú taaⁿ contra yeⁿ'e 'i'i'yāⁿ ndúúcū nduudu chi nguéeⁿ n'daacā.

¹⁵ Ní neene nadacadíínuuⁿ yā chi 'caaⁿ'nuⁿ yā 'i'i'yāⁿ.

¹⁶ Ní nducuéⁿ'ē cuaaⁿ naachí caⁿ'á yā, dííⁿ yā chi 'i'i'yāⁿ cunnccāⁿ 'cuenú yā cuuvi ní dituúví yā nducuéⁿ'ē dendu'u ndúúcū vaadi cadíínuuⁿ yeⁿ'é 'i'i'yāⁿ s'eeⁿ.

¹⁷ Ní nguéeⁿ déenu yā yeⁿ'e yúúní chi candē na vaadi 'diíiⁿ yeⁿ'é Ndyuūs.

¹⁸ Ní nguéeⁿ nadacadíínuuⁿ yā chi canee chi 'va'a yā Ndyuūs.

¹⁹ Maaⁿ ní s'uuúⁿ deenu yú chi tanducuéⁿ'ē chi canée nguūⁿ na ley yeⁿ'e Moisés ní cáávā 'i'i'yāⁿ chi n'gēetinee yā ndúúcū ley miiⁿ. Ní cáávā 'i'i'yāⁿ s'eeⁿ 'āā ntéeⁿ caaⁿ'maⁿ yā nanááⁿ Ndyuūs chi nguēe deenú yā yeⁿ'ē. Ní 'íicú ley miiⁿ diíiⁿ chi Ndyuūs caⁿ'á yā n'diichi yā nuuⁿndi yeⁿ'é nducyaaca 'i'i'yāⁿ yeⁿ'e núúⁿmáⁿ iⁿ'yeeⁿdí. ²⁰ Ní Ndyuūs nguéeⁿ dííⁿ yā recibir 'i'i'yāⁿ cáávā chi dííⁿ yā tan'dúúcā chi ngaⁿ'a ley miiⁿ caati ley miiⁿ n'g'iⁿ'i s'uuúⁿ chi véeⁿ nuuⁿndi yeⁿ'e yú nanááⁿ Ndyuūs.

Ndyuūs nadinguaⁿ'ai yā 'i'i'yāⁿ caati i'téenu yā Jesucristo

²¹ Maaⁿ ní nduudu cuaacu yeⁿ'é Ndyuūs n'giⁿ'i s'uuúⁿ chi Ndyuūs dííⁿ yā recibir s'uuúⁿ manera chi 'āā

vi'í cá yeⁿ'e ley miiⁿ. Ní canée nguūⁿ na libro yeⁿ'é ley yeⁿ'e Ndyuūs yeⁿ'e chuū naachi saⁿ'a profetas ngaⁿ'a yā nduudu cuaacu yeⁿ'e chuū.

²² Ndyuūs dííⁿ yā recibir nducyáácá 'i'i'yāⁿ dámaāⁿ cáávā chi i'téenu yā Jesucristo ní nanááⁿ Ndyuūs nducyáácá 'i'i'yāⁿ yeⁿ'e núúⁿmáⁿ iⁿ'yeeⁿdí 'āā daamá nūuⁿ. Ndyuūs nguéeⁿ n'dáaⁿ yā. ²³ Ní nducyáácá 'i'i'yāⁿ yeⁿ'e núúⁿmáⁿ iⁿ'yeeⁿdí ní dinuuⁿndí yā ní nguéeⁿ cuuvi dííⁿ 'i'i'yāⁿ s'eeⁿ chi dēeve n'dai tan'dúúcā Ndyuūs chi dēeve n'dai. ²⁴ Naati Ndyuūs cáávā chi n'dai taaví yā dííⁿ yā recibir 'i'i'yāⁿ cucáávā Jesucristo chi nadanguáⁿ'ai yā 'i'i'yāⁿ. Ní Jesucristo nadíí've yā nuuⁿndi yeⁿ'é 'i'i'yāⁿ lado yeⁿ'é 'i'i'yāⁿ. ²⁵ Ní Ndyuūs dicho'ó yā Jesucristo iⁿ'yeeⁿdí 'cūū lado yeⁿ'e ofrenda chi ch'iⁱ yā caava nuuⁿndi yeⁿ'e nducyáácá 'i'i'yāⁿ. Ní cáávā chi ch'iⁱ Cristo, Cristo cuuvi nadach'ēecú yā nuuⁿndi yeⁿ'e nducyaaca 'i'i'yāⁿ chi i'téenu yā Jesucristo. 'Tíicā Ndyuūs ch'iⁱ'i yā 'i'i'yāⁿ táácā cuuvi ndaa yā nanááⁿ Ndyuūs. Ní tiempo chi chó'oo ní Ndyuūs chi n'dai taavi ch'iⁱ'i yā 'i'i'yāⁿ chi Ndyuūs dííⁿ yā cosas chi cuaacu taachi nguéeⁿ dííⁿ yā cuenta yeⁿ'e nuuⁿndi yeⁿ'e 'i'i'yāⁿ taachi 'āā 'cuéeⁿ dicho'ó yā Cristo. ²⁶ Ní tiicā ntúūⁿ tiempo 'cūū Ndyuūs cáávā chi nadach'ēecú yā nuuⁿndi yeⁿ'e 'i'i'yāⁿ ní ch'iⁱ'i yā chi caⁿ'á yā chi dííⁿ yā recibir 'i'i'yāⁿ chí cuuví yeⁿ'é yā 'i'i'yāⁿ. 'Tíicā Ndyuūs ch'iⁱ'i yā chi cuaacu yā. Ní dííⁿ yā chi nducyáácá 'i'i'yāⁿ chi i'téenu yā Cristo ní yeⁿ'e yā 'i'i'yāⁿ.

²⁷ Maaⁿ ní ðdé'ē cúúví chi 'i'i'yāⁿ cuuvi caaⁿ'máⁿ yā chi ch'ēetē yā?

Nguée cuuví yā. ¿De'ē cáávā? ¿Áá cáávā chi diiⁿ yā tan'dúúćā chi ngaⁿa ley miiⁿ? Nguée 'tíćā. Naati maaⁿ ní Ndyuūs dííⁿ yā recibir s'uuúⁿ dámaāⁿ cáávā chi i'teenu yú Jesucristo. ²⁸Maaⁿ ní n'diichi yú chi Ndyuūs dííⁿ yā recibir 'iiⁿ'yāⁿ caati cucáávā chi i'téenu yā Jesucristo ní nguée caavā chi dííⁿ yā chi ngaⁿa ley miiⁿ.

²⁹¿Áá Ndyuūs ni dámaāⁿ Ndyuūs yeⁿe 'iiⁿ'yāⁿ Israel s'eeⁿ chi judíos? ¿Áá nguée Ndyuūs ní yeⁿe 'iiⁿ'yāⁿ chi nguée yeⁿe ndaata Israel? Cuaacu chi Ndyuūs ní Ndyuūs dendú^u yeⁿe 'iiⁿ'yāⁿ chi nguée yeⁿe ndaata Israel. ³⁰Cuaacu chi véé 'áámá n'dyáⁿā Ndyuūs. Ní Ndyuūs dííⁿ yā recibir nducyáácá 'iiⁿ'yāⁿ chi i'téenu yā Cristo 'iiⁿ'yāⁿ chi Israel s'eeⁿ ní 'tiicá ntuūⁿ 'iiⁿ'yāⁿ chi nguée yeⁿe ndaata Israel. ³¹Maaⁿ ní ¿áá cucáávā chi i'téenu yú Jesucristo chi diiⁿ yú chi nguée 'caandiveeⁿ yú tan'dúúćā chi ngaⁿa ley miiⁿ? Ní ley miiⁿ 'āā vi'i caā yeⁿe yú. Ní nguée dichíí'vē s'uuúⁿ. Mar 'áámá naaⁿ, nguēē 'tíćā. N'giindiveeⁿ ca yú chí ngaⁿā ley miiⁿ.

Tan'dúúćā chí diiⁿ Abraham

4 ¿De'ē ngaⁿa yú yeⁿe chiida yú Abraham chi chiida ndaata yeⁿe yú? ¿De'ē nndaacá yā nanááⁿ Ndyuūs? ²Nduuti chi Ndyuūs dííⁿ yā recibir Abraham miiⁿ cáávā cosa chi dííⁿ yā, tuu'mi ní Abraham cuuvi caaⁿmaⁿ yā chi ch'ēete maáⁿ yā. Nguée cuuvi caaⁿmaⁿ yā chi ch'ēete maáⁿ yā nanááⁿ Ndyuūs. ³Canée nguūⁿ na libro yeⁿe Dendyuūs 'tíćā: Abraham i'téenu yā Ndyuūs ní cáávā chi i'téenu yā

Ndyuūs, Ndyuūs dííⁿ yā recibir Abraham miiⁿ chi yeⁿe yā 'iiⁿ'yāⁿ. ⁴Maaⁿ ní 'iiⁿ'yāⁿ chi idiíⁿ ntiiⁿnyuⁿ ní sta'a yā chíí'vē yeⁿe ntiiⁿnyuⁿ yeⁿe yā. Nguée nadacadíínuuⁿ yā chí chíí'vē yeⁿe ntiiⁿnyuⁿ yeⁿe yā ní 'aama regalo naati tan'dúúćā 'áámá cosa chí can'diicú yā. ⁵Maaⁿ ní nduuti chí 'áámá 'iiⁿ'yāⁿ i'téenu yā Jesucristo ní nguée cuuvi dííⁿ yā ntiiⁿnyuⁿ cáávā chí cuuvi cu'téenu yā. Ní Ndyuūs dííⁿ yā recibir 'iiⁿ'yāⁿ nuuⁿndi chí cuuvi yeⁿe yā, tuu'mi ní Ndyuūs dííⁿ yā recibir 'iiⁿ'yāⁿ miiⁿ caati i'téenu yā Jesucristo. ⁶Tiicá ntúūⁿ tiempo chí 'āā chó'oo David ngaⁿá yā 'tíćā yeⁿe chuū. N'dai saⁿā chí Ndyuūs dííⁿ yā recibir chí yeⁿe yā saⁿa. Ní saⁿā miiⁿ ní n'dai sa n'dáá rá chí nguée idiíⁿ sa ntiiⁿnyuⁿ chí cuuvi yeⁿe Ndyuūs. ⁷'Tíćā ngaⁿa sa:

De'ē chúúćā n'dai 'iiⁿ'yāⁿ chí Ndyuūs nadach'ēēcú yā nuuⁿndi yeⁿe yā ní diví yā nuuⁿndi yeⁿe yā chí 'āā ntée vēē.

⁸De'ē chúúćā n'dai 'iiⁿ'yāⁿ chí Ndyuūs diiⁿ cuenta yā chí nguēē véé nuuⁿndi yeⁿe yā.

⁹Ní yeⁿe chí ngaⁿa David yeⁿe chí de'ē chúúćā n'dai 'iiⁿ'yāⁿ, ¿áá dámaāⁿ caava 'iiⁿ'yāⁿ Israel chí yeⁿe na circuncisión? Nguēē 'tíćā, ti cáávā 'iiⁿ'yāⁿ chí nguée yeⁿe 'iiⁿ'yāⁿ Israel ní nguée véé ley yeⁿe circuncisión yeⁿe yā. 'Āā ngaⁿa nū chí canée nguūⁿ na libro yeⁿe Ndyuūs 'tíćā. Abraham i'téenu yā Ndyuūs ní cáávā chí i'téenu yā Ndyuūs, Ndyuūs dííⁿ yā recibir Abraham miiⁿ chí yeⁿe yā 'iiⁿ'yāⁿ. ¹⁰¿De'ē tiempo chí

Ndyuūs diíⁿ yā recibir Abraham miiⁿ? ¿Áa taachi 'āa cuéé cuuvi circuncidado o cuayiivi taachi chii yā circuncidado? Ndyuūs 'āa diíⁿ yā recibir 'iiⁿyāⁿ taachi 'āa cuéé cuuvi yā circuncidado. ¹¹ Cuayiivi chi Abraham i'téenu yā Ndyuūs, tuu'mi ní chíí yā circuncidado. Ní chuū ní 'áamá seña chi Ndyuūs diíⁿ yā recibir Abraham miiⁿ cáávā chi i'téenu yā Ndyuūs. Ní chuū ní diíⁿ yā chi Abraham miiⁿ ní cuuví yā chiidaá nducyáácá 'iiⁿyāⁿ chi i'téenu yā Ndyuūs 'áará chi nguée chíí yā circuncidado. Ní 'tíicā Ndyuūs ngaⁿá yā chi diíⁿ yā recibir 'iiⁿyāⁿ chi nguée circuncidado yā. ¹² Cuaacu chi Abraham ní chiidaá 'iiⁿyāⁿ circuncidado yā chi Israel. Naati 'tíicā chiidaá 'iiⁿyāⁿ s'eeⁿ nguée dámaāⁿ cáávā chi circuncidado yā naati cáávā chi i'téenu yā Ndyuūs tan'dúúcā chi Abraham chi'téenu yā Ndyuūs vmnááⁿ vmnaaⁿ taachi 'āa cuéé cuuvi yā circuncidado yā.

Compromiso chi diíⁿ Ndyuūs ní chii cucáávā chi chi'teenú 'iiⁿyāⁿ

¹³ Ndyuūs caⁿa yā chii yā Abraham chi iⁿyeeⁿdí cūū cuuvi yeⁿe Abraham ndúúcū 'iiⁿyāⁿ yeⁿé yā chíí cuhii cuayiivi ní Ndyuūs caⁿa yā chii yā Abraham 'tíicā. Ní nguée cáávā chi idiíⁿ Abraham chi ngaⁿa ley caati cáávā chi i'téenu yā Ndyuūs. Ní cáávā chi i'téenu yā Ndyuūs, Ndyuūs diíⁿ yā cuenta chi saⁿā Abraham miiⁿ ní yeⁿé yā. ¹⁴ Ní nduuti chi 'iiⁿyāⁿ chi véé ley yeⁿe yā ní diíⁿ yā chi ngaⁿa ley miiⁿ ní cuuví yeⁿé yā chiiⁿ chi Ndyuūs caⁿa yā chi ca'a yā, tuu'mi ní nguée

dichíí'vē yeⁿé 'iiⁿyāⁿ chi i'téenu yā Ndyuūs. Ní nguée dichíí'vē chiiⁿ chi Ndyuūs caⁿa yā chi ca'a yā chi cuuvi yeⁿé yā cáávā chi i'téenu yā. ¹⁵ Naachi véé ley, véé castigo cáávā 'iiⁿyāⁿ chi nguée diíⁿ yā chiiⁿ chi ngaⁿā. Naachi nguée véé ley, 'iiⁿyāⁿ nguée cuuvi diíⁿ yā nuuⁿndi chi contra ley.

¹⁶ Ndyuūs caⁿa yā chi ca'a yā compromiso yeⁿé yā, compromiso chi n'dai taavi 'iiⁿyāⁿ chi cuuvi yeⁿé yā cucáávā chi i'téenu yā Ndyuūs ní nguēe nadíí'vē yā yeⁿé. Ní 'tíicā seguro cānee chi Ndyuūs caⁿa yā chí ca'a yā chi cuuvi yeⁿe nducyáácá 'iiⁿyāⁿ chi yeⁿe ndaata Israel ní nguée dámaāⁿ caava 'iiⁿyāⁿ chi véé ley yeⁿé yā ní diíⁿ yā chi ngaⁿa ley miiⁿ, naati cáávā nducyaaca 'iiⁿyāⁿ chi i'téenu yā Ndyuūs tan'dúúcā chi Abraham chi'téenu yā Ndyuūs. 'Tíicā Abraham miiⁿ ní cuuvi chiidaá nducyaaca s'uuúⁿ. ¹⁷ Ní canée nguūⁿ na libro yeⁿé Ndyuūs 'tíicā. Ndyuūs ngaⁿa yā ngii yā Abraham: Díí Abraham, 'úú idiíⁿ chí díí cuuvi chiidaá 'yaaⁿ n'dái naciones. Ní nanááⁿ Ndyuūs chuū ní n'daacā canee, ní Abraham ní i'téenu yā Ndyuūs chi cuaacu ca'a yā vida 'iiⁿyāⁿ chi n'díí. Ní caⁿá yā din'dai yā cosas chi 'āa cuéé snaaⁿ yú.

¹⁸ Abraham miiⁿ taachi 'āa cuéé de'ē vee chi cānee ngínú yā, chi'teēnu yā Ndyuūs. Ní Ndyuūs ní diíⁿ yā chí cūnee ngiinú yā yeⁿé chi Ndyuūs caⁿa yā ca'a yā chi cuuví yeⁿe yā. Ní cáávā chuū ni Abraham miiⁿ ní chii chiidaá 'yaaⁿ n'dái naciones tan'dúúcā chi Ndyuūs 'āa ngaⁿa yā yeⁿe yā. Ní Ndyuūs ngaⁿá

yā: 'Tíicā cuuví 'yaaⁿ taavi ndaata yeⁿē dii. ¹⁹Saⁿa Abraham miiⁿ 'āā ngii sa tan'dúucā 'aama ciento nduüyū yeⁿe sa. Ní 'tiicā ntúūⁿ vée nduüyū yeⁿe Sara chi n'daata yeⁿē sa. Ní caneé yā tan'dúucā 'iiⁿyāⁿ chi n'dii caati Abraham ndúucū Sara miiⁿ nguée ch'iindí daiya tá. 'Áará chi 'tíicā ní nguée ch'iindi daiya yā Abraham miiⁿ chi'téenu yā Ndyuūs. ²⁰Ní nguée dííⁿ yā 'uūví vaanicadínuūⁿ yeⁿe yā yeⁿe chi Ndyuūs caⁿa yā chi diiⁿ yā cááva yā naati chi'téenu cá yā ní vée ca confianza yeⁿé yā ndúucū Ndyuūs. Ní dich'eté yā Ndyuūs. ²¹Ní deenú n'dai yā chi Ndyuūs cuuví dííⁿ yā nducuéⁿē chi caⁿa yā chi cuuví dííⁿ yā. ²²Ní cucáávā chi Abraham i'téenu yā 'tíicā Ndyuūs dííⁿ yā chi cuuvi yeⁿé yā 'iiⁿyāⁿ.

²³Ní nduudu chi caneé nguūⁿ chi Ndyuūs ngaⁿa yeⁿe Abraham miiⁿ chi dííⁿ yā chi cuuví yeⁿé yā cáávā chi i'téenu yā Ndyuūs nguée dámaāⁿ caavā Abraham. ²⁴'Tiicā ntúūⁿ ní cáávā s'uūuⁿ cánée nguūⁿ. Ndyuūs dííⁿ yā recibir s'uúúⁿ chi cuuvi yeⁿé yā s'uúúⁿ chi cu'téenu yú Ndyuūs chi nadicuéⁿ yā Señor Jesucristo yeⁿe yú yeⁿe nguaaⁿ tináⁿā. ²⁵Ndyuūs dicho'ó yā Jesucristo caati ch'ii yā cucáávā nuuⁿndi yeⁿe yú. Ní nadicuéⁿ yā Jesucristo yeⁿe nguaaⁿ tináⁿā caati Ndyuūs cuuvi dííⁿ yā recibir s'uúúⁿ ní yeⁿé Ndyuūs s'uúúⁿ.

**Vée chi cuuvi yeⁿe yú taachi
Ndyuūs ngaⁿa yā chi nguée
vée nuuⁿndi yeⁿe yú**

5 Maaⁿ ní chi Ndyuūs dííⁿ yā recibir s'uúuⁿ cáávā chi i'téenu

yú Jesucristo vée vaadí 'diiⁿ yeⁿe yú ndúucū Ndyuūs caava Señor Jesucristo yeⁿe yú. ²Ní cáávā Señor Jesucristo ndaa yú nanááⁿ Ndyuūs. Ní Ndyuūs itée yā s'uúúⁿ dendu'ū chi n'dai taavi yeⁿé yā. Ní díítú i'téenu yú ndúucū dendu'ū chi n'dai yeⁿé yā chi itée yā s'uúúⁿ. Ní yeenú n'dai yú ní caneé ngiinu yú chííⁿ chí cuuvi yeⁿe yú na va'ai chæeti nguuvi naachi caneé Ndyuūs chi dæevé n'dai. ³Ní 'tiicā ntúūⁿ yeenú taavi yú taachi n'geenu yú ngii caati deenu yú chi taachi n'geenu yú ngii ní n'daacā ca yeⁿe yú ti vée cá paciencia yeⁿe yú. ⁴Ní taachi cuchæ yú yeⁿe nducuéⁿē, tuu'mi ní deenu yú chi diiⁿ yú chi Ndyuūs neⁿe yā chi diiⁿ yú 'túucā. Ní cūnee ngiinu yú chi cuuvi yeⁿe yú chi Ndyuūs caⁿá yā téé yā s'uúúⁿ. ⁵Ní deenu yú chi cuaacu chi cuuvi yeⁿe yú chi cūnee ngiinu yú. Ní nguée 'cuináaⁿ yú caati Ndyuūs 'āā tee yā s'uúuⁿ na staava yeⁿe yú vaadí neⁿe yeⁿé yā cucáávā Espíritu N'dai yeⁿé yā chi 'āā tee yā s'uúuⁿ.

⁶Taachi 'āā cuée cuuvi nanguaⁿāi yú cucáávā maaⁿ yú, tuu'mi ní Ndyuūs dicho'ó yā Cristo tiempo chi neⁿe yā caati Cristo ch'ii yā cáávā 'iiⁿyāⁿ chi vée nuuⁿndi yeⁿe yā. ⁷Nguée n'gíⁿii chi 'áámá 'iiⁿyāⁿ 'cuūvi yā cucáávā táámá 'iiⁿyāⁿ chi nguée nuuⁿndi yeⁿe yā. Ní n'dáá rá chi 'áámá 'iiⁿyāⁿ 'cuūvi yā cáávā táámá 'iiⁿyāⁿ chi n'daāca dííⁿ yā, 'áará chi 'iiⁿyāⁿ chi cuaacu chi n'daāca yā. ⁸Ní Ndyuūs ch'iⁿí yā chi neⁿé yā s'uúúⁿ taachi dicho'ó yā Cristo iⁿ'yeeⁿdí cūū chi ch'ii yā cáávā s'uúúⁿ caati s'uúúⁿ vée nuuⁿndi yeⁿe yú. ⁹Maaⁿ ní Ndyuūs

dífn yā recibir s'uuúⁿ cáávā Cristo chi ch'ií yā chi nadanguáⁿai yā s'uuúⁿ. Ní Ndyuūs caⁿá yā nadanguaⁿai cá yā s'uuúⁿ yeⁿe castigo cucáávā Cristo. ¹⁰Ní taachi s'uuúⁿ 'āā cuéé cuuvi n'diichi yú Ndyuūs, Ndyuūs dífn yā chi cuuvi yeⁿé yā s'uuúⁿ cáávā Jesucristo chi ch'ií yā. Maaⁿ ní s'uuúⁿ ní yeⁿe Ndyuūs s'uuúⁿ ní nanguaⁿai cá yú cáávā chi Cristo cánduuchi yā ní yeⁿe yā s'uuúⁿ. ¹¹Ní yeenu ca yú nanáán Ndyuūs nguéé damaāⁿ cáávā chuū ti yeⁿé Ndyuūs s'uuúⁿ cáávā Señor Jesucristo yeⁿe yú. Ní cáávā Cristo miiⁿ véé vaadi 'diiⁿ yeⁿe yú nanáán Ndyuūs.

Yeⁿe saⁿā Adán ndúúcū Cristo

¹²Tíicā caati cáávā 'áámá saⁿā chi duuchi Adán ndāā nuuⁿndi iⁿ'yeeⁿdí 'cūū. Ní cáávā nuuⁿndi miiⁿ 'iiⁿ'yāⁿ n'dii yā. Maaⁿ ní chífn chi nducyaaca 'iiⁿ'yāⁿ ní 'cuūvi yā caati nducyáaca yā ní dinuuⁿndi yā. ¹³Ní nuuⁿndi miiⁿ canéé iⁿ'yeeⁿdí 'cūū. Ní 'iiⁿ'yāⁿ idinuuⁿndí yā vmnaaⁿ chi ndāā ley yeⁿe Moisés. Ní nguéé dífn yā cuenta yeⁿe nuuⁿndi taachi nguéé ley miiⁿ chi ch'iⁿ'i 'iiⁿ'yāⁿ yeⁿe nuuⁿndi. ¹⁴¿Déē yeⁿe chuū? Ndií tiempo chi canéé Adán ní dinuuⁿndi sa ndii tiempo chi canéé Moisés. Ní Moisés caⁿá yā ley miiⁿ 'iiⁿ'yāⁿ s'eeⁿ chi dinuuⁿndí yā ní canéé chi 'cuūvi yā. Ní ch'ií yā 'áará chi nguéé dinuuⁿndí yā tan'dúúcā Adán chi nguéé n'giindiveéⁿ yā chi ngaⁿa Ndyuūs. Ní cáávā chi Adán miiⁿ dinuuⁿndí yā, chuū ch'iⁿ'i 'iiⁿ'yāⁿ chi Daiyā Ndyuūs canéé chí cúchii ní 'iiⁿ'yāⁿ s'eeⁿ 'caandiveéⁿ yā nduudu yeⁿé Ndyuūs.

¹⁵Ní nguéé cuuvi nduuvíidáámá cosa chi Ndyuūs tee yā s'uuúⁿ ndúúcū nuuⁿndi chi diíⁿ Adán miiⁿ. Cáávā chi 'áámá saⁿā Adán miiⁿ idinuuⁿndí yā, nducyaaca 'iiⁿ'yāⁿ canéé chi 'cuūvi yā caati condenado yā. Ní cáávā 'áámá saⁿā Jesucristo, Ndyuūs dátēe yā s'uuúⁿ chi nadinguaⁿái yā s'uuúⁿ ní nguéé nadífvē yú yeⁿé yā. Ní chuū chi tee Ndyuūs ní n'daacā ca ní cáávā n'deēe n'dái 'iiⁿ'yāⁿ. ¹⁶Ní 'āā vi'í cá nuuⁿndi chi diíⁿ Adán yeⁿe chiiⁿ chi Ndyuūs tee yā 'iiⁿ'yāⁿ chi nadinguáⁿai yā 'iiⁿ'yāⁿ. Cuayiivi chi Adán idinuuⁿndí yā nducyaaca 'iiⁿ'yāⁿ ní canéé yā condenado. Maaⁿ ní Ndyuūs nadinguáⁿai yā 'iiⁿ'yāⁿ chi cuuvi yeⁿé yā 'iiⁿ'yāⁿ. Ní 'iiⁿ'yāⁿ s'eeⁿ nguéé nadífvē yā ní Ndyuūs nadinguáⁿai yā 'iiⁿ'yāⁿ chi n'deēe n'dái nuuⁿndi idiíⁿ yā. ¹⁷Cuaacu chi 'iiⁿ'yāⁿ canéé chi 'cuūvi yā cáávā chi 'áámá saⁿā dinuuⁿndi sa. Ní maaⁿ ní n'daacā ca chi diíⁿ 'áámá 'iiⁿ'yāⁿ chi Jesucristo miiⁿ. Ní cucáávā Jesucristo miiⁿ Ndyuūs dífn yā recibir 'iiⁿ'yāⁿ s'eeⁿ chi cuuvi yeⁿé yā. Ní 'iiⁿ'yāⁿ s'eeⁿ nguéé nadífvē yā yeⁿe chuū. 'Iiⁿ'yāⁿ s'eeⁿ ní véé poder yeⁿé Ndyuūs ndúúcu yā chi 'cuētinéé n'dáaca yā na vida yeⁿé yā chi ngai.

¹⁸Tíicā nducyáácá 'iiⁿ'yāⁿ canee condenado yā cáávā 'áámá saⁿā Adán chi dinuuⁿndí yā. Naati cáávā Jesucristo miiⁿ chi dífn yā chi neⁿe Ndyuūs, Ndyuūs dífn yā recibir nducyaaca 'iiⁿ'yāⁿ chi cuuví yeⁿé yā ní véé vida cueⁿe daāⁿmaⁿ yeⁿé yā. ¹⁹Chuū ní neⁿe caaⁿ'maⁿ 'tíicā. Cáávā chi 'áámá saⁿā Adán nguéé ch'iindiveeⁿ sa nduudu chi ngaⁿa

Ndyuūs nducyaaca 'iiⁿ'yāⁿ snée yā maaⁿ poder yeⁿ'ē nuuⁿndi. 'Tiicá ntúūⁿ. Cáávā chi 'áámá saⁿ'a Cristo ch'iindiveéⁿ yā nduudu chi ngaⁿ'a Ndyuūs néené 'yaaⁿ 'iiⁿ'yāⁿ cuuví ndaa yā nanááⁿ Ndyuūs, ní cuuvi yeⁿ'é Ndyuūs 'iiⁿ'yāⁿ s'eeⁿ.

²⁰Ndyuūs tee yā ley miiⁿ caati 'iiⁿ'yāⁿ cuuví n'diichi cá yā chi dinuuⁿndi cá yā. Ní taachi dinuuⁿndi cá yā Ndyuūs tee yā vaadī n'dai ca yeⁿ'e yā chí ch'ēete ca chi nadanguáⁿ'ai yā 'iiⁿ'yāⁿ nguéeⁿ ti nuuⁿndi miiⁿ. ²¹Maaⁿ ní cho'ó chuū caati taachi 'iiⁿ'yāⁿ idinuuⁿndí yā ní canéeⁿ chi 'cuūvi yā cáávā poder yeⁿ'e nuuⁿndi. 'Tiicá ntúūⁿ vaadī n'dai ca yeⁿ'é Ndyuūs ndúúcu poder yeⁿ'é yā diiⁿ chi diíⁿ yā aceptar s'uuúⁿ chi cuuvi yeⁿ'é yā s'uuúⁿ ní diiⁿ chi véé vida cueⁿ'e daāⁿ'maⁿ yeⁿ'e yú cucáávā Señor Jesucristo yeⁿ'e yú.

N'dii yú cucáávā nuuⁿndi yeⁿ'e yú naati canduuchi yú cucáávā Cristo

6 Maaⁿ ní ǐde'é caaⁿ'māⁿ yú? ǐÁá dinuuⁿndi yú caati Ndyuūs cuuvi téé yā s'uuúⁿ vaadī n'dai ca yeⁿ'é yā? ²Nguéeⁿ diiⁿ yú 'tíicā. 'Āā ch'iī yú yeⁿ'e nuuⁿndi chi diiⁿ yú, ǐtáácā cuuvi 'cuētinéeⁿ chiichi yú ndúúcu nuūⁿndi chi diiⁿ yú? ³ǐÁá nguéeⁿ déenu ndís'tiī chi nducyaaca s'uuūⁿ chi chēēdinuūⁿ'niⁿ yú cáávā chi s'uuúⁿ ní yeⁿ'e Cristo s'uuúⁿ, ní véé 'aama parte yeⁿ'e yú ndúúcu Cristo taachi ch'iī yā? ⁴Ní caavā chí chēēdinuūⁿ'niⁿ yú tan'dúúca chi daama ch'ēēchi yú ndúúcu Cristo, ní tan'dúúca chi ch'iī yú ndúúcu yā caati cuuvi nnduuchi yú yeⁿ'ē nguaaⁿ tináⁿ'ā ndúúcu

Cristo. Ní tiicá ntúūⁿ véé vida ngai yeⁿ'e yú ti 'tíicā Cristo nduuchi yā yeⁿ'e nguaaⁿ tinaⁿ'ā cáávā poder chi ch'ēetē ca yeⁿ'e Chiida yú.

⁵Ní nduuti chi tan'dúúca chi daama cueⁿ'e yú ndúúcu yā taachi ch'iī yā, 'tiicá ntúūⁿ cuaacu níⁿ'nyúⁿ chi dáámá cunee yú ndúúcu yā. Ní nnduuchi yú tan'dúúca chí maáⁿ yā nnduuchi yā yeⁿ'ē nguaaⁿ tináⁿ'ā.

⁶Ní chuū ní deenu yú vida ndiicúū yeⁿ'e yú tan'dúúca chi dáámá ca'neeⁿngá'āa na cruz ndúúcu Señor Jesucristo yeⁿ'e yú caati vida ndiicúū yeⁿ'e yú ndúúcu chi neⁿ'e chi diiⁿ yú ní canee tan'dúúca chi n'diī ndúúcu poder yeⁿ'e nuuⁿndi caati nguéeⁿ cuuvi caaⁿ'maⁿ ntiiⁿ'nyuⁿ vida yeⁿ'e yú chi dinuuⁿndi yú.

⁷Deenu yú chi taachi 'iiⁿ'yāⁿ 'āā ch'iī yā 'āā ntéeⁿ cuuvi dinuuⁿndí yā.

⁸Ní nduuti chi s'uuúⁿ ní 'āā ch'iī yú dáámá ndúúcu Cristo miiⁿ, tuu'mi ní i'téenu yú chi canduuchi yú ní cunee yú ndúúcu Cristo. ⁹Deenu yú chi taachi Cristo 'āā ch'iī yā ní nnduuchi yā yeⁿ'e nguaaⁿ tináⁿ'ā, 'āā ntéeⁿ ngueecunéeⁿ yā 'cuūví yā caati vaadī n'gii mífⁿ nguéeⁿ de'ē vee cuuvi diiⁿ ndúúcu yā. ¹⁰Taachi Cristo ch'iī yā, ch'iī yā 'áámá vmneⁿ'é nūuⁿ ní cáávā nducyáácā 'iiⁿ'yāⁿ ni cáávā nuuⁿndi yeⁿ'é yā. Maaⁿ ní nnduuchi yā ní vida yeⁿ'e yā nnduuchi yā cáávā Ndyuūs. ¹¹'Tiicá ntúūⁿ ndís'tiī diíⁿ nī cuenta chi n'diī nī ndúúcu nuuⁿndi yeⁿ'e nī ní maaⁿ ní canduuchi nī cáávā Ndyuūs caati ndís'tiī ní yeⁿ'e Jesucristo ndís'tiī ni Jesucristo ní Señor yeⁿ'e yú.

¹²Ní cáávā chuū ndís'tiī nguéeⁿ ca'á nī lugar chi nuuⁿndi caaⁿ'maⁿ ntiiⁿ'nyuⁿ yeⁿ'e cuerpo yeⁿ'e nī ti

ndís'tií dífⁿ nī nuuⁿndi tan'dúúcā
chi neⁿe cuerpo yeⁿ'é nī. ¹³Ní
nguéeⁿ nca'á nī cuerpo yeⁿ'e maaⁿ nī
na poder yeⁿ'e nuuⁿndi chi cuuvi
dinuuⁿndí nī tan'dúúcā chi neⁿ'e
cuerpo yeⁿ'é nī. Nguéeⁿ dífⁿ nī 'tífcā.
Nca'á nī vida yeⁿ'e maáⁿ nī ndúúcū
cuerpo yeⁿ'e maáⁿ nī maaⁿ poder
yeⁿ'e Ndyuūs tan'dúúcā chi 'āā n'dií
nī ní 'āā nnduuchí nī ndúúcū 'áámá
vida ngai. Maaⁿ ní cuuvi din'daacá
nī. ¹⁴Ní nuuⁿndi ní nguéeⁿ vée poder
yeⁿ'e nanááⁿ ndís'tií caati nguéeⁿ
caneé nī maaⁿ yeⁿ'e ley miiⁿ naati
caneé nī maaⁿ nducuéⁿ'ē vaadi n'dai
yeⁿ'é Ndyuūs.

**Yeⁿ'e ejemplo yeⁿ'e 'iiⁿ'yāⁿ chi 'áámá
idíⁿ yā ntiiⁿnyuⁿ yeⁿ'é Ndyuūs**

¹⁵¿Tuu'mi ní dē'ē diiⁿ yú? ¿Áá
diiⁿ yú nuuⁿndi caati 'āā ntéeⁿ canee
yú maaⁿ ley miiⁿ naati canee yú
maaⁿ dendu'ū chi n'dai taavi chi
yeⁿ'é Ndyuūs? Nguēⁿ yeⁿ'ē mar
'áámá naaⁿ. ¹⁶Ndís'tií ní deenu nī
chi nduuti chi ca'á nī vida yeⁿ'e
maáⁿ nī na ta'a 'áámá patrón yeⁿ'e
nī ní 'áámá caneé nī chi dífⁿ nī
ntiiⁿnyuⁿ chi ngaⁿ'a 'iiví nī, tuu'mí
ndís'tií ní esclavos ndís'tií yeⁿ'e 'iiví
nī. Ní caneé chí dífⁿ nī nducuéⁿ'ē
chí ngaⁿ'a 'iiví nī chi dífⁿ nī. 'Tiicá
ntúūⁿ nduuti chi dífⁿ nī chi ngaⁿ'a
nuuⁿndi chi dífⁿ nī tuu'mi ní canee
nī tan'dúúcā chi nuuⁿndi miiⁿ
patrón yeⁿ'e nī. Ní cuuvi 'cuūvi nī
cueⁿ'e daāⁿmaⁿ. Ní nduuti chi dífⁿ nī
chi ngaⁿ'a Ndyuūs, tuu'mi ní n'daacā
dífⁿ nī nanááⁿ Ndyuūs. ¹⁷Úú ní ca'á
gracias Ndyuūs caava ndís'tií caati
ndís'tií 'áará chi tiempo chi chó'ōo
ní ndís'tií esclavos yeⁿ'e nuuⁿndi
ndís'tií naati maaⁿ ní ch'iindiveéⁿ

nī ndúúcū nuuⁿmaⁿ staava yeⁿ'é
nī nduudu cuaacu yeⁿ'é Ndyuūs
chi 'iiⁿ'yāⁿ s'eeⁿ 'āā chí'cueéⁿ yā
ndís'tií. ¹⁸Ní taachi canee libre nī
yeⁿ'e poder yeⁿ'e nuuⁿndi, tuu'mi ní
ndís'tií dífⁿ nī nducuéⁿ'ē chi n'daacā
cáāvā poder yeⁿ'é Ndyuūs chí
ngaⁿ'a ntiiⁿnyuⁿ yeⁿ'é nī. ¹⁹Ngaⁿ'á
ndúúcū ndís'tií ndúúcū nduudu
chi tuumicadiinúúⁿ nī caati ndís'tií
cuuvi tuumicadiinuuⁿ cá nī. Tiempo
chi chó'ōo ndís'tií s'neéⁿ nī cuerpo
yeⁿ'é nī cáāvā nuuⁿndi ní dinuuⁿndí
nī tan'dúúcā chi maaⁿ cuerpo yeⁿ'é
nī neⁿ'e chí dífⁿ nī. Ní diiⁿ cá nī chí
nguéeⁿ n'daacā. Maaⁿ ní 'āā 'neéⁿ nī
cuerpo yeⁿ'e nī cáāvā chí dífⁿ nī
cosa chí n'daacā ní nducuéⁿ'ē chí
dífⁿ nī, dífⁿ nī cáāvā Ndyuūs.

²⁰Taachi ndís'tií canee nī maaⁿ
poder yeⁿ'e nuuⁿndi, nguéeⁿ cuuvi
dífⁿ nī dendu'ū chí n'daacā. ²¹Ní
¿dē'ē chí n'daacā chí dífⁿ nī
aprovechar yeⁿ'e nuuⁿndi chí dífⁿ nī
chí ngii 'cuináaⁿ nī yeⁿ'ē? Chífⁿ chí
diiiⁿ chí caⁿ'á nī 'cuūvi nī cueⁿ'e
daāⁿmaⁿ. ²²Naati maaⁿ ní nguéeⁿ
caneé nī maaⁿ poder yeⁿ'e nuuⁿndi
caati dichí'vē nī Ndyuūs chí dífⁿ nī
ntiiⁿnyuⁿ yeⁿ'é Ndyuūs. Ní cuayiivi
ní vée vida cueⁿ'e daāⁿmaⁿ chí yeⁿ'e
nī. ²³Chí chii'vē yeⁿ'e nuuⁿndi miiⁿ
ní diiⁿ chí 'iiⁿ'yāⁿ ch'ii yā cueⁿ'e
daāⁿmaⁿ naati chiiⁿ chí Ndyuūs téé
yā 'iiⁿ'yāⁿ s'eeⁿ ní regalo chí vida
cueⁿ'e daāⁿmaⁿ ti 'iiⁿ'yāⁿ s'eeⁿ ní
yeⁿ'e Jesucristo chí Señor yeⁿ'e yú.

**Ejemplo yeⁿ'e 'iiⁿ'yāⁿ chi
n'giindivaacu yā**

7 Ndís'tií hermanos yeⁿ'é chí
vée ley yeⁿ'é nī, deenu nī chí
'iiⁿ'yāⁿ caneé chí 'caandiveéⁿ yā ley

miiⁿ nuuⁿmaⁿ neⁿe chí canduuchí yā. ²Maaⁿ ní caⁿá 'aama ejemplo. 'Áamá n'daataá chi n'giindivaacu tá ní véé isaⁿā yeⁿe tá, n'daataá miiⁿ ní n'daataá yeⁿe isaⁿā tá tanducuéⁿē tiempo chi canduuchi sa tan'dúúcā chi ngaⁿa ley. Ní taachi ch'iⁿi isaⁿā yeⁿe tá canee tá libre yeⁿe ley miiⁿ chi ngaⁿa yeⁿe isaⁿā yeⁿē tá. ³Naati taachi canduuchi isaⁿā yeⁿe tá ní caⁿa tá ndúúcū táámá saⁿā, tuuⁿmi ní idinuūⁿndí ta. Ní nduuti chi ch'iⁿi isaⁿā yeⁿe tá, nguée canee yā maaⁿ ley yeⁿe 'iiⁿyāⁿ chi n'giindivaacú yā ní cuuvi 'caandavaacú yā ndúúcū táámá saⁿā ní nguée dinuuⁿndi tá.

⁴Ní 'tiicá ntúūⁿ ndís'tiī hermanos yeⁿe chí yeⁿe Cristo, ley miiⁿ tan'dúúcā esposo yeⁿe nī chí 'āā n'díí, ní 'āā n'diī ley miiⁿ cáávā ndís'tiī. Ní maaⁿ ní cuuvi yeⁿe táámá yā ndís'tiī ní yeⁿe Cristo ndís'tiī. 'Iiⁿyāⁿ miiⁿ ní nducuéⁿ yā yeⁿe nguaaⁿ tináⁿā ní cucáávā 'iiⁿyāⁿ miiⁿ dichiiⁿve yú Ndyuūs. ⁵Ní tiempo chi ch'ó'oo taachi diiⁿ yú tan'dúúcā chi neⁿe maaⁿ cuerpo yeⁿe yú tuumicadíínuuⁿ yú chí véé nuuⁿndi yeⁿe yú cáávā chí ngaⁿa ley miiⁿ chí diiⁿ yú 'tíicā. Ní nuuⁿndi chí diiⁿ yú diiⁿ chí 'cuūvi yú cueⁿe daāⁿmaⁿ. ⁶Naati maaⁿ ní diiⁿ yú cuenta chí n'diī yú yeⁿe ley miiⁿ. Ní nguée canee yú maaⁿ poder yeⁿē ley miiⁿ. Maaⁿ ní libre canee yú chí dichiiⁿve yú Ndyuūs ndúúcū vida yeⁿe yú chí ngai. Ní vida yeⁿe yú ní yeⁿe Espíritu N'dai yeⁿē Ndyuūs. Ní nguée canee yú maaⁿ poder yeⁿe ley ndiicúū chí canée nguūⁿ.

Nuuⁿndi chí idiⁿ yú

⁷Maaⁿ ní ǀdeⁿē caaⁿmaⁿ yú? ǀÁá ley miiⁿ chí nuuⁿndi? Nguée yeⁿē

mar 'áamá naaⁿ. 'Úú ní nguée n'diichí nuuⁿndi nduuti chí nguée cáávā ley miiⁿ. Ní 'tiicá ntúūⁿ, 'úú ní nguée deenú chí nuuⁿndi 'úú nduuti chí neⁿé denduⁿ chí véé yeⁿe tanáⁿā 'iiⁿyāⁿ nduuti chí ley miiⁿ nguée 'tíicā ngaⁿa: Nguée dinéⁿe nī denduⁿ chí véé yeⁿe tanáⁿā 'iiⁿyāⁿ. ⁸Ní cáávā ley miiⁿ tuumicadíínuúⁿ nuuⁿndi miiⁿ chí cuuvi neⁿé dííⁿ tanducuéⁿē denduⁿ chí nuuⁿndi. Ní ndúúti chí nguée cáávā ley miiⁿ, nuuⁿndi miiⁿ canée tan'dúúcā chí n'diī. Ní nguée deenú yeⁿē. ⁹Tiempo chí ch'ó'oo 'úú ní nadacadíínuúⁿ chí n'daacā canée nguée ndúúcū ley miiⁿ naati taachi n'diichí ley miiⁿ, tuuⁿmi n'diichí nuuⁿndi, ní 'úú ní canee tan'dúúcā chí ch'iⁿi. ¹⁰Ní 'tíicā ley miiⁿ ch'iⁿi 'iiⁿyāⁿ táácā cuuvi cunduuchí yā cueⁿe daāⁿmaⁿ, naati cucáávā 'úú n'g'iⁿi chí idiíⁿ nuuⁿndi tuuⁿmi ní cuuvi 'cuūvi cueⁿe daāⁿmaⁿ. ¹¹Ní cáávā ley miiⁿ deenú chí nuuⁿndi chí dííⁿ chííⁿ chí chinncheⁿi 'úú ti nguée dííⁿ tan'dúúcā chí ch'iindiveéⁿ ley miiⁿ. Naati cáávā ley miiⁿ, deenú nuuⁿndi chí dííⁿ ní diiⁿ chí ch'iⁿi cueⁿe daāⁿmaⁿ.

¹²Ní ley miiⁿ ní dēēve ní yeⁿe Ndyuūs. Ní mandamiento yeⁿe ley miiⁿ 'tiicá ntúūⁿ ní dēēve ní cuaacu ní n'dáácā. ¹³Tuuⁿmi ní ley ǀ'áá cucáávā chí n'daacā diiⁿ chí 'úú 'cuūvi cueⁿe daāⁿmaⁿ? Nguée 'túúcā. Nuūⁿndi chí dííⁿ, diiⁿ chí 'úú 'cuūvi. Ní 'tíicā cuuvi deenú nuuⁿndi ti nuuⁿndi miiⁿ ch'iⁿi chí cuáácú chí nuuⁿndi cáávā ley miiⁿ chí cosa chí n'daacā. Ní cosa chí n'daacā miiⁿ ní mandamiento chí ch'iⁿi chí nguēe n'daacā chí nuūⁿndi miiⁿ.

¹⁴Deenu yú chi ley miiⁿ ní yeⁿe Espíritu N'dai yeⁿé Ndyuūs. Naati 'úú ní saⁿā yeⁿe iⁿ'yeeⁿdí 'cūū. 'Úú chi dinuuⁿndí ni caneé maaⁿ poder yeⁿe nuuⁿndi chi idiíⁿ nuuⁿndi. ¹⁵'Úú nguéeⁿ deenú de'e cáávā chi diíⁿ chiiⁿ chi diíⁿ. 'Úú nguéeⁿ diíⁿ chi neⁿé diíⁿ naati diíⁿ chi nguéeⁿ neⁿé diíⁿ ti nguéeⁿ neⁿé diíⁿ. ¹⁶Ní nduuti chi nguéeⁿ neⁿé diíⁿ ní chííⁿ chí diíⁿ, tuuⁿ'mi ní deenú chi ley miiⁿ ní n'dai. ¹⁷'Tíicā nguéeⁿ 'úú chi diíⁿ, naati nuuⁿndi chi canéeⁿ nduucú chííⁿ diiíⁿ chi dinuuⁿndí. ¹⁸Caati deenú chi maaⁿ 'úú chi cuerpo yeⁿé nguεε vεε mar 'áámá dendu'ū chi n'daacā. Cuaacu chi 'úú neⁿé diíⁿ chi n'daacā naati nguéeⁿ deenú táácā cuuvi diíⁿ chi n'daacā. ¹⁹Dendu'ū chi n'dai chi neⁿé diíⁿ, nguéeⁿ diíⁿ naati chi nguéeⁿ n'daacā chi nguéeⁿ neⁿé diíⁿ, chííⁿ chí diíⁿ. ²⁰Maaⁿ ní nduuti chi diíⁿ chi nguéeⁿ neⁿé diíⁿ, tuuⁿ'mi nguéeⁿ 'úú chi diíⁿ naati nuuⁿndi ndúúcū poder yeⁿé chi canéeⁿ nduucú chííⁿ diiíⁿ chi dinuuⁿndí.

²¹Ní 'tíicā canee nduucú. Taachi neⁿé diíⁿ chi n'daacā miiⁿ, dámaaⁿ chi nguéeⁿ n'daacā canee nduucú. ²²Cuáácú chi neⁿé diíⁿ chiiⁿ chi ngaⁿā ley yeⁿé Ndyuūs. ²³Naati deenú chi véé táámá cosa na cuerpo yeⁿé chi nguéeⁿ neⁿé chi 'úú idiíⁿ cosa chi n'daacā tan'dúúcā chi nadacadiinúúⁿ chi diíⁿ. Chuū ní ley yeⁿe nuūⁿndí chi véé na cuerpo yeⁿé. Ní 'úú caneé tan'dúúcā preso yeⁿe ley yeⁿe nuuⁿndi. 'Tíicā 'úú.

²⁴Dé'e chúúcā nndaachíí yeⁿé maaⁿ. ¿Du'ú cuuvi nadanguáⁿ'ai 'úú yeⁿe cuerpo yeⁿé chí diiⁿ chi 'cuūví cueⁿe daāⁿmaⁿ? ²⁵Maaⁿ ní 'úú ní nc'aⁿ gracias Ndyuūs chi dámaaⁿ

Ndyuūs cuuvi nadinguáⁿ'ai yā 'úú cáávā Jesucristo Señor yeⁿe yú. 'Úú ní dichíí'vε 'úú ley yeⁿe Ndyuūs ndúúcū núúⁿmáⁿ staāvā yeⁿé naati cuerpo yeⁿé ní neⁿe dinuuⁿndi cáávā ley yeⁿe nuuⁿndi chi canéeⁿ nduucú.

Vida chi véé cáávā Espíritu N'dai yeⁿé Ndyuūs

8 Maaⁿ ní 'iiⁿ'yāⁿ s'eeⁿ chi yeⁿe Señor Jesucristo nguéeⁿ condenado yā. Ní 'iiⁿ'yāⁿ s'eeⁿ nguéeⁿ n'gεetineé yā chi diíⁿ yā chiiⁿ chi neⁿe cuerpo yeⁿe maāⁿ yā naati n'gεetineé yā tan'dúúcā chi neⁿe Espíritu N'dai yeⁿé Ndyuūs. ²Caati ley yeⁿe Espíritu N'dai yeⁿé Ndyuūs chiiⁿ diiíⁿ chi véé vida cueⁿe daāⁿmaⁿ yeⁿe 'iiⁿ'yāⁿ chi yeⁿe Jesucristo. Ní diiíⁿ chi 'úú caneé libre yeⁿe nuuⁿndi chi diiíⁿ chi ch'íí cueⁿe daāⁿmaⁿ. ³Ní Ndyuūs diíⁿ yā chiiⁿ chi nguéeⁿ cuuvi diiíⁿ ley yeⁿe Moisés miiⁿ caati 'iiⁿ'yāⁿ ní duūvā yā na cuerpo yeⁿe yā. Ní Ndyuūs diíⁿ yā condenar nuuⁿndi chi véé na cuerpo yeⁿé 'iiⁿ'yāⁿ yeⁿe iⁿ'yeeⁿdí 'cūū taachi dicho'ó yā 'áámá n'dyáⁿā Daiya yā ndúúcū cuerpo tan'dúúcā s'uúúⁿ cáávā chi divíí yā nuūⁿndí yeⁿé 'iiⁿ'yāⁿ. ⁴Ní chúú Ndyuūs diiⁿ yā cáávā chi s'uūúⁿ cuuvi ch'εetinee yú tan'dúúcā chi ngaⁿ'a ley miiⁿ ti yeⁿe Espíritu N'dai s'uúúⁿ. Ní nguéeⁿ diiⁿ yú chiiⁿ chi neⁿe maaⁿ cuerpo yeⁿe yú ti diiⁿ yú tan'dúúcā chi neⁿe Espíritu N'dai yeⁿé Ndyuūs.

⁵'Iiⁿ'yāⁿ chi n'gεetinee yā ní diíⁿ yā chi neⁿe maaⁿ cuerpo yeⁿé yā nacadiinúúⁿ yā ní diíⁿ yā dendu'ū chi neⁿé yā. 'Iiⁿ'yāⁿ chi yeⁿe Espíritu N'dai yeⁿé Ndyuūs

nadacadiinúúⁿ yā ní dííⁿ yā chi neⁿe Espíritu N'dai yeⁿe Ndyuūs.
⁶Ní 'iiⁿ'yāⁿ chi nadacadiinúúⁿ yā ní dííⁿ yā dēē chi cuerpo yeⁿe maáⁿ yā neⁿe, ní 'cuūvi yā cueⁿe daāⁿmaⁿ naati 'iiⁿ'yāⁿ chi nadacadiinúúⁿ yā ní dííⁿ yā dendu'ū chi neⁿe Espíritu N'dai yeⁿe Ndyuūs ní vee vida cueⁿe daāⁿmaⁿ yeⁿe yā ní n'geetinéé yā ndúúcū vaadi 'diiíⁿ. ⁷'Iiⁿ'yāⁿ chi nadacadiinúúⁿ yā dendu'ū chi yeⁿe cuerpo yeⁿe yā, 'iiⁿ'yāⁿ s'eeⁿ ní contra yeⁿe Ndyuūs 'iiⁿ'yāⁿ ti nguée neⁿe yā dííⁿ yā chi ngaⁿ'a ley miíⁿ, ní nguée cuuvi dííⁿ yā. ⁸Ní cáávā chuū 'iiⁿ'yāⁿ s'eeⁿ chi dííⁿ yā tan'dúúcā chi neⁿe cuerpo yeⁿe yā Ndyuūs nguée inee yiinú yā chííⁿ chí dííⁿ yā.

⁹Naati maaⁿ ní ndís'tiī nguée dííⁿ ní tan'dúúcā chi neⁿe cuerpo yeⁿe maáⁿ ní naati dííⁿ ní tan'dúúcā chi neⁿe Espíritu N'dai yeⁿe Ndyuūs ti maaⁿ ní Espíritu N'dai yeⁿe Ndyuūs cánée yā ndúúcū ndís'tiī. Ní nduuti chi 'áámá 'iiⁿ'yāⁿ nguée cánée yā ndúúcū Espíritu yeⁿe Cristo, tuu'mi ní 'iiⁿ'yāⁿ 'cūū nguée yeⁿe Cristo 'iiⁿ'yāⁿ. ¹⁰Ní nduuti chi ndís'tiī ní yeⁿe Cristo ndís'tiī, 'áará chi cuerpo yeⁿe ní cuuvi n'diī cucáávā nuuⁿndi yeⁿe ní, tuu'mi ní canduuchí ní cáávā Espíritu N'dai yeⁿe Ndyuūs miíⁿ caati Ndyuūs dííⁿ yā aceptar ndís'tiī chí yeⁿe yā ndís'tiī. ¹¹Ní ndúúti chí cánée ní ndúúcū Espíritu N'dai yeⁿe Ndyuūs, Espíritu N'dai yeⁿe Ndyuūs chí nadacuéeⁿ yā Cristo yeⁿe nguaaⁿ tináⁿā, tuu'mi ní maaⁿ Ndyuūs miíⁿ chí nadacuéeⁿ yā Cristo caⁿ'a yā chí tée yā cáávā Espíritu N'dai yeⁿe Ndyuūs chí cánée nduucú ní vida ngai na cuerpo yeⁿe ní chí 'āā n'díí.

¹²Ní cáávā chuū, ndís'tiī hermanos yeⁿe, vée chí cánée chí diiⁿ yú naati nguée 'cueetinee yú ní nguée diiⁿ yú tan'dúúcā chí neⁿe cuerpo yeⁿe yú. ¹³Caati ndúúti chí diiⁿ yú tan'dúúcā chí neⁿe cuerpo yeⁿe maaⁿ yú, tuu'mi ní cuuvi 'cuūvi yú cueⁿe daāⁿmaⁿ. Naati nduuti chí nguée diiⁿ yú cuenta chí diiⁿ cuerpo yeⁿe yú, tuu'mi ní cáávā Espíritu N'dai yeⁿe Ndyuūs chí canee ndúúcu yú 'cueetinee yú.

¹⁴Ní nducyáácá 'iiⁿ'yāⁿ chí Espíritu N'dai yeⁿe Ndyuūs ngaⁿ'a yā chí cuuvi dííⁿ yā 'iiⁿ'yāⁿ s'eeⁿ ní daiya Dendyuūs 'iiⁿ'yāⁿ. ¹⁵Ní Ndyuūs 'āā tee yā s'uuúⁿ Espíritu N'dai yeⁿe yā nguée cáávā chí diiⁿ yú ntiin'nyuⁿ yeⁿe yā chí di'va'a yú ley cáávā chí condenado yú taama vmnéⁿēe naati cáávā chí s'uuúⁿ ní daiya Ndyuūs s'uuúⁿ. 'Íicú cucáávā Espíritu N'dai yeⁿe Ndyuūs ní s'uuuⁿ ní cuuvi caaⁿ'maⁿ yú: N'diī, Ndyuūs ní Chiidá. ¹⁶Ní maaⁿ Espíritu N'dai yeⁿe Ndyuūs ngaⁿ'á yā ndúúdu cuaacu ndúúcū espíritu yeⁿe yú chí s'uuuⁿ ní daiya Dendyuūs s'uuúⁿ.

¹⁷Ní nduuti chí s'uuuⁿ ní daiyá Ndyuūs s'uuuⁿ, tuu'mi ní vée chí cuuvi yeⁿe yú chí Ndyuūs caⁿ'a yā chí tée yā s'uuúⁿ. Ní cuta'a yú chí cuuvi yeⁿe yú ndúúcū Cristo maáⁿ yā nduuti chí s'uuuⁿ ní 'cueenu yú cuuvi maaⁿ cáávā chí yeⁿe Cristo s'uuúⁿ. Cuayiivi ní vée parte yeⁿe yú ndúúcū Cristo ndúúcū vaadi dēeve n'dái taavi yeⁿe yā.

¹⁸Maaⁿ ní inadacadiinúúⁿ chí dendu'ū chí n'geenu yú ngii maaⁿ nguée dēē vee chí ch'ete nguée tan'dúúcā dendu'ū chí dēeve ca ní ch'ete ca chí Ndyuūs 'cuuⁿ'míⁿ

yā s'uuúⁿ. ¹⁹Tanducuéⁿē yeⁿe iⁿ'yeeⁿdī chi din'dái Ndyuūs cuáácú cunee ngiinu tiempo chi cuuvi n'diichi 'iⁿ'yāⁿ s'eeⁿ chi daiya Ndyuūs. ²⁰Caati tanducuéⁿē chi din'dái Ndyuūs ndāā nguuvi chi 'āā ntéé n'daacā. Ní nguéé cucáávā chi maāⁿ néⁿe naati cucáávā chi Ndyuūs neⁿé yā chi 'tíicā. Ní maaⁿ ní tanducuéⁿē tiempo miiⁿ ní tanducuéⁿē dendu'ū cunee ngiinu chi Ndyuūs diⁿ yā chi canéé n'daacā cáávā yeⁿē. ²¹Ní tanducuéⁿē chi din'dái Ndyuūs canéé chi natuuvií. Naati ndāā tiempo chi nguéé natúúvií caati véé parte yeⁿē ndúúcu libertad chí n'dai taavi chi yeⁿē 'iⁿ'yāⁿ s'eeⁿ chi daiyá Dendyuūs. ²²Ní s'uūuⁿ ní deenu yú chi ndíí nguuvi maaⁿ tanducuéⁿē chi din'dái Ndyuūs ní n'gai ya'āi ngeecū yeⁿē tan'dúúcu 'áámá n'daataá ndúúcu vaadi ya'ai yeⁿē chi 'cundiyáaⁿ daiya tá. ²³Ní nguéé dāmaāⁿ tanducuéⁿē chi din'dái Ndyuūs ní n'gái ya'āi naati 'tiicá ntúūⁿ s'uuúⁿ n'geenu yú ngii. Áará chi canee yú ndúúcu Espíritu N'dai yeⁿé Ndyuūs chi Ndyuūs datee yā s'uuúⁿ chi vmnááⁿ vmnaaⁿ sta'a yú yeⁿé Ndyuūs. Ní 'cueenu taavi yú cuuvi 'naaⁿ chi canéé ngiinu yú tiempo chi Ndyuūs cuta'á yā s'uūuⁿ chi daiyá Ndyuūs s'uuúⁿ. Ní nanguaⁿ'ái yā s'uūuⁿ yeⁿe cuerpo yeⁿe yú chi véé maaⁿ. Ní 'āā ntéé véé cuerpo ndíicuū yeⁿe yú naati vεε cuerpo chí ngai yeⁿe yú. ²⁴Ní s'uuúⁿ nguaⁿ'ai yú cáávā chi canee ngiinu yú chi Ndyuūs caⁿ'a yā chi téé yā s'uuúⁿ. Nduuti chi 'āā inaaⁿ yú de'ē chi canee ngiinu yú 'āā ntéé canee ngiinu yú yeⁿē. Chífⁿ chi 'āā

inaaⁿ 'iⁿ'yāⁿ 'āā ntéé canéé ngiinu yā yeⁿē. ²⁵Naati nduuti chi canéé ngiinu yú chi 'āā cuéé snaaⁿ yú canéé chi cunee ngiinu yú ndúúcu 'víich'etítínūuⁿ.

²⁶Ní Espíritu N'dai yeⁿé Ndyuūs nnginnée yā s'uūuⁿ taachi dúuvā yú. S'uuúⁿ nguéé deenu yú táácā canéé chí caaⁿ'maⁿngua'a yú tan'dúúcu chi Ndyuūs neⁿé yā, ní maaⁿ ní Espíritu N'dai yeⁿé Ndyuūs inneé yā s'uuúⁿ taachi ngaⁿ'angua'a yú nanááⁿ Ndyuūs taachi n'gai ya'ái yā ní nguéé cuuvi caaⁿ'maⁿ yú chuū ndúúcu nduudu. ²⁷Ní Ndyuūs chi n'diichí yā staava yeⁿe yú deenú yā chi nadacadiinuⁿ Espíritu N'dai yeⁿé Ndyuūs caati Espíritu N'dai yeⁿe Ndyuūs ngiica yā dāmaāⁿ yeⁿe chi neⁿe Ndyuūs ní cáávā 'iⁿ'yāⁿ chi yeⁿe Ndyuūs.

Cuchεε ca yú yeⁿe nducuéⁿē

²⁸Ní deenu yú chi Ndyuūs diⁿ yā chi tanducuéⁿē chi chó'oo yeⁿe s'uūuⁿ chí yeⁿe s'uūuⁿ ní cáávā chi n'daacā yeⁿe yú caati neⁿe yú Ndyuūs. Ní Ndyuūs yaa'ví yā 'iⁿ'yāⁿ s'eeⁿ chi cuuvi yeⁿé yā 'iⁿ'yāⁿ s'eeⁿ. ²⁹Ní Ndyuūs ndεεve yā 'iⁿ'yāⁿ chi cuuvi yeⁿé yā ní diví yā 'iⁿ'yāⁿ s'eeⁿ lado yeⁿé yā ndii vmnááⁿ vmnaaⁿ caati 'iⁿ'yāⁿ s'eeⁿ cuuvi daiyá yā tan'dúúcu Daiyá yā Jesucristo. Ní 'íicú Cristo chi Daiya Ndyuūs ní Daiyá yā vmnááⁿ vmnaaⁿ nguaaⁿ n'dee n'dái vi'i yā.

³⁰Ní 'iⁿ'yāⁿ s'eeⁿ chi Ndyuūs chínδεεve yā ndíí vmnááⁿ vmnaaⁿ Ndyuūs yaa'ví yā 'iⁿ'yāⁿ s'eeⁿ chi cuuvi yeⁿé yā 'iⁿ'yāⁿ s'eeⁿ. Ní yaa'ví yā 'iⁿ'yāⁿ chí sta'á yā 'iⁿ'yāⁿ s'eeⁿ chi cuuvi daiyá yā. Ní Ndyuūs chí

sta'a yā 'iiⁿyāⁿ s'eeⁿ chi cuuvi yeⁿ'é yā ní cuayiivi dich'eteté yā 'iiⁿyāⁿ s'eeⁿ.

³¹¿D'éē cuuvi caaⁿmaⁿ yú yeⁿ'é dendu'ū s'eeⁿ? Dámaāⁿ cuuvi caaⁿmaⁿ yú chuū. Nduuti chi Ndyuūs canée yā ndúúcu s'uuúⁿ, ¿du'ū cuchéé cūnee contra yeⁿ'e s'uuúⁿ? ³²Ní Ndyuūs nguée diya'āi 'íinu yā Daiya yā cáávā s'uuúⁿ naati dicholó yā Daiyá yā caati ch'ii Daiya yā caavā nducyaaca s'uuúⁿ. Ní nduuti chi 'tíicā díiⁿ yā ndúúcu Daiya yā, ¿'áá nguée tee Ndyuūs tanducuéⁿ'ē s'uuúⁿ daama ndúúcu Daiyá yā ní ndee n'dái yeⁿ'ē?

³³¿Dú'ū cuuvi caaⁿmaⁿ nuuⁿndi yeⁿ'é 'iiⁿyāⁿ chi Ndyuūs ndeeve yā? Ndyuūs maáⁿ yā díiⁿ yā aceptar 'iiⁿyāⁿ chi yeⁿ'é yā. ³⁴¿Dú'ū tuu'mi cuuvi díiⁿ yā condenar s'uuúⁿ? Cristo ní 'iiⁿyāⁿ chi ch'ii yā cáávā nuuⁿndi yeⁿ'e yú ní nduuchí yā yeⁿ'e nguaaⁿ tinaⁿā. Ní maaⁿ ní Cristo canee yā na lado yeⁿ'e honor yeⁿ'ē Chiidá yā. Ní ngaⁿangua'á yā cáávā s'uuúⁿ. ³⁵¿Du'ū cuuvi divíi yā s'uūuⁿ yeⁿ'e Cristo chi neⁿ'é yā s'uuúⁿ? ¿'Áá chiiⁿ chi n'geenu yú ngii, 'áá cuuvi nadivíi s'uūuⁿ, o dendu'ū chi diiiⁿ chi idi'vaachi yú o dendu'ū chi diiⁿ 'iiⁿyāⁿ chi 'cueenu yú cuuvi o taachi cuuví cuiica yú o taachi 'āā ntéé catecai yú o cáánda yeⁿ'e yú o taachi ch'iin'núⁿ yā s'uūuⁿ ndúúcu machete chi 'uūvi lados 'caāiⁿ? ¿'Áá cuuvi diiiⁿ nducuéⁿ'ē chuū nadivíi s'uuúⁿ ná vaadi neⁿ'e yeⁿ'e Cristo? Nguée cuuvi. ³⁶'Tíicā canée nguūⁿ na libro yeⁿ'é Ndyuūs:

Cáávā chi s'uuúⁿ ní yeⁿ'e di s'uuúⁿ nuuⁿmaⁿ nguuvi canee yú listo chi 'caaⁿnúⁿ yā s'uuúⁿ

cáávā di. Ní 'iiⁿyāⁿ diiⁿ cuenta yā chi s'uuúⁿ tan'dúúca 'iiti cuūchī chi caⁿ'á yā 'caaⁿ'nuⁿ yā, 'tíicā s'uuúⁿ.

³⁷Naati yeⁿ'e nducuéⁿ'ē dendu'ū cuchéé cá yú cáávā Cristo chi dinéⁿ'e yā s'uuúⁿ. ³⁸'Tíicā 'úú ní deenú chi cuaacu chi mar 'áámá 'iiⁿyāⁿ nguée cuuvi divíi yā s'uūuⁿ yeⁿ'e Ndyuūs chi dinéⁿ'e yā s'uuúⁿ. Ndíi nguée ndúú vaadi n'gii, ndíi nguée ndúú chi cunduūchi yú, ndíi nguée ndúú ángeles, ndíi nguée ndúú espíritus chi ngaⁿ'a ntiⁿ'nyuⁿ ndúúcu poder yeⁿ'e espíritus, ndíi nguée ndúú dendu'ū chi véé maaⁿ, ndíi nguée ndúú dendu'ū chi cuchii, ³⁹ndíi nguée ndúú yeⁿ'e chi véé chí na yáácú, ndíi nguée ndúú yeⁿ'e chi véé ndii na yáanūⁿ, ndíi nguée ndúú táamá naaⁿ chi véé, tanducuéⁿ'ē chuū nguée cuuví divíi s'uuúⁿ yeⁿ'e Ndyuūs chi dinéⁿ'e yā s'uuúⁿ caati s'uuúⁿ ní yeⁿ'e Jesucristo s'uuúⁿ.

Ndyuūs ndeeve yā 'iiⁿyāⁿ Israel chí judíos chi cuuvi 'iiⁿyāⁿ yeⁿ'e yā

9 'Úú Pablo ní ngaⁿ'á nduudu cuaacu ti 'úú ní yeⁿ'é Cristo 'úú, ní nguée ngaⁿ'á nduudu yaadi. Chífⁿ chi nadacádiinúúⁿ na staava yeⁿ'é ní yeⁿ'e Espírítu N'dai yeⁿ'é Ndyuūs. Cáávā chuū cuaacu niiⁿ'nyúⁿ deenú chi ngaⁿ'á nduudu cuaacu. ²Neené ndaachií yiinú ní neené ya'ai staava yeⁿ'é cáávā 'iiⁿyāⁿ yeⁿ'e ndaata yeⁿ'é, ³ndíi chí 'úú maáⁿ neⁿ'é chí cuneé condenado 'úú ní canee 'aama lado yeⁿ'e Cristo nduuti chí chiiⁿ cuuví díiⁿ, ní cuuví 'cuetinéé n'daacā 'iiⁿyāⁿ yeⁿ'e ndaata yeⁿ'é, ní cuuví

yā yeⁿe Cristo 'iiⁿ'yāⁿ. ⁴'Iiⁿ'yāⁿ s'eeⁿ ní yeⁿ'ē 'iiⁿ'yāⁿ yeⁿ'e ndaata Israel. Ní Ndyuūs sta'á yā 'iiⁿ'yāⁿ s'eeⁿ chi cuuvi daiyá yā. Ní Ndyuūs chí ðeeve n'dái taavi ca canée yā nguaaⁿ 'iiⁿ'yāⁿ s'eeⁿ. Ní dííⁿ yā 'áámá compromiso ndúúcu yā. Ní ca'á yā 'iiⁿ'yāⁿ s'eeⁿ ley yeⁿ'é yā chi ley yeⁿ'e Moisés. Ní 'iiⁿ'yāⁿ s'eeⁿ canée yā ndúúcu ntiⁿ'nyuⁿ yeⁿ'e yaacū ní ndúúcu compromiso yeⁿ'é Ndyuūs chi Ndyuūs caⁿ'a yā chi ca'á yā 'iiⁿ'yāⁿ s'eeⁿ. ⁵Ní 'iiⁿ'yāⁿ s'eeⁿ ní daiya chiida yú cuááⁿ vmnaaⁿ ní yeⁿ'e ndaata 'iiⁿ'yāⁿ s'eeⁿ. Ní yeⁿ'e ndaata 'iiⁿ'yāⁿ s'eeⁿ Cristo ní ndaa yā ndúúcu cuerpo tan'dúúca 'iiⁿ'yāⁿ s'eeⁿ. Ní Cristo miⁿ ní Ndyuūs, ní ch'ēete taavi yā yeⁿ'e nducuéⁿē. Cueⁿ'e daaⁿmaⁿ dich'ēete yú Ndyuūs. 'Tíicā.

⁶'Úú nguéeⁿ ngaⁿ'á chi compromiso chi ngaⁿ'a Ndyuūs nanááⁿ 'iiⁿ'yāⁿ Israel chí nguéeⁿ dich'ííⁿvē. N'daācā ca chi ngaⁿ'á chi nducyaaca 'iiⁿ'yāⁿ yeⁿ'e ndaata Israel miⁿ cuaacu chi nguéeⁿ yeⁿ'e 'iiⁿ'yāⁿ Israel. ⁷Naati nguéeⁿ nducyaaca 'iiⁿ'yāⁿ yeⁿ'e ndaata Israel ní daiya Abraham 'iiⁿ'yāⁿ. Naati 'túúca ngaⁿ'a Ndyuūs: Dii Abraham, cáávā saⁿ'ā daiya di chi nguuvi Isaac véé 'iiⁿ'yāⁿ yeⁿ'ē di cuayiivi. ⁸Ní cáávā nduudu chi ngaⁿ'a Ndyuūs cuuvi deenú chi mar 'áámá 'iiⁿ'yāⁿ cuuvi daiya Ndyuūs cáávā chi ch'iindiyáaⁿ yā na ndaata yeⁿ'é Abraham. Nguēe 'tíicā. 'Iiⁿ'yāⁿ s'eeⁿ ní daiya Dendyuūs nduuti chi cucáávā compromiso yeⁿ'e Ndyuūs, 'iiⁿ'yāⁿ s'eeⁿ cuaacu chi daiyá Ndyuūs. ⁹Nduudú 'cūū nduudu chi canée nguūⁿ yeⁿ'ē compromiso miⁿ chi Ndyuūs ca'á yā Abraham:

Tiempo chi ch'iⁿ'í, 'úú ndaá ní ch'iⁿ'í poder yeⁿ'é ní Sara chi n'daataá yeⁿ'ē di ní 'cuundi 'aama daiya tá.

¹⁰Ní nguéeⁿ dámaaⁿ chuū. Nduu 'uuvi daiya táⁿā Rebeca míⁿ ní cuaāchī. Ní nguuvi yā Esaú ndúúcu Jacob ní yeⁿ'ē 'áámá chiidaá ní chiidá yā ní Isaac chi yeⁿ'e ndaata yeⁿ'e 'iiⁿ'yāⁿ vmnááⁿ vmnaaⁿ yeⁿ'e yú. ¹¹⁻¹³Ní taachi daiyā Rebeca miⁿ chi cuaāchī 'āā cuéeⁿ 'cuēetiýáaⁿ yā ní 'āā cuéeⁿ dííⁿ yā cosa chi n'daacā o cosa chi nguéeⁿ n'daāca, Ndyuūs yaa'ví yā táⁿā Rebeca miⁿ 'tíicā: Daiya di chi saⁿ'ā vmnaaⁿ chí Esaú dííⁿ sa servir daiya di chi saⁿ'ā chí cuchii cuayiivi chi Jacob. Ní chuū ní tan'dúúca chi canée nguūⁿ naachí Ndyuūs ngaⁿ'a yā 'tíicā: 'Úú dineⁿ'é saⁿ'a Jacob miⁿ, naati sáⁿ'ā Esaú miⁿ 'úú nguéeⁿ neⁿ'é. Déenu yú chi canée cuaacu chi Ndyuūs cuuvi ndēeve yā 'āā du'ú nūuⁿ 'iiⁿ'yāⁿ chi neⁿ'e yā tan'duucā chi neⁿ'e yā. Ní cuuvi yaa'vi yā 'iiⁿ'yāⁿ chi neⁿ'é yā yaa'ví yā chi cuuvi yeⁿ'e yā. Ní nguéeⁿ dííⁿ yā cuenta chiiⁿ chi diiⁿ 'iiⁿ'yāⁿ chi yaa'ví yā. Ní ndēevé yā Jacob.

¹⁴¿De'ē cuuvi caaⁿ'maⁿ s'uūuⁿ yeⁿ'e chi diiⁿ Ndyuūs? ¿Áá diiⁿ Ndyuūs cosa chi nguéeⁿ cuaacu? Nguéeⁿ mar 'áámá naaⁿ. ¹⁵Ndyuūs ní caⁿ'a yā chii yā Moisés miⁿ 'tíicā: 'Úú ní ya'ái cáávā 'iiⁿ'yāⁿ chi 'úú neⁿ'é chi caⁿ'á chí ya'ái yeⁿ'e yā; ní 'úú ya'ái 'iinú cáávā 'iiⁿ'yāⁿ chi 'úú neⁿ'é chi caⁿ'á chí ya'ái 'iinú cááva yā. ¹⁶Maaⁿ ní nguéeⁿ tan'dúúca chi 'iiⁿ'yāⁿ s'eeⁿ neⁿ'é yā o dííⁿ yā chi cuuvi yeⁿ'é Ndyuūs 'iiⁿ'yāⁿ, naati dámaaⁿ tan'dúúca chi Ndyuūs ya'ai 'iinú yā caava 'āā du'ú nūuⁿ chi neⁿ'é yā chi

cuuvi yeⁿé yā. ¹⁷Ní canéé nguūⁿ na libro yeⁿe Ndyuūs taachi Ndyuūs yaa'ví yā rey yeⁿe yāⁿaa Egipto 'tíicā: Dii Faraón, 'úú s'neéⁿ dii rey caati 'úú cuuvi 'cuuⁿmíⁿ poder yeⁿé cucáávā dii. Ní 'iiⁿyāⁿ yeⁿe núúⁿmáⁿ íⁿ'yeeⁿdí cuuvi déénú yā chi duuchí ní caaⁿmáⁿ yā chi duuchí. ¹⁸Ní 'tíicā diiⁿ Ndyuūs. Ya'ái yā cáávā 'iiⁿyāⁿ s'eeⁿ chi maáⁿ yā neⁿé yā, ní 'tiicá ntúūⁿ Ndyuūs dicheéchi yā staava yeⁿe 'iiⁿyāⁿ s'eeⁿ chi maáⁿ yā neⁿé yā dicheéchi yā.

¹⁹Tuu'mi ní 'aamá nī caⁿa nī chíi nī 'úú 'tíicā: Nduuti chi 'tíicā, 'de'e cúúvī chi Ndyuūs ngaⁿá yā chi nuuⁿndi ní yeⁿe saⁿá? Ní 'dúúⁿ cuuvi diiⁿ cosa chi contra yeⁿe chi Ndyuūs neⁿé yā chi diiⁿ? ²⁰'Úú ní ngaⁿá ngii díí saⁿá: 'Dúúⁿ dii chi díí cuuvi n'guécútaⁿa di yeⁿé Ndyuūs? 'Áá cuaacu chi 'áamá 'cúutii yeⁿe íncheētí cuuvi caaⁿmaⁿ ndúúcu 'iiⁿyāⁿ chi din'dái yā 'cúutii miiⁿ ní caaⁿmaⁿ 'tíicā: 'De'e cúúvī chi din'dái nī 'úú 'túúcā? ²¹Deenu yú chi 'iiⁿyāⁿ chi din'dái yā 'cúutii cuuvi din'dái yā yeⁿe íncheētí tan'dúúcā chi neⁿé yā din'dái yā. Cuuvi din'dái yā yeⁿe 'áamá taaⁿ íncheētí 'uūvī 'cúutii, 'áamá chi yaⁿai chíí'vē nī táámá chíi nguée yaⁿai chíí'vē.

²²Ní 'tiicá ntúūⁿ chi diiⁿ Ndyuūs. Ndyuūs neⁿé yā 'cuuⁿmíⁿ yā 'iiⁿyāⁿ táácā cuuvi dííⁿ yā castigar 'iiⁿyāⁿ ní ch'iⁿí yā poder yeⁿé yā. Ní n'dee 'nááⁿ tiempo Ndyuūs chéé yā ndúúcu vaadi ngiinu yeⁿé yā ndúúcu 'iiⁿyāⁿ s'eeⁿ chi nguée n'daacá idiíⁿ yā. Ní Ndyuūs canéé chi dííⁿ yā castigar 'iiⁿyāⁿ s'eeⁿ. Ní Ndyuūs dituūvī yā 'iiⁿyāⁿ s'eeⁿ. ²³Ní

Ndyuūs neⁿé yā ch'iⁿí yā s'uūuⁿ chí chéete ca vaadi dēene taavi yeⁿé yā ní néené ya'ai iinú yā cááva s'uūuⁿ. Ní ndii vmnááⁿ vmnaaⁿ dííⁿ yā chi s'uúuⁿ ní véé parte yeⁿe yú ndúúcu yā ndúúcu dēene taavi ca yeⁿé yā. ²⁴Ní Ndyuūs yaa'ví yā s'uūuⁿ chi cuuvi yeⁿé yā s'uūuⁿ, náⁿā s'uūuⁿ chi 'iiⁿyāⁿ Israel s'eeⁿ chi judíos s'uūuⁿ nī tanáⁿa s'uūuⁿ chi nguée 'iiⁿyāⁿ Israel s'eeⁿ chi judíos s'uūuⁿ. ²⁵Tan'dúúcā chi canéé nguūⁿ na libro yeⁿé Ndyuūs naachi dingūⁿ profeta Oseas ní Ndyuūs ngaⁿá yā 'tíicā:

'Iiⁿyāⁿ chi nguée yeⁿe ndaata yeⁿé, 'úú yaa'ví 'iiⁿyāⁿ s'eeⁿ chi cuuvi yeⁿé; 'iiⁿyāⁿ chi nguée dineⁿé vmnaáⁿ ti nguée 'iiⁿyāⁿ yeⁿe 'úú maaⁿ ní ngaⁿá 'iiⁿyāⁿ s'eeⁿ chi neené neⁿé 'iiⁿyāⁿ s'eeⁿ.

²⁶Ní lugar mífⁿ nūuⁿ naachi Ndyuūs caⁿa yā chíi yā 'iiⁿyāⁿ s'eeⁿ 'túúcā: Ndís'tii ní nguée 'iiⁿyāⁿ yeⁿé ndís'tii, mífⁿ nūuⁿ ní ngaⁿá 'iiⁿyāⁿ s'eeⁿ ní chi duuchí yā daiya Dendyuūs chí canduuchi.

²⁷Ní saⁿa profeta Isaías caⁿa sá yeⁿe 'iiⁿyāⁿ Israel 'tíicā: 'Áará chí 'iiⁿyāⁿ yeⁿe ndaata Israel ní n'dee n'dái yā tan'dúúcā yáⁿaa ndúútii yeⁿe yiicu dámaaⁿ n'duu'vi núúⁿ yā nnguaⁿai yā. ²⁸Ní Señor Ndyuūs dííⁿ yā chi cuuvi cuaacu nduudu chi 'āa caⁿa yā yeⁿe yáⁿaa 'cūū ní nuuⁿ dííⁿ yā nducuéⁿe. ²⁹Ní 'tíicā ngaⁿa profeta Isaías cuaaⁿ vmnaaⁿ:

Nduuti chi Señor chi ngaⁿa ntiiⁿnyúⁿ yā yeⁿe nducuéⁿe nguée s'neéⁿ yā 'iiⁿyāⁿ yeⁿe yú ndúúcu yú, tuu'mi ní s'uúuⁿ

canee yú tan'dúúcā nducyáácá
'iiⁿyāⁿ yeⁿe yāāⁿ Sodoma
ndúúcū yāāⁿ Gomorra chí
ch'ii yā cucáávā nuuⁿndi yeⁿe
yā. 'Tífcā s'uuúⁿ.

**Yeⁿe 'iiⁿyāⁿ Israel s'eeⁿ ní yeⁿe
nduudu cuaacu yeⁿe evangelio**

³⁰ ¿Dē'ē cuuvi caaⁿmaⁿ yú tuuⁿmi?
'Tífcā cuuvi caaⁿmaⁿ yú. 'Iiⁿyāⁿ
chi nguéé yeⁿe ndaata Israel chi
judíos 'iiⁿyāⁿ s'eeⁿ nguéé inⁿnuúⁿ yā
Ndyuūs ní nguéé díⁿ yā chi canee
n'daāca yā nanáāⁿ Ndyuūs. Naati
cuayiivi míⁿ ní 'iiⁿyāⁿ s'eeⁿ canee
n'daāca yā nanáāⁿ Ndyuūs cáávā chí
i'téenu yā Ndyuūs. Ní Ndyuūs díⁿ
yā aceptar 'iiⁿyāⁿ s'eeⁿ chi yeⁿe yā
'iiⁿyāⁿ s'eeⁿ. ³¹ Nguéé 'tífcā ndúúcū
'iiⁿyāⁿ chi yeⁿe ndaataá Israel.
Caneé yā ndúúcū ley yeⁿe Moisés
chi cuuvi diiⁿ chi n'daacā caneé yā
nanáāⁿ Ndyuūs. Ní 'áará chi neⁿe yā
caneé n'daacā nanáāⁿ Ndyuūs naati
nguéé cuuvi díⁿ yā cumplir chiiⁿ
chi ngaⁿa ley miiⁿ. ³² ¿Dē'ē cúúvī
chi 'tífcā? 'Tífcā canee, caati 'iiⁿyāⁿ
yeⁿe ndaata Israel nguéé n'daacā
canee yā nanáāⁿ Ndyuūs cáávā
ntiiⁿnyuⁿ chi díⁿ yā cáávā ley yeⁿe
yā, ní nguéé neⁿe yā cu'téenu yā
Jesucristo. Ní cáávā chuū 'iiⁿyāⁿ
s'eeⁿ canee tan'dúúcā chi candēē
ca'a yā ná tuūu chi Jesucristo chi
diiⁿ chí indēē ca'a 'iiⁿyāⁿ. ³³ Ní 'tífcā
caneé nguūⁿ na libro yeⁿe Ndyuūs
yeⁿe tuūu miiⁿ:

'Úú Ndyuūs ní cu'neéⁿ na
yāāⁿ Sióⁿ 'áámá 'iiⁿyāⁿ chi
Jesucristo chi nguuvī tuūu chi
cuundeē ca'a 'iiⁿyāⁿ ní tuūú
miiⁿ ní 'áámá tuūú ch'ēēte chi
diiⁿ chi cundeēve 'iiⁿyāⁿ; ní

nducyáácá 'iiⁿyāⁿ chi cu'téenu
yā 'iiⁿyāⁿ miiⁿ, nguéé cuuvi
'cuināāⁿ yā.

10 Ndís'tii hermanos yeⁿe,
neⁿe ndúúcū núúⁿmāⁿ
staava yeⁿe chi nducyaaca 'iiⁿyāⁿ
Israel yeⁿe ndaata yeⁿe cuuvi
nnguaⁿai yā. Ní 'úú ní ngaⁿanguaⁿá
cááva yā. ² Deenú chi cuaacu chi
'iiⁿyāⁿ yeⁿe ndaataá yeⁿe ní neⁿe
yā dich'ēēte cá yā Ndyuūs naati
nguéé díⁿ yā tan'dúúcā chi neⁿe
Ndyuūs caati nguéé déenu yā táácā
cuuvi diiⁿ yā. ³ Ní nguéé déenu
yā táácā Ndyuūs díⁿ yā aceptar
'iiⁿyāⁿ chi cuuvi yeⁿe yā 'iiⁿyāⁿ. Ní
díⁿ yā chēē chi nadacádíínuuⁿ yā
chi n'daacā. Ní nguéé neⁿe yā díⁿ
yā tan'dúúcā chi Ndyuūs neⁿe yā
chi diiⁿ yā caati n'daacā caneé yā
nanáāⁿ Ndyuūs. ⁴ Ní taachi ndaā
Cristo díⁿ yā chi 'āā víí cā ley yeⁿe
Moisés. Ní maaⁿ ní nducyáácá 'iiⁿyāⁿ
chi i'téenu yā Cristo, 'iiⁿyāⁿ s'eeⁿ
n'daacā caneé yā nanáāⁿ Ndyuūs.
⁵ Ní Moisés miiⁿ dinguuⁿ yā yeⁿe
'iiⁿyāⁿ chi neⁿe yā canee n'daāca
yā nanáāⁿ Ndyuūs cáávā chi
díⁿ yā chi ngaⁿa ley miiⁿ. 'Tífcā
dinguúⁿ yā: 'Iiⁿyāⁿ chi diiⁿ yā
tanducuéⁿē denduⁿū chi ngaⁿa ley
yeⁿe Moisés canduuchí yā cueⁿe
daāⁿmaⁿ cucáávā ley miiⁿ. ⁶ Naati
chuū ní ngaⁿa yeⁿe 'iiⁿyāⁿ chi
canee n'daacā nanáāⁿ Ndyuūs cáávā
chi i'téenu yā Jesucristo. Díí nguéé
ngaⁿa di na staava yeⁿe di 'tífcā:
¿Du'u caⁿā na va'ai chēēti nguuvī?
Taachi ngaⁿa di 'tífcā, nadicua'ái
di Cristo yeⁿe va'āi chēēti nguuvī.
⁷ Ní nguéé caaⁿmaⁿ di na staava
yeⁿe di 'tífcā: ¿Du'ū cuuvi caⁿā yā
iⁿyeēⁿdi chí yāanūⁿ tan'dúúcā chi

cheⁿe Cristo? Taachi diiⁿ di 'tíicā, diiⁿ di chi Cristo nadacuéeⁿ yā yeⁿē nguaaⁿ tináⁿā. ⁸Chuū chi canee chi caaⁿmaⁿ yú: Nduudu cuaacu yeⁿē Ndyuūs 'āā niⁿnuúⁿ canee yeⁿē ní ní canee na cheendí ní ní canee na staava yeⁿē ní. Nduudu cuaacu miⁿ ní nduudu chi ngaⁿá 'nū nanááⁿ ndís'tii cááva chi cuuvi cu'téenu ní. ⁹Nduuti chi caaⁿmáⁿ ní ndúúcū 'iiⁿyāⁿ ní ngaⁿa ní 'tíicā chi Jesús miⁿ chííⁿ chí 'iiví ní ní i'téenu ní ndúúcū núúⁿmáⁿ staava yeⁿē ní chi Ndyuūs nadicuéeⁿ yā Cristo miⁿ yeⁿe nguaaⁿ tináⁿā, tuu'mi ní díí nanguáⁿai di. ¹⁰Canée chi cu'teenú ní ndúúcū núúⁿmáⁿ staava yeⁿe ní ní Ndyuūs cuaáⁿ yā ndís'tii. Canée chi caaⁿmáⁿ ní ndúúcū 'iiⁿyāⁿ ní ngaⁿá ní chi i'téenu ní Jesucristo ní cuuvi nanguaⁿai ní.

¹¹Ní canée nguūⁿ na libro yeⁿē Ndyuūs 'tíicā: Nducyáácá 'iiⁿyāⁿ chi cu'téenu yā Cristo nguéeⁿ cuuvi 'cuináaⁿ yā. ¹²Nguéeⁿ n'dáaⁿ yā 'iiⁿyāⁿ Israel s'eeⁿ ndúúcū 'iiⁿyāⁿ yeⁿe tanáⁿā naciones. Maaⁿ Señor Jesucristo miⁿ ní maaⁿ Señor yeⁿe nducyáácá 'iiⁿyāⁿ. Ní Señor miⁿ itée yā yeⁿe nducueⁿē chi n'dai yeⁿē yā nducyaaca 'iiⁿyāⁿ chi ngaⁿanguaⁿá yā nanááⁿ Ndyuūs cáávā chi duuchi yā. ¹³Caati 'tíicā canée nguūⁿ na libro yeⁿē Ndyuūs: Nducyáácá 'iiⁿyāⁿ chi ngaⁿa yā ngii yā: “N'díí Señor Jesucristo yeⁿē,” ní cuuví nanguaⁿai yā. ¹⁴¿Táácā cuuvi caaⁿmáⁿ yā ndúúcū Señor miⁿ nduuti chi nguē i'téenu yā 'iiⁿyāⁿ? ¿Ní táácā cuuvi cu'téenu yā yeⁿē áámá 'iiⁿyāⁿ chi nguéeⁿ n'giindiveéⁿ yā yeⁿe yā? ¿Ní táácā cuuvi caandiveéⁿ yā nduuti chi

nguéeⁿ 'aama 'iiⁿyāⁿ chi caaⁿmáⁿ yā nduudu cuaacu yeⁿe Ndyuūs? ¹⁵¿Ní táácā cuuvi caaⁿmáⁿ yā nduudu cuaacu yeⁿē Ndyuūs miⁿ nduuti chi nguéeⁿ du'ū vee dicho'ó? 'Tíicā canée nguūⁿ na libro yeⁿē Ndyuūs: De'e chúúcā n'daacā chi ndaaⁿ 'iiⁿyāⁿ s'eeⁿ chi candée yā nduudu cuaacu yeⁿe vaadi 'diiⁿ ní ngaⁿá yā nduudu ngai yeⁿē Cristo.

¹⁶Naati nguéeⁿ nducyaaca 'iiⁿyāⁿ i'téenu yā nduudu cuaacu yeⁿē Cristo. Ní tan'dúúcā chi ngaⁿa profeta Isaías ndii cuááⁿ vmnaaⁿ taachi ngaⁿa 'tíicā: N'dii Señor, ¿dú'ū i'téenu nduudu cuaacu chí ngaⁿā cuaacu yú? ¹⁷'Tíicā tuu'mi, 'iiⁿyāⁿ i'téenu yā nduudu cuaacu yeⁿe Jesucristo cáávā chi n'giindiveéⁿ yā nduudu miⁿ, ní n'giindiveéⁿ yā nduudu cuaacu yeⁿe Cristo.

¹⁸Naati 'úú itiinguuneéⁿ ndís'tii: ¿'Áá cuaacu chi nguéeⁿ n'giindiveéⁿ yā nduudu cuaacu yeⁿē Ndyuūs? Cuaacu chi n'giindiveéⁿ yā. 'Tíicā canée nguūⁿ na libro yeⁿē Ndyuūs:

Nduudu cuaacu chi ngaⁿa yā, ngaⁿa yā na núúⁿmáⁿ íⁿyeēⁿdí. Ní nduudu yeⁿe yā ní ngaⁿa yā ní ndíí núúⁿmáⁿ cuaaⁿ chi yaⁿai ca yeⁿē íⁿyeēⁿdí.

¹⁹Táámá vmnéⁿēe itiinguuneéⁿ ndís'tii: ¿'Áá nguéeⁿ dííⁿ cuenta 'iiⁿyāⁿ Israel chi judíos s'eeⁿ yeⁿe nduudu cuaacu yeⁿē Ndyuūs? Moisés miⁿ, 'iiⁿyāⁿ chi vmnááⁿ vmnaaⁿ nguēecuneéⁿ yā yeⁿe chuū, ní 'tíicā canée nguūⁿ:

'Úú ní dííⁿ chi cuuvi nngueé ní yeⁿe 'iiⁿyāⁿ yeⁿe táámá nación chi nguéeⁿ vée nación yeⁿē Ndyuūs. 'Úú ní dííⁿ chi

nduuví táaⁿ ní ndúúcū 'iiⁿyāⁿ
chi nguéeⁿ yeⁿé chí yeⁿe
táámá nación caati caⁿá dííⁿ
cosa chi n'daacā nduucú yā.

²⁰Ní profeta Isaías miiⁿ claro ca
chi ngaⁿá yā ndúúcū nduudú 'cūū.
Ndyuūs ngaⁿá yā 'tíicā:

'Iiⁿyāⁿ chi nguéeⁿ n'nuúⁿ yā 'úú
ní indaacā yā 'úú. 'Iiⁿyāⁿ chi
nguéeⁿ itiinguuneéⁿ yā yeⁿé,
'úú ní ch'iⁿí maáⁿ 'úú nanáaⁿ
yā.

²¹Ní taachi Isaías miiⁿ ngaⁿa yā
nanáaⁿ 'iiⁿyāⁿ yeⁿe Israel, 'tíicā
ngaⁿa yā: Ndyuūs ngaⁿa 'tíicā:
Nguuvi nguvi n'doó ta'á ní yaa'ví
'iiⁿyāⁿ chi nguéeⁿ n'giindiveéⁿ yā
nduudu yeⁿé. Ní chēechi staava
yeⁿé yā.

'Iiⁿyāⁿ yeⁿe Israel chí nanguáⁿai yā

11 Maaⁿ ní intíinguuneéⁿ
ndís'ti: 'Áá dííⁿ Ndyuūs
chi s'neéⁿ yā 'iiⁿyāⁿ Israel yeⁿe
ndaata yeⁿé yā? Nguéeⁿ dííⁿ yā 'tíicā.
'Úú Pablo maáⁿ 'iiⁿyāⁿ yeⁿe ndaata
Israel 'úú ní yeⁿe ndaata yeⁿe
Abraham 'úú, ní yeⁿé 'iiⁿyāⁿ yeⁿe
ndaata Benjamín 'úú. ²Ndii cuááⁿ
vmnaaⁿ Ndyuūs dííⁿ yā recibir
'iiⁿyāⁿ yeⁿe ndaata yeⁿé yā, 'iiⁿyāⁿ
Israel chi ndēēve yā chi cuuvi yeⁿe
yā 'iiⁿyāⁿ. Ní ndís'ti, 'Áá nguéeⁿ
déenu ní yeⁿe chi canéeⁿ nguūⁿ na
libro yeⁿé Ndyuūs naachi profeta
Elías ngaⁿangua'á yā ní di'cuiitú
yā Ndyuūs contra yeⁿé 'iiⁿyāⁿ
Israel? Ní caⁿa yā 'tíicā: ³N'díí
Señor Ndyuūs, 'iiⁿyāⁿ Israel s'eeⁿ ní
'niiⁿnúⁿ yā saⁿá profetas yeⁿé ní
dituúví yā nátaí s'eeⁿ yeⁿe ní, n'dii
Ndyuūs chí canduuchi. Ní maaⁿ
dámaāⁿ 'úú caneéⁿ ní 'tiicā ntúūⁿ

neⁿé yā 'caaⁿnuⁿ yā 'úú. ⁴Naati
Ndyuūs nan'guēcútaⁿa yā yeⁿe
profeta Elías miiⁿ, 'tíicā: Canéeⁿ lado
yeⁿé ndēēchē mil saⁿá chi nguéeⁿ
chiintii'yā yā nanáaⁿ santo ídolo chi
nguvi Baal. ⁵Ní 'tiicā ntúūⁿ yeⁿe
tiempo 'cūū canéeⁿ duu'ví 'iiⁿyāⁿ
yeⁿe Israel chi i'téenu yā Ndyuūs ní
Ndyuūs ndēēve yā 'iiⁿyāⁿ s'eeⁿ. Ní
dííⁿ yā cosa chi n'dai taavi cáava
yā. ⁶Ní nduuti chi yeⁿé Ndyuūs
'iiⁿyāⁿ s'eeⁿ cáávā chi Ndyuūs ní diiⁿ
n'dai taaví yā ní ndēēve yā 'iiⁿyāⁿ
s'eeⁿ, tuu'mi ní nguéeⁿ cáávā cosa chi
'iiⁿyāⁿ s'eeⁿ maáⁿ yā cuuvi diiⁿ yā.
Ní ndúúti chi cáávā cosa chi 'iiⁿyāⁿ
s'eeⁿ cuuví dííⁿ yā, tuu'mi ní nguéeⁿ
cáávā vaadi n'dai yeⁿé Ndyuūs chi
yeⁿé Ndyuūs 'iiⁿyāⁿ.

⁷¿D'é ra tuu'mi? 'Iiⁿyāⁿ Israel
nguéeⁿ ndaaca yā d'e'ē chi in'nuúⁿ yā.
Naati 'iiⁿyāⁿ chi Ndyuūs ndēēve yā,
'iiⁿyāⁿ s'eeⁿ ndaaca yā. Ní tanáⁿa
'iiⁿyāⁿ nguéeⁿ n'giindiveéⁿ yā nduudu
yeⁿé Ndyuūs ti ndii chēechí maáⁿ
yā 'iiⁿyāⁿ. ⁸'Tíicā canéeⁿ nguūⁿ na
libro yeⁿé Ndyuūs: Ndyuūs dííⁿ
yā chi nguéeⁿ tuumicádíínuuⁿ yā
na staava yeⁿé yā dendu'ū yeⁿe
Espíritu N'dai yeⁿé Ndyuūs; ní dííⁿ
yā chi nduutináaⁿ yā nguéeⁿ snaaⁿ yā
ní veéⁿ yā nguéeⁿ 'caandiveéⁿ yā. Ní
'tíicā 'iiⁿyāⁿ Israel ndii tiempo 'cūū.

⁹'Tiicā ntúūⁿ David ngaⁿa yā:

'Viicu yeⁿé chi che'ē yā ní
nduuvi tan'dúúcā tuúví cáávā
'iiⁿyāⁿ s'eeⁿ. Ní tiempo chi
che'ē yā ndaā enemigos yeⁿé
yā ní nadituu'ví ya 'iiⁿyāⁿ
s'eeⁿ. Ní 'tíicā Ndyuūs cuuvi
dííⁿ yā castigar 'iiⁿyāⁿ s'eeⁿ.

¹⁰Ní nduutinaáⁿ yā tan'dúúcā chi
cuuvi ngueēe chí nguéeⁿ snaaⁿ

yā. Ní dáámí yā 'áámá nūuⁿ
can'díi yā cueⁿe daāⁿmaⁿ.

**Nanguaⁿai 'iiⁿyāⁿ chi
nguéeⁿ 'iiⁿyāⁿ Israel**

¹¹Maaⁿ ní itiinguuneéⁿ ndís'tiī:
Taachi 'iiⁿyāⁿ Israel s'eeⁿ candéeⁿ
ca'a yā chí cundeeve yā caati nguéeⁿ
i'téenu yā Ndyuūs, ¿'áá 'áámá
caneé chi chindeeve yā? Nguéeⁿ
'tíicā mar 'áámá naaⁿ. Naati chó'oo
chuū caati 'iiⁿyāⁿ Israel chi judíos
s'eeⁿ nguéeⁿ n'giindiveéⁿ yā nduudu
yeⁿ'é Ndyuūs. Ní 'íicú 'iiⁿyāⁿ chi
nguéeⁿ yeⁿ'e ndaata Israel cuuvi
nánguaⁿai yā. Ní diiīⁿ chi 'iiⁿyāⁿ
yeⁿ'e ndaata Israel nnguéeⁿ yā yeⁿ'e
tanáⁿ'ā 'iiⁿyāⁿ ní cu'téenu cá yā
Ndyuūs. ¹²Ní caati 'iiⁿyāⁿ Israel
s'eeⁿ nguéeⁿ ch'iindiveéⁿ yā nduudu
yeⁿ'e Ndyuūs ní chó'oo chi tuneéⁿ
'iiⁿyāⁿ yeⁿ'e núuⁿmáⁿ iⁿ'yeeⁿdī chi
cuuvi cu'teenú yā Ndyuūs. Ní sta'a
yā yeⁿ'e vaadī n'dai yeⁿ'é Ndyuūs. Ní
nduuti chi 'iiⁿyāⁿ chi nguéeⁿ yeⁿ'e
ndaata Israel cuuvi cu'téenu yā
caava 'iiⁿyāⁿ yeⁿ'e ndaata Israel
nguéeⁿ ch'iindiveéⁿ yā nduudu yeⁿ'é
Ndyuūs, tuuⁿmi n'dee ca n'daacā
ca yeⁿ'e nducyáácā 'iiⁿyāⁿ taachi
'iiⁿyāⁿ Israel s'eeⁿ nanguēcúndií yā
ní cu'téenu yā nduudu yeⁿ'é Ndyuūs
taama vmnéⁿ'ēe.

¹³Maaⁿ ní neⁿ'é caāⁿmáⁿ nduucú
ndís'tiī chi nguéeⁿ 'iiⁿyāⁿ Israel
ndís'tiī. Maaⁿ chi Ndyuūs dicho'ó
yā 'úú chi 'úú ní apóstol chi candéeⁿ
nduudu yeⁿ'é yā nanááⁿ 'iiⁿyāⁿ chi
nguéeⁿ Israel s'eeⁿ. Úú deenú chi
ch'etete ntiiⁿnyuⁿ yeⁿ'é. ¹⁴Ní 'úú neⁿ'é
chi 'iiⁿyāⁿ yeⁿ'e ndaata yeⁿ'é ngueéⁿ
yā yeⁿ'e ndís'tiī niicu cu'téenu yā
Ndyuūs tan'dúucā chi ndís'tiī i'téenu

nī Ndyuūs. Ní 'iicú cuuvi nanguaⁿai
n'duuvī 'iiⁿyāⁿ yeⁿ'e ndaata yeⁿ'é
tan'dúucā ndís'tiī nanguaⁿai nī.
¹⁵Ní taachi Ndyuūs s'neéⁿ yā 'áámá
lado 'iiⁿyāⁿ Israel s'eeⁿ diīⁿ yā
'tíicā caati nducyaaca 'iiⁿyāⁿ yeⁿ'e
iⁿ'yeeⁿdí 'cūū chi nguéeⁿ yeⁿ'e 'iiⁿyāⁿ
Israel cuuvi cunee 'diīfⁿ yā ndúucū
Ndyuūs. ¿Táácā cuuvi yeⁿ'e 'iiⁿyāⁿ
Israel s'eeⁿ taachi Ndyuūs cuaāⁿ
ntuúⁿ yā 'iiⁿyāⁿ Israel s'eeⁿ? Ndyuūs
nca'á yā vida cueⁿe daāⁿmaⁿ yeⁿ'é
yā lugar yeⁿ'e vaadī n'gii cueⁿe
daāⁿmaⁿ. ¹⁶N'giindiveéⁿ nī yeⁿ'e
chuū chi caaⁿmáⁿ: Nduuti chi ca'a
yú Ndyuūs 'áámá taaⁿ yeⁿ'e masa
yeⁿ'é pan cáávā ofrenda, 'tiicā ntúūⁿ
nducuéⁿ'ē masa yeⁿ'e pan miiⁿ ní
yeⁿ'é Ndyuūs. Ní nduuti chi ca'a yú
Ndyuūs cáávā ofrenda diiⁿyu yeⁿ'e
yáⁿ'á, 'tiicā ntúūⁿ nducuéⁿ'ē yáⁿ'á ní
yeⁿ'é Ndyuūs. 'Tiicā ntúūⁿ Ndyuūs
di'viicú yā 'iiⁿyāⁿ yeⁿ'e ndaata Israel
caati 'āā di'viicú yā 'iiⁿyāⁿ vmnáāⁿ
vmnaaⁿ yeⁿ'e ndaata yeⁿ'é yā.

¹⁷Náⁿ'á dúuⁿnē yeⁿ'e yáⁿ'á olivo
chi canée na yáⁿ'āā 'iiⁿyāⁿ, ní 'iiⁿyāⁿ
'caaca yā ní sta'a yā dúuⁿnē yeⁿ'e
yáⁿ'á olivo chi canée icyáⁿ'ā ní diīⁿ
yā chi yeⁿ'e yáⁿ'á olivo yeⁿ'é yā.
'Tíicā ndís'tiī, 'iiⁿyāⁿ chi nguéeⁿ yeⁿ'e
ndaata Israel. Ní ndís'tiī tan'dúucā
dúuⁿnē yeⁿ'e yáⁿ'á olivo yeⁿ'e icyáⁿ'ā
miiⁿ 'tiicā nī naati maaⁿ ní véé parte
yeⁿ'é nī ndúucū 'iiⁿyāⁿ Israel chi
tan'dúucā yáⁿ'á olivo chi canée
yáⁿ'āā 'iiⁿyāⁿ. Ní maaⁿ ní ndís'tiī
chi nguéeⁿ yeⁿ'e ndaata Israel cuuvi
yeⁿ'é nī nducuéⁿ'ē chi n'dai taavi
yeⁿ'e 'iiⁿyāⁿ chi Israel yā. ¹⁸Maaⁿ ní
ndís'tiī chi nguéeⁿ Israel nī, nguéeⁿ
caaⁿmáⁿ nī chi ch'etete maáⁿ nī
ndís'tiī, caati nguéeⁿ 'iiⁿyāⁿ chi Israel

yā chi tan'dúúccā chi nguée yeⁿe yáⁿá. Ní 'iiⁿyāⁿ 'caaca yā dúuⁿnē miiⁿ, 'tííca yā. Ndí's'tií n'gaacú nī chi ndí's'tií ní tan'dúúccā 'áámá dúuⁿnē 'tííccā ndí's'tií. Tan'dúúccā dúuⁿnē nguée ca'a fuerzas yeⁿe diiⁿyu yeⁿe yáⁿá naati yáⁿá ca'a fuerzas yeⁿe dúuⁿnē, 'tííccā ndí's'tií. Cuta'á nī fuerzas yeⁿe 'iiⁿyāⁿ chi Israel yā.

¹⁹Úú nguée deenú nduuti chi ndí's'tií caaⁿmaⁿ nī 'tííccā yeⁿe chuū: 'iiⁿyāⁿ ch'iicá yā dúuⁿnē s'eeⁿ caati 'úú cuuvi caneé lado yeⁿe dúuⁿnē chi ch'iicá yā. 'Úú chi nguée Israel 'úú caneé lado yeⁿe 'iiⁿyāⁿ chi Israel yā. ²⁰N'daacā ngaⁿa nī naati deenú nī chi 'iiⁿyāⁿ s'eeⁿ tan'dúúccā dúuⁿnē chi ch'iicá yā, 'tiicá yā, ti nguée i'téenu yā Cristo. Ní maaⁿ ní ndí's'tií tan'dúúccā dúuⁿnē yeⁿe yáⁿá miiⁿ 'tiicá nī caati i'téenu nī Cristo. Maaⁿ ní ndí's'tií nguée dííⁿ nguee nī naati cundée nī cuidado tááccā chi 'cuéetinee nī. ²¹Caati nduuti chi Ndyuūs nguée dííⁿ yā perdonar 'iiⁿyāⁿ Israel chi nguée i'téenu chi tan'dúúccā dúuⁿnē yeⁿe yáⁿá, nguée dííⁿ yā nadach'ēcú yā nuuⁿndi yeⁿe ndí's'tií chi vmnááⁿ vmnaaⁿ tan'dúúccā dúuⁿnē chi yeⁿe yáⁿá yeⁿe icyáⁿā nduuti chi nguée candée nī cuidado tááccā chi 'cuéetinee nī. ²²Cuin'diichí nī, tuuⁿmi Ndyuūs ní neené n'dai taavi yā ndúúccū 'iiⁿyāⁿ chi i'téenu yā naati neene ch'ēcí ntúúⁿ yā vaa. Ch'ēcí yā ndúúccū 'iiⁿyāⁿ ti nguée i'téenu yā. Naati Ndyuūs ní neené n'dai taavi yā ndúúccū nī nduuti chi 'áámá cuneé nī chi cu'téenu nī. Ní nduuti chi nguée dííⁿ nī 'tuuccā, tuuⁿmi 'tiicá ntúúⁿ Ndyuūs caⁿá yā dííⁿ yā castigar ndí's'tií tan'dúúccā chi ch'iicá

yā dúuⁿnē yeⁿe maaⁿ yáⁿá. ²³Ní nduuti chi 'iiⁿyāⁿ Israel cu'téenu yā Cristo, tuuⁿmi ní Ndyuūs ní cuta'á yā ní nguēcunée dííⁿ yā chi 'iiⁿyāⁿ s'eeⁿ ní táámá vmnéⁿēe canee yā tan'dúúccā 'āā dúuⁿnē yeⁿe maaⁿ yáⁿá miiⁿ 'tííca yā. Ní vée poder yeⁿe Ndyuūs chi cuuvi dííⁿ yā 'tííccā. ²⁴Ní nduuti chi ndí's'tií chi nguée 'iiⁿyāⁿ Israel ndí's'tií, ní Ndyuūs sta'á yā ndí's'tií tan'dúúccā chí n'giicá yā dúuⁿnē yeⁿe táámá yáⁿá olivo yeⁿe icyáⁿā ní dííⁿ yā chi yeⁿe yáⁿá olivo yeⁿe yā, 'tííccā ndí's'tií maaⁿ. 'Tiicá ntúúⁿ n'dááccā n'dai ca dííⁿ Ndyuūs ndúúccū 'iiⁿyāⁿ Israel chi vmnááⁿ vmnaaⁿ tan'dúúccā dúuⁿnē yeⁿe yáⁿá yeⁿe yā, ní cuuvi dííⁿ yā chi táámá vmnéⁿēe ní yeⁿe maaⁿ yáⁿá miiⁿ.

Yeⁿe chi nanguaⁿai 'iiⁿyāⁿ Israel yeⁿe tiempo chi cuchii

²⁵Maaⁿ ní hermanos yeⁿe, neⁿé chi ndí's'tií cadíínúúⁿ nī chi canúúⁿ n'de'ei. Ní nguée nadicádíínnuⁿ nī chi deenu ca nī. 'Áámá tiempo nūuⁿ 'iiⁿyāⁿ Israel dicheéchí yā staava yeⁿe yā dámaāⁿ 'naaⁿ tiempo taachi nducyaaca 'iiⁿyāⁿ chi nguée 'iiⁿyāⁿ Israel ní Ndyuūs ndēene yā nducyaaca 'iiⁿyāⁿ s'eeⁿ chi neⁿé yā chi cuuvi yeⁿe yā. ²⁶Ní taachi cho'oo tiempo miiⁿ nducyááccā 'iiⁿyāⁿ Israel ní caⁿa yā cu'téenu yā caati 'tííccā canée nguūⁿ na libro yeⁿe Ndyuūs:

'Iiⁿyāⁿ chi nadanguáⁿai yā 'iiⁿyāⁿ Israel chiicá yā yeⁿe yááⁿ Sión, ní divíi yā nducuéⁿē nuuⁿndi yeⁿe 'iiⁿyāⁿ yeⁿe ndaata Israel.

²⁷Ní 'úú Ndyuūs dicuaacú compromiso yeⁿe ndúúccū

'iiⁿyāⁿ s'eeⁿ, taachi 'úú nadviví nuuⁿndi yeⁿe yā.

²⁸Ní 'iiⁿyāⁿ Israel nguéeⁿ i'téenu yā nduudu cuaacu yeⁿe Ndyuūs yeⁿe chi nadanguáⁿai yā. Ní maaⁿ ní contra yeⁿé Ndyuūs 'iiⁿyāⁿ s'eeⁿ caati ndís'tií chi nguéeⁿ 'iiⁿyāⁿ Israel ndís'tií, cuuvi yeⁿé Ndyuūs ndís'tií. Ní 'áará chi 'iiⁿyāⁿ Israel s'eeⁿ nguéeⁿ i'téenu yā Cristo, Ndyuūs dineⁿé yā 'iiⁿyāⁿ s'eeⁿ caati Ndyuūs nínɛɛvé yā 'iiⁿyāⁿ s'eeⁿ chi vmnááⁿ vmnaaⁿ chi yeⁿe ndaata yeⁿé yā. ²⁹Ní Ndyuūs nguéeⁿ ndaacadaamí yā yeⁿé 'iiⁿyāⁿ s'eeⁿ chi yaa'ví yā chi cuuvi yeⁿé yā 'iiⁿyāⁿ s'eeⁿ. Ní Ndyuūs di'viicú ntúūⁿ yā 'iiⁿyāⁿ s'eeⁿ. ³⁰Ní tiempo chi chó'oo ndís'tií chi nguéeⁿ 'iiⁿyāⁿ Israel ndís'tií, nguéeⁿ n'giindiveéⁿ nī nduudu cuaacu yeⁿé Ndyuūs naati maaⁿ ní 'iiⁿyāⁿ Israel s'eeⁿ nguéeⁿ n'giindiveéⁿ yā nduudu yeⁿé Ndyuūs. Ní Ndyuūs yá'ai yā caavā ndís'tií chi nguéeⁿ i'téenu nī. ³¹Ní 'tiicá ntúūⁿ, 'iiⁿyāⁿ Israel s'eeⁿ nguéeⁿ n'giindiveéⁿ yā nduudu cuaacu yeⁿé Ndyuūs ní dííⁿ yā 'tíicā caati cuayiivi Ndyuūs cuuvi ya'ái yā cáávā 'iiⁿyāⁿ s'eeⁿ tan'dúucā chi ya'ái yā cáávā ndís'tií. ³²Ní Ndyuūs 'āā daamá nūuⁿ s'néeⁿ yā nducyaaca 'iiⁿyāⁿ chi nguéeⁿ ch'iindiveéⁿ yā nduudu yeⁿé yā cáávā chi Ndyuūs cuuvi ya'ái yā caavā nducyaaca 'iiⁿyāⁿ.

³³De'e chúúcā n'deee cá vaadi n'dai yeⁿé Ndyuūs. De'e chúúcā n'deee cá chi tuumicádíínuuⁿ yā ndúúcū chi déenu yā. S'uuúⁿ ní nguéeⁿ cuuvi caaⁿmaⁿ yú de'e cuuvi chi tuumicadiinúúⁿ yā 'tíicā; ní nguéeⁿ cuuvi tuumicadiinuuⁿ yú chiíⁿ chi dííⁿ yā. ³⁴Ní 'tíicā canéeⁿ nguūⁿ

na libro yeⁿé Ndyuūs: ¿Dú'ū cuuvi túúmícadíinūuⁿ vaadi cadíínuuⁿ yeⁿe Señor Ndyuūs? ¿Du'ū cuuvi ca'a consejo Ndyuūs? ³⁵¿Du'ú 'iiⁿyāⁿ ca'a yā algo Ndyuūs vmnááⁿ vmnaaⁿ ní cuayiivi Ndyuūs ca'á yā tan'dúucā chi nadí'vé yā yeⁿé? ³⁶Tanducuéⁿē dendu'ū chí véeⁿ ní Ndyuūs din'dái yā ní tee yā s'uuúⁿ tanducuéⁿē. Ní cucáávā 'iiⁿyāⁿ miiⁿ véeⁿ tanducuéⁿē dendu'ū chí yeⁿé yā. Maaⁿ ní cueⁿē daāⁿmaⁿ dich'εete yú Ndyuūs. 'Tíicā.

Ca'a yú vida yeⁿe yú Ndyuūs ní dííⁿ yú tanducuéⁿē chi neⁿé yā

12 Maaⁿ ní ndís'tií, hermanos yeⁿé, cáávā chi Ndyuūs ya'ai i'inú yā yeⁿe ndís'tií, di'cuíítūu ndís'tií chi ca'á nī vida yeⁿe maáⁿ nī tan'dúucā 'áamá ofrenda chí canduuchi nanááⁿ Ndyuūs cáávā ntiiⁿnyuⁿ yeⁿé Ndyuūs. Ní dííⁿ nī ntiiⁿnyuⁿ chi neⁿé yā chí dííⁿ nī. Chuū chí dííⁿ nī ní cuaacu chí n'dai taavi chí inee yiinú Ndyuūs. Ní canéeⁿ chí dííⁿ nī 'tíicā. ²Ní nguéeⁿ dííⁿ nī tan'dúucā chí neⁿé 'iiⁿyāⁿ yeⁿe iⁿ'yeeⁿdí 'cūū naati cuaáⁿ nī lugar Ndyuūs chí n'daáⁿ yā vaanicadíínuuⁿ yeⁿé nī nī 'tiicá ntúūⁿ n'daáⁿ yā vida yeⁿé nī. Ní 'íicú cuuví deenú nī cheé chí Ndyuūs neⁿé yā chí dííⁿ nī, cheé chí n'daacā, cheé chí cunee yiinú Ndyuūs nī cheé chí n'dai taavi ca.

³Ní cáávā chí Ndyuūs tee yā 'úú chí n'dai taavi ntiiⁿnyuⁿ yeⁿé yā 'úú ní ngaⁿá ngii cá'áamá ca'aama ndís'tií chí nguéeⁿ nadacádíínuuⁿ nī chí n'gεete cá nī ngo'o ca chí canéeⁿ chí nadacádíínuuⁿ nī naati nadacádíínuuⁿ nī ní n'diichí nī yeⁿe maáⁿ nī ndúúcū

chí i'téenu nī chi Ndyuūs itée yā ndís'tiī. ⁴Caati 'tíicā tan'dúúcā 'áámá cuerpo yeⁿe 'iīⁿyāⁿ chí neené n'dee n'ááⁿ chí véé yeⁿe ní nguée dáámá ntiiⁿnyuⁿ chí yeⁿe n'dee n'ááⁿ yeⁿe; ⁵'tiicā ntúūⁿ s'uuúⁿ 'áará chí néené 'yaaⁿ yú ní s'uuúⁿ ní tan'dúúcā chí 'áámá cuerpo ti yeⁿe Cristo s'uuúⁿ, 'tíicā s'uuúⁿ ní s'uuúⁿ ní tan'dúúcā chí nduuvidaama yú 'aama yú taama yú tan'dúúcā chí n'dee n'ááⁿ yeⁿe 'áámá cuerpo yeⁿe maaⁿ yú, 'tíicā s'uuúⁿ.

⁶Ní Ndyuūs tee yā yeⁿe vaadi n'dai yeⁿe yā ntiiⁿnyuⁿ chí n'dááⁿ ca'áámá ca'aama s'uuūⁿ tan'dúúcā chí neⁿe yā díⁿ yā. Ní canee chí diiⁿ yú n'dai ntiiⁿnyuⁿ yeⁿe yú. Ní nduuti chí Ndyuūs tee yā ntiiⁿnyuⁿ yeⁿe yú chí candē yú nduudu cuaacu yeⁿe yā chí tee yā s'uuúⁿ canéé chí caaⁿmaⁿ yú nduudu miiⁿ tan'dúúcā chí i'téenu yú. ⁷Ní nduuti chí Ndyuūs tee yā s'uuúⁿ ntiiⁿnyuⁿ chí nginne yú, tanáⁿā 'iīⁿyāⁿ canee chí cunnee yú n'daacā ca. Ní s'uuúⁿ chí véé ntiiⁿnyuⁿ yeⁿe yú chí ngi'cueeⁿ yú canéé chí ca'cueeⁿ yú n'daacā. ⁸S'uuūⁿ chí díⁿ ntiiⁿnyuⁿ chí yaa'vi née yú 'iīⁿyāⁿ chí cu'téenu cá yā canéé chí diiⁿ yú n'daacā ca. S'uuúⁿ chí véé ca yeⁿe yú chí cuuvi ca'a yú taama yā, canéé chí ca'a yú ndúúcū núúⁿmáⁿ staava yeⁿe yú. S'uuúⁿ chí ngaⁿa ntiiⁿnyuⁿ yeⁿe tanáⁿā s'uuúⁿ canee chí nga'a ntiiⁿnyuⁿ yú n'daacā ca. S'uuúⁿ chí ca'a yú tanáⁿā s'uuúⁿ chí nguée véé necesidades yeⁿe yā canéé chí diiⁿ yú ní yeenu yú.

**Yeⁿe chí canéé chí diiⁿ yú
ti yeⁿe Cristo s'uuúⁿ**

⁹Canéé chí dineⁿe yú 'aama yú taama yú ndúúcū núúⁿmáⁿ staava

yeⁿe yú. Ní nguée dineⁿe yú cosa chí nguē n'daacā naati canéé chí diiⁿ yú tanducuéⁿe chí n'daacā.

¹⁰Canéé chí dineⁿe yú 'aama yú taama yú tan'dúúcā chí 'aama vi' i yú chí cuaacu chí 'áámá yuuuⁿ yú ní dineⁿe yú 'aama yú ndúúcū taama yú.

¹¹Ní n'daacā idiīⁿ ca yú ntiiⁿnyūⁿ ní nguée 'daandí yú ní diiⁿ yú ntiiⁿnyuⁿ yeⁿe Señor ndúúcū núúⁿmáⁿ staava yeⁿe yú ti neⁿe yú Señor yeⁿe yú.

¹²Ní cáávā chí Ndyuūs caⁿá yā chí téé yā s'uuúⁿ chí cuuvi yeⁿe yú canéé chí yeenu yú. Ní taachi n'geenu yú ngii canéé chí cuchée yú ngiinū ngiinū. Ní cuéⁿe daāⁿmaⁿ canéé chí caaⁿmaⁿngua'a yú.

¹³Ní canéé chí cunnee yú 'iīⁿyāⁿ chí i'téenu yā Ndyuūs ní téé yú yeⁿe necesidades chí nguée véé yeⁿe yā. Canéé chí cuaaⁿ yú 'iīⁿyāⁿ chí díⁿ yā visitar s'uuúⁿ.

¹⁴Canéé chí caaⁿmaⁿ yú: Dé'e chúúcā n'dai yeⁿe 'iīⁿyāⁿ chí nguée n'daacā idiīⁿ yā ndúúcū s'uuúⁿ. Ní ngiica yú Ndyuūs chí di'viicú yā 'iīⁿyāⁿ s'eeⁿ ní nguée taaⁿ yú nduucú yā.

¹⁵Ní canéé chí cuuvi yeenu yú ndúúcū 'iīⁿyāⁿ chí yeenu yā. Ní canéé chí cuēecú yú ndúúcū 'iīⁿyāⁿ chí ngēecú yā.

¹⁶Ní 'cuēetinee yú n'daacā ndúúcū 'áámá yú taama yú. Nguée nadacádíínuuⁿ yú yeⁿe maaⁿ yú chí ch'etē naati ndiicúúⁿ n'dai 'cuēetinee yú ní nguée nadacádíínuuⁿ yú yeⁿe maaⁿ yú chí s'uuūⁿ chí deenu yú.

¹⁷Nguée nanguēecundii yú ní diiⁿ yú cosa chí nguē n'daacā ndúúcū

'iiⁿyāⁿ chi 'āā díⁿ yā cosa chi nguée n'daacā ndúúcu yú. Diiⁿ núⁿ yíⁿnuⁿ yú chi diiⁿ yú dámaāⁿ chi n'daacā ndúúcu nducyaaca 'iiⁿyāⁿ. ¹⁸Ní diiⁿ yú nducuéⁿē chi n'daacā chi cuuvi diiⁿ yú caati 'diiⁿ cuuvi cunee yú nguaaⁿ nducyaaca 'iiⁿyāⁿ. ¹⁹Ní ndísⁿtii hermanos yeⁿé chi neⁿé taavi, nguée diiⁿ yú castigar 'iiⁿyāⁿ naati cu'neeⁿ yú nanááⁿ Ndyuūs ní nguée cuuvi 'cuinaaⁿ yú. Ní 'íicú Ndyuūs cā'a yā castigo 'iiⁿyāⁿ. Canée nguūⁿ na libro yeⁿé Ndyuūs 'tíicā: 'Úú chi Señor ní ngaⁿá chi 'úú ní díⁿ castigar 'iiⁿyāⁿ yeⁿe 'úú ní nadííⁿvē yā yeⁿe chi nguée n'daacā chi díⁿ yā. ²⁰Naati s'uuúⁿ ní diiⁿ yú tan'dúúⁿcā chi canée nguūⁿ na libro yeⁿé Ndyuūs 'tíicā: Nduuti chi 'iiⁿyāⁿ chi taáⁿ yā yeⁿé nī nadich'ēcú nī yeⁿe yā. Nduuti chi cuicu yā, ca'a nī chi che'e yā. Ní nduuti chi yaaca yā, ca'á nī chi cu'u yā. Tí caati díⁿ nī 'túúⁿcā, tuu'mi ní díⁿ nī chi 'cuinaáⁿ yā yeⁿe chi díⁿ yā chi taáⁿ yā ndúúcu nī. ²¹Maaⁿ ní cucheē yú cáávā cosa chi nguē n'daacā chi diiⁿ yú naati cucheē yú yeⁿe tanducuéⁿē chi nguē n'daacā cáávā chi n'daacā chi idiíⁿ yú.

13 Nducyaaca yú canee chi cu'neeⁿ veeⁿ yú yeⁿe 'iiⁿntyéⁿē caati nguée véé mar 'áámá 'iiⁿntyéⁿē chi nguée Ndyuūs ca'á yā 'iiⁿyāⁿ chi véé lugar yeⁿé yā chi 'iiⁿntyéⁿē. Ní Ndyuūs s'neéⁿ yā nducuéⁿē 'iiⁿntyéⁿē chi véé na lugar yeⁿe yā. ²Ní 'iiⁿyāⁿ chi nguée idiíⁿ yā chi ngaⁿa 'iiⁿntyéⁿē 'tiicá ntúūⁿ 'iiⁿyāⁿ ní contra yeⁿe chi Ndyuūs ngaⁿa ntiiⁿnyúⁿ yā. Ní 'iiⁿyāⁿ chi díⁿ yā 'túúⁿcā idinuuⁿndí yā ní cuuví yā condenado. ³Ní 'iiⁿyāⁿ

chi n'daacā idiíⁿ yā nguée canee chi díⁿva'á yā yeⁿe 'iiⁿntyéⁿē naati 'iiⁿyāⁿ chi nguée n'daacā idiíⁿ yā 'va'á yā yeⁿe 'iiⁿntyéⁿē. ¿Áá neⁿé nī chi nguée 'va'á nī yeⁿe 'iiⁿntyéⁿē? Díⁿ nī chi n'daacā ní 'iiⁿntyéⁿē miiⁿ ní cuuví ngaⁿá yā chi n'daacā idiíⁿ nī, ⁴caati 'iiⁿntyéⁿē chi ngaⁿa yā ntiiⁿnyuⁿ dichííⁿvē Ndyuūs cáávā chi cuuvi n'daacā yeⁿé nī. Naati nduuti chi idiíⁿ nī chi nguée n'daacā, tuu'mi ní díⁿva'á nī yeⁿe 'iiⁿntyéⁿē. Caati cuaacu chi 'iiⁿntyéⁿē cuuvi díⁿ yā castigar 'iiⁿyāⁿ tiiⁿ 'iiⁿntyéⁿē ní véé poder yeⁿe yā. 'Iiⁿntyéⁿē ní dichííⁿvē Ndyuūs ní canée chi díⁿ yā dendu'ū chi cuaacu. Ní díⁿ yā castigar 'iiⁿyāⁿ caati Ndyuūs nguée inee yíinú yā yeⁿe 'iiⁿyāⁿ chi nguée n'daacā idiíⁿ yā. ⁵Ní cáávā chuū canee chi 'caandiveéⁿ nī chi ngaⁿa 'iiⁿntyéⁿē nguée dámaāⁿ caavā chi cuuví nī castigo ti cáávā deenú nī chi n'daacā chi nacadiinúúⁿ nī na staava yeⁿé nī. ⁶Ní 'tiicá ntúūⁿ caavā chúū, ca'á nī tuumí cobrador yeⁿē gobierno. 'Iiⁿntyéⁿē miiⁿ dichííⁿvē Ndyuūs taachi díⁿ yā ntiiⁿnyuⁿ yeⁿé yā.

⁷Canee yú chi ca'a yú tuumí cobrador yeⁿē gobierno. Canee yú chi ca'a yú tuumí yeⁿe yáⁿāa yeⁿe yú cobrador miiⁿ. Canee yú chi diiⁿ yú chí cu'teenú yú 'iiⁿyāⁿ 'iiⁿntyéⁿē ní diiⁿ yú estimar 'iiⁿyāⁿ s'eeⁿ. ⁸Nguée cun'diicú nī yeⁿē mar 'áámá 'iiⁿyāⁿ nguée du'ū véē. Dámaāⁿ canee chi dineⁿe yú nducyaaca 'iiⁿyāⁿ. 'Iiⁿyāⁿ chi dineⁿē nducyaaca 'iiⁿyāⁿ díⁿ yā tan'dúúⁿcā chi ngaⁿa ley yeⁿe yú. ⁹Ní mandamiento yeⁿē ley yeⁿe yú ní chuū chiiⁿ: Nguée caⁿá nī ndúúcu n'daata o isaⁿā chi

nguée yeⁿé nī. Nguée 'caaⁿ'núⁿ nī 'iiⁿ'yāⁿ. Nguée diduucú nī. Nguée caaⁿ'maⁿ nī nduudu yaadi yeⁿe mar 'áamá 'iiⁿ'yāⁿ. Nguée dinéⁿe nī dendu'ū chi véé chi yeⁿe táámá yā. Ní nducuéⁿē mandamiento 'cūū ndúúcū tanáⁿ'ā mandamiento yeⁿē ley yeⁿe yú chi véé, ní cuuví cuaacú nduudu ní tuumicádíínuuⁿ yú na nduudú 'cūū: Dinéⁿe nī 'iiⁿ'yāⁿ nīiⁿnuúⁿ vaacú nī tan'dúúcā chi dineⁿ'é nī maáⁿ nī. ¹⁰'Iiⁿ'yāⁿ chi dineⁿ'é yā 'iiⁿ'yāⁿ nīiⁿnuúⁿ vaacú yā nguée cunncāa idiíⁿ yā ndúúcu yā. Ní 'tíicā. Taachi dineⁿe yú 'iiⁿ'yāⁿ diiⁿ yú tan'dúúcā chi ngaⁿ'a ley yeⁿe yú.

¹¹N'dee cá ní nguée dámaāⁿ chúū. Nadacádíínuuⁿ yú yeⁿe nguuví s'eeⁿ chi canee yú iⁿ'yeeⁿdí 'cūū. Canée chi 'cuεetineé ngiinu yú caati yeⁿe hora chi nguaⁿ'ai yú ní 'āā snee nīiⁿnuúⁿ cá yeⁿe s'uuúⁿ nguée ti taachi caama i'téenu yú Cristo. ¹²Maaⁿ ní hora miiⁿ tan'dúúcā chi 'āā chée cuuvi dεeve ní 'āā cūchii nguuví taachi ndaá Cristo maaⁿ. Ní nguée canee chi diiⁿ yú dendu'ū chi nguε n'daacā chi diiⁿ yú tan'dúúcā chi na maaiⁿ, naati n'daacā 'cuεetinee yú tan'dúúcā chi canee yú na dεeve yeⁿ'é Ndyuūs ní n'daacā canee cáávā s'uuúⁿ. ¹³Ní 'cuεetinee yú n'daacā tan'dúúcā chi canée chi diiⁿ yú na dεeve yeⁿ'é Ndyuūs. Nguée cuuvi cuu'vi yú ní nguée idiiⁿ yú 'viicu yeⁿē chi che'e yú ndúúcū n'dee n'dái ruido. Ní nguée 'cuáaⁿ yú caⁿ'a yú ndúúcū n'daataa o isaⁿ'ā chi nguée yeⁿe yú. Ndí nguée ndúú canee yú ndúúcū vicio yeⁿe yú. Nguée 'caaⁿ'va yú ní nguée ngueē yú yeⁿē táámá 'iiⁿ'yāⁿ.

¹⁴Naati 'cuεetinee yú n'daacā ní diiⁿ yú tan'dúúcā chi Señor Jesucristo yeⁿe yú dííⁿ yā. Ní nguée diiⁿ yú tan'dúúcā chi neⁿe maaⁿ cuerpo yeⁿe yú.

Nguée caaⁿ'maⁿ nī yeⁿē chi idiiⁿ hermano yeⁿ'é nī

14 Ndís'tii ní cuta'á nī nguaaⁿ ndís'tii hermanos yeⁿe yú chí duūva yā yeⁿe chi i'téenu yā; ní nguée néené n'deē caaⁿ'máⁿ nī nduucú yā yeⁿe chi nadacádíínuuⁿ yā chi nguée ituumicádíínuuⁿ yú yeⁿē. ²Ti 'tíicā, véé 'iiⁿ'yāⁿ chi i'téenu yā Ndyuūs ní nadicadíínuuⁿ yā chi cuuvi che'é yā nducuéⁿē chi véé. Ní náⁿ'á 'iiⁿ'yāⁿ chi nguée i'téenu n'daaca yā ní nguée cuuvi che'é yā nducuéⁿē. Taachi caⁿ'á yā che'é yā níí'vē nguée che'e yā yuūte cáávā religión yeⁿe yā. ³Iiⁿ'yāⁿ chi che'é yā tanducuéⁿē chi véé nguée cánée chi caaⁿ'máⁿ yā yeⁿe chi nguε ineeⁿ yiinú yā yeⁿ'é 'iiⁿ'yāⁿ chi nguée nge'é yā nducuéⁿē. Ní 'iiⁿ'yāⁿ chi nguée che'é yā nducuéⁿē nguée canée chí n'diichí yā 'iiⁿ'yāⁿ chi che'e tanducuéⁿē chi véé caati Ndyuūs sta'á ntúuⁿ yā 'iiⁿ'yāⁿ s'eeⁿ chi cuuvi yeⁿ'é yā 'iiⁿ'yāⁿ. ⁴Ndís'tii, ¿du'ū ndís'tii chi n'diichí nī chi diiⁿ 'iiⁿ'yāⁿ chi dichíí'vē táámá yā? nduuti chí dííⁿ yā chi n'daacā o chi nguée n'daacā. Dámaāⁿ 'iiví yā canée chi n'diichí yā 'iiⁿ'yāⁿ chí dichíí'vε yā. Ní n'daacā cuuvi canee caavá yā, caati Señor Ndyuūs yeⁿe yú cuuví dííⁿ yā chí canée n'daacā yeⁿ'é yā caati Señor Ndyuūs véé poder yeⁿ'é yā chí inneé yā 'iiⁿ'yāⁿ chí dichíí'vε yā.

⁵Ní 'tiicá ntúūⁿ, 'áámá 'iiⁿ'yāⁿ nadacadíínuuⁿ yā chí 'áámá nguuví

ní ch'ēete ca nguée ti táámá nguuvi. Táámá 'iiⁿyāⁿ nadacadíínuuⁿ yā chi 'āā daamá nūuⁿ nducuéⁿē nguuvi. Ní ca'áámá ca'aama nī ní canee nī tan'dúúcā chi diitu nadicadíínuúⁿ nī. ⁶Iiⁿyāⁿ chi dííⁿ yā cuenta chi 'áámá nguuvi ní ch'ēete ca nguée ti tanáⁿā nguuvi, 'iiⁿyāⁿ miiⁿ nadicadíínuuⁿ yā 'tíicā cáávā chi dich'ēetē yā Señor Ndyuūs yeⁿé yā. 'Iiⁿyāⁿ chi nadicadíínuuⁿ yā dáámá nūuⁿ nducuéⁿē nguuvi 'tiicā ntúūⁿ dííⁿ yā cáávā chi dich'ēetē yā Señor Ndyuūs yeⁿé yā. Ní 'iiⁿyāⁿ chi nguée che^e yā yeⁿe tanducuéⁿē chi véé dííⁿ yā 'túúcā cáávā chi i'téenu yā Señor ní ca'á yā gracias Ndyuūs cáávā chi che'e yā. Ní 'tiicā ntúūⁿ 'iiⁿyāⁿ chi che'e yā yeⁿe tanducuéⁿē chi véé dííⁿ yā 'túúcā cáávā chi i'téenu yā Señor ní 'tiicā ntúūⁿ ca'á yā gracias Ndyuūs cáávā chi che'e yā.

⁷Ní 'tíicā mar 'áámá s'uuúⁿ nguée sндуuchi yú cucáávā maaⁿ yú ndíí nguée ndúú 'cuūvi yú cucáávā maaⁿ yú. ⁸Ndúúti chi sндуuchi yú, sндуuchi yú cáávā Señor. Ní nduuti chi 'cuūvi yú, 'cuūvi yú cáávā Señor. Maaⁿ ní ndúúti chi sндуuchi yú o n'dií yú yeⁿe Señor s'uuúⁿ. ⁹Ní Cristo ch'ii yā ní nduuchi ntuúⁿ yā yeⁿe nguaaⁿ tináⁿā caati cuuví yā Señor yeⁿe tináⁿā, ní 'tiicā ntuūⁿ yeⁿē 'iiⁿyāⁿ chí sндуuchi.

¹⁰Maaⁿ ní dii, ¿de'ē cúúví chí n'díichí nuuⁿndi yeⁿe hermano yeⁿē di? ¿O dé'ē cúúví chí nguēe neⁿe di hermano yeⁿē di? 'Tíicā nducyaaca yú canee chi naⁿa yú nanááⁿ Cristo. Ní Cristo miiⁿ caⁿá yā n'diichí yā nuuⁿndi yeⁿe yú. ¹¹Canée nguūⁿ na libro yeⁿé Ndyuūs 'tíicā:

Cuaacu níⁿnyúⁿ tan'dúúcā chi 'úú chí canduuchí, ngaⁿa

Señor Ndyuūs, nducyáácá 'iiⁿyāⁿ canée chi cáántii'yā yā nanáaⁿ 'úú, ní nducyaaca yā canee chi caaⁿmáⁿ yā chi 'úú ní Ndyuūs 'úú.

¹²Ní 'tíicā vaa. Ca'áámá ca'aama s'uuuⁿ canee chi ca'a yú cuenta nanááⁿ Ndyuūs yeⁿe chi maaⁿ yú diiⁿ yú.

Nguée dííⁿ nī chi hermano yeⁿé nī dinuuⁿndí yā

¹³Cáávā chuū nguée canée chi n'diichi yú yeⁿe chi diiⁿ hermanos yeⁿe yú. Nguée idiíⁿ yú 'túúcā. Canée chi nadacadíínuuⁿ nī chi nguée idiíⁿ nī mar 'áámá naaⁿ chi hermanos yeⁿé nī nguée cūnee yiínú yā ní cuuvá yā na nuuⁿndi.

¹⁴Maaⁿ ní chi 'úú ni yeⁿé Jesucristo 'úú, deenú chi cuaacu chi nguée véé mar 'áámá dendu'ū chi nguée n'daacā yeⁿē maááⁿ. Ní nduuti chi 'iiⁿyāⁿ nadacadíínuuⁿ yā chi 'áámá dendu'ū nguée n'daacā, tuu'mi ní chuū ní cáávā 'iiⁿyāⁿ miiⁿ cuaacu chi nguée n'daacā. ¹⁵Ní nduuti chí cáávā 'áámá dendu'ū chi che'e nī ní dííⁿ nī chi hermano yeⁿé nī cuuvi ya'ái yā, tuu'mi ní nguée dííⁿ nī 'túúcā cáávā chi dineⁿé nī hermano yeⁿé nī. Nguée dííⁿ nī chi cuuvi ndaí hermano yeⁿe nī cáávā 'áámá dendu'ū chi che'e nī caati Cristo ní ch'ii yā cáávā 'iiⁿyāⁿ miiⁿ. ¹⁶Nguée dííⁿ nī cosas chi 'iiⁿyāⁿ cuuvi caaⁿmáⁿ yā yeⁿe chi ndís'tii chi nguée n'daacā idiíⁿ nī yeⁿe chi ndís'tii deenú nī chi n'daacā. ¹⁷Naati chííⁿ chi yeⁿē Ndyuūs chi ngaⁿa ntiiⁿnyuⁿ yeⁿē nguée yeⁿē chi nge'e yú ndúúcū chi ngí'i yú. Ndyuūs ngaⁿa ntiiⁿnyúⁿ yā

yeⁿe dendu'ū chi cuaacu ndúúcū vaadi 'dii' ndúúcū vaadi yeenú chi Espíritu N'dai yeⁿe Ndyuūs tee yā s'uuú'. ¹⁸Ní 'iiⁿyāⁿ chi dichí'vē Cristo ní diíⁿ yā dendu'ū chi 'túúcā, 'iiⁿyāⁿ miiⁿ diíⁿ yā tan'dúúcā chi neⁿe Ndyuūs. 'Tiicá ntuūⁿ 'iiⁿyāⁿ yeⁿe iⁿ'yeeⁿdí 'cūū ngaⁿ'a yā chi n'daacā idiiⁿ 'iiⁿyāⁿ miiⁿ.

¹⁹Maaⁿ ní 'tíicā canee chi diiⁿ yú. Canéé chi diiⁿ yú dendu'ū cáávā chi 'iiⁿyāⁿ 'cuætinée yā ndúúcū vaadi 'diiiⁿ ní ndúúcū chi diiⁿ yú cunnee yú 'aama yú taama yú chi cu'téenu ca yú yeⁿe Ndyuūs. ²⁰Ní nguée ñdituuví nī dendu'ū ntiⁿnyuⁿ chi diiⁿ Ndyuūs cáávā 'áamá dendu'ū chi nge'é nī. Cuaacu chi tanducuéⁿe dendu'ū ní ðeeve naati nguée n'daacā idiiⁿ yú. Nduuti chi che'e yú 'áamá dendu'ū, ní cáávā chi che'e yú tuu'mi ní diiⁿ yú chi táámá 'iiⁿyāⁿ dinuuⁿndí yā. ²¹N'daacā ca chi nguée diiⁿ yú mar 'áamá dendu'ū chi diiⁿ chi hermano yeⁿe yú cuuvi dinuuⁿndí yā o diiⁿ chi nguée i'téenu yā n'daacā. Nguée che'e yú yuutē o nguée ngi'i yú vino o nguée diiⁿ yú 'áamá dendu'ū chi 'túúcā chí diiⁿ chi hermano yeⁿe yú nduuví duūva yā yeⁿe chi i'téenu yā. ²²Ní yeⁿe chi ndís'ti i'téenu nī yeⁿe chi ngaⁿ'a maáⁿ nī canéé chi i'téenu nī yeⁿe nanááⁿ Ndyuūs. Ðe'e chúúcā n'dai taavi 'iiⁿyāⁿ chi staava yeⁿe yā nguée diiⁿ condenar maáⁿ yā cáávā cosa chi diiⁿ yā chi nguée n'daacā. ²³'Iiⁿyāⁿ chi che'é yā 'áamá dendu'ū ní n'dee nadicadínuuⁿ yā yeⁿe nduuti chi n'daacā o chi nguée n'daacā cuuví yā condenado caati nguée nge'é yā ndúúcū núúⁿmáⁿ staava yeⁿe yā. Ní nducuéⁿe chi diiⁿ

yú taachi nguée deenu yú nduuti chi n'daacā o nguée n'daacā, tuu'mi ní dinuuⁿndi yú.

Dinéⁿe yú 'iiⁿyāⁿ niiⁿnuⁿ ná vaacu yú nguée dinéⁿe yú maáⁿ yú

15 S'uuúⁿ chi i'téenu ca yú Jesucristo canee chi cunnee yú 'iiⁿyāⁿ chi duu'vi i'téenu yā Jesucristo. Ní nguée diiⁿ yú tan'dúúcā chi neⁿe maaⁿ yú chi canee n'daacā yú. ²Ní ca'áamá ca'aama yú canéé chi diiⁿ yú chi n'daacā ndúúcū 'iiⁿyāⁿ niiⁿnuúⁿ vaacu yú cáávā chi n'daacā canéé yā ní cuuvi cu'téenu cá yā. ³Deenu yú chi ní nguée Cristo diíⁿ yā chi neⁿe maáⁿ yā ti 'tíicā tan'dúúcā chi canéé nguūⁿ na libro yeⁿe Ndyuūs. Cristo ngaⁿ'á yā yeⁿe maáⁿ yā nanááⁿ Ndyuūs: Chífⁿ chi nguée n'daacā chi 'iiⁿyāⁿ ngaⁿ'a yeⁿe di ní canéé vmnaaⁿ yeⁿe. ⁴Ní nducuéⁿe chi vmnááⁿ vmnaaⁿ canéé nguūⁿ na libro yeⁿe Ndyuūs ní canéé nguūⁿ caavā chi 'cueēⁿ yú; ní cáávā chi 'áamá canee yú ndúúcū chi i'téenu yú ní cáávā chi diiⁿ animar s'uuúⁿ chi cunee ngiinu yú yeⁿe chi cuuvi yeⁿe yú. 'Tíicā diiⁿ nduudu yeⁿe Ndyuūs cáávā s'uuúⁿ. ⁵Ndyuūs chi tee yā vaadi yeenú s'uuuⁿ ndúúcū chi cunee ngiinu yú chi cuuvi yeⁿe yú, Ndyuūs ní innéé yā ndís'ti chi cuuvi 'diiⁿ 'diiⁿ 'cuætinée nī 'áamá nī ndúúcū taama nī tan'dúúcā Cristo neⁿe yā chi diíⁿ nī. ⁶Tuu'mi ní nducyáácá nī tan'dúúcā chi 'áamá nī cuuvi dich'etē nī Ndyuūs chi chiidá Señor Jesucristo yeⁿe yú.

'Iiⁿyāⁿ candéé yā nduudu cuaacu yeⁿe Cristo nanááⁿ 'iiⁿyāⁿ chi nguée yeⁿe ndaata Israel

⁷Ní 'tíicā 'cuaáⁿ nī ndúúcū núúⁿmáⁿ staava yeⁿe nī 'áamá nī

taama nī tan'dúucā Cristo 'cuúⁿ yā s'uuúⁿ ní 'iicu cuuvi dich'etē yú Ndyuūs. ⁸Ní chuū maaⁿ ngaⁿá ngí ndís'tiī. Cristo ndaa yā iⁿ'yeeⁿdí 'cūū chi dichíⁿ'vé yā 'iⁿ'yāⁿ Israel s'eeⁿ ní idicuaacú yā chi Ndyuūs caⁿ'a yā chi ca'a yā chiida yú tiempo chi 'āā chó'ōo. Ní 'tíicā Cristo ch'iⁿ'í yā chi Ndyuūs ní díⁿ yā tanducueⁿ'ē chi caⁿ'a yā chi díⁿ yā. ⁹Ní 'tiicā ntúūⁿ ndái yā cáávā chi tanáⁿ'ā 'iⁿ'yāⁿ chi nguéⁿ yeⁿ'e ndaata Israel cuuvi dich'etē yā Ndyuūs caati Ndyuūs ya'āi 'iinú yā yeⁿ'e tanáⁿ'ā 'iⁿ'yāⁿ dendú'ū. Ní 'tiicā ntúūⁿ canéⁿ nguūⁿ na libro yeⁿ'é Ndyuūs:

Cáávā chuū 'úú ní dich'etē n'diī Señor nguaaⁿ na nducyáácá nación, ní 'úú ní caatá canciones chi díⁿ honrar n'diī.

¹⁰Ní táámá cuaaⁿ naachi canéⁿ nguūⁿ na libro yeⁿ'e Ndyuūs ngaⁿ'a 'tíicā:

'Iⁿ'yāⁿ yeⁿ'e nducyáácá nación canéⁿ chi yeenú yā ndúucū 'iⁿ'yāⁿ chi Ndyuūs nndeévé yā chi cuuvi yeⁿ'é yā 'iⁿ'yāⁿ s'eeⁿ.

¹¹Táámá cuaaⁿ yeⁿ'e libro yeⁿ'é Ndyuūs ngaⁿ'a 'tíicā:

'Iⁿ'yāⁿ yeⁿ'e nducyáácá nación canee chi dich'etē yā Ndyuūs, ní nducyáácá yā ngaⁿ'á yā chí n'diī Ndyuūs ní ch'etē n'dai n'diī.

¹²Ní 'tiicā ntúūⁿ canéⁿ nguūⁿ na libro yeⁿ'é Ndyuūs naachi profeta Isaías dingúⁿ yā 'tíica yeⁿ'e 'iⁿ'yāⁿ chi Ndyuūs ngaⁿ'á yā chi caⁿ'á yā chi dichó'o yā:

'Úú idíⁿ chi ndaa 'iⁿ'yāⁿ yeⁿ'e ndaata yeⁿ'e saⁿ'ā Isaías, ní 'iⁿ'yāⁿ miⁿ ncuéⁿ yā chi gobernador chi caaⁿ'maⁿ

ntiiⁿnyuⁿ yā yeⁿ'ē nducueⁿ'ē nación. Ní véé chi 'iⁿ'yāⁿ s'eeⁿ ní cūnee ngiinú yā nanáaⁿ yā cáávā chi caⁿ'a yā chi diiⁿ yā.

¹³Ní Ndyuūs chi ca'a yā ndís'tiī chi véé chi cūnee ngiinú ní nanáaⁿ yā, neⁿ'é chi téē yā ndís'tiī n'deeē n'dái vaadi yeenú ndúucū vaadi 'diiⁿ, ti ndís'tiī ní i'téenu ní Jesucristo. Caati cáávā poder yeⁿ'ē Espíritu N'dai yeⁿ'é Ndyuūs cuuvi cá ní cūnee ngiinu cá ní yeⁿ'e chi cuuvi yeⁿ'é ní.

¹⁴Ndís'tiī hermanos yeⁿ'é, 'úú ní deenú chi cuaacu chi ndís'tiī ní díⁿ ní dendu'ū chi n'dai. Ní ndís'tiī ní 'iⁿ'yāⁿ chi deenu ndís'tiī. Ní deenú ní ca'a ní consejo 'áamá ní ndúucū taama ní. ¹⁵Naati maaⁿ ní na carta 'cūū 'úú diitu idinguúⁿ n'deeē n'dái cá yeⁿ'é ní yeⁿ'e dendu'ú 'cūū caati ndís'tiī ní cuuvi n'gaacu ní yeⁿ'ē chi 'āā deenú ní. Chuū ní dingúⁿ ch'echi caati Ndyuūs chí n'dai taavi nduucú ní tee yā 'úú yeⁿ'e chi n'dai taavi yeⁿ'é yā chí díⁿ. ¹⁶Ní 'úú ní dichíⁿ'vé Cristo 'úú nguaaⁿ 'iⁿ'yāⁿ chi nguéⁿ Israel yā. Ní nguaaⁿ 'iⁿ'yāⁿ miⁿ 'úú díⁿ ntiiⁿnyuⁿ yeⁿ'ē chi ngaⁿ'á nduudu cuaacu yeⁿ'e evangelio chi nduudu ngai yeⁿ'e Jesucristo chi nadanguáⁿ'āi 'iⁿ'yāⁿ. Ní 'tíicā cuuvi candéⁿ 'iⁿ'yāⁿ chi nguéⁿ Israel yā nanáaⁿ Ndyuūs tan'dúucā chi ofrenda n'dai yā chi Ndyuūs 'cuaáⁿ yā 'iⁿ'yāⁿ s'eeⁿ, caati Espíritu N'dai yeⁿ'é Ndyuūs s'née yā 'iⁿ'yāⁿ s'eeⁿ cáávā ntiiⁿnyuⁿ yeⁿ'é Ndyuūs.

¹⁷Ní 'úú ní cáávā chi i'teenú Jesucristo, 'úú ní yeenú chi díⁿ ntiiⁿnyuⁿ n'dai yeⁿ'é Ndyuūs. ¹⁸Tí 'úú ní nguéⁿ du'ū véē ngaⁿ'á, dámaaⁿ

chííⁿ chi Cristo dííⁿ yā cáávā 'úú. Ní 'íicú 'iiⁿyāⁿ chi nguée Israel yā cuuvi cu'téenu yā Ndyuūs. Ní chúū idiíⁿ cáávā nduudu cuaacu chi ngaⁿá ní cáávā nducuéⁿē chi dííⁿ. ¹⁹Ní 'úú ní ngāⁿa cuaacú tanducuéⁿē yeⁿe evangelio yeⁿe Cristo nducuéⁿē yāāⁿ taachí chōó ndíí yāāⁿ Jerusalén ndii yáⁿāa Ilírico. Ní dííⁿ ntiiⁿnyuⁿ yeⁿé ndúúcū poder yeⁿe Espíritu N'dai yeⁿé Ndyuūs, ndúúcū señales chi inaaⁿ yú ndúúcū vaadi n'giinu. ²⁰Ní idiíⁿ ca ntiiⁿnyuⁿ caati cuuvi caaⁿmáⁿ nduudu cuaacu chi nadanguaⁿāi 'iiⁿyāⁿ ndii nducuéⁿē yāāⁿ naachi 'āa cuée 'caandivéeⁿ yā chi duuchí Cristo, caati 'úú nguée neⁿé caaⁿmáⁿ nduudu cuaacu yeⁿe Cristo naachi táámá yā 'āa candéé yā nduudu miiⁿ ní dííⁿ yā ntiiⁿnyuⁿ yeⁿe Cristo. ²¹Naati neⁿé dííⁿ tan'dúúcā chi canée nguūⁿ na libro yeⁿé Ndyuūs 'tíicā:

'Iiⁿyāⁿ chi 'aa cuée ndaa tááma yā nanáaⁿ yā chi caaⁿmáⁿ yā yeⁿe Cristo, 'iiⁿyāⁿ s'eeⁿ cuuví cadíínuuⁿ yā yeⁿé yā. Ní 'iiⁿyāⁿ chi mar 'áámá vmnéⁿēe nguée n'giindivéeⁿ yā yeⁿe Cristo ní 'caandivéeⁿ yā ní cuuvi tuumicadíínuuⁿ yā yeⁿe yā.

Pablo neⁿé yā caⁿa yā na yāāⁿ Roma

²²Neené n'dee cuuví nadicadiinúúⁿ chi neⁿé chíí nanááⁿ ndís'tii naati nguée chíí ndāa. ²³Naati maaⁿ ní 'āa ch'iinū ntiiⁿnyuⁿ yeⁿé na yāāⁿ s'uuⁿ. Néené n'dee nduūyú chi neⁿé ndaá n'diichí ndís'tii. ²⁴Ní neⁿé naⁿá ndii yáⁿāa España ní taachi caⁿá cyúúní neⁿé n'diichí ndís'tii ní cuneé nducú

ní 'áámá tiempo nūuⁿ. Ní cuayiivi chi yeenú chi caneé ndúúcū ndís'tii neⁿé chíí ndís'tii cunneé ní 'úú taachi naⁿá ndii yāāⁿ Roma. ²⁵Maaⁿ ní caⁿá na yāāⁿ Jerusalén ní ndéé ofrenda chíí cunneé hermanos Israel yeⁿe yú chi i'téenu yā Cristo. ²⁶Caati hermanos yeⁿe yú yeⁿe yáⁿāa Macedonia ndúúcū hermanos yeⁿe yú yeⁿe yáⁿāa Acaya maáⁿ yā neⁿé yā caⁿá yā ofrenda ní nadacadíínuuⁿ n'daaca yā taachi staⁿá yā 'aama ofrenda yeⁿe tuumí nguaaⁿ yeⁿé yā chíí dichó'o yā tuumi miiⁿ yeⁿe hermanos yeⁿe yú chíí snée yā na yāāⁿ Jerusalén, yeⁿe hermanos chíí pobre yā chíí nguée vée necesidades yeⁿe yā. ²⁷Ní 'tíicā dííⁿ yā naati cuaacu nííⁿnyúⁿ hermanos canée chíí cunneé yā hermanos Israel s'eeⁿ chíí pobre yā chíí snée yā na yāāⁿ Jerusalén caati hermanos Israel s'uuⁿ ní 'āa diiⁿ yā chíí hermanos chíí nguée Israel yā staⁿá yā yeⁿe dendú'ū chíí n'dai chíí yeⁿe Espíritu N'dai yeⁿé Ndyuūs. Ní cáávā hermanos Israel yeⁿe yú 'túúcā dííⁿ yā hermanos chíí nguée Israel yā ndúúcū chíí n'dee n'dái yeⁿé yā canée chíí cunneé yā 'iiⁿyāⁿ Israel chíí i'téenu yā Cristo. ²⁸Maaⁿ ní taachi 'cuiinū dííⁿ asunto 'cūū ní taachi ngaⁿá ofrenda 'cūū hermanos Israel, tuu'mi ní naⁿá na yáⁿāa España. Ní taachi caⁿá cyúúní ní ndaá na yāāⁿ yeⁿé ní, cho'ó n'diichí ndís'tii. ²⁹Ní deenú chíí taachi ndaá nanááⁿ ndís'tii seguro chíí ndaá ndúúcū tanducuéⁿē chíí n'dai taavi chíí vée chíí yeⁿe nduudu n'dai yeⁿé Cristo.

³⁰Maaⁿ ní ndís'tii hermanos yeⁿé di'cuiitú ndís'tii cáávā Señor

Jesucristo yeⁿe yú ní cáávā Espíritu N'dai yeⁿe Ndyuūs chi dinéⁿe yā s'uuúⁿ chi 'tiicá ntúūⁿ ndís'tiī caaⁿ'maⁿngua'a cá nī cáávā 'úú. Ní 'úú ngaⁿ'angua'á chi Ndyuūs cunnée yā 'úú. ³¹Caaⁿ'maⁿngua'á nī chi Ndyuūs nadanguáⁿ'ai yā 'úú yeⁿe ta'a 'iiⁿ'yāⁿ Israel chi snée yā na yáⁿ'āa Judea, 'iiⁿ'yāⁿ chi nguéé i'téenu yā Cristo. Ní caaⁿ'maⁿngua'á nī chi ntiiⁿ'nyuⁿ chi diíⁿ cáávā hermanos chi snée yā na yāⁿ Jerusalén, Ndyuūs inee yiinú yā ntiiⁿ'nyuⁿ chi diíⁿ. ³²Ní 'íicú nduuti chi Ndyuūs neⁿ'é yā, 'úú ní yeenú taachi ndaá nanááⁿ ndís'tiī ní cuntaaviⁿ'tuūnú ndúúcū ndís'tiī. ³³Neⁿ'é chi Ndyuūs téé yā nducyaaca ndís'tiī vaadiⁿ 'diiⁿ chi 'cuētinéé 'diíⁿ nī. 'Tíicā.

Pablo dicho'ó yā, N'dai ndís'tiī, hermanos yeⁿ'é yā

16 'Úú ní ngaⁿ'á ngii ndís'tiī chi 'cuaáⁿ nī Febe chi hermana yeⁿe yú. N'daata miiⁿ dichíⁿ've yā 'iiⁿ'yāⁿ yeⁿe yáacū chi canée na yāⁿ Cencrea. ²Ní n'daacā 'cuaáⁿ nī n'daata miiⁿ ndúúcū chi duuchi Señor yeⁿe yú, tan'dúúcā chi canée chi 'cuaáⁿ nī hermanos yeⁿe yú chi i'téenu yā Cristo. Ní cunnée nī n'daata miiⁿ yeⁿe tanducuéⁿ'ē chi neⁿ'e tá ti n'daata miiⁿ neené 'yaaⁿ 'iiⁿ'yāⁿ chinnee tá 'iiⁿ'yāⁿ. 'Tiicá ntúūⁿ chinnee tá 'úú.

³Ní ndís'tiī caaⁿ'máⁿ nī hermano Aquila ndúúcū n'daataá Priscila chi n'daata yeⁿ'é yā, N'daí ndís'tiī. 'Iiⁿ'yāⁿ s'eeⁿ idiíⁿ yā ntiiⁿ'nyuⁿ yeⁿ'e Señor Jesucristo dáámá nduucú. ⁴'Iiⁿ'yāⁿ s'eeⁿ n'geenú yā ngii cáávā 'úú ndíí chi cuuvi 'cuūvi yā cáávā

chi cuuvi nadanguáⁿ'ai yā 'úú. Ní 'úú ní ca'á 'iiⁿ'yāⁿ s'eeⁿ gracias. Ní nguéé dámaāⁿ 'úú, 'tiicá ntúūⁿ diiⁿ nducyaaca hermanos yeⁿ'e yú chi nguéé naⁿ'á yā yaacū yeⁿ'e 'iiⁿ'yāⁿ Israel s'eeⁿ. ⁵Ní 'iiⁿ'yāⁿ yeⁿ'e yaacū chi nduuvidaamá yā na vaacu táⁿ'ā Priscila ndúúcū isáⁿ'ā yeⁿ'é yā chi Aquila: N'daí ndís'tiī, caaⁿ'máⁿ nī. Ní Epeneto amigo chi neené neⁿ'é: N'daí dii, caaⁿ'máⁿ nī. Epeneto miiⁿ saⁿ'a vmnááⁿ vmnaaⁿ chíⁿteenú sá Cristo na yáⁿ'āa Acaya. ⁶Ní tá Maríá chi neené diiⁿ tá ntiiⁿ'nyuⁿ nguaaⁿ ndís'tiī: N'daí tá, caaⁿ'máⁿ nī. ⁷Ní saⁿ'ā Andrónico ndúúcū sáⁿ'ā Junias canée yā vácū taachi 'úú caneé vácū, ní saⁿ'ā s'eeⁿ ní n'geete nguaaⁿ 'iiⁿ'yāⁿ chi apóstoles. Ní saⁿ'ā s'eeⁿ i'téenu yā Cristo vmnaaⁿ cá nícu 'úú: N'daí ndís'tiī, caaⁿ'máⁿ nī.

⁸Ní sáⁿ'ā Amplias chi neené neⁿ'é ti yeⁿ'e Señor saⁿ'a miiⁿ: N'daí dii, caaⁿ'máⁿ nī. ⁹Ní saⁿ'ā Urbano chi dáámá diiⁿ sa ntiiⁿ'nyuⁿ yeⁿ'é Señor nduucú nū: N'daí dii, caaⁿ'máⁿ nī. Ní saⁿ'a Estaquis chi neené neⁿ'é: N'daí dii, caaⁿ'máⁿ nī. ¹⁰Ní saⁿ'ā Apeles chi neené ch'eenú yā chii cáávā chi i'téenu yā Cristo: N'daí dii, caaⁿ'máⁿ nī. 'Tiicá ntúūⁿ nducyaaca 'iiⁿ'yāⁿ yeⁿ'e vaacu Aristóbulo: N'daí ndís'tiī, caaⁿ'máⁿ nī. ¹¹Ní saⁿ'a Herodión chi yeⁿ'e yáⁿ vaacú: N'daí dii, caaⁿ'máⁿ nī. Ní 'iiⁿ'yāⁿ chi i'téenu yā yeⁿ'e vaacu Narciso: N'daí ndís'tiī caaⁿ'máⁿ nī. ¹²Ní n'daataá Trifena ndúúcū n'daataá Trifosa chi diíⁿ yā ntiiⁿ'nyuⁿ chi ntiiⁿ'nyuⁿ yeⁿ'e Señor: N'daí ndís'tiī caaⁿ'máⁿ nī. Ní n'daataá Pérsida, hermana yeⁿ'é chi neené neⁿ'é chi n'dee n'daí ntiiⁿ'nyuⁿ diíⁿ tá yeⁿ'e ntiiⁿ'nyuⁿ yeⁿ'e Señor:

N'daí tá, caaⁿ'maⁿ nī. ¹³Ní saⁿ'ā Rufo, chi saⁿ'ā ch'εεε nguaaⁿ 'iⁿ'yāⁿ chi i'téenu yā Cristo ndúúcu chεecu sa chi tan'dúúca chεecu dendú'u: N'dai ndís'tiī, caaⁿ'maⁿ nī. ¹⁴Ní saⁿ'a s'eeⁿ Asíncrito ndúúcu Flegonte ndúúcu Hermas ndúúcu Patrobas ndúúcu Hermes ndúúcu tanáⁿ'ā hermanos chi snée yā ndúúcu yā: N'daí ndís'tiī, caaⁿ'māⁿ nī. ¹⁵Tiicá ntúūⁿ saⁿ'a Filólogo ndúúcu n'daataá Julia ndúúcu saⁿ'ā Nereo ndúúcu n'daataá ví'i yā, ndúúcu saⁿ'a Olimpás ndúúcu nducyáácá hermanos yeⁿ'e yú chi snée yā ndúúcu 'iⁿ'yāⁿ s'eeⁿ: N'daí ndís'tiī, caaⁿ'māⁿ nī.

¹⁶Maaⁿ ní nguaaⁿ maáⁿ nī chi i'téenu nī Cristo: N'daí dii, caaⁿ'māⁿ nī, ní ca'á nī 'áámá beso 'áámá nī ndúúcu taama nī tan'dúúca costumbre yeⁿ'e nī caati néⁿ'e nī ví'i. Nducyáácá 'iⁿ'yāⁿ yeⁿ'e nducyáácá yaācū: N'daí ndís'tiī ngaⁿ'a yā.

¹⁷Maaⁿ ní di'cuiitú ndís'tiī hermanos yeⁿ'é chi cundée nī cuidado yeⁿ'é 'iⁿ'yāⁿ chi diiⁿ 'úúví vaadi cadíínūⁿ nguaaⁿ ndís'tiī. Ní dííⁿ yā chi ndís'tiī dinuuⁿndí nī. 'iⁿ'yāⁿ s'eeⁿ ní contra yeⁿ'ē chi 'iⁿ'yāⁿ ca'cueéⁿ yā ndís'tiī. Ní contra yeⁿ'ē chí ch'éeⁿ nī. Diví nī 'iⁿ'yāⁿ s'eeⁿ yeⁿ'ē nguaaⁿ ndís'tiī. ¹⁸Caati 'iⁿ'yāⁿ s'eeⁿ nguée dichí'vε yā Señor Jesucristo yeⁿ'e yú ti dííⁿ yā tan'dúúca chi neⁿ'e yā. Ní nginnche'éei yā staava yeⁿ'e 'iⁿ'yāⁿ chi ndiicúūⁿ caati ngaⁿ'á yā ndúúcu nduudu cúuⁿnūⁿ yeⁿ'é yā chi cunee ngíínu yā. ¹⁹Nducyáácá 'iⁿ'yāⁿ 'āā deenú yā tan'dúúca chí ndís'tiī n'giindiveéⁿ nī nduudu yeⁿ'é Ndyuūs nī cáávā chuū 'úú ní yeenú. Neⁿ'é chi ndís'tiī listo canee nī chi dííⁿ

nī dendu'ū chi n'daacā. Nguée chi dííⁿ nī cosa chi nguée n'daacā. ²⁰Ní Ndyuūs chi véé nducuéⁿ'ē vaadi 'diííⁿ nduucú yā maaⁿ nch'εētε cu'néeⁿ yā yááⁿ'nguiniūⁿ miiⁿ cuaaⁿ mááⁿ ca'á nī. Neⁿ'é chi Jesucristo téε yā nducyáácá ndís'tiī nducuéⁿ'ē vaadi n'dai yeⁿ'é yā.

²¹Saⁿ'a Timoteo chi dáámá idiiⁿ sa ntiíⁿnyuⁿ nduucú ndúúcu sáⁿ'ā Lucio ndúúcu sáⁿ'ā Jasón ndúúcu sáⁿ'ā Sosípater chi sáⁿ'ā s'eeⁿ yeⁿ'e yáāⁿ vaacú: N'daí ndís'tiī, ngaⁿ'á yā.

²²Ní 'úú, sáⁿ'ā chi nguuví Tercio chi dingúūⁿ carta 'cūū cáávā Pablo: N'daí ndís'tiī, ngaⁿ'á ti yeⁿ'é Cristo s'uuúⁿ.

²³Ní 'tiicá ntúūⁿ saⁿ'a Gayo: N'daí ndis'tíi, ngaⁿ'a sa. 'Úú ní canee na vaacu sa ní nduuvidaamā yā 'iⁿ'yāⁿ yeⁿ'e yaācū na vaacu sa. Ní sáⁿ'ā Erasto ntúūⁿ chi sáⁿ'ā tesorero yeⁿ'e yáāⁿ 'cūū, ndúúcu hermano Cuarto: N'daí ndís'tiī, ngaⁿ'a yā.

²⁴Neⁿ'é chi Señor Jesucristo yeⁿ'e yú di'viicú yā nducyaaca ndís'tiī. 'Tíicā.

'Cuíínū carta 'cūū ndúúcu chi dich'εete yú Ndyuūs

²⁵Maaⁿ ní dich'εete yú Ndyuūs. Ndyuūs cuuvi diiⁿ cá yā chi díítū canee di ndúúcu chi i'téenu di tan'dúúca chí 'úú caⁿ'á nduudu cuaacu chi Cristo nadanguáⁿ'ai yā ndís'tiī. Ní chí'cueéⁿ ndís'tiī yeⁿ'e evangelio chi nduudu ngai yeⁿ'e Cristo. Chuū chí ngaⁿ'á ní chííⁿ chi Ndyuūs snúúⁿ n'de'éei yā ndii tiempo vmnááⁿ vmnaaⁿ chi canee iⁿ'yeeⁿdi ní Ndyuūs ch'iⁿ'í yā 'úú nduudu yeⁿ'e Cristo. ²⁶Ní maaⁿ ní deenu yú chuū cáávā chi profetas dingúūⁿ yā na libro yeⁿ'é Ndyuūs yeⁿ'é chuū. Ní dííⁿ yā tan'dúúca

Ndyuūs ngaⁿa yā yeⁿe chuū. Ní Ndyuūs
 cuéⁿé daāⁿmaⁿ caneé yā. Ní maaⁿ ní
 Ndyuūs ch'iⁿí yā nduudu cuaacu yeⁿé
 Cristo nanááⁿ 'iiⁿyāⁿ yeⁿe nducuéⁿē
 naciones cáávā chi 'caandiveéⁿ yā ní
 cu'téenu yā.

²⁷ Cuéⁿé daāⁿmaⁿ canee chi
 dich'εεε yú Ndyuūs chi 'aama
 n'dyáⁿā Ndyuūs chi deenú yā
 tanducuéⁿē dendu'ū. Ní diiⁿ yú 'tíicā
 cáávā Jesucristo Señor yeⁿe yú. 'Tíicā
 diiⁿ yú.

CARTA VMNÁÁⁿ VMNAAⁿ YEⁿE 'IIⁿ'YĀⁿ YEⁿE YĀĀⁿ CORINTO

**Pablo idinguúⁿ yā carta 'cūū yeⁿe
'iiⁿ'yāⁿ yeⁿe yaacū na yāāⁿ Corinto**

1 'Úú Pablo 'úú. Dendyuūs yaa'ví
yā 'úú chi cuuvi apóstol yeⁿe
Jesucristo tan'dúúcā chi Ndyuūs
neⁿé yā. 'Úú ndúúcū hermano
Sóstenes yaa'ví 'nū ndís'tii. **2** 'Úú
idinguúⁿ carta 'cūū yeⁿe 'iiⁿ'yāⁿ
chi i'téenu yā Ndyuūs, 'iiⁿ'yāⁿ chi
snée yā na yāāⁿ Corinto. 'Iiⁿ'yāⁿ
s'eeⁿ, Ndyuūs yaa'ví yā 'iiⁿ'yāⁿ chi
cuuvi yeⁿé yā 'iiⁿ'yāⁿ s'eeⁿ ti yeⁿe
Cristo Jesús. Idinguúⁿ dendu'ū yeⁿe
nducyaaca 'iiⁿ'yāⁿ yeⁿe nducyáácá
yāāⁿ, 'iiⁿ'yāⁿ s'eeⁿ chi ngaⁿ'angua'á
yā ndúúcū Señor Jesucristo. Señor
Jesucristo miiⁿ 'iivú Ndyuūs yeⁿé yā
ndúúcū s'uūuⁿ. **3** Ndyuūs Chiida yú
ndúúcū Señor Jesucristo cuuvi téé
yā s'uūúⁿ cosa chí n'dáácā n'dai yeⁿé
yā, ní 'íícú cunée vaadi 'diiⁿ yeⁿé
yā na staava yeⁿe yú.

**Pablo caaⁿ'maⁿ yā gracias Ndyuūs
caava chi Ndyuūs dateé yā 'iiⁿ'yāⁿ**

4 Cueⁿé daāⁿmaⁿ ngaⁿ'á gracias
Ndyuūs cáávā cosa chi n'daacā n'dai
yeⁿé Ndyuūs chi dátee yā s'uūúⁿ
chi yeⁿe Jesucristo. **5** Dendyuūs
dateé yā tanducuéⁿ dendu'ū chi vée

yeⁿé yā ti maaⁿ ní ndís'tii ní yeⁿe
Cristo ndis'tii. Ní Ndyuūs chinnee
yā ndís'tii chí caaⁿ'máⁿ nī nduudu
yeⁿé yā, ní teé yā ndís'tii vaadi
deenu. **6** 'Tíicā chiiⁿ chí 'úú ngaⁿ'á
nduudu cuaacu miiⁿ yeⁿe Jesucristo
miiⁿ. Ní ndís'tii n'giindiveéⁿ nī ní
diíⁿ nī 'tíicā, ní ch'iⁿ'í nī chí nduudu
miiⁿ chí cuaacu. **7** Ní cuuvi yeⁿé
nī nducueⁿ chí dateé Ndyuūs, ní
ndís'tii nguée diiⁿ faltar mar 'áámá.
Neⁿé chí ndís'tii 'cuætinéeⁿ ngiinu
nī Señor Jesucristo yeⁿe yú chí
ndaa yā taama vmnéⁿē. **8** Ní Cristo
miiⁿ ní téé yā fuerzas ndís'tii, ní
'cuætinéeⁿ nī n'daacā ndí nguuví
chí Jesucristo ndaa ntuúⁿ yā. Ní
nguée vée nuuⁿndi yeⁿé nī nguuví
chí ndaa Señor Jesucristo yeⁿe
yú. **9** Ndyuūs ní diíⁿ yā chí caⁿ'a yā
chí diíⁿ yā. Ní yaa'ví yā ndís'tii chí
'cuætinéeⁿ nī ndúúcū daiyā yā chí
Señor Jesucristo yeⁿe yú.

**Vée divisiones nguaaⁿ 'iiⁿ'yāⁿ
chí caⁿ'á yā na yāacū**

10 Ndís'tii hermanos yeⁿé, 'úú
ngiicā ndís'tii cáávā chí duuchi Señor
Jesucristo yeⁿe yú chí 'cuætinéeⁿ
ngíínú nī, ní nguée vée divisiones
nguaaⁿ ndís'tii. N'dáácā n'dai

'cuetinée nī ní daama daamá nī ndúúcū 'aama vaanicadiinūū" ye"e ndís'tiī chí n'daacā ndúúcū tanducué"ē chí dií" nī. ¹¹N'duuví 'iī"yā" ye"ē familia ye"e n'daataá Cloé yaa'ví yā 'úú ye"e ndís'tiī hermanos ye"é. Ní nga"á yā chí ndís'tiī n'gēecu cheendí nī. ¹²Chuū chí ye"ē chí caa"má". 'Áámá 'áámá ndís'tiī nga"á nī ye"ē 'áámá sa"ā 'tíicā. 'Áámá yā ní nga"ā yā: 'Úú ye"ē sa"ā Pablo; taamá yā ní nga"ā yā: 'Úú ye"ē sa"ā Apolos; taamá yā ní nga"ā yā: 'Úú ye"ē sa"ā Pedro; taamá yā ní nga"ā yā: 'Úú ye"e Cristo. ¹³¿Áá cuaacu chí Cristo ye"ē yú chí 'yaa" yā? Nguéé 'tíicā. ¿Áá ca'nee"ngá'āa Pablo cáávā nuu"ndi ye"ē ndís'tiī? Nguéé. ¿Áá cheedinuū"nī" nī ndúúcū chí duuchi Pablo? Nguéé 'tíicā. ¹⁴'Úú cā"ā: Gracias Dendyuūs, ti 'úú chí Pablo, nguéé cheedinuū"nī" mar 'áámá ndís'tiī. Dámaā" cheedinuū"nī" sa"ā Crispo ndúúcū sa"ā Gayo. ¹⁵Maa" ní mar 'áámá ndís'tiī nguéé cuuvi caa"má" nī chí ndēedinuū"nī" ndúúcū chí duūchí. ¹⁶Cheedinuū"nī" ntúú" 'iī"yā" ye"e familia ye"e sa"ā Estéfanos. Ní ye"e taná"ā 'iī"yā" 'úú nguéé deenú chí ndēedinuū"nī" du'ū ca táámá 'iī"yā". ¹⁷Cristo nguéé dichó'o yā 'úú chí cuēedinuū"nī" 'iī"yā" caati dichó'o yā 'úú chí caa"má" nduudu ye"ē evangelio chí nduudu ngai ye"e Cristo. 'Úú nguéé caa"má" ndúúcū nduudu deenu ye"e sa"ā ye"ē i"yee"dí 'cūū, ní 'iicu nducué"ē chí nga"á ní ye"e poder ye"ē Cristo chí ch'iī yā na cruz.

**Cristo mii" ní poder ye"ē
Ndyuūs ndúúcū vaadi deenu**

¹⁸'Úú deenú chí taachi 'iī"yā" chí nguéé deenú yā du'ū chí Cristo mii" ní n'giindiveé" yā nduudu ye"ē

cruz, 'iī"yā" mii" nacadínuu" yā chí 'áámá cosa chí duuchi. S'uūú" chí nangua"āi yú, deenu yú chí Ndyuūs ch'iī"i yā poder ye"é yā cucáávā nduudu ye"é yā. ¹⁹Naati canéé nguū" na libro ye"é Ndyuūs ndíí vmnaa" chí nga"ā 'tíicā:

'Úú dituūví vaadi deenu ye"e 'iī"yā" chí deenu, ní idií" chí nguéé dichí'vē nduudu ye"e 'iī"yā" chí deenu taavi.

²⁰¿De'ē dichí'vē vaadi deenu ye"e 'iī"yā" chí deenu? ¿De'ē dichí'vē vaadi deenu ye"ē maestro chí deenu taavi? ¿De'ē dichí'vē vaadi deenu ye"é 'iī"yā" chí deenu taavi ní caa"má" yā ndúúcū compañeros ye"é yā ye"e cosas chí véé i"yee"dí 'cūū? Ndyuūs ch'iī"i yā chí vaadi deenu ye"e i"yee"dí 'cūū ní dúú'vī vee ní nguéé de'ē vee. ²¹'Iī"yā" ye"e i"yee"dí 'cūū nguéé cuuvi n'diichí yā Dendyuūs cucáávā vaadi deenu ye"é i"yee"dí 'cūū. Ndyuūs canee yiinú yā ní nadangua"ái yā 'iī"yā" chí i'téenu yā nduudu cuaacu ye"é yā, naati taná"ā 'iī"yā" ye"e i"yee"dí 'cūū nga"á yā chí nduudu cuaacu mii" ní tan'dúúicā 'áámá cosa chí duuchi.

²²'Iī"yā" Israel s'ee" chí judíos ngiicá yā señales Ndyuūs ní 'iicu 'iī"yā" griegos ní in'nuu" cá yā vaadi deenu ye"e i"yee"dí 'cūū. ²³S'uūú" ní ca'cuee" yú ye"e Cristo chí ca'néé"nga'āa na cruz cáávā nuū"ndi ye"e nducyáácā 'iī"yā". 'Iī"yā" Israel s'ee" nguéé ne"e 'caandiveé" yā nduudú 'cūū, ní taná"ā 'iī"yā" sta'á yā nduudú 'cūū tan'dúúicā 'áámá cosa chí duuchi. ²⁴Nduuti chí 'iī"yā" Israel s'ee" o nduuti chí 'iī"yā" griegos, Ndyuūs

yaa'ví yā 'ii'nyā'n s'ee'n chi cuuvi ye'né yā 'ii'nyā'n. Cristo ní poder ye'né Ndyuūs ní Cristo mii'n vaadi deenu ye'né Ndyuūs cucááva nducyaaca 'ii'nyā'n. ²⁵Nduudu ye'né Ndyuūs chi 'ii'nyā'n nga'á yā chi cosa chí duuchi, nduudu mii'n nduudu déénú ca nguée tí nduudu ye'ne sa'ā ye'ne i'nyee'dí 'cūū. Ní cosa chi sta'á yā tan'dúúca chi duuvā ye'né Dendyuūs chí'f chi ditiinú ca, nguée ti ye'ne 'ii'nyā'n ye'ne i'nyee'dí 'cūū. ²⁶Ndís'tií hermanos ye'né, nadacádiinúú'n nī ye'ne maá'n nī. Nguée 'yaa'n ndís'tií 'ii'nyā'n chi deenu taavi, nguée 'yaa'n ndís'tií 'ii'nyā'n ndíí tii'n, ndíí nguée 'yaa'n ndís'tií 'ii'nyā'n 'cuiica. ²⁷Ndyuūs ndéevé yā 'ii'nyā'n chi nguée deenu taavi yā ní 'íicú 'ii'nyā'n chi deenu taavi yā cuuví 'cuináa'n yā. Ní Ndyuūs ndéevé yā 'ii'nyā'n ye'ne i'nyee'dí 'cūū chi véé duu'vīi fuerzas ye'né yā ní 'íicú 'ii'nyā'n chi véé fuerza ye'né yā cuuví 'cuináa'n yā. ²⁸Ndyuūs ndéevé yā 'ii'nyā'n chi nguée du'ū vee nanáá'n 'ii'nyā'n ye'ne i'nyee'dí 'cūū ní ndéevé yā 'ii'nyā'n chi nguée inuu'ndi ní ya'ai 'iinú yā 'ii'nyā'n. Ní 'iicu Ndyuūs dí'f yā chi nguée de'ē vee cosa chi ch'ete chí 'ii'nyā'n ye'ne i'nyee'dí 'cūū dí'f yā. ²⁹Tíicā Ndyuūs idi'f yā ti mar 'áamá 'ii'nyā'n nguée cuuvi dich'etē yā 'ii'nyā'n nanáá'n Dendyuūs. ³⁰Tíicā Dendyuūs maá'n yā teé yā vida cue'ne daá'ma'n ye'ne ndís'tií tí i'teenú nī Cristo Jesús. Ndyuūs dich'óo yā Jesucristo i'nyee'dí 'cūū chi cuuvi deenu yú nducué'ne cáávā Cristo. Ní cáávā Cristo mii'n nguée nuu'ndi ye'ne yú nanáá'n Ndyuūs ti Cristo mii'n chí'i yā na cruz cucáávā nuu'ndi ye'ne nducyaaca 'ii'nyā'n, ní

'iicu s'uūu'n chi cuuvi ye'né yā s'uūu'n. ³¹Cáávā chuū canée nguū'n na libro ye'né Ndyuūs ndíí vmaaa'n 'tíicā: 'ii'nyā'n chi nga'a chi idich'etē maá'n yā 'ii'nyā'n, nguée n'daacā idi'f yā. Dámaa'n canée chi dich'etē yā 'iivú Ndyuūs.

Nga'a yā chí Cristo ca'néé'nga'á yā

2 Ndís'tií hermanos ye'né, taachi ndāa ní canée ndúúcu nī 'tíicā ca'á nduudu cuaacu ye'né Dendyuūs. Nguée ca'á nduudu mii'n ndúúcu núú'má'n vadicadínnūu'n ye'ne vaadi deenu. ²Tíicā nga'á, ti nguée ne'né caā'ma'n táámá cosa nanáá'n ndís'tií, dámaa'n ne'né caa'má'n ye'ne Jesucristo chi ca'néé'nga'á yā. ³Taachi canée ndúúcu ndís'tií ndii cuū'nū'n 'úú; ní 'va'á 'úú; ní nééné in'duuví vaa. ⁴Nguée nga'á nduudu mii'n ndúúcu vaadi deenu chi cadiinuu'n 'ii'nyā'n ye'ne i'nyee'dí 'cūū, naati nga'á nduudu cuaacu mii'n ndúúcu nduudu chi nguée ng'i'ii. Nga'á chii'n chi Espíritu N'dai ye'né Ndyuūs chí'i'í yā 'úú ndúúcu poder ye'né yā chí nduudu cuaacu mii'n ní ye'ne Dendyuūs. Níicú 'ii'nyā'n cuuvi deenú yā chí nduudu cuaacu mii'n ní nduudu ye'né Dendyuūs. ⁵Tíicā nga'á ti chí'f chi i'teenú yú nguée chiicā na vaanicadiinuu'n ye'ne 'ii'nyā'n ye'ne i'nyee'dí 'cūū ti ye'ne poder ye'né Dendyuūs.

Dendyuūs dí'f yā chi deenu 'ii'nyā'n cucáávā Espíritu N'dai ye'ne yā

⁶Taachi canée nū nguaa'n 'ii'nyā'n chi i'teenú yā Dendyuūs ní 'áamá canée yā ndúúcu Dendyuūs, tuu'mi ní nga'á nū ndúúcu nduudu ngi'ii

yeⁿe vaanicádiinūⁿ. Nguéé ti vaadi deenu chi nadacadiinúⁿ 'iiⁿ'yāⁿ yeⁿ'ē iⁿ'yeeⁿdí 'cūū, 'iiⁿ'yāⁿ chi nguéé i'téenu yā Dendyuūs yeⁿ'ē yú. Ndíí nguéé ti yeⁿ'ē saⁿ'ā chi ndii tīiⁿ yeⁿ'ē iⁿ'yeeⁿdí 'cūū chi ch'ó'oo poder yeⁿ'e yā. ⁷Naati ngaⁿ'á 'nū vaadi déenu yeⁿ'ē Dendyuūs. Ní nguéé deenú 'iiⁿ'yāⁿ yeⁿ'ē iⁿ'yeeⁿdí 'cūū vaadi deenu miiⁿ, ti Ndyuūs caⁿ'a yā vaadi deenú 'cūū chi yeⁿ'e maáⁿ yā vmnááⁿ vmnaaⁿ chi din'dái yā iⁿ'yeeⁿdí 'cūū, ní 'iicu cuuvi nadinguáⁿ'ai yā s'uūúⁿ. ⁸Mar 'áámá 'iiⁿ'yāⁿ n'gæte yeⁿ'ē iⁿ'yeeⁿdí 'cūū déenú yā yeⁿ'e vaadi deenú 'cūū, ti nduuti chi déenu yā, tuuⁿ'mi ní nguéé s'neeⁿ'ngaⁿ'á yā Señor Jesucristo chi chiica yā yeⁿ'ē va'ai chæeti nguūvī. ⁹Canéé nguūⁿ ndii cuááⁿ vmnaaⁿ ná libro yeⁿ'ē Ndyuūs 'tíicā:

Nducuéⁿ'ē chi din'dái Dendyuūs ní yeⁿ'ē 'iiⁿ'yāⁿ chí i'teenu 'iivú Ndyuūs, tanáⁿ'ā 'iiⁿ'yāⁿ yeⁿ'ē iⁿ'yeeⁿdí 'cūū nguéé n'diichí yā Jesucristo, ndíí nguéé n'giindiveéⁿ yā yeⁿ'ē yā, ndíí nguéé nadicadiinúⁿ yā yeⁿ'e dendu'ū chuū na staava yeⁿ'e yā.

¹⁰Ndyuūs ch'iⁿ'í yā nducuéⁿ'ē s'uūúⁿ cucaavā Espíritu N'dai yeⁿ'ē yā. Espíritu N'dai yeⁿ'ē Dendyuūs ní deenú yā nducuéⁿ'ē, ní deenú yā nducuéⁿ'ē vaadi deenu yeⁿ'ē Ndyuūs. ¹¹¿Du'ú 'iiⁿ'yāⁿ cuuvi deenú yā chi nadacadiinúⁿ taama 'iiⁿ'yāⁿ? Dámaaⁿ espíritu yeⁿ'e maáⁿ yā deēnu chi maáⁿ yā nadacadínnuⁿ yā. 'Tíicá ntúūⁿ mar 'áámá 'iiⁿ'yāⁿ nguæe cádínnuⁿ yā chi Ndyuūs nadicadínnuⁿ yā, ti dámaaⁿ Espíritu N'dai yeⁿ'ē Dendyuūs deenu

yā yeⁿ'ē Dendyuūs. ¹²S'uūúⁿ ní nguéé sta'ā yú espíritu chi yeⁿ'ē iⁿ'yeeⁿdí ti sta'ā yú Espíritu N'dai chí cuchii yeⁿ'ē Ndyuūs. Maaⁿ ní cuuvi deenu yú nducuéⁿ'ē chí n'daacā n'dai ti Ndyuūs teé yā s'uūúⁿ Espíritu N'dai yeⁿ'ē yā. ¹³Ngaⁿ'a ntúūⁿ yú yeⁿ'e nducuéⁿ'ē chuū. Nguéé ngaⁿ'a yú ndúúcū nduudu chi ngi'cueeⁿ 'iiⁿ'yāⁿ yeⁿ'e iⁿ'yeeⁿdí 'cūū. Espíritu N'dai yeⁿ'ē Ndyuūs ca'cueeⁿ yā nducyaaca 'iiⁿ'yāⁿ chi canee ndúúcū Espíritu N'dai miiⁿ.

¹⁴'Iiⁿ'yāⁿ chi nguéé i'téenu yā Jesucristo yeⁿ'ē yú nguéé ituumicádiinnuⁿ yā dendu'ū chí yeⁿ'ē Espíritu N'dai yeⁿ'ē Dendyuūs, ti sta'ā yā nduudu miiⁿ tan'dúúcā 'áámá cosa chí duuchi. Ní nguéé cuuvi tuumicadiinúⁿ yā nduudu miiⁿ ti canéé chi cadiinúⁿ yā nduudu miiⁿ cáávā Espíritu N'dai yeⁿ'ē Dendyuūs. ¹⁵'Iiⁿ'yāⁿ chi canéé ndúúcū Espíritu N'dai yeⁿ'ē Dendyuūs n'diichí yā tanducuéⁿ'ē dendu'ū, naati 'iiⁿ'yāⁿ chi nguéé i'téenu yā Jesucristo nguéé cuuvi tuumicadiinúⁿ yā táácā idiíⁿ 'iiⁿ'yāⁿ chi canee ndúúcū Espíritu N'dai yeⁿ'ē Dendyuūs. ¹⁶Canéé nguūⁿ na libro yeⁿ'ē Ndyuūs ndíí vmnaaⁿ chi ngaⁿ'a tíicā: 'Iiⁿ'yāⁿ chi nguéé i'téenu yā Jesucristo, ¿táácā cuuvi deenú yā chi nadacadiinúⁿ 'iivú Ndyuūs? ¿Du'ú 'iiⁿ'yāⁿ cuuvi ca'cueeⁿ yā Ndyuūs? S'uūúⁿ chí canee yú ndúúcū Espíritu N'dai yeⁿ'ē Dendyuūs snee yú ndúúcū vaanicadínnuⁿ yeⁿ'ē Cristo chi 'iivú Ndyuūs yeⁿ'ē yú.

S'uūúⁿ ní compañeros yeⁿ'ē yú vi'í ní diiⁿ yú ntiiⁿ'nyuⁿ yeⁿ'ē Dendyuūs

3 Ndís'tií hermanos yeⁿ'ē, nguéé cuuvi caaⁿ'máⁿ ndúúcū ndís'tií

tan'dúúcā chi ndís'tií ní 'ii''yāⁿ
 chi 'áámá canéé ndúúcū Espíritu
 N'dai ye''é Ndyuūs, ní 'ii''yāⁿ chí
 n'giindiveéⁿ yā ye''e yā. Naati
 ca''á nduucú nī tan'dúúcā chi
 ndís'tií daiya ye''é Ndyuūs ndís'tií,
 tan'dúúcā chi ndís'tií 'ii''yāⁿ chi
 caama i'téenu yā Cristo ndís'tií.
 2 Tan'dúúcā da'caiyāa chi ngi'i leche
 ti 'āā cuéé cuuvi che'é yā, 'tiicā ntúūⁿ
 ndís'tií. Ca'cueéⁿ ndís'tií ndúúcū
 dendu'ū nduudu chi nguée ngi''ií, tí
 nguée dííⁿ nī tan'dúúcā chi nga''a
 Espíritu N'dai ye''é Ndyuūs. 3 Naati
 tan'dúúcā 'ii''yāⁿ ye''é i''yee''dí cūū
 dííⁿ yā chi ne''e maá''n yā, 'tíicā idiíⁿ
 nī. Ndís'tií ní 'téé ní ngu''u nī ní
 nguée nduuvidaamá nī. Nguée idiíⁿ
 n'daacá nī tan'dúúcā 'ii''yāⁿ chi
 i'téenu yā 'iivú Ndyuūs chi idiíⁿ yā,
 ti idiíⁿ nī tan'dúúcā 'ii''yāⁿ chi nguée
 i'teenú yā 'iivú Ndyuūs chi idiíⁿ yā
 'tíicā, ní idiíⁿ 'tíicā nī. 4 Caati nán''ā
 ndís'tií nga''á nī: 'Úú ní i'teenú
 tan'dúúcā chi nga''a Pablo, ní táámá
 nī nga''a nī: 'Úú i'teenú tan'dúúcā
 chi nga''a sa''a Apolos. ǀÁá nguée
 nga''á nī tan'dúúcā chi ca''a nī
 tiempo chi 'āā chó'oo taachi 'āā
 cuéé cu'téenu nī Jesucristo? 5 ǀDu'ú
 sa''a Pablo 'úú? ǀDu'ú sa''a Apolos
 mii''? ǀÁá nguée nús'uu 'ii''yāⁿ chi
 dichíí'vē Dendyuūs? Nga''á 'nū
 nduudu chi ch'i''i Dendyuūs nús'uu
 ní ndís'tií ní i'teenú nī. 6 'Úú nga''á
 nduudu ye''é Dendyuūs nanáá''n
 ndís'tií ní dííⁿ tan'dúúcā chí chiínú
 ndaata na staava ye''é nī. Sá''ā
 Apolos mii'' canee sa ndúúcu nī
 ní ngi'cuee'' sá ndís'tií ní dii'' sa
 tan'dúúcā chí ch'ii''yú sa ndaata
 mii''. Dendyuūs dííⁿ yā chi 'cuiita
 ndaata mii''. 7 Cáávā chuū 'ii''yāⁿ

chi nga''a nduudu ye''é Dendyuūs
 o 'ii''yāⁿ chí ca'cuee'' nduudu mii''
 nguée ch'eté yā. Dámaa'' Ndyuūs
 chi 'cuiitá yā nduudu mii'' ní ch'etete
 cá yā. 8 'Ii''yāⁿ chi caa''má''n yā
 nduudu mii'' ní 'ii''yāⁿ chi ca'cuee''
 yā nduudu mii'', 'āā daamá nūu'' dííⁿ
 yā ntii''nyu'' ye''é Ndyuūs. Ndyuūs
 ca'á yā 'ii''yāⁿ mii'' chii'' chi cuuvi
 ye''é yā caavā ntii''nyu'' ye''e yā chí
 dííⁿ yā. 9 Nús'uu ní daama dáámá
 nuú'' idiíⁿ 'nū ntii''nyú'' ndúúcū
 Dendyuūs. Ndís'tií ní tan'dúúcā
 'áámá campo ye''é Ndyuūs chí
 Ndyuūs chidi'cuiitá yā 'tíicā ndis'tií.
 Tan'dúúcā 'áámá va'ai chí idin'dai
 Dendyuūs, 'tíicā ndís'tií. 10 Ndyuūs
 teé yā 'úú vaadi deenú ye''é yā ní
 tan'dúúcā 'áámá sa''ā deenu din'dai
 sa cimientto ye''e va'ai, 'tíicā 'úú. 'Úú
 nga''á nduudu cuaacu chí tan'dúúcā
 cimientto mii'' chí din'dai sa. Táámá
 'ii''yāⁿ 'iicandíí yā ndúúcū va'ai mii''.
 Ca'áámá ca'aama 'ii''yāⁿ chí 'iicandíí
 yā nduúcu canéé chí 'iicandíí yā
 ndúúcu va'āi ndúúcu cuidado.
 11 Mar 'áámá 'ii''yāⁿ nguée cuuvi
 cu'nee'' yā táámá cimientto chí
 n'daa'' ye''é chí 'úú chí'neé'', ti tuúú
 ye''é cimientto mii'' ní Jesucristo.
 12 'Ii''yāⁿ s'ee'' chí 'iicandíí yā vmnaa''
 cimientto mii'' ndúúcu 'díí''nguaa'',
 o ndúúcu 'díí''nguae, o ndúúcu
 tuúu ndē chee'', o ndúúcu yá''á,
 o ndúúcu yaata o ndúúcu 'í'voōo
 canéé chí cadiinúú'' yā, ti chuū chí
 nga''á. 13 Nguuvi chí Jesucristo dííⁿ
 yā juzgar ntii''nyu'' ye''é ca'áámá
 ca'áámá 'ii''yāⁿ, ní 'íicú 'ii''yāⁿ
 cádíínuu'' yā de'ē ntii''nyu'' chii''
 ye''é 'áámá 'áámá yā. Ntii''nyu''
 mii'' ní canéé chí cho'oo naavta''ā
 ngiichí ya''ā ní deenú yā 'ii''yāⁿ

yeⁿe ntiiⁿnyuⁿ yeⁿé yā. ¹⁴Nduuti chí cunee ntiiⁿnyuⁿ yeⁿe 'iiⁿ'yāⁿ s'eeⁿ chí 'licandí yā vmnaaⁿ cimientó miiⁿ, ntiiⁿnyuⁿ chí 'āā chó'oo naavtaⁿā ngiichi yaⁿā ní nguée chiichi, tuuⁿmi ní 'iiⁿ'yāⁿ s'eeⁿ véé chí cuuvi yeⁿe yā. ¹⁵Ndúúti chí cuucu ntiiⁿnyuⁿ chí 'licandí yā ndúúcu yaⁿā, tuuⁿmi ní di'cuuinú ntiiⁿnyuⁿ miiⁿ. 'Iiⁿ'yāⁿ s'eeⁿ ní nanguáⁿai yā tan'dúúca 'iiⁿ'yāⁿ chí chéenu yā yeⁿe va'ai yeⁿe yā taachi ngiichi va'ai yeⁿé yā.

¹⁶¿Áá nguée déenu ndís'tii chí i'teenú nī Jesucristo chí cuerpo yeⁿe nī ní yāacū yeⁿe Dendyuūs, ní canée Espíritu N'dai yeⁿe Ndyuūs ndúúcu ndís'tii? ¹⁷Ndúúti chí 'áamá 'iiⁿ'yāⁿ dituuvi yā yaacū yeⁿé Ndyuūs, Ndyuūs ní di'cuuinú yā 'iiⁿ'yāⁿ miiⁿ. Yāacū yeⁿé Ndyuūs ní déeve. Ndís'tii ní yaacū yeⁿé Ndyuūs ndís'tii.

¹⁸Mar 'áamá nī ní nguée nginnche'í maáⁿ nī ndís'tii. Taachi 'aamá ndís'tii nadacadiinuun nī chí nge'e taavi nī yeⁿé vaadi deenu yeⁿe iⁿ'yeeⁿdí 'cūū, tuuⁿmi ní canee cuuⁿmiⁿ chí díⁿ nī tan'duucā 'áamá 'iiⁿ'yāⁿ chí nguée deenu. Ní cuuvi ndaācā vaadi deenu yeⁿé nī chí yeⁿé Dendyuūs. ¹⁹Vaadi déenu yeⁿé 'iiⁿ'yāⁿ yeⁿe iⁿ'yeeⁿdí 'cūū tan'dúúca 'áamá cosa chí duuchi nanááⁿ Ndyuūs. 'Āā canée nguūⁿ na libro yeⁿé Ndyuūs ndíⁿ vmnaaⁿ 'tífca: Ndyuūs díⁿ yā chí vaadi deenu yeⁿé 'iiⁿ'yāⁿ yeⁿé iⁿ'yeeⁿdí 'cūū dííⁿ chí 'cuuvi 'iiⁿ'yāⁿ ní 'iiⁿ'yāⁿ miiⁿ canee yā tan'dúúca chí cundaí yā na trampa yeⁿe maáⁿ yā. ²⁰Canée nguūⁿ ntuuⁿ táamá chí 'tuuca: 'Iivú Ndyuūs déenu yā vaanicadiinuun

yeⁿé 'iiⁿ'yāⁿ chí deenu yeⁿé iⁿ'yeeⁿdí 'cūū. Nguée dé'e vee dichí'vē chí nadacadiinuun 'iiⁿ'yāⁿ s'eeⁿ. ²¹Mar 'áamá 'iiⁿ'yāⁿ nguée cuuvi caaⁿmaⁿ yā chí dich'etē yā saⁿā iⁿ'yeeⁿdí 'cūū. Tanducuéⁿe denduⁿū ní yeⁿe ndís'tii. ²²Nduuti chí 'úú chí Pablo, o saⁿā Apolos, o saⁿā Pedro, o nduuti chí yeⁿé iⁿ'yeeⁿdí, o yeⁿe vida yeⁿé yú, o yeⁿe vaadi n'gii, o yeⁿe cosa chí 'āā vee o yeⁿé denduⁿū chí caama cuchii, tanducuéⁿe chuū ní yeⁿe ndís'tii. ²³Ní ndís'tii ní yeⁿe Cristo ndís'tii. Ní Cristo miiⁿ ní yeⁿe Dendyuūs chí cánduuchi yā cueⁿe daāⁿmaⁿ.

Ntiiⁿnyuⁿ yeⁿe apóstoles

4 Ndís'tii ní didúúché nī nús'uu tan'dúúca 'iiⁿ'yāⁿ chí idiⁿ ntiiⁿnyúⁿ yā yeⁿe Jesucristo. Nús'uu ní ngaⁿá 'nū nduudu cuaacu yeⁿé Ndyuūs nanaaⁿ ndís'tii. Vmnááⁿ vmnaaⁿ ní nguée chí cadíinuun nī naati maaⁿ ní cádiinuun nī nduudu cuaacu miiⁿ. ²'Iiⁿ'yāⁿ chí díⁿ ntiiⁿnyuⁿ yeⁿe 'iivú Ndyuūs canee cuuⁿmiⁿ chí díⁿ yā cumplir tanducuéⁿe chí caaⁿmaⁿ Ndyuūs yeⁿé ntiiⁿnyuⁿ chí díⁿ yā. ³Nguée dé'e vee tuneé 'úú nduuti chí 'iiⁿ'yāⁿ díⁿ yā juzgar 'úú, o nduuti chí ndís'tii, o táamá 'iiⁿ'yāⁿ o 'úú maáⁿ n'diichí nuuⁿndi yeⁿé. ⁴Áará chí staava yeⁿé ngéé diiⁿ condenar 'úú cáávā chiiⁿ chí díⁿ, 'úú nguée cuuvi caaⁿmaⁿ chí nguée nuuⁿndi yeⁿé. Dámaāⁿ Señor Jesucristo díⁿ yā juzgar 'úú, ní caaⁿmaⁿ yā nuuⁿndi yeⁿé. ⁵Ndís'tii nguée díⁿ nī juzgar 'iiⁿ'yāⁿ. Taachí ndáá Señor Jesucristo yeⁿé yú taama vmnéⁿēe tuuⁿmi 'cuuⁿmfⁿ yā tanducuéⁿe chí

cadiinuuⁿ yú 'aama 'aama yú ndii na staava yeⁿē yú. Tiempo miiⁿ ní 'iivú Ndyuūs téē yā s'uuúⁿ chí cuuvi yeⁿē yú caavā ntiiⁿnyuⁿ chí diiⁿ yú.

⁶Úú ngaⁿá yeⁿē chí 'úú ndúúcū saⁿā Apolos diiⁿ 'nū. Ní 'íicú ndís'tií cuuvi 'cueéⁿ nī tan'dúúcā chí cuuvi diiⁿ nī tan'dúúcā chí canéé nguūⁿ ndíí vmnaaⁿ na libro yeⁿe Ndyuūs. Ndís'tií nguéé n'diichí nī 'iiⁿyāⁿ. Ní nguéé caaⁿmán nī chí 'áámá 'iiⁿyāⁿ chí ch'εεte ca yā nguéé ti táámá yā. ⁷¿Dē'ε cuuvi chí ngaⁿa nī chí naⁿa 'iiⁿyāⁿ chí ch'εεte yā? ¿Áá nguéé tee Ndyuūs tanducuéⁿe chí vεε yeⁿé nī? ¿Dē'ε cuuvi chí ngaⁿa nī chí tanducuéⁿe chí vεε chí yeⁿé nī ní maáⁿ nī sta'á nī, ní nguéé diiⁿ nī cuenta yeⁿē chíiⁿ chí tee Ndyuūs ndís'tií?

⁸Ndís'tií ní nadacadíinuⁿ nī chí deenú nī nducuéⁿē chí yeⁿe nduudu yeⁿe Dendyuūs. Ní diiⁿ nī tan'dúúcā 'iiⁿyāⁿ chí 'cuiica. Taachi nguéé ch'εεtineé 'nū ndúúcū ndís'tií, tuu'mi ní ndís'tií diiⁿ nī tan'dúúcā chí reyes ndís'tií. Nduuti chí ndaa tiempo chí ndís'tií caaⁿmán nī ntiiⁿnyuⁿ ti rey ndís'tií, tuu'mi ní nús'uu caaⁿmaⁿ ntiiⁿnyúⁿ 'nū nduucú nī. ⁹Tan'dúúcā chí 'úú nadacadíinuúⁿ, nús'uu chí apóstoles ní candéε 'nū nduudu yeⁿe Ndyuūs. Ndyuūs s'neéⁿ yā nus'ūū lugar chí ndii na n'giinū yeⁿe fila. Ní nús'uu canéé 'nū tan'dúúcā 'iiⁿyāⁿ chí niiⁿnuúⁿ cánee nguuvi chí 'cuūvi yā, ní niiⁿnuúⁿ canéé nguuvi chí ch'iiⁿnúⁿ yā nús'uu. 'Tíicā snéé nús'uu. 'Iiⁿyāⁿ yeⁿe iⁿyeeⁿdí 'cūū ndúúcū ángeles yeⁿē nanguuvi n'gíinu yā nús'uu. ¹⁰'Iiⁿyāⁿ yeⁿe iⁿyeeⁿdí 'cūū ngaⁿá yā chí nús'uu tonto 'nū ti neⁿé 'nū

Cristo, naati ngaⁿá yā ti ndís'tií ní saⁿā deenu ndís'tií. Ngaⁿá yā ti nús'uu ní 'va'á 'nū naati ndís'tií ní ditiinú nī. Ngaⁿá yā chí nús'uu ní nguéé n'dááca 'nū naati ndís'tií ní n'dááca nī. ¹¹Ndii nguuvi miiⁿ ní cuiicu 'nū ní yaaca 'nū va. Ní 'āā ntéé n'deeε catécai 'nū chí n'daacā. Ní 'iiche yeⁿé 'nū. Ní 'iiⁿyāⁿ ch'eⁿé yā nús'uu. Ní diiⁿ yā chí ch'éénú 'nū ndii miiⁿ ní ndii 'múúⁿ ní nguéé vaacu 'nū. ¹²Ní diiⁿ 'nū ntiiⁿnyuⁿ ndúúcū ta'á 'nū chí cuuvi che'ε 'nū. Taachi 'caa'va yā yeⁿé 'nū tuu'mi ní 'iiⁿyāⁿ miiⁿ di'viicú yā nús'uu. Diiⁿ yā chí néénε ch'eenu 'nū chíi ní nús'uu ní chí cheé 'nū yeⁿé nducuéⁿē. ¹³Caⁿa yā cunnacā yeⁿé 'nū ní ch'ée 'nū ndúúcū vaadi ngiinu. Ndii nguuvi miiⁿ 'iiⁿyāⁿ nacadiinuúⁿ yā chí nús'uu tan'dúúcā dεεcúū yeⁿe iⁿyeeⁿdí 'cūū 'tíica nús'uu.

¹⁴Úú nguéé idinguúⁿ yeⁿe dendu'ú 'cūū yeⁿe ndís'tií caati chí cuuvi 'cuinaáⁿ nī. Yaa'ví ndís'tií yeⁿe nducuéⁿē chuū tí ndís'tií tan'dúúcā daiyá chí néénε neⁿé, 'tíicā ndís'tií. ¹⁵Áará chí vée ndiichi mil maestros chí ngi'cueéⁿ yā ndís'tií yeⁿe Cristo, nguéé néénε 'yaaⁿ 'iiⁿyāⁿ chí snéε yā tan'dúúcā chiidá nī. 'Úú ní tan'dúúcā chiidá nī na ndaata yeⁿé Dendyuūs, ti candéε evangelio chí nduudu cuaacu chí ngai yeⁿé Cristo nanááⁿ ndís'tií. Ní ndís'tií ní chí'téenu nī ní ch'iindiyááⁿ ntúuⁿ nī na ndaata yeⁿé Ndyuūs. ¹⁶Cáávā chíiⁿ 'úú idi'cuítú ndís'tií. Diiⁿ nī tan'dúúcā chí 'úú idifⁿ.

¹⁷Cáávā chuū dicho'ó Timoteo nanááⁿ ndís'tií. Saⁿā miiⁿ tan'dúúcā daiyá, 'tíica sa. Ní saⁿa chí neⁿé. Saⁿā miiⁿ ní 'áámá canee sa ndúúcū

'iivú Ndyuūs. Saⁿā miiⁿ ní ca'cueeⁿ sa ndís'tií yeⁿe Cristo. Ní n'gaacu nī yeⁿē tanducueⁿē chi cuuvi dííⁿ nī maaⁿ chi i'teenú nī Cristo tan'dúúcā chi 'úú ngi'cueéⁿ nduu cuaaⁿ nducueⁿē yáacū va. ¹⁸Maaⁿ ní deenú chi náⁿā ndís'tií ngaⁿ'a nī chi n'geete ndai maaⁿ nī. Ní nadacádíínuuⁿ nī chí 'úú ní 'aa ntéé ndaá naachi cánéé nī. ¹⁹Ndaa nuúⁿ yeⁿé ndís'tií nduuti chí Ndyuūs neⁿé yā chi ndaá. Taachi ndaá tuuⁿmi 'úú cadiinúúⁿ yeⁿe chi 'iiⁿ'yāⁿ chi ngaⁿ'a maáⁿ yā chi n'geete yā. Cadiinúúⁿ nduuti chí 'iiⁿ'yāⁿ miiⁿ dííⁿ yā tan'dúúcā chi Ndyuūs neⁿé yā chí dííⁿ yā. ²⁰Nducueⁿē yeⁿe naachi Ndyuūs ngaⁿ'a ntiíⁿnyuⁿ yā nguée dámaāⁿ yeⁿe chi ngaⁿ'a yā, ti chiiⁿ chí diiⁿ yā ti poder yeⁿé Ndyuūs. ²¹De'ē neⁿé ndís'tií. ¿Áá neⁿe nī chi taachi ndaá ní dííⁿ regañar ndís'tií, o taachi ndaá caaⁿ'máⁿ nduucú ndís'tií ndúúcū vaadi néⁿé?

Ngaⁿ'a yā nuuⁿndi yeⁿē 'áámá saⁿ'a chi caⁿ'á yā na yaācū

5 N'giindiveéⁿ 'nū chi nguááⁿ ndís'tií véé 'áámá saⁿ'a chí diiⁿ nuuⁿndi ca tí canee sa ndúúcū n'daataá chi nguée yeⁿē sa. Nguée 'tíicā nguaaⁿ 'iiⁿ'yāⁿ gentiles chi nguēe i'téenu yā Jesucristo. N'giindiveéⁿ 'nū chi saⁿ'ā miiⁿ sta'a n'daataá yeⁿē chiida sa ní canee sá ndúúcū tá. ²Ní ndís'tií ngaⁿ'a maáⁿ nī yeⁿe nī chi n'geete nī n'dáará chí idiíⁿ saⁿ'ā miiⁿ nuuⁿndi 'tíicā. ¿De'ē cuuvi chí nguée divíⁿ ní saⁿ'a miiⁿ na yaacū yeⁿé Ndyuūs yeⁿē yú? ³N'dáará chí 'úú nguée canee ndúúcū ndís'tií inacádiinúúⁿ yeⁿé ndís'tií. 'Úú ní caaⁿ'máⁿ nuuⁿndi

yeⁿe saⁿ'ā miiⁿ yeⁿe dendú'u chí idiíⁿ sa tan'dúúcā chí 'úú canee ndúúcū ndís'tií. ⁴Taachí nduuvíidáámá ndís'tií ná chí duuchi Señor Jesucristo tuuⁿmi ní poder yeⁿē Señor Jesucristo canee ndúúcū ndís'tií. Ní dííⁿ nī tan'dúúcā chí 'úú canee ndúúcū ndís'tií. ⁵'Tíicā nadacádiinúúⁿ chí ndís'tií canee cuuⁿmiⁿ chí dííⁿ nī. Divíⁿ nī saⁿ'ā miiⁿ nguaaⁿ ndís'tií ti saⁿ'ā miiⁿ ní canee sa yeⁿē na poder yeⁿe yááⁿ'nguiinúuⁿ. 'Tíicā castigo yeⁿē sa. Ní cuuvi cadíínuuⁿ sa yeⁿe alma yeⁿe sa. Ní cuuvi nanguaⁿ'ai alma yeⁿē sa nguuvi chí ndaa ntúúⁿ Señor Jesucristo yeⁿē yú.

⁶Nguée n'dáacā ndís'tií ní ngaⁿ'á nī chí n'dái ndís'tií, ní véé 'iiⁿ'yāⁿ chí idiíⁿ yā nuuⁿndi nguaaⁿ ndís'tií. ¿Áá nguée deenú nī ti ta 'lííⁿ chuundi levadura ichée ndúúcū tanducueⁿē yaāchí? ⁷Saⁿ'ā miiⁿ tan'dúúcā levadura 'tíicā sa. Ndís'tií divíⁿ nī saⁿ'ā miiⁿ ní cūnee n'dáaca nī. Cuneé nī tan'dúúcā yaāchí chí nguée levadura yeⁿē, tan'dúúcā pan chí che'e yā yeⁿē pascua. 'Iiⁿ'yāⁿ ch'iíⁿ'núⁿ yā Cristo. Ní Cristo miiⁿ ní tan'dúúcā 'iiti cuūchí chí ch'iíⁿ'núⁿ yā cáávā 'viicu pascua. Cáávā s'uūuⁿ ní Cristo miiⁿ ní sta'á yā lugar yeⁿē 'iiti cuūchí yeⁿe 'viicu pascua ti ch'ii yā cucáávā s'uúúⁿ. ⁸Maaⁿ ní nguée dich'ete yú 'viicu yeⁿe pascua miiⁿ tan'dúúcā 'iiⁿ'yāⁿ chí véé nuuⁿndi yeⁿé yā ti nguée yeⁿe Cristo 'iiⁿ'yāⁿ s'eeⁿ. Ní nguée dich'ete yú ndúúcū vaadi n'giinu na staava yeⁿē yú o ndúúcū cosa chí nguée n'daacā, ti chuū ní tan'dúúcā levadura 'tíicā. Dich'ete yú pascua miiⁿ dámaāⁿ ndúúcū nducueⁿē chí n'daacā na

staava yeⁿē yú ti tan'dúúcā pan chi nguée levadura yeⁿē, 'tíicā canee yú.

⁹Áá dinguúⁿ yeⁿe ndís'tií chi nguée cáⁿa nī ndúúcu saⁿā chi canee sa ndúúcu n'daataá chi nguē yeⁿē sa ndí nguée cáⁿa nī ndúúcu n'daataá miíⁿ.

¹⁰Úú nguée ngaⁿá chi nguée n'diichí nī sáⁿā chi véé n'daataá yeⁿē sa, o n'daataá chi véé saⁿā yeⁿē tá, o 'iíⁿ'yāⁿ chi nginnche'í yā 'iíⁿ'yāⁿ, o 'iíⁿ'yāⁿ chi duúcu, o 'iíⁿ'yāⁿ chi i'teenú yā ídolos. Ndís'tií nguée cuuvi cuneé nī na iⁿ'yeeⁿdí cūū ní nguée n'diichí nī 'iíⁿ'yāⁿ yeⁿe iⁿ'yeeⁿdí cūū. ¹¹Naati maaⁿ ní 'āā dinguúⁿ yeⁿē ndís'tií chi nguée cáⁿa nī ndúúcu 'iíⁿ'yāⁿ s'eeⁿ chi ngaⁿá yā chi hermanos yeⁿē nī ní nguée n'daacā idiíⁿ yā, ti saⁿā chi canee ndúúcu n'daataá chi nguē yeⁿe sa, o n'daataa chi canee ndúúcu saⁿa chi nguē yeⁿē tá. Ndí nguée cáⁿa nī ndúúcu 'iíⁿ'yāⁿ chi i'teenú yā ídolos. Ndí nguée cáⁿa nī ndúúcu 'iíⁿ'yāⁿ chi ngaⁿá yā nduudu yaadi, o ndúúcu 'iíⁿ'yāⁿ chi nginnche'í yā 'iíⁿ'yāⁿ, o ndúúcu 'iíⁿ'yāⁿ chi ngii cuuⁿ'vi, o ndúúcu 'iíⁿ'yāⁿ chi duucu. Ní nguée cheⁿē nī ndúúcu 'iíⁿ'yāⁿ s'eeⁿ. ¹²¿De'ē cúúví chí 'úú n'diichí nuuⁿndi yeⁿe 'iíⁿ'yāⁿ chi nguée i'téenu yā Jesucristo yeⁿē yú? Chuū ní nguée ntiíⁿnyuⁿ yeⁿē ti yeⁿē Dendyuūs. Ndís'tií canee chi n'diichi nī nuuⁿndi yeⁿe 'iíⁿ'yāⁿ chi caⁿá yā yaacū ndúúcu nī. ¹³Jesucristo n'diichí yā nuuⁿndi yeⁿe 'iíⁿ'yāⁿ chi nguée i'téenu yā Ndyuūs. Maaⁿ ní ndís'tií diví nī saⁿā miíⁿ nguaaⁿ ndís'tií.

**'Iíⁿ'yāⁿ chi i'téenu yā Señor
Jesucristo naⁿá yā nanááⁿ juez
ndúúcu vaadi 'caaⁿ'va yeⁿē yā**

6 Nduuti chi 'aama chéé ndís'tií
véé vaadi 'caaⁿ'va ndúúcu

taama chéé ndís'tií, ¿de'ē cúúví chí caⁿá nī nanááⁿ juez yeⁿe yaāⁿ vaacū nī, ní nguée caⁿá nī nanááⁿ 'iíⁿ'yāⁿ chi chéé vmnaaⁿ yeⁿe yāacū yeⁿē nī? ²¿Áá nguée deenu ndís'tií ti s'uuúⁿ chi i'teenú yú Jesucristo ndáá nguuví chi cuuvi n'diichi yú nuuⁿndi yeⁿe 'iíⁿ'yāⁿ yeⁿe iⁿ'yeeⁿdí 'cūū? Nduuti chi ndís'tií caⁿá nī n'diichí nī nuuⁿndi chi idiíⁿ 'iíⁿ'yāⁿ yeⁿe iⁿ'yeeⁿdí 'cūū, ¿áá nguée cuuvi n'diichí nī ta 'lírⁿ nuuⁿndi yeⁿe nī chí nguaaⁿ ndís'tií? ³¿Áá nguée deenu ndís'tií chi s'uuúⁿ caⁿa yú n'diichi yú nuuⁿndi yeⁿe ángeles? Ní nduuti chi cuuvi diíⁿ yú 'tíicā tuuⁿ'mí ní cuuvi n'diichi yú denduⁿ'u nuuⁿndi chi véé yeⁿe yú iⁿ'yeeⁿdí 'cūū. ⁴Nduuti chi canéé chi n'diichí nī denduⁿ'u vaadi 'caaⁿ'va nguaaⁿ ndís'tií, n'daacā chi caⁿá nī nanááⁿ 'iíⁿ'yāⁿ yeⁿe yaācū 'aara chi nguée 'iíⁿ'yāⁿ chí duuⁿ'vī néⁿe yā vīⁿ. ⁵Ngaⁿá chuū chi cuuvi 'cuinaáⁿ nī. ¿Áá cadiinuⁿ nī chi nguée véé mar 'áámá 'iíⁿ'yāⁿ nguaaⁿ ndís'tií, mar 'áámá 'iíⁿ'yāⁿ chi nguée cuuvi n'diichí yā duⁿ'u hermano chi véé nuuⁿndi yeⁿe yā? ⁶Nduuti chi véé 'aama hermano chi deenu ca nguaaⁿ ndís'tií, ¿de'ē cúúví chi ngeⁿ'e hermanos ndúúcu vaadi 'caaⁿ'va yeⁿē yā nanááⁿ 'iíⁿ'yāⁿ chi nguée i'téenu yā Señor Jesucristo yeⁿē yú?

⁷Cuaacu níⁿ'nyúⁿ nguée ng'iⁿ'i ndís'tií chi yeⁿe Ndyuūs ndís'tií ti véé vaadi 'caaⁿ'va yeⁿe 'áámá nī táámá nī ndúúcu vīⁿ. ¿De'ē cúúví chi nguée ichéé nī nguaaⁿ ndís'tií denduⁿ'u chi nguē n'daacā chi hermano diíⁿ yā nduucu nī? N'daacā n'dai chi ichéé nī tanducueⁿē ní nguée caⁿá nī

nanááⁿ 'iiⁿyāⁿ cucáávā hermanos chi idíⁿ yā ndúúcu nī. ⁸Ndís'tiī, hermanos, ní nguée n'daacā idíⁿ nī chi nginnche'él nī 'áámá nī ndúúcu taama nī chi hermano yeⁿe nī.

⁹Ndís'tiī nguée 'caandiveeⁿ nī chiīⁿ chi 'iiⁿyāⁿ ngaⁿa yā chi cuaacu ní nguée cuaacu. ¿Áá nguée deenu nī chi 'iiⁿyāⁿ chi nguée idin'daacá yā nguée ndaa yā naachí Ndyuūs ngaⁿa ntiīⁿnyúⁿ yā? Ní nguée 'iiⁿyāⁿ s'eeⁿ ndíí nguée 'iiⁿyāⁿ chi sta'á yā n'daataá yeⁿe taama sa, o isaⁿā yeⁿe taama ta, ní nguée n'daataá chi n'diichi tá saⁿā chi nguée yeⁿe tá, ní nguée saⁿā chi n'diichi sa n'daataá chi nguée yeⁿe sá, ndúúcu 'iiⁿyāⁿ chi i'teenu ídolos chi santos, ndúúcu saⁿā chi iduuchinéⁿ ví'i sa. ¹⁰Tiicá ntúuⁿ 'iiⁿyāⁿ duucu, ndúúcu 'iiⁿyāⁿ chi neⁿe cá yā dendu'u chi véé yeⁿe taama 'iiⁿyāⁿ, ndúúcu 'iiⁿyāⁿ chí ngii cúú'ví, ndúúcu 'iiⁿyāⁿ chi ngaⁿa taán yā yeⁿe taama 'iiⁿyāⁿ, ndúúcu 'iiⁿyāⁿ chí itá'á yā yeⁿe taama yā. Nducuéⁿ 'iiⁿyāⁿ s'eeⁿ nguée cuuvi nndaá yā naachi Ndyuūs ngaⁿa ntiīⁿnyuⁿ yā. ¹¹Tiicá ntúuⁿ diiīⁿ ndís'tiī. Dinuuⁿndí nī tiempo chi 'āá chó'oo naati maaⁿ ní Ndyuūs n'diichí yā ndís'tiī tan'dúúcā chi 'āá ntée vee nuuⁿndi yeⁿe nī cáávā Jesucristo. Maaⁿ ní ndís'tiī ní dííⁿ nī nducuéⁿ chi n'daacā ti yeⁿe Jesucristo ndís'tiī. Ní Espíritu N'dai yeⁿe Ndyuūs yeⁿe yú canée ndúúcu nī.

Yeⁿe chi n'daacā chi diiⁿ yú

¹²Tanducuéⁿ chi nguée nuuⁿndi cuuvi dííⁿ, naati nducueⁿ chi n'daacā nguée neⁿe dííⁿ, ti nguée n'dai chi dííⁿ. Cuuvi dííⁿ tanducuéⁿ

chi neⁿe chi n'daacā, naati nguée necio canee yeⁿe mar 'áámá dendu'ū. ¹³Cuaacu chi yútē chi che'e yú ní caavā cheeti yú. Cheeti yú ní neⁿe che'e yuūtē. Naati Ndyuūs dí'cuuīn yā yuūtē chi che'e yú ndúúcu cuerpo yeⁿe yú ndúúcu chi véé yeⁿe. Nguée cuuvi caaⁿmaⁿ yú chi Ndyuūs teé yā cuerpo yeⁿe yú chi n'daataá n'diichí yā saⁿā. Ndyuūs dííⁿ yā chi s'uuúⁿ chi cuuvi yeⁿe yā ní cuerpo yeⁿe yú ní yeⁿe Dendyuūs. ¹⁴Jesucristo chi 'iivi yú, Ndyuūs nducueeⁿ yā yeⁿe nguaaⁿ tináⁿā. 'Tiicá ntúuⁿ Ndyuūs nadacueeⁿ ntúuⁿ yā s'uuúⁿ ndúúcu poder yeⁿe yā.

¹⁵¿Áá nguée deenu ndís'tiī chi cuerpo yeⁿe nī ní yeⁿe Cristo? ¿Áá cuta'á nī 'áámá saⁿā chi yeⁿe Cristo ní dííⁿ nī chi saⁿā miiⁿ yeⁿe 'áámá n'dáatāa chi 'yaaⁿ saⁿā yeⁿe tá? Ndyuūs nguée 'cuáaⁿ yā chi 'tíicā. ¹⁶¿Áá nguée deenu ndís'tiī chi saⁿā chi caⁿa sa ndúúcu n'daātāa chí 'yaaⁿ saⁿā yeⁿe tá nduuvi 'aama nú yā? 'Iivú Ndyuūs ngaⁿa yā ndii cuááⁿ vmnaaⁿ naachi canée nguūⁿ na libro yeⁿe yā 'tiicā: Naachí na'uuví yā ní nduuvi 'aama cuerpo núu yā. ¹⁷S'uuúⁿ chi i'teenu yú Jesucristo chí 'iivi yú canee yú ndúúcu dáámá espíritu chí yeⁿe Jesucristo.

¹⁸Ndís'tiī n'daataá, nguée caⁿā nī ndúúcu saⁿā, o saⁿā nguée caⁿā nī ndúúcu n'daataá, chi idinuuⁿndí nī ti idiiⁿ nuuⁿndí nī ndúúcu cuerpo yeⁿe maáⁿ nī. Castigo yeⁿe nuuⁿndi miiⁿ 'áámá cūnee na cuerpo yeⁿe nī. Tanáⁿa ca nuuⁿndi chi idííⁿ nī ní nguée contra cuerpo chi yeⁿe maáⁿ nī. ¹⁹¿Áá nguée deenú ndís'tiī

chi cuerpo yeⁿé nī chíⁿ chí yaācū
 yeⁿe Espíritu N'dai yeⁿé Ndyuūs
 chi canéé ndúúcū ndís'ti? Ndyuūs
 tee yā Espíritu N'dai yeⁿe yā
 ndís'ti. Maaⁿ ni cuerpo yeⁿe nī
 nguéeⁿ yeⁿe maaⁿ nī ti yeⁿe Espíritu
 N'dai chi yeⁿe Ndyuūs. Ní Ndyuūs
 tee yā ndís'ti Espíritu N'dai yeⁿé
 yā. ²⁰Chuū ní cáāvā Jesucristo cái
 yā ndís'ti ndúúcū 'áámá precio chi
 nééné yaⁿai chíiⁿvē. Cáāvā chuū
 dich'etē nī Dendyuūs ndúúcū
 nuuⁿmáⁿ cuerpo yeⁿe nī ti ndís'ti
 ní yeⁿé Ndyuūs ndís'ti.

**Pablo ca'á yā consejo 'iiⁿyāⁿ
 chí n'giindivaacu yā**

7 Maaⁿ ní idinguúⁿ ní
 nan'guεεcútāⁿ a yeⁿe
 preguntas chi dingúⁿ nī yeⁿé.
 N'daacā chi 'aama saⁿā nguéeⁿ
 'caandavaacu sa. ²Naati 'tíicā.
 Deenú chi saⁿā neⁿe sa cūnee
 sa ndúúcū n'daataá. Cáāvā chuū
 n'dáaca chi 'caandavaacu sá ní véeⁿ
 n'daataá yeⁿē sa. 'Tiicá ntúūⁿ chi
 'aama n'daataá 'caandavaacu tá ní
 véeⁿ saⁿā yeⁿē tá. 'Tíicā ní nguéeⁿ
 dííⁿ yā nuuⁿndi. ³Saⁿā ní canéé chí
 cun'diití sá ndúúcū n'daataá yeⁿē
 sa. 'Tiicá ntúūⁿ n'daata miiⁿ canéé
 chí cun'diití tá ndúúcū sáⁿā yeⁿē
 tá. ⁴N'daataá chi n'gííndivaacu
 tá, cuerpo yeⁿē tá nguéeⁿ yeⁿē
 tá dámaāⁿ tá ti yeⁿe sa ndúúcū
 tá. 'Tiicá ntúūⁿ saⁿā miiⁿ. Cuerpo
 yeⁿē sa nguéeⁿ yeⁿē sa dámaāⁿ sa ti
 yeⁿē sa ndúúcū tá. ⁵Dííⁿ nī cumplir
 ndúúcū n'daata yeⁿe nī o isaⁿā
 yeⁿé nī. Nduuti chi nduu 'uuví nī
 canee yiinú nī yeⁿē 'áámá tiempo
 chi 'áámá caaⁿmaⁿngua'á nī ní ndeé
 nī ndúúcū 'iivú Ndyuūs, tuuⁿmí

chuū ní chi dííⁿ nī cumplir tiempo
 'cūū. 'Cuiinū caaⁿmaⁿngua'á nī
 ndúúcū 'iivú Ndyuūs, tuuⁿmi ní dííⁿ
 nī cumplir ndúúcū isaⁿā o n'daataá
 yeⁿe nī. Nduuti chi nguéeⁿ dííⁿ nī
 'tuucā, tuuⁿmi ní cuuvi neⁿé nī caⁿā
 nī ndúúcū táámá saⁿā o n'daataá.
 Ní yááⁿn'guiinūⁿ n'diichínēē sa
 ndís'ti neⁿe chí nguéeⁿ dííⁿ nī
 cumplir ndúúcū isáⁿā o n'daataá
 yeⁿe nī. Ní cuuvi dííⁿ nī nuuⁿndi.

⁶Úú nguéeⁿ caaⁿmáⁿ ndis'ti
 chíiⁿ chí dííⁿ nī, ndís'ti chí neⁿé
 nī 'caandavaacú nī. Nguéeⁿ teé chuū
 tan'dúúcā 'áámá ley. ⁷Ti neⁿé chí
 nducyaaca saⁿā nguéeⁿ 'caandavaacu
 sa ní cūnee sa dámaāⁿ sa tan'dúúcā
 chí 'úú caneé, naati nguεε cuuví chí
 'tíicā. 'Úú deenu chí Ndyuūs ca'á yā
 'áámá 'áámá 'iiⁿyāⁿ chíiⁿ chí cuuvi
 dííⁿ yā.

⁸Úú ngaⁿā ngii saⁿā n'gaiyáa o
 n'daataá n'gaiyáa ndúúcū n'daataá
 n'guá'āa chí n'daacā chí 'iiⁿyāⁿ s'eeⁿ
 nguéeⁿ 'caandavaacú yā ní cunee
 yā dámaāⁿ yā tan'dúúcā chí 'úú
 caneé. ⁹Nduuti chí nguéeⁿ cuuvi
 'cuεetinée yā damaāⁿ yā, tuuⁿmi
 ní 'caandavaacú yā. Ti n'daacā chí
 'caandavaacú yā ní nguéeⁿ cūnee
 yā ndúúcū deseo chí saⁿā neⁿe sa
 n'daataá o n'daataá neⁿe tá saⁿā.

¹⁰Chuū ngaⁿā yeⁿé 'iiⁿyāⁿ chí
 n'giindivaacu yā. Saⁿā miiⁿ nguéeⁿ
 divíi sa n'daataá yeⁿē sa, o táⁿā miiⁿ
 nguéeⁿ divii tá isáⁿā yeⁿē tá. Chuū chí
 ley yeⁿe Ndyuūs. ¹¹Ndúúti chí 'áámá
 n'daataá divíi tá yeⁿe isaⁿā yeⁿē ta
 caati nguéeⁿ yaaⁿ yiinú tá ndúúcū isaⁿā
 yeⁿē tá, tuuⁿmi ní 'āā ntéeⁿ 'caandavaacu
 tá ndúúcū taama sáⁿā. 'Tiicá ntúūⁿ
 saⁿa yeⁿē tá nguéeⁿ cu'neeⁿ sá n'daataá
 yeⁿē sa cucáāvā taama n'daataá.

¹²Maaⁿ ní chuū chí ngaⁿá ngī tanáⁿā 'iiⁿyāⁿ ni cosa tan'dúúcā chi deenú chi n'daacā cááva yā. Ní chuū ní nguée ley yeⁿe Ndyuūs. Nduuti chí 'áámá saⁿā chi i'teenu Ndyuūs ní n'daataá yeⁿe sa ní nguée i'teenu tá, tuu'mi nguée cu'neeⁿ sa n'daataá yeⁿe sa nduuti chí táⁿā miiⁿ n'daacā canee tá ndúúcū sa. ¹³Tiicá ntúūⁿ, n'daataá chí i'teenu tá ní saⁿā yeⁿe tá nguée i'téenu sa ní n'dááca canee tá ndúúcū sa, tuu'mi nguée cu'neeⁿ tá isaⁿā yeⁿe tá. ¹⁴Sáⁿā yeⁿe tá chí nguée i'téenu sa ní cuuvi yeⁿe Jesucristo saⁿā miiⁿ cucáávā n'daataá yeⁿe sa chí i'teenu tá. 'Tiicá ntúūⁿ, n'daataá chí nguée i'teenu tá ní cuuvi yeⁿe Jesucristo n'daataá miiⁿ cucáávā isaⁿā yeⁿe tá chí i'teenu sa. Ndúúti chí nguée 'tíicā, tuu'mi ní nguée cuuví yeⁿe Jesucristo daiyá yā. Naati 'tíicā, tuu'mi ní cuuví yeⁿe Jesucristo daiyá yā. ¹⁵Naati nduuti chí saⁿā o n'daata chí nguée i'téenu yā Señor Jesucristo nguée cūnee n'dááca saⁿā miiⁿ ndúúcū n'daataá yeⁿe sa, o n'daataá míⁿ ndúúcū isaⁿā yeⁿe tá chí i'téenu yā Señor Jesucristo, tuu'mi ní cuuvi divíi yā yeⁿe víi. 'Iiⁿyāⁿ chí i'téenu yā Jesucristo nguée a fuerza chí cunee yā ndúúcū 'iiⁿyāⁿ chí nguē i'téenu yā Señor Jesucristo. Ndyuūs neⁿe yā chí 'iiⁿyāⁿ chí i'téenu yā Señor Jesucristo cunee n'dááca yā ndúúcū vaadi 'diiⁿ. ¹⁶Ndís'tii 'iiⁿyāⁿ chí i'téenu nī Señor Jesucristo, 'tááca cuuvi deenú nī nduuti chí cuuvi dingúáⁿai nī isaⁿā yeⁿe nī o n'daataá yeⁿe nī? Nguée cuuvi déenu nī chuū chí 'tíicā.

¹⁷Ndyuūs yeⁿe yú yaa'ví yā s'uuúⁿ chí yeⁿe yā s'uuúⁿ. Ní tee yā 'áámá

'áámá s'uuúⁿ ntiiⁿnyuⁿ s'uuúⁿ chí yeⁿe yā chí ituneeⁿ s'uuúⁿ. Ní 'íicú véé ntiiⁿnyuⁿ yeⁿe Ndyuūs yeⁿe 'áámá 'áámá s'uuúⁿ. Ní canee chí 'cuetinee yú n'daacā tan'dúúca Ndyuūs neⁿe yā chí diiⁿ yú. 'Tíicā ngaⁿā ntiiⁿnyuⁿ 'úú yeⁿe nducyááca yáacū. ¹⁸Nduuti chí Ndyuūs yaa'ví yā 'áámá saⁿā yeⁿe ndaata Israel chí cuuvi yeⁿe yā ní 'iiⁿyāⁿ 'āā diiⁿ yā circuncidar cuerpo yeⁿe saⁿā miiⁿ ndii chí 'líiⁿ sa tan'dúúca chí ngaⁿā ley yeⁿe 'iiⁿyāⁿ ndaata Israel, 'āā canee sa 'tíicā. Ndúúti chí Ndyuūs yaa'ví yā 'áámá saⁿā chí cuuvi yeⁿe yā ní saⁿā miiⁿ nguée yeⁿe ndaata Israel ní nguée diiⁿ yā circuncidar cuerpo yeⁿe saⁿā miiⁿ, 'āā canee sa 'tíicā. ¹⁹Nguée dēē vee nanááⁿ Ndyuūs nduuti chí diiⁿ yā circuncidar cuerpo yeⁿe saⁿā o nguée. Dámaāⁿ dichíí'vē nduuti chí cu'teenu yú Jesucristo ní diiⁿ yú tan'dúúca chí Ndyuūs neⁿe yā. ²⁰Tan'dúúca chí ndís'tii 'āā canee nī taachí Ndyuūs yaa'ví yā 'áámá 'áámá ndís'tii 'tiicá ntúūⁿ cunee nī. ²¹Taachi Ndyuūs yaa'ví yā n'dii chí cuuvi yeⁿe yā, nduuti chí n'dii canee nī tan'dúúca chí canee 'iiⁿyāⁿ chí canee caadi 'iiyu ní nguée cuuvi naⁿā yā nguée nacádiinúúⁿ nī dēē vee yeⁿe chúú. Ní nduuti chí cuuvi canee libre ndís'tii, chí diiⁿ nī ntiiⁿnyuⁿ caadi 'iiyu tuu'mi ní caⁿá nī. Ní cunee nī libre. ²²Taachí Ndyuūs yaa'ví yā 'iiⁿyāⁿ chí canee caadi 'iiyu ní 'iiⁿyāⁿ miiⁿ i'téenu yā Jesucristo, 'iiⁿyāⁿ canee yā tan'dúúca chí libre, ti canee libre yā yeⁿe nuuⁿndi yeⁿe yā. 'Iiⁿyāⁿ chí canee libre taachí Ndyuūs yaa'ví yā 'iiⁿyāⁿ, 'iiⁿyāⁿ miiⁿ nguée libre

ti dichí'v'e yā Ndyuūs. ²³Iivú Ndyuūs ní cá yā ndís'tiī ndúúcū 'áámá precio chi néené ya"ai chii'vē ti yuúú" ye"e daiyá yā. Maa" ní ndís'tiī ní ye"é Ndyuūs ndís'tiī. Ní díi" nī ntii"nyu" ye"é Ndyuūs. Nguéé díi" nī tan'dúúcā 'ii"yā" ye"e i"yee"dí 'cūū chi nguēe i'téenu yā Jesucristo nga"a yā chí díi" nī. ²⁴Ndís'tiī hermanos ye"é, ca'áámá ca'áámá ndís'tiī canéé nī ndúúcū Ndyuūs. Naachi canéé nī míf" canéé Dendyuūs ndúúcu nī.

²⁵Úú ca'á 'áámá consejo ye"é n'daataá chi nguéé n'giindivaacu tá. Deenú chi nga"á tan'dúúcā chí Dendyuūs né"é yā, naati chuū ní nguéé ley ye"é yā. 'Úú Pablo 'úú chi i'teenú Ndyuūs. Ní Ndyuūs ch'i"í yā 'úú chii" chi 'úú díi" ní nga"á. ²⁶Úú nadacadiinúú" chi n'daacā chi sa"ā s'ee" 'cuēetinée sa damaā" sa. Ti maa" ní deenu yú chi ndaā tiempo chi n'geenu yú ngii. ²⁷Ndís'tiī sa"ā chi véé n'daataá ye"é nī, nguéé cu'nee" nī tá"ā. Ndís'tiī sa"ā chi nguéé n'daataá ye"é nī nguéé in'nuú" nī n'daataá chi cuuvi ye"é nī. ²⁸Nduuti chi 'áámá sa"ā ch'iindivaacu sa, nguéé dinuū"ndí sa. Nduuti chi n'daataá míf" 'caandavaacú tá, nguéé dinuū"ndí tá. 'Úú nadacadiinúú" chi 'ii"yā" chi ch'iindivaacu yā ní 'cueenu cá yā cuuvi. Nguéé ne"é chi ndís'tiī 'cueenu cá nī cuuvi.

²⁹Chuū nga"á ngii ndís'tiī hermanos ye"é: Nguéé 'naa" tiempo 'cuēetinée yú i"yee"dí 'cūū. Sa"ā chi véé n'daataá ye"é sa ndii" sa ntii"nyu" ye"e 'iivú Ndyuūs vmnáá" vmnaa" nguéé ti ne"e n'daataá ye"é sa. ³⁰Nguéé díi" nī cuenta ye"e de'e

vēe chi chó'ōo ye"é nī. Nduuti chi nguēcú nī ye"e 'aama tiná"ā nguéé 'naa" tiempo cuēcú nī. Nduuti chi yeenú nī ti véé 'áámá 'viicu nguéé 'naa" tiempo cunéé vaadi yeenú nanáa" nī. Nduuti chi ngái nī tuu'mi ní ngáácú nī chi nguéé 'naa tiempo cunee. ³¹Ní ndís'tiī chi véé negocio ye"é nī ye"é cosa chi véé ná i"yee"dí 'cūū, nguéé 'cuēetineé nī dámaā" ye"e chuū, ti i"yee"dí ndúúcū nducué"ē chi vēe ye"é nī chó'óo.

³²Úú ne"é chi nguéé nadacadíinu" nī ye"é dendu'ū chi véé. Sa"ā s'ee" chi nguéé n'giindivaacu sa ndéé sa cuidado ye"e dendu'ū chi ye"é 'iivú Ndyuūs. Ní idii" sa tan'dúúcā chi ne"é Ndyuūs. ³³Sa"ā chi n'giindivaacu sa ndéé sa cuidado ye"é chi véé na i"yee"dí 'cūū táácā cuuvi cunee yínūu n'daataá ye"é sa. ³⁴'Tiicā ntúū" idii" n'daataá chí n'gíndiváacu tá. 'Áámá n'daataá chí nguéé n'giindivaacu tá ndéé tá cuidado ye"e dendu'ū ye"e 'iivú Ndyuūs. Ní dii" tá ndúúcū nuu"ma" staava ye"é tá nducué"ē chi ne"e Ndyuūs. Nguéé 'tíicā idii" n'daataa chí n'giindivaacu tá. Ndéé tá cuidado ye"e nducué"ē ye"é vaacu tá nī táácā chi cuuvi cunee yínūu isa"ā ye"é tá.

³⁵Nga"á ngii ndís'tiī chuū: Nguéé chi nguéé 'caandavaacú nī ti ne"é chi ndís'tiī ní cuuvi cunee n'daaca cá nī. Ne"é chi ndís'tiī díi" nī ndúúcū nuu"ma" staava ye"e nī chii" chi cuuvi dichí'v'e ca Ndyuūs. Ní cu'neé" nī nducué"ē chi véé i"yee"dí 'cūū chí cuuvi nī.

³⁶Nduuti chi 'áámá sa"ā nadacadiinuu" sa chi n'daacā

chi daiya sa chi n'daataa cuiinu 'caandavaacu tá ti véé nduuyu ye^{n'}é tá tuu'mi ní cuuvi diiⁿ sa n'daacā caava tá. Ní 'caandavaacú tá. Chuū ní nguée nuuⁿndi. ³⁷Nduuti chi táámá sa^{n'}ā miiⁿ nguée ne^{n'}e sa chi daiya sa 'caandavaacu tá ti canée ditiinú sa na staava ye^{n'}é sa chi nguée ne^{n'}e sa 'caandavaacu tá, tuu'mi ní cunee libre sa. Ní cuuví diiⁿ sa chee chí ne^{n'}é sa. Ní diiⁿ sa cuidado tá^{n'}ā daiya sa. Ní n'daacā idiiⁿ sa. ³⁸Sa^{n'}ā chi nga^{n'}a sa chi n'gīindivaacu tá, o sa^{n'}ā chi nguée ne^{n'}e sa chi 'caandavaacú tá, nduu 'uuví sa^{n'}ā miiⁿ din'daacá sa. Naati n'daacā ca idiiⁿ sa^{n'}ā chi nguée ne^{n'}e sa chi 'caandavaacú tá.

³⁹N'daataa chi n'gídívaacu tá canée chi 'cuɛtinee tá ndúucū isa^{n'}ā ye^{n'}é tá núuⁿmán ne^{n'}e chí cándúuchi sá. Ndúuti chi 'cuūvi sa^{n'}ā ye^{n'}e tá tuu'mi ní cuuví 'caandavaacu tá ndúucū táámá sa^{n'}ā chi i'téenu sa Jesucristo. ⁴⁰Úú inadacádiinúú chí n'daacā ca ye^{n'}é tá chi 'aa ntée 'caandavaacu tá. Chuū chi nga^{n'}á nguée dámaāⁿ ye^{n'}e chi 'úú nadicádiinúú ti tan'dúucā chi ne^{n'}e Espíritu N'dai ye^{n'}é Ndyuūs.

Ye^{n'}e yuūtē chi 'iiⁿyāⁿ cá'a yā ye^{n'}é nátaí ye^{n'}e ídolos

8 Maaⁿ ní idinguúⁿ taama chi ye^{n'}e yuūtē ye^{n'}e 'iiti chi 'iiⁿyāⁿ 'caa^{n'}núⁿ yā ní cá'a yā yuūtē miiⁿ ye^{n'}é nátaí cáávā ídolos. Deenu yú chi nducyaaca yú deenu yú 'tɛɛ ye^{n'}e chuū. 'Iiⁿyāⁿ chi nadacádiinúú yā chi deenú cá yā cuuvi dich'ɛɛté maáⁿ yā 'iiⁿyāⁿ. 'Iiⁿyāⁿ chi ne^{n'}é yā Ndyuūs ní ne^{n'}é yā hermanos, 'iiⁿyāⁿ

miiⁿ né^{n'}é yā chi taná^{n'}ā hermanos chi cuuvi déenu cá yā ye^{n'}e Ndyuūs. ²'Iiⁿyāⁿ chi nadacádiinúúⁿ yā chi deenu yā nguée tanducue^{n'}é deenu yā tan'dúucā chi canée chi cuuví deenu yā. ³Nduuti chi 'áámá 'iiⁿyāⁿ diné^{n'}e yā Ndyuūs, tuu'mi ní Ndyuūs inaaⁿ yā 'iiⁿyāⁿ miiⁿ. ⁴Maaⁿ ní 'úú ne^{n'}é chi cadíinúúⁿ ní ye^{n'}e yuūtē chi 'iiⁿyāⁿ cá'a yā ye^{n'}e nátaí ye^{n'}e ídolos. Deenu yú chí ídolos nguée cánduuchi. Deenu yú ti 'áámá n'dyá^{n'}ā Ndyuūs chi vɛɛ yā ní nguée ca táámá yā. ⁵'Iiⁿyāⁿ nga^{n'}a yā chi néené véé cá ídolos na yā^{n'}āa 'cūū níicú nanguuvi váá. Ní 'iiⁿyāⁿ nga^{n'}á yā chi cosa s'eeⁿ ní dendyuūs s'eeⁿ. ⁶S'uuúⁿ deenu yú chi véé 'áámá nuúⁿ Ndyuūs ye^{n'}é yú. Ndyuūs Chiida yú chi din'dái yā tanducue^{n'}é dendu'ū. Ní Ndyuūs diiⁿ yā chi cuuvi ye^{n'}é yā s'uuúⁿ. Véé 'áámá n'dyá^{n'}a 'iiví Ndyuūs ye^{n'}é yú chi Jesucristo. Ndyuūs Chiida yú ndúucū Jesucristo daiyá yā din'dái yā tanducue^{n'}é dendu'ū chi véé. Jesucristo ye^{n'}é yú tee yā vida ye^{n'}é yú cue^{n'}e daāⁿmaⁿ.

⁷Nguée nducyaaca 'iiⁿyāⁿ chi i'téenu yā Jesucristo deenú yā chi 'aama n'dyá^{n'}ā Dendyuūs vɛɛ yā. Ndií maaⁿ ní ná^{n'}a yā ní i'téenu yā chi canduuchi ídolos. Taachi 'iiⁿyāⁿ cá'a yā yuūtē ye^{n'}é nátaí ye^{n'}e ídolos, ní i'téenu yā chi ca'a yā yuūtē nátaí ye^{n'}é dendyuūs s'eeⁿ. Ní taachi 'iiⁿyāⁿ chi duu'ví deenú yā ye^{n'}e Ndyuūs cheé yā yuūtē ye^{n'}e nátaí s'eeⁿ, 'iiⁿyāⁿ miiⁿ nadacádiinuuⁿ yā chi véé nuūⁿndi ye^{n'}e yā. ⁸Ndyuūs nguée diiⁿ cuenta yā ye^{n'}é s'uuúⁿ nduuti chi nge'e yú yuūtē miiⁿ o nguée. Nduuti chi nge'e yú yuūtē miiⁿ nguée idiiⁿ chi n'daacā

ca yú. Nduuti chi nguée che'e yú nguée idiiⁿ chi nguée n'daaca ca yú. ⁹Ndís'tii chi déenu nī chee chi Ndyuūs neⁿé yā chi diiⁿ nī, 'caandiveeⁿ nī. Nguée diiⁿ nī de'e vee chi 'iiⁿyāⁿ chi duuⁿvī déénú yā yeⁿe Jesucristo cuuvi nacádíinuⁿ yā chi vee nuuⁿndi yeⁿe yā. ¹⁰Úú ngaⁿá ngī ndís'tii chi canee diituu cá nī chi i'téenu cá nī Ndyuūs. Deenú nī chi nguée vée nuuⁿndi yeⁿe nī taachi chi snée na mesa yeⁿe níⁿvēē yeⁿe yaācū yeⁿe ídolos. Naati 'iiⁿyāⁿ chi duuⁿvī déenu yā yeⁿe Jesucristo cuuvi n'diichí yā ndís'tii, tuuⁿmi ní 'iiⁿyāⁿ miiⁿ chi nadacadiinuⁿ yā chi ndís'tii 'tēe 'tēe i'téenu nī ídolos. 'Iiⁿyāⁿ miiⁿ cuuvi diiⁿ yā tan'dúúcā ndís'tii idiⁿ nī. Caⁿá yā che'é yā yuūtē miiⁿ ní diiⁿ yā sentir chi vée nuuⁿndi yeⁿe yā. ¹¹Áará chi cuuvi che'é nī yuutē 'cūū ní nguée vée nuuⁿndi yeⁿe nī nguée neⁿé nī chi hermanos chi duuⁿvī deenú yā yeⁿe Jesucristo diiⁿ yā 'tíicā, caati nguēcúndiⁿ yā ní 'tēe 'tēe i'téenu yā ídolos. Ní 'tíicā idiⁿ hermanos ní Cristo ch'ii yā na cruz ntúūⁿ caavā yā. ¹²Taachí diiⁿ nī 'tuucā 'tíicā idinuⁿndi nī contra Cristo níicú contra yeⁿe hermano chi duuⁿvī déenu yā yeⁿe Jesucristo. Caati hermanos miiⁿ 'tēe 'tēe i'téenu yā ídolos, ní vée nuuⁿndi yeⁿe yā. ¹³Úú nacádiinuⁿ yeⁿe chuū 'tíicā. Nduuti chi 'úú che'é yuūtē miiⁿ, ní 'úú diiⁿ chi hermano chi duuⁿvī deenú yā yeⁿe Jesucristo che'é yā ní vée nuuⁿndi yā, tuuⁿmi ní 'āā ntéé che'é yuūtē miiⁿ.

Pablo ca'á yā orden ti 'áamá apóstol yeⁿe Jesucristo

9 ¿Áá nguée 'úú Pablo 'áamá apóstol 'úú ní cuuvi diiⁿ nducueⁿé chi nguée nuuⁿndi? ¿Áá

nguée 'úú nnguaⁿāi 'úú? 'Úú n'diichí Señor Jesucristo yeⁿe yú. 'Úú candéé nduudu cuaacu yeⁿe Ndyuūs. Ní ndís'tii i'téenu nī nduudu miiⁿ caavā ntiⁿnyuⁿ yeⁿe. ²Nduuti chi tanáⁿa yā nguée i'téenu yā chi 'úú apóstol 'úú, ndís'tii i'téenu nī chi cuaacu. Ndís'tii ní tan'dúúcā sello 'tiicá nī, ti i'téenu nī Señor Jesucristo. Ní deenú nī chi 'úú 'aama apóstol yeⁿe Señor Jesucristo. Ndís'tii ní yeⁿe Jesucristo caavā chi 'úú candéé nduudu miiⁿ.

³Iiⁿyāⁿ chi itíinguuneeⁿ yā 'úú yeⁿe chi 'úú chi 'aama apóstol, 'túúcā nan'guēcútaⁿá yeⁿe yā. ⁴Nús'uu chi apóstoles ¿áá nguée tuneéⁿ 'nū chi ch'éé 'nū ní cú'ú 'nū ndúúcū ndís'tii na vaacu ní? ⁵¿Áá nguée tuneéⁿ 'nū chi 'áamá 'áamá 'nū candéé 'nū n'daataá yeⁿe 'nū taachi caⁿa 'nū cuaaⁿ cyúúni? 'Túúcā diiⁿ tanáⁿā apóstoles, ndúúcū hermanos chi yeⁿe Jesucristo, ndúúcū hermano Pedro. ⁶Dámaāⁿ 'úú ndúúcū Bernabé diiⁿ 'nū ntiⁿnyuⁿ cáávā chi ch'éé 'nū. ⁷¿Du'ú soldado diiⁿ sa gastar tuumi caavā gastos yeⁿe sa taachi diiⁿ sa ntiⁿnyuⁿ miiⁿ? ¿Du'ú saⁿā ngiichi sa díf'yú uvas ní 'áá nguée cuuvi ch'éé sá yeⁿe? ¿Du'ú 'iiⁿyāⁿ chi diiⁿ cuidado 'áamá taaⁿ 'iiti cuūchí ní 'áá nguée cuuvi cu'ú yā leche yeⁿe 'iiti miiⁿ? ⁸Úú nguée ngaⁿá chuū tan'dúúcā chi ngaⁿa saⁿa chi ca'a orden. Ngaⁿá chuū, ti 'tíicā ngaⁿa ley yeⁿe Moisés miiⁿ. ⁹Canee nguūⁿ na libro yeⁿe Ndyuūs chi ley chi Moisés dingúú yā chi 'tíicā: Nguée cu'nuúⁿ ní yaana duutú ti chi inde'ei nuúⁿ ti nguaaⁿ trigo chi nguée cuuvi che'é ti: ¿Áá ndēe cuidado Ndyuūs dámaāⁿ 'iiti? Nguée 'túúcā. ¹⁰Caávā

nús'uu, ní cuaacu níⁿnyúⁿ canéé nguúⁿ 'tíicā: 'Iiⁿyāⁿ chí di'cuúndú yā 'iiti ndúúcu 'iiⁿyāⁿ chí yiinenaáⁿ yā 'iiti chí inde'ei nuúⁿ tī nguaaⁿ trigo, 'iiⁿyāⁿ s'eeⁿ ní cunee ngiínú yā cosechā yeⁿe yā. ¹¹Candéé 'nū nduudu yeⁿe Ndyuūs nguaaⁿ ndís'tii taachi 'āā cuéé 'caandiveéⁿ nī nduudu miiⁿ. 'Áá nguéé téé nī nús'uu necesidades yeⁿe 'nū? ¹²Nduuti chí tanáⁿā apóstoles cuuvi cuta'á yā necesidades yeⁿe yā yeⁿe ndís'tii, 'áá nguéé cuuvi cuta'á 'nu necesidades yeⁿe 'nū dendú'ú? Nguéé caaⁿmáⁿ 'nū chí ndís'tii téé nī necesidades yeⁿe 'nū naatí chí chéé 'nū nducuéⁿe dendú'ú, caati 'iiⁿyāⁿ cuuvi cu'téénu yā nduudu yeⁿe 'iivú Ndyuūs. ¹³'Áá nguéé déénú ndís'tii chuú ndii tiempo chí 'aa chó'oo yeⁿe 'iiⁿyāⁿ chí diiⁿ ntiⁿnyuⁿ yeⁿe yaacū templo? 'Iiⁿyāⁿ miiⁿ che'é yā comida yeⁿe yaacū. 'Tiicā ntúūⁿ, 'iiⁿyāⁿ chí diíⁿ yā ntiⁿnyuⁿ yeⁿe nátai, 'iiⁿyāⁿ miiⁿ che'é ntúūⁿ yā chí véé nátai chí 'iiⁿyāⁿ ndéé yā ndaa yā nátai. ¹⁴'Tíicā ngaⁿa Señor 'iivú Ndyuūs yeⁿe 'iiⁿyāⁿ chí candéé yā nduudu yeⁿe evangelio chí nduudu ngai yeⁿe Jesucristo. 'Iiⁿyāⁿ miiⁿ 'cuéetinee yā ndúúcu 'iiⁿyāⁿ chí i'téénu yā Señor Jesucristo, ní ca'á yā 'iiⁿyāⁿ s'uuⁿ chí che'é yā. ¹⁵'Úú nguéé sta'á túumī yeⁿe nī, ní nguéé che'é de'ē vee, ti téé túumī ndís'tii. Nguéé dingúúⁿ chuú chí 'tíicā diíⁿ nī nduucú. N'dáácā ca yeⁿe chí 'cuúví ní mar 'áamá 'iiⁿyāⁿ nguéé cuuvi caaⁿmaⁿ yā chí 'úú candéé ndúúdu cuaacu yeⁿe Dendyuūs cáávā chí nadí'v'e yā 'úú.

¹⁶Áará chí ngaⁿá evangelio chí ndúúdu ngai yeⁿe Jesucristo 'úú nguéé cuuvi caaⁿmáⁿ chí 'úú chí

ch'et'é. Canéé chí caaⁿmáⁿ yeⁿe evangelio, ti cáávā chuú chíⁿ chí Ndyuūs dichó'ó yā 'úú. Néené 'cuenú cuuvi nduuti chí nguéé caaⁿmáⁿ yeⁿe evangelio. ¹⁷Ndúúti chí caaⁿmáⁿ yeⁿe evangelio ti diíⁿ buscar ntiⁿnyuⁿ miiⁿ tuu'mi ní Ndyuūs nadí'v'e yā 'úú, naati nguéé 'tíicā. Cáávā chuú canéé chí caaⁿmáⁿ evangelio chí ndúúdu ngai yeⁿe Jesucristo. ¹⁸De'ē ndaacā yeⁿe 'úú? Nguéé de'ē vee ndaacā yeⁿe. Cáávā 'úú nadí'v'e yeⁿe chíⁿ chí ngaⁿá ndúúdu ngai. 'Úú caaⁿmáⁿ nduudu ngai yeⁿe Jesucristo ní yeenú taavi 'úú ti nguéé cutaⁿá dendú'ú yeⁿe nī. Nguéé caaⁿmáⁿ chí ndís'tii tee nī 'úú de'ē vee cáávā ntiⁿnyuⁿ yeⁿe 'aara chí cuaacu chí canéé chí diíⁿ nī.

¹⁹N'daacā caneé 'tíicā. Nguéé du'ú vee cuuvi caaⁿmaⁿ ntiⁿnyuⁿ yeⁿe, ti 'iiⁿyāⁿ nguéé nadí'v'e yā 'úú. 'Úú dichí'v'e nducyáácā 'iiⁿyāⁿ 'iicu cuuvi cu'téénu yā Jesucristo yeⁿe yú. ²⁰Áará chí maaⁿ nguéé costumbre yeⁿe chí idiíⁿ tan'dúúcā chí ngaⁿa ley yeⁿe Moisés, naati taachi caneé nguaaⁿ 'iiⁿyāⁿ hebreo s'eeⁿ chí diíⁿ yā tan'dúúcā chí ngaⁿa ley yeⁿe Moisés, 'tíicā idiíⁿ dendú'ú. Idiíⁿ 'tiicā ní 'iicu 'iiⁿyāⁿ hebreo s'eeⁿ cuuvi cu'téénu yā Jesucristo. ²¹Taachi 'úú caneé ndúúcu 'iiⁿyāⁿ chí 'āā vi'i cā ley yeⁿe yā nguéé ti ley yeⁿe Moisés miiⁿ, 'úú idiíⁿ tan'dúúcā 'iiⁿyāⁿ s'eeⁿ. Naati nguéé idiíⁿ cosa chí Ndyuūs nguéé neⁿe yā chí 'úú diíⁿ. 'Tíicā idiíⁿ, ní 'ífcú 'iiⁿyāⁿ miiⁿ cuuvi cu'téénu yā Jesucristo. ²²Taachi caneé nguaaⁿ 'iiⁿyāⁿ chí duūvā tuu'mi 'úú idiíⁿ tan'dúúcā 'aama chí

duūvā, ní 'iicu cuuvi cu'téenu yā Jesucristo. Nduu cuaaⁿ naachi caⁿ'á 'úú idiíⁿ nducuéⁿ'ē tan'dúúcā chi idiíⁿ 'iiⁿ'yāⁿ s'uuⁿ. Idiíⁿ 'tíicā ní 'iicu dííⁿ chí nanguáⁿ'ai náⁿ'a yā. ²³'Úú idiíⁿ tanducuéⁿ'ē chuū chi 'úú cuuvi caaⁿ'máⁿ nduudu yeⁿ'e Ndyuūs nanááⁿ 'iiⁿ'yāⁿ. Ní cuuvi cuta'a yú cosa chi n'dai chi Ndyuūs téé yā s'uūúⁿ.

²⁴¿Áá nguée déenu ndís'tií yeⁿ'e 'iiⁿ'yāⁿ chi ngéenu yā na juego? Nducyaaca yā ngéenu yā na juego naati 'áámá núuⁿ yā chi dííⁿ yā ganar ní ndaaca regalo yeⁿ'e yā. Maaⁿ ní ndís'tií dííⁿ nī tan'duucā 'aama chi ngéenu yā ní dííⁿ nī ganar. 'Tíicā dííⁿ nī chiiⁿ chi Ndyuūs neⁿ'é yā, ní tunée ndís'tií chi cuuvi yeⁿ'é nī chēe chí Ndyuūs téé yā ndís'tií. ²⁵Ca'áámá ca'aama saⁿ'ā chi ngeēnū sa nguée cuuvi diiⁿ sa nducuéⁿ'ē chi neⁿ'e sa. Dámaāⁿ idiiⁿ sa cosas chi n'daācā caavā sa cucáavā chi ditiinú sa. 'Tíicā idiiⁿ sa nī cuuví ndaacā sa 'áámá corona yeⁿ'e naāndā chi ngo'o yéⁿ'ē. S'uūúⁿ ní idiiⁿ cá yú tan'dúúcā chí Dendyuūs neⁿ'é yā chi diiⁿ yú, ní ndaaca yú 'áámá corona chi nguée tuví yeⁿ'ē chi Dendyuūs téé yā s'uūúⁿ. ²⁶'Úú idiíⁿ ntiíⁿ'nyuⁿ yeⁿ'é Ndyuūs tan'dúúcā 'áámá chi ngeenu na juego ní dííⁿ yā ganar. 'Úú idiíⁿ ntiíⁿ'nyuⁿ díítūu tan'dúúcā 'iiⁿ'yāⁿ chi nguⁿ'ú yā ndúúcū taamá yā, nguée tan'duucā chi nguⁿ'ú yā ní ngéⁿ'é yā na 'yúúné. ²⁷'Úú idiíⁿ sufrir cáavā ntiíⁿ'nyuⁿ yeⁿ'é Ndyuūs, ní diiⁿ n'dai cá ntiíⁿ'nyuⁿ miiⁿ. 'Tíicā idiíⁿ, ti nguée neⁿ'é chi cuayiivi chi caaⁿ'máⁿ nduudu cuaacu miiⁿ, Ndyuūs cuuvi caaⁿ'máⁿ yā yeⁿ'e 'úú chi nguée n'daaca dííⁿ ntiíⁿ'nyúⁿ yeⁿ'e yā.

Pablo ca'á yā consejo chi 'iiⁿ'yāⁿ nguée canee chi i'teenú yā ídolos

10 Ndís'tií hermanos yeⁿ'é, neⁿ'é chi ndís'tií nan'gáácú nī yeⁿ'e tiempo chi 'āā chó'ōo. 'Iiⁿ'yāⁿ hebreos dííⁿ yā seguir 'áámá meēⁿ chi ngíicá nanguuvi. Ndyuūs dicholó yā méeeⁿ miiⁿ. Ní nducyaaca 'iiⁿ'yāⁿ n'diichi yā tíí cueⁿ'ē méeeⁿ miiⁿ. Ní ngíicá yā ní cho'ó yā naavtaⁿ'ā yíicú chí nuūⁿnīⁿ'yáⁿ'ā chi nguuvi Roja naachí Ndyuūs dííⁿ yā chí nduūví cuuⁿ'máⁿ 'áámá yáanūu yeⁿ'ē caavá yā. ²Nducyaaca 'iiⁿ'yāⁿ ní cueⁿ'é yā ndúúcū Moisés. Ní meēⁿ miiⁿ ch'iⁿ'i yúúní 'iiⁿ'yāⁿ s'eeⁿ. Ní cho'ó yā naavtaⁿ'ā nuūⁿnīⁿ'yáⁿ'ā ndúúcū Moisés miiⁿ. Chuū ní tan'dúúcā chi Ndyuūs chēedínuūⁿnī yā 'iiⁿ'yāⁿ s'eeⁿ ndúúcū Moisés miiⁿ. ³Nducyáácá yā che'é yā pan chi Ndyuūs dicholó. Ní pan miiⁿ chí chiicā ndii nanguuvi. ⁴Ndyuūs ca'a yā 'iiⁿ'yāⁿ s'eeⁿ nuūⁿnīⁿ chi can'daā na tuūu, ní nducyáácá yā chi'i yā nuuⁿnīⁿ miiⁿ. Ní tuūu miiⁿ ní tan'dúúcā chi Cristo miiⁿ, 'tíicā. Espíritu yeⁿ'é Cristo cueⁿ'ē ndúúcū yā naachí cueⁿ'e yā. ⁵Ndyuūs nguée canee yiinú yā tan'dúúcā chi idiiⁿ n'deēe n'daí 'iiⁿ'yāⁿ ti nguée ch'iindiveéⁿ yā yeⁿ'é Ndyuūs. Ní 'iiⁿ'yāⁿ s'eeⁿ ch'i yā cuaaⁿ naachi nguée 'iiⁿ'yāⁿ na yáⁿ'āa cuūⁿ'máⁿ. ⁶Dendúⁿ chuū chi chó'ōo ní 'íicú n'diichi yú, 'íicú s'uūúⁿ nguée neⁿ'e yú yeⁿ'e dendúⁿ chi nguée n'daaca tan'dúúcā 'iiⁿ'yāⁿ s'eeⁿ chí idinéⁿ'e yā. ⁷Cáavā chuū nguée idiiⁿ yú 'viicu cáavā ídolos, tan'dúúcā chi idiiⁿ tanáⁿ'ā 'iiⁿ'yāⁿ tiempo chi 'āā chó'ōo. Canée nguūⁿ ndii cuááⁿ

vmnaaⁿ na libro yeⁿé Ndyuūs 'tífcā:
'Iiⁿyāⁿ s'eeⁿ dííⁿ yā 'viicu cáávā
ídolos, ní ch'eté yā, ní che'e yā, ní
ch'íí yā ní ch'iinu chuū, ní nacueeⁿ
yā, ní nde'ei yā. Cuayiivi ní saⁿa
s'eeⁿ n'diichí yā n'daataa s'eeⁿ ní
dinuuⁿndí yā. ⁸Nguéé n'diichi yú
'áamá sáⁿā o 'aama n'daataá taachí
'āa cuéé 'caandavaacu yú ndúúcu
yā, tan'dúúccā chi idiíiⁿ tanáⁿā 'iiⁿyāⁿ
s'eeⁿ. Ní cáávā nuuⁿndi yeⁿé yā, na
'áamá nguuví nūuⁿ n'diicu 'línú mil
'iiⁿyāⁿ ch'ii yā ná yáⁿāa cuūⁿmáⁿ
naachi nguéé 'iiⁿyāⁿ. ⁹Nguéé diiⁿ
yú chí tuuⁿví yú Ndyuūs, ti neⁿe
yú n'diichí yú nduutí chi Ndyuūs
dííⁿ yā castigar s'uūúⁿ tan'dúúccā
chi Ndyuūs dííⁿ yā ndúúccū tanáⁿā
'iiⁿyāⁿ. Ní Ndyuūs dich'óo yā cúú
taaⁿ chí che'é tí 'iiⁿyāⁿ s'eeⁿ ní ch'ii
yā. ¹⁰Ní nguéé caaⁿmaⁿ taaⁿ yú
yeⁿe Ndyuūs tan'dúúccā chi diiⁿ
tanáⁿā 'iiⁿyāⁿ s'eeⁿ. Cáávā chuū ní
Ndyuūs dich'óo yā ángel yeⁿé yā ní
ch'ii yā.

¹¹Tiempo chí 'āa chó'oo ndíí
cuááⁿ vmnaaⁿ, chó'oo tanducuéⁿe
chuū ní canéé nguūⁿ na libro yeⁿé
Ndyuūs. Maaⁿ ní s'uūúⁿ cuuvi deenu
yú yeⁿe 'iiⁿyāⁿ s'eeⁿ ní nguéé diiⁿ
yú tan'dúúccā chí dííⁿ yā. ¹²Cáávā
chuū 'iiⁿyāⁿ chi nadacadiinúúⁿ yā
chi i'teenu diitú yā Ndyuūs canee
chi nadacadiinúúⁿ yā chee chí dííⁿ
yā, ní nguéé 'cuūvá yā na nuuⁿndi.
¹³Ndís'tií 'caandiveéⁿ nī yeⁿé.
Mar 'áamá cosa chi nguéé n'daacā
nguéé ndaā nanááⁿ ndís'tií nduuti
chi nguéé ndaā nanááⁿ tanáⁿa
ca 'iiⁿyāⁿ. Ndyuūs ní n'dai ca yā
ndúúccū ndís'tií, ní nguéé 'cuúⁿ yā
chi ndaā nanááⁿ ndís'tií dendu'ū chi
nguée cuuví cuchée nī. Taachi ndaā

dendu'ū chi nguéé n'daacā nanaaⁿ
ndís'tií Ndyuūs teé yā fuerzas
ndís'tií chi nguéé dííⁿ nī dendu'ū chi
nguéé n'daacā. Ní 'ífcú cuuví cuchée
nī.

¹⁴Cáávā chuū ndís'tií hermanos
chi neⁿé taavi, diví nī yeⁿe
nducyaaca ídolos. ¹⁵Úú ngaⁿá
ngii ndís'tií chí 'iiⁿyāⁿ chí deenu,
ní ndís'tií cuuvi deenú nī yeⁿe
chííⁿ chí ngaⁿá nduuti chí nduudu
cuaacu o nguéé. ¹⁶Taachi diiⁿ yú
'viicu ní che'e yú Santa Cena yeⁿe
Señor Jesucristo ní sta'a yú taza
chí cu'u yú vino, tuuⁿmi ní caaⁿmaⁿ
yú gracias Ndyuūs chí di'viicú yā
vino miiⁿ. Diiⁿ yú chuū ti maaⁿ ní
ch'iⁿi yú chí yeⁿé Cristo s'uūúⁿ. Ní
véé vida yeⁿe yú cueⁿe daāⁿmaⁿ
cucáávā yuūúⁿ yeⁿé Cristo chí
n'geeⁿ. Pan yeⁿe Santa Cena chí
n'dee yú, n'dee yú ti maaⁿ ní yeⁿé
Cristo s'uūúⁿ. Ní cuerpo yeⁿe yā
ca'nééⁿngá'āa na cruz cáávā s'uūúⁿ.
¹⁷S'uūúⁿ ní 'yaaⁿ yú ní nducyaacu
yú che'e yú yeⁿe 'áamá pan nūuⁿ.
'Tífcā s'uūúⁿ ní tan'dúúccā 'áamá
cuerpo nūuⁿ ti yeⁿé Cristo s'uūúⁿ.

¹⁸Cuin'diichí nī 'iiⁿyāⁿ yeⁿe
ndaata Israel tiempo chí 'āa chó'oo.
'Iiⁿyāⁿ s'eeⁿ 'caaⁿnúⁿ yā 'iiti ní
tee yā yuūtē vmnaaⁿ nátaí yeⁿe
Ndyuūs. Ní i'téenu yā 'iivú Ndyuūs
yeⁿe yú. Cuayiivi ní che'é yā yuūtē
miiⁿ. 'Tífcā 'iiⁿyāⁿ ch'ííⁿ chí yeⁿé
Ndyuūs. ¹⁹Neⁿé caāⁿmáⁿ yeⁿé yuūtē
chí 'iiⁿyāⁿ che'é yā maaⁿ chí yeⁿe
nátaí yeⁿe ídolos. Nguéé véé poder
yeⁿe ídolos. Nguéé véé poder yeⁿe
yuūtē miiⁿ. ²⁰Chúú ní ngaⁿá. 'Iiⁿyāⁿ
chí ch'iⁿnúⁿ yā 'iiti s'eeⁿ ní tee yā
yuūtē nátaí yeⁿe ídolos dííⁿ yā chuū
cáávā yááⁿnguiniūⁿ s'eeⁿ. Ní nguéé

diíⁿ yā cáávā 'iivú Ndyuūs. 'Úú nguéeⁿ neⁿé chi che^e ní yuūtē miiⁿ yeⁿe nátaí miiⁿ, ní ndís'tii ní nguéeⁿ caⁿá ní lado yeⁿe yáá'n'guinūⁿ.

²¹Ndís'tii nguéeⁿ cuuvi cu'ú ní vino yeⁿe taza ní yeⁿe chi véé na mesa yeⁿe Santa Cena yeⁿe Jesucristo nduuti chi cu'ú ní yeⁿe chi véé na mesa yeⁿe yáá'n'guinūⁿ. Nguéeⁿ cuuvi yeⁿe Ndyuūs ndís'tii nduuti chi yeⁿe yáá'n'guinūⁿ ndís'tii.

²²¿Áá neⁿe ní 'cuu'miⁿ ní 'iivú Ndyuūs chi ca'á ní lado yeⁿe yáá'n'guinūⁿ? ¿Áá ditiinú cá ndís'tii nguéeⁿ ti 'iivú Ndyuūs ti Ndyuūs nguéeⁿ diíⁿ yā castigar ndís'tii?

Yeⁿe chi 'iiⁿyāⁿ cuuvi diíⁿ yā ti i'teenú yā Jesucristo ní canee yā ndúúcū vaadi neⁿe yeⁿe Ndyuūs

²³Cuuví diiⁿ yú tanducuéⁿe chi n'daacā, naati nguéeⁿ diiⁿ yú cosa chi nguéeⁿ n'daacā ti nguéeⁿ véé nuuⁿndi yeⁿe yú. Nguéeⁿ nducuéⁿe chi n'daacā chi diiⁿ yú nginne s'uuúⁿ chi yeⁿe Cristo. Ní dendu'ū miiⁿ chi n'daacā, nguéeⁿ n'daacā cá caavā s'uuúⁿ chi i'téenu yú 'iivú Ndyuūs.

²⁴Mar 'áamá 'iiⁿyāⁿ chi yeⁿe Cristo damaáⁿ yā nadacadíinuⁿ yā dendu'ū chi yeⁿe maáⁿ yā, naati nadacadíinuⁿ ntúuⁿ yā yeⁿe chi neⁿe tanáⁿā 'iiⁿyāⁿ.

²⁵Yúútē chi 'iiⁿyāⁿ in'diicuí yā níí'vēē cuuvi che^e ní. Ní nguéeⁿ itínguuneeⁿ ní yeⁿe yuūtē miiⁿ. 'Tífcā diíⁿ ní ní nguéeⁿ dinuuⁿndí ní.

²⁶Ní yáⁿāa ndúúcū nducuéⁿe chi véé vmnaaⁿ yeⁿe ní yeⁿe 'iivú Ndyuūs.

²⁷Nduuti chi 'aama 'iiⁿyāⁿ chi nguéeⁿ i'téenu yā Jesucristo diíⁿ yā invitar ndís'tii chi che^e ní ndúúcū

yā, ní nduuti chi neⁿé ní tuu'mi ní caⁿá ní ndúúcū yā. Tanducuéⁿe chi cun'duú yā na mesa ní che^e ní. Nguéeⁿ tiinguuneeⁿ ní dē'ē vee yeⁿe chi che^e ní. 'Tífcā nguēe dinuuⁿndí ní. ²⁸Nduuti chi 'áamá 'iiⁿyāⁿ ngaⁿa yā ngii yā ndís'tii chuu: Yúúte 'cūū ní canée vmnaaⁿ nátaí yeⁿe ídolos, tuu'mi ní nguéeⁿ che^e ní yuūtē miiⁿ. Ní nguéeⁿ diíⁿ ní chi 'iiⁿyāⁿ miiⁿ cuuvi nadacadíinúúⁿ yā chi dinuuⁿndí ní. Ní yáⁿāa ndúúcū nducuéⁿe chi véé vmnaaⁿ yeⁿe ní yeⁿe 'iivú Ndyuūs. ²⁹'Úú ngaⁿā ngii ndís'tii chuū. Nguéeⁿ che^e ní yuūtē miiⁿ chi yeⁿe nátaí taachi 'iiⁿyāⁿ ngaⁿā yā chi che^e ní yuūtē miiⁿ, ti 'iiⁿyāⁿ nadacadíinúúⁿ yā chi véé nuuⁿndi yeⁿe ní taachi che^e ní yuūtē miiⁿ. 'Úú deenú chi cuuvi che^e yuūtē miiⁿ ní nguéeⁿ idinuuⁿndí. 'Iiⁿyāⁿ chi duu'vī déenu yā yeⁿe Jesucristo nguéeⁿ cuuvi che^e yā. 'Túúcā yúúte 'cūū, ní diíⁿ yā juzgar cosa chi nguéeⁿ ituneeⁿ yā. 'Úú deenú chi nguéeⁿ véé poder yeⁿe ídolos. 'Úú caⁿá, gracias Ndyuūs caava yuūtē miiⁿ, ní che^e yuūtē miiⁿ.

³⁰Ndúúti chi caⁿá, gracias Ndyuūs cáávā yuūtē chi che^e, ¿dē'ē cuuvi chi cunncaā ngaⁿa yā yeⁿe 'úú yeⁿe chi che^e? ³¹Diíⁿ ní tan'dúúcā chi ngaⁿā. Ní nduuti chi nge'e ní, o ngii ní, o yeⁿe táamá cosa chi diíⁿ ní, ndís'tii diíⁿ ní tanducuéⁿe cucáávā chi cuuvi dich'etē n'dai ní Ndyuūs. ³²Nguéeⁿ diíⁿ ní cosa chi 'iiⁿyāⁿ Israel s'eeⁿ o 'iiⁿyāⁿ s'eeⁿ chi nguéeⁿ ndaata Israel, o 'iiⁿyāⁿ s'eeⁿ chi i'téenu yā Jesucristo yeⁿe yú cuuvi nadacadíinuⁿ yā chi véé nuuⁿndi yeⁿe ní. ³³Áa tíí nūuⁿ lugar taachi 'úú canee, 'úú idiíⁿ tanducuéⁿe chi

cunée yiinu 'iiⁿ'yāⁿ na lugar miiⁿ.
Nguée idiiⁿ cosa chi neⁿ'é maáⁿ,
ti dííⁿ tanducuéⁿ'ē ní 'licu cuuvi
nanguáⁿ'ai 'iiⁿ'yāⁿ.

11 Ndís'tii ní dííⁿ nī tan'dúúca
chi 'úú idiiⁿ ti 'úú idiiⁿ
tan'dúúca chi Cristo chí'cueeⁿ yā 'úú.

Yeⁿ'ē n'daata s'ééⁿ chí caⁿ'á yā yaācū

²'Úú ngaⁿ'á n'daacā yeⁿ'e ndís'tii
hermanos yeⁿ'é ti n'gaacú nī yeⁿ'e
'úú, ndúúcu tanducueⁿ'ē dendu'ū. Ní
dííⁿ nī tan'dúúca chi 'úú ngi'cueeⁿ
ndís'tii. ³'Úú neⁿ'é chi cadíínūⁿ
ndís'tii chi Cristo miiⁿ ní ngaⁿ'a
ntiiⁿnyúⁿ yā yeⁿ'ē nducyaaca saⁿ'ā.
'Íícú saⁿ'ā ní ngaⁿ'ā ntiiⁿnyuⁿ sa
yeⁿ'e n'daataá yéⁿ'e sa. 'Íícú Ndyuūs
Chiida yú ngaⁿ'ā ntiiⁿnyúⁿ yā yeⁿ'e
Cristo miiⁿ. ⁴Nducyáácá saⁿ'ā chí
ngaⁿ'ángua'a sa o ngaⁿ'a sa nduudu
yeⁿ'é Ndyuūs ndúúcu sndiiⁿ yeⁿ'ē
sa chi canúúⁿ tiíⁿ sa, ngíí 'cuináaⁿ
sa. ⁵Nducyáácá n'daataá chi
ngaⁿ'angua'a tá o ngaⁿ'a tá nduudu
yeⁿ'é Ndyuūs ní nguée ndeecu
pañó yeⁿ'e tá tiíⁿ tá, ngíí 'cuináaⁿ
tá ti idiiⁿ tá tan'dúúca chi ndíí
tiíⁿ ta. ⁶Ndúúti chi nguée ndeecu
pañó yeⁿ'e tá tiíⁿ tá tuu'mi ní cuú
tá yuudū tiíⁿ tá. Nduuti chi 'aama
n'dáataá ngíí 'cuináaⁿ tá chi ndíí
tiíⁿ tá, tuu'mi ní canée chi cheecu
pañó yeⁿ'e tá tiíⁿ tá. ⁷Saⁿ'ā ní nguée
cánée chi caaⁿ'maⁿ sa nduudu yeⁿ'é
Ndyuūs ndúúcu sndiiⁿ yeⁿ'ē sa chi
canuuⁿ tiíⁿ sa, ti Ndyuūs din'dái
yā saⁿ'ā tan'dúúca maáⁿ yā chi
caaⁿ'maⁿ ntiiⁿnyuⁿ sa, 'tíicā. Saⁿ'ā
s'uūuⁿ, saⁿ'ā ní diiⁿ sa ntiiⁿnyuⁿ yeⁿ'e
Ndyuūs. N'daataá nguée 'tíicā. Idiiⁿ
tá chííⁿ chí ngaⁿ'a isaⁿ'ā yeⁿ'e tá, ti
saⁿ'ā miiⁿ caaⁿ'maⁿ ntiiⁿnyuⁿ sa

yeⁿ'ē n'daata miiⁿ. ⁸Ti Ndyuūs nguée
din'dái yā saⁿ'ā yeⁿ'e n'daataá naati
din'dái yā n'daataá yeⁿ'e sáⁿ'ā. ⁹Ti
Ndyuūs nguée din'dái yā saⁿ'ā chí
dichíí'vē sa n'daataá, naati din'dái
yā n'daataá chí dichíí'vē tá saⁿ'ā.

¹⁰N'daataá ní canée chí ndeecu
pañó yeⁿ'ē tá tiíⁿ tá ti ch'iⁿ'i tá chí
nguée caaⁿ'maⁿ ntiiⁿnyuⁿ tá. 'Tiicā
ntúūⁿ ángel s'eeⁿ ní chí canuúⁿ
tiinuú náaⁿ yā taachí canee yā
nanááⁿ 'iivú Ndyuūs. ¹¹Ndyuūs dííⁿ
yā chí sáⁿ'ā nguée canee sa dāmāaⁿ
sa, ndíí nguée n'daataá canee tá
dāmāaⁿ tá. Ndyuūs diiⁿ cuenta chí
saⁿ'ā ní n'daataá daama daamá
yā nanaáⁿ yā ti Jesucristo ch'iⁿ yā
cucáávā nduu 'uuví 'iiⁿ'yāⁿ s'uuⁿ.

¹²Vmnááⁿ vmnaaⁿ n'daata miiⁿ ní
yeⁿ'e saⁿ'ā. Maaⁿ ní saⁿ'ā ch'iindiyáaⁿ
sa yeⁿ'ē n'daataá naati tanducuéⁿ'ē
dendu'ū ní yeⁿ'é 'iivú Ndyuūs.

¹³¿De'ē nadacadiinúuⁿ nī yeⁿ'e
chuū? ¿Áá n'daacā chí n'daata
caaⁿ'maⁿngua'a tá ndúúcu Ndyuūs
'aara chí nguée ndeecu paño yeⁿ'ē tá
tiíⁿ tá? ¹⁴Nducyáácá 'iiⁿ'yāⁿ deenú yā
chí saⁿ'ā chí n'géénūu yuūdū tiíⁿ sa
ti 'cuináaⁿ sa. ¹⁵Nduuti chí n'daata
n'géénūu tiíⁿ tá n'daacā yeⁿ'ē tá. Ní
yuūdū tiíⁿ tá n'daacā chí in'díí tiíⁿ tá
chí tan'dúúca 'áamá paño. ¹⁶Nduuti
chí 'iiⁿ'yāⁿ neⁿ'e caaⁿ'maⁿ taáⁿ yā yeⁿ'e
chuū, 'úú nguée cuuvi caāⁿ'maⁿ cá
yeⁿ'ē ti 'tíicā costumbre yeⁿ'ē yú. 'Tiicā
ntuūⁿ costumbre yeⁿ'e nducyaaca
'iiⁿ'yāⁿ chí i'téenu yā Jesucristo.

**Cosas chí nguée n'daacā idiiⁿ
yā taachi che'é yā Santa Cena
yeⁿ'ē Señor Jesucristo**

¹⁷Maaⁿ ní 'úú idinguúⁿ yeⁿ'é
ndís'tii ti nguée n'daacā dííⁿ nī.

Taachi nduuvidaamá nī nguée n'daaca ca idíⁿ nī ti cunncaā ca idíⁿ nī. ¹⁸Úú n'giindiveeⁿ chi ndís'tiī nguée daama vaadi cadiinuuⁿ yeⁿe nī taachi nduuvidaamá nī ná yaācū. Véé 'téé chi i'teenú chi cuaacu chi ch'iindiveeⁿ. ¹⁹Canée chi véé chi nduuvidaamá 'āā ví'í caā ndís'tiī chi i'téenu nī Jesucristo, ti cuuvi deenú nī cheé hermanos nguaaⁿ ndís'tiī chi 'áamá canee yā chí i'téenu cá yā. ²⁰Taachi 'āā ví'í caā nduuvidaamá nī ní che'é nī Santa Cena yeⁿe Señor Jesucristo nguée che'é nī Cena miiⁿ tan'dúucā chi Jesucristo caⁿa ntiin'nyúⁿ yā. ²¹Ndís'tiī nguée canee ngínú nī taachi ndaa nducyaaca hermanos naati ca'áamá ca'aamá nī diiⁿ núúⁿ yiinu nī ní caⁿ'á nī na yāacū ní che'é nī Cena yeⁿe nī. Ní taachi ndaa tiempo chi che'é nī Santa Cena náⁿa nī ní cuicu nī. Tanáⁿa nī ní cuu'vi nī. ²²¿Déé chuū? ¿Áá nguée véé va'ai yeⁿe nī naachi cuuvi che'e nī ní cu'u nī? Nduuti chi nguée neⁿ'é nī repartir Cena yeⁿ'é nī, ¿déé cuuví chí candéé nī Cena yeⁿ'é nī cheeti yaācū? Nguée n'daaca idíⁿ nī taachi nduuvidaamá nī na yaācū yeⁿe 'iivú Ndyuūs. Díⁿ nī cosa chi cuuvi 'cuinááⁿ 'iiⁿ'yāⁿ chi nguée véé chi che'e yā. ¿Déé neⁿ'é nī chi 'úú caaⁿ'máⁿ ndúucū ndís'tiī yeⁿe chuū? ¿Áá neⁿ'é nī chi 'úú caaⁿ'máⁿ ndúucū ndís'tiī chi n'daaca idíⁿ nī? Nguée cuuvi caaⁿ'máⁿ 'tiicā.

**Chuū historia yeⁿ'ē Santa Cena yeⁿe
Señor Jesucristo**

(Mt. 26.26-29; Mr. 14.22-25; Lc. 22.14-20)

²³Iivú Señor Jesucristo chii yā 'úú chiiⁿ chi 'úú ca'cueeⁿ ndís'tiī. Nguiinū miⁿ chi 'āā cuéeⁿ nca'a

Judas Iscariote miiⁿ Jesucristo chi ndíⁿ yā preso na ta'a 'iiⁿ'ntyéⁿ'ē, Jesús miiⁿ ní sta'a yā pan. ²⁴Ch'iinu Jesús nca'a gracias Ndyuūs cáāvā pan miiⁿ, tuu'mi ní n'deé yā pan. Ní Jesús ní caⁿ'a yā chii yā discípulos yeⁿe yā: Ndís'tiī cuta'a nī ní che'e nī. Pan 'cūū chi 'úú n'deé tan'dúucā cuerpo yeⁿ'é 'tíicā. Ní cuerpo yeⁿ'é ca'a chí n'deé cucáāvā ndís'tiī. Nadiíⁿ nī chuū, ní taachi nache'é nī pan miiⁿ ní nan'gaacū nī yeⁿ'ē 'úú cueⁿ'e daāⁿmaⁿ. ²⁵Cuayiivi chi che'é nī pan 'cūū Jesús sta'a ntúuⁿ yā taza chi s'néeⁿ vino ní ngaⁿ'a yā: Vino cheeti taza 'cūū ní tan'dúucā yuuúⁿ yeⁿ'é 'tíicā. Ndúucū yuuúⁿ yeⁿ'é idíⁿ 'áamá compromiso chí ngai. Nadiíⁿ nī chuū ní taachi nangi'í nī vino miiⁿ nan'gáacū nī yeⁿ'ē 'úú cueⁿ'e daāⁿmaⁿ. ²⁶Maaⁿ ní taachi che'é nī pan 'tíicā, ní cu'ú nī vino yeⁿ'e taza 'tíicā, tuu'mi ní ch'iⁿ'í nī 'iiⁿ'yāⁿ chi Jesucristo ch'iⁿ yā caavā ndís'tiī. Nadiíⁿ nī Cena 'cūū ndii tiempo chi ndaa Jesucristo taama vmnéⁿ'ēe.

**Yeⁿ'e táacā cuuvi che'e yú Santa
Cena yeⁿe Señor Jesucristo**

²⁷'Iiⁿ'yāⁿ chi nge'é yā pan yeⁿ'e Cena 'cūū ní ngi'í ntúuⁿ yā vino yeⁿ'e taza yeⁿ'e Santa Cena yeⁿ'ē Jesucristo, canée chi canée ndúucū staava yeⁿ'é yā dæeve nanááⁿ Dendyuūs. Nduuti chi nguée dæeve staava yeⁿ'é yā nanááⁿ Dendyuūs taachi che'é yā Cena miiⁿ, tuu'mi ní diiⁿ nuuⁿndí yā contra cuerpo yeⁿ'e Señor Jesucristo ndúucú yuuúⁿ yēⁿe yā dendu'ū, ti nguée díⁿ yā respetar Jesucristo. ²⁸Caava chúú 'áamá 'áamá 'iiⁿ'yāⁿ chi neⁿ'é yā che'é yā yeⁿ'ē Santa Cena yeⁿ'ē Señor

Jesucristo, canéé chi n'diichi maáⁿ yā ndúúti chí dēeve staava yeⁿ'é yā nanááⁿ Dendyuūs. Taachí dēeve staava yeⁿ'é yā nanááⁿ Dendyuūs tuu'mi ní cuuvi che'e yā pan yeⁿ'e Santa Cena yeⁿ'ē Señor Jesucristo, ní cu'ú yā vino yeⁿ'e taza yeⁿ'ē Cena 'cūū. ²⁹Iiⁿ'yāⁿ chi nge'é yā ní ngi'i yā yeⁿ'e Cena yeⁿ'ē Señor Jesucristo ní nguée nacádiinúúⁿ yā yeⁿ'e cuerpo yeⁿ'e Jesús chí ch'i'i caava s'uúúⁿ, Dendyuūs diíⁿ yā castigar 'iiⁿ'yāⁿ miiⁿ. Vée nuuⁿ'ndi yeⁿ'é yā nanááⁿ 'iivú Ndyuūs. Maáⁿ yā dinuuⁿ'ndí yā ní diiⁿ yā chi cuuví castigado yā. ³⁰Cáávā chi diíⁿ nī 'túúcā, 'yaaⁿ n'dái ndís'tii ní duuva nī, ní náⁿ'a nī ní ngííta nī, tanáⁿ'ā ní ch'i'i nī nguaaⁿ ndís'tii. ³¹Ndúúti chi s'uúúⁿ n'diichi maaⁿ yú chi n'daacā canee yú nanááⁿ Ndyuūs yeⁿ'ē yú, Ndyuūs nguée diíⁿ yā castigar s'uúúⁿ. ³²Taachi 'iivú Ndyuūs n'diichí yā nuuⁿ'ndi yeⁿ'ē yú ní nguée dēeve staava yeⁿ'ē yú taachi che'e yú Santa Cena yeⁿ'ē Jesucristo, tuu'mi ní tee yā 'aama castigo s'uúúⁿ. Nífcú nadacadíinuⁿ yú yeⁿ'e nuuⁿ'ndi yeⁿ'e yú. Ní 'ífcú nguée canee yú condenado tan'dúúcā tanáⁿ'ā 'iiⁿ'yāⁿ yeⁿ'e iⁿ'yeeⁿ'd'í 'cūū chi nguée i'téenu yā 'iivú Ndyuūs.

³³Maaⁿ ní ndís'tii hermanos yeⁿ'é, taachi nduuvidaamaⁿ nī ní che'é nī Santa Cena yeⁿ'e Jesucristo 'cuętinee ngiinú nī ti ndāā tanáⁿ'ā hermanos yeⁿ'é nī. ³⁴Nduuti chi 'áámá 'iiⁿ'yāⁿ cuicú yā, canéé chí ch'éé yā na vaacú yā. Tuu'mi ní nducyaaca nī nduuvidaama nī na yaacū ní che'é nī Santa Cena yeⁿ'e Señor Jesucristo. 'Tífcā cuuvi che'é nī pan ní ngi'í nī vino ní

diíⁿ nī respetar Señor Jesucristo. Ní n'diichí Ndyuūs chí nguée vée nuuⁿ'ndi yeⁿ'é nī. Tan'dúúcā tanáⁿ'ā chí vée 'úú caaⁿ'máⁿ yeⁿ'ē taachi ndāā ní cuneé ndúúcu nī.

**Yeⁿ'ē nducuéⁿ'ē chi Espíritu
N'dai yeⁿ'é Ndyuūs téé yā s'uúúⁿ
ti yeⁿ'é Señor Jesucristo**

12 Maaⁿ ní 'úú neⁿ'é idinguúⁿ yeⁿ'e chí nca'a Espíritu N'dai yeⁿ'é Ndyuūs s'uúúⁿ. Neⁿ'é chí cadíinuⁿ nī chuū. ²Ndís'tii chí nguée 'iiⁿ'yāⁿ yeⁿ'e ndaata Israel ndís'tii, ti taachi 'āā cuée i'teenú nī Señor Jesucristo diíⁿ nī tan'dúúcā costumbre yeⁿ'é nī ní s'téenu nī ídolos chí nguée cuuví caāⁿ'maⁿ. ³Neⁿ'é chí ndis'tii cadíinuúⁿ nī chuū. 'Iiⁿ'yāⁿ chí canee ndúúcū Espíritu N'dai yeⁿ'é Ndyuūs ní ngaⁿ'á yā nduudu cuaacu yeⁿ'é Dendyuūs, nguée cuuvi caaⁿ'máⁿ yā contra yeⁿ'e Jesucristo. 'Iiⁿ'yāⁿ chí ngaⁿ'á yā chí Jesucristo ní 'iivú Ndyuūs yeⁿ'e yā, ngaⁿ'a yā 'túúcā ti Espíritu N'dai yeⁿ'é Ndyuūs diíⁿ yā chí 'túúcā chí ngaⁿ'a yā.

⁴Espíritu N'dai yeⁿ'é Ndyuūs tee yā ntiiⁿ'nyuⁿ s'uúúⁿ chí 'āā vi'i caā ntiiⁿ'nyuⁿ yeⁿ'ē 'áámá 'áámá s'uúúⁿ. Ní tee yā poder s'uúúⁿ chí cuuvi diiⁿ yú ntiiⁿ'nyuⁿ miiⁿ chí 'āā vi'i caā. Niicu vée 'áámá n'dyáⁿ'ā Espíritu N'dai yeⁿ'é Ndyuūs. ⁵Idiiⁿ yú ndee nááⁿ ntiiⁿ'nyuⁿ chí 'āā vi'i caā chí yeⁿ'e 'iivú Ndyuūs, naati nducyaaca ntiiⁿ'nyuⁿ miiⁿ ní yeⁿ'e 'áámá n'dyáⁿ'ā 'iivú Ndyuūs. ⁶N'dee nááⁿ ntiiⁿ'nyuⁿ yeⁿ'e Dendyuūs vée chí idiiⁿ yú ní Ndyuūs ngínnee yā 'áámá 'áámá s'uúúⁿ. ⁷Ndyuūs tee yā Espíritu N'dai yeⁿ'é yā s'uúúⁿ ní Espíritu

miiⁿ nginnee s'uuúⁿ. Ní s'uuúⁿ cuuvi cunnee yú nducyaaca 'iiⁿ'yāⁿ chí i'téenu yā Señor Jesucristo chí 'iivi yú. ⁸Espíritu N'dai miiⁿ ní cunnee tanáⁿ'ā 'iiⁿ'yāⁿ chí ngaⁿ'a n'dááca yā nduudu yeⁿ'é Ndyuūs. Espíritu N'dai yeⁿ'é Ndyuūs nginnee naⁿ'a 'iiⁿ'yāⁿ chí cuuvi caaⁿ'maⁿ yā ndúúcū vaadī deenú ca. Dámaāⁿ 'áámá n'dyáⁿ'ā Espiritu N'dai miiⁿ diiⁿ chuú. ⁹Ní Espiritu N'dai miiⁿ ní nginnee nducyaaca 'iiⁿ'yāⁿ chí i'téenu cá yā Dendyuūs. Ní Espiritu N'dai nginnee náⁿ'ā 'iiⁿ'yāⁿ ní ca'á poder miiⁿ 'iiⁿ'yāⁿ s'uuⁿ chí 'iiⁿ'yāⁿ s'uuⁿ cuuvi diiⁿ yā chí nduūvā yeⁿ'é 'iiⁿ'yāⁿ chí ngiitā. ¹⁰Espiritu N'dai miiⁿ ca'á naⁿ'a 'iiⁿ'yāⁿ chí idiíⁿ yā vaadī n'giinuú ní nga'a poder náⁿ'ā 'iiⁿ'yāⁿ chí cuuvi candéé yā nduudu cuaacu yeⁿ'é Ndyuūs. Espíritu N'dai miiⁿ ní diiⁿ chí náⁿ'ā 'iiⁿ'yāⁿ cuuvi déenu yā chæ 'iiⁿ'yāⁿ ngaⁿ'á yā caavā Espiritu N'dai yeⁿ'é Ndyuūs o cáávā espíritu yeⁿ'e yáá'n'guiinūⁿ. Ní Espiritu N'dai ca'a náⁿ'a yā poder chí caaⁿ'maⁿ yā n'dee náⁿ'a davaacu, ní náⁿ'a yā chí caⁿ'a yā chíⁿ chí neⁿ'e caāⁿ'maⁿ nduudu miiⁿ. ¹¹'Áámá n'dyáⁿ'ā Espiritu N'dai yeⁿ'é Ndyuūs tee yā poder 'áámá 'áámá s'uuúⁿ chí cuuvi diiⁿ yú ntiíⁿnyuⁿ yeⁿ'é yā tan'dúúcā chí néⁿ'e yā.

**S'uuúⁿ ní tan'dúúcā chí s'uuúⁿ
ní 'áámá cuerpo nūⁿ s'uuúⁿ**

¹²Tíicā véé 'áámá cuerpo yeⁿ'ē yú ní nééné n'dee náⁿ'a chí véé yeⁿ'ē. Ní ndúúcū n'dee náⁿ'a chí véé yeⁿ'ē, ní yeⁿ'ē 'áámá cuerpo nūⁿ, 'túúcā. Cucáávā chí yeⁿ'e Jesucristo s'uuúⁿ, tuu'mi s'uuúⁿ ní tan'dúúcā chí s'uuúⁿ ní 'áámá cuerpo nūⁿ s'uuúⁿ. Ní

cuerpo miiⁿ ní Jesucristo miiⁿ. ¹³Ti cááva Espiritu N'dai yeⁿ'é Ndyuūs miiⁿ ngeēdinuūⁿníⁿ yú ní maaⁿ ní s'uuúⁿ ní yeⁿ'ē 'áámá cuerpo s'uuúⁿ. Nduuti chí 'iiⁿ'yāⁿ Israel chí judíos s'uuúⁿ, o 'iiⁿ'yāⁿ griegos s'uuúⁿ o 'iiⁿ'yāⁿ chí snéé caadi 'iiyu s'uuúⁿ, o 'iiⁿ'yāⁿ chí diiⁿ ntiíⁿnyuⁿ cáávā maáⁿ yā s'uuúⁿ, nducyaaca s'uuúⁿ ní yeⁿ'ē 'áámá Espiritu N'dai yeⁿ'é Dendyuūs.

¹⁴Tíicā cuerpo yeⁿ'ē yú, ní nguée 'áámá n'dyáⁿ'ā nūⁿ ti 'yaaⁿ n'dái yeⁿ'ē. ¹⁵Ndúúti chí ca'a yú chí ngí ngaⁿ'a ní miiⁿ ní caāⁿ'maⁿ: Caati 'úú nguée 'áámá ta'á 'úú nguée yeⁿ'e cuerpo yeⁿ'e yú. ¿Áá nadacadíínuuⁿ ní chí cáávā chíiⁿ chí caⁿ'a ca'a yú, ní ca'a yú nguée yeⁿ'e cuerpo yeⁿ'e yú? Nguée 'tíicā. ¹⁶Ndúúti chí veeⁿ yú chí ngí ngaⁿ'a ní miiⁿ ní caāⁿ'maⁿ: Caati 'úú ní nguée 'áámá nduutináaⁿ 'úú nguée yeⁿ'e cuerpo yeⁿ'ē yú. ¿Áá nadacadíínuuⁿ ní chí cáávā chíiⁿ chí caⁿ'a veeⁿ yú, ní veeⁿ yú nguée yeⁿ'ē cuerpo yeⁿ'e yú? Nguée 'tíicā. ¹⁷Nduuti chí nuuⁿmaⁿ cuerpo yeⁿ'ē yú ní 'áámá nduutinaaⁿ yú tuu'mi ní ìtaacā cúúví 'caandiveeⁿ yú? Ní ndúúti chí nuuⁿmáⁿ cuerpo yeⁿ'ē yú ní veeⁿ yú tuu'mi ní ìtáácā cuuvi 'táaⁿ'nuⁿ yú? ¹⁸Dendyuūs s'néeⁿ yā ca'áámá ca'áámá chí canee yeⁿ'ē cuerpo yeⁿ'ē yú na lugar naachi canee yiinú yā. ¹⁹Nduuti chí cuerpo yeⁿ'ē yú ní 'áámá parte nūⁿ ìtíí canée nducuéⁿ'ē cuerpo yeⁿ'ē yú? ²⁰Tíicā Dendyuūs din'dái yā 'áámá cuerpo yeⁿ'ē yú chí n'dee náⁿ'a chí væ naati véé 'áámá cuerpo yeⁿ'ē yú.

²¹Nduuti chí nduutinaaⁿ yú chí ngí ngaⁿ'a ní miiⁿ ní caāⁿ'maⁿ yeⁿ'e ta'á yú 'tíicā: Dii ta'á, nguée dichíí'vē

di. 'Tiicá ntúū tiīⁿ ra yú ni caaⁿmaⁿ yeⁿē ca'ā yú 'tiicā: Díí ca'á, nguée dichíí'vē dii. Nguée cuuvi 'tíicā.

²²Dendu'ū chi snée na cuerpo yeⁿe yú chi duūvā ni 'lííⁿ chi nguée diiⁿ yú cuenta yeⁿē, chííⁿ chi neené dichíí'vē s'uuúⁿ. ²³Dendu'u chi yeⁿe cuerpo yeⁿē yú chí nacadiinuⁿ yú chi nguée importante, chuū ní diiⁿ yú cuidado yeⁿē tan'dúucā chí ch'ēete ca. Dendu'ū yeⁿe cuerpo yeⁿe yú chi nguée neⁿe yú chi 'iiⁿyāⁿ n'diichi yā chi n'díi yú ndúucū catecai yú. ²⁴Tanáⁿā parte yeⁿe cuerpo yeⁿe yú āā n'daacā canee 'āā tiiní caā. Dendyuūs dííⁿ yā cuerpo yeⁿe yú ní dííⁿ yā chi cundēē ca yú cuidado yeⁿē nducuéⁿē chi nadacādiinuⁿ yú chi nguée importante yeⁿe cuerpo yeⁿe yú. ²⁵Chuū ní dííⁿ Dendyuūs chi nducuéⁿē parte yeⁿe cuerpo n'daacā diiⁿ ntiinⁿyuⁿ yeⁿē cuerpo yeⁿe yú. Ní nducuéⁿē cuerpo yeⁿe yú diiⁿ yú cuidado 'áámá parte yeⁿē yú ndúucū táámá parte yeⁿe yú. ²⁶Nduuti chi diiⁿ yú cuidado yeⁿe 'áámá dendú'ū nūⁿ yeⁿe cuerpo yeⁿe yú ti diiⁿ sufrir, tuu'mi ní nuuⁿmaⁿ ch'ēete cuerpo yeⁿe yú diiⁿ sufrir. Nduuti chi dich'ēetē yā 'áámá dendu'ū yeⁿe cuerpo yeⁿē yú tuu'mi ní núúⁿmáⁿ cuerpo yeⁿe yú ní yeenú taavi.

²⁷Chuū chi caaⁿmaⁿ. Maaⁿ ní nducyaaca ndís'tií ní yeⁿe cuerpo yeⁿe Cristo Jesús. Ní ca'áámá ca'áámá nī véē parte yeⁿe cuerpo yeⁿe Cristo Jesús. ²⁸Ndyuūs tee yā ntiinⁿyuⁿ ca'áámá ca'áámá s'uuúⁿ chi i'teenu yú Jesucristo. Vmnaáⁿ vmnaaⁿ ca'a yā ntiinⁿyuⁿ chí ch'ēete ca chí ntiinⁿyuⁿ yeⁿe apóstoles

chi dichó'ó Dendyuūs. Cuayiivi ní tee yā tanáⁿā yú ntiinⁿyuⁿ yeⁿe profetas chi ndēē yú nduudu yeⁿē 'iivú Ndyuūs. Cuayiivi ní tee yā tanáⁿā yú ntiinⁿyuⁿ chi maestros yeⁿe nduudu yeⁿē Ndyuūs. Ní tanáⁿā yú Ndyuūs tee yā ntiinⁿyuⁿ s'uuúⁿ chi diiⁿ yú vaadi n'giinu. Tuu'mi ní tee yā tanáⁿā yú ntiinⁿyuⁿ chi diiⁿ yú chí induūvā yeⁿe 'iiⁿyāⁿ. Tee yā tanáⁿā yú ntiinⁿyuⁿ chí cunnee yú 'iiⁿyāⁿ. Tee yā tanáⁿā yú ntiinⁿyuⁿ chi caaⁿmaⁿ ntiinⁿyuⁿ yú yeⁿe 'iiⁿyāⁿ chi cunnee yā 'iiⁿyāⁿ chi dííⁿ yā ntiinⁿyuⁿ yeⁿē Ndyuūs. Ní teé yā ntiinⁿyuⁿ tanáⁿā yú chi ngaⁿa yú n'deeē nááⁿ davaacu. ²⁹¿Áá nadacadíinuⁿ nī chi nducyaaca yú apóstoles? ¿Áá nadacadíinuⁿ nī chi nducyaaca yú profetas chi ndēē nduudu yeⁿē 'iivú Ndyuūs? ¿Áá nadacadíinuⁿ nī chí nducyaaca yú maestros yeⁿē nduudu yeⁿē Ndyuūs? ¿Áá nducyaaca yú diiⁿ yú vaadi n'giinu? ³⁰¿Áá nducyaaca yú cuuvi diiⁿ yú chi nduuvā yeⁿe 'iiⁿyāⁿ? ¿Áá nducyaaca yú ngaⁿa yú n'deeē 'naaⁿ davaacu? ¿Áá nducyaaca yú cuuvi caaⁿmaⁿ yú chi neⁿe caaⁿmaⁿ táámá davaacu? Nguée 'tíicā. ³¹Canée chi diiⁿ yú ntiinⁿyuⁿ yeⁿē Dendyuūs tan'dúucā chi Dendyuūs neⁿē yā chí diiⁿ yú. Ní caavā s'uuúⁿ ní ntiinⁿyuⁿ miiⁿ ní n'daacā ca. Maaⁿ ní 'úú 'cuuⁿmíⁿ ndís'tií táacā cuuvi chí diiⁿ yú chí más cā n'daacā ca.

Yeⁿe vaadi neⁿe chí ch'ēete n'daí

13 Nduuti chi s'uuúⁿ caaⁿmaⁿ yú tan'dúucā chí ngaⁿa 'iiⁿyāⁿ chí deenu, o tan'duucā chí ngaⁿa ángeles, ní nguée neⁿe yú

nducyaaca 'iiⁿ'yāⁿ, tuu'mi ní nduudu yeⁿ'e yú tan'duucā 'áámá cūū 'lííⁿ chí n'geecu, o tan'dúúcā 'áámá cu'u lata chi di'cuecú yú. ²Ndúúti chi Ndyuūs tee yā ntiíⁿnyuⁿ s'uuúⁿ chi cuuvi caaⁿ'maⁿ yú dendú^u chí cuchii, ní nduuti chí cadiinuuⁿ yú nducuéⁿ'ē chí yeⁿ'é Ndyuūs chí nguē deenu tanáⁿ'a yā, ní nducuéⁿ'e vaadi deenu chí yeⁿ'ē iⁿ'yeeⁿdí 'cūū, ní nguée neⁿ'e yú nducyaaca 'iiⁿ'yāⁿ, tuu'mi ní chiiⁿ chí diíⁿ yú nguée dichííⁿvē nanááⁿ Dendyuūs. Ní nduuti chí i'teenu ca yú Dendyuūs chí cuuvi caaⁿ'maⁿ yú yeⁿ'ē 'áámá yiicū 'tíicā: N'dii yiicū, divíi ní yeⁿ'ē 'muuⁿ, ní yiicū miiⁿ caⁿ'ā taama lado. Ní nduuti chí nguée neⁿ'e yú nducyaaca 'iiⁿ'yāⁿ, tuu'mi ní chiiⁿ chí diíⁿ yú nguée dichííⁿvē nanááⁿ Dendyuūs. ³Ndúúti chí ca'a yú nducuéⁿ'ē chí véé yeⁿ'e yú 'iiⁿ'yāⁿ chí nguée yeⁿ'é yā, ní 'áará chí ca'a yú maaⁿ cuerpo yeⁿ'e yú chí 'iiⁿ'yāⁿ cuucú yā s'uuúⁿ cucáávā chí ngaⁿ'a yú nduudu cuaacu, ní nguée neⁿ'e yú nducyaaca 'iiⁿ'yāⁿ, tuu'mi ní nguée de'ē vεε chí diíⁿ yú chí dichííⁿvē nanááⁿ Dendyuūs.

⁴Ndúúti chí s'uuúⁿ ní neⁿ'e yú nducyaaca 'iiⁿ'yāⁿ ní nguée caaⁿ'maⁿ taaⁿ yú ndúúcu 'iiⁿ'yāⁿ ní cucheε yú tanducuéⁿ'e tuu'mi ní neene n'dai yú. Ndúúti chí s'uuúⁿ neⁿ'e yú nducyaaca 'iiⁿ'yāⁿ ní nguée nguē yú chiiⁿ chí naaⁿ yú chí véé yeⁿ'e 'iiⁿ'yāⁿ. Ní nguée nadacadíínuuⁿ yú chí ch'εεte n'dai yú. Ní nguée maāⁿ yú caaⁿ'maⁿ yú chí ch'εεte n'dai maāⁿ yú. ⁵Ndúúti chí s'uuúⁿ neⁿ'e yú nducyaaca 'iiⁿ'yāⁿ nguée a fuerza diíⁿ yú dámaāⁿ chiiⁿ chí neⁿ'e yú.

Ní nguée nadacadíínuuⁿ yú dámaāⁿ yeⁿ'e maaⁿ yú, naati nginee yú 'iiⁿ'yāⁿ chí di'vaachi. Ní cucheε yú taachí 'iiⁿ'yāⁿ s'eeⁿ dí'vaachí yā s'uuúⁿ. Ní nguée nadacadíínuuⁿ yú yeⁿ'ē chí nguée n'daacā. ⁶Nduuti chí s'uuúⁿ neⁿ'e yú nducyaaca 'iiⁿ'yāⁿ nguée yeenu yú taachi táámá 'iiⁿ'yāⁿ diíⁿ yā chí nguē n'daacā, ti yeenu yú taachi 'iiⁿ'yāⁿ diíⁿ yā dendu^u chí n'daacā. ⁷Nduuti chí s'uuúⁿ neⁿ'e yú nducyaaca 'iiⁿ'yāⁿ tuu'mi ní cuchée yú tanducuéⁿ'ē dendu^u chí chó'oo ndúúcu yú. Ní nguée i'teenu yú tanducuéⁿ'ē dendu^u chí n'giindiveeⁿ yú chí 'iiⁿ'yāⁿ ngaⁿ'a yeⁿ'e táámá 'iiⁿ'yāⁿ yeⁿ'e chí nguée n'daacā idiíⁿ yā. Ní cunee yíínu yú nducuéⁿ'e chí n'daacā. Ní cuchée yú yeⁿ'ē tanducuéⁿ'ē dendu^u chí diíⁿtu n'dái taachí chó'oo yeⁿ'ē yú.

⁸Nduuti chí s'uuúⁿ neⁿ'e yú nducyaaca 'iiⁿ'yāⁿ, tuu'mi ní 'áámá canee yú ndúúcu vaadi neⁿ'e yeⁿ'é Dendyuūs chí 'áámá cūneé ndúúcu yú. Ndaā tiempo chí profetas chí ngaⁿ'a nduudu yeⁿ'é Dendyuūs 'āā ntée caaⁿ'maⁿ yā 'tiicā. Ní 'iiⁿ'yāⁿ chí ngaⁿ'a yā n'deeé 'nááⁿ davaacu 'āā ntée caaⁿ'maⁿ yā 'tíicā. Ní vaadi déenū ntúūⁿ chí 'iiⁿ'yāⁿ ngaⁿ'a ní cho'oo yén'ē. Dámaāⁿ canee vaadi neⁿ'e. ⁹Maaⁿ ní caaⁿ'maⁿ yú nduudu yeⁿ'é Dendyuūs tan'dúúca chí n'gi'í yā s'uuúⁿ naati Ndyuūs nguée ch'i'í yā s'uuúⁿ vaadi déenū yeⁿ'ē tanducuéⁿ'ē. ¹⁰Taachi chó'oo tanducuéⁿ'ē dendu^u chí canée chí cuchii tuu'mi ní deenu yú nducuéⁿ'ē, nguée dámaāⁿ 'téé nūuⁿ.

¹¹Taachí saⁿ'a 'lííⁿ 'úú, ngaⁿ'a tan'dúúca chí ngaⁿ'ā da'cáiyāa ní nadacadíinúúⁿ tan'duucā da'cáiyāa.

Taachí chi ch'εete 'úú 'āā ntée dífⁿ tan'dúúcā da'cáiyāa. ¹²Maaⁿ ní inaaⁿ yú tanducuéⁿē tan'dúúcā chi inaaⁿ yú chεeti 'áámá espejo yaāⁿ yáāiⁿ, ní nguée inaaⁿ yú n'daacā. Cuayiivi miiⁿ ní n'diichi yú 'iivú Señor Jesucristo dánaaⁿ dánaaⁿ yú. Maaⁿ ní 'téé nuúⁿ deenu yú. Cuayiivi miiⁿ ní snaaⁿ yú tan'dúúcā 'iivu Señor Jesucristo n'diichí yā s'uuúⁿ. 'Tíicā snaaⁿ yú. ¹³Ná vida yeⁿe s'uuúⁿ véé 'iinū chi n'daacā. Véé chi i'teenu yú Dendyuūs, ní véé chi canee ngiinu yú chi diiⁿ Dendyuūs ndúúcu yú, ní véé chi neⁿe yú Dendyuūs. Nduu 'iinú naaⁿ chuū ní chiiⁿ chi ch'εeté n'dai, ní chííⁿ chi neⁿe yú 'iivú Dendyuūs ní neⁿe yú nducyaaca 'iiⁿyāⁿ.

Yeⁿe chi 'iiⁿyāⁿ ngaⁿa
yā táámá davaacu

14 Nducuéⁿē chi diiⁿ yú canéeⁿ chi diiⁿ yú chi n'daacā, ti neⁿe yú nducyaaca 'iiⁿyāⁿ. Véé ntiiⁿnyuⁿ ch'εete yeⁿe Ndyuūs. Ntiiⁿnyuⁿ miiⁿ chuū chi vmnááⁿ vmnaaⁿ chi ndís'tií cuuvi neⁿe ní chi dífⁿ nī. Chííⁿ chí caaⁿmáⁿ nī nduudu cuaacu chi Ndyuūs ch'iⁿí yā ndís'tií. ²'Áámá hermano yeⁿe yú chi ngaⁿa táámá davaacu chi n'dááⁿ chi nguée deēnū yú, hermano miiⁿ nguée ngaⁿa sa ndúúcu 'iiⁿyāⁿ ti ngaⁿa sa ndúúcu Ndyuūs. S'uuúⁿ nguεε n'giindiveeⁿ yú nduudu miiⁿ, naati Ndyuūs n'giindiveeⁿ yā, ní hermano miiⁿ ngaⁿa sa yeⁿe espíritu yeⁿe maaⁿ sa. ³Iiⁿyāⁿ chi ngaⁿa yā nduudu yeⁿe Ndyuūs na veedi dífⁿ yā chi hermanos chi i'téenu cá yā Ndyuūs. Ní ca'cueeⁿ yā hermanos. Ní cá'a yā

'viich'εetínūⁿ hermanos. ⁴Iiⁿyāⁿ chi ngaⁿa yā nduudu chi n'dááⁿ chi nguée deenú tanáⁿa 'iiⁿyāⁿ, 'iiⁿyāⁿ miiⁿ ngi'cueeⁿ maáⁿ yā. Ní 'iiⁿyāⁿ chi candée nduudu yeⁿe Ndyuūs chi n'giindiveeⁿ tanáⁿa yā, 'iiⁿyāⁿ miiⁿ ngi'cueeⁿ yā tanáⁿa yā chi snúūⁿ yaācū.

⁵Neⁿe chi nducyaaca ndís'tií cuuvi caaⁿmáⁿ nī tanáⁿa davaacu chi n'dááⁿ naati n'daacā ca chi caaⁿmáⁿ nī nduudu yeⁿe Ndyuūs na veedi ní n'giindiveeⁿ yā 'iiⁿyāⁿ. 'Iiⁿyāⁿ chi ngaⁿa yā tanáⁿa davaacu chi n'dááⁿ chi nguée deenu yú, 'iiⁿyāⁿ s'eeⁿ nguée ca'cueeⁿ yā s'uuúⁿ. Dámaāⁿ n'giindiveeⁿ yú nduuti chi táámá yā caaⁿmáⁿ yā de'ε neⁿe caaⁿmaⁿ nduudu miiⁿ. ⁶Ndís'tií hermanos yeⁿe, ndúúti chi 'úú ndáá ní caaⁿmáⁿ ndúúcu táámá davaacu chi n'dááⁿ chi nguée n'giindiveeⁿ nī, 'táácā cuuvi cunneeⁿ ndís'tií? Naati nduuti chi caaⁿmáⁿ na veedi tuu'mi ní cuuví caaⁿmáⁿ yeⁿe cosas chi cuchíi, o yeⁿe nduudu cuaacu chí n'dai chí yeⁿe Ndyuūs. Tuu'mi ní cuuvi 'cuεetinée nī tan'dúúcā chi ngaⁿa nduudu yeⁿe Ndyuūs, ní ca'cueeⁿ ndís'tií.

⁷Taachí 'iiⁿyāⁿ itii'ví yā 'áámá flauta, o tuu'ví yā 'áámá guitarra, ní nguée n'daaⁿ tono chi itii'ví yā, o tuu'ví yā tuu'mi ní 'táácā cuuvi deenú tanáⁿa 'iiⁿyāⁿ de'ε música chi itii'ví yā o tuu'ví yā? ⁸Nduuti chi 'áámá soldado itii'ví yā trompeta yeⁿe música yeⁿe caanda, ní nguεε n'dááⁿ tono chi itii'ví yā, 'táácā cuuvi deenú tanáⁿa soldados ní cuundiyaáⁿ yā chi 'āā ndáá caanda? ⁹Tiicā ntúūⁿ. Nduuti chi ndís'tií ní caaⁿmaⁿ nī ndúúcu

nduudu chi nguée deenu tanáⁿa yā
 ɛ́tááɛ́ tuumicadiinúⁿ yā chi ngaⁿá
 nĩ? Ndís'tiĩ ní díⁿ nĩ tan'dúúɛ́ chi
 ngaⁿá nĩ na 'yúúné. ¹⁰Nééné n'dee
 'nááⁿ davaacu véé iⁿ'yeeⁿdíⁿ cūū. Ní
 'iⁿ'yāⁿ cuuvi caaⁿ'máⁿ yā maaⁿ na
 nduudu yeⁿe yā nducuéⁿé chi neⁿé
 yā ní tanáⁿá 'iⁿ'yāⁿ s'eeⁿ 'caandiveéⁿ
 yā nduudu yeⁿe yā. ¹¹Nduuti chi
 'úú nguɛɛ n'giindiveéⁿ nduudu yeⁿe
 tanáⁿá 'iⁿ'yāⁿ tuuⁿmi ní 'iⁿ'yāⁿ miiⁿ
 canée yā tan'dúúɛ́ áámá 'iⁿ'yāⁿ chi
 canúúⁿ yúúní. 'Tííca ntúuⁿ, 'úú ní
 caneé tan'dúúɛ́ áámá 'iⁿ'yāⁿ chi
 canúúⁿ yúúní ti nguéeⁿ n'giindiveéⁿ
 yā nduudu yeⁿé. ¹²Ndís'tiĩ chi neⁿé
 nĩ díⁿ nĩ ntiⁿ'nyuⁿ ch'ɛete yeⁿé
 Ndyuūs, ngiicá nĩ Espíritu N'dai
 yeⁿé Ndyuūs chi téé yā ntiⁿ'nyuⁿ
 ndís'tiĩ, ntiⁿ'nyuⁿ chi cuuví ca'cuéeⁿ
 nĩ nduudu yeⁿé Ndyuūs 'iⁿ'yāⁿ. Ní
 'íícú 'iⁿ'yāⁿ cuuvi déenu ca yā yeⁿe
 Ndyuūs.

¹³'iⁿ'yāⁿ mífⁿ chi caaⁿ'maⁿ yā
 táámá davaacu chi n'dááⁿ canée
 chi ngiicá yā Ndyuūs de'e chi
 neⁿé caaⁿ'maⁿ nduudu chí caⁿ'a
 yā. Ní cuuvi caaⁿ'máⁿ yā tanáⁿa
 yā nduudú miiⁿ. ¹⁴Nduuti chi 'úú
 caaⁿ'máⁿngua'á ndúúɛ́ táámá
 davaacu chi n'dááⁿ ní nguéeⁿ deenú
 chíⁿ chí caaⁿ'máⁿ tuuⁿmi ní dámaaⁿ
 espíritu yeⁿé caaⁿ'maⁿ. Ní 'úú ní
 nguéeⁿ tuumicadiinúⁿ d'ɛ́ vɛɛ
 chi caaⁿ'máⁿ. ¹⁵¿Dɛ́ díⁿ tuuⁿmi?
 Caaⁿ'maⁿngua'á ndúúɛ́ nduudu
 na veedi ní espíritu yeⁿé ní
 túúmíɛ́adiinúⁿ chíⁿ chí díⁿ. Ní
 caatá ndúúɛ́ nduudu na veedi ní
 espíritu yeⁿé ní túúmíɛ́adiinúⁿ
 chíⁿ chí caatá dendu'ú. ¹⁶Ndúúti
 chi ndís'tiĩ caaⁿ'maⁿngua'á nĩ
 ndúúɛ́ táámá davaacu chi n'dááⁿ

ní ngaⁿá nĩ 'tííɛ́: N'dií Ndyuūs,
 gracias, ní díⁿ nĩ ndúúɛ́ espíritu
 yeⁿé nĩ, tuuⁿmi ní ɛ́tááɛ́ cuuvi
 caaⁿ'maⁿ tanáⁿa yā chí 'tííɛ́ chíⁿ
 chí ngaⁿ'a nĩ? ¹⁷Áará chí n'daacā
 ngaⁿ'a nĩ, nguéeⁿ cunnee nĩ 'iⁿ'yāⁿ
 chí caⁿ'á yā yaācū. ¹⁸Úú Pablo
 nca'á gracias Ndyuūs yeⁿe yú chí
 ngaⁿá cá n'dee 'nááⁿ davaacu chí
 n'dááⁿ ndúúɛ́ espíritu yeⁿé nguɛɛ
 ti ndís'tiĩ. ¹⁹Taachí ngaⁿá na yaācū
 n'daacā ca chí caaⁿ'máⁿ nyuⁿu
 nduudu na veedi chí 'úú cadiinúⁿ
 ní 'iicu ca'cueéⁿ tanáⁿa yā, ti 'úú
 ngaⁿá ta ndiichi mil nduudu táámá
 naaⁿ davaacu chí n'dááⁿ chí nguéeⁿ
 itúúmíɛ́adiinuuⁿ tanáⁿa yā.

²⁰Ndís'tiĩ hermanos yeⁿé, nguéeⁿ
 nadacadíinuuⁿ nĩ tan'dúúɛ́
 dá'caiyaā, o tan'dúúɛ́ áámá
 da'cuá'aa chí nguéeⁿ inadacadíinuuⁿ
 yā yeⁿé nuuⁿndi yeⁿe yā 'tííɛ́ nĩ.
 Maaⁿ ní nducueⁿé chí díⁿ nĩ ní
 nadacadíinuuⁿ nĩ yeⁿé tan'dúúɛ́
 saⁿā n'geete nadacadíinuuⁿ sa.
²¹Canée nguūⁿ na libro yeⁿé
 Ndyuūs ndii cuááⁿ vmnaaⁿ 'tííɛ́:
 'Úú chí 'iivú Ndyuūs ngaⁿá chuū.
 'Úú dicho'ó 'iⁿ'yāⁿ chí canúúⁿ yúúní
 chí ngaⁿá yā nduudu cuaacu yeⁿé
 ndúúɛ́ táámá naaⁿ davaacu. Ndaa
 yā nanááⁿ 'iⁿ'yāⁿ s'eeⁿ ní 'iⁿ'yāⁿ
 s'eeⁿ nguéeⁿ neⁿé yā 'caandiveéⁿ yā
 nduudu yeⁿé. 'Tííɛ́ ngaⁿ'a Ndyuūs.
²²Cáávā chíⁿ ní Ndyuūs ca'á yā
 poder 'iⁿ'yāⁿ chí caaⁿ'máⁿ yā n'dee
 'naaⁿ davaacu chí 'iⁿ'yāⁿ nguéeⁿ
 tuumicadíinuuⁿ yā. Ní chíⁿ chí
 n'giⁿ'i Ndyuūs ní 'aama seña chí
 poder yeⁿe yā cááva 'iⁿ'yāⁿ chí
 nguéeⁿ i'téenu yā Ndyuūs. Nguéeⁿ
 caavā s'uuúⁿ chí i'téenu yú. 'iⁿ'yāⁿ
 chí ca'cueéⁿ yā nduudu yeⁿé

Ndyuūs ní ngaⁿa yā cáāvā s'uuúⁿ chi i'teenu yú nguéé ti cáāvā 'iiⁿyāⁿ chi nguéé i'téenu yā Dendyuūs yeⁿē yú. ²³Ndúúti chi 'iiⁿyāⁿ chi nguéé i'téenu yā 'iivú Ndyuūs, o 'iiⁿyāⁿ chi canúúⁿ yúúni, ndaa yā na yáacū ní nduuvidaamá yā ndúúcu yú ní nducyaaca yú ngaⁿa yú davaacu chí ñ'dááⁿ. ¿Áá nguéé caaⁿmáⁿ yā chi s'uuúⁿ ní loco yú? ²⁴Ndúúti chi nducyaaca nī ca'cueeⁿ nī nduudu yeⁿē Ndyuūs na veedi ní ndaa 'áámá 'iiⁿyāⁿ chēeti yaācū, 'iiⁿyāⁿ chi nguéé i'téenu yā 'iivú Ndyuūs o nguéé déenu yā 'iivú Ndyuūs yeⁿē yú, tuu'mi ní 'iiⁿyāⁿ miiⁿ cuuvi dííⁿ yā sentir nuuⁿndi yeⁿē yā. Ní nadacadiinúúⁿ yā yeⁿē nuuⁿndi yeⁿē yā na staava yeⁿē yā. ²⁵Iiⁿyāⁿ miiⁿ ní cuuvi deenu yā de'ē chi maáⁿ yā nadacadiinúúⁿ yā na staava yeⁿe yā chi nguēe cuuvi n'diichí yā. Ní 'iiⁿyāⁿ miiⁿ cundiitín'díí yā ní cu'téenu yā Ndyuūs. Ní ngaⁿá yā 'tiicā: Cuaacu níⁿnyúⁿ Ndyuūs caneé yā ndúúcu ndís'tii.

**Diiⁿ n'daacá nī tanducuéⁿe
ndúúcu orden**

²⁶Ndís'tii ní 'tíicā dííⁿ nī taachi nduuvidáámá nī. Naⁿa ndís'tii ní candée nī 'aama canción. Ní naⁿa nī ch'eeⁿnee listo nī chi ca'cueeⁿ nī tanáⁿa yā. Naⁿá nī ní ch'eeⁿnee listo nī chi caaⁿmáⁿ nī 'áámá nduudu cuaacu yeⁿē Ndyuūs. Naⁿá nī ní caaⁿmáⁿ nī táámá naaⁿ davaacu chí ñ'dááⁿ naati n'nuúⁿ nī vmnaaⁿ vmnaaⁿ 'áámá hermano chi cuuvi caaⁿmáⁿ de'ē chi neⁿe caaⁿmaⁿ nduudu s'eeⁿ chí ñ'dááⁿ. 'Tíicā cuuvi, ní cu'téenu cá nī yeⁿē 'iivú Ndyuūs. ²⁷Damaāⁿ 'uuví o

'iinú nī 'aama 'aamá nī caaⁿmáⁿ nī ndúúcu naaⁿ davaacu, nduudú chí ñ'dááⁿ, naatí táámá nī ch'eeⁿnee listo chi caaⁿmáⁿ nī de'ē neⁿe caaⁿmāⁿ nduudu s'eeⁿ chí ñ'dááⁿ. ²⁸Nduuti chi nguéé véé 'áámá yā nguaaⁿ ndís'tii chí cuuvi caaⁿmaⁿ de'ē neⁿe caaⁿmāⁿ nduudu s'eeⁿ chí ñ'dááⁿ tuu'mi 'iiⁿyāⁿ nguéé cuuvi caaⁿmáⁿ yā ndúúcu davaacu chí ñ'dááⁿ naachi nduuvidaamá nī. Naati 'iiⁿyāⁿ miiⁿ cuuvi ndeé yā cúūnū cúūnū ndúúcu Dendyuūs ndúúcu davaacu chí ñ'dááⁿ.

²⁹Taachí nduuvidaamá nī, 'uuví nī o 'iinu nī candée nī nduudu cuaacu yeⁿē Ndyuūs ní ca'aama ca'aama nī caaⁿmáⁿ nī nduudu na veedi ní tanaⁿá yā nadacadíinuⁿ yā yeⁿe nduudu chí ngaⁿa nī. ³⁰Ní nduuti Ndyuūs ní n'giⁿi yā 'áámá ndís'tii chí véé nī 'áámá nduudu yeⁿē yā chí caaⁿmáⁿ nī, tuu'mi ní 'iiⁿyāⁿ chí candée yā nduudu miiⁿ canéé chí téé yā lugar chí caaⁿmáⁿ nī nduudu yeⁿē Ndyuūs. ³¹'Tíicā nducyaaca nī cuuvi caaⁿmáⁿ nī nduudu yeⁿē Ndyuūs ca'áámá ca'áámá nī. Tanáⁿa nī n'giindiveeⁿ nī. Ní 'tíicā ní cuuvi déenu cá nī yeⁿē Ndyuūs ní cu'téenu cá nī yeⁿē yā. ³²Iiⁿyāⁿ chí caaⁿmáⁿ yā nduudu yeⁿē Ndyuūs deenu yā de'ē tiempo chí caaⁿmáⁿ yā. ³³Ndyuūs neⁿe yā chí véé orden chēeti yaācū yeⁿē yā ní véé vaadi 'diiⁿ. 'Tíicā ní ch'eeⁿnee 'dííⁿ nī dendu'ū na staava yeⁿē nī. 'Tíicā cānee tanducuéⁿē yaācū yeⁿē Ndyuūs. ³⁴Taachi nduuvidaámá nī n'daataa nguéé cuuvi candēe tá nduudu yeⁿe Dendyuūs, naati 'diiⁿ 'dííⁿ nuuⁿ 'cuētinéé cheendí tá. 'Tíicā canéé nguūⁿ na ley

yeⁿé Ndyuūs. ³⁵Nduuti chi 'áámá n'daataá nguée tuumicadínuuⁿ tá yeⁿe nducuéⁿē chi ngaⁿa yā cheeti yaācū, tuuⁿmi taachi ndaa tá ná vaacu tá cuuvi nítinguuneeⁿ ta isaⁿā yeⁿe tá. Nduuti chi 'áama n'daataá candēē tá nduudu yeⁿé Ndyuūs cheeti yaācū, tuuⁿmi 'cuináaⁿ tá.

³⁶¿Áá nguée neⁿé nī 'caandiveeⁿ nī chi dinguúⁿ yeⁿe nī? ¿Dēē ra tuuⁿmi? ¿Áá yeⁿe ndís'tiī nduudu yeⁿe Ndyuūs o ndaā dāmáāaⁿ nanááⁿ ndís'tiī nduudu miiⁿ?

³⁷Nduuti chi 'áámá saⁿā nguaaⁿ ndís'tiī nadacadínuuⁿ sa chi cuaacu chi ntiiⁿnyuⁿ yeⁿē sa chiiⁿ chi caaⁿmaⁿ sa nduudu cuaacu yeⁿé Ndyuūs, ní Espíritu N'dai yeⁿé Ndyuūs ca'cueéⁿ yā saⁿa miiⁿ, tuuⁿmi ní cuuvi deenu sa chííⁿ chi idinguúⁿ tan'dúúcā chi Ndyuūs chííⁿ yā 'úú. ³⁸Nduuti chi saⁿā miiⁿ nguée 'caandiveeⁿ sa nduudu yeⁿé, tuuⁿmi ní ndís'tiī nguée 'caandiveeⁿ nī nduudu yeⁿē sa.

³⁹Tíicā dííⁿ nī, ndís'tiī hermanos yeⁿé. Caaⁿmánⁿ nī nduudu cuaacu ní ca'á nī lugar chi 'iiⁿyāⁿ caaⁿmánⁿ yā táámá davaacu chi n'dááⁿ. ⁴⁰Diíⁿ n'daacá nī tanducuéⁿē ndúúcū orden.

Jesucristo 'āā nnduuchi yā yeⁿē nguaaⁿ tináⁿā

15 Ndís'tiī hermanos yeⁿé, maaⁿ ní chuū ngaⁿa cuaācū ngíí ndís'tiī nduudu yeⁿe evangelio chi ndúúdú ngai yeⁿē Jesucristo. Chííⁿ 'āā ngaⁿá, ní ngi'cueeⁿ ndís'tiī. Ní ndís'tiī ní ngiindiveeⁿ nī ní s'téenu nī. Ní 'aama canee n'daacá nī ná nduudu 'cūū. ²Cáávā nduudu

cuaacu yeⁿé Dendyuūs ndís'tiī ní nnguáⁿai nī yeⁿé nuuⁿndi yeⁿé nī nduuti chi 'áámá cānee na staava yeⁿé nī chííⁿ chi ca'cueeⁿ ndís'tiī. Nduuti chi ndís'tiī nguée i'teenú nī nguée dichíí'vē nduudu miiⁿ cáávā ndís'tiī.

³Vmnááⁿ vmnaaⁿ ní chí'cueeⁿ ndís'tiī chee chi más ca importante tan'dúúcā chi Cristo chí'cueeⁿ yā 'úú. Chuū chiiⁿ chi Cristo ní chííⁿ yā cáávā nuuⁿndi yeⁿē yú tan'dúúcā chi canée nguūⁿ ndii cuááⁿ vmnaaⁿ na libro yeⁿé Ndyuūs. ⁴Iiⁿyāⁿ ní chí'ichi yā Cristo ní cho'ōo ndii 'íínú nguuví ní Dendyuūs nadin'duuchí yā Cristo yeⁿe nguaaⁿ tináⁿā tan'dúúcā chi canée nguūⁿ na libro yeⁿé Dendyuūs. ⁵Guayiivi chi Cristo nduuchi yā yeⁿe nguaaⁿ tináⁿā saⁿā Pedro n'diichi sá Cristo. Guayiivi chí cho'ōo chuū ní ndichuuví apóstoles n'diichí yā Cristo.

⁶Guayiivi miiⁿ ní 'áámá tiempo nūuⁿ nyuⁿu ciento hermanos nduuvidaamá yā ní n'diichí yā Cristo chí 'āā nduuchi yā yeⁿē nguaaⁿ tináⁿā. N'dee cá yā yeⁿe nyuⁿu ciento hermanos snduuchí yā ndíí maaⁿ, naati duu'ví yā n'dii yā. ⁷Guayiivi miiⁿ ní Jacobo, apóstol chí ndēē nduudu yeⁿé Dendyuūs n'diichi ntúuⁿ yā Cristo. Ní guayiivi ní nducyaaca apóstoles n'diichí yā Cristo.

⁸Cho'ōo 'yááⁿ n'dai nguuví ní 'úú, Pablo, n'diichi ntúúⁿ Cristo, 'áará chí 'úú nguée intiinaáⁿ Cristo taachi cánée yā iⁿ'yeeⁿdí 'cūū. ⁹'Úú, Pablo, nacadiinúúⁿ chí 'úú nguée n'daacā 'úú, tan'dúúcā yeⁿe tanáⁿā apóstoles chí candēē yā nduudu yeⁿé Ndyuūs. 'Úú nguée canée chí cuuví apóstol

ti vmnááⁿ vmnaaⁿ can'daá 'ii'yāⁿ yeⁿe yaācū yeⁿé Dendyuūs, ti neⁿé chi 'ii'ntyéⁿē ca'á yā orden chi 'caaⁿnúⁿ yā 'ii'yāⁿ chi naⁿá yā yaacū yeⁿé Ndyuūs. ¹⁰Maaⁿ ní 'úú 'aama apóstol 'úú ti Ndyuūs dííⁿ yā n'daacā n'dai nduucú. Caati Ndyuūs dííⁿ yā n'daacā n'dai nduucú maaⁿ ní 'úú idííⁿ ntiiⁿnyuⁿ yeⁿé yā. Ní chííⁿ chi Ndyuūs dííⁿ yā nduucú dichíí'vē. Nguéé dāmaāⁿ 'úú chi diiⁿ ca ntiiⁿnyuⁿ yeⁿé yā ti Ndyuūs. Ndyuūs chi dííⁿ yā n'daacā n'dai nduucú ní canée yā nduucú ní nginneē yā 'úú. ¹¹Nguéé dē'ē vee ndii nduuti chi 'úú o náⁿa yā chi candee nduudu yeⁿé Ndyuūs, tí nús'ūū ngaⁿ'a n'ū nduudu miíⁿ. Ní ndís'tii ní i'téenu nī nduudu miíⁿ.

**'Ii'yāⁿ caⁿ'á yā nnduuchi
yā yeⁿē nguaaⁿ tináⁿ'ā**

¹²Ndís'tii ní i'téenu nī chí ngaⁿ'a 'nū chi Cristo nduuchi yā yeⁿē nguaaⁿ tináⁿ'ā. ¿Táacā cuuvi chí ngaⁿ'á nī chi nguéeⁿ nnduuchi 'ii'yāⁿ s'eeⁿ yeⁿē nguaaⁿ tináⁿ'ā? ¹³Nduuti chi nguéeⁿ nnduuchi 'ii'yāⁿ s'eeⁿ yeⁿē nguaaⁿ tináⁿ'ā Cristo ntúūⁿ ní nguéeⁿ 'āā nduuchi yā yeⁿē nguaaⁿ tináⁿ'ā. Ní cuerpo yeⁿe Cristo canee na yáinyāⁿ ndíí maaⁿ. ¹⁴Ndúúti chi Cristo nguéeⁿ 'āā nduuchi yā yeⁿe nguaaⁿ tináⁿ'ā tuu'mi ní nduudu chi ngaⁿ'á 'nū nguéeⁿ dichíí'vē. 'Tiicá ntúūⁿ nguéeⁿ dichíí'vē chiiⁿ chi i'téenu 'nū yeⁿe Cristo. ¹⁵'Tiicá ntuūⁿ chiiⁿ chi ngaⁿ'á 'nū chi nduudu cuaacu yeⁿé Ndyuūs, tuu'mi ní nduudu yaadi nduuti chi nguéeⁿ 'tíicā. Naati ngaⁿ'a cuaacú 'nū chi Ndyuūs dííⁿ yā chí 'āā nduuchi Cristo yeⁿē nguaaⁿ tináⁿ'ā. Nduuti

chi nguéeⁿ nnduuchi tanáⁿ'ā 'ii'yāⁿ yeⁿē nguaaⁿ tináⁿ'ā 'tiicá ntuūⁿ nguéeⁿ 'āā nduuchi Ndyuūs Cristo yeⁿē nguaaⁿ tinaⁿ'ā. ¹⁶Ndúúti chi tanáⁿ'ā 'ii'yāⁿ nguéeⁿ nnduuchi yā yeⁿē nguaaⁿ tináⁿ'ā, 'tiica ntúūⁿ, Cristo nguéeⁿ 'āā nduuchi yā yeⁿē nguaaⁿ tináⁿ'ā. ¹⁷Nduuti chi Cristo nguéeⁿ 'āā nduuchi yā yeⁿē nguaaⁿ tináⁿ'ā nguéeⁿ dichíí'vē chi i'téenu yú Ndyuūs. Ní s'uuúⁿ canee yú condenado ndúúcū nuuⁿndi yeⁿē yú. ¹⁸Nduuti chi 'tíicā, tuu'mi ní 'ii'yāⁿ chí 'āā i'téenu yā Cristo, ní maaⁿ ní 'āā n'dii yā, 'āā chindái yā ndúúcū nuuⁿndi yeⁿé yā. ¹⁹Nduuti chi nguéeⁿ nduuchi Cristo yeⁿē nguaaⁿ tináⁿ'ā tuu'mi ní s'uuúⁿ chí i'teenu yú Cristo, núúⁿmáⁿ neⁿe chí snée yú na iⁿ'yeeⁿdí 'cūū neenē ndaachi yíínu yú nguéeⁿ ti tanáⁿ'ā 'ii'yāⁿ.

²⁰Naati cuaacu chí Cristo miíⁿ 'āā nduuchi yā yeⁿe nguaaⁿ tináⁿ'ā. Ní Cristo miíⁿ ní 'ii'yāⁿ vmnááⁿ vmnaaⁿ chí nduuchi yā yeⁿe nguaaⁿ tináⁿ'ā yeⁿē nducyáácá 'ii'yāⁿ chí n'díí. ²¹Ti cáávā nuuⁿndi yeⁿe 'áámá saⁿ'a Adán, canée chí nducyaaca yú 'cuūvi yú. Ní cáávā chí diiⁿ 'aama saⁿ'ā Cristo mífⁿ, canée chí nduuchi yú yeⁿē nguaaⁿ tináⁿ'ā. ²²S'uuúⁿ ní yeⁿe Adán chí diiⁿ nuuⁿndi sa. S'uuúⁿ ní 'ii'yāⁿ chí diiⁿ nuuⁿndi s'uuúⁿ. Taachí 'ii'yāⁿ diiⁿ nuuⁿndi yā tuu'mi canee chí 'cuūvi yā. S'uuúⁿ ní yeⁿe Cristo s'uuúⁿ ní 'cuæti nduuchi yú. ²³Ti 'áámá 'áámá 'ii'yāⁿ caⁿ'á yā nnduuchi yā yeⁿe nguaaⁿ tináⁿ'ā tan'dúúcā chí itunéeⁿ 'ii'yāⁿ. Cristo 'āā nduuchi yā vmnááⁿ vmnaaⁿ yeⁿē nguaaⁿ tináⁿ'ā. Ní cuayiivi taachi ndaá Cristo na iⁿ'yeeⁿdí 'cūū taama

vmné^{n'}ēē, tuu'mi ní 'ii^{n'}yāⁿ chi n'díí
 chi ye^{n'}e Cristo, 'ii^{n'}yāⁿ s'eeⁿ ní
 ca^{n'}á yā nduuchi yā ye^{n'}e nguaaⁿ
 tiná^{n'}ā. ²⁴Tuu'mi ní ndaā nguuví chi
 'cuiinū i^{n'}yee^{n'}dí 'cūū cuayiivi taachi
 chó'oo tanducué^{n'}ē chi Dendyuūs
 Chiida yú ne^{n'}é yā chi chó'oo. Ní
 Cristo caa^{n'}maⁿ ntii^{n'}nyúⁿ yā ye^{n'}e
 nducyaaca 'ii^{n'}yāⁿ ndíí tii^{n'} ye^{n'}e
 i^{n'}yee^{n'}dí 'cūū ndúú^{n'}cū poder ye^{n'}e.
 Tuu'mi ní Cristo nca^{n'}á yā Chiidá
 yā tanducué^{n'}ē chi ye^{n'}e chi nga^{n'}a
 ntii^{n'}nyúⁿ yā. ²⁵Ti maaⁿ ní Cristo
 miiⁿ canée yā tan'dúú^{n'}cā 'áámá
 Rey. Ní taachi chí cuchée yā ye^{n'}e
 tanducué^{n'}ē enemigo ye^{n'}e yā,
 tuu'mi ní enemigos ye^{n'}é yā canée
 yā tan'dúú^{n'}cā chi canée yā mááⁿ
 ca'a Cristo; ²⁶tuu'mi ní chi 'cuiinu
 enemigo ye^{n'}e Cristo chi vaadí
 n'gii. Ní Cristo chichē yā ye^{n'}e.
²⁷Dendyuūs 'āā ca'a yā nducué^{n'}ē
 dendu'u na ta'ā Cristo ní Cristo
 nga^{n'}a ntii^{n'}nyúⁿ yā ye^{n'}e tanducué^{n'}ē.
 Ní nducué^{n'}ē canee tan'dúú^{n'}cā chi
 canee maaⁿ ca'a Cristo. Cristo miiⁿ
 nguéeⁿ nga^{n'}a ntii^{n'}nyúⁿ yā ye^{n'}e
 Chiidá yā naati Chiidá yā 'āā ca'a yā
 Cristo tanducué^{n'}ē. ²⁸Taachí Cristo
 chēé yā ye^{n'}e tanducué^{n'}ē, tuu'mi
 ní Cristo, chi daiya Dendyuūs, ca'a
 yā nducué^{n'}ē na ca'a Dendyuūs chi
 Chiidá yā. Ní Cristo miiⁿ maáⁿ yā
 canee yā maaⁿ poder ye^{n'}e Chiidá
 yā.

²⁹¿De'e rá tuu'mi? Nduuti chi nguéeⁿ
 nduuchi 'ii^{n'}yāⁿ s'eeⁿ ye^{n'}e nguaaⁿ
 tiná^{n'}ā, ¿de'e cúúví chi dííⁿ yā 'ii^{n'}yāⁿ
 chi ndéédínuū^{n'}niⁿ yā cáávā taná^{n'}ā
 'ii^{n'}yāⁿ s'eeⁿ chi n'dii? ¿De'e cáávā
 idííⁿ yā 'tíicā? Nduuti chi nguéeⁿ
 i'téenu yā chi 'ii^{n'}yāⁿ chi n'dii ca^{n'}á
 yā nduuchi yā ye^{n'}e nguaaⁿ tiná^{n'}ā.

³⁰Tiicá dendu'ū. ¿De'e cúúví chí
 'úú cuneé ndúú^{n'}cū cáándá chi 'ii^{n'}yāⁿ
 'caa^{n'}núⁿ yā 'úú ndii hora miiⁿ?

³¹Cuáácú chi nguuví nguuví 'ii^{n'}yāⁿ
 ne^{n'}e 'caa^{n'}núⁿ yā 'úú cucáávā chi
 i'teenú Cristo. Cuáácú chi yeenú, ti
 cáávā Señor Jesucristo chí Señor
 ye^{n'}e yú ndís'tii i'téenu nī Jesucristo
 ti 'úú nga^{n'}á nduudu cuaacu ye^{n'}e
 Jesucristo nanááⁿ ndis'tii. ³²¿De'e
 chí cuuvi ye^{n'}é chí cuchēé ye^{n'}é
 'ii^{n'}yāⁿ yááⁿ Efeso chí dííⁿ yā nduucú
 tan'dúú^{n'}cā 'iiti taaⁿ nduuti chí nguéeⁿ
 nduuchi 'ii^{n'}yāⁿ s'eeⁿ ye^{n'}e nguaaⁿ
 tiná^{n'}ā? Tuu'mi ní nga^{n'}a yú 'tiicā:
 Che'e yú vaa, cu'u yú vaa, ti cavyaaⁿ
 ní 'cuūví yú.

³³Nguée dííⁿ nī chí 'ii^{n'}yāⁿ
 canche'éeⁿ yā ndís'tii. Nduuti chí
 ca^{n'}á nī ndúú^{n'}cū 'ii^{n'}yāⁿ chí nguéeⁿ
 n'daacā idiíⁿ yā tuu'mi ndís'tii cuuví
 dííⁿ nī tan'dúú^{n'}cā chí idiíⁿ 'ii^{n'}yāⁿ
 s'eeⁿ. Nguéeⁿ n'daacā chí dííⁿ nī 'tííca.
³⁴Nadacadíínuuⁿ nī chēé chí dííⁿ nī.
 Ní dííⁿ nī cosa chí n'daacā. Ní nguéeⁿ
 dinuu^{n'}ndí nī. Taná^{n'}ā 'ii^{n'}yāⁿ nguéeⁿ
 deenú yā ye^{n'}e Dendyuūs. Chuū ní
 nga^{n'}á ye^{n'}e ndís'tii ní cuuví 'cuinááⁿ
 nī.

**Ye^{n'}e tan'dúú^{n'}cā chí 'ii^{n'}yāⁿ ca^{n'}á yā
 nduuchi yā ye^{n'}e nguaaⁿ tiná^{n'}ā**

³⁵Nduu'ví 'ii^{n'}yāⁿ ní cuuvi caa^{n'}maⁿ
 yā chuu. ¿Táácā chí 'ii^{n'}yāⁿ chí
 'āā tiná^{n'}ā chí nduuchi yā ye^{n'}e
 nguaaⁿ tiná^{n'}ā? Ní vee cuerpo ngai
 ye^{n'}é 'ii^{n'}yāⁿ s'eeⁿ, ¿táácā canée?
³⁶Ndís'tii chí nga^{n'}a nī 'túú^{n'}cā nguéeⁿ
 nadacadíínuuⁿ nī ye^{n'}e chí nga^{n'}a
 nī. Ndís'tii chí ngiinu nī ndaata
 deenú nī chí ndaata miiⁿ canée chí
 n'dii vmnááⁿ vmnaaⁿ chí dichíí'vē
 ní ndēē n'gui'í ye^{n'}e. ³⁷Ndaata

miiⁿ chi ndís'tiī ngiīnu nī. ¿Áá nguée tan'dúúcā 'áámá planta chi cuchii, nduuti chi trigo, o nduuti chi niⁿnuⁿ, o dē'ē vee ndaata chi véé? ³⁸Dendyuūs díⁿ yā chi 'cuiita ca'áámá ca'áámá ndaata miiⁿ tan'dúúcā chi neⁿe yā, ni 'āā vi'í cā ca'áámá ca'áámá yaata naaⁿ yeⁿe ndaata miiⁿ. ³⁹Tíicá ntúūⁿ na iⁿ'yeeⁿdí 'cūū. Nguēē dáámá cuerpo yeⁿe 'iiⁿ'yāⁿ. Áā vi'í caā cuerpo yeⁿe 'iiti, 'āā vi'í caā cuerpo yeⁿe 'yáádá, ní 'āā vi'í caā cuerpo yeⁿe 'yáacā. ⁴⁰Véé cuerpo yeⁿe cosa s'eeⁿ chi véé nanguuvi. Ní véé cuerpo yeⁿe 'iiⁿ'yāⁿ chi canée na iⁿ'yeeⁿdí 'cūū. Ní cuerpo yeⁿe cosa chi véé nanguuvi ní dēve. Ní 'aa vi'í caā cuerpo chi ndēve yeⁿe 'iiⁿ'yāⁿ yeⁿe iⁿ'yeeⁿdí 'cūū. ⁴¹Tiicá ntúūⁿ 'yáⁿā, ní 'iīyū, ní 'iiⁿ'nyúⁿ, ni nducyaaca ní dēveē cá ní 'āā vi'í caā. Nguaaⁿ 'íiⁿ'nyuⁿ s'eeⁿ chi dēveē, nguēē dáámá tí 'āā vi'í caā. ⁴²Tiicá ntúūⁿ cuerpo yeⁿe yú, ch'iī yú ní choō cuerpo yeⁿe yú, naati taachi nnduuchi yú yeⁿe nguaaⁿ tináⁿā, 'āā ntéē nuuⁿndi yú. ⁴³Maaⁿ ní idinuunⁿdi yú ni 'cuināaⁿ yú cáāvā cuerpo yeⁿe yú. Naati taachi nnduuchi yú yeⁿe nguaaⁿ tináⁿā, tuuⁿmi ní cuerpo yeⁿe yú ní dēve, ní n'daacā canée. ⁴⁴Maaⁿ ní cuerpo yeⁿe yú ní yeⁿe iⁿ'yeeⁿdí 'cūū ni 'cuūvi yú. Ní taachi nnduuchi yú yeⁿe nguaaⁿ tináⁿā, tuuⁿmi ní cuerpo yeⁿe yú ní yeⁿe espíritu. Nduuti chi véé cuerpo yeⁿe yú chi yeⁿe iⁿ'yeeⁿdí 'cūū, tuuⁿmi ní véé cuerpo yeⁿe yú chi yeⁿe espíritu.

⁴⁵Canée nguūⁿ ndii cuááⁿ vmnaaⁿ na libro yeⁿe Dendyuūs 'tíicá: Dendyuūs din'dái yā cuerpo yeⁿe

saⁿā Adán chi sáⁿā chí cunduuchi sá vmnááⁿ vmnaaⁿ. Naati táámá Adán chí cuayiivi ní nguuvi yā Jesucristo. Ní Jesucristo miiⁿ ní yeⁿe vida chi espíritu chi canduuchi. Ní Jesucristo ca'á yā vida 'iiⁿ'yāⁿ s'eeⁿ yeⁿe iⁿ'yeeⁿdí 'cūū chi vida chi yeⁿe espíritu. ⁴⁶Nadacadiīnuuⁿ ní yeⁿe chuū. Vmnááⁿ vmnaaⁿ véé cuerpo tan'dúúcā cuerpo yeⁿe s'uúúⁿ, ní cuayiivi véé cuerpo chi yeⁿe espíritu. ⁴⁷Dendyuūs din'dái yā Adán chi saⁿa vmnááⁿ vmnaaⁿ yeⁿe yaⁿá 'cūū. Naati saⁿā cuayiivi miiⁿ chiicā sa ná va'ai cheeti nguuvi ní saⁿā miiⁿ chí Jesucristo. ⁴⁸Nducyáácá 'iiⁿ'yāⁿ yeⁿe iⁿ'yeeⁿdí 'cūū canée ndúúcū cuerpo tan'dúúcā 'iiⁿ'yāⁿ yeⁿe iⁿ'yeeⁿdí 'cūū. Nducyáácá 'iiⁿ'yāⁿ chi yeⁿe Cristo cuuvi canée ndúúcū cuerpo tan'dúúcā cuerpo yeⁿe Jesucristo chi yeⁿe va'ai cheeti nguuvi. ⁴⁹Maaⁿ ní cuerpo yeⁿe yú tan'dúúcā cuerpo yeⁿe 'iiⁿ'yāⁿ yeⁿe iⁿ'yeeⁿdí 'cūū. Cuayiivi ní ndaāca yú 'áámá cuerpo yeⁿe yú tan'dúúcā chi véé na va'ai cheeti nguuvi.

⁵⁰Maaⁿ ní chuū ngaⁿá ngii ndís'tiī hermanos yeⁿe: Ndúúcū cuerpo yeⁿe yú ndúúcū yuūtē yeⁿe ndúúcū yuūuⁿ yeⁿe nguée cuuvi ndaa yú na va'ai cheeti nguuvi. Ndí nguée véé 'áámá cuaaⁿ dendú'ū chí nchoo ndúúcū chi nguée nngoō. ⁵¹Quin'diichí nī. 'Úú ní ngaⁿá n'g'iⁿí ndís'tiī yeⁿe 'áámá cosa chi 'iiⁿ'yāⁿ nguēē deenu yā. Nguée nducyaaca yú 'cuūvi yú. Naati Ndyuūs téē yā nducyaaca s'uúúⁿ 'áámá cuerpo chí ngai tan'dúúcā cuerpo yeⁿe yā chi yeⁿe espíritu. ⁵²Ní 'áámá tiempo 'líí

'lín nūuⁿ tan'dúúcā chi 'áámá ingaaⁿ
 'áámá in'gaadi nduutinaaⁿ yú, mááⁿ
 n'cheetē nūuⁿ, ní n'daaⁿ cuerpo yeⁿē
 yú, taachi 'cuēcú trompeta chí
 ndii na 'cuiinu. Ní taachi 'cuēcú
 trompeta miiⁿ, tuu'mi ní 'iiⁿyāⁿ chi
 i'téenu yā Señor Jesucristo chi
 maaⁿ ní 'āā tináⁿā ní nducuéⁿ yā
 yeⁿē nguaaⁿ tináⁿā ndúúcū cuerpo
 ngai yeⁿé yā chi 'āā ntéé choo.
 Ní 'tiicā ntūūⁿ. S'uuúⁿ chi i'teenu
 yú Jesucristo ní canduuchi yú, ní
 n'daaⁿ cuerpo yeⁿe yú. ⁵³Cuerpo
 yeⁿe yú chí ngoō. Ní Ndyuūs canéé
 chí n'daaⁿ yā cuerpo yeⁿē yú ní
 téē yā s'uuúⁿ táámá cuerpo chí
 nguéeé nchoo. Cuerpo yeⁿē yú chí
 n'gii, Ndyuūs canéé chí téē yā s'uuúⁿ
 táámá cuerpo chi 'āā ntéé ndaa
 nguuvi chi 'cuūvi. ⁵⁴Taachí cuerpo
 yeⁿē yú chí n'gii ní ngoo, 'āā n'daaⁿ
 cuerpo yeⁿe chi nguée cuuvi n'gii
 ndíí nguée cuuvi chōō. Tuu'mi cuuvi
 cuaacu chi canéé nguūⁿ ndii cuááⁿ
 vmnaaⁿ na libro yeⁿe Ndyuūs 'tíicā:
 Vida cueⁿe daāⁿmaⁿ miiⁿ ní chicheé
 yeⁿē vaadi n'gii miiⁿ ti 'āā ntéé ch'ii
 'iiⁿyāⁿ. ⁵⁵Vaadi n'gii ni 'āā chó'ōo.
 ¿Táácā cuuvi cuchée vaadi n'gii
 yeⁿe 'iiⁿyāⁿ chi nguée cuuvi 'cuūvi
 yā? ¿Táácā cuuvi diiⁿ vaadi n'gii miiⁿ
 tan'dúúcā chi 'áámá 'iiti chí nga'a
 ti 'iiⁿyāⁿ ní n'gii yā? Nguée cuuvi.
⁵⁶Nuuⁿndi miiⁿ chi diiⁿ yú, chííⁿ chi
 tee lugar vaadi n'gii, ní n'gii yú. Ní
 vaadi n'gii miiⁿ diiⁿ tan'dúúcā chí
 nga'a ti 'iiⁿyāⁿ ní n'gii yā. Ley miiⁿ
 chííⁿ chi diiⁿ chi 'iiⁿyāⁿ deenu yā
 chí véé nuuⁿndi yeⁿe yā. ⁵⁷Nca'a
 yú gracias Ndyuūs, ti nginneé yā
 s'uuúⁿ chi ichē yú yeⁿe nducuéⁿe
 chi yeⁿē yááⁿnguiinūuⁿ cáávā
 Señor Jesucristo yeⁿē yú. ⁵⁸Cáávā

chuū ndís'tii hermanos yeⁿé chi
 neⁿe taaví, 'cueetinéeⁿ n'daaca nī
 ndúúcū chiíⁿ chi i'téenu nī. Ní nguée
 n'daaⁿ chííⁿ chi i'téenu nī. Ní cueⁿe
 daāⁿmaⁿ dííⁿ nī ntiiⁿnyuⁿ yeⁿe
 Señor Jesucristo yeⁿē yú. Ní deenú
 nī chí ntiiⁿnyuⁿ miiⁿ ní véé chiiⁿvē.

Yeⁿe ofrenda caavā hermanos

16 Maaⁿ ní neⁿé caaⁿmáⁿ
 ndís'tii yeⁿe ofrenda yeⁿé
 nī chi ca'a nī 'iiⁿyāⁿ chi i'téenu yā
 Jesucristo cáávā 'iiⁿyāⁿ ndaachí
 snée yā ní nguée dendu'u yeⁿē.
 Dííⁿ nī tan'dúúcā chí 'úú ngaⁿá
 ngii 'iiⁿyāⁿ yeⁿe tanáⁿā yáacū s'eeⁿ
 na yáⁿāa Galacia. ²Tíicā dííⁿ nī.
 Nguuví vmnááⁿ vmnaaⁿ yeⁿé ndēētē
 chi domingo miiⁿ, ca'áámá ca'áámá
 ndís'tii ní cu'néeⁿ nī 'āā víí caā
 parte yeⁿé nī chi tunéeⁿ Ndyuūs chi
 yeⁿe nducuéⁿē chi Ndyuūs tee yā
 ndís'tii. Ní ndís'tii ca'a nī ofrenda
 yeⁿé nī na ta'a 'iiⁿyāⁿ chí ngaⁿa
 ntiiⁿnyuⁿ yeⁿe yáacū. Ní taachi
 'úú ndaa nguée canéé chi ca'a nī
 ofrenda yeⁿe nī. ³Ní taachi ndaa,
 'úú dicho'ó 'iiⁿyāⁿ chi ndis'tii ne'éⁿ nī
 chi candée yā ofrenda yeⁿé nī ndíí
 yáāⁿ Jerusalén. 'Iiⁿyāⁿ miiⁿ candée
 yā carta yeⁿé ndúúcū ofrenda yeⁿe
 nī. ⁴Nduuti chí 'úú canéé chí caⁿá
 yáāⁿ Jerusalén tuu'mi 'iiⁿyāⁿ s'eeⁿ
 caⁿá yā nduucú.

Pablo caⁿa yā chí caⁿá yā yāāⁿ s'eeⁿ

⁵Canéé chí cho'ó na yáⁿāa
 Macedonia. Ní taachi cho'ó na
 yáⁿāa miiⁿ cuayiivi ní ndaa na yáāⁿ
 Corinto ní cuneé ndúúcū ndís'tii.
⁶Neⁿé chí cūnē ndúúcū ndis'tii
 tiempo chí 'iiche. Ní cuayiivi ní
 ndís'tii cuuvi caⁿá nī nduucú 'téé

nūuⁿ naachi 'úú naⁿá cuaaⁿ cyúúní.
⁷Nguéé neⁿé n'diichí ndís'tii taachi
 cho'ó yáaⁿ vaacú nī, naati canéé
 ngiinú chi ndaa n'diichí ndís'tii
 'áamá tiempo nduuti chi Ndyuūs tée
 yā lugar 'úú. ⁸Naati cuneé na yáaⁿ
 Efeso ndii tiempo yeⁿe 'viicu yeⁿe
 Pentecostés. ⁹Miiⁿ ní véé n'dee ca
 ntiiⁿnyuⁿ chi dííⁿ. Ní yáaⁿ Efeso miiⁿ
 tan'dúúcā 'áamá cheendi va'āi chi
 ch'ēete n'dai ni ndeēvéé n'dai caavā
 'úú, ti véé cá ntiiⁿnyuⁿ chi dííⁿ. Miiⁿ
 ntúúⁿ neene vee 'iiⁿyāⁿ chi induuví
 táaⁿ yā yeⁿé.

¹⁰Ndúúti chi ndaa saⁿā Timoteo
 nanááⁿ ndís'tii, canéé chi dííⁿ nī
 recibir saⁿā miiⁿ tan'dúúcā 'áamá saⁿā
 chi dííⁿ ntiiⁿnyuⁿ sa yeⁿé Ndyuūs, ti
 saⁿā miiⁿ ní idiiiⁿ sa ntiiⁿnyuⁿ yeⁿé
 Ndyuūs tan'dúúcā 'úú. ¹¹Mar 'áamá
 ndís'tii nguéé dííⁿ nī ndúúcu Timoteo
 tan'dúúcā chi saⁿā chi nguēe ndaacā,
 ní nguéé deenu sa. Cuaviivi taachi
 dicho'ó nī Timoteo miiⁿ cuaaⁿ cyúúní,
 dicho'ó nī saⁿa miiⁿ ndúúcu n'dai.
 Canee ngiinú chi ndaa sa ndúúcu
 tanáⁿā hermanos nanááⁿ 'úú.

¹²Úú neⁿé chi hermano Apolos
 ndaa sa nanááⁿ ndís'tii taachi ndaa
 tanáⁿā hermanos. Apolos miiⁿ nguéé
 neⁿe sa ndaa sa maaⁿ, naati ndaa sa
 nanááⁿ ndís'tii taachi véé yaaⁿ sa.

Pablo dííⁿ yā saludar hermanos

¹³Cueéte n'daacá nī ndúúcu cuidado.
 Ní cuēetinéé n'daacá nī ndúúcu
 chi i'téenu nī chi yeⁿe Ndyuūs.
 Ní tan'dúúcā saⁿā n'gēete dííⁿ yā
 ní 'tíicā dííⁿ nī. Ní cunéé diitú nī.
¹⁴Tanducuéⁿē chi dííⁿ nī, ní dííⁿ nī ti
 neⁿe nī Ndyuūs.

¹⁵Ndís'tii ní deenú nī chi 'iiⁿyāⁿ
 yeⁿe va'āi saⁿa Estéfanos s'téenu yā

Jesucristo vmnááⁿ vmnaaⁿ taachi
 snee yā na yáⁿāa Acaya. Úú yaa'ví
 ndís'tii chi 'iiⁿyāⁿ s'eeⁿ neⁿé yā dííⁿ
 yā ntiiⁿnyuⁿ chi nginne nducyaaca
 'iiⁿyāⁿ chi i'téenu yā Señor Jesucristo
 yeⁿé yú. ¹⁶Úú ngiicá ndís'tii
 hermanos yeⁿé, chi 'caandiveéⁿ nī
 yeⁿe chi ngaⁿā 'iiⁿyāⁿ s'eeⁿ yeⁿe
 va'ai Estéfanos ní cunneé nī 'áamá
 'áamá 'iiⁿyāⁿ chí idiiiⁿ ntiiⁿnyuⁿ yeⁿé
 Dendyuūs. ¹⁷Yeenú chi ndaa hermano
 Estéfanos ndúúcu hermano Fortunato
 ndúúcu hermano Acaico. N'daacā chi
 canéé yā ndúúcu nī na lugar yeⁿé.
¹⁸Iiⁿyāⁿ s'eeⁿ ní nduūvi n'daí yā na
 espíritu yeⁿé ní caⁿā yā nduūvi n'daí
 yā na espíritu yeⁿe nī dendú'ū. Canéé
 chi dííⁿ nī aceptar tanáⁿā 'iiⁿyāⁿ chi
 dííⁿ yā tan'dúúcā 'iiⁿyāⁿ s'eeⁿ.

¹⁹Iiⁿyāⁿ yeⁿe yaācu yeⁿe yáⁿāa
 Asia dicho'ó yā saludos yeⁿé nī: N'daí
 nī, ngaⁿa yā. Saⁿa Aquila ndúúcu
 n'daataá Priscila ndúúcā 'iiⁿyāⁿ yeⁿe
 yaācu chi snee yā ndavaacú yā
 dicho'ó yā saludos yeⁿe nī: N'daí nī,
 ngaⁿa yā. ²⁰Nducyáácá hermanos
 ní dicho'ó yā saludos yeⁿe nī: N'daí
 nī, ngaⁿa yā. Ndís'tii ní caaⁿmaⁿ nī
 'tíicā yeⁿe hermanos: N'daí yā, ngaⁿa
 nī. Ní ca'á nī ta'a nī taachi dííⁿ nī
 saludar hermanos ti ndís'tii ní neⁿé nī
 Dendyuūs.

²¹Úú Pablo dinguúⁿ carta miiⁿ
 ndúúcu ta'á, ní: N'daí nī, ngaⁿā.

²²Nduuti chi 'áamá saⁿā nguéé
 idinéⁿe yā Señor Jesucristo yeⁿe yú
 'āa cuuví yā condenado. Niiⁿnuⁿ niiⁿnuⁿ
 canee tiempo chi Señor Jesucristo
 yeⁿé yú cuuvi ndaa ntúuⁿ yā.

²³Ní Señor Jesucristo yeⁿe yú tée
 yā ndís'tii nducuéⁿē chi n'daacā
 yeⁿe yā. ²⁴Úú neⁿé ndís'tii ti ndís'tii
 ní yeⁿe Cristo Jesús ndís'tii. 'Tíicā.

CARTA CUAYIIVI YEⁿE 'IIⁿ'YĀⁿ CHI SNÉE YĀ YĀĀⁿ CORINTO

Pablo idinguúⁿ yā carta 'cūū yeⁿe
'iiⁿ'yāⁿ yeⁿe yaacū na yāāⁿ Corinto

1 'Úú Pablo 'úú. Ní Ndyuūs neⁿ'é
yā chi 'úú cuuvi 'áámá apóstol
chi candéé nduudu cuaacu yeⁿ'ē
Jesucristo. 'Úú ndúúcū Timoteo chi
hermano yeⁿ'e yú idinguúⁿ carta
'cūū yeⁿ'e 'iiⁿ'yāⁿ yeⁿ'e yāāⁿ Corinto
chi caⁿ'á yā yāacū yeⁿ'e 'iivú
Ndyuūs, ní yeⁿ'ē nducyaaca 'iiⁿ'yāⁿ
chi i'teenú yā Jesucristo, 'iiⁿ'yāⁿ chi
snée yā na núúⁿmáⁿ yāⁿ'āa yeⁿ'e
Acaya. ²Ndyuūs Chiida yú ndúúcū
Señor Jesucristo cuuvi tée yā s'uuúⁿ
cosa chi n'daacā yeⁿ'é yā ní 'ífcú
cunéé vaadī 'diiiⁿ yeⁿ'é yā na staava
yeⁿ'e yú.

Pablo ch'eenú yā chiī

³Dich'ēete yú Ndyuūs ti nééné
n'dai Ndyuūs Chiida yú chi Chiida
Señor Jesucristo yeⁿ'ē yú. Ndyuūs
Chiida yú ya'ai 'iinú yā s'uuúⁿ ní tee
yā 'viich'ēetínūuⁿ s'uuúⁿ. ⁴Ndyuūs
yeⁿ'e yú itee yā 'viich'ēetínūuⁿ
núⁿs'uu yeⁿ'e tanducuéⁿ'ē chi n'geenú
'nū ngii ti núⁿs'uu ní cuuvi ca'á 'nū
dáámá 'viich'ēetínūuⁿ 'iiⁿ'yāⁿ chi
n'geenú yā ngii ndúúcū dáámá
'viich'ēetínūuⁿ chi Ndyuūs tee

yā núⁿs'uu. ⁵Núⁿs'uu ní n'geenú 'nū
ngii n'dee ca cáavā chi idiíⁿ 'nū
ntiiⁿnyuⁿ yeⁿ'e Señor Jesucristo.
Ní Señor Jesucristo tee ca yā
'viich'ēetínūuⁿ núⁿs'uu. ⁶Maaⁿ ní,
nduuti chi n'geenú 'nū ngii, chuu
ní cáavā ndís'tiī cuuvi cuta'á nī
'viich'ēetínūuⁿ yeⁿ'é Ndyuūs ní
cuuvi nnguaⁿ'ai nī. Ní nduuti chi
Ndyuūs tee yā núⁿs'uu 'viich'ēetínūuⁿ,
chuū ní cáavā ndís'tiī cuuvi cuta'á
nī 'viich'ēetínūuⁿ yeⁿ'é Ndyuūs, ní
cuuvi nnguaiⁿ'ai nī. 'Tiicá ntúūⁿ
ndís'tiī cuuvi cuchée nī nducuéⁿ'ē
chi n'geenu nī ngii tan'dúúcā chi
núⁿs'uu n'geenú 'nū ngii. ⁷Ní canee
ngiinú 'nū yeⁿ'e ndís'tiī chi cunee
n'daaca nī. Ti deenú 'nū ti taachi
ndís'tiī n'geenu nī ngii tan'dúúcā
núⁿs'uu 'tiicá ntúūⁿ Ndyuūs tee yā,
'viich'ēetínūuⁿ ndís'tiī tan'dúúca chí
tee yā núⁿs'uu.

⁸Ní ndís'tiī hermanos yeⁿ'é 'nū.
Neⁿ'é 'nū chi cadiinuuⁿ nī yeⁿ'e
tanduvéé vaadī caa'va chi cho'ō
nuúⁿ 'nū na yāⁿ'āa yeⁿ'e Asia. Chíⁿ
chí ch'eenu taaví 'nū chiī ní nééné
n'dee ca, ní nadicadiinúúⁿ 'nū chi
nguée fuerzas yeⁿ'é 'nū chi cuchée
'nū yeⁿ'e nducuéⁿ'ē ti cuuví 'cuūvi
'nū. ⁹Nacadiinúúⁿ 'nū chí ca'á yā

orden chi 'cuūvi 'nū naati chuū ní
 chíi chí ch'i'í' nús'uu chi cu'téenu
 cá 'nū Ndyuūs chi nadacuée' yā
 'ii'nyā' ye'e' nguaa' tiná'ā. Ní nguē
 i'téenu 'nū ye'e' maá' nū. ¹⁰Tíicā
 Ndyuūs nadanguá' ai yā nús'uu
 ye'e' peligro chi 'āā chéé' cuūví
 'nū. 'Tiicā ntúū' cunee ngiinu 'nū
 Ndyuūs chi nadanguá' ai yā nús'uu
 ye'e' nducué'ē chi n'geenú 'nū
 ngii ní ye'e' chí ch'ēete n'dai. ¹¹Ní
 ndís'tií ní nginne ntúū' nī nús'uu
 ti nga'anguā'ā nī caavā nús'uu.
 Caati ndúútí chí 'yáá' ca hermanos
 nga'angua'á yā ye'e' 'nū, tuu'mi ní
 ca'á yā gracias Ndyuūs, ti Ndyuūs
 díí' yā n'dai ca cáávā nús'uu.

**Pablo chi'naa' yā chi ndaá
 yā na yāā' Corinto**

¹²Ní yeenú 'nū ti deenú 'nū na
 staava ye'e' 'nū chi chíi' chi idií'
 'nū ní cáávā 'ii'nyā' ye'e' i'nyee'ndí
 'cuū. Ní n'daacā díí' nū. Ní n'daacā
 díí' nū cáávā ndís'tií. Ndyuūs chi
 n'dai taavi chínneé yā nús'uu chi
 'túúcā din'daacá 'nū. Chuū nguéé
 cuuvi díí' nū cáávā vaadi deenu
 ye'e' maá' nū. ¹³Chíí' chí dingúú'
 'nū ye'e' ndís'tií ní ndís'tií ní cuuvi
 'cueé' nī ní intiinaá' nī. Cunee
 ngíínú 'nū chi túúmícadíinúú' nī
 nducué'ē. ¹⁴Tan'dúúcā chi ndís'tií
 túúmícadíinúú' nī 'téé maa' naati
 taachi ndaa Señor Jesucristo taama
 vmné'ēe tuu'mí ndís'tií cuuvi yeenú
 nī cáávā nús'uu tan'dúúcā chi cuuvi
 yeenú 'nū cáávā ndís'tií.

¹⁵Caati véé confianza ye'e' 'nū
 ndúúcū ndís'tií, vmnáá' vmnaa'
 nadacádiinúú' chí chíi ní ndaá ní
 caneé nduucú nī 'áámá tiempo ní
 cuayiivi ndaá taama vmné'ēe ní

cunee nduucú nī chi cuuvi yeenu
 cá nī. ¹⁶Nadacádiinúú' chí cho'ó
 yaá'ví ndís'tií taachi ca'á na yā'āa
 Macedonia. Ní cuayiivi míí' taachi
 n'daá yā'āa Macedonia mií' tuu'mi
 ní nandaa ntuú' yaa'ví ndís'tií ní
 cunee ndúúcū nī. Ní taachi can'daá
 ye'e' nī, ndís'tií cuuvi cunnee nī 'úú
 ndúúcū necesidades ye'e' caati ca'á
 yā'āa Judea. ¹⁷Tíicā nadacádiinúú'
 chí díí'. 'Úú nguéé díí' tan'dúúcā
 'ii'nyā' chí díí' yā tan'dúúcā chí
 maá' yā ne'e' yā. Ní nga'a yā:
 Júū, júū chuū chí díí', ní cuayiivi
 nga'á yā chí nguéé díí' yā ti díí'
 yā tan'dúúcā chí ne'e' yā. ¹⁸Naatí
 Ndyuūs deenú yā nduudu chí nga'á
 'nū chí nguéé nga'á 'nū 'tíicā idií'
 'nū ní cuayiivi nguéé idií' 'nū 'tíicā.
¹⁹Ti taachi 'úú ndúúcū sa'ā Silvano
 ndúúcū Timoteo candéé 'nū nduudu
 cuaacu ye'e' Señor Jesucristo chí
 Daiya Dendyuūs nguéé nga'á 'nū
 chí Jesucristo mií' nga'á yā chí
 júū 'tíicā, ní cuayiivi nguéé 'tíicā
 díí' yā. Cristo ní nga'á yā ní díí'
 yā tanducué'ē dendu'ú chí cuaacu.
²⁰Ti Cristo mií' nga'á yā chí 'tíicā,
 ye'e' nducué'ē chí Ndyuūs Chiida
 yú ca'á yā chí téé yā 'ii'nyā' ndúúcū
 s'uuú' chí i'téenu yú Ndyuūs.
 Cáávā chuū idich'ēete yú Ndyuūs
 ti cucáávā Cristo ca'a yú chí 'tiicā.
²¹Ní Chiida yú díí' yā chí ndís'tií
 ndúúcū nús'uu cunee diitu ca yú
 ndúúcū chí i'teenu yú ye'e' Cristo.
 Ní Ndyuūs nadideevé yā s'uuú' chí
 dií' yú ntii'nyu' ye'e' yā. ²²Ndyuūs
 tee yā s'uuú' 'áámá sello ye'e' yā
 na cuerpo ye'e' yú ti ye'e' yā s'uuú'.
 Tee yā Espíritu N'dai ye'e' yā na
 staava ye'e' yú. Ní cáávā Espíritu
 N'dai ye'e' yā deenu yú chí cuuvi

yeⁿe yú chiiⁿ chi Ndyuūs caⁿa yā
chi téé yā s'uuúⁿ.

²³Nguéé cueⁿé yāāⁿ Corinto ti
neⁿé yaaⁿ'vi neéⁿ ndís'tiī ní nguéé
neⁿé 'caaⁿvá cucáávā chi 'cuētinéé
ya'ai nī. Maaⁿ ní Ndyuūs deenú yā
staava yeⁿé ní testigo yeⁿé. ²⁴Nguéé
neⁿé 'nū caaⁿ'máⁿ 'nū ntiiⁿnyuⁿ yeⁿé
nī yeⁿé chiiⁿ chi canee chi i'téenu
nī ti 'āā canee diitú nī ndúúcū chi
i'téenu nī. Naati neⁿé 'nū cunneé
'nū ndís'tiī. Nús'uu diiⁿ 'nū ntiiⁿnyuⁿ
ndúúcū ndís'tiī ní cuuvi yeenú nī.
Ní ndís'tiī snéé n'daaca nī caavā chi
i'teenú nī Jesucristo.

2 'Úú nadicádiinúúⁿ māaⁿ chi
nguéé ndaaⁿ nanááⁿ ndís'tiī chi
cuuvi ndaachí nī. ²'Úú nguē neⁿé
ndaá nanááⁿ ndís'tiī nduuti chi 'úú
idiíⁿ chi ngii ndaachi yiinú ndís'tiī.
¿De'ē cúúví chi diíⁿ chi ngii ndaachi
yiinú ndís'tiī ti nguéé du'ū chi
cuuvi tee yā 'úú vaadi yeenú nduuti
chi ndaachi yiinú ndís'tiī? ³Chuū
idinguúⁿ yeⁿé ndís'tiī ti taachi ndaaⁿ
nguéé cu'neeⁿ ndaachi nuúⁿ cucáávā
ndís'tiī ti ndís'tiī cuuvi tee nī 'úú
vaadi yeenú. Véé 'viich'ētiinúúⁿ
'cúū nanááⁿ nducyáácá ndís'tiī chi
vaadi yeenú chi véé yeⁿé, maaⁿ
vaadi yeenú miiⁿ cunéé ndúúcū
nducyaaca nī. ⁴Ní taachi dinguúⁿ
yeⁿé ndís'tiī neené di'vaachi 'úú ndii
ná staava yeⁿé ndíí tuunu chēécú.
Nguéé diíⁿ 'tuucā ti cu'neeⁿ ndaachi
yiinú ndis'tiī ti neⁿé chi ndís'tiī
cuuvi déenu nī chi neené neⁿé taavi
cá ndís'tiī.

**Ndyuūs nadach'ēécú yā
nuuⁿndi yeⁿé 'iiⁿ'yāⁿ**

⁵Ndúútí chi 'aama 'iiⁿ'yāⁿ diíⁿ
yā 'aama cosa chi véé de'ē cáávā

chi cu'neeⁿ ndaachi yiinú náⁿā
ndís'tiī 'úú ntúūⁿ cu'neeⁿ ndaachi
yiinú 'úú ndúúcū nducyáácá ndís'tiī
dendu'ū 'téé nūuⁿ. 'Úú nguéé neⁿé
caaⁿ'máⁿ yeⁿé 'iiⁿ'yāⁿ miiⁿ chi
véé cá nuuⁿndi yeⁿé yā yeⁿé chi
dinuuⁿndí yā. ⁶Deenú ntúūⁿ chi
n'deē cá ndís'tiī 'āā n'diichí nī
nuuⁿndi yeⁿé yā ní nadacádiinúúⁿ
chi 'āā véé castigo yeⁿé 'iiⁿ'yāⁿ miiⁿ,
ní nguéé diíⁿ nī más ca ndúúcū
'iiⁿ'yāⁿ miiⁿ. ⁷Maaⁿ ní canéé chi
nca'á nī 'viich'ētinūuⁿ 'iiⁿ'yāⁿ 'cúū
ní nadach'ēécú yā yeⁿé 'iiⁿ'yāⁿ 'cúū
ní nguéé neené taaⁿ cu'neeⁿ ndaachi
yiinú yā. ⁸Caavā chuū chi ngaⁿ'á chí
ndis'tiī 'cuuⁿ'miⁿ nī chi dinéⁿe ca nī
'iiⁿ'yāⁿ 'cúū. ⁹Nícu taachi idinguúⁿ
chuū yeⁿé ndís'tiī yeⁿé 'iiⁿ'yāⁿ 'cúū
neⁿé cadiinúúⁿ ní n'diichí nduuti
chi ndís'tiī ní diíⁿ nī ndúúcú yā
tan'dúúcā chi 'āā ngaⁿ'á ngii ndís'tiī
na carta yeⁿé. ¹⁰'Úú dendú'ū caⁿ'á
inadich'ēécú nuuⁿndi yeⁿé 'āā de'ē
nūuⁿ 'iiⁿ'yāⁿ chi ndís'tiī nadich'ēécú
yā nuuⁿndi yeⁿé yā. Ní taachi 'úú
nadich'ēécú yeⁿé yā, ní 'túúca diíⁿ
cucáávā ndís'tiī ní nanááⁿ Cristo.
¹¹Nduuti chí diiⁿ yú 'túúcā tuuⁿ'miⁿ ní
yááⁿ'n'guinūuⁿ nguéé cuuvi cuchée
sa yeⁿé yú ti deenu yú de'ē chi
nginnche'ei sá.

**Pablo nguē yeenú yā chi
ndaa yā na yááⁿ Troas**

¹²Taachi cueⁿé cuaaⁿ cyuuni ní
ndaá na yááⁿ Troas chi caaⁿ'máⁿ
nduudu yeⁿé evangelio yeⁿé Cristo,
tuuⁿ'miⁿ ní Ndyuūs nn'guaáⁿ yā yááⁿ
miiⁿ tan'dúúcā chi nn'guaaⁿ 'iiⁿ'yāⁿ
'áámá cheendi va'āi. 'Tíicā diíⁿ
Ndyuūs cucaavā 'úú chi caaⁿ'máⁿ
nduudu yeⁿé evangelio. ¹³Ní neené

nadacadiinúúⁿ na staava yeⁿé ti nguéé ndaācá saⁿā Tito, hermano yeⁿé yú. Cáāvā chuū díⁿ despedir 'iiⁿyāⁿ yeⁿe yāāⁿ miiⁿ ní chiicá ni cueⁿé na yáⁿāa Macedonia.

**Chæe yú yeⁿe nducuéⁿé
ti yeⁿe Cristo s'uuúⁿ**

¹⁴Úú ní ca'á gracia Ndyuūs caati Ndyuūs caⁿá yā nduucú 'nū 'āā tií nūuⁿ lugar naachi caⁿá 'nū caati nús'uu cuuvi chæé 'nū yeⁿe nducuéⁿé cucáāvā s'uuúⁿ ní yeⁿe Cristo s'uuúⁿ. Níicú Ndyuūs díⁿ yā cáāvā nús'uu chi deenu 'nū yeⁿé Cristo chi cuuvi caaⁿmáⁿ 'nū yeⁿe Cristo nanááⁿ nducyaaca 'iiⁿyāⁿ yeⁿe núuⁿmáⁿ iⁿ'yeeⁿdī. Ní 'iiⁿyāⁿ cuuvi deenú yā yeⁿé Cristo dendú'ū. Ní chuū ní tan'dúúcā 'áámá cosa chi n'dēēvæe ngééⁿ chi véé nducuéⁿé yāāⁿ naachi cueⁿé 'nū. ¹⁵S'uuúⁿ tan'dúúcā 'áámá cosa chi n'dēēvæe ngééⁿ chi incienso nanááⁿ Dendyuūs. 'Tíicā s'uuúⁿ chi i'teenu yú Cristo. 'Tiicā ntúūⁿ s'uuúⁿ nanááⁿ 'iiⁿyāⁿ chi caⁿá yā cu'téenu yā Jesucristo ní caⁿá yā na va'ai chæeti nguuví. Ní nanááⁿ 'iiⁿyāⁿ chi nguéé i'téenu yā ní caⁿá yā ná vaadi n'gii cueⁿe daāⁿmaⁿ, ¹⁶s'uuúⁿ tan'dúúcā 'áámá cosa chi ngééⁿ chi n'díí chí 'āā ntæe n'dáaca, 'tíicā s'uuúⁿ nanááⁿ 'iiⁿyāⁿ chi nguéé i'téenu yā Jesucristo. Ní chuū ch'iⁿi chi caⁿá yā 'cuuvi yā cueⁿe daāⁿmaⁿ. Ní s'uuúⁿ ní tan'dúúcā 'áámá cosa chi n'dēēvæe ngééⁿ ti véé vida yeⁿé. 'Tíicā s'uuúⁿ nanááⁿ 'iiⁿyāⁿ chi caⁿá yā cu'téenu yā Jesucristo ní caⁿá yā na va'ai chæeti nguuví. ¿Dú'ū cuuvi díiⁿ yeⁿe chuū 'tuucā? ¹⁷Nús'uu ní nguéé caaⁿmáⁿ 'nū nduudu cuaacu

yeⁿé Ndyuūs chi 'iiⁿyāⁿ nadíí'væ yā nús'uu, tan'dúúcā chi díiⁿ n'deēe n'dáí 'iiⁿyāⁿ. Naati Ndyuūs dich'óo yā nús'uu ní nús'uu ní caaⁿmáⁿ 'nū nduudu miiⁿ ndúúcū núuⁿmáⁿ staava yeⁿé 'nū. Ní Ndyuūs inaáⁿ yā nús'uu ti dííⁿ 'nū tan'dúúcā chi Cristo neⁿé yā chi dííⁿ 'nū, ti yeⁿé Cristo nús'uu.

Yeⁿe Nduudu Ngai yeⁿé Ndyuūs

3 Taachi dingúúⁿ 'nū chuu, ¿'áá nadacadiinúúⁿ nī chi nús'uu caaⁿmaⁿ cá 'nū chi n'daācā idiíⁿ 'nū? O ¿'áá canee chi ndeé 'nū taama carta chi ndéē recomendación, nanááⁿ ndís'tií, o 'áámá carta chi dingúúⁿ nī chi ngíicá nī recomendación yeⁿé nī tan'dúúcā chi ndeé tanáⁿ'ā 'iiⁿyāⁿ? Nguæe 'tíicā. ²Ndís'tií ní tan'dúúcā carta yeⁿé 'nū 'tíicā ndís'tií ti yeⁿé Cristo ndís'tií. Ní ndís'tií tan'dúúcā chi carta yeⁿé 'nū chi canéé nguūⁿ na staava yeⁿé 'nū 'tíicā ndís'tií. Ní 'íicú nducyáácá 'iiⁿyāⁿ cuuvi 'cueeⁿ yā níicú cadíínuuⁿ yā chi ndís'tií i'téenu nī Jesucristo. ³Ní nducyáácá 'iiⁿyāⁿ deenú yā chi ndís'tií ní tan'dúúcā 'áámá carta chi dingúúⁿ Cristo ní tee yā nús'uu 'tiicā ndís'tií cáāvā ntiiⁿnyuⁿ yeⁿe Cristo chi dííⁿ 'nū nanááⁿ ndís'tií. Carta miiⁿ nguéé cánéé nguūⁿ ndúúcū tinta ndíí nguéé ndúú tan'dúúcā chi Ndyuūs díiⁿ nguúⁿ yā ley na tabla yeⁿe tuūu ti Espíritu N'dai yeⁿé Ndyuūs chi canduuchi dingúúⁿ carta 'cūū staava yeⁿé yú.

⁴Ní seguro chi Ndyuūs ndæeve yā ndís'tií ní véé 'viichæetiinūuⁿ yeⁿé 'nū caati Jesucristo innee yā 'úú. Ní deenú chi dichíí'væ Ndyuūs ndúúcū

ntiiⁿnyuⁿ n'daacā chi diiⁿ cucááva Cristo. ⁵Nguéé nadacadiinúúⁿ 'nū chi cuuvi cundee yú cuidado yeⁿe nducuéⁿē chi diiⁿ yú. Ndyuūs nginnee yā nūs'uu ní tée yā poder nūs'uu ní cuuvi diiⁿ 'nū nducuéⁿē. ⁶Ndyuūs tee yā nūs'uu ntiiⁿnyuⁿ chi candee 'nū táámá compromiso yeⁿé yā chí ngai. Ní compromiso chí ngai miiⁿ nguéé yeⁿe ley yeⁿe yú chi canéé nguūⁿ ti yeⁿe Espíritu N'dai yeⁿé Dendyuūs. Nduudu yeⁿe ley yeⁿe yú diiⁿ chi condenado s'uuúⁿ ní 'cuuvi yú naati Espíritu N'dai miiⁿ itee vida cueⁿe daāⁿmaⁿ s'uuúⁿ.

⁷Ley yeⁿē yú chi Ndyuūs dingúúⁿ yā na tabla yeⁿe tuūu nanááⁿ Moisés ní dichí'íve chi deenu yú chi véé nuuⁿndi yeⁿe yú, ní chindai yú. Ní taachi ndaā ley miiⁿ chi deeve n'dai ca yeⁿé Ndyuūs tuu'mi ní ngii na naaⁿ Moisés miiⁿ. Ní 'iiⁿyāⁿ yeⁿe Israel nguéé cuuvi n'diichí yā naaⁿ Moisés miiⁿ cáávā chi neené deeve ngii naáⁿ yā, naati deevé miiⁿ na naáⁿ yā 'āā ntuūví. ⁸Taachi ndaā ley miiⁿ ní deevé cá ngii ní chó'oo deeve yeⁿē 'áá nguéé cuuvi ch'ete n'dái cá ngii ntiiⁿnyuⁿ yeⁿe Espíritu N'dai yeⁿé Ndyuūs nguéé ti ntiiⁿnyuⁿ yeⁿe ley miiⁿ? ⁹Ní nduuti chí ntiiⁿnyuⁿ yeⁿe ley miiⁿ chi deevé n'dai ní diiⁿ condenar 'iiⁿyāⁿ chí ndai yā, tuu'mi ní 'áá nguéé más cā ch'ete taavi cá ngii ntiiⁿnyuⁿ yeⁿé nduudu yeⁿé Ndyuūs ndúúú Espíritu N'dai ti diiⁿ yā aceptar 'iiⁿyāⁿ nguéé ti ley miiⁿ? 'Tífcā váá. ¹⁰Caati 'aara chí deevé n'dai ley miiⁿ nguéé deevé chiiⁿ chi cuuvi tan'dúúú cá chi deevé n'dai ca yeⁿé Ndyuūs. Maaⁿ ní ley miiⁿ canee tan'dúúú cá chi nguéé deevé n'dai. ¹¹Caati chí ley miiⁿ chí deevé

ní cunee 'áámá tiempo nūuⁿ tuu'mi ní chuunee deevé taavi cá nduudu yeⁿé Ndyuūs chíⁿ chí 'áámá cūnee.

¹²Cáávā chuū deenúⁿ 'nū chi compromiso chí ngai canéé cueⁿe daāⁿmaⁿ ní 'tífcā cuuví. Maaⁿ ní caaⁿmaⁿ 'nū nduudu ngai yeⁿé Ndyuūs ní nguéé 'va'a 'nū mar 'áámá. ¹³Nguéé diiⁿ 'nū tan'dúúú cá chí diiⁿ Moisés taachi sндуú yā 'áámá velo naáⁿ yā ti 'iiⁿyāⁿ Israel nguéé cuuvi snáaⁿ yā naaⁿ Moisés miiⁿ cucáávā deeve yeⁿe Ndyuūs chí canéé na náaⁿ yā. Deevé miiⁿ nguéé chíⁿ 'naaⁿ. ¹⁴Ní 'iiⁿyāⁿ Israel s'eeⁿ nguéé tuumicadiinúúⁿ yā yeⁿe deevé chí canéé náaⁿ Moisés miiⁿ. Ndií nguuví 'cūū taachi 'iiⁿyāⁿ Israel s'eeⁿ ch'eeⁿ yā compromiso ndiicúū miiⁿ, nguē cuuvi deenú yā caati canéé yā tan'dúúú cá chí canéé 'aama velo na naáⁿ yā. Velo miiⁿ Cristo diiⁿ chí chó'oo yeⁿē. ¹⁵Ndií nguuví 'cūū taachí 'iiⁿyāⁿ s'eeⁿ 'cueeⁿ yā ley yeⁿe Moisés, cunee velo miiⁿ ti nan'gaadí vaanicadiinūuⁿ yeⁿe yā. ¹⁶Ní ndií taachi cu'téenu yā Señor Jesucristo Daiyá Dendyuūs tuu'mi ní velo miiⁿ ní cuavii. ¹⁷Señor miiⁿ ní Espíritu yeⁿe Cristo. Ní naachi véé Espíritu miiⁿ yeⁿe Señor miiⁿ tuu'mi ní 'iiⁿyāⁿ canéé libre yā. ¹⁸Maaⁿ ní cáávā chuū nducyaaca yú nguéé snee yú tan'dúúú cá chí véé 'áámá velo na naaⁿ yú. Maaⁿ ní 'iiⁿyāⁿ n'diichi yā deeve yeⁿe Señor Jesucristo yeⁿe yú na vida yeⁿe yú ti s'uuúⁿ tan'dúúú cá 'áámá espejo, 'tífcā s'uuúⁿ. Ní taachi n'diichi yú Señor Jesucristo yeⁿē yú tuu'mi ní n'daaⁿ vida yeⁿe yú chí cuuvi tan'dúúú cá vida yeⁿé Cristo. Ní cūnee ngiinu yú chí n'daaⁿ vida

yeⁿe yú tan'dúúcā chi ch'ēete ca dēēve vida yeⁿē Señor Jesucristo yeⁿē yú. Chuū chi idiíⁿ Espíritu yeⁿe Cristo cáávā s'uuúⁿ.

4 Deenu yú chi Señor Jesucristo tee yā s'uuúⁿ cosas chi n'dai ca. Cáávā chuū dííⁿ 'nū ntiiⁿnyuⁿ yeⁿé yā ní caaⁿmaⁿ 'nū nduudu cuaacu yeⁿé yā ní nguēē cuuvi cúunū 'nū. ²Maaⁿ ní nguēē dííⁿ 'nū cosas chi nguēē n'daaca chi cuuvi snááⁿ 'iiⁿyāⁿ, cosa chi dííⁿ 'nū chi 'cuináaⁿ 'nū nanááⁿ 'iiⁿyāⁿ. Ní nguēé cachiicá 'nu nginnche'élí 'nū 'iiⁿyāⁿ. Ní nguēé ndastaⁿá 'nū nduudu cuaacu yeⁿé Ndyuūs ndúúcu nduudu yaadi. 'Tíicā idiíⁿ 'nū ní caaⁿmaⁿ 'nū dámaaⁿ nduudu cuaacu yeⁿé Dendyuūs ní cuuvi deenú nducyaaca 'iiⁿyāⁿ, ní Dendyuūs n'diichí yā nús'uu. ³Nduuti chi 'iiⁿyāⁿ nguēé ituumicádiinuuⁿ yā nduudu cuaacu chi ngaⁿá 'nū tuu'mí ní 'iiⁿyāⁿ miiⁿ nguēé i'téenu yā Señor Jesucristo yeⁿē yú ní cuuvi ndái yā. ⁴'Iiⁿyāⁿ nguēé i'téenu yā Señor Jesucristo caati ndyuūs yeⁿē iⁿ'yeeⁿdí 'cūū chi yááⁿn'guiinūⁿ n'gaadi sá ná vaadi cadiinúúⁿ yeⁿe yā, caati yaaⁿn'guiinūⁿ nguēé n'gúúⁿ sá chi n'diichí yā dēēve yeⁿe Dendyuūs. Maaⁿ ní 'iicu 'iiⁿyāⁿ nguēé snaaⁿ yā dēēv' n'dai yeⁿe nduudu yeⁿe Cristo chí dēēve. Ní s'uuúⁿ taachí inaaⁿ yú Cristo miiⁿ inaaⁿ yú Ndyuūs. ⁵Ní taachi ngaⁿá 'nū nduudu yeⁿe Dendyuūs nguēé ngaⁿá 'nū nduudu yeⁿe maá 'nū ti ngaⁿá 'nū chi Jesucristo miiⁿ ní Señor yeⁿē yú. Tii nús'uu ní dichíí'v' 'nū ndís'tii cucáávā chi Cristo neⁿé yā nducyaaca 'iiⁿyāⁿ. ⁶Ní taachi Ndyuūs din'dái

yā iⁿ'yeeⁿdí ngaⁿa yā 'tíicā: Yeⁿe naachí maaiⁿ miiⁿ canéé dēēve. Maaⁿ Ndyuūs miiⁿ ní dííⁿ yā chi dēēve miiⁿ canéé na staava yeⁿé 'nū. Ní ndúúcu dēēve miiⁿ cuuvi deenú 'nū vaadi deenu yeⁿé Ndyuūs chí n'dai taavi ca. Ní nús'uu n'diichí 'nū dēēve yeⁿé Ndyuūs taachi n'diichi 'nū naaⁿ Jesucristo miiⁿ.

Vida yeⁿé 'iiⁿyāⁿ chi i'téenu yā Jesucristo

⁷Ní nduudu cuaacu yeⁿe Ndyuūs chi i'téenu 'nū canéé na staava yeⁿe 'nū tan'dúúcā tesoro 'tíicā. Ní 'áará chi cuerpo yeⁿé 'nū tan'dúúcā 'cuutí yáⁿaa chi nguēē dēēvéé, nús'uu ch'iⁿí 'nū cáávā ntiiⁿnyuⁿ chi dííⁿ 'nū chi poder chi cānee nduucú 'nū ní ch'ēete ca ní yeⁿé Ndyuūs. Ní nguēé yeⁿē nús'uu. ⁸'Áará chi nduū cuaaⁿ n'geenú 'nū ngii mar 'áámá naaⁿ nguēé diíⁿ chi dúú'va 'nū. 'Áará chi n'dee nááⁿ inadacádiinúúⁿ 'nū deenú chēē chi dííⁿ 'nū. ⁹'Áará chi 'iiⁿyāⁿ ní n'daa yā chi neⁿe 'caaⁿnúⁿ yā nús'uu Dendyuūs canee yā nduucú 'nū. 'Áará chi 'iiⁿyāⁿ cun'dáa yā nús'uu na yáⁿaa nguēē 'cuūvi 'nū. ¹⁰Áā tíí nūuⁿ cuááⁿ naachi caⁿá 'nū cueⁿe daaⁿmaⁿ canee na staava yeⁿé 'nū chi cuuvi 'cuūví 'nū tan'dúúcā chi ch'ií Señor Jesucristo yeⁿe yú. Ní 'íicú 'iiⁿyāⁿ cuuvi n'diichí yā chi Jesucristo nadanguáⁿai yā nús'uu. Ní cuuvi deenú yā chí Jesucristo canduuchí yā. ¹¹Ní nducuéⁿe tiempo chi sндуuchí 'nū na iⁿ'yeeⁿdí 'cūū deenú 'nū chi cuuvi 'cuuví 'nū cucáávā chi nús'uu dííⁿ 'nū ntiiⁿnyuⁿ yeⁿe Cristo. Ní 'íicú 'iiⁿyāⁿ cuuvi n'diichí yā chi poder yeⁿe Cristo

Jesús canéé ndúúcū nús'uu. ¹²Tíicā ní vaadī n'gii dii' n'ntii'nyu' ye'ē na vida ye'ē nū 'tiicā ntuū' vida cue'ē daā'ma' dii' n'ntii'nyu' ye'ē na vida ye'ē ndís'tii.

¹³Tíicā canéé nguū' na libro ye'ē Ndyuūs ndii cuáá' vmnaa': 'Úú i'teenú, ní cáávā chii' chi nga'á. Ní 'tiicā ntúū' nús'uu i'téenu nū ní cáávā chuū nga'á nū. Ní daama chi'téenu nū ndúúcu yā. ¹⁴Caati deenu yú chi 'ii'nyā' chi nadacuée' yā Señor Jesucristo ye'ē nguaa' tina'ā, 'ii'nyā' mii' nadacuée' ntúū' yā s'uuú' ye'ē nguaa' tiná'ā. Ní Dendyuūs candéé yā nús'uu ndúúcū ndís'tii nanáá' Jesucristo. ¹⁵Nducué' chi dii' nū ní cucáávā chi ndís'tii cuuvi cuta'á nī tanducué'ē chí n'dai. Ní 'íicú n'dee 'náá' 'ii'nyā' cuuvi cuta'á yā cosa chi n'dai ye'ē Dendyuūs. Ní n'dee n'dái 'ii'nyā' cuuvi caa'ma'ngua'á yā, ní ca'a yā gracia, Dendyuūs, ní cuuvi ch'ēete cá yā Dendyuūs chi dēve taavi ca.

¹⁶Cáávā nducué'ē chuū nguéé ngii cúunu yú 'aara chi cuerpo ye'ē yú n'gii néé' nguuvī nguuvī naati Dendyuūs téé yā fuerzas s'uuú' nguuvī nguuvī. ¹⁷Níicú chuū chi n'geenú yú ngii na i'nyee'dí 'cūū nguéé ch'ēete ní nuu' nūū' ch'ó'oo, ní dii' cáávā s'uuú' chi véé ye'ē yú 'aama lugar chí n'dēve n'dai ca ní n'dēē ca chi 'áamá cunee cue'ē daā'ma'. ¹⁸Maa' ní nguēē dii' yú cuenta ye'ē dendu'ū chi inaa' yú ti chí'ín chí inaa' yú ní ngo'o yé'ē. Naati chí'ín chi nguéé inaa' yú cunee cue'ē daā'ma'.

5 Maa' ní deenu yú chi cuerpo ye'ē yú 'cuiinu ti tan'dúúca

'áamá va'ai chi nguéé 'áamá cūnee 'tíicā cuerpo ye'ē yú naati Ndyuūs idin'dái yā 'aama va'āi ye'ē yú ná va'ai ch'ēeti nguuvī chí 'áamá cūnee. Ní nguéé sa'ā ye'ē i'nyee'dí 'cūū din'dái sa ndúúcū ta'a sa va'ai mii'. ²Maa' ní chí n'dai yiinu yú ti néené ne'ē yú n'daa' yú cuerpo ye'ē yú ní snee yú na va'ai ch'ēeti nguuvī ndúúcū cuerpo ngai ní dēve chi ye'ē va'ai ch'ēeti nguuvī. ³Nguuvī mii' ní Ndyuūs ca'á yā chí téé yā 'aama cuerpo ngai ye'ē yú chí tan'dúúca chí 'aama vestido. Ní Ndyuūs nguéé cuuvi ndaacá yā s'uuú' chí nguéé chí dēve cuerpo ye'ē yú. ⁴Ne'ē chí snée yú na i'nyee'dí 'cūū na va'ai ye'ē yú chí cuerpo ye'ē yú, nandái yiinu yú ti n'geenu yú ngii. Nguéé cucaavā chí ne'ē yú chí cuerpo ndiicúū ye'ē yú 'cuuvī naati ne'ē yú chí Ndyuūs téé yā chí'caadí na cuerpo ye'ē yú chí ngai chí tan'dúúca chí catecai ngai yú. Ní 'iicú cuerpo ndiicúū ye'ē yú ye'ē i'nyee'dí 'cūū ní 'cuiinu ti snée yú ndúúcū cuerpo chí ngai ní véé vida cue'ē daā'ma' ye'ē yú. ⁵Ní cáávā chuū ní Ndyuūs ch'iindiyaá' yā ye'ē yú cuerpo chí ngai ní tee yā Espíritu N'dai ye'ē yā s'uuú' chí cuuvi deenu yú chí cuaacu chí tee yā chuū chí cuuvi ye'ē yú.

⁶Tíicā rā va, cue'ē daā'ma' véé confianza ye'ē yú ndúúcū Dendyuūs. Deenu yú chí ne'ē chí snée yú na i'nyee'dí 'cūū ndúúcū cuerpo ndiicúū ye'ē yú nguéé cuuvī cunee yú ndúúcū Señor ye'ē yú na va'ai ch'ēeti nguuvī. ⁷Maa' ní chii' chí dii' yú, dii' yú ti i'teenú yú Jesucristo ní nguéé idii' yú cucáávā chí n'diichi yú cosa chí

ye^{n'}ē i^{n'}yee^{n'}dí 'cūū. ⁸Íícu v̄e
 confianza ye^{n'}ē yú. Ne^{n'}e yú ca^{n'}a yú
 ye^{n'}ē vaacu yú chi cuerpo ndiicū
 ye^{n'}e yú ní cunee yú ndúúcu cuerpo
 ngai ye^{n'}e yú na va'ai ch̄eti nguuv
 ndúúcu Señor ye^{n'}ē yú. ⁹Cáávā chuū
 ne^{n'}e yú dii^{n'} yú cue^{n'}e daa^{n'}ma^{n'} chii^{n'}
 chi Ndyuūs ne^{n'}é yā chi dii^{n'} yú
 nduuti chi snée yú na va'ai ye^{n'}e yú
 na i^{n'}yee^{n'}dí 'cūū o nduuti chi snée
 yú na va'ai ye^{n'}e yú na va'ai ch̄eti
 nguuv ndúúcu Señor Jesucristo.
¹⁰Ti 'tíicā nducyaaca yú canee chi
 na^{n'}a yú nanáá^{n'} juez chi Cristo ní
 'íícu ca'aama ca'aama s'uuú^{n'} cuuvi
 cuta'a yú chuu chi cuuvi ye^{n'}ē yú
 tan'dúúca chi dii^{n'} yú ntii^{n'}nyu^{n'} ye^{n'}é
 yā ne^{n'}e chi snée yú na cuerpo
 ndiicū ye^{n'}e yú na i^{n'}yee^{n'}dí 'cūū,
 nduuti chi ntii^{n'}nyu^{n'} chi n'daacā o
 ngūe n'daacā.

Nduudu cuaacu ye^{n'}e vaadi 'diii^{n'}

¹¹Nús'uu ní deenú 'nū chi Señor
 Jesucristo ca^{n'}á yā n'diichí yā
 nducyaaca 'ii^{n'}yā^{n'}. Ní ne^{n'}é 'nū dí^{n'}
 'nū n'daacā. Ní cáávā chuū ní nús'uu
 diitu dí^{n'} 'nū nducué^{n'}ē chi ch'i^{n'}í 'nū
 'ii^{n'}yā^{n'} chi nga^{n'}á 'nū nduudu cuaacu
 ye^{n'}e Señor Jesucristo. Ndyuūs
 déenu yā chii^{n'} chi dí^{n'} 'nū ní cunee
 ngiinú 'nū chi ndís'tii cuuvi déenu
 nī chuū dendu'ū. ¹²Nguéé nga^{n'}á 'nū
 taama vmné^{n'}ēe ye^{n'}e vida ye^{n'}é 'nū
 nanáá^{n'} ndís'tii naati ca'á 'nū 'áámá
 lugar ndís'tii ti cuuvi caa^{n'}má^{n'} nī
 chi n'daacā idif^{n'} 'nū. Nga^{n'}á 'nū
 nduudu cuaacu nanáá^{n'} ndís'tii. Maa^{n'}
 ní 'iicu ndís'tii cuuvi nan'gūecútá^{n'}a
 nī ye^{n'}e 'ii^{n'}yā^{n'} chi itiinguuneé^{n'} nī,
 'ii^{n'}yā^{n'} chi nga^{n'}a yā ye^{n'}e maá^{n'} yā
 chi n'daacā yā tan'dúúca chi taná^{n'}ā
 'ii^{n'}yā^{n'} snaa^{n'} yā, ní 'ii^{n'}yā^{n'} mii^{n'} nguéé

nacádiinúú^{n'} yā ye^{n'}ē chí^{n'} chi v̄e
 na staava ye^{n'}é yā. ¹³Ní nduuti
 chi nadacadiinúú^{n'} nī chi nús'uu
 tan'dúúca loco nús'uu, 'tíicā nga^{n'}á
 'nū ní dí^{n'} 'nū chi Ndyuūs ní ch̄et̄é
 yā nanáá^{n'} ndís'tii. Ní nduuti chí
 nguéé loco 'nū ní cáávā chi dí^{n'} 'nū
 ntii^{n'}nyu^{n'} ye^{n'}e Ndyuūs cucáávā
 ndís'tii. ¹⁴Jesucristo nga^{n'}a ntii^{n'}nyu^{n'}
 ye^{n'}é 'nū ti ne^{n'}é yā nús'uu. Deenu
 yú chi cuaacu chi 'áámá sa^{n'}a chi
 Cristo ch'i sa, ní cucáávā sa^{n'}ā
 mii^{n'} ní tan'dúúca chi nducyaaca
 'ii^{n'}yā^{n'} ní ch'i. ¹⁵Tíicā Cristo ch'i
 yā cucáávā nducyaaca 'ii^{n'}yā^{n'} maa^{n'}
 ní 'ii^{n'}yā^{n'} chi snée yā na i^{n'}yee^{n'}dí
 'cūū. 'Ii^{n'}yā^{n'} s'ee^{n'} 'āā ntéé snée yā
 cucáávā vida ye^{n'}e maá^{n'} yā caati
 snée yā ye^{n'}e Jesucristo chi ch'i yā
 ní nduuchi ntuu^{n'} yā ye^{n'}e nguaa^{n'}
 tiná^{n'}ā cucáávā 'ii^{n'}yā^{n'}. ¹⁶Maa^{n'} ní
 cáávā chuū chi chó'oo nús'uu nguéé
 inaá^{n'} 'nū 'téé ye^{n'}ē 'ii^{n'}yā^{n'} tan'dúúca
 taná^{n'}ā 'ii^{n'}yā^{n'} ye^{n'}ē i^{n'}yee^{n'}dí 'cūū.
 Tiempo chi 'āā chó'oo nús'uu inaá^{n'}
 'nū Cristo ndúúcu ye^{n'}ē chi dí^{n'} yā
 taachi canee yā na i^{n'}yee^{n'}dí 'cūū
 naati maa^{n'} ní ngūe inaá^{n'} 'nū 'tíicā.
 Inaá^{n'} 'nū chi Cristo ní Ndyuūs.
¹⁷Tíicā ní 'ii^{n'}yā^{n'} chi i'téenu yā
 Cristo ní ye^{n'}é Cristo. Ní 'ii^{n'}yā^{n'} mii^{n'}
 'áámá 'ii^{n'}yā^{n'} ngai. Cosas chi dí^{n'}
 yā vmnaa^{n'} nguéé dí^{n'} yā maa^{n'} ti
 nducué^{n'}ē chí dí^{n'} yā ní ye^{n'}e vida
 ngai ye^{n'}e yā.

¹⁸Ní tanducue^{n'}ē chúū ní Ndyuūs
 dí^{n'} yā. Cucáávā Cristo mii^{n'} ní
 Ndyuūs dí^{n'} yā chi s'uuú^{n'} ní ye^{n'}é
 yā s'uuú^{n'} ní nguéé contra ye^{n'}e yā
 s'uuú^{n'}. Ní Ndyuūs nga^{n'}a ntii^{n'}nyú^{n'}
 yā ye^{n'}é 'nū chi caa^{n'}má^{n'} 'nū nduudu
 ye^{n'}é yā chi 'ii^{n'}yā^{n'} na i^{n'}yee^{n'}dí 'cūū
 cuuví ye^{n'}é yā 'ii^{n'}yā^{n'}. ¹⁹Tíicā canee

chi caaⁿ máⁿ 'nū nduudu cuaacu yeⁿe Cristo chi 'iⁿ'yāⁿ s'eeⁿ cuuvi yeⁿe yā 'iⁿ'yāⁿ. Ní cucáávā Cristo miiⁿ Ndyuūs diíⁿ yā chi véé vaadi 'diiíⁿ nguaaⁿ 'iⁿ'yāⁿ nduucú yā. Ní nguéeⁿ diíⁿ Ndyuūs cuenta yeⁿe nuuⁿndi yeⁿe 'iⁿ'yāⁿ s'eeⁿ. Nícu Ndyuūs tee yā nús'uu ntiiⁿnyuⁿ chi caaⁿ máⁿ 'nū nduudú 'cūū yeⁿe yā chi vaadi 'diiíⁿ. ²⁰Maaⁿ ní 'tíicā ndaá 'nū nanááⁿ ndís'tii ndúúcū nduudu yeⁿe Cristo ní caaⁿ máⁿ 'nū nduudu miiⁿ na lado yeⁿe Ndyuūs. Ní tan'dúúcā chi Cristo ngaⁿá yā chi ndaacadaamí nī, cáávā chuū nús'uu ngiicá 'nū ndís'tii cááva Cristo chi ndaacadaamí nī yeⁿe nuuⁿndi yeⁿe nī ní 'íicú véé vaadi 'diiíⁿ yeⁿe ndís'tii ndúúcū Ndyuūs. ²¹Cristo nguéeⁿ dinuuⁿndí yā mar 'áámá. Caati cucáávā s'uúuⁿ Ndyuūs diíⁿ cuenta yā ní diíⁿ yā tan'dúúcā chi Cristo dinuuⁿndí yā. Ní 'íicú taachi yeⁿe Cristo s'uúúⁿ Ndyuūs n'diichí yā s'uúúⁿ chi nduuví n'dai vida yeⁿe yū nanááⁿ yā.

6 'Tíicā ntúūⁿ nús'uu diíⁿ 'nū ntiiⁿnyuⁿ tan'dúúcā chi ntiiⁿnyuⁿ chi neⁿe Ndyuūs. Ngicá 'nū ndís'tii chi cutaⁿá nī vaadi n'dai chi itée Ndyuūs chi vaadi n'dai chi Ndyuūs ch'iⁿ'í yā s'uúúⁿ. ²Caati 'tíicā Ndyuūs ngaⁿá yā. Ní canéeⁿ nguūⁿ na libro yeⁿe yā:

'Úú ch'iindiveéⁿ nduudu yeⁿe nī tiempo chi n'daacā. Ní chinneeⁿ ndís'tii nguuvi chí nanguaⁿái nī.

Nguuvi 'cūū ní 'áámá nguuvi chi cuuvi n'dai cáávā ndís'tii, nguuvi 'cūū ní nguuvi chi cuuvi nanguaⁿai nī.

³Maaⁿ ní nguéeⁿ diíⁿ 'nū mar 'áámá cosa chi di'vaachí 'iⁿ'yāⁿ ti 'iⁿ'yāⁿ

cuuvi caaⁿ máⁿ yā chi ntiiⁿnyuⁿ yeⁿe Ndyuūs chi diíⁿ 'nū nguéeⁿ n'daacā.

⁴Naati diíⁿ 'nū nducuéⁿe ntiiⁿnyuⁿ miiⁿ chi n'daacā ti neⁿe 'nū ch'iⁿ'í 'nū nducyáácá 'iⁿ'yāⁿ chi ntiiⁿnyuⁿ chi diíⁿ 'nū ní yeⁿe Ndyuūs. Ní cucáávā ntiiⁿnyuⁿ miiⁿ chi cheé 'nū yeⁿe nducuéⁿe chi ch'eenú 'nū chií nguuvi nguuvi. Ní néenéⁿ n'deée dendu'ū chííⁿ chí di'vaachi nús'uu ndúúcū chi véé necesidades yeⁿe 'nū ndúúcū vaadi 'caa'va. ⁵Ní ch'eⁿe yā nús'uu chí cu'néeⁿ yā nús'uu na vacūū. Ní neenéⁿ 'yaaⁿ 'iⁿ'yāⁿ nduuvidaamá yā yeⁿe chi neⁿe 'cueⁿe yā nús'uu. Ní diíⁿ 'nū n'dee n'dái ntiiⁿnyuⁿ chi néenéⁿ díitū.

Ní cho'oo 'nááⁿ nguuvi chi nguéeⁿ cheetiyaadú 'nū, ní nguéeⁿ che'e 'nū va. ⁶Níicú nducuéⁿe dendu'ū chuū ní ch'iⁿ'í 'nū 'iⁿ'yāⁿ chi vida yeⁿe 'nū ní n'daacā. Ní ch'iⁿ'í 'nū chi deenú 'nū nduudu cuaacu yeⁿe Ndyuūs. Ní diíⁿ 'nū ntiiⁿnyuⁿ miiⁿ ndúúcū vaadi ngiínū ní ndúúcū vaadi n'dai. Ní diíⁿ 'nū nducuéⁿe cucáávā Espíritu N'dai yeⁿe Ndyuūs canee nduucú 'nū. Diíⁿ 'nū túúcā ti cuaacu nííⁿnyúⁿ dineⁿe 'nu nducyaaca 'iⁿ'yāⁿ. ⁷Ní ngaⁿá 'nū nduudu cuaacu cucáávā poder yeⁿe Ndyuūs chi canee nduucú 'nū ní caavā chi n'daacā canee 'nū nanááⁿ Ndyuūs. 'Tíicā diíⁿ 'nū. Ní diíⁿ 'nū defender nús'uu ndúúcū vaadi cuaacu. Ndúúcū vaadi cuaacu miiⁿ ní tan'dúúcā chi ndéeⁿ 'nū 'áámá machete chí 'uúvi lados 'caāiⁿ ní diíⁿ 'nū defender nús'uu nduucú. 'Tíicā diíⁿ 'nū. ⁸Ní náⁿá 'iⁿ'yāⁿ ngaⁿá yā chí n'dái 'nū ní tanáⁿa yā ngaⁿá yā chi nguéeⁿ n'dái 'nū. Ní náⁿá 'iⁿ'yāⁿ ngaⁿá n'daaca yeⁿe 'nū ní tanáⁿa yā nguéeⁿ ngaⁿa n'daaca

ye^{ní}é 'nū. 'Áámá tiempo ní dííⁿ yā tratar nduucú 'nū tan'dúúcā chi nga^{ní}á 'nū nduudu yaadi ní taama tiempo tan'dúúcā chi nga^{ní}á 'nū chi cuaacu. ⁹Ní 'áámá tiempo 'ii^{ní}yāⁿ dííⁿ yā tan'dúúcā chi nguée^{ní} n'diichí yā nús'uu 'tíicā dííⁿ yā, ní táámá tiempo dííⁿ yā tan'dúúcā chi nús'uu amigos ye^{ní}é yā, 'tíicā dííⁿ yā. Ní n'dee n'dái tiempo cuuví 'cuūvi 'nū ní nguée^{ní} 'cuūvi 'nū. Ní tee yā nús'uu 'áámá castigo chi neené díítū n'dee n'dái tiempo naati nguée^{ní} 'caa^{ní}núⁿ yā nús'uu. ¹⁰Áára chí di'vaachí yā nús'uu, nús'uu ní yeenú 'nū. 'Áára chi pobre nús'uu, dííⁿ 'nū ntii^{ní}nyuⁿ ni n'dee n'dái 'ii^{ní}yāⁿ véé vaadi 'cuiica ye^{ní}é yā. 'Áára chi nguée^{ní} de^{ní}é vée ye^{ní}é 'nū nducué^{ní}é chi véé ní ye^{ní}é 'nū.

¹¹Ndís'tii hermanos ye^{ní}e yú ye^{ní}e yāāⁿ Corinto, dingúúⁿ 'nū nduudu ye^{ní}é 'nū ye^{ní}e nducué^{ní}é chi véé tan'dúúcā chi véé ca. Ní nduudu miiⁿ cachiica ye^{ní}é staava ye^{ní}é 'nū ti ne^{ní}é 'nū ndís'tii. ¹²Nús'uu ch'i^{ní}í 'nū nducué^{ní}é chi canee na staava ye^{ní}é 'nū naati ndís'tii nguée^{ní} dííⁿ nī 'túúcā nduucú 'nū ti nguée^{ní} ch'i^{ní}í nī nús'uu chi ne^{ní}é nī nús'uu ndúúcū núú^{ní}máⁿ staava ye^{ní}é nī. ¹³Nús'uu ngiica 'nū ndís'tii tan'dúúcā 'áámá chiida ngiica yā daiya yā 'tíicā ngiica 'nū ndís'tii ti cuuví diné^{ní}e nī nús'uu ndúúcū núú^{ní}máⁿ staava ye^{ní}é nī. Ní ndís'tii cuuví caa^{ní}máⁿ nī nduudu cuaacu ye^{ní}é nducué^{ní}é tan'dúúcā chi nús'uu dííⁿ 'nū ndúúcū nī.

Cuerpo ye^{ní}e yú miiⁿ ní yáacū ye^{ní}é Ndyuūs chí canduuchi

¹⁴Ndís'tii, nguée^{ní} ca^{ní}á nī ndúúcū 'ii^{ní}yāⁿ chi nguée^{ní} i'téenu yā

Jesucristo ti nguée^{ní} cuuvi dííⁿ nī dáámá ntii^{ní}nyúⁿ ndúúcū yā. Ní dííⁿ nī tan'dúúcā 'áámá yunta chi nguée^{ní} daamá tī, 'tíicā dííⁿ nī. ¿Áá cuuví cuuvi dáámá chi n'daācā ndúúcū chi nguée^{ní} n'daācā? O ¿Áá daama canee chi de^{ní}eve ndúúcū chi maāi^{ní}? Nguée^{ní} cuuvi. ¹⁵¿Áá cuuvi nduuvidaamá Cristo ndúúcū Satanás? O ¿Áá daama vee parte ye^{ní}e 'ii^{ní}yāⁿ chi i'téenu yā Cristo ndúúcū 'ii^{ní}yāⁿ chi nguée^{ní} i'téenu yā Cristo? Nguée^{ní} cuuvi. ¹⁶¿Áá nduuvidaama templo ye^{ní}e Ndyuūs ndúúcū ídolos? Nguée^{ní} cuuvi. Cuerpo ye^{ní}e ndís'tii ní yaacū ye^{ní}é Ndyuūs. Ndyuūs maáⁿ yā nga^{ní}a yā na libro ye^{ní}é yā 'tíicā:

'Úú Ndyuūs canee nduucú 'ii^{ní}yāⁿ ye^{ní}é ní cachiica nguaaⁿ 'ii^{ní}yāⁿ ye^{ní}é. 'Úú ní cuuvi Ndyuūs ye^{ní}é yā ní 'ii^{ní}yāⁿ cuuvi 'ii^{ní}yāⁿ ye^{ní}é.

¹⁷Cááva chuū Ndyuūs nga^{ní}á yā ní canee nguūⁿ 'tíicā:

Nan'dáa nī nguaaⁿ 'ii^{ní}yāⁿ s'ee^{ní} ní divíi nī ye^{ní}e 'ii^{ní}yāⁿ s'ee^{ní}. 'Tíicā nga^{ní}a Señor iivú Ndyuūs. Nguée^{ní} tuu^{ní}ví nī dendu^{ní}ū chi vaatíi. Ní 'iicu 'úú Ndyuūs dííⁿ aceptar ndís'tii.

¹⁸Ní 'úú Ndyuūs cuuví Chiidá nī. Ní ndís'tii cuuvi daiyá ndís'tii, 'tíicā nga^{ní}a iivú Ndyuūs caati nducué^{ní}é poder chi véé ní ye^{ní}é yā.

7 'Tíicā ndís'tii hermanos ye^{ní}é chi neené ne^{ní}é. Nducué^{ní}é chuū ní promesa chi Ndyuūs téé yā s'uūuⁿ. Cááva chuū canee ntúūⁿ chi dííⁿ yú ndúúcū cuerpo ye^{ní}é yú ní ndúúcū espíritu ye^{ní}é yú nducué^{ní}é chi n'daacā 'iicu ní de^{ní}eve yú. Ní

nguée diiⁿ yú mar 'áamá cosa chi nguée n'daacā ti vee nuuⁿndí yeⁿē yú. Ní neⁿé chi canduuchi yú na iⁿ'yeeⁿdí 'cūū canee chi diiⁿ yú chi dēēve ca yú tan'dúúca chi neⁿe Ndyuūs. 'Tíicā diiⁿ yú ti 'va'a yú Ndyuūs.

'Iiⁿ'yāⁿ chi i'teenú yā Cristo na yáaⁿ Corinto nanguēcunée yā dín'daacá yā

²Maaⁿ ní ngiica 'nū ndís'tií chi 'cuáaⁿ nī nduudu yeⁿé 'nū na staava yeⁿé nī. Nús'uū nguēe diiⁿ daño 'nū yeⁿē mar 'áamá nī, ndíí nguée diiⁿ 'nū chi diiⁿ nuuⁿndí nī ndíí nguée nginnche'ái 'nū mar 'áamá 'iiⁿ'yāⁿ. ³'Úú nguēe ngaⁿ'á chuū ti diiⁿ condenar ndís'tií chi nguée n'daacā nī. Naati tan'dúúca chi ngaⁿ'á vmnááⁿ vmnaaⁿ, neⁿé taavi ndís'tií. Ní canee yú tan'dúúca chi daama snée yú. 'Tiicā ntúūⁿ ní canduuchi yú daama vida yeⁿē yú na iⁿ'yeeⁿdí 'cūū ní dáámá 'cuūvi yú. ⁴Vee 'viich'ētíinúúⁿ n'dai yeⁿé ndúúcu nī ní yeenú yeⁿe nī. Ní maaⁿ ní ndúúcu nducuéⁿē chi ch'eenú chii nguée di'vaachi 'úú ti nééné vée vaadi yeenú yeⁿé.

⁵Ní ndíí tiempo taachi ndaa 'nū na yáⁿ'āa Macedonia nguée ntaavi'tuūnuúⁿ cuerpo yeⁿé 'nū naati n'geenú 'nū ngíí nducuéⁿē cuaaⁿ. Ní nguⁿ'u 'iiⁿ'yāⁿ nduucú 'nū ní di'va'á 'nū na staava yeⁿé 'nū. ⁶Naati Ndyuūs chi ca'a yā 'viich'ētíinúūⁿ 'iiⁿ'yāⁿ chi chicuūnú, maaⁿ Ndyuūs ní tee yā 'viich'ētíinúūⁿ nús'uu taachi ndaa saⁿ'ā Tito hermano yeⁿé 'nū. ⁷Nguée dámaāⁿ caavā chi ndaa saⁿ'ā Tito miiⁿ ti cáavā chi chiiⁿ sá chi ndís'tií

ca'a nī 'viich'ētíinúūⁿ saⁿ'ā miiⁿ. Ní saⁿ'ā miiⁿ yaa'vi sá nús'uu chi ndís'tií neené neⁿé nī n'diichi nī nús'uu, ní neene dindaachí nī yeⁿé 'nū ndii ná stááva yeⁿé nī. Ní neené neⁿé nī diiⁿ nī nducuéⁿē chi 'úú neⁿé chi diiⁿ nī. Ní cucáávā chííⁿ ní yeenú taavi ca.

⁸Vmnááⁿ vmnaaⁿ diiⁿ sentir yeⁿe carta chi dingúúⁿ yeⁿé nī. 'Aara chi s'neeⁿ ndaachi yiinu nī cáávā carta miiⁿ. Maaⁿ ní nguée diiⁿ sentir yeⁿe chi dingúúⁿ yeⁿé nī. Vmnaaⁿ vmnaaⁿ nduuti chi s'neeⁿ ndaachí núúⁿ nī, deenú chi carta miiⁿ diiⁿ chí ch'ētíinée ndaachí nī 'áamá tiempo nūūⁿ. ⁹Maaⁿ ní vée vaadi yeenú yeⁿé. Nguée cucáávā chi s'neeⁿ ndaachi núúⁿ nī naati s'neeⁿ ya'ai 'iinú nī taanduvée ní ndaacadaami nī yeⁿe nuuⁿndi chi diiⁿ nī. Ní ndís'tií s'neeⁿ ndaachí nī tan'dúúca chi Ndyuūs neⁿe yā chi diiⁿ nī ní 'íicú nús'uu nguée diiⁿ 'nū mar 'áamá chi cuuvi ndái nī cucáávā nús'uu. ¹⁰Caati chííⁿ chi diiⁿ Ndyuūs chi inee ya'ai 'iinú yú ní diiiⁿ chi ndaacadaami yú yeⁿe nuuⁿndi yeⁿe yú ní nnguaⁿ'ai yú. Ní 'íicú cáávā chuū nguée diiⁿ yú chi cunée ya'āi 'íinu yú yeⁿe chi nadacadaami yú yeⁿē nuuⁿndi yeⁿe yú. 'Iiⁿ'yāⁿ chi nguée i'téenu yā Ndyuūs ní ndaachi canee yā na iⁿ'yeeⁿdí 'cūū ní 'cuūvi yā cueⁿe daāⁿmaⁿ. ¹¹Naati ndís'tií cucheē nī chi inée ndaachí nī. N'diichi nī maaⁿ ntiiⁿnyuⁿ yeⁿe vaadi ndaachi táácā idiiiⁿ na vida yeⁿé nī. 'Áá diiiⁿ chi nadacadiinúúⁿ nī n'daacā yeⁿe nuuⁿndi chi diiⁿ nī ní caaⁿ'máⁿ nī chi nguēe n'daacā idiíⁿ ní? 'Áá diiiⁿ chi ndís'tií nguée canee yiinu nī yeⁿe chííⁿ chi diiⁿ ní? 'Áá 'va'á nī cucááva

nuuⁿndi chi dííⁿ ní? Cuayiivi ní neⁿé ní n'diichí ní 'úú ní neⁿé ní chi ca'a castigo yeⁿe 'iiⁿ'yāⁿ chi dinuuⁿndí yā. Ní yeⁿe nducueⁿé chuú ch'iⁿí ní ndúúcū chiíⁿ chi dííⁿ ní chi ndís'tií dííⁿ ní chííⁿ chí n'daacā. ¹²'Tíicā taachi dinguúⁿ carta miíⁿ yeⁿe ndís'tií, nguéeⁿ dinguúⁿ cáávā 'iiⁿ'yāⁿ chi dinuuⁿndi o cáávā 'iiⁿ'yāⁿ chi ch'leenú yā chií caavā nuuⁿndi miíⁿ. Dinguúⁿ yeⁿe ní ti ndís'tií cuuvi deenú ní chi nús'uu ní n'giⁿí 'nū chi véé cuidado yeⁿé 'nū ndúúcū ndís'tií nanááⁿ Dendyuūs. ¹³Ní cáávā chuú sta'á 'nū 'viich'etíínūuⁿ yeⁿé ndís'tií. Nguéeⁿ dámaāⁿ chi sta'á 'nū 'viich'etíínūuⁿ yeⁿé ndís'tií naati saⁿ'ā Tito miíⁿ diíⁿ sá chi yeenú taaví 'nū taachi yaa'vi sá nús'uú yeⁿé ní tan'dúúcā ndís'tií dííⁿ ní ndúúcū sa. Ní yeenú taavi sā. ¹⁴'Úú ngaⁿ'á ngii saⁿ'ā Tito miíⁿ chi ndís'tií ní n'daacā ní ní 'caandiveéⁿ ní nduudu yeⁿe carta miíⁿ. Ní nguēⁿ 'cuinaáⁿ cucáávā chi ngaⁿ'á 'tuucā yeⁿé ní ti 'tíicā dííⁿ ní. Nducuéⁿé chi ngaⁿ'á 'nū ndúúcū ndís'tií ní nduudu cuaacu. 'Tiicā ntúūⁿ nduudu chi ngaⁿ'á 'nū ngii 'nū Tito miíⁿ yeⁿé ndís'tií ní chiíⁿ chi n'giindiveéⁿ ní nduudu yeⁿe carta miíⁿ ní 'tíicā dííⁿ ní. ¹⁵'Tiicā ntúūⁿ Tito miíⁿ dineⁿe cá sa ndís'tií taachi nan'gaācu sa yeⁿe ndís'tií tan'dúúcā ndís'tií ch'iindiveéⁿ ní nduudu yeⁿe sa ní dííⁿ ní 'tuucā. Ní ndís'tií ní 'cuúⁿ ní saⁿ'ā miíⁿ ní din'daaca ní caatí 'va'a ní. ¹⁶Cáávā chuú véé 'viich'etíínúuⁿ yeⁿé ndúúcū ndís'tií yeⁿe tanducuéⁿé dendu'ū chi dííⁿ ní.

'Iiⁿ'yāⁿ ca'á yā n'deeē n'daí ofrenda

8 Ndís'tií, hermanos yeⁿé, maaⁿ ní caaⁿ'máⁿ 'nū ndís'tií ti

deenú ní yeⁿe vaadi n'dai ch'ēete yeⁿé Dendyuūs ní táacā chi dííⁿ 'nū ntiiⁿnyuⁿ yeⁿe na nducuéⁿé yaacū yeⁿé Ndyuūs chi snee na nducuéⁿé yáⁿ'āa yeⁿe Macedonia. ²'Aara chi 'iiⁿ'yāⁿ s'eeⁿ yeⁿe yáacū s'eeⁿ diitū n'dáí n'geenú yā ngii cucáávā chi chó'oo yeⁿe yā yeenú taavi cá yā. Ní 'áará chi pobre yā ca'á yā n'deeē n'daí ofrenda tan'dúúcā chi 'áamá 'iiⁿ'yāⁿ chi 'cuiica, 'tíicā dííⁿ yā caava hermanos chi snée yā na yáⁿ'āa Judea. ³'Úú ngaⁿ'á nduudu cuaacu yeⁿé yā. Ndúúcū núuⁿ'máⁿ staava yeⁿé yā ca'á yā ofrenda, ní ca'á yā nducuéⁿé chi cuuví yeⁿe yā. Ní ndii ca'á yā más cā chi cuuví yeⁿe yā. ⁴Caⁿ'a diitú yā ndúúcū 'nū chi 'cuaaⁿ 'nū ofrenda chi 'áamá ayuda yeⁿe chi cuuvi yeⁿe hermanos yeⁿe yú chi nguéeⁿ véé yeⁿe yā ní ca'á 'nū hermanos s'uuúⁿ. ⁵Ní dííⁿ yā más cā chi cunee ngiinú 'nū chi dííⁿ yā. Vmnááⁿ vmnaaⁿ ca'á yā vida yeⁿe maáⁿ yā na ta'a Señor Jesucristo yeⁿe yú. Ní cuayiivi, tan'dúúcā chi Ndyuūs neⁿé yā chi dííⁿ yā, 'iiⁿ'yāⁿ s'eeⁿ téē yā vida yeⁿé yā nús'uu chi dííⁿ yā ntiiⁿnyuⁿ cáávā nús'uu. ⁶Nducuéⁿé chuú vmnááⁿ vmnaaⁿ cuuví 'nū Tito ní dicho'ó 'nū saⁿ'ā chi caaⁿ'maⁿ yā yeⁿe ofrendá yeⁿé ndís'tií. 'Tiicā ntúūⁿ maaⁿ ní dicho'ó 'nū Tito chi 'cuiinu ntiiⁿnyuⁿ miíⁿ ní cut'á sa ofrenda yeⁿé ní chi ntiiⁿnyuⁿ chi n'dai taavi chi yeⁿé Ndyuūs. ⁷Ní ndís'tií ní tan'dúúcā chi 'cuiicā ní 'tiicā ní ti i'téenu cá ní Ndyuūs. Ní ngaⁿ'a cá ní nduudu cuaacu, ní déenu cá ní. Ní nééne neⁿé ní cunnee ní nús'uu, ní neⁿé ní nús'uu. Maaⁿ ní neⁿé 'nū chi ndís'tií ní ca'a cá ní ofrenda yeⁿé ní ní

din'dai ca ntiⁿnyúⁿ 'cūū chi cunnee nī hermanos yeⁿe yú.

⁸Úú nguée ca'á orden yeⁿe chuū. Dámaāⁿ neⁿé chi deenú nī tan'dúúcā chi diiⁿ tanáⁿā hermanos yeⁿe yáⁿāa yeⁿe Macedonia ní 'ífcú cuuvi deenú chi cuaacu chi ndís'tiī dinéⁿe nī Ndyuūs caavā ofrenda chi ca'á nī. ⁹Ní ndís'tiī ní 'āā deenú nī chéé chí vaadi n'dai taavi ca yeⁿé Señor Jesucristo yeⁿe yú. Cristo miiⁿ 'āā 'cuiicá yā naati díⁿ yā chi pobre yā cucáāvā chi néⁿe yā s'uuuⁿ. Ní 'ífcú ndís'tiī cuuvi cuta'á nī vaadi 'cuiica yeⁿé yā cáāvā Cristo chi díⁿ yā chi pobre yā.

¹⁰Ní yeⁿe ofrenda 'cūū 'úú yaa'vi neéⁿ ndís'tiī chuū. N'daaca ca chi 'cuiinú nī chéé chi díⁿ nī nduuyu chi 'āā chó'oo. Ndís'tiī ní vmnááⁿ vmnaaⁿ 'iiⁿyāⁿ chi díⁿ yā 'tuucā nī 'tíicā ní neⁿé chi di'cuiinú nī yeⁿe ofrenda miiⁿ nguuvi chi cuchíi. ¹¹Maaⁿ ní díⁿ nī 'tiicā ní di'cuiinú nī ntiⁿnyuⁿ yeⁿe nī chi 'āā neⁿé nī tan'dúúcā chi cuchíi nī diiⁿ nī ndii cuááⁿ vmnaaⁿ. Ní ca'á nī ofrenda chéé chi cuuvi díⁿ nī. ¹²Ní nduuti chi 'áámá ndís'tiī cuaacu níⁿnyúⁿ neⁿé nī ca'a nī ofrenda, tuu'mi ní Ndyuūs díⁿ yā aceptar ofrenda yeⁿé nī ní diiⁿ cuenta yā yeⁿe chi véé yeⁿé nī nguée yeⁿe chi nguée véé yeⁿé nī.

¹³Úú nguée neⁿé chi ndís'tiī ca'á nī más cā ofrenda chi cuuvi nī nī 'āā ntéé véé necesidades yeⁿé nī cucáāvā chi inneé nī náⁿā hermanos. ¹⁴Maaⁿ ní véé ca yeⁿé nī ní cuuvi díⁿ nī completar ofrenda yeⁿé nī ní ca'á nī 'iiⁿyāⁿ chi nguée véé yeⁿé yā. Ní cunnee nī 'iiⁿyāⁿ. Ní cuuvi ca'á nī daamá nduucú yā.

Quayivi ní taachi nguée véé yeⁿé nī ní 'iiⁿyāⁿ s'eeⁿ vee ca yeⁿé yā, 'iiⁿyāⁿ s'eeⁿ cuuvi téé yā ofrenda yeⁿé nī ní teé yā ofrenda ndís'tiī. Ní nginee yā ndís'tiī. 'Tíicā ca'á nī daama ndúucu yā. ¹⁵'Tíicā canee nguūⁿ na libro yeⁿe Ndyuūs ndii cuááⁿ vmnaaⁿ: 'Iiⁿyāⁿ chi véé cá yeⁿé yā nguée nacaāva yeⁿé yā. 'Iiⁿyāⁿ chi duū'vi vee yeⁿé yā nguée chii faltar yeⁿé yā.

Yeⁿé saⁿā Tito ndúucū compañeros yeⁿé yā

¹⁶Maaⁿ ní 'úú ca'á gracias Ndyuūs ti Ndyuūs chi'neéⁿ yā na staava yeⁿe Tito chí neⁿe yā cunnee cá yā ndís'tiī tan'dúúcā chi nús'uū díⁿ 'nū. ¹⁷Ní neⁿé yā díⁿ yā tan'dúúcā chi ngaⁿá 'nū nduucú yā yeⁿe ndís'tiī. Ní nééné neⁿé yā nginee yā ndís'tiī caati neⁿé yā n'diichí yā ndís'tiī.

¹⁸Ní dicho'ó 'nū ndúucū Tito miiⁿ táamá hermano yeⁿe yú ní nducyáácá 'iiⁿyāⁿ yeⁿe nducyáácá yaācū ngaⁿá yā chi hermano miiⁿ ní neené n'dai diiⁿ sa ntiⁿnyuⁿ. Ní ngaⁿa sa nduudu cuaacu yeⁿe evangelio chi nduudú ngai yeⁿe Jesucristo. ¹⁹Nguée damāāⁿ chuū idiⁿ saⁿā miiⁿ ti nducyáácá 'iiⁿyāⁿ yeⁿe nducyáácá yāacū s'eeⁿ naachi caⁿá 'iiⁿyāⁿ chi i'teenú yā Señor Jesucristo yeⁿe yú nndéévé yā saⁿā miiⁿ chi caⁿa sa ndúucū nús'uu caati cuuvi cunnee sa nús'uu ndúucū ofrenda chi cuuvi cunnee hermanos. Ní 'ífcú hermanos cuuvi yā dich'eete cá yā Señor yeⁿe yú. Ní cuuvi 'cuuⁿmíⁿ 'nū hermanos chi ndís'tiī neⁿé nī cunnee nī hermanos. ²⁰'Tíicā ní 'iiⁿyāⁿ nguée cuuvi caaⁿmaⁿ neeⁿ yā nús'uū yeⁿe chi díⁿ

'nū ndúúcū ofrenda miiⁿ chi cuta'á
'nū yeⁿe hermanos. ²¹Ní 'tíicā neⁿé
'nū diiⁿ 'nū nducueⁿe n'daacā nanááⁿ
Ndyuūs ní 'tíicā ntúūⁿ nanááⁿ
nducyáácá 'iiⁿ'yāⁿ.

²²Maaⁿ ní dicho'ó 'nu taama
hermano yeⁿe yú ndúúcū Tito miiⁿ.
Ní 'āā diiⁿ 'nū probar hermano
miiⁿ n'deee n'dái naaⁿ ni ch'iⁿí
saⁿ'ā miiⁿ n'deee n'dái naaⁿ chi
neⁿe sa nginne sa nús'uu. Maaⁿ ní
saⁿ'ā miiⁿ neenē neⁿe sa nginne
sa ndís'tiī ti vee 'viich'etiiinūⁿ
ca yeⁿé 'nū ndúúcū ndís'tiī. ²³Ní
ndúúti chi 'áámá 'iiⁿ'yāⁿ itiiinguuneeⁿ
yā yeⁿe saⁿ'ā Tito miiⁿ tuu'mi
ní ndís'tiī caaⁿ'máⁿ nī chi saⁿ'ā
miiⁿ compañoero yeⁿé. Ní diiⁿ sa
ntiiⁿnyuⁿ dáámá nduucú ní diiⁿ sa
ntiiⁿnyuⁿ chí dichí'vē ndís'tiī. O
nduuti chi itiiinguuneeⁿ yā yeⁿe
tanáⁿ'ā hermanos chi dicho'ó tuu'mi
ní ndís'tiī caaⁿ'maⁿ nī chi 'iiⁿ'yāⁿ
yeⁿé nducyaaca yaācū s'eeⁿ dichó'ó
yā hermanos s'eeⁿ. Ní hermanos
ní dich'etē cá yā Cristo yeⁿé yú.
²⁴Ca'á nī ofrenda yeⁿé nī ní 'tíicā
cuuvi deenú 'iiⁿ'yāⁿ yeⁿe yaacu s'eeⁿ
chi dineⁿé nī hermanos chi dicho'ó.
Ndís'tiī ní 'cuuⁿ'miⁿ nī nducyáácá
'iiⁿ'yāⁿ cáāvā ofrenda yeⁿé nī chi
cuaacu niiⁿnyúⁿ neⁿé nī hermanos.
Ní nús'uu deenú 'nū chi caⁿ'á nī
diiⁿ nī 'tíicā. Ní yeenú 'nū cucáāvā
ndís'tiī. Ní 'iiⁿ'yāⁿ cuuvi deenú yā
chiiⁿ chi ngaⁿ'á yeⁿe nī ní cuaacu.

Ofrenda cáāvā hermanos yeⁿe yú

9 Ndís'tiī hermanos yeⁿé nguée
canee chi dingúúⁿ yeⁿé ndís'tiī
yeⁿe ofrenda chi nga'a nī hermanos
chi itéenu yā Jesucristo yeⁿé yú.
²Úú tuumicadiinúúⁿ chi ndís'tiī

neⁿé nī cunnee nī hermanos. Ní
yeenú cucáāvā ndís'tiī taachi 'úú
yaa'ví 'iiⁿ'yāⁿ yeⁿe yáⁿ'āa yeⁿé
Macedonia yeⁿé ndís'tiī chi snée nī
na yáⁿ'āa Acaya táácā idiⁿ nī. Ní
'úú yaa'ví 'iiⁿ'yāⁿ s'eeⁿ chi ndís'tiī
canee yaaⁿ nī ndii nduuyu chi
chó'oo chi nginne nī hermanos
yeⁿé yú. Ní maaⁿ ní n'deee 'nááⁿ
hermanos yeⁿe yáⁿ'āa Macedonia
neⁿé yā nginne yā hermanos
cáāvā chi ndís'tiī caⁿ'á nī chi ca'a
nī ofrenda yeⁿé nī. ³Ni cáāvā chuū
dicho'ó Tito ndúúcū 'uuvi hermanos.
Ní nguée cúúví chó'oo 'áámá cosa
chi nguée cuaacu yeⁿé nī yeⁿé chi
'úú yaa'ví 'iiⁿ'yāⁿ s'eeⁿ yeⁿe tan'dúúccā
chi ndís'tiī n'daacā diiⁿ nī yeⁿé
ofrenda 'cūū. Ní ndís'tiī 'cuēeti yaáⁿ
nī ofrenda yeⁿe nī chi cunnee nī
hermanos. ⁴Nguée deenú nduuti chi
naⁿ'a 'iiⁿ'yāⁿ yeⁿe yáⁿ'āa Macedonia
caⁿ'á yā nduucú. Ní taachi ndaá 'nū
nanááⁿ ndís'tiī nguée véé yaáⁿ nī
ndúúcū ofrenda yeⁿé nī. Ní nús'uu
cuuvi 'cuinaáⁿ 'nū ti yaa'ví 'nū
hermanos yeⁿé yáⁿ'āa Macedonia ti
véé 'viich'etíínúuⁿ ch'etē yeⁿé 'nū
nduucú nī. Ní ndís'tiī cuuvi 'cuinaáⁿ
nī dendú'ū. ⁵Ní caavā chíⁿ 'úú
nadicadiinúúⁿ chi chiicá hermanos
chi chii yā vmnááⁿ vmnaaⁿ nanááⁿ
ndís'tiī ní cunee yā nduucú nī. Ní
'íicú ndís'tiī ca'a nī ofrenda yeⁿe
nī hermanos chi dicho'ó. Níicú
cuuvi cunnee nī hermanos yeⁿe
yáⁿ'āa Judea ndúúcū ofrenda yeⁿe
nī, ofrenda miiⁿ chi ngaⁿ'a nī chi
ca'a nī. 'Tíicā níicú 'cuēeti yaáⁿ nī
ndúúcū ofrenda yeⁿe nī ní ch'iⁿí nī
'iiⁿ'yāⁿ s'eeⁿ chi cuaacu chi neⁿé nī
ca'á nī ofrenda yeⁿe nī. Ní nguée a
fuerza canee chi ca'á nī ofrenda.

⁶Maaⁿ ní ndís'tii ní n'gaacú ní ye^{n'}ē chuū chí caaⁿmaⁿ. 'Iiⁿyāⁿ chi duuⁿvī cá ngīnu yā cutaⁿá yā duuⁿvī ca cosecha ye^{n'}ē yā ní 'iiⁿyāⁿ chi n'deeé ca ngīnu yā cutaⁿá yā n'deeé cá cosecha ye^{n'}ē yā. ⁷Caⁿáamá cáⁿáamá nī caⁿá nī ofrenda ye^{n'}ē nī tanⁿduucā chi nacádiinuⁿ nī chi dííⁿ nī na staava ye^{n'}e nī. Nguéé caⁿá nī nduuti chi nguéé ne^{n'}e nī, ní nguéé a fuerza caⁿá nī. Ndyuūs ne^{n'}ē yā 'iiⁿyāⁿ chi caⁿá yā ofrenda ye^{n'}ē yā tí yeenú yā chi caⁿá yā. ⁸Ní Ndyuūs ní cuuví té yā ndís'tii n'deeé cá ye^{n'}e nducué^{n'}ē chi n'dai taavi ca. Ní 'tíicā ndís'tii ní cuuví 'cuūndī necesidades ye^{n'}ē nī. Ní cuuvi cunnee nī hermanos ndúúcū nducué^{n'}ē necesidades ye^{n'}ē yā. ⁹Ní canéé nguūⁿ na libro ye^{n'}ē Ndyuūs ndii cuááⁿ vmnaaⁿ 'tíica:

Nduuti chí 'iiⁿyāⁿ caⁿá yā n'deeé cá ye^{n'}e 'iiⁿyāⁿ chi pobre yā; tuuⁿmi ní vee ca ye^{n'}e maáⁿ yā chi cuuvi caⁿá yā 'iiⁿyāⁿ ní 'áamá cānee yā 'tíicā.

¹⁰Ní Ndyuūs chí ngaⁿá yā ndaata chi 'iiⁿyāⁿ cuūnu yā ndaata miiⁿ, nga'a ntuúⁿ yā pan chi che^{n'}é yā. Maaⁿ ní Ndyuūs miiⁿ té yā ndaata ndís'tii nducué^{n'}ē chi cuūnu nī. Ní dííⁿ yā chi véé ca cosecha ye^{n'}e ntiíⁿnyuⁿ chi n'daacā chi dííⁿ nī.

¹¹'Tiicā ntúūⁿ ndís'tii cuuvi cutaⁿá nī ye^{n'}e nducué^{n'}ē vaadi 'cuiica ní 'íicú cuuvi ca'a cá nī ofrenda ye^{n'}e nī. Ní cucáavā nús'uu, ca'a yā ofrenda ye^{n'}ē nī hermanos, tuuⁿmi ní hermanos ngaⁿá yā: Ndyuūs nadíí've n'dii cáavā ofrenda miiⁿ.

¹²Ní ndúúcū ofrenda ye^{n'}e nī chi ca'a nī nguéé damāāⁿ caⁿá nī ti véé ye^{n'}ē hermanos naati dííⁿ nī

chi hermanos ca'a yā n'deeé cá gracias Ndyuūs. ¹³Ní 'íicú hermanos dich'eté yā Ndyuūs nduuti chi ndís'tii ch'ííⁿ nī hermanos chi i'téenu nī nduudu cuaacu ye^{n'}e Cristo. 'Tiicā ntúūⁿ hermanos dich'eté yā Ndyuūs ti ndís'tii ca'a cá nī ofrenda ye^{n'}ē nī cáavā hermanos miiⁿ ní caavā tanáⁿā hermanos. ¹⁴'Tiicā ntúūⁿ hermanos ngaⁿanguaⁿá yā caavā ndís'tii. Ní dine^{n'}e cá yā ndís'tii. 'Tíicā dííⁿ yā ti Ndyuūs s'neéⁿ yā na staava ye^{n'}ē nī chi ndís'tii dííⁿ nī cosa chi n'daacā. ¹⁵Maaⁿ ní ca'a yú gracias Ndyuūs ti tee yā s'uuúⁿ nducué^{n'}ē chi vaadi n'dai ca ye^{n'}e yā chi ch'etete taavi cá chi nguéé cuuvi caaⁿmaⁿ yú ye^{n'}ē nducué^{n'}ē.

Pablo caaⁿmaⁿ yā chi cuaacu chi apóstol yā ye^{n'}e Señor Jesucristo

10 'Úú Pablo di'cuiitú ndís'tii chuū. 'Úú ní ndiicuúⁿ ní véé cá paciencia ye^{n'}ē ní tanⁿdúúcā Cristo ngaⁿá yā, 'tíicā ngaⁿá. 'Iiⁿyāⁿ ngaⁿá yā ye^{n'}e 'úú chi 'úú 'aama saⁿā ndiicuúⁿ taachi caneé nduucú ndís'tii ní naati nguéé caneé nduucú ndís'tii tuuⁿmi ní ch'echí yaaⁿvī ndís'tii. ²'Úú di'cuiitú ndís'tii chi dííⁿ n'daacá nī ti taachi ndaá n'diichí ndís'tii nguéé canee chi caaⁿmaⁿ nduudu ch'echi ndúúcū ndís'tii. Náⁿā 'iiⁿyāⁿ ní ngaⁿá yā ye^{n'}ē 'nū chi nús'uu dííⁿ 'nū ntiíⁿnyuⁿ ye^{n'}e Ndyuūs tanⁿdúúcā chi ne^{n'}é 'nū dííⁿ 'nū. 'Úú vee yaáⁿ chi nandaācā 'iiⁿyāⁿ s'eeⁿ ní caaⁿmaⁿ taáⁿ nduucú yā. ³Cuaacu chi ne^{n'}e chi nús'uu ní 'iiⁿyāⁿ ye^{n'}e iⁿ'yeeⁿdí 'cūú nús'uu dííⁿ 'nū ntiíⁿnyuⁿ ye^{n'}e Ndyuūs. Nguéé dííⁿ 'nū ntiíⁿnyuⁿ

cucáávā chi véé chi cuuvi ye^{ní}é 'nū na i^{ní}yee^{ndí} 'cūū tan'dúúacā chi diiⁿ taná^{ná} 'ā 'ii^{ní}yāⁿ ye^{ní}é i^{ní}yee^{ndí} 'cūū chi nguéeⁿ i'téenu yā Cristo. ⁴Caati ntiiⁿnyuⁿ chi diiⁿ 'nū nguéeⁿ diiⁿ 'nū ndúúcuⁿ vaadi deenu ye^{ní}e i^{ní}yee^{ndí} 'cūū tí diiⁿ 'nū ndúúcuⁿ poder ye^{ní}é Ndyuūs. Ní Ndyuūs nginneé yā s'uuúⁿ chi cuuvi dituūví 'nū denduⁿū chi ye^{ní}e enemigo ye^{ní}é 'nū chi yááⁿ'n'guinūⁿ miiⁿ. ⁵Tíicā chuū cuuvi diiⁿ 'nū. Dituuví 'nū nducué^{ní}ē vaanicadiiⁿūⁿ ye^{ní}e 'ii^{ní}yāⁿ chi contra ye^{ní}é Ndyuūs. Ní 'íicu 'ii^{ní}yāⁿ cuuví nadacadiiⁿúⁿ yā ye^{ní}e Cristo ní cuuví cu'téenu yā ye^{ní}e yā. ⁶Maaⁿ ní taachi ndís'tiī n'giindiveéⁿ nī nduudu chí nga^{ná} 'a tuuⁿmi ní nús'uu canee yaáⁿ 'nū chi diiⁿ 'nū castigar nducyáácá nī chi nguéeⁿ n'giindiveéⁿ nī nduudu chi nga^{ná} 'a.

⁷Ndís'tiī ní n'diichí nī dendu'u chi véé tan'duucā chi cánée. Ní ndúútí chi 'áámá yā ye^{ní}e ndís'tiī deenú yā chi seguro chi ye^{ní}e Cristo 'ii^{ní}yāⁿ miiⁿ, tuuⁿmí canee cúúⁿmíⁿ yā chi nadacadiiⁿūⁿ yā chi nús'uū ntúūⁿ ní ye^{ní}e Cristo nús'uu. Tan'dúúca yā 'tiicá ntúūⁿ nús'uu. ⁸Áará chi 'úú Pablo nga^{ná} 'a chi 'úú ch'εεté 'úú na ntiiⁿnyuⁿ ye^{ní}e Señor Jesucristo nguéeⁿ 'cuinaáⁿ cáávā chi caaⁿ 'máⁿ 'túúcā. Deenú 'nū chi Señor ye^{ní}é yú tée yā nús'uu ntiiⁿnyuⁿ chi diiⁿ 'nū ndúúcuⁿ poder ye^{ní}é yā ti ndís'tiī cuuvi cu'téenu ca nī Ndyuūs, ní nguéeⁿ cáávā chi diiⁿ chi nguéeⁿ i'téenu nī Ndyuūs. ⁹Úú nguéeⁿ ne^{ní}é chi ndís'tiī nadacadiiⁿūⁿ nī chi dingúúⁿ carta ye^{ní}é nī cucaavā chi candií ndís'tiī chí 'va'á nī. ¹⁰Ii^{ní}yāⁿ nga^{ná} 'a yā chi cartas ye^{ní}é chí nguúⁿ ní neené ditiinu nduudu ye^{ní}é ní

taachi canee nanááⁿ ndís'tiī ní 'úú ní duūvā 'úú. Ní nduudu chi nga^{ná} 'a ní nguéeⁿ de'ε véé ye^{ní}é. ¹¹Ne^{ní}é chi 'ii^{ní}yāⁿ chi nga^{ná} 'a yā 'túúcā ye^{ní}é, cadiiⁿūⁿ yā chuū. 'Túúcā tan'dúúcā chi dingúúⁿ 'nū na cartas ti ya'ai canee 'nū ye^{ní}e nī, 'tiicá ntúūⁿ taachi ndaá 'nū nanááⁿ ndís'tiī nga^{ná} 'a 'nū ndúúcuⁿ yā ní dáámá diiⁿ 'nū ndúúcuⁿ yā.

¹²Nguéeⁿ caaⁿ 'máⁿ 'nū chi nduuvidaamá 'nū ndúúcuⁿ tanáⁿ 'a yā chi nga^{ná} 'a yā chi maáⁿ yā ní n'geεté yā. 'Ii^{ní}yāⁿ s'eeⁿ nga^{ná} 'a yā tan'dúúcā chi tonto yā tí dicaadi maáⁿ yā ndúúcuⁿ 'áámá yā táámá yā hermanos. ¹³Nús'uu ní nguεε caaⁿ 'máⁿ 'nū ye^{ní}e ndúcué^{ní}é chi n'geεte chi nguéeⁿ candeé 'nū cuidado ye^{ní}é. Ndyuūs ch'i^{ní}í yā nús'uu naachi cuuvi cuchiiⁿá 'nū ní diiⁿ 'nū ntiiⁿnyuⁿ ye^{ní}é yā. Ní ch'i^{ní}í yā chi nús'uu cho'ó 'nū nanááⁿ ndís'tiī chi snée na yááⁿ Corinto. ¹⁴Cáávā chuū ní deenú 'nū chi nguéeⁿ cue^{ní}é 'nū mar 'áámá yáⁿāa nduuti chi Ndyuūs nguéeⁿ ch'i^{ní}í yā nús'uu chi ca^{ná} 'a 'nū miiⁿya. Ní cáávā chuū ndaá 'nū nanááⁿ ndís'tiī ní candeé 'nū nduudu cuaacu chi nduudu ngai ye^{ní}é Señor Jesucristo ye^{ní}é yú. ¹⁵Nguéeⁿ nga^{ná} 'a 'nū chi n'geεte ntiiⁿnyuⁿ ye^{ní}e táámá yā tan'dúúcā chi nús'uu diiⁿ 'nū ntiiⁿnyuⁿ ye^{ní}é yā. Dámaāⁿ nga^{ná} 'a 'nū ye^{ní}é ntiiⁿnyuⁿ chi diiⁿ 'nū. Cunee ngiinúⁿ 'nū chi ndís'tiī cu'téenu cá nī ní nús'uu cuuvi diiⁿ 'nū ntiiⁿnyuⁿ chi más cā ch'εεte ca nguaaⁿ ndís'tiī, naati dámaāⁿ diiⁿ 'nū ntiiⁿnyuⁿ naachi Ndyuūs ch'i^{ní}í yā nús'uu chi diiⁿ 'nū. ¹⁶Cuayiivi miiⁿ ní ne^{ní}é 'nū ca^{ná} 'a 'nū táámá cuaaⁿ chí táámá lado

yeⁿē ndís'tiī chi cuuvi caaⁿ máⁿ 'nū nduudu cuaacu yeⁿé Ndyuūs. Ní nguée cánée chí caaⁿ máⁿ yeⁿē ntiiⁿnyuⁿ yeⁿe táámá yā tan'dúúcā chi nús'uu dííⁿ 'nū ntiiⁿnyuⁿ yeⁿé yā.

¹⁷Ní nduuti chí 'áámá 'iiⁿyāⁿ neⁿé yā caaⁿ máⁿ yā yeⁿe cosa chí ch'ēete ca tuu'mi ní canee chí caaⁿ máⁿ yā chí Ndyuūs dííⁿ yā chiiⁿ chí ch'ēete ca. ¹⁸Nduuti chí Ndyuūs deenu yā chí 'áámá 'iiⁿyāⁿ ní n'daacā idiíⁿ yā tuu'mi ní cuaacu. Nduuti chí maáⁿ yā ngaⁿa yā chí n'daacā chí dííⁿ yā tuu'mi ní ǵdu'ū deenu chí cuaacu?

Pablo ndúúcū 'iiⁿyāⁿ chí ngaⁿá chí apóstoles 'iiⁿyāⁿ ní nguée cuaacu

11 Neⁿé chí ndís'tiī cuchée nī yeⁿé 'aara chí nadacadiinúúⁿ nī yeⁿé chí duuchi ngaⁿá nduucú nī. ²Caati 'úú ní neⁿé ndís'tiī tan'duucā chí Ndyuūs neⁿé yā ndís'tiī. Ní 'úú ngaⁿá ngii ndís'tiī chí yeⁿe Jesucristo yeⁿé yú chí ndís'tiī caⁿá nī lado yeⁿé Cristo. Ní neⁿé chí ndís'tiī cunée nī nanááⁿ Ndyuūs. Ní tan'dúúcā 'áámá n'daataá chí cuíínú chí caⁿa 'caandavaacu tá ndúúcū 'áámá saⁿá nuūⁿ. 'Tíicā ndís'tiī nanááⁿ Ndyuūs. ³Ní 'úú 'va'á cáávā ndís'tiī. Caati tan'dúúcā chí 'áámá cúú chinnc'he'éf tī táⁿā Eva ndúúcū nduudu yaadi yeⁿé tī chí nduudu yeⁿe yááⁿnguiinuūⁿ, 'tiicá ntúūⁿ 'iiⁿyāⁿ cannche'éf yā ndís'tiī níicú divíi yā vaadi cadiinúúⁿ yeⁿé nī ní nguée dineⁿé nī Jesucristo ndúúcū nuuⁿmaⁿ staava yeⁿé nī. ⁴Caati ndís'tiī ca'á nī lugar 'āā du'ú nuūⁿ 'iiⁿyāⁿ chí caaⁿ máⁿ yā nduudu chí n'dááⁿ yeⁿe Jesucristo yeⁿé yú nguée tan'dúúcā nduudu cuaacu chí caⁿa 'nū nanááⁿ ndís'tiī. Ní ndís'tiī ní

n'giindiveéⁿ nī yeⁿé taama espíritu chí n'dááⁿ ní nguée n'giindiveéⁿ nī yeⁿe Espíritu N'dai yeⁿe Ndyuūs chí sta'á nī yeⁿe Ndyuūs taachi ngaⁿa 'nū nduudu cuaacu nanááⁿ ndís'tiī. Ní ch'iindiveéⁿ nī nduudu chí n'dááⁿ chí ngaⁿá yā yeⁿe chí nadinguáⁿai yā. Nguée tan'dúúcā nduudu cuaacu chí nús'uu caⁿá 'nū nguaaⁿ ndís'tiī. Ní yeenú nī yeⁿé chuū. ⁵'Úú nadacadiinúúⁿ chí nguée n'gēete ca tanáⁿā 'iiⁿyāⁿ chí ngaⁿá yā chí apóstoles naati nguē 'tíicā. N'dááⁿ yā nduudu yeⁿe Cristo ní ndís'tiī cu'teenú nī yeⁿe yā. ⁶'Áará chí nguē caⁿá nduudu cuaacu yeⁿe Cristo ndúúcū nduudu deenu ca, deenú ca yeⁿé nduudu chí ngaⁿá. 'Tíicā ch'iⁿí 'nū ndís'tiī yeⁿé nducuéⁿē ntiiⁿnyuⁿ chí dííⁿ 'nū nguááⁿ ndís'tiī.

⁷O nguée n'daacā dííⁿ chí ngaⁿá nduudu cuaacu yeⁿé Cristo nanááⁿ ndís'tiī ní nguée nadíí'v'e nī 'úú caavā ntiiⁿnyuⁿ chí dííⁿ. Nguée nadicadiinúúⁿ yeⁿé maáⁿ naati neⁿé chí ndís'tiī cuuvi n'gēetē nī. ⁸'Úú ní nguée chita'á tuumi yeⁿe 'iiⁿyāⁿ yeⁿe tanáⁿā yaacū cucáávā chí cuuvi dííⁿ ntiiⁿnyuⁿ yeⁿé Cristo nguaaⁿ ndís'tiī. ⁹Ní neⁿe chí canee ndúúcū ndís'tiī ní véé necesidades yeⁿé tuu'mi ní hermanos yeⁿe yú ndaá yā yeⁿe yáⁿāa Macedonia ní tee yā 'úú chiiⁿ chí nguē v'e yeⁿé. 'Tíicā nguée di'vaachí mar 'áámá ndís'tiī caavā necesidades yeⁿé ní nguée ndaá di'vaachí ndís'tiī tiempo chí cuchii. ¹⁰Neené seguro chí nduudu cuaacu yeⁿe Cristo canee nduucú. Ní 'íicú mar 'áámá 'iiⁿyāⁿ cuuvi dííⁿ yā chí nguē cuuvi caaⁿ máⁿ nduudu cuaacu miiⁿ na

núuⁿmáⁿ yáⁿāa Acaya caati nguée^e sta^aá tuumí cáávā ntiiⁿnyuⁿ chí dííⁿ.
 11 ¿Dē^e cáávā chí caaⁿmáⁿ 'túú^{cā}?
 ¿Áá cáávā chí nguée^e neⁿé ndís^{tii}?
 Nguée^e 'tíicā. Ndyuūs deenú yā chí neené neⁿé ndís^{tii}.

12 Ní ntiiⁿnyúⁿ chí dííⁿ canée^e chí dííⁿ naati nguée^e cuta^aá tuu^mi yeⁿe ntiiⁿnyuⁿ chí dííⁿ. Ní 'íicú 'iiⁿyāⁿ chí neⁿe caaⁿmáⁿ yā chí ntiiⁿnyuⁿ yeⁿe yā chí dáámá ndúú^{cū} ntiiⁿnyuⁿ chí dííⁿ 'nū nguée^e lugar chí cuuvi caaⁿmáⁿ yā chí 'tíicā ti sta^aá yā tuumi yeⁿe ntiiⁿnyuⁿ chí dííⁿ yā.
 13 'iiⁿyāⁿ miiⁿ nguée^e apóstoles yeⁿe Cristo ti apóstoles chí falso yā. Ní nginnche^eí yā 'iiⁿyāⁿ ní dííⁿ yā tan^{dúú}cā chí maāⁿ yā apóstoles yeⁿe Jesucristo chí candé^e yā nduudu yeⁿe Cristo. 14 Ní nguée^e nadacadíinuⁿ yú yeⁿe chí vee ca apóstoles chí falso yā na iⁿyeen^{dí} 'cūū. Maaⁿ yááⁿ'nguiniūⁿ mífⁿ ní diiⁿ sa chí maāⁿ sa ní tan^{dúú}cā 'áámá ángel yeⁿe Ndyuūs. 'Tíicā diiⁿ sa. 15 Cáávā chuū ní nguée^e cosa chí ch'etete chí 'iiⁿyāⁿ dííⁿ yā ntiiⁿnyuⁿ yeⁿe yááⁿ'nguiniūⁿ tan^{dúú}cā chí ntiiⁿnyuⁿ yeⁿe Ndyuūs. Taachí 'cuiinu iⁿyeen^{dí} 'cuū caⁿá yā cuta^a yā chí cuuvi yeⁿe yā.

Pablo neéné ch'eenú yā chíi cáávā chí apóstol yeⁿe Jesucristo

16 Maaⁿ ní taama vmnéⁿēe neⁿe caaⁿmáⁿ ndúú^{cū} ndís^{tii} ní nguée^e nadacadíinuⁿ nī chí 'úú ngaⁿá tan^{dúú}cā chí 'aama chí loco yā, ti ngaⁿá chí ch'etete maāⁿ. Ní 'aara chí nadacadíinuⁿ nī yeⁿe 'tíicā, ¿áá 'tíicā 'caandiveéⁿ nī yeⁿe?
 17 'Úú nguée^e caⁿá chuū chí Señor Jesucristo yeⁿe yú yaa^ví yā 'úú chí

caⁿá 'tíicā. Caati caⁿá tan^{dúú}cā 'aama chí loco 'tíicā caⁿá. Ní 'íicú māaⁿ cuuvi caaⁿmáⁿ chí dich'etete 'úú. 18 Ní n'deee n'dái 'iiⁿyāⁿ ngaⁿá yā yeⁿe maāⁿ yā chí ch'etete yā cucáávā chíiⁿ chí dííⁿ yā na iⁿyeen^{dí} 'cūū. Ní maaⁿ ní 'úú ntúūⁿ ngaⁿá chí 'úú ní ch'etete maāⁿ. 19 Ní ndís^{tii} ní nadacadíinuⁿ nī chí deenu cá nī ní chiche^e nī yeⁿe 'iiⁿyāⁿ chí ngaⁿá yā chí maāⁿ yā ch'etete yā tan^{dúú}cā chí loco yā, ní yeenú yā. 20 Ní chiche^e nī yeⁿe 'iiⁿyāⁿ s'eeⁿ ní ch'iindiveéⁿ nī yeⁿe yā ní dííⁿ nī tan^{dúú}cā chí 'iiⁿyāⁿ s'eeⁿ ngaⁿá yā chí a fuerza dííⁿ nī. Ní tan^{dúú}cā chí s'neéⁿ yā 'áámá trampa 'tíicā dííⁿ yā ndúú^{cū} ndís^{tii}. Ní n'diichí yā ndís^{tii} tan^{dúú}cā 'iiⁿyāⁿ chí nguée^e du^u vee 'tíicā ndís^{tii}. Ní caaⁿmáⁿ yā chí ch'etete maāⁿ yā. Ní ch'eⁿé yā naaⁿ nī. Ní cuché^e nī yeⁿe nducuéⁿē. 21 Nús^{uu} nguée^e cuuvi dííⁿ 'nū ndúú^{cū} nī 'tíicā 'aara chí nadacadiinuⁿ nī chí n'daacā dííⁿ yā ndúú^{cū} nī 'tíicā. Maaⁿ ní 'áará chí 'cuinaaⁿ yeⁿe chí caaⁿmáⁿ, 'tíicā caaⁿmáⁿ. Nús^{uu} dííⁿ 'nū chí duūva 'nū ní 'iicu cuuvi dííⁿ 'nū ntiiⁿnyuⁿ yeⁿe 'nū. Maaⁿ ní caaⁿmáⁿ tan^{dúú}cā chí loco 'úú. Ní 'úú ní caaⁿmáⁿ chí ch'etete maāⁿ yeⁿe ntiiⁿnyuⁿ chí dííⁿ tan^{dúú}cā chí tanáⁿā 'iiⁿyāⁿ chí ngaⁿa yā chí ch'etete yā maāⁿ yā cáávā ntiiⁿnyuⁿ chí dííⁿ yā. 22 ¿Áá 'iiⁿyāⁿ hebreos 'iiⁿyāⁿ s'eeⁿ? 'Tiicá ntúūⁿ 'úú. ¿Áá 'iiⁿyāⁿ s'eeⁿ yeⁿe ndaata Israel? 'Tiicá ntúūⁿ 'úú. ¿Áá 'iiⁿyāⁿ s'eeⁿ yeⁿe ndaataá Abraham? 'Tiicá ntúūⁿ 'úú. 23 ¿Áá 'iiⁿyāⁿ s'eeⁿ 'iiⁿyāⁿ chí idiiⁿ ntiiⁿnyuⁿ yeⁿe Cristo? Deenú chí caaⁿmáⁿ tan^{dúú}cā 'iiⁿyāⁿ chí

loco yā taachi caaⁿ máⁿ 'tiicā. 'Úú idíⁿ más ca ntiⁿnyúⁿ yeⁿe Cristo nguée ti 'iiⁿyāⁿ s'eeⁿ. Ní canée taavi yaātū na cuerpo yeⁿe chí ch'eⁿé yā 'úú. Neené n'deee cuuví cheⁿé vácūū. Ní neené n'deee cuūví chí 'āā cháā 'caaⁿnúⁿ yā 'úú. ²⁴Ní cho'ó nyuⁿu cuuvi chí 'iiⁿyāⁿ Israel s'eeⁿ ch'eⁿé yā yā ndiicu ndíitiⁿnyuⁿ cuūⁿ vuelta 'úú ndúúcū cuarta. ²⁵Ní cho'ó 'iinū tiempo chí ch'eⁿé yā 'uu ndúúcū nduucu. Ní 'áámá cuuvi nūⁿ chítuú yā 'úú. Ní cho'ó 'iinū cuuvi chí chechi barco naachi cueⁿé na nuūⁿnīⁿyáⁿā. Ni 'áámá vmnéⁿēe cánée nguaaⁿ nuūⁿnīⁿyáⁿā núúⁿmáⁿ yaaⁿ núúⁿmáⁿ nguuvi. ²⁶N'deee n'dái cuūví cachiicá ní n'diichi peligros yeⁿé, peligros yeⁿe yíicú, ndúúcū peligros cáávā 'iiⁿyāⁿ chí duucu yā, ndúúcū peligros nguaaⁿ 'iiⁿyāⁿ yeⁿe yāāⁿ yeⁿé ní yeⁿe 'iiⁿyāⁿ yeⁿe táámá yāāⁿ, ndúúcū peligros taachi cánée ná yāāⁿ n'geete, ní taachi caneé na yāⁿāa cuūⁿmáⁿ naachi nguée ch'etinéé 'iiⁿyāⁿ, ní taachi cachiicá na barco vmnaaⁿ nuūⁿnīⁿyáⁿā. Ní chó'oo peligros yeⁿé taachi caneé nguaaⁿ 'iiⁿyāⁿ chí ngaⁿa yā chí hermanos yeⁿe nūⁿ ní nguée 'tíica yā. ²⁷'Úú díⁿ ntiⁿnyuⁿ chí néené díttū ndúúcū vaadi 'caaⁿva ní chicuūū 'úú. Ní n'deee taaví nguiinū nguée chíi cyaadú, ní cho'oo n'deee taaví cuuvi chí ch'eenú chíi ti 'āā ntée cheⁿé ní 'āā ntée chíi nuūⁿnīⁿ va. Ní 'āā 'liche yeⁿé ní nguée catecaí.

²⁸Ní 'āā vi'í cā yeⁿe nducuéⁿē chuū chí chó'oo na cuerpo yeⁿé, vee más cā denduū ti nguuví nguuví candéé cuidado yeⁿé nducyáácá 'iiⁿyāⁿ yeⁿe nducyáácá yaacū. ²⁹Ní

nduuti chí 'áámá 'iiⁿyāⁿ duūvá yā ní 'úú ntūūⁿ díⁿ tan'dúúcā chí duūva 'úú. Ni nduuti chí 'áámá 'iiⁿyāⁿ díⁿ yā chí taama 'iiⁿyāⁿ dinuuⁿndí yā, 'úú ntūūⁿ n'geenú ngii ní 'cuināaⁿ 'úú, ní nduuví taāⁿ. ³⁰Maaⁿ ní nduuti chí canée chí dich'eté yeⁿé maāⁿ, tuuⁿmí dich'eté yeⁿé maāⁿ yeⁿe nducuéⁿē chí chó'oo yeⁿé níicu 'cuuⁿmíⁿ ti duūva 'úú. ³¹Dendyuūs chí Chiidá Señor Jesucristo yeⁿé yú ní n'dai taavi cá yā cueⁿe daāⁿmaⁿ. Ndyuūs ní deenú yā chí nguée ngaⁿá nduudu yaadi. ³²Chó'oo chí taachi caneé na yāāⁿ Damasco chí gobernador chí maaⁿ poder yeⁿe rey Aretas, gobernador miiⁿ s'neeⁿ yā soldados na cheendi va'āi s'eeⁿ chí n'geete yeⁿé yāāⁿ Damasco miiⁿ caati neⁿe sa cuta'a sa 'úú ní candé sa 'úú chí preso 'úú. ³³Naati hermanos yeⁿé yú s'nuúⁿ yā 'úú cheeti 'áámá 'cuéetēe ch'etēe ní dicua'ái yā 'úú na 'áámá ventana yeⁿe ncheeti yeⁿe yāāⁿ miiⁿ ní 'tíicā ca'ái na ta'a soldado s'eeⁿ caati yāāⁿ miiⁿ ní nuuⁿmaⁿ ndiivi canée ncheeti chí yaacū tan'dúúcā coral.

Visión yeⁿe Pablo ndúúcū chí n'diichí yā

12 Cuaacu níⁿnyúⁿ chí nguée deē vee n'daacá chí caaⁿmáⁿ yeⁿé 'úú maāⁿ chí 'úú ch'eté 'úú. N'dáaca ca chí 'úú caaⁿmáⁿ yeⁿe n'deee náāⁿ chí canée chí snaāⁿ yeⁿe Señor Jesucristo ní yeⁿe chí canúúⁿ n'de'ei chí n'giⁿí yā 'úú. ²Cuayiivi chí i'teenú Cristo chó'oo ndiichi cúūⁿ nduuyúú chí n'diichí 'áámá visión tan'dúúcā chí chíinú. Ní 'aama 'iiⁿyāⁿ candé yā 'úú ndii va'āi cheeti nguuví. Nguée deenú

nduuti chi candee yā cuerpo yeⁿé o nguée. Dámaaⁿ Ndyuūs deenú yā chuū. ³Naati chíí ní nguée deenú nduuti chi cueⁿé ndúúcū cuerpo yeⁿé o nguée ndúúcū cuerpo yeⁿé naati dámaaⁿ Ndyuūs deenú yā táácā cueⁿé. ⁴Úú deenú chi candee yā 'úú ní cueⁿé ndii paraíso chi va'ai chēeti nguuví. Ní 'úú n'giindiveeⁿ nduudu chi nguée tan'duucā nduudu yeⁿe 'iiⁿyā yeⁿe iⁿ'yeeⁿdí 'cūū ti yeⁿe Ndyuūs. Nguée vée permiso chi cuuvi caaⁿmáⁿ yeⁿe chi n'giindiveeⁿ. ⁵Úú cuuvi caaⁿmáⁿ chi 'úú ní ch'ēete maáⁿ yeⁿe chi Ndyuūs díⁿ yā nduucú. 'Úú nguée caaⁿmáⁿ yeⁿe maáⁿ chi ch'ēete maáⁿ. Dámaaⁿ caaⁿmáⁿ chi duūvā 'úú. ⁶Áará chi caaⁿmáⁿ chi 'úú ch'ēete maáⁿ nguée caaⁿmáⁿ tan'dúúcā chi zonso 'úú ti caaⁿmáⁿ nduudu cuaacu yeⁿé naati nguée caaⁿmáⁿ 'tíicā ti nguée neⁿé chi mar 'áámá 'iiⁿyā nadacadíinuⁿ yā chi 'úú ch'ēete ca 'úú. Neⁿé chi 'iiⁿyā miiⁿ nadacadíinuⁿ yā yeⁿe 'úú tan'dúúcā chi n'diichí yā 'úú, ní n'giindiveeⁿ yā nduudu yeⁿé.

⁷Chuū chi Cristo chíⁿí yā 'úú ní 'áámá visión chi ch'ēete ní dēeve taavi ca. Ní Cristo tee yā 'úú 'áámá ya'ai na cuerpo yeⁿé chi 'áámá canée ní tan'dúúcā chi 'áámá yááⁿ chi cata'āi na cuerpo yeⁿé. Ní chíi tan'dúúcā chi yááⁿn'guiinuⁿ s'neeⁿ sa yááⁿ miiⁿ chi neⁿe sa chí 'cúeenú cuuvi. Ní Ndyuūs tee yā permiso chi 'úú canee ndúúcū dolor miiⁿ cáávā chi nguée cuuvi caaⁿmáⁿ yeⁿe maáⁿ chi ch'ēete 'úú. ⁸Ní 'iinū cuuvi chíicā Señor Jesucristo yeⁿe yú chi diví yā vaadi ya'ái 'cūū yeⁿé. ⁹Naati Señor yeⁿe yú ngaⁿá yā ngii

yā 'úú 'tíicā: Vaadi neⁿe yeⁿé ní tūneeⁿ di ní nguée más ca neⁿe ní ti chuū. Ní poder yeⁿé chuū chi n'giⁿi cá taachí 'iiⁿyāⁿ chi duūva cuerpo yeⁿé yā. Maaⁿ ní cucáávā chi yaa'ví Señor 'úú 'túúcā, 'úú yeenú ti 'úú duūvā 'úú ti Cristo cuuvi 'cuuⁿmíⁿ yā poder yeⁿé yā ti canee yā na cuerpo yeⁿé. ¹⁰Cáávā chuū ní yeenú ti duūvā. Ní yeenú 'aara chi 'iiⁿyāⁿ ngaⁿ'a taaⁿ yā yeⁿé, ní nguée vée necesidades yeⁿé, ní 'iiⁿyāⁿ díⁿ yā chi n'geenú ngii. Ní yeⁿe dendú'u díitūu chi cho'ōo yeⁿé ní n'geenú ngii nducuéⁿe chuū cáávā Cristo. 'Tíicā rā va. Taachi duūvā cuerpo yeⁿé tuu'mi ní más ca ditiinu 'úú.

Pablo nadacadiinuⁿ cá yā yeⁿe 'iiⁿyāⁿ yeⁿe yaacū yeⁿe yāáⁿ Corinto

¹¹'Úú deenú chi ngaⁿ'á tan'dúúcā chi loco 'úú taachi ngaⁿ'á yeⁿe maáⁿ naati ndís'tii díⁿ ní chi a fuerza canee chi caaⁿmáⁿ yeⁿe maáⁿ ti ndís'tii nguée ngaⁿ'á ní yeⁿé 'túúcā. N'daacā ca chi ndís'tii caaⁿmaⁿ n'dáaca ní yeⁿé. 'Úú nguée duu'ví 'úú yeⁿe tanáⁿ'ā 'iiⁿyāⁿ chi ngaⁿ'á yā chi apóstoles ní nguée 'tíicā 'aara chi 'úú nguée dē'e vee 'úú. ¹²Ní taachi canee nduucú ní chíⁿí ndís'tii chi cuaacu chi 'úú 'áámá apóstol yeⁿe Jesucristo 'úú ndúúcū vaadi n'giinu ch'ēete chí díⁿ ní ndúúcū ntiiⁿnyuⁿ ch'ēete chí díⁿ ní nduucū vaadi n'giinu n'dai chí díⁿ. ¹³Dē'e vee chí nguée díⁿ ndúúcu ndis'tii taachi canee ndúúcu ní tan'dúúcā chí díⁿ ndúúcū nducyaaca 'iiⁿyāⁿ yeⁿe tanáⁿ'ā yaacū. 'Āā daamá nūuⁿ idíⁿ nduucú ní. Deenú chí nguée ngiicā ndís'tii chí cunnee ní 'úú caavā necesidades

yeⁿé. Maaⁿ ní nadich'εεcú nī yeⁿé caavā falta 'cūu ti nguée diiⁿ daamā ndúúcu nī.

¹⁴Maaⁿ ní vεε yaáⁿ chi ndaá nanááⁿ ndís'tiī ndiichi ndii 'íínú cuuvi, ní taachi ndaá nguée di'vaachí ndís'tiī. Ní nguée neⁿé de'ε véé yeⁿe nī chi maáⁿ nī in'nuúⁿ nī naati 'úú neⁿé ndís'tiī. Deenu yú chi 'iiⁿyaⁿ chi chiidá yā canée chí in'nuúⁿ yā necesidades yeⁿe daiyá yā, nguée ti daiyá yā in'nuúⁿ yā necesidades yeⁿe chiidá yā. ¹⁵Ni 'úú diíⁿ gastar tuūmī yeⁿé chi diíⁿ ntiiⁿnyuⁿ cáávā ndís'tiī ní ndíí chi cuūnū 'úú cáávā almas yeⁿe nī níícu 'cuεetinée n'daacá nī. Áará chí neⁿe cá ndís'tiī ní nguée ti ndís'tiī neⁿé nī 'úú.

¹⁶Ní 'áará chí 'úú nginneé ndís'tiī, náⁿá 'iiⁿyaⁿ nguaaⁿ ndís'tiī chí deenú yā chí nguée sta'á tuumi yeⁿé nī, ngaⁿá yā chí 'úú nginnche'éf 'iiⁿyaⁿ s'eeⁿ. ¹⁷¿Áá nginnche'éf ndís'tiī cucáávā 'iiⁿyaⁿ s'eeⁿ chí dicho'ó nanááⁿ ndís'tiī? Nguεε 'tíicā. ¹⁸Úú chiicá saⁿá Tito chí naⁿá yā. Ní dicho'ó Tito ndúúcu táámá hermano yeⁿe yú nanááⁿ ndís'tiī. ¿Áá cuaacu chí Tito miiⁿ chinnche'éf yā ndís'tiī? Nguεε 'tíicā. O ¿áá cuaacu chí 'úú ndúúcu 'iiⁿyaⁿ miiⁿ nguée diíⁿ 'nū dáámá ntiiⁿnyuⁿ nguaaⁿ ndís'tiī ní nguée ndúúcu dáámá sentido yeⁿé 'nū? Nguεε 'tíicā.

¹⁹Maaⁿ ní ndís'tiī, ¿áá nadacadiinuⁿ nī chí ngaⁿá 'nū chí chííⁿ chí diíⁿ 'nū ní cuaacu caatí chí idiíⁿ 'nū defender ntiiⁿnyuⁿ yeⁿé 'nū? Nguée 'tíicā. Ngaⁿá 'nū nanááⁿ Ndyuūs nduudú 'cūu cáávā chí nús'uu ní yeⁿé Jesucristo. Ní

nducuéⁿé chí diíⁿ 'nū, diíⁿ 'nū ti ndís'tiī hermanos chí neⁿé 'nū cuuvi cu'téenu cá nī Ndyuūs. ²⁰Ni 'úú nī 'va'á ti taachi ndaá nanááⁿ ndís'tiī 'úú nguée ndaācā chí ndís'tiī diíⁿ nī tan'dúúcā chí 'úú neⁿé chí diíⁿ nī. Ní ndís'tiī nguée ndaācā nī 'úú tan'dúúcā chí neⁿé nī chí 'úú idiíⁿ tí canée chí 'caa'vá ndúúcu ndís'tiī. Ní ndaācā ndís'tiī tan'dúúcā chí nguée canée chí 'cuεetineé nī. Ní ndaācā chí véé nguaaⁿ ndís'tiī 'iiⁿyaⁿ chí n'gεecu cheendí yā, ndúúcu 'iiⁿyaⁿ chí neⁿé yā cosas tan'dúúcā chí véé yeⁿe taama yā ndúúcu 'iiⁿyaⁿ chí nduuví taáⁿ yā. Ní 'iiⁿyaⁿ s'eeⁿ chí 'caa'vá yā ndúúcu táámá hermano ní maáⁿ yā divíi yā yeⁿé yā ti neⁿé yā ngaⁿá yā chí ch'εete maáⁿ yā. Ní 'iiⁿyaⁿ ngaⁿá yā contra yeⁿe taama yā. Ní 'iiⁿyaⁿ néené neⁿe caaⁿmaⁿ yā yeⁿé chí diiⁿ taama yā. Ní 'iiⁿyaⁿ ngaⁿá yā chí maáⁿ yā ní ch'εeté yā, ní nguée véé vaadi 'diííⁿ nguaaⁿ ndís'tiī. ²¹Ni 'va'á chí 'cuinaáⁿ nanááⁿ Ndyuūs cáávā ndís'tiī taachi ndaá nanááⁿ ndís'tiī taama vmnéⁿé. Ní taachi canée ndúúcu nī ngii ya'āi 'iinú yeⁿé 'yááⁿ ndís'tiī chí dinuuⁿndí nī ní nguée nadaacadaamí nī yeⁿe nuuⁿndí nī chí diíⁿ nī yeⁿe chí neⁿe cuerpo yeⁿe nī. Ní diíⁿ nī cosas chí nguεε n'daacā. Chííⁿ ní diíⁿ nī chí sáⁿá sta'a sa n'daataá yeⁿe tááma saⁿá.

**Pablo dingúūⁿ diitú yā yeⁿe
'iiⁿyaⁿ yeⁿe yáāⁿ Corinto ní
ngaⁿá yā: N'dai ndís'tiī**

13 Chuū ní ndii 'íínú cuuvi chí caⁿá ndaá nanááⁿ ndís'tiī ní taachi ndaá nduuti chí 'iiⁿyaⁿ caaⁿmaⁿ nuuⁿndi yeⁿé

táamá 'iiⁿyāⁿ canée chi véé 'uūvi o 'iinū testigo ndúúcu yā. Ní cunee n'daacā nduudu miiⁿ tan'dúúca chi canée nguūⁿ na libro yeⁿ'é Ndyuūs. ²Āā ngaⁿ'á cuááⁿ vmnaaⁿ taachi cānee nduucú nī ndúúcu 'iiⁿyāⁿ chi dinuuⁿndí yā ní ndúúcu nducyaaca nī. Maaⁿ ní chi canee ya'ái yeⁿ'ē ndís'tiī dinguúⁿ taama vmnéⁿ'ēe yeⁿ'e chúu tan'dúúca chi ngaⁿ'á cuaaⁿ vmnaaⁿ nanááⁿ ndís'tiī. Taachi ndaá nanááⁿ ndís'tiī taama vmnéⁿ'ēe n'diichí nuuⁿndi yeⁿ'ē nducyaaca hermanos. ³Ní 'úú idiíⁿ ti ndís'tiī cadiinuūⁿ nī nduuti chi Cristo yeⁿ'ē yú ch'iⁿ'í yā 'úú nduudu chi ngaⁿ'á o nguée. Ní Cristo yeⁿ'e yú nguée duūvā taachi dííⁿ yā tratar nduucú nī. Caⁿ'á yā ch'iⁿ'í yā chi d'tiínú yā nguée ti ndís'tiī. ⁴Cuáácú chi 'iiⁿyāⁿ ch'iⁿ'éé ngaⁿ'á yā Cristo tan'dúúca chi Cristo ní 'aama 'iiⁿyāⁿ chi duuvā, naati maaⁿ ní Cristo miiⁿ canduuchí yā yeⁿ'ē nguaaⁿ tináⁿ'ā cucáávā poder yeⁿ'é Ndyuūs. 'Tiicá ntúūⁿ nús'uu ní yeⁿ'e Cristo. Nús'uu ní duūvā 'nū naati poder yeⁿ'e Ndyuūs canee ndúúcu 'nū. Ní cáávā chuū cuuví n'diichi 'nū nuuⁿndi yeⁿ'é nī ní dichí'v'e 'nū ndís'tiī.

⁵Maaⁿ ní ndís'tiī n'diichi maáⁿ nī nduuti chi ndís'tiī 'āā canee diitú nī ndúúcu chi i'téenu nī yeⁿ'ē Cristo. N'diichi maáⁿ nī chí cuaacu chi i'téenu nī. ¿Áā nguée déenu ndís'tiī nduuti chi Cristo canee nduucú nī o nguée? Ní nduuti chi cuaacu chi nguée i'téenu nī cáávā nuuⁿndi yeⁿ'é nī tuu'mi ní nguée yeⁿ'é Ndyuūs ndís'tiī. ⁶Neⁿ'é chi ndís'tiī cadiinuūⁿ nī chi nús'uu ní dichii'vé 'nū Ndyuūs ní ti yeⁿ'é Ndyuūs nús'uu. Nguée falso 'nū. ⁷Maaⁿ ní ngaⁿ'anguaⁿ'á 'nū

Ndyuūs caavā ndís'tiī chi ndís'tiī nguée dinuuⁿndí nī yeⁿ'e mar 'áámá chi nguée n'daacā. Neⁿ'é 'nū chi ndís'tiī ní dííⁿ nī nducuéⁿ'ē chi n'daacā. Nguée ti cuuvi 'cuuⁿ'míⁿ 'nū chi dííⁿ 'nū ntiiⁿ'nyuⁿ chi n'daacā. 'Iiⁿ'yāⁿ ní cuuvi n'diichí yā ntiiⁿ'nyuⁿ yeⁿ'é 'nū, ní caaⁿ'máⁿ yā chi nguée n'daacā idiíⁿ 'nū. Dámaāⁿ neⁿ'é 'nū chi ndís'tiī din'daacá nī. ⁸Nús'uu ní nguée de'ē vee dííⁿ 'nū chi contra yeⁿ'e nduudu cuaacú naati nducuéⁿ'ē chi dííⁿ 'nū ní yeⁿ'ē nduudu cuaacu miiⁿ. ⁹Cáávā chuū nús'uu ní yeenú taaví 'nū taachi duūva 'nū ní taachi ndís'tiī ditiínú nī ndúúcu chi i'téenu nī. Ní ngaⁿ'anguaⁿ'á cá 'nū ní ngiicá 'nū Ndyuūs chi ndís'tiī cuuvi dííⁿ nī chi n'daacā n'dai ní 'cuetineé nī tan'dúúca chi Jesucristo neⁿ'é yā chi dííⁿ nī. ¹⁰Idingúuⁿ 'nū yeⁿ'e ndís'tiī vmnaaⁿ taachi 'āā cuée ndaá 'nū nanááⁿ ndís'tiī caati taachi ndáa 'nū nanááⁿ ndís'tiī nguée chechi caaⁿ'máⁿ ndúúcu nī cucáávā poder chi Señor Jesucristo tee yā 'úú. Ní Señor yeⁿ'ē yú tee yā poder 'úú caavā chi ndís'tiī ní cuuvi cu'téenu cá nī nguée caava chi cuuvi ndái nī.

¹¹Maaⁿ ní 'cuiínú carta yeⁿ'é. Ní na carta yeⁿ'é ní ngaⁿ'á ti n'dai taavi ndís'tiī ní dííⁿ nī chi 'cuetineé n'daacā nī ndúúcu vaadi 'diiⁿ na vida yeⁿ'e nī. Níicú cunee nī ndúúcu dáámá vaanicádinūuⁿ yeⁿ'é nī ní Ndyuūs chi véé vaadi 'diiⁿ yeⁿ'e yā ní dinéⁿ'e yā ndís'tiī Ndyuūs miiⁿ canee nduucú nī. ¹²Ní nguaaⁿ maáⁿ nī dííⁿ nī saludar 'áámá nī ndúúcu taamá nī. Caaⁿ'máⁿ nī chi n'dai hermano yeⁿ'é nī ní túú'ví nī cheendi hermano yeⁿ'é nī tan'dúúca costumbre yeⁿ'é nī ti yeⁿ'é Ndyuūs ndís'tiī. ¹³Nducyáácá 'iiⁿ'yāⁿ chi i'teenú

yā Jesucristo yeⁿe yú dichó'o yā saludos
na carta 'cūū yeⁿ'é nī ní ngaⁿ'á yā: N'dai
ndís'tiī.

¹⁴Ní neⁿ'é chi Señor Jesucristo
téé yā ndís'tiī vaadī n'dai taavi

yeⁿ'é yā. Ní vaadī neⁿe yeⁿ'é
Ndyuūs ní Espíritu N'dai yeⁿ'é
Ndyuūs canéé nduucú nī. Chuū
carta chi 'úú Pablo dingúⁿ yeⁿ'e nī.
'Tífcā chii.

CARTA YEⁿ'E 'IIⁿ'YĀⁿ YEⁿ'E YĀⁿ'ĀA GALACIA

Pablo idinguúⁿ yā carta 'cūū
yeⁿ'e 'iiⁿ'yāⁿ chí caⁿ'á yā yaācū
s'eeⁿ na yāⁿ'āa Galacia

1 'Úú Pablo 'úú ní 'úú 'áámá
apóstol chí dichó'ó Ndyuūs.
Mar 'áámá saⁿ'ā nguée dichó'ó
sa 'úú chí 'úú ngaⁿ'á nduudu yeⁿ'é
Ndyuūs, ndíí nguée ndúú ndēeve
sá 'úú, tí Ndyuūs Chiida yú ndúúcū
Señor Jesucristo dichó'ó yā 'úú. Ní
Chiida yú nadacuéeⁿ yā Jesucristo
yeⁿ'ē nguaaⁿ tináⁿ'ā. ²Nducyaaca vi'i
yú s'tiī chí 'cuēetinée yā yāāⁿ miīⁿ
ndúúcū 'úú, idinguúⁿ carta 'cūū yeⁿ'e
ndís'tiī chí i'téenu nī Jesucristo ní
caⁿ'á nī yaācū s'eeⁿ na yaⁿ'āa Galacia.
³Neⁿ'é chí Chiida yú ndúúcū Señor
Jesucristo yeⁿ'ē yú téé yā s'uuúⁿ
dendú'ū chí n'dai. Ní ndís'tiī canee nī
ndúúcū vaadi 'diiīⁿ chí Ndyuūs itée
yā s'uuúⁿ. ⁴Jesucristo miīⁿ ca'a yā
vida yeⁿ'e maāⁿ yā cucáāv nūⁿndi
yeⁿ'e yú. Maaⁿ ní nadanguáⁿ'ai
yā s'uuúⁿ yeⁿ'e dendu'ū chí nguée
n'daacā chí véé iⁿ'yeeⁿdí 'cūū. 'Tífcā
neⁿ'e Ndyuūs Chiida yú. ⁵Cueⁿ'e
daāⁿmaⁿ canee Ndyuūs ndúúcū
dēeve yeⁿ'é yā. Nducyáácá 'iiⁿ'yāⁿ
canee chí dich'ēete cá yā Ndyuūs chí
dēeve cueⁿ'e daāⁿmaⁿ. 'Tífcā.

Nguée véé táámá nduudu yeⁿ'e
chí Cristo nanguáⁿ'ai yā s'uuúⁿ

⁶Neené nge'e yiinú chí ndís'tiī
neenē niiⁿnuúⁿ nūuⁿ idivíi nī yeⁿ'e
Ndyuūs chí n'gai yā ndís'tiī, ní yeⁿ'e
cosas chí n'dai ca chí Cristo tee yā
ndís'tiī. Ní n'giindiveéⁿ nī nduudu
chí nguée cuaacu yeⁿ'ē táámá 'iiⁿ'yāⁿ
chí ngaⁿ'a nduudu miīⁿ tan'dúúcā
chí táámá evangelio. ⁷Cuaacu chí
nguée véé táámá evangelio chí
nduudu yeⁿ'e Dendyuūs naati véé
n'dúúví yā chí idi'vaachí yā ndís'tiī.
Ní neⁿ'e yā n'daaⁿ yā evangelio chí
nduudu ngai yeⁿ'e Cristo. ⁸Aara
chí s'uuúⁿ o 'áámá ángel chí ndaa
yeⁿ'e va'ai chēēti nguuví ngaⁿ'a yā
táámá evangelio chí n'daaⁿ nguée
tan'dúúcā chí caⁿ'a 'nū chíi 'nū
ndís'tiī, tuu'mi 'iiⁿ'yāⁿ s'eeⁿ cuuví
yā condenado. ⁹'Āa caⁿ'á chuū
maaⁿ ní neⁿ'é caaⁿ'maⁿ ntuúⁿ táámá
vmnéⁿ'ēe: Nduuti chí 'áámá 'iiⁿ'yāⁿ
caaⁿ'maⁿ yā táámá evangelio chí
n'daaⁿ nguée tan'dúúcā chí caⁿ'a
'nū chíi 'nū ndís'tiī, tuu'mi ní 'iiⁿ'yāⁿ
s'eeⁿ cuuví yā condenado.

¹⁰Taachi ngaⁿ'á chuū, ¿de'ē
inadacadíínuuⁿ nī nduucú? Nguée
neⁿ'é chí cunee yiinú nī yeⁿ'é caati

ne^{n'}é chi Ndyuūs cunee yiinú yā ye^{n'}é. O ɛ'áá canee chi 'úú idiíⁿ chi cunee yíinūu sa^{n'}ā i^{n'}ye^{n'}é dí 'cūū? Nduuti chi 'úú idiíⁿ chiiⁿ ti inee yíinūu sa^{n'}ā i^{n'}ye^{n'}é dí 'cūū, tuu^{n'}mi ní nguéé idiíⁿ ntiiⁿnyuⁿ ye^{n'}é Cristo.

Taacā chí chii Pablo apóstol

¹¹'Úú nga^{n'}á cuaacu ní ngii ndís'tii hermanos ye^{n'}é. Nduudu ngai chi evangelio ye^{n'}é Jesucristo chi 'úú nga^{n'}á, nguéé ye^{n'}é mar 'áámá sa^{n'}ā ye^{n'}é i^{n'}ye^{n'}é dí 'cūū. ¹²Ti 'úú nguéé sta'á nduudu miiⁿ ye^{n'}é sa^{n'}ā, ndíí nguéé ndúú ch'eeéⁿ ye^{n'}é mar 'áámá sa^{n'}ā caati Jesucristo ch'i^{n'}i yā 'úú nduudu cuaacu ye^{n'}é yā.

¹³Ndís'tii ch'iindiveéⁿ nī tan'dúúcā chi 'úú i'teenú tiempo chi ch'ó'oo ní caneé ch'eechí na religión ye^{n'}é 'ii^{n'}yāⁿ judíos chi Israel. Ní deenú nī taacā chi dííⁿ. Ní dííⁿ chi dícaānú 'ii^{n'}yāⁿ chi i'téenu yā Jesucristo ti ca^{n'}á yā na yaācū ye^{n'}é Ndyuūs. Ní dííⁿ chuū ti ne^{n'}é can'daá 'ii^{n'}yāⁿ s'eeⁿ ye^{n'}é nducyáácá yaācū ye^{n'}é Ndyuūs ti ne^{n'}é di'cuinú 'ii^{n'}yāⁿ s'eeⁿ. ¹⁴Ní chi'teenú más ca ye^{n'}é religión ye^{n'}é 'ii^{n'}yāⁿ chi ndaata ye^{n'}é Israel s'eeⁿ nguaaⁿ nducyaaca yā chi dáamá ndaata ye^{n'}é ndúúcu yā ti ne^{n'}é dííⁿ nducué^{n'}é tan'dúúcā chi diiⁿ 'ii^{n'}yāⁿ ndiicūū chi 'āā n'díí. ¹⁵Naatí Ndyuūs nd'eeve yā 'úú taachi 'āā cuéé 'cuundiyaáⁿ. Ní taachi ndaa tiempo chi Ndyuūs ne^{n'}é yā, Ndyuūs yaa'ví yā 'úú cáávā chi ne^{n'}é yā 'úú chi 'úú n'giindiveéⁿ nduudu ye^{n'}é yā ní cu'teenú Ndyuūs. ¹⁶Ní Ndyuūs yaa'ví yā 'úú ye^{n'}é Daiyá yā Jesucristo chi 'úú i'teenú 'yā, ti 'úú ní caa^{n'}máⁿ nduudu ye^{n'}é Cristo nguaaⁿ 'ii^{n'}yāⁿ

gentiles, 'ii^{n'}yāⁿ chi nguεε ye^{n'}é ndaata Israel. Ndíí tuu^{n'}mi nguéé tiinguuneéⁿ mar 'aama sa^{n'}ā ye^{n'}é nduudu ye^{n'}é Cristo. ¹⁷Ndíí nguéé ndúú ndaá na yāāⁿ Jerusalén chi intiinguuneéⁿ apóstoles chi dich'ó'ó Ndyuūs vmnaaⁿ chi dich'ó'ó yā 'úú, naati 'úú che^{n'}é na yá^{n'}āa Arabia. Ní cuayiiivi miiⁿ ní nguεεcuneeⁿ na yāāⁿ Damasco.

¹⁸Cuayiiivi chi cho'ó 'iinū nduūyū ndii tiempo chi 'āā i'teenú Jesucristo tuu^{n'}mi ní cue^{n'}é yāāⁿ Jerusalén tuu^{n'}mi n'diichí Pedro tí 'āā cuéé n'diichí sa^{n'}ā. Ní caneé ndúúcu sa ndíitii^{n'}yuⁿ nguuví. ¹⁹Yāāⁿ miiⁿ nguéé n'diichí táámá apóstol chi dich'ó'ó Ndyuūs. Dámaāⁿ n'diichí Jacobo sa^{n'}ā 'diinū Jesús miiⁿ. ²⁰Chuū idinguúⁿ ye^{n'}é ndís'tii. 'Cui^{n'}díichí ndís'tii. 'Úú nguéé nga^{n'}á nduudu yaadi ti Ndyuūs n'diichí yā 'úú ní deenú yā chi cuaacu nga^{n'}á.

²¹Cuayiiivi ní ndaá na yá^{n'}āa ye^{n'}é Siria ndúúcu yá^{n'}āa Cilicia. ²²'Ii^{n'}yāⁿ ye^{n'}é yá^{n'}āa Judea chi cue^{n'}é yā na yaācū naachi nge^{n'}é yā ye^{n'}é Cristo nguéé iitiinaáⁿ yā 'úú ti nguéé i^{n'}diichí yā 'úú. ²³'Ii^{n'}yāⁿ s'eeⁿ dámaāⁿ n'giindiveéⁿ yā ye^{n'}é 'úú cuááⁿ vmnaaⁿ 'tíicā, 'ii^{n'}yāⁿ chi can'dáa yā s'uuúⁿ ti ne^{n'}é yā di'cuinú yā s'uuúⁿ maaⁿ ní nga^{n'}a yā nduudu cuaacu ye^{n'}é Jesucristo. Cuááⁿ vmnaaⁿ nguéé ne^{n'}é yā chi 'ii^{n'}yāⁿ i'téenu yā nduudu cuaacu ye^{n'}é Jesucristo. ²⁴Ní ye^{n'}é chúu 'ii^{n'}yāⁿ s'eeⁿ dich'eté yā Ndyuūs caavā chi maaⁿ ní 'úú i'teenú Jesucristo.

Taná^{n'}ā apóstoles dííⁿ yā aceptar Pablo chi 'áámá apóstol ndúúcu yā

2 Cho'oo ndiichi cúūuⁿ nduuyúú chi 'úú che^{n'}é ntuúⁿ yāāⁿ

Jerusalén. Cheⁿé ndúúcū saⁿā Bernabé chi compañero yeⁿé ndúúcū saⁿā Tito. ²Ní ndaá ti Ndyuūs ch'iⁿi yā 'úú chi canéé chi caⁿá. Vmnááⁿ vmaⁿaaⁿ caⁿá nanááⁿ apóstoles chi n'geete yeⁿe yaācū miiⁿ. Ní chíí 'iiⁿyāⁿ s'eeⁿ taacā chi ngaⁿá nduudu ngai yeⁿe Cristo nanááⁿ 'iiⁿyāⁿ gentiles chi nguée yeⁿe ndaata Israel. Chuū dííⁿ chí 'iiⁿyāⁿ s'eeⁿ cu'téenu yā chi dichíí'vē ntiiⁿnyuⁿ yeⁿe Ndyuūs chi dííⁿ nguaaⁿ 'iiⁿyāⁿ gentiles. Ni apóstoles n'geete nguée caⁿa yā chi nguée 'cuúⁿ yā 'úú. ³Ní apóstoles n'geete ní canee yiinú yā ndúúcū nduudu chi ngaⁿá. Ni saⁿā Tito chi saⁿā griego chi canéé sa nduucú, nguée canee chi cuuví circuncidar Tito tan'dúúcā chi ngaⁿa ley yeⁿe 'iiⁿyāⁿ Israel s'eeⁿ ti nguée yeⁿe ndaata Israel. ⁴Chuū dííⁿ ti naachi nduuvidaama yú chí ndaā n'dé'í 'iiⁿyāⁿ chi dííⁿ yā tan'dúúcā chi hermanos yeⁿe yú 'yā, naati nguée 'tíicā. Ní ndaa yā chí n'diichí yā s'uuúⁿ caati 'āā cuée dííⁿ yú tan'dúúcā chi ngaⁿā ley yeⁿe circuncisión ti s'uuúⁿ ní yeⁿe Cristo s'uuúⁿ ní dííⁿ yú chi ngaⁿa Cristo. Neⁿé yā chi dííⁿ yú tan'dúúcā chi ngaⁿa ley yeⁿe Moisés miiⁿ. ⁵Nús'uu ní nguée dííⁿ 'nū tan'dúúcā chi 'iiⁿyāⁿ s'eeⁿ neⁿé yā yeⁿe ley yeⁿe circuncisión caati neⁿé 'nū chi nduudu cuaacu chi 'āā ngaⁿá 'nū yeⁿe evangelio yeⁿe Señor Jesucristo, ní 'áámá cūnē ndúúcū ndís'tii. 'Tíicā dííⁿ 'nū.

⁶Apóstoles n'geete yeⁿe yaācū miiⁿ nguée d'e vε más cā ca'cueéⁿ yā 'úú yeⁿe chí 'úú caaⁿmáⁿ. 'Áará chí n'geete n'dai yā nguée d'e vε tuneⁿ 'úú ti Ndyuūs neⁿe yā

nducyaaca 'iiⁿyāⁿ 'āā daamá nūuⁿ. ⁷Apóstoles n'geete yeⁿe yaācū 'āā deenú yā chi Ndyuūs dicho'ó yā 'úú. 'Úú, Pablo, ngaⁿá nduudu ngai yeⁿe Cristo nanááⁿ 'iiⁿyāⁿ chi nguée yeⁿe ndaata Israel. 'Tiicā ntúūⁿ deenú yā chi Ndyuūs dicho'ó yā Pedro chi ngaⁿá yā nduudu ngai yeⁿe Cristo nguaaⁿ 'iiⁿyāⁿ yeⁿe ndaata Israel. ⁸Ti Ndyuūs yeⁿe yú ní nginnee yā Pedro miiⁿ chi ngaⁿa nduudu cuaacu yeⁿe yā nguaaⁿ 'iiⁿyāⁿ Israel s'eeⁿ chí dííⁿ yā tan'dúúcā chí ngaⁿā ley yeⁿe circuncisión. Maaⁿ Señor miiⁿ nginnee yā 'úú chí caaⁿmáⁿ nduudu yeⁿe yā nguaaⁿ 'iiⁿyāⁿ chí nguée yeⁿe ndaata Israel. Ní nguée véé ley yeⁿe circuncisión yeⁿe yā.

⁹Apóstoles n'geete yeⁿe yaācū chí Jacobo ndúúcū Pedro ndúúcū Juan ní deenu ntúūⁿ yā chí Ndyuūs din'daacá yā nduucú chí 'úú idiíⁿ ntiiⁿnyuⁿ yeⁿe apóstol nguaaⁿ 'iiⁿyāⁿ chí nguée yeⁿe ndaata Israel. Tuu'mi ní sta'á yā tá'á cuaacú 'nū ní nduuvidaamā nduudu yú nanááⁿ Ndyuūs ti 'úú ndúúcū Bernabé ní caaⁿmáⁿ 'nū nduudu cuaacu yeⁿe Jesucristo nanááⁿ 'iiⁿyāⁿ gentiles ní 'iiⁿyāⁿ s'eeⁿ nanááⁿ 'iiⁿyāⁿ yeⁿe ndaata Israel. ¹⁰Ní ngaⁿá yā ngii yā nús'uu chí n'gáácú 'nū yeⁿe hermanos chí véé necesidades yeⁿe yā. 'Úú ntúūⁿ ní ngaⁿá, 'tíicā.

Pablo caⁿa cheechi yā ndúúcū Pedro

¹¹Ndaá 'nū na yāāⁿ Antioquía ní taachí ndaa Pedro miiⁿ na yāāⁿ Antioquía 'úú ní caⁿa cheechí ndúúcū sa yáāvēnaaⁿ sa nanááⁿ 'iiⁿyāⁿ s'eeⁿ ti Pedro miiⁿ nguée idiíⁿ sa tan'dúúcā chí deenu sa chí canee chí dííⁿ sa. ¹²Ti taachi 'āā

cuéé ndaa saⁿā s'eeⁿ chi dichóó Jacobo yeⁿē yáāⁿ Jerusalén, Pedro miiⁿ ní che'é sa ndúú^{cū} 'iiⁿ'yāⁿ gentiles chi hermanos yeⁿe yú. Ní taachi ndaa saⁿā s'eeⁿ tuuⁿmi 'āā ntéé che'e sa ndúú^{cū} 'iiⁿ'yāⁿ gentiles chi hermanos yeⁿe yú ti 'va'a sá yeⁿē 'iiⁿ'yāⁿ yeⁿē sa chi yeⁿē ndaata Israel chi díⁿ yā tan'dúú^{cā} chi ngaⁿa ley yeⁿe circuncisión. ¹³Ní tanáⁿā hermanos chi yeⁿē ndaata Israel díⁿ yā tan'dúú^{cā} chi ídiiⁿ Pedro miiⁿ. 'Tiicá ntúūⁿ Bernabé díⁿ yā chi maaⁿ ní 'āā ntéé che'é yā ndúú^{cū} 'iiⁿ'yāⁿ gentiles. 'Tiicá nducyaacá yā díⁿ yā 'áará chi deenú yā chi n'daacā chi che'é yā ndúú^{cū} 'iiⁿ'yāⁿ gentiles. ¹⁴Taachi n'diichí chi 'iiⁿ'yāⁿ s'eeⁿ nguéeé din'daacá yā ti nguéeé che'é yā ndúú^{cū} 'iiⁿ'yāⁿ gentiles chi hermanos yeⁿe yú tan'dúú^{cā} chi ngaⁿa nduudu cuaacu yeⁿe Cristo, tuuⁿmi ní 'úú Pablo caⁿá chíi Pedro miiⁿ nanááⁿ nducyaaca yā 'túú^{cā}: Díí chi saⁿā Israel, díí chí maaⁿ ní nguéeé diiⁿ di tan'dúú^{cā} chi ngaⁿa ley yeⁿe Israel ti maaⁿ ní i'téenu di Cristo, táácā cúúví chí nguéeé che'e di ndúú^{cū} hermanos yeⁿe yú chi 'iiⁿ'yāⁿ gentiles ní diiⁿ di chi 'iiⁿ'yāⁿ s'eeⁿ nadacadínnuⁿ yā chi cánéé chí díⁿ yā tan'dúú^{cā} chi ngaⁿa ley yeⁿe 'iiⁿ'yāⁿ Israel chi judíos.

'Iiⁿ'yāⁿ Israel s'eeⁿ dáámá yā ndúú^{cū} tanáⁿā 'iiⁿ'yāⁿ yeⁿe iⁿ'yeeⁿdí 'cūū nánguaⁿai yā caavā chi i'téenu yā Jesucristo

¹⁵Ní s'uúúⁿ ní 'iiⁿ'yāⁿ Israel s'uúúⁿ ti 'tíicā ch'etiyáaⁿ yú ní nguéeé diiⁿ nuuⁿndí yú daama tan'dúú^{cā} chi diiⁿ tanáⁿā 'iiⁿ'yāⁿ gentiles chi nguée

yeⁿe ndaata yeⁿe yú. ¹⁶Ní s'uúúⁿ chi 'iiⁿ'yāⁿ Israel deenu yú chi Ndyuūs nguéeé nadach'εεcú yā nuuⁿndi yeⁿe yú ti idiiⁿ yú dámaaⁿ chi ngaⁿa ley yeⁿe yú. 'Tiicá ntúūⁿ Ndyuūs nguéeé nadach'εεcú yā nuuⁿndi yeⁿe nducyaaca 'iiⁿ'yāⁿ yeⁿe iⁿ'yeeⁿdí 'cūū ti díⁿ yā dámaaⁿ tan'dúú^{cā} chi ngaⁿa ley yeⁿe Moisés. Ndyuūs nadach'εεcú yā nuuⁿndi yeⁿe 'iiⁿ'yāⁿ chi i'téenu yā Jesucristo. Cáávā chuū s'uúúⁿ ní i'teenu yú Jesucristo ní Ndyuūs nadach'εεcú yā nuuⁿndi yeⁿe yú. Ti cucáávā ley yeⁿe yú mar 'áámá 'iiⁿ'yāⁿ chi díⁿ yā chi ngaⁿa ley miiⁿ cuuví yā perdonado, ti nguéeé nadach'εεcú ley miiⁿ nuuⁿndi yeⁿé yā.

¹⁷S'uúuⁿ ní i'téenu yú Jesucristo chi Jesucristo miiⁿ nadach'εεcú yā nuuⁿndi yeⁿe yú. 'Tíicā s'uúuⁿ ní ch'iⁿi yú chi dinuuⁿndi yú tan'dúú^{cā} tanáⁿā 'iiⁿ'yāⁿ yeⁿe iⁿ'yeeⁿdí 'cūū. Maaⁿ ní, 'áá cuaacu chi Cristo nginneé yā s'uúuⁿ ti idinuuⁿndi yú? Nguéeé 'tíicā. ¹⁸Nduuti chi s'uúúⁿ nadiⁿtuuvi yú 'áámá cosa chi ley yeⁿe yú ní 'cuiinuu ní nadin'dái ntúūⁿ yú ley miiⁿ chi n'giindiveeⁿ yú yeⁿē, tuuⁿmi ní dinuuⁿndi yú. ¹⁹Vmnááⁿ vmnaaⁿ idiiⁿ yú tan'dúú^{cā} chi ngaⁿa ley yeⁿē yú naati nguéeé ngii idiiⁿ yú nducuéⁿē yeⁿē. Ní ley miiⁿ diiⁿ condenar s'uúúⁿ. Ní canee yú tan'dúú^{cā} 'iiⁿ'yāⁿ chi 'āā víí cā yeⁿē ley yeⁿe yú. Cáávā chuū ní maaⁿ ní ch'etinéé yú tan'dúú^{cā} chi neⁿe Ndyuūs. Ní Ndyuūs nadach'εεcú yā yeⁿē yú yeⁿe nuuⁿndi yeⁿe yú. Ní cáávā chuū cunduuchi yú cueⁿe daāⁿmaⁿ. ²⁰Taachi caⁿneeⁿngaⁿá yā Cristo, tuuⁿmi ní cánéé tan'dúú^{cā}

chi 'úú ntúúⁿ ca'neeⁿnga'á nduucú yā. Maaⁿ ní nguéeⁿ idííⁿ tan'dúúcā chi 'úú neⁿé ti idííⁿ chiiⁿ chi neⁿé Jesucristo ti Jesucristo chi daiya Dendyuūs canée yā na staava yeⁿé. Ní maaⁿ ní 'úú canduuchí ti i'teenú Daiyá Ndyuūs miiⁿ. Cristo miiⁿ dinéⁿe yā 'úú ní ca'a maáⁿ yā vida yeⁿe maáⁿ yā ní ch'ií yā caavā 'úú. ²¹Uú nguéeⁿ cuta'á vaadi n'dai yeⁿe Ndyuūs tan'dúúcā 'áamá cosa chiduuchi. Nduuti chi ley miiⁿ cuuví nach'εεcú nuuⁿndi yeⁿe yú tuu'mi ní nguéeⁿ ch'ií Cristo cucáávā s'uuúⁿ.

¿Áá i'teenú yú ley miiⁿ o i'teenú yú Cristo?

3 Ndís'tií 'iiⁿyāⁿ yeⁿe yáⁿāa Galacia, de'ε chúúcā chεεchi tiíⁿ nī. ¿Dú'ú chi nche'ei ndís'tií chi maaⁿ ní nguéeⁿ n'giindiveéⁿ nī nduudu cuaacu? Ngaⁿá nduudu cuaacu nanááⁿ ndís'tií ní ndís'tií déenu nī chi iiⁿyāⁿ chi'neeⁿnga'á yā Jesucristo na cruz cucáávā nuuⁿndi yeⁿe nducyaaca 'iiⁿyāⁿ. ²Chuū neⁿé chi 'cuuvi nī 'úú: ¿Áá sta'á nī Espíritu N'dai yeⁿé Ndyuūs cucáávā chi dííⁿ nī tan'dúúcā chi ngaⁿā ley yeⁿé Moisés, o cucáávā chi n'giindiveéⁿ nī nduudu cuaacu yeⁿé Ndyuūs ní i'téenu nī? ³¿De'ε chúúcā chεεchi tiíⁿ nī? Áā i'téenu nī nduudu yeⁿé Ndyuūs nī sta'á nī Espíritu N'dai yeⁿé Ndyuūs. Maaⁿ ní neⁿé nī ndúúcū fuerzas yeⁿe maáⁿ nī dííⁿ nī tan'dúúcā chi ngaⁿa ley caati Ndyuūs cuuvi n'diichí yā chi n'daacā idííⁿ nī. ⁴Áā ch'eenu taaví nī chií cucáávā chi i'téenu nī Cristo. Maaⁿ ní chuū nguéeⁿ dichíí'vē ndís'tií, nduuti chi nadacadaamí nī yeⁿe

yā. Áā deenú chi dichíí'vē ndís'tií nduuti chi 'cuεetinée nī ndúúcū Cristo. ⁵Ndyuūs tee yā ndís'tií Espíritu N'dai yeⁿé Ndyuūs ní dííⁿ yā vaadi n'giinu nguaaⁿ ndís'tií. ¿Áá dííⁿ Ndyuūs chuū caati ndís'tií 'āā dííⁿ nī tan'duucā chi ngaⁿa ley? Nguεε 'tíicā. Ndyuūs dííⁿ yā vaadi n'giinu nguaaⁿ ndís'tií caati i'téenu nī nduudu cuaacu yeⁿé yā.

⁶Ndii cuááⁿ vmnaaⁿ nduudu yeⁿé Ndyuūs ngaⁿa yeⁿe Abraham chi 'āā n'dii. Abraham chi'téenu yā Ndyuūs ní Ndyuūs diiⁿ cuenta yā chi'téenu Abraham ní nadach'εεcú yā nuuⁿndi yeⁿé yā. ⁷Cáávā chuū deenu nī chi 'iiⁿyāⁿ chi i'téenu yā nduudu yeⁿé Ndyuūs, cuaacu nííⁿnyúⁿ ní yeⁿe ndaata Abraham, caati i'téenu yā tan'dúúcā chi'téenu Abraham miiⁿ. ⁸Ndii cuaaⁿ vmnaaⁿ canée nguūⁿ na libro yeⁿe Ndyuūs chi Ndyuūs caⁿá yā nadach'εεcú yā nuuⁿndi yeⁿe 'iiⁿyāⁿ gentiles chi nguéeⁿ yeⁿe ndaata Abraham o Israel nduuti chi i'téenu yā Ndyuūs. Chuū Ndyuūs ngaⁿá yā ngii yā Abraham ndii tiempo chi 'āā ch'ó'oo, vmnaaⁿ chi dííⁿ yā. 'Tíicā ngaⁿa Ndyuūs ndúúcū Abraham: 'Uú caaⁿmáⁿ chi di'viicú 'iiⁿyāⁿ yeⁿe nuuⁿmáⁿ íⁿyeēⁿdí nduuti chi cu'téenu yā 'úú tan'dúúcā chi díí i'téenu di 'úú. ⁹Tan'dúúcā Abraham chi'téenu yā Ndyuūs ní Ndyuūs ca'a yā Abraham vaadi n'dai yeⁿé yā ní 'tiicá ntúūⁿ Ndyuūs ca'a yā vaadi n'dai yeⁿé yā nducyáácā 'iiⁿyāⁿ chi cu'téenu yā Ndyuūs.

¹⁰Nducyáácā 'iiⁿyāⁿ chi nadacadíínuuⁿ yā na staava yeⁿe yā chi Ndyuūs nadach'εεcú yā nuuⁿndi yeⁿe yā ti dííⁿ yā tan'dúúcā chi

ngaⁿa ley miiⁿ 'iiⁿ'yāⁿ s'eeⁿ nan'dai yā ní cánée yā condenado, ti mar 'áámá 'iiⁿ'yāⁿ cuuvi dííⁿ yā nducuéⁿē chi ngaⁿa ley miiⁿ. Canée nguūⁿ ndii cuááⁿ vmnaaⁿ na libro yeⁿ'é Ndyuūs 'tíicā: 'Iiⁿ'yāⁿ chi nguée dííⁿ yā tanducuéⁿē chi canée nguūⁿ na ley yeⁿ'e Moisés chii yā condenado. ¹¹S'uuúⁿ ní deenu yú chi Ndyuūs nguée nadach'εcú yā nuuⁿndi yeⁿ'é 'iiⁿ'yāⁿ caava chi diiⁿ yā chi ngaⁿa ley ti 'tíicā canée nguūⁿ na libro yeⁿ'é Ndyuūs: Ndyuūs nadach'εcú yā nuuⁿndi yeⁿ'é 'iiⁿ'yāⁿ chi i'téenu yā ní ca'a yā 'iiⁿ'yāⁿ s'eeⁿ vida cueⁿ'e daāⁿmaⁿ. ¹²Ní ley yeⁿ'e Moisés miiⁿ ní nguée ngaⁿa chi 'iiⁿ'yāⁿ cu'téenu yā Jesucristo caati 'tíicā canée nguūⁿ na libro yeⁿ'e Dendyuūs ndii cuááⁿ vmnaaⁿ: 'Iiⁿ'yāⁿ chi diiⁿ tanducuéⁿē dendu'ū chi ngaⁿa ley miiⁿ 'cuεtinée yā ndúúcu vida cueⁿ'e daāⁿmaⁿ.

¹³Cucáāvā ley miiⁿ deenu yú chi diiⁿ yú nuuⁿndi ní canee yú condenado. Ní nguée canee yú condenado cáāvā ley miiⁿ ti Jesucristo dííⁿ yā tan'dúúccā chí canée yā condenado. Ní sta'á yā lugar yeⁿ'e nducyaaca 'iiⁿ'yāⁿ chí vée nuuⁿndi yeⁿ'é yā ní can'diicú yā na cruz. 'Tíicā canée nguūⁿ na libro yeⁿ'é Ndyuūs: Condenado taanduvée 'iiⁿ'yāⁿ chí ch'ii tí can'diicú yā na 'áámá yáⁿá. ¹⁴Chuū chí chii. Maaⁿ níícu 'iiⁿ'yāⁿ gentiles cuuvi diiⁿ yā recibir vaadi n'dai yeⁿ'é Dendyuūs tan'dúúccā Ndyuūs caⁿ'a yā ndúúcu Abraham, ni chi ca'a yā nducyaaca 'iiⁿ'yāⁿ gentiles chí i'téenu yā Jesucristo. Íícu s'uuúⁿ ndúúcu 'iiⁿ'yāⁿ gentiles chí i'teenu yú Jesucristo cuta'a yú Espíritu N'dai yeⁿ'e

Ndyuūs chí Ndyuūs caⁿ'a yā chí ca'a yā 'iiⁿ'yāⁿ.

Ley yeⁿ'e Moisés ndúúcu compromiso chí Ndyuūs ca'a yā

¹⁵Ndíⁿs'tii hermanos yeⁿ'é, n'diichí ní tan'dúúccā 'aama ejemplo yeⁿ'e 'iiⁿ'yāⁿ yeⁿ'e iⁿ'yeeⁿdí 'cūū tan'dúúccā chí idiíⁿ yā taachi vée papel chí cuaacu yeⁿ'e 'áámá compromiso yeⁿ'é yā. Canee ngiinú yā ní dingúⁿ yā 'aama papel chí cuaacu. Maaⁿ ní chí canée nguūⁿ ní cuaacu chí mar 'áámá 'iiⁿ'yāⁿ nguεε nadiví yā ndíí nguée ndúú íintiinee ra yā chíⁿ chí canée nguūⁿ. ¹⁶Tíicā ntúūⁿ, Ndyuūs ndii vmnááⁿ vmnaaⁿ ca'a yā promesa Abraham ndúúcu nducyaaca 'iiⁿ'yāⁿ ndaata yeⁿ'e yā chí cuchii cuayivi. Canée nguūⁿ na libro yeⁿ'e Ndyuūs 'tíicā: Nguée ngaⁿa yeⁿ'e ndaata chí n'dee n'dái yeⁿ'e Abraham tan'dúúccā chí 'yaaⁿ yā ti ngaⁿa tan'dúúccā chí yeⁿ'e 'aama 'iiⁿ'yāⁿ yeⁿ'e Abraham ní 'iiⁿ'yāⁿ miiⁿ chí Jesucristo. ¹⁷Chuū ngaⁿ'á cuaacu yeⁿ'e compromiso chí idi'cuaacú yā cáāvā Cristo: Ndyuūs dííⁿ yā 'áámá compromiso ndúúcu Abraham chí canée nguūⁿ. Cho'oo cuūⁿ ciento canee ndiicú ndíichí nduuyū ní Ndyuūs ca'a yā ley Moisés. Ley miiⁿ nguée cuuvi diví 'aama lado compromiso yeⁿ'e Ndyuūs chí ca'a yā vmnááⁿ vmnaaⁿ ní diiⁿ chí nguée dichí'vε compromiso yeⁿ'é yā. ¹⁸Ndúúti chí Ndyuūs téé yā chí cuuvi yeⁿ'e yú cáāvā chí diiⁿ yú tan'dúúccā chí ngaⁿa ley miiⁿ tuu'mi ní 'āā ntée téé yā chí cuuvi yeⁿ'e yú cáāvā compromiso. Ndyuūs ca'a yā Abraham chí cuuvi yeⁿ'e yā cáāvā compromiso chí dííⁿ yā ndúúcu yā.

¹⁹¿De'ε dichí'vε ley tuu'mi? Ndyuūs ca'a yā 'iiⁿ'yāⁿ ley miiⁿ chí cuuvi deenu yú chí vée nuuⁿndi

yeⁿe yú. Ní ley miiⁿ canee ndii tiempo chí ndaā Cristo Daiya Dendyuūs iⁿ'yeeⁿdí 'cūū. Cristo miiⁿ 'iiⁿ'yāⁿ yeⁿe compromiso chi Ndyuūs caⁿa yā chí ca'a yā. Ndyuūs dich'o yā ángeles chí ca'a yā ley Moisés. Moisés miiⁿ ní saⁿ'ā chí canee naavtaⁿ'ā yeⁿ'é 'iiⁿ'yāⁿ ndúúcū Ndyuūs. ²⁰Taachi Ndyuūs ca'a yā compromiso ndúúcū Abraham, nguée cānee 'aama saⁿ'ā naavtaⁿ'ā yeⁿ'é yā ndúúcū Abraham, nguée ti tan'dúúcā Moisés miiⁿ.

Yeⁿe chi diiⁿ ley yeⁿe Moisés

²¹¿Áá ley miiⁿ contra compromiso yeⁿe Dendyuūs? Nguεε 'tíicā. Nduuti chí Ndyuūs cuuvi ca'a yā 'áámá ley chí cuuví ca'a vida cueⁿe daāⁿmaⁿ 'iiⁿ'yāⁿ, tuuⁿmi ní 'āā ntée vεε nuuⁿndi yeⁿ'é 'iiⁿ'yāⁿ caavā ley miiⁿ. ²²Naati canée nguūⁿ na libro yeⁿ'é Ndyuūs chí nducyáácá 'iiⁿ'yāⁿ vée nuuⁿndi yeⁿ'e yā ti nguée diíⁿ yā cumplir ley miiⁿ. Cáávā chuū canée chí i'téenu yú Jesucristo ní Ndyuūs cuuvi téé yā s'uuúⁿ vida cueⁿe daāⁿmaⁿ cucáávā compromiso miiⁿ.

²³Taachi 'āā cuée ndaā Jesucristo caavā chí cuuvi cu'téenu yú Jesucristo, tuuⁿmi ní ch'εetinée yú maaⁿ poder yeⁿ'e ley. 'Tíicā ch'εetinée yú ndíí tiempo chí Ndyuūs dich'o yā Jesucristo na iⁿ'yeeⁿdí 'cūū ní 'íicú cuuvi cu'téenu yú Jesucristo. ²⁴Ley miiⁿ canee tan'dúúcā criada yeⁿ'e s'uuúⁿ chí diiⁿ cuidado s'uuúⁿ ndíí tiempo chí ndaā Cristo. Maaⁿ ní cucáávā chí i'téenu yú Jesucristo tuuⁿmi ní Ndyuūs nadich'εécú yā nuuⁿndi yeⁿ'e yú. ²⁵Ní taachi ndaā Jesucristo miiⁿ ní i'teenu yú 'yā, nguée canee yú maaⁿ

poder yeⁿ'e ley miiⁿ chí ley miiⁿ nguée diiⁿ cuidado s'uuúⁿ.

²⁶Maaⁿ ní nducyaaca yú ní daiya Dendyuūs s'uuúⁿ caavā chí i'teenu yú Jesucristo. ²⁷Caati nducyaaca yú chí ch'εedínuūⁿni ti i'teenu yú Jesucristo, s'uuúⁿ ní canee yú tan'dúúcā chí vée vestido ngai yeⁿ'ē yú ní canee yú tan'dúúcā Jesucristo ti yeⁿ'é yā s'uuúⁿ. 'Tíicā s'uuúⁿ.

²⁸Maaⁿ ní nguée de'ē vεε ndíí nduuti chí s'uuúⁿ ní 'iiⁿ'yāⁿ yeⁿ'e ndaata Israel, o 'iiⁿ'yāⁿ yeⁿ'e ndaata griego, o criada chí yeⁿ'ē 'áámá patrón, o 'iiⁿ'yāⁿ chí libre yā, o saⁿ'ā o n'daataa ti nducyaaca s'uuúⁿ ní tan'dúúcā 'áámá s'uuúⁿ nūuⁿ cucáávā chí i'teenu yú Jesucristo ní yeⁿ'é Cristo s'uuúⁿ. ²⁹Ndúúti chí s'uuúⁿ ní yeⁿ'ē Cristo s'uuúⁿ tuuⁿmi ní s'uuúⁿ ní yeⁿ'e ndaata Abraham s'uuúⁿ, ní vée chí cuuvi yeⁿ'e yú yeⁿ'ē compromiso ti 'tíicā Ndyuūs caⁿa yā ndúúcū Abraham chí téé yā s'uuúⁿ.

4 Maaⁿ ní neⁿ'é caaⁿ'máⁿ chuū ndís'tií yeⁿ'e 'áámá saⁿ'ā n'gaiyāá chí vée chí cuuvi yeⁿ'e sa. Taachi saⁿ'ā 'lílⁿ sa canee sa tan'dúúcā 'aama mozo ni idiíⁿ sa chiiⁿ chí ngaⁿ'ā 'iiⁿ'yāⁿ chí ch'εetinée yā ná vaacu sa. 'Áará chí vεε chí cuuvi yeⁿ'e sa nducuéⁿ'ē. ²Saⁿ'ā 'lílⁿ sa canee sa ndúúcū 'iiⁿ'yāⁿ chí diiⁿ cuidado yeⁿ'ē sa ní ndúúcū 'iiⁿ'yāⁿ chí ngaⁿ'a ntiíⁿnyuⁿ yeⁿ'e nducuéⁿ'ē chí yeⁿ'ē sa. 'Tíicā canee sa ndii tiempo chí ngaⁿ'ā chiida sa ní vée nduuyu yeⁿ'ē sa. Tuuⁿmi ní 'iiⁿ'yāⁿ ca'a yā nducuéⁿ'ē chí cuuvi yeⁿ'ē sa. ³'Tiicá ntúūⁿ s'uuúⁿ Taachi nguée deenu yú yeⁿ'e Cristo, tuuⁿmi ní canee yú tan'dúúcā n'gaiyāá yú chí nguée iincheenaaⁿ yú. Ní canee yú

maaⁿ poder yeⁿe ley yeⁿe yú ní diiⁿ
yú chi ngaⁿá ley yeⁿe yú ndúúcū
costumbre yeⁿe yú. ⁴Taachi snuūⁿ
ca'ā nguuvī miiⁿ Ndyuūs dichó'o
yā Daiya yā iⁿyeⁿé dī' cūū. Ní
ch'iindiyáaⁿ yā yeⁿé 'áámá n'daataá
chi yeⁿé ndaata Israel, yeⁿé 'iiⁿyāⁿ
chi diíⁿ yā chí ngaⁿa ley yeⁿe
Moisés. ⁵Ní saⁿá miiⁿ ní ndaā sa
ní nadanguáⁿai sa s'uuúⁿ chí 'iiⁿyāⁿ
Israel s'eeⁿ chi snéé yú ndúúcū ley
yeⁿé Ndyuūs ndúúcū 'iiⁿyāⁿ gentiles
ndúúcū costumbres yeⁿé yā, 'iiⁿyāⁿ
s'eeⁿ chi nguéé yeⁿé ndaata Israel,
níícú nducyaaca yú cuuvi daiya sa
s'uuúⁿ.

⁶Maaⁿ ní nducyaaca s'uuúⁿ ní
daiya Ndyuūs s'uuúⁿ. Ní Ndyuūs
dichó'o yā Espíritu yeⁿé Daiya
yā chi Cristo na staava yeⁿe yú.
Espíritu miiⁿ chííⁿ chí diiⁿ chi cuuvi
caaⁿmaⁿ yú 'tíicā: N'dii Ndyuūs
Chiidá. ⁷Maaⁿ ní s'uuúⁿ nguéé
tan'dúúcā mozos s'uuúⁿ ti daiyá
Dendyuūs s'uuúⁿ. Ní ndúúti chi
daiyá yā s'uuúⁿ tuu'mí Ndyuūs caⁿa
yā ca'a yā s'uuúⁿ chi cuuvi yeⁿe yú
tan'dúúcā chi ngaⁿa yā ti i'teenu yú
Cristo.

**Pablo idiíⁿ yā cuidado yeⁿe
'iiⁿyāⁿ chi i'téenu Jesucristo**

⁸Vmnááⁿ vmnaaⁿ taachi nguéé
n'diichí nī Ndyuūs, ndís'tií chi
nguéé yeⁿé 'iiⁿyāⁿ yeⁿe ndaata
Israel dííⁿ nī ntiíⁿnyuⁿ caavā ídolos
chi nguéé dendyuūs s'eeⁿ. ⁹Maaⁿ
ní chi n'diichí nī Ndyuūs o más cā
n'daacā chi caaⁿmáⁿ chi Ndyuūs
chi n'diichí yā ndís'tií chi yeⁿé
yā taacā chi maaⁿ ní nguécúndii
ntúuⁿ nī ní neⁿé nī dííⁿ nī dendúú
cosas chi nguéé cuuvi nanguaⁿai

yú. Dé'ē cuuvi chi neⁿé nī cunée nī
tan'duucā 'áámá mozo yeⁿé cosas
chi 'tíicā. ¹⁰Ndís'tií ní dī'viicú nī
nguuvī s'eeⁿ, ndúúcū 'iiyū, ndúúcū
tiempo, ndúúcū nduūyū ti neⁿé
nī caⁿá nī favor yeⁿé Ndyuūs.

¹¹Ndís'tií hermanos yeⁿé, 'va'a yeⁿe
ndís'tií ti nguéé dichíí'vē nduudu
cuaacu chi ngaⁿá nguaaⁿ ndís'tií.

¹²Ndís'tií hermanos yeⁿé dī'cuiitú
nī chi diíⁿ nī tan'dúúcā chi 'úú
idiíⁿ, ní divíí nī yeⁿe ley ti 'úú
divíí yeⁿe ley miiⁿ ti neⁿé dííⁿ
tan'dúúcā ndís'tií chi nguéé deenú
nī ley. Taachí ngaⁿá nduudu cuaacu
nguaaⁿ ndís'tií, ndís'tií ní dīn'dái
nī nduucú. ¹³Ndís'tií deenu nī chi
vmnááⁿ vmnaaⁿ chí'cueéⁿ ndís'tií
nduudu yeⁿé Ndyuūs ní ngíítā
'úú. ¹⁴Ndís'tií nguéé taanduvéé dííⁿ
nī nduucú chi nguéé neⁿé nī 'úú
cáávā ca'ai chi canuuⁿ 'úú chi idiíⁿ
sufrir. Ní 'cuuⁿ nī 'úú ní sta'a nī 'úú
tan'dúúcā chi 'úú 'áámá ángel yeⁿé
Dendyuūs chi ndaā nanááⁿ ndís'tií.
Ní sta'a nī 'úú tan'dúúcā chi 'úú ní
Cristo 'úú. ¹⁵¿Dé'ē cuuvi chi maaⁿ
ní nguéé yeenú nī nduucú ní nguéé
neⁿé nī 'úú? 'Úú ngaⁿá nduudu
cuaacu chi vmnááⁿ vmnaaⁿ neⁿé
nī 'úú ti nduuti chí cuuvi tun'dáa nī
nduutinaáⁿ nī maáⁿ nī chi téé nī 'úú.
¹⁶Maaⁿ ní 'áá enemigo yeⁿé nī 'úú ti
ngii chēechí ndís'tií nduudu cuaacu.
¹⁷Véé 'iiⁿyāⁿ chi ndaā nguaaⁿ
ndís'tií chi ngaⁿá yā chi neⁿé yā
ndís'tií naati nguéé n'daacā idiíⁿ yā.
Neⁿé yā chi ndaacadáámí ndís'tií
yeⁿé nduudu cuaacu ní 'caandiveéⁿ
nī yeⁿe 'iiⁿyāⁿ. ¹⁸N'dáácā chi 'iiⁿyāⁿ
ngaⁿa yā chi neⁿe yā ndís'tií nduuti
chi dííⁿ yā chi n'daacā ndúúcu nī. Ní
'iiⁿyāⁿ s'eeⁿ ní dííⁿ yā 'túúcā nguéé

dámaāⁿ taachi 'úú caneé nguaaⁿ ndís'tií. ¹⁹Ndís'tií hermanos yeⁿ'é, ndís'tií tan'dúúcā daiyá 'tíicā ndís'tií. Ti taachi ngaⁿ'á nduudu cuaacu nanáaⁿ ndís'tií, 'úú díiⁿ sufrir tan'dúúcā 'aama n'daataa diiⁿ tá sufrir taachi ch'iindiyaāⁿ dacuá'āa. 'Tíicā idiíⁿ ndii tiempo chi i'téenu nī Jesucristo ní yeⁿ'é yā ndís'tií. 'Tíicā idiíⁿ sufrir taama vmnéⁿ'ēe ti neⁿ'é chi ndís'tií ch'iⁿ'í nī chi cuaacu níiⁿnyúⁿ i'téenu nī Cristo. ²⁰Maaⁿ ní neⁿ'é cuneé ndúúcū ndís'tií ní cunnee ndís'tií ti nguée deenú táácā cuuvi díiⁿ nduucú ndís'tií taachi yaⁿ'ái caneé yeⁿ'e nī.

'Áamá ejemplo chi historia yeⁿ'ē n'daataa Agar ndúúcū n'daataa Sara

²¹Ndís'tií chi neⁿ'é nī canee nī ndúúcū ley yeⁿ'e Moisés, 'cuuvi nī 'úú: ¿Áá nguée déenu nī chi ngaⁿ'a ley miiⁿ? ²²Canee nguūⁿ na libro yeⁿ'é Ndyuūs chi Abraham ní vée 'uūvi daiya yā. 'Aama daiya yā ní yeⁿ'e táⁿ'ā chi canee caadi 'iyyū. Ní táámá daiya yā ní yeⁿ'ē n'daataa yeⁿ'e yā chi nguée criada. ²³Daiya yā chi yeⁿ'e táⁿ'ā chi canee caadi 'iyyū ch'iindiyaāⁿ sa ti Abraham neⁿ'e yā daiya yā. Naati táámá daiya táámá n'daataa chi n'daataa yeⁿ'é yā, ch'iindiyaāⁿ sa cucáávā compromiso chi díiⁿ Ndyuūs. Ni maaⁿ níicú chiī compromiso chí caⁿ'a Ndyuūs chí ca'a yā daiya Abraham. ²⁴Chuū ní 'áamá historia ní 'áamá comparación yeⁿ'e táⁿ'ā criada miiⁿ ndúúcū táⁿ'ā chi n'daataa yeⁿ'e Abraham. Ndyuūs díiⁿ yā contratar cucáávā nduu 'uuvi cosas chi Ndyuūs cānee yiinú yā chi diiⁿ yā. Táⁿ'ā criada miiⁿ

ní nguuvi tá Agar ní 'áamá seña tan'dúúcā chi Ndyuūs cānee yiinú yā ní ca'a yā ley Moisés miiⁿ na 'cuēti Sinaí. Nducyaaca 'iiⁿ'yāⁿ chi caneé yā maaⁿ poder yeⁿ'e ley miiⁿ tan'dúúcā criada yeⁿ'e ley 'tíica yā. Ní tan'dúúcā criada Agar ndúúcū daiyá yā canee caadi 'iyyu, 'tíica yā. ²⁵Ndyuūs ch'iⁿ'í yā s'uuúⁿ chi Agar miiⁿ ní 'áamá seña tan'dúúcā chi 'cuēti Sinaí na yāⁿ'āa Arabia 'tíica yā. 'Tiicā ntúūⁿ táámá seña tan'dúúcā 'iiⁿ'yāⁿ Israel s'eeⁿ chi ye'e yāⁿ Jerusalén ti 'iiⁿ'yāⁿ yeⁿ'e yāⁿ Jerusalén miiⁿ canee yā maaⁿ poder yeⁿ'e ley yeⁿ'e Moisés. Ní canee yā tan'dúúcā criados yeⁿ'ē ley miiⁿ. ²⁶Naati Ndyuūs ch'iⁿ'í yā s'uuúⁿ chi n'daataa chi nguuvi Sara chi nguée criada ní 'áamá seña tan'dúúcā chi yāⁿ Jerusalén chí ngai chí canee na va'ai cheēti nguuvi. Ní yāⁿ yeⁿ'e nducyaaca yú chi i'teenu yú Jesucristo. ²⁷Canee nguūⁿ ndii cuááⁿ vmnaaⁿ na nduudu yeⁿ'é Ndyuūs, 'tiicā:

Ndís'tií n'daata s'eeⁿ chi nguée chiīndi daiyá nī cuuvi yeenu taavi nī. Ní 'cuai nī ní caaⁿ'máⁿ nī ndúúcū vaadi yeenú 'aara chi nguée vée daiya nī. Ti ndís'tií chi libre chi nguée daiyá nī cuuvi más ca daiyá nī nguée ti n'daataa criada chi vée daiyá yā yeⁿ'e isaⁿ'ā yeⁿ'é nī.

²⁸Ndís'tií hermanos yeⁿ'é, 'tíicā s'uuúⁿ tan'dúúcā daiya chi nguuvi Isaac chi yeⁿ'ē Abraham ndúúcū Sara 'tíicā s'uuúⁿ. Ní Ndyuūs tee yā compromiso s'uuúⁿ ti 'tiicā Ndyuūs ngaⁿ'a yā chí ca'a yā Abraham miiⁿ daiyá yā Isaac miiⁿ tí Isaac miiⁿ

ní yeⁿé compromiso, 'tíicā s'uuúⁿ.
²⁹'Tíicā tiempo chi 'āā chó'ōo
 Ndyuūs idiíⁿ yā chi saⁿā daiya
 criada chi daiya Abraham caati
 neⁿe yā daiya yā, daiya criada miiⁿ
 can'dāa sa saⁿā daiya Sara caati
 daiya Sara ndúúcu Abraham ní
 yeⁿe compromiso chi diiⁿ Ndyuūs
 ndúúcu Abraham. 'Tíicā maaⁿ ní,
 'iiⁿyāⁿ chi cānee yā maaⁿ poder
 yeⁿe ley yeⁿe Moisés ní nguéeⁿ
 yeⁿe Señor Jesucristo. 'Iiⁿyāⁿ s'eeⁿ
 can'dāa yā s'uuúⁿ ní diíⁿ yā chi diiⁿ
 yú sufrir ti i'teenu yú Jesucristo.
 Ní canée yú ndúúcu Espíritu N'dai
 yeⁿé Ndyuūs cáávā compromiso
 yeⁿé yā. ³⁰Naati canée nguūⁿ na
 libro yeⁿé Ndyuūs ndii cuááⁿ
 vmnaaⁿ 'tíicā: Cuaaⁿ chuva'āi f'neēⁿ
 táⁿā chi canée caadi 'iiyū ndúúcu
 daiya tá ti nguéeⁿ dē'ē vεε chi
 tuneⁿ daiya táⁿā chi canée caadi
 'iiyū yeⁿé chi cuuvi yeⁿe saⁿā chi
 daiya táⁿā Sara chi libre. ³¹Ndís'tii
 hermanos yeⁿé, cáávā chuū s'uuúⁿ
 ní nguéeⁿ tan'dúúca chi daiya táⁿā
 chi canée caadi 'iiyū s'uuúⁿ, ti s'uuúⁿ
 tan'dúúca chi daiya táⁿā chi libre
 'tíicā s'uuúⁿ.

**Cunée diitū yú ndúúcu chi
 i'teenu yú ti libre yú**

5 Maaⁿ ní Cristo nadanguáⁿai
 yā s'uuúⁿ yeⁿe maaⁿ poder
 yeⁿe ley. Caavā chúu 'cuεetinéeⁿ
 n'daaca yú caati i'teenu yú Cristo.
 Ní nguéeⁿ nguεεcunée yú ní diiⁿ yú
 tan'duucā chi ngaⁿa ley. Ní nguéeⁿ
 canee yú tan'dúúca 'iiⁿyāⁿ chi canée
 caadi 'iiyū.

²Ndís'tii 'caandiveéⁿ nī. 'Úú,
 Pablo, ngaⁿá ngii ndís'tii. Nduuti
 chi ndís'tii saⁿā ca'a nī lugar chí

'iiⁿyāⁿ diíⁿ yā circuncidar ndís'tii
 tuu'mi ní nguéeⁿ cuuvi cuta'á nī
 yeⁿé vaadi n'dai chi Cristo neⁿé
 yā téé yā ndís'tii. ³Ngaⁿá ntuūⁿ
 chi nducyaaca saⁿā chi canée sá
 circuncidado canée chi diiⁿ sa
 cumplir nducuéⁿé chi ngaⁿa ley
 miiⁿ. ⁴Nduuti chi nadacadíinuⁿ
 nī chi ndís'tii nanguáⁿai nī yeⁿe
 nuuⁿndi yeⁿe nī cucáavā ley miiⁿ
 tuu'mi ní 'āā divíi nī Cristo 'áámá
 lado. Ní Cristo miiⁿ nguéeⁿ téé yā
 ndís'tii dendú'ū chi n'dai ca yeⁿe
 yā cucáavā chi dineⁿe cá yā s'uuúⁿ.
⁵Ti s'uuúⁿ chi i'teenu yú Jesucristo
 canée yú ndúúcu Espíritu N'dai
 yeⁿé Ndyuūs chi nginneⁿ s'uuúⁿ.
 Ní canee ngiinu yú chi nguéeⁿ véeⁿ
 nuuⁿndi yeⁿe yú nanááⁿ Ndyuūs.
⁶S'uuúⁿ chi saⁿā s'uuúⁿ nguéeⁿ
 dichí'vε nduuti chi 'iiⁿyāⁿ diíⁿ yā
 circuncidar s'uuúⁿ o nguéeⁿ. Chuū
 dichí'vε chi i'teenu yú Jesucristo.
 Ní cáávā chuū neⁿe yú 'iiⁿyāⁿ.

⁷Nguuvi chi chó'ōo ndís'tii n'daacā
 i'téenu nī Jesucristo naati maaⁿ ní
 nguεε 'tíicā. ¿Du'ú di'vaachi yeⁿe
 nī chi nguεε n'giindiveéⁿ nī nduudu
 cuaacu yeⁿé Cristo? ⁸Ndyuūs nguéeⁿ
 dí'vaachi yā ndís'tii ti Ndyuūs miiⁿ
 yaa'ví yā ndís'tii chi cuuvi yeⁿé yā
 ndís'tii. ⁹Iiⁿyāⁿ chi di'vaachí yā
 ndís'tii ní tan'duucā ta 'líiⁿ chúúndí
 levadura chí nadicuéeⁿ tanducuéⁿé
 yaāchi, 'tíica yā. ¹⁰Véeⁿ confianza
 yeⁿé ndúúcu Señor Jesucristo
 ní 'úú ní deenú chi ndís'tii nguéeⁿ
 n'giindiveéⁿ nī nduudu yeⁿe 'iiⁿyāⁿ
 chí di'vaachi yā ndís'tii. Ndyuūs dííⁿ
 yā castigar 'āā du'ú nūuⁿ 'iiⁿyāⁿ chí
 di'vaachi ndís'tii.

¹¹Ndís'tii hermanos yeⁿé, nduuti
 chi ndíí maaⁿ 'úú ngaⁿá chí

saⁿā gentiles canee chi canéé circuncidado tuu^mi ní 'iiⁿyāⁿ Israel chí judío s'eeⁿ nguéeé can'dáa yā 'úú chi ya'āi 'úú. Nguéeé 'tíicā. 'Iiⁿyāⁿ Israel s'eeⁿ can'dáa yā 'úú ti 'úú ngaⁿá chi Jesucristo nadanguáⁿai yā 'iiⁿyāⁿ ti ch'iⁿi yā na cruz cáávā nuuⁿndi yeⁿé yā. ¹²N'daacā chi 'iiⁿyāⁿ chi di'vaachi yā ndís'tii divíi yā yeⁿē nguaaⁿ ndís'tii.

¹³Ndís'tii hermanos yeⁿé, Ndyuūs yaa'ví yā s'uuúⁿ ní nguéeé canée yú maaⁿ poder yeⁿe ley ti libre yú. Maaⁿ ní chi libre yú nguéeé diiⁿ yú dendu'ū chi neⁿe yú yeⁿe cosas chi véé iⁿ'yeeⁿdí, naati dineⁿe yú 'aama yú ndúúcū taama yú. Ní cunnee yú vi'í cucáávā chi neⁿe yú vi'í. ¹⁴S'uuúⁿ cuuvi diiⁿ yú nducuéⁿē chi ngaⁿa ley ndúúti chí diiⁿ yú tan'dúúcā chí ngaⁿa 'tíicā: Dinéⁿe yú nducyaaca 'iiⁿyāⁿ tan'duucā chi dinéⁿe yú maāⁿ yú. ¹⁵Ndúúti chi nguéeé neⁿe yú 'aama yú taama yú tuu^mi ní diiⁿ yú tan'dúúcā chi che'e yú 'aama yú taama yú; cuin'diichi yú ti cuuvi ituuvi yú 'aama yú taama yú.

Lo que chi neⁿe yú diiⁿ yú ndúúcū chi neⁿe Espíritu N'dai yeⁿe Ndyuūs chi diiⁿ yú

¹⁶'Caandiveéⁿ nī chuū chi ngaⁿá: Canee yú chí 'cuēeti chiicá yú tan'dúúcā chi Espíritu N'dai yeⁿé Ndyuūs ch'iⁿi s'uuúⁿ. Ní nguéeé diiⁿ yú tan'dúúcā chi neⁿe cuerpo yeⁿē yú. ¹⁷Ti chííⁿ chí neⁿe cuerpo yeⁿe yú chi diiⁿ yú nguéeé tan'dúúcā chi neⁿe Espíritu N'dai yeⁿé Ndyuūs chi diiⁿ yú. Ní Espíritu N'dai yeⁿé Ndyuūs ndúúcū chi neⁿe diiⁿ cuerpo yeⁿe yú nguéeé neⁿe 'aama

taama na staava yeⁿē yú. Chííⁿ chí nguéeé cuuvi diiⁿ yú ní chííⁿ chí neⁿe yú diiⁿ yú. ¹⁸Nduuti chí s'uuuⁿ idiíⁿ yú tan'dúúcā chi ch'iⁿi Espíritu N'dai yeⁿé Ndyuūs s'uuuⁿ tuu^mi ní nguéeé canee yú maaⁿ poder yeⁿe ley.

¹⁹Ti nuuⁿndi yeⁿe cuerpo chí 'iiⁿyāⁿ diiⁿ yā ní inaaⁿ yú, ní chúú: 'iiⁿyāⁿ chi n'giindivaacú yā ngaⁿá yā ndúúcū n'daataá o saⁿā yeⁿe taama yā. Saⁿā da'caiyāa caⁿá sa ndúúcū áámá n'daataá chi duuchi née sa taⁿā. 'Iiⁿyāⁿ chí dííⁿ yā dendu'ū chi nguéeé n'daacā, 'iiⁿyāⁿ s'eeⁿ ní nguéeé nadacadíínūⁿ yā taacā chí dííⁿ yā. ²⁰'Iiⁿyāⁿ i'teenú yā ídolos ndúúcū cosas chí nguéeé Ndyuūs ndúúcū nducueⁿē chí diiⁿ 'iiⁿyāⁿ chí yeⁿe chínгааtu. 'Iiⁿyāⁿ nduuvitaáⁿ yā ní n'dííte yā. Ní taán yā ní in'nuúⁿ yā vaadi 'caa'va. 'Iiⁿyāⁿ 'i'nuⁿ cheendí yā ní 'iiⁿyāⁿ dííⁿ yā chí véé divisiones nguaaⁿ vi'í yā. Ní dííⁿ yā chí véé vaadi 'caa'va. ²¹'Iiⁿyāⁿ neⁿé yā cosas tan'dúúcā chí véé yeⁿē tanáⁿa yā. Ní 'iiⁿyāⁿ n'giíⁿnúⁿ yā 'iiⁿyāⁿ. Ní 'iiⁿyāⁿ chí cúú'ví ndúúcū 'iiⁿyāⁿ chí n'dee n'dái nge'e ní idiíⁿ yā dendu'ū chí nguéeé n'daacā chí tan'dúúcā chuū. 'Úú ní ngaⁿá ngii ndís'tii chí divíi nī yeⁿe dendu'ū chuū tan'dúúcā chí áā ngaⁿá nguuvi chí áā cho'oo. 'Iiⁿyāⁿ chí idiíⁿ yā s'tuucā nguéeé de'ē vee cuuvi yeⁿé yā naachi Ndyuūs ngaⁿa ntiiⁿnyúⁿ yā.

²²Naati nduuti chí 'cuēeti chiicá yú tan'dúúcā chí ch'iⁿi Espíritu N'dai yeⁿé Ndyuūs s'uuuⁿ tuu^mi ní dineⁿe yú 'iiⁿyāⁿ. Ni yeenú taavi yú. Ní canéé vaadi 'diiⁿ na staava yeⁿe yú. Ní cucheé yú yeⁿe tanducuéⁿē

chi n'geenu yú ngii. Ní din'daaca yú ndúúcu ví'í ní diiⁿ yú nducuéⁿē chi n'dai ndúúcu ví'í. Ní 'áámá canee yú ndúúcu chi i'teenu yú. ²³Ní canee yú ndiicúⁿ. Ní diiⁿ yú cuidado chi diiⁿ yú cosas chi n'daacā. Espíritu N'dai yeⁿé Ndyuūs nginne s'uuúⁿ chi diiⁿ yú nducuéⁿē chuū chí n'daacā. Ní ley yeⁿe Moisés miiⁿ nguéeⁿ ngaⁿa chi nguéeⁿ cuuvi diiⁿ yú s'túúca. ²⁴S'uuúⁿ chi 'āā i'teenu yú Señor Jesucristo yeⁿe yú nguéeⁿ diiⁿ yú tan'duucā chi neⁿe cuerpo yeⁿe yú. Ní canee yú tan'dúúca chi 'āā ca'neeⁿngaⁿā yú nducueⁿē chi nguéeⁿ n'daacā chi neⁿe diiⁿ cuerpo yeⁿe yú, 'tíicā canee yú. ²⁵Nduuti chi candúúchí yú ndúúcu Espíritu N'dai yeⁿé Ndyuūs tuu'mi ní canéeⁿ chi 'cuēeti chiicá yú tan'dúúca chi n'giⁿi Espíritu N'dai yeⁿé Ndyuūs s'uuúⁿ. ²⁶Nguéeⁿ canéeⁿ chi din'geete yú chi véé vaadi 'caa'va nguaaⁿ s'uuúⁿ. Ní nguéeⁿ nguee yú 'aama yú taama yú.

**S'uuúⁿ cunnee yú 'aama
yú ndúúcu taama yú**

6 Ndís'tii hermanos yeⁿé chi dífⁿ nī tan'dúúca chi ch'iⁿi Espíritu N'dai yeⁿé Ndyuūs, nduuti chi 'áámá hermano yeⁿe yú 'āā dífⁿ yā nuuⁿndi ndís'tii canéeⁿ chí cunnee nī hermano miiⁿ. Diiⁿ n'daacā nī ndúúcu yā. Ní ch'iⁿi nī hermano miiⁿ chēē nuuⁿndi chi dífⁿ yā caati cuuvi nguēcúndi yā yeⁿe nuuⁿndi yeⁿe yā. Ndís'tii ntúūⁿ 'cuēetinēē nī cáácá nī ndúúcu cuidado ti nguéeⁿ dinuuⁿndí nī. ²Cunnée yú 'aama yú taama yú ní ya'āi 'iinu yú hermanos caava dendu'ū vaadi ya'āi chi yeⁿē 'aama yú taama yú. 'Tíicā ní diiⁿ yú

tan'dúúca chi Cristo caⁿ'a ntiiⁿnyúⁿ yā s'uuúⁿ.

³Nduuti chí 'áámá saⁿā nadacadínuuⁿ sa chí neenē ch'ēete sa ní nguēē 'tíicā, saⁿā miiⁿ nginnche'éí máaⁿ sa saⁿā. ⁴Ca'áámá ca'aama s'uuúⁿ ní canee chí tuumicádínuuⁿ yú nducuéⁿē chi diiⁿ yú. Tuu'mi ní cuuvi yeenu yú ti n'daacā cosas chi diiⁿ yú. Ní nguéeⁿ nadacadínuuⁿ yú yeⁿē ntiiⁿnyuⁿ yeⁿē taama 'iiⁿyāⁿ táácā chi diiⁿ yā. ⁵Caati ca'áámá ca'aama s'uuúⁿ canee chí cucheē yú yeⁿe nducueⁿē chí ch'ó'oo yeⁿē maaⁿ yú ní diiⁿ yú cuenta yeⁿē maaⁿ yú yeⁿe chí diiⁿ yú nguéeⁿ yeⁿē taamá yā.

⁶'Iiⁿyāⁿ chí n'geēⁿ nduudu yeⁿé Ndyuūs canéeⁿ chí cunneeⁿ yā tanáⁿā 'iiⁿyāⁿ chí ngi'cueeⁿ nduudu miiⁿ.

⁷Ndís'tii nguéeⁿ canee chí cannche'éí nī maaⁿ nī. Ndyuūs n'diichí yā ndís'tii ní nguéeⁿ cuuvi cannche'éí nī Ndyuūs. Nducueⁿē cosa chí idiiⁿ saⁿā tan'dúúca chí cúunū sa, ní chíiⁿ ntúūⁿ cútā'a sa cosecha yeⁿē sa. ⁸Nduuti chí diiⁿ yú tan'dúúca chí neⁿe cuerpo yeⁿē yú chí dinuuⁿndi yú tuu'mi ní dindai yú ní canee yú tan'dúúca 'áámá cosecha chí ngiīnū chí ngo'oo yeⁿē. Naati nduuti chí diiⁿ yú cosas chí ch'iⁿi Espíritu N'dai yeⁿé Ndyuūs s'uuúⁿ tuu'mi ní Espíritu N'dai yeⁿé Ndyuūs téē yā s'uuúⁿ vida cueⁿe daāⁿmaⁿ. Ní dendu'ū tan'dúúca cosecha yeⁿē chí diiⁿ yú téē yā s'uuúⁿ. ⁹Cáávā chuū nguéeⁿ canee chí cuuvi 'daān'di yú chí diiⁿ yú nducueⁿē chí n'daacā. ti ndaá nguuvi yeⁿē chí cuuvi cuta'a yú cosecha yeⁿē chí n'daacā idiiⁿ yú nduuti chí nguéeⁿ cuūnu

yú. ¹⁰Tan'dúúcā chi vée yaaⁿ yú din'daāca yú ndúúcū nducyaaca 'iiⁿyāⁿ. 'Tiicá ntúūⁿ din'daāca ca yú ndúúcū hermanos yeⁿe yú chi i'téenu yā Jesucristo.

Consejo yeⁿe Pablo ndúúcū saludos yeⁿé 'iiⁿyāⁿ

¹¹N'diichí nī 'téé cheete 'áámá caaca dinguún yeⁿé nī ndúúcū ta'á. ¹²'Iiⁿyāⁿ s'eeⁿ chi ngaⁿa yā ndís'tii chi canée chi cuuví nī circuncidado, 'iiⁿyāⁿ s'eeⁿ dííⁿ yā 'túúcā, ti neⁿé yā caⁿá yā favor yeⁿe 'iiⁿyāⁿ judíos chi Israel chi yeⁿe circuncisión chi canée ndúúcū ley yeⁿe yā. Ní nguée neⁿé yā chí 'cueenu yā cuuvi cáávā Jesucristo chí ch'ii yā na cruz. ¹³Saⁿa Israel s'eeⁿ chi 'āā circuncidado yā ní mar 'áámá yā nguée cuuvi dííⁿ yā tanducuéⁿe chi canée nguūⁿ na ley yeⁿé yā. Neⁿé yā chi ndís'tii saⁿā cuuví nī circuncidado. Ní 'iiⁿyāⁿ s'eeⁿ cuuvi yeenú yā ní ngaⁿá yā chi dich'ete yā maaⁿ yā 'iiⁿyāⁿ tí ndís'tii ntúūⁿ dííⁿ nī tan'duucā chi dííⁿ yā, ní candee nī marca yeⁿe circuncisión na cuerpo yeⁿe nī. ¹⁴'Úú nguée neⁿé caaⁿmánⁿ chi ch'ete yeⁿe mar 'áámá denduū yeⁿe iⁿ'yeeⁿdí 'cūū. Neⁿé caaⁿmánⁿ chi Jesucristo ch'ii yā na cruz caava nuuⁿndi yeⁿe nducyáácá

'iiⁿyāⁿ. Taachi Cristo ch'ii yā na cruz, 'tíicā tan'duucā chi cuerpo yeⁿé ch'ii ntúūⁿ. 'Tiicá ntúūⁿ ní caavā 'úú nducuéⁿe chi yeⁿe iⁿ'yeeⁿdí canee tan'duucā chi n'díí.

¹⁵Maaⁿ ní s'uuúⁿ saⁿā chi i'teenu yú Señor Jesucristo yeⁿe yú nguée dichí'vē nduuti chi vée marca yeⁿe circuncisión na cuerpo yeⁿe yú o nguée. Chuū nī dichí'vē chi 'iiⁿyāⁿ ngai s'uuúⁿ ní vée vida ngai yeⁿe yú tan'dúúcā chi nuuⁿmaⁿ ch'iindiyāāⁿ ntúūⁿ yú táámá.

¹⁶Nducyaaca yú chi 'cueeti chiicá yú tan'dúúcā chi ch'iⁿí ndís'tii tuuⁿmi nī Ndyuūs téé yā vaadi 'diiíⁿ na staava yeⁿe yú. Ní Ndyuūs ya'ai iinú yā caavā ndís'tii. Ní nducyaaca s'uuúⁿ chi i'teenu yú Jesucristo, s'uuúⁿ ní yeⁿé ndaata yeⁿe Ndyuūs chi cuaacu nííⁿnyúⁿ ndaata yeⁿe 'iiⁿyāⁿ Israel chi judíos.

¹⁷Ndíí maaⁿ ndíí cuaaⁿ chi cuchii nguée neⁿé chi mar 'áámá 'iiⁿyāⁿ dííⁿ nndú'u yā 'úú, caati 'úú ndéé yaātū na cuerpo yeⁿé naachi 'iiⁿyāⁿ ch'eⁿé yā 'úú, ti 'úú idiíⁿ ntiiⁿnyuⁿ yeⁿe Señor Jesucristo yeⁿe yú.

¹⁸Ndís'tii hermanos yeⁿé, Señor Jesucristo yeⁿe yú canée yā nduucū nī ní cueⁿe daāⁿmaⁿ itée yā ndís'tii nducuéⁿe chi n'daaca n'dai yeⁿé yā. 'Tíicā cuuvi.

CARTA YEⁿE 'IIⁿ'YĀⁿ YEⁿE YĀĀⁿ EFESO

**Pablo idinguúⁿ yā carta 'cūū
yeⁿe 'iiⁿ'yāⁿ chi naⁿ'á yā
yaācū na yāāⁿ Efeso**

1 'Úú Pablo 'úú, ní 'úú apóstol
yeⁿe Señor Jesucristo caavā
chi 'tíicā neⁿe Ndyuūs chi dich'ó
yā 'úú. 'Úú idinguúⁿ carta 'cūū yeⁿe
nducyaaca 'iiⁿ'yāⁿ chi snée yā na
yāāⁿ Efeso, 'iiⁿ'yāⁿ chi yeⁿe Ndyuūs
ni i'téenu yā Señor Jesucristo.
²Ndyuūs Chiida yú ndúúcū Señor
Jesucristo yeⁿe yú nginneé yā
ndís'tii ní tée yā cosas chi n'daacā
n'dai, ní tée yā ndís'tii vaadī 'diiⁿ
yeⁿ'é yā.

**Yeⁿe dendu'ū chi n'daacā n'dai chi
Cristo ca'á yā 'iiⁿ'yāⁿ yeⁿ'é yā**

³Nducyaaca yú canee chi dich'etē
yú Ndyuūs chi Chiidā Señor
Jesucristo. Maaⁿ ní caavā chi s'uuúⁿ
ní yeⁿe Cristo s'uuúⁿ, Ndyuūs tée yā
s'uuúⁿ dendu'ū yeⁿ'é yā chi n'dai taavi
ca yeⁿe nducuéⁿ'ē chi n'dai tan'dúúcā
chi s'uuúⁿ snee yú na va'ai chēeti
nguuvi. ⁴Ní 'tíicā Ndyuūs nadidēevé
yā s'uuúⁿ chi cuuvi yeⁿ'é yā s'uuúⁿ ní
cuuvi yeⁿe Cristo s'uuúⁿ ndíf taachi
'āā 'cuéé din'dái yā iⁿ'yeēⁿdi. Ní
nduuví n'dai yú ní i'teenū n'daāca yú
Cristo ní nguée véé nuuⁿndi yeⁿe yú

nanáaⁿ yā. ⁵Ní Ndyuūs 'āā deenú yā
chiiⁿ chi neⁿ'é yā díⁿ yā cáávā chi
neⁿ'é yā s'uuúⁿ. Cáávā chi neⁿ'é yā chi
cuuvi yeⁿ'é yā s'uuúⁿ, sta'á yā s'uuúⁿ
chi cuuvi daiyā yā s'uuúⁿ cucáávā
Cristo Jesús. ⁶Cucáávā chuū cueⁿe
daāⁿmaⁿ dich'etē taavi yú Ndyuūs
chi itée yā s'uuúⁿ dendu'ū chi ch'etē
n'dai yeⁿ'é yā caati maaⁿ ní s'uuúⁿ ní
yeⁿe Cristo s'uuúⁿ. Ndyuūs díⁿ yā
recibir s'uuúⁿ caati neⁿe taavi cá
yā Cristo. ⁷Ní cáávā Ndyuūs neⁿe
taavi cá yā nducyaaca yú dich'ó yā
Daiya yā chi ch'iī yā cáávā s'uuúⁿ.
Ní Ndyuūs nadich'etē yā nuuⁿndi
yeⁿe yú cáávā yuūuⁿ yeⁿ'é Cristo. Ní
cáávā chi Ndyuūs 'tíicā neⁿ'é yā s'uuúⁿ
itēe yā dendu'ū chi n'daacā yeⁿ'é yā.
⁸Níicú Ndyuūs ch'iī'í yā s'uuúⁿ chi
neⁿe taavi cá yā s'uuúⁿ. Ní díⁿ yā chi
deenu yú taanduvéé vaadī n'dai yeⁿ'é
yā ní tuumicadífnuuⁿ yú nducuéⁿ'ē.
⁹Ní Ndyuūs 'āā díⁿ yā chiiⁿ chi neⁿ'é
yā díⁿ yā. Ní díⁿ yā chí n'diichi yú
chiiⁿ chi canúúⁿ n'de'ei yeⁿ'é yā ndii
cuááⁿ vmnaaⁿ cucááva Cristo. ¹⁰Ní
chuū chi canuuⁿ n'de'ei yeⁿ'é Ndyuūs
chi Ndyuūs caⁿ'a yā chi diiⁿ yā chi
cuuvi taachi ndaa tiempo yeⁿ'ē,
Ndyuūs caⁿ'a yā chi díⁿ yā chi Cristo
ngaⁿ'a ntiiⁿnyúⁿ yā yeⁿe nducuéⁿ'ē
chi snée nanguuvi ndúúcū chi snée

ná yáⁿāa. Ní Ndyuūs caⁿá yā chi nduuvidaamá tanducuéⁿē dendu^u nanáⁿ Cristo.

¹¹Ndyuūs díⁿ yā chi nducuéⁿē chi chó^oo ní chó^oo tan^udúú^{cā} chi neⁿe yā. Ní Ndyuūs ndeēv^e yā s^uuúⁿ ndii cuááⁿ vmnaaⁿ ní^{cú} chi cuuvi yeⁿe yú cosas chi caⁿa yā chi tée yā s^uuúⁿ, caati s^uuúⁿ ní yeⁿe Cristo s^uuúⁿ. ¹²Ní Ndyuūs t^íí^{cā} díⁿ yā ti neⁿé yā chi nús^uu ní chⁱⁿíⁿíⁿ nū vaadi dēēve ca yeⁿé Ndyuūs nanááⁿ 'iiⁿyāⁿ ti nús^uu ní yeⁿe 'iiⁿyāⁿ Israel nús^uu chi vmnááⁿ vmnaaⁿ i^{té}énu nū Cristo. ¹³Chuū dendu^u ní yeⁿe ndís^{tíi} chi nguéeⁿ yeⁿe 'iiⁿyāⁿ Israel s^{ee}n ti taachi chⁱindiveéⁿ nī nduudu cuaacu yeⁿe evangelio chi ndúú^{dú} ngai yeⁿe Cristo chi nadanguaⁿaí ndís^{tíi} ní s^{té}énu nī yeⁿē. Tuu^umi ní canéeⁿ áámá sello yeⁿé Ndyuūs ndúú^{cū} nī. Ní sello miiⁿ ní Espíritu N^{dai} yeⁿe Ndyuūs chíⁿ áámá compromiso chi Ndyuūs caⁿa yā chi tée yā s^uuūⁿ ndíⁿ cuááⁿ vmnaaⁿ. ¹⁴Ní Espíritu N^{dai} yeⁿé Ndyuūs ní áámá seña chi cuta'a yú chi cuuvi yeⁿe yú chiiⁿ chi Ndyuūs caⁿa yā chi tée yā chi cuuvi yeⁿe yú. Ní Ndyuūs yaa^{vi} yā s^uuúⁿ chi cuuvi yeⁿé yā s^uuúⁿ. Taachi ndaa nguuvi chi neⁿe Ndyuūs, Ndyuūs caⁿá yā díⁿ yā chi s^uuúⁿ tan^udúú^{cā} maáⁿ yā t^íí^{cā} s^uuúⁿ. Ní Espíritu N^{dai} yeⁿé Ndyuūs ní áámá seña yeⁿé chuū. Ní í^{cú} nducyaaca yú ndúú^{cū} 'iiⁿyāⁿ chi cuuvi cu^{té}énu yā Cristo cuuvi nadich^{ēte} yú Ndyuūs cucáá^{vā} chi ch^{ēte}é n^{dai} yā.

**Pablo ngiicá yā Ndyuūs chi
ca'á yā vaadi deenu 'iiⁿyāⁿ
chi cu^{té}énu yā Cristo**

¹⁵Cucaavā chuū, taachi 'úú Pablo chⁱindiveéⁿ chi ndís^{tíi} i^{té}énu

nī Señor Jesucristo ní dinéⁿe nī nducyaaca 'iiⁿyāⁿ chi i^{té}énu yā Señor Jesucristo iivú Ndyuūs, ¹⁶tuu^umi ní nguéeⁿ ngíⁿ daandíⁿ chi ca'á gracias Ndyuūs cucáá^{vā} ndís^{tíi}. Ní taachi in^{ga}acú yeⁿe ndís^{tíi}, tuu^umi ní ngaⁿ angua'á cucáá^{vā} ndís^{tíi}. ¹⁷Ní ngiicá Ndyuūs yeⁿe Señor Jesucristo yeⁿé yú chi Ndyuūs miiⁿ chi Chiida yú chi dēēve taavi ca, ní ngiicá Ndyuūs chi tée yā ndís^{tíi} vaadi deenu yeⁿe Espíritu N^{dai} yeⁿé Ndyuūs, ní í^{cú} cuuvi déénu cá nī ní iⁱintiinaáⁿ nī chíⁿ chí neⁿe Ndyuūs. ¹⁸Ní ngiicá Ndyuūs chi díⁿ yā chi cuuvi déénu nī ní cadíⁿnuuⁿ nī chēⁿ chi cūnee ngiinu yú chi Ndyuūs tée yā s^uuúⁿ, ti ndeēve yā s^uuúⁿ. Ní deenú nī dē^ē chúú^{cā} n^{dai} ca ní dēēve ca chi cuuvi yeⁿé nī chi Ndyuūs ca'á yā 'iiⁿyāⁿ chi yeⁿe yā. ¹⁹Ní ngiicá Ndyuūs chi cuuvi deenú nī chi poder chi ch^{ēte} taavi ca chi yeⁿe Ndyuūs. Ní nguéeⁿ mar áámá dendu^u chi Ndyuūs nguēⁿ cuuvi díⁿ yā. Ní Ndyuūs díⁿ yā ntiiⁿnyuⁿ caavā s^uuūⁿ chi i^{té}énu yú 'iiⁿyāⁿ. Maaⁿ ní díⁿ yā ntiiⁿnyuⁿ ndúú^{cū} poder yeⁿé yā cáá^{vā} s^uuúⁿ, ní chⁱⁿíⁿíⁿ yā poder yeⁿé yā chíⁿ ch^{ēte} ní ndúú^{cū} fuerzas yeⁿé yā. ²⁰Tí^{cā} Ndyuūs chⁱⁿíⁿíⁿ yā maaⁿ poder yeⁿé yā taachi nadicuéⁿ yā Cristo yeⁿe nguaaⁿ tináⁿā. Ní sⁿéeⁿ yā Cristo na va'ai chē^{ti} nguuvi ní Cristo chⁱindíⁿ yā lado tá cuaacu yeⁿé Ndyuūs chiidá yā chi lado yeⁿē honor. ²¹Ní ca'á yā Cristo nducuéⁿē poder tan^udúú^{cā} áámá 'iiⁿntyéⁿē chi caaⁿmaⁿ ntiiⁿnyúⁿ yā yeⁿe tanáⁿā 'iiⁿntyéⁿē ndúú^{cū} yeⁿē nducyáácá 'iiⁿyāⁿ chí ngaⁿa ntiiⁿnyúⁿ yā

ndúúcu yeⁿē nducuéⁿē poder chi véé yeⁿe nducyaaca patrón chi ngaⁿa ntiiⁿnyúⁿ yā. Ní Cristo ní más ca ch'εete ca yeⁿe nducuéⁿē chi véé chi cuuvi caaⁿmaⁿ yú yeⁿē, nguée dámaāⁿ yeⁿē chi véé mááⁿ, 'tiicá ntúūⁿ yeⁿe nducuéⁿē chi cuchii. ²²Ní Ndyuūs s'néeⁿ yā tanducuéⁿē dendu'ū maaⁿ poder yeⁿe Cristo. Ní Ndyuūs s'néeⁿ yā Cristo lugar más cā ch'εete. Ní Cristo miiⁿ tan'duucā chi tiíⁿ yā yeⁿe nducyaaca 'iiⁿyāⁿ chi i'téenu yā ní cáⁿa yā yaacū yeⁿe Cristo, 'tíicā Cristo miiⁿ. ²³'Iiⁿyāⁿ chi i'téenu yā Cristo ní nducyaaca 'iiⁿyāⁿ s'eeⁿ ní tan'duucā cuerpo yeⁿé Cristo, 'tíica yā. Ní cuaacu nducyaaca 'iiⁿyāⁿ s'eeⁿ ní yeⁿe Cristo. Ní Cristo miiⁿ ní n'daacā taavi yā ní canée yā yeⁿe tanducuéⁿē dendu'ū ndúúcu tanducuéⁿē cuaaⁿ.

**Ndyuūs nadanguáⁿai yā s'uuúⁿ
ti neⁿé yā nducyaaca 'iiⁿyāⁿ**

2 Nguuvi chi ch'ó'oo ndís'tii dinuuⁿndí nī ní sneé nī tan'dúúca 'iiⁿyāⁿ chi n'díf caavā nducuéⁿē dendu'ū chi díⁿ nī chi nguεε n'daacā. Naati maaⁿ ní Ndyuūs tee yā ndís'tii vida cueⁿe daāⁿmaⁿ dáamá ndúúcu Cristo caati nadacuéⁿē yā Cristo yeⁿe nguaaⁿ tináⁿā. ²Ní nguuvi chi ch'ó'oo ndís'tii díⁿ nī nuuⁿndi ní dinuuⁿndí nī ndúúcu tanáⁿā 'iiⁿyāⁿ yeⁿe iⁿyeeⁿdí c'ūū. Ní díⁿ nī tan'dúúca chi neⁿe espíritu chi nguée n'dai. Espíritu miiⁿ nī yááⁿnguiniūⁿ ní espíritu chi canée na 'yúúne nī ngaⁿā ntíⁿnyúⁿ yeⁿe iⁿyeeⁿdí ní ngaⁿā ntíⁿnyúⁿ yeⁿe nducyaaca 'iiⁿyāⁿ chi nguée

n'giindiveéⁿ yā nduudu yeⁿé Ndyuūs. ³Ní nducyaaca s'uuúⁿ 'tíicā díⁿ yú nguuvi chi ch'ó'oo ní díⁿ yú tan'dúúca chi neⁿe yú ní díⁿ yú tan'dúúca chi neⁿe cuerpo yeⁿe yú ní tan'dúúca chi nadicadiinuⁿ yú. Ní cáávā chuū nducyaaca yú canée chí cuta'a yú ndúúcu tanáⁿā 'iiⁿyāⁿ castigo chi diitu n'dái chí ca'a Ndyuūs 'iiⁿyāⁿ chi dinuuⁿndí yā. ⁴Naati Ndyuūs ní néené ya'āi 'iinu cá yā nducyaaca 'iiⁿyāⁿ ní neⁿe taavi cá yā s'uuúⁿ. ⁵Ní 'áará chí n'dii yú cucáávā chi dinuūⁿndi yú Ndyuūs itée yā vida cueⁿe daāⁿmaⁿ yeⁿé yú dáamá dáamá ndúúcu Jesucristo caati nadacuéⁿē yā Cristo yeⁿe nguaaⁿ tináⁿā. Maaⁿ ní ninnguaⁿai yú caavā chi Ndyuūs ní n'dai taavi cá yā ní neⁿe cá yā s'uuúⁿ. ⁶Ndyuūs díⁿ yā chi nanduuchí yā s'uuúⁿ dáamá dáamá ndúúcu Cristo ti s'uuúⁿ ní yeⁿé Cristo s'uuúⁿ. Ní 'tiicá ntúūⁿ díⁿ yā chi s'uuúⁿ tan'dúúca chí snee yú ná va'ai cheeti nguuvi ndúúcu Jesucristo 'tíicā s'uuúⁿ. ⁷Ní Ndyuūs díⁿ yā 'tuucā chi cuuvi 'cuuⁿmiⁿ cá yā s'uuúⁿ nguuvi chi cuchii tan'dúúca chi dineⁿe taavi cá yā s'uuúⁿ ndúúcu n'dee n'dái dendu'ū chi n'dai taavi chi itée yā s'uuúⁿ, ti yeⁿe Cristo Jesús s'uuúⁿ. ⁸Ní cucáávā chi Ndyuūs ní neⁿe taavi cá yā s'uuúⁿ, ndís'tii ní ninnguaⁿai nī tí i'téenu nī Cristo. Ndís'tii nguée díⁿ nī mar 'áamá chi nanguaⁿai nī naati Ndyuūs chi datée yā vida cueⁿe daāⁿmaⁿ yeⁿé nī. ⁹Ní nguée nanguaⁿai nī cucáávā ntiiⁿnyuⁿ chí díⁿ nī caati nguée cuuvi caaⁿmáⁿ nī chí ch'εete n'dái nī maáⁿ nī cucáávā chí díⁿ nī. ¹⁰Taachi Ndyuūs

nadinguáⁿ ai yā s'uuúⁿ diíⁿ yā chi s'uuúⁿ ní yeⁿ e Jesucristo s'uuúⁿ ní cuuvi diíⁿ yú ntiíⁿ nyuⁿ chi n'daacā. Ndyuūs 'āā ch'iindiyaáⁿ yā ntiíⁿ nyuⁿ chi canéé chí diíⁿ yú ndii cuááⁿ vmnaaⁿ.

**Véé vaadi 'diiíⁿ yeⁿ ē yú
cucáávā Cristo**

¹¹ Maaⁿ ní n'gaacú nī tan'dúúcā chi sneé nī nguuví chi 'āā chó'ōo. Ndís'tií ní nguéé 'iiⁿ yāⁿ yeⁿ e ndaata Israel naati 'iiⁿ yāⁿ gentiles ndís'tií. Ní 'iiⁿ yāⁿ yeⁿ e ndaata Israel diíⁿ yā circuncidar ca'áámá ca'áámá saⁿ ā ní 'caacá yā 'áámá seña na cuerpo yeⁿ e saⁿ ā s'eeⁿ. Ní canéé na cuerpo yeⁿ e saⁿ ā s'eeⁿ seña 'cūū chi saⁿ ā s'eeⁿ ní yeⁿ e ndaata yeⁿ e Ndyuūs. Cáávā chuū 'iiⁿ yāⁿ yeⁿ e ndaata Israel nguuví yā maáⁿ yā 'iiⁿ yāⁿ circuncidado yā, ní caⁿ a yā yeⁿ e ndís'tií chi nguuví nī 'iiⁿ yāⁿ chi nguéé ndíi nī circuncidado, ní caⁿ a yā yeⁿ e nī chi nguéé 'iiⁿ yāⁿ yeⁿ e Ndyuūs ndís'tií. ¹² Ní tiempo miiⁿ ní ndís'tií nguéé déenu nī yeⁿ e Cristo, ní canéé nī tan'dúúcā 'iiⁿ yāⁿ chi canúúⁿ yúúní. Ní nguéé ndís'tií yeⁿ e 'iiⁿ yāⁿ Israel ndís'tií. Ndyuūs nndeēve yā 'iiⁿ yāⁿ chi cuuvi yeⁿ e yā 'iiⁿ yāⁿ. Nguéé véé 'áámá parte yeⁿ e nī ndúúcu 'iiⁿ yāⁿ chi nndeēvé yā ní ca'á yā compromisos ndúúcu promesas nduucú yā. Ndís'tií ch'etinéé nī na iⁿ yeeⁿ dí 'cūū nguéé ndúúcu de'ē vee chi canee ngiinú nī chi cuuvi yeⁿ e nī. Ní nguéé ch'etinéé nī ndúúcu Ndyuūs ndís'tií. ¹³ Ndís'tií chi yaⁿ ai canéé nī yeⁿ e Ndyuūs cuááⁿ vmnaaⁿ naati maaⁿ ní 'āā nduuvidaamá nī nduucú yā caavā chi ch'ií Cristo

cucáávā nuuⁿ ndi yeⁿ e yú. Ní maaⁿ ní ndís'tií ní yeⁿ e Cristo ndís'tií. ¹⁴ Ní cáávā Cristo miiⁿ véé vaadi 'diiíⁿ yeⁿ e yú. Ní Cristo diíⁿ yā chi 'iiⁿ yāⁿ yeⁿ e ndaata Israel ndúúcu 'iiⁿ yāⁿ chi nguéé yeⁿ e ndaata Israel nduuvidaamá yā tan'dúúcā 'áámá raza nūuⁿ. Ní Cristo miiⁿ divíi yā vaadi 'caa'va chi canéé nguaaⁿ 'iiⁿ yāⁿ Israel s'eeⁿ ndúúcu tanáⁿ ā 'iiⁿ yāⁿ s'eeⁿ chi nguéé 'iiⁿ yāⁿ Israel yā. Vaadi 'caa'va ch'etete mííⁿ chi cuⁿ néeⁿ yā ní tan'dúúcā 'áámá ch'etē náávtaⁿ a 'iiⁿ yāⁿ s'eeⁿ, 'tíicā. ¹⁵ Ní cucáávā chi Cristo maáⁿ yā ch'ií yā tuuⁿ mi ní divíi yā ley yeⁿ e 'iiⁿ yāⁿ Israel ndúúcu mandamientos yeⁿ e ndúúcu reglas yeⁿ e. Cristo mííⁿ diíⁿ yā chi naachi nduu 'uuvi clase yeⁿ e 'iiⁿ yāⁿ nadáámá yā ní véé 'áámá clase nūuⁿ 'iiⁿ yāⁿ, ní 'iiⁿ yāⁿ s'eeⁿ ní yeⁿ e Cristo. 'Tíicā diiíⁿ Cristo chi véé vaadi 'diiíⁿ. ¹⁶ 'Tíicā diiíⁿ Cristo taachi ch'ií yā na cruz. Ní diíⁿ yā chi 'āā nteē véé vaadi 'caa'va nguaaⁿ 'iiⁿ yāⁿ s'eeⁿ. Ní diíⁿ yā chi véé vaadi 'diiíⁿ nguaaⁿ 'iiⁿ yāⁿ s'eeⁿ ndúúcu Ndyuūs. 'Tíicā Cristo diíⁿ yā chi véé 'áámá clase nūuⁿ 'iiⁿ yāⁿ.

¹⁷ Cristo ndaá yā na iⁿ yeeⁿ dí 'cūū ní maaⁿ ní cuuvi deenú nī yeⁿ e vaadi 'diiíⁿ, ndís'tií chi nguéé 'iiⁿ yāⁿ yeⁿ e ndaata Israel chi yaⁿ ai ch'etinéé nī yeⁿ e Cristo. 'Tiicā ntúūⁿ cuuvi deenú 'iiⁿ yāⁿ yeⁿ e ndaata Israel chi ch'etinéé nī nuⁿ yā. ¹⁸ Ní cucáávā Cristo miiⁿ nducyaaca yú nduuti chi 'iiⁿ yāⁿ Israel s'uuúⁿ o nguéé 'iiⁿ yāⁿ Israel s'uuúⁿ, nducyaaca yú, cucáávā Cristo miiⁿ cuuvi cundáa yú nanááⁿ Ndyuūs Chiida yú ndúúcu 'áámá Espíritu N'dai yeⁿ e Ndyuūs. ¹⁹ Ní ndís'tií chi

nguée yeⁿē ndaata Israel chi ndaata yeⁿe Ndyuūs, maaⁿ ní 'āā ntée 'iiⁿyāⁿ chi snúúⁿ yā yúúní ndís'tiī ní snée nī na yáⁿāa chi nguée yeⁿé nī. Maaⁿ ní dáámá snée nī ndúúcū 'iiⁿyāⁿ chi yeⁿe Ndyuūs. Ní ndís'tiī ní yeⁿe ndaata yeⁿe nducyaaca 'iiⁿyāⁿ chi yeⁿé Dendyuūs. ²⁰Ní ndís'tiī ní tan'dúúcā 'áámá va'ai ch'ēete taavi ca chi 'iiⁿyāⁿ din'dái yā 'tífcā ndís'tiī. Ní yeⁿē va'ai ch'ēete miīⁿ Cristo miiⁿ ní tan'dúúcā tuūu ch'ēete yeⁿe esquina, 'tífcā yā. Ní apóstoles chi candéé yā nduudu yeⁿé Ndyuūs ndúúcū profetas chi ngaⁿa yā nduudu yeⁿé Ndyuūs 'iiⁿyāⁿ s'eeⁿ ní tan'dúúcā tuūu yeⁿe cimientó yeⁿe va'āi miīⁿ, 'tiicá yā. Ní ndís'tiī ní tan'dúúcā tuūu vmnaaⁿ tuūu ch'ēete yeⁿē esquina, 'tiicá nī. ²¹Ní vmnaaⁿ tuūu ch'ēete yeⁿe esquina chi Cristo miiⁿ nducuéⁿē tuūu ní yeⁿe va'āi ch'ēete chi din'dái Cristo. Ní Cristo dííⁿ yā chi n'daacā canee nducuéⁿē na lugar yeⁿē cucáávā chi dichííⁿvē Ndyuūs. Ní Cristo dííⁿ yā chi va'āi ch'ēete taavi ca ní 'áámá templo yeⁿe 'iivú Ndyuūs. ²²'Tiicá ntúūⁿ, ndís'tiī chi yeⁿe Cristo nduuvidaamá nī ndúúcū tanáⁿā 'iiⁿyāⁿ chi yeⁿe Cristo ní tan'dúúcā 'áámá va'ai naachi Ndyuūs canee yā cucáávā Espíritu N'dai yeⁿe yā, 'tífcā nducyaaca 'iiⁿyāⁿ chi yeⁿe Cristo.

Ndyuūs dichó'o yā Pablo chi ngaⁿa yā evangelio chí nduudu ngai yeⁿe Jesucristo nanááⁿ 'iiⁿyāⁿ chi nguée yeⁿe ndaata Israel

3 Cáávā chuū 'úú Pablo canéé preso ná vácūú ti dichííⁿvē 'úú Jesucristo ní ngaⁿá nduudu cuaacu

yeⁿé yā cucáávā ndís'tiī chi nguée yeⁿe 'iiⁿyāⁿ yeⁿē ndaata Israel. Ní ngaⁿanguaⁿá cáávā ndís'tiī. ²Cuaacu nííⁿnyúⁿ 'āā deenú nī chi Ndyuūs chi n'dai taavi cá yā dichó'o yā 'úú chi ngaⁿá ngii ndís'tiī chi Ndyuūs neⁿe taavi cá yā ndís'tiī. ³Ndyuūs ch'íⁿí yā 'úú dendu'ū yeⁿe yā chi canúúⁿ n'de'ei ní dííⁿ yā chi deenú chi canúúⁿ n'de'ei tan'dúúcā chi 'āā dingúúⁿ yeⁿé nī ndúúcū duūⁿvī nduudu. ⁴Ní taachi ndís'tiī ch'éeⁿ nī caacá 'cūū chidingúúⁿ tuuⁿmi ní cuuvi deenú nī chi 'úú deenú chiiⁿ chi canúúⁿ n'de'ei yeⁿé Ndyuūs, chiiⁿ chi yeⁿē Jesucristo. ⁵Ní tiempo chi 'āā chó'oo Ndyuūs nguée ch'íⁿí yā mar 'áámá 'iiⁿyāⁿ nduudu yeⁿé yā chi canúúⁿ n'de'ei naati tiempo miīⁿ Ndyuūs ch'íⁿí yā chuū apóstoles chi didéevé yā yeⁿe nuuⁿndi yeⁿé yā ndúúcū profetas chi ngaⁿa nduudu yeⁿé yā cucáávā Espíritu N'dai yeⁿé yā. ⁶Ní chuū chi canúúⁿ n'de'ei cáávā nduudu cuaacu chí nduudu ngai yeⁿe Jesucristo. 'iiⁿyāⁿ chi nguée yeⁿe ndaata Israel chi yeⁿe Jesucristo, 'iiⁿyāⁿ s'eeⁿ ní cuuvi yeⁿé yā dáámá dáámá ndúúcū chi cuuvi 'iiⁿyāⁿ yeⁿe Israel. Ní dáámá canée yā ndúúcū 'iiⁿyāⁿ Israel. Ní sneé yā tan'dúúcā 'áámá cuerpo yeⁿe Cristo. Ní véé 'áámá parte yeⁿē yā yeⁿe compromiso chi Ndyuūs dííⁿ yā. ⁷Ní 'úú nguée n'daaca ca 'úú naatí Ndyuūs tee yā privilegio 'úú chi caaⁿmáⁿ nduudu yeⁿe yā cucáávā poder yeⁿé yā. ⁸Ní 'úú chí 'lííⁿ chuundí nguaaⁿ nducyáácá 'iiⁿyāⁿ chi yeⁿé Ndyuūs naati Ndyuūs tee yā 'úú privilegio 'cūū chí 'úú ngaⁿá nduudu cuaacu yeⁿé yā nanááⁿ 'iiⁿyāⁿ chi nguée yeⁿē

ndaata judíos chi Israel. Ní ngaⁿá nduudu cuaacu yeⁿē n'dee n'dái vaadi 'cuiica taavi ca yeⁿe Cristo. Ní nguée cuuvi diiⁿ yú cuenta yeⁿe vaadi 'cuiica miiⁿ. ⁹Ní ngaⁿá nduudu cuaacu yeⁿé yā. Ní 'íicú nducyaaca 'iiⁿyāⁿ cuuvi deenu yā tan'dúúcā Ndyuūs caⁿá yā diiⁿ yā yeⁿe chi canúúⁿ n'de'ei yeⁿé yā. Ní Ndyuūs chi din'dái yā nducuéⁿē chi véé ní chi'neeⁿ n'de'ei yā chuū nducuéⁿē tiempo chi 'āā chó'ōo. ¹⁰Ní 'tíicā diiⁿ Ndyuūs caati maaⁿ ní nducyáácā chi canée na va'ai chēeti nguuvi chí ngaⁿā ntiiⁿnyuⁿ o chi 'iiⁿntyéⁿē cuuvi n'diichi nducuéⁿē vaadi deenu yeⁿé Ndyuūs cucáávā vaadi n'giinu yeⁿé Ndyuūs chi diiⁿ yā ndúúcū 'iiⁿyāⁿ ná iⁿ'yeeⁿdí 'cūū, 'iiⁿyāⁿ chi i'téenu yā Cristo ní caⁿá yā yaācū yeⁿé yā. ¹¹Ní 'túúcā diiⁿ Ndyuūs ti tan'dúúcā chi neⁿé yā diiⁿ yā ndii vmnááⁿ vmnaaⁿ. Ní diiⁿ yā chi cuaacu yeⁿē cucáávā Jesucristo chi 'iivi yú. ¹²Ní caavā chi s'uuúⁿ ní yeⁿe Cristo s'uuúⁿ ní cáávā chi i'teenu yú Jesucristo, cuuví ndaā yú nanááⁿ Ndyuūs ndúúcū confianza. ¹³Cáávā chuū 'úú d'i'cuíftūu ndís'tiī chi nguée cuuvi ngáaⁿ nī cucaavā chi 'úú n'geenú ngii ti chuū chi n'geenú ngii ní cosa chi n'daacā chi cuuví ndís'tiī ní canee chi yeenú nī.

Cristo neⁿé yā nducyaaca 'iiⁿyāⁿ

¹⁴Ní cucaavā chuū 'úú ca'á gracias Ndyuūs ní 'úú ní ngiintii'yá nanááⁿ Ndyuūs Chiidá Señor Jesucristo yeⁿē yú. ¹⁵Ndyuūs ní Chiida nducyaaca yú ní cuaacu Chiida nducyaaca 'iiⁿyāⁿ yeⁿé yā chi snée nanguuvi, 'tiicá ntúūⁿ nducyaaca 'iiⁿyāⁿ

yeⁿé yā chi snée iⁿ'yeeⁿdí 'cūū. ¹⁶Caⁿ'angua'á ní ngiicá Ndyuūs Chiida yú chi yeⁿē néené n'dee n'dái chi n'daacā yeⁿé yā ní tée yā ndís'tiī fuerza na staava yeⁿé nī chi ditiinú nī cucáávā Espíritu N'dai yeⁿé yā. ¹⁷Ní ngiicá Ndyuūs chi Cristo canée yā na staava yeⁿé nī cáávā chi i'téenu nī Cristo. Ní 'íicú ndís'tiī snee diitú nī ndúúcū vaadi neⁿe yeⁿe Cristo. Ní snee nī tan'dúúcā chi véé dii'yu na yáⁿāa yeⁿē 'áámá yáⁿá. 'Tíicā cunée vaadi neⁿe yeⁿé Cristo na staava yeⁿé nī. 'Tíicā snee nī. ¹⁸Tuu'mí ndís'tiī ndúúcū nducyaaca 'iiⁿyāⁿ chi i'téenu yā Cristo n'daacā cuuvi cádiinuuⁿ nī yeⁿē chi vaadi neⁿe yeⁿé Cristo ní tan'dúúcā Cristo neⁿé taavi cá yā nducyaaca 'iiⁿyāⁿ. ¹⁹Ní ngiicá Ndyuūs chi ndís'tiī ní cádiinuuⁿ nī chēé chí vaadi neⁿe yeⁿé Cristo, 'áará chí ch'ēete taavi ca chi nguée cuuvi deenu yú nducuéⁿē yeⁿē. Ní ngiicá chi staava yeⁿe ndís'tiī ní canee diitú ndúúcū nducuéⁿē chi n'daacā n'dai taavi caavā chí ndís'tiī ní yeⁿe Ndyuūs ndís'tiī.

²⁰Ní Ndyuūs yeⁿe yú cuuvi diiⁿ yā tanducuéⁿē ní n'deē ca cuuvi diiⁿ ya ní nguée tí chi ngiica yú o chí tuumicádiinuuⁿ yú. Tan'dúúcā chi n'dee n'dái idiíⁿ yā cucáávā poder yeⁿé yā 'tíicā idiíⁿ yā ntiiⁿnyuⁿ yeⁿé yā ndúúcū s'uuúⁿ. ²¹Maaⁿ ní nducuéⁿē tiempo ní cueⁿe daāⁿmaⁿ canée Ndyuūs chi ch'ēete taavi ca ní dēeve taavi cá yā nanááⁿ 'iiⁿyāⁿ chi caⁿá yā yaācū yeⁿé yā. 'Tiicá ntúūⁿ nanááⁿ Cristo.

**Nduuvidaama yú cucáávā
Espíritu N'dai ye^{n'}é Ndyuūs**

4 'Úú Pablo chi preso caneé vácúū caati dííⁿ ntiiⁿnyuⁿ ye^{n'}ē 'iivú Ndyuūs. Ní 'úú dí'cuiitú ndís'tii chi n'daacā n'dai dííⁿ nī nducué^{n'}ē tan'dúúcā Ndyuūs ne^{n'}é yā chi dííⁿ nī caati yaa'ví yā ndís'tii chi cuuvi ye^{n'}e yā. ²'Úú ngiicá chi 'cuetiné nī chi maáⁿ nī ndiicúúⁿ nī. Ní dííⁿ nī nducué^{n'}ē ndúúcū 'viich'etfínūⁿ ndúúcū 'aama nī taama nī ni cucheé nī ye^{n'}e nducué^{n'}ē ti diné^{n'}e nī 'áámá nī taama nī. ³Ní cucáávā Ndyuūs itée yā vaadi 'diiíⁿ ye^{n'}é yā chi diiⁿ chi nduuvidaamá nī, 'úú ngiicá chi cue^{n'}e daāⁿmaⁿ dííⁿ nī nducué^{n'}e chi cuuví nī chi nduuvidaamá nī caati Espíritu N'dai ye^{n'}é Ndyuūs nginneé yā ndís'tii. ⁴Véé 'áámá cuerpo nūⁿ ndúúcū 'áámá nūⁿ Espíritu N'dai ye^{n'}é Ndyuūs. 'Tiicá ntúūⁿ Ndyuūs yaa'ví yā s'uuúⁿ chi cuuvi yú ye^{n'}é yā ní ndúúcū 'áámá nūⁿ chi cunee ngiinu ye^{n'}e yú. ⁵Ní véé 'áámá nūⁿ Señor Jesucristo chí 'áámá nūⁿ 'iiⁿyāⁿ chi i'teenu yú, ní véé 'áámá nūⁿ chi duuchi chi ngeēdínūⁿ nīⁿ 'iiⁿyāⁿ. ⁶Véé 'áámá nūⁿ Ndyuūs chi Chiidá nducyáácá 'iiⁿyāⁿ ní 'iivú Ndyuūs miiⁿ nga^{n'}a ntiiⁿnyúⁿ yā ye^{n'}e nducué^{n'}ē. Ní dííⁿ yā ntiiⁿnyuⁿ cucáávā nducue^{n'}ē, ní caneé yā ndúúcū nducué^{n'}ē.

⁷Naati Ndyuūs tee yā ca'áámá ca'áámá s'uuúⁿ vaadi n'dai ye^{n'}é yā cáávā ntiiⁿnyuⁿ ye^{n'}e yú tan'dúúcā chi deenú yā chi cuuvi diiⁿ yú, ní ntiiⁿnyuⁿ miiⁿ ní chííⁿ chi tee Cristo ca'áámá ca'áámá s'uuúⁿ. ⁸Nífcú canéé nguūⁿ na libro ye^{n'}é Ndyuūs ndii cuááⁿ vmnaaⁿ 'tífcā:

Chichēē yā ye^{n'}e enemigos ye^{n'}e yā ní cuicheé yā ná va'ai chēeti nguuvi, ní candēē yā n'deeē n'dái 'iiⁿyāⁿ ye^{n'}é yā chi snúuⁿ yā vácúū, ní ca'á yā regalos 'iiⁿyāⁿ s'eeⁿ ye^{n'}é yā.

⁹¿Déē ne^{n'}e caaⁿmaⁿ nduudú 'cūū chiiⁿ chi chēé yā? Nduudú 'cūū ne^{n'}e caaⁿmaⁿ chi vmnááⁿ vmnaaⁿ 'iiⁿyāⁿ miiⁿ ca^{n'}á yā 'áámá cuaaⁿ yáánūⁿ ca chi chēeti yá^{n'}āa. ¹⁰'Iiⁿyāⁿ chí cá^{n'}ā miiⁿ maáⁿ 'iiⁿyāⁿ miiⁿ cucheé yā cuaaⁿ naachí yaacu taavi ca chí va'ai chēeti nguuvi caati maáⁿ yā cuuvi caneé yā tanducué^{n'}ē dendúⁿ cuaaⁿ. ¹¹Ní itée yā ca'áámá ca'áámá s'uuúⁿ ntiiⁿnyuⁿ chi cuuvi diiⁿ yú. Itée yā na^{n'}a yú ntiiⁿnyuⁿ ye^{n'}e apóstoles chi candēē yú nduudu ye^{n'}e Ndyuūs. Ní itée yā na^{n'}a yú ntiiⁿnyuⁿ chi caaⁿmaⁿ yú nduudu chi sta'a yú ye^{n'}é Ndyuūs. Ní itée yā ntiiⁿnyuⁿ na^{n'}a yú chi nga^{n'}a yú nduudu chi nangua^{n'}ai 'iiⁿyāⁿ. Ní itée yā ntiiⁿnyuⁿ na^{n'}a yú chi candēē yú nduudu ye^{n'}é yā na yaācū. Ní itée yā na^{n'}a yú ntiiⁿnyuⁿ chi maestro ye^{n'}e nduudu ye^{n'}é yā. ¹²'Tífcā diiⁿ Ndyuūs chi chí'cueéⁿ yā nducyaaca 'iiⁿyāⁿ chi i'téenu yā Cristo ní 'ífcú 'iiⁿyāⁿ s'eeⁿ cuuvi dííⁿ yā ntiiⁿnyuⁿ chi tunéeⁿ yā. Ní nducyaacá yā chi ye^{n'}ē cuerpo ye^{n'}e Cristo cuuvi cu'téenu cá yā Ndyuūs. ¹³Ní nducyaaca s'uuúⁿ ní cuuvi nduuvidaama yú ti maaⁿ ní s'uuúⁿ ní tan'dúúcā chi 'aama yú ndúúcū chi i'teenu yú ní ndúúcū chi deenu yú ye^{n'}e Cristo chi Daiya Dendyuūs. Ní nguuvi nguuvi cuuvi diitú ca yú ndúúcū chi i'teenu yú ndúúcū vaanicadiinūⁿ ye^{n'}e yú ndíí tiempo chi s'uuúⁿ din'daaca yú ní

tan'dúúcā Cristo 'tíicā s'uuúⁿ. ¹⁴Āā ntéé diiⁿ yú tan'dúúcā da'caiyāā diiⁿ yā chi ch'iindiveéⁿ yā yeⁿe 'aamá yā taamá yā chi ca'cueéⁿ yā cosa chi n'dááⁿ ní diiⁿ yā tan'dúúcā chi 'yúúné candéé 'iiⁿyāⁿ 'múúⁿ miiⁿ. Ní nguée canéé chi i'téenu yú nduudu yeⁿe 'iiⁿyāⁿ chi nginnche'éf yā s'uuúⁿ. 'Iiⁿyāⁿ s'eeⁿ neⁿ'é yā candéé yā s'uūuⁿ lado yeⁿ'é yā chi i'téenu yú chiiⁿ chi nguée cuaacu. ¹⁵Nguée diiⁿ yú 'túúcā naati canee chi caaⁿmaⁿ yú nduudu cuaacu yeⁿ'é Ndyuūs ti neⁿe yú 'iiⁿyāⁿ ndúúcū núúⁿmáⁿ staava yeⁿe yú. Ní cuuvi cu'teenu ca yú ní diiⁿ yú nducuéⁿē chi n'daacā tan'dúúcā chi diiⁿ Cristo chi tiíiⁿ 'áámá cuerpo yeⁿe nducyaaca yú. Ní s'uuúⁿ tan'dúúcā cuerpo yeⁿ'é yā, 'tíicā s'uuúⁿ. ¹⁶Ní nducyaaca yú ní canee yú maaⁿ poder yeⁿe Cristo chi tiíiⁿ nducyaaca yú. Ní canee yú n'daacā na lugar chi tuneenⁿ yú ti yeⁿ'é Cristo s'uuúⁿ. Ní nducuéⁿē coo yeⁿe cuerpo yeⁿ'é yā n'daacā n'dai snéé ní 'áámá 'áámá coo ní inuⁿ'u tan'dúúcā chi canéé chi diiⁿ. 'Tíicā s'uuúⁿ chi yeⁿe Cristo canee chí diiⁿ yú ntiiⁿnyuⁿ chí tuneenⁿ yú cáávā chi n'giita yú, ní ditiinu yú, ní dineⁿe yú nducyaaca 'iiⁿyāⁿ.

**Véé vida ngai yeⁿe 'iiⁿyāⁿ
chi yeⁿe Cristo**

¹⁷Maaⁿ ní 'úú ngaⁿ'á cáávā Señor Jesucristo ní ngaⁿ'á chi din'daacá nī. Nguée 'cuētinée nī tan'duucā tanáⁿ'ā 'iiⁿyāⁿ chi nguēe i'téenu yā Ndyuūs. 'Iiⁿyāⁿ s'eeⁿ nadacadíínuuⁿ yā yeⁿe dendu'ū chi nguēe dichíí'vē. ¹⁸Ní chiiⁿ chi nadacadíínuuⁿ yā ní yeⁿ'ē ná maáiⁿ. 'Iiⁿyāⁿ s'eeⁿ nguée véé vida cueⁿe daāⁿmaⁿ yeⁿ'é yā

chi Ndyuūs ca'á yā 'iiⁿyāⁿ chi yeⁿ'é yā ti 'iiⁿyāⁿ s'eeⁿ canéé yā ndúúcū staava yeⁿ'é yā chí chēēchi. Ní cáávā chuū 'iiⁿyāⁿ s'eeⁿ canéé yā chi nguée deenú yā Ndyuūs. ¹⁹'Iiⁿyāⁿ s'eeⁿ 'āā ntéé diiⁿ yā sentir chi cuuvi 'cuinaáⁿ yā caavā nuuⁿndi chi diiⁿ yā. Ní diiⁿ yā tan'dúúcā chi véé vicio yeⁿe yā. Ní diiⁿ yā nducuéⁿē dendu'ū chi nguēe n'daacā. Ní nguée nadacadíínuuⁿ yā yeⁿ'e chi diiⁿ yā. ²⁰Naati ndís'tii nguée 'tiicā ch'éeⁿ nī yeⁿ'e Cristo. ²¹Nduuti chi cuaacu chi ch'iindiveéⁿ nī nduudu yeⁿ'e Cristo ní Cristo ch'icueéⁿ yā ndís'tii ní i'téenu nī nduudu cuaacu chi yeⁿ'é Cristo, tuuⁿmi ní nduudu cuaacu yeⁿ'é yā cūnee ndúúcū nī. ²²Maaⁿ ní 'āā ntéé diiⁿ nī tan'dúúcā chi diiⁿ nī vmnaaⁿ chi i'téenu nī. Divii nī yeⁿ'e nducuéⁿē chi diiⁿ nī tiempo chi chó'oo caati chuū nginnche'éf ndís'tii ndúúcū nducuéⁿē chi neⁿ'e chi diiⁿ nī chi nguée n'daacā. ²³Ndís'tii ní canee chi nadíngai nī espíritu yeⁿ'é nī ndúúcū vaanicadíínuuⁿ yeⁿ'e maáⁿ nī. ²⁴Ní canéé chi cuta'á nī vida ngai yeⁿ'e Cristo tan'dúúcā chi 'áámá vestido ngai ní cunúuⁿ nī vestido ngai. Ní diiⁿ nī nducuéⁿē tan'dúúcā chi Ndyuūs neⁿ'é yā chi diiⁿ nī. Ní 'tíicā vida yeⁿ'e maáⁿ nī ní cuaacu nííⁿnyúⁿ chí n'daacā ní dēēve.

²⁵Cáávā chuū nguée caaⁿmáⁿ nī nduudu yaadi. Ca'áámá ca'áámá s'uuúⁿ ní caaⁿmaⁿ yú nduudu cuaacu ndúúcū nducyaaca 'iiⁿyāⁿ na niiⁿnuúⁿ va'āi. Caati s'uuúⁿ ní yeⁿ'ē 'áámá cuerpo nūuⁿ ti yeⁿ'e Cristo s'uuúⁿ.

²⁶Ní nduuti chi nduuvi taáⁿ nī, nguée ca'a nī lugar chi vaadi taaⁿ

yeⁿé nī diiⁿ chi dinuuⁿndí nī. Ní nguéeⁿ 'naaⁿ tiempo nduuví taáⁿ nī. ²⁷Nguéeⁿ ca'á nī mar 'áamá lugar yááⁿnguiniūⁿ chi cuuvi tuuⁿvi sa vida yeⁿé nī.

²⁸Ní ndís'tií chi diduucú nī 'āā ntéeⁿ diduucú nī. Dííⁿ nī ntiiⁿnyuⁿ n'daacā caati véé yeⁿe nī. Ní 'íicú cuuvi ca'á nī 'iiⁿyāⁿ chi pobre yā chi nguéeⁿ véé yeⁿé yā.

²⁹Nguéeⁿ caaⁿmaⁿ nī nduudu yaadí 'yāa, dámaāⁿ caaⁿmaⁿ nī nduudu chí n'daacā chi diiⁿ chi cu'téenu cá yā nī diiⁿ chi cunneeⁿ nī 'iiⁿyāⁿ chi 'caandiveéⁿ yā nduudu yeⁿé nī. ³⁰Ndís'tií nguéeⁿ dííⁿ nī dendu'ū chi cuuví ndaachií Espíritu N'dai yeⁿé Ndyuūs ti maaⁿ Espíritu yeⁿe Ndyuūs miiⁿ chi véé yeⁿe yú ní diiⁿ chi sellado nī chi yeⁿé Ndyuūs s'uuúⁿ. Ní diiⁿ chi cuuvi cuaacu chi Ndyuūs nadanguáⁿai yā s'uuúⁿ.

³¹Ní ndís'tií 'āā ntéeⁿ cuneé nī ndúucū vaadī taaⁿ, ní nguéeⁿ dííⁿ nī chi nguéeⁿ neⁿe nī 'iiⁿyāⁿ, ndíí nguéeⁿ 'cuaí taáⁿ nī, ndíí nguéeⁿ caaⁿmaⁿ nī dendu'ū chi nguéeⁿ n'daacā yeⁿe taamá yā, ndíí nguéeⁿ dííⁿ nī yeⁿe taama yā cosas chi nguéeⁿ n'daacā.

³²Caati diiⁿ n'daacá nī ní diya'ai 'íinu nī 'aamá nī taamá nī vi'í, ní nadich'ēcú nī nuuⁿndi yeⁿé nī yeⁿe 'áamá nī taamá nī vi'í tan'dúucā Ndyuūs nadāch'ēcú yā nuuⁿndi yeⁿé nī ti yeⁿé Cristo ndís'tií.

**Táacā canee chi 'cuētinéé
'iiⁿyāⁿ chi daiya Ndyuūs**

5 Cuaacu chi ndís'tií ní daiya Dendyuūs ndís'tií. Maaⁿ ní cáánu nī dííⁿ nī tan'dúucā Ndyuūs dííⁿ yā. ²Ní dinéⁿe nī nducyaaca 'iiⁿyāⁿ tan'dúucā Cristo dinéⁿe yā

s'uuúⁿ ní ca'a maáⁿ yā vida yeⁿe maáⁿ yā cáávā s'uuúⁿ. Ní dííⁿ yā tan'dúucā chi maáⁿ yā nī 'áamá 'íití cuūchí chi 'iiⁿyāⁿ dííⁿ yā 'caaⁿnúⁿ yā 'iiti chi ofrenda yeⁿé yā ní ca'á yā nátai nanááⁿ Ndyuūs. Ní Cristo maáⁿ yā ofrenda chi n'dēeve ngéeⁿ nanááⁿ Ndyuūs. Ní yeenú Ndyuūs ndúucū ofrenda miiⁿ chi Cristo miiⁿ.

³Maaⁿ ní chi ndís'tií ní yeⁿé Ndyuūs ndís'tií nguéeⁿ canee chí caaⁿmaⁿ nī mar 'áamá yeⁿe nuuⁿndi chi saⁿā n'diichi sa n'daataá. Ní nguéeⁿ canee chi caaⁿmaⁿ nī yeⁿe táamá dendu'ū chi nguéeⁿ n'daacā ní nguéeⁿ dēeve, ndíí nguéeⁿ dínngueé nī yeⁿe chí véé chí yeⁿe taamá yā. ⁴Ndíí nguéeⁿ canee chi caaⁿmaⁿ nī dendu'ū chí cuuvi 'cuinaáⁿ nī, ndíí nguéeⁿ caaⁿmaⁿ nī nduudu tonto o nduudu chi nguéeⁿ n'daacā, caati nducuéⁿe chuū ní nguéeⁿ n'daacā yeⁿé nī. Naati ndís'tií ní canee chi caaⁿmaⁿ nī Ndyuūs 'tíicā:

Gracias n'dii Ndyuūs. ⁵Ní ndís'tií 'āā deenú nī chi saⁿā chí caⁿa sá ndúucū n'daataá chí nguéeⁿ yeⁿe sa o n'daataá chí caⁿa tá ndúucū saⁿā chí nguéeⁿ yeⁿe ta, o 'iiⁿyāⁿ chí diiⁿ dendu'ū chí nguéeⁿ n'daacā o 'iiⁿyāⁿ chí dínngueé yā yeⁿe chí véé yeⁿe taama yā ti tanducuéⁿe chuū ní tan'dúucā chí i'téenu yā santos ídolos. Nducyáácá 'iiⁿyāⁿ s'eeⁿ ní nguéeⁿ véé parte yeⁿé yā naachi Cristo ndúucū Ndyuūs ngaⁿa ntiíⁿnyúⁿ yā. ⁶Nguéeⁿ ca'á nī lugar chí caaⁿmaⁿ 'iiⁿyāⁿ chí cannche'í yā ndís'tií ndúucū nduudu chí tonta ti ngaⁿá yā chí cuuvi dííⁿ nī nducuéⁿe chí nguéeⁿ n'daacā. Caati cáávā nducuéⁿe chuū ní Ndyuūs dííⁿ yā diituu cá castigar 'iiⁿyāⁿ s'eeⁿ

chi nguée n'giindiveeⁿ yā nduudu yeⁿe Ndyuūs. ⁷Ní ndís'tiī nguée nduuvidaamá nī ndúúcu 'iiⁿ'yāⁿ s'eeⁿ ní nguée dííⁿ nī mar 'áámá chi dííⁿ yā.

⁸Ndís'tiī ní tiempo chi 'āā chó'ōo ch'etinee nī ndúúcu yááⁿn'guiinūuⁿ na maāiⁿ, naati maaⁿ ní chi ndís'tiī ní yeⁿ'ē Señor Jesucristo, ndís'tiī canée nī na chideeve yeⁿe Señor miíⁿ. Ní maaⁿ ní cuēti chiicá nī na chideeve miíⁿ tan'dúúca chi ndís'tiī ní daiyá Ndyuūs ndís'tiī.

⁹Ní chuū 'iiⁿ'yāⁿ dííⁿ yā taachi snée yā chideeve yeⁿ'ē Ndyuūs. Tanducuéⁿ'ē chi n'daacā ndúúcu tanducuéⁿ'ē chí cuaacu dííⁿ yā. Ní ch'iⁿ'í yā na vida yeⁿ'e maáⁿ yā chi n'daacá yā. Chuū ní tan'dúúca n'guiⁱ yeⁿ'e yáⁿ'á ti n'guiⁱ yeⁿ'ē chideeve miíⁿ ní 'tíicā. ¹⁰Ní caanú nī dííⁿ nī ca'cueeⁿ nī nducuéⁿ'ē chi Ndyuūs neⁿ'ē yā chi dííⁿ nī. ¹¹Ní ndís'tiī nguée dííⁿ nī mar 'áámá chi nguée dichíí'vē ndúúcu 'iiⁿ'yāⁿ chi chiicá yā na maāiⁿ naati caaⁿ'máⁿ nī 'iiⁿ'yāⁿ chi chiicá yā na maāiⁿ chée chi nguée n'daacā chi dííⁿ yā nanááⁿ Dendyuūs. ¹²S'uuⁿ cuuvi 'cuinaaⁿ yú nduuti chi caaⁿ'maⁿ yú yeⁿ'e dendu'ū nuuⁿndi ch'ēte chi 'iiⁿ'yāⁿ dííⁿ yā taachi din'dé'ei yā. ¹³Ní taachi ngaⁿ'á nī 'iiⁿ'yāⁿ s'eeⁿ yeⁿ'e tanducuéⁿ'ē chi nguée n'daacā chí dííⁿ yā tuuⁿ'mi ní canée na chideeve. Ní Ndyuūs ch'iⁿ'í yā 'iiⁿ'yāⁿ nducuéⁿ'ē tan'dúúca chi dííⁿ yā, ti 'āā ntée canúúⁿ n'de'ei. ¹⁴Canée nguūⁿ na libro yeⁿ'ē Ndyuūs. Cáávā chuū ní Ndyuūs ngaⁿ'a yā 'tíicā :

Ndís'tiī 'iiⁿ'yāⁿ chi ch'ií;
nadacuéⁿ nī yeⁿ'e nguaaⁿ
tináⁿ'ā, ní 'íicú Cristo chí

chideeve ní tée yā chideeve ndís'tiī.

¹⁵Cáávā chuū ndís'tiī ní nadacadíinuⁿ n'daacá nī yeⁿ'e chi dííⁿ nī. Nguée dííⁿ nī tan'duucā chi ndís'tiī 'iiⁿ'yāⁿ zonso ndís'tiī naati dííⁿ nī tan'duucā chi ndís'tiī 'iiⁿ'yāⁿ deenu ndís'tiī. ¹⁶Ní dííⁿ nī aprovechar tiempo chi véé yeⁿ'ē nī chi din'daacá nī caati tiempo 'cūū 'iiⁿ'yāⁿ dííⁿ yā dendu'ū chi nguée n'daacā. ¹⁷Nguée dííⁿ nī tan'dúúca 'iiⁿ'yāⁿ chi nguée tuumicadíinuⁿ yā ti zonso yā naati diiⁿnúú yiiⁿnuⁿ nī maaⁿ níicú tuumicadíinuⁿ nī chee chi Ndyuūs neⁿ'ē yā chi dííⁿ nī. ¹⁸Nguée cuuvi cuu'ví nī ti diiⁿ chí cuuvi ndái nī, naati itée nī lugar chi Espíritu N'dai yeⁿ'ē Ndyuūs cuuví cūnee nduucú nī. ¹⁹Ní ndeé nī 'áámá nī ndúúcu taama nī ndúúcu salmos, ndúúcu himnos, ndúúcu canciones chi ngaⁿ'a yeⁿ'ē Ndyuūs. Ní ngiitá nī ní dinéⁿ'e nī Señor Jesucristo yeⁿ'ē yú ndúúcu núúⁿmáⁿ staava yeⁿ'ē nī. ²⁰Ní cueⁿ'e daāⁿmaⁿ ncaⁿ'á nī gracias Ndyuūs Chiida yú ndúúcu chi dúúchí Señor Jesucristo yeⁿ'ē yú caava nducuéⁿ'ē chi véé.

**Yeⁿ'e vida yeⁿ'e familia
s'eeⁿ chi yeⁿ'e Jesucristo**

²¹Nguée dich'etē nī maáⁿ nī. Dinéⁿ'e nī viⁱ 'áámá nī ndúúcu taama nī caati 'āā dííⁿ nī respetar Ndyuūs.

²²Ní ndís'tiī táⁿ'ā chi ch'iindivaacu canee chi 'caandiveeⁿ nī yeⁿ'e isaⁿ'ā yeⁿ'ē nī tan'dúúca chí ch'iindiveeⁿ nī nduudu yeⁿ'ē Ndyuūs ti isaⁿ'ā yeⁿ'ē nī tan'duucā 'iiví nī, 'tíicā sa. ²³Caati isaⁿ'ā yeⁿ'ē nī ní tan'dúúca tiíiⁿ yeⁿ'e familia, 'tíicā sa. 'Tiicá

ntúúⁿ tan'dúúcā Cristo ní tiiⁿ
'iiⁿyāⁿ chi i'téenu yā 'yā, Cristo
ntúúⁿ 'iiⁿyāⁿ chi nadanguáⁿai yā
nducyaaca 'iiⁿyāⁿ chi i'téenu yā 'yā.
Ní nducyáácá 'iiⁿyāⁿ chi i'téenu yā
Cristo, 'iiⁿyāⁿ s'eeⁿ tan'duucā cuerpo
yeⁿe Cristo, 'tiicá yā. ²⁴Ní tan'duucā
'iiⁿyāⁿ chi i'téenu yā Cristo canee
yā maaⁿ poder yeⁿe Cristo 'tiicá
ntúúⁿ táⁿā canee tá maaⁿ poder
yeⁿe isaⁿā yeⁿe tá ní canee chi
'caandiveeⁿ tá yeⁿē sa.

²⁵Ní ndís'tii chi isaⁿā chí
ch'iindivaacu canee chi neⁿé nī
n'daataá yeⁿé nī tan'duucā Cristo
neⁿé yā 'iiⁿyāⁿ yeⁿe yaacu yeⁿé yā.
Ní Cristo nca'a maáⁿ yā vida yeⁿe
maáⁿ yā ní ch'ii yā cáávā 'iiⁿyāⁿ
chi yeⁿé yā. ²⁶Ní 'tíicā ch'ii Cristo
caati s'uuúⁿ cuuvi 'iiⁿyāⁿ yeⁿé yā
s'uuúⁿ caavā ntiiⁿnyuⁿ chi dííⁿ yā.
Ní Cristo didéevé yā 'iiⁿyāⁿ cucáávā
nuúⁿnīⁿ ní cucáávā nduudu yeⁿé
yā. ²⁷Ní Cristo candéé yā 'iiⁿyāⁿ
chí yeⁿé yā nanááⁿ Ndyuūs. Ní
'iiⁿyāⁿ s'eeⁿ ní ngii n'gai ní dēeve
yā. Ní nguée falta yeⁿé yā, ndíí
nguée véé mar 'áámá nuuⁿndi yeⁿé
yā, ndíí nguée 'áámá dendu'ū chi
nguée cuaacu na vida yeⁿé yā, ndíí
nguée véé mar 'áámá dendu'ū chi
'túúcā. Ní 'iiⁿyāⁿ chi yeⁿé yā ní
núúⁿmáⁿ yā ní yeⁿé Cristo. Ní nguée
véé mar 'áámá chi nguée n'daaca
yeⁿé 'iiⁿyāⁿ s'eeⁿ. ²⁸Ní isaⁿā chí
ch'iindivaacú canée chí dinéⁿe
sa n'daataá yeⁿē sa tan'dúúcā chi
neⁿe sa maaⁿ sa cuerpo yeⁿe sa,
'tíicā n'daataá yeⁿē sa. Ní saⁿa chi
dinéⁿe sa n'daataá yéⁿē sa neⁿe
maaⁿ sa saⁿā. ²⁹Nguée véé mar
'áámá 'iiⁿyāⁿ chi nguée neⁿé maáⁿ
yā cuerpo yeⁿé yā, naati nga'a

maáⁿ yā chiiⁿ chi n'daacā chi cuuvi
yeⁿé yā. Ní maáⁿ yā dííⁿ yā cuidar
cuerpo yeⁿe maáⁿ yā. 'Tiicá ntúúⁿ
Cristo dinéⁿe yā ní dííⁿ yā cuidar
nducyaaca 'iiⁿyāⁿ chi i'téenu yā 'yā.
³⁰'Tíicā dííⁿ Cristo ti 'iiⁿyāⁿ s'eeⁿ chi
yeⁿé yā ní tan'dúúcā cuerpo yeⁿé
yā 'tíicā 'iiⁿyāⁿ s'eeⁿ. Ní s'uuúⁿ ní
tan'dúúcā 'áámá parte yeⁿe cuerpo
yeⁿe Cristo 'tíicā s'uuúⁿ. ³¹Ní 'tiicá
ntúúⁿ saⁿā i'neeⁿ sa chæecu sa
ndúúcū chiida sa ní nduuvidaama
sa ndúúcū n'daataá yeⁿē sa ní nduu
'uuví yā nduuvidaamá yā ní dííⁿ yā
tan'dúúcā chi 'áámá cuerpo nūuⁿ.
³²Chuū ní 'áámá vaadi cuaacu na
libro yeⁿé Ndyuūs, ní ngaⁿá ngíí
ndís'tii yeⁿe chuū. Nduudu miiⁿ
ngaⁿā yeⁿe Cristo ndúúcū 'iiⁿyāⁿ
chi i'téenu yā Cristo ní yeⁿé yā
'iiⁿyāⁿ s'eeⁿ. ³³Maaⁿ ní neⁿé caaⁿmáⁿ
ca'áámá cā'aama ndís'tii chi saⁿā
chí 'nínívaacu, canee chi neⁿe
nī n'daataá yeⁿe nī tan'dúúcā chi
neⁿé nī maáⁿ nī. Ní ndís'tii n'daataá
canée chi dinéⁿe nī isaⁿā yeⁿé nī nī
'caandiveeⁿ nī yeⁿe sa.

6 Ndís'tii da'caiyá chi i'téenu nī
Cristo, canee chi 'caandiveeⁿ
nī yeⁿe chiidá nī caati chuū chí
cosa chí n'daacā chí dííⁿ nī. ²Ní
mandamiento yeⁿe Ndyuūs chi
vmnááⁿ vmnaaⁿ chi Ndyuūs teé yā
compromiso yeⁿē ní chuū: Cu'téenu
nī chiidá nī ndúúcū chæecú nī, ³ní
'iicu nduuti chi dííⁿ nī 'tíicā cuuvi
yeenú nī nífcú cuneé nī na iⁿ'yeeⁿdí
'cūū n'dee n'dái nduuyu.

⁴Ní ndís'tii saⁿā chí véé daiyá
nī, nguée dííⁿ nī chi nduuvi taaⁿ
daiyá nī naati di'cuuitá nī daiya nī
ní yaa'ví nī daiya nī taachi nguée
din'daacā ní ca'cuéeⁿ nī daiyá nī

yeⁿe Señor Jesucristo caati cuuvi cu'téenu yā yeⁿ'é yā.

⁵Ní ndís'tií 'iiⁿyāⁿ chi diiⁿ ntiiⁿnyuⁿ ndúúcu 'iiví nī, 'caandiveéⁿ nī yeⁿ'e 'iiví nī chi véé na iⁿ'yeeⁿdí 'cūū. Ní dííⁿ nī respetar 'iiví nī ní 'va'á nī yeⁿ'e yā. Ní dííⁿ nī ntiiⁿnyuⁿ yeⁿ'e yā ndúúcu núúⁿmáⁿ staava yeⁿ'e nī. Ní dííⁿ nī nducuéⁿ'ē ntiiⁿnyuⁿ yeⁿ'é yā tan'duucā chí dííⁿ nī caavā Cristo. ⁶Ní dííⁿ nī n'dai ntiiⁿnyuⁿ yeⁿ'é yā nguéé dāmáāⁿ taachi 'iiví nī inaáⁿ yā ndís'tií caati n'daacā caneé nī ndúúcu yā. Naati dííⁿ nī ntiiⁿnyuⁿ yeⁿ'é yā tan'dúúca chi ntiiⁿnyuⁿ yeⁿ'e Cristo chi dííⁿ nī ní ndúúcu núúⁿmáⁿ staava yeⁿ'é nī. Chuū ní chiiⁿ chi Ndyuūs neⁿ'é yā chí dííⁿ nī. ⁷Ní dinéⁿ'e nī din'daacā nī ntiiⁿnyuⁿ yeⁿ'e yā tan'dúúca chi ntiiⁿnyuⁿ yeⁿ'e yā tan'dúúca chi ntiiⁿnyuⁿ yeⁿ'e 'iiⁿyāⁿ yeⁿ'é iⁿ'yeeⁿdí 'cūū. ⁸Ní nducyááca nī ní déénu nī nduuti chí 'iiⁿyāⁿ chí dííⁿ ntiiⁿnyuⁿ caadi 'iiyu o nduuti chí 'iiⁿyāⁿ libre yā nducyááca yā cuta'á yā yeⁿ'e Señor Jesucristo chí 'iiví yú chííⁿ chí téé yā 'iiⁿyāⁿ caavā ntiiⁿnyuⁿ n'daacā chí dííⁿ yā.

⁹Ní ndís'tií chí 'iiví yeⁿ'e 'iiⁿyāⁿ, 'tiicá ntúū din'daacā nī ndúúcu 'iiⁿyāⁿ chí dichíí'vē ndís'tií. Nguéé caaⁿmáⁿ nī chí ca'á nī 'cueⁿ'é nī 'iiⁿyāⁿ chí dichíí'vē ndís'tií. N'gaacu nī chí ndís'tií ndúúcu 'iiⁿyāⁿ chí dichíí'vē ndís'tií ní snée nī na poder yeⁿ'e 'iiví Señor Jesucristo chí canéé na va'ai chēeti nguuví. Ní 'āā daamá nūuⁿ nducyááca 'iiⁿyāⁿ nanááⁿ Señor Jesucristo yeⁿ'é yū.

**Armas yeⁿ'e Espíritu N'dai
yeⁿ'é Ndyuūs cáava 'iiⁿyāⁿ
chí i'téenu yā Ndyuūs**

¹⁰Maaⁿ ní ndís'tií hermanos yeⁿ'é dííⁿ nī chí ditiinú 'cuēetinée

nī nanááⁿ Señor Jesucristo yeⁿ'e yú ndúúcu nducuéⁿ'ē poder chí véé yeⁿ'é Cristo. ¹¹Ní cuuví dííⁿ nī defender maaⁿ nī ndúúcu nducuéⁿ'ē armadura chí tan'dúúca armadura catecai soldados chí Ndyuūs dátee yā s'uuuⁿ chí yeⁿ'e Cristo. Ní 'íicú cuuvi cuchéé nī yeⁿ'e nducuéⁿ'ē dendu'ū chí diiⁿ yááⁿ'nguiinūuⁿ taachi ngínnc'he'e sa ndís'tií.

¹²Nguéé 'cuuⁿ'maⁿ yú contra 'iiⁿyāⁿ chí nguéé n'daacā naati 'cuuⁿ'maⁿ yú ní contra fuerzas yeⁿ'e espíritus chí nguéé n'daacā chí canéé na 'yúúné ndúúcu espíritus chí 'iiⁿntyéⁿ'ē yeⁿ'é tanáⁿ'ā espíritus chí ca'a orden yeⁿ'e espíritus chí nguéé n'dai ndúúcu nducuéⁿ'ē yeⁿ'e iⁿ'yeeⁿdí chí canéé na maaⁿ chí yeⁿ'e yááⁿ'nguiinūuⁿ.

¹³Cáavā chuū tan'dúúca 'áamá soldado cuta'a sa catecai yeⁿ'e soldado ní maaⁿ ní cuta'á nī nducuéⁿ'ē armadura chí tan'dúúca catecai nī chí Ndyuūs dátee yā ndís'tií. Ní 'íicú cuuvi cuchéé nī contra enemigo nguuví taachi ndaa nanááⁿ nī nducuéⁿ'ē dendu'ū chí nguēé n'daacā. Ní taachi chichéé nī yeⁿ'e nducuéⁿ'ē chí nguéé n'daacā ndíí chí 'cuiinū, tuu'mi ní cuuvi 'cuēetinée diitú nī ndúúcu chí i'téenu nī. ¹⁴Ní canéé diitú nī ndúúcu armadura yeⁿ'é Ndyuūs. Cáavā caandaá 'tiicá ntúū ndís'tií cuta'á nī cinturón ní chiichi cunéé cinturón yeⁿ'é nī chí armadura yeⁿ'e Ndyuūs chí vaadi cuaacu. Ní véé fuerzas yeⁿ'é nī. Ní diiⁿ n'daacā nī caati canéé diitú nī. 'Tiicá ntúū ndís'tií cuta'á nī chaleco cūū yeⁿ'e Ndyuūs chí vaadi cuaacu. Ní canéé chí dííⁿ nī nducuéⁿ'ē chí n'daacā caati cuuvi dííⁿ nī proteger pecho

maáⁿ nī yeⁿe nducuéⁿē chi nguēe n'daacā chí dardos yeⁿe enemigo. ¹⁵Tiicá ntúūⁿ ndís'tiī snúúⁿ ca'a nī zapatos chí yeⁿé Ndyuūs chí yeⁿē vaadī 'diiíⁿ. Ní 'cuetinée listo nī chí caaⁿmaⁿ nī 'iiⁿyāⁿ nduudu cuaacu yeⁿe Jesucristo ní 'íicú cuuvi cunée vaadī 'diiiⁿ yeⁿé yā. ¹⁶Tiicá ntúūⁿ ndís'tiī sta'á nī escudo yeⁿé Ndyuūs chí vaadī i'teenū. Ní 'íicú díitú canee nī ndúúcū chí i'téenu nī. Ní diíⁿ nī proteger maáⁿ nī yeⁿe dardos chí ngiichi yeⁿe yááⁿ'nguiinūⁿ. Ní yááⁿ'nguiinūⁿ nguée cuuvi cuchée sá yeⁿe ndís'tiī ndúúcū cosas yeⁿe sa chí nguée n'daacā. ¹⁷Tiicá ntúūⁿ ndís'tiī sta'á nī cachucha cūū yeⁿe Ndyuūs chí vaadī nguaⁿ'ai yeⁿé nī chí diiⁿ proteger tiíⁿ nī. Ní n'gáácú nī chí Jesucristo nadanguáⁿ'ai yā ndís'tiī ní itee yā fuerzas ndís'tiī chí nguée 'va'á nī ní nguée véé 'uuvī vaanicádiinūⁿ yeⁿé nī. 'Tiicá ntúūⁿ ndís'tiī sta'á nī espada yeⁿe Ndyuūs chí Espíritu N'dai yeⁿé Ndyuūs. Ní Espíritu N'dai yeⁿe Ndyuūs ndúúcū Nduudu Cuaacu yeⁿé Ndyuūs inneé yā ndís'tiī chí nguée n'giindiveéⁿ nī nduudu yeⁿe yááⁿ'nguiinūⁿ naati yááⁿ'nguiinūⁿ caⁿ'a sa caanu sa yeⁿé nī. ¹⁸Ní cueⁿe daāⁿmaⁿ caaⁿmaⁿngua'á nī yeⁿē tanducuéⁿē chuū. Ní cueⁿe daāⁿmaⁿ dī'cuiitú nī Ndyuūs cucáávā Espíritu N'dai yeⁿé yā, ní ngiicá nī caati cuuvi cuta'á nī yeⁿē poder yeⁿe Ndyuūs. Ní 'íicú cuuvi diíⁿ nī nducuéⁿē chuū. Ní canee listo nī. Ní nguée cuuvi cúunu nī. Ní caaⁿmaⁿngua'á nī caavā nducyaaca 'iiⁿyāⁿ chí i'téenu yā Ndyuūs. ¹⁹Ní caⁿ'angua'á nī caavā 'úú dendu'ū ti Ndyuūs

tée yā nduudu yeⁿé yā 'úú taachi ngaⁿ'á nduudu cuaacu yeⁿé yā. Ní 'íicú 'úú cuuvi caaⁿmáⁿ nduudu miiⁿ ndúúcū valor caati 'iiⁿyāⁿ cuuvi déenu yā nduudu chí ngaⁿ'á táácā chí cuuvi nanguáⁿ'ai 'iiⁿyāⁿ, nduudu chí canee n'de'ei cuááⁿ vmnaaⁿ. ²⁰Ndyuūs yeⁿe yú ní dichó'o yā 'úú tan'dúúcā chí 'úú embajador yeⁿé yā 'úú chí 'úú caaⁿmáⁿ nduudu cuaacu yeⁿé yā. Ní cááva chuū ní 'úú ní preso 'úú ní maaⁿ canuúⁿ vácūū. Ní ndís'tiī ní caⁿ'angua'á nī caavā 'úú chí 'úú cuuvi caaⁿmáⁿ nduudu cuaacu miiⁿ ndúúcū valor tan'dúúcā chí 'úú canee chí caaⁿmáⁿ.

Saludos yeⁿe Pablo naachi ch'iinū carta 'cuū

²¹Hermano Tíquico, chí neⁿe nducyaaca s'uuúⁿ, ní n'daacā diiⁿ sa ntiiⁿnyuⁿ yeⁿe Señor Jesucristo nduucú. Ní saⁿ'ā miiⁿ caaⁿmaⁿ sa ndúúcū ndís'tiī yeⁿe 'úú ní yeⁿē chí 'úú idiíⁿ. ²²Cáávā chuū dicho'ó hermano Tíquico nanááⁿ ndís'tiī ti caaⁿmaⁿ sa táácā snée 'nū ní 'iicu diiⁿ sa chí diituu 'cuetinéeⁿ nī na staava yeⁿé nī.

²³Maaⁿ ní 'úú neⁿé chí Ndyuūs Chiida yú ndúúcū Señor Jesucristo yeⁿe yú ca'á yā nducyaaca hermanos yeⁿé vaadī 'diiíⁿ na staava yeⁿé yā. Ní neⁿé chí Ndyuūs diíⁿ yā chí ndís'tiī cu'téenu cá nī Ndyuūs, ní dineⁿe cá nī nducyaaca 'iiⁿyāⁿ. ²⁴Ní neⁿé chí Ndyuūs ca'á yā vaadī n'dai yeⁿé yā nducyaaca 'iiⁿyāⁿ chí cuaacu níⁿ'nyúⁿ neⁿé yā Señor Jesucristo yeⁿe yú. Ní 'áamá neⁿé yā, ní nguée n'daáⁿ yā. 'Tiicā cuuvi.

CARTA YEⁿE 'IIⁿ'YĀⁿ YEⁿE YĀĀⁿ FILIPOS

**Taachi Pablo canúuⁿ yā vácūū
idingúuⁿ yā yeⁿe 'iiⁿ'yāⁿ yeⁿe
yāāⁿ Filipos, 'iiⁿ'yāⁿ chi
i'téenu yā Jesucristo**

1 'Úú Pablo ndúúcū Timoteo
ní nús'uu ní dichíí'v'e 'nū
Jesucristo. Maaⁿ ní idinguúⁿ 'nū
carta 'cūū yeⁿe nducyáácá
hermanos chi i'téenu yā Jesucristo
ndúúcū obispos chi saⁿā ndíí tiiⁿ
yeⁿe 'iiⁿ'yāⁿ chi i'téenu yā Jesucristo
ndúúcū diáconos chi nginneé yā
obispos, nducyaaca yā chi snee
yā na yāāⁿ Filipos. ²Neⁿ'é 'nū chí
Ndyuūs Chiida yú ndúúcū Señor
Jesucristo yeⁿe yú tée yā ndís'tii
yeⁿe vaadi n'dai taavi yeⁿ'é yā ní
'cuɛɛtinée nī ndúúcū vaadi 'diííⁿ
yeⁿ'é Ndyuūs.

**Pablo ngaⁿ'angua'á yā cáávā
'iiⁿ'yāⁿ chi i'téenu yā Jesucristo**

³'Úú nca'á gracias Ndyuūs yeⁿ'e
yú ca'áámá ca'áámá vuelta taachi
n'gaacú yeⁿe ndís'tii. ⁴Ní taachi
caⁿ'anguā'á, nducuéⁿe tiempo
caⁿ'anguā'á yeⁿe nducyaaca ndís'tii
ndúúcū vaadi yeenú. ⁵Caati
ndís'tii ní nduucú ní dáámá diíⁿ yú
ntiiⁿnyuⁿ ti inneé nī 'úú chí 'úú

candéé nduudu yeⁿ'e evangelio
chí nduudu ngai yeⁿ'e Cristo, ndii
nguuvi chí i'téenu nī Jesucristo ndíí
maaⁿ. ⁶Ní deenú chí seguro canee
chiiⁿ chí yeⁿ'e Ndyuūs ti Ndyuūs
chí tuca'á yā diíⁿ yā ntiiⁿnyuⁿ
n'daacā n'dai na vida yeⁿ'e ndís'tii
ní idiíⁿ yā chí ndís'tii 'cuɛɛtinée
nī diíⁿ nī ntiiⁿnyuⁿ chí n'daacā
nguuvi nguuvi ndíí nguuvi chí ndaa
Jesucristo taama vmnéⁿ'ée. ⁷Ní
'tíicā chí n'dai chí 'úú nacádiinúúⁿ
chuū yeⁿ'e nducyaaca ndís'tii caati
neⁿ'é taavi ndís'tii. Ní nducyaaca
ndís'tii ní vée parte yeⁿ'é nī nduucú
yeⁿ'e nducuéⁿe chí n'dai taavi chí
Ndyuūs itée yā s'uuúⁿ. Ní ndís'tii
nginneé nī 'úú 'áará chí canuúⁿ
vácūū o 'áará chí canee nanááⁿ
'iiⁿ'yāⁿ 'iiⁿ'ntyéⁿ'e 'úú ní ngaⁿ'á
nduudu cuaacu yeⁿ'e nduudu ngai
yeⁿ'é Cristo chí cuaacu chí 'tíicā.
⁸Ní Ndyuūs yeⁿ'e yú ní deenú yā
chí 'úú neⁿ'é ndís'tii tan'dúúca chí
Cristo neⁿ'é yā s'uuúⁿ. ⁹Ní 'úú ngiicá
Ndyuūs chí ndís'tii cuuvi dinéⁿe
ca nī nducyaaca 'iiⁿ'yāⁿ. Ní cuuvi
deenu cá nī yeⁿ'e nduudu cuaacu
ní cuuvi nadacadíínuuⁿ n'daāca nī
yeⁿ'e nducuéⁿe chí cuaacu. ¹⁰Caati
cuuví ndɛɛve nī nducuéⁿ'e tiempo

chéé chí n'daacā taavi ca. Ní 'tíicā cuuvi 'cuetinéé nī n'daacā n'dai. Ní taachi ndaa Jesucristo taama vmnéⁿēe nguée véé mar 'áámá nuuⁿndi yeⁿé nī. ¹¹Ní neⁿé chí Jesucristo ndaacá yā ndís'tiī chí 'cuetinéé n'daacá nī cucáāvā poder yeⁿe Cristo ní dííⁿ nī ntiiⁿnyuⁿ yeⁿe evangelio chí nduudu ngai yeⁿe Cristo. Ní 'íicú nducyaaca 'iiⁿ'yāⁿ cuuvi caaⁿ'máⁿ yā chí ch'ete taavi Ndyuūs. Ní dííⁿ yā honrar Ndyuūs.

Cáāvā 'úú vida yeⁿé ní Cristo

¹²Maaⁿ ní ndís'tiī hermanos yeⁿé, neⁿé chí cadíínuuⁿ nī chí tanducuéⁿē chí ch'eenú chíí ní díííⁿ chí 'yaaⁿ ca 'iiⁿ'yāⁿ ngíí n'giindiveéⁿ yā nduudu cuaacu chí ngai yeⁿe Cristo. ¹³Tíicā chíí chí taanduvéé soldados chí dííⁿ ntiiⁿnyuⁿ na palacio yeⁿe César ndúúcu taanduvéé 'iiⁿ'yāⁿ, nducyaaca yā deenu yā chí 'úú caneé preso na vácūū cucáāvā chí dííⁿ ntiiⁿnyuⁿ yeⁿe Cristo. ¹⁴Ní néené 'yaaⁿ hermanos chí i'téenu yā Señor Jesucristo taachi cadíínuuⁿ yā chí caneé vácūū nguée dí'va'á yā naati neⁿé yā caaⁿ'maⁿ cá yā nduudu ngai chí nduudu cuaacu yeⁿe Ndyuūs ndúúcu confianza nanááⁿ Cristo miiⁿ.

¹⁵Cuaacu chí nán'a yā ní ngaⁿ'a yā nduudu ngai yeⁿe Cristo cáāvā chí dinguéeé yā yeⁿé ní cáāvā chí neⁿe yā 'caa'va yā nduucú. Ní tanáⁿ'a yā ní ngaⁿ'á yā nduudu ngai miiⁿ ti cuaacu chí neⁿé yā dííⁿ yā ní neⁿé yā cunnee yā 'úú. ¹⁶Naati 'iiⁿ'yāⁿ s'eeⁿ vmnaaⁿ nguée ngaⁿ'a yā nduudu ngai yeⁿe Cristo ndúúcu nuuⁿ'maⁿ staava yeⁿé yā naati dííⁿ

yā chí 'iiⁿ'yāⁿ caⁿ'a yā ndúúcu yā. Dííⁿ yā ti neⁿé yā chí 'úú ní ngueeé yeⁿé yā. Ní cadíínuuⁿ yā chí dííⁿ yā chí 'úú n'geenú ngii ca taachi canuúⁿ vácūū. ¹⁷Ní 'iiⁿ'yāⁿ cuayiivi ní ngaⁿ'á yā nduudu ngai miiⁿ ti neⁿé yā 'úú. Ní deenú yā chí Ndyuūs tee yā 'úú ntiiⁿnyuⁿ yeⁿé yā chí ngaⁿ'á nanááⁿ 'iiⁿ'ntyéⁿē táácā chí dííⁿ ntiiⁿnyuⁿ yeⁿé Ndyuūs ní ngaⁿ'á nduudu cuaacu yeⁿe evangelio chí nduudu ngai yeⁿe Cristo. ¹⁸Naati ¿de'ē ituneeⁿ? 'Āā 'tuucá nūuⁿ nduuti chí 'iiⁿ'yāⁿ caaⁿ'máⁿ yā nduudu ngai miiⁿ ndúúcu nuuⁿ'máⁿ staava yeⁿé yā o cáāvā chí nguée neⁿé yā 'úú, nducyaacá yā ngaⁿ'a yā nduudu ngai yeⁿe Cristo. Ní cáāvā chuū 'úú ní yeenú, ní yeenú taavi cá.

¹⁹Caati deenú chí yeⁿe nducuéⁿē chí ch'óo yeⁿé, n'daacā cuuvi yeⁿé caati ndís'tiī ní ngaⁿ'angua'á nī cáāvā 'úú. Ní Jesucristo nginneé yā 'úú cucáāvā Espíritu yeⁿé yā. ²⁰Ní maaⁿ chuū chí neⁿé chí dicuaacu chí cuuvi dííⁿ. Nguée 'cuinaáⁿ yeⁿē mar 'áámá naaⁿ naati ngaⁿ'á nduudu ngai yeⁿe Cristo cueⁿe daāⁿ'maⁿ ndúúcu nducuéⁿē confianza tan'dúúcā chí dííⁿ maaⁿ, 'tiicá ntūūⁿ cuuvi dííⁿ cueⁿe daāⁿ'maⁿ. Ní 'íicú 'iiⁿ'yāⁿ cuuvi n'diichi cá yā Cristo chí ch'ete ca yā cucáāvā 'úú, 'áará chí 'úú cunduūchí o 'áará chí 'úú 'āā n'díí. ²¹Ní cucaavā 'úú, vida yeⁿé ní Cristo níicú nduuti chí 'cuūví 'āā dííⁿ ganar caati 'úú caneé ndúúcu Cristo. ²²Ní nduuti chí candíí ca cunee ca na iⁿ'yeeⁿdí 'cūū ndúúcu cuerpo yeⁿé, tuu'mi ní cuuvi dííⁿ ca ntiiⁿnyuⁿ yeⁿe Señor Jesucristo yeⁿē yú. Ní candéé nduudu yeⁿe yā nanááⁿ 'iiⁿ'yāⁿ níicú 'iiⁿ'yāⁿ cuuvi

cu'téenu yā Ndyuūs. Maaⁿ ní nguée^é deenú de'ē chi n'daacā ca chi ndeēv^é cáávā 'úú²³ caati 'úú canuúⁿ nguaaⁿ nduu 'uuví vaanicadínūⁿ. Ní neⁿ'é chí 'cuúví nífú^c caⁿ'á cunēe ndúú^c Cristo caati deenú chi neen^é n'daacā caavā 'úú. ²⁴Naati cáávā ndís'tií ní n'daacā ca chi 'úú cune^é ca na cuerpo yeⁿ'é 'tē^é 'tée ndúú^c ndís'tií. ²⁵Seguro cane^é maaⁿ yeⁿ'e chuū. Ní deenú ti 'úú cune^é ca 'tē^é 'tée ndúú^c ndís'tií caati ndís'tií cuuvi 'cuētinéeⁿ nī n'daacā ca ní yeenu taaví nī caati i'téenu nī Ndyuūs. ²⁶Túú^c cune^é 'tē^é 'tée ndúú^c ndís'tií ní taachi ndáⁿ nanááⁿ ndís'tií tuu'mi ní ndís'tií cuuvi yeenu cá nī nduucú ti s'uú^ú ní yeⁿ'e Cristo s'uú^ú.

²⁷Di'cuuítú ndís'tií chi dámaāⁿ diiⁿ núú yiiⁿnuⁿ nī chi 'cuētinéeⁿ n'daacā nī taanduv^é chi n'daacā tan'dúú^c chi ngaⁿ'a nduudu n'dai yeⁿ'e Cristo. Nífú^c ndúú^ti chi ndáⁿ n'diichí ndís'tií o ndúú^ti chi cane^é yaⁿ'ai yeⁿ'é ndís'tií neⁿ'é 'caandive^én yeⁿ'é ndís'tií. Neⁿ'é chí 'iiⁿ'yāⁿ cuuví yaaⁿ'v yā 'úú yeⁿ'é ndís'tií chi ndís'tií ní n'daacā sne^é nī. Ní nduuvidaamá nī ndúú^c 'áámá espí^ritu nūⁿ ndúú^c 'áámá vaanicadínūⁿ yeⁿ'é nī. Ní 'áámá díⁿ nī ntiⁿ'nyuⁿ yeⁿ'é Ndyuūs ní ngaⁿ'á nī nduudu ngai yeⁿ'e Cristo chi evangelio caati 'iiⁿ'yāⁿ cuuvi cu'téenu yā Cristo. ²⁸Neⁿ'é 'caandive^én yeⁿ'é nī chi nguée^é di'vaⁿ'á nī mar 'áámá yeⁿ'é 'iiⁿ'yāⁿ chi contra yeⁿ'e nī. Caati chuū ní 'áámá seña yeⁿ'é yā chi nguée^é i'téenu yā Cristo ní caⁿ'á yā infierno. Naati chuū ní 'áámá seña yeⁿ'é nī chi ndís'tií ní cuuví ninguaⁿ'ái nī yeⁿ'e infierno caati chuū ní yeⁿ'é Ndyuūs. ²⁹Ní

Ndyuūs díⁿ yā 'áámá favor ndúú^c ndís'tií caati nguée^é dámaāⁿ chi cu'téenu nī Cristo naati cane^é chi 'cuenú nī cuuvi caavā chi i'téenu nī Cristo. ³⁰Ní ndís'tií ndúú^c 'úú 'āā daamá nūⁿ snée yú chí n'geenu yú ngii cucáávā chi ngaⁿ'a yú nduudu cuaacu yeⁿ'é Cristo. Ndís'tií 'āā n'diichí nī cuááⁿ vmnaaⁿ tan'dúú^c chí díⁿ ntiⁿ'nyuⁿ ní ch'eenú chii. Ní maaⁿ ní n'giindiv^én ntúuⁿ nī tan'dúú^c chí díⁿ ntiⁿ'nyuⁿ ní tan'dúú^c chí n'geenú ngii.

**Cristo ní ndiicúúⁿ yā ní
cuayiiⁿvi chich'eet^é yā**

2 Ndís'tií hermanos yeⁿ'é, nduuti chi Cristo díⁿ yā animar ndís'tií ní nduuti chi Cristo tee yā 'viich'eetínūⁿ ndís'tií ti neⁿ'é yā ndís'tií ní nduuti chi Espí^ritu N'dai yeⁿ'é Ndyuūs cane^é yā ndúú^c ndís'tií ní nduuti chi neⁿ'é nī nducyaaca 'iiⁿ'yāⁿ ní ya'ai 'ínú nī 'iiⁿ'yāⁿ tuu'mi ní 'tí^cā díⁿ nī. ²Díⁿ nī chi cuuvi yeenú taavi cá caati snée nī 'túú^c. N'dáácā 'cuētinéeⁿ nī ndúú^c 'aama vaadi cadínūⁿ yeⁿ'é nī. Ní neⁿ'é nī dáámá nūⁿ 'aama nī ndúú^c taama nī tan'dúú^c Cristo neⁿ'é yā s'uú^ú. Ní 'tiicá ntúūⁿ neⁿ'é nī vi'í 'aama nī ndúú^c taama nī. Ní nduuvidaamá nī ndúú^c 'áámá espí^ritu yeⁿ'é nī ndúú^c 'áámá staava yeⁿ'é nī. ³Ní nguée^é díⁿ nī dendu'ū chi neⁿ'e maáⁿ nī o caavā chi neⁿ'é nī ch'et^é maáⁿ nī caati ndiicúúⁿ 'cuētinéeⁿ nī. Maaⁿ ní ca'áámá ca'aamá nī cane^é chí nadacadínūⁿ nī yeⁿ'e hermanos yeⁿ'é nī chi neén^é n'dai ca hermanos yeⁿ'é nī nguée^é ti maáⁿ nī. ⁴Ní mar 'áámá nī nguée^é n'nú^ú nī dendu'ū chi

cuuví ye^{n'}ē maáⁿ nī caati n'nuúⁿ nī ntúuⁿ dendu'u chi n'daacā chi cuuvi ye^{n'}e taná^{n'}ā hermanos ye^{n'}é nī.

⁵Ní nguaaⁿ ndís'tiī ní tan'dúúca chi Cristo nadacadíínuuⁿ yā ye^{n'}ē maáⁿ ya 'tiicá ntúuⁿ ndís'tiī canee chi nadacadíínuuⁿ nī ye^{n'}e maaⁿ nī. ⁶Ní n'dáá rá chí Cristo miiⁿ ti Ndyuūs 'yā, Cristo nguéé 'āā fuerza dííⁿ yā chi cuuvi daamá yā ndúúcu Ndyuūs Chiidá yā. ⁷Naati Cristo s'neeⁿ yā chi ch'εete ye^{n'}é yā tanducué^{n'}e chi canéé na va'ai chεeti nguuvi. Ní tan'dúúca s'uúúⁿ 'tiicá yā. Ní tan'dúúca 'áámá sa^{n'}ā chi dichíí'vē 'ii^{n'}yāⁿ, 'tiicā núuⁿ yā. Ní ch'iindiyáaⁿ yā tan'dúúca 'áámá sa^{n'}a ye^{n'}ē i^{n'}yee^{n'}dí 'cūū. ⁸Ní taachi canee yā tan'dúúca sa^{n'}a na i^{n'}yee^{n'}dí 'cūū ndiicúúⁿ n'dai dííⁿ yā ní ch'iindiveéⁿ yā taanduvée chi nga^{n'}ā Chiidá yā chi canéé na va'ai chεeti nguuvi. 'Áará chí ch'ii yā na cruz, ch'iindiveéⁿ yā nduudu ye^{n'}e Chiidá yā ní ca'á yā lugar 'ii^{n'}yāⁿ s'eeⁿ chi 'caa^{n'}núⁿ yā 'ii^{n'}yāⁿ. ⁹Ní cáávā chi diiⁿ Jesús, Ndyuūs dííⁿ yā chi Jesús ní ch'εete cundaá yā na va'ai chεeti nguuvi. Ní Ndyuūs ca'á yā 'áámá chi duuchí yā chi ch'εete n'dai nguéé ti taná^{n'}ā 'ii^{n'}yāⁿ ye^{n'}e i^{n'}yee^{n'}dí 'cūū. ¹⁰Ní nducyáácá yā canéé chi caāntii^{n'}ya yā taachi 'caandiveéⁿ yā chi duuchi Jesús miiⁿ. 'Tiicá ntúuⁿ nducyaacá yā chi snee yā na va'ai ch'εeti nguuvi. 'Tiicá ntúuⁿ nducyaaca yā chi snee yā na yá^{n'}āa. 'Tiicá ntúuⁿ nducyaaca yā chi snee yā na infierno. ¹¹'Tiicá ntúuⁿ canee chi caa^{n'}maⁿ cuaacú yā chi Jesucristo miiⁿ ní 'iivú Ndyuūs. Ní caa^{n'}maⁿ cuaacú yā chi néené ch'εete n'dai Ndyuūs chi Chiida yú.

**'Ii^{n'}yāⁿ chi i'téenu yā Cristo
ní tan'duucā chi deeve ye^{n'}e
i^{n'}yee^{n'}dí 'cūū 'tiicá yā**

¹²Maaⁿ ní ndís'tiī hermanos ye^{n'}é chi ne^{n'}e taaví, tan'dúúca chi cue^{n'}e daāⁿmaⁿ i'téenu nī nduudu ye^{n'}é Ndyuūs taachi canee ndúúcu ndís'tiī, maaⁿ ní i'téenu nī taachi 'āā ya^{n'}ai canee ye^{n'}é ndís'tiī. Maaⁿ ní 'va'á nī Ndyuūs. Ní ndís'tiī dííⁿ n'daacá nī ti Ndyuūs nadinguá^{n'}ai yā ndís'tiī ní dííⁿ n'daacá nī ndúúcu cuidado ye^{n'}e nducué^{n'}ē. ¹³Cuaacu chi Ndyuūs dííⁿ yā chi ndís'tiī ne^{n'}é nī dííⁿ nī nducué^{n'}ē chi n'daacā. Ní Ndyuūs cunnee yā ndís'tiī chí dííⁿ nī. Ní 'cuiinú nī chiiⁿ chí dííⁿ nī tan'dúúca chí ne^{n'}é yā chííⁿ chí n'daacā n'dai.

¹⁴Maaⁿ ní ndís'tiī dííⁿ nī nducué^{n'}ē ní nguéé cueé^{n'}diitú nī ndíí nguéé 'cuu^{n'}máⁿ nī. ¹⁵Ní ndúúti chí dííⁿ nī 'tuucā mar 'áámá 'ii^{n'}yāⁿ nguéé cuuvi caa^{n'}máⁿ yā nuu^{n'}ndi ye^{n'}é nī o nguéé n'daacā idiíⁿ nī caati deenú yā chí ndís'tiī daiyá Dendyuūs ndís'tiī. Ní nguéé véé nuu^{n'}ndi ye^{n'}é nī nguaaⁿ 'ii^{n'}yāⁿ chí nguéé i'téenu yā Ndyuūs ní nguéé n'daacā idiíⁿ yā. Ní tan'dúúca 'áámá 'íí^{n'}nyúⁿ ngíí yá^{n'}āa taachi maāiⁿ 'tiicá nī. ¹⁶Ní candee nī nduudu cuaacu ye^{n'}e Cristo nanááⁿ 'ii^{n'}yāⁿ ti nduudu miiⁿ diiⁿ chí 'ii^{n'}yāⁿ cuuvi cunduuchí yā cue^{n'}e daāⁿmaⁿ caati 'úú ní cuuví yeenú taavi nguuvi chí ndaa Cristo taama vmné^{n'}ēe. Ní deenú chí nguéé tandii rá dííⁿ ndu'ú 'úú ndíí nguéé nduu tandii rá dííⁿ ntii^{n'}nyuⁿ ye^{n'}é Ndyuūs nguaaⁿ ndís'tiī. ¹⁷Ndúúti chí nca'á vida ye^{n'}e maáⁿ ní ch'ii caavā ntii^{n'}nyuⁿ ye^{n'}é Ndyuūs,

tuu'mi ní cáávā chi 'āā itéenu nī Ndyuūs ní dífⁿ nī ntiiⁿnyuⁿ yeⁿ'é yā, tanducuéⁿē chuū ní tan'dúúcā 'áámá ofrenda nanááⁿ Ndyuūs 'tíicā. Ní 'úú ní yeenú, ní cuuvi yeenú ndúúcu nī. ¹⁸Tiicā ntúūⁿ cáávā chuū ndís'tiī cuuvi yeenú nī. Ní cuuvi yeenú ntúūⁿ nī nduucú.

**Yeⁿ'ē hermano Timoteo ndúúcu
hermano Epafrodito**

¹⁹Nduuti chi Señor Jesucristo neⁿ'é yā chi 'úú idiíⁿ chiiⁿ chi nadacadíínuuⁿ chi dífⁿ, tuu'mi ní caⁿ'á dicho'ó Timoteo nanááⁿ ndís'tiī nguuvī chi cuchii. Maaⁿ níicú cuuvi yeenú taachi cadiinuúⁿ ní cuuvi deenú táácā snee ndís'tiī. ²⁰Ti nguéé véé táámá compañero yeⁿ'é chi dáámá nadacadíínuuⁿ sa nduucú tan'dúúcā Timoteo miiⁿ. Ní n'daacā idiíⁿ sa cuidado yeⁿ'é ndís'tiī. ²¹N'dee n'dái 'iiⁿyāⁿ i'nuúⁿ yā chi n'daacā yeⁿ'ē maáⁿ yā ní nguéé dífⁿ yā dendu'ū chi ntiiⁿnyuⁿ yeⁿ'e Cristo Jesús. ²²Naati ndís'tiī ní deenú nī yeⁿ'e Timoteo chi n'daacā canee sa yeⁿ'e nducuéⁿē. Ní deenú nī chi saⁿ'a miiⁿ tan'dúúcā daiyā chi dichí'vē sa 'úú, 'tíicā sa taachi ngaⁿ'á nū evangelio chí nduudu ngai yeⁿ'é Cristo. ²³Sáⁿ'a 'cūū nadacadíínuuⁿ chi dicho'ó saⁿ'ā nanááⁿ ndís'tiī naati neⁿ'é cadiinuúⁿ vmnaaⁿ táácā 'cuenú asuntos yeⁿ'é núúⁿ niiⁿyūⁿ. ²⁴Maaⁿ ní véé confianza yeⁿ'é ndúúcu Ndyuūs chi núúⁿ niiⁿyūⁿ cuuvī ndaá maáⁿ ní n'diichí ndís'tiī.

²⁵Ní nadicadíínuuⁿ ntúūⁿ chi dicho'ó yeⁿ'e ndís'tiī hermano Epafrodito. Saⁿ'ā miiⁿ idiíⁿ sa ntiiⁿnyuⁿ nduucú ní diiⁿ sá luchar

nduucú. Saⁿ'ā miiⁿ ndís'tiī maáⁿ nī dicho'ó nī saⁿ'ā nanaáⁿ chi cuuvi cunnee sa 'úú ndúúcu necesidades yeⁿ'é. ²⁶Saⁿ'ā miiⁿ neené neⁿ'e sa n'diichi sa nducyaaca ndís'tiī ní neené nadacadíínuuⁿ sa yeⁿ'e ndís'tiī caati ndís'tiī n'giindiveeⁿ nī chí ngíitā sa. ²⁷Cuaacu níⁿnyúⁿ chí néené ya'ai chiitā sa ti 'āā cháa 'cuūvī sa. Naati Ndyuūs ní ya'āi 'iinú yā saⁿ'ā ní nguéé dámaaⁿ saⁿ'ā miiⁿ caati ndúúcu 'úú ti 'úú nguē cunee ndaachī yiinú cá de'ē ca chí canéé yeⁿ'é. ²⁸Ní cáávā chuū neⁿ'e cá dicho'ó saⁿ'ā Epafrodito nanááⁿ ndís'tiī ní ndís'tiī cuuvi yeenú nī taachi snaaⁿ nī taama vmnéⁿ'ē saⁿ'ā. Ní 'tiicā ntúūⁿ 'úú nguéé nadacadíínuuⁿ ndaachí yeⁿ'é nī. ²⁹Ní taachi ndaa sa nanááⁿ ndís'tiī, 'cuáaⁿ nī Epafrodito ndúúcu vaadi yeenú caati saⁿ'ā miiⁿ hermano yeⁿ'é nī ti i'téenu sa Señor Jesucristo yeⁿ'e yú. Ní dífⁿ nī honrar tanáⁿ'a yā chí dífⁿ yā ntiiⁿnyuⁿ yeⁿ'é Ndyuūs tan'dúúcā saⁿ'ā miiⁿ. ³⁰Caati 'áará chí néené chíitā sa nī 'āā cháa 'cuūvī sa cucáávā chí diiⁿ sa ntiiⁿnyuⁿ yeⁿ'ē Cristo, nguéé nadacadíínuuⁿ sa yeⁿ'e vida yeⁿ'e maáⁿ sa ndúúcu peligro chí cuuvi 'cuūvī sa caati dichí'vē sa 'úú. Ní diiⁿ sa ntiiⁿnyuⁿ yeⁿ'é chí ndís'tiī maáⁿ nī neⁿ'é nī dífⁿ nī naati nguē cuuvi dífⁿ nī.

**Pablo yaa'ví yā contra yeⁿ'e 'iiⁿyāⁿ
Israel chí necio yeⁿ'e ley yeⁿ'é yā**

3 Maaⁿ ní ndís'tiī hermanos yeⁿ'é ngaⁿ'á ngii ndís'tiī chí canéé chí cuuvi yeenú nī ti yeⁿ'e Señor Jesucristo ndís'tiī. Ní cáávā 'úú nguéé de'ē vee chí di'vaachi

'úú taachi dingúúⁿ yeⁿe ndís'tií táámá vmnéⁿēē chi cuuvi yeenu nī, ti canéé chí dííⁿ nī cáávā chi cho'ōo n'dai yeⁿé nī. ²Ndís'tií ní dííⁿ nī cuidado yeⁿe 'iíⁿyāⁿ chi tan'dúúcā 'yaānā ti 'tiicá yā ti neⁿé yā circuncidar cuerpo yeⁿe saⁿa chi nguée saⁿā Israel sa. Nguée n'daacā dííⁿ yā chi nadacadíínuuⁿ yā chi canee chí díí yā circuncidar cuerpo yeⁿe saⁿā s'eeⁿ. ³Ní cuaacu nííⁿnyúⁿ s'uuúⁿ ní tan'dúúcā chi 'āā circuncidado s'uuúⁿ caati s'uuúⁿ dich'ēte yú Ndyuūs ndúúⁿcū espíritu yeⁿe maāⁿ yú. Ní s'uuúⁿ ní yeenu yú ti yeⁿe Señor Jesucristo s'uuúⁿ. Ní nguée véé confianza yeⁿē yú yeⁿe tan'dúúcā chi 'āā circuncidado cuerpo yeⁿe yú. ⁴Ní 'úú dendúⁿū cuuví cuneé ndúúⁿcū confianza na vida yeⁿé nanááⁿ 'iíⁿyāⁿ tí 'úú canéé circuncidado. Ní nguē vεε mar 'áámá 'iíⁿyāⁿ chi cuuvi nadacadíínuuⁿ cá yā yeⁿe nducuéⁿē chuū ndúúⁿcū confianza tan'dúúcā chi cuuvi 'úú. ⁵Caati taachi chíí nííⁿníⁿ nguuví chi ch'iidiyááⁿ 'iíⁿyāⁿ dííⁿ yā circuncidar 'úú ní 'caacá yā seña na cuerpo yeⁿé tan'dúúcā chí dííⁿ yā ndúúⁿcū nducyaaca saⁿā 'lílíⁿ yeⁿe ndaata Israel chí judíos. Ní 'úú ní yeⁿe 'iíⁿyāⁿ Benjamín 'úú. Ní 'úú ní saⁿa yeⁿe 'iíⁿyāⁿ hebreo o Israel 'úú ndíí taachi ch'iindiyaáⁿ caati chíidá ní saⁿā hebreo yā. Ní 'úú ní saⁿa fariseo 'úú ní dííⁿ ndúúⁿcū núúⁿmáⁿ staava yeⁿé chííⁿ chi ngaⁿa ley yeⁿe 'iíⁿyāⁿ yeⁿē ndaata yeⁿé. ⁶Ní 'úú ní neené necio 'úú chí dííⁿ ntííⁿnyuⁿ yeⁿe yaācū yeⁿe ndaata yeⁿé. Ní 'úú i'nuuⁿca'ái 'iíⁿyāⁿ chí ngeⁿe yaācū yeⁿe 'iíⁿyāⁿ chí i'téenu yā Cristo. Ní dííⁿ nducuéⁿē

chí ngaⁿa ley yeⁿē yú. Ní 'iíⁿyāⁿ nguée cuuvi caaⁿmáⁿ yā chí véé nuuⁿndi yeⁿé. ⁷Naati nducuéⁿē chuū chí nadacadíínuuⁿ chí cosas chí ch'ēte chí neené dichííⁿvē caavā 'úú, ní nducuéⁿē denduⁿū yeⁿé 'āā chíⁿneéⁿ. Ní maaⁿ ní dichííⁿvē 'úú chí i'teenú Jesucristo. ⁸Ní nguée nadacadíínuuⁿ cá yeⁿe nducuéⁿē denduⁿū yeⁿé chí 'úú chíⁿneéⁿ ti dííⁿ cuenta chí dindaí nducuéⁿē denduⁿū yeⁿé cáávā chí n'dai taavi ca chí maaⁿ ní i'teenú Jesucristo chí 'iivú. Ní dííⁿ cuenta chí nducuéⁿē denduⁿū yeⁿé ní tan'dúúcā yaācā, 'tíicā vεε, cáávā chí n'daáⁿ nducuéⁿē denduⁿū yeⁿé cáávā chí i'teenú Cristo. Ní sta'á Cristo tan'dúúcā chí 'iivú 'tíica yā. ⁹Ní 'tíicā idiíⁿ ti maaⁿ ní 'úú ní yeⁿe Cristo 'úú. Maaⁿ ní canee n'daacā nanááⁿ Ndyuūs. Nguée cucáávā chí neⁿé canee n'daacā nanááⁿ Ndyuūs cucáávā ley miiⁿ naati cucáávā chí i'teenú Cristo. Ní 'úú ní n'daacā ca 'úú nanááⁿ Ndyuūs caati neⁿé Jesucristo. ¹⁰Níicú 'úú ní dámaāⁿ neⁿe chí 'úú snaáⁿ Cristo ní canee cuuⁿmiⁿ chí canee ndúúⁿcū maaⁿ poder chí diiíⁿ chí nduuchi Cristo yeⁿē nguaaⁿ tináⁿā. Níicú cuuví daamá nduucú yā chí 'cueenú cuuvi tan'dúúcā chí Cristo chíⁿeenú yā chíí ndíí cuuví 'cuuvi tan'dúúcā Cristo chíⁿi yā. ¹¹Ní 'tiicá ntúúⁿ 'úú cuuvi deenú chí 'āā cuuví ndduuchi yeⁿē nguaaⁿ tináⁿā.

Diiⁿ yú luchar cáávā premio chí Ndyuūs caⁿa yā tée yā s'uuuⁿ

¹²'Úú nguée neⁿé caaⁿmáⁿ ndís'tií chí 'āā tuneéⁿ tanducuéⁿe chuū caati 'āā cuéeⁿ ndaa n'daacā 'úú. Naati 'úú candíí cá cuááⁿ vmnaaⁿ

ndúúcū chi i'teenú ní ngiinú ndíí taanduvéé tuneéⁿ yeⁿe premio chi cuuvi yeⁿé. Ní vmnááⁿ vmnaaⁿ Cristo miíⁿ dííⁿ yā chi 'úú ní yeⁿé yā 'úú, caati cuuvi cuta'á premio miíⁿ. ¹³Ní ndís'tií hermanos yeⁿé, 'úú māaⁿ nguéé nacadíínuuⁿ chi 'āā tuneéⁿ dendú'u 'cūū. Naati chuū idiíⁿ chi cuuvi naáⁿ nducuéⁿe chi 'āā dííⁿ nguuvi chi chó'oo. Ní dííⁿ chi cuuvi tuneé nducuéⁿe chi cuuvi yeⁿé nguuvi chi cuchii. ¹⁴Ní 'íícú 'úú cuuvi dííⁿ nducuéⁿe caati cuuvi dííⁿ ganar vida cueⁿe daāⁿmaⁿ chi premio chi cuuvi yeⁿé chi cūnéé na va'ai chæeti nguuvi ndúúcū Ndyuūs. Ndyuūs chi canéé na va'ai chæeti nguuvi yaa'ví yā s'uuúⁿ chí dátee yā s'uuúⁿ chi cuuvi yeⁿe yú vida cueⁿe daāⁿmaⁿ caati s'uuúⁿ ní yeⁿé Cristo s'uuúⁿ.

¹⁵Ní nducyaaca yú chí n'daacā snée yú ndúúcū chi i'teenú yú, canee cuuⁿmiⁿ chi nadacadíínuuⁿ yú 'tífcā chi nguéé tuneéⁿ yú. Ní nduuti chi tanáⁿa ndís'tií nguéé nadacadíínuuⁿ nī 'tífcā, tuu'mi ní Ndyuūs ní 'cuuⁿmiⁿ yā ndís'tií chæē chi cuaacu. ¹⁶Nífcú chuū ní nééné neⁿe cunéé chí dáámá nūuⁿ cadiínuuⁿ yú n'daacā ní 'cuæetinee yú n'daacā ndúúcū chi 'āā deenu yú yeⁿé Ndyuūs.

¹⁷Ndís'tií hermanos yeⁿé dííⁿ nī tan'dúúcā chi 'úú idiíⁿ. Ní nadacadíínuuⁿ n'dai nī yeⁿe 'iiⁿyāⁿ chi 'cuæetinee n'daacá yā tan'dúúcā chi ch'iⁿí nū 'iiⁿyāⁿ ní 'tiicā ntúūⁿ ch'iⁿí nū ndís'tií. ¹⁸Ní nééné n'dee cuuví caⁿá ndís'tií chi vée 'yaaⁿ taavi 'iiⁿyāⁿ chi neⁿé yā dííⁿ yā tan'dúúcā chi maáⁿ yā neⁿé yā. Ní nguéé neⁿe yā Cristo chi maáⁿ yā

ch'ií yā na cruz. Maaⁿ ní ngaⁿá chuū taama vmnéⁿēe ní nééné ya'āi 'iinu ndíí chi ngæécú yeⁿé. ¹⁹Ní cáávā 'iiⁿyāⁿ s'eeⁿ ndaā tiempo chí ndái yā. 'Iiⁿyāⁿ s'eeⁿ ní dámaāⁿ neⁿé yā n'nuuⁿ yā chi che'e yā ndúúcū nducuéⁿe chi neⁿe yā. Ní dich'æete maáⁿ yā 'iiⁿyāⁿ taachi canee chi 'cuinaáⁿ yā caavā chi dííⁿ yā. 'Iiⁿyāⁿ s'eeⁿ dámaāⁿ nadacadíínuuⁿ yā yeⁿe nducuéⁿe vicio chi vée iⁿ'yeeⁿdí 'cūū. ²⁰Naati s'uuúⁿ chi yeⁿe Cristo ní yáāⁿ vaacu yú ní va'ai chæeti nguuvi. Ní snée ngiinu yú Señor Jesucristo yeⁿe va'ai chæeti nguuvi chi ndaa yā taama vmnéⁿēe ní nadinguáⁿáí yā s'uuúⁿ. ²¹Ní taachi Cristo ndaa yā, tuu'mi ní n'dááⁿ yā cuerpo yeⁿe yú chi cuerpo ndúúcū nuūⁿndí ndii cuerpo ngai yeⁿe yú chí tan'dúúcā cuerpo yeⁿé yā chi dæeⁿe n'dai, 'tífcā cuerpo s'uuúⁿ. Ní 'tífcā Cristo caⁿa yā chi dííⁿ yā ndúúcū dáámá poder yeⁿé maáⁿ yā chi yeⁿé chi ngaⁿa ntiiⁿnyuⁿ yā yeⁿe taanduvéé chi vée.

**Canee chi yeenu yú nducuéⁿe
tiempo ti s'uuúⁿ ní yeⁿe Cristo s'uuúⁿ**

4 Maaⁿ ní ndís'tií hermanos yeⁿé chi neⁿé cáávā nducuéⁿe chuū neenē neⁿé n'diichí ndís'tií. Ndís'tií ní dííⁿ nī chi 'úú ní yeenú ní vée premio yeⁿé tan'dúúcā chi corona yeⁿé caati ndís'tií ní i'téenu nī Jesucristo. Canee diitú nī ndúúcū chi i'téenu nī yeⁿe 'iivu yú chi Cristo. 'Úú yaa'ví ndís'tií 'tífcā ti neⁿé taavi ndís'tií.

²'Úú di'cuítú táⁿa Euodias ní di'cuítú táⁿa Síntique chi dííⁿ yā chi dáámá nūuⁿ cuuví vaanicadíínuuⁿ yeⁿé yā tan'dúúcā

chi canee chi diiⁿ hermanos chi i'téenu yā Señor Jesucristo yeⁿē yú. ³Ní di'cuítú n'dií, saⁿā chi 'áamá canee nduucú na ntiíⁿnyuⁿ chi cúnnee nī n'daataá hermanas chi diíⁿ yā ntiíⁿnyuⁿ nduucú. N'daataá s'eeⁿ ní dichí'vε yā 'úú naachi 'úú ngaⁿá nduudu ngai yeⁿé Cristo chi nadanguáⁿai yā nducyaaca 'iiⁿyāⁿ. Ní cúnnee nī saⁿā Clemente ndúúcū tanáⁿa yā chi nginneé yā 'úú ní 'iiⁿyāⁿ s'eeⁿ chi duuchí yā ní canéé nguūⁿ na libro yeⁿé Ndyuūs naachi canéé nguūⁿ chi dúúchí nducyáácá 'iiⁿyāⁿ chi canduuchí yā cueⁿe daāⁿmaⁿ.

⁴Ndís'tií canéé chi yeenú nī nducuéⁿē tiempo caati ndís'tií ní yeⁿe Señor Jesucristo ndís'tií. Ní 'tíicā caaⁿmáⁿ ntuúⁿ taama vmnéⁿēe chi canee chi cuuví yeenú nī. ⁵Ní nducyaaca 'iiⁿyāⁿ cuuvi snaáⁿ yā ndís'tií chi 'iiⁿyāⁿ n'dái taavi ndís'tií. Ní ndís'tií deenú nī chí nīiⁿnuúⁿ canee Señor Jesucristo yeⁿē yú.

⁶Ní nguéé de'ε vεε nadicadíínuuⁿ nī yeⁿe tanducuéⁿē. Ní taachi caaⁿmaⁿnguaⁿá nī cuuví nī Ndyuūs nducuéⁿē chi neⁿé nī. Ní taachi caacá nī Ndyuūs cucáávā chiíⁿ chi neⁿé nī ní ca'a ntuúⁿ nī gracias Ndyuūs. ⁷Tu'u mi ní Ndyuūs téε yā vaadí 'diííⁿ yeⁿé yā chí ch'εεε ca chi nguéé cuuvi tuumicadíínuuⁿ nī yeⁿē. Níicú vaadí 'diííⁿ miiⁿ ní nguáín'dai nī na staava yeⁿé nī ndúúcū vaanicadíínuuⁿ yeⁿé nī caati ndís'tií ní yeⁿe Cristo ndís'tií.

**Nadacadíínuuⁿ nī yeⁿe
nducuéⁿē chi n'daacā**

⁸Ní ndís'tií ní yeⁿe nducuéⁿē dendú'ū nadacadíínuuⁿ nī yeⁿe

nducuéⁿē chi nduudu cuaacu, ní yeⁿe nducuéⁿē chí n'dai chi diíⁿ yú respetar, ní yeⁿe nducuéⁿē vaadí cuaacu, ní yeⁿe nducuéⁿē chí deεve, ní yeⁿe nducuéⁿē chi neⁿe Ndyuūs chi nadacadíínuuⁿ nī, ní yeⁿe nducuéⁿē chi 'iiⁿyāⁿ deenu n'dái yā chi n'daacā. Ní nadacadíínuuⁿ nī yeⁿe tanducuéⁿē chi n'daacā ca chi cuuví nī caaⁿmáⁿ nī yeⁿe 'tíicā, de'ε chúúcā n'daacā chuū.

⁹Níicú diíⁿ nī dendu'ū chí ch'eeⁿ nī yeⁿé tan'dúúcā chi chí'í ndís'tií. Ní diíⁿ nī tan'dúúcā chi chíindiveéⁿ nī yeⁿé chi n'geéⁿ ndís'tií ní tan'dúúcā chi n'diichí nī chí 'úú idííⁿ. Diíⁿ nī nducuéⁿē chuū. Ndyuūs chi canee ndúúcū vaadí 'diííⁿ yeⁿé yā ní canéé yā ndúúcū ndís'tií ndúúcū vaadí 'diííⁿ yeⁿé yā.

**'Iiⁿyaⁿ yeⁿe yáāⁿ Filipos
ca'á yā ofrendas Pablo**

¹⁰Uú ní yeenú taavi ti yeⁿé Señor Jesucristo ní caati ndís'tií ní 'āā n'gaacu ntúuⁿ nī ní nadicadíínuuⁿ nī yeⁿē 'úú. Deenú chi ndís'tií 'āā n'gaacú nī yeⁿe tiempo chí chó'ōo naati nguéé cuuvi cunnee nī 'úú, 'áará chi neⁿé nī. ¹¹Ní 'úú nguéé ngaⁿá ndís'tií yeⁿē chí nguεε vée yeⁿé caati maaⁿ ní 'āā deenú chi cuuvi yeenú ndúúcū de'ε chí vée yeⁿé. ¹²Ní 'āā deenú táácā chí diíⁿ taachi pobre 'úú, ní 'āā deenú táácā chí diíⁿ taachi vée cá yeⁿé. Ní 'āā deenú ntúūⁿ táácā chí cunee ndúúcū 'āā de'ε nūuⁿ chí cúchii yeⁿé, nduuti chí vée cá chí che'ε o nduuti chí nguéé vée chí che'ε, o nduuti chí vée taavi ca yeⁿé o nduuti chí nguéé de'ε vεε yeⁿé. Ní yeⁿē taanduvée chuū ní deenú táácā cuuvi diíⁿ.

¹³Ní 'úú ní cuuví dííⁿ tanducuéⁿē chi cho'ō yeⁿé caati Cristo itée yā fuerzas 'úú. ¹⁴Ní ndís'tiī ní n'daacā idiíⁿ nī chi chinnee ní 'úú taachi n'geenú ngii.

¹⁵Ní ndís'tiī 'iiⁿyāⁿ yeⁿe yāāⁿ Filipos deenu n'daacā nī taachi cho'ó na yáⁿāa Macedonia ní tuca'á cáⁿa nduudu yeⁿe Cristo chi nadanguáⁿai yā 'iiⁿyāⁿ na yáⁿāa Macedonia miiⁿ. Deenú nī chi taachi can'daá cueⁿé chi dámaāⁿ ndís'tiī chi yeⁿé yaācū Filipos tee nī 'úú tuumi chi ofrenda yeⁿe yaācū yeⁿé nī chi nnee nī 'úú. ¹⁶Ní taachi 'úú caneé na yāāⁿ Tesalónica, ndís'tiī ní tee nī 'áámá 'uūví cuuvi ayuda ndúúcu tuumī taachi 'āā véé necesidades yeⁿé. ¹⁷Nguéé dámaāⁿ nacadíínuúⁿ yeⁿe chi cuta'á de'e tuumī chi ndís'tiī tée nī 'úú naati neⁿé chi snāⁿ chi cuuvi véé cá yeⁿe ndís'tiī, chiiⁿ chi Ndyuūs caⁿá yā tée yā ndís'tiī cucáāvā chi ndís'tiī nnee nī 'úú. ¹⁸'Úú ní yaa'ví ndís'tiī chi 'āā sta'á nducuéⁿē chi tee nī 'úú ní ngo'o ca cáāvā necesidades yeⁿé. Ní maaⁿ ní chi sta'á yeⁿe hermano Epafrodito dendu'ū ofrenda chi dicho'o ndís'tiī. Ndúúcu chuū ní véé cá yeⁿé. Ní nducuéⁿē ofrenda

chi dicho'o ndís'tiī 'úú, ní chuū ní 'áámá ofrenda chi n'dai taavi nanááⁿ Dendyuūs. Ní tan'dúúca 'áámá ofrenda chi ca'á nī Ndyuūs, tíicā ofrenda yeⁿé nī. Ní ofrenda miiⁿ cosas chi Ndyuūs neⁿe taavi yā. ¹⁹Ní maaⁿ ní Ndyuūs yeⁿé yú tée yā ndís'tiī nducuéⁿē dendu'ū chi necesidades yeⁿé nī yeⁿé vaadi 'cuiica n'dai chi véé yeⁿé yā chi n'deee taavi ca. Chuū ní Ndyuūs dííⁿ yā ti s'uuúⁿ ní yeⁿé Cristo Jesús s'uuúⁿ. ²⁰Maaⁿ ní caaⁿmaⁿ yú chi Ndyuūs Chiida yú, ni ch'ēete ca ní ndēēvⁿ ndái cá caati cueⁿe daāⁿmaⁿ 'tiicá yā.

'Cuiinū carta miiⁿ ndúúcu saludos

²¹Maaⁿ ní ngaⁿá ndúúcu nducyaaca ndís'tiī chi i'téenu nī Jesucristo: N'dai nī, ngaⁿá. Hermanos yeⁿé yú chi canéé nduucú: N'dai ndís'tiī, ngaⁿa yā. ²²Ní nducyáácá 'iiⁿyāⁿ chi snée yā 'muuⁿ nduucú ní i'téenu yā Cristo: N'dai ndís'tiī, ngaⁿa yā. 'Tiicá ntúūⁿ 'iiⁿyāⁿ chi snée na va'ai yeⁿe César chi emperador yeⁿe Roma: N'dai ndís'tiī, ngaⁿá yā.

²³Ní Jesucristo yeⁿe yú itée yā nducyaaca ndís'tiī nducuéⁿē chi n'dai taavi ca yeⁿé yā. 'Tíicā cuuvi.

CARTA YEⁿE 'IIⁿ'YĀⁿ YEⁿE YĀĀⁿ COLOSAS

**Pablo idinguúⁿ yā yeⁿe 'iiⁿ'yāⁿ chi
naⁿ'a yāacū na yāāⁿ Colosas**

1 'Úú Pablo 'úú ní 'úú apóstol
yeⁿe Señor Jesucristo caati
'tíicā neⁿ'é Ndyuūs. ²'Úú ní ndúúcū
hermano Timoteo idinguúⁿ carta
'cūū yeⁿe 'iiⁿ'yāⁿ chi yeⁿe Ndyuūs
ní i'téenu yā Jesucristo, 'iiⁿ'yāⁿ chi
snée yā na yāāⁿ Colosas. Neⁿ'é chi
Ndyuūs Chiida yú téé yā ndís'tiī
vaadi n'dai ca yeⁿ'é yā ndúúcū vaadi
'diiíⁿ yeⁿ'é yā.

**Pablo ngaⁿ'angua'á yā caava
'iiⁿ'yāⁿ chi i'téenu yā Jesucristo**

³Taachi ngaⁿ'angua'á nū, 'úú
ndúúcū Timoteo cueⁿe daāⁿ'maⁿ
ca'á nū gracias Ndyuūs Chiidá
Señor Jesucristo yeⁿe yú caavā
ndís'tiī. ⁴'Tíicā dííⁿ nū ti caati náⁿ'ā
hermanos yeⁿe yú ndaá yā nanááⁿ
nús'uu 'āā yaa'vī yā yeⁿ'ē ndís'tiī
tan'dúúcā chi i'téenu nī Cristo
Jesús ní tan'dúúcā chi dineⁿ'e nī
nducyáácá 'iiⁿ'yāⁿ chi yeⁿe Ndyuūs.
⁵Chuū ní cucáāvā chí snée ngiinú nī
chiiⁿ chi cuuvi yeⁿ'é nī chi Ndyuūs
nguáín'dai yā na va'ai chēeti nguuvi
cáāvā ndís'tiī. Ní 'āā ch'iindiveéⁿ
nī nduudu cuaacu chi yeⁿ'é Cristo.

Ní nduudu cuaacu miiⁿ ní cuuvi
nanguaⁿ'ai 'iiⁿ'yāⁿ ní véé chi cuuvi
yeⁿ'é nī. ⁶Ní nduudu miiⁿ ní 'iiⁿ'yāⁿ
ngaⁿ'á yā nanááⁿ ndís'tiī, ní maaⁿ ní
'iiⁿ'yāⁿ ngaⁿ'á yā nanááⁿ 'iiⁿ'yāⁿ chi
snee núúⁿ máⁿ iⁿ'yeēⁿdī. Ní tan'dúúcā
'áámá cosecha chi véé n'gui'i yeⁿ'ē,
'tíicā nduudu miiⁿ caati n'giita
nduudu miiⁿ. 'Tiicá ntúūⁿ nduudu
miiⁿ 'cuiita na staava yeⁿ'e ndís'tiī
ndii nguuvi chí ch'iindiveéⁿ nī
yeⁿ'ē. Ní tuumicadínuuⁿ cá nī chēē
chi cuaacu yeⁿ'e vaadi n'dai yeⁿ'e
Ndyuūs yeⁿ'ē yú chi Ndyuūs tee yā
s'uuúⁿ ní taacā Ndyuūs dineⁿ'é yā
s'uuúⁿ. ⁷Chuū ní ch'éeⁿ nī yeⁿ'e saⁿ'ā
Epafras chi saⁿ'ā chi neenē neⁿ'e
yú. Ní dáámá nginne sa s'uuúⁿ. Ní
'áámá canee sa na ntiiⁿ'nyuⁿ yeⁿ'é
Cristo. Ní diiⁿ sa ntiiⁿ'nyuⁿ yeⁿ'e
Cristo nguaaⁿ ndís'tiī. ⁸Saⁿ'ā miiⁿ
ní ndaa sa nanááⁿ nús'uu ní ngaⁿ'a
cuaacu sa yeⁿ'e ndís'tiī. Ní ngaⁿ'a sa
chi ndís'tiī dineⁿ'é nī 'iiⁿ'yāⁿ caati
Espíritu N'dai yeⁿ'é Ndyuūs canee
yā ndúúcū ndís'tiī.

⁹Ní cáāvā chuū ntúūⁿ nús'uu ndii
tiempo chi ch'iindiveéⁿ nū yeⁿ'e ndís'tiī
nguée s'neeⁿ naaⁿ nū caⁿ'angua'á nū
caavā ndís'tiī. Ngiiáⁿ nū chi maaⁿ
Ndyuūs ch'iⁿ'í yā ndís'tiī nducuéⁿē

chi neⁿé yā chi diíⁿ nī. Ní ngiicá 'nū Ndyuūs chi Espíritu N'dai yeⁿé Ndyuūs tée yā ndís'tii nducuéⁿe vaadi deenu ndúúcū vaanicadínnūⁿ chi yeⁿé Ndyuūs. ¹⁰Ngaⁿangua'á 'nū chi ndís'tii cuuvi 'cuētinéé n'daacá nī nanááⁿ Jesucristo ti yeⁿé yā s'uuúⁿ. Ní cueⁿe daāⁿmaⁿ diíⁿ nī tan'dúúca chi neⁿe Señor yeⁿe yú. Ní 'íicú véé n'gui'i yeⁿé nī yeⁿe tanducuéⁿe chi n'daacá chi idiíⁿ nī. Ní cuuvi 'cueēⁿ ca nī yeⁿe vaadi deenu chí yeⁿe Dendyuūs. ¹¹Ngicá 'nū Ndyuūs chi tée yā ndís'tii poder yeⁿé yā chí ch'ēte ca chí cuuvi diíⁿ nī ntiiⁿnyuⁿ yeⁿé nī ndúúcū poder chi yeⁿé Ndyuūs. Ní 'íicú ndúúcū paciencia cuuvi cucheé nī yeⁿe tanducuéⁿe chi 'iiⁿyāⁿ diíⁿ yā ndúúcu nī. Ní yeenú nī. ¹²Ní ndís'tii canéé chi ca'á nī gracias Ndyuūs Chiida yú caati Ndyuūs diíⁿ yā ndúúcu yú chí véé parte yeⁿe yú naachi cuuvi yeⁿe yú ndúúcū 'iiⁿyāⁿ s'eeⁿ chi i'téenu yā Cristo. Ní caⁿa yā chi tée yā s'uuúⁿ chi cuuvi yeⁿe yú ndúúcū 'iiⁿyāⁿ s'eeⁿ chi yeⁿé yā taachi ndaa yú na lugar chí dēve ca naachi Ndyuūs ngaⁿa ntiiⁿnyúⁿ yā yeⁿé. ¹³Canéé chi ca'á nī gracias Ndyuūs caati nadanguáⁿai yā s'uuúⁿ yeⁿe saⁿā chi ngaⁿā ntiiⁿnyuⁿ yeⁿe maaiⁿ. Ní Ndyuūs dicho'ó yā s'uuúⁿ naachi canéé Jesucristo chí ngaⁿā ntiiⁿnyúⁿ yā. Jesucristo ní Daiyá Ndyuūs chi Ndyuūs neⁿe taaví yā. ¹⁴Níicú Jesucristo cuai yā s'uuúⁿ ndúúcū precio chi yuúúⁿ yeⁿé yā taachi ch'ií yā na cruz cucáávā s'uuúⁿ. Ní cáávā chuū Ndyuūs nadach'ēcú yā s'uuúⁿ yeⁿe nuūⁿndi yeⁿe yú.

**Chi nduuvidaama yú ndúúcū
Ndyuūs cucáávā chi Cristo ch'ií yā**

¹⁵Jesucristo ní tan'dúúca Ndyuūs chiida yú chi nguée inaaⁿ yú, 'tiicá

yā. Ní Cristo miiⁿ 'āā canéé yā vmnááⁿ vmnaaⁿ chi din'dái yā núúⁿmáⁿ íⁿ'yeeⁿdi. ¹⁶Ní Ndyuūs yeⁿe yú ndúúcū Cristo miiⁿ din'dái yā tanducuéⁿe dendu'ū chi véé. Din'dái yā tanducuéⁿe dendu'ū chi véé nanguuvi. 'Tiicá ntúúⁿ na yáⁿāa yeⁿé chi inaaⁿ yú ndúúcū yeⁿé chi nguée inaaⁿ yú. N'dáá rá chi véé ángeles chi yeⁿe Ndyuūs ndúúcū ángeles chi yeⁿe yááⁿnguiinūⁿ chi ngaⁿā ntiiⁿnyuⁿ na 'yúúné ndúúcū 'iiⁿntyéⁿe chi ngaⁿā yā ntiiⁿnyuⁿ yeⁿé naciones na iⁿ'yeeⁿdí 'cūū ndúúcū 'iiⁿntyéⁿe ndúúcū poder yeⁿe yā, tanducuéⁿe ní Cristo miiⁿ din'dái yā ní 'iivi yeⁿe tanducuéⁿe. ¹⁷Cristo miiⁿ ní ngaⁿa ntiiⁿnyúⁿ yā yeⁿe tanducuéⁿe dendu'ū. Ní Cristo miiⁿ diíⁿ yā chi tanducuéⁿe dendu'ū chi véé canéé lugar yeⁿé ndúúcū orden. ¹⁸Ní Cristo miiⁿ ní tiíⁿ yā yeⁿe cuerpo chi yaācū yeⁿe yā chi nducyaaca 'iiⁿyāⁿ chi i'téenu yā Cristo. Ní ca'á yā vida 'iiⁿyāⁿ chi yeⁿe cuerpo yeⁿé yā. Ní Cristo miiⁿ vmnááⁿ vmnaaⁿ 'iiⁿyāⁿ chi nduuchí yā yeⁿé nguaaⁿ tináⁿā, caati lugar chi vmnááⁿ vmnaaⁿ cuuvi yeⁿé yā yeⁿe nducuéⁿe dendu'ū chi véé. ¹⁹Ní Ndyuūs Chiida yú neⁿé yā chi Cristo miiⁿ canéé yā ndúúcū nducuéⁿe poder chi yeⁿé Ndyuūs. ²⁰Ní cucáávā Cristo miiⁿ Ndyuūs Chiida yú neⁿé yā diíⁿ yā chi cuuvi yeⁿé Cristo tanducuéⁿe dendu'ū taama vmnēⁿēe tan'dúúca tanducuéⁿe chi véé vmnááⁿ vmnaaⁿ na va'ai chēti nguuvi. 'Tiicá ntúúⁿ cuuvi yeⁿé yā tanducuéⁿe chi véé na iⁿ'yeeⁿdí 'cūū. Ní diíⁿ yā chi véé vaadi 'diíⁿ cáávā yuúúⁿ yeⁿé Jesucristo chi can'daa taachi ch'ií yā na cruz.

²¹Ní tiempo chi 'āā chó'ōo ndís'tiī ní tan'dúucā 'ii''yā''n chi snúu''n yā yúúni 'tíicā ndís'tiī. Ní nguée deenú nī Ndyuūs caati díi''n nī cosas chi nguée n'daāca. Ní ndís'tiī ní contra ye''e Ndyuūs ndís'tiī. Ní nguée n'daacā staava ye''é nī. Naati maa''n ní Ndyuūs nch'ēcú yā nuu''ndi ye''e ndís'tiī. Maa''n ní amigos ye''é Ndyuūs ndís'tiī. ²²Ní díi''n yā chi nduuvidaamá nī ndúucū Ndyuūs cáávā chi cuerpo ye''e Jesucristo ch'iī na cruz. Ní Jesucristo ch'iī yā caavā s'uuú''n chi ndaa yā ndúucū s'uuú''n nanáá''n Ndyuūs Chiida yú. Ní Cristo ch'i''í yā chi s'uuú''n ní ye''é Ndyuūs s'uuú''n ní ðeeve vida ye''é yú. Níicu 'āā ntée caa''ma''n Ndyuūs chi véé nuu''ndi ye''e yú. ²³Maa''n ní canee chi i'téenu n'daacá nī nduudu cuaacu ní cunee diitú nī ndúucū chi i'téenu nī chi ye''e Cristo. Ní cu'téenu cá nī nduudu cuaacu ye''e Jesucristo chi ch'i''i chée chi cuuvi ye''e yú ní ye''é chi cunee ngiinu yú. Ní nguée divíi nī ye''e nduudu cuaacu ye''e Jesucristo ti n'daacā canee nī nanáa''n yā ní cunee ngiinu cá nī. Nduudu cuaacú 'cūū ye''e Jesucristo mii''n maa''n ní 'ii''yā''n s'ee''n che''e yā candē yā chí cuuvi ye''é nducyáácá 'ii''yā''n chi snée na i''yee''dí 'cūū. Ní nduudu cuaacu mii''n chii''n chi 'úú Pablo nga''a caati 'tíicā ntii''nyu''n ye''é.

**Pablo nginneé yā 'ii''yā''n
chi ye''e Jesucristo**

²⁴Maa''n ní yeenú taaví ye''é chi n'geenú ngii cucáávā ndís'tiī chi i'téenu nī nduudú 'cūū. Ní 'tíicā maa''n ní yeenú taaví chi 'cuenú cuuvi na cuerpo ye''é tan'dúucā

chi ch'eenú chiī Cristo na cuerpo ye''e yā cucáávā 'ii''yā''n chi i'téenu yā 'ii''yā''n ní ye''e cuerpo ye''e yā. Ní 'tíicā díi''n cumplir vaadī ya'ai ye''e Cristo cucáávā 'ii''yā''n ye''e yā. ²⁵Ndyuūs tee yā ntii''nyu''n 'cūū ye''é chi díi''n ntii''nyu''n ye''e yaacū ye''é yā. Ní díi''n ntii''nyu''n ye''e Ndyuūs nguaa''n ndís'tiī chi nguée ye''é ndaata Israel caati 'tíicā cuuvi cuaacu nduudu ye''e Ndyuūs chi nga''a ndii cuáá''n vmnaa''n. ²⁶Ní nduudú 'cūū nguée deenú 'ii''yā''n caati canúú''n n'de'ei ndii tiempo chi 'āā 'cuée 'ii''yā''n i''yee''dí 'cūū, naati maa''n ní chuū ch'i''i Cristo nanáá''n 'ii''yā''n ye''é yā. ²⁷Níicú Ndyuūs ne''é yā chi nducyáácá 'ii''yā''n chi ye''é yā, 'ii''yā''n chi Israel s'ee''n yā ndúucū 'ii''yā''n chí nguée Israel s'ee''n yā, nducyaaca yā cuuvi deenú yā vaadī 'cuica ye''é chi canúú''n n'de'ei. Chuū ní secreto mii''. Cristo caneé yā ndúucū ndís'tiī chi nguée 'ii''yā''n Israel yā. Ní ndúucū Cristo mii''n snee ngiinú nī chi ca''á nī na va'ai chæti nguuvi.

²⁸Nús'uu ní nga''á 'nū nduudu cuaacu ye''é Cristo nanáá''n nducyaaca 'ii''yā''n. Ní nducué''é ngi'cueé''n 'nū 'ii''yā''n ndúucū vaadi deenu caati cuuvi deenú n'daacá yā nduudu cuaacu ye''é Ndyuūs. Ní cuuvi ye''é Cristo 'ii''yā''n ní n'daacā caneé yā nanáá''n Jesucristo. ²⁹Ní cáávā chuū 'úú idií''n ntii''nyú''n 'cūū, ní díi''n diituú taavi nducué''é tiempo ndúucū nducué''é poder chi Ndyuūs itée yā 'úú.

2 'Úú ne''é chi ndís'tiī cadíinu''n nī chi díituú díi''n ntii''nyu''n caavā ndís'tiī ní cáávā 'ii''yā''n chi snée na yáā''n Laodicea, ní cáávā 'ii''yā''n chi

nguée n'diichi tandii yā naáⁿ. ²Neⁿé chi nducyáácá 'iⁿ'yāⁿ s'eeⁿ ndúúcū ndís'tiī cuuvi diitú nī ndúúcū staava yeⁿ'é nī. Ní nguée 'va'a nī. Ní dáámá nadacadíínūⁿ nī, ni dineⁿ'é nī 'aamá nī taama nī. Ní deenu cá nī yeⁿ'e nducuéⁿ'ē vaadi cuaacu, ní diituu caneé nī ndúúcū chi i'téenu nī. Ní 'íicú cuuvi deenu cá nī chiⁿ chi Ndyuūs cunuⁿ n'de'él yā chi yeⁿ'e maaⁿ Jesucristo miiⁿ. Ní 'íicú cuuvi diituu cá nī ndúúcū chi i'téenu nī yeⁿ'e Jesucristo. ³Caati ndúúcū Cristo miiⁿ tanducuéⁿ'ē chi véé yeⁿ'ē vaadi deenu ndúúcū vaadi cadiinuⁿ ní yeⁿ'é yā ndúúcū nducueⁿ'ē cosa chi cunúúⁿ n'de'ei yeⁿ'e nducyáácá 'iⁿ'yāⁿ. ⁴Ní nducuéⁿ'ē chuū ngaⁿ'á chi nguée du'ū vee canche'ei ndís'tiī ndúúcū nduūdū yaadi yeⁿ'é yā. ⁵Ní chuū ngaⁿ'á caati 'áará chi nguée caneé ndúúcū ndís'tiī cuuvi deenú nī chi nadacadíínúⁿ taavi yeⁿ'e ndís'tiī. Ní yeenú taavi 'úú taachi n'giindiveeⁿ chi n'daacā idiⁿ nī ní díítuu caneé nī ndúúcū nduudu cuaacu yeⁿ'e Cristo chi i'téenu nī.

⁶Maaⁿ ní tan'dúúcā chi i'téenu nī Señor Jesucristo yeⁿ'ē yú 'tiicá ntúúⁿ ndís'tiī chi yeⁿ'é Cristo canée chi n'geetinéé n'daacā nī cáávā Señor Jesucristo yeⁿ'ē yú nginneé yā ndís'tiī. ⁷Ní canée chi diiⁿ n'daacā nī ndúúcū nducuéⁿ'ē caati cu'téenu cá nī Jesucristo. Ní cu'téenu cá nī nguuvi nguuvi tan'dúúcā chi ch'eeⁿ ndís'tiī. Ní nguée ndaacadaamí nī yeⁿ'e chi i'teenú nī. Ní cuéⁿ'é daāⁿmaⁿ ngaⁿ'á nī, gracias Ndyuūs ti yeⁿ'é yā ndís'tiī.

**Yeⁿ'é vida ngai yeⁿ'é 'iⁿ'yāⁿ
chi yeⁿ'e Cristo**

⁸Maaⁿ ní dííⁿ nī cuidado ndís'tiī yeⁿ'e maáⁿ nī chí mar 'áámá saⁿ'ā

nguée castaⁿ'a sa ndís'tiī caavā vaanicadíínūⁿ ch'eté yeⁿ'ē sa ndúúcū nduudu yaadi yeⁿ'ē sa. Ní nguée canche'ei sa ndís'tiī caati nduudu yeⁿ'ē sa chí sta'a sa yeⁿ'e vaanicadíínūⁿ yeⁿ'e 'iⁿ'yāⁿ ní yeⁿ'e costumbre yeⁿ'é 'iⁿ'yāⁿ yeⁿ'é iⁿ'yeeⁿdí. Ndí nguée sta'a sa yeⁿ'ē vaanicadíínūⁿ yeⁿ'é Cristo.

⁹Caati nducuéⁿ'ē chi véé ní yeⁿ'e Ndyuūs ndúúcū daiya yā Jesucristo. Jesucristo miiⁿ ní Ndyuūs 'yā ní dáámá yā ndúúcū chiidá yā. 'Tííca yā. ¹⁰Ní nducuéⁿ'ē chi véé ní yeⁿ'e ndís'tiī caati ndís'tiī ní yeⁿ'e Cristo ndís'tiī. Jesucristo miiⁿ ní ndíí tiiⁿ yā yeⁿ'e tanducuéⁿ'ē 'iⁿ'yāⁿ ní yeⁿ'e tanducuéⁿ'ē 'iⁿ'ntyéⁿ'ē yeⁿ'e tanducuéⁿ'ē nación ní yeⁿ'e tanducuéⁿ'ē poder yeⁿ'e yááⁿ'nguiinūⁿ chi véé na iⁿ'yeeⁿdí 'cūū. ¹¹Ndís'tiī nguée 'iⁿ'yāⁿ circuncidado yā na cuerpo yeⁿ'é yā. Naati cáávā chi ndís'tiī ní yeⁿ'e Jesucristo ndís'tiī, Cristo ní dííⁿ yā cuenta chi ndís'tiī tan'dúúcā 'iⁿ'yāⁿ chí circuncidado yā ndís'tiī taachi Jesucristo nadanguáⁿ'ai yā ndís'tiī yeⁿ'e poder yeⁿ'e nuūⁿndi chi véé na cuerpo yeⁿ'é nī. ¹²Ní taachi ch'edinuūⁿ'niⁿ yā ndís'tiī, tuuⁿ'mi ní canée nī tan'dúúcā chí ch'eechi nī na yáinyāⁿ ndúúcū Cristo ní canée nī tan'dúúcā chi nadacuéⁿ'ē nī yeⁿ'ē nguaaⁿ tináⁿ'ā ndúúcū Cristo. 'Tííca rá váá caati i'téenu nī poder yeⁿ'e Ndyuūs chi diiⁿ chi nacueeⁿ Jesucristo yeⁿ'ē nguaaⁿ tináⁿ'ā. ¹³Ní tiempo chí chó'oo espíritu yeⁿ'e ndís'tiī ní n'diī cucáávā nuuⁿndi chí dííⁿ nī. Ní nguée ndís'tiī 'iⁿ'yāⁿ circuncidado yā ndís'tiī. Naati maaⁿ ní Ndyuūs tee yā vida

cueⁿe daaⁿmaⁿ ndís'tii dáámá dáámá ndúúcū Cristo ti Ndyuūs nadanch'εεcū yā yeⁿē tanducuéⁿē nuuⁿndi yeⁿé nī. ¹⁴Cuááⁿ vmaaaⁿ canee yú ndúúcū nducuéⁿē cuenta yeⁿe nuuⁿndi yeⁿe yú ti nguεε diiⁿ yú tan'dúúcā chi ngaⁿa ley yeⁿé Ndyuūs. Ní cáávā ley miiⁿ ní cuenta yeⁿe nuuⁿndi yeⁿe yú diiⁿ condenar s'uuúⁿ. Naati Cristo nadí'fve yā 'áámá vmnéⁿēe cuenta yeⁿe nuuⁿndi yú taachi ch'iī yā na cruz cáávā s'uuúⁿ. Ní cáávā chi ch'iī yā cáávā s'uuúⁿ ní tan'dúúcā chi nadatuūví yā ley miiⁿ ti nguéé cuuvi condenar s'uuuⁿ. ¹⁵Ní taachi Cristo ch'iī yā na cruz cucheé yā yeⁿe nducuéⁿē 'iīⁿntyéⁿē yeⁿe espíritu chi nguéé n'daacā ndúúcū poder yeⁿé yā. Ní diíⁿ yā chi 'cuinaaⁿ espíritu s'eeⁿ nanááⁿ nducyáácá espíritus. Ní Cristo ch'iⁿí yā nducyáácá 'iīⁿyāⁿ chi chéε yā yeⁿe espíritus.

In'nuúⁿ nī nducuéⁿē chi yeⁿē va'ai cheeti nguuvi

¹⁶Maaⁿ ní nguéé nacadíínuuⁿ nī yeⁿe 'iīⁿyāⁿ chi diíⁿ yā condenar ndís'tii caavā dendu'ū chi nguéé chi nge'é nī ndúúcū chi ngi'í nī o ndúúcū yeⁿē chi diíⁿ nī taachi véé 'viicu s'eeⁿ ndúúcū 'viicu yeⁿe 'iīyū ngai ndúúcū 'viicu yeⁿe sábadó chí nguuvi chi ntaaví'tuunúūⁿ 'iīⁿyāⁿ. ¹⁷Nducuéⁿē 'viicu ndúúcū chi diíⁿ 'iīⁿyāⁿ ní ch'iⁿí yeⁿe Cristo chi cuchiī, naati nducuéⁿē chuū cuaacu nííⁿnyúⁿ ngaⁿā chi yeⁿe Cristo miiⁿ. ¹⁸Nguéé nadacadíínuuⁿ nī yeⁿe 'iīⁿyāⁿ chi diíⁿ yā condenar ndís'tii caati ngaⁿa yā chí n'diichí yā visiones. 'Iīⁿyāⁿ s'eeⁿ nadacadíínuuⁿ yā chi n'gεete maáⁿ yā caavā cosas

chi n'diichí yā. 'Iīⁿyāⁿ s'eeⁿ ngaⁿa yā chi canee chi ndiicuúⁿ nī maáⁿ nī ní dich'εetē nī ángeles. 'Iīⁿyāⁿ s'eeⁿ diíⁿ yā cosas chi nguéé deenú yā yeⁿē ní n'gεete maáⁿ yā caavā chi nadacadíínuuⁿ yā yeⁿe cosas chi candεε yeⁿē maaⁿ tiíⁿ yā. ¹⁹'Iīⁿyāⁿ s'eeⁿ nguéé canee yā ndúúcū nduudu cuaacu yeⁿé Jesucristo. Cristo miiⁿ ní tiiⁿ yeⁿe cuerpo yeⁿé yā chi 'iīⁿyāⁿ chi i'téenu yā yā. Ní Cristo miiⁿ ní diíⁿ yā chi nducuéⁿē 'iīⁿyāⁿ yeⁿé yā ní n'giita yā caati i'téenu cá yā yeⁿé yā. Ní Cristo miiⁿ diíⁿ yā chi nducyaaⁿ 'iīⁿyāⁿ yeⁿé yā canee yā tan'dúúcā chi nduuvi daamá yā tan'dúúcā cuerpo yeⁿe yú nduuvidaama yeⁿē ndúúcū 'iīni ndíí nduū. 'Tíicā diíⁿ Cristo tan'dúúcā chi neⁿe Ndyuūs.

²⁰Maaⁿ ní ndís'tii 'āā ch'iī nī taachi ch'iī Jesucristo. Ní canee nī libre yeⁿe reglas yeⁿe iⁿyeeⁿdí 'cūū. Maaⁿ ní, ¿dε'ε cuuvi chi n'gεetinée ndís'tii tan'dúúcā chi yeⁿe iⁿyeeⁿdí 'cūū ndís'tii? ¿Dε'ε cuuvi chi i'téenu nī reglas yeⁿē iⁿyeeⁿdí 'cūū chi ngaⁿa 'tíicā? ²¹Nguéé tuu'ví nī chuū, nguéé che'é nī cosa 'cūū, ní nguéé cuta'á nī cosa 'cūū na ta'á nī. ²²Ní reglas miiⁿ chííⁿ chi 'iīⁿyāⁿ din'dái yā ní chííⁿ chí ca'cueeⁿ yā 'iīⁿyāⁿ. Nducuéⁿē reglas 'cūū nguéé dichí'fve caati Ndyuūs ca'á yā 'iīⁿyāⁿ cosas caati cuuvi che'é yā yeⁿē. ²³Cuaacu chi 'iīⁿyāⁿ sta'á yā reglas miiⁿ tan'dúúcā chi ch'iⁿí chi yeⁿē vaadi deenu yeⁿé 'iīⁿyāⁿ. Reglas miiⁿ ch'iⁿí chi yeⁿē religión chi ngaⁿā chi 'iīⁿyāⁿ canee chí dich'εetē yā ángeles. Ní reglas miiⁿ ch'iⁿí chí 'iīⁿyāⁿ canee chí ndiicuúⁿ yā maáⁿ yā ní ch'iⁿí chi 'iīⁿyāⁿ canee chí

'cuenú yā cuuvi na cuerpo yeⁿe yā. Naati nguée dichíí'vē mar 'áamá regla yeⁿe chí diiⁿ ayudar 'iiⁿyāⁿ caati nguēe dinuuⁿndí yā tan'dúúcā chi neⁿe diiⁿ cuerpo yeⁿe yā.

3 Maaⁿ ní chi ndís'tií ní 'āā nduuchí nī yeⁿe nguaaⁿ tináⁿā dáámá ndúúcū Jesucristo, ndís'tií in'nuúⁿ nī dendu'ū chi yeⁿe va'ai chēeti nguuvī naachi Cristo vēē yā lado yeⁿe honor yeⁿe Ndyuūs chí lado tá cuaacú yā. ²Ní nadacadíinuⁿ nī yeⁿe nducuéⁿe chí yeⁿe Ndyuūs ní nguéeⁿ yeⁿe nducuéⁿe chí vēē iⁿ'yeeⁿdí 'cūū. ³Tíicā ndís'tií ní ch'ii nī dáámá ndúúcū Cristo ní caneé nī tan'duucā chí ch'ii cuerpo yeⁿe nī. Maaⁿ ní canúúⁿ n'de'ei vida yeⁿe nī ndúúcū Cristo nanááⁿ Ndyuūs. ⁴Maaⁿ vida yeⁿe yú ní cuaacu chí Cristo. Ní taachi ndaa Cristo taama vmnéⁿēe tuu'mi ní s'uuúⁿ ndaa yú nduucú yā ní vēē parte yeⁿe yú nduucú yā na va'ai chēeti nguuvī.

Yeⁿe vida ndiicúū yeⁿe yú ní yeⁿe vidā ngai yeⁿe yú

⁵Maaⁿ ní diiⁿ yú cuenta chí ch'ii cuerpo yeⁿe yú ní 'āā ntéē diiⁿ yú nuuⁿndi. N'diichí nī, vēē nuuⁿndi nguaáⁿ nī. Neⁿé nī 'áamá saⁿā o 'aama n'daataá chí nguéeⁿ yeⁿe nī. Ní neⁿé nī dííⁿ nī cosa chí nguéeⁿ yeⁿe Ndyuūs. Ní neⁿé nī n'diichí nī 'áamá n'daataá o 'áamá sáⁿā chí nguéeⁿ yeⁿe nī. Ní neⁿé nī dendu'ū chí nguéeⁿ yeⁿe nī. 'Tiicá nī. Ní caneé nī tan'dúúcā chí i'téenu nī ídolos chí imágenes. ⁶Nducuéⁿe chuū ní nuuⁿndi. Ní Ndyuūs dííⁿ yā castigar nducyáácá 'iiⁿyāⁿ chí nguéeⁿ dííⁿ yā tan'dúúcā chí ngaⁿa yā. ⁷Tíicā 'āā

dinuuⁿndí ndís'tií tiempo chí 'āā chó'oo. ⁸Maaⁿ ní 'āā ntéē dííⁿ nī nuuⁿndi. Nguéeⁿ ditaáⁿ nī, nguéeⁿ caaⁿmaⁿ taáⁿ nī. Nguéeⁿ dííⁿ nī cosas chí nguēe n'daācā 'aamá nī ndúúcū taamá nī. Nguéeⁿ caaⁿmáⁿ nī 'iiⁿyāⁿ chííⁿ chí nguéeⁿ n'daācā chí maáⁿ yā dííⁿ yā. Nguéeⁿ caaⁿmáⁿ nī mar 'áámá nduudu chí nguéeⁿ n'daācā. ⁹Nguéeⁿ caaⁿmáⁿ nī nduudu yaadi 'aama nī ndúúcū taama nī. Nguéeⁿ dííⁿ nī 'túúcā caati 'āā dicuenta nī tan'dúúcā chí 'āā ch'ii cuerpo yeⁿe nī ndúúcū nducuéⁿe chí nguéeⁿ n'dáācā chí 'āā dííⁿ nī. ¹⁰Ní maaⁿ ní cuerpo yeⁿe nī ní tan'dúúcā cuerpo chí ngai chí Ndyuūs din'dái yā. Ní nguuvī nguuvī dííⁿ yā chí ndís'tií cuuví nī tan'dúúcā Ndyuūs, 'tiicá nī. Ní 'íicú Ndyuūs dííⁿ yā chí cuuvi deenu cá nī yeⁿe Ndyuūs. ¹¹Caati nanááⁿ Jesucristo miiⁿ nguéeⁿ dē'ē vēē nduuti chí 'iiⁿyāⁿ nguéeⁿ yeⁿe ndaata 'iiⁿyāⁿ Israel o 'iiⁿyāⁿ chí yeⁿe ndaata 'iiⁿyāⁿ Israel. Nguéeⁿ dē'ē vēē nduuti chí 'iiⁿyāⁿ ní circuncidado yā o nguéeⁿ circuncidado yā. Nguéeⁿ dē'ē vēē nduuti chí 'iiⁿyāⁿ tan'dúúcā chí snéē yúúní, o nduuti chí 'iiⁿyāⁿ tan'dúúcā chí 'iiti 'cūeti. Nguéeⁿ dē'ē vēē nduuti chí 'iiⁿyāⁿ chí dichíí'vē 'iivi yeⁿe yā, o 'iiⁿyāⁿ chí snéē libre yā. Dámaāⁿ dichíí'vē chí 'iiⁿyāⁿ s'eeⁿ ní yeⁿe Cristo ní Cristo caneé yā nduucú yā.

¹²Ndís'tií ní yeⁿe Ndyuūs ndís'tií. Ní Ndyuūs dineⁿé yā ndís'tií ní nndēēve yā ndís'tií chí cuuvi yeⁿe yā ndís'tií. Maaⁿ ní ndís'tií caneé chí diya'ái nī 'iiⁿyāⁿ ní din'daācā cá nī. Nguéeⁿ dich'etē nī maáⁿ nī naati dííⁿ nī nducuéⁿe ndúúcū vaadi ndiicúúⁿ.

¹³Ní nginneé nī 'aamá nī taama nī. Ní cuheé nī yeⁿe nducuéⁿē. Ní nadach'εécú nī 'iīⁿyāⁿ chí díⁿ yā 'áámá falta ndúúcu nī. Ní tan'dúúcā chí Cristo nadach'εécú yā nuuⁿndi yeⁿé nī, 'tiicá ntúúⁿ nadach'εécú nī yeⁿe 'aama nī ndúúcu taama nī. ¹⁴Nguaaⁿ nducuéⁿē chí díⁿ nī, dineⁿe taavi cá nī 'iīⁿyāⁿ ti taachi díⁿ nī 'túúcā caneé nī tan'dúúcā chí nduuvidaamá nī yeⁿē nducuéⁿē chí véé. Ní díⁿ nī cumplir nducuéⁿē dendu^u. ¹⁵Ní vaadi 'diiⁿ chí Ndyuūs itée yā ndís'tiī na staava yeⁿé nī canee chí ch'iⁿi ndís'tiī nducuéⁿē chí díⁿ nī caati Ndyuūs yaa'ví yā nducyáácá ndís'tiī chí cuuvi yeⁿé nī vaadi 'diiⁿ miiⁿ. Ní nducyáácá nī ní caneé nī tan'dúúcā 'áámá cuerpo nūuⁿ, 'tiicá nī. Maaⁿ ní ca'á nī gracias Ndyuūs caavā chuū.

¹⁶Ní 'áámá canéé n'daacā na staava yeⁿé nī nducuéⁿē nduudu cuaacu chí n'daacā taavi ní yeⁿe Ndyuūs. Ca'cueéⁿ nī ní ch'iⁿi nī 'áámá nī taama nī ndúúcu nducuéⁿē vaadi deenu. Ngiitá nī salmos ndúúcu himnos ndúúcu canciones chí ngaⁿā yeⁿé Ndyuūs. Ní ndúúcu núúⁿmáⁿ staava yeⁿé nī nca'á nī gracias Ndyuūs. ¹⁷Nífcú nducuéⁿē cosa chí diiⁿ nī 'áará chí caaⁿmáⁿ nī o díⁿ nī ntiiⁿnyuⁿ, díⁿ nī nducuéⁿē caavā Señor Jesús ní nca'á nī gracias Ndyuūs Chiida yú cáávā Cristo.

**Tan'dúúcā chí canee chí diiⁿ
yú ti yeⁿe Cristo s'uuúⁿ**

¹⁸Ndís'tiī n'daataá chí 'nínívaacu, cu'teenú nī yeⁿe isaⁿā yeⁿé nī caati 'tífā canee chí díⁿ nī ti yeⁿé Ndyuūs ndís'tiī. ¹⁹'Tiicá ntúúⁿ isaⁿa

yeⁿé yā, dinéⁿe nī n'daataá yeⁿé nī ní nguée nduuví taáⁿ nī ndúúcu n'daataá yeⁿé nī. ²⁰Ndís'tiī daiyá yā chí yeⁿe Cristo 'caandiveeⁿ nī yeⁿe chiidá nī ní cheecu nī yeⁿe tanducuéⁿē caati 'tífā neⁿe Ndyuūs. ²¹Ní ndís'tiī chí véé daiyá nī, nguée díⁿ nī chí nduuví táaⁿ daiyá nī caati cuayiivi ní nguée cu'téenu yā chee chí caaⁿmáⁿ nī yeⁿe yā. ²²Ndís'tiī chí dichíⁿvē 'iīⁿyāⁿ, 'caandiveeⁿ nī yeⁿē tanducuéⁿē chí ngaⁿā 'iiví nī yeⁿē iⁿ'yeeⁿdí 'cūū. Nguée díⁿ nī tan'dúúcā chí neⁿé yā dámaaⁿ taachi nanáaⁿ yā ndís'tiī. Ní 'iiví nī cuuvi deenú yā chí n'daacā idiⁿ nī, naati díⁿ nī nducuéⁿē ntiiⁿnyuⁿ ndúúcu núúⁿmáⁿ staava yeⁿé nī. Ní 'va'á nī Ndyuūs. ²³Ní tanducuéⁿē chí díⁿ nī, díⁿ nī ndúúcu núúⁿmáⁿ staava yeⁿé nī. Ní díⁿ nī ntiiⁿnyuⁿ miiⁿ tan'dúúcā chí ntiiⁿnyuⁿ yeⁿé Ndyuūs ní nguée ntiiⁿnyuⁿ yeⁿē 'iiví nī. ²⁴Ní ndís'tiī deenú nī chí cuuvi cuta'á nī yeⁿe chí véé yeⁿé nī chíⁿ chí téé Cristo ndís'tiī. Cuaacu chí ndís'tiī dichíⁿvē nī Jesucristo ní cuaacu níⁿnyúⁿ Cristo ní 'iiví nī. ²⁵Ní 'iīⁿyāⁿ chí nguée n'daacā idiⁿ yā caⁿā yā cuta'á yā ná díⁿvē yā yeⁿē chí díⁿ yā chí nguée n'daacā. Ndyuūs 'āā daamá nūuⁿ díⁿ yā tratar ndúúcu nducyáácá 'iīⁿyāⁿ.

4 Ndís'tiī patrones chí véé mozos yeⁿé nī, díⁿ nī chí cuaacu ndúúcu chí n'daacā ndúúcu mozos yeⁿé nī. N'gaacú nī chí véé 'iiví nī chí canéé na va'ai cheeti nguuví.

²Nducuéⁿē tiempo caaⁿmaⁿngua'á nī ní 'cuēti nduuchí nī. Ní ca'á nī gracias Ndyuūs. ³Caaⁿmaⁿngua'á ntuúⁿ nī yeⁿē nús'uu ti Ndyuūs téé

yā lugar nús'uu chi cuuvi caa'má'n
'nū nduudu cuaacu ye'n'é yā. Ní
nduudu mii'n ní ye'n'e Cristo. Ní nguée
déenu 'ii'n'yā' naati maa'n ní nga'a
'nū nduudu mii'n. Ní cucáávā nduudu
mii'n maa'n 'úú canuún' vácūū ndúúcū
cadena 'cūū. ⁴Caa'ma'ngua'á
nī cáávā 'úú chi cuuvi caa'má'n
n'daacā nduudu mii'n tan'dúúcā chi
canée chi caa'má'n.

⁵Maa'n ní ndís'tiī 'cuēetinée
n'daacā nī ndúúcū 'ii'n'yā' chi nguée
i'téenu yā Ndyuūs. Díi'n nī n'daacā
nducué'n'e tiempo. ⁶Cué'n'é daā'ma'n
caa'má'n nī chí n'daacā ndúúcū
nduudu n'dai. Ní canée chí déenu
nī táácā chi cuuvi nan'guēecuta'á nī
ca'áámá ca'áámá 'ii'n'yā'.

'Cuiinu carta mii'n ndúúcū saludos

⁷Hermano Tíquico chi ne'n'e yú,
'áámá canee sa chi dii'n sa ntiī'nyu'n
ye'n'é Jesucristo ní dii'n sa dáámá
ntiī'nyu'n nduucú. Sa'nā mii'n cuuvi
sa ndís'tiī tan'dúúcā chi 'úú canee ní
dii'n. ⁸Ní cáávā chiī'n dicho'ó Tíquico
nanáán ndís'tiī caati cuuvi sa ndís'tiī
táácā n'gēetineé 'nū. Ní tée sa
'viich'ēetínūū na stava ye'n'é nī. ⁹Ní
dicho'ó ntúū'n hermano Onésimo,
sa'nā chi ne'n'e yú, ní 'áámá canee sa
chi dii'n ntiī'nyu'n ye'n'é Ndyuūs. Ní
ye'n'e 'áámá chēē ndís'tiī. Hermanos
s'ee'n yaa'ví yā ndís'tiī tanducué'n'e
chi dii'n 'nū 'muu'n.

¹⁰Sa'nā Aristarco chi canuún' vácūū
nduucú idich'ó sa: N'dai ndís'tiī.
'Tiicá ntúū'n dicho'ó sa'nā Marcos chi
dácūū sa'nā Bernabé. Ní ndís'tiī 'āā
sta'á nī orden chi 'cuaa'n nī hermano
Marcos mii'n nduuti chi ndaa sa
nanáán ndís'tiī. ¹¹'Tiicá ntúū'n Jesús
chi nguuvī Justo dicho'ó sa: N'dai

ndís'tiī. Dámaā'n sa'nā s'uu'n chi
ye'n'e ndaata 'ii'n'yā' Israel ní i'téenu
yā Jesucristo dii'n yā ntiī'nyu'n
nduucú ye'n'e naachi Ndyuūs nga'a
ntiī'nyú'n yā. Sa'nā s'uu'n ntée ca yā
'viich'ēetínūū'n 'úú. ¹²Sa'nā Epafras
ntúū'n chi dii'n ntiī'nyu'n ye'n'e Cristo
ní ye'n'e 'áámá chēē ndís'tiī dicho'ó
sa: N'dai ndís'tiī. Sa'nā mii'n neené
nga'angua'á sa ye'n'e ndís'tiī chi
ndís'tiī 'áámá canee nī ndúúcū chi
i'téenu nī níicú chi dámaā'n ne'n'é nī
dii'n nī tanducué'n'e tan'dúúcā chi
Ndyuūs ne'n'e yā chi dii'n nī. ¹³'Úú ní
nga'á nduudu cuaacu ye'n'e Epafras
mii'n. Neené inadacadíinuū sa ye'n'é
ndís'tiī ndúúcū 'ii'n'yā' chi snée
yā na yāā'n Laodicea ndúúcū yāā'n
Hierápolis. ¹⁴Sa'nā Lucas chi doctor
chi ne'n'e yú ndúúcū sa'nā Demas
dicho'ó yā: N'dai ndís'tiī, nga'á yā.

¹⁵Maa'n ní ndís'tiī dicho'ó nī: N'dai
ndís'tiī, nga'á nī hermanos chi snée
na yāā'n Laodicea. Dicho'ó nī: N'dai
ndís'tiī, n'daataá Ninfas ndúúcū
'ii'n'yā' chi i'téenu yā Jesucristo ní
nduuvidaamá yā na vaacu tá chi
yaācū ye'n'é yā. ¹⁶Ní taachi 'cuiinū
n'geé'n nī carta 'cūū nguua'n ndís'tiī
dicho'ó nī carta 'cūū 'ii'n'yā' ye'n'e
yāā'n Laodicea chi 'cueé'n yā na yaacū
ye'n'é yā. Ní canee chi 'cueé'n nī ntúū'n
'áámá carta chi dicho'ó 'ii'n'yā' ye'n'e
yāā'n Laodicea. ¹⁷Ní ndís'tiī cuuvi nī
sa'nā Arquipo chi 'úú caa'má'n 'tíficā:
Díi Arquipo, dii'n di cuidado chi
dii'n n'daacā di ní 'cuiinu di ntiī'nyu'n
ye'n'e Señor chi Señor tee yā díi.

¹⁸'Úú, Pablo, dingúú'n saludos 'cūū
ndúúcū ta'á ndúúcū letras ye'n'é.
N'gaacú nī ye'n'é chi canuún' vácūū.
Ne'n'é chi Ndyuūs itée yā vaadi n'dai
ye'n'é yā. 'Tíficā cuuvi.

CARTA VMNÁÁⁿ VMNAAⁿ YEⁿE 'IIⁿ'YĀⁿ YEⁿE YĀĀⁿ TESALÓNICA

Pablo ndúúcū compañeros yeⁿ'é yā idinguúⁿ yā carta 'cūū yeⁿ'e 'iiⁿ'yāⁿ yeⁿ'e yaācū na yāāⁿ Tesalónica

1 'Úú, Pablo, idinguúⁿ carta 'cūū ndúúcū saⁿ'a Silvano ndúúcū saⁿ'ā Timoteo yeⁿ'e hermanos yeⁿ'e yú chi caⁿ'á yā na yaācū yeⁿ'e yāāⁿ Tesalónica, 'iiⁿ'yāⁿ chi yeⁿ'é Ndyuūs Chiida yú nícú yeⁿ'é Señor Jesucristo. Neⁿ'é 'nū chi Ndyuūs Chiida yú ndúúcū Señor Jesucristo téé yā ndís'tiī nducuéⁿ'ē vaadi n'dai yeⁿ'é yā, ní vaadi 'diifⁿ yeⁿ'é yā canee na staava yeⁿ'é nī.

'Iiⁿ'yāⁿ yeⁿ'e yāāⁿ Tesalónica din'daacá yā ní diitu i'téenu yā Jesucristo

2 Ca'á 'nū gracias nanááⁿ Ndyuūs cáávā nducyaaca ndís'tiī ní taachi caaⁿ'maⁿ'ngua'á 'nū inin'gáácú 'nū yeⁿ'e ndís'tiī. **3** Ní taachi ngaⁿ'angua'á 'nū nanááⁿ Ndyuūs Chiida yú, ngaⁿ'angua'á 'nū yeⁿ'e ntiiⁿ'nyuⁿ chi dífⁿ nī caati i'téenu cá nī ní chí neⁿ'e cá nī nducyaaca 'iiⁿ'yāⁿ ní chí nginneé yā 'iiⁿ'yāⁿ. Ní cuchée nī yeⁿ'e tanducuéⁿ'ē. Ní 'áámá canee nī ndúúcū chi i'téenu nī caati cūnee ngiinú nī chi Señor Jesucristo yeⁿ'ē yú caⁿ'á yā téé yā

chiiⁿ chi cuuvi yeⁿ'é nī. **4** Ndís'tiī, hermanos yeⁿ'é 'nū, Ndyuūs neⁿ'é yā ndís'tiī. Ní deenú 'nū chi Ndyuūs ndeēve yā ndís'tiī chi ndís'tiī cuuvi yeⁿ'é yā ndís'tiī. **5** Taachi ngaⁿ'a 'nū nduudu cuaacu yeⁿ'é Ndyuūs nanááⁿ ndís'tiī nguēē dámaāⁿ ngaⁿ'á 'nū nduudu miiⁿ ndúúcū nduudu yeⁿ'é 'nū ti ndúúcū poder yeⁿ'ē Espíritu N'dai yeⁿ'é Ndyuūs. Ní deenú 'nū chi nduudu cuaacu miiⁿ ní cuaacu. Ndís'tiī ní deenú nī du'u saⁿ'ā nús'uu taachi caneé 'nū ndúúcū ndís'tiī ní táácā dífⁿ 'nū caati maáⁿ nī cuuvi 'cuēetinée n'daaca nī.

6 Ní ndís'tiī ní 'āā diiⁿ nī tan'dúúcā chi nús'uu dífⁿ 'nū ní tan'dúúcā chi diiⁿ Señor Jesucristo yeⁿ'ē yú. Ní i'téenu nī nduudu cuaacu yeⁿ'é Ndyuūs. Ní yeenú nī ndúúcū vaadi yeenú chi Espíritu N'dai yeⁿ'é Ndyuūs tee yā ndís'tiī 'áará chí ch'eenú nī chiī cucáávā chi i'téenu nī. **7** Ní cucáávā chi dífⁿ nī 'tuucā nducyáácá 'iiⁿ'yāⁿ chi i'téenu yā Señor Jesucristo, 'iiⁿ'yāⁿ yeⁿ'e núúⁿ'máⁿ yāⁿ'āa Macedonia ndúúcū núúⁿ'máⁿ yāⁿ'āa Acaya cuuvi cuta'á ndís'tiī tan'dúúcā 'áámá ejemplo ní dífⁿ yā tan'dúúcā chi dífⁿ nī. **8** Ní ndís'tiī diiⁿ nī chi tanáⁿ'ā 'iiⁿ'yāⁿ

cuuvi déénu yā nduudu cuaacu yeⁿe Señor. Nguεε dámaaⁿ 'iiⁿ'yāⁿ yeⁿe yāⁿāa Macedonia ndúúcu 'iiⁿ'yāⁿ yeⁿe yāⁿāa Acaya naati 'iiⁿ'yāⁿ yeⁿe nducuéⁿē cuaāⁿ 'āā deenú yā chi ndis'tii i'téenu nī Ndyuus. Ní nguεε canéé chi caaⁿ'maⁿ cá 'nū de'ē vεε yeⁿe nī ti n'daacā i'téenu nī. ⁹Ní nducyaaca 'iiⁿ'yāⁿ ngaⁿ'a yā nús'uu yeⁿe visita yeⁿé 'nu taachi caneé 'nū nguaaⁿ ndís'tii. Nī ngaⁿ'a yā tan'dúúca chi ndís'tii s'néeⁿ nī ídolos caavā chi cu'téenu nī Ndyuūs chí canduuchi, Ndyuūs chí cuáácú chi Ndyuūs. Ní tuca'á nī díⁿ nī ntiiⁿ'nyuⁿ yeⁿé Ndyuūs. ¹⁰Tiicá ntúūⁿ ngaⁿ'a yā chi ndís'tii cūnee ngiinú nī chi Jesucristo chi Daiya Ndyuūs ní ndaa yā taama vmnéⁿēe yeⁿé va'ai chεeti nguuví. Ndyuūs nada'cueeⁿ yā Jesús miiⁿ yeⁿé nguaaⁿ tináⁿā. Nífcú Jesucristo miiⁿ ní 'iiⁿ'yāⁿ chi nadanguáⁿ'ai yā s'uuúⁿ yeⁿé castigo chi neené díftūu yeⁿe tiempo chi cuchíi.

Ntiiⁿ'nyuⁿ chi díiⁿ Pablo naachi canéé yā na yāāⁿ Tesalónica

2 Ndís'tii, hermanos yeⁿe yú, deenú nī chi tiempo chi canéé 'nū nguaaⁿ ndís'tii chi nguεε tandii rá díⁿ 'nū ntiiⁿ'nyuⁿ yeⁿé Ndyuūs. ²Āā deenú nī chi 'āā cueⁿé 'nū yāāⁿ Filipos vmnaaⁿ chi ndaaⁿ 'nū nanááⁿ ndís'tii. Ní déénu nī chi 'iiⁿ'yāⁿ miiⁿ'ya nguεε n'daacā díⁿ yā nduucú 'nū. Ní ngaⁿ'a taāⁿ yā yeⁿé 'nū chi ch'eenú 'nū chii. Nífcú taachi ndaaⁿ 'nū nanááⁿ ndís'tii, nguεε 'va'á 'nū chi caaⁿ'máⁿ 'nū nduudu cuaacu chí ngai yeⁿe Cristo 'áará chí deenú 'nū chi vεε cá 'iiⁿ'yāⁿ chi contra yeⁿe nús'uu, 'iiⁿ'yāⁿ chí nguéé n'daacā

díⁿ yā nduucú 'nū. ³Caati deenú 'nū chi ngaⁿ'á 'nū nduudu cuaacu miiⁿ nguéé ndúúcu vaanicadíínuuⁿ yeⁿé 'nū chí nguéé n'daacā ndíí nguéé ndúú nginnche'éí 'nū 'iiⁿ'yāⁿ. ⁴Naati Ndyuūs n'diichí ya vida yeⁿé 'nū chi n'daacā n'geetineé 'nū. Ní tee yā ntiiⁿ'nyuⁿ nús'uu chí caaⁿ'máⁿ 'nū nduudu cuaacu yeⁿé chí cuuvi nanguáⁿ'ai 'iiⁿ'yāⁿ yeⁿe nuuⁿndi yeⁿé yā. Ní nguεε díⁿ 'nū ntiiⁿ'nyuⁿ miiⁿ chí cūnee yíínuu 'iiⁿ'yāⁿ naati díⁿ 'nū chiiⁿ chí neⁿe Ndyuūs chí snaaⁿ yā nducuéⁿē chí vεε na staava yeⁿe yú. ⁵Ní ndís'tii deenú nī chí nguéé ngaⁿ'á 'nū nduudu cuaacu miiⁿ ndúúcu n'dee n'dái nduudu chí n'dai taavi chí cūnee yiinú nī yeⁿé 'nū. Ní nguéé ngaⁿ'á 'nū cáávā chí díⁿ 'nū ganar tuūmí. Ndyuūs ní deenú yā yeⁿé 'nū yeⁿe chí díⁿ 'nū. ⁶Mar 'áamá vmnéⁿēe díⁿ 'nū ntiiⁿ'nyuⁿ yeⁿé Ndyuūs caavā chí 'iiⁿ'yāⁿ cuuvi caaⁿ'máⁿ yā chí n'geetε 'nū. Ní nguéé nanááⁿ ndís'tii, ndíí nguεε nduu nanááⁿ tanáⁿ'a yā. Ní deenú 'nū chí cuuvi ch'iⁿ'í 'nū 'iiⁿ'yāⁿ chí ch'εete maáⁿ 'nū caati Cristo dich'ó yā nús'uu chí díⁿ 'nū ntiiⁿ'nyuⁿ yeⁿe apóstoles ní candéε 'nū nduudu yeⁿé yā. ⁷Naati 'tíicā díⁿ 'nū ndúúcu nī tan'dúúca chí ndís'tii da'cai yā daiyá 'nū. Niicu tan'dúúca chí díⁿ 'áamá n'daataá ndúúcu daiyá yā taachi idi'cuiitá yā ní díⁿ yā cuidado daiyá yā, 'tíicā díⁿ 'nū ndúúcu nī. Ní n'daacā ngaⁿ'á 'nū ndúúcu nī ndúúcu vaadi n'giinu. ⁸Ní 'tíicā neⁿe cá 'nū ndís'tii chí neⁿé 'nū tee 'nū ndís'tii nguéé dámaaⁿ nduudu cuaacu yeⁿé Ndyuūs, naati 'tiicá ntuūⁿ neⁿé 'nū 'cuuví 'nū cáávā ndís'tii caati 'āā neⁿe taavi cá 'nū

ndís'tií. ⁹Ndís'tií hermanos yeⁿe yú, n'gaacu nī yeⁿē ntiiⁿnyuⁿ chi diíⁿ cá 'nū nī ngaⁿá 'nū nduudu cuaacu yeⁿé Ndyuūs nanááⁿ ndís'tií. Ní diíⁿ 'nū ntiiⁿnyuⁿ ndúúcu ta'á 'nū ndíí nguuví ndíí n'gaaⁿ cáávā chi véé necesidades yeⁿé 'nū. Ní nguée diíⁿ vaachí 'nū ndís'tií yeⁿē dé'ē vee.

¹⁰Ní ndís'tií ní testigos yeⁿé 'nū. 'Tiicá ntúūⁿ Ndyuūs ní testigo yeⁿé 'nū tan'dúúca chi 'cuēetinee n'daacá 'nū ní diíⁿ 'nū dendu'ū chi cuaacu taachi caneé 'nū nguaaⁿ ndís'tií chi i'téenu nī Señor Jesucristo. Ní nguée mar 'áamá 'iiⁿyāⁿ cuuvi caaⁿmaⁿ yā chi nguée n'daacā diíⁿ 'nū. ¹¹Ní 'tiicá ntúūⁿ ndís'tií deenú nī tan'dúúca chi diíⁿ 'nū ndúúcu ca'áamá ca'áamá ndís'tií. Ní diíⁿ 'nū tan'dúúca chi nús'uu ní chiidá nī nī ndís'tií ní daiyá 'nū ní tee 'nū consejo ndís'tií ndúúcu 'viich'etínūⁿ. ¹²Ní ch'iⁿi 'nū ndís'tií tan'dúúca chi cuuvi n'gēetinee n'daacá nī nanááⁿ Ndyuūs caati ndís'tií ní yeⁿé Ndyuūs ndís'tií. Ní Ndyuūs ní yaa'ví yā ndís'tií chi cuuvi ndaa nī naachi Ndyuūs ngaⁿa ntiiⁿnyúⁿ yā. Ní véé nducuén'ē cosas chí n'dai yeⁿé nī. ¹³Níicú cáávā nducuén'ē chuū cueⁿe daāⁿmaⁿ ní ca'á 'nū gracias Ndyuūs caati taachi ndís'tií ní ch'iinniveéⁿ nī nduudu yeⁿé Ndyuūs chi ngaⁿá 'nū nanááⁿ ndís'tií, chi'téenu nī nduudu miiⁿ chi nduudu yeⁿé Ndyuūs ní nguée nduudu chi yeⁿe 'iiⁿyāⁿ. Ní cuaacu chi nduudu miiⁿ ní yeⁿé Ndyuūs caati diíⁿ ntiiⁿnyuⁿ na vida yeⁿé ndís'tií chi i'téenu nī. ¹⁴Ndís'tií, hermanos yeⁿé 'nū. Dáámá cho'o yeⁿe ndís'tií taachi n'geenú nī ngii cucáávā chi diíⁿ 'iiⁿyāⁿ Israel chi paisanos yeⁿé nī ndúúcu nī. Chó'ōo

ntúūⁿ yeⁿe 'iiⁿyāⁿ chi naⁿá yā yaācū naachi 'iiⁿyāⁿ i'téenu yā Jesucristo na yáⁿā Judea caati 'tíicā diíⁿ 'iiⁿyāⁿ Israel chi paisanos yeⁿé yā ndúúcu yā. ¹⁵Maaⁿ 'iiⁿyāⁿ paisanos chi 'iiⁿyāⁿ Israel ch'iiⁿnuⁿ yā Señor Jesucristo yeⁿé yú tan'dúúca chi diíⁿ yā ndúúcu profetas chi ngaⁿá yā nduudu cuaacu yeⁿé Ndyuūs tiempo chi 'āā chó'ōo. Ní 'iiⁿyāⁿ s'eeⁿ can'dáa yā s'uuúⁿ ní diíⁿ chi n'geenu yú ngii. Ní nguée diíⁿ yā chiiⁿ chi Ndyuūs neⁿé yā chi diíⁿ yā ní contra yā nducyaaca 'iiⁿyāⁿ. ¹⁶Ní taachi neⁿé 'nū ngaⁿá 'nū nduudu cuaacu nanááⁿ 'iiⁿyāⁿ chi nguée yeⁿe ndaata yeⁿé yā caati cuuví nnguaⁿai yā, 'iiⁿyāⁿ s'eeⁿ chi paisanos yeⁿé nī nguée n'guúⁿ yā chi ngaⁿá 'nū. 'Tíicā nī véé cá nuuⁿndi yeⁿé yā. 'Tíicā diíⁿ yā maaⁿ naati cuayiivi Ndyuūs caⁿá yā chi ca'a yā 'iiⁿyāⁿ s'eeⁿ 'áamá castigo chi neené diitūu ca.

**Pablo neⁿé yā caⁿá yā taama
vmnéⁿēe ní n'diichí yā 'iiⁿyāⁿ
yeⁿe yāāⁿ Tesalónica**

¹⁷Ndís'tií hermanos yeⁿe yú 'áará chí maaⁿ ní yaⁿai snée 'nū yeⁿe ndís'tií ní nguée cuuvi naáⁿ 'nū ndís'tií nadacadiinúúⁿ 'nū yeⁿe ndís'tií. Néené neⁿé 'nū cunée 'nū ndúúcu ndís'tií ní n'diichí 'nū ndís'tií. ¹⁸Ní diíⁿ 'nū nducuén'ē chi cuuví 'nū ti cuuvi ndaá 'nū nanááⁿ ndís'tií. Ní 'úú Pablo 'naaⁿ tiempo canee listo chi naⁿá naati yááⁿn'guinūuⁿ diíⁿ sa chi nguēe cuuvi ndaá. ¹⁹¿De'ē cáávā chi snée ngiinū 'nū ní yeenú 'nū? Snée ngiinū 'nū ní yeenú 'nū ti cuuvi candé'ē 'nū ndís'tií nanááⁿ Jesucristo taachi

ndaa yā taama vmnéⁿēe. ²⁰Cuaacu níⁿnyúⁿ chi ndís'tií chi i'téenu nī ní diiⁿ chi néené yeenú 'nū cáávā chi díⁿ 'nū ntiiⁿnyuⁿ yeⁿ'é Ndyuūs nguaaⁿ ndís'tií.

3 Ní taachi 'āā ntéé cucheé 'nū chi nguée ndaa 'nū nanááⁿ ndís'tií, tuu'mi ní nadicadínuuⁿ 'nū chi n'daacā chi maáⁿ 'nū n'geetineé 'nū na yāāⁿ Atenas. ²Ní dicho'ó 'nū Timoteo chi hermano yeⁿ'ē yú chi cuuvi n'diichi sa ndís'tií taacā snée nī. Saⁿ'ā miiⁿ 'āā diiⁿ sa ntiiⁿnyuⁿ yeⁿ'é Ndyuūs daama nduucú 'nū ní ngaⁿ'a sa nduudu cuaacu yeⁿ'é Cristo chi diiⁿ chi nadinguáⁿ'ai 'iiⁿyāⁿ. Saⁿ'ā miiⁿ ní cuuví cūnnee sa ndís'tií ní téé sa 'viich'etfínūuⁿ ndís'tií. Ní cuuví cūnee diitu cá nī ndúúcū chi i'téenu nī. Cáávā chuū dichó'ó 'nū Timoteo. ³Nguee neⁿ'é 'nū chi ndís'tií ndaacadaamí nī yeⁿ'e Jesucristo chi guee i'téenu nī Jesucristo cucáávā chi n'geenú nī ngii. 'Āā deenú nī chi canee chi 'cuenú nī cuuvi caati i'téenu nī Jesucristo. ⁴Ní cuaacú taachí ch'etinee 'nū ndúúcū ndís'tií chii 'nū ndís'tií chi ndaa tiempo chi canéé chi 'cuenú yú cuuvi tan'dúúcā chi ch'ó'oo yeⁿ'é nī. Chuū ní ndís'tií déenu nī. ⁵Ní cáávā chuū taachi 'āā ntéé cheé chi nguée n'giindiveéⁿ yeⁿ'é ndís'tií cho'ó hermano Timoteo chi 'úú cuuvi deenú táacā snée nī ndúúcū chi i'téenu nī. Caati 'úú 'va'á chi yááⁿ'nguiniūuⁿ diiⁿ chi nguée i'téenu nī ní maaⁿ ní nguée dichí'vē ntiiⁿnyuⁿ chi 'āā diiⁿ 'nū nguaaⁿ ndís'tií.

⁶Naati maaⁿ ní Timoteo chi chiica sá yeⁿ'e ndís'tií chi snée na

yāāⁿ Tesalónica ndaā sa nanaáⁿ 'nū. Ní yaa'vi sa nús'uuⁿ chi n'daacā n'dai snée nī ti i'téenu nī Ndyuūs. Ní ngaⁿ'a ntúūⁿ sā chi neⁿ'e nī nducyaaca 'iiⁿyāⁿ. Ní yaa'vi sa nús'uu chi cueⁿ'e daāⁿmaⁿ n'gaacu nī yeⁿ'é 'nū ní neⁿ'é nī nús'uu. Ní néené neⁿ'é nī n'diichi nī nús'uu. Ní nús'uu neⁿ'e ntúūⁿ 'nū n'diichi 'nū ndís'tií. ⁷Ní ndís'tií hermanos yeⁿ'é 'nū cucáávā chi n'giindiveéⁿ 'nū yeⁿ'ē ndís'tií chi díítū canee nī ndúúcū chi i'téenu nī yeⁿ'e Señor Jesucristo yeⁿ'e yú maaⁿ ní véé 'viich'etfínūuⁿ yeⁿ'é 'nū yeⁿ'ē tanducuéⁿ'ē chi ch'eenú 'nū chii. ⁸Ní snée 'nū tan'dúúcā chi véé vida ngai yeⁿ'é 'nū ti n'giindiveéⁿ 'nū chí n'daacā n'dai canee nī maaⁿ chi ndís'tií ní yeⁿ'e Señor Jesucristo ndís'tií. ⁹Maaⁿ ní gracias cuuvi nca'á 'nū Ndyuūs Chiida yú cucáávā ndís'tií ní cucáávā chi ndís'tií díⁿ nī chi yeenu taaví 'nū taachi ngaⁿ'angua'á 'nū caavā ndís'tií ndúúcū Ndyuūs Chiida yú. ¹⁰Ní ngaⁿ'angua'á 'nū ndíⁿ nguuví ndii n'gaaⁿ chi Ndyuūs díⁿ yā chi ndaá 'nū naachi snée nī. Nífcú cūnnee 'nū ndís'tií nífcú cuuvi cu'téenu cá nī yeⁿ'e Señor Jesucristo yeⁿ'e yú.

¹¹Neⁿ'é 'nū chi Ndyuūs Chiida yú ndúúcū Señor Jesucristo yeⁿ'e yú cūnnee yā nús'uu caati cuuvi ndaa 'nū nanááⁿ ndís'tií. ¹²Ní Señor Jesucristo yeⁿ'e yú cūnnee yā ndís'tií caati cuuvi neⁿ'e cá nī nducyáácā 'iiⁿyāⁿ. Ní dineⁿ'e taavi cá nī tan'dúúcā nús'uu neⁿ'e taavi cá 'nū ndís'tií. ¹³Ní Ndyuūs cuuvi cūnnee yā ndís'tií chi 'áamá canéé vaadí neⁿ'e yeⁿ'é yā na staava yeⁿ'é nī. Ní nguée véé nuuⁿ'ndi yeⁿ'é nī. Ní

canéé deeve staava yeⁿé nī nanááⁿ
Ndyuūs Chiida yú taachi ndaa
Señor Jesucristo yeⁿé yú ndúúcū
nducyáácá 'iiⁿyāⁿ chi i'téenu yā 'yā.

**Yeⁿé tan'dúúcā chi Ndyuūs
neⁿé yā chi 'cuēetinee yú**

4 Maaⁿ ní di'cuíftu ca 'nū ndís'tiī
hermanos yeⁿe yú ní ngiicá
'nū ndís'tiī nanááⁿ Jesucristo chi diíⁿ
nī chuū. Tan'dúúcā chi ca'cueéⁿ 'nū
ndís'tiī táácā chi cuuvi n'gēetinee
nī tan'dúúcā Ndyuūs neⁿé yā, 'tíicā
'āā diíⁿ nī. Ní 'tiicá ntúūⁿ diiⁿ cá nī
cueⁿe daāⁿmaⁿ ní ngo'o cá diíⁿ nī.

²Ndís'tiī ní deenú nī tan'dúúcā
chí ch'cueeⁿ 'nū nanááⁿ ndís'tiī
caati Ndyuūs dicho'ó yā nús'uu.

³Ní Ndyuūs neⁿé yā chi ndís'tiī
n'gēetinéeⁿ n'daacá nī. Ní nducueⁿ
chi diíⁿ nī, diíⁿ nī ti yeⁿé Ndyuūs
ndís'tiī. Ní nguéeⁿ caⁿá nī ndúúcū
'iiⁿyāⁿ chi nguéeⁿ isaⁿa o n'daataá
yeⁿé nī. ⁴Ní ca'áámá ca'aama
ndís'tiī chi saⁿā canee chi déenu
nī tan'dúúcā chi cuuvi cuta'á nī
n'daataá yeⁿé nī ní 'caandavaacú nī.
Ní canee n'daacá nī ndúúcū n'daataá
yeⁿé nī. Ní dinéⁿe nī n'daataá yeⁿé
nī. ⁵Nguéeⁿ diiⁿ nī cosa chi nguéeⁿ
n'daacā ndúúcū cuerpo yeⁿé tá
tan'dúúcā chi diiⁿ tanáⁿā 'iiⁿyāⁿ chi
nguéeⁿ yeⁿé ndaata 'iiⁿyāⁿ Israel,
'iiⁿyāⁿ chi nguéeⁿ déenu yā Ndyuūs.

⁶Ní mar 'áámá yú chi sáⁿā nguéeⁿ
caⁿa sa ndúúcū n'daataá chi nguéeⁿ
yeⁿe sa o n'daataá nguéeⁿ caⁿa tá
ndúúcū 'áámá isáⁿā chi nguéeⁿ yeⁿe
tá caati Señor Jesucristo yeⁿé yú
ca'á yā 'iiⁿyāⁿ miíⁿ 'áámá castigo
chí ch'ēete caavā nuuⁿndi chi 'tíicā
yeⁿé yā. Ní yeⁿé chuū 'āā n'diichi
yú na vida yeⁿe hermanos yeⁿe yú

chi diíⁿ yā 'túúcā chi nginnche'í
yā hermano yeⁿé yā. Ní nguéeⁿ
n'daacā chuū. ⁷'Tíicā Ndyuūs yaa'ví
yā s'uuúⁿ chi cuuvi yeⁿé yā s'uuúⁿ
cáavā chi diiⁿ yú nducueⁿé chi
n'daacā nguéeⁿ caavā chi diiⁿ yú
cosas chi nguéeⁿ n'daacā. ⁸'Tíicā
'iiⁿyāⁿ chi nguéeⁿ diíⁿ yā tan'dúúcā
chi ngi'cueéⁿ 'nū. Ndís'tiī nguéeⁿ
idi'vaachí yā mar 'áámá 'iiⁿyāⁿ.
Dámaāⁿ di'vaachí yā Ndyuūs caati
Ndyuūs tee yā Espíritu N'dai yeⁿé
yā s'uuúⁿ. ⁹Úú nguéeⁿ canee chi
dinguúⁿ yeⁿé ndís'tiī tan'dúúcā
chi canee chi neⁿé nī nducyaaca
'iiⁿyāⁿ chi yeⁿe Cristo chi hermanos
yeⁿé yú. Deenú chi Ndyuūs maáⁿ
yā ngi'cueéⁿ yā ndís'tiī tan'duucā
chi canee chi dineⁿé nī 'áámá nī
ndúúcū taama nī. ¹⁰Cuáácú chi
neⁿé nī nducyaaca hermanos yeⁿé
yú chi snée na yáⁿā Macedonia
naati maaⁿ ní di'cuíftu caⁿa 'nū
chi dinéⁿe ca nī hermanos yeⁿe nī.
¹¹Ngicá 'nū chi ch'ēetinéeⁿ n'daacā
nī nguaaⁿ nducyaaca nī ndúúcū
vaadi 'diiíⁿ. Ní diíⁿ nī ntiíⁿnyuⁿ yeⁿé
maáⁿ nī ndúúcū ta'á nī tan'dúúcā
chi n'giⁿi 'nū ndís'tiī. ¹²Ní diíⁿ nī
'tuucā caati 'iiⁿyāⁿ chi nguēe i'téenu
yā Jesucristo yeⁿe yú cuuvi diíⁿ yā
respetar ndís'tiī ní véé necesidades
yeⁿé nī.

**Yeⁿé chi ndaa Jesucristo
taama vmnéⁿēe**

¹³Ndís'tiī hermanos yeⁿé 'nū,
nguéeⁿ neⁿé 'nū chi nguéeⁿ cadífnuuⁿ
nī yeⁿe chi cuchii yeⁿe 'iiⁿyāⁿ chi
n'díí caati nguéeⁿ cuuvi ndaachii
nuuⁿ nī tan'dúúcā tanáⁿā 'iiⁿyāⁿ chi
nguéeⁿ cunee ngiinú yā chí ndaa
Jesucristo taama vmnéⁿēe. ¹⁴Ní

'tíicā tan'duucā chi i'teenu yú chí Jesucristo ch'ii yā ní nduuchí yā ye"ⁿē nguaaⁿ tiná"ⁿā, 'tiicā ntúuⁿ i'teenu yú chi taachi Ndyuūs dicholó yā Jesucristo taama vmné"ⁿēe, Cristo miiⁿ ní ndēe yā ndúúcu yā nducyaaca 'ii"ⁿyāⁿ chi 'āā n'díí ní 'āā i'téenu yā Señor Jesucristo ye"ⁿē yú. ¹⁵Ní cáāvā chuū yaa'ví nū ndís'tiī chuū tan'dúúicā chi Señor chí'cuee"ⁿ yā nús'uu. S'uuúⁿ chi canduuchi yú ní canee yú na i"ⁿyeen'dí' cūū ndíí ndaa Señor ye"ⁿē yú nguée cand'áánaaⁿ yú ye"ⁿē 'ii"ⁿyāⁿ chi 'āā n'díí. ¹⁶Caati maaⁿ Señor Jesucristo ye"ⁿē yú nch'éeⁿ yā ye"ⁿē va'ai chæeti nguuví taachí Ndyuūs ca'á yā orden. Ní ángel chí ch'æete ca ní caa"ⁿmáⁿ yā ní dí'cuæecú yā trompeta ye"ⁿē Ndyuūs. Ní 'ii"ⁿyāⁿ s'eeⁿ chi 'āā n'díí chí chí'téenu yā Jesucristo taachi 'ii"ⁿyāⁿ s'eeⁿ snée yā i"ⁿyeen'dí' cūū ní snuuⁿ yā maaⁿ yá"ⁿāa, 'ii"ⁿyāⁿ s'eeⁿ vmnááⁿ vmnaaⁿ nduuchí yā ye"ⁿē nguaaⁿ tiná"ⁿā. ¹⁷Tuu'mi ní s'uuúⁿ chi sндуuchi yú chi snee yú na i"ⁿyeen'dí' cūū, Cristo mííⁿ cuta'á yā s'uuúⁿ na 'yúúné. Ní ndaa yú na meēⁿ ndúúcu taná"ⁿa yā chí 'āā n'díí, ní nducyaaca yú ní dáámá ndaa yú nanááⁿ Jesucristo na 'yúúné. 'Tíicā ní 'áámá cūnee yú ndúúcu Señor ye"ⁿē yú. ¹⁸Níicú cáāvā chííⁿ chi nca'a ní 'viich'æetínūⁿ 'áámá ní taama ní ndúúcu nduudu' cūū.

5 Ndís'tiī hermanos ye"ⁿē 'nū, nguée canee chí dinguúⁿ nū ye"ⁿē ndís'tiī ye"ⁿē chæe fecha o de'e tiempo nduuti chí tiempo 'iiche o 'íí'nūⁿ taachi ndaa Señor Jesucristo taama vmné"ⁿēe. ²Āā deenu n'daacá ní chí nguuví chí ndaa Señor

Jesucristo ní nguuví chí nguée du'ū vee deenu. Hora miiⁿ tan'dúúca hora ye"ⁿē n'gaaⁿ chí ndaa 'áámá duucu chí 'ii"ⁿyāⁿ nguée déenu yā. ³Níicú taachi 'tíicā nga"ⁿa 'ii"ⁿyāⁿ: Maaⁿ ní vée vaadi 'diiíⁿ ndúúcu yú ní seguro chí n'daacá canee yú tuu'mi dácanaaⁿ ní ndaa nanááⁿ ye"ⁿē 'ii"ⁿyāⁿ s'eeⁿ tiempo chí dí'cuinú yā 'ii"ⁿyāⁿ. Ní tiempo miiⁿ ndaa tan'dúúicā chí ndaa vaadi ya'āi ngii ye"ⁿē 'áámá n'daataa taachi 'cuundiyaāⁿ daiya tá. Ní ye"ⁿē tiempo miiⁿ 'ii"ⁿyāⁿ s'eeⁿ ní nguée cuuvi nánguaⁿai yā ye"ⁿē. ⁴Naati ndís'tiī hermanos ye"ⁿē nguée canee ní tan'duucā chí nguée deenú ní ye"ⁿē chuū, ní ndaa tiempo miiⁿ tan'dúúicā tiempo chí ndaa 'áámá chí duucu. ⁵Ní nducyaaca s'uuúⁿ ní ye"ⁿē deene s'uuúⁿ ní s'uuúⁿ ye"ⁿē nguuví s'uuúⁿ. Nguée ye"ⁿē n'gaaⁿ s'uuúⁿ ndíí nguée ye"ⁿē na maāiⁿ s'uuúⁿ. ⁶Ní cáāvā chuū nguée ch'æetinee yú tan'dúúicā chí 'cuæetī yaadu yú tan'dúúicā taná"ⁿā 'ii"ⁿyāⁿ chí nguæe cūnee ngiinú yā Señor Jesucristo ye"ⁿē yú naati 'cuæetī nduuchi yú, níicú cadiinuⁿ yú. ⁷'Ii"ⁿyāⁿ chí cyaadu ní cyaadú yā n'gaaⁿ. Ní 'ii"ⁿyāⁿ chí ngii cúú'ví, ní cuuvi cúú'ví yā n'gaaⁿ. ⁸Naati s'uuúⁿ chí ye"ⁿē nguuví s'uuúⁿ ní 'cuæetinée yaaⁿ yú nguuví chí ndaa Señor ye"ⁿē yú. Ní diiⁿ yú cuidado s'uuúⁿ chí 'aama canee yú lado ye"ⁿē Ndyuūs cucáāvā chí i'teenu yú. Ní canee chí ne"ⁿē yú nducyaaca 'ii"ⁿyāⁿ. Ní diiⁿ yú tan'dúúicā 'áámá soldado dííⁿ yā defender mááⁿ yā ndúúcu armadura ye"ⁿē yā. Ní canee yú cūnee ngiinú yú nguuví chí Ndyuūs nadanguá"ⁿai yā s'uuúⁿ ye"ⁿē castigo. Ní chuū ní tan'dúúicā 'aama soldado sta'á yā

cachucha yeⁿe cūū yeⁿé yā ní dííⁿ yā defender tiíⁿ yā nduūcū. ⁹Ní Ndyuūs nguée yaa'ví yā s'uuúⁿ chi cuuvi yeⁿé yā s'uuúⁿ caati téé yā s'uuúⁿ castigo chi díftūu naati caati nadanguáⁿai yā s'uuúⁿ yeⁿe castigo cucáávā Señor Jesucristo yeⁿe yú. ¹⁰Nífcú Jesucristo ch'ii yā na cruz cucááva s'uuúⁿ caati maaⁿ ní cuuvi caⁿa yú 'cuētinée yú nduucú yā taachi ndaa yā 'áará chí n'gētinée yú na iⁿ'yeeⁿdí cūū o 'áará chí 'āā ch'ii yú. ¹¹Ní cáávā chuū ndís'tií ní nca'á ní 'viich'etíínūuⁿ ndís'tií ní di'cuíftu ní 'aamá ní ndúúcū taamá ní tan'dúúcā chi maaⁿ 'āā idiíⁿ ní 'aamá ní ndúúcū taamá ní.

**Pablo nca'á yā consejo hermanos
chi yeⁿe yāāⁿ Tesalónica**

¹²Ní di'cuiitū nū ndís'tií chi 'caandiveéⁿ ní yeⁿe 'iiⁿ'yāⁿ chi diiⁿ ntiíⁿnyuⁿ yeⁿé Ndyuūs nguaaⁿ ndís'tií caati 'iiⁿ'yāⁿ miiⁿ ngaⁿa ntiíⁿnyúⁿ yā ní itée yā consejo ndís'tií. 'Iiⁿ'yāⁿ s'eeⁿ ní 'iiⁿ'yāⁿ chi Ndyuūs dich'ó yā nanááⁿ ndís'tií. ¹³Ní canee chi n'giindiveéⁿ ní ní dineⁿe cá ní 'iiⁿ'yāⁿ s'eeⁿ cucáávā chi dííⁿ yā ntiíⁿnyuⁿ yeⁿé Ndyuūs. Maaⁿ ní 'cuētinée n'daacá ní 'aamá ní ndúúcū taama ní ndúúcū vaadi 'diiíⁿ.

¹⁴Ní di'cuiitu cá nū ndís'tií hermanos yeⁿe yú chi dííⁿ ní chuū tan'dúúcā chi idinguúⁿ nū. Caaⁿ'máⁿ ní cuuví ní 'iiⁿ'yāⁿ chi nguée neⁿe diiⁿ ntiíⁿnyuⁿ ní cunnee ní 'iiⁿ'yāⁿ chi 'va'a. Ní ca'á ní 'viich'etíínūuⁿ yeⁿe 'iiⁿ'yāⁿ chi duūvá yā. Ní canée chi véé paciencia yeⁿé ní ndúúcū nducyaaca 'iiⁿ'yāⁿ.

¹⁵Ní n'diichí ní chi din'daacá ní ndúúcū 'iiⁿ'yāⁿ chi nguée din'daacá yā nduucú ní. Naati 'tífcā diiⁿ núⁿú yiiⁿ'nuⁿ ní chi din'daacá ní 'áamá ní ndúúcū taamá ní ndúúcū nducyaaca 'iiⁿ'yāⁿ.

¹⁶Nducuéⁿe tiempo ní yeenú ní. ¹⁷Cueⁿe daāⁿmaⁿ ngaⁿ'angua'á ní. ¹⁸Nífcú ca'á ní gracias Ndyuūs caava nducuéⁿe chi cho'ō nuúⁿ ní caati 'tífcā neⁿé Ndyuūs yeⁿe yú chi dííⁿ ní ti maaⁿ ní i'téenu ní Cristo Jesús.

¹⁹Nguēe diíⁿ ní chi nguée n'giindiveéⁿ ní nduudu yeⁿe Espíritu N'dai yeⁿé Ndyuūs. ²⁰Ní nguée diíⁿ ní despreciar nduudu yeⁿé Ndyuūs chi ngaⁿ'a 'iiⁿ'yāⁿ, nduudu chi Espíritu N'dai yeⁿé Ndyuūs ca'a yā 'iiⁿ'yāⁿ. ²¹N'diichínee ní nducuéⁿe dendu'ū nduuti chi n'daacā o nguée. Nífcú cuta'á ní yeⁿe nducuéⁿe chi n'daacā ní din'daacá ní. ²²Ní diví ní yeⁿe nducuéⁿe chi n'diichi ní chi nguée n'daacā.

²³Ní maaⁿ ní Ndyuūs yeⁿe yú tee yā vaadi 'diiíⁿ s'uuúⁿ ní dideevé n'daacá yā ndís'tií. Ní candée yā cuidado ndís'tií ndúúcū espíritu yeⁿé ní ndúúcū alma yeⁿé ní ndúúcū cuerpo yeⁿé ní ndúúcū nducuéⁿe vida yeⁿé ní. Ní 'ífcú 'iiⁿ'yāⁿ cuuvi caaⁿ'máⁿ yā chi nguēe véé mar 'áamá nuuⁿndi yeⁿé ní taachi ndaa Señor Jesucristo yeⁿe yú taama vmnéⁿēe na iⁿ'yéⁿdí cūū. ²⁴Nífcú Ndyuūs chi yaa'ví yā ndís'tií chi cuuvi yeⁿé yā ndís'tií dííⁿ yā chi véé confianza yeⁿe yú ndúúcū yā. Ní Cristo miiⁿ ntúúⁿ dííⁿ yā cumplir nducuéⁿe chi ngaⁿ'a yā chi cuuvi diiⁿ yā.

Pablo ca'a yā saludos 'ii"yāⁿ
 ní ne"é yā chi Ndyuūs ca'a
 yā cosas n'dai ye"é yā

²⁵Ndís'tii hermanos ye"e yú
 nga"angua'a ndís'tiī cáávā nús'uu.

²⁶Caa"má" nī nducyaaca
 hermanos ye"e yú: N'dai ndís'tiī.
 Ní ituu'ví nī cheendi yā taachi
 dií" nī saludar hermanos ye"e yú

tan'dúúcā costumbre ye"e yú ti
 ye"e yú Ndyuūs.

²⁷'Úú ndúúcū poder ye"e Señor
 nga"á ngii chi 'cueé" nī carta 'cūū
 nanáá" nducyaaca hermanos ye"e
 yú.

²⁸Ne"é chi Señor Jesucristo ye"ē
 yú téé yā ndís'tiī nducue"e cosas
 chí n'daacā taavi ca ye"é yā. 'Tífcā
 cuuvi.

CARTA CUAYIIVI YEⁿE 'IIⁿ'YĀⁿ YEⁿE YĀĀⁿ TESALÓNICA

**Pablo ndúúcū compañeros yeⁿé
yā idinguúⁿ yā carta 'cūū yeⁿe
'iiⁿ'yāⁿ yeⁿe yāāⁿ Tesalónica,
'iiⁿ'yāⁿ chi i'téenu yā Ndyuūs**

1 'Úú Pablo idinguúⁿ carta 'cūū
ndúúcū hermano Silvano
ndúúcū hermano Timoteo. Ní
idinguúⁿ yeⁿe hermanos chi caⁿá
yā na yaācū yeⁿe yāāⁿ Tesalónica.
Ní hermanos ní yeⁿe Ndyuūs Chiida
yú ní yeⁿe Señor Jesucristo yeⁿe
yú. ²Neⁿé chi Ndyuūs Chiida yú
ndúúcū Señor Jesucristo cuuví téé
yā ndís'tií cosas chí n'daacā n'dai
yeⁿé yā ndúúcū vaadi 'diiíⁿ yeⁿe yā.

**Ndyuūs caⁿá yā diíⁿ yā juzgar 'iiⁿ'yāⁿ
chi véé nuuⁿndi yeⁿé yā taachi
ndaa Cristo taama vmnéⁿéé**

³Ndís'tií hermanos yeⁿe yú,
cueⁿe daāⁿmaⁿ canéé chi caⁿá 'nū
gracias Ndyuūs cucáāvā ndís'tií
caati n'daacā chi diíⁿ 'nū 'tíicā.
Caati deenú 'nū chi nguuvi nguuvi
ca'áámá ca'áámá ndís'tií ní i'téenu
ca nī ní neⁿe cá nī nducyaaca nī
'aamā nī ndúúcū taama nī. ⁴Nífcú
taachi ngaⁿá 'nū ngii 'nū hermanos
yeⁿe yú yeⁿe ndís'tií, tuuⁿmi ngaⁿá
'nū chi yeenu 'nū caati ch'etinéé

n'daacá nī nducyaaca nī chi caⁿá nī
na yaācū yeⁿé Ndyuūs yeⁿe yú, ní
cáāvā chi ndís'tií ní ch'iⁿí nī ndúúcū
nducuéⁿe chi n'geenu nī ngii ní
ndúúcū cosas chi díftūu chi ch'ó'ōo
yeⁿé nī chi véé paciencia yeⁿé nī.
Ní n'daacā i'teenú nī. ⁵Ní chuū ní
cuaacu ch'iⁿí chi Ndyuūs ní diíⁿ yā
juzgar 'iiⁿ'yāⁿ ndúúcū vaadi cuaacu
caati Ndyuūs diíⁿ yā chi ndís'tií
ch'iⁿí nī chi n'dai taaví nī chi cuuvi
ndaa nī naachi Ndyuūs ngaⁿa
ntiíⁿnyúⁿ yā. Ní cáāvā chuū chíⁿ
chi ndís'tií ní n'geenu nī ngii.

⁶Caati n'daacā nduucú Ndyuūs
chi Ndyuūs nadíⁿvē 'iiⁿ'yāⁿ chi idiíⁿ
chí ndís'tií n'geenu nī ngii ndúúcū
chi 'cuenú yā cuuvi. ⁷Tiempo
taachi Señor Jesucristo miiⁿ ngiicá
yā yeⁿe va'ai ch'etii nguuvi ndúúcū
ángeles yeⁿé yā ndúúcū poder yeⁿe
yā, tuuⁿmi ní 'iiⁿ'yāⁿ s'eeⁿ ndaa yā
ná nguuchi yaⁿá. Ní tiempo miiⁿ
Ndyuūs teé yā ndís'tií chí 'āā ntéé
'cuenú nī cuuvi. 'Tiicá ntúūⁿ ní
teé ya nús'uu chi 'āā ntéé 'cuenú
'nū cuuvi. ⁸Ní ndaa yā chí ca'a yā
castigo 'iiⁿ'yāⁿ chi nguéé n'diichí
yā Ndyuūs ndúúcū 'iiⁿ'yāⁿ chi nguéé
n'giindiveéⁿ yā nduudu cuaacu yeⁿe
evangelio yeⁿe Señor Jesucristo

yeⁿe yú chi nadanguáⁿai yā 'iⁿyāⁿ.
⁹Iⁿyāⁿ s'eeⁿ ní cuuví yā castigados
 ní cueⁿe daāⁿmaⁿ Ndyuūs di'cuiinú
 yā 'iⁿyāⁿ s'eeⁿ ní Ndyuūs s'neeⁿ yā
 'iⁿyāⁿ s'eeⁿ yaⁿai yeⁿé yā. Ní nguéeⁿ
 cuuvi n'diichí yā naaⁿ Ndyuūs. Ndíí
 nguéeⁿ ndúú cuuvi n'diichí yā deeve
 taavi ca yeⁿé yā ndúúcú poder yeⁿé
 yā. ¹⁰Ní tiempo chi ndaa Jesucristo
 miⁿ nducyaaca 'iⁿyāⁿ chi 'āā
 i'téenu yā Jesucristo ní caⁿa yā
 dich'eté yā Ndyuūs. Ní 'iⁿyāⁿ s'eeⁿ
 ntúúⁿ caⁿa yā dich'eté yā Ndyuūs
 caati i'téenu nī nduudu cuaacu yeⁿé
 Ndyuūs chi ngaⁿa 'nū nanááⁿ nī. Ní
 'iⁿyāⁿ s'eeⁿ ngeⁿe yiiⁿnuⁿ yā.

¹¹Ní cáávā chuū cueⁿe daāⁿmaⁿ
 ngaⁿangua^á 'nū caavā ndís'tií. Ní
 ngiicá 'nū Ndyuūs yeⁿe yú chí diiⁿ
 cuenta yā chi ndís'tií ní n'daacā ti
 yaa^á yā ndís'tií chi cuuvi yeⁿé yā
 ndís'tií. Ní ngiicá 'nū Ndyuūs chi diíⁿ
 yā ndúúcú ndís'tií ndúúcú poder
 yeⁿé yā chi ndís'tií ní cuuvi diíⁿ nī
 nducuéⁿe chi n'daacā. Ní cuuvi diíⁿ
 nī cumplir ntiiⁿnyuⁿ n'dai chi diíⁿ nī
 cáávā chi i'téenu nī Jesucristo. ¹²Ní
 'iicu 'iⁿyāⁿ cuuvi dich'eté yā Señor
 Jesucristo yeⁿe yú cáávā chiiⁿ chi
 diiⁿ ndís'tií. Ní 'iⁿyāⁿ s'eeⁿ dich'eté
 yā ndís'tií caati Ndyuūs yeⁿe yú
 ndúúcú Señor Jesucristo nginneé yā
 ndís'tií.

Yeⁿé 'áámá 'iⁿyāⁿ chi dinuuⁿndi yā

2 Maaⁿ ní hermanos yeⁿe
 di'cuiitú 'nū ndís'tií chi
 cūnee ngiinú nī yeⁿe tiempo chí
 nindaa Señor Jesucristo ní yeⁿe
 taachi nduuvidaama yú ndúúcu yā.
²Di'cuiitú 'nū chi nguéeⁿ na'daaⁿ nī
 chííⁿ chi nadacádíinuⁿ nī. Nguéeⁿ
 diiⁿ 'va^á nī yeⁿe chi 'iⁿyāⁿ ngaⁿá

yā chi Cristo 'āā ndaaⁿ yā taama
 vmnéⁿēe ti ngaⁿá yā tan'dúúcā chi
 cáávā Espíritu N'dai yeⁿé Ndyuūs,
 naati nguéeⁿ 'tíicā. Ndíí nguéeⁿ ndúú
 'va^á nī yeⁿe 'táámá nduudu chi
 n'giindiveeⁿ nī yeⁿe chuū. Ndíí
 nguéeⁿ ndúú caavā carta chi sta^á
 nī chi tan'dúúcā chi dinguúⁿ 'nū
 yeⁿe nī naati nguéeⁿ 'tíicā. Ní yeⁿe
 nducuéⁿe chuū ní chiiⁿ chi ngaⁿá
 chí 'āā ndaa Señor Jesucristo yeⁿe
 yú, nguéeⁿ 'va^á nī. ³Nguéeⁿ ca^á nī
 lugar 'iⁿyāⁿ chi cuuvi cannche'éí
 yā ndís'tií mar 'áámá vmnéⁿēe.
 Vmnaaⁿ chi ndaa tiempo chi cuuvi
 nindaa Jesucristo taama vmnéⁿēe,
 'iⁿyāⁿ na iⁿ'yeeⁿdí 'cūū canéeⁿ chi
 ndaacadaamí yā yeⁿe Señor ní
 canee yā contra yeⁿe Señor. Tuuⁿmi
 ní ndaa 'áámá Saⁿā Nuunⁿdi,
 saⁿā chi Ndyuūs ngaⁿá yā chi 'āā
 condenado sa ní caⁿa sa infierno.
⁴Saⁿā miiⁿ ní caaca taaⁿ sa ní
 contra nducuéⁿe chi yeⁿé Ndyuūs
 ndúúcú nducuéⁿe chi 'iⁿyāⁿ i'téenu
 yā. Saⁿā miiⁿ ní dich'etete sa maaⁿ sa
 nguéeⁿ tan'dúúcā tanáⁿā 'iⁿyāⁿ. Ní
 ndaa sa cuaaⁿ cheeti yaācū templo
 yeⁿé Ndyuūs ní 'cuūndí sa. Ní maaⁿ
 sa sta^á sa lugar yeⁿé Ndyuūs. Ní diiⁿ
 sa maaⁿ sa chi cu'téenu 'iⁿyāⁿ saⁿā.
 Ní diiⁿ sa tan'dúúcā Ndyuūs saⁿā.

⁵¿Áá nguéeⁿ n'gaacú nī ndís'tií
 yeⁿe tiempo chí caneeⁿ nduucú nī
 ní caⁿá chíí ndís'tií nduudú 'cūū?

⁶Maaⁿ ní 'āā deenú nī de'e idiíiⁿ
 chi 'āā 'cuéeⁿ ndaa saⁿā miiⁿ caati
 cuuvi ndaa saⁿā miiⁿ taachi ndaa
 tiempo yeⁿe sa chi ndaa sa. ⁷Niicu
 maaⁿ poder yeⁿe nuuⁿndi chi idiíiⁿ
 chi 'iⁿyāⁿ dinuuⁿndí yā ní 'āā ngii.
 Chííⁿ chi diiⁿ chi Saⁿā Nuunⁿdi
 nguéeⁿ cuuvi 'cuuⁿmiⁿ sa maaⁿ sa

chi Saⁿā Nuⁿndi. 'Tííca rā vaa ndii tiempo chi 'iiⁿyāⁿ chi diiⁿ chi nguéeⁿ cuuvi 'cuuⁿmiⁿ Saⁿā Nuⁿndi, 'iiⁿyāⁿ miiⁿ caⁿá yā tāámá lado.

⁸Tuuⁿmi ní ndaa Saⁿā Nuⁿndi ní 'iiⁿyāⁿ cuuvi n'diichí yā saⁿā níícu Señor Jesucristo caⁿá yā 'caaⁿnúⁿ yā Saⁿā Nuⁿndi ndúúcu 'yúúné chi candaā yeⁿe cheendí yā ní di'cuiinú yā Saⁿā Nuⁿndi miiⁿ ndúúcu dēevé yeⁿé yā taachi nndaa yā. ⁹Ní Saⁿā Nuⁿndi miiⁿ ndaa sa ndúúcu n'dee n'dái poder yeⁿe Satanás chi yáá'n'guiinūⁿ. Ní diiⁿ sa vaadi n'giinu ndúúcu milagros chi nguéeⁿ vaadi cuaacu. ¹⁰Ní ndúúcu nducuéⁿé chi nguéeⁿ n'daacā idiin sa ntiin'nyuⁿ yeⁿé sa ní nginnche'ei sa 'iiⁿyāⁿ caati cuuvi diiⁿ sa ganar 'iiⁿyāⁿ lado yeⁿé yā, 'iiⁿyāⁿ chi caⁿá yā infierno. Ni chó'oo nducuéⁿé chuú caati 'iiⁿyāⁿ nguéeⁿ neⁿé yā 'caandiveéⁿ yā nduudu cuaacu yeⁿé Ndyuūs, nduudu chi diiⁿ chi ninguáⁿai yā. ¹¹Níícu cucáávā chi diiⁿ yā 'túúca, Ndyuūs caⁿá yā diiⁿ yā ndúúcu 'iiⁿyāⁿ s'eeⁿ chi cu'téenu yā nduudu yaadi yeⁿe Saⁿā Nuⁿndi. ¹²Ní nducyáácá 'iiⁿyāⁿ chi nguéeⁿ neⁿé yā cu'téenu yā nduudu cuaacu caati neⁿe ca yā cosas chi nguéeⁿ n'daacā ní cuuví yā condenado.

**Ndyuūs ndēevé yā nducyaaca
'iiⁿyāⁿ chi nadanguáⁿai yā 'iiⁿyāⁿ**

¹³Níícu ndís'tii hermanos yeⁿe yú, Señor neⁿé yā ndís'tii. Ní nús'uu ní cuéⁿé daāⁿmaⁿ caⁿá 'nū gracias Ndyuūs cucáávā ndís'tii caati Ndyuūs ndēevé yā ndís'tii vmnááⁿ vmnaaⁿ chi cuuvi nadanguáⁿai yā ndís'tii cucáávā Espíritu N'dai yeⁿé yā. Espíritu N'dai yeⁿé Ndyuūs

miiⁿ ní cuuvi dideeve ndís'tii caati ndís'tii cuuvi cu'téenu nī nduudu cuaacu yeⁿé Ndyuūs. ¹⁴Ní Ndyuūs yaa'ví yā ndís'tii chi cuuvi yeⁿé yā ndís'tii cucáávā nduudu cuaacu yeⁿé yā chi n'giindiveéⁿ nī ní diiⁿ chi cuuví nanguáⁿai nī. Ní nduudu cuaacu miiⁿ nús'uu ngaⁿá 'nū nanááⁿ ndís'tii. Ní Ndyuūs neⁿé yā chi ndís'tii tunéeⁿ nī chi cuuví canee nī tan'dúúca Señor Jesucristo yeⁿe yú.

¹⁵Tííca maaⁿ ní 'cuēetinéé n'daacá nī ndúúcu chi i'téenu nī. N'gaacú nī yeⁿe chi ngi'cueéⁿ 'nū ndís'tii taachi sneéⁿ 'nū nduucú nī ní yeⁿé chi idinguúⁿ 'nū yeⁿé nī. ¹⁶Maaⁿ Señor Jesucristo yeⁿé yú ndúúcu Ndyuūs Chiida yú dinéⁿe yā s'uuúⁿ caati Ndyuūs ní n'dai taavi. Ní cueⁿe daāⁿmaⁿ itée yā s'uuúⁿ 'viich'etítinūⁿ ní cānee ngiinu yú vaadi n'dai taavi yeⁿé Ndyuūs chi Ndyuūs caⁿa yā chi tée yā s'uuúⁿ. ¹⁷Neⁿé chi Ndyuūs ní tée yā 'viich'etítinūⁿ ndís'tii na staava yeⁿé nī ní tée yā fuerzas n'dís'tii caati ndís'tii ní cuuvi diiⁿ nī nducuéⁿé chi n'daacā ní caaⁿmaⁿ nī dámaāⁿ nduudu chi n'daacā.

Caaⁿmaⁿnguaⁿá nī caavā nús'uu

3 Maaⁿ ní yeⁿe nducuéⁿé, ndís'tii hermanos yeⁿé 'nū caaⁿmaⁿnguaⁿá nī cucáávā nús'uu chi nīⁿnúúⁿ nūⁿ cuuvi candéⁿé nī nduudu cuaacu yeⁿé Ndyuūs na núúⁿmaⁿ cuaaⁿ. Ní 'iiⁿyāⁿ cuuvi cu'téenu yā nduudu cuaacu miiⁿ ní cuuvi din'daacá yā ní diiⁿ yā chiiⁿ chi Ndyuūs neⁿé yā tan'dúúca chi ndís'tii diiⁿ nī. ²Caaⁿmaⁿnguaⁿá nī ntúūⁿ chi cuuví nadanguáⁿai 'nū yeⁿe 'iiⁿyāⁿ chi nguéeⁿ n'daacā

idiíⁿ yā chi perverso yā caati nguée nducyaaca 'iiⁿ'yāⁿ i'téenu yā Señor Jesucristo. ³Naati Señor Jesucristo ní dámaāⁿ n'daacā díⁿ yā ní nducuéⁿē tiempo nginneé yā ndís'tií chi 'áámá canee nī ndúúcū chi i'téenu nī. Ní candee yā cuidado ndís'tií yeⁿe dendu'ū chi nguēe n'daacā. ⁴Ní vée 'viich'etínūⁿ yeⁿ'é 'nū ndúúcū Señor ndúúcū ndís'tií caati ndís'tií ní idiíⁿ nī nducuéⁿē chi caⁿ'a 'nū nduucú nī chi canee chi díⁿ nī ní 'tíicā caⁿ'a nī díⁿ nī. ⁵Neⁿ'é 'nū chi Señor Jesucristo cunnee yā ndís'tií chi cuuvi deenú nī na staava yeⁿ'é nī de'ē chi vaadī neⁿ'e yeⁿ'é Ndyuūs. Ní cuuví yeⁿ'e nī maāⁿ 'viich'etínūⁿ chi yeⁿ'e Cristo. Ní cuuvi cuheé nī yeⁿ'e tanducuéⁿē chi cuchii.

Canee chi diiⁿ yú ntiíⁿnyuⁿ

⁶Maaⁿ ní ndís'tií hermanos yeⁿ'e yú, itée 'nū orden ndís'tií ndúúcū chi dúúchí Señor Jesucristo chi diví nī yeⁿ'e hermanos yeⁿ'e yú chi nguée neⁿ'é yā díⁿ yā ntiíⁿnyuⁿ ní nguée díⁿ yā tan'dúúcā chi nús'uu chi'cueéⁿ 'nū 'iiⁿ'yāⁿ. ⁷Ndís'tií ní deenú nī tan'dúúcā chi cánée chi ch'etinee nī. Ní díⁿ nī ntiíⁿnyuⁿ tan'dúúcā chi díⁿ 'nū taachi sneé 'nū ndúúcu nī ní díⁿ 'nū ntiíⁿnyuⁿ. ⁸Ní nguée sta'á 'nū pan yeⁿ'e mar 'áámá ndís'tií chi nguée cáí 'nū. Naati 'tíicā díⁿ 'nū. Díⁿ 'nū ntiíⁿnyú ndii nguuví ndíí n'gaaⁿ chi nguée di'vaachí 'nū mar 'áámá ndís'tií. ⁹Ní 'áará chí cuuvi ngiicá ndis'tií chi téé nī necesidades yeⁿ'é 'nū nguēe díⁿ 'nū 'tíicā. Idiiⁿ 'nū ntiíⁿnyúⁿ chi neⁿ'é 'nū cu'neéⁿ 'nū cáávā 'áámá ejemplo nanááⁿ ndís'tií caati cuuvi díⁿ nī

tan'dúúcā chi díⁿ 'nū. ¹⁰Ní taachi ch'etinee 'nū ndúúcū ndís'tií caⁿ'a 'nū nduucú nī nduudú 'cūū. 'Iiⁿ'yāⁿ chi nguée neⁿ'é yā díⁿ yā ntiíⁿnyuⁿ nguée che'ē yā. ¹¹Ch'iindiveéⁿ 'nū chi duu'vi 'iiⁿ'yāⁿ chiicá yā nguaaⁿ ndís'tií nguée chiicá n'daaca yā ti nguée idiíⁿ yā ntiíⁿnyuⁿ ní neenē n'dee n'dái díⁿ yā cosas chi nguée dichí'vē. ¹²'Iiⁿ'yāⁿ chi diiⁿ 'tíicā, ca'á 'nū orden ní di'cuítu 'nū 'iiⁿ'yāⁿ ndúúcū chi duuchi Señor Jesucristo yeⁿ'e yú chi díⁿ yā ntiíⁿnyuⁿ ndúúcū vaadī yeenú. Níicú díⁿ yā ganar cáávā gastos yeⁿ'é yā.

¹³Ndís'tií hermanos yeⁿ'é 'nū nguée cánée chi cuuvi 'daandí nī chi díⁿ nī dendu'ū chi n'daacā. ¹⁴Ndúútí chi 'áámá 'iiⁿ'yāⁿ nguée cu'nee'veéⁿ yā nduudu chí idinguúⁿ 'nū na carta 'cūū, n'diichí nī du'u chi 'iiⁿ'yāⁿ miiⁿ ní nguée díⁿ nī de'ē vee ndúúcu yā. 'Tíicā ní cuuvi 'cuināaⁿ yā. ¹⁵Ní nguée díⁿ nī ndúúcu yā tan'dúúcā chi contra yeⁿ'é nī naati ca'á nī consejo 'iiⁿ'yāⁿ miiⁿ tan'dúúcā chi díⁿ nī 'iiⁿ'yāⁿ.

Yeⁿ'e vaadī n'dai yeⁿ'é Ndyuūs

¹⁶Neⁿ'é chi maaⁿ Señor Jesucristo chi vee vaadī 'diiⁿ yeⁿ'é yā cueⁿ'e daāⁿmaⁿ itée yā ndís'tií vaadī 'diiⁿ nducuéⁿē tiempo ní nducuéⁿē cuaaⁿ. Señor miiⁿ ní cunée yā ndúúcū nducyaaca ndís'tií.

¹⁷'Úú Pablo idinguúⁿ nduudu 'cūū yeⁿ'e carta 'cūū ndúúcū ta'á ní cánée letra yeⁿ'é. 'Tíicā dinguúⁿ ní 'tíicā díⁿ firmar nducuéⁿē cartas yeⁿ'é. ¹⁸Neⁿ'é chi Señor Jesucristo yeⁿ'e yú téé yā nducyáacá ndís'tií nducuéⁿē vaadī n'dai yeⁿ'é yā. 'Tíicā cuuvi.

CARTA VMNÁÁⁿ VMNAAⁿ YEⁿE SAⁿĀ TIMOTEO

1 'Úú Pablo 'úú. Ní 'úú apóstol yeⁿe Señor Jesucristo caati Ndyuūs ndúúcū Señor Jesucristo dichó'o yā 'úú. Ní snéé ngiinu yú 'iiⁿyāⁿ miiⁿ yeⁿe yú chi nadanguáⁿai yā s'uuúⁿ. ²'Úú ngiicá compañero yeⁿé chi idingúuⁿ yā carta 'cūū yeⁿe dii Timoteo chi saⁿā chi cuaacu níⁿnyúⁿ i'téenu sa Señor Jesucristo yeⁿé yú. Ní alumno yeⁿé. Ní tan'dúúcā chi daiyá 'tíicā di. Neⁿé chi Ndyuūs chiida yú ndúúcū Señor Jesucristo yeⁿé yú téé yā dii vaadi n'dai yeⁿé yā ndúúcū vaadi ya'ai i'inú yeⁿé yā. Ní téé yā dii vaadi 'diií yeⁿé yā.

**Ngaⁿá yā yeⁿe 'iiⁿyāⁿ chi
nguée n'daācā ngi'cueeⁿ yā**

³Dii, Timoteo, 'úú neⁿé chi cūnee di yāāⁿ Efesio tan'dúúcā chi 'āā yaa'ví dii taachi cueⁿé yāⁿāa Macedonia ti véé 'iiⁿyāⁿ chi chi'cueeⁿ doctrina chi n'dááⁿ. Yaa'vi di 'iiⁿyāⁿ s'eeⁿ chi nguée ngi'cueeⁿ doctrina chi n'dááⁿ. ⁴Ní yaa'vi di 'iiⁿyāⁿ yeⁿe yāāⁿ miiⁿ chi nguée 'caandiveéⁿ yā yeⁿe cuentos yeⁿé yā chi falsos. Ndíí nguée ndúú 'caandiveéⁿ yā nduudu chi chi'cueeⁿ 'iiⁿyāⁿ ndiicúū. Nduudu

miiⁿ ní nguée dichíí'vē. Damaāⁿ diiⁿ chi 'iiⁿyāⁿ ch'εεcu cheendí yā ní nguée nginnee 'iiⁿyāⁿ tan'dúúcā chi Ndyuūs neⁿé yā. Caati Ndyuūs dichó'o yā orden chi 'iiⁿyāⁿ ngi'cueeⁿ yā cáāvā chi tanáⁿā 'iiⁿyāⁿ cuuvi cu'téenu cá yā Ndyuūs.

⁵Ní ngaⁿa yú tan'dúúcā Ndyuūs neⁿé yā taachi ngi'cueeⁿ yú ndúúcū vaadi neⁿe chí ngíicá ná staava yeⁿé yú chi Ndyuūs 'āā didεεvé yā. Tanducuéⁿē ní diiⁿ yú ndúúcū vaanicadínnuⁿ yeⁿe yú chi ndεεve. Ní i'teenⁿu yú Ndyuūs ndúúcū núúⁿmáⁿ staava yeⁿé yú.

⁶Naⁿa 'iiⁿyāⁿ ndaacadaamí yā yeⁿé nduudu yeⁿé Ndyuūs ní n'giindiveéⁿ yā nduudu chi nguée dichíí'vē. Ní n'gεεcu cheendí yā. Ní cuuvi ndái yā. ⁷'Iiⁿyāⁿ s'eeⁿ ní neⁿé yā ca'cueeⁿ yā ley yeⁿé Ndyuūs naati nguée tuumicadínnuⁿ yā nduudu chi ngaⁿa yā, ndíí nguée ndúú nduudu chi ca'cueeⁿ yā 'áará chí díⁿ yā tan'dúúcā chi déenu yā tanducueⁿē.

⁸S'uuúⁿ ní deenu yú chi ley yeⁿe Moisés ní n'dai ndúúti chi cu'téenu n'daāca yú yeⁿé. ⁹Deenu yú chi ley miiⁿ nguée dámaāⁿ caavā 'iiⁿyāⁿ chi dín'daacá yā naati caavā 'iiⁿyāⁿ chi nguée diiⁿ yā tan'dúúcā

chí ngaⁿā ley, caavā 'iⁿiyāⁿ chi nguéeⁿ n'giindiveéⁿ yā chiiⁿ chi ngaⁿā ley, níícú caavā 'iⁿiyāⁿ chi nguéeⁿ n'daacā, caavā 'iⁿiyāⁿ chi idinuuⁿndi, caavā 'iⁿiyāⁿ chi nguéeⁿ dííⁿ yā respetar Ndyuūs ndíí nguéeⁿ dííⁿ yā respetar religión, ní caavā 'iⁿiyāⁿ chi n'giiⁿnúⁿ yā chæécú yā o chiidá yā, ní cáávā 'iⁿiyāⁿ chi n'giiⁿnúⁿ yā 'iⁿiyāⁿ. ¹⁰Ley miiⁿ ní caavā saⁿā chi caⁿa sa ndúúcú n'daataá o n'daataá chi caⁿa tá ndúúcú saⁿā ní nguéeⁿ yeⁿe yā viⁱ ní cáávā saⁿā chi caⁿa sa ndúúcú saⁿa chi duuchineeⁿ sa ndúúcú sa chi viⁱ, ní cáávā 'iⁿiyāⁿ chi duucú yā 'iⁿiyāⁿ caati cuuvi dichííⁿve yā táámá 'iⁿiyāⁿ ní cáávā 'iⁿiyāⁿ chi indee ndúúúú yaadi, ní caavā 'iⁿiyāⁿ chi ngaⁿa yā chi cuaacu chiiⁿ chi ngaⁿa yā ní n'gai yā: “Por Dios”, chi 'tíícā, ní nguéeⁿ 'tíícā. Ní ley miiⁿ ní caavā 'iⁿiyāⁿ chi ngi'cueéⁿ yā nducueⁿē chi nguéeⁿ n'daacā ní nguéeⁿ tan'dúúúca Ndyuūs chi'cueeⁿ yā 'iⁿiyāⁿ. ¹¹Naati chuū chi ngi'cueeⁿ chi nduudu n'dai yeⁿe evangelio ní n'dēēve n'dai chi nanguaⁿāi 'iⁿiyāⁿ, ní yeⁿé Ndyuūs chi n'dai taavi. Ní Ndyuūs dichó'o yā 'úú chi caaⁿmáⁿ nduudu miiⁿ.

**Caaⁿmaⁿ yú, gracias Ndyuūs
ti ya'ai i'inú yā s'uuúⁿ**

¹²Úú ní caⁿá gracias Señor Jesucristo yeⁿē yú chi itée yā fuerzas 'úú chi dííⁿ ntiⁿnyuⁿ yeⁿé yā. Ní s'neéⁿ yā 'úú tan'dúúúca 'áámá 'iⁿiyāⁿ chi véé valor yeⁿé yā. Ní s'neéⁿ yā 'úú na ntiⁿnyuⁿ yeⁿé yā. ¹³Ní vmnááⁿ vmnaaⁿ chi Jesucristo yaa'ví yā 'úú chi cuuvi yeⁿé yā, 'úú ní neené caaⁿmaⁿ taáⁿ yeⁿe Jesucristo ní cachiicá can'dáá 'iⁿiyāⁿ

chi i'téenu yā Jesucristo ti neⁿé i'nuuⁿ cá'ai 'iⁿiyāⁿ. Ní caneeⁿ taaⁿ contra Jesucristo. Naati Ndyuūs ya'ai i'inú yā 'úú 'áará chi dííⁿ 'túúca taachi 'áá cuéeⁿ cu'teenú 'iⁿiyāⁿ, ní nguéeⁿ deenú de'ē cáávā chi dííⁿ 'tíícā. ¹⁴Ní Señor diiⁿ n'dai cá yā nduucú, ní 'úú i'teenú Jesucristo, ní neⁿé Jesucristo caati maaⁿ ní 'úú ní yeⁿé Jesucristo 'úú.

¹⁵Ní nduudu 'cūū ní nduudu cuaacu chi Cristo Jesús ndaá yā i'yééⁿdi 'cūū chi nadanguáⁿai yā nducyaaca 'iⁿiyāⁿ caati idinuuⁿndí yā, ní n'dái taavi chi nducyaaca 'iⁿiyāⁿ cu'téenu yā nduudú 'cūū. Ní deenú chi 'úú ní ch'æete cá nuuⁿndi yeⁿé nguéeⁿ ti tanáⁿa yā. ¹⁶Naati cucáávā chi véé nuuⁿndi yeⁿe 'úú Ndyuūs ya'ai i'inú yā 'úú caati Señor Jesucristo chi'íⁿ yā 'úú tanducueⁿē vaadi n'dái taavi yeⁿé yā, 'úú chi ch'æete cá nuuⁿndi yeⁿé. 'Tíícā ní Ndyuūs véé paciencia yeⁿé yā nduucú vmnááⁿ vmnaaⁿ ní s'neéⁿ yā 'úú chi 'úú tan'dúúúca 'áámá ejemplo yeⁿe tanáⁿā 'iⁿiyāⁿ chi cuayiivi caⁿá yā cu'téenu yā Cristo ni véé vida cueⁿe daāⁿmaⁿ yeⁿe yā. ¹⁷Cáávā nducueⁿē chuū cueⁿe daāⁿmaⁿ ca'a yú Ndyuūs honra ní dich'æete ca yú Ndyuūs chi rey chi 'áámá canee cueⁿe daāⁿmaⁿ ní nguéeⁿ n'gii yā. Ní maaⁿ ní nguéeⁿ cuuvi snaaⁿ yú Ndyuūs chi 'áámá n'dyáⁿā Dendyuūs yeⁿe yú. 'Tííca rā vaa.

¹⁸Maaⁿ ní, dii Timoteo chi tan'dúúúca daiyá, i'neéⁿ encargo 'cūū ndúúcú dii. Ní encargo 'cūū chííⁿ chi tiempo chi 'áá chó'oo 'iⁿiyāⁿ profetas caⁿa yā yeⁿē di yeⁿē di caⁿá di diiⁿ di. Maaⁿ ní cuchéé di yeⁿē tanducueⁿē ní diiⁿ di tan'dúúúca

chi diiⁿ 'áamá soldado chi nguⁿu n'daacā sa. 'Tíicā diiⁿ di tan'dúucā chi profetas caⁿa yā yeⁿ'ē di tiempo chi 'āā ch'ó'ōo. ¹⁹Dii ní cu'téenu n'daacā di ní diiⁿ n'daacā di ndúucū vaanicadínūuⁿ yeⁿ'ē di chí n'dai. Náⁿ'ā 'iiⁿ'yāⁿ ni nguéé diiⁿ n'daacā yā caati vaanicadínūuⁿ yeⁿ'é yā ní nguéé n'dai. Ní cáāvā chuū nguéé i'téenu yā Señor Jesucristo maaⁿ ní canéé yā tan'dúucā chi yaⁿ'ai yeⁿ'e Ndyuūs. ²⁰Túucā ch'ó'ōo yeⁿ'e saⁿ'ā Himeneo ndúucū saⁿ'ā Alejandro ní 'úú deenú chí canéé yā a cuenta yeⁿ'e yááⁿ'nguiniūuⁿ maaⁿ. Ní 'íicú cuuvi deenú yā chi 'āā ntéé cuuvi caaⁿ'máⁿ yā ní nguéé diiⁿ yā ofender Ndyuūs yeⁿ'e yú.

Yeⁿ'e chí cuuvi caaⁿ'maⁿ'ngua'a yú

2 Vmnaán vmnaaⁿ ngiicá dii Timoteo chi caaⁿ'maⁿ'ngua'a di cáāvā nducyáácá 'iiⁿ'yāⁿ ní ca'a di gracias Ndyuūs cáāvā nducyáácá 'iiⁿ'yāⁿ. ²Ní canee cuuⁿ'miⁿ chi caaⁿ'maⁿ'ngua'a di cáāvā saⁿ'ā reyes níicú cáāvā nducyáácá 'iiⁿ'yāⁿ 'iiⁿ'ntyéⁿ'ē caati cuuvi 'cuæetinee yú n'daacā ní nguéé ndúucū vaadi 'caa'va ti 'cuæetinee yú ndúucū vaadi 'diiⁿ. Ní diiⁿ yú tanducuéⁿ'ē tan'dúucā chi Ndyuūs neⁿ'é yā chi diiⁿ yú. Ní 'cuæetinee yú n'daacā yeⁿ'e nducuéⁿ'ē ndúucū 'iiⁿ'yāⁿ. ³Ti chuū ní n'daacā nanááⁿ Ndyuūs ní inéé yiiniūu taaví yā taachí diiⁿ yú 'tíicā. Ndyuūs yeⁿ'ē yú nadanguáⁿ'ai yā s'uuúⁿ. ⁴Ní neⁿ'é yā chi nducyaaca 'iiⁿ'yāⁿ ninguaⁿ'ai yā ní tuumicádínūuⁿ yā chéé chí nduudu cuaacu yeⁿ'é Ndyuūs. ⁵Deenu yú chi véé 'áamá Ndyuūs. Ní véé 'áamá 'iiⁿ'yāⁿ chi caaⁿ'máⁿ yā na lugar

yeⁿ'ē yú nanááⁿ Ndyuūs. Ní 'iiⁿ'yāⁿ miiⁿ ní Saⁿ'ā chi Daiyá yā chi Señor Jesucristo yeⁿ'ē yú. ⁶Ní Jesucristo ca'á yā vida yeⁿ'e maáⁿ yā chi ch'ii yā cáāvā chi nadí'íve yā nuuⁿ'ndi yeⁿ'ē nducyáácá 'iiⁿ'yāⁿ ní 'iicu cuuvi nadinguáⁿ'ai yā nducyaaca 'iiⁿ'yāⁿ. Chuū ní Cristo diiⁿ yā tiempo chi n'daacā 'íicú 'cuuⁿ'miⁿ yā chi Ndyuūs neⁿ'é yā chi nducyaaca 'iiⁿ'yāⁿ cuuvi ninguaⁿ'āi. ⁷Ní cáāvā chuū Ndyuūs dich'ó'ō yā 'úú chi 'úú cuuvi apóstol yeⁿ'é yā. Ní 'úú ca'cueéⁿ 'iiⁿ'yāⁿ nduudu cuaacu yeⁿ'e Ndyuūs nanááⁿ 'iiⁿ'yāⁿ gentiles chi nguéé yeⁿ'ē ndaata 'iiⁿ'yāⁿ Israel. 'Úú ngaⁿ'á nduudu cuaacu yeⁿ'é Ndyuūs ní 'íicú 'iiⁿ'yāⁿ cuuvi cu'téenu yā. Nguéé ngaⁿ'á nduudu yaadi.

⁸Neⁿ'é chi ndii nducuéⁿ'ē cuaaⁿ nducyáácá 'iiⁿ'yāⁿ cááⁿ'máⁿ'ngua'a yā ndúucū nuuⁿ'maⁿ staava yeⁿ'é yā chi dæeve. Ní nguéé nduuvi taáⁿ yā, ndíí nguéé ndúú 'cuuⁿ'maⁿ yā. ⁹Ní 'tiicá ntúūⁿ n'daataá canéé chí cunúu yā catecai yā chi n'daacā chi nguéé yaⁿ'āi ca chii've ní nguéé neené n'dæeveé. Ní nguéé canéé chí dich'eete yā maáⁿ yā. Ní nguéé diiⁿ yā 'aama peinada tííⁿ yā chi nguéé n'daacā. Ní nguéé snuuⁿ yā vmnaaⁿ cuerpo yeⁿ'é yā ndee n'dái 'díí'nguāaⁿ ndíí nguéé ndúú perlas. Ní nguéé cunúuⁿ yā tiiniūuⁿ chi yaⁿ'ai chíí'vē. ¹⁰Naati n'daata s'eeⁿ canee chi din'daaca yā nanááⁿ 'iiⁿ'yāⁿ tan'dúucā chi Ndyuūs neⁿ'e yā ní tan'dúucā chi canee chi diiⁿ nducyaaca n'daataá chi cuaacu chi i'téenu yā iivú Ndyuūs. ¹¹Ní n'daataá s'eeⁿ canee chi n'geeⁿ yā chííⁿ chi n'giindiveeⁿ yā ní cuneé yā chi ndiicúuⁿ yā. ¹²Nguéé neⁿ'é

chi n'daataá ca'cueeⁿ yā saⁿā cheeti yaacū ní nguée cunee yā lado yeⁿe 'iiⁿntyéⁿē chi caaⁿmaⁿ ntiⁿnyuⁿ yā yeⁿe saⁿā. Ní nguée canée chi caaⁿmaⁿ n'daataá s'eeⁿ cheeti yaacū. ¹³Caati Ndyuūs vmnāáⁿ vmnaaⁿ din'dái yā saⁿā Adán ní cuayiivi miiⁿ ní din'dái yā n'daataá Eva. ¹⁴Ní yááⁿn'giinūⁿ nguée chinnche'ei sa Adán miiⁿ naati chinnche'ei sa n'daataá Eva miiⁿ ní dinuuⁿndi tá. ¹⁵De'ē chúúca n'dai 'áámá n'daataá chi véé daiyá tá. Cuuvi nguáⁿai tá nduuti chi 'áámá cunee tá ndúúcu chi i'teenu tá, ní nduuti chi dinéⁿe tá nducyaaca 'iiⁿyāⁿ. Ní ch'iⁿi tá chi yeⁿe Ndyuūs, ní diiⁿ ta cosas chi seria.

**Yeⁿe tan'dúúca chi canee
chi diiⁿ saⁿā chi obispo**

3 Chuū chi ngaⁿá maaⁿ ní cuaacu. 'Āā du'ú nūuⁿ saⁿā chi neⁿe sa cuuvi sa obispo ní cundee sa cuidado yeⁿe 'iiⁿyāⁿ yeⁿe yaacū canee sa chi diiⁿ sa ntiⁿnyuⁿ chí n'daacā. ²Ní cáávā chuū saⁿā chí diiⁿ sa ntiⁿnyuⁿ yeⁿe obispo canee chi 'cuēetinee sa n'daacā caati 'iiⁿyāⁿ s'eeⁿ nguée cuuvi caaⁿmáⁿ yā chi véé nuuⁿndi yeⁿé yā. Ní saⁿā miiⁿ, sáⁿā chi 'áámá nūuⁿ n'daataá yeⁿé sa. Ní saⁿā miiⁿ canée cuuⁿmiⁿ chi serio sa ní diiⁿ sa cueⁿe daāⁿmaⁿ ntiⁿnyuⁿ chi n'daacā ndúúcu orden. Saⁿā miiⁿ canee chi 'cuaaⁿ sa na vaacu sa 'iiⁿyāⁿ chi canúúⁿ yúúni. Ní canee chi ca'cueeⁿ sa n'dai. ³Saⁿā miiⁿ nguée cuuvi 'cúúví sá ní nguée in'nuuⁿ sa vaadi 'caa'va chi 'caa'va sa. Ndí nguée ndúú neⁿe sa diiⁿ sa ganar tuūmi manera chi nguée n'daacā cáávā vicio yeⁿe sa. Sáⁿā

obispo miiⁿ canee chi diiⁿ sa 'tíicā. Canee chi manso sa ní nguée neⁿe sa 'cuuⁿmaⁿ sa ndúúcu 'iiⁿyāⁿ, ndí nguée ndee sa 'aama vicio yeⁿe tuūmi. ⁴Saⁿā miiⁿ canee chi ngaⁿā ntiⁿnyuⁿ sa chi n'daacā na vaacu sa ní diiⁿ sa chi daiya sa 'caandiveeⁿ yā yeⁿe sa ní daiya sa díⁿ yā respetar chiidá yā. ⁵Ní ndúúti chi 'áámá saⁿā nguée déenu sa caaⁿmaⁿ ntiⁿnyuⁿ sa na vaacu sa tuuⁿmi ní 'táácā cuuvi diiⁿ sa cuidado yeⁿe dendu'ū chi yeⁿe yáacū yeⁿé Ndyuūs? ⁶Saⁿā obispo miiⁿ nguée canee sa tan'dúúca 'áámá saⁿā chi caama i'téenu sa Jesucristo caati cuuvi nacádiínuuⁿ sa chi ch'ēete maaⁿ sa ti nguée dinuuⁿdi sa tan'dúúca chi diiⁿ yááⁿn'guiinūⁿ. ⁷Ní saⁿā obispo miiⁿ canee ntúúⁿ chi din'daacā sa nanááⁿ 'iiⁿyāⁿ chi nguēe i'téenu yā Señor Jesucristo yeⁿe yú caati 'iiⁿyāⁿ s'eeⁿ díⁿ yā honrar saⁿā miiⁿ. Ní 'íicú saⁿā obispo miiⁿ nguée cúúví cunee sa ndúúcu vaadi 'cuiinuú chi ca'a sa lugar chi nginnche'ei yááⁿn'guiinūⁿ saⁿā miiⁿ.

**Yeⁿe chi canée chi diiⁿ
saⁿā chi diáconos**

⁸Maaⁿ ní ngaⁿá yeⁿe saⁿā diáconos chi cūnnee sa ndúúcu ntiⁿnyuⁿ yeⁿe yáacū. 'Tíicá ntúúⁿ saⁿa sa diáconos canee chí diiⁿ sa ntiⁿnyuⁿ chi n'daacā ndúúcu orden. Ní canée cuuⁿmiⁿ chi saⁿā serio sa. Ní canée chí diiⁿ sa cumplir chiiⁿ chi ngaⁿā sa. Saⁿā miiⁿ ní nguée cuuvi 'cúúví sá. Ndí nguée ndúú neⁿe sa diiⁿ sa ganar tuūmi manera chi nguée n'daacā cáávā vicio yeⁿe sa. ⁹Saⁿā diácono canée chí deenu sa n'daacā n'dai nducuéⁿē

enseñanza yeⁿē chi i'teenu sa yeⁿe chi Ndyuūs chi'cueéⁿ yā s'uuúⁿ. Ní canee sa ndúúcū vaanicadínūuⁿ yeⁿē sa chi dēve. ¹⁰Saⁿā diácono ní saⁿā chi 'iiⁿyāⁿ 'āā n'diichí yā chi n'daacā chi diiⁿ sa. Ní nduuti chi nguée vée falta yeⁿē sa tuu'mi ní cuuvi diiⁿ sa ntiiⁿnyuⁿ yeⁿe saⁿā diáconos. ¹¹Níicú 'tiicá ntúūⁿ n'daataa yeⁿe saⁿā diácono canee chi táⁿā seria ta ní din'daacā tá. Nguée canee chi caaⁿmaⁿ tá yeⁿe 'iiⁿyāⁿ. Ní canee chi din'daacā tá yeⁿe tanducuéⁿē chi diiⁿ tá. ¹²Níicú saⁿā diácono miiⁿ ní saⁿā chi 'áámá nūuⁿ n'daataa yeⁿē sa. Ní canee chi ngaⁿā ntiiⁿnyuⁿ sá chi n'daacā na vaacu sa ní diiⁿ sa chi daiya sa n'giindiveéⁿ yā yeⁿē sa. ¹³Caati saⁿā miiⁿ chi diiⁿ n'daacā ntiiⁿnyuⁿ yeⁿe diácono, saⁿā miiⁿ diiⁿ sa ganar lugar yeⁿe 'iiⁿyāⁿ chi honrado yā. Ní vée cá confianza yeⁿē sa chi cuuvi caaⁿmaⁿ sa yeⁿe Señor Jesucristo tan'dúúcā chi i'téenu sa yeⁿē nduudu yeⁿé yā.

**Yeⁿe chi 'iiⁿyāⁿ nguée deenú
yā chi yeⁿe Ndyuūs**

¹⁴Cunee ngiinú chi ndaa nuúⁿ n'diichí dii naati maaⁿ ní chuū idinguúⁿ yeⁿē di. ¹⁵Ní nduuti chi nguée ndaa nuúⁿ tuu'mi cuuvi tuumicádínūuⁿ di táácā chi cuuvi 'cuētinée 'iiⁿyāⁿ s'eeⁿ taachi i'téenu yā ní yeⁿé Ndyuūs 'iiⁿyāⁿ s'eeⁿ. Caati nducyaaca s'uuúⁿ chi i'teenu yú Señor Jesucristo ní yeⁿé Ndyuūs s'uuúⁿ. Ní s'uuúⁿ ní yáacū yeⁿe Ndyuūs chi canduuchi, 'tíicā s'uuúⁿ. Ní s'uuúⁿ tan'dúúcā cimientu ndúúcū pilar yeⁿe yáacū, 'tíicā s'uuúⁿ ti ngaⁿa yú nduudu cuaacu

yeⁿé Ndyuūs nanááⁿ nducyáácá 'iiⁿyāⁿ. ¹⁶Níicú mar 'áámá 'iiⁿyāⁿ nguée cuuvi caaⁿmaⁿ yā yeⁿe enseñanzas yeⁿé Ndyuūs yeⁿē yú chi nguée ch'ēte taavi ca, enseñanzas chi Ndyuūs chi'cueéⁿ yā s'uuúⁿ:

Ndyuūs yeⁿe yú ndaá yā na iⁿyeeⁿdi 'cūū ndúúcū cuerpo tan'dúúcā s'uuúⁿ. Ní ch'iⁿi Espíritu N'dai yeⁿé Ndyuūs chi Cristo ní cuaacu yā. Ní ángeles yeⁿē va'ai chēeti nguuvi n'diichí yā Cristo. Ní 'iiⁿyāⁿ candeé yā nduudu cuaacu yeⁿé Cristo nanááⁿ 'iiⁿyāⁿ yeⁿe tanducuéⁿē país yeⁿē iⁿyeeⁿdí 'cūū. Ní 'iiⁿyāⁿ yeⁿe tanducuéⁿē cuaaⁿ yeⁿe iⁿyeeⁿdí 'cūū ní ch'i'téenu yā Cristo. Ní Cristo cunaⁿa ntuúⁿ yā na va'ai chēeti nguuvi.

**Yeⁿe 'iiⁿyāⁿ chi nguée 'áámá
cunee yā ndúúcū chi i'téenu yā**

4 Espíritu N'dai yeⁿé Ndyuūs ngaⁿa cuaacu yeⁿē nguuvi chi cuchii taachi ngaⁿa chí naⁿa 'iiⁿyāⁿ caⁿa yā ndaacadaamí yā yeⁿē nduudu cuaacu ní cu'neeⁿveéⁿ yā nduudu yeⁿe espíritus chi nginnche'ei 'iiⁿyāⁿ, espíritus chi ngi'cueeⁿ cosas chi nguée cuaacu. Ní yááⁿn'guinūuⁿ dichóⁿ sa espíritus. ²Ní 'iiⁿyāⁿ s'eeⁿ 'caandiveéⁿ yā nduudu yeⁿe 'iiⁿyāⁿ chi ngaⁿá yā chi i'téenu yā Ndyuūs yeⁿē yú, ní nguée cuaacu. Ní caⁿá yā n'giindiveéⁿ yā nduudu yeⁿe 'iiⁿyāⁿ chi ngaⁿa nduudu yaadi. Níicú 'iiⁿyāⁿ chi nguē n'daacā idíⁿ yā canee yā ndúúcū vaanicadínūuⁿ yeⁿé yā chi nguée n'daacā. Ní nguée

ya'ái yā yeⁿe chi díiⁿ yā taachi díiⁿ yā cosas chi nguéeⁿ n'daacā. ³Iiⁿyāⁿ s'eeⁿ nguéeⁿ n'guuⁿ yā chi ch'iindivaacu 'iiⁿyāⁿ. Ní nguéeⁿ n'guuⁿ yā chi nge'e 'iiⁿyāⁿ tanducuéⁿe chi nge'e yú. Deenu yú chi Ndyuūs din'dái yā tanducuéⁿe chi nge'e yú. Cáávā chi nducyáácá 'iiⁿyāⁿ chi i'téenu yā Ndyuūs ndúúcū 'iiⁿyāⁿ chi deenú yā nduudu cuaacu yeⁿe yā cuuvi che'é yā tanducuéⁿe. Ní nducyaaca 'iiⁿyāⁿ chi che'é yā canee chi caaⁿmaⁿ yā gracias Ndyuūs cáávā chí che'e yā. ⁴Deenu yú chi nducuéⁿe chi din'dái Ndyuūs chi che'e yú ní n'daacā. Ní 'iiⁿyāⁿ nguéeⁿ canee chi cu'neeⁿ yā 'áámá lado mar 'áámá caati canée chi cuta'á yā ní caaⁿmaⁿ yā gracias Ndyuūs. ⁵Caati tanducuéⁿe dendu'ú 'cūū ní n'daacā ní 'iiⁿyāⁿ cuuvi che'é yā chuū ti Dendyuūs ngaⁿá yā 'tíicā yeⁿe na libro yeⁿe yā. Maaⁿ ní ngiica yú Ndyuūs chi Ndyuūs díiⁿ yā bendecir chuū chi che'e yú.

**'Iiⁿyāⁿ idiⁿ ntiiⁿnyuⁿ yā chí
n'dai yeⁿe Jesucristo**

⁶Nduuti chi dii, Timoteo, ca'cueeⁿ dí dendú'u 'cūū nanáán 'iiⁿyāⁿ chi i'téenu Señor Jesucristo tuu'mi ní dichí'vē ca di Señor Jesucristo. Ní taachi ca'cueeⁿ di nduudu n'dái 'cūū yeⁿe Jesucristo ní 'cuætinee di tan'dúúcā chi ngaⁿa nduudú 'cūū tuu'mi ní idiⁿ di chi dii maaⁿ di chi n'giindiveeⁿ di nduudu yeⁿe di ní cu'téenu ca di yeⁿe Ndyuūs. ⁷Nguéeⁿ cu'neeⁿveeⁿ di yeⁿe cuentos zonzos chi yeⁿe ínyeeⁿdí, cuentos chi nguéeⁿ ngíicá yeⁿe Ndyuūs caati nguéeⁿ dichí'vē chi caaⁿmaⁿ yú chuū nanáán 'iiⁿyāⁿ. Ní tanducuéⁿe

chi diiⁿ di, cueⁿe daāⁿmaⁿ diiⁿ di tan'dúúcā Ndyuūs neⁿe yā chi diiⁿ di. ⁸Deenu yú chi taachi diiⁿ yú ejercicios cáávā cuerpo yeⁿe yú taaⁿ 'líiⁿ chuundi dichí'vē s'uuúⁿ. Níicú taachí diiⁿ yú chíiⁿ chí neⁿe Ndyuūs tanducuéⁿe dichí'vē yú caati diiⁿ yú chi n'daacā cáávā s'uuúⁿ nguuvi s'eeⁿ chi canee yú iⁿ'yeeⁿdí 'cūū níicú cucáávā nguuvi chi cuchii. ⁹Nduudú 'cūū ní cuaacu chí cuaacu, níicú nducyáácá 'iiⁿyāⁿ canée chi cu'téenu yā nduudú 'cūū. ¹⁰Ní cáávā nduudú 'cūū ní diiⁿ yú ntiiⁿnyuⁿ. Ní n'geenu yú ngii ti 'iiⁿyāⁿ ngaⁿa taán yā yeⁿe yú. 'Tíicā chó'oo yeⁿe yú caati i'teenu yú Jesucristo ní canée ngiinu yú Ndyuūs chi canduuchi chí cuuvi nadanguán'ai yā nducyaaca 'iiⁿyāⁿ ní nadanguán'ai yā nducyaaca 'iiⁿyāⁿ chi i'téenu yā 'yā.

¹¹Níicú díiⁿ, Timoteo, 'úu ngaⁿá chi canee chi ca'cueeⁿ di nduudú 'cūū. ¹²Nguéeⁿ 'cuaaⁿ di lugar chi 'iiⁿyāⁿ nguéeⁿ neⁿe yā dii cucáávā chi duū'vi nguuví yeⁿe di. Din'daacā di ndúúcū tanducuéⁿe chi diiⁿ di, ye'e chi ngaⁿa di, yeⁿe chi diiⁿ di. Ní dine'e di nducyáácá 'iiⁿyāⁿ. Ní diitu canee di ndúúcū chi i'téenu di. Ní diiⁿ di chi vida yeⁿe di ní n'daacā nanáán nducyáácá 'iiⁿyāⁿ. Ní vida yeⁿe di canee tan'dúúcā 'áámá ejemplo. ¹³Níicú 'naaⁿ tiempo chi 'āā cuéeⁿ ndaá nanáán di 'cueeⁿ di libro yeⁿe Ndyuūs nanáán 'iiⁿyāⁿ. Ní yaa'vi di 'iiⁿyāⁿ chi 'caandiveeⁿ yā nduudu yeⁿe Ndyuūs. Ní ca'cueeⁿ di 'iiⁿyāⁿ tanducuéⁿe chi yeⁿe Ndyuūs neⁿe chi ndaá. ¹⁴Ní diiⁿ di tanducuéⁿe chi cuuvi di yeⁿe ntiiⁿnyuⁿ chi Ndyuūs tee yā dii

taachi saⁿā chi 'cueeⁿ nduudu yeⁿe Ndyuūs ngaⁿá yā yeⁿē chi diiⁿ di. Ní saⁿā chi ngaⁿa ntiiⁿnyuⁿ yeⁿe yāacū s'núuⁿ yā ta'a yā ná tiiⁿ di cáávā chi cho'ó yā dii chi diiⁿ di ntiiⁿnyuⁿ yeⁿē Ndyuūs.

¹⁵Canée chí diiⁿ di nducué^e chi ngaⁿá dii ní diiⁿ di tan'dúúcā chi 'āā 'cueeⁿ di. Ní 'íicú 'iiⁿyāⁿ cuuvi deenú yā chi cu'téenu ca di nguuvi nguuví. ¹⁶Ní díí, Timoteo, cundée di cuidado yeⁿē maaⁿ di, ní yeⁿē tanducuéⁿē chi diiⁿ di, ní yeⁿē chi ca'cueeⁿ di 'iiⁿyāⁿ. Caati nduuti chi diiⁿ di 'túúcā nadinguáⁿai maaⁿ di dii ndúúcū 'iiⁿyāⁿ chi n'giindiveéⁿ yā nduudu yeⁿē di.

Yeⁿe tan'dúúcā chi cuuvi diiⁿ di ndúúcū 'iiⁿyāⁿ chi i'téenu yā Ndyuūs

5 Nguée diiⁿ di reprender mar 'áámá saⁿā ndiicúū naati ca'a di consejo saⁿā miiⁿ tan'dúúcā chi chiida di. Ní diiⁿ di tratar ndúúcū saⁿā da'caiyāá tan'dúúcā chi saⁿā s'eeⁿ ní 'díínū di. Ní canée chí diiⁿ di nducuéⁿē chi n'daacā. ²Ní diiⁿ di tratar ndúúcū n'daataá ndiicúū tan'dúúcā chi chεecu di. Ní diiⁿ di tratar ndúúcū taⁿā dá'caiyāa tan'dúúcā chi ví'i di. Ní canée chí diiⁿ di tanducuéⁿē n'daacā ndúúcū 'iiⁿyāⁿ.

³Ní innée di n'daataá nguá'āa chi cuaacu níⁿnyúⁿ véé necesidades yeⁿe yā. ⁴Naati nduuti chi n'daataá nguá'āa véé daiya tá o daiya yiinu tá da'caiyāa s'ééⁿ canée chí din'daacā yā ní canée chí diiⁿ cumplir obligaciones yeⁿē yā ndúúcū 'iiⁿyāⁿ yeⁿe familia yeⁿē yā. Ní da'caiyāa s'ééⁿ ní canée chí diiⁿ yā cosas chi n'daacā cáávā chεecú

yā ndúúcū chiidá yā ní cáávā chi neⁿe ca yā chiidá yā ndúúcū chεecú yā caati chuū ní cosa chi n'daacā, ní cosa chi Ndyuūs neⁿē yā chi da'caiyāa s'ééⁿ diiⁿ yā. ⁵Ní nduuti chi cuaacu níⁿnyuⁿ chi n'daataá nguá'āa ní dámaāⁿ ta, canée chí i'téenu tá Ndyuūs ndúúcū confianza ní caaⁿmaⁿngua'a tá nanááⁿ Ndyuūs ndii nguuvi ndii n'gaaⁿ. ⁶Ní nduuti chi n'daataá nguá'āa diiⁿ tá tan'dúúcā chi maaⁿ tá neⁿe tá, 'áará chi canduūchi tá caneē tá tan'dúúcā chi n'dii tá nanááⁿ Ndyuūs. ⁷Tiicá ntúūⁿ ca'cueeⁿ di nducuéⁿē chuū nanááⁿ 'iiⁿyāⁿ yeⁿe yāacū ní tanáⁿā 'iiⁿyāⁿ nguée cuuvi caaⁿmáⁿ yā chi véé nuuⁿndi yeⁿē yā. ⁸Nduuti chi 'iiⁿyāⁿ s'eeⁿ nguée candεe yā cuidado yeⁿe 'iiⁿyāⁿ yeⁿe familia yeⁿē yā ndúúcū chεecú yā ndúúcū chiidá yā tuuⁿmi ní 'iiⁿyāⁿ s'eeⁿ ndaacadaamí yā yeⁿe chi i'téenu yā ní ndii cunncāa cā nguée ti 'iiⁿyāⁿ chi nguεe i'téenu yā.

⁹Cuuvi dingúūⁿ di na lista yeⁿe n'daataá nguá'āa ca'áámá n'daataá nguá'āa chi 'āā ngii tá 'iinu ngeεcu 'áámá nduūyū ní 'áámá nūuⁿ isaⁿā nduūcū ta. ¹⁰Ní n'daataá nguá'āa miiⁿ canee chi 'āā ch'εetinee n'daacā tá ní taaví n'daacā tá daiya tá. Ní canée chi n'guuⁿ tá na vaacu tá 'iiⁿyāⁿ chi snúuⁿ yā yúúní, ní 'āā naaⁿnu tá ca'ā 'iiⁿyāⁿ chí i'téenu yā Ndyuūs tan'dúúcā costumbre yeⁿē 'iiⁿyāⁿ yeⁿe ndaata yeⁿe yā. Ní chinnee ta'ā tá 'iiⁿyāⁿ chi ngiitā, ní diiⁿ tá 'āā dε'ε nūuⁿ ntiiⁿnyuⁿ chi n'daacā.

¹¹Nguée dingúūⁿ di na lista yeⁿe n'daataá nguá'āa 'áámá n'daataá nguá'āa naⁿa chi nguée nduuyu

yeⁿe tá caati cuuvi neⁿe ta
'caandavaacu tá ní nguée neⁿe tá
diiⁿ tá ntiiⁿnyuⁿ yeⁿe Cristo. ¹²Ní
cuayiyi miiⁿ ní n'daataá nguá'aa
miiⁿ véé culpa yeⁿe tá chi nguée diiⁿ
tá cumplir compromiso yeⁿe tá chi
diiⁿ tá ntiiⁿnyuⁿ yeⁿe Cristo. ¹³Ní
más cā cuuvi diiⁿ n'daataá nguá'aa
s'eeⁿ. Íícú cuuvi 'daān'dī ntúūⁿ ta
taachi ngeⁿē tá 'áámá va'ai táámá
va'ai. Níícú nguée dámaaⁿ chi
'daān'dī tá ti neenē neⁿe nandē
tá yeⁿe 'iiⁿyāⁿ ndúúcū nduudu chi
nguée cánéé chi caaⁿmaⁿ tá ní
diyaādī ta. Ní caⁿa tá miiⁿ caⁿa
tá 'muuⁿ ní diiⁿ tá cosas chi nguée
ituneⁿ táⁿā. ¹⁴Cáávā chuū neⁿé
chi n'daataá nguá'aa chi da'caiyā
ta 'caandivaacu tá ni taavi tá daiya
tá ní caaⁿmaⁿ ntiiⁿnyuⁿ tá na
vaacu tá. 'Tífcā ní 'iiⁿyāⁿ chi nguée
i'téenu yā Ndyuūs nguée caaⁿmaⁿ
cúnncā yā yeⁿē tá. ¹⁵Caati n'duuví
n'daataá nguá'aa chi da'caiya tá
'āā ndaacadaami tá yeⁿē Cristo ní
cueⁿe tá lado yeⁿe yáán'n'guiinūⁿ.

¹⁶Ní nduuti chi 'áámá n'daataá o
saⁿā chi i'téenu yā Jesucristo yeⁿē
yú ní vee n'daataá nguá'aa chi 'iiⁿyāⁿ
yeⁿē yā, canée chí ca'á yā n'daataá
nguá'aa deē chi neⁿe tá. 'Tífcā ní
nguée canée chi ca'a 'iiⁿyāⁿ yeⁿe
yaācū n'daataa nguá'aa miiⁿ. 'Tífcā
ní cúví ca'a 'iiⁿyāⁿ yeⁿe yaācū
tanáⁿā n'daataá nguá'aa chi cuaacu
nífⁿnyúⁿ chi véé necesidades yeⁿe
tá.

¹⁷Maaⁿ ní saⁿā s'eeⁿ chi ngaⁿa
ntiiⁿnyuⁿ n'dai yeⁿe yaācū ndúúcū
saⁿā chi ca'cueeⁿ nduudu yeⁿe
Ndyuūs ndúúcū saⁿā chi candē
nduudu yeⁿe Ndyuūs cuuvi cuta'a
sa honor chi doble yeⁿe 'iiⁿyāⁿ s'eeⁿ

yeⁿe yaācū. ¹⁸'Tífcā canée nguūⁿ
na libro yeⁿe Ndyuūs ndii cuááⁿ
vmnaaⁿ. Nguée cu'nūu di yaānā
duutu 'yúúdūu o 'itiindu chí inde'ei
nuúⁿ ti nguaaⁿ trigo ní 'íícú cuuvi
che'ē ti yeⁿē. Ní canée nguūⁿ táámá.
Saⁿā chi nídiⁿ ntiiⁿnyuⁿ cuuvi
cuta'ā sa chiiⁿvē yeⁿē sa.

¹⁹Nguée cu'téenu di 'iiⁿyāⁿ chi
ngaⁿa yā yeⁿe saⁿā chi ngaⁿa
ntiiⁿnyuⁿ yeⁿe yaācū nduuti chi
nguée véé 'uuví ndúú 'iinu testigos
yeⁿē yā. ²⁰Naati canee chi diiⁿ di
reprender nanááⁿ nducyáácá 'iiⁿyāⁿ
yeⁿe yaācū 'iiⁿyāⁿ chi nadinuuⁿndí
yā. Ní 'íícú tanáⁿā 'iiⁿyāⁿ ní dí'valá
yā. ²¹Maaⁿ ní 'úú Pablo ngaⁿa ngii
dii Timoteo chuū nanááⁿ Dendyuūs
ní nanááⁿ Señor Jesucristo ní
nanááⁿ ángeles chí Ndyuūs ndēene
yā. Diiⁿ di nducuéⁿē chuū ní nguée
nadacadíinuⁿ di chi 'áámá yā chi
ch'ēte cá yā nguée ti táámá yā.
Ní 'āā daamá nūuⁿ diiⁿ di ndúúcū
nducyaaca 'iiⁿyāⁿ. ²²Nguée ndēene
nuuⁿ di 'áámá saⁿā chi caaⁿmaⁿ
ntiiⁿnyuⁿ sa yeⁿe yaācū nduuti
chi nguée n'diichi di saⁿā miiⁿ
'naaⁿ tiempo. Ní nguée véé 'áámá
parte yeⁿē di ndúúcū saⁿā miiⁿ
taachi dinuuⁿndi sa. Diví di yeⁿe
nducuéⁿē chi nguée n'daacā ní nguée
dinuuⁿndí maaⁿ di.

²³Maaⁿ ní taachi ya'āi chēeti di
nguée cu'u di dámaaⁿ nuūⁿnīⁿ caati
cuuvi cu'u di 'téé vino. Ní taama
vmnéⁿēe chi ya'āi cuerpo yeⁿē di
cu'u di 'téé vino.

²⁴Ní nuuⁿndi chi diiⁿ náⁿā 'iiⁿyāⁿ,
ní deenu yú ti n'diichi yú vmnaaⁿ
chi ndaā nguuvi chi Ndyuūs n'diichi
yā nuuⁿndi yeⁿe yú. Níícú nguée
deenu yú nuuⁿndi chi diiⁿ tanáⁿā

'i'iⁿyāⁿ naati cuayiivi míⁿ taachi n'diichi Ndyuūs nuuⁿndi yeⁿe yú tuuⁿmi ní snaaⁿ yú nuuⁿndi yeⁿe yā. ²⁵Tiicá ntúūⁿ snaaⁿ yú nducuéⁿe chi n'daacā chi diiⁿ 'i'iⁿyāⁿ. Ní 'áará chí nguéeⁿ inaaⁿ yú maaⁿ chiiⁿ chi n'daacā chi díⁿ yā cuayiivi ní Ndyuūs idiiⁿ yā chi cadiiⁿnuuⁿ yú táácā yeⁿe 'i'iⁿyāⁿ s'eeⁿ.

6 Nducyaaca 'i'iⁿyāⁿ chi i'téenu yā Jesucristo chi diiⁿ ntiⁿnyuⁿ yeⁿe criado o criada ni 'áamá canee yā na ntiⁿnyuⁿ yeⁿe 'iiví yā chi esclavo yā, canee yā tan'dúúcā chi véé 'áamá yugo na daandú yā. Ní 'i'iⁿyāⁿ esclavos canee chi diiⁿ ca yā respetar 'iivi yā. Níⁿcú 'iivi yā nguéeⁿ cuuvi cunncaā caaⁿmaⁿ yā yeⁿe Señor Jesucristo yeⁿe yú ndíⁿ nguéeⁿ ndúú yeⁿe chi ca'cueeⁿ yú. ²Ní saⁿā esclavos chi i'téenu sa ní véé 'iivi sa chi 'tiicá ntúūⁿ i'téenu yā, caneeⁿ chi diiⁿ ca sa respetar 'iivi sa tan'dúúcā chi 'aama 'iivi sa chi nguéeⁿ i'téenu yā. Naati canee chi diiⁿ sa servir más cā 'iivi sa chi i'téenu yā caati 'iivi sa ní hermano ndúúcū sa caati yeⁿe Ndyuūs nduu 'uuví yā. Ní hermanos neⁿe sa 'iivi sa. Tanducuéⁿe denduⁿū dii, Timoteo, ngi'cueeⁿ di ní ngaⁿa di.

'i'iⁿyāⁿ chi i'téenu yā Jesucristo ní véé vaadi yeenú yeⁿe yā

³Níⁿcú nduuti chi 'áamá 'i'iⁿyāⁿ ngi'cueeⁿ yā táámá nduudu chí n'dááⁿ ní nguéeⁿ tan'dúúcā nduudu n'dai yeⁿe Señor Jesucristo, ndíⁿ nguéeⁿ ndúú tan'dúúcā nduudu yeⁿe Ndyuūs chi ngi'cueeⁿ yú yeⁿe chi 'cuéetinee yú n'daacā tan'dúúcā chi Ndyuūs neⁿe yā chi diiⁿ yú, ⁴tuuⁿmi ní 'i'iⁿyāⁿ miiⁿ ní

nadacadíⁿnuuⁿ yā chi maaⁿ yā ch'etéⁿe yā, ní nguéeⁿ deⁿe véé deenu yā. 'i'iⁿyāⁿ miiⁿ ní ch'eeⁿcu cheendí yā. Ní díⁿ yā chí náⁿā 'i'iⁿyāⁿ nguⁿu yā ní nguéeⁿ yā ní caaⁿvá yā ní ngaⁿa taáⁿ yā yeⁿe 'i'iⁿyāⁿ. Ní 'i'iⁿyāⁿ miiⁿ díⁿ yā chí náⁿā 'i'iⁿyāⁿ nguéeⁿ véé 'viich'etíⁿnuuⁿ ndúúcū tanáⁿā 'i'iⁿyāⁿ. ⁵Ní 'i'iⁿyāⁿ miiⁿ díⁿ yā chí nducyaaca 'i'iⁿyāⁿ dámaaⁿ n'geecu cheendí yā, ní nguéeⁿ n'daacā nadacadíⁿnuuⁿ yā. Ní nguéeⁿ deenú yā nduudu yeⁿe Cristo. 'i'iⁿyāⁿ miiⁿ nadacadíⁿnuuⁿ yā chí díⁿ yā ganar tuumí caati chíⁿ i'téenu yā ní ngaⁿa yā nduudu yeⁿe Cristo. Divíⁿ di yeⁿe tanducuéⁿe 'i'iⁿyāⁿ chí 'tíicā. ⁶Deenu yú chí 'i'iⁿyāⁿ chí i'téenu yā Jesucristo canee n'daacā yā ndúúcū chí véé yeⁿe yā ní yeenú yā. Chiiⁿ chí i'téenu yā ní tan'dúúcā vaadi 'cuiica ca yeⁿe yā. 'Tíica rā vaa. ⁷Deenu yú chí nguéeⁿ deⁿe véé ndéé yú taachi chíⁿ iindiyāⁿ yú iⁿ'yeeⁿdí 'cūū. Ní nguéeⁿ deⁿe véé ntúūⁿ candéé yú yeⁿe iⁿ'yeeⁿdí 'cūū taachi 'cuūvī yú. ⁸Neⁿe chí snee yú iⁿ'yeeⁿdí 'cūū nduuti chí véé chí ngeⁿe yú ndúúcū catecai yú, ní ndúúcū chuū nūⁿ cānee chí yeenú yú. ⁹Caati 'i'iⁿyāⁿ chí neⁿe yā 'cuiicā yā taachi yááⁿ n'guinūⁿ n'diichi neeⁿ sa 'yā cuuvi díⁿ yā dendúⁿū chí nguéeⁿ n'daacā. Ní canee yā ndúúcū vicio zongo yeⁿe yā chí nguéeⁿ n'daacā. Ní nguéeⁿ dichíⁿvē. Ní diiⁿ chí dinuuⁿndí yā níⁿcú diiⁿ chí caⁿá yā infierno. ¹⁰Chíⁿ chí diiⁿ chí 'i'iⁿyāⁿ dinuuⁿndí yā ní chuū. 'i'iⁿyāⁿ neⁿe cá yā tuūmí. Ní inⁿ'nuuⁿ cá yā tuūmí chí 'āā ntéé véé tiempo chí cu'téenu yā. Ní maáⁿ yā díⁿ yā chí ya'āi n'geenu taaví yā ngii.

**Yeⁿe chi cuuvi din'daaca
yú maaⁿ chi i'teenu yú**

¹¹Maaⁿ ní dii, Timoteo, saⁿá
chi yeⁿe Ndyuūs dii, diví di yeⁿe
nducuéⁿe chuū chi nguē n'daacā. Ní
diiⁿ di nducuéⁿe chi n'daacā. Dich'ēete
di Ndyuūs ní cu'téenu ca di. Diné'e
ca di nducyaaca 'iiⁿyāⁿ ní diiⁿ di
nducuéⁿe ndúúcū paciencia. Ní canee
di ndúúcū staava yeⁿe di chi n'dai.
¹²Ní taachi 'cueenu di cuuvi cáávā
chi i'téenu di Ndyuūs canee diitu di
ndúúcū chi i'téenu di yeⁿe Ndyuūs
yeⁿe yú. Ní diitu diiⁿ di caati chi cuuvi
yeⁿe di vida cueⁿe daāⁿmaⁿ chi cuuvi
cuta'a di yeⁿe Ndyuūs ti Ndyuūs yaa'ví
yā dii chi cuuvi yeⁿe yā dii. Ní dii 'āā
ngaⁿa di chi i'téenu di Ndyuūs nanááⁿ
'yaaⁿ ndáí 'iiⁿyāⁿ. ¹³Maaⁿ ní 'úú yaa'ví
dii nanááⁿ Ndyuūs chi testigo yeⁿe
yú, Ndyuūs chi itée yā vida yeⁿe
nducuéⁿe chi véé, ní nanááⁿ Jesucristo
chi 'āā ngaⁿa yā nduudu cuaacu yeⁿe
Ndyuūs chiidá yā nanááⁿ gobernador
Poncio Pilato. ¹⁴'Úú yaa'ví dii chi
'caandiveeⁿ di ní diiⁿ di nducuéⁿe chi
ca'á orden yeⁿe di. Ní nguéé n'daaⁿ
orden yeⁿe caati nguéé neⁿe chi 'iiⁿyāⁿ
caaⁿmáⁿ yā contra yeⁿe di caavā cosa
chi diiⁿ di. Diiⁿ di 'tíicā ndii tiempo
chi ndaa Señor Jesucristo yeⁿe yú
táámá vmnéⁿēe. ¹⁵Níicú tiempo
taachi Ndyuūs neⁿe yā, Ndyuūs caⁿá
yā dicho'ó yā Jesucristo chí n'dai taavi
nanááⁿ 'iiⁿyāⁿ taama vmnéⁿēe. Ní
Cristo miiⁿ maáⁿ yā ní 'áámá n'dyáⁿā
'iiⁿyāⁿ nūuⁿ chi ngaⁿa ntiⁿnyuⁿ yā
yeⁿe nducueⁿe chi véé, ní Rey chi
ch'ēete taavi ca nguéé ti tanáⁿā reyes.
Ní 'iivi yú chi ch'ēete taavi ca nguéé
ti tanáⁿā saⁿā chi 'iivi. ¹⁶Dámaāⁿ
Ndyuūs miiⁿ ní 'áámá canduuchí yā

cueⁿe daāⁿmaⁿ. Ní canduuchí yā ná
chideeve chi nguéé cuuvi indaa mar
'áámá 'iiⁿyāⁿ. Ní nguéé n'diichi mar
'áámá 'iiⁿyāⁿ Ndyuūs miiⁿ ndíi nguéé
cuuvi snaaⁿ ra yā. Maaⁿ ní cueⁿe
daāⁿmaⁿ canee cuuⁿmiⁿ yú dich'ēete
yú Ndyuūs ti tanducuéⁿe poder chi véé
ní yeⁿe yā. 'Tíicā rā vaa.

¹⁷Maaⁿ ní dii, Timoteo, cuuvi di
'iiⁿyāⁿ 'cuiica chi nguéé nadacadíinuⁿ
yā chi ch'ēete ndáí yā. Ní nguéé cunee
ngiinū yā yeⁿe chi véé yeⁿe yā caati
cosa chi nguéé seguro chi 'áámá
cūnee ndúúcu yā. N'dáácā ca nduuti
chi 'iiⁿyāⁿ s'eeⁿ cu'téenu yā Ndyuūs chi
canduuchi ní Ndyuūs ca'á yā n'dee
ndáí dendu'ū yeⁿe nducuéⁿe chi vee
caati cuuvi cuta'a yú ní yeenu yú.
¹⁸Níicú díi yaa'ví di 'iiⁿyāⁿ 'cuiica chi
din'daacá yā ní díiⁿ yā n'dee tááví
ntiiⁿnyuⁿ chi n'daacā. 'Íicú canee listo
yā chi cuuvi ca'á yā tanáⁿā 'iiⁿyāⁿ chi
nguéé véé yeⁿe yā ní innee yā 'iiⁿyāⁿ
s'eeⁿ. ¹⁹'Tíicā cuuvi yeⁿe 'iiⁿyāⁿ s'eeⁿ
vaadi 'cuiica yeⁿe yā chi vida cueⁿe
daāⁿmaⁿ chi Ndyuūs caⁿá yā chi ca'á
yā 'iiⁿyāⁿ yeⁿe yā.

**Pablo ca'á yā últimas órdenes
Timoteo ti 'cuiinū carta maaⁿ**

²⁰Díiⁿ, Timoteo, cundée di n'daacā
cuidado yeⁿe encargo chi 'iiⁿyāⁿ 'āā
tee yā dii. Nguéé cu'neeⁿveeⁿ di n'dee
ndáí nduudu chi ngaⁿa 'iiⁿyāⁿ yeⁿe
cosa yeⁿe iⁿyeenⁿdí cūū o yeⁿe nduudu
chi nguéé dichí'vē o yeⁿe chi ngaⁿa
'iiⁿyāⁿ chi nduudu deenu ní nguéé
'tíicā. ²¹'Iiⁿyāⁿ s'eeⁿ ndáácadaami yā
yeⁿe nduudu cuaacu yeⁿe Ndyuūs ní
maáⁿ yā ní nguéé i'téenu yā nduudu
cuaacu yeⁿe Ndyuūs. Maaⁿ ní 'úú neⁿe
chi Ndyuūs téé yā dii tanducuéⁿe chi
n'daacā. 'Tíicā cuuvi.

CARTA CUAYIIVI YEⁿE TIMOTEO

1 'Úú Pablo 'úú ní 'úú apóstol yeⁿe Jesucristo caati Ndyuūs neⁿé yā chi 'úú cuuvi apóstol yeⁿé yā, ní dichó'o yā 'úú. Ní chuū chi Ndyuūs diiⁿ yā ní tan'dúúcā chi ngaⁿa yā chi ca'a yā vida cueⁿe daāⁿmaⁿ nducyaaca 'iiⁿyāⁿ chi yeⁿe Jesucristo. ²'Úú dingúúⁿ carta 'cūū yeⁿe di, Timoteo, chi tan'dúúcā daiyá 'tíicā dii caati neⁿé taavi dii. Neⁿé chi Ndyuūs chiida yú ndúúcu Señor Jesucristo yeⁿe yú tée yā dii cosas chi n'dai, ní ya'āi 'iinú yā dii, ní tée yā dii vaadi 'diiⁿ na staava yeⁿe di.

**Caaⁿmaⁿ di nduudu yeⁿe
Cristo nanááⁿ 'iiⁿyāⁿ**

³Maaⁿ ní ca'á Ndyuūs gracias caavā chi 'úú dichii'vé Ndyuūs ndúúcu vaanicadínūuⁿ yeⁿé chi n'daacā tan'dúúcā chi diiⁿ 'iiⁿyāⁿ yeⁿe yú tiempo chi 'āā ch'ó'o. Ní ndii nguuví ndii n'gaaⁿ taachi ngaⁿanguā'a, 'úú ca'á Ndyuūs gracias, ní cueⁿe daāⁿmaⁿ 'úú ngaⁿanguā'a caavā dii, Timoteo. ⁴Nééné neⁿé snaáⁿ dii, Timoteo, taachi n'gaacú yeⁿe nuūⁿniⁿ nduutinááⁿ di taachi caneé 'áámá lado yeⁿe di. Ní taachi cuuvi n'diichí dii tuu'mi ní yeenú taaví.

⁵Ní n'gaacú chi i'téenu di Ndyuūs ndúúcu núúⁿmáⁿ staava yeⁿe di. Vmnaaⁿ chi i'teenu di Jesucristo táⁿā Loida chi chicuⁿu di ní táⁿā Eunice cheecu di i'téenu yā Jesucristo. Maaⁿ ní seguro caneé chi cuaacu chi dii ntúūⁿ i'téenu di.

⁶Cáávā chi i'téenu di Ndyuūs neⁿé chi n'gaacu di chi cuéⁿé daāⁿmaⁿ diiⁿ di ntiiⁿnyuⁿ chi Ndyuūs 'āā teé yā dii ndíí tiempo chi 'úú sn'duū ta'á vmnaaⁿ tiiⁿ di. ⁷Ndyuūs nguéeⁿ 'āā teé yā s'uuúⁿ 'áámá staava yeⁿe yú chi 'va'a yú naati 'āā teé yā s'uuúⁿ 'áámá staava yeⁿe yú chi véé poder yeⁿe yú. Ní 'íicú cuuví dinéⁿe yú nducyaaca 'iiⁿyāⁿ. Ní cuuvi nadicadínūuⁿ yú n'daacā. ⁸Maaⁿ ní nguéeⁿ 'cuináaⁿ di chi caaⁿmaⁿ di nduudu cuaacu yeⁿe Señor Jesucristo yeⁿe yú nanááⁿ 'iiⁿyāⁿ. Ndíí nguéeⁿ ndúú 'cuináaⁿ di yeⁿe 'úú caati canuúⁿ vácūū cáávā chi ngaⁿá nduudu cuaacu yeⁿe Cristo. Naati n'daacā ca diiⁿ di chi cuché di yeⁿe nducuéⁿe chi 'cueenu di cuuvi ntúūⁿ cáávā chí ngaⁿa di nduudu yeⁿe Cristo chí nadanguáⁿāi 'iiⁿyāⁿ chi n'giindiveéⁿ yā yeⁿe di. Diiⁿ di tanducuéⁿe ndúúcu fuerzas chi Ndyuūs itée yā dii. ⁹Ndyuūs nadinguáⁿai yā

s'uuúⁿ ní yaa'ví yā s'uuúⁿ chi diiⁿ yú ntiiⁿnyuⁿ yeⁿe yā chí n'daacā. Nguéé nadinguáⁿai yā s'uuúⁿ cáávā ntiiⁿnyuⁿ chi diiⁿ yú chí n'daacā. Naati Ndyuūs díⁿ yā 'túúcā ndúúcū s'uuúⁿ ti 'tíicā neⁿe yā diiⁿ yā. Níicú neené neⁿe yā s'uuúⁿ. Ní maaⁿ ní s'uuúⁿ 'āā nduuví daama yú ndúúcū Cristo Jesus. Níicú Ndyuūs neⁿe yā s'uuúⁿ cuááⁿ vmnaaⁿ chi 'āā cuéé iⁿ'yeeⁿdí. ¹⁰Maaⁿ ní Ndyuūs ch'iⁿ'í yā chí neⁿe taaví yā nducyaaca 'iiⁿ'yāⁿ taachi dich'ó yā Jesucristo yeⁿe yú iⁿ'yeeⁿdí 'cūū. Jesucristo ní 'iiⁿ'yāⁿ miiⁿ chi nadanguáⁿai yā s'uuúⁿ. Ní nduudu cuaacu yeⁿe evangelio chi yeⁿe vida yeⁿe Cristo ch'iⁿ'i s'uuúⁿ chi nguéé 'aama 'cuūvi yú. Níicú cáávā chi nadanguáⁿai yā s'uuúⁿ cuuvi cunduuchi yú cueⁿe daāⁿmaⁿ.

¹¹Níicú Ndyuūs nideevé yā 'úú chí caaⁿ'máⁿ nduudu cuaacu yeⁿe yā ní dich'ó yā 'úú lado yeⁿe apóstol yeⁿe yā chí 'úú caaⁿ'máⁿ nduudu cuaacu yeⁿe yā nanááⁿ 'iiⁿ'yāⁿ chi nguéé yeⁿe ndaata Israel. ¹²Níicú cáávā chí 'úú apóstol yeⁿe yā tanducuéⁿe n'geenú ngii chí canuúⁿ vácūū. Ní nguéé ngii 'cuinaáⁿ caati deenú du'ū chí Cristo chí i'teenú. Ní deenú chí cuaacu chí Cristo miiⁿ ní véé poder yeⁿe yā chí diiⁿ cuenta yā yeⁿe nducuéⁿe ntiiⁿnyuⁿ chí tee yā 'úú ndíí nguuvi chí díⁿ yā juzgar nducyaaca 'iiⁿ'yāⁿ.

¹³Dii, Timoteo, diiⁿ di ndúúcū nduudu chí serio nducuéⁿe tan'dúúcā chí 'úú chí'cueéⁿ dii. Ní cunée di n'daacā ndúúcū chí i'teenú di Dinéⁿe di nducyaaca 'iiⁿ'yāⁿ caati mááⁿ ní s'uuúⁿ ní yeⁿe Jesucristo s'uuúⁿ. ¹⁴Ní cundee di cuidado chí

diiⁿ di ntiiⁿnyuⁿ chí Ndyuūs tee yā dii. Ní tee di lugar chí Espíritu N'dai yeⁿe Ndyuūs chí canee ndúúcū yú cunnee yā dii.

¹⁵Dii ní deenu di chí nducyaaca 'iiⁿ'yāⁿ chí i'téenu yā Jesucristo chí yeⁿe yáⁿ'āa Asia, 'iiⁿ'yāⁿ s'eeⁿ chí canee yā nduucú nguuvi chí chó'oo, maaⁿ ní ndaacadaamí yā yeⁿe 'úú. Ní nguaaⁿ 'iiⁿ'yāⁿ s'eeⁿ canée saⁿ'ā Figelo ndúúcū saⁿ'a Hermógenes. ¹⁶Naati 'iiⁿ'yāⁿ yeⁿe familia yeⁿe saⁿ'ā Onesíforo nguéé 'cuináaⁿ yā 'úú yeⁿe chí canuúⁿ vácūū. Saⁿ'ā miiⁿ ndaa sa n'diichi sa 'úú chí nnee sa 'úú. Neⁿe chí Señor Jesucristo ca'á yā vaadí ya'ai yeⁿe yā saⁿ'ā miiⁿ ndúúcū 'iiⁿ'yāⁿ yeⁿe familia yeⁿe sa. ¹⁷Nguéé diiⁿ saⁿ'ā Onesíforo tan'dúúcā chí diiⁿ tanáⁿ'a yā caati taachi canée sa na yāāⁿ Roma neené na'nuūⁿ sa 'úú ndíí taachi nndaacā sa 'úú. ¹⁸Neⁿe chí Ndyuūs ya'ai 'iinú yā saⁿ'ā miiⁿ nguuvi chí Señor Jesucristo yeⁿe yú díⁿ yā juzgar 'iiⁿ'yāⁿ yeⁿe iⁿ'yeeⁿdí 'cūū. Ní dii ní neené n'dai deenú di tan'dúúcā chí chinnee sa s'uuúⁿ taachi snée yú na yāāⁿ Efeso.

'Aámá soldado yeⁿe Señor Jesucristo chí din'dáaca sa

2 Díí, Timoteo, chí tan'dúúcā daiyá, cuta'a di fuerzas yeⁿe nducuéⁿe vaadí n'dai chí cuuvi yeⁿe yú caati maaⁿ ní yeⁿe Jesucristo s'uuúⁿ. ²Ní tanducuéⁿe chí n'giindiveeⁿ di yeⁿe 'úú chí ngaⁿ'á nanááⁿ n'dee n'dái 'iiⁿ'yāⁿ, chuū ní ca'cueeⁿ di saⁿ'ā s'eeⁿ chí i'téenu sa chí 'áámá cūnee sa n'daacā ndúúcū chí i'téenu sa, ní saⁿ'ā s'eeⁿ ní cuuvi ca'cueeⁿ sa tanáⁿ'a 'iiⁿ'yāⁿ.

³Ní taachi canee chi 'cueenu dí cuuvi tuu'mi ní n'geenu di ngii tan'dúúcā 'áámá soldado chi n'daacā sa. 'Tíicā dii' di caati dii ní 'áámá soldado ye'"e Señor Jesucristo.

⁴Deenu di tan'dúúcā chi 'áámá soldado chi canéé na servicio nguée dii' sa tan'dúúcā taná"ā sa"ā chi nguée canee na servicio caati canee sa dii' sa cumplir tanducué"ē chi nga"n comandante ye"ē sa.

⁵Tiicá ntúū". 'Ii"yā" chi ca"á na cancha nguée cuuvi cuta'a yā mar 'áámá premio nduuti chi nguée dii' yā cumplir reglas ye"ē. ⁶Tiicá ntúū". 'Ii"yā" chi dii' ntii"nyu" na campo ye"é yā cuuvi cuta'á yā caavā maá"n yā cosecha ye"é yā chi vmnāá"n vmnaa". ⁷Dii, Timoteo, nadacádíínū" di ye"ē chi nga"n níicú Señor ye"ē yú dii' yā chi cadíínū" di tanducué"ē.

⁸N'gáácú dí ti Jesucristo ye"ē yú ní ye"ē ndaata ye"ē David 'ii"yā", ní nduuchi yā ye"ē nguaa" tiná"ā. 'Túúcā nga"ā nduudu cuaacu chi nadinguá"āi 'ii"yā". ⁹Níicú cáávā chi nga"n nduudu cuaacu ye"é yā neene n'geenú ngii ní canuú"n vácūū ndúúcū cadenas tan'dúúcā chi 'ii"n"nú" 'ii"yā" naati nduudu ye"é Ndyuūs nguée cuuvi 'cuēē chiichí ndúúcū cadenas. ¹⁰Ní cáávā nducué"ē chuū 'úú cucheé ye"e tanducué"ē chi n'geenú ngii caavā 'ii"yā" chi Ndyuūs nndeēve yā chi cuuvi ye"é yā 'ii"yā". Ní 'íicú 'ii"yā" s'ee" cuuvi cu'téenu yā Ndyuūs. Ní Ndyuūs cuuvi nadangua"ai yā 'ii"yā" ye"e nuu"ndi ye"é yā cáávā Jesucristo. Ní 'ii"yā" s'ee" cuuvi ndaaca yā vida n'dai chi vida cue"e daā"ma".

¹¹Nduudú 'cūū ní cuaacu chi nga"n a 'ii"yā":

Nduuti chi dii" yú cuenta chi 'āā n'diī yú ndúúcū Cristo tuu'mi ní dii" yú cuenta chi cunduuchi ntuū" yú ndúúcu yā.

¹²Tiicá ntúū". Nduuti chi n'geenū yú ngii cááva yā ndúúcū nducué"ē dendu'ū tuu'mi ní caa"ma" ntii"nyu" yú ndúúcu yā. Ní nduuti chí cuee"diitu yú ye"e Cristo tuu'mi ní Cristo ca"á yā caa"ma" yā chi s'uúú"n nguée ye"é yā s'uúú".

¹³Nduuti chi n'daa" yú ní nguée 'aama canee yú ndúúcū chi i'teenu yú ye"e Jesucristo tuu'mi ní Jesucristo nguée n'daa" yā ti 'tíica yā ní 'áámá canee yā caati Cristo mii"n nguée cuuvi cuee"diitú yā ye"ē maá"n yā.

¹⁴Maa" ní dii, Timoteo, n'gaacú di ye"e nducué"ē dendu'ū. Yaa'vi di 'ii"yā" s'ee" nanáá"n 'iivú Ndyuūs ye"é yú chi canéé chi dii' yā 'túúcā. Yaa'vi di 'ii"yā" s'ee" chi nguée cuuvi 'cuu"má"n yā ndúúcū cheendí yā caati nduudu ye"é yā nguée dichí'vē. Nduudu s'ee" dámaā"n dii"n chi taná"ā 'ii"yā" nadacádíínū" ca yā ye"e chi ch'iindiveé"n yā ye"e nduudu ye"é yā. ¹⁵Ní dí dii' di tanducué"ē chi n'daacā chi cuuvi di caati taachi ndaa di nanáá"n Dendyuūs cuuvi di 'cuu"mi"n di chi n'daacā dii' di ntii"nyu" ye"é yā. Ní n'daacā ngi'cuee" di nduudu cuaacu ye"é Ndyuūs nanáá"n 'ii"yā". Ní nguée cuuvi 'cuināa" di nanáá"n Ndyuūs. ¹⁶Diví di ye"e 'ii"yā" chi nga"n a n'dee n'dái nduudu chi nguée

dáamá ndúúcū nduudu cuaacu yeⁿé Ndyuūs caati nguée dichíí'vē. 'Iiⁿyāⁿ chi ngaⁿa yā 'túúcā diiⁿ cá yā nuuⁿndi. ¹⁷Níícú nduudu chi nguée n'daacā chi 'iiⁿyāⁿ s'eeⁿ ca'cueéⁿ yā 'iiⁿyāⁿ ní ngéenū tan'dúúcā chi ca'ai gangrena ní tan'dúúcā chi nge'e 'áámá n'daa. 'Tíícā diiⁿ nduudu yeⁿe saⁿā Himeneo ndúúcū saⁿā Fileto. ¹⁸Sáⁿā s'eeⁿ ní divíi yā yeⁿe nduudu cuaacu ní ngaⁿa yā chi 'iiⁿyāⁿ nguée nnduuchí yā yeⁿe nguaaⁿ tináⁿā. Ní náⁿā 'iiⁿyāⁿ 'āā ntéé i'téenu yā nducuéⁿe nduudu cuaacu. ¹⁹Naati chíiⁿ chi Ndyuūs 'āā diiⁿ yā mar 'áámá 'āā ntéé cuuvi nadin'nú'u yā. Ní 'āā canée nguūⁿ na libro yeⁿé yā ní chiichi canée tan'dúúcā 'áámá sello. 'Tíícā nduudu miiⁿ: Señor Jesucristo yeⁿe yú deenú yā du'u 'iiⁿyāⁿ chi yeⁿé yā. Níícú nducyaaca 'iiⁿyāⁿ chi ngaⁿa yā chi yeⁿe Señor yeⁿe yú canée chi divíi yā yeⁿe nuuⁿndi.

²⁰Taachi caⁿa yú cuaaⁿ chēeti va'ai chí ch'ēete taavi ca n'diichi yú nguée dámaāⁿ platos ndúúcū 'cuūtu yeⁿe 'dífⁿguaaⁿ o 'dífⁿguue naati n'diichi yú ntúūⁿ 'cuūtu yeⁿe yáⁿá ní yeⁿe íncēetí. N'duuví 'cuūtu 'iiⁿyāⁿ cuta'á yā cáávā ntiⁿnyuⁿ especiales ní náⁿā 'cuūtu ní 'iiⁿyāⁿ sta'á yā chi 'cuíi yā cosas chi nguée dichíí'vē. ²¹Ní taachi 'aama yú neⁿe yú diiⁿ yú ntiⁿnyuⁿ yeⁿe Señor Jesucristo yeⁿe yú canee chi 'cuētinéé n'daacā yú ní divíi yú yeⁿe tanducuéⁿe chi nguée dichíí'vē. 'Tíícā diiⁿ yú maaⁿ níícú cuuvi diiⁿ yú 'āā de'é nūuⁿ ntiⁿnyuⁿ chi n'daacā.

²²Tiicá ntúūⁿ. Dii, Timoteo, divíi di yeⁿe vicios yeⁿe saⁿā

n'gaiyāā. Cunée di n'daacā ní diiⁿ di tanducuéⁿe chi n'daacā. Cu'téenu ca di Ndyuūs, dinéⁿe di nducyaaca 'iiⁿyāⁿ, ní cunée di ndúúcū vaadī 'diiⁿ ndúúcū nducyáácá 'iiⁿyāⁿ chi Ndyuūs nadidēevé yā yeⁿe nuuⁿndi yeⁿé yā. Ní maaⁿ ní ngaⁿ'angua'á yā ndúúcū 'iiⁿyāⁿ chi yeⁿe Señor Jesucristo yeⁿe yú. ²³Ní dii, Timoteo, nguée diiⁿ di cuenta yeⁿe 'iiⁿyāⁿ chi n'deee n'dái neⁿé yā caaⁿmaⁿ yā ndúúcū dii ndúúcū nduudu chi zonza caati nguē déenu yā. 'Āā déenu di chi naachi 'cuiinū nduudu miiⁿ ní ndaacā vaadī 'caa'va. ²⁴Deenu di chi mar 'áámá 'iiⁿyāⁿ chi dichíí'vē Señor Jesucristo yeⁿe yú nguée cánée chi 'cuuⁿmaⁿ yā ndúúcū 'iiⁿyāⁿ naati canée chí ndíícúuⁿ yā ndúúcū nducyaaca 'iiⁿyāⁿ. Ní canee chi ngi'cueeⁿ n'dáácá yā. Ní canee chi diiⁿ yā tanducuéⁿe ndúúcū paciencia. ²⁵Ní canee chi dííⁿ di componer 'iiⁿyāⁿ chi yáádí'yāā ndúúcū núúⁿmaⁿ staava yeⁿe di. Ní 'iiⁿyāⁿ miiⁿ canee chi cūnee ngiinú yā chi Ndyuūs n'daáⁿ yā vida yeⁿe 'iiⁿyāⁿ rebelde caati cuuvi deenú yā nduudu chi cuaacu. ²⁶Tíícā ní 'iiⁿyāⁿ s'eeⁿ canée yā tan'dúúcā chi cyaadú yā níícú cuayiivi ní canduuchí yā ní 'íícú cuuvi ngeenú yā tan'duucā chi dííⁿ yā cuáⁿai yā yeⁿe trampa yeⁿe yááⁿnguiniūuⁿ. Ní nguée preso yā yeⁿe yááⁿnguiniūuⁿ chi yááⁿnguiniūuⁿ cuuvi diiⁿ sa chiⁿ chi neⁿe sa nduucú yā. Ní maaⁿ ní 'iiⁿyāⁿ cuuvi dííⁿ yā chííⁿ chí neⁿe Ndyuūs.

Tan'dúúcā chi 'iiⁿyāⁿ caⁿá yā diiⁿ yā nguuví chí cúchii

3 Dii, Timoteo canee chi déenu ntúūⁿ di chuū. Nguuvi chi

cuchii véé cosas chi ngíⁿi. ²Iiⁿyāⁿ ní neⁿé yā maáⁿ yā 'iiⁿyāⁿ ní dinéⁿe taavi yā tuūmī. Ní caaⁿmáⁿ yā chi neené n'geete maaⁿ yā ní nacádíínuuⁿ yā chi neené n'daacā maáⁿ yā, ní nguée n'daacā dináaⁿ yā yeⁿe tanáⁿ'ā 'iiⁿyāⁿ. Ní ngii taaⁿ yā contra yeⁿe Ndyuūs. Ní nguée n'giindiveéⁿ yā yeⁿe chiidá yā ndúúcu chεécú yā. Ní nguée ngaⁿa yā 'tíicā: N'dii Ndyuūs, gracias. Ní nguée n'giindiveéⁿ yā yeⁿe nduudu cuaacu yeⁿe Ndyuūs. ³Ní nguée dinéⁿe yā 'iiⁿyāⁿ tan'dúúca chi canée chi dineⁿ'é yā 'iiⁿyāⁿ, ndí nguée ndúú ya'āi 'iinú yā 'iiⁿyāⁿ. Caaⁿmáⁿ yā nuuⁿndi yeⁿe 'iiⁿyāⁿ ní nguée 'tíicā. Ní nguée dííⁿ yā chi n'daacā caati neⁿ'é yā caⁿ'á yā ndúúcu n'daataá ó saⁿ'ā chi nguée yeⁿ'é yā. Ní neené taaⁿ yā. Ní nguée cuuvi n'diichí yā cosa chi n'daacā. ⁴Nééné neⁿ'e yā vaadi 'caa'va ndúúcu 'iiⁿyāⁿ. Nguée 'va'a yā 'āā de'é nūuⁿ chi dííⁿ yā ndúúcu 'iiⁿyāⁿ. Ní neené nadacadíínuuⁿ yā chi n'dεεve maáⁿ yā. Nééné neⁿ'e yā diiⁿ yā taanduvée vicio chi véé iⁿ'yeeⁿdí 'cūū. Ní nguée nadacadíínuuⁿ yā yeⁿ'e Ndyuūs. ⁵Nééné n'giⁿi yā chi i'téenu yā Ndyuūs naati nguée dííⁿ yā chiíⁿ chi ngaⁿa nduudu cuaacu yeⁿ'é Ndyuūs. Díí, Timoteo, diví di yeⁿ'e 'iiⁿyāⁿ chi 'tíicā.

⁶Caati náⁿ'ā saⁿ'ā s'eeⁿ ní ngeⁿ'e yā ndúú va'ai nduu va'ai yeⁿ'e n'daataá chi nguée diiⁿ n'daacá yā. Ní ca'cueeⁿ sa nduudu chi nguée n'daacā. Ní n'daataa s'ééⁿ nguée cuuvi ndaacadaamí yā yeⁿ'e nuuⁿndi yeⁿ'é yā. ⁷N'daataa s'eeⁿ ní nguuví nguuví n'geeⁿ yā nduudu miiⁿ naati nguée cuuvi tuumicadíínuuⁿ yā nduudu

miiⁿ. ⁸Ní iiⁿyāⁿ s'eeⁿ chi diiⁿ 'tíicā ní contra yeⁿ'e nduudu cuaacu yeⁿ'é Ndyuūs. Ní tan'dúúca chi diiⁿ saⁿ'ā ngaatúū Janes ndúúcu Jambres taachi contra yeⁿ'e Moisés tiempo chi 'āā chó'oo, 'tíicā maaⁿ ní 'iiⁿyāⁿ s'eeⁿ nguée n'daacā nadicadíínuuⁿ yā. Ní nguée cuaacu chi i'téenu yā Ndyuūs. ⁹Ní 'iiⁿyāⁿ s'eeⁿ nguée cuuvi 'cueeⁿ cá yā caati nducyaaca 'iiⁿyāⁿ deenú yā táacā idiiⁿ 'iiⁿyāⁿ s'eeⁿ chi tonto yā tan'dúúca chi 'tiicá ntúū deenú nducyaaca 'iiⁿyāⁿ taacā chi diiⁿ ngaatúū Janes ndúúcu Jambres tiempo chi 'āā chó'oo.

**Cuááⁿ ná ch'iinu ní Pablo dinguúⁿ
yā carta 'cūū yeⁿ'e Timoteo**

¹⁰Díí, Timoteo, 'āā diiⁿ di nducuéⁿ'e tan'dúúca chi ch'icueéⁿ dii. Ní tan'dúúca chi 'úú canée n'daacā, 'tiicá ntúūⁿ cunee di n'daacā. Ní diiⁿ di tanducuéⁿ'e tan'dúúca chi 'úú dííⁿ nducuéⁿ'e cáávā chi i'teenu yú Ndyuūs. 'Tíicā diiⁿ di. Ní i'téenu di tan'dúúca chi 'úú i'teenú. Ní ya'ai i'inu di 'iiⁿyāⁿ ní dineⁿ'e di nducyaaca 'iiⁿyāⁿ. Ní cucheε di yeⁿ'e nducuéⁿ'e. Tan'dúúca chi dííⁿ 'tiicá ntúūⁿ diiⁿ di. ¹¹Ní deenu di tanducuéⁿ'e chi ch'eenú chií cáávā chi diiⁿ 'iiⁿyāⁿ nducú ní táacā chi ch'eenú na yáāⁿ Antioquíā ndúúcu yáāⁿ Iconio ndúúcu yáāⁿ Lистра. Ní chicheε tanducuéⁿ'e chi ch'eenú chií naati Señor Jesucristo yeⁿ'e yú ní nadanguáⁿ'ai yā 'úú yeⁿ'e nducuéⁿ'e chúū. ¹²'Tíicā ní cuaacu. Nducyaaca 'iiⁿyāⁿ chi neⁿ'é yā 'cuetinéé n'daacā vida yeⁿ'é yā cáávā Jesucristo ní caⁿ'á yā 'cuenú yā cuuvi. ¹³Naati 'ii'yā chi nguée n'daacā ní nginnche'éí yā 'iiⁿyāⁿ.

Dach'εεε cách'εεε cá dífⁿ yā. Ní nginnche'úi yā tanáⁿā 'iiⁿyāⁿ ní ndíí maáⁿ yā nginnche'úi yā 'iiⁿyāⁿ.

¹⁴Naati dii, Timoteo, canee n'daacā di yeⁿe chi ch'eeⁿ di caati cuaacu níⁿnyúⁿ chí deenu di chi cuaacu ní deenu di du'ú 'iiⁿyāⁿ s'eeⁿ chi chí'cueeⁿ di 'túúcā. ¹⁵Ndíí taachi 'lííⁿ dii chicadíínuuⁿ di yeⁿe nduudu yeⁿe Ndyuūs. Ní cáávā nduudu miiⁿ chí ca'cueeⁿ di cuuvi cadíínuuⁿ di táácā cuuvi ninguaⁿāi di cáávā chí i'téenu di Señor Jesucristo. ¹⁶Ní nducuéⁿe chí canée nguūⁿ na libro yeⁿe Ndyuūs cucáávā Espíritu N'dai yeⁿe Ndyuūs ní dichíí'vē chí ca'cueeⁿ yú 'iiⁿyāⁿ ní cuuvi yú 'iiⁿyāⁿ chēe chí nguéeⁿ n'daacā chí dííⁿ yā. Ní cuuvi yú 'iiⁿyāⁿ táácā chí cuuvi dín'daacá yā. Ní ca'cueeⁿ yú táácā chí 'iiⁿyāⁿ cuuvi 'cuēetinéⁿ n'daacā yā nanááⁿ Ndyuūs. ¹⁷Caati 'iiⁿyāⁿ chí yeⁿeⁿ Ndyuūs ní dichíí'vē yā Ndyuūs ní cuuvi dííⁿ yā nducuéⁿe ntiíⁿnyuⁿ chí n'daacā.

4 'Úú yaa'ví dii nanááⁿ Ndyuūs ní nanááⁿ Señor Jesucristo. 'Iiⁿyāⁿ miiⁿ caⁿá yā chí ndaa yā taama vmnéⁿēe tan'dúúca rey. Ní ndaa yā ní dííⁿ yā juzgar 'iiⁿyāⁿ chí sндуuchí ndúúcu 'iiⁿyāⁿ chí 'āā n'dii caatí ngaⁿa ntiíⁿnyúⁿ yā yeⁿe nducuéⁿe naachi ngaⁿa ntiíⁿnyúⁿ yā. ²Ní 'úú yaa'ví dii chí ngaⁿa di nduudu cuaacu yeⁿe Cristo nanááⁿ 'iiⁿyāⁿ. Ní caaⁿmaⁿ di nducuéⁿe tiempo chí cuuví diiⁿ di ní 'aara chí tiempo chí nguéeⁿ cuuvi diiⁿ di ní diiⁿ di. Caaⁿmaⁿ yuudu di caati 'iiⁿyāⁿ cuuvi cu'téenu yā. Ní caaⁿmaⁿ díí nanááⁿ 'iiⁿyāⁿ chí dinuuⁿndí yā chí 'āā ntée dinuuⁿndí yā 'tífca. Ní ca'a di consejo 'iiⁿyāⁿ, ní ca'cueeⁿ

di 'iiⁿyāⁿ. Ní diiⁿ di tanducuéⁿe ndúúcu n'dai, ní ca'cueeⁿ di nduú 'cuaaⁿ. ³'Tífca dííⁿ di caati ndaa tiempo chí 'iiⁿyāⁿ nguéeⁿ caandiveéⁿ yā nduudu chí n'dai. Naati caⁿá yā in'nuúⁿ yā n'dee n'dái maestros chí ca'cueeⁿ yā 'iiⁿyāⁿ tan'dúúca chí neⁿé yā 'caandiveéⁿ yā. Ní tan'dúúca vaanicadíínnūⁿ yeⁿe maáⁿ yā 'tífca neⁿe yā chí ca'cueeⁿ yā. ⁴Ní ndaacadaamí yā yeⁿe nduudu cuaacu ní nguéeⁿ caandiveéⁿ yā yeⁿe. Ní 'caandiveéⁿ yā cuentos chí nguéeⁿ n'daacā. ⁵Naati dii ní canee chí candée di cuidado yeⁿe tanducuéⁿe dendu'ú tanducuéⁿe tiempo. Ní cuchée di yeⁿe nducuéⁿe chí 'cueenu di cuuvi. Diiⁿ di ntiíⁿnyuⁿ yeⁿe Ndyuūs ní caaⁿmaⁿ di nduudu yeⁿe Ndyuūs chí diiⁿ chí nguaⁿāi 'iiⁿyāⁿ. Canée chí diiⁿ di cumplir ntiíⁿnyuⁿ chí Ndyuūs tee yā dii.

⁶'Úú deenú chí ca'a vida yeⁿe cáávā Cristo ní 'iiⁿyāⁿ caⁿá yā caaⁿnuⁿ yā 'úú. 'Āā canée ntiíⁿnyuⁿ nguuvi chí 'cuúví. ⁷Naati deenú chí dííⁿ ntiíⁿnyuⁿ yeⁿe tan'dúúca 'áamá soldado chí idiiⁿ sa caandaá n'daacā. 'Tífca dííⁿ. Ch'iínú ntiíⁿnyuⁿ yeⁿe ní 'áamá canee n'daacā ndúúcu chí i'teenú yeⁿe Ndyuūs. ⁸Cáávā chuū cunee ngiinú 'aama corona chí Señor Jesucristo chí juez chí diiⁿ nducuéⁿe chí cuaacu, caⁿá yā chí téé yā 'úú ndúúcu 'iiⁿyāⁿ chí yeⁿe yā, 'iiⁿyāⁿ s'eeⁿ chí n'daacā idííⁿ yā. 'Tífca cuuvi nguuvi chí Cristo ndaa yā taama vmnéⁿēe. Ní nguée téé yā corona dámaāⁿ 'úú naati ca'a yā corona nducyáácā 'iiⁿyāⁿ chí neⁿé yā Jesucristo ní cūnee ngiinú yā Jesucristo ní neⁿé yā chí ndaa Jesucristo taama vmnéⁿēe.

**Pablo ca'á yā instrucciones
ca'áamá cā'aama 'ii''yā'**

⁹Dii, Timoteo, dii' nún' yii'nu di chi chi' di n'diichi di 'úú. ¹⁰Sa'ā Demas mii' ní ndaacadaamí sá ye'e 'úú caati ne'e ca sa cosas chi véé i'nyee'dí 'cūū ní che'e sa yāā' Tesalónica. Sa'ā Cresente che'e sa yā'āa Galacia ní sa'ā Tito che'e sa yā'āa Dalmacia. ¹¹Dámaā' Lucas canee sa nduucú maa'. Ní yaa'vi di Marcos chi ca'na sa ndúúcu dii. Ní candēē di sá'ā ndúúcu di caati Marcos cuuvi cunnee ca sá 'úú na ntii'nyu' chi dí'. ¹²'Úú 'āā dicho'ó sa'ā Tíquico na yāā' Efeso. ¹³Ní taachi cuchii di, nandēē di cotón ye'é chi s'neé' na vaacu sa'ā Carpo na yāā' Troas. Nandēē di ntúū' libros ye'é ndúúcu caaca chi ne'e nii'nyú'.

¹⁴Sa'ā Alejandro chí 'viichi cūū ní néené n'deeé cosas chi nguéé n'daacā dii' sa nduucú. Ndyuūs ca'á yā nadí've yā sa'ā caavā tanducué'e chi nguēē n'daacā dii' sa nduucú. ¹⁵Cundēē di cuidado ye'e sa'ā mii' caati neenē taa' nga'a sa ye'e chi ngi'cuee' yú ti contra ye'e chi ngi'cuee' yú.

¹⁶Vmnáā' vmnaa' taachi 'úú che'é nanaa' juez mar 'áamá 'ii''yā' nguéé che'e yā nduucú naati nducyaaca 'ii''yā' diví yā ye'e 'úú. 'Úú ngiicá nanáá' Ndyuūs chi nadach'ēecú yā nuu'ndi ye'e 'iis'ti'. ¹⁷Naati Señor nginneé yā 'úú ní téé yā fuerzas 'úú cáávā chi 'úú ngii nga'á nduudu cuaacu ye'é yā nanáá' 'ii''yā' chi nguéé

ye'e ndaata 'ii''yā' Israel, nduudu chi dii' chi nngua'āi 'ii''yā'. Ní 'íicú nducué'e 'ii''yā' s'ee' cuuvi 'caandivee' yā nduudu cuaacu ye'e Ndyuūs. Ní 'tíicā Señor ye'e yú nadanguá'ai yā 'úú ye'e 'ii''yā' s'ee'. Ní chuū ní tan'dúúca chi ninguá'ai yā 'úú ye'e cheendi 'yáí'yāa' cuá'āa. 'Tíicā dí' yā nduucú. ¹⁸Níicú Señor Jesucristo ní nadangua'ai yā 'úú ye'e tanducué'e cosas chi nguēē n'daacā chi 'ii''yā' ne'é yā dii' yā nduucú. Ní Señor Jesucristo candēē yā cuidado ye'e vida ye'é chi cuuvi na'á na va'ai cheeti nguuvi naachi nga'a ntii'nyú' yā. Señor Jesucristo mii' ní dich'ēete yú 'ii''yā' cue'e daā'ma'. 'Tíicā.

**'Cuuiū carta ndúúcu saludos
ndúúcu vaadi n'dai ye'e Ndyuūs**

¹⁹Lado ye'é: N'dái yā nga'á, caa'ma' di ta'ā Prisca ndúúcu isa'ā tá chi Aquila ndúúcu 'ii''yā' ye'e familia ye'e sa'ā Onesíforo.

²⁰Sa'ā Erasto canee sá na yāā' Corinto. Ní sa'ā Trófimo chi ngiitā sa, 'úú s'neé' sa'ā na yāā' Mileto. ²¹Maa' ní dii' nún' yii'nu di cuchii dí n'diichi di 'úú taachi 'āā 'cuéé ndaa tiempo chi 'iiche. Sa'ā Eubulo ndúúcu sa'ā Pudente ndúúcu sa'ā Lino ndúúcu n'daataá Claudia ndúúcu nducyaaca vi' yú: N'dái ndís'tii nga'á yā.

²²Ne'é chi Señor Jesucristo ye'e yú canee yā ndúúcu dii hermano ye'é níicú Ndyuūs téé yā dii ye'e nducué'e chi n'dai ye'é yā. 'Tíicā cuuvi.

CARTA YEⁿE SAⁿĀ TITO

1 'Úú Pablo chi apóstol yeⁿé Señor Jesucristo ní dííⁿ ntiiⁿnyuⁿ yeⁿé Ndyuūs. Ndyuūs dichó'o yā 'úú chi cuuvi inneé 'iiⁿyāⁿ s'eeⁿ chi Ndyuūs nndεεve yā chi cuuvi yeⁿé yā 'iiⁿyāⁿ s'eeⁿ caati cu'teenu cá yā yeⁿe religiún yeⁿe yú. ²Ní cūnee ngiinú yā ndúúcū s'uuúⁿ chi Ndyuūs téé yā vida cueⁿe daāⁿmaⁿ s'uuúⁿ chi Ndyuūs caⁿa yā chi ca'a yā 'iiⁿyāⁿ chi yeⁿe yā vmnááⁿ vmnaaⁿ chi 'āā cuéé cūnee iⁿyeeⁿdí cūū. Ndyuūs miiⁿ ní nguée cuuvi caaⁿmaⁿ yā nduudu yaadi. ³Ní taachi ndaa tiempo chi neⁿe Ndyuūs, Ndyuūs ch'iⁿi yā nduudu cuaacu yeⁿé yā cucáávā 'iiⁿyāⁿ chi ngaⁿa nduudu cuaacu yeⁿé yā. Maaⁿ ní Ndyuūs yeⁿe yú chi nadanguáⁿai yā s'uuúⁿ dichó'o yā 'úú chi ngaⁿá nduudu cuaacu yeⁿé yā. ⁴Maaⁿ ní dinguúⁿ carta 'cūū yeⁿé dii, Tito. Ní cuaacu nííⁿnyúⁿ díí ní tan'dúúcā daiyá chi ngaⁿá nduudu cuaacu nanááⁿ dii, nduudu chi i'teenu yú. Neⁿé chi Ndyuūs chiida yú ndúúcū Señor Jesucristo yeⁿe yú chi nadanguáⁿai yā s'uuúⁿ itée yā dii nducuéⁿē chi n'dai taavi yeⁿé yā ní ya'ai i'inu yā dii. Ní tan'dúúcā chi ya'ai i'inú Ndyuūs 'iiⁿyāⁿ 'tiicá ntúūⁿ diiⁿ di. Ní Ndyuūs téé yā dii vaadi 'diifⁿ yeⁿé yā.

Ntiiⁿnyuⁿ yeⁿe Tito na yáⁿāa Creta

⁵Ní cáávā ntiiⁿnyuⁿ chi canee chi diiⁿ di 'úú chi'neéⁿ dii na isla Creta. Canéé chi dicuaacú di cosas chi nguεε n'daacā. Ní cu'neeⁿ dí 'iiⁿyāⁿ n'gεεte chi ngaⁿa ntiiⁿnyúⁿ yā yeⁿé nducuéⁿē yaācū na 'áámá 'áámá ciudad. 'Úú dicho'ó dii chi diiⁿ di ntiiⁿnyuⁿ 'cūū. ⁶Ní 'iiⁿyāⁿ chi ndεεve dí canee chi 'cuεetinée n'daaca yā manera chi nguée cuuvi caaⁿmaⁿ tanáⁿā 'iiⁿyāⁿ chi véé nuuⁿndi yeⁿé yā. Ní véé 'áámá nūuⁿ n'daataa yeⁿe yā. Ní daiyá yā canéé chí i'téenu yā Ndyuūs, ní nguée da'caiyāa chi travieso yā chi nguée n'daacā idiiⁿ yā, ní nguée da'caiyāa chí yaadí'yāa. ⁷Iiⁿyāⁿ chi dííⁿ yā ntiiⁿnyuⁿ yeⁿé Ndyuūs canee chi candeé yā cuidado yeⁿe ntiiⁿnyuⁿ yeⁿé Ndyuūs. Ní cáávā chuū 'iiⁿyāⁿ s'eeⁿ canee chi 'cuεetinée n'daaca yā. Nguée cuuvi 'iiⁿyāⁿ chi necio yā, ní nguée 'iiⁿyāⁿ chi nduuví taáⁿ yā, ndíí nguée ndúú 'iiⁿyāⁿ chi ngii cuu'ví yā va ní in'nuuⁿ yā vaadi 'caa'va. Ní nguée cuuvi 'iiⁿyāⁿ chi neⁿé yā diiⁿ yā ganar tuūmí cáávā ntiiⁿnyuⁿ chi dííⁿ yā chi nguée n'daacā. ⁸Naati 'tíicā canee chi dííⁿ yā. Canéé chi dííⁿ yā recibir na

vaacú yā 'ii'nyāⁿ chi canúúⁿ yúúni.
Canéé chi neⁿe yā chi din'daaca yā
ní n'daacā nadacadíínuuⁿ yā yeⁿe
nducuéⁿe chi caⁿ'á yā diiⁿ yā, ní diíⁿ
yā chiíⁿ chi cuaacu. Ní dēēve vida
yeⁿe yā, ní nguée canee chi taamá
yā ca'a yā consejo 'ii'nyāⁿ. ⁹Ní cundéé
n'daaca yā nduudu cuaacu yeⁿe
Ndyuūs chi ch'eeⁿ yā ní 'tíicā cuuvi
ca'cueéⁿ yā nduudu cuaacu miiⁿ.
Ní cuuvi diíⁿ yā cuchéé yā ndúúcu
'ii'nyāⁿ chi contra yeⁿe nduudu
cuaacu ní cuuvi ch'iⁿ'í yā 'ii'nyāⁿ s'eeⁿ
chi nduudu cuaacu miiⁿ ní cuaacu.

¹⁰Neene n'dái 'ii'nyāⁿ nguaaⁿ
'ii'nyāⁿ judíos s'eeⁿ nguée neⁿe yā
cu'téenu yā nduudu cuaacu miiⁿ.
'ii'nyāⁿ s'eeⁿ ngaⁿ'á yā cosas chi nguée
dichíí'vē ní nginnche'éei yā 'ii'nyāⁿ.
¹¹Canee chi diiⁿ yú chi 'ii'nyāⁿ s'eeⁿ
nguée cuuvi candē yā nduudu
yeⁿe yā caati ndástaⁿ'á yā vaadi
cadíínuuⁿ yeⁿe 'ii'nyāⁿ. Ní diíⁿ yā
chi nducyaaca 'ii'nyāⁿ yeⁿe 'áámá
va'ái yeⁿe táámá va'ái cu'téenu yā
nduudu yeⁿe yā. Ní ngí'cueéⁿ yā
cosas chi nguée n'daacā cucáávā chi
neⁿe yā diiⁿ yā ganar tuūmī manera
chi nguée n'daacā.

¹²Ní 'áámá saⁿ'ā yeⁿe isla Creta
chi profeta yeⁿe yāāⁿ miiⁿ ngaⁿ'a
sa 'túúca yeⁿe 'ii'nyāⁿ yeⁿe yāāⁿ
vaacú sa. Ngaⁿ'a sa chi 'ii'nyāⁿ yeⁿe
yāⁿ'āa Creta ní nééné yaadí yā, ní
nééné tááⁿ yā, ní nééné 'daandí
yā, ní nééné n'deē nge'e yā. ¹³Ní
saⁿ'ā miiⁿ ní ngaⁿ'a sa nduudu
cuaacu yeⁿe 'ii'nyāⁿ. Níicú cáávā
chuū canee chi yaa'vi dí 'ii'nyāⁿ s'eeⁿ
ndúúcu nduudu chēchi caati cuuvi
cu'téenu n'daacá yā nduudu cuaacu
miiⁿ. ¹⁴Ní nguée diíⁿ yā cuenta
yeⁿe nduudu yeⁿe 'ii'nyāⁿ judíos

chi nginnche'éei yā 'ii'nyāⁿ ndúúcu
nduudu chi maáⁿ yā nadacadíínuuⁿ
yā ní ngaⁿ'a yā. Ndíí nguée
n'giindiveéⁿ yā orden chi ngaⁿ'a
'ii'nyāⁿ s'eeⁿ chi ndaacadaamí yā
yeⁿe nduudu cuaacu yeⁿe Ndyuūs.

¹⁵Ní 'ii'nyāⁿ chi Ndyuūs didēēve
yā staava yeⁿe yā chí dēēve
nacadíínuuⁿ yā dámaāⁿ yeⁿe
dendu'ū chi dēēve ní sta'á yā
nducuéⁿe tan'dúúca chi dēēve. Naati
'ii'nyāⁿ chi nguée i'téenu yā Ndyuūs
nadacadíínuuⁿ yā yeⁿe cosas chi
nguée n'daacā. Ní mar 'áámá cosa ní
nguée dēēve yeⁿe 'ii'nyāⁿ miiⁿ. 'Tiicá
ntúūⁿ ní vaanicadíínuuⁿ yeⁿe yā ní
nguée dēēve. Ní nducuéⁿe chi véé
na staava yeⁿe yā ní nguée dēēve.
Ndíí nguée ndúú chi inadacadíínuuⁿ
yā chí dēēve. ¹⁶'ii'nyāⁿ s'eeⁿ ngaⁿ'a
yā chi n'diichí yā Ndyuūs naati
dendu'ū chi diíⁿ yā ch'iⁿ'i chi nguée
cuaacu. 'ii'nyāⁿ s'eeⁿ nguée neⁿe
yā 'ii'nyāⁿ ní nguée neⁿe yā diiⁿ yā
chi ngaⁿ'a 'ii'nyāⁿ. Nguée n'daacā yā.
Ní nguée dichíí'vē chi diíⁿ yā mar
'áámá cosa chi n'daacā.

Canéé chi ca'cueeⁿ di dendu'ū chi cuaacu

2 Díí, Tito, nducuéⁿe chi
caaⁿ'maⁿ di canee chi caaⁿ'maⁿ
di ndúúcu nduudu cuaacu yeⁿe
Ndyuūs. ²Yaa'vi di saⁿ'ā ndiicúú
chi ngaⁿ'a ntiíⁿnyuⁿ yeⁿe yaācū
naachi 'ii'nyāⁿ i'téenu yā Jesucristo
chi canéé chí serio yā. Ní canéé
chí nadacadíínuuⁿ yā n'dai ní nguée
diíⁿ yā dendu'ū chi nguē n'daacā.
Canéé chi cu'téenu yā dámaāⁿ
nduudu cuaacu yeⁿe Ndyuūs ní
dinéⁿe yā nducyaaca 'ii'nyāⁿ. Ní
canéé chi cuchéé yā yeⁿe nducuéⁿe

ndúúcū paciencia. ³Tiicá ntúūⁿ yaa'vi di n'daataa s'eeⁿ chi ngeⁿe yā na yaācū yeⁿé 'iiⁿyā chí i'téenu yā Jesucristo chí 'cuēetinéé n'daaca yā tan'dúúcā 'iiⁿyāⁿ dēēve chí yeⁿé Ndyuūs. Nguéé caaⁿmáⁿ yā yeⁿē mar 'áámá 'iiⁿyāⁿ chí nduudu yaadi ní nguéé cuu'ví yā va. Ní canee chí diiⁿ n'daacā yā caati tanáⁿā 'iiⁿyāⁿ cuuvi cuta'á yā ejemplo yeⁿē n'daataa s'eeⁿ. ⁴Ní 'íicú cuuvi ca'cueéⁿ yā tanáⁿā n'daataa da'cáiyā tan'dúúcā chí canéé chí dinéⁿe yā isaⁿā yeⁿé yā ní dinéⁿe ntúūⁿ yā daiya yā. ⁵Ní n'daataa s'eeⁿ cuuvi nadacádíinuⁿ yā chēe chí n'daācā ní diiⁿ yā chuū. Ní diiⁿ yā nducuéⁿē chí neⁿe Ndyuūs. Ní din'dai cá yā na vaacú yā ní n'giindiveéⁿ yā isaⁿā yeⁿe yā. 'Tíicā ní mar 'áámá 'iiⁿyāⁿ nguéé cuuvi cunn'cā caaⁿmaⁿ yā yeⁿē nduudu yeⁿé Ndyuūs.

⁶Tiicá ntúūⁿ yaa'vi di saⁿā n'gaiyā chí nadacádíinuⁿ yā n'daacā vmnaaⁿ chí diiⁿ yā dē'ē vēē. ⁷Ní díí, Tito, diiⁿ di n'daacā nducuéⁿē chí diiⁿ di ní 'íicú 'iiⁿyāⁿ cuuvi cuta'á yā vida yeⁿē di tan'dúúcā 'áámá ejemplo. Ní taachi ca'cueeⁿ di 'iiⁿyāⁿ, diiⁿ di ndúúcū núúⁿmáⁿ staava yeⁿē di ní canee di serio di. ⁸Ní ca'cueeⁿ di ndúúcū nduudu chí n'daacā ní 'iicu mar 'áámá 'iiⁿyāⁿ nguéé cuuvi caaⁿmáⁿ yā dē'ē vēē yeⁿe chí ngaⁿa di. Ní 'iiⁿyāⁿ chí contra yeⁿē di cuuvi 'cuinaáⁿ yā caati nguéé cuuvi caaⁿmáⁿ yā mar 'áámá contra yeⁿē di.

⁹Ní yaa'vi dí 'iiⁿyāⁿ chí 'áámá canee chí diiⁿ yā ntiiⁿnyuⁿ, canéé chí n'giindiveéⁿ yā nducuéⁿē yeⁿē

'iiví yā. Ní cunee yiinú yā yeⁿe nducuéⁿē yeⁿē 'iiví yā. Ní nguéé canee chí nguēcútaⁿá yā yeⁿe 'iivi yā. ¹⁰Ní nguéé canéé chí diduucú yā yeⁿē 'iivi yā naati canee chí diiⁿ n'daacā yā ndúúcū 'iivi yā ní ch'iⁿí yā chí dámaāⁿ diiⁿ yā cosas chí n'daacā cáávā 'iivi yā. Ní 'íicú ndúúcū nducuéⁿē chí diiⁿ yā cuuvi ch'iⁿí yā 'iivi yā ní 'iiví yā cuuvi caaⁿmaⁿ n'daacā yā yeⁿe nduudu cuaacu yeⁿé Ndyuūs chí nanguaⁿāi yú.

¹¹Ndyuūs ch'iⁿí yā chí díneⁿe yā nducyaaca 'iiⁿyāⁿ. Ní ch'iⁿí yā vaadi n'dai taavi yeⁿé yā caati cuuvi nadanguáⁿai yā nducyaaca 'iiⁿyāⁿ. ¹²Níicú vaadi n'dai taavi yeⁿé Ndyuūs ngi'cueeⁿ s'uúúⁿ chí canee chí divíi yú yeⁿe nducuéⁿē chí nguē n'daacā ndúúcū nducuéⁿē vicio chí véé iⁿyeedíⁿ 'cūū chí neⁿe yú diiⁿ yú. Ní canee chí nadacadiinuⁿ yú n'daacā yeⁿe nducuéⁿē vmnááⁿ chí diiⁿ yú. Ní 'cuēetinéé n'daaca yú ní diiⁿ yú tanducuéⁿē chí neⁿe Ndyuūs 'naaⁿ chí canee yú iⁿyeedíⁿ 'cūū. ¹³Ní vaadi n'dai taavi yeⁿé Ndyuūs ngi'cueeⁿ s'uúúⁿ chí 'cuēetinéé n'giiⁿnu yú nguuví ch'ēete taachi Cristo diiⁿ yā cumplir nduudu chí ngaⁿa yā. Ní taama vmnéⁿē ndaa ntúūⁿ Jesucristo yeⁿe yú chí Ndyuūs chí ch'ēete taavi ca chí nadanguáⁿai yā s'uúúⁿ. ¹⁴Ní ca'á yā vida yeⁿe maáⁿ yā chí ch'iⁿí yā cáávā s'uúúⁿ chí nadanguáⁿai yā s'uúúⁿ yeⁿe nducuéⁿē nuuⁿndi yeⁿē yú. Ní nadidēēvé yā s'uúúⁿ yeⁿe nducuéⁿē nuuⁿndi chí diiⁿ yú chí cuuvi yeⁿé yā s'uúúⁿ. Ní 'íicú 'áámá cunee yú diiⁿ yú ntiiⁿnyuⁿ chí n'daacā.

¹⁵Nducuéⁿē chuū ní canee chi ca'cueeⁿ di. Ní ca'a di orden ti dii tan'dúúcā 'iⁿntyéⁿē dii. Cunnee di 'iⁿyāⁿ chi dí'vaachí yā. Ca'a di consejo 'iⁿyāⁿ chi nguεε n'daacā idiiⁿ yā. Din'daacá di yeⁿe nducuéⁿē caati mar 'áámá 'iⁿyāⁿ cuuvi cunnkáā caaⁿmán yā yeⁿē di.

Yeⁿe chi canéé chi diiⁿ 'iⁿyāⁿ chi i'téenu yā Señor Jesucristo yeⁿe yú

3 Cúuví dí 'iⁿyāⁿ chi i'téenu yā Señor Jesucristo chi n'gaacu yā chí canéé maaⁿ poder yeⁿe gobernador ndúúcū tanáⁿā 'iⁿntyéⁿē ní canee chi n'giindiveéⁿ yā yeⁿe yā. Ní 'āā vεε yaáⁿ yā chi dííⁿ yā nducuéⁿē ntiíⁿnyuⁿ chi n'daacā. ²Ní nguéé canéé chi caaⁿmaⁿ taaⁿ yā yeⁿe mar 'áámá 'iⁿyāⁿ. 'Tíicā canee chi 'cuεetinéé 'dííⁿ yā ndúúcū 'iⁿyāⁿ ní din'dai yā ndúúcu yā. Ní canéé chí ch'iⁿi yā tanáⁿā 'iⁿyāⁿ ndúúcū tanducuéⁿē chi dííⁿ yā ndúúcu yā chi maaⁿ yā ndiicuuⁿ yā.

³Tiicá ntúūⁿ s'uuúⁿ tiempo chi chó'oo taachi tonto yú ní nguéé n'giindiveeⁿ yú nduudu yeⁿé Ndyuūs ní nguéé n'daacā idiiⁿ yú. Ní canee yú tan'dúúcā saⁿa esclavo caati yeⁿe chi neⁿe cuerpo yeⁿe yú ní diiⁿ yú ndúúcū nducuéⁿē vicio yeⁿe chi véé, 'tíicā diiⁿ yú. Ní diiⁿ taáⁿ yú, ní neⁿe ca yú cosas tan'dúúcā chi véé yeⁿē tanáⁿā 'iⁿyāⁿ. Ní nguéé neⁿe yú 'iⁿyāⁿ. Ndíí nguéé ndúú neⁿé yā s'uuúⁿ. Ní nguéé neⁿe yú 'aama yú taama yú. ⁴Naati taachi Cristo chi n'dai taaví yā ní neⁿé yā nducyaaca 'iⁿyāⁿ ndaa yā nanáaⁿ yú, Cristo chi nadanguáⁿai yā s'uuúⁿ, ⁵tuu'mi

ní nadanguáⁿai yā s'uuúⁿ. Nguéé nadanguáⁿai yā s'uuúⁿ cáávā chi diiⁿ yú cosas chi n'daacā naati caati ya'āi 'iinú yā s'uuúⁿ ní nadanguáⁿai yā s'uuúⁿ caavā chi naaⁿnú yā s'uuúⁿ. Ní chuū neⁿe caaⁿmaⁿ chi ch'iindiyaaⁿ yú ndúúcū vida ngai cucáávā Espíritu N'dai yeⁿé Ndyuūs. Ní Espíritu miiⁿ tee yā s'uuúⁿ 'áámá vida chí ngāi. ⁶Ní 'tíicā cuuvi cucáávā Señor Jesucristo yeⁿe yú chi nadanguáⁿai yā s'uuúⁿ, Ndyuūs tee yā núúⁿmáⁿ ch'εεte Espíritu N'dai yeⁿe yā s'uuúⁿ. ⁷Ní cucáávā Ndyuūs ca'á yā nducuéⁿē chi n'dai yeⁿé yā, dííⁿ yā chi s'uuúⁿ nguεε 'iⁿyāⁿ nuuⁿndi yú nanáaⁿ yā ti didεεvé yā s'uuúⁿ. Ní maaⁿ ní diiⁿ yā aceptar s'uuúⁿ ní caⁿá yā chi tée yā s'uuúⁿ vida cueⁿe daāⁿmaⁿ chi cuuvi yeⁿe yú. Ní cunee ngiiⁿnuⁿ yú vida 'cūū chi cuuvi yeⁿe yú.

⁸Nduudú 'cūū chi ngaⁿá ní nduudu cuaacu ní 'áámá cūnee. Neⁿé chi diitū cunee di ndúúcū nduudu 'cūū ní diitu caaⁿmaⁿ di va. Ní 'íicú nduudú 'cūū cūnnee 'iⁿyāⁿ chi i'téenu yā Ndyuūs, ní 'iⁿyāⁿ s'eeⁿ caⁿá yā diiⁿ yā ntiíⁿnyuⁿ chí n'daacā. Nduudú 'cūū ní n'daacā ní dichíí'vε 'iⁿyāⁿ. ⁹Nguéé cu'neeⁿveeⁿ di nduudu chi nguéé dichíí'vε chi n'dee n'dái chi n'guεεcútaⁿā 'iⁿyāⁿ. Ní nguéé cu'neeⁿveeⁿ ca di nduudu chi canéé nguūⁿ yeⁿe 'iⁿyāⁿ yeⁿe ndaata yeⁿe di. Ndíí nguéé ndúú cu'neeⁿveeⁿ di yeⁿe 'iⁿyāⁿ chi nguúⁿ yā yeⁿē nduudu yeⁿe ley. Nduudú 'cūū nguéé dε'ε vεε ní nguéé dichíí'vε. Naati cu'neeⁿveeⁿ cá di nduudu cuaacu yeⁿé Ndyuūs.

¹⁰Nduuti chi 'áámá 'iⁿyāⁿ dííⁿ yā chi véé divisiones nguaaⁿ 'iⁿyāⁿ

yeⁿe yaācū yeⁿe 'iiⁿyāⁿ chi i'téenu
yā Cristo, yaa'vi di 'iiⁿyāⁿ miiⁿ
'áamá cuuvi o 'uūvi cuuvi. Ní ndúúti
chi nguéeⁿ n'giindiveéⁿ yā yeⁿe di
tuuⁿmi ní tun'dáa di 'iiⁿyāⁿ miiⁿ
yeⁿe yaācū. ¹¹Deenu di chi 'iiⁿyāⁿ
miiⁿ nguéeⁿ n'daacā vaanicadíínūⁿ
yeⁿe yā ní dinuuⁿndí yā. Ní
nuuⁿndí chi dííⁿ yā ní caaⁿ'maⁿ chi
condenado yā.

**Pablo ca'cueéⁿ yā Tito yeⁿe
chi canee chi dííⁿ yā**

¹²Taachi dicho'ó hermano
Artemas o hermano Tíquico
nanááⁿ di, diiⁿ di chi diiⁿnúúⁿ
yiiⁿnu di chií di naachi caneeⁿ
na yáāⁿ Nicópolis caati neⁿ'é
cūneeⁿ yáāⁿ miiⁿ tiempo chi 'iiche.
¹³Cunnee di Zenas chi abogado
ndúúcū Apolos chi caⁿ'á yā na

yúúní. Ní ca'a di 'iiⁿyāⁿ s'uuⁿ
nducuéⁿe necesidades yeⁿ'é yā
cáāvā viaje yeⁿ'é yā caati nguéeⁿ
diiⁿ yā falta mar 'áamá. ¹⁴Ní
yaa'vi di hermanos yeⁿe yú chi
i'téenu yā Jesucristo chí 'cueeⁿ yā
taacā chi canee chi din'daacā yā
nducuéⁿe tiempo ní cunneeⁿ yā
'iiⁿyāⁿ chi véé necesidades yeⁿe yā
caati 'tíicā dichíí'vē vida yeⁿe yā.

**'Cuiinū carta ndúúcū saludos
ndúúcū vaadi n'dai yeⁿ'é Ndyuūs**

¹⁵Nducyaaca hermanos chi snée
yā nduucú: N'dai dii, ngāⁿ'a yā. Ní
díí ngāⁿ'a di: N'dai yā, nducyaaca
'iiⁿyāⁿ chi i'téenu yā Ndyuūs,
hermanos chi dineⁿ'e yú 'iiⁿyāⁿ.
Neⁿ'é chi Ndyuūs téé yā ndís'tiī
nducuéⁿe chi n'dai taavi yeⁿ'é yā.
'Tíicā cuuvi.

CARTA YEⁿE SAⁿĀ FILEMÓN

¹Úú Pablo, saⁿā chi canuúⁿ vácū cāá vā chi díⁿ ntiⁿnyuⁿ yeⁿē Jesucristo. 'Úú ndúú cū hermano Timoteo idingúⁿ 'nū carta 'cū yeⁿē dii Filemón chi néé né neⁿe 'nū dii compañero yeⁿe yú v'í chi dáámá idiⁿ yú ntiⁿnyuⁿ ndúú cū v'í. ²Ní idingúⁿ yeⁿe 'iiⁿyāⁿ chi yeⁿe yaā cū chi nduuvidaamá yā ná vaacu di ní yeⁿē hermana Apia ní yeⁿē hermano Arquipo chi diiⁿ sa luchar nduucú 'nū na ntiⁿnyuⁿ chi diiⁿ 'nū. ³Neⁿé chi Ndyuūs chiida yú ndúú cū Señor Jesucristo téé yā ndís'ti nducuéⁿē dendu'u chi n'dai taavi yeⁿé yā ndúú cū vaadi 'diiⁿ.

Filemón dinéⁿe yā 'iiⁿyāⁿ ni i'téenu yā Ndyuūs

⁴Cueⁿe daāⁿmaⁿ 'úú ca'á gracias Ndyuūs taachi n'gaacú yeⁿe di 'naaⁿ chi ngaⁿāngua'á. ⁵Caati hermanos yeⁿe yú ngaⁿa yā yeⁿe di tan'dúú cā chi neⁿe di Señor Jesucristo yeⁿe yú ndúú cū nducyaaca 'iiⁿyāⁿ chi yeⁿé Jesucristo, ní tan'dúú cā chi i'téenu di Señor Jesucristo. ⁶'Úú ngiicá Ndyuūs caava 'iiⁿyāⁿ chi i'téenu yā caati candee di nduudu cuaacu yeⁿé Jesucristo nanáaⁿ yā. Ní ngiicá chi cuuvi tuumicadínuuⁿ yā yeⁿe tanducuéⁿē chi n'daacā chi

Jesucristo itée yā s'uuúⁿ. ⁷Ní 'úú yeenu taavi ní véé 'viich'etínūⁿ yeⁿé caati dinéⁿe di nducyaaca 'iiⁿyāⁿ. Ní ca'a di consuelo 'iiⁿyāⁿ chi i'téenu yā Ndyuūs.

Pablo ngiicá yā 'áamá favor caavā esclavo Onésimo

⁸'Áará chí cuuví dicho'ó orden yeⁿē di caati 'úú apóstol 'úú chí candee nduudu yeⁿé Ndyuūs, ⁹naati neⁿé di'cuiitú dii cucáá vā chi neⁿe yú Cristo. 'Úú Pablo 'āā ndiicú maaⁿ ní canuúⁿ vácū cucáá vā chi díⁿ ntiⁿnyuⁿ yeⁿe Cristo. ¹⁰Ní ngiicá 'áamá favor caavā Onésimo chi tan'dúú cā daiyá cucáá vā chi i'téenu sa nduudu cuaacu yeⁿé Ndyuūs chi 'úú ngaⁿā taachi canuúⁿ vácū.

¹¹Tiempo chi chó'oo sáⁿa 'cū 'áamá esclavo yeⁿē di. Ní chéenu sa yeⁿē di. Ní nguée de'ē vee dichí'vē sa dii naati maaⁿ ní dichí'vē sa dii tan'dúú cā chi dichí'vē sa 'úú. ¹²'Úú dicho'ó sáⁿa 'cū nanááⁿ dii. Dii ní 'cuáaⁿ di sáⁿa 'cū tan'dúú cā chi maáⁿ 'úú. ¹³'Úú neⁿé chi cunee sa nduucú caati cuuvi sa dichí'vē sa 'úú lado yeⁿē di neⁿe chi canuúⁿ vácū cucáá vā chi idiⁿ ntiⁿnyuⁿ yeⁿé Ndyuūs. ¹⁴Naati nguée de'ē vee

neⁿé chi a fuerza canee chi diiⁿ di nduuti chi nguée neⁿe di. Naati neⁿé chi dii cunee yiinū di. Neⁿé chi diiⁿ di 'áamá favor nduucú, nguée 'aama cosa chi di'cuuitú dii naati cosa chí maaⁿ di neⁿe di diiⁿ di. ¹⁵Nééné dīvīi sa yeⁿe di 'áamá tiempo nūuⁿ caati cuuvi cuta'a di saⁿá 'cūū chi dichíí'vē sa dii cueⁿe daāⁿmaⁿ. ¹⁶Naati maaⁿ ní nguée cuta'a di saⁿá 'cūū tan'dúúcā esclavo chi 'áamá cānee sa dichíí'vē sa dii naati tan'dúúcā chi 'aama saⁿā n'daacā ca, nguée ti 'aama esclavo caati maaⁿ ní Onésimo 'cūū 'áamá hermano yeⁿe yú chi neené neⁿé 'nū. 'Úú neⁿé taavi hermano Onésimo naati dii canee chi dinéⁿe taavi ca di saⁿā. Nguée dámaāⁿ chi saⁿā esclavo naati chi hermano yeⁿe yú ti saⁿā miiⁿ ntūūⁿ ní yeⁿe Señor Jesucristo yeⁿe yú.

¹⁷Maaⁿ ní nduuti chi dii sta'a di 'úú chi compañero yeⁿe di tuu'mi ní 'cuuaⁿ di Onésimo tan'dúúcā chi 'úú nūuⁿ. ¹⁸Ní nduuti chi vee chi nguēe n'daacā idiiⁿ sa ndúúcu di o nduuti chi can'díícu sa yeⁿe di tuu'mi ní cu'neeⁿ dí cuenta yeⁿē 'úú. ¹⁹'Úú maáⁿ idinguúⁿ carta yeⁿe di ndúúcū ta'á ní ndúúcū letra yeⁿé. 'Úú nadii'vē yeⁿē di. Nguée canee chi 'cuuví dii ti maaⁿ vida yeⁿē di can'diicu di yeⁿé

cáávā chi caⁿá nduudu cuaacu yeⁿē di. ²⁰Maaⁿ ní dii Filemón, di'cuíítu ca dii chi diiⁿ di favor 'cūū nduucú chi 'cuuaⁿ di Onésimo caati s'uuúⁿ hermanos yeⁿe yú vi'í cucáávā chi i'téenu yú Señor Jesucristo. Tée di 'viich'etínūuⁿ na staava yeⁿé tan'dúúcā hermano yeⁿe yú vi'í chi yeⁿe Cristo.

²¹Maaⁿ ní idinguúⁿ yeⁿē di ti seguro cānee chi n'giindiveeⁿ di nduudu yeⁿé. 'Úú ní deenú chi idiiⁿ di ní n'daacā ca idiiⁿ di nguée ti chi ngiicá dii. ²²Ní taachi 'úú ndaá cu'neeⁿ yaaⁿ di 'aama cuarto yeⁿé. Cunee ngiinú chi Ndyuūs caⁿá yā dííⁿ yā chiiⁿ chi ngaⁿ'angua'á ní cáávā 'úú ní Ndyuūs neⁿe yā chi chíí ní n'diichí ndís'tií.

**'Cuiinū carta ndúúcū saludos
ndúúcū vaadī n'dai yeⁿe Jesucristo**

²³Saⁿā Epafras chi yeⁿe Jesucristo ní compañero yeⁿé ní canee sa vácūū nduucú: N'dai di, ngaⁿ'a sa. ²⁴Tiicá ntūūⁿ hermanos Marcos ndúúcū Aristarco ndúúcū Demas ndúúcū Lucas, hermanos chi dííⁿ yā dáámá ntiiⁿnyuⁿ nduucú: N'dai di, ngaⁿ'á yā.

²⁵Neⁿé chi Señor Jesucristo yeⁿe yú tée yā vaadī n'dai yeⁿé yā nducyaaca ndís'tií. 'Tíicā cuuvi.

CARTA YEⁿE 'IIⁿ'YĀⁿ HEBREOS

Ndyuūs dichó'o yā daiyá yā chi
caaⁿ máⁿ yā lado yeⁿé yā

1 Tiempo chi 'āā chó'ōo, Ndyuūs
caⁿ'a yā n'deee cūūví tiempo
ndúúcu neenē n'deee nááⁿ taachi
profetas chi candéé yā nduudu yeⁿe
Ndyuūs ngaⁿ'á yā lado yeⁿé yā. ²Ní
maaⁿ ní tiempo 'cūū Ndyuūs dichó'o
yā daiyá yā Jesucristo chi ngaⁿ'á yā
ndúúcu s'uuúⁿ. Ní Ndyuūs ndúúcu
daiyá yā din'dái yā tanducuéⁿē chi
véé ní Ndyuūs caⁿ'á yā tanducuéⁿē
chi yeⁿē daiyá yā. ³Ní daiyá
Dendyuūs miiⁿ ní ngíí n'gai yā yeⁿē
chidéevé n'dai yeⁿé Ndyuūs. Ní
tan'dúúca Ndyuūs miiⁿ 'āā 'tiicá
nūuⁿ daiyá yā. Daiyá yā ní ndúúcu
nduudu chi ngaⁿ'a yā, dííⁿ yā chi
tanducuéⁿē dendu'ū snéé na lugar
yeⁿē. Ní cuayiivi chi daiyá yā dííⁿ yā
chi nadach'ecú yā yeⁿe 'iiⁿ'yāⁿ yeⁿe
nuuⁿndi yeⁿé yā tuu'mi ní ch'iindí
yā ná va'ai chéeti nguuví na lado
tá cuaacú chiidá yā chi lado yeⁿe
honor. Ndyuūs miiⁿ ní poder chi
ch'ēete ca yeⁿē tanducuéⁿē poder.

**Daiya Ndyuūs ní ch'ēete
ca nguéé ti ángeles**

⁴Ní daiya Dendyuūs ní neenē
ch'ēete ca nguéé ti ángeles. Ní chi

duuchí yā ndúúcu chi véé yeⁿé
yā ní neenē ch'ēete ca nguéé ti
ángeles. ⁵Caati mar 'áámá vmnéⁿēe
nguéé caⁿ'a Ndyuūs ndúúcu mar
'áámá ángel tan'dúúca chi ngaⁿ'a yā
ndúúcu daiyá yā Jesucristo:

Díí ní daiyá; maaⁿ caⁿ'á vida
yeⁿé nī.

Ní nguéé caⁿ'a yā ndúúcu mar 'áámá
ángel 'tíicā:

'Úú ní chiida di 'úú; niicu díí ní
daiyá dii. ⁶Ní taachi Ndyuūs
dichó'o yā 'áámá n'dyaⁿ'ā
daiyá yā iⁿ'yeeⁿdí 'cūū ngaⁿ'a
yā 'tíicā:

Nducyaaca ángeles yeⁿé Ndyuūs
canéé chi dich'ēetē yā daiya
Ndyuūs. ⁷Ní Ndyuūs ngaⁿ'a yā
yeⁿe ángeles yeⁿe yā 'tíicā:

'Úú dííⁿ chi ángeles yeⁿé ní
tan'dúúca espíritu s'eeⁿ, 'tiicá
yā. Ní dííⁿ chi ángeles dichííⁿve
yā 'úú. Ní tan'dúúca 'áámá
nguuchi yaⁿ'ā 'tíicā ángeles
yeⁿé. ⁸Naati Ndyuūs ngaⁿ'á yā
yeⁿe daiya yā Jesucristo 'tíicā:

Dii Ndyuūs, trono yeⁿe di
ní 'áámá cūnee. Ní ngaⁿ'a
ntiiⁿnyuⁿ di yeⁿē tanducuéⁿē
ndúúcu vaadi cuaacu.

⁹Dii ní neⁿe di cosas chi cuaacu, ní
nguéé neⁿe di chēe chi nguéé

cuaacu. Cucáávā chuū Ndyuūs
yeⁿe di chi chiida di ní tee yā dii
vaadi yeenu taavi nguée ti ca'a
yā 'iiⁿ'yāⁿ chi yeⁿ'é nī. ¹⁰Tiicá
ntúūⁿ Ndyuūs ngaⁿ'a yā yeⁿ'é
daiyā yā Jesucristo:

Díí, Señor, ndii cuááⁿ vmnaaⁿ
s'núuⁿ di cimientu yeⁿ'e
iⁿ'yeeⁿdí 'cūū, ní din'dái di
nanguuvi ndúúcū ta'a di.

¹¹Iⁿ'yeeⁿdi ndúúcū nánguuví ní
dí'cuinu naati díí 'áámá
cūnee di. Ní tanducuéⁿ'ē
chuū cuuvi ndiicūū tan'dúúcā
catecai yú, 'tíicā ndiicūū.

¹²Ní dííⁿ nī n'cánnduu nī nducuéⁿ'ē
tan'dúúcā 'iiⁿ'yāⁿ dííⁿ yā chí
n'cánnduu yā catecaí yā. Ní
n'daaⁿ di nducuéⁿ'ē tan'dúúcā
'iiⁿ'yāⁿ n'daaⁿ yā catecaí yā. Naati
dii Jesucristo daiyā Ndyuūs 'āā
daamá nūuⁿ canee di nduuyu
nduuyu. Ní 'áámá cūnee di
cueⁿ'e daāⁿmaⁿ. ¹³Ndyuūs nguée
caⁿ'á yā mar 'áámá ángel mar
'áámá vmnéⁿ'ē tan'dúúcā chi
ngii yā daiyā yā Jesucristo 'tíicā:

'Cuūndi di lado ta cuaācū ndíí
'úú dííⁿ chi nducyaacá yā chi
taáⁿ yā yeⁿ'ē di canée yā maaⁿ
ca'a di tan'dúúcā 'áámá banco
'líí 'tíica yā chí chéé dí yeⁿ'é yā.

¹⁴Nducyaacá ángeles ní espíritu
s'eeⁿ chi dííⁿ yā ntiiⁿnyuⁿ yeⁿ'é
Ndyuūs. Ní Ndyuūs dich'óo
yā ángeles chí inne yā 'iiⁿ'yāⁿ
na iⁿ'yeeⁿdí 'cūū chi Ndyuūs
nadinguáⁿ'ai yā.

**Canée chí dííⁿ yú cuidado yeⁿ'e chí
Ndyuūs nadanguáⁿ'ai yā s'uuúⁿ**

2 Ní cucáávā chí Cristo
nadanguáⁿ'ai yā s'uuúⁿ canée

chí candee yú cuidado yeⁿ'é nduudu
cuaacu chí n'giindiveeⁿ yú ti nguée
i'neeⁿ yú cucáávā nduudu chí n'daaⁿ
ní maaⁿ ní nguée caⁿ'a yú táamá
yúúní. ²Nduudu cuaacu chí 'āā
ngaⁿ'a ángeles ní nduudu chí ch'iⁿ'i
nanááⁿ 'iiⁿ'yāⁿ chí cuaacu níⁿ'nyúⁿ
chí nduudu cuaacu. Ní 'iiⁿ'yāⁿ chí
nguée n'giindiveeⁿ yā nduudu
cuaacu miiⁿ ní véé nuuⁿndi yeⁿ'é yā
'āā cūnee yā na castigo caati 'tíicā
cuuvi. ³Ní maaⁿ ní 'táácā cuuví
nanguaⁿ'āi s'uuúⁿ yeⁿ'e castigo
nduuti chí nguée dííⁿ yú cuidado
yeⁿ'ē chí nadanguáⁿ'ai yā s'uuúⁿ?
Vmnááⁿ vmnaaⁿ Señor Jesucristo
ngaⁿ'á yā chí nadanguáⁿ'ai yā
'iiⁿ'yāⁿ. Cuayiivi miiⁿ ní 'iiⁿ'yāⁿ chí
ch'iindiveeⁿ yā nduudu miiⁿ dííⁿ yā
ch'iⁿ'í yā s'uuúⁿ ndúúcū pruebas
chí nduudu miiⁿ ní nduudu cuaacu.
⁴Tiicá ntúūⁿ tiempo maaⁿ Ndyuūs
ch'iⁿ'í yā s'uuúⁿ chí cuaacu chí
nduudu miiⁿ ní cuaacu caati dííⁿ
yā señas ndúúcū vaadi n'giinu chí
ch'εεε. Ní ch'iⁿ'í yā poder yeⁿ'é
yā ní dííⁿ yā milagros. Ní ca'a yā
n'dee n'dái ntiiⁿnyuⁿ yeⁿ'é Espíritu
N'dai yeⁿ'é yā 'iiⁿ'yāⁿ chí yeⁿ'e yā
caati 'tíicā neⁿ'é yā dííⁿ yā.

**Jesucristo ch'iindiyáaⁿ yā tan'dúúcā
'áámá saⁿ'ā yeⁿ'e iⁿ'yeeⁿdí**

⁵Ndyuūs nguée cuuvi s'neéⁿ yā
chí ángeles miiⁿ ngaⁿ'á yā ntiiⁿnyuⁿ
yeⁿ'e iⁿ'yeeⁿdí chí cuayiivi caⁿ'á yā
din'dái yā. Ní yeⁿ'e iⁿ'yeeⁿdí miiⁿ
chífⁿ chí ngaⁿ'a yú. ⁶Nguée dííⁿ yā
'tíicā. Ná libro yeⁿ'e Ndyuūs chí
canée nguūⁿ ní 'áámá yā ngaⁿ'a yā
'tíicā:

N'dii, Ndyuūs, 'd'é'ē chí saⁿ'ā
s'eeⁿ chí snéⁿ na iⁿ'yeeⁿdí 'cūū

chi nan'gaacu nī ye^{n'}ē sa?
¿Dé'ē chi sa^{n'}ā s'eeⁿ chi snéē
na i^{n'}yeeⁿdí cūū chi díⁿ nī
cuidado ye^{n'}e sa^{n'}ā s'eeⁿ?

⁷ Ta 'líⁿ tiempo nūuⁿ n'dii,
Ndyuūs, s'néēⁿ nī sa^{n'}ā Daiyá
nī chi nguéeⁿ ch'ēete cá yā
tan'dúúca ángeles. Ní teé
nī sa^{n'}ā daiyá nī chi ch'ēeté
yā ndúúcu honra ye^{n'}é yā
tan'dúúca chi sa^{n'}ā rey 'tíica
yā. Ní chi'néeⁿ nī sa^{n'}a miⁿ
chi caa^{n'}maⁿ ntiiⁿnyuⁿ yā ye^{n'}e
tanducué^{n'}ē chi nadin'dái nī.

⁸ Ní s'néēⁿ nī tanducué^{n'}ē dendu'ū
maaⁿ ta'á yā.

Ní 'tíica rā va ti Ndyuūs s'néēⁿ yā
tanducué^{n'}ē dendu'ū chi sa^{n'}ā miⁿ
caa^{n'}máⁿ yā ntiiⁿnyuⁿ ye^{n'}ē. Maaⁿ ní
nguéeⁿ inaaⁿ yú chi sa^{n'}ā miⁿ nga^{n'}a
ntiiⁿnyúⁿ yā ye^{n'}e tanducué^{n'}ē.

⁹ Naati maaⁿ ní snaaⁿ yú chi Ndyuūs
díⁿ yā chi Jesucristo nguéeⁿ ch'ēeté
yā tan'dúúca ángeles dúú'ví tiempo
nūuⁿ. Ní Ndyuūs neene ya'ai i'inú yā
'iiⁿyāⁿ ye^{n'}e i^{n'}yeeⁿdí cūū chi ne^{n'}é
yā chi Jesucristo ch'iⁱ yā lugar ye^{n'}e
nducyaaca yú. Maaⁿ ní véé dēevé
ye^{n'}e Jesucristo ní véé honra ye^{n'}é
yā cucáávā chí ch'iⁱ yā na cruz.

¹⁰ Ní Ndyuūs din'dái yā
tanducué^{n'}ē dendu'ū ní díⁿ yā
cuidado ye^{n'}ē. Ní n'daacā diiⁿ
Ndyuūs taachi diiⁿ chi Jesucristo
miiⁿ ní sa^{n'}ā perfecto yā chí chichéeⁿ
yā ye^{n'}e nducué^{n'}ē chi n'geenu yā
ngii. Ní Ndyuūs n'diichí yā chi
n'daacā idíⁿ yā. 'Tíicā diiⁿ Ndyuūs
caati cuuvi ye^{n'}é yā n'dee n'dái
daiyá yā. Ní cuuvi ca'a yā 'iiⁿyāⁿ
s'eeⁿ parte chi cuuvi ye^{n'}é yā
ndúúcu vaadi dēeve n'dai ye^{n'}é yā.
Jesucristo ní sa^{n'}ā chi nadanguá^{n'}ai

yā 'iiⁿyāⁿ ye^{n'}e i^{n'}yeeⁿdí cūū. ¹¹ Ní
Jesucristo ní dideevé yā 'iiⁿyāⁿ
ye^{n'}e nuuⁿndi ye^{n'}é yā ní 'iiⁿyāⁿ
chí ndúúví dēevé yā ní tan'dúúca
Jesucristo miiⁿ. Véé 'áamá nūuⁿ
chiida nducyaaca 'iiⁿyā. Cáávā chuū
Jesucristo nguéeⁿ 'cuinaáⁿ yā chi
caa^{n'}máⁿ yā chi 'iiⁿyāⁿ s'eeⁿ ní ví'i
yā. ¹² Ní 'tíicā Jesucristo nga^{n'}á yā
ngii yā 'iiⁿyāⁿ s'eeⁿ ní canée nguūⁿ:

N'dii Ndyuūs, 'úú caa^{n'}máⁿ ye^{n'}é
n'dii nanááⁿ hermanos ye^{n'}é
ní caátá himnos chi cantos
chi nga^{n'}á chi ch'ēeté nī
nanááⁿ 'iiⁿyāⁿ ye^{n'}é nī taachi
nduvidaamā yā. ¹³ Taama
vmné^{n'}ēe Jesucristo ca^{n'}a yā
'tiicā:

'Úú ní canée confianza ye^{n'}é
ndúúcu Ndyuūs.

Ní 'táamá ca^{n'}a yā:

'Muuⁿ canée ndúúcu daiyá chi
Ndyuūs tee yā 'úú.

¹⁴ 'Tíicā, 'iiⁿyāⁿ ye^{n'}e 'áamá
familia ní 'áamá yuūtē ye^{n'}é yā
ní 'áamá yuūuⁿ ntúūⁿ va. Ní 'tiicā
ntúūⁿ Jesucristo miiⁿ ch'iindiyáaⁿ
yā ndúúcu cuerpo ndúúcu yuūúⁿ
tan'dúúca s'uuúⁿ. Ní 'tiicā ntúūⁿ
Jesucristo ch'iⁱ yā caati cuuvi
di'cuiinú yā yááⁿnguiinūuⁿ caavā
chi diiⁿ sa chi nducyaaca yú ní n'gii
yú. ¹⁵ 'Tiicā ntúūⁿ Jesucristo díⁿ yā
chi nguéeⁿ 'va'a yú ye^{n'}e tiempo chí
'cuuvi yú. ¹⁶ Cuaacu chi Jesucristo
nguéeⁿ ndaá yā nanááⁿ ángeles chi
chinnee yā ángeles naati nanááⁿ
'iiⁿyāⁿ ye^{n'}e ndaata ye^{n'}e Abraham
cáávā chi nadanguá^{n'}ai yā 'iiⁿyāⁿ.
¹⁷ Cáávā chuū Jesucristo canée chi
ch'iindiyáaⁿ yā tan'dúúca nducyaaca
hermanos ye^{n'}é yā ní 'íicú maáⁿ yā
cuuvi cūnéé yā chiiduú ch'ēete ca

chi 'áamá cānee yeⁿe ntiiⁿnyuⁿ yeⁿe Ndyuūs. Ní ya'ai 'iinú yā 'iiⁿyāⁿ. Ní 'íicú cuuví nadach'ēēcú yā nuuⁿndi yeⁿe 'iiⁿyāⁿ ti nadí'v̄e yā nducuéⁿē nuuⁿndi yeⁿe 'iiⁿyāⁿ. ¹⁸Ní Jesucristo maáⁿ yā ch'eenú yā chií ní chichēe yā taachi ndaá yááⁿn'guiinūⁿ chí n'diichineeⁿ sa 'yā. Ní cáāvā chuū maaⁿ ní Jesucristo cuuvi cūnnee yā 'iiⁿyāⁿ s'eeⁿ taachi n'geenú yā ngii ní nadanguáⁿ'ai yā 'iiⁿyāⁿ s'eeⁿ yeⁿe yááⁿn'guiinūⁿ taachi ndaa sa n'diichineeⁿ sa 'iiⁿyāⁿ s'eeⁿ.

**Jesucristo ní ch'ēete taavi
cá yā nguéé ti Moisés**

3 Ndís'tií, hermanos yeⁿe yú chi Cristo didēēv̄e yā ní ndís'tií ntúūⁿ Ndyuūs yaa'v̄i yā ndís'tií chi cuuvi yeⁿe yā. Maaⁿ ní nadicádíinuⁿ n'dai nī yeⁿe Jesucristo chi apóstol chi dichó'o Ndyuūs ti Jesucristo miiⁿ ní chiiduú ch'ēete cá yeⁿe 'iiⁿyāⁿ chi i'téenu yā Jesucristo tan'dúúcā s'uuúⁿ. ²Jesucristo miiⁿ 'áamá caneé yā ndúúcū Ndyuūs ní dííⁿ yā tanducuéⁿē dendu'ū. Ní dííⁿ yā tanducuéⁿē dendu'ū chi Ndyuūs dineⁿé yā. Ní tan'dúúcā Moisés din'daacá yā ntiiⁿnyuⁿ chi Ndyuūs ca'a yā, 'tiicá ntúūⁿ Jesucristo din'daacá yā tanducuéⁿē ntiiⁿnyuⁿ yeⁿe va'ai yeⁿe Ndyuūs chi Ndyuūs ca'a yā. ³Ní 'áamá 'iiⁿyāⁿ chi din'dái yā 'aama va'āi ní ch'ēete cá yā nguéé ti va'āi miiⁿ. 'Tíicā Jesucristo ní ch'ēete taavi cá yā nguéé ti Moisés. ⁴Deenu yú chi véé 'iiⁿyāⁿ chi din'dái yā ca'áamá cā'aama va'āi naati Ndyuūs din'dái yā nducuéⁿē dendu'ū chi véé.

⁵Moisés miiⁿ dichí'v̄e yā Ndyuūs

ní n'dáaca taavi idiiⁿ sa ntiiⁿnyuⁿ yeⁿe vaacu Ndyuūs. Ní Moisés dííⁿ yā ntiiⁿnyuⁿ chi ngaⁿ'a yā nduudu yeⁿe Ndyuūs chi Ndyuūs caⁿ'a yā chi caaⁿ'máⁿ yā cuayiivi. ⁶Naati Cristo chi daiyá Dendyuūs ní 'áamá dííⁿ yā ntiiⁿnyuⁿ ti 'iiⁿyāⁿ ndii tííⁿ yā yeⁿe vaacu Dendyuūs. Ní s'uuúⁿ tan'dúúcā vaacu Ndyuūs 'tíicā s'uuúⁿ nduuti chi canéé diitu yú ndúúcū chi i'teenu yú. Ní yeenu yú ndúúcū chi cuuvi yeⁿe yú ndíí tiempo chi 'cuuvi yú.

**Véé tiempo chi ntaavi'tuunúūⁿ
'iiⁿyāⁿ chi yeⁿe Ndyuūs**

⁷Ní chuū Espíritu N'dai yeⁿe Ndyuūs ngaⁿ'a yā 'túúcā naachi canéé nguūⁿ na libro yeⁿe Ndyuūs: Maaⁿnguuví miiⁿ nduuti chi ndís'tií 'caandiveéⁿ nī nduudu yeⁿe Ndyuūs:

⁸Nguéé dichēēchí nī staava yeⁿe nī chí ditaáⁿ nī tan'dúúcā chí dííⁿ 'iiⁿyāⁿ tiempo chí 'āā chó'oo taachi 'iiⁿyāⁿ s'eeⁿ dííⁿ yā n'diichineeⁿ yā Ndyuūs ndúúcū nuuⁿndi chí dííⁿ yā na yáⁿ'āa cuuⁿmáⁿ naachi nguéé ch'ēetinéé 'iiⁿyāⁿ. ⁹Ní Ndyuūs ngaⁿ'á yā ngii yā 'iiⁿyāⁿ:

Tiempo chí chó'oo na yáⁿ'āa cuuⁿmáⁿ naachi nguéé ch'ēetinéé 'iiⁿyāⁿ, 'iiⁿyāⁿ s'eeⁿ yeⁿe ndaata yeⁿe nī n'diichineeⁿ ntúuⁿ yā 'úú 'áára chí n'diichí yā nducuéⁿē chí 'úú dííⁿ ndúúcū yā 'naaⁿ chí 'uūvi ngēecu nduuyū.

¹⁰Ní cáāvā chuū 'úú, Ndyuūs, ditaáⁿ ndúúcū 'iiⁿyāⁿ s'eeⁿ. Ní 'túúcā ngaⁿ'á ngii 'iiⁿyāⁿ s'eeⁿ: Ndis'tií, nducuéⁿē tiempo

nguée n'daacā nadacadíínuu"
nī na staava ye"ⁿé nī. Ní nguée
n'diichí nī yúúní ye"ⁿé.

¹¹ Ní cáávā chi diiⁿ 'iiⁿ'yāⁿ s'eeⁿ 'úú
ní nguée canee yiinú ye"ⁿe
yā ní caⁿ'a 'túúcā: Cuáácú
chí 'iiⁿ'yāⁿ s'eeⁿ nguée cuuvi
ndaa yā naachi canée chí
ntaavi'tuunúūⁿ 'iiⁿ'yāⁿ ye"ⁿe
ndaata ye"ⁿé nī.

¹² Maaⁿ ní ndís'tiī, hermanos
ye"ⁿé, cundée nī cuidado chi nguée
'áámá ndís'tiī chi nguée n'daacā
staava ye"ⁿé nī chi nguée i'téenu nī
ní nguée divíi nī ye"ⁿé Ndyuūs chi
canduuchi. ¹³ Ní ndís'tiī ní yaa'ví
nī ví'i nī 'áámá nī taama nī nguuvi
nguovi taachi maaⁿnguovi ní 'íicú
mar 'áámá ndís'tiī nguée dicheechí
nī staava ye"ⁿé nī cáávā nuuⁿndi
chi nginnche'eī ndís'tiī. ¹⁴ Ní vée
'áámá cuaaⁿ ye"ⁿé yú ndúúcu Cristo
nduuti chi s'uuúⁿ ní 'áámá canee
yú ndúúcu chi i'téenu yú vmnááⁿ
vmnaaⁿ ye"ⁿe Cristo ndíí tiempo chi
'cuūvi yú.

¹⁵ 'Tíicā canée nguūⁿ na libro ye"ⁿé
Ndyuūs:

Nguée dicheechí nī staava ye"ⁿé
nī chi ditaáⁿ nī tan'dúúcu chi
diiⁿ 'iiⁿ'yāⁿ na yáⁿ'āa cuūⁿmáⁿ
naachi nguée ch'etinéé
'iiⁿ'yāⁿ tiempo chi ch'óo
taachi n'diichineeⁿ yā 'úú chi
Ndyuūs. ¹⁶ 'Du'ú 'iiⁿ'yāⁿ chi
ch'iindiveéⁿ yā nduudu ye"ⁿé
Ndyuūs ní cuayiivi nduuvitaáⁿ
yā? 'Túúcā diiⁿ nducyaaca
'iiⁿ'yāⁿ chi cue"ⁿé yā ndúúcu
Moisés ye"ⁿe yáⁿ'āa Egipto.
Nducyaacá yā nduuvitaáⁿ yā.
¹⁷ 'Du'ú 'iiⁿ'yāⁿ chi Ndyuūs
nguée yiinú yā nduucú yā

'uūvi ngeecu nduuyu? 'Túúcā
nguee yiinú yā ndúúcu 'iiⁿ'yāⁿ
chi dinuuⁿndí yā ní ch'iī yā na
yáⁿ'āa cuūⁿmáⁿ naachi nguée
ch'etinéé 'iiⁿ'yāⁿ. ¹⁸ 'Du'ú
'iiⁿ'yāⁿ chi Ndyuūs ngaⁿ'á yā
caavā maaⁿ chi duuchí yā
chi 'iiⁿ'yāⁿ s'eeⁿ nguée cuuvi
cundaa yā lugar naachi
ntaavi'tuunúūⁿ 'iiⁿ'yāⁿ ye"ⁿe
yā? 'Túúcā ngaⁿ'á yā ye"ⁿe
'iiⁿ'yāⁿ chi nguée n'giindiveéⁿ
yā nduudu ye"ⁿe yā. ¹⁹ Maaⁿ ní
deenu yú ti 'iiⁿ'yāⁿ s'eeⁿ nguée
cuuvi cundaa yā lugar ye"ⁿe
Ndyuūs ti nguée i'téenu yā
Ndyuūs.

4 Maaⁿ ní Ndyuūs tee yā
promesa s'uuúⁿ chi cuuvi
cundaa yú lugar ye"ⁿé yā ní cuuvi
ntaavi'tuunúūⁿ yú ndúúcu Ndyuūs.
Canée chí candee yú cuidado
caati 'aatī 'aama chée ndis'tiī nguée
cuchée nī tanducuéⁿē dendu'ū ní
nguée cuuvi cundaa nī lugar miiⁿ.
² Caati 'iiⁿ'yāⁿ ye"ⁿé Jesucristo ndée
yā nduudu cuaacu ye"ⁿé Jesucristo
nanááⁿ s'uuúⁿ, 'tiicā ntúūⁿ nanááⁿ
'iiⁿ'yāⁿ s'eeⁿ chi ch'iī yā na yáⁿ'āa
cuuⁿmáⁿ naachi nguée ch'etinéé
'iiⁿ'yāⁿ. Ní nguée dichí'vē nduudu
cuaacu ye"ⁿé Ndyuūs nguaaⁿ 'iiⁿ'yāⁿ
s'eeⁿ ti taachi ch'iindiveéⁿ yā
nduudu miiⁿ nguée s'téenu yā ye"ⁿé.
³ Naati s'uuúⁿ chi i'teenu yú nduudu
miiⁿ, s'uuúⁿ ní cuuvi ndaa yú naachi
caⁿ'a Ndyuūs chi ntaavi'tuunúūⁿ yú
ndúúcu yā. 'Tíicā ngaⁿ'a Ndyuūs na
libro ye"ⁿé yā naachi canée nguūⁿ:

Cáávā chi dííⁿ 'iiⁿ'yāⁿ s'eeⁿ 'úú
nguée yiinú ye"ⁿe yā. Ní
cuaacú ngaⁿ'á nduudu
ndúúcu maááⁿ chi duuchí.

Nguéé cuuvi ndaa yā nduucú
na lugar yeⁿé naachi
ntaavi'tuunúⁿ.

Ní Ndyuūs dī'cuinú yā ntiiⁿnyuⁿ
yeⁿé yā taachi din'dái yā iⁿ'yeeⁿdí
'cūū. ⁴Ní 'áámá cuaaⁿ yeⁿé libro
yeⁿé Ndyuūs naachi canéé nguūⁿ ní
ngaⁿ'a yeⁿé ndíí chí ndēēchē nguuvi
chi ntaavi'tuunúⁿ 'iiⁿ'yāⁿ:

Ndyuūs ní ndíí chí ndēēchē
nguuvi ntaavi'tuunúⁿ yā
yeⁿé tanducuéⁿē ntiiⁿnyuⁿ
yeⁿé yā. ⁵Ní canee táámá
vmneⁿ'ēe na libro yeⁿe
Ndyuūs 'tíicā:

'Iiⁿ'yāⁿ s'eeⁿ nguéé cuuvi
cūndaa yā ní ntaavi'tuunúⁿ
yā nduucú. ⁶Maaⁿ ní véé
n'duuvi 'iiⁿ'yāⁿ chi canéé chi
cundaa yā na lugar naachi
ntaavi'tuunúⁿ 'iiⁿ'yāⁿ. Naati
'iiⁿ'yāⁿ chi vmnááⁿ vmnaaⁿ
n'giindiveéⁿ yā nduudu
cuaacu miiⁿ nguéé sndaā yā
ti nguéé s'téenu yā Ndyuūs.
⁷Taama vmnéⁿ'ēe Ndyuūs
s'neéⁿ yā 'áámá nguuvi ní
ngaⁿ'a yā chi nguuvi ní
maaⁿ'nguuvi. Ní Ndyuūs
ngaⁿ'a yā yeⁿé nduudu miiⁿ
cuayiivi taachí 'āā chó'ōo
chuū. 'Āā 'naaⁿ tiempo nguuvi
chi David ngaⁿ'a sa yeⁿé. Ní
'tíicā canéé nguūⁿ na libro
yeⁿé Ndyuūs yeⁿé nguuvi
miiⁿ:

Maaⁿ'nguuvi nduuti chi ndís'tiī
'caandiveéⁿ nī nduudu chi
Ndyuūs ngaⁿ'á yā: Nguéé
dicheēchí nī staava yeⁿé nī.
⁸Ní nduuti chi saⁿ'ā Josué
chi saⁿ'ā ndíí tiiiⁿ yeⁿe
'iiⁿ'yāⁿ Israel s'eeⁿ cuuvi sa

ca'a sa 'iiⁿ'yāⁿ Israel s'eeⁿ chí
ntaavi'tuunúⁿ yā tuu'mi
ní Ndyuūs nguéé canee chi
caaⁿ'máⁿ yā taama vmnéⁿ'ēe
yeⁿé táámá nguuvi. ⁹Maaⁿ
ní cáāvā chuū véé chi
ntaavi'tuunúⁿ 'iiⁿ'yāⁿ chi
yeⁿé Ndyuūs. ¹⁰Ní 'iiⁿ'yāⁿ chi
sndaā yā naachi Ndyuūs
ntaavi'tuunúⁿ yā 'āā ntéé
idiíⁿ yā ntiiⁿnyuⁿ tan'dúúicā
chi Ndyuūs 'āā ntéé idiíⁿ yā
ntiiⁿnyuⁿ. ¹¹Maaⁿ ní canéé chí
dī'cuíftu yú chi cuuvi cūndaā
yú lugar naachi ntaavi'tuunúⁿ
yú ní 'aatīi tanáⁿ'ā yú diiⁿ yú
chi nguéé i'téenu yú tan'dúúicā
'iiⁿ'yāⁿ s'eeⁿ chi nguéé
chi'téenu yā.

¹²Ní nduudu cuaacu yeⁿé Ndyuūs
ní canduuchi ní neené ditiinú. Ní
vée ca 'caāiⁿ yeⁿé nguéé ti 'áámá
machete chi 'caāiⁿ nduu 'uuvī lados.
'Tíicā nduudu cuaacu yeⁿé Ndyuūs.
Ndaā na coo yeⁿe cuerpo yeⁿe yú
naachi canee alma yeⁿe yú ndúúicū
espíritu yeⁿe yú ndíí túútē yeⁿe yú.
Ní déénu chēē chi tumicadífínuuⁿ yú
ndúúicū chēē chi neⁿe yú diiⁿ yú chi
ngiicā yeⁿe staava yeⁿe yú. ¹³Nguéé
dē'ē vée chi véé chi cuuvi cunúúⁿ
n'de'ei yeⁿé Ndyuūs. Ndyuūs din'dái
yā tanducuéⁿē dendu'ū chi véé ní
inaáⁿ yā nducuéⁿē tan'dúúicā chi
canee nanáaⁿ yā. Ní canéé chí ca'a
yú cuenta yeⁿe vida yeⁿe yú taachi
ndaa yú nanáaⁿ yā.

**Jesús ni chiiduú ch'ēete
taavi ca yeⁿe yú**

¹⁴Jesús chi daiyá Dendyuūs ní
chiiduú ch'ēete taavi ca yeⁿe yú. Ní
cunaⁿ'a yā va'ai chēeti nguuvi ní

ndaá yā nanááⁿ Ndyuūs. Ní cáávā chuū canee chi 'áámá canee yú ndúúcū chi i'teenu yú Ndyuūs. ¹⁵Ní chiiduú ch'ēete taavi ca yeⁿe yú ya'ai 'iinú yā s'uuúⁿ taachi n'geenu yú ngii caati Jesús miiⁿ ní ch'eenú yā chii tanducuéⁿē tan'dúúcā s'uuúⁿ naati nguéé dinuuⁿndí yā mar 'áámá vmnéⁿēe. ¹⁶Ní cáávā chuū cuuvi ndaa yú nanááⁿ trono yeⁿé Ndyuūs yeⁿe yú ndúúcū confianza ti dineⁿé yā s'uuúⁿ. Ní 'íicú Ndyuūs cuuvi ya'ai 'iinú yā yeⁿe s'uuúⁿ ní cunnee yā s'uuúⁿ taachi, véé necesidades yeⁿe yú. Ní itée yā s'uuúⁿ denduⁿū chi n'daacā n'dai yeⁿé yā.

5 Tiempo chi chó'oo 'iiⁿyāⁿ chi snée yā iⁿ'yeeⁿdí 'cūū ndēēvē yā ca'áámá cā'aama chiiduú ch'ēete chi canéé chi díⁿ yā ntiiⁿnyuⁿ yeⁿé Ndyuūs cucáávā 'iiⁿyāⁿ s'eeⁿ. Ní ca'á yā ofrendas ní 'caaⁿnúⁿ yā 'iiti chi candēe 'iiⁿyāⁿ s'eeⁿ ti ofrenda caavā nuuⁿndi yeⁿé yā. ²Ní chiiduú ch'ēete ca ní dinuuⁿndí yā tan'dúúcā nducyáácā 'iiⁿyāⁿ. Ní cáávā chuū véé paciencia yeⁿé yā ndúúcū 'iiⁿyāⁿ chi tonto ní ndúúcū 'iiⁿyāⁿ chi dinuuⁿndí yā. ³Ní chiiduú ch'ēete ca cáávā chi dinuuⁿndi yā canéé chí 'caaⁿnúⁿ yā 'iiti chi ofrenda yeⁿe maáⁿ yā cáávā nuuⁿndi yeⁿe maáⁿ yā tan'dúúcā chi díⁿ tanáⁿā 'iiⁿyāⁿ cáávā nuuⁿndi yeⁿé yā.

⁴Ní mar 'áámá saⁿā cuuví diiⁿ sa nombrar maaⁿ sa lado yeⁿē chiiduú ch'ēete ca cáávā chi maāⁿ sa neⁿe sa ti Ndyuūs yaa'ví yā saⁿā chi cuuvi chiiduú ch'ēete ca chi diiⁿ sa ntiiⁿnyuⁿ yeⁿé yā tan'dúúcā chi yaa'ví yā saⁿā Aarón chi cuuvi chiiduú ch'ēete ca tiempo chi 'āā chó'oo. ⁵Tiicá ntúūⁿ chó'oo yeⁿe

Cristo. Cristo miiⁿ nguéé díⁿ yā nombrar maáⁿ yā chi cuuvi chiiduú ch'ēete ca. Ndyuūs yaa'ví yā Cristo chi cuuvi chiiduú ch'ēete ca. Ní 'tíicā canéé nguūⁿ na libro yeⁿé Ndyuūs:

Dii ní daiyá, 'úú ní chiida di ní cuaacu chí dii ní daiyá.

⁶Ngaⁿa ntúūⁿ táámá ni canéé nguūⁿ na libro yeⁿé Ndyuūs 'tíicā:

Díí ní daiyá ní cuéⁿé daāⁿmaⁿ canee di chiiduú ch'ēete ca. Tan'dúúcā chi tiempo chi 'āā chó'oo chiiduú ch'ēete ca chi nguuvi Melquisedec 'tiicá nī ti yeⁿē ndaata yeⁿé yā. ⁷Ní taachi Jesús canee yā iⁿ'yeeⁿdí 'cūū caⁿ'angua'á yā nanááⁿ Ndyuūs chiidá yā ní ngaⁿa yā: N'díí Ndyuūs díⁿ nī chiiⁿ chi neⁿé nī. Ní 'caí diitú yā neⁿe chi cheēcú yā: N'díi, Ndyuūs, cuuvi nadanguáⁿai nī 'úú chi nguéé 'cuūví nduuti chi neⁿé nī díⁿ nī 'tíicā. Ní Ndyuūs ch'iindiveéⁿ yā nduudu yeⁿe Jesús taachi ngaⁿ'angua'á yā ti dich'ēetē yā Ndyuūs. Ní Ndyuūs ca'á yā fuerzas Jesús. ⁸Ní 'áará chí Jesús miiⁿ ní daiyá Dendyuūs ch'eeⁿ yā cáávā dendú'ū chi canéé chí ch'eenú yā chii ní ch'iindiveéⁿ yā yeⁿe nducuéⁿē. ⁹Ní taachi Ndyuūs n'diichineéⁿ yā Jesús, Jesús miiⁿ ní díⁿ yā nducuéⁿē chi neⁿe Ndyuūs. Ní 'íicú Jesús miiⁿ cuuví yā nadanguáⁿai yā nducyaaca s'uuúⁿ chi n'giindiveeⁿ yú yeⁿe yā. ¹⁰Ní Ndyuūs díⁿ yā chi Jesús cuuvi chiiduú

ch'εεte ca tan'dúúcā tiempo
chi ch'ó'oo chiiduú ch'εεte ca
chi nguuví Melquisedec, 'tiicá
yā.

**Véé peligro ye"e yú chi nga" a yú
chi 'āā ntéé i'teenu yú Jesucristo**

¹¹Maa" ní véé cá chi ne"é 'nū
caa"má" 'nū ye"e Melquisedec chi
chiiduú ch'εεte ca naati ngii n'dái
caa"má" 'nū ye"e ti ndís'tií ní nguée
ituumicadiinuu" nī. ¹²'Āā ch'ó'oo
tiempo chi ndís'tií 'āā s'téenu nī ní
maa" ní ndís'tií canéé chí ca'cueé"
nī 'i'i"yā" naati ndíí maa" 'āā ne"é
nī taama vmné"ēe chi 'áámá 'i'i"yā"
ca'cueé" yā ndís'tií dendu'ū chi
vmnáá" vmnaa" ye"é Ndyuūs. Ní
ndís'tií ní 'āā débíl nī. Ní tan'dúúcā
dacuá'āa chi ne"e leche ní nguée
ne"e comida chi ditiinú, 'tiicá nī.
¹³Ní 'i'i"yā" chi dámaa" ngi'i leche
ní tan'dúúcā dacuá'āa 'tiicá yā. Ní
nguée deenú yā de'ē chi n'daacā o
de'ē chi nguée n'daacā. ¹⁴Ní comida
chí ditiinu ní che'ē 'i'i"yā" n'gēēte
chi 'āā deenú yā in'nuú yā chéé chí
n'daacā o chéé chi nguée n'daacā
caati 'tíicā costumbre ye"é yā chi
díí" yā.

6 Maa" ní i'téenu ca yú ní
'caandivee" ca yú cosas chi
chæchi chi 'i'i"yā" ca'cueé" yā
s'uúú". Ní nguée ne"e yú 'caandivee"
yú taama vmné"ēe tan'dúúcā chi
ngi'cueé" yā s'uúú" ndii vmnáá"
vmnaa" taachi cáámá i'teenu yú
nduudu cuaacu ye"é Cristo. Ní
nguée nga" a yú táámá vmné"ēe
chi s'nee" yú ntii"nyu" ye"e yú chi
nguée n'daacā chí díí" chi 'cuūvi
yú ti maa" ní i'teenu yú Jesucristo.
²Ní nguée ca'cuee" ca yú ye"ē chi

ngēēdínū"ní, ní nguée ye"ē chi
s'nuu" yú ta'la yú nanáá" tií" 'i'i"yā",
ní nguée ye"ē chi nduuchí 'i'i"yā"
chi ye"e Cristo ye"ē nguaa" tiná"ā,
ní nguée ye"ē nguuví chi Cristo
díí" yā juzgar nducyaaca 'i'i"yā".

³Ca'cuee" ca yú más cā ye"e chi
i'téenu yú ye"e Cristo. Ní chuū ní
díí" yú nduuti chi Ndyuūs ne"e yā.

⁴Ní 'de'ē ye"e 'i'i"yā" chi 'āā sta'á
yā deēve chi Cristo, ní sta'á yā cosas
chi n'dai taavi chi Cristo ca'la yā, ní
'āā sta'á yā Espíritu N'dai ye"e Cristo,
⁵ní deēnú yā nduudu cuaacu chí n'dai
chí ye"é Ndyuūs ndúúcū poder chi
ye"e táámá i"yee"di chi cuchíi? ⁶Ní
nduuti chi 'i'i"yā" s'ee" ndaacadaamí
yā ye"e Cristo ní dinuu"ndí yā, nguée
cuuvi díí" yā ndaa yā nanáá" Cristo
chi nadach'εecú yā nuu"ndi ye"é
yā, tí 'i'i"yā" s'ee" díí" yā tan'dúúcā
chi s'néé"nga'á yā daiyá Ndyuūs mii"
taama vmné"ēe. Ní díí" yā chi Cristo
mii" 'cuiináa" yā nguaa" 'yáá" n'dái
'i'i"yā". ⁷Ndyuūs díí" yā ndúúcū 'i'i"yā"
s'ee" tan'dúúcā chi díí" yā ndúúcū
yá"āa taachi n'dee cuuví ngee" cuūvi
vmnáá" yá"āa ní yá"āa sta'ā nuū"nī"
mii" 'áámá 'áámá vmné"ēe chi ngee"
cúúvi. Ndyuūs ca'á yā yá"āa mii"
cosecha chi n'dai 'i'i"yā" chí ngiínú
yā ndaataá. ⁸Naati nduuti chi yá"āa
mii" ní ngii yáá" ye"ē ndúúcū yaata
chi nguée dichí'vē tuu'mi ní nguée
dichí'vē. Ní Ndyuūs nguée ca'á yā
cosecha n'dai ye"ē nífcú cuayiivi
'i'i"yā" ní 'nee" yá" a yā yá"āa mii".

**Véé chi cuuvi ye"e yú chi nnee
s'uúú" chi 'áámá cunee yú**

⁹Maa" ní 'áará chi nga"á 'nū 'tíicā
ye"e ndís'tií, hermanos, deenu 'nū
chi véé cosas chi n'dai taavi ca ye"é

ní ti yeⁿé Cristo ndís'tií ní Ndyuūs nadanguáⁿai yā ndís'tií. ¹⁰Ndyuūs dámaāⁿ dííⁿ yā dendu'ū chí cuaacu. Nn'gaacú yā yeⁿé ntiíⁿnyuⁿ chí dííⁿ ní ní táácā nneé ní hermanos yeⁿé yú caati dineⁿé ní hermanos chí i'téenu yā Jesucristo. Ní 'tíicā ní dííⁿ ní nguuví nguuví. ¹¹Maaⁿ ní neⁿé 'nū chí ca'áámá ca'áámá ndís'tií daamá nūⁿ idííⁿ ní ndúúcū nūúⁿmāⁿ staava yeⁿé ní tan'dúúcā chí dííⁿ ní taachi cáámá i'téenu ní. Ní dííⁿ ní ndíí tiempo chí ch'íi ní. Ní 'tíicā cuuvi cuaacu chí véé chí cuuvi yeⁿé ní. ¹²Nguéé neⁿé 'nū chí nduuví 'daan'di ní naati neⁿé 'nū chí din'daacá ní tan'dúúcā tanáⁿa cā 'iiⁿyāⁿ chí i'téenu yā. Ní cunee ngiinú yā yeⁿe vaadi n'dai chí Ndyuūs ca'á yā 'iiⁿyāⁿ s'eeⁿ chí Ndyuūs ngaⁿá yā chí cuuvi yeⁿé yā 'iiⁿyāⁿ s'eeⁿ.

¹³Āā náán tiempo chí ch'óōo Ndyuūs dííⁿ yā 'áámá compromiso ndúúcū Abraham ní Ndyuūs ngaⁿá yā cáávā chí duuchi maán yā chí 'tíicā caⁿá yā dííⁿ yā caati nguéé cá táámá 'iiⁿyāⁿ chí ch'ēete cá yā ti Ndyuūs. ¹⁴Ní caⁿa yā: Díí, Abraham, cuaacu nííⁿnyúⁿ d'i'viicú díí ní dííⁿ chí cuuvi n'deeé n'dái daiyá 'iiⁿyāⁿ yeⁿé di cuaaⁿ naachi cuchíi. ¹⁵Abraham cūnee ngiinú yā compromiso yeⁿé Ndyuūs ndúúcū vaadi ngiinú ní tunée yā compromiso chí Ndyuūs caⁿa yā chí ca'á yā Abraham miiⁿ. ¹⁶Maaⁿ ní taachi 'iiⁿyāⁿ yeⁿe iⁿ'yeeⁿdí cūū ngaⁿá yā chí cuaacu nííⁿnyúⁿ caⁿá yā dííⁿ yā, ngaⁿá yā “Por Dios” cucáávā 'áámá yā chí ch'ēete cá yā nguéé ti 'iiⁿyāⁿ s'eeⁿ. Níicú taachi 'iiⁿyāⁿ s'eeⁿ ngaⁿá yā chí 'tíicā caⁿá

yā dííⁿ yā cáávā 'iiⁿyāⁿ miiⁿ chí ch'ēete ca tuuⁿmi ní nguéé véé más cā chí cuuvi caaⁿmáⁿ yā yeⁿé. ¹⁷Ní 'tíicā Ndyuūs neⁿé yā chí 'iiⁿyāⁿ s'eeⁿ yeⁿe Abraham chí cuaacu nííⁿnyúⁿ dííⁿ yā cumplir compromiso yeⁿé yā. Ní nguéé n'daaⁿ mar 'áámá nduudu yeⁿé yā. Ní cáávā chuū ngaⁿá yā cucáávā chí duuchi maán yā. ¹⁸Ní cáávā chuū véé 'úúví dendu'ū chí nguéé cuuvi n'daaⁿ. Ndyuūs ní nguéé cuuvi cuⁿneeⁿ yā táámá cosa lugar yeⁿé 'uuví compromiso yeⁿé Ndyuūs ndúúcū chí ngaⁿá yā chí caⁿá yā dííⁿ yā cáávā chí duuchi maán yā. Ndyuūs nguéé cuuvi caaⁿmáⁿ yā nduudu yaadi. Ní ndúúcū compromiso yeⁿé yā, Ndyuūs tee yā s'uúúⁿ 'viich'etífínūⁿ ch'ēete yeⁿe yú caati s'uúúⁿ n'nuuⁿ yú Ndyuūs ní i'téenu yú 'yā ní yeⁿé chí Ndyuūs tée yā chí cuuvi yeⁿé yú. ¹⁹Chííⁿ chí i'téenu yú cáávā alma yeⁿe yú ní tan'dúúcā 'áámá ancla yeⁿe barco ti i'nēēⁿ dííⁿ barco chí 'āā ntéé ínuⁿu. 'Tíicā s'uúúⁿ ndúúcū chí i'téenu yú cuuvi ndáá nííⁿnuⁿ yú nanáán Ndyuūs. ²⁰Jesucristo 'āā ndaá yā nanáán Ndyuūs vmnáánⁿ vmnaaⁿ yeⁿé s'uúúⁿ. Ní maaⁿ ní cááva yā cuuvi ndaa yú nanáán Ndyuūs. Ní maaⁿ ní Jesucristo miiⁿ ní chiiduú ch'ēete ca yeⁿe yú chí 'áámá cūnee ná ntiíⁿnyuⁿ miiⁿ. Ní tan'dúúcā chiiduú ch'ēete ca Melquisedec chí 'áámá cūnee na ntiíⁿnyuⁿ 'āā tiicá nūⁿ Jesucristo.

**Yeⁿe Jesús chí chiiduú ch'ēete
ca tan'dúúcā Melquisedec
chí chiiduú ch'ēete ca**

7 'Iiⁿyāⁿ Melquisedec ní rey
yeⁿé yáāⁿ Salem ní chiiduú

ch'εεε ca yeⁿe Ndyuūs chí ch'εεε n'dai. Tiempo chi 'āā 'nāáⁿ ch'ó'ō, saⁿ'ā Abraham ní taachi cuchí sa chi cheⁿe sa ná caandaá naachi ch'iiⁿ'nuⁿ sa reyes, saⁿ'ā Abraham miiⁿ ndaaca sa nanááⁿ chiiduú ch'εεε ca Melquisedec ní Melquisedec di'viicú yā Abraham. ²Ní Abraham miiⁿ ní caā sa Melquisedec 'áamá ndiichí parte yeⁿ'e nducuéⁿ'ē chi divíi yā yeⁿ'e 'iiⁿ'yāⁿ yeⁿ'e reyes cucááⁿvā caāndāa. Ní chi duuchi chi Melquisedec vmnááⁿ vmnaaⁿ neⁿ'ē caaⁿ'máⁿ rey chi yeⁿ'e vaadi cuaacu. Ní cuayivi ní neⁿ'e caaⁿ'máⁿ rey yeⁿ'e yāáⁿ Salem, ní chi duuchí yā neⁿ'e caāⁿ'maⁿ rey yeⁿ'e vaadi 'diiⁿ'. ³Nguéé canee nguūⁿ chεε chi chεεcú Melquisedec, chεē chi chiidá yā ndíi nguéé ndúú yeⁿ'e 'iiⁿ'yāⁿ yeⁿ'é yā yeⁿ'e chi chiicá yā. Nguéé canee nguūⁿ yeⁿ'e tiempo chi ch'iindiyáaⁿ yā ndíi nguéé ndúú yeⁿ'e tiempo chi ch'ii yā. Ní cucááⁿvā chuū Melquisedec miiⁿ tan'dúúⁿcā daiyá Ndyuūs 'tiicá yā ti 'áamá chiiduú ch'εεε ca chi 'áamá cūneeⁿ na ntiiⁿ'nyuⁿ cueⁿ'e daāⁿ'maⁿ.

⁴Maaⁿ ní nadacádíinuⁿ ní chi ch'εεε n'dai saⁿ'ā Abraham 'cūū. Abraham ca'a yā 'áamá ndiichi parte yeⁿ'e nducuéⁿ'ē chi divíi yā yeⁿ'e reyes taachi cuⁿ'u yā na caāndaá. ⁵'Tíicā ngaⁿ'ā ley yeⁿ'e Ndyuūs chi Moisés dingúuⁿ yā: Nducyaaca chiiduú chi yeⁿ'e ndaata yeⁿ'ē 'iiⁿ'yāⁿ Leví canéé chi cuta'á yā ndíichí parte yeⁿ'e nducuéⁿ'ē chi vée yeⁿ'e nducyáácá 'iiⁿ'yāⁿ chí yeⁿ'e Abraham ní yeⁿ'e 'iiⁿ'yāⁿ yeⁿ'e ndaata yeⁿ'é yā, ti 'iiⁿ'yāⁿ Leví miiⁿ ní yeⁿ'e ndaata Abraham. ⁶Naati

chiiduú ch'εεε ca Melquisedec miiⁿ ní nguéé yeⁿ'e 'iiⁿ'yāⁿ Leví naati sta'á yā ndíichí parte yeⁿ'e Abraham. Ní Abraham miiⁿ ní saⁿ'ā chi Ndyuūs diⁿ yā compromiso ndúúⁿcū sa chi vée chi cuuví yeⁿ'e sa. Ní chiiduú ch'εεε ca Melquisedec di'viicú yā Abraham. ⁷Maaⁿ ní Melquisedec chí di'viicú yā Abraham ní ch'εεε cá yā nguéé ti Abraham chí di'viicú yā 'yā. ⁸Maaⁿ ní 'iiⁿ'yāⁿ Leví chi ita'á yā chi ndiichí parte yeⁿ'e nducuéⁿ'ē chi vεε yeⁿ'e yú, ní 'iiⁿ'yāⁿ chí caⁿ'á yā 'cuūvi yā. Naati canéé nguūⁿ na libro yeⁿ'é Dendyuūs 'tíicā chi chiiduú ch'εεε ca Melquisedec chí sta'á yā ndiichi parte yeⁿ'é 'iiⁿ'yāⁿ ní nguéé ngaⁿ'ā chí n'díi yā. ⁹Ní chuū ní neⁿ'e caaⁿ'māⁿ chí taachi Abraham ca'á yā ndiichi parte yeⁿ'é yā chiiduú ch'εεε ca Melquisedec, maaⁿ tiempo nūuⁿ 'iiⁿ'yāⁿ yeⁿ'e Leví chí yeⁿ'ē ndaata Abraham ní 'iiⁿ'yāⁿ chí sta'á yā ntúūⁿ chí ndiichi parte yeⁿ'é yā. 'Tiicá ntúūⁿ ca'a yā chí ndiichi parte yeⁿ'é yā chiiduú ch'εεε ca Melquisedec. ¹⁰Ní 'áará chí saⁿ'ā Leví miiⁿ 'āā cuéé 'cuundiyaāⁿ sa, Abraham miiⁿ díiⁿ yā chuū cááⁿvā 'iiⁿ'yāⁿ yeⁿ'é yā chí 'āā cuéé 'cuundiyaāⁿ yā taachi ndaācā sa chiiduú ch'εεε ca Melquisedec cuaaⁿ na yúúⁿí, ní ca'á yā chí ndiichi parte miiⁿ.

¹¹Maaⁿ ní 'iiⁿ'yāⁿ s'eeⁿ yeⁿ'e ndaata Israel sta'á yā ley yeⁿ'é yā yeⁿ'ē chiiduú s'eeⁿ chí yeⁿ'ē ndaata Leví. Ní 'iiⁿ'yāⁿ Leví s'eeⁿ ní yeⁿ'e ndaata Aarón. Ní nduuti chí 'iiⁿ'yāⁿ Leví s'eeⁿ cuuvi díiⁿ yā chí nducyaaca 'iiⁿ'yāⁿ cuuvi 'cuεetinée n'daaca yā ní nguéé nuuⁿ'ndi yeⁿ'é yā, 'de'ē cááⁿvā chí neⁿ'é yā táámá

chiiduú ch'ēete ca chí 'āā vi'í cā ní nguée ye"ē ndaata chiiduú Aaron? Naati tan'dúúcā chiiduú ch'ēete ca Melquisedec, 'tiicá yā. ¹²Caati naachi n'daa" yā chiiduú ch'ēete ca ye"ē táámá ndaata ye"e 'ii"yā" Israel 'tiicá ntúū" canee chi n'daa yā ley. ¹³Ná libro ye"é Ndyuūs 'tíicā canéé nguū" ye"e Señor ye"e yú. Señor ní ye"ē táámá 'ii"yā" chi nguée dí" yā ntii"nyu" ye"e chiiduú chi dí" ntii"nyu" ye"ē nátai naachi 'caa"nú" yā 'iiti cáávā ye"e ofrenda ye"e Ndyuūs. ¹⁴Nducyaaca 'ii"yā" ní déenu yā chi Señor Jesucristo ye"ē yú ch'iindiyāa" yā ye"ē 'ii"yā" ye"e Judá. Ní Moisés nguée nga"á yā dē'ē vee ye"e 'ii"yā" ye"e Judá taachi cā"á yā ye"e chiiduú ye"e ndaata ye"é yā.

¹⁵Ní neené cuaacu ca canee taachi ndaa táámá chiiduú chí tan'dúúcā chiiduú ch'ēete ca Melquisedec, 'tíicā yā. ¹⁶Ní táámá chiiduú mii" nguée dí" yā ntii"nyu" ye"ē chiiduú cáávā ley chi nga"á chi chiiduú mii" canee chi cuuvi ye"e 'ii"yā" ye"e ndaata ye"e chiiduú. Naati táámá chiiduú mii" dí" yā ntii"nyu" ye"ē chiiduú cáávā chi véé vida cue"e daā"ma" ye"é yā ní véé poder ye"é yā. ¹⁷'Tíicā canee nguū" na libro ye"é Ndyuūs naachi Ndyuūs nga"á yā ye"e yā 'tíicā:

Dí" ní 'áámá chiiduú chi cué"é daā"ma" 'áámá cūnee na ntii"nyu". Tan'dúúcā chiiduú ch'ēete ca Melquisedec 'tiicá nī. ¹⁸Maa" ní ley ye"e Moisés ní nguée ley ye"ē maa" caati nguée dichí'vē. ¹⁹Ley ye"e Moisés nguée cuuvi dí" chi 'ii"yā" 'cuēetinée n'daaca yā

chi nguée nuu"ndi ye"é yā. Naati maa" ná lugar ye"ē ley mii" véé 'viich'etífínū" chi n'daacā ca chi cuuvi ye"ē yú chi Ndyuūs tee yā s'uúú". Ní cáávā chuū ndaa yú nanáá" Ndyuūs.

²⁰Ní Ndyuūs, cáávā chi duuchi maá" yā, ca"á yā chi dí" yā chi Jesucristo chiiduú ch'ēete ca. Taná"ā ca chiiduú dí" yā ntii"nyu" tan'dúúcā chi nga"á reglas ye"e 'ii"yā" nguée cáávā mar 'áámá nombre ye"é Ndyuūs. Naati ye"ē táámá chiiduú ch'ēete ca chi Jesucristo, Ndyuūs nga"á yā ye"e Jesucristo ndúúcū chi duuchi maá" yā chi canéé yā 'áámá chiiduú ch'ēete ca. ²¹'Tíicā canéé nguū" na libro ye"é Ndyuūs naachi Ndyuūs nga"á yā ye"ē taama yā:

Señor Ndyuūs nga"á yā ndúúcū chi duuchi maá" yā ní nguée n'daa" yā chi nga"á yā. Dí" ní cué"é daā"ma" canéé dí" chi dí" ní 'áámá chiiduú dí" tan'dúúcā chiiduú ch'ēete ca Melquisedec 'tíicā di. ²²Maa" ní cucáávā chi Ndyuūs dí" yā chuū, Jesús ní dí" yā chi seguro canee compromiso ye"é Ndyuūs. Ní n'daacā ca nguée ti chi vmnáá" vmnaa" chi ye"é 'ii"yā" s'ee". ²³'Tiicá dendú'ū neené 'yaa" chiiduú vee naati nguée ch'ēetinée yā ndúúcū ntii"nyu" caati ch'ii yā. ²⁴Naati Jesucristo mii" nguée ch'ii yā ti 'áámá canee yā. Ní nguée ca'á yā táámá 'ii"yā" ntii"nyu" chi ye"é yā. ²⁵Maa" ní Jesucristo cuuvi nadanguá"ai yā cue"e

daaⁿmaⁿ nducyáácá 'iⁿyāⁿ
 chi ndaa yā nanááⁿ Ndyuūs
 cáávā Jesucristo miⁿ. Nífcú
 Jesucristo miⁿ canduuchí
 yā cueⁿe daaⁿmaⁿ ní
 ngaⁿangua^a yā cáávā 'iⁿyāⁿ
 s'eeⁿ chi yeⁿ'é yā.

²⁶Tífcā Jesús miⁿ ní chiiduú
 ch'ēete ca chi itée yā necesidades
 yeⁿ'e yú. Ní dēēve yā. Ní nguée díⁿ
 yā cosas chi nguée n'daacā. Ní
 nguée díⁿ yā mar 'áámá nuuⁿndi.
 Jesucristo miⁿ 'āā v'í ca yā yeⁿ'e
 'iⁿyāⁿ chi dinuuⁿndí yā. Ní cueⁿ'é
 yā yaācu cá nguée tí nanguuvi.
²⁷Ní Jesucristo chi chiiduú
 ch'ēete ca nguée canée chí díⁿ yā
 tan'dúúcā tanáⁿ'ā chiiduú n'gēete
 ca chi 'caaⁿnúⁿ yā 'iiti nguuvi
 nguuvi cáávā nuuⁿndi yeⁿ'e maáⁿ
 yā ní cuayiivi cáávā nuuⁿndi yeⁿ'e
 tanáⁿ'ā ca 'iⁿyāⁿ. Jesús miⁿ 'áámá
 vmnéⁿ'ēe díⁿ yā chuū taachi nca'a
 vida yeⁿ'e maáⁿ yā taachi ch'iⁿ yā
 cáávā nuuⁿndi yeⁿ'e yú. ²⁸Cáávā ley
 yeⁿ'e Moisés 'iⁿyāⁿ i'néeⁿ yā chiiduú
 n'gēete ca chi 'iⁿyāⁿ chi vée nuuⁿndi
 yeⁿ'é yā. Chó'oo 'naaⁿ tiempo ní
 cuayiivi ní Ndyuūs ngaⁿ'á yā cáávā
 chi duuchi maáⁿ yā chi daiyá yā ní
 chiiduú ch'ēete ca chi díⁿ yā chiⁿ
 chi Ndyuūs neⁿ'é yā chi díⁿ yā. Ní
 'áámá cūnee yā cueⁿ'e daaⁿmaⁿ.

Jesucristo ní abogado yeⁿ'e táámá compromiso

8 Chuū chi caⁿ'a 'nū ní ch'ēete
 ca yeⁿ'e tanducuéⁿ'ē chi ngaⁿ'á
 'nū chi 'tífcā. Chiiduú ch'ēete ca
 yeⁿ'e yú chi Jesucristo ní vée yā ná
 va'ai cheeti nguuví na lado yeⁿ'e
 honor yeⁿ'e trono yeⁿ'é Ndyuūs chí
 canée na va'ai cheeti nguuví. ²Ní

Jesucristo díⁿ yā ntiiⁿnyuⁿ yeⁿ'ē
 chiiduú ch'ēete ca na yaācū na
 va'ai ch'ēete nguuví chi cuaacu
 níⁿnyúⁿ chí yeⁿ'é Ndyuūs. Ní 'iⁿyāⁿ
 s'eeⁿ nguée din'dái yā yaācū miⁿ ti
 Señor Jesucristo maáⁿ yā din'dái yā.
³'Iⁿyāⁿ s'neéⁿ yā ca'áámá cā'aama
 chiiduú ch'ēete ca chi canée chí
 ca'á yā ofrenda ní 'caaⁿnúⁿ yā 'iiti
 cáávā nuuⁿndi yeⁿ'é 'iⁿyāⁿ. Cáávā
 chuū Jesucristo canée chi vée yeⁿ'é
 yā chi cuuví ca'a yā chi vida yeⁿ'e
 maáⁿ yā. ⁴Ní ndúútí chi Cristo
 miⁿ cunée yā iⁿ'yeeⁿdí 'cūū nguée
 cuuvi chiidúú yā caati vée chiiduú
 s'eeⁿ chi nga'a yā ofrendas nanááⁿ
 Ndyuūs tan'dúúcā chi ngaⁿ'a ley
 yeⁿ'e Moisés. ⁵Ní chiiduú s'eeⁿ ní
 díⁿ yā ntiiⁿnyuⁿ yeⁿ'é yā ní díⁿ yā
 tan'dúúcā ntiiⁿnyuⁿ yeⁿ'e yaācū chi
 canée na va'ai ch'ēeti nguuví. Deenú
 'nū chi díⁿ yā copiar ntiiⁿnyuⁿ yeⁿ'é
 Ndyuūs ti taachi Moisés neⁿ'é yā
 din'dái yā yaācū chi va'ai tínūuⁿ,
 Ndyuūs caⁿ'a yā chíi yā Moisés ní
 ngaⁿ'a yā:

Dii, Moisés, candée nī cuidado
 yeⁿ'ē tanducuéⁿ'ē chi díⁿ di.
 Ní díⁿ di tan'dúúcā chi chíⁿ'í
 díi taachi canee di na cuéétí.
⁶Naati Cristo chi chiiduú
 ch'ēete ca yeⁿ'e yú díⁿ yā
 ntiiⁿnyuⁿ chí ch'ēete taavi ca
 nguée ti yeⁿ'e chiiduú n'gēete ca
 yeⁿ'ē iⁿ'yeeⁿdí 'cūū caati Ndyuūs
 díⁿ yā compromiso chi Cristo
 canée yā naavtaⁿ'ā yeⁿ'e 'iⁿyāⁿ
 yeⁿ'e iⁿ'yeeⁿdí 'cūū ndúúcū
 Ndyuūs. Maaⁿ ní s'uuúⁿ cuuvi
 ndaa yú nanááⁿ Ndyuūs cáávā
 Cristo miⁿ. Ní compromiso miⁿ
 ní ch'ēete ca tí yeⁿ'e tanducuéⁿ'ē
 chi n'daacā taavi ca.

⁷Ní nduuti chí compromiso chi vmnááⁿ vmnaaⁿ chi yeⁿé Ndyuūs ní n'daacā taavi ca tuu'mi ní nguée canee chi díⁿ yā ndiichí ndii 'úúví compromiso. ⁸Naati Ndyuūs n'diichi yā chi nguée n'daacā díⁿ 'iiⁿyāⁿ tiempo chi 'āā chó'oo. Ní ngaⁿá yā ngii yā 'iiⁿyāⁿ s'eeⁿ tan'dúúćā chi canée nguūⁿ na libro yeⁿé yā 'tííćā:

'Tííćā ngaⁿa Señor: Tiempo chi cuchii 'úú ní díⁿ 'áámá compromiso ngaī ndúúćū 'iiⁿyāⁿ yeⁿe ndaata Israel ní ndúúćū 'iiⁿyāⁿ yeⁿe ndaata Judá.

⁹Nguēē idiíⁿ tan'dúúćā chi díⁿ ndúúćū chiidá yā taachi diví 'iiⁿyāⁿ yeⁿe yāⁿāa Egipto. 'Iiⁿyāⁿ s'uuⁿ nguée díⁿ yā tan'dúúćā chi 'úú yaa'ví 'iiⁿyāⁿ s'uuⁿ. Ní cáāvā chuū nguée díⁿ cuenta yeⁿé yā.

¹⁰Cuayiivi chi chó'oo nguuvi s'eeⁿ ní maaⁿ ní chuū chi compromiso ngaī chi caⁿá díⁿ ndúúćū 'iiⁿyāⁿ yeⁿe nación Israel. Ngaⁿa Señor: Cu'neéⁿ leyes yeⁿé na vaanicadíínnūⁿ yeⁿé yā ní dinguúⁿ leyes yeⁿé na staava yeⁿé yā. Ní 'úú cuuvi Ndyuūs yeⁿé yā, ní 'iiⁿyāⁿ s'eeⁿ cuuvi 'iiⁿyāⁿ yeⁿé.

¹¹Ní mar 'áámá yā canee chi ca'cueéⁿ yā 'iiⁿyāⁿ yeⁿe nación yeⁿé yā 'tííćā. Ndís'tii n'diichí nī Señor miiⁿ, caati nducyááćā yā ní n'diichí yā 'úú ndíí 'iiⁿyāⁿ chi ngaⁿā ntiíⁿnyúⁿ yā ndii taná'ā 'iiⁿyāⁿ.

¹²Ní 'úú ní nadach'ēćú nuuⁿndi chí díⁿ yā ní 'āā ntée nn'gaacú nuuⁿndi yeⁿé yā. ¹³Ní Ndyuūs ngaⁿa yā yeⁿé compromiso

chi ngai ti caati compromiso chí vmnááⁿ vmnaaⁿ ní 'āā ndiicúū tuu'mi ní deenu yú chí dendú'ū chí 'āā ndiicúū ní 'āā nuúⁿ 'cuiinu.

Yeⁿe yáacū na iⁿyeeⁿdí 'cūū ní yeⁿé yáacū na va'ai cheeti nguuvi

9 Cuáácú chí vée reglas yeⁿe compromiso chí vmnááⁿ vmnaaⁿ ndúúćū yaacū chí 'iiⁿyāⁿ s'eeⁿ din'dái yā naachi dich'ēte yā Ndyuūs. ²Din'dái yā yaacū yeⁿe tíínnūⁿ ndúúćū 'uuví cuartos. Cuarto chí vmnááⁿ vmnaaⁿ ní nguuvi Lugar Dēēve. Ní cheeti cuarto miiⁿ vée 'áámá candelero ndúúćū 'áámá mesa, ní vmnaaⁿ mesa vée pan chí ofrenda yeⁿé Ndyuūs. ³Ná cuarto chí yaānnūⁿ táámá lado yeⁿe cortina yeⁿe tíínnūⁿ nguuvi Lugar Dēēve N'dai Ca Yeⁿé Ndyuūs. ⁴Na cuarto miiⁿ vée 'áámá nátaī yeⁿe 'diiⁿnguāaⁿ naachi chiiduú ch'ēte ca ngíⁿí yā cúⁿúyaa. Ní míⁿ canée 'áámá caja chí yeⁿé compromiso. Nducuéⁿē lados yeⁿe caja miiⁿ ní candúū 'diiⁿnguāaⁿ vmnááⁿ yeⁿé. Cheeti caja miiⁿ vée chííťe yeⁿé 'diiⁿnguāaⁿ ní miiⁿ snúūⁿ pan chí nguuvi maná. Ní cheeti caja ntúūⁿ canée nduucu chí nanguaaⁿnu chí yeⁿe Aarón ndúúćū 'úúví tablas yeⁿé tuūu naachi canée nguūⁿ ley chí díⁿ Ndyuūs. ⁵Vmnaaⁿ caja miiⁿ canée 'uūví querubines tan'dúúćā ángeles ndúúćū ngēchí yā. Ní miiⁿ Ndyuūs canée yā. Ní canée 'cutií yeⁿe ngēchí yā yeⁿé vmnaaⁿ cuaaⁿ naachi Ndyuūs nadich'ēćú yā nuuⁿndi yeⁿé nducyaaca 'iiⁿyāⁿ. Maaⁿ ní yeⁿé chuū nguée cuuvi caaⁿ máⁿ yeⁿé tanducuéⁿē maaⁿ.

⁶'Tíicā chiiduú s'eeⁿ idiíⁿ yā nducuéⁿē. Nguuvi nguuvi chiiduú s'eeⁿ ngéⁿe yā na cuarto vmnááⁿ vmnaaⁿ ní dííⁿ yā ntiiⁿnyuⁿ yeⁿé yaācū yeⁿé Ndyuūs. ⁷Ní na cuarto chi yaānūuⁿ miiⁿ chi ndii 'úúví dāmaāⁿ chiiduú ch'etete ca indaá yā 'áámá vmneⁿéé nūuⁿ ca'áámá ca'áámá nduuyū. Ní canéé chí candéé yā yuūúⁿ yeⁿe 'iiti chi ca'a yā ofrenda Ndyuūs cáávā nuuⁿndi yeⁿé yā ní cáávā nuuⁿndi yeⁿé tanáⁿā 'iiⁿyāⁿ. ⁸Espíritu N'dai yeⁿé Ndyuūs chíⁿí yā s'uúúⁿ chi nguée cuuvi ndaa yú nanááⁿ Ndyuūs néⁿé chi canéé yaācū yeⁿe tíínūuⁿ caati yaacu tíínūuⁿ miiⁿ ní yeⁿe compromiso chi vmnááⁿ vmnaaⁿ. ⁹Ní nducuéⁿē chuū chi dííⁿ chiiduú s'eeⁿ ní canee tan'dúúicā 'áámá ejemplo yeⁿé tiempo yeⁿe yú. Chiiduú s'eeⁿ ní ca'a yā ofrendas nanááⁿ Ndyuūs ndúúcu 'iiti chí n'giiⁿnúⁿ yā cáávā ofrendas yeⁿé nuuⁿndi yeⁿé yā. Chuū ní neⁿē caaⁿmaⁿ chí ofrendas ndúúcu 'iiti chí n'giiⁿnúⁿ yā ní ca'a yā Ndyuūs nguée cuuvi diiⁿ chí staava yeⁿe 'iiⁿyāⁿ s'eeⁿ ní dēēve neⁿe chí 'tíicā chí nga'a yā ofrendas nanááⁿ Ndyuūs. ¹⁰'Iiⁿyāⁿ s'eeⁿ dich'etete yā Ndyuūs dāmaāⁿ ndúúcu cosas chí che'é yā ndúúcu cosas chí cu'u yā ndúúcu chiiⁿ chí dííⁿ yā chí cuuvi dēēvé yā staava yeⁿé yā. Nducuéⁿē chuū ní reglas chí dííⁿ yā ní canee chí dííⁿ yā 'tíicā ndii tiempo chí Ndyuūs n'daaⁿ yā dendu'ū yeⁿē.

¹¹Cristo ní 'āā ndāa yā iⁿ'yeeⁿdí 'cūū. Ní maaⁿ ní Cristo miiⁿ ní chiiduú ch'etete ca yeⁿe dendu'ū chí n'dai taavi ca. Ní yaācū naachi Cristo dííⁿ yā ntiiⁿnyuⁿ ní ch'etete

taavi ca ní n'daacā ca nguée ti yaācū yeⁿe tíínūuⁿ chí yeⁿé iⁿ'yeeⁿdí 'cūū. Ní 'iiⁿyāⁿ s'eeⁿ nguée n'dái yā yaācū chí ch'etete ca. ¹²Ní Cristo ndāa yā ch'eteti yāacū ndíí cuarto yaānūuⁿ chí nguuvi Lugar Dēēve N'dai Ca Yeⁿé Ndyuūs. Nguée sndéé yā ndúúcu yuuúⁿ yeⁿe 'iiti chí chivo o daiyā vaca chí n'giiⁿnuⁿ yā naati ndúúcu yuuúⁿ yeⁿe maāⁿ yā. Ní 'tíicā sndāa yā dāmaāⁿ 'aama vmneⁿēē na Lugar Dēēve N'dai Ca Yeⁿé Ndyuūs cáávā nducyaaca 'iiⁿyāⁿ. Ní maaⁿ ní nadanguáⁿai yā s'uúúⁿ chí cuuvi yeⁿé yā s'uúúⁿ cueⁿe daāⁿmaⁿ. ¹³Cuáácú chí yuūuⁿ yeⁿe itiindu ndúúcu yuūuⁿ yeⁿe chí chivo ndúúcu yaiyāā yeⁿe daiya vaca chí 'āā ngiichi vmnaaⁿ nátaí ní chiiduú s'eeⁿ ch'eeⁿ ndái yā vmnaaⁿ 'iiⁿyāⁿ chí véé nuuⁿndi yeⁿé yā ti yuūúⁿ cuuvi nadiveēve 'iiⁿyāⁿ cáávā ley yeⁿé yā. ¹⁴Ní chuū ní cuaacu. Maaⁿ ní nééné n'daacā ca chí cuuvi diiⁿ yuūúⁿ yeⁿe Cristo nguée ti yuūúⁿ yeⁿé 'iiti. Cucáávā Espiritu N'dai yeⁿé Ndyuūs chí canduuchi cueⁿé daāⁿmaⁿ, Cristo dííⁿ yā ofrecer cuerpo yeⁿe maāⁿ yā chí 'iiⁿyāⁿ s'eeⁿ 'caaⁿnúⁿ yā yā cáávā ofrenda yeⁿé Ndyuūs, ofrenda chí n'daacā yeⁿē. Ní yuūúⁿ yeⁿe Cristo ní cuuvi didēēve staava yeⁿē yú yeⁿe nducuéⁿē chí nadacadíínuuⁿ yú chí nguée n'daacā. Ní 'íicú cuuvi s'uúúⁿ ní dichí'vē yú Ndyuūs chí canduuchi.

¹⁵Cáávā chí Jesucristo dííⁿ yā 'áámá compromiso chí ngai, Jesucristo canéé yā naavtáⁿā yeⁿe 'iiⁿyāⁿ yeⁿe iⁿ'yeeⁿdí 'cūū ndúúcu Ndyuūs. Ní maaⁿ ní cuuvi ndaa yú nanááⁿ Ndyuūs. Ní cáávā

chi ch'iī Cristo, Cristo ní cuuvi nadach'εεcú yā nuu"ndi ye"e 'ii"yā" chi cuneé yā máá"n compromiso chi vmnáá" vmnaa". Ní 'ii"yā" chi Ndyuūs yaa'ví yā chi cuuvi ye"é yā, 'ii"yā" s'ee" cuuvi cuta'a yā chi cuuvi ye"é yā chi 'áámá cūnee chi Ndyuūs ca'á yā 'ii"yā" cucáávā Cristo. ¹⁶Taachí 'ii"yā" s'nee" yā escrito ye"e herencia ye"é yā chi ca"n'a yā ca'a yā taamá yā, 'ii"yā" mii"n canee chi 'cuūvi yā vmnáá" vmnaa" chi dichí'vē chii"n chi canéé nguū". Chuū ní tan'dúúcā 'áámá compromiso chi dí'f yā. ¹⁷'ii"yā" chi s'nee" escrito ye"e herencia ye"é yā chi ca"á yā ca'a yā taama yā, nguéé dichí'vē escrito ye"é yā ne"e tiempo chi canduuchí yā. Naati taachi 'āā n'dii yā tuu'mi ní dichí'vē chuū. Ní tan'dúúcā 'áámá compromiso chi dí'f yā 'tíicā escrito mii". ¹⁸Ní 'tíicā chí'f chi dichí'vē compromiso chi dí'f Ndyuūs vmnáá" vmnaa" nduuti chi chéé yuūú" ti ch'i'nnú" yā 'iiti. ¹⁹Moisés ca"n'a sa chii sá nducyaaca mandamiento ye"e ley. Cuayiivi ní 'ii"yā" caa"nú" yā 'iiti ní Moisés sta'a sa yuūú" ye"e daiya vaca ndúúcū yuūú" ye"e chivo ní ndásta"n'a sa nuū"nī" ndúúcū yuūú". Cuayiivi ní sta'á sa yuūú" ndúúcū duūdū 'iití cuūchī ndúúcū 'áámá yaatā chi duuchi hisopo. Ní s'neé" yā yuūú" vmnaa" libro ye"e ley ní vmnaa" ye"e nducyaaca 'ii"yā" dendú'ū. ²⁰Ní nga"á Moisés 'tíicā: Chuū ní yuūú" chi 'áámá sello ye"e chí cuuví cuaacu compromiso chi Ndyuūs ca'a yā orden chi ndís'tiī canee chi dí'f nī 'tíicā. ²¹'Tiicā ntúū" Moisés s'nee" sa yuūú" mii" vmnaa" ye"e

yaācū ye"e tínnū" ní vmnaa" ye"e tanducué"ē dendu'ū chí itunee" na nti"nyu" ye"é Ndyuūs. ²²Cuaacu chi tan'dúúcā chi nga"ā ley 'téé 'téé nguéé nducué"ē ní yuūú" dii"n chi canéé dēēve nducué"ē. Ní Ndyuūs nguéé nadich'εεcú yā 'ii"yā" ye"e nuu"ndi ye"é yā nduuti chi nguéé ndúúcū yuūú" ye"e 'iiti chi 'caa"nú" chiiduú s'ee".

**Jesucristo ca'á yā maa" cuerpo
ye"é yā chi 'ii"yā" s'ee" 'caa"nú"
yā 'yā lado ye"e ofrenda**

²³'Tíicā nducué"ē dendú'ū ye"e i"yee"dí 'cūū canéé chi ndúúvī dēēve ndúúcū yuūú" ye"e 'iiti. 'Téé 'téé nduuvī dēēve tan'dúúcā dēēve na va'ai chēeti nguuvī. 'Tiicā ntúū" cuuvi ndaa yú na va'ai chēeti nguuvī nduuti chi dēēve yú ndúúcū yuūú" ye"e táámá yā chí Cristo chí ch'ēete taavi ca nguéé ti ndúúcū yuūú" ye"e 'iiti. ²⁴Cristo nguéé cue"é yā sndaa yā na 'áámá yaacū chi dēēve taavi ca chí nín'dái sa"ā ye"e i"yee"dí 'cūū. Yaācū ye"e i"yee"dí 'cūū 'tēé 'téé tan'dúúcā yaācū chí dēēve taavi ca chí cuaacu ní'nyú" chí yaācū ye"é Ndyuūs. Cristo cue"é yā sndaa yā na va'ai chēeti nguuvī ní mii"n canee yā nanáá" Ndyuūs lado ye"e s'uuú". ²⁵Sa"ā chiiduú ch'ēete ca ye"e i"yee"dí 'cūū chí ye"e ndaata judíos chí Israel nduuyu nduuyu ndaá yā na Lugar Dēēve N'dai Ca ndí'f ná yaānū" ye"e yaācū ye"e Ndyuūs ní ca'á yā Ndyuūs ofrenda chí yuūú" ye"e 'iiti, ní nguéé yuūú" ye"é yā chí ca'a yā. Naati Cristo ca'á yā vida ye"e maá"n yā caavā ofrenda 'áámá vmne"éé nūu". ²⁶Nduuti chí Cristo

canee chi díⁿ yā tan'dúúcā chi idiíⁿ
chiiduú ch'ēete ca tuu'mi ní canéé
chi 'cuūvi yā n'deee n'dái cuuvi
ndíí tiempo chi Ndyuūs din'dái
yā iⁿ'yeeⁿdí 'cūū ndíí chi 'cuiīnū
íⁿ'yeeⁿdí. Naati nguée díⁿ Cristo
'tíicā. Caati tiempo chi Ndyuūs
s'neéⁿ yā ní Jesucristo 'áámá
vmneⁿ'ée nūⁿ ch'íi yā ní ndāa yā
nanááⁿ Ndyuūs chi nadach'ēecú
yā nuuⁿndi yeⁿ'ē nducyaaca 'iiⁿ'yāⁿ
cucáávā chi ca'a maáⁿ yā cuerpo
yeⁿ'é yā chi 'iiⁿ'yāⁿ s'eeⁿ n'giiⁿ'núⁿ
yā 'yā cáávā ofrenda. ²⁷Tiicā ntúūⁿ
nducyaaca 'iiⁿ'yāⁿ yeⁿ'e iⁿ'yeeⁿdí
'cūū canee chi 'cuūvi yā 'áámá
vmnéⁿ'ēe. Níicú cuayiivi ní Cristo
caⁿ'á yā n'diichí yā nuuⁿndi yeⁿ'e
'iiⁿ'yāⁿ s'eeⁿ. ²⁸Ní 'tíicā Cristo 'áámá
vmnéⁿ'ēe ca'á yā cuerpo yeⁿ'e maáⁿ
yā cáávā ofrenda chi nadich'ēecú
yā nuuⁿndi yeⁿ'e nducyaaca 'iiⁿ'yāⁿ.
Ní taachi caⁿ'á yā ndaa yā taama
vmnéⁿ'ēe nguée ndaa yā cucáávā
chi caⁿ'á yā nadíí've yā nuuⁿndi
yeⁿ'e nducyaaca 'iiⁿ'yāⁿ. Naati caⁿ'á
yā nadanguáⁿ'ai yā nducyaaca s'uúúⁿ
chi canéé ngiinu yú chi ndaa yā
ndiichi ndii 'úúví cuuvi. Ndaa yā
chi nadanguáⁿ'ai yā s'uúúⁿ.

10 Ní ley yeⁿ'e Moisés ní
tan'dúúcā 'daā'nú nūⁿ 'tíicā
ti nguée 'áámá cūnee. Ní nguée
dáámá dáámá ndúúcu nducuéⁿ'ē
vaadi cuaacu chi n'daacā chi cuchii.
Ti cáávā chi ngaⁿ'a ley miiⁿ 'iiⁿ'yāⁿ
s'eeⁿ nduuyu nduuyu 'caaⁿ'núⁿ yā
'iiti cáávā ofrenda cucáávā nuuⁿndi
yeⁿ'é yā. Ní cáávā chuū, 'táácā
cuuvi ley miiⁿ diiⁿ chi 'iiⁿ'yāⁿ s'eeⁿ
canéé n'daaca yā nanááⁿ Ndyuūs?
²Ti nduuti chi ley miiⁿ diiⁿ chi
'iiⁿ'yāⁿ s'eeⁿ canee n'daaca yā nanááⁿ

Ndyuūs ní nguée nuuⁿndi yeⁿ'é
yā nanááⁿ Ndyuūs, tuu'mi ní 'āā
ntéeⁿ 'caaⁿ'núⁿ yā 'iiti cáávā nuuⁿndi
yeⁿ'é yā. Ní nguée nadacadífnuuⁿ yā
yeⁿ'e chí chideevé yā yeⁿ'e nuuⁿndi
yeⁿ'é yā. ³Ní 'tíicā diiⁿ ley miiⁿ.
Taachi n'giiⁿ'núⁿ yā 'iiti nduuyu
nduuyu tuu'mi ní nan'gáácú yā
yeⁿ'e nuuⁿndi yeⁿ'é yā. ⁴Ti ndúúcu
yuúúⁿ yeⁿ'e 'itííndú ndúúcu yuúúⁿ
yeⁿ'e chivo 'iiⁿ'yāⁿ s'eeⁿ nguée cuuvi
dideevé yā yeⁿ'e nuuⁿndi yeⁿ'é yā.

⁵Ní cucáávā chuū taachi ndaá
Cristo na iⁿ'yeeⁿdí 'cūū ngaⁿ'á yā
ngii yā yeⁿ'e nduudu yeⁿ'é Ndyuūs
chi canéé nguūⁿ 'tíicā:

Díí, Ndyuūs, nguée neⁿ'e di chi
'iiⁿ'yāⁿ 'caaⁿ'nuⁿ yā 'iiti lado
yeⁿ'e ofrenda ndíí nguée ndúú
chi ca'á yā 'iiti cáávā ofrenda
yeⁿ'e di naati din'dái di 'áámá
cuerpo yeⁿ'é chi ch'iindiyaáⁿ.

⁶Ní nguée neⁿ'e di ofrendas
yeⁿ'e chi nguuchí yā cuerpo
yeⁿ'e 'iiti nátaí, ní nguée yeⁿ'e
chi 'caaⁿ'núⁿ yā 'iiti cáávā
chi Ndyuūs nadach'ēecú yā
nuuⁿndi yeⁿ'é yā.

⁷Dii Ndyuūs, 'úú ndaá iⁿ'yeeⁿdí
'cūū chi cuuvi díⁿ chēē chi
neⁿ'e di chi díⁿ caati 'tíicā
canéé nguūⁿ yeⁿ'e 'úú na libro
yeⁿ'e Ndyuūs naachi canéé
nguūⁿ ley. ⁸Vmnááⁿ vmnaaⁿ
ngaⁿ'a Cristo: Dii Ndyuūs
nguée neⁿ'e di ní nguée
yeenú di ndúúcu ofrendas
yeⁿ'e chi n'giiⁿ'núⁿ yā 'iiti, ní
nguée yeⁿ'e 'iiti chi tee yā
dii. Ndíí nguée ndúú yeⁿ'e chi
n'giiⁿ'núⁿ yā 'iiti ní ngiichí
yā yuútē yeⁿ'e 'iiti cáávā
chi nadach'ēecu di nuuⁿndi

yeⁿé yā. 'Tíicā ngaⁿa Cristo 'áará chí 'iiⁿyāⁿ s'eeⁿ dííⁿ yā tan'dúucā chí ngaⁿa ley miíⁿ yeⁿé ofrenda chí canéé chí ca'á yā Ndyuūs. ⁹Ní cuayiivi ngaⁿá Cristo: Dii, Ndyuūs, 'úú ndaá na iⁿyeeⁿdí 'cūū chí cuuvi dííⁿ chēē chí neⁿe dí chí dííⁿ. Maaⁿ ní nducuéⁿē chuū neⁿe caaⁿmaⁿ 'tíicā. Ndyuūs diví yā 'áámá lado ofrenda yeⁿe 'iiti chí 'iiⁿyāⁿ s'eeⁿ ch'iiⁿnúⁿ yā. Ní na lugar yeⁿe ofrenda miíⁿ Ndyuūs ca'á yā Cristo chí ch'ii yā. ¹⁰Maaⁿ ní Ndyuūs didēē yā s'uuúⁿ cáávā Jesucristo dííⁿ yā nducuéⁿē chí Ndyuūs neⁿé yā chí diiⁿ yā. Ní 'áámá vmnéⁿee nūuⁿ Jesucristo ca'á yā cuerpo yeⁿe maáⁿ yā cáávā ofrenda chí 'iiⁿyāⁿ s'eeⁿ n'giiⁿnúⁿ yā 'yā cáávā nuuⁿndi yeⁿe nducyáácá 'iiⁿyāⁿ.

¹¹Ca'áámá cā'aama chiidūú judío chí Israel nguuví nguuví dííⁿ yā ntiiⁿnyuⁿ ní cheendii yā ní ngá'á yā ofrenda dáámá daama nūuⁿ nééné n'dēē cuuví 'áará chí ofrenda miíⁿ chí n'giiⁿnúⁿ yā 'iiti nguéé cuuvi diví nuuⁿndi yeⁿe 'iiⁿyāⁿ mar 'áámá vmnéⁿee. ¹²Naati Jesucristo 'áámá vmnéⁿee nūuⁿ ca'á yā maaⁿ cuerpo yeⁿé yā chí 'iiⁿyāⁿ s'eeⁿ n'giiⁿnúⁿ yā 'yā caavā ofrenda yeⁿe nuuⁿndi yeⁿe nducyáácú 'iiⁿyāⁿ. Ní cuayiivi cueⁿé yā na va'ai chēeti nguuví ní ch'iindí yā na lado yeⁿe honor yeⁿé Ndyuūs chí lado tá cuaacu. ¹³Maaⁿ ní Jesucristo canee ngiinú yā chí ndaa tiempo chí Ndyuūs idííⁿ yā chí nducyaaca 'iiⁿyāⁿ chí contra yeⁿé yā canéé

yā maaⁿ ca'á Jesucristo tan'dúucā chí 'áámá banco 'lííⁿ 'tiicá yā chí Jesucristo cuchēē yā yeⁿe yā. ¹⁴Ní cáávā chí Cristo ca'á yā cuerpo yeⁿe maáⁿ yā chí 'iiⁿyāⁿ s'eeⁿ n'giiⁿnúⁿ yā 'yā 'áámá vmnéⁿee nūuⁿ cáávā ofrenda tuu'mi ní Cristo dííⁿ yā chí dáámá cuuvi dēē yā 'iiⁿyāⁿ ti nadach'ēecú yā nuuⁿndi yeⁿé yā. Ní 'iiⁿyāⁿ s'eeⁿ ní yeⁿe Ndyuūs cueⁿe daaⁿmaⁿ. ¹⁵Ní Espíritu N'dai yeⁿé Ndyuūs ngaⁿa ndúucu yú chí nducuéⁿē chuū ní cuaacu. Vmnááⁿ vmnaaⁿ ngaⁿa Ndyuūs chuū:

¹⁶Chuū chí dííⁿ prometer chí dííⁿ caavā yā cuayiivi chí ch'óo nguuví s'eeⁿ, ngaⁿa Ndyuūs. Cu'neéⁿ ley yeⁿé na staava yeⁿé yā. Ní dinguúⁿ ley yeⁿé na vaanicadínūuⁿ yeⁿé yā.

¹⁷Ní cuayiivi ngaⁿá yā:

'Āā ntéé nan'gaacú nuuⁿndi yeⁿé yā ní nguéé nducuéⁿē chí dííⁿ yā chí nguéé n'daacā. ¹⁸Níicú taachi Ndyuūs nadich'ēecú yā nuuⁿndi yeⁿé 'iiⁿyāⁿ s'eeⁿ tuu'mi ní 'āā ntéé canéé chí ca'á yā ofrendas chí 'caaⁿnúⁿ yā 'iiti cáávā nuuⁿndi yeⁿe yā.

Canéé chí nan'gaacu yú yeⁿe Ndyuūs yeⁿe yú

¹⁹'Tíicā ní hermanos yeⁿé maaⁿ ní cuuvi nandaa yú nanááⁿ Ndyuūs na cuarto chí Dēēve N'dai Ca na yaacū yeⁿé Ndyuūs ti véé 'viich'ēetínūuⁿ yeⁿé yú nanááⁿ Ndyuūs cáávā yuúúⁿ yeⁿe Señor Jesucristo. ²⁰Ní Jesucristo nn'guaaⁿ yā 'áámá yúúní chí n'dai ní canduuchi taachi chíí nteeⁿ yā tীনūuⁿ yeⁿe yaacū. Tীনūuⁿ miíⁿ ní neⁿe caaⁿmaⁿ chí tan'dúucā cuerpo yeⁿe maáⁿ Cristo taachí ch'ii

yā, 'tíicā va. Maaⁿ ní cuuvi ndaa yú na cuarto chi yaānūuⁿ nanááⁿ Ndyuūs caavá yā. ²¹Ní Jesucristo ní chiiduú ch'etete ca yeⁿe yú ní dííⁿ yā ntiiⁿnyuⁿ yeⁿe yaācū yeⁿe Ndyuūs. ²²Maaⁿ ní canée chí indaa yú nanááⁿ Ndyuūs ndúúcu núuⁿmáⁿ staava yeⁿe yú ní 'áámá canee yú ndúúcu chi i'téenu yú. Cristo miiⁿ 'āā didēēv yā staava yeⁿe yú yeⁿe nuuⁿndi yeⁿe yú caati nguée nadacadíínuuⁿ ca yú yeⁿe castigo yeⁿe nuuⁿndi chi diiⁿ yú. Ní nadidēēve yā cuerpo yeⁿe yú ndúúcu nuūⁿnīⁿ dēēve. ²³Maaⁿ ní diiⁿ yú chi 'áámá canee yú ndúúcu chi ngaⁿa yú chi i'téenu yú caati deenu yú chi Ndyuūs caⁿá yā dííⁿ yā cumplir compromiso yeⁿe chi caⁿa yā chi tēe yā s'uuúⁿ. ²⁴Ní s'uuúⁿ canée chí inadícadíínuuⁿ yú táácā cuuvi cunnee yú 'aama yú taama yú ní dineⁿe yú 'aama yú taama yú ní diiⁿ yú denduⁿū chi n'daacā. ²⁵Ní nguée diiⁿ yú chi nguée nduuvídaama yú chēeti yaācū tan'dúúcā chi diiⁿ náⁿa yā. Naati ca'a yú consejo 'aama yú taama yú caati deenu yú chi nguuví chi ndaa Cristo taama vmnéⁿēē 'āā snee niiⁿnuúⁿ.

²⁶Ní nduuti chi idiíⁿ yú nuuⁿndi caati maaⁿ yú neⁿe yú cuayiivi chi 'āā deenu yú nduudu cuaacu yeⁿe Ndyuūs tuuⁿmi ní 'āā ntēē vée taama ofrenda chi cuuvi ca'a yú Ndyuūs cáávā nuuⁿndi yeⁿe yú chi Ndyuūs diví yā nuuⁿndi yeⁿe yú. ²⁷Dámaāⁿ 'va'a yú neⁿe chi cunee ngiinu yú yeⁿe chi cuchii. Cristo caⁿá yā n'diichi yā nuuⁿndi yeⁿe yú ní ndúúcu yaⁿā ingiichi chi cuucu tanducuéⁿē 'iiⁿyāⁿ chi contra yeⁿe

Ndyuūs. ²⁸Deenu yú yeⁿe 'iiⁿyāⁿ chi nguée dííⁿ yā cuenta yeⁿe ley yeⁿe Moisés. Nduuti chi vée 'uuvi o 'iinū 'iiⁿyāⁿ chi ngaⁿā nduudu cuaacu yeⁿe falta yeⁿe yā tuuⁿmi ní ch'ii 'iiⁿyāⁿ miiⁿ. Ní nguée ya'ai 'iiⁿyāⁿ s'eeⁿ taachi ch'ii yā.

²⁹Maaⁿ ní nadacadíínuuⁿ yú yeⁿe 'iiⁿyāⁿ s'eeⁿ chi nguée dííⁿ yā cuenta yeⁿe yuúúⁿ yeⁿe Cristo chí cuuví dēēve 'iiⁿyāⁿ s'eeⁿ. 'Iiⁿyāⁿ s'eeⁿ ngaⁿa taāⁿ yā yeⁿe Espíritu N'dai yeⁿe Ndyuūs. ¿Deē chúúca n'dee ca castigo vée yeⁿe 'iiⁿyāⁿ s'eeⁿ?

³⁰Deenu yú chi Señor ní ngaⁿa yā 'tíicā: 'Úú canée chí ca'á castigo 'iiⁿyāⁿ. 'Úú idiíⁿ chi 'iiⁿyāⁿ nadíí've yā chiíⁿ chi dííⁿ yā chi nguée n'daacā. Chuū dendú'ū ngaⁿa Señor miiⁿ: Señor miiⁿ caⁿá yā n'diichi yā nuuⁿndi yeⁿe 'iiⁿyāⁿ yeⁿe yā. ³¹Deē chúúca ya'āi yeⁿe yú. Nééné 'va'a yú chi ndaa yú nanááⁿ Ndyuūs chi cānduuchi chi dííⁿ yā castigar s'uuúⁿ nduuti chi nguée n'daacā idiíⁿ yú.

³²Maaⁿ ní n'gaacú nī yeⁿe nguuví s'eeⁿ chi 'āā chó'oo chi caama n'diichí nī ní s'téenu nī Jesucristo, ní cuayiivi chi chēé nī ch'eenu nī chií yeⁿe tanducuéⁿē denduⁿū cucáávā chi dííⁿ nī luchar yeⁿe chi i'téenu nī. ³³Náⁿa nī ch'eenú nī chií ní 'cuináaⁿ nī taachi 'iiⁿyāⁿ sta'á yā ndís'tii ní ngaⁿa taāⁿ yā yeⁿe ndís'tii ní ch'eⁿe yā ndís'tii nanááⁿ n'dee n'dáí 'iiⁿyāⁿ. Ní taachi 'tíicā dííⁿ yā ndúúcu naⁿā hermanos yeⁿe yú neⁿe nī 'cuenú nī cuuvi nduucú yā. ³⁴Ní taachi náⁿā hermanos ch'eenú yā chií chi canee yā vácūū, ndís'tii ní ya'ái nī hermanos s'eeⁿ. Ní taachí 'iiⁿyāⁿ sta'á yā nducuéⁿē chi vée yeⁿe nī ndís'tii ní chichēē nī

yeⁿe nducuéⁿē. Ní yeenú nī caati deenú nī chí vée chí cuuvi yeⁿé nī chí n'dai taavi ca ná va'ai cheeti nguuví chí cueⁿe daaⁿmaⁿ 'áamá cūnee yeⁿe nī. ³⁵Maaⁿ ní nguée di'vaachí nī ti nguée vée confianza yeⁿé nī ndúucū Ndyuūs caati ndúucū chí i'téenu nī cuuvi dííⁿ nī ganar cosas chí n'daacā taavi ca. ³⁶Ní ndís'tií ní canée chí cuhéé nī yeⁿe nducuéⁿē ní dííⁿ nī nducuéⁿē chí Ndyuūs neⁿé yā chí dííⁿ nī. Ní 'íicú cuuvi cuta'á nī yeⁿe chí vée yeⁿé nī chí Ndyuūs caⁿa yā chí téé yā ndís'tií. ³⁷Canée nguūⁿ na libro yeⁿé Ndyuūs 'tíicā:

'Āā ntée 'nááⁿ tiempo ní Señor chí canée chí ndaa ní ndaa yā. Ní 'āā ntée cuuví 'náaⁿ yā.

³⁸Ní ngaⁿa yā 'tíicā:

'Iiⁿyāⁿ chí yeⁿé ní deevé yā tí i'téenu yā 'úú ní canduuchí yā cueⁿe daaⁿmaⁿ. Ní nduuti chí 'aama yā ndaacadaamí yā yeⁿé tuu'mi ní 'úú nguée yeenú yeⁿe yā. ³⁹Maaⁿ ní s'uuúⁿ ní nguée tan'dúucā 'iiⁿyāⁿ chí ndaacadaamí yā yeⁿe Cristo ní chindai yā. Nguée 'tíicā s'uuúⁿ. S'uuúⁿ ní i'téenu yú Cristo ní Cristo nadanguáⁿai yā s'uuúⁿ.

Yeⁿe chí i'teenu yú Jesucristo

11 Cáávā chí i'teenu yú Ndyuūs deenu yú chí seguro chí cuta'a yú yeⁿē chí canee ngiinu yú. Ní deenu yú chí cuuvi cuaacu yeⁿe dendu'ū chí nguée inaaⁿ yú. ²Ní tiempo chí 'āā chó'oo 'iiⁿyāⁿ ngaⁿá yā chí 'iiⁿyāⁿ chí dííⁿ yā ntiiⁿnyuⁿ yeⁿe Ndyuūs ní n'dáaca yā nanááⁿ Ndyuūs ti i'téenu yā Ndyuūs.

³Ní deenu yú cucáávā chí i'teenu yú Ndyuūs, chí chíiⁿ chí inaaⁿ yú ní cáávā chí Ndyuūs din'dái yā íⁿyeⁿēⁿdí ní nguée de'ē vee.

⁴Ní cáávā chí saⁿā Abel ní i'téenu sa Ndyuūs, ca'a sa 'áamá ofrenda chí n'daacā ca nguée ti saⁿa Caín miiⁿ. Ní Ndyuūs n'diichí yā chí ofrenda yeⁿe Abel miiⁿ ní n'daacā ca ní sta'á yā ofrenda miiⁿ. Ní Ndyuūs n'diichí yā chí Abel ní n'daacā sa. Ní cáávā chí Abel i'téenu sa Ndyuūs 'áará chí chíiⁿ saⁿā miiⁿ ndíí maaⁿ ní ngaⁿa 'iiⁿyāⁿ yeⁿe vaadi i'téenu yeⁿē sa.

⁵Cáávā chí saⁿā Enoc i'téenu sa Ndyuūs, nguée chíiⁿ sa ti Ndyuūs candée yā saⁿā miiⁿ na va'ai cheeti nguuví. 'Iiⁿyāⁿ yeⁿé yā 'āā ntée ndaacā yā saⁿā miiⁿ ti Ndyuūs candée yā saⁿā miiⁿ nduucú yā. Canée nguūⁿ na libro yeⁿe Ndyuūs 'tíicā: Taachi 'āā cuée candée Ndyuūs saⁿā miiⁿ, Ndyuūs canee yiinú yā chí idiíⁿ sa. ⁶Mar 'áamá 'iiⁿyāⁿ nduuti chí nguée i'téenu yā Ndyuūs, Ndyuūs nguée cunee yiinú yā 'iiⁿyāⁿ. Nduuti chí 'iiⁿyāⁿ neⁿé yā ndaa yā nanááⁿ Ndyuūs canee chí cu'téenu yā chí vée Ndyuūs. Ní Ndyuūs caⁿa yā chí ca'a yā chí vée chí cuuvi yeⁿé 'iiⁿyāⁿ chí n'nuúⁿ yā Ndyuūs.

⁷Ní cáávā saⁿā Noé i'téenu sa Ndyuūs ní n'giindiveeⁿ sa nduudu yeⁿe Ndyuūs taachi Ndyuūs yaa'ví yā cosas chí caⁿá yā dííⁿ yā. 'Áará chí nguée inaaⁿ sa cosas miiⁿ n'giindiveeⁿ sa nduudu yeⁿé Ndyuūs ní din'dái sa 'áamá arca chí barco ch'ete ní 'íicú cuuví nanguáⁿāi 'iiⁿyāⁿ yeⁿē sa na vaacú sa. 'Túucā Noé díiⁿ sa condenar 'iiⁿyāⁿ yeⁿe

iⁿ'yeeⁿdí 'cūū caati i'téenu sa Ndyuūs. Ní Ndyuūs didéevé yā Noé chi cuuvi yeⁿ'é yā caati i'téenu sa Ndyuūs.

⁸Ní cáávā saⁿā Abraham i'téenu sa Ndyuūs, ch'iindiveeⁿ sa nduudu yeⁿ'e Ndyuūs taachi Ndyuūs yaa'ví yā Abraham. Ní yaa'ví yā saⁿā chi canéé chí caⁿa sa táámá yáⁿāa chi caⁿa Ndyuūs chi cuuvi yeⁿ'e sa. Ní s'neeⁿ sa yāāⁿ vaacú sa ní cuéⁿ'e sa. Ní nguéé déénu sá tíí ndíí caⁿa sa. ⁹Ní cáávā chi Abraham i'téenu sa Ndyuūs, canee sa na yáⁿāa chi Ndyuūs caⁿa yā chi ca'a yā. Ní miiⁿ canee sa tan'dúúca 'iiⁿ'yā chi canúúⁿ yúúní. Ní canúúⁿ sá va'āi tíínūuⁿ ndúúcu daiya sa chi Isaac ndúúcu Jacob. Ní 'āā daamá nūuⁿ cuuvi yeⁿ'é yā yeⁿ'e chí cuuvi yeⁿ'e Abraham miiⁿ. ¹⁰Abraham miiⁿ ní cūnee ngíínu sa yāāⁿ chi Ndyuūs 'āā din'dái yā tan'dúúca chi Ndyuūs nadacádíínuuⁿ yā. Yāāⁿ miiⁿ chi 'áámá cūnee cimientu yeⁿ'e ní va'ai cheeti nguuví.

¹¹Ní cáávā chi Sara i'téenu tá Ndyuūs, ní ditiínú ca tá chi taavi tá daiya tá. Sta'a tá poder yeⁿ'e Ndyuūs ní ch'iindí daiya tá taachi 'āā ndiicúu ta ti i'téenu tá chi Ndyuūs dííⁿ yā cumplir nduudu chi ngaⁿa yā. ¹²Ní 'tíicā Abraham miiⁿ 'āā ndiicúu ca yā chi cuuvi chiidá yeⁿ'e daiyá yā. Ní n'daataa yeⁿ'é yā chi Sara miiⁿ 'āā ndiicúu ca ntúuⁿ tá. Naati ná 'iiⁿ'yāⁿ yeⁿ'é yā ichii n'deee n'dái 'iiⁿ'yāⁿ tan'dúúca 'íínyúⁿ yeⁿ'e nanguuvi ní tan'dúúca yáⁿāa ndútúú chi véé cuaaⁿ 'diitúú yíicú chi s'uúúⁿ nguéé ngii iduuche yú.

¹³Nducyaaⁿ 'iiⁿ'yāⁿ s'eeⁿ ch'ii yā naati i'téenu yā Ndyuūs. Nguéé sta'á

yā cosas chi Ndyuūs caⁿa yā chi ca'a yā naati i'téenu yā ní n'diichi chi yaⁿ'ái yā cosas chi Ndyuūs caⁿa yā chí ca'a yā. Ní yeenú yā. Ní 'iiⁿ'yāⁿ s'eeⁿ ngaⁿa yā chii yā nducyáácā 'iiⁿ'yāⁿ chi tan'dúúca 'iiⁿ'yāⁿ chi snúúⁿ yúúní, 'tiicá yā 'naaⁿ tiempo chi snée yā iⁿ'yeeⁿdí 'cūū. ¹⁴Ní nducyaaca 'iiⁿ'yāⁿ chi ngaⁿ'á yā 'tíicā ch'iⁿ'i yā chi in'nuúⁿ yā táámá nación chí n'dai chí cuuvi yeⁿ'e yā. ¹⁵Ní nduuti chi nn'gaacú yā yeⁿ'e yáⁿāa naachi chiicá yā tuu'mi ní cuuvi nguεεcunée yā ní ndaa yā na yáāⁿ miiⁿ. ¹⁶Naati 'iiⁿ'yāⁿ s'eeⁿ neⁿ'é yā táámá nación chi n'daacā ca chí yeⁿ'e va'ai cheeti nguuví. Ní cáávā chuū Ndyuūs nguéé 'cuináaⁿ yā taachi 'iiⁿ'yāⁿ s'eeⁿ ngaⁿa yā 'tíicā: N'dii Ndyuūs ní Ndyuūs yeⁿ'e yú. Ndyuūs 'āā véé yaāⁿ yā 'áámá yāāⁿ chi cuuvi yeⁿ'e 'iiⁿ'yāⁿ s'eeⁿ.

¹⁷Ní cáávā chi Abraham miiⁿ i'téenu yā Ndyuūs, n'giindiveéⁿ yā yeⁿ'e Ndyuūs taachi Ndyuūs n'diichinéⁿ yā Abraham. Ní Abraham ní caⁿ'á yā ca'á yā daiyá yā Isaac cáávā lado yeⁿ'e ofrenda chi 'caaⁿ'núⁿ yā daiyá yā. Ní canee listo yā chi ca'á yā 'áámá n'dyaⁿ'ā daiyá yā lado yeⁿ'e ofrenda miiⁿ 'áará chí Ndyuūs ca'á yā 'áámá compromiso chi 'tíicā: ¹⁸Díí, Abraham, cáávā daiya di Isaac 'úú ní teé dii n'deee n'dái taavi cuuvi ndaata yeⁿ'e di. ¹⁹Ní Abraham miiⁿ tuumicádíínuuⁿ yā chi Ndyuūs cuuví nadacuéeⁿ yā 'iiⁿ'yāⁿ s'eeⁿ yeⁿ'e nguaaⁿ tináⁿ'ā. Ní Abraham déénu sa chi Ndyuūs cuuvi nadacuéeⁿ yā daiya sa yeⁿ'e nguaaⁿ tináⁿ'ā, naati nguéé ch'ii sa. Abraham miiⁿ candée sa daiya sa na vaacú sa.

²⁰Ní cáávā chi Isaac i'téenu sa Ndyuūs, ngaⁿa sa chi caⁿa sa di'viicú sa daiya sa Jacob ndúúcú saⁿā Esaú. Ní ngaⁿā sa yeⁿe cosas n'dai chi cuchii. ²¹Ní cáávā chi Jacob i'téenu sa Ndyuūs, taachi 'āā cháā 'cuuvi sa di'viicu sa ca'áámá ca'áámá daiya yeⁿē daiya José. Ní cuayiivi ní dich'εεε sá Ndyuūs neⁿe chí sta^a sa in'daacúu yeⁿē sa. Ní yiin'diicúneeⁿ sa na in'daacúu yeⁿē sa. ²²Ní cáávā chi José i'téenu sa Ndyuūs taachi 'āā cháā 'cuuvi sa ngaⁿa sa yeⁿe tiempo chi 'iiⁿyāⁿ yeⁿe ndaata Israel nan'dáa yā ná yáⁿāa Egipto. Ní yaaⁿvi sa 'iiⁿyāⁿ yeⁿe chi canéé chi diⁿ yā ndúúcú 'iini yeⁿe sa taachi tináⁿā sa.

²³Ní cáávā chi i'téenu yā Ndyuūs chiida sa ní chεεcu sa Moisés, taachi ch'iindiyaāⁿ Moisés miiⁿ chinuun'déⁿei yā saⁿā 'lííⁿ miiⁿ na 'iinu 'iiyū. N'diichi yā daiyá yā chi Moisés miiⁿ saⁿā 'lííⁿ sa neené n'dεεvεε sa. Nguéé di'vá'a yā yeⁿe orden yeⁿe rey chi canéé chi 'caaⁿnúⁿ yā saⁿā 'lííⁿ miiⁿ. ²⁴Cáávā chi Moisés i'téenu sa Ndyuūs, ní tááchí ch'εētē sa nguéé 'cuūⁿ sa chi 'iiⁿyāⁿ ngaⁿā yā chi Moisés ní daiya n'daataa daiyá rey yeⁿe yáⁿāa Egipto. ²⁵Naati Moisés miiⁿ neⁿe sa 'cueenu ca sá cuuvi ndúúcú 'iiⁿyāⁿ chi yeⁿe Ndyuūs. Ní nguéé 'cuūⁿ sa chi yeenú sa 'áámá tiempo ndúúcú vaadi yeenú chi dinuuⁿndi sa. ²⁶Ní Moisés miiⁿ nadacádíínuuⁿ sa chi n'daacā ca chi 'cueenu sa cuuvi tan'dúúcā chi ch'eenu Cristo chií na yáⁿāa 'cúú ní nguéé ti chi cuuví yeⁿe sa tanducuéⁿē vaadi 'cuiica chi véé na yáⁿāa Egipto. Ní 'tífcā nacádíínuuⁿ sa caati deenu sa

chi Ndyuūs caⁿā yā ca'a yā chi véé chi cuuvi yeⁿe sa. ²⁷Ní cáávā chi Moisés i'téenu sa Ndyuūs, nan'dáa sa yeⁿe yáⁿāa Egipto ní nguéé 'va'a sa chi nduuví taaⁿ rey. Ní díftu canee sa chi i'téenu sa Ndyuūs tan'dúúcā chi n'diichi sa Ndyuūs 'áará chi nguéé inaaⁿ sa Ndyuūs.

²⁸Ní cáávā chi Moisés i'téenu sa Ndyuūs s'neeⁿ sa orden yeⁿe 'viicu pascua chi 'iiⁿyāⁿ canéé chí s'neéⁿ yā yuúúⁿ yeⁿe 'iiti cuūchí na cheendí va'ai yeⁿé yā caati taachi ndaa ángel chi n'giiⁿnuⁿ yā nducyaaca da'caiyāa saⁿā chi vmnááⁿ vmnaaⁿ, nguéé cuuvi 'caaⁿnúⁿ yā da'caiyāa chi yeⁿé ndaata yeⁿé Israel. ²⁹Ní cáávā 'iiⁿyāⁿ yeⁿe ndaata Israel i'téenu yā Ndyuūs, chicho'ó yā naavtaⁿā yeⁿe mar chi nguuví Rojo ní ngiicá yā ndii yáⁿāa cuūⁿmáⁿ. Ní cuayiivi ní taachi cho'o 'iiⁿyāⁿ s'eenⁿ yeⁿe yáⁿāa Egipto tuuⁿmi ní chi'i nuūⁿnīⁿ 'iiⁿyāⁿ ní nducyaaca yā ch'ii yā ti nduuvidaāⁿmáⁿ nuūⁿnīⁿ.

³⁰Ní cáávā 'iiⁿyāⁿ yeⁿe ndaata Israel i'téenu yā Ndyuūs, cheⁿe yā nuuⁿmaⁿ ndiivi chεēti yeⁿe yāāⁿ Jericó ndεēchē nguuví. Tuuⁿmi ní ch'iinu miiⁿ ní chínδεεve chεēti yeⁿe yāāⁿ miiⁿ. ³¹Ní cáávā chi Rahab i'téenu tá Ndyuūs, ní 'áará chi cueⁿe tá ndúúcú saⁿā s'eenⁿ, nguéé ch'ii tá ndúúcú 'iiⁿyāⁿ s'eenⁿ yeⁿe yāāⁿ yeⁿe tá chi nguéé i'téenu yā Ndyuūs; ti n'daata miiⁿ ní sta'a tá saⁿā s'eenⁿ yeⁿe Israel. Ní n'daacā idiiⁿ tá ndúúcú saⁿā s'eenⁿ chi 'díííⁿ 'díííⁿ ndaá yā nguaaⁿ 'iiⁿyāⁿ yeⁿe tá chi cuuvi deenú yā táácā canee 'iiⁿyāⁿ yeⁿe tá.

³²Maaⁿ ní ıde'ē cá cuuví caaⁿmáⁿ ndís'tii? Nguéé véé tiempo chi cuuví

ndís'tií yeⁿe saⁿā Gedeón ní yeⁿe saⁿā Barac, ní yeⁿe saⁿā Sansón, ní yeⁿe saⁿā Jefté, ní yeⁿe saⁿā David, ní yeⁿe saⁿā Samuel, ní yeⁿe saⁿā profetas chi candee nduudu yeⁿe Ndyuūs. ³³Nducyaaca 'iiⁿyāⁿ s'eeⁿ ní cáávā chi i'téenu yā Ndyuūs idiⁿ caandá yā ní cuchéé yā yeⁿe náⁿā países. Ní n'daacā ngaⁿa ntiiⁿnyuⁿ yā yeⁿe tanáⁿā yáaⁿ. Ní tuneéⁿ yā chí Ndyuūs ngaⁿa yā chíⁿ chí ca'a yā. Ní díⁿ yā chi nduūdi cheendi 'yáíⁿyāaⁿ cuáⁿáa. ³⁴Ní yaⁿā chi diitu n'dái ngiichi nguéeⁿ cuuvi 'tuuvi 'iiⁿyāⁿ s'eeⁿ chi i'téenu yā Ndyuūs. Ní n'géenu yā yeⁿe 'iiⁿyāⁿ chi neⁿé yā 'caaⁿnúⁿ yā 'yā ndúúⁿcū machete chi 'caāiⁿ ndúú 'uuvi lados. Ní ááraⁿ chi duúvā yā ditiinú yā. Ní taachi diiⁿ caandá yā ní ditiinú yā chí 'caaⁿnúⁿ yā. Ní chée yā yeⁿe n'dee n'dái soldados yeⁿe enemigos yeⁿe yā. ³⁵Ní cáávā chi n'daataa s'eeⁿ i'téenu yā Ndyuūs, ntaⁿā yā tináⁿā chi n'dii yeⁿe familia yeⁿe yā taachi 'āā nduuchí yā yeⁿe nguaaⁿ tináⁿā. Ní náⁿā 'iiⁿyāⁿ ch'éenu yā chií ní ch'ii yā. Ní nguéeⁿ 'cūuⁿ yā chi nnguaⁿai yā ti neⁿé yā n'diichí yā táámá vida chi n'daacā ca. ³⁶Náⁿa yā ní 'iiⁿyāⁿ s'eeⁿ duuchí yā yeⁿe yā ní ch'eⁿé yā 'iiⁿyāⁿ. Ní náⁿa yā ní 'iiⁿyāⁿ s'eeⁿ ch'ēē chiichí yā ndúúⁿcū cadenas ní cheⁿé yā vácū. ³⁷Ní náⁿa yā ní 'iiⁿyāⁿ s'eeⁿ ca'a tuúú yā 'iiⁿyāⁿ ní ch'ii yā. Ní náⁿa yā ní 'iiⁿyāⁿ s'eeⁿ n'deé yā nduu 'uuvi taaⁿ yā ndúúⁿcū cierra. Ní náⁿa yā 'iiⁿyāⁿ s'eeⁿ n'giiⁿnuⁿ yā 'iiⁿyāⁿ ndúúⁿcū machete chi 'úúvi lados 'caāiⁿ. Náⁿa yā ní ch'ēē chiicá yā ndíⁿ 'muuⁿ ndíⁿ miiⁿ ndúúⁿcū catecai yā yeⁿe 'iiti cuūchí ní yeⁿe diiⁿmaⁿ chivo. Ní

pobre yā ní ch'eenú yā chií. Ní nguéeⁿ din'daacá 'iiⁿyāⁿ s'eeⁿ ndúúⁿcū yā. ³⁸Ní 'iiⁿyāⁿ chi ch'eenú yā chií cáávā chi i'téenu yā Ndyuūs, 'iiⁿyāⁿ yeⁿe íⁿyeeⁿdí nguéeⁿ n'daacā ca chi cuuvi cūneé yā ndúúⁿcū yā. 'iiⁿyāⁿ chi i'téenu yā ngeⁿé yā 'muuⁿ ngeⁿé yā miiⁿ ní tan'dúúⁿcā 'iiⁿyāⁿ chi nguéeⁿ vaacú yā, 'tiicá yā. Chiicá yā yáⁿāa cuuⁿmaⁿ naachi nguéeⁿ ch'ēetinée 'iiⁿyāⁿ. Ní chiicá yā na cuéétí ní ná yiivi yáávā yeⁿe 'iiti o yiivi yáⁿā naachi 'cūēetinée yā. ³⁹Cáávā chi 'iiⁿyāⁿ s'eeⁿ chi i'téenu yā Ndyuūs, n'dai yā ndúúⁿcū nducuéⁿē chi Ndyuūs 'cūuⁿ yā chi n'geenu yā ngii ndíⁿ tiempo chi ch'ii yā. Áā cuéé cuta'a yā chi cuuvi yeⁿe yā chi Ndyuūs caⁿa yā chi ca'a yā, ⁴⁰caati Ndyuūs nadacádíinuⁿ yā chi caⁿá yā diiⁿ yā chi n'daacā ca cááva yā ní cáávā s'uuúⁿ. 'iiⁿyāⁿ s'eeⁿ nguéeⁿ cuuvi cuta'á yā chi cuuvi yeⁿe yā ndíⁿ tiempo chi s'uuúⁿ cuuvi cuta'a yú chi cuuvi yeⁿe yú.

Cueⁿe daāⁿmaⁿ snaaⁿ yú yeⁿe Jesús

12 Maaⁿ ní deenu yú cáávā vida yeⁿe n'dee n'dái 'iiⁿyāⁿ chí ch'ii yā ti ch'íⁿí yā s'uuúⁿ táácā cuuvi cu'teenu ca yú Ndyuūs. Ní cáávā chuū canee chi cū'neeⁿ yú tanducuéⁿē dendu'ū chi di'vaachi s'uuúⁿ ndúúⁿcū nuuⁿndi chi diiⁿ yú caati nuuⁿndi míⁿ diiⁿ chí cuuvi ndai yú. Ní caānu yú ndúúⁿcū ngiīnū carrera yeⁿe vida yeⁿe yú chi Ndyuūs itée yā s'uuúⁿ. ²Ní cueⁿe daāⁿmāⁿ snaaⁿ yú Jesús ti díⁿ yā chi cuuvi i'téenu yú 'yā. Ní díⁿ yā chi n'daacā ca cuuvi cu'teenu yú. Jesucristo ní ch'eenú yā chií taachi ch'ii yā na cruz. Ní nguéeⁿ díⁿ yā

cuenta chi 'cuinaáⁿ yā cucáāvā chi ch'iī yā tan'dúúcā chi n'giīⁿnuⁿ yā 'iiⁿyāⁿ caati deenú yā chi yeenú yā cuayiivi ti cuuví nadanguáⁿai yā 'iiⁿyāⁿ. Maaⁿ ní vée yā na lado yeⁿe honor yeⁿe trono yeⁿe Ndyuūs.

³Ndís'tiī, nadacadíínuuⁿ nī tan'dúúcā Jesucristo chi ejemplo yeⁿe yú. Ch'eenú yā chii cucáāvā 'iiⁿyāⁿ s'eeⁿ chi dinuuⁿndí yā. Ní 'íicú ndís'tiī nguée cuuvi 'daandí nī ní nguée s'neéⁿ nī chiiⁿ chi i'téenu nī. ⁴Ndís'tiī ní 'āā chichēē nī ndúúcu nuūⁿndí ní nguée ch'eenú nī chii ndíí chi 'āā n'diī nī. ⁵¿Āā nguée n'gaacú ndís'tiī consejo chi Ndyuūs ca'á yā ndís'tiī chi daiyá yā? Canée nguūⁿ na libro yeⁿe Ndyuūs 'tíicā:

Díí, daiyá, nguée nadacadíínuuⁿ nī chi nguée de'ē vee taachi Ndyuūs dííⁿ yā castigar ndís'tiī caati cuuvi deenú nī chi nguée n'daacā idiíⁿ nī. Ní nguée ndaacadáámí nī yeⁿe yā taachi dííⁿ yā castigar ndís'tiī.

⁶Señor yeⁿe yú yaa'vineéⁿ yā nducyáácá 'iiⁿyāⁿ chi neⁿe yā ní dííⁿ yā castigar nducyaaca 'iiⁿyāⁿ chi sta'á yā chi cuuvi daiyá yā. ⁷Maaⁿ ní cuchée nī castigo chi Ndyuūs itée yā ndís'tiī ti Ndyuūs ní chiidá nī. Taachi n'geenú nī ngii tuu'mi ní deenú nī chi dííⁿ yā ndúúcu ndís'tiī tan'dúúcā chi ndís'tiī ní daiyá yā. 'Tíicā dííⁿ yā. ¿Dú'ū daiyá yā vee chi chiidá yā nguée idiíⁿ yā castigar? ⁸Nduuti chi Ndyuūs nguée dííⁿ yā castigar ndís'tiī tan'dúúcā chi dííⁿ yā castigar nducuéⁿe daiyá yā, tuu'mi

ní ndís'tiī nguée maaⁿ daiyá yā ti ndís'tiī ní daiyá yeⁿe táámá yā. Ní nguée daiya Dendyuūs ndís'tiī. ⁹Ní 'tiicá ntúūⁿ chiida yú chi yeⁿe iⁿ'yeeⁿdí 'cūū dííⁿ yā castigar s'uuúⁿ tan'dúúcā chi neⁿe yā. Ní s'uuúⁿ ní dinéⁿe yú chiida yú. N'daacā ca chi dííⁿ yú chiiⁿ chi neⁿe Ndyuūs chi canée na va'ai cheeti nguuvi ní sндуuchi yú. ¹⁰Chiida yú chi yeⁿe iⁿ'yeeⁿdí 'cūū dííⁿ yā castigar s'uuúⁿ dúu'vī nduuyū nūuⁿ tan'dúúcā chi tumicadíínuuⁿ yā chi n'daacā caavā s'uuúⁿ. Ndyuūs yeⁿe yú ní dííⁿ yā castigar s'uuúⁿ ti cuáácú chí n'dai caavā s'uuúⁿ ti s'uuúⁿ ní cuuvi din'dai ca yú tan'dúúcā chi Ndyuūs ní n'dai cá yā. ¹¹Cuaacu chi nguée yeenu yú taachi téē yā castigo s'uuúⁿ naati yá'ai yú. Cuayiivi ní 'iiⁿyāⁿ chi tuumicadíínuuⁿ yā yeⁿe castigo yeⁿe yā ni vée chi n'daacā yeⁿe castigo. 'Iiⁿyāⁿ s'eeⁿ din'daacā cá yā ní canée 'diiiⁿ vida yeⁿe yā.

Vée peligro yeⁿe yú nduuti chi nguée n'giindiveeⁿ yú nduudu yeⁿe Ndyuūs

¹²Maaⁿ ní Ndyuūs 'āā tee yā castigo ndís'tiī ní maaⁿ ní cuta'á nī fuerzas ndúúcu ta'á nī ní dicuaacú nī duūⁿntiī'yá nī chi ndicuūnū.

¹³Cachiicá nī ná yúúní cuaacu maaⁿ ní 'íicú cuuvi nanduūvā yeⁿe nī ca'a nī chi ndíí dúúvā yeⁿe nī.

¹⁴Maaⁿ ndís'tiī ní dííⁿ nī chi 'diííⁿ 'cuētinée nī ndúúcu nducyaaca 'iiⁿyāⁿ. Ní dííⁿ nī nducuéⁿe chi n'daacā ca caati deēve canée vida

yeⁿé nī. 'Iiⁿ'yāⁿ chi nguée dɛɛve
 vida yeⁿé yā nguée cuuvi n'diichí yā
 Señor Ndyuūs. ¹⁵Cundée nī cuidado
 chi mar 'áámá ndís'tii nguée diví
 nī yeⁿe Ndyuūs ti nguée cuuvi
 inneé yā ndís'tii. Ní nguée cúúví
 cunee 'aamá nī nguaaⁿ ndís'tii chi
 tan'dúúcā 'áámá dii'yu yaātā yaāa
 chi diiⁿ daño yeⁿe nducuéⁿē dii'yu
 yaātā. 'Tífcā cuuvi diiⁿ daño 'áámá
 nī tan'dúúcā chi veneno nguaaⁿ
 ndís'tii. ¹⁶Candée nī cuidado chi
 mar 'áámá ndís'tii nguée caⁿá nī
 ndúúcū n'daataa o saⁿā chi nguée
 yeⁿe nī. Ní nguée diiⁿ nī cuenta
 yeⁿe nducuéⁿē chi yeⁿé Ndyuūs.
 'Tífcā diiⁿ saⁿā Esaú ti cáávā 'áámá
 comida nūuⁿ n'diicuí sá chi cuuvi
 yeⁿe sa ti saⁿā vmnaaⁿ. ¹⁷Ní ndís'tii
 deenú nī yeⁿe saⁿā Esaú taachi
 neⁿe sa cuta'a sa yeⁿe chiidá sa chi
 cuuvi yeⁿē sa ti saⁿā daiya vmnaaⁿ,
 naati nguée 'cuūⁿ chiida sa. Ní Esaú
 chēcū taavi sá ní n'nuuⁿ sa manera
 chi nduuví n'daacā chi 'āā diiⁿ sa
 naati nguée ndaācā n'daaca sa.

¹⁸Maaⁿ ní ndís'tii nguée ndāa
 nī na yīicū chi ngiichi chi diiⁿ nī
 sentir ngiichi miiⁿ, tan'dúúcū chi
 diiⁿ 'iiⁿ'yāⁿ Israel tiempo chi 'āā
 chó'ōo. Ndíí nguée diiⁿ nī sentir
 maāiⁿ, ndíí nguée ndúú meēeⁿ, ndíí
 nguée ndúú 'áámá cheeⁿ cúúví
 díftūu. ¹⁹Ní nguée n'giindiveéⁿ nī
 chi ch'ēcū trompeta miiⁿ ní nguée
 nduudu yeⁿé Ndyuūs chi caⁿa yā
 ndúúcū 'iiⁿ'yāⁿ s'eeⁿ. Taachí 'iiⁿ'yāⁿ
 s'eeⁿ ch'iindiveéⁿ yā nduudu yeⁿe
 Ndyuūs chiica yā Ndyuūs chi 'āā
 ntéé caaⁿmaⁿ cá yā 'iiⁿ'yāⁿ s'eeⁿ.
²⁰'Tífcā ngaⁿa yā ti nguée cuuvi
 chēc yā chi Ndyuūs ngaⁿa ntii'nyuⁿ
 yā ti 'tífcā: Ndúúti chi 'áámá 'iiti

nindaá ti na yīicu 'cūū canee chi
 cuiituú yā 'iiti ní 'caaⁿnúⁿ yā 'iiti.
²¹Ní maaⁿ Moisés miiⁿ ní taachi
 n'diichí yā yīicu 'cūū ní ch'iindiveéⁿ
 yā nducuéⁿē, 'tífcā ngaⁿá yā: Nééné
 'valá ní yīin'duuví 'úú.

²²Maaⁿ ní nguée 'tífcā ti ndís'tii
 ndaa nī 'áámá yīicū chi nguuví
 Sión chi yāāⁿ yeⁿe Ndyuūs chi
 cánduuchi chí yāāⁿ Jerusalén chí
 va'ai chēeti nguuví naachi n'dee
 n'dái miles ángeles snée yā. ²³Ní
 nduuvidaamá yā chi dich'etē yā
 Ndyuūs. Ní miiⁿ canee nducyaaca
 'iiⁿ'yāⁿ chi daiyá Ndyuūs. Ní chi
 duuchí yā canéé nguūⁿ na libro
 yeⁿē va'ai chēeti nguuví. Nducyaaca
 nī ndaa nī nanááⁿ Ndyuūs chi diiⁿ
 yā juzgar nducyáácá 'iiⁿ'yāⁿ. Ní
 ndís'tii chi yeⁿē iⁿ'yeeⁿdí 'cūū ní
 ndaa nī nanááⁿ espíritu s'eeⁿ yeⁿe
 'iiⁿ'yāⁿ chi dɛɛve ca chi Ndyuūs
 diiⁿ yā chi nguée nuuⁿndi yeⁿé yā.

²⁴Ní ndaa nī nanááⁿ Jesucristo chi
 abogado chi canúuⁿ yā naavtaⁿā
 compromiso chí ngai chi yeⁿé
 Ndyuūs ndúúcū 'iiⁿ'yāⁿ. Ní ndaa
 nī nanááⁿ Cristo chi chingée yā
 yuūúⁿ yeⁿé yā cucáávā s'uuúⁿ. Yuūúⁿ
 yeⁿe Cristo ní n'daacā ca nguée ti
 yuūúⁿ yeⁿe Abel. Ndúúcū yuūúⁿ
 yeⁿe Cristo, Ndyuūs nadich'ecú yā
 nuuⁿndi yeⁿe 'iiⁿ'yāⁿ. Naati cáávā
 'díinu Abel ch'iⁿ'núⁿ Abel tuu'mi ní
 Ndyuūs ca'a yā castigo 'díinu Abel.

²⁵Ní cáávā nducuéⁿē chuū candē
 nī cuidado chi n'giindiveéⁿ nī
 nduudu yeⁿe Ndyuūs chi ngaⁿá
 yā ngii yā ndís'tii. 'Iiⁿ'yāⁿ s'eeⁿ chi
 nguée ch'iindiveéⁿ yā nduudu yeⁿe
 Cristo taachí snée yā iⁿ'yeeⁿdí 'cūū
 nguée nguaⁿái yā yeⁿē nuuⁿndi
 yeⁿé yā. Ní 'tēc cá s'uuúⁿ chi cuuvi

nguaⁿāi yú nduuti chi ndaacadaami yú yeⁿé Cristo chi canee na va'ai cheeti nguuví ní ngaⁿá yā ndúúcū s'uuúⁿ yeⁿe chi cuchíi. ²⁶Tiempo chi chó'oo taachi Ndyuūs ngaⁿá yā yeⁿe yīcū nuⁿu yáⁿāa. Maaⁿ ní Ndyuūs ngaⁿá yā 'tíicā: Taama vmnéⁿēe inuⁿú yáⁿāa ndúúcū nanguuvi. ²⁷Maaⁿ ní taachi ngaⁿa Ndyuūs taama vmnéⁿēe nūuⁿ deenu yú chi nducuéⁿē chi din'dái Ndyuūs ní caⁿá yā din'núⁿu yā ní divíi yā. Ní nducuéⁿē chi nguéeⁿ din'núⁿu yā ní cūnee. ²⁸Canée chí ca'a yú gracias Ndyuūs caati véé yāⁿ yeⁿe yú, lugar naachi Ndyuūs ngaⁿa ntiiⁿnyuⁿ yā. Ní nguéeⁿ cuuví nuⁿu lugar miíⁿ. Canee chi dich'εεε yú Ndyuūs ní i'teenu yú Ndyuūs. Ní 'va'a yú yeⁿé yā ní diiⁿ yú tan'dúúca chi neⁿe yā. ²⁹Ndyuūs yeⁿe yú tan'dúúca 'áámá nguuchi yáⁿā chí dituúví nducuéⁿē chi nguéeⁿ n'daacā. Tiicá yā.

Yeⁿé chi diiⁿ yú chi cunee
yiinuú Ndyuūs

13 Canée chi dineⁿe yú 'aama yú taama yú caati hermanos s'uuúⁿ ní yeⁿe Cristo s'uuúⁿ. ²Nan'gaacu yú chi canee chi ca'a yú va'āi yeⁿe yú 'iiⁿyāⁿ chi canúúⁿ yúúní. N'duuví yā ní dííⁿ yā 'túúca ní sta'á yā va'ai yā ángeles ní nguéeⁿ déenu yā chí ángeles.

³Nan'gaacu yú yeⁿe 'iiⁿyāⁿ chí snúúⁿ yā vácū. Diiⁿ yú cuenta chí s'uuúⁿ snuūⁿ yú vácū nduucú yā. Nan'gaacu yú yeⁿe 'iiⁿyāⁿ chí n'geenú yā ngii na cuerpo yeⁿé yā ní diiⁿ yú cuenta chí s'uuúⁿ ní n'geenu yú ngii na cuerpo yeⁿe yú nduucú yā.

⁴Diiⁿ yú respetar 'iiⁿyāⁿ chí n'giindivaacú yā tí nguéeⁿ dinuuⁿndí yā. 'Iiⁿyāⁿ chí n'giindivaacú yā canee chí caⁿá yā dámaāⁿ ndúúcū isaⁿā o n'daataá yeⁿé yā. Ndyuūs ní n'diichí yā nuuⁿndi yeⁿe 'iiⁿyāⁿ chí véé nuuⁿndi yeⁿé yā ndúúcū 'iiⁿyāⁿ chí n'giindivaacú yā ní caⁿá yā ndúúcū táámá n'daataá o saⁿā.

⁵Nguéeⁿ dineⁿe yú tuūmí naati yeenú yú ndúúcū chí véé chí yeⁿe yú tí Ndyuūs ngaⁿá yā 'tíicā: 'Úú nguéeⁿ cu'neeⁿ ndís'tií ní nguéeⁿ dííⁿ abandonar ndís'tií. ⁶Ní 'tíicā cuuvi caaⁿmaⁿ cuaacu yú ndúúcū confianza:

Señor ní nginnee yā 'úú. 'Úú nguéeⁿ 'va'á yeⁿe chí 'iiⁿyāⁿ cuuvi dííⁿ yā nduucú.

⁷Nan'gaacú ní yeⁿe 'iiⁿyāⁿ n'geεε yeⁿe yaacú chí ngaⁿa ntiiⁿnyúⁿ yā nanááⁿ ndís'tií ní ngaⁿá yā ngii yā ndís'tií nduudu cuaacu yeⁿé Ndyuūs. Nadacadíínuuⁿ ní táaca 'iiⁿyāⁿ s'eeⁿ dííⁿ yā ní n'geεεineé yā ní ch'ii yā. Maaⁿ ní candée ní cuidado chí dííⁿ ní tan'dúúca 'iiⁿyāⁿ n'geεε chí i'téenu yā Ndyuūs dííⁿ yā tí 'iiⁿyāⁿ s'eeⁿ ejemplo yeⁿé ní.

⁸Jesucristo miíⁿ ní 'āā 'tiicá nūuⁿ tan'duucá yā 'iicu, 'tiicá ntúuⁿ yā maaⁿnguuví. 'Āā 'tiica nuúⁿ yā cueⁿe daaⁿmaⁿ. ⁹Quin'diichí ní ndís'tií. Nguéeⁿ 'caandiveéⁿ ní ndúúdú 'naⁿa chí n'dááⁿ ndúúcū yeⁿé chí che'e yú. N'daacā ca chí staava yeⁿé ní canée n'daacā chí cuuvi cuta'á ní fuerzas yeⁿé nducuéⁿē chí n'dai taavi chí Ndyuūs itée yā ndís'tií. Staava yeⁿé 'iiⁿyāⁿ nguéeⁿ diiⁿ aprovechar nduuti chí chiindiveéⁿ yā nduudu n'dááⁿ ndúúcū yeⁿe chí che'e yú.

¹⁰Deenu yú chi chiiduú s'eeⁿ chi dííⁿ yā ntiíⁿnyuⁿ yeⁿe yaācū yeⁿé yā nguée cuuvi che^é yā yuūtē yeⁿe nátaí yeⁿe 'iiti chi ch'iiⁿnúⁿ yā cáávā ofrenda yeⁿe yú ti ofrenda yeⁿe yú ní 'āā víí caā ti i'teenu yú Jesucristo. Ní Jesucristo miiⁿ ní ch'ii yā chi lado yeⁿe ofrenda yeⁿe yú.

¹¹Chiiduú ch'ēete ca yeⁿe judíos chi Israel s'eeⁿ taachi ch'iiⁿnúⁿ yā 'iiti cáávā ofrenda yeⁿe nuūⁿndí candée yā yuūúⁿ yeⁿé 'iiti cheeti cuarto chi nguuví Dēēve naati cuerpo yeⁿé 'iiti miiⁿ ní ngiichí yā 'áámá lado yeⁿé yāāⁿ yeⁿé yā. ¹²Ní 'tiicá ntūūⁿ Jesucristo ch'ii yā cuaaⁿ dáámí cheendi va'āí yeⁿe yāāⁿ Jerusalén ní 'íicú cuuvi dēēvé yā 'iiⁿyāⁿ yeⁿe nuuⁿndi yeⁿé yā ndúúcū yuuúⁿ yeⁿe maáⁿ yā. ¹³Maaⁿ ní caⁿ'a yú tan'dúúcā chi cueⁿe Jesús 'áámá lado yeⁿé yāāⁿ ní 'cueenu yú cuuvi tan'dúúcā chi ch'eenú yā chií ní cuuvi 'cuinaaⁿ yú tan'dúúcā chi 'cuinaáⁿ yā. ¹⁴Caati nguée véé 'áámá yāāⁿ chi 'áámá cūnee cáávā s'uuúⁿ naati in'nuuⁿ yú 'áámá yāāⁿ ch'ēete chi 'áámá cūnee chi véé tiempo chi cuchí. ¹⁵Ní cáávā chuū canee yú chi dich'ēete yú Ndyuūs cucáávā Jesucristo. Ní taachi dich'ēete yú Ndyuūs chuū ní ofrenda chi canee chi ca'a yú Ndyuūs. Ní canée chi ca'a yú gracias Ndyuūs cáávā Jesucristo ndúúcū nduudu yeⁿé yú.

¹⁶Nguée cuuvi 'náaⁿ nī chi din'daacá nī ní nnee nī 'aamá nī taamá nī caati chuū ní ofrenda yeⁿé nī chi 'túúcā Ndyuūs neⁿe yā.

¹⁷Cu'neeⁿveéⁿ nī nduudu yeⁿé 'iiⁿyāⁿ chi ngaⁿ'a ntiíⁿnyuⁿ yeⁿé nī. Cu'téenu nī yeⁿé yā chi ngaⁿ'a yā caati 'iiⁿyāⁿ s'eeⁿ dííⁿ yā cuidado

yeⁿé staava yeⁿé nī. 'Iiⁿyāⁿ s'eeⁿ canée chi nca'á yā cuenta nanááⁿ Ndyuūs yeⁿé ntiíⁿnyuⁿ chi dííⁿ yā. Dííⁿ núúⁿ yíiⁿnu nī chi ngaⁿ'a yā caati yeenú yā dííⁿ yā ntiíⁿnyuⁿ yeⁿé yā. Ti nduuti chi nguée dííⁿ nī 'túúcā nguée yeenú yā ní nguée dííⁿ nī aprovechar yeⁿé ntiíⁿnyuⁿ chi dííⁿ yā cáávā ndís'tií.

¹⁸Maaⁿ ní caaⁿ'maⁿngua'á nī cáávā nús'uu ti nadacadiinúúⁿ 'nū n'daacā na staava yeⁿé 'nū ní neⁿé 'nū 'cuetinéé n'daacá 'nū yeⁿe nducuéⁿē dendu'ū. ¹⁹Úú ngiicá ndís'tií chi taachi ngaⁿ'angua'á nī, ngiicá nī Ndyuūs chi téé yā lugar 'nū chi niíⁿnuúⁿ nūuⁿ cuuví nandaá ní cuneé ndúúcū ndís'tií.

Dí'viicú yā ndís'tií ní dicho'ó yā, n'dai ndís'tií

²⁰Maaⁿ ní Ndyuūs ní yeⁿé vaadi 'diiiⁿ, maaⁿ Ndyuūs miiⁿ nadin'duuchí yā Jesucristo yeⁿé yú yeⁿé nguaaⁿ tináⁿ'ā chi Jesucristo miiⁿ Pastor chi ch'ēete n'dai chi dííⁿ yā cuidado s'uuúⁿ chi tan'dúúcā 'iiti cuūchí yeⁿé yā. Ní Jesucristo yeⁿé yú ndúúcū yuuúⁿ yeⁿé yā dííⁿ yā chi 'áámá cūnee compromiso chi Ndyuūs dííⁿ yā ndúúcū 'iiⁿyāⁿ.

²¹Neⁿé chi Ndyuūs yeⁿe vaadi 'diiiⁿ téé yā ndís'tií nducuéⁿē chi n'dai yeⁿé yā chi nguée yeⁿé nī. Ní cuuvi n'dai nī ti ndís'tií cuuvi dííⁿ nī chiíⁿ chi neⁿé Ndyuūs chi dííⁿ nī. Ní neⁿé chi Ndyuūs dííⁿ yā cáávā nducyaaca yú nducuéⁿē chi neⁿé yā dííⁿ yā cáávā Jesucristo. Caⁿ'a yú chi ch'ēete ca canée Cristo ní n'dēēvé ngii yā cuéⁿé daāⁿ'maⁿ cueⁿ'e daāⁿ'maⁿ. 'Tíicā. ²²Ndís'tií hermanos yeⁿé ngiicá ndís'tií chí cucheé nī

ndúúcū nduudu chi ngi'cueéⁿ ti nguéé 'yaaⁿ idinguúⁿ na carta miiⁿ yeⁿ'é ndís'tiī. ²³Yaa'ví ndís'tiī chi cadiinúúⁿ nī chi Timoteo hermano yeⁿ'ē yú 'āā ntéé canee sa vácūū. Ní ndúúti chi niiⁿnuⁿ niiⁿnuⁿ ndaa sa nanáaⁿ 'úú tuu'mi 'úú ní candéé saⁿ'ā taachi ndaá nanááⁿ ndís'tiī ní n'diichí ndís'tiī.

²⁴Maaⁿ ní caaⁿ'máⁿ nī 'iiⁿ'yāⁿ chi ngaⁿ'a ntiiⁿnyuⁿ yeⁿ'é nī ndúúcū nducyaaca 'iiⁿ'yāⁿ chi i'téenu yā Jesucristo: N'daí ndís'tiī, caaⁿ'máⁿ nī. 'Iiⁿ'yāⁿ yeⁿ'e país Italia: N'daí ndís'tiī, ngaⁿ'a yā.

²⁵Neⁿ'é chi Ndyuūs téé yā nducyaaca ndís'tiī nducuéⁿ'ē vaadi n'dai yeⁿ'é yā. 'Tíicā cuuvi.

CARTA YEⁿE SANTIAGO

**Santiago idingúuⁿ yā yeⁿe 'iiⁿyāⁿ
chi s'néeⁿ 'muuⁿ s'néeⁿ miiⁿ**

1 'Úú Santiago 'úú ní 'úú idiíⁿ
ntiiⁿnyuⁿ yeⁿe Ndyuūs ní yeⁿe
Señor Jesucristo. Idingúuⁿ carta
'cūū ní dicho'ó: Ndaí ndís'tiī ndúúcū
'iiⁿyāⁿ yeⁿe ndu'ū ndiichúúví tribus
chi familias chi yeⁿe ndaata Israel
chi s'néeⁿ 'muuⁿ chi s'néeⁿ miiⁿ ndii
núúⁿmáⁿ íⁿyeēⁿdī.

**Ndyuūs ca'á yā vaadi deenu
'iiⁿyāⁿ s'eeⁿ chi i'téenu yā 'yā**

²Ndís'tiī hermanos yeⁿé, canée
chi yeenú ní taachi ndaā n'dee
n'dái chi idi'vaachí yeⁿe ní. ³Caati
déenu ní chuū chi taachi ndaā
n'dee n'dái chi idi'vaachí yeⁿe ní ní
n'daacā idiíⁿ ní, ch'i'í ní chi i'téenu
ní Jesucristo ní ch'i'í ntúuⁿ ní chi
cuuvi cuchéⁿ ní yeⁿe tanducuéⁿe
ndúúcū paciencia. ⁴Ní canée chi
candéⁿ ní cuidado chi cuchéⁿ ní
yeⁿe nducuéⁿe chi di'vaachi ndís'tiī
ní cuuvi 'cuētinéⁿ n'daacá ní ní
diiⁿ cá chí n'daaca ní. Ní 'āā véé
nducuéⁿe necesidades yeⁿé ní. Ní
Ndyuūs téé yā ndís'tiī cosas chi
n'dai yeⁿé yā.

⁵Ndúútiⁿ chi 'áamá ndís'tiī deenú
ní chi nguéeⁿ deenú ní tuu'mi ní

canée chí caacá ní Ndyuūs chi itée
yā vaadi deenu. Ndyuūs ca'a yā
n'dee n'dái vaadi deenu yeⁿé yā
nducyáácá 'iiⁿyāⁿ. Ní nguéeⁿ n'gaa'vá
yā ndúúcū 'iiⁿyāⁿ yeⁿé chi n'deē
vueltas caaca yā Ndyuūs. ⁶Canée
chí caacá ní Ndyuūs ní cu'téenu
ní Ndyuūs chi ca'á yā téé yā
ndís'tiī. Taachi nguéeⁿ cu'téenu ní
chi Ndyuūs nguéeⁿ ca'á yā ca'a yā
chiiⁿ chi ngiicá ní tuu'mi ní ndís'tiī
tan'dúúcā nuūⁿnīⁿyāⁿā taachi olas
yeⁿé indéⁿ yaācū chi candéⁿ yúúné
cuuaⁿ lácūū cuuaⁿ lácā, 'tíicā
ndís'tiī. ⁷'Áamá 'iiⁿyāⁿ chi ngiica
yā Ndyuūs ní nguéeⁿ cu'téenu yā
chi Ndyuūs ca'á yā téé yā de'ē vεε,
tuu'mi ní 'iiⁿyāⁿ miiⁿ nguéeⁿ cūnee
ngínú yā chi Ndyuūs ca'á yā téé
yā 'iiⁿyāⁿ de'ē vεε. ⁸'Iiⁿyāⁿ miiⁿ
véé 'uūvī vaanicadínūuⁿ yeⁿé
yā. Maaⁿ ní neⁿé yā diiⁿ yā 'áamá
cosa, cuayiivi ní taama cosa. 'Iiⁿyāⁿ
miiⁿ nguéeⁿ canée yā ndúúcū 'áamá
vaanicadínūuⁿ yeⁿe yā.

⁹Ní hermano yeⁿé yú chi nguéeⁿ
ch'εεε ca ní canée chi yeenú yā
taachi Ndyuūs nginneé yā 'iiⁿyāⁿ.
¹⁰'Iiⁿyāⁿ chi 'cuiicá yā canée chi
yeenú yā taachí Ndyuūs díⁿ yā chi
nguéeⁿ 'cuiicá yā. 'Iiⁿyāⁿ chi 'cuiica
miiⁿ ní tan'dúúcā naāndā yeⁿe

yaātā chi 'cuiinu, 'tiicá yā. ¹¹Taachi can'dáa 'yá"ā ní 'áamá 'i'nūu" tuu'mi ní t'í yaatā ní naāndā ye"ē chingéé" ní 'āa nteē véé naandā ti ch'iinu. 'Tiicá ntúu" 'ii"yā" chi 'cuiica ní 'cuiinú yā ndúúcu vaadi 'cuiica ye"é yā.

Canéé chí cuchéé yú ye"e nducué"ē

¹²Dē'ē chúicā yeenu 'ii"yā" chi ichéé yā tanducué"ē taachi n'geenu yā ngii. Taachi chéé yā ye"ē tanducué"ē tuu'mi ní Ndyuūs téé yā 'ii"yā" chi canduuchí yā cue"e daā"ma". 'Tíicā Ndyuūs nga"á yā chi ca"á yā ca'a yā 'ii"yā" vida cue"e daā"ma" tan'dúúca chi 'aama corona ye"e 'ii"yā" chi diné"e yā Ndyuūs. ¹³Taachi ndaā nanáán ndís'tii cosa chí dii"i chí di'vaachí ndís'tii chi ne"é nī dii"i nī chi nguēé n'daācā, nguéé canéé chí nadacadíínuu" nī chi Ndyuūs díf"i yā chuū caati mar 'áamá 'ii"yā" cuuvi di'vaachí yā ye"e Ndyuūs chi Ndyuūs díf"i yā cosa chi nguēé n'daācā. Ndíí nguéé ndúú cuuvi dinuu"ndí Ndyuūs. Ndíí nguéé ndúú Ndyuūs di'vaachí yā ye"e 'ii"yā" chí díf"i yā cosa chí nguéé n'daācā. ¹⁴Taachi 'ii"yā" inadicadíínuu" yā chí maán yā ne"é yā dii"i yā cosa chí nguēé n'daācā tuu'mi ní véé nuu"ndi ye"e yā ní díf"i yā chí nguēé n'daācā. ¹⁵Ní taachi díf"i yā chíi"i chí ne"é yā dii"i yā chí nguéé n'daācā tuu'mi ní dinuu"ndí yā. Ní taachi ch'ēete ca nuu"ndi mi"i tuu'mi ní 'cuiinū ní dii"i chí 'cuūvi yā cue"e daā"ma". ¹⁶Ndís'tii hermanos ye"é chí ne"e taaví. Nguéé ca'a nī lugar 'ii"yā" chí cannche'éi yā ndís'tii chí dinuu"ndí nī. ¹⁷Nducué"ē chí n'daācā ní dēeve

chí Ndyuūs itée yā s'uuú" chíi"i ní ngíicá cuaa" 'nii"nu". Chíi"i ní ye"e Ndyuūs. Ndyuūs din'dái yā tanducué"ē dēeve ye"ē nanguuvi. Ndyuūs nguéé n'daa" yā tan'dúúca 'áamá 'daa"nū" chí n'daa". ¹⁸Ní Ndyuūs tee yā vida s'uuú" cáávā chí i'teenu yú nduudu cuaacu ye"é yā. Ní díf"i yā tan'dúúca chí maán yā ne"e yā dii"i yā. Ní 'íicú s'uuú" chí i'teenu yú, tan'dúúca 'áamá cosecha chí vmnáán vmnaa" ye"e nducué"ē chí din'dái yā 'tíicá s'uuú".

Ye"e vaadi cuaacu ye"é Ndyuūs

¹⁹Maa" ní ndís'tii hermanos chí ne"e taaví 'aama 'aamá nī canee chí 'cuēetinéé yaán" ní chí 'caandiveé" nī naati nguéé maa" n'cheeté caa"má" nī. Ní nguéé maa" n'cheete nūu" nduuví taán" nī. ²⁰'Ii"yā" chí induuvi taán" yā nguéé n'daācā díf"i yā ye"e chí vaadi cuaacu ye"é Ndyuūs. ²¹Ní cáávā nducué"ē chuū canee chí divíi nī ye"é tanducué"ē chí nguēé n'daācā chí nadacadíínuu" nī. Ní nguéé díf"i nī cosa chí nguēé ndaācā. Ní 'caandiveé" nī nduudu cuaacu chí i'téenu nī ní canee na staava ye"é nī. Ní ndiicuu" nī. Ní véé poder ye"e nduudu cuaacú 'cūu chí cuuvi dinguá"ai alma ye"é nī.

²²Naati canéé chí díf"i nī chíi"i chí nga"ā nduudu cuaacu mi"i. Nguéé dámaā" chí 'caandiveé" nī ní nguēé dii"i nī. Ní nguéé cannche'éi maán" nī ndís'tii. ²³Nduuti chí 'áamá 'ii"yā" n'giindiveé" yā nduudu cuaacu mi"i ní nguéé díf"i yā chíi"i chí nga"ā tuu'mi ní 'ii"yā" mi"i tan'dúúca 'áamá 'ii"yā" chí inaán" yā maán" yā na 'aama espejo, 'tiicá yā. ²⁴Inaán" yā maán" yā tan'duucá yā 'tíicā.

Ní cuayiivi nguée nn'gaacu yā tan'duucá yā 'áará chi n'diichí yā maá"n yā na 'áamá espejo. ²⁵Naati 'ii"yā" chi nn'gaacú yā chii"n chi n'giindiveé"n yā ní nadacádíínuu" n'daacá yā ye"e ley chi nduudu cuaacu mii"n ye"é Ndyuūs, tuu'mi ní nduudu cuaacu mii"n cuuví nadinguá"ái 'ii"yā". Ní 'ii"yā" mii"n canéé chi 'caandivee" cá yā nguuvi nguuvi. Ní nguée dámaā"n n'giindiveé"n yā naati díí"n yā chii"n chi nga"á, tuu'mi ní cuuvi yeenú yā ndúúcū chi díí"n yā.

²⁶Ní nduuti chi 'aama ndís'tií nga"á ni chi i'téenu nī Ndyuūs ní nguée candéé nī cuidado ye"e chi nga"á nī tuu'mi ní nginnche'i maá"n nī ndís'tií. Ní nguée dichí'vē chi nga"á nī chi i'téenu nī Ndyuūs. ²⁷'ii"yā" chi neenē i'téenu yā ní didēve staava ye"é yā ní nguée véé nuu"ndi ye"é yā nanáá"n Ndyuūs chiida yú ní 'tífā díí"n yā. Nginnē yā da'cáiyāa nguá"āa ndúúcū n'daataá nguá"āa taachi n'geenu yā ngii. Ní 'ii"yā" mii"n ní nguée díí"n yā cosas ye"é i"yee"dí' cūū chi nguée n'daacā.

'Cuaá"n nī nducyaaca 'ii"yā" chi daama daamá nūu" 'ii"yā"

2 Ndís'tií hermanos ye"é chi maa"n ní i'téenu nī Señor Jesucristo ye"e yú chi dēvé ngii ye"é yā, ndís'tií canéé chí díí"n nī chi 'āa dáamá daamá nūu" nducyaaca 'ii"yā" nanáa"n nī. ²N'diichí nī. Taachi ndaá 'áamá 'ii"yā" nguaa"n ndís'tií taachi nduuvidaamá nī ní 'ii"yā" mii"n canúú" nduu tá'a yā 'áamá chi ntá'āa ye"e 'díí"nguāa"n ní n'daacā catecai

yā, ní 'tiicá ntúū" ndaá táamá 'ii"yā" chi ndaachíí yā ní ndiicúū catecai yā, ³ní ne"e cá nī 'ii"yā" chi n'daacā catecaí yā, ní nga"á nī ngii nī 'ii"yā" mii: N'dií cun'dií nī lugar chi n'daacā ca; ní nga"á nī ngii nī sa"ā chi ndaachíí: N'dií cuééndiinú nī cuaa"n la'tií o 'cundíí nī na yiive, ⁴tuu'mi ní nguée díí"n nī chi dáamá daamá nūu" 'ii"yā" nguaa"n ndís'tií. Ní n'diichí nī 'ii"yā" s'ee"n chee chi n'daacā, ní nguée n'daacā chii"n chi nadacádíínuu" nī.

⁵Ndís'tií hermanos ye"é chi ne"é taavi, 'caandiveé"n nī chii"n chi nga"á. Ndyuūs ndēvé yā 'ii"yā" ye"é i"yee"dí' cūū chi pobre yā chi cuuvi 'cuiicá yā ndúúcū chi i'téenu yā. Ní véé chi cuuvi ye"é yā naachi Ndyuūs caa"má"n ntii"nyú"n yā ti chuū Ndyuūs nga"á yā chi ca'á yā nducyaaca 'ii"yā" chi ne"é yā Ndyuūs. ⁶Maa"n ní ndís'tií maá"n nī s'née"n nī 'ii"yā" chi ndaachíí yā chi nguée véé ye"e yā ná lugar chi nguée n'daacā. 'Áá nguée 'ii"yā" 'cuiica chí idi'vaachí yā ndís'tií ní icandéé yā ndís'tií nanáa"n 'ii"ntyé"é? ⁷'Áá nguée 'ii"yā" s'ee"n chi cunncaā nga"á yā ye"é chi duuchi ye"e Cristo chí n'daacā? Ní Cristo ye"e yú yaa'ví yā ndís'tií chi cuuvi ye"é yā ndís'tií.

⁸Nduuti chi ndís'tií cuaacu níí"nyú"n díí"n nī tanducué"é chi nga"á ley ye"é Ndyuūs chi 'tífā canéé nguū"n na libro ye"é yā: Diné"e di 'ii"yā" nīi"nuu"n vaacu di tan'dúúcā chi ne"e di maa"n di, tuu'mi ní n'daacā idii"n di. ⁹Ní ndúúti chi ndís'tií nguée dáamá daamá nūu"n diné"e nī nducyaaca 'ii"yā"n tuu'mi ní dinuu"ndi nī. Ní nguée díí"

nī tan'dúúcā chi ngaⁿā ley yeⁿé Ndyuūs. Ley miiⁿ n'giⁿi chi ndís'tii ní véé nuuⁿndi yeⁿé nī. ¹⁰Ní ndúútí chi 'áámá 'iiⁿyāⁿ nguée díⁿ yā chi ngaⁿā 'áámá 'lírⁿ chuundi yeⁿe ley yeⁿé Ndyuūs tuuⁿmi ní caneé yā tan'dúúcā chi nguée díⁿ yā mar 'áámá chi ngaⁿā ley miiⁿ. ¹¹Ndyuūs chi ngaⁿa yā 'tíicā: Nguée caⁿá di ndúúcū n'daataá o sáⁿā chi nguée yeⁿe di, Ndyuūs miiⁿ 'tiicá ntúūⁿ ngaⁿa yā: Nguée 'caaⁿnuⁿ di 'iiⁿyāⁿ. Maaⁿ ní nduuti chi 'aama 'iiⁿyāⁿ nguée caⁿá yā ndúúcū n'daataá o saⁿā chi nguée yeⁿe yā naati ch'iⁿnuⁿ yā 'iiⁿyāⁿ 'āā nguée díⁿ yā chi ngaⁿa ley yeⁿé Ndyuūs. ¹²Ní ndís'tii ní canee chi caaⁿmáⁿ nī n'daacā ní din'daacá nī tan'dúúcā chi ngaⁿa ley yeⁿé Ndyuūs ti ley miiⁿ n'diichi s'uuúⁿ. Ní ley miiⁿ diiⁿ chi cuuvi nanguáⁿāi s'uuúⁿ. ¹³Iiⁿyāⁿ chi nguée neⁿe ya'ai iinú yā 'iiⁿyāⁿ 'tiicá ntúūⁿ Ndyuūs nguée neⁿe ya'ai iinú yā 'iiⁿyāⁿ s'eeⁿ taachi n'diichí yā nuuⁿndi yeⁿé yā. Iiⁿyāⁿ chi ya'ai iinú yā 'iiⁿyāⁿ ichée yā taachi Ndyuūs n'diichí yā nuuⁿndi yeⁿé nducyaaca 'iiⁿyāⁿ.

'Iiⁿyāⁿ chi i'téenu yā Ndyuūs díⁿ yā ntiiⁿnyuⁿ yeⁿé Ndyuūs

¹⁴Ndís'tii hermanos yeⁿé, ¿de'ē dichíí'vē 'áámá 'iiⁿyāⁿ chi ngaⁿá yā chi i'téenu yā Jesucristo ní nguée díⁿ yā cosas chi n'daacā? ¿Áá cuuvi nanguaⁿai yā nduuti chi ngaⁿá yā chi i'téenu yā 'tíicā? ¹⁵Maaⁿ ní nadacadíinuⁿ yú yeⁿe 'áámá hermano o hermana yeⁿe yú chi nguée véé catecai yā ní nguée véé chi che'e yā. ¹⁶Nduuti chi n'diichi yú hermano o hermana miiⁿ ní

ngaⁿa yú ngii yú 'yā: Dii cueⁿe di ndúúcū vaadi 'diiíⁿ. Nan'guēecundii di ní che'e di. Ní nguée ca'a yú hermano o hermana miiⁿ yeⁿe yú chi che'é yā o catecai caavā chi díⁿ yā tapar, tuuⁿmi ní, ¿de'ē chíí'vē chi ngaⁿa yú ngii yú hermano o hermana yeⁿe yú 'tíicā? ¹⁷Ní 'tiicá ntúūⁿ yeⁿe chiiⁿ chi i'teenu yú Ndyuūs. Nduuti chi 'áámá 'iiⁿyāⁿ nguée din'daacá yā cáávā chi i'téenu yā Cristo tuuⁿmi ní chííⁿ chí i'téenu yā tan'duucā chi cosa chi n'díí.

¹⁸Nduuti chi 'áámá yā ngaⁿá yā ngii yā s'uuúⁿ 'tíicā: Díí ngaⁿa di chi i'téenu di Ndyuūs naati 'úú idiíⁿ nducueⁿē chi n'daacā. 'Úu ngaⁿá ngii 'iiⁿyāⁿ miiⁿ: Dii ch'iⁿi di 'úú tan'dúúcā chi cuuvi cu'téenu yú Ndyuūs ní nguée n'daacā cuuvi diiⁿ yú. 'Úú ch'iⁿi dii chi i'teenu Ndyuūs caavā chi n'daacā idiíⁿ.

¹⁹Áā i'téenu di chi véé 'áámá n'dyáⁿā Ndyuūs. N'daacā chi i'téenu di 'tíicā. 'Tiicá ntúūⁿ 'yááⁿn'guiinuⁿ i'téenu sa ní n'duuvi sa ti 'va'a sa.

²⁰Díí 'iiⁿyāⁿ chi che'echí tiiⁿ chi nguée neⁿe di cu'téenu di. Nduuti chi 'áámá 'iiⁿyāⁿ i'téenu yā Ndyuūs ní nguée din'daacá yā tuuⁿmi ní díⁿ yā tan'dúúcā chi nguée i'téenu yā. Ní vaadi i'teenu yeⁿé yā cūnee tan'dúúcā chi n'díí 'tíicā cunée. ²¹Maaⁿ ní nadacadíinuⁿ ní yeⁿe tiempo chi 'āā chó'ōo yeⁿe chiida yú chi nguuvi Abraham chi yeⁿe ndaata yeⁿe yú. Ndyuūs inadach'ēcú yā nuuⁿndi yeⁿé yā cáávā ntiiⁿnyuⁿ chi díⁿ yā taachi ca'á yā daiyá yā Isaac lado yeⁿe ofrenda nanááⁿ na nátaí cáávā chi 'caaⁿnúⁿ yā daiyá yā naati nguée ch'iⁿ sa. ²²¿Áá nguée deenú nī chi

Abraham i'téenu yā Ndyuūs ní ch'iⁿí yā 'iiⁿyāⁿ chi i'téenu yā caavā chiiⁿ chi díⁿ yā? Ní Abraham néené i'téenu yā Ndyuūs caavā chi díⁿ yā. ²³Ní chiiⁿ cuaacu chi canée nguūⁿ na libro yeⁿé Ndyuūs 'tíicā: Abraham s'téenu yā Ndyuūs ní Ndyuūs ní díⁿ yā cuenta chi Abraham ní n'daaca yā. Ní Ndyuūs sta'á yā Abraham chi cuuvi yeⁿé yā cáavā chi i'téenu yā Ndyuūs. Ní 'iiⁿyāⁿ s'eeⁿ ngaⁿá yā chi Abraham miiⁿ ní amigo yeⁿé Ndyuūs.

²⁴Maaⁿ ní cuuvi n'diichí nī chi Ndyuūs cuta'á yā 'iiⁿyāⁿ chi cuuvi yeⁿé yā nguée dámaāⁿ caava chi i'téenu yā yā naati 'tiicā ntúūⁿ caavā chi din'daāca yā. ²⁵'Tiicā ntúūⁿ táⁿā Rahab chi ndúucu tá 'yaaⁿ saⁿā, Ndyuūs ní díⁿ yā cuenta yeⁿe tá chi n'daacā tá. Ní Ndyuūs sta'á yā táⁿā chi cuuvi yeⁿé yā caava chi n'daacā diiⁿ tá. N'daata miiⁿ 'cuuⁿ tá saⁿā s'eeⁿ chi ndaā n'de'ei n'de'ei saⁿā chi Ndyuūs dich'oⁿ yā. Ní táⁿā miiⁿ dicho'o tá saⁿā s'eeⁿ táamá yúuní taachi véé peligro yeⁿe sa. ²⁶Ní tan'dúúcā cuerpo yeⁿe yú taachi nguée canée espíritu yeⁿe yú ndúucū ní n'díí, 'tiicā ntúūⁿ taachi i'téenu yú Ndyuūs ní nguée n'daacā idiíⁿ yú, chiiⁿ chi i'téenu yú cunée tan'dúúcā chi n'díí.

Yeⁿe chiiya yú

3 Ndís'tiī hermanos yeⁿé nguée canée chi cuuví 'yaaⁿ maestros yeⁿe yaacū nguaaⁿ ndís'tiī. Deenú nī chi Ndyuūs diitu n'diichí yā nuuⁿndi yeⁿe maestros miiⁿ nguée ti ndís'tiī. ²Nducyaacu yú idiíⁿ yú n'dee n'dái faltas. Ní nduuti chi 'áamá 'iiⁿyāⁿ nguée caaⁿmaⁿ yā

mar 'áamá falta tuuⁿmi ní 'iiⁿyāⁿ miiⁿ ní neené n'daacā. Ní cuuvi ngaⁿá ntiíⁿnyuⁿ yā yeⁿe nuuⁿmaⁿ cuerpo yeⁿe maáⁿ yā. ³Cuin'diichí nī. Cu'nuūⁿ yú frenos naaⁿ 'yúúdūu ní cu'téenu ti yeⁿe yú. Ní nuuⁿmaⁿ cuerpo yeⁿe ti cuuvi diiⁿ tan'dúúcā chi neⁿe yú. ⁴Maaⁿ ní nadacadíinuūⁿ yú yeⁿe barco. 'Áará chí ch'ēete ní 'yúúné taaⁿ ngéenu ní 'iiⁿyāⁿ cuuvi diiⁿ yā manejar barco miiⁿ cáavā 'áamá yáⁿá 'lííⁿ yeⁿe barco miiⁿ chi canúúⁿ ch'ēeti nuūⁿnīⁿyáⁿā. Ní barco miiⁿ ngiicā naachi neⁿé yā. ⁵'Tiicā ntúūⁿ chiiya yú. 'Áará chí 'áamá chí 'lííⁿ chí yeⁿe cuerpo yeⁿe yú naati ngaⁿa yú yeⁿe n'dee n'dái cosas chí n'gēete ndúúcū chiiya yú. Ní cuin'diichí nī ta 'lííⁿ chuundí yaⁿā cuuvi caacyáⁿā 'áamá icyáⁿā ch'ēete. ⁶Ní chiiya yú tan'dúúcā 'áamá nguuchi yaⁿā 'tíicā chiiya yú. Ní tanducuéⁿe tan'dúúcā 'áamá iⁿyeeⁿdi chí ndiituú ndúúcū nducuéⁿe chí nguee n'daacā, 'tíicā cuerpo yeⁿe yú cáavā chiiya yú. Ní diiⁿ chí núúⁿmaⁿ cuerpo yeⁿe yú véé nuuⁿndi yeⁿe. Ní tan'dúúcā infierno chí ngiichi yaⁿā 'tíicā diiⁿ chí chiiya yú. Ní yaⁿā miiⁿ ní diiⁿ tan'dúúcā chí ngiichi nducuéⁿe vida yeⁿe yú 'naaⁿ chí canee yú iⁿyeeⁿdí 'cūū. ⁷Ca'áamá ca'áamá naaⁿ 'iiti chí véé iⁿyeeⁿdí 'cūū yeⁿe 'iiti 'yúúdūu, yeⁿe 'yaada, yeⁿe cúú, 'iiti chí snúūⁿ ch'ēeti nuūⁿnīⁿyáⁿā ní nducyaaca tī saⁿā cuuvi diiⁿ sa amansar ní 'āā diiⁿ sa amansar 'iiti s'eeⁿ. ⁸Naati mar 'áamá 'iiⁿyāⁿ nguée cuuvi díⁿ yā chí amansar chiiya maáⁿ yā. Ngaⁿa yú cosas chí nguée n'daacā 'aara chí nguée neⁿe yú. Ní ndúúcū chiiya yú ngaⁿa yú n'dee

n'dái chi nguée n'daacā yeⁿe 'iiⁿyāⁿ.
 Ní diiⁿ yú chi cuuvi 'cuūvi yā. ⁹Ní
 ndúúcu maaⁿ chiya yú dich'ete
 yú Ndyuūs chiida yú ní ngaⁿa taaⁿ
 yú yeⁿe 'iiⁿyāⁿ chi Ndyuūs din'dái
 yā chi tan'dúúca maáⁿ Ndyuūs
 'tiicá din'dái yā 'iiⁿyāⁿ. ¹⁰Yeⁿe
 maaⁿ cheendi ntúuⁿ yú ngaⁿa yú
 chi Ndyuūs n'daacā yā ní ngaⁿa
 taaⁿ yú ndúúcu 'iiⁿyāⁿ. Ndis'tii
 hermanos yeⁿé, nguée canée chi
 cuuvi 'tíicā. ¹¹¿Áa yeⁿe 'áamá
 nduutinaaⁿ nuūⁿnīⁿ can'dáa nuūⁿnī
 yaāa ndúúcu nuūⁿnīⁿ yaādi? Nguée
 cuuvi. ¹²Ndis'tii hermanos yeⁿé,
 ¿áa cúuví 'áamá yáⁿá yeⁿe n'guiidii
 yááⁿ nguuví cuuvi aceitunas yeⁿe?
 Nguée cuuvi. O 'aama yáⁿá 'líiⁿ
 yeⁿe uvas ááa cuuvi n'guiidii yááⁿ
 nguuví cuuvi yeⁿe? Nguée cuuvi.
 'Tiicá ntúuⁿ yeⁿe 'aama ndúútinaaⁿ
 nuūⁿnīⁿ nguée cuuvi can'dáa nuūⁿnīⁿ
 diini ndúúcu nuūⁿnīⁿ yaadi.

**Yeⁿe vaadi deenu chi cuaacu
 níiⁿnyúⁿ chi vaadi deenu**

¹³Nduuti chi vée saⁿā chi
 cadiinuⁿ sa ní chi deenu nguaaⁿ
 ndis'tii canée chí cuuⁿmiⁿ sa 'iiⁿyāⁿ
 chi cuaacu chi deenu sa ní ndiicuⁿ
 sa cáávā nduudu n'dai yeⁿe sa
 ndúúcu ntiiⁿnyuⁿ n'daacā chi diiⁿ
 sa. ¹⁴Naati nduuti chi vée vaadi
 nguee chi ch'ete ndúúcu vaadi
 'caa'va na staava yeⁿé nī ní ndis'tii
 ní nadacádíinuⁿ nī na staava yeⁿé
 nī chi caⁿá nī diiⁿ nī nducuéⁿe
 caavā maáⁿ nī diiⁿ nī aprovechar,
 tuu'mi ní nguée cuuvi nadacádíinuⁿ
 nī chi n'geete nī. Ndíi nguée cuuvi
 caaⁿmáⁿ nī nduudu yaadi chi
 contra yeⁿe nduudu cuaacu. ¹⁵Ní
 vaadi deenú 'cūu yeⁿé nī nguée

vaadi deenu chi yeⁿé Ndyuūs naati
 vaadi deenú 'cūu ní yeⁿe iⁿyeeⁿdí
 'cūu ní yeⁿe chi nadacádíinuⁿ yā
 ní yeⁿe yááⁿn'guiinuⁿ. ¹⁶Naachi
 'iiⁿyāⁿ chí dínnguee yā ní diiⁿ yā
 nducuéⁿe caava maáⁿ yā neⁿé yā
 diiⁿ yā aprovechar, tuu'mi ní miiⁿ
 canée 'iiⁿyāⁿ chi nguée vée orden
 yeⁿé yā. Ní diiⁿ yā tanducuéⁿe
 dendu'ū chi nguée n'daacā. ¹⁷Naati
 'iiⁿyāⁿ chí vée vaadi deenu yeⁿé yā
 chí yeⁿe Ndyuūs, tuu'mi ní vmnáaⁿ
 vmnaaⁿ canée chí ch'etinéⁿ n'daaca
 yā ndúúcu vida yeⁿé yā chí deene.
 Cuayiivi ní diiⁿ yā chí vée vaadi
 'diiⁿ. Ní ndiicúuⁿ yā, ní amigo yā.
 Ní ya'ai iinú yā ndúúcu 'iiⁿyāⁿ ní
 dámaā diiⁿ yā tanducuéⁿe chí
 n'daacā. Áa daamá nūuⁿ 'cuaaⁿ
 yā nducyaaca 'iiⁿyāⁿ. Ní nguée
 nadacádíinuⁿ yā yeⁿe chí nguée
 ndaacā, ní nguée diiⁿ yā dendu'ū
 chí nguée n'daacā. ¹⁸Ní 'iiⁿyāⁿ chí
 diiⁿ yā chí vée vaadi 'diiⁿ ní diiⁿ
 yā tan'dúúca chí cuuⁿnú yā ndaata
 yeⁿe nducuéⁿe chí cuaacu. 'Tíicā
 diiⁿ yā. Ní n'guiiⁿ yeⁿe nducueⁿe chí
 cuaacu ní vaadi cuaacu.

**Yeⁿe ndis'tii amigos yeⁿe 'iiⁿyāⁿ
 chí nguée i'téenu yā Jesucristo**

4 ¿Tii ngiica cosas chí
 caandaá chí 'tíica nguⁿú
 nī nguaaⁿ maáⁿ nī? Ngica yeⁿe
 ná vaanicadínūuⁿ yeⁿe maáⁿ nī
 ti neⁿe nī diiⁿ nī cosas chí nguée
 n'daacā. ²Ndis'tii neⁿé nī cosas ní
 nguée vée yeⁿe nī. Ní cáávā chuū
 neⁿé nī 'caaⁿnúⁿ nī 'iiⁿyāⁿ. Neⁿé nī
 dendu'ū chí inaáⁿ nī ní nguée cuuvi
 cuta'á nī. Ní cáávā chuū nguⁿú nī
 ní diiⁿ nī caandaá. Ní nguée ndaaca
 nī chiiⁿ chí neⁿé nī ti nguée ngiicá

nī Ndyuūs de'ē chi neⁿe nī. ³Ní taachi ndís'tiī ngiicá nī Ndyuūs de'ē chi neⁿe nī, Ndyuūs nguée téē yā chiⁿ chi neⁿe nī ti ngiicá nī dámaāⁿ caavā maáⁿ nī caati cuuvi yeenú nī. Ní nguée n'daacā chi ngiica nī 'tíicā. ⁴Ndís'tiī 'iiⁿ'yāⁿ chi nguée 'áámá cunee nī ndúúcū chi i'téenu nī, 'áá nguée deenu ndís'tiī chi taachi caⁿ'á nī ndúúcū 'iiⁿ'yāⁿ chi nguée i'téenu yā Jesucristo ní dífⁿ nī dendu'ū chi yeⁿ'e iⁿ'yeeⁿ'dí cūū tuu'mi ní canee nī enemigos yeⁿ'é Ndyuūs? 'Tiicá nī. ⁵¿Áá nadacádíínuuⁿ ndís'tiī chi dífⁿ nī chi nguée dichíí'vē nduudu yeⁿ'e libro yeⁿ'é Ndyuūs naachi canée nguūⁿ 'tíicā?: Ndyuūs s'neeⁿ yā Espiritu N'dai yeⁿ'é yā cheeti staava yeⁿ'e yú. Ní Espiritu miiⁿ ní neⁿ'e ca chi s'uuúⁿ canee yú dámaāⁿ yeⁿ'e Ndyuūs s'uuúⁿ. ⁶Naati Ndyuūs nginnée yā s'uuúⁿ ní itée yā s'uuúⁿ vaadī n'dai yeⁿ'é yā s'uuúⁿ. Canée nguūⁿ na libro yeⁿ'é Ndyuūs 'tíicā: Ndyuūs nguée caⁿ'á yā lado yeⁿ'e 'iiⁿ'yāⁿ chi idin'geete maáⁿ yā naati ca'a yā vaadī n'dai yeⁿ'é yā 'iiⁿ'yāⁿ ndiicúúⁿ. ⁷'Tíicā canee chi s'neéⁿ nī vida yeⁿ'e maáⁿ nī na ta'á Ndyuūs. Nguée ca'á nī lugar yááⁿnguiinūuⁿ chi ngaⁿ'a ntiiⁿnyuⁿ sa yeⁿ'e ndís'tiī ní yááⁿnguiinūuⁿ ní cuēvii sá yeⁿ'ē nanááⁿ ndís'tiī. ⁸Ndaá nī nanááⁿ Ndyuūs ní Ndyuūs ní chí nndaa ntúūⁿ yā nanááⁿ ndís'tiī. Ndís'tiī 'iiⁿ'yāⁿ nuuⁿndíí nadideēvé nī vida yeⁿ'é nī. Ndís'tiī chi véé 'uūvi vaanicadíínuuⁿ yeⁿ'é nī, nadideēvé nī staava yeⁿ'é nī. ⁹Ndís'tiī 'iiⁿ'yāⁿ nuuⁿndíí di'vaachi maáⁿ nī ní cuēcú nī ní ya'āi 'iinú nī yeⁿ'ē chi diiⁿ nī. Nguée canee chi n'gííⁿnyuⁿ nī naati canee chi cuēcú nī. Nguée

canée chi yeenú nī naati canee chi di'vaachí maaⁿ nī. ¹⁰Ní 'cuēetinée ndiicuuⁿ nī nanááⁿ Señor yeⁿ'e yú ní Señor yeⁿ'ē yú ní dífⁿ yā chi n'geete nī.

Yeⁿ'ē chi n'diichi yú nuūⁿndi yeⁿ'e hermanos yeⁿ'e yú

¹¹Ndís'tiī hermanos yeⁿ'é, nguée caaⁿ'maⁿ cúnncaa nī yeⁿ'ē 'aama nī taama nī hermanos yeⁿ'e yú. 'Áa du'ú ndís'tiī chí ngaⁿ'a contra 'áámá hermano yeⁿ'e yú o n'diichi nī nuuⁿndi yeⁿ'e hermano yeⁿ'e yú, ndís'tiī ngaⁿ'a ntúūⁿ cúnncaa nī contra ley yeⁿ'é Ndyuūs ní n'diichi nī yeⁿ'e ley miiⁿ. Ní naachi n'diichí nī yeⁿ'e ley miiⁿ tuu'mi ní dífⁿ nī ntiiⁿnyuⁿ yeⁿ'e juez ní nguée dífⁿ nī chi ngaⁿ'a ley miiⁿ. ¹²Dámaāⁿ vee 'áámá n'dyáⁿ'ā chi Ndyuūs chi ca'á yā ley miiⁿ ní 'tiicá ntúūⁿ Ndyuūs ní juez. Maáⁿ yā cuuvi nadinguáⁿ'ai yā 'iiⁿ'yāⁿ o cuuvi di'cuiinú yā 'iiⁿ'yāⁿ. Maaⁿ ní ndís'tiī, 'duu ndís'tiī chi n'diichí nī de'ē idiiⁿ táámá 'iiⁿ'yāⁿ?

Nguée deenu yú de'ē chi cuuvi ndúúcu yú ndii cavyaaⁿ

¹³Maaⁿ ní 'caandiveéⁿ nī nduudu chi ngaⁿ'á ngii ndís'tiī chi ngaⁿ'a nī 'tíicā. Maaⁿnguuví o cavyaaⁿ caⁿ'á táámá yāáⁿ nī canee miiⁿ 'áámá nduūyū, ní dífⁿ negocio ní dífⁿ ganar. ¹⁴Ndís'tiī ní nguée de'ē vee déenu nī chi de'ē cuuvi cavyaaⁿ. ¿De'ē vida yeⁿ'e ndís'tiī? Vida yeⁿ'é nī ní tan'dúúcā 'áámá meēeⁿ chi ngo'oó 'áámá nch'eētē ní n'giinu. ¹⁵Ndís'tiī ní canee chi caaⁿ'máⁿ nī 'tíicā. Nduuti chi Ndyuūs neⁿ'é yā chi cunduūchí tuu'mi ní dífⁿ chuū o dífⁿ cháá. ¹⁶Naati nguée dífⁿ nī

'tíicā. Ndís'tií ngaⁿá nī yeⁿe cosas n'geete chi dííⁿ nī. Ní yeenú nī yeⁿe nducuéⁿe 'cūū chi ngaⁿa nī chí n'geete. Ní nguéeⁿ n'daacā chi dííⁿ nī 'tíicā. ¹⁷Iiⁿ'yāⁿ chi déenu yā yeⁿe chi cuuvi dííⁿ yā chi n'daacā ní nguéeⁿ idiíⁿ yā chuū tuu'mi ní dinuuⁿndí yā.

**Yaa'vī 'iiⁿ'yāⁿ chi 'cuiica
chi candéé yā cuidado**

5 'Caandiveeⁿ ndís'tií 'iiⁿ'yāⁿ chi 'cuiica. Cuεεcū nī ní 'cuai nī caati 'cuenú nī cuuvi dendu'ū chi díítūu chi cuchii nanááⁿ yeⁿe ndís'tií. ²Vaadī 'cuiica yeⁿe nī ní nchōō ní catecai n'dai nī n'dáá ní che'é tī. ³Ní 'dííⁿnguāāⁿ ndúúcu 'dííⁿnguεε yeⁿe nī ní che'e yáⁿāa. Ní chiiⁿ chi nche'e yáⁿāa miiⁿ ní canée tan'dúúca 'áámá lado yeⁿe testigo chi caaⁿ'maⁿ contra yeⁿe nī. Ní chiiⁿ chi diiⁿ tan'dúúca chi cacyáⁿā cuerpo yeⁿe nī nduucū yaⁿā. Ní vaadī 'cuiica yeⁿe nī ní nguáin'dai nī ní maaⁿ ní tiempo chí cuuví 'cuiinu íⁿ'yeēⁿdī. ⁴N'diichí nī. 'Āā cuéeⁿ nadííⁿ've nī 'iiⁿ'yāⁿ chi dííⁿ yā ntiíⁿ'nyuⁿ ní sta'á yā cosecha yeⁿe nī. Ní chííⁿ'vē miiⁿ canée tan'dúúca 'áámá testigo contra yeⁿe ndís'tií. 'Iiⁿ'yāⁿ s'eeⁿ ní 'caí yā contra yeⁿe ndís'tií ní Señor chi ngaⁿa ntiíⁿ'nyúⁿ yā yeⁿe nducyáácá 'iiⁿ'yāⁿ 'āā n'giindiveéⁿ yā chiiⁿ chi 'caí yā. ⁵Ndís'tií 'iiⁿ'yāⁿ 'cuiica, maáⁿ nī ch'εetineé nī ndúúcu tanducuéⁿe chi neⁿe nī ní yeenú nī. Ní dicheetē nī cáávā nguuvi chi 'cuuví nī tan'dúúca chi dííⁿ nī ndúúcu 'áámá cuuchí chi cuuvi 'viiché tī nífcú ndaa 'áámá nguuvi chi 'caaⁿ'núⁿ nī 'iiti miiⁿ. ⁶Ní ndís'tií 'āā dííⁿ nī

condenar saⁿā chi n'dai ní 'iiⁿ'yāⁿ s'eeⁿ n'giíⁿ'núⁿ yā saⁿā. Ní nguéeⁿ diiⁿ sa mar 'áámá chi nadanguáⁿ'ai sa maaⁿ sa.

**Yeⁿe 'viich'εetfínūⁿ yeⁿe yú
ní yeⁿe chi ngaⁿ'angua'a yú**

⁷Ní cáávā nducuéⁿe ngaⁿ'á ndís'tií hermanos yeⁿe canée chí dííⁿ nī nducuéⁿe ndúúcu vaadī 'diiíⁿ nanááⁿ nī ní nanááⁿ Señor yeⁿe yú ndii tiempo chi ndaa yā taama vmnéⁿēe. Cuin'diichí nī. 'Iiⁿ'yāⁿ chi dííⁿ yā ntiíⁿ'nyuⁿ yeⁿe campo canee chi cūnee ngíínú yā chi ndaācá n'daacā cosecha yeⁿe yā. Ní cūnee ngíínú n'dai yā chi cueeⁿ cuuvi vmnááⁿ vmnaaⁿ. Ní taachi cho'ōo chi cueeⁿ cúuvi cuayiivi tuu'mi ní cuta'á yā cosecha yeⁿe yā. ⁸Tiicá ntúūⁿ ndís'tií vée paciencia yeⁿe nī ní canee diitú nī ndúúcu chi i'téenu nī na staava yeⁿe nī caati tiempo chi ndaa Señor yeⁿe yú 'āā snee niiⁿnuúⁿ. ⁹Ní ndís'tií hermanos yeⁿe nguéeⁿ caaca nuuⁿndi nī 'aama nī contra taama nī ní nguéeⁿ cuuvi n'diichi Ndyuūs nuuⁿndi 'cūū chi yeⁿe nī. Ndyuūs chi juez ní niiⁿnuúⁿ nūuⁿ ndaa yā. ¹⁰Maaⁿ ní hermanos yeⁿe nadacádífnuuⁿ nī yeⁿe tiempo chi 'āā chó'ōo tan'dúúca chi diiⁿ profetas chi candεε yā nduudu yeⁿe Ndyuūs ní n'dee n'dái ch'eenú yā chii. Ní vée paciencia yeⁿe yā. Tan'dúúca chi dííⁿ yā 'tiicá ntúūⁿ canee chi dííⁿ nī. ¹¹Deenu yú chi yeenú profetas s'eeⁿ taachi ch'eenú yā chii. Ndís'tií ní ch'iindiveéⁿ nī yeⁿe saⁿā Job ní tan'dúúca chi vée ca paciencia yeⁿe sa taachi ch'eenu sa chii. 'Āā n'diichí nī ntúūⁿ tan'dúúca Señor yeⁿe yú dííⁿ yā

cáávā sa^{n'a} Job miiⁿ taachi ch'iinu ch'eenu sa chií. Maaⁿ ní Señor ye^{n'e} yú ní néené ne^{n'é} yā s'uuúⁿ ní néené ya'ai yā s'uuúⁿ.

¹²Ní ye^{n'e} tanducué^{n'e} hermanos ye^{n'é}, nguée caaⁿmaⁿ nī de'ē chi ne^{n'e} diíⁿ nī ndúúcū nduudu “por Dios” chi caⁿá nī diíⁿ nī 'tíicā o nguée caⁿá nī diíⁿ nī 'tíicā. Ní nguée caaⁿmaⁿ nī “caavā nanguuvi”, ndíí nguée ndúú cáávā “iⁿ'yeeⁿdí 'cūū”, ndíí nguée ndúú caavā táámá naaⁿ. Dámaāⁿ caaⁿmaⁿ nī, “tíicā idiíⁿ” o “nguée 'tíicā idiíⁿ” caati Ndyuūs nguée cuuvi diíⁿ yā condenar ndís'tií.

¹³Ndúútí chi 'áámá chee ndís'tií chi n'geenú nī ngii, canée chí caaⁿmaⁿngua^a nī Ndyuūs. Nduuti chi canee 'áámá 'iⁿ'yāⁿ chi diyeenú, cánée chí caatá yā chi Ndyuūs ní ch'eté yā. ¹⁴Nduuti chi 'áámá chee ndís'tií ní ngífta nī canée chí yaa'ví nī 'iⁿ'ntyé^{n'e} ye^{n'e} yaācū chi cuchíí yā ní 'cuēendāa yā aceite na cuerpo ye^{n'é} 'iⁿ'yāⁿ miiⁿ chi ngífta yā ní caaⁿmaⁿngua^a yā nanááⁿ Señor Jesucristo ye^{n'e} yú cáávā 'iⁿ'yāⁿ miiⁿ chi ngífta yā.

¹⁵Ní taachi ngaⁿangua^a nī, i'téenu nī chi Jesucristo cuuvi diíⁿ yā chí nduūvā ye^{n'e} 'iⁿ'yāⁿ chí ngiitā, ní Señor Jesucristo miiⁿ ní nadicuéeⁿ yā 'iⁿ'yāⁿ chí ngiitā ní nduūvā ye^{n'é} yā. Ní nduuti chi véé nuuⁿndi ye^{n'é}

yā Señor Jesucristo nadach'ēcú yā nuuⁿndi ye^{n'e} yā. ¹⁶Cáávā chuū ní caaⁿmaⁿ nī nuuⁿndi chi diíⁿ nī contra hermanos ye^{n'é} nī ní cuuvi nī hermanos. Ní caaⁿmaⁿngua^a nī 'áámá nī táámá nī ní cuuvi nduūvā ye^{n'é} nī. 'iⁿ'yāⁿ chi n'dai taavi taachi caaⁿmaⁿngua^a yā véé poder ye^{n'e} Ndyuūs na staava ye^{n'é} yā taachi caaⁿmaⁿngua^a yā. ¹⁷Deenu yú chi sa^{n'a} Elías chi profeta ní 'áámá sa^{n'a} tan'dúúcā s'uuúⁿ 'tíicā sa. Taachi caⁿānguā'a sa chi chiica sa Ndyuūs chi diíⁿ yā chi nguée cueeⁿ cuūví tuu'mi ní nguée cheeⁿ cuūví vmnaaⁿ yáⁿāa 'iinu nduūyū canée maⁿā.

¹⁸Ní cuayiivi miiⁿ ní caⁿānguā'a ntúuⁿ sa táámá vmné^{n'e} chi cueeⁿ cuūví ní cheeⁿ cuūví vmnaaⁿ yáⁿāa ní chií taavi cosecha ye^{n'e}.

¹⁹Maaⁿ ní ndís'tií hermanos ye^{n'é}, nduuti chi 'áámá ndís'tií ngíí divíí nī ye^{n'e} nduudu cuaacu ní táámá yā idiíⁿ yā chi 'iⁿ'yāⁿ miiⁿ nanguēcunée yā ní i'téenu yā nduudu cuaacu, ²⁰tuumi ní canée chi cadíínuuⁿ nī chuū. 'Áámá 'iⁿ'yāⁿ chi diíⁿ yā chí táámá 'iⁿ'yāⁿ chí dinuuⁿndí yā nacuēcúndii yā ní cuvíí yā ye^{n'e} nuuⁿndi ye^{n'é} yā, tuu'mi ní 'iⁿ'yāⁿ vmnaaⁿ nadanguáⁿai yā alma chi n'dii ye^{n'e} taamá yā. Ní diíⁿ chi Ndyuūs nadach'ēcú yā n'dee n'dái nuuⁿndi ye^{n'é} yā. 'Tíicā cuuvi.

CARTA VMNÁÁⁿ VMNAAⁿ YEⁿE SAN PEDRO

**Pedro idingúuⁿ yā carta 'cūū
yeⁿē hermanos chi i'téenu
yā Jesucristo hermanos chi
s'nééⁿ 'muuⁿ chi s'nééⁿ miíⁿ**

1 'Úú Pedro 'úú ni 'úú 'áámá
apóstol yeⁿe Jesucristo. Ní
Cristo dichó'o yā 'úú chi 'úú candé
nduudu cuaacu yeⁿe Ndyuūs. 'Úú
idingúuⁿ carta 'cūū yeⁿe 'iiⁿ'yāⁿ chi
i'téenu yā Señor Jesucristo ní nguée
chií ch'etinéé yā na yáāⁿ yeⁿe yā tí
cheⁿe 'nééⁿ 'múúⁿ cheⁿe 'nééⁿ miíⁿ
yā ndii yáⁿāa yeⁿe Ponto, yeⁿe
Galacia, yeⁿe Capadocia, yeⁿe Asia,
ndúúcū Bitinia. ²Ní idinguúⁿ yeⁿe
ndís'tií, 'iiⁿ'yāⁿ chi Ndyuūs ndéene
yā tan'dúúcā chi Ndyuūs deenú
yā chi caⁿ'a yā diíⁿ yā ndíí vmnááⁿ
vmnaaⁿ. Ní Espíritu N'dai yeⁿe
Ndyuūs ní nadidéevé yā ndís'tií
cáávā chi n'giindiveéⁿ nī yeⁿe yā ní
cáávā yuuúⁿ yeⁿe Señor Jesucristo
chi nadidéevé yā ndís'tií. Neⁿ'é chi
Ndyuūs téé yā ndís'tií n'dee n'dái
vaadi n'dai yeⁿé yā ní vaadi 'diíiⁿ
cuuvi ch'etete nguaaⁿ ndís'tií.

³Dich'etete ca yú Ndyuūs chi
chiida Señor Jesucristo caati néené
ya'ai iinú yā s'uuúⁿ chi dííⁿ yā chi
ch'iindiyáāⁿ ngai yú. Chuū dííⁿ yā

caati nadacuéeⁿ yā Jesucristo yeⁿē
nguaaⁿ tináⁿā. Maaⁿ ní cucáávā
Ndyuūs tee yā s'uuúⁿ 'áámá vida
ngai yeⁿe yú ní véé esperanza
yeⁿe yú. ⁴Ní cūnee ngiinu yú
yeⁿe tanducuéⁿē vaadi n'dai yeⁿē
Ndyuūs chi Ndyuūs ngaⁿ'á yā chi
tée yā s'uuúⁿ chi cuuvi yeⁿe yú.
Ní Ndyuūs nanguáin'dai yā cáávā
s'uuúⁿ chiíⁿ chi cuuvi yeⁿe yú na
va'ai cheeti nguuvu naachi nguée
cuuvi chōō. Ní nguée cuuví 'cuéé,
ndíí nguée cúuví ch'ó'oo yeⁿē. ⁵Ní
chuū chi Ndyuūs nguáin'dai yā
ní cáávā ndís'tií ti ndís'tií i'téenu
nī Jesucristo. Ní Ndyuūs dííⁿ yā
cuidado ndís'tií ndúúcū poder yeⁿé
yā 'naaⁿ chi cūnee ngiinú nī chi
nadanguáⁿ'ai yā ndís'tií chi cuuvi
déenu nī yeⁿe chuū tiempo chi
cuchií.

⁶Ní canee chi yeenú nī yeⁿe
chuū 'aara chi dindaachí nī duu'vi
tiempo nūuⁿ 'naaⁿ chi n'geenú nī
ngií n'dee n'dái cosas chí ngií.
⁷Cáávā chi i'téenu nī Jesucristo
vaadi i'téenu yeⁿé nī ní tan'dúúcā
'díí'nguāⁿ, 'tífā. Ní 'iiⁿ'yāⁿ canéé
chi n'diichineeⁿ 'díí'nguāⁿ ndúúcū
yaⁿ'ā caati cuuvi deenú yā chi
dámaāⁿ 'díí'nguāⁿ. Ní 'tiicá

ntúūⁿ vaadi i'téenu yeⁿ'é nī 'iiⁿ'yāⁿ canéé chí n'diichíneeⁿ yā. Ní vaadi i'téenu yeⁿ'é nī nduuti chi ichéé yeⁿ'e tanducuéⁿ'ē taachi 'iiⁿ'yāⁿ n'diichineeⁿ yā yeⁿ'ē, tuu'mi ní cuaacu chi i'téenu nī ní 'áámá cūnee vaadi i'téenu yeⁿ'é nī nguéé ti 'díⁿ'nguāⁿ chí n'giinu. Cuayiivi taachi ndaá Jesucristo tuu'mi ní dich'eté yā ndís'tií ní díⁿ' yā honrar ndís'tií ní díⁿ' yā chí n'deévé ngii ndís'tií cáávā chí n'daacā ca i'téenu nī Jesucristo.

⁸Áará chí nguéé n'diichí yā Jesucristo dineⁿ'é nī 'iiⁿ'yāⁿ. Ní i'téenu nī 'iiⁿ'yāⁿ 'áará chí nguéé inaáⁿ nī 'iiⁿ'yāⁿ. Maaⁿ ní neené yeenú nī ndúúcū vaadi yeenu chí ch'etē taavi ca. Ní nguéé véé nduudu yeⁿ'é nī chí cuuvi caaⁿ'máⁿ nī yeⁿ'ē. ⁹Ní neⁿ'é nī tunééⁿ nī nguuvi chí Ndyuūs nadanguáⁿ'ai yā almas yeⁿ'e nī. Ní cáávā chuū chí i'téenu ca nī Ndyuūs.

¹⁰Tiempo chí 'āā chó'ōo 'iiⁿ'yāⁿ profetas chí candéé yā nduudu yeⁿ'é Ndyuūs neené n'dai n'nuuⁿ yā yeⁿ'e chí Ndyuūs nadanguáⁿ'ai yā 'iiⁿ'yāⁿ. Ní itínguuneeⁿ yā yeⁿ'e chuū. Profetas ní 'iiⁿ'yāⁿ chí ngaⁿ'á yā yeⁿ'e chí Ndyuūs caⁿ'á yā chí téé yā ndís'tií yeⁿ'e chí n'dai taavi ca yeⁿ'é yā. ¹¹Ní profetas ní neⁿ'é yā deenu yā yeⁿ'e tiempo 'cūū ní táácā cuuvi chó'ōo yeⁿ'e tiempo 'cūū taachi Cristo 'cúeenú yā cuuvi ní cuchēē yā. Ní cuayiivi cuchii chí dēévé ngii yeⁿ'é Cristo caati Espíritu yeⁿ'e Cristo chí canee ndúúcū profetas 'āā chíⁿ'í yā profetas yeⁿ'e chuū. ¹²Naati Ndyuūs chíⁿ'í yā profetas chí tiempo yeⁿ'e Cristo yeⁿ'e chí ngaⁿ'a yā nguéé cuuvi n'diichí

profetas naati ndís'tií ní 'āā n'diichí nī. Profetas ngaⁿ'á yā nduudu cuaacu yeⁿ'e chí cuchii naati ndís'tií 'āā n'giindivééⁿ nī chí 'āā chó'ōo chíⁿ' chí caⁿ'a yā. Ní cáávā 'iiⁿ'yāⁿ chí ngaⁿ'á yā ngii yā ndís'tií nduudu cuaacu chí Jesús nadanguáⁿ'ai yā 'iiⁿ'yāⁿ ndúúcū poder yeⁿ'ē Espíritu N'dai yeⁿ'é Ndyuūs. Ní Ndyuūs dich'óo yā Espíritu N'dai yeⁿ'é yā yeⁿ'ē va'ai cheeti nguuvi nanááⁿ s'uúúⁿ. Ní nducuéⁿ'ē chuū ní ángeles maáⁿ yā neⁿ'e yā snaaⁿ yā dendu'ū.

Ndyuūs yaa'ví yā 'iiⁿ'yāⁿ chí cuuvi yeⁿ'é yā ní n'daacā ca cuuví yā

¹³Maaⁿ ní cáávā nducuéⁿ'ē chuū nadacadínuuⁿ nī n'daacā yeⁿ'e chí caⁿ'á nī diiⁿ nī ní 'cúeetinéé n'daacá nī. Ní cunee ngiinú nī dámaāⁿ yeⁿ'e nducuéⁿ'ē chí n'dai taavi chí Señor Jesucristo caⁿ'á yā téé yā ndís'tií taachi ndaa yā taama vmnéⁿ'ē. ¹⁴Ndís'tií ní 'caandivééⁿ nī nduudu yeⁿ'é Ndyuūs ti daiya Ndyuūs ndís'tií. Ní nguéé diiⁿ nī tan'dúúcā chí díⁿ' nī nducuéⁿ'ē chí neⁿ'e maáⁿ nī taachi 'āā cuéé n'diichí nī Ndyuūs. ¹⁵Maaⁿ ní 'cúeetinéé n'daacā nī chí nguéé véé nuuⁿ'ndi yeⁿ'é nī caati Ndyuūs chí yaa'ví yā ndís'tií chí cuuvi yeⁿ'é yā ndís'tií ní dēēve yā. ¹⁶Canéé nguūⁿ na libro yeⁿ'é Ndyuūs 'tíicā: Canéé chí diiⁿ n'daacá nī chí dēēve nī caati 'úú, Ndyuūs, ní dēēve 'úú.

¹⁷Nduuti chí ndís'tií ní ngaⁿ'á nī chí Ndyuūs ní chiidá nī ní caacá nī Ndyuūs chí cunnee yā ndís'tií, canéé chí 'cúeetinéé n'daacá nī ní 'va'á nī Ndyuūs neⁿ'e chí cunee nī iⁿ'yeeⁿ'dí 'cūū. Ndyuūs yeⁿ'e yú 'āā daamá nūuⁿ n'guúⁿ yā

nducyaaca 'iiⁿyāⁿ. Ní n'diichí yā ca'áamá cā'aama yā tan'dúúcā chi ch'ēetineé yā ndúúcū ntiiⁿnyuⁿ chi díⁿ yā. ¹⁸Deenú nī chi Ndyuūs nadanguáⁿai yā ndís'tii yeⁿe vida chi nguée n'daācā chi sta'á nī yeⁿe 'iiⁿyāⁿ yeⁿe ndaata yeⁿé nī. Ní n'dáácā ca deenú nī chi nadí'vē yeⁿe chi nadanguáⁿai yā ndís'tii. Nguée cuái yā ndúúcū dendu'ū chí nchōō tan'duucā 'díⁿnguāⁿ o 'díⁿnguē. ¹⁹Naati Ndyuūs nadanguáⁿai yā ndís'tii ndúúcū yuūúⁿ chi yaⁿ'ai chí'vē ti yuūúⁿ yeⁿe Cristo. Cristo ní ca'a yā maáⁿ yā cuerpo caavā ofrenda chi 'iiⁿyāⁿ s'eeⁿ 'caaⁿnúⁿ ya 'yā. Ní Cristo miiⁿ tan'dúúcā 'áamá 'iiti cuūchī chi nguée n'gai tī ní nguée de'ē vee ndíⁿ yeⁿe tī, 'tíica yā. ²⁰Ní Ndyuūs ndēevé yā Cristo chi maáⁿ yā cuerpo yeⁿé yā cuuvi ofrenda ndíⁿ vmnááⁿ vmnaaⁿ taachi 'āa cuéeⁿ din'dái yā iⁿ'yeeⁿdí 'cūū. Naati maaⁿ ní nguuvī s'eeⁿ Ndyuūs ch'iⁿi yā Cristo nanááⁿ ndís'tii ní caavā ndís'tii. ²¹Ní cucáávā Cristo miiⁿ ní ndís'tii i'téenu nī Ndyuūs chi nadacuéeⁿ yā Cristo yeⁿé nguaaⁿ tináⁿā. Ní Ndyuūs dich'ēetē yā Cristo ndúúcū honor. Ní ndís'tii 'āa i'téenu nī Ndyuūs ní cūnee ngiinú nī yeⁿé chi Ndyuūs caⁿ'a yā chí tée yā ndís'tii chi cuuvi yeⁿé nī.

²²Maaⁿ ní chi 'āa i'téenu nī nduudu cuaacu yeⁿé Cristo cucáávā Espíritu N'dai yeⁿé Ndyuūs 'āa didēevé nī staava yeⁿé nī chi dineⁿé nī hermanos yeⁿe yú. Canée chi dineⁿé taavi cá nī 'aama nī taama nī hermanos ndúúcū staava yeⁿé nī chí dēeve. ²³Ndís'tii ní 'āa ch'iindiyáaⁿ nī taama vmnéⁿēe

nguée yeⁿé 'iiⁿyāⁿ yeⁿé iⁿ'yeeⁿdí 'cūū chí 'cuūvi yā naati yeⁿe nduudu yeⁿé Ndyuūs, nduudu chi canduuchi ní 'áamá cūnee cueⁿe daāⁿmaⁿ. ²⁴Caati canée nguūⁿ na libro yeⁿé Ndyuūs 'tíicā:

Tanducuéⁿé 'iiⁿyāⁿ yeⁿe iⁿ'yeeⁿdí 'cūū ní tan'dúúcā yaātā ní tanducuéⁿé chi n'gēete ca yeⁿé 'iiⁿyāⁿ ní tan'dúúcā naāndā yeⁿe yaātā, 'tíica yā. Yaātā miiⁿ ní tīⁿ ní naandā miiⁿ ní n'geeⁿ,

²⁵naati nduudu cuaacu yeⁿé Ndyuūs ní 'áamá cūnee cueⁿe daāⁿmaⁿ.

Ní nduudu cuaacú 'cūū yeⁿe evangelio chíⁿ chi candée 'iiⁿyāⁿ nanááⁿ ndís'iī.

2 Maaⁿ ní cáávā chuū diví nī 'áamá lado nducuéⁿé chi díⁿ nī chi nguée n'daācā ní nguée canche'éeⁿ nī. Ndíⁿ nguée caaⁿmáⁿ nī dendu'ū chi nguēe cuaacu. Ndíⁿ nguée ndúú díⁿ n'geeⁿ nī yeⁿé taama 'iiⁿyāⁿ. Ndíⁿ nguée ndúú ngaⁿ'a nī nduudu yaadi yeⁿé 'iiⁿyāⁿ. ²Ní ndís'tii tan'dúúcā chi dacua'aá chi caama 'niindiyáaⁿ ní neⁿe leche, 'tíicā ndís'tii. Díⁿ nī ní neⁿé nī leche chi nduudu n'dai yeⁿé nduudu cuaacu. Ní cuuvi cu'téenu cá nī ndúúcū nduudú 'cūū tan'dúúcā dacua'aá cuuvi 'cuiitá yā ndúúcū leche n'dai. ³Tíicā cuuvi díⁿ nī nduuti chi cuaacu níⁿnyúⁿ n'diichíneeⁿ nī Señor Jesucristo chí n'dai yā.

Jesucristo ní tan'dúúcā tuūu ch'ēete chí canduuchi

⁴Ndís'tii canée chi ndaa niiⁿnuúⁿ nī nanááⁿ Señor Jesucristo ti tan'dúúcā

'áamá tuūu ch'εete chí canduuchi
'tiicá nī. 'Ii"yā" ye"e i"yee"dí
'cūū nguée' cuú" yā tuuú mii" ti
nadacadíínuu" yā chí nguée' dichí'vē
naati Ndyuūs ndεεve yā tuūu mii" chí
ya"ai chí'vē chí Cristo. ⁵Ní ndís'tiī
ntúū" tan'dúúcā tuūu cánduuchi
'tiicá nī ti Ndyuūs 'āā teé yā ndís'tiī
vida ngai. Ca'a nī lugar Ndyuūs
chí cuta'á yā vida ye"e ndís'tiī ní
din'dái yā ye"e cuerpo ye"e ndís'tiī
'áamá yaācū ye"e Espíritu N'dai
ye"é Ndyuūs. Ní ndís'tiī canée
chí dií" nī ntii"nyu" ye"e chiiduú
ye"e yaacú 'cūū ní ca'á nī ofrendas
nanáá" Ndyuūs ndúúcū chí duuchi
Jesucristo, ofrendas chí Ndyuūs
cuuvi 'cuáa" yā. ⁶Ní 'tíicā canée nguū"
na libro ye"é Ndyuūs cáāvā chuū:

Quin'diichí nī. 'Úú Ndyuūs cu'neé"
yāā" Sión 'áamá tuūu ch'εete
ye"e cimientto ye"e esquina
ye"e yaācū. Tuūu mii" n'dεεvé
ní ya"ai chí'vē. 'Ii"yā" chí
i'téenu yā Señor ye"e yú chí
tuūu ch'εete mii" nguée' cuuvi
'cuinaá" yā ye"e Señor ye"e yú.

⁷Ní tuūu mii" ní neené véé chii'vē
cucáāvā ndís'tiī chí i'téenu nī Cristo
naati nguée' 'tíicā tuūu mii" nanáá"
'ii"yā" chí nguée' i'téenu yā. 'Tíicā
canée nguū" na libro ye"é Ndyuūs:

Tuūu míf" nūu" chí 'ii"yā" chí
din'dái yā yaācū nguée' 'cūū"
yā ti nadacadíínuu" yā chí
nguée' dichí'vē. Tuuú 'cūū nūu"
ní tuūu chεete ye"e cimientto
ye"e esquina.

⁸Ní canée nguū" na libro ye"é
Ndyuūs táámá chí 'tíicā:

Tuuú 'cūū ní dii" chí cuundí ca'a
'ii"yā" nī tuūu míf" chii" chí
cundεεve 'ii"yā".

Cuaacu chí indée' ca'a yā ti nguée'
n'giindiveé" yā nduudu cuaacu ní
Ndyuūs dii" yā chí 'tíicā canee chí
dii" 'ii"yā" s'ee".

Ye"e 'ii"yā" chí ye"e Ndyuūs

⁹Ndís'tiī ní ye"e 'ii"yā" chí
Ndyuūs ndεεvé yā. Ndís'tiī ní
chiiduú ye"e Ndyuūs chí Rey.
Ndís'tiī ní ye"e ndaata dεεvé.
Ndís'tiī ní ye"e Ndyuūs ndís'tiī.
'Tíicā dii" Ndyuūs caati ndís'tiī
cuuvi caa"má" nī chí ch'εete n'dai
chí dii" Ndyuūs. Ndyuūs n'gai yā
ndís'tiī ye"e na maai" ní ndaá nī
nanáa" yā ná déévé chí n'dεεvé
n'dai ye"e maá" yā. ¹⁰Ndís'tiī ní
tiempo chí chó'oo ní nguée' ye"e
Ndyuūs ndís'tiī naati maa" ní 'tiicá
nī. Tiempo chí chó'oo Ndyuūs nguée'
ya'ai 'iinú yā ndís'tiī naati maa" ní
'tíicā déenu nī chí Ndyuūs ya'ai 'iinú
yā ndís'tiī ti ye"é Ndyuūs ndís'tiī.

**'Ii"yā" chí 'áamá dii" yā
ntii"nyu" ye"e Ndyuūs**

¹¹Ndís'tiī hermanos ye"é chí
ne"é taavi, 'úú idi'cuiitú ndís'tiī chí
tan'dúúcā 'ii"yā" chí snúú" yúúní
'tiicá nī ne"e chí snée nī i"yee"dí
'cūū ndís'tiī. Nguée' dii" nī nuu"ndi
tan'dúúcā chí ne"e cuerpo ye"é
nī chí dii" nī caati chii" chí ne"e
cuerpo ye"é nī ní cue"e daā"ma"
contra ye"é chí ne"e staava ye"é
nī. ¹²Cueetinée' n'daaca nī nguaa"
'ii"yā" chí nguée' i'téenu yā nduudu
cuaacu ye"é Ndyuūs. Ní 'áará chí
nga"á 'ii"yā" s'ee" contra ye"e
ndís'tiī tan'dúúcā chí ndís'tiī ní
'ii"yā" chí nguée' n'daaca, 'ii"yā"
s'ee" ní cuuvi snaa" yā ntii"nyu" chí
n'daaca ca chí idií" nī. Ní cuuvi

'caaⁿ'máⁿ yā chi ch'εεte ca Ndyuūs nguuvⁱ chi Ndyuūs ndaa yā taama vmnéⁿ'ēē ní nguāi yā cuenta yeⁿ'e nuūⁿndi yeⁿ'e yú.

¹³Canée chi díⁿ nī tan'dúúcā chi ngaⁿ'ā 'iiⁿntyéⁿ'ē 'āā du'ú nūuⁿ chi véé nduuti chi saⁿ'ā rey o chí 'iiⁿntyéⁿ'ē ch'εεte. Ní n'daacā canee nī nanáaⁿ yā caavā chi ndís'tiī ní yeⁿ'e Señor Ndyuūs yeⁿ'e yú ndís'tiī. ¹⁴Ní díⁿ nī chi ngaⁿ'a 'iiⁿ'yāⁿ 'iiⁿntyéⁿ'ē chi Ndyuūs s'neéⁿ yā miiⁿ caati 'iiⁿntyéⁿ'ē cuuvi ca'a yā castigo 'iiⁿ'yāⁿ chi nguée n'daacā idiíⁿ yā ní cuuvi caaⁿ'máⁿ yā chi ch'εεtē 'iiⁿ'yāⁿ chi n'daacā idiíⁿ yā. ¹⁵Ti chuū ní chiiⁿ chi Ndyuūs neⁿ'é yā chi díⁿ nī. Ní cáávā chi ndís'tiī din'daacā nī, 'iiⁿ'yāⁿ chi zonzo yā ní nguée deenu yā nguée cuuvi caaⁿ'máⁿ yā dē'ē vεε contra yeⁿ'e ndís'tiī.

¹⁶Ní 'cuεetinée nī tan'dúúcā 'iiⁿ'yāⁿ chi canée libre yā. Nguée díⁿ nī chiiⁿ chi nguεε n'daacā cucáávā chi canée libre nī, ní ngaⁿ'ā nī chi cuuvi díⁿ nī 'túúcā. N'daacā ca chi 'cuεetinée n'daacā nī ti ndís'tiī 'iiⁿ'yāⁿ chi 'áámá canee chi dichíí'vε Ndyuūs. ¹⁷Ní díⁿ nī honrar nducyaaca 'iiⁿ'yāⁿ. Ní dinéⁿ'e nī nducyaaca hermanos yeⁿ'e yú. 'Va'a nī Ndyuūs ní díⁿ nī honrar emperador chi 'iiⁿntyéⁿ'ē.

Yeⁿ'e chi Cristo n'geenu yā ngii chi ejemplo yeⁿ'e yú

¹⁸Ndís'tiī 'iiⁿ'yāⁿ criados chi chíí'vε, díⁿ nī respetar patrón yeⁿ'é nī ní díⁿ nī tan'dúúcā chi ngaⁿ'a patrón yeⁿ'e nī, nguée dámaāⁿ patrón yeⁿ'é nī chi din'daacā ní n'dai yā naati patrón yeⁿ'é nī chi nguée din'daaca yā ní taaⁿ yā.

¹⁹Caati n'daacā ca chi cuchεε nī taachi n'geenu nī ngii cáávā cosas chi nguée n'daacā chi díⁿ 'iiⁿ'yāⁿ chi contra yeⁿ'é nī. Ní cuchεε nī ti deenu nī chi n'daacā idiíⁿ nī. 'Tíicā Ndyuūs neⁿ'e yā chi díⁿ nī. ²⁰¿Dε'ε ch'εεte chuū nduuti chi n'geenú nī ngii ti véé nuuⁿndi yeⁿ'é nī nī 'tíicā castigo yeⁿ'é nī, ní ichée nī? Nguée ch'εεte chuū. Naati nduuti chi n'geenu nī ngii ti n'daacā idiíⁿ nī nī ngiinū ngiinū cuchεε nī tuu'mi ní Ndyuūs nadi'viicú yā ndís'tiī. ²¹Ní yaa'ví yā ndís'tiī caavā chi díⁿ nī 'tíicā. Cristo 'āā ch'leenú yā chii cáávā s'uuúⁿ ní s'neéⁿ yā 'áámá ejemplo yeⁿ'e yú. Ní s'uuúⁿ canée chi 'tíicā nūuⁿ díⁿ yú tan'dúúcā chi díⁿ yā. ²²Cristo miiⁿ nguée díⁿ yā mar 'áámá chuundi 'liiⁿ nuuⁿndi ní nguée chinnc'he'él yā mar 'áámá. ²³Ní taachí 'iiⁿ'yāⁿ s'eeⁿ ngaⁿ'a taáⁿ yā yeⁿ'e Cristo, Cristo miiⁿ nguée ngaⁿ'a taáⁿ yā yeⁿ'e yā. Ní taachi 'iiⁿ'yāⁿ s'eeⁿ díⁿ yā chi Cristo ya'ai ch'leenú yā chii nguée caⁿ'ā cúnncā yā yeⁿ'e yā. Naati cūnee ngiinú yā nanáaⁿ Ndyuūs chi cuaacu chí Ndyuūs caⁿ'ā yā n'diichi yā nuuⁿndi yeⁿ'e 'iiⁿ'yāⁿ s'eeⁿ. Ní Ndyuūs díⁿ yā cosa chi cuaacu. ²⁴Cristo maáⁿ yā candεε yā nuuⁿndi yeⁿ'e yú na cuerpo yeⁿ'e maáⁿ yā taachi ch'ii yā na cruz. Ní 'íicú s'uuúⁿ ní cuuvi díⁿ yú tan'dúúcā chi n'dii yú yeⁿ'e nuuⁿndi yeⁿ'e yú. Ní maaⁿ ní 'cuεetinee yú yeⁿ'e nducuéⁿ'ē chi n'daacā. Ní 'āā nnduuvá yeⁿ'ē yú yeⁿ'e castigo yeⁿ'e nuūⁿndi yeⁿ'e yú cáávā chi Cristo naca'ái yā cáávā nuuⁿndi yeⁿ'e yú. ²⁵Tiempo chi ch'ó'oo s'uuúⁿ ní tan'dúúcā 'iiti cuūchi chi nindai tī 'tíicā s'uuúⁿ

naati maaⁿ ní ndaa yú nanááⁿ
Cristo chi candée yā cuidado s'uuúⁿ
tan'duucā 'áámá pastor. Cristo ní
candée yā cuidado alma yeⁿe yú.

Yeⁿe 'iiⁿyāⁿ chí 'níndívaacu chí
canée chí 'caandiveéⁿ yā yeⁿe ví'i

3 'Tiicá ntúūⁿ ndís'tiī n'daataá
chí 'níndívaacu tá, canée
chí diīⁿ nī chí ngaⁿā isaⁿā yeⁿe nī.
Ní nduuti chí isaⁿā yeⁿe nī nguée
i'téenu sa Cristo, cuuvi cu'téenu
sa Cristo cáávā n'daataá yeⁿe sa
tí n'daacā n'geetinee tá. 'Áará chí
nguée ngaⁿā ta mar 'áámá nduudu
yeⁿe Cristo tuu'mi ní cuuvi cu'téenu
sa Cristo. ²Caati n'diichi sa chí
n'daataá yeⁿe sa yeⁿe nducuéⁿe
chí idiīⁿ tá ní n'daacā ní diīⁿ tá
respetar isaⁿā tá. ³Ní n'daataá
chí n'dai tá chí véé isaⁿā yeⁿe tá
nguée canée chí sta'a tá cosas ní
s'nuuⁿ tá cosas miiⁿ na cuerpo yeⁿe
tá chí diīⁿ chí n'deēvee maaⁿ tá. Ní
nguée neenē n'deēvéé diīⁿ tá tiīⁿ tá
o sta'a tá cosas yeⁿe 'diiⁿnguāⁿ o
catecai chí ya'ai chíf'vē chí snee
tá chí cuuvi dich'eetē maaⁿ tá táⁿā.
⁴Naati n'deēvéé chí yeⁿe tá canee
chí cūnee yeⁿe maaⁿ tá ní canée
chí n'deēvee tá ndúúcū espíritu yeⁿe
tá chí ndiicúúⁿ. Ní canee 'diiⁿ tá.
Chuū ní dichí'f'vē nanááⁿ Ndyuūs.
⁵Caati tiempo chí chó'oo 'tífā idiīⁿ
n'daataa s'eeⁿ chí yeⁿe Ndyuūs,
n'daataa chí i'téenu ca Ndyuūs ní
s'teenu tá chí ngaⁿā isaⁿā yeⁿe tá.
⁶Ní táⁿā Sara 'tiicá ntúūⁿ diīⁿ tá.
S'teenu tá isaⁿā yeⁿe tá chí nguuvi
Abraham. Ní ngaⁿā tá isaⁿā yeⁿe
tá: N'dii ní señor yeⁿe. Maaⁿ ní
ndís'tiī cuuvi diīⁿ nī tan'dúúcā chí
ndís'tiī daiya Sara ndís'tiī nduuti

chí n'daacā idiīⁿ nī ní nguée 'va'á nī
yeⁿe mar 'áámá.

⁷Ní 'tiicá ntúūⁿ ndís'tiī saⁿā chí
véé n'daataá yeⁿe nī. 'Cuēetinée
nī ndúúcū tá ní diīⁿ nī respetar
n'daataá yeⁿe nī. Ní diīⁿ nī honrar
n'daataá yeⁿe nī tan'dúúcā chí
deenu nī chí n'daacā ti n'daataa
miiⁿ nguée véé fuerzas yeⁿe tá
tan'dúúcā 'áámá saⁿā. Ní 'tiicá ntúūⁿ
Ndyuūs yeⁿe vaadi n'dai yeⁿe yā
ca'a yā vida yeⁿe tá daama daama
tan'dúúcā chí tee yā ndís'tiī saⁿā. Ní
ndís'tiī saⁿā diīⁿ nī 'túúcā ní nguée
du'ū vee chí di'vaachí ndís'tiī yeⁿe
chí diīⁿ nī taachi ngaⁿangua'á nī.

Yeⁿe chí n'geenu yú ngii
caavā chí n'daacā idiīⁿ yú.

⁸Ní yeⁿe nducuéⁿe canée chí
dáámá nūuⁿ nadacadíínuuⁿ nī
nducyaaca ndís'tiī ní dáámá nūuⁿ
nadacadíínuuⁿ nī na staava yeⁿe
nī. Dinéⁿe nī 'aama nī taama nī
tan'dúúcā chí cuáácú chí vi'í nī. Ní
ya'ai 'iinú nī 'aamá nī taama nī. Ní
diīⁿ chí ndiicúúⁿ nī 'aamá nī ndúúcū
taama nī. ⁹Taachi 'iiⁿyāⁿ nguée
n'daacā idiīⁿ yā ndúúcū nī nguée
idiīⁿ nī chí nguée ndaacā ndúúcū
yā. Ní taachi 'iiⁿyāⁿ nguée n'daacā
caaⁿmáⁿ yā yeⁿe nī nguée cunncaā
caaⁿmáⁿ nī yeⁿe yā. Ndaacā ca
diīⁿ nī ní caaⁿmáⁿ nī ndúúcū 'iiⁿyāⁿ
s'tiī ní di'viicú nī 'iiⁿyāⁿ s'tiī. 'Tífā
Ndyuūs cuuvi di'viicú yā ndís'tiī.
Ndyuūs yaa'ví yā ndís'tiī chí cuuvi
yeⁿe yā ti diīⁿ yā 'tífā nduucú
nī. ¹⁰Canée nguūⁿ na libro yeⁿe
Ndyuūs 'tífā:

'Iiⁿyāⁿ chí neⁿe chí yeenú yā
ndúúcū vida yeⁿe yā ní neⁿe
yā chí véé nduuyu yeⁿe yā, 'āā

ntéé canéé chi caaⁿ máⁿ yā dendu'ū chi nguée n'daacā. Ní nguée caaⁿ máⁿ yā nduudu yaadi. ¹¹Canéé chi diví yā yeⁿe nducueⁿe chi nguée n'daacā ní dámaāⁿ díⁿ yā chi n'daacā. Canéé chí neⁿé yā vaadi 'diiⁿ ní díⁿ yā nducueⁿe chi véé vaadi 'diiⁿ yeⁿe yā. ¹²Señor Ndyuūs yeⁿe yú maāⁿ yā 'iiⁿyāⁿ chi din'daacá yā. Ní cueⁿe daāⁿmaⁿ n'giindiveéⁿ yā chi 'iiⁿyāⁿ s'eeⁿ ngaⁿ angua^a yā. Ní Señor yeⁿe yú ní contra yeⁿe 'iiⁿyāⁿ chi nguée n'daacā idiⁿ yā.

¹³¿Du'ú 'iiⁿyāⁿ chi'nuucá'ai yā ndís'tii nduuti chi ndís'tii nducueⁿe tiempo díⁿ nī chi n'daacā? Nguée díⁿ yā 'tíicā. ¹⁴Ní nduuti chi ndís'tii n'geenu nī ngii cáávā chi n'daacā idiⁿ nī tuu'mi ní yeenú nī. Nguée díⁿ 'va'a nī yeⁿe mar 'áamā 'iiⁿyāⁿ ní nguée dí'yáá nī cuuvi. ¹⁵Canéé chí dich'eté nī Cristo na staava yeⁿe nī ní 'cuaāⁿ nī lugar Cristo chi 'iiví nī. Ní canéé listo nī chi cuuvi nan'gueecútaⁿá nī 'āā du'ú nūuⁿ 'iiⁿyāⁿ chi intiinguuneeⁿ ndís'tii 'tíicā: Ndís'tii de'e cáávā chi cūnee ngínú nī yeⁿe Ndyuūs yeⁿe nī. Ní taachi nan'gueecutaⁿá nī yeⁿe yā díⁿ nī chi ndiicúúⁿ n'dai nī. Ní díⁿ nī respetar 'iiⁿyāⁿ. ¹⁶Cuētinéé n'daaca nī chi nguée véé chi nadacadínuuⁿ nī yeⁿe chi nguée n'daacā chi díⁿ nī. Ní 'iiⁿyāⁿ chi cunncaā ngaⁿa yā yeⁿe chi n'daacā chi díⁿ nī caavā chi i'téenu nī Cristo, cuuvi 'cuináaⁿ yā cáávā chi ngaⁿá yā. ¹⁷N'dáacā ca chi 'cueenu yú cuuvi cáávā cosas chi n'daacā

idiiⁿ yú nduuti chi Ndyuūs neⁿé yā 'tíicā, nguée ti cáávā cosas chi nguée n'daacā idiiⁿ yú.

¹⁸Cristo miiⁿ maāⁿ yā ch'eenú yā chíi chi ch'ii yā cáávā nuuⁿndi yeⁿe yú ní 'áamā vmnéⁿee ch'ii Cristo cáávā nuuⁿndi yeⁿe nducyaaca 'iiⁿyāⁿ, ní nguée nuuⁿndi yeⁿe yā. Ní ch'ii yā caati cuuvi candée ya s'uuúⁿ nanááⁿ Ndyuūs. Cuáácú ch'ii cuerpo yeⁿe yā naati espíritu yeⁿe yā nduuchi. ¹⁹Ní espíritu yeⁿe Cristo cuayiivi chi ch'ii yā cheⁿe yā ní caⁿa yā nduudu cuaacu yeⁿe Ndyuūs nanááⁿ espíritu s'eeⁿ yeⁿe 'iiⁿyāⁿ s'eeⁿ chi n'dii. Ní espíritu s'eeⁿ ní preso yā na lugar yeⁿe espíritu s'eeⁿ. ²⁰Espíritu s'eeⁿ ní yeⁿe 'iiⁿyāⁿ chi nguée ch'iindiveéⁿ yā Ndyuūs 'áamā tiempo chi 'āā chó'oo. Ní Ndyuūs canee ngínú yā ní 'diiⁿ canéé yā chi 'iiⁿyāⁿ s'eeⁿ ndaacadaamí yā yeⁿe nuuⁿndi yeⁿe yā 'naaⁿ tiempo chi saⁿā Noé din'dái sa 'áamā arco chí barco ch'etete. Ní ch'eti barco miiⁿ n'duuví 'iiⁿyāⁿ, dámaāⁿ niiní yā, ní nguaⁿ'ai yā yeⁿe nuūⁿnīⁿ. ²¹Ní nuūⁿnīⁿ miiⁿ ní tan'dúucā nuūⁿnīⁿ chi ngeedínuūⁿnīⁿ yú chi nanguaⁿ'āi s'uuúⁿ. 'Tíicā nuuⁿniⁿ miiⁿ. Taachi ngeedínuūⁿnīⁿ yú nguée caavā chi naaⁿnu cuerpo yeⁿe yú naati cáávā chi 'áamā compromiso yeⁿe yú nanááⁿ Ndyuūs. Ní n'daacā diiⁿ yú chuū ndúucū núúⁿmáⁿ staava yeⁿe yú. Ní Ndyuūs nadanguáⁿ'ai yā s'uuúⁿ chi i'teenu yú Cristo cáávā Cristo nducueeⁿ yā yeⁿe nguaaⁿ tináⁿā. ²²Ní Cristo miiⁿ cunaⁿá yā na va'ai ch'eti nguuví ní maaⁿ canee yā lado yeⁿe honor yeⁿe Ndyuūs chi lado tá cuaacu. Ní Cristo ngaⁿa ntiⁿnyúⁿ

yā yeⁿé ángeles ndúúcu 'iiⁿntyéⁿē
ní yeⁿē poderes chi véé.

**Canee chi dichíⁿve yú
Ndyuūs tan'dúúcā chi Ndyuūs
tee yā fuerzas s'uuúⁿ**

4 Tan'dúúcā Cristo ch'eenú yā
chií ní díⁿ yā sentir na cuerpo
yeⁿé yā 'tiicá ntúúⁿ ndís'tiī canéé
chi cuta'á nī fuerzas yeⁿé nī cáávā
tiempo chi caⁿá nī 'cuenú nī cuuvi.
Maaⁿ ní 'iiⁿyāⁿ s'eeⁿ chí ch'eenú
yā chií ní díⁿ yā sentir na cuerpo
yeⁿé yā 'āā ntéé neⁿé yā dinuuⁿndi
yā. ²Ní ndíí maaⁿ ndís'tiī canee chi
díⁿ nī tanducuéⁿē chi neⁿe Ndyuūs
chi díⁿ nī tanducuéⁿē nguuví yeⁿe
nī. Ní nguéé díⁿ nī tan'dúúcā chi
maaⁿ cuerpo yeⁿé nī neⁿe chi díⁿ
nī. ³Tiempo chi 'āā chó'oo ní diiⁿ
yú tan'dúúcā 'iiⁿyāⁿ chi nguéé yeⁿe
ndaata Israel chi nguéé i'téenu yā
Ndyuūs. Tiempo miiⁿ ní diiⁿ yú
cosas chi nguéé n'daaca. Ní diiⁿ yú
nuuⁿndi tan'dúúcā chi neⁿe cuerpo
yeⁿe yú chi diiⁿ yú. Ní 'cuūⁿvi yú
ní cho'o nee che'e yú taachi véé
fiesta yeⁿē chi che'e yú. Ní cu'u ca
yú vino. Ní s'teenú yú santo s'eeⁿ
chi ídolo s'eeⁿ. ⁴'Iiⁿyāⁿ s'eeⁿ chi
nguéé i'téenu yā Cristo, ¿De'ē cáávā
chi nadacadíínuuⁿ yā chi ndís'tiī
nguéé nduuvidaamá nī ndúúcu
yā, ní nguéé idiíⁿ nī ndúúcu yā
cosas chi nguéé n'daaca? Ní chíⁿ
chi 'iiⁿyāⁿ s'eeⁿ ní cunncāā ngaⁿa
yā yeⁿé nī. ⁵'Iiⁿyāⁿ s'eeⁿ canéé chi
nga'a yā cuenta yeⁿe vida yeⁿe
maáⁿ yā nanááⁿ Cristo chi díⁿ yā
juzgar nducyaaca 'iiⁿyāⁿ, 'iiⁿyāⁿ chi
canduuchi ndúúcu 'iiⁿyāⁿ chi n'díí.
⁶Ní cáávā chuū Cristo ngaⁿá yā
nduudu cuaacu yeⁿe maáⁿ yā nanááⁿ

espíritus yeⁿe 'iiⁿyāⁿ chi n'díí caati
espíritus yeⁿé yā cuuvi canduuchi
tan'dúúcā chi Ndyuūs canduuchí yā.
Ní Ndyuūs n'diichí yā nuuⁿndi yeⁿé
'iiⁿyāⁿ s'eeⁿ taachi ch'etinee yā
iⁿ'yeeⁿdí 'cūū tan'dúúcā chi n'diichí
yā nuuⁿndi yeⁿe nducyáácá 'iiⁿyāⁿ
chi snee yā iⁿ'yeeⁿdi 'cūū.

⁷'Āā cháā snee niⁿnuúⁿ nguuví chi
'cuiinu tanducuéⁿē denduⁿ. Ní cáávā
chuū 'cuēetinee n'daaca nī ní 'āā de'ē
ora nūuⁿ ní cuuvi caaⁿmaⁿngua'á
nī. ⁸Ní yeⁿē tanducuéⁿē dineⁿe cá
nī 'aama nī taama nī caati taachi
dineⁿe cá nī tuuⁿmi ní inadich'ēecú
nī nuuⁿndi yeⁿē 'áámá nī taama
nī. ⁹Cuaáⁿ nī 'áámá nī taama nī na
vaacu nī ní nguéé 'cuēecu cheendí
nī. ¹⁰Ní ca'áámá ca'aama nī ní díⁿ
nī servir taamá nī ndúúcu ntiⁿnyuⁿ
chi Ndyuūs itée yā chi díⁿ nī. Ní
canéé chi diiⁿ n'daaca nī ntiⁿnyuⁿ
yeⁿé nī chi Ndyuūs itée yā ca'aama
ca'aamá nī ti Ndyuūs itée yā ndís'tiī
nducuéⁿē chi n'dai taavi yeⁿe yā.
¹¹Nduuti chi 'áámá nī candee nī
nduudu cuaacu canéé chí ngaⁿá yā
nduudu cuaacu yeⁿé Ndyuūs. Nduuti
chi 'aamá nī díⁿ nī ntiⁿnyuⁿ yeⁿe
yaācū canéé chi díⁿ yā ndúúcu
nducuéⁿē fuerzas yeⁿé yā chi
Ndyuūs ca'a yā 'iiⁿyāⁿ miiⁿ. Ní yeⁿe
tanducuéⁿē chi ndís'tiī díⁿ nī canéé
chi díⁿ nī chi cuuvi dich'etē nī
Ndyuūs cucáávā Jesucristo. Ní yeⁿé
Ndyuūs chí ngíí dēeve yeⁿe yā ní vee
poder yeⁿé yā tanducuéⁿē tiempo.
'Tííca yā.

**Canéé chi n'geenu yú ngii
ti yeⁿe Cristo s'uuúⁿ**

¹²Ndís'tiī hermanos chi neⁿé taavi
nguéé nadacadíínuuⁿ nī chi cosa

chi díftūu nguée canée chí chó'oo yeⁿé nī taachi 'iiⁿyāⁿ n'diichineeⁿ cá yā ndís'tiī chi ya'ai n'geenú nī ngii ti canée chí chó'oo yeⁿé nī 'tíicā. ¹³Naati canée chí cuuvi yeenú nī taachí n'geenú nī ngii tan'dúucā Cristo ch'eenú yā chii. Ní cuayiivi cuuvi yeenú cá nī taachi Cristo ndaa yā taama vmnéⁿēe ní 'cuuⁿmíⁿ yā chi ch'εεε n'dai ngiichí yā tan'dúucā dεεve ngiichí ch'εεε.

¹⁴Nduuti chi 'iiⁿyāⁿ n'gaa'vá yā ndúucu nī cucáávā chi i'téenu nī Cristo tuu'mi ní yeenú nī. Espiritu N'dai yeⁿé Ndyuūs chí dεεvé ngii canée ndúucū ndís'tiī. Áará chí 'iiⁿyāⁿ s'eeⁿ cunncaā ngaⁿa yā yeⁿe Cristo, ndís'tiī ní dííⁿ nī honrar Cristo. ¹⁵Ní nduuti chi 'áamá chée ndís'tiī n'geenu nī ngii 'úu nguée neⁿé chi 'cuenú nī cuuvi caati ch'iíⁿnúⁿ nī 'iiⁿyāⁿ o ididuucú nī o nguée dííⁿ nī tan'dúucā chi ngaⁿā ley yeⁿé Ndyuūs chi ch'εεε ca.

¹⁶Ní nduuti chi 'áamá chεε ndís'tiī n'geenu nī ngii cáávā chi i'téenu nī Cristo nguée cuuvi 'cuinaáⁿ nī naati canee chi dich'εεé nī Ndyuūs caati 'iiⁿyāⁿ ngaⁿa yā chí díí ní yeⁿe Cristo dii.

¹⁷Áā ndaa tiempo chi Cristo caⁿá yā n'diichi yā nuuⁿndi yeⁿe 'iiⁿyāⁿ ní vmnááⁿ vmnaaⁿ caⁿá yā n'diichí yā nuuⁿndi yeⁿe 'iiⁿyāⁿ chi i'téenu yā 'iiⁿyāⁿ. Ní nduuti chi vmnááⁿ vmnaaⁿ n'diichí yā nuuⁿndi yeⁿe yú, 'táácā cuuvi yeⁿé 'iiⁿyāⁿ chi nguée i'téenu yā nduudu cuaacu yeⁿé Ndyuūs cuayiivi taachi n'diichí Cristo nuuⁿndi yeⁿe yā? ¹⁸Ní nduuti chí ngf'ii chí 'iiⁿyāⁿ chí n'dai cuuvi nanguaⁿai yā, 'déd'ε cuuví ndúucū 'iiⁿyāⁿ chí nguée n'daacā dííⁿ yā ní

ndúucū 'iiⁿyāⁿ chí dinuuⁿndí yā ní nguée i'téenu yā? ¹⁹Ní 'tíicā canee chí diiⁿ yú. Taachi n'geenu yú ngii caavā chí Ndyuūs neⁿé yā chí diiⁿ yú 'tíicā, canée chí diiⁿ yú nducuéⁿē chí n'daacā. Ní canée chí nga'a yú vida yeⁿe yú na ta'a Ndyuūs caati Ndyuūs din'dái yā s'uuúⁿ ní 'indεε yā cuidado s'uuúⁿ. Ndyuūs ní dííⁿ yā chiiⁿ chí ngaⁿa yā chí caⁿa yā diiⁿ yā.

Yeⁿé 'iiⁿyāⁿ chí i'téenu yā Ndyuūs

5 'Úú Pedro ca'á consejo 'iiⁿntyéⁿē yeⁿe yaācū chí snée nguaaⁿ ndís'tiī. 'Úú 'tiicā ntúūⁿ 'iiⁿntyéⁿē 'úú. 'Úú ngaⁿá yeⁿe Cristo tan'dúucā chí ch'eenú yā chí ti n'diichí nduucū nduutinaáⁿ maáⁿ. Ní 'tiicā ntúūⁿ véé parte yeⁿé vaadi dεεve ngii chí Ndyuūs 'cuuⁿmíⁿ yā s'uuúⁿ cuayiivi. ²Ndís'tiī 'iiⁿntyéⁿē yeⁿe yaācū, idiíⁿ nī ntiíⁿnyuⁿ yeⁿé nī tan'dúucā 'áamá pastor chí indεε yā cuidado yeⁿe 'iiti cuūchī. 'Tíicā dííⁿ nī ndúucū 'iiⁿyāⁿ chí yeⁿé Ndyuūs chí caⁿá yā yaācū naachi ndís'tiī ní 'iiⁿntyéⁿē. Nguée dííⁿ nī ntiíⁿnyuⁿ yeⁿe nī chí canée chí dííⁿ nī naati dííⁿ nī ti maáⁿ nī neⁿe nī diiⁿ nī caati 'tíicā neⁿe Ndyuūs. Nguée dííⁿ nī caavā chí cuta'á nī tuūmī naati dííⁿ nī ndúucū nuuⁿmaⁿ staava yeⁿé nī chí n'dai. ³Nguée dííⁿ nī ndúucū 'iiⁿyāⁿ chí maaⁿ cuidado yeⁿé nī tan'dúucā chí ndís'tiī ní 'iiví yeⁿé yā naati 'cuεetinée n'daacá nī níicú 'iiⁿyāⁿ cuuvi n'diichí yā ndís'tiī ní dííⁿ yā tan'dúucā chí ndís'tiī dííⁿ nī. ⁴Ní 'íicú taachi ndaa Jesucristo chí 'iiⁿyāⁿ chí ndíí tiiíⁿ chí ícandεε yā cuidado yeⁿe 'iiⁿyāⁿ yeⁿé yā tan'dúucā 'áamá pastor chí

ndii tiiⁿ chí ícandee yā cuidado
'iiti yeⁿé yā, tuu'mi ní ndís'tii cuuvi
cuta'á ní 'áamá corona chi nguée
'cuiinu deevé yeⁿé. Nguée corona
yeⁿe yaātā chi ituuvií.

⁵Tiicá ntúuⁿ ndís'tii saⁿā
da'caiyāā canée chí díⁿ ní tan'dúucā
chi ngaⁿa 'iiⁿntyeⁿé yeⁿe yaācū.
Nducyaaca ní canée chí ndiicuuⁿ
ní ní cunnee ní 'aama ní taama ní
caati canée nguūⁿ na libro yeⁿé
Ndyuūs 'tíicā:

Ndyuūs nguée neⁿe yā 'iiⁿyāⁿ
chi nacadínuuⁿ yā chi maáⁿ
yā ch'eeⁿe yā naati ca'á yā
nducuéⁿé chi n'dai yeⁿe yā
'iiⁿyāⁿ chi ndiicúúⁿ.

⁶Maaⁿ ní nducyaaca ndís'tii ndiicúúⁿ
n'dai 'cuētinée ní maaⁿ poder yeⁿé
Ndyuūs ti Ndyuūs cuuvi dich'etē yā
ndís'tii tiempo chi neⁿé yā. ⁷Ca'á ní
nducueⁿé cuidado chi díttū yeⁿe
ní na ta'a Cristo caati Cristo candeé
yā cuidado yeⁿe ndís'tii.

⁸Canée listo ní ní nguée
'cuētiyaadú ní. Cundée ní cuidado
chi n'daacā 'cuētinée ní ti
yááⁿn'guiinūⁿ miiⁿ chí contra yeⁿe
ní chíicá sá ní n'diichi sa ndii 'muuⁿ
ní ndii miiⁿ. Ní tan'dúucā 'áamá
'yáíⁿyāⁿ cuá'áá n'gai tí ní cachiiicá
tí ní i'nuúⁿ tí du'u chi cuuvi che'é
tí 'tíicā díiⁿ yááⁿn'guiinūⁿ miiⁿ.

⁹Nguée ca'a ní lugar yááⁿn'guiinuúⁿ
'cūū naati 'áamá cūnee ní ndúucū
chi i'téenu ní. Ní déenu ní chi
'āā daamá nūuⁿ n'geenu yú ngii
tan'dúucā nducyaaca hermanos chi
s'néeⁿ yā na núúⁿmáⁿ íⁿyeⁿe dī tí
i'téenu yā Cristo. ¹⁰Ní cuayiivi chi
ch'eenú ní chií duu'vi tiempo nūuⁿ

tuu'mi ní Ndyuūs díiⁿ yā chi ndeeve
canée vida yeⁿe ní. Ní diituú canee
ní ndúucū chi i'téenu ní Ndyuūs. Ní
Ndyuūs ca'á yā fuerzas yeⁿe ní ní
díiⁿ yā chi seguro canee ní ndúucū
chi i'téenu ní. Maaⁿ Ndyuūs miiⁿ ní
teé yā nducuéⁿé chi n'dai. Ní maáⁿ
yā yaa'ví yā s'uuúⁿ chi cuuvi yeⁿé
yā s'uuúⁿ cáávā chi véé parte yeⁿe
yú ndúucū deeve ngii ch'eeⁿe yeⁿé
yā caati s'uuúⁿ ní yeⁿe Cristo s'uuúⁿ.
¹¹Caaⁿmaⁿ yú chi Ndyuūs ní ch'eeⁿe
n'dai yā ní yeⁿé yā véé nducuéⁿé
poder chi véé ní cueⁿe daāⁿmaⁿ
cueⁿe daāⁿmaⁿ 'tíicā.

**'Cuiinu carta miiⁿ ní yaa'vi
yā 'iiⁿyāⁿ chi n'daí ndís'tii**

¹²Téé nūuⁿ idinguúⁿ carta 'cūū
yeⁿé ndís'tii ní hermano Silvano
nginnee sa 'úú. Nadicádiinúúⁿ chi
Silvano miiⁿ ní hermano chi n'dai
taavi. 'Úú teé consejo ndís'tii chi
seguro canee ndís'tii chi nducuéⁿé
chi Ndyuūs itee yā ndís'tii yeⁿe
vaadi n'dai yeⁿé yā ní yeⁿé ní ti
neⁿé yā ndís'tii. Maaⁿ ní 'cuētinée
n'daaca ní ní diituu canee ní ní
cuchée ní yeⁿe tanducuéⁿé chuū.

¹³Iiⁿyāⁿ yeⁿe yaācū chi canee na
yāāⁿ Babilonia chi Ndyuūs didēevé
yā tan'dúucā s'uuúⁿ: N'daí ndís'tii,
ngaⁿa yā. 'Tiicá ntúuⁿ Marcos
chi tan'dúucā daiyá: N'daí ndís'tii,
ngaⁿa sa. ¹⁴Ndís'tii hermanos:
N'daí ní, ngaⁿa ní 'aama ní taama
ní ti neⁿé ní 'aama ní taama ní ti
yeⁿé Cristo ndís'tii. Ní Ndyuūs tee
yā vaadi 'diiⁿ yeⁿé yā nducyaacá
ndís'tii chi yeⁿe Cristo. 'Tíicā
cuuvi.

CARTA CUAYIIVI YEⁿE SAN PEDRO

**Pedro idinguúⁿ yā carta 'cūū yeⁿe
'iiⁿyāⁿ chi i'téenu yā Cristo**

1 'Úú Simón Pedro 'úú ní 'úú
ní apóstol yeⁿe Jesucristo.
Ní candéé nduudu yeⁿe Ndyuūs
ti Ndyuūs dichí'vē Jesucristo. Dinguúⁿ carta
'cūū yeⁿe 'iiⁿyāⁿ chi 'āā i'téenu n'dai
yā Jesucristo tan'dúúcā nú'suu.
'Tíicā diiⁿ Ndyuūs ndúúcu Salvador
chi Jesucristo ti cuaacu yā. ²'Úú
neⁿe chi ndís'tiī cuta'á nī nducueⁿe
vaadi n'dai ndúúcu vaadi 'diiⁿ chi
Ndyuūs téé yā ndís'tiī, ní cáávā
chi deenū n'daacá nī yeⁿe Ndyuūs
chiida yú ndúúcu Jesucristo yeⁿe
yú.

**Yeⁿe vida yeⁿe 'iiⁿyāⁿ chi
i'téenu yā Jesucristo**

³Ndyuūs cáávā poder yeⁿe yā
'āā tee yā s'uuúⁿ tanducuéⁿe caati
cuuvi 'cuēetineé n'daāca yú ní cuuvi
dich'ēte yú Ndyuūs. Ní 'tíicā cuuvi
diiⁿ yú ti deenu yú Jesucristo chi
ch'ēte maáⁿ yā ní dííⁿ yā vaadi
n'giinu. Ní Jesucristo yaa'ví yā
s'uuúⁿ chi cuuvi yeⁿe yā s'uuúⁿ. ⁴Ní
Cristo 'āā tee yā s'uuúⁿ promesas
chí n'dēevéé n'dai ní ng'ēte ca. Ní
cucáávā promesas miiⁿ ndís'tiī ní

cuuví cuta'á nī yeⁿe vida ngai chí
yeⁿe Ndyuūs. Ní cuuvi nnguaⁿ'ai
nī yeⁿe nuuⁿndi yeⁿe iⁿ'yeeⁿdí 'cūū,
nuūⁿndi chi maaⁿ cuerpo yeⁿe yú
neⁿe chi diiⁿ yú. ⁵Maaⁿ chi i'téenu
nī Jesucristo candéé nī cuidado chi
n'daacā ca 'cuēetineé nī. Ní taachi
n'daacā ca 'cuēetineé nī tuu'mi ní
ca'cueéⁿ nī caati cuuvi deenu cá
nī. ⁶Ní taachi déénú cá nī tuu'mi
ní ngaⁿ'a ntiīⁿnyuⁿ nī yeⁿe maaⁿ
cuerpo yeⁿe nī. Ní taachi dííⁿ nī
chi ngaⁿ'a ntiīⁿnyuⁿ nī yeⁿe maaⁿ
cuerpo yeⁿe nī tuu'mi ní cuchē
nī yeⁿe maaⁿ cuerpo yeⁿe nī. Ní
taachi cuchē nī yeⁿe maaⁿ cuerpo
yeⁿe nī tuu'mi ní dííⁿ nī tan'dúúcā
chi Ndyuūs neⁿe yā chi dííⁿ nī. ⁷Ní
taachi 'āā dííⁿ nī tan'dúúcā chi
Ndyuūs neⁿe yā chi dííⁿ nī tuu'mi
ní dineⁿe nī 'áámá nī taama nī. Ní
taachi dineⁿe nī 'áámá nī taama nī
tuu'mi ní 'áámá dinéⁿe nī 'iiⁿyāⁿ.

⁸Ní yeⁿe tanducuéⁿe chuū, nduuti
chi ndís'tiī dííⁿ nī ní n'dai n'dai dííⁿ
nī tuu'mi ní cuuvi dííⁿ nī ntiīⁿnyuⁿ
yeⁿe Señor Jesucristo yeⁿe yú. Ní
dichí'vē nī Señor yeⁿe yú. Ní chuū
diiⁿ chi dichí'vē chí deenu n'daāca
cá nī Señor Jesucristo yeⁿe yú. ⁹Ní
nduuti chi 'áámá nī nguéeⁿ dííⁿ nī
tanducuéⁿe chuū tuu'mi ní ndís'tiī

ní tan'dúúcā 'áámá 'iiⁿyāⁿ chi ngeenááⁿ 'tiicá nī ti nguéeⁿ cuuvi snaaⁿ nī chí yaⁿ'ai. Ní nguéeⁿ n'gaacu nī chí nduuví dēeve nī yeⁿ'e nuuⁿndi yeⁿ'e nī chí dííⁿ nī cuááⁿ vmnaaⁿ taachi caama i'téenu nī Jesucristo. ¹⁰Maaⁿ ní ndís'tiī hermanos yeⁿ'é cáávā nducuéⁿē chuū candēe cá nī cuidado chi 'aama canéeⁿ n'daaca nī ndúúcu chi i'téenu nī. Ní canee nī seguro chi Ndyuūs yaa'ví yā ndís'tiī chí cuuvi yeⁿ'é yā ndís'tiī. Ní ndēevé yā ndís'tiī. Ní nduuti chí dííⁿ nī dendu'ū chí 'túúca tuu'mi ní 'āā ntéeⁿ dē'ē cáávā chí dííⁿ nī nuuⁿndi. ¹¹Ní taachi dííⁿ nī 'túúca Jesucristo tée yā lugar ndís'tiī chí cuuvi ndaa nī naachi canee Señor Jesucristo chí nadanguaⁿ'ai yā s'uuúⁿ ní naachi cuéⁿ'é daāⁿmaⁿ ngaⁿ'a ntiiⁿnyuⁿ yā yeⁿ'ē.

¹²Ní cáávā chuū 'úú cueⁿ'e daāⁿmaⁿ idiíⁿ chí ndís'tiī n'gaacu nī yeⁿ'ē tanducuéⁿē chuū 'áará chí deenú n'dai nī yeⁿ'ē. Ní n'geetinée n'daaca nī ní n'giindivééⁿ n'daaca nī nduudu cuaacu yeⁿ'é Ndyuūs. ¹³Úú nadacádiinúúⁿ chí n'daāca ca neⁿ'e chí canduuchi cá chí 'tíicā dííⁿ chí ndís'tiī cuuvi nan'gaacu nī yeⁿ'e tanducuéⁿē chuū. ¹⁴Señor Jesucristo yeⁿ'e yú 'āā ch'iⁿ'í yā 'úú, Pedro, 'tíicā. 'Āā ntéeⁿ 'nááⁿ canduuchí ní 'cuūví. ¹⁵'Tiicá ntúūⁿ idiíⁿ chí ndís'tiī n'gaacu nī cuéⁿ'é daāⁿmaⁿ yeⁿ'e dendu'u 'cūū taachi 'āā n'díí.

**'Iiⁿyāⁿ n'diichí yā dēeve
ngii yeⁿ'e Cristo**

¹⁶Chííⁿ chí nús'uu ca'cueéⁿ 'nū ndís'tiī yeⁿ'e Señor Jesucristo yeⁿ'e yú chí ndaa ntuúⁿ yā ndúúcu poder

yeⁿ'é yā nguéeⁿ yeⁿ'e vaanicadínnūⁿ yeⁿ'e 'iiⁿyāⁿ yeⁿ'e iⁿ'yeeⁿdí 'cūū. 'Tíicā nús'uu 'āā n'diichí 'nū ndúúcu nduutinaáⁿ maáⁿ 'nū Señor Jesucristo yeⁿ'e yú chí neené ch'ēte. ¹⁷Ní n'diichí 'nū chí Cristo ní neené ch'ēte yā taachi Ndyuūs chiida yú dich'ēte yā Jesucristo ní ca'a yā Cristo chí dēevé taavi ngii yā. Caati Ndyuūs chí dēeve ngii ca ngaⁿ'á yā yeⁿ'e Cristo ní n'giindivééⁿ 'nū nduudú 'cūū. Chuū caⁿ'a Ndyuūs: Sáⁿ'a 'cūū chí daiyá chí neⁿ'e taaví ní 'úú néené yeenú yeⁿ'ē daiyá. ¹⁸Ní nús'sū maáⁿ 'nū ch'iindivééⁿ 'nū nduudu 'cūū chí chiica yeⁿ'e va'ai chēeti nguuvi taachi cueⁿ'é 'nū ndúúcu Jesucristo na yīicū chí duuchi N'dēevé N'dai.

¹⁹Maaⁿ ní cu'téenu cá 'nū chí nduudu cuaacu chí 'iiⁿyāⁿ profetas candēe yā tiempo chí 'āā chó'oo ní cuaacu. N'daacā ca chí ndís'tiī i'neeⁿveéⁿ nī nduudú 'cūū. Nduudú 'cūū tan'dúúcā 'áámá chideeve chí ngii yaⁿ'ā na 'áámá cuaaⁿ chí maāⁿ. 'Tíicā yeⁿ'ē, ní chideeve ní ngii ndii tiempo chí ndaa nguuví ní can'daā 'ííⁿnyúⁿ chí nguuví 'yuudi chí nduudu cuaacu ní canee na staava yeⁿ'é nī. ²⁰Neⁿ'é chí ndís'tiī vmnááⁿ vmnaaⁿ nadacadínnūⁿ nī yeⁿ'e chuū. Mar 'áámá nduudu yeⁿ'e libro yeⁿ'é Ndyuūs chí ngaⁿ'ā yeⁿ'e 'áámá dendu'ū chí cuchii ndís'tiī nguéeⁿ dámaāⁿ maáⁿ nī cuuvi deenú nī yeⁿ'ē. ²¹Ní nduudu cuaacu chí ngaⁿ'a profetas tiempo chí chó'oo nguéeⁿ ngaⁿ'a yā yeⁿ'e chí nadacadínnūⁿ yā maáⁿ yā naati Espíritu N'dai yeⁿ'é Ndyuūs yaa'ví yā profetas nduudu cuaacu chí caⁿ'a yā. Ní nduudu yeⁿ'é yā ngiica yeⁿ'é

Ndyuūs ti 'áámá dífⁿ yā ntiiⁿnyuⁿ yeⁿ'é Ndyuūs.

Yeⁿ'é 'iiⁿ'yāⁿ chi nguéeⁿ ca'cueéⁿ yā nduudu cuaacu yeⁿ'é Ndyuūs

2 Tiempo chi chó'oo nguaaⁿ 'iiⁿ'yāⁿ Israel véé 'iiⁿ'yāⁿ profetas chi nguéeⁿ ngaⁿ'a yā nduudu cuaacu yeⁿ'é Ndyuūs. 'Tiicá ntúūⁿ tiempo maaⁿ caⁿ'a n'dai maestros yeⁿ'e yaācū nguaaⁿ ndís'tiī chi nguéeⁿ caaⁿ'máⁿ yā nduudu cuaacu yeⁿ'é Ndyuūs. Ní candéeⁿ n'de'ei yā nduudu chi nguéeⁿ cuaacu chi diiⁿ chi nguéeⁿ i'téenu ní Cristo. Ní 'iiⁿ'yāⁿ s'eeⁿ caaⁿ'máⁿ yā contra yeⁿ'e Jesucristo chi nadanguáⁿ'ai yā 'iiⁿ'yāⁿ. Ní chífⁿ chi dífⁿ yā diiⁿ chi 'iiⁿ'yāⁿ s'eeⁿ niiⁿnuuⁿ niiⁿnuúⁿ nūūⁿ 'cuiinú maáⁿ yā. ²Áará chi nguéeⁿ 'tíicā chiīⁿ chi ngaⁿ'a 'iiⁿ'yāⁿ s'eeⁿ 'yaaⁿ 'iiⁿ'yāⁿ ní 'caandiveéⁿ yā yeⁿ'e 'iiⁿ'yāⁿ s'eeⁿ. Ní dífⁿ yā chi nguēⁿ n'daacā tan'dúúcā chi diiⁿ 'iiⁿ'yāⁿ s'eeⁿ. Ní nguéeⁿ n'daacā ngaⁿ'a 'iiⁿ'yāⁿ s'eeⁿ yeⁿ'e yúúní cuaacu chi evangelio chi nduudu ngai yeⁿ'e Jesucristo. ³Ní 'iiⁿ'yāⁿ s'eeⁿ ca'cueéⁿ yā nduudu chi ngiica yeⁿ'e chi maáⁿ yā nadacadíinuūⁿ yā ti neⁿ'é yā tuumī chi ndís'tiī ca'á ní 'iiⁿ'yāⁿ s'eeⁿ. Áā 'naaⁿ tiempo chi Ndyuūs 'āā n'diichí yā nuuⁿndi yeⁿ'é yā ní 'āā ngaⁿ'á yā chi 'iiⁿ'yāⁿ s'eeⁿ 'āā condenado yā.

⁴Deenu yú chi Ndyuūs nguéeⁿ nadich'écú yā yeⁿ'e ángeles chi dinuuⁿndí yā naati s'neéⁿ yā cuaaⁿ chuva'ai na infierno ní s'neéⁿ yā naachi maafⁿ. Ní dichiichí yā ángeles ndúúcū cadenas. Ní ángeles cūnee yā miiⁿ ndii nguuví chi Cristo caⁿ'á yā n'diichi yā nuuⁿndi. ⁵Ní

deenu yú chi Ndyuūs 'āā idi'cuiinú yā iⁿ'yeeⁿdíⁿ 'cūū ndúúcū 'iiⁿ'yāⁿ yeⁿ'ē taachi dífⁿ yā chi chee cúúví vmnááⁿ iⁿ'yeeⁿdíⁿ ndúúcū 'iiⁿ'yāⁿ chi nguéeⁿ n'daacā idiíⁿ yā. Ndyuūs dámaāⁿ nadinguaⁿ'ai yā saⁿ'a Noé chi candéeⁿ sa nduudu cuaacu yeⁿ'é Ndyuūs ndúúcū táámá ndēēchē 'iiⁿ'yāⁿ. Tanaⁿ'a cá yā ní ch'iī yā. ⁶Tiicá ntúūⁿ Ndyuūs dífⁿ yā condenar 'iiⁿ'yāⁿ yeⁿ'e yáāⁿ Sodoma ndúúcū yaāⁿ Gomorra. Ní di'cuiinú yā yáāⁿ s'eeⁿ chi nduuví yāiyáā cáávā chi dicho'ó yā nguuchi yáⁿ'ā vmnaaⁿ yáāⁿ s'eeⁿ. Ní 'íicú Ndyuūs s'neeⁿ yā ejemplo 'cūū chi 'iiⁿ'yāⁿ chi cuchiiⁿ cuayiiⁿvi, ní nguéeⁿ n'daacā idiíⁿ yā, cuuvi deenú yā táácā cuuvi chó'oo yeⁿ'e yā. ⁷Naati Ndyuūs nadanguaⁿ'ai yā yeⁿ'e yáāⁿ s'eeⁿ saⁿ'a Lot chi saⁿ'ā n'dai, saⁿ'ā chi ch'leenu sa chii caavā chi diiⁿ 'iiⁿ'yāⁿ chi nguéeⁿ n'daacā. ⁸Ní Lot miiⁿ chi n'dai sa canéeⁿ sá nguaaⁿ 'iiⁿ'yāⁿ s'eeⁿ. Ní nguuví nguuví n'diichi sa ní n'giindiveeⁿ sa nducuéⁿ'ē chi dífⁿ yā chi nguéeⁿ n'daacā. Ní n'geenu sa ngii na staava yeⁿ'ē sa. ⁹Ní nduuti chi Ndyuūs dífⁿ yā 'túúcā tiempo chi 'āā chó'oo 'tiicá ntúūⁿ Ndyuūs deenú yā táácā chi nadanguáⁿ'ai yā 'iiⁿ'yāⁿ chi i'téenu yā Ndyuūs yeⁿ'e 'iiⁿ'yāⁿ chi nguéeⁿ n'daacā idiíⁿ yā chí n'diichineeⁿ yā 'iiⁿ'yāⁿ yeⁿ'e yā. 'Tiicá ntúūⁿ Ndyuūs deenú yā táácā ca'á yā testigo 'iiⁿ'yāⁿ chi nguéeⁿ n'daacā ndí taachi ndaa nguuví chi n'diichí yā nuuⁿndi yeⁿ'e nducyaaca 'iiⁿ'yāⁿ.

¹⁰'Tiicá Ndyuūs ca'a yā castigo 'iiⁿ'yāⁿ chi dífⁿ yā nuuⁿndi tan'dúúcā chi neⁿ'e cuerpo yeⁿ'é yā. Ní nguéeⁿ n'giindiveeⁿ yā nduudu cuaacu

yeⁿe 'iivú Ndyuūs. 'Iiⁿ'yāⁿ s'eeⁿ ní nguéeⁿ 'va'á yā chi caaⁿ'maⁿ yā cosas chi nguēē ndaacā yeⁿe 'iiⁿ'ntyéⁿē. Ní nguéeⁿ 'va'á yā yeⁿe mar 'áámá. Ní dííⁿ yā nducuéⁿē nuuⁿ'ndi chi neⁿe yā. ¹¹Ní ángeles nguéeⁿ 'tíicā yā. 'Áará chi ditiinu cá yā nguéeⁿ ti 'iiⁿ'ntyéⁿē s'eeⁿ ti taachi ndaá yā nanááⁿ Señor Jesucristo yeⁿe yú nguéeⁿ cunncāā ngaⁿ'a ángeles contra yeⁿe 'iiⁿ'ntyéⁿē s'eeⁿ. ¹²'Iiⁿ'yāⁿ s'eeⁿ dííⁿ yā tan'dúúcā 'yúudu taáⁿ dííⁿ ti ní nguéeⁿ nadacadíínuuⁿ ti. 'Tíicā dííⁿ yā. Ní tan'dúúcā 'iiti taaⁿ chi 'iiⁿ'yāⁿ n'nuúⁿ yā ní n'giiⁿ'núⁿ yā 'iiti, 'tíicā 'iiⁿ'yāⁿ s'eeⁿ. Ní cunncāā ngaⁿ'a yā yeⁿe dendu'ū chi nguéeⁿ ituumicadíínuuⁿ yā. Ní 'cuūví yā tan'dúúcā 'áámá 'iiti taaⁿ. ¹³Ní 'iiⁿ'yāⁿ s'eeⁿ ní ch'eenú yā chii caati 'āā dííⁿ yā chi tanáⁿ'a yā ch'eenú yā chii. Maaⁿ ní yeenú yā chi dinuuⁿ'ndí yā tan'dúúcā chi neⁿe cuerpo yeⁿe yā. Ní nduuti chi 'iiⁿ'yāⁿ s'eeⁿ caⁿ'á yā ndúúcu nī ní che'é yā ndúúcu nī taachi véé 'viicu yeⁿe nī tuuⁿ'mi ní nadacadíínuuⁿ yā chi nginnche'éeí yā ndís'tii. Ní chuū ni cosa chi cuuvi 'cuinaáⁿ yā yeⁿe.

¹⁴'Iiⁿ'yāⁿ s'eeⁿ taachi n'diichí yā 'áámá n'daataá neⁿ'é yā caⁿ'á yā ndúúcu n'daataá miiⁿ. Dámaāⁿ neⁿ'é yā dinuuⁿ'ndi yā ní nginnche'éeí yā 'iiⁿ'yāⁿ chi debil staava yeⁿ'é yā chi dinuuⁿ'ndí yā. 'Iiⁿ'yāⁿ s'eeⁿ deenu n'dai yā na staava yeⁿ'é yā chi neⁿ'é yā dendu'ū chi nguéeⁿ n'daacā. Ní Ndyuūs ngaⁿ'a yā yeⁿe yā 'tíicā: D'e chúi cá ya'ai yeⁿ'é yā ti condenado yā. ¹⁵'Iiⁿ'yāⁿ s'eeⁿ diví yā yeⁿe yúúni cuaacu yeⁿe Ndyuūs ní chiicá yā yúúni chí neⁿe maáⁿ yā. Dííⁿ yā tan'dúúcā chi dííⁿ profeta Balaam

chi daiya saⁿ'ā Beor. Tiempo chi chó'oo Balaam miiⁿ neⁿe sa dííⁿ sa ganar tuumí yeⁿe chi nguéeⁿ n'daacā chi dííⁿ sa. ¹⁶Ní taachi cueⁿ'e sa ndúúcu burro yeⁿe sa, burro yeⁿe sa ngaⁿ'á ti ndúúcu nduudu yeⁿe 'iiⁿ'yāⁿ ní dííⁿ ti reprender saⁿ'ā Balaam miiⁿ yeⁿ'ē nuuⁿ'ndi chi dííⁿ sa. Ní 'āā ntéeⁿ dííⁿ sa nuuⁿ'ndi miiⁿ tiempo miiⁿ.

¹⁷Ní 'iiⁿ'yāⁿ s'eeⁿ ní tan'dúúcā vaacu nuūⁿ'nī díyaāi 'tiicá yā. Tan'dúúcā meēēⁿ chi candéē 'yúúné taaⁿ 'tiicá yā. 'Iiⁿ'yāⁿ s'eeⁿ ní condenado yā ní caⁿ'á yā cho'ó yā naachi diituu n'dái maaⁿ. Ní miiⁿ canee yā cueⁿ'e daāⁿ'maⁿ. ¹⁸'Iiⁿ'yāⁿ s'eeⁿ ní ngaⁿ'a yā nduudu n'geete chi nguéeⁿ dichíí'vē. Ní ndúúcu vicio yeⁿe yā, ndúúcu nducuéⁿē nuuⁿ'ndi chi neⁿe cuerpo yeⁿe yā, 'iiⁿ'yāⁿ s'eeⁿ ní neⁿ'e yā dííⁿ yā chi tanáⁿ'ā 'iiⁿ'yāⁿ chi 'āā nduuvideēvé yā ní 'āā ntéeⁿ caⁿ'á yā ndúúcu 'iiⁿ'yāⁿ chi dinuuⁿ'ndi yā ní tanáⁿ'a yā neⁿ'é yā nanguēēcúndii ntuúⁿ yā ní dinuuⁿ'ndi yā taama vmnéⁿ'ēē. ¹⁹'Iiⁿ'yāⁿ s'eeⁿ chi nginnche'éeí yā 'iiⁿ'yāⁿ ngaⁿ'á yā chi caⁿ'á yā 'iiⁿ'yāⁿ s'eeⁿ chi libre yā. 'Iiⁿ'yāⁿ s'eeⁿ maáⁿ yā ní canée yā prisioneros yeⁿ'e nuuⁿ'ndi chi dííⁿ yā. Ní ca'áámá ca'aama 'iiⁿ'yāⁿ chi nguéeⁿ libre yā ní canée yā maaⁿ poder nuuⁿ'ndi ní nguéeⁿ cuuvi cucheē yā yeⁿ'ē. ²⁰Ní 'iiⁿ'yāⁿ chi i'téenu yā Señor Jesucristo yeⁿ'e yú ní yeⁿ'é yā, ní Cristo 'āā nadanguáⁿ'ai yā 'iiⁿ'yāⁿ yeⁿ'e nducuéⁿē chi nguéeⁿ n'daacā yeⁿ'e iⁿ'yeeⁿ'dí 'cūū. Ní cuayiivi miiⁿ nduuti chi 'iiⁿ'yāⁿ nanguēēcunée yā taama vmnéⁿ'ēē ní dííⁿ yā dendu'ū nuuⁿ'ndi chi yeⁿ'e iⁿ'yeeⁿ'dí

'cūū tuu'mi ní cunncaā ca canee yā nguée ti tiempo chi 'āā cuée i'téenu yā Jesucristo. ²¹N'dáacā ca chi 'ii'yā s'ee nguée n'diichí yā yúúni cuaacu ye'É Ndyuūs ti taachi 'āā n'diichí yā yúúni cuaacu tuu'mi ní ndaācādaamí yā ye'ne ley ye'É Ndyuūs chi Ndyuūs ca'a yā 'ii'yā s'ee. ²²Ní cho'oo ye'ne 'ii'yā s'ee tan'dúucā chi nga'a 'áamá nduudu cuaacu 'tíicā: 'Yaānā nguēcunée ti che'e ti chí ndaāchi tī ní cuuchí chi 'ii'yā naa'nú yā chi dēēve tī ní nguēcunée ti nge'ne tī nguēcundāa tī nguaa nuū'nī ncheētí.

Jesucristo ndaá yā taama vmné'ēe

3 Ndís'tii hermanos ye'É chi ne'ne taaví, carta 'cūū ní ndii chí ndii 'úúví chi idinguún ye'ne nī. Ní na 'uuví carta chi idinguún ye'ne ndís'tii, ne'É díí chi nadacadíínuu nī ye'ne nducué'ē chi dēēve n'dai. Ní teé consejo ndís'tii chi n'gaacú nī ye'ne nducué'ē chi idinguún. ²Ne'É chi n'gaacu nī ye'ne tiempo chi chó'oo ye'ne profetas chi dēēve ní nga'a yā nduudu cuaacu. Ní n'gaacú nī ye'ne tiempo maa' ye'ne mandamiento ye'ne Señor chi nadanguá'ai yā s'uúú. Mandamiento ye'É yā ní apóstoles chi'cuee yā ndís'tii.

³Ní vmnáā vmnaa nadacadíínuu nī ye'ne chuū chí nguuví s'ee chi 'cuiinū i'nyee'dí 'cūū. Véé 'ii'yā chi duuchinée yā ye'ne nducué'ē chi ye'É Ndyuūs. Ní 'ii'yā s'ee díí yā nuu'ndi tan'duucā chi ma'a yā ne'ne yā. ⁴Ní nga'a yā: ¿Tíí cánée promesa chi nga'a chi Cristo canée chi ndaa yā táamá vmné'ēe? Ndii

tiempo chi 'āā chó'oo taachi ch'ii 'ii'yā ye'ne ndaata ye'ne yú. 'Āā daamá nuu canée tanducué'ē ndíí taachi Ndyuūs din'dái yā i'nyee'dí. ⁵Ii'yā chi nga'a yā 'tíicā nguée ne'ne yā díí yā cuenta ye'ne tiempo chi 'naa tiempo chi chó'oo. Tiempo mii' Ndyuūs nga'a yā ní ndúúcū nduudu ye'É yā din'dái yā nánguuví ndúúcū i'nyee'dí 'cūū. Ní i'nyee'dí 'cūū candaā ná nuū'nī. Ní i'nyee'dí 'cūū canee na lugar ye'ne cáávā nduudu ye'É Ndyuūs. ⁶Ní i'nyee'dí ye'ne tiempo chi chó'oo ní chiituú nuū'nī ní ndai naāa ye'ne cáávā chi chee' taa' cúúví. ⁷Ní nanguuvi ndúúcū yá'āa chi véé maa' Ndyuūs ca'a yā orden ye'ne chi canée chí candeé yā cuidado ye'ne ndii tiempo chi cuucu ndúúcū ya'ā. Ní taachi ngiichi yá'āa mii' tuu'mi ní Ndyuūs n'diichí yā nuu'ndi ye'É 'ii'yā. Ní Ndyuūs díí yā chi 'cuiinū 'ii'yā chi nguée n'daacā.

⁸Maa' ní ndís'tii hermanos ye'É chi ne'É taavi, nguée cuuvi naā nī chi nanáā Ndyuūs 'áamá nguuví ní tan'dúucā chi 'áamá mil nduūyū ní 'áamá mil nduūyū ní tan'dúucā chi 'áamá nguuví. 'Tíicā canée nanáā Ndyuūs. ⁹Ní Señor Jesucristo ye'ne yú nguée cuuvi 'naa yā ye'ne chi nga'a yā chi díí yā tan'dúucā chi nadacadíínuu taná'ā sa'ā. Naati Ndyuūs ní véé paciencia ye'ne yā ndúúcū s'uúú caati nguée ne'É yā chi 'aama yú cuuvi ndai yú ti ne'É yā chi nducyaaca s'uúú ní ndaacadaami yú ye'ne nuu'ndi ye'ne yú.

¹⁰Ní nguuví chi ndaa Señor Jesucristo taama vmné'ēe, nguuví mii' ndaa tan'dúucā chi 'áama

duucu chi indáá n'gaaⁿ. Ní nguée canée ngiinu yú yeⁿē nguuvi 'cūū taachi Ndyuūs nadi'tuūví yā nanguuvi yuudu n'dái 'cuēecú. Ní tanducuéⁿē chi vée nanguuvi ní cuūcū ní 'cuiinū ndúúcū ngiichi yaⁿā chi 'iiⁿ'nuⁿ taaⁿ. Ní yáⁿāa ntúūⁿ va ndúúcū tanducuéⁿē dendu'ū ní cuūcū.

¹¹Deenu yú chi tanducuéⁿē dendu'ū chí 'túúcā 'cuiinu tuví. Ní ʔtáácā cuuvi 'cuēetinée nī? Ndís'tiī canee chi ca'á nī núúⁿ máⁿ staava yeⁿē nī na ta'a Ndyuūs ní dich'etée nī Ndyuūs. Ní 'cuēetineé nī dámaāⁿ tan'dúúcā chi Ndyuūs neⁿē yā.

¹²Tíicā 'cuēetineé nī 'naaⁿ chi canee ngiinu yú ndii nguuvi chi ndaā Señor Jesucristo taama vmnéⁿēe. Ní diiⁿ yú nducuéⁿē ntiⁿ'nyuⁿ yeⁿē Señor caati niiⁿ'nuúⁿ niiⁿ'nuuⁿ cuuvi ndaa yā. Nguuvi chi ndaa yā nánguuví ní cuūcū ní 'cuiinu ndúúcū tanducuéⁿē chi vée yeⁿē. Ní 'cuiinu ntuvíí cáávā nguuchi yaⁿā.

¹³Naati s'uuúⁿ ní canée ngiinu yú chi snaaⁿ yú 'áámá nanguuvi chí ngai ndúúcū 'áámá iⁿ'yeēⁿdī chí ngai naachi vée dámaāⁿ nducuéⁿē chi cuaacu ní nducuéⁿē ní n'daacā n'dai. 'Tíicā Ndyuūs ngaⁿá yā chi tée yā s'uuúⁿ.

¹⁴Ní cáávā chuū ndís'tiī hermanos chi neⁿē taavi, 'naaⁿ tiempo chi cunee ngiinú nī dendu'ú 'cūū candee cá nī cuidado chi 'diiíⁿ 'diiíⁿ 'cuēetineé nī ní nguée dinuuⁿndí nī. Ní 'tíicā nguée vée culpa yeⁿē nī nanááⁿ Ndyuūs taachi Cristo

ndaa yā. ¹⁵Diíⁿ nī cuenta chi Señor Jesucristo yeⁿē yú ndúúcū ngiinū n'dái diíⁿ yā ndúúcū yú caati neⁿē yā chi nanguaⁿai yú. 'Tiicā ntúūⁿ Pablo, hermano yeⁿē yú chi neenē neⁿē yú, 'āā dinguúⁿ yā yeⁿē ndís'tiī 'áámá carta ndúúcū vaadi deenu chi Ndyuūs nca'á yā Pablo miiⁿ. ¹⁶Ní Pablo miiⁿ ngaⁿá yā yeⁿē nducuéⁿē 'cūū ndúúcū vaadi deenu yeⁿē Ndyuūs na nducyáácá carta chí dinguúⁿ yā. Ní naⁿa carta yeⁿē yā duū'vi dendú'ū ní n'gíⁿi n'dái chi cuuvi déenu yú. Ní 'iiⁿ'yāⁿ chi nguée deenu yā ndúúcū 'iiⁿ'yāⁿ chi duu'vi i'téenu yā nguée ngaⁿá yā nduudu cuaacu yeⁿē dendu'ū chi ngii ní yeⁿē 'tēe chi canée nguūⁿ. Ní caavā chi ngaⁿá yā chi nguée cuaacu ní diíⁿ yā chi canée chi ntuvíí maáⁿ yā.

¹⁷Naati ndís'tiī hermanos yeⁿē chi neⁿē taavi, 'āā deenú nī dendu'ú 'cūū. Cundée nī cuidado chi nguée 'caandiveéⁿ nī nduudu yeⁿē 'iiⁿ'yāⁿ chi nguée diíⁿ yā chi ngaⁿa ley yeⁿē Ndyuūs iiⁿ'yāⁿ chi candee yā ndís'tiī lado yeⁿē yā ti ndís'tiī nguée 'cuēetinée n'daacā ndúúcū chi i'téenu nī.

¹⁸Maaⁿ ní ndís'tiī cu'téenu cá nī Señor Jesucristo yeⁿē yú chi nadanguáⁿai yā s'uuúⁿ. Ní itée yā s'uuúⁿ nducuéⁿē chi n'dai taavi yeⁿē yā ndúúcū vaadi deenu yeⁿē yā. Ngaⁿa yú chi Jesucristo miiⁿ ní ch'ēete cá yā maaⁿ ndúúcū nguuvi chí cúchií ní cueⁿē daāⁿmaⁿ. 'Tíicā cuuvi.

CARTA VMNÁÁⁿ VMNAAⁿ YEⁿ'E SAN JUAN

**Nduudu cuaacu yeⁿ'e
vida cueⁿ'e daāⁿmaⁿ**

1 Chiiⁿ chí ndii vmnaaⁿ, chiiⁿ chí ch'iindiveéⁿ 'nū, chiiⁿ chí n'diichí 'nū ndúúcu nduutináaⁿ 'nū, chiiⁿ chí n'gínú 'nū, nífcū chiiⁿ chí tuu'vi 'nū ndúúcu ta'á 'nū chiiⁿ ní Nduudu yeⁿ'e vida cueⁿ'e daāⁿmaⁿ. ²Ch'iⁿi yā ní naáⁿ 'nū chiiⁿ chí vida cueⁿ'e daāⁿmaⁿ. Nífcū n'diichí 'nū ní caaⁿmaⁿ cuaacu 'nū, ní yaa'ví 'nū yeⁿ'e vida cueⁿ'e daāⁿmaⁿ chí canéé ndúúcu chiidá yā. Ní chiidá yā ch'iⁿi yā nús'uu vida cueⁿ'e daāⁿmaⁿ miiⁿ. ³Chiiⁿ chí n'diichí 'nū ní ch'iindiveéⁿ 'nū, chífcí chí ngaⁿ'á 'nū yeⁿ'e vida caati ndis'tíi ní canee cúuⁿmiⁿ ní chí nduuvidaama ní ndúúcu nús'uu. Nífcū cuaacu nífcínyúⁿ nduuvidaama yú ndúúcu chiida yú ní ndúúcu daiya yā Jesucristo. ⁴Cosa chuu ní dingúuⁿ 'nū yeⁿ'é ndis'tii caati vaadi yeenú yeⁿ'é ní cuuvi cuaacu cá.

Dendyuūs ní dēeve ngii

⁵Chuū ní nduudu chí ch'iindiveéⁿ 'nū yeⁿ'é yā. Chífcí chí ngaⁿ'a 'nū chí Dendyuūs ní chidēeve. Nífcū mar 'áamá maāiⁿ nguée ndúúcu

yā. ⁶Ndúúti chí s'uuúⁿ ngaⁿ'ā yú chí ndiidaama yú ndúúcu yā nífcú na maaiⁿ cachiica yú tuu'mí nduudu yaadi ngaⁿ'ā yú, nífcú nguée idiiⁿ yú chí ngaⁿ'a nduudu cuaacu. ⁷Nduuti chí cachiica yú na chidēeve tan'dúúcā chí Jesucristo canéé yā na chidēeve tuu'mi ní nduuvidaama yú 'aama yú ndúúcu taama yú. Yuuúⁿ yeⁿ'e Jesucristo daiya Dendyuūs inaaⁿnu yā s'uuúⁿ yeⁿ'é tanducuéⁿ'é nuuⁿndi yeⁿ'e yú. ⁸Nduuti chí ngaⁿ'ā yú chí nguée nuuⁿndi yú maāⁿ yú nginnche'ei yú s'uuúⁿ ní nguée canee nduudu cuaacu ndúúcu yú. ⁹Nduuti chí natúmiiⁿnu yú nuuⁿndi yeⁿ'é yú tuu'mí Jesucristo miiⁿ ní n'daí yā ní dífcí yā dácaā chí caaⁿmáⁿ yā ní nguée n'daāⁿ yā caati nadach'ēecú yā nuuⁿndi yeⁿ'é yú. Nífcū naaⁿnú yā s'uuúⁿ yeⁿ'é tanducuéⁿ'é nuuⁿndi yeⁿ'e yú. ¹⁰Nduuti chí ngaⁿ'ā yú chí nguée nuuⁿndi yú tuu'mi ní idiiⁿ yú chí Jesucristo ngaⁿ'a yā nduudu yaadi, nífcú nduudu yeⁿ'é yā nguée canéé ndúúcu yú.

Cristo ní caaⁿmáⁿ yā lado yeⁿ'e yú

2 Ndís'tii daiya n'gaiyáá, chuū dingúuⁿ yeⁿ'e ndís'tii caati

nguée idííⁿ nī nuuⁿndi. Níícú nduuti chí 'áámá yā dííⁿ yā nuuⁿndi véé táámá yā chí Jesucristo chí neené n'dai chí caaⁿmaⁿ yā yeⁿe yú ndúúú Ndyuūs chiida yú. ²Níícú Jesucristo ca'á maáⁿ yā vida yeⁿe maaⁿ yā ní ch'ií yā cucáávā nuuⁿndi yeⁿe yú. 'Iicu nguée dámaaⁿ yeⁿe s'uuúⁿ naati cucáávā nuuⁿndi yeⁿe 'iiⁿyāⁿ yeⁿe núúⁿmaⁿ iⁿyeeⁿdí.

³Chuū chí deenu nús'uū chí n'diichí 'nū 'yā ndúúti chí dííⁿ 'nū tan'dúúca chí ngaⁿa ley yeⁿe yā. ⁴Du'ū chí ngaⁿa chí n'diichí yā 'iiⁿyāⁿ ní nguée dííⁿ yā tan'dúúca chí ngaⁿa ley yeⁿe yā tuuⁿmi ní nduudu yaadi chí ngaⁿa yā. Níícú nguée cánée nduudu cuaacu ndúúcu yā. ⁵Du'ū chí n'giindiveeⁿ nduudu yeⁿe yā cuaacu níⁿnyúⁿ cánée n'dai vaadí neⁿe yeⁿe Dendyuūs ndúúcu yā. Chiiⁿ chí deenu yú chí canee yú nduucú yā. ⁶Du'ū chí ngaⁿa chí canee nduucú yā, cánée chí cuchiicá tan'dúúca chí cáchiicá yā.

Ley chí ngai

⁷Ndís'tií vi'í, nguée dinguúⁿ mar 'áámá ley chí ngai, tii ley ndiicú chí 'āa canee ndíí cuaaⁿ vmnaaⁿ, ley ndiicú ní ndúúú chí ch'iindiveeⁿ nī ndíí cuaaⁿ vmnaaⁿ. ⁸Dinguúⁿ táámá vmnéⁿee ley ngai yeⁿe ndís'tií chí cuaacu chí nduucú yā ní nduucú nī. Caati maáiⁿ mífⁿ 'āa cho'ōo níícú chideeve mífⁿ ní cuaacu ní ngiichi.

⁹Du'ū chí ngaⁿa chí cachiica na chideeve ní nguée ngíí n'diichi vi'í, tuuⁿmi ní 'iiⁿyāⁿ miiⁿ cáchiica núúⁿ yā na maáiⁿ ndíí maaⁿ. ¹⁰Du'ū chí neⁿe vi'í cánée ná chideeve ní nguée idíí yā chí cundee ca'a yā

yeⁿe taamá yā. ¹¹Naati du'ū chí nguée ngii n'diichí yā vi'í cánée ná maáiⁿ níícú cachiica ná maáiⁿ, ní nguée deenú yā tíí cuaaⁿ cachiicá yā caati chí maáiⁿ miiⁿ ní nguée dííⁿ chí inaaⁿ yā.

¹²Dinguúⁿ yeⁿe ndís'tií daiya n'gaiyāa, caati nuuⁿndi yeⁿe nī ních'eeccu cáávā chí dúúchí Jesucristo. ¹³Dinguúⁿ yeⁿe ndís'tií chiida s'éeⁿ caati 'āa n'diichí nī 'iiⁿyāⁿ ndii cuááⁿ vmnaaⁿ. Dinguúⁿ yeⁿe ndís'tií saⁿā ngaiyāa caati cuheé nī ndúúcu chí nguée n'daacā. Dinguúⁿ yeⁿe ndís'tií daiya n'gaiyāa caati 'āa n'diichí nī chiida yú. ¹⁴Úú dinguúⁿ yeⁿe ndís'tií chiida s'éeⁿ caati 'āa n'diichí nī 'iiⁿyāⁿ chí canee ndíí cuaaⁿ vmnaaⁿ. Dinguúⁿ yeⁿe ndís'tií saⁿā ngaiyāa caati ditiinú nī. Níícú nduudu yeⁿe Dendyuūs chí cánée nduucú nī níícú cuheé nī ndúúcu chí nguée n'daacā.

¹⁵Nguée dinéⁿe nī iⁿyéeⁿdí ndíí nguée dendu'ū chí véé na iⁿyéeⁿdí. Du'ū chí dineⁿe iⁿyéeⁿdí vaadí neⁿe yeⁿe Dendyuūs nguée canée nduucú yā. ¹⁶Caati tánducueⁿe chí véé na iⁿyéeⁿdí chí neⁿe cuerpo yeⁿe yú ndúúcu chí neⁿe nduutináaⁿ yú, níícú vaadí ingueeⁿ yeⁿe vida yeⁿe iⁿyéeⁿdí ní nguée yeⁿe chiida yú, tii ní yeⁿe iⁿyéeⁿdí. ¹⁷Iⁿyéeⁿdí nínch'ōo ndúúcu taanduvéeⁿ yeⁿe ndúúcu vaadí neⁿe chí nguée n'daacā. Naati du'ū 'iiⁿyāⁿ chí dííⁿ yā chí neⁿe Dendyuūs, 'iiⁿyāⁿ miiⁿ cunee yā cueⁿe daāⁿmaⁿ.

Yeⁿe nduudu cuaacu ní yeⁿe nduudu yaadi

¹⁸Ndís'tií daiya n'gaiyāa, 'āa chéé 'cuiinu hora tan'dúúca chí ndís'tií

ch'iindiveén nī yeⁿe chí anticristo miiⁿ ní ndaa yā. 'Tiicá ntúūⁿ chí caama véé chí n'deeé n'dáí 'iiⁿyāⁿ ní ngaⁿá yā chí anticristo yā. Tii ní cucáāvā chí s'uuúⁿ deenu yú chí 'āā chéé 'cuiinu hora. ¹⁹'Iiⁿyāⁿ s'eeⁿ can'dáa yā yeⁿe yú naati nguéeⁿ yeⁿe yú yā. Nduuti chí yeⁿe yú 'áámá canée yā nduucū yú naati can'dáa yā ní cueⁿé yā. Ní chííⁿ ní cuuⁿmiⁿ chí iiⁿyāⁿ s'eeⁿ ní nguéeⁿ yeⁿe yú yā.

²⁰Naati ndís'tii ní véé yeⁿé nī chí ca'ā Espíritu N'dai yeⁿé Ndyuūs. Ní ndís'tii nin'diichí nī tanducueⁿé dendu'ū. ²¹Nguéeⁿ idinguúⁿ yeⁿe ndís'tii tan'dúúca chí nguéeⁿ deenú nī nduudu cuaacu, ti idinguúⁿ tan'dúúca chí 'āā deenú nī ti nguéeⁿ véé ndii 'áámá nduudu yaadi chí yeⁿe nduudu cuaacu.

²²¿Du'ū chí yaadi mííⁿ? 'Iiⁿyāⁿ chí ngaⁿá yā chí nguéeⁿ Jesús chí Cristo ní yaadi yā. 'Iiⁿyāⁿ s'eeⁿ chí anticristo chí caaⁿmaⁿ yā chí nguéeⁿ i'téenu yā Dendyuūs chiida yú ndúúcu daiyá yā. ²³Du'ū chí nguéeⁿ i'téenu yā daiyá yā ní nguéeⁿ canee yā ndúúcu chiidá yā. Du'ū chí i'téenu yā daiyá yā canee yā ndúúcu chiidá yā.

²⁴Tuu'mi ní chííⁿ chí ch'iindiveén nī ndíí vmnaaⁿ 'tíicā canee cúuⁿmiⁿ chí canee ndúúcu ndís'tii. 'Tiicá ntúūⁿ ndís'tii ní yeⁿe daiyá yā ní yeⁿe chiida yú cueⁿe daāⁿmaⁿ.

²⁵Chuū compromiso chí dííⁿ yā ndúúcu nús'uu chí cunee yú ndúúcu vida cueⁿe daāⁿmaⁿ.

²⁶Dinguúⁿ chuū yeⁿe ndís'tii chí yeⁿé 'iiⁿyāⁿ chí nginnche'éí yā ndís'tii. ²⁷Naati chííⁿ chí yeⁿe Espíritu N'dai yeⁿé Ndyuūs chí

ndís'tii sta'á nī yeⁿé yā, chuū canee ndúúcu ndís'tii. Nguéeⁿ canee cúuⁿmiⁿ chí du'ū véé iiⁿyāⁿ ca'cueeⁿ yā ndís'tii, naati Espíritu N'dai yeⁿé Ndyuūs maáⁿ yā ngi'cuéeⁿ yā ndís'tii nducueⁿé dendu'ū. 'Tíicā chuū ní nduudu cuaacu, nguéeⁿ nduudu yaadi. Tan'dúúca chí chí'cueeⁿ yā ndís'tii, 'túúca canee diitú nī ndúúcu nduudu miiⁿ.

²⁸Maaⁿ ndís'tii daiya n'gaiyáa, cunee nī chí yeⁿé nī caatí taachi Cristo ndaa yā véé nduudu yeⁿe yú nduucú yā. Ní nguéeⁿ 'cuiináⁿ yú nanáaⁿ yā taachi ndaa yā. ²⁹Ndúúti chí ndís'tii déenu nī chí Cristo miiⁿ ní n'dai yā, 'tíicā ntúūⁿ deenu ndís'tii chí du'ū chí diiⁿ chí n'daacā ch'iindiyáaⁿ táamá yeⁿé yā.

'Iiⁿyāⁿ s'eeⁿ chí daiyá Dendyuūs

3 Cun'díichí ndís'tii vaadi néⁿe chí tee chiida yú s'uuúⁿ chí yaa'vi yā s'uuúⁿ chí daiyá Dendyuūs s'uuúⁿ. Cáāvā chuū chí iⁿyéeⁿdi nguéeⁿ in'diichi s'uuúⁿ caati nguéeⁿ in'diichi Cristo. ²Ndís'tii chí neⁿe taaví, maaⁿ ní daiya Dendyuūs s'uuúⁿ. Ní nguéeⁿ ngii yā s'uuúⁿ táácā chí cūnee yú. Caati deenu yú taachi ndaa yā 'iiⁿyāⁿ miiⁿ ní tan'dúúca yā 'tíicā ntúūⁿ s'uuúⁿ, caati n'diichi yú 'iiⁿyāⁿ taacá yā. ³Du'ū chí canee ngíínú yā chuū ní nadéevé yā tan'dúúca chí Ndyuūs miiⁿ ní déevé yā.

⁴Du'ū chí idiiⁿ nuuⁿndi nguéeⁿ dííⁿ yā tanducueⁿé chí ngaⁿa ley. Níicú nuuⁿndi ní chiiⁿ chí nguéeⁿ diiⁿ yā chí ngaⁿa ley. ⁵Ndís'tii déenu nī chí Dendyuūs ní ndaa yā chí divíi yā nuuⁿndi yeⁿe yú. Níicú nguéeⁿ véé nuuⁿndi yeⁿé yā. ⁶Du'ū chí

ye^{n'e} yā nguée idiiⁿ nuuⁿndi. Du'ū chi idiiⁿ nuuⁿndi nguée n'diichí yā 'iiⁿyāⁿ. ⁷Ndís'tii daiya n'gaiyáa nguée canche'ei ní mar 'áámá 'iiⁿyāⁿ. Du'ū chi idiiⁿ dendu'ū chí n'daacā tuu'mi ní n'dai tan'dúucā 'iiⁿyāⁿ miiⁿ ní n'dai yā. ⁸Du'ū chi idiiⁿ nuuⁿndi ní ye^{n'e} yááⁿn'guinūⁿ caati yááⁿn'guinūⁿ diiⁿ nuuⁿndi sa ndii vmnaaⁿ. Cáávā chuū ndaá daiya Dendyuūs cucáávā chí nadituuví yā chí diiⁿ yááⁿn'guinūⁿ.

⁹Du'ū chí ch'iindiyáaⁿ yā taama vmnéⁿēe ní ye^{n'e} Dendyuūs ní nguée idiiⁿ yā nuuⁿndi caati ndaata ye^{n'e} Ndyuūs canée ndúucu yā. Ní nguée ngii diiⁿ yā nuuⁿndi caati ch'iindiyáaⁿ yā taama vmnéⁿēe ní ye^{n'e} Dendyuūs. ¹⁰Nífcú chuū chí n'giⁿi chee chí daiya Dendyuūs. Nífcú n'giⁿi chee chí daiya yááⁿn'guinūⁿ. Du'ū chí nguée idiiⁿ n'daacā ní nguée ne^{n'e} viⁱ, ní nguée ye^{n'e} Dendyuūs.

Dine^{n'e} yú 'aama yú taama yú

¹¹Chuū ní nduudu cuaacu ye^{n'e} Ndyuūs chi ndís'tii ch'iindiveeⁿ ní ndii vmnaaⁿ, chi dine^{n'e} yú 'aama yú ndúucū taama yú. ¹²Nguée tan'dúucā saⁿá Caín chí ye^{n'e} yááⁿn'guinūⁿ. Saⁿá ch'iiⁿnuⁿ sá 'diinū sa. ¿Ífcú de'ē cáávā chí ch'iiⁿnuⁿ sá 'diinū sa? 'Tífcā diiⁿ sa caati chífc chí maaⁿ sa diiⁿ sa ní nguée n'daacā. Nífcú chífc chí diiⁿ 'diinū sa ní n'daacā.

¹³Ndís'tii viⁱ, 'áá nguée n'diichí ní chí 'iiⁿyāⁿ ye^{n'e} fⁿ'yeeⁿdí nguée ne^{n'e} yā ndís'tii. ¹⁴Áa cho'ō yú vaadi n'gii ní 'áa n'geetineeⁿ yú ndúucū vida cue^{n'e} daāⁿmaⁿ. S'uuúⁿ déenu yú ti ne^{n'e} yú viⁱ yú. Du'ū chí nguée

ne^{n'e} viⁱ, 'iiⁿyāⁿ miiⁿ cánée vaadi n'gii ndúucu yā. ¹⁵Du'ū chí nguée n'diichi viⁱ 'caaⁿnúⁿ yā 'iiⁿyāⁿ. Nífcú deenu yú chí 'iiⁿyāⁿ chí n'giiⁿnūⁿ 'iiⁿyāⁿ nguée canée vida cue^{n'e} daāⁿmaⁿ ndúucu yā. ¹⁶Ní ndúucū chuū n'diichi yú vaadi né^{n'e}, caati ch'ii Jesús cáávā s'uuúⁿ. 'Tiicá ntúúⁿ s'uuúⁿ canee chí 'cuúvī yú lado ye^{n'e} viⁱ yú. ¹⁷Naati du'ū chí véé ye^{n'e} tanducuéⁿē chí vee ye^{n'e} iⁿ'yeeⁿdí 'cūú nífcú naáⁿ yā viⁱ yā chí nguée ye^{n'e} yā, ní nguée ne^{n'e} yā ca'á yā 'iiⁿyāⁿ, ítaácā cūnee vaadi ne^{n'e} ye^{n'e} Dendyuūs nduucú yā? ¹⁸Ndís'tii daiya n'gaiyáa, nguée dine^{n'e} yú ndúucū nduudu ye^{n'e} yú ndúucū chí caaⁿmaⁿ yú naati ndúucū ntiiⁿnyuⁿ chí diiⁿ yú ndúucū vaadi cuaacu.

Vée confianza ye^{n'e} yú nanáaⁿ Ndyuūs

¹⁹Ndúucū chuū ní deenu yú chí vaadi cuaacu ní ndúucu yú. Nífcú staava ye^{n'e} yú seguro canée nanáaⁿ yā. ²⁰Ndúuti chí staava ye^{n'e} yú caaⁿmaⁿ nuuⁿndi ye^{n'e} yú, ch'etee cá Dendyuūs nguée ti staava ye^{n'e} yú. Nífcú déenu yā nducuéⁿē dendu'ū. ²¹Ndís'tii chí ne^{n'e}, ndúuti chí staava ye^{n'e} yú nguée caaⁿmaⁿ nuuⁿndi ye^{n'e} yú tuu'mi ní véé confianza ye^{n'e} yú ndúucū Dendyuūs. ²²Nducuéⁿē chí caaca yú Ndyuūs, itee yā ye^{n'e} yú caati diiⁿ yú chí ngaⁿa ley ye^{n'e} yā nífcú idiiⁿ yú cosa chí n'daacā nanáaⁿ yā. ²³Chúú chí ley ye^{n'e} yā, chí i'teenu yú chí duuchi daiyá yā Jesucristo, ní dine^{n'e} yú 'aama yú ndúucū taama yú, tan'dúucā chí ngaⁿá yā nduucú yú. ²⁴Du'ū chí diiⁿ

chi ngaⁿ a ley yeⁿé yā canéé ndúúcū Ndyuūs, níćú Dendyuūs canee yā ndúúcū. Ní chuū chi deenu yú chi 'áámá cūnéé yā ndúúcu yú cáávā Espíritu N'dai yeⁿé yā chi tee yā s'uuúⁿ.

Yeⁿe Espíritu N'dai yeⁿé Ndyuūs ní yeⁿe espíritu chi contra yeⁿe Cristo

4 Ndís'tií chi neⁿé, nguéé cu'téenu nī tanducuéⁿē espíritu naati n'díichineeⁿ nī tanducuéⁿē espíritu cheé chi yeⁿe Dendyuūs caati nééné 'yaaⁿ 'iiⁿyāⁿ nguéé ngaⁿ a yā nduudu cuaacu yeⁿe Dendyuūs. ²Caati 'tíicā ní cuuvi deenú nī Espíritu chi yeⁿe Dendyuūs 'yā. Tanducuéⁿē espíritu chí ntúmiiⁿnuⁿ chi Jesucristo ní ndaá yā iⁿ'yeeⁿdí 'cūū ní yeⁿe Dendyuūs. ³Niicu tanducuéⁿē espíritu chi nguéé ntúmiiⁿnuⁿ chí Jesucristo ní ndaá yā iⁿ'yeeⁿdí tan'dúúca s'uuúⁿ nguéé yeⁿe Dendyuūs 'yā. Chíⁿ chí espíritu yeⁿē anticristo. 'Āā ch'iindiveéⁿ nī yeⁿē espíritu yeⁿe anticristo chí cánéé chi ndaa ni maaⁿ 'āā canéé iⁿ'yeeⁿdí 'cūū.

⁴Ndís'tií ní daiyá yeⁿe Dendyuūs ndís'tií. Níćú 'āā chicheé nī yeⁿe espíritu chí canéé iⁿ'yeeⁿdí 'cūū chí espíritu yeⁿe anticristo caati 'iiⁿyāⁿ chí canéé ndúúcu nī ch'etē cá yā nguéé ti espíritu chí canéé iⁿ'yeeⁿdí 'cūū. ⁵Ní espíritus ní yeⁿe iⁿ'yeeⁿdí 'cūū, caavā chíⁿ chí ngaⁿá yā yeⁿe iⁿ'yeeⁿdí. Ní 'iiⁿyāⁿ yeⁿe iⁿ'yeeⁿdí n'giindiveéⁿ yā yeⁿē. ⁶S'uuúⁿ ní yeⁿé Dendyuūs s'uuúⁿ. Du'u chí n'diichí Dendyuūs n'giindiveéⁿ yā yeⁿe yú. Du'u chí nguéé yeⁿe Dendyuūs, nguéé n'giindiveéⁿ yā

yeⁿe yú. Caati ndúúcū chuū ní n'diichi yú Espíritu yeⁿe nduudu cuaacu ní espíritu chí nguéé yeⁿe nduudu cuaacu.

Ndyuūs ní vaadi neⁿe

⁷Ndís'tií chí neⁿe taaví, dineⁿē yú 'aama yú taama yú caati vaadi neⁿe ní yeⁿe Dendyuūs. Nducyáácá 'iiⁿyāⁿ chí ya'āi 'línú yā 'iiⁿyāⁿ ní yeⁿe Dendyuūs 'iiⁿyāⁿ miiⁿ, ní n'diichi yā Dendyuūs. ⁸Du'u chí nguéé idinéⁿe yā 'iiⁿyāⁿ nguéé in'diichí yā Dendyuūs, ti Dendyuūs ní vaadi neⁿe. ⁹Níćú chuū chí ch'iⁿí yā nanáaⁿ yú ní vaadi neⁿe yeⁿe Dendyuūs. Níćú chuū chí Dendyuūs dichó'o yā 'áámá n'dyáⁿā daiya yā iⁿ'yeeⁿdí 'cūū caati cuuvi 'cuēeti nduuchi yú cáávā 'iiⁿyāⁿ mífⁿ. ¹⁰Níćú chuū ní chíⁿ chí canéé vaadi neⁿe. Nguéé chí s'uuúⁿ chí dinéⁿe yú Dendyuūs miiⁿ, ti Dendyuūs mífⁿ chí idinéⁿe yā s'uuúⁿ, níćú dichó'o yā daiyá yā chí ch'ií yā lado yeⁿe yú cucáávā nuūⁿndi yeⁿe yú.

¹¹Ndís'tií chí neⁿé, ndúúti chí 'tíicā neⁿe Dendyuūs s'uuúⁿ 'tiicá ntúūⁿ s'uuúⁿ canéé chí dinéⁿe yú 'aama yú taama yú. ¹²Mar 'áámá 'iiⁿyāⁿ nguéé n'diichí yā Dendyuūs. Ndúúti chí idinéⁿe yú 'aama yú taama yú, Dendyuūs ní canéé yā ndúúcu yú. Níćú vaadi neⁿe n'daacā n'dai canéé ndúúcu yú. ¹³Ndúúcū chuū ní deenu yú chí canee yú nduucú yā ní 'iiⁿyāⁿ miiⁿ nduucú yā s'uuúⁿ cáávā chí tee yā Espíritu N'dai yeⁿé Ndyuūs s'uuúⁿ. ¹⁴S'uuúⁿ in'diichí yú ní ngaⁿa yú nduudu cuaacu chí chiida yú dichó'o yā daiya yā. Ní daiya

yā nadangáⁿai yā 'iiⁿyāⁿ yeⁿe tanducuéⁿē nuuⁿndi chi véé yeⁿe yā yeⁿē iⁿ'yeeⁿdí 'cūū. ¹⁵Du'ū chí intúmiⁿnuⁿ chí Jesús ní daiyá Dendyuūs 'yā, Dendyuūs canée yā nduucú yā, ní 'iiⁿyāⁿ miiⁿ canée yā ndúúⁿcū Dendyuūs.

¹⁶Níicú s'uuúⁿ nin'diichi yú ní i'teenu yú chéé chi vaadi neⁿe chi Dendyuūs dineⁿé yā s'uuúⁿ. Vaadi neⁿē miiⁿ ní Dendyuūs. Níicú 'iiⁿyāⁿ chí neⁿé yā nducyaaca 'iiⁿyāⁿ ní yeⁿe Dendyuūs 'iiⁿyāⁿ. Níicú Dendyuūs canée yā nduucú yā. ¹⁷Ní chuū ní vaadi neⁿe chi n'dai taavi chí véé yeⁿe yú. Níicú véé nduudu yeⁿe yú nduucú yā nguuvi chí ndaa juicio. Tan'dúúⁿcā 'iiⁿyāⁿ miiⁿ 'tíicā ntúúⁿ s'uuúⁿ canée yú iⁿ'yeeⁿdí.

¹⁸Vaadi neⁿé ní nguée vaadi 'va'a. Naati chíⁿ chí n'dáacā taavi yeⁿe vaadi neⁿe i'neéⁿ 'áamá lado vaadi 'va'a ti vaadi 'va'a ngíⁿ chí 'cuínáaⁿ yú. Du'ū chí 'va'a nguée canée vaadi neⁿē n'daacā ndúúⁿcū.

¹⁹S'uuúⁿ ní idinéⁿe yú 'yā ti 'iiⁿyāⁿ miiⁿ dinéⁿe yā s'uuúⁿ vmnaaⁿ.

²⁰Du'ū chí ngaⁿa: 'Úú idineⁿé Dendyuūs, níicú nguée in'diichí yā vi'i yā, ní yaadi yā. Caati dú'u chí nguée idinéⁿe yā vi'i chí n'diichí yā, ítáacā cuuvi dinéⁿe yā Dendyuūs chí nguée in'diichí yā? ²¹Níicu s'uuúⁿ ní canee yú ndúúⁿcū ley yeⁿé yā. Du'u chí idinéⁿe Dendyuūs, 'tiicá ntúúⁿ idinéⁿe yā vi'i yā.

S'uuúⁿ cuuvi cucheé yú yeⁿe iⁿ'yeeⁿdí

5 Nducyáácá yā chí i'téenu yā chí Jesús chí Cristo miiⁿ tuu'mi ní ch'iindiyáaⁿ yā táamá yeⁿé Dendyuūs. Nducyáácá yā chí dinéⁿe yā chiida yú, idinéⁿe ntúúⁿ

yā 'iiⁿyāⁿ chí daiyá yā. ²Ndúúⁿcū chuū ní deenu yú chí idinéⁿe yú 'iiⁿyāⁿ s'eeⁿ chí daiya Dendyuūs miiⁿ taachi idinéⁿe yú Dendyuūs ní diiⁿ yú chí ngaⁿa ley yeⁿe yā. ³Caati chuū chí vaadi neⁿe yeⁿe Dendyuūs chí s'uuúⁿ ní diiⁿ yú chí ngaⁿa ley yeⁿe yā. Ní ley yeⁿe yā nguée cosa chí 'cuinaaⁿ yú yeⁿē. ⁴Nducyáácá yā chí ch'iindiyáaⁿ táamá ní yeⁿé Dendyuūs ní cuuvi cucheé yā yeⁿe iⁿ'yeeⁿdí. Ní chuū chí diiiⁿ chí cucheé yú yeⁿe iⁿ'yeeⁿdí, ní chuū chí i'teenu yú Dendyuūs. ⁵¿Du'ū chí cuuvi cucheé yeⁿe iⁿ'yeeⁿdí? 'Iiⁿyāⁿ chí i'téenu yā chí Jesús ní daiyá Dendyuūs 'yā ní cucheé yā.

Nduudu cuaacu yeⁿe Daiyá Ndyuūs

⁶Ní chuū ní Jesucristo chí ndaa ndúúⁿcū nuūⁿnⁱ ndúúⁿcū yuuúⁿ. Nguée dámaaⁿ ndúúⁿcū nuūⁿnⁱ caati ndúúⁿcū nuūⁿnⁱ ndúúⁿcū yuuúⁿ. Ní Espíritu N'dai yeⁿé Ndyuūs ngaⁿā nduudu cuaacu yeⁿe yā caati Espíritu miiⁿ ní vaadi cuaacu. ⁷Caati 'iinu yā ngaⁿa yā nduudu cuaacu na va'ai cheeti nguuvi, Dendyuūs chiida yú ndúúⁿcū Nduudu ndúúⁿcū Espíritu N'dai yeⁿé Ndyuūs. Níicú naachi ndii 'iinú yā vee 'áamá núúⁿ yā. ⁸Véé 'iinu yā chí ngaⁿa yā nduudu cuaacu ná iⁿ'yeeⁿdí 'cūū ní Espíritu N'dai yeⁿé Ndyuūs ndúúⁿcū nuūⁿnⁱ ndúúⁿcū yuuúⁿ. Ní naachi ndúúⁿ 'iinu yā ní véé 'áamá núúⁿ yā. ⁹Ndúúⁿti chí cu'teenu yú nduudu cuaacu yeⁿé 'iiⁿyāⁿ yeⁿe iⁿ'yeeⁿdí 'cūū ch'eeⁿ ca nduudu cuaacu yeⁿé Dendyuūs nguée ti 'iiⁿyāⁿ miiⁿ. Caati chúⁿ chíⁿ chí nduudu cuaacu yeⁿé Dendyuūs, Ndyuūs ngaⁿā yā nduudu cuaacu

yeⁿe daiyá yā. ¹⁰Du'ū chí i'teenu daiyá Dendyuūs vée nduudu cuaacu ndúúcū maāⁿ. Du'ū chi nguée i'teenu Dendyuūs, díⁿ yā chí Dendyuūs ní yaadi yā caati nguée i'téenu yā nduudu cuaacu chí Dendyuūs chiida yú ngaⁿá yā yeⁿē Daiyá yā. ¹¹Níícú chuū chi nduudu cuaacu ní chuū chí Dendyuūs téé yā vida cueⁿe daāⁿmaⁿ s'uuúⁿ. Níícú vida cueⁿe daaⁿmáⁿ 'cūū ní yeⁿē daiya yā. ¹²Du'ū chí i'teenu daiya yā vée vida cueⁿe daāⁿmaⁿ yeⁿe yā. Du'ū chi nguée yeⁿe daiya yā nguée vée vida cueⁿe daāⁿmaⁿ yeⁿé yā.

Ch'iinū carta ndúúcū consejos

¹³Chuū ní dinguúⁿ yeⁿe ndís'tiī chí i'téenu nī chí Cristo ní daiyá Dendyuūs caati maaⁿ ní cuuvi cádíinuⁿ nī chí vée vida cueⁿe daāⁿmaⁿ yeⁿé nī. Níícú cu'téenu nī chí Cristo ní daiyá Dendyuūs miiⁿ.

¹⁴Ní chuū ní confianza chí vée yeⁿe yú ndúúcu yā. Nduuti chí s'uuúⁿ caaca yú 'yā tan'dúúca chí neⁿé yā chí caaca yú 'yā 'iiⁿ'yāⁿ miiⁿ n'giindiveéⁿ yā yeⁿē yú. ¹⁵Nduuti chí deenu yú chí n'giindiveéⁿ yā yeⁿe yú yeⁿe tanducuéⁿē chí caaca yú 'yā, tuu'mi ní 'āā deenu yú chí itée yā s'uuúⁿ chiiⁿ chí 'āā chiica yú 'yā.

¹⁶Du'ū chí n'diichi chí dinuuⁿndí vi'i nuuⁿndi chí nguée

yeⁿe vaadi n'gii, canée chí caacá yā Dendyuūs chí Dendyuūs ca'á yā vida cueⁿe daāⁿmaⁿ yeⁿé yā. Ngaⁿá yeⁿe 'iiⁿ'yāⁿ chí nguée dinuuⁿndí yā yeⁿe vaadi n'gii. Vée nuuⁿndi chí yeⁿe vaadi n'gii. Ní yeⁿe chuū nguée caacá chí caacá nī yeⁿe 'iiⁿ'yāⁿ chí diiⁿ nuuⁿndí yeⁿe vaadi n'gii. ¹⁷Tanducuéⁿē chí nguée yeⁿe nduudu cuaacu ní nuuⁿndi, naati vée nuuⁿndi miiⁿ chí nguée yeⁿe vaadi n'gii.

¹⁸Āā deenu yú du'u 'iiⁿ'yāⁿ chí ch'iindiyāⁿ yā táámá ní yeⁿe Dendyuūs ní nguée idinuuⁿndí yā. 'Iiⁿ'yāⁿ miiⁿ candée yā cuidado yeⁿe maāⁿ yā. Ní yááⁿn'guinūⁿ nguée cuuvi tuneⁿ 'iiⁿ'yāⁿ miiⁿ.

¹⁹Déenu yú ti yeⁿe Dendyuūs s'uuúⁿ, ní tanáⁿā 'iiⁿ'yāⁿ yeⁿe iⁿ'yeēⁿdí canee yā lado yeⁿe yááⁿn'guinūⁿ.

²⁰Déenu yú ti daiya Dendyuūs miiⁿ ní ndaá yā. Ní tee yā chí cadiinuⁿ yú, ní 'íícú n'diichi yú 'iiⁿ'yāⁿ chí cuaacu yā. Ní s'uuúⁿ ní yeⁿé 'iiⁿ'yāⁿ chí cuaacu yā ní yeⁿe daiya Dendyuūs chí Jesucristo. Dendyuūs miiⁿ ní 'iiⁿ'yāⁿ chí cuaacu, 'iiⁿ'yāⁿ chí vée vida cueⁿe daāⁿmaⁿ yeⁿé yā. ²¹Ndís'tiī daiyá cundée nī cuidado ti nguée cu'téenu nī santos ídolos. 'Tíicā cuuvi.

CARTA CUAYIIVI YEⁿE SAN JUAN

**Yeⁿe nduudu cuaacu ní
yeⁿē vaadi neⁿe**

¹Ú Juan chi saⁿā chi ngaⁿa ntiiⁿnyuⁿ yeⁿe yaācū idinguúⁿ yeⁿē n'daataá chí Ndyuūs ndēve yā ndúúcū daiya yā chi cuaacu níⁿnyúⁿ neⁿé. Ní nguée 'úú dámaáⁿ neⁿé ti 'tiicá ntúūⁿ nducyáácá yā chi n'diichí yā nduudu cuaacu. ²Ní cáavā chi véé vaadi cuaacu yeⁿe yú ní caavā nduudu cuaacu chi canée ndúúcu yú, 'áamá cūnee tandíí ndúúcu yú. ³Neⁿé chi canée ndúúcū ndís'tii vaadi n'dai yeⁿe Ndyuūs ndúúcū vaadi ya'ai 'iinu yeⁿe yā ndúúcū 'diiⁿ yeⁿe Dendyuūs chiida yú ndúúcū Señor Jesucristo chí daiya Dendyuūs chi chiida yú. Tanducuéⁿē chuū canée ndúúcu ní ndúúcū nduudu cuaacu ndúúcū vaadi neⁿē.

⁴Āā 'áamá yeenú caati chí nindaācá daiya di chí díⁿ yā chiⁿ chi cuaacu tan'dúúcā s'uuúⁿ chi sta'a yú ley yeⁿē chiida yú. ⁵Maaⁿ ní idi'cuítú n'dii n'daataā chí dinéⁿe yú 'áamá yú táamá yú. Chuū nguée tan'dúúcā chi idinguúⁿ 'áamá ley ngai caati ley yeⁿē yú chíⁿ chí canee ndíí cuaaⁿ vmnaaⁿ. ⁶Nífcú chuū chí vaadi neⁿe ní chiiⁿ chi

cachiica yú tan'dúúcā chi caaⁿmaⁿ ley yeⁿe yā. Ley yeⁿe yā ní chuū chí cachiicá ní ndúúcū vaadi neⁿe tan'dúúcā chi n'giindiveéⁿ ní ndíí cuaaⁿ vmnaaⁿ.

'Iiⁿyāⁿ chi nginnche'etí yā 'iiⁿyāⁿ

⁷N'deee n'dái 'iiⁿyāⁿ 'āā nginnche'etí yā 'iiⁿyāⁿ na iⁿ'yeeⁿdí 'cūū. Nguée natumiiⁿnúⁿ yā chi Jesucristo ní ndaá yā tan'dúúcā s'uuúⁿ. 'Iiⁿyāⁿ chi 'tífcā nginnche'etí yā, 'tiicá ntúūⁿ anticristo yā. ⁸Cundée ní cuidado yeⁿē maáⁿ ní ní nguée dindai yú tanducuéⁿē ntiiⁿnyuⁿ chi diiⁿ yú ti s'uuúⁿ ní cuuvi cuta'a yú tanducuéⁿē chi yeⁿe yú.

⁹Du'ū chí díⁿ nuuⁿndi ní nguée 'áamá canée yā ndúúcū nduudu cuaacu yeⁿe Cristo, nguée yeⁿe Dendyuūs 'iiⁿyāⁿ. Du'ū chí 'aama canée ndúúcū nduudu cuaacu yeⁿē Cristo, tuu'mí 'iiⁿyāⁿ miiⁿ ní yeⁿe chiida yú Dendyuūs ndúúcū daiya yā. ¹⁰Du'ū chí ndaa vaacú ní chí nguée ngaⁿa nduudu cuaacú 'cūū nguée 'cuaaⁿ ní chí cunée yā na vaacú ní. Ní nguée caaⁿmaⁿ ní, n'daaca chí ndaá yā va'āi yeⁿe ní. ¹¹Du'ú 'iiⁿyāⁿ chí ngaⁿá yā 'iiⁿyāⁿ miiⁿ chí n'daaca chí ndaá yā va'āi

ye^{n'}é yā tuu'mi ní induuvidáámá yā
ndúúcū 'ii^{n'}yāⁿ chí idiiⁿ chi nguée
n'daacā.

Ch'iinu carta maaⁿ

¹²Áámá véé cá ye^{n'}é chi ne^{n'}é
dinguúⁿ ye^{n'}e ndís'tiī ní nguée ne^{n'}é
dinguúⁿ na caaca 'cūū ndúúcū

tinta, caati ne^{n'}é chi n'diichí ndís'tiī
ní caa^{n'}máⁿ ndúúcu nī ní ndís'tiī
nduucú. Níícú vaadī yeenú ye^{n'}e yú
ní cúúví cuaacu.

¹³Vée daiya tá ye^{n'}e n'daataá chi
Ndyuūs indεevé yā tá^{n'}ā. Daiya tá
idicho'ó yā: N'dai n'diī, nga^{n'}a yā.
'Tíicā cuuvi.

CARTA NDÍÍ 'IINŪ YEⁿE SAN JUAN

Yeⁿe saⁿā Gayo chi n'dai

¹Úú Juan, saⁿā chi ngaⁿa ntiiⁿnyuⁿ yeⁿe yáacū idinguúⁿ carta 'cūū yeⁿe saⁿā Gayo chi cuaacu nííⁿyúⁿ neⁿe taaví saⁿā.

²Díí saⁿā Gayo chi neⁿé, 'úú neⁿé chi cáávā maaⁿ di tanducuéⁿē chi véé yeⁿē di ní n'dai taavi. Níícú véé vaadí 'viichéé yeⁿē di tan'dúúcā chi alma yeⁿe di véé vaadí 'viichéé yeⁿē. ³Nduudu cuaacu chi neene yeenú taachi ndaā vi'í yú chi caⁿa yā nduudu cuaacu yeⁿē di chi n'daācā diiⁿ di, tan'dúúcā chi 'áámá idiíⁿ di chiíⁿ chi cuaacu. ⁴Nguéé ch'etete ca vaadí yeenu yeⁿé chi ch'iindiveéⁿ chí daiyá dííⁿ yā chiíⁿ chi cuaacu.

⁵Dii chi neⁿé, tanducuéⁿē chi diiⁿ di, n'daācā n'dai diiⁿ di ndúúcu vi'í yú ndúúcu 'iiⁿyāⁿ chi ngiica ná yúúní. ⁶Iiⁿyāⁿ miiⁿ ngaⁿá yā nduudu cuaacú yeⁿe vaadí neⁿe yeⁿe di nanááⁿ 'iiⁿyāⁿ chi snūūⁿ yaācū. Nduuti chi cunnéé dí 'iiⁿyāⁿ tan'dúúcā chi canéé chi diiⁿ di ní tan'dúúcā chi neⁿe Dendyuūs chi diiⁿ di, tuuⁿmi ní n'daācā idiíⁿ di. ⁷Caati 'iiⁿyāⁿ cueⁿé yā 'muuⁿ cueⁿé yā miiⁿ cucáávā chi neⁿé yā caaⁿmáⁿ yā yeⁿe Cristo. Nguéé

dé'ē vεε sta'á yā yeⁿē 'iiⁿyāⁿ chi nguéé yeⁿe ndaata yeⁿé yā. ⁸S'uuúⁿ ní canee chi 'cuaaⁿ yú 'iiⁿyāⁿ s'tíí. Níícú cuuvi cunée yā ndúúcu yú 'iiⁿyāⁿ chí idiíⁿ yā ntiiⁿnyuⁿ yeⁿe vaadí cuaacu.

Saⁿa Diótrefes nguéé n'daācā diiⁿ sa

⁹Úú nidinguúⁿ yeⁿē 'iiⁿyāⁿ yeⁿe yaācū caati Diótrefes nguéé 'cuaaⁿ sa nús'uu ti néⁿé sa caaⁿmaⁿ ntiiⁿnyuⁿ sá yeⁿé yā. ¹⁰Cáávā chuū taachi 'úú chi ndaā tuuⁿmi ní nin'gaacú tanducuéⁿē chi diiⁿ sáⁿā miiⁿ. Taatií caⁿā sa yeⁿe s'uuúⁿ ndúúcu nduudu taaⁿ chi nguéé n'daācā taatií 'caā'vā sa contra yeⁿe s'uuúⁿ. Ní nguéé yeenú sá ndúúcu dendu'ū. Nguéé n'guuⁿ sa vi'í yú. Ní nguéé neⁿe sa chi tanáⁿa yā chi 'cuaaⁿ yā vi'í yā. Níícú tun'dáa sa 'yā chεeti yaācū.

¹¹Díí chi neⁿé, nguéé diiⁿ di chiíⁿ chi n'diichi di chi nguéé n'daācā. Diiⁿ di chi n'daācā. Du'ū chi din'daācā ní yeⁿē Dendyuūs. Du'ū chi nguéé n'daācā nidiíⁿ ní nguéé n'dííchí Dendyuūs.

Saⁿa Demetrio, n'daācā idiíⁿ sa

¹²Nducyáácá yā ngaⁿá yā nduudu cuaacu yeⁿe saⁿā Demetrio. 'Áā

'tiicá nūuⁿ nduudu cuaacu n'giⁿi
 vida yeⁿ'é yā. 'Tiicá ntúūⁿ s'uuúⁿ
 ngaⁿ'a yú ndúúdú cuaacu yeⁿ'e yā.
 Ní ndís'tiī deenú ni chí ngaⁿ'ā yú
 nduudu cuaacu yeⁿ'é yā.

Ch'iinū carta maaⁿ

¹³Nééné véé yeⁿ'é chi neⁿ'é
 dingúúⁿ yeⁿ'e ndís'tiī naati nguéé
 neⁿ'é dingúúⁿ ndúúcū tinta ndúúcū
 pluma.

¹⁴Caati neⁿ'é n'diichí ndís'tiī núúⁿ
 nīīⁿyūⁿ ní caaⁿmáⁿ ndúúcu di ní
 ndís'tiī nduucú.

¹⁵'Diiíⁿ canéé ndúúcū di.
 Amigos yeⁿ'e s'uuúⁿ dichó'o
 yā: N'daí n'diī, ngaⁿ'a yā. Dii
 dichó'o di: N'daí ndís'tiī, yeⁿ'ē
 amigos yeⁿ'e s'uuúⁿ taachi yaa'vi
 di 'iiⁿ'yāⁿ ca'áámá ca'áámá yā
 caavā chi duuchí Cristo. 'Tífcā
 cuuvi.

CARTA YEⁿE JUDAS

**Judas idinguúⁿ carta 'cūū
yeⁿe 'iiⁿyāⁿ chi Ndyuūs yaa'ví
yā chi cuuvi yeⁿé yā**

¹Úú saⁿā Judas ní saⁿā chi dichíí'vē Jesucristo. 'Úú 'diinú Jacobo ní 'úú idinguúⁿ carta 'cūū yeⁿe 'iiⁿyāⁿ s'eeⁿ chi Ndyuūs chiida yú dinéⁿe yā ní didεεvé yā. Ní Cristo yaa'ví yā 'iiⁿyāⁿ s'eeⁿ chi cuuvi yeⁿé yā. Ní Cristo candeé yā cuidado 'iiⁿyāⁿ s'eeⁿ cáávā chi yeⁿé yā 'iiⁿyāⁿ s'eeⁿ. ²Neⁿé chi Ndyuūs téé yā ndís'tiī n'deeé cá yeⁿé yā yeⁿe vaadi ya'ai ní yeⁿé vaadi 'diifⁿ ní yeⁿé vaadi neⁿe caati cuuví 'yaaⁿ nducuéⁿē chuū nguaaⁿ ndís'tiī.

**Yeⁿé 'iiⁿyāⁿ chi nguée ngaⁿā
nduudu cuaacu**

³Ndís'tiī hermanos yeⁿé chi neⁿe taaví, neené neⁿé idinguúⁿ yeⁿe ndís'tiī yeⁿé chi Ndyuūs nadanguáⁿai yā s'uuúⁿ. Maaⁿ ní cadiinuúⁿ chi canee chi idinguúⁿ carta 'cūū yeⁿe ní caati cuuví yaa'ví ch'εechi ndís'tiī chi canéé chi dííⁿ ní luchar n'dai cáávā chiíⁿ chi i'téenu ní Ndyuūs. Ndyuūs 'áamá vmnéⁿēe ca'á yā vaadi i'téenu yeⁿé yā 'iiⁿyāⁿ chi yeⁿé yā. ⁴Náⁿā 'iiⁿyāⁿ chi nguée yeⁿé Ndyuūs ní nduuvidaamā yā

ndúúcū ní. Ndíí nguée deenú ní chuū. 'Iiⁿyāⁿ s'eeⁿ ní nguée n'daacā. Ní canéé nguūⁿ na libro yeⁿé Ndyuūs ndii cuááⁿ vmnaaⁿ yeⁿé yā 'tíicā: Condenado yā ní 'cuūvi yā. Ní 'iiⁿyāⁿ s'eeⁿ dámaāⁿ sta'á yā nduudu cuaacu yeⁿé Ndyuūs chi tanáⁿā 'iiⁿyāⁿ nguée cuuvi tuumicádíínuuⁿ yā yeⁿe chi maáⁿ yā diiⁿ yā chi nguée n'daacā. 'Iiⁿyāⁿ s'eeⁿ ngaⁿā yā contra yeⁿe Ndyuūs yeⁿe yú chi 'áamá n'dyáⁿā Ndyuūs chi 'iivu yú, ní contra yeⁿe Señor Jesucristo yeⁿe yú dendú'ū.

⁵Áará chi 'āā deenú ní yeⁿé Señor 'iivú Ndyuūs taachi nadanguáⁿai yā 'iiⁿyāⁿ Israel ní diví yā 'iiⁿyāⁿ s'eeⁿ yeⁿe yáⁿāa Egipto, neⁿé chi ndís'tiī n'gaacú ní chuū. Cuayiivi mífⁿ Ndyuūs d'icuiinú yā 'iiⁿyāⁿ na yáⁿāa miiⁿ, 'iiⁿyāⁿ chi nguée s'téenu yā 'yā. ⁶Ní n'gaacú ní yeⁿe ángeles chi nguée dííⁿ yā tan'dúúcā chi Ndyuūs ngaⁿa ntiiⁿnyuⁿ yā ángeles miiⁿ. Ní Ndyuūs canéé chí diví yā yeⁿe lugar yeⁿé yā. Maaⁿ ní Ndyuūs s'néeⁿ yā ángeles chi presos yeⁿé yā na maaiⁿ chi yáanuⁿ. Miiⁿ canee yā ndíí chiichi yā ndúúcū cadenas chi 'áamá canee ndii tiempo chi Ndyuūs n'diichí yā nuuⁿndi yeⁿe ángeles miiⁿ. ⁷Ní n'gaacú ní yeⁿe

yáaⁿ Sodoma ndúúcū yáaⁿ Gomorra ndúúcū yáaⁿ chi snéé cuaaⁿ 'diituú.
 'Tiicá ntúūⁿ nguéeⁿ n'daacā idiīⁿ
 'iiⁿyāⁿ yeⁿe yáaⁿ s'eeⁿ tan'dúúcā
 chi diiⁿ ángeles. 'Iiⁿyāⁿ s'eeⁿ ní
 cueⁿé yā ndúúcū n'daataá o isaⁿā
 chi nguéeⁿ yeⁿé yā. Ní n'daataā
 nguaaⁿ n'daataá yā induuchineeⁿ
 tá n'daataa ndúúcū vi'i. Ní saⁿā
 nguaaⁿ saⁿā yā induuchinéeⁿ sa
 saⁿā ndúúcū vi'i. 'Iiⁿyāⁿ s'eeⁿ cáávā
 castigo yeⁿe yā 'áámá cunée yā
 cueⁿe daāⁿmaⁿ na nguuchi yaⁿā.
 Ní chuū ni ch'iⁿiⁿ s'uuúⁿ chi cuuvi
 ch'ó'oo yeⁿe yú nduuti chi diiⁿ yú
 chi nguéeⁿ n'daacā.

⁸'Tiicá ntúūⁿ nguuví nguuví saⁿā
 s'eeⁿ n'gíínu sa tan'dúúcā chi taachi
 cyaadu sa yeⁿe dendú'ū chi cuuvi
 diiⁿ sa chi dinuuⁿndi sa ndúúcū
 maaⁿ cuerpo yeⁿe sa. Ní nguéeⁿ neⁿe
 sa chi Ndyuūs ngaⁿa ntiīⁿnyuⁿ yā
 yeⁿe sa. Ní cunncaā ngaⁿa yā yeⁿe
 'iiⁿntyéⁿē chi diiⁿ ntiīⁿnyuⁿ yeⁿé
 Ndyuūs. ⁹Ní nguéeⁿ 'tíicā diiⁿ ángel
 Miguel chí ndíf tiiīⁿ taachi diiⁿ
 caandaá ndúúcū yááⁿn'guiinūⁿ
 ní ngaⁿa yā yeⁿe cuerpo yeⁿe
 Moisés. Angel Miguel miiⁿ nguéeⁿ
 dííⁿ yā condenar yááⁿn'guiinūⁿ
 miiⁿ ní nguéeⁿ cuuvi ngaⁿa taáⁿ
 yā chi yááⁿn'guiinūⁿ chi cuuvi
 condenado yā. Dámaāⁿ ngaⁿa yā
 'túúcā. Señor ní dííⁿ yā repretter
 diiⁿ yeⁿe nuuⁿndi chi diiⁿ di. ¹⁰Saⁿā
 s'eeⁿ ní nguéeⁿ n'daacā ngaⁿa sa
 yeⁿe dendú'ū chi nguéeⁿ deenu sa.
 Ní taachi saⁿā s'eeⁿ yeⁿe chi maaⁿ
 sa deenu sa ngaⁿa sa tuuⁿmí ní
 canee sa tan'dúúcā chi 'iiti s'eeⁿ chi
 maaⁿ ti deenu ti. 'Tíicā saⁿā s'eeⁿ.
 Dendú'ū miiⁿ ní diiīⁿ chi dituuví
 maāⁿ saⁿā s'eeⁿ.

¹¹De'e chúúca ya'ai yeⁿe saⁿā
 s'eeⁿ caati dámaāⁿ chi neⁿē sa diiⁿ
 sa tan'dúúcā chi diiⁿ saⁿā Caín.
 Ní saⁿā s'eeⁿ cáávā chi neⁿe sa
 tuūmī, dinuuⁿndi sa tan'dúúcā chi
 diiⁿ saⁿā Balaam. Ní ch'iī sa caati
 nguéeⁿ diiⁿ sa chi ngaⁿa Ndyuūs,
 tan'dúúcā saⁿā Coré chi nguéeⁿ diiⁿ
 sa chi ngaⁿa Ndyuūs taachi nguéeⁿ
 ch'iindiveeⁿ sa chi ngaⁿa Moisés.
¹²Maaⁿ ní 'iiⁿyāⁿ chi 'tíicā, taachi
 nduuvidaamá yā ní che'ē yā ní cu'ú
 yā ndúúcū ndís'tiī taachi véé 'viicu
 ná va'ai yeⁿé nī yeⁿe chi dineⁿé nī
 'áámá nī taama nī, tuuⁿmí ní chuū
 ní cosa chi cuuvi 'cuināaⁿ nī. 'Iiⁿyāⁿ
 s'eeⁿ nguéeⁿ 'va'á yā yeⁿē mar 'áámá.
 Dámaāⁿ candēe yā cuidado yeⁿe
 maāⁿ yā. 'Iiⁿyāⁿ s'eeⁿ tan'dúúcā
 meēeⁿ chi nguéeⁿ nuūⁿnīⁿ yeⁿē chi
 cueeⁿ cuuvi ní tan'dúúcā 'yúúné
 candēé 'muuⁿ ni candēé miiⁿ 'tíica
 yā. 'Iiⁿyāⁿ s'eeⁿ tan'dúúcā yáⁿá
 chi nguéeⁿ véé n'gui'i yeⁿē 'tíica
 yā. Ní yáⁿá miiⁿ ní nguéeⁿ dichí'vē
 caati nguéeⁿ n'gui'i yeⁿē ní n'diī
 tan'dúúcā tiempo yeⁿē 'iichēe. Ní
 'iiⁿyāⁿ tiicú yā yáⁿá miiⁿ ndii díf'yú.
 'Tíicā 'iiⁿyāⁿ s'eeⁿ. ¹³'Iiⁿyāⁿ s'eeⁿ ní
 tan'dúúcā nuūⁿnīⁿyáⁿā chi ngii
 yú yaacu ndúúcū ngii yáíⁿ inaaⁿ
 cucáávā 'yúúné taaⁿ. Ní nducueⁿē
 chi nguéeⁿ n'daacā chi diiⁿ yā yeⁿe
 chi cuuvi 'cuinaáⁿ yā ní tan'dúúcā
 ngii yáíⁿ inaaⁿ yeⁿe nuūⁿnīⁿ miiⁿ
 chi inaaⁿ yú 'táácā idiíⁿ yā. 'Iiⁿyāⁿ
 s'eeⁿ ni tan'dúúcā 'ííⁿnyúⁿ chi ngíicá,
 'tíica yā. Ndyuūs nguáín'dai yā
 'áámá lugar yeⁿe 'iiⁿyāⁿ s'eeⁿ chi
 díttuu taavi ca maāⁿ ndii yaānūⁿ
 naachi canée yā cueⁿe daāⁿmaⁿ.
¹⁴'Tiicá ntúūⁿ, saⁿa Enoc chí ndíf
 ná ndēēchē ngiini familia yeⁿe saⁿa

Adán, ní Enoc miiⁿ cáávā Espíritu N'dai yeⁿé Ndyuūs caⁿa sa chii sa 'iiⁿyāⁿ yeⁿe dendu'ū chi cuchíi yeⁿé yā. Ní caⁿa sa 'tíicā: Cuin'diichí ní Señor Jesucristo miiⁿ ní cuchii yā ndúúcu n'dee n'dái mil 'iiⁿyāⁿ chi i'téenu yā yā. ¹⁵Señor Jesucristo ndaa yā chi n'diichí yā nuuⁿndi yeⁿe nducyaaca 'iiⁿyāⁿ. Ní caaⁿmaⁿ yā chi condenado yā nducyaaca 'iiⁿyāⁿ nuuⁿndi chi nguée i'téenu yā 'yā caavā nducuéⁿe nuuⁿndi chi díiⁿ yā ndúúcu nduudu chi ngaⁿa yā chi nguée n'daacā chi contra Ndyuūs. ¹⁶'iiⁿyāⁿ s'eeⁿ ní néené n'gεεcu cheendí yā tan'dúúca chi 'téé nūuⁿ taáⁿ yā ní ngaⁿá yā yeⁿe chi nguée neⁿé yā yeⁿe chi táamá yā idiiⁿ yā. Ní díiⁿ yā chi nguεε n'daacā caati maáⁿ yā neⁿe yā. Ní ndúúcu nduudu chi n'gεete ngaⁿá yā yeⁿe taamá yā chi ch'εeté yā taachi 'iiⁿyāⁿ s'eeⁿ neⁿé yā diiⁿ yā aprovechar dendu'ū cáávā maáⁿ yā.

Judas ngaⁿa yā yeⁿe chi 'iiⁿyāⁿ chi yeⁿe Cristo canée chí díiⁿ yā

¹⁷Ndís'tii, hermanos chi neene neⁿé, maaⁿ ní neⁿé chi ndís'tii ní n'gaacu nī yeⁿe nduudu chi apóstoles yeⁿe Señor Jesucristo yeⁿe yú taacā chi caⁿa yā. ¹⁸Tíicā caⁿa yā chii yā ndís'tii: Taachí 'āa canée niiⁿnuúⁿ nguuvi chí ndaa Señor Jesucristo taama vmnéⁿēe tuu'mi ní 'iiⁿyāⁿ s'eeⁿ ní diduuchineéⁿ yā yeⁿe nī ndúúcu tanducuéⁿe chi yeⁿe Ndyuūs. Ní nducuéⁿe chi 'iiⁿyāⁿ s'eeⁿ neⁿé yā díiⁿ yā chi nguεε n'daacā, chuū ní díiⁿ yā. ¹⁹'iiⁿyāⁿ s'eeⁿ ní divíi yā yeⁿe nguaaⁿ ndís'tii. 'iiⁿyāⁿ s'eeⁿ ní

dinuuⁿndí yā tan'dúúca chi neⁿe yā ní nguée canée Espíritu N'dai yeⁿé Ndyuūs ndúúcu yā.

²⁰Maaⁿ ní ndís'tii hermanos yeⁿé chi neene neⁿé, cu'téenu cá nī nguuvi nguuvi yeⁿe vaadi i'teenu chi Ndyuūs itée yā ndís'tii. Taachi caaⁿmaⁿnguaⁿá nī díiⁿ nī ndúúcu poder yeⁿe Espíritu N'dai yeⁿé Ndyuūs. ²¹Cuεetineeⁿ nī nī díiⁿ nī nducuéⁿe ndúúcu vaadi neⁿe chi Ndyuūs itée yā ndís'tii 'naaⁿ chi cūnee ngiinú nī nguuvi chi Señor Jesucristo yeⁿe yú chí n'dai taavi caⁿa yā téé yā vida cueⁿe daāⁿmaⁿ ndís'tii.

²²Ndís'tii n'dee cá ngaⁿa nī ndúúcu 'iiⁿyāⁿ chi nguée n'daacā i'téenu yā.

²³Ní 'tíicā nadanguáⁿai nī 'iiⁿyāⁿ s'eeⁿ yeⁿe chi nguée i'téenu yā tan'dúúca chi tun'dáa nī 'iiⁿyāⁿ nguááⁿ nguuchi yaⁿā, 'tíicā díiⁿ nī. Ya'ai 'iinú nī yeⁿe tanáⁿā 'iiⁿyāⁿ naati díiⁿ nī ndúúcu cuidado, ndíi nguée cuuvi caⁿa nī ndúúcu yā chi dinuuⁿndí nī.

Judas ngaⁿanguaⁿá yā ní dich'εeté yā Ndyuūs

²⁴Maaⁿ ní 'úú chíⁿeeⁿ ndís'tii na ta'a Ndyuūs chi cuuvi candεε yā cuidado yeⁿe ndís'tii chi nguée dinuuⁿndí nī. Ní Jesucristo cuuvi 'cuuⁿmíⁿ yā nanááⁿ Ndyuūs chi dεεve ngii n'dai ndís'tii chi nguée nuuⁿndi yeⁿé nī. Ní neene yeenu nī. ²⁵Dich'εete yú Ndyuūs chi 'áámā n'dyáⁿā Ndyuūs chi deenu nducuéⁿe ní nadanguáⁿai yā s'uuúⁿ cáávā Señor Jesucristo chí 'iivi yú. Caati yeⁿé yā ní véé dεεvé ngii n'dai ndúúcu n'gεete n'dai ndúúcu poder ch'εete n'dai ndúúcu poder yeⁿe 'iiⁿntyénéⁿ yeⁿé yā nguuvi chí chóo ndúúcu nguuvi maaⁿ ní cuéⁿé daāⁿmaⁿ. 'Tíicā cuuvi.

APOCALIPSIS, NDUUDU CHÍ CH'IⁿI NDYUŪS YEⁿ'E JESUCRISTO

Yeⁿ'e chi Jesucristo ch'íⁿi yā

1 Na libro 'cūū canéé nguūⁿ chuū chi ch'íⁿi Jesucristo. Ní Ndyuūs ch'íⁿi yā Jesucristo chuū caati 'cuuⁿmiⁿ yā 'iiⁿyāⁿ chi dichíⁿvē Ndyuūs dendúⁿū chi 'āā ntéé 'nááⁿ chi ndaa yeⁿ'ē. Ní Jesucristo ch'íⁿi yā chuū Juan chi dichíⁿvē Ndyuūs cáávā 'áámá ángel chi dichó'o yā nanááⁿ yā. ²Juan miiⁿ caⁿ'a cuaacú yā nduudu cuaacu yeⁿ'e tanducueⁿ'ē chi n'diichí yā. Chuū ní nduudu cuaacu yeⁿ'e Ndyuūs. Ní chuū ní nduudu cuaacu chí Jesucristo ch'íⁿi yā Juan miiⁿ.

³De'e chúúcā yeenú 'iiⁿyāⁿ chi n'geeⁿ yā libro 'cūū chi yeⁿ'é Ndyuūs. Ní de'e chúúcā yeenú 'iiⁿyāⁿ s'uuuⁿ chi n'giindiveéⁿ yā nduudu yeⁿ'e libro 'cūū ní i'téenu yā yeⁿ'e chí ngaⁿ'ā, ti ngaⁿ'ā yeⁿ'e denduⁿū chí cuchii ti tiempo miiⁿ chi canee chi chó'oo 'āā snee niiⁿnuúⁿ.

Juan idingúuⁿ yā yeⁿ'e 'iiⁿyāⁿ yeⁿ'e ndu'u ndéechē yaācū.

⁴Ú Juan idinguúⁿ cartas yeⁿ'e 'iiⁿyāⁿ yeⁿ'e ndéechē yaācū chi snéé na yāⁿāa Asia. Neⁿ'é chi Ndyuūs téé yā ndís'tii dendúⁿū chi n'dai yeⁿ'é

yā ndúúcū vaādī 'diiⁿ yeⁿ'é yā. Ní Ndyuūs ní 'áámá canee yā tiempo chi chó'oo, ní maaⁿ ní 'tíica yā, ní caⁿ'á yā ndaa yā. Maaⁿ ní neⁿ'é chi yeⁿ'e ndu'u ndéechē espíritus chi snée yā nanááⁿ trono yeⁿ'é Ndyuūs, espíritus téé yā ndís'tii vaadī n'dai yeⁿ'e Ndyuūs. ⁵Ní 'tiicá ntúūⁿ neⁿ'é chi Cristo téé yā ndís'tii vaadī n'dai yeⁿ'é yā, Jesucristo chi cuéⁿ'é daāⁿmaⁿ ngaⁿ'a cuaacú yā. Ní Cristo miiⁿ ní daiyá Ndyuūs ní 'iiⁿyāⁿ chi vmnááⁿ vmnaaⁿ nacueeⁿ yā yeⁿ'e nguaaⁿ tináⁿ'ā. Ní ngaⁿ'a ntiiⁿnyúⁿ yā yeⁿ'e nducyáácá reyes chi véé iⁿ'yeeⁿdí 'cūū. Ní Cristo dinéⁿ'e yā s'uuúⁿ ní nadeēvē yā s'uuúⁿ yeⁿ'e nuuⁿndi yeⁿ'e yú ndúúcū yuuúⁿ yeⁿ'e maáⁿ yā. ⁶Ní Cristo díⁿ yā chi s'uuúⁿ reyes s'uuúⁿ ní chiiduú s'uuúⁿ chi dichiiⁿvē yú Ndyuūs chi chiidá yā. Maaⁿ ní vaadī dēene ngii ní yeⁿ'é yā ndúúcū nducueⁿ'ē poder chi yeⁿ'é yā cuuvi yeⁿ'é yā cueⁿ'e daāⁿmaⁿ. 'Tíicā.

⁷Cuin'diichí nī. Cristo miiⁿ cuchii yā nguááⁿ meēⁿ ní nducyáácá 'iiⁿyāⁿ cuuvi snaaⁿ yā ndúúcū 'iiⁿyāⁿ s'eeⁿ chi dichó'oo tíicūa Cristo ndúúcū machete chi 'uūvi lados 'caāiⁿ. Ní nducyaaca 'iiⁿyāⁿ yeⁿ'e

nducyaaca yáaⁿ yeⁿe iⁿ'yeeⁿdí 'cūū
cueēcú yā taachi n'diichí yā Cristo.
'Tíica rā va. Cuaacu níⁿ'nyúⁿ chí
'tíicā.

⁸ Señor Ndyuūs chi véé
tanducuéⁿē poder dendu'ū yeⁿe
yā chi 'áamá caneé yā tiempo chi
chó'ōo, ní maaⁿ ní 'tíica yā, ní caⁿ'a
yā ndaa yā, Señor miiⁿ ngaⁿ'a yā:
'Úú chí 'iiⁿ'yāⁿ vmnááⁿ vmnaaⁿ 'úú,
ní 'úú ndíí cuááⁿ naachí 'cuiinu
'úú. Tan'dúúcā letras A ndii Z yeⁿe
alfabeto 'tíicā 'úú.

**Yeⁿe chi Juan n'diichí yā
Cristo chi dēeve n'dai taavi yā
ndii túúⁿnúⁿ ngii 'yáⁿ'a yā**

⁹ 'Úú apóstol Juan 'úú ní hermano
yeⁿe ndís'tii. Ní caati 'úú ní yeⁿe
Jesús 'úú, 'úú dáámá ch'eenú chii
ndúúcū ndis'tii ní dáámá nduucú ní
yeⁿe naachi Ndyuūs ngaⁿ'a ntiiⁿ'nyúⁿ
yā, ní dáámá nduucú ní yeⁿe vaadi
'diiíⁿ chi Jesucristo itée yā s'uuúⁿ.
'Úú canée preso 'úú na isla Patmos
cáávā chi candéé nduudu cuaacu
yeⁿe Ndyuūs ní ngaⁿ'á nduudu
cuaacu yeⁿe Jesucristo. ¹⁰ Ní taachi
'úú caneé miiⁿ 'áamá domingo
chó'ōo chi 'úú ní caneé maaⁿ poder
yeⁿe Espíritu N'dai yeⁿe Ndyuūs.
Ní ch'iindiveéⁿ 'áamá nduudu
ch'ēete cuaaⁿ daamí tan'dúúcā
chi n'gēcú 'áamá trompeta. ¹¹ Ní
'tíicā ngaⁿ'ā ngii 'úú: 'Úú 'iiⁿ'yāⁿ chi
vmnááⁿ vmnaaⁿ 'úú, 'úú ndíí cuááⁿ
naachí 'cuiinu 'úú. Tan'dúúcā letras
A ndii Z yeⁿe alfabeto 'tíicā 'úú.
Dii, Juan, idingúuⁿ di na 'áamá
libro cosa chi inaaⁿ di ní dichó'o
di libro miiⁿ nanááⁿ 'iiⁿ'yāⁿ yeⁿe
ndu'u ndēēchē yaācū chi sneē na
yáⁿ'āa Asia. Yáacū s'eeⁿ ní yeⁿe

yáaⁿ Efeso, ní yeⁿe yáaⁿ Esmirna,
ní yeⁿe yáaⁿ Pérgamo, ní yeⁿe yáaⁿ
Tiatira, ní yeⁿe yáaⁿ Sardis, ní yeⁿe
yáaⁿ Filadelfia, ndúúcū yeⁿe yáaⁿ
Laodicea.

¹² Tuu'mi ní 'úú nan'guaacúndii ní
n'diichí du'ū chi yaā'vi 'úú. Taachi
n'diichi cuaaⁿ daamí n'diichí ndēēchē
candeleros yeⁿe 'dííⁿ'nguāⁿ. ¹³ Ní
náávtaⁿ'a yeⁿe ndu'u candeleros
miiⁿ 'áamá yā cheendii yā tan'dúúcā
'aama saⁿ'ā daiyá 'iiⁿ'yāⁿ iⁿ'yeeⁿdí
'cūū. Canúuⁿ yā 'áamá catecai chi
ngeē yā chi ndaa ndii ná daandu
ca'a yā. Ní ndéé chiichí 'áamá cinta
yeⁿe 'dííⁿ'nguāⁿ cuaaⁿ 'níⁿ'núⁿ yā.
¹⁴ Ní tííⁿ yā ndúúcū yundutiíⁿ yā ní
cuéē tan'dúúcā duudū 'iiti cuūchí
cuéé, ní 'tiicā ntūūⁿ cuéē tan'dúúcā
yāaⁿ. Ní nduutináaⁿ yā tan'dúúcā
'áamá nguuchi yaⁿ'ā. ¹⁵ Ní ca'a yā
tan'dúúcā cūū cuááⁿ chi ndís'tii 'āa
ngiichí ní chēeti 'áamá horno ní
dēevé diiⁿ nī. Ní nduudu yeⁿe yā
ní tan'dúúcā chí n'gēcú 'yaa n'dái
yíicú. ¹⁶ Ní ndēē yā na ta'a cuaacú
yā ndēēchē 'ííⁿ'nyúⁿ. Ní na cheendí
yā miiⁿ canée 'áamá machete chi
'caāiⁿ nduu 'uuví lados. Ní núúⁿ'māⁿ
naaⁿ yā ngíí n'gāi tan'dúúcā chi
n'gāi 'yáⁿ'ā taachi nééné íniguaaⁿ
nááⁿ.

¹⁷ Ní taachi 'úú snaáⁿ 'iiⁿ'yāⁿ miiⁿ
sndēevé na ca'a yā tan'dúúcā chi
ch'íí. Ní 'iiⁿ'yāⁿ miiⁿ s'neéⁿ yā ta'a
cuaacú yā vmnaaⁿ yeⁿe 'úú ní caⁿ'a
yā chí yā 'úú: Nguéé 'va'a di. 'Úú
chí vmnááⁿ vmnaaⁿ, 'úú ndíí cuaaⁿ
naachí 'cuiinu 'úú. ¹⁸ 'Úú 'áamá
canduuchí. Cuáácú ch'ii naati
cuiⁿ'diichí nī maaⁿ ní 'úú canduuchí
cueⁿe daāⁿ'maⁿ 'tíicā. 'Úú ní ndēé
llaves yeⁿe vaadi n'gii chi yeⁿe

lugar naachi snée 'iiⁿ'yāⁿ chi n'díí ní nguéeⁿ ch'i'téenu yā Ndyuūs. ¹⁹Maaⁿ ní dii dingúuⁿ di dendu'ū chi 'túúcā chi n'diichi di ndúúcū dendu'ū chi 'tíicā ndúúcū dendu'ū chi ndaa cuayiivi. ²⁰Maaⁿ ní 'úú n'g'iⁿ'í dii dē'e neⁿ'e caaⁿ'maⁿ ndēēchē 'iiⁿ'nyúⁿ miiⁿ chi n'diichi di na ta'ā cuaacú ní yeⁿ'e chi ndēēchē candeleros yeⁿ'e 'diiⁿ'nguāāⁿ miiⁿ. Ndu'u ndēēchē 'iiⁿ'nyúⁿ miiⁿ chíⁿ chí du'ū ndēēchē 'iiⁿ'yāⁿ chi ndíí tiiⁿ yeⁿ'e ndu'ū ndēēchē yāacū miiⁿ. Ní ndu'ū ndēēchē candeleros chíⁿ n'diichi di chíⁿ chí ndēēchē yāacū miiⁿ.

Juan idingúuⁿ yā carta 'cūū yeⁿ'e 'iiⁿ'yāⁿ yeⁿ'e yāāⁿ Efeso

2 Díí, Juan idingúuⁿ di chuū yeⁿ'e 'iiⁿ'yāⁿ chi ndíí tiiⁿ yeⁿ'e yāacū yeⁿ'e yāāⁿ Efeso. 'Iiⁿ'yāⁿ chi ndēé yā ndu'u ndēēchē 'ííⁿ'nyúⁿ na tá'ā cuaacú yā ní chiicá yā nguāāⁿ ndēēchē candeleros yeⁿ'e 'dííⁿ'nguāāⁿ, 'iiⁿ'yāⁿ miiⁿ ngaⁿ'á yā dendu'ū chi 'túúcā: ²'Úú ní deenú ntiiⁿ'nyuⁿ chi diiⁿ di. Deenú chi díítūu n'dái diiⁿ dí ntiiⁿ'nyuⁿ ní véeⁿ paciencia nanáāⁿ di. Ní deenú chi ichēe di yeⁿ'e 'iiⁿ'yāⁿ chi nguēe n'daācā idiíⁿ yā. Ní deenú ntúūⁿ chi ndēē di cuidado yeⁿ'e 'iiⁿ'yāⁿ chi ngaⁿ'a chi apóstoles ní nguéeⁿ 'tiicá yā. Ní dii deenu di chi 'iiⁿ'yāⁿ s'eeⁿ nguéeⁿ apóstoles 'iiⁿ'yāⁿ. Ní deenu di chí yaadi yā. ³Ní dii véeⁿ paciencia nanáāⁿ di ní n'geenu di ngii. Ní diiⁿ di n'dee n'dái ntiiⁿ'nyuⁿ cáāvā 'úú. Ní nguéeⁿ chicúuⁿnuⁿ di yeⁿ'e dendu'ū. ⁴Naati véeⁿ 'téé contra yeⁿ'ē di. Nguéeⁿ dineⁿ'e di 'úú tan'dúúcā chi vmnáāⁿ vmnaaⁿ dineⁿ'e ca di. ⁵Ní cáāvā chuū n'gáácú dí yeⁿ'e chi

diiⁿ di chi nguéeⁿ dineⁿ'e ca di 'úú ní ndaacadaami di yeⁿ'ē. Ní dineⁿ'e ca di 'úú tan'dúúcā chí diiⁿ di vmnáāⁿ vmnaaⁿ. Ní nduuti chi nguéeⁿ 'túúcā diiⁿ di, 'úú ní ndāa niiⁿ'nuúⁿ ní divií candelero yeⁿ'e di yeⁿ'e naachi snéeⁿ. ⁶Ní chuū chi véeⁿ favor yeⁿ'e di. Nguéeⁿ inee yiinu di ntiiⁿ'nyuⁿ chi diiⁿ 'iiⁿ'yāⁿ yeⁿ'e grupo yeⁿ'e Nicolaítas. Ní 'úú ntúūⁿ nguēe neⁿ'é chí diiⁿ yā. ⁷'Iiⁿ'yāⁿ chí véeⁿ veéⁿ yā 'caandiveeⁿ yā chí ngaⁿ'ā Espíritu N'dai yeⁿ'é Ndyuūs ngii 'iiⁿ'yāⁿ yeⁿ'e yāacū s'eeⁿ. 'Úú ngaⁿ'á chí 'iiⁿ'yāⁿ chí cuchée yā yeⁿ'e dendu'ū, 'úú ca'á 'iiⁿ'yāⁿ s'eeⁿ chí che'é yā n'gui'í yeⁿ'e yá'á yeⁿ'e vida cueⁿ'e daāⁿ'maⁿ chí cánéeⁿ naavtaⁿ'ā yeⁿ'e paraíso chí jardín yeⁿ'e Ndyuūs.

Juan idingúuⁿ yā carta 'cūū yeⁿ'e 'iiⁿ'yāⁿ yeⁿ'e yāāⁿ Esmirna

⁸Díí, Juan, idingúuⁿ di yeⁿ'e 'iiⁿ'yāⁿ chí ndíí tiiⁿ yeⁿ'e 'iiⁿ'yāⁿ yeⁿ'e yāacū yeⁿ'e yāāⁿ Esmirna. Dendu'ū chí 'túúcā ngaⁿ'á 'iiⁿ'yāⁿ chí vmnáāⁿ vmnaaⁿ ndii chí 'cuiinu, 'iiⁿ'yāⁿ chí 'āā n'dii yā ní maaⁿ ní 'āā canduuchi ntúúⁿ yā. ⁹'Úú deenú ntiiⁿ'nyuⁿ chí diiⁿ di. Deenú chí n'geenu di ngii ndúúcū dendu'ū chí chēechí n'dai yeⁿ'e di. Deenú chí nguéeⁿ dē'e vee yeⁿ'e di naati cuaacu nííⁿ'nyúⁿ chí 'cuiica di. 'Úú deenú yeⁿ'ē chí 'iiⁿ'yāⁿ chí ngaⁿ'á yā chí judíos yā chí Israel ya ní nguéeⁿ dííⁿ yā tan'dúúcā chí 'iiⁿ'yāⁿ judíos yā. Ní deenú chí 'iiⁿ'yāⁿ s'eeⁿ nguéeⁿ n'daacā ngaⁿ'á yā yeⁿ'e di. Ní 'iiⁿ'yāⁿ s'eeⁿ ní yeⁿ'e yááⁿ'n'guiinūuⁿ. ¹⁰Nguéeⁿ 'va'a di yeⁿ'ē dendú'ū chí canee chí 'cueenu di cuuvi. 'Caandiveeⁿ di yeⁿ'é. Yááⁿ'n'guiinūuⁿ cutá'a sa ná'ā

ndís'tií ní cu'nuu" sa 'i'i'yā" vácū
 caati n'diichinee" sa nducyaaca
 ndís'tií. Ní canee chi 'cuenú nī
 cuuvi ndiichí nguuvi. Naati 'áamá
 canee nī ndúúcū chi i'téenu nī ndii
 chi 'cuūvi nī ní 'úú teé ndís'tií 'áamá
 corona chi vida cue"e daā"ma".
 11 'i'i'yā" chi véé veé" yā 'caandiveé"
 yā chi nga"ā Espíritu N'dai ye"é
 Ndyuūs ngii 'i'i'yā" s'ee" ye"e yáacū
 s'ee". 'I'i'yā" chi cuchéé yā ye"e
 tanducué"ē dendu'ū nguéé cuuvi
 'cuenú yā cuuvi ye"ē ndii 'úúví
 vaadí n'gii chi infierno.

**Juan idingúu" yā carta 'cūū ye"e
 'i'i'yā" ye"e yāā" Pérgamo**

12 Díí, Juan, idingúu" di ntúū"
 'i'i'yā" ndíí tiíi" chi ye"e 'i'i'yā" ye"e
 yáacū ye"e yāā" Pérgamo: Chuū
 nga"á 'i'i'yā" chi véé machete chi
 'uūví lados 'caāi". 13 Chuū nga"ā
 yā. 'Úú ní deenú tanducué"ē chi
 dii" di. Deenú chi canee di naachi
 yáā'n'guinūu" nga"ā ntiin'nyu" sa.
 Ní 'áará chí 'tíicā 'áamá canee di
 lado ye"é nguéé ndaacádaami di
 ye"e chi i'téenu di 'úú. Ní 'tiicá
 ntúū" dii" di nguuvi chi ch'ó'oo
 taachi nguaa" ndís'tií 'i'i'yā" s'ee"
 ch'i'i'nú" yā sa"ā Antipas chi 'áamá
 ca"ā sa nduudu cuaacu ye"é na yāā"
 naachi canee yáā'n'giinūu". 14 Naati
 véé n'duuví dendu'ū ye"e chi
 contra ye"ē di. Na yāā" Pérgamo
 chi yāā" ye"e di véé nguaa" ndís'tií
 ná"ā 'i'i'yā" chi nguéé ne"é yā
 s'neé" yā ye"e chi i'téenu yā chi
 'cuee" Balaam. Ní Balaam mii"
 'i'i'yā" chí chi'cueé" yā sa"ā Balac
 táácā cuuvi dii" sa chi 'i'i'yā" ye"e
 Israel dinuu"ndí yā. Ní 'i'i'yā" s'ee"
 ye"e Israel dinuu"ndí yā taachi

che'é yā dendu'ū ye"e chi 'i'i'yā"
 cááv' ofrenda ca'a yā nátai ye"e
 santos chi ídolos, ní taachi ca"á
 yā ndúúcū 'aama n'daataá o 'aama
 isá"ā chi nguéé ye"é yā. 15 Ní 'tiicá
 ntúū" véé nguaa" ndís'tií 'i'i'yā"
 chi nguéé ne"é yā s'nee" yā ye"e
 chi i'téenu yā chi ca'cueé" yā ye"e
 'i'i'yā" ye"e grupo ye"e nicolaítas.
 Ní 'úú nguéé inee yiinú ye"e chuū.
 16 Ndaacadáámí dí ye"e nducué"ē
 chuū. Nduuti chi nguéé dii" di
 'túúcā ndaa nuú" naachi canee di
 ní 'cuu"má" ndúúcū 'i'i'yā" s'ee"
 ndúúcū machete chi 'uūví lados
 'caāi" chi canéé cheendí. 17 'i'i'yā"
 chi véé veé" yā 'caandiveé" yā chi
 nga"ā Espíritu N'dai ye"é Ndyuūs
 ngii 'i'i'yā" s'ee" ye"e yáacū
 s'ee". 'I'i'yā" chi cuchéé yā ye"e
 tanducué"ē 'úú ní ca'á 'i'i'yā" s'ee"
 pan chi duuchi maná chi canúú"
 n'de'ei. Ní ca'á 'i'i'yā" s'ee" 'áamá
 tuūu cuéé naachi canéé nguū"
 'áamá chi duuchi chi ngai. Mar
 'áamá 'i'i'yā" nguéé deenú yā chi
 duuchi mii", dámaā" 'i'i'yā" chi
 cuta'á yā tuūu cuéé mii" deenú yā
 chi duuchi mii".

**Juan idingúu" yā carta 'cūū
 ye"e 'i'i'yā" ye"e yāā" Tiatira**

18 Díí, Juan, idingúu" di ye"e
 'i'i'yā" ndíí tiíi" ye"e 'i'i'yā" ye"e
 yáacū ye"e yāā" Tiatira: Daiyá
 Ndyuūs chi véé nduutináa" yā
 tan'dúúcā nguuchi ya"ā ni ca'a
 yā tan'dúúca cūū cuaaa" chi dēēvé
 n'dai nga"á yā 'tíicā. 19 Uú deenú
 nducué"ē chi dii" di. Deenú chi
 dine"e di 'úú, chi i'téenu di 'úú, ní
 dichii've di 'úú. Ní véé paciencia
 nanáa" di. Deenú chi maa" díi" nī

ntiiⁿnyuⁿ chi n'deeⁿ n'dái nguéeⁿ ti ntiⁿnyuⁿ yeⁿé nī chi vmaⁿaⁿ.
²⁰Naati véé duúⁿvī dendúⁿū contra yeⁿé di. Ndísⁿtii ní 'cuaáⁿ nī táⁿā Jezabel chi ngaⁿa tá chi chíⁿ chi ngaⁿa tá ní nduudu cuaacu yeⁿé Ndyuūs. Nginncheⁿei tá 'iiⁿyāⁿ chi dichíⁿvē 'úú ndúúⁿcū chí ngíⁿcueeⁿ tá. Ní ngaⁿa tá chí 'iiⁿyāⁿ cuuvi caⁿá yā ndúúⁿcū n'daataⁿa o isaⁿā chi nguéeⁿ yeⁿé yā ní cuuvi chéⁿe yā denduⁿū chi 'iiⁿyāⁿ s'eeⁿ cáávā ofrenda caⁿa yā nátaⁿi yeⁿe santos chi ídolos. ²¹'Úú ní caⁿá lugar táⁿā miiⁿ chi ndaacadaami tá yeⁿe chi diiⁿ tá chí nguéeⁿ n'daacā naati nguéeⁿ 'cuūⁿ ta ndaacadaami tá yeⁿe nducueⁿé chí diiⁿ tá chi nguéeⁿ n'daacā. Ní neⁿe tá chi tanáⁿā 'iiⁿyāⁿ dinuuⁿndí yā ndúúⁿcū tá.
²²Maaⁿ ní 'úú díⁿ chi neéⁿe ngiitā tá miiⁿ ní nducyááⁿcá isaⁿā chi díⁿ yā tan'dúúⁿcā chi ngíⁿcueeⁿ tá neenⁿe 'cueenu yā cuuvi. 'Tíicā maaⁿ ní díⁿ ndúúⁿcū nducyááⁿcá yā nduuti chi nguéeⁿ ndaacadáámí yā yeⁿe chi ngíⁿcueeⁿ n'daataⁿá míⁿ. ²³Tiicá ntúūⁿ 'úú ní 'caāⁿnúⁿ nducyaaca 'iiⁿyāⁿ chi díⁿ yā tan'dúúⁿcā chi chíⁿcueeⁿ tá. Ní nducyaaca 'iiⁿyāⁿ yeⁿe nducyááⁿcá yaācū caⁿá yā cadíⁿnuuⁿ yā chí 'úú chí n'diichí dēⁿē vεε chí 'iiⁿyāⁿ nadicadíⁿnuuⁿ yā ndii na staava yeⁿé yā. Ní 'úú nadiⁿvé ndísⁿtii tuunu tuunu ca denduⁿū chí díⁿ nī. ²⁴Chuū ngaⁿá ngii ndísⁿtii ndúúⁿcū tanáⁿā 'iiⁿyāⁿ chí i'téenu yā Ndyuūs ní chí snée yā na yāāⁿ Tiatira chí nguéeⁿ díⁿ yā tan'dúúⁿcā chí ngíⁿcueeⁿ táⁿā miiⁿ. Ní nguéeⁿ déenu nī dēⁿē chí nuuⁿndi s'eeⁿ chí ch'εεte chí yeⁿe yááⁿn'guiniūⁿ. Tan'dúúⁿcā chí ngaⁿa

náⁿā 'iiⁿyāⁿ 'úú ngaⁿá chí nguéeⁿ cuⁿneéⁿ táámá dendúⁿū chí díⁿtūu nanááⁿ ndísⁿtii. ²⁵Naati chíⁿ chí 'āā véé yeⁿé nī cundeéⁿ nī cuidado yeⁿé ndii 'úú nindaá nanááⁿ nī. ²⁶'iiⁿyāⁿ chí cuchéeⁿ yā yeⁿe tanducueⁿé denduⁿū ní nguuví nguuví díⁿ yā tan'dúúⁿcā 'úú neⁿé ndíⁿ cuaaⁿ ná n'giinu, 'úú ní caⁿá ntiiⁿnyuⁿ 'iiⁿyāⁿ s'eeⁿ chí 'iiⁿntyéⁿé yeⁿe nducueⁿé naciones. ²⁷Ní caⁿa ntiiⁿnyúⁿ yā yeⁿe 'iiⁿyāⁿ s'eeⁿ tan'dúúⁿcā chiidá tee yā poder 'úú chí 'úú ngaⁿa ntiiⁿnyúⁿ yeⁿe nducueⁿé naciones ndúúⁿcū 'áámá nduucu cūū yeⁿé. Ní ndúúⁿcū nduucu cūū miiⁿ 'cueⁿé naciones chí chicheiyei tan'dúúⁿcā chí naciones ní 'aama vaso yeⁿe yáⁿā chí 'cueēⁿ. ²⁸Ní 'iiⁿyāⁿ chí cuchεε yā yeⁿe tanducueⁿé 'úú ní caⁿá 'iiⁿyāⁿ miiⁿ 'íⁿnyúⁿ yeⁿe nguεetiⁿyaaⁿ. ²⁹'iiⁿyāⁿ chí véé veéⁿ yā 'caandiveéⁿ yā chí ngaⁿā Espíⁿritu N'dai yeⁿé Ndyuūs ngii 'iiⁿyāⁿ s'eeⁿ yeⁿe yaācū s'eeⁿ.

Juan idingúuⁿ yā carta 'cūū yeⁿe 'iiⁿyāⁿ yeⁿe yāāⁿ Sardis

3 Díⁿ Juan, idingúuⁿ di yeⁿe 'iiⁿyāⁿ ndíⁿ tiiⁿ yeⁿe 'iiⁿyāⁿ yeⁿe yācū yeⁿe yāāⁿ Sardis: Chuū ngaⁿa Cristo chí véé ndēēchē espíⁿritus yeⁿe Ndyuūs ndúúⁿcū ndēēchē 'íⁿnyúⁿ s'eeⁿ. 'Úú deenú chíⁿ chí diiⁿ di. Ní deenú chí 'áará chí 'iiⁿyāⁿ s'eeⁿ deenú yā dii cáávā cosas chí diiⁿ di ti cánduuchi di naati nanááⁿ 'úú dii canéeⁿ dí tan'dúúⁿcā chí n'díⁿ di cucáávā nuuⁿndi yeⁿe di. ²Nandúúⁿchí dí. Cunéeⁿ díitū di ní cu'téenu ca di yeⁿe cosas chí véé caati vmaⁿaⁿ nguéeⁿ diiⁿ di cuidado yeⁿe

nducuéⁿē. Cu'téenu ca di ní nguéeⁿ cuuvi cho'oo yeⁿē chi véé chi yeⁿe di. Ní 'úú n'diichí ntiⁿnyuⁿ chi diiⁿ di. Ní nguéeⁿ n'daacā ca nanááⁿ Ndyuūs. ³N'gaacú di yeⁿe chi n'giindiveeⁿ di chi 'iⁿyāⁿ ch'i'cueeⁿ yā dii. Maaⁿ ní diiⁿ di tan'dúúcā chi 'cueeⁿ di ní ndaacadaami di yeⁿe chi diiⁿ di chi nguéeⁿ n'daacā. Ní nduuti chi nguéeⁿ diiⁿ di cuidado tuu'mi ní 'úú ndaá tan'dúúcā 'áámá chi duucu ní nguéeⁿ cadíínuuⁿ di hora chí ndaá nanááⁿ dii. ⁴Véé duu'vi 'iⁿyāⁿ nguaaⁿ ndís'tií chi snée yā na yāāⁿ Sardis, 'iⁿyāⁿ chi nguéeⁿ dinuuⁿndí yā tan'dúúcā tanáⁿā 'iⁿyāⁿ chi dinuuⁿndí yā. 'Iⁿyāⁿ s'eeⁿ caⁿá yā nduucú ndúúcū catecai cuée yā ti 'iⁿyāⁿ s'eeⁿ ní n'dai taaví yā chí cuuvi 'tífcā ndúúcu yā. ⁵'Iⁿyāⁿ chi cuchéé yā yeⁿe tanducuéⁿē nndaāca yā catecai cuée yā. Ní 'úú nguéeⁿ nadatuūví chi duuchi yā naachi canée nguūⁿ na libro yeⁿe vida cueⁿe daāⁿmaⁿ. Ní 'úú ní caaⁿmáⁿ chi duuchí yā nanááⁿ chiidá ní nanááⁿ ángeles dendú'ū. ⁶'Iⁿyāⁿ chi véé veéⁿ yā 'caandiveeⁿ yā chíⁿ chi ngaⁿā Espíritu N'dai yeⁿé Ndyuūs ngii 'iⁿyāⁿ s'eeⁿ yeⁿe yaācū s'eeⁿ.

**Juan idingúuⁿ yā carta 'cūū yeⁿe
'iⁿyāⁿ yeⁿe yāāⁿ Filadelfia**

⁷Díí, Juan, idingúuⁿ ntúūⁿ di yeⁿe 'iⁿyāⁿ ndii tiiⁿ yeⁿe 'iⁿyāⁿ yeⁿe yaācū yeⁿe yāāⁿ Filadelfia. Dendu'ū chi 'túúcā ngaⁿā 'iⁿyāⁿ chi dēve taavi ca yā ní cuaacu yā. 'Iⁿyāⁿ miiⁿ chi ndée yā llave yeⁿe David, 'iⁿyāⁿ miiⁿ taachi nn'guaaⁿ yā puerta mar 'áámá 'iⁿyāⁿ nguéeⁿ cuuvi nn'gaadí yā. Ní taachi nn'gaadí yā 'tiicā ntúūⁿ mar

'áámá 'iⁿyāⁿ nguéeⁿ cuuvi nn'guaaⁿ yā. ⁸'Úú n'diichí tanducuéⁿē chi diiⁿ di. 'Úú n'neeⁿ cucáāvā di 'áámá cheendi va'āi chi maaⁿ ní cánda'āi ní mar 'áámá 'iⁿyāⁿ nguéeⁿ cuuvi nn'gaadí yā cheendi va'āi miiⁿ. 'Áará chi véé duu'vi fuerzas yeⁿe di ch'iindiveeⁿ di nduudu cuaacu yeⁿé ní nguéeⁿ ndaacadaami di yeⁿé. ⁹'Caandiveeⁿ di yeⁿé. 'Iⁿyāⁿ s'eeⁿ ní yeⁿe yááⁿn'guiinūūⁿ ti ngaⁿá yā nduudu yaadi. Ngaⁿá yā chi 'iⁿyāⁿ judíos yā chi Israel yā ní nguéeⁿ 'túúcā dííⁿ yā tan'dúúcā 'iⁿyāⁿ judíos yā. Cuin'diichi di. 'Úú idiíⁿ chi 'iⁿyāⁿ s'eeⁿ ní ndaá yā nanaaⁿ di ní caantii'yā yā nanááⁿ ca'a di ní cu'téenu yā dii. Ní 'iⁿyāⁿ s'eeⁿ cuuvi cadíínuuⁿ yā chi 'úú ní neⁿé dii. ¹⁰Dii ní ndē di cuidado yeⁿe nuuⁿndi chi ngaⁿá yeⁿe chi cuchéé di, ní cuchéé di. Ní cáāvā chuū 'úú ndēé cuidado yeⁿe dii yeⁿe tiempo chi cuchii chi caaⁿmaⁿ ndaá cosas chi n'diichineeⁿ yā dii. Ní cosas miiⁿ ndaa yeⁿe 'iⁿyāⁿ chi snée yā núúⁿmáⁿ iⁿ'yeeⁿdí. Ní n'diichineeⁿ nducyaaca 'iⁿyāⁿ chi s'neeⁿ yā na iⁿ'yeeⁿdí 'cūū. ¹¹Cuin'diichi di. Niiⁿnuⁿ ndaá nanááⁿ dii. Cundée ca di cuidado yeⁿē chi véé yeⁿe di ní mar 'áámá 'iⁿyāⁿ cuuvi cuta'á yā corona chi cuuvi yeⁿe di. ¹²'Iⁿyāⁿ chi cuchéé yā yeⁿe tanducuéⁿē, 'úú idiíⁿ chi 'iⁿyāⁿ s'eeⁿ 'áámá caneeⁿ yā na yaācū yeⁿé tan'dúúcā 'áámá pilar yeⁿe yaācū yeⁿe Ndyuūs, 'tífcā yā. Ní 'āā ntée can'daa yā yeⁿe yaācū miiⁿ. Ní 'úú idinguúⁿ ncheeté yā chi dúúchí Ndyuūs yeⁿé ndúúcū chi duuchi yeⁿe yāāⁿ yeⁿe Ndyuūs yeⁿé. Ní yāāⁿ miiⁿ nguuví Jerusalén chí ngai chi ndaá yeⁿe va'ai cheeti

nguuvi ní yeⁿe Ndyuūs yeⁿé.

¹³Iiⁿ'yāⁿ chi véé veéⁿ yā 'caandiveéⁿ yā chi ngaⁿ'ā Espíritu N'dai yeⁿé Ndyuūs ngii 'iiⁿ'yāⁿ s'eeⁿ yeⁿe yaācū s'eeⁿ.

Juan idingúuⁿ yā carta 'cūū yeⁿe 'iiⁿ'yāⁿ yeⁿe yāāⁿ Laodicea

¹⁴Díí, Juan, idingúuⁿ di yeⁿe 'iiⁿ'yāⁿ ndii tíiⁿ yeⁿe 'iiⁿ'yāⁿ yeⁿe yaācū yeⁿe yāāⁿ Laodicea: Nduudú 'cūū ní yeⁿe 'iiⁿ'yāⁿ chi nguuví yā Amén chi neⁿe caaⁿ'maⁿ chí cuaacu yā. 'Iiⁿ'yāⁿ miiⁿ chi testigo yā ní ngaⁿ'a cuaacu yā cueⁿe daāⁿ'maⁿ. 'Iiⁿ'yāⁿ miiⁿ ní yeⁿé yā tanducuéⁿē chi Ndyuūs dín'dái yā. ¹⁵Úú deenú tanducuéⁿē chi diiⁿ di. Ní díí canee di tan'dúúⁿcā chi nguéé ndúú 'iiⁿ'nūⁿ di ndíí nguéé ndúú 'iiche di. De'e chúúⁿcā n'daacā cáávā dii ndúúⁿtí chí 'iiⁿ'nūⁿ di o 'iiche di. ¹⁶Cáávā chi dii ní cuūtū di, ní nguéé 'iiⁿ'nūⁿ di, ndíí nguéé ndúú 'iiche di, 'úú ní dííⁿ ndúúⁿcū di tan'dúúⁿcā chi caachí dii yeⁿē na cheendí ti dii tan'dúúⁿcā chi nuūⁿnīⁿ daaíⁿ dii, ní 'tífā dííⁿ. ¹⁷Díí ní 'túúⁿcā ngaⁿ'a di chi 'cuiica di ní nguéé de'e vεe neⁿe di ti neenē n'deēe dendúⁿ'ū yeⁿe di véé. Naati díí nguéé deenu di chi nguéé de'e vεe yeⁿe di. Ní ndaachí canée di caati canée di tan'dúúⁿcā chi díí ní pobre di ní nguéé catecai di, ní ngueenáaⁿ di. 'Tífā canée di. ¹⁸Úú ní teé consejo dii. Cuai di yeⁿe 'úú 'dííⁿ'nguāaⁿ chi 'iiⁿ'yāⁿ dín'dái yā cáávā nguuchi yaⁿ'ā ní 'ífcú cuuvi cuaacu chi 'cuiica di. Ní cuai di catecai cuéē chi cu'nuuⁿ di cuerpo yeⁿe maaⁿ di ní nguéé cuuvi 'cuináaⁿ di caavā chi nguéé catecai di. Ní cuai di yiicū ní cu'neeⁿ di

na nduutináaⁿ di ní 'ífcú cuuvi snaaⁿ di. ¹⁹Úú yaa'vineé nducyaaca 'iiⁿ'yāⁿ chi idineⁿé ní dííⁿ castigar 'iiⁿ'yāⁿ s'eeⁿ. Maaⁿ ní canée chi nndáácádáámí dí yeⁿe chi diiⁿ di chi nguéé n'daacā. Ní serio canee di ndii staava yeⁿe di. ²⁰Cuin'diichi di. 'Úú ní canée cheendi va'āi ní 'cuai 'iiⁿ'yāⁿ. Nduuti chi 'áámá 'iiⁿ'yāⁿ 'caandiveéⁿ yā nduudu yeⁿé ní nn'guaaⁿ yā cheendi va'āi caavā 'úú, tuu'mi ní 'úú cho'ó cuaaⁿ chεeti va'āi ní n'diichí 'iiⁿ'yāⁿ miiⁿ. Ní che'é ndúúⁿcū yā ní 'iiⁿ'yāⁿ miiⁿ che'é yā nduucú. ²¹Iiⁿ'yāⁿ chi cucheε yā yeⁿe tanducuéⁿē dendu'ū 'úú ní ca'á lugar yeⁿe yā chi 'cuúndí yā ndúúⁿcū 'úú na trono yeⁿé tan'dúúⁿcā chí 'úú chicheε yeⁿe tanducuéⁿē dendu'ū ní ch'iindí ndúúⁿcū chiidá na trono yeⁿé yā. ²²Iiⁿ'yāⁿ chi véé veéⁿ yā 'caandiveéⁿ yā chi ngaⁿ'ā Espíritu N'dai yeⁿé Ndyuūs ngii nducyaaca 'iiⁿ'yāⁿ yeⁿe yaācū s'eeⁿ.

Nducyáácá yā chí snée yā na va'ai cheeti nguuví dich'εeté yā Ndyuūs

4 Chó'oo dendu'ū chi 'túúⁿcā ní cuayiivi ní 'úú n'diichí cuaaⁿ 'nífⁿ'núⁿ ní miiⁿ canée 'áámá cheendi va'āi yeⁿe va'ai cheeti nguuví chi canée candá'āi. Ní ch'iindiveéⁿ 'áámá nduudu chi tan'dúúⁿcā chi n'gεecu trompeta. Ní nduudu miiⁿ dáámá ndúúⁿcū nduudu chi ch'iindiveéⁿ vmnááⁿ vmnaaⁿ. Ní nduudu miiⁿ ní caⁿ'a nduucú 'tífā: Dii cūcheε dí 'múúⁿ ní 'úú ní 'cuuⁿ'míⁿ dii dendu'ū chi cuchii cuayiivi.

²Hora mífⁿ nūuⁿ 'úú canée maaⁿ poder Espíritu N'dai yeⁿé Ndyuūs ní n'diichí 'áámá trono na va'ai

cheeti nguuví. Ní Ndyuūs véé yā na trono miiⁿ. ³Iiⁿyāⁿ chi véé yā na trono miiⁿ ní núúⁿmáⁿ cuerpo yeⁿé yā naáⁿ yā tan'dúú^{cā} 'áámá tuūu chi 'áámá ngíí n'gai tan'dúú^{cā} tuūu jaspe ndúú^{cū} tuūu sardio. 'Tíí^{cā} cuerpo yeⁿé yā. Ní nuuⁿmaⁿ ndiivíⁱ cuaaⁿ 'diituú trono miiⁿ canee 'áámá cun'gúúⁿn'dí tan'dúú^{cā} color yeⁿe tuūu esmeralda. ⁴Ní nuuⁿmaⁿ ndiivíⁱ cuááⁿ 'diituú trono miiⁿ n'diichí ndiicu cuūuⁿ tronos yeⁿe 'iiⁿntyéⁿé s'eeⁿ naachi véé yā. Ní nducyáá^{cā} yā véé catecaí yā chi cueé. Ní nducyáá^{cā} yā snúúⁿ tiíⁿ yā 'áámá corona yeⁿe 'dííⁿnguāⁿ. ⁵Ní yeⁿe trono chi naavtaⁿā can'dáā 'cuai ndúú^{cū} dēeve ndúú^{cū} nduudu. Ní nanááⁿ trono miiⁿ canéé ndúú^{cū} ndēēchē yaⁿā ngiichi chi ndēēchē espíritus yeⁿe Ndyuūs. ⁶Ní canéé ntúúⁿ nanááⁿ trono miiⁿ 'áámá cosa tan'dúú^{cā} nuūⁿníⁿ'yāⁿā tan'dúú^{cā} 'áámá vidrio chi ngii dēeve n'dai. Ní naavtaⁿā yeⁿe trono miiⁿ ní nuuⁿmaⁿ ndiivii cuaaⁿ 'diituú yeⁿe trono miiⁿ snéé cuūuⁿ 'iiⁿyāⁿ yeⁿe va'ai cheeti nguuví chi snéé 'yaaⁿ n'dái nduutináaⁿ yā ndii cuááⁿ vmnaaⁿ yā ndii cuááⁿ daamí yā. Ní ndiituú nduutinaáⁿ yā núúⁿmáⁿ ch'etete cuerpo yeⁿé yā. ⁷Iiⁿyāⁿ yeⁿe va'ai cheeti nguuví chi vmnááⁿ vmnaaⁿ tan'dúú^{cā} 'áámá 'yáíⁿyāⁿ cuá'áá 'tiicá yā. Ndií chííⁿ ndii 'uuví yā tan'dúú^{cā} 'áámá itiindu 'lííⁿ 'tiicá yā. Ní 'iiⁿyāⁿ ndii chííⁿ ndii 'iinū miiⁿ vεε naáⁿ yā tan'dúú^{cā} naáⁿ 'iiⁿyāⁿ 'tíí^{cā} yā. Ní ndii chííⁿ ndii cuūúⁿ 'iiⁿyāⁿ ní tan'dúú^{cā} í'yāa chi nge'e ti na 'yúúné 'tiicá yā. ⁸Ní nduu cuūuⁿ 'iiⁿyāⁿ s'eeⁿ ní véé niyaaⁿ ngeechi yā 'áámá 'aamá yā

ní núúⁿmáⁿ cuááⁿ 'diituú yā ní cuaaⁿ nááⁿ ngeechi yā ní ndiitúu nduuti náaⁿ yā. Nguéé intaavi'tuunuúⁿ yā ndíí nguéé ndúú nguuví ndíí nguéé ndúu n'gaaⁿ chi caⁿa yā:

De'ē chúú^{cā} dēeve yā, de'ē chúú^{cā} dēeve yā, de'ē chúú^{cā} dēeve yā, Señor Ndyuūs, chi véé tanducuéⁿé poder yeⁿé yā. 'Iiⁿyāⁿ chi canéé ndii vmnááⁿ vmnaaⁿ 'iiⁿyāⁿ chi maaⁿ canéé yā, ní 'iiⁿyāⁿ chí canéé chí ndaa yā.

⁹Ní ca'áámá ca'áámá vmnéⁿēe chi 'iiⁿyāⁿ s'eeⁿ dich'etété yā 'iiⁿyāⁿ miiⁿ chi véé yā na trono miiⁿ ní dííⁿ yā honrar 'iiⁿyāⁿ miiⁿ ní ca'á yā gracias 'iiⁿyāⁿ miiⁿ chi candúú^{chí} yā cueⁿe daāⁿmaⁿ 'tíí^{cā} diiⁿ yā. ¹⁰Ndu'u ndiicú cuūuⁿ 'iiⁿntyéⁿé candiitín'díí yā nanááⁿ 'iiⁿyāⁿ miiⁿ chi véé yā na trono miiⁿ ní dich'etété yā 'iiⁿyāⁿ chi 'áámá canéé yā cueⁿe daāⁿmaⁿ. Ní 'iiⁿyāⁿ s'eeⁿ s'neeⁿ yā coronas yeⁿe yā nanááⁿ trono miiⁿ ní caⁿa yā 'túú^{cā}:

¹¹Díí Señor chi Ndyuūs yeⁿe yú, díí ní n'dai taavi di chi dich'etété yā dii, ní dííⁿ yā honrar dii, ní ngaⁿá yā chi tanducuéⁿé poder ní yeⁿe di caati dii ní din'dái di tanducuéⁿé dendu'ū chi véé. Ní cáávā chi maaⁿ di neⁿe di din'dái di tanducuéⁿé dendu'ū, 'tíí^{cā} diiⁿ di.

Libro ndúú^{cū} 'iiti cuūchi

5 Ní n'diichí na ta'a cuaacú yā 'iiⁿyāⁿ chi véé yā na trono miiⁿ 'áámá libro chi tan'dúú^{cā} 'áámá rollo caaca naachi canéé nguūⁿ cuááⁿ cheeti ndii cuaaⁿ dáámí. Ní

libro miiⁿ nduudi ndúúcu ndeēchē sellos. ²Ní n'diichí 'áámá ángel chí véé poder yeⁿé yā. Ní yuudu n'dái 'cai yā ní caⁿa yā 'túúcā. ¿Dú'ú chí n'dai taavi ca chí cuuvi nn'guaaⁿ libro 'cūú ní ndiví sellos chí nduudí?

³Naati mar 'áámá 'iiⁿyāⁿ yeⁿe va'ai chēeti nguuvi ndíí nguéé mar 'áámá 'iiⁿyāⁿ yeⁿe iⁿ'yeeⁿdí 'cūú ndíí nguéé ndúú mar 'áámá 'iiⁿyāⁿ chí canúúⁿ maaⁿ yáⁿāa cuuvi nan'guaáⁿ yā libro miiⁿ ndíí nguéé ndúú cuuvi n'diichí yā libro miiⁿ. ⁴Ní 'úú Juan neené chēēcu taaví ti nguéé ndaaca yā mar 'áámá 'iiⁿyāⁿ chí n'dai taavi cá yā chí cuuvi nan'guaaⁿ yā libro miiⁿ ní 'cueeⁿ yā yeⁿē. Ndíí nguéé ndúú cuuvi snaaⁿ yā libro miiⁿ.

⁵Tuu'mi ní 'áámá 'iiⁿntyéⁿē caⁿa yā chíi yā 'úú: Díí nguéé cuēecu dí. Cuin'díichí dí. Jesucristo chí duuchi 'yáíⁿyāⁿ cuáⁿáá, chí yeⁿe ndaata yeⁿe 'iiⁿyāⁿ Judá chí yeⁿe 'iiⁿyāⁿ yeⁿe ndaata David, 'iiⁿyāⁿ miiⁿ chichéé yā yeⁿe tanducuéⁿē ní cuuví nan'guaáⁿ yā libro miiⁿ ní cuuvi cáánteéⁿ yā ndu'u ndeēchē sellos.

⁶Tuu'mi ní n'diichí chí naavtaⁿā yeⁿe trono miiⁿ ní naavtaⁿā yeⁿe ndu'u cuūuⁿ 'iiⁿyāⁿ miiⁿ ní naavtaⁿā yeⁿe 'iiⁿntyéⁿē s'eeⁿ n'diichí 'áámá 'iiⁿyāⁿ chí nguuvi 'iiti cuūchí chí chééndii yā. Ní n'diichí chí véé seña na cuerpo yeⁿe yā chí 'iiⁿyāⁿ ch'iⁿ'núⁿ yā 'yā. Ní 'iiⁿyāⁿ chí nguuvi 'iiti cuūchí miiⁿ véé ndeēchē duuⁿníⁿ yā ní ndeēchē nduutináaⁿ yā chí ndeēchē espíritus yeⁿé Ndyuūs chí Ndyuūs dich'oó yā n'úúⁿmáⁿ íⁿ'yeeⁿdí. ⁷Iiⁿyāⁿ miiⁿ ní cueⁿé yā ní ndaá yā ní sta'á

yā libro miiⁿ yeⁿe ta'ā cuaácú yā 'iiⁿyāⁿ chí véé yā na trono miiⁿ.

⁸Ní taachi sta'á yā libro miiⁿ ní ndúú cuūuⁿ 'iiⁿyāⁿ miiⁿ ndúúcu ndiicú cuūuⁿ 'iiⁿntyéⁿē chintii'yá yā nanááⁿ 'iiⁿyāⁿ chí nguuvi 'iiti cuūchí miiⁿ. Ní ca'áámá ca'áámá 'iiⁿntyéⁿē s'eeⁿ candēe yā arpas yeⁿe yā. Ní ndeé yā chíite yeⁿe 'dííⁿnguāaⁿ ndiituú ndúúcu cúⁿúyaa. Ní 'yaaⁿmiⁿ yeⁿe cúⁿúyaa miiⁿ chííⁿ chí ngaⁿ'anguá'āa 'iiⁿyāⁿ na iⁿ'yeeⁿdí 'cūú, 'iiⁿyāⁿ chí yeⁿe Ndyuūs. ⁹Ní chíitá yā 'áámá canto chí ngai chí 'tíicā:

Díí ní n'dai taavi dí chí cuta'a dí libro miiⁿ ní cáánteⁿ dí sellos yeⁿē caati 'iiⁿyāⁿ ch'iⁿ'núⁿ yā díi. Ní díi cáávā yuūúⁿ yeⁿe dí cái dí nús'ūú chí cuuví 'nū yeⁿe Ndyuūs nús'uu. Ní nús'uu ní yeⁿe nducyáácá raza yeⁿe 'iiⁿyāⁿ, ní yeⁿē tanducuéⁿē idioma ní yeⁿē tanducuéⁿē yáāⁿ, ní yeⁿē tanducuéⁿē nación. 'Tíicā nús'uu.

¹⁰Ní díi ní din'dái dí nús'uu ní díiⁿ dí chí reyes nús'uu, ní díiⁿ dí chí chiiduú nús'uu cucáávā Ndyuūs yeⁿe yú. Ní 'iicú cuuvi caaⁿ'maⁿ ntiiⁿnyuⁿ 'nū nanááⁿ 'iiⁿyāⁿ yeⁿe iⁿ'yeeⁿdí 'cūú.

¹¹Ní cuaaⁿ 'n'íⁿnúⁿ n'diichí ní ch'iindiveéⁿ nduudu yeⁿē 'yaaⁿ n'dái ángeles chí snée yā cuaaⁿ 'diituú yeⁿe trono miiⁿ ní yeⁿe nduu cuūuⁿ 'iiⁿyāⁿ miiⁿ, ní yeⁿe 'iiⁿntyéⁿē s'eeⁿ. Ní ángeles ní n'deeⁿ n'dái yā chí ngii yā ndiichi millares ndii chííⁿ cuuvi millares ndúúcu millares ndúúcu millares. ¹²Ní yuudu n'dai caⁿa nducyaaca s'eeⁿ:

'Iiⁿ'yāⁿ chi nguuvi 'iiti cuūchī
 chi 'iiⁿ'yāⁿ ch'iiⁿ'núⁿ yā ní n'dai
 taavi cá yā chi nducyaaca
 'iiⁿ'yāⁿ dich'etétē yā. 'Iiⁿ'yāⁿ
 miiⁿ sta'á yā tanducuéⁿ'ē
 dendu'ū poder ndúúcū
 tanducuéⁿ'ē vaadi 'cuiica
 ndúúcū tanducuéⁿ'ē vaadi
 deenu ndúúcū tanducuéⁿ'ē
 fuerzas ndúúcū tanducuéⁿ'ē
 honra ndúúcū tanducuéⁿ'ē
 vaadi dēēve ngíí ndúúcū chi
 nducyaaca 'iiⁿ'yāⁿ dich'etétē yā
 'iiⁿ'yāⁿ miiⁿ.

¹³Ní ch'iindiveéⁿ ntuúⁿ nduudu
 yeⁿ'e nducyaaca chi snéé na va'ai
 chēeti nguuvī ndúúcū nducyaaca
 chi snéé vmaāⁿ yāⁿ'āa 'cūū ndúúcū
 nducyaaca chi snéé maaⁿ yāⁿ'āa
 ndúúcū nducyaaca chi snéé ná
 nuūⁿnīⁿ'yāⁿ'ā, nducyaaca chi véé
 yeⁿ'e nducueⁿ'ē chi véé ní ngiita yā
 'tíicā:

Cueⁿ'e daāⁿmaⁿ cueⁿ'e daāⁿmaⁿ
 dich'etétē nū dii ní díⁿ nū
 honrar dii. Ní caⁿ'a nū chi
 vaadi dēēve ngii ndúúcū
 poder ní yeⁿ'é 'iiⁿ'yāⁿ chi
 véé yā na trono miiⁿ ní yeⁿ'é
 'iiⁿ'yāⁿ chi nguuvī 'iiti cuūchī.

¹⁴Ní ndu'u cuūuⁿ 'iiⁿ'yāⁿ s'eeⁿ ní
 caⁿ'a yā: Tíicā cuuvi. Ní ndu'u
 ndiichi cuūuⁿ 'iiⁿ'ntyéⁿ'ē chintii'yā
 yā ní s'téenu yā 'iiⁿ'yāⁿ chi 'áámá
 canéé yā cueⁿ'e daāⁿmaⁿ.

Yeⁿ'e ndēēchē sellos

6 Cuayiivi ní n'diichí taachi
 'iiⁿ'yāⁿ chi nguuvī 'iiti cuūchī
 nan'guáaⁿ yā 'áámá chéé sello yeⁿ'e
 chi naachi ndēēchē sello yeⁿ'e libro
 miiⁿ. Ní ch'iindiveéⁿ nduudu yeⁿ'e
 'áámá chéé 'iiⁿ'yāⁿ yeⁿ'e chi cuuúⁿ

yā chi canduuchi. Ní neenē diitūu
 n'gai yā tan'dúúcā daavi ní caⁿ'a yā:
 Cuchíí di ní n'diichi di.

²Úú ní n'diichí ní miiⁿ cánéé
 'yúúdūu cuéé ndúúcū 'áámá saⁿ'ā
 candúu sa 'iiti miiⁿ. Ní ndēē sa
 'áámá arco na ta'a sa. Ní ca'a yā
 'áámá corona saⁿ'ā miiⁿ ní can'daā
 sa chi 'cuuⁿ'miiⁿ sa. Ní diiⁿ sa chí
 cuchēē sa yeⁿ'e enemigo yeⁿ'e sa.

³Ní taachi 'iiⁿ'yāⁿ chi nguuvī
 'iiti cuūchī nan'guaaⁿ yā ndii chíⁿ
 ndii 'úúví sello yeⁿ'e libro miiⁿ
 ch'iindiveéⁿ nduudu yeⁿ'e ndii chíⁿ
 ndii 'uuvī 'iiⁿ'yāⁿ chí naachi cuuúⁿ
 yā, ní caⁿ'a yā: Cuchíí di ní n'diichi
 di.

⁴Tuu'mi ní n'diichí. Can'daā táámá
 'yúúdūu chi cu'áa tī ndúúcū 'áámá
 saⁿ'ā candúu sa 'iiti miiⁿ. Ní saⁿ'ā
 miiⁿ sta'a sa 'áámá machete chí
 ch'ēēte chí 'uūví lados 'caāiⁿ chi
 táámá yā ca'a sa. Ní saⁿ'ā miiⁿ ndēē
 sa poder chi diitiiⁿ miiⁿ chi diví
 sa vaadi 'diíⁿ yeⁿ'e iⁿ'yeeⁿ'dí 'cūū ní
 'íicú 'iiⁿ'yāⁿ yeⁿ'e iⁿ'yeeⁿ'dí 'cūū caⁿ'á
 yā 'caaⁿ'núⁿ yā 'áámá yā taama yā.

⁵Ní taachi 'iiⁿ'yāⁿ chi nguuvī 'iiti
 cuūchī nan'guaaⁿ yā ndii chíⁿ ndii
 'íinú sello ch'iindiveéⁿ nduudu yeⁿ'e
 ndii chíⁿ ndii 'íinú 'iiⁿ'yāⁿ miiⁿ chí
 caⁿ'a yā 'túúcā: Cuchíí di ní n'diichi
 di. Ní n'diichí 'áámá 'yuūdūu cuáiⁿ.
 Ní saⁿ'ā chí candúu sa 'yuūdūu miiⁿ
 ndēē sa 'áámá cūū caadi na ta'a sa.

⁶Ní ch'iindiveéⁿ nduudu naavtáⁿ'ā
 yeⁿ'e na cuūuⁿ 'iiⁿ'yāⁿ s'eeⁿ chí
 caⁿ'a 'tíicā: 'Áámá kilo yeⁿ'e trigo ní
 nditiiⁿ'yuⁿ caadi, ní 'iiⁿ'nū kilos yeⁿ'e
 cebada ní nditiiⁿ'yuⁿ caadi. Nguéé
 diiⁿ di daño yeⁿ'e aceite, ndíí nguéé
 ndúú yeⁿ'e vino ti nduu 'uuvī naaⁿ
 ní nduuví n'dēē n'dái.

⁷Ní taachi 'ii'nyāⁿ chi nguuví 'iiti cuūchī miiⁿ nan'guaaⁿ yā ndii chííⁿ ndíí cúūⁿ sello miiⁿ ch'iindiveéⁿ nduudu yeⁿe 'ii'nyāⁿ chi ndii chííⁿ ndíí cúūⁿ 'iiti miiⁿ chi caⁿ'a 'túúcā: Cuchíí di ní n'diichí di.

⁸N'diichí ní snaáⁿ 'áámá 'yúúdūu cuaaaⁿ dēevé ndúúcū saⁿ'ā chi cundūu sa 'yúúdūu miiⁿ. Saⁿ'ā miiⁿ ní nguuví sa vaadī n'gii. Ní cuaaⁿ daami sa cuchíí taama saⁿ'ā chi mensajero yeⁿe vaadī n'gíí chíí tá'āa ní nguain'dai almas yeⁿe 'ii'nyāⁿ chi n'díí. Tuu'mi ní 'ii'nyāⁿ ca'á yā poder saⁿ'ā s'eeⁿ yeⁿe 'áámá cuarto parte yeⁿe yá'āa yeⁿe iⁿ'yeeⁿdí 'cūū chi saⁿ'ā s'eeⁿ diiⁿ sa caandaá s'eeⁿ. Ní 'íícú ch'iin'ūⁿ sa 'ii'nyāⁿ ndúúcū machete chi 'uūví lados 'caāiⁿ ní ndúúcū 'áámá vaadī cuicu ní ndúúcū ca'ai ní ndúúcū 'iiti taaⁿ. Ní 'tíicā saⁿ'ā s'eeⁿ ch'iin'ūⁿ sa 'ii'nyāⁿ.

⁹Ní taachi 'ii'nyāⁿ chi nguuví 'iiti cuūchī nan'guaaⁿ yā ndii chííⁿ ndii nyuⁿ'u sello miiⁿ, n'diichí mááⁿ nátaí ní n'diichí almas yeⁿe 'ii'nyāⁿ chi n'díí. Ní 'ii'nyāⁿ ch'iin'ūⁿ yā 'ii'nyāⁿ s'eeⁿ cáávā chi ngaⁿ'á yā nduudu cuaacu yeⁿe Ndyuūs ní cáávā chi ngaⁿ'a cuaacú yā yeⁿe Ndyuūs. ¹⁰Ní almas yeⁿe 'ii'nyāⁿ s'eeⁿ yuudu n'dái 'caí yā ní caⁿ'a yā: N'dii Señor chi véé tanducuéⁿ poder yeⁿe nī, n'dii chi dēeve nī ní cuaacú nī, ɛndíí dē'ē tiempo caⁿ'á nī n'diichí nī nuuⁿndi yeⁿe 'ii'nyāⁿ chi snée yā iⁿ'yeeⁿdí 'cūū ní dííⁿ nī castigar 'ii'nyāⁿ s'eeⁿ cáávā chi ch'iin'ūⁿ yā núsuu?

¹¹Ní 'ii'nyāⁿ miiⁿ ca'á yā 'áámá 'áámá yā catecai cuéé yā. Ní 'ii'nyāⁿ miiⁿ ngaⁿ'á yā 'tíicā: Ndís'tií ní ntaavi'tuunúúⁿ nī 'tēe 'tée cá ndíí taachi 'ii'nyāⁿ yeⁿe iⁿ'yeeⁿdí 'cūū

'caaⁿ'núⁿ yā tanáⁿ'ā ca 'ii'nyāⁿ chi diiⁿ ntiíⁿnyúⁿ yeⁿe Cristo, 'ii'nyāⁿ chi hermanos yeⁿ'é nī. Ní canéé chi 'cuūví yā tan'dúúcā ndís'tií ch'íí nī.

¹²Ní n'diichí 'ii'nyāⁿ chi nguuví 'iiti cuūchī taachi nan'guaaⁿ yā ndii chííⁿ ndii niyaaⁿ sello miiⁿ. Ní n'diichí chi díítūu n'dái nuⁿ'u yá'āa yeⁿ'ē iⁿ'yeeⁿdí 'cūū. N'diichí 'yá'āa miiⁿ chíí tan'dúúcā chi cuáiⁿ catecai yā chi cuáiⁿ yeⁿe luto. Ní 'iiyū miiⁿ ní nduuví cua'āa tan'dúúcā yuūúⁿ.

¹³Ní 'ííⁿnyúⁿ s'eeⁿ yeⁿe nanguuvi ní sn'daā ndii na yá'āa. Ní tan'dúúcā chi ingéé táá n'guí'í yá'á yeⁿe n'guíídii taachi ndaā 'áámá 'yúúné tááⁿ 'tíicā sn'daā 'ííⁿnyúⁿ s'eeⁿ. ¹⁴Ní nanguuvi ní ch'iinu yeⁿ'ē ní nduuví 'lííⁿ tan'dúúcā chi n'gēēcu yú 'áámá caaca. Ní 'áámá 'áámá yiicū ndúúcū 'áámá 'áámá isla ní nuⁿ'u yeⁿ'e na lugar yeⁿ'ē. ¹⁵Ní 'ii'nyāⁿ yeⁿ'e iⁿ'yeeⁿdí 'cūū, reyes ndúúcū 'ii'nyāⁿ chí ch'ēete ndúúcū 'ii'nyāⁿ 'cuiica ndúúcū 'ii'nyāⁿ comandantes ndúúcū 'ii'nyāⁿ chi véé poder yeⁿ'é yā ndúúcū 'ii'nyāⁿ chi 'áámá dííⁿ yā ntiíⁿnyuⁿ yeⁿ'e iiví yā ndúúcū 'ii'nyāⁿ chi libre yā, nducyáácá yā chēeti núúⁿ n'de'ei yā na yiivi yáává ní nguááⁿ na tuūu yeⁿ'e yiicū. ¹⁶Ní 'ii'nyāⁿ s'eeⁿ caⁿ'a yā chii yā icyáⁿ'ā ndúúcū tuūu: Ndís'tií icyáⁿ'ā ndúúcū tuūu, cun'dáá nduú nī vmnaaⁿ yeⁿ'e nús'uu ní cunūúⁿ n'dé'ei nī nús'uu yeⁿ'ē nanááⁿ Ndyuūs chí véé yā na trono miiⁿ ní yeⁿ'e castigo chí neené diitūu n'dai chí Jesucristo chí nguuví 'iiti cuūchí tée yā nús'uu.

¹⁷Caati 'āa ndaā nguuví ch'ēete miiⁿ taachi Ndyuūs ca'a yā castigo 'ii'nyāⁿ s'eeⁿ ní ɛDú'ū cuuvi cuchéé castigo 'cūū?

**Yeⁿé 'iiⁿyāⁿ chi señalado yā
yeⁿe tribu yeⁿe 'iiⁿyāⁿ Israel**

7 N'diichí dendú'ū chi 'túúcā,
ní cuayiivi 'úú n'diichí cuūuⁿ
ángeles chi chééndii yā ndu'u cuuúⁿ
esquinas yeⁿé iⁿ'yeeⁿdí 'cūū. Ní
ángeles s'eeⁿ índεεnee yā ndii chííⁿ
ndii cuuúⁿ 'yúúné yeⁿe yáⁿā 'cūū.
Ní 'íicú 'yúúné s'eeⁿ nguée chéenū
diituú na yáⁿā ndíí nguée ndúú
vmnaaⁿ mar 'áámá nuūⁿníⁿyáⁿā,
ndíí nguée ndúú vmnaaⁿ mar 'áámá
yáⁿā. ²Ní n'diichí ntuúⁿ táámá
ángel chi cuchii yā naachi can'daa
'yáⁿā. Ní ndεε yā na ta'a yā 'áámá
sello yeⁿé Ndyuūs chí canduuchi.
Ní ángel miiⁿ yúúúú n'dái ngaⁿa
yā ndu'u cuūuⁿ ángeles chi sta'a
yā poder chi ditiinú yā chi dííⁿ yā
daño na yáⁿā 'cūū ndúúcū ná
nuuⁿníⁿyáⁿā.

³Ní ángel miiⁿ ngaⁿá yā 'túúcā:
Ndís'tií ángeles, nguée dííⁿ nī daño
yeⁿe yáⁿā 'cūū, ndíí nguée ndúú
yeⁿe nuūⁿníⁿyáⁿā, ndíí nguée ndúú
yeⁿe yáⁿā ndíí taachi s'nuúⁿ 'nū
'áámá sello yeⁿe Ndyuūs na nchéetē
'iiⁿyāⁿ chi dichííⁿvē Ndyuūs yeⁿe yú.

⁴Ní ch'iindiveeⁿ chi duuchi
'iiⁿyāⁿ chi chií sellado yā ní ngii
yā 'áámá ciento 'uūvī ngεεcú
cuūuⁿ mil 'iiⁿyāⁿ chi 'iiⁿyāⁿ yeⁿe
nducuéⁿē tribus yeⁿe ndaata yeⁿe
'iiⁿyāⁿ Israel. ⁵'Iiⁿyāⁿ yeⁿe tribu
yeⁿe ndaata saⁿā Judá ní ndíí yā
sellado yā ndiichúúví mil. 'Iiⁿyāⁿ
yeⁿe tribu yeⁿe ndaata saⁿā Rubén
ní ndíí yā sellado yā ndiichúúví
mil. 'Iiⁿyāⁿ yeⁿe tribu yeⁿe ndaata
saⁿā Gad ní ndíí yā sellado yā
ndiichúúví mil. ⁶'Iiⁿyāⁿ yeⁿe tribu
yeⁿe ndaata saⁿā Aser ní ndíí yā

sellado yā ndiichúúví mil. 'Iiⁿyāⁿ
yeⁿe tribu yeⁿe ndaata saⁿā Neftalí
ní ndíí yā sellado yā ndiichúúví
mil. 'Iiⁿyāⁿ yeⁿe tribu yeⁿe ndaata
saⁿā Manasés ní ndíí yā sellado yā
ndiichúúví mil. ⁷'Iiⁿyāⁿ yeⁿe tribu
yeⁿe ndaata saⁿā Simeón ní ndíí yā
sellado yā ndiichúúví mil. 'Iiⁿyāⁿ
yeⁿe tribu yeⁿe ndaata saⁿā Leví
ní ndíí yā sellado yā ndiichúúví
mil. 'Iiⁿyāⁿ yeⁿe tribu yeⁿe ndaata
saⁿā Isacar ní ndíí yā sellado yā
ndiichúúví mil. ⁸'Iiⁿyāⁿ yeⁿe tribu
yeⁿe ndaata saⁿā Zabulón ní ndíí
yā sellado yā ndiichúúví mil. 'Iiⁿyāⁿ
yeⁿe tribu yeⁿe ndaata saⁿā José
ní ndíí yā sellado yā ndiichúúví
mil. 'Iiⁿyāⁿ yeⁿe tribu yeⁿe ndaata
saⁿā Benjamín ní ndíí yā sellado yā
ndiichúúví mil.

**Nducyáácá 'iiⁿyāⁿ chi
véé catecai cuée yā**

⁹Cuayiivi ní n'diichí n'dee
n'dái 'iiⁿyāⁿ yeⁿe tanducuéⁿē
nación, yeⁿe tanducuéⁿē raza, yeⁿe
'iiⁿyāⁿ yeⁿe tanducuéⁿē daveedi
ndúúcū tanducuéⁿē davaacu chi
n'dááⁿ, yeⁿe tanducuéⁿē yááⁿ yeⁿe
tanducuéⁿē 'iiⁿyāⁿ chi véé na
iⁿ'yeeⁿdí 'cūū. Ní nducyaaca 'iiⁿyāⁿ
s'eeⁿ chééndii yā nanááⁿ trono miiⁿ
ní nanááⁿ 'iiⁿyāⁿ chi nguuvi 'iiti
cuūchī. Ní mar 'áámá 'iiⁿyāⁿ nguée
cuuvi didúúché yā. Nducyáácá
yā véé catecai yā cuée ní ndée yā
yiiⁿnyúⁿ na ta'a yā. ¹⁰Ní nducyáácá
yā 'cai yā yiicú yā ní caⁿa yā 'tíicā:

Ndyuūs chi véé yā na trono miiⁿ
ndúúcū Cristo chi nguuvi 'iiti
cuūchī nadanguáⁿai yā s'uúúⁿ.
¹¹Ní nducyaaca ángeles s'eeⁿ
ní ch'εete yā núúⁿmáⁿ 'diituú

yeⁿe trono miiⁿ ndúúcū
ndu'ū ndiicú cuūuⁿ 'iiⁿntyéⁿē
ndúúcū ndu'u cuūuⁿ 'iiⁿyāⁿ
s'eeⁿ. Ní nducyaaca yā
candiitín'dii yā nanááⁿ 'iiⁿyāⁿ
chi véé yā na trono miiⁿ ní
dich'εεté yā Ndyuūs. ¹²Ní
'tíicā caⁿ'a yā:

'Tíicā va. Dī'chεεte yú Ndyuūs
chi dεεve ngii yā chí deenu
yā tanducuéⁿē dendu'ū chi
véé. Caⁿ'a yú gracias Ndyuūs.
Ní diiⁿ yú honrar 'iiⁿyāⁿ. Ní
nducuéⁿē poder ndúúcū
nducuéⁿē fuerzas ní yeⁿe
yā. Ní 'tíicā canéé Ndyuūs
yeⁿe yú cueⁿe daāⁿmaⁿ cueⁿe
daāⁿmaⁿ. 'Tíicā.

¹³Cuayiivi ní 'áámá 'iiⁿntyéⁿē
nan'guεεcútaⁿ'a yā ní itinguuneéⁿ
yā 'úú: ¿Dú'u rá 'iiⁿyāⁿ chi véé
catecai cuéé yā ní tíí chiicá yā?

¹⁴Ní 'úú ní ngaⁿ'á: N'dii, Señor,
deenú ní yeⁿe yā. Tuu'mi ní
'iiⁿntyéⁿē miiⁿ caⁿ'a yā: 'iiⁿyāⁿ s'eeⁿ
ní chiica yā yeⁿē chi ch'eenu taaví
yā chií ní 'āā dεεvé yā catecai yā
ndúúcū yuuúⁿ yeⁿe Cristo chi
nguuvi 'iiti cuūchī. ¹⁵Ní cáávā chuū
'iiⁿyāⁿ s'eeⁿ snée yā nanááⁿ Ndyuūs
chi véé yā na trono yeⁿé yā. Ní
dichíí'vε yā Ndyuūs ndii nguuvi
ndii n'gaaⁿ na yáacū yeⁿe yā. Ní
'iiⁿyāⁿ chi véé yā na trono miiⁿ ní
canéé yā miiⁿ ní candeé yā cuidado
nducyaaca 'iiⁿyāⁿ s'eeⁿ. ¹⁶Ní 'iiⁿyāⁿ
s'eeⁿ 'āā ntéé cuuvi cuicú yā, ní
'āā ntéé cuuvi yaācá yā. Ní 'āā ntéé
cundāā yaⁿ'ā vmnaaⁿ yeⁿe yā ndíí
nguée ndúú cuuvi cuucu 'iiⁿyāⁿ
ndúúcū yaⁿ'ā. ¹⁷Caati 'iiⁿyāⁿ chi
nguuvi 'iiti cuūchī chi véé yā na
trono miiⁿ ní dííⁿ yā cuidado 'iiⁿyāⁿ

s'eeⁿ tan'dúúcā chi 'iiⁿyāⁿ s'eeⁿ ní
'iiti cuūchī yeⁿé yā. 'Tíicā dííⁿ yā.
Ní can'dáá naaⁿ yā ní 'cuuⁿmíⁿ yā
'iiⁿyāⁿ s'eeⁿ naachí candaā nuūⁿnīⁿ
yeⁿe vida cueⁿe daāⁿmaⁿ. Ní
Ndyuūs nadidεεvé yā tanducuéⁿē
nuūⁿnīⁿ nduutināaⁿ yā.

**Sello chi ndii chííⁿ ndíí ndεēchē
ndúúcū incensario yeⁿe 'dííⁿnguāaⁿ**

8 Ní taachi 'iiⁿyāⁿ chi nguuvi
'iiti cuūchī nan'guaaⁿ yā ní
divíi yā ndii chííⁿ ndíí ndεēchē
sellos miiⁿ yeⁿe libro miiⁿ tuu'mi ní
chó'oo tan'dúúcā maⁿ'a hora chí chií
'diiíⁿ canéé na va'ai chεeti nguuvi.
²Tuu'mi ní n'diichí chi ndu'u ndεēchē
ángeles chi chééndii yā nanááⁿ
Ndyuūs. Ní ángeles sta'á yā 'áámá
trompeta 'áámá 'aamá yā yeⁿe
'iiⁿyāⁿ miiⁿ chi ca'á yā trompetas.
³Ní cuayiivi táámá ángel chi ndεe
yā 'áámá incensario yeⁿe 'dííⁿnguāaⁿ
ní ndaa yā nanááⁿ nátaí yeⁿe
'dííⁿnguāaⁿ ní chééndii yā miiⁿ. Ní
ángel miiⁿ ní sta'á yā n'dee n'dái
cúⁿ'úyaa. Ní ca'á yā cáávā ofrenda
dáámá ndúúcū chi ngaⁿ'angua'á yā
'iiⁿyāⁿ chi yeⁿé Ndyuūs. Ní s'néeⁿ
yā incienso nanááⁿ nátaí yeⁿe
'dííⁿnguāaⁿ chi canéé nanááⁿ trono
miiⁿ. ⁴Ní 'yááⁿmíⁿ yeⁿē cúⁿ'úyaa
chí canéé na ta'a ángel miiⁿ ndúúcū
yeⁿe chi ngaⁿ'angua'a 'iiⁿyāⁿ yeⁿe
iⁿ'yeēⁿdí 'cūū chi yeⁿe Ndyuūs
ní dáámá cucheε nanááⁿ Ndyuūs.
⁵Tuu'mi ní ángel miiⁿ sta'á yā
incensario yeⁿe 'dííⁿnguāaⁿ chiitú
yā ndúúcū nduucyaⁿ'ā yeⁿe nátaí
miiⁿ. Ní chingée yā vmnaaⁿ yáⁿ'āa
yeⁿe iⁿ'yeeⁿdí 'cūū. Ní ndaa daavi
chi diituu n'gεεcūū ndúúcū dεeve
yeⁿe 'cuai ndúúcū chi 'nuⁿ'u yáⁿ'āa.

Yeⁿe trompetas

⁶Ní ndu'u ndeēchē ángeles chi ndée yā trompetas ch'etinéé yááⁿ yā chi di'cuēcú yā trompetas yeⁿé yā.

⁷Ní ángel chi vmnááⁿ vmnaaⁿ di'cuēcú yā trompeta yeⁿe yā ní chingéē vmnaaⁿ yáⁿāa yuūuⁿ ndúúcū nguuchi yaⁿā ndístáⁿā ndúúcū yuūúⁿ. Ní chiichi 'iinū parte yeⁿe yáⁿāa yeⁿe iⁿ'yeeⁿdí 'cūū ndúúcū 'iinū parte yeⁿe yáⁿá chi véé. Dáámá chiichi ndúúcū 'iinū parte yeⁿe yáⁿá ndúúcū nducuéⁿē yaātā cueēe yéⁿē.

⁸Tuu'mi ní ndii chíⁿ ndii 'úúví ángel di'cuēcú yā trompeta yeⁿe yā ní n'diichí 'áámá cosa tan'dúúcā 'áámá yiicū ch'eté chí ngiichi chí 'áámá 'iiⁿ'yāⁿ ch'ēcú yā yeⁿe va'ai cheeti nguūvi. Ní sndaā vmnaaⁿ yeⁿe nuūⁿnīⁿ'yáⁿā. Ní yeⁿē iⁿ'yeeⁿdí 'cūū ná 'iinū parte yeⁿe nuūⁿnīⁿ'yáⁿā nduuvi yuūúⁿ. ⁹Ní ch'ií 'áámá 'iinū parte yeⁿe 'iiti chi véé cheeti nuūⁿnīⁿ'yáⁿā miiⁿ ndúúcū 'iinū parte yeⁿe nducuéⁿē barcos chi chiica vmnaaⁿ nuūⁿnīⁿ'yáⁿā ní ntūvií.

¹⁰Tuu'mi ní ángel ndii chíⁿ ndii 'iinū miiⁿ di'cuēcú yā trompeta yeⁿe yā ní sndaā 'áámá 'ííⁿ'nyúⁿ ch'etē ca yeⁿē nanguuvi tan'dúúcā 'áámá tááⁿ yáácá chi ngiichi. Ní sndaā vmnaaⁿ yeⁿe 'iinū parte yeⁿē yíícú s'eeⁿ ndúúcū nuūⁿnīⁿ chi can'daā chi véé na iⁿ'yeeⁿdí 'cūū.

¹¹Ní 'ííⁿ'nyúⁿ ch'etē ca miiⁿ ní chi duuchi Ajenjo chí neⁿe caaⁿ'maⁿ chí yaaá. Ní 'iinū parte yeⁿe nuūⁿnīⁿ yeⁿe yiicū ndúúcū nuūⁿnīⁿ chi can'daā ní nduūvi Ajenjo chí yaaá.

Ní neené 'yaaⁿ 'iiⁿ'yāⁿ ch'ií yā chí chí'i yā nuūⁿnīⁿ miiⁿ ti neené yaaá nuūⁿnīⁿ miiⁿ.

¹²Tuu'mi ní ángel ndii chíⁿ ndii cuūuⁿ di'cuēcú yā trompeta yeⁿe yā ní 'iinū parte yeⁿe 'yáⁿā nca'ái ndúúcū 'iinū parte yeⁿē 'íiⁿyū ndúúcū 'iinū parte yeⁿe 'ííⁿ'nyúⁿ. Ní 'íícú 'iinū parte yeⁿe dendu'ú chi 'túucā ní chii maāiⁿ. Ní nguéé canuuⁿ dēeve yeⁿē na 'iinū parte yeⁿe nguuvi. 'Tiicā ntúūⁿ n'gaaⁿ.

¹³Tuu'mi ní n'diichí 'áámá ángel tan'dúúcā 'ííⁿ'yāa ní n'giindiveéⁿ chi n'gaí yā naachi cueⁿe yā naavtaⁿā nanguuvi. Ní ngaⁿ'a yuudú yā 'tíicā: De'ē chúúcā ya'āi, de'ē chúúcā ya'āi, de'ē chúúcā ya'āi yeⁿē 'iiⁿ'yāⁿ chi snée yā na yáⁿāa yeⁿe chi cuuvi taachi tá'iinū ángeles caⁿ'á yā di'cuēcú yā trompetas yeⁿé yā.

9 Cuayliivi ní n'diichí ndii nyuⁿ'u ángel miiⁿ di'cuēcú yā trompeta yeⁿe yā ní n'diichí 'áámá 'ííⁿ'nyúⁿ chi chiicā nanguuvi ní chiya na yáⁿāa. Ní 'áámá 'iiⁿ'yāⁿ ndée yā llave yeⁿe abismo chí 'áámá yiive yáⁿāa ch'eté chí nan'guāāⁿ yáaⁿnūuⁿ n'dái. Ní 'áámá ángel chi nguéé n'daacā ca'a yā llave miiⁿ na ta'a 'ííⁿ'nyúⁿ miiⁿ. ²Ní ángel miiⁿ n'guaaⁿ yā yiive yáⁿāa ní can'dáá 'yaaⁿ'miiⁿ yeⁿē tan'dúúcā 'yaaⁿ'miiⁿ chi can'daā yeⁿē 'áámá horno ch'etē. Ní 'yaaⁿ'miiⁿ miiⁿ chi can'daā yeⁿē yiivé miiⁿ ní diiⁿ chi nduuvi maāiⁿ na 'yáⁿā ndúúcū 'yúúné. ³Ní yeⁿē 'yaaⁿ'miiⁿ miiⁿ can'daā langostas na yáⁿāa. Ní 'iiti s'eeⁿ ní taáⁿ tī, ní chingaá tī. Ní tan'dúúcā 'iiti dáⁿ'āi díⁿ tī, 'tíicā cuuvi díⁿ tī. ⁴Ní 'iiⁿ'yāⁿ dichó'o yā langostas chi nguéé díⁿ tī daño yeⁿe yaātā chí véé

na yaⁿāa ndúúcū mar 'áámá naaⁿ
chi yaātā cueéé ndíí mar 'áámá
yáⁿá, naati dámaāⁿ cuuvi dííⁿ tī
daño 'iiⁿyāⁿ chi nguéé ndéé yā sello
yeⁿe Ndyuūs ná ncheeté yā. ⁵Naati
caⁿá yā chiī yā langostas chi nguéé
cuuvi 'caaⁿnúⁿ tī 'iiⁿyāⁿ s'eeⁿ naati
cuuvi dííⁿ tī chí 'cueenu yā cuuvi
chi ya'ai cá yā cheeti nyúⁿú 'ííyú. Ní
dííⁿ tī chi ya'ai cá yā tan'dúúca chi
ya'ai ca 'iiⁿyāⁿ taachi cá'a 'iiti daⁿāī
'iiⁿyāⁿ. ⁶Ní nguuvī s'eeⁿ ní 'iiⁿyāⁿ
yeⁿe iⁿ'yeeⁿdí 'cūū in'nuúⁿ yā taacā
chi cuuvi 'cuūví yā tī neⁿe yā chi
'cuūví yā, naati nguéé cuuvi 'cuūví
yā.

⁷Ní langostas miiⁿ ní tan'dúúca
'aama 'yúúdūu chi canee listo tī
chi 'cuuⁿmáⁿ tī 'tífcā langostas
miiⁿ. Na tííⁿ tī cánduūu cosa
tan'dúúca corona yeⁿe 'dííⁿnguāⁿ.
Ní naáⁿ tī ní tan'dúúca nááⁿ 'iiⁿyāⁿ.
⁸Ní yuūdūu tííⁿ tī tan'dúúca
yuūdūu tííⁿ n'daataá. Ní 'diiⁿ'yuⁿ
tī tan'dúúca 'diiⁿ'yuⁿ 'yáíⁿyāⁿ
cuáⁿáá. ⁹Ní snúⁿ cuerpo yeⁿe tī
catecai tan'dúúca catecai cūū chi
armadura cūū yeⁿe soldado. Ní
n'gégécú ngeēchi tī tan'dúúca chi
n'gēecu 'yaaⁿ n'dái carros ndúúcū
'yaaⁿ n'dái 'yúúdūu chi ngéenu tī
ndéé tī carro yeⁿe tī tan'dúúca
chi ngéenu tī cueⁿe tī neⁿe chí
'cuuⁿmáⁿ yā. ¹⁰Ní véé nduucudaⁿai
tī tan'dúúca nduucudaⁿai 'iiti daⁿāī
ní véé 'iini ch'ēete na nduucudaⁿai
tī. Ní ndúúcū 'iini ch'ēete yeⁿe
nduucudaⁿai tī chi dííⁿ tī daño chi
ch'eenu yā chiī cheeti nyúⁿú 'ííyú.
¹¹Ní canéé 'áámá ángel ndíí tiiíⁿ
yeⁿe 'iiti s'eeⁿ, chííⁿ chí ángel yeⁿe
yiive yáⁿāa miiⁿ. Ní ángel miiⁿ chi
duuchi Abadón na nduudu hebreo,

ní Apolión ná nduudu griego chi
neⁿe caaⁿmaⁿ 'iiⁿyāⁿ chi nada'tuūví
tanducuéⁿē.

¹²Maaⁿ ní chó'oo 'áámá vaadi
ya'āi chi canéé chi chó'oo naati véé
na 'uūví vaadi ya'āi chi canéé chi
cho'oo.

¹³Tuu'mi ní ndii chííⁿ ndii niyaaⁿ
ángel miiⁿ idi'cueécú yā trompeta
yeⁿe yā ní ch'iindiveéⁿ 'áámá
nduudu chi cuchii naavtaⁿā yeⁿe
chi cuūuⁿ nííⁿniⁿ tī chi adorno yeⁿe
nátaí yeⁿe 'diiⁿnguāⁿ chi canéé
nanááⁿ Ndyuūs naachi dich'ēeté yā
Ndyuūs. ¹⁴Ní nduudu miiⁿ caⁿā
chiī ndii niyaaⁿ ángel miiⁿ chi ndéé
yā trompeta yeⁿe yā: Dii, ángel,
n'daatíí di ndu'u cuūuⁿ ángeles
chi snée i'yúú yā niiⁿnuúⁿ na yíícú
ch'ēete chí nguuvī Eufates.

¹⁵Ní nín'daatíí yā ndú'ú cuūuⁿ
ángeles s'eeⁿ caati cuuvi 'caāⁿnuⁿ yā
'iinū parte yeⁿe 'iiⁿyāⁿ yeⁿe iⁿ'yeeⁿdí
'cūū. Ní canéé listo yā hora yeⁿe.

¹⁶Ní ch'iindiveéⁿ chi cheē dúúché
yā soldados chi sndúu sa 'yuūdūu
chí ngii sa tan'dúúca 'uuvī ciento
millones.

¹⁷Ní 'tífcā n'diichí 'yuūdūu s'eeⁿ
taachi 'úú, Juan, cueⁿe ndúúcū
espíritu yeⁿe. Ní 'iiⁿyāⁿ chi sndúu
yā 'yúúdūu s'éeⁿ véé catecai yā chi
armadura yeⁿe pecho yeⁿe yā ní
color cuáⁿā tan'dúúca chi nguuchi
yaⁿā ndúúcū color cueéé nanguuvi
ndúúcū color cuaaⁿā. Ní 'yúúdūu
s'eeⁿ ní tííⁿ tī tan'dúúca tííⁿ 'yáíⁿyāⁿ
cuáⁿá. Ní na cheendí tī ican'dāa
nguuchi yaⁿā ndúúcū 'yaaⁿmiⁿ
ndúúcū azufre. ¹⁸Ní yeⁿe 'iinū naaⁿ
dendu'ú s'túúca chi can'dāa yeⁿe
cheendí tī ní 'áámá 'iinū parte yeⁿe
'iiⁿyāⁿ yeⁿe iⁿ'yeeⁿdí 'cūū ch'ii yā

ndúúcū nguuchi yá"ā mii" ndúúcū
'yaa"mī" mii" ndúúcū azufre mii".

¹⁹Ní chi ditiínú ye"e 'yúúdūu
s'éé" canúú" cheendí tī ndúúcū
nduucuda"ai tī tī nduucuda"ai tī
mii" ní yaaa" ní tan'dúúcā tīí" cúú,
'tíicā nduucuda"ai tī. Ní ndúúcū
cheendí tī ndúúcū nduucuda"ai tī
díí" tī dañó 'ii"yā" s'ee".

²⁰Taná"ā 'ii"yā" ye"e i"yee"dí
'cūū chi nguée ch'ii yā ye"e daños
nguée ndaācādaamí yā ye"e
dendu'ū chi díí" yā chi nguée
n'daacā. Ní i'téenu yā espíritu ye"e
yáá"n'guinūu" ndúúcū santos ídolos
ye"e 'díí"nguāa" ndúúcū santos
ídolos ye"e 'díí"nguee ndúúcū
santos ídolos ye"e cúú cuaaa"
ndúúcū santos ídolos ye"e tuūu
ndúúcū santos ídolos ye"e yá"á.
Dendu'ū santos ídolos nguée cuuvi
inaa", ní nguée cuuvi n'giindiveé",
ndíí nguée cuuvi ngiicā. ²¹Ní 'ii"yā"
s'ee" 'tiicā ntūū" nguée ndaācādaamí
yā ye"e chí n'gii"nú" yā 'ii"yā", ndíí
nguée ndúú ye"e ngaatu chi díí" yā,
ndíí nguée ndúú ye"e chi ca"á yā
ndúúcū isa"ā o n'daataá chi nguée
ye"é yā, ndíí nguée ndúú ye"e chi
duucu yā.

Ye"e ángel ndúúcū libro 'líf"

10 Cuayiivi ní n'diichí 'áámá
ángel chi véé n'deee n'dái
poder ye"e yā. Ní chiicā yā ye"e
va'ai cheeti nguuvi ní chihiyā yā.
Ní véé catecaí yā ye"e meēe". Ní
vmnaa" tíf" yā canée cuu"n'gúú"ndí
ye"e nanguuvi. Ní naá" yā
tan'dúúcā dēve ye"e 'yá"ā, 'tíicā
ngii naá" yā. Ní ca'á yā ní tan'dúúcā
columnas chi nguuchi ya"ā. ²Ní na
ta'á yā ndēe yā 'áámá libro 'líf" chi

canda'āi. Ní ángel mii" s'nee" yā ca'á
yā lado ta cuaacú yā vmnaa" na
nuū"nī"yá"ā. Ní s'nee" yā ca'á yā
lado tá 'cuae yā vmnaa" na yá"āa.

³Tuu'mi ní yuudu n'dái 'caí yā
tan'dúúcā chi n'gai 'áámá 'yá"yāa"
cuá'aá. Ní ch'íínú 'cai yā ní ndēēchē
daavi ní ca"ā ndúúcū nduudu ye"e.
⁴Taachí ch'íínú nga"ā ndu'ū ndēēchē
daavi míf" 'úú ní canée listo chi
dinguú" chií" chi n'diichí taachi
ch'iindiveé" 'áámá nduudu ye"e ná
va'ai cheeti nguuvi chí ca"ā chií 'úú:
Nguée dinguu" di nduudu chi nga"ā
ndu'u ndēēche daavi mii" naati
canúú" n'de'ei di na staava ye"e di
nduudu mii".

⁵Ní ángel mii" chi n'diichí chi
chéendii vmnaa" na nuū"nī"yá"ā
ndúúcū vmnaa" na yá"āa ch'ēé yā
ta'a yā lado ta cuaacú yā ndíí
nanguuvi. ⁶Ní díí" yā 'áámá
compromiso ní nga"ā yā: "Por
Dios", Ndyuūs chi canduuchi cue"e
daā"ma", Ndyuūs chí din'dái yā
nánguuvi ndúúcū tanducué"ē
dendu'ū chi vee ye"ē, ndúúcū yá"āa
ndúúcū tanducué"ē dendu'ū chi
vee ye"ē, ndúúcū nuu"nī"yá"ā
ndúúcū tanducué"ē dendu'ū chi
vee ye"ē. Ní ángel mii" ca"ā yā:
'Āā ntéé tiempo chi cuuvi 'naa".

⁷Ti nguuvi taachi ndii chíí" ndii
ndēēchē ángeles ní tucá'a yā 'cuēecú
yā trompetas ye"e yā tuu'mi ní
chií" chi Ndyuūs cunee n'de'ei yā
ní 'cuiinu. Ní Ndyuūs tucá'a yā díí"
yā tanducué"ē chi nga"ā yā ngii
yā 'ii"yā" profetas chi dichíí'vē yā
Ndyuūs.

⁸Tuu'mi ní nduudu chi ch'iindiveé"
ndii nanguuvi ca"ā ntúu" yā
ndúúcū 'úú táámá vmne"ēe ní ca"ā

'tífā: Dii, Juan, cueⁿe di ní cuta'a di libro 'lífⁿ chi ngaadi chi ángel miiⁿ ndée yā na ta'á yā, ángel chi chééndii yā vmnaaⁿ na nuūⁿníⁿyáⁿā ndúúⁿcū vmnaaⁿ na yáⁿāa.

⁹Ní cheⁿé nanááⁿ ángel miiⁿ ní caⁿá chíí ángel: Díí, ángel, tee di libro 'lífⁿ 'úú. Ní teé yā libro 'lífⁿ 'úú. Ní ángel miiⁿ caⁿa yā chiīyā 'úú: Cuta'a di ní ché'é dí libro 'lífⁿ. Ní cuuvi yaadi na cheendi di tan'dúúⁿcā ndi'i naati nduūⁿvī yaāá ná cheēti di.

¹⁰Tuuⁿ'mi ní sta'á libro 'lífⁿ mífⁿ chi canée na ta'a ángel miiⁿ ní che'é. Ní chii yaadi cheendí tan'dúúⁿcā ndi'i. Taachi 'āa ch'íínú che'é ní nduūⁿvī yaāá yeⁿe cheēti. ¹¹Ángel miiⁿ ní nííⁿnúúⁿ nūuⁿ ngaⁿ'a yā ngii yā 'úú: Díí, Juan, taama vmnéⁿ'ēe canée chí caaⁿ'maⁿ di nduudu cuaacu yeⁿ'é Ndyuūs yeⁿ'ē n'dee n'dái 'iiⁿ'yāⁿ ndúúⁿcū 'yaaⁿ n'dái naciones ndúúⁿcū 'yaaⁿ taavi 'iiⁿ'yāⁿ chi ngaⁿ'a davaacu s'eeⁿ chi n'dááⁿ ní ndúúⁿcū reyes.

'Uuvi 'iiⁿ'yāⁿ chi ngaⁿ'a yā nduudu cuaacu

11 Tuuⁿ'mi ní ángel miiⁿ tee yā 'aama taaⁿ nduu 'úú ti tan'dúúⁿcā 'áámá nduucu chi dicaadí yā, 'tífā. Ní ángel miiⁿ ngaⁿ'a yā ngii yā 'úú: Cuééndii di ní dícaadí dí yáacū yeⁿ'e Ndyuūs ndúúⁿcū nátaī. Ní diduuche di cheeti yaācū 'iiⁿ'yāⁿ chi i'téenu yā Ndyuūs. ²Naati chuva'āi yeⁿ'e yáacū na patio miiⁿ nguée dícaadí dí miiⁿ ti chiiⁿ ní caⁿ'á 'iiⁿ'yāⁿ chi nguée i'téenu yā Ndyuūs. 'Iiⁿ'yāⁿ s'eeⁿ ní 'caanca'a yā nducuéⁿ'ē yāāⁿ miiⁿ chi yeⁿ'é Ndyuūs 'uūⁿvī ngeecú 'uūⁿvī 'iīyū. ³Ní ngaⁿ'á yā 'tífā. 'Úú ní dicho'ó 'uūⁿvī 'iiⁿ'yāⁿ chi ngaⁿ'a cuaacú yā yeⁿ'é,

chi caaⁿ'máⁿ yā nduudu cuaacu yeⁿ'é 'áámá mil canee 'uūⁿvī ciento ndúúⁿcū 'iīnu ngeecu nguuvi. Ní catecai yā ní 'iiⁿ'yāⁿ chi luto yā.

⁴Ná 'uūⁿvī 'iiⁿ'yāⁿ s'eeⁿ chi ngaⁿ'a cuaacu yeⁿ'é, 'iiⁿ'yāⁿ s'eeⁿ ní tan'dúúⁿcā 'uūⁿvī yáⁿ'á yeⁿ'e olivas ndúúⁿcū 'uūⁿvī candeleros chi snée nanááⁿ Señor chi 'iīvi yeⁿ'e yáⁿ'āa.

⁵Ní nduuti chi 'áámá 'iiⁿ'yāⁿ neⁿ'e yā dííⁿ yā dañó 'uūⁿvī 'iiⁿ'yāⁿ chi ngaⁿ'a cuaacu yeⁿ'é tuuⁿ'mi ní can'dāa nguuchi yaⁿ'ā na cheendi 'uūⁿvī

'iiⁿ'yāⁿ ní ch'iīnū 'iiⁿ'yāⁿ chi contra yeⁿ'e yā. Ní 'tífā cuuvi 'iiⁿ'yāⁿ chi neⁿ'é yā dííⁿ yā dañó 'uūⁿvī 'iiⁿ'yāⁿ s'eeⁿ, canée chi 'cuūⁿvī yā ndúúⁿcū nguuchi yaⁿ'ā. ⁶Uuvi 'iiⁿ'yāⁿ chi caaⁿ'maⁿ cuaacu yeⁿ'é ni véé poder yeⁿ'e yā chi cuuvi nn'gaadí yā nanguuvi ní 'íícú nguée cueⁿ cúúⁿvī 'naaⁿ tiempo chi ngaⁿ'á yā nduudu cuaacu yeⁿ'é Ndyuūs. Ní cuuví yā dííⁿ ntúuⁿ yā chi nuuⁿ'nīⁿ nduuvi yuūⁿ.

Ní dííⁿ yā chi ndáá n'dee n'dái ca'ai yeⁿ'e 'iiⁿ'yāⁿ yeⁿ'e iⁿ'yeeⁿdí 'cūū, ní dííⁿ yā chuū 'āa de'é nūuⁿ tiempo taachi neⁿ'e yā. ⁷Ní cuayiivi taachi 'cuiinu caaⁿ'máⁿ yā nduudu cuaacu yeⁿ'é Ndyuūs tuuⁿ'mí 'iiti taaⁿ chi nguuvi monstruo ní can'dāa ti yeⁿ'e yiive yáⁿ'āa ní dííⁿ caandaá ti ndúúⁿcū 'uūⁿvī 'iiⁿ'yāⁿ s'eeⁿ. Ní cuchæ ti yeⁿ'e yā ní 'caaⁿ'núⁿ ti 'uūⁿvī 'iiⁿ'yāⁿ s'eeⁿ. ⁸Ní cuerpo yeⁿ'e 'uūⁿvī tináⁿ'ā s'eeⁿ cunée na yúúní yeⁿ'e yāāⁿ ch'æte miiⁿ chi dáámá yāāⁿ miiⁿ naachi 'iiⁿ'yāⁿ ca'néeⁿnga'á yā Señor Jesucristo yeⁿ'e yú na cruz. Ní ndúúⁿcū táámá nduudu yāāⁿ ch'æte miiⁿ tan'dúúⁿcā yāāⁿ Sodoma o yáⁿ'āa Egipto ti 'iiⁿ'yāⁿ chi nguée n'daacā ch'ætinée yā miiⁿ. ⁹Ní 'iiⁿ'yāⁿ yeⁿ'e

yáaⁿ s'eeⁿ ndúúcū 'iiⁿ'yāⁿ ndaataa s'eeⁿ ndúúcū 'iiⁿ'yāⁿ yeⁿ'e n'dee n'dái davaacu chi n'dááⁿ ndúúcū 'iiⁿ'yāⁿ yeⁿ'e naaⁿ naciones caⁿ'á yā n'diichi yā 'uūvī cuerpo chi tináⁿ'ā yeⁿ'e 'iiⁿ'yāⁿ chi n'diī chéeti na 'ínú nguuvī canéé maⁿ'a. Ní 'iiⁿ'yāⁿ s'eeⁿ nguéeⁿ 'cuaáⁿ yā chi 'iiⁿ'yāⁿ 'cuεεchi yā cuerpos yeⁿ'e tináⁿ'ā yeⁿ'e 'iiⁿ'yāⁿ chi n'díí miiⁿ. ¹⁰Ní 'iiⁿ'yāⁿ chi ch'εetinée yā na yáⁿ'āa ní neené cuuvi yeenú yā chi n'díí nduu 'uūvī profetas. Ní dííⁿ yā 'viicu. Ní dicho'ó yā regalos yeⁿ'e 'aamá yā taama yā caati 'uuvī profetas chi ngaⁿ'a nduudu cuaacu yeⁿ'é Ndyuūs dííⁿ yā chi 'iiⁿ'yāⁿ s'eeⁿ nééné ch'eenu yā chii. ¹¹Naati cuayiivi chi chó'oo 'iinu nguuvī canéé maⁿ'a Ndyuūs nadacuéeⁿ yā nduu 'uuvī 'iiⁿ'yāⁿ s'eeⁿ yeⁿ'e nguaaⁿ tináⁿ'ā. Ní nducyaaca 'iiⁿ'yāⁿ di'va'a yā yeⁿ'e chi n'diichi yā. ¹²Ní cuayiivi mííⁿ 'uuvī 'iiⁿ'yāⁿ s'eeⁿ ch'iindiveéⁿ yā 'áamá nduudu yuudu n'dái yeⁿ'e ná va'ai chéeti nguuvī chi caⁿ'ā: Ndís'tiī, cuchée nī 'muuⁿ. Ní 'iiⁿ'yāⁿ s'eeⁿ ní cuchée yā na va'ai chéeti nguuvī na 'áamá meēⁿ. Ní 'iiⁿ'yāⁿ s'eeⁿ chi taanⁿ yā yeⁿ'e yā n'diichi yā chuū. ¹³Ní hora mííⁿ nūuⁿ 'nuⁿ'u taanⁿ yáⁿ'āa ní 'áamá ndiichi parte yeⁿ'e yāaⁿ miiⁿ chi n'daā ní ndēēchē mil 'iiⁿ'yāⁿ ch'ii yā taachi n'nuⁿ'u yáⁿ'āa miiⁿ. Tanáⁿ'a yā ní dí'v'á'a yā ní dich'εeté yā Ndyuūs chi canéé na va'ai chéeti nguuvī.

¹⁴Chó'oo ndii 'uuvī vaadi yáⁿ'āi naati ní ndii chííⁿ ndii 'iinu miiⁿ ndaa núúⁿ.

Yeⁿ'e ángel chí di'cuεécú yā ndíí ndēēchē trompeta

¹⁵Ní ndii chííⁿ ndii ndēēchē ángel miiⁿ di'cuεécú yā trompetas yeⁿ'e yā

ní ch'iindiveéⁿ 'naaⁿ nduudu yuudu na va'ai chéeti nguuvī chi ngaⁿ'ā:

Maaⁿ ní Señor Ndyuūs yeⁿ'e yú ndúúcū Cristo ní vεε poder yeⁿ'é yā tiempo maaⁿ chi caaⁿ'maⁿ ntiiⁿ'nyuⁿ yā cueⁿ'e daāⁿ'maⁿ yeⁿ'e nducuéⁿ'ē 'iiⁿ'ntyéⁿ'ē yeⁿ'e íⁿ'yeeⁿ'dī ndúúcū naachi ngaⁿ'a ntiiⁿ'nyuⁿ yā ti nducuéⁿ'ē ní yeⁿ'e Cristo maaⁿ. ¹⁶Tuu'mi ní ndu'u ndiicú cuūⁿ 'iiⁿ'ntyéⁿ'ē chi vée yā na trono yeⁿ'e yā nanááⁿ Ndyuūs ch'εeti ndiitindíí yā ndúúcū naaⁿ yā na yáⁿ'āa nanááⁿ Ndyuūs ní dich'εeté yā Ndyuūs. ¹⁷Ní ngaⁿ'a yā:

N'diī Señor Ndyuūs chi vée tanducuéⁿ'ē dendu'ū poder yeⁿ'e nī, n'diī chi canéé nī tiempo maaⁿ ní canéé nī tiempo ndíí vmnaaⁿ ní canéé nī ndíí tiempo chi cuchii. Teé 'nū gracia n'diī, Ndyuūs, ti n'diī ní sta'á nī poder chi yeⁿ'é nī chí ch'εete n'dai. Ní n'diī ngaⁿ'a ntiiⁿ'nyúⁿ nī maaⁿ.

¹⁸Ní maaⁿ ní ndaa tiempo chi dituūvī nī 'iiⁿ'yāⁿ s'eeⁿ chi idituuvī yā íⁿ'yeeⁿ'dī. 'Iiⁿ'yāⁿ yeⁿ'e naciones chi nguée i'téenu yā ní nduuvī taāⁿ yā ti ndaā nguuvī chi ca'á nī castigo yeⁿ'e 'iiⁿ'yāⁿ s'eeⁿ ní hora chi cuuvi n'diichi nī nuuⁿ'ndi yeⁿ'e tináⁿ'ā s'ee. Ní ca'á nī premio 'iiⁿ'yāⁿ profetas chi dichíí'vε n'diī ní ngaⁿ'á yā nduudu cuaacu yeⁿ'é nī. Ní ca'á nī nducyááca 'iiⁿ'yāⁿ chi neⁿ'e yā n'diī ndúúcū 'iiⁿ'yāⁿ chi dich'εeté yā n'diī, 'iiⁿ'yāⁿ chi ngaⁿ'a ntiiⁿ'nyúⁿ yā ndúúcū

tanáⁿā 'iiⁿyāⁿ, nducyáácá
'iiⁿyāⁿ chi i'téenu yā Ndyuūs.

¹⁹Tuu'mi ní 'áámá yā n'guaaⁿ yā cheendi va'āi yeⁿe yáacū yeⁿe Ndyuūs, yáacū chi canéé na va'ai cheeti nguuvi. Ní mífⁿ canéé arca chi caja naachi canéé compromiso yeⁿe Ndyuūs. Ní canéé cheeti yáacū miiⁿ. Ní n'diichí 'cuāi ndúúcū n'dee n'dái ruido ndúúcū daavi n'nuⁿu na yáⁿāa ndúúcū 'aama cúúvi yuūⁿ.

N'daataá ndúúcū 'iiti dragón

12 Tuu'mi ní vée 'áámá seña chi néené ch'ete chi ch'iⁿi na va'ai cheeti nguuvi. N'diichí 'áámá n'daataá chi canuⁿ tá catecai tan'dúúcā 'yáⁿā. Ní 'iiⁿnyuⁿ miiⁿ ní canéé maaⁿ ca'a tá. Ní canūⁿ tiiⁿ tá 'áámá corona ndúúcū ndichuui 'iiⁿnyuⁿ. ²Ní hora mífⁿ nūuⁿ ní cuuvi 'cuundiyáāⁿ daiya tá ní 'cāi yiicu tá ndúúcū vaadi ya'ai chi cuuvi 'cuundiyáāⁿ daiya tá. Neené ch'eenu tá chií ní 'āa 'cuéé 'cuundiyáāⁿ daiya tá. ³Ní nífⁿnuúⁿ nūuⁿ vée táámá seña chi néené ch'ete chi ch'iⁿi nanguuvi. N'diichí 'áámá 'iiti cuá'āa chi ch'ete ca chi nguuvi dragón. Ní vée ndēēchē tífⁿ tī ní ndiichí duuⁿniiⁿníⁿ tī. Ní canduu tífⁿ tī ndēēchē coronas 'áámá 'áámá ca'áámá cā'aama tífⁿ tī. ⁴Ní dragón miiⁿ ndúúcū ndúúcudaⁿai tī díⁿ tī chín'daā na 'iinu parte yeⁿe 'iiⁿnyúⁿ yeⁿe nanguuvi ní chiya ndii na yáⁿāa. 'Iiti dragón miiⁿ chééndii tī nanáāⁿ n'daataá chí 'cuundiyáāⁿ daiya tá ní 'ífcú cuuvi che'é tī daiya tá miiⁿ taachi 'cuundiyáāⁿ. ⁵Tuu'mi ní n'daataá miiⁿ ní ch'iiⁿndiyáāⁿ 'áámá saⁿā 'lífⁿ. Saⁿā 'lífⁿ miiⁿ canéé chi diituu caaⁿmaⁿ ntiⁿnyuⁿ sa

yeⁿe tanducuéⁿē naciones yeⁿe iⁿ'yeeⁿdí ndúúcū 'áámá nduucu cūu. Ní nífⁿnuúⁿ nūuⁿ 'áámá yā sta'a yā saⁿā 'lífⁿ mífⁿ ní cunaⁿá yā ndúúcū dacuá'āa miiⁿ na va'ai cheeti nguuvi naachi canéé Ndyuūs chi vée yā na trono yeⁿe yā. ⁶N'daata miiⁿ ní chéénū ta na yáⁿāa cuūⁿmaⁿ naachi nguéé ch'etinéé 'iiⁿyāⁿ ní miiⁿ nūuⁿ Ndyuūs din'dái yā 'áámá lugar cáávā táⁿā miiⁿ. Ní miiⁿ Ndyuūs ca'á yā chi che'e tá 'áámá mil canee 'uūvi ciento nduuyu canéé 'iinū ngeecu nguuvi.

⁷Cuayiivi ní vée 'aama caandaá ch'ete na va'ai cheeti nguuvi. Angel Miguel chi ngaⁿa ntiⁿnyuⁿ ndúúcū ángeles yeⁿé yā 'cuⁿu yā contra yeⁿe 'iiti dragón. Ní 'iiti dragón miiⁿ ndúúcū ángeles yeⁿé tī 'cuⁿu tī ndúúcū ángel Miguel miiⁿ. ⁸Naati 'iiti dragón miiⁿ nguéé díⁿ tī ganar caandaá ch'ete miiⁿ. Ní 'āa ntéé vée lugar cááva tī na va'ai cheeti nguuvi. ⁹'Áámá 'iiⁿyāⁿ ch'ecú yā 'iiti dragón miiⁿ ndúúcū nducyaaca ángeles yeⁿé tī ndíí iⁿ'yeeⁿdí 'cūu. 'Iiti dragón miiⁿ chi ch'ete ní 'iiti cúú miiⁿ ndíí vmnáāⁿ vmnaaⁿ chi yááⁿn'guinūuⁿ chi Satanás. 'Iiti cúú miiⁿ ní chinche'éf tī núúⁿmáⁿ íⁿ'yeeⁿdí.

¹⁰Tuu'mi ní ch'iindiveéⁿ 'áámá nduudu chí diitūu n'dai yeⁿe na va'ai cheeti nguuvi chi ngaⁿa 'tíicā: Maaⁿ ní ndaā tiempo chí Ndyuūs yeⁿe yú nadanguáⁿai yā 'iiⁿyāⁿ yeⁿé yā. Ní ch'iⁿí yā poder yeⁿé yā chi rey yā. Ní ngaⁿa ntiⁿnyúⁿ yā yeⁿe tanducuéⁿē denduⁿu yeⁿe yā. Ní Cristo ch'iⁿí yā chi 'iiⁿntyéⁿe yā caati saⁿā miiⁿ chi Satanás chí ca'a sa nuuⁿndi yeⁿe hermanos

yeⁿe yú ndíí ngúúví ndíí n'gááⁿ
 nanááⁿ Ndyuūs, 'iⁿ'yāⁿ ch'εεcú yā
 saⁿ'ā miiⁿ ndii va'ai chεeti nguuv
 ndii na yāⁿ'āa. ¹¹Ní hermanos yeⁿe
 yú chicheé yā yeⁿe yááⁿ'n'guinūⁿ
 cáávā yuūⁿ yeⁿe Cristo chi nguuv
 'iiti cuūchī, ní cáávā chi ngaⁿ'á yā
 nduudu cuaacu yeⁿe Ndyuūs, ní
 cáávā chi nguéé 'va'á yā yeⁿe vida
 yeⁿe maáⁿ yā chi ch'ii ya cáávā
 Señor Jesucristo yeⁿe yú. ¹²Ndís'tii
 chi canéé na va'ai chεeti nguuv
 yeenú nī, naati dε'ε chúúca yā'āi
 yeⁿ'é nducyaaca chi snéé na yāⁿ'āa
 'cūū ndúúcu nducyaaca chi snéé na
 nuūⁿnīⁿ'yāⁿ'ā caati yááⁿ'n'guinūⁿ
 ndaa sa nanáaⁿ yā. Ní neené taaⁿ sa
 ti deenu sa chí 'āā ntéé cuuvi 'naaⁿ
 sa na iⁿ'yeeⁿdī.

¹³Taachi 'iiti dragón miiⁿ ní
 chicadínuuⁿ tī chi 'āā candiití tī
 ndíí na yāⁿ'āa, cheⁿ'e tī can'dáa tī
 n'daataá chi ch'iⁿ'ndiyáāⁿ daiya tá
 chi 'cueenu tá cuuvi. ¹⁴Naati 'áámá
 yā ca'a yā n'daata miiⁿ 'uūví ngeεchi
 tá tan'dúúca ngeεchi 'íí'yāa chi
 ch'εete ca. Ní 'iicú cuuvi caavā tá
 nanguuvi ní caⁿ'a tá lugar yeⁿe tá
 naachi nguéé 'iⁿ'yāⁿ. Ní yaⁿ'ai canee
 tá yeⁿ'e 'iiti cúu chi yááⁿ'n'guinūⁿ.
 Ní 'iⁿ'yāⁿ ca'á yā chi che'e tá 'iinū
 ndúuyū canéé maⁿ'a. ¹⁵Ní cúu miiⁿ
 tun'dáa tī na cheendi tī n'dee n'dái
 nuūⁿnīⁿ tan'dúúca nuūⁿnīⁿ yeⁿe
 'áámá yífcú. Ní nuūⁿnīⁿ miiⁿ ní
 nduuví yífcú chí cuuvi candeε táⁿ'ā
 miiⁿ tī 'tíicā neⁿ'e cúu miiⁿ. ¹⁶Naati
 yāⁿ'āa miiⁿ chinnee n'daataá mífⁿ
 tī n'da'ai tan'dúúca 'iⁿ'yāⁿ n'da'ái
 yā cheendí yā ní yāⁿ'āa mífⁿ chí
 nuūⁿnīⁿ miiⁿ ní cheēnū nuūⁿnīⁿ
 miiⁿ chεeti yāⁿ'āa, nuūⁿnīⁿ chi 'iiti
 dragón miiⁿ tun'dáa tī ndúúcu

cheendí tī. ¹⁷Ní ndúúcu chuū 'iiti
 dragón miiⁿ neené taaⁿ n'dái tī
 ndúúcu n'daataa mífⁿ ní chéⁿ'e
 tī cuⁿ'ú tī ndúúcu tanáⁿ'ā 'iⁿ'yāⁿ
 ndaata yeⁿ'e n'daataa miiⁿ, 'iⁿ'yāⁿ
 chí dííⁿ yā chí ngaⁿ'a mandamiento
 yeⁿ'é Ndyuūs. Ní 'áámá canee
 yā ndúúcu nduudu cuaacu yeⁿ'e
 Jesucristo.

Yeⁿ'e 'uūví 'iiti taaⁿ chi nguuví monstruo

13 Tuuⁿ'mi ní taachi chééndíí
 vmnaaⁿ yāⁿ'āa ndúútii
 yeⁿ'e nuūⁿnīⁿ'yāⁿ'ā miiⁿ n'diichí chi
 can'daa 'áámá 'iiti chí ch'εete taavi
 ca yeⁿ'e nuuⁿnīⁿ'yāⁿ'ā. 'Iiti miiⁿ ní
 nguuví monstruo ní véé ndεēchē tííⁿ
 tī ndúúcu ndiichi duuⁿ'niiⁿ'nīⁿ tī. Ní
 vmnaaⁿ 'áámá 'aama duuⁿ'niiⁿ'nīⁿ
 tī sndūūⁿ 'áámá corona. Ní canéé
 nguūⁿ ca'áámá cā'aama tííⁿ tī chí
 duuchi chí nguéé inee yíínū
 Ndyuūs. ²'Iiti chí monstruo chí
 ch'εete mífⁿ chí n'diichí ní tan'dúúca
 'iiti chí leopardo, 'tiicá tī. Ca'a tī
 ní tan'dúúca ca'a oso, 'tíicā ca'a tī.
 Cheendí tī ní tan'dúúca cheendi
 'yáíⁿ'yāa cu'á'á, 'tíicā cheendí tī.
 'Iiti dragón miiⁿ ca'á tī poder yeⁿ'é
 tī ndúúcu trono yeⁿ'é tī na ta'a 'iiti
 monstruo chí ch'εete miiⁿ chí ngaⁿ'a
 ntiiⁿ'nyúⁿ tī. ³Ní n'diichí chí 'áámá
 chéé tííⁿ 'iiti monstruo chí ch'εete
 taavi ca ní tan'dúúca chí nca'āi
 'áámá 'iiti chí n'díí ní nduūvā yeⁿ'é
 tī, 'tíicā 'áámá tííⁿ tī. Ní nducyáácá
 'iⁿ'yāⁿ yeⁿ'e iⁿ'yeeⁿ'dī 'cūū néené
 cheⁿ'e yiinú yā yeⁿ'e chuū. Ní cueⁿ'é
 yā ndúúcu 'iiti monstruo miiⁿ. ⁴Ní
 nducyaacá yā s'téenu yā 'iiti dragón
 miiⁿ cáávā chí ca'á tī poder yeⁿ'é tī
 táámá 'iiti chí monstruo chí ch'εete

taavi ca. Ní 'iiⁿ'yāⁿ 'tiicá ntúūⁿ ch'i'téenu yā 'iiti monstruo miiⁿ. Tuuⁿ'mi ní caⁿ'a yā: ¿Duⁿ'u véé poder yeⁿ'ē tan'dúúcā 'iiti monstruo 'cūū? ¿Duⁿ'u cúúví 'cuuⁿ'maⁿ ndúúcū 'iiti monstruo 'cūū ní cucheē ndúúcū 'iiti 'cūū?

⁵Ní 'iiti dragón ca'á tī poder 'iiti monstruo miiⁿ chi caaⁿ'máⁿ tī dendu'ū chi ch'ēete. Ní cunnkáā ngaⁿ'a tī contra yeⁿ'e Ndyuūs. Ní dí'tiinuū tī chi ngaⁿ'a ntiinⁿ'nyuⁿ tī 'túúcā ch'éeti 'uūví ngēecu 'uūví 'iyyū. ⁶Ní 'tíicā idiiⁿ 'iiti monstruo. Ní cunnkáā ngaⁿ'a tī contra yeⁿ'e Ndyuūs ní ngaⁿ'a tī cunnkáā contra yeⁿ'e chi duuchi Ndyuūs ní contra yeⁿ'e va'ai ch'ēeti nguuvi naachi Ndyuūs ch'ēetinée yā ní contra yeⁿ'e 'iiⁿ'yāⁿ chi snée yā ndúúcū Ndyuūs. ⁷Ní 'tiicá ntúūⁿ 'iiti dragón ca'á tī poder 'iiti monstruo miiⁿ chi dííⁿ tī vaadi 'caa'va ndúúcū 'iiⁿ'yāⁿ chi yeⁿ'é Ndyuūs ndíí chi ch'ē tī ndúúcū 'iiⁿ'yāⁿ s'eeⁿ. Ní ca'á tī poder 'iiti monstruo chi ngaⁿ'a ntiinⁿ'nyúⁿ tī yeⁿ'e tanducuéⁿ'ē raza yeⁿ'e 'iiⁿ'yāⁿ yeⁿ'e tanducuéⁿ'ē yāāⁿ ndúúcū yeⁿ'e tanducuéⁿ'ē davaacu ndúúcū yeⁿ'e tanducuéⁿ'ē nación. ⁸Ní nducyáácá 'iiⁿ'yāⁿ chi snée yā na yāⁿ'āa cu'téenu yā 'iiti monstruo miiⁿ. 'Tíicā néⁿ'e Ndyuūs. Ní nguéé canée nguūⁿ chi duuchi 'iiⁿ'yāⁿ s'eeⁿ na libro yeⁿ'e vida cueⁿ'e daāⁿ'maⁿ chi yeⁿ'e 'iiⁿ'yāⁿ chi duuchi 'iiti cuūchī. Ní 'iiⁿ'yāⁿ s'eeⁿ ch'iinⁿ'núⁿ yā Cristo ndii tiempo chi Ndyuūs din'dái yā iⁿ'yeeⁿdí.

⁹Nduuti chi 'áámá 'iiⁿ'yāⁿ véé veéⁿ yā 'caandiveéⁿ yā nduudu 'cūū.

¹⁰'Iiⁿ'yāⁿ chi can'daa yā 'iiⁿ'yāⁿ chi cuuvi preso yā, 'tiicá ntúūⁿ maáⁿ yā canée chí cuuvi preso yā. 'Iiⁿ'yāⁿ chi

n'giiⁿ'nuⁿ yā 'iiⁿ'yāⁿ ndúúcū machete 'uūví lados 'caāiⁿ canée chí 'cuuvi ntúūⁿ yā 'tíicā. Ní caāvā chuū 'iiⁿ'yāⁿ chi yeⁿ'é Ndyuūs canée chí véé 'viicheē'tíínūū ndúúcū yā ní canée chí i'téenu yā Ndyuūs.

¹¹Guayiiⁿ ní n'diichí táámá 'iiti monstruo chi ch'ēete ca chi can'dáa tī nguaaⁿ yáⁿ'āa miiⁿ. Véé 'uūví duuⁿ'niⁿ'níⁿ tī tan'dúúcā 'áámá duuⁿ'niⁿ'niⁿ 'iiti cuūchī 'tiicá tī. Ní 'iiti monstruo ndii 'uūví indeé tī tan'dúúcā 'áámá 'iiti dragón. ¹²Ní véé tanducuéⁿ'ē poder yeⁿ'e 'iiti monstruo chi ndii 'uuvi chi ch'ēete taavi ca tan'dúúcā poder yeⁿ'ē 'iiti monstruo ch'ēete ca chí vmnaaⁿ. Ní dííⁿ tī chi 'iiⁿ'yāⁿ yeⁿ'ē iⁿ'yeeⁿdí 'cūū ní cu'téenu yā 'iiti vmnááⁿ vmnaaⁿ chi 'iiti monstruo chi naca'ái tī ní nduūvá yeⁿ'é tī. ¹³Ní 'iiti chi monstruo chí ndii 'uūví dííⁿ tī vaadi n'giinu ch'ēete n'dai. Dííⁿ tī chí can'daa yaⁿ'ā yeⁿ'ē nanguuvi ndíí vmnaaⁿ yáⁿ'āa 'cūū ní n'dee n'dái 'iiⁿ'yāⁿ n'diichí yā chuū. ¹⁴Ní caavā vaadi n'giinu chi dííⁿ tī taachi cheendií tī nanááⁿ 'iiti monstruo chi vmnááⁿ vmnaaⁿ chi teé tī lugar chi dííⁿ tī 'túúcā, tuuⁿ'mi ní chinche'ée tī 'iiⁿ'yāⁿ chi ch'ēetinée yā iⁿ'yeeⁿdí 'cūū. Ní ca'a tī orden 'iiⁿ'yāⁿ s'eeⁿ chi din'dái yā 'áámá santo ídolo tan'dúúcā 'iiti monstruo chi nca'ái tī ndúúcū machete 'uūví lados 'caāiⁿ ní cunduuchi tī chi cuuvi santo yeⁿ'e yā. ¹⁵Ní 'iiti monstruo chi vmnááⁿ vmnaaⁿ ní ca'á tī poder 'iiti monstruo chiiⁿ ndíí 'uuví tī chi ca'á tī vida santo 'iiti ídolo miiⁿ. Ní 'íicú 'iiti santo tī cuuvi 'caaⁿ'máⁿ tī ní dííⁿ tī chi 'cuuvi nducyáácá 'iiⁿ'yāⁿ chi nguéé i'téenu yā 'iiti santo miiⁿ. ¹⁶Ní

cuayiivi ní 'iiti monstruo chi ndii 'uūvī ní dífⁿ tī ntúūⁿ chi nducyaaca 'iiⁿyāⁿ chi ngaⁿa ntiiⁿnyūⁿ yā ndúúcū tanáⁿā 'iiⁿyāⁿ ndúúcū 'iiⁿyāⁿ chi 'cuica ndúúcū 'iiⁿyāⁿ pobre yā ndúúcū 'iiⁿyāⁿ chi libre yā ní ndúúcū 'iiⁿyāⁿ chi 'áámá dichíⁿve yā 'iivi yā, 'iiti monstruo miiⁿ dífⁿ tī chi nducyaaca yā canéé chi ndée yā 'áámá sello na ta'a cuaacú yā o ncheeté yā. ¹⁷Ní dífⁿ ntúūⁿ tī 'tífcā. Mar 'áámá 'iiⁿyāⁿ nguée cuuvi cuái yā o n'diicui yā nduuti chi nguée ndée yā sello yeⁿe 'iiti monstruo ndii 'uūvī o chi duuchí tī o número yeⁿe chi duuchí tī. ¹⁸Ní chuū ní 'iiⁿyāⁿ chi déenu yā cuuvi diiⁿ yā. 'iiⁿyāⁿ chi déenu yā caⁿá yā ngaⁿa duuchi yā chi dúúchí 'iiti monstruo ndíí 'uūvī miiⁿ tī número miiⁿ ní lado yeⁿe chi duuchi 'áámá saⁿá. Ní número miiⁿ ní ngii jaāⁿ ciento canduū 'iinu ngēecu jaaⁿ.

Ngiiⁿtá 'iiⁿyāⁿ chi 'áámá ciento canéé 'uūvī ngēecu cuūuⁿ mil yeⁿe chí nanguaⁿai yā

14 Cuayiivi ní n'diichí 'iiⁿyāⁿ chi nguuvī 'iiti cuūchí chi chééndii yā ná yiicū chi nguuvī Sión. Ní nduucú yā canéé 'áámá ciento 'uūvī ngēecu cuūuⁿ mil 'iiⁿyāⁿ chi ndée yā chi duuchí yā ndúúcū chi duuchi chiidá yā chi canee nguūⁿ ncheeté yā. ²Ní ch'iindiveéⁿ 'áámá nduudu chí ngeⁿē na va'ai chēeti nguuvī. Ní nduudu miiⁿ tan'dúúcā chi yuūdūu n'gēete chi chí yā n'dai nuūⁿnīⁿ o tan'dúúcā chi n'gēecu 'áámá daavi ch'ēete; ní nduudu miiⁿ ní tan'dúúcā chi n'gēecu n'dee n'dái arpas chi idi'cuēēcū 'iiⁿyāⁿ. 'Tífcā nduudu

miiⁿ. ³Ní 'iiⁿyāⁿ chi n'dee n'dái miiⁿ chi snée yā nanááⁿ trono miiⁿ ní nanááⁿ ndu'u cuūúⁿ 'iiⁿyāⁿ miiⁿ ní nanááⁿ 'iiⁿntyéⁿē miiⁿ ní ngiiⁿtá yā 'áámá canto chi ngai. Ní mar 'áámá 'iiⁿyāⁿ nguée ngii n'geeⁿ yā canto miiⁿ, dámaāⁿ ndu'u chi 'áámá ciento 'uūvī ngēecu cuūuⁿ mil 'iiⁿyāⁿ chí Ndyuūs nadanguáⁿai yā nguaaⁿ 'iiⁿyāⁿ yeⁿe iⁿyeēⁿdí 'cūū. ⁴Ní 'iiⁿyāⁿ s'eeⁿ chi saⁿá chi nguée ngaⁿá yā ndúúcū mar 'áámá n'daataaⁿ ní nguée n'giindivaacú yā. Ní caⁿa yā ndúúcū 'iiⁿyāⁿ chi nguuvī 'iiti cuūchí 'āā tífⁿ nūuⁿ cuaaⁿ naachi caⁿá yā. Ní 'iiⁿyāⁿ s'eeⁿ Ndyuūs yaaⁿví yā chi cuuvi yeⁿe yā yeⁿe nducyaaca 'iiⁿyāⁿ. Ní 'iiⁿyāⁿ s'eeⁿ 'iiⁿyāⁿ chi vmnááⁿ vmnaaⁿ chi ch'iī yā cáávā chi dífⁿ yā ntiiⁿnyuⁿ yeⁿé Ndyuūs ní yeⁿe 'iiⁿyāⁿ chi duuchi 'iiti cuūchí. ⁵'iiⁿyāⁿ s'eeⁿ nguée ngaⁿá yā mar 'áámá nduudu yaadi ní nguée véé nuuⁿndi yeⁿe yā nanááⁿ trono yeⁿe Ndyuūs.

Yeⁿe chí ngaⁿá 'iinū ángeles

⁶Tuuⁿmi ní n'diichí tááma ángel ngaá yā naavtaⁿā nanguuvī. Ní ángel miiⁿ ní ndée yā nduudu chí canéé cueⁿe daāⁿmaⁿ chi nduudu ngai chí nanguaⁿai 'iiⁿyāⁿ. Ní ngaⁿá yā nduudu ngai miiⁿ nanááⁿ nducyaaca 'iiⁿyāⁿ yeⁿe iⁿyeēⁿdí 'cūū, nanááⁿ nducuéⁿē naciones ndúúcū nducuéⁿē tribus yeⁿe 'iiⁿyāⁿ ndúúcū nducyaaca davaacu yeⁿe tanducuéⁿē 'iiⁿyāⁿ ndúúcū nducyaaca 'iiⁿyāⁿ chí snée yā na yáⁿāa 'cūū. ⁷Ní ángel miiⁿ caⁿá yā ndúúcū 'áámá nduudu díftūu: Ndís'tiī 'va'á nī Ndyuūs, dich'ēeté ní 'iiⁿyāⁿ tī 'āā ndaa hora chí dífⁿ yā

juzgar nducyaaca 'iiⁿ'yāⁿ. Dich'etēē nī 'iiⁿ'yāⁿ chī dīn'dái yā nanguuvi ndúúcu yáⁿ'āa ndúúcu nuūⁿ'nīⁿ'yáⁿ'ā ndúúcu naachí icān'daa nuūⁿ'nīⁿ.

⁸Ní n'diichí taama ángel can'dáa yā ángel miiⁿ ní ngaⁿ'á yā: Yáāⁿ Babilonia 'āā ntuūvii. Yáāⁿ Babilonia chī yáāⁿ ch'etēē miiⁿ 'āā ntuūvii tī 'iiⁿ'yāⁿ yeⁿ'e yáāⁿ miiⁿ ní dííⁿ yā chī tanáⁿ'ā 'iiⁿ'yāⁿ yeⁿ'e nducuéⁿ'ē nación dinuuⁿ'ndi cá yā ní caⁿ'á yā ndúúcu n'daataa ó isaⁿ'ā chī nguéé yeⁿ'é yā tī dííⁿ yā nuuⁿ'ndi tan'dúúca chī diiⁿ 'iiⁿ'yāⁿ s'eeⁿ.

⁹Ní cuayiivi ní n'diichí ndii 'íínú ángel miiⁿ can'dáa yā ángel s'eeⁿ ní caⁿ'a yuudu yā: Nduuti chī 'áámá 'iiⁿ'yāⁿ cu'téenu yā 'iiti monstruo miiⁿ ndúúcu 'iiti santo chī dáámá ndúúcu 'iiti miiⁿ ní 'iiⁿ'yāⁿ ndée yā sello yeⁿ'é tī nchēetēē yā o na ta'á yā, ¹⁰canéé chī cuta'á yā neené taaⁿ castigo chī Ndyuūs caⁿ'á yā ca'a yā 'iiⁿ'yāⁿ miiⁿ. Ní castigo miiⁿ tan'dúúca 'áámá copa diituu ndúúcu vaadī taaⁿ yeⁿ'e Ndyuūs. 'Tíicā va. Ní castigo miiⁿ ní chiiⁿ chī 'iiⁿ'yāⁿ s'eeⁿ cuuvi yá'ái yeⁿ'é yā ndúúcu nguuchi yáⁿ'ā ní ndúúcu tuūu chī nguuvi azufre chī nguuchi yaⁿ'ā ní cuuvi chó'oo chuū nanááⁿ ángeles yeⁿ'é Ndyuūs ní nanááⁿ 'iiⁿ'yāⁿ chī duuchi 'iiti cuūchī. ¹¹Ní 'yááⁿ'míⁿ yeⁿ'ē nguuchi yáⁿ'ā miiⁿ chī castigo miiⁿ ngēē cueⁿ'e daāⁿ'maⁿ yeⁿ'e lugar chī n'geenu yā ngii. Ní 'iiⁿ'yāⁿ s'eeⁿ chī n'geenú yā ngii ní i'téenu yā 'iiti monstruo miiⁿ chí ch'etēē taavi ca ndúúcu 'iiti chī santo yeⁿ'é tī. Ní ndéé yā seña yeⁿ'é chī duuchí tī na cuerpo yeⁿ'é yā. 'Iiⁿ'yāⁿ s'eeⁿ nguéé ntaaviⁿ'tuunúúⁿ yā yeⁿ'e chī ya'ái yā ndíí nguéé nguuvi ndíí nguéé

n'gaaⁿ. ¹²Ní cáávā chuū 'iiⁿ'yāⁿ chī yeⁿ'e Ndyuūs ní n'giindiveéⁿ yā mandamiento yeⁿ'é yā ní 'áámá canéé yā chī i'téenu yā Cristo ní canéé chī vee paciencia yeⁿ'e yā.

¹³Cuayiivi ní 'úú ch'iindiveéⁿ 'áámá nduudu yeⁿ'e va'ai chēeti nguuvi chī ngaⁿ'a ngii 'úú 'tíicā: Díí, Juan, dingúuⁿ di chuū. De'ē chúúca yeenu 'iiⁿ'yāⁿ chī caⁿ'á yā 'cuūvi yā tiempo 'cūū ndíí tiempo chī cuchii, 'iiⁿ'yāⁿ chī i'téenu yā Señor. Ní 'tíicā cuuvi ngaⁿ'a Espíritu N'dai yeⁿ'é Ndyuūs. Ní 'iiⁿ'yāⁿ s'eeⁿ ntaaviⁿ'tuunúúⁿ yā yeⁿ'e ntiiⁿ'nyuⁿ yeⁿ'é yā ní candéé yā ndúúcu yā yeⁿ'e chī dííⁿ yā.

Cosecha yeⁿ'e yáⁿ'āa 'cūū

¹⁴Cuayiivi miiⁿ ní n'diichí 'áámá meēēⁿ cuéé. Ní 'áámá 'iiⁿ'yāⁿ vee yā vmnaaⁿ meēēⁿ miiⁿ ní tandúúca Jesucristo chī duuchi Sáⁿ'ā chī Daiya 'Iiⁿ'yāⁿ yeⁿ'e iⁿ'yeeⁿ'dí 'cūū. Canduu tííⁿ yā 'áámá corona yeⁿ'e 'dííⁿ'nguāaⁿ ní na ca'á yā ní ndée yā 'áámá hoz chī 'caāiⁿ. ¹⁵Ní n'diichí táámá ángel can'dáa yā yeⁿ'e yaācū miiⁿ yeⁿ'e Ndyuūs ní yuudu caⁿ'a yā ndúúcu 'iiⁿ'yāⁿ chī vee yā na meēēⁿ miiⁿ. 'Cáácá dí cosecha ndúúcu hoz yeⁿ'e di tī maaⁿ ní 'āā tiempo yeⁿ'e chī diiⁿ di cosechar tī cosecha yeⁿ'ē yáⁿ'āa miiⁿ 'āā n'daacā.

¹⁶Nííⁿ'nuúⁿ nuūⁿ 'iiⁿ'yāⁿ chī vee yā na meēēⁿ miiⁿ ch'iicá yā cosecha yeⁿ'e yā chī canéé na yáⁿ'āa ní nta'á yā.

¹⁷Tuuⁿ'mi ní táámá ángel can'dáa yā yeⁿ'e yaācū miiⁿ chiiⁿ canéé na va'ai chēeti nguuvi. Ní 'tiicá ntúūⁿ ángel miiⁿ ndée yā 'áámá hoz chī 'caāiⁿ. ¹⁸Ní táámá ángel chī

candéé yā cuidado yeⁿe nguuchi yaⁿā vmnaaⁿ nátaī yeⁿe yaācū miiⁿ can'dáa yā yeⁿe nátaī ní caⁿ'a yuudu yā ángel chi ndeé yā hoz chí 'caāiⁿ. Dii 'caaca di ndúúcu hoz 'caāiⁿ yeⁿe di duuⁿnē 'lírⁿ yeⁿe yáⁿá 'lírⁿ miiⁿ ndúúcu n'gui'i chi uvas chi canéé na yáⁿāa ní cuta'a di uvas miiⁿ ti n'guí'í yeⁿe 'āā n'daacā maaⁿ.

¹⁹Tuu'mi ní ángel miiⁿ ndúúcu hoz 'caāiⁿ yeⁿe yā chíica yā duuⁿ'ne 'lírⁿ yeⁿe yáⁿá chi snéé ndúúcu n'gui'i uvas yeⁿe chi canee vmnaaⁿ yáⁿá. Ní nta'á yā n'gui'i uvas ní s'néeⁿ yā n'gui'i uvas miiⁿ na trapiche naachi cuta'á yā nuūⁿnīⁿ uvas miiⁿ chi vino. Ní trujal miiⁿ ní tan'dúúca castigo chi ch'ete n'dai chi Ndyuūs caⁿ'a yā chí ca'a yā 'iiⁿ'yāⁿ. ²⁰Ní trapiche naachi cuta'á yā nuūⁿnīⁿ yeⁿe uvas miiⁿ canéé 'áámá lado yeⁿe yāāⁿ miiⁿ. Ní yeⁿe trapiche can'dāa n'dee n'dái yuūⁿ chí yaacu. Ní yuūⁿ miiⁿ tan'dúúca 'áámá yíícu ch'ete yuūⁿ chi ngii caadi 'iínū ciento kilómetros yeⁿe. Ní yaacu n'dái indáá ndii na freno yeⁿe 'yúudū.

Angeles ndúúcu tá ndeēchē yá'āi

15 Cuayiivi ní n'diichí táamá señal na va'ai ch'eti nguuví chí ch'ete n'dai ní cheⁿe yíinú yeⁿe. Ní véé ndeēchē ángeles ndúúcu ndeēchē chi cuuvi 'nuūcá'ai chí 'cuiinu. Ní ndúúcu ndeēchē chi cuuvi 'nuūcá'ai chí 'cuiinu, ndúúcu chuú nūⁿ 'cuiinū tiempo chi Ndyuūs nduuví taáⁿ yā.

²Tuu'mi n'diichí 'áámá nuūⁿnīⁿ'yáⁿā chi tan'dúúca vidrio ndístaⁿ'a ndúúcu nguūchí yáⁿā. Ní 'iiⁿ'yāⁿ s'eeⁿ chi ch'é yā cuⁿ'u yā

ndúúcu 'iiti monstruo miiⁿ ndúúcu 'iiti chi santo yeⁿe tī ndúúcu 'iiⁿ'yāⁿ chi canéé chi duuchí tī ní número yeⁿe tī na cuerpo yeⁿe yā, 'iiⁿ'yāⁿ chi ichéé yā yeⁿe 'iiⁿ'yāⁿ s'eeⁿ chééndii yā nīiⁿnuūⁿ ná nuūⁿnīⁿ'yáⁿā chi vidrio miiⁿ, ní ndeé yā arpas chi Ndyuūs ca'á yā 'iiⁿ'yāⁿ s'eeⁿ. ³Ní chiitá yā canto yeⁿe Moisés, chi saⁿ'ā chi dichí'v sa Ndyuūs. Ní chiitá yā canto yeⁿe 'iiⁿ'yāⁿ chi nguuví 'iiti cuūchí. Ní 'tíicā nduudu chi chiitá yā:

Dii Señor Ndyuūs chi véé tanducuéⁿe dendu'ū poder ndúúcu di. N'geete taavi ca dii ní ngeⁿe yíinu yú yeⁿe tanducuéⁿe dendu'ū chi dii di. Dii rey yeⁿe tanducuéⁿe nación ní yúúní yeⁿe di ní cuaacu.

⁴Díí, Señor, ¿du'ū nguéé 'va'ā dii? ¿Du'ū nguéé caaⁿ'maⁿ chi dii ní neené ch'ete dii ti dámaaⁿ dii chi d'eeve di? Ní ndaa 'iiⁿ'yāⁿ yeⁿe tanducuéⁿe naciones nanááⁿ dii chi dich'et'et' yā dii caati nducyáácá 'iiⁿ'yāⁿ n'diichi yā chi dii di tanducuéⁿe dendu'ū chi cuaacu ní n'daacā n'dai.

⁵Ní cuayiivi ní n'diichí chi nanguaaⁿ cheendi va'āi yeⁿe yāacū chi canéé na va'ai ch'eti nguuví, ní ch'eti yaācū miiⁿ, miiⁿ canéé cuarto chí yaānū naachi canéé tuū ch'et'et' chi canéé nguūⁿ ley yeⁿe Moisés. ⁶Ní yeⁿe yaācū miiⁿ can'dāa ndeēchē ángeles. Ní ndeé yā ndu'ū ndeēchē chí n'nuu cá'ai yā. Ní véé catecai yā yeⁿe tiinūⁿ chi nguuví lino chi cuéé ní d'eeve. Ní n'deé

chiichí nīⁿuⁿ yā ndúúⁿcū cinta yeⁿe 'díⁿnguāⁿ. ⁷Núúⁿmáⁿ chēetí nūⁿ 'áámá 'iⁿyāⁿ naachi na cuuúⁿ yā ní ca'a yā ndu'u ndēēchē ángeles ndēēchē 'cuutíⁿ yeⁿe 'díⁿnguāⁿ ca'áámá ca'áámá yā 'áámá 'cuutíⁿ chi ndiituú yeⁿe castigo chi neene taaⁿ chi yeⁿe Ndyuūs chi canduuchi cueⁿe daāⁿmaⁿ. ⁸Ní yaācū mīⁿ ndiituú 'yaaⁿmīⁿ chi can'daā yeⁿe vaadī ch'ēete taavi ca yeⁿe Ndyuūs ní yeⁿe poder yeⁿe yā. Ní mar 'áámá 'iⁿyāⁿ cuuví cundaa yā na yaācū mīⁿ ndíⁿ taachi ch'ó'oo ndēēchē vaadī ya'ai chi ndēē ndu'u ndēēchē ángeles.

Ndeēchē 'cuutíⁿ yeⁿe vaadī ya'ai

16 Tuuⁿmi ní ch'iindiveéⁿ 'áámá nduudu neene díⁿtūu chi can'daā yeⁿe yaacu mīⁿ ní ngaⁿ'a ngii ndu'u ndēēchē ángeles mīⁿ: Ndís'tií ángeles, cueⁿ'é nī ní n'daaviyái nī vmnaaⁿ yáⁿ'āa yeⁿe chi snúūⁿ chēeti 'cuutíⁿ yeⁿe nī chi castigo chi neenē díⁿtūu chi Ndyuūs ca'á yā 'iⁿyāⁿ.

²Ní ángel vmnááⁿ vmnaaⁿ cheⁿe yā n'daaviyái yā chi snúūⁿ 'cuutíⁿ yeⁿe yā vmnaaⁿ yáⁿ'āa ní vmnaaⁿ nducyaaca 'iⁿyāⁿ chi ndēē yā sello yeⁿe 'iiti monstruo na cuerpo yeⁿe yā, 'iⁿyāⁿ chi i'téenu yā 'iiti santo yeⁿ'é tī. Ní can'dāā n'dúú'vī n'gēete chi neenē ya'ai na cuerpo 'iⁿyāⁿ s'eeⁿ.

³Tuuⁿmi ní ndii chíⁿ ndii 'uūvī ángel mīⁿ n'daaviyái yā 'cuutíⁿ yeⁿe yā vmnaaⁿ nuūⁿnīⁿyáⁿ'ā ní nduuví yuuúⁿ tan'dúúⁿcā yuuúⁿ yeⁿe 'aama tináⁿ'ā. Ní tanducuéⁿ'ē 'iiti chi sндуuchí chēeti nuūⁿnīⁿyáⁿ'ā mīⁿ ch'ií tī.

⁴Ní ndii chíⁿ ndii 'íⁿú ángel mīⁿ n'daaviyái yā 'cuutíⁿ yeⁿe yā vmnaaⁿ yeⁿe yíⁿcú ní vmnaaⁿ yeⁿ'ē naachi can'daā nuūⁿnīⁿ mīⁿ. Ní nducuéⁿ'ē nuūⁿnīⁿ mīⁿ nduuví yuuúⁿ. ⁵Ní nīⁿnuúⁿ nūⁿ ch'iindiveéⁿ ángel yeⁿe nuūⁿnīⁿ mīⁿ chi ngaⁿ'a yā: Dii Señor, 'āa canéé dí cuááⁿ vmnaaⁿ, ní canee di maaⁿ. Dii ní cuaacu di ti n'diichi di nuūⁿndī 'iⁿyāⁿ s'eeⁿ. ⁶Ní 'tíⁿcā diiⁿ di caati 'iⁿyāⁿ s'eeⁿ ní ch'iⁿnúⁿ yā 'iⁿyāⁿ yeⁿe di ndúúⁿcū 'iⁿyāⁿ chi 'áámá díⁿ yā ntiⁿnyuⁿ yeⁿe di ndúúⁿcū 'iⁿyāⁿ chí caⁿ'a nduudu cuaacu yeⁿe di. Ní maaⁿ ní dii nca'a di yuuúⁿ yeⁿ'ē nuūⁿnīⁿ mīⁿ chi cu'ú yā caati 'tíⁿcā chi n'daacā chi cu'ú yā yuūuⁿ mīⁿ cucááⁿvā chi diiⁿ yā chí nguéé n'daacā.

⁷Ní ch'iindiveéⁿ nduudu yeⁿe 'áámá yeⁿe náⁿai chi ngaⁿ'a ngii Ndyuūs, ní ngaⁿ'a: Dii, Ndyuūs, chi véé tanducuéⁿ'ē dendu'ú poder ndúúⁿcū di, cuaacu níⁿnyúⁿ n'diichi di nuuⁿndi yeⁿe 'iⁿyāⁿ. Ní diiⁿ di chi cuaacu ní n'dai taavi.

⁸Ní n'diichí ndíⁿ cuūuⁿ ángel mīⁿ n'daaviyái yā 'cuutíⁿ yeⁿe yā vmnaaⁿ yeⁿe yáⁿ'ā. Ní ca'á yā poder yáⁿ'ā mīⁿ chi 'neeⁿ yáⁿ'ā 'iⁿyāⁿ ndúúⁿcū yáⁿ'ā yeⁿ'ē. ⁹Ní nducyaaca 'iⁿyāⁿ ní chiichi yā ndúúⁿcū 'iⁿnūⁿ taáⁿ yeⁿe yáⁿ'ā mīⁿ. Ní neenē taaⁿ ya'ai yeⁿ'é yā. Ní cunnécā caⁿ'a yā yeⁿe chi duuchi Ndyuūs chi véé poder yeⁿ'é yā yeⁿ'ē ndēēchē cá'ai 'cūū. Naati 'iⁿyāⁿ s'eeⁿ nguéé ndaacadaamí yā yeⁿe nuuⁿndi yeⁿ'é yā ní nguéé dich'ēetē yā Ndyuūs.

¹⁰Ní n'diichí ndii nyuⁿ'u ángel mīⁿ n'daaviyái yā 'cuutíⁿ yeⁿe yā vmnaaⁿ yeⁿe trono yeⁿe 'iiti monstruo mīⁿ ní vmnaaⁿ yeⁿe tanducuéⁿ'ē chi

ngaⁿ'á ti ntiiⁿnyuⁿ yeⁿ'ē ní canée ná 'áámá maáiⁿ. Ní 'iiⁿyāⁿ s'eeⁿ ní cheⁿ'enée yā chiia yā cáávā chi ya'ai yā. ¹¹Ní 'iiⁿyāⁿ s'eeⁿ cunncaā caⁿ'a yā yeⁿ'e Ndyuūs chi canée yā na va'ai cheeti nguuvu cucáávā chi ya'ai yeⁿ'e yā ndúúcū n'duuⁿ'vi yeⁿ'é yā. Ní nguée nandaacadaamí yā yeⁿ'e nuuⁿ'ndi yeⁿ'e yā.

¹²Tuuⁿ'mi ní ndii chíⁿ ndii niyaaⁿ ángel miiⁿ n'daaviyaí yā 'cuutíⁿ yeⁿ'é yā vmnaaⁿ yíicú ch'ēete chi nguuvu Eufates ní nuuⁿ'niⁿ yeⁿ'e yíicú ch'ēete miiⁿ ntíⁿ. Ní n'guaaⁿ 'aama yúúni ní 'iicu 'iiⁿyāⁿ reyes cuuvi cuchii yā cuaaⁿ naachi can'daā 'yáⁿ'ā na yúúni miiⁿ.

¹³Tuuⁿ'mi ní n'diichí chí can'daā 'iinū espíritus yeⁿ'e yááⁿ'n'guiniūⁿ chi tan'dúúcā sapo, 'tíicā espíritus. Ní can'daā yeⁿ'ē cheendi 'iiti dragón miiⁿ ní yeⁿ'ē cheendi 'iiti monstruo chi ch'ēete taavi cá ti ní yeⁿ'e cheendi profeta chi ngaⁿ'a yā chi yeⁿ'e Ndyuūs 'yā, ní nguée ngaⁿ'a yā nduudu cuaacu yeⁿ'e maáⁿ yā.

¹⁴Espíritus ndúúcū espíritus yeⁿ'e yááⁿ'n'guiniūⁿ ní díⁿ yā señas yeⁿ'e vaadi n'giinu. Ní cueⁿ'e yā nanááⁿ nducyáácá reyes yeⁿ'ē núúⁿ'máⁿ iⁿ'yeeⁿ'dí 'cūū chi nadaama yā 'iiⁿyāⁿ s'eeⁿ chi cuuvi 'cuuⁿ'maⁿ yā nguuvu chi ch'ēete chi yeⁿ'é Ndyuūs chi véé nducuéⁿ'ē dendu'u poder yeⁿ'e yā.

¹⁵Ní Cristo ngaⁿ'á yā. Cuin'diichí nī. 'Úú ní cuchíⁿ tan'dúúcā 'áámá chíduucu. De'ē chúúcā n'dai 'iiⁿyāⁿ chi sндуuchí yā ní snúuⁿ yā catecai yā ní nguée 'cuēetinée yā chi chiica yā chi yuucú yā chi 'iiⁿyāⁿ s'eeⁿ inaáⁿ yā ní 'íicú cuuvi 'cuináⁿ yā.

¹⁶Ní espíritus nduuvidaami yā reyes yeⁿ'e yáⁿ'ā na 'áámá lugar

chi nguuvu Armagedón na davaacu hebreo.

¹⁷Tuuⁿ'mi ní ndii chíⁿ ndii ndeēchē ángel miiⁿ n'daaviyaí yā 'cuutíⁿ yeⁿ'e yā na 'yúúné. Ní yeⁿ'e yáacū miiⁿ chi canée na va'ai cheeti nguuvu miiⁿ can'daā 'áámá nduudu neene díftūu lado yeⁿ'e trono miiⁿ chí ngaⁿ'ā 'túúcā: Áā tunéeⁿ nducuéⁿ'ē.

¹⁸Tuuⁿ'mi ní véé 'cuaí ndúúcū nduudu s'eeⁿ ndúúcū daavi ndúúcū chi diituu n'dái n'nuⁿ'u yáⁿ'ā. Ní ch'ēete ca nguée ti tan'dúúcā chi cunee ndii tiempo chi 'iiⁿyāⁿ canée yā iⁿ'yeeⁿ'dí 'cūū. ¹⁹Ní yááⁿ ch'ēete chi yááⁿ Babilonia miiⁿ chii 'iinū taaⁿ ní nducuéⁿ'ē yááⁿ yeⁿ'ē iⁿ'yeeⁿ'dí 'cūū ní sndeēve. Ní Ndyuūs nn'gáácú yā yeⁿ'e yááⁿ ch'ēete chi yááⁿ Babilonia miiⁿ. Ní ca'á yā 'iiⁿyāⁿ chi canée na yááⁿ s'eeⁿ chi cu'ú yā vino yeⁿ'é yā chi vino yeⁿ'e vaadi taaⁿ yeⁿ'é Ndyuūs. Ní vino miiⁿ chi ca'á yā ní castigo chi neenē díftūu. ²⁰Ní tanducuéⁿ'ē yáⁿ'ā islas ndúúcū tanducuéⁿ'ē yiicū n'geete ní ndáá inaaaⁿ. ²¹Ní yeⁿ'e nanguuvi ní ndeēve n'dee n'dái yuúúⁿ chi neenē diituu vmnaaⁿ 'iiⁿyāⁿ yeⁿ'e iⁿ'yeeⁿ'dí. 'Áámá áámá yuúuⁿ miiⁿ n'gii tan'dúúcā 'uúvī ngeecu kilos. Ní 'iiⁿyāⁿ yeⁿ'e iⁿ'yeeⁿ'dí caaⁿ'maⁿ taáⁿ yā yeⁿ'é Ndyuūs cáávā yeⁿ'e vaadi ya'ai miiⁿ yeⁿ'e yuúuⁿ ti castigo yeⁿ'ē vaadi ya'ai miiⁿ ní neenē díftūu.

Nuuⁿ'ndi taavi yeⁿ'e 'áámá n'daataá chi neenē caⁿ'a tá ndúúcū saⁿ'ā s'eeⁿ

17 Tuuⁿ'mi ní 'áámá ángel naachi ndeēche yā chi ndée yā ndu'u ndeēchē 'cuutíⁿ ndáa yā nanááⁿ 'úú, ní caⁿ'a yā chii yā 'úú: Dii, Juan cuchíⁿ di nducúⁿ ní 'úú ní

'cuu'míⁿ dii castigo chi ch'εεte ca chi cuchii vmnaaⁿ 'áámá ndaataá chi véé cá saⁿá yeⁿē ta. N'daataá miiⁿ ní véé yā vmnaaⁿ nuūⁿniⁿyáⁿá s'eeⁿ. ²Saⁿá reyes yeⁿe iⁿ'yeeⁿdíⁿ cūū cueⁿé yā ndúúcu n'daataá miiⁿ ní n'geetinée yā ndúúcu n'daataá miiⁿ. Ní nducyaaca 'iiⁿyāⁿ chi snée yā na yáⁿāa cueⁿé yā ndúúcu n'daataá ó isaⁿá chi nguée yeⁿe yā tan'dúúca chi cuu'ví yā ndúúcu vino yeⁿe tá yeⁿē chi dinuuⁿndi cá yā 'tíicā.

³Ní 'úú canée maáⁿ poder Espíritu N'dai yeⁿé Ndyuūs ní ángel miiⁿ candée yā 'úú na yāāⁿ cuuⁿmáⁿ naachi nguée ch'εetinée 'iiⁿyāⁿ. Ní míⁿ n'diichí 'áámá n'daataá candúu tá 'áámá monstruo cuá'a tī chi ch'εεte ca. Ní néené n'deēe chi duuchi chi contra yeⁿe Ndyuūs s'néeⁿ nguūⁿ na cuerpo yeⁿe 'iiti miiⁿ. Ní véé ndeεche tíⁿ tī ní véé ndiichi duuⁿniiⁿníⁿ tī. ⁴Ní n'daataá chi candúu ta monstruo cuá'a tī ní canuuⁿ tá vestido chi morado ndúúcu cuá'ā. Ní véé adorno yeⁿē tá chi 'díⁿnguāaⁿ ndúúcu tuūu chi néené yaⁿai chíⁿvē ndúúcu perlas. Ní ndεε tá ná ta'a tá 'aama taza yeⁿe 'díⁿnguāaⁿ chi diituú ndúúcu dendu'ū chi nguεε n'daacā chi nuūⁿndī vaatii ndúúcu chi dendú'ū yeⁿe chi cueⁿe tá ndúúcu saⁿá s'eeⁿ chi nguée yeⁿe tá. ⁵Ní canée nguūⁿ 'áámá chi duuchi ná nchεetē tá chi canúúⁿ n'de'ei chi neⁿe caaⁿmaⁿ chi 'túúca. Yāā Babilonia ch'εεte chi chεεcuú nducyaaca n'daataá chi caⁿá yā ndúúcu saⁿá chi nguée yeⁿe yā ndúúcu nducuéⁿē cosas chí nguée n'daacā na iⁿ'yeeⁿdíⁿ cūū chi diiⁿ 'iiⁿyāⁿ s'eeⁿ. ⁶Ní 'úú chicadiinúúⁿ chi n'daata miiⁿ ní cuu'vi tá caati

cu'u ta yuūuⁿ yeⁿe 'iiⁿyāⁿ chi n'díi yā ti yeⁿe Ndyuūs ní yeⁿe 'iiⁿyāⁿ chí ngaⁿá yā nduudu cuaacu yeⁿe Cristo. Ní taachi n'diichí chuū cueⁿe yiinú yeⁿē. ⁷Tuu'mi ní ángel chi ndεε yā 'úú ngaⁿa yā ngii yā 'úú: ¿De'ē cúúví chí ngeⁿe yiinu dí yeⁿe chuū? 'Úú ní cuuví dii chí canúúⁿ n'de'ei yeⁿē n'daataá miiⁿ ndúúcu yeⁿe monstruo ch'εεte chi ndεé tī ndaataá miiⁿ, monstruo miiⁿ chí véé ndeēchē tíⁿ tī ní ndiichi duuⁿniiⁿníⁿ tī. ⁸Iiti monstruo chi n'diichí di ní 'áámá tī chí ndii tiempo vmnaaⁿ canduuchí tī naati maaⁿ ní 'āā ntée tī, naati 'iiti miiⁿ cáámá canée chí can'daá tī na yiivée yeⁿe yáⁿāa vmnááⁿ vmnaaⁿ chí caⁿá tī di'cuiinú tī. Ní 'iiⁿyāⁿ chí snée yā na yáⁿāa ní nguée snée chí duuchí yā na libro yeⁿe vida cueⁿe daāⁿmaⁿ ndíí taachi Ndyuūs din'dái yā iⁿ'yeeⁿdí. 'Iiⁿyāⁿ s'eeⁿ ní ngeⁿe yiinú yā taachi n'diichí yā 'iiti miiⁿ chí vmnaaⁿ canduuchí tī naati maaⁿ ní 'āā ntée tī. 'Āā chíⁿ tī naati nnguaacunée tī ndaá tī.

⁹Ní yeⁿē chúu véé cá chí cuuvi déenu 'iiⁿyāⁿ. Ndu'u ndeēchē tíⁿ tī ní chíⁿ tan'dúúca chí ndeēchē yiicū ch'εεte naachi n'daataá miiⁿ ní véé yā vmnaaⁿ yeⁿē. ¹⁰Ní véé ndeēchē reyes. Nyuⁿ'u reyes ní chíⁿ yā. Maaⁿ ní 'áámá rey miiⁿ ní ngaⁿa ntiⁿnyuⁿ yā yeⁿe 'iiⁿyāⁿ chí véé maaⁿ. Ní táámá rey ní canée chí ndaá yā. Ní taachi ndaá rey miiⁿ chí ndu'u chí ndeēchē nguée 'naaⁿ tiempo canée yā iⁿ'yeeⁿdí. ¹¹Ní táámá 'iiti monstruo chí vmnaaⁿ canduuchí tī ní maaⁿ ní 'āā ntée tī chíⁿ tī ní 'iiti miiⁿ chí rey miiⁿ ní nduividáámá tī ndúúcu ta ndeēché tī. Ní cuayiivi ní

rey miiⁿ caⁿá yā cuuvi ndai yā chi vaadi n'gii yeⁿe ndii 'uūvi cuuvi chi infierno.

¹²Ní ndu'u ndiichi duuⁿniiⁿíⁿ tī chi n'diichi di chííⁿ chí ndu'ū ndiichi reyes chi 'āā cuéé cuta'á yā poder yeⁿé yā naachi ngaⁿā ntiiⁿnyúⁿ yā. Taachi cuta'á yā poder ní chi cuuvi reyes ndúú^{cū} 'iiti monstruo miiⁿ 'áámá hora nūⁿ.

¹³Ní reyes s'eeⁿ ní dáámá nūⁿ vaanicadínnūⁿ yeⁿé yā. Ní ca'a yā poder yeⁿé yā ndúú^{cū} fuerzas yeⁿe yā na ta'a 'iiti monstruo miiⁿ. ¹⁴Ní reyes ní 'cuuⁿmaⁿ yā ndúú^{cū} 'iiⁿyāⁿ chí nguuví 'iiti cuūchī naati 'iiⁿyāⁿ miiⁿ chí nguuví 'iiti cuūchī cuchée yā yeⁿe reyes. Ní Señor ch'ēete ca ní 'iivi nducyaaca 'iiⁿyāⁿ señores ní rey ch'ēete ca yeⁿe nducyaaca reyes. Ní 'iiⁿyāⁿ s'eeⁿ chi canée yā ndúú^{cū} 'iiⁿyāⁿ miiⁿ ní Ndyuūs yaa'ví yā 'iiⁿyāⁿ s'eeⁿ chi cuuvi yeⁿé yā. Ní Ndyuūs ndēēvé yā 'iiⁿyāⁿ s'eeⁿ chi yeⁿé yā. Ní 'iiⁿyāⁿ s'eeⁿ ní 'aama canee yā ndúú^{cū} chi i'téenu yā Ndyuūs.

¹⁵Ní ángel miiⁿ caⁿa yā chii yā 'úú: Nuūⁿnīⁿyáⁿā s'eeⁿ chí n'diichi di naachi véē n'daataá chi caⁿa tá ndúú^{cū} saⁿa s'eeⁿ, nuūⁿnīⁿyáⁿā s'eeⁿ ní chííⁿ chí yāāⁿ s'eeⁿ ndúú^{cū} n'dee n'dái 'iiⁿyāⁿ ndúú^{cū} 'iiⁿyāⁿ chí ngaⁿa n'dee n'dái davaacu chi n'dááⁿ ndúú^{cū} naciones. ¹⁶Ní ndu'ū ndiichi duuⁿniiⁿíⁿ tī chi véē yeⁿe monstruo miiⁿ, nguéé neⁿe n'daataa miiⁿ. Ní diví tī catecai n'daataa miiⁿ ní s'neeⁿ táⁿā chi yuucúū tá. Ní che'é tī yuūtē yeⁿe tá. Ní 'neeⁿ yaⁿā n'daataa miiⁿ ndúú^{cū} nguuchi yaⁿā. ¹⁷Caati Ndyuūs s'neeⁿ

yā na staava yeⁿe reyes chí dííⁿ yā 'túú^{cā} tan'dúú^{cā} chí Ndyuūs neⁿé yā chí dííⁿ yā. Ní ndiichi duuⁿniiⁿíⁿ tī nduuvidaamí tī ní ca'á tī poder yeⁿé tī na ta'a 'iiti monstruo miiⁿ chí caaⁿmaⁿ ntiiⁿnyúⁿ tī. Ní 'tíicā dííⁿ tī chí cuuví cuaacu nduudu chí ngaⁿa Ndyuūs. ¹⁸Ní n'daataá chí n'diichi di chííⁿ chí yāāⁿ ch'ēete chí caaⁿmaⁿ ntiiⁿnyuⁿ yeⁿe nducyaaca reyes chí snée yā ná iⁿyeēⁿdí.

Yāāⁿ Babilonia ntuūvii

18 Ní cuayiivi miiⁿ ní n'diichi táámá ángel chí ngiicá yā yeⁿe na va'ai ch'ēeti nguuví ní véē poder ch'ēete yeⁿé yā. Ní yáⁿā miiⁿ canée dēēve ndúú^{cū} dēēve yeⁿe ángel miiⁿ. ²Ní 'cai yiicú yā ní caⁿa yā: Yāāⁿ chí ch'ēete nituūvii, yāāⁿ Babilonia chí ch'ēete ní ntuūvii. Ní maaⁿ ní ch'ēetinee espíritus yeⁿe yāāⁿngiinūⁿ ndúú^{cū} espíritus chí nguéé n'daacā. Ní n'dee n'dái 'yaada chí vaatí snée tī yāāⁿ miiⁿ, 'yaada chí ní nguéé 'iinéé yiinú yā 'iiti. ³Caati n'daataa miiⁿ chí yāāⁿ Babilonia miiⁿ ní ca'a tá vino chí vaadi taaⁿ yeⁿe tá nducyaaca 'iiⁿyāⁿ ní cu'ú yā vino miiⁿ chííⁿ chí yeⁿe chí dinuunⁿdi tá. Ní reyes yeⁿe iⁿ'yeeⁿdí 'cūū cueⁿé yā na yāāⁿ miiⁿ ní dinuunⁿdi yā. Ní 'iiⁿyāⁿ yeⁿe iⁿ'yeeⁿdí 'cūū dííⁿ yā negocios chí 'cuiica yā cucáāvā poder yeⁿe vaadi 'cuiica yeⁿe tá.

⁴Tuuⁿmi ní ch'iindiveēⁿ táámá nduudu yeⁿe va'ai ch'ēeti nguuví chí ngaⁿa 'túú^{cā}: Ndís'tiū, 'iiⁿyāⁿ yeⁿé, nan'daa ní yeⁿe yāāⁿ miiⁿ caati nguéé dííⁿ ní nuunⁿdi ndúú^{cū} tá. Ní nguéé cuta'á ní yeⁿe vaadi yá'āi yeⁿe tá. ⁵Tí núúⁿndí yeⁿe

tá n'deeē n'dái chi ndaā ndii na va'ai cheeti nguuví. Ní Ndyuūs nin'gaacu yā yeⁿe chí diiⁿ tá chí nguée n'daacā. ⁶Ní ndís'tiī dííⁿ nī ndúúcū tá tan'dúúcā chí diiⁿ tá nduucú nī. Ní ca'á nī táⁿā miiⁿ 'uūvī vueltas yeⁿe chí tee tá ndís'tiī. Ní didiitú nī ndúúcū vino yeⁿe taza yeⁿe tá ndúúcū vino chí 'uūvī veces ditiinúú yeⁿe chí tee tá ndís'tiī. ⁷Ní dííⁿ nī chí 'cueenu taavi tá cuuvi ní cuuvi yá'ai yeⁿe tá n'deeē cá tan'dúúcā chí maaⁿ tá dich'ete maaⁿ ta táⁿā ndúúcū chí véé cá chí sta'a tá cáávā maaⁿ tá. Ní 'tíicā nacadiinuⁿ tá maaⁿ tá na staava yeⁿe tá. 'Muuⁿ caneé ní 'úú véé tan'dúúcā 'aama reina véé yā. Nguée n'daata nguá'āa 'úú. Ní nguē 'cuenú cuuvi. ⁸Ní yāā Babilonia, cáávā chí diiⁿ tá 'túúcā, n'deeē n'dái vaadi yá'āi ní ndaā vmnaaⁿ yeⁿe tá na 'áámá nguuví nūuⁿ, chííⁿ chí cuuvi yá'ai yeⁿe 'iiⁿ'yāⁿ s'eeⁿ. Ní 'cuūvī yā ní cheēcu yā chí ya'ai yā. Ní cuiicu yā ní cuūcu 'iiⁿ'yāⁿ s'eeⁿ ndúúcū nguuchi yáⁿā ti Señor Ndyuūs miiⁿ ní véé poder yeⁿe yā chí ch'ete taavi ca ní ngaⁿá yā chí condenado yā.

⁹Ní reyes yeⁿe yáⁿāa 'cúū chí cueⁿé yā ndúúcu tá ní dinuuⁿndí yā ndúúcu tá, ní n'deeē n'dái véé yeⁿe yā ti dííⁿ yā tan'dúúcā chí diiⁿ tá. Reyes miiⁿ cuéécú yā ní yuudu n'dái cuéécú yā taachi snaaⁿ yā táⁿā miiⁿ chí cuūcu tá ní snaaⁿ yā 'yaaⁿ'míⁿ yeⁿe tá. ¹⁰Ní 'va'á yā yeⁿe tá cáávā castigo yeⁿe tá ní cuééndí yā yaⁿ'ai yeⁿe tá ní caaⁿ'máⁿ yā: De'e chúúcā ya'ái díí, de'e chúúca ya'ái díí n'daataá chí yāā Babilonia chí ch'ete chí véé poder ch'ete yeⁿe, ti

cheeti 'áámá miníⁿ'yúⁿ nūuⁿ ndaā castigo yeⁿe dí.

¹¹Ní 'iiⁿ'yāⁿ chí dííⁿ yā negocio na iⁿ'yeeⁿdí 'cūū cuéécú yā ní yuudu n'dái cuéécú yā cáávā yāāⁿ Babilonia miiⁿ. Ní ya'ai yā cáávā yāāⁿ miiⁿ ti nguée véé mar 'áámá 'iiⁿ'yāⁿ chí cuuvi cuái yā yeⁿe mercancia chí ndē yā. ¹²Mar 'áámá 'iiⁿ'yāⁿ nguée cuái yā yeⁿe chí ndē yā chí 'dííⁿ'nguāⁿ ndúúcū 'dííⁿ'nguē, ndúúcū tuū chí yaⁿ'ai chííⁿvē, ndúúcū perlas ndúúcū tiinūuⁿ n'dai ca chí nguuví lino, ndúúcū tiinūuⁿ seda, ndúúcū tiinūuⁿ n'dai ca chí cuáⁿā ndúúcū tiinūuⁿ n'dai ca chí morado, ndúúcū tanducuéⁿē clase yeⁿe yáⁿá chí yuūdū ngéēⁿ, ndúúcū cosas yeⁿe marfil, ndúúcū nducuéⁿē cosas yeⁿe yáⁿá chí yaⁿ'ai chííⁿvē ndúúcū cūū cuááⁿ, ndúúcū cūū, ndúúcū tuū mármol, ¹³ndúúcū canela, ndúúcū especias chí yuudu ngéēⁿ, ndúúcū cúⁿ'úyaa, ndúúcū ungüento chí nguuví mirra ndúúcū perfumes chí dēve ngéēⁿ, ndúúcū vino, ndúúcū aceite, ndúúcū harina fino, ndúúcū trigo. Ní ndē yā ntūūⁿ 'iiti s'eeⁿ yeⁿe carga ndúúcū 'iiti cuūchí s'eeⁿ, ndúúcū 'yuūdūu s'eeⁿ, ndúúcū carros, ndúúcū 'iiⁿ'yāⁿ chí esclavos. ¹⁴Ní 'iiⁿ'yāⁿ s'eeⁿ chí dííⁿ yā negocios miiⁿ ngaⁿá yā yeⁿe yāāⁿ ch'ete miiⁿ: Tanducuéⁿē cosas yeⁿe chí nguée n'daacā n'dai chí neⁿe 'iiⁿ'yāⁿ yeⁿe yāāⁿ 'āā ntéé véé. Ní nducuéⁿē chí vaadi 'cuiica ndúúcū cosas chí n'dai taavi yeⁿe yāāⁿ miiⁿ 'āā ntéé véé. Ní 'āā ntéé cuuví nndaāca yā tanducuéⁿē denduⁿū yeⁿe.

¹⁵Ní 'iiⁿ'yāⁿ chí dííⁿ yā negocios ndúúcū 'iiⁿ'yāⁿ yeⁿe yāāⁿ ch'ete

miiⁿ, chííⁿ chi diíⁿ chi 'cuiicá yā.
 'Iiⁿyāⁿ s'eeⁿ cuēetindíí yaⁿái yā ti
 'va'a yā yeⁿe castigo yeⁿe yāāⁿ miiⁿ.
 Ní cuēcú yā ní yuudu n'dai 'cuai
 yā. ¹⁶Ní ngaⁿa yā: Dē'ē chúúcā
 ya'ai yeⁿe yāāⁿ Babilonia ch'ēete
 ti tan'dúúcā 'áámá n'daataá chi véé
 vestido yeⁿe tiinūⁿ lino chi yaⁿai
 chíí'vē ndúúcū tíinūⁿ chi cu'á
 ndúúcū morado. Ní véé adorno
 yeⁿe tá chi 'dí'nguāaⁿ ndúúcū
 tuūu chi yaⁿai chíí'vē ndúúcū
 perlas. ¹⁷Ní chēeti 'áámá hora nūuⁿ
 tanducuéⁿē vaadi 'cuiica yeⁿe
 yāāⁿ miiⁿ ní ch'iinu. Ní nducyaaca
 'iiⁿyāⁿ capitanes chi ngaⁿa ntiⁿnyuⁿ
 yeⁿe barcos ti diíⁿ yā negocios
 cucáávā barcos yeⁿe yā ní ndúúcū
 nducyaaca 'iiⁿyāⁿ chi caⁿá yā na
 barcos, ndúúcū nducyaaca 'iiⁿyāⁿ
 chi diíⁿ yā ntiⁿnyuⁿ yeⁿe barcos,
 nducyaaca 'iiⁿyāⁿ miiⁿ ní chēetindii
 yaⁿai yā. ¹⁸Ní taachi n'diichí yā
 'yaaⁿmiⁿ yeⁿe nguuchi yaⁿā yeⁿe
 yāāⁿ miiⁿ 'cai yiicú yā: ¿Chēe táámá
 yāāⁿ tan'dúúcā yāāⁿ 'cūū?

¹⁹Ní 'iiⁿyāⁿ s'eeⁿ ní s'neéⁿ yā
 iyaácá vmnaaⁿ tííⁿ yā ní chēcú yā.
 Ní yuudu n'dai chēcú yā. Ní 'caí yā:
 Dē'ē chúúcā ya'ai, dē'ē chúúcā ya'ai
 yeⁿe yāāⁿ ch'ēete miiⁿ. Ní nducyaaca
 'iiⁿyāⁿ chi véé barco yeⁿe yā vmnaaⁿ
 nuūⁿnīⁿyāⁿ ní 'cuíca yā cáávā
 vaadi 'cuiica yeⁿe yāāⁿ miiⁿ, chēeti
 'áámá hora nūuⁿ ch'iinu yāāⁿ ch'ēete
 miiⁿ ndúúcū chi véé yeⁿē.

²⁰Naati ndís'tií chi canéé na
 va'ai chēeti nguuví ndúúcū ndís'tií
 chí apóstoles, ndúúcū ndís'tií chi
 ngaⁿa nduudu yeⁿé Ndyuūs ní
 ndúúcū nducyaaca 'iiⁿyāⁿ chi yeⁿé
 Ndyuūs, nducyáácá nī yeenú nī
 yeⁿe yāāⁿ miiⁿ ti Ndyuūs caⁿa yā

chi condenado yāāⁿ miiⁿ. Ní Ndyuūs
 diíⁿ yā justicia yeⁿe ndís'tií.

²¹Tuuⁿmi ní ángel chi neené
 ditiinú yā sta'á yā 'áámá tuūu ch'ēete
 chi tan'dúúcā 'áámá tuūu ch'ēete
 yeⁿe molino. Ní canuúⁿ yā tuūu miiⁿ
 na nuūⁿnīⁿyāⁿ ní ngaⁿá yā. 'Tífcā:
 Ní diitu dituuví yā yāāⁿ Babilonia
 chi yāāⁿ ch'ēete miiⁿ ní 'āā ntéé
 cuuvi n'diichí yā yāāⁿ miiⁿ. ²²Ní 'āā
 ntéé n'giindiveeⁿ yā na yúúní yeⁿe
 yāāⁿ miiⁿ música yeⁿe 'iiⁿyāⁿ chi
 di'cuēcú yā arpas, ndúúcū música
 yeⁿe 'iiⁿyāⁿ músicos, ndúúcū música
 yeⁿe 'iiⁿyāⁿ chi i'tiiví yā flautas,
 ndúúcū 'iiⁿyāⁿ chi di'cuēcú yā
 trompetas. Ní nguée véé 'iiⁿyāⁿ chi
 idiiⁿ ntiⁿnyuⁿ na yāāⁿ miiⁿ. Ní nguée
 n'giindiveeⁿ yā chi 'cuēcú tuūu
 yeⁿe molino na yāāⁿ miiⁿ. ²³Áā ntéé
 n'diichí yā chideēve yeⁿe lámparas
 yeⁿe yāāⁿ miiⁿ. Áā ntéé n'giindiveeⁿ
 yā ruido yeⁿe 'viicú chi diíⁿ 'iiⁿyāⁿ
 chi n'giindivaacú yā. Áará chi 'iiⁿyāⁿ
 yeⁿe yāāⁿ miiⁿ ní diíⁿ yā negocios ní
 ch'ēete n'dai ca poder yeⁿé yā nguée
 ti tanáⁿa yā yeⁿe iⁿ'yeeⁿdí 'cūū, ní
 'iiⁿyāⁿ yeⁿe yāāⁿ miiⁿ ní chinnche'í
 yā 'iiⁿyāⁿ yeⁿe tanáⁿā naciones
 ndúúcū dendu'ū yeⁿe vaadi ngaatu
 chi diíⁿ yā.

²⁴Ní na yāāⁿ ch'ēete miiⁿ 'iiⁿyāⁿ
 nndaāca yā yuūuⁿ yeⁿé 'iiⁿyāⁿ
 chi ngaⁿá yā nduudu cuaacu
 yeⁿé Ndyuūs ndúúcū yuūuⁿ yeⁿé
 'iiⁿyāⁿ chí yeⁿé Ndyuūs ndúúcū
 yuūuⁿ yeⁿe nducyáácá 'iiⁿyāⁿ yeⁿe
 iⁿ'yeeⁿdí 'cūū chi ch'ií yā.

19 Cuayiivi miiⁿ ní ch'iindiveeⁿ
 'áámá nduudu chi ch'ēete
 n'dai yeⁿe na va'ai chēeti nguuví
 chi yeⁿe néené 'yaaⁿ n'dai 'iiⁿyāⁿ. Ní
 ngaⁿa yā:

Aleluya. Dich'εεte yú Ndyuūs
ti nadanguáⁿai yā s'uuúⁿ. Ní
vaadi dεεve n'gii ndúúcū
tanducuéⁿē poder ní yeⁿe
Ndyuūs yeⁿe yú.

² Caati Ndyuūs n'diichí yā
nuuⁿndi yeⁿe 'iiⁿ'yāⁿ ndúúcū
nduudu cuaacu chí n'dai.
Ngaⁿ'á yā chi n'daataá chi
cueⁿe tá ndúúcū saⁿ'á s'eeⁿ
ní condenado tá ti n'daataa
míⁿ ní diiⁿ tá chi 'iiⁿ'yāⁿ yeⁿe
yáⁿ'āa cūū ní dinuuⁿndi yā
cáávā chi nééné dinuuⁿndi tá.
Ndyuūs ca'a yā castigo táⁿ'ā
miiⁿ caati ngée tá yuūuⁿ yeⁿe
'iiⁿ'yāⁿ chi dichíⁿ'vε yā Cristo
taachi ch'iiⁿ'nuⁿ tá 'iiⁿ'yāⁿ s'eeⁿ.

³ Ní n'deeē n'dái 'iiⁿ'yāⁿ ngaⁿ'a ntúuⁿ
yā: Aleluya. Dich'εεte yú Ndyuūs.
'Yaaⁿ'miⁿ yeⁿe n'daataá miiⁿ chi cuucu
yaⁿ'ā táⁿ'ā 'áámá chεε 'yaaⁿ'miⁿ yeⁿe
tá chi castigo yeⁿe tá cueⁿe daāⁿmaⁿ.

⁴ Ní ndu'u ndiicú cuūuⁿ 'iiⁿ'ntyéⁿē
ndúúcū ndu'u cuūuⁿ 'iiⁿ'yāⁿ
ch'eēndiitⁿndi yā nanááⁿ Ndyuūs chi
véε yā na trono yeⁿé yā ní nducyaaca
yā ndúúcū naáⁿ yā na yáⁿ'āa chi'téenu
yā Ndyuūs ní caⁿ'a yā 'tíicā: Aleluya.
Dich'εεte yú Ndyuūs.

⁵ Ní ch'iindiveéⁿ 'áámá nduudu
yeⁿe trono miiⁿ chi ngaⁿ'a 'tíicā:
Nducyáácá nī canéé chi dich'εεte
nī Ndyuūs yeⁿe yú. Ndís'tii
chi ngaⁿ'a ntiiⁿ'nyúⁿ nī ndúúcū
tanáⁿ'a nī, nducyaaca nī chi
dichíⁿ'vε nī Ndyuūs ní 'vaⁿ'á nī
yeⁿe yā.

**'Viicu yeⁿē chi ch'iindivaacú
'iiⁿ'yāⁿ chi nguuví 'iiti cuūchí**

⁶ Ní táámá vmnéⁿē ch'iindiveéⁿ
'áámá nduudu yeⁿē n'deeē n'dái

'iiⁿ'yāⁿ tan'dúúcā chi n'gεεcú naachí
'yaaⁿ n'dái nuūⁿnīⁿ ní tan'dúúcā chi
n'gεecu diituu n'dái daavi. Ní ngaⁿ'a
yā:

Aleluya. Dich'εεte yú Ndyuūs
ti Señor yeⁿe yú, Ndyuūs
yeⁿe yú chí véé tanducuéⁿē
dendu'ū poder nduucú yā
'āā ngaⁿ'a ntiiⁿ'nyúⁿ yā yeⁿe
tanducuéⁿē dendu'ū.

⁷ Maaⁿ ní yeenu taavi yú ní
véé vaadi yeenú nanáaⁿ yú
ní caⁿ'a yú chí ch'εεte taavi
ca Ndyuūs ti ndaā tiempo
chi 'iiⁿ'yāⁿ chi nguuví 'iiti
cuūchí ní 'caandavaacú
yā. Ní n'daataá yeⁿe yā 'āā
véé yaaⁿ tá. N'daataá miiⁿ ní
nducyaaca 'iiⁿ'yāⁿ chí i'téenu
yā Cristo.

⁸ Ní caⁿ'á yā n'daataa yeⁿe yā
'áámá vestido chí yeⁿe lino
chí yaⁿ'ai chíⁿ'vε chí dεεve ní
cuéē.

Ní tiinūuⁿ lino miiⁿ ní chíⁿ'f chí vida
chí n'dai taavi yeⁿé 'iiⁿ'yāⁿ chí yeⁿé
Ndyuūs.

⁹ Tuuⁿ'mi ní ángel chí candée yā
'úú caⁿ'a yā chí yā 'úú. Díⁿ, Juan,
dingúuⁿ di 'tíicā: De'e chúúcā
n'dai cáávā 'iiⁿ'yāⁿ s'eeⁿ chí 'áámá
'caí yā 'iiⁿ'yāⁿ s'eeⁿ chí cuchíⁿ yā
naachi 'iiⁿ'yāⁿ chí nguuví 'iiti
cuūchí 'caandavaacú yā ní 'iiⁿ'yāⁿ
s'eeⁿ che'e nguiinú yā yeⁿe 'viicu
miiⁿ. Ní ángel miiⁿ caⁿ'a yā chí yā
'úú: Nduudú 'cūū ní yeⁿé Ndyuūs ní
cuaacu.

¹⁰ Ní 'úú chiintii'yá na ca'a ángel
miiⁿ chí dich'εεte ángel miiⁿ. Ní
caⁿ'a yā: Nguéé 'tíicā diiⁿ di. 'Úú
ntúūⁿ dichíⁿ'vε Ndyuūs tan'dúúcā
díⁿ ndúúcū hermanos yeⁿē di

dichí'vê nî Ndyuūs ní nga^{na} nî nduudu cuaacu ye^{ne} Jesucristo. Dii, cu'téenu di Ndyuūs. Ní 'ii^{nyā} chi nga^{na} yā nduudu cuaacu ye^{ne} Cristo ní nga^{na} á yā cáávā chi Ndyuūs ch'i'í yā 'ii^{nyā} s'eeⁿ chiiⁿ chi nga^{na} á yā.

**Ye^{ne} 'áámá 'ii^{nyā} chi
canduú yā 'yuūdūu cuéē**

¹¹Tuu'mi ní n'diichí chi canda'āi va'ai cheeti nguuví ní can'dāā 'áámá 'yuūdūu cuéē. Ní Cristo chi canduú yā 'yuūdūu miiⁿ chi duuchí yā ní Áámá N'daacā N'dai yā ní Cuaacú yā. Ní 'ii^{nyā} miiⁿ ní diíⁿ yā tanducuéⁿē chi cuaacu taachi diíⁿ yā caandaá ní n'diichí yā nuuⁿndi ye^{ne} 'ii^{nyā} s'eeⁿ. ¹²Ní nduutinaáⁿ yā miiⁿ ní tan'dúúcā nguuchi ya^{na}, 'tíicā nduutinaáⁿ yā. Ní canéé n'deee n'dái coronas na tiíⁿ yā. Ní canéé nguūⁿ 'áámá chi duuchi yā chi mar 'áámá 'ii^{nyā} nguéé n'diichí yā. Dámaāⁿ 'ii^{nyā} miiⁿ deenú yā de'ē chi duuchí yā. ¹³Ní catecaí yā chi canuuⁿ yā ndiituú yúuúⁿ. Ní chi duuchí yā ní Nduudu ye^{ne} Ndyuūs. ¹⁴Ní cuaaⁿ daamí yā ní n'dāā n'deee n'dái soldados ye^{ne} va'ai cheeti nguuví ndúúcu catecaí yā chi lino chi ya^{na}ai chí'vê chi cuéē ní deēve. Ní soldado candúu ntúuⁿ yā 'yuūdūu cuéē ye^{ne} yā. ¹⁵Ní na cheendí Cristo can'dāā 'áámá machete nduu uūvī lados 'caāiⁿ. Ní ndúúcu chuū n'nuū cá'ai yā 'ii^{nyā} ye^{ne} naciones. Tuu'mi ní caa^{na}maⁿ ntiiⁿnyúⁿ yā diituú ye^{ne} naciones ndúúcu 'áámá nduucu cūū. Ní ngii ca'a yā lugar chi 'ii^{nyā} s'eeⁿ sta'á yā vino chi nuūⁿnī ye^{ne} n'g'uí uvas chi 'ii^{nyā} dinde'éi yā ndúúcu cá

yā. Ní Cristo ca'a yā 'ii^{nyā} s'eeⁿ chi cu'u yā vino miiⁿ chi castigo ye^{ne} vaadi taaⁿ ye^{ne}é Ndyuūs chi véé tanducuéⁿē poder chi véé ní ye^{ne} yā. ¹⁶Ní canéé nguūⁿ na vestido ye^{ne} yā ní na 'diiⁿmaⁿ yā chi duuchí 'cūū: Rey ch'ēete ye^{ne}ē nducuéⁿē reyes chi véé, Señor 'iiví yā ch'ēete ye^{ne} nducyaaca señores 'iivi chi véé.

¹⁷Ní cuayiví nūuⁿ n'diichí 'aama ángel cheendii yā vmaāⁿ 'yá^{na}. Ní ángel miiⁿ yuudu n'dái n'gai yā ní ca^{na} yā chii yā nducyaaca 'iiti chi ngaá tī nánguuví: Ndís'tii 'iiti s'eeⁿ cuchíi nī ní nduuvidaamá nī chi che^{ne} nguuiⁿ nī chi ye^{ne}ē 'viicu ye^{ne}é Ndyuūs chi ch'ēete. ¹⁸Cuchíi nī ní che'ē nī yuute ye^{ne} reyes ndúúcu yuute ye^{ne}ē capitanes ndúúcu yuute ye^{ne} sa^{na} chi véé ca fuerzas ye^{ne} yā ndúúcu yuute ye^{ne} 'yuūdūu ní ye^{ne} nducyaaca 'ii^{nyā} chi sндуú yā 'yuūdūu ndúúcu yuutē ye^{ne} nducyáácá 'ii^{nyā}, 'ii^{nyā} chi libre yā ní 'ii^{nyā} chi esclavo yā, 'ii^{nyā} chi nga^{na} n'tiiⁿnyuⁿ ndúúcu taná^{na} 'ii^{nyā}.

¹⁹Tuu'mi ní n'diichí 'iiti monstruo chi ch'ēete ca ndúúcu reyes ye^{ne} iⁿ'yeeⁿdí 'cūū ndúúcu soldados ye^{ne} yā chi nduuvidaamá yā ndúúcu 'iiti miiⁿ chi diíⁿ yā caandaá ndúúcu 'ii^{nyā} chi canduú yā 'yuūdūu cuéē miiⁿ ndúúcu soldados ye^{ne}é yā. ²⁰Ní 'ii^{nyā} miiⁿ chi canduú yā 'yuūdūu cuéē miiⁿ sta'á yā monstruo miiⁿ chi 'iiti preso tī. 'Tiicá ntúūⁿ sta'á yā chi preso sa 'áámá sa^{na} chi nga^{na} sa chi profeta sa, ní nguéé profeta sa. Naati sa^{na} miiⁿ diiⁿ sa señas ndúúcu vaadi n'gínūu ní chinche'éi yā 'ii^{nyā} chi canéé ndúúcu sello ye^{ne}é tī na cuerpo ye^{ne}é yā. Ní i'téenu yā

'iiti santo yeⁿé tī. Níicú nduu 'uuví sa chi preso sa, 'iⁿyāⁿ miiⁿ sta'á yā nduu 'uuví sa neⁿe chi canduuchi sa ní chin'dáá nuún yā nduu 'uuví sa na nuūⁿnīⁿyáⁿā yeⁿe ngiichi yaⁿā chi ngiichi ndúúcū tuūu chi azufre. ²¹Áámá yā ndúúcū machete 'uuvi lados 'caāiⁿ chi canéé na cheendí yā chi canduú yā na 'yuūdūu cuéé ch'iⁿnúⁿ yā tanáⁿā soldados yeⁿe 'iiti monstruo. Ní nducyaaca 'yáádá che'é tī nducuéⁿē yuūtē yeⁿe soldados ní chiitu 'yáádá s'éeⁿ yeⁿe yúútē yeⁿe yā.

Yeⁿe mil nduūyū

20 Cuayiivi ní n'diichí 'áámá ángel chi cuch'éeⁿ yā yeⁿe va'ai ch'etī nguuví ní ndéé yā na ta'a yā llave yeⁿe yiive yáⁿāa ndúúcū 'áámá cadena ch'etē ca. ²Ní ángel miiⁿ sta'á yā 'iiti dragón chi cúú miiⁿ chi canéé tī ndii tiempo chi chó'oo chi nguuví diablo o yááⁿnguiniūuⁿ chi Satanás. Ní ángel miiⁿ dichíichí yā 'iiti dragón miiⁿ ndúúcū cadena ch'etē ca. Ní canéé tī 'tíicā ch'etī 'áámá mil nduūyū. ³Ní ángel miiⁿ chin'dáá nuún yā 'iiti dragón miiⁿ na yiive yáⁿāa naachi canee chiichí tī. Ní nan'gaadí yā cheendi va'ai yeⁿē. Ní s'neéⁿ yā 'áámá sello vmnaaⁿ cheendi va'ai miiⁿ. Ní 'iiti dragón miiⁿ 'āa ntéé cuuvi cannche'etí tī 'iⁿyāⁿ yeⁿe naciones ndíí 'cuiinu 'áámá mil nduūyū. Ní cuayiivi ní canéé chi n'daatií yā 'iiti dragón miiⁿ 'áámá tiempo 'lííⁿ nuūⁿ.

⁴Ní cuayiivi ní n'diichí tronos ní 'iⁿyāⁿ véé yā na tronos. Ní 'áámá 'iⁿyāⁿ ca'á yā poder 'iⁿyāⁿ s'eeⁿ chi dííⁿ yā juzgar 'iⁿyāⁿ. Ní n'diichí

almas yeⁿe 'iⁿyāⁿ ndiitaá daandu yā ti caⁿa cuaacú yā yeⁿe Jesucristo. Ní caⁿa ntúuⁿ yā nduudu cuaacu yeⁿé Ndyuūs. 'Iⁿyāⁿ s'eeⁿ nguéé ch'i'téenu yā 'iiti monstruo miiⁿ, ní nguéé ch'i'téenu yā 'iiti santo yeⁿé tī. Ndíí nguéé ndúú ca'a yā lugar 'iiti monstruo miiⁿ chi s'neéⁿ tī sello yeⁿé tī ncheeté yā o ta'á yā. Ní 'iⁿyāⁿ s'eeⁿ ch'etinduuchí ntuuⁿ yā ní ngaⁿa ntiiⁿnyúⁿ yā dáámá ndúúcū Cristo ch'etī 'áámá mil nduūyū. ⁵Chuū miiⁿ ní vmnááⁿ vmnaaⁿ chi 'iⁿyāⁿ s'eeⁿ nanduuchí ntuuⁿ yā naati tanáⁿā 'iⁿyāⁿ chi n'díí yā nguéé nduuchí ntúuⁿ yā ndíí chi chó'oo 'áámá mil nduūyū miiⁿ. ⁶De'e chúúcā yeenú 'iⁿyāⁿ chí yeⁿé Ndyuūs, 'iⁿyāⁿ chi vmnááⁿ vmnaaⁿ caⁿá yā ch'etinduuchí ntuuⁿ yā yeⁿē nguaaⁿ tináⁿā. Maaⁿ ní ndii chííⁿ ndii 'úúví cuuvi 'cuūvi 'iⁿyāⁿ nguéé véé poder yeⁿe chi tuneenⁿ 'iⁿyāⁿ s'eeⁿ chi 'cuūvi yā. Ní 'iⁿyāⁿ s'eeⁿ ní cuuvi chiiduú s'eeⁿ yeⁿe Ndyuūs ní yeⁿe Cristo ní caaⁿmaⁿ ntiiⁿnyúⁿ yā dáámá ndúúcū Cristo ch'etī 'áámá mil nduūyū.

⁷Ní taachi ch'iinu 'áámá mil nduūyū miiⁿ n'daatií yā yááⁿnguiniūuⁿ chí ndíchiichi sa ní cuch'ee sá yeⁿe yiivéé chi vácūū naachi canéé sa. ⁸Ní caⁿa sa chiica sa chi cannche'ei sa 'iⁿyāⁿ yeⁿe naciones yeⁿe núúⁿmánⁿ íⁿyeedíⁿ chi 'iⁿyāⁿ s'eeⁿ caⁿá yā lado yeⁿē sa. Ní cannche'ei sa rey Gog ndúúcū yáaⁿ Magog chi yáaⁿ yeⁿe yā. Ní nadidáámá sá nducyaaca 'iⁿyāⁿ chi dííⁿ sa caandaá. Ní 'iⁿyāⁿ s'eeⁿ ndúúcū sa ní ndee n'dái yā tan'dúúcā yaⁿā ndúútí yeⁿē yíicú. ⁹Ní 'iⁿyāⁿ s'eeⁿ cueⁿé yā

nuuⁿmaⁿ iⁿ'yeeⁿdí ní cuaaⁿ diituu ní nuuⁿmaⁿ ndiivi yeⁿ'e campamento yeⁿ'e 'iiⁿ'yāⁿ chi yeⁿ'é Ndyuūs ní yeⁿ'e yáāⁿ Jerusalén chi Ndyuūs neené neⁿ'e. Ní Ndyuūs dicho'ó yā chi chingéé nguuchi yaⁿ'ā yeⁿ'é na va'ai cheeti nguuvi. Ní 'iiⁿ'yāⁿ s'eeⁿ ngiichi ndúúcū nguuchi yaⁿ'ā miiⁿ ní d'cuiinú yā. ¹⁰Ní yááⁿ'n'guiinūuⁿ miiⁿ chi diablo chi chinnche'ei sá 'iiⁿ'yāⁿ, 'áámá yā chin'dáánuúⁿ yā saⁿ'ā miiⁿ ndii nuūⁿnīⁿ'yāⁿ'ā chi ngiichi ndúúcū tuūu azufre naachi 'āā chin'dáánuúⁿ yā 'iiti monstroo miiⁿ ndúúcū profeta chi nguée caⁿ'a yā nduudu cuaacu. Ní 'cuenú yā cuuvi na lugar miiⁿ ndii nguuvi ndíí n'gaaⁿ. Ní cueⁿ'e daāⁿmaⁿ ní 'cuenú yā cuuvi.

**Cristo n'diichí yā nuuⁿndi
yeⁿ'e 'iiⁿ'yāⁿ taachi ch'iindí
yā na trono cuée yeⁿ'e yā**

¹¹Cuayiivi ní n'diichí 'áámá trono chi ch'ēte ní cuée ní 'áámá 'iiⁿ'yāⁿ vée yā na trono miiⁿ. Ní na yáⁿ'āa ndúúcū nanguuvi cueⁿ'e yeⁿ'é nanáaⁿ yā. 'Āā ntée mar táámá lugar naachi cuuví cuēetinee na yáⁿ'āa ndúúcū nanguuvi. ¹²Ní n'diichí 'iiⁿ'yāⁿ s'eeⁿ chí n'dii yā, tináⁿ'ā chi n'gēte yā chi ngaⁿ'a ntiiⁿ'nyuⁿ yā ndúúcū tanáⁿ'ā tináⁿ'ā. Nducyaaaca yā ní cheetindii yā nanáaⁿ Ndyuūs. Ní Ndyuūs nan'gaaⁿ yā libros yeⁿ'e yā. Ní nan'gaaⁿ yā táámá libro chí libro yeⁿ'e vida cueⁿ'e daāⁿmaⁿ. Ní Ndyuūs n'diichí yā nuuⁿndi yeⁿ'e tináⁿ'ā s'eeⁿ yeⁿ'é dendu'ū chi canée nguūⁿ na libro s'eeⁿ tan'dúúcā chi dííⁿ yā. ¹³Ní 'iiⁿ'yāⁿ chi ch'ii yā nguaaⁿ nuūⁿnīⁿ'yāⁿ'ā ní nan'dáa yā. Ní tanáⁿ'ā chi snú yā na lugar

yeⁿ'e 'iiⁿ'yāⁿ chi n'díí ní nan'dáa yā. Ní Cristo n'diichí yā nuuⁿndi yeⁿ'e ca'áámá ca'aamá yā tan'dúúcā chi dííⁿ yā. ¹⁴Tuuⁿ'mi ní vaadī n'gii ndúúcū lugar yeⁿ'é ndúúcū 'iiⁿ'yāⁿ chi n'díí yeⁿ'e 'áámá yā cannuúⁿ yā ná nuūⁿnīⁿ'yāⁿ'ā chí ngiichi. Ní nuūⁿnīⁿ'yāⁿ'ā chí ngiichi miiⁿ, chííⁿ chí ndíí 'úúví vaadī n'gii ní yeⁿ'é 'iiⁿ'yāⁿ chi n'díí yā. ¹⁵'Áámá 'iiⁿ'yāⁿ chin'dáa nuuⁿ yā na nuūⁿnīⁿ'yāⁿ'ā chí ngiichi miiⁿ nducyáácá 'iiⁿ'yāⁿ chí nguée canee n'guūⁿ chí duuchi yeⁿ'e yā na libro yeⁿ'e vida cueⁿ'e daāⁿmaⁿ.

**Yeⁿ'e va'ai cheeti nguuvi ngai
ndúúcū iⁿ'yeeⁿdí ngai**

21 Maaⁿ ní n'diichí táámá va'ai cheeti nguuvi chi ngai ndúúcū 'áámá yáⁿ'āa chí ngai ti va'ai cheeti nguuvi chí vmnááⁿ vmnaaⁿ miiⁿ ndúúcū yáⁿ'āa chí vmnááⁿ vmnaaⁿ miiⁿ ní chó'oo yeⁿ'é. Ní 'tiicá ntúūⁿ 'āā ntée vée nuūⁿnīⁿ'yāⁿ'ā. ²Ní 'úú, Juan, n'diichí yáāⁿ chí dēve chí yáāⁿ Jerusalén chí ngai chí chiicā yeⁿ'e na va'ai cheeti nguuvi naachi canée Ndyuūs. Ní yáāⁿ miiⁿ ní yēve taavi tan'dúúcā 'aama n'daataá chí caama 'caandavaacu tá ní dēve idiiⁿ tá ndúúcū tá cáávā novio yeⁿ'e tá. ³Ní ch'iindiveéⁿ 'áámá nduudu ch'ēte yeⁿ'e na va'ai cheeti nguuvi chí caⁿ'a 'túúcā: Cuin'diichí nī maaⁿ. Va'ai yeⁿ'e Ndyuūs ní canee ndúúcū 'iiⁿ'yāⁿ s'eeⁿ ní Ndyuūs canée yā nguaaⁿ 'iiⁿ'yāⁿ s'eeⁿ. Ní Ndyuūs canée yā ndúúcū 'iiⁿ'yāⁿ s'eeⁿ. Ní 'iiⁿ'yāⁿ s'eeⁿ ní cuuvi 'iiⁿ'yāⁿ yeⁿ'é yā. Ní maááⁿ Ndyuūs miiⁿ ní cuuvi Ndyuūs yeⁿ'é yā. ⁴Ndyuūs didēvé yā nuūⁿnīⁿ

nduutinaáⁿ yā yeⁿ'e nduutinaáⁿ
 'iiⁿ'yāⁿ s'eeⁿ. 'Āā ntéé cuuvi 'cuūvi yā.
 'Āā ntéé cuuvi ya'ai ca yā ní 'āā ntéé
 cuēecu yā. 'Āā ntéé cuuvi 'cueenú yā
 cuuvi ti dendú'ū yeⁿ'e cuááⁿ vmnaaⁿ
 'āā chó'ōo.

⁵Tuu'mi ní 'iiⁿ'yāⁿ chi vée yā
 na trono miiⁿ ní caⁿ'a yā: Ndis'tii
 n'diichí nī. 'Úú ní dííⁿ tanducuéⁿ'ē
 dendu'ū chi nduuví ngai. Ní 'iiⁿ'yāⁿ
 miiⁿ caⁿ'a yā chii yā 'úú: Dii,
 Juan, dingúuⁿ di nduudu s'eeⁿ ti
 nduudu s'eeⁿ ní nduudu cuaacu. Ní
 nducyaaca 'iiⁿ'yāⁿ cuuvi cu'téenu yā
 nduudu s'eeⁿ.

⁶Cuayivi caⁿ'a yā chii yā 'úú
 'tíicā: 'Úú dīn'daí nducuéⁿ'ē. 'Úú ní
 yeⁿ'e cuaaⁿ naachi ínga'ā ní ndíí
 cuaaⁿ ná 'cuiinu tan'dúucā letras
 A ndíí Z yeⁿ'e alfabeto. 'Iiⁿ'yāⁿ chi
 yaaca yā 'úú ní ca'á nuūⁿnīⁿ chi cu'u
 yā tanducuéⁿ'ē chi neⁿ'é yā ní nguée
 nadí'vē yā cáávā nuūⁿnīⁿ miiⁿ chi
 vida cueⁿ'e daāⁿmaⁿ. ⁷'Iiⁿ'yāⁿ chi
 cuchée yā yeⁿ'ē tanducuéⁿ'ē 'úú ní
 ca'á tanducuéⁿ'ē chuū chi cuuvi
 yeⁿ'é yā. Ní 'úú cuuvi Ndyuūs yeⁿ'e
 yā ní 'iiⁿ'yāⁿ s'eeⁿ ní cuuvi daiyá.

⁸Naati 'iiⁿ'yāⁿ chí 'va'a yā ndúúcū
 'iiⁿ'yāⁿ chí nguée i'téenu yā o 'iiⁿ'yāⁿ
 chi nguée neⁿ'e yā 'iiⁿ'yāⁿ, ndúúcū
 'iiⁿ'yāⁿ chi n'gi'nnúⁿ yā 'iiⁿ'yāⁿ,
 ndúúcū 'iiⁿ'yāⁿ chi caⁿ'á yā ndúúcū
 n'daataa o isaⁿ'ā chi nguée yeⁿ'e yā,
 ndúúcū 'iiⁿ'yāⁿ chi nadiiⁿ dendu'ū
 yeⁿ'e ngaatu, ndúúcū 'iiⁿ'yāⁿ chi
 i'téenu yā santos chi ídolos, ndúúcū
 'iiⁿ'yāⁿ chi yaadí yā, nducyaaca
 'iiⁿ'yāⁿ s'eeⁿ ní canée chi caⁿ'á yā
 nuūⁿnīⁿyáⁿ'ā chi ngiichi ndúúcū
 yaⁿ'ā ní ndúúcū tuūu azufre. Chuū
 ní chiiⁿ chii ndii 'uūvī cúúví 'cuūvi
 yā.

Yeⁿ'e yāāⁿ Jerusalén chí ngai

⁹Tuu'mi ní ndaā nanááⁿ 'úú 'áámá
 chee ángel naachi ndēēche yā chí vée
 'cuūtií yeⁿ'é yā, 'cuūtií s'eeⁿ ndúúcū
 ndēēche vaadí ya'ai yeⁿ'e cuaaⁿ na
 'cuiinu. Ní caⁿ'a yā chii yā 'úú: Díí,
 Juan, cuchíí di 'muuⁿ ní 'úú 'cuuⁿ'míⁿ
 dii du'u chi novia chi n'daataá yeⁿ'e
 'iiⁿ'yāⁿ chi nguuvi 'iiti cuūchí.

¹⁰Ní chuū ní yeⁿ'e chi n'diichí
 taachi caneé maaⁿ poder yeⁿ'e
 Espíritu N'dai yeⁿ'é Ndyuūs. Angel
 candée yā 'úú naachi vée 'áámá
 yiicū ch'ēete ní yaacu. Ní ch'iⁿ'í yā
 'úú yāāⁿ ch'ēete ní dēeve chi nguuvi
 Jerusalén chi cuch'éeⁿ yeⁿ'e na va'ai
 cheeti nguuvi yeⁿ'e nanááⁿ Ndyuūs.
¹¹Yāāⁿ miiⁿ ní dēevé ngii ndúúcū
 yeⁿ'é Ndyuūs chi dēevé ngii. Ní dēevé
 ngii yeⁿ'e yāāⁿ miiⁿ ní tan'dúúcā
 'áámá tuūu chi yaⁿ'ai chí'vē chi
 tan'dúúcā tuūu jaspe chí dēevé
 tan'dúúcā cristal. ¹²Ní vée 'áámá
 ncheēti nuuⁿmaⁿ ndiivi na yāāⁿ
 miiⁿ ndúúcū ndichúúví cheendi
 va'āi ch'ēete yeⁿ'ē. Ní vée ndichúúví
 ángeles 'áámá 'áámá yā ní
 nguaindaí yā 'áámá 'áámá cheendi
 va'āi ch'ēete miiⁿ. Ní chi duuchi
 chi canée nguūⁿ vmnaaⁿ ca'áámá
 ca'áámá cheendi va'ai ch'ēete miiⁿ
 ní 'áámá yeⁿ'e chi duuchi yeⁿ'e chi
 ndu'u ndichúúví tribus yeⁿ'e 'iiⁿ'yāⁿ
 chi Israel chi judíos. ¹³Ní vée 'iinū
 cheendi va'āi n'gēete 'áámá 'áámá
 lado yeⁿ'ē yāāⁿ miiⁿ. Cuaaⁿ naachí
 can'daā 'yáⁿ'ā vee 'iinū cheendi
 va'āi. Ní cuaaⁿ na 'niiⁿ'nuⁿ vée 'iinū
 cheendi va'āi, ní cuaaⁿ ndiiyā vée
 'iinū cheendi va'āi, ní cuááⁿ na
 ngiiya 'yáⁿ'ā vée 'iinū cheendi va'āi.
¹⁴Ní cimientu yeⁿ'e yāāⁿ miiⁿ vée

ndichúúví tuúu chi cimientó yeⁿē. Ní chi duuchi yeⁿe ndu'ū ndichuuví apóstoles yeⁿe 'iⁿ'yāⁿ chi duuchi 'iiti cuūchī, 'áámá 'áámá chi duuchí yā canéé nguūⁿ vmnaaⁿ 'áámá 'áámá tuúu miⁿ.

¹⁵Ní ángel miⁿ chi ngāⁿa yā ndúúcu 'úú ndéε yā 'áámá tááⁿ ndúú yeⁿe 'díⁿ'nguāⁿ chi dicaadí yā yááⁿ miⁿ ndúúcu cheendi va'āi ch'εεte miⁿ yeⁿē ndúúcu ncheētí miⁿ yeⁿē.

¹⁶Ní yāāⁿ miⁿ ní cuadrada ní chi ch'ee'nuu dáámá nūuⁿ ndúúcu chi ch'ēēnuu. Ní ángel miⁿ ní dicaadí yā yāāⁿ miⁿ ndúúcu nduu yeⁿe 'díⁿ'nguāⁿ. Ní caadi yeⁿe yāāⁿ miⁿ ní 'uūví mil canéé 'uūví cientos kilómetros yeⁿē. Ní chí ch'ee'nuu miⁿ ní chi ch'ēēnuu ní chi yaacu yeⁿe yāāⁿ miⁿ 'āā daamá nūuⁿ. ¹⁷Ní ángel miⁿ dicaadí yā nancheētí miⁿ. Ní ngíí 'iinū ngeεcu cuūuⁿ metros chi ángel miⁿ dicaadí yā. Ní caadí miⁿ ní dáámá ndúúcu caadí yeⁿe chi caadí 'iⁿ'yāⁿ chi snee iⁿ'yeeⁿdí 'cūū.

¹⁸Ní ncheētí miⁿ ní chin'dai ndúúcu tuúu jaspe. Ní yāāⁿ miⁿ ní chin'dai yeⁿe dámaāⁿ 'díⁿ'nguāⁿ puro. Ní tan'dúúca chi 'nááⁿ vidrio dεεve, 'tíicā yāāⁿ miⁿ. ¹⁹Cimiento yeⁿe ncheētí miⁿ ndíí adornado ndúúcu tanducuéⁿē tuúu chí yaⁿai chíⁿvē. Cimiento chí vmnááⁿ vmnaaⁿ miⁿ ní yeⁿe tuúu jaspe, ndii chíⁿ ndii 'uūví miⁿ ní yeⁿe tuúu zafiro, ndii chíⁿ ndii 'ínú miⁿ ní yeⁿe tuúu ágata ní ndii chíⁿ ndii cuūuⁿ miⁿ ní yeⁿe tuúu esmeralda. ²⁰Ndii chíⁿ ndii nyuⁿu miⁿ ní yeⁿē tuúu ónice, ní ndii chíⁿ ndii niyaaⁿ miⁿ ní yeⁿē tuúu cornalina, ní ndii chíⁿ ndii ndéēchē ní yeⁿe tuúu

crisólito, ní ndii chíⁿ ndii niiⁿniⁿ ní yeⁿe tuúu berilo, ní ndii chíⁿ ndii nuuⁿ ní yeⁿe tuúu topacio, ní ndii chíⁿ ndii ndiichi ní yeⁿe tuúu crisoprasa, ní ndii chíⁿ ndicháámá ní yeⁿe tuúu jacinto, ní ndii chíⁿ ndichúúví ní yeⁿe tuúu amatista. ²¹Ní ndu'u ndichúúví cheendi va'āi n'geεte miⁿ ní ndiichúúví perlas. Ní ca'áámá ca'áámá cheendi va'āi ch'εεte miⁿ ní 'áámá perla nūuⁿ. Ní yúúní ch'εεte yeⁿe yāāⁿ miⁿ dámaāⁿ 'díⁿ'nguāⁿ puro ní dinááⁿ tan'dúúca vidrio dεεve.

²²Ní 'úú nguéé n'diichí mar 'áámá yaācu na yāāⁿ miⁿ ti Señor chi Ndyuūs chi véé tanducuéⁿē dendu'ū poder yeⁿe yā ndúúcu 'iⁿ'yāⁿ chi nguuví 'iiti cuūchī miⁿ, 'iⁿ'yāⁿ s'uuuⁿ chi Ndyuūs chi yaācu yeⁿe yāāⁿ miⁿ. ²³Ní yāāⁿ miⁿ nguéé neⁿe 'yāⁿā ndíí nguéé ndúú 'iⁿiyū chi dεεve yeⁿē ti Ndyuūs chi dεεve ngii ní dεεve yeⁿe yāāⁿ miⁿ, ní 'iⁿ'yāⁿ chi duuchi 'iiti cuūchī ní dεεve yeⁿe yāāⁿ miⁿ. ²⁴Ní 'iⁿ'yāⁿ chi nadanguaⁿai yā yeⁿe naciones chiicá yā ná dεεve yeⁿe yāāⁿ miⁿ. Ní reyes yeⁿe yāⁿāa 'cūū ndéε yā ch'εεte yeⁿe maáⁿ yā ndúúcu honra yeⁿe maáⁿ yā nduucú yā ndii yāāⁿ miⁿ. ²⁵Ní cheendi va'ai n'geεte yeⁿe yāāⁿ miⁿ nguéé nduudi núúⁿmáⁿ nguuví. Ní 'āā ntéé véé n'gaaⁿ miⁿ. ²⁶Ní 'iⁿ'yāⁿ s'eeⁿ yeⁿe naciones yeⁿe iⁿ'yeeⁿdí 'cūū ní ndéε yā yeⁿē chi ch'εεte ndúúcu honor yeⁿe naciones yeⁿé yā. ²⁷Nguéé cuuvi cundaā na yāāⁿ miⁿ dendu'ū chi nguéé dεεve, ndúúcu 'iⁿ'yāⁿ chi diiⁿ yā chí nguéé n'daaca, ndúúcu 'iⁿ'yāⁿ chí ngaⁿa yā nduudu yaadi. Dámaāⁿ cundaā 'iⁿ'yāⁿ chí canéé nguūⁿ chí duuchi

yā na libro yeⁿe vida cueⁿe daāⁿmaⁿ chi ndée 'iiⁿyāⁿ chi nguuvⁱ 'iiti cuūchī.

22 Tuu'mi ní ángel miiⁿ ch'iⁿi yā 'úú 'áámá yíícú dēeve naachi canée nuūⁿnīⁿ yeⁿe vida cueⁿe daāⁿmaⁿ. Nuūⁿnīⁿ miiⁿ ní dēevé tan'dúúcā cristal ní ican'daā yeⁿe trono yeⁿe Ndyuūs ndúúcū trono yeⁿe 'iiⁿyāⁿ chi nguuvⁱ 'iiti cuūchī. ²Ní náávtaⁿ a yeⁿe yúúní ch'ēete yeⁿe yāāⁿ miiⁿ ní nduu 'úúví lado yeⁿe yíícú míⁿ cáta'ai yáⁿá yeⁿe vida cueⁿe daāⁿmaⁿ chi ngii ndu'ū ndichúúví naaⁿ n'gui'i. Ní ca'aama 'íyú ní ngii 'áámá 'áámá naaⁿ n'gui'i yeⁿē. Ní tá'á yáⁿá miiⁿ chíⁿ chi diiⁿ chi nduūvā yeⁿe vaadi ya'ai yeⁿe naciones. ³Áā ntée véé mar 'áámá dendu'ū miiⁿ chi Ndyuūs caⁿa yā chi condenado chi canée na yāāⁿ miiⁿ. Trono yeⁿe Ndyuūs ndúúcū trono yeⁿe 'iiⁿyāⁿ chi nguuvⁱ 'iiti cuūchī canée na yāāⁿ miiⁿ. Ní 'iiⁿyāⁿ chi dichíí'vē Ndyuūs canée yā miiⁿ. ⁴Ní 'iiⁿyāⁿ s'eeⁿ ní snaáⁿ yā naáⁿ Ndyuūs ní canée nguūⁿ chi duuchi Ndyuūs nchēetē yā. ⁵Ní nguée cuuvⁱ n'gaaⁿ yāāⁿ miiⁿ. 'Iiⁿyāⁿ s'eeⁿ chi n'geetinée yā miiⁿ nguée neⁿé yā mar 'áámá dēeve yeⁿe lámpara ní nguée dēeve yeⁿe yáⁿā caati 'iivú Ndyuūs ngíí dēeve yā. Ní 'iiⁿyāⁿ s'eeⁿ caaⁿmaⁿ ntiiⁿnyuⁿ yā cueⁿe daāⁿmaⁿ cueⁿe daāⁿmaⁿ tan'dúúcā reyes.

**Tiempo taachi cuchíí Jesucristo
ní 'āā canée niiⁿnuúⁿ**

⁶Cuayiivi miiⁿ ní ángel caⁿá yā chii yā 'úú: Nduudú 'cūū ní nduudu cuaacu. Ní 'iiⁿyāⁿ cuuvi cu'téenu yā nduudu miiⁿ. Señor chi

maaⁿ Ndyuūs yeⁿe espíritus yeⁿe 'iiⁿyāⁿ profetas chi Ndyuūs ndēevé yā, maáⁿ yā dicho'ó yā ángel yeⁿe yā chi ángel 'cuuⁿmíⁿ yā 'iiⁿyāⁿ chi dichíí'vē Ndyuūs dendu'ū chi 'āā canée chi chó'oo ní 'āā snee niiⁿnuúⁿ.

⁷Jesús ngaⁿá yā ngii yā ndís'tiī. 'Caandiveéⁿ nī. 'Úú ní ndaá nuuⁿ. De'e chúúcā yeenu 'iiⁿyāⁿ chi 'caandiveéⁿ yā nduudu cuaacu yeⁿe Ndyuūs, nduudu chi canée nguūⁿ na libro 'cūū.

⁸'Úú, chi Juan, ch'iindiveéⁿ ní n'diichí dendú'ū chi 'túúcā. Ní cuayiivi chi n'diichí ní ch'iindiveéⁿ chuū, candiitin'dií ná ca'a ángel chi ch'iⁿi yā 'úú dendu'ū chi 'túúcā chi neⁿé i'teenú ángel miiⁿ.

⁹Naati ángel miiⁿ caⁿa yā chii yā 'úú: Nguée diiⁿ di 'tífā. 'Úú ntúūⁿ dichii'vē Ndyuūs tan'dúúcā dii ndúúcū hermanos yeⁿe di chi ngaⁿá yā nduudu cuaacu yeⁿe Ndyuūs ndúúcū nducyáácá yā chí 'caandiveéⁿ yā nduudu cuaacu chi canée nguūⁿ na libro 'cūū. Díí, cu'téenu di Ndyuūs.

¹⁰Ní ángel miiⁿ ní caⁿa ntúūⁿ yā chii yā 'úú: Nguée cunuuⁿ n'dé'ei di nduudu cuaacu yeⁿe Ndyuūs chi canée nguūⁿ na libro 'cūū caati tiempo yeⁿe dendú'ū chi 'túúcā 'āā snee niiⁿnuúⁿ. ¹¹Maaⁿ ní cu'néeⁿ nī 'iiⁿyāⁿ chi nguēe n'daacā idiíⁿ yā chí 'tífā dííⁿ yā. 'Tiicá ntúūⁿ 'iiⁿyāⁿ chi nadacadiinúúⁿ yā yeⁿe dendu'ū chi nguēe n'daacā, cu'néeⁿ nī chí 'tífā dííⁿ yā. 'Iiⁿyāⁿ chí din'daacá yā, cu'néeⁿ nī chí dííⁿ yā 'tífā. 'Iiⁿyāⁿ chí 'áámá dííⁿ yā ntiiⁿnyuⁿ yeⁿe Ndyuūs cu'néeⁿ nī chí 'aama dííⁿ yā 'tífā.

¹²'Caandiveéⁿ nī chiiⁿ chi caⁿa Jesús. 'Úú ní núúⁿ nūuⁿ ndaá. Ní ndéé premios chi caⁿá ca'á 'áámá 'áámá 'iiⁿyāⁿ premios chi tuneé yā yeⁿ'ē ntiiⁿnyuⁿ chi yeⁿ'e yā. ¹³'Úú ní 'iiⁿyāⁿ vmnááⁿ vmnaaⁿ ndíí naachi 'cuiinu. 'Úú ní caneé naachi chinga'ā ndíí cuayiivi chí 'cuiinū tan'dúúca letras yeⁿ'e alfabeto A ndíí Z, 'tíicā 'úú, ngaⁿa Jesús.

¹⁴De'e chúúcā yeenu 'iiⁿyāⁿ s'eeⁿ chi nandεεv yā catecai yā caati cuuvi cuta'á yā n'gui'i yeⁿ'ē yá'á yeⁿ'e vida, ní cuuví cundaa yā cheendi va'ai yeⁿ'e yāāⁿ miiⁿ ní cho'ó yā cuaaⁿ cheēti va'ai cheēti nguuvi. ¹⁵Naati cuaaⁿ daami yāāⁿ miiⁿ ch'εetinée 'iiⁿyāⁿ chi nguée chí'téenu yā Ndyuūs ndúúcū 'iiⁿyāⁿ chí ngaatu, ndúúcū 'iiⁿyāⁿ chí caⁿá yā ndúúcū ndaataá o isaⁿā chi nguée yeⁿ'é yā, ndúúcū 'iiⁿyāⁿ chi n'giiⁿnúⁿ yā 'iiⁿyāⁿ, ndúúcū 'iiⁿyāⁿ chí i'téenu yā santos o ídolos ndúúcū nducyáácá 'iiⁿyāⁿ chí neⁿ'é yā nginnche'éei yā 'iiⁿyāⁿ ní ngaⁿa yā nduudu yaadi.

¹⁶'Úú Jesús idicho'ó ángel yeⁿ'é chí caaⁿmaⁿ cuaacú yā yeⁿ'e nducuéⁿe cosas chí 'túúcā nanááⁿ ndís'tii chí 'iiⁿyāⁿ yeⁿ'e yāācū s'eeⁿ. 'Úú ní 'iiⁿyāⁿ vmnááⁿ vmnaaⁿ yeⁿ'e ndaata yeⁿ'e David 'úú. 'Úú ní 'ííⁿnyúⁿ chí ngíí dεεve nguεetiyyaⁿ.

¹⁷Espíritu N'dai yeⁿ'é Ndyuūs ndúúcū 'iiⁿyāⁿ s'eeⁿ chí yeⁿ'é Ndyuūs ngaⁿa yā 'tíicā: Ndís'tii

cuchíi nī. Ní 'āā du'ú nūuⁿ 'iiⁿyāⁿ chí n'giindiveéⁿ yā nduudu yeⁿ'é ní canée chí caaⁿmaⁿ yā: Cuchíi nī. Ní n'dií chí yaaca nī cuchíi nī. Cuchíi nī ndúúcū 'āā du'ú nūuⁿ 'iiⁿyāⁿ chí neⁿ'é yā. Cuchíi nī ní cu'u nī yeⁿ'e nuūⁿnīⁿ yeⁿ'e vida cueⁿ'e daāⁿmaⁿ. Ní nguée dε'ε vεε cūndi'i yeⁿ'é ní nuūⁿnīⁿ yeⁿ'e vida cueⁿ'e daāⁿmaⁿ.

¹⁸'Úú ngaⁿá ngii nduudu cuaacu ca'áámá ca'áámá 'iiⁿyāⁿ chí n'giindiveéⁿ yā nduudu yeⁿ'e dendú'ū chí canée chí cuchíi chí canée nguūⁿ na libro 'cūū. Nduuti chí 'áámá yā cu'neeⁿ ca n'deēe nduudú nguée ti chí canée nguūⁿ na libro 'cūū Ndyuūs ca'á yā 'iiⁿyāⁿ miiⁿ castigo yeⁿ'e yā yeⁿ'e nducuéⁿē vaadi ya'ai chí canée nguūⁿ na libro 'cūū. ¹⁹Ní nduuti chí 'áámá 'iiⁿyāⁿ divíi yā naⁿa nduudu yeⁿ'é Ndyuūs yeⁿ'e dendú'ū chí cuchíi chí canée nguūⁿ na libro 'cūū, 'tiicá ntúūⁿ Ndyuūs nadivíi yā parte chí cuuvi yeⁿ'e yā yeⁿ'e libro yeⁿ'ē vida cueⁿ'e daāⁿmaⁿ ndúúcū parte chí cuuvi yeⁿ'é yā yeⁿ'e yāāⁿ chí dεεve yeⁿ'e chí canée nguūⁿ na libro 'cūū.

²⁰'Iiⁿyāⁿ chí ngaⁿa cuaacú yā dendu'ū chí 'túúcā, 'iiⁿyāⁿ miiⁿ ngaⁿa yā: Cuaacu níⁿnyuⁿ chí 'āā cuchíi nuúⁿ. 'Tíicā cuuvi. Cuchíi nī Señor Jesucristo.

²¹Ní maaⁿ ní Señor Jesucristo yeⁿ'e yú téé yā ndís'tii nducuéⁿē chí n'daacā yeⁿ'é yā, ní canée yā ndúúcū ndís'tii. 'Tíicā cuuvi.